

Kàddug Yàlla gi



Wolof Bible 2020 revision.

Kàddug Yàlla gi
Wolof Bible 2020 revision.
La bible en wolof; revision 2020

copyright © 2010, 2020 La Mission Baptiste du Sénégal

Language: Wolof

Dialect: Regional Wolof

Translation by: La MBS

For complete copyright statement, please see <http://sng.al/copyright>

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-07-22

PDF generated using Haiola and XeLaTeX on 11 Nov 2022 from source files dated 23 Jul 2020
eb088fb7-76e3-5c5f-ab35-a0da6cd8fd40

Yawut ya	750
Yanqóoba	760
1.Piyeer	763
2.Piyeer	767
Yudd	770
Peeñu ma	771

Contents

Njàlbéen ga	1
Mucc ga	43
Sarxalkat yi	79
Màndij ma	105
Baamtug Yoon wi	142
Ruut	172
1.Samiyel	175
2.Samiyel	201
1.Buur ya	224
2.Buur ya	250
Esra	275
Neyemi	284
Esteer	297
Ayóoba	303
Sabóor	326
Kàddu yu Xelu	387
Kàdduy Waare	409
Ngèn-gi-woy	416
Esayi	421
Yeremi	469
Jooytu	519
Esekiyel	525
Dañeel	569
Ose	581
Yowel	589
Amos	592
Abdiyas	599
Yunus	601
Mise	603
Nawum	608
Abakug	610
Cefaña	613
Ase	616
Sàkkaryaa	618
Malasi	627
Luug	630
Jéf ya	659
Room	687
1.Korent	700
2.Korent	712
Galasi	720
Efes	725
Filib	729
Kolos	732
1.Tesalonig	735
2.Tesalonig	738
1.Timote	740
2.Timote	744
Tit	747
Filemon	749

Njålbeén ga di xaaj bi jëkk ci Tawreetu Musaa Ubbite gi

Njålbeén ga mooy téere bi jëkk ci Tawreet. Yonent Yàlla Musaa moo bind Tawreet, juróomi téere yi jiiu ci Mbind mu sell mi.

Téereb *Njålbeén ga* moo ténk ndoortel lépp lu Yàlla sàkk, muy asamaan ak suuf ak gancax geek rab yi, ba ci nit; lépp di lu baax.

Téere bii nag wone na ni àddina mujj mel, ndax ñaawtéefi nit, yi law ba sunu jonna Yállay tey. Gis nanu ci *Njålbeén ga* ne ca Aadama ak Awa la nit dale déggadil Yàlla, di wuta moom boppam tey fippu, te loolu mooy bàkkaaram. Mu jural ko lu bon, jural ko coonob àddina bu tar, tey géna tar, soreele kook Yàlla. Booba la dee tàmbali ci àddina. Nekkinu nit mujj na naqari lool, nekkinu suuf it noonu, wuuteek ba Yàlla di sàkk lépp, ba mu baax.

Nu gis ne *Njålbeén ga* dafa lëkkloo ak mboolem yeneen wàll yi ci des, lépp di benn xibaar buy dégtal nit alkàndeem, gi sababoo ci bàkkaaram, te di ko xamal mbaaxu Yàlla ñeel képp kuy doom Aadama. Waaye xibaar la it buy yégle àtteb Yàlla, ñeel ñi xalab aw yiwam.

Pexe mi Yàlla lalal nit ngir texeem te misaaloon ko xaat ci *Njålbeén ga* ci saar 3, aaya 15 (3.15), mu ngi sottee ci musalkat bi wara ñew.

Téereb *Njålbeén ga* nag làqul matadig nitoo nit, te yonenti Yàlla yi sax muccuñu ci bàkkaar. Looloo tax du kenn ci yonent yi ku manoon sottal li Yàlla tëralal doom Aadama, ngir mu mucc ci noteelu bàkkaar, mucc ci sànkute gi bàkkaar jur, ba jot ci yiwu Yàlla wi koy texeel.

Bu loolu weesee, téereb *Njålbeén ga* leeral na ci saar 12, aaya 3 (12.3) ne, la Yàlla digoon Ibraayma, maami aji gëm ñi, dig ko doomam Isaaxa ak sëtam, Yanqóoba, moom Isaaxa ak askanam ñoo ko jëkkoono jagoo. Waaye dige la bu jaare ca ñoom, doon barke, ñeel xeeti àddina yépp.

Ibraayma wone na nu nit wara taxawe, ba jot ci digeb Yàlla. Ngëm gu déggu ak kóolote gu wér ci Yàlla. Ngëm googu ak kóolote googu ci Yàllaak káddoom moo mana tax nit ku nekk mana jot ci barke bi Yàlla dig Ibraayma, doonte kenn yelloowu ko.

Ci Tënk:

1:1-2:25 Lu jëm ci càkkuteefu asamaan ak suuf

3:1-3:24 Lu jëm ci bàkkaar nit ak nje-exitalam

4:1-8:22 Lu jëm ci askanu Kayin ak Set ba ca mbénn ma

9:1-11:9 Gannaaw mbénn ma ba ca taaxum Babel

11:10-50:26 Lu jëm ci Ibraayma ak Isaaxa ak Yanqóoba ba ci Yuusufa

Yàlla sàkk na àddina, fal ci nit

¹ Ca njålbeén ga Yàlla sàkk na asamaan ak suuf. ² Suuf nag daa maase woon te wéet, lëndëm muur ndox mu xóot mi, lal ca kaw, Noowug Yàlla di wër, tiim ndox mi.

³ Ba loolu amee Yàlla ne: «Na leer nekk,» leer daldi am. ⁴ Yàlla gis ne leer gi lu baax la, mu xàjjale leer ak lëndëm. ⁵ Yàlla tudde leer gi bëccég, lëndëm gi guddi. Ngoon jot, suba dugg, muy bés ba jëkk.

⁶ Yàlla ne: «Na aw dénd dox diggante ndox yi, ngir xàjjale leen, yii fii, yii fale.» ⁷ Yàlla nag sàkk dénd wi, xàjjalee ko ndox yi féete dénd wi suuf ak yi ko féete kaw. Mu daldi nekk noona. ⁸ Yàlla tudde dénd wi asamaan. Ngoon jot, suba dugg, muy bés sub ñaareel ba.

⁹ Yàlla ne: «Na ndox, mi asamaan tiim, gëndoo benn bérab, ba joor gu wow feeñ.» Mu daldi nekk noona. ¹⁰ Yàlla tudde joor gu wow gi suuf, ndox mi gëndoo, mu tudde ko géej. Yàlla gis ne baax na.

¹¹ Yàlla ne: «Na suuf sax ñax, muy gancax gu ànd ak jiwoom, ak garab yuy meññ tey jur seeni jiwu, lu ci nekk ak wirgoom ci kaw suuf.» Mu daldi nekk noona. ¹² Suuf nag sax ñax, muy gancax gu ànd ak wirgoy jiwoom, ak garab yuy meññ tey jur seeni wirgoy jiwu. Yàlla gis ne baax na. ¹³ Ngoon jot, suba dugg, muy bés sub ñetteel ba.

¹⁴ Yàlla ne: «Na am ay leer ci asamaan, ngir xàjjale guddi ak bëccég, te doon ay tegtal, yuy raññile jamono yi, tey takk bés yi ak at yi. ¹⁵ Nañu nekk ay leer ci asamaan si, di leeral suuf.» Mu daldi nekk noona. ¹⁶ Yàlla sàkk ñaari leer yu mag, gi géna mag yilif bëccég, gi géna ndaw yilif guddi; mu sàkk it biddiwi yi. ¹⁷ Yàlla nag teg leen ci asamaan, di ca leeral suuf, ¹⁸ ñuy yore guddi ak bëccég, tey xàjjale lëndëm ak leer. Yàlla gis ne baax na. ¹⁹ Ngoon jot, suba dugg, muy bés sub ñeenteel ba.

²⁰ Ba loolu amee Yàlla ne: «Na ndox fees ak ay ndiiraani xeeti bindeef, te ay picc tiim suuf, di naaw ci asamaan.» ²¹ Ci biir loolu Yàlla bind rabi géej yu mag yi ak mboolem mbindeef muy féey tey ramm-rammi ci ndox mi, mu ci nekk ak

wirgoom, teg ca lépp luy boroomi laaf, lu ci nekk ak wirgoom. Yàlla gis ne baax na. ²² Ba mu ko defee Yàlla barkeel leen, daldi ne: «Giirleen te bare, ba fees ndoxi géej.» Mu neeti: «Na picc yi bare ci kaw suuf.» ²³ Ngoon jot, suba dugg, muy bésuub juróomeel ba.

²⁴ Yàlla ne: «Na suuf génne ay bindeef, mu ci nekk ak wirgoom: ag jur, luy raam aki rabi àll, lu ci nekk ak wirgoom.» Mu daldi nekk noona. ²⁵ Yàlla dafa bind rabi àll yi, lu ci nekk ak wirgoom, jur gu ci nekk ak wirgoom, ak lépp luy raam ci kaw suuf, lu ci nekk ak wirgoom. Yàlla nag gis ne baax na.

²⁶ Yàlla ne: «Nanu bind nit ci sunu melokaan, mu nirook nun, te na yilif jëni géej ak picci asamaan ak jur gépp ak suuf sépp ak lépp lu ciy raam.»

²⁷ Yàlla dafa bind nit ci takkndeeram; ci takkndeeru boppam la Yàlla bind nit, góor ak jigéen la bind.

²⁸ Yàlla barkeel leen ne leen: «Giirleen te bare, ba fees àddina, di ko saytu; te it yilifteen jëni géej ak picci asamaan ak mboolem mbindeef muy yëngu ci kaw suuf.»

²⁹ Yàlla ne: «Xool-leen, jox naa leen gépp gāncax gu ànd ak jiwoom ci kaw suuf sépp ak gépp garab guy meññ tey jur jiwoom, muy seen dund. ³⁰ Naka rabi àll yépp it, ñook picci asamaan yépp ak lépp luy raam ci kaw suuf, te di boroom bakkan, jox naa leen lépp luy ñax mu tooy, ñoom itam, muy seen lekk.» Mu daldi nekk noona.

³¹ Yàlla nag gis li mu def lépp, fekk lépp baax lool. Ngoon jot, suba dugg, muy bésuub juróom benneel ba.

2

¹ Ci kaw loolu asamaan ak suuf ak li ñu èmb lépp mat. ² Bésuub juróom ñaareel ba fekk na Yàlla matal liggéeyam. Mu dal-lu nag ca bésuub juróom ñaareel ba, gannaaw ba mu liggéeyee loolu lépp. ³ Yàlla daldi barkeel bésuub juróom ñaareel ba, def ko bés bu sell, ndax da caa dal-lu woon gannaaw liggéey, ba mu sàkke lépp.

Cosaanal asamaan ak suuf

(Saar 2.4—4.26)

Yàlla dugal na nit Àjjana, jox ko ndigal

⁴ Liy cosaanal asamaan ak suuf, ba ñu leen di sàkk, mooy lii. Bés ba Aji Sax ji Yàlla sàkke suuf ak asamaan, ⁵ genn garab nekkagul woon ci kaw suuf, te genn gāncax saxagul; ndaxte booba Yàlla Aji Sax ji tawagul, te nit kuy bey amagul. ⁶ Ci biir loolu mbénn di balle ci suuf, di tooyal fépp.

⁷ Yàlla Aji Sax ji nag móol nit ci pëndu suuf, sol ngelawal dund ci paxi bakkanam, nit daldi doon boroom bakkan.

⁸ Naka noona Yàlla Aji Sax ji jëmbat tool ca biir Àjjana fa féete penku ba, tàbbal ca nit ka mu bind. ⁹ Yàlla Aji Sax ji nag saxal ci suuf lépp luy garab gu meññeef ma rafet te neexa lekk; mu def it garab gay taxa dund ca digg tool ba, moom ak garab gay taxa xam lu baax ak lu bon.

¹⁰ Amoon na dex guy balle Àjjana, di suuxat tool ba, dale fa nag, séddlikoo, def ñeenti wal. ¹¹ Turu menn wal ma di dexu Pison, moo wër réewum Awila mépp. Wurus a nga woon ca réew mooma, ¹² di wurusu ngalam; te it ndàbb lu neex xet a nga fa woon ak per yu jafe yu ñuy wax onigsë. ¹³ Ñaareelu dex ga di Giyon, wër réewu Kuus mépp; ¹⁴ turu ñetteelu dex ga di Tiigar, féete réewum Asiri penku; ñeenteelu dex ga di Efraat.

¹⁵ Yàlla Aji Sax ji nag jël nit ki, tàbbal ko biir toolub Àjjana, mu di ko bey ak a sàmm. ¹⁶ Yàlla Aji Sax ji sant nit ki, ne ko: «Man ngaa lekk ci mboolem garabi tool bi, ¹⁷ waaye bul lekk ci garab giy taxa xam lu baax ak lu bon, ndaxte bés boo ci lekkee kat, li wër mooy fa ngay doxe dee.»

¹⁸ Yàlla Aji Sax ji daldi ne: «Wéet baaxul ci nit, kon dinaa ko bindal ku koy jàpple te jekk ci doon wéttalam.» ¹⁹ Loolu fekk na Yàlla Aji Sax ji sàkk ci suuf nja-àll yépp ak njanaaw yépp, daldi leen indil nit, di seet nu leen nit di tudde; te tur wu nu leen jox, muy moom. ²⁰ Ba mu ko defee nit kooku, di Aadama, tudd jur gépp ak picc yépp ak rabi àll yépp, waaye fekku ca ku koy jàpple te jekk ci doon wéttalam.

²¹ Bi loolu amee Yàlla Aji Sax ji nelawloo Aadama nelaw yu xóot. Ba muy nelaw nag, mu rocci genn ciy faaram, fatte pax ma aw suux. ²² Yàlla Aji Sax ji bind jigéen ci faar, gi mu jële ci Aadama, indil ko ko. ²³ Aadama ne tonet, daldi ne:

«Waaw kay nag, kii moo bokk ci samay yax ak sama suux!

Dees na ko tudde jigéen, ndaxte ci góor lees ko jële*.»

²⁴ Looloo tax góor di bàyyikoo ci ndeyam ak baayam, ànd ak soxnaam, ñuy wenn suux.

²⁵ Ku góor ki ak soxnaam, ñoom ñaar ñépp, yaramu neen lañu defoon, te amuñu ci woon genn kersa.

3

Yàlla dàq na nit Àjjana

¹ Jaan nag moo génoona muus ci rabi àll, yi Yàlla Aji Sax ji sàkk yépp. Jaan ja

* 2:23 2.23 Ni ñuy wooye góor ak ni ñuy wooye jigéen dañoo jegeyoo ci làkku ebrë.

moo ne jigéen ja: «Ndax wóor na ne Yàllaane: “Buleen lekk ci doomi genn garabu tool bi?”»² Jigéen ja wax jaan ja, ne ko: «Man nanoo lekk ci doomi garabi tool bi kay.»³ Waaye garab gi ci digg tool bi la Yàlla ne: «Buleen ci lekk, buleen ko laal sax, lu ko moy ngeen dee.»⁴ Jaan ja ne jigéen ja: «Déedéet, dungeen dee!»⁵ Waaye Yàlla xam na ne bés bu ngeen ci lekkee, seeni bêt dina ubbiku, ngeen mel ni Yàlla, xam lu baax ak lu bon.»

⁶ Jigéen ja dafa gis ne garab gi rafet na, niru na lu neex, te mata bëgg ci kuy wuta am xel, mu witt ci doom yi, lekk; jox ci jëkkëram, ji mu àndal, moom it mu lekk.⁷ Seenii bêt daldi ubbiku, ñu xam ne yaramu neen lañu def. Ba mu ko defee ñu ràbb xobi garabu figg, gemboo.

⁸ Gannaaw loolu ñu dégg tãnki Yàlla Aji Sax ji, muy doxantu ca tool ba, fekk ker gi sedd, ñu daldi fexee làqu Yàlla Aji Sax ji ci biir garabi tool bi.⁹ Yàlla Aji Sax ji nag ne Aadama: «Ana nga?»¹⁰ Mu ne ko: «Damaa dégg say tãnk ci tool bi, tiit, ndax yaramu neen laa def, ma daldi làqu.»¹¹ Yàlla Aji Sax ji ne ko: «Ku la xamal ne dangaa def yaramu neen? Mbaa du dangaa lekk ca garab, ga ma la aaye, waay?»¹² Aadama ne ko: «Jigéen, ji nga ma booleel de, moo ma jox ci garab gi, ma lekk.»¹³ Yàlla Aji Sax ji ne jigéen ja: «Yaw, li nga def nii mooy lan?» Jigéen ja ne ko: «Aa, jaan de moo ma nax, ba ma lekk ci.»

¹⁴ Yàlla Aji Sax ji nag ne jaan ja: «Gannaaw def nga loolu, yaw rekk yaay alku ci rabi kër yépp ak rabi àll yépp; dinga watatu, di lekk pënd sa giiru dund gépp.»

¹⁵ Dinaa def mbañeel sa digganteek jigéen ji, ba dëddale sa xeet ak xeetam, muy toj sa bopp, nga di ko màtt ci téstën.»

¹⁶ Yàlla teg ca ne jigéen ja: «Dinaa taral sa metitu mat, ci metit ngay wasin. Sa bëgg-bëggu bakkan dina la xiir ci sa jëkkër, te moo lay teg tãnk.»

¹⁷ Mu tegaat ca ne Aadama: «Gannaaw dégg nga sa waxu soxna, ba lekk ci garab gi ma la aaye, dinaa rèbb suuf ndax yaw; coono bu metti nga ciy dunde sa giiru dund gépp.»

¹⁸ Suuf dina la meññalal ay dég aki dagg, doo lekk te beyoo,

¹⁹ saw ñaq ngay dunde,

ba kera ngay dellu ci suuf, si ma la jële; ndaxte pënd nga, te dinga dellu di pënd.»

²⁰ Aadama nag tudde soxnaam Awa (mu firi Dund), ndax mooy ndeyu képp kuy dund.²¹ Gannaaw gi Yàlla Aji Sax ji sàkkal Aadama ak soxnaam ay yérey der, wodde leen.²² Yàlla Aji Sax ji daldi ne: «Léegi nit mel na ni nun, xam lu baax ak lu bon. Kon nag bumu tállal loxoom, di witt ci doomi garab giy taxa dund, di lekk, bay dund fàww.»

²³ Ba loolu amee Yàlla Aji Sax ji génne ko toolub Àjjana, muy bey suuf, si ñu ko sàkke.²⁴ Da koo dàq, ba noppi teg ca penkub toolu Àjjana ba ay malaakay serub*, boole ca saamar buy xuyy-xuyyi, tey dem ak a dik, di wattu yoon, wa jëm ca garab gay taxa dund.

4

Kayin rey na Abel

¹ Gannaaw loolu Aadama dëkkoo na soxnaam Awa, mu ëmb, am Kayin, mu ne: «Am naa doom ju góor ci ndimbalu Aji Sax ji*.»² Awa teg ca rakkam, Abel. Abel di sàmm, Kayin di bey†.

³ Ñu dem ba mu yàgg, Kayin sàkk ci mbeyam, jébbal ko Aji Sax ji, màggale ko ko.⁴ Abel moom jébbal ko nebbonu jur, ga jëkka juddu ca géttam. Aji Sax ji nangul Abel,⁵ te nangulul Kayin. Kayin nag mer lool, ba ne fòññ.

⁶ Aji Sax ji ne Kayin: «Lu la taxa mer, ba ne fòññ nii?»⁷ Soo defee lu baax, dees na la nangul; soo deful lu baax, bàkkaar a ngi lay yeeru ci sa bunt, di la tërook a wut, waaye yaa ko wara man.»

⁸ Ci kaw loolu Kayin séq ak rakkam Abel wax. Ba mu ko defee ñu dem ca àll ba, Kayin dal ci kaw Abel, bóom ko.⁹ Aji Sax ji ne Kayin: «Ana sa rakk Abel?» Mu ne ko: «Gisuma ko de; xanaa maa wara sàmm sama rakk?»¹⁰ Yàlla ne ko: «Loo def? Sa deretu rakk jaa ngi yuuxoo ci suuf, ma di ci dégg.¹¹ Léegi dinga alku, ba suuf dummóoyu la, moom mi ubbi gémmiñam, naan sa deretu rakk, ji nga tuur.¹² Boo beyee, dootu nangu. Dinga dëkke dan-dan, di wëreelu ci àddina.»

¹³ Teewul Kayin wax Aji Sax ji ne ko: «Sama mbugal diis na lool, ba àttanuma ko!»¹⁴ Ndegam tey jii danga maa dàq, xañ ma sa jataay, dinaa dëkke dan-dan, di wëreelu ci kaw suuf, te kon ku ma gis rey ma.»¹⁵ Aji Sax ji ne ko: «Kon nag ku la rey, yaw Kayin, dina jot juróom ñaari

* 3:24 3.24 serub: serub yi ay bindeef lañu yu teew fa Yàlla.

† 4:1 4.1 Awa mu ngi dendle turu taawam Kayin ak baatu ebrë biy tekki «am». † 4:2 4.2 Kayin, Abel: am na ñu leen géna xam ci turi Xabiil ak Abiil.

yoon lu ko raw.» Ba loolu amee mu sàkkal Kayin màndarga, ba ku ko gis du ko rey. ¹⁶ Kayin daldi bàyyikoo ca Aji Sax ji, dem dèkki réewu Nódd[‡], fa féete Àjjana penku.

Askanu Kayin

¹⁷ Gannaaw loolu Kayin dèkkoo na soxnaam, mu ëmb, am Enog. Ci biir loolu Kayin sanc ab dèkk, dippee ko doomam ju góor Enog. ¹⁸ Enog jur Iraat; Iraat jur Mexuyayel; Mexuyayel jur Metusayel; Metusayel jur Lemeg. ¹⁹ Lemeg nag jël ñaari jabar, aawo bi tudd Ada, ñaareel bi di Silla. ²⁰ Ada taawloo Yabal, miy cosaanu sàmm yiy màngaan, ²¹ teg ca Yubal, miy cosaanu ñi mane xalam ak toxoro. ²² Silla moom jur Tubal Kayin miy tégg lépp luy jumtukaayu xànjari ak weñ. Tubal Kayin am na jigéen bu tudd Naama.

²³ Lemeg nag ne ay soxnaam: «Dégluleen maa, yeen soxnay Lemeg, teeyluleen maa, yeen Ada ak Silla. Nit a ma gaañ, ma bóom, goneg jambaar dóor ma, ma faat.

²⁴ Kayin kay, lees di feyul juróom ñaari yoon, ne, bu dee Lemeg mii, muy juróom ñaar fukki yoon ak juróom ñaar.»

²⁵ Bi loolu wéyee Aadama dèkkoo soxnaam, mu am doom ju góor; tudde ko Set (mu firi May), ndax da ne: «Yàlla may na ma weneen askan, mu wuutu Abel, mi Kayin rey.» ²⁶ Set it, am doom ju góor, tudde ko Enos. Fan yooya lañu tàmbalee tudd Aji Sax ji, di ko wormaal.

Askanu Aadama, ba ci Nóoyin

5

(Saar 5.1—6.8)

¹ Ni téere indee askanu Aadama nii la. Ba Yàlla di sàkk nit, da koo bind ci melokaanam, ² góor ak jigéen la sàkk, barkeel leen, tudde leen Nit, keroog ba mu leen sàkkee.

³ Aadama dund téeméeri at ak fanweer (130), jur doom ju góor, mu bindoo melokaanam te nirook moom. Mu tudde ko Set. ⁴ Set juddu na, Aadama dundaat juróom ñetti téeméeri at (800), amaat ay doom yu góor ak yu jigéen. ⁵ Kon Aadama dund na juróom ñeenti téeméeri at ak fanweer (930), doora faatu.

⁶ Set moomée am na téeméeri at ak juróom (105), doora jur Enos. ⁷ Enos juddu na, Set dundaat juróom ñetti téeméeri at ak juróom ñaar (807), amaat doom yu góor ak yu jigéen. ⁸ Kon Set dund na juróom ñeenti téeméeri at ak fukk ak ñaar (912), doora faatu.

⁹ Enos nag am na juróom ñeent fukki at (90), doora jur Kenan. ¹⁰ Kenan juddu na, Enos dundaat juróom ñetti téeméeri at ak fukk ak juróom (815), amaat doom yu góor ak yu jigéen. ¹¹ Kon Enos dund na juróom ñeenti téeméeri at ak juróom (905), doora faatu.

¹² Kenan moomée am na juróom ñaar fukki at (70), doora jur Malaleel. ¹³ Malaleel juddu na, Kenan dundaat juróom ñetti téeméeri at ak ñeent fukk (840), amaat ay doom yu góor ak yu jigéen. ¹⁴ Kon Kenan dund na juróom ñeenti téeméeri at ak fukk (910), doora faatu.

¹⁵ Malaleel nag am na juróom benn fukki at ak juróom (65), doora jur Yeredd. ¹⁶ Yeredd juddu na, Malaleel dundaat juróom ñetti téeméeri at ak fanweer (830), amaat ay doom yu góor ak yu jigéen. ¹⁷ Kon Malaleel dund na juróom ñetti téeméeri at ak juróom ñeent fukk ak juróom (895), doora faatu.

¹⁸ Yeredd moomée am na téeméeri at ak juróom benn fukk ak ñaar (162), doora jur Enog. ¹⁹ Enog juddu na, Yeredd dundaat juróom ñetti téeméeri at (800), amaat ay doom yu góor ak yu jigéen. ²⁰ Kon Yeredd dund na juróom ñeenti téeméeri at ak juróom benn fukk ak ñaar (962), doora faatu.

²¹ Enog moomée, am na juróom benn fukki at ak juróom (65), doora jur Matusalem. ²² Matusalem juddu na, ba noppi Enog topp Yàlla ñetti téeméeri at (300), amaat ay doom yu góor ak yu jigéen. ²³ Kon Enog dund na ñetti téeméeri at ak juróom benn fukk ak juróom (365). ²⁴ Enog dafa topp Yàlla, ba jekki-jekki giseesatu ko, ndaxte Yàlla ko yéege fa moom.

²⁵ Matusalem moomée am na téeméeri at ak juróom ñett fukk ak juróom ñaar (187), doora jur Lemeg. ²⁶ Lemeg juddu na, Matusalem dundaat juróom ñaar téeméeri at ak juróom ñett fukk ak ñaar (782), amaat ay doom yu góor ak yu jigéen. ²⁷ Kon Matusalem dund na juróom ñeenti téeméeri at ak juróom benn fukk ak juróom ñeent (969), doora faatu.

²⁸ Lemeg nag am na téeméeri at ak juróom ñett fukk ak ñaar (182), doora jur doom ju góor. ²⁹ Mu tudde ko Nóoyin (mu firi Noflaay) ndax dafa ne: «Kii moo nuy taxa noyyiwaat, noppal nu ci liggéey yu metti ak coonoy mbeyu suuf, si Aji Sax ji rëbb.» ³⁰ Nóoyin juddu na, Lemeg dundaat juróomi téeméeri at ak juróom ñeent fukk ak juróom (595), amaat ay doom yu góor ak yu jigéen. ³¹ Kon Lemeg dund na juróom ñaar téeméeri at ak juróom ñaar fukk ak juróom ñaar (777), doora faatu.

‡ 4:16 4.16 Nódd baatu ebré la buy tekki «ku dèkkul fenn».

³² Nóoyin moomee am na juróomi tééméeri at (500), doora jur Sem ak Xam ak Yafet.

6

Yàlla fas na yéene tas àddina ndax mbonu nit

¹ Bi nga xamee ne nit ñi tàmbali nañoo fulandiwu ci kaw suuf, te am ay doom yu jigéen, ² ay goney Yàlla ñoo gis jigéen ñeek seen taar, ñuy jël ñi ñu bëgg ci ñoom, def leeni jabar. ³ Aji Sax ji daldi wax ne: «Manumaa bàyyi nit, muy wéyee dunde noo, gi ma ko may, ndax nit du dara lu dul suuxi neen, kon dinaa leen àppal diirub tééméeri at ak ñaar fukk (120).»

⁴ Ca jamono yooya ak itam gannaaw ba goney Yàlla yooyu àndeek jigéeni àddina, ba am ca ay doom, aw xeetu ponkal wu ñuy wax Nefilim moo nekkoon ci àddina. Nóoy ponkal ya woon te doonoon góor ñu amoon tur.

⁵ Aji Sax ji dafa gis ne mbonu nit màgg na lool ci biir àddina, te fu mu mana tollu, lu bon rekk lay xinte ci xolam. ⁶ Aji Sax ji nag am tiis ci xolam, ba mititlu li mu doon sàkk nit ci kaw suuf. ⁷ Aji Sax ji daldi ne: «Dinaa far ci kaw suuf doom aadama yi ma sàkk, nit ak jur, luy raam ak luy naaw, ndax mititlu naa li ma leen sàkk.» ⁸ Waaye fekk na Aji Sax ji xool Nóoyin bëti yërmande.

Askanu Nóoyin

(Saar 6.9—9.29)

⁹ Askanu Nóoyin mooy lii. Nóoyin nit ku jub la woon, di ku mat ci biir nit ñi mu bokkal jamono, te di ku topp Yàlla. ¹⁰ Nóoyin nag amoon na ñetti doom yu góor: seeni tur di Sem, Xam ak Yafet.

¹¹ Booba fekk na àddina yàqu, te fees ak ay, Yàlla teg ci bëtam. ¹² Yàlla gis ne àddina yàqu na, ndaxte jëfi ñépp a bokk ñaaw fi kaw suuf.

¹³ Ba mu ko defee Yàlla ne Nóoyin: «Dogal naa ne dinaa boole faat mboolem boroom bakkan, ndaxte ayu nit dajal na kaw suuf. Dinaa leen boole ak li ci àddina, faagaagal.

¹⁴ «Yaw nag wutal dénku sippar, yettal ci sa bopp gaal gu mag; nga sàkk ci ay néeg, te diw ko koltaar biir ak biti. ¹⁵ Ni nga koy defare nii la. Na guddaayu gaal gi di ñetti tééméeri xasab, yaatuwaay bi di juróom fukki xasab, taxawaay bi di fanweeri xasab. ¹⁶ Yettal mbaar, mu ko tiim, te nga àggle gaal gi, bàyyi lu tollook xasab diggante kéméj yi ak mbaar mi. Sàkkal ko bunt ci wet gi, te séddale ko ñetti néeg yu tegloo, benn ci suuf, benn ci digg bi ak benn ci kaw.

¹⁷ «Maa ngi nii di indi mbënnu ndox ci kaw suuf, mu far lépp luy dund lu asamaan tiim; te lépp lu nekk ci kaw suuf dina dee. ¹⁸ Waaye dinaa fas kóllère ak yaw, nga dugg ci gaal gi, yaak say doom ak sa soxna ak say soxnay doom. ¹⁹ Te xeeti rab yépp nanga ci dugal ñaar ci gaal gi, wu ci nekk, nga def ko góor ak jigéen; su ko defee ngeen ànd mucc. ²⁰ Xeetu picc wu ci nekk ak xeetu bàyyima wu ci nekk ak wépp xeetu rab wuy raam ci suuf, dina def ñaar, ñëw ci yaw, ba raw. ²¹ Sàkkal ci bépp xeetu dund, denc, ngeen bokk dunde.»

²² Noonu la Nóoyin def. Lépp lu ko Yàlla sant, def na ko.

7

Yàlla musal na Nóoyin ci mbënn mi

¹ Gannaaw ba loolu amee Aji Sax ji dafa wax Nóoyin ne ko: «Duggal ci gaal gu mag gi, yaak sa njaboot gépp, ndaxte niti jamono jii, yaw rekk laa ci gis, nga jub ni ma ko bëgge. ² Xeeti rab yu set* yépp yóbbaaale ci juróom ñaar yu góor ak juróom ñaar yu jigéen, ak ñaar ci xeeti rab yi setul, te ñuy góor ak jigéen. ³ Te it xeetu picc mu nekk yóbbaaale ci juróom ñaar yu góor ak juróom ñaar yu jigéen, ngir seen xeet baña fey ci kaw suuf. ⁴ Ndax kat li feek juróom ñaari fan dinaa wáce taw ci kaw suuf diiru ñeent fukki guddi ak ñeent fukki bëccég, ba far ci àddina mboolem mbindeef mu ma sàkk.» ⁵ Nóoyin daldi def la ko Aji Sax ji sant lépp.

⁶ Bi mbënn miy ñëw ci àddina, booba fekk na Nóoyin am juróom benni tééméeri at. ⁷ Nóoyin dugg na ca gaal ga, ànd ak ay doomam ak soxnaam ak soxnay doomam ya, ngir mucc ca ndoxu mbënn ma. ⁸ Rab yu set yi ak yi setul ak picc yi ak yiy raam ⁹ ànd nañu ak Nóoyin, dugg ca gaal ga, def ñaar-ñaar, góor ak jigéen, ni ko Yàlla sante Nóoyin. ¹⁰ Ba juróom ñaari fan wéyee nag, ndoxu mbënn ma agsi ci kaw suuf.

¹¹ At ma Nóoyin amee juróom benni tééméeri at, ca fukki fan ya juróom ñaar ca ñaareelu weer wa, kera la bëti ndox ya ne jàyy, jóge xóotey géj, bunti ndoxi asamaan ne kulbét, mu ne yureet, ¹² taw biy sottiku ci suuf diiru ñeent fukki guddi ak ñeent fukki bëccég.

¹³ Keroog bés boobu la Nóoyin ànd aki doomam yu góor, Sem ak Xam ak Yafet, ak soxnaam ak ñetti soxnay doomam yooyu, ñu dugg ca gaal ga, ¹⁴ àndandook rabu àll yépp, lu ci nekk ak wirgoom, ak jur gépp, lu ci nekk ak wirgoom, ak lépp luy raam ci kaw suuf, lu ci nekk ak wirgoom, ak lépp luy naaw, lu ci nekk ak wirgoom,

* 7:2 7.2 rab yi set ñoo di rab, yi Yàlla nangu, ñu sarxal ko.

muy picc mbaa boroomi laaf. ¹⁵ Lépp luy boroom bakkan def na ñaar-ñaar, ñand ak Nóoyin, dugg ca gaal ga, ¹⁶ mboolem xeetu mbindeef rekk, di góor ak jigéen, ni ko ko Yälla sante. Ci kaw loolu Aji Sax ji ne ràpp buntu gaal gi, gannaaw bi Nóoyin duggee.

¹⁷ Mbënn ma nag di wal ci àddina diiru ñeent fukki fan. Ndox ya di yokku, gaal gay jóg, ba tëmb, tiim suuf lu sore. ¹⁸ Ma ngay gën di yokku, tey baawaan ci kaw suuf, ba gaal ga tëmb, di dem ca kaw ndox ma. ¹⁹ Ndox ma di walangaan, ba mëdd tund yu kawwe ya fépp fu asamaan tiim. ²⁰ Muy yokku, di yokku, ba gëna kawwe tund ya lu mat fukki xasab ak juróom.

²¹ Mboolem mbindeef mu daan dox ci kaw suuf dee na ca. Picc yi ak jur gi ak rabi àll yi ak lépp luy raam ci kaw suuf dee na, ñoom ak nit ñépp. ²² Mboolem mbindeef muy boroom bakkan ci kaw suuf a bokk dee. ²³ Luy dund ci àddina daldi sànkú, ba nit ak jur ak luy raam ak luy naaw—lépp la Aji Sax ji raafal ci àddina. Nóoyin rekk a des, moom ak ña àndoon ak moom ca gaal ga.

²⁴ Ndox mi nag di wal-wali ci kaw suuf diirub téeméeri fan ak juróom fukk.

8

Nóoyin génna na gaal gu mag ga

¹ Ci biir loolu Yälla xalaat na Nóoyin ak li mu nekkal ci gaal gi, di rabi àll yi ak jur gi. Yälla daldi yebal ngelaw, mu wal kaw suuf, ba ndox yi wàcc. ² Bëti ndox ya ca xóote ya dafa taxaw, bunti ndoxi asamaan tëju, taw bi dal. ³ Ci kaw loolu ndox mi taa ci suuf di wàññiku. Bi téeméeri fan yi ak juróom fukk matee nag, ndox ma gëna néew. ⁴ Ba juróom ñaareelu weer wa amee fukki fan ak juróom ñaar, gaal gaa nga teereji tundi Araraat. ⁵ Ndox may wàññiku rekk ba ca fukkeelu weer wa. Keroog ba fukkeelu weer wa teroo, ca la njobbaxtali tund ya tãmbalee feeñ.

⁶ Teg nañu ca ñeent fukki fan, Nóoyin doora ubbi poroxndoll, ba mu sàkkaloon gaal ga, ⁷ daldi yebal ab baaxoñ, muy naaw, di dem ak a dikk, ba ndox mi fendi ci kaw suuf. ⁸ Mu teg ca yebal pitax, ba xam ndax ndox mi ci suuf fer na. ⁹ Teewul pitax ma gisul fenn fu mu tag, ndax ndox mi muur na suuf sépp. Mu dëlsi nag fa moom ca gaal ga. Nóoyin tállal loxoom, jàpp ko dugal ci biir fi wetam. ¹⁰ Négandiku na juróom ñaari fan, doora yebalaat pitax ma. ¹¹ Ba mu dëlsee ca ngoon, indaalewul lu moy xobu oliw wu tooy wu keppe ca sáll wa. Nóoyin xam ne ndox mi taa woon ci suuf, fer na. ¹² Mu négati juróom ñaari fan, bàyyiwaat pitax ma. Boobu yoon nag dëlsiwaatul ca moom.

¹³ At ma Nóoyin amee juróom benni téeméeri at ak benn, keroog benn fanu weer wa jëkk, ndox ma taa woon ca suuf daldi fendi. Nóoyin ubbi kubeer ga, xool, ba gis ne kaw suuf sépp wow na. ¹⁴ Keroog ñaar fukki fan ak juróom ñaar ca ñaareelu weer wa, ca la suuf si doora wow konj.

¹⁵ Ba loolu amee Yälla ne Nóoyin: ¹⁶ «Génnal gaal gi, yaak sa soxna ak say doom ak say soxnay doom. ¹⁷ Génnawaaleel lépp luy xeetu mbindeef mu ngeen àndal: picc yi ak bàyyima yi ak luy raam, ñu fulandiwi ci kaw suuf, daldi giir te bare.» ¹⁸ Nóoyin daldi génn, moom aki doomam ak soxnaam ak soxnay doomam ya. ¹⁹ Rabi àll yi ak luy raam ak luy naaw ak luy dox ci kaw suuf—lépp gënn ca gaal ga, lu ci nekk ak wirgoom.

²⁰ Naka la Nóoyin génn, daldi sàkkal Aji Sax ji sarxalukaay, mággaale ko ko. Mu sàkk nag ci luy dox ci kaw suuf—lépp mboolem picc mu set, jébbal Yälla ca sarxalukaay ba, muy saraxu rendi-dóomal. ²¹ Ci kaw loolu xetug jàmm gillee ca sarax sa, yéeg fa Aji Sax ja. Booba la wax ci xolam ne: «Dootuma rëbb suuf mukk ndax nit, doonte ba muy ndaw lay dale xinte lu ñaaw ci xolam. Dootuma boole fàdd mukk lépp luy dund, nii ma ko defe.

²² Li feek suuf di suuf, dootu jiwooy dakk mbaa ngóob, te du sedd aku tàngoor, du nawet it mbaa noor, mbaa guddeek bëccëg.»

9

Yälla fas na kòllère ak Nóoyin

¹ Ci kaw loolu Yälla barkeel Nóoyin aki doomam ne leen: «Giirleen te bare, ba fees àddina. ² Mboolem rabi àll yi ak njanaawi asamaan ak ndégmeent yi ci suuf, ak jëni géj yépp, dinañu leen ragal lool. Teg naa leen ci seeni loxo. ³ Man ngeena dunde boroom bakkan yooyu yépp. Jagleel naa leen bindeef yooyu yépp, ni ma leen jagleele woon gàncax.

⁴ «Waaye buleen lekk yàpp wu ànd ak deret, ndaxte dund a ngi ci deret. ⁵ Seen dundu nit itam, mu ngi ci seen deret, kon kat, képp ku tuur seen deret dinaa ko ko topp. Te it mala mu ci rey nit dinaa ko ko topp, ni may toppe nit. Dinaa topp ku nekk deretu moroomam.

⁶ Ku tuur deretu nit, na nit tuur deretam, ngir melokaanu boppam la Yälla sàkke nit.

⁷ Yeen nag, giirleen te bare, fulandiwi ci kaw suuf te fees ko.»

⁸ Yàlla nag wax Nóoyin ak doomam, yi mu àndal, ne leen: ⁹ «Bés niki tey fasal naa sama bopp kóllère sama diggante ak yeen ak seen askan, ¹⁰ fas ko it sama diggante ak mboolem mbindeef mu ngeen àndal, muy picc akug jur mbaa rabi àll—lépp daal lu génnandoo ak yeen ci gaal gi, di lépp luy dund ci kaw suuf. ¹¹ Ni may faseek yeen kóllère nii la:

Deesatul boole bindeef yépp, faat ci mbënn muk.

Du menn mbënn mu deeti faagaagal àddina.»

¹² Yàlla neeti: «Kóllère gi may fas ak yeen ak mboolem mbindeef mu ànd ak yeen, day sax ba fàww te liy màndargaam mooy lii: ¹³ def naa sama xon ci niir yi, muy màndargaal kóllère, gi dox sama diggante ak àddina.

¹⁴ «Saa su ma dajalee niir yi ci jaww ji, ba xon gi feen ci niir yi, ¹⁵ damay daldi xalaataat kóllère, gi ma fas sama digganteek yeen ak mboolem xeeti bindeef, su ko defee ndox dootu sabab mbënn muy faagaagal lépp luy dund. ¹⁶ Xon gi day nekk ci biir niir yi, ma di ko gis, di xalaat kóllère, gi ma fas fàww, sama diggante, man Yàlla, ak mboolem xeetu mbindeef mu nekk ci kaw suuf.» ¹⁷ Ci kaw loolu Yàlla ne Nóoyin: «Loolu mooy màndargaal sama kóllère, gi ma fas ak mboolem mbindeef mu nekk ci kaw suuf.»

Mbirum Nóoyin ma aki doomam

¹⁸ Doomi Nóoyin yu góor, yi génne ci gaal gi, ñooy: Sem, Xam ak Yafet; Xam mooy baayu Kanaan. ¹⁹ Nòoñu ñooy ñetti doomi Nóoyin yu góor, te ci ñoom la àddina sépp soqikoo.

²⁰ Nóoyin ab beykat la woon. Mu nekk nag ci njëmbatum reseñ. ²¹ Mu am bés mu naan biiñ, ba màndi, tèdd ci xaymaam, daldi sàgganu.

²² Ba loolu amee Xam, baayu Kanaan, gis céri baayam, génn waxi ko Sem ak Yafet ca biti. ²³ Sem ak Yafet ànd, jël malaan, teg ko ci seeni mbagg, doxe gannaaw ba agsi, doora sàng seen céri baay. Dañoo dummóoyu, ba gisuñu seeni baay.

²⁴ Màndite ma giif, Nóoyin yewwu, daldi yég ni xale bi def ak moom. ²⁵ Ba mu ko defee mu ne:

«Yal na Kanaan torox,
bay jaamu jaami doomi ndeyam.»

²⁶ Mu dellu ne:

«Cant ñeel na Aji Sax ji, Yàllay Sem,
yal na Kanaan dib jaamam.

²⁷ Yal na Yàlla lawal askanu Yafet,
dèël ko ci xaymay Sem,

te Kanaan di seen jaam.»

²⁸ Gannaaw ba mbënn ma wéyee, Nóoyin dundaat na ñetti téeméeri at ak

juróom fukk (350). ²⁹ Nóoyin dund na juróom ñeenti téeméeri at ak juróom fukk (950), doora faatu.

Askanu doomi Nóoyin

10

(Saar 10.1—11.9)

Xeet yi sosoo ci doomi Nóoyin

¹ Askanu doomi Nóoyin mooy lii. Gannaaw ba mbënn ma wéyee, Sem ak Xam ak Yafet am nafu ay doom.

Li jëm ci askanu Yafet

² Doomi Yafet yu góor ñii la: Gomeer ak Magok ak Madéy ak Yawaan ak Tubal ak Meseg ak Tiraas. ³ Doomi Gomeer yu góor di Askenas, Rifaat ak Togarma. ⁴ Doomi Yawaan yu góor di Elisa ak Tarsis ak Kitim ak Dodanim. ⁵ Ñi sosoo ci ñoom ñoo law ca wàllaa géej, meññ nag ay xeet ci seeni suuf, xeet wu ci nekk ak làkkam, def it ay làng ci seen biiri xeet.

Li jëm ci askanu Xam

⁶ Doomi Xam yu góor ñoo di ñii: Kuus ak Misrayim ak Puut ak Kanaan. ⁷ Doomi Kuus yu góor di Seba ak Awila ak Sabta ak Raama ak Sabteka. Doomi Raama yu góor di Saba ak Dedan.

⁸ Kuus moom itam jur Namróot, ki jëkk di jambaar ju siiw ci kaw suuf, ⁹ mu doonoon rëbbkat bu maga mag. Looloo waral ñu naan: «Mbeté Namróot, rëbbkat bu maga mag ba.» ¹⁰ Dëkk yiy péeyi nguuram ñoo di: Babel ak Ereg ak Akádd ak Kalne, gi ci réewu Sineyaar. ¹¹⁻¹² Ca réew mooma la Namróot jóge dem Asur, sanc dëkk bu mag boobee di Niniw, ak dëkk yooyee di Reyobot Ir ak Kala, ba Resen, gi ci diggante Niniw ak Kala.

¹³ Misrayim nag mooy maami Luddeen ñi ak Anameen ñi ak Leyabeen ñi ak Naf-tuyeen ñi ¹⁴ ak Pataruseen ñi ak Kasluyeen, ñooñee waa Filisti bàyyikoo ca seen réew; ak it Kaftoreen ñi.

¹⁵ Kanaan moo taawloo Sidon, teg ca Ett, ¹⁶ te mooy maami Yebuseen ñi ak Amoreen ñi ak Girgaseen ñi ¹⁷ ak Eween ñi ak Arkeen ñi ak Sineen ñi, ¹⁸ ak Arwàddeen ñi ak Semareen ñi ak Amateen ñi. La ca tegu làngi Kanaan tasaaroo. ¹⁹ Kemu suufas Kanaaneen ña, mu ngi tàmbalee Sidon, jaar weti Gerar, dem ba Gasa, wuti Sodom ak Gomor ak Atma ak Ceboyim, daldi teeri Lesa.

²⁰ Nòoñu ñooy askani Xam, askan wu ci nekk ak làngam ak làkkam, di ay xeet ci seeni réew.

Li jëm ci askanu Sem

²¹ Sem, miy magu Yafet, jur na moom itam ay doom yu góor. Mooy maami Eber

ak askanam. ²² Doomi Sem yu góor ñii la: Elam ak Asur ak Arpagsádd ak Ludd ak Aram. ²³ Góor ñi Aram jur ñii la: Uus ak Xuul ak Geter ak Maas. ²⁴ Arpagsádd jur Sela, Sela jur Eber; ²⁵ Eber moom, jur ñaari doom yu góor, kenn ki tudd Peleg (mu firi Séddlikoo), ndaxte ci jamonoom áddina dafa séddlikoo woon. Rakku Peleg mooy Yogtaan.

²⁶ Yogtaan a jur Alamodádd ak Selef ak Asarmawet ak Yera ²⁷ ak Adoram ak Usal ak Digla ²⁸ ak Obal ak Abimayel ak Saba ²⁹ ak Ofir ak Awila ak Yobab. Nōoñu ñépp di doomi Yogtaan yu góor. ³⁰ Ña nga dékkoon ca wállu Mesa, ga wuti Sefar, di diiwaanu tund yu ca penku.

³¹ Nōoñu askanoo ci Sem, askan wu ci nekk ak ñangam ak làkkam, di ay xeet ci seeni réew.

³² Långi doomi Nōoyin yu góor a ngoogu, lång gu nekk ak askanam, ñu diy xeet. Ci ñoom la xeet yépp jóge tasaaroo ci kaw suuf, gannaaw ba mbénn ma wéyee.

11

Yàlla safaan na làkku àddina, mu jaxasoo

¹ Ca ndoorte la nag waa áddina sépp a bokkoon wenn làkk, seeni wax di benn. ² Bi nit ñi toxoo, jëm penku, dañoo gis ag joor ci réewu Sineyaar, ñu sanc fa. ³ Ñu ne: «Ayca nu defar ay móol yu ñu lafk cib taal, ba mu ñor.» Ci kaw loolu ñu def móol ya doji tabax, taqalee ko koltaar. ⁴ daldí ne: «Ayca nu tabax ab dékk bu taax ma bëtt asamaan; kon dinanu am woy, te dunu tasaaroo ci kaw suuf.»

⁵ Ba ñu noppee Aji Sax ji wàcc, xoolsi dékk bi ak taax, mi doom aadama yi tabax.

⁶ Aji Sax ji da ne: «Su ñu tãmbalee nii, di menn mbooloo te bokk wenn làkk, kon dara dootu leen tẽ. ⁷ Ayca nu wàcc, safaan seen làkk, ba dootuñu déggoo.»

⁸ Ba loolu amee Aji Sax ji jële leen foofa, tasaare leen ci kaw suuf sépp, ñu yemale fa dékk ba ñu doon tabax. ⁹ Looloo tax ñu tudde dékk ba Babel (mu firi Safaan), ndax foofa la Aji Sax ji safaane làkku áddina sépp, mu jaxasoo, te fa la leen tasaaree ci kaw suuf sépp.

Askanu Sem, maamu Ibraam

(Saar 11.10-26)

¹⁰ Askanu Sem mooy lii. Sem am na téeméeri at, doora jur Arpagsádd, fekk na mbénn ma wees, ba mu am ñaari at. ¹¹ Arpagsádd juddu na, Sem dundaat juróomi téeméeri at (500), juraat ay doom yu góor ak yu jigéen.

* 11:27 11.27 Ibraam mii: Yàlla dina ko mujja tudde Ibraayma. Seetal ci 17.5.

† 11:28 11.28 Ur: dékk bu yággoon la, te bokkoon ci réew, mi ñu tudde Iraag léegi.

¹² Arpagsádd am fanweeri at ak juróom, jur Sela. ¹³ Sela juddu na, Arpagsádd dundaat ñeenti téeméeri at ak ñett (403), juraat ay doom yu góor ak yu jigéen.

¹⁴ Sela am fanweeri at, jur Eber. ¹⁵ Eber juddu na, Sela dundaat ñeenti téeméeri at ak ñett (403), juraat ay doom yu góor ak yu jigéen.

¹⁶ Eber am fanweeri at ak ñeent, jur Peleg. ¹⁷ Peleg juddu na, Eber dundaat ñeenti téeméeri at ak fanweer (430), juraat ay doom yu góor ak yu jigéen.

¹⁸ Peleg am fanweeri at, jur Rew. ¹⁹ Rew juddu na, Peleg dundaat ñaar téeméeri at ak juróom ñeent (209), juraat ay doom yu góor ak yu jigéen.

²⁰ Rew am fanweeri at ak ñaar, jur Serug. ²¹ Serug juddu na, Rew dundaat ñaar téeméeri at ak juróom ñaar (207), juraat ay doom yu góor ak yu jigéen.

²² Serug am fanweeri at, jur Naxor. ²³ Naxor juddu na, Serug dundaat ñaar téeméeri at, juraat ay doom yu góor ak yu jigéen.

²⁴ Naxor am ñaar fukki at ak juróom ñeent, jur Teraa. ²⁵ Teraa gane na áddina, Naxor dundaat téeméeri at ak fukk ak juróom ñeent (119), juraat ay doom yu góor ak yu jigéen.

²⁶ Gannaaw ba Teraa amee juróom ñaar fukki at, am na Ibraam ak Naxor ak Aran.

Askanu Teraa, baayu Ibraam

(Saar 11.27–25.11)

²⁷ Askanu Teraa mooy lii. Teraa mooy baayu Ibraam* ak Naxor ak Aran. Aran mooy baayu Lóot. ²⁸ Gannaaw loolu Aran faatu na lu jiiitu faatug baayam Teraa, ca réew ma mu juddoo, di Ur†, dékku Kaldeen ña. ²⁹ Ibraam ak Naxor jël nañu ay soxna; soxnas Ibraam tudd Sarayi, soxnas Naxor di Milka. Milka moomu, moom ak rakkam ju jigéen Yiska, Aran ay seen baay. ³⁰ Sarayi moomu masuloona am doom te it manu ko woota am.

³¹ Mu am bés Teraa ànd ak doomam Ibraam ak sëtam Lóot, mi Aran di baayam, ak Sarayi, soxnas Ibraam. Ñu bokk jóge Ur gu Kaldeen ña, jëm réewu Kanaan. Ba ñu demee ba Karan, daldí fay sanc. ³² Teraa dund na ñaar téeméeri at ak juróom (205), doora génn áddina, ñu denc ko Karan.

12

Yàlla sant na Ibraam, mu gáddaay

¹ Aji Sax ji moo waxoon Ibraam, ne ko: «Jógeel sam réew, jóge ci say bokk ak sa kër baay, te nga dem ca réew mi ma lay won,

† 11:28 11.28 Ur: dékk bu

² ma def la ngay cossaanal xeet wu yaa, barkeel la, mággal sa tur, ngay buntu barke;

³ ku la ñaanal barke, ma barkeel, ku la móolu it, ma alag, te xeeti áddina sépp, ci yaw lañuy barkeele.»

⁴ Ibraam daldi dem, na ko ko Aji Sax ji waxe woon, Lóot topp ca. Ba Ibraam di jóge Karan, booba am na juróom ñaar fukki at ak juróom (75). ⁵ Ibraam ànd ak soxnaam Sarayi ak Lóot, mi muy baay bu ndaw ci moom. Mu yóbbaaale nag alal, ja mu dajale jépp, ak jaam, ya mu jénde Karan. Ñu jóge fa, jublu réewu Kanaan.

⁶ Ba ñu agsee Kanaan, Ibraam dafa jàll ca biir réew ma, ba àgg bérab bu sell, ba féete ak Sikem, ca garab* gu mag, ga ñuy wooye More. Booba fekk na waa Kanaan a nga woon ca réew ma. ⁷ Ci kaw loolu Aji Sax ji feeñu Ibraam ne ko: «Sa askan wi soqikoo ci yaw laay jox réew mii.» Ibraam nag daldi tabaxal Aji Sax, ji ko feeñu, ab sarxalukaay.

⁸ Gannaaw loolu mu jóge fa, jëm tund, wi féete Betel penku, samp fa xaymaam; Betel féete ko sowu, Ayi féete ko penku. Foofa itam Ibraam tabaxal na fa Aji Sax ji sarxalukaay, tudd fa Aji Sax ji, wormaal ko. ⁹ Ibraam bàyyikooti fa, aw yoonam, jublu àllub Negew†.

Ibraam dem na réewum Misra

¹⁰ Ca jamono jooja xiif a amoon ca réew ma, ba tax Ibraam dem réewum Misra, toogi fa, ndax xiif bu metti la woon. ¹¹ Naka lay jub Misra, daldi ne soxnaam Sarayi: «Déglu ma, xam naa ne ku rafet nga. ¹² Bu la waa Misra gisee, dinañu ne sama soxna nga. Te dinañu ma rey, nga des. ¹³ Kon nag ngalla waxal ne sama jigéen nga, ba tax ma am jàmm; su ko defee dees na ma bàyyi, ma dund, te di la ko gèrème.»

¹⁴ Ba Ibraam àggee Misra, waa Misra gis ne jigéen ji mu àndal rafet na lool. ¹⁵ Jaraafi Firawna itam gis ko, di ko kañ ca Firawna ndax taar ba, ñu daldi ko yóbbu ca kër Firawna. ¹⁶ Firawna nag topptoo Ibraam bu baax ndax moom, ñu may ko ay gátt ak ay nag, ay mbaam yu góor, ak ay jaam yu góor ak yu jigéen, ak ay mbaam yu jigéen aki giléem.

¹⁷ Teewul Aji Sax ji wáce ca Firawna ak waa kèram jàngoro yu metti ndax Sarayi, soxnas Ibraam. ¹⁸ Firawna woolu Ibraam ne ko: «Li nga ma def nag? Lu tax waxoo

ma ne kii sa soxna la? ¹⁹ Lu tax nga ne sa jigéen la, ba tax ma jël ko, bëgg koo def sama jabar? Ayca, sa jabar a ngoog, fabal te ne mott!» ²⁰ Naka la Firawna wax loolu ba noppi, daldi sant ay dagam, ñu génne Ibraam réew ma, moom ak soxnaam ak alalam jépp.

13

Ibraam ak Lóot teqlikoo nañu

¹ Bi loolu amee Ibraam dafa jóge Misra, moom ak soxnaam, yóbbaaale alalam jépp, daldi dem ca àllub Negew, Lóot topp ca. ² Ibraam nag amoon alal ju bare diggante jur, xaalis ak wurus. ³ Gannaaw loolu mu awati yoonam, jóge àllub Negew, jëm dëkk ba ñu naa Betel, dem ba àgg ca bérab, ba mu jëkkoonaa samp xaymaam, ci diggante Betel ak Ayi, ⁴ fa mu tabaxoon ab sarxalukaay. Ibraam nag tudd fa Aji Sax ji, wormaal ko.

⁵ Ci biir loolu Lóot, mi mu àndal, moom it yor jur gu gudd ak gu gátt aki xayma, ⁶ ba tax xajatuñu ca réew ma, ndax seen alal dafa bare, ba manatuñu faa bokk dëkk. ⁷ Loolu tax sàmmi Ibraam ak sàmmi Lóot di jote. Rax ci dolli Kanaaneeen ñi ak Periseen ñi ña nga woon ca réew ma.

⁸ Ba loolu amee Ibraam da ne Lóot: «Waay waay, bu xuloo am sama diggan-teek yaw mbaa say sàmm ak samay sàmm. Xanaa dunuy bokk nag? ⁹ Xanaa àll bi newul yàmblan ngay gis? Nan teqlikoo, kay; boo demee càmmoñ, ma dem ndijoor; boo demee ndijoor, ma dem càmmoñ.»

¹⁰ Ba mu waxee ba noppi, Lóot dafa xool, gis joor, gi wër dexu Yurdan gépp, màndi ndox. Ndax laata Aji Sax jiy tas dëkk yu ñuy wax Sodom ak Gomor, àll bi jëm Sodar dafa naatoon, ni réewum Misra naate, ba faf mel ni toolub Aji Sax ja*. ¹¹ Ba mu ko defee Lóot tànn jooru Yurdan gépp, daldi toxu jëm penku. Noonu lañu teqlikoo. ¹² Ibraam dëkke réewu Kanaan, Lóot sanee dëkk ya ca jooru Yurdan, daldi toxal xaymaam, samp ko Sodom. ¹³ Waaye waa Sodom ñu bon lañu woon, te mana moy Aji Sax ji lool.

Digeb Aji Sax ja ak Ibraam

¹⁴ Gannaaw ba Lóot teqlikook Ibraam, Aji Sax ji wax na Ibraam ne ko: «Téenal foofu nga taxaw, te séenu bėj-gànaar ak bėj-saalum ak penkook sowu, ¹⁵ ndaxte réew, mi ngay gis mépp, yaw laa koy may ba fàww, yaak askan wi soqikoo ci yaw. ¹⁶ Dinaa leen yokk, ba ñu tollu ni feppi suuf, ba feppi suuf gèna neexa waññ sa

* **12:6** 12.6 Xeetu garab la gu ñuy wax terebent. † **12:9** 12.9 àllub Negew: mu nga féete Kanaan bėj-saalum, nekk ca yoonu Misra. Li muy tekki mooy «wowaay». * **13:10** 13.10 Tool booba mooy Ajjana, fa Yàlla jëkkoonaa dëkkal Aadama ak Awa.

† **12:9** 12.9 àllub Negew: mu nga féete Kanaan bėj-saalum, * **13:10** 13.10 Tool booba mooy Ajjana, fa Yàlla jëkkoonaa

askan. ¹⁷ Jógal wër réew mi mépp, ba mu daj, ndax yaw laa koy may.»

¹⁸ Ba mu ko defee Ibraam sempi xaymaam, ñëw dal Ebron ca garab yu mag ya ca toolub Mamre, daldi fay tabaxal Aji Sax ji sarxalukaay.

14

Ibraam wallu na Lóot

¹ Ca jamonoy Amrafel buurub Sineyaar, ak Aryog buurub Elasaar, Kedorlamer buurub Elam, ak Tidal buurub Goyim, ² ànd nañu, dal ci kaw ñoom Bera buurub Sodom, ak Birsá buurub Gomor, ak Sineyab buurub Atma, ak Semeber buurub Ceboyim, ak it buuru dëkk ba ñuy wax Bela, mooy Sowar ba tey. ³ Nooñoño booloo woon ca xuru Sidim, mooy géēju Xorom gi léegi. ⁴ Fekk na ñiuru fukkí at ak ñaar Kedorlamer moo leen yilifoón, teewul ca fukkeelu at ma ak ñett ñu fippu.

⁵ Ca déwén sa Kedorlamer ak buur ya faroon ak moom, dem dàq Refayeen ña ca Àsterot Karnayim, ak Suseen ña ca Am, ak Emeen ña ca jooru Kiryaatayim, ⁶ ak Oreen ña ca seen tund wa ñuy wax Seyir. Da leena dàq ba ca garabu Paran gu mag ga ca wetu màndij ma. ⁷ Ñu jóge fa nag, waññiku, dem En Mispát, di Kades ba tey, daldi teg mboole réewum Amalegeen ña tànk, boole ca song Amoreen ña dëkk Asaron Tamar.

⁸ Ci kaw loolu buurub Sodom génn, mook buurub Gomor ak buurub Atma ak buurub Ceboyim ak buuru Bela, di Sowar ba tey, ñoom ñépp daldi làng, nara xare ca xuru Sidim, ⁹ di sot ñoom Kedorlamer buurub Elam, ak Tidal buurub Goyim, ak Amrafel buurub Sineyaar, ak Aryog buurub Elasaar. Ñeenti buur di xareek juróom.

¹⁰ Waaye xuru Sidim woowu dafa feesoon dell aki pax aki kàmbi koltaar. Ba mu ko defee buuri Sodom ak Gomor di daw, far daanu ca kàmb ya. Ña ca des daw ba ca tund ya. ¹¹ Ña leen dàq nag, jël alalu Sodom ak Gomor yépp, nanguwaale seen dund bépp boole ca, daldi dem seen yoon. ¹² Booba lañu yóbbu Lóot ma dëkk Sodom, te Ibraam di baayam bu ndaw. Ci biir loolu ñu yóbbaaale li mu amoon lépp, dem.

¹³ Ba loolu xewee, kenn ci ñi ñu jàppoon récc, ñëw ci Ibraam miy ab Ebrè, wax ko ko. Fekk na mu dëkk ca wetu garab yu mag ya woon ca toolub Mamre, ma dib Amoreen, di mbokk mu jege ci Eskol ak Aner, ñoom ñi doon wóllérey Ibraam.

¹⁴ Ba Ibraam déggee ne jàpp nañu Lóot ma muy baayam bu ndaw, fa saa sa daa

dajale dagam, yi juddoo kéram te tollu ci ñetti téeméer ak fukk ak juróom ñett (318), ñu dàq buur ya ba dëkk ba ñuy wax Dan. ¹⁵ Ibraam dafa xàjjale mbooloom, dal ci kaw buur ya guddi, dàq leen, topp ci ñoom ba Koba, ca bėj-gàannaaru Damaas. ¹⁶ Ibraam nag délloosi alal ja jépp, nangu Lóot, mook alalam, ak jigéen ña ak ñeneen, ña ñu jàppoon.

Melkisedeg ñaanal na Ibraam barke

¹⁷ Gannaaw ba Ibraam dàqee Kedorlamer ak buur ya àndoon ak moom, ba délsi, buurub Sodom dafa génn, gatandu ko ca xur wa ñuy wax Sawe, ñu di ko wooye xuru Buur ba tey. ¹⁸ Ci kaw loolu Melkisedeg* buurub Salem, mi doon sarxalkatu Yàlla Aji Kawe ji, daldi ñëw, indi mburu ak biiñ. ¹⁹ Mu ñaanal Ibraam ne ko:

«Yaw Ibraam, Yàlla na la Yàlla Aji Kawe ji barkeel,

moom mi sàkk asamaan ak suuf!

²⁰ Waaye jaaraamaa Yàlla Aji Kawe ji,

moom mi la dumaal say noon!»

Ba loolu amee Ibraam sàkk fukkeelu la mu lël lépp, jox ko.

²¹ Gannaaw loolu buurub Sodom wax Ibraam ne ko: «Jox ma nit, ñi nga jàpp, te nga fab alal ji.» ²² Ibraam nag wax buurub Sodom ne ko: «Man yékkati naa sama loxo, Yàlla Aji Sax ju Kawe ji seede, moom mi sàkk asamaan ak suuf, ²³ nee naa: duma jël ci yaw dara, du puso, bi géna tuut sax, su ko defee doo mana wax ne yaa ma taxa am alal. ²⁴ Duma jël dara, lu wees li sama nit ñi lekk ba noppi ak sama wàllu farandoo yi, di Aner ak Eskol ak Mamre, ñoom it, nañu jot seen wàll.»

15

Yàlla fas na ak Ibraam kóllère

¹ Gannaaw ba loolu wéyee kàddug Aji Sax ji dikke na Ibraam wax jii ci peeñu, mu ne ko: «Yaw Ibraam, buul ragal dara; man maay sa kiiraay, te sa yool dina mágg lool.» ² Ibraam ne ko: «Boroom bi, yaw Aji Sax ji, ana loo may may nag? Man awma doom sax, te ki wara donn sama alal moo di Elyeser, miy waa Damaas.» ³ Ibraam teg ca ne: «Mayoo ma giir, te it jaam bu juddoo sama kër moo may donn.»

⁴ Kàddug Aji Sax ji nag dikkal ko, ne ko: «Du moom moo lay donn, waaye ku sosoo ci sa geño moo lay donn.» ⁵ Loolu wees Aji Sax ji yóbbu ko ci biti ne ko: «Xoolal asamaan, te waññ biddiww yi, ndegam man nga ko.» Mu dellu ne ko: «Noonun la sa askan di tollu.» ⁶ Ibraam nag gëm na Aji

* 14:18 14:18 Melkisedeg mu ngi tekki «buuru njubte».

Sax ji, ba tax Aji Sax ji waññal ko ngëmam ag njub.

⁷ Gannaaw loolu Aji Sax ji wax ko ne ko: «Man maay Aji Sax, ji la génnée Ur, ga ca Kaldeen ña, ngir may la réew mii, nga moom ko.» ⁸ Ibraam ne ko: «Yaw Aji Sax ji sama Boroom, nan la may wóore ne maa koy moom?» ⁹ Aji Sax ji ne ko: «Jëlal wëllu w ñetti at ak bëyu ñetti at ak kuuyu ñetti at, boole ci pitaxu àll ak xati mu ndaw.» ¹⁰ Ibraam boole yooyu yépp, rey, lu ci nekk mu dagg ko ci digg bi, dog bu nekk janook moroom ma, waaye daggul picc ya. ¹¹ Ba mu ko defee ay tan jóge ca, dal ca kaw yàpp wa, Ibraam nag dàq leen.

¹² Ba jant bay so, ngëmment lu réy a ko jàpp, tiitaange lu mag, ànd ak lëndëm gu ne këruus, ne milib ci kawam. ¹³ Aji Sax ji wax Ibraam ne ko: «Déglul bu baax li ma lay wax: sa askan dinañu nekk ay doxandëem ci réew mu ñu moomul, ñu def leeni jaam, sonal leen diiru ñeenti téeméeri at. ¹⁴ Waaye waa réew moomu leen di def ay jaam, dinaa leen àtte. Gannaaw loolu sa askan dina ca génn, ànd ak alal ju bare. ¹⁵ Yaw nag dinga gudd fan lool, doora nelaw, ñu denc la, nga fekki say maam ci jamm. ¹⁶ Say sët-sëtaat ay délsi fii bu seen jamono jotee, ndaxte bàkkaar Amoreen ñi* jéggeegul dayo.»

¹⁷ Ba jant sowee, ba guddi jot, njaq luy saxar, ànd ak jum buy tàkk, daldi jaar ci diggante dogi yàpp yooyu. ¹⁸ Keroog Aji Sax ji fas na kóllère digganteem ak Ibraam, ne ko: «Askan wi soqikoo ci yaw laa jox réew mii dale ci dexu Misra, ba ca dex gu mag googee di Efraat, ¹⁹ mooy réewu Keneen ñi ak Keniseen ñi ak Kadmoneen ñi ²⁰ ak Etteen ñi ak Periseen ñi ak Refayeen ñi, ²¹ boole ci réewum Amoreen ñi ak Kanaaneen ñi ak Gírgaseen ñi ak Yebuseen ñi.»

16

Ismayla juddu na

¹ Sarayi amul woon doom ak boroom këram Ibraam. Waaye fekk na mu am jaam bu juddoo Misra te tudd Ajara. ² Sarayi ne Ibraam: «Li am mooy Aji Sax ji deful ma am doom. Kon ngalla waay, dëkkool sama jaam bi, ndax Yàlla def, mu amal ma doom ju góor.» Ibraam nag dégg la Sarayi wax. ³ Looloo ngi am, gannaaw ba Ibraam dëkkee fukki at ca réewu Kanaan. Sarayi daldi jël Ajara, jaamam bi juddoo Misra, jox ko jëkkëram Ibraam, ngir mu dëkkoo ko. ⁴ Loolu wees Ibraam dëkkoo Ajara, mu daldi ëmb. Ajara yég ne ëmb na, indi nag yabeel digganteem ak sangam Sarayi.

⁵ Sarayi nag wax Ibraam ne ko: «Tooñ gi ma Ajara di tooñ, yaa ma ko yóbbe! Maa la jox sama jaam, ngir nga dëkkoo ko, naam, waaye moom, naka la yég ne ëmb na rekk, daldi indi yabeel sama digganteek moom. Kon yal na ma Aji Sax ji àtteek yaw!» ⁶ Ibraam wax Sarayi ne ko: «Sa jaam a ngoog ci say loxo, def ko lu la neex.» Sarayi nag di torxal Ajara, ba mu daw, ba soreek moom.

⁷ Ba mu dawee, malaakam Aji Sax ja gis ko fu dend akub bëtu ndox ca màndiñ ma, mooy bëtu ndox, ba ca yoonu Sur. ⁸ Mu ne ko: «Yaw Ajara, jaamu Sarayi bi, foo bàyyikoo nii? Ak foo jëm?» Mu ne ko: «Damay daw ba fu soreek sama sang Sarayi.»

⁹ Malaakam Aji Sax ja ne ko: «Dellul ca sa sang, te nga yem ciy loxoom.» ¹⁰ Mu teg ca ne ko: «Dinaa yokk sa askan lool, ba kenn du leen mana waññ.» ¹¹ tegaat ca ne ko:

«Léegi jigéenu wérul nga, te dinga am doom ju góor;

nanga ko tudde Ismayla (mu firi Yàlla dégg na),

ndax Aji Sax ji yég na sa naqar.

¹² Ismaylaay tiife, ni mbaamu àll mu deesul not,

di noonoo ñépp, ñépp noonoo ko.

Mooy sanc fu muy jàkkaarlook bokkam yépp.»

¹³ Ajara nag tudde Aji Sax ji wax ak moom, Ata El Roy (mu firi Yaa di Yàlla jiy gis), ndaxte da ne: «Moo man! Moona gis naa Yàlla, moom it mu gisal ma boppam de!» ¹⁴ Loolu moo tax ñu tudde teen booba teenu Laxay Roy (mu firi teenu Aji Dund ji may gis); mu nga nekk diggante Kades ak Beret.

¹⁵ Ba loolu weesee Ajara amal Ibraam doom ju góor. Ibraam tudde doom ji Ismayla. ¹⁶ Ba Ajaray am Ismayla, Ibraam a ngi tollu woon ci juróom ñiett fukki at ak juróom benn (86).

17

Yàlla soppa na turu Ibraam

¹ Ba Ibraam amee juróom ñeent fukki at ak juróom ñeent (99), am na bés Aji Sax ji feeñu ko ne ko: «Man maay Yàlla Aji Man ji. Topp ma te mat sëkk. ² Dinaa feddli sama kóllère ak yaw, yokk la bu baax.»

³ Ibraam dégg loola, daldi sujjóot. Yàlla wax ak moom ne ko: ⁴ «Man ci sama wàllu bopp, kóllère gi ma fas ak yaw mooy lii. Dinga nekk maamu xeet yu baree bare. ⁵ Te tuddatulo Ibraam; léegi yaa di Ibraayma (mu firi Maamu ñu bare), ndax maa la def ngay maamu xeet yu baree

* 15:16 15.16 Amoreen ñi: ñoo jëkkoona moom réewu Kanaan.

bare. ⁶ Dinaa la defal njaboot gu ne xas, ay xeet sosoo ci yaw, ba ay buur soqikoo ci yaw. ⁷ Te dinaa feddli sama kóllère, gi ci sama diggante ak yaw, yaak sa askan, muy kóllère guy sax maasoo maas ba fàww. Maay doon sa Yàlla, yaak sa askan. ⁸ Te réew mi nga doon ab doxandéem léegi, muy réewu Kanaan mépp, jox naa la ko, yaak sa askan, ngeen moom ko fàww. Te dinaa doon seen Yàlla.»

Xaraf màndargaal na kóllèreg Yàlla

⁹ Gannaaw loolu Yàlla waxaat na Ibraayma ne ko: «Yaw nag, sàmmal sama kóllère, yaak sa askan ak say sèt ak say sètaat. ¹⁰ Kóllère gi ma fas ak yaw, te nga war koo sàmm, yaak sa askan, li mu laaj mooy lii: góor gu nekk ci yeen, war naa xaraf. ¹¹ Xaraf mooy màndargaal kóllère googu ma fas ak yeen. ¹² Xale bu góor, bu amee juróom ñetti fan war naa xaraf. Képp kuy góor ci seen maasoo maas, war naa xaraf, ba ci jaam bu juddoo sa kër, mbaa ku ñu jënd ci sa xaalis, ak bépp doomu doxandéem boo jurul. ¹³ Jaam bu juddoo sa kër ak boo jënd, ñoom ñaar ñépp, dees leen wara xaraf. Xaraf ay màndargaal sama kóllère ci seen yaram, muy kóllère gu sax fàww. ¹⁴ Góor gu xaraful, ndax nanguwula xaraf, dees na ko dagge ci biir xeetam, ndax sàmmul sama kóllère.»

¹⁵ Ba loolu weese Yàlla waxaat na Ibraayma, ne ko: «Sa soxna tuddatul Sarayi; léegi moo di Saarata* . ¹⁶ Dinaa ko barkeel, may la ak moom doom ju góor; dinaa ko barkeel moos, ba mu jaboote xeet yu bare, te ay buuri xeet sax dinañu soqikoo ci moom.»

¹⁷ Bi Ibraayma dégge loolu, daa sujjóot, ree. Booba ma nga naan ci xelam: «Góoru téeméeri at, ndax dina mana am doom waay? Te Saarata, mi am juróom ñeent fukki at (90) sax, manati naa am doom a?» ¹⁸ Ibraayma ne Yàlla: «Moo, tee ngaa saxal Ismayla rekk te ànd ak moom?»

¹⁹ Yàlla ne ko: «Waaw, waaye du tere sa soxna Saarata amal la doom ju góor, nga tudde ko nag Isaaxa. Dinaa fas ak moom sama kóllère, mu wéy ba ciy sètam ba fàww. ²⁰ Bu dee ci wàllu Ismayla, nangul naa la ba tey. Ndax kat dinaa ko barkeel, jox ko njaboot gu yaa, yokk ko bu baax. Dina jur fukki kilifa ak ñaar yu mag, te dinaa ko defal mu sos xeet wu yaa. ²¹ Waaye sama kóllère nag, Isaaxa laa koy fasool, moom Isaaxa, mi Saarata di am, nègèni déwén.» ²² Loola la Yàlla wax Ibraayma, daldi fay bàyyikoo.

²³ Ba loolu amee Ibraayma boole doomam Ismayla, ak jaam, yi juddoo kèram yépp, ak ñi mu jëndoon ci xaalisam ñépp, góori waa kèram ñépp, xaraf leen ca bés ba, muy la ko Yàlla waxoon. ²⁴ Ibraayma amoon na juróom ñeent fukki at ak juróom ñeent (99), bi muy xaraf; ²⁵ doomam Ismayla am fukki at ak ñett, bi ñu koy xaraf. ²⁶ Bés sub keroog la Ibraayma xaraf, moom ak doomam Ismayla ²⁷ ak mboolem góori kèram, muy jaam ya fa juddoo mbaa ñu mu jënd ci ay doxandéem, ñoom ñépp a ànd ak moom xaraf.

18

Ibraayma ak ganam ña

¹ Am na bés, Aji Sax ji feeñu Ibraayma ca garabi Mamre yu mag ya. Booba ma nga toogoon ca buntu xaymaam digg njolloor. ² Naka la siggi, gis ñetti nit, ñu ne jimeet ci kanamam. Ibraayma gaawtu, gatandu leen, sujjóotal leen. ³ Mu daldi ne: «Sang bi, siyaare naa la. Ngalla waay, bu ma romb. ⁴ Xaarleen, ñu indil leen tuuti ndax, ngeen jàngu te nopplu ci ker garab gi. ⁵ Maa ngi leen di indil dogu mburu mu ngeen dègërloo, ba mana topp seen yoon, gannaaw nangu ngeena toog, ma siyaare leen.» Ñu ne ko: «Waaw, baax na.»

⁶ Ibraayma daldi gaaw, dugg biir xayma ba, ne Saarata: «Gaawal, jël ñetti ndabi sunguf su muc ayib, not ko, def ko mburu yu ndaw.» ⁷ Ibraayma nag daw ca gétt ga, sàkk fa sèllu wu duuf te baax, ñéw jox ko jaamam, mu gaaw togg ko. ⁸ Ibraayma taajal leen ndawal, la ñu togg, ba mu sotti, indaaleel leen soow ak meew mu bees. Ma nga taxaw ca seen wet ca ker garab ga, ñuy lekk.

⁹ Ñu daldi ko laaj ne ko: «Ana sa soxna Saarata?» Mu ne leen: «Mu ngi ci biir.» ¹⁰ Kooka ne ko: «Nègèni sii déwén déy laay délsi, te sa soxna Saarata dina am doom ju góor moos.» Bi muy wax loolu, Saarataa ngi ci buntu xayma bi ci gannaawam, di déglu. ¹¹ Booba fekk na Ibraayma ak Saarata doon mag, ba màggat lool sax, te Saarata weesoon na njurum doom. ¹² Ci kaw loolu Saarata ree ci suuf, daldi ne: «Man mu ñor xomm mii, ndax man naa amati boobu bânneex, te sama boroom kër it di mag?» ¹³ Aji Sax ji daldi wax Ibraayma ne ko: «Lu Saarata di ree, te naan: “Man mu màggat mii, deeti naa am doom moos?” ¹⁴ Ana lu tè Aji Sax ji? Bu ñu ca àggee nègèni déwén déy, dinaa fi délsiwaat, te Saarata dina am doom ju góor.» ¹⁵ Saarata dégg loolu, daldi tiit,

* 17:15 17.15 Sarayi, Saarata neexoo na ak baatu ebrè biy tekki «lingeer, doomu buur».

miim ko ne: «Reetaanuma de.» Teewul Aji Sax ji ne ko: «Ree nga kay!»

Ibraayma tinul na waa Sodom

¹⁶ Gannaaw loolu gan ña jóge foofa, tiim Sodom, di ko séentu. Ibraayma ànd ak ñoom, di leen gunge. ¹⁷ Booba Aji Sax jaa ngi wax naan: «Xanaa duma nèbb Ibraayma li ma nar?» ¹⁸ Ndax kat Ibraayma dina sos xeet wu mag te am doole, te xeeti àddina yépp ci moom lañuy barkeele. ¹⁹ Moo tax ma tànn ko, ngir mu sant ay doomam ak waa kèram, ñuy déggal Aji Sax ji, di jéfe yoon ak njub. Noonu laay defale Ibraayma li ma ko digoon.» ²⁰ Aji Sax ji nag àddu ne: «Bàkkaari Sodom ak Gomor bare na lool, ba may dégg yuux, yi sababoo ci seen moy. ²¹ Dinaa wàcc, seede ko, ba mu wóor ne ñoo def lépp li sabab yuux yi, am déet.»

²² Gan ña nag dem, jublu Sodom, Ibraayma moom taxaw ba tey fi kanam Aji Sax ji. ²³ Naka la Ibraayma jegeñsi, ne ko: «Mbaa doo boole ku jub ak ku jubadi, rey leen?» ²⁴ Su juróom fukk rekk jubee ca dèkk bi, mbaa doo tas dèkk bi ba tey, tee nga leena jéggal rekk ngir juróom fukk ñu jub ña ca nekk?» ²⁵ Rikk bul yemale ku jub ak ku jubadi, ba boole leen rey, loolu jomb na la moos! Yaw miy àtte àddina sépp kay, lu jub rekk ngay def!» ²⁶ Aji Sax ji ne ko: «Su ma gisee ci Sodom juróom fukk ñu jub, dinaa jéggal waa dèkk bi yépp ngir ñoom.»

²⁷ Ibraayma dellu ne: «Ma ñemee wax ak yaw, Boroom bi, te duma dara ba dara boooloo jeex. ²⁸ Waaye juróom fukk ñooñu jub, su yésee juróom rekk nag? Mbaa doo tas dèkk bi ndax juróom ñi ci yées?» Aji Sax ji ne ko: «Su ma fa gisee ñeent fukk ak juróom ñu jub, duma ko tas.» ²⁹ Ibraayma dellu wax ne: «Su fa ñeent fukk ñu jub rekk amee nag?» Aji Sax ji ne ko: «Duma def dara ngir ñeent fukk ñooñu.»

³⁰ Ibraayma dellooti ne: «Rikk Boroom bi, bu ma mere. Dinaa ci teg lii. Su fa fanweer ñu jub rekk amee nag?» Aji Sax ji ne ko: «Su fa fanweer ñu jub amee, kon duma def dara.»

³¹ Ibraayma neeti: «Léegi ma ñemeeti wax ak yaw boog, Boroom bi! Su ñu doon ñaar fukk rekk nag?» Aji Sax ji ne ko: «Kon duma ko tas ngir ñaar fukk ñooñu.»

³² Ibraayma dellu neeti: «Ngalla Boroom bi, bul mer, ma wax bii yoon rekk te noppi. Léegi su ñu dee fukk donj nag?» Aji Sax ji ne ko: «Kon duma tas dèkk bi, ndax fukk ñooñu jub.»

³³ Loolu la Aji Sax ji wax ak Ibraayma, daldi dèddu. Ibraayma it ñibbi kèram.

19

Bàkkaari waa Sodom

¹ Ba loolu amee ñaari malaaka ya dikk Sodom ca ngoon, fekk Lóot toog ca buntu dèkk ba*. Lóot séen leen, jóg gatandu leen, daldi leen sujjóotal, ne leen: ² «Dégluleen ma, ngalla sang yi, siyaare naa leen, tee ngeena dal ak man, su ko defee ngeen jàngu, fanaan ba suba, ngeen xëy topp seen yoon?» Ñu ne ko: «Bàyyil, nu fanaan ci mbedd mi.» ³ Lóot nag soññ leen, ba ñu dal kèram, mu ganale leen. Lóot da leena berndeel, lakkal leen mburu mu amul lawiir, ñu lekk.

⁴ Teewul bala ñoo téd, góori Sodom, mag ak ndaw, daldi jóge gox bu nekk, ñew yéew kër ga. ⁵ Ñu daldi woo Lóot ne ko: «Ana góor ñi fi ñew tey ci guddi? Génneel nu leen fii, ndax nu mana àgg ci ñoom.» ⁶ Lóot gén, fekk leen ca buntu kër ga ca biti, daldi tēj bunt ba. ⁷ Mu ne leen: «Bokk yi, ngalla buleen def lu bon loolu waay!» ⁸ Dégluleen, ma wax leen; man, am naa ñaari doom yu jigéen, te xamuñu góor. Mayleen ma, ma yót leen leen, ngeen def leen lu leen neex. Rikk buleen def góor ñii dara, ndaxte samay gan lañu.» ⁹ Ñu ne ko: «Toppal fale!» te naan: «Waay! Waa jii dal ci sunu dèkk bi rekk, bëgg di fi àtte! Léegi nag dinanu la def lu raw li nu bëggoona def say gan.» Ñu sunu Lóot, ba nara dàjji bunt ba. ¹⁰ Teewul gan ña yoor seeni loxo, ñoddi Lóot ba ci biir, tēj bunt ba. ¹¹ Ba loolu amee ñu gumbaal nit ña nekkoon ca buntu kër ga, mag ak ndaw, ñuy làmbatu bunt ba, ba sonn, bàyyi.

Lóot gén na Sodom

¹² Ba loolu wéyee gan ña wax Lóot ne ko: «Boo amee mbokk ci dèkk bi, muy sa doom ju góor mbaa ju jigéen, mbaa kuy denc sa doom— koo fi am, génne ko fi, ¹³ ndax dinanu ko tas de. Aji Sax ji dégg na jooytu yu réy, yi niti dèkk bi sabab, ba tax mu yónni nu, ngir nu tas-si ko.» ¹⁴ Lóot daldi gén, wax ak goroom, ya naroona takk ay doomam yu jigéen, ne leen: «Gaawleen gaaw, gén dèkk bi, ndaxte Aji Sax ji dina ko tas.» Teewul ñu defe ne day kaf.

¹⁵ Fajar a ngay xar, malaaka ya fuug Lóot ne ko: «Gaawal gaaw, ànd ak sa soxna ak sa ñaari doom yu jigéen yii, ba bu Yalla tasee dèkk bi, dungeen sànk.» ¹⁶ Lóot di tendeefal, gan ña japp ci loxo bi, booleek soxnaam ak ñaari doomam génne, laq leen ca gannaaw dèkk ba, ndax yèrmande ju Aji Sax ji am ci Lóot. ¹⁷ Ba ñu leen génnee, kenn ci ñoom ne Lóot: «Dawal sa xélu bakkan, bul geestu, bul taxaw fenn

* 19:1 19.1 ca buntu dèkk ba la pénc ma nekkoon, booy duggsi.

ci joor gi. Dawal ca tund ya, bala ngaa dee.»¹⁸ Lóot nag ne ko: «Déet, sang bi!¹⁹ Defal nga ma yiw, yërèm ma lool, ba musal ma. Waaye bala maa daw, ba àgg ca tund ya, musiba mii man naa dal ci sama kaw, ma dee.²⁰ Gisuloo dëkk bale; jege na, te dëkk bu tuut la, am déet? Ma daw, làquji fa boog, ba mucc?»²¹ Malaaka ma ne ko: «Waaw baax na ba tey, duma tas dëkk boobu ngay wax.²² Nanga gaaw nag, làquji fa, ndax duma mana def dara te àgguloo ca.» Loolu moo tax ñu tudde dëkk boobu Sowar (mu firi Bu tuut).

Yàlla tas na dëkk yooyu di Sodom ak Gomor

²³ Ba jant bay fenk, Lóot dugg sa Sowar.²⁴ Aji Sax ji nag yuree ca asamaan tamarax buy tàkk, muy taw ci kaw Sodom ak Gomor, na ko Aji Sax ji dogale.²⁵ Mu daldi tas mboolem dëkki joor ga, boole ca nit ña ak gàncax gépp.²⁶ Ci kaw loolu soxnas Lóot ne gees, jëmm ja far soppliku xorom.

²⁷ Ca èllëg sa Ibraayma dafa teela jóg, dem fa mu taxawoon jàkkaarlook Aji Sax ji.²⁸ Naka la séentu Sodom ak Gomor ak joor ga ba fa mu yem, gis nag saxar suy gillee ci suuf, mel ni saxaru taalu ban.

²⁹ Ndaxam bi Yállay tas dëkki joor ga, xalaat na Ibraayma, ba musal Lóot ca dogalam boobe, keroog ba mu tasee dëkk, ya Lóot daloon.

Mbirum Lóot ak doomam yu jigéen ya

³⁰ Gannaaw loolu Lóot dafa ragala dëkk Sowar, ba toxoo fa, ànd ak ñaari doomam yu jigéen, sancu ca tund ya. Mu dëkk ci xuntim xeer, moom ak ñaari doomam yu jigéen.

³¹ Mu am bés, taaw bi wax rakk ji, ne ko: «Sunu baay a ngii màggat, te fii fépp amul góor gu nu mana séqal ci wàllu séy, ni ko waa àddina yépp baaxoo defe.³² Kon nanu def nii: danuy nàndal sunu baay biñ, tédd ak moom, ngir sunu xeetu baay du fey.»³³ Ca guddi ga ñu nàndal seen baay biñ, taaw ba dugg, tédd ak baayam, te Lóot yégu ba fa doom jay tédd ak ba muy jóg.³⁴ Ca èllëg sa taaw ba wax rakk ji, ne ko: «Man tédd naa ak sama baay biig; guddig tey it, danu koy nàndalaat biñ, su ko defeex nga dugg tédd ak moom, ndax sunu xeetu baay du fey.»³⁵ Guddi jot, ñu nàndalaat seen baay biñ, rakk ja dem tédd ak baayam, te Lóot yégu ba fa doom jay tédd ak ba muy jóg.

³⁶ Noonu la ñaari doomi Lóot def ak seen baay, daldi cay doxe èmb.³⁷ Taaw ba am ca doom ju góor, tudde ko Mowab (mu firi Jóge ci baay). Mowab moo sos Mowabeen ñi.³⁸ Rakk ja moom it am doom ju góor,

tudde ko Ben Aami (mu firi Sama doomu mbokk). Ben Aami moo sos Amoneen, ñi fi nekk ba tey.

20

Lu jëm ci Ibraayma ak Abimeleg

¹ Ba loolu amee Ibraayma dafa jóge fa mu nekkoon, jublu àllub Negew, sancu digante Kades ak Sur, ba noppi ganeji ay fan ca dëkk ba ñu naa Gerar.² Ba Ibraayma àggee nag, da ne soxnaam Saarata ab jigéenam la. Abimeleg buurub Gerar daldi yónnee jëlsi Saarata.³ Teewul genn guddi Yàlla feñu Abimeleg ci gént ne ko: «Yaw dee nga ba noppi, ndax jigéen, ji nga nangu, soxnas jaambur la.»⁴ Loolu fekkul Abimeleg dëkkoo Saarata. Mu wax Yàlla ne ko: «Sama Boroom, mbaa doo bóom réew mi ci mbir mu ñu doonul dara?»⁵ Du góor gi da maa waxoon ne kii jigéenam la? Du jigéen ji it da maa waxoon ne kooku càmmiñam la? Fexewuma dara lu ñaaw te di ko tey de!»⁶ Yàlla ne ko a gént ga: «Waaw, xam naa ne li nga def du sa teyef. Moo tax man it mayuma la nga laal ko, di ma tooñ.⁷ Léegi nag dellool góor gi soxnaam, ab yonent la de, te dina la ñaanal, nga raw. Waaye soo ko deful, na la bir ne dinga dee, yaak sa waa kër yépp.»

⁸ Abimeleg jóg suba teel, woolu dagam yépp, nettali leen loolu lépp, ñu tiit lool.⁹ Gannaaw loolu Abimeleg woolu Ibraayma ne ko: «Li nga nu def nag? Ndax dama laa tooñ, ba nga yóbbe ma tooñ gu réye nii, man ak sama réew mi mépp? Lii nga ma def de, waroo ko woona def.»¹⁰ Abimeleg teg ca ne ko: «Te li nga def sax, lu la ci xiir?»¹¹ Ibraayma ne ko: «Da di dama noon, amul kenn ci réew mii ku ragal Yàlla, te dees na ma rey ndax sama soxna.¹² Te moona dëgg la sax, sama jigéen a, ndaxte danoo bokk baay te bokkunu yaay, ma jël ko.¹³ Te bés, ba ma Yàlla génnee sama kër baay, may wèndeelu, dama koo waxoon ne ko: «Déglul, li ngay def soo ma béggee xettli, mooy lii: fépp fu ñu dem, nanga wax ne sa càmmiñ laa.»

¹⁴ Ba mu waxee ba noppi, Abimeleg jël ay xar aki nag ak ay jaam yu góor ak yu jigéen, jox ko Ibraayma, daldi ko delloo soxnaam Saarata.¹⁵ Abimeleg ne ko: «Sama réew mépp a ngi noonu, dëkkal fu la neex.»¹⁶ Gannaaw loolu wax na Saarata ne ko: «Déglu ma fii, jox naa sa càmmiñ limu junniy dogi xaalis* . Loolu dama koo def, ngir setal sa der ci kanam

* 20:16 20.16 junniy dogi xaalis tollu woon na ci fukki kiloy xaalis ak benn.

ñi nga dëkkal ñépp. Léegi nag ñépp xam nañu ne set nga wecc.»

¹⁷⁻¹⁸ Fekk na Aji Sax ji um jigéeni waa kër Abimeleg, ba kenn du ci am doom, du soxnaam, du ay jaamaam, te li ko waral di Saarata soxnas Ibraayma. Ibraayma nag ñaan Yàlla; Yàlla def ñu wér, ba mana am doom.

21

Juddub Isaaxa

¹ Gannaaw loolu Aji Sax ji yéwéne na Saarata, ni mu ko waxe woon, defal ko li mu ko digoon. ² Saarata ëmb, amal Ibraayma doom ju góor ci jamono, ji ko Yàlla waxoon, te fekk góor gi di mágat. ³ Ibraayma tudde doomu Saarata jaak moom, Isaaxa. ⁴ Ba bés ba délsee, Ibraayma xarfal doomam Isaaxa, ni ko ko Yàlla digale woon.

⁵ Ba Isaaxa di juddu, booba Ibraaymaa ngi woon ci téméeri atam. Saarata ne: «Yàllaaka maa bégal, may ree,

ànd ak ku yég, nuy ree*.»

⁷ Mu neeti:

«Éy, ku noon Ibraayma, Saarataa ngay nàmpal!

Teewul ma jural ko góor, te muy mag.»

Saarata jote na ak Ismayla ak Ajara

⁸ Ba loolu amee doom ja mág, ba bés, ba ñu ko feralee. Keroog Ibraayma def na bernde ju mag. ⁹ Saarata nag gis doomu Ajaram Misra, jaak Ibraayma, muy kókkalee. ¹⁰ Saarata ne Ibraayma: «Dàqal jaam bii, mook doomam, ndax doomu jaam bii du bokk ak sama doom ndono.»

¹¹ Loolu Saarata wax naqari Ibraayma lool ndax li Ismayla di doomam, moom it.

¹² Teewul Yàlla ne Ibraayma: «Bu la dara naqari ci xale bu góor bii, mook sa jaam bi. Defalal Saarata li mu la wax rekk, ndax ci Isaaxa lees di tudde saw askan. ¹³ Doomu jaam bi it, dinaa ci lawale aw xeet nag, ndaxte yaa ko jur.»

¹⁴ Ca ëllég sa Ibraayma jóg suba teel, sàkk mburu, booleek mbuus ndox, jox Ajara, mu gaddu. Mu daldi ko dénk Ismayla, yebal ko, mu dem. Ci kaw loolu muy wéndeelu ca màndiñu Beerseba. ¹⁵ Ba ñu demee, ba ndox ma jeex, Ajara daa bàyyi xale bu góor bi ci taatu ngarab su ndaw, ¹⁶ dox, ba dànd ko lu tollook saanu fitt, toog nag jàkkaarlook moom te naa ci xelam: «Duma fekke muk sama deewu doom.» Naka la toog foofa janook moom, ne yikkét jooy.

¹⁷ Ba mu ko defee Yàlla dégg baatu xale bu góor ba. Malaakam Yàlla ma àddoo asamaan, ne Ajara: «Ajara, lan la? Bul

* **21:6** 21.6 Isaaxa mu ngi tekki «ree» ci làkku ebré. ñaar» ba tey.

ragal dara, ndaxte Yàlla dégg na sa baatu doom ci diggante bii mu tollu. ¹⁸ Demal yékkati ko, may ko loxo, mu jóg. Dinaa def mu law, ba doon xeet wu yaa.»

¹⁹ Ci kaw loolu Yàlla muri ay bëtam, mu gis ab seyaan, daldi cay dem, duy mbuusam, ba mu fees, jox ca doomam, mu naan. ²⁰ Yàlla nag ànd ak Ismayla, muy mág, dëkk ca màndiñ ma, di fittkat. ²¹ Ca àllub Paran la dëkkoon, yaayam wutali ko soxna ca réewum Misra.

Ibraayma waatoo na ak Abimeleg

²² Jamono yooyu Abimeleg àndoon na ak Pikol kilifay xarekatam, dem ci Ibraayma ne ko: «Gis naa ne Yàlla ànd na ak yaw, di àntal li ngay def lépp. ²³ Léegi nag waatal ma fii ci Yàlla ne doo ma wor muk, man ak samay doom, ba ci samay sët. Waatal ma ne noonee ma rafetoo woon ak yaw, ni ngay rafetoo ak man, maak waa réew, mi nga dal.» ²⁴ Ibraayma ne ko: «Waat naa ko.»

²⁵ Ci kaw loolu Ibraayma tawat Abimeleg teen bu surgay Abimeleg nangu woon ci moom, aakimoo ko. ²⁶ Abimeleg nag ne ko: «Xawma ku la def jooju jéf de, ndax yaw waxoo ma ci dara; guléet ma dégg ko tey.»

²⁷ Ba loolu amee Ibraayma jël ay gàtt aki nag, may ko Abimeleg, ñu fasoo kóllère ñoom ñaar. ²⁸ Fekk na Ibraayma ber juróom ñaari xar yu jigéen. ²⁹ Abimeleg nag ne Ibraayma: «Lu tax nga ber juróom ñaari xar yooyu?» ³⁰ Ibraayma ne ko: «Jélal xar yii ci sama loxo, muy firnde ne man maa gas teen bii.» ³¹ Looloo tax ñu tudde teen boobu Beerseba (mu firi Teenu waat ga)†, ndaxte fa lañu waatoo woon ñoom ñaar. ³² Naka lañu fasoo kóllère ca Beerseba, Abimeleg jóg ànd ak Pikol kilifay xarekatam, ñu ñibbi réewu Filisti.

³³ Ibraayma nag jëmbat na garabu tamaris foofa ca Beerseba, tudd fa Yàlla Aji Sax ji, ji nekk ba fàww. ³⁴ Ibraayma gane na réewu Filisti lu yàgg.

22

Yàlla nattu na Ibraayma

¹ Gannaaw loolu am na bés Yàlla di nattu Ibraayma ne ko: «Ibraayma!» Mu ne ko: «Naam.» ² Yàlla ne ko: «Ngalla jélal sa jenn doom jii di Isaaxa, muy koo bëgg, nga dem ca réewu Morya ca tund wa ma lay wax, joxe ko fa, mu nekk saraxu rendi-dóomal.»

³ Ibraayma nag teela xëy, takk mbaa-mam, ànd ak ñaari surgaam ak doomam Isaaxa, daldi xar matt, mi muy lakke sarax bi. Ma nga jëm fa ko Yàlla wax. ⁴ Ca

† **21:31** 21.31 Beerseba man naa tekki «teenu juróom

gannaaw èllëg sa, Ibraayma daa dawal bêtam, séen bérab ba fu sore. ⁵ Mu ne surga ya: «Négleen fii, mbaam mi taxaw. Man ak xale bi nu dem ba fale, mąggali Yàlla te ñëw.»

⁶ Ba loolu amee Ibraayma jël mattum saraxu rendi-dóomal ba, yen ko doomam Isaaxa; moom mu nàbb la muy taale ak paaka ba ci loxoom, ñu ànd ñoom ñaar. ⁷ Isaaxa ne baayam Ibraayma: «Baay!» Mu ne ko: «Naam, doom sama.» Isaaxa ne ko: «Sawara saa ngi, matt maa ngi, waaye ana gàtt, bi nuy sarxal?» ⁸ Ibraayma ne ko: «Yàlla moom ci boppam dina dikk ak gàtt bi nuy def sarax, doom.» ñu daldi ànd dem, ñoom ñaar.

⁹ Ba ñu àggee fa ko Yàlla wax, Ibraayma sàkk fa ab sarxalukaay, teg ca matt ma, yeew Isaaxa doomam, teg ko ca kaw matt ma ca sarxalukaay ba. ¹⁰ Ibraaymaa nga tàllal loxoom, nêb paaka, ba muy rendee doom ja. ¹¹ Teewul malaakam Aji Sax ja àddoo asamaan, ne ko: «Ibraayma! Ibraayma!» Mu ne ko: «Áa!» ¹² Malaaka ma ne ko: «Bu sa loxo laal xale bi; bu ko def dara, ndaxte léegi xam naa ne ragal nga Yàlla, ndax gántaloo ma sa jenn doom ji.» ¹³ Naka la Ibraayma siggi rekk, yem ci menn kuuyun xar mu béjjen ya lonke ci as ngarab. Ibraayma dem, jël kuuy ma, rendi, mu wuutu doom ja, di ab saraxu rendi-dóomal. ¹⁴ Ibraayma nag tudde bérab boobu Yawe Yire (mu firi Aji Sax ji dina dikk). Moo tax ñuy wax ba tey, naan: «Aji Sax jaa ngay dikke ca tundam.»

¹⁵ Ci kaw loolu malaakam Yàlla ma dellu àddoo asamaan ne Ibraayma: ¹⁶ «Déglul lii Aji Sax ji wax: «Giñ naa ci man mii, gannaaw yaa def lii, te gántaloo ma sa jenn doom ji, ¹⁷ maa lay barkeela barkeel, fùla ful saw askan ni biddiwi asamaan, mbaa feppi suufi géej. Sa askan dina teg ay bañam tànk, ¹⁸ te xeeti àddina sépp ci saw askan lañuy barkeele, ndax déggal nga ma.»»

¹⁹ Ba loolu wéyee Ibraayma waññiku, fekki surga ya, ñu daldi ànd ñoom ñépp, jëm Beerseba, ndax fa la Ibraayma dékkoon.

Askanu Naxor

²⁰ Gannaaw gi, dañoo yégal Ibraayma ne ko: «Milka kat am na ay doom moom it, moom ak sa mag Naxor. ²¹ Uus lañu taawloo, teg ca Bus, teg ca Kemwel, miy baayu Aram, ²² teg ca Keset ak Aso ak Pildas ak Yidlaf ak Betuwel.» ²³ Betuwel ay baayu Rebeka. Ñooñu ñooy juróom

ñetti doom yu góor, yi Milka am ak magu Ibraayma, Naxor. ²⁴ Rewma it nekkaleem la woon, doom ya mu ca am di Teba ak Gaxam ak Taxas ak Maaka.

23

Ibraayma jënd na suuf ca Kanaan

¹ Saarata dund na, ba am téeméeri at ak ñaar fukk ak juróom ñaar (127), ² doora faatu ca Kiryaat Arba, mooy Ebron, ca réewu Kanaan. Ibraayma nag dēj Saarata, jooy ko lool.

³ Gannaaw loolu Ibraayma bàyyi fa néew ba, dem ca Etteen ña*, ne leen: ⁴ «Dama di doxandéem ci seen biir, tey gan; moo tax ma di leen ñaan, ngeen sédd ma bàmmeel† bu ma suul sama néew, ba mu làqu ma.» ⁵ Kenn ci Etteen ñi wax Ibraayma ne ko: ⁶ «Déglul rekk, kilifa gi. Kilifa gu mag nga ci sunu biir. Dangay tànn ci sunuy bàmmeel, bi la neex, suul fa néew bi; kenn ci nun du la tere, nga suul sa néew ci bàmmeelam.»

⁷ Naka la Ibraayma dégg loolu, daldi jóg sujjóotal waa réew ma, maanaam Etteen ña. ⁸ Mu ne leen: «Gannaaw nangu ngeen, ma suul fi sama néew, ba mu làqu ma, dégluleen, ma wax leen li ngeen may ñaanal Efron doomu Sowar. ⁹ Damaa bëgg, mu bàyyee ma xuntim xeer, mi ñuy wax Magpela te muy boroom. Mu ngi ci catu toolam. Na ma ko jaay lu mat njégam sékk, dinaa ko jënd, muy sama bàmmeel ci seen biir.»

¹⁰ Booba Efron a ngi teew ci biir Etteen ñi. Efron, miy Etteen nag, wax ak Ibraayma ci kanam bokkam yi séq pénc mi, ne ko: ¹¹ «Déglul, ma wax la, kilifa gi, fabal tool bi, booleek xuntim xeer, mi ci nekk far. Maa la ko jox ci sama kanami bokk; jëlal, denc fa sa néew.»

¹² Ba mu ko defee Ibraayma sujjóotal waa réew ma, ¹³ daldi wax Efron ci seen kanam ne ko: «Ngalla déglu ma, dama lay jox njégu tool bi, nga jël rekk, ndax ma man faa suul sama néew.» ¹⁴ Efron wax Ibraayma ne ko: ¹⁵ «Déglu ma, kilifa gi, suuf suy jar ñeenti téeméeri dogi xalis donj‡ du dara ci sama diggante ak yaw; tee nga faa denc sa néew rekk?»

¹⁶ Ibraayma dégg li ko Efron wax, daldi waññal Efron limu xalis, bi mu wax ci kanam Etteen ñi, maanaam ñeenti téeméeri dogi xalis yu dèppook nattu jaaykat ya.

¹⁷⁻¹⁸ Noonu la Ibraayma jende toolub Efron ba nekk ca Magpela te janook

* 23:3 23.3 Etteen ña: ñooñoona nga bokk ci askanu Ett. Noo moomoon diiwaanu Ebron ca jooja jamono. † 23:4 23.4 bàmmeel: booba nit ñi dañoo taamu di denc seeni néew ci ay xuntiy xeer, mu di ay bàmmeel yu ñu bare mana bokk. ‡ 23:15 23.15 Loolu tollu woon na ci juróomi kiloy xalis.

Mamre, muy moomeelam. Dafa jënd tool ba bépp, jëndaale xuntim xeer ma ca biir, ak garab ya ca sax yépp, ba fa tool ba yem. Mboolem Etteen ña séqoon pénc ma, seede nañu ne Ibraayma moo ko moom. ¹⁹ Ibraayma daldi suul soxnaam Saarata ca xuntim xeer ma ca biir toolub Magpela, booba janook Mamre, di Ebron léegi, ca réewu Kanaan. ²⁰ Nii la Etteen ña dogalale Ibraayma njaayum tool ba ak xunti ma ca nekk, mu def ko bàmmeel.

24

Isaaxa jël na Rebeka soxna

¹ Ibraayma guddoon na fan, ba màggat lool, te Aji Sax ji barkeel ko ci lépp.

² Mu am bés Ibraayma wax surgaam, bi gëna yàgg ci këram, tey saytu alalam jépp, ne ko: «Dugalal sa loxo ci sama suufu lupp*, ³ ma giñloo la ci Aji Sax jiy Yállay asamaan ak suuf ne doo jëlal sama doom soxna ci biir jigéeni waa Kanaan, gi ma dëkk ci seen biir. ⁴ Waaye dinga dem sama réew, ma ma cosaanoo, jëlal fa sama doom Isaaxa soxna.»

⁵ Surga ba ne ko: «Su ndaw sa nanguwula ànd ak man ci réew mii nag? Ndax kon damaa wara yóbbu sa doom ba ca réew ma nga jóge?» ⁶ Ibraayma itam ne ko: «Bu fa yóbbu sama doom mukk. ⁷ Aji Sax ji, Yállay asamaan, moom mi ma jële sama kër baay ak fa ma juddoo, te wax ak man, giñal ma ne ma, dina jox sama askan réew mii, moom ci boppam dina yebal malaakaam, mu jiitu la. Foofa ngay jëlale sama doom soxna. ⁸ Su la ndaw si buggula topp, kon wàccoo nga ak man. Waaye rikk bul yóbbu sama doom foofa.» ⁹ Surga ba dugal loxoom ca suufu lupp Ibraayma sangam ba, daldi giñ ca loola.

¹⁰ Ba loolu amee surga ba jële fukki giléem ca giléemi sangam, dem, yóbbaaale li gën ci mboolem xeeti alalu sangam. Ma nga jëm réewu Mesopotami, ga Naxor dëkk. ¹¹ Ba muy jub dëkk ba, daa yésal giléem ya fu dend akub seyaan waxtuw ngoon, fekk jigéen ñay génn di rootsi. ¹² Mu daldi ne: «Yaw Aji Sax ji, sama Yállay sang Ibraayma, ngalla nangul ma tey jii te laaye biir sama sang Ibraayma. ¹³ Maa ngi nii taxaw ci bētu ndox mi, janqi dëkk bi di rootsi. ¹⁴ Janq bu ma wax ne ko: “Doo yenniku sa njaq, may ma, ma naan,” mu ne ma: “Naanal ba noppi, ma wëggal la say giléem,” na kooka di ki nga jagleel sa jaam Isaaxa. Noonu laay xame ne laaye nga biir sama sang.»

¹⁵ Laata muy ñaan ba noppi sax, gis na Rebeka gaddu njaqam, di ñëw. Rebeka

moomu di doomu Betuwel te di sētu Milka ak Naxor, miy magu Ibraayma. ¹⁶ Ndaw su taaru la woon, di ab janq bu séyagul. Naka la wàcc ba ca seyaan ba, duy njaqam, yéegaat. ¹⁷ Surga ba daw, daje ak moom ne ko: «Doo ma may tuuti ci sa njaq li, ma naan.» ¹⁸ Mu ne ko: «Ahakay, sang bi,» daldi gaaw, yenniku njaq la, may ko mu naan. ¹⁹ Ba ko ndaw si mayee, mu naan ba noppi, da ne ko: «Xaaral, ma wëggal la giléem yi, ñu naan ba noppi.» ²⁰ Mu daldi gaaw, sotti njaq la ca mbalka ma, dawaat rootali giléem yi ca seyaan ba. ²¹ Waa ja ne ko jàkk, ne tekk, di seet, ba xam ndax Aji Sax ji àntal na yoonam am déet.

²² Ba giléem ya naanee ba sottal, waa ji jël jaarob bakkan bu wurus bu tollook juróom benni garaam, ak ñaari lami wurus yu tollu ci téeméeri garaam, takkal ko. ²³ Mu ne ko: «Wax ma, kan moo la jur?» Ak itam: «Ndax man nanoo dal sa kër baay?» ²⁴ Mu ne ko: «Betuwel a ma jur, doomu Naxor ak Milka,» ²⁵ teg ca ne ko: «Waawaaw, ñax maak ngoofi maa nga fa, ne gáññ, te it manees na faa dal.» ²⁶ Waa ji nag sujjóot, sant Aji Sax ji, ²⁷ daldi ne: «Cant ñeel na Aji Sax ji, sama Yállay sang, Ibraayma, moom mi masula noppee laaye biir sama sang, te masu koo ñàkke worma. Man it, Aji Sax ji wommat na ma ba sama kër bokki sang!»

²⁸ Janq bi nag daw dem, nettali waa kër yaayam la xew lépp. ²⁹ Rebeka amoon na càmmiñ lu tudd Laban. Laban daldi gaawtu génn, fekki waa ja ca seyaan ba. ³⁰ Booba gis na jaaro ba ak lam, ya ca loxol jigéenam Rebeka, te dégg na jigéenam di nettali la ko waa ja wax. Loolu tax mu dem ca waa ja, fekk ko ca giléem ya ca seyaan ba. ³¹ Mu ne ko: «Yaw mi Aji Sax ji barkeel, agsil boog! Looy toog ci àll bi; waajalal naa la ab dal, te giléem yi am nañu fu ñu nekk.» ³² Waa ja daldi àgg ca kër ga, ñu sippi giléem ya, may leen ñax ak ngoofi, may waa ja ndox, mu jàngu, moom ak ñi mu àndal, ³³ ba noppi ñu taajal ko lu mu lekk. Mu ne: «Déédéet, duma lekk mukk kay, te waxuma li ma taxa jóg.» Laban ne ko: «Kon nag waxal.»

³⁴ Mu ne ko: «Man surgab Ibraayma laa. ³⁵ Aji Sax ji dafa barkeel sama sang lool, ba muy boroom daraja. May na ko jur gu gàtt ak gu gudd, xaalis ak wurus ak ay surga yu góor ak yu jigéen ak ay giléem aki mbaam. ³⁶ Sama soxnas sang Saarata nag dem na ba màggat, doora amal sama sang doom ju góor. Doomam jooju la jox li mu moom lépp. ³⁷ Sama sang nag giñloo ma ne: “Bul jëlal mukk sama doom soxna ci biir jigéeni waa réewu Kanaan, gi ma dëkk. ³⁸ Waaye

* 24:2 24.2 dugal loxo ci suufu lupp mooy li bànni Israyil daan dogale ngiñ.

demal ca sama kër baay, ca samay bokk, nga jëlal fa sama doom soxna.”³⁹ Ma ne sama sang: “Bu ndaw sa nanguwula ànd ak man nag?”⁴⁰ Mu ne ma: “Aji Sax, ji ma topp, dina yónni malaakaam, mu ànd ak yaw, ba àntalal la sa yoon, nga jëlal sama doom soxna ca sama kër baay, ca sama biiri bokk.”⁴¹ Boo demee ba ca samay bokk, wàcc nga, ndax bu ñu la mayul soxna, wàccoo nga ak man.”⁴² Ba ma agsee tey jii ca seyaan ba, damaa wax ne: “Aji Sax ji, sama Yállay sang Ibraayma, ndegam nar ngaa àntal yoon wi may dox, ngalla may ma lii: “⁴³ maa ngii taxaw ci seyaan bi; janq bay ñew rootsi, ma ne ko: ‘Doo ma may tuuti ci sa njaq li, ma naan,’⁴⁴ mu ne ma: ‘Naanal ba noppi, ma wëggal la say giléem,’ kooku na di soxna, si Aji Sax ji jagleel sama doomu sang.”

⁴⁵ «Bala maa ñaan ba noppi, Rebeka ne jimeet, gaddu njaqam, wàcc ca seyaan ba, di root. Ma ne ko: “May ma, ma naan.”⁴⁶ Mu gaaw yenniku njaq li, daldi ne ma: “Naanal ba noppi ma wëggal la say giléem.” Ma naan ba noppi, mu wëggal ma giléem yi.⁴⁷ Ma laaj ko ne ko: “Kan moo la jur?” Mu ne: “Betuwel, doomu Naxor ak Milka.”

«Ca laa ko takkal jaaro bi ci bakkanam, ak lam yi ciy loxoom.⁴⁸ Ba mu ko defee ma sujjóotal Aji Sax ji, sant Aji Sax jiy sama Yállay sang Ibraayma, ndax jubal na sama yoon, ba ma jëlal doomam soxna ciy bokkam.⁴⁹ Léegi nag ndegam nar ngeena rafetoo ak sama sang tey sàmm kòllère, xamal-leen ma ko, ba mu leer. Su ngeen ko narul it, waxleen ma, ma xam nu may def.»

⁵⁰ Laban ak Betuwel ne ko: «Mbir moomu de ci Aji Sax ji la jóge, te amunu ci dara lu nuy wax.⁵¹ Rebekaa ngoogu, jëlal te dem, muy sa soxnas doomu sang, ni la ko Aji Sax ji tegtale.»⁵² Naka la surgab Ibraayma dégg yooyu kàddu, daldi sujjóotal Aji Sax ji.

⁵³ Surga ba nag génne ay gànjari xalis ak yu wurus booleek ay yère, jox Rebeka. Càmmiñ la ak yaay ja itam, mu may leen alal ju takku.⁵⁴ Ba loolu weese mu doora lekk, daldi naan, moom ak ñi mu àndal. Ñu fanaan fa keroug.

Ba ñu yewwoo ca èllég sa, surga ba ne: «Bàyyileen ma nag, ma dellu ca sama sang.»⁵⁵ Càmmiñal ndaw sa ak yaay ja daldi ne ko: «Xanaa kay janq bi dina tooqaat ak nun ab diir boog, maanaam fii ak sibbir, doora dem.»⁵⁶ Mu ne leen: «Gannaaw Aji Sax ji àntal na sama yoon, tee ngeen ma baña yeexal, te bàyyi ma

rek, ma dellu ca sama sang?»⁵⁷ Ñu ne ko: «Kon nag nanu woo janq bi, laaj ko moom ci boppam.»⁵⁸ Ci kaw loolu ñu woo Rebeka, ne ko: «Ndax dangay ànd ak waa ji léegi?» Mu ne: «Waaw.»⁵⁹ Ba loolu amee càmmiñ ya bàyyi seen jigéen Rebeka, moom ak surga, bi ko yar te daan ko nàmpal, ñu ànd ak surgab Ibraayma ak ñi ko topp, ñu dem.⁶⁰ Ña ngay ñaanal Rebeka, mu barkeel, te naan: «Éy jigéen sunu! Giiral, ba sos ay junni junni,

te sa askan teg ay bañam tànk.»

⁶¹ Gannaaw loolu Rebeka ànd ak xale yu jigéen, yiy jaamam, ñu war ay giléem, topp waa ja. Surga ba daldi dem, yóbbu Rebeka.

⁶² Loolu fekk na Isaaxa dëkk ca àllub Negew. Mu demoon nag teenu Laxay Roy, ba ñibbsi.⁶³ Genn ngoon Isaaxa génn, di doxantu ca àll ba. Naka la ne sigget xool, séen giléem yuy ñew.⁶⁴ Rebeka it ne sigget, gis Isaaxa. Mu ne cëpp nag, wàcc giléem ga,⁶⁵ daldi ne surga ba: «Waa jee ci àll biy ñew, jëm ci nun, kan a?» Surga ba ne ko: «Sama sang la de.» Rebeka daldi jël muuraay ba, muuroo.⁶⁶ Surga ba nag nettali Isaaxa li mu def lépp.⁶⁷ Ba loolu wéyee Isaaxa yóbbu Rebeka ca xaymab yaayam Saarata, muy soxnaam, di ku mu bëgg, te di ko muñe yaayam, ndax fekk na mu faatu.

25

Ibraayma nelaw na

¹ Ibraayma jëlaat na soxna su tudd Keturat, ² am ca Simran ak Yogsan ak Medan ak Majan ak Yisbag ak Suwa. ³ Yogsan jur Saba ak Dedan. Askani Dedan ñooy Asureen ñi, Letuseen ñi ak Lewumeen ñi. ⁴ Doomi Majan di Efa ak Efer ak Anog ak Abida ak Elda. Ñoofu ñépp xeetu Keturat lañu.

⁵ Ibraayma nag donale Isaaxa lépp lu mu moom. ⁶ Doom yu góor, ya mu am aki nekkaaleem, mu may leen alal ca ba muy dund, ba noppi yebal leen penku, ñi sancu ca réewu penku, ba sore doomam Isaaxa*.

⁷ Ati Ibraayma téeméer la ak juróom ñaar fukk ak juróom (175). ⁸ Ba loolu weese la bakkanu Ibraayma rot, mu nelaw, fekki ay maaman, gannaaw ba mu guddee fan, ba màggat lool te barkeel. ⁹ Isaaxa ak Ismayla, doomam yu góor ya, rob ko ca xuntim xeer ma ca Magpela te jàkkaarloo ak Mamre, ca toolub Efron doomu Sowar, Etteen ba. ¹⁰ Tool ba Ibraayma jëndoon ca Etteen ña, foofa lañu denc Ibraayma ak soxnaam Saarata.

* 25:6 25.6 Ca yooya jamono, nit manoon naa am ay soxna yu am cér bu mat sèkk, ak yeneen soxna, yu géna néewle sañ-sañ, ñoom ak seeni doom.

¹¹ Gannaaw ba Ibraayma nelawee, Yàlla barkeel na doomam Isaaxa. Isaaxaa ngi dèkkoon ca wetu teenu Laxay Roy.

Askanu Ismayla

(Saar 25.12-18)

¹² Ismayla moomee nag, doomu Ibraayma jaak Ajaram Misra, ma doon jaamub Saarata, askanam mooy lii. ¹³ Turi doomi Ismayla yu góor yaa di: Nebayot, taawub Ismayla, ña ca topp di Kedar ak Adabeel ak Míbsam ¹⁴ ak Mísa ak Duuma ak Maasa ¹⁵ ak Adádd ak Tema ak Yetur ak Nafis ak Kedama. ¹⁶ Nòoñu ñooy doomi Ismayla yu góor, seeni tur a ngoog, ñuy fukki garmi ak ñaar yu jiite seeni mbooloo ci seeni sanc ak seeni dal. ¹⁷ Ati Ismayla téeméer la ak fanweer ak juróom ñaar (137). Gannaaw loolu la nelaw, fekki ay maamam.

¹⁸ Ña nga dèkkoon diggante ba dale Awila ba Sur ga jàkkaarlook Misra, booy jëm Asur. Noonu la fa askanu Ismayla sance, jàkkaarlook doomi baayam yépp.

Askanu Isaaxa doomu Ibraayma

(Saar 25.19—35.29)

¹⁹ Isaaxa doomu Ibraayma ju góor ja, askanam mooy lii. Ibraaymaa jur Isaaxa. ²⁰ Isaaxa am ñeent fukki at, jël Rebeka doomu Betuwel, Arameen, bi dèkke diiwaanu Padan Aram, dib jigéenu Laban, Arameen ba. ²¹ Gannaaw ga soxnas Isaaxa amul doom, Isaaxa dagaanal ko Aji Sax ji, mu nangul ko, soxna si daldi èmb. ²² Doom yi nag di buuxante ci biiram, ba mu naan: «Ndegam nii la kay, jaru ko woon!» Ci kaw loolu soxna si dem, diis ko Aji Sax ji.

²³ Aji Sax ji ne ko:

«Ñaari giir nga èmb, nara am ñaari xeet yuy xaajaloo, wenn wi mooy èpp doole wi ci des, te mag ji mooy surgawu rakk ji†.»

²⁴ Ba mu demee ba wara mucc, amul lu moy ay seex. ²⁵ Naka noona ka jékka gane àddina xong, yaram wi sèq lipp, mel ni mbubbum der mu ne sàyy akí kawaram, ñu tudde ko Esawu (mu firi Ku jèxëm). ²⁶ Gannaaw ga ka ca des topp ca, loxo ba jàpp ca téstènu Esawu. Ñu tudde ko Yanqóoba (mu firi Jàpp ci téstèn)‡. Ba leen Rebeka di am, fekk na Isaaxa am juróom benn fukki at.

Esawu sàggane na céram

²⁷ Ba mu ko defee gone ya di màgg, Esawu di rëbbkat bu ñaw, di ku bëgg

àll; Yanqóoba moom di nit ku gátteñlu§ te bëggoon toogaayu kër. ²⁸ Isaaxa nag am cofeel ci Esawu ndax li muy lekk ci am rëbbam, te Rebeka moom gëna sopp Yanqóoba.

²⁹ Mu am bés Yanqóoba di togg ndambel ñebbe ju xonq, yemook Esawu jóge ca tool ya, xiif ba ne ñedd. ³⁰ Mu ne Yanqóoba: «Gaawe ma ci ndambe lee waay, ba ma duy sama biir ci sa ndambe lu xonq loolu, ndax xiif a ngi may rey.» Loolu moo tax ñu tudde Esawu, Edom (mu firi Xonqe). ³¹ Yanqóoba ne ko: «Danga ma koy jékka wecci sa céru ndono bi nga yeyoo ndax li ngay taaw*.» ³² Esawu ne: «Man miy waaja dee ak xiif, ana lu ma céru taaw di jariñ?» ³³ Yanqóoba ne ko: «Giñal ma jèkk.» Esawu giñal ko, mu jaay Yanqóoba ndono, li mu yeyoo ndax li muy taaw. ³⁴ Yanqóoba jox Esawu mburu ak ndambe, mu lekk, naan, daldi jóg dem yoonam. Noonu la Esawu sàgganee céru taaw, bi mu yeyoo.

26

Isaaxa nèbbu na waa Gerar ngir mucc

¹ Ba loolu wéyee xiif am ca réew ma, muy xiif bu wuute ak ba woon ca jamonoy Ibraayma; Isaaxa nag dem Gerar ca Abimeleg, buurub waa Filisti.

² Foofa Aji Sax ji feeñu ko fa ne ko: «Bul dem Misra, waaye nanga toog ci réew mi ma lay wax. ³ Dalal ci réew mii; dinaa ànd ak yaw, barkeel la. Yaak sa askan laay jox suuf sii sépp, te dinaa sàmm li ma giñaloon sa baay Ibraayma. ⁴ Dinaa ful sa askan ni biddiwi asamaan, dinaa jox sa askan suuf sii sépp, te it ci saw askan la xeeti àddina sépp di barkeele, ⁵ ndax Ibraayma déggal na ma, dénkoo na sama ndénkaane, ak samay santaane, ak sama dogali yoon, ak samay yoon.»

⁶ Isaaxa nag toog Gerar. ⁷ Góori foofa laaj ko ndaw si mu àndal, lu mu doon ci moom, mu ne: «Sama jigéen la.» Dafa bañoona wax ne soxnaam la, ngir ragal waa foofa rey ko ndax taaru Rebeka. ⁸ Ba ñu fa toogee ba mu yàgg, mu am bés Abimeleg, buurub waa Filisti tollu ci palanteeram, gis leen, fekk yóo Isaaxaa ngay raay soxnaam Rebeka. ⁹ Abimeleg woolu Isaaxa ne ko: «Kii kay ndeke sa soxna la! Noo mana waxe ne sa jigéen la?» Isaaxa ne ko: «Damaa waxe noonu, ngir ñu bañ maa rey ndax moom.» ¹⁰ Abimeleg ne ko: «Li nga nu def nag? Xaw tuuti kenn ci nit ñi tédde sa soxna, te kon nga yóbbe

† 25:23 25.23 Ci bànni Israyil, seex, bi jékka juddu, moo mag ki mujja juddu. ‡ 25:26 25.26 Jàpp ci téstèn mu ngi tekki ci waxin «suufu nit, ba am loo nangu ci moom». § 25:27 25.27 gátteñlu gi ci Yanqóoba moo waraloon

xamul dara ci rëbb. * 25:31 25.31 Ci bànni Israyil, taaw mooy mujj doon kilifag kër, te mooy èpple ay rakkam ab cér ci ndono.

nu tooñ.» ¹¹ Abimeleg daldi fay doxe ártu waa réewam mépp ne leen: «Ku laal waa jii walla soxnaam, dees na ko rey.»

Isaaxa fas na kóllère ak Abimeleg

¹² Gannaaw loolu Isaaxa bey ca réew ma, góob ca at ma lu tollook téeméeri yoon la mu ji woon, ndax Aji Sax ji da koo barkeel. ¹³ Alalam di yokku, muy gêna barele, ba mujj am doole lool, ¹⁴ am géttu jur gu gudd ak gu gátt, ak ay surga yu bare, ba tax waa Filisti ifñaane ko, ¹⁵ bay sakk ak a sékk mboolem teen, yi surgay baayam Ibraayma gasoon ca jamonoom. ¹⁶ Abimeleg daldi ne Isaaxa: «Demal, ba sore nu, ndax danga noo épp doole lool.» ¹⁷ Isaaxa jóge foofa, dali ca xuru Gerar, sanc fa.

¹⁸ Ba loolu weesee Isaaxa sikkli teen, yi ñu gasoon ca jamonoy baayam Ibraayma, te waa Filisti sakkoon leen gannaaw ba Ibraayma nelawee. Ca la tudde teen yi tur, ya leen baayam tudde woon. ¹⁹ Surgay Isaaxa gasaat ca xur wa, jot ndox mu neex. ²⁰ Teewul sàmmi Gerar di soowook sàmmi Isaaxa naan: «Nun noo moom ndox mi.» Mu tudde teen ba Eseg (mu firi Coow), ndax li ñu soowoo ak moom. ²¹ Ñu gasaat ab teen, xuloo amati ca, mu tudde ko Sitna (mu firi Xuloo). ²² Mu jóge foofa, gasati teen, jàmm ne ñoyy, mu tudde ko Reyobot (mu firi Fu yaatu), ndax da ne: «Léegi Aji Sax ji yaatal na nu, te dinanu woomle ci réew mi.»

²³ Ba mu fa jógee, dafa dellu Beerseba. ²⁴ Guddi googu Aji Sax ji feeñu ko ne ko: «Maay Yállay Ibraayma sa baay; bul ragal dara, ndax maa ngi ànd ak yaw. Dinaa la barkeel, ful sa askan ndax sama jaam Ibraayma.» ²⁵ Isaaxa nag sàkk fa sarxalukaay, tudd fa Aji Sax ji, wormaal ko, ba noppi samp fa xaymaam. Te itam ay surgaam bènn nañu fa ab teen.

²⁶ Ci diggante boobu Abimeleg dafa jóge Gerar, dem fekki ko, ànd ak Awusat, ma doon wóllèreem, ak Pikol, njiital xarekatam. ²⁷ Isaaxa ne leen: «Lu waral ngeen fekksi ma fii, gannaaw dangeen maa bañ, ba dàq ma?» ²⁸ Ñu ne ko: «Gis nanu bu baax ne Aji Sax ji ànd na ak yaw; moo tax nu ne ayca nu waatoo ci sunu digganteek yaw te fasanteek yaw kóllère. ²⁹ Su ko defee doo nu def dara lu bon, gannaaw defunu la dara lu bon, xanaa lu baax rekk, ba yebal la, nga dem ci jàmm. Kon léegi yal na la Aji Sax ji barkeel.»

³⁰ Isaaxa nag berndeel leen, ñu bokk lekk, ba noppi naan. ³¹ Ca èllég sa, ñu xéy suba teel, daldi waatoo, Isaaxa door leena yiwi, ñu dem ci jàmm.

³² Ca bés booba ay surgay Isaaxa ñew nañu, di ko wax lu jëm ci teen, ba ñu doon

gas, ne ko: «Gis nanu ndox.» ³³ Isaaxa tudde teen ba Siba (mu firi Waatoo), moo tax turu dëkk ba, ba fii nu tollu, di Beerseba (mu firi Teenu waat ga).

Esawu jël na ay soxna

³⁴ Esawu am na ñeent fukki at, jël na soxna ku ñuy wax Yudit, muy doomu Beer, miy Etteen, jëlaat Basmat doomu Elon, miy Etteen. ³⁵ Jigéen ñooñu mu jël nag di naqar wu réy ci Isaaxa ak Rebeka.

27

Yanqóoba jëkk na Esawu ci ñaanam

¹ Ba Isaaxa màggatee, te bët yi naqari, ba gisatul, am na bés mu woo taawam Esawu ne ko: «Doom.» Mu ne ko: «Naam.» ² Isaaxa ne ko: «Déglul, ma wax la. Màggat naa te xawma sama bésu dee. ³ Kon léegi jëlal say gannaay: say fitt ak sa xala, nga dem ca àll ba, rébbali ma. ⁴ Toggal ma ko, ba mu neex, ni ma ko bégge, indil ma, ma lekk, ndax ma ñaanal la lu ma tibbe ci sama xol, bala may dëddu.» ⁵ Fekk na Rebekaa ngi déglu, ba Isaaxay wax ak doomam Esawu. Esawu daldi dem ca àll ba, rébbi lu mu toggsi.

⁶ Rebeka moom ne doomam Yanqóoba: «Dégg naa sa baay wax sa mag Esawu ne ko: ⁷ «Demal rébbi, indil ma, toggal ma ko lu neex, ma lekk, ba ñaanal la, Aji Sax ji seede, bala may dëddu.» ⁸ Kon nag doom, defal lii ma lay wax. ⁹ Demal ca gétt ga, nga jàpp ñaari tef yu duuf, ma defaral ko sa baay, ba mu neex, ni mu ko bégge, ¹⁰ nga yóbbul ko, ngir mu ñaanal la, bala moo dee.»

¹¹ Yanqóoba ne yaayam: «Waaw, waaye sama mag Esawu dafa jëxëm, te man sama yaram rattax. ¹² Xéy na sama baay làmbatu ma de, te kon dina ne njublarj laa. Su ko defee ay móolu laay yóbbe sama bopp, waaye du barkeb ñaan.» ¹³ Yaayam ne ko: «Bu la móoloo, Yàlla na ma topp, doom. Defal li ma la wax rekk te dem indil ma gátt yi.»

¹⁴ Yanqóoba dem, jël gátt yi, indil yaayam, mu defar ba mu neex, ni ko baayam bégge. ¹⁵ Rebeka daldi seet ca dencam la gën ca yérey Esawu taaw ba, solal Yanqóoba doomam ju ndaw. ¹⁶ Ba mu noppee, daa sàkk ca deri gátt ya, sànge loxo ya ak fi rattax ci doq gi, ¹⁷ doora boole mburu ma ak ñiam wa mu togg, jox doomam Yanqóoba.

¹⁸ Mu dikk ci baayam, ne ko: «Baay.» Mu ne ko: «Naam doom, kooku?»

¹⁹ Yanqóoba ne baayam: «Mana Esawu sa taaw. Def naa li nga ma wax. Jógal toog te lekk ci li ma la rébbal, ndax nga ñaanal ma ci sa xol.» ²⁰ Isaaxa ne doomam: «Moo doom! Noo def, ba gaawa jàpp nii?»

Yanqóoba ne ko: «Aji Sax jiy sa Yälla, moo ma ko jagleel.»

²¹ Isaaxa ne Yanqóoba: «Jegesil, ma làmb la, ba mu wóor ma ne sama doom Esawoo.» ²² Yanqóoba nag jegesi, baayam Isaaxa làmbatu ko ne: «Baat bi de baatu Yanqóobaa, waaye loxo yi, loxoy Esawoo.»

²³ Xàmmiwu ko, ndax li loxo yi jèxëm ni yuy magam Esawu, ba tax mu ñaanal ko. ²⁴ Isaaxa laaj ko ne ko: «Mbaa wóor na ne yaw ay Esawu?» Mu ne ko: «Waawaaw.» ²⁵ Isaaxa ne ko: «Jottli ma fii ma lekk ci sam rëbb, doom, ba ñaanal la ci sama xol.» Yanqóoba jottli Isaaxa ndab li, mu lekk, daldi koy may biññ, mu naan. ²⁶ Isaaxa ne ko: «Kaay fii, foon ma, doom.» ²⁷ Yanqóoba jegesi, foon ko, xetu yére yi mu sol xeeñ Isaaxa, mu door koo ñaanal ne ko:

«Sama xetu doom kay

xetug tool la,

bu Aji Sax ji barkeel.

²⁸ Yal na la Yälla may layub asamaan

ak ngéneeli suuf,

pepp ne gǎññ, biññ walangaan.

²⁹ Yal na la ay giir nangul,

ay réew di la sujjóotal,

nga yilif say bokk,

te say doomi ndey di la sujjóotal.

Ku la móolooy alku,

te ku la ñaanal barkeel.»

³⁰ Naka la Isaaxa noppee ñaanal Yanqóoba, ba mu won baayam Isaaxa gannaaw rekk, Esawu, mag ji, rëbbi ba ñëw, ne jalañ. ³¹ Mu togg moom it, ba mu neex, indil baayam. Mu ne ko: «Jógal baay, lekk ci sa rëbbum doom, ndax nga ñaanal ma ci sa xol.» ³² Baayam Isaaxa ne ko: «Kooku?» Mu ne ko: «Mana sa taaw Esawu.» ³³ Isaaxa ngay lox, bay rag-ragi, daldi ne ko: «Kan? Ana ku rëbbi woon nag, indil ma, ba ma lekk ba noppi? Ñaanal naa ko bala ngaa ñëw. Te dina barkeel moos.»

³⁴ Esawu dégg li baayam wax rekk, yuuxu yuux gu réy ndax naqar. Mu ne baayam: «Ngalla baay, ñaanal ma, man itam.» ³⁵ Isaaxa ne ko: «Sa rakk ñëw na, nax ma, ba yóbbu sa ñaan.» ³⁶ Esawu ne: «Moom kay moo yey tudd Yanqóoba, ndax suufu na ma ñaari yoon. Sama céru taaw la jékka nangu, tey mu nangooti sama ñaanu baay.» Mu teg ca ne: «Ndax desalaloo ma ag ñaan?» ³⁷ Isaaxa ne Esawu: «Mbaa am naa lu ma la ñaanalati, doom? Ndax kat xas naa koo def, muy sa kilifa, te bokkam yépp laa def ñuy surgaam, te pepp ak biññ laa ko woomale it, ba mu ne gǎññ.» ³⁸ Esawu ne baayam:

«Baay, xanaa genn ñaan rekk nga am? Ngalla baay, ñaanal ma, man itam!» Ca la Esawu ne yikkét jooy. ³⁹ Baayam Isaaxa ne ko:

«Déglul, ma wax la,

dinga dèkk fu sore ngéneeli suuf, mbaa fu la layub asamaan tiime.

⁴⁰ Sa saamar ngay dunde,

sa rakk di la yilif.

Waaye bés a ngi ñëw yaay sigiñu, ba yenniku notaangeem.»

Yanqóoba dem na ca nijaayam

⁴¹ Esawu nag bañ Yanqóoba ndax barke ba ko baayam ñaanal. Ma ngay wax ca xolam naan: «Balaa yàgg ñu déj sama baay, te bu boobaa dinaa rey sama rakk Yanqóoba.» ⁴² Naka lañu nettali Rebeka la taawam Esawu wax, mu woolu Yanqóoba, doomam ju ndaw ja, ne ko: «Sa mag a ngi fexee feyu, di la wuta rey. ⁴³ Kon doom, defal lii ma lay wax, demal làquji fa sama càmmiñ Laban ca Karan, ⁴⁴ nga toog fa moom ay fan, ba kera sa meru mag giif. ⁴⁵ Bu sa meru mag giifee, ba mu fátte li nga ko def, dinaa yónnee, ñu jèlsi la. Duma seetaan muk, ba boole leen ñakk, yeen ñaar ñépp, ci benn bés*!»

⁴⁶ Gannaaw gi Rebeka ne Isaaxa: «Àddina soof na ma ndax jigéeni Etteen ñi. Yanqóoba de, bu jélee ci jigéeni réew mi di Etteen ñu mel ni ñii, sama dund gi, dee a koy gën!»

28

¹ Ci kaw loolu Isaaxa woo Yanqóoba, ñaanal ko, jox ko ndigal lii ne ko: «Bul jël ci jigéeni Kanaan, ² waaye demal Padan Aram ca sa kër maam-góor, ji jur sa yaay, nga jël fa jabar ca sa doomi nijaay Laban. ³ Yal na la Yälla Aji Man ji barkeel, nga jaboot lool te sa giir yokku, ba sos ay mboolooy askan. ⁴ Yal na la barkeb Ibraayma dal, yaak askan wi soqikoo ci yaw, ba nga moom réew mii ngay doxandéem tey, te Yälla mayoon ko Ibraayma.» ⁵ Isaaxa daldi yebal Yanqóoba, mu dem Padan Aram ca Laban doomu Betuwel, Arameen bay càmmiñu Rebeka, miy yaayu Yanqóoba ak Esawu.

Esawu jël na keneen soxna

⁶ Esawu nag yég ne Isaaxa ñaanal na Yanqóoba, ba noppi yebal ko Padan Aram, ngir mu jël fa soxna. Te it ba mu koy ñaanal, digal na ko ne ko, bumu jël ca jigéeni Kanaaneen ña. ⁷ Mu yég ne Yanqóoba déggal na baayam ak yaayam, ba dem Padan Aram. ⁸ Loolu won Esawu ne jigéeni Kanaan neexuñu baayam. ⁹ Ba

* **27:45** 27.45 Dañoo yaakaar ne bu Yanqóoba dawuloon, Esawu dina ko rey, te kon dees na ko feyul, daldi rey Esawu.

mu ko defee Esawu dem ca xeetu Ismayla, jël fa Maalat doomu Ismayla, miy doomu Ibraayma, te di jigéenu Nebayot, mu bokk ciy soxnaam.

Yanqóoba sàrtoo na ak Yàlla

¹⁰ Ba loolu wéyee Yanqóoba génn Beerseba, wuti Karan. ¹¹ Naka la dem, ba ágg fu ko jant bi sowe, daldi fay fanaan. Mu jël ca doj ya fa ne woon, gegenoo.

¹² Guddi googu Yanqóoba dafa gént, gis raas bu sampu ci suuf, te cat la sar asamaan, malaakay Yàlla yi di ci yéeg ak a wàcc. ¹³ Ndeke Aji Sax jaa nga tollu ca wetam. Mu wax ak moom ne ko: «Maay Aji Sax ji, di sa Yàllay maam Ibraayma te di Yàllay Isaaxa. Suuf si nga tédd dinaa la ko jox, yaak sa askan. ¹⁴ Saw askan dina ne gāññ ni suuf. Dinga law penku ak sowu, ndjiour ak cāmmon. Ci yaw ak saw askan la giir yi ci kaw suuf yépp di barkeele. ¹⁵ Maa ngi nii ànd ak yaw, di la sàmm fépp foo jēm, te itam dinaa la déelloosi ci réew mii. Duma la bàyyi muk, waaye dinaa def li ma la wax lépp.»

¹⁶ Ci kaw loolu Yanqóoba yewwu ne: «Ndekete Aji Sax ji mu ngi ci bérab bii, te xawma ko woon.» ¹⁷ Ma nga tiit nag te naan: «Bérab beeka raglu! Fii kay du fenn, fu dul kër Yàlla; te mooy buntu asamaan.»

¹⁸ Ca suba teel Yanqóoba jóg, jël doj, wi mu gegenoo woon, samp fa, muy xammikaay, ba noppi sotti ci ag diw, sellale ko. ¹⁹ Ca la tudde bérab ba Betel*, waaye ca njálbéen Lus la dëkk ba tuddoon. ²⁰ Gannaaw loolu Yanqóoba dogu na ne: «Su Yàlla àndee ak man, di ma sàmm ci yoon yi may aw, di ma jox lu ma lekk ak lu ma sol, ²¹ ba kera may dellu sama kër baay ci jàmm, su boobaa, Aji Sax ji dina doon sama Yàlla. ²² Doj wii ma samp, muy xammikaay, mooy doon kër Yàlla, te lépp lu mu ma wërségal, dinaa ko génneel fukkeel ba moos.»

29

Yanqóoba daje na ak Rasel

¹ Ba loolu xewee, Yanqóoba awaait yoonam, ba agsi réewum waa penku. ² Mu yem foofa ca ab teen ca àll ba, ñetti gétti gätt goor ca wet ga, ndax ca booba teen lañu doon wégge gétt ya, waaye doj wu réy moo uboon teen ba. ³ Bu gétt yépp dajaloo foofa, sàmm yi doora àndandoo bérab doj wa, mu moy buntu teen ba, ñu wégg, ba noppi delloo doj wa, mu ubaait teen ba.

⁴ Yanqóoba ne leen: «Bokki fan?» Ñu ne ko: «Karan.» ⁵ Mu ne leen: «Ndax xam ngeen Laban doomu Naxor?» Ñu ne ko:

«Xam nanu ko kay.» ⁶ Mu dellu laaj leen ne leen: «Mbaa mu ngi ci jàmm?» Ñu ne ko: «Jàmm rekk kay. Xoolal ndaw see di ñew, mook gätt yi, mooy doomam Rasel.»

⁷ Yanqóoba ne leen: «Jant bi demagul fenn, ba ngeen di dajale jur gi. Wéggleen gätt yi, sàmmi leen kay!» ⁸ Ñu ne ko: «Dunu ko man mbete gétt yépp daje, nu bérab doj wi, ubbi teen bi, doora wégg gätt yi.»

⁹ Na muy wax ak ñoom nag, Rasel agsi, indaale gätti baayam, ndaxte sàmm la woon. ¹⁰ Ba Yanqóoba gisee Rasel, doomu nijaayam Laban, moom ak gätti nijaayam ya, dafa daaga ba ca teen ba, bérab doj wa ko ub, daldi wégg gätti Laban. ¹¹ Ba loolu amee Yanqóoba foon Rasel, ne yikkét jooy. ¹² Ca la Yanqóoba wax Rasel ne ko: «Maak sa baay a bokk, ndax maay sa doomu bàjjan Rebeka.» Rasel daw, yégal ko baayam.

¹³ Ba Laban déggée ne jarbaatam Yanqóoba ñew na, dafa daw gatandu ko, taf ko ci boppam, foon ko, yobbu ko kër ga. Ba Yanqóoba nettalee Laban lépp, ¹⁴ Laban da ne ko: «Yaw kay sama jarbaat nga lenqe!» Yanqóoba toog na fa ak moom lu mat weer. ¹⁵ Gannaaw loolu Laban ne Yanqóoba: «Li ngay sama mbokk kat, taxul nga war maa liggéeyal ci neen. Wax ma lan mooy sa peyoor.»

¹⁶ Laban nag amoon na ñaari doom yu jigéen, taaw ba di Leya, rakk ja di Rasel. ¹⁷ Leya di ku bët ya yànjuloon, te Rasel nekkoon ju jekk te neexa xool, ¹⁸ Yanqóoba bëgg Rasel lool, ba ne Laban: «Dinaa la liggéeyal juróom ñaari at ngir Rasel sa doom ju ndaw ji.» ¹⁹ Laban ne ko: «Ma may la ko de moo ma gènal may ko keneen. Kon toogal ci man.» ²⁰ Ci kaw loolu Yanqóoba liggéeyal Laban diiru juróom ñaari at ngir Rasel, te mu mel ni ay fan rekk ci moom ndax mbéggéel, gi mu am ci Rasel.

²¹ Loolu wéy, Yanqóoba ne Laban: «Jox ma sama jabar, ma séetal ko, ndax àpp bi jot na.» ²² Laban nangu, daldi togglu ay reer, woo ca waa gox ba bépp. ²³ Timis jot Laban jël doomam Leya, jébbal ko Yanqóoba, mu dëkkoo ko. ²⁴ Ci biir loolu Laban jël jaamam bu jigéen bu ñuy wax Silpa, may ko doomam Leya, mu dib jaamam.

²⁵ Ba bët setee, Yanqóoba fekk muy Leya. Mu ne Laban: «Waaw, li nga ma def nag? Du Rasel a taxoon ma liggéeyal la? Lu tax nga wor ma?» ²⁶ Laban ne ko: «Rakk jëkka séy taaw daal, du aada fii. ²⁷ Séetul ak kii, ba ayu bésam mat, ma door laa jox ki ci des, soo ma dee liggéeyaatal diiru

* 28:19 28.19 Betel mu ngi tekki «kër Yàlla».

juróom ñaari at.» ²⁸ Yanqóoba nangu, daldi séetu ak Leya ayu bés, ba noppi Laban jébbal ko doomam Rasel. ²⁹ Booba la Laban may Rasel jaamam bu jigéen bu ñuy wax Bilaa, mu dib jaamam. ³⁰ Yanqóoba nag dékkoo Rasel, mi mu génoona bëgg Leya. Ci kaw loolu mu liggéeyaatal Laban juróom ñaari at.

Lu jëm ci njabootu Yanqóoba

³¹ Ba Aji Sax ji gisee ne Leya fonkeesu ko, mu may ko, mu taawlu, te Rasel moom manula am doom. ³² Ba Leya ëmbee, am doom ju góor, da koo tudde Ruben (mu firi Gisleen, doom ju góor a ngi), ndaxte Leya da ne: «Aji Sax ji gis na sama toroxte. Léegi sama jëkkër dina ma bëgg.» ³³ Mu dellu ëmb, am doom ju góor. Mu ne: «Aji Sax ji yég na ne fonkeesu ma, looloo tax mu mayaata ma doom jii.» Mu tudde ko Simeyon (mu firi Kiy dégg). ³⁴ Mu delluwaat ëmb, am doom ju góor, ba noppi waxaat ne: «Bii yoon sama jëkkër dina am cofeel ci man, ndax jural naa ko ñetti doom yu góor,» loolu tax mu tudde ko Lewi (mu firi Boroom cofeel). ³⁵ Mu dellooti ëmb, am doom ju góor daldi ne: «Bii yoon dinaa sant Aji Sax ji,» loolu tax mu tudde ko Yuda (mu firi Cant). Gannaaw loolu njuram taxaw.

30

¹ Ba Rasel gisee ne amalul Yanqóoba doom, dafa ñee magam, ba tax mu wax Yanqóoba ne ko: «Nanu am ay doom, mbaa ma dee.» ² Yanqóoba mere ca Rasel ne ko: «Ndax maay Yàlla, mi la teree am doom?» ³ Mu ne ko: «Xoolal, sama jaam Bilaa ngii; dékkoo ko, ndax mu amal ma doom, ba jabootal ma.» ⁴ Ci kaw loolu mu may ko jaamam Bilaa, muy soxnaam. Yanqóoba dékkoo Bilaa, ⁵ mu ëmb, amal Yanqóoba doom ju góor. ⁶ Bi loolu amee Rasel ne: «Yàlla àtte na ma; dégg na sama ñaan, ba may ma doom.» Mu tudde ko nag Dan (mu firi Kiy àtte). ⁷ Gannaaw ga Bilaa, jaamub Rasel, ëmbaat, dellu amal Yanqóoba doom ju góor. ⁸ Rasel ne: «Bère naa ak sama mag bëre bu réy, ba daan,» daldi ko tudde Neftali (mu firi Kiy bëre).

⁹ Leya moom ii xam ne taxawaayam yàgg na, mu fab jaamam Silpa, may ko Yanqóoba. ¹⁰ Bi loolu amee Silpa, jaamub Leya, amal Yanqóoba doom ju góor. ¹¹ Leya ne: «Ndaw wërség wu réy!» daldi ko tudde Gàdd (mu firi Wërség). ¹² Silpa jaamub Leya dellu, amal Yanqóoba doom ju góor. ¹³ Leya ne: «Éey waay, maaka bé! Jeeg ji dinañu ma wooye boroom

mbégte mi.» Mu tudde ko nag Aser (mu firi Boroom mbégte).

¹⁴ Mu am bés ñuy góob bele, Ruben dem tool, sàkke ca gancax gu ñu naan màndaragoor*, indil ko yaayam Leya. Rasel ne Leya: «Ngalla may ma ci màndaragoor ji la sa doom indil.» ¹⁵ Teewul mu ne ko: «Ndax nangu sama jëkkër rekk doyu la, ba nga bëgg cee boole màndaragoor ji ma sama doom indil?» Rasel ne ko: «Kon jox ma ci màndaragoor ji sa doom indi, ma wecci la ko sama ayu tey boog.»

¹⁶ Yanqóobaa ngay jóge tool ca ngon, Leya génn, gatandu ko, ne ko: «Fi man nga wara aye tey, ndaxte jënde naa ay gi màndaragoor ji sama doom indi.» Yanqóoba daldi féete ca moom guddi googu. ¹⁷ Yàlla nangul Leya, mu ëmb, am ak Yanqóoba seen juróomeelu doom ju góor. ¹⁸ Leya neeti: «Yàlla da maa fey, ndax maa may sama jëkkër sama jaam.» Mu tudde ko Isaakar (mu firi Boroom pey). ¹⁹ Gannaaw gi Leya ëmbaat, am ak Yanqóoba seen juróom benneelu doom ju góor. ²⁰ Booba la ne: «Yàlla defal na ma teraanga ju réy. Bii yoon sama jëkkër dina ma teral, ndax amal naa ko juróom benni doom yu góor.» Moo tax mu tudde ko Sabulon (mu firi Teraanga). ²¹ Gannaaw ga mu am doom ju jigéen, tudde ko Diina.

²² Ba loolu amee Yàlla geestu Rasel, nangul ko, may ko doom. ²³ Mu ëmb, am doom ju góor, daldi ne: «Yàlla teggil na ma gacce.» ²⁴ Moo tax mu tudde ko Yuusufa (mu firi Yal na dollil), ndax dafa ne: «Yal na ma Aji Sax ji dollil doom ju góor.»

Yanqóoba woomle na

²⁵ Ba Rasel amee doom ci Yuusufa, Yanqóoba da ne Laban: «Yiwi ma boog, ma dellu sama réew ca sama kër. ²⁶ Su ko defee nga jox ma samay doom ak sama jabar yi taxoon ma di la liggéeyal, te bàyyi ma, ma dem, ndax yaw ci sa bopp xam nga li ma la liggéeyal.» ²⁷ Laban ne ko: «Ngalla waay, déglu ma, ngir sama ngisaane won na ma ne Aji Sax ji barkeel na ma ndax yaw. ²⁸ Wax ma loo may feyeeku rekk, dinaa la ko fey.» ²⁹ Yanqóoba ne ko: «Yaw ci sa bopp xam nga ni ma la liggéeyale ak ni sa gétt mujj mel ndax man; ³⁰ ndaxte lu néew nga amoon laata may ñëw, te yokku na, ba bare lool, ngir Aji Sax ji da laa barkeel ndax man. Waaye léegi nag, liggéeyal sama waa kër bopp jot na xanaa?» ³¹ Laban dellu ne ko: «Dama ne, ñaata laa lay fey?» Yanqóoba ne ko: «Doo ma jox dara. Boo nangoo lii ma lay

* 30:14 30.14 màndaragoor gancax la gu ñu yaakaar ne day giiral jigéen. † 30:32 30.32 Ca yooyu jamono xar yi dañu daan faral di weex, bëy yi farala ñiul te duñu rax.

wax, dinaa sàmmaat say gàtt, wattu ko.³² Damay seet tey jii ci biir jur gu gàtt gépp, génne ci xar yu ñuul yépp[†], ak bëy, yi todde ak yi tippante yépp, ñu doon sama peyoor[‡].³³ Èllëg aki sibbir booy seetsi sama peyoor, sama njubtee may layool: lépp lu toddewul te tippantewul ci biir bëy yi ak lu ñuulul ci mburt yi, boo ko gisee ci man, càcc la.»³⁴ Laban ne: «Waa, kon baax na.»

³⁵ Ca bés booba Laban dafa ber sikket, yi seereer te todde, ak bëy, yi tippante te todde, maanaam yi rax, ak xari menn melo yu ñuul yi, daldi leen dénk ay doomam.³⁶ Gannaaw loolu mu doxale digganteem ak Yanqóoba doxu ñetti fan. Yanqóoba nag di sàmm li des ci gàtti Laban.

³⁷ Ci kaw loolu Yanqóoba tànn ñetti garab yu ñuy wax pèpalyee, gerte-tubaab ak palataan, gor ci bant yu tooy, xànc-xàncee ko, ba mu defi rèdd yu weex.³⁸ Mu yeb bant, ya mu xànc-xàncee, ca naanukaay ya, mu janook jur ga, ca mbalka ya jur gay naane, ndax fa la jur ga daan tèboo.³⁹ Loolu tax bëy yay tèbu ca wetu car ya, di jur doom yu seereer, yu tippante ak yu todde.⁴⁰ Xar ya, Yanqóoba da leena ber, tey fexe ñuy janook lépp lu seereer ak lu ñuul ci biir juru Laban. Noonu la sàkke juru boppam, bañ koo boole ak juru Laban.⁴¹ Saa yu jur gi èpp doole dee tèbu, Yanqóoba yeb car yi ci naanukaay yi, tiimale ci jur gi, ngir bu ñuy tèbu, ne ci jàkk.⁴² Bu jur gu xiibon gi dee tèbu, mu bañ leena tegal dara. Muy def noonu ba jur gi xiibon, di gu Laban, gi am doole, di gu Yanqóoba.⁴³ Waa ji mujj na barele lool, am gàtt yu ne gāññ ak ay jaam yu góor ak yu jigéen ak ay giléem aki mbaam-sëf.

31

Yanqóoba toxu na, jëm Kanaan

¹ Ba loolu amee mu am bés Yanqóoba dégg doomi Laban ya naan, Yanqóoba nangu na li seen baay amoon lépp, te ci seen alalu baay la sàkkoo alalam jooju jépp.² Naka la Yanqóoba gis kanamu Laban, daldi xam ne melatul, na mu meloon ci moom.³ Aji Sax ji wax Yanqóoba ne ko: «Dellul ca sa réewu maam ya, ca say bokk. Dinaa ànd ak yaw.»

⁴ Yanqóoba woolu Rasel ak Leya ca tool ya, fa gàttam ya nekk.⁵ Mu ne leen: «Gis naa seen kanamu baay. Xam naa ne melatul na mu meloon ci man. Waaye sama Yállay baay ay ànd ak man.⁶ Yeen ci seen bopp xam ngeen ne liggéeyal naa

seen baay sama kem kàttan.⁷ Teewul seen baay wor ma, soppi sama peyoor fukki yoon ak juróom, waaye Yàlla seetaanu ko, mu di ma lor.⁸ Bu nee: “Yi tippanteey sa peyoor,” jur gépp jur lu tippante; mbaa mu ne: “Yi seereer ay sa peyoor,” jur gépp jur lu seereer.⁹ Nii la Yàlla nangoo seen juru baay, jox ma.

¹⁰ «Ba ñu demee ba jur giy wara tèbu, damaa jeneer sikket yiy tèb bëy yi yépp di lu seereer ak lu tippante mbaa ñu raxe.¹¹ Ca la ma malaakam Yàlla ma wax ci biir gént gi ne ma: “Yanqóoba,” ma ne ko: “Naam.”¹² Mu ne ma: “Siggil, xool sikket yiy tèb bëy yi yépp, yii dañoo seereer, yee todde, yi ci des tippante, ndaxte gis naa li la Laban di def lépp.¹³ Maay Yàlla, ja la feeñu woon Betel, fa nga samp doj, sotti ci diw, sellale ko, te dogu woon fa ci man. Léegi nag jógal, génn réew mii, dellu ca réew, ma nga juddoo.”

¹⁴ Rasel ak Leya ne ko: «Ndax amati nanu benn cér walla ndono sunu kër baay? ¹⁵ Doonunu lu moy ay doxandéem ci moom de! Nde da noo jaay, lekk sunu njég, ba mu jeex tàkk.¹⁶ Te mboolem alal, ji Yàlla nangoo ci sunu baay, noo ko moom, nun ak sunuy doom. Kon nag léegi lu la Yàlla wax rekk, def ko.»

¹⁷ Yanqóoba daldi dajale ay doomam ak ay soxnaam, waral leen giléem,¹⁸ ñu ànd tegu ca yoon wa, yóbbaaale géttam gépp ak mboolem alal ju mu liggéey. Mooy gètt, ga mu sàkkoo Padan Aram. Ña ngay ñibbi kër baayam Isaaxa ca réewu Kanaan.

¹⁹ Fekk na Laban dem wati ay xaram*. Ci biir loolu Rasel sàcc gällaaji kër yu baayam.²⁰ Noonu la Yanqóoba nèbboo Laban, Arameen ba, bañ koo yégal ne day dem.²¹ Ba mu demee, dafa yóbbaaale la mu amoon lépp, jóge fa, jàll dexu Efraat, wuti tundi Galàdd.

Laban dabi na Yanqóoba

²² Yanqóoba daw na, ba mu am ñetti fan, ñu soog koo yégal Laban.²³ Mu ànd nag ak ay bokkam, topp ko juróom ñaari fan, door koo dab ca tundi Galàdd.²⁴ Ci kaw loolu Yàlla feeñu Laban, Arameen ba, ci géntu guddi ne ko: «Moytula wax Yanqóoba lenn lu koy gaar.»²⁵ Ba Laban dabee Yanqóoba, dafa fekk mu samp xaymaam ca tund wa. Laban it samp bosam ca kaw tundi Galàdd, moom aki bokkam.

²⁶ Laban ne Yanqóoba: «Looy def nii, yaw, di ma nèbbuy daw, yóbbaaale sama doom yu jigéen, ñu mel ni ñu ñu lële xare? ²⁷ Lu waral nga di ma nèbbuy daw

[†] 30:32 30.32 Fii dañoo topp téereb kàddug Yàlla gi ni ñu ko tekkee ci lammañu gereg, te ci booba téere melow todde ak tippante bëy yi rekk a ko féetewoo. * 31:19 31.19 Xari waa penku dañuy bare kawar gu ñuy wat ak a écc, di ci defar ag wën.

te bañ maa tàggu? Nde konoon jombul ma yiwi la ci xol bu sedd, bu ànd aki woy, boole ci xalam aki sabar. ²⁸ Mayoo ma sax, ma foon samay sèt ak samay doom yu jigéen, tàggtook ñoom; yéfi dof de nga def nii! ²⁹ Manoon naa laa def lu bon, waaye sa Yállay baay da maa feeñu biig ne ma: “Moytula wax Yanqóoba lenn lu koy gaar.” ³⁰ Bu la neexee, nga namm sa kër baay, ba dogu caa dem, waaye lu tax nga sàcc sama gällaaji kër, teg ci?»

³¹ Yanqóoba tontu Laban ne ko: «Xanaa ragaloon rekk ne jombul dinga téye say doom yu jigéen. ³² Waaye képp koo gis mu yor sa gällaaji kër, boo yeboo reyal. Seetal fii ci sunu kanami bokk lépp lu ma fi yor, loo ci moom fabal, yóbbu.» Booba Yanqóoba xamul woon ne Rasel a ko jël. ³³ Laban dugg ci xaymab Yanqóoba, teg ca xaymab Leya ak yosi ñaari jaamam yu jigéen ya, te gisul dara. Mu génne xaymab Leya, dugg ci bu Rasel.

³⁴ Fekk na Rasel fab gällaaji kër ya, làq ca ron tegu giléem ga, toog ca. Laban técc, técc ca biir xayma ba, gisul dara. ³⁵ Rasel wax baayam ne ko: «Baay, baal ma de, damaa manula jóg ci sa kanam, ndaxte damaa ànd ak mbaax.» Laban seet na fu ne, waaye gisul gällaaji kër am ya.

³⁶ Yanqóoba mar lool, daldi gëdd Laban ne ko: «Ndax damaa tooñ walla damaa moy, ba nga sambal ma, di ma topp nii?

³⁷ Bi nga jéexee sama yéf yépp ba noppi, ana loo gis lu bokk ci sa yéfi kër? Teg ko fii ci sama kanami bokk ak say bokk, ñu àtte nu. ³⁸ Xanaa du ñaar fukki at a ngii ma nekk ak yaw? Say xar ak say bëy èmbuñu sax, mu yaqu, te masumaa lekk sa kuuyi gétt. ³⁹ Jur gu rab fàdd sax ma féetewoo, waaye masuma la koo indil. Mboolem lu ñu sàcc guddi ak lu ñu sàcc bëccëg, danga ma ko daa feyu. ⁴⁰ Naaj wi laa daan yendoo yenu bëccëg, di fanaanoo sedd guddi, mu xaw maa rey, ba duma gëmm bët. ⁴¹ Ñaar fukki at a ngii, ma di la jaamu ci kër gi, liggeeyal naa la fukki at ak ñeentu ngir sa ñaari doom yu jigéen ñii, teg ci juróom benni at yu ma la sàmmal say gàtt, nga soppa sama peyoor fukki yoon ak juróom. ⁴² Su dul woon ak sama Yállay baay, ji ànd ak man, di Yállay Ibraayma, ji Isaaxa wormaaloon, konoon nga dàq ma tey, ma dem loxoy neen. Waaye sama toskare ak sama àqu ñaq la Yàlla gis, ba tax mu àtte ma ak yaw biig.»

⁴³ Ba mu ko waxee loolu, Laban ne ko: «Jigéen ñii samay doom lañu, xale yii di samay sèt, te gétt gii sama gétt a; lu fi nekk maa ko moom. Ñii di sama doom yu jigéen, nu ma leen di def tey, ñoom

ak seeni doom? ⁴⁴ Léegi ñéwal rekk, ñu fasante kóllère maak yaw, te seede dox sunu diggante maak yaw.» ⁴⁵ Ba loolu amee Yanqóoba jël aw doj, samp ko, muy doju xàmmikaay. ⁴⁶ Yanqóoba ne ay bokkam: «Forleen ay doj.» Ñu for ay doj, def ko ab jal, daldi lekk foofa ca wetu jal ba. ⁴⁷ Laban tudde bérab ba Yegar Saaduta; Yanqóoba tudde ko Galet†.

⁴⁸ Booba la Laban ne: «Jal bii tey, mooy sunu seede sama diggante ak yaw.» Moo tax ñu tudde ko Galet (mu firi Jalub seede).

⁴⁹ Ñu di ko tudde itam Mispa (mu firi Tatay wattukaay), ndax Laban da ne: «Yal na Aji Sax ji wattu sunu diggante, keroog bu ñu sooree. ⁵⁰ Soo soxoree samay doom yu jigéen, mbaa nga takk yeneen jabar, bu fa kenn nekkul sax, moytul, ndax Yàllaa nuy seede.» ⁵¹ Laban neeti Yanqóoba:

«Xoolal ci jal bii ak doju xàmmikaay, wi ci sama digganteek yaw. ⁵² Jal bi seede la, doj wi di seede ne duma jéggi jal bi, jublu ci yaw, te yaw itam doo jéggi jal bi mbaa doj wi, jublu ci man, te naraluloo ma jàmm. ⁵³ Yállay Ibraayma ak Yállay Naxor, ñoom ñooñee di seen Yállay baay, yal nañu àtte sunu diggante.» Yanqóoba daldi giñ ci Yàlla, ji baayam Isaaxa wormaaloon.

⁵⁴ Gannaaw loolu Yanqóoba sàkk sarax ca kaw tund wa, woo ay bokkam, ñu bokk lekk. Ba ñu lekkee ba noppi, fanaan ca tund wa.

32

¹ Ca èllëg sa, Laban xëy suba teel, tàggoo aki sëtam ak doomam yu jigéen ya, ñaanal leen, ba noppi waññiku ñibbi.

² Yanqóoba moom topp yoonam. Ci kaw loolu ay malaakay Yàlla feeñu ko. ³ Ba leen Yanqóoba gisee, da ne dalub Yàllaa ngii, ba tax mu tudde bérab ba Maanayim (mu firi Ñaari dal).

Yanqóoba ragal naa daje ak Esawu

⁴ Ba loolu amee Yanqóoba dafa yónni ay ndaw, ñu jiitu ko ca magam Esawu, ca réewu Seyir, di diiwaanu Edom. ⁵ Mu sant leen ne leen: «Bu ngeen demee ca sama sang Esawu, neleen ko: Sa surga Yanqóoba nee na: “Maa nga woon ca kër Laban bu yàgg ba tey, ⁶ ma doora ñew, ànd ak ay nag ak ay mbaam ak ay gàtt ak ay jaam yu góor ak yu jigéen; may yónnee ci yaw, di la siyaare tey sàkku nga dalal ma jàmm.» ⁷ Ndaw ya daldi dem ba délsi ca Yanqóoba, ne ko: «Dem nanu ca sa mag Esawu, waaye moom ci boppam mu ngi ci yoon wi di ñew, fekkxi la fii, te ma nga ànd ak ñeenti tééméeri góor.»

† 31:47 31.47 Galet bokk na lu mu tekki ak Yegar Saaduta ci làkku Arameen ña.

⁸ Yanqóoba dégg loolu, tiit lool te ànd ak njàqare, ba tax mu séddale mbooloo, ma mu àndal, gàtt ya ak jur gu gudd ga ak giléem ya itam, mu xaaj leen ñaar. ⁹ Booba mu ngi naan, bu Esawu songee benn dal bi, dal bi ci des mana raw. ¹⁰ Ci kaw loolu Yanqóoba ñaan Yàlla, ne ko: «Yaw Aji Sax ji, sama Yállay maam Ibraayma, di sama Yállay baay Isaaxa itam, yaa ma ne woon: “Dellul réew ma nga cosaanoo, ca say bokk; dinaa la baaxe.” ¹¹ Yelloowuma lu géna tuuti ci sa ngor ak sa worma, gi nga ma won, man sa jaam. Aw yet donj laa njàbboon, ba ma jàlle dexu Yurdan, te yokku naa tey, ba doon ñaari kurél. ¹² Maa ngi lay ñaan, nga musal ma ci sama loxol mag Esawu, ndaxte ragal naa, mu ñew bóom ma, bóomaale jigéen ñi ak seeni doom. ¹³ Te yaw yaa ma ne: “Dinaa la baaxe moos, yokk saw askan, ba mu tollu ni sufas géej, si kenn manula lim ndax bare.”»

¹⁴ Yanqóoba fanaan na fa guddig keroog, doora sàkk ca alalam, sédd magam Esawu, ¹⁵ lépp di ñaar téeméeri bëy ak ñaar fukki sikket ak ñaar téeméeri xar ak ñaar fukki kuuy ¹⁶ ak fanweeri giléem yu seeni doom di nàmp, ak ñeent fukki nag ak fukki yèkk ak ñaar fukki mbaam ak fukki mbaam yu góor.

¹⁷ Dafa ber gétt yi, gu ci nekk mu jox ay surgaam, ne leen: «Jiituleen ma, te na gétt yi dándante.» ¹⁸ Ci biir loolu mu sant ki jiitu, ne ko: «Boo dajeeek sama mag, mu laaj la ne la: “Kuy sa njaatage?” ak “Ku moom li nga jiital?” ak “Foo jëm?” ¹⁹ nee ko: “Lii de sang bi, lu la Yanqóoba may la, di la ko siyaaree, yaw Esawu, te moom ci boppam mu ngi topp ci sunu gannaaw.”» ²⁰ Ndigal loolu la joxaat ñaareelu surga ba ak ñetteel ba ak mboolem ña topp ca gétt ya, ku ci nekk mu wax ko ne ko loolu lay wax Esawu, bu ko gisee, ²¹ tegati ca ne ko: «Te nee ko itam: “Sa surga Yanqóobaa ngi topp ci sunu gannaaw.”» Booba Yanqóobaa ngi naa ci xelam: «Bu ma jiitalee li ma ko may, neexale ko ko, bala maa janook moom, jombul mu dalal ma jàmm.» ²² Neexal ba da koo jiitu, moom mu fanaan guddig keroog ca dal ba.

Lu jëm ci bëreb Yanqóoba ba

²³ Gannaaw loolu Yanqóoba jóg ca guddi ga, ànd ak ñaari soxnaam, ñaari jaamam yu jigéen ak fukki doomam yu góor ak benn, daldi jàll dexu Yabog. ²⁴ Yanqóoba da leena jàllale, jàllewaale alalam jépp itam. ²⁵ Mu des fa nag moom donj.

Kera la genn góor fanaana bëre ak moom, ba bêt set. ²⁶ Ba nit ka xamee ne manalu ko dara, dafa dóor Yanqóoba ci mooco, mooco mi summikoo ca bëre ba.

²⁷ Nit ka ne ko: «Bàyyi ma, ma dem, ndax bêt a ngi bëgga set.» Teewul Yanqóoba ne ko: «Duma la bàyyi, nga dem, li feek ñaanaloo ma.» ²⁸ Nit ka ne ko: «Na nga tudd?» Mu ne ko: «Yanqóoba.» ²⁹ Nit ka ne ko: «Tuddatulo Yanqóoba, léegi Israyil nga tudd, ndaxte bëre nga ak nit, bëre ak Yàlla, ba génn ci ak jàmm*.» ³⁰ Yanqóoba ne ko: «Waaw, yaw nag noo tudd?» Mu wax ko ne ko: «Loo may laaje sama tur?» ba noppi barkeel ko foofa.

³¹ Ci kaw loolu Yanqóoba tudde bérab ba Peniyel (mu firi Xar-kanamu Yàlla), ndaxte da ne: «Ne naa Yàlla jàkk, te maa ngi dund ba tey.»

³² Ba jant bay fenk, Yanqóobaa ngi soox tànk bi, di bàyyikoo Penuwel†. ³³ Looloo tax ba tey jii bànni Israyil duñu lekk suux, wi jàpp ci tenqob mooco, ndax li moocob Yanqóoba summikoo woon ca suuxu tenqo ba.

33

Yanqóoba ak Esawu daje nañu ci jàmm

¹ Gannaaw loolu Yanqóoba séen Esawu di ñew, ànd ak ñeenti téeméeri góor, mu séddale xale yi, diggante Leya, Rasel ak ñaari jaam ya. ² Dafa jiital jaam ya ak seeni doom, tofal ca Leya ak ay doomam, Rasel ak Yuusufa fèete gannaaw. ³ Moom ci boppam nag, mu jiitu leen, wutali magam, di dox tey sujjóot, ba muy juróom ñaari yoon. ⁴ Teewul Esawu daw gatandu ko, taf ko ci boppam, langaamu ko, di ko foon. Ñu daldi jooy!

⁵ Naka la Esawu siggi, gis jigéen ñi ak xale yi, mu ne: «Ñii ànd ak yaw ñooy ñan?» Yanqóoba ne ko: «Xanaa njaboot, gi ma Yàlla baaxe, sang bi.» ⁶ Jaam ya ak seeni doom daldi jegesi, sujjóotal ko. ⁷ Leya it topp ca, moom aki doomam, jegesi ñoom itam, sujjóot. Yuusufa ak Rasel doora jegesi sujjóot.

⁸ Esawu ne ko: «Waaw, dal bu réy bii ma dajeel, loo ci namm?» Yanqóoba ne ko: «Xanaa di sàkku nga dalal ma jàmm rekk, sang bi.» ⁹ Esawu ne ko: «Am naa ba biibal, sama rakk, fabal sa alal.» ¹⁰ Yanqóoba ne ko: «Ngalla waay déet, dimbali ma rekk te jël li ma la may. Ndaxte bi ma nee jàkk ci sa kanam, gis naa ni nga ma laaye biir, ba mu mel ni Yàllaa ma geestoo yërmandeem. ¹¹ Kon jëlal lii ma

* **32:29** 32.29 Ñaari kàdduy ebré yu taqoo ñoo sos baatu Israyil. Li jiitu ci baat bi mu ngi tekki «bëre». Li ci topp di tekki «Yàlla». † **32:32** 32.32 Penuwel mooy Peniyel ba tey.

la may, ndax Yälla baaxe na ma, ba ma barele.» Mu tinu ko, ba Esawu mujj nangu.

¹² Gannaaw loolu Esawu ne: «Tee noo ànd dem boog, ma jiiitu la?» ¹³ Yanqóoba ne ko: «Sang bi, xam nga, xale yi dañoo néew doole, te it gätt yi ak nag yiy nàmpal laay xalaat. Su nu leen séqatalee benn bés rekk, gätt yépp dee. ¹⁴ Jiiitu ma rekk, sang bi, man ma topp ndànk ci wewu jur gi, jiiital leen, te baña raw xale yi, ba kera ma lay fekksi Seyir.» ¹⁵ Esawu ne ko: «Xaaral ma bàyyee la ñenn ci góor, ñi ma àndal.» Yanqóoba ne ko: «Matu ko. Boobu teraanga épp na, sang bi. Jàmm ji nga ma dalal rekk doy na.» ¹⁶ Booba la Esawu dellu, jubal yoonu Seyir.

¹⁷ Yanqóoba moom jubal gox bu ñu naan Sukkóot, tabax fa kër, mbaaral géttam, moo tax ñu tudde bérab boobu Sukkóot (mu firi Ay mbaar). ¹⁸ Gannaaw ga Yanqóoba agsi Sikem, ga ca réewu Kanaan, ci jàmm. Fekk na mu bàyyikoo Padan Aram, ba dal fa jàkkaarlook dëkk ba. ¹⁹ Booba la jènde ci doomi Amor, baayu Sikem, pàkk, ba mu sampoon xaymaam, ci tééméeri kesita*. ²⁰ Mu daldi fay sàkk sarxalukaay, tudde ko El Elowe Israyil (mu firi Yállay Israyil mooy Yälla).

34

Toon nañu Diina doomu Yanqóoba

¹ Am na bés Diina, ku jigéen ki Leya amal Yanqóoba, génn di seeti moroom ya ca dëkk ba. ² Ci kaw loolu Sikem doomu Amor, miy Eween te di kilifa ca dëkk ba, daldi koy gis, jàpp ko, tédde ko, torxal ko. ³ Teewul Sikem xemmemoon na Diina doomu Yanqóoba lool te bëgg ko, ba tax mu di ko naxtaan. ⁴ Loolu waral mu ne baayam Amor: «Ñaanal ma janq bi jabar.»

⁵ Yanqóoba nag dégg ne Sikem torxal na Diina, doomam ju jigéen, fekk booba doomam yu góor yaa nga woon ca àll ba, fa jur ga nekk. Yanqóoba ne cell, ba ñu ñibbsi. ⁶ Ci diggante boobu Amor, baayu Sikem, ñew ci Yanqóoba, ngir gise ak moom. ⁷ Ca la doomi Yanqóoba agsi, jóge ca tool ya. Ba ñu déggee la xew, dañoo am naqar wu réy, mer lool ndax gáce, ga Sikem teg waa Israyil, ba mu téddee doomu Yanqóoba ja, te loolu di lu defuwul.

⁸ Amor wax ak ñoom ne leen: «Sama doom Sikem dafa bëgg seen jigéen ci xolam. Dama leen di ñaan, ngeen may ko ko jabar. ⁹ Tee noo séyante, ngeen may nu seeni janq, te jël ci sunuy janq? ¹⁰ Su ko defee ngeen dëkk ak nun te réew mi di seen réew. Man ngeen fee sanc, dem fu

leen neex, sàkku fi alal.» ¹¹ Sikem it wax ak baayu Diina ak càmmiñ ya ne leen: «Su ngeen ma nangulee, lépp lu ngeen ma wax dinaa ko joxe. ¹² Limal-leen ma warugar yi ak nu mu mana tollu, boole ci may gi; dinaa joxe lu ngeen ma sas; mayleen ma janq bi rekk.»

¹³ Waaye doomi Yanqóoba ya, ay nax lañu tontoo Sikem ak baayam Amor, ndax li Sikem torxal seen jigéen Diina. ¹⁴ Dañu ne leen: «Manunu loolu, ndax may sunu jigéen góor gu xaraful, loolu gáce la ci nun. ¹⁵ Dunu leen mana nangul mbete ngeen melee ni nun ci kaw seeni góor ñépp xaraf. ¹⁶ Su ko defee dinanu leen may sunuy janq, te dinanu jël ci seeni janq, dëkk ak yeen, nuy ay bokk. ¹⁷ Waaye su ngeen nu déggalul, ba xarafuleen, danuy jël sunu jigéen, dem.»

¹⁸ Seen wax jooju neex Amor ak Sikem doomu Amor. ¹⁹ Xale bu góor bi daldi gaawtu def li ñu ko sant ndax mbéggelam ca doomu Yanqóoba. Booba Sikem lañu génoona weg ca waa kër baayam yépp. ²⁰ Amor nag ànd ak doomam Sikem, dem ba ca pénc ma, wax ak waa dëkk ba ne leen: ²¹ «Ñii sunuy am-di-jàmm lañu, te gannaaw réew maa ngi ne yàmblanj, bàyyileen leen, ñu sanc te dem fu leen neex. Man nanoo jël seen doomi janq te di leen may sunuy doom. ²² Waaye li ci nekk mooy, seeni góor duñu nangoo dëkk ak nun, nuy ay bokk, ndare sunu góor ñépp xaraf ni ñoom. ²³ Bu nu leen nangulee, ba ñu dëkk ci sunu biir, kon seeni jur ak seen alal ak seen mala yépp, ndax du nooy doon boroom?» ²⁴ Ba mu ko defee mboolem góori dëkk ba déggal Amor ak doomam Sikem, ba ñoom ñépp xaraf.

²⁵ Ca gannaaw èllég sa ñu ànd ak metit, ñaari doomi Yanqóoba ya, Simeyon ak Lewi, càmmiñi Diina, jël seeni saamar, dugg ca dëkk ba, bett leen, rey góor ñépp. ²⁶ Ca lañu leel ñawkey saamar Amor ak doomam Sikem, ñu dee, ñu jële Diina kër Sikem, ànd ak moom, dem. ²⁷ La ca tegu doomi Yanqóoba ya ca des futti néew ya, lëlaale dëkk ba, ndax li ñu torxal seen jigéen. ²⁸ Nu daldi jël seen jur gu gätt ak gu gudd, seeni mbaam ak mboolem la ca biir dëkk ba ak la ko wër. ²⁹ Noonu lañu jële seen alal jépp ak seeni doom ak seeni jabar, boole ca lël mboolem lu nekkoon ca biir kër ya.

³⁰ Yanqóoba nag wax ak Simeyon ak Lewi ne leen: «Indil ngeen ma musiba, ndax dingeen tax waa réew mépp sib ma, muy Kanaaneeen ñi, di Periseen ñi. Te itam awma lu dul góor ñu néew, te bu ñu

* 33:19 33.19 kesita xaalisu réew ma la woon.

booloo dal ci sama kaw, dañu may booleek sama waa kër faagaagal.» ³¹ Ñu ne ko: «Danuy seetaan sunu jigéen daal, ñu di ko def ab ganc?»

35

Yanqóoba sanc na Betel

¹ Ba loolu wéyee Yàlla ne Yanqóoba: «Jógal dem Betel, toog fa te nga sàkkal fa sarxalukaay Yàlla, ji la feeñu, ba ngay daw sa mag Esawu.» ² Yanqóoba wax ak waa kërám ak ñi ànd ak moom ñépp ne leen: «Jéleleen ci seen biir tuuri doxandéem yi, te ngeen sangu-set te solu. ³ Danuy dem Betel, ma sàkkal fa sarxalukaay Yàlla, ji ma wallu, ba ma nekkee ci njàqare, te ànd ak man fépp fu ma jaar.» ⁴ Ñu daldi jox Yanqóoba mboolem tuuri doxandéem, yi ñu yor, ak seen jaaroy nopp, Yanqóoba boole suul ca taatu garab* gu mag ga nekkoon ca wetu dèkk, ba ñu naan Sikem. ⁵ Gannaaw loolu ñu sàqi, Yàlla nag wàcce tiitaange lu réy ca kaw dèkk, ya leen wër, ba taluñoo dabi doomi Yanqóoba ya.

⁶ Ba mu ko defee Yanqóoba ak ñi mu àndal ñépp agsi Lus, di Betel ba tey, foofa ca réewu Kanaan. ⁷ Mu sàkk fa nag sarxalukaay, tudde bérab ba El Betel, ndax foofa la ko Yàlla feeñoo, bi muy daw magam. ⁸ Foofa itam la Debora, ma daa nàmpal Rebeka, faatoo, ñu suul ko ca taatu garab gu mag ga ca wetu Betel. Ñu tudde garab ga Alon Bakut (mu firi Garabu jooyoo).

⁹ Ba Yanqóoba jógee Padan Aram, Yàlla feeñuwaat na ko, barkeel ko ¹⁰ ne ko: «Yaa di Yanqóoba, waaye deesatu la wooye Yanqóoba; léegi yaa di Israyil.»

Mu tudde ko nag Israyil. ¹¹ Yàlla neeti ko: «Man maay Yàlla Aji Man ji. Giiral te yokku, ba aw askan ak mboolooy askan sosoo ci yaw, te ay buur askanoo ci sa geño. ¹² Réew, mi ma sédd Ibraayma ak Isaaxa, yaw laa koy sédd, yaak askan wi soqikoo ci yaw.»

¹³ Naka la Yàlla wax ak Yanqóoba loolu, daldi teqlikoo ak moom. ¹⁴ Yanqóoba samp doju xàmmikaay ca bérab, ba Yàlla waxe ak moom, tuural ko fa biiñ, sotti fa diw, sellale. ¹⁵ Yanqóoba ma nga tudde bérab, ba Yàlla waxeek moom, Betel†.

Beñamin juddu na, Rasel faatu

¹⁶ Ba loolu wéyee ñu jóge Betel, dem bay bégga jub Efrata. Rasel tollu ciw mat, te mat wi metti. ¹⁷ Ba mu demee ba mat wa gèna metti, rewlikat ba ne ko: «Muñal

nag, ndax góor laati de!» ¹⁸ Booba Rasel a ngi waaaja faatu. Terewel bala bakkanam a rot tudde na xale bi Benoni (mu firi Sama doomu coono). Teewul baay bi tudde ko Beñamin (mu firi Sama doomu njiglaay)‡.

¹⁹ Ci kaw loolu Rasel faatu, ñu denc ko ca younu Efrata, ga ñuy wax Betleyem ba tey. ²⁰ Yanqóoba nag samp aw doj ca bàmmeel ba, te mooy xàmmikaay bàmmeelu Rasel ba tey jii. ²¹ Ba mu ko defee Israyil jóge fa, samp xaymaam ca gannaaw Migdal Eder.

Doomi Yanqóoba ya

²² Ba Israyil dèkkee ca réew ma, am na bés Ruben dem tédde ak Bilaa, nekkaaleb baayam; Israyil yég ko.

Doomi Yanqóoba§ yu góor fukk lañu ak ñaar. ²³ Doomi Leya ñooy: Ruben, taawub Yanqóoba, ak Simeyon ak Lewi ak Yuda ak Isaakar ak Sabulon. ²⁴ Doomi Rasel di Yuusufa ak Beñamin. ²⁵ Doomi Bilaa, jaamub Rasel, di Dan ak Neftali. ²⁶ Doomi Silpa, jaamub Leya, di Gàdd ak Aser. Ñooñooy doomi Yanqóoba, te mu am leen ca Padan Aram.

Isaaxa nelaw na

²⁷ Yanqóoba dellu na kër baayam Isaaxa fa Mamre, ca Kiryaat Arba, gay Ebron ba tey, fa Ibraayma ak Isaaxa daloon. ²⁸ Isaaxa dund na téeméeri at ak juróom ñett fukk (180). ²⁹ Foofa la bakkanam rote, mu faatu, fekki ay maamam, gannaaw ba mu màggatee, ba ñor xomm. Ba loolu amee ay doomam Esawu ak Yanqóoba rob ko.

Askanu Esawu

36

(Saar 36.1-43)

¹ Askanu Esawu, mi ñuy wax Edom, mooy lii.

² Esawu jël na janqi Kanaaneen jabar. Ñooño di: Ada doomu Elon, Etteen ba, ak Olibama doomu Ana, miy doomu Sibeyon, Eween ba, ³ ak Basmat doomu Ismayla, di jigéenub Nebayot. ⁴ Ada am ak Esawu Elifas; Basmat am ca Rewel. ⁵ Olibama am ca Yewus, Yalam ak Kora. Ñooñu ñooy doomi Esawu, te mu am leen ca réewu Kanaan.

⁶ Ba loolu amee Esawu ànd aki soxnaam, aki doomam yu góor ak yu jigéen, ak waa kërám ñépp, jiital géttam ak juram gépp, yóbbaaale mboolem alal ju mu amoon ca réewu Kanaan, daldi sanc menene réew ngir sore rakkam Yanqóoba. ⁷ Li ko waral mooy, seen alal dafa bare woon lool, ba manuñoo dèkk ñoom ñaar, te réew, mi

* 35:4 35.4 Xeetu garab la gu ñuy wax terebent. † 35:15 35.15 Seetal ci 28.19. ‡ 35:18 35.18 Beñamin mu ngi jóge ci ben yamin, di tekki «doomu ndijoor», waaye li tur wiy wund mooy «doomu njiglaay». § 35:22 35.22 Yanqóoba mooy Israyil.

ñu daloon, áttanu leen ndax seen gétt yu bare. ⁸ Esawu nag dëkk ca tundu Seyir: Esawu moomu mooy Edom.

⁹ Askanu Esawu, di maami Edomeen ña ca tundi Seyir, mooy lii.

¹⁰ Doomi Esawu yu góor ñooy: Elifas, mi mu am ak soxnaam Ada ak Rewel, mi mu am ak Basmat. ¹¹ Doomi Elifas yu góor yi di: Teman ak Omar ak Sefo ak Gatam ak Kenas. ¹² Timna it nekkaleb Elifas. Mu am caak moom Amaleg. Ñooño xheetoo ci Ada, soxnas Esawu. ¹³ Doomi Rewel yu góor yi ñoo di: Naxat ak Sera ak Saama ak Misa. Ñooño xheetoo ca Basmat, soxnas Esawu. ¹⁴ Soxnas Esawu, si ñu naa Olibama, tey doomu Ana miy doomu Sibeyon, moo am ak Esawu doom yu góor yii: Yewus, Yalam ak Kora.

¹⁵ Làngi doomi Esawu yu góor nag, ñooy ñii. Ñi askanoo ci Elifas taawub Esawu, ñuy Teman ak Omar ak Sefo ak Kenas ¹⁶ ak Kora ak Gatam ak Amaleg, ku ci nekk ak làngam. Làngi Elifas, ya ca réewum Edom a ngi noonu; ñooy sèti Ada. ¹⁷ Ñi askanoo ci Rewel doomu Esawu, ñooy Naxat ak Sera ak Saama ak Misa, ku ci nekk ak làngam. Làngi Rewel, ya ca réewum Edom a ngi noonu; ñooy sèti Basmat, soxnas Esawu. ¹⁸ Ñi xheetoo ci Olibama soxnas Esawu, ñooy Yewus, Yalam ak Kora, ku ci nekk ak làngam. Ñooñooy làngi Olibama, soxnas Esawu siy doomu Ana. ¹⁹ Ñooñooy doomi Esawu, mi ñuy wax Edom, ñooñooy doomam yu góor, ñook seeni làng.

Lu jëm ci askanu Seyir

²⁰ Doomi Seyir, ya bokk ca waa Or te sancoon ca réew ma, ñooy Lotan ak Sobal ak Sibeyon ak Ana ²¹ ak Dison ak Eser ak Disan. Ñooñooy làngi waa Or, di sèti Seyir ya ca réewum Edom. ²² Doomi Lotan yu góor ya nag ñooy Ori ak Emam. Jigéenub Lotan di Timna. ²³ Doomi Sobal yu góor ya di Alwan ak Manaak ak Ebal ak Sefo ak Onam. ²⁴ Doomi Sibeyon yu góor di Aya ak Ana. Te Ana moomu moo feeñal bêti ndox yu tàng ya ca màndij ma, ba muy sàmm mbaami baayam Sibeyon. ²⁵ Doomi Ana ñooy Dison ak Olibama, doomam ju jigéen. ²⁶ Doomi Dison di Emdan ak Esban ak Yitran ak Keran. ²⁷ Doomi Eser di Bilan, Saawan ak Akan. ²⁸ Doomi Disan di Uus ak Aran.

Lu jëm ci buur ya jëkka falu ca Edom

²⁹ Làngi waa Or ñooy ñi askanoo ci Lotan ak Sobal ak Sibeyon ak Ana ³⁰ ak Dison ak Eser ak Disan, ku ci nekk ak làngam. Ñooñooy làngi waa Or, na ñu xajjalikoo kenn-kenn ca réewu Seyir.

³¹ Buur, yi falu ca réewum Edom, lu jiitu kenn ci waa Israyil di fa falu, ñooy ñii. ³² Bela doomu Beyor falu na ca Edom. Dinaba moo doon péeyam. ³³ Ba Bela faatoo, Yobab doomu Sera, ma dëkk Boccra, wuutu ko. ³⁴ Ba Yobab faatoo, Usam mu diiwaanu waa Teman wuutu ko. ³⁵ Ba Usam faatoo, Adàdd, ma dàqoon waa Majan ca réewu Mowab, tey doomu Bedàdd, moo falu, wuutu ko. Awit a doon péeyam. ³⁶ Ba Adàdd faatoo, Samla, ma dëkk Masreka, falu, wuutu ko. ³⁷ Ba Samla faatoo, Sawul ma woon ca Reyobot Efraat, falu, wuutu ko. ³⁸ Ba Sawul faatoo, Baal Anan doomu Agbor falu, wuutu ko. ³⁹ Ba Baal Anan doomu Agbor faatoo, Adar falu, wuutu ko. Pawu moo doon péeyam, soxnaam di Metabeel, mi Mataredd doomu Me Saab di yaayam.

⁴⁰ Làng yi soosoo ci Esawu nag, làng gu ci nekk ak turam ak njaboot, ya mu èmb, ak gox, ba mu dëkke, ñoo di ñii: ñi askanoo ci Timna ak Alwa ak Yetet ⁴¹ ak Olibama ak Ela ak Pinon ⁴² ak Kenas ak Teman ak Mibsar ⁴³ ak Magdiyel ak Iram, ku ci nekk ak làngam. Ñooño ñooy làngi Edom, ma ñu naa Esawu, moom ma giir Edomeen ñi, làng gu ci nekk ak gox, ba nga dëkke te moom ko.

Askanu Yanqóoba

37

(Saar 37.1—50.26)

Yuusufa gént na lu yéeme

¹ Yanqóoba ma nga dëkkoon réewu Kanaan, fa baayam daloon.

² Askanu Yanqóoba mooy lii.

Yuusufa tollu na ci waxambaane, am fukki at ak juróom ñaar, di sàmmle jur gi doomi baayam, yi nga xam ne soxnay baayam Bilaa ak Silpa ñoo leen jur. Yuusufa nag di leen boole ak seen baay. ³ Booba Yanqóoba, Yuusufa la gëna bëgg ci ay doomam, ndax li mu màggat door koo am. Mu ràbbul ko mbubb mu yànj. ⁴ Mag ya nag gis ne Yuusufa la seen baay gëna bëgg ci ay doomam. Loolu tax ñu bañ ko, ba manuñoó séq ak moom kàddu ju rafet.

⁵ Mu am bés Yuusufa gént, nettali ko ay magam, ba tax ñu gënati koo bañ. ⁶ Da ne leen: «Dégluleen li ma gént. ⁷ Danoo nekk ca tool ya, di goob. Ba nu takkee, sama takk jekki-jekki ne sàtt, taxaw, seen takk wër sama takk, di ko sujjóotal.» ⁸ Mag ya ne ko: «Dangaa nara falu ci sunu kaw? Danga noo nara jiite?» Ñu gënati koo bañ nag ndax géntam ya ak la mu leen ca wax.

⁹ Gannaaw gi geneen gént dikkal ko, mu nettali ko ay magam ne leen: «Dégluleen, géntaat naa. Gis naa jant bi ak weer wi ak fukki biddiiw ak benn di ma sujjóotal.»

¹⁰ Ba mu ko nettalee ay magam, ba nettali ko baayam, baayam da koo soow ne ko: «Yaw, li nga gént, lu mu doon? Xanaa du maak sa yaay ak say mag noo lay sujjóotal?» ¹¹ Mag ya nag iñaane ko. Teewul baayam moom bëyyi xel ci mbir moomu.

¹² Mu am bés ay magam dem dëkk ba ñuy wax Sikem, sàmmi seen juru baay. ¹³ Israyil ne Yuusufa: «Xam nga ne say mag sàmmi nañu Sikem. Kaay, ma yónni la ci ñoom.» Yuusufa ne ko: «Waaw.» ¹⁴ Yanqóoba ne ko: «Demal seeti say mag, ba xam ndax ñu ngi ci jàmm, ñoom ak jur ga, te nga ñëw, wax ma.» Mu yebal ko, mu jóge xuru Ebron, jubal Sikem.

¹⁵ Naka la jenn waay dajeeq moom foofa, fekk muy wéreelu ca àll ba. Waa ja ne ko: «Looy seet?» ¹⁶ Yuusufa ne ko: «Samay mag laay seet. Xamoo fu ñu tollu, di sàmm?» ¹⁷ Waa ja ne ko: «Jóge nañu fii de, ndax dégg naa ñu naan: «Nanu dem Dotan.» Yuusufa toppi magam ya ba Dotan, fekk leen fa.

¹⁸ Naka la ko mag ya séen fu sore, daldi mànkoo bala moo agsi, ci pexem rey ko. ¹⁹ Na nga naan: «Boroom gént gaa ngee di ñëw!» ²⁰ Nanu ko rey gaaw, sànni ko ca kàmb yee*, su ko defee danu naan, rabu àll a ko fàdd. Nu seet ba xam fu muy mujj aki géntam?»

²¹ Ruben nag dégg ca, di ko fexee xettli. Mu ne leen: «Bunu ko rey.» ²² Ruben teg ca ne leen: «Buleen tuur deret. Sànnileen ko ca kàmb gee ca àll ba, waaye bu ko loxo dal.» Booba ma ngay wut nu mu xettlee Yuusufa ci ñoom, ba delloo ko baayam.

²³ Ba Yuusufa agsee ca magam ya, dañoo futti mbubbam, mooy mbubb mu yànj, ma mu soloon. ²⁴ Ñu jàpp ko, tàbbal ca biir kàmb ga, fekk mu déy, ba wow konj. ²⁵ Loolu wees ñu toog, di lekk. Nes tuut ñu siggi, séen am njéggum giléem, muy ay Ismayleen, yu séf cuuraayu ndàbb ak diwu yaram ak cuuraayu xas†, jële ko réewu Galàdd, jëme Misra. ²⁶ Yuda ne doomi baayam ya: «Bu nu reye sunu rakk jii, nëbb deret ji, lu nu ciy jële?» ²⁷ Tee nu koo jaay Ismayleen ñi, te bañ koo sàkkal pexe nun ci sunu bopp? Ndax kat sunu rakk a, di sunu deret.» Doomi baay ya déggal ko. ²⁸ Julay Majan ya nag jaare fa, ñu yóotu Yuusufa, géenne ko kàmb ga, jaay ko Ismayleen ña ci ñaar fukki dogi xaalis. Ñu yóbbu Yuusufa Misra.

²⁹ Ba mu ko defee Ruben dellu ca kàmb ga, gis ne Yuusufa nekkatul ca biir, mu

mititlu ko, ba xotti ay yéreem. ³⁰ Ba loolu amee mu jóge ca, dem ca ay rakkam ne leen: «Xale ba nekkatu fa de! Te man xawma nu may def léegi.» ³¹ Ñu jël nag mbubbu Yuusufa, rendi ab sikket, taqal mbubb ma ca deret ja. ³² Gannaaw loolu ñu yóti seen baay mbubb na, ne ko: «Lii lanu gis de, xoolal bu baax ndax du sa mbubbu doom?» ³³ Yanqóoba xàmmi ko, daldi ne: «Sama mbubbu doom a moos! Éey waay, rabu àll kay moo daggate Yuusufa, yàpp ko!» ³⁴ Ci kaw loolu Yanqóoba mititlu ko, ba xotti ay yéreem, taraxlaayoo ab saaku, di jooy doomam ay fan. ³⁵ Doomam yépp, góor ak jigéen ñëw, di ko dëfal, te noppiwul, xanaa naan: «Damay jooy, ba dem njaniw, fekki sama doom.» Baayam di ko jooy, ³⁶ fekk waa Majan yóbbu nañu ko Misra, jaay ko Potifaar, jawriñu Firawna mi jiite ay dagam.

38

Lu jëm ci Yuda ak Tamar ak seen askan

¹ Ca jamono yooyu Yuda dafa teqlikoo ak ay doomi baayam, dal ca waa ju dëkk Adulam te tudd Ira. ² Foofa nag Yuda gis fa senn as ndaw, su doon doomu Kanaaneen bu tudd Suwa, mu jël ko soxna. ³ Mu èmb, am doom ju góor, tudde ko Er. ⁴ Mu dellu èmb, am doom ju góor, tudde ko Onan. ⁵ Mu amati doom ju góor, tudde ko Sela. Ba Sela di juddu, ca Kesib la fekk Yuda.

⁶ Gannaaw gi Yuda jëlal taawam Er jabar ju tudd Tamar. ⁷ Er, taawub Yuda boobee, doonoon ku Aji Sax ji seede coxoram; Aji Sax ji nag rey ko. ⁸ Yuda ne Onan: «Demal ci sa jabaru mag, donn ko, ndax nga giiral sa mag aw askan.» ⁹ Teewul Onan xam ne du doon askan wu muy moom, ba tax saa yuy dëkkoo jabaru magam, bay wara àgg rekk, tuur wasal wi ci suuf, ngir baña giiral magam*. ¹⁰ Aji Sax ji ñaawlu li muy def, ba tax mu faat ko, moom itam. ¹¹ Yuda daldi wax Tamar jabaru dooman ne ko: «Demal sa kër baay, ténjeji fa, ba sama doom Sela màgg.» Booba Yuda dafa ragal Sela faatu moom itam ni ay magam. Tamar nag dem, toog kër baayam.

¹² Ba ñu demee ba mu yàgg, doomu Suwa, soxnas Yuda faatu. Ba dëj ba wéyee, Yuda dem fekki watkati xaram ca Timna. Ira, xaritam bi dëkk Adulam a nga ànd ak moom. ¹³ Ñu yégal Tamar ne ko: «Sa goroo ngii jëm Timna, di wati ay xaram.» ¹⁴ Ba loolu amee mu summi yérey jëtun ya, muuru, sàngu, toog ca selebe yoon wa

* 37:20 37.20 kàmb yooyu loxo lañu ko daan yette ca màndij ma, di ca denc ndox. † 37:25 37.25 cuuraay yooyu

gom la woon ak boom ak miir. * 38:9 38.9 Ci yooyu jamono, ku donn sa jabaru mag ci bànni Israyil, doom joo ca am, du bokk ci yaw waaye dañu koy féetele sa mag ji faatu.

jëm Enayim ca yoonu Timna, ndax booba gis na ne Sela màgg na te mayuñu ko ko, muy jabaram. ¹⁵ Yuda gis ko, yaakaar ne gànc la, ndax li mu muuru†. ¹⁶ Mu jàdd, ñëw ba ca moom, ne ko: «May ma, ma ànd ak yaw.» Fekk na xamul woon ne goroom la. Mu ne ko: «Loo may fey, ngir ànd ak man?» ¹⁷ Mu ne ko: «Dinaa jël bëy wu ndaw ca sama gëtt, yónnee la.» Mu ne ko: «Jox ma lenn looy tayle, ba kera ngay yónnee.» ¹⁸ Mu ne ko: «Lu ma lay tayle?» Ndaw si ne ko: «Xanaa sa jaarob màndargaal, ak buum, gi mu àndal ak yet, wi ci sa loxo.» Mu jox ko nag, ba noppi ànd ak moom. Fa la doxe ëmb. ¹⁹ Ndaw sa dem yoonam, dindi muuraay ba, solaat yérey jëtun ya.

²⁰ Ba loolu wéyee Yuda yebal xaritam, ba dëkk Adulam, mu yoti ndaw sa bëy wu ndaw wa, ba mana jotaat la mu tayle woon ca ndaw sa. Xarit ba nag gisu ko. ²¹ Mu laaj waa gox ba, ne leen: «Ana gànc biy toog Enayim ci yoon wi?» Ñu ne ko: «Fii de ab gànc nekku fi.» ²² Mu dellu ca Yuda ne ko: «Gisuma ko de, te it waa gox ba nee nañu, foofa gànc nekku fa.» ²³ Yuda ne ko: «Nanu ko ko wacce, mu jël, lu ko moy ñu ree nu, gannaaw maa ngi nii yónnee bëy wu ndaw wii, te yaw gisoo ko kay.»

²⁴ Ba ñu ca tegee lu tollook ñetti weer, ñu xamal Yuda ne ko, Tamar goroom ba, da doon jaay boppam, ba jaare ca ëmb. Yuda ne: «Nañu ko yóbbu, lakk ko, ba mu dee.» ²⁵ Naka lañu koy yóbbu, mu yóbbante goroom ay kàddu. Da koo wax ne ko: «Ki moom lii moo ma ëmbal.» Mu teg ca ne ko: «Xoolal bu baax te wax ma ku moom jaarob màndargaal, bi ànd ak buum gi, ak yet wi.» ²⁶ Yuda xàmmi yëf ya nag, ne: «Moo ma gëna nekk ci dëgg de, gannaaw mayuma ko sama doom Sela.» Gannaaw ba loolu wéyee, àndatul ak moom.

²⁷ Tamar dem, ba wara wasin, ndekete ay seex la ëmb. ²⁸ Ba muy mucc, kenn ca doom ya daa tàllal loxo ba, rewlikat ba jàpp ca, takk ca wëñ gu xonq curr. Mu ne: «Kii moo jëkka génn.» ²⁹ Naka la delloo loxoom, seexam juddu, mu ne ko: «Yaw foo bëtte, ba génn?» Ñu daldi ko tudde Peres (mu firi Bëtt). ³⁰ Nes tuut seex, bi wëñ gi takke ci loxo li, door caa topp, ñu tudde ko Sera.

39

Jaay nañu Yuusufa jawriñu Firawna

¹ Ba ñu yóbboo Yuusufa Misra, Potifaar, jawriñu Firawna*, ma jüte ay dagam, da koo jënd ca Ismayleen, ña ko fa indi.

² Ci kaw loolu Aji Sax ji ànd ak Yuusufa, may ko ndam, mu dëkk ca kër sangub waa Misraam ba. ³ Sang ba nag gis ne Aji Sax jaa ngi ànd ak Yuusufa, di ko may ndam ci lépp lu mu sabablu. ⁴ Sang ba am cofeel ci Yuusufa, def ko fara biir kërám, dénk ko saytub kër ga, ba teg ciy loxoom lépp lu mu moom. ⁵ Boobee waayi Misra ja déntee Yuusufa kërám ak lépp lu mu moom, mu di ko saytu, ca la Aji Sax ji dale barkeel kërám, barkeelaale booboom lu mu moom, kër ak tool. ⁶ Mu daldi bàyyi lépp ci loxol Yuusufa, te li mu fa nekk tax ba topptootul dara ciy mbiram, lu moy li muy lekk rekk. Booba Yuusufa ku jekkoon bind la te góorayiw.

Soxnas Potifaar fexeel na Yuusufa

⁷ Mu am bés nag soxnas sangub Yuusufa ba xemmem Yuusufa, daldi ne ko: «Kaay tédde ak man.» ⁸ Teewul Yuusufa bañ, ne soxnas sang ba: «Déglul, sama sang da maa jébbal lépp, ba topptootul dara ci kër gi. ⁹ Épplewu ma sañ-sañ ci biir kër gi, te aayewu ma lenn xanaa yaw, ndax soxnaam nga. Kon léegi nu may mana defe ñaawtéef wu réy wu ni tollu, di moy Yalla?» ¹⁰ Ba loolu amee bés bu Yalla sàkk mu di ko wax Yuusufa, te dégluwu ko, wéetul ak moom sax, bay tédde ak moom.

¹¹ Mu am bés Yuusufa dugg ca kër ga, di def liggéeyam, te kenn ci surga yu góor ya nekku fa. ¹² Ndaw si jàpp ci mbubb mi, ne ko: «Kaay tédde ak man.» Yuusufa nag wacc mbubb ma cay loxoom, daw génn kër ga. ¹³ Ndaw si gis mbubb, mi mu ko wacce, ba daw génn, ¹⁴ mu woo surgay kër ga, ne leen: «Xool-leen, Ebré, sii sama jëkkër indi ci kër gi, mu di nu yab. Dafa ñëw, bëgg maa tédde, ma yuuxu ca kaw. ¹⁵ Naka laa yuuxu ca kaw, mu wacce ma mbubbam, daw génn.» ¹⁶ Ba mu ko defee ndaw si denc mbubb ma, ba sangub Yuusufa ba ñibbsi, ¹⁷ mu nettalee ko ko noonu ne ko: «Jaamu ebré, bi nga indi ci kër gi de, da maa fekkisi, di ma sàkku. ¹⁸ Naka laa yuuxu ca kaw, mu daw génn, wacce ma mbubbam.»

Těj nañu Yuusufa kaso

¹⁹ Sang bi dëgg li ko soxnaam wax ne moom la ko jaamam def, mu mer lool, ²⁰ ba jàpp Yuusufa, tej ko kaso, ba ñuy denc ñi buur jàpp. Yuusufa nekk foofa ca kaso ba.

²¹ Teewul Aji Sax ji ànd ak Yuusufa, laaye ko biir, daldi xiir wattukatú kaso ba ca

† 38:15 38.15 Ci yooyu jamono gànc yi daan nañu leen xàmnee seen muuraay. * 39:1 39.1 Firawna tur la, wu buuri Misra daan tudd. Firawna mii wuute na ak Firawna, mi bokkoon ak Mussa jamono.

moom, mu yéwéne ko. ²² Ci kaw loolu mu may Yuusufa, mu yilif ñi ñu tëj ñépp, te mboolem lu ñu fay def, mu di ko jiite. ²³ Wattukat ba seetatuloon dara lu Yuusufa jiite, ndax Aji Sax jee ànd ak moom, te lu mu sabablu, Aji Sax ji may ko a ndam.

40

Yuusufa firi na ñaari gént

¹ Ba loolu wéyee kiy topptoo naani buuru Misra ak lakk-katu mburoom dañoo tooñ buuru Misra, seen sang. ² Firawna nag mere lool ñaari jawriñ yooya, kenn ka di kilifay ñay topptoo naani buur, ka ca des di kilifay lakk-kati mburu ya, ³ ba tax mu tëj leen ca kër kilifag wattukat ba, ca kaso, ba ñu tëj Yuusufa. ⁴ Kilifag wattukat ya teg leen ca loxol Yuusufa, mu di leen topptoo.

Ba ñu nekkee ab diir ca kaso ba, ⁵ jawriñi buuru Misra, ya ñu tëj, muy ñaar ña féeetewoo naani buur ak mburoom, dañoo géntandoo ci genn guddi, gént gu ci nekk ak li muy firi. ⁶ Yuusufa xéy, fekk leen ñu jaaxle. ⁷ Mu laaj jawriñi Firawna, yooyee ñu tëjandoo woon ak moom ca kër sangam, ne leen: «Lu leen tax ne yogg tey?» ⁸ Ñu ne ko: «Ay gént daal a nu dikkal, te amunu ku nu koy firil.» Yuusufa ne leen: «Xanaa du Yállaa moom piri? Nettalileen ma seeni gént rekk kay.»

⁹ Jawriñ bay topptoo naanu buur daldi nettali géntam Yuusufa, ne ko: «Ci gént gi, garabu reseñ laa gis ci sama kanam, ¹⁰ mu def ñetti car. Naka la focci rekk, gaawa tóor, cëgg ya meññ reseñ ju ñor. ¹¹ Maa ngi téye nii kaasu Firawna ci sama loxo, jël reseñ ji nag, nal ko ci kaasu Firawna, ba noppi teg kaas bi ci loxol Firawna.»

¹² Yuusufa ne ko: «Piri mi mooy lii. Ñetti car yi, ñetti fan la. ¹³ Fii ak ñetti fan Firawna dina la siggil, delloo la sa liggéey, ngay teg kaasu Firawna ci loxoom, ni nga ko daa defe naka jekk, ba nga yoree naanam. ¹⁴ Waaye ngalla boo delloo ca sa teraanga, nanga ma geestu te dimbali ma, waxal ma Firawna lu jëm ci man, ba man maa géenne fii. ¹⁵ Ndx man kat dañu maa sàcce ca réewum Ebré ya, te fii itam, defuma fi lu tax, ñu war maa tëj.»

¹⁶ Kilifag lakk-kati mburu ya nag gis ne piri mi neex na, mu ne Yuusufa: «Man it sama gént gi, xam nga lu ma ci gis? Ñetti pañey mburu mu weex laa yenu, ¹⁷ ba féeete kaw a nga yeb mboolem xeeti mburu yu ñuy lakkal Firawna, picc yaa nga koy for ca pañe, ba ma yenu.»

¹⁸ Yuusufa ne ko: «Piri mi mooy: ñetti pañe yi, ñetti fan la. ¹⁹ Fii ak ñetti fan

Firawna dina la siggil, ba noppi wékk la ci bant, picc yi ñew, di for sa suux.»

²⁰ Ñu teg ca ñetti fan, Firawna di mággal bésu juddoom, dajale jawriñam yépp, di leen berndeel, daldi cay seppee kilifa gay topptoo ay naanam, ak kilifag lakk-kati mburu ya, siggil leen. ²¹ Mu delloo nag kilifa gay topptoo ay naanam ca liggéeyam, mu teg kaas ba ca loxol Firawna. ²² Kilifag lakk-kati mburu ya moom, da koo wékk ci bant, na leen ko Yuusufa firile woon.

²³ Waaye kilifa, ga yore naani Firawna, xalaatul sax Yuusufa, da koo fátte.

41

Firawna gént na

¹ Ñaari ati lëmm wees na gannaaw loolu, gént dikkal Firawna, mu jeneer taxaw ca wetu dexu Niil. ² Mu gis juróom ñaari nag yu rafet te suur géenne ca dex ga, di for baraxi tàkk ga. ³ Mu dellu gis juróom ñaari nag yu ñaaw te yooy topp ca ñoom, géenne ca dex ga, làng ak ñoom ca tàkk ga. ⁴ Nag yu ñaaw ya te yooy daldi lekk juróom ñaari nag yu rafet ya te suur. Firawna yewwu, ⁵ ba noppi nelawaat, dellu gént, gis juróom ñaari gub* yu nangu te baax sax ci benn gattax. ⁶ Gannaaw ga juróom ñaari gub yu gooy yu ngelaw li lakk sax, tegu ca ya jiitu. ⁷ Ca la gub yu gooy ya wonn juróom ñaari gub yu nangu ya te baax. Gannaaw loolu Firawna yewwu, xam ne gént la woon.

⁸ Ba bët setee, Firawna jaaxle lool, ba woolu jibar ya ak boroom xam-xami Misra yépp, nettali leen la mu gént, te kenn manu koo firil Firawna.

⁹ Ba loolu amee kilifa gay topptoo naani Firawna ne ko: «Man de tooñ naa te dinaa la ko wax tey. ¹⁰ Sang bi, ba nga nu meree, yaw Firawna, ba tëj ma kaso ca kër njiitu dag ya, man ak kilifag lakk-kati mburu ya, ¹¹ genn guddi danoo géntandoo, man ak moom, gént gu ci nekk ak la muy firi. ¹² Fekk amoon na waxambaanew ebré wu fa nekkoon ak nun, te doonoon jaamub njiital dag ya. Nu nettali ko sunuy gént, mu firil nu ko, wax nu ku nekk la sa gént di tekki. ¹³ Te na mu nu ko firile woon, na la ame: delloo nañu ma sama liggéey, ka ca des ñu wékk ko ci bant.»

Yuusufa firi na génti Firawna

¹⁴ Ba Firawna déggee loolu, dafa woolu Yuusufa. Ñu gaaw tiji ko, mu watu, solu, doora wuyji Firawna. ¹⁵ Firawna ne Yuusufa: «Damaa gént, te kenn manu koo firi, te ma dégg ñuy wax ci yaw naan, gént goo dégg rekk, xam ko, ba man koo firi.»

* 41:5 41.5 gub yi ñuy wax fii, bele la woon.

16 Yuusufa ne ko: «Du ci man de, waaye Yàlla mooy baaxe Firawna pirim jàmm.»

17 Firawna ne Yuusufa: «Damaa gént, taxaw ci tàkkal dèxu Niil, 18 ma gis juróom ñaari nag yu suur te rafet génne ca dex ga, di for baraxu tàkk ga. 19 Ma dellu gis yeneen juróom ñaari nag yu ràgg, ñaaw te yooy génne ca dex ga, topp ci ñoom, di yu ñaaw, ba masumaa gis lu ni mel ci Misra. 20 Noonu yu yooy ya te ñaaw daldi lekk juróom ñaari nag, ya jèkkoona feeñ te suur. 21 Waaye bi ñu leen lekkee ba noppi, itam dafa mel ni lekkuñu leen, ndax terewuleena mel na woon. Booba laa yewwu, 22 ba noppi dellu gént, gis juróom ñaari gub yu fees te baax sax ci benn gattax. 23 Gannaaw ga ma gis juróom ñaari gub yu gooy yu ngelaw li lakk, sax tegu ca ya jiiu. 24 Gub yu gooy ya nag wonn juróom ñaari gub yu baax ya. Nettali naa ko samay jibar, waaye kenn ci ñoom man u ma koo firil.»

25 Yuusufa ne Firawna: «Sa ñaari gént yi de, sang bi, ñoo bokk piri. Sang bi, Yàlla da laa xamal li muy def èllég. 26 Juróom ñaari nag yu baax yi, juróom ñaari at la. Te it juróom ñaari gub yu baax yi, juróom ñaari at la. Muy genn gént gi. 27 Te itam juróom ñaari nag yu yooy, yi ci topp te ñaaw, juróom ñaari at la. Naka noonu juróom ñaari gub yu gooy, yi ngelaw li lakk, juróom ñaari ati xiif lay firi. 28 Mooy li ma la wax rekk, sang bu tedd bi: li Yàlla di defi èllég la la won. 29 Nu ngi dëgmal juróom ñaari ati naataange yu réy ci mboolem réewum Misra. 30 Te juróom ñaari ati xiif a ciy topp, ba ñu fàtte naataange gu réy ga amoon réewum Misra. Xiif ba cay topp dina yàq réew mi. 31 Xiif bi dina tax lenn luy nirook naataange dootu des ci réew mi, ndax dina metti lool. 32 Te nag, sang bi, gannaaw gént nga ko ñaari yoon, kon Yàlla dogal na mbir mi, te dina ko amal balaa yàgg.»

33 Yuusufa teg ca ne Firawna: «Kon léegi sang bi, wufal nit ku muus te rafet xel, jiiital ko ci réewum Misra. 34 Te itam sang bi, dangay fal ay ndaw ci réew mi, ñuy sàkku juróomi natt yu ne benn ci mboolem lu ñu góobe réewum Misra diiru juróom ñaari ati naataange yiy ñëw. 35 Ñoom nañu dajale mboolem dundi at yu baax yi, te boole pepp mi ci sa ndigalu bopp, yaw Firawna, muy dund bu ñuy denc ci dëkk yi. 36 Dund boobooy doon sàqu réew mi diiru juróom ñaari ati xiif yiy dal ci réewum Misra; su ko defee waa réew mi duñu loru ci xiif bi.»

Firawna fal na Yuusufa, mu jiite Misra gépp

37 Pexe moomu nag doon lu Firawna aki jawriñam yépp njort ne baax na. 38 Firawna daldi ne jawriñ ya: «Ndax masees naa gis ku mel ni kii a waay, nit ku Yàlla sol Noowug boppam?» 39 Firawna wax ak Yuusufa ne ko: «Ndegam Yàlla xamal na la lii lépp kay, leer na ne amul kenn ku muus te rafet xel ni yaw. 40 Kon dinaa la may, nga jiite kër buur, te waa réew mépp ci sa waaw lañuy wéy; jal bi ma toog donj laa lay sute.»

41 Gannaaw loolu Firawna neeti Yuusufa: «Bés niki tey, dénk naa la réewum Misra gépp» 42 Ba loolu amee Firawna tekkee jaarob màndargaal ba ca loxoom, takkal ko Yuusufa, solal ko yérey tànnéef, takkal ko caqu wurus, 43 ba noppi waral ko watiiru ku sës rëkk ci moom Firawna, te fu mu ware ñu jiiu ko, di yéene naan: «Sujjootleen†!» Noonu la ko Firawna fale, mu yilif Misra gépp.

44 Ci kaw loolu Firawna ne Yuusufa: «Man maay Firawna, waaye gannaaw-si-tey mboolem waa réewum Misra, kenn du ci sañatee yékkati loxo mbaa muy séci jéego, te ándoo ci.» 45 Firawna nag tudde Yuusufa Safnat Paneya, may ko jabar Asnat doomu Potifera ma doon sarxalkat ca dëkk ba ñuy wax On†. Yuusufa doxe ca tegoo kilifteefu Misra gépp. 46 Ba Yuusufay tàmbalee liggéeyal Firawna buuru Misra, mu ngi tollu ci fanweeri at. Yuusufa daldi bàyyikoo ca Firawna, wër réew ma mépp.

47 Diiru juróom ñaari ati naataange ya suuf sa nangu, ba meñneef ma tuuru. 48 Mu dajale mboolem dundub réewum Misra diiru juróom ñaari at yooyee, dëkk bu nekk mu denc fa dund, ba jóge ca tool ya ko wër. 49 Fa la Yuusufa jaare dajale pepp, mu ne gàññ, ni suufas géej, ba tàyyeeti koo waññ, ndax mujj na wees ab lim.

50 Laata ati xiif yay agsi, Yuusufa am na ñaari doom yu góor ak Asnat doomu Potifera, kilifag diine, ga ca On. 51 Yuusufa tudde taaw ba Manase (mu firi Ki ma taxa fàtte), ndaxte da ne: «Li ma sonn ak li ma sore sama kër baay lépp, Yàlla fàtteloo na ma ko.» 52 Doomam ja ca topp mu tudde ko Efrayim (mu firi Giir), ndaxte da ne: «Yàllaa ma giiral ca réew, ma ma sonne.»

53 Ci kaw loolu juróom ñaari ati naataange ya jeex ca réewum Misra, 54 juróom ñaari ati xiif ya tàmbali, na ko Yuusufa waxe woon. Réew yépp nag nekk ci xiif, waaye amul fu ñàkk dund ca Misra.

† 41:43 41.43 Baat bi ñu tekkee sujjooteen man naa tekki itam «moytuleen» walla «xáll-leen yoon wi». † 41:45 41.45 On moo doon péeyu diiney ñiy jaamu jant ca Misra.

⁵⁵ Ba waa Misra xiifee, dañoo dem jooy-tuji dund ca Firawna. Mu wax ak ñépp ne leen: «Demleen ca Yuusufa; lu mu leen wax, defleen ko.» ⁵⁶ Ba ñu demee, ba metitu xiif bi dajal réew mépp, Yuusufa dafa ubbi denc yépp, di jaay pepp mi waa Misra, ⁵⁷ ba nit ñiy jóge fu nekk ci àddina, di wutsi njël ci Yuusufa ndax xiif bu mettee fépp ca àddina.

42

Magi Yuusufa ya dem nañu Misra

¹ Ba Yanqóoba yégee ne pepp am na Misra, daa wax ay doomam yu góor, ne leen: «Lu ngeen di toog, di xoolante rekk?» ² Mu ne leen: «Dégg naa ne pepp am na ca Misra. Demleen jëndali nu ca, ndax nu mana dund, ba xiif bañ noo rey kay!»

³ Ci kaw loolu fukki magi Yuusufa ya dem Misra, jëndi pepp. ⁴ Waaye Yanqóoba yebalul Beñamin, rakku Yuusufa, ndax dafa ragal ne musiba man na koo dab. ⁵ Doomi Israyil ñew nag ci biir ñiy jëndsi pepp, ndax xiif bi lawoon na ba Kanaan. ⁶ Fekk booba Yuusufa mooy dogal ca réew ma, di jaay pepp waa réew mépp. Magi Yuusufa ya ñew, sujjóotal Yuusufa.

Yuusufa xupp na magam ya

⁷ Naka la Yuusufa gis magam ya, xàmmi leen, te mel ni ku leen xamul, di wax ak ñoom kàddu yu dègër ne leen: «Fu ngeen jóge?» Ñu ne ko: «Réewu Kanaan lañu jóge, di jëndsi ab dund.» ⁸ Yuusufa xàmmi na ay magam, waaye ñoom xàmmiwuñu ko. ⁹ Xelum Yuusufa ne yarr ca la mu géntoon ca ñoom, daldi ne leen: «Yeen ay yèddukat ngeen, yuy nemmiki mbóoti réew mi.» ¹⁰ Ñu ne ko: «Mukk sang bi, danu lay siyaare, di wutsi ab dund rekk, ¹¹ te nun ñépp a bokk baay, di nit ñu maandu; nun kay, sang bi, dunu ay yèddukat.» ¹² Mu ne leen: «Ahakay, nemmiki mbóoti réew mi moo leen taxa jóg.» ¹³ Ñu ne ko: «Nun ñii di la siyaare de, fukki góor ak ñaar lanu woon, bokk sunu baay, ba ca Kanaan. Ka ca gën di xalee nga ca sunu baay, te ka ca des nekkatul.» ¹⁴ Yuusufa ne leen: «Li ma leen wax moo am, ay yèddukat donj ngeen. ¹⁵ Waaye nii laa leen di seetloo: bu seen rakk ñewul, ak bakkanu Firawna, dungeen fi jóge. ¹⁶ Na kenn ci yeen jëli seen rakk, ñu tēj ñi ci des te topp seen wax, ba xam ndax yeena ngi ci dègg. Su dul dègg, giñ naa ci Firawna ne ay yèddukat donj ngeen.» ¹⁷ Mu tēj leen ñetti fan.

¹⁸ Ca gannaaw èllëg sa Yuusufa ne leen: «Bu ngeen defee lii may wax, dingeen dund, ndax man ragal naa Yàlla. ¹⁹ Ndegam ñu maandu ngeen, na leen kenn ci seen doomi baay wuutu fii, ñi ci des

dem yóbbul pepp seen waa kër, yi nekk ci xiif. ²⁰ Waaye nangeen ma indil seen rakk, ba ma xam ne li ngeen wax dègg la; su ko defee dungeen dee.» Ñu daldi ne: «Waaaw,» ²¹ te naa ci seen biir: «Céy su nu yégoon, sunu àqu rakk a nu topp nii, ndax danu koo seetaanoon, mu nekk ci njàqarey xol, di nu tinu, te faalewunu ko; looloo waral sunu njàqarey tey jii.» ²² Ruben nag àddu ne leen: «Ndax newuma leen woon: “Buleen gàddu bakkanu xale bi,” waaye faalewuleen ma; tey rekk la nu Yàlla doon xaare bakkanam, bi nu gàddu.» ²³ Ba ñuy wax loolu, foogoon nañu ne Yuusufa dèggul seen làkk, ndax làppto, ba doxoon seen diggante, di tekki.

²⁴ Ci biir loolu mu dummóoyu leen, di jooy.

Doomi Yanqóoba ya dellu nañu Kanaan

Ba mu jooyee ba noppi, walbatiku, wax ak ñoom, doora jël Simeyon, jéng ko ci seen kanam.

²⁵ Gannaaw loolu Yuusufa joxe ndigal, ñu sol seeni saaku pepp, te ku nekk ca ñoom, ñu yebal ko xaalislam ca saakoom, ba noppi mayaale leen lu ñu lekk ca yoon wa. Ñu defal leen noonu. ²⁶ Ba mu ko defee ñu sêf seeni mbaam pepp ma, daldi fay bàyyikoo.

²⁷ Fa ñu dal ca guddi, kenn ci ñoom bégga xont mbaamam, ubbi saakoom rekk, ne pemm ci xaalislam. ²⁸ Mu ne doomi baay ya: «Delloo nañu ma sama xaalislam, mu ngi nii ci sama saaku.» Seen fit ne tērit, ñuy rag-ragi, ku ne xool sa moroom, naan: «Lu nu Yàlla nattoo nii?»

²⁹ Ba ñu yeggee ca seen baay Yanqóoba ca réewu Kanaan, daldi koy nettali li leen dal lépp, ne ko: ³⁰ «Waa ja yilif réew ma dafa noo résēti, foog ne danuy yèddusi réew ma. ³¹ Nu ne ko: “Nun ay nit ñu maandu lanu, dunu ay yèddukat; ³² fukki góor ak ñaar lanu woon yu bokk sunu baay, waaye kenn ka nekkatul, te ka gën di xalee nga fa sunu baay, ba ca réewu Kanaan.” ³³ Waa ja yilif réew ma ne nu: “Ni may xame ne ñu maandu ngeen, nii la: dangeen may bàyyeek kenn ci yeen, te dem yóbbul dund seen waa kër, yi nekk ci xiif; ³⁴ su ko defee ngeen indil ma seen rakk ju ndaw, kon dinaa xam ne dungeen ay yèddukat waaye nit ñu maandu ngeen, te dinaa leen delloo seen mbokk, ngeen mana dem fu leen neex ci réew mi.”»

³⁵ Naka la ku nekk sotti saakoom, ne jàkk ca mbuusu xaalislam. Ba ñu gisee mbuusi xaalislam, ñoom ak seen baay, dañoo tiit. ³⁶ Seen baay Yanqóoba ne leen: «Xañ ngeen ma ay doom: Yuusufa nekkatul, Simeyon nekkatul, léegi ngeen bégga jël Beñamin, yóbbu. Loolu lépp ci sama kaw;

ngalla man!»³⁷ Ruben wax ak baayam ne ko: «Su ma la ko déllóosilul, boo yeboo reyal sama ñaari doom yu góor yi. Tegal Beñamin ci sama loxo rekk, man dinaa la ko déllóosil.»³⁸ Ci kaw loolu Yanqóoba ne: «Sama doom daal, du ànd ak yeen, ndax magam faatu na, te moom rekk a des. Su ko musiba dabee ci yoon wi ngeen jëm, dingeen ma yóbbe naqar wu may jàpp, ba kera may ànd ak sama bijjaaw, tàbbi njaniiw.»

43

Magi Yuusufa ya yóbbu nañu Beñamin

¹ Gannaaw loolu xiif bi metti ca réew ma. ² Ba ñu lekkee pepp mi ñu jële woon Misra, ba mu jeex, seen baay ne leen: «Delluleen, wutali nu dund.»³ Yuda ne ko: «Waa ja da noo àrtu woon de, wax na nu ne nu: «Dootuleen jàkkaarlook man te ànduleen ak seen rakk.»⁴ Boo bàyyee sunu rakk, mu ànd ak nun nag, dinanu dem jëndali la dund. ⁵ Waaye boo ko bàyyiwul kat, dunu dem, ndax waa ja waxoon na nu ne nu: «Dungeen jàkkaarlook man te seen rakk àndul ak yeen.»⁶ Israyil ne leen: «Ana lu waral ngeen di ma lor, naan waa ja am ngeen jeneen rakk?»⁷ Ñu ne ko: «Waa ja kat da nu doon laaj ak a laajaat ci nun ak sunuy bokk, ba naa nu ndax sunu baay mu ngi dund ba tey, ak ndax am nanu rakk. Nun itam nu wax ko li mu nu laaj. Géntunu woon moos ne dina nu sant, nu indil ko sunu rakk!»

⁸ La ca tegu Yuda ne Israyil: «Baay, tegal ngóor si ci sama loxo, nu daldi dem, ndax nu dund, baña dee, nook yaw ak sunuy doom. ⁹ Dige naa sama bakkan; boo yeboo laaj ma ko. Bu ma la ko déllóosilul, ba teg ko fi sa kanam, maa lay tooñ sama giiru dund. ¹⁰ Bu nu yeexuloon ba léegi, manoon nanoo dem ba délsi ñaari yoon sax.»

¹¹ Seen baay Israyil nag ne leen: «Ndegam manula ñàkk, dangeen di def nii: sàkkleen ci ngéneeli réew mi, yeb ci seeni saaku, yóbbul waa ja lu mel ni tuuti diwu yaram ak lem ak cuuraayu xas ak cuuraayu ndàbb ak ay xeeti saal*.¹² Te ngeen yóbbaa le ci xaa lis lu tollook ñaar-cay la ngeen jënde woon, ngir feyaale loola, ndax jombul njuumte la woon. ¹³ Su ko defee ngeen ànd ak seen rakk, fabu dellu ca waa ja. ¹⁴ Yal na Yàlla Aji Man ji def waa ja yërëm leen, ba bàyyi seen doomu baay ba, moom ak Beñamin itam. Man nag, su ma naree ñàkk ay doom—aa! Naa leen ñàkk rekk.»

Magi Yuusufa ya dellu nañu Misra

¹⁵ Gaa ña jël nañu sarica booba, yóbbaa le nañu it ñaar-cay xaa lis ba, daldi ànd ak Beñamin, ñu dem Misra, teewi ca kanam Yuusufa. ¹⁶ Ba Yuusufa gisee Beñamin ànd ak ñoom, dafa wax fara biir kërám, ne ko: «Yóbbul gaa ñi ca kër ga, te nga rey gàtt, defar ko, ndax maak ñoom nooy bokk añ tey.»¹⁷ Waa ja def la ko Yuusufa wax, yóbbu gaa ña kër Yuusufa. ¹⁸ Ñu am nag tiitaange ndax li ñu leen yóbbu kër Yuusufa. Ña ngay xalaat naan: «Boo demee, xaa lis bi ñu yeboon ci sunuy saaku yoon wu jëkk wa, moom lañu bégga taafantoo, dugal nu fii, ba song nu, jàpp nu jaam, nangu sunuy mbaam, boole ci.»

¹⁹ Ba ñu demee ba ca buntu kër Yuusufa, wax nañu ak fara biir kërám. ²⁰ Ñu ne ko: «Sang bi baal nu, nun de ñewoon nanu fi lu jütu ngir jëndsi dund, ²¹ waaye ba nu dalee ca yoon wa, danoo ubbi sunuy saaku, ku nekk ci nun fekk xaa lisam ca kaw, mu tollu na mu tollu woon, te indiwaat nanu ko. ²² Te it indaale nanu xaa lis bu nu jende dund. Waaye xamunu ku delloo xaa lis ba ci sunuy saaku.»²³ Mu ne leen: «Jàmm rekk la; buleen tiit, seen Yàlla, jiy seen Yàllay baay, moo leen defal alal ci seeni saaku. Seen xaa lis jot naa ci.» Ci kaw loolu mu génne Simeyon, indil leen ko.

²⁴ Waa ja dugal leen kër Yuusufa, may leen ndox ñu jàngu, ba noppi xont seeni mbaam. ²⁵ Ba mu ko defee ñu yebbi seeni sarica, bala Yuusufaa agsi ca digg bëccég, ndaxte dégg nañu ne foofa lañuy aña.

²⁶ Ba Yuusufa wàccsee, ñu jébbal ko foofa ca biir kër ga sarica, ba ñu ko indaaleel, daldi koy sujjóotal. ²⁷ Mu nuyoo ak ñoom, ba noppi laaj leen ne leen: «Seen baay bu màggat, ba ngeen doon wax, mbaa mu ngi dund? Mbaa mu ngi ci jàmm?»²⁸ Ñu ne ko: «Sunu baay mu ngi dund, sang bi, te mu ngi ci jàmm.» Ña nga koy sukkal tey sujjóotati.

²⁹ Naka la Yuusufa ne gees, gis Beñamin raku doomu ndeyam ja. Mu laaj leen ne leen: «Ndax kii mooy seen rakk, jii ngeen ma doon wax?» La ca tegu mu ne rakkam ja: «Sama ngóor si, yal na la Yàlla defal yiw waay!»³⁰ Ci kaw loolu Yuusufa gaaw génn ndax yaram wu daw, te manatula téye ay rongooñam ndax rakkam ja, mu dugg nëegu biiram, di jooy. ³¹ Ba mu noppee, sélmu, génn, doora ànd ak sa-goom, daldi joxe ndigal, ne: «Taajleen añ bi.»³² Loolu wees ñu may Yuusufa moom rekk; ber doomi baayam ya. Waa Misra ña fa doon lekke it, ñu beral leen seen ndab, ngir waa Misra daawuñu bokk ak Ebré yi

* 43:11 43.11 ay xeeti saal lañu, yu ñuy wax pistaas ak amànd.

lekk, ndax mbañ la fa woon. ³³ Ña nga toog, na mu leen ko sante, taaw ba fegge wet, ni ko ko céru taaw maye, ñu sésaloo, na ñu toppantee ciy at, ba ca caat ma. Gaa ñaa nga yéemu, di xoolante. ³⁴ Mu sakkal leen ca ndabam, te Beñamin èpple ku ci nekk juróomi yoon. Ñu bokk nag naana naan, ba seen xol sedd.

44

Yuusufa nattu na ay magam

¹ Ba loolu wéyee mu sant fara biir kërám, ne ko: «Solal seeni saaku pepp lu ñu mana àttan, te nga delloo ku nekk xaalísam, tegal ko ko ca buntu saakoom. ² Waaye sama kaasu xaalís boobee, yebal ko ki gën di xale ci saakoom, boole ko ak xaalísu peppam.» Mu def la Yuusufa wax.

³ Ca èllég sa, ba jant bay fenk, yiwi nañu gaa ña, ñu sèf seeni mbaam, dem. ⁴ Naka lañu génn dëkk ba, te soreeguñu sax, Yuusufa sant fara biir kërám, ne ko: «Gaawal dab gaa ña, te boo leen dabee, wax leen ne leen: “Lu tax ñu ji leen njekk, ngeen feye ngoreedi?” ⁵ Ndax li ngeen jël du sama kaasu sang, bi muy naane, rawatina di ko gisaanee? Lu ñaaw ngeen def nii!”»

⁶ Mu daldi leen dab, wax leen loolu. ⁷ Ñu ne ko: «Kilifa gi, looy wax nii? Nun de, sang bi, jomb nanu loolu! ⁸ Xaalís bi nu fekkoon ci sunu bunti saaku sax, danoo àndaat ak moom, jóge ba Kanaan, délloosil la ko, kon nan lanu mana sàcce sa kër sang xaalís mbaa wurus? ⁹ Ngalla kilifa gi, yaay sunu sang; koo ko fekke ci nun rekk, boo yeboo reyal, ñi des ci nun doxe fa, di say jaam.» ¹⁰ Mu ne leen: «Li ngeen wax yoon la sax, waaye na ki ma ko fekke doñj di sama jaam, su ko defee ñi ci des wàcc.»

¹¹ Ñu gaaw nag, wàcce seeni saaku ci suuf, ku nekk ubbi saakoom. ¹² Ma ngay seet, tàmbalee ca taaw ba, ba ca caat ma, doora fekk kaas ba ca saaku Beñamin. ¹³ Ba loolu amee dañoo torox, ba xotti seeni yére, ku nekk sèfaat mbaamam, ñu dellu ca dëkk ba.

Yuda tinul na Beñamin ca Yuusufa

¹⁴ Yuda aki doomi baayam nag délsi kër Yuusufa, fekk demagul. Ñu daldi ne nërëm, dèpp seen jë fi suuf. ¹⁵ Yuusufa ne leen: «Li ngeen def nag? Xanaa xamuleen ne nit ku mel ni man day gisaane?» ¹⁶ Yuda ne: «Sang bi, lu nuy waxati? Lu nu mana lay, ba setal sunu bopp? Yàllaa nu feeñal, sang bi. Nanu bokk nun ñépp di say jaam, yem ci kepp ak ki ñu fekk kaas bi ci loxoom.» ¹⁷ Mu ne leen: «Jomb naa loolu. Ki ñu fekk kaas bi ci loxoom mooy doon sama jaam; ñi ci des dellu ca seen baay ci jàmm.»

¹⁸ Yuda jegesi ne ko: «Ngalla sang bi, ma ñeme laa diis lenn rekk, te sa xol baña tàng ci man, doonte yaak Firawnaa tolloo. ¹⁹ Sang bi, danga noo laajoon ne nu: “Ndax am ngeen baay walla rakk?” ²⁰ Ba mu ko defee nu ne la: “Am nanu baay bu màggat. Sunu rakk, ji mu jur te fekk ko di màggat nag, moo ci gën di ndaw. Magam dafa dee, mu des moom doñj ci ndeyam, baayam sopp ko lool.” ²¹ Nga waxoon nu ne nu: “Indil-leen ma ko, ngir ma gisal ko sama bopp.” ²² Ci kaw loolu, sang bi, nu wax la ne: “Xale bu góor bi manula tàggook baayam. Bu tàggo ak moom, kon baayam dina dee.” ²³ Nga wax nu ne nu: “Bu seen rakk àndul ak yeen, dungeen jàkkaarlook man.” ²⁴ Booba lanu dem ca sunu baay, ba lay siyaare, daldi koy jottli say kàddu.

²⁵ «Ba nu demee ba mu yàgg, sunu baay ne: “Delluleen, jëndali nu tuuti dund.” ²⁶ Teewul nu ne: “Dunu mana dem te sunu rakk àndul ak nun, ndaxte bu nu àndul ak moom, dunu gis kilifa ga.” ²⁷ Sunu baay, ba lay siyaare, ne nu: “Xam ngeen ne damaa amul ak sama soxna lu dul ñaari doom. ²⁸ Kenn ki dem, wacc ma, ma ne moom kay, aw rabu àll a ko daggate! Gisaatuma ko ba tey jii. ²⁹ Te bu ngeen ma fi jëlalee kii itam, ba musiba dab ko, dingeen ma yóbbe naqar wu may jàpp, ba kera may ànd ak sama bijjaaw, tàbbi njaniiw.”

³⁰ «Léegi nag, bu ma ñibbee ca sama baay, ba lay siyaare, te àndunook xale bii muy noyyee, ³¹ bu gisul xale bu góor bi ànd ak nun ñibbsi— aa! Kon de dina dee, te dinanu yóbbe sunu baay naqar, wu koy topp, ba kera muy ànd ak bijjaawam, tàbbi njaniiw. ³² Gannaaw loolu it xasoon naa dige sama bakkan, ndax damaa waxoon ne: “Bu ma la ko délloosilul, maa koy gálloo ba kera may dee.” ³³ Kon ngalla sang bi, bàyyi ma man ma des fi di sa jaam, wuutu xale bi, te moom mu dellu ànd aki magam ñibbi. ³⁴ Ndax xawma nan laay delloo ca sama baay te ànduma ak xale bi. Yàlla buma fekke njekkar, li ciy dal sama baay!»

45

Yuusufa xàmniku na ay magam

¹ Ba loolu amee Yuusufa manatula téye boppam, te surgaam yépp a nga teew. Mu daldi àddu ne: «Xiddileen na, yeen ñépp!» Ñépp dem, ba benn jaambur nekku fa, ba Yuusufa di xàmniku ay bokkam. ² Mu ne yikkét, jooy jooy yu metti, waa Misra di ca dégg, ba ca kër Firawna sax.

³ Yuusufa nag ne magam ya: «Man mii maay Yuusufa! Mbaa sama baay a ngi dund?» Magam ya nag manuñu

koo toutu, ndax booba njàqare jàpp na leen. ⁴ Yuusufa dellu ne ay magam: «Jegeñsileen.» Ñu jegeñsi. Mu ne leen: «Man maay Yuusufa, seen rakk, ji ngeen jaayoon, ñu indi ma Misra. ⁵ Waaye buleen jaaxle tey, mbaa ngeen di sikk seen bopp ndax li ngeen ma jaay, ñu indi ma fi. Rawale ay bakkan moo tax Yàlla yebal ma fi, ma jiiusi leen. ⁶ Ñaari at a ngii xiif baa ngi ci réew mi, te fii ak juróomi at ci kanam, kenn du bey, kenn du góob. ⁷ Yàlla da maa yebal, ma jiiusi leen, ba rawale seen bakkan, dikke leen xettal gu mag, ba seen askan baña fey. ⁸ Kon nag du yeena ma yebal fii, waaye Yàllaa. Te moo ma jagleel, ma doon céslaayal Firawna, mel ni baay ci moom, jiiite kërám gépp, boole ci yilif mboolem réewum Misra.

⁹ «Gaawleen dellu ci sama baay te ne ko: “Sa doom Yuusufa nee na: Yàlla fal na ma kilifag Misra gépp; ñëwal fi man, nu mu gëna gaawe. ¹⁰ Su ko defee nga dëkksi diiwaanu Gosen, nekk ci sama wet, yaak say doom ak say sët ak say gätt ak say gétt ak mboolem loo moom, ¹¹ ndaxte des na juróomi ati xiif. Waaye dinaa la fi yore, ba doo ñàkk dara, yaak sa waa kër ak mboolem lu bokk ci yaw.” ¹² Yeena gisal seen bopp, yeen ak sama rakk Beñamin, ne man Yuusufa mii, maay wax ak yeen. ¹³ Nettalileen sama baay ndam li ma am ci Misra ak li ngeen gis lépp, te ngeen indi sama baay, nu mu gëna gaawe.» ¹⁴ Mu laxasu Beñamin rakkam, daldi jooy, Beñamin it laxasu ko, jooy. ¹⁵ Magam ña itam, mu foon leen tey jooy. Booba la magi Yuusufa ya doora wax ak moom.

Firawna woo na Yanqóoba Misra

¹⁶ Ba xibaar ba àggee kër Firawna, ñu naan magi Yuusufa ñëw nañu, doonoon na lu neex Firawna, moom aki dagam. ¹⁷ Firawna ne Yuusufa: «Waxal say mag, ne leen: “Ni ngeen di def mooy nii: sëfleen seeni mbaam te dem réewu Kanaan, ¹⁸ jéli seen baay ak seeni njaboot, ngeen ñëw fi sama wet. Dinaa leen jox suuf si gën ci réewum Misra, ngeen di lekk li fi gëna duuf.”» ¹⁹ Firawna dellu ne Yuusufa: «Am nga ndigal itam ci wax leen ne leen: “Ni ngeen koy defe nii la: dangeen di jële ay watiir ci réew mi, dem yeb ci seeni doom ak seeni soxna, te ànd ak seen baay, ngeen ñëw. ²⁰ Te buleen réccu alal, ji ngeen di bàyyi seen gannaaw, ndax li gën ci réewum Misra yeena koy moom.”»

²¹ Ba loolu amee doomi Israyil def noona. Yuusufa jox leen ay watiir ci ndigalu Firawna, ak lu ñu lekk ca yoon wa, ²² mayaale leen ku ne mbubb mu rafet. Waaye Beñamin moom, ñetti téeméeri dogi xaalis la ko mayn, tegal ko ca juróomi

mbubb yu rafet. ²³ Baayam nag, mu yóbbante ko fukki mbaam yu góor yu sëf lay tannéef ca Misra, ak fukki mbaam yu jigéen yu sëf pepp ak mburu, tegal ko ca lu mu dunde ca yoon wa, buy ñëw. ²⁴ Gannaaw loolu mu yiwi ay magam ne leen: «Ngalla buleen xuloo ci yoon wi.» Ñu daldi dem.

²⁵ Booba lañu bàyyikoo Misra, dellu réewu Kanaan ca seen baay Yanqóoba. ²⁶ Ñu wax ko ne ko: «Ndekete Yuusufaa ngi dund! te sax mooy kilifag réewum Misra gépp.» Ba Yanqóoba déggee loolu, yaramam dafa dee goyy ca saa sa, ndaxte gëmu leen. ²⁷ Waaye ba ñu nettalee seen baay Yanqóoba li Yuusufa wax lépp, te mu gis watiir, yi Yuusufa yónnee, ngir jëlsi ko, ca la xelam délsi. ²⁸ Israyil daldi ne: «Moom kay na dund rekk! Sama doom Yuusufaa ngi dund. Man kay dinaa dem ba gis ko, bala ma fee jóge.»

46

Yanqóoba dem na Misra

¹ Israyil nag dem, yóbbaaale mboolem lu bokk ci moom. Ba mu agsee Beerseba, dafa sarxal Yállay baayam Isaaxa. ² Yàlla wax ak Israyil foofa ca guddi ci biir gént ne ko: «Yanqóoba, Yanqóoba!» Israyil ne ko: «Naam.» ³ Yàlla ne ko: «Man maay Yàlla, di sa Yállay baay. Bul ragala dem Misra, ndaxte askan wu réy laa fay sose ci yaw. ⁴ Man ci sama bopp maay ànd ak yaw Misra, te na la wóor ne dinaa la délloosi, te it Yuusufa moo lay doggali.»

⁵ Ba loolu amee Yanqóoba jóge Beerseba; doomi Israyil boole seen baay ak seeni doom ak seeni soxna, yeb leen ci watiir, yi Firawna yónnee woon, ngir yóbbu leen. ⁶ Ña nga jiiital seeni jur, daldi yóbbaaale seen alal, ja ñu ame réewu Kanaan. Noonu la Yanqóoba deme Misra ànd ak njabootam gépp, ⁷ yóbbaaale doomam yu góor ya ak sëtam yu góor ya ak doomam yu jigéen ya it, ñook sëtam yu jigéen ya, ak mboolem ña askanoo ca moom.

Njabootu Yanqóoba, gi ñëw Misra

⁸ Waa kër Israyil, yi ñëw Misra te di Yanqóoba aki doomam, seeni tur a di:

Ruben, taawub Yanqóoba. ⁹ Doomi Ruben yu góor di Anog ak Palu ak Esron ak Karmi. ¹⁰ Doomi Simeyon yu góor di Yemuwel ak Yamin ak Owàdd ak Yakin ak Sowar ak Sawul, mi ndeyam di Kanaan. ¹¹ Doomi Lewi yu góor di Gerson, Keyat ak Merari. ¹² Doomi Yuda yu góor di Er ak Onan ak Sela ak Peres ak Sera, te Er ak Onan faatu ca réewu Kanaan. Doomi Peres yu góor di Esron ak Amul. ¹³ Doomi

Isaakar yu góor di Tola ak Puwa ak Yasub ak Simron. ¹⁴ Doomi Sabulon yu góor di Seredd, Elon ak Yaleel. ¹⁵ Góor ñooñoo xheetoo ci Leya, te askanoo ci Yanqóoba ca Padan Aram, gannaaw Diina miy doomam ju jigéen. Boo boolee doomam yépp, góor ak jigéen, ñuy fanweer ak ñett.

¹⁶ Doomi Gàdd yu góor ñoo di Cefon ak Agi ak Suni ak Esbon ak Eri ak Arodi ak Areli. ¹⁷ Doomi Aser yu góor di Imna ak Yiswa ak Iswi ak Berya, Sera di seen jigéen. Doomi Berya yu góor di Eber ak Malkiyel. ¹⁸ Góor ñooñoo xheetoo ci Silpa, mi Laban may Leya, doomam ju jigéen, te ñu askanoo ci Yanqóoba, ñuy fukki bakkan ak juróom benn.

¹⁹ Doom yu góor yi Rasel, soxnas Yanqóoba, am nag ñoo di Yuusufa ak Beñamin. ²⁰ Yuusufa itam am Manase ak Efrayim ca réewum Misra, seen yaay di Asnat doomu Potifera, may njiitu diine ca dëkk ba ñu naan On. ²¹ Doomi Beñamin yu góor ñoo di Bela ak Beker ak Asbel ak Gera ak Naaman ak Eyi ak Ros ak Muppim ak Uppim ak Àrd. ²² Góor ñooñoo xheetoo ci Rasel, te askanoo ci Yanqóoba, ñépp di fukki bakkan ak ñeent.

²³ Doomu Dan ju góor di Usim. ²⁴ Doomi Neftali yu góor di Yacceel ak Gunni ak Yeccer ak Silem. ²⁵ Góor ñooñoo xheetoo ci Bilaa, mi Laban may doomam Rasel, te ñu askanoo ci Yanqóoba, ñoom ñépp di juróom ñaari bakkan.

²⁶ Mboolem ñi ànd ak Yanqóoba, ñew Misra, muy ñi nu giir, te limaaleesul soxnay doomi Yanqóoba ya, tollu nañu ci juróom benn fukki bakkan ak juróom benn. ²⁷ Doomi Yuusufa yu góor, ya mu am Misra, tollu ci ñaar. Kon mboolem ña dem Misra te di waa kër Yanqóoba, tollu nañu ci juróom ñaar fukk.

Yanqóoba gis na Yuusufa

²⁸ Yanqóoba dafa yebal Yuda, mu ànd ak Yuusufa, jiiuji ko diiwaanu Gosen, Yanqóoba fekki leen fa. Ñu daldi agsi Gosen. ²⁹ Yuusufa nag waajal waruwaayam, dajeji ak baayam Israyil ca Gosen. Ba Yuusufa àggee ba ca moom, da koo laxasu, ne ñàpp ci kawam, jooy lu yàgg. ³⁰ Israyil ne Yuusufa: «Léegi de, bu ma yeboo dee, gannaaw gisaat naa la, ngay dund.»

³¹ Ba mu ko defee Yuusufa wax ak doomi baayam ya ak waa kër baayam ne leen: «Maa ngi dellu yégali Firawna ne ko: “Samay bokk ak sama waa kër baay, ña nekkoon ca réewu Kanaan, ñew nañu fi man. ³² Dafa di seeni góor ay sàmm lañu, ag jur lañu masa yar, te indaale nañu seen jur gu gàtt ak gu gudd ak mboolem lu ñu moom.” ³³ Kon bu leen Firawna wooyee,

ne leen: ³⁴ “Lan mooy seen liggéey?” ngeen ne ko: “Nun de sang bi, ag jur lanu masa yar, ba nuy gone ba tey, te noonu la ko sunuy maam daan defe.” Su boobaa, ngeen mana féetewoo diiwaanu Gosen, ndaxte waa Misra dañuy xof sàmm.»

47

Yuusufa nuyole na ay bokkam Firawna

¹ Yuusufa daa dem ca Firawna, wax ko ne ko: «Sama baay ak samay bokk, jóge nañu Kanaan, ànd ak seen jur gu gàtt ak gu gudd ak mboolem lu ñu moom. Ña nga léegi ca diiwaanu Gosen.» ² Fekk na Yuusufa tànn juróom ciy doomi baayam. Mu nuyole leen ak Firawna. ³ Firawna laaj doomi baay ya, ne leen: «Lan mooy seen liggéey?» Ñu ne ko: «Nun de sang bi, ay sàmm lanu naka jekk ca sunuy maam ba tey.» ⁴ Ñu teg ca ne ko: «Danoo ñew ngir dal ci réew mi, ndaxte amalatumu sunu jur parlu, te xiif bi metti na ca réewu Kanaan. Moo tax sang bi, nu di la ñaan, nga may nu, nu dal foofa ca diiwaanu Gosen.» ⁵ Firawna wax ak Yuusufa ne ko: «Gannaaw sa baay ak say bokk ñew nañu fi yaw, ⁶ réewum Misra a ngii ci sa kanam. Seetal fi gën ci réew mi, nga jox sa baay ak say bokk, ñu sanc. Bàyyi leen, ñu sanc Gosen, te bu ci amee ñu xarefi ci ñoom, nga dénk leen samay gétt.»

⁷ Gannaaw loolu Yuusufa ànd ak baayam ba fa Firawna, nuyole ko ak moom. Yanqóoba nuyu Firawna. ⁸ Firawna laaj Yanqóoba ne ko: «Aa, góor gi, xanaa war ngaa doon mag de!» ⁹ Yanqóoba wax Firawna ne ko: «Samay ati mangan, ba ma ganee àddina ba tey de, mu ngi tollu ci téeméer ak fanweer, muy at yu gàtt te naqari, te it demuma bay tolloo ay at ak samay maam, ba ñuy mangan ci àddina.» ¹⁰ Ba mu ko defee Yanqóoba ñaanal Firawna, bàyyikoo fa, daldi dem.

¹¹ Yuusufa nag dalal baayam aki bokkam, dogal leen suuf sa gën ca réewum Misra ca diiwaanu Ramses, ni ko ko Firawna sante woon. ¹² Ba loolu amee Yuusufa di dundal baayam aki bokkam, ak mboolem waa kër baayam, boole ca ña bootu ca ñoom.

Lu jëm ci saytub Yuusufa ca xiif ba

¹³ Ab dund amuloon fenn ca réew ma mépp, ndax xiif bu metti lool. Waa réewum Misra ak réewu Kanaan jeex tàkk ndax xiif ba. ¹⁴ Yuusufa nag dajalee ca pepp, ma mu jaay waa Misra ak waa Kanaan, mboolem xalisu ñaari réew ya, yóbbu nag xalis ba kër Firawna. ¹⁵ Ba ñu demee, ba xalis amatul ca Misra ak ca Kanaan, waa Misra gépp ñew fa Yuusufa

ne ko: «Jox nu ab dund kay! Mbaa du danga nuy seetaan, nuy dee? Ndax xaalis amatul.»¹⁶ Yuusufa ne leen: «Indileen seeni jur, ma wecci leen ko dund, ndegam amatuleen xaalis.»¹⁷ Gannaaw loolu ñu indil Yuusufa seeni jur, Yuusufa jox leen ko pepp, wecci leen ko seeni fas ak seeni gétti jur gu gátt ak gu gudd ak seeni mbaam. At mooma jox na leen ab dund, mu wecci seen gétt gépp.¹⁸ Ba at ma jeexee, ñu ñéwaat ca moom ca déwén sa ne ko: «Sang bi, dunu la nëbb ne amatunu dara, ndax xaalis bi jeex na, te jur gaa ngi ci yaw, dara nekkatu fi lu nu la mana jox lu moy sunuy jëmm ak sunuy tool.¹⁹ Mbaa du danga nuy seetaan, nu bokk sànkú ci sa kanam, nook sunu suuf? Ngalla boole nu jénde ab dund, nun ak sunuy suuf. Su ko defee nuy moomeeli Firawna, nun ak sunuy suuf. Te nga jox nu pepp mu nu dunde, lu ko moy kat nun dinanu dee, suuf si it dina booy.»

²⁰ Yuusufa nag jëndal Firawna suufas Misra gépp, ngir waa Misra ya jaay ku ci nekk sa tool ndax xiif, ba leen jiital, ba Firawna mujj moom suuf si.²¹ Waa réew ma ñoom, Yuusufa da leena def ay jaam ca Misra, giñ wet ba gaa.²² Bàyyiwul lu moy suufu njiiti diine ya, ndax Firawna jotoon na leena dogal ay cér, jagleel leen. Moo tax jaayuñu seeni suuf.

²³ Yuusufa ne waa réew ma: «Léegi gannaaw jënd naa leen, ba Firawna moom leen, yeen ak seeni suuf, jiwoo ngii, dem-leen jiyi.²⁴ Bu nu ággee ci ngóob, juróom yu ngeen am dingeen ci jox Firawna benn, te féetewoo ñeenti cér yi des. Su ko defee ngeen géenne ci jiwuy tool yi, li ci des ngeen dunde, yeen ak seen waa kër ak seeni doom.»²⁵ Ñu ne ko: «Sang bi, rawale nga nu! Te gannaaw laaye nga nu biir, nangu nanoo doon jaami Firawna.»²⁶ Noonu la Yuusufa téréale loola, def ko dogalu yoon ca suufu Misra, te loolooy wéy ba tey jii: juróomi céri meññeef mu ne, Firawnaay moom benn ba. Waaye suufi njiiti diine ya ca bokkul, Firawna amu ca dara.

Lu jëm ci ati Yanqóoba yu mujj ya

²⁷ Bànni Israyil sanc nañu réewum Misra ca diiwaanu Gosen. Am nañu fa alal, giir fa, ba yokku lool.

²⁸ Yanqóoba nag nekk na fukki at ak juróom ñaar ca réewum Misra, ay atam yépp tollu ci téeméer ak ñeent fukk ak juróom ñaar (147).²⁹ Ba nga xamee ne àppu Israyil a ngay bégga mat, dafa woolu doomam Yuusufa ne ko: «Ngalla waay dugalal sa loxo, mu ron sama lupp*, muy ngiñ ci yaw ne dinga jëflanteek man ci ngor ak worma: rikk, bu ma denc Misra.

³⁰ Bés bu ma fekkijee samay maam, nanga ma jële Misra, denci ma ca seen xuntim bàmmeel.» Yuusufa ne ko: «Dinaa la defal li nga wax.»³¹ Mu ne ko: «Giñal ma ko.» Yuusufa giñ ko, Israyil doora am jàmm, daldi wéeru ca bopp lal ba.

48

Israyil ñaanal na Efrayim ak Manase

¹ Ba loolu wéyee ñu ne Yuusufa baayam dafa tawat, mu ànd ak ñaari doomam Manase ak Efrayim, seeti ko.² Ba ñu yégalee Yanqóoba ne doomam Yuusufaa koy seetsi, Israyil dafa dëgërllu, toog ca lal ba.

³ Yanqóoba ne Yuusufa: «Yàlla Buur bi feeñu woon na ma ca Lus ca réewu Kanaan, barkeel ma,⁴ te wax na ma ne ma: «Dinaa la giiral, fulandi la, def la nga sos mboooloom xeet, te réew mii laay may ñi askanoo ci yaw, ñu moom ko fàww.»⁵ Léegi nag sa ñaari doom, yi nga am Misra, laata ma di la fekksi Misra, maa leen séddoo. Maay séddoo Efrayim ak Manase, ñuy samay doom, ni ma jure Ruben ak Simeyon.⁶ Waaye doom, yi nga am seen gannaaw yaa leen di féetewoo, ñuy wuyoo seen turi mag ci wàllu ndono.⁷ Li tax ma def loolu mooy, bi ma jógee Padan di ñibbi, Rasel dafa faatu ca yoon wa ci sama kanam, ba nuy tollu ca réewu Kanaan, booba nu ngay dem, bay jub Efrata. Ma suul ko foofa, ca yoonu Efrata.» Efrata mooy Betleyem tey.

⁸ Ci kaw loolu Israyil gis doomi Yuusufa ya. Mu ne: «Ñii ñooy ñan?»⁹ Yuusufa ne baayam: «Ñii ñooy sama doom, yi ma Yàlla jox fi.» Baayam ne ko: «Nañu jegesi, ma ñaanal leen.»¹⁰ Booba bëti Israyil dafa lëndëm, ba gisatul ndax li muy mag. Yuusufa jegeñal leen seen maam, mu foon leen, taf leen ci boppam.¹¹ Israyil nag ne Yuusufa: «Yaakaaruma la woona gisati, ndeke Yàlla dina ma may lu raw gis la, ndax gis naa say doom.»

¹² Ca la leen Yuusufa wàccee fi ñu uufu ci seen maam, daldi dëpp jëem ci suuf,¹³ ba noppi Yuusufa taxawal leen ñoom ñaar, ñu séq ko janook Israyil, loxol ndijooram jàpp ci Efrayim, mu féete ak càmmoñu Israyil, loxol càmmoñam jàpp ci Manase, mu féete ak ndijooru Israyil. Ñu ànd jegesi,¹⁴ Israyil nag jállawle ay loxoom, tállal ndijooram, teg ko ca kaw boppu Efrayim, mi gén di ndaw; càmmoñam tege ca boppu Manase, doonte mooy taaw.

¹⁵ Ma ngay ñaanal Yuusufa. Mu ne:

«Yàlla ji samay waajur Ibraayma ak Isaaxa toppoon,

* 47:29 47:29 Seetal ci 24.2-3.

moom Yàlla, ji ma sàmm, ba ma juddoo ba tey jii,

¹⁶ malaaka mi ma jot ci bépp loraange— yal na barkeel xale yi, ba ñu saxal sama tur ak samay turi waajur, Ibraayma ak Isaaxa, te giir, ba ne gâññ ci kaw suuf.»

¹⁷ Ba Yuusufa gisee ne baayam ca boppu Efrayim la teg loxol ndijooram, mu naqari ko, mu daldi jàpp loxol baayam, bëgg koo jële ca boppu Efrayim, teg ko ca boppu Manase. ¹⁸ Yuusufa ne baayam: «Déet, baay, ndax kii mooy taaw, tegal sa ndijoor ci boppam.» ¹⁹ Teewul baayam lank, ne ko: «Xam naa ko, doom, xam naa ko. Moom itam dina doon aw xeet tey doon ku màgg, waaye rakkam a koy sut, te askanam dina law, ba di ay xeet.» ²⁰ Gannaaw loolu mu ñaanal leen keroog ne leen: «Yal na Israyil di ñaane seeni tur naan: “Yal na la Yàlla def ni Efrayim ak Manase.”» Noonu la jiiitale Efrayim, door caa teg Manase.

²¹ Ba mu ko defee Israyil ne Yuusufa: «Léegi man dinaa dee, waaye Yàlla dina ànd ak yeen, ba delloo leen ca seen réewu maam. ²² Man nag dinaa la may cér booy éppe say doomi baay, muy suuf su ma nangoo sama saamar ak sama fitt ca Amoreen ña.»

49

Yanqóoba tàggoon na

¹ Gannaaw loolu Yanqóoba woo ay doomam ne leen:

«Bokkleen daje, ma xamal leen li leen di dikkal èllëg.

² Dajeleen te déglu ma, man Yanqóoba seen baay; teewluleen seen baay Israyil.

³ «Ruben, yaw mi ma taawloo, nga sosoo sama digg doole, sama ndoortel kàttan,

yaa jëkke sut moos ci teraanga ak doole.

⁴ Yaa toogadi it ni ndox muy wal-wali, doo mujje sut,

nde yaa tédde sa lalu baay, ba teddadi, kera ba nga ca téddee.

⁵ «Simeyon ak Lewi ñoo duye yene, ñooy nas pexey ay.

⁶ Yàlla bu sama xol ànd ci seeni pexe, mbaa sama xel di nangu seeni diisoo, ndax fu ñu mere, xal faa bóome, te làggal ay yëkk lañuy foye.

⁷ Mbas ma seen xadar, gu tar, ak seen mer, mi dul meddi.

Maa leen di wasaare ci kër Yanqóoba, tasaare leen ci Israyil.

⁸ «Yaw Yuda, mi say doomi baay di taggeji, ngay sèqi sa ndoddi noon, ségal leen, sa doomi baay a lay sujjóotal.

⁹ Yuda yaa di gaynde gu ndaw, doom, doora jóge nii ci pàdd, tey yuug ay a goor ni gayndeg sibi. Yaa di gaynde gu deesul yee.

¹⁰ Nguur gi du jóge ci loxol Yuda, te yetu buur ay wéye sampe ciy tãnkam, li feek boroom* di ñëw, ba xeet yi déggal ko.

¹¹ Mooy yeew mbaamam cig reseñ, cumbur ma féeteek car, ba ca gën; muy fóote ay yéereem biiñ, di sumb mbubbam ci ndoxum reseñ.

¹² Bët yaa ngay nes-nesi ndax biiñ, bëñ ya weex furr ndax um soow.

¹³ «Sabulon ay dëkke tefesi géej, di teerub gaal yi, am réewam digalook Sidon.

¹⁴ «Isaakar mbaam ngonk la, muy goor diggante ñaari sêf.

¹⁵ Bu gisee ni mbaaram neexe, ak ni réew mi naate, day waaf, gaddu ngaaxam, daldi féetewoo coonob njaam.

¹⁶ «Dan ay àtteji xeetam, ni ko giiri Israyil baaxoo.

¹⁷ Waaye Dan ay jaan ju dog aw yoon, mbaa céebi ciw ñall, mooy màtt tãnki fas, gawar jullootu.

¹⁸ «Céy Aji Sax ji, maa ngi séentu sa xettal!

¹⁹ «Gàdd la gàngoor di gaw, mu téqtal leen, ba daan.

²⁰ «Aser ay boroom dund bu duun, mooy maye ngëneeli ñami buur.

²¹ «Neftalee di kéwél gu fëx, te mooy jur doom yu taaru.

²² «Yuusufaay bànqaasu garab, garab guy meññ, feggook bëtu ndox, car yaa nga law, tiim digu tool ba.

²³ Ay fittkat a ko torjal, di ko song ak a fitt.

²⁴ Teewul xalaam ga di wéye dan, te la loxo yay dëgërloo mooy loxoy Jambaar ju Yanqóoba, kookooy Sàmm bi, Doju cëslaayal Israyil,

²⁵ mooy sa Yállay baay, ji lay wallu, mooy Aji Man ji lay barkeele ca barkey asamaan, ya fa kaw, ak barke ya ne leww ca suuf xóote ya,

* 49:10 49.10 Baat bi ñu tekkee boroom fii, bare na nu ñu koy tekkee.

teg ca barkeb njur ak nàmpal.

²⁶ Sa ñaani baay a romb xéewali tund, ya sax fàww, rombati ngëneeli jànji cosaan ya, yal na dal ci boppu Yuusufa, ca kaw ndaal boppam, moom sangub doomi baayam ya.

²⁷ «Beñamin ay till guy yeeroo, di xéye yàpp rëbbam, tey gonloo séddale am lëlam.»

²⁸ Noofu ñoo sos mboolem giiri Israyil, ñu tollu ci fukk ak ñaar, te loolu la leen seen baay wax, ba mu leen di tàggu. Ku ci nekk mu tàgguo ko kàdduy tàggtoo, ya war ca moom.

Yanqóoba nelaw na

²⁹ Gannaaw loolu da leena dénk ne leen: «Maa ngi waaja fekki samay maam; dencleen ma fa samay maam ca xuntim bàmmeel ba ca toolub Efron, Etteen ba. ³⁰ Mooy xuntim bàmmeel ba ca biir tool, ba ca Magpela, te jàkkaarloo ak Mamre ca réewu Kanaan, di tool, ba Ibraayma jëndoon ca Efron, Etteen ba, ngir def ko bàmmeel. ³¹ Foofa lañu denc Ibraayma ak soxnaam Saarata, te foofa lañu denc Isaaxa ak soxnaam Rebeka, te fa laa denc Leya it. ³² Tool ba ak xuntim bàmmeel ba ca nekk, ña nga ko jënde ca Etteen ña.»

³³ Naka la Yanqóoba dénk doomam yu góor ya noona, daldi delloo ay tãnkam ca lal ba, bakkan ba rot, mu fekki ay maamam.

50

Yuusufa rob na Yanqóoba réewu Kanaan

¹ Ba mu ko defee Yuusufa daanu ci kaw baayam. Ma ngay jooy te di ko foon. ² Ba loolu weesee Yuusufa jox ay fajkatam ndigal, ñu waajal baayam. Fajkat ya waajal Israyil*. ³ Waaj ma am na ñeent fukki fan, ndaxte loolooy waajal bu mat sékk cib néew. Waa Misra nag déjal ko juróom ñaar fukki fan.

⁴ Ba dëj ba weesee, Yuusufa dafa wax ak waa kër Firawna, ñaan leen ñu dimbali ko, waxal ko Firawna ne ko, ⁵ baayam da ne woon, mu ngi waaja dee, waaye bàmmeel ba mu yettaloon boppam ca xunti ma ca réewu Kanaan, na ko giñal ne dina ko denc foofa. Mu ne kon, na ko Firawna may, mu robi baayam, ni mu ko ko giñloo woon, te délsi. ⁶ Firawna may ko, mu robi baayam, na mu ko ko giñloo woon.

⁷ Yuusufaa ngay dem robi baayam, moom ak mboolem jawriñi Firawna ak

magi kërám ak mboolem kàngama Misra. ⁸ Ña nga ànd ak waa kër Yuusufa gépp ak ay doomi baayam ak waa kër baayam, bàyyiwuñu diiwaanu Gosen lu moy xale ya ak gatt ya ak jur gu gudd ga, ⁹ ay watiir aki gawar topp ca, ñu def gàngoor gu réy.

¹⁰ Ba ñu agsee ca dàggay Ataata, ja ca wàllaa dexu Yurdan, dañu koo jooy jooy yu réy te metti. Yuusufa déjal fa baayam diiru juróom ñaari fan. ¹¹ Waa réewu Kanaan, gis dëj ba ca dàggay Ataata, naan: «Dëju waa Misra bii aka réy!» Moo tax ñu tudde bérab booba ca wàllaa dexu Yurdan, Abel Misra (mu firi Dëju waa Misra).

¹² Doomi Yanqóoba nag def la leen seen baay dénkoon, ¹³ yóbbu ko ca réewu Kanaan, daldi koy rob ca xunti ma ca toolub Magpela, te Ibraayma jëndoon ko ca Efron, Etteen ba, ngir def ko bàmmeel. Mooy tool, ba jàkkaarloo ak Mamre. ¹⁴ Ba Yuusufa dencee baayam ba noppi, dafa dellu Misra, moom ak doomi baayam ya ak mboolem, ña mu àndaloon ca robu baayam.

Magi Yuusufa yaa ngi jéggalu

¹⁵ Magi Yuusufa ya xam nañu ne seen baay nelaw na. Ña ngay wax ca seen biir naan: «Waaw, mbaa Yuusufa dencalu nu mer, nar noo fey sunu bor ndax lu bon li nu ko ji woon lépp?» ¹⁶ Boobu lañu yóbbante Yuusufa kàddu yii, di ko wax ne ko: «Sa baay dafa noo dénkoon, bala moo nelaw, ne nu: ¹⁷ Waxleen Yuusufa ne ko, sa baay nee: “Say mag def nañu la lu bon moos, waaye ngalla baal leen seeni tooñ ak àq, ji ñu la ameel.” Kon rikk waay, baal nu àq, ndax nun nook sa baaya a bokk jenn Yàlla ju nuy jaamu.» Ba ñu waxee Yuusufa loolu, mu daldi jooy.

¹⁸ Ci kaw loolu magam ya ñéwal seen bopp ba ca moom, sujjóotal ko ne ko: «Sang bi, nu ngi nii, di la siyaare.» ¹⁹ Yuusufa nag ne leen: «Buleen am dara lu ngeen di ragal. Xanaa maay Yàlla? ²⁰ Dëgg la, fexeel ngeen ma lu bon, waaye Yàllaa ko walbati, def ko lu baax, ba dogal li am tey jii, muy bakkan yu bare yi mucc. ²¹ Kon nag buleen tiit, dinaa leen yor, yeen ak seeni doom.» Yooyu kàddu la dalale seen xol, ba ñu am jàmm.

Yuusufa nelaw na

²² Yuusufa dëkk na Misra, moom ak waa kër baayam ñépp, ba tollu ci téeméri atam ak fukk, ²³ te gis na doomi Efrayim, ba gis sèti Efrayim sax; rax ca dolli doomi Makir, mi Manase jur, fa kanamam lañu juddoo.

²⁴ Mu am bés Yuusufa ne ay bokkam: «Sama waxtu jege na, waaye Yàlla moo

* 50:2 50.2 Fajkati waa Misra ndabb lañu daan waajale néew, ba du yaqu.

leen di jëlsi moos, ba jële leen ci réew mii, yóbbu leen ca réew ma mu dige woon, ba giñal ko Ibraayma, Isaaxa ak Yanqóoba.»

²⁵ Booba la Yuusufa wax doomi Israyil, ne leen: «Giñal-leen ma ne bés bu leen Yàlla jëlsee, dingeen yóbbaaale samay yax, waaye dungeen ma fi bàyyi.»

²⁶ Gannaaw loolu Yuusufa nelaw ci téeméeri atam ak fukk. Ñu waajal néew ba, ba du yàqu, daldi koy yeb cib tàdd, denc ko foofa ca Misra.

Muccug bànni Israyil di ñaareelu xaaju Tawreetu Musaa Ubbite gi

Ñaareelu xaaju Tawreet bii moo wéyal jaar-jaari bànni Israyil, jële ko fa ko téere bu jëkk ba, téereb Njálbéen ga bàyyi woon. Fi téere bi jële aw turam, Mucc gi, mooy xew-xew bi ci gëna fés, di mucc gi Yàlla musal bànni Israyil, ca mbugal mu mujj ma mu wacce woon fa Misra, mbugal ma Yàlla doge seen buumi njaam, ba génne leen fa.

Yàlla moo jox bànni Israyil ndigali yoon wi ca tundu Sinayi, Musaa jottli ko, muy li lal kóllère gi mu fas, moom Yàlla ak bànni Israyil. Yàlla nag musal leen, ba ñu tala séq ak moom digganteb kóllère. Ndigali yoon wi moo xamal mbooloom bànni Israyil nan lañuy sàmme seen digganteek moom. Yàlla moo bëggoon bànni Israyil doon ñoñam, ndax ci ñoom la nammoona amal digeem baak seen maam Ibraayma. Dige ba mooy xeeti àddina sépp, ci askanu Ibraayma lañuy barkeele.

Mujug téere bi kéemaan gu réy la. Mooy gannaaw ba ñu sampee jaamookaay ba, na ko Yàlla santaanee, ba Yàlla feesale ag leeram xaymab jaamookaay ba, ngir wone ne moo fa teew.

Ci Tënk:

Saar 1—18 Yàlla yiwi na bànni Israyil, génne leen Misra.

Saar 19—24 Yàlla fasante na kóllère ak bànni Israyil.

Saar 25—40 Yàlla sant na Musaa, mu defarlu xaymab jaamookaay.

Bànni Israyil dem na réewum Misra

¹ Góor ñi seen baay di Yanqóoba, mi ñu dippee Israyil, ñu àndon ak moom, dem Misra, te ku nekk yóbbaaale waa kërám, seeni tur a di: ² Ruben ak Simeyon ak Lewi ak Yuda ³ ak Isaakar ak Sabulon, ak itam Beñamin; ⁴ ak Dan ak Neftali ak Gàdd ak Aser. ⁵ Góor ñi soqikoo yi Yanqóoba ñépp juróom ñaar fukk lañu (70), bu ñu ci boolee doomam, ji ñuy wax Yuusufa, moom ma ñu fekk Misra. ⁶ Gannaaw ga Yuusufaaki doomi baayam yu góor yépp nelaw, ñook maas googu gépp. ⁷ Bànni Israyil nag giir fa, law, di fulandiwu, ba yokku lool, fees réew ma.

Firawna not na bànni Israyil

* **1:11** 1.11 Firawna turu pal la, ñeel bépp buuri Misra.

† **1:15** 1.15 Ebré tur la wu niti jamono jooja daan wooye xeet, ya bànni Israyil bokk.

6.20.

⁸ Ñu dem ba jëmme jamono, beneen buur bu xamul Yuusufa falu ca Misra. ⁹ Mu wax ak waa réewam, ne leen: «Giirug bànni Israyil kat ñu ngi nuy gëna bare, ba épp nu doole. ¹⁰ Nanu ci sàkk pexe, ngir ñu bañatee yokku. Lu ko moy bu xare amee, man nañoo far ak sunuy noon, xeex ak nun, ba génn réew mi.» ¹¹ Ba loolu amee ñu fal ay nit ñu leen di ga ca seeni sas, di leen ca fitnaal lool. Noonu la bànni Israyil tabaxale Firawna* buuru Misra† dëkk, ya ñu naa Pitom ak Ramses, mu def ko ay dencukaayi dund. ¹² Terewul lu ñu leen gëna fitnaal, ñuy gën di fulandiwu, yokku, ba waa Misra am njàqare ca bànni Israyil.

¹³ Waa Misra dañoo mujj di jaamloo bànni Israyil bu metti, ¹⁴ yen leen toskarey àddina ndax liggéey yu metti. Ñuy móol ban, di tabax, waa Misra teg ca séf leen mboolem liggéeyu tool ya. Néegoon nañu ca ñoom lool ca mboolem liggéeyu njaam bu ñu leen sas.

¹⁵ Firawna buuru Misra teg ca wax ak rewlikati Ebré ya†, te kenn ka tuddoon Sifra, ka ca des di Puwa. ¹⁶ Mu ne leen: «Bu ngeen dee rewli jigéeni Ebré yi, nangeen xool lu xale bi doon. Su dee góor, reyleen, su dee jigéen, bàyyileen, mu dund.» ¹⁷ Teewul rewlikat ya ragal Yàlla, ba defuñu la leen buur ba sant; xanaa ñu bàyyi liir yu góor ya, ñu dund. ¹⁸ Buuru Misra woolu rewlikat ya, ne leen: «Ana lu tax ngeen def lii, di bàyyi liir yu góor yi, ñu dund?» ¹⁹ Rewlikat ya ne ko: «Li tax kay mooy, jigéeni Ebré yi dañoo niroowul ak jigéeni waa Misra; ndax dañoo njaxlaf, ba bu rewlikat yiy laata agsi, fekk ñu mucc ba noppi.» ²⁰ Bànni Israyil nag di fulandiwu, gëna yokku, Yàlla defal rewlikat ya aw yiw, ²¹ may leen giir ndax seenug ragal Yàlla. ²² Gannaaw loolu Firawna sant waa réew ma yépp, ne leen: «Mboolem doom ju juddu ci Ebré yi, di góor, sännileen ca dex ga, waaye lu ciy jigéen, bàyyileen, mu dund.»

2

Musaa gane na àddina

¹ Jenn waay ju bokk ci giirug Lewi nag moo jëlloon janq bu mu bokkal giir. ² Ndaw sa ëmb, ba mujj am doom ju góor*. Ba mu gisee taar, ba liir ba àndal, nébb na ko lu mat ñetti weer. ³ Mu dem nag, ba manatu koo nébb. Mu wut pañe bu ñu ràbbe barax, fatte ko godoron ak ndàbb, yeb ca liir ba, daldi dem, teg ko ca biir barax, ba ca tàkkal dex, ga ñu naan Niil.

† **1:11** 1.11 Misra mooy réew mi ñuy wax Esibte ba tay.

* **2:2** 2.2 Seetal ci Mucc ga

⁴ Xale bu jigéen bay magu liir ba ma nga taxaw fu soreyaatoo ak liir ba, di xool, ba xam nu muy mujje.

⁵ Ba mu ko defee doomu Firawna ju jigéen dikk, di sangusi ca dexu Niil ga, surgaam yu jigéen yay doxantu ca tàkk ga. Ba loolu amee mu séen pañe ba ca biir barax ba, daldi yónni jaamam, mu yót ko ko. ⁶ Naka la ko ne ubbet, yem ca xale ba, muy liir bu góor, xale bay jooy, yaram wa daw, mu ne: «Kii de ndeysaan, ci doomi Ebrè yi la!» ⁷ Magu liir ba daldi wax doomu Firawna ja, ne ko: «Ndax ma dem wutali la ku koy nàmpal ci Ebrè yi?» ⁸ Doo mu Firawna ne ko: «Waaw, demal.» Xale ba dem, indil ko yaayu liir ba. ⁹ Doo mu Firawna ne ko: «Yóbbul xale bii te nàmpalal ma ko, maa lay fey.» Ndax sa jël liir ba, di ko nàmpal. ¹⁰ Ba xale ba mággee, mu yót ko doomu Firawna, mu def ko muy doomam, tudde ko Musaa (mu firi Ki ñu génne), ndax la mu ko génnee ca ndox ma†.

Musaa gaddaayi na réewum Majan

¹¹ Ba ñu demee ba Musaa mágge, dafa am bés, mu seeti bokkam ya, gis leen ca liggéey yu metti, ya ñu leen sas. Mu gis jenn waayu Misra di dóor kenn ca bokki Ebrè ya. ¹² Musaa geestu wet gu nekk, gisul kenn, mu rey waa Misra ja, daldi gas, suul ko.

¹³ Ca èllég sa mu dellu génn, yem ci ñaari Ebrè yuy xeex. Musaa wax ak ka tooñ, ne ko: «Lu tax ngay dóor sa moroom mii?» ¹⁴ Waa ja ne ko: «Ku la def sunu njiit mbaa sunu àttekat? Xanaa danga maa nara rey, na nga reye woon waa Misra ja?» Musaa nag tiit, naan ca xelam: «Ndeke mbir mi kay siiw na.»

¹⁵ Ba loolu amee Firawna dégg mbir ma, di wuta reylu Musaa. Musaa daw, ba sore Firawna, dem dali ca réewu Majan, fu dend ak ab teen. ¹⁶ Yетро, sarxalkatu Majan ba nag, amoon na juróom ñaari doom yu jigéen. Ñu ñew di rootsi, di duy mbalka, ya ñuy wégge seen juru baay. ¹⁷ Ay sàmm agsi, dàq leen. Musaa wallu jigéen ña, wéggal leen seen jur.

¹⁸ Ba ñu delloo ca seen baay Ruwel†, mu laaj leen ne leen: «Lu tax ngeen teela ñibbsi tey?» ¹⁹ Ñu ne ko: «Ab waa Misra daal, moo nu xetli ca sàmm ya; rootal na nu sax, ba wégg jur gi.» ²⁰ Ruwel ne leen: «Ana waa ja? Lu tax ngeen bàyyi ko fa? Wooyileen ko, mu añsi kay!»

²¹ Musaa far dal ca kër waa ja. Mu mujj ko may doomam ju ñuy wax Sipora. ²² Mu

am doom ju góor, Musaa tudde ko Gersom (mu firi Doxandéem fii), ndaxte dafa ne: «Doxandéem laa fii.»

Yàlla ñeewante na bànni Israyil

²³ Ba ñu demee ba mu yàgg, Firawna buuru Misra dee. Fekk na bànni Israyil a ngay binni rekk ndax seen njaam ga. Ñuy woote wall, ba seen jooy, ya sababoo ca seen toroxtegg njaam ga, àgg fa Yàlla. ²⁴ Booba Yàllaa ngay dégg seeni yuux, te fàttewul kóllère ga mu fasoon ak Ibraayma ak Isaaxa ak Yanqóoba. ²⁵ Yàlla nag geesu bànni Israyil, ñeewante leen.

3

Aji Sax ji yónni na Musaa

¹ Léegi Musaa ngay sàmm gatti goroom Yетро, sarxalkatu Majan ba. Mu yóbbu jur ga fu sore ca mândinj ma, daldi agsi ca suufu tundu Yàlla wa* ca Oreb. ² Malaakam Aji Sax ja feeñoo ko foofa, melow sawara wuy tàkk, jafal fa ab gajj. Musaa xoolaat, ndeke gajj ba bépp jàpp na, ba ne jippét, waaye lakkul. ³ Musaa ne: «Mbir mu yéeme mii daal, naa jàdd xool ko, ba xam lu tax gajj bi lakkul.»

⁴ Ba Aji Sax ji Yàlla gisee Musaa jàdd, di xoolsi, ca gajj ba la àddoo, ne ko: «Musaa, Musaa!» Mu ne ko: «Maa ngi.» ⁵ Yàlla ne ko: «Bul jegesi, summil say dàll, ndax fi nga taxaw suuf su sell la.» ⁶ Mu teg ca ne: «Man maay sa Yállay baay, di Yállay Ibraayma, di Yállay Isaaxa te di Yállay Yanqóoba.» Ca la Musaa nébb kanam ga, ndax ragala xool Yàlla.

⁷ Aji Sax ji tegaat ca ne ko: «Gis naa bu baax fitna, ji sama ñoñ nekke Misra. Dégg naa itam seen jooy ndax kilifay saskat, yi leen di gétèn ci liggéey, te ñeewante naa leen ngir seen coono. ⁸ Damaa wàcc, xettlisi leen ci waa Misra; génne leen réew moomu, ba yóbbu leen réew mu baax te yaatu, réew mu meew maak lem ja tuuroo, foofa ca diiwaanu Kanaanee ña ak Etteen ña ak Amoreen ña ak Periseen ña ak Eween ña ak Yebuseen ña. ⁹ Yuux, yi bànni Israyil nekke nii, agsi na ba ci man, te gis naa it ni leen waa Misra di note. ¹⁰ Kon nag kaay, ma yónni la ca Firawna. Demal yiwiji bànni Israyil, sama ñoñ, ñu génn Misra.»

Musaa di leewaayu, Yàlla di ko ñaax

¹¹ Musaa ne Yàlla: «Waaw, waaye man tekkiwuma dara, bay dem ca Firawna, di génne bànni Israyil Misra.» ¹² Mu ne ko: «Man déy, maay ànd ak yaw, te boo génnee mbooloo ma Misra, dingeen ma

† **2:10** 2.10 Mose baatu lakku Misra la bu neexoo ak masa, di baat biy tekki «génne» ci lakku ebrè. ‡ **2:18** 2.18 Ruwel mooy Yетро ba tey. * **3:1** 3.1 tundu Yàlla wa: tund woowu, li tax ñu tudde ko tundu Yàlla, Yàlla dafa feeñoo ca kawam.

jaamusi ci tund wii. Loolooy firndeel ne, maa la yónni.»

¹³ Musaa ne Yàlla: «Su ma demee ca bànni Israyil, ne leen seen Yàllay maam ya moo ma yónni ca ñoom bànni Israyil de, dinañu ma laaj nu mu tudd. Lu ma leen di wax nag?» ¹⁴ Yàlla ne Musaa: «Maay Ki nekk. Kon waxal bànni Israyil ne leen: “Aji Nekk ji moo ma yónni ci yeen.»» ¹⁵ Yàlla dellu ne Musaa: «Dangay wax bànni Israyil, ne leen: “Aji Sax ji, seen Yàllay maam ya, di Yàllay Ibraayma, di Yàllay Isaaxa te di Yàllay Yanqóoba, moo ma yónni ci yeen.” Aji Sax jee di sama tur wu sax dàkk, ñu di ma ko fàttlikoo ba fàww. ¹⁶ Demal woo magi Israyil, ñu daje, nga ne leen: “Aji Sax ji, seen Yàllay maam ya, di Yàllay Ibraayma ak Isaaxa ak Yanqóoba, moo ma feeñu, ne ma: ‘Gis naa leen, te yég naa li ñu leen di teg ci Misra. ¹⁷ Dogu naa leena jële ci seen notaange gii ngeen nekke ci Misra, yóbbu leen ca réewum Kanaaneen ña ak Etteen ña ak Amoreen ña ak Periseen ña ak Eween ña ak Yebuseen ña, réew mu meew maak lem ja tuuroo.’»

¹⁸ «Magi Israyil dinañu la déggal, su ko defee nga ànd ak ñoom, dem ca buuru Misra. Waxleen ko ne ko: “Aji Sax ji Yàllay Ebrè yi moo nu feeñu. Kon nag ngalla may nu, nu dem topp màndiñ mi lu mat doxub ñetti fan, ngir rendili sunu Yàlla Aji Sax ji ay sarax.» ¹⁹ Waaye man xam naa ne buuru Misra du leen bàyyi, ngeen dem, mbete mu taseek doole ju ko tiiñ. ²⁰ Moo tax maay xàcci sama loxo, ba dumaa waa Misra ay mbugali mbugal yu kéemaane yu may def ci seen biir. Su ko defee dina leen bàyyi, ngeen dem. ²¹ Maay dogal sax waa Misra yéwéne mbooloo mii, ba keroog bu ngeen di dem, dungeen deme loxoy neen. ²² Képp kuy jigéen ci bànni Israyil, na laaj dëkkandoom, laajaale ku dëkk ak dëkkandoom, ay gànjari xaalis, ak gànjari wurus, ak yére yu ngeen di solal seen doom yu góor ak yu jigéen, ba waa Misra ne duñj.»

4

Yàlla jox na Musaa ay firnde

¹ Gannaaw loolu Musaa dellu wax Aji Sax ji ne ko: «Waaw, su ñu ma dégluwul te gëmuñu ma, xanaa ne ma: “Aji Sax ji feeñu wu la” nag?» ² Aji Sax ji ne ko: «Li ci sa loxo lu mu doon?» Mu ne ko: «Aw yet.» ³ Aji Sax ji ne ko: «Sànni ko ci suuf.» Mu sànni yet wa ca suuf, mu soppliku jaan. Musaa dellu gannaaw. ⁴ Aji Sax ji ne ko: «Tàllalal sa loxo, jàpp ci geen gi.» Musaa tàllal loxo ba, ne nikk jaan ja, mu dellu di

aw yet ca loxoom. ⁵ Aji Sax ji ne ko: «Loolu ngay def, ngir ñu gëm ne Aji Sax ji seen Yàllay maam ya, di Yàllay Ibraayma, di Yàllay Isaaxa te di Yàllay Yanqóoba, moo la feeñu ci lu wér.»

⁶ Aji Sax ji dellooti ne ko: «Léegi dugalal sa loxo, teg ko ci sa dënn.» Musaa dugal loxoom, teg ko ca dënnam; ba mu ko génnee, mu defi àkk, xobbiku. ⁷ Aji Sax ji ne ko: «Dellool sa loxo ci sa dënn.» Musaa delloo loxo ba ca dënn ba, gënnewaata ko, mu dellu mel ni yaramam. ⁸ Mu ne ko: «Bu ñu la gëmul mbaa ñu baña seet ci firnde ju jëkk ji, dinañu gëm ndax firnde ji ci topp. ⁹ Waaye su lenn ci ñaari firnde yi taxul ñu gëm, te déggaluñu la, nanga tanqe ndox ci dexu Niil gi, tuur ko ci suuf su wow si, su ko defee ndox, ma nga tanqe ca dex ga, day soppliku deret ci suuf si.»

Yàlla def na Aaróona bëkk-néegu Musaa

¹⁰ Musaa nag ne Aji Sax ji: «Da di, Boroom bi, man naka jekk duma nitu waxkat, du démb, du tey jii ngay wax ak man. Dama di ku leeb, Sang bi, te tëlee wax.» ¹¹ Aji Sax ji ne ko: «Ku sàkkal nit gëmmiñ? Kan mooy luuwal, di téal, di gisal mbaa muy gumbaal? Xanaa du man Aji Sax ji? ¹² Demal rekk, man maay ànd ak yaw booy wax, di la xamal li ngay wax.» ¹³ Teewul Musaa ne ko: «Ngalla waay, yónnil keneen ku la soob rekk, sama Boroom.» ¹⁴ Aji Sax ji nag mer ba fees ndax Musaa. Mu ne ko: «Sa mag Aaróona, Leween bi, da fee nekkul? Moom, xam naa ne ku mana wax la. Mu ngi lay gatandusi sax, te bu la gisee, bég. ¹⁵ Nanga wax ak moom, digal ko li mu wara wax. Man maay ànd ak yeen, yaak moom, saa yu ngeen dee wax, te maa leen di xamal, yeen ñaar, li ngeen wara def. ¹⁶ Na lay waxal ak mbooloo mi; su ko defee sa kàddu di kàddoom, te yaw nga mel ci moom ni Yàlla. ¹⁷ Yóbbaaaleel yet wii nag, ndax ci ngay defe firnde yi.»

Musaa dellu na Misra

¹⁸ Musaa nag dellu ca goroom Yетро, ne ko: «May ma, ma dellu Misra, seeti samay bokk, ba xam nu ñu def.» Yетро ne ko: «Demal ak jàmm.» ¹⁹ Ci biir loolu Aji Sax ji wax ak Musaa ca Majan, ne ko: «Dellu Misra, ndaxte ña la doon wuta rey ñépp dee nañu.» ²⁰ Musaa ànd ak soxnaam ak doomam yu góor, waral leen mbaam. Ma ngay dellu Misra, jàpp yetu Yàlla wa* ca loxo ba, yóbbaaale. ²¹ Aji Sax ji ne ko: «Keroog boo delloo Misra, nanga taxaw temm, te def ca kanam Firawna kéemaan, yi ma teg ci sa loxo yépp. Man

* 4:20 4.20 yetu Yàlla wa mooy yetu Musaa, wa Yàlla defe kéemaan ya.

maay dëgëral boppam, mu të ba du bàyyi mbooloo mi, ñu dem. ²² Su ko defee nga wax Firawna, ne ko: “Aji Sax ji dafa wax ne: ‘Israyil mooy sama taaw bu géor. ²³ Te wax naa la ne la, nga bàyyi sama doom, ndax mu man maa jaamu, nga bañ. Kon nag dinaa rey sa taaw bu géor.’ ”

²⁴ Ba ñu lalee panaan ca yoon wa, Aji Sax ji dafa dogale Musaa, nar koo rey. ²⁵ Soxnaam Sipora jël paaka bu ñu yette doj, dog mbuñkam doomam, laalale ko ca tànkam, ne ko: «Jëkkër ju ñuy jote deret de laa am.» ²⁶ Ba loolu amee Aji Sax ji bàyyi Musaa. Ba Sipora di wax lu jëm ci jëkkër ju ñuy jote deret, aaday xarfal gaa taxoon.

²⁷ Ci biir loolu Aji Sax ji wax Aaróona ne ko: «Demal gatanduji Musaa ca mändinj ma.» Aaróona dem seeti ko ca tundu Yàlla wa, fekk ko fa, taf ko ca kawam. ²⁸ Musaa xamal ko la ko Aji Sax ji dënk lépp, ak mbooloom firnde, ya mu ko sant mu def ko.

²⁹ Ci kaw loolu Musaa ak Aaróona agsi Misra. Ñu woo magi bànni Israyil yépp, ñu daje. ³⁰ Aaróona jottli leen kàddu ya Aji Sax ji wax Musaa yépp, ba noppi Musaa wone firnde ya ca kanam mbooloo ma, ³¹ ba mbooloo ma gëm. Ba magi Israyil déggee ne Aji Sax ji nemmiku na bànni Israyil te gis na notaange, gi ñu nekke, dañoos sujjóot, mággal Aji Sax ji.

5

Musaa ak Aaróona seeti nañu Firawna

¹ Gannaaw loolu Musaa ak Aaróona dem ca Firawna, ne ko: «Aji Sax ji Yàllay Israyil dafa wax ne: “Bàyyil sama ñoñ, ñu dem mágkali ma ca mändinj ma.”»

² Firawna ne: «Kan mooy Aji Sax ji, ba ma di ko déggal, di bàyyi Israyil, ñuy dem? Xawma sax kuy Aji Sax ji, waxumalaa may bàyyi Israyil, ñuy dem.» ³ Ñu ne ko: «Sunu Yàlla, nun Ebrë yi, moo nu feeñu. Ngalla may nu, nu dem topp mändinj mi lu mat doxub ñetti fan, ngir rendili sunu Yàlla Aji Sax ji sarax, lu ko moy mu dumaa nu jàngoro mbaa ab xare.»

⁴ Buuru Misra ne leen: «Yeen Musaa ak Aaróona, lu waral ngeen di jële mbooloo mi ci seeni liggéey? Laggleen ca seeni sas waay!» ⁵ Firawna dellu ne: «Baadoolo yi ne xas tey ci réew mi, ngeen nar leena dëdduloo seeni sas!»

Firawna yokk na liggéeyu bànni Israyil

⁶ Keroog ca bés ba la Firawna sant saskati liggéey yaak farbay ngàllo, ga jiite jaam ya, ne leen: ⁷ «Buleen defati na woon, di jox mbooloo mi boob mu ñuy móole. Gannaaw-si-tey nañu dem wutal seen bopp boob. ⁸ Waaye sasleen leen

limu móol, ya ñu daan móol naka jekk. Buleen ko wàññi, ndax ay yaafus lañu; moo leen tax di dee-deeluy waxeey naan: “May nu, nu dem rendili sunu Yàlla sarax!” ⁹ Nañu leen yen liggéey bu gëna metti, te ñu dëkke ko, ba duñu tala déglu ay feni neen.»

¹⁰ Ba mu ko defee saskati liggéey ya ak farbay ngàllo ga gënn, wax ak mbooloo ma, ne leen: «Firawna nee na, du moo leen di jox boob. ¹¹ Yeena wara wutal seen bopp boob ak fu ngeen ko mana ame, te du tax lenn teggiku ci seen liggéey.» ¹² Fa la mbooloo ma tasaaroo ca biir réewum Misra, di wut boob. ¹³ Saskati liggéey ya nag di leen soññ, naan leen: «Matal-leen seen sasu bëccëg bu nekk, ni ngeen ko daan matala, ba boob amee.» ¹⁴ Ñuy dóor farbay ngàllo, ga bokk ca bànni Israyil, te saskati liggéey yu Firawna fal leen ngir ñuy jiite bànni Israyil ca liggéey ba. Na nga leen naan: «Lu waral démb ak tey yépp mataluleen limu móol, yi ñu leen sas, te ngeen daan ko matal?»

¹⁵ Booba la farbay ngàllog Israyil, dem jooytuji ca Firawna, ne ko: «Sang bi, lu tax nga def nu nii? ¹⁶ Du menn boob mu ñu nu joxati, te teewul ñu di nu sant nuy móol, di nu ci dóor. Te kat sang bi, sa waa réew a tooñ.» ¹⁷ Firawna ne leen: «Yaafus yi ngeen doon! Yaafus a leen tax di wax naan: “May nu, nu dem rendili Aji Sax ji sarax.” ¹⁸ Neleen mott, liggéeyi! Du menn boob mu ñu leen di jox. Te du tee ngeen matal seen limu móol.» ¹⁹ Farbay ngàllo, ga bokk ca bànni Israyil nag xam ne dal nañu aw sas, ndax la ñu leen ne duñu wàññi lenn ca limu móol, ya leen war bés bu nekk.

²⁰ Ba loolu amee ñu bàyyikoo ca Firawna, daldi yem ca Musaak Aaróona, fa ñu leen doon xaar. ²¹ Farba ya ne leen: «Yal na leen Aji Sax ji gis ba mbugal leen, ndax tax ngeen Firawnaaki dagam jéppi nu, te mel na ni yeena teg ci seeni loxo saamar, bi ñu nuy reye.»

²² Musaa dégg loolu, dellu ci Aji Sax ji, ne ko: «Éey Boroom bi, loraange gi nga yóbbe mbooloo mii nag? Loo ma doon yónnee? ²³ Ba ma demee ca Firawna, di wax ci sa tur ba tey, mu ngi lor bànni Israyil, sa ñoñ, te xettliwoo leen sax!»

6

¹ Aji Sax ji wax Musaa ne ko: «Dinga gis léegi ni may def Firawna: loxo bu ko épp dooleey tax mu bàyyi leen ñu dem. Bir na ne, loxo bu ko épp doole mooy tax mu dàq leen réewam.»

Yàlla dellu na yónni Musaa

² Yàlla dellu wax Musaa ne ko: «Man maay Aji Sax ji. ³ Yàlla Aji Man ji, mooy ni ma feeñoò woon Ibraayma, te ni laa feeñoò Isaaxa ak Yanqóoba it, waaye sama tur, Aji Sax ji, leeraluma leen ko woon. ⁴ Te itam damaa fasoon ak ñoom kóllère, ngir jox leen réewum Kanaan, réew ma ñu nekkoon ay doxandéem. ⁵ Maa déggal sama bopp yuuxi bànni Israyil, gi waa Misra def ay jaam, te fàttewuma sama kóllère ga. ⁶ Kon nag waxal bànni Israyil ne leen: Man maay Aji Sax ji. Maa leen di sippil, yeen bànni Israyil, li leen waa Misra séf, te maa leen di teggil njaam, gi ñu leen teg. Maay tàllal sama loxo, dogal mbugal yu kéemaane, ba goreel leen. ⁷ Maa leen di def sama ñoñ, di seen Yàlla. Dingen xam ne man Aji Sax ji maay seen Yàlla, ji leen di teggil sas, yi leen waa Misra teg. ⁸ Maa leen di yóbbu ba ngeen dugg réew ma ma giñoon ne maa koy jox Ibraayma ak Isaaxa ak Yanqóoba, te maa leen koy moomale, man Aji Sax ji.»

⁹ Ba Musaa waxee loolu bànni Israyil, dégluwuñu ko sax ndax xol bu jeex ak njaam gu metti.

¹⁰ Aji Sax ji wax Musaa ne ko: ¹¹ «Demal wax Firawna buuru Misra, mu bàyyi bànni Israyil, ñu génn réewam.» ¹² Musaa tinu Aji Sax ji ne ko: «Waaw, ndegam bànni Israyil sax nanguwuñu maa déglu, nu ma Firawna di déggale, man mii télee wax?» ¹³ Aji Sax ji nag wax ak Musaa ak Aaróona, jox leen ay ndigal ci mbirum bànni Israyil ak Firawna buuru Misra, ngir ñu yiwi bànni Israyil, ba ñu génn Misra.

Lu jëm ci cosaanu Musaa ak Aaróona

¹⁴ Bànni Israyil ya yilifoon seen kër baay, ñoo di:

Góor ña Ruben, taawu Israyil, jur: Anog ak Palu ak Ebron ak Karmi. Ñooñoos sos làngi Ruben.

¹⁵ Doomi Simeyon yu góor di Yemuwel ak Yamín ak Owàdd ak Yakín ak Sowar ak Sawul, mi ndeyam dib Kanaaneen. Ñooñoos sos làngi Simeyon.

¹⁶ Doomi Lewi yu góor ñoo di Gerson ak Keyat ak Merari, ku nekk ak askanam. At ya Lewi dund, téeméer la ak fanweer ak juróom ñaar (137).

¹⁷ Doomi Gerson yu góor ñoo di Libni ak Simey, ñook seeni làng.

¹⁸ Doomi Keyat yu góor ñoo di Amram ak Isar ak Ebron ak Uysel; te at ya Keyat dund, téeméer la ak fanweer ak ñett (133).

¹⁹ Doomi Merari yu góor ñoo di Maali ak Musi.

Ñooñoos sos làngi Lewi ak seeni giir.

²⁰ Amram moo jël bàjjanam Yokebedd soxna*, kooku am ak moom Aaróona ak Musaa. At, ya Amram dund, téeméer la ak fanweer ak juróom ñaar (137).

²¹ Doomi Isar yu góor ñoo di Kore ak Nefeg ak Sikkri.

²² Doomi Uysel yu góor di Mikayel ak Elsafan ak Sitiri.

²³ Aaróona moo jël Eliseba doomu Aminadab, jigéenub Nason. Kooku am ak moom Nadab ak Abiyu ak Elasar ak Itamar.

²⁴ Doomi Kore yu góor ñoo di Asir ak Elkana ak Abiyasaf. Ñooñoos sos làngi Kore.

²⁵ Elasar doomu Aaróona moom, moo jël soxna kenn ca doomi Putiyel, kooku am ak moom Fineyas.

Ñooñoos yilif seeni kër baay ca Leween ña, ku nekk sos làngam. ²⁶ Aaróona moomu nag, mook Musaa, la Aji Sax ji wax, ne leen: «Génneleen bànni Israyil Misra, kurél ci kaw kurél.» ²⁷ Ñoom ñooñu ñoo wax ak Firawna buuru Misra, ngir génne bànni Israyil Misra; du keneen ku dul Musaa ak Aaróona.

Yàlla feddli na digeem baak Musaa

²⁸ Keroog ba Aji Sax ji waxee ak Musaa ca réewum Misra, ²⁹ da koo wax, ne ko: «Man maay Aji Sax ji. Nanga wax Firawna buuru Misra, li ma lay wax lépp.» ³⁰ Teewul Musaa tinu Aji Sax ji, ne ko: «Waaw, waaye man, damaa télee wax. Mbaa Firawna dina ma déggal yee?»

7

¹ Aji Sax ji ne Musaa: «Dama ne, def naa nga féete Firawna fi ko Yàlla féete, sa mag Aaróona di sa yonent. ² Su ko defee yaw nga wax ko li ma la sant lépp, sa mag Aaróona wax ko Firawna, ngir mu bàyyi bànni Israyil, ñu génn réewam. ³ Waaye man maay dégéral boppu Firawna, ba fulandi samay firnde ak samay kéemaan ci biir réewum Misra. ⁴ Firawna du leen déggal. Su ko defee nag maay tàllal sama loxo, tiimale Misra, te maay dogal mbugal yu kéemaane, ba goreel bànni Israyil, sama ñoñ, ñu génn Misra, kurél ci kaw kurél. ⁵ Keroog bu ma tàllalee sama loxo, tiimale ko Misra, ba génnee bànni Israyil ca seen biir, waa Misra dinañu xam ne maay Aji Sax ji.»

⁶ La Aji Sax ji santoon Musaak Aaróona, noonu rekk lañu ko defe. ⁷ Musaa nga tollu woon ci juróom ñett fukki at (80); Aaróona moom am juróom ñett fukki at ak ñett (83); ca jamono, ya ñuy wax ak Firawna.

* 6:20 6.20 Séy bu ni jegee mujj nañu ko tere bànni Israyil. Waaye jamonoy waajuri Musaa, séy bu jegee noonu aada la fa woon.

Firawna gântu na

⁸ Aji Sax ji dafa wax Musaa ak Aaróona ne leen: ⁹ «Bu leen Firawna waxee ne leen: «Defleen seeni kéemaan boog!» danga naan Aaróona: «J'èlal yet wi, sànni ci suuf ci kanam Firawna.» Su ko defee yet wi dina soppliku jaan.»

¹⁰ Ci kaw loolu Musaa ak Aaróona àgg ba ca Firawna. Ñu def la leen Aji Sax ji santoon. Aaróona j'èl yetam, sànni ca suuf ca kanam Firawnaaki dagam; yet wa soppliku jaan. ¹¹ Ba mu ko defee Firawna moom itam woo boroom xam-xam yaak jibar ya. Ñeengokati Misra ya ñoom it fexe ca seeni xargafuufa, ba def lu mel noona. ¹² Ku nekk ca ñoom sànni yetam, mu soppliku jaan, yetu Aaróona nag wonn seeni yet*.¹³ Terewul Firawna të, faalewu leen, muy la Aji Sax ji waxoon.

Yar bu jëkk ba: ndox mu soppliku deret

¹⁴ Gannaaw loolu Aji Sax ji wax na Musaa ne ko: «Firawna daa d'égër bopp. Bañ naa bàyyi mbooloo mi, ñu dem. ¹⁵ Dangay teela xëy ca Firawna èllég, buy génn jëm ca ndox ma, nga dogale ko ca tàkkal dëxu Niil, te yóbbaaale yet, wa soppliku woon jaan. ¹⁶ Wax ko ne ko: «Aji Sax ji Yállay Ebré yi, moo ma yónni ci yaw. Mu di la wax, ne la: 'Bàyyil sama ñoñ, ñu jaamuji ma ca màndinj ma.' Yaw nag booba ba tey yaa ngi tanqamlu. ¹⁷ Aji Sax ji dafa wax ne: 'Ni ngay xame ne man maay Aji Sax ji nii la: Dama ne, dinaa dóor ci ndoxum Niil mi yet, wi ci sama loxo, ndox mi soppliku deret; ¹⁸ su ko defee jën yi ci dex gi dee, dëxu Niil gi mujj xasaw, ba waa Misra dootuñu mana naan ci ndoxum Niil.' »

¹⁹ Ci kaw loolu Aji Sax ji ne Musaa: «Waxal Aaróona ne ko: «J'èlal saw yet, te tàllal sa loxo tiimale ko ndoxi Misra, muy seeni dex ak seen yooni ndox ak seeni déeg ak fépp fu ndox taa, mu ànd soppliku deret.» Deret ja dina daj Misra gépp, ba ca kèll yaak njaq ya.» ²⁰ Musaa ak Aaróona def loolu lépp, na leen ko Aji Sax ji sante. Naka la ne xaas yet wa, ne ko tàrr ca ndoxum Niil ma, ca kanam Firawnaaki dagam, ndoxum Niil ma mépp di deret, ²¹ jën ya ca dëxu Niil ga dee, dëxu Niil ga xasaw, ba waa Misra manatuñu caa naan. Misra gépp di deret. ²² Ñeengokati Misra itam fexe ca seeni xargafuufa, ba def lu mel noona. Firawna të rekk, tanqamlu MUSAAK AARÓONA, muy la Aji Sax ji waxoon. ²³ Ba loolu amee Firawna ne wërëñ, dellu kërám, te bàyyiwul xel ca mbir ma. ²⁴ Waa Misra gépp di gas la

wër dëxu Niil, ngir am ndoxum naan, ndax manuñi woona naan ca dex ga.

Yarub ñaareel ba: mbott yu daj réew ma

²⁵ Ba Aji Sax ji dalee ca kaw dëxu Niil, ba ñu teg ca juróom ñaari fan, ²⁶ Aji Sax ji da ne Musaa: «Demal ca Firawna, ne ko: «Aji Sax ji dafa wax ne: Bàyyil sama ñoñ, ñu dem jaamuji ma. ²⁷ Soo leen bañee bàyyi, ñu dem kat, maa leen di mbugale ay mbott yu daj sam réew. ²⁸ Dëxu Niil gi day ramm-rammeeki mbott, te dinañu ñëw, duggsi sa biir kër, ak sa néegu biir, ak sa kaw lal, ak sa kéri dag, ak sa waa réew, ba ca lakkukaay yaak notukaayi mburu ya. ²⁹ Mbott yi dinañu yéeg ci sa kaw, yéeg ci kaw waa réew mi, ak sa dag yépp.» »

8

¹ Ba loolu weesee Aji Sax ji ne Musaa: «Waxal Aaróona, ne ko mu ñàbb yet wi, tàllal loxoom, tiimale ko dex yi, ak yooni ndox yeek déeg yi, ngir indi mbott yi ci biir réewum Misra.» ² Aaróona tàllal loxoom, mu tiim ndoxi Misra, mbott ya jóg, lal réewum Misra. ³ Ñeengokat ya it fexe ca seeni xargafuufa, ba indi ay mbott ca réewum Misra.

⁴ Ba mu ko defee Firawna woo MUSAAK AARÓONA, ne leen: «Ñaanleen Aji Sax ji, ngir mu teqale nook mbott yi, man ak sama waa réew. Kon dinaa bàyyi mbooloo mi, ñu dem rendili Aji Sax ji sarax.» ⁵ Musaa ne Firawna: «Saa yu la neexee rekk, sang bi. Wax ma kañ laa lay ñaanal, yaw ak say dag ak sa waa réew, ngir jële fi mbott yi, ñu tàggook yeen, génn seeni kër, ca dëxu Niil ga donj lañuy des.» ⁶ Mu ne ko: «Nay èllég.» Musaa ne ko: «Baax na, ndax nga xam ne sunu Yàlla Aji Sax ji amul moroom. ⁷ Mbott yi dinañu jóge sa kër, teqlikook yeen, yaak say dag ak sa waa réew, ca dëxu Niil ga donj lañuy des.» ⁸ Musaa ak Aaróona nag jóge ca Firawna, Musaa tinu Aji Sax ji ca mbirum mbott ya mu yare Firawna. ⁹ Aji Sax ji def la ko Musaa ñaan, mbott ya dee, ba jeex ca kër yaak ca ètt yaak tool ya. ¹⁰ Ñu jal koo jal, ba xet ga ubale ca réew ma. ¹¹ Teewul, ba Firawna gisee ca mbir ma tan, daa wéye të, tanqamlu leen, muy la Aji Sax ji waxoon.

Yarub ñetteel ba: rayentaan yu daj réew ma

¹² Ba loolu amee Aji Sax ji ne Musaa: «Waxal Aaróona ne ko mu tàllal yetam, dóor ci pëndub suuf si, mu doon ay rayentaan* ci réewum Misra gépp.» ¹³ Ñu

* **7:12** 7.12 Manees naa jàpp ne jaan, ja yetu Aaróona soppliku woon, moo wonn jaan, ya seen yet soppliku. * **8:12** 8.12 rayentaan: li ñuy wax rayentaan fii, kenn xamul lan la d'égg. Waaye luy naaw lu tuut la, di same aka mätte.

def loola, Aaróona tállal loxoom, ba mu ñàbbe yet wa, dóor ca pënd ba, mu doon ay rayentaan yu song nit ak rab; pëndu suuf sépp a defí rayentaan ca réewum Misra gépp. ¹⁴ Ñeengokat ya fexe ca seeni xargafuufa, nu ñu defe ay rayentaan, waaye manuñu. Rayentaan ya nag song nit ñaak rab ya. ¹⁵ Ñeengokat ya ne Firawna: «Lii de Yàlla rekk a ko man!» Teewul Firawna wéye të rekk, tanqamlu leen, muy la Aji Sax ji waxoon.

Yarub ñeenteel ba: weñ yuy mätte

¹⁶ Aji Sax ji waxati Musaa, ne ko: «Tee-lala xéy èllég ca Firawna, buy génn jëm ca ndox ma, nga wax ko ne ko: “Aji Sax ji dafa wax ne: “Bàyyil sama ñoñ, ñu dem jaamuji ma. ¹⁷ Ndaxte soo bàyyiwul sama ñoñ, ñu dem kat, dinaa yuri ay ndiiraani weñ yuy mätte ci seen kaw, yaak say dag ak sa waa réew, te dinañu àgg ci sa biir kër. Këri waa Misra dina fees ak weñ yuy mätte, ba suuf, si ñu taxaw sax, weñ yee koy muur. ¹⁸ Waaye bu keroogee dinaa ci musal diiwaanu Gosen, ga sama ñoñ dëkke, ba ay weñ du fa same, ndax nga xam ne, man Aji Sax ji maa ngi ci digg réew mii, ¹⁹ te maay musal sama ñoñ ci musiba moomuy dal saw askan. Èllég firnde jooju dina am.’ » ²⁰ Aji Sax ji def loola, weñ yi def ndiiraan yu réy, song kër Firawna ak kër dagam ya, dajal réewum Misra, ba réew ma yàqu ndax ndiiraani weñ ya.

²¹ Firawna daldi woolu Musaak Aaróona, ne leen: «Demleen rendili seen Yàlla sarax, te nay ci biir réew mi nag.» ²² Musaa ne ko: «Loolu du yoon, ndax li nuy rendil sunu Yàlla Aji Sax ji, waa Misra dañu koy xof. Te bu nu sarxalee lenn lu waa Misra xof, ñuy gis, dinañu nu dóor ay doj, ba nu dee. ²³ Kon kay danoo wara génn, topp màndinj mi lu mat doxub ñetti fan, rendili fa sunu Yàlla Aji Sax ji sarax, ni mu nu ko sante.» ²⁴ Firawna àddu ne: «Dinaa leen may, ngeen dem ca màndinj ma, rendili seen Yàlla Aji Sax ji sarax, waaye buleen sore lool. Ñaanal-leen ma nag.» ²⁵ Musaa ne ko: «Bu ma bàyyikoo ci yaw rekk Firawna, dinaa tinu Aji Sax ji, ngir èllég ndiiraani weñ yi teqlikook yaw, ak say dag ak sa waa réew, waaye kat Firawna, bu nu naxati, di baña bàyyi mbooloo mi, ñu rendili Aji Sax ji sarax.»

²⁶ Musaa bàyyikoo fa Firawna, daldi tinu Aji Sax ji. ²⁷ Aji Sax ji defal Musaa la mu ñaan, jële ndiiraani weñ ya ca Firawnaaki dagam ak waa réewam, ba weñ desatu fa. ²⁸ Teewul Firawna të rekk, baña bàyyi mbooloo ma, ñu dem.

9

Yarub juróomeel ba: Deewug jur ga

¹ Ba loolu wéyee Aji Sax ji da ne Musaa: «Demal ca Firawna, nga ne ko: Aji Sax ji Yállay Ebré yi dafa wax ne: “Bàyyil sama ñoñ, ñu dem mággaali ma. ²⁻³ Ndax boo leen bañee bàyyi kat, xanaa di leen téye ba tey, loxol Aji Sax ji dina dal ci sa kaw jur gi ci tool yi, muy fas ak mbaam ak giléem, jur gu gudd ak gu gätt, te jàngoro ju aaytal lool lay doon. ⁴ Waaye man Aji Sax ji maay rãññatle juru bànni Israyil ak juru waa Misra, ba lenn du dee ci mboollem lu bànni Israyil moom.”»

⁵ Aji Sax ji nag jàpp na bés, nee na: «Èllég maay def loolu ci réew mi.» ⁶ Ca èllég sa Aji Sax ji def ko: jurug waa Misra gépp dee, te jurug bànni Israyil, lenn deewu ca. ⁷ Ba Firawna yónnee, ba nemmiku mbir ma, xam na ne lenn deewul ca juru bànni Israyil. Teewul mu të ticc ba tey, baña bàyyi mbooloo ma, ñu dem.

Yarub juróom benneel ba: Taab ya

⁸ Ba loolu amee Aji Sax ji wax Musaa ak Aaróona ne leen: «Tibbleen seeni loxo dóomu puuru ban, ba mu fees, Musaa xalab mu jëm asamaan, Firawna di ci gis. ⁹ Su ko defee dóom bi doon pënd bu sew ci kaw réewum Misra gépp, daldi def ay taab yuy sotti dëtt ci réewum Misra gépp, nit ak mala.» ¹⁰ Ñu sàkk dóomu-taal, àgg ca kanam Firawna, Musaa xalab dóom ba, mu jëm asamaan, dóom ba def ay taab yuy sotti dëtt ca nit ñaak mala ya. ¹¹ Ci kaw loolu ñeengokat ya taluñoo janook Musaa ndax ay taab, ñoom ak waa Misra gépp. ¹² Teewul Aji Sax ji dëgéral boppu Firawna, mu të, tanqamlu leen, muy la Aji Sax ji waxoon Musaa.

Yarub juróom ñaareel ba: Tawub yuur ba

¹³ Aji Sax ji waxati Musaa ne ko: «Tee-lala xéy ca Firawna èllég, nga wax ko ne ko: “Aji Sax ji, Yállay Ebré yi, dafa wax ne: “Bàyyil sama ñoñ, ñu dem mággaali ma. ¹⁴ Ndax kat bii yoon maa ngii di yebal sama mbugal yépp ci yaw ci sa bopp, ak say dag ak sa waa réew, ngir nga xam ne awma moroom ci àddina wërngal képp. ¹⁵ Négèni tey doon naa xàcci sama loxo xaat, dumaa leen mbas mu leen di fare ci kaw suuf, yaw yaak sa waa réew. ¹⁶ Waaye maa la musal, te li ma ci jublu moo di won la sama doole, ba sama riirum tur dajal àddina. ¹⁷ Ndaxam yaa ngi réy-réylu ci sama kaw ñoñ ba tey, bañ leena bàyyi, ñu dem. ¹⁸ Te kat négèni èllég dinaa taw

* 9:18 9.18 tawub yuur: ndoxum taw la, mu sedd, ba defí donj.

yuur* bu réy, bu masula am Misra, ba mu sosoo ba tey jii. ¹⁹ Kon nag sa jur ak mboolem loo am, te mu nekk ci biti, booleel fat fu wóor, ndax lu nekk ci biti te fateesu ko, su tawtee dee, muy nit mbaa mala.’ » ²⁰ Ba mu ko defee ña ragal kàddug Aji Sax ji ca dagi Firawna fat seeni jaam ak seeni jur fu wóor. ²¹ Ña faalewul kàddug Aji Sax ji, ñoom, wacc seeni jaam ak seeni jur ca biti.

²² Aji Sax ji ne Musaa: «Yékkatil sa loxo ca kaw, mu jublu asamaan, ngir tawub yuur bi dal ci réewum Misra mépp, nit ak mala, ba ci lépp luy gancax ci réewum Misra.» ²³ Musaa ne yékkét yet wa, mu jublu asamaan, Aji Sax ji yebal dënu baak tawub yuur ba, sawara wa ne yureet fi suuf, ànd ak tawub yuur, ba Aji Sax ji sóob ca réewum Misra. ²⁴ Tawub yuur ba réy lool, ànd ak sawara, wa jaxasook yuur ba, di xuyy-xuyyi, muy guléet ca cosaanu réewum Misra ba bésub keroo. ²⁵ Tawub yuur ba dal ca mboolem réewum Misra, daaneel lépp lu ne woon ca biti, nit ak mala, daaneel gancax gépp, dammat garab ya ca àll ba yépp. ²⁶ Diiwaanu Gosen, ga bànni Israyil dëkkoon donj, moo mucc ca tawub yuur ba.

²⁷ Firawna nag yónnee, woolu Musaa ak Aaróona. Mu wax leen ne leen: «Bii yoon de, maa tooñ. Aji Sax ji moo nekk ci dëgg, te maak sama waa réew ñoo sikk. ²⁸ Tinuleen Aji Sax ji, ndax dënu yu mág yeeek tawub yuur bi dakk. Dinaa leen bàyyi, ngeen dem. Deesu leen fi téyeeti.» ²⁹ Musaa ne ko: «Bu may génn dëkk bi rekk, di tàllal Aji Sax ji samay loxo, dënu yi dakk, tawub yuur bi siwet, ngir nga xam ne àddina, Aji Sax jeey boroom. ³⁰ Waaye xam naa ne, loolu du tax ba tey, nga ragal Yàlla Aji Sax ji, yaw, yaak say dag.»

³¹ Fekk na gancax ga ñuy defare wëñu lée yaqu na, mook peppum lors ba, ndax lors baa nga tollu woon ci waaja focci, gancax ga ñuy defare lée di tooor. ³² Waaye xeeti peppi bele ya, lenn yaquwu ca, ndax yooyooy mujja ñor.

³³ Naka la Musaa bàyyikoo ca Firawna, ba génn dëkk ba rekk, daldi tàllal Aji Sax ji ay loxoom. Dënu yaak tawub yuur ba ne tekk, taw ba siwet. ³⁴ Ba mu ko defee Firawna gis ne tawub yuur baak dënu ya dakk na, mu téeti ticc, mooki dagam, dellu cig tooñam. ³⁵ Firawna té rekk, baña bàyyi bànni Israyil, ñu dem, muy la Aji Sax ji waxoon, Musaa jottli.

10

Yarub juróom ñetteel ba: Njéeréer ya

¹ Ba loolu weesee Aji Sax ji dafa wax Musaa ne ko: «Demal ca Firawna. Maa

dëgéral boppam, mooki dagam, ngir jéfe samay firnde fi seen biir. ² Su ko defee ngeen mana nettali seeni doom ak seeni sët ni ma torxale waa Misra, ak sama firnde, yi ma def fi seen biir, ndax ngeen xam ne man maay Aji Sax ji.»

³ Musaa ak Aaróona nag dem ca Firawna, wax ko ne ko: «Aji Sax ji Yàllay Ebré yi dafa wax ne: «Siide nga maa nangul daal? Waaw, foo àpp sa ngantal ak man? Bàyyil sama ñoñ, ñu dem mágali ma. ⁴ Soo bañee bàyyi sama ñoñ, ñu dem kat, èllég dinaa wacce ay njéeréer ci sam réew. ⁵ Dinañu lal dëndu réew mi, ba kenn dootu gis suuf. Dinañu lekk lu fi tawub yuur bi ba woon, te garab yi ci seeni tool yépp lañuy lekk. ⁶ Te itam dinañu fees say biir kër ak sa kéri dag yépp ak kéri waa Misra gépp, muy mbir mu say maam ak say mamaat masula gis, ba ñu ganee àddina ba bésub tey jii.»

Ba loolu amee Musaa walbatiku, bàyyikoo ca Firawna. ⁷ Dagi Firawna ya wax Firawna ne ko: «Lu nuy seetaanati, waa jii di nu yóbbe aw ay? Bàyyil bànni Israyil ñii kay, ñu mágali seen Yàlla Aji Sax ji! Xanaa yéguloo ne Misra tas na?» ⁸ Ñu délloosi nag Musaa Aaróona ca Firawna, mu ne leen: «Demleen mágali seen Yàlla Aji Sax ji! Waaw, ñiy dem sax, ñan la?» ⁹ Musaa ne ko: «Nun ñépp ay dem kay, mag ak ndaw; danuy dem, ànd ak sunuy doom, góor ak jigéen, ak sunuy jur, gu gudd ak gu gätt, ndax mággalug Aji Sax ji la ci nun.»

¹⁰ Firawna ne leen: «Áa, yal na leen Aji Sax ji saxoo taxawu walla, ndegam maa leen di bàyyi moos, ngeen dem, yóbbaale seen njaboot! Xam ngeen ne naruleen njub de. ¹¹ Mukk laa wax! Du dangeen di mággal Aji Sax ji? Demleen boog, yeen ñiy góor!»

Ba loolu amee ñu dàq leen, ñu jóge ca Firawna, ¹² Aji Sax ji ne Musaa: «Tàllalal sa loxo, mu tiim réewum Misra, ngir njéeréer yi ñëw, song réewum Misra, ba lekk gancax gi ci réew mi, lekk lépp lu fi tawub yuur bi bàyyi woon.»

¹³ Ba mu ko defee Musaa tàllal yetam, mu tiim réewum Misra, Aji Sax ji yékkati ngelaw ca réew ma, mu jóge penku, yendoo gelaw, fanaanoo ko. Bèt set, ngelawal penku la indi njéeréer ya. ¹⁴ Njéeréer ya song réewum Misra mépp, sam dëndu Misra wépp, ba mu fatt taraj. Lu ni tollu masula am, te dootu amati. ¹⁵ Njéeréer ya daa muur suuf sa sépp, ba giseesu ko. Suuf sa ñuul kukk. Njéeréer ya lekk lépp luy gancax mbaa meññeefi garab gu tawub yuur ba jotuloona yaq, ba lenn lu

naat desatul, du xobi garab, du gâncax, ca mboolem réewum Misra.

¹⁶ Firawna nag gaaw woolu Musaak Aaróona, ne leen: «Tooñ naa seen Yàlla Aji Sax ji, tooñ leen. ¹⁷ Baal ma àq bii yoon rekk, te ngeen ñaanal ma seen Yàlla Aji Sax ji, ngir mu teggil ma rekk, wii ay wu rey.» ¹⁸ Musaa bàyyikoo ca Firawna, tinu Aji Sax ji. ¹⁹ Aji Sax ji walbati ngelaw la, mu jóge sowu, am doole lool, daldi fêl njéeréer ya, sànni ca géēju Barax ya, ba luy niru njéeréer desatul ca dëndu Misra. ²⁰ Teewul Aji Sax ji dэггéral boppu Firawna, mu tē rekk, baña bàyyi bànni Israyil ñu dem.

Yarub juróom ñeenteel ba: Lëndem gu tar ga

²¹ Gannaaw loolu Aji Sax ji ne Musaa: «Tállalal sa loxo, mu jublu asamaan, lëndem wàcc ci kaw réewum Misra, lëndem gu nit mana daj, ndax fatt.»

²² Musaa tàllal loxoom, mu jublu asamaan, lëndem gu fatt wàcc ca kaw réewum Misra gépp, diiru ñetti fan. ²³ Kenn gisul sa moroom, kenn manula jóge fa nga nekk, diiru ñetti fan. Teewul kéri bànni Israyil gépp di leer.

²⁴ Firawna nag woolu Musaa, ne ko: «Demleen màggali Aji Sax ji. Seen jur gu gudd ak gu gätt rekk a fiy des, seeni doom sax man nañoo ànd ak yeen.» ²⁵ Musaa ne ko: «Danga noo wara bàyyee lu nuy sarxalal sunu Yàlla, Aji Sax ji, ak yu ñu koy defal saraxu rendi-dóomal. ²⁶ Sunuy gétt dina nu topp moos, luy nirook we sax du des gannaaw, ndax ci lanuy tãne lu nuy màggale sunu Yàlla Aji Sax ji, te itam li feek nuy àgg foofa, manunoo xam lan lanu ciy def sarax, màggale Aji Sax ji.» ²⁷ Teewul Aji Sax ji dэггéral boppu Firawna, mu tē rekk, bañ leena bàyyi ñu dem. ²⁸ Firawna nag ne Musaa: «Neel mott! Bul fexe ba taxawati sama kanam! Ndax bés boo jækkaarlooteek man, kera ngay dee.» ²⁹ Musaa ne ko: «Noonu la sax de. Duma jækkaarlooteek yaw moos!»

11

Yàlla waaj na yar bu mujj ba

¹ Ba loolu wéyee Aji Sax ji waxati Musaa ne ko: «Benn yarub mujjantal laay dellu wàcce ci kaw Firawna ak waa Misra. Su ko defee du leen bàyyi ngeen dem, yem ca. Da leen fiy far dàqe, ba fàww. ² Te neel mbooloo mi, góor gu nekk ak jigéen ju nekk ci ñoom, na sàkkoo ci dèkkandoob waa Misraam, ay gànjari xaalis ak wurus.» ³ Ci biir loolu Aji Sax ji def waa Misra yéwéne leen. Musaa sax ci boppam ku ñu naw la woon ca réewum Misra, ca dagi Firawna ya, ba ca baadoolo ya.

⁴ Musaa daldi wax Firawna ne ko: «Aji Sax ji dafa wax ne: “Bu guddi gi xaajee, maay wër Misra gépp, ⁵ te lépp luy taaw bu góor ci réewum Misra, dina dee, dale ko ci taaw bu góoru Firawna, mi toog ci jal bi, ba ci taaw bu góoru jaam bu jigéen bu fêetewoo wol, boole ci luy taaw bu góor ci jur gépp. ⁶ Dees na dégg yuux yu réy jibe Misra gépp, lu masula am, te dootu am mukk. ⁷ Waaye fépp fu bànni Israyil dèkke, dara du fa wokk nit ak mala.” Su boobaa dingeen xam ne, Aji Sax jee ràññatle waa Misra ak bànni Israyil. ⁸ Bu loolu amee mboolem sa dag yii dinañu ma sujjóotalsi te naan ma: “Demal, yaak mbooloo, mi la topp yépp!” Su ko defee ma doora dem.» Musaa nag won Firawna gannaaw, mer ba, fees. ⁹ Fekk na Aji Sax ji wax Musaa ne ko: «Li waral Firawna du leen déglu, mooy sama kéemaan yi wara fulandiwi ci réewum Misra.» ¹⁰ Musaa ak Aaróona def nañu yooyu kéemaan yépp ca kanam Firawna, waaye fekk na Aji Sax ji dэггéral boppu Firawna, ba mu tē, baña bàyyi bànni Israyil, ñu génn réew ma.

12

Lu jëm ci bésuub Mucc ba

¹ Aji Sax ji wax na ak Musaa ak Aaróona ca réewum Misra, ne leen: ² «Weer wii mooy doon ci yeen wi jiitu ci weer yi, te na doon ci yeen weer, wi jèkk ci at mi. ³ Waxleen ak mbooloom Israyil mépp ne leen, bésuub fukkeel ba ci weer wii, na ku nekk jèlal njabootam ab gätt, kër gu nekk ak gättam. ⁴ Waaye yu dee gätt bu épp waa kër ga, dañu koy bokk ak kër, gi leen gëna jege, te nañu seet nu nit ña tollu, doora tànn gätt bu dèppook la ñu mana lekk. ⁵ Gätt ba bumum am sikk te na di kuuyu menn at. Man naa doon xar mbaa sikket. ⁶ Dangeen koy denc ba fukkeel bés ba ak ñeent ci weer wii. Bu bés baa ci diggante ngon ak jant bu so, na mbooloom Israyil mépp bokk rendi seeni gätt. ⁷ Su ko defee ñu sàkk ca deret ja, taqal ca buntu kër, ga ñu ko nara lekke, taqal ca ñaari jëni bunt ba ak njéel bunt ba ca kaw. ⁸ Dañuy lakk yàpp wa cib taal, lekk ko guddig keroog, boole kook mburu mu amul lawiir ak xob yu wex. ⁹ Nañu ko wàjj, mu ne ñumm, bopp bi ak tãnk yi ak yérey biir yi. Buleen ci lekk dara lu ñorul, mbaa lu ñu baxal. ¹⁰ Buleen ci wacc dara mu fanaan, te lépp lu ci des bu bêt setee, lakkleen ba mu jeex tàkk. ¹¹ Ni ngeen koy lekke nag, nii la: bu ngeen koy lekk, dangeen di takku, sol seeni dàll, nàbb seen yet, te ngeen lekk ko ci lu gaaw. Loolu gattu saraxu bésuub Mucc ba lay doon, ñeel Aji Sax ji.

¹² «Guddig keroog maay wër réewum Misra te maay fàdd lépp luy taaw bu góor ci réewum Misra, nit ak mala, te itam maay mbugal mboolem tuuri Misra. Man maay Aji Sax ji. ¹³ Deret ji ci kër, yi ngeen dëkke nag, mooy doon seen xammikaay, ba tax bu ma gisee deret ji, musal leen. Su ko defee bu may dal ci kaw réewum Misra, menn musiba du leen lor.

¹⁴ «Bésu keroog bésu pàttliku lay doon ci yeen, ngeen war koo mággal ngir Aji Sax ji, muy dogal bu leen war fàww, yeen ak seen askan.

Lu jëm ci ayu bésu Mburu mu amul lawiir

¹⁵ «Diiru juróom ñaari fan ngeen di lekk mburu mu amul lawiir; te bés bu jëkk bi ci boppam nangeen jële seeni kër luy lawiir, ndaxte képp ku ci lekk mburu mu am lawiir, li ko dale bés bu jëkk bi, ba kera bésu juróom ñaareel ba, dees na ko dagge ci askanu Israyil. ¹⁶ Bés bu jëkk bi nangeen ci amal ndaje mu sell. Juróom ñaareelu lu ba itam nangeen ca amal ndaje mu sell; deesul liggéey lenn ci yooyu bés, lu moy ngeen togg ñam wu ñépp lekk. Loolu donj lees ciy mana def.

¹⁷ «Nangeen wormaal ayu bésu Mburu mu amul lawiir, ndaxte ci bés boobu tembe laa leen génnee réewum Misra, kurél ci kaw kurél. Kon nag nangeen wormaal bés bi, muy dogal bu leen war fàww, yeen ak seen askan. ¹⁸ Li ko dale ngoonu fukki fan ak ñeent ci weer wu jëkk wi, ba ca ngoonu ñaar fukki fan ak benn ci weer woowu, nangeen ci lekk mburu mu amul lawiir. ¹⁹ Diiru juróom ñaari fan, bu dara ci lawiir am fenn ci seeni kër, ndax képp ku lekk lu am lawiir, dees na ko dagge ci askanu Israyil, muy doxandéem mbaa doomu réew mi. ²⁰ Buleen ci lekk lenn lu am lawiir, te fépp fu ngeen dal, na mburu mu ngeen mana lekk di mu amul lawiir.»

Waajal nañu bésu Mucc ba

²¹ Ba loolu amee Musaa woo magi Israyil ñépp, ne leen: «Demleen tànnali seeni njaboot ay gàtt, te ngeen rendi gàtt yooyu, def ko saraxu bésu Mucc bi. ²² Dangeen di jël ab takku cari isob*, capp ci deret ji ci ndab li, diw ci seen njëel bunt ak seen ñaari jëni bunt, te bu kenn ci yeen wees buntu kéram ba bët set. ²³ Su ko defee, bu Aji Sax jiy wër ci biir réew mi, di fàdd waa Misra, ba gis deret ji taq ci seen njëel bunt ak seen ñaari jëni bunt, day teggi bunt ba, te du bàyyi malaakam reykak bi, mu dugg seeni kër, di fàdde.

²⁴ «Nangeen sàmmonteeke loolu, muy dogal bu leen war fàww, yeen ak seen askan. ²⁵ Keroog bu ngeen duggee nag ca réew ma leen Aji Sax ji jox na mu leen ko dige woon, nangeen sàmmonteeke jooju aada. ²⁶ Te bu leen seeni doom laajee ne leen: “Lu aada jii di wund?” ²⁷ waxleen leen ne leen: “Loolu sarax la ñeel Aji Sax ji ngir bésu Mucc ba, ndax la mu teggi woon kéri bànni Israyil ca Misra, kera ba muy fàdd waa Misra te musal ca sunuy kër.»

Ba mu waxee loolu ba noppi, mbooloo ma sujjóot, mággal Yàlla. ²⁸ La Aji Sax ji santoon Musaa ak Aaróona, noonu rekk la ko bànni Israyil defe.

Yarub fukkeel ba, di deewu taaw ya

²⁹ Ca xaaju guddi la Aji Sax ji fàdd mboolem taawi réewum Misra yu góor, dale ko ca taaw bu góor bu Firawna, ma toog ca jal ba, ba ca taaw yu góor yu nit ña ñu tēj kaso, boole ca lépp luy taaw bu góor ca jur ga. ³⁰ Firawna nag jóg ca guddi ga, moom ak dagam yépp ak waa Misra gépp, yuux gu réy jibe ca Misra, ndax kéroo kër, du genn gu nit deewul.

³¹ Ba loolu amee Firawna woolu Musaa Aaróona ca guddi googu, ne leen: «Ayca! Mott! Soreleen sama waa réew, yeen ak seeni bokk! Laggleen, jaamuji Aji Sax ji, li ngeen bëgg. ³² Te itam yóbbaaleen seen juroo jur, gu gudd ak gu gàtt, li ngeen bëgg rekk, te ne mott! Waaye ñaanaaleen ma seen Yàlla nag, mu barkeel ma.»

Bànni Israyil gaddaay na

³³ Ba mu ko defee waa Misra soññ bànni Israyil, ngir ñu gaaw génn réew ma, ndax booba ña nga naan: «Nun ñépp ay dee!» ³⁴ Loolu tax mbooloom Israyil roñ seen xiiwi sunguf yu amagul lawiir. Ñu ñu ñu seen ndabi notukaay ca seeni malaan, gaddu. ³⁵ Fekk na bànni Israyil def la leen Musaa santoon ca waa Misra. Sàkku nañu ca ñoom ay gánjari xalis ak wurus aki yére. ³⁶ Aji Sax ji nag def waa Misra nangul bànni Israyil, ba jox leen la ñu sàkku; noonu lañu futtee waa Misra.

³⁷ Ci kaw loolu bànni Israyil jóge dëkk ba ñuy wax Ramses, jëm Sukkóot. Ña nga tollu ci juróom benni téeméeri junniy góor (600 000) te limaalessul jigéen ñaak xale ya. ³⁸ Amoon na it mbooloom nit ñu ànd ak ñoom, te di askan yu raxe, ak jur gu bare, gu gudd ak gu gàtt. ³⁹ Ñu daldi lakk mburu mu tàppandaar ca xiiw wu amul lawiir; wa ñu jële Misra. La taxoon xiiw wa ñàkk lawiir mooy dañu leena dàge Misra, ba taluñu woona fàggu lu ñu lekk.

* 12:22 12.22 isob as ngarab la su car ba sèq, ba ñu man koo diwe.

⁴⁰ Diir ba bànni Israyil nekk Misra tollu na ci ñeenti tééméeri at ak fanweer (430). ⁴¹ Keroog ca bés, ba ñeenti tééméeri at ya ak fanweer matee sèkk, ca la ñoñi Aji Sax ji génn réewum Misra, kurél ci kaw kurél. ⁴² Guddig keroog guddig teewlu la, ñeel Aji Sax ji, ngir moo leen ca génne réewum Misra, moo tax guddi googu di gu ñu jagleel Aji Sax ji, bànni Israyil gépp war cee fanaanee teewlu, ñeel Aji Sax ji, ba fàww.

Ay dogali Aji Sax jaa ngii, ñeel bésu Mucc ba

⁴³ Gannaaw loolu Aji Sax ji dafa wax ak Musaa ak Aaróona, ne leen: «Li ma dogal ci saraxu bésu Mucc bi mooy lii: Benn doxandéem du ci lekk. ⁴⁴ Waaye bépp jaam bu ñu jënd te mu xasa xaraf, man na cee lekk. ⁴⁵ Benn mangan mbaa liggeeykat bu ñu bind it du ci lekk. ⁴⁶ Genn kër lees koy lekke: bu lenn ci yàpp wi génn kër gi, te deesu ci damm benn yax sax. ⁴⁷ Mboolem ku bokk ci bànni Israyil, na def sarax bi. ⁴⁸ Su fekke ne ab doxandéem bu ngeen dëkkal dafa bégga wormaal mággalu bésu Mucc bi ngir Aji Sax ji, xaraf war na ko, te war na gépp goor gu bootu ci moom; su loolu amee, dees na ko may, mu def ko, ndax kon day mel ni doomu réew mi. Waaye kenn ku xaraf du ci lekk. ⁴⁹ Dogal bi benn lay doon, doomu réew mi ak doxandéem bi dëkk ci seen biir, bokk ci yem kepp.»

⁵⁰ La Aji Sax ji santoon Musaa Aaróona, noonu rek la ko bànni Israyil defe.

⁵¹ Bésu keroog boobe la Aji Sax ji yiwi bànni Israyil, ñu def kurél ci kaw kurél, génn réewum Misra.

13

Lu jëm ci aada, yi ñuy baaxantale

¹ Aji Sax ji waxaat Musaa, ne ko: ² «Nanga ma sédde bépp taaw bu goor, nit ak mala, lépp lu jékka juddu ci bànni Israyil, maa moom.» ³ Musaa ne mbooloo ma: «Fàttlikuleen bésu tey jii ngeen génne Misra, kërug njaam gi, ak ni leen Aji Sax ji yiwee dooley loxoom. Bu ci kenn lekk mburu mu am lawiir. ⁴ Yeena ngii tey di dem seen yoon ci weeru Abiib. ⁵ Kon keroog bu leen Aji Sax ji yóbboo réewum Kanaaneen ña ak Etteen ña ak Amoreen ña ak Eween ña ak Yebuseen ña, fa mu giñaloon seeni maam, ne dina leen ko jox, réew mu meew maak lem ja tuuroo, nangeen wormaal mággal gi ci wii weer te ngeen di ko defe nii.

⁶ «Diiru juróom ñaari fan ngeen di lekk mburu mu amul lawiir, te na bésu juróom ñaareel ba di bésu mággalug Aji Sax ji. ⁷ Mburu mu amul lawiir ngeen di

lekk diiru juróom ñaari fan; te it bu lenn lu am lawiir mbaa lawiir sax am fenn ci seen biir réew. ⁸ Bu keroogee na ku nekk xamal doomam, ne ko: «La ma Aji Sax ji defaloon, ba ma génnee Misra, moo waral lii tey.»

⁹ «Na mággal googu di pàttliki ci yeen. Na mel ni màndarga mu nekk ci seen loxo ak seen jë. Su ko defee ngeen saxoo jàngle yoonu Aji Sax ji, ndax ci dooley loxoom la leen Aji Sax ji génnee Misra. ¹⁰ Nangeen sàmmontee bii dogal ci bésam, at mu nekk.

¹¹ «Bu leen Aji Sax ji yóbboo nag réewum Kanaaneen ña, noonee mu leen ko giñale woon, yeen ak seeni maam, ba jox leen ko, ¹² nangeen sédde Aji Sax ji lépp lu jékka juddu, rendil ko ko: lépp luy goor lu seen jur taawloo, Aji Sax jee boroom. ¹³ Waaye lépp lu mbaam-séf taawloo, nangeen ko jote kuuyum xar, mu wuutu ko. Bu ngeen ko jotul, nangeen damm loos wi. Te itam jotleen képp kuy taaw bu goor ci seeni doom. ¹⁴ Su ko defee, bu leen seen doom laajee èllég, ne leen: «Lii lu muy tekki?» ngeen wax ko ne ko: «Dooley loxol Aji Sax jee nu génne Misra, kërug njaam ga. ¹⁵ Ba Firawna tēwee, bañ noo bàyyi, nu dem, Aji Sax jee rey mboolem lu doon taaw bu goor ca réewum Misra, taawu nit ba ci taaw mala. Looloo waral nuy rendil Aji Sax ji mépp mala mu jékka juddu, di goor, sunu bépp taaw bu goor it, ñu war koo jote sarax su nu koy rendil.» ¹⁶ Na yooyu sarax mel ni màndarga mu nekk ci seen loxo ak seen jë, di leen fàttli ni nu Aji Sax ji génnee Misra ci dooley loxoom.»

Aji Sax ji jiite na mbooloo ma

¹⁷ Firawna bàyyi na mbooloo ma, ñu dem, waaye Yalla jaaralewu leen ca yoon, wa jëm réewu Filisti, doonte moo génoona gàtt. Booba Yalla dafa xam ne, su mbooloo ma sóoboo ci ay xare ci woowu yoon, dañuy yoqi, bay xalaata dépp, dellu Misra. ¹⁸ Moo tax Yalla wiiriloo mbooloo ma, ñu jaare ca màndinj ma, jëm ca géju Barax ya. Ba mu ko defee bànni Israyil fagaru ba jekk, daldi génn Misra.

¹⁹ Musaa nag yóbbaale yaxi Yuusufa, ma giñloo woon bànni Israyil, ne leen: «Yalla dina leen geesu moos, te bu keroogee nangeen fi jële samay yax, yóbbaale.»

²⁰ Ñu bàyyikoo Sukkóot, dal Etam ca wetu màndinj ma. ²¹ Bu bèccégee nag Aji Sax ji nekk ci seen kanam ci biir taxaaru niir, di leen jiite ca yoon wa, te bu guddee mu nekk ci biir taxaaru sawara, di leen leeral, ba ñu mana dem guddi ak bèccég. ²² Du bèccég bu niir wa jóge ca kanam

mbooloo ma, te du guddi it gu sawara wa masa wuute.

14

Firawna dabi na bànni Israyil

¹ Aji Sax ji waxati Musaa, ne ko: ² «Waxal bànni Israyil, ne leen ñu walbatiku dali fa jækkaarlook Pi Axirof, ca diggante Migadol ak géēju Barax ya. Dal-leen foofa jækkaarlook Baal Cefon ca tefes ga. ³ Su ko defee Firawna da naan: «Bànni Israyil de dañoó réer ci àll bi, ba faf keppu ci màndiñ mi.» ⁴ Gannaaw loolu maay dègèral boppu Firawna, mu topp leen, ba ma jaare ca siwal sama ndam, ndax maay daan Firawnaaki xarekatam yépp, te waa Misra dinañu xam ne, man maay Aji Sax ji.» Musaa jottli leen ko, ñu def noona.

⁵ Ba ñu yégalee Firawna buuru Misra, ne mbooloo ma daw na, mooki dagam dañoó soppi xalaat ca mbirum bànni Israyil. Ñu ne: «Waaw nun, li nu def nag? Ana luy ndeyi yiwi bànni Israyil, ba dootuñu nu surgawu?» ⁶ Firawna takklu watiiru xareem, ànd aki jambaaram. ⁷ Mboolem watiiri xarey Misra la yóbbu, jiital juróom benni téeméer, ya ca gën, bu ci nekk yeb ay kilifay xarekat*.⁸ Aji Sax jee dègèral boppu Firawna buuru Misra, mu toppi bànni Israyil, fekk bànni Israyil ñoom, ña ngay génn réew ma ci seen teeyu bakkan. ⁹ Waa Misra topp leen, ñook fasi Firawna yépp, ak watiiri xareem ak dawalkatam yaak xarekatam ya, ba dab leen fa ñu dal ca tefesu géēju Barax ya, fa jækkaarlook Baal Cefon ca wetu Pi Axirof.

¹⁰ Firawnaa ngay jubsì, bànni Israyil séentu, yemuñu ci ñu moy waa Misra, ñu dikk, jubsì leen. Tiitaange lu réy jàpp bànni Israyil. Ñu woo Aji Sax ji wall. ¹¹ Ci biir loolu ñu ne Musaa: «Xanaa Misra dafa amul ay sèg, ba nga di nu indi ci màndiñ mi, nu deesi fi? Loo nu doon génnée Misra? ¹² Xanaa du lii lanu la waxoon ca Misra? Noon nanu la, nga bàyyi nu, nu surgawu waa Misra, ndax surgawu waa Misra moo nu gènal nu dee ci màndiñ mi!»

¹³ Musaa nag ne mbooloo ma: «Buleen tiit, neleen tekk te xool li Aji Sax jiy def, ba xettli leen tey jii. Ndax kat waa Misra yii ngeen di gis nii tey, dootuleen leen gis mukk. ¹⁴ Aji Sax ji moo leen di xeexal, yeen kay neleen tekk rekk.»

Yàlla xàll na gééj ga

¹⁵ Ci kaw loolu Aji Sax ji wax Musaa ne ko: «Loo may wooye wall? Waxal bànni Israyil, ne leen ñu dem rekk, ¹⁶ te yaw nanga yékkati saw yet, tàllal sa loxo

mu tiim gééj gi, ba xàll ko, ndax bànni Israyil mana dox ci suuf su wow, jàll gééj gi. ¹⁷ Man nag maay dègèral boppu waa Misra, ba ñu dugg, topp leen. Su ko defee ma siwal sama ndam, ndax dinaa yar Firawnaaki xarekatam yépp, boole ci watiiri xareem aki gawaram. ¹⁸ Bu ma dumaa Firawna, boole kooki watiiram aki gawaram, ba doxe fa siwal sama ndam, waa Misra dinañu xam ne man maay Aji Sax ji.»

¹⁹ Ci kaw loolu malaakam Yàlla, ma féete woon xarekati Israyil kanam naka jekk te di leen jiite, daldi toxu, féete leen gannaaw. Niir, wa leen jiitu woon it walbatiku, taxaw ca seen gannaaw, ²⁰ dox diggante dalu waa Misra ak dalu bànni Israyil. Niir waa nga lëndème genn wet, wet ga ca des di leer ca guddi ga, ba tax guddi ga gépp benn dal manula fekki moroom ma.

²¹ Gannaaw ga Musaa tàllal loxoom, mu tiim gééj ga, Aji Sax ji yebal ngelawal penku lu réy guddi ga gépp, jañaxe ko gééj ga, ndox ya xàjjalikoo, ba suuf su wow feeñ. ²² Bànni Israyil nag dugg ca biir gééj ga, di dox ci kaw suuf su wow, ndox ya ne sàtt, ñagal leen ndijoor ak càmmoñ.

²³ Ba mu ko defee waa Misra daw topp ca ñoom, fasi Firawna ak watiiri xareem aki gawaram ànd, ñoom ñépp ne yentam ca biir gééj ga. ²⁴ Ba njël jotee Aji Sax ji dafa tollu ci biir taxaaru sawara wu ànd aku niir, di xool xarekati Misra, tiital leen, ñu fèlxxoo. ²⁵ Mu boole ca téye mbegey watiiri ya, ba neexatuñoo dawal. Waa Misra ne: «Nan daw gaaw, ba récc bànni Israyil, ndax kat Aji Sax ji moo leen di xeexal, te moo dal ci sunu kaw!»

²⁶ Aji Sax ji nag wax Musaa ne ko: «Tàllalal sa loxo, mu tiim gééj gi, ndax ndox mi délsi, ba sottiku ci kaw waa Misra, ñook seen watiiri xare aki seeni gawar.» ²⁷ Musaa tàllal loxoom, mu tiim gééj ga. Ba bët di set gééj ga dellu na, mel na mu meloon. Waa Misra di daw, gééj ga wal, dogale leen, Aji Sax ji fèl leen, ñu ne ca menteñ. ²⁸ Ndox ma daa délsi, boole mèdd watiiri xare yaak gawar ya, mboolem xarekati Firawna, ya leen toppoon ca biir gééj ga rekk. Kenn réccul. ²⁹ Waaye bànni Israyil ñoom, ci suuf su wow lañu jaare ca digg gééj ga, jàll, ndox ya ne sàtt, ñagal leen ndijoor ak càmmoñ.

³⁰ Noona la Aji Sax ji xettlee bànni Israyil bésub keroog ca waa Misra, ñu gis néewi waa Misra ya ne wetar ca tefes ga. ³¹ Ba Israyil gisee na Aji Sax ji jowe loxoom bu baax ca xareem baak waa Misra, dañu

* 14:7 14.7 kilifay xarekat: watiiru xare yi ñaar la daan yeb, kiy dawal ak kiy fitt, waaye bii yoon Firawna da caa tofal njiitu xarekat, mu fiettee leen.

daldi ragal Aji Sax ji, teg ca am kóolute ci Aji Sax ji ak ci Musaa, jaamam ba.

15

Woyu Musaa waak bànni Israyil

¹ Ba loolu amee nag Musaa ak bànni Israyil woy Aji Sax ji, màggal ko. Ña nga naan:

«Ma woy Aji Sax ji, ngir ndamam li kawee kawee.

Fas ak gawaram la fab, xalab gééj.

² Sama doole, sama kaaraange, Ki Sax a; te mooy sama wall tey.

Mooy sama Yàlla, ji may tagge, sama Yàllay maam, ji may joobe.

³ «Aji Sax ji jambaari xare ji,

Aji Sax jeey turam!

⁴ Watiiri Firawnaaki xarekatam la fab sànni gééj;

ñeyi xareem ya labandoo ca géēju Barax ya,

⁵ xóote ya boole sàng, ñu ne ca biir menteñ niw doj.

⁶ «Aji Sax ji, sa kàttanu ndijoor a yéeme! Aji Sax ji, sa ndijoor a ne noon ba rajax.

⁷ Sa màggaay gu yéemee nërmeel say noon.

Yaa yebal sa mer, mu ne jippét, xoyom leen ni boob.

⁸ Nga wal sag noo, ndox ya tegloo, wal ma ne sàtt, jaloo jalu, ndoxi xóotey gééj way deen!

⁹ «Noon baa nga naa: “Maay dàqe, dabe, lèl alal ja, séddale séddu, ba xol sedd, ne saamar boset, teg leen loxo.”

¹⁰ Waaye sa ngelaw nga wal, gééj mèdd leen, ñu diigandoo ni beteex biir gééj mbàmbulaan!

¹¹ «Ana kuy sa moroom ci tuur yi, yaw Aji Sax ji?

Kuy sa dend, yaak sa sellaay bu yéeme, sa yànjaay bu raglook sa jéf yu yéeme?

¹² Yaa tàllal sa ndijoor, suuf wonn leen.

¹³ «Sa ngor nga jiitee mbooloo, mi nga jot, te sa kàttan nga leen di yóbboo ca sa kër gu sell.

¹⁴ Jaambur ñay dégg, di rag-ragi, tiitaange ne taral waa Filisti,

¹⁵ kilifay waa Edom jaq,

njiiti Mowab di kat-kati,

mboolem waa Kanaan tiit, ne yasar;

¹⁶ tiitaangeek njàqaree ne milib ca seen kaw.

Sa kàttan a tax ñu mel niw doj, ne yàcc,

ba kera sa ñoñ jàll, Aji Sax ji,

ba kera askan wa nga goreel, jàll,

¹⁷ te yaa leen di sampi ca sa tund wa nga séddoo,

fa nga waajal sa dèkkuwaay, Aji Sax ji, bérab bu sell ba nga sàkke sa loxol bopp, Boroom bi.

¹⁸ Aji Sax jeey Buur, tey ak èllég ba fàww.»

¹⁹ Ci kaw loolu fasi Firawna ànd ak watiiri xareem aki gawaram, tàbbi gééj, Aji Sax ji delloo ndoxi gééj ga ca seen kaw, bànni Israyil ñoom, jaare joor gu wow ca digg gééj ga.

Maryaama woy na

²⁰ Yonent Yàlla Maryaama, jigéenub Aaróona nag nàbb tabala, jigéen ñépp topp ko, génn di fecc, tabala ya jiin.

²¹ Maryaamaa nga leen di dèbbeel, naa:

«Woyleen Aji Sax ji, ngir ndamam li kawee kawee.

Fas ak gawaram la fab, xalab gééj.»

Lu jëm ci ndox mu wex ma

²² Gannaaw loolu Musaa jële bànni Israyil géēju Barax ya, ñu wéy, wuti màndinj, ma ñuy wax Sur. Dox nañu ñetti fan ca màndinj ma, gisuñu ndox. ²³ Ñu dem, ba àgg fu ñu naan Maara, waaye manufoo naan ca ndoxum Maara, ndax wex. Looloo waral ñu tudde bérab ba Maara (mu firi Fu wex). ²⁴ Mbooloo ma nag di diinjat Musaa, naan: «Ana ndox mu nuy naan nag?» ²⁵ Musaa woo Aji Sax ji wall, Aji Sax ji won ko dammitu bant, mu sànni ko ca ndox ma, ndox ma neex.

Foofa la Aji Sax ji dogalal bànni Israyil ay sàrti yoon ak ndigal, te fa la leen nattoo itam. ²⁶ Da ne leen: «Bu ngeen farloo ci déggal seen Yàlla Aji Sax ji, di def li mu rafetlu, di teewlu tey jéfe ay santaaneem, di sàmm bépp dogali yoonam, su boobaa duma leen teg lenn ci jàngoro, yi ma tegoon waa Misra, ndax man maay Aji Sax, ji leen di wérloo.»

²⁷ Ci kaw loolu ñu dem ba Elim, fekk fa fukki bëti ndox ak ñaar, ak juróom ñaar fukki garabi tàndarma. Ñu dal foofa ca wetu ndox ma.

16

Aji Sax ji leel na bànni Israyil

¹ Gannaaw gi mbooloom bànni Israyil gépp bàyyikoo fa Elim, dem, ba keroog fukki fan ak juróom, ca weer wa topp ca wa ñu génne réewum Misra, ñu doora agsi

* 16:1 16.1 Sinayi mooy Oreb ba tey.

màndiŋ Ciin diggante Elim ak Sinayi*.
 2 Mbooloom bànni Israyil gépp nag di diinjat Musaa ak Aaróona ca màndiŋ ma.
 3 Ña nga naa leen: «Céy ngalla nun, su nu sañoon dee, Yalla moom nu ca réewum Misra, fa nu daan uufe cini yàpp, ñam wa ne gaññ, nu suur këll. Yeena nu indi ba ci màndiŋ mii, ngeen nara xiifloo mbooloo mii mépp, ba ñu dee.»

4 Ba loolu amee Aji Sax ji wax Musaa ne ko: «Maa ngi nii di tawal bànni Israyil ñam wu jóge asamaan, te na mbooloo mi dem bés bu set, fori njêlu bés ak bés. Ma nattu leen ci, ba xam ndax dinañu doxe sama ndigalu yoon am déet. 5 Waaye bu ñu demee ba bés sub juróom benneel ba, ba togg la ñu ca indi, day tollook ñaar-cay dayo ba ñuy for bés bu set.»

6 Musaa ak Aaróona nag xamal bànni Israyil ne leen: «Bu ngoonee dingeen xam ne, Aji Sax ji moo leen génne réewum Misra, 7 te bu bêt setee dingeen gis manoorey Aji Sax ji, ndaxte dégg na ngeen di diinjat Aji Sax ji, ndax nun kat tekkiwunu dara, ba ngeen di nu diinjat.»
 8 Musaa teg ca ne: «Moo tax Aji Sax ji dina leen jox yàpp wu ngeen lekk ngon, te bu bêt setee mu jox leen ñam wu leen reggal, ndax Aji Sax jee dégg ngeen di ko diinjat. Nun lu nu ci? Du nun ngeen di diinjat waaye yeen ak Aji Sax ji la.»

9 Ba loolu wéyee Musaa ne Aaróona: «Waxal mbooloom bànni Israyil gépp, ne leen ñu dem ba ca kanam Aji Sax ji, ndaxte dégg na seeni diinjat.»
 10 Naka la Aaróona di wax ak mbooloom Israyil mépp, ñu jekki ne gees ca màndiŋ ma, daldi yem ci aw niir, leeru Aji Sax ji di ca feeñ. 11 Aji Sax ji wax Musaa ne ko: 12 «Dégg naa diinjati bànni Israyil. Wax leen ne leen, diggante ngon ak jant bu so, dinañu lekk yàpp, te bu bêt setee ñu lekk aw ñam, ba regg, ndax ñu xam ne man Aji Sax ji, maay seen Yalla.»

Aji Sax ji wàcce na mànn aki picc

13 Ba ngon jotee ay picci pèrèntaan† dikk, fees dal ba. Ba bêt setee lay bay wàcc ca dal ba. 14 Naka la lay ba bàcc, ñu jekki gis lu sew lale ca màndiŋ ma, def fepp yu sew ca biir, te mel ni tawub yuur, tege ca suuf. 15 Bànni Israyil gis ko, di wax ca seen biir naan: «Lii lu mu?» ndax xamuñu woon lu mu doon. Musaa ne leen: «Lii mooy ñam wu leen Aji Sax ji jox, ngeen lekk. 16 Aji Sax ji dafa santaane ne: “Na ku nekk for lu mat njêlam, bopp bu ne andaar‡, te mu natt ko ci limu nit, ñi mu bokkal xayma.”» 17 Bànni Israyil

def noona, ñii for lu bare, ñee lu néew. 18 Waaye ba ñu ko nattee ci andaar, ña sàkkoon lu bare amuñu lu èpp, te ña sàkkoon lu néew yéeslewuñu. La ñu for dafa tolloo tembe ak seen njël. 19 Musaa ne leen: «Bu ci kenn wacc dara, mu fanaan.»
 20 Waaye dégluwuñu Musaa, am na ñenn ca ñoom ñu ca wàññi, fanaanal, mu def ay sax, xasaw xunn. Musaa nag mere leen.

21 Suba su ñu xéyaan nag, ku nekk for ca njêlam, ndax bu naaj wa tàngaan, mu seey.

Aji Sax ji santaane na bés sub Noflaay

22 Ba bésu juróom benneel ba jotee, dañoo for lu mat ñaari njël, ku nekk am ñaari andaar, njiiiti mbooloo ma nag dem yeggeji ko Musaa, 23 mu ne leen: «Loolu la Aji Sax ji wax, te li muy tekki mooy: èllég bésu dal-lu la, di bés sub Noflaay bu sell ñeel Aji Sax ji. Lakkleen li ngeen di lakk, baxal li ngeen di baxal, te lu ci des, ngeen denc ba suba.»
 24 Ba ñu dencee la ca des ba ca èllég sa, na ko Musaa santaanee, xasawul, saxewul. 25 Musaa wax leen ne leen: «Lekkleen li des tey, ndax tey jii bés sub Noflaay la, ñeel Aji Sax ji, te dungeen ko gis tey ci àll bi. 26 Juróom benni fan ngeen koy for, waaye bés sub juróom ñaareel bay bés sub Noflaay, kenn du ko gis.»

27 Terewul mu am ñu fori ca bés sub juróom ñaareel ba, waaye gisuñu dara. 28 Ca la Aji Sax ji wax Musaa ne ko: «Waaw yeen nag, dungeen ma noppee gántalal samay santaaneek samay ndigali yoon mukki? 29 Nangeen xam xéll ne, man Aji Sax ji, maa leen may bés sub Noflaay ngir ngeen nopplu, te looloo tax ma may leen dundub ñaari fan ci bés sub juróom benneel bi. Kon nag bés sub juróom ñaareel ba, na ku nekk toog fi mu nekk, bu ci kenn génnati fi mu dékk.»
 30 Ba loolu amee bànni Israyil di nopplu bés sub juróom ñaareel ba.

Mànn ma jar naa fàttliku

31 Waa kër Israyil nag tudde ñam wa mànn (mu firi Lii lu mu?). Dafa meloon ni pepp, mi ñuy wax koryanda, te weex, di saf lu mel ni nàkk bu ànd ak lem. 32 Ci biir loolu Musaa ne: «Aji Sax ji dafa santaane ne: “Sàkkleen ci andaar, denc ngir seeni sèt ak seeni sètaat. Su ko defee ñu gis ñam, wi ma leen daan leel ca màndiŋ ma, gannaaw ba ma leen génnee réewum Misra.”»

33 Musaa wax Aaróona ne ko: «Fabal ndab, def ci andaaru mànn, teg ko fi

† 16:13 16.13 picci pèrèntaan: xeetu picc la, muy nirook naat te gën koo tuuti. ‡ 16:16 16.16 andaar: moom lañu tekkee omer ci ebré, te muy natt buy tollu ci ñaari liitar.

kanam Aji Sax ji, dencal ko seeni sèt ak seeni sètaat.»

³⁴ La Aji Sax ji santoon Musaa la Aaróona def, daldi koy teg ca kanam gaal gay def àlluway kóllère ga^S, ñu denc ko fa. ³⁵ Bànni Israyil dunde nañu mànn diiru ñeent fukki at, ba kera ñu agsee réew mu ay nit dèkke, gannaaw ba ñu jéggee kemu réewum Kanaan.

³⁶ Ñu jàpp ne andaar, boo ci amee fukk, mooy benn efa*.

17

Ndox balle na ciw doj

¹ Gannaaw loolu mbooloom bànni Israyil gépp bàyyikoo màndiŋ Ciin, di dox ak a taxaw, ci ndigalal Aji Sax ji. Ñu dem ba Refidim, dal fa. Foofa nag mbooloo ma amuñu woon ndox mu ñu naan. ² Ñu jote faak Musaa, naan ko: «Joxleen nu nag ndox mu nu naan!» Musaa ne leen: «Ana lu ngeen joteek man? Aji Sax ji ngeen di seetlu nag?» ³ Mbooloo ma mar na fa, bay xultu ci kaw Musaa, naan: «Loo nu doon jële Misra nag, xanaa du boole nu rey ndax mar, nook sunuy doom ak sunuy gétt?» ⁴ Ba mu ko defee Musaa woo Aji Sax ji wall, ne ko: «Nu may def ak mbooloo mii? Des na tuuti de, ñu dóor ma ay doj, ba ma dee.» ⁵ Aji Sax ji ne Musaa «Àndal ak ñeenn ci magi Israyil, nga jaar ci kanam mbooloo mi, yóbbaaale yet, wa nga dóoroon ca dexu Niil ga. Nàbb ko ci sa loxo te dem. ⁶ Man dinaa taxaw ci sa kanam ci doj woowu ca tundu Oreb. Dóoral ci doj wi, su ko defee ndox dina ci génne, mbooloo mi naan.» Musaa def noona ca kanam magi Israyil ña. ⁷ Bérab boobu la Musaa wooye Maasa (mu firi Nattu). Mu wooye ko itam Meriba (mu firi ab Jote), ndax joteb bànni Israyil ba fa amoon, ak na ñu fa nattoo Aji Sax ji, naan: «Moo Aji Sax ji ndax mu ngi ci sunu biir, am déet?»

Amalegeen ña xare nañook Israyil

⁸ Ba loolu weese Amalegeen ña dikk, xareek bànni Israyil ca Refidim. ⁹ Musaa ne Yosuwe*: «Tànnal nu ay xarekat te nga dem xeex ak Amaleg. Èllég dinaa taxaw ca kaw tund wa, nàbb yetu Yàlla wi ci sama loxo.» ¹⁰ Yosuwe def la ko Musaa wax, di xeex ak Amaleg. Musaa ak Aaróona ak Ur nag ànd yéeg ba ca kaw tund wa. ¹¹ Ci kaw loolu saa yu Musaa yékkatee loxoom, Israyil man, saa yu wàccee loxo ba, Amaleg man. ¹² Musaa nag mujj sonn ndax loxo yu toqi; ñu jël aw doj, tegal

ko, mu toog ca, Aaróona ak Ur séq ko, ku ci nekk taawu benn loxo, loxoom ya ne sàtt taxaw, ba jant so. ¹³ Ba mu ko defee Yosuwe duma Amaleg ak mbooloom, leel leen ñawkay saamar.

¹⁴ Ba loolu amee Aji Sax ji wax Musaa ne ko: «Bindal lii xew cib téere, muy pàttli, te nga xamal Yosuwe ne ko, raafal laay def askanu Amaleg, ba ñu jeex tàkk, ba deesatu leen fàttliku fu asamaan tiim.»

¹⁵ Musaa nag sàkk fa sarxalukaay, tudde ko tur wuy tekki «Aji Sax jeey sama raaya».

¹⁶ Booba la wax ne, gannaaw loxoo ñemee xàcci, jëm ci ngànguney Aji Sax ji[†], Aji Sax ji dootu noppee xareek Amaleg ba fàww.

18

Gorob Musaa yedd na Musaa

¹ Yetto sarxalkatu réewum Majan ba, baayu soxnas Musaa, dafa dégg mboollem la Yàlla defal Musaa ak bànni Israyil ñoñam ak ni Aji Sax ji génnee Israyil Misra. ² Ci kaw loolu Yetto gorob Musaa, ànd ak Sipora soxnas Musaa, sa Musaa yehaloon ca kër baayam, ³ boole kook ñaari doomi Musaa yu góor ya, kenn ka di Gersom (mu firi Doxandéem fii), ndaxte Musaa da ne woon: «Doxandéem laa fii.» ⁴ Ka ca des mu tudde ko Elyeser (mu firi Yàlla dimbali na ma), ndax da ne woon: «Sama Yàllay baay mooy sama ndimbal te moo ma musal ci saamaru Firawna.» ⁵ Yetto, gorob Musaa nag yóbbul Musaa soxnaam aki doomam ba ca màndiŋ ma, fa Musaa dal ca kaw tundu Yàlla wa. ⁶ Mu yónnee ca Musaa, ne ko: «Man Yetto, sa goro, maa ñew fi yaw, ànd ak sa soxna ak sa ñaari doom yu góor.» ⁷ Musaa génn gatandu ko, sujjóotal ko, foon ko; ñu jàmmante ba noppi, doora dugg ca xayma ba.

⁸ Musaa nag nettali goroom mboollem li Aji Sax ji def Firawna ak waa Misra ndax Israyil, ak jafe-jafe, ya leen dab ca yoon wa yépp, ak na leen ca Aji Sax ji xettlee. ⁹ Yetto bég lool ca la Aji Sax ji def lépp, ba baaxe Israyil, xettli leen ca noteulu waa Misra. ¹⁰ Yetto nag ne: «Cant ñeel na Aji Sax, ji leen xettli ci notaangey waa Misra ak notaangey Firawna, xettliwaale mbooloo mi ci notaangey waa Misra. ¹¹ Léegi nag xam naa ne, Aji Sax jee sut mboollem tuur yi, ndax la mu def, ba leen waa Misra torxalee.» ¹² Yetto, gorob Musaa, daldi sàkk saraxu rendi-dóomal ak yeneen sarax, jagleel ko Yàlla. Aaróona ak magi Israyil ñépp dikk, ñu bokk lekk ñook gorob Musaa fa kanam Yàlla.

§ 16:34 16.34 Seetal ci 25.10-12. * 16:36 16.36 efa ab natt la woon, bu wara tollook ñeent fukki liitar ak juróom.

* 17:9 17.9 Yosuwe: seetal ci 33.11. † 17:16 17.16 Manees na koo tekkee nii it: raayay Aji Sax ji,

¹³ Ca èllëg sa Musaa toog, di àtte mbooloo ma, ñu wër Musaa suba ba ngoon. ¹⁴ Gorob Musaa gis mbooloom la Musaa di defal mbooloo ma. Mu ne ko: «Waaaw, ni ngay jëflanteek nit ñi nag? Lu tax ngay toog, di àtte yaw rekk, mbooloo mépp wër la, suba ba ngoon?» ¹⁵ Musaa ne goroom: «Li ko waral mooy nit ñi dañuy dikk, di laaj li dëppook àttey Yàlla. ¹⁶ Bu ñu jotee, dañuy ñëw diis ma ko, su ko defee ma àtte leen ci mbir mi leen jotale, ba noppi xamal leen santaaney Yàlla ak ndigali yoonam.» ¹⁷ Goro ba ne ko: «Ni ngay doxale gënul. ¹⁸ Dangay dajji sa bopp donj, dajji mbooloo mi, ndax yen bee diis, ba èpp ci sa kaw; doo ko àttan yaw rekk. ¹⁹ Déglu ma fii, ma digal la, tey ñaan Yàlla ànd ceek yaw. Danga fee toogal mbooloo mi ci kanam Yàlla, di diis Yàlla jotey nit ñi, ²⁰ di leen xamal ay santaane aki ndigali yoon, di leen won fi ñu wara jaare ak li ñu wara def. ²¹ Kon nag dangay tann ci biir mbooloo mi mépp ay góor ñu mat, ñu ragal Yàlla te dëgggu, boole ci sib alalu ger. Su ko defee nga tabb leen, ñu yilif ay kurél yu mat junniy nit ak yu tollu ci téeméeri nit, ba ci juróom fukki nit mbaa fukki nit. ²² Nga bàyyi leen nag, ñuy àtteel mbooloo mi bés bu nekk seeni jote. Su ko defee, mbooloom réeroo bu mag, ñu indil la ko; mbooloom réeroo bu sew nag, ñoom ñu àtteel ko seen bopp. Noonu ngay woyofale sab yen, ñu japple la ci. ²³ Boo defee noonu, te Yàlla ànd ci, dinga ko mana dékku, mbooloo mii mépp it mana dellook jamm ca seeni kër.»

²⁴ Musaa nag topp ndigalu goroom, daldi def mbooloom la mu ko wax. ²⁵ Mu seet ca bànni Israyil gépp, tann ca góor ñu mat, fal leen, ñu yilif mbooloo ma: ñii jiite kuréli junniy nit; ñii, téeméer; ñii, juróom fukk; ñii fukk. ²⁶ Nuy àtte nag mbooloo ma saa su nekk. Su dee mbir mu lëj, ñu indil Musaa; mbooloom mbir yu sew-sewaan ya, ñoom ñu àtte ko. ²⁷ Ba loolu weesee Musaa tagtgoom goroom, mu delu réewam.

19

Yàlla xamle na kóllëreem

¹ Keroog benn fan ca ñetteelu weer wa, gannaaw ba ñu génnee Misra, ca lañu agsi màndiñu Sinayi. ² Fekk na ñu bàyyikoo Refidim, doora duggsi màndiñu Sinayi, daldi dal ca màndiñ ma. Israyil a nga daloon foofa janook tund wa.

³ Ba loolu amee Musaa yéeg, jëm ca Yàlla. Aji Sax ji jaar ci turu Musaa foofa ca kaw, ne ko: «Nanga wax ak waa kër Yanqóoba te nanga ma siwtaaneel ci bànni Israyil googu, lii ma lay wax:

⁴ «Yeena gisal seen bopp ni ma def waa Misra, te yeen, ma boot leen, ni jaxaay di fireey laafam, boot ay doomam, ba ngeen jegesi ma fii. ⁵ Léegi nag su ngeen ma déggalee bu baax, di samm sama kóllëre ak yeen, yeenay doon sama moomeelu bopp ci mbooloom askan yi. Dégg la, àddina wërngal képp maay Boroom, ⁶ waaye yeenay doon nguuru sarx-alkati Yàlla, te di xeet wu sell.» Kaddu yooyu ngay wax bànni Israyil.»

⁷ Musaa delu, woolu magi mbooloo ma. Mu jottli leen mbooloom wax jooju ko Aji Sax ji dénk. ⁸ Mbooloo ma mépp bokk benn baat, àddu ne: «Li Aji Sax ji wax lépp dinanu ko def.» Ci kaw loolu Musaa dem yegge Aji Sax ji tontal mbooloo ma.

⁹ Aji Sax ji wax Musaa ne ko: «Ma ne, dinaa yiiroo niir wu fatt, dikk ba agsi fi yaw, ngir bu may wax ak yaw, mbooloo mi di ci dégg, ndax ñu wóolu la ba fàww.» Ba loolu amee Musaa baamtul Aji Sax ji tontal mbooloo ma.

Yàlla wàcc na ca kaw tundu Sinayi

¹⁰ Gannaaw loolu Aji Sax ji waxaast Musaa ne ko: «Dellul ca mbooloo ma, te nanga leen sell-luloo tey ak èllëg. Nañu fóot seeni yére, ¹¹ te waajal gannaaw-èllëg, ndax gannaaw-èllëg man Aji Sax ji maay wàcc ci kaw tundu Sinayi ci kanam mbooloo mépp. ¹² Sakkalal mbooloo mi ag kemu fi wër tund wi, te nga wax leen ne leen: “Moytuleena yéeg ci kaw tund wi, mbaa ngeen di laal tund wi fenn. Képp ku laal tund wi, dees na ko rey. ¹³ Bu loxo laal kooka, waaye nañu ko dóor ay doj ba mu dee, mbaa ñu jam ko. Su dee nit, su dee mala, bumu dundati.” Bu liit gi jibee donj nag lañuy doora mana dem ba ca tund wa.»

¹⁴ Ba loolu amee Musaa wàcc tund wa, delu ca mbooloo ma. Mu sell-luloo leen, ñu fóot seeni yére, ¹⁵ ba noppi, mu wax leen ne leen: «Waaajal-leen gannaaw-èllëg, te li feek booba, buleen fi ànd ak jigéen.»

¹⁶ Keroog ca gannaaw-èllëg sa, naka la njël jot, muy dénook a melax, ànd akaw niir wu fatt ca kaw tund wa, ak coowal liit gu xumb. Waa dal ba bépp a nga tiit, bay lox. ¹⁷ Musaa daldi jiite mbooloo ma, ñu génn dal ba, ngir dajejeek Yàlla.

Ñu dem ba ca suufu tund wa, taxaw fa. ¹⁸ Fekk na tundu Sinayi wa wépp di sël-sëleeku saxar, ndax Aji Sax ja fa wàcc ci biir sawara. Saxar saa ngay gilli ni saxaru puuru ban, tund wépp di yéngook doole, ¹⁹ liit ga gëna jolli. Musaa ngay wax, Yàlla di ko tontoo kaddug dënu. ²⁰ Ba mu ko defee Aji Sax ji wàcc ca tundu Sinayi wa, ca njobbaxtal tund wa. Aji Sax ji nag woo Musaa foofa, ca njobbaxtal ga, Musaa delu

yéeg. ²¹ Aji Sax ji ne ko: «Wàccal, àrtu mbooloo mi, ndax ñu baña bètt, di ma deñsi kumpa; lu ko moy ñu bare ci ñoom dinañu dee. ²² Te it sarxalkat, yi may jege, man Aji Sax ji, dañoo wara sellal, bala may dal ci seen kaw.» ²³ Musaa wax Aji Sax ji ne ko: «Mbooloo mi kat manuñoo yéeg tundu Sinayi, ndax yaw ci sa bopp àrtu nga nu, ne nu, nu sàkk ag kemu fi wër tund wi, te nu xam ne tund wu sell la.» ²⁴ Aji Sax ji ne ko: «Wàccal te délsi, ànd ak Aaróona. Waaye muy sarxalkat yi, di mbooloo mi, bu kenn bètt, jëm ci man Aji Sax ji, lu ko moy ma dal ci seen kaw.» ²⁵ Ba loolu amee Musaa wàcc, fekki mbooloo ma, wax ak ñoom.

20

Kóllère gi laaj na ay sàrt

¹ Yàlla wax na bànni Israyil kàddu yii yépp, ne leen: ² «Man Aji Sax ji, maa di seen Yàlla, ji leen génne réewum Misra, kërug njaam ga.

³ «Buleen am yeneen yàlla ci sama kanam.

⁴ «Buleen sàkkal seen bopp tuur muy jëmmal lenn lu nekk ci kaw asamaan, mbaa ci kaw suuf, mbaa lu nekk ci ndox mu suuf tiim. ⁵ Buleen ci sujjóotal lenn, buleen ci jaamu lenn, ndax man seen Yàlla Aji Sax ji, Yàlla ju fiir laa. Maay topp doom tooñu waajur, ba ca seen maasi sèt, ba ca maasug sètaati nit ñi ma bañ. ⁶ Waaye maay baaxe ñi ma sopp, di sàmm samay santaane, ba ci junniy maas ya leen di wuutuji.

⁷ «Buleen tudd seen turu Yàlla Aji Sax ji ci neen, ndax Aji Sax ji du ñàkka topp kuy tudd aw turam ci neen.

⁸ «Deeleen baaxantal bésub Noflaay, ngir sellal ko. ⁹ Juróom benni fan ngeen wara liggéey, def ci seen soxla yépp. ¹⁰ Waaye bésub juróom ñaareel ba, Noflaay lay doon, ñeel seen Yàlla Aji Sax ji. Buleen ci liggéey lenn; du yeen, du seen doom ju góor ak ju jigéen, du seen jaam bu góor ak bu jigéen, du seenug jur; te du seen gan gu nekk ci seen biir dëkk. ¹¹ Ndax man Aji Sax ji, juróom benni fan laa sàkk asamaan ak suuf ak géey ak mboolem li ci biir, bésub juróom ñaareel ba, ma dal-lu. Moo tax man Aji Sax ji ma barkeel bésub Noflaay, sellal ko.

¹² «Teral-leen seen ndey ak seen baay, ndax ngeen gudd fan ca suuf sa leen seen Yàlla Aji Sax ji jox.

¹³ «Buleen bóome.

¹⁴ «Buleen jaaloo.

¹⁵ «Buleen sàcc.

¹⁶ «Buleen seedeel seen moroom lu dul dëgg.

¹⁷ «Buleen xemmem seen lennu moroom: du këràm, du jabaram, du jaamam bu góor, du jaamam bu jigéen, du nagam, du mbaamam.»

Mbooloo ma dagaan na ab jottlikat

¹⁸ Mbooloo mépp a nga teew, ba muy dënook a melax, ànd ak coowal liit gaak tund way saxar. Ñu gis loolu, di kat-kati, dànd fu sore. ¹⁹ Ci kaw loolu ñu ne Musaa: «Yaw, waxal ak nun, nu dëgg, waaye bu Yàlla ci boppam wax ak nun, lu ko moy nu dee.»

²⁰ Musaa ne mbooloo ma: «Buleen ragal, ndax nattu leen moo tax Yàlla ñiww, ngir ngeen ragal ko, ba dungeen moy.»

²¹ Noonu la mbooloo ma taxawe, dànd tund wa. Mennam Musaa moo jegeji niir wu fatt, wa Yàlla nekkoon.

Téereb kóllère gi

Ay dogal a ngi, yu jëm ci ab sarxalukaay

²² Aji Sax ji waxati Musaa ne ko: «Li ngay wax bànni Israyil mooy lii: “Yeena ko gisal seen bopp. Ca asamaan sax laa àddoo, wax ak yeen. ²³ Buleen sàkkal seen bopp ay tuuri xaaalis, mbaa ay tuuri wurus, di ma bokkaale, bumu am mukk. ²⁴ Sarxalukaay bu ñu defare suuf ngeen may sàkkal, di ci sarxal seeni gàtt ak seeni nag, muy seen saraxu rendi-dóomal, mbaa seen saraxi cant ci biir jàmm. Sàkkleen ab sarxalukaay ci mboolem bérab bu may fàttlee sama tur, ma dikk fi yeen, barkeel leen. ²⁵ Su ngeen ma dee sàkkal sarxalukaayu xeer, buleen ko defare xeer yu ñu yett, ndaxte bu ngeen ko laalalee ab jumbukaay, teddadil ngeen ko. ²⁶ Buleen yéeg ci ay dëggastal, doora mana àgg ca sama sarxalukaay, ndax loolu day tax ngeen di fa sàgganu.”»

21

¹ Aji Sax ji teg ca ne: «Àttey yoon yii, nanga leen ko jox:

Lu jëm ci Ebrë yiy ay jaam

² «Su ngeen jëndee jaam bu góor bu dib Ebrë, lu liggéey juróom benni at. Juróom ñaareel ba lay moom boppam te du ameel kenn dara. ³ Su fekkee ne ba muy dugg njaam, moom donj la woon, moom donj ay moom boppam; su ko fekkee mu am jabar, na jabaram ànd ak moom, ñu moom seen bopp. ⁴ Su fekkee ne sangam a ko may jabar, ndaw si am ak moom ay doom, jabar jeek doomam yu góor mbaa yu jigéen, sang bee leen di moom. Moom ci boppam donj ay moom boppam. ⁵ Waaye su jaam bi biralee ne: “Maa bëgg sama sang, maak sama jabar ak samay doom, te buggumaa moom sama bopp”, ⁶ su boobaa na ci sang bi sàkku seede àttekat yi. Su ko defee mu

sésal waa ji ci lafu bunt bi mbaa jënu bunt bi. Foofa lay bënnen noppu waa ji ab puso, mu daldi doon ab jaamam giiru dundam.

⁷ «Su fekke ne góor dafa jaay doomam ju jigéen njaam, deesu ko mana goreel ni bu doon góor. ⁸ Su ko sangam jëndee, def ko jabar, ba noppi bëggatu ko, na fexe ñu feyal ndaw si ag njotam, waaye amul sañ-sañu jaay ko ay doxandéem, ndax loolu wor la. ⁹ Su fekke ne da koo jëndal doomam ju góor, na jëfeek moom, na mu dëppook wareefu doom ju jigéen. ¹⁰ Ki jënd as ndaw, def ko jabar nag, su takkee keneen it, warula waññi la mu warlook jaam ba mu def jabar ci wàllu dund ak koddáay ak dëkkoo. ¹¹ Su ko sang ba matalul ñiett yooyii nag, day moom boppam, dem te du fey dara.

Lu jëm ci lor sa moroom

¹² «Ku dóor nit, rey ko, dee rekk mooy àtteem. ¹³ Su duul woon pexe mu mu lal, xanaa mu fekk Yàlla yemale nit ki ciy loxoom, dinaa leen won bérab bu muy daw, làquji fa.

¹⁴ «Waaye nag, su nit fexeelee moroomam, nax ko, ba rey ko, su làqoo woon sama sarxalukaay sax, jàppleen ko, rey.

¹⁵ «Ku dóor baayam mbaa ndeyam, dee rekk mooy àtteem.

¹⁶ «Ku sàcc nit, dee rekk mooy àtteem, moo xam da koo jaay, mbaa ñu fekk ko ci ay loxoom.

¹⁷ «Ku saaga baayam mbaa ndeyam, dee rekk mooy àtteem.

¹⁸ «Su ay nit jàppantee, kenn ki dóor moroom ma loxoom mbaa aw doj, su ca deewul, te ab téraayam sababoo ca, ¹⁹ su ci jógee mana gén ci biti, jàpp ciw yet sax, di dox, deesul daan ki ko dóor, waaye dina dàm ki mu dóor ngir li mu tédd liggéeyul, ak li pajam laaj.

²⁰ «Ku dóor yet jaamam bu góor mbaa bu jigéen, ba mu dee ciy loxoom, dees na ko feyul moos. ²¹ Waaye su jaam ba dundee ba ca èllég sa, mbaa gannaaw-èllég sa, deesu ko feyul ndaxte moomeelu sangam la.

²² «Su ay góor dee jàppante, ba kenn ci ñoom dal ci jigéenu wérul, ba liir bi gén, bu ci genn loraange toppul, dees na feylo moos ki dal ci kawam, ndàmpaay li jëkkér ji laaj, te ña leen di àtte juboo ca limu pey ga.

²³ «Waaye su ci loraange sababoo nag, na bakkan fey bakkan, ²⁴ bët fey bët, bëñ fey bëñ, loxo fey loxo; tãnk fey tãnk, ²⁵ lakk-lakk fey lakk-lakk, tèccu-tèccu fey tèccu-tèccu, góom fey góom.

²⁶ «Ku dóor ab jaamam bu góor mbaa bu jigéen, ba tuur bëtam, na ko goreel ndax

bët ba. ²⁷ Su foqee bëñu jaamam bu góor mbaa bu jigéen, na ko goreel ndax bëñ ba.

²⁸ «Su aw nag dañee góor mbaa jigéen, ba rey ko, dóorleen nag wi ay xeer ba mu dee, te buleen lekk yàpp wi, waaye boroom nag wi, yoon toppu ko. ²⁹ Su fekke ne nag wi da daan dañe, ñu yégaloon ko boroom, wattuwo ko, ba nag wi rey góor mbaa jigéen, dóorleen nag wi ay xeer, ba mu dee, te teg ci rey boroom nag wi.

³⁰ Su fekke ne dees koo sas ndàmpaay, na fey lim bu ñu ko mana sas, muy njot-gi-bakkanam. ³¹ Ba tey itam, su nag wi dañee xale, ba mu dee, muy góor mbaa jigéen, na àtte biy benn rekk ci boroom nag wi.

³² Su nag wi dañee ab jaam ba mu dee, muy góor mbaa jigéen, na boroom nag wi fey boroom jaam bi fanweeri dogi xaalis, te nañu dóor nag wi ay xeer, ba mu dee.

³³ «Su fekke ne nit dafa ubbi kàmb gu ube woon, mbaa mu gas kàmb, wacc ko mu ne nàpp, ba nag mbaa mbaam daanu ci, ³⁴ na boroom kàmb gi fey; day delloo boroom mala mi njégu mala mi, daldi féetewoo mala mi ci dee.

³⁵ «Su nagu nit jamee nagu moroomam, ba mu dee, nañu bokk jaay nag wiy dund, séddoo njég gi, te séddoo nag wi dee.

³⁶ «Waaye su fekke muy nag wu ñu xam ne da daan dañe, te boroomam ñàkk koo wattu, boroomam day feye nag wi dee aw nag wuy dund, daldi féetewoo wi dee.

³⁷ «Ku sàcc aw nag mbaa ab gàtt, rey ko mbaa mu jaay ko, na feye wenn nag, juróomi nag; benn gàtt, mu feye ko ñeenti gàtt.

22

Yoonu Aji Sax ji ñoñal na alalu nit

¹ «Su fekke dañoo jàpp ab sàcc guddi, muy toj kër jaambur, bu ñu ko dóoree, ba mu dee, deesul topp ki dóor, bakkanu sàcc bi, ² waaye su jant xasee fenk, dees na ko topp bakkanam.

«Ab sàcc nag, bu ñu ko jàppée, na delloo li mu sàcc rekk. Su fekke amu ko, dees koy jaay njaam, ndax càcc gi.

³ «Su dee ku sàcc mala, muy nag mbaa mbaam mbaa ab gàtt, te ñu fekk ko ciy loxoom, muy dund, na fey ñaaram.

⁴ «Ku wacc sag jur, mu ruur toolub jaambur, ba lekk toolam mbaa tookéru reseñam, na tann li gën ci meññeefum toolu boppam mbaa tookéru reseñam, dàmpe ko boroom tool bi mu lor.

⁵ «Su fekke ne dañoo taal sawara, mu jàpp cib ñag, lakkaale pepp mu jóore, mbaa pepp mu ñor mu ñu góobagul, mbaa mu ñoragul, ka taal sawara wa mooy xala fey li lakk.

⁶ «Su nit dénkee moroomam xaalís, mbaa alal, ñu sàcce ko ci kër ki denc, te ñu jàpp sàcc bi, na sàcc bi fey ñaari yoon la mu sàcc. ⁷ Su ñu ko jàppul nag, na boroom kër gi sàkku seede àttekat yi, te waat ne, du moom ci boppam moo aakimoo alalu moroomam. ⁸ Saa yu ay nit jotee ci mbirum nag mbaa mbaam mbaa gàtt mbaa yére, mbaa lu réer lu mu doon, ñaari ñi solowoo alal ji, muy mala mbaa leneen, nañu yóbbu mbir mi fi kanam àttekat yi. Ku ci àttekat yi teg tooñ, na fey moroom mi ñaari yoon.

⁹ «Su nit dénkee moroomam mbaam mbaa nag mbaa gàtt mbaa mala mu mu mana doon, su jur gi deeyee mbaa mu damm mbaa ñu sàcce ko àll te amul seede, ¹⁰ li leen di àtte ngiñ lay doon ci Aji Sax ji. Na ka dencoon mala ma giñ ne jëlu ko. Na boroom mala mi it nangu ngiñ li. Ki dencoon du ko fey dara. ¹¹ Waaye su ñu sàccee mala mi ci këram, moom mi dencoon mooy delloo boroom. ¹² Su fekke ne rabu àll a fàdd mala mi, na indi li ci des, muy firnde. Su boobaa du fey dara. ¹³ Su nit àbbee juru moroomam, jur ga damm mbaa mu dee fu boroom nekkul, na ki àbboon fey. ¹⁴ Waaye su ko boroomam fekke, du laaj muy fey. Su fekke ne dafa bindoon mala mi ci boroom, di ko fey, na boroom fëetewoo njég, ga ñu binde woon mala mi, muy peyam.

Yoonu Aji Sax ji rafetal na dundin

¹⁵ «Su góor naxee ab janq bu kenn joxagul warugar; ba tédde ko, na fey warugaram, muy jabaram. ¹⁶ Su fekke ne baayam dafa lánk, ne du ko ko may it, du tere mu wara fey ci xaalís lu tollook warugaru janq.

¹⁷ «Ab xërëmkat bu jigéen, buleen ko bàyyi, mu dund*.

¹⁸ «Képp ku jaxasoo ak mala, dee rekk mooy àtteem.

¹⁹ «Kuy sarxeel jeneen yàlla ju dul Aji Sax ji moom rekk, dees koy faagaagal.

²⁰ «Ab doxandéem, buleen ko lor, buleen ko not, ndaxte yeen itam ay doxandéem ngeen woon fa réewum Misra.

²¹ «Képp ku dib jëtun akub jirim, buleen ko néewal. ²² Bu ngeen leen néewalee déy, bu ñu yuuxoo, woo ma wall, dinaa dégg seen yuux moos. ²³ Su boobaa sama mer dina tang, ma reye leen saamar; seeni jabar diy jëtun, seeni doom diy jirim.

²⁴ «Bu ngeen dee lebal ku bokk ci sama ñoñ, di néew-ji-doole ju ngeen dëkkal, buleen def ni ab leblekat, di ko sas ab tegandaay.

²⁵ «Su ngeen nangoo mbubbam tayle ci seen dëkkandoo, dellooleen ko ko bala jant a so. ²⁶ Moom donj la am ci yére, di ko sänge yaramam; su ko ñàkke, lu muy sângoo ba tédde? Te su ma wooyee wall kat, dinaa ci dégg, ndax man Boroom Yërmande laa.

²⁷ «Man Yàlla, buleen wax lu ñaaw ci man, te seen kilifag askan, buleen wax lu bon ci moom.

²⁸ «Li tuuroo ci seen sàq yu fees, ak li wale ci seen nalukaay yu rembat, sama cér la; buleen ko yeexe, te seen taaw yu góor it, man ngeen leen di sédde. ²⁹ Seen jur gu gudd ak gu gàtt itam, naka noonu. Juróom ñaari fan lay nekk ak ndeyam, bésub juróom ñetteel ba, ngeen jox ma ko. ³⁰ Te itam nit ñu sell ngeen wara doon, ñeel ma, kon nag yàppu mala mu ñu fàdde ci àll bi, buleen ko lekk; sannileen ko xaj yi.

23

Àtte laaj na njub ak yërmande

¹ «Buleen siiwal ay fen; buleen lëngoo ak tooñkat, ngir doon seede naaféqam.

² Buleen seet fi mbooloo gëna baree, ngeen topp leen ci jëf ju bon; te it buleen jeng, di topp mbooloo mu gëna bare ci ab layoo, di leen seedeel lu toxal dégg. ³ Néew-doole bi it, buleen ko far cib layoo.

⁴ «Su ngeen dajeek seen nagu noon mbaa mbaamam mu réer, fexeleen ba délloosil ko ko. ⁵ Su ngeen gisee seen mbaamu noon mu ab sëf daaneel, buleen ko romb; dimbalileen seen noon, yékkatilleen ko ko.

⁶ «Buleen jalgati àqu néew-ji-doole cib layoom. ⁷ Kàddu gu dëgguwul, soreleen ko, te ku deful dara ak kuy def njekk, buleen ko reylu, ndax nit ku bon, duma ko àtte mukk àtteb kuy def njekk. ⁸ Alali ger nag buleen ko nangu, ndax ger day gumbaal njaccaar, di safaan waxi ku nekk ci dégg.

⁹ «Ab doxandéem, buleen ko not; yeen ci seen bopp, jaar ngeen ci ndoxandéem, ndax ay doxandéem ngeen woon ca réewum Misra.

Lu jëm ci bési Noflaay

¹⁰ «Diiru juróom benni at ngeen di ji seen tool, for li ci meññe; ¹¹ waaye atum juróom ñaareel ma, noppal-leen tool bi, booyal ko; seen néew-dooley askan wi man cee lekk, li ci des, rabi àll yi for ko. Seen toolub reseñ ak seen tóokëru oliw itam, naka noonu.

¹² «Diiru juróom benni fan ngeen di liggéey, waaye bésuub juróom ñaareel

* 22:17 22.17 Seetal ci *Sarxalkat* yi 19.26 ak 31.

ba, nopplu leen, ndax seen nag ak seen mbaam mana nopplu, seen surga akub doxandéem ita mana astandikuu.

¹³ «Li ma leen wax lépp sàmmleen ko, te turi yeneen yàlla, buleen ko tudd; bumu jibe sax seen gémmiñ.

Lu jëm ci bësi màggali Israyil

¹⁴ «Ñetti yoon cim at ngeen may jagleel màggal. ¹⁵ Màggalu Mburu mu amul lawiir, wormaal-leen ko. Diiru juróom ñaari fan ngeen ciy lekk mburu mu amul lawiir ni ma leen ko sante, saa yi jamonoom jotee ci weeru Añib, ndaxte ci ngeen génn Misra. Te itam buleen taxawe loxoy neen ci sama kanam. ¹⁶ Wormaal-leen màggalu bésu Ngóob mi jékka ñore ci tool, yi ngeen di bey, ak màggalu bésu Farmàngu mi ci ndeetel at mi, gannaaw bu ngeen dajalee seen meññeef ba noppi. ¹⁷ Ñetti yoon cim at la seen góor ñépp di teew fi kanam Boroom bi Aji Sax ji.

¹⁸ «Buleen ma rendil benn sarax, di boole deret jaak lu am lawiir, te nebbonu jur gu ngeen ma sarxal ci sama màggal, bumu fanaana ba bët set.

¹⁹ «Ngéneeli meññeef ma jékka ñore ca seen suuf, moom ngeen di yóbbu seen kër Yàlla Aji Sax ji.

«Ab tef, buleen ko togge soowum yaavam.

Yàlla yeb na bànni Israyil

²⁰ «Te nag man ci sama bopp, maay yebal malaaka, mu di leen sàmm ci yoon wi, ba yóbbu leen bérab ba ma waajal. ²¹ Bàyyiileen ko xel bu baax, déggal ko te bañ koo merloo, ndax du leen baal seen moy, ngir sama tur la taxawe. ²² Waaye su ngeen ko déggalee ba déggal ko, di jéfe li ma leen wax lépp, su boobaa ma noonoo seeni noon, bañ seeni bañaale.

²³ «Bu leen sama malaaka jiiitoo, ba yóbbu leen ca réewum Amoreen ña ak Etteen ña ak Periseen ña ak Kanaaneen ña ak Eween ña ak Yebuseen ña, ba ma faagaagal leen ñoom ñépp, ²⁴ su boobaa buleen sujjóotal mukkk seeni tuur, di leen jaamu, mbaa ngeen di roy seeni aada, waaye yaqteleen seeni tuur te toj tasar seen tuuri doj, ya fa sampe. ²⁵ Jaamuleen ma, man seen Yàlla Aji Sax ji, ma barkeel seen dugub ak seen ndox, boole ci jële wopp ci seen biir. ²⁶ Su ko defee du kenn ku émbam di yàqu, mbaa mu télee am doom ci seenum réew, te maay matal sékk seen limu fan.

²⁷ «Tiitaange laay yebal, mu jiiito leen. Maay tiital mboolem xeet wu ngeen fekki, te maay def seen noon yépp won leen gannaaw. ²⁸ Maay yebal ñàqare lu leen jiiito, dàqal leen Eween ña ak Kanaaneen

ñi ak Etteen ñi. ²⁹ Waaye duma leen dàqandoo ci menn at, lu ko moy réew mi gent, rabi àll yi mujj bare lool ci seen kaw. ³⁰ Ndànk-ndànk laa leen leen di dàqal, ba kera ngeen di yokku, ba nangu réew mi.

³¹ «Maa leen di dogal kemug suuf gu dale géēju Barax yi, ba géēju waa Filisti, daleeti ca màndiñ ma, ba ca dexu Efraat, ndax maay teg waa réew mi ci seeni loxo, ngeen dàq leen. ³² Buleen wóllèranteek ñoom, buleen wóllèranteek seeni tuur. ³³ Buñu dèkke seenum réew, lu ko moy muy seen ndégg-sèrèx; ndax dañu leen di xiir ci moy ma, ba ngeen jaamu seeni tuur.»

24

Yàlla fasoo na kóllère ak bànni Israyil

¹ Mu neeti Musaa: «Yéegal ñew fi Aji Sax ji, yaw ak Aaróona ak Nadab ak Abiyu ak juróom ñaar fukki magi Israyil, te ngeen sujjóote nee, dánd ma. ² Su ko defee yaw rekk yaay dikk, ba jege ma, man Aji Sax ji, waaye ñi ci des buñu jegesi, te it bu mbooloo mi yéegandoo ak yaw.» ³ Musaa dem, yeggeji mbooloo ma kadduy Aji Sax ji yépp, ak àttey yoonam yépp. Mbooloo ma mépp bokk benn baat, ne ko: «Li Aji Sax ji wax lépp dinanu ko def.» ⁴ Ba loolu weesee Musaa bind na mboolem kadduy Aji Sax ji. Mu xëy nag suba teel, daldi sàkk ab sarxalukaay ca suufu tund wa, sampaale fa fukki doj ak ñaar, ñeel fukki giiri Israyil yaak ñaar. ⁵ Ba mu ko defee mu yebal ay ndawi bànni Israyil, ñooña def ay saraxi rendi-dóomal, boole ci rendi yékk yu ndaw yu ñu def saraxi cant ci biir jámm, ñeel Aji Sax ji. ⁶ Musaa jël genn-wàllu deret ja, sotti ci ay ndab, la des ca deret ja, mu xépp ko ca sarxalukaay ba. ⁷ Ba loolu amee mu jël téere ba ñu bind kóllère ga, jàngal ko mbooloo ma, ñuy dégg. Mbooloo ma ne ko: «Li Aji Sax ji wax lépp dinanu ko def, ba mu mat sékk.» ⁸ Musaa jël deret ja, wis-wisal ca kaw mbooloo ma, ne leen: «Lii nag mooy deret ji Yàlla fase kóllère gi mu séq ak yeen te mu aju ci mboolem kaddoom yii.»

⁹ Ba loolu amee Musaa yéeg, ànd ak Aaróona ak Nadab ak Abiyu ak juróom ñaar fukki magi Israyil. ¹⁰ Ñu daldi gis Yàllay bànni Israyil. Lu mel ni dëru per bu safiir a nga lal tãnkam ya, mel ni asamaan, ndax na mu sete wecc. ¹¹ Waaye njiiti bànni Israyil ña, loxol Yàlla dalu leen. Ñoo gis Yàlla, te gannaaw loolu lekk nañu, naan nañu.

Musaa yéeg na ca tund wa

¹² Aji Sax ji waxati Musaa ne ko: «Yéegal ba ci man ci kaw tund wi te négandiku fa, ma jox la àlluwax xeer yi ak yoon wi,

ak santaane yi ma ci bind ngir jàngle ko.»
¹³ Musaa daldi jóg, mook Yosuwe, bëkk-
 néegam. Musaa nag yéeg ca tundu Yàlla
 wa. ¹⁴ Fekk na mu wax mag ña ne leen:
 «Xaarleen nu fii, ba nu délisi. Aaróona ak
 Ur a ngi nii ak yeen; ku ci am mbir mooy
 àttelu, demal ci ñoom.»

¹⁵ Ba Musaa yéegée ca kaw tund wa,
 niir wa daa yiir tund wa, ¹⁶ leeru Aji Sax
 ja dal ca kaw tundu Sinayi, niir wa yiir
 tund wa diiru juróom benni fan. Bésu
 juróom ñaareel ba Aji Sax ji áddoo ca digg
 niir wa, woo Musaa. ¹⁷ Melow leeru Aji
 Sax jaa ngay nirook sawara wuy tàkk ca
 njobbaxtalu tund wa, bànni Israyil di gis.
¹⁸ Musaa yéeg ca kaw tund wa ba tàbbi ca
 biir niir wa, di wéy. Musaa nekk na ca kaw
 tund wa ñeent fukki guddi ak ñeent fukki
 bëccëg.

Lu jëm ci jaamookaay bi

25

¹ Aji Sax ji waxati Musaa ne ko: ² «Waxal
 bànni Israyil ne leen, ñu indil ma ab jooxe.
 Ci képp ku am yéeneem ngeen di nangoo
 sama jooxe, indil ma ko. ³ Jooxe bi ngeen
 di nangoo ci ñoom di wurus ak xalis ak
 xàñjar, ⁴ ak wëñ gu baxa te laal yolet ak
 wëñ gu xewar ak gu xonq curr ak wëñu
 lée, ak kawari bëy ⁵ ak deri kuuyu xar yu
 ñu wulli, sóob ko xonqal, ak deri piipi* ak
 banti séng†, ⁶ ak diwu oliw gu ñuy taaloo,
 ak ndàbb luy xeeñal diwu pal, di xeeñal
 cuuraay, ⁷ ak peri onigsë, ak yeneen per yu
 ñuy tapp ci xar-sànnim sarxalkat bu mag
 ba ak kiiraayal dënnam. ⁸ Na ma bànni
 Israyil defaral kër gu sell, ndax ma dëkk ci
 seen biir. ⁹ Na lépp dëppoo ak li ma lay
 won. Muy misaalu xaymab jaamookaay
 bi, di misaalu mboolem ay jumtukaayam,
 lépp defeleen ko noonu.

Lu jëm ci gaal giy def àlluway seede si

¹⁰ «Defarleen gaalu dénku séng, gud-
 daayam di ñaari xasab‡ ak genn-wàll,
 yaatuwaayam di xasab ak genn-wàll; tax-
 awaayam di xasab ak genn-wàll. ¹¹ Nañu
 ko xoob wurusu ngalam. Biir ak biti lañu
 koy xoob, sàkkal ko kéméju wurus, gu
 ko wër. ¹² Móolalal gaal gi ñeenti lami
 wurus yu ñuy takk ci ñeenti tànk yi; ñaari
 lam, wet gi; ñaar wet gee. ¹³ Yettul ay
 banti njàppuy séng te nga xoob bu ci nekk
 wurus. ¹⁴ Su ko defee nga roof njàppu yi ci
 lam, yi ci weti gaal gi, ngir ñu di ko yóbboo
 gaal gi. ¹⁵ Ci lami gaal gi la njàppu yiy
 des te bañ cee jógeeti. ¹⁶ Yebal ci gaal gi
 àlluway seede si ma lay jox.

* **25:5** 25.5 piipi rabu géej la, bu der ba nooy te ndox du ko dugg. † **25:5** 25.5 séng: am na ñu koy wooye kasiya.

‡ **25:10** 25.10 xasab mooy guddaayu loxo, diggante catu baaraamu digg ak conc. § **25:33** 25.33 garabu amànd
 xeetoo naak gerte-tubaah.

¹⁷ «Defarlul kubeer gu ñuy amale njot-
 laay gu wurusu ngalam ngir gaal gi.
 Na guddaayam di ñaari xasab ak genn-
 wàll, yaatuwaayam di xasab ak genn-wàll.
¹⁸ Tëggul ñaari malaakay serub yu wurus
 te nga féetale leen ak ñaari cati kubeeru
 njotlaay ga. ¹⁹ Defal cat lii ab serub, cat
 lee ab serub te nanga móolaale kubeer gi
 ak serub yi ci ñaari cat yi, ñu ànd di benn.
²⁰ Na serub yi tàllal seeni laaf, jème kaw te
 nañu yiire kubeeru njotlaay gi seeni laaf.
 Nañu janoo, te na seeni kanam jublook
 kubeeru njotlaay gi. ²¹ Tegal kubeeru
 njotlaay gi ci kaw gaal gi, gannaaw boo ci
 yebee àlluway seede si ma lay jox. ²² Foofa
 laay dajeeq yaw; fa tiim kubeeru njotlaay
 ga, ca diggante ñaari serub ya ca kaw
 gaalu seede sa, fa laa lay waxe mboolem
 lu ma lay sant, ñeel bànni Israyil.

Lu jëm ci taabalu mburum sarax mi

²³ «Defarlul taabalu bantu séng, gud-
 daayam di ñaari xasab, yaatuwaayam di
 xasab, taxawaayam di xasab ak genn-wàll.
²⁴ Xoob ko wurusu ngalam te defal ko
 kéméju wurus gu ko wër. ²⁵ Defal ko pegg
 bu ko wër bu tollu ci ñeenti baaraam, te
 sàkkal pegg ba wombu wurus, wërle ko.
²⁶ Defarlul ko ñeenti lami wurus te takk
 lam ya ca ñeenti wet ya, fa fareek ñeenti
 tànk ya. ²⁷ Na lam yi dendeek pegg bi, ngir
 mana tée njàppu, yi ñuy yóbboo taabal
 ji. ²⁸ Yettul ay njàppu yu bantu séng, nga
 xoob njàppu yi wurus, ñu di ko yóbboo
 taabal ji. ²⁹ Sàkkal ko ay ndabam yu tell
 aki mbàttoom aki njaqam, ak këllam yi
 ñuy tuuroo. Te wurusu ngalam ngay def
 lu ci nekk. ³⁰ Tegal mburum teewal mi ci
 kaw taabal ji, mu nekk ci sama kanam ba
 fàww.

Lu jëm ci tegukaayu làmp bi

³¹ «Defarlul tegukaayu làmp bu wurusu
 ngalam. Tegukaay ba, dees koy tégg.
 Na taatu tegukaay ba ak per ba ànd
 aki kaasam aki kàmbóotam aki mbaram,
 lépp di benn. ³² Juróom benni car ñoy
 soqikoo ca wet ya, ñetti car ci gi wet,
 ñetti ca ga ca des. ³³ Benn car day
 am ñetti kaas yu bindoo ni tóor-tóoru
 garabu amànd§, kaas bu ci nekk ànd ak
 ay kàmbóotam aki mbaram, car ba ca
 topp am ñetti kaas yu bindoo ni tóor-
 tóoru garabu amànd, kaas bu ci nekk
 ànd aki kàmbóotam aki mbaram, juróom
 benni car, ya soqikoo ca per ba, daj.
³⁴ Gannaaw loolu peru tegukaayu làmp
 ba itam day am ñeenti kaas yu bindoo
 ni tóor-tóoru garabu amànd, ànd ak ay

kàmbóotam aki mbaram. ³⁵ Ab kàmbóot ay ronu yii ñaari car, jàpp ca; beneen kàmbóot ronu ñaari car ya ca topp, jàpp ca, ab kàmbóot ronu ñaari car ya mujj, jàpp ca, juróom benni car, ya soqikoo ca peru lãmp ba, daj. ³⁶ Kàmbóot ya ak car ya dañuy ànd ak tegukaay ba, di benn, lépp doon lu ñu tégge wenn dogu wurusu ngalam. ³⁷ Defarlul juróom ñaari lãmpam. Te na lãmp ya tege tegin wuy leeral ca kanam tegukaay ba. ³⁸ Ñiimi feyukaayu lãmp yi ak andi lãmp yi na doon wurusu ngalam. ³⁹ Fanweeri kiloy wurusu ngalam ak juróom*, ci lees di sàkk tegukaayu lãmp bi, ak mboolem li mu àndal. ⁴⁰ Nanga xool te topp misaal, yi ñu la ciy won ci kaw tund wi.

26

Lu jëm ci sori xaymab jaamookaay bi

¹ «Xaymab jaamookaay bi nag, defare ko fukki sori rabali lée, mu ànd ak wëñ gu baxa te laal yolet ak wëñ gu xewar ak gu xonq curr, te nga ñawaale ca nataali serub. ² Guddaayu sor bu nekk na doon ñaar fukki xasab ak juróom ñett, yaatuwaay ba di ñeenti xasab, te sor yépp ay tolloo. ³ Yii juróomi sor day taqloo ca guddaay ba, juróomi sor ya ca des taqloo noonu. ⁴ Ñawlul ay takku yu baxa te laal yolet ca catal sor, ba mujj ca benn taqalante ba, te ñawe ko noonu itam ca catal sor, ba jeexal taqalante ba ca des. ⁵ Juróom fukki takku ngay def ci catal benn sor bi, ak juróom fukki takku ci catal sor, bi jeexal taqalante bi ci des, te na takku yi yemo. ⁶ Su ko defee nga defarlul juróom fukki lonku yu wurus yu ñuy jokklee sor yi, ba jaamookaay bi doon benn.

⁷ «Te itam ràbblul ay sori kawari bëy, ngir def ko ñaareelu xayma, muy kiiraay ci kaw jaamookaay bi. Fukk ak benn la sor yiy doon. ⁸ Guddaayu sor bu nekk di fanweeri xasab, yaatuwaay bi di ñeenti xasab, te fukki sor yee benn yépp ay tolloo dayo. ⁹ Taqleel yii juróomi sor, juróom benni sor yi ci des it noonu, te juróom benneelu sor bi, nanga ko lem, fi feeteek kanam xayma bi. ¹⁰ Sàkkal juróom fukki takku ci catal sor, bi mujj ci benn taqalante bi, ak juróom fukki takku ci catal sor, bi jeexal taqalante bi ci des. ¹¹ Sàkkal juróom fukki lonku yu xanjar te nga we lonku yi ci takku yi, daldi jokkle ñaari taqalante yi, muy benn xayma. ¹² Liy lang te éppe ci sori xayma bi nag, di beneen genn-wàllu sor bi, na lange ci gannaaw jaamookaay bi. ¹³ Waaye benn xasab bi éppe wet gu nekk ci guddaayu sori xayma bi, na lange

ci ñaari weti jaamookaay bi, ngir yiire ko ko. ¹⁴ Nanga defarlul xayma bi malaanum deri kuuy yu ñu sóob xonq, ak meneen malaanum deri piipi muy tege ca kawam.

Lu jëm ci kenuy jaamookaay bi

¹⁵⁻¹⁷ «Sàkkalal jaamookaay bi ay làcci bantu séng yuy sampe. Na làcc wu nekk am ñaari kenu yu ñu lékklee galan yu ndaw, te nga def làcci jaamookaay bi yépp noonu. Na taxawaayu làcc wu nekk di fukki xasab, yaatuwaay bi di xasab ak genn-wàll. ¹⁸ Ci wàllu làcci jaamookaay bi, sésaleel ñaar fukki làcc fi féete bëj-saalum, ¹⁹ boole kook ñeent fukki tegukaayi xaalis yuy ronuy kenuy ñaar fukki làcc yi, ñaari tegukaay ay ronuy làcc wi jiitu ngir ñaari kenoom yi muy àndal, ñaari tegu topp ci, ronuy wépp làcc wu ci topp, ngir ñaari kenoom yi muy àndal. ²⁰ Geneen wetu jaamookaay gi féete bëj-gannaar itam, na doon ñaar fukki làcc ²¹ ak seeni ñeent fukki teguy xaalis, ñaari tegu ronuy làcc wi jiitu, ñaari tegu topp ci, ronuy wépp làcc wu ci topp. ²² Gannaawu jaamookaay gi féete sowu, sàkkal ko juróom benni làcc; ²³ nga teg ci ñaari làcc ngir colli jaamookaay bi ci gannaaw. ²⁴ Nañu àndandoo ci suuf te lékkoo ca kaw ci benn lam kepp. Noonu lañuy bindoo ñoom ñaar; ñooy doon ñaari coll yi. ²⁵ Muy juróom ñetti làcc ak seen teguy xaalis, di fukki tegu ak juróom benn, ñaari tegu ronuy làcc wi jiitu, ñaari tegu topp ci, ronuy wépp làcc wu ci topp.

²⁶ «Nanga sàkk itam ay galani bantu séng: juróomi galan yuy ànd ak làcc yi ci genn wetu jaamookaay bi, ²⁷ ak juróomi galan ngir làcci wet gi ci des, ak juróomi galan ngir làcc, yi ci gannaaw jaamookaay bi, fi féete sowu. ²⁸ Galanu digg bi, ci digg làcc yi lay nekk, dale ko cat ba cat. ²⁹ Xoobal làcc yi wurus te nga sàkkal làcc wu ci nekk ay lami wurus yuy téye galan yi, te nga xoob galan yi it wurus. ³⁰ Su ko defee nga taxawal jaamookaay bi, ni ñu la ko wone ci kaw tund wi.

Lu jëm ci rido bi

³¹ «Sàkkal rido bu ñu ràbbe wëñ gu baxa te laal yolet, ak wëñ gu xewar ak gu xonq curr, ak wëñu lée, ñu ñawaale ca nataali serub, ³² te nga wékk ko ci ñeenti jëni séng yu ñu xoob wurus, jën yi ànd ak seen wékkukaayi wurus, te nga móolal jën yi ñeenti teguy xaalis. ³³ Wewal rido bi ci ron lonku yi, su ko defee nga yóbbu galu àlluway seede si foofu ci gannaaw rido bi, rido bi xàjjaleel leen bérab bu sell bi, ak bérab bu sell bee sell. ³⁴ Tegal kubeer ga ñuy amale ag njetlaay ca kaw gaal ga

* 25:39 25.39 Mu yemook benn nattu diisaay bu ñu daan jéfandikoo, ñu di ko wax talan.

àlluway seede sa dence, ca biir bérab bu sell baa sell. ³⁵ Tegal taabal ja ca biti, ca kanam rido ba, te nga teg tegukaayu lãmp ba ca wetu bëj-saalumu jaamookaay ba, mu jãkkaarlook taabal ja, taabal ja nag, nga tege ko wetu bëj-gãnnaar.

Lu jëm ci kiiraayal buntu xayma bi

³⁶ «Sàkkalal buntu xayma bi kiiraay lu ñu ràbbe wëñ gu baxa te laal yolet, ak wëñ gu xewar ak gu xonq curr ak wëñu lëe, muy liggéeyu ràbb bu rafet. ³⁷ Nga sàkkal nag kiiraay li juróomi jëni séng, xoob wu ci nekk wurus, seeni wékkukaay di wurus, te nga móolal jën yi juróomi teguy xànjjar.

27

Lu jëm ci sarxalukaay bi

¹ «Nanga defare sarxalukaay bi bantu séng, guddaay bi di juróomi xasab, yaatuwaay bi di juróomi xasab; ab kaare la sarxalukaay biy doon, taxawaayam di ñetti xasab. ² Defaral ko ay bëjjénam ci ñeenti koñ yi ci kaw. Bëjjén yi, dees koy liggéeyaaleek sarxalukaay ba, ñu ànd di benn, te nanga xoob sarxalukaay bi xànjjar. ³ Sàkkal ay ndabi tibbukaayu dóomam, ak ay ñiitukaayam, ak ay kèllam, ak ay cap-pukaayam aki andam. Defal juntuukaayam yépp xànjjar. ⁴ Sàkkal ko caax bu ñu tégge xànjjar te nga sàkkal caaxu xànjjar bi ñeenti nopp ci ñeenti collam. ⁵ Tegal caax bi, mu ronu peggu sarxalukaay bi, te dale ci suuf ba ci digg sarxalukaay bi. ⁶ Sàkkalal sarxalukaay bi ay njàppuy bantu séng, te nga xoob lu ci nekk xànjjar, ⁷ te nga roof njàppu yi ci nopp yi, su ko defee njàppu yi des ci ñaari weti sarxalukaay bi, ngir bu ñu koy yóbbu. ⁸ Pax ngay def sarxalukaay bi ci biir; nga defare ko ay xàng yu tàppandaar. Na ñu la ko wone ca kaw tund wa rekk lañu koy defe.

Lu jëm ci èttu jaamookaay bi

⁹ «Nanga sàkkalal jaamookaay bi ab ètt: guddaayu ètt bi ci wetu bëj-saalum, tééméeri xasabi sori rabal yu ñu ràbbe wëñu lëe moo koy ub, ci genn wet googu. ¹⁰ Jëni jaamookaay bi ñaar fukk lay doon, seen ñaar fukki tegu di xànjjar, wékkukaay yeek galani jën yi di xaalis.

¹¹ «Naka noonu it ci wetu bëj-gãnnaar, guddaay bi di tééméeri xasabi sori rabal, ak seen ñaar fukki jën yu seen ñaar fukki teguy xànjjar ronu, wékkukaay yeek galani jën yi di xaalis.

¹² «Yaatuwaayu ètt bi, fi féete sowu, juróom fukki xasabi sori rabal a koy ub, seeni jën di fukk, seeni tegu di fukk.

¹³ «Yaatuwaayu ètt bi, fi féete penku ci kanam, juróom fukki xasab la: ¹⁴ fukki

xasabi sori rabal ak juróom moo ub ètt bi ci googu wet, seeni jën di ñett, seeni tegu di ñett. ¹⁵ Wet gi ci des it, fukki xasabi sori rabal ak juróom, seeni jën di ñett, seeni tegu di ñett. ¹⁶ Buntu ètt bi nag, na doon lafu ñaar fukki xasab, wu ñu defare wëñ gu baxa te laal yolet, ak wëñ gu xewar ak gu xonq curr ak wëñu lëe, muy liggéeyu ràbb bu rafet, ay jënam di ñeent, seeni tegu di ñeent.

¹⁷ «Jën ya wër ètt ba yépp, dees koy lëkklee galan yu xaalis, wékkukaay jën yi di xaalis, seeni tegu di xànjjar.

¹⁸ «Guddaayu ètt bi tééméeri xasab lay doon, yaatuwaay bi di juróom fukk, taxawaayu wet yi di juróomi xasab, sor yi ñu ràbbe lépp di wëñu lëe, tegu yi di xànjjar. ¹⁹ Mboolem juntuukaay yi ñuy liggéeye ci jaamookaay bi, ba ci mboolem xeri xaymaam, ak mboolem xeri ètt bi, lépp xànjjar lay doon.

Lu jëm ci santaane, yi sarxalkat yi sasoo

Lu jëm ci diwu lãmp bi

²⁰ «Yaw nag, santal bànni Israyil, ñu indil la diwu segalu oliw gu set gu ñuy taaloo, ngir lãmp yi dëkke tàkk. ²¹ Ci biir xaymab ndaje mi* la Aaróona ak doomam yu góor di teg lãmp yi, ci kanam rido bi laq gaalu àlluway seede si, ñuy fanaanee tàkk ngoon ba bët set, fi kanam Aji Sax ji. Dogal a ngoogu, war bànni Israyil fãww, ñoom ak seen askan.

28

Lu jëm ci yérey sarxalkat yi

¹ «Léegi nag yaw, nanga seppée ci bànni Israyil sa mag Aaróona, ak doomam yu góor, nga woo leen fi yaw, ñu di ma sarxalal: Aaróona ak doomam yu góor, Nadab ak Abiyu ak Elasar ak Itamar. ² Sàkkalal sa mag Aaróona yérey sellnga ngir daraja, ak teraanga bu sarxalkat wara yellow. ³ Dangay sant mboolem liggéeykat yu xareñ, yi ma feesal xelum xareñte, ñu defar yérey Aaróona, ngir fal ko, mu di ma sarxalal. ⁴ Yii yérey nag lañu koy defaral: kiiraayal dënn ak ab xar-sànni ak ab fëxya, ak mbubb mu gudd mu ñu ràbb, ak kaala ak laxasaay. Yérey sellnga lañuy defal sa mag Aaróona ak doomam yu góor, ngir ñu di ma sarxalal. ⁵ Liggéeykat yooyu ñooy jël wëñi wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe ngir liggéeye ko.

Lu jëm ci xar-sànni mi

⁶ «Nañu ràbbe xar-sànni mi wëñu wurus, ak wëñ gu baxa te laal yolet, ak wëñ

* 27:21 27:21 xaymab ndaje ma: dees na ko wooye jaamookaay ba, ba tey.

gu xewar ak gu xonq curre ak wëñu lëe, ñu ñawaale ci ay nataal. ⁷ Ñaari ngalli mbagg yu ñuy faste la xar-sànni miy am, ñu di leen fastee ci ñaari cat yi. ⁸ Ngañaay liy tege ci kaw xar-sànni mi, ni xar-sànni mi lañu koy liggéeyee, mu and ak moom, di benn, di wëñu wurus, ak wëñ gu baxa te laal yolet, ak wëñ gu xewar, ak gu xonq curre, ak wëñu lëe. ⁹ Nanga jël ñaari peri onigsé, nga ñaas ci turi doomi Israyil yu góor: ¹⁰ yii juróom benni tur ci benn per, juróom benni tur yi ci des ci beneen per bi, tur yi toppante, ni boroom tur yi toppantee ci juddu. ¹¹ Ni ko ab liggéeyak bu farewo mbindum doj di defe, ni lañuy ñaase turi doomi Israyil yu góor ci kaw ñaari per yi, mu mel ni ni ñuy ñaase xämmikaayi yu ñuy torloo, te nañu we per yi ci ay ñankukaayi wurus. ¹² Tappal ñaari per yi ci kaw ngalli waggi xar-sànni mi, per yi wuutu bànni Israyil, Aaróona gaddu seeni tur ci kaw ñaari ngalli waggam, fi kanam Aji Sax ji, ngir saxal ag pättliku.

¹³ «Sàkkal ay ñankukaayi wurus, ¹⁴ ak ñaari caqi wurusu ngalam, bu ci nekk nga rawaase ko nig buum, ba noppi nga we caq yu rawaasoo yooyu ci ñankukaayi yi.

Lu jëm ci kiiraayal dënn bi

¹⁵ «Nanga sàkk kiiraayal dënn bi ñuy jëfoo cib àtte, ñu liggéeyaale ko ay nataal ni xar-sànni mi, te nañu ko ràbbe wëñu wurus, ak wëñ gu baxa te laal yolet, ak wëñ gu xewar, ak gu xonq curre, ak wëñu lëe. ¹⁶ Ab kaare bu ñu lem lay doon, guddaay bi di ñaraleb baaraamu déy ak digg, yaatuwaay bi di ñaraleb baaraamu déy ak digg. ¹⁷ Nanga we ay per ci kaw kiiraayal dënn bi, nga def ko ñeenti làngi per. Làng gi jiitu, peru sarduwan ak peru topaas ak peru eskarbukal moo cay nekk; ¹⁸ ñaareelu làng gi di peru emëródd ak peru safiir ak peru jamaa; ¹⁹ ñetteelu làng gi di peru yasent ak peru agaat ak peru ametisté; ²⁰ ñeenteelu làng gi di peru kirsolit ak peru onigsé ak peru jaspé, te per bu ci nekk, ñankukaayi wurus lees koy wewe. ²¹ Per yeek turi doomi Israyil ñooy tolloo ab lim: muy fukk ak ñaar, ni tur yi tollu. Dees ciy ñaas tur yi ni xämmikaayi torlu, ku nekk ak turam, ba fukki giir yeek ñaar daj. ²² «Nanga sàkkal kiiraayal dënn bi ñaari caqi wurusu ngalam yu ciy tege, te rawaasoo ni ay buum, ²³ ak ñaari jaaroy wurus yu ñuy takk ci ñaari cati kiiraayal dënn bi ci kaw, ²⁴ te nga nas ñaari buumi wurus yi ci ñaari jaaro, yi ci cati kiiraay li. ²⁵ Yeneen ñaari cati buumi wurus yi, nga we leen ci ñaari ñankukaayi, yi ci

kaw ngalli waggi xar-sànni mi, ci kanam. ²⁶ Sàkkal ko it ñaari jaaroy wurus yu ñuy we ci ñaari cati suufi kiiraay li, fi féete biir, wet gi tafu ci xar-sànni mi. ²⁷ Nga sàkkalaat ko yeneen ñaari jaaroy wurus yooy we ci suufu ngalli xar-sànni mi, fi féete kanam, dendeek sofu ngall yi, te tiim ngañaayu xar-sànni mi. ²⁸ Kiiraayal dënn bi, buum gu sew gu baxa te laal yolet, moom lees koy téyee, lëkklee ko jaaroy kiiraay leek jaaroy xar-sànni mi, su ko defee kiiraay li dëkke tiim ngañaay li, ba du teqlikook xar-sànni mi. ²⁹ Aaróona nag nay tegoo turi bànni Israyil ci kaw kiiraayal dënn bi ñuy àttee, tur yi tafu ci xolam, saa yuy dugg ci bérab bu sell bi, ngir saxal pättliku ba fàww fi kanam Aji Sax ji. ³⁰ Nanga yeb ci biir kiiraayal dënn bi ñuy àttee, jumtukaayi tegtal yooyu di Urim ak Tumim*, ngir ñu tafu ci xolu Aaróona, saa yuy taxawi fi kanam Aji Sax ji. Noonu la Aaróona di dëkke yóbbaaale ci kaw xolam jumtukaayi àtte yu bànni Israyil, saa suy taxawi fi kanam Aji Sax ji, ba fàww.

Lu jëm ci yéree yu sell, yi ci des

³¹ «Fëxya bi xar-sànni miy tege, lépp, wëñ gu baxa te laal yolet nga koy liggéeyee ba mu daj. ³² Na baatu fëxya bi nekk ci digg bi, mel ni baatu mbubbam xare, te nañu ko ombe omb bu dëgër ba mu daj, ngir du xottiku. ³³ Nanga takk ci ombu fëxya bi ba mu daj, ay doomi gërënaat yu ñu defare wëñ gu baxa te laal yolet, ak wëñ gu xewar ak gu xonq curre, te diggante gërënaat yi, nga doxale ci ay jóolooli yu wurus ba omb bi daj. ³⁴ Ab jóoloolib wurus, ab doomu gërënaat, ab jóoloolib wurus, ab doomu gërënaat, ba ombu fëxya bi daj. ³⁵ Na ko Aaróona sol bu nekke ci liggéeyu sarxaleem. Su ko defee coowal jóolooli yi di jib, ba buy jall ci biir bérab bu sell bi, jëm fi kanam Aji Sax ji, mbaa mu di ci génne, du tax mu dee.

³⁶ «Sàkkal dogu wurusu ngalam wu tell, nga ñaas ci mbind mii ni ñuy ñaase mbindum torlu: “Lu sell a ngii, ñeel Aji Sax ji.” ³⁷ Takke ko buum gu baxa te laal yolet ci kaw kaala gi, mu féete kanam. ³⁸ Na tafu ci jëwu Aaróona, mu gaddoo ko ay wu tukkee ci lu bànni Israyil moy ci wàllu yëf yu sell yi ñu wara sellal ci seen mboolem sarax yu sell. Na nekk fàww ci jëëm, ndax Aji Sax ji nangul leen.

³⁹ «Mbubb mu gudd mi nag, nanga ko ràbbe wëñu lëe, kaala gi itam di wëñu lëe. Te laxasaay gi, liggéeyu ràbb bu rafet lay doon. ⁴⁰ Doomi Aaróona yu góor yi

* 28:30 28.30 Urim boobu ak Tumim ba, sarxalkat baa ko daan jëfandikoo, ngir xam lu Yàlla namm. Xameesul nag nan lañu ko daa jëfandikoo, waaye jombul mu nirook ab tegoo bant.

itam, sàkkal leen ay mbubb. Sàkkal leen ay laxasaay, te ay kaala it, sàkkal leen ko ngir daraja ak teraanga bu sarxalkat wara yelloo. ⁴¹ Nanga solal yooyii sa mag Aaróona, mook ay doomam yu góor, te nga sotti leen diwu pal† gi, dénk leen seen sas. Noonu nga leen di sédde céru sellnga, ñu di ma sarxalal. ⁴² Sàkkal leen ay tubéyi njiitlaayi lée, ñu sange ko seeni cér, dale ko ci ndigg li ba ci lupp yi. ⁴³ Na Aaróona aki doomam jittloo loolu, bu ñuy dugg ci xaymab ndaje mi, mbaa ñuy jegeji sarxalukaay bi, ngir liggéey ci bérab bu sell bi, ndax ñu baña yóbbe seen bopp mbugal, muy seen dee. Na Aaróona ak askanam sàrtoo loolu fàww.

29

Lu jëm ci sarxalkat yeek seen xewu colu

¹ «Lii nag mooy li nga leen di defal, ngir sédd leen céru sellnga, ngir ñu di ma sarxalal: Dangay jël yékk wu ndaw ak ñaari kuuy yu amul sikk, ² ak mburu yu mag yu amul lawiir, ak kàmp yu sew yu amul lawiir yu ñu xiiwaale diw, ak mburu yu tàppandaar yu amul lawiir, ñu wis diw ca kaw, te sungufu bele su mucc ayib ngay defare yooyu. ³ Yebal lépp ci benn pañe te jébbale ko, mook yékk wu ndaw wi ak ñaari kuuy yi. ⁴ Yóbbul Aaróona ak doomam yu góor, ba ca bunt xaymab ndaje ma, nga sang leen. ⁵ Nga jël yére yi nag, solal Aaróona mbubb mu gudd mi, ak féxyab xar-sànni mi, teg ci xar-sànni mi, tegaat ci kiiraayal dënn bi, daldi koy takkal ngañaaay liy tege ci xar-sànni mi. ⁶ Su ko defee nga kaala ko, takkal ko meeteel gu sell gi, fi kanam kaala gi. ⁷ Te nga jël diwu pal gi, sotti ko ci kaw boppam, diw ko. ⁸ Bu loolu weesee, nga ne doomi Aaróona ñu jegesi, nga solal leen seeni mbubb, ⁹ kaala leen, te takkal Aaróona ak doomam yu góor ay laxasaay. Su ko defee ñu féezewoo céru sarxalkat, muy dogal bu sax dàkk.

«Noonu ngay sase Aaróona ak doomam yu góor. ¹⁰ Nanga yóbbu yékk wu ndaw wi ba ci bunt xaymab ndaje mi, Aaróona aki doomam teg seeni loxo ci kaw boppu yékk wi, ¹¹ nga daldi rendi yékk wi fi kanam Aji Sax ji, fi bunt xaymab ndaje mi. ¹² Sàkkal ci deretu yékk wu ndaw wi, nga capp ci sa baaraam, diw ci béjjéni sarxalukaay bi, te nga tuur li des ci deret ji ci suufu sarxalukaay bi. ¹³ Jëlal mboolem nebbon bi sàng yére yérey biir yi, ak bàjjo bi ci res wi, ak ñaari dëmbéen yi ànd ak nebbon bi ci kaw dëmbéen yi, nga boole lépp def ko saraxu taal-saxaral ci kaw sarxalukaay bi. ¹⁴ Seen saraxu pootum bàkkaar a ngoogu. Li des ci yàppu yékk wi, boole kook der bi,

ak sébbriit mi, nga génne ko dal bi, lakk ko.

¹⁵ «Menn kuuy mi, jël ko, Aaróona aki doomam teg seeni loxo ci boppu kuuy mi, ¹⁶ ba noppi, nga rendi kuuy mi, jël deret ji, xépp ko ci peggi sarxalukaay bi yépp ba mu daj. ¹⁷ Kuuy mi, ay dog nga koy dogat, daldi raxas yére yérey biir yi ak yeel yi, teg ci kaw dog yi ak bopp bi. ¹⁸ Lakkal kuuy mépp ci kaw sarxalukaay bi. Saraxu rendi-dóomal la, ñeel Aji Sax ji, di xeeñ xetug jàmm; saraxu sawara la, ñeel Aji Sax ji.

¹⁹ «Jëlal kuuy mi ci des, Aaróona ak doomam yu góor teg seeni loxo ci boppu kuuy mi. ²⁰ Su ko defee nga rendi kuuy mi, sàkk ci deret ji, taqal ci tabanum noppu ndijooru Aaróona ak tabanum noppu ndijooru doomam yi, te nga taqal ci seen baaraamu déyu ndijoor; ak seen baaraamu tànkub ndijoor bu mag. Boo noppee, nga xépp li des ci deret ji ci peggi sarxalukaay bi yépp ba mu daj. ²¹ Sàkkal ci deret ji ci sarxalukaay bi, ak ci diwu pal gi, nga wis-wisal ko ci kaw yaramu Aaróona ak ci kawi yéreem, wis-wisal ko ci kaw yarami doomam ak ci seen kawi yére. Su ko defee Aaróona sell, mooki yéreem, ay doomam it sell, ñook seeni yére.

²² «Kuuy mi, nanga ci génne li ci duuf: calgeen bi, ak nebbon bi sàng yére yérey biir yi, ak bàjjo bi ci res wi, ak ñaari dëmbéen yeek nebbon bi ci seen kaw, ak tànkub ndijoor bu kanam bi, ndax kuuyum colug sarxalkat yi la. ²³ Pañe biy taaje fi kanam Aji Sax ji te def mburu yu amul lawiir nag, nanga ci sàkke menn mburu mu tàppandaar, ak menn mburu mu ñu xiiwe diwu oliw, ak menn mburu mu gëna sew. ²⁴ Nga boole lépp, teg ko ci loxoy Aaróona aki doomam, ñu def ko saraxu yékkati-jébbale, ñeel Aji Sax ji. ²⁵ Nga daldi koy nangoo ci seeni loxo, lakk ko ci kaw sarxalukaay bi, boole kook saraxu rendi-dóomal bi, muy xeeñ xetug jàmm fi kanam Aji Sax ji. Saraxu sawaraa ngoogu, ñeel Aji Sax ji.

²⁶ «Nanga jël dënn bi bokk ci kuuyum xewu colug Aaróona, nga def ko saraxu yékkati-jébbale, ñeel Aji Sax ji. Loolu moo cay sa wàll. ²⁷ Nanga ber dënn bi ñu def saraxu yékkati-jébbale, mook tànkub jooxe bi ñu def saraxu yékkati-jébbale, te ñu jooxee ko ci kuuyu colu gi, ñeel Aaróona aki doomam. ²⁸ Aaróona aki sètam la loolu di doon seeni cér bu bànni Israyil di warlook ñoom ba fàww, ndax ab jooxe la; jooxe bu bànni Israyil di génnee ci seen saraxi cant ci biir jàmm, muy seenub jooxe, ñeel Aji Sax ji.

† 28:41 28.41 diwu pal: seetal ci 30.22-33.

²⁹ «Yérey Aaróona yu sell yi nag, gan-naaw bu déddoo, dees koy féetale ay doomam, ñu fale leen ko ci seen xewu colug carxal. ³⁰ Diiru juróom ñaari fan, ci la sarxalkat bi koy wuutu ci doomam yu góor, di sol yérey yooyu, moom miy dugg ci biir xaymab ndaje mi, ci biir bérab bu sell bi.

³¹ «Nanga jël kuuyu xewu colu gi, nga baxal yàpp wi ci bérab bu sell. ³² Aaróona aki doomam ñooy lekk yàppu kuuy mi ci bunt xaymab ndaje mi, boole kook mburu mi ci pañe bi. ³³ Ñam yooyu, ña koy lekk mooy ña muy seen saraxu njotlaay, kerooq ca seen xewu colu, ga ñu leen tabbe ngir sellal leen. Waaye keneen du ci lekk, ndaxte ñam wu sell la. ³⁴ Bu lenn ci yàppu colu gi mbaa lenn ci mburu mi fanaanee ba bêt set, nañu lakk loola ca fanaan ba mu jeex. Deesu ko lekk, ndaxte ñam wu sell la.

³⁵ «Noonu ngay def ak Aaróona aki doomam, ni ma la ko sante rekk. Diiru juróom ñaari fan ci nga leen di sas, ³⁶ te aw yèkk ngay def saraxu póotum bàkkaar bés bu nekk, muy seen njotlaay, di njotlaay liy setal sarxalukaay bi. Te itam nanga diw sarxalukaay bi ag diw, sellale ko ko. ³⁷ Diiru juróom ñaari fan ngay defal sarxalukaay bi saraxu njotlaayam, sellale ko ko, ba sarxalukaay bi doon lu sella sell. Lépp lu laal sarxalukaay bi day séddu ci sellayam.

Lu jëm ci sarax yi war bés bu nekk

³⁸ «Lii mooy li ngay rendi ci kaw sarxalukaay bi: ñaari kuuyi menn at, bés bu nekk ba fàww. ³⁹ Menn kuuy mi, nga rendi ko ci suba, meneen kuuy mi, diggante ngoon, ba jant di so. ⁴⁰ Sàkkal ñetti kilo, yemook benn fukkeelu nattub sunguf su mucc ayib su ñu xiwe liitar ak genn-wàll, yemook xaajaatub natt bi ñuy wax xiin ci diwu segalu oliw, ak saraxu tuurub benn liitaru biiñ ak genn-wàll, yemook xaajaatub xiin. Loolu yépp ànd ak menn kuuy mi. ⁴¹ Meneen kuuy mi, nga rendi ko diggante ngoon ak jant bu so, booleeti ko ak saraxu pepp mi ak saraxu tuuru bi, ni woon ci suba, muy xeeñ xetug jàmm, di saraxu sawara, ñeel Aji Sax ji. ⁴² Saraxu rendi-dóomal lay doon bu sax, te war seen maasoo maas fi bunt xaymab ndaje mi, ci kanam Aji Sax ji. Foofu laay dajeek yeen, te fa laay waxe ak yaw, ⁴³ Foofa laay dajeek bànni Israyil, bérab ba doxe fa sell, ndax samag leer. ⁴⁴ Maay sellal xaymab ndaje mi ak sarxalukaay bi, te Aaróona aki doomam, maa leen di sellal, ngir ñu doon samay sarxalkat. ⁴⁵ Maay dëkk fi

digg bànni Israyil te maay nekk seen Yàlla. ⁴⁶ Su boobaa bànni Israyil xam ne, man Aji Sax ji maay seen Yàlla, ji leen génnee réewum Misra, ngir dëkk fi seen biir. Man maay seen Yàlla Aji Sax ji.

30

Lu jëm ci sarxalukaayu cuuraay bi

¹ «Sàkkal ab sarxalukaay bu ñuy taal cuuraay ci kawam. Bantu séng nga koy defare. ² Guddaay bi di xasab, yaatuwaay bi di xasab; ab kaare lay doon, taxawaay bi di ñaari xasab, ay béjjénam ànd ak moom di benn bant bi. ³ Xoobal wurusu ngalam kaw gi ak wet yi ba mu daj ak béjjén yi, te nga sàkkal ko kéméju wurusu gu ko wër. ⁴ Naari noppi wurusu nga koy sàkkal ci ron kéméji gi. Féetaleel nopp yi ci ñaari wetam, ñu jàkkaarloo, di téye banti njàppu, yi ñu koy yóbboo. ⁵ Defal njàppu yi bantu séng te nga xoob njàppu yi wurusu.

⁶ «Tegal sarxalukaayu cuuraay bi ci kanam rido, bi laq gaalu àlluway seede si ak kubeeru njotlaay, gi ci kaw gaalu àlluway seede si, foofu may dajejeek yaw. ⁷ Na fa Aaróona taal cuuraay suba su nekk. Buy topptoo làmp yi lay taal cuuraay lu xeeñ li. ⁸ Bu Aaróona di taal làmp yi diggante ngoon ak jant bu so itam, na taal cuuraay lu xeeñ li. Cuuraay la su ñuy taal ba fàww, ci seen gépp maas fi kanam Aji Sax ji. ⁹ Deesu ci sarxal cuuraay lu ñu diglewul, deesu ci rendi saraxu dóomal, deesu ci def saraxu pepp mbaa saraxu tuuru. ¹⁰ Na Aaróona di sàkk ci deretu saraxu póotum bàkkaar bi, taqal ci béjjéni sarxalukaay bi, ngir def ko njotlaayal sarxalukaay bi benn yoon cim at. Benn yoon cim at lañu koy defal njotlaayam ci seen gépp maas. Sarxalukaay bu sella sell la, ñeel Aji Sax ji.»

Lu jëm ci njot-gi-bakkan

¹¹ Aji Sax ji waxati Musaa ne ko: ¹² «Boo tolloo ci taxawal limeefu boppi bànni Israyil, na ku nekk ci ñoom fey Aji Sax ji njot-gi-bakkanam ba nga koy lim, ndax menn musiba bañ leena dikkal ci biir lim bi.

¹³ «Lii nag mooy li képp ku ñu bind ci limeef yi wara fey: dogu xalis bu diisaay bi di genn-wàllu siikal, bi ñuy natte ci jaamookaay bi, dayo boobu tollook fukki gera*, mu dib jooxe, ñeel Aji Sax ji. ¹⁴ Képp ku bindu ci limeef bi, te am ñaar fukki at, jëm kaw, na fey jooxe bi, ñeel Aji Sax ji. ¹⁵ Ki woomele du fey lu épp, ki néewle du fey lu yées genn-wàllu siikal, buy fey jooxeb Aji Sax ji ngir njot-gi-bakkanam. ¹⁶ Nanga nangoo xalisu njot-gi-bakkan bi

* 30:13 30.13 gera moo doon natt, ba gënoona tuut ci wàllu diisaay, yemook genn-wàllu garaam.

ci bànni Israyil, te nga féeetale ko liggéeyu xaymab ndaje mi. Loolu pàttliku lay doon, ñeel bànni Israyil fi kanam Aji Sax ji, ngir seen njot-gi-bakkan.»

Lu jëm ci mbalkam njàpp mi

¹⁷ Aji Sax ji waxati Musaa ne ko: ¹⁸ «Sàkkal mbalkam njàpp mu xànjari, ak tegub xànjaram ngir ñu di ko jàppe. Teg ko ci diggante xaymab ndaje mi ak sarx-alukaay bi, te nga duy ko ndox. ¹⁹ Aaróona aki doomam di ci tanq, raxase seeni loxo ak seeni tànk. ²⁰ Bu ñuy duggisi ci xaymab ndaje mi, nañu jàpp, ndax ñu baña dee, nañu jàpp itam, bu ñuy liggéeyi fi sarx-alukaay bi, di taal saraxu sawara, ñeel Aji Sax ji. ²¹ Nañu raxas seeni loxo ak seeni tànk, ndax ñu baña dee. Na loolu di dogal bu sax dàkk, ñeel Aaróona ak askanam ci seen gépp maas.»

Lu jëm ci diwu pal gi ñuy sellale

²² Aji Sax ji waxati Musaa ne ko: ²³ «Yaw nag, tànnal ngèn-gi-xeeñal; xeetu ndàbb li ñuy wax miir, bu tooy bi, sàkk ci juróomi kilo, xasum kanel mu xeeñ; ñaari kilo ak genn-wàll, yuuru gattax gu xeeñ; ñaari kilo ak genn-wàll, ²⁴ ak xasum kaas; juróomi kilo, yemook juróomi téeméeri siikal, ci siikal jaamookaay bi, ak juróom benni liitari diwu oliw, yemook benn natt bi ñuy wax xiin. ²⁵ Loolu ngay def diwu pal gu sell gi, te na doon njafaan lu njafaan-kat waajal ba mu baax. Diwu pal gu sell lay doon.

²⁶ «Nanga ci diw xaymab ndaje mi, diw ci gaal gi àlluway seede si dence, ²⁷ ak taabal ji aki ndabam, ak tegukaayu lãmp bi, ak jumtukaayam yépp, ak sarx-alukaayu cuuraay bi. ²⁸ Nanga ci diw itam sarxalukaayu saraxu rendi-dóomal bi, ak ndabam yépp, ak mbalkam njàpp mi akub tegoom. ²⁹ Noonu ngay sellale yooyii, mu daldi doon lu sella sell. Lépp lu laal yooyii day doon lu sell. ³⁰ Aaróona aki doomam itam, nanga leen diw. Noonu nga leen di sellale, ngir ñu doon samay sarxalkat.

³¹ «Nanga wax nag bànni Israyil ne leen: “Googu diw sama diwu pal gu sell lay doon, ci seen gépp maas. ³² Doom aadama ju ko jagoowul, deesu ko ko diw, te buleen njafaan lenn lu ni mel, lu ngeen yemale dayoy xeeñal ya ak dayoy diw gu sell gi. Deesu ko def ci yaramu kenn ku ko jagoowul, te buleen njafaan xeeñal yi ciy dem, ci dayoy yu tollook dayoy diw gu sell gi, ngir defar lenn lu ni mel. Lu sell la, lu ngeen wara wormaal sellngaam. ³³ Képp ku njafaan lu ni mel, mbaa mu taqal ci yaramu ku ci bokkam, dees koy dagge ci biir bànni Israyil.”»

Lu jëm ci cuuraay li

³⁴ Aji Sax ji waxati Musaa ne ko: «Wutal nag xeeñal yii: ndàbbu estaagte, ak ndàbbi galbanom, ak xori onigsè yu xeeñ, ak cuuraay-libañ lu raxul, te yooyu yépp tolloo dayo. ³⁵ Def ko njafaan lu njafaan-kat waajal ba mu baax, xorom ko, mu set, sell. ³⁶ Sàkk ci, wol ko ba mu moka, nga teg ko fi kanam gaal gi àlluway seede si dence, fi biir xaymab ndaje mi, fi may dajeek yaw. Loolu lu sella sell la lu ngeen wara wormaal. ³⁷ Waaye cuuraay loolu ngay njafaanlu nag, bu ci njafaan la bopp ci dayoy xeeñal yu ni tollu. Lu sell la lu ngeen wara wormaal, ñeel Aji Sax ji. ³⁸ Képp ku defar lenn lu ni mel, ngir di ko xeeño, dees koy dagge ci bànni Israyil.»

31

Tabb nañu ay liggéeykat yu xareñ

¹ Aji Sax ji waxati Musaa ne ko: ² «Gisal, maa woo Besalel ci turam. Besalel, Uri mooy baayam; Uri, Ur Yudeen bi di baayam. ³ Maa ko feesale xelum Yàlla, ak xareñte ak déggin ak xam-xam, ak manoorey bépp xeetu liggéey, ⁴ ngir muy nas ay liggéeyi wurus ak xaalis ak xànjari, ⁵ di yett per yu muy tapp, di yett bant, di liggéey lu nekk. ⁶ Maa ngii di ko tofal Oliyab doomu Ayisamaag Daneen bi, te itam mboolem ñi xarala, may naa leen xelum xarala, ngir ñu ànd def mboolem lii ma la sant: ⁷ Muy xaymab ndaje mi, ak gaalu àlluway seede si, ak kubeeru saraxu njotlaay gi ci kawam, ak mboolem jumtukaayi xayma bi; ⁸ taabal ji, ak ndab yi, ak tegukaayu lãmpu wurus ngalam beek yéfam yépp, ak sarxalukaayu cuuraay bi, ⁹ ak sarxalukaayu rendi-dóomal bi, ak ndabam yépp, ak mbalkam njàpp mi akub tegoom, ¹⁰ ak itam yére yu yànj yi, yére yu sell yi ñeel Aaróona sarxalkat bi ak yérey doomam, yi ñuy sol, di sarxale, ¹¹ ak diwu pal gu sell gi, ak cuuraay lu xeeñ li ñeel bérab bu sell bi. Loolu ma la sant lépp, nañu ko defe noonu.»

Lu jëm ci solob bésu Noflaay

¹² Aji Sax ji waxati Musaa ne ko: ¹³ «Waxal bànni Israyil ne leen: “Fexeelen rekk ba sama bési Noflaay, ngeen di ko wormaal, ndax bésu Noflaay da di firnde sama digganteek yeen ak seen askan, ngir ngeen xam ne man Aji Sax ji maa leen ber, sellal leen. ¹⁴ Wormaal-leen bésu Noflaay ndax lu sell la, ñeel leen. Ku ko teddadil, dee rekk mooy àtteem: képp ku ci liggéey, kooku dees na ko dagge ci biiri bokkam. ¹⁵ Juróom benni fan lees wara liggéey, waaye bésu Noflaay bay juróom ñaareel ba, bés bu sell la, bésu Noflaay bu mat sékk, ñeel Aji Sax ji. Képp ku liggéey bésu Noflaay, dee rekk

mooy átteem. ¹⁶ Na bànni Israyil wormala bésub Noflaay, nañu sàmm bésub Noflaay, ñook seen askan. Kóllère la gu sax dàkk. ¹⁷ Sama diggante laak bànni Israyil, te firnde la ju sax dàkk, ndax ci juróom benni fan la Aji Sax ji sàkk asamaan ak suuf, bésub juróom ñaareel ba, mu dal-lu, daldi yeesu.»

¹⁸ Ba Yàlla noppee wax ak Musaa ca kaw tundu Sinayi, da koo jox ñaari àlluway doj yu mu binde loxol boppam.

32

Israyil fecci na kóllère

¹ Ba mbooloo ma gisee Musaa yàgg lool te wàccul tund wa, dañoo songandoo Aaróona, ne ko: «Ayca, sàkkal nu yàlla ju nu jiite, ndax Musaa mii nu génne réewum Misra kat, xamunu lu ko dal.» ² Aaróona ne leen: «Tekkileen boog, indil ma seen jaaroy wurusi nopp, yi ci seeni jabar ak seeni doom, góor ak jigéen.» ³ Ba loolu amee mbooloo mépp tekki seen jaaroy wurusi nopp, indil Aaróona. ⁴ Mu nangoo ko ci seeni loxo, liggéey ko ba sàkk ci sèllu wu ñu móol. Ci kaw loolu ñu naan: «Bànni Israyiloo, seen Yàllaa ngii, moo leen génne réewum Misra!» ⁵ Aaróona gis la xew, daldi tabax ci kanam sèllu wi ab sarxalukaay. Mu daldi yéene, ne: «Èllég màggal la, ñeel Aji Sax ji.» ⁶ Ca èllég sa mbooloo ma teela xëy, ñu def ay saraxi rendi-dóomal, ak ay saraxi cant ci biir jàmm. Ba mu ko defee ñu toog, di lekk ak a naan, nes tuut ñu jóg, di mbumbaay.

⁷ Aji Sax ji nag waxati Musaa ne ko: «Gaawal wàcc, ndax sa mbooloo, ma nga génne réewum Misra def nañu yàqute. ⁸ Jàdd nañu xaat yoon wa ma leen tegoon. Dañoo sàkkal seen bopp sèllu wu ñu móol, di ko sujjóotal ak a sarxalal, naan: “Israyiloo, seen yàllaa ngii, moo leen génne réewum Misra!”»

⁹ Aji Sax ji dellu ne Musaa: «Maa gis askan wii, askan wu dègèr bopp a ngii! ¹⁰ Léegi seetaan ma rekk, samam sànj tàkkal leen, ba ma faagaagal leen, te du tee ma def la askan wu mag.» ¹¹ Musaa nag tinu Yàllaam Aji Sax ji ne ko: «Aji Sax ji, ana lu waral sam sànj di tàkkal sa ñoñ ñi nga génne réewum Misra ci sa kàttan gu màgg ak sa dooley loxo? ¹² Ana lu jar Misra di wax naan: “Musiba mi mu leen naraloon, ba mu leen di yiwi de, du lenn lu moy rey leen ba ñu jeex ca tund ya, ba fare leen kaw suuf sépp.” Ngalla dèddul sa sawaras sànj te nga fomm musiba mi nga naral sa ñoñ. ¹³ Bàyyil xel Ibraayma ak Isaaxa ak Israyil, sa jaam ñi nga giñaloon ci sa bopp, ne leen: “Maay yokk seen askan ni biddiwi asamaan, te mboollem réew mii

ma waxoon, maa koy jox seen askan, ñu moom ko fàww.» ¹⁴ Ba loolu amee Aji Sax ji fomm musiba ma mu waxoon ne dina ko teg ñoñam.

Merum Musaa am na njeexital

¹⁵ Ba mu ko defee Musaa walbatiku, wàcce ca tund wa, mook ñaari àlluway seede ya ca loxoom, àlluwa yu ñu bind ñaari wet yépp, biir ak biti. ¹⁶ Àlluwa ya, liggéeyu Yàllaa, mbind ma di mbindum Yàlla mu ñaase ca kaw àlluwa ya. ¹⁷ Ci kaw loolu Yosuwe dégg coowal mbooloo may xaacu. Mu ne Musaa: «Coowal xaree ngoog ca dal ba!» ¹⁸ Musaa ne ko:

«Coow loolu de du bàkku yu njambaar waral,

du jooytu yu jéll sabab,
woyi mbumbaay daal laa dégg.»

¹⁹ Ba Musaa jubee dal ba, ba gis sèllu wa ak pecc ma, mer mu ne jippét tàkk la ko def, mu sànni àlluwa ya mu ñabbon, mu ne tasar ca suufu tund wa. ²⁰ Ci kaw loolu mu jél sèllu, wa ñu sàkk, lakk ko, wol ko ba mu mook, mu suy cim ndox, daldi koy naanloo bànni Israyil.

²¹ Musaa nag ne Aaróona: «Lan la la mbooloo mii def, ba nga yóbbe leen gii moy gu réy?» ²² Aaróona ne ko: «Sang bi, rikk bul mer, yaw ci sa bopp xam nga ni mbooloo mii yeboo ci mbon. ²³ Dañu ma ne: “Sàkkal nu yàlla ju nu jiite, ndax Musaa mii nu génne réewum Misra kat, xamunu lu ko dal.” ²⁴ Ma ne leen: “Ku takk wurus, tekkil, indi!” Ñu jox ma, ma sànni ci sawara wi, sèllu wii génne ci!»

²⁵ Musaa nag gis ni mbooloo mi ràkkaajoo, ndax fekk na Aaróona bay-bayal leen, ba ñu ràkkaajoo, ba ku leen doon fexeel man leena ree. ²⁶ Musaa taxaw ca buntu dal ba, ne: «Ku ànd ak Aji Sax ji, fii ci man!» Leween ñépp dikki, yéew ko. ²⁷ Mu ne leen: «Aji Sax ji, Yàllay Israyil dafa wax ne: “Na ku nekk teg saamaram ci luppam, te ngeen wër dal bi bépp buntoo bunt, ba mu daj. Reyleen ñépp; doomu ndey, xarit ak jegeñaale.”» ²⁸ Ba loolu amee Leween ña def la leen Musaa sant. Ñi daanu ci bànni Israyil bésub keroog tollu na ci ñetti junniy góor. ²⁹ Musaa nag ne: «Bés niki tey sasoo ngeen Aji Sax ji, gannaaw yeena dal ci kaw doom, dal ci kaw doomu ndey. Kon bésub tey tegoon ngeen barkeb Aji Sax ji.»

Musaa tinu na Yàlla

³⁰ Ca èllég sa Musaa ne mbooloo ma: «Yeen de bàkkaar ngeen bàkkaar bu réy, waaye maa ngi nii di yéeg, jem ci Aji Sax ji. Jombul ma jotul leen seen bàkkaar.» ³¹ Ba mu ko defee Musaa dellu ci Aji Sax ji, ne ko: «Éey Aji Sax ji, mbooloo mii de moy

nañu la lool, ba ñu sàkkalee seen bopp ay yállay wurus. ³² Léegi nag, soo leen dee baal seen bàkkaar, aa... Lu ko moy kat, far ma rekk ci téere bi nga bind*.» ³³ Aji Sax ji ne Musaa: «Ki ma moy, kooku donj laay far ci sama téere. ³⁴ Yaw daal demal rekk, yóbbu mbooloo mi fa ma la waxoon, te sama malaakaa ngii di la jiituji. Waaye keroog sama bésu mbugal, maay mbugal mbooloo mi ndax seen bàkkaar.»

³⁵ Gannaaw gi Aji Sax ji mbugal na mbooloo ma ndax la ñu sàkkloo woon Aaróona aw sèllu.

33

Yàlla yebal na Musaa

¹ Aji Sax ji waxati Musaa ne ko: «Doxal jóge fii, yaak mbooloo mi nga génne réewum Misra, ngeen dem ca réew ma ma giñaloon Ibraayma ak Isaaxa ak Yanqóoba, ne leen seen askan laa koy jox. ² Maay yebal malaaka mu jiitu la, te maa fay dāge Kanaaneen ña ak Amoreen ña ak Etteen ña ak Periseen ña ak Eween ña ak Yebuseen ña, ³ ba ngeen dugg ca réew mooma meew maak lem ja tuuroo. Waaye duma ànd ak yeen, lu ko moy dinaa leen faagaagal ci yoon wi, ndax askan wu dēgēr bopp ngeen.» ⁴ Ba mbooloo ma déggee kaddu yu dēgēr yooyu, dañoo daldi toroxlu, ba kenn takkootul gànjarām.

⁵ Fekk na Aji Sax ji wax Musaa ne ko: «Waxal bànni Israyil ne leen, ñoom askan wu dēgēr bopp lañu. Su ma àndoon ak ñoom ab diir rekk, dinaa leen faagaagal. Kon nag nañu tàggook seeni gànjar, ba ma seet nu may def ak ñoom.» ⁶ Bànni Israyil a nga dale teqlikook seeni gànjar ca tundu Oreb.

Yàlla feeñ na cib xayma

⁷ Musaa da daan toxal xayma bi, samp ko fu sorewaatook dal bi, ca biti. Mu di ko wooye xaymab ndaje mi* . Ku amaan lu muy diis Aji Sax ji, da daan génn dal bi, dem ba ca xaymab ndaje mooma ca biti. ⁸ Bu Musaa jémaan ca xayma ba, mbooloo mépp ay daldi taxaw, ku nekk tollu ci sa bunt xayma, di ko seetaan, ba mu dugg ca biir xayma ba. ⁹ Te bu Musaa duggaan ca xayma ba, taxaaru niir wa day wàcc, ne tekk ca bunt xayma ba, fekk Aji Sax jaa ngay wax ak Musaa. ¹⁰ Su ko defee bu mbooloo ma mépp gisee taxaaru niir wa taxaw ca bunt xayma ba, ñoom fépp ay daldi sujjóot, ku nekk ca sa bunt xayma. ¹¹ Aji Sax ji da daan wax ak Musaa ne

ko jàkk, mu ne ko jàkk, ni nit di waxe ak moroomam rekk. Bu ca Musaa jógee, daldi dellu ca dal ba, waaye bëkk-néegu Musaa, ngóor sa Yosuwe doomu Nuun daawul génn biir xayma ba.

Musaa layool na bànni Israyil

¹² Musaa nag ne Aji Sax ji: «Waaw, yaw de yaa ngi ma naa ma yóbbu mbooloo mii, waaye xamalo ma kan ngay yebal, mu ànd ak man. Yaa ma waxoon it ne ma: “Maa la xam ci saw tur, te it daj nga sama yiw.” ¹³ Gannaaw daj naa saw yiw nag, rikk xamal ma li nga namm, ba ma xam la. Su ko defee ma man di daj saw yiw. Te ngalla jàppal ne xeet wii kat, ñoo di sa ñoñ.»

¹⁴ Aji Sax ji ne ko: «Man ci sama bopp maay ànd ak yaw te maa lay noppal.»

¹⁵ Musaa ne ko: «Soo demul yaw ci sa bopp kay, bu nu jële fii! ¹⁶ Nees di xame ne daj naa saw yiw, maak sa ñoñ, te fekk ànduloo ak nun, ba nu doon, maak sa ñoñ, ñu ràññiku ci biir mboolem xeet yi ci kaw suuf?»

¹⁷ Aji Sax ji ne Musaa: «Loolu nga wax, moom laa lay defal, ndax daj nga samaw yiw, te it maa la xam ci saw tur.»

¹⁸ Musaa teg ca ne ko: «Ngalla may ma nag ma niir sag leer!» ¹⁹ Aji Sax ji ne ko: «Dinaa rombale sama gépp mbaax fi sa kanam, tey biralaale turu Aji Sax ji fi sa kanam. Maay baaxe ku ma neex, te maay ñeewante ku ma neex.» ²⁰ Mu teg ca ne ko: «Doo mana gi sama kanam nag, ndax doom aadama du ma gis ba noppi di dund.» ²¹ Ci kaw loolu Aji Sax ji ne ko: «Xoolal fii ci sama wet, taxaweel ci kaw doj wi. ²² Bu sama leer di romb, maa lay làq fi xar-xaru doj wi, yiiraale la sama loxo, ba jáll, ²³ doora dindi sama loxo, nga gis sama gannaaw, waaye sama kanam, maneesu koo giis.»

34

Lu jëm ci àlluway doj yu bees yi

¹ Aji Sax ji waxati Musaa ne ko: «Yettal ñaari àlluway doj yu mel ni yu jëkk ya, ma bind ci kaddu ya woon ca àlluwa yu jëkk, ya nga toj. ² Nanga waajal èllég, te nga teela yéegsi kaw tundu Sinayi wii, ba teewsi fi man ci njobbaxtaluu tund wi. ³ Bu kenn ànd ak yaw, te bu kenn xand fenn kaw tund wi. Jur gi sax bumu forsi ci suufu tund wi, du gu gudd, du gu gatt.» ⁴ Musaa nag yett ñaari àlluway doj yu mel ni yu jëkk ya, ba noppi teela xéy, yéegi ca tundu

* **32:32** 32.32 téere bi ñuy wax fii jombul mooy lim, ya Yàlla bind turi nit ña bokk ca mbooloo ma. Nit ku ñu masa far ca yooyu lim bokkatoow ca ñoñi Yàlla. * **33:7** 33.7 Gannaaw ga mbooloo ma defar jaamookaay, di ko wooye xaymab ndaje mi ba tey.

Sinayi, na ko ko Aji Sax ji sante. Ma nga ñàbb ñaari àlluway doj ya.

⁵ Aji Sax ji nag wàcc ci biir aw niir, taxaw ak Musaa foofa, daldi biral turam, ne: «Aji Sax ji.» ⁶ Ci kaw loolu Aji Sax ji romb fa kanam Musaa, di biral naan: «Aji Sax jee, Aji Sax ji, Yàlla jiy yèrèm, di yéwéne, mer ma diib, ngor gaak kóllère ga bare. ⁷ Keey saxal ngor ba ci junniy maas, di bale tooñ ak moy ak bàkkaar, te du ñàkka topp ku tooñ, ag tooñaangeem, xanaa di topp doom tooñu waajur, ba ca sèt yaak sétaat ya.» ⁸ Ba loolu amee Musaa ne gurub fa suuf, sujjóot, ⁹ ne ko: «Éey Boroom bi, ndegam daj naa saw yiw, rikk ándal ak nun rekk, Boroom bi, ak li mbooloo miy dègër bopp lépp! Jéggal nu sunu ñaawtéef ak sunu bàkkaar rekk, te nga séddoo nu.»

Aji Sax ji yeasal na kóllère gi

¹⁰ Aji Sax ji ne ko: «Maa ngi nii di fas kóllère ak yeen. Ci sa kanam mbooloo mépp laay def ay jaloore yu kenn masula amal ci áddina sépp, ak ci askan yépp, te mbooloo, mi ngore nekk ci seen biir mépp ay gis jaloorey Aji Sax ji, jaloore ju raglu ji ma lay defal. ¹¹ Bàyiyileen xel bu baax li ma leen sant bésuub tey jii. Maa ngii di leen dàqal Amoreen ñi ak Kanaaneen ñi ak Etteen ñi ak Periseen ñi ak Eween ñi ak Yebuseen ñi. ¹² Moytuleena wóllèrantèek niti réew ma ngeen jëm, bala ñoo doon ndègg-sèrèx ci seen biir. ¹³ Seeni sarxalukaay kay ngeen di màbb, seen tuuri doj, ngeen rajaxe, seen xer yi ñuy jaamoo Asera tuur mi, ngeen gor, ¹⁴ ndax waruleena jaamu jeneen yàlla, ngir Aji Sax ji, turu “Ku fiir ki” lay wuyoo, te Yàlla ju fiir la. ¹⁵ Buleen wóllèrantèek niti réew ma, lu ko moy dinañu gànctook seeni tuur, rendil seeni tuur ay sarax, woo leen ca, ngeen lekk ca seeni sarax. ¹⁶ Te it bu ngeen jèlalee seeni doom jabar ca seen doom yu jigéen, seen jigéen ñooña dinañu gànctook seeni tuur, ba xiir seen doom yu góor ci gànctook seen tuur yooyu.

¹⁷ «Ay tuur yu ñu móole weñ, buleen ko móol.

¹⁸ «Màggalug ayu bésu Mburu mu amul lawiir, wormaal-leen ko. Diiru juróom ñaari fan ngeen ciy lekk mburu mu amul lawiir, ni ma la ko sante bu áppam tax-awee ci weeru Abiib, ndaxte weeru Abiib ngeen génne fa Misra.

¹⁹ «Bépp taaw bu góor maay boroom, ba ci lépp lu góor lu jur taawloo, muy nag mbaa gátt. ²⁰ Waaye lu góor lu mbaam taawloo, joteleen ko ab gátt, mu wuutu ko. Su ngeen ko jotewul lu ko wuutu, dammleen loos wi. Képp kuy taaw bu góor

ci seeni doom it, nangeen ko jot. Te itam bu kenn taxawe loxoy neen fi sama kanam.

²¹ «Juróom benni fan nag ngeen di liggéey, waaye bésuub juróom ñaareel ba, dal-luleen. Bu ngeen doon bey, bu ngeen doon góob, dal-luleen.

²² «Màggalug ayi bési Ngóob, nangeen ko wormaal, bu ngeen di góob gubi bele yi jékka ñor, màggalu bésu Farmàngu mi ci ndeetel at mi itam, màggal-leen ko. ²³ Ñetti yoon cim at la seen góor ñépp di teew fi kanam Boroom bi Aji Sax ji, Yàlla Israyil. ²⁴ Maa leen di dàqal ay xeet, ba yaatal seen suuf, te diiru ñetti yoon yi ngeen di teewi cim at fi kanam Yàlla Aji Sax ji, kenn du ci wuta nangu seenum réew.

²⁵ «Buleen rendi sama sarax, di boole deret jeek lu am lawiir, te gáttu saraxu bésuub Mucc, bu ci dara fanaan ba bêt set.

²⁶ «Ngéneeli meñneef mi jékka ñore ci seen suuf, nangeen ko yóbbu seen kër Yàlla Aji Sax ji.

«Buleen togge ab tef soowum yaayam.»

²⁷ Aji Sax ji teg ca ne ko: «Nanga bind yii santaane, ndax ci kaw santaane yii laa fasook yaw kóllère, yaak bànni Israyil.»

²⁸ Foofa la Musaa des ak Aji Sax ji diiru ñeent fukki guddi ak ñeent fukki bèccég te lekkul, naanul. Aji Sax ji nag bind ci àlluwa yi, fukki santaane yi lal kóllère gi.

Musaa dellu na dal ba

²⁹ Ci kaw loolu Musaa wàcc tundu Sinayi, ñàbb ñaari àlluway seede sa. Naka la Musaa di wàcce ca tund wa, deru kanam ga di lèrxat te yégu ko. Booba ñaaroom baak Yàlla moo waral loola. ³⁰ Naka la Aaróona ak bànni Israyil gépp xoolaat Musaa, gisuñu lu moy deru kanam gay lèrxat, ñu daldi koy ragala jege. ³¹ Musaa nag woo leen, Aaróona ak njiiti mbooloo ma yépp dikk, mu wax ak ñoom. ³² Gannaaw loolu bànni Israyil ga ca des gépp doora jegesi, mu dénk leen mboolem la Aji Sax ji waxoon ak moom ca kaw tundu Sinayi. ³³ Musaa wax ak ñoom ba noppi, daldi muuroo kaala, làqe ko kanamam.

³⁴ Saa yu Musaa teewiwaan fa kanam Aji Sax ji, ngir wax ak moom, day muri kaala gi ba ba muy génñ; bu génnee, yegge bànni Israyil la ñu ko sant. ³⁵ Bànni Israyil nag di gis kanamu Musaa ak na deru kanam gay lèrxate. Su ko defee Musaa dellu muuruwaat, làq kanamam, ba ba muy demaat, ngir wax ak Aji Sax ji.

Bànni Israyil yékkati na jaamookaay ba

35

Bésub Noflaay du bésu liggéey

¹ Musaa nag dajale mbooloom bànni Israyil mépp. Mu wax leen ne leen: «Lii mooy li Aji Sax ji santaane, ngir ñu def ko: ² Juróom benni fan lees di liggéey, waaye bésub juróom ñaareel ba, seen bésub Noflaay bu sell bu mat sékk la, ñeel Aji Sax ji. Képp ku ci liggéey lenn, dees koy rey. ³ Buleen jafal sax sawara fenn ci seeni dëkkuwaay, ci bésub Noflaay.»

Ay sarax war na ci jaamookaay bi

⁴ Musaa dellu wax ak mbooloom bànni Israyil mépp ne leen: «Lii mooy li Aji Sax ji santaane.

⁵ «Sàkkleen ci seen alal ab jooxe bu ñeel Aji Sax ji. Képp ku am yéeneb xolam, na indi jooxeb Aji Sax ji: wurus ak xalis ak xànjär, ⁶ ak wëñ gu baxa te laal yolet, ak wëñ gu xewar, ak gu xonq curr, ak wëñu lée, ak kawari bëy ⁷ ak deri kuuy yu ñu suub xonq, ak deri piipi, ak banti séng, ⁸ ak diwu lãmp, ak ay xeeñal ngir diwu pal geek cuuraay lu xeeñ li, ⁹ ak ay peri onigsë ak yeneen per yuy tappe ci xar-sànni meek kiiraayal dënn bi.

¹⁰ «Mboolem ku xareñ ci yeen, na ñëw, ngeen def li Aji Sax ji santaane lépp: ¹¹ jaamookaay bi ak xaymaam ak kiiraayam aki keppoom aki làccam, ak galan yeek jën yeek tegu yi, ¹² ak gaal geek ay njàppoom ak kubeer gi ñuy amale ag njotlaay, ak rido bi ko làq, ¹³ ak taabal jeeki njàppoom ak ndabam yépp ak mburum teewal mi, ¹⁴ ak tegukaayu lãmp bi, aki juntuukaayam aki lãmpam ak diwu lãmp bi, ¹⁵ ak sarxalukaayu cuuraay bi aki njàppoom, ak diwu pal gu sell gi, ak cuuraay lu xeeñ li; ak kiiraayal buntu jaamookaay bi, ¹⁶ ak sarxalukaayu rendi-dóomal bi, ak caaxub xànjaram aki njàppoom ak li muy àndal lépp; mbalkam njàpp mi akub tegoom, ¹⁷ ak sor yi yéew jaamookaay bi aki jënam aki tegoom, ak lafu buntu ètt bi, ¹⁸ ak xeri jaamookaay bi, ak jën yi yéew ètt bi ak seeni buum, ¹⁹ ak yére yu yànj yi ñuy liggéey ci bérab bu sell bi, yére yu sell yu Aaróona, sarxalkat bi, ak yére doomam, yi ñuy sarxalee.»

²⁰ Ci kaw loolu mbooloom bànni Israyil gépp bàyyikoo fa Musaa. ²¹ Ba mu ko defee mboolem ña ca seen am pastéefu xol ak mboolem ña ca seen xel xiir; ñépp dikk, indi jooxeb Aji Sax ji ngir liggéeyu xaymab ndaje meek bépp liggéey bu mu laaj, ngir itam yére yu sell yi. ²² Góor ak jigéen bokk dikk, mboolem ñi am yéney xolam, mboolem ñi bëgga indi wurus, defal ko Aji Sax ji saraxu yékkati-jébbale; ñii indi ay lam, ñii jaaroy nopp, ñii jaaroy loxo, ñii ay caq, gànjari wurus yu nekk rekk. ²³ Te it

mboolem ñi dencoon wëñ gu baxa te laal yolet, ak wëñ gu xewar, ak gu xonq curr ak wëñu lée, ak kawari bëy mbaa deri xar yu ñu suub xonq, mbaa deri piipi, ñoom ñépp a indi la ñu dencoon. ²⁴ Képp ku namma jooxe xalis mbaa xànjär, jooxeel nga ko Aji Sax ji, te itam képp ku dencoon bantu séng bu jëm ci mboolem liggéeyu sarxal bi, indi nga bant bi. ²⁵ Ci biir loolu jigéen ñu xareñ ñépp ècce seeni loxo, ngir waajal wëñ gu baxa te laal yolet, ak wëñ gu xewar, ak gu xonq curr ak wëñu lée, ñu boole, indi. ²⁶ Mboolem jigéen ñi ko mane te am yéeneem itam, daldi ècc kawari bëy. ²⁷ Njiit yi nag indi ay peri onigsë ak yeneen per yiy tappe ci xar-sànni meek kiiraayal dënn bi, ²⁸ aki xeeñal, akug diw ngir lãmp beek diwu pal geek cuuraay lu xeeñ li. ²⁹ Mboolem bànni Israyil, góor ñeek jigéen ñi am yéney indi lu jëm ci liggéey bi Aji Sax ji santaane, Musaa jottli, ñoom ñépp a indil Aji Sax ji ay saraxi yéene.

Besalel ak Oliyab tàmbali nañu liggéey bi

³⁰ Musaa nag ne bànni Israyil: «Gisleen, Aji Sax ji moo woo Besalel ci turam. Besalel, Uri mooy baayam; Uri, Ur Yudeen bi di baayam. ³¹ Moo ko feesale xelum Yàlla ak xareñte ak déggin ak xam-xam ak manoorey bépp xeetu liggéey, ³² ngir muy nas ay liggéeyi wurus ak xalis ak xànjär, ³³ di yett per yu muy tapp, di yett bant, di liggéey lu nekk. ³⁴ Mayu jàngle itam yeb na ko cib dënnam, moom ak Oliyab, Daneen bi, doomu Ayisamaag. ³⁵ Moo leen feesal xareñte, ngir bépp liggéey, ci wàllu yett ak nataal, ak liggéeyu wëñ gu baxa te laal yolet, ak wëñ gu xewar, ak gu xonq curr ak wëñu lée. Mane nañu ràbb te itam dañuy sos seen taaral bopp.

36

¹ «Kon nag Besalel ak Oliyab ak mboolem ñu xareñ ñi Aji Sax ji may xareñte ak déggin ngir ñu mana jéfe mboolem sas yi jëm ci liggéeyu bérab bu sell bi, ñoom ñépp nañu sottal lépp li Aji Sax ji santaane.»

² Ba loolu amee Musaa woo Besalel ak Oliyab ak mboolem ñi xareñ ñi Aji Sax ji xareñal, mboolem ñi am yéney wàllsi ci liggéey bi, ngir sottal ko. ³ Ba mu ko defee ñu nangoo ci Musaa mboolem jooxe bu bànni Israyil indi, ngir sottal liggéeyu bérab bu sell bi. Bànni Israyil nag jàppoo suba gu jot di indil Musaa ay saraxi yéene, ⁴ ba mboolem liggéeykat yu xareñ yi nekkoon ci mboolem liggéeyu bérab bu sell bi, kenn ku ci nekk bàyyi la nga jàppoon, daldi dikk. ⁵ Ñu ne Musaa: «Li mbooloo mi indi wees na dayob liggéey bi

Aji Sax ji santaane.»⁶ Musaa nag yéenelu ca dal ba bépp, ñu ne, ñépp, géor ak jigéen, bu ci kenn waajalati ab jooxe, ñeel bérab bu sell bi. Fa la mbooloo ma noppee indi.⁷ Booba jumtukaay ya doyoon na sékk, ba épp sax la ñu cay liggéey lépp.

Defar nañu bérab bu sell ba

⁸ Ba loolu amee mboolom ñu xareñ ñi bokk ci liggéey bi daldi defar jaamookaay bi. Ñu def ko fukki sori rabali lée, yu ànd ak wëñ gu baxa te laal yolet, ak wëñ gu xewar ak gu xonq curr. Ñu ñawaale ci ay nataali serub.⁹ Guddaayu sor bu nekk di ñaar fukki xasab ak juróom ñiett, yaatuwaay bi di ñeenti xasab, sor yépp tolloo.¹⁰ Ñu taqle yii juróomi sor, taqle juróomi sor yi ci des.¹¹ Ci kaw loolu ñu ñaw ay takku yu baxa te laal yolet ci catal sor bi mujj ci benn taqalante bi, sor bi jeexal taqalante bi ci des it, ñu def ko noonu.¹² Juróom fukki takku lañu ñaw ci benn sor bi, ak juróom fukki takku ci catal sor bi jeexal taqalante bi ci des, takku yi yemoo.¹³ Ñu defar juróom fukki lonkuy wurus, daldi jokklantee sor yi lonku yi, ba jaamookaay bi di benn.

¹⁴ Ba loolu weesee ñu ràbb ay sori kawari bëy, ngir def ko ñaareelu xayma, muy kiiraay ci kaw jaamookaay bi. Fukk ak benn lañu def sor yi.¹⁵ Guddaayu sor bu nekk fanweeri xasab la, yaatuwaay bi di ñeenti xasab, te fukki sor yeek benn yépp a tolloo dayo.¹⁶ Ñu taqle yii juróomi sor, juróom benni sor yi ci des it noonu.¹⁷ Ñu sàkk juróom fukki takku ci catal sor, bi jeexal benn taqalante bi, daldi sàkk juróom fukki takku itam ci catal sor, bi jeexal taqalante bi ci des.¹⁸ Ñu sàkk nag juróom fukki lonkuy xánjar yu ñu jokklantee ñaari taqalante yi, muy benn xayma.¹⁹ Ñu defaral xayma bi malaanum deri kuuy bu ñu sóob xonq, ak menea malaanum deri piipi muy tege ci kawam.

²⁰⁻²² Gannaaw gi ñu sàkkal jaamookaay bi ay làcci bantu séng yu sampe. Làcc wu nekk am ñaari kenu yu ñu lékklee galan yu ndaw, te noonu lañu def làcci jaamookaay bi yépp. Fukki xasab lañu def taxawaayu làcc wu nekk, def yaatuwaay bi xasab ak genn-wàll.²³ Ci wàllu làcci jaamookaay bi, ñu sésale ñaar fukki làcc fi féete bëj-saalum,²⁴ boole kook ñeent fukki tegukaayi xalis yu ronu kenuy ñaar fukki làcc yi, ñaari tegukaay ronu làcc wi jiitu ngir ñaari kenoom yi mu àndal, ñaari tegu topp ci, ronu wépp làcc wu ci topp, ngir ñaari kenoom yi mu àndal.²⁵ Geneen wetu jaamookaay gi féete bëj-gannaar itam, ñu def ko ñaar fukki làcc,²⁶ ak seen ñeent fukki teguy xalis, ñaari

tegu ronu làcc wi jiitu, ñaari tegu topp ci, ronu wépp làcc wu ci topp.²⁷ Gannaaw jaamookaay gi féete sowu, ñu sàkkal ko juróom benni làcc,²⁸ teg ci ñaari làcc ngir colli jaamookaay bi ci gannaaw,²⁹ ñu àndandoo di benn ci suuf te lékkloo ci kaw ci benn lam kepp. Noonu lañu leen def ñoom ñaar, ñuy ñaari coll yi.³⁰ Muy juróom ñetti làcc ak seeni teguy xalis; di fukki tegu ak juróom benn, ñaari tegu ronu làcc wu nekk.

³¹ Gannaaw loolu ñu sàkk ay galani banti séng, juróomi galan yiy ànd ak làcc, yi ci genn wetu jaamookaay bi,³² ak juróomi galan ngir làcci wet gi ci des, ak juróomi galan ngir làcc yi ci gannaaw jaamookaay bi, fi féete sowu.³³ Ñu def galanu digg bi ci digg làcc yi, dale ko cat ba cat.³⁴ Ci biir loolu ñu xoox làcc yi wurus, sàkkal leen ay lami wurus yuy téye galan yi, daldi xoox galan yi it wurus.

³⁵ Ñu sàkk itam rido bi, ràbbe ko wëñ gu baxa te laal yolet, ak wëñ gu xewar, ak gu xonq curr ak wëñu lée, ñawaale ci ay nataali serub.³⁶ Ñu sàkkal rido bi ñeenti jëni séng yu ñu xoox wurus, jën yi ànd ak wékkukaayi wurus, ñu móolal jën yi ñeenti teguy xalis.

³⁷ Ñu sàkkal buntu xayma bi kiiraay lu ñu ràbbe wëñ gu baxa te laal yolet, ak wëñ gu xewar, ak gu xonq curr ak wëñu lée, mu doon liggéeyu ràbb bu rafet,³⁸ ak juróomi jënam yu ànd ak seeni wékkukaay. Ñu xoox nag wurus boppi jën yi ak seeni galan, juróomi teguy jën yi di xánjar.

37

Defar nañu gaalu kóllère gi

¹ Besalee nag defare gaalu kóllère gi déngu séng, guddaay bi di ñaari xasab ak genn-wàll, yaatuwaay bi di xasab ak genn-wàll, taxawaay bi di xasab ak genn-wàll.² Mu xoox ko wurusu ngalam biir ak biti, sàkkal ko kéméju wurus gu ko wër.³ Mu daldi koy móolal ñeenti lami wurus ci ñeenti tánkam, ñaari lam ci genn wet gi, ñaar, wet gi ci des.⁴ Mu sàkk nag ay njàppuy bantu séng, xoox bu ci nekk wurus,⁵ daldi roof njàppu yi ci lami weti gaal gi, ngir ñu di ko yóbboo gaal gi.

⁶ Ci kaw loolu mu sàkk kubeeru saraxu njotlaay gu wurusu ngalam, guddaay bi di ñaari xasab ak genn-wàll, yaatuwaay bi di xasab ak genn-wàll.⁷ Mu sàkk itam ñaari malaakay serub yu wurus. Liggéeyu téggu bu jekk la def serub yi ci ñaari cati kubeer gi,⁸ cat lii ab serub, cat lee ab serub, mu móolaale serub yi ak ñaari cat yi, serub yi ànd ak kubeer gi, di benn.⁹ Serub yaa ngi tàllal seeni laaf, jème kaw, yiire kubeer gi

seeni laaf te janoo, seeni kanam jublook kuberer gi.

Defar nañu taabalu mburum teewal mi

¹⁰ Ci biir loolu Besalel sàkk taabalu bantu séng, guddaay bi di ñaari xasab, yaatuwaay bi di xasab, taxawaay bi di xasab ak genn-wàll. ¹¹ Mu xoob ko wurusu ngalam, defal ko ombu wurus bu ko wër. ¹² Mu defal ko it pegg bu ko wër bu tollu ci yaatuwaayu ñeenti baaraam, ba noppi sàkkal pegg bi ombu wurus, wëralee ko ko. ¹³ Mu móolal taabal ji ñeenti lami wurus, daldi we lam yi ci ñeenti wet yi, fi fareek ñeenti tánk yi, ¹⁴ lam yi dendeek pegg bi, di téye njàppu, yi ñuy yóbboo taabal ji. ¹⁵ Mu sàkk ay njàppuy bantu séng, xoob ko wurus, ñu di ko yóbboo taabal ji. ¹⁶ Ci kaw loolu mu sàkk jumtukaay yiy tege ci taabal ji; ndabam yu tell yeek mbàttu yeek njaq yeek kèll, yi ñuy tuural Yàlla, lépp di wurusu ngalam.

Defar nañu tegukaayu làmp bi

¹⁷ Besalel sàkk itam tegukaayu làmp bu wurusu ngalam. Liggéeyu tégg bu jekk la def tegukaayu làmp bi, ak taatu tegukaay bi, ak peru tegukaay bi, ay kaasam aki kàmbóotam aki mbaram, lépp ànd ak tegukaay bi, di benn. ¹⁸ Juróom benni car a soqikoo ci weti tegukaayu làmp bi, ñetti car ci gii wet, ñett ci gi ci des. ¹⁹ Ñetti kaas yu bindoo ni tóor-tóori garabu amànd ñoo nekk ci benn car bi, kaas bu ci nekk ànd ak ay kàmbóotam aki mbaram, ñetti kaas yu bindoo ni tóor-tóori garabu amànd nekk ci car bi ci topp, kaas bu ci nekk ànd ak ay kàmbóotam aki mbaram, ba juróom benni car, yi soqikoo ci per bi, daj. ²⁰ Peru tegukaayu làmp bi itam am na ñeenti kaas yu bindoo ni tóor-tóori garabu amànd, ànd ak ay kàmbóotam aki mbaram. ²¹ Ab kàmbóot a ronu ñaari car, jàpp ci, beneen kàmbóot ronu ñaari car yi ci topp, jàpp ci, ab kàmbóot ronu ñaari car yi mujj, jàpp ci, juróom benni car, yi soqikoo ci weti per bi, daj. ²² Kàmbóot yi ak car yi nag ànd ak tegukaay bi, di wenn donju wurusu ngalam wu ñu tégg ba mu jekk. ²³ Mu sàkk juróom ñaari làmpam ak ay ñiimi feyukaayam ak ay andam, lépp di wurusu ngalam. ²⁴ Benn talañu wurusu ngalam, yemook fanweeri kilo, ci la sàkk tegukaayu làmp bi ak mboolem ay jumtukaayam.

Defar nañu sarxalukaayu cuuraay bi

²⁵ Ci kaw loolu Besalel sàkk ci bantu séng sarxalukaayu cuuraay bu kaare, guddaay bi di xasab, yaatuwaay bi di xasab, taxawaay bi di ñaari xasab, ay béjjénam ànd ak moom di benn bant bi. ²⁶ Mu xoob ko

wurusu ngalam ci kaw ak ci wet yi, ba mu daj, ak béjjén yi, daldi koy sàkkal wombu wurus bu ko wër. ²⁷ Ñaari noppi wurus la ko sàkkal ci ron kéméj gi, ci ñaari wetam, ñu jàkkaarloo, di téye banti njàppu, yi ñu koy yóbboo. ²⁸ Ci biir loolu mu sàkk ay njàppuy banti séng, xoob lu ci nekk wurus. ²⁹ Mu sàkk nag diwu pal gu sell gi, sàkk cuuraay lu xeeñ li raxul, def ko njafaan lu njafaan-kat waajal ba mu baax.

38

Defar nañu sarxalukaay bi ak mbalkam njàpp mi

¹ Ba tey Besalel sàkk ci bantu séng sarxalukaayu rendi-dóomal bu kaare, guddaay bi di juróomi xasab, yaatuwaay bi di juróomi xasab, taxawaay bi di ñetti xasab. ² Mu sàkkal ko ay béjjénam ci ñeenti collam, mu ànd aki béjjénam, di benn. Mu xoob nag lépp xàñjar. ³ Mu sàkk jumtukaayi sarxalukaay bi yépp: ndabi tibbukaayu dóom yi ak ñiitukaay yi ak kèll yi, ak lonkukaayi yàpp yi, ak and yi, jumtukaay yépp di xàñjar. ⁴ Mu sàkkal sarxalukaay bi caax bu ñu tégge xàñjar, mu ronu pegg sarxalukaay bi, dale ci suuf ba ci digg sarxalukaay bi. ⁵ Mu daldi koy móolal ñeenti nopp ci ñeenti colli caaxu xàñjar bi, ñuy téye njàppu yi. ⁶ Mu sàkk njàppuy bantu séng, xoob lu ci nekk xàñjar, ⁷ daldi roof njàppu yi ci nopp yi ci weti sarxalukaay bi, ngir bu ñu koy yóbbu. Am pax, mu xàñq yu tàppandaar ub, moom la def sarxalukaay bi. ⁸ Mu sàkk itam mbalkam njàpp mu ànd ak tegoom, di xàñjar ju jóge ci seetuy jigéen*, ñi doon liggéey ci bunt xaymab ndaje mi.

Defar nañu èttu jaamookaay bi

⁹ Besalel nag sàkk wurmbalu jaamookaay bi. Wetam, gi fare bëj-saalum di téeméeri xasabi sori rabal yu ñu ràbbe wëñu lée, ¹⁰ seen ñaar fukki jën ànd ak seen ñaar fukki tegu, di xàñjar, lonku yeek galani jën yi di xaalis.

¹¹ Wetu bëj-gànnar it di téeméeri xasabi sori rabal, seen ñaar fukki jën ànd ak seen ñaar fukki tegu, di xàñjar, lonku yeek galani jën yi di xaalis.

¹² Wetu sowu di juróom fukki xasabi sori rabal, ak seen fukki jën yu ànd ak seen fukki tegu, lonku yeek galani jën yi di xaalis.

¹³ Wetu penku bi ci kanam di juróom fukki xasab; ¹⁴⁻¹⁵ fukki xasabi sori rabal ak juróom fi làng ak buntu ètt bi ci genn wetam, ak seen ñetti jën yu ànd ak seen ñetti tegu, ak fukki xasabi sori rabal ak

* 38:8 38.8 seetuy jigéen ñi: booba ay dogi xàñjar lañu daan def seetu.

juróom, wet gi ci des, ak seen ñetti jën yu ànd ak seen ñetti tegu.

¹⁶ Mboolem sori wurmbalu ètt bi ba mu daj, wëñu lëe la.

¹⁷ Teguy jën yi xàñar la, wékkukaayi jën yeek ay galanam di xaalis, ñu xoob boppi jën yi xaalis; jëni ètt bi yépp nag, galani xaalis lañu leen lékklee. ¹⁸ Lafu buntu ètt bi, liggéeyu ràbb bu rafet la, bu ñu ràbbe wëñ gu baxa te laal yolet, ak wëñ gu xewar, ak gu xonq curr ak wëñu lëe. Guddaayu laf bi ñaar fukki xasab la, taxawaay bi yemook yaatuwaay bi, di juróomi xasab, tollook sori wurmbalu ètt bi. ¹⁹ Jëni lafu bunt bi ñeent la, seen ñeenti tegu di xàñar, seeni wékkukaay di xaalis, ñu xoob kaw jën yi xaalis, galan yi di xaalis. ²⁰ Mboolem xeri jaamookaay bi ak xeri wurmbalu ètt bi ba mu daj, lépp xàñar la.

Lim nañu juntuukaay yi

²¹ Lii nag moo di ténkub dayoy gànjar yi ñu jéfandikoo ci liggéeyu jaamookaay bi, jaamookaay boobu àlluway seede si dence. Ténkees na ko ci ndigalu Musaa, Leween ñi sasoo ténk bi ci njiital Itamar doomu Aaróona sarxalkat bi. ²² Fekk na Yudeen bi Besalel doomu Uri, miy doomu Ur, sottal na mboolem li Aji Sax ji santoon Musaa. ²³ Mu àndoon ci ak Daneen bi, doomu Ayisamaag, Oliyab. Mu dib yettkat, dib taarakal te di liggéeykatu wëñ gu baxa te laal yolet, ak wëñ gu xewar ak gu xonq curr ak wëñu lëe.

²⁴ Wurus wi dem ci liggéey bi bépp, mboolem liggéeyu bérab bu sell bi, te muy wurus wu ñu def saraxu yékkati-jébbal Yàlla, juróom ñetti téeméeri kilo ak juróom ñaar fukk ak juróom ñaar la (877), ak ñetti téeméeri garaam (300), yemook ñaar fukki talañ ak juróom ñeent, ak juróom ñaar téeméer ak fanweeri (730) siikal ci siikal bi ñu yoonal ci bérab bu sell bi. ²⁵ Xaalis bi tukkee ci limeefu askan wi, ñetti junniy kilo ak fukk ak juróom ñaar (3 017), ak juróom ñaar téeméeri garaam ak juróom fukk (750), yemook téeméeri (100) talañ ak junneek juróom ñaar téeméer ak juróom ñaar fukk ak juróomi (1 775) siikal, ci siikal bi ñu yoonal ci bérab bu sell bi, ²⁶ muy juróomi garaami xaalis bopp bu nekk, yemook genn-wàllu siikal, ci siikal bi ñu yoonal ci bérab bu sell bi, ñeel képp ku bindu ci limeef bi, dale ko ci ñi am ñaar fukki at jëm kaw, ñépp di juróom benni téeméeri junniy góor ak ñetti junneek juróomi téeméer ak juróom fukk (603 550). ²⁷ Ñetti junniy (3 000) kiloy xaalis, di téeméeri talañ, ñeel móolub teguy bérab bu sell bi, ak teguy rido bi. Muy téeméeri tegu ci ñetti

junniy kilo, di fanweeri kilo ci benn tegu, muy téeméeri tegu ci téeméeri talañ, benn talañ ci benn tegu. ²⁸ Fukki kilook juróom ñaar yeek juróom ñaar téeméeri garaam yeek juróom fukk (17 kilo 750 garaam) yi ci topp, yemook junneek juróom ñaar téeméer ak juróom ñaar fukk ak juróomi siikali xaalis, ay wékkukaay la ci sàkk ngir jën yi, xoob ci boppi jën yi, sàkk ci galan yi.

²⁹ Xàñar bi ñu def saraxu yékkati-jébbal Yàlla, ñaari junniy kilo ak téeméer ak ñaar fukk ak ñeent la (2 124), yemook juróom ñaar fukki (70) talañ ak ñaari junneek ñeenti téeméeri (2 400) siikal. ³⁰ Mu sàkk ci teguy buntu xaymab ndaje mi, ak sarxalukaayu xàñar bi, ak caaxub xànjaram, ak mboolem juntuukaayi sarxalukaay bi, ³¹ ak teguy wurmbalu ètt bi, ak teguy buntu ètt bi, ak xeri jaamookaay bi yépp, ak xeri wurmbalu ètt bi.

39

Defar nañu yérey sarxalkat yi

¹ Wëñ gu baxa gi te laal yolet nag ak wëñ gu xewar gi ak gu xonq gi curr, ci lañu sàkk yére yu yànj yi ñuy liggéeye ci bérab bu sell bi. Ñu daldi defar yére yu sell, yi ñeel Aaróona noonee ko Aji Sax ji sante woon Musaa.

² Xar-sànni mi, wëñu wurus lees ko ràbbe, ak wëñ gu baxa te laal yolet, ak wëñ gu xewar, ak gu xonq curr ak wëñu lëe. ³ Ay xobi wurus lañu tégg ba mu jekk, ñu dagg ko ay wëñ yu ñu ràbbaaleek wëñ gu baxa gi te laal yolet, ak wëñ gu xewar gi, ak gu xonq gi curr, ak wëñu lëe gi. Ñu daldi ciy ñawaale ay nataal. ⁴ Ñaari ngàlli mbagg lañu ko defal, daldi faste wu ci nekk ci ñaari cati xar-sànni mi. ⁵ Ngañayuu taaral li tege ci kaw, ni xar-sànni mi lees ko defare, liggéeyaale kook moom, ñu ànd di benn. Ñu ràbbe ko wëñu wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe, noonee ko Aji Sax ji sante woon Musaa.

⁶ Ci kaw loolu ñu we peri onigsé yi, fege per yi ñankukaayi wurus, daldi ciy ñaas turi doomi Israyil yu góor, noonu ñuy ñaase xàmrikaay yi ñuy torloo. ⁷ Ñu tapp per yi ci kaw ngàlli waggi xar-sànni mi, per yi nag taxawe taxawaayu bànni Israyil, noonu ko Aji Sax ji sante woon Musaa.

Defar nañu kiiraayal dënn bi

⁸ Ñu sàkk kiiraayal dënn bi, liggéeyaale ko ay nataal ni xar-sànni mi, ràbbe ko wëñu wurus, ak wëñ gu baxa te laal yolet, ak wëñ gu xewar, ak gu xonq curr, ak wëñu lëe. ⁹ Ab kaare bu ñu lem lañu ko def, guddaay bi, gannaaw bu ñu ko

lemee, di ñaraleb baaraamu déy ak digg, yaatuwaay bi di ñaraleb baaraamu déy ak digg. ¹⁰ Ñu we nag ay per ci kaw kiiraayal dënn bi, def ko ñeenti lànggi per. Lànggi jiiu, peru sarduwan ak peru topaas ak peru eskarbukal moo ca nekk; ¹¹ ñaareelu lànggi di di peru emëródd ak peru safiir ak peru jamaa, ¹² ñetteelu lànggi di di peru yasent ak peru agaak ak peru ametisté, ¹³ ñeenteelu lànggi di di peru kirsolit ak peru onigsé ak peru jaspé, te per bu ci nekk ñankukaayu wurus lees ko wewe. ¹⁴ Per yeek turi doomi Israyil yu góor ñoo tolloo ab lim: muy fukk ak ñaar, ni tur yi tollu. Ñu ñaas ci tur yi ni xämmikaayi torlu, ku nekk ak turam, ba fukki giir yeek ñaar daj.

¹⁵ Ci biir loolu ñu sakkal kiiraayal dënn bi ñaari caqi wurus ngalam yu ci tege, te rawaasoo ni ay buum. ¹⁶ Ñu sakk itam ñaari ñankukaayi wurus ak ñaari jaaroy wurus yu ñu takk ci ñaari cati kiiraayal dënn bi ci kaw ¹⁷ Ñu nas nag ñaari buumi wurus yi ci ñaari jaaroy yi ci cati kiiraay li. ¹⁸ Yeneen ñaari cati buumi wurus yi, ñu we leen ci ñaari ñankukaay, yi ci kaw ngállli waggi xar-sànni mi, ci kanam. ¹⁹ Ñu sakkal ko itam ñaari jaaroy wurus, yu ñu we ci ñaari cati suufi kiiraay li, fi féete biir, wet gi tafu ci xar-sànni mi. ²⁰ Ñu sakkalaat kiiraay li yeneen ñaari jaaroy wurus, yu ñu we ci suufi ngállli xar-sànni mi, fi féete kanam, dendeek sofu ngáll yi, te tiim ngañaayu xar-sànni mi. ²¹ Kiiraayal dënn bi, buum gu sew gu baxa te laal yolet, moom lees ko téyee, lékklee ko jaaroy kiiraay leek jaaroy xar-sànni mi, kiiraay li dëkke tiim ngañaay li, ba du teqlikook xar-sànni mi, noonee ko Aji Sax ji sante woon Musaa.

Defar nañu yérey sarxal, yi ci des

²² Fëxya bi xar-sànni miy tege, lépp, wëñ gu baxa te laal yolet lees ko rãbbe ba mu daj. ²³ Baatu fëxya baa ngi ci digg bi, mel ni baatu mbubbam xare, ñu ombé ko omb bu dëgër, ba mu daj, ngir du xottiku. ²⁴ Ci biir loolu ñu takk ci ombu fëxya bi, ay doomi gërënaat yu ñu defare wëñ gu baxa te laal yolet, ak wëñ gu xewar, ak gu xonq curr, ak wëñu lée. ²⁵ Ñu def itam ay jóolooliy wurus ngalam, ba takk jóolooli yi ci diggante doomi gërënaat yi, wërãle ko ombu fëxya bi, ba mu daj, jóolooli yi dox diggante doomi gërënaat yi. ²⁶ Ab jóolooli, ab gërënaat, ab jóolooli, ab gërënaat ba ombu fëxya, bi ñuy sol di sarxal daj, noonee ko Aji Sax ji sante woon Musaa.

²⁷ Ñu sakkal nag Aaróona aki doomam mbubb yu gudd yu ñu rãbbe wëñu lée,

²⁸ ak kaalag lée, ak mbaxanay lée, ak tubéyi njiitlaay yu lée, ²⁹ ak laxasaay giy liggéeyu rãbb bu rafet, bu ñu rãbbe wëñu lée bu dëgër, ak wëñ gu baxa te laal yolet, ak wëñ gu xewar, ak gu xonq curr, noonee ko Aji Sax ji sante woon Musaa.

³⁰ Ñu sàkk nag meeteel gu sell gu wurus ngalam, muy dogu wurus wu tell, ñu ñaas ci kawam mi mbind, ni ñuy ñaase mbindum torlu: «Sell na, ñeel Aji Sax ji». ³¹ Ñu daldi koy takke buum gu baxa te laal yolet, téyee ko ko ci kaw kaala gi, na ko Aji Sax ji sante woon Musaa.

Musaa memmiku na liggéey bi

³² Noonu la mboolem liggéeyu mækkaanu xaymab ndaje mi mate. Noonee ko Aji Sax ji sante woon Musaa rekk, ni la ko bànni Israyil defe.

³³ Ba loolu amee ñu indil Musaa jaamookaay bi: xayma bi ak yéfam yépp; lonku yi ak lacc yi ak galan yi ak jën yeek tegu yi, ³⁴ ak kiiraayal deri kuuy yi ñu sóob xonq, ak kiiraayal deri piipi yi, ak kiiraayal xájjatle bi, ³⁵ ak gaal gi álluway seede si dence, aki njáppoom, ak kubeeru saraxu njotlaay gi, ³⁶ ak taabal jeek ndabam yépp, ak mburum teewal mi ciy tege, ³⁷ ak tegukaayu lãmp bu wurus ngalam bi aki lãmpam, lãmp yi sésaloo ba jekk ak mboolemi juntuukaayam, ak diw gi ñuy taaloo, ³⁸ ak sarxalukaay bu wurus bi, ak diwu pal gi, ak cuuraay lu xeeñ li, ak kiiraayal buntu xayma bi, ³⁹ ak sarxalukaayu xànjãr beek caaxub xànjãram, aki njáppoom ak ndabam yépp, ak mbalkam njãpp mi akub tegoom, ⁴⁰ ak sori wurmbalu ètt bi aki jënam aki tegoom, ak kiiraayal lafu buntu ètt bi, aki buumam aki xeram; mboolem juntuukaay, yi ñuy liggéeye ci mækkaanu xaymab ndaje mi rekk, ⁴¹ ak yere yu yànj yi ñuy liggéeye ci bérãb bu sell bi; yere yu sell yu Aaróona sarxalkat bi, ak yerey doomam yi ñuy sol, di sarxale. ⁴² Noonee ko Aji Sax ji sante woon Musaa rekk, ni la bànni Israyil sottale liggéey bi bépp. ⁴³ Musaa nag memmiku mboolem liggéey bi, ba gis ne sotta nañu ko; noonee ko Aji Sax ji santaanee woon, ni lañu ko defe. Musaa daldi leen ñaanal.

40

Samp jaamookaay bi jot na

¹ Aji Sax ji waxati Musaa ne ko: ² «Bu keroogee benn fanu weer wi jiiu, nanga samp mækkaanu xaymab ndaje mi. ³ Nanga yeb ci biir, gaal gi álluway seede si dence, te nga làqe gaal gi rido bi. ⁴ Dugalal taabal ji te taaj ci li muy àndal; dugalal tegukaayu lãmp bi, nga taal ay lãmpam, ⁵ te nga teg sarxalukaayu cuuraay bu

wurus bi ci kanam gaal gi àlluway seede si dence, ba noppi nga samp lafu buntu jaamookaay bi.

⁶ «Tegal sarxalukaayu rendi-dóomal bi fi kanam buntu màkkaanu xaymab ndaje mi. ⁷ Tegal mbalkam njàpp mi ci diggante xaymab ndaje mi ak sarxalukaay bi, te nga duy ko ndox. ⁸ Sampal nag wurmbalu ètt bi bépp, te nga we lafu buntu wurmbal bi.

⁹ «Jélal nag diwu pal gi, nga diw ci jaamookaay bi ak li ci biiram lépp, sellale ko ko, mook yéfam yépp, mu daldi sell. ¹⁰ Boo noppee, diwal sarxalukaayu rendi-dóomal bi, mook ndabam yépp, nga sellale ko sarxalukaay bi, sarxalukaay bi daldi sella sell. ¹¹ Nanga diw mbalkam njàpp mi akub teogom, nga sellale ko ko.

¹² «Índil Aaróona aki doomam ba ci bunt xaymab ndaje mi, nga sang leen ci ndox mi. ¹³ Nga daldi solal Aaróona yére yu sell yi, diw ko, sellale ko ko, mu doon sama sarxalkat. ¹⁴ Su ko defee nga indi ay doomam, solal leen ay mbubb. ¹⁵ Nga diw leen, ni nga diwe seen baay, ñu doon samay sarxalkat. Seen diwu googu moo leen sédd sasu carxal bu sax dàkk, maasoo maas.» ¹⁶ Musaa nag def loola. Mboolem noonee ko ko Aji Sax ji sante, na la ko defe.

Musaa samp na jaamookaay bi

¹⁷ Keroog at ma topp ca at ma ñu génne Misra, ca benn fanu weer wa jëkk, ca lañu samp jaamookaay ba.

¹⁸ Musaa nag samplu jaamookaay bi: Ñu jiital tegu yi, samp làcc yi, we galan yi, daldi samp jën yi. ¹⁹ Ci kaw loolu, ñu firi malaan mi ci kaw jaamookaay bi, daldi lal kiiraay li ci kawam, na ko Aji Sax ji sante woon Musaa.

²⁰ Gannaaw loolu ñu jël àlluway seede si, yeb ko ci gaal gi, ba noppi roof njàppu yi ci gaal gi. Ñu daldi teg kubeeru saraxu njotlaay gi ci kaw gaal gi. ²¹ Ba mu ko defee ñu fat gaal gi ci biir bérab bu sell bi, doora firi ridob xàjjatle bi, làqe ko ko, na ko Aji Sax ji sante woon Musaa.

²² Ba loolu amee ñu dugal taabal ji ci biir xaymab ndaje mi, ci wetu bëj-gànnaaru jaamookaay bi, ci kanam rido bi. ²³ Ñu daldi teg ci kaw taabal ji, tegin wu jekk, mburu mi fi kanam Aji Sax ji, na ko Aji Sax ji sante woon Musaa.

²⁴ Ñu dugal nag tegukaayu làmp bi ci biir xaymab ndaje mi, fi janook taabal ji, ci wetu bëj-saalumu jaamookaay bi, ²⁵ daldi taal làmp yi fi kanam Aji Sax ji, na ko Aji Sax ji sante woon Musaa.

²⁶ Ba mu ko defee ñu dugal sarxalukaayu wurus bi ci biir xaymab ndaje mi, ci kanam rido bi, ²⁷ daldi taal cuuraay lu xeeñ li ci kawam, na ko Aji Sax ji sante woon Musaa.

²⁸ Ñu samp lafu buntu jaamookaay bi. ²⁹ Sarxalukaayu rendi-dóomal bi nag, ñu teg ko ci bunt màkkaanu xaymab ndaje mi, daldi def ci kawam saraxu rendi-dóomal bi, ak saraxi pepp mi, na ko Aji Sax ji sante woon Musaa.

³⁰ Ba loolu amee ñu teg mbalkam njàpp mi ci diggante xaymab ndaje mi ak sarxalukaay bi, ba noppi duy ko ndoxum njàpp. ³¹ Ci la Musaa ak Aaróona aki doomam di raxas seeni loxo ak seeni tànk, ³² ndax bu ñuy dugg ci xaymab ndaje mi, ak bu ñuy jejeji sarxalukaay bi, dañuy jàpp, na ko Aji Sax ji sante woon Musaa.

³³ Gannaaw loolu ñu samp wurmbal bi yéew jaamookaay beek sarxalukaay bi, daldi samp lafu buntu ètt bi. Noonu la Musaa sottale liggéey bi.

Leeru Aji Sax ji gane na bérab bu sell bi

³⁴ Ba loolu amee niir wa yiir xaymab ndaje ma, leeru Aji Sax ji fees jaamookaay ba, ³⁵ ba Musaa tëlee dugg ca xaymab ndaje ma, ndax niir wa màkkaanoo kaw xayma ba, ak leeru Aji Sax ji fees jaamookaay ba.

³⁶ Saa yu niir wa yékkatikoo, ba tiim jaamookaay ba nag, bànni Israyil daldi tegu ca seen yooni tukki ya. ³⁷ Waaye bu niir wa yékkatikuwul, duñu dem, ba keroog muy yékkatiku. ³⁸ Ndax booba niiru Aji Sax jaa nga ca kaw jaamookaay ba, ag bëccëg, te sawara waa nga ca biir niir wa, ag guddi, waa kër Israyil gépp di ci gis, seen diiru yooni tukki ya.

Sasu Sarxalkat yi di ñetteelu xaaju Tawreetu Musaa Ubbite gi

Aaya bi jiiitu ci Sasu Sarxalkat yi moo indi na Yàlla àddoo woon ca xaymab ndaje ma, woo Yonent Yàlla Musaa, ngir wax ak moom. Bare na lool fu téere bi joxe ay ndigali yoon aki sàrt yu Yàlla jox Musaa, ngir mu jottli ko bànni Israyil, te dige bi ci Yàlla boole moo di ndigal yooyu ñooy taxa dund képp ku leen jéfe.

Ci gàttal, ci téere bi la Yàlla di xamal bànni Israyil, nan lees di dindée mboolem li gállankoor seenub neexoo ak Yàlla, ak nan lees di jéfe ba xaymab jaamookaay bi doon bérabu ndaje dëgg bu ñuy dajee ak Yàlla. Fàww ñiy jooxe ay sarax jooxe sarax yi ni mu ware. Fàww it sarxalkat yi di nit ñu ñu weg, nit ñu seen jéfin tedd, te kenn ku nekk ci askan wi moytu, kem kàttanam, mboolem luy sobeel aw yaram, te moytu di fecci kóllère ci jéfinam ak ci ni muy jaamoo Yàlla. Yàlla miy Ku Sell, di Cofeelu neen, di Ki yor ndund, moo namm ñoñam wàllsi ci sellngay boppam, ngir ñoom itam ñu man di jottlee, ndund ak cofeel. Yéene boobu la Yàlla joxe bànni Israyil santaane bii Almasi ne mooy kenug yoonu Yàlla: “Ni ngeen soppe seen bopp nag, nangeen ko soppe seen moroom.” Aaya 19:18.

Mboolem ndigali yoon yi ci téere bi, li leen taxa jóg mooy yombal nu gëmkat ñi mana neexoo ak Yàlla, ak fépp fu ñu mana bokk, ak jant bu ñu mana yemool. Kon ndigali yoon yii tàywiwuñu benn yoon di soññe ci mboolem xeeti kàddu, ngir gëmkat bi saxoo bàyyi xel ne neexoo ak Yàlla manula ñàkk, te ci la ag dundamaju.

Ci Tënk:

Saar 1—7 Ay dogal ci mbirum sarax yi

Saar 8—10 Fal nañu sarxalkat yi

Saar 11—15 Sàrtal nañu lu set ak lu setul

Saar 16 Lu jëm ci bésub Njotlaay

Saar 17—26 Ndigal yi jëm ci sellal

Saar 27 Lu jëm ci jagleel Aji Sax ji nit ak alal

Ay dogal ci mbirum sarax yi

(Saar 1.1—7.38)

Lu jëm ci saraxu rendi-dóomal

¹ Aji Sax ji woo na Musaa, wax ak moom ca xaymab ndaje ma ne ko: ² «Waxal bànni Israyil ne leen: Bu kenn ci yeen dee sàkkal Aji Sax ji sarax, na indi ag jur, muy gu gudd mbaa gu gátt.

³ «Bu saraxam dee saraxu jur gu gudd gu ñuy def rendi-dóomal, na sarxal aw yëkk wu amul sikk. Na ko yóbbu ci bunt xaymab ndaje mi ci kanam Aji Sax ji, ngir mu nangul ko ko. ⁴ Na teg loxoom ci kaw boppu juru saraxu rendi-dóomal bi, ndax ñu nangul ko ko, muy njotlaayam. ⁵ Na rendi yëkk wi ci kanam Aji Sax ji, te doomi Aaróona yu góor yiy sarxalkat yi ñooy indi deret ji, xépp ko ci mboolem weti sarxalukaay bi ci bunt xaymab ndaje mi. ⁶ Juru saraxu rendi-dóomal bi, na ko boroom sarax bi fees, daggat ko. ⁷ Doomi Aaróona, sarxalkat bi, dañuy jafal aa taal ci kaw sarxalukaay bi, teg matt mi ci taal bi. ⁸ Su ko defee doomi Aaróona yu góor, yiy sarxalkat yi, jël dog yi, booleek bopp bi ak nebbon bi, teg ko ci kaw mattum taal bi ci sarxalukaay bi. ⁹ Nañu raxas yérey biir yi ak yeel yi, sarxalkat bi boole lépp lakk ci kaw sarxalukaay bi. Saraxu rendi-dóomal la, saraxu sawara ngir xetug jàmm, ñeel Aji Sax ji.

¹⁰ «Bu saraxam dee ab gátt bu ñuy def rendi-dóomal, muy xar mbaa bëy, na sarxal bu góor bu amul sikk. ¹¹ Na rendi sarax si ci kanam Aji Sax ji, fa féete sarxalukaay bi bëj-gànnaar. Na doomi Aaróona yu góor yiy sarxalkat yi xépp deret ji ci mboolem weti sarxalukaay bi. ¹² Bu ko boroom sarax bi daggatee ba noppi, sarxalkat bi day boole dog yeek bopp bi ak nebbon bi, teg ko ci kaw mattum taal bi ci kaw sarxalukaay bi. ¹³ Na boroom sarax bi raxas yérey biir yi ak yeel yi, sarxalkat bi boole lépp lakk ci kaw sarxalukaay bi. Saraxu rendi-dóomal la, saraxu sawara ngir xetug jàmm, ñeel Aji Sax ji.

¹⁴ «Bu nit ki dee sarxalal Aji Sax ji njanaaw luy doon rendi-dóomal, na sarxe pitax mbaa xati mu ndaw. ¹⁵ Na ko sarxalkat bi yóbbu ca sarxalukaay ba, kutt baat bi, lakk ko ci kaw sarxalukaay bi. Deret ji dees koy siital ci wetu sarxalukaay bi, ba mu jeex. ¹⁶ Na indi gag bi ak li ci nekk te wetti ko fa ñuy def dóomu-taal ba, fa féete sarxalukaay bi penku. ¹⁷ Sarxalkat bi day jàpp ci laaf yi, xotti te bañ koo tegale, daldi koy lakk ci sarxalukaay bi, ci kaw mattum taal bi. Saraxu rendi-dóomal la, saraxu sawara ngir xetug jàmm, ñeel Aji Sax ji.

2

Lu jëm ci saraxu pepp

¹ «Bu nit dee indil Aji Sax ji saraxu pepp, sunguf* su mucc ayib la saraxam wara doon, mu sotti ci diw, def ci cuuraay, ² te

* 2:1 2.1 Sungufu bele lay doon.

yót ko doomi Aaróona yu góor yiy sarxalkat yi. Na sarxalkat bi sàkk barci-loxob sunguf su mucc ayib soosu ànd ak diw gi, te boole kook cuuraay li lépp. Na sarxalkat bi def cér boobu saraxu baaxantal, lakk ko ca kaw sarxalukaay ba, muy saraxu sawara ngir xetug jàmm, ñeel Aji Sax ji. ³ Li des ci saraxu pepp mi, Aaróona aki doomam ñoo koy féeetewoo, muy cér bu sella sell, bawoo ci saraxi sawara yi ñeel Aji Sax ji.

⁴ «Su dee sarxal lu ñu defare pepp, di lu ñu lakk cib taal ba mu ñor, na doon sunguf su mucc ayib, di mburu yu amul lawiir yu ñu xiiwaale diw, mbaa mburu yu sew yu amul lawiir, ñu sotti diw ca kawam. ⁵ Bu saraxam dee lu ñu defare pepp, lakke ko ci saafukaayu weñ, na doon sunguf su mucc ayib su ñu xiiwaale diw te bumu am lawiir. ⁶ Na ko dammat te sotti diw ca kaw dog ya. Saraxu pepp la. ⁷ Bu saraxam dee lu ñu defare pepp, di lu ñu saaf ci cin ba mu ñor, na doon sunguf su mucc ayib su ñu xiiwaale diw.

⁸ «Na yóbbul Aji Sax ji saraxu pepp su ñu defar ci tegtal yooyu, yót ko sarxalkat bi, mu yóbbu ko ca sarxalukaay ba. ⁹ Su ko defee sarxalkat bi génne ci saraxu pepp mi, ab saraxu baaxantal, daldi koy lakk ci kaw sarxalukaay bi, muy saraxu sawara ngir xetug jàmm ñeel Aji Sax ji. ¹⁰ Li des ci saraxu pepp mi, Aaróona aki doomam ñoo koy féeetewoo, muy cér bu sella sell, bawoo ci saraxi sawara yi ñeel Aji Sax ji.

¹¹ «Du benn saraxu pepp bu ñuy defal Aji Sax ji muy am lawiir, ndax du lenn ci lawiir mbaa lem, lu ñu wara lakk, ngir saraxu sawara su ñeel Aji Sax ji. ¹² Saraxi ndoortel meñneef man naa ànd ak yooyu, waaye du bokk ci sarax su jëm ca sarxalukaay ba, ñu di ko taal, ngir xetug jàmm. ¹³ Seen mboolem saraxu pepp nangeen ko xorom. Bu seen saraxu pepp ñàkk mukkk xorom, ndax mooy màndargaal seen kòllèreek seen Yàlla. Seen sarax yépp ngeen di xorom.

¹⁴ «Bu nit dee indil Aji Sax ji saraxu ndoortel meñneef, na ko indil mbool† mu ñu séndal, def ko sàñqal, muy saraxu ndoortel meñneefam. ¹⁵ Na ci sotti diw ak cuuraay. Saraxu pepp la. ¹⁶ Na sarxalkat bi lakk lenn ci mbool mu mukk mi ànd ak diw, boole kook cuuraay li lépp, muy saraxu baaxantal, te di saraxu sawara.

3

Lu jëm ci saraxi cant ci biir jàmm

¹ «Su fekke ne li nit kiy sarxe saraxu cant la ci biir jàmm, mu di ko jële ci nag

† 2:14 2.14 Mboolum bele lay doon mbaa mboolum lors.

wu góor mbaa wu jigéen, na indil Aji Sax ji lu amul sikk. ² Day teg loxoom ci kaw boppu jur gi muy sarxal, te rendi ko ca bunt xaymab ndaje ma. Doomi Aaróona yu góor yiy sarxalkat yi daldi xépp deret ji ci mboolem weti sarxalukaay bi. ³ Li muy génne ci saraxu cant gi ci biir jàmm, ñu war koo taalal Aji Sax ji mooy nebbon bi sàng yérey biir yi, ak lépp luy nebbon te jàpp ci yérey biir yi, ⁴ ak ñaari dëmbéen yi ànd ak seen nebbon ca kaw, jàpp ca fallare ja, ak bàjjo bi ci res wi te mu di ko booleek dëmbéen yi, génne ko. ⁵ Na doomi Aaróona yi boole yooyu lakk ci kaw sarxalukaay bi, mu tege ci kaw saraxu rendi-dóomal bi ci kaw mattum taal bi. Saraxu sawara la ngir xetug jàmm ñeel Aji Sax ji.

⁶ «Su fekke ne li nit kiy sarxalal Aji Sax ji saraxu cant la ci biir jàmm, te mu di ko jële ci jur gu gàtt, gu góor mbaa gu jigéen, na sarxal lu amul sikk. ⁷ Su dee sarxal xar, na ko indil Aji Sax ji ⁸ te teg loxoom ci boppu xar mi muy sarxe, ñu rendi ko ci bunt xaymab ndaje mi, doomi Aaróona yu góor yi xépp deret ji ci mboolem weti sarxalukaay bi. ⁹ Li muy génne ci saraxu cantu biir jàmm bi, muy saraxu sawara ngir xetug jàmm, ñeel Aji Sax ji, mooy nebbon bi, ak calgeen bi yépp, ñu doge ko fa sës ca fallare ja, ak nebbon bi sàng yérey biir yi, ak lépp luy nebbon te jàpp ci yérey biir yi, ¹⁰ ak ñaari dëmbéen yi ànd ak seen nebbon ca kaw, jàpp ca fallare ja, ak bàjjo bi ci res wi te mu di ko booleek dëmbéen yi, génne ko. ¹¹ Na sarxalkat bi boole loolu lakk ci kaw sarxalukaay bi, muy ñamu sawara, ñeel Aji Sax ji.

¹² «Bu saraxu nit ki dee bëy, na ko indil Aji Sax ji ¹³ te teg loxoom ci bopp bi, ñu rendi ko ci bunt xaymab ndaje mi. Na doomi Aaróona yu góor yi xépp deret ji ci mboolem weti sarxalukaay bi. ¹⁴ La mu cay génnee muy saraxu sawara, ñeel Aji Sax ji mooy nebbon bi sàng yérey biir yi yépp, ak lépp luy nebbon te jàpp ci yérey biir yi, ¹⁵ ak ñaari dëmbéen yi ànd ak seen nebbon ca kaw, jàpp ca fallare ja, ak bàjjo bi ci res wi te mu di ko booleek dëmbéen yi, génne ko. ¹⁶ Na sarxalkat bi boole loolu lakk ci kaw sarxalukaay bi, muy ñamu sawara ngir xetug jàmm, ñeel Aji Sax ji. Mboolem luy nebbon, Aji Sax jeej boroom. ¹⁷ Dogal a ngii, di lu leen war faww, ak fépp fu ngeen dëkk: lépp luy nebbon mbaa deret, buleen ko lekk.»

4

Lu jëm ci sarax su bàkkaar sabab

¹ Aji Sax ji wax na itam Musaa ne ko:
² «Waxal bànni Israyil ne leen: Su fekkee ne nit ki dafa moy lenn ci santaaney Aji Sax ji, ba def lenn lu warul te du teyeefam, li ci war lii la.

Li war sarxalkat bu mag bu bàkkaar

³ «Ndegam sarxalkat bi ñu diw, fal ko, moo moy, ba yóbbe mbooloo mi tooñ, na indil Aji Sax ji yékk wu ndaw wu amul sikk, muy saraxu póotum bàkkaar ndax bàkkaar ba mu def. ⁴ Day yóbbu yékk wi ci bunt xaymab ndaje mi, ci kanam Aji Sax ji, daldi teg loxoom ci boppu yékk wi, ñu rendi yékk wi ci kanam Aji Sax ji. ⁵ Sarxalkat bi ñu diw, fal ko, na sàkk ci deretu yékk wi, yóbbu ci biir xaymab ndaje mi. ⁶ Su ko defee sarxalkat bi capp baaraamam ci deret ji, wis-wisal deret ji juróom ñaari yoon fi kanam Aji Sax ji, fa janook ridob bérab bu sell ba. ⁷ Na sarxalkat bi sàkk ci deret ji, taqal ci béjjéni sarxalukaayu cuuraay lu xeeñ la ca biir xaymab ndaje ma ca kanam Aji Sax ji. Li des ci deretu yékk wi, na ko tuur ci taatu sarxalukaay bi ñuy lakk saraxu rendi-dóomal, foofa ca bunt xaymab ndaje ma. ⁸ Na génne lépp luy nebbon ci yékk wi ñuy sarxal muy póotum bàkkaar: nebbon bi sàng yérey biir yi, ak lépp luy nebbon te jàpp ci yérey biir yi, ⁹ ak ñaari dëmbéen yi ànd ak seen nebbon ca kaw, jàpp ca fàllare ja, ak bàjjo bi ci res wi te mu di ko booleek dëmbéen yi, génne ko. ¹⁰ Mooy ni ñu koy génnee rekk ci yèkku saraxu cant ci biir jàmm. Sarxalkat bi da koy boole lakk ca kaw sarxalukaayu rendi-dóomal ba. ¹¹ Waaye deru yékk wi ak yàppam wépp dees koy booleek bopp bi ak yeel yi ak yérey biir yi ak sébbriit mi; ¹² mboolem li des ci yékk wi daal lay génne dal bi, yóbbu ko ci bérab bu mucc sobe, ca jalub dóom ba, daldi taal matt, lakk ko ca, ba mu dib dóom. Foofa dóom ba jale lees koy lakk.

Lu jëm ci sarax yi war mbooloo mi

¹³ «Ndegam mbooloom Israyil mépp a moy lenn ci santaaney Aji Sax ji, ba def lenn lu warul te du seen teyeef, muy seenug tooñ te seetluwuñu ko, ¹⁴ bu mbooloo mi nemmikoo moy gi rekk, war nañoo génne ci jur gu gudd gi yékk wu ndaw wuy doon saraxu póotum bàkkaar, yóbbu ko ca bunt xaymab ndaje ma. ¹⁵ Magi mbooloo mi dañuy teg seeni loxo ci boppu yékk wi, fi kanam Aji Sax ji, ba nopp'i ñu rendi yékk wi fi kanam Aji Sax ji. ¹⁶ Gannaaw loolu na sarxalkat bi ñu diw, fal ko, sàkk ci deretu yékk wi, yóbbu ci biir xaymab ndaje mi. ¹⁷ Na capp baaraamam ci deret ji, wis-wisal deret ji juróom ñaari yoon fi kanam Aji Sax ji, foofu ci kanam

rido bi. ¹⁸ Bu noppee na sàkk ci deret ji, taqal ci béjjéni sarxalukaay bi ci kanam Aji Sax ji, ci biir xaymab ndaje mi. Li des ci deret ji, na ko tuur ca taatu sarxalukaayu rendi-dóomal ba, ca bunt xaymab ndaje ma. ¹⁹ Na génne lépp li ciy nebbon, lakk ko ci kaw sarxalukaay bi. ²⁰ Na def ak yékk woowu na muy def ak yékk saraxu póotum bàkkaar rekk. Noonu lay def ak moom. Ni la ko sarxalkat biy defale seen njotlaay, ñu am njéggal. ²¹ Na génne yékk wi dal bi, taal ko, na muy taale yékk wi ñu jèkka wax. Saraxu póotum bàkkaar mbooloo mi la.

Li war kilifa gu bàkkaar

²² «Su fekkee ne kilifa moo moy lenn ci santaaney Yàllaam Aji Sax ji, ba def lenn lu warul te du teyeefam, mu dig tooñam, ²³ bu nemmikoo bàkkaar bi mu def rekk, na sarxe sikket bu amul sikk. ²⁴ Day teg loxoom ci boppu sikket bi, rendi ko fa ñuy rendi saraxu rendi-dóomal, fa kanam Aji Sax ji. Saraxu póotum bàkkaar la. ²⁵ Na sarxalkat bi capp baaraamam ci deretu sarax siy póotum bàkkaar, taqal ko ci béjjéni sarxalukaayu rendi-dóomal bi, ba nopp'i tuur deret ji ci taatu sarxalukaayu rendi-dóomal bi. ²⁶ Na lakk nebbon bi yépp ci kaw sarxalukaay bi, def ko ni nebbonu saraxu cant ci biir jàmm. Noonu la ko sarxalkat biy defale njotlaayal bàkkaaram, mu am njéggal.

Li war baadoolo bu bàkkaar

²⁷ «Su dee kenn ci baadoolo yee moy lenn ci santaaney Aji Sax ji, ba def lenn lu warul te du teyeefam, mu dig tooñam, ²⁸ bu nemmikoo bàkkaar bi mu def rekk, na sarxe aw bëy wu jigéen wu amul sikk, ndax bàkkaar bi mu def. ²⁹ Day teg loxoom ci boppu gattu sarax soosu di póotum bàkkaar, rendi ko fa ñuy lakk saraxu rendi-dóomal. ³⁰ Na sarxalkat bi capp baaraamam ci deret ji, taqal ci béjjéni sarxalukaayu rendi-dóomal bi; li des ci deret ji da koy tuur ci taatu sarxalukaay bi. ³¹ Te it na génne nebbon bi yépp ni muy génnee nebbonu jur gu ñu def saraxu cant ci biir jàmm. Na ko sarxalkat bi lakkal Aji Sax ji ci kaw sarxalukaay bi, muy xeeñ xetug jàmm. Noonu la ko sarxalkat biy defale njotlaayal bàkkaaram, mu am njéggal.

³² «Su fekkee ne am xar lay sarxe, muy saraxu póotum bàkkaaram, na doon xar mu jigéen, mu amul sikk. ³³ Day teg loxoom ci boppu xar moomu di saraxu póotum bàkkaar, rendi ko fa ñuy reecee saraxu rendi-dóomal, muy saraxu póotum bàkkaar. ³⁴ Na sarxalkat bi capp baaraamam ci deretu xar miy saraxu póotum bàkkaar, te taqal ci béjjéni sarxalukaayu

rendi-dóomal bi; li des ci deret ji da koy tuur ci taatu sarxalukaay bi. ³⁵ Te itam na génne nebbon bi yépp, ni muy génnee nebbonu xar mu ñuy def saraxu cant ci biir jámm. Na sarxalkat bi lakk loolu ci kaw sarxalukaay bi, mu dolliku ci saraxu sawara yi ñeel Aji Sax ji. Noonu la sarxalkat biy defale nit ki njotlaayal bákkaar bi mu def, mu am njéggal.

5

Ay xeeti bákkaar a ngi ak li ciy njotlaay

¹ «Bu nit bákkaaree ndax lu mu dégg wooteb seede cib átte, ba noppi baña wax la mu gis mbaa mu xam ko ca mbir ma, dees na ko ko topp.

² «Su fekkee ne nit ki dafa laal lu sobewu, te seetluwu ko, lu mel ni rab wu daganul te médd, muy rabu àll mbaa ag jur, mbaa luy raam, kon sobewu na, tooñ na. ³ Su fekkee ne nit ki dafa laal sobey nit ak su mu mana doon, te teyu ko, ba mu wees, saa yu ko xamee, tooñ na. ⁴ Su sàgganee it ba giñ ne dina def nàngam, muy lu baax mbaa lu bon, muy mboolem ngiñ lu ko récc te ba mu koy wax teyu ko, ba mu wees, saa yu ko xamee tooñ na. ⁵ Ci tooñin yooyu ñu lim war naa wax na mu tooñe. ⁶ Na indil Aji Sax ji gàtt bu jigéen, xar mbaa bëy, muy daanam ndax bákkaar bi mu def. Saraxu póotum bákkaar lay doon, sarxalkat bi defal ko ko njotlaayal bákkaar bi mu def.

Lu jëm ci saraxi aji ñàkk

⁷ «Nit ki amul lu mat njégu gàtt, na indil Aji Sax ji ñaari pitax mbaa ñaari xati yu ndaw, muy daanam ndax bákkaar bi mu def; benn bi di saraxu póotum bákkaar, bi ci des di sarax rendi-dóomal. ⁸ Da koy yót sarxalkat bi, kooku jëkka rey benn bi, muy saraxu póotum bákkaar; na kutt baat bi te bumu teqale bopp beek baat bi. ⁹ Day xépp ci wetu sarxalukaay bi deretu njanaaw liy saraxu póotum bákkaar. Li des ci deret ji dees koy tuur ci taatu sarxalukaay bi. Saraxu póotum bákkaar la. ¹⁰ Ñaareel bi na ko def saraxu rendi-dóomal, muy li ñu santaane. Noonu la ko sarxalkat biy defale njotlaayal bákkaar bi mu def, mu am njéggal.

¹¹ «Su amul lu mat njégu ñaari pitax mbaa ñaari xati yu ndaw, li muy indi, sarxal ko ngir bákkaar bi mu def, fietti kiloy sunguf su mucc ayib lay doon, muy saraxu póotum bákkaar. Du ci def diw, te du ci sotti cuuraay, ndax li mu di saraxu póotum bákkaar. ¹² Da koy yót sarxalkat bi, sarxalkat bi sàkk ci barcilo, muy saraxu baaxantal, mu daldi koy lakk ca kaw sarxalukaay bi, mu dolliku ci saraxi sawara yi. Saraxu póotum bákkaar

la. ¹³ Noonu la ko sarxalkat biy defale njotlaayal bákkaar, bi mu def te mu bokk ci xeeti bákkaar yooyu ñu lim. Su ko defee mu am njéggal. Li des ci sarax bi sarxalkat bee koy moom, mu mel ni bu doon saraxu pepp rekk.»

Lu jëm ci saraxu peyug tooñ

¹⁴ Bu loolu weesee, Aji Sax ji wax na Musaa ne ko: ¹⁵ «Ku ñàkka wormaal lenn lu ñu sellalal Aji Sax ji te du teyeefam, daan ba ko war, mu di ko indil Aji Sax ji, am kuuy mu amul sikk lay doon, ñuy xayma njégam, déppale dayob xaalis baak natt ba ñu yoonal ca bérab bu sell ba. Saraxu peyug tooñ la. ¹⁶ La mu sàggane woon ca yooyu ñu sellalal Aji Sax ji da koy fey, ba dolli ci juróomeelu céru njég ga mu fey, jox ko sarxalkat bi. Sarxalkat bi da koy defal kuuy mi njotlaayam, muy saraxu peyug tooñ, ngir mu am njéggal.

¹⁷ «Su fekkee ne nit ki dafa moy lenn ci santaaney Aji Sax ji ci lu warul lu mu def, su ko xamul it, tooñ na, te dees na ko ko topp. ¹⁸ Na indi kuuy mu amul sikk, ñu xayma njégam, yót ko sarxalkat bi, muy saraxu peyug tooñ. Na ko ko sarxalkat bi defal njotlaayal bákkaar bi mu def te xamu ko woon. Su ko defee mu am njéggal. ¹⁹ Loolu saraxu peyug tooñ la, ndax kooka kat tooñ na Aji Sax ji.»

²⁰ Aji Sax ji wax na Musaa ba tey ne ko: ²¹ «Su nit ñàkkee wormaal Aji Sax ji ci waxi fen yu mu wax moroomam, ci alal ju ñu ko tayle mbaa ñu abal ko ko, mbaa muy lu mu jële ci càcc mbaa àq ju mu lekke ci moroomam, ²² mbaa muy lu réer boroom, mu for ko, di ko miim, mbaa mu giñ te du dégg ci mbir mu mu mana doon, ²³ ku bákkaare noonu ñu ko waxe, tooñ na, te na delloo alal ji mu ame ci càcc, mbaa njublanj mbaa tayle bu ñu ko dénkoon, mbaa muy lu réer, mu for ko. ²⁴ Su dee leneen lu ko taxoona giñ te du dégg itam naka noonu, na ko delloo ba mu mat sèkk, te saa yu ci nekk da cay dolli juróomeelu céru njég ga, jox ko boroom alal ja, keroog ba muy génne saraxu peyug tooñam. ²⁵ Na yóbbul Aji Sax ji li ñu koy daan, muy am kuuy mu amul sikk, ñu xayma njégam, muy saraxas peyug tooñ su muy yót sarxalkat bi. ²⁶ Noonu la ko sarxalkat biy defale njotlaayam fa kanam Aji Sax ji, mu am njéggal ci mboolem lu mu defoon te mu dig tooñam.»

6

Mbirum santaane yu sarxalkat yi sasoo

(Saar 6.1—7.21)

Lu jëm ci saraxi rendi-dóomal

¹ Aji Sax ji waxaat Musaa ne ko: ² «Santal Aaróona ak doomam yu góor, ne leen li ñu dogal ci saraxu rendi-dóomal mooy lii: Ab saraxu rendi-dóomal day fanaan fi ñu koy lakke ci kaw sarxalukaay bi, ba bêt set, sawara way wéye tàkk ca kaw sarxalukaay ba. ³ Sarxalkat bi day sol mbubbam mi ñu ràbbe wéñ gu èccu* ba sew ak tubéyi njiitlaayam ji ñu ràbbe wéñ gu èccu ba sew. Na tonnee ca sarxalukaay ba dóomu saraxu rendi-dóomal bi, daldi teg dóom bi ci wetu sarxalukaay bi. ⁴ Su ko defee mu summi yéreem yooyu, sol yeneen te génne dóom bi dal bi, yóbbu ko fu mucc sobe. ⁵ Na sawaras sarxalukaay bi wéye tàkk te du fey. Suba su nekk na ko sarxalkat bi xamb, ba noppi teg ci saraxu rendi-dóomal bi, te na lakk nebboni saraxi cant gi ci biir jàmm. ⁶ Na sawara wéye tàkk fàww ci kaw sarxalukaay bi, te bumu fey.

Lu jëm ci saraxi pepp

⁷ «Li ñu dogal ci saraxi pepp mooy lii: Na ko doomi Aaróona yu góor joxe fa kanam Aji Sax ji ca sarxalukaay ba. ⁸ Barci-loxob sunguf su mucc ayib ànd ak diwam lees ciy tibbe, boole kook mboolem cuuraay la ca kaw saraxu pepp ma, daldi koy lakkal Aji Sax ji ci kaw sarxalukaay bi, muy xeeñ xetug jàmm, di saraxu baaxantal. ⁹ La ca des Aaróona aki doomam yu góor ñoo koy lekk, te buñu ci boole lawiir. Nañu ko lekke ci bérab bu sell. Ci biir èttu xaymab ndaje mi lañu koy lekke. ¹⁰ Deesu ko lakkaaleek lawiir. Seen cér la bu leen Aji Sax ji sédd ci saraxi sawaraam. Lu sella sell la, mel ni saraxu póotum bàkkaar ak saraxu peyug tooñ. ¹¹ Képp kuy góor ci doomi Aaróona yi man na cee lekk. Seen cér la bu ñu leen sédde ci saraxi sawara yi ñeel Aji Sax ji, te dogalal leen ko fàww. Lépp lu ci laal day doon lu sella sell.»

¹² Aji Sax ji wax na Musaa ba tey ne ko: ¹³ «Li Aaróona aki doomam yu góor di sarxalal Aji Sax ji, keroog bu ñu koy diw, fal ko, mooy lii: ñetti kiloy sunguf su mucc ayib, tollook saraxu pepp bi ñu saxoo bés bu nekk, te genn-wáll gi di suba, genn-wáll gi ngon. ¹⁴ Saafukaayu weñ lañu koy lakke, xiiwaale ko diw, indi xiiw ba, muy saraxu pepp. Nañu ko def ay dog yu ñuy lakkal Aji Sax ji, muy xeeñ xetug jàmm. ¹⁵ Sarxalkat bi ñuy fal ci doomi Aaróona yu góor yi, mu war koo wuutu, da koy def moom itam. Aji Sax ji moo jagoo sarax boobu fàww, te dañu koy lakk ba mu jeex. ¹⁶ Te it mboolem saraxu pepp bu sarxalkat di defal boppam, dees koy lakk ba mu jeex. Deesu ci lekk.»

Lu jëm ci sarax su bàkkaar waral

¹⁷ Aji Sax ji waxati Musaa ne ko: ¹⁸ «Waxal Aaróona ak doomam yu góor ne leen: Dogal bi ci saraxu póotum bàkkaar mooy lii: Juru saraxas póotum bàkkaar dañu koy rendi fa ñu wara rendi juru saraxu dóomal, fi kanam Aji Sax ji. Lu sella sell la. ¹⁹ Sarxalkat bi koy rendi, muy saraxu póotum bàkkaar da ciy lekk, te fu sell lañu koy lekke, ci biir èttu xaymab ndaje mi. ²⁰ Lépp lu laal ci yàpp wi, day doon lu sell, te bu lenn ci deretu sarax si tisee ci kawi yére, dees koy xaj fa mu tis, ci bérab bu sell. ²¹ Su fekkee ne ndabal xandeer lañu togge woon yàppu sarax sa, nañu ko toj. Bu doon ndabal xàñjar, ñu jonj ko, raxas ko. ²² Képp kuy góor ci askanu sarxalkat sañ na cee lekk. Lu sella sell la. ²³ Waaye juru saraxas póotum bàkkaar deesu ci lekk lenn te fekk deretam dugg ca biir xaymab ndaje ma, ñu di ca amal ag njotlaay ca biir bérab bu sell ba. Loolu du lu ñuy lekk. Dees koy lakk, ba mu dib dóom.

7

Lu jëm ci saraxi peyug tooñ

¹ «Liy dogal bi ci saraxas peyug tooñ mooy lii: Lu sella sell la. ² Fa ñuy rendee juru saraxu dóomal, fa lañu wara rendee juru saraxas peyug tooñ. Deret ji dees koy xépp ci mboolem weti sarxalukaay bi. ³ Nebbon ji jépp lañuy sarxal: calgeen bi, nebbon bi sàng yérey biir yi, ⁴ ak ñaari dëmbéen yi ànd ak seen nebbon ca kaw, jàpp ca fàllare ja, ak bàjjo bi ci res wi te ñu di ko booleek dëmbéen yi, génne ko. ⁵ Sarxalkat bi da koy boole lakk ci kaw sarxalukaay bi, muy saraxu sawara, ñeel Aji Sax ji, te di saraxu peyug tooñ. ⁶ Képp kuy góor te bokk ci askanu sarxalkat yi sañ na cee lekk. Bérab bu sell lees koy lekke. Lu sella sell la.

⁷ «Li ci saraxu póotum bàkkaar moo nekk ci saraxu peyug tooñ, dogal bi di benn ci yooyu yaar: sarxalkat bi def gätt bi njotlaay moo koy moom. ⁸ Su nit joxee ab saraxu rendi-dóomal, sarxalkat bi mooy féetewoo deru jur gi mu sarxal. ⁹ Ci biir loolu bépp saraxu pepp mu ñu lakk cib taal, mbaa ñu saaf ko ci cin mbaa ci saafukaayu weñ, sarxalkat bi koy joxe moo koy moom. ¹⁰ Waaye weneen xeetu saraxu pepp mu mu mana doon, su dee saraxu pepp mu ñuy xiiwaale diw mbaa muy mu wow, doomi Aaróona yu góor yépp a koy moom, ku nekk tollook sa moroom cér.

Lu jëm ci saraxi cant ci biir jàmm

* 6:3 6.3 wéñ gu èccu googu, gâncax gu tudd lêe lañu koy defare.

¹¹ «Li yoon dogal ci saraxu cant ci biir jàmm, te nit sañ koo sarxalal Aji Sax ji mooy lii: ¹² Bu ci nit ki jubloo ag njukkal gu muy delloo Aji Sax ji, day boole ci saraxu cant gi ay mburu yu ndaw yu amul lawiir yu ñu xiiwaale diw ak ay mburu yu tàppandaar yu amul lawiir, ñu wis diw ca kaw, ak ay mburu yu ñu lakke sunguf su mucx ayib, xiiwaale ko diw, not ko bu baax. ¹³ Sarax boobu da ciy doli mburu yu am lawiir, boole kook saraxu cant googu ci biir jàmm te mu jublu ci njukkal. ¹⁴ Nañu jooxeel Aji Sax ji ab cér ci sarax yooyu yépp, muy moomeelu sarxalkat bi xépp deretu juru saraxas cant gi ci biir jàmm ci mboolem weti sarxalukaay bi. ¹⁵ Yàppu saraxas cant googu ci biir jàmm te ñu jublu ci njukkal Aji Sax ji, dees koy lekk bés bi ñu ko rendee. Du lenn lees ciy wacc, mu fanaan.

¹⁶ «Su sarax si nit kiy génne dee sarax su ñuy wàccoo ngiñ mbaa sarax yéene, dees na ko lekk bés bi ko nit ki joxee, te lu ca des ba ca èllég sa, ñu man koo lekk. ¹⁷ Lu des ci yàppu sarax si ba ca gannaaw èllég sa dees koy lakk, ba mu dib dóom. ¹⁸ Waaye kat bu nit lekkee lenn ci yàpp wu ñu def saraxu cant ci biir jàmm te fekk mu am ñetti fan, deesul nangul boroom sarax si te du ko jariñ dara. Lu ñu sib la te ku ca lekk mooy gáddu bàkkaaram. ¹⁹ Yàpp wu ci laal lenn lu sobewu it deesu ko lekk. Dees koy lakk. Ci biir loolu yàppu sarax, képp ku set sañ nga cee lekk. ²⁰ Waaye ku sobewu ku lekk ci yàppu jur gu ñu defal Aji Sax ji saraxu cant ci biir jàmm, kooku nañu ko dagge ci biir bànni Israyil. ²¹ Sobe su mu mana doon, muy lu jóge ci nit mbaa mala mu daganul mbaa mboolem lu daganul te mata sib, ku ci laal ba noppi, lekk ci lu ñu defal Aji Sax ji saraxu cant ci biir jàmm, kooku dees koo wara dagge ci bànni Israyil.»

Lu jëm ci santaane yi war mbooloo mi

(7.22-38)

²² Aji Sax ji dellu wax Musaa ne ko: ²³ «Waxal bànni Israyil ne leen: Buleen lekk lenn luy nebbonu nag mbaa xar mbaa bëy. ²⁴ Nebbonu jur gu dee mbaa lu rabu àll fàdd, manees na koo jëfandikoo neneen nu mu mana doon, waaye deesu ko lekk muk. ²⁵ Képp ku lekk ci nebbonu jur gu ñu def saraxu sawara, ñeel Aji Sax ji, kooku ko lekk, dees koy dagge ca biir bànni Israyil. ²⁶ Te itam du lenn luy deret lu ngeen di lekke fenn fu ngeen dëkk, mu jóge ci njanaaw mbaa ag jur. ²⁷ Képp ku lekk lenn luy deret, dees na ko dagge ci biir bànni Israyil.»

²⁸ Aji Sax ji dellooti wax Musaa ne ko:

²⁹ «Waxal bànni Israyil ne leen: Képp kuy jox Aji Sax ji saraxu cantam ci biir jàmm na indi cér bi Aji Sax ji séddoo ci saraxu cant googu ci biir jàmm. ³⁰ Ci loxol boppam lay indee sarax bi ñuy def saraxu sawara, ñeel Aji Sax ji. Day indi nebbon bi, boole kook dënn bi, dënn bi di sarax bu ñuy yékkati, jébbal Aji Sax ji. ³¹ Sarxalkat bi day lakk nebbon bi ci kaw sarxalukaay bi, waaye dënn bi, Aaróona aki doomam yu góor ñoo ko moom. ³² Tànkub ndijoor bi jóge ci seen saraxi cant ci biir jàmm, dees koy jooxeel sarxalkat bi. ³³ Doomu Aaróona ji joxe deretu sarax beek nebbon bi jóge ci saraxu cant gi ci biir jàmm, kookoo jagoo tànkub ndijoor bi, muy céram. ³⁴ Li ko waral mooy, man Aji Sax ji damaa jële ci seen saraxi cant ci biir jàmm, dënn bi ñuy def saraxu yékkati-jébbale, ak tànkub jooxe bi, jox ko Aaróona, sarxalkat bi mook doomam yu góor. Seen cér la ba fàww ci biir bànni Israyil.»

³⁵ Loolooy céri pal yi Aaróona ak askanam di am ci saraxi sawara yi ñeel Aji Sax ji, dale ko keroog bu ñu leen teewalee fi kanam Aji Sax ji, ñu doon ay sarxalkat. ³⁶ Loolu la Aji Sax ji santaane ñu jox leen ko. Bés bu ñu leen xasee diw, fal leen, mu daldi doon seen cér ci biir bànni Israyil ak seen askan ba fàww.

³⁷ Loolu la yoon digle ci wàllu saraxu rendi-dóomal, ak saraxu pepp ak saraxu pootum bàkkaar ak saraxu peyug tooñ ak saraxu xewu colu ak saraxu cant ci biir jàmm. ³⁸ Loolu it la Aji Sax ji dénkoon Musaa ca kaw tundu Sinayi, bés ba mu santee bànni Israyil ca mandinju Sinayi ñu di ko génneel ay sarax.

Fal nañu sarxalkat yi

8

(Saar 8—10)

Lu jëm ci xewu colug sarxalkat ya

¹ Aji Sax ji waxati Musaa ne ko: ² «Indil Aaróona aki doomam yu góor te indaale yére yi ak diw gi ñuy fale ak yékk wiy saraxu pootum bàkkaar ak ñaari kuuy yi, boole ca pañeb mburu ya amul lawiir. ³ Te nga woo mbooloo mi mépp, ñu daje ci bunt xaymab ndaje mi.»

⁴ Musaa def la ko Aji Sax ji sant, mbooloo ma daje ca bunt xaymab ndaje ma. ⁵ Musaa wax mbooloo ma ne leen: «Lii may waaj la Aji Sax ji santaane woon ñu def ko.»

⁶ Ci kaw loolu Musaa indi Aaróona aki doomam yu góor, ñu sangu, ⁷ solal Aaróona mbubb mu gudd ma, takkal ko laxasaay ga, solal ko fëxya ba, tegal ko ca xar-sànni ma, takkal ko ngañyaay la ca

kawam, jàppe ko ko, mu tafu ca kawam.
⁸ Mu solal ko nag kiiraayal dënn ba, daldi yeb ca biir kiiraay la jumtukaayi tegtal ya, di Urim ba ak Tumim ba*, ⁹ la ca tegu mu tegal ko kaala ga ca bopp ba, takkal ko dogu wurus wu tell wa, mooy meeteel gu sell ga, mu nekk ca kaw kaala ga, féete kanam, muy la Aji Sax ji santoon Musaa.

¹⁰ Ba loolu wéyee Musaa jël diwu pal ga, diw ca jaamookaay baak ya ca biir yépp, sellale ko yooya, ¹¹ ba noppi wis-wisal ca juróom ñaari yoon ca kaw sarxalukaay ba, diwe ko sarxalukaay ba ak mboolem ay ndabam, boole ca mbalkam njàpp ma, mook ub tegoom ngir yooyu it sell. ¹² Mu sotti nag tuuti ci diw gi ñuy fale ci boppu Aaróona, diw ko, sellale ko ko. ¹³ Ba mu ko defee Musaa indi doomi Aaróona yu góor ya, solal leen mbubb yu gudd, takkal leen ay laxasaay, solal leen mbaxana, muy la Aji Sax ji santoon Musaa.

¹⁴ Musaa teg ca indi yèkku sarax siy póotum bàkkaar, Aaróona aki doomam teg seeni loxo ci kaw boppu yèkku sarax siy póotum bàkkaar, ¹⁵ Musaa rendi ko, sàkk ci deret ji, capp ci baaraamam, diw ci ñeenti béjjéni sarxalukaay bi yépp, setale ko sarxalukaay bi. Mu daldi tuur li des ci deret ji ci taatu sarxalukaay bi, sellale ko noonu, muy njotlaayal sarxalukaay bi.

¹⁶ Ba loolu amee mu jël nebbon bi sàng yérey biir yi, ak bàjjo bi ci res wi ak ñaari dëmbéen yi ànd ak seen nebbon, lakk ko ci kaw sarxalukaay bi. ¹⁷ Li des ci yèkk wi, di der beek yàpp week sébbriit mi, mu génne ko dal bi, lakk ko ca biti, muy la Aji Sax ji santoon Musaa.

¹⁸ La ca tegu mu indi kuuyu saraxu rendi-dóomal bi, Aaróona ak doomam yu góor teg seeni loxo ca boppu kuuy ma. ¹⁹ Musaa rendi ko, xépp deret ji ci mboolem weti sarxalukaay bi, ²⁰ daldi daggat kuuy mi, def ko ay dog, boole bopp beek dog yeek nebbon bi, lakk ko, ba mu dib dóom. ²¹ Ba loolu weesee Musaa boole yérey biir yi, ak yeel yi, raxas, ba noppi lakk kuuy mi yépp ca sarxalukaay ba. Loolu saraxu rendi-dóomal bi, ngir xetug jàmm. Saraxu sawara la, ñeel Aji Sax ji, na ko Aji Sax ji sante woon Musaa.

²² Gannaaw loolu Musaa indi kuuy ma ca des, di kuuyu xewu colu. Aaróona aki doomam teg seeni loxo ci boppu kuuy mi, ²³ Musaa rendi ko, sàkk ca deret ja, taqal ca tabanu noppu ndijooru Aaróona, taqal ca baaraamu déyu ndijooram ak baaraamu déyu tànkú ndijooram. ²⁴ Musaa doora indi doomi Aaróona yu góor ya, sàkk ca deret ja, taqal ca seen tabani noppi ndijoor ak seen baaraamu déyu ndijoor ak seen

baaraamu déyu tànkú ndijoor. La des ca deret ja, Musaa xépp ko ca mboolem weti sarxalukaay bi. ²⁵ Ba mu ko defee mu génne nebbon bi, muy calgeen bi ak nebbon bi sàng yérey biir yépp ak bàjjo bi ci res wi ak ñaari dëmbéen yi ànd ak seen nebbon, ak tànkú ndijoor bi. ²⁶ Layu bi def mburu yi amul lawiir, taaje fi kanam Aji Sax ji, mu jële ca menn mburu kese mu ndaw ak menn mburu mu ndaw te am diw ak menn mburu mu tàppandaar, boole ko teg ca kaw nebbon ba ak tànkú ndijoor ba. ²⁷ Mu boole yooyu yépp teg ci loxol Aaróona ak loxoy doomam yu góor, ngir ñu def ko sarax bu ñuy yékkati, jébbal Aji Sax ji. ²⁸ Ba loolu amee Musaa nangoo ko ca seeni loxo, teg ko ca kaw saraxu rendi-dóomal ba, lakk ko ca sarxalukaay ba. Loolu saraxas xewu colu la woon, ngir xetug jàmm. Saraxu sawara la, ñeel Aji Sax ji. ²⁹ Musaa daldi jël dënn biy céram ci kuuyu xewu colu gi, yékkati ko, jébbal Aji Sax ji, muy saraxu yékkati-jébbale, di la Aji Sax ji santoon Musaa.

³⁰ Musaa teg ca sàkk ca diwu pal ga, ak deret ji ci sarxalukaay bi, wis-wisal ko ci kaw yaramu Aaróona ak ca kawi yéreem, wis-wisaale ko ca kaw yarami doomam yu góor ak ca kaw yérey doomam.

³¹ Musaa wax ak Aaróona aki doomam yu góor ne leen: «Toggleen yàpp wi ci bunt xaymab ndaje mi te lekk ko foofa, boole kook mburu mi ci layub saraxi xewu colu gi, muy la ma santaane woon ne yaw Aaróona yaak say doom yu góor yeena koy lekk. ³² Li des ci yàpp wi ak mburu mi, lakkleen ko, ba mu dib dóom. ³³ Waaye bunt xaymab ndaje mi buleen ko wees diiru juróom ñaari fan, ba bésub keroog ba seen xewu colu di mat, ndax juróom ñaari fan lay mat. ³⁴ Lépp lu ñu def tey, Aji Sax ji daa santaane ñu def ko, mu daldi matal seen njotlaay. ³⁵ Ci bunt xaymab ndaje mi ngeen di yem guddeek béccég diiru juróom ñaari fan, boole ci di dénkoo dénkaaney Aji Sax ji, ndax ngeen baña dee, ndaxte loolu moo di li ñu ma santoon.»

³⁶ Aaróona ak doomam yu góor nag def lépp lu Aji Sax ji santaane woon, Musaa jottli.

9

Liggéeyu sarxalkat yi tàmbali na

¹ Keroog bésub juróom ñetteel ba, Musaa woolu na Aaróona ak doomam yu góor, ñook magi Israyil ña. ² Mu ne Aaróona: «Sàkkal aw sèllu, muy saraxas póotum bàkkaar akum kuuy, muy saraxu rendi-dóomal, te bu ci lenn am sikk, nga

* 8:8 8.8 Seetal ci *Mucc ga* 28.30.

boole indil Aji Sax ji. ³ Te nga wax bànni Israyil ne leen ñu jël ab sikket, mu doon saraxu póotum bàkkaar, akaw sèllu akam xar, lu ci nekk am at te mucc sikk, ngir saraxu rendi-dóomal, ⁴ ak itam aw nag akam kuuy, muy saraxu cant ci biir jàmm, di lu ñuy rendi fi kanam Aji Sax ji. Nañu defaale saraxu pepp mu am diw, ndax tey jii Aji Sax ji dina leen feeñu.»

⁵ Ba mu ko defee ñu yóbbu ca bunt xaymab ndaje ma la Musaa santaane woon, mbooloo ma mépp ñew, taxaw fa kanam Aji Sax ji. ⁶ Musaa ne: «Lii mooy li Aji Sax ji santaane ne, moom ngeen wara def ngir leeram feeñu leen.» ⁷ Musaa wax ak Aaróona ne ko: «Dikkal fii ci sarxalukaay bi te joxe sa saraxu póotum bàkkaar ak sa saraxu rendi-dóomal, nga jotoo ko, yaw yaak mbooloo mi, boo noppee joxe saraxu mbooloo mi, jote leen ko, muy li Aji Sax ji santaane.»

⁸ Aaróona dikk ba ci sarxalukaay bi, rendi sèllu wi, muy saraxu póotum bàkkaaram. ⁹ Gannaaw loolu doomi Aaróona yu góor ya indil ko deret ja, mu capp ca baaraamam, taqal ca béjjéni sarxalukaay ba; la des ca deret ja mu tuur ko ca taatu sarxalukaay ba. ¹⁰ Aaróona jël nebbon bi jóge ci sarax biy póotum bàkkaar, aki dèmbéenam ak bàjjo bi ci res wi, mu boole ko lakk ci kaw sarxalukaay bi, muy la Aji Sax ji santoon Musaa. ¹¹ Yápp wi ak der bi, mu génne ko dal ba, lakk ko, ba mu dib dóom. ¹² La ca tegu Aaróona rendi juru rendi-dóomal bi. Ba loolu amee doomam yu góor ya jox ko deret ja, mu xépp ko ci mboollem weti sarxalukaay bi. ¹³ Ñu jox ko saraxu rendi-dóomal bi ñu def dog yu ànd ak bopp ba, mu boole lakk ca sarxalukaay ba. ¹⁴ Loolu wéy, mu raxas yérey biir yi, ak yeel yi, teg ko ca kaw saraxu rendi-dóomal ba, lakkaale ko ca.

¹⁵ Gannaaw gi Aaróona indi saraxi mbooloo mi, jël sikketu mbooloo miy doon seen saraxu póotum bàkkaar, rendi ko, sarxal ko, na mu sarxale la jiiu. ¹⁶ Ci kaw loolu mu indi saraxu rendi-dóomal ba, sarxal ko, na ñu ko diglee. ¹⁷ Mu doora indi saraxu pepp mi, sàkk ci ab tib, lakk ko ca kaw sarxalukaay ba, dolli ko ca dóomal suba sa. ¹⁸ Mu sooga rendi nag wi ak kuuy mi, defal ko mbooloo mi saraxu cant ci biir jàmm. Doomam yu góor ya jox ko deret ja, mu xépp ko ca mboollem weti sarxalukaay ba. ¹⁹ Waaye lay nebbon ca nag wa ak kuuy ma, di calgeen ba ak nebbon bi sàng yérey biir yi, ak dèmbéen yi ak bàjjo bi ci res wi, ²⁰ nebbon yooyu lañu teg ca kaw dènni nag wa ak kuuy ma, Aaróona lakk ko ca kaw sarxalukaay ba. ²¹ Ba mu ko defee Aaróona yékkati dènn

yaak tàngu ndijoor ba, defal ko Aji Sax ji saraxu yékkati-jébbale, muy la Musaa santaane woon.

²² Ba Aaróona noppee, yékkati na mbooloo ma ay loxoom, ñaanal leen, doora wàcc. Fekk na mu joxe saraxu póotum bàkkaar ba, ak saraxu rendi-dóomal ba, ak saraxu cant ga ci biir jàmm. ²³ Musaa ak Aaróona ànd dugg ca biir xaymab ndaje ma; ba ñu génnee, ñaanal mbooloo ma, leeru Aji Sax ji feeñu mbooloo ma mépp. ²⁴ Ci kaw loolu sawara bawoo fi Aji Sax ji, tàkk ca kaw sarxalukaay ba, xoyom saraxu rendi-dóomal ba ak nebbon ba. Naka la mbooloo ma mépp gis loola, daldi sarxolle, ba noppi dépp seen jë fa suuf.

10

Musiba dal na Nadab ak Abiyu

¹ Ci kaw loolu doomi Aaróona yu góor yi tudd Nadab ak Abiyu jël ku ci nekk ab andam, def cay xal, def ca cuuraay, indil ko Aji Sax ji, muy taal bu dul ndigal te santu leen ko woon. ² Sawara ne jippét, bawoo fi Aji Sax ji, lakk leen ba ñu dee fa kanam Aji Sax ji. ³ Musaa ne Aaróona: «Lii la Aji Sax ji doon wax ba mu nee: “Ci biir ñi may jegeñ laay feeñal samag sellaa, te ci kanam mbooloo mi mépp lees may terale.”» Aaróonaa nga ne cell.

⁴ Ba mu ko defee Musaa woolu Mikayel ak Elsafan, góor ñiy doomi Uysel, baayu Aaróona bu ndaw. Mu ne leen: «Kaayleen jële fi seen bokk yii ci bérab bu sell bi, te ngeen génne leen dal bi.» ⁵ Ñu jàpp ca seeni mbubb, génne leen dal ba, muy la Musaa santaane woon. ⁶ Musaa wax Aaróona ak doomam yu góor yi tudd Elasar ak Itamar ne leen: «Buleen njañu te buleen ñaawlu di xotti seeni yére, lu ko moy dingeen dee, te merum Yalla dina dal ci kaw mbooloo mi mépp. Waaye seen bokki bànni Israyil gépp sañ nañoo jooj ñi Aji Sax ji lakk. ⁷ Bunt xaymab ndaje mi, buleen ko wees, lu ko moy dingeen dee, ndax diwu palu Aji Sax jaa ngi ci seen kaw.» Ñu def la leen Musaa sant.

Li war ci sarxalkat

⁸ Aji Sax ji wax Aaróona itam ne ko: ⁹ «Biiñ mbaa naan buy mándal bu ko kenn ci yeen naan buy duggsi ci biir xaymab ndaje mi, du yaw, du say doom yu góor, lu ko moy dingeen dee. Dogal a ngoogu, di lu leen war fàww, yeen ak seen askan. ¹⁰ Dangeen wara mana ràññee lu sell ak lu ñu sellalul, dangeen wara ràññee itam lu set ak lu setul. ¹¹ Nangeen jàngal bànni Israyil mboollem dogal yi leen Aji Sax ji dénk, te Musaa jottli leen ko.»

¹² Ci kaw loolu Musaa wax ak Aaróona ak doomam yu góor yi des, di Elasar ak Itamar, ne leen: «Jël-leen saraxu pepp mi des ci saraxi sawara yi ñeel Aji Sax ji, ngeen lekk ko, bañ cee boole lawiir, ci wetu sarxalukaay bi, ndax lu sell la sell la. ¹³ Lekkleen ko ci bérab bu sell. Sa cér la, yaw ak say doom yu góor, ci saraxi sawara yi ñeel Aji Sax ji. Loolu lañu ma sant. ¹⁴ Waaye dënnu saraxu yékkati-jébbale bi ak tãnkub jooxe bi, lekkleen ko ci bérab bu mucc sobe, yaak say doom yu góor ak say doom yu jigéen, ndax seen cér la, ci saraxi canti bànni Israyil ci biir jàmm, nga moom ko yaak say doom. ¹⁵ Tãnkub jooxe bi ak dënnu saraxu yékkati-jébbale bi, mook nebbon bi ñuy def saraxu sawara, dees koy boole indi yékkati ko, def ko sarax bu ñuy yékkati, jébbal Aji Sax ji. Yeena moom yooyu, yaak say doom, muy seen cér bu ñu leen dogalal fàww, te di la Aji Sax ji santaane woon.»

¹⁶ Gannaaw loolu Musaa laajte, ba am lu leer ci mbirum sikketu saraxas póotum bàkkaar bi, ndekete lakk nañu ko, ba ma dib dóom. Mu mere ca doomi Aaróona yu góor ya des, di Elasar ak Itamar, ne leen: ¹⁷ «Lu waral lekkuleen sarax biy póotum bàkkaar ci bérab bu sell? Lu sell la, ñu jox leen ko, ngeen war koo yenniku bàkkaaru mbooloo mi, ba defal leen seen njotlaay fi kanam Aji Sax ji. ¹⁸ Gannaaw dugaleesul deret ji ca biir bérab bu sell ba, waroon ngeena lekk sikket bi ci bérab bu sell, muy li ma santaane woon.» ¹⁹ Aaróona ne Musaa: «Xoolal rekk tey ni bànni Israyil indile Aji Sax ji seen saraxu póotum bàkkaar ak seen saraxu rendi-dóomal, te teewul lii dal ci sama kaw! Bu ma lekkoon tey ci yàppu saraxas póotum bàkkaar bi, ndax dina neex Aji Sax ji?» ²⁰ Musaa dégg kaddu yooyu, rafetlu ko.

Sàrtal nañu lu set ak lu setul

11

(Saar 11—15)

Lu jëm ci mala mu set ak mu setul

¹ Aji Sax ji wax na Musaa ak Aaróona ne leen: ² «Waxleen bànni Israyil ne leen: Boroom bakkan yi ngeen di lekk seen yàpp, ci mboolem mala yiy dox ci suuf moo di yii: ³ Mboolem mala mu we wa xar, séddlikoo ñaar, te muy duññ, moom ngeen di lekk aw yàppam. ⁴ Yii ñuy lim, buleen ko lekk: mala muy duññ te we wi xarul, mbaa we wi xar te du duññ. Lu mel ni giléem, buleen ko lekk ndax duññ, waaye we wi xarul. Daganul ci yeen. ⁵ Daman* day duññ waaye we

wi xarul, kon daganul ci yeen. ⁶ Lég day duññ waaye we wi xarul, kon daganul ci yeen. ⁷ Mbaam-xuux, we wi xar na waaye du duññ, kon daganul ci yeen. ⁸ Buleen ci lekk lenn te buleen laal méddam ndax lenn daganu ci, ci yeen.

⁹ «Li ngeen mana lekk ci mboolem luy nekk ci ndox mooy lii: Mboolem lu am ay ciiriir aki waasintóor tey nekk ci ndoxum géeg mbaa dex, man ngeen koo lekk. ¹⁰ Waaye mboolem luy nekk ci géeg mbaa dex, di lépp luy ramm-rammi cim ndox mbaa mboolem yeneen bindeef yuy nekk ci ndox, su amul ciiriir aki waasintóor, sibleen ko. ¹¹ Lu ngeen sib lay doon, kon buleen ci lekk yàppu lenn te sibleen méddam. ¹² Mboolem luy nekk ci ndox te amul ciiriir aki waasintóor, sibleen ko.

¹³⁻¹⁸ «Li ngeen wara sib ci njanaaw yi te deesu ko lekk moo di: jaxaay ak mboolem xeeti tan; ak céeli, bu xonq baak bu ñuul ba, bu mu mana doon, ak mboolem xeeti baaxoñ, ak mboolem xeeti looy, muy looy mu ndaw ak looy muy napp ak looy mu gudd nopp ak looyu màndiñ, ba ci xar-jéjj ak tiwi. Nangeen sib maf itam, ak kirigéeg ak mboolem xeeti liccin; ¹⁹ ak yébb ak lu xeetook xodd, ak musejubru ak njugub.

²⁰ «Mboolem gunóor guy naaw tey doxe ñeenti tãnk sibleen ko. ²¹ Li ngeen mana lekk daal ci mboolem gunóor guy naaw tey doxe ñeenti tãnk moo di: lépp lu tãnk yi ànd aki yeel, mu man caa tēb-tēbe ci suuf. ²² Li ngeen mana lekk ci yooyu moo di: mboolem xeetu njéeréer ak mboolem xeetu saller ak mboolem xeetu soccet ak yeneen yu ñu xeetool yépp. ²³ Waaye mboolem yeneen gunóor yuy naaw tey doxe ñeenti tãnk sibleen ko.

²⁴ «Yii nag da leen di sobeel te képp ku laal lu ci dee dina yendoo sobe ba jant so. ²⁵ Te itam képp ku for lenn lu dee ci yii, na fóot ay yéreem, waaye dina yendoo sobe ba jant so. ²⁶ Mboolem mala mu we wa xar te séddlikoo wul ñaar mbaa du duññ daganul ci yeen, ku ci laal lenn it sobewu na. ²⁷ Ba tey lépp luy doxe ndégguy tãnkam ci mboolem boroom ñeenti tãnk, daganul ci yeen te ku laal méddam dina yendoo sobe ba jant so. ²⁸ Ku for méddam, na fóot ay yéreem te dina yendoo sobe ba jant so. Yooyu daganul ci yeen.

²⁹ «Bu loolu weesee, leneen lu daganul ci yeen ci rab yu sew-sewaan yiy dox ne ñàpp ci suuf, mooy kaña ak janax ak xeeti mbétt yépp; ³⁰ ak unk ak bar ak sindax buy yéeg, ak sindax buy dox ci suuf, ak kàkkatar. ³¹ Yooyoo daganul ci yeen ci mboolem rab yu sew-sewaan yiy dox ne ñàpp ci suuf. Képp ku laal lenn lu ci dee dina yendoo

* 11:5 11.5 daman xaw naa nirook njomboor.

sobe ba jant so. ³² Te it lu ci dee ba wadd ci kaw lenn, loola day sobewu, nay ndabal bant, mbaa ndimo, der mbaa ab saaku, mbaa jumtukaay bu mu mana doon. Nañu sóob loola ci ndox te du tee mu yendoo sobe ba jant so, mu doora set. ³³ Su fekke ne lenn a dee ci yooyu, wadd ci biir ndabal xandeer, lu woon ca biir sobewu na, te nañu toj ndab la. ³⁴ Ndox mu jóge ci ndab loolu, bu dalee ci ñam wu dagan, ñam woowu dal nay sobewu moom itam; bu doon ag naan gu dagan moo ca nekk it, sobewu na, ak ndab lu naan ga mana nekk. ³⁵ Lépp lu lenn ci yooyu dee, ba dal ca, la mu dal sobewu na. Su dee ab puuru ban mbaa cin, dees koy toj ndax sobewu na te lu setul la ci yeen. ³⁶ Su fekke ne loola dee daa wadd ci biir bētu ndox mbaa kàmb gu def ndox, du tee ndox ma laab, waaye ku laal la dee ca biir sobewu nga. ³⁷ Su la dee waddee ci peppum jiwu, du tee peppum jiwu ma set; ³⁸ waaye su fekke ñu kaas pepp ma te lenn lu dee lu bokk ci yooyu dal ca, pepp ma daganul ci yeen.

³⁹ «Su mala mu dagan méddée, ku laal médd ma dina yendoo sobe ba jant so. ⁴⁰ Képp ku lekk ca médd ma, na fóot ay yéreem, te du tee mu yendoo sobe ba jant so. Képp ku for médd ma, na fóot ay yéreem te du tee mu yendoo sobe ba jant so.

⁴¹ «Mboolem bindeef yu sew-sewaan yiy dox ne ñapp ci suuf, sibleen ko. Deesu ko lekk. ⁴² Lépp luy watatu, mbaa lu sew di boroom ñeenti tãnk, mbaa mu bare ay tãnk ci mboolem bindeef yu sew-sewaan yiy dox ne ñapp ci suuf, waruleen koo lekk, ndax lu ñu wara sib la. ⁴³ Buleen araamal seen bopp ci lenn ci yu sew-sewaan yooyu; buleen ci taq, di ci sobeel seen bopp, ⁴⁴ ndaxte man Aji Sax ji maay seen Yàlla. Kon nag sell-luleen te sell ndax man ku Sell laa. Kon buleen sobeel muk seen bopp ci mboolem bindeef yu sew-sewaan yiy dox ci suuf. ⁴⁵ Ndaxte kat man Aji Sax ji maay ki leen génne woon réewum Misra, di seen Yàlla. Sell-leen boog, ndax man ku Sell laa.»

⁴⁶ Loolu la yoon digle ci wàllu mala ak njanaaw ak bindeef yi nekk ci ndox, ak mboolem bindeef yu sew-sewaan yiy dox ne ñapp ci suuf. ⁴⁷ Dina taxa ràññatle lu set ak lu setul. Dina taxa ràññatle boroom bakkan yi daganale lekk ñook boroom bakkan yi daganula lekk.

12

Li war ci ku wasin

¹ Bu loolu wéyee Aji Sax ji wax na Musaa ne ko: ² «Waxal bànni Israyil ne leen: Ku èmb ba wasin, am doom ju góor,

dina sobewu diiru juróom ñaari fan. Day sobewu ni bu tolloo ci fan yi muy gis baax. ³ Bu bés ba délsee, nañu xarfal xale bi. ⁴ Dina ca teg fanweeri fan ak ñett, ngir setlu ca meret ma. Ci diir booba warula laal lenn lu ñu sellal, mbaa muy dugg fu sell li feek àppu setloom matul. ⁵ Su amee doom ju jigéen, dina sobewu diiru ñaari ayi bés, mu mel ni ku gis baax. Dina ca teg juróom benn fukki fan ak juróom benn, doora tàggook sobey meret ma.

⁶ «Keroog bu àppu setloom matee, bu doom ja dee góor, bu dee jigéen, na dem ca bunt xaymab ndaje ma te yóbbul sarxalkat bi am xar mu am at, muy saraxu rendi-dóomal, ak xati mu ndaw mbaa pitax, mu doon saraxu póotum bàkkaar. ⁷ Na ko sarxalkat bi sarxal fi kanam Aji Sax ji, def ko njotlaayal wasin-bees wi, mu doora tàggook sobey meret ma.»

Loolu la yoon digle ci wasin-bees, mu am doom ju góor mbaa ju jigéen. ⁸ «Su fekke ne wasin-bees wi amul njégu xar, na indi ñaari pitax mbaa ñaari xati yu ndaw, benn bi di saraxu rendi-dóomal, bi ci des di saraxu póotum bàkkaar. Sarxalkat bi defal ko ku jigéen ki njotlaayam, mu daldi set.»

13

Li war ci jàngoroy der

¹ Aji Sax ji wax na Musaa ak Aaróona ne leen: ² «Su nit amee ab tērgēn ci yaramam mbaa ab ēr, mbaa ab gākk bu weex bu mana doon jàngoroy der juy law ci yaramam, nañu ko yóbbu ci Aaróona sarxalkat bi mbaa kenn ciy doomam yu góor yiy sarxalkat yi. ³ Na sarxalkat bi seet gākk bi ci yaramu nit ki; su fekke ne kawar gi ci gākk bi dafa soppiku weex, te mu mel ni lu def pax ci der bi, jàngoroy der juy law la. Bu sarxalkat bi gisee loolu, na biral ne nit ki sobewu na. ⁴ Waaye su dee ab gākk bu weex ci yaram wi te melul ni lu def pax ci der bi, taxul itam kawar gi ci nekk soppiku weex, na sarxalkat bi ber nit ki ame gākk bi diiru juróom ñaari fan. ⁵ Na ko sarxalkat bi xoolaat bésul juróom ñaareel ba. Bu sarxalkat bi seetloo ne gākk bi soppikuwul mbaa mu law ci yaramam, na ko beraat juróom ñaari fan. ⁶ Na ko sarxalkat bi xoolaat ca bésul juróom ñaareel ba. Su fekke gākk bi di raaf te lawul ci kaw deru yaram wi, na sarxalkat bi biral ne nit ki set na; ab ēr donṅ la. Day fóot ay yéreem rekk daldi set. ⁷ Su fekke ne wóor na ne ēr bi law na ci deru yaramu nit ki, gannaaw ba mu ko wonnee sarxalkat bi, ba mu biral ne set na, day dellu ca sarxalkat ba. ⁸ Su boobaa na ko sarxalkat bi xoolaat ba gis ēr bi law

ci deru yaram wi, mu doora biral ne nit ki sobewu na te jàngoroy der juy law la.

⁹ «Képp ku ame jàngoroy der juy law, nañu ko yóbbu ca sarxalkat ba. ¹⁰ Na ko sarxalkat bi seet. Su dee ab tērgēn bu weex te kawar gi ci nekk soppiku weex, boole ci def góom ca biir, ¹¹ kon jàngoroy der juy law la te xas naa law ci yaram wi. Na sarxalkat bi biral ne nit ki sobewu na. Du jar mu di ko ber ndax taq na sobe ba noppi. ¹² Su fekkee ne nag jàngoro ji génn naa génn ci yaramu nit ki, sarxalkat bi gis ko fépp, li ko dale ci bopp bi ba ci tãnk yi, ¹³ na ko sarxalkat bi seet bu baax. Bu gisee ne li génn ci yaramam daj na yaram wi yépp, na biral ne nit ki mu dal set na; gannaaw léppam a soppiku weex, set na. ¹⁴ Ba yé bés bu ay góom génnatee ci yaram wi, nit ki sobewu na. ¹⁵ Su sarxalkat bi gisee yaramu nit ki def góom rekk, na biral ne sobewu na. Góom boobu génn ci yaram wi sobe la. Jàngoroy der juy law la. ¹⁶ Te it bu góom bi soppikoo weex, na dem ca sarxalkat ba. ¹⁷ Na ko sarxalkat bi seet, ba gis ne weexaat na, mu biral ne ki jàngoro ji dal set na te kon it set na.

¹⁸ «Su nit taabee ba wér, ¹⁹ ab tērgēn bu weex mbaa gakk bu weex bu rax xonq feefi fa taab ba nekkoon, na dem ca sarxalkat ba. ²⁰ Su ko sarxalkat bi seetee ba gis fa taab ba nekkoon mel ni lu def pax, te kawar gi ci nekk soppiku weex, na sarxalkat bi biral ne nit ki sobewu na. Jàngoroy der juy law la, ju juddoo ca taab ba. ²¹ Waaye su ko sarxalkat bi seetee te gisu ca kawar gu weex, deful pax it te raaf na, na ber nit ki juróom ñaari fan. ²² Su wéree ne jàngoro ji law na ci yaram wi, na sarxalkat bi biral ne nit ki sobewu na. Jàngoroy der juy law la. ²³ Su gakk bi yemee foofu, baña law, légétub taab ba la, te na sarxalkat bi biral ne nit ki set na.

²⁴ «Su nit lakkee, ab gakk bu weex mbaa bu weex te rax xonq feefi ca kaw suux wu xonq wa lakk, ²⁵ na ko sarxalkat bi seet. Su kawar gi ci nekk soppikoo weex te gakk bi mel ni lu def pax, kon jàngoroy der juy law la, ju juddoo ca lakk-lakk ba. Na sarxalkat bi biral ne nit ki sobewu na, ndax jàngoroy der juy law la. ²⁶ Waaye su ko sarxalkat bi seetee, gisul kawar gu weex ci gakk bi, deful pax it te raaf na, na ber nit ki juróom ñaari fan. ²⁷ Sarxalkat bi da koy seet ca bésub juróom ñaareel ba. Su wéree ne jàngoro ji law na ci yaram wi, na biral ne nit ki sobewu na. Jàngoroy der juy law la. ²⁸ Su gakk bi yemee foofu te lawul ci yaram wi, ab tut la bu juddoo ci lakk-lakk bi. Na sarxalkat bi biral ne nit ki set na, ndax légétub lakk-lakk ba la.

²⁹ «Su fekkee ne góor mbaa jigéen dafa ame jàngoro ci bopp mbaa ci sikkim, ³⁰ na sarxalkat bi seet fi jàngoro ji nekk. Su melee ni lu def pax ci der bi, kawar gu xall te sew nekk ca, na sarxalkat bi biral ne nit ki sobewu na. Loolu wat-wataan la, di ér yuy génn ci bopp mbaa sikkim. ³¹ Ndegam sarxalkat bi seet na ér wi te niruwul lu def pax, amul it kawar gu ñuul ca biir, day ber nit ki ame ér wi diiru juróom ñaari fan. ³² Sarxalkat bi day seetaat ér wi ca bésub juróom ñaareel ba. Su wat-wataan ji lawul, kawar gu xall nekku ca, te melul ni lu def pax, ³³ na nit ki watu waaye du wataale wat-wataan ji. Sarxalkat bi da koy beraat juróom ñaari fan. ³⁴ Na sarxalkat bi seetaat wat-wataan ji ca bésub juróom ñaareel ba. Su wat-wataan ji lawul ci yaram wi te niruwul lu def pax, sarxalkat bi day biral ne nit ki sobewuwul. Nit ki day fót ay yéreeem daldi set. ³⁵ Waaye su wéree ne wat-wataan ji law na ci yaram wi gannaaw ba ñu biralee ne set na, ³⁶ na ko sarxalkat bi dellu seet ba gis ne wat-wataan ji law na ci yaram wi. Su boobaa soxlaatul mu di ca seet kawar gu xall, ndax nit ki sobewu na. ³⁷ Waaye su seetloo ne wat-wataan ji soppikuwul te kawar gu ñuul sax ca, wat-wataan ja wér na, nit ki it set na. Na sarxalkat bi biral ne nit ki set na.

³⁸ «Su góor mbaa jigéen amee ay gakk-gakk yu weex ci yaram wi, ³⁹ sarxalkat bi seet ko, gakk yooyu ci yaram wi di lu weex, xawa xall, xam rekk la, ju feefi ci yaram wi waaye nit ki set na.

⁴⁰ «Góor gu bopp ba amatul kawar dafa leel waaye set na. ⁴¹ Bu bopp bi ñakkee kawar fi féeteek kanam gi, jé baa leel waaye set na. ⁴² Waaye su amee gakk bu weex bu feefi te rax xonq ci leelub ndaal bopp mbaa jé, jàngoroy der la juy mágg tey génn ci leelub ndaal bopp mbaa jé. ⁴³ Sarxalkat bi da koy seet. Ndegam ay tērgēn yu weex te rax xonq a ngi ci leelub ndaal bopp bi mbaa jé bi, mu mel ni jàngoroy der juy law ci yaram wi, ⁴⁴ nit ki ànd naak jàngoro te taq na sobe. Na sarxalkat bi biral ci lu leer ne nit ki sobewu na ndax jàngoro ji ci bopp bi.

⁴⁵ «Ku ànd ak jàngoroy der juy law nag yéree yu xottiku lay sol te day njañu*. Na muur li ko dale ci tuñm kaw mi ba ci sikkim bi, te nay jàppoo àddu ca kaw naan: “Setuma de, setuma!” ⁴⁶ Li feek jàngoro jaa ngi ci moom, day sobewu te gannaaw daa sobewu, na dëkk moom donj te na dëkkuwaayam génn dal bi.

Li war ci këf ku teg liir

* 13:45 13.45 Dafa wara ñaawlu ni bu nekkoon ci dēj, ngir artu nit ñi ba ñu sore ko, ndax setul.

⁴⁷ «Su ndimo xuuree, teg aw liir, muy ndimol kawaru gätt gu ñu ècc mbaa yu wëñ gu èccu[†], ⁴⁸ mu tegu ci bàgg mbaa ci poqe, su dee kawar gu èccu, su dee wëñ gu èccu walla der bu ñu wulli walla mboolem lu ñu defare der, ⁴⁹ su liir wi nètèxee mbaa mu xonq, tege ci yére mbaa der mbaa bàgg mbaa poqe mbaa lu ñu defare der, liir wuy law la. Dees koy won sarxalkat bi. ⁵⁰ Na sarxalkat bi nemmiku liir wi, ba noppi ber kéf ki teg liir wi diiru juróom ñaari fan. ⁵¹ Bésub juróom ñaareel ba na seet liir wa. Su liir wa lawee ca kaw kéf ka, muy ndimo mbaa bàgg mbaa poqe mbaa der mbaa jumtukaayu der, kon liir wu aaytal la te kéf ka sobewu na. ⁵² Da koy lakk, ndax liir wu aaytal la, muy ndimo mbaa bàgg mbaa poqe mbaa kawaru gätt gu ñu ècc mbaa wëñ gu èccu mbaa lu ñu defare der te liir wa tegu ca. Dees koy lakk, ba mu dib dóom. ⁵³ Waaye kat bu sarxalkat bi seetloo ne liir wi lawul ci kéf ki, muy ndimo mbaa bàgg mbaa poqe mbaa jumtukaayu der, ⁵⁴ na santaane ñu fóot ko, mu daldi koy beraat juróom ñaari fan. ⁵⁵ Ndegam nag gannaaw ba ñu fóotee kéf ka teg liir, sarxalkat bi seet na ko, te liir wi soppiwul melo, bu lawul it setul. Dees koy lakk, ba mu dib dóom, su yàqoo biir ak su yàqoo biti yépp. ⁵⁶ Su sarxalkat bi gisee gannaaw ba ñu fóotee kéf ka ne, liir wi raaf na, na dagg sànni fa tegoon liir ca kéf ka, muy ndimo mbaa der mbaa bàgg mbaa poqe. ⁵⁷ Su liir wa génnatee ca kéf ka, muy ndimo mbaa bàgg mbaa poqe mbaa lu ñu defare der, kon liir wuy mágg la. Kéf ka teg liir dees koy lakk, ba mu dib dóom. ⁵⁸ Ndegam liir wa deñ na, gannaaw ba ñu fóotee kéf ka, muy ndimo mbaa bàgg mbaa poqe mbaa lu ñu defare der, dees koy fóotaat, mu doora set.»

⁵⁹ Loolu la yoon digle ci liir wuy law wu tegu ci ndimol kawar gu èccu mbaa lu wëñ gu èccu mbaa bàgg mbaa poqe mbaa lu ñu defare der. Ci digle yooyu lañuy tegu, ba mana biral ne kéf ka set na am setul.

14

Li war ci laabal boroom jàngoroy der

¹ Aji Sax ji teg na ca ne Musaa: ² «Li yoon digle ci mbirum nit ku ame jàngoroy der juy law, keroog bés ba ñuy laabal nit ki, mooy lii: Nañu ko yegge sarxalkat bi. ³ Sarxalkat bi day génn dal bi, bu koy seet. Su nit ki demee ba jàngoroy der ji ko daloon wér, ⁴ sarxalkat bi day santaane, ñu indil nit kooku ñuy laabal ñaari picc yu dagan tey dund, ak bantu garabu seedar, ak wëñ gu xonq curr, ak caru garabu isob*.

⁵ Na sarxalkat bi santaane, ñu rendi menn picc mi, tiimale ko ndabal xandeer lu def ndox mu balle ci bētu ndox. ⁶ Picc miy dund da koy booleek bantu seedar bi ak wëñ gu xonq curr gi ak caru isob bi, boole lépp sóob ci deretu picc ma ñu rendi woon tiimale ko ndox mi balle ci bētu ndox. ⁷ Bu loolu amee sarxalkat bi wis-wisal juróom ñaari yoon ci kaw ki ñuy laabal, ngir mu tággoók sobey jàngoro ji. Su ko defee sarxalkat bi biral ne set na. Bu noppee na bàyyi picc miy dund mu naaw ca àll ba. ⁸ Ku ñuy laabal day fóot ay yéreem, watu ba set te sangu, doora set. Gannaaw loolu man naa dugg ci dal bi, waaye na yem ca bunt xaymaam ca biti diiru juróom ñaari fan. ⁹ Bésub juróom ñaareel ba na watu ba set, bopp beek sikkim beek yeen yi ak kawar gi ci des yépp lay wat, fóot ay yéreem, sangu, daldi set. ¹⁰ Bésub juróom ñetteel ba na indi ñaari kuuy yu amul sikk, ak menn xar mu jigéen mu am at te amul sikk ak juróom ñeenti kiloy sunguf su mucc ayib su ñu xiiwe diw, muy saraxu pepp. Mu indaale genn-wàllu liitaru diw. ¹¹ Sarxalkat biy laabal nit ki day indi nit ki, mu ànd ak loolu lépp, taxaw fi kanam Aji Sax ji, ci bunt xaymab ndaje mi.

¹² «Sarxalkat bi teg ca jël menn kuuy mi, rendi ko, muy saraxu peyug tooñ, boole kook genn-wàll liitaru diw ga, def ko sarax bu ñuy yékkati, jébbal Aji Sax ji. ¹³ Nañu rendi kuuy mi ci bérab bu sell bi, fi ñuy rendee juru saraxu póotum bàkkaar ak saraxu rendi-dóomal, ndax li nekk ci saraxu peyug tooñ moo nekk ci saraxu póotum bàkkaar: sarxalkat bee ko moom; lu sella sell la. ¹⁴ Na sarxalkat bi sàkk ci deretu jur giy saraxu peyug tooñ, taqal ko ci tabanu noppu ndijooru nit ki ñuy laabal ak baaraamu déyu ndijooram ak baaraamu déyu tãngu ndijooram. ¹⁵ Bu sarxalkat bi noppee, na sàkk ci genn-wàll liitaru diw gi, sotti ko ci biir loxol càmmoñu boppam. ¹⁶ Na sarxalkat bi capp baaraamu joxoñu ndijooram ci diw gi ci loxol càmmoñam, daldi wis-wisale diw gi baaraamam, ba mu mat juróom ñaari yoon fi kanam Aji Sax ji. ¹⁷ Na sarxalkat bi sàkk ci diw gi des ci loxoom, tooyal ci tabanu noppu ndijooru nit ki ñuy laabal ak baaraamu déyu ndijooram ak baaraamu déyu tãngu ndijooram; nañu ko laalal ci diw gi fa ñu ko jèkkoonaa taqal ci deretu sarax siy peyug tooñ. ¹⁸ Li des ci diw gi ci loxol sarxalkat bi, na ko diw ci boppu nit ki ñuy laabal. Noonu la ko sarxalkat bi defale njotlaayam fi kanam Aji Sax ji. Ba loolu amee sarxalkat bi rendi sarax biy póotum bàkkaar, ¹⁹ defal ko ki ñuy laabal

† 13:47 13.47 wëñ gu èccu: seetal ci 6.3.

* 14:4 14.4 isob: seetal ci Mucc ga 12.22.

njotlaayam ngir mu tàggook sobeem. Te itam na sarxalkat bi rendi saraxu dóomal bi,²⁰ boole kook saraxu pepp mi, joxe lépp ci kaw sarxalukaay bi, defal ko nit ki njotlaayam, mu set.

²¹ «Su fekkee ne nit ki dafa ñàkk ba dooleem matewu ko, na wut menn kuuy, muy saraxu peyug tooñ, di saraxu yékkati-jébbale, ngir njotlaayam, boole kook ñetti kiloy sunguf su mucc ayib, xiiwe ko diw, muy saraxu pepp. Na indaale genn-wáll liitaru diw,²² ak ñaari pitax mbaa ñaari xati yu ndaw, lu mu ci gëna jekku rekk. Menn mi saraxu póotum bàkkaar la, mi ci des di saraxu rendi-dóomal.²³ Da koy indil sarxalkat bi, ngir mu laabal ko bu bés ba délsee, ca bunt xaymab ndaje ma, fi kanam Aji Sax ji.²⁴ Sarxalkat bi day jël kuuyu sarax siy peyug tooñ ak genn-wáll liitaru diw gi, boole ko, muy sarax bu ñuy yékkati, jébbal Aji Sax ji.²⁵ Gannaaw gi ñu rendi kuuy miy saraxu peyug tooñ, sarxalkat bi sàkk ci deret ji, taqal ci tabanu noppu ndijooru nit ki ñuy laabal ak baaraamu déyu ndijooram ak baaraamu déyu tãngu ndijooram.²⁶ Bu sarxalkat bi noppee, na sotti tuuti ci diw gi ci loxol càmmoñu boppam,²⁷ Baaraamu joxoñu ndijooram lay wis-wisale diw gi ci loxol càmmoñam ba muy juróom ñaari yoon fi kanam Aji Sax ji.²⁸ Loolu wéy sarxalkat bi wara sàkk ci diw gi ci loxoom, tooyal ca tabanu noppu ndijooru ki ñuy laabal ak baaraamu déyu ndijooram ak baaraamu déyu tãngu ndijooram; na ko def ca bérab boobu mu taaj deretu sarax siy peyug tooñ.²⁹ Li des ci diw gi ci loxol sarxalkat bi na ko diw ci boppu ki ñuy laabal, defal ko ko njotlaay fi kanam Aji Sax ji.³⁰ Bu noppee na rendi menn pitax mi mbaa menn xati mu ndaw mi, lu mu ci gëna jekku rekk,³¹ menn mi di saraxas peyug tooñ, mi ci des di saraxu rendi-dóomal, te mu boole kook saraxu pepp mi. Noonu la sarxalkat biy defale ki ñuy laabal njotlaayam fi kanam Aji Sax ji.»

³² Loolu la yoon digle ci mbirum nit ku ànd ak jàngoroy der juy law te dooleem matewul sarax yi ñu koy laabale.

Li war ci néeg bu teg liir

³³ Aji Sax ji wax na Musaa ak Aaróona ne leen: ³⁴ «Bu ngeen demee ca réewu Kanaan ga ma leen jox muy seen moomeel, bu ma tegee liir wuy law ba xuural ab néeg foofa ca seen réewum bopp,³⁵ boroom néeg bi dafa wara dem ca sarxalkat ba ne ko: “Lu mel ni aw liir laa gis sama néeg.”

³⁶ Su boobaa na sarxalkat bi santaane, ñu génne lépp lu nekk ca néeg ba, bala muy dugd di seet liir wi. Su ko defee

du am lenn lu nekk ca néeg ba, lu muy biral ne sobe topp na ko. Gannaaw loolu sarxalkat bi dugd, seet néeg bi.³⁷ Bu sarxalkat bi seetee liir wi ci miiri néeg bi ca biir, muy ay xóot-xóot yu xawa nêtëx, mbaa mu xawa xonq, mel ni lu def pax ci miir bi,³⁸ na génne néeg bi te tēj néeg bi diiru juróom ñaari fan.³⁹ Bésu juróom ñaareel ba na sarxalkat bi délsi seet néeg bi. Bu liir wi lawee ci miiri néeg bi,⁴⁰ na sarxalkat bi santaane, ñu teggi doj yi liir wi xuural, boole ko génne dëkk bi, sànni ko fu setul.⁴¹ Na xeetlu biir néeg bi ba mu daj, te pënd ba ñu ca xeete dees koy génne dëkk ba, tuur ko fu setul.⁴² Dañoowara sàkkaat ay doj, wuutale ko doj yooyu te sàkk ban bu bees, raaxe ko néeg bi.

⁴³ «Su liir wi delloo tegu ci biir néeg bi gannaaw bu ñu teggee doj yi, xeet biir néeg bi, ba raax ko,⁴⁴ sarxalkat bi day dikk seet ko. Su liir wi lawee ci néeg bi, liir wu aaytal la wu xuural biir néeg bi, di sobe.⁴⁵ Néeg ba dees koy daane, boole doj yaak bant yaak banu raax ba bépp, génne ko dëkk bi, tuur ko fu setul.

⁴⁶ «Ku dugd biir néeg bi diiru fan yi mu tēja dina yendoo sobe ba jant so.⁴⁷ Ku téd d ca biir néeg ba war naa fóot ay yéreem te ku fa lekke it war naa fóot ay yéreem.

⁴⁸ «Su sarxalkat ba delloo ca néeg ba, seet ko, fekk liir wa lawul ca néeg ba, gannaaw ba ñu ko raaxee, na biral ne néeg bi set na, ndax kon liir wa raaf na.⁴⁹ Liy laabal néeg bi moo di mu sàkk ñaari picc ak bantu garabu seedar ak wëñ gu xonq curr ak caru isob†.⁵⁰ Day rendi menn picc mi, tiimale ko ndabal xandeer mu def ndox mu balle ci bētu ndox.⁵¹ Bu noppee na jaxase deretu picc mi ñu rendi ak ndox mu balle ci bētu ndox, daldi jël bantu seedar bi ak caru isob bi ak wëñ gi xonq curr ak picc miy dund, boole lépp sóob ca. Su ko defee mu wis-wisal ca juróom ñaari yoon ci néeg bi.⁵² Kon li muy laabale néeg bi moo di deretu picc mi ak ndox moomu ak picc miy dund ak bantu seedar bi ak caru isob bi ak wëñ gi xonq curr.⁵³ Na bàyyi picc miy dund fu génne dëkk ba, mu naaw ca àll ba. Noonu lay defe njotlaayal néeg bi, mu set.»

⁵⁴ Loolu la yoon digle ci lépp luy jàngoroy der juy law ak wat-wataan,⁵⁵ mbaa liir wu tegu ci ndimo mbaa ci néeg,⁵⁶ ak ci wàllu tērgén itam mbaa mu diy ér mbaa gàkk bu weex;⁵⁷ mooy tegtal biy xamle lu set ak lu setul. Loolu la yoon digle ci jàngoroy der juy law mbaa liir.

15

Lu jëm ci sobey góor

† 14:49 14.49 isob: seetal ci *Mucc ga* 12.22.

¹ Aji Sax ji wax na it Musaa ak Aaróona ne leen: ² «Waxleen ak bànni Israyil ne leen: Góor gu ànd ak jàngoro ju sabab ngóoraam di xelli mbér, kooku sobewu na. ³ Mbér mi muy xelli moo ko sobeel; su ngóora liy xelli mbér mbaa su ko mbér mi fattee, waa ji sobewu na. ⁴ Lal ba mu tèdd sobewu na, te lépp lu mu toog loola sobewu na. ⁵ Képp ku laal lalam, na fóot ay yéereem, sangu, te du tee mu yendoo sobe ba jant so. ⁶ Ku toog ci lenn lu boroom jàngoroy xelli toogoon, na fóot ay yéereem, sangu, te du tee mu yendoo sobe ba jant so. ⁷ Ku laal boroom jàngoroy xelli war naa fóot ay yéereem, sangu, te du tee mu ànd ak sobe ba jant so. ⁸ Su ku ànd ak jàngoroy xelli tiflee ku taqul sobe, na kooku fóot ay yéereem, sangu, te du tere mu yendoo sobe ba jant so. ⁹ Gépp tegu daamar gu boroom jàngoroy xelli waroon, sobewu na. ¹⁰ Ku laal lenn lu mu toogoon lu ko féete woon suuf dina yendoo sobe ba jant so, te képp ku yékkati loola na fóot ay yéereem, sangu, te du tere mu yendoo sobe ba jant so. ¹¹ Boroom jàngoroy xelli bu raxasul ay loxoom, ku mu laal, kooku, na fóot ay yéereem, sangu, te du tere mu yendoo sobe ba jant so. ¹² Ndabal xandeer lu boroom jàngoroy xelli laal, dees koo wara toj. Su dee mboolem ndabal bant, dees koy raxas.

¹³ «Gannaaw loolu bu boroom jàngoroy xelli ji tàggook sobey jàngoro ja, dafa wara waññ juróom ñaari fan ngir setlu, ba noppi fóot ay yéereem, sangoo ndox mu balle ci bétu ndox, doora set. ¹⁴ Bésub juróom ñetteel ba, na wut ñaari pitax mbaa ñaari xati yu ndaw te teewi fi kanam Aji Sax ji ca bunt xaymab ndaje ma, daldi koy jox sarxalkat bi. ¹⁵ Sarxalkat bi day rendi yooyu, menn mi di saraxu póotum bàkkaar, mi ci des di saraxu rendi-dóomal. Noonu la ko sarxalkat biy defale njotlaayam fi kanam Aji Sax ji ndax jàngoroy xelleem jooju.

¹⁶ «Su góor génnee wasal, war naa ragg yaramam wépp, te du tere mu yendoo sobe ba jant so. ¹⁷ Lépp luy yére mbaa der bu wasal taq, dees koy fóot te du tere mu yendoo sobe ba jant so. ¹⁸ Su dee jigéen ju góor àndal, te wasal génn, nañu sangu, te du tere ñu yendoo sobe ba jant so.

Lu jëm ci sobey jigéen

¹⁹ «Su jigéen gisee mbërëg, sobey mbërëg ma day ànd ak moom juróom ñaari fan te képp ku laal ku jigéen ka dina yendoo sobe ba jant so. ²⁰ Lépp lu mu tèdd te fekk mu gis baax, loola sobewu na te lépp lu mu toog, loola sobewu na. ²¹ Te it képp ku laal ab lalam, war naa fóot ay

yéereem, sangu, te du tere mu yendoo sobe ba jant so. ²² Képp ku laal lenn lu mu toogoon war naa fóot ay yéereem, sangu, te du tee mu yendoo sobe ba jant so. ²³ Su toogoon ci lal mbaa leneen lu mu toogoon, ku laal loola dina yendoo sobe ba jant so, ²⁴ te ku ko dëkkoo, ba mbërëg taq ko, kooka sobewu na diiru juróom ñaari fan, te ka ko dëkkoo, lal bu mu tèdd sobewu na.

²⁵ «Kuy xépp deret ay fan yu bare te du jamonoy baaxam, mbaa mu gis mbërëg mu wees àpp bi mu ko baaxoo gis, kooka sobewu na diiru fan yi muy xépp. Day mel ni bu nekkee ci jamonoy baaxam. ²⁶ Lal bu mu tèdd ci diir bi muy xépp yépp, day mel ni lalam bu ko fekk ci jamonoy baax te lépp lu mu toog day sobewu, ni bu nekkoon ci jamonoy baaxam. ²⁷ Ku laal lenn ci yooyu yéf, kooka sobewu na. War naa fóot ay yéereem, sangu, te du tere mu yendoo sobe ba jant so.

²⁸ «Bu xéppée ba jeexal, dina waññ juróom ñaari fan, doora tàggook sobe sa. ²⁹ Bésub juróom ñetteel ba na wut ñaari pitax mbaa ñaari xati yu ndaw, yóbbu ca sarxalkat ba, ca bunt xaymab ndaje ma. ³⁰ Sarxalkat bi day rendi menn mi muy saraxu póotum bàkkaar, mi ci des doon saraxu rendi-dóomal. Su ko defee sarxalkat bi defal ko ko njotlaay fi kanam Aji Sax ji ndax sobey xépp ja.

³¹ «Fexeelen ba bànni Israyil di tàggook seeni sobe, lu ko moy dinañu dee ndax seen sobe, ngir dañuy taqal sama màkkaan mi ci seen biir.»

³² Loolu la yoon digle ci mbiri góor gu ànd ak jàngoroy xelli mbaa mu génne wasal, ba sobewu; ³³ ak jigéen ju nekk ci jamonoy baaxam; ci gáttal képp ku taq sobe suy génne ci moom, muy góor mbaa jigéen, ak itam góor gu dëkkoo jigéen ju sobewu.

Lu jëm ci bésub Njotlaay

16

¹ Bu loolu weesee Aji Sax ji wax naak Musaa gannaaw ba ñaari doomi Aaróona yu góor ya deeyee, ba ñu taxawsee fa kanam Aji Sax ji. ² Aji Sax ji dafa wax Musaa ne ko: «Waxal sa mag Aaróona ne ko du saa yu nekk lay àgg ci biir bérab bu sell bee sell, ci gannaaw rido bi, di janook kubeeru saraxu njotlaay gi ub gaal gi àlluway kóllère gi dence, lu ko moy dina dee, ndax ci niir wi tiim kubeeru gaal gi laay feeñe*.

³ «Ni Aaróona di dugge ci biir bérab bu sell bee sell nii la: day indaale aw yëkk wu ndaw ngir ab saraxu póotum bàkkaar,

* 16:2 16.2 Seetal ci *Mucc ga* 25.17.

akum kuuy ngir ab saraxu rendi-dóomal. ⁴Mbubb mu sell lay sol, mu ñu ràbbe wëñ gu èccu† ba sew ak tubéyi njiitlaay ju ñu ràbbe wëñ gu èccu ba sew. Na takkoo laxasaay gu ñu ràbbe wëñ gu èccu ba sew, te kaalag wëñ gu èccu ba sew lay takk. Yére yu sell a ngoogu; kon nag na sangu bala mu koy sol. ⁵Na jële ci mbooloom bànni Israyil ñaari sikket, sikket yuy doon saraxu pootum bàkkaar ak menn kuuyum rendi-dóomal.

⁶«Aaróona day sarxal yëkk wi, muy saraxu pootum bàkkaaram, di njotlaayal boppam, mook waa kërám. ⁷Gannaaw loolu na Aaróona indi ñaari sikket yi, taxawal fi kanam Aji Sax ji, ci bunt xaymab ndaje mi. ⁸Na Aaróona tegal ñaari sikket yi bant, ngir xam bu ñuy rendil Aji Sax ji ak biy doon ngir Asasel‡. ⁹Su ko defee Aaróona indi sikket, bi muurloo, ñu sarxalal ko Aji Sax ji, rendi ko, muy saraxu pootum bàkkaar. ¹⁰Waaye sikket bi muurloo doon sikketu Asasel, dees koy taxawal muy dund fi kanam Aji Sax ji, te ni ñu koy jotoo, mooy dees koy dàq mu dem ca mândij ma, ngir Asasel.

¹¹«Bu Aaróona noppee, na indi yëkku saraxas pootum bàkkaaram, def ko njotlaayam mook waa kërám. Na rendi yëkku saraxas pootum bàkkaaram, ¹²te na sàkk andu xal bu fees, tibbe ko ca sarxalukaay ba, fi kanam Aji Sax ji, ak ñaari barci-loxoy cuuraay lu mook te xeeñ, boole ko yóbbu ca gannaaw rido ba. ¹³Na def cuuraay li ci taal bi, foofa ca kanam Aji Sax ji, saxaru cuuraay si di làq kubeeru saraxu njotlaay gi ub gaalu àlluway seede si, ndax mu baña dee. ¹⁴Na sàkk ci deretu yëkk wi, wis-wisale ko baaraamam ci kaw kubeeru gaal gi, ci wetam gi fèete penku, te it na wis-wisale baaraamam deret ji lu mat juróom ñaari yoon ci kanam kubeeru gaal gi. ¹⁵Bu noppee na rendi sikket biy saraxas pootum bàkkaar mbooloo mi, te yóbbu deret ji ca gannaaw rido ba. Na def deret ji na mu defoon ak deretu yëkk wa, wis-wisal ko ca kaw kubeeru gaal gi ak ci kanam kubeer gi. ¹⁶Mu daldi matale loolu njotlaayal bérab bu sell bee sell, tàggale kook sobey bànni Israyil ak seeni tooñ, ak lu seen bàkkaar mana doon. Noonu lay defal mboolem xaymab ndaje, mi dëkk ci seen biir ci seen biiri sobe. ¹⁷Du kenn ku saña nekk ci biir xaymab ndaje mi, bu Aaróona duggee ci biir bérab bu sell bee sell, di matal ag njotlaay, ba kerooq muy génn, gannaaw bu jotoo moom ci boppam, mook waa kërám, ba jotaale mbooloom bànni Israyil mépp.

¹⁸«Bu sottalee, na génn jëm ca sarxalukaay ba ca kanam Aji Sax ji, ba noppi defal sarxalukaay bi njotlaayal boppam. Day sàkk ci deretu yëkk wi ak ju sikket bi, taqal béjjéni sarxalukaay bi yépp. ¹⁹Te itam day wis-wisale baaraamam deret ji lu mat juróom ñaari yoon ci kaw sarxalukaay bi, setal ko, sellal ko, mu tàggook sobey bànni Israyil.

²⁰«Bu Aaróona matalee njotlaayal bérab bu sell bee sell ak xaymab ndaje ma ak sarxalukaay ba, na indi sikket biy dund. ²¹Aaróona day teg ay loxoom ci kaw boppu sikket biy dund te tudd ci kawam mboolem ñaawtéefi bànni Israyil ak seeni tooñ, ak seeni bàkkaar yépp, boole ko yen sikket bi, teg ko ci loxol nit ku ñu yónni, mu dàq ko ca mândij ma. ²²Sikket bi day yenu seeni ñaawtéef yépp, yóbbale ca ndànd-foyfoy ga, ñu wacc ko ca mândij ma.

²³«Na Aaróona dellu ca xaymab ndaje ma, summi yére ya ñu ràbbe wëñ gu èccu ba sew, di ya mu soloon bala moo dugg ca bérab bu sell baa sell, te na fa wacc yére ya. ²⁴Bu loolu weese mu sangoo fu sell, sol yérey boppam, génn, joxeel boppam ab saraxu rendi-dóomal, joxeel mbooloo mi seen saraxu rendi-dóomal ngir njotlaayal boppam ak njotlaayal mbooloo mi. ²⁵Nebbonu jur giy saraxu pootum bàkkaar, na ko lakk ci kaw sarxalukaay bi.

²⁶«Ka wacci woon sikketu Asasel, na fót ay yéreem, sangu, doora mana duggaat ci dal bi. ²⁷Muy yëkk wiy saraxu pootum bàkkaar, muy sikket biy saraxu pootum bàkkaar te ñu yóbbu woon seen deret ca biir bérab bu sell baa sell ngir defe ko njotlaay, lépp lañuy génne dal bi. Der yaak yàpp waak sébbriit ma dees koy boole lakk, ba mu dib dóom. ²⁸Ki ko lakk bu noppee, na fót ay yéreem, sangu, doora mana duggaat ci dal bi.

²⁹«Te itam dogal a ngii, di lu leen war fàww. Bésuub fukki fan ci juróom ñaareelu weeru at mi nangeen ci toroxlu te du lenn lu ngeen ci mana liggéey, du njuddu-ji-réew du doxandéem bi ci seen biir; ³⁰ndaxte ci bés boobu lañu leen di joxeel njotlaay ngir fót seen mboolem bàkkaar, ba ngeen set fi kanam Aji Sax ji. ³¹Na doon seen bés bu ngeen di nopplu donj, ngeen war cee toroxlu. Dogal la bu sax dàkk.

³²«Sarxalkat bi ñu fal nag, solal ko, jox ko sañ-sañ sarxalkat bu mag, mu wuutu baayam, na def saraxu njotlaay gi. Na sol yére yu sell yooyu di yi ñu ràbbe wëñ gu èccu ba sew, ³³te it na def njotlaayal

† 16:4 16.4 wëñ gu èccu: seetal ci 6.3. ‡ 16:8 16.8 Asasel: am na ñu ne mi ngi tekki «kasara». Am na ba tey ñu naan rab wu bon la, wu dëkk ci mândij mi.

bérah bu sell bee sell ak xaymab ndaje mi ak sarxalukaay bi, boole ci defal sarxalkat yi seen njotlaay, ñook mbooloom Israyil mépp.

³⁴ «Dogal a ngoogu, di lu leen war fâww, te mooy ñuy joxeel bànni Israyil seen njotlaay benn yoon cim at ngir seen bakkaar yépp.»

Ñu daldi def li Aji Sax ji santoon Musaa.

Ndugal yi jëm ci sellal

17

(Saar 17—26)

Li war ci jaamu ak sarxal

¹ Bu loolu wéyee Aji Sax ji wax na Musaa ne ko: ² «Waxal Aaróona aki doomam yu góor ak bànni Israyil gépp ne leen li Aji Sax ji santaane mooy lii: ³ Képp kuy góor ci waa kër Israyil, bu rendee aw nag mbaa xar mbaa bëy ci biir dal bi, ak fu génnd dal bi, ⁴ te indiwu ko ci bunt xaymab ndaje mi, teewalal ko Aji Sax ji, muy sarax ca bunt jaamookaayu Aji Sax ji, kooku dees na ko topp àqu deret. Dafa tuur deret. Kon dees na ko dagge ci biir bànni Israyil. ⁵ Su ko defee bànni Israyil dinañu indil Aji Sax ji juri sarax yi ñuy rendi ci àll bi. Dañu koo wara yóbbu ca sarxalkat ba, fi Aji Sax ji, ca bunt xaymab ndaje ma, defal ko Aji Sax ji saraxi cant ci biir jàmm. ⁶ Sarxalkat bi day xépp deret ji ci sarxalukaayu Aji Sax ji, ci bunt xaymab ndaje mi, ba noppi, lakkal Aji Sax ji nebbon bi, muy xeeñ xetug jàmm. ⁷ Buñu di sarxalatil tuur, yi ñuy jëmmale sikket, di ko bokkaalee. Na loolu di dogal bu leen war fâww, ñoom ak seen askan. ⁸ Wax leen boog ne leen: Képp kuy góor, ku bokk ci waa kër Israyil, mbaa mu bokk ci doxandéem yi ci seen biir, buy génne ab saraxu rendi-dóomal mbaa beneen sarax, ⁹ te indiwu ko ci bunt xaymab ndaje mi, sarxalal ko Aji Sax ji, kooku dees koo wara dagge ci biir bànni Israyil.

¹⁰ «Te it képp ku bokk ci waa kër Israyil mbaa doxandéem yi ci seen biir, bu lekkee lenn luy deret, kooku lekk deret, man Aji Sax ji, dinaa ko noonoo te dinaa ko dagge ci biir bànni Israyil. ¹¹ Ndaxte dundu mbindeef ci deret la nekk, te man maa leen sédde deret, ngeen di ko jotoo seen bakkan ci kaw sarxalukaay bi. Ndax kat bakkanu mbindeef deretam la taxawe. Moo tax deret mana defal nit njotlaayam. ¹² Looloo waral ma ne bànni Israyil, bu kenn ci ñoom lekk deret, te doxandéem bi ci seen biir it bumu lekk deret.

¹³ «Képp ku bokk ci bànni Israyil mbaa ci doxandéem yi ci seen biir, bu rébbee ba jàpp mala mbaa njanaaw, mu di lu dagana lekk, na tuur deret ji, suul, ¹⁴ ndax dundu mbooloom mbindeef mooy deretam. Moo

waral, man Aji Sax ji, ma ne bànni Israyil buñu lekk deretu menn mbindeef ngir dundu mbooloom mbindeef mooy deretam. Képp ku lekk deret, dees koy dagge ci askan wi.

¹⁵ «Te itam képp ku lekk médd mbaa lu rab fàdd, muy njuddu-ji-réew mbaa doxandéem, na fóot ay yéreem, sangu, te du tere mu yendoo sobe ba jant so, mu doora set. ¹⁶ Waaye su fóotul, sanguwul, mooy gáddu bakkaaram.»

18

Li warul ci mbirum séy

¹ Aji Sax ji wax na Musaa ba tey ne ko: ² «Waxal bànni Israyil ne leen: Man Aji Sax ji maay seen Yàlla. ³ Defini waa réewam Misra ga ngeen dékkoon, buleen ko roy, te defini waa réewu Kanaan ga ma leen jëme, buleen ko roy te it buleen leen topp ci seeni aada. ⁴ Samay santaane ngeen wara dégg tey topp samay dogal. Man Aji Sax ji maay seen Yàlla. ⁵ Nangeen sàmm samay dogal ak samay santaane, ndax ngeen jëfe yooyu moo leen di taxa dund. Man maay Aji Sax ji.

⁶ «Bu kenn ci yeen dékkoo ku mu jege-wool lool cig bokk. Maay Aji Sax ji. ⁷ Bul torxal sa baay, di dékkoo sa yaay. Sa yaay la, kon bu ko torxal moom it.

⁸ «Bul dékkoo sa soxnas baay, di torxal sa baay.

⁹ «Bul dékkoo sab jigéen, te muy koo bokkal benn baay mbaa koo bokkal jenn ndey, muy ku juddoo ci kër gi mbaa feneen.

¹⁰ «Bul dékkoo sab sèt bu jigéen bu sa doom ju góor jur mbaa sa doom ju jigéen, ndax kon torxal nga sa bopp.

¹¹ «Bul dékkoo ku sa soxnas baay am ak sa baay, ndax sab jigéen la.

¹² «Bul dékkoo sa bàjjan, ndax daa jegewook sa baay lool cig bokk.

¹³ «Bul dékkoo sa ndey ju ndaw, ndax daa jegewook sa yaay lool cig bokk.

¹⁴ «Bul torxal sa baay bu ndaw di dékkoo soxnaam. Sa ndey la.

¹⁵ «Bul dékkoo sa soxnas doom. Sa soxnas doom la. Bu ko dékkoo muk.

¹⁶ «Bul dékkoo soxnas koo bokkal benn baay mbaa jenn ndey, nde kon nga torxal sa doomu baay mbaa sa doomu ndey.

¹⁷ «Bul boole dékkoo jigéen, dékkoo doom ja mbaa sètam bu doomam ju góor jur mbaa doomam ju jigéen jur ko, ndax dañoo jegewoo lool cig bokk. Loolu ñaawtéef la.

¹⁸ «Bul jël jigéen di séq ak moom séy, muy wujjeek doomu ndeyam mbaa doomu baayam joo jékka jël, li feek kookoo ngi dund.

¹⁹ «Bul dëkkoo jigéen ju gis baax, ndax daa sobewu.

²⁰ «Bul ànd ak jabaru jaambur, di sobeel sa bopp.

²¹ «Bul jébbal kenn ci say doom tuur mi ñuy wax Moleg, ndax waruloo teddadil sa turu Yàlla. Man maay Aji Sax ji.

²² «Bu góor tédde góor, ni bu doon jigéen. Lu ñaawa ñaaw la.

²³ «Bu góor tédde menn mala, di sobeel boppam, te bu jigéen jox boppam mala, di ànd ak moom. Loolu yàqute la.

²⁴ «Buleen sobeel seen bopp ci mboolem defin yooyu, ndax xeet yi ma leen dàqal, noonu lañu daan jéfe, ba sobeel seen bopp.

²⁵ Réew ma sax mujj na daj ak sobe, ma wacce mbugal ca kaw réew ma, ba mu gëq ay nitam.

²⁶ «Yeen nag sàmmleen samay dogal ak samay santaane te bu kenn def lenn ci yooyu ñaawtéef, du njuddu-ji-réew, du doxandéem bi ci seen biir, ²⁷ ndax kat mboolem ñaawtéef yooyu la waa réew ma leen fa jiiitu daan def, ba réew ma mujj daj ak sobe. ²⁸ Su ngeen sobeelee réew ma, dinaa leen gëq, na ma gëqe woon xeet ya leen fa jiiitu woon. ²⁹ Képp ku def lenn ci yooyu ñaawtéef déy, kooku dees koy dagge ci biir bànni Israyil. ³⁰ Dénkooleen sama ndénkaane ngir baña roy lenn ci aada yu ñaaw yi ñu fi doon topp lu leen jiiitu, te buleen sobeel seen bopp ci yooyu. Man Aji Sax ji maay seen Yàlla.»

19

Lu jëm ci dundin wu sell te jub

¹ Bu loolu wéyee Aji Sax ji wax na Musaa ne ko: ² «Waxal mboolum bànni Israyil gépp ne leen: Ñu sell ngeen wara doon, sarxal ku Sell laa, man seen Yàlla Aji Sax ji.

³ «Na ku nekk weg ndeyam ak baayam te wormal sama bési Noflaay. Man Aji Sax ji, maay seen Yàlla.

⁴ «Buleen walbatiku di jaamu ay yallantu mbaa ngeen di sàkkal seen bopp ay tuur yu ñu móole weñ. Man Aji Sax ji maay seen Yàlla.

⁵ «Bu ngeen dee rendil Aji Sax ji saraxas cant ci biir jàmm, sarxal-leen ko ni mu ware, ndax ñu nangul leen. ⁶ Ca bés ba ñu ko sarxale lees koy lekk, mbaa ca èllëg sa; lu ca des ba ca gannaaw èllëg sa dees koy lakk, ba mu dib doom. ⁷ Bu ñu ci lekkee déy te fekk mu am ñetti fan, day doon lu ñu sib, te deesu ko nangu. ⁸ Ku ci lekk mooy gaddu bàkkaar bi, ndaxte lu ñu sellalal Aji Sax ji la teddadil, te kooku dees na ko dagge ci biir bànni Israyil.

⁹ «Bu ngeen dee góob seen tool, buleen góob ba fa tool ba yem te buleen ca toppaat, di foraatu. ¹⁰ Seen tóokëri reseñ

it buleen ko witt ñaari yoon te buleen foraatu doom yu wadde ca witt ma. Aji ñàkk akub doxandéem ngeen koy bàyyee. Maay seen Yàlla, man Aji Sax ji.

¹¹ «Buleen sàcc, buleen fen te buleen di worante.

¹² «Buleen giñe sama tur lu dul dëgg, di teddadil seen turu Yàlla. Maay Aji Sax ji.

¹³ «Buleen lekk seen àqu moroom, buleen sàcc. Buleen wacc peyu liggéeykat, muy fanaani ci seeni loxo.

¹⁴ «Buleen saaga ab tēx te buleen fakktal silmaxa. Ragal-leen seen Yàlla. Maay Aji Sax ji.

¹⁵ «Buleen safaan dëgg cib àtte. Buleen far néew-ji-doole te buleen far boroom doole. Àtteleen seen moroom ci dëgg. ¹⁶ Buleen wër di yàq deru nit ci seen bokki waa réew. Buleen def dara lu mana reylu seen moroom. Maay Aji Sax ji.

¹⁷ «Buleen tong seen mbokk, te àrtuleen seen moroom bu baax bala ngeena bokk ak moom gaddu bàkkaar. ¹⁸ Buleen di feyantook seen mbokkum waa réew te buleen ko dencal mer. Ni ngeen soppe seen bopp nag, nangeen ko soppe seen moroom. Maay Aji Sax ji.

¹⁹ «Te it sama dogali yoon yii nangeen ko sàmm: buleen boole ñaar yu bokkul wirgo ci seenug jur, ñuy jaxasoo; seen tool it buleen ci ji ñaari wirgoy jiwu te buleen sol yére yu ñu ràbbe ñaari xeeti weñ yu bokkul.

²⁰ «Ku tédde ab jaam bu wara séy ak keneen te fekk joteesu ko, goreeleesu ko, ndàmpaay war na ca, waaye deesu leen boole rey, ndax li ndaw si dib jaam ba tey. ²¹ Waa ji day yóbbu am kuuyu peyug tooñ ca bunt xaymab ndaje ma, muy peyug tooñ, gi muy sarxalal Aji Sax ji. ²² Na ko sarxalkat bi defal kuuy miy saraxas peyug tooñ muy njotlaayam fi kanam Aji Sax ji, ndax bàkkaar bi mu def. Kon dees na ko jéggal bàkkaar bi mu def.

²³ «Bu ngeen duggee ca réew ma, ba jëmbat fa mboolem xeetu garab guy meññ ay doom, nangeen aayal doom ya. Diiru ñetti at ngeen di aayal doom ya. Dungeen ko lekk ci diir boobu. ²⁴ Atum ñeenteel ba doom ya yépp lañuy sellalal Aji Sax ji, te di ko bége ci biir cant. ²⁵ Juróomeelu at ma donj ngeen di saña lekk doom ya. Su ko defee meñneef ma barkeelal leen. Man Aji Sax ji maay seen Yàlla.

²⁶ «Buleen lekk lu am deret. Buleen di gisaane mbaa ngeen di jibar. ²⁷ Buleen wat seen peggu kawaru bopp te buleen dagg seen peggu sikkim, ²⁸ mbaa ngeen di dagg seen yaram, di ko mititloo ku dee, te buleen ñaasu fenn ci seen yaram. Maay Aji Sax ji.

²⁹ «Buleen torxal seen doom ju jigéen, di ko def ab ganc; lu ko moy réew mi sóobu ci gànctu ba ne lijj ci ñaawtéef.

³⁰ «Samay bési Noflaay nag wormaal-leen ko te sama bérab bu sell teral-leen ko. Maay Aji Sax ji.

³¹ «Buleen jublu ci ñiy gisaane nit ñu dee te buleen jublu ci boroom rawaan yiy seet, ndax kon ñu sobeel leen. Man maay seen Yàlla Aji Sax ji.

³² «Bu boroom bijjaaw teewee, jógleen wormaal ko. Deeleen rus mag te ragal-leen seen Yàlla. Maay Aji Sax ji.

³³ «Bu ab doxandéem daleek yeen ci seenum réew, buleen ko lor. ³⁴ Njuddu-jiréew ji nangeen ko yemaleek doxandéem bi ngeen dëkkal. Soppelen ko ni ngeen soppe seen bopp, ndaxte ay doxandéem ngeen woon ca réewum Misra. Man Aji Sax ji maay seen Yàlla.

³⁵ «Buleen def njubadi ci lu ñuy natte guddaay mbaa diisaay mbaa lu ñuy sol, sotti. ³⁶ Na seen nattukaayu diisaay jub, doom ya ngeen cay natte jub, te na nattukaayi sol-sotti yi jub. Maay seen Yàlla Aji Sax, ji leen génne réewum Misra.

³⁷ «Nangeen sàmm sama dogali yoon yépp ak sama santaane yépp te di ko jéfe. Maay Aji Sax ji.»

20

Lu jëm ci peyug bàkkaar

¹ Aji Sax ji wax na Musaa ba tay ne ko:

² «Waxal bànni Israyil ne leen: Muy bànni Israyil muy doxandéem ci Israyil, képp ku ci jël ciy doomam, jébbal tur mi ñuy wax Moleg, dee rekk mooy àtteem. Na ko waa réew mi dóor ay doj, ba mu dee. ³ Man ci sama bopp dinaa noonoo nit kooku te dinaa ko dagge ci biir bànni Israyil, ndax li mu jël ciy doomam jox Moleg, di sobeel sama bérab bu sell tey teddadil sama tur wu sell. ⁴ Su fekkee ne waa réew mi dañu koo seetaan ba seetaan ko, muy jox Moleg ku bokk ciy doomam te taxul ñu rey ko, ⁵ man ci sama bopp maay noonoo nit kooku ci biir bànni Israyil, génne ko, mook mboolem ñi mu àndal topp Moleg di bokkaale. ⁶ Ku jublu ci ñiy gisaane nit ñu dee mbaa mu jublu ci boroom rawaan yiy seet, topp leen, di ma leen bokkaalee, dinaa ko noonoo moom itam te dinaa ko dagge ci biir bànni Israyil. ⁷ Sell-luleen te sell, ngir man Aji Sax ji maay seen Yàlla. ⁸ Nangeen sàmm samay dogali yoon te di ko jéfe. Man Aji Sax ji maay ki leen sellal.

⁹ «Képp ku saaga baayam mbaa ndeyam, dee rekk mooy àtteem. Gannaaw baayam la saaga mbaa ndeyam, mooy gaddu bakkanu boppam.

¹⁰ «Góor gu njaaloo, mook jabaru moomam ji muy njaalool, dee rekk mooy seen àtte.

¹¹ «Ku dëkkoo sa soxnas baay, sa baay nga torxal. Ñoom ñaar ñépp dee rekk mooy seen àtte, te ñooy gaddu seen bakkanu bopp. ¹² Ku dëkkoo sa soxnas doom, mook soxnas doomam ñoom ñaar ñépp dee mooy seen àtte. Jéfu yàqute lañu def, kon ñooy gaddu seen bakkanu bopp.

¹³ «Su góor téddee góor ni ñuy téddee jigéen, ñaawtéef lañu def ñoom ñaar. Dee rekk mooy seen àtte, te ñooy gaddu seen bakkanu bopp. ¹⁴ Ku boole nit ak ndeyam jël leen jabar, def na lu bona bon. Dees leen di boole taal, lakk leen, moom ak jigéen ña, ndax mbon gu ni mel baña am ci seen biir. ¹⁵ Góor gu tédde mala dee rekk mooy àtteem, te mala ma it dees koy rey. ¹⁶ Su jigéen jëmee ci mala mu mu doon, ba jaxasook moom, booleleen ku jigéen kaak mala ma, rey. Dee rekk mooy seen àtte, te ñooy gaddu seen bakkanu bopp.

¹⁷ «Su nit jëlee jabar ab jigéenam bu mu bokkal jenn ndey mbaa benn baay, ñu séq lalú séy, loolu gacce la. Nañu leen dagge ci biir bànni Israyil, ñooñuy gis. Gannaaw moo tédde ab jigéenam, na wéetoo aña ñaawtéefam.

¹⁸ «Ku tédde jigéen ju gis baax, torxal na ko, xàwwi na suturaam ci biir pootam te ku jigéen ki itam xàwwi na suturas boppam. Dees leen wara dagge ñoom ñaar ñépp ci biir bànni Israyil.

¹⁹ «Buleen dëkkoo seen yaay ju ndaw mbaa seen bàjjan, ndax kon torxal ngeen ku ngeen jegewool lool cig bokk, te yeen ñaar ñépp ay wéetoo seen aña ñaawtéef.

²⁰ «Ku dëkkoo soxnas baayam bu ndaw, baayam bu ndaw la torxal. Ñooy wéetoo seen aña ñaawtéef. Duñu am takkndeer ba keroog ñuy dee.

²¹ «Bu nit nangoo jabaru ku mu bokkal waajur, loolu gacce la. Torxal na ka mu bokkal waajur te duñu am takkndeer.

²² «Sàmmleen sama dogali yoon yépp ak sama santaane yépp te jéfe ko, ngir réew ma ma leen jëme, ngeen dëkki fa, bañ leena gëq. ²³ Buleen roy defni xeet wi ma leen di dàqal, ndax yooyu yépp lañu doon def, ba ma sib leen. ²⁴ Yeen nag ma ne leen yeenay nangu seen réew ñoom, ndax maa leen ko jox, ngeen moom ko, muy réew mu meew maak lem ja tuuroo. Man maay seen Yàlla Aji Sax, ji leen rañfiatleek yeneen xeet yi. ²⁵ Kon nangeen raññee mala mu dagan ak mu daganul, ak itam njanaaw lu dagan ak lu daganul, te baña sobeel seen bopp ndax mala mbaa njanaaw mbaa

mboolem bindeef yu sew-sewaan yiy dox ci suuf te ma limal leen ne setul.

²⁶ «Nangeen ma nekkal ñu sell, ndaxte ku Sell laa, man Aji Sax ji, te dama leena raññatleek yeneen xeet yi, ngeen di sama ñoñ.

²⁷ «Góor gu bokk ci yeen mbaa jigéen, di seete nit ñu dee mbaa muy boroom rawaan buy gisaane, dee rekk mooy átteem. Dees koy dóor ay doj, mu dee, gáddu bakkanu boppam.»

21

Lu jëm ci sañ-sañ sarxalkat yi

¹ Gannaaw loolu Aji Sax ji wax na Musaa ne ko: «Waxal sarxalkat yiy doomi Aaróona ne leen: Bu ci kenn sobeel boppam, di laal mbokkam mu dee, ² su dul ñi ko gëna jege ci wállu mbokk, muy ndeyam mbaa baayam mbaa doomam ju góor ak doomam ju jigéen, mbaa ku góor ku mu bokkal waajur, ³ mbaa ab jigéenam bu séyagul te bootu ci moom ndax amul jëkkër— ku mu bokkal noonu, sañ naa sobewu ndax moom. ⁴ Warula sobeel boppam, di teddadil boppam, ndax kilifa la ciw xeetam.

⁵ «Buñu wat fenn ci seen bopp te buñu wat seen peggi sikkim, buñu dagg seen yaram it, di ko mititloo ku dee. ⁶ Nañu nekkal seen Yàlla ay nit ñu sell, te baña teddadil seen turu Yàlla, ndax saraxi sawar yi ñeel Aji Sax ji, te di seen ñamu Yàlla, ñoo koy joxe. Kon nag dañoo wara sell.

⁷ «Ab gànc mbaa ku ñu torxal, tédde ko, ñoom duñu ko jël soxna. Ku jëkkëram baal it duñu ko jël soxna, ndax dañoo sellalal seen bopp seen Yàlla. ⁸ Te itam nangeen raññee ne ñu sell lañu, ndax seen ñamu Yàlla, ñoo koy joxe. Nangeen leen jox céru nit ñu sell, ndax ku Sell laa, man Aji Sax ji leen sellal, yeen.

⁹ «Su fekkee ne doomu sarxalkat da di jigéen juy teddadil boppam, di gànctu, kooku baayam lay torxal. Dees koy taal, lakk ko.

¹⁰ «Sarxalkat, bi gëna màgg ci bokkam yiy sarxalkat, te ñu sotti diw gi ñuy fale ci boppam, sellal ko, muy sol yére yu sell yi, kooku du njañu te du xotti ay yéereem, di ko ñaawloo ku dee. ¹¹ Fu ab néew nekk du fa dem, bu doon ndeyam mbaa baayam sax, du ko taxa sobeel boppam. ¹² Du génn èttu bérab bu sell bi, mbaa muy teddadil bérabu Yàllaam bu sell bi, ndax diwu pal gu sell gi ko Yàllaam fale. Maay Aji Sax ji. ¹³ Sarxalkat bu mag bi, ku xamul góor lay jël soxna. ¹⁴ Ku jëkkëram faatu mbaa ku ñu baal mbaa ku ñu torxal, tédde ko, mbaa ab gànc, du ko mana jël soxna. Ab

janq bu mu bokkal donj la mana jël soxna. ¹⁵ Su ko defee du teddadil aw askanam ci biir bànni Israyil, ndax man Aji Sax ji maa ko sellal.»

Liy ngànt ci sarxalkat

¹⁶ Bu loolu wéyee Aji Sax ji wax na Musaa ne ko: ¹⁷ «Waxal Aaróona ne ko: Muy tey muy èllëg ba fàww, góor gu askanoo ci yaw ak maas gu mu mana bokk, su amee sikk du mana agsi ba ci sarxalukaay bi, di joxe ñamu Yàllaam.

¹⁸ Du kenn sax ku am sikk kuy agsi ba fii, du gumba, du kuy soox, du ku xar-kanamam am sikk mbaa ku cér yi sutaate. ¹⁹ Du it ku tànk bi làggi mbaa loxo bi, ²⁰ mbaa ab xuuge mbaa ab tungune; du it ku bëtam am sikk mbaa ku ràmm mbaa ku am góom yu sol dëtt, mbaa ku ñu tàpp. ²¹ Askanu Aaróona sarxalkat bi, du kenn ku ci am sikk kuy agsi ba fii, di joxe saraxi sawara yi ñeel Aji Sax ji. Sikk si ci moom a tax du mana agsi ba fii, di joxe ñamu Yàllaam. ²² Du tere mu saña lekk ci ñamu Yàllaam, muy ñam yu sell ak wu sella sell. ²³ Waaye warula jege rido bi, mbaa muy dem ba ca sarxalukaay ba, ndax sikk si ci moom. Bumu teddadil sama bérab yu sell, ngir man Aji Sax ji maa sellal bérab yooyu.»

²⁴ Musaa jottli na Aaróona aki doomam kàddu yooyu, ñoom ak mboolem bànni Israyil.

22

Liy tax ñu nangu sarax

¹ Aji Sax ji dellu wax Musaa ne ko: ² «Waxal Aaróona aki doomam yu góor ne leen lii mooy li mana tax ñu sore yu sell, yi ma bànni Israyil sellalal, ngir baña teddadil sama tur wu sell. Maay Aji Sax ji. ³ Wax leen ne leen: Muy tey, muy èllëg, ba fàww, képp ku sobewu, di góor gu bokk ci seen askan, bu jegee lenn luy sarax su sell su ma bànni Israyil jagleel, kooku dootu ma liggéeyal. Maay Aji Sax ji. ⁴ Askanu Aaróona, genn góor gu ci bokk du lekk ci sarax yu sell yi, li feek muy ànd ak jàngoroy der juy law mbaa jàngoroy xelli, ba kerooq muy set. Ku ci laal lenn lu laal ab néew ba sobewu, mbaa mu tuur wasal moom ci boppam. ⁵ mbaa mu laal yu sew-sewaan yiy dox ci suuf te di ko sobeel, mbaa mu laal nit ku ko sobeel ak lu sobe sa mana doon, ⁶ dina yendoo sobe sa ba jant so, te du lekk ci sarax yu sell yi ndare du dafa sangu. ⁷ Bu jant soweet nag set na, te man naa lekk ci sarax yu sell yi, ndax ñamam la. ⁸ Lu médd mbaa lu rab fàdd waru koo lekk, mu di ko sobeel. Maay Aji Sax ji. ⁹ Sarxalkat yi dañoo wara dénkoo samay dénkaane bala ñoo gáddu bàkkaar,

di dee ndax seenug néewal ci yooyu. Maay Aji Sax ji leen sellal.

¹⁰ «Kenn ku bokkul ci waa kër sarxalkat yi du lekk ci sarax yu sell yi. Muy ku dal ak ab sarxalkat, muy ku koy liggéeyal di feyeeku, kenn du ci lekk ci sarax yu sell yi. ¹¹ Waaye su sarxalkat bi jëndee ab jaam ci xalisam, jaam ba man na caa lekk. Jaam bu juddoo ci kër sarxalkat bi it man naa lekk ci ñamam woowu. ¹² Doomu sarxalkat, bu séyeek goor gu bokkul ci waa kër sarxalkat yi, jooxe yu sell yi, dootu ci saña lekk. ¹³ Waaye doomu sarxalkat bu boroom kéram faatoo mbaa mu tággoon moom te amu ca doom, bu delloo kër baayam na mu fa nekke woon ba muy gone, sañ naa lekk ci ñamu baayam. Waaye kenn ku ci bokkul sañu cee lekk. ¹⁴ Gannaaw loolu képp ku bokkul ci waa kër sarxalkat yi, bu lekkee ci sarax su sell te du teyefam, na dolli ca njégu sarax sa juróomeelu céru njég ga, delloo ko sarxalkat bi. ¹⁵ Te itam bu sarxalkat yi bëyyi bànni Israyil di teddadil sarax yu sell yi ñu jagleel Aji Sax ji. ¹⁶ Buñu leen di bëyyi it ñuy gáddu bàkkaar buy laaj peyug tooñ, ngir lenn lu ñu lekk ci sarax yu sell yooyu. Man Aji Sax ji maa sellal yooyu sarax.»

¹⁷ Aji Sax ji waxati Musaa ne ko: ¹⁸ «Waxal Aaróona aki doomam yu goor ak bànni Israyil gépp ne leen: Képp ku bokk ci waa kër Israyil, mbaa ci doxandéem yi ci Israyil, di joxeel Aji Sax ji ab saraxu rendidóomal, muy sarax su ñuy wáccoo ngiñ mbaa saraxu yéene, ¹⁹ liy tax ñu nangul ko mooy muy jur gu amul sikk, di goor; man naa doon aw yékk mbaa kuuy mbaa sikket. ²⁰ Lenn lu ci am sikk buleen ko sarxal, ndax deesu leen ko nangul.

²¹ «Su nit dee joxsi Aji Sax ji aw nag mbaa gätt, muy saraxu cant ci biir jàmm, mu di ko wáccoo ngiñ mbaa muy saraxu yéene, na doon lu amul sikk, ndax ñu nangul ko. Lenn luy sikk du nekk ci jur gi. ²² Du doon lu gumba, du doon lu làggi, du doon lu kuuñ, du doon lu ami goom, mbaa lu ràmm, mbaa lu xas. Buleen sarxalal Aji Sax ji yu mel noonu. Ab saraxu sawara, buleen ko jële ci lu mel noonu, di ko joxe ci kaw sarxalukaay bi, ñeel Aji Sax ji. ²³ Waaye su dee nag mbaa gätt bu ab céram épp mbaa mu yées, saraxu yéene la mana doon; su dee sarax su ñuy wáccoo ngiñ, deesu ko nangu. ²⁴ Te it jur gu ñu motoxal ngóoraam mbaa ñu toj ko mbaa ñu xuuf ko mbaa ñu dog ko, deesu ko sarxalal Aji Sax ji. Buleen def loolu mukki ci seenum réew. ²⁵ Buleen nangoo lenn lu ni mel ci loxol doxandéem it, di ko jébbal seen Yälla, muy saraxu ñamam. Deesu

leen ko nangul, ndax la matadi ca moom mooy sikk sa.»

²⁶ Aji Sax ji wax na Musaa itam ne ko: ²⁷ «Barmol mbaa mbote mbaa tef wu doora juddu, na toog ci yaayam juróom ñaari fan; bu xasee am juróom ñetti fan, manees naa nangu mu doon saraxu sawara, ñeel Aji Sax ji. ²⁸ Waaye su dee aw nag mbaa ab gätt, deesu ko booleek doom ji rendi ci benn bés.

²⁹ «Bu ngeen dee defal Aji Sax ji saraxu cant, sarxal-leen ko na ñu leen koy nangule. ³⁰ Ci bés bi lees koy lekk, buleen ci fanaanal dara. Maay Aji Sax ji.

³¹ «Kon sàmmleen samay santaane te di ko jëfe. Maay Aji Sax ji. ³² Te buleen teddadil sama tur wu sell. Na bànni Israyil wormaal sama sellaa. Maay Aji Sax ji leen sellal, ³³ génne leen réewum Misra, di seen Yälla. Maay Aji Sax ji.»

23

Lu jëm ci bési mággal yi

¹ Aji Sax ji dellooti wax Musaa ne ko: ² «Samay mággal, man Aji Sax ji, dangeen koo wara siiwal, muy ndaje yu sell. Samay mággal yii la.

³ «Juróom benni fan lees di liggéey, bésu juróom ñaareel ba bésu Noflaay donj lay doon, di bésu ndaje mu sell. Du lenn lu ngeen ciy liggéey. Bésu Noflaay la bu ñuy jagleel Aji Sax ji, ak fépp fu ngeen dëkk.

⁴ «Aji Sax ji, deeleen yégle ay mággalam, muy ay ndaje yu sell yu ngeen di wormaal saa yu jotee. Mággal yii la.

Lu jëm ci bésu Mucc ak bési Mburu mu amul lawiir

⁵ «Fukki fan ak ñeent ci weer wi jékk, diggante ngoon ak jant bu so, mooy mággalu bésu Mucc ba, ñeel Aji Sax ji.

⁶ «Fukki fan ak juróom ci weer woowu la ayu bésu Mburu mu amul lawiir di tàmbali, ñeel Aji Sax ji. Diiru juróom ñaari fan mburu mu amul lawiir ngeen wara lekk. ⁷ Bés bu jékk bi ndaje mu sell ngeen ciy amal. Mboolem lu ngeen faral di liggéey buleen ko ci liggéey. ⁸ Defleen ci saraxu sawara, ñeel Aji Sax ji diiru juróom ñaari fan. Bésu juróom ñaareel ba di bésu ndaje mu sell. Mboolem lu ngeen faral di liggéey buleen ko ci liggéey.»

Lu jëm ci mággalu Ndoortel meññeef

⁹ Su loolu wéyee Aji Sax ji wax na Musaa ne ko: ¹⁰ «Waxal bànni Israyil ne leen: Bu ngeen duggee ca réew ma la len jox, ba dajale la ngeen jële ca suufam, yóbbuleen ci sarxalkat bi takku peppum lors bi ngeen jékka goob. ¹¹ Sarxalkat bi day yékkati takk bi, jébbal ko Aji Sax ji, ngir mu nangul

leen. Bés bi topp ci bés sub Noflaay bi lay yékkati takk bi, jébbal ko ko. ¹² Bés bi ñuy yékkati takk bi, jébbale, nangeen ci sarxal kuuy mu amul sikk, tollu ci menn at, ñu defal ko Aji Sax ji saraxu rendi-dóomal. ¹³ Saraxu pepp mi muy àndal juróom benni kiloy sunguf su mucc ayib lay doon, ñu xiiwe ko diw, muy saraxu sawara, ñeel Aji Sax ji, ngir xetug jámm. Sarax si ñuy tuural Aji Sax ji, liitaru biñ laak genn-wàll. ¹⁴ Du mburu, du pepp mu ñu séndal, du pepp mu bees mu ngeen wara lekk, ba kerooq bés boobu ngeen di indi seen saraxu Yalla. Dogal a ngoogu, di lu leen war fàww, yeen ak seen askan, ak fépp fu ngeen dëkk.

Lu jëm ci màggalu bésu Ngóob

¹⁵ «Bés sub Noflaay ba ngeen di indi takku bele biy saraxu yékkati-jébbale, bés ba ca topp ngeen di dale waññ juróom ñaari ayi bés yu mat sékk. ¹⁶ Waññleen ba ca bés ba topp ci juróom ñaareelu bés sub Noflaay ba, muy juróom fukki fan, ngeen indil ca Aji Sax ji saraxu pepp mu bees. ¹⁷ Seen kër ngeen di jële ñaari mburu yuy doon saraxu yékkati-jébbale, mu ci nekk di lu ñu lakke juróom benni kiloy sunguf su mucc ayib; dees ciy def lawiir, lakkaale ko ko, muy saraxu ndoortel meññeef, ñeel Aji Sax ji. ¹⁸ Na mbooloo mi booleek mburu mi juróom ñaari kuuy yu amul sikk te tollu ci menn at, ak yékk ak ñaari kuuy, mu doon saraxu rendi-dóomal, ñeel Aji Sax ji. Na ànd ak saraxu pepp ak sarax si ñuy tuur. Loolu sarax la ngir xetug jámm, ñeel Aji Sax ji. ¹⁹ Te itam ngeen sarxal ab sikket buy doon saraxu póotum bákkaar ak ñaari xari menn at, muy saraxu cant ci biir jámm. ²⁰ Sarxalkat bi day yékkati ñaari xar yooyu, boole kook mburum ndoortel meññeef mi, def ko sarax bu ñuy yékkati, jébbal Aji Sax ji. Yooyu sarax di lu sell ñeel Aji Sax ji, sarxalkat bee ko moom. ²¹ Wooteleen ci bés boobu ndaje mu sell, te lu ngeen faral di liggéey buleen ko ci liggéey. Dogal a ngoogu, di lu leen war fàww, yeen ak seen askan, ak fépp fu ngeen dëkk.

²² «Bu ngeen dee góob seen tool, buleen góob ba fa tool ba yem te buleen ci toppaat, di foraatu. Aji ñàkk akub doxandéem ngeen koy bàyyee. Maay seen Yalla Aji Sax ji.»

Li ci màggalu bésu Liit ya

²³ Gannaaw loolu Aji Sax ji wax na Musaa ne ko: ²⁴ «Waxal bànni Israyil ne leen: Bu juróom ñaareelu weer taxawee, bés bi jékk ci weer wi, na doon seen bés sub Noflaay bu ngeen di amal ndaje mu sell. Deeleen fàttlee bés bi liit yu xumb. ²⁵ Mboolem lu ngeen faral di liggéey

buleen ko ci liggéey, waaye nangeen ci indi saraxu sawara, ñeel Aji Sax ji.»

Li ci bés sub Njotlaay ba

²⁶ Aji Sax ji teg ca wax Musaa ne ko: ²⁷ «Te itam fukki fan ci juróom ñaareelu weer woowu, bés sub Njotlaay ba lay doon. Ndaje mu sell ngeen ciy amal. Nangeen ci toroxlu te indi saraxu sawara, ñeel Aji Sax ji. ²⁸ Du lenn lu ngeen di liggéey ci boobu bés, ndax bés sub Njotlaay la bu ngeen di jotoo fi seen kanam Yalla, Aji Sax ji. ²⁹ Te kat, képp ku toroxluwul boobu bés, dees koy dagge ci biir bànni Israyil. ³⁰ Képp ku liggéey lenn ci boobu bés, su boobaa dinaa far kooku ci biir bànni Israyil, sànk ko. ³¹ Buleen ci liggéey dara. Dogal a ngoogu, di lu leen war fàww, yeen ak seen askan ak fépp fu ngeen dëkk. ³² Seen bés sub Noflaay la bu ngeen di nopplu donj te war cee toroxlu. Li ko dale ci ngononj juróom ñeenti fan ci weer wi ba ca èllég sa, ba jant so, ci ngeen di wormaal seen bés sub Noflaay.»

Li ci màggalu bési Mbaar yi

³³ Su loolu wéyee Aji Sax ji wax na Musaa ne ko: ³⁴ «Waxal bànni Israyil ne leen: Ñu waññ dale ko ci fukki fan ak juróom ci weeru juróom ñaareel woowu ba mu am juróom ñaari fan. Diir boobu mooy màggalu bési Mbaar yi, ñeel Aji Sax ji. ³⁵ Bés bu jékk bi bés sub ndaje mu sell la. Mboolem lu ngeen faral di liggéey buleen ko ci liggéey. ³⁶ Diiru juróom ñaari fan ngeen di indi saraxu sawara, ñeel Aji Sax ji. Bés sub juróom ñetteel, ba wara doon seen ndaje mu sell, nangeen ci indi saraxu sawara, ñeel Aji Sax ji. Ndajem mujjantal ba la. Mboolem lu ngeen faral di liggéey buleen ko ci liggéey.

³⁷ «Yooyoo di màggali Aji Sax ji, yi ñu wara yégle, di ndaje yu sell yu ñuy indi ay saraxi sawara, ñeel Aji Sax ji, muy saraxu rendi-dóomal, ak saraxu pepp, ak yeneen saraxi jur gu ñuy rendi, ak sarax yi ñuy tuural Aji Sax ji, bés bu nekk ak la ca war. ³⁸ Yooyu sarax jotewul dara ak saraxi bési Noflaay yu Aji Sax ji. Jotewul dara it ak yi ngeen di joxeel Aji Sax ji mbaa mboolem sarax yi ngeen di wàccoo ngiñ, ak mboolem saraxi yéene yi ngeen di defal Aji Sax ji.

³⁹ «Ci biir loolu, fukki fan ak juróom ci juróom ñaareelu weer wi, gannaaw bu ngeen dajalee meññeefum réew mi, amal-leen màggalug Aji Sax ji diiru juróom ñaari fan. Na bés bu jékk ba di bés sub Noflaay, bés sub juróom ñetteel ba di bés sub Noflaay. ⁴⁰ Bés bu jékk ba wittleen doomi garab yu rafet ak cari tiir ak cari garab yu séq ak cari garab yu ñuy wax sóol, tey saxe tàkkal dex. Nangeen bannexu

fi seen kanam Yàlla Aji Sax ji diiru juróom ñaari fan. ⁴¹ Wormaal-leen mággalug Aji Sax jooju, di juróom ñaari fan cim at, te wormaal-leen ko ci juróom ñaareelu weer wi. Dogal a ngoogu, di lu leen war fàww, yeen ak seen askan. ⁴² Ci ay mbaar ngeen di dëkk diiru juróom ñaari fan yooyu. Mboolem njuddu-ji-réew ci Israyil na ci dëkke mbaar, ⁴³ su ko defee seeni sët xam ne ciy mbaar laa dëkkaloon bànni Israyil, ba ma leen génnee réewum Misra. Maay seen Yàlla Aji Sax ji.»

⁴⁴ Noonu la Musaa xamale bànni Israyil bési mággalug Aji Sax ji.

24

Lu jëm ci tegukaayu lãmp bi ak mburu

yi

¹ Ba loolu amee Aji Sax ji wax na Musaa ne ko: ² «Santal bànni Israyil, ñu indil la diwu segalu oliw gu set, ngir leerlu, ñu di ko taale lãmp yi guddi gu nekk. ³ Ci kanam rido bi lãq gaalu àlluway seede si, ci biir xaymab ndaje mi la Aaróona di teg lãmp yi, muy fanaanee tàkk ba bët set, fi kanam Aji Sax ji. Dogal a ngoogu, di lu leen war fàww, yeen ak seen askan. ⁴ Na teg lãmp yi ci kaw tegukaayu lãmp ba ñuy tégge wurusu ngalam, muy fanaanee tàkk fi kanam Aji Sax ji.

⁵ «Sàkkal sunguf su mucç ayib, lakk ci fukki mburu ak ñaar, mburu mu nekk di juróom benni kiloy sunguf. ⁶ Tegal mburu yi ci kaw taabalu wurusu ngalam bi, fi kanam Aji Sax ji, te def ko ñaari jal, jal bu ne juróom benni mburu. ⁷ Jal bu nekk teg ca cuuraay lu raxul, mu wuutu mburu mi, di saraxu baaxantal, te di saraxu sawara, ñeel Aji Sax ji. ⁸ Bésub Noflaay bu nekk nañu saxoo taaj mburu yooyu fi kanam Aji Sax ji. Loolu sas la bu bànni Israyil di tegoo fàww. ⁹ Mburu yooyu Aaróona aki doomam yu góor ñoo koy fëetewoo, te nañu ko lekke fu sell, ndaxte lu sella sell la, di lu ñu séddoo fàww ci saraxi sawara yi ñeel Aji Sax ji.»

Li war ci yenn xeeti tooñaange

¹⁰⁻¹¹ Ba loolu wéyee amoon na ci biir bànni Israyil jenn waay ju yaayam di doomu Israyil te tuddoon Selomit doomu Dibbri, Daneen ba. Baayam di waa Misra. Mu am bés xeex jib ci biir dal bi, ci diggante waa jooju ak jenn waayi Israyil ju raxul. Ci biir loolu waa ji yaayam di doomu Israyil wax Yàlla lu ñaaw, tudd ko jaar fu bon. Ñu yóbbu ko ca Musaa. ¹² Ñu tēj waa ja, ba xam lu Aji Sax ji namm ci moom.

¹³ Ci kaw loolu Aji Sax ji wax Musaa ne ko: ¹⁴ «Génneel dal bi ki may wax lu ñaaw, man Yàlla, te na mboolem ku

ci dégg teg loxoom ci kaw boppam, ba noppi mbooloo mépp dóor koy doj, ba mu dee. ¹⁵ Bànni Israyil nag nangeen leen wax ne leen: Képp ku wax Yàllaam lu ñaaw, jaar fu bon, na wéetoo aŋam. ¹⁶ Ku ñàkke kersa turu Aji Sax ji, dee rekk mooy àtteem. Mbooloo mi mépp a ko wara dóor ay doj, ba mu dee. Muy doxandéem muy njuddu-ji-réew, ku ci ñàkke kersa turu Aji Sax ji, dee mooy àtteem.

¹⁷ «Bu loolu weesee képp ku faat bakkanu nit, dee rekk mooy àtteem. ¹⁸ Ku faat bakkanu mala, na fey boroom. Bakkan, bakkan a koy fey. ¹⁹ Képp ku gaañ moroomam, la mu ko def rekk lañu koy def. ²⁰ Damm-damm, damm-damm a koy fey; bët, bët a koy fey; bën it bën a koy fey. Ni mu gaañe moroomam rekk, ni lañu koy gaañe.

²¹ «Ku rey ag jur na fey boroom, waaye ku rey nit dee mooy àtteem. ²² Na àtte bi di benn ci doxandéem ak njuddu-ji-réew, ndax man Aji Sax ji maay seen Yàlla.»

²³ Ci kaw loolu Musaa wax ko bànni Israyil, ñu génne dal ba waa ja ñàkke Yàlla kersa, dóor ko ay doj, ba mu dee. Kon li bànni Israyil def mooy li Aji Sax ji santoon Musaa rekk.

25

Lu jëm ci atum Noflaay

¹ Gannaaw loolu Aji Sax ji wax na Musaa ca tundu Sinayi ne ko: ² «Waxal bànni Israyil ne leen: Bu ngeen duggee ca réew ma ma leen jox, suuf sa ca boppam war naa am àppu noflaayam ngir Aji Sax ji. ³ Diiru juróom benni at ngeen di ji seen tool; juróom benni at yooyu itam ngeen di wolle seen tóokëru reseñ, dajale meññeef ma. ⁴ Waaye atum juróom ñaareel ba atum Noflaay la wara doon: suuf sa ca boppam day nopplu donj ngir Aji Sax ji. Buleen ci ji seen tool, buleen ci wolle seen tóokëru reseñ. ⁵ La saxe ca seenum ngóob sax, buleen ko góobaat te it reseñ gu ñu wollewuloon buleen ko raasaatu. Atum Noflaay la wara doon: suuf sa ca boppam na nopplu atum lëmm. ⁶ Waaye lépp luy saxayaay ci atum Noflaay sañ ngeen koo lekk, yeen ak seen jaam yu góor ak yu jigéen, ak seeni surga ak doxandéem bu dal ak yeen. ⁷ Seen jur it ca la, ba sa rabi àll ya ca seen réew. Mboolem lu suuf sa meññ, manees na koo lekk.

⁸ «Gannaaw loolu nangeen waññ ba ci juróom ñaari ati Noflaay, loolu di juróom ñaari at ba muy juróom ñaari yoon. Mu doon seen juróom ñaari ati Noflaay, tollu ci ñeent fukki at ak juróom ñeent. ⁹ Su boobaa ci fukki fan ca juróom ñaareelu weer wa nangeen wal-lu ag liit fépp.

Bésub Njotlaay boobu nangeen wal ag liit ci seenum réew ba mu daj. ¹⁰ Te nangeen sellal at ma ca topp di juróom fukkeelu at ma, ngeen yéene ca mboolem waa réew ma ba mu daj, ne ngoreel taxaw na. Seen atum Yiwiku la, ku nekk war cee dellu ca suufu waa këram, ku nekk it wara dellu ca làng ga mu bodd. ¹¹ Seen atum Yiwiku la atum juróom fukkeel boobu di doon. Dungeen ci ji, dungeen ci goóbaat lu saxe ca seenum ngóob te dungeen ci wollu ag reseñ, di ko witt. ¹² Gannaaw atum Yiwiku la, na doon at mu ngeen sellal. Saxayaayub tool ngeen saña lekk.

¹³ «Atum Yiwiku moomu ci ngeen di delloo ku nekk suufam. ¹⁴ Bu ngeen di jaay seen waa réew suuf nag mbaa ngeen di jénde suuf ci seen waa réew, buleen di naxante. ¹⁵ Limu at yi dox seen digganteek atum Yiwiku ma mujj, na dëppook njég gi ngeen di jénde suuf ci seen waa réew. Limu ati mbey yi dox seen digganteek atum Yiwiku ma ca toppaat it, war naa dëppook njég ga ñu leen jaaye. ¹⁶ Lu at yooya gëna bare, njég ga gëna jafe; lu at ya gëna néew, njég ga gëna yomb, ndaxte limu meññeefum suuf sa lees leen koy jaaye. ¹⁷ Buleen di naxante, waaye ragal-leen seen Yàlla, ndax man Aji Sax ji maay seen Yàlla.

¹⁸ «Saxleen ci samay dogal, sàmm samay ndigali yoon, di ko jéfe, ndax ngeen dëkk ak jàmm ci réew mi. ¹⁹ Kon suuf si dina nangu, ngeen di lekk ba suur te dëkk fa ci jàmm. ²⁰ Jombul ngeen di wax naan: “Lu nuy lekk nag ci atum juróom ñaareel ba, gannaaw dunu ci ji te dunu ci dajale sunu meññeef?” ²¹ Waaye dinaa leen yónnee sama barke ca atum juróom benneel ba, suuf si nangul leen meññeefum ñetti at. ²² Bu ngeen tolloo ci ji ci atum juróom ñetteel ba, dina leen fekk ngeen di lekk meññeefum daaw-jéeg, te meññeefum atum juróom ñeenteel ba dina agsi, fekk ngeen di lekk ca mu daaw-jéeg ma.

Liy sañ-sañ ci mbirum suuf su ñuy jotaat

²³ «Suuf si deesu ko jaay, mu wel fàww, ndax maay Boroom suuf si, yeen ay doxandéem ngeen fi, yu ma fi dëkkal. ²⁴ Fépp fu bodd ci seenum réew, nangeen fa yoonal sañ-sañu jotaat ca suuf sa.

²⁵ «Bu sa mbodd demee ba ñakk tax koo jaay ci suufam, mbokkam mi ko gëna jeje te am sañ-sañu jotaat suufam, na jéndaat la mbokk ma jaayoon. ²⁶ Ku amul ku ko ko jotaatal te moom ci boppam mu mujj woomle, ba am lu mu ko jotaate, ²⁷ day waññ at ya njaay ma am, delloo ki mu jaayoon ati mbey ya ca kooka dese, daldi mana jotaat ci suufam. ²⁸ Waaye su amul

lu mu jéndaate suufam, suuf sa day des ca loxol ka mu jaayoon, ba keroog atum Yiwiku ma délsi. Bu atum Yiwiku ma délsee, sañ naa dellu ca suufam.

²⁹ «Su dee waa ju jaay ab dëkkuwaay bu nekk ci dëkk bu mag bu ñu tabax tata wëralee ko ko, dina ko saña jotaat li feek njaay mi amul at. Ci diir boobu la ko saña jotaate. ³⁰ Su ñu ko jotaatul ba njaay ma am atum lëmm, dëkkuwaay boobu ci biir dëkk bu mag ba ñu wëralee tata day wel fàww, ñeel ka ko jënd, mook ku askanoo ci moom. Du lees di delloo ci atum Yiwiku. ³¹ Su dee ay dëkkuwaay ci dëkk yu ndaw yu ñu tabaxul tata, wëralee ko ko, dees koy yemaleek alali suuf. Sañees na koo jotaat te dees koy delloo ci atum Yiwiku.

³² «Su dee dëkki Leween ñi ak seen dëkkuwaay ya ca biir nag, Leween ñi sañ nañu cee jotaat fàww. ³³ Kon alalu Leween manees na koo jotaat —dëkkuwaay lay doon bu ñu jaay ci dëkki Leween ñi— dees koy delloo bu atum Yiwiku dikkee, ndax dëkkuwaay yi ci dëkki Leween ñi, seen alal la ju leen lew fàww ci seen biir bokki banni Israyil. ³⁴ Waaye suufas parlu yi bokk ci dëkki Leween ñi, deesu ko jaay, ndax ñoo koy moom fàww.

Baaxeleen aji ñakk

³⁵ «Bu seen mbokkam banni Israyil ñakkee ba manatula fey lu mu leen ameel, nangeen ko dimbali, ni bu doon doxandéem mbaa mangan, ndax mu mana dund ci seen biir. ³⁶ Buleen teg lenn lu mu mana doon ci bor bu leen seen mbokk moomu ameel, waaye ragal-leen ci seen Yàlla, ndax mu mana dund ci seen biir. ³⁷ Buleen ko lebal seen xaalis, di ca teg lenn, te buleen ko jox dund, di sàkku lu mu ca yokk ngir delloo leen ko. ³⁸ Man Aji Sax ji maay seen Yàlla ji leen génne réewum Misra, jox leen réewu Kanaan, te di seen Yàlla.

Liy sañ-sañ ci jotaat nit

³⁹ «Bu seen mbokk ñakkee ci seen biir, ba jaay leen boppam, buleen ko jaamloo.

⁴⁰ Defleen ko ni liggéeykat buy feyeeku mbaa mangan bu ngeen dëkkal. Na leen liggéeyal ba keroog atum Yiwiku ma, ⁴¹ mu génnci seeni loxo, mook ay doomam, daldi dellu ci langu boppam, fa ay maamam séddoo. ⁴² Li waral loolu moo di banni Israyil dañu di sama jaam yi ma génne réewum Misra. Deesu leen jaay njaam. ⁴³ Buleen leen soxore ci biir kilifteef, waaye ragal-leen ci seen Yàlla. ⁴⁴ Seen jaam yu góor ak seen jaam yu jigéen, nangeen leen jële ci xeet yi leen wër. Ci ñooñu ngeen di jénde ay jaam, góor ak jigéen. ⁴⁵ Walla ngeen jénde ba tey ci doxandéem yi ci seen biir, mbaa

ci njaboot yi doxandéem yi am ci réew mi te ñu nekk ci seen biir. Su ko defee ñu doon seen ngallo. ⁴⁶ Sañ ngeen leena donale seen doom yi leen di wuutu, ñu doon seen ngallo seen giiru dund. Ñooñu sañ ngeen leena def ay jaam, waaye su dee ci seen diggante, yeen bànni Israyil, buleen di soxorante ci biir kilifteef.

⁴⁷ «Su fekke ne ab doxandéem bu ngeen dëkkal mbaa ab mangan dafa woomle te kenn ci seeni bokk ñakk, ba jaay boppam doxandéem bi ngeen dëkkal mbaa kenn ku bokk ak doxandéem bi, ⁴⁸ gannaaw bu jaayee boppam, manees na koo joota ba tey. Kenn ciy bokkam sañ na koo joota, ⁴⁹ jaar muy baayam bu ndaw mbaa doomu baayam bu ndaw. Ku mu bokkal làng di mbokkam lenqe sax man na koo joota, te moom ci boppam man naa woomle ba joota boppam. ⁵⁰ Na bokk ak ka ko jënd waññ, la dale ca at ma mu jaaye boppam, ba ca atum Yiwiki may ñew, muy njégu goreelam, dëppook at yooya. Te it nañu ci seet àqu ñaqu liggéeykat. ⁵¹ Su desee ay at, lu at ya gêna baree, njég ga muy jootaate boppam gêna sore ci njég, ga ñu ko jénde woon. ⁵² Te su at yu néew doxee seen digganteek atum Yiwiki ma, na ko waññ te fey lu ni néewe, ngr joota boppam. ⁵³ Ab surga lay doon ci njaatigeem at mu nekk, waaye waru koo soxore ci biir kilifteef, ngeen di seetaan. ⁵⁴ Su fekke ne jootaatuñu ko ci jotin yooyu sax, war naa moom boppam mooki doomaa ca atum Yiwiki ma. ⁵⁵ Ndax kat man la bànni Israyil di samay jaam. Ñoo di sama jaam ya ma géenne réewum Misra; yeen, maay seen Yalla Aji Sax ji.

26

Yool yi ci déggal Yalla

¹ «Buleen sàkkal seen bopp ay yallantu, du lenn luy jëmmu tuur mbaa tuuru doj wu ngeen sampil seen bopp, te doj wu ñu ñaas ay nataal it, buleen ko sàkkal bérab ci seen réew, di ko sujjootal, ndax man Aji Sax ji maay seen Yalla. ² Sama bési Noflaay, wormaal-leen ko, te sama bérab bu sell ngeen teral ko. Maay Aji Sax ji.

³ «Su ngeen dee topp samay dogal, fonk samay santaane te di ko jéfe, ⁴ kon maa leen di tawal ci waxtoom, suuf si nangu, garab yi meññ. ⁵ Dingengeen bàcc ba keroog wittum reseñ jot te dingengeen wittum reseñ ba keroog ji jot. Dingengeen lekk seenum pepp ba suur kèll te dingengeen dëkk ak jàmm ci seenum réew.

⁶ «Maay baaxee réew mi jàmm it, ba bu ngeen téddee kenn du leen tiital. Maay jële rab wu aay ci réew mi, te saamar du

jóg, dal ci seenum réew. ⁷ Kon dingengeen dàq seeni noon, saamar ba dal, ñu daanu fi seen kanam. ⁸ Seen juróomi nit ay dàq téeméer, seen téeméeri nit dàq fukki junni. Seeni noon la saamar di dal, ñu daanu fi seen kanam.

⁹ «Te itam maa leen di baaxe, giiral leen, yokk leen. Dinaa sàmm sama kólléréek yeen. ¹⁰ Dingengeen lekk ngóob mu yàgg, dence lu yàgg, ba far géenne mu yàgg ma, wuutal fa mu bees.

¹¹ «Maay samp sama kër ci seen biir te duma leen sib. ¹² Maay ànd ak yeen, di seen Yalla, ngeen di sama ñoñ. ¹³ Man Aji Sax ji maay seen Yalla ji leen géenne réewum Misra, ngeen noppe doon seeni jaam; maa dog seen buumi njaam, siggil leen.

Mbugal yi ci déggadil Yalla

¹⁴ «Waaye bu ngeen ma déggalul te baña jéfe sama santaane yooyu yépp, ¹⁵ su ngeen teddadilee samay dogal, dëddu samay ndigal, ba jéfewuleen sama santaane yépp, xanaa di fecci sama kólléréek yeen, ¹⁶ su boobaa li may def ak yeen mooy lii: maay jekki wacce njàqare ci seen kaw, mu ànd ak woppi ràgg, yaram wu tàng jérr ak bët yu lëndem, ngeen gën di wopp. Dingengeen ji seenum pepp ci neen, ndax seeni noon a koy lekk. ¹⁷ Maa leen di noonoo ba seeni noon duma leen, seeni bañ yilif leen. Dingengeen daw te kenn dàqu leen.

¹⁸ «Bu loolu taxul ngeen déggal ma, maa leen di mbugal lu ko épp juróom ñaari yoon, feye leen ko seeni bàkkaar. ¹⁹ Maay sàggi seen sag bu réy. Maay def asamaan si leen tiim ne sereñ nig weñ, suuf si wow konñ ni xàñjar. ²⁰ Seen doole dina kasara, ndax suuf si ngeen di bey du leen nangul te garabi réew mi du meññ.

²¹ «Su ngeen saxee ci noonoo ma, bañ maa déggal, maay fulaat seen mbugal fukki yoon ak juróom, feye leen ko seeni bàkkaar. ²² Maay xabtal rabi àll yi ci seen kaw, ñu xañ leen seeni doom, seeni gétt ñu tas, seeni nit ñu néewal, ba seeni mbedd ne wëyëj.

²³ «Su ma leen loolu yaralul ba tey, xanaa ngeen sax ci noonoo ma, ²⁴ su boobaa man itam maa leen di noonoo, te it man ci sama bopp maa leen di mbugalaat lu ko épp fukki yoon ak juróom, feye leen ko seeni bàkkaar. ²⁵ Maay dalal saamar ci seen kaw, feye leen ko kóllère gi ngeen fecci. Bu ngeen làqoo ci seeni biir dëkk yu mag sax, maay wacce mbas ci seen biir, seeni noon jekku leen. ²⁶ Bu ma téyee loxo bi ma leen di leele, fukki jigéen dinañu bokk lakk seen mburum njël ci benn taal

donj, natt ko ay somp, séddale, ngeen lekk, te dungeen suur.

²⁷ «Waaye bu loolu weesee te déggaluleen ma, xanaa di ma noonoo ba tey, ²⁸ su boobaa ma gën leena mereeti, noonoo leen, te man ci sama bopp maa leen di mbugalati lu ko ëpp fukki yoon ak juróom, feye leen ko seen bákkaar. ²⁹ Dingen yàpp seeni doom yu góor, yàpp seen doom yu jigéen ndax xiif. ³⁰ Dinaa tas seen hérabi jaamookaay*, toj seeni suuruukaay. Seen kasaray tuur yi ne làcc, ma jal ca seeni néew. Maa leen di sib, ³¹ gental seen dëkk yu mag, tas seen bérab yu sell, te dootuma faale xetug jàmm ca seeni sarax. ³² Maay tas seenum réew, ba seen noon ya ko nangu yéemu ca. ³³ Yeen nag maa leen di tasaare ci biir xeet yi, ndax maay génne saamar mbaram, mu dal ci seen kaw. Seenum réew dina wéet, seen dëkk yu mag gent.

³⁴ «Su boobaa mboolem diir ba suuf di wéet moom lay daboo ati Noflaayam, fekk yeen ngeen nekk ca seen réewu noon ya. Su ko defee suuf si dina nopplu moos, ba daboo ko ati Noflaayam. ³⁵ Mboolem diir bi suuf siy wéet, moom lay nopplu la mu noppluwuloon, ba leen ay ati Noflaay fekkee ngeen dëkk fa.

³⁶ «Ñi des ci yeen, dinaa indi njàqare ci seen xol, foofa ngeen nekk ca seen réewu noon ya, ba xob wu ne foy-foy ngeen daw. Dingen xélu ni ku ñuy dāge saamar, bay daanu, te dāgeesu leen. ³⁷ Dingen fakkastalante di daw, ni ñu ñuy dāge saamar, te dāgeesu leen, ba dungen mana taxaw ci seen kanami noon. ³⁸ Dingen deeye àll, te seen suufu noon yaa leen di lekk. ³⁹ Ñi des ci yeen dinañu rāgg ca seen réewi noon ndax seeni bákkaar ak seen bákkaari maam.

Aji Sax ji du fecci kóllèreem

⁴⁰ «Su ko defee ñoom dinañu tudd seen bákkaar ak seen bákkaar maam ya, ndax dañu maa wor te dëkke maa noonoo, ⁴¹ ba man itam ma noonoo leen, toxal leen seen réewu noon. Bu ñu tuube seen xol bu dēgér nag, ba matal seen mbugal yi saba-boo ci seeni ñaawtéef, ⁴² su boobaa maay bàyyi xel ci sama kóllère gaak Yanqóoba ak sama kóllère gaak Isaaxa ak sama kóllère gaak Ibraayma, te duma fátte li ma dige ci wàllu réew mi.

⁴³ «Waaye réew mi dinañu ko gental, mu daboo ati Noflaayam diir ba ñu ko dēddoo, wéetal ko, te fekk ñoom ñuy fey seen boru

toofñ; ndax kat dañoo sofental samay sannaane, xalab samay dogal. ⁴⁴ Ndaxam du tax ma sofental leen ca seen réewu noon, mbaa ma di leen xalab, di leen faagaagal, nde kon ma fecci sama kóllèreek ñoom. Ndax man Aji Sax ji maay seen Yàlla. ⁴⁵ Maa leen di bàyyil xel ci sama kóllère gaak seen maam ya ma génne réewum Misra, jaambur ñi seede, ngir doon seen Yàlla. Maay Aji Sax ji.»

⁴⁶ Looloo di dogal yaak santaane yaak ndigali yoon ya Aji Sax ji téral ca diggan-teem ak bànni Israyil ca kaw tundu Sinayi, Musaa jottli leen ko.

27

Lu jëm ci jagleel Aji Sax ji nit ak alal

¹ Bu loolu weesee Aji Sax ji wax na Musaa ne ko: ² «Waxal bànni Israyil ne leen: Képp ku dogoo jagleel Aji Sax ji nit*, man naa waccok kaddoom ci kaw nii ñu ko xaymaa. ³ Su dee góor gu am ñaar fukki at ba juróom benn fukki at, nanga ko xayma ci juróom fukki dogi xalis, ci xalisu bérab bu sell bi. ⁴ Su dee jigéen, nanga ko xayma ci fanweeri dogi xalis. ⁵ Su amee juróomi at ba ñaar fukki at, danga koy xayma ci ñaar fukki dogi xalis, su dee góor, mbaa fukki dogi xalis, su dee jigéen. ⁶ Su dee ku am weer jàpp juróomi at, nanga ko xayma ci juróomi dogi xalis su dee góor; mbaa ñetti dogi xalis su dee jigéen. ⁷ Su dee ku am juróom benn fukki at ak lu ko ëpp, nanga ko xayma ci fukki dogi xalis ak juróom su dee góor; mbaa fukki dogi xalis su dee jigéen. ⁸ Su fekkee ne ki dogu woona jagleel nit ki Aji Sax ji da di ku am-amam yées sa xayma, na kooku yóbbu nit ki ba ca sarxalkat ba, sarxalkat bi xaymaal ko nit ki ci lu dēppook am-amam, moom mi dogu woon.

⁹ «Su fekkee ne la ñu dogu woona joxe ag jur la gu dagna sarxalal Aji Sax ji, day daldi sell. ¹⁰ Deesu ko weccee. Du jur gu baax gu ñu ko mana wuutoo, doonte jur gu bon la, te du jur gu bon gu ñu ko mana wuutoo, te fekk muy gu baax. Ci biir jagleel googu ku xasa wuutoo ag jur moroom ma, jur gu jëkk gaak kuutaay la dañuy bokk doon lu sell. ¹¹ Su fekkee ne la ñu dogu woona joxe mala mu daganul la te daganula sarxalal Aji Sax ji, na nit ki yóbbu jur ga ba ca sarxalkat ba, ¹² sarxalkat ba xayma ko. Su baaxee su bonee, lu mu ci dogal mooy wéy. ¹³ Su

* **26:30** 26.30 hérabi jaamookaay: ay tund la daan doon mbaa ay bérab yu ñu tànn. Waa Kanaan daan ci jaamu seeni yàllantu, di ca def xeeti jaamu yu jëm ci luy taxa giir; ak lu jëm ci rawaani ñu dee mbaa ñu di ca gānctu, topp seeni tuur ya leen ca doon xiir. * **27:2** 27.2 Nit man naa jagleel moroomam Yàlla, muy liggéey ca kër Yàlla ga. Aaya yii wone na ne nit ku ñu jagleel moroomam Yàlla, manees na koo yiwi ci kaw ñu feyal ko ab limu xalis.

ko boroom bëggee jootaat, day fey njég ga, yokk ca xaajub juróomeelu njég ga.

¹⁴ «Su nit jagleelee Aji Sax ji dëkkuwaayam, sellalal ko ko, na sarxalkat bi xayma dëkkuwaay bi. Su baaxee su bonee, lu mu ci dogal mooy wéy. ¹⁵ Su fekkee ne ki dogu woona joxe dëkkuwaayam da koo bëgga jootaat, day fey njég ga ñu ko xaymaa, yokk ca xaajub juróomeelam, mu doonaat alalam.

¹⁶ «Su nit jagleelee Aji Sax ji suuf su mu moom ci suufas ndonoom, na ñuy xaymaa suuf sa, na dëppook dayob pepp bay mat jiwum suuf sa. Ñetti barigoy peppum lors yu ne juróom fukki dogi xalis† a koy wecci. ¹⁷ Su fekkee ne ci atum Yiwiku la joxe suuf si, xaymab suuf si day mat sékk and ak moom. ¹⁸ Waaye su fekkee ne gannaaw atum Yiwiku la joxe suuf si, sarxalkat bi da koy nattal njég gi ci at yi dox seen digganteek atum Yiwiku ma ca topp, génne ca at ya wees. ¹⁹ Su fekkee ne ki dogu woona joxe tool bi da koo bëgga jootaat, day fey njég ga ñu ko xaymaa, yokk ca xaajub juróomeelam, mu doonaat alalam. ²⁰ Su jootaatul tool bi, ba ñu jaay tool bi keneen, deesu ko mana jootaat. ²¹ Bu tool bi yiwikoo ci atum Yiwiku nag, day daldi doon lu ñu sellalal Aji Sax ji, mel ni tool bu ñu aaye, mu doon alalu sarxalkat.

²² «Su fekkee ne nit ki dafa jagleel Aji Sax ji tool bu mu jënd, te donnu ko, ²³ sarxalkat bi da koy xaymaal njég gi, méngale kook at yi dox seen digganteek atum Yiwiku may ñew. Na nit ki fey la ñu xayma ca bés ba, xalis ba di lu ñuy sellalal Aji Sax ji. ²⁴ Bu atum Yiwiku dikkee, tool bi day dellu ca ka ñu ko jënde woon te mu di alalu ndonoom. ²⁵ Mboolem lu ngeen xayma, na dëppook natt ba ñu yoonal ci bérab bu sell bi, maanaam li ñuy wax siikal te mu tollu ci fukki garaam.

²⁶ «Waaye kat luy taaw cig jur, Aji Sax jee ko moom jeeg. Du lu kenn di dogoo jagleel Aji Sax ji. Muy barmol, muy mbote, muy tef, Aji Sax jee boroom. ²⁷ Su dee lu mala mu daganul taawloo, ka ko moomoon man na koo jootaat ndegam fey na njégam, ba dolli ca xaajub juróomeelu njég ga. Bu ñu ko jootaatul, dees koy jaay ci njég gi ñu ko xaymaa. ²⁸ Mboolem lu ñu aayalal Aji Sax ji, lu sella sell la ñeel Aji Sax ji. Lépp lu nit moom, su dee nit mbaa jur mbaa suuf su mu donn, amu ci lenn lu mu aayalal Aji Sax ji te ñu sañ koo jaay mbaa mu di ko jootaat. ²⁹ Ba tey du kenn nit ku ñu aayalal bakkanam Aji Sax ji, mu wara sànk, ba noppi ñu di ko jootaat. Dees koy rey rekk.

³⁰ «Bu loolu weesee mboolem lu jóge ci suuf, muy pepp mbaa doomi garab, cérub fukkeel ba Aji Sax jee boroom. Dees koy sellalal Aji Sax ji. ³¹ Su fekkee ne nit ki dafa namma jootaat lenn ca céru fukkeelu meññeefam ma muy génne, day yokk ca njég ga xaajub juróomeelam. ³² Mboolem céru fukkeel bu ñu génnee cig jur, gu gudd gaak gu gatt ga, muy lépp lu sàmm waññe bantam, cérub fukkeel la bu ñuy sellalal Aji Sax ji. ³³ Deesu ci seet jur gu baax ak gu bon te deesu ci wuutal lenn. Bu ci nit xasee wuutal lenn, la jëkk ak la ko wuutu lépp day daldi doon lu sell. Deesu ko mana jootaat.»

³⁴ Yooyu santaane la Aji Sax ji dénkoon Musaa ca tundu Sinayi, ngir mu jottli ko bànni Israyil.

† 27:16 27.16 Benn dogu xalis boobu mu ngi tollu woon ci benn siikal, diisaayam di fukki garaam.

Màndiŋ ma fa bànni Israyil jaare woon di ñeenteelu xaaju Tawreetu Musaa Ubbite gi

Téere bii moo tàmbalee ca bés ba bànni Israyil dalee ca taatu tundu Sinayi. Foofu la bànni Israyil jóge jëm màndiŋu Paran, ca bėj-gannaaru réewum dige ba. Fa lañu yebale ay ndaw yu yërnduji réew ma, te délsi wax seen gis-gis ca ña fa dëkke. Ba ñu demee ba délsi, lañu ne ñoom la ñu gis neexul. Loolu nag tax bànni Israyil di nàttable ndax Yàlla man na leena jox suuf sa mu leen sédd. Ci kaw loolu ñuy jàmbat ci kaw Yàlla. Seen ñàkk kóllère googu tax na Yàlla teg leen ab daan, ñuy wèndeelu ca màndiŋ ma, ba maas ga doon jàmbat dee, ba geneen maas wuutu leen. Ñeent fukki at lañu wèndeelu, doora walbatiku dox ndànk, jëm Kanaan. Boobu yoon lañu doora nangoo déggal Yàlla. Gannaaw gi lañu sumb ay xare yu am solo, ba daan, ca penkub dexu Yurdan, doora waaj, ngir jàll ca biir réewum dige, ba ñu nammoona gis bu yàgg. Téere bi wone na ne, ni xolu doom Aadama mel rekk moom la ñoñi Yàlla feeñal ci seen jikko ju toogadi. Saxoowuñu lenn, xanaa ñarale diggante ngëm ak nàttable, cawarte ak xàddi, jéfi ngor ak jéf ju sew. Seen jikko jooju la téere bi wone ne moo leen worale ak Yàlla mi dul soppiku ci kóllèreem, digganteem ak ñoñam, doonte kóllère gi nag, teewu koo yor ab yaram, te ànd ak njubteem. Musaa nag diggante bu xat lañu ko gisal ci téere bi, Aji Sax ji ak ay bokkam séq ko: Musaa moo doon ndawal Yàlla liy jottli ay ndigalam, te amul woon ab dend ci na mu xejjoo woon ak Yàlla, waaye moo taxawoon itam fa kanam Yàlla, taxawal fa askan wu ñàkk kóllère, di ko layal te tàyyiwul.

Ci Tënk:

Saar 1—21 Israyil jàngé na ca maam ya jóge woon Misra

Saar 22—25 Céru barke bu sax ñeel na Israyil

Saar 26—36 Israyil dégg na ab artoom balaa dugg Kanaan

Israyil jàngé na ca maam ya jóge woon Misra

(Saar 1—21)

Takk nañu limu bànni Israyil

¹ Aji Sax ji moo wax ak Musaa ca màndiŋu Sinayi ca biir xaymab ndaje ma, keroog benn fanu ñaareelu weer wu ñaareelu at, ma topp ca gàddaay ga bawoo Misra. Mu ne ko:

² «Limleen mbooloom bànni Israyil gépp, na ñu bokke seeni làng ak seen kéri maam. Waññleen góor ñépp, bopp ak bopp, ku nekk ak turam. ³ Li ko dale ñaar fukki at, jëm kaw, mboolem ñi xare war ci Israyil daal, nangeen leen lim, gàngoor ak gàngoor, yaw ak Aaróona. ⁴ Giir gu ci nekk, àndleen ceek kilifa yi jiite seen kéri maam, ñu jàpple leen ci.

⁵ Ñiy wuyoo tur yi nag, ñoo leen ciy taxawu:

Ci wàllu Rubeneen ñi, Elisur doomu Sedeyur.

⁶ Wàllu Cimyoneen ñi, Selumyel doomu Surisadaay.

⁷ Wàllu Yudeen ñi, Nason doomu Aminadab.

⁸ Wàllu Isakareen ñi, Netanel doomu Suwar.

⁹ Wàllu Sabuloneen ñi, Elyab doomu Elon.

¹⁰ Ñi ciy askanu Yuusufa ñii la:

Ci wàllu Efraymeen ñi, Elisama doomu Amiyut.

Wàllu Manaseen ñi, Gamalyel doomu Pedasur.

¹¹ Wàllu Beñamineen ñi, Abidan doomu Gidoni.

¹² Wàllu Daneen ñi, Ayeser doomu Amisadaay.

¹³ Wàllu Asereen ñi, Pagyel doomu Okkran.

¹⁴ Wàllu Gàddeen ñi, Elyasaf doomu Dewel.

¹⁵ Wàllu Neftaleen ñi, Ayra doomu Enan.»

¹⁶ Ñooñu lañu woo ci mbooloo mi, muy ñi jiite seen giiri maam. Nooy njiti gàngoori Israyil.

¹⁷ Ba loolu amee Musaa ak Aaróona tofloo ñooñu ñu tudd seeni tur, ¹⁸ ñu dajale mbooloo ma mépp, keroog ca benn fanu ñaareelu weer wa. La ko dale ca ña am ñaar fukki at, jëm kaw, ñoom ñépp daldi bindu ca limeefu tur ya, ku nekk ak kër maamam, giir ak giir, làng ak làng, bopp ak bopp. ¹⁹ Noonee ko Aji Sax ji sante woon Musaa, na la Musaa takke seen lim ca màndiŋu Sinayi.

²⁰ Ñu lim bopp ak bopp, turi sèti Ruben taawub Israyil seen maam*, ku nekk ak làngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ²¹ Limub Rubeneen ñi

* 1:20 1.20 Israyil mooy Yanqóoba.

di ñeent fukki junni ak juróom benn ak juróomi téeméer (46 500).

²² Ñu lim bopp ak bopp, turi sėti Simeyon, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ²³ Limub Cimyoneen ñi di juróom fukki junneek juróom ñeent ak ñetti téeméer (59 300).

²⁴ Ñu lim turi sėti Gàdd, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ²⁵ Limub Gàddeen ñi di ñeent fukki junneek juróom ak juróom benni téeméer ak juróom fukk (45 650).

²⁶ Ñu lim turi sėti Yuda, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ²⁷ Limub Yudeen ñi di juróom ñaar fukki junneek ñeent, ak juróom benni téeméer (74 600).

²⁸ Ñu lim turi sėti Isaakar, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ²⁹ Limub Isakareen ñi di juróom fukki junneek ñeent ak ñeenti téeméer (54 400).

³⁰ Ñu lim turi sėti Sabulon, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ³¹ Limub Sabuloneen ñi di juróom fukki junneek juróom ñaar ak ñeenti téeméer (57 400).

³² Ñu lim turi sėti Yuusufa yi askanoo ci doomam Efrayim, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ³³ Limub Efraymeen ñi di ñeent fukki junni ak juróomi téeméer (40 500).

³⁴ Ñu lim turi sėti Yuusufa yi askanoo ci doomam Manase, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ³⁵ Limub Manaseen ñi di fanweeri junneek ñaar ak ñaar téeméer (32 200).

³⁶ Ñu lim turi sėti Beñamin, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ³⁷ Limub Beñamineen ñi di fanweeri junneek juróom ak ñeenti téeméer (35 400). ³⁸ Ñu lim turi sėti Dan, ku nekk ak lǎngu cosaanam ak kër maamam, mboolem góor ñi xare war, te ñu am ñaar fukki at, jëm kaw. ³⁹ Limub Daneen ñi di juróom benn fukki junneek ñaar ak juróom ñaar téeméer (62 700).

⁴⁰ Ñu lim turi sėti Aser, ku nekk ak lǎngam ak kër maamam, mboolem góor ñi xare war, te ñu am ñaar fukki at, jëm kaw. ⁴¹ Limub Aseren ñi di ñeent fukki junneek benn ak juróomi téeméer (41 500).

⁴² Ñu lim turi sėti Neftali, ku nekk ak lǎngu cosaanam ak kër maamam, mboolem ñi xare war, te ñu am ñaar fukki at, jëm kaw. ⁴³ Limub Neftaleen ñi di juróom fukki junneek ñetti ak ñeenti téeméer (53 400).

⁴⁴ Yooyu limeef la Musaa ak Aaróona tǎnk, ña naer ca jǎpple di fukki kilifay Israyil ak ñaar, ku ci nekk taxawal kër maamam. ⁴⁵ Mboolem bànni Israyil yi xare war, te ñu am ñaar fukki at, jëm kaw, limees na leen, ku ci nekk ak kër maamam. ⁴⁶ Ña ñu lim ñépp di juróom benn téeméeri junneek ñetti ak juróomi téeméer ak juróom fukk (603 550).

Limaaleesul Leween ñi

⁴⁷ Giirug Leween ñi nag ci bànni Israyil lañu bokk, waaye limaaleesu leen ak ñoom. ⁴⁸ Aji Sax ji moo waxoon Musaa, ne ko: ⁴⁹ «Giirug Lewi ñoom, bu leen lim, bu leen waññaaleek bànni Israyil. ⁵⁰ Waaye yaw ci sa bopp nanga sas Leween ñi jaamookaay bi seedes kóllère gi dence, mook la muy àndal lépp, ak mboolem lu ca bokk. Ñooy gǎddu jaamookaay bi, ak la muy àndal lépp, di ko topptoo, te it fi wër jaamookaay bi lañuy dal. ⁵¹ Bu jaamookaay bi dee dem, Leween ñee koy wékki, bu jaamookaay bi dee dale bérab, Leween ñee koy we. Ku ci bokkul ba laal ci nag, dees koy rey. ⁵² Bànni Israyil gi ci des, na ku ci nekk topp dalam, ak raayaam ak kurélam. ⁵³ Leween ñi nag nañu dal fi wër jaamookaay bi seedes kóllère gi dence. Su ko defeo am sànj du dal ci kaw mbooloom bànni Israyil. Te itam na Leween ñi dénkoo dénkaneey jaamookaay bi seedes kóllère gi dence.»

⁵⁴ Bànni Israyil daldi def noonu. Mboolem lu Aji Sax ji santoon Musaa, noonee lañu ko defe.

2

Lu jëm ci dalinu giir yi

¹ Ba loolu wéyee Aji Sax ji wax Musaa ak Aaróona, ne leen: ² «Na bànni Israyil di dal, ku nekk ak raayaam ak xàmmiikaayu kër maamam. Fi wër xaymab ndaje mi te dǎnd ko as lǎf, fi lañuy dale:

³ «Ñay dale ca kanam, fa féete penku, ñooy waa raayab Yuda ak seeni gǎngoor, kilifag Yudeen ñi di Nason doomu Aminadab. ⁴ Ña ñu lim ci gǎngooram di juróom ñaar fukki junneek ñeent ak juróom benni téeméer (74 600).

⁵ «Ñay dale fa feggook ñoom ñooy giirug Isakareen ñi, kilifag askanu Isaakar di Netanel doomu Suwar. ⁶ Ña ñu lim ci gǎngooram di juróom fukki junneek ñeent ak ñeenti téeméer (54 400).

⁷ «Giirug Sabuloneen ñeey feggook ñoom, kilifag askanu Sabulon di Elyab doomu Elon. ⁸ Ña ñu limal gàngooram di juróom fukki junneek juróom ñaar ak ñeenti téeméer (57 400).

⁹ «Mboolem ña ñu limal dalub Yuda aki gàngooram daldi doon téeméeri junneek juróom ñett fukk ak juróom benn ak ñeenti téeméer (186 400). Bu ñuy dem, ñooñooy dox, jiitu.

¹⁰ «Waa raayab Ruben ñooy dale bëj-saalum, ñook seeni gàngoor, kilifag askanu Ruben di Elisur doomu Sedeyur. ¹¹ Ña ñu limal gàngooram di ñeent fukki junneek juróom benn ak juróomi téeméer (46 500).

¹² «Ñay dale fa feggook ñoom ñooy giirug Cimyoneen ñi, kilifag askanu Simeyon di Selumyel doomu Surisadaay. ¹³ Ña ñu limal gàngooram di juróom fukki junneek juróom ñeent ak ñetti téeméer (59 300).

¹⁴ «Giiru Gáddeen ñeey feggook ñoom, kilifag askanu Gádd di Elyasaf doomu Rewel. ¹⁵ Ña ñu limal gàngooram di ñeent fukki junneek juróom ak juróom benni téeméer ak juróom fukk (45 650).

¹⁶ «Mboolem ña ñu limal dalub Ruben aki gàngooram doon téeméeri junneek juróom fukk ak benn, ak ñeenti téeméer ak juróom fukk (151 450). Bu ñuy dem, ñooñooy doon ñaareelu kurél, dox, topp ca.

¹⁷ «Su ko defee xaymab ndaje mi jóg topp ca, ànd ak Leween ñi koy gáddu, te seen dal nekk ci digg dal yi. Noonee kurél yiy dale daal, ni lañuy jóge dem, ku nekk topp ayam ak raayaam.

¹⁸ «Waa raayab Efrayim ñooy dale wetu sowu, ñook seeni gàngoor, kilifag askanu Efrayim di Elisama doomu Amiyut. ¹⁹ Ña ñu limal gàngooram di ñeent fukki junni ak juróomi téeméer (40 500).

²⁰ «Ñay dale fa feggook ñoom ñooy giirug Manaseen ñi, kilifag askanu Manase di Gamalyel doomu Pedasur. ²¹ Ña ñu limal gàngooram di fanweeri junneek ñaar ak ñaar téeméer (32 200).

²² «Giirug Beñamineen ñeey feggook ñoom, kilifag askanu Beñamin di Abidan doomu Gidoni. ²³ Ña ñu limal gàngooram di fanweeri junneek juróom ak ñeenti téeméer (35 400).

²⁴ «Mboolem ña ñu limal dalub Efrayim aki gàngooram daldi doon téeméeri junneek juróom ñett ak téeméer (108 100). Bu ñuy dem, ñooñooy di ñetteelu kurél, dox topp ca.

²⁵ «Waa raayab Dan ñooy dale bëj-gànaar, ñook seeni gàngoor, kilifag askanu Dan di Ayeser doomu Amisadaay. ²⁶ Ña ñu limal gàngooram di juróom benn fukki junneek ñaar ak juróom ñaar téeméer (62 700).

²⁷ «Ñay dale fa feggook ñoom ñooy giirug Asereen ñi, kilifag askanu Aser di Pagyel doomu Okkran. ²⁸ Ña ñu limal gàngooram di ñeent fukki junneek benn ak juróomi téeméer (41 500).

²⁹ «Giirug Neftaleen ñeey feggook ñoom, kilifag askanu Neftali di Ayra doomu Enan. ³⁰ Ña ñu limal gàngooram di juróom fukki junneek ñett ak ñeenti téeméer (53 400).

³¹ «Mboolem ña ñu limal dalub Dan daldi doon téeméer ak juróom fukki junneek juróom ñaar ak juróom benni téeméer (157 600). Ñooñooy mujja jóg, topp seeni raaya.»

³² Ñooñu lañu limal bànni Israyil na ñu bokke seen kəri maam. Mboolem ña ñu limal dal ya ak seeni gàngoor doon juróom benni téeméeri junneek ñett ak juróomi téeméer ak juróom fukk (603 550). ³³ Leween ñi nag limaaleesu leen ci bànni Israyil, te noonu la ko Aji Sax ji sante woon Musaa.

³⁴ Bànni Israyil daldi def noonu. Mboolem noonee ko Aji Sax ji sante woon Musaa, na lañu daan dale, topp seeni raaya, na lañu daan jóge, ku nekk ak làngam ak kər maamam.

3

Lu jëm ci sasi Leween ñi

¹ Ñii ñoo di askani Aaróona ak Musaa, jant ba Aji Sax jiy wax, mook Musaa ca kaw tundu Sinayi. ² Doomi Aaróona yu góor ñoo di Nadab, taaw ba, ak Abiyu ak Elasar ak Itamar. ³ Turi doomi Aaróona yu góor, sarxalkat yaa ngi noonu; ñu faloon leen, sédd leen céru carxal. ⁴ Nadab ak Abiyu nag mujj dee fi kanam Aji Sax ji, ba ñu taalalee Aji Sax ji cuuraay lu warul ca mändinju Sinayi. Gannaaw amuñu woon doom yu góor, Elasar ak Itamar daldi féetewoo liggéeyu carxal ba, ca seen kanamu baay Aaróona.

⁵ Ci kaw loolu Aji Sax ji ne Musaa: ⁶ «Indil Leween ñi, tegleen ci kilifteefu Aaróona sarxalkat bi, ngir ñu di ko japple; ⁷ ñooy dénkoo ndénkaaneem, di dénkoo dénkaaney mbooloo mépp fi kanam xaymab ndaje mi, ndax ñooy sasoo liggéeyu jaamookaay bi. ⁸ Ñooy sàmm mboolem juntuukaayi xaymab ndaje mi, ñooy dénkoo dénkaaney bànni Israyil,

ndax ñooy sasoo liggéeyu jaamookaay bi. ⁹ Noonu ngay jële Leween ñi, sédd leen Aaróona ak doomam yu góor. Ñoom ñoo di cér bu mat sèkk bu ñu koy sédde ci bànni Israyil. ¹⁰ Aaróona ak doomam yu góor nag ngay tabb ngir ñu sasoo seenug carxal, waaye képp ku ci laal te bokku ci, dees koy rey.» ¹¹ Aji Sax ji waxati Musaa, ne ko: ¹² «Man mii nag, maa seppee Leween ñi ci bànni Israyil, maa leen weccoo mboolem taaw bu góor bu jékka juddoo ci ndeyam, ci biir bànni Israyil. Kon nag Leween ñi, sama cér lañuy doon. ¹³ Ndash lépp luy taaw bu góor, sama cér la. Keroog ba ma fàddee lépp luy taaw bu góor ca réewum Misra, ca laa sellalal sama bopp lépp luy taaw ci Israyil, dale ci nit ba ci jur. Maa leen séddoo. Maay Aji Sax ji.»

Lim nañu Leween ñi ak seeni maam

¹⁴ Aji Sax ji waxati Musaa ca màndinju Sinayi, ne ko: ¹⁵ «Limal askanu Leween ñi, ni ñu bokke seen kéri maam ak seeni làng. Mboolem góor ñi am weer, jëm kaw, ngay lim.» ¹⁶ Musaa daldi leen lim ci ndigalal Aji Sax ji, na ñu ko ko sante.

¹⁷ Gerson ak Keyat ak Merari ñoo soqikoo ci Lewi.* ¹⁸ Doomi Gerson yu góor ñoo di Libni ak Simey, ku ci nekk ak làngam. ¹⁹ Doomi Keyat yu góor ñoo di Amram ak Isar ak Ebron ak Usyel, ku ci nekk ak làngam. ²⁰ Doomi Merari yu góor ñoo di Maali ak Musi, ku ci nekk ak làngam. Làngji Leween ñaa ngoogu, na ñu bokke seen kéri maam.

²¹ Ci Gerson la làngu Libneen ñi, ak làngu Simeyeen ñi soqikoo. Làngji Gerson-eeen ñaa ngoogu. ²² Ña ñu leen limal, ba ñu waññee mboolem góor ña am weer, jëm kaw, juróom ñaari junni ak juróomi téeméer (7 500) lañu. ²³ Làngji Gerson-eeen ña, ca gannaaw jaamookaay ba lañu daan dale, fa féete sowu. ²⁴ Gerson-eeen ñi, seen kilifag kër maam moo doon Elyasaf doomu Layel.

²⁵ Askanu Gerson nag, seen sas ci wàllu xaymab ndaje mi, jaamookaay bi la woon ak xayma bi, ak malaan mi koy ub, ak ridob bunt xaymab ndaje mi, ²⁶ ak ki-iraayi ètt beek ridob bunt ètt bi wër jaamookaay beek sarxalukaay bi, ak buum yeek mboolem liggéeyu bu ci war.

²⁷ Keyat nag, ci moom la làngu Amrameen ñi soqikoo, ak làngu Isareen ñi, ak làngu Ebroneen ñi, ak làngu Usiyleen ñi. Làngji Keyateen ñaa ngoogu. ²⁸ Ba ñu waññee mboolem góor ña ca am weer, jëm kaw, juróom ñetti junni ak juróom benni téeméer (8 600) lañu. Ñoo dénkoo

woon dénkaneey bérab bu sell bi. ²⁹ Làngji Keyateen ñi, wet ga féete jaamookaay ba bëj-saalum, fa lañu daan dale. ³⁰ Keyateen ñi, seen kilifag kër maam moo doon Elisafan doomu Usyel.

³¹ Seen sas nag moo doon gaal gi, ak taabal ji, ak tegukaayu làmp bi, ak sarxalukaay yi, ak ndabi sarxal ya ñu ca daa jëfandikoo, ak ridob biir bi, ak mboolem liggéeyu bu ci war. ³² Njiiti Leween ñi nag, seen kilifa gu mag moo doon Elasar doomu Aaróona sarxalkat ba. Moo doon saytu ña dénkoo woon dénkaneey bérab bu sell ba.

³³ Ci Merari la làngu Maaleen ñi ak làngji Museen ñi soqikoo. Làngji Merareen ñaa ngoogu. ³⁴ Ña ñu leen limal, ba ñu waññee mboolem góor ña am weer, jëm kaw, juróom benni junni ak ñaar téeméer (6 200) lañu. ³⁵ Merareen ñi, seen kilifag kër maam moo doon Suryel doomu Abixayil. Ca wet ga féete jaamookaay ba bëj-gannaar, fa lañu daan dale.

³⁶ Askanu Merari, seen sas moo doon xànqi jaamookaay bi aki galanam ak jën yi ak tegu yi, ak mboolem juntuukaay ya muy àndal, ak liggéeyu bu ca war, ³⁷ ak jën yi wër ètt bi, ak seeni tegu, ak seen xeri sampukaay, ak seeni buum.

³⁸ Ña daan dale nag fa jàkkaarlook jaamookaay bi, ca kanam, janlook xaymab ndaje mi, ca wetu penku, ñoo doon Musaa ak Aaróona ak doomam yu góor. Ñoo dénkoo woon dénkaneey bérab bu sell bi, sasool ko bànni Israyil, te ku ci laal te bokku ci, dees koy rey. ³⁹ Mboolem ña ñu limal Leween ñi, te Musaa ak Aaróona lim leen na ñu bokke seeni làng ci ndigalal Aji Sax ji, ñuy mboolem góor ñi am weer, jëm kaw, ñaar fukki junneek ñaar (22 000) lañu.

Lim nañu taaw yi ngir seen njotlaay

⁴⁰ Aji Sax ji waxaat Musaa, ne ko: «Limal taawi bànni Israyil yu góor yépp, dale ko ci ñi am weer, jëm kaw, nga waññ te bind seeni tur. ⁴¹ Su ko defee nga beral ma Leween ñi, man Aji Sax ji, ñu wecci mboolem taawi bànni Israyil gi ci des, juri Leween ñi itam wecci mboolem luy taaw ci juri bànni Israyil gi ci des.» ⁴² Ci kaw loolu Musaa lim taawi bànni Israyil yépp, na ko ko Aji Sax ji sante. ⁴³ Ba ñu waññee mboolem taaw yu góor ya, bind seeni tur, dale ci ñi am weer, jëm kaw, seenub lim nekk na ñaar fukki junneek ñaar ak ñaar téeméer ak juróom ñaar fukk ak ñett (22 273).

⁴⁴ Aji Sax ji waxati Musaa, ne ko: ⁴⁵ «Beral Leween ñi, ñu wecci mboolem taawi bànni Israyil, juri Leween ñi it wecci

* 3:17 3:17 Seetal ci Njàlbeén ga 46.11.

seenug jur, ma daldi séddoo Leween ñi, man Aji Sax ji. ⁴⁶ Njotlaay nag dina war ci ñaar téeméer ak juróom ñaar fukk ak ñetti (273) bopp, yi taawi bànni Israyil éppe Leween ñi. ⁴⁷ Su ko defee nga sàkku bopp bu ci nekk juróomi siikal; ci siikalu bérab bu sell bi nga koy sàkkoo, siikal bu ci nekk wecci ñaar fukki gera†. ⁴⁸ Nanga jox xaalis boobu Aaróona ak doomam yu góor, muy njotlaayal taaw yi ci tegu.» ⁴⁹ Ba loolu amee Musaa feyeeku xaalisu njotlaayal taaw yooyu tegu ca taaw, ya jotoo Leween ña. ⁵⁰ Xaalis ba mu nangoo ca taawi bànni Israyil di junniy siikal ak ñetti téeméer ak juróom benn fukk ak juróom (1 365), ci siikalu bérab bu sell bi, xawa tollu ci fukki kilo ak ñett. ⁵¹ Ci kaw loolu Musaa jox xaalisu njotlaay ba, Aaróona ak doomam yu góor, ci ndigalal Aji Sax ji, na ko ko Aji Sax ji sante.

4

Yeneen kuréli Leween a ngi ak seeni sas

¹ Aji Sax ji waxati Musaa ak Aaróona, ne: ² «Leween ñi askanoo ci Keyat, waññleen leen bopp ak bopp, na ñu bokke seeni làng, ak seen kéri maam. ³ Daleleen ci góor ñi am fanweeri at, ba juróom fukki at, muy mboolem ñi yelloo bokk ci kurél, gi liggéeyu biir xaymab ndaje mi war. ⁴ Liggéeyu Keyateen ñi ci biir xaymab ndaje mi moo di wàllu jumtukaay yu sell yee sell.

⁵ «Bu dal bi dee jóg, na Aaróona ak doomam yu góor dugg, wékki kiiraay li, di ridob biir bi, te ñu muure ko gaalu seedes kóllère gi. ⁶ Nañu lalaat ca kaw kiiraayal deru piipi, te ñu lalati ca kaw, ndimo lu lépp baxa, doora roof njàppuy gaal gi.

⁷ «Taabalul mburuu teewal mi, nañu ci lal ndimo lu baxa, teg ci ndab yeek bàttu yeek njaq yeek tax yi ñuy sottée saraxi tuuru, door cee teg mburuu moomu dul wuute. ⁸ Nañu muure yooyu ndimo lu xonq curr; te ñu lalaat ca kaw malaanum deru piipi, doora roof njàppuy taabal ji.

⁹ «Su ko defee ñu jël ndimo lu baxa, muure ko tegukaayu lãmp bi, aki lãmpam aki ñiimam aki andam, ak mboolem ndabi diwam ya ñu cay jëfoo. ¹⁰ Nañu boole tegukaayu lãmp beek mboolem la muy àndal, ñu òmbe lépp malaanum deru piipi, te teg ko ci kaw tagar bi ñu koy gáddoo. ¹¹ Sarxalukaayu wurus bi*, nañu lal ci kawam ndimo lu baxa, lalaat ca kaw malaanum deru piipi, doora roof njàppuy sarxalukaay bi. ¹² Nañu jël mboolem jumtukaay yi ñuy liggéeye ci biir bérab

bu sell bi, ñu òmbe ko ndimo lu baxa, muure ko malaanum deru piipi, door koo teg ci kaw tagar bi ñu koy gáddoo. ¹³ Nañu dindi niiniti sarxalukaayu xàñjar bi, te ñu lal ci kaw sarxalukaay bi, ndimo lu xonq curr. ¹⁴ Nañu teg ca kaw ndimo la mboolem ndab, ya ñuy liggéeye ca sarxalukaay ba: and yeek cappukaayi yàpp yeek ñiitukaay yeek kèll yi; jumtukaayi sarxalukaay bi yépp daal, te ñu lal ca kaw, malaanum deru piipi, doora roof njàppuy sarxalukaay bi.

¹⁵ «Bu dal bi waree jóg, na Aaróona ak doomam yu góor muur yéf yu sell yi, ak mboolem jumtukaayi bérab bu sell bi ba noppi. Gannaaw loolu la askanu Keyat di dikk, ngir gáddu ko. Su ko defee duñu laal dara lu sell, bay dee. Loolu la Keyateen ñi di gáddu ci wàllu xaymab ndaje mi.

¹⁶ «Elasar doomu Aaróona sarxalkat bi nag, ab saytoom moo di diwu lãmp bi, ak cuuraay li, ak saraxu pepp bi dul jaas, ak diwu pal gi. Mooy feétewoo jaamookaay bi bépp, ak mboolem li ci biiram, ba ci yéf yu sell yi, aki jumtukaayam.»

¹⁷ Aji Sax ji waxati ba tey ak Musaa ak Aaróona, ne leen: ¹⁸ «Buleen yóbbe Keyateen ñeek seeni làng, lu ñu leen di dagge ci biir Leween ñi. ¹⁹ Nii ngeen di def ak ñoom, ba bu ñu jegee yéf yu sell yee sell, di dund te duñu ca dee: Aaróona aki doomam ñooy dugg, daldi séddu ko nekk ci ñoom liggéeyam ak la muy gáddu. ²⁰ Bu Keyateen ñi dugg, di xool lu mu gàtt gàtt, yéf yu sell yi. Lu ko moy ñu dee.»

²¹ Gannaaw loolu Aji Sax ji wax Musaa, ne ko: ²² «Ñi askanoo ci Gerson itam, nanga leen waññ bopp ak bopp, na ñu bokke seen kéri maam ak seeni làng. ²³ Li dale ci góor ñi am fanweeri at, ba juróom fukki at ngay lim, ñuy mboolem ñi liggéeyu xaymab ndaje mi war. ²⁴ Gersonen ñi nag, lii moo di seen cér ci wàllu liggéey bi, ak li ñu wara gáddu: ²⁵ ñooy gáddu kiiraayi jaamookaay bi, ak xaymab ndaje meek malaanum, ak malaanum deru piipi bi ci kaw, ak ridob bunt xaymab ndaje mi; ²⁶ ak sori ètt bi, ak kiiraayal bunt ètt bi wër jaamookaay beek sarxalukaay bi, ak seeni buum ak mboolem jumtukaay ya ñu cay liggéeye. Mboolem lees cay def, ñoo koy liggéey. ²⁷ Mboolem sasu Gersonen ñi ci mboolem lu ñuy gáddu ak mboolem lu ñuy liggéey, ci ndigalal Aaróona aki doomam lay doon. Ñoo leen di sas mboolem lu ñu wara gáddu. ²⁸ Loolooy céru Gersonen ñi, ci wàllu xaymab ndaje mi, te loolu lañu leen

† 3:47 3.47 Ñaar fukki gera tollu na ci juróom fukki garaam. cuuraay bi. Seetal ci *Mucc ga* 30.1-10.

* 4:11 4.11sarxalukaayu wurus bi mooy sarxalukaayu

dénk, Itamar doomu Aaróona sarxalkat bi di leen ca saytu.

²⁹ «Ñi askanoo ci Merari itam, na ñu bokke seeni làng ak seen kəri maam, noonu nga leen di lime, ³⁰ dale ko ci ñi am fanweeri at, ba juróom fukki at, ñuy mboolem ñi yellow bokk ci kurél, gi liggéeyu xaymab ndaje mi war. ³¹ Lii mooy li ñu sasoo gáddu ci seen mboolem liggéey ci xaymab ndaje mi: xànqi jaamookaay bi aki galanam aki jënám aki tegoom; ³² muy jën yi wër ètt bi, ak seeni tegu ak seeni buum, mboolem seen juntuukaay yu ñu cay liggéeye. Limal-leen leen juntuukaay yi ñu wara gáddu. ³³ Loolooy céru Merareen ñi, ci wàllu xaymab ndaje mi ci njiital sarxalkat bi Itamar doomu Aaróona.»

Lim nañu Leween ñi liggéey war

³⁴ Ci kaw loolu Musaa ak Aaróona ak kilifay mbooloo ma lim Keyateen ña, na ñu bokke seeni làng ak seen kəri maam. ³⁵ Ñu dale ko ci ñi am fanweeri at, ba juróom fukki at, ñuy mboolem ñi yellow bokk ci kurél, gi liggéeyu xaymab ndaje mi war. ³⁶ Ña ñu limal seeni làng di ñaari junni ak juróom ñaar téeméer ak juróom fukki góor (2 750). ³⁷ Ñooñu lañu limal làngi Keyateen ñi, ñoom ñépp la liggéeyu xaymab ndaje mi war. Musaa ak Aaróona ñoo leen limoon, na ko Aji Sax ji santaanee, Musaa jottli.

³⁸ Ña ñu limal Gersoneen ñi, na ñu bokke seeni làng ak seen kəri maam, ³⁹ dale ko ci ñi am fanweeri at, ba juróom fukki at, mboolem ña yellow bokk ci kurél, gi liggéeyu xaymab ndaje mi war, ⁴⁰ te ñu limal leen seeni làng ak seen kəri maam, ñaari junneek juróom benni téeméer ak fanweeri góor lañu (2 630). ⁴¹ Ñooñu lañu limal làngi Gersoneen ñi, te ñoom ñépp la liggéeyu xaymab ndaje mi war. Musaa ak Aaróona ñoo leen limoon ci ndigalal Aji Sax ji.

⁴² Ña ñu limal làngi Merareen ñi, na ñu bokke seeni làng, ak seen kəri maam, ⁴³ dale ko ci ñi am fanweeri at, ba juróom fukki at, mboolem ña yellow bokk ci kurél, gi liggéeyu xaymab ndaje mi war, ⁴⁴ te ñu limal leen seeni làng, ñetti junni ak ñaar téeméeri góor (3 200) lañu. ⁴⁵ Ñooñu lañu limal làngi Merareen ñi, Musaa ak Aaróona ñoo leen limoon, na ko Aji Sax ji santaanee, Musaa jottli.

⁴⁶ Mboolem Leween ña Musaa ak Aaróona, ak kilifay Israyil limoon, na ñu bokke seeni làng, ak seen kəri maam, ⁴⁷ dale ko ci ñi am fanweeri at, ba juróom fukki at, ñuy mboolem ña yellow bokk ci kurél, gi liggéeyu xaymab ndaje mi war, ⁴⁸ seenub lim nekk na juróom ñetti junni

ak juróomi téeméer ak juróom ñett fukki góor (8 580). ⁴⁹ Ci ndigalal Aji Sax ji Musaa jottli, lañu leen lim, ba sas ku ci nekk ab liggéeyam ak la muy gáddu. Na ko Aji Sax ji sante Musaa, na lañu leen lime.

5

Sàrtal nañu doxalin yiy setal dal bi

¹ Aji Sax ji waxati Musaa, ne ko: ² «Santal bànni Israyil ñu génne dal bi képp ku ànd ak jàngoroy der juy law, mbaa jàngoroy xelli, ak képp ku sobeb néew bu mu laal, topp. ³ Muy góor, di jigéen, génneleen leen. Bitib dal bi ngeen leen di génne. Buñu sobeel dali bànni Israyil yi ma mākkaanoo ci seen biir.»

⁴ Bànni Israyil def noonu, daldi leen génne dal bi, dàq leen ca bitii. Ni ko Aji Sax ji waxe Musaa, noonu lañu ko defe.

⁵ Aji Sax ji waxati Musaa, ⁶ ne ko mu wax bànni Israyil, ne leen: «Muy góor, di jigéen, bu tooñee moroomam, ba fecci wormay Aji Sax ji, nit kooku tooñ na. ⁷ Day tuub bàkkaaram, ba noppi fey dayo ba mu ameel ka mu tooñ. Te juróomeelu xaajam la cay teg, jox ko ko. ⁸ Bu ki ñu tooñ wuutee, te amul mbokk mu koy jotaat, pey ga ñeel na Aji Sax ji, sarxalkat bee koy jagoo, te bokkul ak kuuyum njotlaay, mi sarxalkat biy defale ki tooñ, njotlaayam. ⁹ Te itam bépp jooxe bu bokk ci mboolem sarax yu sell, yi bànni Israyil indil sarxalkat bi, sarxalkat bee koy moom. ¹⁰ Ku nekk ci sarxalkat yi, sa sarax yu sell, yaa ko moom. Ku ci nekk, li ñu la jox, yaay boroom.»

Lu jëm ci jigéen ju moy

¹¹ Aji Sax ji waxati Musaa, ¹² ne mu wax bànni Israyil, ne leen: «Képp ku jabaram moy, fecci ko worma, ¹³ bu ñu àndee ak ndaw si, te moom miy jëkkëram yégu ko; te ba ndaw say sobeel boppam, fekkeesu ko fa ba di ko seede; ¹⁴ ndegam xelum fiiraangee dikkal waa ji, ba mu fiire jabaram, te fekk jabar jaa sobeel boppam ci njaaloo, mbaa muy fiiraange gu dikkal waa ji rekk, mu fiire jabaram, te fekk ndaw si sobeelul boppam ci njaaloo; ¹⁵ na waa ji yóbbu jabaram ca sarxalkat ba, te yóbbaleel ko saraxu ñetti kiloy sungufu lors. Du ci sotti diw, du ci def cuuraay, ndax saraxu pepp boobu saraxu fiiraange la, saraxu toppukaay la bu ñuy toppe ñaawtéef.

¹⁶ «Na sarxalkat bi indi ndaw si, taxawal ko fi kanam Aji Sax ji. ¹⁷ Su ko defe sarxalkat bi day fab ndabal xandeer, duy ko ndox mu sell mi ñuy setloo, te na sàkk ci suufas jaamookaay bi, def ko ci ndox mi. ¹⁸ Bu taxawloo ndaw si fi kanam Aji Sax ji, na muri boppu ndaw si, te teg ciy

loxoom, saraxu pepp boobu di toppukaayu ñaawtéef te di saraxu fiiraange. Na fekk sarxalkat bi yore ciy loxoom ndoxum wextan, miy alage. ¹⁹ Su ko defee sarxalkat bi waatloo ndaw si, ne ko: “Ndegam góor àndul ak yaw, moyuloo, sobeel sa bopp te fekk la ci buum, muccal ci loraangey ndoxum wextan mii, di alage. ²⁰ Waaye su dee yaa moy te fekk la ci sa buumu jëkkër, su dee yaa sobeel sa bopp ak geneen góor gu ànd ak yaw te du sa jëkkër nag...” ²¹ Fii la sarxalkat biy waatloo ndaw si waatu alkànde gi, wax ko ne ko: “...yal na la Aji Sax ji def ku alku ku ñuy móoloo ci sa biir askan. Yal na laxal sa njurukaay, wal sab koll. ²² Yal na ndoxum alkànde mii tàbbi ci say butit, laxal sa njurukaay, wal sab koll.” Su ko defee ndaw si ne: “Amiin, Amiin.”

²³ «Na sarxalkat bi bind kàdduy alkànde yooyu cib taxañu bindukaay, te na raxas mbind mi ci ndoxum wextan mi. ²⁴ Sarxalkat bi day naanloo ndaw si ndoxum wextan, miy alage, ndox miy alage tàbbi ci biiram, man koo wex xàtt. ²⁵ Waaye na jëkka nangoo ci loxol ndaw si, peppum saraxu fiiraange bi, daldi yékkati saraxas pepp mi, jébbale ko fi kanam Aji Sax ji, doora indi sarax bi ci sarxalukaay bi. ²⁶ Na sarxalkat bi sàkk ci saraxu pepp bi, ab nǽb buy fàttlee, daldi koy lakk ci kaw sarxalukaay bi. Gannaaw loolu mu naanloo ndaw si ndox mi.

²⁷ «Bu ko xasee naanloo ndox mi, ndegam ndaw see sobeel boppam, wor jëkkëram, ndoxum alkànde mi day tàbbi ci biiram, jural ko wextan, koll bi newi, njurukaayam lax, mu mujj doon ku ñuy móoloo ci biir askanam. ²⁸ Waaye su ndaw si sobeelul boppam, xanaa di ku set, dina mucc, te dina mana am doom.

²⁹ «Loolooy dogalu yoon ci mbirum fiiraange, bu jigéen moyee, sobeel boppam te fekk buum ci baatam, ³⁰ mbaa jëkkër ju xelum fiiraange dikkal, mu fiire jabaram. Jabar ji lay taxawloo fi kanam Aji Sax ji, sarxalkat bi defal ko mboolem dogalu yoon boobu. ³¹ Deesul topp jëkkër ji genn tooñ, waaye jabar jeey gàddu ñaawtéefu boppam.»

6

Lii moo war ku séddoo Aji Sax ji

¹ Aji Sax ji waxati Musaa, ² ne ko mu wax bànni Israyil ne leen: «Góor ak jigéen, képp ku ci dogu ba xas xasu doon ab nasireen*, ngir sédd boppam Aji Sax ji, ³ muy biin, di ñoll wu mu mana doon, na séddoo di ko moyu. Bineegaru biin ak bineegaru ñoll wu mu mana doon it, du

ko naan. Mboolem luy ndoxum reseñ, du ko naan, te reseñ ju tooy ak ju wou it, du ko lekk. ⁴ Mboolem diiru fani céddoom, mboolem lu jóge ci doomu garabu reseñ, dale ci xoox ba ci der, du ci lekk lenn.

⁵ «Kemu fani céddoo yi mu xas ne dina ko nasireenal, saatus watakaay du laal boppam ba keroog fani nasireenal, yi mu séddoo Aji Sax ji matee. Ku sell lay doon te day jañu. ⁶ Kemu fan yi muy nasireenal, séddoo Aji Sax ji, ab néew, bumu ko jege. ⁷ Baayam ak ndeyam, mbaa góor mbaa jigéen ju mu bokkal waajur sax, bu deeyee, du sobeel boppam ngir ñoom, ndax moo yenu ci kaw boppam, njañu nasireen gi mu séddoo Yàllaam. ⁸ Kemu fani céddoom, ku sell lay doon, ñeel Aji Sax ji.

⁹ «Su nit jekkee dee ci wetam, ba sobeel njañu céddoom, keroog bés buy setlu ca lay watu, te keroog bés sub juróom ñaareel ba lay watu. ¹⁰ Bés ba ca topp, di juróom ñetteel ba, na yóbbu ca sarxalkat ba, ñaari pitax mbaa ñaari xati yu ndaw, ca bunt xaymab ndaje ma. ¹¹ Sarxalkat bi day def menn mi saraxu póotum bàkkaar, mi ci des saraxu rendi-dóomal, mu jote ko boroom céddoo gi, bàkkaaram ba ko néew ba yóbbe. Bés sub keroog lay sellalaat boppam ba yenu woon njañam. ¹² Day yeesalal Aji Sax ji nasireenam ga mu ko séddoo woon, kemu fan ya mu xasoona nasireenal. Su ko defee day indi xarum menn at, def ko saraxas peyug tooñ. Fan yi mu jëkkoona nasireenal day neen, ndax nasireen googa moo sobewu.

¹³ «Dogalu yoon wi ci ab nasireen nag mooy lii: Bés bi ag céddoom matee, dees koy yóbbu ca bunt xaymab ndaje ma. ¹⁴ Sarax si muy sarxalsi Aji Sax ji di menn xarum menn at mu amul sikk, ngir rendi-dóomal, ak menn xarum menn at mu jigéen mu amul sikk, ngir póotum bàkkaar, ak menn kuuy mu amul sikk, ngir saraxas cant ci biir jàmm, ¹⁵ ak pañeb mburu yu amul lawiir, yu ñu lakke sunguf su mucc ayib su ñu xiiwaale ag diw, ak mburu yu sew yu amul lawiir yu ñu wis ag diw, ak saraxi peppam ak saraxi tuuroom ya muy àndal.

¹⁶ «Su ko defee sarxalkat bi boole ko indi fi kanam Aji Sax ji, daldi joxe póotum bàkkaar bi, ak rendi-dóomal bi. ¹⁷ Kuuy mi, na ko sarxalkat bi def saraxas cant ci biir jàmm, ñeel Aji Sax ji, boole kook pañeb mburu mi amul lawiir, doora joxe saraxi pepp yeek, saraxi tuuru yi. ¹⁸ Su ko defee nasireen bi watu ci bunt xaymab ndaje mi te for kawari céddoom googu, def ko ci taal, bi ci suufu saraxas cantu biir jàmm bi.

* 6:2 6.2 nasireen: Baat bii jotewul dara ak nasaraan, tur wi ñuy wooye waa sowub jant.

¹⁹ «Na sarxalkat bi jël tànku kanamu kuuy mi, gannaaw bu ñoree, te sàkk ci pañe bi menn mburu mu amul lawiir, ak menn mburu mu ndaw, daldi boole loola teg ci lboxul nasireen bi, gannaaw bu wattoo ba noppi.

²⁰ «Na sarxalkat bi jébbale loola, defal ko Aji Sax ji saraxu yékkati-jébbal. Cér yu sell a ngoogu ñeel sarxalkat bi, mu boole kook dënn biy saraxu yékkati-jébbal, ak jooxeb tánkub kanam bi. Gannaaw loolu nasireen bi sañ naa naan biññ.

²¹ «Loolooy wartéef ci ab nasireen bu xas. Loolooy saraxam bi mu warlook Aji Sax ji cig céddoom, te bokkewul ak leeneen lu mu ci áttan; waaye kádduy xas wa mu xasoon daal, na sàmmonteeek moom ni ko yoon diglee ci céddoom googu.»

Gii ñaan moo war ci askan wi

²² Gannaaw loolu Aji Sax ji waxati Musaa, ne; ²³ «Waxal Aaróona aki doomam ne leen ni ñuy ñaanale bànni Israyil, nii la; nañu leen wax ne leen:

²⁴ «Yal na la Aji Sax ji barkeel, sàmm la.

²⁵ «Yal na la Aji Sax ji geesoo leeram, baaxe la.

²⁶ «Yal na la Aji Sax ji siggil, jàmmal la.»

²⁷ Bu ñu tuddalee noonu bànni Israyil sama tur, man, maa leen di barkeel.»

7

Daloob jaamookaay bi laaj nay sarax

¹ Keroog ba Musaa sampee jaamookaay bi ba noppi, diw na ko ngir sellal ko, mook mboolem ay juntuukaayam, sarxalukaay beek mboolem ndabam it, mu boole diw, sellale ko. ² Ba loolu amee kilifag Israyil yi jiite seeni kër maam dikk. Ñooñoon doon njiiti giir yi te ñoo doon saytu limeefu nit ñi. ³ Ñu indil Aji Sax ji seen sarax, muy juróom benni watiir ak fukki nag ak ñaar; ñaari kilifa yu nekk, benn watiir; kilifa gu nekk, wenn nag, ñu yóbbu lépp fa kanam jaamookaay ba. ⁴ Aji Sax ji wax Musaa, ⁵ ne ko: «Nangul lii, mu jëm ci liggéeyu xaymab ndaje mi, te nga jox ko Leween ñi, ku ci nekk ak li liggéeyam laaj.»

⁶ Musaa nangu watiir yaak nag ya, jox Leween ñi. ⁷ Yii ñaari watiir ak ñeenti nag, mu jox Gersoneen ña, na ko seen liggéey laaje, ⁸ yee ñeenti, mu booleek juróom netti nag, jox Merareen ña, na ko seen liggéey laaje, ci njiital sarxalkat ba Itamar doomu Aaróona. ⁹ Keyateen ña nag, joxu leen, ndax yu sell ya lañu sasoo woona gáddu.

¹⁰ Ci biir loolu kilifa yi indi itam saraxu daloob sarxalukaay bi, keroog bés ba ñu koy diw. Ñu daldi joxe seeni sarax fi kanam sarxalukaay bi. ¹¹ Teewul Aji Sax

ji wax Musaa, ne ko: «Kilifa yiy joxesi seen sarax, yi jëm ci daloob sarxalukaay bi, nañu ko def bés bu nekk, kenn.»

¹² Ki joxe saraxam ci bés bu jékk bi, ñeel giirug Yuda, mooy Nason doomu Aminadab. ¹³ Ab saraxam di benn ndabu xaaalis bu diise téeméeri siikal ak fanweer, muy kilook liibar, ak benn këllu xaaalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp bi, ¹⁴ ak senn mbàttus wurus su fees ak cuuraay te diise fukki siikal, di téeméeri garaam ak fukk, ¹⁵ ak wenn yékk wu ndaw, ak menn kuuy, ak menn xarum menn at, ngir saraxu rendi-dóomal, ¹⁶ ak wenn sikket ngir saraxu póotum bàkkaar, ¹⁷ ak saraxas cant gi ci biir jàmm, di ñaari yékk ak juróomi kuuy ak juróomi sikket, ak juróomi xari menn at. Looloo doon saraxu Nason doomu Aminadab.

¹⁸ Bésuub ñaareel ba, kilifag Isakareen ña, Netanel doomu Suwar moo indi saraxam, ¹⁹ sarax ba mu indi di benn ndabu xaaalis bu diise téeméeri siikal ak fanweer, di kilook liibar, ak benn këllu xaaalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ²⁰ ak senn mbàttus wurus su fees ak cuuraay te diise fukki siikal, di téeméeri garaam ak fukk, ²¹ ak wenn yékk wu ndaw, ak menn kuuy, ak menn xarum menn at, ngir saraxu rendi-dóomal, ²² ak wenn sikket ngir saraxu póotum bàkkaar, ²³ ak saraxas cant gi ci biir jàmm, di ñaari yékk ak juróomi kuuy ak juróomi sikket, ak juróomi xari menn at. Looloo doon saraxu Netanel doomu Suwar.

²⁴ Bésuub ñetteel ba, kilifag Sabuloneen ña, Elyab doomu Elon moo aye, ²⁵ ab saraxam di benn ndabu xaaalis bu diise téeméeri siikal ak fanweer, muy kilook liibar, ak benn këllu xaaalis bu diise juróom ñaar fukki siikali bérab bu sell bi, di juróom ñetti téeméeri garaam, lu ci nekk fees ak sunguf su mucc ayib su ñu xiwaale ag diw, ngir saraxu pepp, ²⁶ ak senn mbàttus wurus su fees ak cuuraay te diise fukki siikal, muy téeméeri garaam ak fukk, ²⁷ ak wenn yékk wu ndaw, ak menn kuuy, ak menn xarum menn at, ngir saraxu rendi-dóomal, ²⁸ ak wenn sikket ngir saraxu póotum bàkkaar, ²⁹ ak saraxas cant ci biir jàmm, di ñaari yékk ak juróomi kuuy ak juróomi sikket, ak juróomi xari menn at. Looloo doon saraxu Elyab doomu Elon.

³⁰ Bésuub ñeenteel ba kilifag Rubeneen ña, Elisur doomu Sedeyur moo aye, ³¹ ab

saraxam di benn ndabu xalis bu diise tééméeri siikal ak fanweer, di kilook liibar, ak benn këllu xalis bu diise juróom ñaar fukki siikali bérab bu sell bi, di juróom ñetti tééméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ³² ak senn mbàttus wurus su fees ak cuuraay te diise fukki siikal, muy tééméeri garaam ak fukk, ³³ ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, ³⁴ ak wenn sikket ngir saraxu póotum bàkkaar, ³⁵ ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Elisur doomu Sedeyur.

³⁶ Bésub juróomeel ba kilifag Cimyoneen ña, Selumyel doomu Surisadaay moo aye, ³⁷ ab saraxam di benn ndabu xalis bu diise tééméeri siikal ak fanweer, di kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti tééméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ³⁸ ak senn mbàttus wurus su fees ak cuuraay te diise fukki siikal, muy tééméeri garaam ak fukk, ³⁹ ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, ⁴⁰ ak wenn sikket ngir saraxu póotum bàkkaar, ⁴¹ ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Selumyel doomu Surisadaay.

⁴² Bésub juróom benneel ba kilifag Gàddeen ña, Elyasaf doomu Dewel moo aye, ⁴³ ab saraxam di benn ndabu xalis bu diise tééméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti tééméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ⁴⁴ ak senn mbàttus wurus su fees ak cuuraay te diise fukki siikal, muy tééméeri garaam ak fukk, ⁴⁵ ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, ⁴⁶ ak wenn sikket ngir saraxu póotum bàkkaar, ⁴⁷ ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Elyasaf doomu Dewel.

⁴⁸ Bésub juróom ñaareel ba kilifag Efraymeen ña, Elisama doomu Amiyut moo aye, ⁴⁹ ab saraxam di benn ndabu xalis bu diise tééméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti tééméeri

garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ⁵⁰ ak senn mbàttus wurus su fees ak cuuraay te diise fukki siikal, muy tééméeri garaam ak fukk, ⁵¹ ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, ⁵² ak wenn sikket ngir saraxu póotum bàkkaar, ⁵³ ak saraxas cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Elisama doomu Amiyut.

⁵⁴ Bésub juróom ñetteel ba kilifag Manaseen ña, Gamalyel doomu Pedasur moo aye, ⁵⁵ ab saraxam di benn ndabu xalis bu diise tééméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti tééméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ⁵⁶ ak senn mbàttus wurus su fees ak cuuraay te diise fukki siikal, di tééméeri garaam ak fukk, ⁵⁷ ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, ⁵⁸ ak wenn sikket ngir saraxu póotum bàkkaar, ⁵⁹ ak saraxu cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Gamalyel doomu Pedasur.

⁶⁰ Bésub juróom ñeenteel ba kilifag Beñamineen ña, Abidan doomu Gidoni moo aye, ⁶¹ ab saraxam di benn ndabu xalis bu diise tééméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti tééméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ⁶² ak senn mbàttus wurus su fees ak cuuraay te diise fukki siikal, di tééméeri garaam ak fukk, ⁶³ ak wenn yëkk wu ndaw, ak menn kuuy, ak menn xarum menn at, ngir saraxu rendi-dóomal, ⁶⁴ ak wenn sikket ngir saraxu póotum bàkkaar, ⁶⁵ ak saraxu cant gi ci biir jàmm, di ñaari yëkk ak juróomi kuuy ak juróomi sikket, ak juróomi xari menn at. Looloo doon saraxu Abidan doomu Gidoni.

⁶⁶ Bésub fukkeel ba kilifag Daneen ña, Ayeser doomu Amisadaay moo aye, ⁶⁷ ab saraxam di benn ndabu xalis bu diise tééméeri siikal ak fanweer, muy kilook liibar, ak benn këllu xalis bu diise juróom ñaar fukki siikali bérab bu sell bi, muy juróom ñetti tééméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ⁶⁸ ak senn mbàttus wurus su fees ak cuuraay te diise fukki siikal, di tééméeri garaam ak fukk, ⁶⁹ ak wenn yëkk wu ndaw, ak

menn kuuy, ak menn xarum menn at, ngir saraxu rendi-dóomal, ⁷⁰ ak wenn sikket ngir saraxu póotum bàkkaar, ⁷¹ ak saraxu cant gi ci biir jàmm, di ñaari yèkk ak juróomi kuuy ak juróomi sikket, ak juróomi xari menn at. Looloo doon saraxu Ayeser doomu Amisadaay.

⁷² Bésub fukkeel baak benn, kilifag Asereen ña, Pagyel doomu Okkran moo aye, ⁷³ ab saraxam di benn ndabu xalis bu diise téeméeri siikal ak fanweer, muy kilook liibar, ak benn kèllu xalis bu juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ⁷⁴ ak senn mbàttus wurus su fees ak cuuraay te diise fukki siikal, di téeméeri garaam ak fukk, ⁷⁵ ak wenn yèkk wu ndaw, ak menn kuuy, ak menn xarum menn at, ngir saraxu rendi-dóomal, ⁷⁶ ak wenn sikket ngir saraxu póotum bàkkaar, ⁷⁷ ak saraxu cant gi ci biir jàmm, di ñaari yèkk ak juróomi kuuy ak juróomi sikket, ak juróomi xari menn at. Looloo doon saraxu Pagyel doomu Okkran.

⁷⁸ Bésub fukkeel baak ñaar kilifag Nef-taleen ña, Ayra doomu Enan moo aye, ⁷⁹ ab saraxam di benn ndabu xalis bu diise téeméeri siikal ak fanweer, muy kilook liibar, ak benn kèllu xalis bu diise juróom ñaar fukki siikali bérab bu sell bi, muy juróom ñetti téeméeri garaam, lu ci nekk fees ak sunguf su mucc ayib su ñu xiiwaale ag diw, ngir saraxu pepp, ⁸⁰ ak senn mbàttus wurus su fees ak cuuraay te diise fukki siikal, di téeméeri garaam ak fukk, ⁸¹ ak wenn yèkk wu ndaw, ak menn kuuy, ak menn xarum menn at, ngir saraxu rendi-dóomal, ⁸² ak wenn sikket ngir saraxu póotum bàkkaar, ⁸³ ak saraxu cant gi ci biir jàmm, di ñaari yèkk ak juróomi kuuy ak juróomi sikket, ak juróomi xari menn at. Looloo doon saraxu Ayra doomu Enan.

⁸⁴ Loolooy saraxi daloob sarxalukaay ba, ca bés ba ñu koy diw, sellal ko, lépp bawoo ca kilifay Israyil. Ndabi xalis ya fukk laak ñaar, kèlli xalis ya di fukk ak ñaar, bàttuy wurus ya di fukk ak ñaar, ⁸⁵ ndabal xalis lu nekk di téeméeri siikal ak fanweer, di kilook liibar, kèll bu nekk di juróom ñaar fukki siikal, di juróom ñetti téeméeri garaam, mboolem xalisu jumtukaay yi di ñaari junniy siikali bérab bu sell bi ak ñeenti téeméer (2 400), di ñaar fukki kilook juróom ñaar ak juróomi téeméeri garaam (27 500). ⁸⁶ Fukki bàttuy wurus yi feese cuuraay, mbàttu su ci nekk fukki siikali bérab bu sell bi la, di téeméeri garaam ak fukk (110), mboolem wurusu bàttu yi di téeméeri siikal ak ñaar fukk

(120), muy kilo ak ñetti téeméeri garaam (1 300). ⁸⁷ Mboolem nagi saraxu rendi-dóomal yi, fukki yèkk yu ndaw ak ñaar la, kuuy yi di fukk ak ñaar, xari menn at yi di fukk ak ñaar, ñand ak seen saraxi pepp, sikketi saraxu póotum bàkkaar bi di fukk ak ñaar. ⁸⁸ Mboolem nagi saraxu cantu biir jàmm yi, ñaar fukki yèkk yu ndaw ak ñeent la, kuuy yi di juróom benn fukk, sikket yi di juróom benn fukk, xari menn at yi di juróom benn fukk. Loolooy saraxi daloob sarxalukaay ba, gannaaw ba ñu ko diwee, sellal ko.

⁸⁹ Bu Musaa duggaan ca biir xaymab ndaje ma, ngir wax ak Aji Sax ji, day dégg baat ba di wax ak moom, bawoo fa tiim kubeeru gaalu seedes kóllère ga, ca diggante ñaari serub ya. Noonu la daan waxeek moom.

8

Lu jëm ci teginu lãmp ya

¹ Aji Sax ji waxati Musaa ne ko, ² mu wax Aaróona, ne ko: «Buy teg lãmp yi, fa féete tegukaayu lãmp ba kanam, fa la juróom ñaari lãmp ya wara niite.» ³ Noonu la Aaróona def. Fa féete tegukaay ba kanam, fa la féetale ay lãmpam, muy la Aji Sax ji santoon Musaa. ⁴ Tegukaayu lãmp bi nag, ni ñu ko liggéeye nii la. Wurus lañu ko tégge ba mu jekk, dale ko ci tãnk bi, ba ci mbar mi. Noonee ko Aji Sax ji wone woon Musaa, na lañu liggéeye tegukaayu lãmp ba.

Lu jëm ci cetlug Leween ñi

⁵ Aji Sax ji waxati Musaa ne ko, ⁶ «Nanga jële Leween ñi ci biir bànni Israyil te nga setluloo leen. ⁷ Ni ngay def ngir setluloo leen nii la: Danga leen di wis ndoxum setlu, ba noppi ñu wat seen yaram wépp, fóot seeni yére, daldi set. ⁸ Su ko defee ñu jël aw yèkk wu ndaw, booleek saraxu peppam, di sunguf su mucc ayib su ñu xiiwaale ag diw, ak weneen yèkk wu ndaw wooy jël ngir saraxu póotum bàkkaar. ⁹ Indil Leween ñi ci kanam xaymab ndaje mi, te nga dajale mbooloom bànni Israyil mépp. ¹⁰ Boo indee Leween ñi fi kanam Aji Sax ji, bànni Israyil daldi teg seeni loxo ci kaw Leween ñi. ¹¹ Su ko defee Aaróona taxawal Leween ñi taxawaayu saraxu yékkati-jébbal fi kanam Aji Sax ji, muy sarax bu bawoo ci bànni Israyil, Leween ñi daldi sasoo di liggéey liggéeyu Aji Sax ji. ¹² Leween ñi ñoom, nañu teg seeni loxo ci kaw boppi yèkk yi, ñu def wenn wi saraxu póotum bàkkaar, te def wi ci des ab rendi-dóomal, ñeel Aji Sax ji, ngir njotlaayal Leween ñi. ¹³ Gannaaw loolu ngay taxawal Leween ñi fi kanam Aaróona ak doomam yu góor, daldi leen

def saraxu yékkati-jébbal, ñeel Aji Sax ji. ¹⁴ Noonu ngay seppée Leween ñi ci biir bànni Israyil, Leween ñi doon sama cér. ¹⁵ Gannaaw loolu la Leween ñiy doora dugg ci liggéeyu xaymab ndaje mi. Danga leen di jékka setlloo, ba noppi def leen saraxu yékkati-jébbal. ¹⁶ Ñoom déy lañu ma sédda sédd ci biir bànni Israyil, ñu wuutu mboolem luy ubbiteg njur, di taawi mboolem bànni Israyil. Maa leen sédd sama bopp. ¹⁷ Ndax man maa séddoo mboolem taaw ci biir bànni Israyil, nit ak mala. Keroog ba ma fáddee mboolem taaw ca réewum Misra, ca laa leen sellalal sama bopp.

¹⁸ «Maa jël Leween ñi, weccikoo leen bépp taaw ci biir bànni Israyil, ¹⁹ te itam maa jukkee Leween ñi ci bànni Israyil, maa leen yékkati, jox leen Aaróona aki doomam, ngir ñu liggéey liggéeyu bànni Israyil ci wàllu xaymab ndaje mi, di defal bànni Israyil seenug njotlaay, ngir bu bànni Israyil jegee bérab bu sell bi it, du tax menn mbas am ci seen biir.»

²⁰ Ba loolu amee Musaa ak Aaróona ak mbooloom bànni Israyil mépp daldi defal Leween ñi noonu. Mboolem lu Aji Sax ji santoon Musaa ci Leween ñi, noona la ko bànni Israyil defe ak ñoom. ²¹ Leween ñi setlu, fóot seeni yéree, Aaróona def leen ni saraxu yékkati-jébbal, ñeel Aji Sax ji. Mu defal leen nag seen njotlaay ngir setal leen. ²² Gannaaw loolu Leween ñi doora liggéeyi seen liggéey ci wàllu xaymab ndaje mi, ci kiliftefu Aaróona aki doomam. Noonee ko Aji Sax ji sante woon Musaa ci Leween ñi, na lañu def ak ñoom.

²³ Aji Sax ji waxati Musaa, ne: ²⁴ «Lii nag moo war ci Leween ñi: ku ci am ñaar fukki at ak juróom, jëm kaw, yelloo naa bokk ci kurel, gi liggéeyu xaymab ndaje mi war. ²⁵ Waaye ku xasa am juróom fukki at, na génn kurel gi boobu liggéey war, te bumu ca liggéeyati. ²⁶ Sañ naa jàpple bokki Leweenam ñi dénkoo dénkaneey xaymab ndaje mi, waaye dootu ci liggéeyi lenn. Noonu ngay def ak Leween ñi, ci seen wàlli dénkane.»

9

Lu jëm ci mággalu bésuub Mucc

¹ Aji Sax ji wax na Musaa ca màndinj Sinayi, ca seen atum ñaareel, gannaaw ba ñu génnee réewum Misra ca weer wa jékk. Mu ne ko: ² «Na bànni Israyil di mággal bésuub Mucc ba, saa yu jotee.

³ «Fukki fan ak ñeent ci weer wii, diggante ngoon ak jant bu so, ci ngeen koy mággal, saa yu jotee. Na mu dèppook mboolem dogali yoonam ak àttey yoonam, nangeen ko mággale noonu.»

⁴ Musaa nag sant bànni Israyil ne leen ñu mággal bésuub Mucc bi. ⁵ Ñu daldi mággal bésuub Mucc bi ci weer wi jékk, fukki fanam ak ñeent, diggante ngoon ak jant bu so, ca màndinj Sinayi. Noonee ko Aji Sax ji sante woon Musaa, na la ko bànni Israyil defe.

⁶ Ci biir loolu mu am ay nit ñu ab néew tax ñu sobewu, ba manuño mággal bésuub Mucc bi bésuub keroog. Ñu dikk ba ci Musaa ak Aaróona ca bés ba. ⁷ Nooñu nag ne Musaa: «Nun de, danoo sobewu ndax ab néew, waaye lu nu teree joxesi saraxu Aji Sax ji ci waxtoom, ci digg bànni Israyil?» ⁸ Musaa ne leen: «Taxawleen, ba ma dégg lu Aji Sax ji di santaane ci seen mbir.»

⁹ Aji Sax ji ne Musaa: ¹⁰ «Waxal bànni Israyil ne leen, képp ku bokk ci yeen tey, mbaa mu bokk ci seen kuutaay èllég, su sobewoo ndax ab néew, mbaa mu nekk ci yoon wu sore, du tere mu mággal bésuub Mucc bi ngir Aji Sax ji. ¹¹ Waaye ñaareelu weer wa, ca fukki fanam ak ñeent, diggante ngoon ak jant bu so, ca la koy mággal. Mburu mu amul lawiir ak xob yu wex lay booleek gattu sarax bi, lekk ko. ¹² Bumu ci wacc dara mu fanaan, te benn yax, bumu ko ci damm. Na mu dèppook mboolem dogali yooni bésuub Mucc, na ko mággale noonu. ¹³ Ku set nag te nekkul ciw yoon, su ñakkee mággal bésuub Mucc bi, kooku dees koy dagge ciw askanam, ndax saraxu Aji Sax ji mu joxewul ci bésam. Kooku moo gaddu bàkkaaruu boppam.

¹⁴ «Su dee ab doxandéem bu ngeen dëkkal, sañ naa mággal bésuub Mucc bi ñeel Aji Sax ji. Na mu dèppook mboolem dogali yooni bésuub Mucc, ak àttey yoonam, ni la koy mággale; benn dogal bi lay doon ci yeen, muy doxandéem bi, di njuddu-ji-réew.»

Aji Sax ji yiir na xaymab ndaje ma

¹⁵ Keroog bés ba ñu sampee mákkaan ma, niir wa daa muur mákkaanu xaymab seede sa. Ca ngoon sa lu mel ni sawara tiim mákkaan ma, ba ca èllég sa. ¹⁶ Noonu la ko niir wa jàppoo muure, bu guddee mu mel ni sawara. ¹⁷ Fu niir wa masa bàyyikoo fa tiim xayma ba, bànni Israyil day fabu topp ko, te fépp fu niir wa masa dale, fa la bànni Israyil di fakk ab dal. ¹⁸ Ci kàddug Aji Sax ji la bànni Israyil daan faboo, ci kàddug Aji Sax ji lañu daan dale, te mboolem fan ya niir way dal, tiim mákkaan ma, ñoom it dañuy dal. ¹⁹ Su niir wa yággee ca kaw mákkaan ma it, ak lu fan ya bare bare, bànni Israyil a ngay dénkoo dénkaneey Aji Sax ji, waaye duñu dem. ²⁰ Leeg-leegaa fan yu néew la niir way dal-lu fa tiim mákkaan

ma. Waaye ci kàddug Aji Sax ji daal, lañuy dale te ci kàddug Aji Sax ji lañuy faboo. ²¹ Leeg-leegaa it niir wa dal-lu ag ngoon, fanaan, ba bêt set, mu sàqi, ñu fabu ànd ak moom. Muy guddi, di bëccëg, bu niir wa jógea, rekk, ñu fabu. ²² Su doon ñaari fan, su doon weer, mbaa ay fani fan la niir wa taxaw tiim màkkaan ma, des fa it, bànni Israyil dañuy dal, waaye duñu dem. Bu jógee rekk lañuy fabu. ²³ Ci kàddug Aji Sax ji lañu daa dale, ci kàddug Aji Sax ji lañu daa faboo. Dénkaaney Aji Sax ji daal lañuy dénkoo, ci kàddug Aji Sax, ji Musaa di jottli.

10

Lu jëm ci liiti xaalís ya

¹ Aji Sax ji waxati Musaa, ne: ² «Sàkklul ñaari liiti xaalís. Lu ñu tégglu ba mu jekk nga koy def. Liit yi ngay wootee am ndaje, di ko yékkatee dal yi. ³ Bu ñu liitee ñaar yépp, mbooloo mépp ay dajesi fi yaw, ci bunt xaymab ndaje mi. ⁴ Bu ñu liitee benn nag kilifa yi jiitee gàngoori Israyil ñoo dajesi fi yaw. ⁵ Su ñu liitee menn riirum liit mu xumb, dal yi dale penku ñoo fabu. ⁶ Su ñu liitee riirum liit mu xumb, ñaareel bi yoon, dal yi dale bëj-saalum ñoo fabu. Riirum liit mu xumb mooy tegtale seeni fabu. ⁷ Bu dee wooteb ndaje nag, dees koy liit waaye du doon riir mu xumb. ⁸ Na doomi Aaróona sarxalkat yi di wal liit yi, te mu doon dogal bu leen saxal dàkk, ci seen maasoo maas.

⁹ «Bu loolu wéyee, bu ngeen dee xare ci seenum réew, ak noon bu leen songsi, nangeen riiral liit yi riir mu xumb, su boobaa dees na leen bëyyi xel fa seen kanam Yàlla Aji Sax ji, ba wallu leen ak seeni noon. ¹⁰ Seen bési mbég itam, muy seen bési màggal, di seen ndoortel weer, nangeen ciy riiral liit yi riir mu xumb, yéenee ko seen saraxi rendi-dóomal, ak seen saraxi cant ci biir jàmm. Riirum liit yooyu mooy doon seen baaxantal fa seen kanam Yàlla. Maay seen Yàlla, Aji Sax ji.»

Bànni Israyil sàqee nañu tundu Sinayi

¹¹ Ca ñaareelu at ma, gannaaw ba bànni Israyil génnée Misra, ca ñaareelu weer wa, keroog ñaar fukkeelu fanam, ca la niir wa bëyyikoo fa tiim màkkaanu seedes kóllère ga. ¹² Bànni Israyil daldi sumb seen yooni tukki ya, bëyyikoo màndinj Sinayi. Ci kaw loolu niir wa daleji ca màndinj Paran.

¹³ Booba lañu jékka fabu ci kàddug Aji Sax ji, Musaa jottli. ¹⁴ Raayab dalu Yudeen ña moo jékka jóg, ànd aki gàngooram, njiital gàngooru Yuda di Nason doomu Aminadab, ¹⁵ njiital gàngooru Isakareen ña di Netanel doomu Suwar, ¹⁶ njiital

gàngooru Sabuloneen ña di Elyab doomu Elon.

¹⁷ Ci biir loolu ñu wékki jaamookaay ba, Gersonen ñaak Merareen ñay gàddu jaamookaay ba daldi dem.

¹⁸ Raayab dalu Rubeneen ña jóg ànd aki gàngooram, topp ca, njiital gàngooru Rubeneen ña di Elisur doomu Sedeyur, ¹⁹ njiital gàngooru Cimiyoneen ña di Selumyel doomu Surisadaay, ²⁰ njiital gàngooru Gáddeen ña di Elyasaf doomu Dewel.

²¹ Gannaaw loolu Keyateen ñay gàddu yéf yu sell ya, ñoo fabu, topp ca. Bala ñoo àgg fa ñuy dalewaat nag, day fekk jaamookaay ba sampewaat.

²² Ci kaw loolu raayab dalu Efraymeen ña jóg, ànd ak seeni gàngoor, topp ca, njiital gàngooru Efraymeen ña di Elisama doomu Amiyut, ²³ njiital gàngooru Manaseen ña di Gamalyel doomu Pedasur, ²⁴ njiital gàngooru Beñamineen ña di Abidan doomu Gidoni.

²⁵ Ba mu ko defee raayab dalu Daneen ña doora jóg, topp ca gannaaw kurél yépp, ànd aki gàngooram, njiital gàngooru Daneen ña di Ayeser doomu Amisadaay, ²⁶ njiital gàngooru Asereen ña di Pagyel doomu Okkran, ²⁷ njiital gàngooru Nef-taleen ña di Ayra doomu Enan.

²⁸ Noonu la bànni Israyil topplante, ànd ak seeni gàngoor, tegu ca yoon wa.

Bànni Israyil jóge nañu Sinayi

²⁹ Ba loolu amee Musaa wax ak Obab doomu Ruwel waa Majan ba, baayu sox-naam, ne ko: «Nu ngi nii jëm fa nu Aji Sax ji wax ne moom lanuy jox. Kaay nu ànd, dem, nu baaxe la, ndax Aji Sax ji moo digee baaxe Israyil.»

³⁰ Mu ne ko: «Déedéet, duma dem, samam réew kay laa jëm, ca saay bokk.»

³¹ Mu ne ko: «Bu nu wacc kay, ndax gannaaw yaa xam fu nu wara dal ci màndinj mi, yaa nu wara jiite. ³² Soo àndeek nun déy, xéewal googa nu Aji Sax jiy baaxeji, dinanu la ci baaxe.»

³³ Ci kaw loolu ñu bëyyikoo ca tundu Aji Sax ja, doxe fa doxub ñetti fan. Gaalu kóllèrey Aji Sax jaa nga leen jiitu diiru ñetti fan ña, di leen wutal dal-lukaay. ³⁴ Niiru Aji Sax ji nag di leen yiir bëccëg bu nekk, saa yu ñu bëyyikoo ab dal.

³⁵ Bu gaal ga jógaan, Musaa da naan: «Jógaloo, Aji Sax ji, say noon félxoo, say bañ daw la.»

³⁶ Bu gaal ga dalee, Musaa ne: «Dikkaloo Aji Sax ji boroom ndiiraani junniy Israyil.»

11

Bànni Israyil ñaxtu nañu

¹ Mboooloo ma nag mujj di tawat ab coono fi kanam Aji Sax ji. Aji Sax ji dégg ci, am sànjam tàkk, sawaras Aji Sax ji tàkkal leen, ba xoyom la wër dal ba. ² Mboooloo ma jooy ko Musaa, Musaa tinu Aji Sax ji, sawara wa fey. ³ Ñu tudde bérab boobu Tabera (mu neexook Tàkkaan), ndax sawaras Aji Sax ji leen fa tàkkal.

⁴ Ci biir loolu genn gàngooru njaxasaan mu nekkoon ca seen biir jiital seen bakkan, di ñaf-ñafi, ba tax bànni Israyil itam dellu di jàmbat. Ña nga naan: «Éy ku nuy leelatiw yàpp! ⁵ Namm nan jèn ya nu daa ndawaloo ca Misra, te dikkewu nu tus! Ak yomb jaak xaal jaak pooro baak soble saak laaj ja! ⁶ Tey jii sunu put yaa ngi wow kojñ, gisunu lenn lu moy mànn*!»

⁷ Mànn ma nag daa meloon ni pepp mi ñuy wax koryanda, te nirook ndàbbu garab gi ñuy wax bedola. ⁸ Mboooloo ma da daan wër, di ko for, di ko wole doji wolukaay, mbaa ñu di ko débba ciy gënn, ba ñoppi baxal ko ci cin, def ko ay mburu yu cafrikaam mel ni cafkay nàkk yu am niw. ⁹ Bu layaa ca dal ba ag guddi, mànn ma day wàccaale ak moom.

¹⁰ Ci biir loolu Musaa dégg mboooloo miy ñaxtu, làng ak làng, ku nekk ci sa bunt xayma. Ba loolu amee sànjum Aji Sax ji tàkk jippét, Musaa nag ñaawlu ko. ¹¹ Ba mu ko defee Musaa ne Aji Sax ji: «Aji Sax ji, loo may mititale, Sang bi? Lu tee nga baaxe ma, xanaa ngay teg séfub mii mboooloo mépp ci sama kaw? ¹² Xanaa maa èmb mii mboooloo mépp, am maa leen jur, ba nga di ma leen bootloo fàpp, ni jaboot di boote luy nàmp, jème leen réew, ma nga giñaloon seeni maam? ¹³ Ana fu may jële yàpp wu ma jox mii mboooloo mépp, ba ñuy jooy nii ci sama kaw, naa ma: “Jox nu yàpp wu nu lekk?” ¹⁴ Manumaa boot mii mboooloo mépp, man donj, ndax àttanuma ko. ¹⁵ Su dee nii ngay def ak man nag, dimbali ma rekk, rey ma ba ma dee, ndax ma baña gis sama toskare.»

Aji Sax ji dig na Musaa ñu ko jàpple

¹⁶ Ba mu ko defee Aji Sax ji dafa wax Musaa, ne ko: «Dajaleel ma juróom ñaar fukki magi Israyil, ñoo xamal sa bopp ne ñooy magi mboooloo mi, di seeni njiit, nga indi leen ci xaymab ndaje mi, ñu teew faak yaw. ¹⁷ Maay wàcc wax ak yaw foofa te maay sàkk ci leer gi ci yaw, def ko ci ñoom, ñu yenule la yenu mboooloo mi, ba dootuloo ko yenu yaw donj.

¹⁸ «Mboooloo ni nag, ne leen ñu sell-lu ngir èllég, te ne leen dinañu yàpp moos, gannaaw ñooy jooy ci kaw Aji Sax ji, naan

“Éy ku nuy leelatiw yàpp, nooka neexle woon ca Misra!” Kon nag Aji Sax jee leen di jox yàpp wu ñu lekk. ¹⁹ Du benn fan lañuy yàpp, du ñaar, du juróomi fan, du fukk, te du ñaar fukki fan. ²⁰ Weeru lèmm kay lañuy yàpp, ba yàpp wiy géne ci seen paxi bakkan, ba mujj génnliki leen, gannaaw ñoo xarab Aji Sax ji ci seen biir, di jooy ci kawam, naan: “Moo lu nu taxoona jóge Misra!”»

²¹ Ci kaw loolu Musaa ne: «Áa! Juróom benni téeméeri junniy (600 000) góor a ngi ci mboooloo mii ma ne ci seen biir. Yaw nga ne aw yàpp nga leen di jox, ñu yàpp weeru lèmm! ²² Diggante jur gu gudd ak gu gátt, manees na leen cee rendil lu leen doy a? Am mbooleem jëni géeg lees leen di dajaleel, mu doy leen?»

²³ Aji Sax ji ne Musaa: «Loxol Aji Sax ji da koo jotewul? Léegi nag dinga gis ndax sama kàddu dina la sottil, am déet!»

Yalla sol na mag ña ag leeram

²⁴ Ci kaw loolu Musaa génn, jottli mboooloo ma kàdduy Aji Sax ji, daldi dajale juróom ñaar fukki góor ñu bokk ca magi mboooloo ma, taxawal leen, ñu wër xayma ba. ²⁵ Aji Sax ji nag wàcc ca biir niir wa, wax ak moom, daldi sàkk ca leer ga ca Musaa, sédd ca juróom ñaar fukki mag ña. Naka la leer ga dal ca seen kaw, ñu tàmbali di wax ay waxyu, benn yoon bu ñu tòllantiwul.

²⁶ Fekk na ñaari góor a nga desoon ca dal ba, kenn ka di Eldàdd, ka ca des di Medàdd, te teewul leer ga dal ca seen kaw, ndax dees leena limaale woon ca mag ña, doonte demuñu ca xayma ba. Ñoom it ñuy wax ay waxyu ca dal ba. ²⁷ Ab xale dawé ca, àgge ko Musaa, ne ko: «Eldàdd ak Medàdd déy a ngay wax ay waxyu ca dal ba!» ²⁸ Yosuwe doomu Nuun, ja dale doon bèkk-néegu Musaa cag ndawam, daldi cay àddu, ne: «Sang Musaa, aaye leen!» ²⁹ Musaa ne ko: «Fiiraangee la jàpp ndax man, am? Éy bu niti mboooloom Aji Sax ji mépp doon ay yonent, Aji Sax ji sol leen ag leeram!» ³⁰ Ba loolu amee Musaa dellu ca dal ba, moom ak magi Israyil ña.

Mbas wàcc na ca Kibbrot Taawa

³¹ Ba loolu amee ngelaw wale ci Aji Sax ji, daldi bàbbee ca géeg ga ay picci pèrèntaan, wàcce leen ca dal ba lu tollook doxub benn fan ci gii wet, ak doxub benn fan ca gee, ñu dajal dal ba bépp, jale ci suuf ba xawa mat ñaari xasab. ³² Ci kaw loolu mboooloo ma taxaw di for, bèccégub keroog bépp, ak guddi ga gépp, ak bèccégub èllég sa sépp, ba ka géna néewle, for lu mat fukki barigo. Ñu weer

* 11:6 11.6 Seetal ci *Mucc ga* 16.12-21.

pèrèntaan ya fa wër dal ba. ³³ Suux waa nga ca seeni gëñ, sàqameeguŋu sax, sànjum Aji Sax ji tàkkal mbooloo ma. Aji Sax ji dumaa mbooloo ma mbas mu metti lool. ³⁴ Moo tax ñu tudde bérab booba Kibbrot Taawa (mu firi Bàmmeeli ñaf-ñaf), ndax fa lañu denc néewi mbooloo ma doon ñaf-ñafi. ³⁵ Kibbrot Taawa la mbooloo ma bàyyikoo, jëm Aserot. Ñu dal nag ca Aserot.

12

Maryaama ak Aaróona jote nañook Musaa

¹ Maryaama ak Aaróona ñoo doon ñàññ Musaa, ci ndawas Kuuseen su mu takkoon, te ab Kuuseen it la takkoon.

² Ñu ne: «Ndax mennum Musaa donj la Aji Sax jiy waxe ci moom? Xanaa daa waxewul ci nun itam?» Aji Sax ji dégg ca. ³ Góor ga Musaa nag defoon ku woyof lool, ba raw mbooloom doom aadama ci kaw suuf. ⁴ Ci kaw loolu Aji Sax ji jekki wax ak Musaa ak Aaróona ak Maryaama, ne leen: «Dikkleen, yeen ñett, ci xaymab ndaje mi!» Ñu dem, ñoom ñett. ⁵ Aji Sax ji wàcc ci biir niir wu def aw taxaar. Mu taxaw ca bunt xayma ba, daldi woo Aaróona ak Maryaama, ñu bokk diikk. ⁶ Mu ne leen: «Dégluleen bu baax samay kàddu: su ngeen feeñlee ab yonentu Aji Sax ji, ci am peeñu laa koy xamale maay kan, te ci gént laay waxeek moom, ⁷ waaye du Musaa sama jaam bii. Moom mooy ki wóor ci mbooloom sama kër gii. ⁸ Gémmiñ ak gémmiñ laay waxeek moom wax ju leer nàññ ju ñu léebul, te jëmmu Aji Sax ji lay gis. Kon lu leen may fitu ñàññ Musaa sama jaam bi?» ⁹ Sànjum Aji Sax ji nag tàkkal leen. Ci kaw loolu mu dem.

¹⁰ Naka la niir wa jóge ca xayma ba, Maryaama jekki ne fureet ak jàngoroy ngaana, weex furr! Aaróona ne Maryaama gees, yem ca ngaana ga. ¹¹ Aaróona ne Musaa: «Ngalla sang bi, bu nu topp bàkkaar bi nu bàkkaar ndax ñàkk xel!» ¹² Ngalla bul seetaan kii mel ni ku dee te indaalewul bakkan ba mu juddoo ca ndeyam, xaaju yaram wi lekku!» ¹³ Musaa nag jooy Aji Sax ji, ne ko: «Yàlla, ngalla wéral ko!»

¹⁴ Aji Sax ji ne Musaa: «Xanaa baayam sax su ko jéppi woon, ba tifi ko ci kanam, muy gacceem diiru juróom ñaari fan? Nañu ko génne dal bi diiru juróom ñaari fan, door koo délloosi ci biir.» ¹⁵ Ba loolu amee ñu génne Maryaama dal ba diiru juróom ñaari fan. Mbooloo ma demul, ba keroog ba ñu délloosee Maryaama ca biir dal ba. ¹⁶ Gannaaw loolu mbooloo

ma bàyyikoo Aserot, ñu dali ca màndiŋu Paran.

13

Musaa yeble na Kanaan

¹ Aji Sax ji waxati Musaa, ne: ² «Yebalal ay ndaw, ñu dem yëri réewum Kanaan, gi may jox bànni Israyil. Kenn ngay yebal ci seen giiri maam yi, giir gu ci nekk, kenn, te ku ci nekk di kilifa ci ñoom.» ³ Ci kaw loolu Musaa yebal ndaw ña ci ndigalal Aji Sax ji, ñu bàyyikoo ca màndiŋu Paran. Ñoom ñépp ay njiiti bànni Israyil lañu woon.

⁴ Nooñu ñoo di:

Samwa doomu Sakuur, ci giirug Rube-
neen ñi,

⁵ ak Safat doomu Ori, ci giirug Cimy-
oneen ñi,

⁶ ak Kaleb doomu Yefune, ci giirug
Yudeen ñi,

⁷ ak Igal doomu Yuusufa, ci giirug Isaka-
reen ñi,

⁸ ak Oseya doomu Nuun, ci giirug
Efraymeen ñi,

⁹ ak Palti doomu Rafu, ci giirug
Beñamineen ñi,

¹⁰ ak Gadyel doomu Sodi, ci giirug Sabu-
loneen ñi,

¹¹ ak Gadi doomu Susi, mi taxawal làngu
Manase ci biir giirug Yuusufeen ñi,

¹² ak Amyel doomu Gemali, ci giirug
Daneen ñi,

¹³ ak Setur doomu Mikayel, ci giirug
Asereen ñi,

¹⁴ ak Nabi doomu Wofsi, ci giirug Nef-
taleen ñi,

¹⁵ ak Gewuyel doomu Maki, ci giiru
Gàddeen ñi.

¹⁶ Nooñu la Musaa yónni woon, ngir ñu yëri réew ma. Oseya doomu Nuun nag, Musaa tudde ko Yosuwe.

¹⁷ Ba leen Musaa yebalee ngir ñu yëri réewum Kanaan, da ne leen: «Negew gii ci bëj-saalum ngeen di jaare, yéegi ca diiwaanu tund ya, ¹⁸ ba gis nu réew ma mel: ndax waa réew ma, ñu am doole lañu, am ñu néew doole; ñu néew lañu, am ñu bare; ¹⁹ ak ndax réew ma baax na, am baaxul; ak nu seeni dëkk mel: ndax ay dal rekk la, am ay dëkk yu ñu dàbbli la; ²⁰ ak suuf sa: ndax nangu na, am nanguwul; ak itam ndax am nay garab, am déet. Te ngeen góor-góorlu ba sàkkaale ca meññeefi réew ma.» Fan yooyu nag yemook reseñ di meññ ndoortel meññeef.

²¹ Ci kaw loolu ndaw ya dem yëri réew ma, dale ko ca màndiŋu Ciin, ba ágg Reyob, ga ca wetu Amat. ²² Ña nga jaare Negew ca bëj-saalum, dem ba Ebron, fa Anageen ña, Ayman ak Sesay ak Talmay, dëkkoon. Ebron googee, tabaxees na ko

juróom ñaari at lu jiitu Cowan ga ca Misra. ²³ Ñu dem ba ca xuru Eskol, daldi fay dagge ab car bu def benn cëggub reseñ, ñaar ca ñoom gaddoo ko bant, ñu sàkkaale fa gèrënaat ak figg. ²⁴ Bërab boobu lañu ndax xuru Eskol, (mu firi xuru Cëgg) ndax cëgg ba fa bànni Israyil dagge woon.

Ndaw ya délsi nañu

²⁵ Ndaw ya nag ñibbsi, gannaaw ba ñu nemmikoo réew ma lu mat ñeent fukki fan. ²⁶ Ñu dikk ba ci Musaa ak Aaróona, ak mboolooom bànni Israyil gépp, ca màndiŋ Paran, ca Kades. Ñu àgge leen xibaar, ñoom ak mbooloo ma mépp, ba noppi won leen meññeefum réew ma. ²⁷ Ci kaw loolu ñu nettali Musaa, ne: «Dem nanu réew, ma nga nu yebaloon, te it foofa la meew maak lem ja tuuroo! Lii ca meññeef maa. ²⁸ Xanaa kay, kàttan gu askanu réew ma am, péey ya dàbbliku te yaa lool. Te it ponkal yooyu cosaano ci Anageen ñi lanu fa gis. ²⁹ Amalegeen ñaa dëkke běj-saalumu réew ma, Etteen ñaak Yebuseen ñaak Amoreen ña dëkke diiwaanu tund ya, Kanaaneen ña dëkke wetu géej, feggook dexu Yurda.»

³⁰ Ci kaw loolu Kaleb noppiloo mbooloo ma, fekk leen tãmbalee diiŋat Musaa. Mu ne leen: «Nooy dem ba demaatoo, nanguji réew ma, ndax bir na ne noo leen mana duma.»

³¹ Ndaw ya àndoon ak moom daldi ne: «Manunoo songi waa réew ma, ndax ñoo nu èpp doole.» ³² Ci biir loolu ñuy baatal ca kanam bànni Israyil, réew ma ñu nemmikuji woon. Ñu naan: «Réew moomee ñu wëri woon ngir nemmiku ko déy, réew la muy faagaagal ay sancaanam, te mboolem askan wa nu fa gis, ay boroom jëmm lañu. ³³ Fa lanu gis xeetu Nefilim ya, ponkali Anageen ña bokk ca xeetu Nefilim ya, nuy niru sunu bopp ay soccet fi seen kanam, di leen ko niru, ñoom it.»

14

Mbooloo ma bañ naa duggi Kanaan

¹ Ba loolu amee mbooloo mépp tãmbalee yuuxu. Askan wa daa fanaanee jooy guddig keroog. ² Bànni Israyil gépp nag di ñaxtu ci kaw Musaa ak Aaróona, mbooloo ma mépp naa leen: «Waay lu nu tee woonaa dee ca réewum Misra, mbaa sax nu dee ci màndiŋ mii! ³ Ana lu nu Aji Sax jiy indee ci réew mii ñu nara faddoo saamar, sunuy jabar ak sunuy tuut-tànk doon alalu sèxéto! Tee noo dellu Misra yee?» ⁴ Ci kaw loolu ñu naan ca seen biir: «Nan fal njiit te dellu Misra.»

⁵ Ba loolu amee Musaa ne gurub, moom ak Aaróona, ñu dëpp seen jé fa suuf,

fa kanam mboolooom bànni Israyil ma fa daje mépp. ⁶ Yosuwe doomu Nuun, ak Kaleb doomu Yefune, ñoom ña bokk ca ña seeti woon réew ma, daldi xotti seeni yére ndaxu tiis. ⁷ Ñu wax nag mboolooom bànni Israyil mépp, ne leen: «Réew ma nu wëri woon, ba nemmiku ko, réew mu baaxa baax la. ⁸ Bu nu Aji Sax ji nangulee, moo nuy dugal réew moomu, moo nuy jox réew ma meew maak lem ja tuuroo. ⁹ Fexeleen rekk ba Aji Sax ji, buleen ko gantal, te yeen nag ngeen baña ragal waa réew ma, ndax ab lanc donj lañu nuy mat. Seen kiiraay dëddu na leen, te Aji Sax jaa ngeek nun. Buleen leen ragal.»

Gantal Aji Sax ji sabab na mbugal

¹⁰ Ba mu ko defee mbooloo ma mépp ne dañu leen di dóori xeer ba ñu dee. Leeru Aji Sax ji nag feeñ ca xaymab ndaje ma, ci kanam bànni Israyil gépp.

¹¹ Ba loolu amee Aji Sax ji ne Musaa: «Ba kañ la ma askan wii nara xarab? Ba kañ lañu may gëmadi, ak firnde yi ma def ci seen biir yépp? ¹² Maa leen di fadde mbas, nangu seen céer, ba noppi sose ci yaw askan wu leen èpp, èpp leen doole.»

¹³ Musaa ne Aji Sax ji: «Kon de, waa Misra ga nga jële mbooloo mii, génnee leen sa doole ca seen biir, dinañu ko dégg, ¹⁴ te dinañu ko nettali waa réew mii. Waa réew mii dégg nañu ne yaw Aji Sax ji ci sa bopp yaa nekk ci digg mbooloo mii ngay feeñu bët ak bët, yaw Aji Sax ji, saw niir taxaw, tiim leen, te aw taxaaru niir nga leen di jiitoo bëccég, jiitoo leen aw taxaaru sawara, guddi. ¹⁵ Nga nara boole mbooloo mii mépp, bóom benn yoon? Kon de xeet yi dégg sa jaloore dinañu wax ne: ¹⁶ «Ñakka mana yóbbu mbooloo mii ca réew ma mu leen giñaloon, moo waral Aji Sax ji faagaagal leen ci màndiŋ mi!»

¹⁷ Kon nag ngalla Boroom bi, na sa doole mágg rekk, noonee nga noon: ¹⁸ «Aji Sax ji! Kiy muñ mer, te bare ngor, di bale tooñ aki moy te du ñakka topp mukk doom, tooñu waajuram, ba ca sët yaak sètaat ya.» ¹⁹ Ngalla jéggalal mbooloo mii seenug tooñ ci sag bare ngor, noonee nga leen masa bale, ca Misra ba tey jii.»

²⁰ Ba loolu amee Aji Sax ji ne: «Jéggal naa leen noonu nga ko waxe. ²¹ Waaye ndegam maay Kiy Dund, te leeru Aji Sax ji mooy fees àddina sépp, ²² gannaaw mboolem nit ñi gis samag leer, gis firnde yi ma def ci digg Misra ak ci màndiŋ mi, ñoo ma nattu nii fukki yoon, bañ maa déggal, ²³ kenn ci ñoom déy du gis réew, mi ma giñaloon seeni maam. Mboolem ñi ma xarab, kenn du ko ci gis. ²⁴ Sama jaam Kaleb nag, gannaaw meneaen xel lay wéye, te moo topp sama gannaaw,

ba mu mat sèkk, maa koy yóbbu ba ca réew, ma mu demoon, te aw askanam a koy moom. ²⁵ Gannaaw Amalegeen ñaak Kanaaneen ñaa nga dèkke xur wi nag, bu èllègee walbatikuleen, toppaat màndinj mi, te jaareji ko géēju Barax ya.»

²⁶ Aji Sax ji waxati Musaak Aaróona, ne: ²⁷ «Ba kañ la mbooloo mu bon mii di ñaxtu ci sama kaw? Ñaxtu yi bànni Israyil di ñaxtu ci sama kaw, dégg naa ci. ²⁸ Ne leen: Ndegam maay Kiy Dund déy, Kàddug Aji Sax jee, noonu ngeen waxe, may dégg, ni laa leen di def. ²⁹ Ci màndinj mii kay la seeni néew di tédd. Mboolem ñi ñu leen limal, mboolem ñi ñu leen waññal, ñu dale ci ñaar fukki at, jëm kaw te doon ñaxtu ci sama kaw, ³⁰ kenn ku moy Kaleb doomu Yefune ak Yosuwe doomu Nuun, du kenn ku ciy dugg ca réew, ma ma leen giñoona dèél. ³¹ Seen tuut-tànk, yi ngeen ne alalu séxétoo lañuy doon, ñoom laay yóbbu, ba ñu xam réew ma ngeen xarab. ³² Waaye yeen, seeni néew ci màndinj mii lay tédd, ³³ seeni doom di mangan ñeent fukki at ci màndinj mi, gáddoo ko seen ñakk worma, yeen ñi leen jur, ba keroog seeni néew tédd ba jeex ci màndinj mi. ³⁴ Limu fan yi ngeen nemmikuji woon réew ma, ñeent fukki fan, benn fan bu ci nekk day wecci menn at, ngeen gáddoo ko seen mbugali bàkkaar, ñeent fukki at, ba ngeen xam li jànkoonteek man di jur. ³⁵ Man Aji Sax ji, maa ko wax. Noonu déy laay def mbooloo mbooloo mu bon mii boolo ci sama kaw. Ci màndinj mii lañuy raafe, fi lañuy deeye.»

³⁶ Ndaw ya Musaa yebaloon, ñu nemmikuji réew ma nag, te ñu délsi, di baatal réew ma, ba tax mbooloo mépp di ñaxtu ci kawam, ³⁷ ñooña doon baatal réew ma, am mbas a leen rey fi kanam Aji Sax ji. ³⁸ Mennum Yosuwe doomu Nuun ak mennum Kaleb doomu Yefune doññ, ñoo mucc ca ndaw yooya nemmikuji woon réew ma.

Mbooloo ma gantalati na

³⁹ Ba Musaa jottlee bànni Israyil gépp kàddu yooyu, mbooloo ma mititlu nañu ko lool. ⁴⁰ Ca èllég sa ñu teela xëy, yéegi kaw tund ya, te naan: «Nu ngi nii di yéeg, jëm fa nu Aji Sax ji wax, ndax noo tooñ.» ⁴¹ Musaa ne leen: «Liñ nag? Yeena ngi tebbi waxi Aji Sax ji, waaye loolu de du sotti! ⁴² Buleen dem, te Aji Sax ji àndul ak yeen. Lu ko moy dingeen daanu ci seen kanami noon. ⁴³ Te kat Amalegeen ñi ak Kanaaneen ñaa ngi fuu ci seen kanam. Yeenay fàddoo saamar doññ. Gannaaw yeena dèddu Aji Sax ji nag, Aji Sax ji du ànd ak yeen.»

⁴⁴ Teewul ñu të ticc, ne dañuy yéegi kaw tund ya, te gaalu kóllèrey Aji Sax ji ak Musaa gènnuñu dal ba. ⁴⁵ Ba mu ko defee Amalegeen ña ak Kanaaneen ña dèkke woon diiwaanu tund woowa wàccsi, duma leen, tasaan leen ba ca gox ba ñuy wax Xorma.

15

Lu jëm ci saraxi pepp ak diw ak biñ

¹ Aji Sax ji waxati Musaa, ne: ² «Waxal bànni Israyil ne leen: Bu ngeen demee ca réew ma ngeen di sanc, réew ma ma leen jox, ³ bu ngeen di defal Aji Sax ji saraxu sawara, muy saraxu rendi-dóomal, mbaa sarax su nit di wàccoo aw xas, mbaa saraxu yéene, mbaa seen saraxi mággal, ngir xeeñal xetug jàmm ñeel Aji Sax ji, te muy lu jóge ci jur gu gudd mbaa gu gätt, defe leen ko nii:

⁴ «Kiy sarxal Aji Sax ji ab saraxam, na sarxewaale saraxu pepp bu benn fukkeelu efab sunguf su mucc ayib, di ñetti kilo, su ñu xiiwe ñeenteelu xaajub xiinu diw, di liitar ak genn-wáll, ⁵ ak biñ ngir saraxu tuuru, ñeenteelu xaajub xiin, di liitar ak genn-wáll, mu ànd ak saraxu rendi-dóomal mbaa beneen sarax, su dee xar mu ndaw.

⁶ «Su dee am kuuy, saraxu pepp bi muy àndal, ñaari fukkeeli efoy sunguf su mucc ayib lay doon, di juróom benni kilo, ñu xiiwe ko ñetteelu xaajub xiinu diw, di ñaari liitari diw, ⁷ ak biñ ngir saraxu tuuru, ñetteelu xaajub xiin, di ñaari liitar. Na joxe loolu, def ko xetug jàmm, ñeel Aji Sax ji.

⁸ «Su dee sarxe jur gu gudd, muy saraxu rendi-dóomal, mbaa sarax bu muy wàccoo aw xas, mbaa saraxu cant ci biir jàmm, ñeel Aji Sax ji, ⁹ na sarxewaaleek jur gu gudd gi, ab saraxu pepp bu ñetti fukkeeli efoy sunguf su mucc ayib, di juróom ñeenti kilo, ñu xiiwe ko genn-wállu xiinu diw, di ñetti liitar, ¹⁰ ak biñ bu muy joxewaale, ngir saraxu tuuru, di genn-wállu xiin, muy ñetti liitar. Loolu saraxu sawara la, di xetug jàmm, ñeel Aji Sax ji.

¹¹ «Noonu lees di def bu dee saraxu yékk, mbaa am kuuy, mbaa am xar mu ndaw, mbaa bëy. ¹² Nu limu juri sarax yi tollu rekk, ngeen def mu ci nekk noonu, ànd ak lim ba. ¹³ Mboolem njuddu-jiréew, noonu lay defe sarax yooyii, buy indi saraxu sawara ngir xetug jàmm, ñeel Aji Sax ji.

¹⁴ «Su dee ab doxandéem bu dal ak yeen, mbaa ku nekk ak yeen ci seen maas yiy ñew, te muy joxe saraxu sawara ngir xetug jàmm, ñeel Aji Sax ji, ni ngeen koy defe

rekk la koy defe. ¹⁵ Mbooloo mi mépp, dogalu yoon boobu benn la ciy doon, muy yeen, di doxandéem bi. Dogal la buy sax fãww, ñeel seen maasoo maas, te di benn ci yeen ak ci doxandéem bi, fi kanam Aji Sax ji. ¹⁶ Wenn yoon wee, di benn àtte bi, ñeel leen, ñeel doxandéem bi dal ak yeen.»

Ab jooxe war na ci pepp mu jëkk

¹⁷ Aji Sax ji waxati Musaa, ne ¹⁸ «Waxal bànni Israyil, ne leen, bu ngeen demee ca réew, ma ma leen jème, ¹⁹ bay lekk ca ñamu réew ma, nangeen ci jooxe ab jooxe, ñeel Aji Sax ji; ²⁰ seen notu sunguf bu jëkk, ci ngeen di jooxe menn mburum jooxe. Ni ngeen di sàkke jooxe bu jóge ca dægga ja rekk, ni ngeen koy jooxee. ²¹ Seen notu sunguf bu jëkk, ci ngeen di sàkke ab jooxe, ñeel Aji Sax ji, yeen ak seen askan.»

Sarax war na ci moy gu dul teyeef

²² Su dul ci teyeef ngeen ñàkka jéfe lenn ci mboolem santaane yii Aji Sax ji dénk Musaa, ²³ ci mboolem lu leen Aji Sax ji sant, Musaa jottli, dale ko keroog ba Aji Sax ji santaanee loola, ak gannaaw gi, ba ca seen maasoo maas, ²⁴ su dee moy gu dul teyeef, te mbooloo mi yégu ko woon, su boobaa mbooloo mépp ay sarxal aw yëkk wu ndaw wuy doon rendi-dóomal, ngir xetug jàmm, ñeel Aji Sax ji, ak saraxu peppam, ak saraxu tuuroom, ni ko yoon àttee, ak benn sikket ngir saraxu póotum bàkkaar. ²⁵ Sarxalkat bi day def loolu njotlaayal mbooloom bànni Israyil gépp, njéggal daldi leen ñeel, gannaaw moy ga dug teyeef, te ñoom it indi nañu seen saraxu sawara, ñeel Aji Sax ji, booleek seen saraxu póotum bàkkaar fi kanam Aji Sax ji, ndax seen moy ga dul teyeef. ²⁶ Njéggal day daldi ñeel mbooloom bànni Israyil gépp, ak bépp doxandéem bu dal ak ñoom, ndax mbooloo mépp lay seen moy gu dul teyeef.

²⁷ Su dee kenn nit a bàkkaar te du teyeefam, na sarxal aw bëy wu jigéen wu menn at, ngir saraxu póotum bàkkaar. ²⁸ Sarxalkat bi daldi koy def fi kanam Aji Sax ji, njotlaayal ki moy ci ag ñàkka tey, ca bàkkaaram ba dul teyeef. Loolu la koy jote, njéggal ñeel ko. ²⁹ Muy njuddu-ji-réew ju bokk ci bànni Israyil, di doxandéem bu dal ak ñoom, yoon wi wenn lay doon, ñeel ki moy te du teyeefam.

³⁰ Nit ki tooñ cig teyeefam nag, muy njuddu-ji-réew, di doxandéem, kooku Aji Sax ji la ñàkke kersa. Nit kooku, dees koy dagge ci biiri bokkam: ³¹ Gannaaw kàddug Aji Sax ji la teddadil te ndigalam la xëtt, nit kooku dees koy dagg rekk, mu gàddu bàkkaaram.

Bésub Noflaay wormaal la laaj

³² Ba bànni Israyil nekkee ca mändinj ma, dañoo fekk jenn waay, muy taxan bésub Noflaay. ³³ Ña ko fekk muy taxan, yóbbu ko ba ca Musaa ak Aaróona, ak mbooloo ma mépp. ³⁴ Ba loolu amee ñu teg ko ciy loxo, ndax dogaleesagul woon nees di def ak moom. ³⁵ Ci kaw loolu Aji Sax ji ne Musaa: «Dee rekk mooy àtteb waa ji: dees koy génne dal bi, mbooloo mépp dóor koy xeer, ba mu dee.»

³⁶ Mbooloo ma mépp daldi koy génne dal bi, dóor koy xeer ba mu dee, na ko Aji Sax ji tante Musaa.

Yoon sàrtal na wàllu col

³⁷ Aji Sax ji waxati Musaa, ne ko: ³⁸ «Waxal bànni Israyil, ne leen, ci seen maasoo maas, nañu def ay langat ci seen cati mbubb, langat wu ci nekk ñu nas ci buum gu baxa. ³⁹ Mu doon seen langat yu ngeen di xool, di ko fàttlikoo mboolem santaaney Aji Sax ji, ngir di ko jéfe, te baña topp seen bannéexu bakkan ak seeni gët, bay moy. ⁴⁰ Su ko defee ngeen di bàyyi xel tey jéfe sama santaane yépp, daldi doon ñu sell, ñeel seen Yàlla. ⁴¹ Man maay Aji Sax ji, seen Yàlla, ji leen génnee réewum Misra ngir doon seen Yàlla. Maay seen Yàlla Aji Sax ji.»

16

Kore fippu na

¹ Ku ñuy wax Kore doomu Isar, mi askanoo ci Keyat doomu Lewi, moo àndoon ak ay Rubeneen, ñuy Datan ak Abiram, doomi Elyab, ak Onn doomu Pelet, ² ñu jógal Musaa, ñook ñaar téeméer ak juróom fukk (250) ci bànni Israyil, diy kilifa ci mbooloo mi, am baat ca pénc ma, te di ñu amu tur. ³ Ci kaw loolu ñu bokk daje fi kaw Musaa ak Aaróona, ne leen: «Doy na sèkk! Mbooloo mi ba mu daj, ñépp a sell, te ci sunu biir la Aji Sax ji nekk. Ana lu ngeen di xoggliku ci kaw mbooloom Aji Sax ji?»

⁴ Ba Musaa dégge loolu, da ne gurub, dépp jë bi fi suuf. ⁵ Mu wax Kore ak gàngooram gépp, ne: «Bu èllégee, Aji Sax ji mooy xamle kan la séddoo ak kan mooy ki sell, mu jegeñal ko boppam. Ki mu taamu nag, dina ko jegeñal boppam. ⁶ Dangeen di def nii: jël-leeni and, yaw Kore, yaak sa gàngoor gépp, ⁷ te ngeen def ciy xal, def ci cuuraay fi kanam Aji Sax ji, èllég. Su ko defee ku Aji Sax ji taamu, kookooy ki sell. Doy na sèkk, yeen Leween ñi!» ⁸ Musaa teg ca ne Kore: «Yeen Leween ñi, dégluleen nag! ⁹ Xeeb ngeen daal ber gi leen Yàllay Israyil ber ci mbooloom Israyil, jegeñal leen boppam, ngeen di liggéey liggéeyu mākkaanu Aji

Sax ji, di taxaw fi kanam mbooloo mi, di leen jaamul Yàlla? ¹⁰ Yaw mu jegeñal la, yaak sa bokki Leween ñépp, ngeen di xéccu céru carxal, boole ci! ¹¹ Kon kay yaw yaak sa gàngoor gépp, ci kaw Aji Sax ji ngeen bokk daje! Ana kuy Aaróona, ba ngeen di ñaxtu ci kawam?»

¹² Musaa nag woolu Datan ak Abiram, doomi Elyab, ñu ne ko: «Danoo ñéwul! ¹³ Dangaa xeeb li nga nu jële réew mu meew maak lem ja tuuroo, ngir reylu nu ci màndinj mi, ba tax ngay buur-buur lu ci sunu kaw teg ci? ¹⁴ Du réew mu meew maak lem ja tuuroo nga nu yóbbu de, te séddoo nu céri tool mbaa tóokéri reseñ. Mbooloo mii mépp, man nga leena tuur lëndëm? Danoo ñéwul!» ¹⁵ Ba loolu amee Musaa mer lool. Mu ne Aji Sax ji: «Bul geesu sax seen sarax. Menn mbaam sax, masuma leen koo jëlal te masuma cee tooñ kenn.»

Way-fippu ya jot ñañu seen añ

¹⁶ Musaa nag ne Kore: «Yaw, yaak sa gàngoor gépp, ca kanam Aji Sax ji, yaak ñoom ak Aaróona, èllég. ¹⁷ Na ku nekk jël ub andam, def ci cuuraay, te na ku ci nekk indib andam fi kanam Aji Sax ji, muy ñaar téeméeri and ak juróom fukk, yaak Aaróona it, ku nekk akub andam.»

¹⁸ Ba mu ko defee ku nekk jël ub andam, def cay xal, teg ca cuuraay. Ñu taxaw ca bunt xaymab ndaje ma, ñook Musaa ak Aaróona. ¹⁹ Kore nag dajale gàngoor gépp fa ñoom, ca bunt xaymab ndaje ma. Ci kaw loolu leeru Aji Sax ji feeñu mbooloo ma mépp!

²⁰ Aji Sax ji wax Musaa ak Aaróona, ne: ²¹ «Xiddileen mbooloo mii, ma xoyom leen léegi!» ²² Musaa ak Aaróona ne gurub, dépp seen jë fa suuf, daldi ne: «Éy Yàlla, yaw Yállay bépp boroom bakkan bu bindoo aw suux, xanaa du kenn ay bàkkaar, nga far sàñju ci kaw mbooloom lëmm?»

²³ Ci kaw loolu Aji Sax ji ne Musaa: ²⁴ «Waxal mbooloo mi, ne leen ñu jóge fi wër màkkaani Kore ak Datan ak Abiram.»

²⁵ Musaa daldi jubal ca Datan ak Abiram, magi Israyil topp ca. ²⁶ Ci biir loolu mu wax ak mbooloo ma, ne leen: «Ngalla dándleen xaymay nit ñu bon ñii, te buleen laal seen lenn, bala ngeen di buuboondook mbooloom bàkkaari ñii.» ²⁷ Ñu daldi jóge mbooloom fa wër màkkaani Kore ak Datan ak Abiram. Datan ak Abiram ñoom, ña nga génn, taxaw ca seen bunti xayma, ñook seeni jabar ak seeni doom, ak seeni tuut-tànk.

²⁸ Musaa nag ne: «Lii nag moo leen di xamal ne Aji Sax ji moo ma yebal ngir ma def jëf jii jépp, waaye du sama

coobarey bopp: ²⁹ Ndegam ni mbooloom doom aadama di deeye, ni la ñii deeye, seen demin di deminu mbooloom doom aadama, su boobaa du Aji Sax jee ma yebal. ³⁰ Waaye ndegam Aji Sax ji moo sàkk ba sàkk tey lu masula am, ba suuf ña, médd leen, ñook lu bokk ci ñoom, ñu tàbbiwaale bakkan biir njaniiw, su boobaa dingeen xam ne ñoom ñii ñoo xarab Aji Sax ji.» ³¹ Naka la Musaa di daaneel kàddu yooyu yépp, fa ñu taxaw jekki xar, ³² suuf ña, médd leen, ñook seen waa kër, ak mbooloom ku bokk ci Kore, ak mbooloom alal ja. ³³ Ñu daldi tàbbiwaale bakkan biir njaniiw, ñook mbooloom lu ñu moom, suuf sàng leen, ñu réer mbooloo ma mèrr. ³⁴ Mbooloom Israyil dégg seen yuux ya, daldi daw, te naan: «Nan daw bala noo suuf a médd!»

³⁵ Ci kaw loolu sawara moo bawoo fa Aji Sax ji, xoyom ñaar téeméeri nit ak juróom fukk ña indi woon saraxu cuuraay ba.

17

Andi way-fippu ya firnde la

¹ Aji Sax ji waxati Musaa, ne: ² «Waxal Elasar doomu Aaróona, sarxalkat bi, ne ko mu seppée and yi ci lakk gi, ndax lu sell la, te xal yi, na ko tuur fu sore. ³ And yooyii seeni boroom feye seen bakkan seeni bàkkaar, dees koy tégg, ba mu tàlli, xoobe ko sarxalukaay bi. Gannaaw fi kanam Aji Sax ji lañu indi and yi, ba tax mu doon lu sell, na and yi doon firnde, ñeel bànni Israyil.» ⁴ Ci kaw loolu Elasar sarxalkat bi jël andi xàñjar, ya ña dee ca lakk ga indi woon, ñu tégg ko ba mu tàlli, ngir sarxalukaay ba, ⁵ na ko Aji Sax ji sàntaane woon, Musaa jottli. Loolu di fàttli bànni Israyil ne benn jaambur bu bokkul ci askanu Aaróona sañula dikki di taal cuuraay fi kanam Aji Sax ji, lu ko moy lu mel ni li dal Kore ak gàngooram moo koy dal.

Ñaxtu sabab na mbugal

⁶ Ca èllég sa mbooloom bànni Israyil gépp a doon ñaxtu ci kaw Musaa ak Aaróona, naan: «Yeen yeena reylu ñoñi Aji Sax ji!» ⁷ Mbooloo maa nga sam Aaróona ak Musaa. Ci biir loolu, ñu ne gees xaymab ndaje ma, gisuñu lu moy niir wa muur ko, leerug Aji Sax ji feeñ.

⁸ Ba loolu amee Musaa ak Aaróona dem ba ca kanam xaymab ndaje ma, ⁹ Aji Sax ji wax Musaa ne: ¹⁰ «Jógeleen biir mbooloo mii, ma faagaagal leen léegi!» Ñu ne gurub, dépp seen jë fa suuf. ¹¹ Musaa ne Aaróona: «Jëlal and bi, nga sàkke ci sarxalukaay bi ay xal, teg ci cuuraay, yóbbu gaaw ca mbooloo ma, ba defal leen ag njotlaay, ndax sàñj mi tàkke na ci Aji

Sax ji, mbas mi tàmbali na!»¹² Aaróona kéf and ba Musaa wax, daw dugg ca biir mbooloo ma. Ndeke mbas ma tàmbali na ca biir mbooloo ma. Mu def ca and ba cuuraay, daldi defal mbooloo ma njotlaay.¹³ Naka la taxaw ci diggante ñi dee ak ñuy dund, mbas ma dal.¹⁴ Na dee ca mbas ma nag doon fukki junneek ñeent ak juróom ñaar téeméer (14 700), te bokkul ak ña dee woon ca mbirum Kore ma.¹⁵ Ba mu ko defee Aaróona dellu ca Musaa, ca bunt xaymab ndaje ma, fekk mbas ma dal.

Bant bu wow jebbi na

¹⁶ Ba loolu amee Aji Sax ji ne Musaa: ¹⁷ «Waxal ak bànni Israyil, nga nangoo ci mboolem seen kilifay kër maam, aw yet, na wenn yet bawoo ci kër gu ci nekk, muy fukki yet ak ñaar, yet wu ci nekk, nga bind ci turu boroom.¹⁸ Turu Aaróona itam, nga bind ko ci yetu giirug Lewi, ndax wenn yet lay doon, ñeel kilifag kër gu ci nekk.¹⁹ Nga denc yet yi ca biir xaymab ndaje ma, fa kanam gaalu seedes kóllère ga, fa may dajeeq yeen.²⁰ Su ko defee ki ma taamu, aw yetam dina jebbi, ba ma teqlikoo ak xultuy bànni Israyil, yi ñuy xultu ci seen kaw.»

²¹ Musaa àgge ko bànni Israyil, mboolem seen kilifay kër maam jox Musaa aw yet, kilifa gu ci nekk wenn yet, ñeel kër maamam, muy fukki yet ak ñaar, yetu Aaróona bokk ca.²² Musaa teg yet ya fa kanam Aji Sax ji, ca biir xaymab seede sa.²³ Ca èllég sa, naka la Musaa dugg ca xaymab seede sa rekk, daldi fekk yetu Aaróona wu kër Lewi, jebbi; fekk na mu jebbi, ba tóor, ba meññ ay doomi amànd*.²⁴ Ba loolu amee Musaa jële yet yépp ci Aji Sax ji, dem ba ca bànni Israyil gépp, ñépp gis, ku nekk jël yetam.

²⁵ Aji Sax ji waxati Musaa, ne: «Dellool yetu Aaróona fa kanam gaalu seede sa, mu dence fa, di firnde ñeel xeetu fippukat wi, ndax nga dakkal seeni xultu ci sama kaw, ba duñu dee.»²⁶ Musaa def noonu. Na ko ko Aji Sax ji sante, na la ko defe.

²⁷ Bànni Israyil nag naan Musaa: «Jeexal nan nag, sàunku nan, nun ñépp ay sàunku!²⁸ Gannaaw képp ku jege màkkaanu Aji Sax ji donŋ, dangay dee kay, mbaa dunu far jeex tàkk?»

18

Lu jëm ci sarxalkat yi ak Leween ñi

¹ Aji Sax ji ne Aaróona: «Yaw, yaak say doom ak sa waa kër maam, yeenay gaddu peyug tooñ ci wàllu bérab bu sell bi, te itam yaw, yaak say doom, yeenay gaddu peyug tooñ ci seen wàllu carxal.² Te

itam sa bokki Leween ñi, sa giirug baay, jegeñal leen sa bopp, ñu jokku ci yaw, di la jàpple, te yaw yaak say doom, ngeen féete fi kanam xayma ba seedes kóllère ga dence.³ Ñooy dénkoo sa ndénkaane, ak dénkaaney mboolem xayma bi, waaye jumtukaayi bérab bu sell bi, ak sarx-alukaay bi, buñu ko jege, lu ko moy dañuy dee, ñoom ak yeen itam.⁴ Nañu jokku ci yaw, te ñu dénkoo ndénkaanel xaymab ndaje mi, ci mboolem liggéeyu xayma bi. Kenn ku ci bokkul nag du leen jege, yeen.⁵ Nangeen dénkoo ndénkaanel bérab bu sell bi, ak ndénkaanel sarxalukaay bi, ngir am sànj baña dalati ci kaw bànni Israyil.

⁶ «Man mii nag maa seppée seen bokki Leween ñi ci biir bànni Israyil. Yeen lañu leen jagleela jagleel, ñeel Aji Sax ji, ngir ñu liggéey liggéeyu xaymab ndaje mi.⁷ Yaw nag yaak say doom, dénkooléen seenug carxal ci mboolem mbiru sarxalukaay bi, ak ca wàllaa ridob biir bi, ngeen di ca liggéey. Seen liggéeyu carxal bi, ab sasu teraanga la, maa leen ko terale. Waaye ku bokkul ci yeen, bu ci laalee, dees koy rey.»

Lu jëm ci peyu sarxalkat yi

⁸ Aji Sax ji neeti Aaróona: «Man mii maa la sédd ndénkaaneb samay jooxe; mboolem jooxe yu sell yi bànni Israyil indil, yaw laa ko jagleel, nga jagoo, yaak say doom, ci kaw dogal bu sax dàkk.⁹ Lii nag, yaa ko moom, ci mboolem sarax yu sell yee sell, yi mucc sawara: seen bépp sarax, seen bépp saraxu pepp ak seen bépp saraxu póotum bàkkaar, ak seen bépp saraxu peyug tooñ bu ñu ma indil, lu sella sell la, ñeel la, yaak sa doom yu góor.¹⁰ Fu sella sell ngeen koy lekk; képp kuy góor ci yeen, sañ na cee lekk. Lu sell lay doon ci yaw.

¹¹ «Leneen lu la ñeel moo di jooxe bu jóge ci saraxi nit ñi, di bépp saraxu yékkati-jébbal bu bànni Israyil. Yaw laa ko sédd, yaak sa doom yu góor, ak sa doom yu jigéen, ci kaw dogalu yoon bu sax dàkk. Képp ku set ci sa waa kër, sañ na cee lekk.

¹² «Lépp luy ngéneelu diw gu bees, ak ngéneelu biññ bu bees, ak pepp mu jékka ñor, mu ñu jox Aji Sax ji, yaw laa ko jox.¹³ Njalbéenu meññeef mi ñuy indil Aji Sax ji, ci mboolem lu meññee ci seen suuf, yaa koy moom, te képp ku set ci sa waa kër, sañ na cee lekk.¹⁴ Mboolem lees aayalal Aji Sax ji ci Israyil, yaa koy moom.¹⁵ Lépp luy ubbitey njur bu ñu jagleel Aji Sax ji, ci lépp lu bindoo aw suux, nit ak mala, yaa koy moom. Fexeel rekk ba jotlu taawub nit ki, te taawub mala mu setul it, nanga ko jotlu.¹⁶ Njotlu xale bu am lu dale ci weer, app ko ci juróomi siikali xaalis yu bérab bu sell bi,

* 17:23 17.23 amànd: xeetoo naak gerte-tubaab.

benn siikal yemook ñaar fukki gera mbaa fukki garaam. ¹⁷ Waaye lu nag taawloo, ak lu xar taawloo, ak lu bëy taawloo, deesu ko jót. Yooyii yu sell la. Deretam ngay xëpp ci sarxalukaay bi, nebbon bi, nga def ko saxar, muy saraxu sawara ngir xetug jamm, ñeel Aji Sax ji. ¹⁸ Aw yàppam, yaa koy moom, ni nga moome dënnu saraxu yékkati-jébbal, ak tànkub kanam bu ndijoor ba. ¹⁹ Mboolem jooxe yu sell yi bànni Israyil di jooxeel Aji Sax ji, sédd naa la ko, yaak sa doom yu góor, ak sa doom yu jigéen, ci kaw dogalu yoon bu sax dàkk. Kóllérey xorom* a ngoogu, du fecciku, xanaa sax dàkk fi kanam Aji Sax ji, ñeel la yaw, yaak saw askan.» ²⁰ Aji Sax ji neeti Aaróona: «Seenum réew nag doo ci am cér, te wàllu suuf, doo ko am ci seen biir. Man maay sa wàll, di sab cér ci biir bànni Israyil.»

Lu jëm ci peyug Leween ñi

²¹ Leween ñi ñoom, maa leen jox bépp cérú fukkeel bu génne ci Israyil, muy seen cér, ñu yooloo ko seen liggéey bi ñuy liggéey ci xaymab ndaje mi.

²² Bu bànni Israyil juuxati ci xaymab ndaje mi, di gaddu bàkkaar bu dee di àtteem. ²³ Leween ñi ñooy ñiy liggéey liggéeyi xaymab ndaje mi, te lu ñu ca tooñ, ñooy gaddu pey ga, ci kaw dogal bu sax dàkk, ñeel leen, ñook seen askan. Waaye biir bànni Israyil, Leween ñi duñu ci séddu cérú suuf, ²⁴ ndax cérú fukkeel yi bànni Israyil yékkati, jooxeel ko Aji Sax ji, jox naa ko Leween ñi, muy seen cér. Moo tax ma ne leen, biir bànni Israyil, duñu ci séddu cérú suuf.

Ab jooxe ñeel na Leween ñi

²⁵ Aji Sax waxati Musaa ne: ²⁶ «Leween ñi, wax leen, ne leen bu ñu jélee ci bànni Israyil seen cérú fukkeel yi ma leen jagleel yeen, muy seen cér, nañu ci jooxeel Aji Sax ji, fukkeelub cérú fukkeel yooyu. ²⁷ Nañu leen jàppal loolu, yeen Leween ñi, muy seen jooxeb bopp, ni bu doon pepp mu jóge ci seen dàggay bopp, ak biiñ bu bees bu jóge ci seen nalukaay. ²⁸ Su ko defee ngeen jooxe yeen itam, jooxeb Aji Sax ji, ci mboolem seen cérú fukkeel yi ngeen jële ci bànni Israyil. Kon nangeen jële cocu, jooxeb Aji Sax ji, jox ko Aaróona sarxalkat bi. ²⁹ Lépp lu ñu leen sédd, nangeen ci jooxe jooxeb Aji Sax ji. Mboolem cérú ngéneel yooyu, ci ngeen di génne cér bu sell boobu.

³⁰ «Waxal Leween ñi ne leen gannaaw bu ñu ca génnee cérú ngéneel li, li ci des lew na leen, ni bu doon pepp mu jóge

ci seen dàggay bopp, ak biiñ bu jóge ci seen nalukaay. ³¹ Sañ nañu koo lekke fépp, ñoom ak seen waa kër, ndax loolu seen pey la, ñu yooloo ko seen liggéeyu xaymab ndaje mi. ³² Duñu ci gaddu benn bàkkaar, gannaaw bu ñu ci jooxee cérú ngéneel li. Waaye jooxe yu sell yu bànni Israyil yooyu, buñu ci teddadil lenn, ba di ci dee.»

19

Lu jëm ci ndoxum setlu ak setlu gi war

¹ Aji Sax ji waxati Musaa ak Aaróona, ne: ² «Lii mooy dogalu yoon bi Aji Sax ji santaane: Neleen bànni Israyil ñu indil leen nag wu jigéen wu xonq, wu mat, mucc sikk, te kenn masu koo takk, ³ ngeen jox ko Elasar sarxalkat bi, ñu génne ko dal bi, te ñu rendi ko fi kanamam. ⁴ Na Elasar sarxalkat bi capp baaraam ci deret ji, wis-wisal ko juróom ñaari yoon fi féeteek bunt xaymab ndaje mi. ⁵ Nañu lakk nag wi ci kanamam. Der bi ak yàpp wi ak deret ji ak sébbriit mi, lépp lañuy lakk. ⁶ Su ko defee sarxalkat bi sàkk bantu seedar ak caru isob ak ndimo lu xonq curr, boole ko sànni ca sawara wa ñuy lakk nag wa. ⁷ Gannaaw loolu na sarxalkat bi fót ay yéreem, sangu, doora mana duggaat ci dal bi, te du ko tee yendoo sobe ba ca ngoon. ⁸ Kiy lakk nag wi itam, na fót ay yéreem, sangu, te du ko tee yendoo sobe ba ca ngoon. ⁹ Na ku set tonni dóomu nag wa, te sotti ko bérab bu set, foofa ca biti. Dóom ba dencub mbooloom bànni Israyil lay doon, ñu di ko waajale ndoxum setlu, ngir saraxu pootum bàkkaar. ¹⁰ Ku góor kiy tonni dóomi nag wi itam day fót ay yéreem, te du tee mu yendoo sobe ba ca ngoon. Na loolu di dogalu yoon bu sax faww, ñeel bànni Israyil, ak doxandéem bu dëkk ci seen biir.

¹¹ «Bu loolu weesee ku laal nit ku dee, ak néew bu mu mana doon, dina sobewu diiru juróom ñaari fan. ¹² Na setlu ca ndox moomee ca bésuub ñetteel ba, gannaaw ba mu ko laalee, te na setluwaat ca bésuub juróom ñaareel ba. Su ko defee mu set. Waaye yu setluwul ca bésuub ñetteel ba, ak bésuub juróom ñaareel ba, du set. ¹³ Képp ku laal nit ku dee, ak néew bu mu mana doon, bu setluwul, mækkaanu Aji Sax ji la sobeel. Kooku dees koy dagge ci bànni Israyil. Gannaaw ndoxum setlu ma, wiseesu ko ko, sobewu lay wéye.

¹⁴ «Lii la yoon wi téral: Bu nit deeyee ci biir xayma, képp ku dugg ci biir xayma bi, ak képp ku mu fekk ci xayma bi, day sobewu diiru juróom ñaari fan, ¹⁵ te mboolem ndab lu fa ubbiku woon,

* **18:19** 18.19 kóllérey xoromwaxin la, day tegtale kóllérey gu yàgg, ba sax dàkk, ndax lu bare luy yàgu, xorom lees ko baaxoo woona dence, ngir mu yàgg.

kubeer it ubu ko woon ràpp, loola ndab sobewu na. ¹⁶ Képp ku laal ca àll ba, nit ku ñu bóome saamar, mbaa ku Yàlla moomal boppam, mbaa mu laal yaxi nit ku dee, mbaa mu laal bàmmeel, kooka day sobewu diiru juróom ñaari fan. ¹⁷ Nañu sàkkal ki sobewu ca dóomu saraxu póotum bàkkaar ba ñu lakkoon, te ñu sotti ndox muy dund ci ndab, ca kaw dóom ba. ¹⁸ Bu loolu wéyee, na ku set jël caru isob, capp ko ca ndox ma, wis-wisal ko ca kaw xayma ba nit deeye, wis ko ca kaw ndab yépp, ak ca kaw nit ña fa nekkoon. Na ko wis itam ci kaw nit ku laal yaxi ku dee, mbaa mu laal ku ñu bóome saamar, mbaa mu laal ku Yàlla moomal boppam, mbaa mu laal bàmmeel. ¹⁹ Bésub ñetteel ba nag, ak bésub juróom ñaareel ba, ci la nit ku set di wis-wisal ndox mi ci kaw ki sobewu. Bésub juróom ñaareel ba ca la koy settli. Su ko defee ka sobewu fóot ay yéreem, sango, bu jant sowee mu daldi set. ²⁰ Képp ku sobewu te setluwul, kooku dees koy dagge ci mbooloo mi, ndax bérabu sellngay Aji Sax ji la sobeel. Gannaaw wiseesu ko ndoxum setlu mi, sobewu na.

²¹ «Na leen loolu ñeel ci kaw dogalu yoon bu sax dàkk. Ka doon wis-wisal ndoxum setlu mi nag, na fóot ay yéreem, te ku laal ci ndoxum setlu mi day yendoo sobe ba ca ngoon. ²² Nit ki sobewu, mboolom lu mu laal day sobewu, te ku laal ca loola it day yendoo sobe ba ca ngoon.»

20

Diŋat nañu Musaa ak Aaróona fa Meriba

¹ Mbooloom bànni Israyil gépp nag àgg ca màndiŋ Ciin, ci biir weer wi jèkk ci at mi*. Ñu daldi dal ca Kades. Fa la Maryaama faatoo, ñu denc ko foofa.

² Ci kaw loolu mbooloo ma dem ba ñàkk ndox. Ñu daje ci kaw Musaa ak Aaróona. ³ Mbooloo ma di wulook Musaa, naa ko: «Moo lu nu tee woon de keroog ba sunu bokk ya deeyee fa kanam Aji Sax ji? ⁴ Ana loo indee mbooloom Aji Sax ji ci màndiŋ mii, nu di fi deesi doŋŋ, nook sunug jur? ⁵ Ana loo nu jële woon Misra, di nu indi fu bon fii? Du bérab bu nangu menn jiwu: du figg, du reseñ, du gèrènaat, te du siitum ndox mu ñu naan!»

⁶ Ba loolu amee Musaa ak Aaróona bàyyikoo ca mbooloo ma, dem ba ca bunt xaymab ndaje ma. Ñu ne gurub, dèpp seen jë fa suuf. Leeru Aji Sax ji nag feeñu leen. ⁷ Aji Sax ji wax ak Musaa, ne: ⁸ «Jélal saw yet, nga dajale mbooloo mi, yaak sa mag Aaróona, ngeen wax ak doj woowu,

ñuy gis, mu xelli am ndox. Te nga sottil leen ndox mu jóge ci doj wi, nàndale ko mbooloo mi, ñook seenug jur.»

⁹ Ba mu ko defee Musaa jële yet wa fa kanam Aji Sax ji, na mu ko ko sante. ¹⁰ Musaa ak Aaróona nag dajale mbooloo ma fa janook doj wa, Musaa ne leen: «Yeen diŋatkat yi, dégluleen ma fii! Doj wii, tee nu leen cee génneel am ndox boog?» ¹¹ Ci kaw loolu Musaa yékkati loxoom, dóor yetam ca doj wa ñaari yoon, ndox mu bare wale ca, mbooloo ma daldi naan, ñook seenug jur.

¹² Aji Sax ji nag ne Musaa ak Aaróona: «Gannaaw gémuleen ma, ngir wormaal sama sellngá fi kanam bànni Israyil, loolu tax na dungeen yóbbu mukk mbooloo mii ca réew ma ma leen jox.» ¹³ Loolooy walum Meriba, (mu firi jote ba). Fa la bànni Israyil jote woon ak Aji Sax ji, ba mu biral sellngam fa seen biir.

Edom bañ na

¹⁴ Gannaaw gi, Musaa moo yebale ay ndaw fa dèkk ba ñuy wax Kades, ñu dem ca buurub Edom, ne ko: «Israyil say bokk dañoo wax ne: Umplewoo mboolom coono bi nu daj. ¹⁵ Sunuy maam a demoon Misra; dèkk nanu Misra lu yàgg, waa Misra di nu mital, na woon ca sunuy maam. ¹⁶ Ci biir loolu nu woo Aji Sax ji wall, mu dégg sunu yuux, daldi yebal malaaka, mu génne nu Misra. Léegi nu ngi nii fi Kades, dèkk bi digalook sam réew. ¹⁷ Ngalla nag may nu, nu jaare sam réew. Dunu fi jaare benn tool, mbaa ab toókèru reseñ, dunu fi naane ndoxum benn teen. Mbeddum buur daal lanuy topp, dunu jàdd ndijoor ak càmmoñ, ba keroog nuy génn sam réew.»

¹⁸ Buurub Edom nag ne leen: «Dungeen jaare fi man de, lu ko moy saamar laay génne, dajeek yeen.» ¹⁹ Ndawi bànni Israyil ne ko: «Sél wi rekk lanuy topp, te ndox mu nu naan, nook sunug jur, noo la koy fey. Ñaanunu lenu lu moy doxe sunuy tànk, ba jáll.» ²⁰ Mu ne leen: «Dungeen fi jaare mukk!» Ci kaw loolu Edom génn ngir dajeek ñoom, ànd ak gàngoor gu réy, gannaayu ba diis. ²¹ Noonu la Edom lanke, mayul Israyil mu jaare réewam, ba Israyil mujj teggi.

Aaróona nelaw na

²² Ci kaw loolu mbooloom bànni Israyil gépp bàyyikoo Kades, ba ca tundu Or. ²³ Aji Sax ji wax ak Musaa ak Aaróona, ca Or, tund wa ca kemu réewum Edom. Mu ne: ²⁴ «Dees na tërali Aaróona fa ay bokkam. Du dugg déy ca réew ma ma jox bànni Israyil, gannaaw yeena gántaloon

* 20:1 20.1 Jombul muy seen ñeent fukkeelu at, gannaaw seen wèreelu ba. Seetal ci saar 22-29 ak 33.38.

sama ndigal ca walum Meriba. ²⁵ Àndal ak Aaróona ak doomam Elasar, nga yéége leen ca kaw tundu Or. ²⁶ Te nga summi yérey carxal yu Aaróona, solal ko doomam Elasar. Aaróona moom, dees koy tērāli ca ay bokkam. Foofa lay deeye.»

²⁷ Ba loolu amee Musaa def la ko Aji Sax ji sant, ñu ànd yéég kaw tundu Or; mbooloo ma mépp di gis. ²⁸ Musaa summi yérey Aaróona, solal ko doomam Elasar; Aaróona dee foofa ca kaw tund wa, Musaa ak Elasar wàcc tund wa. ²⁹ Mbooloo ma mépp nag xam ne Aaróona dèddu na. Waa kër Israyil gépp a ko jooy diiru fanweeri fan.

21

Bànni Israyil am na ndam

¹ Kanaaneen ba, buurub Arat ba dèkke woon Negew, moo dégg ne Israyil a ngay jaare yoonu Atarim, di dikk. Mu xareek Israyil, jàpp ñenn ca ñoom. ² Ci kaw loolu Israyil xasal Aji Sax ji aw xas, ne ko: «Soo tegee ba teg mbooloo mii ci sunuy loxo déy, dinanu faagaagal seeni dèkk.» ³ Aji Sax ji nangul Israyil, jébbal leen Kanaaneen ña, ñu faagaagal leen, ñook seeni dèkk. Ñu daldi wooye gox ba Xorma (mu firi Lu ñu faagaagal).

Lu jëm ci nattub jaan ya

⁴ Ñu bàyyikoo tundu Or, jubal yoonu géegu Barax ya, ngir teggi réewum Edom. Mbooloo ma nag mujj xáddi ca yoon wa. ⁵ Ña ngay xultu ca kaw Yàlla ak Musaa, naa: «Lu ngeen nu doon jële Misra, ngir nu dee ci màndiŋ mi? Duw ñam, dum ndox, te wii ñamu toskare génnliku nan!» ⁶ Ba loolu amee Aji Sax ji yebal ay jaani danjar ca biir mbooloo ma, ñu màtt leen, ba ñu bare ci bànni Israyil dee. ⁷ Mbooloo ma dikk ba ci Musaa, ne ko: «Noo tooñ, ndax noo xultu ci kaw Aji Sax ji, ak ci sa kaw. Tinul nu Aji Sax ji, mu teggil nu jaan yi!» Musaa daldi tinul mbooloo ma. ⁸ Aji Sax ji ne Musaa: «Defarlu jëmму jaan ju am danjar, nga wékk ko ci bant. Su ko defee képp ku ñu màtt, boo ca xoolée, muc.» ⁹ Ci kaw loolu Musaa defarlu jaanu xànjār, wékk ko ci bant, ba képp ku jaan màtt, bu xoolée jaanu xànjār ja, daldi muc.

Israyil daan na Siwon ak Og

¹⁰ Bànni Israyil fabooti, dem ba dali fa ñuy wax Obot, ¹¹ jóge Obot, dali Yee Abarim, ca màndiŋ ma janook Mowab, ca penku ba. ¹² Foofa lañu faboo, dem ba dali ca walum Seredd, ¹³ bàyyikooti foofa, dem ba dali ca wàlla dexu Arnon, ga wale ca réewum Amoreen ña te jaare ca màndiŋ

ma. Dexu Arnon googa, fa la réewum Mowab digalook Amoreen ñi. ¹⁴ Moo tax téereb Xarey Aji Sax ji indi ko, ne:

«Waxeb ga ca Sufa,

xuri Arnon yaak

¹⁵ xur ya bartalu,

jëm néegi Ar, leriŋ suufas Mowab.»

¹⁶ Fa lañu bàyyikoo, dem Beer, (mu firi ab Teen); teen boobu, fa la Aji Sax ji noon Musaa: «Dajaleel mbooloo mi, ma may leen ndox.» ¹⁷ Ca la Israyil woy woy wii:

«Teen bile walal, nu woy.

¹⁸ Ay garmee la bənn,

kàngami askan wi gase la yeti buur,

ak seen banti bopp.»

Ñu jóge màndiŋ ma, dem ba Matana, ¹⁹ jóge Matana dem Naxaliyel, jóge Naxaliyel, dem Bamot, ²⁰ jóge Bamot ba ca xur, wa ca àllub Mowab, àkki nag njobbaxtalu tundu Pisga, wa tiim ndànd-foyyoy ga.

²¹ Ba loolu amee Israyil yebal ay ndaw ca Siwon buurub Amoreen ña, ne ko: ²² «May nu, nu jaare sam réew. Dunu fi jàdde benn tool mbaa ab tookéru reseñ, dunu fi naan ndoxum teen. Mbeddum buur lanuy topp, ba keroog nuy jàll sam réew.» ²³ Siwon nag mayul Israyil, ñu jaarem réewam, xanaa mu dajale gàngooram gépp, sàqi, ngir dajejeek Israyil ca màndiŋ ma. Mu dikk ba Yaxacc, song Israyil, ²⁴ Israyil leel ko ñawkay saamar, nangu seenum réew, dale ko Arnon ba Yabog, ba àgg ca Amoneen ña, ndax kemu réewum Amoneen ñaa fegu woon ba jotuwul. ²⁵ Israyil nangu dèkki Amoreen yooyu yépp, daldi sance mboolem seeni dèkk, boole ca Esbon aki dèkk-dèkkaanam.

²⁶ Esbon moo doon péeyub Siwon buurub Amoreen ña. Kookoo xare woon ak buuru Mowab ba woon, moo nangu ciy loxoom réewam mépp, ba Arnon. ²⁷ Moo tax woykat ya ne:

Ayca ca Esbon, ba tabaxees kooti;

na dèkkub Siwon jógati.

²⁸ Lakk gaa nga jóge Esbon,

sawaraa bawoo dèkkub Siwon ba,

xoyomi Ar ga ca Mowab,

gor ñooña tiim dexu Arnon.

²⁹ Mowabee ngalla yaw!

Sànkū ngeenee, yeen askanu Kemos*,

mi wacc doomam yu góor, ñu daw,

doomam yu jigéen doon jaami Siwon buurub Amor.

³⁰ Noo leen fitt,

Esbon ba Dibon rajaxoo,

nu rajaxeeti ba Nofa, ba àkki Medeba.

³¹ Israyil nag dèkke réewum Amoreen ña. ³² Ba loolu amee Musaa yebal ay ndaw, ñu yeri dèkk ba ñuy wax Yaser. Gannaaw

* 21:29 21:29 Kemos: tuurum Mowabeen ñi la woon.

gi bànni Israyil nangu dëkk-dëkkaan ya, daldi fay dàqe Amoreen ña.

³³ Ba mu ko defee ñu walbatiku, awe yoonu Basan, Og buuru Basan ànd ak gàngooram gépp, dajejeek ñoom, song leen xare ca Eddrey. ³⁴ Aji Sax ji ne Musaa: «Bu ko ragal, ndax ci say loxo laa ko teg, mook gàngooram gépp akum réewam, nga def ko na nga defoon Siwon buurub Amoreen ba woon fa Esbon.» ³⁵ Ci kaw loolu ñu jam Og, mooki doomam ak gàngooram gépp, ba desewul kuy dund, ñu daldi nangu réewam.

Balaam gis na céru barke bi ñeel Israyil

22

(Saar 22—25)

Buur Balag woo na Balaam wall

¹ Bànni Israyil demati ba dali ca joori Mowab ca wàllaa dexu Yurdan, janook Yeriko. ² Fekk na Balag doomu Sippor gis mboolem la bànni Israyil def Amoreen ña. ³ Mowab nag am tiitaange ju réy ca gàngooru bànni Israyil, ndax bare. Mowab jaq na ba mu gisee bànni Israyil. ⁴ Ci kaw loolu Mowab giseek magi Majan, ne leen: «Ndiiraan wii kat, ni nag di forem parlu ba mu set, ni lañu nara ñedde li nu wér lépp, ba mu set.»

Jant yooyu Balag doomu Sippor moo doon buuru Mowab. ⁵ Mu yebal ay ndaw ca Balaam doomu Bewor ngir wooyi ko, ca Petor ga Balaam cosaano, ca tàkkal dex ga* ngir ne ko: «Balaam! Gàngoor a ngii jóge Misra. Ñu ngii lal suuf si ba mu daj, te ñoo sanc, janook man màkk. ⁶ Kon nag dikkal gaaw ñaanal ma yàlla gàngoor gii, ngir ñoo ma épp doole. Jombul ma duma leen, ba dàq leen réew mi, ndax xam naa ne koo ñaanal, mu barkeel, te koo ñaan-yàlla, mu alku.»

⁷ Ci kaw loolu magi Mowab ànd ak magi Majan, dem, yóbbaale ay weexal. Ba ñu agsee ca Balaam, daldi koy àgge kàdduy Balag. ⁸ Mu ne leen: «Fanaanleen fii guddig tey. Tont lu ma ci Aji Sax ji sant rekk, dinaa leen ko àgge.» Kàngami Mowab dal ak Balaam.

⁹ Yàlla nag dikkal Balaam, ne ko: «Nit ñii fi yaw, ñu mu doon?» ¹⁰ Balaam ne Yàlla: «Buuru Mowab Balag doomu Sippor moo yónnee ci man, ne ma: ¹¹ “Balaam, gàngoor a ngii jóge Misra, lal suuf si ba mu daj. Dikkal gaaw móolul ma leen. Jombul ma mana xareek ñoom, ba dàq leen.”» ¹² Yàlla ne Balaam: «Bul ànd ak ñoom, te bul ñaan-yàlla mbooloo ma, ndax ñooñu ñu barkeel lañu.»

¹³ Ba Balaam jógee ca suba sa, da ne kàngami Balag ya: «Delluleen seenum réew, ndax Aji Sax ji bañ na; mayu ma ma ànd ak yeen.» ¹⁴ Kàngami Mowab daldi dellu ca Balag, ne ko: «Balaam de bañ naa ànd ak nun.»

¹⁵ Balag dellu yebal kàngam yu gëna bare, te gëna kawé. ¹⁶ Ñooña dem ba ca Balaam, ne ko: «Balag doomu Sippor dafa wax ne: “Ngalla, bu la dara teree dikk, wuysi ma. ¹⁷ Maa lay teral teraanga ju réya réy. Loo ma wax, ma def. Dikkal rekk, móolul ma gàngoor gii.”» ¹⁸ Balaam tontu surgay Balag, ne leen: «Bu ma Balag doon jox kéram ba mu fees ak xaalis ak wurus sax, duma mana def lenn lu tuut mbaa lu réy, lu tebbi sama ndigalu Yàlla Aji Sax ji. ¹⁹ Waaye yeen fi guddig tey, ba ma xam lu ma Aji Sax jiy waxaat.» ²⁰ Ci kaw loolu Yàlla dikkal Balaam ca guddi ga, ne ko: «Gannaaw woosi la mooy tãnki ñii, àndal ak ñoom. Waaye nag lu ma la wax rekk, def ko.»

Mbaam yedd na boroom

²¹ Ca èllëg sa Balaam takk mbaamam, ànd ak kàngami Mowab, dem. ²² Ba loolu amee sànjum Yàlla tàkk ndax yoon wa mu sumb. Malaakam Aji Sax ji nag taxaw ca yoon wa, nara jànkoonde ak moom, moom mu war mbaamam, ànd ak ñaari surgaam. ²³ Ci kaw loolu mbaam ma gis malaakam Aji Sax ji taxaw ca digg yoon wa, xàccib saamaram. Mbaam ma ne walbit, wàcc yoon wa, topp àll ba. Balaam dóor mbaam ma, waññi ko ba ca yoon wa. ²⁴ Ba mu ko defee malaakam Aji Sax ji taxawi fu yoon wa def ñall wu sew wu jaare digg tóokëri reseñ, ñaari miir séq ko. ²⁵ Mbaam ma gis malaakam Aji Sax ji, daldi tafu ca miir ba, ba tancaale ca tãnkub Balaam. Balaam dellu ko dóor. ²⁶ Malaakam Aji Sax ja dellu jiitu, ba taxawi fu xat, ba maneesula weesalook moom, du ndijoor, du càmmoñ. ²⁷ Mbaam ma gis malaakam Aji Sax ja, daldi ne wàpp goor ca suufu Balaam, xol ba fuddu, mu dóorati mbaam ma yet wa.

²⁸ Ba loolu amee Aji Sax ji tiji gëmmiñu mbaam mi, mu ne Balaam: «Ana lu ma la def, ba ñetti yoon a ngii nga di ma dóor?» ²⁹ Balaam ne mbaam mi: «Yaa may foontoo, su ma yoroon saamar, léegi laa lay rey!» ³⁰ Mu ne ko: «Xanaa du maay sa mbaam mi ngay war bu yàgg ba nga ma moomee, ba tey jii? Dama laa masa def nii?» Mu ne ko: «Déedéet.»

³¹ Aji Sax ji nag ubbi bëti Balaam, mu gis malaakam Aji Sax ja, mu taxaw ca yoon wa, xàccib saamaram. Mu ne gurub sukk, dëpp jëem fa suuf. ³² Malaakam Aji Sax ji ne ko: «Lu tax ngay dóor sa mbaam

* 22:5 22.5 Mooy dexu Efraat.

mi ñetti yoon nii? Man mii maa dikk, jànkoonteeek yaw, ndax yoonu sànkute laa gis. ³³ Mbaam mi moo ma gis, teggi ma ba muy ñetti yoon nii. Bu ma teggiwuloon déy, yaw laay rey; moom, ma ba ko, mu dund.» ³⁴ Balaam ne malaakam Aji Sax ji: «Maa tooñ, ndax xawma woon ne yaa taxaw, dogale ma ci yoon wi. Léegi nag su la yoon wi neexul, ma daldi dëpp.» ³⁵ Malaakam Aji Sax ji ne Balaam: «Àndal ak nit ñi, waaye daal lu ma la waxloo rekk, wax ko.» Balaam nag ànd ak kàngami Balag, dem.

Balaam tase na ak Balag

³⁶ Ba loolu amee Balag dëgg ne Balaam a ngay ñëw, mu gatanduji ko ca dëkku Mowab, ba digalook dëxu Arnon, ca catu réew ma. ³⁷ Balag ne Balaam: «Xanaa yeblewuma woon, ba yebleeti, di la woolu? Lu la tee woona ñëw? Am dama laa manula teral?» ³⁸ Balaam ne Balag: «Maa ngii, wuysi la, waaye mbaa sañ naa waxal sama bopp lenn? Kaddu gu ma Yàlla waxloo de, moom laay wax.»

³⁹ Ci kaw loolu Balaam ànd ak Balag ba Kiryaat Xusot. ⁴⁰ Balag daldi sarxe ay nag aki xar, sédd ca Balaam ak kàngam ya ko dar. ⁴¹ Ca suba sa Balag ànd ak Balaam, yéege ko ba ca kaw jaamookaay ba ñu dippee Baal, tuur ma, mu tollu fa di séen lenni catu mbooloo ma.

23

Balaam ñaanal na Israyil

¹ Ba loolu amee Balaam ne Balag: «Tabaxal ma fii juróom ñaari sarxalukaay, te waajalal ma fi juróom ñaari yëkk yu ndaw, ak juróom ñaari kuuy.» ² Balag def na ko Balaam wax, Balag ak Balaam ku ci nekk sarxal wenn yëkk ak menn kuuy ci sarxalukaay bu nekk. ³ Balaam ne Balag: «Taxawal fii ci sa saraxu rendi-dóomal, ma dem ba nee. Jombul Aji Sax ji dikk, dajeek man. Mbir mu mu ma won, dinaa la ko àgge.» Mu daldi dem ba ca kaw tund wu ndaw wu dara saxul.

⁴ Ba loolu amee Yàlla dikk, dajeek Balaam, Balaam ne ko: «Ñaari sarxalukaay yi, yékkati naa leen te sarxalukaay bu ci nekk, sarxal naa ci wenn yëkk ak menn kuuy.» ⁵ Aji Sax ji nag yeb kaddu ci gémmiñu Balaam, daldi ne ko: «Dellul ca Balag, te nga waxe noonu.»

⁶ Balaam dellu ca moom, fekkul lu moy mu taxaw ca saraxu dóomal, moom ak kàngami Mowab yépp. ⁷ Balaam yékkati kaddug ñaanam, ne:

«Fa Aram la ma Balag buuru Mowab jële, foofa ca tundi penku ya, ne ma: “Kaay ñaanal ma yàlla Yanqóoba, Dikkal rébbal ma Israyil mii.”

⁸ Moo nu may móoloo ku Yàlla móoluwul? Ana nu may rébbe ku Aji Sax ji rébbul?

⁹ Kaw doj yii laa tollu di leen séen, fi kawte yii laa leen jéere.

Aw askan a ngii, dëkke fu beru, te bokkuñu ak xeet yi.

¹⁰ Ana kuy lim feppi suuf, ba lim askanu Yanqóoba?

Ku mana waññ xaajaatub Israyil gii?

Man de, yal naa dee deewinu aji jub ñii, yal na sama muj mel ni gu askan wii!»

Balaam baamu na ñaanam

¹¹ Ba loolu amee Balag ne Balaam: «Yaw, li nga ma def nag? Móolu samay noon laa la jële, yaw defoo lenn lu moy ñaanal leen?» ¹² Mu ne ko: «Xanaa du kaddu gu Aji Sax ji yeb sama gémmiñ, moom laa wara sàmm, ngir wax ko?» ¹³ Balag ne ko: «Kaay rekk, topp ma, ba feneen fooy tollu di leen gis. Seen cat dojng ngay gis nag, waaye doo leen gis ñoom ñëpp. Su ko defee nga móolul ma leen foofu.» ¹⁴ Mu daldi koy yóbbu ba ca toolub Sofm, ca collu tundu Pisga. Ci kaw loolu mu tabax fa juróom ñaari sarxalukaay, sarxalukaay bu nekk, mu sarxalati fa yëkk wu ndaw akam kuuy. ¹⁵ Balaam ne Balag: «Taxaweel nii ci sa saraxu rendi-dóomal, man ma séentuji nee.»

¹⁶ Ba loolu amee Aji Sax ji dajeek Balaam, daldi yeb kaddu ci gémmiñam, ne ko: «Dellul ca Balag, te nga waxe noonu.»

¹⁷ Mu dem ba ca moom, fekku ko lu moy mu taxaw ca wetu saraxu rendi-dóomal, mook kàngami Mowab. Balag ne ko: «Lu Aji Sax ji wax?» ¹⁸ Balaam daldi yékkati kaddug ñaanam, ne:

«Jógal dégloo, Balag, teewlu maa, doomi Sippor.

¹⁹ Yàlla du nit, bay fen, du doom aadama bay tuub.

Moom wax na lu mu deful a? Am àddu na lu mu sottalul?

²⁰ Kaddug barkeel gii laa jot ndigalam, Yàllaa barkeel, duma ko tebbi.

²¹ Séeneesul aw ay ci askanu Yanqóoba, giseesul aw naqar ci xeetu Israyil wii.

Seen Yàlla Aji Sax jee ànd ak ñoom, njiinum buur a jibe fa seen biir.

²² Yàllaa leen jële Misra, féete leen fa ay béjjén féete nagu àll.

²³ Ñeengo jappul Yanqóoba, gisaane gisul Israyil gii.

Lu jot rekk, àggees ko Yanqóoba: ne ko: “Israyiloo, lii la Yàlla def.”

²⁴ Wii askan ni gaynde lay jóge, ni gayndeg sibi lay faboo,

du goor te yàppul am pàdd, deret ja tuuru, mu xab.»

²⁵ Ba loolu amee Balag ne Balaam: «Boo leen móoluwul benn yoon kay, bu leen

ñaanal ba doyal boog!»²⁶ Balaam ne ko: «Xanaa waxuma la woon ne la lépp lu Aji Sax ji wax, loolu laay def?»²⁷ Balag ne ko: «Kaay rekk, ma yóbbu la feneen. Jombul Yàlla nangu nga móolool ma leen foofu.»²⁸ Balag yóbbu Balaam ba ca collu tundu Pewor, wa tiim ndànd-foyfoy ga.²⁹ Balaam ne Balag: «Tabaxal ma fii juróom ñaari sarxalukaay, te nga waajalal ma fi juróom ñaari yékk yu ndaw, ak juróom ñaari kuuy.»³⁰ Balag def na Balaam wax, ba noppi sarxal aw yékk wu ndaw akam kuuy ci kaw sarxalukaay bu nekk.

24

Balaam ñaanalati na Israyil

¹ Balaam nag gis ne Aji Sax ji la neex mu barkeel Israyil, ba tax sàkkootal ay takk na woon, xanaa mu walbatiku, janook màndinj ma.² Ci kaw loolu Balaam dawal bêtam, daldi séen Israyil, na ñu dale topp seeni giir, Noowug Yàlla daldi wàcc ca moom.³ Ba mu ko defee mu yékkati kàddug ñaanam, ne:

«Kàddug Balaam a ngi, doomu Bewor, kàddug waa jiy boroom ngis,

⁴ kàddug kiy dégg waxi Yàlla, Aji Man ji wonem peeñu, mu gis, kiy daanu leer, te ay gêtam muriku.

⁵ Yanqóobaa, yaaka Yànji xayma! Israyil, laa ne, yaaka taaruy màkkaan!

⁶ Na nga ne màww ni tooli tàndarma, nirootteek tóokèri tàkkal dex, mbaa garabu alowes gu xeeñ gu Aji Sax ji jëmbat,

mbaa garabi seedar yu saxe wali ndox.

⁷ Ndox maay wale cay bagaanam, am jiwoom màndim ndox, buuram nara sut Buur Agag, nguuram jóg ba kawe.

⁸ Yàllaay ki ko jële Misra, féete ko fa ay béjjen féete nagu àll. Mooy warax xeet yi ko jógal, dammat leen, jamat leeni fittam.

⁹ Israyil a ngi yuug ak a goor ni gaynde, mbete gayndeg sibi, ana ku koy yee? Ku ko ñaanal barke, yaay barkeel; ku ko ñaanal alkànde, yaay alku.»

Balaam gis na èllëgu Israyil

¹⁰ Ba loolu amee Balag sànju ci kaw Balaam, daldi fenqey loxoom. Ci kaw loolu Balag ne Balaam: «Móolu samay noon laa la wooye woon, yaw defoo lu moy ñaanal leena ñaanal, ba muy ñetti yoon nii!»¹¹ Léegi nag, laggal ñibbi. Noon naa la dinaa la teral bu baax, waaye mu ngoog, Aji Sax jee la xañ teraanga.»¹² Balaam ne Balag: «Xanaa du sa ndaw yi nga yebaloon ci man sax, waxoon naa leen ne leen,¹³ su ma Balag joxoon kërám ba mu fees ak

xaalis ak wurus sax, duma mana def ci sama coobarey bopp, lenn lu baax mbaa lu bon, lu tebbi ndigalu Yàlla Aji Sax ji? Li Aji Sax ji wax rekk, moom laay wax.¹⁴ Léegi nag maa ngi dellu ca saay bokk, waaye kaay, ma xamal la li xeet wii di def saw xeet, fan yu mujj ya.»¹⁵ Ci kaw loolu mu yékkati kàddug ñaanam, ne: «Kàddug Balaam a ngi, doomu Bewor, kàddug waa jiy boroom ngis,¹⁶ kàddug kiy dégg waxi Yàlla,

kiy xame ca xam-xamu Aji Kawe ji, Aji Man ji wonem peeñu, mu gis, kiy daanu leer, te ay gêtam muriku.

¹⁷ Maa ngi koy gis, te du tey, Maa ngi koy niir, te jubseegul; biddiww a feqe fa Yanqóoba, yetu nguur a yékkatikoo fa Israyil, daldi toj boppi Mowab,

toj kaaji mboolem askanu Set.¹⁸ Edom, mu moom; Seyir, noonam, muy boroom; Israyil def jaloore.

¹⁹ Fa Yanqóoba la buur di bawoo, dem ñèddi ndesu dëkk ba.»

Balaam gis na mujug nooni Israyil

²⁰ Ci kaw loolu Balaam geesu réewum Amaleg, dellu yékki kàddug ñaanam, ne: «Amaleg moo sutu xeet, te sànkú lay mujje.»

²¹ Mu teg ca geesu réewum Keneen ña, yékkeeti kàddug ñaanam, ne: «Keneen ñee wér ab dëkkuwaay, seenub tàgg a làqoo biir doj.

²² Waaye réewum Keneen gépp ay xoy-omu, ba leen Asur di yóbbuji njaam.»

²³ Mu dellooti yékki kàddug ñaanam, ne: «Wóoy kuy dund, keroog bu Yàlla dogalee lii?

²⁴ Ay gaal ay jóge tefesu Kitim, néewalsi doole Asur, néewalsi doole Eber. Waaye ñoom it dañuy mujj sànkú.»

²⁵ Ci kaw loolu Balaam ñibbi am réewam, Balag it demu yoonam.

25

Bànni Israyil bokkaale na ca réewum Mowab

¹ Ci kaw loolu Israyil dale fa Sitim. Mbooloo ma nag tàmbali di moy ak jigéeni Mowab.² Jigéen ña di woo mbooloo ma ca seen saraxi tuur ya, mbooloo ma di lekk ak a sujjóotal seeni tuur.³ Israyil nag taqook tuur ma ñuy wax Baal Pewor; ba sànjum Aji Sax ji tàkkal Israyil.⁴ Aji Sax ji ne Musaa: «Jàppal njiiti mbooloo mi yépp, nga wékk leen ci bant fi kanam Aji Sax ji, bëccëg ndarakàmm, ngir sànjum Aji Sax ji dëddu Israyil.»⁵ Musaa ne àttekati Israyil:

«Na ku nekk ci yeen rey nitam ñi taqook Baal Pewor.»

⁶ Ci biir loolu rekk, jenn waayu bànni Israyil dikk, indaale senn ndawas waa Majan ci biiri bokkam, Musaa ak mbooloom Israyil mépp di gis, fekk ñoom ñuy jooyoo fa bunt xaymab ndaje ma. ⁷ Fineyas, doomu Elasar, doomu sarxalkat ba Aaróona, gis loolu, daldi jóge ca mbooloo ma, jël ab xeej. ⁸ Mu topp waayi Israyil ja ba ca biir néeg ba, daldi leen boole bennub xeej, ñoom ñaar, jam waayi Israyil ji, ba jamaale ndaw si ci biir. Ba mu ko defee mbas ma jotoona dal ca kaw bànni Israyil daldi dakk. ⁹ Ña dee ca mbas ma nag di ñaar fukki junneek ñeent (24 000).

¹⁰ Ba loolu weesee Aji Sax ji wax Musaa, ne ko: ¹¹ «Fineyas, doomu Elasar, doomu sarxalkat bi Aaróona, moo moyale Israyil samam sànj, ndax sama fiiraange gi mu ma fiirlee ci seen biir, ba faagaagaluma bànni Israyil ci sama biir fiiraange. ¹² Kon nag nee ko: Maa ngii di ko baaxe sama kóllèreg jàmm, ¹³ mu ñeel ko, mook askan wi koy wuutu, te di kóllèreg carxal gu sax dàkk, ndax moo fiire Yallaam, ba jot bànni Israyil.»

¹⁴ Waayi bànni Israyil ja ñu jamoon, te boole kook ndawas Majan sa jam, mooy Simri doomu Salu. Kilifag kër maamam la woon ca Cimyoneen ña. ¹⁵ Ndawas Majan sa ñu jam di Kosbi. Baayam Sur doonoon kilifag kër maamam ca giirug Majan ga mu bokk.

¹⁶ Ci kaw loolu Aji Sax ji wax Musaa, ne ko: ¹⁷ «Noonoleen waa Majan yii, te rey leen, ¹⁸ ndax ñoom ñoo leen noonoo woon ba ñu leen woree ca mbirum Pewor ma, ak itam ca mbirum ndaw sa Kosbi, seen mbokk may doomu kilifag Majan ja, te ñu jam ko keroog bésu mbas, ma sababoo ca mbirum Baal Pewor, tuur ma.»

Israyil dégg na ab artoom balaa dugg Kanaan

(Saar 26—36)

Ñaareelu limeefu bànni Israyil taxaw na

¹⁹ Gannaaw ba mbas ma wéyee,

26

¹ Aji Sax ji dafa wax Musaa, ak Elasar doomu Aaróona sarxalkat ba, ne leen: ² «Waññleen mbooloom bànni Israyil gépp, ngeen lim turi góor ñépp, na ñu bokke seen kéri maam, dale ko ci ñi am ñaar fukki at, jëm kaw, mboolom ñi xare war ci bànni Israyil.» ³ Musaa ak Elasar sarxalkat ba wax ak ñoom ca joori Mowab, fa janook Yeriko ca wetu dexu Yurdan; ñu ne leen ⁴ ñi dale ci ñaar fukki at, jëm kaw

lees di lim, na ko Aji Sax ji sante Musaa. Lii moo di limeefu nit ña soqikoo ci bànni Israyil, ña génne woon Misra:

⁵ Ruben moo doon taawub Israyil. Ñi askanoo ci Ruben ñoo di Anog mi sos làngu Anogeen ñi, ak ñoom Palu mi sos làngu Paluween ñi, ⁶ ak ñoom Eson mi sos làngu Esroneen ñi, ak ñoom Karmi mi sos làngu Karmeen ñi. ⁷ Làngi Rubeneen ñaa ngoogu, ña ñu leen limal di ñeent fukki junneek ñett ak juróom ñaar téeméer ak fanweer (43 730).

⁸ Palu moo meññ Elyab, ⁹ Elyab meññ Nemwel ak Datan ak Abiram. Datan ak Abiram ñooñi doonooni njiit ca mbooloo ma, ñoo doon diinjat Musaa ak Aaróona. Ña nga bokkoon ca gàngooru Kore, ba ñuy diinjat Aji Sax ji, ¹⁰ ba suuf sa xar, boole leen ak Kore, wonn, keroog ba gàngoor ga sànkoo, te sawara wa lakk ñaar téeméeri nit ak juróom fukk, ñu daldi doon firnde luy artoo. ¹¹ Doomi Kore ya nag deewuñu ca.

¹² Ñi askanoo ci Simeyon, ñook seeni làng ñoo di ñoom Nemwel mi sos làngu Nemweleen ñi, ak ñoom Yamin mi sos làngu Yamineen ñi, ak ñoom Yakin mi sos làngu Yakineen ñi, ¹³ ak ñoom Sera mi sos làngu Cerayeen ñi, ak ñoom Sawul mi sos làngu Cawuleen ñi. ¹⁴ Làngi Cimyoneen ñaa ngoogu, di ñaar fukki junneek ñaar ak ñaar téeméer (22 200).

¹⁵ Ñi askanoo ci Gàdd, ñook seeni làng ñoo di ñoom Cefon mi sos làngu Cefoneen ñi, ak ñoom Agi mi sos làngu Ageen ñi, ak ñoom Suni mi sos làngu Cuneen ñi, ¹⁶ ak ñoom Osni mi sos làngu Osneen ñi, ak ñoom Eri mi sos làngu Ereen ñi, ¹⁷ ak ñoom Arodd mi sos làngu Aroddeen ñi, ak ñoom Areli mi sos làngu Areeleen ñi. ¹⁸ Làngi Gàddeen ñaa ngoogu, ña ñu leen limal di ñeent fukki junneek juróomi téeméer (40 500).

¹⁹ Am na nag doomi Yuda yu ñuy wax Er ak Onan. Waaye Er ak Onan ña ca réewum Kanaan lañu faatoo. ²⁰ Ñi askanoo ci Yuda, ñook seeni làng ñoo di ñoom Sela mi sos làngu Celaneen ñi, ak ñoom Peres mi sos làngu Pereseen ñi, ak ñoom Sera mi sos làngu Cerayeen ñi. ²¹ Ñi askanoo ci Peres ñoo di ñoom Eson mi sos làngu Esroneen ñi, ak ñoom Amul mi sos làngu Amuleen ñi. ²² Làngi Yudeen ñaa ngoogu, ña ñu leen limal di juróom ñaar fukki junneek juróom benn ak juróomi téeméer (76 500).

²³ Ñi askanoo ci Isaakar, ñook seeni làng ñoo di Tola mi sos làngu Toleen ñi, ak ñoom Puwa mi sos làngu Puween ñi, ²⁴ ak ñoom Yasub mi sos làngu Yasubeen ñi, ak ñoom Simron mi sos làngu Simroneen ñi.

²⁵ Làngi Isaakar a ngoogu. Ña ñu leen limal di juróom benn fukki junneek ñeent ak ñetti tééméer (64 300).

²⁶ Ñi askanoo ci Sabulon, ñook seeni làng ñoo di ñoom Seredd mi sos làngu Sereddeen ñi, ak ñoom Elon mi sos làngu Eloneen ñi, ak ñoom Yaleel, mi sos làngu Yaleleen ñi. ²⁷ Làngi Sabuloneen ñaa ngoogu, ña ñu leen limal di juróom benn fukki junni ak juróomi tééméer (60 500).

²⁸ Ñi askanoo ci Yuusufa nag, ñook seeni làng, ñoo soqikoo ci Manase ak Efrayim. ²⁹ Ñi soqikoo ci Manase ñoo di ñoom Makir mi sos làngu Makireen ñi. Makir moo jur Galádd. Ci Galádd la làngu Galáddeen ñi soqikoo. ³⁰ Ñii ñoo askanoo ci Galádd: Yeser mi sos làngu Yesereen ñi, ak ñoom Eleg mi sos làngu Elegeen ñi, ³¹ ak Asriyel mi sos làngu Asriyeleen ñi, ak Sikem mi sos làngu Sikemeen ñi, ³² ak Semida mi sos làngu Semideen ñi, ak Efer mi sos làngu Eferreen ñi. ³³ Selofat doomu Efer nag amuloon doom ju góor, xanaa aw jigéen donj. Doomi Selofat yu jigéen di Maala ak Nowa ak Ogla ak Milka ak Tirca. ³⁴ Làngi Manasee ngoogu, ña ñu leen limal di juróom fukki junneek ñaar ak juróom ñaar tééméer (52 700).

³⁵ Ñii nag ñoo askanoo ci Efrayim, ñook seeni làng: ñoom Sutela mi sos làngu Cuteleen ñi, ak ñoom Beker mi sos làngu Bekereen ñi, ak ñoom Taxan mi sos làngu Taxaneen ñi. ³⁶ Ñii nag, askanu Sutela lañu: ñoom Eran, ak làngu Eraneen ñi mu sos. ³⁷ Làngi Efrayim a ngoogu, ña ñu leen limal di fanweeri junneek ñaar ak juróomi tééméer (32 500).

Nooño askanoo ci Yuusufa, ñook seeni làng.

³⁸ Ñi askanoo ci Beñamin, ñook seeni làng ñoo di ñoom Bela mi sos làngu Belayeen ñi, ak ñoom Asbel mi sos làngu Asbeleen ñi, ak ñoom Ayram mi sos làngu Ayrameen ñi, ³⁹ ak ñoom Sufam mi sos làngu Sufameen ñi, ak ñoom Ufam mi sos làngu Ufameen ñi. ⁴⁰ Askanu Bela wi sosoo ci Àrd ak Naaman ñoo di làngu Àrdeen ñi, ak làngu Naameen ñi sèto ci Naaman. ⁴¹ Nooño askanoo ci Beñamin, ñook seeni làng, ña ñu leen limal di ñeent fukki junneek juróom ak juróom benni tééméer (45 600).

⁴² Ñii nag ñoo askanoo ci Dan, ñook seeni làng: ñoom Suwam ak làngu Cuwameen ñi. Daneen ñaa ngoogu, na ñu lime seeni làng. ⁴³ Mboolem làngi Cuwameen, ña ñu leen limal juróom benn fukki junneek ñeent la, ak ñeenti tééméer (64 400).

⁴⁴ Ñi askanoo ci Aser, ñook seeni làng ñoo di ñoom Imna mi sos làngu Imneen

ñi, ak ñoom Iswi mi sos làngu Isween ñi, ak ñoom Berya mi sos làngu Beryeen ñi. ⁴⁵ Waa askanu Berya ñoo di ñoom Eber mi sos làngu Eberreen ñi, ak ñoom Malkiyel mi sos làngu Malkiyeleen ñi. ⁴⁶ Doomu Aser ju jigéen nag moo di Sera. ⁴⁷ Làngi Asereen ñaa ngoogu, ña ñu leen limal di juróom fukki junneek ñett ak ñeenti tééméer (53 400).

⁴⁸ Ñi askanoo ci Neftali ñook seeni làng ñoo di ñoom Yáceel, mi sos làngu Yaceleen ñi, ak ñoom Gunni mi sos làngu Guneen ñi, ⁴⁹ ak ñoom Yeccer mi sos làngu Yecereen ñi, ak ñoom Silem mi sos làngu Cilmeen ñi. ⁵⁰ Neftaleen ñaa ngoogu, ñook seeni làng, ña ñu leen limal di ñeent fukki junneek juróom ak ñeenti tééméer (45 400).

⁵¹ Limeefu bànni Israyil a ngoogu, di juróom benni tééméeri junneek benn ak juróom ñaar tééméer ak fanweer (601 730).

Lu jëm ci séddaleb réew ma

⁵² Aji Sax ji nag wax Musaa, ne ko: ⁵³ «Ñii lees di séddale réew mi, te na cér yi dèppook limu nit ñi: ⁵⁴ làng gu gëna mag, na am cér bu gëna mag, làng gu gëna tuut, am cér bu gëna tuut, làng gu ci nekk, cér bi dèppook ab limam lees koy jox. ⁵⁵ Ab tegoo bant donj lees di séddalee réew mi, te seen limu giiri maam ya ñu bokk, na dèppook seenub cér. ⁵⁶ Ci kaw tegoo bant lees di dogale cérú giir gu ñu bare séq, ak gu ñu néew séq.»

Ñaareelu limeefu Leween ñi taxaw na

⁵⁷ Ñii nag lañu limal Leween ñi ak seeni làng: ñoom Gerson mi sos làngu Gersoneen ñi, ak ñoom Keyat mi sos làngu Keyateen ñi, ak ñoom Merari mi sos làngu Merareen ñi. ⁵⁸ Ñii itam ci làngi Leween lañu: làngu Libneen ñi, ak làngu Ebroneen ñi, ak làngu Maaleen ñi, ak làngu Museen ñi, ak làngu Korayeen ñi. Keyat nag mooy maamu Amram; ⁵⁹ soxna Amram di Yokebedd doomu Lewi, ja juddoo Misra. Yokebedd am ak Amram Aaróona ak Musaa ak Maryaama, seenub jigéen. ⁶⁰ Aaróona moo jur Nadab ak Abiyu ak Elasar ak Itamar. ⁶¹ Nadab ak Abiyu ña nga dee keroog ba ñu taalalee Aji Sax ji cuuraay lu warul. ⁶² Ña ñu limal Leween ñi nag ñaar fukki junneek ñett lañu (23 000), di mboolem góor ña am weer, jëm kaw, te limaaleesu leen ak bànni Israyil ga ca des, ndax joxeesu leen ab cér ci biir bànni Israyil.

Těj nañu limeef ya

⁶³ Nooñu lañu lim ci njiital Musaa ak Elasar sarxalkat ba, ba ñu ténkee limeefu bànni Israyil ca joori Mowab, ga janook

Yeriko, ca tàkkal dexu Yurda. ⁶⁴ Ñooŋu, kenn desul ca seen biir; te bokkoon ca limeefu bànni Israyil, ba Musaak Aaróona sarxalkat ba jèkkoon tènke ca màndiŋu Sinayi. ⁶⁵ Ndax ci ñoom la Aji Sax ji noon dee rekk lañuy def ba jeex ca màndiŋ ma. Kenn desu ca, ku dul Kaleb doomu Yefune, ak Yosuwe doomu Nuun.

27

Lu jëm ci jigéen ñi ak seen céri suuf

¹ Ci kaw loolu ay doomi Selofat yu jigéen jóg. Seen baay Selofat, Efer ay baayam, Efer, Galàdd ay baayam, Galàdd, Makir ay baayam, Makir, Manaseey baayam, Manase, Yuusufaay baayam. Jigéen ñooŋu ñoo di Maala ak Nowa ak Oglá ak Milka ak Tirca. ² Ñoo taxaw fa kanam Musaa, ak Elasar sarxalkat ba, ak njiit ya, ak mbooloo ma mépp, ca bunt xaymab ndaje ma. Ñu ne: ³ «Sunu baay daa dee ca màndiŋ ma. Moom nag bokkuloon ca gàngooru Kore, ga daje woon ci kaw Aji Sax ji, waaye bàkkaaruu boppam a ko rey. Bàyyiwul nag doom yu góor. ⁴ Waaye lu tax ñu génne sunu turu baay ci lãngam gi mu bodd, ndax ñàkk doom ju góor? Joxleen nu sunub cér ci biir wàll wi sunu bokki baay yu góor bokk ak sunu baay kay!»

⁵ Ci kaw loolu Musaa jébbal Aji Sax ji, àtteb jigéen ña. ⁶ Aji Sax ji wax Musaa ne ko: ⁷ «Li doomi Selofat yi wax dëgg la. Danga leen di jox kay, ab cér ci biir wàll, wi seen baay bokk ak bokkam yu góor. Su ko defee nga féetale leen seen céru suufu baay.

⁸ «Te nga wax bànni Israyil, ne leen: “Bu ku góor deeyee te bàyyiwul doom ju góor, doomam ju jigéen ngeen di jox céru suufam. ⁹ Su amul doom ju jigéen nag, góor ñi mu bokkal waajur ngeen di jox céru suufam. ¹⁰ Su amul góor gu mu bokkal waajur, góor ña baayam bokkal waajur, ñoom ngeen di jox céru suufam. ¹¹ Su baayam amul góor gu mu bokkal waajur, mbokkam mu ko géna jege ci biir lãngam, moom ngeen di jox céru suufam. Kookooy donn cér ba. Na loolu di dogalu yoon, ñeel bànni Israyil, noonu ko Aji Sax ji sante Musaa.”»

Yosuwe wuutu na Musaa

¹² Gannaaw loolu Aji Sax ji ne Musaa: «Yéegil ca kaw tundu Abarim wee, nga séentu réew mi ma jox bànni Israyil. ¹³ Boo ko séentoo ba noppi, yaw itam dees na la térali ca say bokk, ni sa mag Aaróona, ¹⁴ gannaaw yeena diinjat sama ndigal ca màndiŋu Ciin, fa mbooloo ma jote woon ak man. Yeena wormaalul sama sellnga ca kanam mbooloo ma, ca ndox

ma. Mooy walum Meriba, (mu firi Jote ba), ma woon ca Kades, ca màndiŋu Ciin.»

¹⁵ Musaa nag wax Aji Sax ji, ne ko: ¹⁶ «Aji Sax ji, yaw Yàlla mi moom noowu bépp boroomu suux, ngalla tabbal nit ku jiite mbooloo mi, ¹⁷ kuy xareji, jiite leen, délsi, jiite leen, di leen yóbbu, di leen délloosi, ba mbooloom Aji Sax ji baña mel ni xar yu amul sàmm.» ¹⁸ Aji Sax ji ne Musaa: «Jélal Yosuwe doomu Nuun. Nit la ku noowal biir nekk ci moom. Nanga ko teg sa loxo, sase ko noonu. ¹⁹ Taxawal ko fi kanam Elasar sarxalkat bi, ci kanam mbooloo mépp, te nga sas ko ci seen kanam, ²⁰ daldi koy sédd lenn ci sa daraja, ngir mbooloom bànni Israyil mépp déggal ko. ²¹ Ca Elasar sarxalkat bi nag la war di dem, ngir mu di ko seetal fi kanam Aji Sax ji, lu Urim, jumtukaayu tegtal bi, feeñal. Ci ndigalal Elasar nag lañuy génne, te ci ndigalam it lañuy dellusee, moom Yosuwe, ak mbooloom bànni Israyil giy ànd ak moom, mbooloo mépp.»

²² Ba mu ko defee Musaa def na ko Aji Sax ji sant. Mu ànd ak Yosuwe, taxawal ko fa kanam Elasar sarxalkat bi, ak mbooloo mépp. ²³ Musaa nag teg Yosuwe ay loxoom, daldi koy sas, na ko Aji Sax ji santanee, mu jottli.

28

Bés bu nekk laaj na ab sarax

¹ Aji Sax ji waxati Musaa, ne ko: ² «Santal bànni Israyil ne leen sama sarax, sama ñam yi jëm ci sama saraxi sawara ngir xetug jàmm, ñeel ma, nañu farlu ci di ma ko indil saa yu àppam jotee. ³ Nga waxleen ne leen, lii moo di saraxu sawara bi ñuy indil Aji Sax ji: xar yu góor yu menn at yu mucc sikk, ñaar ci bés bi, muy saraxu rendi-dóomal bi war bés bu nekk. ⁴ Menn xar mi, ngeen sarxal ko ci suba, ñaareel bi, ngeen sarxal ko diggante ngeen ak jant bu so. ⁵ Benn fukkeelu efab sunguf su mucc ayib, di ñetti kilo, mooy saraxu pepp bi xar mu nekk di àndal, ñu tooyale ko walaatu xiinu diwu segalu oliw, di liitar ak genn-wàll. ⁶ Looloo di rendi-dóomal bi war bés bu nekk, na ñu ko dogale woon ca tundu Sinayi, ngir xetug jàmm, muy saraxu sawara, ñeel Aji Sax ji.

⁷ «Saraxu tuuram walaatu xiin lay doon, di liitar ak genn-wàll ngir xar mu ci nekk. Ci ètt bu sell bi lees di sotti saraxu tuuru bi, naan gu diis googu, ñeel Aji Sax ji. ⁸ Ñaareelu xar mi, sarxal-leen ko diggante ngeen ak jant bu so, mu ànd ak saraxu peppam ak saraxu tuuram niki ci suba, ngeen def ko saraxu sawara ngir xetug jàmm, ñeel Aji Sax ji.

Bésuub Noflaay am na saraxam

⁹ «Bésub Noflaay nag ñaari xari menn at yu mucc sikk lay doon, ak saraxu peppam, biy ñaari fukkeeli efay sunguf su mucc ayib, di juróom benni kilo, ñu tooyale ko ag diw, te mu ànd ak saraxu tuuram. ¹⁰ Loolooy saraxu rendi-dóomalú bésub Noflaay, ci bésub Noflaay bu nekk, te bokkewul ak dóomal bi war bés bu nekk, te ànd ak saraxu tuuram.

Terutel weer am na saraxam

¹¹ «Te itam seen bési Terutel weer, nangeen sarxe ab rendi-dóomal, ñeel Aji Sax ji. Ñaari yékk yu ndaw, ak menn kuuy, ak juróom ñaari xar yu góor yu menn at, te lu ci nekk mucc sikk, ¹² ak ñetti fukkeeli efay sunguf su mucc ayib, di juróom ñeenti kilo, muy saraxu pepp, ñu tooyale ko ag diw, booleek yékk wu nekk, ak ñaari fukkeeli efay sunguf su mucc ayib, di juróom benni kilo, muy saraxu pepp, ñu tooyale ko ag diw, booleek kuuy mi, ¹³ ak benn fukkeeli efab sunguf su mucc ayib, di ñetti kilo, muy saraxu pepp, ñu tooyale ko ag diw, booleek xar mu ci nekk. Saraxu rendi-dóomal la, ngir xetug jámm, di saraxu sawara, ñeel Aji Sax ji.

¹⁴ «Ay saraxi tuuram genn-wállu xiinu biiñ la, di ñetti liitar ci yékk wu nekk, ak benn ñetteelub xiin, di ñaari liitar ci kuuy mi, ak walaatu xiin, di liitar ak genn-wállu biiñ ci xar mu ci nekk. Loolooy dóomalú weer wi, weer wu ci nekk, ba weeri at mi daj. ¹⁵ Ak itam bennub sikket, mook saraxu tuuroom ngir saraxu póotum bàkkaar, ñeel Aji Sax ji ci bésub Terutel weer wi, te bokkewul ak rendi-dóomal bi ñuy sarxe bés bu nekk.

Bésub Mucc am na saraxam

¹⁶ «Weer wu jékk ci at mi nag, fukki fanam ak ñeent mooy bésub Mucc bi, ñeel Aji Sax ji. ¹⁷ Èllég sa, fukki fani weer woowu ak juróom, di mággal; diiru juróom ñaari fan, mburu mu amul lawiir lees cay lekk. ¹⁸ Bés bu jékk boobu, woote bu sell lees cay amal. Mboolem lees baaxoo liggéey, deesu ko ci liggéey. ¹⁹ Nangeen ci def saraxu sawara, mu dib rendi-dóomal, ñeel Aji Sax ji: ñaari yékk yu ndaw, ak menn kuuy, ak juróom ñaari xari menn at, te ngeen def lépp di lu mucc sikk. ²⁰ Yooyii ànd ak saraxu peppam, di sunguf su mucc ayib, su ñu tooyale ag diw; ñetti fukkeeli efay sunguf, di juróom ñeenti kilo, ciw yékk, ñaari fukkeeli efay sunguf, di juróom benni kilo, cim kuuy, ²¹ ak benn fukkeeli efab sunguf, di ñetti kilo, ci mii xar, benn fukkeeli efa, ca mee, ba juróom ñaari xar yi daj, ²² ak benn sikketu póotum bàkkaar ngir seen njotlaay. ²³ Te bokkewul ak rendi-dóomalú

suba si, rendi-dóomal boobu war bés bu nekk. ²⁴ Sarax yu mel noonu ngeen di sarxal ci bés bi, ak seen saraxu tuuru, diiru juróom ñaari fan, muy ñamu saraxu sawara ngir xetug jámm, ñeel Aji Sax ji. Ci kaw rendi-dóomal bi war bés bu nekk, ci lees koy dolli. ²⁵ Bésub juróom ñaareel ba, seen bésub woote bu sell lay doon. Mboolem lees baaxoo liggéey, deesu ko ci liggéey.

Ngóob am na saraxam

²⁶ «Bésub ndoortel meññeef ba ngeen di sarxesi saraxu pepp mu bees, ñeel Aji Sax ji, ci seen biir mággalug Ayi bés nag, seen bésub woote bu sell lay doon. Mboolem lees baaxoo liggéey, deesu ko ci liggéey. ²⁷ Nangeen ci sarxal ab rendi-dóomal, ngir xetug jámm, ñeel Aji Sax ji: ñaari yékk yu ndaw, ak menn kuuy, ak juróom ñaari xari menn at. ²⁸ Saraxu peppam di sunguf su mucc ayib, su ñu tooyale ag diw. Ñetti fukkeeli efay sunguf, di juróom ñeenti kilo ci yékk wu nekk, ak ñaari fukkeeli efa, di juróom benni kilo ci kuuy mi, ²⁹ ak fukkeelub efa, di ñetti kilo, ci mii xar, fukkeelub efa ca mee, ba juróom ñaari xar yi daj, ³⁰ ak bennub sikket ngir seen njotlaay. ³¹ Sarxeleen loolu, te bumu bokke ak rendi-dóomal bi war bés bu nekk tey ànd ak saraxu peppam. Lu mucc sikk nag ngeen di def sarax yooyii, te ngeen defaale saraxi tuuram yi ci war.

29

Bési liit yi laaj na sarax

¹ «Bu loolu weese, benn fanu weeru juróom ñaareel, seen bésu woote bu sell lay doon. Mboolem lees baaxoo liggéey, deesu ko ci liggéey. Bés la bu ngeen di yéenee ag liit. ² Sarxal-leen ci ab rendi-dóomal ngir xetug jámm, ñeel Aji Sax ji: wenn yékk wu ndaw, ak menn kuuy, ak juróom ñaari xari menn at, te lu ci nekk mucc sikk. ³ Saraxu peppam lay àndal, di sunguf su mucc ayib, su ñu tooyale ag diw; ñetti fukkeeli efay sunguf, di juróom ñeenti kilo ci yékk wi, ñaari fukkeeli efa, di juróom benni kilo ci kuuy mi, ⁴ ak benn fukkeeli efab sunguf, di ñetti kilo ci mii xar, benn fukkeeli efa ca mee, ba juróom ñaari xar yi daj, ⁵ ak benn sikketu póotum bàkkaar, ngir seen njotlaay. ⁶ Bokkewul ak rendi-dóomalú Terutel weer wu nekk, mook saraxu peppam, bokkewul it ak rendi-dóomal bi war bés bu nekk, ak saraxu peppam, ak seen saraxi tuur; ni ko yoon térale. Dees koy def ngir xetug jámm, muy saraxu sawara, ñeel Aji Sax ji.

Bésub Njotlaay laaj na sarax

⁷ «Fukki fanu juróom ñaareelu weer woowu it, seen bésuub woote bu sell lay doon, te ngeen toroxlu ci. Mboolem lees baaxoo liggéey, deesu ko ci liggéey. ⁸ Sarxal-leen ci ab rendi-dóomal, ñeel Aji Sax ji, ngir xetug jámm: wenn yëkk wu ndaw, ak menn kuuy, ak juróom ñaari xari menn at, te lu mucc sikk ngeen di def lépp. ⁹ Saraxu peppam lay àndal, di sunguf su mucc ayib su ñu tooyale ag diw; ñetti fukkeeli efay sunguf, di juróom ñeenti kilo ci yëkk wi, ñaari fukkeeli efa, di juróom benni kilo ci kuuy mi, ¹⁰ ak benn fukkeelu efab sunguf, di ñetti kilo ci mii xar; benn fukkeelu efa ca mee, ba juróom ñaari xar yi daj, ¹¹ ak benn sikketu póotum bàkkaar, te du bokke ak póotum bàkkaar u njotlaay gi, ak saraxu dóomal bi war bés bu nekk, mook saraxu peppam, ak seen saraxi tuur yi ci war.

Màggalu Mbaar yi laaj na sarax

¹² «Fukki fan yaak juróom ci juróom ñaareelu weer woowu itam, seen bésuub woote bu sell lay doon. Mboolem lees baaxoo liggéey, deesu ko ci liggéey. Amal-leen ci ag màggal, ñeel Aji Sax ji, diiru juróom ñaari fan, doore ko ca bés ba. ¹³ Nangeen ca sarxal ab rendi-dóomal, muy saraxu sawara ngir xetug jámm, ñeel Aji Sax ji: fukki yëkk yu ndaw ak ñett, ak ñaari kuuy, ak fukk ak ñeenti xari menn at, te lépp mucc sikk. ¹⁴ Seen saraxi pepp di sunguf su mucc sikk su ñu tooyale ag diw, ñetti fukkeeli efay sunguf, di juróom ñeenti kilo ci wenn yëkk wu nekk, ba fukki yëkk yeek ñett daj; ñaari kuuy yi, kuuy mu ci nekk, ñaari fukkeeli efay sunguf, di juróom benni kilo, ¹⁵ ak benn fukkeelu efab sunguf, di ñetti kilo ci mii xar; benn fukkeelu efa ca mee, ba fukki xar yeek ñeent daj, ¹⁶ ak benn sikketu póotum bàkkaar. Bokkewul ak saraxu dóomal bi war bés bu nekk, ak saraxu peppam si muy àndal, ak saraxu tuuram.

¹⁷ «Bésuub ñaareel ba: fukki yëkk yu ndaw ak ñaar; ak ñaari kuuy, ak fukk ak ñeenti xari menn at, te lépp mucc sikk. ¹⁸ Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon téral. ¹⁹ Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak seen saraxi tuur.

²⁰ «Bésuub ñetteel ba: fukki yëkk yu ndaw ak benn, ak ñaari kuuy, ak fukk ak ñeenti xari menn at, te lépp mucc sikk. ²¹ Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon téral. ²² Dees na ca teg benn sikketu póotum

bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

²³ «Bésuub ñeenteel ba: fukki yëkk, ak ñaari kuuy, ak fukk ak ñeenti xari menn at, te lépp mucc sikk. ²⁴ Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon téral. ²⁵ Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

²⁶ «Bésuub juróomeel ba: juróom ñeenti yëkk, ak ñaari kuuy, ak fukk ak ñeenti xari menn at, te lépp mucc sikk. ²⁷ Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon téral. ²⁸ Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

²⁹ «Bésuub juróom benneel ba: juróom ñetti yëkk, ak ñaari kuuy, ak fukk ak ñeenti xari menn at, te lépp mucc sikk. ³⁰ Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon téral. ³¹ Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam ak saraxu tuuram.

³² «Bésuub juróom ñaareel ba: juróom ñaari yëkk, ak ñaari kuuy, ak fukk ak ñeenti xari menn at, te lépp mucc sikk. ³³ Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon téral. ³⁴ Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam, ak saraxu tuuram.

³⁵ «Bésuub juróom ñetteel ba seen bésuub ndaje lay doon. Mboolem lees baaxoo liggéey, deesu ko ci liggéey. ³⁶ Nangeen ci sarxal ab rendi-dóomal, muy saraxu sawara ngir xetug jámm, ñeel Aji Sax ji: wenn yëkk, ak menn kuuy, ak juróom ñaari xari menn at, te lépp mucc sikk. ³⁷ Te seen saraxi pepp, ak seen saraxi tuur yay ànd ak yëkk ya, mbaa kuuy ya, mbaa xar ya, na dayo ya dëppoo ak li yoon téral. ³⁸ Dees na ca teg benn sikketu póotum bàkkaar, te du bokke ak saraxu dóomal bi war bés bu nekk, mook saraxu peppam, ak saraxu tuuram.

³⁹ «Yooyu sarax ngeen di def, ñeel Aji Sax ji, ci seen bési màggal, te du bokke ak seen sarax yi ngeen xasal seen bopp, ak seen saraxi yéene, ak seen saraxi dóomali bés bu nekk, ak seen saraxi pepp ak

seen saraxi tuur, ak seen saraxi canti biir jàmm.»

30

¹ Ba mu ko defee Musaa àgge bànni Israyil mboolem la ko Aji Sax ji sant.

Yoon wi sàrtal na lu nit ki xasal boppam

² Ci kaw loolu Musaa wax ak kilifay giiri bànni Israyil, ne leen: «Lii moo di ndigal li Aji Sax ji dénkaane:

³ «Góor gu xasal Aji Sax ji aw xas, mbaa mu giñ ngir dogu gu mu tegool boppam, bumu tebbi kàddoom. Noonee ko làmmiñam tudde, na ko ni defe ba mu mat sèkk.

⁴ «Te jigéen ju xasal Aji Sax ji aw xas, ngir dogu gu mu dogu, te fekk ko di ndaw ca biir kër baayam ba tey, ⁵ su baay ba déggee xasu ndaw sa, ak dogu ga mu tegool boppam, te waxu ca doomam dara, su boobaa mboolem xasi ndaw sa day sax, te mboolem dogu gu mu doguloon boppam day sax. ⁶ Waaye su ko baayam aayee, ca bés ba mu ca déggee, su boobaa mboolem xasi ndaw si, ak mboolem dogu ya mu doguloon boppam, du sax, te Aji Sax jee koy jéggal, ndax baayam aaye woon na ko.

⁷ «Su fekkee ne ndaw si dafa am jékkër gannaaw kàdduy xas yu ko topp, mbaa kàddug réccle, gu mu tegool boppam, ⁸ su ko jékkër ja déggee, te bés ba mu ko déggee, waxu ko ca dara, su boobaa xasi ndaw si day sax, te kàdduy dogu ya mu tegooloon boppam day sax. ⁹ Waaye su fekkee ne ca bés ba ko jékkër ja déggee, ca la ba mu ko déggee, su boobaa lépp lu làmmiñu ndaw si, mbaa kàddug réccle ga mu tegooloon boppam, te Aji Sax jee koy jéggal.

¹⁰ «Su dee kàddug xas gu jibe ci ku jékkëram faatu, mbaa ku ñu baal, mboolem lu mu tegooloon boppam day sax.

¹¹ «Su fekkee ne ci biir kër jékkëram la nit ki xase, mbaa mu dogul fa boppam ab dogu, ci kaw ngiñ, ¹² jékkër ji dégg ci, te waxu ko dara, aayewu ko, su boobaa mboolem xasi ndaw si day sax, te mboolem dogu bu ndaw si tegooloon boppam, day sax. ¹³ Su wéree nag ne jékkër ji neenal na kàdduy jabaram yooyu, ca bés ba mu ko déggee, su boobaa lépp lu làmmiñu ndaw si tuddoon, jème ci kàdduy xasam, mbaa kàddu gu mu tegooloon boppam, lenn du ci sax. Jékkëram a ko neenal, te Aji Sax jee koy jéggal. ¹⁴ Mboolem aw xas nag, ak mboolem ngiñ lu ku jigéen ki dogoo, te jublu ci ag toroxlu, jékkëram moo koy saxal, jékkëram moo koy neenal. ¹⁵ Su jékkër ji noppee ba noppi, waxu

ko dara ca bés ba, ba ca èllég sa, su boobaa mboolem kàdduy xasi jabaram, mbaa mboolem kàdduy dogu yu toppoon jabaram, jékkër jee ko saxal, ndax moo ko waxul dara ca bés ba mu ko déggee. ¹⁶ Ndegam nag jékkër ji, beneen bés, gannaaw ba mu déggee kàdduy jabaram, la doora àddu ngir neenal wax ja, su boobaa mooy gàddu bàkkaaruu jabaram.»

¹⁷ Yooyu dogali yoon la Aji Sax ji dénka Musaa, ci diggante nit ak jabaram, ak diggante baay ak doom ju jigéen, ba muy ndaw te nekk kër baayam.

31

Israyil дума na Majan

¹ Aji Sax ji waxati Musaa, ne ko: ² «Fexeel ba feyul bànni Israyil ci waa Majan*. Gannaaw loolu dees na la yóbbu, téral la fa say bokk.»

³ Musaa daldi wax ak mboooloo ma, ne leen: «Na ñenn ci yeen gannaayu, waajal xare, te dal ci kaw waa Majan, ba feyul Aji Sax ji. ⁴ Gii giir, junni, gee giir junni, ba giiri Israyil yépp daj, ngeen yebal leen ñu xareji.»

⁵ Ba mu ko defee ñu tannée ca gàngoori Israyil, junniy góor jóge ci giir gu nekk, ñuy fukki junneek ñaari (12 000) xarekat yu gannaayu. ⁶ Musaa nag yebal leen, junni jóge ci giir gu nekk, ñu xareji. Ñoom ak sarxalkat bi Fineyas doomu Elasar, ñoo xareji, yóbbaaale juntuukaay yu sell yaak liiti xare ya. ⁷ Ñu xarek Majan, na ko Aji Sax ji sante Musaa, ba rey góor ñépp, ⁸ reyaale buuri Majan, Ewi ak Rekem ak Sur ak Ur ak Reba, juróomi buuri Majan ya. Balaam doomu Bewor it, ñu reye ko saamar.

⁹ Ba loolu amee bànni Israyil jàpp jigéeni Majan, ak seeni tuut-tànk, ak seen jur gépp, gu gudd ak gu gátt, seen alal jépp, ñu sèxétoo ko. ¹⁰ Seen dèkk yépp ak seeni dèkkuwaay, ak seen dal yépp, ñu lakk. ¹¹ Ba mu ko defee ñu jël mboolem la ñu sèxétoo, mboolem la ñu ca jappe, nit ñaak jur ga. ¹² Ñu daldi yóbbu ca Musaa ak Elasar sarxalkat ba, ak mboooloom bànni Israyil, ña ñu jappe ca xare ba, ak la ñu ca jappe, ak la ñu sèxétoo. Ñu indi lépp ca seen dal ba ca joori Mowab, fa janook Yeriko, te dendeek dexu Yurdan.

¹³ Ci kaw loolu Musaa ak Elasar sarxalkat ba ànd ak mboolem njiiti mboooloo ma, ñu génn dal ba, gatandu leen ca biti. ¹⁴ Musaa nag sànju ca kaw kilifay xare ya, muy kilifay kureli junni yaak kilifay kureli téeméer, ya jóge xare. ¹⁵ Musaa ne leen: «Kon jigéeni Majan ñépp ngeen bàyyi, ñu

* 31:2 31.2 Seetal ci 25.16-19.

dund! ¹⁶ Xanaa du ñoom ñoo dëdduloo woon bànni Israyil Aji Sax ji, ci ndigalal Balaam, ca mbir ma woon ca Pewor, ba tax mbas na dikkal mbooloom Aji Sax ji? ¹⁷ Kon nag reyleen lépp luy góor ci tuut-tànk yi, mboolem lu ciy jigéen ju xam lal góor it, rey leen, ¹⁸ mboolem lu ciy jigéen ju ndaw, te xamul lal góor, ngeen bàyyi mu dund, ñeel leen.

¹⁹ «Te yeen nag, dal-leen ci biti, buleen dugg ci biir dal bi diiru juróom ñaari fan, mboolem ñi rey ak mboolem ñi laal ku ñu rey. Nangeen setlu bésub ñetteel ba, ak bésub juróom ñaareel ba, yeen ak ñi ngeen jàpp. ²⁰ Te itam lépp luy yére, ak bépp jumtukaayu der, ak lépp lees defare kawari bëy, ak bépp jumtukaayu bant, nangeen ko setal.»

²¹ Ba mu ko defee Elasar sarxalkat ba wax ak ña xareji woon, ne leen: «Lii moo di dogalu yoon, bi Aji Sax ji dénkk Musaa: ²² Luy wurus ak xaalis ak xànjàr, ak weñ gu ñuul, ak weñ gu weex, ak beteex, ²³ mboolem lu dul lakk, rekk, nangeen ko laalale sawara, mu set. Ndoxum setlu mi it, warees na koo dellu setale yooyii. Waaye mboolem luy lakk, ci ndoxum setal mi donj lees koy dugal, ngir mu set. ²⁴ Bésub juróom ñaareel ba, fòotleen seeni yére, daldi set. Gannaaw loolu man ngeena duggsi ci dal bi.»

Lu jëm ci séddaleb alalu waa Majan

²⁵ Aji Sax ji waxati Musaa ne ko: ²⁶ «Yaw ak Elasar sarxalkat bi, ak ñi jiite seeni kër maam ci mbooloo mi, waññleen alal ji ñu nangoo xare, nit aku jur. ²⁷ Xaajleen sèxëtoo mi ñaar, te ngeen séddale ko dig-gante xarekat ya xareji woon, ak mbooloo mi ci des yépp. ²⁸ Te ngeen sàkkal Aji Sax ji, ci céru xarekat ya xareji woon, ab galag bu yemook benn bopp ci juróomi téeméer (500) yu nekk, ci aw nit, mbaa ay nag, mbaa ay mbaam, mbaa ay gätt. ²⁹ Ci céru xarekat yi ngeen koy sàkke, jox ko Elasar sarxalkat bi, muy jooxeb Aji Sax ji. ³⁰ Céru bànni Israyil bi ci des, nangeen ci sàkk benn ci juróom fukk yu nekk (50), ci aw nit, mbaa ay nag, mbaa ay mbaam, mbaa ay gätt, mbaa gépp jur, te ngeen jox ko Leween ñi dénkkoo dénkaaney màkkaanu Aji Sax ji.»

³¹ Ba loolu amee Musaa ak Elasar sarxalkat bi defe ko noonee ko Aji Sax ji sante Musaa. ³² La des ca alalu sèxëtoo, ja ña xareji woon indaale, gannaaw ba ñu ca génnee yooyu, nii la tollu: gätt yi, juróom benni téeméeri junneek juróom ñaar fukk ak juróom (675 000); ³³ nag yi, juróom ñaar fukki junneek ñaar (72 000); ³⁴ mbaam yi, juróom benn fukki junneek

benn (61 000), ³⁵ aw nit, fanweeri junni jigéen ñu xamul lal góor (30 000).

³⁶ Genn-wàll giy céru nit ña xareji woon, nii la tédde: gätt yi, ñetti téeméeri junneek fanweer ak juróom ñaar ak juróomi téeméer (337 500), ³⁷ galagu Aji Sax ji génne ci gätt yi, di juróom benni téeméer ak juróom ñaar fukk ak juróom (675); ³⁸ nag yi, fanweeri junneek juróom benn (36 000), galagu Aji Sax ji génne ci, di juróom ñaar fukk ak ñaar (72); ³⁹ mbaam yi, fanweeri junneek juróomi téeméer (30 500), galagu Aji Sax ji génne ci, di juróom benn fukk ak benn (61); ⁴⁰ aw nit, fukki junneek juróom benn (16 000), galagu Aji Sax ji génne ci, di fanweeri bopp ak ñaar (32). ⁴¹ Ba mu ko defee Musaa jox galag ba Elasar sarxalkat ba, muy jooxeb Aji Sax ji, na ko Aji Sax ji sante Musaa.

⁴² Genn-wàll giy céru bànni Israyil, ba Musaa teqale ak céru ña xareji woon, ⁴³ te muy céru mbooloo ma, ci wàllu gätt yi, ñetti téeméeri junneek fanweer ak juróom ñaar ak juróomi téeméer (337 500) la; ⁴⁴ nag yi di fanweeri junneek juróom benn (36 000); ⁴⁵ mbaam yi, fanweeri junneek juróomi téeméer (30 500); ⁴⁶ aw nit, fukki junneek juróom benn (16 000). ⁴⁷ Musaa daldi sàkk ci céru bànni Israyil boobu, benn ci juróom fukk yu nekk. Musaa jox loola Leween ñi dénkkoo dénkaaney màkkaanu Aji Sax ji, noonee ko ko Aji Sax ji sante woon.

Kilifay xare ya jëfe nañu ngor

⁴⁸ Ba loolu amee njiiti gàngooru xarekat ya, kilifay kuréli junni yaak kilifay kuréli téeméer ya, ñoom ñépp dem ca Musaa. ⁴⁹ Ñu ne Musaa: «Sang bi, nun de, waññ nanu xarekat yi ci sunu kilifteef, waaye kenn wuutewu ci. ⁵⁰ Moo tax nu indi jooxeb Aji Sax ji, ku nekk ak la nga muurloo, ci gànjari wurus; lami përeg, ak takkub jara, ak jaaroy torluukaay, ak jaaroy nopp, aki caq. Noo ko def sunu njotlaayal bakkan, fi kanam Aji Sax ji.»

⁵¹ Musaa ak Elasar sarxalkat ba nangoo wurus wa ca ñoom, lépp di takkaay yu ñu tegg. ⁵² Mboolem wurusu jooxe, wi ñu jooxeel Aji Sax ji, di fukk ak juróom benni junniyi siikal ak juróom ñaar téeméer ak juróom fukk (16 750), yemook barigo ak juróom ñaar fukki kilo (170), te bawoo ci kilifay kuréli junni yaak kilifay kuréli téeméer ya. ⁵³ Xarekati gàngoor ga ñoom, dañoo fëetewoo la ñu sèxëtoo. ⁵⁴ Musaa ak Elasar sarxalkat ba nag jële wurus wa ca kilifay kuréli junni yaak kuréli téeméer ya. Ñu yóbbu ko ca biir xaymab ndaje ma, muy seedeel bànni Israyil fi kanam Aji Sax ji.

32

Ay giir des na penkub Yurdan

¹ Jur gu ne gǎññ, bare lool, la Rubeneen ñi ak Gàddeen ñi amoon. Ñu xoolaat diiwaanu Yaser ak diiwaanu Galàdd, gisuñu lu moy àll bu neexa yareg jur.

² Ba mu ko defee Gàddeen ñaak Rubeneen ña dikk, wax ak Musaa ak Elasar sarxalkat ba, ak kilifay mbooloo ma. Ñu ne leen: ³ «Gox yii di Atarot, ak Dibon, ak Yaser, ak Nimra, ak Esbon, ak Elale, ak Sebam, ak Nebo, ak Bewon, ⁴ mboollem réew mii Aji Sax ji daan fi kanam mboolloom Israyil de, réew mu neexa yareg jur la, te nun, sang bi, boroomi jur lanu.» ⁵ Ñu teg ca ne: «Kon nag ngalla sang bi, baaxe nu réew mii, muy sunub cér, te nga bañ noo jalle dexu Yurdan.»

⁶ Musaa ne Gàddeen ñaak Rubeneen ña: «Xanaa seeni bokk duñu xareji, yeen ngeen toog fii? ⁷ Dangeena nara yoqiloo bànni Israyil, ba tere leena jalli ca réew, ma leen Aji Sax ji jox? ⁸ Lu mel nii de, la seeni baay defoon ba ma leen yebalee, ñu jóge Kades Barneya, ngir yèri réew ma. ⁹ Dañoó dem ba àgg xuru Eskol, ba gis réew ma, doora délsi, di yoqiloo bànni Israyil, ngir ñu baña duggi ca réew, ma leen Aji Sax ji joxoon. ¹⁰ Sànjum Aji Sax ji tàng na bésuub keroog, ba mu giñ, ne: ¹¹ «Kenn du gis mukk réew ma ma giñaloon Ibraayma ak Isaaxa ak Yanqóoba, ci góor ñi jóge Misra te am ñaar fukki at, jëm kaw, gannaaw mataluñu kóolote ci man. ¹² Xanaa Kaleb doomu Yefune, Kenesene bi, ak Yosuwe doomu Nuun, ndax ñoo matal kóolote ci Aji Sax ji.» ¹³ Ba loolu amee sànjum Aji Sax ji tàkkal Israyil, mu wërlo leen ca màndiŋ ma diiru ñeent fukki at, ba mboollem maas googa defoon lu Aji Sax ji ñaawlu, ñépp jeex tàkk. ¹⁴ Yeen nag defuleen lu moy jóg wuutu seeni baay, njurum bàkkaarkat yi ngeen doon, di xamb sànjum Aji Sax, ji tàkkal bànni Israyil? ¹⁵ Su ngeen ko dèddoo it, day dellu wacc bànni Israyil ci màndiŋ mi rekk, ngeen daldi sànklu mii mbooloo mépp.»

¹⁶ Ba loolu weesee, ñu dikkaat, ne ko: «Ay gétt lanu bégga sàkk fii ngir sunuy gàtt, aki dèkk ngir sunuy njaboot. ¹⁷ Waaye nun kay danuy daldi gannaayu, jiiitu bànni Israyil, ba keroog ñu leen yóbboo ca seen suuf. Sunu njaboot a nuy xaare fii, biir dèkk yu tata wër, ngir ñu mucc ci waa réew mi. ¹⁸ Dunu dellu mukk sunuy kër, ba keroog bànni Israyil di séddu, ku ci nekk jot cérú suufam. ¹⁹ Waaye nun dunu bokk ak ñoom ab cérú suuf ca wàllaa dexu Yurdan, ak la ca topp,

ndax day fekk nu jot sunu cérú suuf, ci wet gii féete dexu Yurdan penku.»

²⁰ Musaa ne leen: «Su ngeen ko defee noonu, gannaayu fi kanam Aji Sax ji ngir xareji, ²¹ su seen mboollem boroomi gannaayu jallee dexu Yurdan fi kanam Aji Sax ji, ba keroog mu dàqee ay noonam, ²² ba réew ma nangul Aji Sax ji, su boobaa déy, sañ ngeena délsi, te wáccoo ngeen ak Aji Sax ji, wáccoo ak bànni Israyil, te su boobaa it réew mii ñeel leen, di seen moomeel fi kanam Aji Sax ji. ²³ Waaye su ngeen jéfewul noonu kat, yeena moy Aji Sax ji, te xamleen ne seenug moy dina leen dab. ²⁴ Kon nag sàkkleen ay dèkk ngir seeni njaboot, aki gétt ngir seeni gàtt, waaye li ngeen dige daal, defleen ko.»

²⁵ Ba loolu amee Gàddeen ñaak Rubeneen ña ne Musaa: «Sang bi, noonu nga ko santaanee, ni lanu koy defe. ²⁶ Sunuy goneek sunuy jabar, ak sunuy gàtt, ak sunu jur gépp fii ci dèkki Galàdd lay des. ²⁷ Waaye nun, mboollem ñi yor ngannaay danuy jall dex gi fi kanam Aji Sax ji, ngir xareji ni nga ko waxe, sang bi.»

²⁸ Musaa nag santaane ci seen mbir ca Elasar sarxalkat ba, ak Yosuwe doomu Nuun, ak kilifay bànni Israyil, ya jiiite seeni kër maam. ²⁹ Musaa ne leen: «Su Rubeneen ñeek Gàddeen ñi àndeek yeen, ñoom ñépp gannaayu ngir xareji fi kanam Aji Sax ji, ba réew ma nangul leen, nangeen leen jox réewum Galàdd, muy seen moomeel. ³⁰ Waaye su ñu àndul ak yeen, gannaayu jall, ci seen biir lañuy séddu suuf, ca biir réewum Kanaan.»

³¹ Ba loolu amee Gàddeen ña ak Rubeneen ña dellu ne: «Sang bi, li nu Aji Sax ji wax rekk lanuy def. ³² Nooy gannaayu jalli réewum Kanaan fi kanam Aji Sax ji, waaye nun, cér bi nuy moom, wàllu dexu Yurdan wii lay doon.»

³³ Musaa nag tudde cér yii, askanu Gàdd, ak askanu Ruben, ak genn-wàllu giirug Manase doomu Yuusufa: nguurug Siwon buuru Amoreen ñi la leen jox, ak nguurug Og buuru Basan, réew ma mépp, boole ca dèkk yu mag ya, ak àll ya ko wër.

³⁴ Ba mu ko defee Gàddeen ña tabax Dibon ak Atarot ak Arower, ³⁵ ak Aterot Sofan, ak Yaser ak Yogbowa, ³⁶ ak Bet Nimra, ak Bet Aran, lépp di dèkk yu tata wër. Ñu sàkkaale ay wurmbal ngir seeni gàtt. ³⁷ Rubeneen ña it tabax Esbon ak Elale ak Kiryaatayim, ³⁸ ak Nebo, ak Baal Mewon, lenn ca turi dèkk ya soppiku, ak Sibma. Ñu tudde dèkk yooyu ñu tabaxaat, seen turi bopp.

³⁹ Ci kaw loolu ñi askanoo ci Makir doomu Manase, songi bėj-gannaaru Galàdd, nangu ko, dàqe fa Amoreen ña.

40 Ba mu ko defee Musaa jox Galàdd, askanu Makir, ñu dèkke. ⁴¹ Ci biir loolu askanu Yayir, mi askanoo ci Manase, dem nanguji yeneen dèkki Galàdd yu ndaw. Ñu tudde leen Awot Yayir. ⁴² Noba it nanguji Kenat ak dèkk ya ko wër, daldi tudde gox ba boppam, muy Noba.

33

Limees na yooni tukkiy Israyil

¹ Lii moo di doxi bànni Israyil, ba ñu génnee réewum Misra, def seeni gàngoor, ca njiital Musaa ak Aaróona. ² Musaa moo bind seeni dalukaay ak seen yoon ya ñu jaare, ci ndigalal Aji Sax ji. Lii moo di seeni jaar-jaar, ak seeni dalukaay:

³ Fa Ramses lañu bàyyikoo, fukki fan ak juróomu weer wi jèkk ci at mi. Keroog bés ba topp ca bésu Mucc ba, ca la bànni Israyil daagu, génn, waa Misra gépp di gis. ⁴ Booba waa Misraa ngay rob ña Aji Sax ji fàdd ca ñoom, néewi mboolem seen taaw ya. Aji Sax jee mbugale noonu seen yàlla ya.

⁵ Bànni Israyil nag jóge Ramses, dali Sukkóot. ⁶ Ñu jóge Sukkóot, dali Etam ga ca catu màndiŋ ma. ⁷ Ba ñu bàyyikoo Etam, dañoow walbatiku ba Pi Axirot ga janook Baal Cefon, daldi dal fa kanam Migadol. ⁸ Ñu jóge Pi Axirot, jàll géej ga, wuti màndiŋ ma. Dox nañu yoonu ñetti fan ca biir màndiŋ Etam, doora dal Maara. ⁹ Ñu jóge Maara, dem ba Elim, Elim ga ca fukki bēti ndox yaak ñaar, ak juróom ñaar fukki garabi tándarma ya. Ñu dal foofa. ¹⁰ Ba ñu jógee Elim, fa feggook géēju Barax ya la ñu dali. ¹¹ Ñu bawoo géēju Barax ya, dali ca màndiŋ Ciin, ¹² bawooti màndiŋ Ciin, dali Dofka, ¹³ bawooti Dofka, dali Alus. ¹⁴ Ba ñu bàyyikoo Alus, Refidim lañu dali. Foofa nag mbooloo ma amuñu fa ndox mu ñu naan. ¹⁵ Ñu bàyyikoo Refidim, dali ca màndiŋ Sinayi, ¹⁶ bàyyikoo màndiŋ Sinayi, dali Kibbrot Taawa, ¹⁷ bàyyikooti Kibbrot Taawa, dali Aserot. ¹⁸ Ba ñu jógee Aserot, Ritma lañu dali. ¹⁹ Ñu jóge Ritma, dali Rimon Peres, ²⁰ jóge Rimon Peres, dali Libna, ²¹ jógeeti Libna, dali Risa. ²² Ba ñu bawoo Risa, Keyelata lañu dali. ²³ Ñu bawoo Keyelata, dali tundu Sefer, ²⁴ bawoo tundu Sefer, dali Arada, ²⁵ bawooti Arada, dali Makeyelot. ²⁶ Naka lañu bàyyikoo Makeyelot, dali Tayat, ²⁷ bàyyikoo Tayat, dali Tera, ²⁸ bàyyikooti Tera, dali Mitka. ²⁹ Ba ñu jógee Mitka, Asmona lañu dali. ³⁰ Ñu jóge Asmona, dali Moserot; ³¹ jóge Moserot, dali Bene Yaakan, ³² jógeeti Bene Yaakan, dali Xor Gitgaat. ³³ Ba ñu bawoo Xor Gitgaat, Yotbata lañu dali. ³⁴ Ñu bawoo Yotbata, dali Abrona, ³⁵ bawoo

Abrona, dali Esiyon Geber, ³⁶ bawooti Esiyon Geber, dali Kades ca màndiŋ Ciin. ³⁷ Ba ñu bàyyikoo Kades, ca tundu Or wa digalook réewum Edom lañu dali.

³⁸ Ba mu ko defee Aaróona sarxalkat ba yéeg ca kaw tundu Or, ci ndigalal Aji Sax ji. Mu daldi faatu foofa, ca ñeent fukkeelu at ma, gannaaw ba bànni Israyil génnee réewum Misra, yemook benn fanu juróomeelu weeru at ma. ³⁹ Aaróona mu ngi woon ci téeméeri atam, ak ñaar fukk at ñett (123) ba mu faatoo ca kaw tundu Or. ⁴⁰ Ci kaw loolu Kanaaneen ba, buurub Arat, ba dèkke woon bēj-saalumu réewum Kanaan, daldi yég ne bànni Israyil a ngay dikk.

⁴¹ Ba ñu jógee tundu Or, Calmona lañu dali. ⁴² Ñu jóge Calmona, dali Punon, ⁴³ jóge Punon, dali Obot, ⁴⁴ jógeeti Obot, dali Yee Abarim, ga digalook réewum Mowab. ⁴⁵ Ba ñu jógee Yee Abarim, Dibon Gàdd lañu dali. ⁴⁶ Ñu jóge Dibon Gàdd, dali Almon Diblatayim, ⁴⁷ jógeeti Almon Diblatayim, dali ca tundi Abarim, janook tundu Nebo. ⁴⁸ Ba ñu bawoo tundi Abarim, ca joori Mowab lañu dali, ca wetu dexu Yurdan, janook Yeriko. ⁴⁹ Wetu dexu Yurdan, ga ca diggante Bet Yesimot ak Abel Sitim, ca joori Mowab, fa lañu dale.

Ndigali xare jib na

⁵⁰ Ba loolu amee Aji Sax ji waxati ak Musaa ca joori Mowab, ca wetu dexu Yurdan, ga janook Yeriko. Mu ne ko: ⁵¹ «Waxal bànni Israyil ne leen: Bu ngeen jàllee dexu Yurdan, ba dugg réewum Kanaan, ⁵² nangeen dàq waa réew mépp, nangeen yaqte seen mboolem tuur yu ñu yett, te seen mboolem jëmm yu ñu móol, yaqteleen ko, seen mboolem bérabi jaamookaay it, tasleen ko. ⁵³ Defleen réew mi moomeel, ngeen dèkke ko, ndax yeen laa jox réew mi, ngir ngeen moom ko. ⁵⁴ Tegoolen bant réew mi, séddoo ko ci seeni làng. Làng gu gēna mag, na am cér bu gēna mag, làng gu gēna tuut, na cér bu gēna tuut. Fépp fu tegoo bant génneel ag làng, ñooy doon boroom. Ci seen biir giiri maam ngeen di séddu. ⁵⁵ Waaye su ngeen dàqul waa réew mi, ña ngeen fa bàyyi ñooy mujj diy dég yu leen di luqi, aki dagg yuy cuut seeni wet. Ñoo leen di lējal witt ca biir réew mooma ngeen sance. ⁵⁶ Su boobaa nag na ma naroona def seen noon yooyu, yeen laa koy def.»

34

Aji Sax ji réddlu na digu réew mi

¹ Aji Sax ji waxati Musaa, ne ko: ² «Santal bànni Israyil, nga ne leen bu ngeen duggee réewum Kanaan, lii moo di

rēew ma ngeen di muurloo, muy seenub cēr. Réewum Kanaan a ngi, ak kemi suufam:

³ «Seen kemu bėj-saalum a ngay dale mändiņ Ciin, leri réewum Edom, daleeti ca catal géēju Xorom ga ca penku. ⁴ Seen kemu daa dēnglu, jaare fa féete yéegub Akerabim bėj-saalum, jaare Ciin nag, dem ba bėj-saalumu Kades Barneya, jēm Àccar Adar ba àgg Asmon. ⁵ Asmon la kem gay jaddaate jubal xuru Misra, doora àkki géėj.

⁶ «Géej gu mag gi mooy doon seen kemu sowu. Loolooy seen kemu sowu.

⁷ «Lii nag mooy seen kemu bėj-gànaar. Ca géej gu mag ga ngeen di rēdde, ba ca tundu Or, ⁸ rēdde ko fa tundu Or, mu jēm Lebo Amat, jäll ba Cedàdd, ⁹ wéyeeti fa, jaare Sifron, jēm Àccar Enan. Loolooy seen kemu bėj-gànaar.

¹⁰ «Rēddleen seen kemu penku, mu dale Àccar Enan ba Sefam, ¹¹ kemu ga wàcce Sefam, jēm Ribla, fa féete Ayin penku, wàccati ba leri dēxu dexu Kineret, ca wet ga ko féete penku, ¹² kemu ga dellu wàcc ba ca dexu Yurdan, doora àkki géēju Xorom ga. Loolooy doon seenum réew ak kemoom yi ko wēr.»

¹³ Ba mu ko defee Musaa sant bànni Israyil, ne leen: «Réew moomu ngeen di tegoo bant, séddoo ko, te moom la Aji Sax ji santaane ñu jox ko juróom ñeenti giir yeek genn-wäll, ¹⁴ gannaaw giirug Ruben, ak seeni kēr maam, ak giiru Gàdd ak seeni kēr maam séddu nañu, te genn-wällu giirug Manase itam jot nañu seen cēr ba noppi. ¹⁵ Ñaari giir ya, ak genn-wällu giir googu ñoo séddu suuf ca penkub dexu Yurdan, fa janook Yeriko.»

Lim nañu saytukati séddale ba

¹⁶ Aji Sax ji waxati Musaa, ne ko: ¹⁷ «Ñii nag ñoo leen di séddale réew mi: Elasar sarxalkat bi, ak Yosuwe doomu Nuun. ¹⁸ Ay njiit ngay jële kenn-kenn, ci giir gu nekk, ngir ñu jàpp ci séddaleb réew mi. ¹⁹ Nōoñoō di: Ci wällu giirug Yuda, Kaleb doomu Yefune, ²⁰ wällu giirug Cimyoneen ñi, Samiyel doomu Amiyut, ²¹ wällu giirug Beñamin, Elidat doomu Kison, ²² wällu giirug Daneen ñi, lenn njiit, di Bukki doomu Yogli, ²³ wällu Yuusufeen ñi; li féete ak giirug Manaseen ñi, lenn njiit, di Aniyel doomu Efat, ²⁴ li féete ak giirug Efraymeen ñi, lenn njiit, di Kemwel doomu Sifan, ²⁵ ci wällu giirug Sabuloneen ñi, lenn njiit, di Elisafan doomu Parnag, ²⁶ wällu giirug Isakareen ñi, lenn njiit, di Paltiyel doomu Asan, ²⁷ wällu giirug Asereen ñi, lenn njiit, di Awiyut doomu Selomi, ²⁸ wällu giirug

Neftaleen ñi, lenn njiit, di Pedayel doomu Amiyut.» ²⁹ Nōoñu la Aji Sax ji sant ñu séddale bànni Israyil, réewum Kanaan.

35

Lu jēm ci céri suufi Leween ñi

¹ Aji Sax ji waxati ak Musaa ca joori Mowab, ca wetu dexu Yurdan, fa jækkaarlook Yeriko. Mu ne ko: ² «Santal bànni Israyil ñu sàkkal Leween ñi ci seen cēru suuf, ay dēkk yu Leween ñi dēkke. Àllu parlu ya wēr dēkk ya it, joxleen ko Leween ñi. ³ Su ko defee dēkk yooyu ñeel leen, ñu dēkke. Seen àlli parlu it ñeel seenug jur, ak seen alal, ak seen mboolem mala. ⁴ Parlu dēkk yi ngeen di jox Leween ñi, ci miiru dēkk ya lay dale, jēm biti lu day ni junniy xasab, yemook juróomi téeméeri meetar, ci wet gu nekk. ⁵ Su ko defee ngeen natte ca biti dig-digal bu gudde ñaari junniy xasab, yemook junniy meetar ci wetu penku; ñaari junniy xasab, yemook junniy meetar; wetu bėj-saalum; ñaari junniy xasab, yemook junniy meetar, wetu sowu; ñaari junniy xasab, yemook junniy meetar, wetu bėj-gànaar, dēkk bi nekk ci digg bi. Dig-digal boobu day ñeel Leween ñi, di seen parlu dēkk. ⁶ Dēkk yi ngeen di jox Leween ñi, ñoo di juróom benni dēkki rawtu, yi ku rey nit mana raweji, ak yeneen ñeent fukki dēkk ak ñaar yu ngeen leen ciy dollil. ⁷ Kon mboolem dēkk yi ngeen di jox Leween ñi, ñeent fukk ak juróom ñett la, ak seen àlli parlu. ⁸ Dēkk yi ngeen leen di gēneel ci céri suufi bànni Israyil nag, la cay gēne ca ña èpple suuf, réyal leen ko, te la cay gēne ca ña néewle suuf, ngeen néewal ko. Giir gu nekk daal, dayob cēru suufam si mu séddu, moom lay topp, ngir sàkke ci ay dēkkam, jox Leween ñi.»

Lu jēm ci dēkki rawtu yi

⁹ Aji Sax ji waxati Musaa, ne ko: ¹⁰ «Waxal bànni Israyil, ne leen bu ñu jällee dexu Yurdan ba dugg réewum Kanaan, ¹¹ nañu sàkk ay dēkk yuy doon seen dēkki rawtu, ba ku rey nit te du tey-eefam, man faa raweji. ¹² Mooy doon seen dēkki rawtu yees di mucce ci mbokkum jotkat buy toppe*, ba ki rey nit du dee, te taxawagul fa kanam mbooloo mi, ngir ñu àtte ko.

¹³ «Kon dēkk yi ngeen di jox Leween ñi, juróom benn a ciy doon seen dēkki rawtu. ¹⁴ Ñetti dēkk yu ngeen di joxe ci wällu dexu Yurdan wii, ak ñetti dēkk yu ngeen di joxe ca réewum Kanaan, lépp di ay dēkki rawtu. ¹⁵ Waaye muy bànni Israyil, muy doxandéem, muy gan gu nekk ci seen biir,

* 35:12 35.12 Seetal ci Sarxalkat yi 24.17-21.

na juróom benni dëkk yooyu doon seen rawtu yeen ñépp, ba képp ku rey nit te du teyeefam, man faa raweji.

¹⁶ «Su dee ag weñ la ko dóor, mu dee, moo ko rey, te dee rekk mooy àtteb ki rey. ¹⁷ Su dee aw doj wu mana rey la jël, dóor ko ko, mu dee, moo ko rey, te dee rekk mooy àtteb ki rey. ¹⁸ Su dee bant bu mana rey la jël, dóor ko ko, mu dee it, moo ko rey, te dee rekk mooy àtteb ki rey. ¹⁹ Jotkat biy toppe bakkan ba nag, mooy rey ka rey; fu mu dajeek moom, moo koy rey. ²⁰ Su dee ci biir mbañeel la dale ci kawam, mbaa mu sànni ko aw saan wu mu ko waajal, ba mu dee, ²¹ mbaa ci biir mbañeel la ko dóore loxoom ba mu dee, su boobaa dee rekk mooy àtteb ka dóore. Moo ko bóom. Jotkat bay toppe bakkan ba nag, bu dajeek ka rey, da koy rey.

²² «Ndegam nag du caageenu mbañeel, xanaa mu jekki dal ci kawam, mbaa mu sànni ko kéf ku mu mana doon, te du lu mu waajoon, ²³ mbaa muy doj wu mana rey wu mu waddal ci kaw nit ki, ba nit ki dee, te gisul woon nit ki, te nit ka du woon ab noonam, te fekkul itam muy sàkku loraangey nit ka, ²⁴ su boobaa la mbooloo may wéyal diggante ki rey, ak jotkat bay toppe, moo di àtte yii ci yoon téral: ²⁵ Mbooloo mi day musal ki rey ci loxol jotkatu bakkanu ka dee, te mbooloo ma da koy delloo ca dëkkub rawtoom ba mu làquji woon. Fa lay toog, ba kera deewug sarxalkat bu mag ba ñu baaxoo fale diw gu sell. ²⁶ Ndegam nag ka rey moo génna génna, ba wees kemu dëkkub rawtoom ba mu làquji woon, ²⁷ ba jotkat bay toppe bakkan fekk ko fu wees kemu dëkkub rawtoom, su boobaa su ko jotkatu bakkan ba reyee, du tax mu gaddu bakkan. ²⁸ Ndax kat ci biir dëkkub rawtoom la wara toog, ba kera deewug sarxalkat bu mag bi. Gannaaw bu sarxalkat bu mag bi deeyee nag, ki rey sañ naa dellu fa mu bokk.

²⁹ «Loolu mooy dogalu yoon bi leen ñeel, yeen ak seen askan, ci seen mboolemi dëkkuwaay.

³⁰ «Képp ku faat bakkan nag, ci kaw kàddu gu tukkee ci ay seede donj lees ko saña reye, moom ma rey, waaye bennub seede du seedeel nit, ngir ñu teg ko àtteb dee.

³¹ «Te it buleen jël benn xalisu n jotug bakkanu kenn ku rey nit ku yelloo dee. Kooku dee rekk mooy àtteem. ³² Buleen jël it xalisu n jotug nit ku làquji ca dëkkub rawtoom, ngir may ko mu dellu fa mu dëkk, te sarxalkat bu mag bi deewul. ³³ Buleen tilimal réew mi ngeen nekk.

Deret kat mooy tilimal réew mi, te réew mi deesu ko jote lenn, ci deret ju ñu tuur ci biiram, lu moy deretu ka tuur deret. ³⁴ Buleen sobeel réew mi ngeen dëkk, te man ma mākkaanoo ci biiram, ndax man Aji Sax ji maa mākkaanoo ci biir bànni Israyil.»

36

Lu jëm ci séyu jigéenu Israyil, ak céru suufam

¹ Ba loolu wéyee kilifay njaboot yi askanoo ci Yuusufa, te bokk ci làngu Galàdd doomu Makir mi sétoo ci Manase, ñoo dikk. Ñu wax fa kanam Musaa, ak kilifay njabooti bànni Israyil. ² Ñu ne: «Sang bi, xam nga Aji Sax ji moo digle woon ñu tegal bant bànni Israyil, séddale leen réew mi. Ci biir loolu, sang bi, ndigal ñeel la, tukkee ci Aji Sax ji, ngir nga jël sunu céru doomu baay Selofat, jox ko ay doomam yu jigéen. ³ Waaye bu ñu séyee ci yeneen giiri bànni Israyil de, seen céru suuf mooy wàññikoo ci sunu céru maam, dolliku ca céru giir ga ñu séyi ca seen biir, te kon cér ba nu tegoo woon bant moo cay wàññikoo. ⁴ Te it bu atum Yiwiku* mu bànni Israyil agsee, seen cér day dolliku ca céru giir ga ñu séyi ca seen biir. Te kon it ci sunu céru giiru maam, la seen cér boobu di wàññikoo.»

⁵ Ba loolu wéyee, Musaa jox bànni Israyil ndigal, ci ndigalal Aji Sax ji, ne: «Dëgg la giirug Yuusufeen ñi wax. ⁶ Kàddu giir nag mooy li Aji Sax ji santaane ci doomi Selofat yu jigéen yooyu: Ku leen neex, nañu séy ak moom, na fekk rekk, ka ñuy séyal askanoo ci làng gu bokk ci seen giirug baay. ⁷ Du benn céru suuf ci biir bànni Israyil, buy jóge ci genn giir, toxu ca geneen, waaye na ku nekk ci bànni Israyil yem kepp ca suufas giiram, ga mu donne cay maamam. ⁸ Mboolem ku jigéen ku donn suuf ci giiri bànni Israyil, ci biir làng gu bokk ci giirug maamam rekk lay séy, ngir ku nekk ci bànni Israyil mana ñoñal céru maamam. ⁹ Su ko defee du benn céru suuf buy jóge ci genn giir, toxu ca geneen, waaye giirug bànni Israyil gu ci nekk day yem kepp ca céru suufam.»

¹⁰ Na ko Aji Sax ji sante Musaa nag, na la ko doomi Selofat yu jigéen defe. ¹¹ Muy Maala, di Tirca, di Ogla, di Milka, di Nowa, doomi Selofat yooyu, ñoom ñépp seen bokki baay lañu séyal. ¹² Ca làngi askanu Manase doomu Yuusufa lañu séy, seen céru suuf daldi des ca giir ga seen làngu baay bokk.

¹³ Loolu mooy santaane yeek àttey yoon yi Aji Sax ji dénkoon bànni Israyil, Musaa

* 36:4 36.4 Seetal ci Sarxalkat yi 25.8-55.

jottli leen ko ca joori Mowab, fa feggook
dexu Yurdan, te janook Yeriko.

Baamtug Yoon wi di juróomeelu xaaju Tawreetu Musaa Ubbite gi

Téereb *Baamtug Yoon wi* moo tēnk ci mbind, yeesalug kóllère gi Yàlla fas ak bànni Israyil, fa tundu Sinayi, gannaaw ba ñu génnee Misra. Ñeent fukki at gannaaw gáddaay ga fekk na mboolem maasug fippukat ga jóge woon Misra, faatu ba jeex. Moo tax yeesalug kóllère ga ngir maas ga ca topp, manul woona ñàkk. Musaa mi doon jottlikatub sàrti kóllère gi moo demoon ba ag dundam desatul lu bare. Kon warteef la woon ci Israyil, mu dogu ne dina déggal kay wuutu Musaa. Ba bànni Israyil nangoo réew ya féete dexu Yurdan penku, dem nañu ba ca tàkkal dex ga, di waaja dugg ganjuji réew ma leen Yàlla digoon.

Téere bi dafay sàrtal itam ni bànni Israyil wara dunde ca réew ma ñu leen dig. Yàlla moo leen jot, ñuy céru boppam bu mu sopp. Moo leen jële ca njaam ga ca Misra, ngir jox leen réew ma mu dige woon, ngir sottal digeem baak Ibraayma ak Isaaxa ak Yanqóoba. Cēslaayal sàrtoo gi nag mooy jeneen Yàlla amul ku moy Aji Sax, ji ñu wara déggal ci lépp, te moom donj a moom askan wi.

Ki jàng Kàddug Yàlla tey mbaa ki ko jàngoon démb, ñoom ñépp la Baamtug Yoon Wi fàttli ne mbég mi mboolem doom Aadama di sàkku, fi mu nekk dégg du fenn fu moy ci saxoo déggal Yàlla, ak fépp fu mu doon, ndax Yàlla mooy texeel, di goreel.

Ci Tēnk:

1.6—4.43 Musaa fàttli na jaar-jaari Israyil

4.44—26.19 Musaa baamtu na yoon wi

27.1—30.20 Musaa biral na yooni barke ak alkànde

31.1—34.12 Musaa tàggoon na

¹ Lii mooy kàddu yi Musaa wax bànni Israyil gépp, ca wàllaa dexu Yurdan, ca màndiñ ma, fa joor ga jàkkaarlook Suf, diggante Paran ak Tofel ak Laban ak Aserot ak Disayab. ² Fukki fan ak benn mooy dox diggante tundu Oreb ba Kades Barneya, boo ko jaaree yoonu tundu Seyir.

³ Waaye ñeent fukkeelu atam, gannaaw ba bànni Israyil génnee Misra, keroog benn fan ca fukkeelu weer waak benn, ca la Musaa doora wax bànni Israyil mboolem lu ko Aji Sax ji santoon ca ñoom. ⁴ Fekk na Musaa дума Siwon, ma toogoon Esbon, di buurub Amoreen ña, дума it

ca Eddrey, Og buuru Basan ba toogoon Astarot.

⁵ Ca wàllaa dexu Yurdan, ca réewum Mowab la Musaa tàmbalee leeral yoonu Yàlla wii. Mu ne:

Musaa fàttli na jaar-jaari Israyil

(*Saar 1.6—4.43*)

⁶ Sunu Yàlla Aji Sax ji da noo waxoon ca Oreb ne nu: «Seen toogaayub tundi wii doy na. ⁷ Walbatikuleen dem, jàll-leen ca biir diiwaanu tundi Amoreen ña, ak mboolem réew ya mu feggool, ca joor ga, ak tund wa, ak suufu tund ya, ak Negew ca bëj-saalum, ba ca tefes ga, ca réewum Kanaaneen ña, ak Liban, ba ca Efraat, dex gu mag ga. ⁸ Mu ngoog, maa leen jox réew moomu. Demleen nangu réew mi Aji Sax ji giñaloon seeni maam Ibraayma ak Isaaxa ak Yanqóoba, ñeel leen ñook seen askan wi leen di wuutu.»

⁹ Musaa teg ca ne leen: jant yooyu laa leen wax, ne leen: «Duma leen àttan yeen ñépp, man donj. ¹⁰ Seen Yàlla Aji Sax ji moo leen ful, ba yeena ngii tey, bare ba tollu ni biddiwi asamaan. ¹¹ Yal na leen seen Yàllay maam Aji Sax ji yokkati junniy yoon, te barkeel leen ni mu leen ko waxe! ¹² Waaye nu ma leen di àttane man donj, ak seen coono, ak seeni lěj-lěj, ak seeni jote? ¹³ Beral-leen seen bopp ay nit ñu rafet xel, am ug dégg, te di ñu ràññiku ci seeni giir. Su ko defee ma tabb leen, ñuy seeni njiit.» ¹⁴ Ba loolu amee ngeen wax ma ne ma: «Loolu nga wax de, xel la.» ¹⁵ Ci kaw loolu ma jël seen njiit yu rafet xel yu ràññiku, yi ngeen jukkee ci seeni giir; daldi leen def seeni njiit, ñii yilif junniy nit, ñii téeméer, ñii juróom fukk, ñii fukk, ñii diy jawriñ ci seeni giir. ¹⁶ Jant yooyu laa sant seeni àttekat ne leen: «Deeleen déglu seeni bokk tey àtte dégg, diggante bànni Israyil ak mbokkam, akub doxandéem. ¹⁷ Buleen far-farloo cib àtte, dégluleen ku tuut, ni ngeen di dégloo ku mag, te buleen ragal kenn, ndax àtte bi Yàllaay boroom. Bu leen mbir mi éppee loxo nag, ngeen indil ma ko, ma seet ko.» ¹⁸ Jant yooyu laa leen sant mboolem lu ngeen wara def.

Ndighu yëri Kanaan jib na

¹⁹ Gannaaw gi nu bàyyikoo tundu Oreb, jaare mboolem màndiñ mu yaa, mu raglu ma ngeen gis. Nu topp yoonu diiwaanu tundi Amoreen ñi, na nu ko sunu Yàlla Aji Sax ji sante woon, ba àgg Kades Barneya. ²⁰ Ci kaw loolu ma ne leen: «Agsi ngeen fii ci tundu Amoreen ñi nu sunu Yàlla Aji Sax ji di jox. ²¹ Mu ngoog, seen Yàlla Aji Sax ji moo teg réew mi fi seen kanam. Demleen

nangu ko, ni leen ko seen Yállay maam Aji Sax ji, waxe. Buleen ragal, buleen yoqi.»

²² Ci kaw loolu ngeen dikk yeen ñépp fi man, ne ma: «Nan yebal aw nit, ñu jiitu nu, yéral nu réew ma, te délsi wax nu yoon wu nuy jaare, ak dëkk yu mag ya nuy duggeji.» ²³ Ma rafetu xel ma, tann ci yeen fukki góor ak ñaar, giir gu nekk, genn góor. ²⁴ Ñu walbatiku jubal yoonu diiwaanu tund ya, ba ágg xuru Eskol, daldi seet foofa, ²⁵ ba noppi sákk ca meññeefum réew ma, indaaleel nu. Ñu wax nu nag ne nu: «Réew mu baax la nu sunu Yàlla Aji Sax ji jox.» ²⁶ Teewul bugguleen woona dem, xanaa di gantal seen ndigalal Yàlla Aji Sax ji. ²⁷ Ngeen di ñurumtoo seen biiri xayma, naan: «Bañ nu kay a tax Aji Sax ji jële nu réewum Misra, teg nu ci loxoy Amoreen ñi, ngir ñu faagaagal nu. ²⁸ Ana fu nu jëm? Te sunu bokk ya demon yoqiloo nu, ne nu waa réew maa nu épp, sut nu, dëkk ya réy te dàbblikoo ay tata yu ákki asamaan. Rax ci dolli, ay ponkal yu bokk ci askanu Anageen ñi lanu fa gis!»

²⁹ Ma wax leen yeen ne leen: «Buleen yox-yoxi, buleen leen ragal. ³⁰ Seen Yàlla Aji Sax ji leen jiitu, moom moo leen di xeexal, noonee mu defoon ak yeen ca Misra, ngeen gis, ³¹ ca mândinj ma it, gis ngeen na leen seen Yàlla Aji Sax ji fabe, ni baay di fabe doomam, ci yoon wi ngeen dox wépp, ba agsi bérab bii.» ³² Loolu lépp taxul ngeen am kóolote ci seen Yàlla Aji Sax ji, ³³ ki leen daan jiitu ci yoon wi, ngir sákkal leen fu ngeen di dale; guddi, mu nekk ci biir sawara, di leen niital yoon wu ngeen jaare; bëccég, mu nekkal leen ci biir aw niir.

³⁴ Ba Aji Sax ji déggee seeni kàddu, dafa mer ha giñ ne: ³⁵ «Du kenn ci nit ñii, maas gu bon gii, kuy gis réew mu baax mi ma giñaloon seeni maam. ³⁶ Xanaa Kaleb doomu Yefune moo koy gis, te réew ma mu teg tãnkam, moom laa koy jox, mook askanam, ndax moo matal kóolote ci Aji Sax ji.» ³⁷ Man itam Aji Sax ji mere na ma ci ndax yeen, ba ne ma: «Yaw itam doo ca dugg. ³⁸ Yosuwe doomu Nuun mi ci sa kilifteef moo cay dugg. Nanga ko ñaax, ndax moom mooy jox Israyil réew ma. ³⁹ Seen tuut-tànk yi ngeen noon dees na leen sèxétoo, seen doom yii xamagul lu baax ak lu bon, ñooy duggi réew ma. Ñoom laa koy jox, te ñoo koy nangu. ⁴⁰ Yeen nag walbatikuleen dellu mândinj ma, topp yoonu géēju Barax ya.»

⁴¹ Ci kaw loolu ngeen wax ma, ne ma: «Noo tooñ Aji Sax ji. Waaye dinanu dem xareji noonee nu ko sunu Yàlla Aji Sax ji sante woon.» Ku nekk ci yeen daldi rãngoo ngãnaayam, ngeen defe ne yéegi

diiwaanu tund wa dina leen yomb. ⁴² Aji Sax ji ne ma: «Wax leen ne leen buñu dem, buñu xeexi ndax man Aji Sax ji àndumaak ñoom. Lu ko moy dinañu daanu ci seen kanami noon.» ⁴³ Ma wax leen ko, dégluween, xanaa gantal ndigalal Aji Sax ji, fétteeral, ba yéegi diiwaanu tund wa. ⁴⁴ Ba loolu amee Amoreen ña dëkke tund woowa dikk, dajeek yeen, ne leen dann niy yamb, yitte leen fa Seyir; ba Xorma. ⁴⁵ Ngeen walbatiku, jooy ko Aji Sax ji, Aji Sax ji dégluwu leen, faalewu leen. ⁴⁶ Gannaaw gi ngeen toog Kades, lu yàgg la ngeen fa toog lépp.

2

¹ Ba loolu amee nu walbatiku, dellu mândinj ma, topp yoonu géēju Barax ya, na ma ko Aji Sax ji waxe woon. Wër nanu diiwaanu tundu Seyir ay fani fan.

Bànni Israyil teggi nañu

² Aji Sax ji wax ma, ne ma: ³ «Seen wërüb tund wii doy na. Walbatikuleen, jublu bëj-gannaar. ⁴ Mbooloo mi ngay sant ne leen: “Yeena ngi waaja jéggi seen kemu réewum bokki Esaween, ñi dëkke Seyir. Dinañu leen ragal, waaye nangeen moytu bu baax. ⁵ Buleen xeex ak ñoom, ndax duma leen jox ci seen suuf fu téstën sax tege, ngir Esaween ñi laa sédd diiwaanu tundu Seyir. ⁶ Aw ñam, weccikoo leen kook ñoom xaalis, door koo lekk; am ndox it, nangeen ko jëndee ñoom, door koo naan. ⁷ Ndax yeen kat seen Yàlla Aji Sax ji moo barkeel seen mboolemu ñaq te moo rãññee seen doxub mândinj mu yaa mii. Ñeent fukki at a ngii seen Yàlla Aji Sax jaa ngeek yeen, ñakkuleen dara.” ⁸ Ba mu ko defee nu romb sunu bokki Esaween ñi dëkke Seyir. Danoo wacc yoonu joor ga, ak Elat ak Esiyon Geber, daldi walbatiku jaareji mândinj Mowab.

⁹ Ba loolu amee Aji Sax ji ne ma: «Buleen dal ci kaw Mowabeen ñi, di leen song ub xare, ngir duma leen jox benn cér ci seenum réew, ndax askanu Lóot laa sédd réewum Ar.»

¹⁰ Emeen ñaa fa jëkkoonu dëkk, askan wu am kattan lañu woon, bare, yegg ca kaw ni Anageen ñi. ¹¹ Ay Refayeen lañu jappe woon Emeen ñooñu ak Anageen ñi, teewul Mowabeen ñi di leen wooye ay Emeen. ¹² Seyir nag la Oreen ña jëkkoonu dëkk, waaye Esaween ñaa leen fa dàqe, faagaagal leen, wuutu leen, noonu Israyil def rekk ak cérü suufam bi leen Aji Sax ji jox.

¹³ Aji Sax ji neeti: «Jáll-leen walum Seredd.» Nu jáll walum Seredd. ¹⁴ Diggante ba nu bëyyikoo Kades Barneya, di dox, ba keroog bés ba nu jállee walum

Seredd, fanweeri at ak juróom ñett la. Fekk na mboolem maasu góor ña tollu woon ci xare, ca ndoortel yoon wa, ñoom ñépp a wuute dal ba, dee ba jeex, na leen ko Aji Sax ji giñale woon. ¹⁵ Aji Sax jee leen toppe diisaayu loxoom, wolle leen ci biir dal bi, ba ñu jeex tàkk.

¹⁶ Ba mboolem ña tollu woon ci xare deeyee ba jeex, ba ñoom ñépp wuute ca mbooloo ma, ¹⁷ Aji Sax ji wax ma, ne ma: ¹⁸ «Yaa ngi waaja jéggi kemu réewum Mowab, ca Ar. ¹⁹ Bu ngeen ággee ca Amoneen ña nag, buleen dal ci seen kaw, buleen xeex ak ñoom, ndax duma leen jox benn cér ci réewum Amoneen ñi, ngir askanu Lóot woowu laa ko sédd.» ²⁰ Diiwaan boobu ti réewum Refayeen lees ko jappe woon, te Refayeen ñaa fa jëkkoono dëkk. Teewul Amoneen ñi di leen wooye ay Samsumeen, ²¹ askan wu am kàttan, bare, te yegg ca kaw ni Anageen ñi. Aji Sax jee leen fàkkasal Amoneen ñi, Amoneen ñi dàq leen, sanc, wuutu leen. ²² Mooy na mu defaloon Esaween ña dëkke Seyir rekk, ba mu leen fàkkasalee Oreen ña, Esaween ña dàq leen, sanc, wuutu leen, ba bésuub tey jii. ²³ Aween ña dëkke woon dëkk yu ndaw ya dem, ba àkki Gasa nag, Kaftoreen ña bàyyikoo Keret ñoo leen faagaagal, wuutu leen.

Israyil nangu na penkub dexu Yurdan

²⁴ Aji Sax ji neeti: «Ayca, jàll-leen walum Arnon. Mu ngoog, maa teg ci seen loxo, Siwon Amoreen ba, buurub Esbon, mook réewam. Dal-leen di nangu réew mi, song ko xare. ²⁵ Bés niki tey maa tàmbalee wacce njàqareek tiitaange ci kaw mboolem askan yi asamaan tiim, ba bu ñu déggee seenum riir, dañuy jaaxle, di lox.»

²⁶ Ci kaw loolu ma yebal ay ndaw yu bàyyikoo mândinju Kedemot, ba ca Siwon buurub Esbon. Ma yóbbante ko kàdduy jàmm, ne ko: ²⁷ «May nu, nu jaare sam réew. Yoon wi rekk lanuy topp; dunu jàdd ndijoor; dunu jàdd càmmoñ. ²⁸ Aw ñam, xalis nga nu koy weccée, nu lekk; am ndox sax, xalis nga nu koy joxe, nu naan. May nu rekk nu dox, ba jàll. ²⁹ Noonu nu Esaween ña dëkke Seyir defaloon, ñook Mowabean ña dëkke Ar rekk. Su ko defee nu mana jàll dexu Yurdan, ba ágg ca réew ma nu sunu Yàlla Aji Sax ji jox.»

³⁰ Siwon buurub Esbon nag nanguwu noo may nu jaare fa moom, ndax booba seen Yàlla Aji Sax ji moo dègéral boppam, wowal xolam, ngir teg ko ci seen loxo niki bésuub tey jii. ³¹ Aji Sax ji ne ma: «Gis nga, maa ngi nii tàmbalee teg Siwon akum réewam ci seen loxo. Dal-leen di nangum

réewam.» ³² Ba mu ko defee Siwon dikk dajeeek nun, mook gàngooram gépp, ngir song nu xare ca Yaxacc. ³³ Sunu Yàlla Aji Sax ji daane ko fi sunu kanam, nu duma ko, mook ay doomam, ak gàngooram gépp. ³⁴ Jant yooyu lanu nangu dëkkam yu mag yépp, faagaagal dëkk yu mag yépp: góor ak jigéen, ba ca tuut-tànk ya, bàyyiwunu kuy dund. ³⁵ Xanaa jur ga lanu sèxéto, ak mboolem alali dëkk ya nu nangu. ³⁶ La ko dale Arower ga tiim walum Arnon, boole ca dëkk ba ca xur wa, ba ca Galàdd, du benn dëkk bu nu të. Foofu yépp la sunu Yàlla Aji Sax ji daane fi sunu kanam. ³⁷ Réewum Amoneen ña donj ngeen jegewul; muy réew ma leru dexu Yabog, ak dëkki tund ya, mboolem daal, fu nu sunu Yàlla Aji Sax ji aaye woon.

3

¹ Ba loolu wéyee nu walbatiku, awe yoon wa yéeg jëm Basan. Og buuru Basan nag dikk dajeeek nun, mook gàngooram gépp, ngir song nu xare ca Eddrey. ² Aji Sax ji ne ma: «Bu ko ragal, ndax ci say loxo laa ko teg, mook gàngooram gépp, akum réewam. Nanga ko def na nga defoon Siwon buurub Amoreen ba woon ca Esbon.» ³ Noonu la sunu Yàlla Aji Sax ji tege Og buuru Basan itam ci sunuy loxo, mook gàngooram gépp, nu duma leen ba desewul kuy dund. ⁴ Booba lanu nangu mboolemi dëkkam. Amul benn dëkk bu nu nanguwul ci ñoom: juróom benn fukki dëkk, mboolem diiwaanu Argob, ba bokk ca nguurug Og ca Basan. ⁵ Yooyu yépp di dëkk yu dàbblikoo tata yu kawe, ak bunt yu tëje ràpp, te limaaleesul dëkk-dëkkaan yu baree bare, yu dara wèrul. ⁶ Nu faagaagal leen, na nu defoon ak Siwon buurub Esbon. Dëkk yépp lanu faagaagal: góor ak jigéen ba ca tuut-tànk ya. ⁷ Mboolem jur gaak alali dëkk ya nag, nu sèxéto.

⁸ Jant yooyu lanu nangoo ci loxol ñaari buuri Amoreen ñooña ca wàllaa dexu Yurdan, réew ma dale ca xuru Arnon, ba ca tundu Ermon. ⁹ Ermon googu la waa Sidon di wooye Siryoj, Amoreen ñi di ko wooye Senir. ¹⁰ Mboolem dëkki joor ga lanu nangu, ak mboolem diiwaanu Galàdd, ak mboolem Basan, ba ca Salka ak Eddrey, dëkki nguurug Og mu Basan. ¹¹ Mennum Og buuru Basan donj moo muccon ca ndesu Refayeen ñu ponkale ña. Lalam ba, lalu weñ gu ñuul la. Ma nga noonee ca Raba, dëkkub Amoneen ña. Guddaayu lal ba ci xasabu góor, juróom ñeenti xasab la, di ñeenti meetar ak genn-wàll, yaatuwaay ba, ñeenti xasab, di ñaari meetar.

Séddale nañu penkub Yurdan

¹² Suuf soosu nu nangu ca jant yooya, te dale ca Arower ga ca xuru Arnon ca bëj-saalum, ak ca bëj-gànnaar, genn-wàllu di-iwaanu tundi Galàdd, aki dëkkam, maa ko jox Rubeneen ñi, ak Gàddeen ñi. ¹³ Ndesu Galàdd ak mboolem Basan gu nguurug Og, ma jox ko genn-wàllu giirug Manase. Diiwaanu Argob gépp ak Basan googu gépp, lañu daan wooye réewum Refayeen ña. ¹⁴ Yayir mi askanoo ci Manase moo nangu mboolem diiwaanu Argob, ba ca kemu réewum Gesureen ña, ak Maakateen ña. Moo tudde boppam Basan googu, ba tax ñu di ko wooye Sancii Yayir ba tey jii. ¹⁵ Askanu Makir laa jox diiwaanu Galàdd*. ¹⁶ Rubeneen ñeek Gàddeen ñi laa jox la dale diiwaanu Galàdd ba ca xuru Arnon, diggu xur wa di seen kemu suuf ci genn wet, dexu Yabog di seen kemu ñook Amoneen ña. ¹⁷ Fa joor ga feggook dexu Yurdan it di kemu, diggante dexu Kineret ca bëj-gànnaar, ak ca bëj-saalumu géegu Xorom ga, ba ba ngay ägg ca suufu tundu Pigma, ca penku.

¹⁸ Jant yooyu laa leen sant ne leen†: «Seen Yàlla Aji Sax ji moo leen jox réew mii, ngir ngeen nangu ko. Na xarekat yépp gannaayu, jàll, jiitu seen bokki bànni Israyil. ¹⁹ Seeni jabar donj, ak seeni doom ak seenug jur, ndax xam naa ne jur gu takku ngeen am, ñooy des ci seen dëkk yi ma leen jox, ²⁰ ba keroog Aji Sax ji noppalee seen bokki bànni Israyil ni yeen, fekk leen nangu, ñoom it, réew ma leen seen Yàlla Aji Sax ji jox, ca wàllaa dexu Yurdan. Su ko defee ku nekk ci yeen saña dellu ca céru suufam ba ma ko jox.»

²¹ Yosuwe itam, sant naa ko ci jant yooyu ne ko: «Sa bët moo la may mboolem ni seen Yàlla Aji Sax ji def ak ñaari buur yii. Noonu rekk la Aji Sax jiy def ak mboolem nguur ya nga jëm. ²² Buleen leen ragal, ndax seen Yàlla Aji Sax ji moo leen di xeexal.»

Musaa duggul Kanaan

²³ Jant yooyu laa tinu Aji Sax ji, ne ko: ²⁴ «Éy Boroom bi Aji Sax ji, yaa ma wonagum lenn ci sa maggaay ak sa doole, Sang bi. Ana yàlla ju nekk asamaan, mbaa ci kaw suuf ju mana roy say jéf ak say jaloore? ²⁵ May ma rekk ma jàll, ba gis réew mu baax, ma ca wàllaa dexu Yurdan, tund wu rafet woowu ba ca Liban!» ²⁶ Waaye fekk na Aji Sax ji mere ma lool ndax yeen, ba faalewu ma. Aji Sax ji ne ma: «Na doy. Bu ma waxati lu jëm ci loolu. ²⁷ Yéegal ba ca kaw tundu

Pigma, nga dawal sa bët, te séenu réew ma wetu sowu, ba bëj-gànnaar, bëj-saalum, ba penku. Xoolal bu baax, nde doo jàll dexu Yurdan gii. ²⁸ Waaye nanga yebal Yosuwe, ñaax ko, jàjj ko, ndax moom mooy jàll, jiite mbooloo mii, te moo leen di jox réew moomu ngay séen.» ²⁹ Ba mu ko defee nu toog ca xur wa, janook Bet Pewor.

4

Musaa ñaax na bànni Israyil

¹ Léegi nag yeen waa Israyil, dégluleen dogali yoon yeek àttey yoon yii ma leen di xamal, ngir ngeen di ko jéfe, ndax ngeen dund ba dugg, nanguji réew ma leen Aji Sax ji seen Yàllay maam, di jox. ² Buleen yokk dara ci kàddu gi ma leen di dénk, te buleen ci wàññi dara, ndax ngeen sàmm seen santaaney Yàlla Aji Sax, ji ma leen di dénk. ³ Seen bët moo leen may la Aji Sax ji def ca Baal Pewor. Mboolem ku toppoon tuur ma ñuy wax Baal ca Pewor, seen Yàlla Aji Sax ji moo ko sànce ci seen biir. ⁴ Waaye yeen ñi ñoyoon ci seen Yàlla Aji Sax ji, yeen ñépp a ngi dund tey jii.

⁵ Mu ngoog, jàngal naa leen ay dogali yoon, aki àttey yoon, na ma ko sama Yàlla Aji Sax ji sante, ngir ngeen war koo jéfe ca biir réew ma ngeen di nanguji. ⁶ Sàmmooleen koo jéfe, ndax mooy doon seenug rafet xel, ak seenug raññee fi kanam xeet yi, ba bu ñu dégge mboolem dogali yoon yii, dinañu ne: «Wii askan wu mag rekk a rafet um xel te raññee!» ⁷ Ana wan xeet wu mag wu am yàlla ju leen jege ni nu sunu Yàlla Aji Sax jiy jegee saa yu nu ko wooyee wall? ⁸ Ana xeet wu ko magge, ba am dogali yoon ak àttey yoon yu jekke ni yoon wii ma joxe fi seen kanam bésub tey?

⁹ Waaye wattuleen, wattuleen seen bopp bu baax, bala ngeena fàtte mbir yi ngeen teg seen bët, ba du génn seenum xel seen giiru dund gépp. Te nangeen ko xamal seeni doom ak seeni sèt. ¹⁰ Bés ba ngeen taxawee fa seen kanam Yàlla Aji Sax ji, fa tundu Oreb, Aji Sax jee ma ne: «Dajaleel ma mbooloo mi, ma dégtal leen samay kàddu, ngir ñu tàggatu ci ragal ma li feek ñuy dund ci kaw suuf, te seeni doom it, ñu tàggat leen ci.» ¹¹ Yeena dikk taxaw ca suufu tund wa, tund wa ne jippét, sawara wa jolli ba ca xolu asamaan, ci biir xàmbaarri guddi gu ne kèruus. ¹² Aji Sax ji àddoo ca digg sawara wa, wax ak yeen, ngeen di dégg baat, te jëm, gisuleen ko, xanaa baat donj. ¹³ Ci kaw loolu mu biralal leen kòllèreem gi mu leen sant ngeen sàmm ko, muy fukki santaane yi.

* **3:15** 3.15 Genn-wàllu diiwaanu Galàdd ba ca bëj-gànnaar lay wax. Seetal ci 3.12. † **3:18** 3.18 Ñi wara fëetewoo penkub dexu Yurdan la Musaa di waxal fii.

Mu daldi leen bindal santaane yi ci ñaari àlluway doj. ¹⁴ Man nag la Aji Sax ji sant ca yooya jant, ne ma xamal leen dogali yoon yeek àttey yoon, yi ngeen wara jêfe ca réew ma ngeen jëm, ngir nanguji ko.

Yoon wi aayal na bokkaale

¹⁵ Nangeen wattu seen bopp bu baax nag ndax keroog ba Aji Sax jiy àddoo ca digg sawara wa, wax ak yeen ca tundu Oreb, gisuleen jenn jëmm. ¹⁶ Kon buleen def ug yàqute, di sàkkal seen bopp menn tuur muy jëmmal lenn lu mel ni góor mbaa jigéen, ¹⁷ mbaa lu mel ni menn malam suuf, mbaa malam kaw mu mel ni njanaaw, ¹⁸ mbaa lu mel ni ndégmeent, di raam, mbaa lu mel niw jën, nekk ci ndox mu suuf tiim. ¹⁹ Buleen séentu asamaan, gis jant bi, mbaa weer wi, mbaa biddiwi yi, ak mboolem leeri asamaan, ba mu xiirtal leen ci di leen sujjóotal ak a jaamu, te seen Yàlla Aji Sax ji féetale yooyii, mboolem xeet yi asamaan tiim. ²⁰ Yeen nag Aji Sax jee leen jël, bellee leen ca Misra, taalu xellikaayu weñ gu ñuul ba, ngir ngeen doon noñam ñi mu séddoo niki bésub tey.

²¹ Waaye yeena tax Aji Sax ji mere ma ba giñ ne duma jáll dexu Yurdan, te duma dugg ca réew mu baax, ma leen seen Yàlla Aji Sax ji moomale. ²² Man nag ci réew mii laay dee. Du maay jáll dexu Yurdan. Waaye yeen yeenay jáll, ba nanguji réew mu baax moomu. ²³ Wattuleen seen bopp ba baña fàtte kóllère gi seen Yàlla Aji Sax ji fas ak yeen, di sàkkal seen bopp tuur muy jëmmal lenn, te seen Yàlla Aji Sax ji aaye leen ko. ²⁴ Seen Yàlla Aji Sax ji kat, mooy sawara wuy xoyome, Yàlla ju fir la.

²⁵ Bu ngeen demee ba am ay doom aki sèt, fekk leen yàgg ca réew ma, su boobaa su ngeen defee ag yàqute, di sàkk am tuur, ak jëmmu lu mu mana doon, mbaa ngeen def lenn lu seen Yàlla Aji Sax ji ñaawlu, lu koy merloo, ²⁶ maa ngi sàkku asamaan ak suuf seedeel maak yeen bésub tey jii, ne su boobaa yeenay sànkoo sànkoo ci lu gaaw, ba wuute ca réew, ma ngeen jáll dexu Yurdan, jëm fa, ngir nanguji ko. Su boobaa dungeen fa yàgge, ndax dees leen di raafal, ba ngeen jeex tàkk. ²⁷ Aji Sax ji moo leen di tasaare ci biir xeet yi, te lu néew la seenu ndes di doon ci biir xeeti jaambur yi leen Aji Sax jiy dàq jème. ²⁸ Foofa ngeen di jaamoo ay yàlla yu loxoy nit sàkke bant, mbaa doj, yàlla yu dul gis, du dégg, du lekk, du xeeñtu. ²⁹ Waaye su ngeen fa sàkkoo seen Yàlla Aji Sax ji, dingeen ko daj, ndegam seen léppi xol, ak seen léppi bakkan ngeen ko sàkkoo. ³⁰ Bu leen njàqare dikkalee, fekk mboolem mbir yooyu dab leen, su boobaa dingeen mujj délsi ci seen Yàlla Aji Sax ji te dingeen ko

déggal. ³¹ Ndax seen Yàlla Aji Sax ji Yállay yërmande la. Du leen wacc, du leen yàqte te du fàtte kóllère, ga mu fasoon ak seeni maam ci kaw ngiñ.

Ab jagle ñeel na Israyil

³² Seetleem rekk ci janti démb yi leen jiitu, la dale bés ba Yàlla sàkke nit fi kaw suuf, mbaa ngeen seet asamaan, cat ba cat. Ndax lu màgge nii mas naa am? Am masees naa dégg lu ni mel? ³³ Ana askan wu masa dégg baatu Yàlla bu jibe ci sawara, ni ngeen ko dégge te dese bakkan? ³⁴ Jan yàlla moo masa fexee dikk foqatil boppam aw xeet, bellee leen ci weneen xeet, ci biiri nattu, aki firnde aki kéemaan ak xare yu mu sottale dooley loxoom, ak kàttanu pèrègam, ak jëf ju raglu, noonee leen ko seen Yàlla Aji Sax ji defale ca Misra, ngeen teg ci bêt? ³⁵ Yeen déy lañu won loolu lépp ngir ngeen xam ne Aji Sax ji donj mooy Yàlla, te jeneen yàlla amul, ju dul moom. ³⁶ Fa asamaan la àddoo, dégtal leen baatam, ngir yar leen, ci kaw suuf it la leen wone sawaraam su mag sa, te ay kàddoom ngeen dégg, mu jibe ca digg sawara sa. ³⁷ Sopp seeni maam nag moo tax mu taamu leen, yeen askan wi leen wuutu, génneel leen boppam Misra, ci dooleem ju bare, ³⁸ ngir dàqal leen xeet yu leen sut, èpp leen doole, ba dugal leen seenum réew, sédd leen ko bés niki tey.

³⁹ Kon xamleem tey te délloosi ci seen xel, ne Aji Sax ji mooy Yàlla fa kaw asamaan ak fi kaw suuf. Du keneen. ⁴⁰ Sàmmleem dogali yoonam, ak santaaneem yi ma leen dénkk bés niki tey, ndax ngeen baaxle yeen ak seen doom yi leen di wuutu, te ngeen yàgg ca réew ma leen seen Yàlla Aji Sax ji jox ba fàww.

Amal nañu ay rawtu ca penkub Yurdan

⁴¹ Ba loolu wéyee Musaa ber na ñetti dèkk ca penkub dexu Yurdan, ⁴² mu diy rawtu ci ku rey moroomu nitam, te rey yu ko cig teyeef, wonu ko woon it mbañeel, lu jiitu loola. Kooku sañ naa làquji ci dèkk yooyu benn, ngir rawale bakkanam. ⁴³ Dèkk yooyu ñoo doon Beccer, ga ca màndiñ ma, ca kaw dènd yu tell wa ca kaw tund wa, su dee ab Rubeneen; ak Ramot ga ca Galàdd, su dee ab Gàddeen; ak Golan ga ca diiwaanu Basan, su dee ab Manaseen.

Musaa baamtu na yoon wi

(Saar 4.44—11.32)

⁴⁴ Lii moo di ndigalu yoon wi Musaa biraloon fi kanam bànni Israyil. ⁴⁵ Lii moo di seede yoon yi, ak dogali yoon yi, ak àttey yoon yi Musaa dénkkoon bànni Israyil, gannaaw ba ñu bàyyikoo Misra, ⁴⁶ ca wàllaa dexu Yurdan, ca xur wa

janook Bet Pewor, ca réewum Siwon buurub Amoreen ba toogoon Esbon, te Musaa ak bànni Israyil duma woon ko, ba ñu génnee Misra. ⁴⁷ Ñoo nangu am réewam, ak réewum Og buuru Basan, ñaari buuri Amoreen ña moomoon wàllaa dexu Yurdan, ca penku, ⁴⁸ fa dale ca Arower, ga ca catal walum Arnon, ba ca tundu Siyon*, ga ñuy wax itam Ermon, ⁴⁹ boole ca mboolem joorug wàllaa dexu Yurdan, ca penku, ba ágg ca géēju Xorom ga, ca suufu tundu Pisga.

5

Fukki santaanee gi

¹ Musaa moo woo bànni Israyil gépp, wax leen ne leen: Yeen, bànni Israyil, dégluleen dogali yoon yi, ak àttey yoon yi may wax, ngeen dégg, tey. Jàngleen ko te farlu koo jéfe. ² Sunu Yàlla Aji Sax ji moo fasoon kóllère ak nun ca tundu Oreb. ³ Du sunuy maam rekk la Aji Sax ji fasoon kóllère gii ak ñoom; waaye ñook nun ñi fii tey, mboolem nun ñiy dund, ci lanu. ⁴ Ci biir jàkkaarloo la Aji Sax ji waxe woon ak yeen ca kaw tund wa, áddoo ca digg sawara wa. ⁵ Maa taxaw diggante Aji Sax jeek yeen, jant yooyu, di leen jottli káddug Aji Sax ji, ndax yeena ragaloon sawara wa, ba yéeguleen ca kaw tund wa. Mu ne:

⁶ «Man Aji Sax ji maay seen Yàlla, ji leen géenne réewum Misra, kèrug njaam ga.

⁷ «Buleen am yeneen yàlla ci sama kanam.

⁸ «Buleen sàkkal seen bopp tuur muy jèmmal lenn lu nekk ci kaw asamaan, mbaa ci kaw suuf, mbaa lu nekk ci ndox nu suuf tiim. ⁹ Buleen ci sujjóotal lenn, buleen ci jaamu lenn, ndax man seen Yàlla Aji Sax ji, Yàlla ju fiir laa. Maay topp doom tooñu waajur, ba ca seen maasi sèt, ba ca maasug sètaati nit ñi ma bañ. ¹⁰ Waaye maay baaxe ñi ma sopp, di sàmm samay santaane, ba ci junniy maas ya leen di wuutuji.

¹¹ «Buleen tudd seen turu Yàlla Aji Sax ji ci neen, ndax Aji Sax ji du ñàkka topp kuy tudd aw turam ci neen.

¹² «Sàmmleen bésub Noflaay, ngir sellal ko, ni leen ko seen Yàlla Aji Sax ji sante. ¹³ Juróom benni fan ngeen wara liggéey, def ci seen soxla yépp. ¹⁴ Waaye bésub juróom ñaareel ba, Noflaay lay doon, ñeel seen Yàlla Aji Sax ji. Buleen ci liggéey lenn; du yeen, du seen doom ju góor, ak ju jigéen, du seen jaam bu góor, ak bu jigéen, du seen nag, du seen mbaam, du mboolem seenug jur, du seen gan gu nekk ci seen biir dèkk. Su ko defee seen jaam bu góor, ak

seen jaam bu jigéen mana dal-lu ni yeen. ¹⁵ Fàttlikuleen ne ay jaam ngeen woon ca réewum Misra. Seen Yàlla Aji Sax ji moo leen fa génnee dooley loxoom, ak kàttanu pèrègam. Moo tax seen Yàlla Aji Sax ji sant leen ngeen wàccoo ak bésub Noflaay.

¹⁶ «Teral-leen seen baay, ak seen ndey, ni leen ko seen Yàlla Aji Sax ji sante, ndax ngeen gudd fan, ndax it ngeen baaxle ca réew ma leen seen Yàlla Aji Sax ji jox.

¹⁷ «Buleen bóom.

¹⁸ «Buleen jaaloo.

¹⁹ «Buleen sàcc.

²⁰ «Buleen seedeel seen moroom lu dul dégg.

²¹ «Buleen xédd seen jabaru dèkkandoo, buleen xemmeme kèram, mbaa toolam, mbaa jaamam bu góor, mbaa jaamam bu jigéen, mbaa aw nagam, mbaa mbaamam, mbaa mboolem seen alalu dèkkandoo.»

²² Kàddu yii la Aji Sax ji wax seen ndaje ma mépp, ca tund wa, ba mu áddoo ca digg sawara wa, kàddu gu xumb, ci biir xàmbaar gu lèndèm kèruus. Tegaatu ca dara. Mu daldi bind kàddu yi ci ñaari àlluway doj, jox ma. ²³ Ba ngeen déggee kàddu gay jibe ca lèndèm ga, tund wa jàpp, di tàkk, yeena dikk, seen mboolem kilifay giir ak seeni mag, ba ci man. ²⁴ Ngeen ne ma: «Sunu Yàlla Aji Sax ji kat, moo nu won darajaam ak mággaayam. Kàddoom lanu dégg, mu jibe ca digg sawara wa. Bésub tey noo gis Yàlla wax ak doom aadama, ba noppi, muy wéye bakkanam! ²⁵ Waaye lu nuy jaayati nag sunu bakkan, doye? Ndax kat, sawara wu réy wii, su nu déggatey sunu kàddug Yàlla Aji Sax ji, da nuy xoyom. ²⁶ Ana ci mboolem boroomu suux, ku ci masa dégg kàddug Yàlla jiy dund, mu jibe ci sawara, nii nu ko dégge, ba noppi di dund? ²⁷ Jegejil yaw te déglu mboolem li sunu Yàlla Aji Sax ji wax. Yaw yaa nuy ágge mboolem li la sunu Yàlla Aji Sax ji wax, nu dégg, jéfe.»

²⁸ Ci biir loolu Aji Sax ji dégg la ngeen ma wax. Mu ne ma: «Dégg naa li la mbooloo mii wax. Noo yey wax yooyu kàddu yépp. ²⁹ Waaye céy bu ñu amoon boobu xol ngir ragal ma, di sàmm sama santaane yépp bés bu nekk, ba tax ñu baaxle, ñoom ak seen askan, ba fàww! ³⁰ Demal, nga ne leen ñu dellu ca seeni xayma. ³¹ Yaw nag, taxawal fi man, ba ma jox la mboolem santaane bi, dogali yoon yi, ak àttey yoon yi nga leen di jàngal, te ñu war koo jéfe ca réew ma ma leen jox, ngir ñu nangu ko.»

³² Kon nag sàmmooleen koo jéfe ni leen ko seen Yàlla Aji Sax ji sante. Buleen lajje

* 4:48 4.48 Gii Siyon wuute na ak weneen tur wi ñuy wooye Yerusaleem.

ndijoor mbaa càmmoñ. ³³ Mboolem yoon wi leen seen Yàlla Aji Sax ji teg, toppleen ko, ndax ngeen dund, baaxle te gudd fan ca réew ma ngeen di moom.

6

Aji Sax ji kenn la

¹ Lii mooy santaane bi, ak dogali yoon yeek àttey yoon yi seen Yàlla Aji Sax ji santaane ma jàngal leen ko, ngir ngeen di ko jéfe ca réew ma ngeen jáll jëm, ngir nanguji ko, ² ndax ngeen ragal seen Yàlla Aji Sax ji, di sàmm mboolem dogali yoonam, ak santaaneem, yi ma leen di dénk, yeen ak seeni doom, ak seeni sèt, seen giiru dund, su ko defee ngeen gudd fan. ³ Kon yeen Israyil, dégluleen te sàmmoo jéfe, ndax ngeen baaxle te yokku bu baax, ni leen ko Aji Sax ji seen Yállay maam waxe, ca réew ma meew maak lem ja tuuroo.

⁴ Dégluleen, bànni Israyil, Aji Sax ji sunu Yàlla, Aji Sax ji kenn la. ⁵ Seen Yàlla Aji Sax ji, soppelen ko seen léppi xol, ak seen léppi bakkan, ak seen léppi doole. ⁶ Kàddu yii ma leen di dénk bésub tey, na dékk ci seen xol. ⁷ Nangeen ko xamal seeni doom, di ko waxe bu ngeen toogee seen biir néeg, ak bu ngeen di dox ciw yoon, ak bu ngeen téddee, ak bu ngeen jógee. ⁸ Takkleen ko, muy firnde ci seen loxo, te na doon am mbandal ci seen diggantey gèt. ⁹ Te itam bindleen ko ci seen kaw jëni buntu néeg, ak ci seen bunti dékk.

¹⁰ Bu ngeen demee ba seen Yàlla Aji Sax ji yóbbu leen ca réew ma mu giñaloon seeni maam Ibraayma ak Isaaxa ak Yanqóoba, ne yeen la koy jox, muy dékk yu mag yu baax yu ngeen tabaxul, ¹¹ kër ya feese mboolem lu baax lu ngeen ko feesaluloon, ak teen yu ngeen gasul, ak garabi reseñ ak oliw yu ngeen jëmbatul; bu ngeen ca lekkee ba regg, ¹² wattuleen seen bopp bala ngeena fátte Aji Sax ji leen génnee réewum Misra, kërug njaam ga. ¹³ Seen Yàlla Aji Sax ji, ragal-leen ko. Moom ngeen di jaamu, te aw turam ngeen di giñe. ¹⁴ Buleen topp yeneen yàlla, ci yállay xeet yi leen séq. ¹⁵ Ndax kat seen Yàlla Aji Sax ji ci seen biir, ku fiir la. Lu ko moy sànjum Aji Sax ji dina tàkk ci seen kaw, te dina leen sànk, ba raafal leen ci kaw suuf. ¹⁶ Buleen seetlu seen Yàlla Aji Sax ji, na ngeen ko seetloo woon ca Maasa. ¹⁷ Sàmmleena sàmm seen santaaney Yàlla Aji Sax ji, ak seedey yoonam, ak dogali yoonam, yi mu leen dénk. ¹⁸ Jéfeleen njub, ak mbaax gi Aji Sax ji rafetlu. Su ko defee dingeen baaxle, ba dem, nanguji réew mu baax mi Aji Sax ji giñaloon seeni maam,

¹⁹ te dingeen fa dàqe seen noon yépp, na ko Aji Sax ji waxe woon.

²⁰ Bu leen seen doom laajee èllég, ne leen: «Ana lu waral seedey yoon yi, ak dogali yoon yeek àttey yoon yi leen sunu Yàlla Aji Sax ji dénk?» ²¹ Su boobaa waxleen seen doom, ne ko: «Ay jaami Firawna lanu woon ca Misra, waaye Aji Sax jee nu génnee Misra ci dooley loxoom. ²² Aji Sax jee nu defal ay firnde, ak kéemaan yu mag te metti ci kaw Misra ak ci kaw Firawna ak ci kaw waa kèram gépp, nu teg ci sunuy gèt. ²³ Nun nag, moo nu fa jële, ngir indi nu ci réew mi mu giñaloon sunuy maam, ne nun la koy jox. ²⁴ Aji Sax jee nu sant nuy jéfe mboolem dogali yoon yii, te ragal sunu Yàlla Aji Sax ji, ngir nu baaxle bés bu nekk, ngir itam mu sàmm sunu bakkan ni bés sub tey jii. ²⁵ Sunu njekk lay doon nag, ndegam sàmmoo nanoo jéfe mboolem santaane bii, fi sunu kanam Yàlla Aji Sax ji, ni mu ko santaanee.»

7

Dogook yenn xeet yi war na Israyil

¹ Bu leen seen Yàlla Aji Sax ji yóbboo réew ma ngeen jëm, ngir nanguji ko, moo fay dàqe xeet yu bare fi seen kanam: Etteen ñi ak Girgaseen ñi ak Amoreen ñi ak Kanaaneen ñi ak Periseen ñi ak Eween ñeek Yebuseen ñi; juróom ñaari xeet yu leen épp, épp leen doole. ² Bu leen leen seen Yàlla Aji Sax ji jébbalee, ba ngeen duma leen, nangeen leen faagaagal ba ñu jeex tàkk. Buleen fasook ñoom kóllère, te buleen leen yèrëm. ³ Buleen séyantee k ñoom: seen doom yu jigéen, buleen ko may doomu xeet yooyu, jigéenu xeet yooyu it, buleen ko jélal seen doom ju góor. ⁴ Ndax dañu may dèddale ak seen doom yu góor, ñu mujj di jaamu yeneen yàlla, ba sànjum Aji Sax ji tàkk ci seen kaw yeen, fàkkas leen ci lu gaaw. ⁵ Ni ngeen di def ak ñoom kay mooy nii: seeni sarxalukaay, ngeen màbb; seen tuuri doj, ngeen rajaxe; seen xer yi ñuy jaamoo Asera tuur mi, ngeen gor; seen jëmme tuur, ngeen lakk. ⁶ Ndax kat askan wu sell ngeen, ñeel seen Yàlla Aji Sax ji. Yeen la seen Yàlla Aji Sax ji taamu, ngir ngeen doon askan wi mu séddool boppam, ci mboolem askani kaw suuf.

⁷ Du seen barewaay bu ngeen èpplee xeet yépp moo tax Aji Sax ji naw leen, ba taamu leen, nde yeena géna néew ci xeet yépp. ⁸ Waaye cofeel gu leen Aji Sax ji sopp, ak sàmm gu mu sàmm ngiñam la mu giñaloon seeni maam, moo tax mu génnee leen dooley loxoom, jote leen ca kërug njaam ga, ak ca loxol Firawna buuru Misra. ⁹ Xamleen boog ne seen Yàlla

Aji Sax ji moom mooy Yàlla; mooy Yàlla ju dëgg ju yij sàmm kóllère ak ngor ñeel soppeem ñiy sàmm ay santaaneem, sèt ba sètaat, ba ci junniy maas. ¹⁰ Waaye mooy fey ci saa si ay bañam, ngir sànk leen. Du yeexe bañam, ci saa si la koy fey.

¹¹ Kon nag sàmmleen santaane bi, muy dogali yoon yi, ak àttey yoon yi ma leen dénk tey, ngir di ko jéfe. ¹² Bu ngeen déggalee àttey yoon yii, te sàmmoo koo jéfe, su boobaa seen Yàlla Aji Sax ji dina sàmm diggam ak yeen, kóllère ak ngor, ga mu giñaloon seeni maam. ¹³ Moo leen di sopp, barkeel leen, yokk leen, barkeel seen meññeefum njurukaay, ak seen meññeefum suuf; seen pepp ak seen biin, ak seenug diw, ak seen doomi jur gu gudd, ak gu gatt, ca réew ma mu giñaloon seeni maam, ne yeen la koy jox. ¹⁴ Su boobaa yeenay gëna barkeel mboolem xeet yi, te du lenn, góor ak jigéen, luy jaasir ci seen biir, ak seen biirug jur. ¹⁵ Su boobaa Aji Sax jee leen di xàjjil mboolem wéradi. Mboolem jàngoroy Misra yu bon yu ngeen xamoon, du leen ci teg lenn, te mboolem seeni bañ la koy teg. ¹⁶ Fàkkasleen mboolem xeet yi leen seen Yàlla Aji Sax ji jébbal nag. Buleen leen xool bëtü yërmande, buleen jaamu seeni tuur: Lu ko moy muy seenug fiir.

¹⁷ Jombul ngeen di wax ci seen xel naan: «Xeet yii gën noo bare, ana nu leen mana dàqe?» ¹⁸ Buleen leen ragal. Fàttlikuleen bu baax ni seen Yàlla Aji Sax ji def Firawna ak Misra gépp, ¹⁹ ak mitit yu réy ya ngeen gisal seen bopp, ak firnde yaak kéemaan ya, ak seen dooley loxol Yàlla Aji Sax jeek kàttanam gu réy, ga mu leen génnee. Noonu la seen Yàlla Aji Sax ji di def mboolem xeet yi ngeen ragal. ²⁰ Te itam seen Yàlla Aji Sax ji, am mbas lay yebal ci seen kaw, ba seenu ndes wu leen làqu woon sànk. ²¹ Buleen am tiitaange ci ñoom, ndax seen Yàlla Aji Sax ji ci seen biir, Yàlla ju màgg la te raglu. ²² Seen Yàlla Aji Sax jee leen di dàqe fi seen kanam, ndànk-ndànk; dungeen leen mana gaawa jeexal, lu ko moy rabi àll yi mujj ne gáññ ci seen kaw. ²³ Seen Yàlla Aji Sax ji moo leen di jébbal xeet yooyu, moo leen di salfaañe salfaañoo gu réy, ba ñu sànk. ²⁴ Mooy teg seeni buur ci seeni loxo, ngeen far seenu tur fi asamaan tiim. Kenn ci ñoom du leen të, ba kera ngeen leen sànk. ²⁵ Seen jëmme tuur yooyu nag, lakkleen leen. Buleen xemmenn lenn luy xaalis mbaa wurus ci kaw tuur yi. Buleen ko aakimoo, lu ko moy muy seenug fiir, ndax lu seexluwo ngoo gu ci seen Yàlla Aji Sax ji. ²⁶ Buleen dugal yëf yu seexluwo seen biir néeg, lu ko moy àtteb faagaagal bi

war ci yëf yooyu, moo leen di dab, yeen itam. Xofleen koo xof, seexlu koo seexlu, ndax yëf yooyu, faagaagal moo ci war.

8

Xéewlu, fàtte aay na

¹ Mboolem santaane bi ma leen dénk bésuub tey nag, sàmmooleen koo jéfe, ndax ngeen dund, yokku, ba dugg nanguji réew ma Aji Sax ji giñaloon seeni maam. ² Fàttlikuleen mboolem yoon yi leen seen Yàlla Aji Sax ji awale diiru ñeent fukki di yii ci màndinj mi, teg leen coono, nattu leen ngir xam li ci seen biir xol, xam ndax dingeen wormala ay santaaneem, am déet. ³ Moo leen teg coono, xiifal leen, leel leen mànn mu ngeen xamul, te seeni maam xamuñu ko woon, ngir xamal leen ne du aw ñam donj la doom aadama di dunde, waaye gépp kàddu gu tukkee ci gémmini Aji Sax ji, dees na ko dunde. ⁴ Seeni yère ràppul, seeni tànk newiwul diiru ñeent fukki di yii. ⁵ Xamleen xéll ne ni baay di yare doomam, ni la leen seen Yàlla Aji Sax ji yare. ⁶ Kon sàmmleen seeni santaaney Yàlla Aji Sax ji, di topp ay yoonam te ragal ko. ⁷ Ndash seen Yàlla Aji Sax jaa ngi leen di yóbbu réew mu baax; réew mu ami wal, ak bėti ndox, ak ndoxi xóote yu waley xur aki tund, ⁸ réewum bele ak lors ak reseñ ak figg ak gërënaat, ak diwu oliw, ak lem. ⁹ Réew ma dungeen fa néewe njël, te dungeen fa ñàkke dara. Réew ma, ay dojam, weñ gu ñuul la, ay tundam, xànjari ngeen cay gase. ¹⁰ Dingeen lekk ba regg, di sante seen Yàlla Aji Sax ji, réew mu baax ma mu leen jox.

¹¹ Wattuleen seen bopp nag, bala ngeena fàtte seen Yàlla Aji Sax ji, baña sàmm ay santaaneem, ak àttey yoonam, ak dogali yoonam yi ma leen di dénk tey. ¹² Su ngeen lekkee ba regg, am kër yu baax yu ngeen tabax dëkke, ¹³ seen jur gu gudd ak gu gatt yokku, xaalis ak wurus yokkul leen, seen jépp alal yokku, ¹⁴ su boobaa moytuleen daldi xoggliku, fàtte seen Yàlla Aji Sax, ji leen génnee réewum Misra, kërug njaam ga, ¹⁵ ki leen wommate biir màndinj yaa mu raglu ma, ak jaani danjar yaaki jiiitam, ci biir maral ak ñàkk um ndox. Moo leen xellil ndox mu balle doj wu ne serej. ¹⁶ Moo leen leele mànnu màndinj, ma seeni maam xamuloon, ngir teg leen coono, nattu leen, te mujje baaxe leen. ¹⁷ Dingeen wax ci seen xel ne: «Sunu doole ak sunu njambaaru bopp moo nu may jii alal.» ¹⁸ Waaye fàttlikuleen ne seen Yàlla Aji Sax ji mooy ki leen may dooley liggéey alal ji, ngir feddi ni mu ko defe tey, kóllèreem ga mu giñaloon seeni maam.

¹⁹ Bu ngeen demee ba fátte lu jëm ci seen Yàlla Aji Sax ji, di topp yeneen yàlla, di leen jaamook a sujjóotal, seedeel naa leen bés niki tey, ne su boobaa déy, dingeen sànkoo cànkute gu mat sèkk. ²⁰ Ni xeet yi Aji Sax ji nara sànk fi seen kanam, noonu ngeen di sànkoo ndax ñakka déggal seen Yàlla Aji Sax ji.

9

Israyil gënul ci xeet yi

¹ Israyil dégluleen! Yeena ngii tey, di jàll dexu Yurdan ngir dàqi xeet yu leen épp, épp leen doole, ngir nangu seen dékk yu réy, dàbblikoo tata yu àkki asamaan. ² Askani wu am kàttan, yegg ca kaw, soqikoo ci Anageen, ñi ngeen xam, te dégg ñuy wax ci ñoom, naan: «Ku mana tē Anageen ñi?» ³ Waaye xamleen bés niki tey ne seen Yàlla Aji Sax ji mooy kiy jàll jüite leen, di sawara wuy xoyome. Moo leen di fakkas, mooy ki leen leen di notal, ngeen dàq leen, sànk leen ci lu gaaw, ni leen ko Aji Sax ji waxe woon.

⁴ Gannaaw bu leen leen seen Yàlla Aji Sax ji dàqalee nag, buleen wax ci seen xel ne: «Sunu njekk a nu may Aji Sax ji indii nu, ngir nu moom réew mii.» Mbonug xeet yii kay moo waral Aji Sax ji dàqal leen leen. ⁵ Du seen genn njekk, akug njub gu leen may ngeen nanguji seenum réew. Waaye mbonug xeet yii moo waral seen Yàlla Aji Sax ji dàqal leen leen, ngir sottaal kàddu ga mu giñaloon seeni maam Ibraayma ak Isaaxa ak Yanqóoba. ⁶ Kon na leen bir ne du seenug njekk moos la leen seen Yàlla Aji Sax ji joxe mii réew mu baax, ngir ngeen moom ko ndax, askani wu danñiiral ngeen.

Israyil jaamu na sèlluw wurus

⁷ Fàttlikuleen! Buleen fátte na ngeen merloo woon seen Yàlla Aji Sax ji ca màndiij ma. La dale bés ba ngeen bàyyikoo réewum Misra, ba ba ngeen agsee bérab bii, fippu ci kaw Aji Sax ji ngeen masa nekke. ⁸ Ca tundu Oreb ngeen merloo Aji Sax ji, Aji Sax ji mere leen, ba nar leena faagaagal. ⁹ Ba ma yéegee ca tund wa, di jéli àlluway doj ya, àlluway kóllère, gi Aji Sax ji fas ak yeen; toog naa ca kaw tund wa ñeent fukki bëccég ak ñeent fukki guddi. Du ñam wu ma lekk, du ndox mu ma naan. ¹⁰ Aji Sax ji jox ma ñaari àlluway doj yu loxol Yàlla bind mboolem kàddu ya leen Aji Sax ji waxoon ca kaw tund wa, ba mu àddoo fa digg sawara wa, keroog bésub ndaje ma.

¹¹ Ba ñeent fukki guddi ak ñeent fukki bëccég matee, Aji Sax ji jox ma ñaari àlluway doj ya, àlluway kóllère ga. ¹² Aji Sax ji ne ma: «Jógal wàcce fii gaaw, ndax

sa bokk ya nga génnee Misra def nañu yàqute. Teggi nañu xaat yoon wa ma leen santoon. Móolal nañu seen bopp jëmму tuur.»

¹³ Aji Sax ji waxati ma, ne ma: «Gis naa ne mbooloo mii kat, ñu dègër bopp lañu. ¹⁴ Bàyyi ma rekk ma faagaagal leen, ba far seen tur fu asamaan tiim, te def la ngay xeet wu épp wii, épp ko doole.»

¹⁵ Ba loolu amee ma walbatiku, wàcce ca tund wa, maak yaari àlluway kóllère ga ca sama yaari loxo, tund wépp di tàkk. ¹⁶ Ma gis ne ndeke moy ngeen seen Yàlla Aji Sax ji, daldi sàkkal seen bopp wèllu wu ñu móol, dèddu xaat yoon wa leen Aji Sax ji santoon. ¹⁷ Ci kaw loolu ma ne cas yaari àlluwa ya ca sama yaari loxo, sànni, rajaxe ko, ngeen di gis.

Musaa tinul na bànni Israyil

¹⁸ Ba loolu amee ma daanu tédde fa kanam Aji Sax ji, na woon, diiru ñeent fukki bëccég ak ñeent fukki guddi. Du ñam wu ma lekk, du ndox mu ma naan ndax seen gépp moy gu ngeen moy, di def lu Aji Sax ji ñaawlu, ba merloo ko. ¹⁹ Booba am naa tiitaange ci merum Aji Sax ji, ak sànjam mii mu nara sàñju ci seen kaw, ngir sànk leen. Teewul Aji Sax ji nangul ma boobu yoon itam. ²⁰ Aaróona nag, Aji Sax ji mere ko lool, nar koo sànk. Ma daldi ñaanalaale Aaróona. ²¹ Seen bàkkaarukaay boobu ngeen sàkkoon nag, jëmму wèllu wa, ma jël ko, lakk ko, tojat, wol ba mu mokk, ba doon pënd. Ma daldi sotti pënd ba ca biir yol ga wale kaw tund wa.

²² Ca Tabera itam, ak ca Maasa, ak ca Kibbrot Taawa, ngeen merlooti fa Aji Sax ji. ²³ Ak ba leen Aji Sax ji yebalee fa Kades Barneya, ne leen: «Demleen nanguji réew ma ma leen jox.» Yeena gántal seen kàddug Yàlla Aji Sax ji, gëmuleen ko, déggaluleen kàddoom. ²⁴ Gántal Aji Sax ji ngeen nekke naka jekk, dale ko ca bés ba ma leen xamee.

²⁵ Maa daanu tédde fa kanam Aji Sax ji diiru ñeent fukki bëccég yooyu, ak ñeent fukki guddi ya ma tédde fa kanamam ndax la Aji Sax ji noon da leen di sànk. ²⁶ Ma ñaan Aji Sax ji, ne ko: «Éy Boroom bi Aji Sax ji, bul sànk sa ñoñ ñi nga séddoo, ñi nga jote sa mággaay, génnee leen Misra ci sa dooley loxo. ²⁷ Ngalla bàyyiil xel sa jaam ña, Ibraayma ak Isaaxa ak Yanqóoba. Bul xool ci tégwug mbooloo mii ak seen mbon, ak seenug moy. ²⁸ Lu ko moy kat waa réew ma nga nu jéle dinañu ne: “Téle leena yóbbu réew ma mu leen digoon, ak jéppi leen moo tax Aji Sax ji génnee leen, ngir rey leen ca màndiij ma.” ²⁹ Ñii de ñooy sa ñoñ

ñi nga séddoo, ñi nga génnee sa doole ju bare, ci sa káttanu loxo.»

10

¹ Jant yooyu la ma Aji Sax ji wax ne ma: «Yettal ñaari àlluway doj yu mel ni yu jëkk ya, nga yéegsi fi man, ci kaw tund wi. Te nanga sàkk itam gaalu bant. ² Dinaa bind ci àlluwa yi, káddu ya woon ca àlluwa yu jëkk, ya nga toj. Su ko defee nga yeb àlluwa yi ci gaal gi.» ³ Ma sàkk gaalu bantu séng, daldi yett ñaari àlluway doj yu mel ni yu jëkk ya. Ci kaw loolu ma yéeg ca kaw tund wa, maak ñaari àlluwa yi ci sama loxo. ⁴ Aji Sax ji nag bind ca àlluwa ya, la mu jëkkoonu bind, muy fukki santaane ya mu leen waxoon ca kaw tund wa, ba mu áddoo fa digg sawara wa, keroog bésub ndaje ma. Ba loolu amee Aji Sax ji jox ma àlluwa yi. ⁵ Ma walbatiku, wàcc tund wa, yeb àlluwa ya ca gaal ga ma sàkk, àlluwa ya des ca biir, na ma ko Aji Sax ji waxe woon.

⁶ Gannaaw gi bànni Israyil bàyyikoo ca teeni Bene Yaakan, dem ba Mosera. Foofa la Aaróona faatoo, ñu denc ko fa, doomam Elasar doon sarxalkat, wuutu ko. ⁷ Foofa lañu bàyyikoo dem Gutgoda, bawooti Gutgoda, jáll ba Yotbata, réewum wali ndox ya.

⁸ Jant yooyu la Aji Sax ji ber giirug Lewi, ngir ñuy gáddu gaalu kólléreg Aji Sax ji, di taxaw fi kanam Aji Sax ji, di ko liggéeyal, di taase barke ciw turam, te mooy seen péete ba tey jii. ⁹ Looloo waral Leween ñi amuñu wàll ci céru suuf su ñuy séddoo ak seeni bokk. Aji Sax ji mooy seenen cér, ni leen ko seen Yàlla Aji Sax ji waxe woon.

¹⁰ Man nag maa am ca kaw tund wa fan ya ma fa jëkkoonu am, muy ñeent fukki béccég, ak ñeent fukki guddi. Aji Sax ji dellu ma nangul, boobu yoon itam, ba béggatu leena sànk. ¹¹ Aji Sax ji ne ma: «Doxal jiite yoonu mbooloo mí, ñu dem nanguji réew, ma ma giñaloon seeni maam, ne ñoom laa koy jox.»

Musaa ngi woote déggal Aji Sax ji

¹² Léegi nag yeen Israyil, ana lu leen seen Yàlla Aji Sax ji laaj, lu moy ngeen ragal seen Yàlla Aji Sax ji, di doxe mboolemi yoonam, sopp ko, di jaamoo seen Yàlla Aji Sax ji seen léppi xol, ak seen léppi bakkan, ¹³ ngir di sàmm santaaney Aji Sax ji, ak dogali yoonam, yi ma leen dénk bésub tey ngir seen njariñal bopp? ¹⁴ Seen Yàlla Aji Sax ji déy mooy boroom asamaan, ak asamaani asamaan, ak suuf, ak mboolem li ci biiram. ¹⁵ Terewul seeni maam donj la Aji Sax ji taqool, ngir sopp leen, te yeen, ñi askanoo ci ñoom la taamu ci biir xeetoo xeet, niki bésub tey jii. ¹⁶ Kon nag

nangeen dogoo seen xol te bañatee sajju loos. ¹⁷ Ndxax kat seen Yàlla Aji Sax ji mooy Yállay yàlla yi, te mooy Sangu sang yi. Mooy Yàlla ju mággi ji, jambaare te raglu. Ki gënalewul, jélul ub ger. ¹⁸ Kiy aar jirim akub jétun, sopp doxandéem, ngir leel ko, wodd ko. ¹⁹ Kon soppleen doxandéem, ndax ay doxandéem ngeen woon ca réewum Misra.

²⁰ Seen Yàlla Aji Sax ji moom ngeen di ragal, te moom ngeen di jaamu. Moom ngeen di ñoyu, te aw turam ngeen di giñe. ²¹ Moo yelloo seeni kañ te mooy seen Yàlla, ji leen defal jaloore yeek kawtéef yooyu ngeen gisal seen bopp. ²² Juróom ñaar fukki bakkan la seeni maam doonoon ba ñuy wàccsi Misra. Tey seen Yàlla Aji Sax ji def leen ngeen day ni biddiwi asamaan.

11

¹ Soppleen seen Yàlla Aji Sax ji, te ngeen dénkoo ndénkaaneem, ak dogali yoonam, ak àttey yoonam, aki santaaneem, bés bu nekk. ² Xamleen bésub tey ne seeni doom taxul may wax, ndax ñoom xamuñu, gisuñu seen njànglem Yàlla Aji Sax ji: maggaayam, ak dooley loxoom, ak káttanam gu réy, ³ aki firndeem, ak jalooreem ja mu jéf ca digg Misra, ci kaw Firawna buuru Misra ak ci biir réewam mépp, ⁴ jéfe kook gàngooru Misra, ak seeni fas ak seen watiiri xare, ba mu leen mēddee ca géēju Barax ya, fekk ñu ne leen dann. Aji Sax jee leen sànk ba bésub tey jii, ⁵ ak la mu leen def ca mändin ma, ba ngeen agsi bérab bii, ⁶ ak la mu def Datan ak Abiram, doomi Elyab Rubeneen ba, ba suuf ñayee, wonn leen, ñook seen waa kër, ak seeni xayma, ak mboolem luy dund lu leen topp, ci digg Israyil gépp. ⁷ Seen gēt déy ngeen teg ci mboolem jaloore ju mággi jooju Aji Sax ji def.

⁸ Kon nag sàmmleen mboolem santaane bi ma leen di dénk tey, ndax ngeen am doole ba nanguji réew ma ngeen jáll jëm, ngir nanguji ko, ⁹ ndax itam ngeen gudd fan ca réew ma Aji Sax ji giñoonu jox seeni maam, ñook seen askan; réew mu meew maak lem ja tuuroo. ¹⁰ Réew mooma ngeen jëm, di ko nanguji, déy, nirowul ak réewum Misra ga ngeen jóge, fa ngeen daan jiwe, ba noppi topp seenum jiwu, di ko suuxate dooley tãnk ni mbeyum dér. ¹¹ Réew mooma ngeen jáll jëm, ngir nanguji ko, réewum tund aki xur la, te ndoxum taw lay naan. ¹² Réew la mu seen Yàlla Aji Sax ji yég, fu mu tollu seen gēti Yàlla Aji Sax jaa ngi ne ko jàkk, terutel at ba ndeetelam.

¹³ Su fekke ne nag sàmm ngeen ba sàmm sama santaane yi ma leen dénk tey jii, ngir sopp seen Yàlla Aji Sax ji, di

ko jaamoo seen léppi xol, ak seen léppi bakkan, ¹⁴ su boobaa, Yàlla nee: «Maa leen di may seen tawub réew, saa yu jotee: lollib réew ma day taw*, cooroonam taw, ngeen dajale seenum pepp, ak seen biifi bu bees, ak seen diw gu yees. ¹⁵ Su boobaa maay mayem ñax ci seenub àll ngir seenug jur, yeen it ngeen di lekk ba regg.»

¹⁶ Wattuleen seen bopp nag, bala leen seen xel a nax, ngeen lajj, di jaamu yeneen yàlla, di leen sujóotal, ¹⁷ ba sànjum Aji Sax ji tàkkal leen, mu ne ràpp asamaan, taw taxaw, suuf noppee meññal, ba ngeen gaawa sànkoo ca réew mu baax ma leen Aji Sax jiy jox.

¹⁸ Defleen sama kàddu yii ci seenum xel ak ci seen xol. Takkleen ko, muy firnde ci seen loxo, te na doon am mbandal ci seen diggantey gèt. ¹⁹ Nangeen ko ñàngal seeni doom, di ko waxe bu ngeen toogee seen biir néeg, ak bu ngeen di dox ciw yoon, ak bu ngeen téddee, ak bu ngeen jógee. ²⁰ Te itam bindleen ko ci seen kaw jèni buntu néeg, ak ci seen bunti dèkk, ²¹ ndax seeni fan, ak seen fani doom, baree ca réew ma Aji Sax ji giñaloon seeni maam, ni kemu fan yi asamaan tiim suuf.

²² Ndegam déy sàmm ngeen ba sàmm mboolem santaane bii ma leen dénk ngir di ko jéfe, ba sopp seen Yàlla Aji Sax ji, di doxe mboolem ay yoonam te noy ci moom, ²³ su boobaa Aji Sax jee leen di dàqal mboolem xeet yooyu, te yeenay nangu réewi xeet yu leen épp, épp leen doole. ²⁴ Fépp fu ngeen teg seen tànk, yeena koy moom. La ko dale ca màndin ma ba ca Liban, daleeti dexu Efraat ba ca géeg ga ca sowu, lépp seen suuf lay doon. ²⁵ Du kenn kuy taxaw fi seen kanam. Seen Yàlla Aji Sax ji mooy def na mu leen ko waxe woon, ba waa dëndu réew mu ngeen teg seen tànk, ñoom ñépp, yeen lañuy tiit, yeen lañuy ragal.

Barke ak alkànde dègmal na

²⁶ Maa ngii nag di leen tegal bésub tey barke ak alkànde. ²⁷ Barkee ngi, ndegam dèggal ngeen seen santaaney Yàlla Aji Sax, ji ma leen di dénk tey. ²⁸ Alkàndee ngi, ndegam dèggaluleen seen santaaney Yàlla Aji Sax ji, xanaa wacc yoon wi ma leen di dénk bésub tey, ngir topp yeneen yàlla yu ngeen xamuloon.

²⁹ Bu leen seen Yàlla Aji Sax ji yóbboo ca réew ma ngeen jëm, ngir nanguji ko, nangeen tudd barke bi ca kaw tundu Garisim, te ngeen tudd alkànde ji ca kaw tundu Ebal. ³⁰ Ñaari tund yooyu, ña nga moos ca wàllaa dexu Yurdan, ca wàllaa yoonu sowu ba, ca réewum Kanaaneen, ña

dèkke joor ga jàkkaarlook Gilgal, ca weti garabi More yu mag ya. ³¹ Léegi nag yeena ngi jàlli dexu Yurdan, ngir nanguji réew mi leen seen Yàlla Aji Sax ji jox. Bu ngeen ko nangoo ba dèkk fa nag, ³² sàmmooléena jéfe mboolem dogal yeek àttey yoon yi ma teg fi seen kanam, bésub tey jii.

12

Lu jëm ci sàrti dundin ca réewum dige ba

(Saar 12—26)

Aji Sax ji mooy taamu bérabam

¹ Dogal yeek àttey yoon, yi ngeen di sàmmoo jéfe seen giiru dund ca suufas réew, ma leen seen Yàllay maam Aji Sax ji moomale, moo di yii: ² tasleen tasar mboolem bérab, ya xeet ya ngeen di dàq, di jaamoo seeni tuur; muy kaw tund yu mag ya, di kaw tund yu ndaw ya, di ker garab yu naat ya. ³ Tojleen seeni sarxalukaay, rajaxe seen tuuri doj; seen xer yi ñuy jaamoo Asera tuur mi, ngeen lakk; seen jëmni tuur, ngeen gor, ba far tukkal turi tuur yi ci yooyu bérab. ⁴ Buleen jaamoo noonu seen Yàlla Aji Sax ji nag. ⁵ Waaye seetleen bérab bu seen Yàlla Aji Sax ji di taamuji, ci mboolem seeni giir; ngir teg fa turam, dèel ko fa, te ngeen dem foofa. ⁶ Foofa ngeen di yóbbu seen saraxi dóomal, ak yeneen sarax, ak seen céri fukkeel, ak seenub jooxe, ak seen sarax yu ngeen xas, ak seen saraxi yéene, ak seen saraxi taawug jur gu gudd ak gu gàtt. ⁷ Foofa ngeen di lekke, yeen ak seeni njaboot fa seen kanam Yàlla Aji Sax ji, ngeen bége fa seen wépp ñaq wu leen seen Yàlla Aji Sax ji barkeelal.

⁸ Buleen jéfe mboolem nii nuy jéfe fii tey, lu neex waay rekk, def. ⁹ Ndxat kat àggaguleen ba tey ca dal-lukaay ba, fa leen seen Yàlla Aji Sax ji sèdde. ¹⁰ Waaye bu ngeen jàllée dexu Yurdan, ba dèkki ca réew ma leen seen Yàlla Aji Sax ji sèdde, ba mu noppal leen ci mboolem noon yi leen séq, ngeen dèkke xel mu dal, ¹¹ su boobaa bérab bu seen Yàlla Aji Sax ji taamu ngir dèel fa turam, foofa ngeen di yóbbu mboolem lu ma leen sant: seen saraxi dóomal, ak yeneen sarax, ak seen céri fukkeel, ak seenub jooxe, ak mboolem ngéneel yu ngeen di def saraxi xas yu ngeen xasoo ak Aji Sax ji. ¹² Su ko defee ngeen bége fi seen kanam Yàlla Aji Sax ji, yeen ak seen doom yu góor ak yu jigéen, ak seen jaam yu góor ak yu jigéen, ak Leween ñi ci seen biiri dèkk te amuñu wàll, amuñu céru suuf ci seen biir.

* 11:14 11.14 Tawub lolli lu jaadu la ca réewum Israyil, bokkul ak jamonoy lolli ji topp ci nawet fii.

¹³ Wattuleen seen bopp bala ngeena joxe seen saraxi dóomal fépp fu ngeen gis, ¹⁴ ndax bérab bu Aji Sax ji taamu ci genn ci seen giir yi, foofa ngeen di joxe seen saraxi dóomal, te foofa ngeen di def lépp lu ma leen sant. ¹⁵ Teewul saa yu leen soobee, sañ ngeena rendi, lekk ci lépp lu leen seen Yàlla Aji Sax ji barkeele, ak fépp fu ngeen dëkk. Ku sobewu ak ku set yépp sañ na caa lekk, mel ni bu doon kéwél mbaa kooba. ¹⁶ Waaye deret ja, buleen ko lekk. Ci suuf ngeen koy tuur nim ndox. ¹⁷ Seen céru fukkeelu pepp nag, ak bu biñ bu bees, ak bu diw gu bees, ak seen taawug jur gu gudd ak gu gätt, ak seen mboolem saraxi xas yu ngeen xasoo woon, ak seen saraxi yéene, ak ab jooxe bu ngeen sàkke ci seenu ñaq, sañuleen cee lekk lenn ci seen biiri dëkk, ¹⁸ ndare ngeen lekke ko fa seen kanam Yàlla Aji Sax ji. Lekkeleen ko fa seen Yàlla Aji Sax ji di taamuji, yeen ak seen doom yu góor, ak yu jigéen, ak seen jaam yu góor ak yu jigéen, ak Leween ñi ci seen biir dëkk. Su ko defee ngeen bége seen wépp ñaq, fi seen kanam Yàlla Aji Sax ji. ¹⁹ Wattuleen seen bopp nag, ngir baña sàggane Leween ñi, seen giiru dund ca seen suuf.

²⁰ Bu seen Yàlla Aji Sax ji yokkee seen suuf noonee mu leen ko waxe woon, te ngeen namma lekk yàpp, saa yu leen neexee sañ ngeena lekk yàpp. ²¹ Bu fekkee ne fi seen Yàlla Aji Sax ji taamoo dëel turam dafa soreek yeen, man ngeena rendi ci seen jur gu gudd mbaa gu gätt, ga leen Aji Sax ji jox, na ma leen ko waxe woon. Sañ ngeen caa lekke seen biir dëkk lu leen neex. ²² Ni ñuy lekke yàppu kéwél mbaa kooba rekk ngeen koy lekke. Ku sobewu ak ku set yépp sañ na caa lekk. ²³ Moyuleen bu baax rekk ba baña lekk deret ji, ndax deret mooy bakkan te waruleen boole lekk bakkanu jur gi, aku suuxam. ²⁴ Buleen lekk deret ji. Ci suuf ngeen koy tuur nim ndox. ²⁵ Buleen ko lekk mukk, su boobaa dingeen baaxle, yeen ak seen doom yi leen di wuutu; ngir su boobaa yeena ngi jéfe li Aji Sax ji rafetlu.

²⁶ Waaye seen yéf yu ñu sellal, ak seen sarax yi ngeen xasoo, jël-leen ko, yóbbu ca bérab ba Aji Sax ji di taamuji. ²⁷ Te nangeen sarxe seen saraxi rendi-dóomal, yàpp wi ak deret ji, ci seen kaw sarxalukaayu Yàlla Aji Sax ji. Seen deretu yeneen sarax, tuurleen ko ca seen kaw sarxalukaayu Yàlla Aji Sax ji, yàpp wi ngeen lekk ko.

²⁸ Sàmmooleena déggal mboolem kàddu yii ma leen di dénk, ngir ngeen baaxle ba fàww, yeen ak seen doom, yi leen di wuutu, ndax kon yeena ngi jéfe lu baax li seen Yàlla Aji Sax ji rafetlu.

²⁹ Bu leen seen Yàlla Aji Sax ji sànkalee xeet yi ngeen jëm, ngir dàq leen, gannaaw bu ngeen leen dàqee ba dëkke seenum réew, ³⁰ nangeen wattu seen bopp, ba gannaaw bu xeet yooyu sànkoo ci seen kanam, dungeen tàbbi cig fiir, di leen roy, naan: «Ana nu xeet yii di jaamoo seeni tuur, ngir nun it nu def ni ñoom?» ³¹ Buleen defee noonu ak seen Yàlla Aji Sax ji, ndax mboolem lu seexluwu lu Aji Sax ji bañ, defal nañu ko seeni tuur. Seen doom yu góor ak yu jigéen sax, lakk nañu leen, defal leen seeni tuur sarax.

13

Dee mooy àtteb kuy xiirtale ci bokkaale

¹ Mboolem kàddu gi ma leen dénk nag, sàmmooleen koo jéfe. Buleen ci yokk lenn, buleen ci waññi lenn. ² Gannaaw loolu su ab yonent feeñee ci seen biir, mbaa boroom gént, bu leen digee firnde mbaa kiraama, ³ ba firnde la mbaa kiraama ga mu leen waxoon dikk, su leen nee: «Nanu topp yeneen yàlla, jaamu leen,» yàlla yu ngeen xamul, ⁴ buleen déglu waxu yonent boobu, mbaa boroom gént boobu, ndax seen Yàlla Aji Sax ji moo leen di nattu ngir xam ndax yeena ngi koy soppe seen léppi xol ak seen léppi bakkan. ⁵ Seen Yàlla Aji Sax ji moom ngeen di topp, moom ngeen di ragal. Ay santaaneem ngeen di sàmm, baatam ngeen di déglu, moom ngeen di jaamu, te ci moom ngeen wara ñoy. ⁶ Yonent boobu nag mbaa boroom gént boobu, dee mooy àtteem, ndax moo wóote ag fippu ci seen kaw Yàlla Aji Sax, ji leen jéle ca réewum Misra, jote leen kërug njaam ga. Mu nar leena féle ci yoon yi leen seen Yàlla Aji Sax ji sant ngeen doxe ko. Noonu ngeen di tenqee lu bon ci seen biir.

⁷ Seen mbokk mu ngeen bokkal jenn ndey, mbaa seen doom ju góor, mbaa ju jigéen, mbaa seen jabar ju ngeen xejjoo, mbaa seen xaritu benn bakkan, su leen dee xiirtal, naan leen ci kumpa: «Nanu jaamuji yeneen yàlla,» yàlla yu ngeen xamul, du yeen du seeni maam, ⁸ ci yállay xeet yi leen séq, ñi leen jege, ak ñi leen sore, ci àddina sépp, cat ba cat, ⁹ su boobaa buleen ko nangul, buleen ko déglu, buleen ko xool bëti yërmande, buleen ko baal, buleen ko nëbbal. ¹⁰ Reyleen ko rekk. Yeen ñi mu doon jéema yóbbaaale, na ko seen loxo jékka dal, ngir rey ko, bala cee loxol mbooloo mépp topp. ¹¹ Dóorleen koy doj ba mu dee, ndax moo leen doon fexee soreleek seen Yàlla Aji Sax, ji leen jéle réewum Misra, kërug njaam ga. ¹² Israyil gépp a koy dégg, daldi ragal ba deesatul def mbon gu ni mel ci seen biir.

¹³ Bu ngeen déggée, ci benn dëkk, ci dëkk yi leen seen Yàlla Aji Sax ji jox, ngir ngeen dëkke, ñu ne ¹⁴ ay nit ñu tekkiwul dara, te bokk ci yeen, ñoo jóg di waññi seen waa dëkk, naan leen: «Nanu jaamuji yeneen yàlla,» yàlla yu ngeen xamul, ¹⁵ su boobaa nangeen gëstu, seet te laajte bu baax, ba dëgg gu wér feeñe ca mbir ma, ne defees na moomu mbir mu jomblu ci seen biir, ¹⁶ ngeen daldi jam rekk waa dëkk boobu, leel leen ñawkay saamar, faagaagal dëkk ba, ak mboolem la ca biiram, jur ga it, ngeen leel leen ñawkay saamar. ¹⁷ Mboolem alalu sèxëtoo ju jóge ca dëkk ba, dajaleen ko ca digg pénc ma, te ngeen lakk dëkk ba, booleek cèxëtoo ma, def ko dóomal bu mat sèkk, ñeel seen Yàlla Aji Sax ji. Day doon ab gent ba faww, deesu ko tabaxaat. ¹⁸ Bu dara des ci seen loxo, lu bokk ci alal jooju ñu wara faagaagal. Su ko defee Aji Sax ji dëddu sànjam mu tàng, yèrëm leen, ñeewante leen, yokk leen na mu ko giñale woon seeni maam, ¹⁹ ndegam yeena ngi dégg seen káddug Yàlla Aji Sax ji, ngir sámm mboolem sàntaaneem yi ma leen di dënk bésub tey, ngir di jéfe lí seen Yàlla Aji Sax ji rafetlu.

14

Yoon wi sàrtal na jéfin yu set

¹ Ay doom ngeen, ñeel seen Yàlla Aji Sax ji. Buleen ñaasu, buleen wat seen kawaru bopp fi féeteek jé bi, ngir di ko mititloo ku dee, ² ndax askan wu sell ngeen, ñeel seen Yàlla Aji Sax ji. Yeen la Aji Sax ji taamu, ngir ngeen doon askan wi mu séddool boppam, ci mboolem askani kaw suuf.

³ Buleen lekk lenn lu seexluwu. ⁴ Lii moo di mala yi ngeen di lekk seen suux: nag ak xar ak bëy; ⁵ ak kooba ak kéwél, ak lu xeetook kooba, ak lu xeetook kéwél, ak bëyu àll, ak bëyu kaw tund. ⁶ Mboolem mala mu ci we wi xar, séddlikoo yaar, te muy duññ, moom ngeen di lekk aw suuxam. ⁷ Waaye yii, buleen lekk seen suux: lu ciy duññ doɲɲ, te we wi xarul, mbaa lu we wi xar, te duññul. Lu mel ni giléem ak njomboor ak daman, ndax dañuy duññ waaye seen we xarul. Yooyu daganul ci yeen. ⁸ Mbaam-xuux, moom, we wi xar na waaye du duññ. Kon daganul ci yeen. Aw suuxam, buleen ko lekk, te méddam, buleen ko laal.

⁹ Lii nag, sañ ngeen koo lekk, ci mboolem lu dëkke ndox: mboolem lu ci am ci-iriir aki waasintóor, sañ ngeen koo lekk. ¹⁰ Waaye lu ci amul ciiriir aki waasintóor, buleen ko lekk, ndax daganul ci yeen.

¹¹ Mboolem njanaaw lu set, sañ ngeen koo lekk. ¹² Waaye lii ngeen dul lekk ci

njanaaw yi: jaxaay ak tan, ba ca mu ñuul ma, ¹³ ak céeli bu xonq, ak céeli bu ñuul, ak maf, ak lu mu xeetool, ¹⁴ ak lépp luy baaxoñ ak lu mu xeetool, ¹⁵⁻¹⁸ ak bànjóoli ak looy, ak lu mu xeetool, ak kirigéej, ak mboolem xeeti liccin, ak yébb, ak lu xeetook xodd, ak musejubru ak njugub. ¹⁹ Mboolem boroomi laaf yu sew-sewaan, daganul ci yeen. Deesu ci lekk lenn, ²⁰ xanaa boroomi laaf yi ci set. Yooyu, sañ ngeen koo lekk.

²¹ Buleen lekk lenn lu médd. Jaambur bu dal ak yeen, sañ ngeen koo jox lu médd, mu lekk, mbaa ngeen jaay ko ab doxandéem. Waaye yeen askan wu sell ngeen, ñeel seen Yàlla Aji Sax ji.

Te buleen togg ab tef ci meewum yaayam.

Lu jëm ci céri fukkeel

²² Fexeleen bay génne benn céru fukkeel ci mboolem lu seeni tool meññ at mu nekk. ²³ Seen cérub fukkeelu pepp, ak biiñ bu bees, ak diw gu bees, ak lu seen jur taawloo, muy nag, di gätt, nangeen ko xéewloo fi seen kanam Yàlla Aji Sax ji, fi bérab bi mu taamoo dëel turam éllég. Su ko defee ngeen tàggatu ci ragal seen Yàlla Aji Sax ji fu ngeen tollu. ²⁴ Su ngeen manula dox yoon wi, ndax seen Yàlla Aji Sax jee leen barkeele meññeef mu bare mu ngeen dul àttan, ci diggante bu sorewaatoo lool ak bérab bi seen Yàlla Aji Sax ji taamoo dëel turam, ²⁵ su boobaa dangeen di wecci cérub fukkeel ba xaalis, jël xaalis ba te dem ba fa seen Yàlla Aji Sax ji taamu. ²⁶ Su ko defee ngeen weccikoo fa xaalis bi lu leen neex, muy nag mbaa gätt, mbaa biiñ, mbaa geneen naan gu diis, ak lu leen seen bakkan xiir, ngeen xéewloo fa seen kanam Yàlla Aji Sax ji, bànneexoo ko, yeen ak seen njaboot. ²⁷ Leween gi ci seen biir dëkk nag, buleen leen fátte, ndax amuñu wàll ci seen céru suuf.

²⁸ Ñetti at yu mat yu nekk, nangeen génne mboolem seen céri fukkeeli meññeef ca at mooma, te ngeen denc ko ca seen biir dëkk, ²⁹ ndax Leween, ñi amul wàll ci seen céru suuf, diikk, ñook doxandéem yi ak jirim yi ak jëtun, yi ngeen dëkkal, ngir ñu lekk ba regg. Su ko defee seen Yàlla Aji Sax ji barkeel mboolem seenu ñaq.

15

Lu jëm ci njéggalug bor

¹ Juróom ñaari at yu mat yu nekk, nangeen amal njéggalug bor. ² Mbirum njéggaleg bor gi, nii lay deme: mboolem ku lebaloon dëkkandoom, bumu ko ca feyeekooti. Na jéggale la mu lebaloon dëkkandoom, mbokkum bànni Israyilam,

gannaaw bu ñu biralee njéggaleg bor, ñeel Aji Sax ji. ³ Jaambur bi bokkul ci bànni Israyil, sañ ngeen koo feyeeku, waaye la leen seen mbokkum bànni Israyil ameel, jéggaleen ko.

⁴ Waaye ab ndóol du am ci seen biir, ndax seen Yàlla Aji Sax ji moo leen di barkeel bu baax ca réew ma mu leen di jox, muy seen cér, ngeen jagoo, ⁵ ndegam déggal ngeen bu baax seen Yàlla Aji Sax ji, di sàmmoo jéfe mboolem santaane bii ma leen di dénk tey. ⁶ Bu leen seen Yàlla Aji Sax ji barkeele ni mu ko waxe déy, yeenay lebal xeet yu bare, waaye yeen dungeen leb. Te it yeenay yilif xeet yu bare, waaye yeen, deesu leen yilif.

⁷ Su amee ci seen biir ab ndóol, di kenn ci seen bokki bànni Israyil, ci benn ci seen dékki réew, mi leen seen Yàlla Aji Sax ji di jox, buleen dëgër xol, di téjal seen loxo, seen mbokkum ndóol moomu. ⁸ Nàddil-leen koo nàddil, abal koo abal dayob soxlaam. ⁹ Wattuleen seen bopp, bala leena jikko ju sew yóbbe ngeen naan ci seen xel: «Atum juróom ñaareel mi, atum njéggalug bor dëgmal na,» ba tax ngeen saaje xef, seen mbokkum ndóol, joxuleen ko dara. Da leen di booleek Aji Sax ji, ngeen gàddu bàkkaar. ¹⁰ Nangeen ko joxa jox te bu ngeen koy jox it, bu ci seen xol bon, ndax loolu mooy tax seen Yàlla Aji Sax ji barkeel mboolem seen liggéey, ak mboolem seenu ñaq. ¹¹ Du ñàkk nag ab ndóol ci réew mi. Moo tax ma sant leen ne leen ngeen nàddil seen mbokkum ndóol, ak seen néew-ji-doole ji ci seenum réew.

Sang am na lu ko war ci jaamam

¹² Su fekkee ne seen mbokkum bànni Israyil, góor mbaa jigéen da leena jaay boppam*, bu leen liggéeyalee juróom benni at, atum juróom ñaareel ma, yiwileen ko, mu moom boppam. ¹³ Te bu ngeen ko yiwee, mu moom boppam it, buleen ko yiwee loxoy neen. ¹⁴ Sàkkal-leen koo sàkkal ci seeni gätt, ak seenum pepp, ak seen biñ. Kemu alal ja leen seen Yàlla Aji Sax ji barkeele, moom ngeen koy jox. ¹⁵ Fàttlikuleen ne ay jaam ngeen woon ca réewum Misra, seen Yàlla Aji Sax ji moo leen jot. Moo tax ma sant leen lii tey.

¹⁶ Ndegam nag seen jaam a leen ne: «Duma dem, ba la,» ndax cofeel gu mu am ci yeen ak seen waa kër, te bannexam di nekk ak yeen, ¹⁷ su boobaa fableen puso, ngeen sésale noppu jaam bi seen lafu bunt, te ngeen bënne puso bi noppam, ba mu jam ci lafu bunt bi, mu daldí doon

seen jaam ba fàww. Seen jaam bu jigéen it, noonu ngeen di def ak moom.

¹⁸ Buleen mititlu lu ngeen yiwi seenub jaam, mu moom boppam, ndax jariñ na leen lu fey ñaari yoon surga buy feyeeku, ci juróom benni at yi mu leen liggéeyal. Te seen Yàlla Aji Sax ji dina leen barkeel ci mboolem lu ngeen def.

Li war ci taawug jur

¹⁹ Mboolem luy taaw ci seen jur gu gudd, ak gu gätt, te di góor, defal leen ko seen Yàlla Aji Sax ji cér bu sell. Buleen liggéeyloo mukk seen yëkk wu dib taaw, te buleen wat seen gätt bu dib taaw. ²⁰ Fi seen kanam Yàlla Aji Sax ji ngeen ko wara xéewloo at mu jot, yeen ak seen njaboot, fi bérab bi Aji Sax ji taamu. ²¹ Jur gu ci am sikk nag, muy soox, mbaa mu gumba, mbaa mu am sikk su réy su mu mana doon, buleen ko sarxalal seen Yàlla Aji Sax ji. ²² Ci seen biir dékk ngeen ko wara xéewloo, te ku sobewu ak ku set yépp man na caa lekk, mel ni bu doon kéwél mbaa kooba. ²³ Waaye deretam, buleen ko lekk. Ci suuf ngeen koy sotti nim ndox.

16

Ñetti yoon lees di mágalsi ci bérab bu sell bi

¹ Wormaal-leen weeru Abiib, te ngeen amal ci mággalu bésu Mucc, ñeel seen Yàlla Aji Sax ji, ndax ci weeru Abiib la leen seen Yàlla Aji Sax ji génnee Misra, ag guddi. ² Nangeen ci sarxalal seen Yàlla Aji Sax ji, ab gätt mbaa aw nag, ci bérab bi Aji Sax ji taamoo déel turam èllég. ³ Buleen ko lekkaale lenn lu am lawiir. Daleleen caa lekk, ba diiru juróom ñaari fan, mburu mu amul lawiir, mburum njàqare, ndax ci biir gaawtu ngeen génne woon réewum Misra. Su ko defee ngeen baaxantal seen giiru dund, bés ba ngeen génnee réewum Misra. ⁴ Bu leen kenn gisal lawiir ci seen tund wépp, diiru juróom ñaari fan, te bu lenn fanaan ci yàppu jur gi ngeen sarxal, diggante ngoonu bés bu jëkk ba, ba ca suba sa.

⁵ Juru bésu Mucc bi, dungeen ko mana rendi fenn ci dékk yi leen seen Yàlla Aji Sax ji jox, ⁶ fu moy bérab ba seen Yàlla Aji Sax ji taamoo déel turam. Foofa ngeen di rendi juru bésu Mucc bi ci ngonon bu jant biy so, yemook waxtu wa ngeen bàyyikoo woon Misra. ⁷ Toggleen ko, te lekk ko ci bérab bi seen Yàlla Aji Sax ji di taamuji, ca suba sa ngeen xèy, dellu ca seeni xayma. ⁸ Juróom benni fan ngeen di lekk mburu mu amul lawiir, bésu juróom ñaareel di

* 15:12 15.12 Mbaa: su fekkee ne dees leena jaay seen mbokkum bànni Israyil.

am ndaje, ñeel seen Yàlla Aji Sax ji. Buleen ci liggéey dara.

⁹ Juróom ñaari ayi bés nag, ngeen di waññ, te ci ndoortel ngóob ngeen di tãmbalee waññ juróom ñaari ayi bés yi, ¹⁰ ngeen doora amal mággalug Ayi bés, ñeel seen Yàlla Aji Sax ji, te saraxu yéene ba ngeen cay joxe di kemu koom ga leen seen Yàlla barkeele. ¹¹ Ngeen daldi bannexu fa seen kanam Yàlla Aji Sax ji, yeen ak seeni doom, góor ak jigéen ak seeni jaam, góor ak jigéen, ak Leween ñi ci seen dëkk, ak doxandéem yeek jirim yeek jëtun ñi ci seen biir, ci bérab bi seen Yàlla Aji Sax ji taamoo dëel turam ëllëg. ¹² Fattlikuleen ne ay jaam ngeen woon ca Misra te ngeen sãmmoo jëfe dogali yoon yii.

¹³ Mággalu Mbaar yi it nangeen ko wormaal diiru juróom ñaari fan, gannaaw bu ngeen dajalee seenum pepp, ak seen ndoxum reseñ. ¹⁴ Ngeen daldi bannexoo seenug mággal, yeen ak seeni doom, góor ak jigéen, ak seeni jaam, góor ak jigéen, ak Leween ñeek doxandéem yeek jirim yeek jëtun, ñi ci seen biir dëkk. ¹⁵ Juróom ñaari fan ngeen koy mággal ñeel seen Yàlla Aji Sax ji ci bérab bi Aji Sax ji di taamuji, ndax seen Yàlla Aji Sax ji moo leen di barkeelal seen meññat mépp, ak seen mboolem ñaq, seen mbégte mat sëkk.

¹⁶ Kon ñetti yoon cim at la mboolem seeni góor di teew fi seen kanam Yàlla Aji Sax ji, ci bérab bi muy taamuji: fani mággalu Mburu mu amul lawiir, ak fani mággalug Ayi bés, ak fani mággalu Mbaar yi. Waaye deesul teewe loxoy neen fi kanam Aji Sax ji. ¹⁷ Ku nekk, na sarax ba muy indi, di kemu barke ba ko Yàlla jagleel.

Yoon wi sàrtal na mbirum àtte

¹⁸ Te itam ay àttekat aki kilifa ngeen di tabb ngir seeni giir, ci mboolem dëkk yi leen seen Yàlla Aji Sax jiy jox, ñuy àtte mbooloo mi àtteb dëgg. ¹⁹ Buleen jalgati yoon cib àtte, buleen jeng te buleen nangu alalu ger, ndax ab ger day muur bėti boroom xel, di xañ abji jub dëgg. ²⁰ Dëgg donj ngeen wara topp, ndax ngeen dund, jagoo réew mi leen seen Yàlla Aji Sax ji di jox.

²¹ Buleen samp benn xeru bant, bu jóge ci genn garab, ngir di ko jaamoo Asera tuur mi, ci seen wetu sarxalukaay bi ngeen sàkk ngir seen Yàlla Aji Sax ji. ²² Te itam buleen yékkati lenn lu bokk ci doji jaamookaay yooyu seen Yàlla Aji Sax ji bañ.

17

¹ Buleen sarxalal seen Yàlla Aji Sax ji, aw nag mbaa ab gätt bu am sikk, mbaa jenn

laago, ndax seen Yàlla Aji Sax ji seexlu na loolu.

² Bu nit feeñee ci seen biir, ci benn ci dëkk yi leen seen Yàlla Aji Sax jiy jox, muy góor mbaa jigéen juy def lu seen Yàlla Aji Sax ji ñaawlu, di fecci kóllèreem, ³ bay jaamuji yeenen yàlla, di leen sujjóotal, mbaa muy sujjóotal jant bi, mbaa weer wi, mbaa mboolem gàngooru asamaan, te santaanewuma ci lenn, ⁴ buñu leen ko yeggee ba ngeen dégg ko, seetleen mbir ma bu baax. Su dee dégg gu wér, ne defees na lu jomblu loolu ci biir Israyil, ⁵ nangeen géenne ba ca buntu dëkk ba, waa ji, mbaa ndaw si def jooju jëf ju bon, te ngeen dóor ay doj, waa jooju mbaa ndaw si, ba mu dee. ⁶ Kàddug ñaari seede ba ñett nag, ci lees di reye ki ñu wara rey, waaye deesu ko rey ci kàddug benn seede. ⁷ Loxoy seede yee koy jëkka dóor doj ngir rey ko, loxoy mbooloo mépp door koo dóor. Noonu ngeen di tenqee lu bon ci seen biir.

⁸ Su leen mbir jafee ba wees leen ci àtteb bakkan bu ñu faat, ak ay jote, ak loraangey yaram yu ñu teg nit, ak mboolem dëngoo bu laaj àtte ci seen biir dëkk, dangeen di dem ba ca bérab ba seen Yàlla Aji Sax ji di taamuji, ⁹ ngeen àgg ca sarxalkat ya, Leween ña, ak àttekat, ba mbir ma yemool jamono, te ngeen sàkku ñu biral leen àtteb mbir ma. ¹⁰ Nangeen jëfe nag kàddu ga ñu leen ca wax, ca bérab booba Aji Sax ji taamu, te ngeen sãmmoo koo jëfe mboolem noonee ñu leen ko digale. ¹¹ Kàddug ndigal la ñu leen digal, ak àtte ba ñu leen ci wax, jëfeleen ko. Buleen lajje fenn kàddu ga ñu leen ca wax; du ndjiir, du cãmmoñ. ¹² Képp ku ci danjjiiral, baña déggal sarxalkat ba fa ayee liggéeyal seen Yàlla Aji Sax ji, baña déggal àttekat ba, kooku dees koy rey. Noonu ngeen di tenqee lu bon ci Israyil. ¹³ Askan wépp a koy dégg, tiit, ba duñu danjjiiralati.

Ay ndigal ñeel na buur

¹⁴ Bu ngeen demee nag ca réew ma leen seen Yàlla Aji Sax ji di jox, bu ngeen ko nangoo, dëkke, ba ne: «Nanu fal buur bu nu jiite ni mboolem xeet yi nu séq.» ¹⁵ su boobaa fexeleen ba ka ngeen di fal buur, di ka seen Yàlla Aji Sax ji taamu. Ci seen biiri bokk nag ngeen di fal seen buur. Dungen mana fal buur ab jaambur bu dul seen mbokkum banni Israyil. ¹⁶ Waaye bu buur bi barey fas, te bumu delloo askan wi Misra, ngir sàkku fas yu bare, te Aji Sax ji waxoon leen ne buleen dellooti woowu yoon. ¹⁷ Bumu barey jabar, balaa am xelam di lajj. Xaalis ak wurus it, bumu ko barele lool.

¹⁸ Bu buur bi toogee ci jalub nguuram, na bindlu ngir moom ci boppam, ab sottib

téereb yoon wii cib taxañ, ci dégtalub sarxalkat yi, Leween ñi. ¹⁹ Na téere boobu ànd ak moom, mu di ci jàng giiru dundam, ndax mu tàggatu ci ragal Yàllaam Aji Sax ji, ngir di sàmm mboolem kàdduy yoon wii, ak dogali yoon yii, ngir di ko jéfe, ²⁰ ba du xoggliku ci kawi bokkam, te du moye santaane bi fenn; du ndijoor, du cammoñ, ndax mu gudd fan ci nguuram, moom ak askanam, ci digg Israyil.

18

Ay yelleef ñeel na Leween ñi ak sarxalkat yi

¹ Leween ñiy ay sarxalkat, ba ci giirug Leween gépp nag, wenn wàll mbaa céru suuf ñeelu leen ci seen bokki Israyil. Saraxi sawara yu Aji Sax ji, akub céram, moom lañuy dunde. ² Ab cér du leen ñeel ci seen biiri bokk. Aji Sax ji mooy seenub cér, na mu leen ko waxe woon. ³ Lii mooy li lew sarxalkat yi, te bàyyikoo ci askan wi, ci ñiy rendi ay sarax, muy aw nag, di ab gàtt: nañu jox sarxalkat bi, mbaag mi ak lex yi, ak mbàq gi. ⁴ Te seen pepp mu jékka ñor, ak seen biñ bu bees, ak seen diw gu bees, ak kawar gi ngeen jékka wate ca seeni xar, joxleen ko ko, ⁵ ndax seen Yàlla Aji Sax ji moo ko taamu, ci seen mboolemi giir, ngir mu taxaw, di liggéey ci turu Aji Sax ji, moom ak askanam, ba fàww.

⁶ Ab Leween bu dèkke benn ci seeni dèkk, ak fu mu mana doon ci Israyil, su fa jógee dem ci coobarey boppam, bérab bu Aji Sax ji taamu, ⁷ da fay liggéey ci turu Yàllaam Aji Sax ji ni mboolem bokki Leweenam, ña fa taxawe fa kanam Aji Sax ji, ⁸ njël lu yemook njëlal ña mu fa fekk it lew na ko, te limaalesul lu ko dikke ci njaayum alalu baayam.

Kàddug waxyu day sotti

⁹ Bu ngeen demee ca réew ma leen seen Yàlla Aji Sax ji di jox, buleen roy jéf ju jomblu ju xeet yooyu. ¹⁰ Bu kenn fekk ci seen biir kuy sarxe doomam ju góor, ak ju jigéen, lakk ko; ak kuy luxus, ak kuy seet, ak kuy gisaane, ak kuy xèrèm, ¹¹ ak kuy liggéeyaate, ak kuy seete ab rawaan, ak kuy seete aw rab, mbaa kuy seete nit ñu dee, ¹² ndax mboolem ñiy def yooyu, Aji Sax ji seexlu na leen. Jéf ju seexluwu jooju moo waral seen Yàlla Aji Sax ji di leen dàqal seeni boroom.

¹³ Mucclen sikk seen digganteek seen Yàlla Aji Sax ji, ¹⁴ ndax xeet yooyii ngeen di dàqi kat, ay luxuskat aki seetkat lañuy déggal, waaye yeen seen Yàlla Aji Sax ji mayu leen loolu. ¹⁵ Ab yonent bu soqikoo ci yeen kay, di seen mbokk ni man, moom la leen seen Yàlla Aji Sax ji di feenlalal. Moom ngeen di déggal. ¹⁶ Mooy noonee

ngéen ko sàkkoo woon rekk, ci seen Yàlla Aji Sax ji ca tundu Oreb, ca bésuub ndaje ma, ngeen ne: «Rikk bunu déggati sunu baatu Yàlla Aji Sax ji. Sawara wu réy wii it, bunu ko gisati, lu ko moy nu dee,» ¹⁷ te Aji Sax ji ne ma: «Noo yey wax loolu. ¹⁸ Ab yonent laa leen di feenlalal ci seen biiri bokk, ni yaw. Maay yeb samay kàddu ci gémmiñam, mu àgge leen mboolem lu ma ko sant. ¹⁹ Su boobaa ku déggalul sama kàddu yi muy wax ci sama tur, man maa ko koy topp. ²⁰ Waaye déy yonent bu am fitu àddu genn kàddu ci sama tur, te santuma ko mu wax ko, mbaa mu wax ci turi yeneen yàlla, boobu yonent, dee mooy àtteem.»

²¹ Dingen wax ci seen xel, ne: «Ana nu nuy ràññee kàddu gu Aji Sax ji waxul?»

²² La yonent bi wax ci turu Aji Sax ji, su sottiwul, dikkul rekk, loola du kàddu gu Aji Sax ji wax. Neme Yàlla la ko yonent ba waxe, buleen ko ragal.

19

Ber dèkki rawtu ndigal la

¹ Gannaaw bu leen seen Yàlla Aji Sax ji wollilee xeet yi mu leen di jox seenum réew, ngeen dàq leen, ba dèkke seeni dèkk ak seeni kër, ² ñetti dèkk yu mag ngeen di ber ca biir réew mooma leen seen Yàlla Aji Sax ji jox, ngir ngeen jagoo ko. ³ Ngeen waajal nag yoon wu jëm ci dèkk bu ci nekk, te ngeen séddale ñetti pàcc réew mooma leen seen Yàlla Aji Sax ji sédd, ngir képp ku rey nit, man caa làquji.

⁴ Mbirum ki rey nit te di fa làquji ba muccl, nii lay tédde: day fekk mu rey moroomam te du teyeebam, waaye bañu ko woon démb ak bèkk-démb. ⁵ Mu mel ni ku ànd ak moroomam ca gott ba, di gor matt. Mu doon xàcci sémmiñam di gor, weñ ga fettaxe ca njàppu la, dal ca moroom ma, mu dee. Kooku day làquji ci dèkk yooyu benn, ba muccl. ⁶ Toppkatu bakkan ba nag warul mana dabi ci biir xolam bu tàng, ki rey, ba rey ko ngir sorewaayu yoon wa jëm ca dèkkub rawtu ba, te àtteb yoon reyluwu ko, gannaaw fekkul woon mu bañ ka mu rey, démb ak bèkk-démb. ⁷ Looloo waral ma sant leen, ne leen ñetti dèkki rawtu ngeen di ber.

⁸ Bu seen Yàlla Aji Sax ji yaatalee seen suuf, na mu ko giñale woon seeni maam nag, ba jox leen mboolem réew ma mu dige woon ne dina ko jox seeni maam, ⁹ ndegam sàmm ngeen mboolem santaane bii ma leen dénk tey, ngir di ko jéfe, ngir sopp seen Yàlla Aji Sax ji, di awe ay yoonam bés bu nekk, su boobaa nangeen yokkaat ñetti dèkk yu mag, mu dolliku ci ñetti dèkk yi ngeen jékka ber. ¹⁰ Su ko

defee deesul tuur deretu jaambur bu deful dara ci suufas réew, mi leen seen Yàlla Aji Sax ji sédd, ba àqu deret di leen topp.

¹¹ Su fekke ne nit ki dafa bañ moroomam, su ko tëroo, dal ci kawam, ba fàdd ko, mu dee, su làqujee ci dëkk yooyu benn, ¹² su boobaa na magi dëkkam yeble, ñu jële ko foofa, teg ko ci loxol toppkatu bakkan ba, ngir mu dee. ¹³ Buleen ko xool bētu yërmande. Noonu ngeen di dindee ci Israyil, àqu deretu jaambur bu deful dara, ndax ngeen baaxle.

Lu jëm ci kemu suuf ak limu seede cib àtte

¹⁴ Te it buleen toxal seen yemukaayu suufas moroom yu maam ya yemalee woon ci seen biir céru suuf ba ngeen jagoo, ca réew ma leen seen Yàlla Aji Sax ji di moomale.

¹⁵ Bennub seede nag du taxaw, di tuumaal kenn, ci genn tooñ mbaa bàkkaar, ak bépp bàkkaar bu mu mana bàkkaar. Ci kaw kàddug ñaari seede mbaa ñett la mbir ma di wére.

¹⁶ Su ab seede safaan taxawee, tuumaal kenn, ne moo lajj yoon, ¹⁷ na ñaari nit, ña séq mbir ma taxawi fa kanam Aji Sax ji, fa kanam sarxalkat ya, ak àttekat ya ca yooyu jant. ¹⁸ Su ko defee àttekat yi seet bu baax, ba mu wér ne seede ba kat, seede soskat la buy seedeel mbokkam aw sos, ¹⁹ te ngeen def ak moom, la mu naroonna yóbbe ka mu sosal. Noonu ngeen di tenqee lu bon ci seen biir. ²⁰ Ñi ci des dinañu ko dégg, te dinañu ragal ba duñu defati lu bon lu ni mel ci seen biir. ²¹ Buleen ci xool bētu yërmande. Bakkan, bakkan a koy fey; bêt, bêt; bëñ, bëñ; loxo, loxo; tànk, tànk.

20

Yoon wi sàrtal na mbirum xare

¹ Bu ngeen demee ngir xarejeek seeni noon ba gis ay fas, aki watiir, ak gàngoor gu leen épp, buleen leen ragal, ndax seen Yàlla Aji Sax jaa ngeek yeen, ki leen jële woon réewum Misra. ² Bu ngeen di waaja xare, na sarxalkat bi dikk, wax ak mbooloo mi, ³ ne leen: «Éey Israyil, dégluleen, yeena ngi waaja xareek seeni noon tey jii. Buleen yox-yoxi, buleen ragal, buleen tiit, buleen teqlikook seen sago ci seen kanam! ⁴ Ndaxte seen Yàlla Aji Sax ji mooy kiy dox ànd ak yeen, xeexal leen ak seeni noon, ngir may leen ndam.»

⁵ Su ko defee kilifay xarekat yi wax ak gàngoor gi, ne leen: «Ana góor gu ci tabaxoon néeg bu bees te daloo gu ko? Na daldi dellu cab néegam bala moo dee ci xare bi, geneen góor daloo ko. ⁶ Ana góor gu ci jëmbatoon tóokéru reseñ te

jariñoogu ko? Na daldi ñibbi bala moo dee ci xare bi, geneen góor jariño ko. ⁷ Ana ku ci ngoroom dëgëroon te jëlagul? Na daldi ñibbi bala moo dee ci xare bi, geneen góor jël ko.» ⁸ Gannaaw loolu, na kilifa yi dellu wax ak gàngoor gi, ne leen: «Ana ku ci ragal, ana ku ciy yox-yoxi? Na daldi ñibbi kat, bala moo yoqiloo ay moroomam, ni moom.» ⁹ Bu kilifay xare ya waxeek gàngoor gi ba noppi, nañu tabb ay njiiti kurel, ñu jiite gàngoor gi.

¹⁰ Bu ngeen dikkee ba jub ab dëkk, ngir xareek ñoom, jëkkleen leena woo ci jamm. ¹¹ Ndegam jamm lañu leen wuyoo, ba ubbil leen, mboolem askan wa mu fekk ca biir dëkk ba dañuy tegoo liggéeyu sañul-bañ, ñeel leen, di leen jaamu. ¹² Waaye bu ñu jammoo wul ak yeen, xanaa di xareek yeen, gawleen dëkk ba. ¹³ Seen Yàlla Aji Sax ji moo leen di teg ci seen loxo, ngeen daldi leel ñawkay saamar mboolem seeni góor. ¹⁴ Waaye jigéen ñi ak tuut-tànk yi, ak jur gi, ak mboolem lu ne ca biir dëkk ba, mboolem alal ja, sëxëtooleen, jagoo. Lekkleen alal ji ngeen foqatee ci seen noon, yi leen seen Yàlla Aji Sax ji jébbal.

¹⁵ Noonu ngeen di def ak dëkk yi soreek yeen lool te bokkuñu ci dëkki xeet yii ngeen jëm. ¹⁶ Dëkki xeet yii leen seen Yàlla Aji Sax ji sédd nag, buleen ci bàyyi lenn luy noyyi, mu dund. ¹⁷ Nangeen faagaagal Etteen ñi ak Amoreen ñi ak Kanaaneen ñi ak Periseen ñi ak Eween ñi ak Yebuseen ñi, na leen ko seen Yàlla Aji Sax ji sante woon, ¹⁸ ndax ñu bañ leena royloo, ngir ngeen di jëfe seen mboolem yu jomblu yi ñuy defal seeni tuur, ba ngeen moy seen Yàlla Aji Sax ji.

¹⁹ Bu ngeen gawee lu yàgg ab dëkk, ngir song leen xare, ba nangu ko, buleen foom ay garabam, di ca gor lenn te mana lekk ca doom ya. Kon nag garab, buleen ko gor. Garab du nit ba ñu di ko def ni ku ñu gaw. ²⁰ Terewul garab gu ngeen xam ne deesul lekk doom ya, gorleen ko, daaneel, te ngeen sàkke ko ab gawukaay bu wér dëkk biy xareek yeen, ba keroog dëkk bay daanu.

21

Njotlaay war na ci bóomkat bu umpe

¹ Su dee dañoo fekk ku ñu bóom ci biir réew mi leen seen Yàlla Aji Sax ji moomale, mu tédd ci àll bi, te xameesul ku ko rey, ² na seeni mag ak seeni àttekat dem, natti diggante fa néew ba tédd, ak dëkk ya ko séq. ³ Su ko defee dëkk ba gëna jegewook néew ba, magi dëkk booba tannée ca nag wu jigéen wu ñu masula liggéeyloo, te maseesu koo ràng. ⁴ Na magi dëkk boobu

wommat nag wi ba ci xur wu wal ma dul ñiise, te maseesu cee bey, maseesu cee ji. Ñu daldi damm loosu nag wu jigéen wi foofa ca wal ma.

⁵ Su ko defee sarxalkat yi, Leween ñi dikk, ndax ñoom la seen Yàlla Aji Sax ji taamu, ngir ñu di ko liggéeyal, di barkeele ciw turam, te ci seen kaw kàddu lees di àttee bépp jote, ak gépp loraange ci wàllu yaram. ⁶ Dëkk boobu gëna jegewook fa néew ba tèdd, na mboolem seeni mag raxas seeni loxo, tiimale ca nag wu jigéen wa ñu damm loos wa, ca wal ma. ⁷ Ñu biral ne: «Nun déy sunuy loxo tuurul deretu nit kii, te sunuy gët it gisul ba ñi koy tuur. ⁸ Ngalla Aji Sax ji, jéggalal Israyil, sa ñoñ ñi nga jot, te baña toppe àqu deretu jaambur bu deful dara, fi digg Israyil sa ñoñ.» Su ko defee njéggal ñeel leen, ca deretu nit ka. ⁹ Yeen nag, noonu ngeen di tenqee ci seen biir, àqu deretu jaambur ju ñu tuur, ndax kon def ngeen li Aji Sax ji rafetlu.

Ay sàrt a ngi ci wàllu njaboot

¹⁰ Bu ngeen xarejeek seeni noon, te seen Yàlla Aji Sax ji teg leen ci seeni loxo, ba ngeen jàpp leen njaam, ¹¹ su ngeen gisee ca jaam yu jigéen ya, ku rafet ku ngeen xédd, te bëgg koo jël jabar, ¹² yóbbuleen ko seen biir néeg, mu watu nel, dagg ay wewam, ¹³ summi yére ya ñu ko jàppe njaam, te toog seen biir néeg. Day tiislu nag ndeyam ak baayam lu mat weeru lémm. Gannaaw loolu ngeen dëkkoo ko, di jëkkëram, muy seen jabar. ¹⁴ Bu loolu amee ba neexatu leen, bàyyileen ko, mu dem fu ko neex, waaye buleen ko jaay mukd, di ko weccikoo xaaalis. Buleen ko jaamloo it, gannaaw bu ngeen ko jabaroo ba noppi.

¹⁵ Ku am ñaari jabar, su xejjoo kenn ki, foñ ki ci des, te ki mu xejjoo, ak ki mu foñ jural koy doomu yu góor, te taaw bu góor bi di doomu ki mu foñ, ¹⁶ bés buy séddale doomam yu góor alalam, du saña jox doomu xejj bi, cér bi taaw yelloo, wacc doomu ka mu foñ, te muy taaw. ¹⁷ Taaw bay doomu ka mu foñ, na ko nangul ab céram, jox ko ñaar-cay cérú rakk ja, ci mboolem alalam, ndax kooka soqikoo ci digg dooleem, mooy ka yelloo cérú taaw.

¹⁸ Ku am doom ju góor ju dëgër bopp te tè; déggalul baay, déggalul ndey, su ñu ko yaree, te taxul mu déggal leen, ¹⁹ na ko baayam ak ndeyam jàpp, yóbbu ba ca seen magi dëkk ba, ca seen bunt dëkk. ²⁰ Ñu wax seen magi dëkk ba, ne leen: «Sunu doom jii ku dëgër bopp la te tè. Déggalu nu, xanaa di xawaareek a màndi rekk.» ²¹ Na ko góori dëkk bépp dóori doj ba mu

dee. Noonu ngeen di tenqee lu bon ci seen biir. Israyil gépp a koy dëgg, daldi ragal.

Deesul wékk nit, fanaanal ko

²² Su nit moyee ba dee di àtteem, ñu rey ko, wékk ko ci garab, ²³ bu néewam fanaan ca garab ga, nañu ko daldi rob ca bés ba, ndax ki wékke alkandey Yàlla la. Buleen sobeel réew mi leen seen Yàlla Aji Sax sédd.

22

Yoon wi sàrtal na dundin wu jekk

¹ Buleen gis seen nagu mbokk mbaa gàttam bu réer, ba jàpp ci seen njaambur. Fexeleen koo waññi, ba delloo ko seen mbokk ma. ² Su mbokk mi jegewoowul ak yeen, mbaa xamuleen ko, yóbbuleen jur gi seen kër, mu des fa, ba mbokk mi dikk, di ko seet, ngeen delloo ko ko. ³ Noonu ngeen di def, su dee mbaam, noonu ngeen di def su dee mbubb, noonu it ngeen di def, ak mboolem lu seen mbokk réerle, ba ngeen gis ko. Dungeen ci mana jàpp seen njaambur.

⁴ Buleen gis seen mbaamu mbokk, mbaa nagam wu daanu ciw yoon, ba ngeen jàpp ci seen njaambur. Fexeleen ba yékkatile ko ko.

⁵ Bu lenn ci mboolem yéfi góor, tegu ci kaw ku jigéen, te bu góor sol yérey jigéen, ndax Aji Sax ji seen Yàlla seexlu na képp kuy def yooyu.

⁶ Bu ngeen doxee ba yem ci tàggum picc ci seenu yoon, mu nekk ci garab gu mu mana doon, mbaa ci suuf, cuuj ya mbaa nen ya nekk ca, te yaay ja bóof ca kaw cuuj ya, mbaa nen ya, buleen boole jël yaay ja ak cuuj ya. ⁷ Fexeleen ba bàyyi yaay ja, te jël cuuj ya, ndax ngeen baaxle te gudd fan.

⁸ Su ngeen dee tabax kër gu bees, sàkkalleen seen kawum taax, ab feguwaay, bala caa nit a daano, àqu deret topp seen kër.

⁹ Buleen ji ci seen toókëru reseñ, weneen wirgo, lu ko moy lépp ay doon cérú sellnga bu ngeen dul saña jariño: li jóge ci jiwu mi rax reseñ ji, ak itam meññeefum reseñ ji. ¹⁰ Buleen rāngandoo nag ak mbaam, di leen rijjiloo.

¹¹ Buleen sol ndimol njaxas lu ñu raxe kawaru gàtt ak wëñu lée.

¹² Ay cimbir-cimbir nag ngeen di def ci ñeenti weti malaanum sàngukaay mu ngeen di sàngoo.

Sàmmonteleen ak àqu jigéen

¹³ Ku jël jabar, dëkkoo ko, ba noppi jéppi ko, ¹⁴ di ko tuumaal, di teg lu ñaaw ci deram, naan: «Ndaw sii ma jël, ba ma àggee ci moom, fekkuma ko janq.» ¹⁵ su boobaa na baayu ndaw si ak ndeyam, jël firndey ndaw la, yóbbu ko ba ca kanam magi dëkk ba, ca bunt dëkk ba. ¹⁶ Su ko

defee baayu ndaw si ne mag ñi: «Sama doom laa mayoon waa jii jabar; mu walbatiku jéppi ko. ¹⁷ Mu ngii di ko tuumaal, naan: “Fekkuma sa doom jii janq.” Te sama ndawal doom a ngii!» Nañu tallal malaan ma ca kanam magi dëkk ba. ¹⁸ Su lolu amee, na magi dëkk booba jàpp waa ji, yar ko. ¹⁹ Nañu ko daan téeméeri donji xalis, jox ko baayu ndaw si, ndax moo yàq deru janqub Israyil. Jabaram lay doon ba tey, te du ko saña wacc giiru dundam.

²⁰ Waaye su tuuma ji dee dëgg, te giseesul lenn ndaw ca ndaw sa, ²¹ nañu yóbbu ndaw sa ba ca bunt kër baayam, te góori dëkk bi dóor koy doj ba mu dee, ndax moo def jéf ju gâccelu ci digg Israyil, di gänctoo kër baayam. Noonu ngeen di tenqee lu bon ci seen biir.

²² Bu ñu fekke kuy tédde ku am jëkkër; ka ko tédde ak ka ñu tédde, dee mooy seen àtte, ñoom ñaar ñépp, ngeen tenqee ko lu bon ci Israyil.

²³ Su ab janq digoo ak waayam ab séy, gannaaw gi keneen dajeek moom ci biir dëkk bi, tédde ko, ²⁴ gënneleen leen ñoom ñaar, ba ca bunt dëkk booba, ngeen dóor leen ay doj ba ñu dee, ndax ndaw si moo yuuxuwul woon wall, te muy ca biir dëkk ba, te waa ji it moo jabaroo jabaru moroomu góoram. Noonu ngeen di tenqee lu bon ci seen biir.

²⁵ Su fekke ne ci àll bi la waa ji dajeek ndaw, si digook keneen ab séy, mu jàpp ko, tédde ko, nag, waa ji ko tédde donj la dee di àtteem. ²⁶ Waaye ndaw si deesu ko def dara. Bàkkaar bu dee di àtteem toppu ko ca, ndax ni ku song moroomam, bóom ko rekk, ni la mbir moomu deme, ²⁷ nde biir àll ba mu dajeek ndaw sa, bu ndaw sa yuuxu woon it, du am ku ko wallu.

²⁸ Ku dajeek as ndaw, te mu dib janq bu digoowul ak keneen ab séy, su ko jàppee, tédde ko, ba ñu gis leen, ²⁹ kooka tédde ndaw sa, day jox baayu ndaw sa juróom fukki donji xalis. Jabaram lay doon it, gannaaw moo ko jabaroo, te du ko saña fase, giiru dundam.

23

¹ Bu kenn jël jabaru baayam, di teddadil lala baayam.

Am na ñu dul bokk ci ndajem Aji Sax ji

² Ku ñu mor mbaa ñu dagg ngóoraam, du bokk ci ndajem gëmkati Aji Sax ji. ³ Ku dul doomu yoon du bokk ci ndajem gëmkati Aji Sax ji. Ku askanoo ci moom it, ba ca fukkeelu maas ga, du bokk ci ndajem gëmkati Aji Sax ji. ⁴ Ab Amoneen

mbaa ab Mowabeen du bokk ci ndajem gëmkati Aji Sax ji. Ku askanoo ci ñoom it, ba ca fukkeelu maas ga, du bokk ci ndajem gëmkati Aji Sax ji mukk, ⁵ ndax la ñu leen dabewul woon aw ñam, mbaa am ndox, ca yoon wa, ba ngeen gënnee Misra, xanaa di fey Balaam doomu Bewor ma bokk Petor ca Aram Naarim, ngir mu sàbbi leen. ⁶ Waaye seen Yàlla Aji Sax ji moo nanguwula déglu Balaam; kàddug yàqe ga la leen seen Yàlla Aji Sax ji soppil barke, ndax seen Yàlla Aji Sax ji da leena sopp. ⁷ Buleen sàkku mukk jàmmu ñoofu mbaa seen njariif, seen giiru dund, ba fàww.

⁸ Buleen bañ ab Edomeen, ndax seen mbokk la. Buleen bañ nitu Misra, ndax ay doxandéem ngeen woon ca seenum réew. ⁹ Ñi soqikoo ci ñaari xeet yooyii, ca ñetteelu maas ga, te di seeni sètaat* nag, sañ nañoo bokk ci ndajem gëmkati Aji Sax ji.

¹⁰ Bu ngeen gënnee ba fàkk ab dal, ngir jänkoonte ak seeni noon, nangeen sàmму ci lépp lu aay. ¹¹ Su amee ci seen biir ku setul, ndax géntu guddi gu ko dikkal, na génn dal bi, ca biti, te bumu duggaat ci biir dal bi. ¹² Bu ngoon di jubsu na sangu, ba jant bi so, mu doora délsi ci biir dal bi. ¹³ Te sàkkleen bérab bu génn dal bi, ngeen di fa dem, di suturluji. ¹⁴ Na ngaska bokk ci seeni fàgguwaay, ndax su ngeen suturlujee ca biti ba noppi, moom ngeen di gase, ba suul seeni jonkan. ¹⁵ Ndax seen Yàlla Aji Sax ji mooy dem ak a dikki ci seen biir dal bi, ngir xettli leen, ba jébbal leen seeni noon. Kon nag seenub dal daa wara sell, ngir Aji Sax ji ñàkka gis fi seen biir, lenn lu teggnewul, ba dëddu leen.

¹⁶ Gannaaw lolu buleen delloo ab jaam bu làqu ci yeen, te réece ci ab sangam. ¹⁷ Ci yeen lay toog, ci seen biir, bérab ba mu taamu, ci benn bi ko génal ci seeni dëkk, te buleen ko néewal doole.

¹⁸ Gànc bu jigéeni buy gänctul ay tuur, bumu am ci biir jigéeni Israyil, te ganc bu góor buy gänctul ay tuur†, bumu am ci góori Israyil. ¹⁹ Buleen indi mukk ci seen biir kër Yàlla Aji Sax ji, peyooru ganc bu jigéen, mbaa bu góor, ngir wépp xas wu ngeen namma wàccoo googu peyoor, ndax yooyu jaar yépp, seen Yàlla Aji Sax ji seexlu na ko.

Deesul topp bànni Israyil ab tegandaay

²⁰ Buleen teg seen mbokkom bànni Israyil tegandaayal xalis, mbaa tegandaayal ñam, mbaa tegandaayal mboolem bor bu tegandaay tege. ²¹ Ab doxandéem,

* 23:9 23.9 Mooy ñetteelu maasug xeet yooyu taamoo dëkke réewum Israyil. Seetal ci *Mandij ma* 12.1-15. † 23:18 23.18 Googu gänctu, jaamukati tuur ya ca Kanaan daan nañu ko jéfe, ngir yaakaar ne dina tax seenum njur, ak seeni tool nangu.

sañ ngeen koo sàkku tegandaay, waaye seen mbokkmò bànni Israyil, buleen ko sàkku tegandaay. Su ko defee seen Yàlla Aji Sax ji mooy barkeel mboolem seenu ñaq, ca réew ma ngeen jëm, ngir nanguiji ko.

Wàccook aw xas wartéef la

²² Su ngeen xasalee seen Yàlla Aji Sax ji, aw xas, buleen ko yeexa wàccool, ndax kon seen Yàlla Aji Sax ji du leen ko ñàkka topp, te kon may seen bàkkaar. ²³ Waaye baña xas, amul bàkkaar. ²⁴ Li seen làmmiñ tudd, sàmmooleen koo jëfe na ngeen ko xasale woon seen Yàlla Aji Sax ji, ci seen sagoy bopp, ak seen kàddug bopp.

Raasaatu mu suur boroom lew na

²⁵ Bu ngeen duggee ci seen tóokëru reseñu moroom, lekklee ca reseñ ja lu leen neex ba suur, waaye seen ndab, buleen ko ca yeb. ²⁶ Bu ngeen duggee ci seen toolu peppu moroom, fekk mu ñor, sàkkeleen seen loxo ca gub ya, waaye ab sàrt, buleen ko xàccil seen peppu moroom.

24

Yoon wi sàrtal na pase ak séyaat

¹ Ku jël jabar, ba gannaaw gi xoolatu ko bëtü yiw, ndax lu tegginewul lu mu ko gisal, su ko bindalee kayitu pase, teg ko ci loxoom, ba yiwi ko, mu jóge këram, ² su jóge ca kër ga, dem ba mujj doon jabaru keneen, ³ su ko jëkkëram ju mujj jooju jéppée, bindal ko kayitu pase, teg ko ci loxoom, ba yiwi ko, mu jóge këram, mbaa su jëkkëram jooju ko mujja jël faatoo, ⁴ su boobaa jëkkëram ju jëkk ja ko yiwi woon du ko saña jëlaat jabar, gannaaw ba ndaw sa sobewoo noonu, ndax loolu lu jomblu la fi kanam Aji Sax ji, te waruleena indi bàkkaar ci biir réew mi leen seen Yàlla Aji Sax ji di moomale.

⁵ Ku jël ab séet du bokk ci gàngoor gu jëm xare, te deesu ko sas lenn. Day moom boppam atum lëmm, ngir toog këram, di bégal jabaram ji mu jël.

Yoon wi aar na néew-ji-doole

⁶ Buleen tayleloo kenn ñaari doji wolukaayam, ci bor bu mu leen ameel. Buleen ko tayleloo wenn doj wa féete kaw sax, ndax kon bakkanam ngeen def ub tayle.

⁷ Su amee nit ku ñu fekke kenn ciy bokkam, lu mu sàcce ci bànni Israyil, mu di ko jaamloo, mbaa mu jaay ko, su boobaa dee mooy àtteb kooka ko sàcc. Noonu ngeen di tenqee lu bon ci seen biir.

⁸ Fexeleen ba ci biir mbasum jàngoroy der juy màgg, ngeen di sàmmoo jëfe

bu baax, mboolem lu leen sarxalkat yi, Leween ñi tegtal. Ni ma ko sante sarxalkat yi, Leween ñi, sàmmooleen koo jëfe noonu. ⁹ Fàttlikuleen la seen Yàlla Aji Sax ji defoon Maryaama ca yoon wa, ba ngeen géenne Misra*.

¹⁰ Bu ngeen lebaalee seen moroom, ak lu bor ba mana doon, buleen dugg biir néegam, di fa jël ab tayleem. ¹¹ Ca biti ngeen di taxaw, ka ngeen di lebal yótsi leen ab tayleem ca biti. ¹² Su dee ku néew doole, buleen téraale ab tayleem. ¹³ Fexeleen ba delloo ko tayle ba bu jant biy so, ba mu téraale mbubbum tayle ma, sante leen ko, mu dig njekk, fa seen kanam Yàlla Aji Sax ji.

¹⁴ Buleen gàddu àqu liggéeykat, baadoolo bu néew doole ci seen biiri bokk, mbaa ci seen dëkkandoo yiy doxandéem ci seen dëkk yi ci réew mi. ¹⁵ Ci bés bi ngeen koy fey peyooram. Bu ko jant sowe, ndax néew doole la te moom la yaakaara dunde. Lu ko moy mu boole leen ak Aji Sax ji, ngeen gàddu bàkkaar.

¹⁶ Deesul teg waajur àtteb dee, ngir weccikoo ko doom ja, te doom it deesu ko teg àtteb dee, weccikoo ko waajur wa. Nit ku nekk, bàkkaaruu boppam lees koy tege àtteb dee.

¹⁷ Buleen xañ dëgg ab doxandéem akub jirim, te buleen taylelu mbubbum jëtun. ¹⁸ Fàttlikuleen ne ay jaam ngeen woon ca Misra, seen Yàlla Aji Sax ji moo leen fa jote. Looloo waral man, ma sant leen ngeen jëfe ndigal loolu.

¹⁹ Bu ngeen di goób seenub tool, ba fàtte ab séq ca tool ba, buleen dellu di ko jëli. Ab doxandéem akub jirim akub jëtun, ñoom la poraat may ñeel, su ko defee seen Yàlla Aji Sax ji barkeel leen ci mboolem seenu ñaq. ²⁰ Bu ngeen bàccee seen garabu oliw ba noppi, buleen toppaat car ya, di witt lu ca des. Ab doxandéem akub jirim akub jëtun, ñoom la ndesit way ñeel. ²¹ Bu ngeen wittée seen tóokëru reseñ, buleen dellu, di ko wittaat. Ab doxandéem akub jirim akub jëtun ñoom la wittaat may ñeel. ²² Fàttlikuleen ne ay jaam ngeen woon ca réewum Misra. Looloo waral man, ma sant leen ngeen jëfe ndigal loolu.

25

Njub ak yërmande wartéef la

¹ Su ab jote amee diggante ay nit, nañu dem ca èttub àttekaay ba, ñu àtte leen, ba ki am dëgg, ñu jox ko dëgg, ki tooñ, ñu teg ko tooñ. ² Su dee ay dóor la ki tooñ yellow, na ko àttekat bi téral, ñu dóor ko ci kanamam, limu yar ba yemook tooñam. ³ Waaye ñeent fukki yar, bu ñu ko dóor lu

* 24:9 24.9 Seetal ci *Màndiñ* ma 12.10.

ko ëpp, ndax dóor ko lu ëpp loolu, torxal seen mbokk ci seen kanam lay doon.

⁴ Buleen sunjuñ gémmiñu nag, te fekk koy bojj am pepp.

Donn sa jabaru mbokk wartéef la

⁵ Bu ay góor yu bokk waajur dëkke, kenn ci ñoom dee te bàyyiwul doom ju góor, jabaru ki dee du génn, di séy akub jaambur. Jëkkëru donaleem ju bokk ak jëkkëram moo ko wara jël, donloo ko. ⁶ Su ko defee bu ca ndaw sa taawloo góor, taaw ba saxal turu mbokkam ma dee, ba turam du fey ci biir Israyil. ⁷ Su waa ji buggula jël jabaru donaleem jooju, na ndaw sa dem ba ca mag ña ca bunt dëkk ba, ne leen: «Sama jëkkëru donaleem jii moo baña saxal turu mbokkam ci Israyil. Moo ma buggula donloo.» ⁸ Bu loolu amee na ko magi dëkkam woolu, wax ak moom. Su waa ji dëggëree, ne buggu koo jël, ⁹ na ko jabaru donaleem ja fekki ca kanam mag ña, daldi summi benn caraxu waa ji ba noppi, tifi waa ji ci kanam, ne ko: «Nii lees di def ku dul sampal mbokkam kër.» ¹⁰ Su boobaa tur wa ñuy dippee waa kër waa ja ci digg Israyil, di «Kërug summi carax.»

Am na jëf ju aay ci sot

¹¹ Su ay góor dee jàppante, ba jabaru kenn ki dikk, di sotle jëkkëram; bu jàppee ca ngóoray kay jàppanteek jëkkër ja, ¹² dogleen loxol ndaw sa te buleen ko ñeeblu.

Ab nattukaay day mat

¹³ Buleen denc ci seen mbuus doju màndaxekaay ak moroom ma, te bii diis, bi ci des woyof. ¹⁴ Buleen denc seen kër nattukaayu sol-sotti ak moroom ma, bii réy, bi ci des tuut. ¹⁵ Doju màndaxekaay bu mat te dëggu ngeen wara am, te nattukaayu sol-sotti bu mat te dëggu ngeen wara am, ndax ngeen gudd fan ca réew ma leen seen Yàlla Aji Sax ji di jox. ¹⁶ Seen Yàlla Aji Sax ji kat seexlu na képp kuy def yoyyii, képp kuy def ug njuban.

Mbugal Amaleg ndigal la

¹⁷ Fàttlikuleen la leen Amalegeen ña de-foon ca yoon wa, ba ngeen génnee Misra: ¹⁸ ñoo leen dab ci yoon wi, songe leen gannaaw, fàdd mboolem ña mujje woon, fekk ngeen sonn, loof, te ragaluñ ci sax Yàlla. ¹⁹ Bu ngeen demee ba seen Yàlla Aji Sax ji noppal leen ci mboolem seen noon yi séq réew, mi mu leen sédd, ngir ngeen nangu ko, nangeen far mboolem lu ñu doon fàttlikoo Amalegeen ñi fu asamaan tiim. Buleen ko fàtte.

26

Njotlaayal Aji Sax ji laaj na ab galag

¹ Gannaaw loolu, bu ngeen demee ca réew ma leen seen Yàlla Aji Sax ji sédd, ba ngeen nangu ko, dëkke, ² na ku nekk ci yeen sàkk ca ndoortel mboolem meññeefum suuf mu mu jële ca seen réew, ma leen seen Yàlla Aji Sax ji di jox, mu def ko ci pañe, yóbbu ca bérab ba seen Yàlla Aji Sax ji taamoo dèèl turam èllég. ³ Na àgg ca sarxalkat ba fa nekk ci yooyu jant, ne ko: «Maa biral tey jii fi sa kanam Yàlla Aji Sax ji, ne agsi naa ci réew mi Aji Sax ji giñaloon samay maam, ne moom la may jox.» ⁴ Na sarxalkat bi nangoo pañe bi ci loxoom, taaj ko fi seen kanam sarxalukaayu Yàlla Aji Sax ji. ⁵ Mu dellu nag wax fi seen kanam Yàlla Aji Sax ji, ne: «Sama maam ab Arameen buy mangan la woon. Mu dem Misra, sance fa mbooloo su néew, te mujj di askan wu réy, am doole te bare. ⁶ Waa Misra nag soxore nu, mitital nu, yen nu liggéey bu diis. ⁷ Ba loolu amee nu yuuxu, woo sunu Yàllay maam Aji Sax ji wall, Aji Sax ji dégg nu, gis sunu mitit, ak sunu coono, ak sunu notaange. ⁸ Aji Sax ji nag génne nu Misra ci dooley loxoom ak kàttanam, ci biir musiba mu réy, aki firnde, aki kéemaan. ⁹ Ba loolu wéyee mu indi nu fi bérab bii, jox nu réew mii, réew mu meew meek lem ji tuuroo. ¹⁰ Moo ma taxa indi nii ndoortel meññeefum suuf, si nga ma jox, Aji Sax ji.» Su ko defee mu taaj pañe bi fi seen kanam Yàlla Aji Sax ji, daldi sujjóot fi seen kanam Yàlla Aji Sax ji. ¹¹ Mu bége nag, moom ak Leween ñeek doxandéem yi dëkk ci seen biir, mboolem lu baax li ko seen Yàlla Aji Sax ji jox, moom ak waa kër am.

¹² Gannaaw bu ngeen génnee mboolem cérú fukkeelub meññeef, ci atum ñetteel, yemook atum génne cérub fukkeel, gannaaw ñaari at yu nekk, nangeen ko jox Leween ñi ak doxandéem yi ak jirim yi ak jëtun ñi, ngir ñu lekk ba regg, fa ñu féete ca seeni dëkk, ¹³ te na ku nekk ci yeen wax fi seen kanam Yàlla Aji Sax ji, ne: «Jële naa sama kër cérú sellnga bi, ba jox ko Leween ñeek doxandéem yeek jirim yeek jëtun yi, noonee mu dëppook sa santaane bi nga nu dénk. Moyuma lenn ci say santaane, te fàttewuma ci lenn. ¹⁴ Lekkuma ci dara ci biir ab dëj, jëlewuma ci dara te fekk ma sobewu, te it sarxaluma ci dara ku dee. Sama kàddug Yàlla Aji Sax ji laa topp, noonee nga ma ko sante woon. ¹⁵ Ngalla geesool fa sa dëkkuwaayu sellnga, fa asamaan, te nga barkeel Israyil, sa ñoñ, barkeel suuf si nga nu jox, noonee nga ko giñale woon sunuy maam, réew mu meew meek lem ji tuuroo.»

Köllère feddliku na

¹⁶ Bésub tey jii seen Yàlla Aji Sax ji moo leen sant ngeen jéfe dogal yii, ak àttey yoon yi. Sàmmooleen koo jéfe seen léppi xol, ak seen léppi bakkan. ¹⁷ Aji Sax ji ngeen biral bésub tey, ne mooy doon seen Yàlla, te dingeen doxe ay yoonam, di sàmm dogali yoonam, aki santaaneem, ak àttey yoonam, tey dégg waxam. ¹⁸ Aji Sax ji it biral na bésub tey, ne yeenay doon ñoñam ñi mu séddoo, noonee mu leen ko dige woon, te ngeen di sàmm mboolemi santaaneem. ¹⁹ Moo leen di aj ba ngeen tiim mboolem xeet yi mu sàkk, ci wàllu bayre, ak tur ak tednga, te moo leen di def askan wu sell, ñeel seen Yàlla Aji Sax ji, noonee mu ko digee woon.

Musaa biral na yooni barke ak alkànde

27

(Saar 27—30)

¹ Ba loolu wéyee Musaa ak magi Israyil sant mbooloo ma, ne leen: «Sàmmléen mboolem santaane yi ma leen dénk bésub tey. ² Bés bu ngeen jàllee dexu Yurdan, ba ca réew ma leen seen Yàlla Aji Sax ji jox, sampleen ay doj yu mag, ngeen diw doj ya weexal, ³ te ngeen bind ca mboolem kàdduy yoon wii, gannaaw bu ngeen jàllee. Su ko defee ngeen mana dugg ca réew, ma leen Aji Sax jiy jox, réew mu meew maak lem ja tuuroo, noonee leen ko seen Yàllay maam Aji Sax ji waxe woon. ⁴ Gannaaw bu ngeen jàllee dexu Yurdan, sampleen doj yooyu ca kaw tundu Ebal, ni ma leen ko sante tey jii, te ngeen diw doj yi weexal. ⁵ Nangeen fa tabax ab sarxalukaay, ñeel seen Yàlla Aji Sax ji, ab sarxalukaay bu ñu defare doj yu jumtukaayu weñ laalul. ⁶ Doj yu mat yu ñu soppiwul lenn ca na ñu bindoo ngeen di tabaxale ab sarxalukaay, seen Yàlla Aji Sax ji, ngeen def ca ay saraxi rendi-dóomal, ñeel seen Yàlla Aji Sax ji. ⁷ Defleen ca itam ay saraxi cant ci biir jàmm yu ngeen di lekk foofa. Ngeen daldi bége fa seen kanam Yàlla Aji Sax ji. ⁸ Nangeen bind ca kaw doj ya, mboolem kàdduy yoon wii, ba mu leer nàññ.»

⁹ Ba mu ko defee Musaa ak sarxalkat yi, Leween ñi wax ak Israyil gépp, ne leen: «Yeen Israyil, neleen cell te déglu. Bés niki tey doon ngeen askan wu ñeel seen Yàlla Aji Sax ji. ¹⁰ Kon nag déggaleen seen Yàlla Aji Sax ji, te ngeen jéfe ay santaaneem, ak dogali yoonam, yi ma leen di dénk tey.» ¹¹ Musaa nag sant mbooloo ma bésub keroog, ne leen:

¹² «Giir yii may lim, ñooy taxawe kaw tundu Garisim, ngir ñaanal mbooloo mi, gannaaw bu ngeen jàllee dexu Yurdan:

Cimyoneen ñi ak Leween ñi ak Yudeen ñi ak Isakareen ñi ak Yuusufeen ñi ak Beñamineen ñi. ¹³ Giir yii nag ñooy taxaw di rëbbe, fa kaw tundu Ebal: Rubeneen ñi ak Gáddeen ñi ak Asereen ñi ak Sabuloneen ñi ak Daneen ñi ak Neftaleen ñi.»

Lu jëm ci alkànde yi

¹⁴ Leween ñi ñooy wax ak waa Israyil gépp, di àddu ca kaw, ne:

¹⁵ «Alku ñeel na képp ku sàkk, bay teg ci bérab bu làqu, li Aji Sax ji seexlu, te ab liggéeykat sàkke ko ay loxoom, muy jëmnu tuur mu ñu yett, mbaa mu ñu móol.» Su ko defee mbooloo mépp àddoondoo, ne: «Amiin!»

¹⁶ Ñu neeti: «Alku ñeel na ku torxal baayam mbaa ndeyam.» Mbooloo mépp ne: «Amiin!»

¹⁷ Ñu neeti: «Alku ñeel na ku toxal màndargam kemu suufas moroomam.» Mbooloo mépp ne: «Amiin!»

¹⁸ Ñu neeti: «Alku ñeel na ku sànk silmaxa ci aw yoon.» Mbooloo mépp ne: «Amiin!»

¹⁹ Ñu neeti: «Alku ñeel na ku jengal àtteb doxandéem ak jirim akub jétun.» Mbooloo mépp ne: «Amiin!»

²⁰ Ñu neeti: «Alku ñeel na ku tédde jabaru baayam, ndax suturas baayam la xàwwi.» Mbooloo mépp ne: «Amiin!»

²¹ Ñu neeti: «Alku ñeel na ku tédde mboolem luy mala.» Mbooloo mépp ne: «Amiin!»

²² Ñu neeti: «Alku ñeel na ku tédde ab jigéenam, muy doomu baayam, mbaa doomu ndeyam.» Mbooloo mépp ne: «Amiin!»

²³ Ñu neeti: «Alku ñeel na ku tédde yaayu jabaram.» Mbooloo mépp ne: «Amiin!»

²⁴ Ñu neeti: «Alku ñeel na ku rey moroomam ci kumpa.» Mbooloo mépp ne: «Amiin!»

²⁵ Ñu neeti: «Alku ñeel na ku nangub ger, ngir rotal bakkanu nit ku deful dara.» Mbooloo mépp ne: «Amiin!»

²⁶ Ñu neeti: «Alku ñeel na ku saxoowul kàdduy yoon wii, di ko jéfe.» Mbooloo mépp ne: «Amiin!»

28

Lu jëm ci barke yi

¹ Su ngeen déggalee ba déggal seen Yàlla Aji Sax ji, ngir di sàmboo jéfe mboolem santaaneem, yi ma leen di dénk tey, kon Aji Sax ji seen Yàlla, Aji Kawe ji moo leen di aj ci kaw mboolem xeeti àddina. ² Barke yii yépp a leen di dab, sottiku ci seen kaw, bu ngeen déggalee seen Yàlla Aji Sax ji:

³ Barkeel a leen di ñeel ci biir dëkk, barkeel a leen di ñeel cib àll.

⁴ Barkeel ay ñeel seen meññeefum nju-rukaay, ak seen meññeefum suuf, ak seenug jur, seen jur gu gudd, ak seen jur gu gätt.

⁵ Barkeel ay ñeel seenum witt, ak seenum xiiw.

⁶ Barkeel ay ñeel seen yoonu dem, barkeel ay ñeel seen yoonu dikk.

⁷ Aji Sax jeey def, noon yi leen di jógal, ñooy daanu fi seen kanam. Wenn yoon lañuy dikke, dal ci seen kaw, waaye juróom ñaari yoon lañuy awe, daw, jiitu leen.

⁸ Aji Sax jee leen di booleek barke bu wàccal seenum sàq, ak seen mboolem ñaq, te moo leen di barkeel ca réew ma leen seen Yàlla Aji Sax ji jox. ⁹ Moo leen di defal boppam askan wu sell, noonee mu leen ko giñale woon, ndegam sàmm ngeen seen sanaaney Yàlla Aji Sax ji, di doxey yoonam. ¹⁰ Su boobaa mboolem xeeti kaw suuf dinañu gis ne turu Aji Sax ji lees leen di wooye, te dinañu leen ragal. ¹¹ Aji Sax jee leen di xéewale, ngir baaxe seen meññeefum njurukaay, ak seenug jur, ak seen meññeefum suuf, ca réew ma mu giñaloon seeni maam, ne moom la leen di jox. ¹² Aji Sax jee leen di ubbil mbàndam mu baax ma fa asamaan, ba bu jotee mu tawal seenum réew, boole ci barkeel seen mboolem ñaq.

Yeenay lebal xeet yu bare, waaye yeen dungeen leb. ¹³ Aji Sax jee leen di def bopp, te du leen def ub geen, te kaw rekk ngeen di jëm, waaye dungeen jëm suuf, ndegam yeena ngi topp seen sanaaney Yàlla Aji Sax ji ma leen di dénk sama bopp bésub tey, di ko sàmmoo jéfe, ¹⁴ te mboolem kàddu yii ma leen di dénk tey, ngeen bañ koo moye ndijoor, mbaa càmmoñ, di topp yeneen yàlla yu ngeen di jaamu.

Déggadi, alku

¹⁵ Waaye nag su ngeen déggalul seen Yàlla Aji Sax ji, te baña sàmmoo jéfe mboolem sanaanem, ak dogali yoonam, yi ma leen di jox tey, mboolem alkànde yii dina leen dab, sottiku ci seen kaw:

¹⁶ Dungeen alkoo biirub dëkk, alkoo àll.

¹⁷ Dungeen alkule am witt, akam xiiw.

¹⁸ Dungeen alkule meññeefum nju-rukaay, ak meññeefum suuf, ak jur gu gudd ak gu gätt.

¹⁹ Dungeen alkoo seen yoonu dem, alkoo seen yoonu dikk.

²⁰ Aji Sax jeey yebal fi seen biir, kumte ak tiitaange, ak mbetteel ci mboolem lu ngeen ñaq, ba ngeen yaqu, ba jekki sàngu ndax seen jéf ju ñaaw ju ngeen ko dèddoo.

²¹ Aji Sax jee leen di langalal mbas, ba raafal leen ca réew ma ngeen jëm, ngir nanguji ko. ²² Aji Sax jee leen di dumaa woppi ràgg, ak yaram wu tàng, ak lakk-lakk, ak jant bu tàng jérr, ak maral, ak gàncax gu xuur, tegi liir, lépp topp leen ba ngeen sàngu.

²³ Asamaan si tiim seen bopp nag da naan seren ni xànjari, suuf si ngeen teg seeni tànk, wow kòrj ni weñ gu ñuul.

²⁴ Aji Sax jeey def seen tawub réew di suuf ak pënd bu bawoo asamaan, di yuriku ci seen kaw, ba ngeen sàngu.

²⁵ Aji Sax jeey def ngeen daanu fi seen kanami noon. Wenn yoon ngeen di dikke, song leen, waaye juróom ñaari yoon ngeen di awe, daw, te dees na leen seexlu ci mboolem nguuri kaw suuf. ²⁶ Su ko defee seeni néew di poraatum mboolem njanaaw ak rabu àll, te kenn du leen dàq.

²⁷ Aji Sax jee leen di dumaa taabi Misra, ak neewoy kërug suuf, ak yaram wu xas, ak èr yuy xasan te dungeen mana am pajam. ²⁸ Aji Sax jee leen di dumaa ag ndof akug cilmaxa ak ngèlëmte, ²⁹ ba ngeen di làmbatoo digg bëccëg ni silmaxa di làmbatoo cig lëndëm. Dungeen sottal seeni mébét. Dees leen di néewal doole, di foqati seen alal rekk, bés bu nekk, te kenn du leen wallu.

³⁰ As ndaw, ngeen digool ab séy, keeneen tédde ko; ag kër, ngeen tabax, te dungeen ko dëkke; ab toókëru reseñ, ngeen jëmbat, te dungeen ko jariñoo.

³¹ Seenu yëkk, ñu rendi, ngeen gis, te dungeen ci lekk; seen mbaam, ñu nangu ko ci seeni loxo, te du délci ci yeen; seeni gätt, ñu jébbal seeni noon, te kenn du leen wallu; ³² Seen doom yu góor ak yu jigéen, ñu jébbal weneen xeet ci seen kanam, ngeen di leen séentu ci neen bés bu Yàlla sàkk, te dungeen ci man dara. ³³ Seen meññeefum suuf, ak mboolem seenu ñaq, xeet wu ngeen xamuloon a koy lekk, te dees leen di not ak a déggaate rekk, bés bu nekk. ³⁴ Dungeen mujj dof ndax lu buur seeni bët ngeen di gis.

³⁵ Aji Sax jee leen di dumaa taabi óom, ak taabi yeel yu bon. Dungeen mana am pajam, te ci seen wewu tànk lay lawe, ba ci seen kaw bopp.

³⁶ Aji Sax jee leen di diri, yeen ak seen buur bi ngeen fal, ba ca biir xeet wu ngeen xamuloon, yeen ak seeni maam, ngeen di fa jaamu yeneen yàllay bant ak doj. ³⁷ Dees na leen mujj seexlu, di leen léebok a kókkalee foofa ca biir mboolem xeet, ya mu leen dàq jème.

³⁸ Jiwu mu bare ngeen di yóbbu tool, te lu néew ngeen cay ame, ndax njéeréer yee koy wat. ³⁹ Ay toókëri reseñ, ngeen jëmbat, sonn ca, te biiñ, dungeen ko naan,

dungeen witt doom ya it, ndax sax yee koy lekk. ⁴⁰ Ay garabi oliw ngeen di am ci seen réew mépp, waaye ag diw, dungeen ko diwoo, ndax seen doomi oliw ya day yolax. ⁴¹ Ay doom yu góor ak yu jigéen ngeen di jur, waaye duñu leen nekkal, ndax njaam lañuy duggi. ⁴² Seen gépp garab ak seen meñneefum suuf, soccet yee koy nangu.

⁴³ Doxandéem bu nekk ci seen biir mooy yéeg tiim leen, ba ca kawa kaw, yeen nag ngeen di wàcc, ba suufee suufe. ⁴⁴ Moom moo leen di lebal, waaye dungeen ko lebal. Moom mooy doon bopp, yeen, ngeen di geen.

⁴⁵ Mboolem alkànde yii ñoo leen di dab, dal ci seen kaw, topp leen, ba ngeen sànk, ndax yeena déggalul seen Yàlla Aji Sax ji, ngir wormaal ay santaaneem, ak dogali yoonam, yi mu leen dénk. ⁴⁶ Loolu mooy doon, ci seen biir ak seen biir askan, ba fàww, ay firnde aki kéemaan yu leen di àrtu.

⁴⁷ Gannaaw yeena jaamuwul seen Yàlla Aji Sax ji ci mbégte ak xol bu sedd, keroog ba ngeen barelee lépp, ⁴⁸ seen noon yi Aji Sax jiy yebal ci seen biir, ñoom ngeen di jaamuji ci biir xiif, ak mar ak raffle, ak gépp ñàkk. Aji Sax jeey teg yetu weñ ci seen ndodd, ba sànk leen. ⁴⁹ Aji Sax jeey jógloo ci seen kaw, xeet wu sore, ñu bàyyikoo ca cati àddina, dikk ne milib nig jaxaay, te dégguleen aw làkkam, ⁵⁰ xeet wu ñang kanam te rusuñu mag, yèrèmuñu gone. ⁵¹ Ñooy yàpp seenug jur, lekk seen gancax, ba ngeen raaf. Duñu leen wacce dara; du pepp, du biñ, dug diw, du doomu jur gu gudd ak gu gàtt, ba ngeen far sànk. ⁵² Dees na leen gawe ci seen dëkk yépp, ba seen tata yu kawe te dàbbliku, ya ngeen yaakaaron ci seen réew mépp, màbb. Dees na leen gawe seen dëkk yépp, ci mboolem réew, mi leen seen Yàlla Aji Sax ji jox. ⁵³ Dingeen mujj lekk seen meñneefum njurukaay, seen suuxu doom yu góor ak yu jigéen, yi leen seen Yàlla Aji Sax ji may, ndax gaw ba, ak tanc bu leen seeni noon tanc. ⁵⁴ Góor gi gëna lewet ci yeen te xay lool dina xeelu mbokkam, xeelu jabar ju muy noyyee, ak ndesu doomam ju mu dese, ⁵⁵ ngir baña sédd kenn ci ñoom ci yàppu doomam ya muy lekk, ndax du dese dara ca biir gaw ba, ak tanc ba leen seeni noon tanc, ci seen dëkk yépp. ⁵⁶ Jigéen ju gëna lewet te xay ci yeen, ba néegula teg ndéggul tãnkam ci suuf ndax xayteam ak lewetaayam, dina xeelu jékkëram ju muy noyyee, ak doomam ju góor ak ju jigéen. ⁵⁷ Day fekk mu namma lekk ci kumpa doom ju mu doora wasin, boole kook ànd ba, ndax lépp ay ñàkk ca biir gaw ba ak tanc, ba leen seeni noon tanc ca seeni dëkk.

⁵⁸ Su ngeen sàmmoowula jéfe mboolem kàdduy yoon wii binde ci téere bii, ngir wormaal boroom tur wu màgg wii te raglu, seen Yàlla Aji Sax ji, ⁵⁹ su boobaa Aji Sax ji dina réyal seeni дума, ak seen dumay askan, дума yu mag te yàgg, ak wopp yu aay te ès. ⁶⁰ Mooy délloosi fi seen kaw, mboolem jàngoroy Misra yu ngeen ragaloon, ñu taq leen. ⁶¹ Te it mboolem wopp ak mboolem mbugal mu bindewul ci téereb yoon wii, Aji Sax jee leen koy yen, ba ngeen sànk. ⁶² Nit ñu néew ngeen di dese, te bare woon ni biddiwi asamaan, ndax ñàkka déggal seen Yàlla Aji Sax ji. ⁶³ Su ko defee noonee Aji Sax ji daan bége di leen baaxe ak a yokk, noonu la Aji Sax jiy bége di leen sànk ak a fàkkas, te dees na leen déjjatee ca réew ma ngeen jëm, ngir nanguji ko. ⁶⁴ Aji Sax jee leen di wasaare ci biir mboolem xeeti àddina, cat ba cat, ngeen di fa jaamu yeneen yàlla yu ngeen xamuloon, du yeen du seeni maam, yàllay bant ak doj. ⁶⁵ Ca biir xeet yooyu nag, dungeen fa astandikoo, dungeen fa am sax yu ngeen noppale seen téstën. Aji Sax jee leen fay teg fit wu récc, ak gët yu giim, ak xol bu jeex. ⁶⁶ Seen bakkan ay nekk ci xott, ngeen dëkke tiitaangey guddi ak bëccëg, te seen èllëg dootu leen wóor. ⁶⁷ Ag suba ngeen ne: «Éy waay, bu doon ngoonati.» Bu ngoonee ngeen ne: «Éy waay, bu doon subaati!», ndax tiitaange lu ngeen di tiit, ak li ngeen di teg seeni gët. ⁶⁸ Aji Sax jee leen di yeb ciy gaal, delloo leen Misra, yoon wu ma leen noon dungeen ko gisati, ngeen di fa jaay seen bopp seeni noon, ngir doon seen jaam yu góor ak yu jigéen, te kenn du leen jënd.

Köllère gi yeestu na

⁶⁹ Lii mooy sàrti köllère, gi Aji Sax ji santoon Musaa ngir mu fasoo ko ak bànni Israyil, ca réewum Mowab, te bokkewul ak köllère ga mu fasoo woon ak ñoom ca tundu Oreb.

29

¹ Ba mu ko defee Musaa woolu Israyil gépp. Mu ne leen:

Yeena gis mboolem la Aji Sax ji def, ngeen teg ci seen bët, ca réewum Misra, ci kaw Firawna ak dagam népp, ak réewam mépp. ² Nattu yu mag yooyu, ak firnde yeek kéemaan yu réy yooyu, yeena ci teg seen bët, ³ te taxul Aji Sax ji may leen xel mu ngeen ràññee, ak gët yu ngeen gise, ak nopp yu ngeen dégge, booba ba sunu jonni yàllay tey! ⁴ Aji Sax ji nee: «Maa leen jiite ñeent fukki at ca màndiñ ma, seeni yère ràppul, seenu dàll ràppul. ⁵ Mburu, lekkuleen ko, biiñ mbaa geneen naan gu diis, naanuleen ko. Maa leen leel, ngir

ngeen xam ne man maay seen Yàlla Aji Sax ji.» ⁶ Ba ngeen agsee ci bérab bii, Siwon bu-urub Esbon dik, ànd ak Og buuru Basan, dik dajeeek nun, ngir song nu xare, nu duma leen. ⁷ Nu nangu seenum réew, sédd ko Rubeneen ñi, ak Gàddeen ñi, ak genn-wàllu giirug Manaseen ñi. ⁸ Sàmmleem nag sàrti kóllère gi, di ko jéfe ndax yàlla ngeen baaxle ci mboolem lu ngeen def.

Buleen caaxaane kóllèreg Aji Sax ji

⁹ Yeena ngii tey, taxaw jonn, yeen ñépp fi seen kanam Yàlla Aji Sax ji, seen njiiti giir, ak seeni mag ak seeni kàngam; mboolem góori Israyil, ¹⁰ ak seeni tuut-tànk, ak seeni jabar, akub doxandéem ci seenub dal, seen gorkatub matt, ba ci seenub rootkat. ¹¹ Yeena ngi tàbbi ci seen biir kóllèreg Yàlla Aji Sax ji, ak ci ngiñam, kóllère gi seen Yàlla Aji Sax ji fasoo ak yeen bésuh tey, ¹² ngir def leen bésuh tey, askan wi mu ñoño; moom ci boppam mu doon seen Yàlla, na mu leen ko waxe woon, na mu ko giñale woon seeni maam, Ibraayma ak Isaaxa ak Yanqóoba. ¹³ Aji Sax ji nee: «Du yeen donj laay fasool kóllère gi, ak ngiñ lii.» ¹⁴ Yeen ñi taxaw ci sunu biir tey, fi sunu kanam Yàlla Aji Sax ji, ci ngeen bokk, waaye yi dikkagul bay bokk ak nun taxaw fii it, ci lañu.

¹⁵ Yeen ci seen bopp, xam ngeen na nu nekke woon réewum Misra ak na nu jaare ca biir xeet ya ngeen jaare seeni réew. ¹⁶ Gis ngeen seen jéf ju jomblu, seen kasaray tuur ya: yéfi bant yeek yéfi doj yeek yéfi xalis yeek yéfi wurus yi ñu àndal. ¹⁷ Kon nag, muy góor, di jigéen, ak làng gu mu mana bokk, mbaa giir, fexeleen ba kenn ci yeen du walbatiku, dèddu bésuh tey, sunu Yàlla Aji Sax ji, di jaamuji yàllay xeet yooyu. Lu ko moy ab reen dina fèlle fi seen biir, meññal leen tooke ak wextan. ¹⁸ Jombul mu am ku dégg kádduy ngiñ lii, tey nax boppam cim xelam, naan: «Jàmm rekk laay am, maa tey të,» ba tax ñax mu wow lakkaale mu tooy. ¹⁹ Aji Sax ji du nangoo baal kooku, nde su boobaa, sànjum Aji Sax jee ànd ak fiiraangeem, tàkk ci kawam, te mboolem alkànde gi ñu bind ci téere bii day képpu ci kawam, te Aji Sax jee far aw turam fu asamaan tiim. ²⁰ Aji Sax jee koy seppee ci mboolem giiri Israyil, ngir sédd ko njekkar, na mu déppook mboolem alkàndey kóllère gi ñu bind ci téereb yoon wii.

Mbugal du jaas

²¹ Maas giy ñew, seen doom yi leen di wuutuji yeen, ñook doxandéem yi jóge fu sore, bu ñu gisee mbugal yi ci réew mi, ak wopp yi fi Aji Sax ji woppale, ²² tamarax ak xorom, ak lakk gi ci seen réew mépp, ba

du lenn lees fay ji, mbaa lu fay jebbi, mbaa genn gancax gu fay saxe, mbete tastey Sodom, ak Gomor ak Atma ak Ceboyim, dèkk ya Aji Sax ji tas, ca meram ma ak sànjam ma, ²³ su boobaa yéefar yépp a naan: «Ana lu waral Aji Sax ji def nii réew mi? Lu waral mii sànj mu tàng te réy?» ²⁴ Ñu ne leen: «Li ko waral mooy, dañoó fecci kóllèrey Aji Sax ji, seen Yàllay maam, te mu fasoon ko ak ñoom ba mu leen jélee réewum Misra. ²⁵ Ñu dem nag, di jaamu yeneen yàlla, di leen sujjóotal, yàlla yu ñu xamuloon, te du lu leen Aji Sax ji féetale. ²⁶ Moo tax sànjum Aji Sax ji tàkkal réew mii, ngir wáceel leen mboolem alkànde yi ñu bind ci téere bii. ²⁷ Aji Sax ji nag moo leen déjjatee seenum réew ci biir mer, ak xadar, ak sànj mu réy, ba sànni leen meneen réew, niki bésuh tey jii.»

²⁸ Mbir yi làqu daal, ñeel na sunu Yàlla Aji Sax ji, mbir yi feñ nag, ñeel nu, nook sunuy doom ba fàww, te nu wara jéfe mboolem kádduy yoon wii.

30

Dellusi ci Aji Sax ji, barkeel

¹ Èllég nag, su mboolem mbir yooyu dik-kee fi seen kaw, muy barke yi, di alkànde yi ma teg fi seen kanam, su boobaa bu ngeen délloosee seen xel foofa mu leen fekk, ca biir mboolem xeet ya leen seen Yàlla Aji Sax ji dàq jème, ² ba ngeen dellusi ci seen Yàlla Aji Sax ji, di ko déggal ci mboolem ni ma leen ko sante bésuh tey, yeen ak seeni doom, te ngeen defe ko seen léppi xol ak seen léppi bakkan, ³ su boobaa Aji Sax jee tijji seen wèrség, yèrèm leen. Seen Yàlla Aji Sax ji moo leen di dellu dajalee foofa, ci biir mboolem xeet ya mu leen tasaare woon ca seen biir. ⁴ Su ñu leen toxaloon ba ca cati asamaan sax, foofa la leen seen Yàlla Aji Sax ji di dajalee, te fa la leen di jéle. ⁵ Seen Yàlla Aji Sax jee leen di delloo ca réew ma seen maam moomoon, ngeen moom ko, te moo leen di baaxe, yokk leen ba ngeen géna bare seeni maam. ⁶ Su boobaa seen Yàlla Aji Sax jee leen di xarfal xarafu xol, te mooy xarfal xarafu xol, seen askan, ngir ngeen soppe seen Yàlla Aji Sax ji seen léppi xol, ak seen léppi bakkan, ndax ngeen dund. ⁷ Su loolu amee seen Yàlla Aji Sax jee teg mboolem alkànde yii ma leen limal, ci kaw seeni noon ak seen bañ yi leen tonjal. ⁸ Yeen nag dingeen walbatiku, di déggal Aji Sax ji, tey jéfe mboolem santaane yi ma leen di dénk bésuh tey jii. ⁹ Ci kaw loolu seen Yàlla Aji Sax ji mooy baaxal mboolem seenu ñaq, ak seen meññeefum njurukaay, ak seen meññeefum jur, ak seen meññeefum suuf, ngir lu baax. Aji Sax ji mooy bégewaati di

leen baaxe na mu daan bégee baaxe seeni maam. ¹⁰ Ndegam déggal ngeen seen Yàlla Aji Sax ji, di topp ay santaaneem, ak dogali yoonam, yi ñu bind ci téereb yoon wii; ndegam yeena walbatikoo seen léppi xol ak seen léppi bakkan, ba dellu ci seen Yàlla Aji Sax ji.

Musaa nee déggal Yàlla yomb na

¹¹ Santaane bii ma leen di dénk tey nag, jafewul te sorewul ba të leen, ¹² Ajewul kaw asamaan ba ngeen naan: «Ana ku nuy yéegali kaw asamaan, àjjil nu ko, dégtal nu ko, ba nu jéfe ko?» ¹³ Nekkul it wàllaa gééj ba ngeen naan: «Ana ku nuy jállil wàllaa gééj, jëlil nu ko, dégtal nu ko, ba nu jéfe ko?» ¹⁴ Kàddu gi kay jege na leen lool; ci seen gémmiñ ak ci seen biir xol la nekk, ngir ngeen di ko jéfe.

¹⁵ Kon nag gis ngeen ko: Teg naa fi seen kanam, bés niki tey, dund ak mbaax, teg naa fi seen kanam, ndee ak loraange. ¹⁶ Li ma leen sant, man, bés sub tey, mooy ngeen sopp seen Yàlla Aji Sax ji, di topp ay yoonam, di sàmm ay santaaneem, ak dogali yoonam, aki àtteem, ngir ngeen dund te yokku, seen Yàlla Aji Sax ji barkeel leen ca réew ma ngeen jëm, ngir nanguji ko. ¹⁷ Waaye su ngeen walbatee seen xol, dégluwuleen, xanaa ngeen lajj, di sujjóotal yeneen yàlla, di leen jaamu, ¹⁸ ma wax leen ko bés niki tey, su boobaa yeenay sànkoo sànkoo, te dungeen gudd fan ca réew ma ngeen di jàll dexu Yurdan, jëm fa, ngir nanguji ko.

¹⁹ Woo naa seede asamaan ak suuf ci yeen, bés sub tey: dund ak ndee laa teg fi seen kanam, ak barke ak alkànde. Taa-muleen dund ndax ngeen dund, yeen ak seen askan. ²⁰ Soppleen seen Yàlla Aji Sax ji, déggal ko te taq ci moom, ndax moom mooy seenug dund, di seen guddgi-fan ca réew ma mu giñaloon seeni maam Ibraayma ak Isaaxa ak Yanqóoba, ne ñoom la koy jox.

Musaa tàggoo na

31

(Saar 31—34)

¹ Gannaaw loolu Musaa dellu na àddu kàddu yii, wax ak bànni Israyil gépp. ² Mu ne leen: «Maa ngi ci sama téeméeri at ak ñaar fukk, tey. Manatuma jiiite, te it Aji Sax ji moo ma wax ne ma: “Doo jàll dexu Yurdan gii.” ³ Seen Yàlla Aji Sax ji ci boppam moo leen di jiiite jàll. Mooy fàkkas xeet yooyu fi seen kanam, ngeen nangu seenum réew. Yosuwe moo leen di jiiite jàll, na ko Aji Sax ji waxe woon. ⁴ Aji Sax ji moo leen di def na mu defoon Siwon ak Og, buuri Amoreen ña, ak seenum réew, fàkkas leen. ⁵ Aji Sax jee leen di joxe fi

seen kanam, ngeen def leen mboolem li ma leen santoon. ⁶ Dégèrluleen nag te am fit. Buleen tiit, buleen yox-yoxi ndax ñoom, ngir seen Yàlla Aji Sax ji mooy ànd ak yeen. Du leen ba, du leen wacc mukk.»

⁷ Ba loolu amee Musaa woolu Yosuwe, wax ak moom, Israyil gépp teg ci seen bët. Mu ne ko: «Dégèrlul te am fit, ndax yaw yaay ànd ak mbooloo mii ca réew ma Aji Sax ji giñaloon seeni maam, ne ñoom la koy jox. Yaw it yaa leen koy sédde. ⁸ Aji Sax ji nag mooy dox, jiiitu la. Moom mooy nekk ak yaw. Du la ba, du la wacc mukk. Bul tiit, bul yoqi.»

⁹ Musaa moo bind kàddug yoon wii, dénk ko doomi Lewi yu góor, sarxalkat yay gàddu gaalu kóllérey Aji Sax ji, ñook magi Israyil ñépp. ¹⁰ Musaa sant leen, ne leen: «Njeexital juróom ñaareelu at mu nekk, àppook atum njéggalug bor, ci diiru mággalu Mbaar yi, ¹¹ bu Israyil gépp teewsee fa seen kanam Yàlla Aji Sax ji, fa bérab ba muy taamuji, nangeen jàng kàdduy yoon wii fi kanam Israyil gépp, ñuy dégg. ¹² Dangeen di dajale mbooloo mi, góor ñi ak jigéen ñi ak tuut-tànk yi, ba ci doxandéem bu nekk ci seen biir dëkk, ndax ñu déglu, ba tàggatu ci ragal seen Yàlla Aji Sax ji, di sàmmoo jéfe mboolem kàdduy yoon wii. ¹³ Su ko defee seen doom yi xamul dinañu ci dégg, ba tàggatu ci ragal seen Yàlla Aji Sax ji, mboolem fan ya ngeen di dund ca réew, ma ngeen jàll dexu Yurdan, jëm fa, ngir nanguji ko.»

¹⁴ Ba loolu wéyee Aji Sax ji ne Musaa: «Ma ne, sa bés sub dee ngi jegesi. Wool Yosuwe, te ngeen teewsi fi xaymab ndaje mi, ma yeb ko.» Musaa dem, ànd ak Yosuwe, ñu teewi fa xaymab ndaje ma. ¹⁵ Aji Sax ji nag feeñ ca xayma ba, ci biir taxaaru niir, taxaaru niir wa taxaw fa bunt xayma ba. ¹⁶ Aji Sax ji ne Musaa: «Yaa ngi nii di tédidi fa say maam. Mbooloo mii nag dinañu tàmbali di gànctuy topp yeneen yàllay doxandéem yu waa réew, ma ñu jëm ca seen biir. Dinañu ma wacc, fecci sama kóllère gi ma fasoon ak ñoom, ¹⁷ te samam sànj dina tàkk ci seen kaw bés sub keroog. Maa leen di wacc, làq leen sama kanam, te kon dees na leen lekk. Musiba yu bare aki njàqare dina leen dikkal. Bés sub keroog ñoo naan: “Xanaa sunu Yàllaa nekkul ci sunu biir kay, ba tax musiba yii dikkal nul!” ¹⁸ Maa nag maa leen di làqa làq sama kanam, bés sub keroog ndax mboolem mbon gi ñu def, ndax ñoo walbatiku ci yeneen yàlla. ¹⁹ Léegi nag bindleen woy wii ma leen di dégtal, te yaw Musaa nga jàngal ko bànni Israyil. Woyloo leen ko, ndax woy wii di sama seede ak bànni Israyil. ²⁰ Maa leen di yóbbu déy ca réew ma ma giñaloon

seeni maam, fa meew maak lem ja tuuroo, ñu lekk ba regg, yaflu, daldi walbatiku ci yeneen yàlla, di leen jaamu, xarab ma, fecci sama kòllèreek ñoom. ²¹ Su ko defee bu leen musiba yu bare dikkalee aki njàqare, woy wii mooy biral kàddug seede fi seen kanam, ndax su boobaa xel du ko faaye, ba mu réer seenu askan. Ndax kat xam naa seen mébét mi ñuy rabat, te yóbbooguma leen sax ca réew ma ma leen giñaloon.» ²² Ba loolu amee Musaa bind woy woowu hésub keroog, daldi koy jàngal bànni Israyil.

²³ Aji Sax ji nag yeb Yosuwe doomu Nuun ne ko: «Dègèrlul te am fit, ndax yaw yaay yóbbu bànni Israyil ca réew ma ma giñoon, te man ci sama bopp maay nekk ak yaw.»

²⁴ Ba Musaa bindee kàdduy yoon woowu cib téere ba mu mat, ²⁵ dafa yeb Leween ñiy gàddu gaal gi àlluway kòllèrey Aji Sax ji dence, ne leen: ²⁶ «Jél-leen téereeb yoon wii, ngeen teg ko ci seen wetu gaalu kòllèrey Yàlla Aji Sax ji, mu doon fa ab seede, ngir àtte leen. ²⁷ Ndax maa xam seen jikkoy fippu, ak seenug dègèr bopp. Seetleen, ndegam bi may dundagum tey ci seen biir ngeen di fippu ci kaw Aji Sax ji, astamaak gannaaw bu ma deeyee. ²⁸ Woolleem ma seen magi giir yépp, ak seeni kàngam, ma wax kàddu yii, ñuy dégg, ba ma seedelo asamaan ak suuf, ci seen kaw, ñoom. ²⁹ Xam naa ne gannaaw bu ma deeyee, dingeen defa def ag yàqute, dingeen teggi yoon wi ma leen jaarloo woon, te musibaa leen di mujj dikkal, ndax yeenay def jéf ju bon ju Aji Sax ji ñaawlu, ba merloo ko ndax seeni jéf.» ³⁰ Ba mu ko defee Musaa jàng kàdduy woy wii ba mu mat, ndajem Israyil ma mépp di dégg.

32

Musaa woy na kòllèreg Aji Sax ji

¹ Yeen asamaan, teewluleen, ma wax,

Yaw suuf, déglul sama kàddu yii.

² Na samam njàngle sóob nib taw,

samay kàddu rogalaat nib lay,

ba tuurul am ñax,

baawaanal gàncax.

³ Turu Aji Sax ji déy laay tudd, seedeleen sunu mäggaayu Yàlla.

⁴ Kee di cès-laay, te mati jéf, wépp yoonam di njub.

Yàlla ju am kòllère, mucc njubadi, te njekk ak njub mooy boroom.

⁵ Njabootam ñoo def ug yàqute ci kawam, ba dootuñuy doomam ndax seeni sikk. Ndaw maas gu dèng te njublanj!

⁶ Aji Sax ji lañuy feye lii?

Ndaw xeet wu dofe te ñàkk xel!

Mooy seen baay, bind leen,

sàkk leen, samp leen.

⁷ Fàttlikuleen jant ya jèkkoon, baleen xel maasi maas ya woon.

Laaajleem seeni baay, ñu xamal leen; ak seen mag ñi, ñu wax leen.

⁸ Ba Aji Kawe ji séddeex xeet yi seeni suuf, tasaare doom aadama yi ci àddina, moo àppal xeet yi seen kemi réew, na mu déppook limeefu goney* Yàlla yi.

⁹ Céru Aji Sax ji moo di ñoñam, askanu Yanqóoba woowoy wàllam.

¹⁰ Moo leen fekk réewum màndinj,

fu ne wéyèj, ubaleeki sab,

mu feg leen, topptoo leen, sàmm leen,

ni bu ñu doon peru bétu boppam.

¹¹ Moo mel ni jaxaay juy naawtal am tostanam,

daayaarlu, tiim leen,

tàllali laafam, aw leen,

teg ciw dunqam, boot leen.

¹² Aji Sax ji donj a leen wommat,

du yàllay jaambur ju ko ci fekk.

¹³ Moo leen waral kawtey réew ma,

ñuy xontoo meññeefum àll bi,

mu di leen nàmpale lem ju walew doj,

ak diw gu balle xeer wu ne seren,

¹⁴ boole ca soowum nag ak meewum xar,

nebbonu mbote, kuuyi diiwaanu Basan aki bëy,

teg ca ngéneeli pepp,

may leen biiñu reseñ ju xonq curr, ngeen naan.

¹⁵ Yeen Yesurun†, yeena yaflu, wanjeetu,

solu yaram, ne faaj, ne fuux,

fàtte Yàlla mi leen sàkk,

faaleedi seen cès-laay li leen musal.

¹⁶ Ñoo yee fiiraangeem, ndax ay yàllay doxandèem,

ñoo ko merloo ak seen tuur yu jomblu.

¹⁷ Ñoo sarxalal ay rab yu dul Yàlla;

ay yàlla yu ñu masula xam,

yu bees yu doora xew,

yu seeni maam ràññeewuloon.

¹⁸ Cès-laay li leen meññ ngeen foñ,

Yàlla ji leen jur ngeen fàtte.

¹⁹ Aji Sax jee gis loolu, gedd,

ndax mere doomam yooyu, góor ak jigéen.

²⁰ Mu ne: «Maa leen di xañ sama kanam,

ba gis nu ñuy mujje,

ndax maasug defkati njekkar lañu,

doom yu ñàkk kòllère.

²¹ Ñoo ma fiirloo ak yàlla yu dul tus,

merloo maak seen tuuri neen,

* **32:8** 32.8 Mooy ndaw yi bokk ci péncum Yàlla. † **32:15** 32.15 Yesurun: tur wii ak Yanqóoba itam dees na ko wooye Israyil.

man ti maa leen di fiireloo xeet wu tekki-wul dara,

ci waasow naataxuuna laa leen di merloo.

²² Sawaraa ngay tàkke ca samam sànj,

di lakke ba ca xóotey njaniw,

ba xoyom suuf ak meññeefam,

ba jafal reeni tund ya.

²³ Maay jal ci seen kaw ay musiba,

maa leen di soqil, ba jeexal samay fitt.

²⁴ Ñooy loof cib xiif, jeex tàkk ndaxi jàngoro,

ak mbas yu metti.

Ay selli rabi àll laay yebal ci seen kaw,

boole ca ñanaru ndox-suuf.

²⁵ Fa biti la leen saamar di xañey doom,

biir néeg ya, tiitaange luy reye feelu ko,

buubaale waxambaane akub janq,

luy nàmp, ak boroom bijjaaw.

²⁶ «Maa noon maa leen di fàkkas, ba far dakkal lu leen nit doon fàttlikoo.

²⁷ Waaye reetaani noon laa ci ragal,

lu ko moy seeni bañ juume ko,

ba naan: “Sunu njàmbaar a!”

te waroon ne: “Aji Sax jee def lii lépp!”»

²⁸ Wii xeet wu gàtt xel

te ñàkk xam-xam!

²⁹ Su ñu muusoon, xalaat ci lii,

ba xam nu ñuy mujje.

³⁰ Ana nu kenn di dàqe seen junni,

ñaar di fèxal seen fukki junni,

te ka ñu yaakaar jaayu leen,

te Aji Sax ji, laa ne, waccu leen?

³¹ Yaakaaru noon yi de melul ni sunu yaakaar,

te loolu la noon ya àtte.

³² Seen reseñ a nga cosaanoo Sodom,

ak tóokëri Gomor,

doom ya di tooke, cëgg ya wex xàtt!

³³ Seen biñ ñanaru ninki-nànka la,

ak tookey ñàngóor bu aay.

³⁴ «Xanaa du loolu laa làq fi sama wet,

ne ko ràpp fi samay denc?

³⁵ Maay kiy feye, di añale,

te bu jotee ñu fakkastalu,

ndax seen bésuub toskaree dëgmal,

dogal ba buur, wutsi leen!»

³⁶ Aji Sax jeey dëggal ñoñam,

mooy ñeewante ay jaamam,

bu gisee doole dëddu,

ba kenn desul, dub jaam, dus gor.

³⁷ Su boobaa da naan: «Ana seen yàlla ya, seen kiirlaay lañu daa làqoo?»

³⁸ Ñi lekk seen nebboni sarax,

naan biñ bi ñu leen di tuural kay,

nañu jóg, boog, xettli leen, di seen kiiraay!

³⁹ Kon gisleen ne man la, man donj,

kenn du Yàlla ku dul man!

Man maay rey, di dunda!

di gaañe, di wéral;

maay jàpp, te kenn du xettli.

⁴⁰ Maay yékkati sama loxo jëme asamaan, giñ ne: “Ndegam maay dund ba fàww,

⁴¹ bu ma daasee sama saamar buy melax,

ba ñàbb ko ci saab loxo, di àtte,

maay fey samay digaale,

añale samay bañ.

⁴² Maay nàndal samay fitt deret,

sama saamar di yàppe,

deret di nàcce ci ku ñu jam, ak ku ñu jàpp,

tey tuuroo ci boppi kilifay noon yi.»

⁴³ Yeen, xeet yi, tàcculeen ñoñam,

deretu jaamam ñi lay feyul,

pey gu muy fey ay bañam,

ba jot suufam ak ñoñam.

Dëggal Aji Sax ji, dund

⁴⁴ Noonu la Musaa dikke, mook Yosuwe

doomu Nuun, ba jaar ci mboolem kàdduy

woy wii, mbooloo mi di dëgg. ⁴⁵ Gannaaw

ba Musaa noppee ci jottli Israyil gépp

mboolem kàddu yooyu, ⁴⁶ da ne leen:

«Defleen seen xel ci mboolem kàddu yi

ma leen di artoo man, bésuub tey, te ngeen

sant seeni doom ñu sàmmoo jëfe mboolem

kàdduy yoon wii. ⁴⁷ Ndax kat du kàddug

neen ci yeen. Mooy seenug dund! Ci giñ

kàddu ngeen di gudde fan, ca réew ma

ngeen di jàll dexu Yurdan jëm fa, ngir

nanguji ko.»

Aji Sax ji woo na Musaa

⁴⁸ Ci kaw loolu Aji Sax ji wax Musaa

bésuub keroog boobee, ne ko: ⁴⁹ «Doxal

yéegi ca tundi Abarim giñ, nga jàll ba ca

tundu Nebo ca diiwaanu Mowabeen, ba

janook Yeriko. Nga séentu nag réewum

Kanaan mi may jox bànni Israyil, ñu

jagoo. ⁵⁰ Boo noppee, deel ca kaw tund

woowu nga yéeg jëm, ba ñu térali la ca

say bokk, noonee sa mag Aaróona deeye

woon ca kaw tundu Or, ba ñu térali ko

cay bokkam. ⁵¹ Li ko waral mooy yeena

ma fecci worma ci digg bànni Israyil, ca

ndoxi Meriba Kades, ca mândinju Ciin,

ndax yeena wormaalul sama sellnga ci

digg bànni Israyil. ⁵² Kon nag ci biti ngay

séentoo réew ma, waaye foofa, doo fa

dem. Doo dugg ca réew, ma may jox bànni

Israyil.»

33

Musaa ñaanal na bànni Israyil

¹ Ñaan giñ nag la Musaa, góoru Yàlla ga

ñaanaloon bànni Israyil, bala moo nelaw.

² Da ne:

Aji Sax ji Sinayi la bawoo,

fenkale leen fa Seyir,

naajali leen fa tundu Paran,

ànd ak ndiiraani ñu sell ña,

ndijooram ba indil leen melax.

³ Yaw kay yaa sopp xeet yi,

sa ñu sell ñépp nga téyee say loxo,

te ñoo topp say tãnk,
di taataan say tegtal.

⁴ Aw yoon la nu Musaa dénk,
muy jagleb péncum Yanqóoba.

⁵ Yesurun am na buur,
kera ba njiiti askan wa dajee,
ba giiri Israyil bokk teew.

⁶ Yal na Ruben dund, baña raaf,
yàlla buy nitam néew.

⁷ Lii nag moo ñeel Yuda. Mu ne:
Éy Aji Sax ji déggal yuuxi Yuda
te yóbbu ko ciy bokkam.
Mooy jänkoontee dooley boppam,
waaye yaa koy wallu ciy noonam.

⁸ Lewi la wax ne ko:
Sa Tumim ak sa Urim, jumtukaayi tegtal
ya,
ñeel na góor gay sa wóllère,
yaa ko nattoo ca Maasa,
joteek moom ca ndoxum Meriba.

⁹ Kee ne ndey ak baay:
«Gisuma leen,»
ay doomi ndeyam, raññeewu leen,
te doomam, xamu ko.
Xanaa di sãmm say wax,
di sãmm sa kóllère.

¹⁰ Leween ñeey xamal askanu Yanqóoba
say àtte,

di won Israyil gii saw yoon.
Ñooy taal cuuraay fi sa kanam,
di teg saraxi dóomal ci sab sarxalukaay.

¹¹ Éy Aji Sax ji barkeelal dooley gii giir,
te bége aw ñaqam.
Dammal ndiggal ña koy jógal,
ba ay bañam duñu jógati.

¹² Beñamin la wax, ne ko:
Soppeb Aji Sax jaa ngi,
keey dëkke xel mu dal fi wetam,
mu di ko yiir bésoo bés,
te diggantey waggam la dëkke.

¹³ Yuusufa la wax, ne ko:
Yal na barkeb Aji Sax ji ñeel suufam,
bawoo ca xéewali asamaan, dib lay,
ak ndox mu lal xóotey suuf,

¹⁴ ak xéewali meññeef mu jant ñoral,
ak tannéefi gāncax yiy sax ci weeram.

¹⁵ Na barke bawoo fa kawtey tundi cosaan
yu mag ya,

ak xéewali tundi cosaan yu ndaw ya,
¹⁶ ak xéewali suuf ak la ko fees,
ànd ak yiwu ka màkkaanoo ngarab sa
doon tàkk,

te wàccandoo ci kaw boppu Yuusufa;
ak kaanji bokkam yay séddooy Aji Sax ji.

¹⁷ Taawub yékk la, daraja mooy boroom,
béjjén ya, béjjéni nagu àll la,
ca lay butteendoo xeet yépp,

ba ca cati àddina.

Ñooñooy junniy junniy nit ca giirug
Efrayim,
ak junni ca giirug Manase.

¹⁸ Sabulon la wax ne ko:

Yaw, Sabulon, bégeel say dem,
Isaakar yaw, bégeel sa biir xayma.

¹⁹ Xeet yi la ñooñu di woo ca tund wa,
te fa lañuy sarxee sarax yi war,
koomu gééj, ca lañuy nàmpe,
booleek kumpay mbell yu làqu biir suuf.

²⁰ Gàdd la wax ne ko:

Barke ñeel na ku yaatal Gàdd.
Ni gaynde la goore,

te mooy xotat pèrèg akum kaan.
²¹ Moo xool cér ba jékka lew, jagoo ko,
nde fa la wàllu njiit di xaar boroom.
Moo fekksi njiiti askan wi,
moo jéfe njekku Aji Sax ji,
aki dogalam fi Israyil.

²² Dan la wax ne ko:

Dan gaynde gu ndaw la,
mooy tēbe fa diiwaanu Basan.

²³ Neftali la wax ne ko:

Neftalee ne xéew aku yiw,
biibal barkey Aji Sax ji,
te sowu ba bēj-saalum lay nangu.

²⁴ Aser la wax ne ko:

Yal na Aser gēna barkeel ci doom yi,
ay bokkam baaxe ko,
tãnk yay xuuse ag diw.

²⁵ Weñ ak xàñjar la say xomb di doon,
sa kàttan ànd ak saw fan.

²⁶ Kenn du Yàllay Yesurun!

Keey war asamaan, wallusi leen,
war ay niir, ànd ak darajaam.

²⁷ Yàlla ji sax fàww moo dib rawtu,
pèrègam bi sax dàkk di cēslaay,
moo la dàqal ab noon
ne la: «Jekklil!»

²⁸ Israyil a ngi dëkke xel mu dal,
walu Yanqóoba mee fegu,
di wale réewum pepp ak biññ bu bees,
asamaan it di ko wàcceel ab layam.

²⁹ Ndokklee, Israyil, ana ku mel ni yeen,
askan wu Aji Sax jiy wallu,
di seen kiiraay, di seen ndimbal,
di saamar bi leen di sagal?
Seeni noon a leen di loxal,
te yeen, fa seen gannaaw ya ngeen di
daagoo.

34

Musaa wuyji na

¹ Ba loolu amee Musaa bàyyikoo jooru
Mowab, yéegi tundu Nebo, ba ca collu

tundu Pisga, wa jàkkaarlook Yeriko. Aji Sax ji nag won ko mboolem réew ma, diiwaanu Galàdd ba diiwaanu Dan, ² mboolem diiwaanu Neftali, ak diiwaanu Efrayim ak Manase, mboolem diiwaanu Yuda, ba ca géej ga ca sowu, ³ ak wetu bëj-saalum, ak xuru Yeriko, dëkku tiir ya, ba ca Sowar. ⁴ Aji Sax ji ne ko: «Réew mii laa giñaloon Ibraayma ak Isaaxa ak Yanqóoba, ne leen seen askan laa koy jox. Won naa la ko, ba nga teg ci sa bët, waaye foofa, doo fa teg sa tãnk.» ⁵ Musaa, jaamub Aji Sax ji nag dee foofa ca réewum Mowab, na ko Aji Sax ji tudde. ⁶ Mu rob ko ca xur wa ca réewum Mowab, fa janook Bet Pewor. Kenn xamul nag fu bàmmeelam nekk ba tey jii.

⁷ Musaa amoon na téeméeri at ak ñaar fukk, ba muy faatu, te ay bêtam naqariwul, dooleem jeexul. ⁸ Bànni Israyil jooy nañu Musaa ca jooru Mowab diiru fanweeri fan, fani dëj ba doora mat. ⁹ Fekk na Yosuwe doomu Nuun feese xel mu rafet, ndax Musaa moo tegoon ay loxoom ci kawam, bànni Israyil nag déggal ko, di jéfe na ko Aji Sax ji sante woon Musaa.

¹⁰ Ab yonent lukkeekootul ci Israyil, mel ni Musaa, ma Aji Sax ji xejjoo woon ba naan ko jàkk, mu ne ko jàkk, ¹¹ ba ca mboolem firnde yaak kéemaan ya ko Aji Sax ji yebale woon, ngir mu def ko ca biir réewum Misra, ca Firawna ak jawriñam ñépp, ak ca biir réewam mépp, ¹² ak itam mboolem doole ju màgg ja Musaa wone, ak jëf ju réy te raglu ja mu def, bànni Israyil gépp teg ci bët.

Ruut

Musiba dikkal na kër Elimeleg

¹ Ba njiit ya daan àtte faloo ca Israyil*, jamono jooju dafa amoon xiif ca réew ma. Jenn waay bàyyikoo Betleyem ca diiwaanu Yuda, ànd ak soxnaam ak ñaari doomam yu góor, ñu toxuji ca réewum Mowab†. ² Waa ja Elimeleg la tuddoon, soxnaam di Nawmi, ñaari doomam yu góor ya di Malon ak Kilyon. Ay Efrateen lañu, cosaanoo Betleyem ca Yuda. Ñu agsi ca réewum Mowab, daldi sanc foofa.

³ Gannaaw gi Elimeleg jëkkëri Nawmi faatu, Nawmi des ak ñaari doomam yu góor. ⁴ Nooñu mujj jël ay jigéeni Mowab soxna; kenn ka di Orpa, ka ca des di Ruut. Ba ñu nekkee foofa lu tollu ci fukki at, ⁵ ñoom ñaar ñooñu di Malon ak Kilyon faatu ñoom it, jigéen ja ñàkk noonu ñaari doomam ak jëkkëram. Mu des moom kenn.

Ruut topp na Nawmi

⁶ Ba loolu amee Nawmi fabu, mook goroom ya, ngir jóge réew ma. Booba fekk na mu dégge ca Mowab ne Aji Sax ji xettli na ñoñam, ba may leen ab dund. ⁷ Ma ngay jóge fa mu dëkkoon, ànd ak ñaari goroom ya, ñu tegu ca yoon wa, jëm Yuda.

⁸ Ci biir loolu mu wax ak ñaari goroom, ne leen: «Demleen kay, ñibbileen, ku nekk sa kër yaay. Yal na leen Aji Sax ji baaxe, na ngeen baaxe woon ñi wuutu, te baaxe ma, man itam. ⁹ Yal na Aji Sax ji may ku nekk ci yeen jàmm ca kër jëkkër ja muy amaat.» Ci kaw loolu mu foon leen, ñu ne yikkét jooyoo. ¹⁰ Ñu ne ko: «Déet, yaw kay lanuy àndal dem ca say bokk.»

¹¹ Mu ne leen: «Ñibbileen ngalla, doom, lu ngeen di ànd ak man doye? Ndax dama leena manatee jural ay jëkkër ci sama biir bii? ¹² Ñibbileen rikk doom, demleen, ngir man damay mag, ba wees séy; te su ma ci dese woon yaakaar it, guddig tey jii sax su ma ci séyoon, jur ciy doom, ¹³ mbaa dingeen leen mana xaar, ba ñu mág? Xanaa dungeen toog, baña séy ndax ñoom? Déedéet, doom. Maa leen èpp naqar, man mi Aji Sax ji nattoo nii.»

¹⁴ Ñu dellu ne yikkét, di jooyoo. Orpa foon goroom, tàgtook moom, Ruut nag moom langaamu ko rekk. ¹⁵ Mu ne ko: «Gis nga sa wuju peccorgo waa ngay ñibbi cay bokkam aki yallaam. Àndal ak moom ñibbi kay!» ¹⁶ Mu ne ko: «Bu ma soññ

mukk ci loolu, дума la wacc, дума la dëddu. Foo jëm, fa laa jëm; foo dal, fa laay dal; say bokk di saay bokk; sa Yalla di sama Yalla. ¹⁷ Foo deeye it, ma deeye fa, ñu denc ma fa. Yal na ma Aji Sax ji teg mbugal mu géna tar, ndegam lenn lu moy dee tàggale na maak yaw.» ¹⁸ Nawmi nag gis ni Ruut dogoo ci ànd ak moom, ba tax soññiatu ko. ¹⁹ Ba mu ko defee ñu ànd ñoom ñaar, ba àgg Betleyem.

Naka lañu àgg Betleyem, dëkk ba bépp ne kër-kër, ne képp ndax ñoom. Jigéen ña naa: «Xanaa kii kay du Nawmi?» ²⁰ Mu ne leen: «Buleen ma ne Nawmi (mu firi Boroom mbégte mi), neleen ma Mara (mu firi Boroom naqar wi), ndax Aji Man ji da maa teg naqar wu réya réy. ²¹ Maa demoon ak loxo yu ne gadd, Aji Sax ji délloosi maak loxoy neen. Kon lu ngeen may wooye Nawmi doye, te Aji Sax ji àtte ma ñàkkal? Ndax kat Aji Man ji ci njàqare la ma tàbbal!»

²² Noonu la Nawmi jógee Mowab, ñibbsi, ànd ak Ruut, gorob Mowabeenam ba. Ñu agsi Betleyem, fekk ngóobum lors ma di tàmbali.

2

Ruut gis na ku ko baaxe

¹ Nawmi nag amoon na wóllérey jëkkëram, di góor gu ñuy wax Bowas, bokk ci langu Elimeleg, di ku am daraja.

² Mu am bés Ruut, ndawas Mowab sa, ne Nawmi: «Tee maa dem tool, ndax ma gis boog ku ma laaye biir, ma mana foraatu gub yu des ca gannaawam?» Mu ne ko: «Waaw, demal, doom.» ³ Mu dem ca tool ya, topp ñay góob, di foraatu. Yalla-wooyalla, tool booba di toolu Bowas ma bokk ak Elimeleg.

⁴ Nes tuut Bowas ne jalañ, jóge Betleyem. Mu nuyook ñay góob ne leen: «Jaagéenjëf waay, yal na Aji Sax ji ànd ak yeen.» Ñu fey ko ne ko: «Jaajëf sa wàll, yal na la Aji Sax ji barkeel.» ⁵ Mu laaj ka jiite ngóob ma, ne ko: «Ndaw sii fu mu bokk?» ⁶ Mu ne ko: «Mooy waa Mowab, ba Nawmi àndal, jóge Mowab, ñibbsi. ⁷ Dafa ñaan ñu may ko, mu topp ci ñuy góob, ba saatu ci gub yi ñu rotle. Ci suba la ñew di liggéey ba nэгèni; noppluwul lu moy diir bu gàtt ci mbaar mi.»

⁸ Bowas nag ne Ruut: «Doom, ma ne, bul saatuji ci beneen tool bu dul bii. Bul wees fii. Toogal fii ci samay surga yu jigéen. ⁹ Xoalal bu baax yi xale yu góor yiy góob, te nga topp fa jigéen ñi. Dinaa wax xale yu góor yi ne leen buñu la sonal. Soo maree, demal naan ca njaq ya góor ñi duy.»

* 1:1 1.1 Booba buur amagul woon ca Israyil. † 1:1 1.1 réewum Mowab ak réewum Israyil ñoo feggoo woon, waaye seen diggante neexul woon.

¹⁰ Naka la wax loolu, mu sujjóot, dëpp jëëm fa suuf, ne ko: «Xanaa su la ne-exoon de, doo ma nemmiku sax, ndax ab doxandéem laa, waxatuma nga di ma laaye nii biir!» ¹¹ Mu ne ko: «Dégg naa bu baax li nga defal sa goro lépp, te fekk sa jëkkër faatu, ak ni nga wone gannaaw sa ndey ak sa baay ak sa réewum cosaan, ba ñëw dëkksi ci biir xeet woo xamuloon démb ak bëkk-démb. ¹² Yal na la Aji Sax ji fey sa jëf. Aji Sax ji Yállay Israyil, ji nga laqusi ci kiiraayam, yal na la yool, ba mu mat sëkk.»

¹³ Ruut ne ko: «Teral nga ma de, sang bi. Yaa ngi may laaye biir, ndaxte dëfal nga ma, wax ma lu seral sama xol, te moona say surga yu jigéen yi sax a ma gën.»

¹⁴ Ba añ jotee, Bowas ne Ruut: «Kaay, sàkk ci mburu mi ak ñeex mi.» Mu daldi toog, feggook ñay góob; Bowas may ko mbool, mu lekk ba suur, ba desal.

¹⁵ Naka la jóg, di saatuji, mu sant ay surgaam, ne leen: «Bu doon for ci biir sabaar yi sax, buleen ko ñàkke kersa. ¹⁶ Roccil-leen koo roccil ci takk yi, bàyyi ko mu for, te buleen ko gëdd.»

¹⁷ Ba loolu amee, Ruut di for ba ngoon jot, mu bàcc la mu for ci peppum lors, mu fees saaku bu ndaw. ¹⁸ Mu yóbbu ko ba ca dëkk ba, goroom gis la mu for, mu daldi yebbi la desoon ca añam, jox ko. ¹⁹ Goro ba ne ko: «Foo fore lii lépp tey? Ban tool nga doon liggéeye sax? Ki la nemmikoo nii de, yal na barkeel!» Ruut nag wax goroom ka mu doon liggéeye toolam, ne ko: «Ka ma doon liggéeye toolam de, Bowas lañu koy wax.»

²⁰ Nawmi ne Ruut: «Yal na Aji Sax ji barkeel Bowas, moom mi saxoo sàmm ngoram digganteem ak nit, muy dund ak mu dee!» Mu teg ca ne ko: «Kooku ku nu jege la; bokk na ci ñi am sañ-sañu jootaat* nu.» ²¹ Ruut ndawas Mowab sa ne: «Moom de da ma ne sax, ma topp ciy surgaam, ba ngóobam mépp daj.» ²² Mu ne ko: «Waaw kay, doom, toppal ci surgay Bowas yu jigéen rekk, bala ñu laa soxore ci beneen tool.» ²³ Noonu la Ruut ànde ak surgay Bowas yu jigéen, topp ci ñoom di for, ba keroog ngóobum lors baak bele ba, lépp jeex. Mu toog nag ak goroom.

3

Ruut gise na ak Bowas

¹ Gannaaw gi Nawmi, gorob Ruut ba, dafa wax Ruut ne ko: «Doom, tee ma laa sàkkal fooy ame jàmm, nga féete fa?

² Bowas mii nga nekkoon aki surgaam yu jigéen, du mbokk lenge la? Guddig tey jii kat Bowas dina jériji peppum lors ca dägga ja. ³ Kon nag sangul, solu ba jekk, xeeñu, dem ca dägga ja. Bu ko feeñu nag te lekkul, ba naan ba noppi. ⁴ Bu demee ba téd, nanga nemmiku fa mu téd. Su ko defee nga àgg ba foofa, muri fa féeteek tànki ya, téd. Moom dina la xamal li nga wara def.» ⁵ Mu ne ko: «Baax na, loolu rekk laay def.»

⁶ Ba mu ko defee mu dem ca dägga ja, daldi def la ko goroom wax lépp. ⁷ Bowas lekk, naan ba xolam sedd, doora dem téd ca peggub jalu pepp ba. Ruut jegesi ndànk, muri fa féeteek tànki yi, téd.

⁸ Ñu dem ba xaaju guddi, góor gi jekki ne bërét, toog, yem ci ndaw si téd fi féeteeki tànkam. ⁹ Mu ne: «Kii ku mu?» Mu ne: «Man a Ruut, sang bi. Yiire ma sa mbubb, ndax mbokk nga, te sañ nga maa jootaat.»

¹⁰ Mu ne ko: «Yal na la Aji Sax ji barkeel, doom! Jiwati nga bokk gi ngor lu gënatee rafet. Ndax su la neexoon, nga topp ci xale yu góor yi, ñu am ak ñu ñàkk. ¹¹ Léegi nag neel tekk rekk, doom. Loolu nga ñaan lépp, dinaa la ko defal, ndax waa dëkk bi bépp xam nañu ne jigéen ju jambaare nga. ¹² Da di nag, dëgg la sax, mbokk laa mu la mana jootaat, waaye menea mbokk mu la mana jootaat a ngi fi, te moo ma ci gëna yey. ¹³ Dangay fanaan fii. Bu èllégee, su fekkee ne nangu naa def warugaram ci yaw, na ko def, baax na. Su nanguwul nag, dogu naa ci Aji Sax ji, Kiy Dund, man dinaa ko def. Tédal fii rekk, ba èllég.»

¹⁴ Ba loolu amee mu téd fa féeteek tànki Bowas, ba njël jot, mu jóg balaa waxtu wu nit mana xàmmi moroomam. Booba Bowas bugguloon ñu xam ne ndaw si ñëw na ci dägga ji. ¹⁵ Mu ne ko: «Tállalal malaan mi nga sàngoo, te taye ko bu baax.» Mu tàllal malaan ma, mu sotti ca juróom benni natti peppum lors, yen ko ko, doora dem ca dëkk ba*.

¹⁶ Naka la àgg ca goroom Nawmi, mu ne ko: «Doom, koo doon nag?!» Ruut nettali ko na góor gi def ak moom yépp, ¹⁷ daldi cay teg ne ko: «Juróom benni natti lors yii, moo ma ko may, ne ma duma dellu loxoy neen ca sama goro.» ¹⁸ Mu ne ko: «Yaw kay neel tekk fii rekk, doom, ba xam nu mbir miy mujje. Waa jii du toog te topptoowul mbir mii tey, ba mu leer.»

4

Bowas lal na pexe

* **2:20** 2.20 jootaat: bu góor masaana dee te amul doom, mbokkam mi ko gëna jege mooy jël jabaram, ngir jurul ko ku ko donn. Kooku mooy jootaat suufi mbokkam mi dee, jënd ko, ngir alal ji des ci biiri bokkam. * **3:15** 3.15

Manees naa dëgge nii itam: yen ko ko, mu ñibbi ca dëkk ba. * **4:1** 4.1 ca bunt dëkk ba booy duggsi, fa la pénc ma nekkoon.

¹ Ci biir loolu Bowas dem ba ca bunt dëkk ba*, toog fa. Noonu rekk mbokk ma mu waxoon ne su dee jootaat, moo ko ci gêna yey, daldi fay jaare. Mu woo ko ne ko: «Diwoo, kaay fii, toog tuuti.» Mu dikk, toog. ² Bowas woo fukki magi dëkk ba, ne leen: «Toogleen.» Ñu toog.

³ Mu wax ak mbokk ma yeyoo sañ-sañu jootaat ba, ne ko: «Ab làccu suuf bu sunu mbokk Elimeleg moomoon la, Nawmi di ko jaay. Mooy ka jóge réewum Mowab, ñibbsi. ⁴ Man nag dama noon war naa la koo yegge, te laaj la ndax danga koy jënd ci kanam magi dëkk bi ak ñi fi toog. Soo béggee def sa warugaru jootaat, jëndal. Soo buggul, wax ma, ma xam. Ndax kat kenn gênu la cee yey, te maa topp ci yaw.» Mu ne ko: «Damay jënd kay!» ⁵ Mu ne ko: «Áa bés boo jëndee suuf si ci Nawmi nag, yaay denc Ruut ndawas Mowabeen, sa doon soxnas ndem-si-yàlla si, ndax nga mana lawal askanam, ba du fey, boole ci sàmmal leen seen alal.» ⁶ Mu ne: «Kon de дума mana def sama warugar, ndax sama alal a ciy yàqoo†. Fabal boog sama sañ-sañu jootaat, ndax дума ko mana jariño.»

⁷ Booba Israyil, jamono yu jëkk yooya, mbirum njëndum jootaat mbaa ag weccoo, la ñu ko baaxoo dogale ci diggante nit ak moroom ma, nii la: kii day summi dàllam, jox kee. Noonu lees daan yoonale ag jëflante ca Israyil. ⁸ Moo tax ba boroom sañ-sañu jootaat ba waxee Bowas, ne ko: «Jënd ko yaw,» dafa daldi summi dàllam, dogale ko mbir ma.

⁹ Ba mu ko defee Bowas wax ak mag ña ak ñeneen ña ñépp, ne leen: «Seedeleen bésuub tey ne jënd naa ci Nawmi mboolem alalu Elimeleg ak mboolem alalu Kilyon ak Malon, ¹⁰ boole ci Ruut, ndawas Mowab, sa doon soxnas Malon, muy sama soxna. Su ko defee ma mana lawal askanam, ba du fey, boole ci sàmmal leen seen alal, ba turu Elimeleg du réer ci biiri bokkam te du raaf ci limeefu dëkk bi. Yeena ko seede bésuub tey jii.»

¹¹ Waa pénc ma mépp ak mag ña nag ne ko: «Noo ko seede. Yal na Aji Sax ji def ndaw siy séysi sa kër, mel ni Rasel ak Leya‡, ñoom ñaar ñi giir waa kër Israyil gépp. Yal nanga tekki ci digg Efrata te amu tur ci Betleyem. ¹² Njaboot gu la Aji Sax jiy may ci ndaw sii, yal na ñu lawal saw askan, ba mu mel ni askanu Peres, ma Tamar am ak Yuda.»

Yàlla barkeel na séy ba

† 4:6 4.6 Su waa ji defoon warugaru jootaatam, ba denc Ruut, kon moom mooy yor Nawmi ak Ruut ak doom ju ñu am ci séy bi, te it ay doomi boppam duñu donn suufas Elimeleg. Doom ji muy am ak Ruut moo koy donn. Loolu moo doon aaday bànni Israyil. ‡ 4:11 4.11 Rasel ak Leya ñooy doon soxnay Yanqóoba. § 4:18 4.18 Peres taawu Yuda la, di sētu Yanqóoba.

¹³ Ba mu ko defee Bowas jël Ruut. Gannaaw gi mu dëkkoo ko; Aji Sax ji may ko mu ëmb, ba mujj am doom ju góor. ¹⁴ Jigéen ña ne Nawmi: «Sant Aji Sax ji, moom mi la xañul mbokk mu la jootaat nii tey! Yal na xale bi di ku amu tur ci Israyil gépp. ¹⁵ Dina la leqli, dimbali la keroog ba ngay mag, ndax sa goro bi la bégge te dàqal la juróom ñaari doom yu góor, moo ko jur.»

¹⁶ Nawmi nag fab xale bi, taf ko ci dënnam. Gannaaw loolu moo ko doon topptoo. ¹⁷ Jigéeni gox ba nag naa: «Waay waay Nawmi am na doom ju góor!» Ñu tudde xale bi Obedd. Obedd moo jur Yese, miy baayu Daawuda.

¹⁸ Kon lii mooy askanu Peres§ ci wàllu geño: Peres moo jur Esron, ¹⁹ Esron, Ram; Ram, Aminadab; ²⁰ Aminadab, Nason; Nason, Salma; ²¹ Salma, Bowas; Bowas, Obedd; ²² Obedd, Yese; Yese, Daawuda.

Samiyel di téere bu jëkk bi Lii mooy jaar-jaari Samiyel

Aana ñaan na doom

¹ Amoon na genn góoru Cuufeen gu dëkkoon Raama*, ga ca tundi Efrayim. Nu di ko wax Elkana, baayam di Yerowam. Yerowam, Eliyu mooy baayam; Eliyu, Towu mooy baayam; Towu, Cuuf mu Efrayim mooy baayam. ² Elkana amoon na ñaari soxna. Kenn ka di Aana, ka ca des di Penina. Penina amoon na ay doom, waaye Aana amul woon doom. ³ At mu nekkaaan Elkana day jóge dëkkam, dem Silo, mággaali fa Aji Sax ji Boroom gàngoori xare yi, sarxalal ko ca Silo. Foofa la Ofni ak Fineyas, ñaari doomi Eli yu góor ya doonoon sarxalkati Aji Sax ji. ⁴ Bés bu Elkana daan sarxal, day jox soxnaam Penina, mook doomam yépp, góor ak jigéen, ci yàppu sarax si. ⁵ Waaye Aana la daan beral loxo ca sarax sa, ndax cofeelam ci moom, doonte Aji Sax ji mayul Aana doom. ⁶ Wujjam nag dëkke koo ñaawal, ngir naqaral ko ndax la ko Aji Sax ji mayul doom. ⁷ At mu nekkaaan noonu la. Saa yu Aana demee kër Aji Sax ji, noonu la koy ñaawale, ba muy jooy, du nangoo lekk. ⁸ Elkana jëkkër ja di ko wax ne ko: «Aana, looy jooy, ak lu la tee lekk? Ñàkk doom a la tax ne yogg nii? Maa ngii! Dama laa gènalul fukki doom yu góor?»

⁹ Mu am bés, gannaaw ba ñu lekkee ba naan ca seen saraxu cant, foofa ca Silo, Aana jóg. Booba Eli sarxalkat baa nga ca toogu ba, feggook jënu buntu jaamookaayu Aji Sax ji. ¹⁰ Aana dem ba foofa, ànd ak naqaru xolam, di ñaan ci Aji Sax ji, tey jooy jooy yu metti. ¹¹ Ci biir loolu mu xas aw xas, daldi ne: «Éy Aji Sax ji Boroom gàngoori xare yi, Sang bi, soo nemmiku woon ba nemmiku njàgare jii ma nekke, bàyyi ma xel, bañ maa fátte, ba may ma doom ju góor! Kon déy, maa ko sédde Aji Sax ji, giiru dundam gépp, saatus watukaay du jaar ci boppam mukkt!†.»

¹² Ñaanu Aana ca Aji Sax ji nag yàgg, Eli di ko seetlu. ¹³ Booba Aanaa ngay ñaan ca xelam, gémminñ ga rekk ay yèngu, waaye déggeesul baatam. Eli foog ne dafa màndi, ¹⁴ ne ko: «Foo àppal sa màndite mi? Doxal, giifali sa ñoll wi!»

¹⁵ Aana ne ko: «Du loolu de, sang bi. Dama di jigéen ju ànd ak naqaru xol,

waaye du biiñ, du leneen luy màndee lu ma naan. Dama doon diis Aji Sax ji sama tiisu xol. ¹⁶ Bu ma jàppe jigéen ju bon, sang bi. Bare naqar aku tiis a ma tax di ñaan nii, booba ba léegi.» ¹⁷ Eli ne ko: «Kon nag demal ak jàmm, yal na la Yàllay Israyil nangul li nga koy ñaan.» ¹⁸ Aana ne ko: «Amiin, sang bi, yal nanga ma yàgga yéwéne.» Ba mu ko defee Aana dem yoonam, doora mana lekk, kanam ga leer.

¹⁹ Ba loolu amee Elkana ak njabootam teela xëy ca èllëg sa. Ñu mággaal Aji Sax ji, ba noppi bàyyikoo fa, ñibbi seen kër ca Raama.

Lu jëm ci juddub Samiyel ak ngoneem

Gannaaw gi Elkana dëkkoo soxnaam Aana, Aji Sax ji nag bàyyi Aana xel. ²⁰ Aana mujj èmb ca ndeetel at ma. Gannaaw gi mu am doom ju góor, tudde ko Samiyel (mu firi Yàlla dégg na), ndax da ne: «Maa ko ñaan Aji Sax ji.»

²¹ Gannaaw gi Elkana ànd ak njabootam gépp dellu Silo, ngir defali Aji Sax ji saraxu at ma, boole ca sarax bu mu xasoon ne dina ko def. ²² Waaye Aana demul, ndax dafa wax jëkkër am ne ko: «Gannaaw bu xale bi feree laa koy yóobu, sédde ko Aji Sax ji, mu des foofa benn yoon.» ²³ Elkana, jëkkër ja, ne ko: «Kon baax na, defal noonu nga bëgg. Toogal fii yaak moom, ba feral ko ba noppi. Yal na Aji Sax ji sottaal la mu waxoon rekk.» Ndaw sa nag des ca Raama, di nàmpal doomam, ba feral ko.

²⁴ Naka la feral xale bi, ànd ak moom, muy lu tuut, mu yóobu ko ca kër Aji Sax ji ca Silo. Mu yóobbaale ñetti yëkk†, ak benn efab sunguf, yemook fukki kilo, ak mbuusu biiñ. ²⁵ Ba mu ko defee ñu rendi yëkk wi, ba noppi indi xale bi ci Eli. ²⁶ Aana ne ko: «Sang bi, baal ma de waaye giñ naa, nga fekke, maay ndaw si taxawoon fii ci sa wet, di ñaan ci Aji Sax ji. ²⁷ Xale bii moo ma taxoon di ñaan, te Aji Sax ji defal na ma sama dagaan. ²⁸ Léegi nag man maa ko sédd Aji Sax ji: giiru dundam lees ko sédd Aji Sax ji.» Ba loolu amee ñu sujjóotal Aji Sax ji foofa.

2

Aana sant na

¹ Ci kaw loolu Aana ñaan ne: «Sama xol a ngi bége Aji Sax ji, ci Aji Sax ji laa ame doole. Maa am tontal noon yi, nde maa bannexoo sag wall.

² «Kenn sellul ni Aji Sax ji,

* 1:1 1.1 Raama mooy Raamatayim ba tey. † 1:11 1.11 Njañ lu ñu dul wat, moom lañu daan màndargaale nit ku ñu sédde Aji Sax ji. ‡ 1:24 1.24 ñetti yëkk: am na ñu naan yëkku ñetti at.

amuloo dend moos,
cêslaay melul ni sunu Yàlla!

³ «Buleen ñalñaleeti, di damook a damooti,

bu reewand gënne seen gëmmiñ,
Aji Sax jeey Yàlla ji xam lépp,
te mooy natt jéfi nit.

⁴ Fittu jambaar damm,
néew-doole yi sol kàttan.

⁵ Ña reggoon, bindu, di dunde,
ña xiifoon, noppee liggéey.
Jigéen ju njur tē woon jur juróom yaar,
ku jur góori góor jeex tàkk.

⁶ «Aji Sax jeey rey, di dundal,
mooy wacce jaam njaniiw, gënnee ko ca.

⁷ Aji Sax jeey xañe, di maye,
di detteel, di kaweel.

⁸ Mooy yékkatee ku ndóol ci suuf,
jële ku ñàkk ci mbuubit,
boole leen dēj ca garmi ya,
sédde leen jataayu teraanga.

«Aji Sax jee moom kenuy suuf,
samp ci àddina.

⁹ Mooy sàmm jéegoy wólléereem,
ku bon sànkoo biir lëndëm,
nde doole mayewul ndam.

¹⁰ Aji Sax ji, ñi koy xeex ay rajaxoo,
kaw asamaan lay dēnoo ci seen kaw.
Mooy mbugal àddina, ba mu daj,
di kàttanal buuru ñoñam,
di dooleel ki mu fal.»

¹¹ Gannaaw ba loolu wéyee Elkana ñibbi
këram ca Raama.

Ngóor sa moom, des ca Silo, di liggéeyal
Aji Sax ji, fa kanam Eli sarxalkat ba.

Lu jëm ci doomi Eli

¹² Doomi Eli yu góor ya nag def nit ñu
bon ñu faalewul Aji Sax ji.

¹³ Lii moo di li sarxalkat yooyu
tàmmoonaa def ak askan wi. Saa yu nit
indi waan juru sarax, bu ñuy togg yàpp wi,
surgab sarxalkat bi day yàbb roqub ñetti
càq, dikk, ¹⁴ capp ko ci biir, muy ndab lu
tell, mbaa kawdir, mbaa cin, mbaa mbana
— lu roq ba gënne rekk, mu jël, sarxalkat
bi fëetewoo. Noonu lañu daan def ak
mboolem niti bànni Israyil, ña daan ñew
foofa ca Silo. ¹⁵ Rax ci doli bala ñoo lakk
nebbon bi* sax, surgab sarxalkat bi day
dikk, ne nit kiy sarxal: «Joxal sarxalkat bi
ci yàpp wi, mu saaf. Du nangu nga jox ko
yàpp wu ñor, yàpp wu xonq rekk.» ¹⁶ Su
ko nit ki nee: «Xanaa dees na jékka lakk
nebbon bi ba mu jeex, nga doora sàkk lu
la neex?» Mu ne ko: «Mukk! Léegi nga
ma ciy jox, lu ko moy doole laa koy jële.»

¹⁷ Bàkkaaruu doomi Eli yi réyoon na lool fi
kanam Aji Sax ji, ndax dañu daan teddadil
saraxu Aji Sax ji.

¹⁸ Ci biir loolu ngóor sa Samiyel moom,
ma ngay liggéeyal Aji Sax ji, sol xar-
sànnim lëewam.

Lu jëm ci waa kër Samiyel

¹⁹ Mbubb mu ndaw nag la ko yaayam
daan ràbbal, yóbbul ko at mu jotaan, buy
ànd ak boroom kéram sarxali saraxu at
ma. ²⁰ Ci biir loolu Eli daan na ñaanal
Elkana ak soxnaam, bala ñoo ñibbi, ne:
«Yal na la Aji Sax ji may kuutaay ak sa
soxna sii, ñu wuutu ki mu sédd Aji Sax
ji.» ²¹ Aji Sax ji nag dikke Aana aw yiw,
mu amaati ñetti doom yu góor ak ñaar ñu
jigéen.

Ci biir loolu Samiyel moom, ma ngay
màgg fa wetu Aji Sax ji.

Eli artu na ay doomam

²² Eli nag mujj na di mag lool. Ba mu
yégee mboolem li doomam yu góor yi def
ak Israyil gépp, bay tédde sax jigéen ñiy
liggéey ci bunt xaymab ndaje mi, ²³ da
leena wax, ne leen: «Ana lu waral ngeen
di def jéf jii? Maa dégge ci askan wépp jéf
ju bon jii ngeen nekke. ²⁴ Aa! Xale yi, coow
li ma dégg, muy law ci biir ñoñi Aji Sax ji,
rafetul de! ²⁵ Su nit ki tooñee moroomu
nitam, Yàllaay àtte; waaye su dee Aji Sax
ji la nit ki tooñ, ana ku koy àtte?» Wax
jooju nag taxul ba tey ñu déggal seen baay.
Booba fekk na Aji Sax ji nam leena rey.

²⁶ Ci biir loolu yépp, ngóor sa Samiyel di
màgg, neex Aji Sax ji, neex nit ñi.

Nitu Yàlla rëbb na Eli

²⁷ Mu am bés genn góoru Yàlla dikk
ci Eli, ne ko: «Aji Sax ji dafa wax ne:
“Maa feeñu woon ci lu leer sa waa kër
baay ba ñu nekkee Misra, di moomeelu
kër Firawna. ²⁸ Maa tanne sa baay ci
digg giiri Israyil yépp, ngir mu doon sama
sarxalkat, di yéeg ci sama sarxalukaay, di
taal cuuraay, sol xar-sànni mi, janook man.
Maa sédd it sa waa kër baay mboolem
saraxi sawara yu bànni Israyil. ²⁹ Lu tax
ngeen di teddadil sama saraxi rendi ak
yeneen sarax yi ma saantaane ci mækkaan
mi? Lu waral ngay teral sa doom yi
teraanga joo ma joxul, ba ngeen di yafloo li
gën ci mboolem saraxi Israyil sama ñoñ?”

³⁰ Kon nag kàddug Aji Sax jee, Yàllay
Israyil: “Maa waxoon déy ne, sa waa kër
ak sa waa kër baay ñooy doxe fi sama
kanam, di ma liggéeyal ba fàww.” Léegi
nag, kàddug Aji Sax jee: “Loolu jomb naa
ko tey. Ñi ma teral laay teral; waaye ñi
ma teddadil, dees na leen tuutal. ³¹ Te

* 2:15 2.15 nebbon: nebbon ak deret, yoon mayewul woon ñu lekk ko. Seetal ci *Sarxalkat yi* 3.16-17.

kat ay bés a ngi ñèw, maay dagg sa doole, dagg sa dooley waa kër baay, ba deesatul mäggate ci sa kër. ³² Njàqare ngay saxoo ci sama dëkkuwaay. Israyil dina baaxle moos, waaye du tax kenn mäggate sa kër muk. ³³ Dina am ku bokk ci yaw ku ma dul dagge ci liggéey bu jëm ci sama sarxalukaay, waaye maa lay joojloo, ba nga ñàkki bët, teg la njàqarey xol, te mboolem ñu yokku ci sa kër, seen digg doole lañuy deeye. ³⁴ Li nga ciy def ab takk mooy liy dikkal Ofni ak Fineyas, sa ñaari doom yu góor yii: Benn bés lañuy bokk dee ñoom ñaar ñépp. ³⁵ Te it maay tabbal sama bopp sarxalkat bu wóor boo xam ne sama nammeelu xol ak sama bëgg-bëggu bakkan lay jéfe. Maa koy sampal kër gu wóor, muy doxe fi kanam ki ma fal ba fàww. ³⁶ Su ko defee mboolem ku des ci sa waa kër dina ko sujjóotalsi, ngir as xaalis mbaa as dogu mburu, naan ko 'Ngalla sas ma lann ci liggéeyu carxal gi, ndax ma am as dogu mburu su ma lekk'."»

3

¹ Ngóor sa Samiyel nag moom, di liggéeyal Aji Sax ji fi kanam Eli.

Yàlla def na Samiyel yonent

Kàddug Aji Sax ji néewoon na ca yooya jamono, peeñu mu leer it tumuránke woon na.

² Mu am bés Eli tédd fa muy tédd naka jekk, fekk bët ya naqari, ba daanaka gisatul. ³ Booba làmpu jaamookaayu Yàlla bi feyagul, te Samiyel a ngi tédd ci biir jaamookaayu Aji Sax ji, fi gaalu Yàlla gi nekk. ⁴ Aji Sax ji woo Samiyel, mu ne: «Maa ngi», ⁵ daldi daw ba ca Eli, ne ko: «Maa ngi, du yaa ma woo?» Eli ne ko: «Wootewuma de, dellul téri.» Mu dellu tédd.

⁶ Aji Sax ji dellu woo Samiyel, Samiyel jóg, dem ba ca Eli ne ko: «Maa ngi, du yaa ma woo?» Eli ne ko: «Wootewuma de doom, dellul téri.» ⁷ Booba Samiyel xamagul woon Aji Sax ji, te kàddug Aji Sax ji dikkalagu ko woon.

⁸ Aji Sax ji wooti Samiyel ñetteel bi yoon, Samiyel jógati, dem ba ca Eli ne ko: «Maa ngi, du yaa ma woo?» Eli nag xam ne Aji Sax jey woo xale bi. ⁹ Mu ne Samiyel: «Demal téri, bu la wootee, nee ko: «Aji Sax ji, maa ngi lay déglu, Sang bi, waxal.» Samiyel dellu tédd fa muy tédd.

¹⁰ Ba mu ko defee Aji Sax ji dikk taxaw, wooti ko na woon, ne ko: «Samiyel, Samiyel.» Samiyel ne: «Maa ngi lay déglu,

Sang bi, waxal.» ¹¹ Aji Sax ji ne Samiyel: «Maa ngii déy, di waja def ci digg bànni Israyil, mbir muy buur noppi mboolem ku ko dégg. ¹² Bésuub keroog ma matal ci Eli mboolem lu ma waxoon ne mooy dal waa kërram, ndoorte la ba ca muj ga. ¹³ Waxoon naa ko ne ko dinaa teg waa kërram mbugal mu sax dàkk, ndax ñaawtéef gu ay doomam nekke, di ñàkke Yàlla teggin, mu yég ko te jubbantiwu leen. ¹⁴ Looloo waral ma giñal waa kër Eli, ne du am muk benn saraxu jur mbaa beneen sarax bu leen mana jot ci seen ñaawtéef.»

¹⁵ Ci kaw loolu Samiyel tédd ba ca suba sa, mu tiji bunti kër Aji Sax ji, waaye ñemewula nettali Eli peeñu ma. ¹⁶ Eli nag woo ko ne ko: «Samiyel doom, ana nga?» Samiyel ne ko: «Maa ngi.» ¹⁷ Eli ne ko: «Kàddu gi mu la wax, lu mu doon? Bu ma nèbbu kay. Soo ma nèbbee lenn ci li mu la wax, yal na la Yàlla teg naqar wu géna tar.» ¹⁸ Samiyel wax ko lépp, nèbbu ko ca dara. Eli ne: «Mooy Aji Sax ji. Li ko soob, na ko def.»

¹⁹ Ci kaw loolu Samiyel di mäg, Aji Sax ji ànd ak moom, waccul genn kàddug Samiyel, mu fanaan àl. ²⁰ Noonu la Israyil gépp ràññee, la dale Dan ca bëj-gànnar ba ca Beerseba ca bëj-saalum, ne Samiyel taxaw na taxawaayu yonentu Aji Sax ji. ²¹ Aji Sax ji nag wéye koo feeñu ca Silo. Ci kàddug Aji Sax ji la ko Aji Sax ji daan feeñoo ca Silo.

4

Nangu nañu gaalu Yàlla ga

¹ Kàddug Samiyel nag di dikkal Israyil gépp.

Ci biir loolu bànni Israyil dem, dajee k waa Filisti ngir xare. Ña nga dal fa feggook Eben Eser, waa Filisti dal ca Afeg. ² Waa Filisti làng-déral Israyil, xare ba jib. Israyil daanu fa kanam waa Filisti, waa Filisti rey ca seeni làng lu jege ñeenti junni ca toolub xare ba. ³ Ba mbooloo ma ñibbee ca dal ba, magi Israyil ña ne: «Lu waral Aji Sax ji dumalu nu tey fi kanam waa Filisti? Nan jëleji gaalu kóllèrey Aji Sax ji fa Silo; na dikki ci sunu biir, ba musal nu ci sunuy noon.»

⁴ Ci kaw loolu mbooloo ma yónnee ca Silo, ñu jëli gaalu kóllèrey Aji Sax ji Boroom gàngoori xare yi, Ki toog fi tiim ñaari malaakay serub yi*. Foofa ca Silo la Ofni ak Fineyas, ñaari doomi Eli yu góor ya, nekkoon ak gaalu kóllèrey Aji Sax ja.

* 4:4 4.4 serub ya: baatu ebrè la. Ay malaaka lañu yu bokk ak Yàlla jataay. Gaalu kóllèrey gu sell ga, ñaari serub yu ñu tégge wurus lañu teg ca kawam, ñu tiim ko, seeni laaf tàllalu, di saamandaay ngàngunem buur. Loolu di wone ne Yàlla Aji Sax jaa nga fa teew, na mu teewe ca kaw asamaan, serub ya yéew ko. Yàlla ci boppam nag kenn jëmmalu ko fa, na ñu jëmmale serub ya ñu tégge.

⁵ Ba gaalu kóllérey Aji Sax ji duggsee ca dal ba, Israyil gépp a xaacoondoo, ba suuf say riir. ⁶ Waa Filisti dégg coow la, ne: «Waaw, coow lu réy loolu ca dalub Ebré ya, lu mu doon?»

Ba waa Filisti yégee ne gaalu kóllérey Aji Sax ja dugg na ca biir dal ba, ⁷ tiitaangee leen jàpp, ñu ne: «Am na yàlla ju dugg ca biir dal ba! Wóoy, ngalla nun! Nde guléet tey lu mel nii am!» ⁸ Wóoy ngalla nun! Ku nuy musal ci jii yàlla ju bare doole. Yàlla jii moo dumaa woon waa Misra xeeti mbugal yu nekk, ca màndin ma. ⁹ Dégèrluleen déy te diy góor, yeen waa Filisti, nde lu ko moy ngeen doon jaami Ebré yi, na ñu nekke woon sunuy jaam. Góor-góorluleen boog te xeex.»

¹⁰ Waa Filisti nag di xare, ba bànni Israyil daanu: ku nekk daw jëm xaymaam. Jéll ba réy na lool; fanweeri junniy xarekat yuy deme tãnk. ¹¹ Gaalu Yàlla ga, ñu jël; Ofni ak Fineyas, ñaari doomi Eli yu góor ya, dee.

Mbugal ma topp na waa kër Eli

¹² Ba mu ko defee jenn waay ju bokk ci giirug Beñamin, dawe ca làngu xare ba ca Silo ci benn bés bi. Mu agsee yére yu xottiku ak bopp bu fees ak suuf, di ko tiisloo. ¹³ Naka la agsi, yem ca Eli, mu toog ca toogoom ca peggu yoon wa, di séentu, ndax booba naw gaa ngay récc, ngir tiitaange ca gaalu Yàlla ga. Naka la waa ja duggsi ca dëkk ba, ba wax la xew, dëkk ba bépp yuuxoondoo.

¹⁴ Eli dégg coow la, ne: «Riir moomu lu mu?» Waa ja gaaw dikk, wax ko Eli. ¹⁵ Booba Elee ngi ci juróom ñeent fukki at ak juróom ñett (98), bët yi ne xóll te gisatul dara. ¹⁶ Waa ja ne ko: «Man mii maa jóge ca toolub xare ba. Maa dawe làng ga tey jii.» Eli ne ko: «Doom, lu xew?» ¹⁷ Ndaw la ne ko: «Bànni Israyil a daw, won waa Filisti gannaaw. Jéll bu réy la sunu mbooloo ma daanu, sa ñaari doom ya, Ofni ak Fineyas dee nañu, te it gaalu Yàlla ga, jël nañu ko.» ¹⁸ Naka la tudd gaalu Yàlla ga rekk, Eli xàwwikoo ca toogu ba, daanoo njaaxaanaay, dal ca bunt dëkk ba, loos wa damm, mu dee, ndax booba day mag mu ànd ak yaramam. Eli jiite na Israyil ñeent fukki at.

¹⁹ Goroom, jabaru Fineyas nag jigéenu wérul la woon te booba mu ngi waaja wasin. Naka la dégg ne jël nañu gaalu Yàlla ga, te baayu jëkkëram ak jëkkëram dee nañu, mu daldi sukk wasin. Waaye fekk na mititu matam jeexal dooleem. ²⁰ Ba loolu amee muy waaja dee, jigéen ña ko doon taxawu ne ko: «Na sa xel dal, ndax doom ju góor nga am.» Waaye àduwul, teewluwul. ²¹ Ndaw sa nag

tudde gone gi Ikabot (mu firi Ana leer ga?) te naan: «Leer ga dëddu na Israyil, dem ngallo.» Ndax la ñu nangu gaalu Yàlla ga ak la goroom ak jëkkëram dee. ²² Mu ne: «Leer ga kay dëddu na Israyil, dem ngallo, ndegam jélees na gaalu Yàlla ga kay!»

5

Gaalu Yàlla ga jaaxal na Filisti

¹ Ba waa Filisti nangoo gaalu Yàlla ga, Eben Eser lañu ko jële, yóbbu ko seen dëkk Asdodd. ² Ñu dugal gaal ga ca seen biir kër tuur ma ñu naan Dagon, teg ko ca wetu jëmmu Dagon ja. ³ Waa Asdodd teela xéy ca èllég sa, fekkuñu lu moy jëmmu Dagon ja, mu daanu ba dëféenu fa suuf, fa kanam gaalu Aji Sax ji. Ñu yékkati jëmmu Dagon ja, delloo ko fa mu taxawoon. ⁴ Ca èllég sa, ñu teela xéyati, fekkuñu lu moy jëmmu Dagon ja daanu ba dëféenu fa suuf, fa kanam gaalu Aji Sax ji. Bopp baak cati loxo ya damm, ne wesar ca dëwu bunt ba, desul lu moy yaram wa. ⁵ Looloo waral ba tey jii, sarxalkati Dagon yeek mboolem ñiy dugg kër tuur ma ñu wax Dagon ca Asdodd, kenn du ci joggi ca dëwu bunt ba.

⁶ Ba mu ko defee loxol Aji Sax ji mujj diis ca kaw waa Asdodd. Mu wáceer njàqare ca seen kaw, daldi teg waa Asdodd ak la ko wër ay taab. ⁷ Waa Asdodd gis la leen dal, daldi ne: «Bu gaalu Yàllay bànni Israyil gii des ci sunu biir kat, ndax loxoom dëgër na ci sunu kaw, nook Dagon sunu tuur mi.» ⁸ Ba loolu amee ñu yónnee, woolu mboolem kàngami waa Filisti. Ñu laaj leen ne leen: «Nan lanuy def ak gaalu Yàllay Israyil gii?» Ñu ne leen: «Toxal-leen gaalu Yàllay Israyil gi ca Gaat.» Ñu toxal gaalu Yàllay Israyil ca seen dëkk ba ñuy wax Gaat. ⁹ Naka lañu fa toxal gaal ga nag, loxol Aji Sax ji dal dëkk ba, mu jur tiitaange lu réy lool. Daa dal ca kaw dëkk ba, mag ak ndaw, ay taab ne fureet ca seen kaw. ¹⁰ Ñu yóbbu gaalu Yàlla ga beneen dëkk bu ñuy wax Ekkrón. Gaal gaa ngay jubsi Ekkrón, waa dëkk ba gaaw yuuxoondoo ne: «Indil nañu nu fi gaalu Yàllay Israyil, bëgg noo rey, nook sunu waa réew mépp!» ¹¹ Ci kaw loolu ñu yónnee, woolu mboolem kàngami waa Filisti, ne leen: «Jélelees fi gaalu Yàllay Israyil gii, mu dellu kërám, lu ko moy dina nu rey, nook sunu askan wépp.» Booba tiitaangey ndee dajal na dëkk ba bépp, ndax loxol Yàlla bu diis lool ca seen kaw. ¹² Ña ca deewul nag, seen yaram yàqooki taab, yuux ya jollee ca dëkk ba, wuti asamaan.

6

Waa Filisti delloo nañu gaalu Yàlla ga

¹ Gaalu Aji Sax ja nekk na réewum Filisti juróom ñaari weer. ² Waa Filisti doora woolu seeni sarxalkat ak seeni gisaanekat, ne leen: «Nan lanuy def ak gaalu Aji Sax ji? Xamal-leen nu nan lanu koy delloo këram!» ³ Ñu ne leen: «Su ngeen dee delloo gaalu Yállay Israyil, buleen ko delloo loxoy neen, waaye fexeleen ba boole kook saraxu peyug tooñ, yónnee ko. Kon dingeen wër, te dingeen xam lu tax loxol Yàlla ji tegikuuw leen.» ⁴ Waa Filisti ne leen: «Ban saraxu peyug tooñ lanu koy yónnee?» Ñu ne leen: «Limu kàngami Filisti ngeen di topp, daldi defarlu juróomi taabi wurus ak juróomi janaxi wurus, mu dèppook limu kàngami waa Filisti, ndax benn balaa bi leen dal moo dal seeni kàngam itam. ⁵ Noonu ngeen di sàkke ay jëmni yuy jëmman seeni taab ak jëmni yuy jëmman seen janax yiy yàq réew mi. Su ko defee ngeen defale ko Yállay Israyil teraanga. Jombul mu woyofal loxoom ci seen kaw ak seeni tuur ak seenum réew. ⁶ Ana lu jar ngeen di jaay dègër bopp ni waa Misraak Firawna? Ba leen Yállay Israyil torxalee, bàyyiwuñu bànni Israyil, ñu dem seen yoon? ⁷ Kon waajal-leen watiir bu bees te ngeen jël ñaari nag yuy nàmpal yu ñu masula takkal. Ngeen takkal nag yi watiir bi te yóbbu doomi nag yi, fat. ⁸ Ngeen daldi jël gaalu Aji Sax ji, teg ko ci kaw watiir bi. Liggéeyi wurus yu peyug tooñ yooyu ngeen di yónnee nag, ci waxande wu ndaw ngeen koy yeb, te teg waxande wi ci wetu gaal gi. Su ko defee ngeen yebal watiir bi, mu dem. ⁹ Nangeen ko xool. Su jubalee réewam, wuti dëkk bi ñuy wax Bet Semes, kon Aji Sax jee nu teg musiba mu réy mii, lu ko moy nu xam ne du loxoom a nu dal, waaye ndogal lu nu dikkal la.»

¹⁰ Waa Filisti def noona, daldi tànn ñaari nag yuy nàmpal, takkal nag yi watiir, doomi nag ya, ñu fat leen. ¹¹ Ñu daldi teg gaalu Aji Sax ja ca kaw watiir ba, ak waxande wu ndaw, wa def janaxi wurus yaak seen jëmni taab ya. ¹² Ba mu ko defee, nag ya jubal xocc yoonu Bet Semes, topp wenn yoon wi rekk, di nàññiy dem. Jàdduñu ndijoor, jàdduñu càmmoñ. Kàngami Filisti ya topp ca, ba fa Bet Semes tàm balee.

¹³ Booba waa Bet Semes a ngay goób bele ca xur wa. Naka lañu dawal seen bët, séen gaal ga, daldi bég. ¹⁴ Watiir ba dikk ba ci

toolu jenn waayu Bet Semes ju ñuy wax Yosuwe, mu taxaw fa. Aw doj wu mag a nga fa woon. Ci kaw loolu ñu xar mattum watiir ba, nag ya, ñu defal ko Aji Sax ji saraxu rendi-dóomal. ¹⁵ Fekk na Leween ña* wàcce gaalu Aji Sax ja, ak waxande wu ndaw wa def liggéeyi wurus ya. Ñu teg lépp ca kaw doj wu mag wa. Bésu keroog waa Bet Semes def nañu ay saraxi rendi-dóomal ak yeneen sarax, ñeel Aji Sax ji. ¹⁶ Juróomi kàngami Filisti ya gis nañu loolu lépp, doora dellu Ekkron ca bés ba.

¹⁷ Jëmni taabi wurus yooyu waa Filisti yónnee ngir saraxu peyug tooñ, ñeel Aji Sax ji, ay teraanga la yu bawoo ci kilifay dëkk yii: Asdodd, benn; Gasa, benn; Askalon, benn; Gaat, benn; Ekkron, benn. ¹⁸ Limu janaxi wurus yi it dèppook limu dëkki waa Filisti, yi seen juróomi kàngam jiite, dale ko ci dëkk yi tata wër, ba ci dëkk-dëkkaan yi dara wërul, ba fi doj wu mag wi ñu tegeon gaalu Aji Sax ji. Doj waa nga ca toolub Yosuwe waa Bet Semes ba, ba tey jii.

¹⁹ Terewul Yàlla mbugal ñenn ca waa Bet Semes, ndax dañoo yérndu woon ca biir gaalu Aji Sax ja. Juróom ñaar fukki nit† la fàdd ca ñoom. Waa dëkk ba nag di tiislu ndax mbugal mu réy moomu leen Aji Sax ji teg. ²⁰ Ci kaw loolu waa Bet Semes ne: «Ana ku mana taxaw fi kanam Aji Sax ji, jii Yàlla ju sell? Ci kan lanuy yóbbu gaal gi, ba mu sore nu?» ²¹ Gannaaw gi ñu yebal ay ndaw ca waa Kiryaat Yarim, ne leen: «Waa Filisti de délloosi nañu gaalu Aji Sax ji. Tee ngeena dikk, yóbbu ko seen dëkk?»

7

¹ Waa Kiryaat Yarim nag dikk, jëlsi gaalu Aji Sax ji, yóbbu ko kër Abinadab ca kaw tund wa. Ñu sellal Elasar, doomam ju goor ngir muy wattu gaalu Aji Sax ja.

Samiyel jiite na Israyil

² Gannaaw bés ba ñu yóbbu gaal ga Kiryaat Yarim, nekk na fa lu yàgg, ba am fa ñaar fukki at. Waa kër Israyil gépp nag namma dellu ci Aji Sax ji. ³ Samiyel wax ak waa kër Israyil gépp, ne leen: «Ndegam seen léppi xol ngeen namma delloo ci Aji Sax ji, jëleleen fi seen biir tuuri doxandéem yi, ak tuur yi ñu dippee Astàrt, te ngeen saxal seen xol ci Aji Sax ji, jaamu ko moom donj. Su ko defee mu xettli leen ci waa Filisti.» ⁴ Ba mu ko defee bànni Israyil génne seen tuur yi ñu dippee

* 6:15 6.15 Leween ña: Yàlla tànn na ñi bokk ci giirug Lewi doomu Yanqóoba, ñuy jàpple sarxalkat ya ca liggéeyu kër Yàlla ga. † 6:19 6.19 Ni ñu ko binde ci ebrë manees na koo dégge nii: juróom ñaar fukki nit a dee ci juróom fukki junnii nit.

Baal ak Astàrt. Ñuy jaamu nag Aji Sax ji moom donj.

⁵ Gannaaw loolu Samiyel ne leen: «Wooleen Israyil gépp, ñu daje ca Mispá, ma tinul leen Aji Sax ji.» ⁶ Ñu daje ca Mispá, tanq ndox, sotti fa suuf, fa kanam Aji Sax ji. Ñu woor nag bésub keroog, daldi wax foofa ne: «Noo tooñ Aji Sax ji.» Ca Mispá la Samiyel doone njiitu Israyil.

⁷ Ba waa Filisti yégee ne bànni Israyil daje na ca Mispá, kàngami waa Filisti ya jóg, ngir songi leen. Bànni Israyil yég ko, am tiitaange ca waa Filisti. ⁸ Bànni Israyil ne Samiyel: «Ngalla bu nu noppee jooytul ci sunu Yàlla Aji Sax ji, ndax mu wallu nook waa Filisti!» ⁹ Samiyel jël menn xar mu feragul, defal ko lépp Aji Sax ji saraxu rendi-dóomal. Mu jooytul Israyil ci Aji Sax ji, Aji Sax ji nangul ko. ¹⁰ Naka la Samiyel di joxe saraxu rendi-dóomal ba, waa Filisti di jegesi ngir xareek bànni Israyil. Aji Sax ji dēnoo kàddu gu réy, ca kaw waa Filisti bésub keroog, fēlxe leen, ñu daanu fa kanam bànni Israyil. ¹¹ Bànni Israyil génne Mispá, dàqi waa Filisti, duma leen, bay waaja àgg Bet Kar.

¹² Gannaaw loolu Samiyel jël aw doj, teg ko ci diggante Mispá ak fu ñuy wax Sen; mu dippee doj wi Eben Eser (mu firi doju Wall). Mu ne: «Ba fii la nu Aji Sax ji wallu.» ¹³ Waa Filisti nag detteelu, dikkatuñu biir suufas Israyil. Giiru dundu Samiyel gépp loxol Aji Sax jaa ngi ci kaw waa Filisti. ¹⁴ Dëkk ya Filisti nangu woon ci Israyil daldi délsi ci seeni loxo; dale ko ca Ekkron ba Gaat. Israyil nangoo ci waa Filisti suufam sépp. Diggante Israyil ak Amoreen ñi itam di jàmm.

¹⁵ Samiyel jiite na Israyil giiru dundam gépp. ¹⁶ At mu jotaan day wër diggante Betel ak Gilgal ak Mispá, di àtte mbiri bànni Israyil, foofu fépp. ¹⁷ Gannaaw loolu mu dellu Raama ndax fa la kēram nekkoon, fa la daan àttee Israyil, te fa la tabax sarxalukaay, ñeel Aji Sax ji.

Israyil sàkku na buur

8

Bànni Israyil ñaan na Samiyel buur

¹ Ba Samiyel màggatee, ay doomam yu góor la fal njiiti Israyil. ² Taaw ba Yowel la tuddoon, ka ca topp di Abya. Ñoo doon njiit ya ca Beerseba. ³ Doomi Samiyel yu góor ya nag jaaruñu ci seen tãnki baay. Dañoó lajj, topp alal ju lewul, di nangu ay ger, di jalgati dëgg.

⁴ Ci kaw loolu magi Israyil ñépp daje, dem ca Samiyel ca Raama. ⁵ Ñu ne ko: «Góor gi, léegi danga di mag, te say doom

jaaruñu ci say tãnk. Kon danga nu falal buur bu nu jiite, ni ko xeet yépp baaxoo.»

⁶ Samiyel ñaawlu la ñu ko ne mu falal leen buur bu leen jiite. Mu diis ko Aji Sax ji. ⁷ Aji Sax ji ne ko: «Déggal mbooloo mi te def li ñu la wax lépp. Du yaw lañu bañ, waaye man mii lañu bañ ma doonati seen buur. ⁸ Na ñu daan def naka jekk, ba ma leen génnee Misra ba tey jii, di ma dëddu, di jaamu yeneen yàlla, noonu rekk lañuy def ak yaw. ⁹ Kon déggal leen rekk, waaye àrtu leen bu baax, xamal leen luy doon sañ-sañu buur bu leen di jiiteji.»

Lu jëm ci sañ-sañu buur

¹⁰ Ba loolu amee Samiyel jottli mbooloo, ma doon sàkku mu falal leen buur, mboolem àrtub Aji Sax ji. ¹¹ Mu ne: «Buur bi leen di jiiteji nag sañ-sañam moo di: Seeni doom yu góor lay jël, ngir tabb leen dawalkati watiiram aki fasam, ñuy daw jiitu watiiram. ¹² Ñoom lay tabb ngir ñu doon njiiti kuréli junniy dag, mbaa njiiti kuréli juróom fukk. Ñoom it lay beyloo toolam, di leen góobloo, di leen sàkkloo ay gannaayi xareem ak jumtukaayi watiiram. ¹³ Seen doom yu jigéen lay jël, def leen ay njafaan-kati cuuraay, aki toggkat ak lakk-kati mburu. ¹⁴ Seen ngēneeli tool ak tóokēri reseñ ak tooli oliw, mu jël, jox ay surgaam. ¹⁵ Seen pepp ak seen reseñ, fukkeel ba lay jël, jox ay jawriñam aki surgaam. ¹⁶ Seen jaam yu góor it, ak seen jaam yu jigéen, ak ñi épp doole ci seeni waxambaane ak seeni mbaam, mu jël, jéfandikoo ci liggéeyam. ¹⁷ Seeni gätt, fukkeel ba lay jël, te yeen ci seen bopp, ay surgaam ngeen di doon. ¹⁸ Bu keroogee dingeen ne wóoy ndax buur bi ngeen falal seen bopp, te bu keroogee Aji Sax ji du leen wallu.»

¹⁹ Mbooloo ma nag lànk, déggaluñu Samiyel, xanaa ne ko: «Ndokk! Buur daal lanuy am, ²⁰ nun itam, ba mel ni xeet yépp. Sunu buur a nuy yilif, dox, jiite nu, di nu xareel sunuy xare.» ²¹ Samiyel déglu la mbooloo ma wax lépp, ba noppi yegge ko Aji Sax ji. ²² Aji Sax ji ne ko: «Déggal leen rekk, te falal leen buur.» Samiyel nag ne bànni Israyil: «Baax na, demleen ñibbi, ku nekk ca dëkkam.»

Lii mooy jaar-jaari Sóol

9

Sóol doxi na yónnent

¹ Jenn waay la woon ju bokk ci gi-irug Beñamin, ñu di ko wax Kis. Abyel ay baayam; Abyel, Seror ay baayam; Seror, Bekorat ay baayam; Bekorat, Afya Beñamineen ba di baayam. Kis ku am

* 9:2 9.2 Sóol: am na ñu ko géna xam ci turu Talut.

daraja la woon. ² Mu am doom ju ñuy wax Sóol*; xalelu gooru bu goorayiw, ba kenn daqu ko ci banni Israyil, sut ñepp taxawaay.

³ Mu am bés mbaam yu jigéen yu Kis, baayy Sóol, réer. Kis ne Sóol: «Àndal ak kenn ci surga yi, nga seetali ma mbaam yi.» ⁴ Ba loolu amee Sóol ak surgaam jaare tundi Efrayim, teg ca diiwaanu Salisa, gisuñu leen. Ñu jall ba ca diiwaanu Saalim, dara. Ñu walbatiku jaarat diiwaanu Beñamin, gisuñu leen.

⁵ Ba ñu aggee diiwaanu Cuuf, Sóol ne surgaam ba mu àndal: «Ayca nu ñibbi, lu ko moy nun la sama baay di xalaat, fàtte mbaam yi.» ⁶ Surga ba ne ko: «Xanaa lenn; genn gooru Yàlla ngi ci dëkk bii, ku ñu naw la. Lépp lu mu wax, dara du ci fanaan àll. Nan fa dem kay, jombul mu xamal nu dara ci sunu yoon wi.» ⁷ Sóol ne surgaam: «Waaw, bu nu demee, lu nuy jox goor gi? Mburu mi woon ci sunuy mbuus jeex na, amunu dara lu nu yóbbul gooru Yàlla gi. Leneen lu nu am?» ⁸ Surga bi dellu ne Sóol: «Xanaa donju xaalis sii ma yor. Naa ko ko jox boog, mu won nu sunuw yoon!»

⁹ Bu jékkoon nag ci Israyil ku daan leerluji ci Yàlla da naan: «Nan dem ca giskat ba,» ndax lu ñuy wooye yonent tey, booba, ab giskat lañu ko daan wooye.

¹⁰ Ci kaw loolu Sóol ne surgaam: «Wax nga dëgg. Kon nan dem.» Ñu jubal ca dëkk ba gooru Yàlla ga nekk. ¹¹ Naka lañu yeeg tund wa, jëm ca dëkk ba, daldi taseek janq ju ca jóge, di rooti. Ñu laaj leen ne leen: «Góorug giskat bi fii la féete?»

¹² Ñu ne leen: «Waaw, mu ngi fii ngeen jublu, waaye gaawleen de; ndax tey jii la dikk ci dëkk bi, ngir sarax su waa dëkk bi xewle tey ca bérabu jaamookaay ba. ¹³ Bu ngeen di agg biir dëkk bi rekk, dal ko fay fekk, bala moo dem jaamookaay ba, ca sarax sa. Waa dëkk bi duñu lekk muk te dikkul, ndax mooy ñaan ci sarax si. Bu noppee, ñi ñu woo doora lekk. Kon demleen gaaw, ndax nēgēni fa ngeen koy fekk.»

Sóol gis na Samiyel

¹⁴ Ba loolu amee ñu dem bay dugg ca biir dëkk ba, yem ca Samiyel, muy dikk, dajeek ñoom, jëm ca jaamookaay ba.

¹⁵ Fekk na balaa Sóol di ñew, Aji Sax ji déey na Samiyel bés ba jiitu, ne ko: ¹⁶ «Nēgēni èllēg maa ngi lay yónnee waa ju dëkk diiwaanu Beñamin. Nanga ko diw, fal ko, ngir mu yilif Israyil, sama ñoñ, ba xettli sama ñoñ ci waa Filisti. Maa geesu sama ñoñ, ndax seeni yuux agg na fi man.»

¹⁷ Naka la Samiyel séen Sóol, Aji Sax ji wax ko, ne ko: «Waa jii laa la wax. Kii mooy yor sama ñoñ.»

¹⁸ Sóol dikk ba ca Samiyel, fa tollook bunt dëkk ba, ne ko: «Góor gi, baal ma tegtal ma kër giskat bi.» ¹⁹ Samiyel ne Sóol: «Man maay giskat bi. Doxal jiitu, nu dem ca jaamookaay ba. Yeen ak man ay bokk lekk tey. Bu subaa mboolem li ub sa bopp, dinaa la ko wax, door laa yiwi. ²⁰ Mbaam yi nga réerle bèkk-démb, bu ci am benn xalaat, ndax feeñ nañu. Te sax, mboolem lu bakkane ci Israyil, xanaa du yaay boroom, yaak sa waa kër baay?»

²¹ Sóol ne ko: «Xanaa du man Beñamineen bi gēna néewle giir ci Israyil, sama làng gēna néew ci mboolem làng yi séq giirug Beñamin? Lii nga may wax, lu mu doon?»

²² Samiyel daldi ànd ak Sóol ak surgaam, yóbbu leen ba ca biir néegu bernde ja. Mu beral leen nag jataay ca kanam mboolor, ma ñu woo, te ñu wara tollu ci faweer. ²³ Samiyel ne toggkat ba: «Indil ma ndawal li ma la joxoon, te noon la, nga ber ko.» ²⁴ Toggkat bi yékkati tãnk baak la mu àndal, teg ko ca kanam Sóol. Samiyel ne ko: «Lii, lañu beroon, tegal sa kanam, te lekk. Moom lañu la dencal ci ndaje mii ma woo askan wi.» Noonu la Sóol bokke ak Samiyel lekk bésu keroog.

²⁵ Gannaaw loolu ñu jóge ca jaamookaay ba, dellu ca dëkk ba. Ba ñu demee kër ga, Samiyel diisook Sóol ca kaw taax ma.

Samiyel diw na Sóol, fal ko

²⁶ Ba ñu jógee ca èllēg sa, bêt a ngay waaja set. Samiyel woo Sóol ca kaw taax ma, ne ko: «Fabul, ma yiwi la.» Sóol fabu, ànd ak Samiyel, ñu génn ñoom ñaar. ²⁷ Naka lañu dem bay bégga génn dëkk ba, Samiyel ne Sóol: «Neel surga bi, mu jiitu nu.» Mu wax ko surga ba, mu jiitu leen. Samiyel neeti Sóol: «Yaw, taxawal fii tuuti, ma dégtal la kaddug Yàlla.»

10

¹ Ba loolu amee Samiyel jël njaqal diwu oliw lu ndaw, sotti ko ci kaw boppu Sóol, foon ko, ne ko: «Aji Sax ji diw na la déy, ngir fal la njiitu ñoñam. ² Gannaaw boo teqlikook man, dinga dajeek ñaari goor ca wetu bàmmeelu Rasel ca Celca ca diiwaanu Beñamin. Dinañu la wax ne la mbaam ya nga seeti woon feeñ nañu. Te sax sa baay xalaatatul mbaam yi, yeena ko jaaxal. Ma nga naan: “Ana nu may def ak sama doom ji?” ³ Boo fa jógee, jubalal ba jot garab gu mag ga ca Tabor. Ñetti goor dinañu fa dajeek yaw, di mággaali Yàlla ca Betel; kenn ka gaddu ñetti tef, keneen ka ñabb ñetti kãmpi mburu, ka ca des yor mbuusum biñ. ⁴ Dinañu la nuy, may la

ñaari mburu; nga nangoo ko ca seeni loxo. ⁵ Bu loolu weese nanga dem ba ca Gibeya Eloyim, fa dalub xarekati Filisti ya nekk. Booy jub dëkk ba, dinga dajeek kurélu yonent yu jóge ca bérabu jaamookaay ba, aw nit jii too leen powum tabalaaki toxoro, ak ñaari xeeti xalam, yonent ya di waxe ni yonent*. ⁶ Su ko defee Noowug Aji Sax jee naa milib ci sa kaw, ngay waxandoo ak ñoom, soppiku, doon keneen nit. ⁷ Bu la firnde yooyu dikkalee rekk, xamal ne Yàllaa ngi ànd ak yaw. Su boobaa, lu bés bi laaj, def ko. ⁸ Léegi doxal jii tu ma Gilgal. Maa ngi noonu di la fekkisi, ngir rendi fa saraxi rendi-dóomal, sarxe fa saraxi cant ci biir jàmm. Juróom ñaari fan nag ngay négandiku, ba ma fekkisi la fa, xamal la looy def.»

Noowug Yàlla gane na Sóol

⁹ Naka la, Sóol bàyyikoo ca Samiyel, walbatiku, Yàlla daldi soppi xelam. Firnde yooyu yépp nag matandoo ca bés ba. ¹⁰ Ba Sóol ak surgaam ággee Gibeya, kurélu yonent yaa ne pemm, dajeek moom. Noowug Yàlla ne milib ca kaw Sóol, muy waxandoo ak ñoom ay waxyu. ¹¹ Ci kaw loolu mboolem ña xamoon Sóol démb ak bëkk-démb, daldi yem ci moom, mu ànd ak yonent ya di wax ay waxyu. Nit ña naan ca seen biir: «Waaw, Sóol doomu Kis jii, lu ko jot nii? Sóol it ci yonent yi laa?» ¹² Jenn waay ju fa dëkk ne: «Yii yonent sax, ci ngéru kan lañu bokk?» Ca lañu jóge, def ko waxin naan: «Sóol it ci yonent yi laa?» ¹³ Sóol biral ay waxyu ba noppi daldi dem ca bérabu jaamookaay ba.

¹⁴ Ci kaw loolu baayy Sóol bu ndaw laaj Sóol ak surgaam, ne leen: «Fu ngeen de-moon?» Sóol ne ko: «Mbaam yi lanu seeti woon, gisunu dara, nu dem ca Samiyel.» ¹⁵ Baayam bu ndaw ne ko: «Wax ma boog lu leen Samiyel wax.» ¹⁶ Sóol ne ko: «Samiyel da noo biralal ne mbaam ya feeñ na.» Mbirum nguuru ma ko Samiyel wax nag, Sóol waxu ko baayam bu ndaw.

Yàlla feddli na palug Sóol

¹⁷ Gannaaw loolu Samiyel woolu askanu Israyil ca Aji Sax ji ca Mispa. ¹⁸ Mu wax bànni Israyil, ne leen: «Aji Sax ji Yàllay Israyil dafa wax ne: “Man maa génne Israyil Misra. Maa leen xettli ca waa Misra ak mboolem buur ya leen notoon. ¹⁹ Waaye tey yeena dëddu seen Yàlla, ji leen musal ci mboolem seeni loraange ak seeni njàqare. Yeena ko ne: ‘Falal buur ci sunu kaw daal!’ Léegi nag taxawleen fi kanam Aji Sax ji, giir ak giir, làng ak làng.”»

²⁰ Ba Samiyel wooyee giiri Israyil yépp, ñu dikk, giirug Beñamin moo génn. ²¹ Mu woo giirug Beñamin, làng ak làng, làngu Matiri génn, Sóol doomu Kis génne ca. Ñu seet Sóol, gisuñu ko. ²² Ñu laajaat Aji Sax ji, ne ko: «Ndax keneen da fee ñëw?» Aji Sax ji ne: «Mu ngi nii, mu ngi làqu ci biir denc bi.» ²³ Ñu daw jële Sóol foofa, mu taxaw ca biir mbooloo ma, sut ñépp. ²⁴ Samiyel wax ak mbooloo mépp, ne leen: «Yeena gis ki Aji Sax ji taamu? Kenn melul ni moom ci mbooloo mi mépp.» Mbooloo ma mépp àddu ca kaw ne: «Buur, guddalu fan!» ²⁵ Samiyel nag xamal mbooloo ma sañ-sañu buur. Mu bind ko cib téere, teg ca kanam Aji Sax ji. Ba mu ko defee Samiyel yiwi mbooloo mépp, ku nekk ñibbi kërám.

²⁶ Sóol itam ñibbi kërám ca Gibeya, jambaari góor yi ci Yàlla xiir, ànd ak moom. ²⁷ Terewul mu am ay nit ñu tekkiwul dara di wax, naan: «Ana nan lanu waa jii di xettlee?» Ñooñu sewal ko, yótuñu ko jenn teraanga. Sóol nag ne cell.

11

Sóol jéngu na

¹ Nayas Amoneen ba moo dikkoon, gaw dëkk ba ñu naan Yabes ca Galàdd. Waa Yabes gépp wax ak moom, ne ko: «Ngalla digool ak nun jàmm, te nu nangul la.»

² Nayas Amoneen ba ne leen: «Ni may digook yeen daal, mooy nii: luqi seen bétu ndijoor yeen ñépp, ba Israyil gépp torox.» ³ Magi Yabes ne ko: «May nu juróom ñaari fan, nu yebal ay ndaw ci Israyil gépp. Su amul kenn ku nu wallu, nu dikk, fekkisi leen.»

⁴ Ba ndaw ya dikkee Gibeya, ga Sóol dëkk, ba xamle mbir ma, waa dëkk ba di dégg, ñoom ñépp a yuuxu, di jooy. ⁵ Ci biir loolu Sóol ne téll, jii tal ay nagam, jóge tool ya. Mu ne: «Lu nit ñi xewle bay jooy nii?» Ñu nettali ko kàdduy waa Yabes.

⁶ Naka la Sóol dégg kàddu yooyu, Noowug Yàlla ne milib ca kawam, mer ma ne jippét tàkk. ⁷ Mu rey ñaari nag, dog ko, yóbbante ko ay ndaw, yóonnee ko Israyil gépp. Mu ne leen: «Képp ku toppul Sóol ak Samiyel, nii lees di def ay nagam.» Ba loolu amee tiitaange ju sababoo ci Aji Sax ji dal ca kaw askan wa, ñu sàqeendoo, di benn bopp. ⁸ Ba Sóol nemmikoo limu góori Israyil ca Beseg, ñetti téeméeri junni lañu (300 000), waa Yuda di fanweeri junni (30 000).

⁹ Ñu wax nag ndaw ya jóge Yabes Galàdd, ñu jottli seen waa dëkk ba ne leen, ca èllég sa bu jant bi tàngee, dees na leen

* 10:5 10.5 waxyu: wax lay doon, ju Yàlla déey ab yonent, mu di ko biral ci ndigalal Yàlla. Leeleeg bu ab yonent tolloo ci biral waxyu, day mel ni ku daanu leer.

wallu. Ndaw ya dem, àgge ko waa Yabes, waa Yabes bég. ¹⁰ Ñu wax Amoneen ña, ne leen: «Èllëg dinanu dikk, fekkisi leen.»

¹¹ Ca èllëg sa Sóol séddale mbooloom xareem ñetti kurél. Ba ñu tolloo ci wattub njël, ñu dugg biir dalu Amoneen ña, di leen duma ba jant bi tàng. Ña ca rëcce daldi tasaaroo ba ñaar sax àndatuñu. ¹² Mbooloo ma ne Samiyel: «Ana ku noon: “Ndax Sóol ay falu ci sunu kaw?” Indileen ñooñu, nu rey leen!» ¹³ Sóol ne leen: «Deesul rey kenn kay bésub tey jii, ndax bésub tey Aji Sax jee indi wall fi Israyil.»

¹⁴ Ci kaw loolu Samiyel ne mbooloo ma: «Ñewleen nu dem Gilgal, ba feddli pal gi.» ¹⁵ Mbooloo ma mépp dem Gilgal, ñu fal Sóol buur foofa, fa kanam Aji Sax ji ca Gilgal*. Ñu sarxe fa saraxi cant ci biir jàmm fa kanam Aji Sax ji, Sóol ak bànni Israyil gépp bannexoo fa bannex bu réy.

12

Samiyel wàcc na

¹ Ba loolu weesee Samiyel wax Israyil gépp ne leen: «Mu ngoog, nangul naa leen li ngeen ma wax lépp, ba falal leen buur. ² Léegi Buur a ngii jiite leen. Man nag màggat naa ba weex tàll, te samay doom a ngii ci seen biir. Maa leen jiite, ba may ndaw ba tey jii. ³ Maa ngii! Seedeleen sama jépp tuuma fi kanam Aji Sax ji ak ki mu fal. Ana ku ma masa jël nagam, mbaa ma jël mbaamam? Ana ku ma masa lekk àqam, mbaa ma néewal ko doole? Ana ci kan laa masa nangoo alalu ger, ba nëpp-nëppal lu mu def. Lu ci am rékk, waxleen, ma fey ko.» ⁴ Ñu ne ko: «Lekkoo sunu àq, néewaloo nu doole. Masoo nangu lenn itam ci loxol kenn.» ⁵ Samiyel ne leen: «Kon Aji Sax ji seede na ci seen biir, ki mu fal it seede tey jii, ne gisuleen lenn ci sama loxo.» Ñu ne ko: «Seede na ko!»

⁶ Samiyel ne mbooloo ma: «Aji Sax ji moo jéfoo Musaa ak Aaróona, ba génne seeni maam réewum Misra. ⁷ Kon nag taxawleen, ma layook yeen fi kanam Aji Sax ji, ci mboolem njekk gu leen Aji Sax ji defal, yeen ak seeni maam.

⁸ «Gannaaw jamono ja Yanqóoba demee Misra, seeni maam a yuuxu, woo Aji Sax ji wall, Aji Sax ji yebal MUSAAK Aaróona, ñu génne seeni maam Misra, dëël leen bérab bii. ⁹ Seeni maam nag ñoo fátte seen Yalla Aji Sax ji, ba tax mu teg leen ca loxol Siserá njiitu xareb dëkk ba ñuy wax Àccor, ak ca loxol waa Filisti, ak ca loxol buuru Mowab,

ñooña doon xareek ñoom ¹⁰ Seeni maam jooy ko Aji Sax ji, ne: “Bàkkaar nanu de, nde noo wacc Aji Sax ji, di jaamu tuur yi ñu naan Baal ak Astàrt. Waaye rikk xettli nook sunuy noon, nu jaamu la.” ¹¹ Aji Sax ji yebal Yërubaal*, teg ca Bedan†, teg ca Yefte, teg ma ca, man Samiyel, daldi leen xettli ci seen noon yi leen séq, ba ngeen dëkke jàmm. ¹² Waaye ba ngeen gisee Nayas, buurub Amoneen ña jëm ca seen kaw, yeena ma ne: “Buur bu nu jiite daal lanu bëgg.” Te Aji Sax ji seen Yalla di seen buur. ¹³ Léegi nag buur bi ngeen taamu, di ko sàkku, mu ngi nii. Mu ngoog, Aji Sax ji fal na buur bu leen jiite. ¹⁴ Su ngeen ragalee Aji Sax ji, jaamu ko, déggal ko, baña gántal ndigalu Aji Sax ji, yeen ak seen buur yépp ay topp seen Yalla Aji Sax ji. ¹⁵ Waaye kat, su ngeen bañee déggal Aji Sax ji, di gántal ndigalal Aji Sax ji, loxol Aji Sax jaa ngi ci seen kaw na mu nekke woon ca seen kaw maam ya.

¹⁶ «Léegi nag taxawleen ba gis jaloore ju réy jii Aji Sax jiy def, ngeen teg ci bët. ¹⁷ Du nu ngi ci ngóobum bele tey? Dinaa ñaan ci Aji Sax ji, mu dënu, taw. Su boobaa dingeen xam xéll ne ba ngeen sàkkoo buur, lu bona bon ngeen def, Aji Sax ji seede.»

¹⁸ Ci kaw loolu Samiyel ñaan ci Aji Sax ji, Aji Sax ji dënu, taw ca bés ba. Mbooloo ma mépp nag ragal lool Aji Sax ji ak Samiyel.

¹⁹ Ba loolu wéyee mbooloo ma mépp ne Samiyel: «Ngalla sang bi, ñaanal nu ci sa Yalla Aji Sax ji, nu baña dee, ndax la nu bàkkaaroon lépp, yokkati nanu ci mbon gu tollu ni di sàkku buur.» ²⁰ Samiyel ne mbooloo ma: «Buleen tiit; dëgg la, yeena def googu mbon gépp, waaye fexeleen rekk ba baña dëddu Aji Sax ji, te ngeen jaamoo Aji Sax ji seen léppi xol. ²¹ Buleen dëddu mukk, ndax su boobaa topp ag neen lay doon; lu dul jariñe, du xettlee, ndax tuur yi kat, neenug neen la. ²² Aji Sax ji moom turam wu màgg wi tax na du wacc ñoñam, ndax Aji Sax ji la soob, mu def leen ñoñam. ²³ Man nag, yalla tere may tooñ Aji Sax ji, di leen noppee ñaanal. Te it dinaa leen won yoon wi baax te jub: ²⁴ ngalla fexeleen rekk ba ragal Aji Sax ji, te ngeen dëggu ci jaamoo ko seen léppi xol, ndax dangeen di xool ci jaloore yu yéeme yi mu leen defal. ²⁵ Waaye su ngeen saxee ci def lu bon, yeen ak seeni buur ay bokk sànkú.»

13

* **11:15** 11.15 Li tax ñu ne fa kanam Aji Sax ji mooy Gilgal dafa amoon bérabu jaamookaayu Aji Sax ji. * **12:11**

12.11 Yërubaal mooy Sedeyor ba tey. Seetal *Njiit ya* 6–8. † **12:11** 12.11 Bedan: am na ñu jàpp ne mooy Barag. Seetal *Njiit ya* 4. * **13:1** 13.1 Sóol falu na ñaari at bala ñoo tànn Daawuda, mi koy wuutu. Seetal ci 16.13 ak *Jéf ya* 13.21.

Sóol tooñ na

¹ Sóol ci boppam làqoon na ay at, ba muy falu buur; mu falu jiite Israyil ñaari at*.

² Ci kaw loolu mu tànn ñetti junniy nit ci Israyil; ñaari junniy nit ñuy nekk ak moom ca Migmas ak ca tundi Betel, ak junniy nit ñu nekk ak Yonatan doomu Sóol ca Gibeya gu Beñamin. Ña ca des mu yiwi leen, ñu ñibbi seeni xayma. ³ Yonatan nag song dalub waa Filisti ca Geba. Waa Filisti yég ko. Ba mu ko defee Sóol wal-lu liit ga ca réew ma mépp, ne: «Na ko Ebrè yi dégg!» ⁴ Ñu yégal Israyil gépp la xew ne leen: «Sóol song na dalub waa Filisti, ba tax waa Filisti jéppi bànni Israyil.» Gàngoor ga daldi daje, topp ca gannaaw Sóol ca Gilgal. ⁵ Ci biir loolu waa Filisti daje ngir xareek Israyil. Ña ngaak ñetti junniy† watiiri xare ak juróom benni junniy gawar, xarekat ya bare, mel ni feppi suufas géeg. Ñu dem dali ca Migmas, ca penkub Bet Awen.

⁶ Niti Israyil nag gis diggante bu metti bi ñu tollu ndax na ñu tance seen gàngoor ga. Ñu dem làquji ci ay xunteek ay dédd ak ay doj, aki seyaan aki kàmb. ⁷ Am na sax ay Ebrè yu jáll dexu Yurdan, wuti réewum Gàdd ak Galàdd. Fekk na Sóol a nga ca Gilgal ba tey. Mbooloom xareem ma mépp nekk faak moom, di pat-pati ndax tiitaange.

⁸ Mu négandiku juróom ñaari fan, diir ba ko Samiyel àppaloon. Waaye taxul Samiyel agsi Gilgal. Mbooloo ma támbalee déddu Sóol, di tasaaroo. ⁹ Ba loolu amee Sóol ne: «Indil-leen ma saraxu rendi-dóomal bi, ak saraxu cantu biir jàmm bi.» Ñu indil ko, mu daldi def saraxu rendi-dóomal bi. ¹⁰ Naka la def saraxu rendi-dóomal bi ba sottal rekk, Samiyel ne jaas. Sóol génn gatandu ko, ngir nuyu ko. ¹¹ Samiyel ne ko: «Loo def nii?» Sóol ne ko: «Man kat damaa gis mbooloo mi déddu ma, di tasaaroo, te yaw it dikkoo bésu àpp bi. Rax ci dolli waa Filistee nga daje ca Migmas. ¹² Ma noon, waa Filisti dinañu ma songsi Gilgal, te sàkkooguma ndimbalu Aji Sax ji. Looloo ma taxa sàcc sama bopp rekk, ba def saraxu rendi-dóomal bi.» ¹³ Samiyel ne Sóol: «Ag ndof nga def, ndax jéfewuloo santaane bi la sa Yàlla Aji Sax ji santoon. Soo ko defoon, Aji Sax ji dina saxal sa nguur ci kaw Israyil ba fàww. ¹⁴ Léegi nag sa nguur du wéy; Aji Sax ji sàkkul na boppam ki xolam jubool, te fal na ko njiitu ñoñam, ndax yaa sàmmul li Aji Sax ji santaane.»

¹⁵ Ba mu ko defee Samiyel bàyyikoo Gilgal, dem Gibeya gu Beñamin. Sóol nag

waññ ñi mu àndal, ñu tollu ci juróom benni téeméeri góor.

Yonatan def na njambaar

¹⁶ Sóol ak doomam Yonatan, ak gàngoor ga ànd ak ñoom ña nga dal ca Geba † gu Beñamin, waa Filisti dal ca Migmas. ¹⁷ Ci biir loolu genn gàngooru yaqkat def ñetti kurél, jóge ca dalub waa Filisti. Genn ga jubal bėj-gànnar; aw yoonu Ofra ca diiwaanu Suwal, ¹⁸ ñaareel ga jubal sowu ca Bet Oron, ñetteel ga jëm penku ca tund ya tiim xuru Ceboyim, fa feeteek màndinj ma.

¹⁹ Booba nag benn tegg amul woon ca réewum Israyil ba mu daj, ndax waa Filisti dañu noon: Bu Ebrè yi sàkk ay saamar aki xeej. ²⁰ Moo tax bànni Israyil gépp, ku ci béggoona nàmmlu sa ngajju mbaa sa daba, mbaa sa sémmiñ, mbaa sa sawta, doo man lu moy dem ca téggi waa Filisti. ²¹ Ku ci nekk, saa yu sa ngajju dayee, mbaa sa daba, ñaari ñetteelu siikal nga koy daasloo, njég gu jafe, tollook ñaari ñetteelu dogu xaalis. Boo dee daalus ab roqub ñetti càq, mbaa sémmiñ, mbaa ngay jubbantilu catal ràbbu, genn-wállam ngay fey. ²² Looloo tax keroog bésu xare ba, du benn xarekat bu ànd ak Sóol ak Yonatan, te yor saamar mbaa xeej ci loxoom. Mennum Sóol rekk a ci amoon, mook doomam Yonatan.

²³ Ci biir loolu ab kurélu xarekati waa Filisti dem, taxawi ca jállukaayu Migmas ba.

14*Yonatan song na waa Filisti*

¹ Ci fan yooyu Yonatan doomu Sóol wax surga ba koy gàddul ngànaayam, ne ko: «Kaay nu dem ba ca gàngooru Filisti ga ca wàlla.» Baayam nag, waxu ko ci dara. ² Fekk na baayam a nga dal fa Gibeya yem, ca ker garabu gèrenaat ga ca Migron. Mbooloo ma ànd ak moom tollu ci juróom benni téeméeri góor. ³ Axiya ma nga fa woon, sol xar-sànnim sarxalkat. Axiya mooy doomu Ayitub, mi bokk ak lkabot seen baay Fineyas; Fineyas moomu, Eli, sarxalkatu Aji Sax ja ca Silo, mooy baayam. Mbooloo ma nag yéguñu ne Yonatan dem na. ⁴ Poot ba Yonatan jaare, wuti dalub waa Filisti, ñaari doj yu mag a sampe woon, séq ko. Ñu dippee wenn doj wa Boses, weneen wa di Sene. ⁵ Wenn doj waa nga sampe wetu bėj-gànnar, janook Migmas, wa ca des sampe wetu bėj-saalum, janook Geba*.

† 13:5 13.5 3 000: mooy lim bi ñu siwal ni ñu ko tekkee ci làkku gereg ak yeneen làkk. † 13:16 13.16 Geba:

seetal ci 13.3. * 14:5 14.5 Geba: seetal ci 13.3.

⁶ Yonatan ne gaddukatu gannaayam: «Ayca nu dem ba ca dalub yéfar yee. Jombul Aji Sax ji defal nu yiw, ndax dara du tee Aji Sax ji maye ndam, nu bareek nu néew.» ⁷ Ba loolu amee gaddukatu gannaayam ne ko: «Ayca, loo namm rekk, sang bi, yaw laa àndal ba jeex tàkk.» ⁸ Yonatan ne ko: «Ayca nu dem ba ca ñoom, feeñu leen.» ⁹ Bu ñu nu nee: «Taxawleen foofu, ba nu feeksi leen,» nu yem fa, bañ leena fekki. ¹⁰ Waaye bu ñu nee: «Ayca, dikkleen,» nu daldi dem te xam ne Aji Sax jee leen teg ci sunu loxo. Nan def loolu ab takk.»

¹¹ Ba loolu amee ñu feeñuji dalub waa Filisti, ñoom ñaar ñépp. Waa Filistee nga naan: «Xool-leen! Ay Ebraa ngay génne pax ya ñu làqu woon.» ¹² Ci kaw loolu waa dal ba ne Yonatan ak gaddukatu gannaayam: «Ée, dikkleen rekk, nu xamal leen lu tuut.» Yonatan ne gaddukatu gannaayam: «Dikkal, topp ci man. Aji Sax ji teg na leen ci loxil Israyil.» ¹³ Yonatan ñalgu ca kaw tund wa, gaddukatu gannaayam topp ko. Yonatan a ngay jam, waa Filisti di daanu, gaddukatu gannaayam ba di leen jekki ca gannaawam. ¹⁴ Cong mu jëkk mooma Yonatan song, mook gaddukatu gannaayam, lu tollook ñaar fukki goor lañu ca téral ci dénd bu wara tollook xéyu nag. ¹⁵ Ci kaw loolu tiitaange dajal dal baak àll ba ko wër, ak mbooloo ma mépp; muy dal ba, di kuréli yàqat ya. Rax ca dolli suuf sa yèngu, muy tiitaange lu Yàlla wàcce.

¹⁶ Fekk na ay jongrukati Sóol a nga tollu ca Gibeya gu Beñamin. Ñu jekki séen gangooru Filisti gay raj-rajloo, fu ne ñu jëm fa. ¹⁷ Sóol ne ña ànd ak moom: «Wooteleen, ba xam ku jóge ci nun.» Ñu woote, Yonatan ak gaddukatu gannaayam wuute. ¹⁸ Sóol ne Axiya sarxalkat ba: «Indil gaalu Yàlla gi.» Bésub keroog gaalu Yàlla gaa ngaak bànni Israyil. ¹⁹ Naka la Sóol di wax ak sarxalkat bi, coow la ca dalub waa Filisti gëna jolli. Sóol ne sarxalkat bi: «Ah, bàyyi ko sax.» ²⁰ Ba mu ko defee Sóol ak gangoor ga ànd ak moom gépp daje, dem ca xare ba. Gisuñu lu moy waa Filisti ne kër-kër, ne képp, di jamante seeni saamar. ²¹ Ci biir loolu Ebré yi nangul woon waa Filisti démb ak bëkk-démb te nekkandook ñoom ca dal baak fa ko wër fépp sax, ne waññet, faraat ak seen bokki bànni Israyil ya ànd ak Sóol ak Yonatan. ²² Mboolem bànni Israyil ya làqu woon ca tundi Efrayim dégg ne waa Filisti daw nañu. Ñoom it ne leen dann ca xare ba. ²³ Noonu la Aji Sax ji maye Israyil ndam bésub keroog, xare bay law, ba ca wàlla Bet Awen.

Sóol wax na lu ëpp

²⁴ Bésub keroog mbooloom Israyil jaq nañu, ndax ngiñ lu Sóol teg ci seen kaw, ne: «Képp ku lekk fii ba ngoon te feyooguma ci samay noon, yal na alku.» Mbooloo ma mépp, kenn sexu ca dugub. ²⁵ Ci kaw loolu waa réew ma mépp dem ba ca gott ba. Fekk na ag lem a nga fa ca suuf. ²⁶ Ba mbooloo ma duggee ca biir gott ba, yemuñu ca lu moy lem jay xelli, waaye kenn sàkku ci, jème ci gémmiñam, ndax ragal ngiñ la. ²⁷ Yonatan nag yégul woon ngiñal baayam la lu moy mbooloo ma. Mu tàllal yew wa ca loxoom, capp cat la ca lem ja, sex, bët ya daldi leer. ²⁸ Kenn ca mbooloo ma ne ko: «Aa! Ngiñ lii de, sa baay giñoon na ko ci kaw mbooloo mi, ne: «Képp ku lekk tey, yal na alku,» moo tax mbooloo mi néew doole.» ²⁹ Yonatan ne: «Sama baay de yàqal na mbooloo mi. Xool-leen rekk ni samay bët leere ndax lem sii ma ñam! ³⁰ Astamaak bu mbooloo mi lekkoon tey ci lël ja ñu nangoo ci noon yi! Du ci la jéllu waa Filisti doon gëna réy a waay?»

³¹ Bésub keroog bànni Israyil a dumaa waa Filisti ca Migmas ba ca Ayalon. Bànni Israyil sonn lool nag. ³² Ba loolu amee ñu sèxétoo lël ja, jël ca gàtt yaak nag ya ba ca wèllu ya, tër ca suuf, boole yàpp waak deret ja, lekk. ³³ Ñu yegge ko Sóol, ne ko: «Mbooloo ma kat a nga nee, di moy Aji Sax ji, di lekk yàpp wu ànd ak deretam.» Sóol ne: «Yeenaka fecci kóllère! Béranjal-leen ma fii aw doj wu mag léegi.» ³⁴ Gannaaw loolu mu joxe leneen ndigal, ne: «Tasaaroolen ci biir mbooloo mi, ne leen ñu indi fii ñoom népp seeni nag ak seeni gatt. Fii lañuy rendee jur gi, door koo lekk. Su ko defee duñu moy Aji Sax ji, di lekk yàpp wu ànd ak deretam.» Mbooloo mépp daldi dikk guddig keroog, ku nekk akaw nagam. Ñu rendi foofa. ³⁵ Sóol daldi fay tabax ab sarxalukaay, ñeel Aji Sax ji. Boobu sarxalukaay la jékka tabax ñeel Aji Sax ji.

Bànni Israyil jot na Yonatan

³⁶ Ba loolu amee Sóol ne: «Nan toppi waa Filisti ci guddi gi, nu sèxétoo seen alal ba bët set, te bunu ci bàyyi kenn, mu dund.» Mbooloo ma ne ko: «Loo bëgg rekk, defal!» Sarxalkat ba nag ne ko: «Nanu ko jékka diis Yàlla fii.» ³⁷ Sóol laaj Yàlla ne ko: «Ndax ma topp waa Filisti? Ndax dinga leen teg ci loxil Israyil?» Bésub keroog nag Yàlla tontuwul. ³⁸ Sóol ne: «Yeen njiiti mbooloo mi yépp, dikkleen fii, nu seet ba gis bàkkaarub tey jii, lu mu doon. ³⁹ Ndax giñ naa ci Aji Sax jiy dund, wallukatub Israyil, bu doon sax lu sama doom Yonatan ci boppam def,

dee rekk ay àtteem.» Mbooloo mépp, kenn tontuwu ko. ⁴⁰ Mu ne bànni Israyil gépp: «Taxaweleen nee, maak sama doom Yonatan, nu taxawe nii.» Mbooloo ma ne Sóol: «Loo bëgg rekk, defal.» ⁴¹ Sóol ñaan ci Aji Sax ji, ne ko: «Yaw Yállay Israyil, ngalla xamleel liy dëgg.» Ñu daldi tegoo bant, mu dal ci kaw Yonatan ak Sóol, mbooloo ma wàcc. ⁴² Sóol ne: «Tegal-leen nu bant sama digganteek Yonatan.» Ñu tegal leen, mu dal ca doomam Yonatan.

⁴³ Sóol ne Yonatan: «Wax ma loo def.» Yonatan ne ko: «Aylayéwén maa ñam tuuti ca lem, ja ma cappe sama catu yet wi ma yoroon ci sama loxo. Maa ngi, naa deel!» ⁴⁴ Sóol ne ko: «Na ma Yàlla teg mbugal mu gëna tar, waaye yaw Yonatan dinga dee déy!» ⁴⁵ Mbooloo ma nag ne Sóol: «Lan? Yonatan dee, moom mi may Israyil ndam lu réy lii? Xalaateesu ko moos! Giñ nanu ci Aji Sax jiy dund, du lenn luy rote ci kawaru boppu Yonatan sax, dal fi suuf, ndax Yàlla la àndal def lii tey.» Noonu la mbooloo ma jote Yonatan, ba deewul. ⁴⁶ Ba loolu wéyee Sóol noppee daq waa Filisti, waa Filisti dellu ca seenum réew.

Sóol am na ndam

⁴⁷ Gannaaw ba Sóol feddlee nguuram ca Israyil, xare naak seen noon ya leen wër yépp: Mowabeen ñaak Amoneen ñaak Edomeen ñaak buuri waa Soba, ak waa Filisti. Mboolem fu mu walbatiku rekk, moo daan. ⁴⁸ Njambaar la xaree, duma Amalegeen ña, ba musal Israyil ca ña doon sexétoo seen alal.

⁴⁹ Doomi Sóol yu goor nag ñoo doon: Yonatan, ak Iswi ak Malkisuwa; ñaari doomam yu jigéen, di Merab mi ci gën di mag, ak Mikal mi gën di ndaw. ⁵⁰ Soxnas Sóol moo doon Ayinowam, Ayimaas di baayu Ayinowam. Njiitu xareem moo doon Abner doomu Ner baayu Sóol bu ndaw, ⁵¹ Kis miy baayu Sóol, ak Ner, baayu Abner, Abyel ay seen baay.

⁵² Xare bu metti la woon seen digg ak waa Filisti, giiru dundu Sóol gépp. Moo tax fu Sóol gisaan boroom kàttan mbaa boroomu fit, da koy dollikoo.

15

Sóol tooñati na

¹ Samiyel daa waxoon Sóol, ne ko: «Man la Aji Sax ji yebal, ngir ma fal la buurub Israyil, aw ñoñam. Kon déglul kàddu yii Aji Sax ji wax. ² Aji Sax ju gàngoor yi dafa wax ne: “Maay dikke mbugal mu faj la Amalegeen ña defoon Israyil, tëru leen ca yoon wa, ba ñuy génn Misra. ³ Demleen

léegi, songi Amalegeen ñi. Faagaagal-leen* seen lépp, te buleen leen ñeewante; reyleen goor ak jigéen, gone yi ba ci ñuy nàmp, ak nag ak gàtt, ak giléem ak mbaam.»

⁴ Ba loolu amee Sóol woo gàngoor ga, lim leen ca Telem, ñuy ñaar téeméeri junniy xarekat yuy deme tànk, ak fukki junniy goori Yudeen. ⁵ Sóol dem ba jot dëkkub Amalegeen ña, daldi waajal am tëru ca xur wa. ⁶ Mu yóñnee ca Keneen ña, ne leen: «Demleen, dawleen jóge ci biir Amalegeen ñi, bala ma leena buubaaleek ñoom, te ba bànni Israyil di génn Misra, yeena leen jiwoon ngor ñoom ñépp.» Keneen ña daw, jóge ca biir Amalegeen ña.

⁷ Ba mu ko defee Sóol song Amalegeen ña, dale ko Awila ba dëkk ba ñuy wax Sur ca penkub Misra. ⁸ Mu jàpp Agag buurub Amalegeen ña, gàngoor ga gépp, mu faagaagal, leel leen ñaw kay saamar. ⁹ Sóol ak gàngooram nag bàyyi Agag, muy dund, mook la gëna baax ca nag yaak gàtt ya: jurug yafal gaak kuuy yu ndaw ya, mboolem lu baax daal. Néeguñu caa faagaagal dara, waaye mboolem lu ca ñàkk solo mbaa mu yooy, loola lañu faagaagal.

Sóol ñàkk na

¹⁰ Gannaaw loolu kàddug Aji Sax ji dikkal Samiyel ne ko: ¹¹ «Réccu naa li ma fale Sóol buur, ndax dëddu na ma, te samay ndigal, jéfewu ko.» Samiyel am ca njàqare lool, ba fanaanee tinu Aji Sax ji guddi gépp. ¹² Ba bët setee Samiyel teela jóg dem ngir dajee Sóol. Ñu ne ko Sóol dem na dëkk ba ñuy wax Karmel, te defu fa lu moy yékkati am taax, terale ko boppam. Jóge na fa it, jáll ba Gilgal.

¹³ Ba Samiyel demee ba gis Sóol, Sóol ne ko: «Yal na la Aji Sax ji barkeel. Def naa la Aji Sax ji santaane!» ¹⁴ Samiyel ne ko: «Ana meem joojuy tàbbi sama nopp bii, lu mu doon? Ak looluy nàññi, may dégg?»

¹⁵ Sóol ne ko: «Ca Amalegeen ña de lañu ko jële. Xarekat yee bàyyi li gën ci gàtt yeek nag yi, ngir sarxal ko sa Yàlla Aji Sax ji. Waaye la ca des moom, faagaagal nañu ko.» ¹⁶ Samiyel ne Sóol: «Defal ndànk! Dinaa la xamal li ma Aji Sax ji wax biig.» Mu ne ko: «Waxal!» ¹⁷ Samiyel ne ko: «Xanaa du yaa gisaloon sa bopp ne lu tuut nga woon, te yaay njiital giiri Israyil tey; Aji Sax ji fal la, ngay buurub Israyil. ¹⁸ Aji Sax ji teg la ci yoon wi, ne la: “Demal faagaagal moykati Amalegeen ñi. Xareel ak ñoom, ba jeexal leen tàkk.” ¹⁹ Lu la tere woona déggal Aji Sax ji, xanaa di saax-saaxee alal ji, di def li Aji Sax ji ñaawlu?»

* 15:3 15.3 Lu Aji Sax ji aayal lañu koy def, yàq ko yaxee; muy nit, mbaa ag jur mbaa alal.

²⁰ Sóol ne Samiyel: «Ndaxam déggal naa Aji Sax ji. Dox naa yoon wi ma Aji Sax ji yebal; indi naa Agag buurub Amaleg te Amalegeen ñi, faagaagal naa leen. ²¹ Xarekat yi daal a tãne ci lël ji li gën ci gàtt yeek nag yi ñu wara faagaagal, ngir sarxal ko sa Yàlla Aji Sax ji ca Gilgal.»

²² Samiyel ne ko:

«Bànnexu Aji Sax ji ci saraxi rendi-dóomal ak yeneen sarax, mbaa tolooo naak bànnex ba muy am ci dégg ndigalal Aji Sax ji?

Ma ne, dégg ndigal a gën ab sarax;

xol bu nangoo gën nebbon kuuy.

²³ Bàkkaar u ngisaane la déggadi yemool, ñaawtéefu bokkaale tolook reewande.

Yaa gántal ndigalu Aji Sax ji,

Moom mu gántal sa nguur.»

²⁴ Sóol ne Samiyel: «Bàkkaar naa! Ndax maa wàcc kàddug Aji Sax ji ak say digal, ndax ragal mbooolo mi, ba topp seen coobare. ²⁵ Léegi nag ngalla waay, baal ma sama bàkkaar bii te walbatiku, ànd ak man, ma sujjóotali Aji Sax ji.» ²⁶ Samiyel ne Sóol: «Duma walbatiku ànd ak yaw, ndax yaa gántal kàddug Aji Sax ji, Aji Sax ji gántal sa nguur ci Israyil.»

²⁷ Naka la Samiyel ne wërëñ, di dem, Sóol jàpp ca catal mbubb ma, mu dagg.

²⁸ Samiyel ne ko: «Nii la Aji Sax ji dagge nguurug Israyil ci yaw bés niki tey, jox ko keneen ku la gën. ²⁹ Te Aji Nekk-Fàww ju Israyil ji du fen, du réccu, ndax du nit bay réccu.»

³⁰ Sóol dellu ne: «Bàkkaar naa! Waaye ngalla waay sagal ma ci sama kanam magi askan wi ak ci kanam Israyil. Walbatikul, ànd ak man rekk, ma sujjóotali sa Yàlla Aji Sax ji.» ³¹ Ba loolu amee Samiyel walbatiku topp Sóol. Sóol dem sujjóotali Aji Sax ji.

³² Gannaaw loolu Samiyel ne: «Indil-leen ma Agag buurub Amalegeen ñi.» Agag nag dikk, wutsi ko, ne finaax. Booba Agag a nga naan ca xelam: «Dee moom, tiitatuma ko, wees na!» ³³ Samiyel nag ne ko: «Ni aw jigéen ñàkke ay doom yu leen sa saamar xañ, ni la sa ndey di bokke tey ci jigéen ñi ñàkke doom.» Ci kaw loolu Samiyel rey Agag fa kanam Aji Sax ji ca Gilgal.

³⁴ Ba mu ko defee Samiyel dellu Raama, Sóol moom ñibbi kërám ca Gibeya gu Sóol.

³⁵ Ba ni Samiyel faatoo, seeteetul Sóol. Teewul mu jooy Sóol, waaye fekk na Aji Sax ji réccu la mu fal Sóol buurub Israyil.

Lii moo dox diggante Sóol ak Daawuda

16

Yàlla fal na Daawuda

¹ Gannaaw ba loolu wéyee Aji Sax ji ne Samiyel: «Yaw foo àpp sa jooy yi ngay jooy Sóol te man maa ko dàq, ba doonatul buur ci Israyil? Gannaaw maa foq nguuram ci Israyil kay, duyul sa béjéñ diwu oliw ba mu fees te nga dox, ma yebal la ci Yese waa Betleyem bi. Gis naa ciy doomam ki may fal buur.» ² Samiyel ne ko: «Ana nu ma fay deme? Sóol da koy dégg, rey ma!» Aji Sax ji ne ko: «Aw nag wu jigéen ngay jël, yóbbu, ne ko sarxalsi Aji Sax ji moo la indi. ³ Su ko defee nga woo Yese ca sarax sa. Man maa lay xamal nooy def, ba nga diwal ma ki ma la wax, fal ko.»

⁴ Samiyel def la Aji Sax ji wax. Ba mu agsee Betleyem, magi dëkk ba gatandoo ko tiitaange, ne ko: «Mbaa tàñki jàmm?»

⁵ Samiyel ne leen: «Jàmm rekk. Sarxalsi Aji Sax ji moo ma indi. Sell-luleen te dikk ànd ak man ca sarax sa.» Ci kaw loolu mu sellal Yese ak doomam yu góor, woo leen ca sarax sa.

⁶ Naka lañu agsi, Samiyel gis Elyab, daldi ne ca xelam: «Xam naa kii fi kanam Aji Sax ji rekk mooy tànnéefam!» ⁷ Aji Sax ji nag ne Samiyel: «Bul xool ci melokaanu kii, mbaa jëmmu taxawaayam, ndax gántal naa ko. Lii du ci gis-gisu nit. Nit, li fees bëtám lay gis, waaye Aji Sax ji ci xol lay xool.» ⁸ Yese daldi woo Abinadab, indi ko fi kanam Samiyel. Mu ne: «Aji Sax ji tànnul kii ba tey del!» ⁹ Yese indi Simeya, Samiyel ne: «Aji Sax ji tànnul kii it.» ¹⁰ Yese indi juróom ñaari doomam yu góor fa kanam Samiyel, Samiyel ne ko: «Aji Sax ji tànnul kenn ci ñii.»

¹¹ Samiyel nag ne Yese: «Xale yu góor yi yemb nañu?» Yese ne ko: «Xanaa ki gën di ndaw. Ma ngay sàmm gàtt ya.» Mu ne ko: «Yónneel, woolu ko, dunu jekki te dikkul fi.» ¹² Yese yónnee, ñu indi ko. Ma nga def ku xees, neexa xool, bët ya leer nàññ. Aji Sax ji ne Samiyel: «Diw ko, kii la.» ¹³ Samiyel fab béjéñu diw ba, diw ko fa kanam magam ña. Ba mu ko defee Noowug Aji Sax ji ne milib ca kaw Daawuda, dale fa ànd ak moom bés sub keroog. Ba loolu wéyee Samiyel moom, dem dëkk ba ñu naan Raama.

Daawuda dugg na ca liggéeyu Sóol

¹⁴ Ci kaw loolu Noowug Aji Sax ji dëddu Sóol, ngelaw lu aay bàyyikoo ci Aji Sax ji, ub boppam. ¹⁵ Ay daga Sóol wax Sóol ne ko: «Lii kat ngelawal Yàlla lu aay la. Moo ub sa bopp. ¹⁶ Nu ngii nag fi sa kanam, joxeel ndigal rekk sang bi, nu wutali la ku mana xalam. Su ko defee bu la ngelawal Yàlla lu aay songee, mu xalamal la, nga am jàmm.»

¹⁷ Sóol ne dagam ya: «Ayca, seetal-leen ma ku mane xalam bu baax, indil ma ko.»

18 Kenn ca dag ya ne ko: «Man de, gis naa jenn doomu Yese waa Betleyem bi. Ku mana xalam la te jambaare. Ñeyi xare la. Ku déggi wax, ku góorayiw, te Aji Sax ji ánd ak moom.»

19 Ba loolu amee Sóol yebal ay ndaw ca Yese ne ko: «Yónnee ma sa doom Daawuda, ma ca gätt ya.» 20 Yese yebal doomam Daawuda, daldi takk mbaam, sêf ko mburu ak mbuusu biñ ak ab tef, ngir mu joxal ko Sóol yóbbal. 21 Daawuda dem ca Sóol, daldi támbali di ko liggéeyal. Sóol sopp ko lool. Daawuda nag mujj di gáddukatu gánnaayam. 22 Ci kaw loolu Sóol yónnee ca Yese, ne ko: «Báyyl Daawuda, mu di ma liggéeyal far, ndax bég naa ci moom.» 23 Ci kaw loolu, saa yu ngelawal Yálla songee Sóol, Daawuda fab xalam ga, xalamal ko, Sóol féex, am jámm, ngelaw lu aay la dèddu ko.

17

Golyaat dëkk na bànni Israyil

1 Waa Filistee boole woon seeni gàngoor ngir xare. Ñu daje ca dëkk ba ñu naan Soko ca diiwaanu Yuda, daldi dale ca Efes Damim diggante Soko ak Aseka. 2 Sóol ak waa Israyil nag daje, dale ca xuru Ela, làng-dér ngir jànkoontek waa Filisti. 3 Waa Filistee nga taxawe tund wi, bànni Israyil taxawe tund wee, xur wa dox seen diggante.

4 Ci biir loolu jenn jambaar génne ca làngu waa Filisti. Ku ñuy wax Golyaat*, dëkke Gaat, taxawaayam di juróom benni xasab yu teg diggante baaraamu déy ak digg, xawa tollu ci ñetti meetar. 5 Mbaxanam xàñjar la sol ak kiiraayal dènnub juróom benn fukki kilo, ñu liggéeye ko waasintóori xàñjar. 6 Ma nga takk kiiraayi yeel yu xàñjar, gálloo xeeju xàñjar bu ndaw ca wagg ya. 7 Bantu xeejam bu mag baa nga saf mbaamum ràbb, ñawkay xeej ba di weñ gu épp juróom ñaari kilo. Gàddukatu pakkam baa ngay dox, jiitu ko.

8 Golyaat taxaw, janook làngi Israyil, àddu ca kaw, ne leen: «Ana lu ngeen di gén, làng-déral xare nii? Xanaa du maay waa Filisti ji, yeen ngeen di surgay Sóol? Tabbleen genn góor, mu wácc, dajeek man. 9 Su ma manee ba rey ma, nuy seeni jaam; waaye su ma ko manee ba rey ko, ngeen di sunuy jaam, di nu jaamu.» 10 Waa Filisti ba neeti: «Maa dëkk làngi Israyil bés niki tey. Booleleen maak genn góor rekk, nu xeex.» 11 Ba Sóol ak bànni Israyil yépp déggee waxi waa Filisti jooju, jáq nañu, tiit nañu lool.

Daawuda def na jaloore

12 Daawuda nag moo doon doomu góor googu dëkk Efrata ca Betleyem ga ca di-iwaanu Yuda, ñu di ko wax Yese. Yese amoon na juróom ñetti doom yu góor. Góor ga, ca jamonoy Sóol, mag mu ñu nawloo la woon. 13 Ñetti doomi Yese yu góor yu mag ñoo rangu woon, topp Sóol ca xare ba. Ñetti doom ya dem xare, taaw ba Elyab lañu koy wax, ka ca topp di Abinadab, ñetteel ba di Simeya. 14 Daawudaa ca génoon di ndaw. Ñetti magam yooyu ñoo toppoon Sóol, 15 waa ke Daawuda da daan jaabantee fa Sóol ak Betleyem ga muy sàmmee gátti baayam.

16 Subaak ngoon nag waayu Filisti ja ne jaas taxaw, ba mu am ñeent fukki fan. 17 Ci biir loolu Yese ne doomam Daawuda: «Ayca, jèlal nattub mbool mii ak fukki mburu yii te nga daw, yóbbul ko sa mag ya ca dal ba. 18 Fukki dogi formaas yii, yóbbul ko seen njiitu kurel. Nemmikil seen jámmu yaram te nga sàkku ci seen firnde, indil ma. 19 Sóol a ngaak ñoom ak waa Israyil gépp ca xuru Ela, di xareek waa Filisti.»

20 Daawuda teela jóg ca èllég sa, wacce gätt ya ab wattukat, daldi jël yóbbal ga, dem na ko ko baayam sante. Naka la àgg ca dal ba, yemook gàngoor gay génnaale seen xaacuy xare, ngir làng-déri. 21 Bànni Israyil ak waa Filisti daldi dér, gàngoor janook gàngoor. 22 Ci biir loolu Daawuda wacce yóbbal ga, wacce ko wattukatub cummikaaya, daldi daw ba ca làngu xare ba. Mu agsi, nuyook ay magam. 23 Na muy wax ak ñoom, jambaar ja ñuy wax Golyaat waa Filisti ba dëkke Gaat, ne tëll génne ca làngi waa Filisti. Mu dellu ca wax jooju mu waxoon, Daawuda dégg ca.

24 Ba bànni Israyil gépp gisee waa ja, dañoo dellu gannaaw, tiit lool. 25 Ña nga naan ca seen biir: «Gis ngeen waa jee di ñew, dëkksi Israyil a ko yékkati. Képp ku ko rey de, Buur dina ko jox alal ju bare. Doomam la koy may jabar, te waa kër baayam, dina leen jagleel ab cér ci digg Israyil.» 26 Daawuda ne ña mu dendal: «Ngeen ne, lees di defal ku rey waa Filisti bii, ba faj gáccég Israyil? Ak kuy yéefaru waa Filisti bii sax, bay dëkk gàngoori Yálla jiy dund?» 27 Nit ña dellu ca loola ñu waxoon, ne moom lañuy defal ku rey waa ja.

28 Elyab, magu Daawuda, dégg Daawuda di wax ak ñooña. Mu mer, ne ko: «Yaw sax lu la fi indi? Ak koo wacce la fay gätt ak as néew ca àll ba? Xam naa bu baax sag réy ngise, ak njubadi gi nga mébét. Seetaansi xare bi donj a la fi indi!» 29 Daawuda ne

* 17:4 17.4 Golyaat: am na ñu ko géna xam ci turu Jalut.

ko: «Waaaw, man lu ma def? Xanaa du wax doɗɗ?»³⁰ Daawuda jóge ca mag ja, dem ca keneen, laaj ko mbir mooma, tont la di lenn.

³¹ Ci kaw loolu ñu dégg kàddu ya ca Daawuda wax, yegge ko Sóol. Sóol woolu ko. ³² Daawuda dikk ne Sóol: «Bu kenn yoqil waa jii, sang bi. Man maay dem xeex ak waa Filisti bii.»³³ Sóol ne Daawuda: «Déedéet, yaw manoo songi waa Filisti bii, di xeex ak moom. Gone doɗɗ nga, te moom cag ndawam la dale di nitu xare.»³⁴ Daawuda ne Sóol: «Sang bi, bu may sàmm sama gàtti baay, ba gaynde mbaa rab wu aay dikk, jël ci ab gàtt, ³⁵ maa koy topp, dóor ko, nangoo gàtt bi ci gémmiñam. Te bu ma songee, sikkim bi laay séq, fàdd, mu dee. ³⁶ Rey naa gaynde, rey naa weneen rabu àll wu aay, sang bi. Kon nag yéefaru Filisti bii it ni wenn ci yooyu rab rekk, ndax moo tékku gàngoori Yàlla jiy dund. ³⁷ Daawuda neeti: Aji Sax ji ma musal ci pàddum gaynde ak weneen rabu àll wu aay, moo may musal ci loxol waa Filisti bii.» Sóol ne Daawuda: «Demal boog, yal na Aji Sax ji ànd ak yaw.»

³⁸ Ba mu ko defee Sóol solal Daawuda yérey boppam, solal ko mbaxanam xàñjar, solal ko kiiraayal dènn. ³⁹ Daawuda rànqoo saamarub Sóol, ca kaw yére ya, daldi jéema dox, mu tē, ndax ñakk koo miin. Daawuda ne Sóol: «Manumaa doxaale lii ndax miinuma ko», daldi koy summi. ⁴⁰ Ba loolu amee Daawuda jël yetam, tànn ca dex ga juróomi doj yu rattax, yeb ca gafakag mbuusum sàmmam, daldi ñàbb mbaqam, wuti waa Filisti ba. ⁴¹ Ci biir loolu waa Filisti ba, dox, dikk ba jege Daawuda, gàddukatu pakkam jii-itu ko. ⁴² Waa Filisti ba séentu, séen Daawuda; muy xale su góor su ndaw, xees te góorayiw, mu daldi koy xeeb. ⁴³ Mu ne Daawuda: «Xanaa ab xaj laa, ba nga di ma jëlalu yet?» La ca tegu waa Filisti ba móolu ko ca turi tuuram, ⁴⁴ ne ko: «Dikkal fii rekk, ba ma leele saw suux njanaaw yeek rabi àll yi.»

⁴⁵ Daawuda ne waa Filisti ba: «Yaw de yaa may jëlal ab saamar ak xeej bu mag ak bu ndaw, waaye man turu Aji Sax ju gàngoor yi laa lay dikke, Yàllay làngi xarey Israyil, ji nga tékku. ⁴⁶ Bésuub tey jii Aji Sax jee lay teg ci sama loxo, ma rey la, dog sa bopp. Tey jii sax laay leele njanaaw yeek rabi àll yi, néewi xarekati Filisti, ba àddina sépp xam ne Israyil am na Yàlla. ⁴⁷ Mboolem ñii fi daje dinañu xam ne du saamar te du xeej la Aji Sax jiy walloo, ndax Aji Sax jee boroom xare bi, te moo leen teg ci sunuy loxo.»

⁴⁸ Ci kaw loolu waa Filisti ba daldi dikk, ba gënatee jege Daawuda, Daawuda riir,

wuti làng ga, ngir dajeek waa Filisti ba. ⁴⁹ Mu yoor loxoom ca mbuusam, jël ca aw doj, mbaq, jam waa Filisti ba ci jē, doj wa tàbbi ca biir jē ba. Mu ne jàñjan, dépp kanam ga fa suuf. ⁵⁰ Ag mbaq aku doj la Daawuda mane waa Filisti ba, jam ko, rey ko, te yorul saamar.

⁵¹ Daawuda nag daw ba taxaw, tiim waa Filisti ba, jàpp saamaram, boccee ko ca mbar ma, jekkli ko, dog bopp ba. Waa Filisti gis ne seen ñeyu xare dee na, ñu daw. ⁵² Ba loolu amee mbooloom Israyil ak Yuda àdu xaacoondoo, daldi dàqi waa Filisti, ba jub xur wa, ba ca bunti Ekkron. Waa Filisti ya ñu rey ne wetar ca yoonu Saarayim ba Gaat, ba ca Ekkron. ⁵³ Bànni Israyil nag waññikoo ca ndàqum Filisti mu metti ma, daldi sèxétou seen dal ba. ⁵⁴ Daawuda jël boppu waa Filisti ba, yóbbu Yerusalem, gannaayi waa ja, mu fat ca xaymab boppam.

⁵⁵ Lu jiitu loolu, ba Sóol gisee Daawuda, mu wuti waa Filisti ba, da ne Abner njiital mbooloom xareem: «Waaaw, Abner, xale bii doomu kan a?» Abner ne ko: «Buur, giñ naa, nga fekke tey, xawma ko.» ⁵⁶ Buur Sóol ne ko: «Nanga laajte, xale bii, doomu kan la.» ⁵⁷ Naka la Daawuda rey waa Filisti ba, ba dikk, Abner jàpp ko, indi ko ca kanam Sóol. Daawuda nga ñàbb boppu waa Filisti ba, ba tey. ⁵⁸ Sóol ne ko: «Yaw, gone gi, yaay doomu kan?» Daawuda ne ko: «Maay doomu Yese, sa surga ba dèkk Betleyem.»

18

Yonatan fas na kólléerek Daawuda

¹ Ba Daawuda di wax ak Sóol ba noppi, fekk na Yonatan yég ci xolam na mu taqook Daawuda ci biir cofeelu benn bakkan. Yonatan dafa soppoon Daawuda ni boppam. ² Bésuub keroog la Sóol téye Daawuda, mayatu ko mu ñibbi kër baayam. ³ Ba loolu amee Yonatan fa-sook Daawuda kólléere, ndax sopp ko ni boppam. ⁴ Ci biir loolu Yonatan summi turkeem, jox ko Daawuda, boole ca ay yérey xareem, ba ca saamaram ak fittam ak ngañaayam sax. ⁵ Daawuda nag di dem ci bépp yoonu xare bu ko Sóol yebal, di ca am ndam. Sóol fal ko njiitu xarekat ya, gàngoor gépp rafetlu loolu, jawriñi Sóol itam rafetlu ko.

Sóol a ngay fexeel Daawuda

⁶ Ba ñu demee ba xarekat yay ñibbi, gannaaw ba Daawuda reye waa Filisti ba, jigéeni mboolem dèkki bànni Israyil a génn gatanduji Buur Sóol, di fecc ak a woy, tabala ya ànd ak sarxolle ya ak xalam ya. ⁷ Ña ngay fo, di awoonte, naan: Sóol jam junneem,

Daawuda jam fukki junneem.

⁸ Sóol ñaawlu kàddu ga, mer lool. Mu ne ca xelam: «Daawuda lañu moomale fukki junni; man, junni! Lu ko deseeti lu moy jal bi?» ⁹ Bésub keroog la Sóol dale ronni Daawuda.

¹⁰ Ca èllëg sa ngelawal Yàlla lu aay ne milib ca kaw Sóol, muy waxtu ca digg kërám. Daawuda nag di ko xalamal, na mu daan def naka jekk, fekk Sóol ñàbb ab xeejam. ¹¹ Mu jekki sànni xeej ba, te naan ca xelam: «Naa daaj Daawuda ci tabax bi!» Daawuda nag mbas ko ñaari yoon.

¹² Sóol daldi ragal Daawuda, ndax booba xam na ne Aji Sax jee ko dèddu, ànd ak Daawuda. ¹³ Ba loolu amee mu jële ko fi wetam, fal ko ñjiitu kurélu junni xarekat, muy xareji, di délsi, jiite gàngoor ga. ¹⁴ Daawuda baaxle ca yoonam yépp, Aji Sax ji ànd ak moom. ¹⁵ Ba Sóol gisee Daawuda àntule lool, mu gën koo ragal. ¹⁶ Teewul mboolem Israyil ak Yuda sopp Daawuda, ngir moo leen jiite woon, di xareji, di dikk.

Daawuda jël na doomu Sóol soxna

¹⁷ Ci kaw loolu Sóol ne Daawuda: «Sama taaw bu jigéen, Merab a ngii. Moom laa lay may. Nekkai na sama jambaaru xare rekk, te xareel Aji Sax ji ay xareem.» Booba Sóol a nga naan ca xelam: «Bu ko sama loxo laal, nay loxol waa Filisti.»

¹⁸ Daawuda ne Sóol: «Waaaw, ana lu ma tekki, man maak samay bokk, sama askanu baay ci Israyil, ba wara mana goromlook Buur?» ¹⁹ Ba ñu demee ba wara jox Daawuda, Merab doomu Sóol ja, Àdiryel ma cosaano Mewola lañu ko may.

²⁰ Ci kaw loolu Mikal doomu Sóol bëgg Daawuda, ñu àgge ko Sóol, mu am ca mbégte. ²¹ Booba Sóol a nga naan: «Naa ko ko may, ngir mu doon ndëgg-sërëxam, ba waa Filisti teg ko loxo.» Sóol nag wax Daawuda, ñaareel bi yoon, ne ko: «Tey ngay samab goro.» ²² Ci biir loolu Sóol sant ay dagam, ne leen: «Diisool-leen maak Daawuda, ngeen wax ko ne ko: “Yaw kat, Buur am na bânneex ci yaw, te it dagam yépp a la sopp. Kon nag nangula doon gorob Buur.”» ²³ Dagí Sóol ya déey Daawuda kàddu yooyu. Daawuda ne leen: «Ngeen defe ne goromlook buur daal, du dara? Man mii taqul dara, tekkiwuma dara!» ²⁴ Dag ya yegge Sóol kàddu yooyu Daawuda wax.

²⁵ Sóol ne leen: «Waxleen Daawuda ne ko, Buur de sàkkuwul ub can: xanaa tééméeri mbutukay waa Filisti yu mu feyoo ci noonam yooyu.» Booba la Sóol laloon mooy pexe mu tàbbal Daawuda ca loxol waa Filisti. ²⁶ Dag ya yegge Daawuda

kàddu yooya, doon gorob buur daldi koy jaral loola. Balaa àpp baa mat, ²⁷ Daawuda dem na, mooki nitam ba rey ñaar tééméeri waa Filisti. Daawuda indi seeni mbutuka, ñu waññal ko Buur ba mu mat sèkk, mu daldi yeyoo goromlook Buur. Ba loolu amee Sóol may Daawuda doomam Mikal. ²⁸ Sóol nag xam xéll ne Aji Sax jee ànd ak Daawuda, te it doomam Mikal bëgg na ko, ²⁹ mu gën koo ragalati. Fa la Sóol doxe doon noonub Daawuda ba fàww.

³⁰ Ci kaw loolu ñjiiti xarey Filisti di amal ay cong, noppiwuñoo xareek Israyil. Teewul saa yu ñu songaan, Daawudaay gëna am ndam mboolem jawriñi Sóol, ba mujj Daawuda amu tur lool.

19

Yonatan taxawu na Daawuda

¹ Ba mu ko defee Sóol xamal doomam Yonatan ak dagam yépp ne reylu Daawuda mooy li mu nar. Te Yonatan doomu Sóol sopp Daawuda lool. ² Yonatan yegge ko Daawuda, ne ko: «Sama baay a ngi lay wuta rey. Yaw nag fagarul kat te teela xëy èllëg, seet foo làquji te baña génn. ³ Man dinaa dem, taxaw ci sama wetu baay fi nga nekk ci àll bi. Dinaa wax ak sama baay ci yaw, nu bokk taxaw ca tool ba ngay làquji, man ci sama bopp dinaa wax ak sama baay ci yaw ba gis nu mbir mi tédde, yegge la ko.» ⁴ Ci kaw loolu Yonatan wax baayam lu baax ci Daawuda, ne ko: «Buur, ngalla bul tooñ Daawuda, sa jaam bii, ndax moom kat tooñu la, lu baax rekk la la masa defal. ⁵ Jaay na bakkanam, ba rey waa Filisti ba. Aji Sax ji maye ca ndam lu réy, ñeel Israyil gépp, nga teg ci bët, am ca mbégte. Ana lu waral ngay tooñ, di tuur deretu jaamburu Yàlla bu mel ni Daawuda, reylu ko ci dara?» ⁶ Sóol nag déggal Yonatan, daldi ne: «Giñ naa ko ci Aji Sax jiy dund, deesul rey Daawuda.» ⁷ Yonatan woo Daawuda, nettali ko waxtaan wa wépp, door koo yóbbu ca Sóol, mu dellu di ko liggéeyal, na woon.

Mikal xettli na Daawuda

⁸ Ci kaw loolu xare jibaat, Daawuda dem xeexi ak waa Filisti, daan leen jéll bu réy, ñu daw. ⁹ Ci kaw loolu ngelaw lu aay lu Aji Sax ji dikkal Sóol, fekk ko toog ci biir kërám, ñàbb ab xeejam, Daawuda di xalam. ¹⁰ Sóol di wuta jam Daawuda xeej bi, ngir daaj ko ca tabax ba. Daawuda nag mbas ko, mu jam xeej ba ca tabax ba. Daawuda daldi daw, ba raw guddig keroog.

¹¹ Sóol yebal ay ndaw ca kër Daawuda ngir ñu xoolal ko ko, ba bët set, ñu rey ko. Mikal, soxnas Daawuda, yégal ko Daawuda, ne ko: «Soo rawalewul sa

bakkan ci guddi gi de, bu ëlléegé dees na la rey.»¹² Ba loolu amee Mikal jaarale ko ca palanteer ba, mu wàcc, daw, ba raw.¹³ Mikal jël gällaaju kër ga, teg ca lal ba, fab deru bëy, teg fa féeteek bopp ba, daldi koy sänge malaan.¹⁴ Sóol yebal ay ndaw yu jàppsi Daawuda, Mikal ne: «Moom de daa wopp.»¹⁵ Ci kaw loolu Sóol dellu yebal ndaw ya, ngir ñu dem ba gis ko. Mu ne leen: «Indil leen ma ko, booleek lal bi, ba ma rey ko!»¹⁶ Naka la ndaw ya délsi, xool, gisuñu lu moy gällaaju kër ga ca kaw lal ba, ak deru bëy ba féeteek bopp ba.¹⁷ Ba loolu amee Sóol ne Mikal: «Ana lu waral nga wor ma nii, bàyyi sama noon, mu rècc?» Mikal ne ko: «Moom kay moo ma ne! «Bàyyi ma, ma daw, lu ko moy ma rey la!»»

Sóol toppi na Daawuda ca Nayot

¹⁸ Noonu la Daawuda dawee ba raw. Mu fekki Samiyel ca Raama, wax ko la ko Sóol def lépp. Ñu ànd, mook Samiyel, dali ca Nayot.¹⁹ Ñu yegge ko Sóol ne ko: «Ndeke Daawudaa nga Nayot ca dëkk ba ñuy wax Raama.»²⁰ Sóol yebal ay ndaw, ngir ñu jàpp Daawuda. Nit ña dikk, gis kurélu yonent yuy wax ay waxyu, Samiyel jiite leen. Ba loolu amee, ca kaw ndawi Sóol ya la Noowug Yàlla wàcc, ñuy wax ay waxyu, ñoom itam.²¹ Ñu yegge ko Sóol, mu yebal yeneen ndaw, ñu dikk, di wax ay waxyu, ñoom it. Sóol dellooti yebal ay ndaw, ñetteel bi yoon, ñu dikk, di wax ay waxyu, ñoom itam.²² Mu jóg moom ci boppam, jëm Raama. Mu dikk ba ca teen bu mag ba ca Seeku, daldi laajte ne: «Ana fu Samiyel ak Daawuda nekk?» Ñu ne ko: «Ña nga ca Nayot ca Raama.»

²³ Sóol jubal yoonu Nayot ca Raama. Ba loolu amee, ca kawam, moom it, la Noowug Yàlla wàcc, muy wéy di wax ay waxyu dem, ba àgg Nayot ca Raama.²⁴ Ci kaw loolu mu summiy yéereem, di wax ay waxyu moom it fa kanam Samiyel, daldi ne lãndan, ne dunj, bëccéeg keroog gépp ak guddi ga gépp. Looloo waral ñu naan: «Moo Sóol it ci yonent yi laa?»

20

Yonatan wallu na Daawuda

¹ Daawuda nag dawé Nayot, ca wetu dëkk ba ñuy wax Raama. Mu dikk ca Yonatan, ne ko: «Ana lu ma def? Ana ñaawtéef gu ma def, ak fu ma tooñe sa baay, ba muy wut sama bakkan?»² Yonatan ne ko: «Yàlla tere kay, doo dee muk! Ma ne, sama baay du def dara lu réy ak lu tuut te yégalu ma ko. Su amoon moomu mébét, lu mu ma ciy nëbb? Loolu kay amull!»³ Daawuda daldi giñ, neeti ko:

«Dinaa la ko giñal, sa baay xam na xéll cér bi ma am ci yaw. Moo tax mu ne: «Bu Yonatan yég sama mébét muk, lu ko moy dina ko naqarlu.» Waaye giñ naa ko, nga fекke ci Aji Sax jiy dund, ab jéego sax doxul sama diggantek dee.»⁴ Yonatan ne Daawuda: «Wax ma loo bëgg rekk, ma defal la ko.»

⁵ Daawuda ne Yonatan: «Xanaa lenn. Èllég la mággalu Terutel weer wi, te man, manumaa ñakka toog ak Buur, ngir lekk. Waaye may ma, ma làquji àll ba, ba gannaaw èllég ca ngoon.⁶ Su sa baay seetloo ba seetlu ne nekkuma fa, nee ko: «Daawuda déy da maa tinoo tinu, ne ma yiwi ko, mu ne cowa ba Betleyem, dëkkam, ngir saraxu at ba at bu fa bokkam yépp amal.»⁷ Su nee baax na de, sang bi, sama jàmm la, waaye su sànjoo ba sànju nag, xamal ne musiba la nar.⁸ Su boobaa nag sang bi, yéwéne ma rekk sang bi, ngir kólléreg Aji Sax ji nga fasook man. Waaye ndegam am na genn ñaawtéef gu ma gakkal, ngalla rey ma yaw ci sa bopp, jarul nga di ma yóbbu ci sa baay.»⁹ Yonatan ne ko: «Yàlla tere. Te su ma yégoon ba yég musiba mu sama baay nara indi fi sa kaw, na la wóor ne dinaa la ko xamal.»¹⁰ Daawuda ne Yonatan: «Su la sa baay tontoo kàddu yu ñagas nag, ana ku ma koy xamal?»¹¹ Yonatan ne Daawuda: «Kaay nu dem ba ca àll ba.» Ñu ànd ñoom ñaar ba ca àll ba.

¹² Yonatan ne Daawuda: «Giñ naa ci Aji Sax ji, Yàllay Israyil, dinaa seetlu sama baay nэгèni sii gannaaw èllég. Su la naralee jàmm, yaw Daawuda, dinaa yónnee ci yaw ku la ko déey.¹³ Waaye su la sama baay nammeé indil musiba, yal na ma Aji Sax ji def lu ko raw, ndegam déeyuma la ko, ba rawale la ci jàmm. Yal na Aji Sax ji ànd ak yaw, na mu ànde woon ak saa baay.¹⁴ Xanaa moos su may dund, ci ngorug Aji Sax ji ngay jéfeek man. Su ma deeyee nag,¹⁵ bul noppee jéfe ngor sa digg ak sama waa kër muk, ba sax keroog bu Aji Sax ji faree fi kaw suuf képp kuy noonu Daawuda.»¹⁶ Noonu la Yonatan fasook waa kër Daawuda, ne: «Yal na Aji Sax ji fey nooni Daawuda.»

¹⁷ Ba mu ko defee Yonatan dellu giñloo Daawuda ci cofeelam gi mu am ci Daawuda ndax ni mu soppe boppam la ko soppe woon.¹⁸ Yonatan dellu ne ko: «Èllég ci mággalu Terutel weer wi, sag wuute dina fés, ndax sa toogu ba mooy wéet.¹⁹ Kon bu gannaaw èlléegé gaawal dem, ba fa nga làqu woon keroog ba mbir mi amee, te nga négandiku ca wetu doju Gindikaaya wa.²⁰ Man nag dinaa sànni ñetti fitt ca wet ga, mu mel ni daa am lu ma fay diir.²¹ Su

ko defee rekk, ma yebal ndaw, ne ko mu jëli fitt yi. Su ma nee ndaw li: “Ée! Xoolal fitt yaa ngii nga romb, foral!” Su boobaa, ñëwal, jàmm ñeel na la, te dara amul, giñ naa ko ci Aji Sax jiy dund. ²² Waaye su ma nee ndaw li: “Fitt yaa nga nale ca sa kanam!” Su boobaa, demal, ndax Aji Sax jee la yebal. ²³ Mbir moomu nu digoo, maak yaw nag, Aji Sax jaa ngii, di ci seede sama digganteek yaw ba fàww.»

²⁴ Daawuda làquji ca àll ba. Ba màggalu Terutel weer wa jotee, Buur toog di waaja lekk. ²⁵ Buur a nga toog ca toogoom naka jekk, fa sës ca miir ba. Yonatan taxaw, Abner toog, feggook Sóol, toogub Daawuda ba nag wéet. ²⁶ Sóol waxul dara bésu keroog, ndax booba ma nga naan ci xelam: «Ndogal la, boo demee daa setul, xam naa daa setul rekk.» ²⁷ Ca èllëg sa, di ñaareelu bésu Terutel weer wa, toogub Daawuda bay wéet ba tey. Sóol nag ne doomam Yonatan: «Waaw, lu waral doomam Yese ji lekksiwul démb ak tey?» ²⁸ Yonatan ne Sóol: «Daawuda de da maa tinoo tinu ngir ma yiwi ko, mu dem Betleyem. ²⁹ Daf ma ne: “Ngalla yiwi ma, ndax saraxu biiri bokk lanu am ca dëkk ba, sama mag a ma sant, ma teeweji ko. Kon nag su la neexee, may ma rekk ma récc, seeti saay bokk.” Looloo waral dikkul ci sa ndab li, Buur.»

³⁰ Ba loolu amee Sóol xadaru ci kaw Yonatan. Mu ne ko: «Doomu caga bi, yaa të ndey! Xanaa xawma ne yaw, doomu Yese ji nga faral, muy sa gâce, di sa gâceog kanamu ndey?» ³¹ Ngir li feek doomu Yese jiy dund fi kaw suuf, yaw doo taxaw, sa nguur du taxaw. Léegi nag, yónneel, ñu indil ma ko, ndax moom aji dee la!» ³² Yonatan ne baayam: «Lu tax muy dee? Ana lu mu def?» ³³ Sóol ne ko xërr xeej ba, nar koo rey. Yonatan nag xam ne rey Daawuda la baayam dogu. ³⁴ Yonatan jóge ca ndab la ak tângooru meram. Lekkul dara keroog ñaareelu bésu màggalu Terutel weer wa, ndax naqar wu mu am ca na baayam torxale Daawuda.

³⁵ Ca èllëg sa Yonatan xëy, xalelu góor bu ndaw ànd ak moom, mu dem ca àll ba, ca digoom baak Daawuda. ³⁶ Mu ne xaleem ba: «Dawal seeti fitt yi may sànni.» Xale ba daw, mu soqi fitt ga, mu jiitu ko. ³⁷ Xalelu góor ba dem ba fa fittu Yonatan ga dal, Yonatan woo xale bi, ne ko: «Ée! Xanaa du fitt gaa nga nale ca sa kanam?» ³⁸ Mu wooti ko, ne ko: «Ée, doxal gaaw, bul taxaw!» Xale ba for fitt ga, dellu ca njaatigeem Yonatan. ³⁹ Xale bu góor ba nag xamu ca dara, Yonatan ak Daawuda rekk a xam mbir ma. ⁴⁰ Yonatan daldi jox xaleem ba ay gannaayam, ne ko:

«Doxal, yóbbu ca dëkk ba.» ⁴¹ Xale ba dem, Daawuda jóg, génne ca làquwaayam ba fare bëj-saalum. Mu ne gurub, dëpp jëem fa suuf, sujjóot ñetti yoon, ku nekk foon sa moroom, ñoom ñaar ñépp jooy, te Daawuda rawati. ⁴² Yonatan ne Daawuda: «Demal ak jàmm, gannaaw noo giñoo nun ñaar ci turu Aji Sax ji ne “Aji Sax jey seede sama digganteek yaw, ak diggante sama askan ak saw askan, ba fàww.»»

21

¹ Ba mu ko defee Daawuda dem, Yonatan dellu ca dëkk ba.

Daawuda dem na ca Ayimeleg

² Gannaaw ba loolu wéyee Daawuda dem dëkk ba ñuy wax Noob ca Ayimeleg sarxalkat ba. Ayimeleg gatandu ko, di lox, ne ko: «Lu la taxa wéet, kenn àndul ak yaw?» ³ Daawuda ne Ayimeleg sarxalkat ba: «Buur a ma sant ne ma: “Bu kenn xam lenn ci li ma la yónni, ak li ma la sant.” Samay ndaw nag, xamal naa leen ne bérab sàngam lañu wara xaar. ⁴ Loo fi denc nag? Su dee juróomi mburu mbaa lu beggandi rekk, jox ma!» ⁵ Sarxalkat ba ne Daawuda: «Dencuma mburum neen de, mburu mu sell a fi ne. Jëlal, jox say nit, ndegam fekk na leen ñu fegu ci aw jigéen.» ⁶ Daawuda ne sarxalkat ba: «Aw jigéen kay mbañ la ci nun naka jekk, su ma nekkee ci yoonu xare, te sellal la sama nit ñi nekke nii. Doonte yoon wii laajul sellal, tey fekk na leen sellal moom ci moomu mbir.» ⁷ Ci kaw loolu sarxalkat ba jox ko loola ñu sellal, ndax mburu amu fa woon, lu moy mburum teewal, ma ñu jële woon fa Aji Sax ji, ba wuutal fa mburu mu tàng ca saa sa ñu ko fa jëlee.

⁸ Fa la fekk keroog ab jawriñu Sóol bu yitte téye woon fa Aji Sax ji. Mooy Edomeen ba ñuy wax Doweg; njiital sàmmi Sóol la woon.

⁹ Daawuda ne Ayimeleg: «Dencoo fi ab xeej mbaa saamar bu jàppandee? Ndax du saamar, du lenn ci samay gannaay lu ma indaale, ngir yónneentu Buur a jampon lool.» ¹⁰ Sarxalkat ba ne ko: «Xanaa saamarub Golyaat waa Filisti ba nga reyoon ca xuru Ela. Ma nga nee laxase ca turki ba, ca gannaaw xar-sànni ma. Soo ko bëggee, jëlal, boobu rekk a fi ne.» Daawuda ne ko: «Aa! Boobu kay amul moroom, jox ma ko.»

Daawuda nax na leen

¹¹ Bésu keroog Daawuda daw na Sóol ba àgg ca Akis buurub Gaat. ¹² Jawriñi Akis ya wax Akis ne ko: «Xanaa kii du Daawuda, boroom réew mi? Du kii lañuy woyal, di fecc, naan: “Sóol jam junneem,

Daawuda jam fukki junneem?”)

¹³ Daawuda am lu mu foog ci kaddu yooyu, ba tax mu ragal lool Akis buurub Gaat. ¹⁴ Mu daldi soppliku ba mel ni ku teqlikook sagoom ca seen kanam, di dof-doflu ca seen kaw, di bindantum ca bunt yaaka rogalaatal ay yuut ca kawaru sikkim ba. ¹⁵ Akis ne jawriñam ya: «Xam ngeen ne kii ab dof la; ana lu ngeen ma koy indile? ¹⁶ Damaa ñakk ay dof ba ngeen di ma yokkal lii, muy def yēfi dof fi sama kaw? Lu lii di wut sama biir kēr?»

22

Daawuda jiite na gangoor

¹ Ba loolu amee Daawuda jóge Gaat, daw làquji ca biir xuntim Adulam. Magam yaak waa kēr baayam gépp yég ko, dikk, fekkisi ko fa. ² Ci biir loolu mboolem boroom njàqare ya, ak ña bor jiital, ak tàng-xol ya, ñoom ñépp dajaji fa Daawuda, mu doon seen njiit. Ñu wara tollook ñeenti téeméeri nit, ànd ak moom. ³ Daawuda bàyyikoo fa dem Mispé, ca diiwaanu Mowab. Mu wax buuru Mowab ne ko: «Rikk may ma, sama baay ak sama ndey dikk toog ak yaw, ba ma xam nu Yàlla di def ak man.» ⁴ Noonu la Daawuda yóbboo ay waajuram Mispé ca buuru Mowab, ñu toog fa mboolem diir ba mu làqu ca rawtoom ba. ⁵ Ci kaw loolu Yonent Yàlla Gàdd ne Daawuda: «Bul toog ci rawtu bi, fabul dem réewum Yuda.» Daawuda bàyyikoo ca, dem ba ca gottub Eret.

Sóol rey na sarxalkati waa Noob

⁶ Ci biir loolu Sóol dégg ne gis nañu Daawuda ak ña ànd moom. Booba Sóol a nga toog ca ker garabu tamaris, ga ca Gibeya ca kaw tund wa. Ma nga ñàbb xeejam, jawriñam yépp taxaw ci wetam. ⁷ Sóol wax ak jawriñam yi taxaw ci wetam, ne leen: «Yeen Beñamineen ñi, dégluleen! Mbaa yeen ñépp, doomu Yese jee leen di jox ay tool aki toókəri reseñ, am yeen ñépp lay fal njiiti kuréli junni ak njiiti kuréli téeméer, ⁸ ba ngeen di ma fexeel yeen ñépp? Du kenn ku ma yégal ne sama doom fasoo naak doomu Yese ji. Du kenn ku ma tiisoo, yégal ma ne sama doom a ngi xabtal sama surga ci sama kaw, ngir mu waajal ma am tēru ni tey jii!»

⁹ Doweg, Edomeen ba taxawandook jawriñi Sóol, daldi àddu, ne: «Man de, gis naa doomu Yese ji, mu dikk dēkk ba ñuy wax Noob, ca Ayimeleg doomu Ayitub. ¹⁰ Ayimeleg seetal na ko ci Aji Sax ji, ab dund it may na ko ko, te it saamaru Golyaat waa Filisti ba, jox na ko ko.» ¹¹ Buur Sóol woolu sarxalkat ba Ayimeleg doomu Ayitub, ak mboolem bokki baayu Ayimeleg ya doon ay sarxalkat ca Noob; ñu wuysi

Buur Sóol, ñoom ñépp. ¹² Buur ne: «Yaw doomu Ayitub, déglu ma fii!» Mu ne ko: «Maa ngi lay dégg, sang bi.» ¹³ Sóol ne ko: «Li nga ma def nag, di ma fexeel, yaak doomu Yese ji? Yaa ko may ab dund, yaa ko jox ab saamar, seetal ko ci Yàlla, ba mu jógal ma, di ma tēru nii tey!»

¹⁴ Ayimeleg ne Buur: «Buur, ana sa surga yii ba ñu daj, ku la nangule ni Daawuda mii, di sa goro, jiite say dag, te di ku ñu nawloo ci sa biir ètt bii? ¹⁵ Du keroog laa ko jēkka seetal ci Yàlla de! Te it Yàlla buma la lalal pexe! Dégg waay, Buur sama sang, bu ma topp lenn maak kenn ci sama waa kēr baay, ndax kat sang bi, xawma dara ba dara booloo jeex ci menn pexe.» ¹⁶ Buur Sóol ne ko: «Yaw Ayimeleg kay, dee rekk mooy sab àtte, sayk sa waa kēr baay yépp.» ¹⁷ Ba mu ko defee Buur ne dagam ya ko dar: «Ayca, reyleen sarxalkati Aji Sax yii, gannaaw ñoom it ñook Daawuda far. Yégoon nañu ba muy daw te xamaluñu ma ko.» Dagi buur ya nag baña xacci seen loxo ci kaw sarxalkati Aji Sax ya. ¹⁸ Buur ne Doweg: «Ayca yaw, fàddal sarxalkat yii!» Doweg Edomeen ba fàdd sarxalkat ya. Rey na bésub keroog juróom ñett fukki nit ak juróom (85) ñuy sol xar-sànnim lēe. ¹⁹ Waa Noob dēkkub sarxalkat ya it, mu jam leen, leele ñawkay saamar; góor ak jigéen, gone ya, ba ca ñay nàmp, ak nag yaak mbaam yaak gàtt ya, lépp la leele ñawkay saamar.

²⁰ Jenn doomu Ayimeleg miy doomu Ayitub donñ a récc, te mooy Abiyatar. Mu daw, fekki Daawuda. ²¹ Mu yégal Daawuda ne ko Sóol rey lu na sarxalkati Aji Sax yi. ²² Daawuda ne Abiyatar: «Xamoon naa bésub keroog ne gannaaw Doweg Edomeen baa nga fa woon, du ñakk moos mu nettali ko Sóol. Man mii maa gàddu sa bakkani waa kēr baay gépp. ²³ Waaye toogal fii ci man, te bul ragal dara. Ki lay wuta rey moo may wuta rey man itam. Soo nekkee ci sama wet nag, yiuru nga.»

23

Daawuda xettli na waa Keyla

¹ Mu am bés nag, ñu yégal Daawuda, ne ko: «Waa Filisti de ña ngay song waa Keyla xare. Ña ngay sēxētōo dàgga ya.» ² Daawuda seet ci Aji Sax ji, ne ko: «Ndax ma dem xarejeek waa Filisti?» Aji Sax ji ne Daawuda: «Demal kay xareek waa Filisti, xettli waa Keyla.» ³ Niti Daawuda ne Daawuda: «Waaw, ndegam fii ci Yuda lanu tiite, astamaak bu nu demee Keyla, ba janook làngi waa Filisti!» ⁴ Daawuda dellu seet ci Aji Sax ji, Aji Sax ji ne ko: «Doxal dem Keyla, man, maay teg waa Filisti ci say loxo.» ⁵ Ba mu ko defee Daawuda ànd

aki nitam dem Keyla, xareek waa Filisti, duma leen duma yu réy, yóbbu seenug jur. Noonu la Daawuda xettlee waa Keyla.

⁶ Ba Abiyatar doomu Ayimeleg dawee fekki Daawuda ca Keyla, xar-sànni ma* la indaale.

⁷ Ci kaw loolu ñu yegge Sóol ne ko Daawuda dem na Keyla. Sóol ne: «Kon de Yállaa ko teg ci samay loxo, ndax ba mu duggee biir dëkk bu tėje rapp la tėje boppam.» ⁸ Ba loolu amee Sóol woo gàngooram gépp xare, ngir ñu dem Keyla, gawi Daawudaaki nitam. ⁹ Daawuda nag yég ne moom la Sóol di fexeel njekkar. Mu ne Abiyatar sarxalkat ba: «Indil xar-sànni mi.» ¹⁰ Mu indi ko, Daawuda ne: «Éy Aji Sax ji, Yállay Israyil sama Boroom, dégg naa déy ne Sóol a ngi waaja dikk Keyla gi, tas-si dëkk bi ndax man.» ¹¹ Mbaa kilifay Keyla duñu ma teg ci loxoom? Boroom bi, ndax li ma dégg ñu naan Sóol a ngi ñew, dégg la? Éy Aji Sax ji, Yállay Israyil, sama Boroom, ngalla wax ma!» Aji Sax ji ne: «Dina ñew.» ¹² Daawuda ne: «Mbaa kilifay Keyla duñu ma teg, maak samay nit ci loxol Sóol?» Aji Sax ji ne ko: «Ahakay.» ¹³ Daawuda fabu mooki nitam, ñu wara tollu ci juróom benni tééméer, daldi bàyyikoo Keyla, di taxawaaloo fépp fu ñu ñeme. Ba ñu yeggee Sóol ne ko Daawuda réece na Keyla, Sóol yebbi.

¹⁴ Daawuda nag nekk ca xunti yu kawe ya ca màndiñ ma, toog foofa ca tund, wa ca màndiñ Sif. Sóol di ko seet bés bu nekk, waaye Yàlla tegul Daawuda cay loxoom. ¹⁵ Gannaaw gi Daawuda yég ne Sóol waajal na aw yoon ngir jël bakkanam. Booba Daawuda nga ca màndiñ Sif ca Orsa. ¹⁶ Ci biir loolu Yonatan doomu Sóol ja dem Orsa ca Daawuda, di ko ñaax ngir mu gëna dëgërloo Yàlla. ¹⁷ Mu ne ko: «Bul tiit. Loxol Sóol sama baay du la jot. Yaw yaay falu Buur ci Israyil, te maay doon sa bummi. Sama baay ci boppam xam na loolu bu baax.» ¹⁸ Ci biir loolu ñu feddli seen kóllère ñoom ñaar fa kanam Aji Sax ji. Daawuda des Orsa, Yonatan ñibbi kërám.

Sóol topp na Daawuda

¹⁹ Ba loolu amee waa Sif dem Gibeya ca Sóol, ne ko: «Daawuda de, ma nga làqu fa nun. Ma nga ca xunti yu kawe ya ca Orsa, ca kaw tundu Akila, fa féete màndiñ ma bėj-saalum.» ²⁰ Buur, saa yoo béggee ñew rekk, ñewal. Kon, Buur, nun noo koy teg ci say loxo.» ²¹ Sóol ne leen: «Yal na leen Aji Sax ji barkeel ndax yég ngeen ma.» ²² Léegi demleen, xoolaat bu baax; seetleen ba gis fu mu jaare, ak ku ko fa gis, ndax xamal

nañu ma ne ku ñora ñor la. ²³ Seetleen ba gis fépp fu mu mana làqu, doora délsi fii ci man, indil ma lu leer. Su ko defee ma ànd ak yeen. Su Daawuda nekkee ci gox bi, dinaa topp tãnkam ci biir mboolem làngi Yudeen ñi.»

²⁴ Ba loolu amee waa Sif jituuji Sóol ca Sif. Fekk na Daawudaaki nitam ña nga woon ca joor ga ca màndiñ Mawon, fa féete màndiñ ma bėj-saalum. ²⁵ Sóol aki nitam dem, di wër Daawuda, ñu yegge ko Daawuda, mu dem ba ca doj wa, làqu foofa ca màndiñ Mawon. Sóol yég ko, dàqi ko ca biir màndiñ Mawon. ²⁶ Sóol a ngay demee gi wetu tund wi, Daawudaaki nitam bartaloo wet ga ca des, gaawtu di wéy, ngir récc Sóol. Naka la Sóol ak mbooloom dem bay wër-ndombo Daawuda aki nitam, ngir japp leen, ²⁷ ndaw dikk ca Sóol ne ko: «Dikkal gaaw, waa Filisti song nañu réew ma.» ²⁸ Sóol nag fomm ndàqum Daawuda, ngir dajejeek waa Filisti. Looloo waral turu bérab boobu di Sela Amalekot (mu firi doju Rawukaay).

24

Daawuda gën na Sóol

¹ Foofa la Daawuda bàyyikoo, dali ca xunti yu kawe ya ca Engedi. ² Naka la Sóol délsi, jóge ca ndàqum waa Filisti, ñu ne ko: «Ndeke Daawuda nga ca màndiñ Engedi!» ³ Ci kaw loolu Sóol jël ñetti junniy xarekat yu mu tãne ci bànni Israyil gépp, ngir wëri Daawuda aki nitam, ba fa dendeek tundi Sikket ya. ⁴ Mu dem ba tollook ay ngéddi xar ca yoon wa; foofa am xuntee nga fa woon. Mu dugg ca biir, di suturlu. Fekk na Daawudaaki nitam a nga ca biir-a-biir xunti ma, toog.

⁵ Ba mu ko defee niti Daawuda ya déey Daawuda, ne ko: «Xoolal bésut tey jii la la sa yàlla Aji Sax ji noon: “Maa ngii, di teg sab noon ci say loxo, nga def ko lu la neex.”» Daawuda yoot ndànk, ba dagg ca lafu mbubbum Sóol. ⁶ Ba loolu amee fitu Daawuda ne tērit ndax la mu dagg ca lafu mbubbum Sóol. ⁷ Mu ne nitam ña: «Yal na ma Aji Sax ji musal ba duma def sama sang, kii Aji Sax ji fal, jéf ju tollu ni xaccil ko sama loxo, ndax moom mooy ki Aji Sax ji fal.» ⁸ Kàddu yooyu la Daawuda dankaafu nitam ña; mayu leen ñu dal ci kaw Sóol, ba Sóol jóge ca xunti ma, dem yoonam.

⁹ Daawuda nag génn xunti ma, woo Sóol, ne ko: «Éey, Buur sama sang!» Sóol geesu; Daawuda sukk, sujjóot, dēpp jēem fa suuf, ¹⁰ daldi wax Sóol ne ko: «Lu waral ngay dēglu ku la naan: “Daawuda mii sa musiba

* 23:6 23.6 xar-sànni ma: dañu ko daan seete ci Aji Sax ji.

lay wut.”¹¹ Bés a ngii tey, nga gisal sa bopp ni la Aji Sax ji tege tey ci samay loxo ci biir xunti mi. Nee ñu ma, ma rey la, waaye dama laa xool bëtu ñeewante. Maa ne duma xaaccil mukk sama loxo sama sang, ndax mooy ki Aji Sax ji fal.¹² Te xoolal, Baay, xoolal rekk sa daggitu mbubb wii ci sama loxo. Gannaaw maa ko dagge ci sa mbubb te reyuma la, war ngaa xam, nag xéll ne naruma genn mbon mbaa pexem fippu, te tooñuma la. Yaw kay yaa may rébb, ngir jël sama bakkan.¹³ Yal na Aji Sax ji àtte sama digganteek yaw. Yal na ma Aji Sax ji feyul ci yaw, waaye du sama loxoo lay dal mukk.¹⁴ Mooy la ñu léeb bu yàgg rekk ne: “Ku bon, mbon rekk.” Man nag sama loxo du la dal mukk.¹⁵ Ana sax ku buurub Israyil jóg, di dàqi? Ab xaj bu dee, aw fel donj lay dàq!¹⁶ Aji Sax jeey àttekat bi, te mooy àtte sama digganteek yaw. Yal na ma geesu te sàmm sama àq. Yal na ma jox dëgg, ba génne ma ci say loxo.»

¹⁷ Ba Daawuda waxee Sóol kàddu yooyu ba daaneel, Sóol da ne: «Éy Daawuda, doom, loolu sa baat la moos?», daldi ne yikkét jooy.¹⁸ Mu ne Daawuda: «Dëgg déy nga am ci sama kaw, ndax yaa ma defal lu baax, ma fey la lu bon!¹⁹ Yaa ma wax lu baax li nga ma defal tey; Aji Sax ji teg ma ci say loxo, te reyuloo ma.²⁰ Ana kuy jekku noonam, wacc ko mu dem ak jàmm? Yal na la Aji Sax ji fey lu baax li nga ma defal bésub tey jii.²¹ Léegi nag dama ne, xam naa ne dinga doon buur moos, te nguurug Israyil dina sax ci say loxo.²² Kon nag giñal ma ci Aji Sax ji ne doo dagg sama askan wi may wuutu, te doo raafal sama tur ci sama waa kër baay.»²³ Ba mu ko defee Daawuda giñal Sóol loolu, Sóol ñibbi kërám, Daawuda ànd aki nitam, dellu ca xunti mu kawé ma.

25

Samiyel saay na

¹ Gannaaw ba loolu wéyee Samiyel faatu, Israyil gépp daje, dëj ko, daldi koy denc ca kërám ca Raama. Daawuda nag fabu, wuti màndinju Paran.

Nabal gântal na Daawuda

² Jenn waay a nga woon ca dëkk ba ñuy wax Mawon. Amoon na alal foofa ca dëkk ba ñuy wax Karmel; ku barele woon lool la, amoon na ñetti junniy xar ak junniy bëy. Mu nekkoon Karmel, di watlu ay xaram.*³ Nabal la waa ji tudoon, soxnaam de Abigayil. Ndaw su yewwu la woon te taaru, jëkkërám nag bokk ci giiru Kaleb, di ku ñàng te soxor.⁴ Ci biir

loolu Daawuda dëgge ca màndin ma ne Nabal a ngay watlu ay xaram.⁵ Mu yebal fukki ndaw, ne leen: «Demleen Karmel, ngeen àgg ba ca Nabal. Nuyul-leen ma ko.⁶ Ngeen ne ko Daawuda nee: “Fekkeel déwén, yal nanga am jàmm, sa kër, jàmm, lépp lu bokk ci yaw it, jàmm.”⁷ Dëgg naa ne watkati jur yaa ngi wate ci yaw. Say sàmm nag nekkoon nañook nun, te soxorewunu leen, lenn lu bokk ci ñoom it réerul, mboolem diir ba ñuy sàmm ca Karmel.⁸ Laajal rekk say surga, dinañu la ko wax. Daawuda sa doom nag, sang bi, moo lay ñaan nga yéwéne nu ci bésu tey bu rafet bii nu dikke, te may nu loo am rekk, nu bokk kook moom.»

⁹ Ndawi Daawuda ya nag dikk, jottli Nabal kàddu yooyu yépp ci turu Daawuda, ba daaneel, ne tekk.¹⁰ Nabal ne ndawi Daawuda: «Ana kuy Daawuda? Kuy doomu Yese sax? Jamonoy tey jaam yu baree ngi fàqe ci seeni sang.¹¹ Ana luy ndeyi may jël saab dund ak samam ndox, ak yàppu jur, gi ma rendil sama watkati jur, di ko jox ñu ma xamul fu ñu jóge?»¹² Ba loolu amee ndawi Daawuda walbatiku ñibbi. Ba ñu dikkee, daldi koy yegge kàddu yooyu yépp.¹³ Daawuda ne ndawam ya: «Ràngooleen seeni saamar, yeen ñépp.» Ñu ràngeo seeni saamar ñoom ñépp, Daawuda it ràngeo saamar, lu tollook ñeenti téeméeri góor ànd ak Daawuda, ñaar téeméer des ca seen cummikaay.

Jabaru Nabal def nag muus

¹⁴ Ci biir loolu kenn ca surga ya wax Abigayil jabaru Nabal, ne ko: «Áa, Daawuda de moo yebal ay ndaw yu jóge ca màndin ma, ngir nuysi sunu sang, waaye moom, da leena jànni.¹⁵ Ndaxam nit ñooñu de, ñu baaxoon lool lañu ci nun. Soxorewuñu nu, te réerlewunu lenn it mboolem diir ba nu bokkee ak ñoom aw yoon, ca àll ba.¹⁶ Sunu kiiraay la nu woon guddi ak bëccég, la nu nekkoon ak ñoom lépp, di sàmm gàtt yi.¹⁷ Léegi nag seetal, ba xam loo ci wara def, ndax musiba kat dëgmál na sunu sang, ak waa kërám gépp. Moom nag dafa naqari deret, ba maneesula wax ak moom.»

¹⁸ Ba mu ko defee Abigayil gaaw sàkk ñaar téeméeri mburu, ak ñaari mbuusi biiñ, ak juróomi gàtt yu ñu defar, ak juróomi natti peppum mbool, ak téeméeri cabbì reseñ, ak ñaar téeméeri danki figg, boole ko sêf ci ay mbaam.¹⁹ Mu ne ay surgaam: «Jiituleen, maa ngi topp ci yeen.» Nabal jëkkër ja nag, ndaw sa waxu ko ci dara.²⁰ Naka la ndaw sa dawal

* 25:2 25.2 Xari waa penku dañuy bare kawar gu ñuy wat ak a ècc, di ci defar ag wëñ.

mbaamam, làqoo mbartalu tund wa, di wàcc ca xur wa, ndeke Daawudaa nga ànd aki nitam, di dajeek moom; ndaw sa ne pemm ca ñoom. ²¹ Fekk na Daawuda doon wax naan: «Ndeke kay neen laa doon wattoo mboolem lu bokk ci kii ca màndiñ ma, ba lennam réerul; lu bon la ma feye lu baax. ²² Yal na ma Yàlla teg mbugal mu gëna tar, ndegam maa wacc bët di sete kenn ku bokk ci waa jii, kuy taxaw, colal.»

²³ Abigayil séen Daawuda, daldi gaaw wàcc mbaam ma, ne gurub fa kanamam, dëpp jëem fa suuf, sujjóot. ²⁴ Naka la ne fêlên ca tànkì Daawuda, ne ko: «Sang bi, naa tegoo tooñ gi, may ma rekk, ma wax la. Ngalla sama sang, déglul sama kàddu. ²⁵ Sang bi, bul déglu mukk nit ku bon kii, Nabal mii. Moom turam donj la wuyu, nde Nabal (Dof bi) la tudd, te ndof la nekke. Man nag sang bi, gisuma woon ndaw yi nga yebal. ²⁶ Léegi nag sang bi, giñ naa ko ci Aji Sax jiy dund, nga fekke tey, Aji Sax jee la teree tuur deret tey, di feyul sa bopp. Muy say noon, di ñi lay fexeel lu bon, yal nañu bokk ak Nabal mii demin. ²⁷ Sarica bii ma la indil nag, sang bi, nañu ko jox xale yu góor yi topp ci yaw. ²⁸ Sang bi, jéggal ma rekk ndax Aji Sax jee lay defal moos kër gu yàgg. Kon nag, Yàlla bu nit gis mukk lu bon ci yaw, sa giiru dund. ²⁹ Bu ñu la doon dàq, di wut sa bakkan, yal na fekk sa bakkan dence ca èmbu aji dund ña, ca sa wetu Yàlla Aji Sax ji, sang bi. Waaye sa bakkan ub noon, yal na ko mbaq, sànni fu sore. ³⁰ Keroog, sang bi, bu la Aji Sax ji defalee mboolem lu baax la mu la dig, ba fal la, nga jiite Israyil déy, ³¹ su boobaa doo réccu, doo am yaraange ci loo doon tuure deret ci neen, mbaa loo doon feyul sa bopp. Te ngalla sang bi, keroog bu la Aji Sax ji baaxee, fàttlikul sab jaam.»

³² Daawuda ne Abigayil: «Cant ñeel na Aji Sax ji Yàllay Israyil, mi la yebal bésuub tey jii, ngir nga dogale ma. ³³ Maa ngi lay gërème sa njort, di la gërème sa jëmmu bopp jii ma teree tuur deret, ngir feyul sama bopp. ³⁴ Lu ko moy de, giñ naa ci Kiy Dund, Aji Sax ji Yàllay Israyil, ji ma téye ba loruma la, soo gaawul woon, dogalesi ma, du kenn moos ku ñuy wacc, bët di ko sete ci mboolem kuy taxaw colal te bokk ci Nabal.» ³⁵ Ba loolu amee Daawuda nangoo ca loxol ndaw sa la mu ko indil, daldi ne ko: «Ñibbil ak jàmm. Dégg naa sa kàddu te nangul naa la.»

Nabal dee, Daawuda dik

³⁶ Ba mu ko defee Abigayil dellu ca Nabal, fekku ko lu moy mu amal biir kërám bernde ju mel ni berndey buur. Xol baa nga sedd, mu màndi lool, ba tax Abigayil waxu ko dara ba bët set. ³⁷ Ca suba sa

ba biiñub Nabal giifee, jabaram wax ko la xew, fit wa jekki dee goyy ca biir dënn ba, yaram wa daldi mel niw doj. ³⁸ Ñu teg ca lu tollook fukki fan, Aji Sax ji fàdd Nabal, mu dee. ³⁹ Ci kaw loolu Daawuda dégg ne Nabal dee na, mu ne: «Cant ñeel na Aji Sax ji sama boroom, mi àtte gacce gi ma ame ci Nabal, te tere maa def lu bon. Mbonug Nabal la Aji Sax ji walbati, képp ci kaw boppam.» Daawuda nag yónnee kàddoom ca Abigayil, ngir jël ko jabar. ⁴⁰ Surgay Daawuda ya dem ca Abigayil ca Karmel, wax ko ne ko: «Daawudaa nu yónni fi yaw, ngir bëgg laa jël soxna.»

⁴¹ Abigayil daldi sujjóot, dëpp jëem fa suuf, ne leen: «Maa ngii dib jaamam, ba ci raxas tànkì surgaam yi.» ⁴² Ci kaw loolu Abigayil ne ñokket, war mbaamam, juróomi surgaam yu jigéen ànd ak moom, mu topp ca ndawi Daawuda ya. Noonu la Abigayil doone soxnaam.

⁴³ Ayinowam ma cosaanoo Yisreel itam, Daawuda jéloon na ko soxna, ñuy wujje ñoom ñaar. ⁴⁴ Fekk na Sóol nangu doomam Mikal, soxnas Daawuda, may ko waa Galim ba ñuy wax Palti doomu Layis.

26

Daawuda gënati na Sóol

¹ Waa Sif ñoo demoon ca Sóol ca Gibeya, ne ko: «Yéguloo ne Daawudaa nga làqu ca tundu Akila, fa janook màndiñ ma?»

² Sóol dem ba ca màndiñu Sif, ànd ak ñetti junniy ñeyi xarey Israyil, ngir rëbb Daawuda ca màndiñu Sif. ³ Ba mu ko defee Sóol dale ca wetu yoon wa, ca kaw tundu Akila, janook màndiñ ma. Daawuda ma ca màndiñ ma nag yég ne Sóol toppsi na ko foofa. ⁴ Mu yebal ay ndaw yu ko nemmikujiil, ba mu wóor ko ne Sóol agsi na. ⁵ Ci kaw loolu Daawuda dem ba fa Sóol dal. Mu gis fa Sóol téd, mook Abner doomu Ner njiital gàngooram. Sóol a nga téd ca digg dal ba, gàngoor ga téd, yéew ko.

⁶ Daawuda daldi laaj Ayimeleg Etteen ba, ak Abisay ma Seruya di yaayam, te mu bokk ak Yowab. Mu ne leen: «Kuy ànd ak man dem ca biir dal ba, fa Sóol?» Abisay ne ko: «Man maay ànd ak yaw.»

⁷ Daawuda ànd ak Abisay ci guddi, ba fa dalu gàngoor ga. Ndeke Sóol a nga téd di nelaw ca digg dal ba, xeejam baa nga sampe fa suuf, féeteek bopp ba, Abner ak gàngoor gaa nga téd, yéew ko. ⁸ Abisay ne Daawuda: «Yàlla de teg na sab noon ci say loxo guddig tey jii. Bàyil rekk ma daaj ko xeej bi fi suuf benn yoon rekk, du ñaar!» ⁹ Daawuda ne Abisay: «Bu ko rey. Ana kuy yékkati loxoom ci kaw ki Aji Sax ji fal, te yoon dabu ko?» ¹⁰ Daawuda teg

ca ne ko: «Giñ naa ci Aji Sax jiy dund, Aji Sax ji ci boppam moo koy fadd. Yaar àppam jot, mu dee, mbaa mu dem xare, des ca. ¹¹ Waaye yal na ma Aji Sax ji musal ci yékkati sama loxo ci kaw ki Aji Sax ji fal. Xanaa nga jël rekk xeej bi féeteek bopp bi, ak njaqal ndox li, te nu dem.» ¹² Daawuda nag jël xeej baak njaqal ndox la féeteek boppu Sóol. Ñu daldi dem te kenn gisul, kenn yégul, kenn yewwuul, ndax ñépp a ngay nelaw nelaw yu xóot yu bawoo ci Aji Sax ji, daanu ci seen kaw.

¹³ Ba loolu amee Daawuda jáll ba ca wàlla, daldi taxawe fu sore ca kaw tund wa, digganteem ak dalub Sóol ne yàmbañ. ¹⁴ Mu àddu ca kaw, wax ak gàngoor ga, daldi ne Abner doomu Ner: «Éey Abner, doo ma wuyu?» Abner ne ko: «Yaw yaa di kan bay joor Buur?» ¹⁵ Daawuda ne Abner: «Xanaa doo jámbaarú góor? Ku fiy sa moroom ci Israyil? Ana lu la tee wattu Buur, sab sang? Am na ci xarekat yi ku bóomsi woon Buur, sab sang. ¹⁶ Xam nga ne li nga def baaxul de! Giñ naa ko ci Aji Sax jiy dund, dee rekk ngeen yelloo, yeen ñi wattuwul seen sang, ki Aji Sax ji fal! Xoolal bu baax, ana xeeju Buur ak njaqal ndox li féete woon ak boppam?»

¹⁷ Ci kaw loolu Sóol xàmmi baatu Daawuda, ne ko: «Daawuda doom, loolu sa baat a?» Daawuda ne ko: «Sama baat a kay, Buur, samab sang.» ¹⁸ daldi cay teg ne ko: «Sang bi, looy toppe nii sab jaam? Ana lu ma def? Lan laa def ci lu bon? ¹⁹ Ngalla Buur, sama sang, déglul lii ma lay wax: su fekkee ne Aji Sax ji moo la xiir ci sama kaw, yal na ko cib sarax giifal. Waaye su dee ay doom aadama de, yal nañu alku ci kanam Aji Sax ji, ndax daq nañu ma tey, ba xañ ma ab cér ci Aji Sax ji, mbete ku ñu ne: «Demal jaamuji yeneen yàlla.» ²⁰ Man de yàlla bu sama bakkan rote àll, fu soreek Aji Sax ji. Te sax, lu tollu ni buurub Israyil ci boppam wutul lu moy wenn fel donj wu mel ni man? Mbete kuy rëbb cokkeer ci tund yi!»

²¹ Sóol nag ne: «Bàkkaar naa de! Daawuda doom, ñibbsil, ndax dootuma la fexeel mukk, gannaaw yaa wormaal sama bakkan tey jii! Lii ma def kay, yéfi dof la, juum naa lool sax.» ²² Daawuda ne ko: «Buur, sa xeej a ngii, na kenn ci sa xale yu góor yi jállsi, jëlsi ko. ²³ Yal na Aji Sax ji yool ku nekk njekkam ak kóllèreem, ndax Aji Sax jee la teg tey jii ci sama loxo, waaye maa buggula yékkati sama loxo ci kaw ki Aji Sax ji fal. ²⁴ Ni ma yéemloo sa bakkan tey jii nag, yal na ni Aji Sax ji yéemloo sama bakkan, te xettlee ma ni ci gépp njàqare.» ²⁵ Sóol ne Daawuda: «Daawuda doom, yal nanga barkeel. Dinga def ay

jaloore déy, te dinga am ndam moos!» Ba mu ko defee Daawuda dem yoonam, Sóol walbatiku, ñibbi.

27

Daawuda làquji na ca waa Filisti

¹ Daawuda nag ma nga naan ca xelam: «Bés a ngi ñëw bu ma nara sàunku ci loxol Sóol. Li gën ci man daal, du lenn lu moy dawa daw ba ca réewu waa Filisti, ba Sóol tàyyi maa rëbbati ci Israyil gépp, ma daldi mucc.» ² Ba loolu amee Daawuda ak juróom benni téeméeri nit ña ànd ak moom, daldi jáll ba ca buurub Gaat, Akis doomu Mawog. ³ Daawuda dal ca Akis ca Gaat, mook ay nitam, ku ci nekk ak njabootam; Daawuda ak ñaari soxnaam, Ayinowam waa Yisreel ba, ak waa Karmel ba, Abigayil, soxnas Nabal woon. ⁴ Ba ñu waxee Sóol ne ko Daawuda daw na, dem Gaat, Sóol rëbbatu ko.

⁵ Daawuda nag ne Akis: «Ngalla baaxe ma, may ma fi ab gox ci dëkki àll bii, ma man faa dëkke; ndax man sab surga laa, warumaa bokk dëkk ak yaw ci péeyu buur.» ⁶ Bésuub keroog la ko Akis jox dëkk ba ñuy wax Ciglaag. Moo tax Ciglaag ñeel buuri Yuda ba tey jii. ⁷ Diir ba Daawuda dal ca àllub Filisti, at la ak ñeenti weer.

⁸ Ci biir loolu Daawuda aki nitam daan nañu song-songee Gesureen ñi ak Giraseen ñi ak Amalegeen ñi. Mooy ña dëkke woon naka jekk réew mooma, ba ca Sur, jàpp réewum Misra. ⁹ Saa yu Daawuda songaan gox ba, du ca wacc kuy dund; du góor, du jigéen, te it day lër jur gu gudd ak gu gatt, mbaam ak giléem, aki yére. Su ko defee mu walbatiku, dellu ca Akis. ¹⁰ Bu ko Akis laajee ne ko: «Fu ngeen léle woon tey?» Daawuda ne ko: «Xanaa wetu Negew ca Yuda,» mbaa «Xanaa wetu Negew ca Yerameleen ña,» mbaa mu ne ko: «Xanaa wetu Negew ca Keneen ña.» ¹¹ Moo tax du genn góor mbaa jigéen ju Daawuda masa bàyyi mu dund, di ko indi Gaat, ndax ragal ñu nettali lu jëm ci ñoom, naan nàngam ak nàngam la ñoom Daawuda def. Noonu la jàppoo woon mboolem diir ba mu dal ca àllub Filisti. ¹² Akis nag amoon na kóolute ci Daawuda, ndax da doon wax ci xelam naan: «Kii de yóbbe na boppam mbañeel gu ko bokki bànni Israyilam bañ lool. Moo tax sama surga rekk lay doon ba fàww.»

28

¹ Jamono yooyu nag waa Filistee dajale woon seeni gàngoori xare, ngir xeex ak Israyil. Akis ne Daawuda: «Xanaa moos xam nga ne man ngay àndal ci xare bi de, yaak say nit?» ² Daawuda ne Akis: «Kon nag, sang bi, yaay gisal sa bopp li may def.»

Akis ne ko: «Kon nag, def naa la sama dagu bopp ba faww.»

Sóol seetluji na ca Endor

³ Samiyel nag faatu woon na, ba Israyil gépp dēj ko, denc ca Raama, dëkkam ba. Te itam Sóol mujjoon naa génne réew ma ñiy seete nit ñu dee, ak boroom rawaan yiy gisaane.

⁴ Ci kaw loolu waa Filisti daje, dali ca dëkk ba ñuy wax Sunem; Sóol ànd ak bànni Israyil gépp, ñu dali ca Gilbowa. ⁵ Sóol gis gàngooru waa Filisti, daldi tiit lool ba fit wa récc. ⁶ Mu seetlu ci Aji Sax ji, Aji Sax ji wuyuwu ko; du ci gént, du ci jumtukaayu tegtal bi ñuy wax Urim, du ci kaddug yonent. ⁷ Sóol wax ay jawriñam, ne leen: «Seetal-leen ma jigéen juy seete nit ñu dee, ma seetluji ci moom.» Jawriñ ya ne ko: «Xanaa jigéenu gisaanekat ba ca Endor.»

⁸ Ba mu ko defee Sóol soppiw melo, sol yeneen yére, daldi ànd ak ñaari nit ag guddi, ba ca jigéen ja. Mu ne ko: «Ngalla gisaaneel ma ci ab rawaan, te nga wool ma ku dee ki ma lay tudd!» ⁹ Jigéen ji ne ko: «Ma ne, yaw ci sa bopp xam nga li Sóol def; moo génne réew mi ñiy seete nit ñu dee, ak boroom rawaan yiy gisaane. Kon loo may fiire, nar maa reylu?» ¹⁰ Sóol giñal ko ci Aji Sax ji, ne ko: «Giñ naa ci Aji Sax ji, Kiy Dund, mbugal du la ci fekk.» ¹¹ Jigéen ji ne ko: «Ku ma lay wool?» Mu ne ko: «Samiyel nga may wool.»

¹² Naka la jigéen ja gis Samiyel, daldi yuuxu ca kaw ne Sóol: «Lu tax nga nax ma? Yaw kay ndeke yaa di Sóol!» ¹³ Buur Sóol ne ko: «Bul tiit, loo gis?» Mu ne ko: «Ab rawaan laa gis, muy yéegge fa suuf.» ¹⁴ Mu ne ko: «Nu mu mel?» Mu ne ko: «Góor gu mag ay yéegsi. Mu ngi sàngoo mbubb.» ¹⁵ Sóol xam ne Samiyel la, daldi sukk, sujjoót, dëpp jëem fa suuf. ¹⁵ Samiyel ne Sóol: «Ana loo may wooye, di ma yékkati nii?» Sóol ne ko: «Damaa nekk ci njàqare lu réy. Waa Filistee ngi xareek man, te Yàlla dëddu na ma. Wuyootu ma, du ci kaddug yonent, du ci gént. Moo tax ma woo la, ngir nga xamal ma lu may def.» ¹⁶ Samiyel ne ko: «Loo may laaj, gannaaw Aji Sax jee la dëddu, def la ab noon?» ¹⁷ Aji Sax jee sottal la mu waxoon, ma jottli ko, te Aji Sax jee foqati nguur gi ci say loxo, jox ko sa jegeñaale, muy Daawuda; ¹⁸ Yaa déggalul Aji Sax ji, jëfewuloo tangooru meram ngir mbugal Amalegeen ñi. Loolu moo waral lii la Aji Sax ji teg tey jii. ¹⁹ Te itam Aji Sax jee lay booleek Israyil, teg ci loxol waa Filisti. Négëni èllëg, yaw yaak say doom, dingeen ma fekkisi. Te it dalub Israyil, Aji Sax jee koy teg ci loxol waa Filisti.»

²⁰ Sóol nag jekki ne dàll fa suuf, tàlli ñareet, tiitaange lu réy jàpp ko ndax kadduy Samiyel. Rax ci dolli amul woon genn kàttan, ngir lekkul woon dara bëccëg baak guddi ga gépp. ²¹ Jigéen ja dikk, gis Sóol mu jàq lool. Mu ne ko: «Aa, sang bi, man de déggal naa la. Jaay naa sama bakkan, def li nga ma sant. ²² Léegi nag, déggal ma rekk sang bi, ma may la tuuti loo lekk, ba am doole, doora topp yoon wi.» ²³ Sóol lànk, ne ko: «Déédéet, lekkuma!» Jawriñam ña nag soññ ko, ñook jigéen ja, ba mu déggal leen. Mu jóge ca suuf, toog ca kaw lal ba. ²⁴ Jigéen ja amoon na sèlluw yar ca kër ga. Mu gaaw rey ko, daldi sàkk sunguf, not ko, lakk ca mburu mu amul lawiir. ²⁵ Ba mu ko defee mu taajal ko Sóol, mooki nitam. Ñu lekk ba noppi, bàyyikoo fa guddig keroog.

29

Waa Filisti dàq nañu Daawuda

¹ Gàngoori waa Filisti yépp a daje woon ca Afeg. Israyil a nga dale woon ca wetu bétu ndox ba ca Yisreel. ² Kàngami waa Filisti yaa ngay jaab jiitu, ànd ak seen kuréli téeméeri xarekat ak kuréli junni. Daawudaaki nitam ànd ak Akis, jaab topp seen gannaaw. ³ Kilifay waa Filisti ne: «Ebrë yii, nag?» Akis wax ak kilifay waa Filisti, ne leen: «Xanaa du Daawuda, surgab Sóol buurub Israyil? Lu épp at a ngii mu nekk ak man, te gisuma ci moom sikk, ba mu teqlikook Sóol, ba bésuub tey jii.» ⁴ Kilifay waa Filisti nag ñéññ ca daldi ne ko: «Waññal waa jii, mu dellu ca gox ba nga ko teg. Bumu ànd ak nun ci xare bi, bay walbatiku di sunub noon ci biir xare bi. Ana lu koy jubaleeteek sangam, lu moy mu dog boppi nit ñii, jox ko?» ⁵ Xanaa du Daawuda mii lañuy woyal, di fecc, naan: «Sóol jam junneem, Daawuda jam fukki junneem?»

⁶ Ci kaw loolu Akis woo Daawuda, ne ko: «Giñ naa ci Aji Sax ji, Kiy Dund, ku jub nga, te doon naa rafetlu sa ànd ak man, di xarejeek a dikk, ndax bés ba nga dikkee fi man ba tey jii, gisuma ci yaw lu bon. Waaye nag kàngami Filisti ñoo rafetluwul sa teewaay. ⁷ Kon nag waññikul, te dem ak jàmm bala ngaa def lenn lu kàngami Filisti rafetluwul.»

⁸ Daawuda ne Akis: «Ana lu ma def, ak loo ma gisal, bés ba ma dikkee fi yaw, ba bésuub tey jii, ba tax duma xarejeek nooni Buur sang bi?» ⁹ Akis ne Daawuda: «Dara! Xam naa loolu. Bége naa la it ni ndawal Yàlla. Kilifay Filisti kay a ma ne: Bumu ànd ak nun ca xare ba. ¹⁰ Kon teelala fabu èllëg, yaak sa surgay sang yi nga àndal; Dangeen di teela jóg

rekk, bu bêt setee ngeen dem.»¹¹ Ca ëllëg sa nag Daawuda teela fabu, mooki nitam, ngir dellu réewum Filisti, waa Filisti ñoom jubal Yisreel.

30

Daawuda toppi na Amalegeen ña

¹ Ba Daawuda aki nitam àggee Ciglaag, ca gannaaw ëllëg sa la. Fekk na Amalegeen ña song bëj-saalumu Yuda ak Ciglaag; ñu yàqte Ciglaag, lakk ko, ² jàpp jigéen ña mu fa fekk, mag ak ndaw. Reyufu ca kenn nag, dañu leena yóbbaale, dem seen yoon. ³ Ba Daawudaaki nitam agsee Ciglaag, fekk nañu mu lakk ba jeex; seeni jabar ak seeni doom, góor ak jigéen, ñépp duggi njaam. ⁴ Daawudaak mbooloo ma mu àndal nag di yuuxook a jooyoo, ba amatuñu dooley jooy.

⁵ Ñaari soxnay Daawuda lañu jàpp; Ayinowam mu Yisreel ak Abigayil waa Karmel ba, soxnas Nabal woon. ⁶ Ba loolu amee Daawuda jaq lool, ndax mbooloo maa nga doon wax naan dañu koy dóori doj. Booba mbooloo ma ba mu daj, ku nekk a ngaak naqaru xol, di xalaat doomam yu góor ak yu jigéen. Daawuda nag dëgërloo Yàllaam Aji Sax ji rekk. ⁷ Ci biir loolu Daawuda wax ak sarxalkat ba Abiyatar doomu Ayimeleg, ne ko mu indil ko xar-sànni mi. Abiyatar indil Daawuda xar-sànni ma. ⁸ Daawuda laaj Aji Sax ji, ne ko: «Ndax ma topp gàngooru yàqkat yii? Ndax dinaa leen dab?» Mu ne ko: «Demal, yaay dabe déy, te yaay xettlee déy.»

⁹ Ba mu ko defee Daawuda dem, mook juróom benni téeméeri nit ña ànd ak moom. Ñu dem ba ca xuru Besor, ñenn ña yem fa. ¹⁰ Daawudaa ñoqli, mook ñeenti téeméeri nit, ñaar téeméeri nit yem foofa, ndax loof, ba manuñoo jáll xuru Besor. ¹¹ Ci kaw loolu ña jáll yem ci jenn waayu Misra ci àll bi. Ñu indi waa ji ba ci Daawuda, daldi may waa ji mburu mu lekk, may ko ndox, mu naan. ¹² Ab danku figg ju wow ak ñaari danki reseñ lañu ko leel, mu doora leqliku, ndax dafa fekk lekkul, naanul diiru ñetti guddi ak ñetti bëccëg. ¹³ Daawuda ne ko: «Yaw, kuy sab sang ak foo bokk?» Xalelu góor ba ne ko: «Man waa Misra laa, di jaamub jenn waayu Amalegeen. Sama sang a ma wacc, ba ma woppee bëkkaati-démb. ¹⁴ Noo song wetu Negew ca diiwaanu waa Keret ña, ak diiwaanu Yuda, ak wetu Negew ca diiwaanu Kaleb, te Ciglaag, noo ko lakk.»¹⁵ Daawuda ne ko: «Ndax man nga maa yóbbu ba ci gàngooru yàqkat yooyu?» Mu ne ko: «Giñal ma ci Yàlla ne, doo ma rey, te doo ma delloo ca sama sang; kon dinaa la yóbbu ba ci gàngooru yàqkat yi.»

¹⁶ Ci kaw loolu waa ja yóbbu Daawuda, ndeke nit ñaa nga ne wesar ca àll ba bépp, di lekk ak a naan, di mbumbaaye mboolem alal ju bare ja ñu nangoo ca réewum Filisti ak réewum Yuda. ¹⁷ Daawuda nag di leen fàdd, njël ba ca ngoon. Kenn réccul, lu moy ñeenti téeméeri xale yu góor yu war ay giléem, daw. ¹⁸ Daawuda nangu mboolem lu Amalegeen ña jëlloon, nangu ñaari soxnaam. ¹⁹ Dara lu bokk ci ñoom rawul. Mag ñaak ndaw ñaak seen doom yu góor ak seen doom yu jigéen ak alal jaak mboolem lu ñu leen jëlaloon. Lépp la Daawuda délloosi. ²⁰ Mu nangu mboolem jur gu gudd ak gu gàtt, nitam ña dàq, tofal ca juru Amalegeen ña, te naan: «Lëlub Daawudaa ngi!»

Daawuda gore na

²¹ Daawuda nag dikk ba ca ñaar téeméeri ña loofoon ba manuñu koo topp, te ñu bàyyi woon leen ca xuru Besor. Naka lañu gatandu Daawuda ak ña mu àndal, Daawuda dikk, dajekk ñoom, jàmmanteek ñoom. ²² Mboolem ñu bon ñaak ñu sew ña jállandoo woon ak Daawuda nag ne leen: «Gannaaw ñii ànduñu woon ak nun, dunu leen jox dara ci alal ji nu nangu. Xanaa ku nekk jël jabaram aki doomam rekk, yóbbu te dem.» ²³ Daawuda ne leen: «Déet bokk yi, buleen def noonu, ak li nu Aji Sax ji defal, aar nu, teg gàngooru yàqkat yi nu songoon ci sunuy loxo. ²⁴ Ana nu xel mana nangoo loolu? Na ku xarejeek ku desoon ca cummikaay la, yem ak sa moroom cé; ñépp ay séddu.» ²⁵ Bésub keroog la Daawuda dale def loolu mu dib dogal, di àtteb yoon bu ñeel Israyil ba tay jii.

Daawuda sédd na njiiti Yudeen ña

²⁶ Ba Daawuda delloo Ciglaag, sédd na ca lël ja, magi Yuda, xaritam ya. Mu yónnee leen ko, ne leen: «Lii, yeenay boroom; xéewal la gu jóge ca alalu nooni Aji Sax ji.» ²⁷ Noonu la ca sédde waa Betel ak waa Ramot Negew ak waa Yatir ²⁸ ak waa Arower ak waa Sifmot ak waa Estemowa ²⁹ ak waa Rakal, ak waa dëkki Yerameleen ña ak waa dëkki Keneen ña, ³⁰ ak ña ca Xorma ak ña ca Bor Asan ak ña ca Atag ³¹ ak ña ca Ebron ak mboolem waa gox ya mu jaare woon, mooki nitam.

31

Lu jëm ci mujug Sóol

¹ Ci biir loolu waa Filisti jaamarloo ak Israyil, ba bànni Israyil won leen gannaaw, daw, ñu bare daanu ca kaw tundu Gilbowa. ² Waa Filisti nag ne dann Sóol aki doomam, ba rey ca ñett; Yonatan ak Abinadab ak Malkisuwa. ³ Xare ba nag

gëna mettee fa Sóol féete, fittkat ya jekku ko, mu jaq.

⁴ Ba loolu amee Sóol ne gàddukatu gànnaayam: «Boccil sa saamar, jam ma bala yéefar yee dikk, jam ma, torxal ma.» Gàddukatu gànnaayam nag buggu koo jam ndax tiitaange lu réy. Sóol jël saamaru boppam, daldi daaneel boppam ca kaw ñawka ga. ⁵ Gàddukatu ngànnaay ba gis ne Sóol dee na, moom it mu daaneel boppam ca kaw saamaram, dee topp Sóol. ⁶ Muy Sóol, di ñetti doomam, di gàddukatu gànnaayam itam, di mboolem ay nitam, ñoom ñépp a bokk dee bésub keroo.

⁷ Ci kaw loolu bànni Israyil, ya ca wàllaa xur wa, ak ña ca wàllaa dexu Yurdaan gis ne xarekati Israyil daw nañu, te Sóol aki doomam dee nañu. Ñu daldi daw, genta seeni dëkk, waa Filisti dikk, dëkke.

⁸ Ca ëllëg sa, ba waa Filisti dikkee, di futtisi ña dee, ca tundu Gilbowa lañu fekk Sóol ak ñetti doomam, ñu tëdd. ⁹ Ñu dog boppu Sóol, jël ay gànnaayam, ba noppi yeble ca réewum Filisti ba mu daj, ngir yégle ko ca seen kéri tuur ya ak ca askan wa. ¹⁰ Ba mu ko defee ñu denc gànnaayi Sóol ca seen biir kër tuur ma ñuy wax Astàrt, néewub Sóol, ñu wékk ca miiru dëkk ba ñuy wax Bet San.

¹¹ Ba waa Yabes ga ca Galàdd déggee la waa Filisti def Sóol, ¹² seen jambaar yépp a fabu, topp guddi ga gépp ba Bet San. Ñu wékkee ca miiru Bet San néewu Sóol ak néewi doomam yu góor, doora ñibbi Yabes, boole fa néew ya, lakk. ¹³ Ñu for nag seeni yax, suul ca ron garabu tamaris ga ca Yabes. Ba loolu amee ñu woor diiru juróom ñaari fan.

Samiyel di téereb ñaareel bi Lii mooy jaar-jaari Buur Daawuda

Lu jëm ci tàggeb Sóol

¹ Gannaaw ba Sóol faatoo, fekk na Daawuda walbatikoo ca dumay Amalegeen ña, dellu Ciglaag, ba toog fa ñaari fan. ² Ca gannaaw èllég sa, jenn waay ne jimeet, jóge ca dalub Sóol, dikk. Yére yaa nga xottiku, bopp ba taq suuf, ngir naqarlu. Naka la agsi ci Daawuda, daldi daanu fi suuf, sujjóot.

³ Daawuda ne ko: «Foo jóge nii?» Mu ne ko: «Ca dalub Israyil laa récce.»

⁴ Daawuda ne ko: «Lu xew, gaawe ma!» Mu ne ko: «Mbooloom Israyil a dawé ca xare ba. Ñu bare ca ñoom daanu nañu, dee. Sóol ak doomam Yonatan it dee nañu.»

⁵ Daawuda ne ndaw la: «Lu la xamal ne Sóol ak doomam Yonatan dee nañu?» ⁶ Ndaw la ne ko: «Dafa yemook ma tollu tembe ca kaw tundu Gilbowa. Ndeke Sóol a nga fa, sukkandikoo xeejam. Watiiri xare yaak gawar ya defuñu lu moy ne ko dann. ⁷ Naka la ne gees, yem ci man, woo ma, ma wuyu. ⁸ Mu ne ma: “Yaa di kan?” Ma ne ko: “Ab Amalegeen laa.” ⁹ Mu ne ma: “Kaay fii, jekkli ma. Maa ngi ci miirum ndee, doonte dese naa tuuti.” ¹⁰ Ma dikk, daldi koy jekkli, ndax xamoon naa ne du dundati gannaaw jéllam ba. Ma summi nag mbaxanam buur ma mu soloon, tekki lam ba woon ca pèrèg ma. Yooyu laa la yótsi nii, sang bi.»

¹¹ Ba loolu amee Daawuda sèq yéereem, xotti, ña ànd ak moom ñépp itam, noonu, ndax aw naqar. ¹² Ñaawlu nañu, di jooy, lekkuñu ba ca ngoon ndax Sóol ak doomam Yonatan ak gangooru Aji Sax ji, waa kër Israyil, ña fàddoo saamar.

¹³ Daawuda ne ndaw la: «Ana foo bokk?» Mu ne ko: «Man doomu doxandéemub Amalegeen laa.»

¹⁴ Daawuda ne ko: «Noo saña xàccee sa loxo, di bóom ki Aji Sax ji fal?» ¹⁵ Daawuda nag woo kenn cay surgaam, ne ko: «Dikkal dóor, mu dee!» ¹⁶ Daawuda ne Amalegeen ba: «Yaa gáddu sa bakkanu bopp, ndax yaa seedee sa gémmiñu bopp ne yaa rey ki Aji Sax ji fal.» Surga ba dóor Amalegeen ba, mu dee.

Daawuda jooy na Sóol ak Yonatan

¹⁷ Kàddu yii la Daawuda jooye Sóol ak doomam Yonatan. ¹⁸ Moo santaane ñu jàngal ko askanu Yuda. «Fittkat» lañu

dippee woy wi. Nii lañu ko binde ci «Téereb aji jub ji.» Mu ne:

¹⁹ Wóoy Israyil, ña ngay sagoo lañu jam, ñu ne lareet ca sa tund ya!
Jambaar ñaa daanu!

²⁰ Buleen ko siiwal fa Gaat, buleen ko yéene fa mbeddi Askalon, lu ko moy janqi Filisti bég, janqi yéefar yiy textexi.

²¹ Wóoy tundi Gilbowa!
Yàlla bu ngeen lay, bu ngeen tawlu, Yàlla bu seeni tool nangooti,
ba duunal jooxeb pepp,
nde foofa lees torxale pakkub jambaar.
Wóoy pakkub Sóol ba deesul diwati!

²² Du deret mbaa nebbonu jambaar bu fittug Yonatan xof,
te saamaru Sóol ba du sooy!

²³ Wóoy Sóol ak Yonatan, ñoo yiw, sopplu ba ñuy dund, te ba ñu deeyee, teqlikoowuñu.
Ag jaxaay, ñoo ko gëna gaaw,
te gaynde, ñoo ko gëna jambaare.

²⁴ Yeen jigéeni Israyil, jooyleen Sóol, ma leen wodde ndimol tànnéef
lu xonq curr,
takkal leen gänjari wurus ca seen kawii yére.

²⁵ Jambaar ñaa daanoo biir xare ba, Yonatan lañu jam ca kaw tund ya!

²⁶ Yonatan, doom yaay, tiisoo naa la, dama laa soppoon lool,
te sa mbèggeel ci man yéeme,
ba raw mbèggeelu jigéen.

²⁷ Jambaar ñaa daanu, ngànnayyi xare ya sànkul!

2

Daawuda falu na buur ca Yuda

¹ Gannaaw ba loolu weesee Daawuda daa laaj Aji Sax ji, ne ko: «Ndax ma dellu ci dèkki Yuda yi benn?» Aji Sax ji ne ko: «Demal.» Daawuda ne ko: «Bu ma ciy dem?» Aji Sax ji ne ko: «Ebron.» ² Daawuda dem ca, ànd ak ñaari soxnaam, Ayinowam ma cosaanoo Yisreel, ak Abigayil ma doon jabaru Nabal waa Karmel ba. ³ Daawuda nag yóbbaale nit ña ànd ak moom, kenn ku ci nekk ak njabootam, ñu dem sancii ca dèkk ya wër Ebron. ⁴ Ba mu ko defee waa Yuda dikk, diw fa Daawuda, fal ko buurub waa kër Yuda.

Gannaaw gi ñu wax Daawuda ne ko waa Yabes Galàdd ñoo rob Sóol. ⁵ Daawuda yónnee ay ndaw ca waa Yabes Galàdd, wax leen ne leen: «Yal na leen Aji Sax ji barkeel ndegam yeena jêfe ngor seen digganteek seen sang Sóol, ba rob ko. ⁶ Kon nag yal na Aji Sax ji jêfeek yeen ngor ak kóllère. Man itam dinaa leen yéwéne ndax nii ngeen jêfe. ⁷ Léegi nag dègèrluleen te góor-góorlu. Dègg la seen sang Sóol faatu na, waaye man mii la giirug Yuda fal, may seen buur.»

Isboset falu na buur ca Israyil

⁸ Doomu Ner, Abner njiital mbooloom xarem Sóol nag, fekk na mu yóbbu Isboset* doomu Sóol ju góor, jállale ko ba Maanayim. ⁹ Mu tabb ko nag buuru diiwaani Galàdd ak Asur ak Yisreel ak Efrayim ak Beñamin, Israyil gépp daal. ¹⁰ Ñeent fukki at la Isboset doomu Sóol amoon ba muy falu buurub Israyil, te ñaari at la nguuru. Waa kër Yuda donj ñoo toppoon Daawuda. ¹¹ Diir ba Daawuda falu buurub Ebron gu waa kër Yuda, juróom ñaari at la ak juróom benni weer.

Yuda ak Israyil xare nañu

¹² Mu am bés, Abner doomu Ner ànd ak niti Isboset doomu Sóol, ñu jóge Maanayim, jëm diiwaanu Gabawon. ¹³ Yowab, mi Seruya di yaayam, daldi ànd ak niti Daawuda, ñu dem dajejeek ñoom ca wetu déegub Gabawon. Ñii taxawe gii wet, ñee taxawe ca wàlla, ñu séq déeg ba. ¹⁴ Abner ne Yowab: «Ayc a na xale yu góor yi jóg, daje fi sunu kanam.» Yowab ne ko: «Ayc!» ¹⁵ Ñu daldi limoo, fukki góor ak ñaar taxawal giirug Beñamin ak Isboset doomu Sóol; fukki góor ak ñaar taxawal Daawuda. ¹⁶ Ku nekk ne sa boppu moroom njéjj, rekk bojj sab saamar ca wet ga, ñu ànd daanu. Moo tax ñu wooye bérab booba ca Gabawon «Toolub ñawka yi.»

¹⁷ Bésub keroog xeex ba metti na lool, waaye Abner ak waa Israyil ñoo féete suuf niti Daawuda.

¹⁸ Ñetti doomi Seruya ña nga fa woon: Yowab ak Abisay ak Asayel. Asayel nag daa manoona daw lool ni kéwél. ¹⁹ Asayel ne dann Abner rekk, jàddul ndijoor, jàddul càmmoñ. ²⁰ Abner geesu ne ko: «Kii Asayel?» Mu ne ko: «Man a.» ²¹ Abner ne ko: «Tee ngaa jàdd ndijoor mbaa càmmoñ, te jàpp kenn ci xale yu góor yi, futti ko!» Asayel nag buggu koo bàyyi, xanaa topp

ko rekk. ²² Abner dellu ne Asayel: «Xiddi ma! Bul tax ma jam la, nga daanu! Te kon xawma nu may jàkkaarlooteek sa mag Yowab!» ²³ Asayel tè ticc, topp ko. Abner jam ko catal xeejam ca biir ba, ba xeej ba fèll ca gannaaw ga, mu daanu dee ca saa sa. Ba loolu amee, ku dikk, ba tollook bérab ba Asayel daanu dee, daldi fay taxaw.

²⁴ Yowab ak Abisay nag dàqi Abner. Ba jant bay lang, ña nga tollu ca tundu Ama, wa janook Giya, ca yoon wa jëm màndiñu Gabawon. ²⁵ Beñamineen ñi daldi mànkoo, topp ca gannaaw Abner, ñu def menn mbooloo, bokk taxaw ci kaw wenn tund. ²⁶ Abner àddu ca kaw, ne Yowab: «Xanaa saamar day lekku suux ba fàww? Xamuloo ne lii aw naqar donj lay mujje? Ana looy xaarati ci ne mbooloo mi ñu noppee topp seeni bokk?» ²⁷ Yowab ne ko: «Giñ naa ci Yàlla jiy dund, boo waxuloo, nit ñi duñu noppee dàq seeni bokk te bêt setul.» ²⁸ Ba loola amee Yowab wal liit ga, gaa ña ñépp nag taxaw, noppee topp Israyil, daldi dakkal xare ba. ²⁹ Abner aki nitam dañoo fanaanee topp xuru Yurdan guddig keroog, ba jáll dexu Yurdan. Ñu daldi jaare Bitron gépp, door a agsi Maanayim.

³⁰ Gannaaw ba Yowab walbatikoo ca ndàqum Abner, daa woo gàngooram gépp, fukk ak juróom ñeent wuute ci niti Daawuda, te limaalewuñu Asayel. ³¹ Waaye fekk na niti Daawuda rey ñetti téeméer ak juróom benn fukk (360) ca Beñamineen ñaak niti Abner. ³² Ñu yóbbu Asayel, rob ko ca wetu baayam ca Betleyem, Yowab aki nitam nag fanaanee dox, ba jant fenke leen Ebron.

3

¹ Xare ba nag yàggoon na diggante waa kër Sóol ak waa kër Daawuda. Daawuda di gèna am doole, waa kër Sóol di gèna néew doole.

Daawuda am nay doom ca Ebron

² Doomi Daawuda yu góor yi jud-doo Ebron ñoo di: taawam Annon, mi Ayinowam waa Yisreel ba di ndeyam; ³ ñaareelu doomam di Kilab, ndeyam di Abigayil, ma doon jabaru Nabal waa Karmel ba; ñetteelu doomam di Absalom, mi Maaka di ndeyam. Maaka, Talmay buurub Gesur ay baayam; ⁴ ñeenteelu doomam di Adoña, mi Agit di ndeyam; juróomeelu doomam di Sefatiya mi Abital di ndeyam; ⁵ juróom benneelu doomam di

* 2:8 2.8 Isboset: mbind mi ci ebré, làkku bànni Israyil, Isboset la indi, mu firi Nitu gacce. Turam wu jèkk nag, Isbaal la woon, mu firi Nitu Baal. Bu jèkkoon Baal «kilifa gi» la doon tekki. Waaye gannaaw gi Baal turu tuur mu waa Kanaan la woon. Du woon teggini ñuy wooye buurub Israyil turu tuur moomu. Moo tax ñu soppi turam wu jèkk wa, tudde ko Isboset.

Ittireyam, mi soxnaam si ñuy wax Eglā di ndeyam. Ñooñu ñooy doomi Daawuda ya juddoo Ebron.

Abner jote naak Isboset

⁶ Diir ba waa kër Sóol di xareek waa kër Daawuda, Abner a ngay gēna dēgéral taxawaayam ca waa kër Sóol. ⁷ Sóol nag amoon na nekkaale bu ñuy wax Rispa doomu Aya. Mu am bés Isboset ne Abner: «Ana lu waral nga dēkkoo sama nekkaaleb baay?» ⁸ Abner mer lool ca la ko Isboset wax. Mu ne ko: «Ndax dama di xajub workat bu Yudeen ñi? Ba tey jii ngor laay jēfe ak sa waa kër baay Sóol, aki bokkam aki soppeem. Te it teguma la ci loxol Daawuda; yaw nga di ma tuumaal ci ndaw sii tey?» ⁹ Yal na ma Aji Sax ji teg mbugal mu gēna tar ndegam defaluma Daawuda la ko Aji Sax ji giñaloon, ¹⁰ ne ko dina jēle nguur gi ci waa kër Sóol, samp jalub Daawuda ci kaw Israyil ak Yuda, dale ko Dan ca bēj-gànnaar, ba Beerseba ca bēj-saalum.» ¹¹ Isboset nag ñemewula teg baat ca la Abner wax, ndax ragal ko.

Abner fekki na Daawuda

¹² Ba loolu amee Abner yebal ca saa sa ay ndaw ca Daawuda, ne ko: «Ana ku moom réew mii?» Mu neeti ko: «Fasool ak man kóllère. Maa lay japple, ba walbatil la Israyil gépp, ñu nangul la.» ¹³ Daawuda ne ko: «Baax na. Dinaa fasook yaw kóllère, waaye lenn rekk laa lay ñaan. Bul dikk fi sama kanam te indiloo ma sama jabar Mikal doomu Sóol.» ¹⁴ Gannaaw loolu Daawuda yebal ay ndaw ca Isboset doomu Sóol, ne ko: «Jox ma Mikal, sama jabar ja ma cane woon téeméeri mbuñukay waa Filisti.» ¹⁵ Isboset yónnee, jēli Mikal ca jēkkéram Paltiyel* doomu Layis. ¹⁶ Paltiyel topp ca gannaaw ndaw sa, di jooy, ba ñu ágg Baxurim. Abner ne ko: «Ayca, doxal ñibbi.» Waa ja ñibbi.

¹⁷ Ba mu ko defee Abner gise ak magi Israyil, ne leen: «Yágg ngeena bēgga fal Daawuda, muy seen buur. ¹⁸ Kon ayca boog! Ndax Aji Sax jee ko digoon Daawuda, ba mu nee: «Ci sama jaam Daawuda laay walloo Israyil sama ñoñ, ci waa Filisti ak mboolem seeni noon.» ¹⁹ Abner wax ak giirug Beñamin itam déeyook ñoom ba noppi dem Ebron ca Daawuda, déey ko la waa Israyil ak giirug Beñamin gépp namma def. ²⁰ Ba Abner agsee Ebron ca Daawuda, ñaar fukki nit la ándal. Daawuda berndeel Abner, mook nit ña ánd ak moom. ²¹ Ba loolu amee Abner ne Daawuda: «Buur sang bi, dama lay wool Israyil gépp, ñu wuysi la. Su ko defee

ñu fasook yaw kóllère, nga mana nguuru fu la neex.» Ba loolu amee Daawuda yiwi Abner, mu dem ci jàmm.

Yowab fey na Abner

²² Ci kaw loolu rekk niti Daawuda ánd ak Yowab, jóge xare, indaale lél ju bare. Waaye fekkul Abner Ebron ca Daawuda, ndax fekk na Daawuda yiwi ko, ba mu dem ci jàmm. ²³ Yowab agsi mook mboolem gàngoor ga ánd ak moom. Ñu ne ko Abner doomu Ner ñewoon na ca Buur, ba mu yiwi ko, mu dem ci jàmm. ²⁴ Yowab dem ca Buur ne ko: «Waaw, li nga def nag? Abner mii dikk, nga bàyyi ko mu dem nii rekk! ²⁵ Xam nga Abner doomu Ner! Wor la moo ko fi indi, ngir xam say dugg ak say génn, ak lépp looy def.» ²⁶ Ci kaw loolu Yowab bàyyikoo ca Daawuda, yebal ay ndaw yu toppi Abner, dab ko, waññee ko ca teenub Sira. Waaye Daawuda yégu ca dara. ²⁷ Naka la Abner délsi ba Ebron, Yowab berook moom ca buntu dēkk ba, mel ni kuy déeyook moom, daldi koy jam ci biir, rey ko, feyul Asayel, rakkam ja Abner bóomoon.

²⁸ Gannaaw ga, ba ko Daawuda yégee, da ne: «Man de set naa wecc, maak sama waa réew ba fàww fi kanam Aji Sax ji ci bakkanu Abner doomu Ner bi rot. ²⁹ Yal na deewug Abner kēppu ci kaw boppu Yowab, mook waa kër baayam gépp. Yàlla bu waa kër Yowab ñàkk ku ánd ak jàngoroy xelli, mbaa jàngoroy der juy law†, mbaa lafañ buy doxe yet, mbaa ku deeye xare, mbaa ku amul lu mu lekk.»

³⁰ Noonu la Yowab ak rakkam Abisay bóome Abner; ndax la mu reyoon seen doomu ndey Asayel ca xareb Gabawon ba.

Jooy nañu Abner

³¹ Ba loolu wéyee Daawuda wax ak Yowab, mook mboolem gàngoor ga ánd ak moom, ne leen: «Xottileen seeni yére, soli saaku, ñaawloo ko deewug Abner.» Buur Daawuda ci boppam dox na, topp ca jaat ja. ³² Ñu denc Abner ca Ebron. Buur Daawuda ne yikkét jooy ca bàmmeelu Abner, mbooloo ma mépp jooy. ³³ Woy wii la Buur fent, jooye ko Abner. Mu ne: «Moo Abner, jombuloo dee ni sagaru nit a?

³⁴ Jéngesu la, yeeweesu laak cállala. Danga ne dàll daanu,

ni ñuy daanoo fi kanam ku bon.» Mbooloo ma mépp dellu jooyati.

³⁵ Gannaaw gi mbooloo mépp di soññ Daawuda, ngir mu lekk, balaa jant a so. Daawuda daldi giñ ne: «Yal na ma Yàlla

* **3:15** 3.15 Paltiyel mooy Palti ba tey. Seetal ci *1.Samiyel* 25.44. **13.2** ak 15.2.

† **3:29** 3.29 jàngoro yi: seetal ci *Sarxalkat* yi

teg mbugal mu gëna tar ndegam maa sex dugub mbaa ñam wu mu doon, te jant sowul.»³⁶ Mbooloo ma mépp a seede loolu, rafetlu ko, na ñu rafetloo mboolem lu Buur Daawuda def.³⁷ Mbooloo mépp ak Israyil gépp a xam bésusb keroog ne pexe ma rey Abner doomu Ner jógewul ca Buur.³⁸ Ba loolu amee Buur wax aki nitam ne leen: «Xanaa xamuleen ne ab garmi, nit ku màgg moo daanu bésusb tey fi digg Israyil?»³⁹ Bésusb tey jii li ma falu buur lépp, néew naa doole, ndax doomi Seruya yii ñoo ma gëna dëgër xol, ba jaaxal ma. Waaye yal na Aji Sax ji fey ku bon jëfam.»

4

Isboset faatu na

¹ Ba Isboset doomu Sóol déggee ne Abner dee na ca Ebron, xolam jeex na, Israyil gépp jàq. ² Isboset amoon na ñaari njiiti gàngooru yaqkat: kenn ka di Baana, ka ca des di Rekab, ñuy doomi góor gu ñuy wax Rimon, giiroo ci giirug Beñamin te dëkke Berot ga ñu boole woon ca suufas Beñamin; ³ ndax waa Berot a dawoon, làquji Gitayim, doon fa ay doxandéem ba tey jii.

⁴ Fekk na Yonatan doomu Sóol ju góor am na doom ju góor ju tànk ya baaxul. Ndaxte ba ñu déggee tàgge bu jóge Yisreel, ñu ne Sóol ak Yonatan faatu nañu, fekk na xale ba am juróomi at. Ndaw sa ko daan topptoo, fab ko di gaawtuy daw, waaye na muy gaawtu di dem, xale ba daanu, daldi lafañ. Ma nga tuddoon Mefiboset*.

⁵ Rekab ak Baana, doomi Rimon ma dëkk Berot nag ñoo demoon kër Isboset, àgg fa ci biir tàngooru njolloor; fekk Isboset di for bët. ⁶ Ñu jáll ba ca biir-a-biir kër ga, mel ni ñuy sàkk peppum bele, daldi ko jam ci biir, ba noppi yoxoosu daw. ⁷ Ba ñuy dugg kërám, ma nga tédmoon ca lalam, ca néegu biiram. Ñu jam ko ba rey ko, dog bopp ba, yóbbu. Ñu jaare xuru Yurdan, fanaanee dox.† ⁸ Ci kaw loolu ñu yóbbul boppu Isboset Daawuda ca Ebron, ne ko: «Buur; Sóol, sa noon ba doon wut sa bakkan, boppu doomam Isboset a ngii. Bésusb tey jii de sang bi, Aji Sax jee la feyul ci Sóol ak askanam.»

⁹ Daawuda nag ne Rekab ak Baana, doomi Rimon waa Berot ba: «Giñ naa ci Aji Sax ji, Kiy Dund te musal sama bakkan ci gépp njàqare, ¹⁰ ka ma tàggesi woon

Sóol, foog ne xibaaru jàmm la ma indil, dama koo jàpp, rey ko ca Ciglaag, yoole ko ko xibaaram. ¹¹ Rawatina nag nit ñu bon ñu rey jaamburu Yàlla ci biir kërám, ci kaw lalam sax. Kon duma def lu moy topp leen bakkanam, jële leen ci kaw suuf!»¹² Daawuda nag jox ay nitam ndigal, ñu rey leen. Ñu dog seeni loxook seeni tànk ca tenqo ya, wékk néew ya ca wetu déegub Ebron, daldi jël boppu Isboset, suul ca bàmmeelu Abner ca Ebron.

5

Daawuda falu na buur ca Israyil

¹ Ci kaw loolu giiri Israyil yépp dikk fa Daawuda ca Ebron, ne ko: «Noo ngii di say bokk lenqe. ² Te it démb ak bëkk-démb, ba Sóol dee sunu buur; yaw yaa doon jiite Israyil ciy xareem. Aji Sax ji ne la: “Yaay sàmm Israyil sama ñoñ te yaay doon kilifag Israyil.” ³ Noonu la magi Israyil ñépp dikke ca Buur Daawuda ca Ebron, mu fasook ñoom kóllère fa kanam Aji Sax ji. Ñu sotti Daawuda diwul pal ga, muy buurub Israyil.

⁴ Daawuda amoon na fanweeri at, ba muy falu buur, te ñeent fukki at la nguuru. ⁵ Ca Ebron la yore nguuruug Yuda juróom ñaari at ak juróom benni weer, waaye ca Yerusaleem la yore diiru fanweeri at ak ñeett, mboolem Israyil ak Yuda.

Daawuda nangu na Yerusaleem

⁶ Gannaaw loolu Buur Daawuda ànd aki xarekatam, jëm Yerusaleem, songi Yebuseen ña dëkkoon ca réew ma. Yebuseen ña ne Daawuda: «Doo fi dugg de, nde gumba yeek lafañ yi rekk ñoo lay waññi.» Booba foog nañu ne Daawuda manu faa dugg. ⁷ Terewul Daawuda nangu tatay Siyon, ga ñu dippee Kër Daawuda. ⁸ Daawudaa noon bésusb keroog: «Ku bëgga jam Yebuseen ñi, ca xuntim yoonu ndox ma ngay mana dabe seeni gumbaak seeni lafañ, xuloowaaley Daawuda yi.» Looloo waral waxin wi ñu naan: «Gumba akub lafañ du dugg kër Buur.» ⁹ Ba mu ko defee Daawuda dëkk ca biir tata ja, wooye ko Kër Daawuda, ba noppi tabax fa ko wër fépp, dale ko ca sèkkub Milo*, ba ca biir. ¹⁰ Daawuda nag di gëna am doole, Aji Sax ji Yàlla, Boroom gàngoori xare yi ànd ak moom.

¹¹ Ci biir loolu Iram buurub Tir, yebal ay ndaw ca Daawuda, ñu yóbbul ko ay banti garabu deedar, ak ay liggéeykati bant ak

* 4:4 4.4 Mefiboset dees na ko wooye Mefibaal ba tey. Seetal lu mel noonu ci 2.8. † 4:7 4.6-7 Am na ci bind yu yàgg yi, yu ci indil: Am na ku jigéen ku doon wattu bunt ba, di bàcc pepp. Ay nelaw dab ko. Rekab ak Baana yoxoosu dugg. Ñu jáll ca néegu biiru Isboset, fekk ko mu téd d ca lalam. Ñu jam ko, rey ko, dog bopp ba, yóbbu, jaareji xuru Yurdan, fanaanee dox. * 5:9 5.9 Milo xur la wu doxoon diggante kër Yàlla ga ak gox ba ñu naan Kër Daawuda. Suleymaan sèkkku ko.

yettkati xeer, ngir ñu tabaxal Daawuda kër. ¹² Daawuda xam ne Aji Sax jee ko tabb buurub Israyil te moo kaweel nguuram ngir Israyil, aw ñoñam.

¹³ Gannaaw ba Daawuda jógee Ebron, dellu na jël ay nekkaaale aki soxna ca Yerusalem. Mu am ca yeneen doom yu góor ak yu jigéen. ¹⁴ Doomam yu góor yi juddoo Yerusalem ñoo di Samwa ak Sobab ak Natan ak Suleyman; ¹⁵ ak Ibaar ak Elisawa ak Nefeg ak Yafiya; ¹⁶ ak Elisama ak Elyada ak Elifelet.

Buur Daawuda duma na waa Filisti

¹⁷ Ba waa Filisti déggee ne fal nañu Daawuda buurub Israyil, ñoom ñépp a jóg, di ko wër. Daawuda nag dégg ko, dem làquji ca biir tata ja. ¹⁸ Waa Filisti dikk, tasaaroo ca xuru Refayeen ña. ¹⁹ Daawuda laaj Aji Sax ji, ne ko: «Ndax ma songi waa Filisti? Dinga leen teg ci sama loxo?» Aji Sax ji ne ko: «Demal, maay teg waa Filisti ci say loxo déy!» ²⁰ Daawuda dem ba ca Baal Perasim, duma leen foofa. Mu ne: «Aji Sax jee ma bëttal noon yi, ni walum ndox di bëtte, wéy.» Moo tax ñu wooye bérab boobu Baal Perasim (mu firi Boroom bëtt-bëtt yi). ²¹ Waa Filistee fa wacc seeni gällaaj, Daawudaaki nitam boole yóbbu.

²² Ba mu ko defee waa Filisti dikkaat, tasaaroo ca xuru Refayeen ña. ²³ Daawuda dellu laaj Aji Sax ji. Mu ne ko: «Bul jubal, doxeleen gannaaw, dal ca seen kaw fa janook garabi sànd ya. ²⁴ Booy dégg tãnk yuy jaab ca kaw njobbaxtali sànd ya rekk, gaawtul, ndax booba Aji Sax jee la jiitu, di dumaji waa dalub Filisti.» ²⁵ Daawuda nag def noonee ko Aji Sax ji sant, ba duma waa Filisti diggante Geba, ba ca buntu Geser.

6

Gaalu Yàlla ga dem na Yerusalem

¹ Ba loolu wéyee Daawuda dellu woo mboolem ñeyi xarey Israyil, ñuy fanweeri junni. ² Mu fabu, mook mboolem gàngoor ga ànd ak moom, dem Baala, ca Yuda, ngir jëleji fa gaalu Yàlla gi ñu tudde Tur wi, turu Aji Sax ji Boroom gàngoori xare yi, ki tooge diggante malaakay serub, yi tiim gaal gi. ³ Ñu teg ko ci kaw watiir wu bees, jële ko kër Abinadab ga woon ca kaw tund wa. Usa ak Axyo, doomi Abinadab yu góor ya dox, jiite watiir wu bees wa. ⁴ Noonu lañu dawale watiir wa yeb gaalu Yàlla ga, jële ko kër Abinadab, ga ca kaw tund wa, Axyo dox jiitu ko. ⁵ Daawudaak waa kër Israyil gépp a ngay bannexoo mboolem jumtukaayi xumbéen fi kanam Aji Sax ji;

muy lu ñu defare bantu garabu sippar, ak ay kesen-kesen aki tabala ak xeeti xalam.

⁶ Naka lañu dem ba tollu ca dàggay Nakon, nag ya tërëf, Usa tàllal loxoom, jàpp ca gaalu Yàlla ga. ⁷ Sànjum Aji Sax ji nag tàkk ci kaw Usa. Yàllaa ko fàdd foofa, ndax ug teeyadeem, mu dee foofa ca wetu gaalu Yàlla ga*. ⁸ Ba loolu amee Daawuda mer ca mbugal mu metti ma Aji Sax ji teg Usa. Moo tax mu tudde bérab booba Peres Usa (mu firi Mbugalum Usa), muy turam ba tey jii.

⁹ Daawuda am na tiitaange lool bésob keroog ci Aji Sax ji. Ma nga naan: «Ana nu gaalu Aji Sax ji mana dale ak man?» ¹⁰ Loolu nag tax Daawuda nanguwula yóbbu gaalu Aji Sax ji fa moom, ca gox ba ñu naan Kër Daawuda. Mu waññi gaal gi, yóbbu ko ca kër Obedd Edom waa Gaat ba. ¹¹ Gaalu Aji Sax ji nekk na kër Obedd Edom waa Gaat ba ñetti weer. Aji Sax ji barkeel Obedd Edom, mook kërám gépp.

Gaal ga dikk na Yerusalem

¹² Ba loolu amee ñu xamal Buur Daawuda ne ko: «Aji Sax ji de barkeel na Obedd Edom ak mboolem lu bokk ci moom ndax gaalu Yàlla gi.» Daawuda jëleji gaalu Yàlla ga kër Obedd Edom, daldi koy yóbbu ci biir mbégte mu réy ba kërám, fa ñu naan Kër Daawuda. ¹³ Ba ña gàddu gaalu Aji Sax ja séqee juróom benni jéego, aw yékk ak wëllu wu duuf la Daawuda sarxal. ¹⁴ Daawudaa ngay fecc ak doole fa kanam Aji Sax ji. Daawudaa nga gaño am xar-sànnim lée. ¹⁵ Naka la Daawuda ak waa kër Israyil gépp di yóbbu gaalu Aji Sax ji, sarxolle yaak liit ya jolli.

¹⁶ Ba gaalu Aji Sax jay duggsi ca biir gox ba ñu naan Kër Daawuda, soxnas Daawuda, Mikal doomu Sóol a nga séppu ca palanteeram. Mu gis Buur Daawuda di tëb a fecc ca kanam Aji Sax ji. Mu jéppi ko lool.

¹⁷ Ba mu ko defee ñu indi gaalu Aji Sax ji, yeb ko ca bérabam, ca biir xayma ba ko Daawuda sampal. Daawuda daldi joxe fa kanam Aji Sax ji ay saraxi rendi-dóomal, ak saraxi cant ci biir jàmm. ¹⁸ Daawuda joxe saraxi rendi-dóomal ak saraxi cant ci biir jàmm, ba noppi daldi ñaanal askan wi ci turu Aji Sax ji Boroom gàngoori xare yi. ¹⁹ Mu séddale aw ñam askan wépp, mbooloom Israyil mépp, góor ak jigéen; ku ci nekk mu jox la menn mburu ak yàpp wu ñu saaf† ak benn nàkku reseñ. Mbooloo ma doora dem, ku nekk ñibbi kërám.

* 6:7 6.7 Sarxalkat yi rekk ñoo amoon sañ-sañu laal gaalu Yàlla ga, te Leween ñi rekk ñoo amoon sañ-sañu gàddu ko. † 6:19 6.19 yàpp wu ñu saaf walla benn nàkku tàndarma.

²⁰ Ba loolu amee Daawuda walbatiku, dugg biir kërám, ngir ñaanal waa kërám. Soxnaam Mikal doomu Sóol génn dajeeek moom, ne ko: «Buuru Israyiloo, yaaka teral sa bopp bésub tey jii! Nga fut-teeku tey jii fi kanam jigéen ñiy sa jaami jawriñ yi, mbete nit ku tekkiwul dara!»

²¹ Daawuda ne Mikal: «Fi kanam Aji Sax ji ma taamu, wacc sa baay ak waa kërám gépp, ngir fal ma kilifag Israyil, ñoñi Aji Sax ji, fi kanam Aji Sax ji laay bannexu. ²² Dinaa gëna teddadil sama bopp sax, gëna toroxlu, ba gisal ko sama bopp, te du tere jaam yu jigéen yi ngay wax teral ma.» ²³ Mikal doomu Sóol jooju nag amul doom, ba ni mu deeye.

7

Lu jëm ci kër Yàlla ak kër Daawuda

¹ Gannaaw loolu Buur Daawuda sanc na kërám, Aji Sax ji noppal ko ci noonam yi ko wër yépp. ² Ci biir loolu mu ne Yonent Yàlla Natan: «Xoolal rekk, maa ngi dëkke kèru banti seedar, gaalu Yàlla gi dëkke ab xayma.» ³ Natan ne Buur: «Mboolem loo ci namma def rekk, defal, ndax Aji Sax ji yaw la àndal.»

⁴ Guddig keroog nag kàddug Aji Sax ji dikkal Natan, ne ko: ⁵ «Demal wax sama jaam Daawuda, ne ko: “Aji Sax ji dafa wax ne: Ndax yaw yaa may tabaxal kër gu ma dëkke?” ⁶ Bés ba ma gënee bànni Israyil Misra ba tey jii, masuma dëkke ci kër. Ci biir xaymab jaamookaay laa masa mänge. ⁷ Mboolem fu ma masa mängeji ak bànni Israyil gépp, ndax mas naa wax benn baat, jème ci genn giirug Israyil gu ma sant ñu sàmm Israyil sama ñoñ, ne leen ñu tabaxal ma kërug bantu seedar?”

⁸ «Kon nag waxal sama jaam Daawuda, ne ko: “Aji Sax ji Boroom gàngoori xare yi dafa wax ne: Maa la jële ca parlu, ga nga toppe woon gätt ya, ngir nga doon kilifag Israyil, sama ñoñ. ⁹ Maa ànd ak yaw fépp foo dem, maa tenqee fi sa kanam mboolem say noon, te maa lay may tur wu mägge ni turi boroom daraja yi ci àddina. ¹⁰ Maay sàkkal dëkkuwaay Israyil sama mos, jëmbat ko, mu dëkke ko, ba deesu ko lëjalati, te ñu bon ñi duñu ko sonalati na woon, ¹¹ ba ma falee ay njiit ci kaw Israyil sama ñoñ. Maa lay noppal ci sa noon yépp. Te it Aji Sax jaa ngi lay yégal ne la Aji Sax ji moo lay sosal kër. ¹² Te bu say fan matee ba nga tédidi, fekki say maam, maay yékkati kenn ci saw askan, sa deretu bopp, mu wuutu la, te maay saxal nguuram. ¹³ Kookooy tabax kër, ñeel sama tur, te maay saxal ab jalam ba fàww. ¹⁴ Man maay doon baay ci moom, moom, muy doom ci man. Su defee naka su dul

noonu, maa koy yare bantu nit, ak dumay doom aadama. ¹⁵ Waaye duma ko noppee laaye biir, ni ma noppee laaye biir Sóol ma ma la randalal. ¹⁶ Sa kër ak sa nguur day sax dàkk fi sa kanam, te sab jal day dëju ba fàww.”»

¹⁷ Noonee Natan jote mboolem kàddu yooyu ak peeñu moomu, na la ko yegge Daawuda.

Daawuda delloo na Yàlla njukkal

¹⁸ Ba loolu amee Buur Daawuda dikk ba fa kanam Aji Sax ji, toog ne ko:

«Boroom bi Aji Sax ji! Ana lu ma doon, ak lu sama waa kër doon, ba tax nga indi ma ba fii? ¹⁹ Boroom bi Aji Sax ji, loolu dooyatu la, nga waxaale ci sama askan, wi xaajagula ñew, Sang bi. Boroom bi, Aji Sax ji, ndax nii ngay jéfeek doom aadama?»

²⁰ «Boroom bi Aji Sax ji, ana lu ma lay waxati? Yaw de, Sang bi, yaa ma ràññee. ²¹ Sa kàddoo waral nga def mboolem jii jéf ju réy ci sa yéney xol, ba noppi yégal ma ko, Sang bi.

²² «Boroom bi, Aji Sax ji, Moo la tax di ku mägge! Kenn du yaw, kenn du Yàlla ku dul yaw doon, te mboolem lu nu nopp may, dëggal na loolu. ²³ Ana askan wu mel ni Israyil sa ñoñ ci kaw suuf, wenn askan wu Yàlla dikk, goreel leen ngir def leen ñoñam, ba turam siiw? Yaa leen defal ay jaloore, yaa defal sam réew ay kéemaan ci sa kanam ñoñ ñi nga goreele fa Misra aki askanam aki yàllaam. ²⁴ Yaa dëgéral Israyil sa ñoñ, ngir ñoñoo leen ba fàww, te yaw Aji Sax ji, yaa doon seen Yàlla.

²⁵ «Léegi nag, Aji Sax ji Yàlla, Sang bi, wax ji nga wax ci man, ak sama waa kër, saxal ko ba fàww rekk, te defe ko noonu nga ko waxe, ²⁶ ngir saw tur di gëna mägge ba fàww, ñu naan: “Aji Sax ji Boroom gàngoori xare yi mooy Yàllay Israyil,” te waa kër Daawuda sax fi sa kanam, Sang bi.

²⁷ «Aji Sax ji Boroom gàngoor yi, Yàllay Israyil, yaw déy yaa ma déey, Sang bi, ne kër nga may sosal. Moo tax ma ñeme laa ñaan lii, Sang bi. ²⁸ Léegi nag, Boroom bi Aji Sax ji, yaw yaay Yàlla, say kàddu mooy dëgg, te yaa ma wax lu baax lii, Sang bi. ²⁹ Kon nag Sang bi, nangula barkeel sama kër, ngir mu sax ba fàww fi sa kanam. Ndax kat yaw Boroom bi Aji Sax ji yaa wax, te ci sa barke la sama kër di barkeele ba fàww, Sang bi.»

8

Daawuda duma na xeet ya ko wër

¹ Gannaaw gi, Daawuda duma na Filis-teen ña, néewal leen doole, jële kiliftefu waa Filisti ca réew ma. ² Daawuda duma Mowabeen ña itam, téral leen ca suuf,

sésale leen, natte leen ag buum. Ñaari buum yu mu natt, yemook ña ñu wara rey, buum gu mat ga ca topp yemook ñi wara dund. Mowabeen ña daldi nangul Daawuda, di ko indil galag.

³ Daawuda duma na itam buurub Soba*, Adadeser doomu Reyob, fekk Adadeser di fexee nanguwaat diiwaan ba feggook dexu Efraat. ⁴ Daawuda jàpp junniy gawaram ak juróom ñaar téeméer (1 700) ak ñaar fukki junniy xarekat (20 000) yuy deme tánk, ba noppi dog sidditi tánk mboolem fas ya doon dawal watiir, báyyiwu ca lu moy téeméeri fas. ⁵ Waa Siri ña dèkke réewum Damaas dikk wallusi Adadeser buurub Soba. Daawuda rey ca ñoom ñaar fukki junneek ñaar (22 000). ⁶ Ba mu ko defee Daawuda tabb ay jawriñam ca Damaas ca Siri, waa Siri nekk ci curgag Daawuda, di ko fey galag. Aji Sax ji may Daawuda ndam fépp fu mu dem. ⁷ Daawuda nag nangu pakki wurus ya kilifay xarekati Adadeser daan aare seen bopp. Mu boole, yóbbu Yerusalem. ⁸ Dèkki Adadeser ya ñuy wax Beta ak Berotay it, xánjar ju bare lool la fa Buur Daawuda nangoo.

⁹ Ci kaw loolu Toyi buurub Amat dégg ne Daawuda duma na gàngooru Adadeser gépp. ¹⁰ Toyi yebal doomam Yoram ca Buur Daawuda, ngir mu nuyy ko, sargal ko ca la mu xareek Adadeser ba duma ko, ngir Toyi ci boppam xare woot naak Adadeser. Yoram indaaleel ko juntuqaayi xaalis ak wurus ak xánjar. ¹¹ Buur Daawuda boole loolu, jagleel ko Aji Sax ji, na mu ko jagleele woot xaalis baak wurus, wa mu léle ca mboolem xeet ya mu tegoon loxo; ¹² la jóge ca Edomeen ñaak Mowabeen ñaak Amoneen ñaak waa Filisteeke Amalegeen ña ak la mu léle ca buurub Soba, Adadeser doomu Reyob.

¹³ Daawudaa nga gënatee siiw ba mu dumaa waa Siri, teg ca duma fukk ak juróom ñetti junniy (18 000) Edomeen ca xuru Xorom wa. ¹⁴ Mu daldi tabb ay jawriñam ca réewum Edom. Réewum Edom gépp la tabb ay jawriñ, Edomeen ñépp nekk ci curgag Daawuda. Aji Sax ji nag may Daawuda ndam fépp fu mu dem.

Lu jëm ci jawriñi Daawuda

¹⁵ Buur Daawuda ci kaw Israyil gépp la nguuru woot; muy jëfe njub ak njekk ñeel réewam mépp. ¹⁶ Yowab, mi Seruya di ndeyam, moo jiite woot mbooloom xare ma; Yosafat doomu Ayilut yor káddug buur; ¹⁷ Cadog doomu Ayitub ak Ayimeleg doomu Abiyatar ñoo doon sarxalkat ya;

Seraya di bindkat ba; ¹⁸ Benaya doomu Yoyada moo jiite woot waa Keret ak waa Pelet, dagi buur ya; doomi Daawuda yu góor nag ay sarxalkat lañu woot†.

9

Daawuda baaxe na Mefiboset

¹ Daawuda moo noon: «Ndax kenn desul ba tey ci waa kër Sóol, ba ma jëfeek moom ngor ngir Yonatan?» ² Fekk na ab surgaa nga woot ca kër Sóol, di ku ñuy wax Ciba. Ñu indi ko ca Daawuda, Buur Daawuda ne ko: «Yaa di Ciba?» Mu ne ko: «waa, sang bi.» ³ Mu ne ko: «Ndax kenn desul ba tey ci waa kër Sóol, ba ma jëfeek moom ngor gu Yalla gërëm?» Ciba ne ko: «Doomu Yonatan yu tánk yi baaxul a nga fa ba tey kay.» ⁴ Buur ne ko: «Ana mu?» Mu ne ko: «Moom de, ma nga ca kër Makir doomu Amiyel, ca dèkk ba ñuy wax Lodebar.»

⁵ Buur Daawuda nag yebale, ñu jëleji ko ca Lodebar, ca kër Makir doomu Amiyel. ⁶ Ba loolu amee Mefiboset* doomu Yonatan doomu Sóol, dikk ca Daawuda, ne gurub, dèpp jëm fa suuf, sujjóot. Daawuda ne ko: «Mefiboset!» Mu ne ko: «Naam, sang bi.» ⁷ Daawuda ne ko: «Bul tiit, dinaa jëfeek yaw ngor déy ngir sa baay Yonatan. Dinaa la delloo mboolem sa suufas maam Sóol, te yaay bokk ak man ndab ba fàww.» ⁸ Mefiboset sujjóot, ne ko: «Moo sang bi, maay kan ba nga di ma geesu, man mi tekkiwul dara, ba dara booloo jeex?»

⁹ Ci kaw loolu Buur woolu Ciba, surgab Sóol ba, ne ko: «Mboolem lu bokk ci alalu Sóol ak alalu waa kërám jox naa ko Mefiboset, sa sëtub sang. ¹⁰ Dee ko beyal tool yi, di ko góobal, yaw yaak say doom ak say surga, ndax waa kërám am ab dund. Mefiboset nag, mook man ay bokk ndab.» Ciba amoon na fukki doom yu góor ak juróom, ak ñaar fukki surga. ¹¹ Ciba ne ko: «Buur, sang bi, noonu nga ma ko sante rekk, ni laa koy defe.» Ci kaw loolu Mefiboset di lekk ca ndabal Daawuda, mel ni ku bokk ci doomi Buur.

¹² Mefiboset amoon na doom ju ndaw ju góor, yu ñuy wax Miika. Waa kër Ciba ñépp nag daldi nekk ci liggéeyu Mefiboset.

¹³ Ci kaw loolu Mefiboset far féete Yerusalem gannaaw ñaari tánkam a lággi, ndax mu mana lekke ca ndabal Buur, bés bu nekk.

10

Daawuda jote naak Amoneen ña

* **8:3** 8.3 Soba turu dèkk la bu amoon buuru boppam. Waaye ci Siri la bokkoon. † **8:18** 8.18 Am na ñu jàpp ne sarxalkat yi ñuy wax fii, ay saytukat lañu woot. * **9:6** 9.6 Mefiboset dees na ko wooye Mefibaal ba tey. Seetal lu mel noonu ci 2.8.

¹ Gannaaw loolu Nayas buurub Amoneen ña dee, Anun doomam ju góor falu buur, wuutu ko. ² Daawuda ne: «Dinaa jéfe ngor sama diggantek Anun doomu Nayas, na ma baayam jiye woon ngor.» Daawuda nag yebal ay ndawam ca Anun, di ko jaal baayam. Ba ndawi Daawuda ya agsee ca réewum Amoneen ña, ³ njiiiti Amoneen ña wax ak seen sang Anun, ne ko: «Defe nga ne moos wormaal sa baay la Daawuda namm, ba yónnee la ay nit ñu la jaal? Foogoo ne seetsi dëkk bi ak nemmikusi ko, ba song ko moo tax Daawuda yebal ay nitam ci yaw?» ⁴ Anun daldi japp niti Daawuda ña, wat seen genn-wállu sikkim, dagg seeni mbubb fa tollook toogukaay ba, daldi leen dàq. ⁵ Ñu yegge Daawuda mbir ma, mu yeble ngir ñu gatanduji leen ndax na ñu leen torxale. Mu ne leen ñu toog Yeriko, ba seeni sikkim séqaat, ñu doora ñibbsi.

⁶ Amoneen ña xam ne Daawuda jéppi na leen lool. Ñu dem bindi ñaar fukki junniy (20 000) xarekat ca waa Siri ña dëkke Bet Reyob ak waa Siri ña dëkke Soba, teg ca junniy nit ñu bàyyikoo ca buuru Maaka, ak fukki junneek ñaar (12 000) ñu waa Tob. ⁷ Daawuda dégg ko, yebal Yowab ak mboolem gàngooru jambaar ña. ⁸ Ba mu ko defee Amoneen ña génn, làng-dér ca seen buntu péey ba, fekk waa Siri ña dëkke Soba ak Reyob ak waa Tob ak waa Maaka, ñoom ñépp a nga taxawe nee ca àll ba, seen wetu bopp. ⁹ Yowab gis làngi xare yi ñu wara jänkooteel, ga ko féete kanam, ak ga ca gannaaw. Mu tanne ca jambaari Israyil yépp jambaari xare yu mag, ñu làng-déral waa Siri. ¹⁰ La des ca gàngoor ga, mu teg ca loxol rakkam Abisay, làng-dérloo leen, ñu janook Amoneen ña. ¹¹ Yowab ne Abisay: «Bu ma waa Siri éppee doole, nga wallusi ma; su la Amoneen ñi éppee doole, ma wallusi la. ¹² Góor-góorlu nag, te nu bokk góor-góorlu ngir sunuw xeet ak sunu dëkki Yàlla yi. Aji Sax ji nag mooy def li ko soob.»

¹³ Ba loolu amee Yowab ak gàngoor ga ànd ak moom sàqi ngir xareek waa Siri, waa Siri daw, won leen gannaaw. ¹⁴ Amoneen ña gis waa Siri di daw, ñoom it ñu daw, won Abisay gannaaw ba dellu ca biir dëkk ba. Yowab nag bàyyikoo ca xare baak Amoneen ña, daldi dellu Yerusaleem.

Daawuda xare naak Siri

¹⁵ Gannaaw loolu waa Siri gis na ñu daanoo fa kanam Israyil. Ñu bokk daje ñoom ñépp. ¹⁶ Ci kaw loolu Buur Adadeser yónnee, jéli waa Siri ña ca wàllaa dexu Efraat. Waa wàllaa dex dikk ba dëkk ba ñuy wax Elam; Sobag, njiiital gàngooru

Adadeser jiite leen. ¹⁷ Naka lañu ko wax Daawuda, mu woo Israyil gépp, daldi jáll dexu Yurdan, ba àgg Elam. Waa Siri nag làng-déral Daawuda, song leen. ¹⁸ Waaye waa Siree daw, won Israyil gannaaw. Daawuda rey ca ñoom juróom ñaar téeméeri dawalkati watiiri xare (700), ak ñeent fukki junniy gawar (40 000). Sobag, seen njiiital gàngoor, mu jam ko, mu dee foofa. ¹⁹ Ba mu ko defee mboolem buur yay jawriñi Adadeser gis na ñu daanoo fa kanam Israyil, ñu daldi jammook bànni Israyil, nangul leen. Ba loolu amee waa Siri ñemeetuñoo sotle Amoneen ña.

11

Daawuda topp na bakkanam

¹ Gannaaw loolu, ca déwén sa, jamono ja buur ya daan xareji, Daawuda daa yebal Yowab, mu ànd aki nitam ak gàngooru Israyil gépp. Ñu faagaagal Amoneen ña, gaw péey ba ñu naan Raba. Fekk na Daawudaa nga des Yerusaleem.

² Genn ngoon, Buur Daawuda jóge ca kaw lalloom, di doxantu ca kaw taaxum kéram. Mu tollu ca kaw taax ma, seen sa ndaw suy sangu. Ndaw sa neexa xool lool. ³ Daawuda yónnee, géstu mbiram, ñu ne ko: «Xanaa du Batseba doomu Eliyam, jabaru Uri, Etteen bi?»

⁴ Ci kaw loolu Daawuda yebal ay ndaw yu jéli ndaw si, mu dikk, mu tédde ko. Fekk na ndaw sa gisoon baax bay doora sangu-set. Ndaw sa daldi ñibbi. ⁵ Ndaw si nag ëmb. Ba loolu amee mu yónnee ca Daawuda ne ko: «Man de, damaa ëmb.»

⁶ Ba mu ko defee Daawuda yónnee ca Yowab, ne ko mu wool ko Uri, Etteen ba. Yowab wool ko Uri. ⁷ Ba Uri dikkee, Daawuda nuyook moom ne ko: «Mbaa Yowab jamm? Mbaa mbooloo ma jamm? Mbaa xare ba jamm?» ⁸ Ba loolu wéyee Daawuda ne Uri: «Àggal sa kër nag te jangu.» Uri bàyyikoo kër Buur, ab yóbbalu Buur topp ca gannaawam. ⁹ Ndeke Uri ñibbiwul kéram. Ca bunt kër Buur la tédde, mook mboolem surgay Buur.

¹⁰ Ñu yégal Daawuda, ne ko: «Uri de ñibbiwul kéram,» mu ne Uri: «Xanaa du ciw yoon nga jóge? Lu la tee àgg sa kër?»

¹¹ Uri ne Daawuda: «Sang bi, gaalu Yàlla ga ak Israyil ak Yuda dëkke ay mbaar, sama njaatige Yowab ak surgay sang bi bokk dale ci digg àll bi, man may dem sama kër, di lekk ak a naan, di dëkkoo sama soxna? Mukk! Giñ naa, nga fekke, duma def loolu!»

¹² Daawuda ne Uri: «Kon toogaatal fii tey ba èllég, ma yiwi la.» Uri toog Yerusaleem bésuub keroog ak ca èllég sa. ¹³ Ci biir loolu Daawuda woo Uri, mu bokk ak moom

lekk, daldi naan. Mu nàndal ko ba mu màndi. Ba ngoon jotee Uri daa génn, tédd ca laltoom ca biir surgay sangam, waaye kèram, àggu fa ba tey.

¹⁴ Ba bêt setee Daawuda bind Yowab bataaxal, yóbbante ko Uri. ¹⁵ Mu bind ci bataaxal bi, ne Yowab: «Jiitalal Uri mii ca làngu kanam, ga xare ba gêna tange, te ngeen dànd ko, ndax ñu jam ko, mu dee.»

¹⁶ Ci kaw loolu Yowab a nga bàyyi xel ca dèkk ba ñu gaw. Mu daldi teg Uri fu ko wóor ne ay ñeyi xarey dèkk baa fa feete. ¹⁷ Ba loolu amee waa dèkk ba génn, xeex ak ñoom Yowab, mu am ñu daanu ca gàngoor ga, ca niti Daawuda ña, Uri Etteen ba bokk ca ña dee.

¹⁸ Ba mu ko defee Yowab yóonnee àgge Daawuda mboolem xew-xewi xare ba. ¹⁹ Yowab sant ndaw la, ne ko: «Boo nettalee buur li xew ci xare bi lépp, ba noppi, ²⁰ su Buur meree, ne la: “Ana lu waral ngeen jegee noonu dèkk ba ci xeex? Xanaa xamuleen ne ca kaw tata ja lañu leen di fitte? ²¹ Ana ku reyoon Abimeleg doomu Yerubese? Xanaa du ca kaw tata ja la ko aw jigéen sànee doju wolukaay, ba mu dee ca Tebes? Lu waral ngeen jegee noonu tata ja?” Su boobaa nee ko: “Sa surga ba, Uri Etteen ba it dee na.”»

²² Ndaw la dem ba àgg, daldi àgge Daawuda la ko Yowab waxloo lépp. ²³ Ndaw la da ko ne: «Nit ñaa nu jèkkoonan man. Dañoó génn, song nu ca àll ba. Waaye noo leen delloo gannaaw ba ca bunt dèkk ba. ²⁴ Fittkat ya nag fitte nu ca kaw tata ja, ba mu am ñu dee ci say nit. Sa surga ba, Uri Etteen ba it dee na.» ²⁵ Daawuda ne ndaw la: «Waxal Yowab ne ko, bumu tiislu moomu mbir; xare bu yóbbuwul kii, yóbbu kee. Na gêna song dèkk ba rekk, ba daane ko. Nga ñaaxe ko noonu.»

²⁶ Ba loolu amee jabaru Uri dégg ne jèkkèram dee na. Mu daldi koy ténj.

²⁷ Ba àppu ténj ba weesee*, Daawuda yóonnee, indi ko kèram, mu doon soxnaam. Gannaaw gi mu am doom ji goór.

Aji Sax ji nag ñaawlu la Daawuda def.

12

Yonent Yàlla Natan yedd na Daawuda

¹ Aji Sax ji moo yónni Natan ca Daawuda. Mu dikk, ne ko: «Naari goór la woon ci ab dèkk. Kenn ka barele, ka ca des néewle. ² Ki barele am na jur gu bare lool, gu gudd ak gu gàtt. ³ Waaye ka néewle amul lu dul mbote nu ndaw mu jigéen mu nu jèndoon, yar ko biir kèram, muy mąggandook ay doomam. Ca njèlam sa la

mbote ma daan lekk, ca kaasam la daan naane, te ca kaw dènnam la daan tédd. Mbote mi daa meloon ni doomam. ⁴ Ci biir loolu ku nekk ciw yoon dikk, dal ak ka barele. Waaye moom néegula sàkk ciy gàttam mbaa nagi boppam, ngir toggal ko gan gi dal ak moom. Ka néewle la nangu mboteem, toggal ko gan gi dal ak moom.»

⁵ Daawuda nag mer lool ca jéfi nit kooku. Mu ne Natan: «Giñ naa ci Aji Sax jiy dund, dee rekk mooy àtteb waa ji def loolu! ⁶ Te it menn mbote mi, ñeentam la koy feye, gannaaw moo def jooju jéf, te amu ci jenn yèrmande!» ⁷ Natan ne Daawuda: «Yaw, yaay waa ji! Aji Sax ji Yállay Israyil dafa wax ne: “Man maa la fal buurub Israyil, maa la xettli ci Sool. ⁸ Maa la jox sa kër sang, maa teg ci say loxo, sa jabari sang, jox la nguugrug Israyil ak Yuda. Te bu doyuuloon it, ma dolli. ⁹ Ana lu waral nga ñàkke worma kàddug Aji Sax ji, di def lu mu ñaawlu? Uri Etteen bi, yaa ko fàdde saamar; jabaram nga jël, def ko sa jabar, moom nga fàdde ko saamaru Amoneen ñi. ¹⁰ Kon nag saamar dootu jóge sa kër muk, ndax yaa ma ñàkke worma, ba jël jabaru Uri Etteen bi, def ko sa jabar.” ¹¹ Aji Sax ji dafa wax ne: “Maa ngii di yékkati fi sa kaw musiba mu jóge ci sa kër. Maay jël say jabar, ngay gis, jox leen goor ni yaw, mu tédde say jabar bëccég ndarakàmm. ¹² Yaw déy ci sutura nga ko defe. Waaye man, ci kanam Israyil gépp laay sabab mbir moomu, bëccég ndarakàmm.”»

¹³ Daawuda nag ne Natan: «Maa tooñ Aji Sax ji.» Natan ne ko: «Aji Sax ji it jéllale na sa bàkkaar; doo ci dee. ¹⁴ Du tere nag, gannaaw dangaa teddadil lool Aji Sax ji ci mbir mii, doom ji nga ci am, moom, day dee rekk.» ¹⁵ Ba loolu amee Natan dellu kèram.

Doomu Daawuda faatu na

Ba mu ko defee Aji Sax ji daane xale ba jabaru Uri am ak Daawuda. Xale ba wopp. ¹⁶ Daawuda nag tinu Yàlla ci xale bi: muy woor, fatu, fanaanee tédd ci suuf. ¹⁷ Magi kèram soññ ko ngir yékkatee ko fa suuf, nanguwul, te bokkul ak ñoom lekk dara. ¹⁸ Ñu teg ca juróom ñaari fan, xale ba dee. Surgay Daawuda ya ragala wax Daawuda ne ko xale ba dee na. Booba ña ngay xalaat naan: «Ndegam ba xale bay dund lanuy wax ak moom, dégluwu nu kay, ana nu nu koy waxe ne xale bi dee na, muy def njaaxum.» ¹⁹ Daawuda nag gis surgaam ya ñuy déeyoo, mu xam ne xale bi dee na. Mu ne leen: «Xale bi daa dee?» Ñu ne ko: «Dee na.»

* **11:27** 11.27 Jamono yooyu bànni Israyil juróom ñaari fan lañu aadawoo woon di ténj.

²⁰ Ba mu ko defee Daawuda jóge ca suuf, sangu, diwu, soluwaat. Ci kaw loolu mu dugg ca kër Aji Sax ji, sujjóot, daldi dem kërám, santaane, ñu taajal ko ag lekk, mu lekk. ²¹ Surga ya ne ko: «Li ngay def lu mu doon? Bi xale biy dund, danga doon woor ak a jooy, léegi bi xale bi deeyee, nga jóg, di lekk?» ²² Mu ne leen: «Ba xale biy dese bakkan laa doon woor ak a jooy, ndax dama noon: «Ana ku xam ndax Aji Sax ji dina ma defalu yiw, ba xale bi dund am déet?» ²³ Waaye gannaaw léegi dee na, ana lu may woorati? Dama koo mana dekkal? Man kay maa koy fekki, waaye moom du délsi ci man mukkk.»

Suleymaan gane na àddina

²⁴ Ba loolu amee Daawuda dëfal sox-naam Batseba. Mu dem ca moom, daldi ànd ak moom. Gannaaw gi ndaw si am ca doom ju góor, tudde ko Suleymaan. Aji Sax ji nag sopp xale bi, ²⁵ ba xamle ko, Yonent Yàlla Natan jottli, daldi koy tudde Yedija (mu firi Soppey Aji Sax ji).

Daawuda nangu na péeyub Amoneen ña

²⁶ Ci biir loolu Yowab xareek waa Raba, péeyub Amoneen ña, ba nangu tatay buur ba. ²⁷ Ba loolu amee Yowab yebal ay ndaw ca Daawuda, ne ko: «Xare namaak waa Raba, nangu naa sax seen gox, ba ñuy jële am ndox. ²⁸ Kon booleel ndesu gàngoor gi, te nga gaw dëkk bi, ba nangu ko. Lu ko moy maay nangu dëkk bi, ñu tudde ma ko.» ²⁹ Daawuda nag dajale gàngoor gépp, daldi dem Raba, xareek ñoom, ba nangu ko. ³⁰ Ba mu ko defee mu jële mbaxanam buur ma ñu solal seen jëmму tuur ma ñuy wax Milkom.* Diisaayu mbaxana maa nga tollu ci fanweeri kiloy wurus, ab per bu gànjare tappe ca. Ñu tappal ko Daawuda ca kaw boppam. Alal ju baree bare la Daawuda nangoo ca dëkk ba. ³¹ Nit ña ca biir nag, mu génne leen, fëetale leen ay xeetukaay ak ngaskay weñ ak sémmiñi weñ, boole ci di leen moolloo. Noonu la def ak mboollem dëkki Amoneen ñi. Gannaaw loolu Daawuda ànd ak mbooloom xareem mépp, delu Yerusalem.

13

Amnon tooñ na Tamar

¹ Gannaaw loolu Absalom doomu Daawuda moo amoon jigéen bu rafet bu ñuy wax Tamar. Jeneen doomu Daawuda ju ñuy wax Amnon nag xemmee Tamar. ² Jaaxle daldi dikkal Amnon, ba mu mujj wopp ngir Tamar, ab jigéenam, ndax ab

janq la woon. Amnon daldi gis ne pexe mu muy jaare ba def Tamar lenn dina jafe. ³ Amnon nag amoon na xarit bu ñuy wax Yonadab doomu Simeya, miy doomu baayu Daawuda. Yonadab, ku ñawoona ñaw la. ⁴ Mu ne Amnon: «Waaw, yaw doomu buur nga, lu la tax ne yogg nii bés bu set? Doo ma ko wax?» Amnon ne ko: «Tamar, mi bokk ak sama doomu baay Absalom ndey ak baay, moom laa bëgg.» ⁵ Yonadab ne ko: «Dangay tédde ci sa la, wopp-wopplu, ba sa baay dikk, seetsi la, nga ne ko: «Na sama jigéen Tamar ñëw, may ma, ma lekk. Na ma toggal ci sama kanam, may gis, te mu sexual ma ci loxol boppam.»

⁶ Ba loolu amee Amnon tédde, wopp-wopplu, ba Buur ñëw di ko seet. Amnon ne ko: «Na sama jigéen Tamar ñëw defaral ma ñaari mburu yu ndaw, may gis, te sexual ma ci loxol boppam, ma lekk.» ⁷ Daawuda yónnee kër ga ca Tamar, ne ko mu dem kër càmmiñam Amnon, toggal ko lu mu lekk. ⁸ Tamar dem kër càmmiñam Amnon, fekk ko mu tédde. Mu sàkk sunguf, not ko, defal ko ko ay mburu yu ndaw, lakkal ko ko, muy gis. ⁹ Mu noppi, jël ndab la, taajal ko Amnon, Amon nag baña lekk. Mu daldi ne: «Na ñépp génn, wacc ma fi!» Ñépp génn, wacc ko fa. ¹⁰ Mu ne Tamar: «Indil ma lekk gi ci sama biir néeg, te sexual ma ci sa loxol bopp, ma lekk.» Tamar jël mburu ya mu lakk, dugalal càmmiñam Amnon ca biir néegam. ¹¹ Naka la Tamar dikk, taajal Amnon mburu ya, ngir mu lekk, mu ne ko katam, ne ko: «Kaay, tédde ak man, sama jigéen.» ¹² Mu ne ko: «Déedéet sama góor, bu ma néewal doole, ndax deesul defe nii ci Israyil! Bul def mukkk jooju jëf ju sew! ¹³ Fu ma jëm ak googu gacce, man? Te yaw it dootuloo jar dara ci digg Israyil. Tee ngaa wax ak Buur? Du ma la baña may.» ¹⁴ Amnon nag dégluwo ko, xanaa néewal ko doole, ba tédde ko.

¹⁵ Gannaaw loolu Amnon jéppi ko njéfo lu raw mbéeggeel ga mu ko bëggoon. Mu ne ko: «Jógal, dem!» ¹⁶ Tamar ne ko: «Déet, soo ma dàqee def ma lu yées li nga ma def ba noppi!» Taxul Amon nangu koo déglu. ¹⁷ Dafa woo bëkk-néegam, ne ko: «Génneel ma kii te tēj bunt beek caabi.» ¹⁸ Surga ba génne ko, tēj bunt baak caabi.

Tamar a nga sol mbubb mu yànj, ndax booba janqi buur bu séyagul noonu la daan soloo. ¹⁹ Ba loolu amee Tamar sottikoo dóom ca bopp ba, xotti mbubb mu yànj ma mu sol, yenu loxo ya, di yuuxuy dem. ²⁰ Càmmiñam Absalom gis ko, ne ko: «Xanaa Amnon sa càmmiñ see nekkoon ak yaw? Neel cell rekk, sama jigéen,

* 12:30 12.30 Am na mbind yu yàgg yu ñu indi ne seen buur lañu daan solal mbaxana mi.

sa càmmiñ la. Bul yenu lii mu la def.» Tamar nag ne cundum, tooge wéetaayam kër càmmiñam Absalom.

²¹ Ba Buur Daawuda déggee mbir moomu mépp, mer na lool. ²² Absalom nag jéppi Amnon, ba séqatul ak moom jenn wax, ndax na mu torxale jigéenam Tamar.

Absalom feyu na

²³ Ba ñu ca tegee ñaari ati lëmm, Absalom dem di watlu ay xaram* ca Baal Àccor, fa feggook diiwaanu Efrayim. Absalom daldi fay woo doomi buur yu góor yépp. ²⁴ Mu dem ca Buur ne ko: «Buur Sang bi, man de, damay watlu samay xar. Tee ngaa ànd ak say jawriñ rekk, nu dem ca?» ²⁵ Buur ne Absalom: «Déet, doom. Bunu dem nun ñépp. Day diis ci yaw.» Absalom soññ ko, soññ, Buur nanguwula dem. Teewul mu ñaanal ko. ²⁶ Absalom nag ne ko: «Bàyyil boog sama mag Amnon, nu ànd ak nun.» Mu ne ko: «Lu muy ànd ak yaw doye?» ²⁷ Absalom soññati ko, ba Buur yebal Amnon, mu ànd ak moom, ak yeneen doomi buur yu góor yépp.

²⁸ Ba mu ko defee Absalom sant ay nitam, ne leen: «Ma ne, bu Amnon naanee biiñ, ba xolam sedd, bu ma leen nee ngeen jam ko rekk, reyleen ko. Buleen ragal; man maa leen ko sant. Góor-góorluleen nag te ñeme.» ²⁹ Niti Absalom ña def ak Amnon la leen Absalom sant, daldi rey Amnon. Ba loolu amee yeneen doomi buur yépp daldi war seeni berkelle, daw.

³⁰ Naka lañu topp yoon wa, xibaar dikkal Daawuda, ne ko: «Buur, Absalom jam na sa doom yu góor yépp, ba kenn desu ca.» ³¹ Buur daldi xotti ay yéreem, daanu ca suuf ndax naqar, surgaam yépp taxaw ak seen yére yu xottiku.

³² Ci kaw loolu Yonadab doomu magu Daawuda Simeya, daldi wax ak baayam Daawuda. Mu ne: «Buur sang bi, bul defe ne sa doom yépp lañu rey de. Amnon rekk a dee, te mooy la Absalom dogu woon keroog ba Amnon torxalee rakkam Tamar. ³³ Kon kat Buur sang bi, bul def ci sa xel ne sa doom yépp a dee. Amnon rekk a dee.» ³⁴ Fekk na Absalom daw.

Ci kaw loolu ngóor sa aye jongru daldi séentu, gisul lu moy nit ñu bare ñuy dikk, awe yoonu Oronayim, bartaloo tund wa. ³⁵ Ba loolu amee Yonadab ne Buur: «Mu ngoog, Buur sang bi, sa doom yaay dikk. La ma waxoon a am.» ³⁶ Naka la daane kàddoom rekk, doomi Buur ya agsi, ne yikkét di jooy. Buur ak surgaam yépp it, di jooy jooy yu metti.

* **13:23** 13.23 Xari waa penku dañuy bare kawar gu ñuy wat ak a écc, di ci defar ag wéñ. Bu ñu daan watlu seeni xar, xew mu réy la woon.

³⁷ Fekk na Absalom daw, dem ca buur-rub Gesur, Talmay doomu Amiyut. Buur Daawuda nag di jooy doomam bés bu nekk. ³⁸ Ba Absalom dawee, dem Gesur, toog na fa ñetti at. ³⁹ Gannaaw gi Buur Daawuda toppatul Absalom, ndax mujj na miis deewug Amnon.

14

Absalom délsi na

¹ Ci biir loolu Yowab, mi Seruya di yaayam, xam ne xelu Buur Daawuda ngi ci Absalom. ² Yowab nag yónnee ca dëkk ba ñuy wax Tekowa, ñu jëleji fa jigéen ju rafet xel, indil ko ko. Yowab ne ko: «Dangay ñaawlu-ñaawlwulu. Solal yérey ñaawlu, te bul xeeñu. Melal daal ni jigéen ju jota ñaawlu lu yàgg, ngir ku mu deele. ³ Su ko defee nga àgg ca Buur, wax ko lii ma lay wax.» Yowab wax ko kàddu ya mu wara wax.

⁴ Jigéen ja dëkk Tekowa àgg ca Buur, daanu ci suuf, sujjóotal ko, ne ko: «Buur, wallu ma!» ⁵ Buur ne ko: «Lu la dal?» Mu ne ko: «Man de gore, dama dib jëtun; sama jëkkër a dee. ⁶ Sang bi, ñaari doom yu góor laa amoon. Dañu doon xeex ñoom ñaar ca àll ba te ku leen àtte nekku fa. Kenn ki dóor moroom mi, rey ko. ⁷ Bokk yépp daldi jóg dal ci sama kaw, sang bi. Ñu ne ma: “Jox nu sa doom ji rey doomu ndeyam, nu rey ko, feyul doomu ndeyam ji mu rey. Moo dese ndono li, kon danu koy sàkkal pexe, moom itam.” Dañoos nara fey wenn xal wi ma dese, ba xañ sama jëkkër aw tur, xañ ko aw askan ci kaw suuf.» ⁸ Buur ne ko: «Demal ñibbi. Man ci sama bopp maay joxe ndigal ci yaw.» ⁹ Jigéen ja ne ko: «Buur sang bi, àq ju ci am, yal na ma topp, maak sama waa kër baay, te nga bañ cee gàddu dara, yaak sa waa kër.» ¹⁰ Buur ne ko: «Ku la tudd, indil ma ko, dootu la sonal.» ¹¹ Mu ne ko: «Kon ngalla Buur, woo ci seede sa turu Yàlla Aji Sax ji, ngir kiy toppe bakkanu ka dee baña yokk yàqute, ba ñu rey sama doom ji.» Mu ne ko: «Giñ naa ko ci turu Aji Sax ji, Kiy Dund, kawar gu géna tuut du jóge ci sa boppu doom, wadd ci suuf.»

¹² Jigéen ja ne ko: «Buur, sang bi, ma ñeme laa waxati benn baat boog!» Mu ne ko: «Waxal.» ¹³ Mu ne: «Lu waral kon nga naral lu ni mel ñoñi Yàlla ñi? Buur, boo waxee loolu kay, mel na ni tooñ nga, ndax jëliwoo sa doom ja gàddaay. ¹⁴ Su dee dee moom, nun ñépp ay dee ni ndox di tuuroo ba deesu ko tanqati. Yàlla nag musalul kenn ci dee, waaye moo lal pexe ngir ki gàddaay du saxoo gàddaay bérab bu ko

sore. ¹⁵ Buur sang bi, maa ñew wax la kàddu yii, ndax mbooloo mee ma tiital. Ma noon nag sang bi, naa wax ak Buur, jombul mu defal ma li may ñaan. ¹⁶ Jombul Buur sang bi nangu maa xettli ci ki nuy fexee boole ak sama doom sànk, beddee nu ci céru Yàlla. ¹⁷ Léegi nag sang bi, yal na sa kàddu gii di sama noflaay. Ndax yaw Buur, sama sang, dangaa mel ni malaakam Yàlla, am ug dégg, di teqale liy yoon ak li dul yoon. Yal na sa Yàlla Aji Sax ji ànd ak yaw.»

¹⁸ Buur ne jigéen ja: «Léegi nag, bu ma nèbbu, tontu ma ci lii ma lay laaj.» Mu ne ko: «Waxal, Buur, sang bi.» ¹⁹ Mu ne ko: «Ndax du Yowab a nas pexe mii mépp, yaak moom?» Mu ne ko: «Buur, sang bi, ak sa barke, li nga wax rekk la, du leenen moos! Yowab, sa jawriñ bee ma ko sant. Moo ma waxloo lii lépp, sang bi. ²⁰ Jubbanti mbir mii de moo tax Yowab def lii. Waaye yaw sang bi, dangax di boroom xel mu rafet ni malaakam Yàlla. Xam nga mboolem lu xew ci réew mi.»

²¹ Gannaaw gi Buur ne Yowab: «Waaw, baax na, nangu naa. Demal jéli ngóor sa, Absalom.» ²² Yowab nag daanu ca suuf, sujjóot, ne Buur: «Buur, sang bi, yal nanga barkeel, sang bi. Xam naa ne may nga ma cér, gannaaw yaa ma may lii may dagaan.» ²³ Ba loolu amee Yowab dem Gesur, daldi délloosi Absalom Yerusalem. ²⁴ Buur Daawuda nag ne, na Absalom yem kèram. Mu ne bumu taxaw ci kanamam. Ba mu ko defee Absalom yem kèram, te taxawul fa kanam Buur Daawuda.

²⁵ Absalom nag amul woon góor gu siuwe ni moom ci Israyil gépp ndax góorayiw. La ko dale ca wewu tánkam ba ca digg bopp ba, du lenn lu ca sikk. ²⁶ At mu jotaan mu watu ndax njañ lu diis, te bu watoon, natt kawar ga ci doomi nattukaayu buur, mu jege ñaari kilook genn-wáll. ²⁷ Absalom amoon na ñetti doom yu góor ak doom ju jigéen. Tamar, doom ju jigéen ja, doon ndaw su taaru.

²⁸ Absalom nekk na Yerusalem ñaari ati lémm yu mu sañula taxaw fa kanam Buur baayam. ²⁹ Gannaaw gi Absalom yónnee, ñu wool ko Yowab ngir mu yónni ko ca Buur. Yowab lánk, ñewul. Mu yónneewaat, mu lánk. ³⁰ Absalom ne ay surgaam: «Gis ngeen, tootub Yowab mook sama tool a sésou, te peppum lors a nga ca. Demleen taal ko.» Surgay Absalom dem, taal tool ba. ³¹ Ba loolu amee Yowab waaxu ba ca kër Absalom, ne ko: «Ana lu waral say surga taal sama tool?» ³² Absalom ne Yowab: «Xam nga damaa yónnee ci yaw, ne la ñewal, ma yónni la ca Buur, nga

laajal ma ko lu ma taxa jóge Gesur. Li génoon ci man kay mooy ma toog foofa! Léegi daal damay gis Buur. Su fekkee ne damaa tooñ, na ma rey!»

³³ Yowab dem ca Buur, wax ko ko. Buur woolu Absalom. Mu dikk sukk, sujjóotal ko. Buur taf ko ca kawam.

15

Absalom lal na pexe

¹ Gannaaw ba loolu wéyee Absalom daa jël watiir aki fas ak juróom fukki nit ñuy daw di ko jiiu. ² Muy teela jóg nag, taxaw ca peggu yoon, wa jëm ca buntu dëkk ba. Saa yu nit dikkee, am lu muy tawat, di ko diis-si Buur, ngir mu àtte ko, Absalom woo ko, laaj ko ne ko: «Ci ban dëkk nga bokk?» Kooku ne ko ci giirug Israyil sngam la bokk. ³ Absalom ne ko: «Gisal, sa tawat yoon la, jaadu na. Waaye kenn ku bokk ci Buur du la déglu.» ⁴ Su ko defee Absalom da cay teg ne ko: «Maa bëggoon ñu fal ma njiit, may àtte ci réew mi! Kon képp ku am lu muy tawat mbaa muy layoo, ci man lay ñew, ma taxaw ci, ba jox ko li ko yoon may.» ⁵ Képp ku ñewaan it di sukkal Absalom, Absalom da koy yóotu, jàpp ci moom, foon ko. ⁶ Absalom jàppoo ko noonu ak mboolem bànni Israyil yay ñew ca buur ba, di sàkku yoon. Ni la fàbbee xoli bànni Israyil.

⁷ Ba ñu demee ba ñeenti at * jáll, Absalom ne Buur: «May ma, ma dem Ebron defali Aji Sax ji la ma ko xasaloon, ⁸ ndax kat, sang bi, ba ma nekkee Gesur ca Siri, damaa dige woon ne: «Su ma Aji Sax ji delloo, ba ma dellu Yerusalem, dinaa dem mággaali ko.» ⁹ Buur ne ko: «Demal ak jàmm.» Mu daldi dem Ebron.

¹⁰ Absalom nag yónnee ndéey. Ay ndaw yegge ko giiri Israyil gépp. Mu ne leen: «Bu ngeen di dégg liit gu jib rekk, ne leen: «Absalom falu na buur ca Ebron!» ¹¹ Ñaar téeméeri góor a jóge Yerusalem, Absalom woo woon leen, ñu ànd ak moom, yéguñu, tinuñu, xamuñu it dara ca mébétam. ¹² Ci biir loolu Absalom di def ay sarax, daldi yónnee, ñu jëli Ayitofel ma topp ca Daawuda, di ko xelal. Ayitofel bàyyikoo ca Gilo. Pexe ma nag mujj na réy, ña topp Absalom di yokku ba bare.

Daawudaa ngi wuta récc

¹³ Ba mu ko defee ñu yebal ndaw, mu dikk ne Daawuda: «Bànni Israyil de jàmbu nañu, ba far ak Absalom.» ¹⁴ Daawuda wax ak mboolem jawriñam ya mu nekkal ca Yerusalem, ne leen: «Nan daw! Lu ko moy kenn ci nun du récc Absalom. Nan dem léegi bala moo gaawtu, ba dab nu,

* 15:7 15.7 ñeenti at yi ñuy wax fi am na ñu ne man naa doon ñeent fukki at.

def nu musiba, leel waa dëkk bi ñawkay saamar.»¹⁵ Jawriñ ya ne Buur: «Buur, sang bi, lépp loo namm rekk, nu ngi nii taxaw.»¹⁶ Ba loolu amee Buur tegu ca yoon wa, waa kërman yépp topp ciy tãnkam. Bàyyiwul gannaaw lu moy fukki nekkaaleem, ñu wara topptoo kër ga.

¹⁷ Buur dem, mbooloo mépp topp ko, ba ca kër gu mujj ga, ñu taxaw. ¹⁸ Nitam ñépp a dox romb ko, ñook dag ya ko dar yépp, di waa Keret ñaak waa Pelet ña, ak mboolem waa Gaat ya tollu ci juróom benni téeméeri nit te toppe woon ko ca Gaat. Ña ngay dox jiitu ko.

¹⁹ Buur ne Itay waa Gaat ba: «Dangay ànd ak nun? Tee ngaa dellu Yerusalem, toog ca Buur Absalom? Gannaaw yaw doxandéem nga bu gaddaaye fa nga fekk baax. ²⁰ Bëkk-démb donj waa fi ñëw, tey ma di la bàyyi ngay ànd ak nun di wëreelu, te xawma sax fu ma jëm. Dellul, kay, ànd ak sa waa réew. Yal na la Aji Sax ji won ngor ak worma.»

²¹ Itay ne Buur: «Sang bi, giñ naa ci Aji Sax ji, Kiy Dund, nga fekke tey, fépp foo jëm yaw Buur, sama sang, dinaa fa ànd ak yaw, su may dund ak su may dee.»²² Daawuda ne Itay: «Kon doxal jiitu.» Itay jiitu, mook nitam ñépp ak mboolem njabootam.

²³ Mbooloom Daawuda mépp a ngay dem, waa réew ma mépp taxaw di yuux-ook a jooyoo. Buur ba jáll xuru Sedoron, mbooloo ma mépp ànd wuti màndij ma.

²⁴ Cadog ak Abiyatar, sarxalkat yaa nga fa woon, ñoom itam. Ñenn ca góori Leween ña bokkoon nañu ca, di gaddu gaal ga àlluway kóllérey Yalla ga dence. Ba ñu tegee gaal ga, Abiyatar di rendi ay sarax, ba mbooloo ma mépp génn dëkk ba. ²⁵ Buur ne Cadog: «Dellool gaalu Yalla gi ca dëkk ba. Bu ma Aji Sax ji baaxee, dina ma délloosi, ma gisaat gaal gi, gisaat fi mu dëkk. ²⁶ Waaye bu ma waxee ne ma bégul ci man, su boobaa ba tey maa ngi. Na def li ko soob ci man.»²⁷ Buur dellu wax ak Cadog sarxalkat ba, ne ko: «Dégg nga déy? Dellul ak jàmm ca dëkk ba, ànd ak Ayimaas, sa doom yu góor, ak Yonatan doomu Abiyatar. Yaak Abiyatar àndleen ak seen ñaari doom yu góor. ²⁸ Xoolal, dinaa leen xaar ca jállukaayu dex ba ca yoonu màndij ma, ba kerooq may dégg kaddu gu bawoo ci yaw.»²⁹ Ba loolu amee Cadog ak Abiyatar delloo gaalu Yalla ga Yerusalem, daldi fay toog.

³⁰ Daawudaa ngay wéy, di yéeg tundu Oliw ya, tey jooy. Ma nga muuru, def tãnki neen ndaxu naqar. Nit ña mu àndal ñépp muur seen bopp ñoom it, di yéeg tey jooyoo. ³¹ Fekk na ñu wax Daawuda ne ko

Ayitofel bokk na ca ña lëngook Absalom. Daawuda nag ñaan ne: «Yaw, Aji Sax ji, ngalla yàqal pexem Ayitofel.»

³² Ba Daawuda àggee ca collu tund wa, fa ñu daan jaamoo Yalla, fekku fa ku moy Usay, Arkeen ba. Mu gatandu ko. Ma ngay tiislu, mbubb ma xottiku, bopp ba pënd. ³³ Daawuda ne ko: «Soo àndee ak man, danga may diisal rekk. ³⁴ Dangay dellu kay ca dëkk ba, ne Absalom: «Buur, sab jaam laa. Sa jaamu baay laa woon, waaye léegi sab jaam laa.» Noonu nga may yàqale pexem Ayitofel. ³⁵ Te sax Cadog ak Abiyatar, sarxalkat ya, nga fay bokk nekkal. Loo dégg kër Buur, wax leen ko. ³⁶ Te sax seen ñaari doom yu góor a nga faak ñoom: Ayimaas doomu Cadog, ak Yonatan doomu Abiyatar. Yónnee ma leen, ñu yegge ma loo dégg.»³⁷ Ci kaw loolu Usay, nitu Daawuda, yoxoosu, duggsi Yerusalem, yemook Absalom itam di agsi.

16

Daawuda tase naak surgab Mefiboset

¹ Naka la Daawuda dox ba wees tuuti collu tund wa rekk, yem ca Ciba, surgab Mefiboset. Ma nga làng ak ñaari mbaam yu ñu laltaay, séf leen ñaar téeméeri mburu ak téeméeri danki reseñ ak téeméeri danki figg ak mbuusum biñi. ² Buur ne Ciba: «Lii nga indi nag?» Mu ne ko: «Buur, mbaam yi sa waa kër laa ko indil, ñu war; mburu meek meñneef mi, gaa ñi lekk; biñi bi, ñi loof ci màndij mi naan ko.»³ Mu ne ko: «Waaw, ana Mefiboset, sa sëtü sang ba?» Ciba ne Buur: «Moom de ma nga des Yerusalem, ndax defe na ne tey bànni Israyil delloo ko nguurug maamam.»⁴ Buur ne ko: «Kon boog, may naa la mboolem alalu Mefiboset.» Mu ne ko: «Jaajéf Buur sang bi, gis naa ni nga ma baaxee.»

Daawuda tase naak mbokkum Sóol

⁵ Gannaaw loolu Buur Daawuda dem bay jub dëkk ba ñuy wax Baxurim rekk, yemook jenn waay ju bokk ci waa kër Sóol. Ma nga tuddoon Simey doomu Gera. Naka la waa ja ne tëll, jubs, di tifaar Daawuda ay saaga,⁶ di ko sànni ay xeer, mooki jawriñam yépp. Faalewul kenn ci mbooloom Daawuda ma mépp ak jambaar ya ko dar yépp. ⁷ Simey a ngay saaga Daawuda naan: «Ayca, mott! Bóomkat bee, nit ku sew ki!»⁸ Aji Sax ji fey na la dereti waa kër Sóol ja nga tuur yépp, ba noppi falu, wuutu ko. Aji Sax ji teg na nguur gi ci sa loxol doom Absalom. Yaa ngi nii torox ndax bóomkat nga.»

⁹ Ci kaw loolu Abisay, waa ja Seruya di yaayam, ne Daawuda: «Buur, sang bi, luy ndeyi xaj bu dee bii di la saaga? Bàyyil

rek ma jäll, teqale boppam ak baatam!»
¹⁰ Buur ne ko: «Yeen doomi Seruya yi, lu ciy seen yoon? Sañ na maa saaga. Su ko Aji Sax ji santee mu saaga ma, ana ku ko saña laaj lu tax?»
¹¹ Ba loolu amee Daawuda wax ak Abisay ak jawriñam yépp, ne leen: «Du gis ngeen sama doom ji ma jur ci sama geño, muy wuta faat sama bakkan? Kon kay kii bokk ci giirug Beñamin matula wax. Bàyyleen ko, mu saaga ma, ndax Aji Sax jee ko ko sant.
¹² Jombul Aji Sax ji gis sama naqar, ba feye ma aw yiw saagay kii tey.»

¹³ Ba mu ko defee Daawuda ànd aki nitam topp yoon wa, Simey làng ak moom ca mbartalun tund wa, di dem, di ko saagaak a sànni xeer, di ko sèllax suuf.
¹⁴ Gannaaw gi Buur ak mbooloo ma mu àndal mépp agsi, sonn lool. Ñu daldi nopplu foofa.

Absalom dugg na Yerusalem

¹⁵ Fekk na Absalom agsi Yerusalem, ànd ak mboolem niti Israyil ñi far ak moom. Ayitofel a nga ànd ak moom.
¹⁶ Usay, Arkeen ba doon nitu Daawuda, dem ca moom, ne ko: «Yal na Buur gudd fan waay, yal na Buur gudd fan!»
¹⁷ Absalom ne Usay: «Loolooy sa kóllère ak sab xarit a? Lu la teree ànd ak sab xarit?»
¹⁸ Usay ne Absalom: «Déédéet, ki Aji Sax ji tànn, mbooloo mii tànn ko, ñook mboolem bànni Israyil, kookoo may moom, te ci moom laay toog.
¹⁹ Te sax ku may topp ku dul yaw, doomu buur? Ni ma toppe woon sa baay rekk laa lay toppe tey.»

²⁰ Ci kaw loolu Absalom ne Ayitofel: «Xelal-leen nu boog, lu nu wara def?»
²¹ Ayitofel ne ko: «Demal dèkkoo sa nekkaaley baay, yi mu wacce kèram, ñu di ko tooptoo. Su ko defee bànni Israyil yépp dinañu xam ne def nga lu tax sa baay sib la. Dina tax say farandoo gèna am fit.»
²² Ba loolu amee ñu sampal Absalom xayma ca kaw taaxum kër Buur, Absalom di dèkkoo nekkaaley baayam, Israyil gépp seede ko.

²³ Booba lu Ayitofel masaana digle day mel ni kàddu gu bawoo ca Yàlla. Daawudaak Absalom, ñoom ñaar ñépp noonu lañu fonke woon ndigalu Ayitofel.

17

Usay nax na Absalom

¹ Gannaaw loolu Ayitofel ne Absalom: «Ngalla may ma, ma tànn fukki junniy xarekat ak ñaar (12 000) te daqi Daawuda ci guddi gi.
² Bu may dal ci kawam, da koy fekk mu sonn, jaq. Su ko defee ma xoqtal ko, ba mbooloo mi mu àndal mépp daw, ma rey ko, moom kenn.
³ Dinaa la délloosil mbooloo mépp. Bu ki ngay fexeel deeyee rekk, mbooloo mi mépp délsi, jàmm ne

ñoyy.»
⁴ Pexe moomu nag jub ci Absalom, mook magi Israyil ñépp.
⁵ Teewul Absalom ne: «Wooleen Usay, Arkeen bi itam, nu déglu lu mu ciy wax.»
⁶ Usay dikk ca Absalom, mu wax ko la Ayitofel digle, ne ko: «Ndax loolu Ayitofel wax lanu wara def am déet? Wax nu lu ciy sa xalaat, yaw.»

⁷ Usay ne Absalom: «Li Ayitofel digle bii yoon de baaxul.
⁸ Xam nga sa baay ak ay nitam. Ay xarekat yu jàmbaare lañu te wex ni gaynde gu ñu nangu doom ya, te it, sa baay ku xam xeex la, du fanaan ak xarekat ya.
⁹ Xam naa ne ma nga làqu ci xuntim xeer, mbaa bérab rekk. Te bu aw nit jèkkee daanu ci seen biir yeen, ku ko dégg dina ne: “Jéll bu réy am na ca mbooloom Absalom.”
¹⁰ Su boobaa, ku ñeme, ba dègèru fit ni gaynde sax, dinga tiit lool, ba ne yàcc, ngir Israyil gépp xam nañu ne sa baay ñeyi xare la, te it ñi ànd ak moom jàmbaar lañu.
¹¹ Kon sama xalaat mooy nga boole ñi ànd ak yaw ba ñu daj, muy Israyil gépp, dale ko diiwaanu Dan ca bëj-gànnar ba ca Beerseba ca bëj-saalum. Muy mbooloo mu bare, tollu ni suufas géej; te yaw ci sa bopp, nga jiite leen ci xare bi.
¹² Nu song ko nag fu nu ko mana fekk, dal ci kawam, ni ab lay ci kaw suuf. Deesu ci báyji kenn muy dund, du moom, du kenn ciy nitam.
¹³ Su làqoo ci ab dèkk bu mag, na Israyil gépp yóbbaaale ay buum ca tata ja, nu laaw ko, wat ba ca xur wa, ba kenn dootu gis aw doj wa ca bokkoon.»
¹⁴ Absalom ak waa Israyil gépp daldi ne: «Ndigalal Usay, Arkeen bii kat, moo gën ndigalu Ayitofel.»
 Booba Aji Sax jee nara indil Absalom musiiba. Moo tax mu neenal pexem Ayitofel mu jub ma mu laloon.

¹⁵ Ci kaw loolu Usay wax ak Cadog ak Abiyatar sarxalkat ya, nettali leen la Ayitofel digal Absalom ak magi Israyil ña, ak la mu leen digal, moom Usay.
¹⁶ Mu ne leen: «Gaawleen yóonnee léegi ca Buur Daawuda te wax ko ne ko bumu fanaan fa ñuy jàlle dex ga, jëm ca màndinj ma. Na jàlla jàll dex ga, lu ko moy dees na ko bóom, mook mbooloo ma mu àndal mépp.»

¹⁷ Ma nga fekk Yonatan ak Ayimaas ca En Rogel. Manuñu woona dugg ca biir dèkk ba, ndax ragal ñu gis leen. Ab jaam bu jigéen nag di dem ca Yonatan ak Ayimaas, di leen wax la xew, ngir ñu dem ca Buur Daawuda, yegge ko ko.
¹⁸ Teewul ab xale bu góor gis leen, wax ko Absalom. Ba mu ko defee ñu ànd ñoom ñaar, gaaw dem ca kër jenn waay ju dèkk Baxurim. Waa ja am ab teen ca èttam, ñu dugg ca biir.
¹⁹ Ci kaw loolu soxna sa jël basaj, lal ko ca pindu teen ba, ba noppi wasaare pepp ca

kaw, ba kenn du ca foog dara. ²⁰ Jawriñi Absalom dikk ca kër ga, fekk fa ndaw sa, ne ko: «Ana Ayimaas ak Yonatan?» Ndaw sa ne leen: «Jéggi nañu dex gi.» Ñu seet, gisuñu kenn, daldi dellu Yerusalem.

²¹ Gannaaw ba ñu demee, Ayimaas ak Yonatan yéeg, génn teen ba, dem nag àrtuji Buur Daawuda. Ñu ne ko Ayitofel digle na nàngam ak nàngam ci moom, neeti ko: «Gaawleen jàll dex gi léegi.» ²² Ca saa sa Daawudaaki nitam ñépp jàll dexu Yurdan ga. Ba jant bay fenk, kenn sax desul ku jàllul dex ga.

²³ Ci biir loolu Ayitofel gis ne déggeesul ndigalam, mu takk mbaamam, ñibbi ca dëkk ba mu fekk baax. Mu daldi topptoo mbiri kërám ba mu jekk, ba noppi wékk boppam. Mu dee, ñu denc ko ca sègi baayam.

²⁴ Ba mu ko defee Daawuda àgg Maanayim, fekk Absalom di jàll dexu Yurdan, ànd ak xarekati Israyil yépp. ²⁵ Amasa nag la Absalom faloon, mu jiite mbooloom xare ma, wuutu Yowab. Amasa moo doon doomu goor gu ñuy wax Yitra, di bànni Israyil bu jèloon Abigayil, mi Nayas di baayam. Abigayil ak Seruya, yaayu Yowab, ñoo bokk ndey. ²⁶ Bànni Israyil daldi ànd ak Absalom dal ca di-iwaanu Galàdd. ²⁷ Ba Daawuda àggee Maanayim, Sobi doomu Nayas mu Raba, ga ca dëkkub Amoneen ña, moo ko teertu, mook Makir doomu Amiyel ma dëkk Lodebar; ak Barsilay waa Galàdd ba dëkk Rogelim. ²⁸ Ñu daldi indi ay laltu aki ndab aki njaq, ak peppum bele ak peppum lors ak sunguf ak mbool ak xeeti ñebbe, ²⁹ ak lem akum soow, aki gàtt, ak formaasu nag ngir Daawudaak mbooloom lekk. Ndaxte booba dañu ne: «Mbooloo mi de, xiif ak mar lañu boole, ak coonob màndinj ma.»

18

Daawuda xare naak Absalom

¹ Ba loolu weesee Daawuda xayma na mbooloo ma mu àndal, fal ca seen biir njiiti kuréli junniy xarekat, kurél gu ci nekk ak njiiti kuréli téeméer ya ko sos. ² Daawuda def mbooloo ma ñetti xaaj, yebal leen. Benn xaaju mbooloo ma, Yowab jiite leen; beneen xaaj ba, Abisay doomu baayu Yowab, mi Seruya di yaayam, jiite leen; xaaj ba ca des Itay waa Gaat ba jiite leen. Buur ne mbooloom xare ma: «Damay ànd ak yeen, man itam.» ³ Teewul mbooloo ma ne ko: «Déédéet, yaw doo ànd ak nun! Ndax nun su ñu nu dàqee, du am boobu solo. Bu sunu genn-wàll deeyee it, du am benn solo. Waaye sa jenn jëmm jii mooy fukki junni ci nun. Kon nag desal nu ci dëkk bi, di nu fi yónnee

wall, moo gën.» ⁴ Buur ne leen: «Baax na, kon ma def noonu.» Ba loolu amee Buur taxaw ca bunt dëkk ba, xarekat ya def ay kuréli téeméer ak kuréli junni, daldi génn dem. ⁵ Buur nag joor Yowab ak Abisay ak Itay, ne leen: «Seetleen ci man te def ndànk ak ngóor si Absalom.» Xarekat yépp a dégg kàddu googu Buur dénk njiit ya ca mbirum Absalom.

⁶ Mbooloo maa nga jëm ca toolub xare ba, di xarejeek Israyil. Xare baa nga ame ca gott ba ñuy wax Efrayim, ⁷ mbooloom Israyil nag daanu foofa ca kanam xarekati Daawuda. Bésub keroog ñu baree dee: ñaar fukki junnee (20 000) daanu. ⁸ Xare ba daa law foofa ba daj diiwaan ba bépp; te ña dee ca gott ba bésub keroog ñoo épp ña saamar rey.

⁹ Ci biir loolu Absalom ne pemm taseek xarekati Daawuda. Ma nga war berkelle. Berkelle ba fëx wuti garab gu réy, te bàngaas ya fatt. Boppu Absalom tance ca garab ga, berkelle ba mu war topp xélam, mu des fa di sandaamtalu. ¹⁰ Ba mu ko defee jenn waay gis ko, dem, wax ko Yowab, ne ko: «Ki ma gis de, Absalom a, ma nga wékku ci genn garab.» ¹¹ Yowab ne ko: «Nga ne? Gis nga ko te jamoo ko foofa, mu daanu? Kon de doon naa la jox fukki dogi xaalis, takkal la ngañayal xarekat tegal la ca.» ¹² Waa ja ne Yowab: «Ku tegoon ci sama loxo junniy dogi xaalis sax, duma xàcci sama loxo jëm ci doomu buur. Noo déggal sunu bopp Buur sant la, yaak Abisay ak Itay, ne leen: “Na ma ku nekk ci yeen dimbali, te def ndànk ak ngóor si Absalom.” ¹³ Su ma jaayoon sama bakkán, ba def njekkar it, amul dara lu ump Buur, te kon it yaw danga ciy raxas say loxo.» ¹⁴ Yowab ne ko: «Duma la déglu sax, nga di ma yàggal!»

Ci kaw loolu Yowab jël ñetti bant yu ñaw, jam ko Absalom ci xol, fekk ko muy dund ba tey ca xolu garab ga mu tancu. ¹⁵ La ca tegu fukki nit ña doon gàddul Yowab ngànaayam, dikk wër Absalom, jam ko, mu dee. ¹⁶ Yowab wal liit ga, dakkal xare ba, xarekat ya noppee dàq waa Israyil. ¹⁷ Ñu jël néewu Absalom, sànni ci kàmbu gu réy ca àll ba, daldi jóor ca kawam jalu xeer bu maga mag. Bànni Israyil yépp nag daw ñibbi seeni kër.

¹⁸ Absalom moo samplu woon cig dundam, doj wu mag wa ca xuru Buur, ndax da noon: «Bàyyiwuma doom ju goor ju ñu may fàttlikoo.» Moo tax mu tudde doj wa boppam, te doju Absalom lañu koy wooye ba tey jii.

Lu jëm ci tàggeb Absalom

¹⁹ Ba loolu wéyee Ayimaas doomu Cadog ne: «May ma rekk ma daw yégali Buur

xibaar bii, ne ko Aji Sax ji musal na ko ciy noonam.»²⁰ Yowab ne ko: «Du yaw waay yégle xibaar tey jii. Man ngaa yégle xibaar beneen yoon, waaye du yaay yégleji tey, ndax doomu buur a dee.»²¹ Yowab nag wax ab waa Kuus, ne ko: «Demal wax Buur li xew.» Waa Kuus ba sujjóotal Yowab, daldi dem.²² Ayimaas doomu Cadog dellu ne Yowab: «Lu ci mana xew, may ma rekk, man itam ma daw topp ci gannaaw waa Kuus bi.» Yowab ne ko: «Doom, lu la taxa bëgga dem, lii du xibaar bu ko jar.»²³ Mu ne ko: «Lu ci mana am, bëgg namaa dem.» Yowab ne ko: «Demal!» Ayimaas daw, jaare ca joor ga, ba jëkk waa Kuus ba.

²⁴ Daawudaa nga toog ca diggante buntu dëkk, ba féete biir ak bunt ba féete biti. Fekk na wattukat ba yéeg ca kaw taax ma tiim buntu dëkk ba, ca kaw tata ja. Naka la dawal bëtam, séentu, gis jenn waay juy daw moom kenn, di ñëw.²⁵ Wattukat ba àddu ca kaw, yéegal ko Buur. Buur ne: «Gannaaw kenn nit la de, xibaaru jàmm lay indi.» Waa ja di gëna jegesi,²⁶ wattukat ba gis jeneen waay juy daw di ñëw, mu wax ko farbay bunt ba, ne ko: «Xoolal, keneen a ngi, di ñëw, moom kenn.» Buur ne: «Kooku it de xibaaru jàmm lay indi.»²⁷ Wattukat ba ne: «Ni ma gise ki jiitu de, dawinu Ayimaas doomu Cadog la ma jox.» Buur ne: «Kooku ku baax la, jàmm rekk lay waxsi.»²⁸ Ci kaw loolu Ayimaas àddu ca kaw, ne Buur: «Jàmm la!» daldi sujjóotal Buur, dëpp jëem fa suuf, ne ko: «Buur, sang bi, cant ñeel na sa Yalla Aji Sax ji, moom mi teg ci sa loxo ña la doon fexeel.»²⁹ Buur ne ko: «Ngóor sa Absalom nag, mbaa jàmm la am?» Ayimaas ne ko: «Sang bi, ba Yowab di yónni sa bëkk-néeg ak man, booba gis naa kër-kër ju réy, waaye xawma lu mu doon.»³⁰ Buur ne: «Randul, taxawe nii.» Ayimaas randu, taxaw ca wet ga.

³¹ Ci kaw loolu waa Kuus ba ne jimeet. Mu ne: «Buur, sang bi, déglul, xibaaru jàmm a ngi. Aji Sax ji musal na la bésub tey ci ña la doon fexeel ñëpp.»³² Buur ne waa Kuus ba: «Ngóor si Absalom mbaa jàmm la am?» Waa Kuus ba ne ko: «Buur sama sang, say noon ak mboolem ñi lay fexeel, yal nañu bokk ak ngóor soosu demin.»

19

¹ Naka la Buur dégg loolu, naqar wu réy jàpp ko. Mu dem ca biir néeg ba, ca taax ma tiim bunt dëkk ba, di jooy. Ma ngay dem te naan: «Wóoy Absalom sama doom ja! Éey sama doom ja, céy Absalom sama doom ja! Éey waay su ma sañoon dee sax

wuutu la, Absalom, doom. Éey waay sama doom ja!»

Yowab sikk na Daawuda

² Ci biir loolu ñu wax Yowab ne ko: «Buur Daawuda kat ma ngay jooy, di mititlu deewu doomam Absalom.»³ Moo tax ndam la bésub keroog walbatiku diw tiis ca gàngooru xarekat ya yépp, ndax lañu dégg ne Buur a ngay mititlu deewu doomam.⁴ Xarekat ya nag di yoxoosuy dugg bésub keroog ca Maanayim, mel ni nit ñu dawe xare, di yoxoosuy ñibbsi, ndax gacce.⁵ Buur a nga dar kanamam, di jooy, baat bay jib ca kaw. Ma nga naan: «Wóoy Absalom, sama doom ja! Céy waay Absalom, sama doom ja! Éey waay sama doom ja!»

⁶ Ba loolu amee Yowab fekk Buur ca kër ga, ne ko: «Bésub tey jii torxal nga mboolem ñi la topp, ba musal sa bakkani bésub tey, musal sa bakkani doom, góor ak jigéen ak sa bakkani soxnaak say nekkaale.⁷ Ndax yaw dangaa bëgg ñi la bañ, bañ ñi la bëgg. Biral nga tey ne kilifay xarekat yeek xarekat yépp, tekkiwuñu dara ci yaw. Bir na ma ne bu Absalom doon dund tey te nun ñëpp nu bokk dee, moo lay gënal.⁸ Léegi nag, jógal kat génn wax ak say nit, ruccanti leen. Ndax giñ naa ci Aji Sax ji, soo génnul, du kenn ku fiy bokk fanaan ak yaw tey. Te loolu de musiba lay doon ci yaw, mu gëna réy musiba mu la masa dal, ba ngay ndaw ba tey.»⁹ Buur daldi jóg, génn, toog ca buntu dëkk ba. Ñu wax mbooloo ma mépp ne leen: «Gisleen Buur a ngee toog ca bunt ba.» Mbooloo mépp dikk taxaw ci wetam.

Fekk na bànni Israyil ya faroon ak Absalom daw ñibbi ca seeni kër.

Daawudaa ngi dellu Yerusalem

¹⁰ Ba loolu amee giiri bànni Israyil yépp diisoo ci seen biir. Ña nga naan: «Buur Daawudaa nu xettli woon ci sunuy noon, rawatina Filisteen ñi. Bu dawee génn réew mi, Absalom a ko waral.¹¹ Gannaaw Absalom ma nu faloon mu jiite nu, dee na ca xare ba, lu nu tee wax lu jëm ci délloosi Buur Daawuda?»

¹² Ci kaw loolu Buur Daawuda ci wàllu boppam yónnee ca Cadog ak Abiyatar, sarxalkat ya, ne leen: «Waxleen ak magi Yuda, te laaj leen, ne leen: «Xanaa ñëpp duñu jéem lu délloosi Buur këram, yeen ngeen des gannaaw, te moom ci boppam dégg na kaddug bànni Israyil gépp.¹³ Yeen de yeenay bokki buur lenqe, ngeen bokk ak moom jenn deret; kon xanaa ñëpp duñu délloosi Buur, ngeen des gannaaw?»¹⁴ Te ngeen waxal ma Amasa ne ko: «Buur nee, xanaa doo mbokkam lenqe,

di deretam? Nee yal na ko Yàlla teg mbugal mu géna tar ndegam du la fal, nga jiite mbooloom xare mi ba fàww, wuutu Yowab.»¹⁵ Kàddu yooyu nag waññi xolu Yudeen ñépp, ñu bokk genn kàddu, daldi yónnee ca Buur ne ko mu délsi, mook nitam ñépp.

Simey tuubal na Daawuda

¹⁶ Gannaaw loolu Buur Daawuda walbatiku, dikk ba ágg dexu Yurdan, Yudeen ña dikk, teertusi ko ca Gilgal, ngir jállale ko dexu Yurdan. ¹⁷ Simey doomu Geraa ngay gaawtu. Mooy waa Baxurim ba askanoo ci Beñamin. Ma nga ànd ak Yudeen ña, di teertu Buur Daawuda. ¹⁸ Junniy nit ñu askanoo ci Beñamin a ko topp, ñook Ciba, surgab waa kër Sóol, ak fukki doomam yu góor ak juróom, ak ñaar fukki surgaam. Nu riirandoo ca dex ga, di gatandu Buur Daawuda. ¹⁹ Ci kaw loolu ñu jáll dex ga, ngir jàlle waa kër Buur, defal ko coobareem. Ba Buur Daawuda di waaja jáll dex ga, Simey doomu Gera da ne gurub sukk, sujjóotal ko, ²⁰ ne ko: «Buur, sang bi, ngalla bu ma topp lu ñaaw li ma def. Bu ma jàppal mer ndax li ma la tooñ, keroog ba ngay jóge Yerusaleem. Ngalla bu ma ko dencal ci sa xol, ²¹ ndaxte xam naa ne bàkkaar naa, sang bi. Waaye xoolal tey, Buur, sang bi, waa giirug Yuusufa gépp, maa ci jékka ñéw gatandusi la.»

²² Abisay ma yaayam di Seruya ne Buur: «Simey mii, lu muy wax nii? Kii deesu ko rey? Du moo la doon saaga, yaw mi Aji Sax ji fal?» ²³ Daawuda ne Abisay: «Yeen, doomi Seruya, lu ciy seen yoon, ba ngeen di ma ñàññ nii tey? Xam naa xéll tey ne maay buurub Israyil. Kon ana ku wara rey kenn tey ci Israyil?» ²⁴ Buur nag wax Simey ne ko deesu ko rey, daldi ko koy giñal.

Daawuda baaxe na Mefiboset

²⁵ Ci kaw loolu Mefiboset, sëtub Sóol, dikk moom it, di teertusi Buur. Diggante bés ba Buur gáddaayee nag, ba bésub keroog ba mu délseek jàmm ca Yerusaleem, Mefiboset jànguwul, watul sikkimam, te fóotul ay yéereem. ²⁶ Naka la Mefiboset dikk ca Buur, di ko teertu, Buur ne ko: «Mefiboset, lu la tee woona ànd ak man?» ²⁷ Mu ne ko: «Éy Buur, sang bi, sama surga Ciba moo ma nax de, sang bi, ndax man, dama noon damay takklu sama mbaam war, gannaaw ab lafañ laa. Su ko defee ma ànd ak yaw. Yaay sama sang. ²⁸ Waaye sama surgaa yaq sama der ci yaw. Yaw nag Buur, sang bi, ndokk ba nga matee ba mel ni malaakam Yàlla. Kon sang bi, defal li la soob. ²⁹ Ndax kat sang bi, du kenn ci sama askanu maam ku yelloowul lu moy nga rey ko. Terewul danga maa xajal, sang

bi, boole ma ci ñiy bokk ak yaw ndab. Kon Buur, ana lu ma la sañatee ñaan?» ³⁰ Buur ne ko: «Ana looy waxati lii lépp? Dogal naa yaak Ciba, ngeen séddoo suuf si.» ³¹ Mu ne Buur: «Amul solo, Buur, sang bi; na jël lépp sax, ndegam yaw ñiibbsi ngaak jàmm sa biir kër kay!»

Daawuda tàggtoo na ak Barsilay

³² Fekk na Barsilay ma bokk ca Galádd jóge woon Rogelim, ngir gunge Buur Daawuda, ba mu jáll dexu Yurdan, bala moo tàggtoo ak moom ca wàllaa dex. ³³ Barsilay mag la woon. Amoon na juróom ñett fukki at. Moom moo daan topptoo Buur diir ba mu nekk Maanayim, ndax nit ku bare alal la woon. ³⁴ Buur ne Barsilay: «Jállal nu dem, nga toog ci man, ma yor la ca Yerusaleem.» ³⁵ Mu ne Buur: «Moo, man, Buur, lu ma deseeti ciy fan, bay ànd ak yaw dem Yerusaleem! ³⁶ Maa ngi ci juróom ñett fukki at tey, te xamatuma lu neex ak lu naqari. Sang bi, man xamatuma sax lu ma lekk di saf mbaa naan, te baatu woykat sax safatu ma dara, muy góor, di jigéen. Kon ana lu ma lay diisalati doye? ³⁷ Naa jáll dex gi, gunge la tuuti rekk, Buur. Te sax gisuma lu jar nga di ma defal boobu yool! ³⁸ Bàyyil rekk sang bi, ma ñiibbi, ndax ma deeyi sama dèkk, ñu denc ma ca sama wetu ndey ak sama baay. Waaye ma ne, Buur, sang bi, Kimyam a ngoogu di sa surga. Na ànd ak yaw jáll. Defal ko lu la soob.» ³⁹ Buur ne ko: «Baax na, na Kimyam ànd ak man, nu jáll. Dinaa ko defal li nga bègg, te loo bègg ma defal la ko rekk, dinaa la ko defal.»

⁴⁰ Noonu la mbooloo ma mépp jàlle dexu Yurdan, Buur it jáll. Buur nag taf Barsilay ca kawam, ñaanal ko, Barsilay doora ñiibbi kèram. ⁴¹ Ba mu ko defee Buur jáll ba Gilgal, Kimyam ànd ak moom. Mbooloom Yuda gépp ak ñenn ci mbooloom Israyil itam ànd ak Buur dem.

⁴² Naka la loolu am rekk waa Israyil yépp dikk ca Buur, ne ko: «Buur Daawuda, ana lu waral sunu bokki Yuda yi aakimoo la, jàlle la dexu Yurdan, yaak sa waa kër ak sa nit ñi nga àndal ñépp?» ⁴³ Waa giirug Yuda gépp nag mànkoo ne waa Israyil: «Li ko waral mooy Buur da di sunu mbokk lenqe. Ana lu ngeen di mer ci loolu? Danoo lekkal Buur dara mbaa nu sàkkal sunu hopp lenn ci alalam?» ⁴⁴ Waa Israyil ne waa Yuda: «Noo leen èpple ci Buur fukki yoon, noo leen èpp sañ-sañ fopp ci Daawuda. Lu ngeen nuy xeebe? Xanaa du noo jékka wax lu jëm ci délloosi sunu buur?» Ci kaw loolu waa Yuda dellu tontu waa Israyil kàddu yu géñatee ñagas.

20

Seba jàmbu na

¹ Booba nit ku bon a nga woon ca mbooloo ma, ku ñuy wax Seba, di doomu Bikkri, ma bokk ca giirug Beñamin. Seba wal liit ga, daldi yéene ne:

«Sunu yoon nekkul ci Daawuda doomu Yese jii,

du benn cér bu nu am ci moom.

Yeen waa Israyil, ku nekk ca sa xayma!»

² Ba mu ko defee waa Israyil yépp jàmbu Daawuda, topp Seba doomu Bikkri. Teewul waa giirug Yuda ñoom taq ci seen buur, toppe ko dexu Yurdan ba Yerusaleem.

³ Buur Daawuda nag ñibbi kërám ga ca Yerusaleem. Teewul fukki nekkaaleem ña mu wacoon ñuy topptoo kër ga, da leena boole denc ci genn kër, ñu di leen fa wattu. Mu yor leen fa, te dëkkootu leen. Dees leen faa denc ba keroog ñuy dee, ñu mel ni ay jëtun.

⁴ Gannaaw loolu Buur ne Amasa, ma jiite mbooloom xareem: «Danga may wool góori Yuda, ñu dajesi ci man fii ak ñetti fan, te yaw itam nga dikk taxaw fii.»

⁵ Amasa dem wooyi Yudeen ña, yàgg ca ba wees diir ba ko Buur àppaloon. ⁶ Daawuda nag ne Abisay: «Seba doomu Bikkri jii de dina nu lor lu raw la nu Absalom lóroon. Àndal ak ñenn ci samay dag te dàqi ko, lu ko moy dina gis fu mu làqu ci ay dëkk yu ñu wëràle ay tata, ba raw nu.» ⁷ Ba loolu amee niti Yowab ña ànd ak waa Keret ñaak waa Pelet ñay dar Daawuda, ak xarekat yépp. Ñu jóge Yerusaleem dàqi Seba doomu Bikkri. ⁸ Dem nañu ba tollu ca doj wu mag wa ca Gabawon, doora gis Amasa, muy dox di dajee k ñoom. Yowab a nga sol yérey xareem, laxasaay ga ca ndigg la ànd ak saamar bu roofe ca mbaram. Naka la séqi jéego jëm kanam, saamar ba rot. ⁹ Yowab ne Amasa: «Mbokk mi, mbaa jàmm nga am?» Yowab jàpp sikkimu Amasa ca loxol ndijooram, mel ni ku koy foon. ¹⁰ Amasa foogul dara ci saamar ba ca loxol càmmoñu Yowab. Yowab bojj ko ko ci biir, wàlli ay butitam ci suuf. Tóllantiwul sax, Amasa dee.

Ci kaw loolu Yowab ànd ak rakkam Abisay, dàqi Seba doomu Bikkri. ¹¹ Ci biir loolu kenn ci niti Yowab ña taxaw fa Amasa tédd, daldi ne: «Ku sopp Yowab ak képp ku ànd ak Daawuda na topp Yowab.» ¹² Néewub Amasaa nga ca digg yoon wa, sangoo deretam. Waa ja gis ne képp ku dox ba tollook moom, taxaw nga fa. Naka la waa ja gis ñépp di taxaw foofa, mu diri néew ba, jële ko ca yoon wa, ba ca àll ba. Mu sànni malaan ca kawam. ¹³ Ba ñu fa jëlee néewu Amasa, ñépp ànd ak Yowab toppi Seba doomu Bikkri.

¹⁴ Yowab jaar ca giiri Israyil gépp ba ca Abel Bet Maaka. Waa Ber gépp dajee topp ko. ¹⁵ Ñu dikk gaw dëkk ba ñuy wax Abel Bet Maaka, fa Seba làqu. Ci kaw loolu ñu jal suuf fa sès ca buntu dëkk ba, mu kawe ba tollook tatay dëkk ba. La ca tegu xarekati Yowab yépp di jéema màbb tata, ja wër dëkk ba.

¹⁶ Ci biir loolu senn as ndaw su am xel ca dëkk ba, woote ne leen: «Dama ne, dégluleen! Neleen Yowab mu ñew, ma wax ko.» ¹⁷ Yowab dem ba ca moom, ndaw sa ne ko: «Yaa di Yowab?» Mu ne ko «Waaw.» Mu ne ko «Sang bi, dama ne...» Mu ne ko: «Áa.» ¹⁸ Mu ne ko: «Daa nañu wax bu jëkk naan: “Lu waay di laaj, na dem Abel, tont laa nga fa.” Su ko defee, wax ja jeex. ¹⁹ Nun danu di niti jàmm ñu am kóllère ci digg Israyil. Yaw nag yaa ngi wuta faagaagal dëkk bu mag bu jaboote ñi ko wër ñépp ci digg Israyil. Ana lu waral nga namma tas dëkk bu Aji Sax ji séddoo?» ²⁰ Yowab ne ko «Yàlla tere, tereeti ko, may tas ak a faagaagal kenn! ²¹ Du loolu! Jenn waay ju ñuy wax Seba doomu Bikkri te bokk ca waa tundi Efrayim, moo jógal Buur Daawuda. Joxleen ma ko moom donj, ma bàyyi dëkk bi te dem.» Ndaw sa ne Yowab: «Xoolal, boppam lañuy tollu ci kaw taax mi, sànni la ko.» ²² Ndaw sa nag dem ca mbooloo ma mépp, xelal leen pexeem mu jub moomu. Ñu dog boppu Seba doomu Bikkri, sànni ko Yowab. Yowab wal liit ga, nitam ña tasaaroo, bàyyi dëkk ba, ku nekk ñibbi kërám. Yowab daldi dellu Yerusaleem ca Buur.

Lu jëm ci jawriñi Daawuda

²³ Yowab moo jiite woon mbooloom xarem Israyil gépp; Benaya doomu Yoyada yilif dag ya dar Buur, te di waa Keret ak waa Pelet; ²⁴ Adoram di saytu liggéey ya ñuy sase; Yosafat doomu Aylut yor kàddug Buur; ²⁵ Sewa di bindkat; Cadog ak Abiyatar di ay sarxalkat; ²⁶ Ira ma fekk baax Yayir itam di sarxalkatu Daawuda.

Yenn xew-xew a ngi

21

Waa Gabawon feyu nañu

¹ Jamono ya Daawuda nekkee ci jal bi, amoon na xiifub ñetti di yu tegloo. Daawuda diis ko Aji Sax ji. Aji Sax ji ne ko: «Li waral xiif bi moo di àqu deret ji topp Sóol ak waa kërám ndax waa Gabawon ña mu rey.» ² Buur woo waa Gabawon, wax ak ñoom. Waa Gabawon bokkuñu woon ci bànni Israyil, waaye ñoo desoon ca Amoreen ña bànni Israyil giñaloon ne duñu leen rey. Teewul Sóol xéroon

loul ci bànni Israyil ak Yuda, bay fexee faagaagal waa Gabawon. ³ Daawuda laaj waa Gabawon, ne leen: «Lan ngeen bëgg ma defal leen ko? Ana lu may def ba jotoo ko àq, ji ñu leen ameel, ba ngeen ñaanan ñoñi Aji Sax ji?» ⁴ Waa Gabawon ne ko: «Du xaaalis, du wurus wu nuy laaj Sóol mbaa waa kërám; te it du kenn ci Israyil ku nu saña reylu.» Mu ne leen: «Waxleen boog lu ngeen di laaj, ma defal leen ko.» ⁵ Ñu ne ko: «Sóol da noo naroon fexeel, sànk nu, faagaagal nu ci réewum Israyil. ⁶ Kon dees nuy jox juróom ñaari góor ñu askanoo ci Sóol, nu jam leen ba mu sar fa kanam Aji Sax ji ca Gibeya, dëkkub Sóol, ma Aji Sax ji faloon.» Buur ne leen: «Dinaa leen leen jox.»

⁷ Teewul Daawuda déeg Mefiboset, ma Yonatan doomu Sóol di baayam, ndax la ñu giñoo woon ci Aji Sax ji, mook Yonatan doomu Sóol. ⁸ Buur nag jàpp Armoni ak meneen Mefiboset, te Rispa doomu Aya di seen yaay, Sóol di seen baay. Buur boole ca juróomi góor ña Mikal* doomu Sóol di seen yaay, te Àddiryel doomu Barsilay ma dëkk Mewola di seen baay. ⁹ Daawuda jébbal leen waa Gabawon, ñu jam leen ba mu sar, foofa ca kaw tund wa, fa kanam Aji Sax ji. Juróom ñaar ñooñu ñépp a bokk tédd. Ña nga leen rey ca fan ya ñu tãmbalee goób, ca ndoortel ngóobum lors ba.

¹⁰ Ba mu ko defee Rispa doomu Aya ju jigéen ja, jël ab saaku, tállalal ko boppam ca doj wa. La ko dale ca ndoortel ngóob ma, ba keroog asamaan di sóob ca kaw néew ya, Rispa bàyyiwul dara mu laal leen bëccëg mbaa guddi, du picc, du rabu àll.

¹¹ Ba loolu amee ñu àgge Daawuda jëfi Rispa doomu Aya, nekkaaleb Sóol ba. ¹² Daawuda dem jëleji yaxi Sóol ak doomam Yonatan ca waa Yabes Galádd. Ndx gannaaw ba ñu daanee Sóol ca Gilbowa, Filisteen ña dañoo wékkoon néewu Sóol ak Yonatan ca péncum Bet San. Waa Yabes Galádd dikk sàcce leen fa. ¹³ Ci kaw loolu Daawuda jële fa yaxi Sóol ak doomam Yonatan, ak yaxi nit ña ñu jamoon ba mu sar te wékk leen. ¹⁴ Ñu boole kook yaxi Sóol ak doomam Yonatan, denc lépp ca sègu Kis, baayu Sóol, ca diiwaanu Beñamin ca Sela. Ñu def la Buur santaane lépp. Gannaaw loolu Yàlla nangul réew ma.

Daawuda daje naak ponkali waa Filisti

¹⁵ Bu loolu wéyee, xare amaati na diggante Filisteen ñi ak bànni Israyil. Daawuda ànd aki nitam xarejeek Filisteen

ña. Daawuda nag sonn ci biir xare bi. ¹⁶ Ci kaw loolu Isbi Bënob ne dina rey Daawuda —kooku askanu ponkal ya ñu daan wooye Rafayeen, ca la bokkoon. Ñawkay xeejam xàñjar la, diise ñetti kilo. Mu yore itam saamar bu bees. ¹⁷ Teewul Abisay doomu Seruya dikk, wallusi Daawuda, jam Filisteen ba, rey ko. Niti Daawuda daldi cay giñal Daawuda, ne: «Dootuloo ànd ak nun mukk cib xare. Lu ko moy dinga ci dee, askanu buur fey ci Israyil.»

¹⁸ Gannaaw gi xare dellu am seen digganteek Filisteen ña ca dëkk ba ñuy wax Gob. Ca la Sibeka, ma askanoo ci Usa, rey Saf ma bokk ca askanu ponkal ya. ¹⁹ Xare amati ca Gob seen digganteek Filisteen ña. Elxanan doomu Yare Oregim ma dëkk Betleyem, jam Golyaat ma dëkk Gaat. Kookoo di waa ja bantub xeejam réyoon, ba tollu ni mbaam mu ñuy ràbbe.

²⁰ Xare dellu amati ca Gaat. Jenn waay ju réya réy a nga ca woon, ku am juróom benni baaraam, loxo bu nekk, ak juróom benni baaraam, tãnk bu nekk, lépp di ñaar fukki baaraam ak ñeent. Moom it ponkalum Rafayeen la woon. ²¹ Ba mu tēkkoo Israyil, Yonatan a ko rey. Yonatan, Simeya magi Daawuda mooy baayam. ²² Ñeent ñooñu ay ponkali Rafayeen lañu woon ca Gaat. Daawudaaki nitam ñoo leen jam, ñu daanu.

22

Daawuda sant na

¹ Daawuda woy na Aji Sax ji gannaaw ba ko Aji Sax ji xettlee ci mboolemi noonam, xettli ko it ci Sóol. Kàdduy woy wa lii la. ² Mu ne:

Aji Sax ji laay sēs,
mu di ma aar,
di ma wallu.

³ Mooy sama Yàlla, ji ma sēs, yiiru,
fegu, mucc,
làqu, raw,
mucc fitna.

⁴ Ki yelloo cant, Aji Sax ji,
moom laa woo, mucc ci samay noon.

⁵ Gannaxi ndee mëdd ma,
walum kasara naq ma.

⁶ Buumi njaniiw laaw ma,
dee ne jaas, di ma fiir.

⁷ Ma jàq, woo Aji Sax ji,
ne sama Yàlla wallóoy, mu dégge kërám.
Ma yuuxu, muy dégg.

⁸ Mu mer, suuf yèngu, di ker-keri,
kenuy asamaan jaayu, di reg-regi.

* **21:8** 21.8 Mikal mii du Mikal mi ñuy wax ci 6.23, ne amul doom, ba keroog muy dee. Mikal mii mook Merab ñuy wax ci 1.Samiyel 18.19 kenn nit ki la. Jëkkëram mooy Àddiryel.

9 Saxar di sël-sëlee ca wakkan ya,
sawara boye ca gémmiñ ga,
xal yu yànj tàkke ca.

10 Mu firi asamaan, wàcc,
niir yu fatt lal tàn̄k ya.

11 Ma nga war molaakam serub, di naaw,
daayaarloo laafi ngelaw.

12 Ma nga bàddoo lëndem,
làmboo jali ndox aki xàmbaar.

13 Leer a ko jiitu,
ay xali sawara topp ca.

14 Aji Sax jee dënoo asamaan.
Aji Kawe jee àddu,

15 soqiy fitt ak jumi melax,
tasaare leen, fêlxe.

16 Aji Sax ji gëdd,
nokki, mu riir;
xuri géej ne fàññ,
kenuy suuf ne durññ.

17 Moo yóotoo fa kaw, jàpp ma,
seppee ma ca xóatey ndox ma,

18 musal ma ca noon yu mag,
ya ma bañ te man ma.

19 Ñu dajeeek man, bés ba ma jàqee,
Aji Sax ji taxawu ma,

20 yaatal ma,
bége ma, ba xettli ma.

21 Aji Sax jee ma yool sama njekk,
samay loxoo set, mu fey ma.

22 Sàmm naa yooni Aji Sax ji,
bonuma, di moy sama Yàlla.

23 Dama ne jàkk ndigalam yépp,
dëdduwma dogali yoonam.

24 Seede na, may jëfeg mat,
di moyoo tooñ.

25 Aji Sax jee ma yool sama njekk,
rafetlu sama mucc ayib.

26 Yaw Aji Sax ji, ku gore, fekk la gore;
ku matale, fekk la matale;

27 ku sellal, fekk la sell;
ku dëng, fekk laak say feem.

28 Yaw yaay musal xeet wu néew doole,
kuy danñiiral, nga dettee.

29 Yaw Aji Sax ji, kay, laay niitoo,
Aji Sax jeey leeral sama lëndem.

30 Maak yaw kay, ma song gàngoor.
Maak sama Yàlla, ma tēb um tata.

31 Yàllaa mat,
kàddug Aji Sax jee wér te wóor.
Mooy feg képp ku ko làqoo.

32 Ana kuy Yàlla ku moy Aji Sax ji?
Ku jara sēs ku dul sunu Yàlla?

33 Yàllaa may làqe dooleem,
xàllal ma, yoon mat.

34 Moo ma gaawal ni kéwél,
taxawal ma fu kawe.

35 Moo may tàggat ngir xare,

may bank xalag xànjjar.

36 Aji Sax ji, yaa may feg, musal ma,
yaa may nangul, darajaal ma.

37 Yaa ma xàllalu yoon,
duma tērēf.

38 Maay dàq noon yi, falaxe,
jekkli, doora dëpp.

39 Ma rajaxe, nemmali, jógatuñu,
xanaa fêlëñu, ma joggi.

40 Sol nga ma dooley xare,
sukkal ñi ma jógal, ñu féete ma suuf.

41 Yaa ma won ndoddi noon,
ma boole bañ yi, bóom.

42 Ñu ne wallóoy, wall amul,
ñu woo Aji Sax ji, faalewu leen.

43 Ma wol, ba ñu doon pënd,
dër, note ni banu mbedd.

44 Yaa ma xettli ci bokk yiy fippu,
def ma, ma jiite ay xeet;

waaso wu ma xamul sax nangul ma,
45 ku ma ci dégg, déggal ma,

ay doomi doxandéem di ma raamal,
46 ne yàcc,
génne seeni tata, di lox.

47 Aji Sax jeey Kiy dund.

Kii ma sēs moo jara sant.

Yàlla sama cēslaay ji may musal moo
màgg!

48 Mooy Yàlla ji may feyul,
di ma suufeelal xeet yi.

49 Xettli nga maak ku ma bañ ak ku ma
jógal,

kaweel ma, ma tiim leen,
xettleeti ma cib soxor.

50 Kon Aji Sax ji, ma sant la ci biir xeet yi,
kañ la!

51 Yaay may sa buuru ñoñ ndam lu réy,
yaay ji ngor ki nga fal,
muy man Daawuda, di sama askan ba
faww.

23

Daawuda biral na waxyu

1 Kàddu yii la Daawuda tàggtoo. Da ne:
Kàddug Daawudaa ngi, doomu Yese,

kàddug góor gu ñu kaweel,
góor gi Yàllay Yanqóoba fal,
muy woykatu Israyil, bi ñu ñal.

2 Noowug Aji Sax jee may waxe,
sol ma kàddoom.

3 Yàllay Israyil a wax,
moom mi Israyil sēs, moo ne:

Ku jiite ay nit cig njub,
bu jiitee cig ragal Yàlla,

4 day mel ni leeru jant bu fenk,
kaw asamaanu suba su niir newul,
leeru asamaan su set, taw ba siwet,
ba ñax jebbi.

5 Du nii la sama waa kër def ak Yàlla?

Moo fas ak man köllëre gu sax dàkk,
lépp jekk, mat sëkk.

Moo may may ndam saa su ne,
di ma defal lu ma namm.

⁶ Waaye ku bon, ñu buub nig taxas, sànni.
Deesu ko fore loxo,

⁷ xanaa fore ko wefi mbaa bantub xeej,
jafal mu lakk fa mu ne.

Jàmbaari Daawuda def nañuy jaloore

⁸ Ñeyi xarey Daawuda ya, ñoo di:
Yosebaset waa Agmon ba bokk ca mbëri
xare ya.

Moo xàcci xeejam, dal ci juróom ñetti
téeméeri nit,
rey leen ci menn cong.

⁹ Ka ca topp di Elasar,
Elasar, Dodo.

Dodo, Awoya.

Elasar bokkoon na ci ñetti jàmbaari xare
ya àndoon ak Daawuda,
di dëkk Filisteen ña fa daje woon ngir xare.
Fekk bànni Israyil di delu gannaaw.

¹⁰ Elasar a taxaw, di cor Filisteen ña,
ba loxo ba banku, taq ca njàppul saama-
ram.

Aji Sax jee maye ndam lu réy bésub
keroog!

Ba ko mbooloom bànni Israyil fekksee,
defuñu lu moy futti néew ya.

¹¹ Ka topp ca Elasar di Saama.
Saama, Age ma dëkk Arar ay baayam.

Ba Filisteen ña dajee ca Léyi,
wetu toolub ñebbe ba meññoon, ba fees
dell,

bànni Israyil dañoo daw.

¹² Saamaa taxaw ca digg tool ba,
aar tool ba, duma Filisteen ña.

Aji Sax jee ca maye ndam lu réy!

¹³ Mu am bés, jamonoy ngóob,
ñett ca mbëri xare ya fekki Daawuda ca
xunti ma ca Adulam.

Mbooloom Filisteen ñaa nga dal ca xuru
Refayeen.

¹⁴ Daawudaa nga ca biir rawtoom.
Mu am kurélu xareb Filisteen ñu dal
Betleyem.

¹⁵ Daawuda jekki-jekki xel ma sore.

Mu ne: «Éy ku ma wutali woon ndox mu
ma naan ca teenu Betleyem ba ca
buntu dëkk ba!»

¹⁶ Ci kaw loolu ñetti jàmbaari xare ya bëtt
dalub Filisteen ña.

Ñu dem duy ndox ca teenu Betleyem ba
ca wetu buntu dëkk ba,
dikk yót Daawuda ndox ma.
Daawuda nag néegu koo naan;
da koo tuur, te Aji Sax ji tax.

¹⁷ Mu ne: «Yàlla tere, Aji Sax ji, may naan
miim ndox,
nde kon deretu ñii dem jaayi seen bakkan
laa naan.»

Daawuda naanul ndox ma.

Jooju jéf la ñetti jàmbaari xare ya def.

¹⁸ Abisay bokkoon na ca mbëri xare ya.
Abisay ak Yowab, Seruyaa di seen yaay.
Abisay a xàcci woon xeejam, dal ci kaw
ñetti téeméeri nit, rey leen.

Mu doxe fa siiw ni ñett ñooña.

¹⁹ Abisay bokk na ca ña gënoona siiw ca
Fanweeri jàmbaar ya;
mujj na sax di seen njiit,
waaye bokkuloon ca Ñett ña.

²⁰ Benaya nag, Yoyadaay baayam,
xarekat bu mag la woon, dëkkoon Kabsel.
Def na jaloore yu réy!

Moo rey ñaari Mowabeen ña gënoona
jàmbaare.

Moo wàccoon ci kàmb, bésu tawu yuur,
rey fa gaynde.

²¹ Moo reyoon it waa Misra bu jekk ba
taxawaay.

Waa Misra baa nga yor ab xeej,
Benaya songewu ko lu moy aw yet.

Mu bif xeeju waa Misra ba,
nangoo ko ciy loxoom, reye ko ko.

²² Jooju jéf la Benaya doomu Yoyada def.
Moom it siiwoon na ni ñetti mbëri xare ya,

²³ ñu gënoon koo naw ca Fanweeri
jàmbaar ya,

waaye bokkuloon ca Ñett ña.
Daawuda nag def ko njiitu dag ya ko dar.

²⁴ Ñii bokkoon nañu ca Fanweeri jàmbaar
ya:

Asayel, rakki Yowab,
Elxanan, Dodo di baayam, dëkk
Betleyem,

²⁵ Saama ma doon waa Arot,

Elika, di waa Arot,

²⁶ Eles ma dëkk Pelet,

Ira, Ikes di baayam, dëkk Tekowa,

²⁷ Abiyeser ma dëkk Anatot,

Mebunay dëkk Usa,

²⁸ Salmon dëkk Awoya,

Maaray dëkk Netofa,

²⁹ Eleb, Baana di baayam, dëkk Netofa,

Itay, Ribayi di baayam, dëkk Gibeya ca
giirug Beñamin.

³⁰ Benaya ma dëkk Piraton,

Iday ma dëkk walum Gaas,

³¹ Abi Albon dëkk Bet Araba,

Asmawet dëkk Barum,

³² Elyaba dëkk Saalbon,

ak góor ñi Yasen di seen baay,

ak Yonatan, ³³ Saama di baayam, dëkk
Arar,

Akiyam, Sarar di baayam, dëkk Arar,
³⁴ ak Elifelet, Axasbay di baayam,
 Axasbay, baayam dëkk Maaka,
 ak Eliyam, Ayitofel di baayam, dëkk Gilo,
³⁵ ak Esray ma dëkk Karmel,
 ak Paray dëkk Arab,
³⁶ ak Igal, Natan di baayam, dëkk Soba,
 ak Bani ma dëkk Gàdd,
³⁷ ak Seleg, Amoneen ba,
 ak Naray ma dëkk Berot.
 Kookoo yoroon ngànnaayi Yowab ma
 Seruya di yaayam.
³⁸ Ira ma dëkk Yeter ca la,
 ak Gareb dëkk Yeter;
³⁹ ak Uri, Etteen ba.
 Noom ñépp tollu ci fanweeri jàmbaar ak
 juróom jaar.

24

Daawuda waññ na bànni Israyil

¹ Gannaaw ba loolu wéyee Aji Sax ji mereeti* bànni Israyil, ba tax mu xiir Daawuda ci def lu leen di lor. Mu def ci xelam ne ko mu dem lim waa Israyil ak Yuda.

² Buur wax ak Yowab ma ca wetam, di njiital xarekat ya. Mu ne ko: «Wèral ci biir giiri Israyil gépp ba ñu daj, li ko dale diiwaanu Dan ca bėj-gànnaar ba Beerseba ca bėj-saalum. Nañu bind askan wi, ndax ma xam seenub lim.» ³ Yowab ne ko: «Buur, yal na Aji Sax ji ful askan wi téeméeri yoon, nga fekke. Waaye sang bi, lu la xiir ci loolu?»

⁴ Teewul kaddug Buur épp doole Yowab ak njiiti xarekat ya. Ñu bàyyikoo ca Buur, dem bindi askanu Israyil. ⁵ Ñu jáll dexu Yurdan, dem dali Arower ca bėj-saalumu dëkk ba, ca biir xur wa, daldi dem Gàdd, jaare fa jëm Yaser. ⁶ Ci kaw loolu ñu dem diiwaanu Galàdd, jáll ba Kades ca diiwaanu Etteen ña, dem Dan Yaan ak la ko wër, teg ca Sidon. ⁷ Ba mu ko defee ñu dem ba Tir, dëkk ba ñu wèralee ab tata, jóge fa dem ca mboolem dëkk-dëkkaani Eween ñaak Kanaaneen ña. Ñu àkkeji Beerseba ca bėj-saalumu mändinju Yuda. ⁸ Wër nañu réew ma mépp ci juróom ñeenti weer ak ñaar fukki fan, doora ñibbsi Yerusalem.

⁹ Yowab nag indil Buur limu askan wa: Israyil di juróom ñetti téeméeri junniy góor (800 000) ñu tollu ci xare; Yuda di juróomi téeméeri junniy góor (500 000).

¹⁰ Daawuda waññ askan wa ba noppi, fit wa ne rës, mu yedd boppam, daldi ne Aji Sax ji: «Aji Sax ji, bàkkaar naa lool. Léegi nag ngalla jéggal ma sama ñaawtéef, ndax def naa jéfi dof ju réy

lool.» ¹¹ Ba Daawuda jógee ca èllég sa, kaddug Aji Sax ji dikkal Gàdd, yonent Yàlla ba fèetewoo kër Buur Daawuda. Mu ne ko: ¹² «Demal ne Daawuda: “Aji Sax ji dafa wax ne: Ñett laa lay jox, nga tànn ci lenn lu ma lay def.”» ¹³ Gàdd dem ca Daawuda, jottli ko ko, ne ko: «Ana yii yett loo ci taamu, mu dal ci sa kaw: juróom yaari ati xiif ci sam réew, am ñetti weer yooy daw say noon, am ñetti fani mbas ci sam réew? Xalaatal léegi te wax ci lenn, ma xam lu may jottli ki ma yónni.» ¹⁴ Daawuda ne Gàdd: «Am naa njàqare lool; waaye naa tàbbi ci loxol Aji Sax ji, ndax yërmandeem réy na, waaye yàlla buma daanu ci loxol nit!»

¹⁵ Ba loolu amee Aji Sax ji wàcce mbas ci kaw Israyil, dale ko ca suba soosa ba keroog ba àpp ba matee. Ña dee ca askan wa di juróom ñaar fukki junni (70 000) diggante Dan ca bėj-gànnaar ba Beerseba ca bėj-saalum. ¹⁶ Naka la malaaka ma tàllal loxoom, ngir faagaagal Yerusalem, Aji Sax ji fomm, daldi wax ak Malaakam bóomkat may fàdd askan wa. Mu ne ko: «Doy na! Teggil sa loxo.» Booba malaakam Aji Sax jaa nga ca wetu dàggay Arawna, Yebuseen ba.

¹⁷ Daawuda nag gis malaaka may fàdd askan wa. Mu ne Aji Sax ji: «Man miy sàmm bi† déy, maa bàkkaar, maa def lu bon. Nii diy xar donj yu topp ci man, lu ñu def? Na sa loxo dal ci sama kaw man kay, maak sama waa kër baay!» ¹⁸ Ba loolu amee Gàdd dem ca Daawuda keroog ca bés ba, ne ko: «Demal, nga tabaxal Aji Sax ji sarxalukaay ca dàggay Arawna, Yebuseen ba.» ¹⁹ Daawuda dem ca, na ko ko Aji Sax ji sante, Gàdd jottli.

²⁰ Ba mu ko defee Arawna séen Buur, mu ànd aki jawriñam, jëm ca moom. Mu génn sujjóotal ko, dèpp jëem ca suuf, ²¹ ne ko: «Buur, sang bi, lu doon say tàn?» Daawuda ne ko: «Xanaa jëndsi sa dàgga jii, ba tabaxal fi Aji Sax ji sarxalukaay, ndax mbas mi dal ci kaw askan wi yem fi.» ²² Arawna ne Daawuda: «Buur, sang bi, jèlal lu la neex, def ko sarax. Buur, yaa ngi, jèlal def saraxu rendi-dóomal, watiiri bojju yeek bant, yi nag yiy lékkloo, nga def ko matt. ²³ Man Arawna, maa la jox lii lépp, Buur. Yal na la sa Yàlla Aji Sax ji nangul.»

²⁴ Teewul Buur ne Arawna: «Déédéet, dama koy jënd ci yaw kay. Ab saraxu rendi-dóomal bu ma dikkewul dara, duma ko defal sama Yàlla Aji Sax ji.» Ci kaw loolu Daawuda jënd dàgga ja ak nag ya ci juróom fukki dogi xalis. ²⁵ Gannaaw

* **24:1** 24.1 Seetal ci 21.1-14. † **24:17** 24.17 sàmm bi: am na ci bind yu yàgg yi, yu ci indiwul baatub sàmm bi ci aaya bi.

loolu Daawuda tabaxal fa Aji Sax ji ab sarxalukaay, rendi fa ay saraxi dóomal, ak ay saraxi cant ci biir jamm. Ba mu ko defee Aji Sax ji nangul réew ma, mbas ma bàyyi Israyil.

Buur ya di téere bu jëkk bi Lu jëm ci nguurg Suleymaan

(Saar 1.1—11.43)

Daawuda néew na doole

¹ Gannaaw gi Buur Daawuda mujj naa mąggat, ba laq at yu bare, ñu di ko sang ay sér te du ko taxa tàng. ² Ay dagam ne ko: «Buur, sang bi, nañu la wutal ab janq, mu di la taxawu, di la topptoo. Man naa tédd it ci sa wet, Buur, ndax nga liwwi, sang bi.» ³ Ñu daldi seet ci tundu Israyil wépp, ba gis janq bu rafet bu ñuy wax Abisag, di waa Sunem. Ñu indil ko Buur. ⁴ Janq baa nga taaru lool. Muy topptoo nag Buur, di ko taxawu, waaye Buur dëkkooowu ko.

Adoña ngi sàkku jal bi

⁵ Ci biir loolu Adoña doomu Daawudaak Agit, di téggu naan: «Man mii maay doon buur.» Mu waajalal boppam watiiru xare aki fas ak juróom fukki nit ñuy daw di ko jiitu. ⁶ Baayam Daawuda nag masu koo wax dara, ak lu mu mana def. Adoña moo toppoon ci Absalom. Mu doonoon ku górayiw lool.

⁷ Ci kaw loolu Adoña diisook Yowab, mi Seruya di ndeyam, ak Abiyatar sarxalkat ba, ñooñu jàpple ko. ⁸ Waaye Cadog sarxalkat ba ak Benaya doomu Yoyada, ak Yonent Yàlla Natan, ak Simey ak Reyi, ñook jambaari Daawuda ya koy dar, ñooñu ànduñu woon ak Adoña. ⁹ Ba mu ko defee Adoña sarxe ay xar aki nag aki wëllu yu duuf ca wetu doju Soyelet, fa feggook En Rogel. Mu woo ca mboolem doomi Buur yu góor ya mu bokkal baay, ak jawriñi Buur yu dii-waanu Yuda. ¹⁰ Waaye woowul Yonent Yàlla Natan ak Benaya, woowul jambaar yay dar Daawuda, woowul rakkam Suleymaan.

¹¹ Ba loolu amee Natan laaj Batseba, ndeyu Suleymaan, ne ko: «Waaw, xanaa déggoo ne Adoña doomu Agit falu na buur te sunu sang Daawuda yégu ko? ¹² Kaay gaaw, ma digal la nooy def, ba musal sa bakkan ak sa bakkanu doom Suleymaan. ¹³ Gaawal dem ca Buur Daawuda, ne ko: «Buur, sang bi, du yaa ma giñaloon, yaw sang bi, ne ma sama doom Suleymaan mooy falu buur, wuutu la, te mooy toog ci sa jal bi? Kon nag lu tax Adoña falu buur?» ¹⁴ Gisal, diir bi ngay wax ak Buur foofa, man dinaa duggsi, topp ci yaw te dinaa déggal sa kàddu.»

¹⁵ Batseba dem ba ca Buur, ca biir néegam. Buur a nga mąggat lool, Abisag mu Sunem di ko taxawu. ¹⁶ Batseba agsi sujjóotal Buur, sukk fi kanamam. Buur ne ko: «Lu doon say tánk?» ¹⁷ Mu ne ko: «Sama sang, yaw yaa ma giñal ci sa Yàlla Aji Sax ji, sang bi, nga ne ma sama doom Suleymaan de dina falu buur moos, wuutu la, te moom mooy toog ci sa kaw jal bi. ¹⁸ Waaye xoolal léegi Adoña ngii falu buur, te yaw Buur sang bi, yéguloo ko. ¹⁹ Sarxe na ay nag ak wëllu yu duuf ak xar yu bare. Woo na ca doomi Buur yu góor yépp, woo ca Abiyatar sarxalkat ba, woo ca Yowab, njiitu mbooloom xare mi. Waaye Suleymaan sa surga ba, woowu ko. ²⁰ Yaw nag Buur, sang bi, Israyil lépp a ngi ne jàkk ci yaw, ngir nga xamal leen kan ngay dēj ci sab jal, mu wuutu la, sang bi. ²¹ Lu ko moy de Buur, sang bi, bés boo nopplujee fekki say maam, su boobaa man, maak sama doom Suleymaan dinañu nu tuumaal.»

²² Na Batseba di wax ak Buur, Yonent Yàlla Natan jekki ne jalañ. ²³ Ñu wax ko ne ko: «Buur, Yonent Yàlla Natan a ngoo.» Mu agsi ba ci kanam Buur, sujjóotal ko, dēpp kanamam fa suuf. ²⁴ Natan ne ko: «Buur, sang bi, ndax yaa wax ne Adoña mooy falu buur, wuutu la, te moom mooy toog ci kaw jal bi? ²⁵ Ndax kat, Adoña dem na tey jii, sarxeji lu bare ciy nag ak wëllu yu duuf aki xar. Woo na ca doomi Buur yu góor yépp, ñook njiiti xare yeek Abiyatar sarxalkat bi. Ña nga noonee di lekk ak a naan ñook moom te naa: «Buur Adoña, guddalu fan!» ²⁶ Man sa surga bii nag, maak Cadog sarxalkat bi ak Benaya doomu Yoyada ak sa surga ba Suleymaan, woowu nu ca. ²⁷ Buur, sang bi, ndax wér na ne loolu ndigal la lu bëyyikoo fi yaw, te xamaloo nu kan mooy toog ci sa kaw jal bi, wuutu la, yaw Buur, sang bi?»

²⁸ Buur Daawuda ne ko: «Wool ma Batseba!» Ci kaw loolu Batseba dikki taxaw fa kanam Buur. ²⁹ Buur daldi giñ ne: «Giñ naa ci Aji Sax ji, Kiy Dund te musal sama bakkan bii ci jépp njàqare, ³⁰ bir na ne loolu ma la giñaloon ci Aji Sax ji, Yállay Israyil, ne la bir na ne Suleymaan sa doom mooy doon buur wuutu ma te mooy toog ci kaw jal bii ma toog— loolu déy dinaa ko sotal bés niki tey.» ³¹ Ba mu ko defee Batseba dēpp kanamam fa suuf, sukk fa kanam Buur, ne ko: «Buur Daawuda, sang bi, yal nanga fi yàgg.»

Suleymaan falu na

³² Buur Daawuda daldi ne: «Wool-leen ma Cadog sarxalkat bi, ak Yonent Yàlla Natan ak Benaya doomu Yoyada.» Ba ñu dikkee fa kanam Buur, ³³ Buur ne leen:

«Andleen ak samay dag, ngeen waral sama doom Suleymaan ca sama kaw berkelle bu jigéen ba, te yóbbu ko Giyon, bētu ndox ba. ³⁴ Cadog sarxalkat bi ak Yonent Yàlla Natan, nañu ko diw foofa, fal ko mu jiite Israyil. Su ko defee ngeen wal liit gi te yéene ne: “Buur Suleymaan, guddalu fan!” ³⁵ Ngeen topp nag ci moom, délsi, mu dikk toog ci kaw jal bi. Moom mooy nguuru, wuutu ma. Moom laa fal, mu yilif Israyil ak Yuda.» ³⁶ Ba loolu amee Benaya doomu Yoyada ne Buur: «Buur, sang bi, yal na ko Aji Sax ji sa Yàlla dogal. Amiin! ³⁷ Na Aji Sax ji ànde woon ak yaw Buur, sang bi, yal na ni àndeek Suleymaan, te yal na kaweel ab jalam, ba mu sut sab jal, yaw Buur Daawuda, sang bi.» ³⁸ Gannaaw loolu Cadog sarxalkat ba daldi ànd ak Yonent Yàlla Natan ak Benaya doomu Yoyada, ak waa Keret ak waa Pelet yay dar Daawuda. Ñu waral Suleymaan berkelleb Buur Daawuda. Ñu dar ko ba Giyon, bētu ndox ba. ³⁹ Ci kaw loolu Cadog sarxalkat ba dem ca xaymab Aji Sax ji, jële fa béjjén ba def diwu pal ga, diw ca Suleymaan. Ñu wal liit ga, mbooloo ma mépp àddu ca kaw ne: «Buur Suleymaan, guddalu fan!» ⁴⁰ Ba loolu amee mbooloo ma mépp topp ca, bég lool, di toxoro, coow la jolli, ba suuf sa di riir.

⁴¹ Ba mu ko defee Adoña dégg ca, mook mboolem ña mu woo woon, ñu nekk faak moom. Fekk ñu lekk ba noppi. Ba Yowab déggee liit ga, da ne: «Waaw, riir mi ci dëkk bi, lu mu doon?» ⁴² Daaneelagul kàddoom sax, Yonatan doomu Abiyatar sarxalkat ba ne jaas, agsi. Adoña ne ko: «Dikkal, yaw nit ku baax nga, te xibaaru jàmm ngay indi.» ⁴³ Yonatan ne Adoña: «Déédéet kay, sunu sang Buur Daawuda fal na Suleymaan buur. ⁴⁴ Buur boole na kook Cadog sarxalkat bi ak Yonent Yàlla Natan ak Benaya doomu Yoyada ak waa Keret ak waa Pelet yay dar Buur. Yebal na leen, ñu waral ko berkelleb Buur. ⁴⁵ Cadog sarxalkat baak Yonent Yàlla Natan diw nañu ko, fal ko ca Giyon, ba bàyyikoo ca, di ko bége, mu dim riir ci dëkk bi. Mooy coow, li ngeen dégg. ⁴⁶ Suleymaan sax toog na ca jalu buur; ⁴⁷ te it jawriñi Buur ñëw nañu, di sargalsi sunu sang Buur Daawuda, ne ko: “Yal na sa Yàlla siiwal turu Suleymaan, ba mu gën laa amu tur. Yal na kaweel ab jalam, ba mu gëna kawee sab jal.” Buur sujjóot ca kaw lalam, ⁴⁸ teg ca ne: “Cant ñeel na Aji Sax ji, Yállay Israyil, ji ma jox bésuub tey ku ma wuutu ci samab jal, may gis.”» ⁴⁹ Ba loolu amee tiitaange jàpp mboolem ña ñu woo woon

ca jataayu Adoña. Ñu jóg, tasaaroo, ku nekk dem yoonam.

⁵⁰ Adoña nag ragal Suleymaan, daldi dem jàpp ca béjjén ya ca cati sarxalukaay ba, ngir rawale bakkanam*. ⁵¹ Ñu wax ko Suleymaan, ne ko: «Buur Suleymaan, Adoña de, ragal na la. Deful lu moy jàpp ca béjjéni sarxalukaay ba te naa: “Na ma Buur Suleymaan sang bi giñal tey jii ne du ma jam saamar, ma dee.”» ⁵² Suleymaan daldi ne: «Su dee nit ku jara wóolu de, genn kawaram du wadd ci suuf. Waaye su lalee pexem wor de, dina dee.» ⁵³ Ba loolu amee Buur Suleymaan yónnee, ñu jëleji Adoña ca sarxalukaay ba, mu dikk, sujjóotal Buur Suleymaan. Mu ne ko: «Man ngaa ñibbi sa kër.»

2

Daawuda dênku na Suleymaan

¹ Ba ñu demee ba bésu appu Daawuda di jegesi, Daawuda dafa dënk dooman Suleymaan, ne ko: ² «Maa ngi ci yoon wu dul jaas ci mboolem àddina. Nanga dëgërlu te góor-góorlu, ³ di dënkoo sa ndénkaanel Yàlla Aji Sax ji, di topp ay yoonam, sàmmonteek ay dogali yoonam aki santaaneem aki àttey yoonam aki seedeem, ni ñu ko binde ci yoonu Musaa. Su ko defee dinga am ndam ci lépp loo def ak fépp foo jëm, ⁴ ba kerog Aji Sax ji sotal kàddoom ga mu ma waxoon ne ma: “Su say sët sàmmee seen dundin, saxoo ngëm gu ma wéetal, te gar ci seen bakkan, kon doo ñàkk mukku ku lay wuutu ci jalub Israyil.”

⁵ «Yaw ci sa bopp xam nga li ma Yowab doomu ndaw sa Seruya def, te def na ko ñaari njiiti xarey Israyil, di Abner doomu Ner ak Amasa doomu Yeter: rey na leen, tuur seen deret ni bu doon xare, ba taqal boppam ripp. Moo rendi ci biir jamonoy jàmm. ⁶ Jéflanteel ak moom ci kaw xel, bu ko bàyyi mu duggaale bàmmeel bijjaaw.

⁷ «Góor ñiy doomi Barsilay mu Galádd nag, nanga leen baaxe, te ñuy bokk ak yaw ndab, ndax kat taxawu woon nañu ma, ba may daw Absalom sa doomu baay.

⁸ «Gannaaw loolu bàyyil xel ci Simey mi nga feggool, muy doomu Gera mu Baxurim, mi bokk ci giirug Beñamin. Moom moo ma doon tifaari saaga, bés ba ma jëmee Maanayim, moom mu dikk dajeeek man ca dexu Yurdan. Ma giñal ko ci Aji Sax ji ne ko: “Duma la rey, sama saamar du la dal!” ⁹ Waaye yaw de, bu ko ñàkka topp, ndax boroom xel nga, te dinga xam ni ngay defeek moom, ba mu

* **1:50** 1.50 Jàpp ca sarxalukaay ba ca kër Yàlla ga, nit daan na ko def, di ko sàkkoo rawale bakkanam. Seetal ci *Mucc ga* 21.14.

sangoo deretam, änd ak bijjaawam, dugg bàmmeel.»

¹⁰ Gannaaw loolu Daawuda nelaw, fekki ay maamam, ñu denc ko ca gox ba ñu naan Kër Daawuda. ¹¹ Nguurug Daawuda ci Israyil tollu na ci ñeent fukki at, di juróom ñaari at ya mu péeyoo Ebron, ak fanweeri at ak ñett ya mu péeyoo Yerusalem.

¹² Suleymaan nag toog ca jalub baayam Daawuda; nguuram dëgër, ne kekk.

Nii la Adoña mujje

¹³ Ci biir loolu Adoña ma Agit di ndeyam, dem ca Batseba, ndeyu Suleymaan. Mu ne ko: «Mbaa jàmm a la indi?» Mu ne ko: «Jàmm la.» ¹⁴ Mu neeti ko: «Mbir la mu ma lay wax.» Mu ne ko: «Waxal.» ¹⁵ Mu ne ko: «Xam nga ne maa moomoon nguuri gi, te man la Israyil gépp séentu woon, ma falu buur. Waaye tey nguuri gi walbatiku na, tegu ci sama loxol doomu baay, ndax Aji Sax jee ko jox. ¹⁶ Léegi nag lenn rekk laa lay ñaan, te nga bañ maa gantu.» Mu ne ko: «Waxal rekk.» ¹⁷ Mu ne ko: «Buur Suleymaan du la gantu, rikk ñaanal ma ko, mu may ma Abisag mu Sunem soxna.» ¹⁸ Batseba ne ko: «Baax na, man kay maa la koy waxal Buur.» ¹⁹ Batseba dem ca Buur Suleymaan, ngir wax ko mbirum Adoña ma. Buur jóg gatandu ko, sukkal ko, daldi toogaat ci ngànguneem. Mu tegal ndeyam ngàngune, mu toog ci ndijooram. ²⁰ Mu ne ko: «Man de, lenn lu tuut rekk laa lay ñaan, te bu ma gantu.» Mu ne ko: «Waxal, saa ndey, дума la gantu.» ²¹ Mu ne ko: «Abisag mu Sunem, may ko sa doomu baay Adoña soxna.» ²² Buur Suleymaan ne ndeyam: «Nga ne! Adoña ngay ñaanal Abisag mu Sunem soxna? Tee nga koo ñaanal nguuri gi far, nde mooy sama mag, ñaanalaale ko Abiyatar sarxalkat bi, mook Yowab doomu Seruya?»

²³ Buur Suleymaan nag giñ ci Aji Sax ji ne: «Yal na ma Yàlla teg mbugal mu gëna tar, ndegam Adoña du feye bakkanam lii muy sàkku!» ²⁴ Léegi nag giñ naa ci Aji Sax ji, Kiy Dund, te teg ma fi, dëj ma ci jalub Daawuda sama baay, sampal ma askanu nguuri, wa mu dige woon, bésuub tey jii Adoña dina dee.» ²⁵ Buur Suleymaan daldi jox ndigal Benaya doomu Yoyada. Benaya jam Adoña, mu dee.

Nii la Abiyatar mujje

²⁶ Abiyatar sarxalkat bi nag, Buur ne ko: «Dellul Anatot ca say tool. Dee rekk a war ci yaw, waaye bésuub tey jii дума la rey, ndax li nga gaddu woon gaalu Aji Sax ji Boroom bi, dox jiitu sama baay Daawuda. Nga teg ci bokk ak sama baay mboolem coono bu mu daj.» ²⁷ Suleymaan nag jële Abiyatar ci liggéeyu saraxi Aji Sax ji, daldi

matal li Aji Sax ji waxoon ci waa kër Eli ca Silo.

Nii la Yowab mujje

²⁸ Yowab ändul woon ak Absalom ci pexeem, waaye Adoña la mujj ändal. Ba Yowab yégee la xew, daa daw ba ca xaymab Aji Sax ji, jàpp ca béjjén ya ca cati sarxalukaay ba, ngir rawale bakkanam.

²⁹ Ñu wax Buur Suleymaan ne ko: «Yowab daw na, làquji ca xaymab Aji Sax ji, te kat ma nga ca sarxalukaay ba.» Suleymaan sant Benaya doomu Yoyada, ne ko mu dem, jam ko. ³⁰ Benaya dugg ca biir xaymab Aji Sax ja, ne ko: «Buur nee nanga génn!» Yowab ne ko: «Génnuma, fi laay deeye!» Benaya yegge Buur waxi Yowab ak la mu ko tontu. ³¹ Buur ne ko: «Defal li mu wax, jam ko mu dee, nga suul ko, ndax ma set, maak sama waa kër baay, ci deretu jaamburi Yàlla ji Yowab tuuroon. ³² Su ko defee Aji Sax ji dina ko gadduloo bakkanu boppam, feye ko ko bakkanu ñaar ña mu songoon, di Abner doomu Ner, njiital xarey Israyil, ak Amasa doomu Yeter, njiital xarey Yuda; muy ñu jub, ñu ko gën, teewul mu jam leen saamar, ñu dee te sama baay Daawuda yégu ko. ³³ Yal na Yowab ak askanam gaddu seen bakkan ba fàww. Waaye Daawudaak askanam ak waa kër am akub jalum, yal na leen Aji Sax ji jàmmal ba fàww.» ³⁴ Ba loolu amee Benaya doomu Yoyada daldi dem jam Yowab, rey ko. Ñu suul ko ca kër am ga ca màndinj ma. ³⁵ Gannaaw loolu Buur tabb Benaya doomu Yoyada ca boppu mbooloom xare ma, mu wuutu Yowab. Cadog sarxalkat ba, Buur tabb ko, mu wuutu Abiyatar.

Nii la Simey mujje

³⁶ Ba mu ko defee Buur yónnee woolu Simey, wax ko ne ko: «Tabaxalal sa bopp kër fi ci Yerusalem, dëkk ca waaye bul dem fenn. ³⁷ Ndaxte bés boo fi jógee, ba jéggi xuru Sedoron, xamal xéll ne dee rekk mooy sab àtte, te yaay gaddu sa bakkanu bopp.» ³⁸ Simey ne Buur: «Baax na, Buur, sang bi. Li nga ma wax rekk de laay def, sang bi.» Ba loolu amee Simey toog Yerusalem lu yàgg.

³⁹ Ba ñu ca tegee ñetti at, ñaari jaami Simey daw dem ca Akis buurub Gaat doomu Maaka. Ñu wax Simey, ne ko: «Ndeke sa jaam yaa nga Gaat!» ⁴⁰ Simey daldi takk mbaamam, dem Gaat ca Akis, ngir jëli ay jaamam. Mu jëleji Gaat ay jaamam, délloosi leen. ⁴¹ Ba ñu waxee Buur Suleymaan, ne ko Simey jóge na Yerusalem dem Gaat, ba délsi, ⁴² Buur yónnee, woolu Simey, ne ko: «Xanaa giñloowuma la woon ci Aji Sax ji, àrtu la

ne la: “Bés boo fi jógee dem fenn, xamal xéll ne dee rekk mooy sa àtte”? Nga ne ma: “Baax na, dinaa la déggal.”⁴³ Ana lu waral nag sàmmoo la nga giñoon ci Aji Sax ji te ma santoon la ko?»⁴⁴ Buur dellu ne Simey: «Yaw ci sa bopp xam nga xéll mboolem li nga lor sama baay Daawuda. Léegi Aji Sax ji dina la fey sa jéf ju bon, mu képpu ci sa kaw bopp.⁴⁵ Waaye man Buur Suleymaan du ma teree barkeel; jalub Daawuda it day sax fàww fi kanam Aji Sax ji.»⁴⁶ Buur nag sant Benaya doomu Yoyada, mu génne Simey, jam ko, mu dee. Ba loolu amee nguur ga géna dégër ca loxol Suleymaan.

3

Buur Suleymaan ñaan na Yàlla xel

¹ Gannaaw ba loolu wéyee Suleymaan goromloo naak Firawna buuru Misra, jël doomu Firawna, indi ko gox ba ñu naan Kër Daawuda, ba kerog muy noppee tabax kër am ak kër Aji Sax ji ak tata ja wër Yerusalem.² Terewul mbooloo ma di rendi ay sarax ca bérabi jaamookaay ya, ndax ca yooya jamono tabaxaguñu woon kër gu ñu tudde Aji Sax ji.³ Suleymaan nag wone na cofealam ci Aji Sax ji, di wéy ci sàrti baayam Daawuda, xanaa lu moy bérabi jaamookaay ya rekk. Moom daan na fa rendi sarax, di fa taal cuuraay.

⁴ Ci biir loolu Buur dem Gabawon, sarxali fa, ndax foofaa doon bérabu jaamookaay ba génoona mag: junnii saraxi rendi-dóomal, Suleymaan joxe na ko fa ca kaw sarxalukaay booba.⁵ Foofa ca Gabawon la Aji Sax ji feñu woon Suleymaan ci géntug guddi. Yàlla ne ko: «Ñaanal loo bëgg, ma may la ko.»⁶ Suleymaan ne ko: «Yaw de yaa baaxe lool sab jaam Daawuda, saa baay, ngir na mu daan doxale fi sa kanam ci dégg ak njekk ak njubteg xol. Yaa ko baaxe lool, may ko doom ju góor ju toog cib jalam, bésub tey jii.⁷ Léegi nag Aji Sax ji, sama Yàlla, fal nga ma buur, ma wuutu saa baay Daawuda. Waaye Sang bi, man ndaw lu tuut laa, xawma sax nu may doxale.⁸ Rax ci dolli, Sang bi, ma nekk ci digg askan wi nga taamu, askan wu yaa, ba maneesu koo waññ mbaa di ko lim.⁹ Kon nag Sang bi, may ma xel mu am ug dégg mu ma àttee sa ñoñ, ngir may ràññee lu baax ak lu bon. Ndax kat, ana kan moo mana àtte sa ñoñ, wii askan wu réy?»

¹⁰ Kàddug Suleymaan ga nag neex Aji Sax ji, ndax loolu mu ñaan.

¹¹ Mu ne ko: «Gannaaw loolu nga ñaan, te ñaanuloo fan wu gudd, ñaanuloo alal, ñaanuloo itam say noon dee, xanaa di ñaan xel nu rafet moo àttee dégg,¹² dama ne, dinaa la defal li nga ñaan, te

sax dinaa la may xel mu rafet, nga am ug dégg, ba raw ku la jiitu ak ku la wuutu.¹³ Te itam li nga ñaanul dinaa la ko may, booleel la alal ak teraanga, ba doo am moroom ci buur yi, sa giiru dund.¹⁴ Te soo jaaree ci samay yoon, jéfe samay sàrt ak samay santaane, muy fi sa baay Daawuda jaaroon, kon dinaa guddal saw fan.»

¹⁵ Ba loolu amee Suleymaan yewwu, ndeke gént la woon. Mu dellu Yerusalem, taxaw fa kanam gaalu kólléréy Aji Sax ji, def fa ay saraxi rendi-dóomal, ak saraxi cant ci biir jàmm, daldi berndeel jawriñam yépp.

Suleymaan wone na xelam

¹⁶ Ba loolu wéyee mu am ñaari ganc yu dikk ca Buur, agsi ca kanamam.¹⁷ Senn ndaw sa ne: «Éy sang bi, maak ndaw sii de, danoo bokk genn kër, bokk fa wasin nun ñaar.¹⁸ Ba ma amee doom ba mu am ñetti fan, moom mii itam mu am doom, te nun rekk a dëkk, keneen nekkul ak nun ca biir kër ga, xanaa nun ñaar.¹⁹ Doomu ndaw sii nag dee ci guddi, ndax daa téddoon ci kawam.²⁰ Mu jóg ci xaaju guddi, jële sama doom fi sama wet, téral ci wetam. Fekk man, sang bi, maa ngi nelaw. Doomam ji dee nag, mu téral ko ci sama wet.²¹ Naka laa jóg ci suba, di nàmpal sama doom, gisuma lu moy mu dee. Ba bêt setee nag ma xool ko bu baax, ndeke du sama doom ji ma jur.»²² Seneen ndaw sa ne: «Déedéet, sama doom mooy dund, sa doom a dee.» Ku jëkk ka ne: «Déedéet, sa doom a dee, sama doom a ngi dund.» Ñu di ko werante fi kanam Buur.

²³ Buur ne: «Kii a ngi naan: “Sama doom jii mooy dund, sa doom a dee.” Kee naan: “Déedéet, sa doom a dee, sama doom mooy dund.”»²⁴ Buur teg ca ne: «Indil-leen ma saamar!» Ñu indil Buur saamar.²⁵ Buur ne: «Dogleen xale biy dund ñaar, te jox kii genn-wàll, jox kee genn-wàll.»²⁶ Ci kaw loolu ndaw si doomam di dund daldi ñeewante doomam. Mu ne: «Déet, sang bi, jox ko xale bi. Bu ko rey muk!» Ndaw sa ca des, moom, ne: «Deesu ma ko jox, deesu la ko jox; dogleen ko ñaar!»²⁷ Ba loolu amee Buur daldi àtte ne: «Joxleen ndaw sii liir biy dund, te buleen ko rey. Mooy ndeyam.»

²⁸ Israyil gépp nag dégg àtteb Buur, daldi yéemu ci moom, ndax dañoo gis ne xelum Yàlla mu rafet a ngi ci moom, di ko jiite ci àtte dégg.

4

Suleymaan fal na ay njiit

¹ Ci kaw loolu Buur Suleymaan di bo-room Israyil gépp.² Ay jawriñam fii la

woon: Asaryaa sētu Cadog moo doon sarxalkat bi; ³ Eliyoref ak Awiya doomi Sisa di bindkat yi; Yosafat doomu Ayilut yore kàddug Buur; ⁴ Benaya doomu Yoyada jiite mboolem xare ma; Cadog ak Abiyatar di ay sarxalkat. ⁵ Asaryaa doomu Natan moo jiite woon ndawi Buur ya, Sabudd doomu Natan di sarxalkat te di diglekatu buur. ⁶ Ayisar moo doon saytu kër Buur, Adoniram doomu Abda di sase liggéeyi sañul-bañ ya.

⁷ Buur Suleymaan amoon na fukki jawriñ ak ñaar ci Israyil gépp. Ñuy toptoo dundub Buur ak waa kéram, weer wu nekk kenn ci ñoom yor dund ba, ba at mi mat. ⁸ Ñooño di:

- Ben Ur ma sasoo woon diiwaanu tundi Efrayim.
- ⁹ Ben Deker sasoo Makas ak Saalbim ak Bet Semes ak Elon Bet Anan.
- ¹⁰ Ben Keset sasoo Arubot, boole kook Soko ak mboolem diiwaanu Efer.
- ¹¹ Ben Abinadab sasoo diiwaanu Dor bépp; Tafat doomu Suleymaan di soxnaam.
- ¹² Baana doomu Ayilut sasoo Taanag ak Megido ak diiwaanu Bet San gépp, feggook Sartan, fa féete Yisreel suuf, muy diggante Bet San ba Abel Mewola, ba ca wàllaa Yogmeyam.
- ¹³ Ben Geber a sasoo woon Ramot ca Galàdd, booleek dëkk-dëkkaan ya làngu Yayir doomu Manase féetewoo woon, foofa ca Galàdd ak diiwaanu Argob ca Basan. Muy juróom benn fukki dëkk yu mag yu ñu wërale ay tata ak seeni bunt ak yeti xànjari yu koy tēj.
- ¹⁴ Ayinadab doomu Ido sasoo Maanayim.
- ¹⁵ Ayimaas ma sasoo Neftali; moom it jël na doomu Suleymaan ju ñuy wax Basmat soxna.
- ¹⁶ Baana doomu Usay boole diiwaanu Aser ak Beyalot.
- ¹⁷ Yosafat doomu Paruwa sasoo diiwaanu Isaakar.
- ¹⁸ Simey doomu Ela sasoo diiwaanu Beñamin.
- ¹⁹ Geber doomu Uri sasoo diiwaanu Galàdd, di réewum Siwon buurub Amoreen ña ak réewum Og buuru Basan. Muy benn ndawal buur bu yilif réew mooma.
- ²⁰ Waa Yuda ak Israyil dañoo bare woon, ba mel ni feppi suufas géej, di lekk, di naan, nekke mbéete.

5

¹ Ci kaw loolu Suleymaan moo yilifoon mboolem réew ya dale dexu Efraat, ba ca dëkki Filisteen ña, dem ba ca digu réewum

Misra. Ñooña di indil Suleymaan galag, nangul ko giiru dundam.

² Suleymaan daan na njéloo bés bu nekk ñeent fukki barigoy sunguf ak juróom (45), ak juróom ñeent fukki (90) barigo ci sunguf su ñagas; ³ ak fukki nag yu ñu yafal, ak ñaar fukki nagi parlu, ak téeméeri gàtt, te limaalesul xeeti kélwél yaak boroom dunq yu duuf ya. ⁴ Suleymaan moo yilifoon mboolem réew ma féete dexu Efraat sowu, dale ko ca Tifsa ba ca Gasa, muy mboolem réew ya féete dexu Efraat sowu. Jàmm ne ñoyy, féete ko wet gu nekk.

⁵ Diirub ayu Suleymaan gépp nag, waa Yudad Israyil ànd ak xel mu dal; ku ci nekk ak sa ker garabu reseñ ak sa ker garabu figg, fa dale diiwaanu Dan ba ca Beerseba. ⁶ Suleymaan amoon na ñeenti junniy (4 000) wuddi fasi watiir ak fukki junniy fas ak ñaar (12 000). ⁷ Jawriñ ya dañu daa ay-ayloo, ku nekk ak sa weer wi ngay toptoo dundub Buur Suleymaan, mook mboolem ñi mu bokkaloon njël, ba dara daawu ca ñàkk. ⁸ Peppum lors ji ànd ak ñax mi jëm ci fasi watiir yeek fasi dawkat yi itam, ku nekk ci ñoom da daan indi la ñu ko ca sas, teg ko fa mu wara nekk.

Suleymaan kenn la woon

⁹ Ci biir loolu Yàlla jagleel Suleymaan mu ñaw lool, am xel mu rafet ak xam-xamam bu yaa, bu solowoo fann yu bare ni feppi suufas géej. ¹⁰ Suleymaan rafetoon nam xel, ba sut mboolem doomi réewum penku ak mboolem waa Misra. ¹¹ Rafetoon nam xel ba raw ñépp: muy Etan Eraseen ba, di Eman, di Kalkol, di Darda, doomi Maxol yu góor ya. Turam nag siiw ca mboolem xeet ya ko wër. ¹² Léeb na ñetti junniy kàddu, woy yi mu fent épp junni. ¹³ Faramfàcce na it mbirum gàncax, dale ko ci garabu seedar gu Liban ba ci isob giy sax cib tabax. Jàngle na mbirum mala ak njanaaw ak luy raam, ba ci jën. ¹⁴ Nit ñi dañu daan jóge ci xeet yépp, di sàkkusi xelam Suleymaan mu rafet; te dañu daan bàyyikoo ci mboolem buuri àddina yi déggoon xelam mu rafet.

Suleymaan waajal na tabaxu kër Yàlla ga

¹⁵ Ba Iram buurub Tir déggée ne Suleymaan lañu fal buur, mu wuutu baayam Daawuda, ak na mu xaritoo woon ak Daawuda naka jekk, Iram daa yónnee ay ndawam ca Suleymaan. ¹⁶ Suleymaan it yónnee ca Iram, ne ko: ¹⁷ «Xam nga sama baay Daawuda manul woona tabaxal Yàllaam Aji Sax ji kër gu mu ko tudde, ndax xare yi mu séqoon ak noonam yi ko wër, ba ni leen Aji Sax ji daanele, mu teg leen tánk. ¹⁸ Léegi nag sama Yàlla Aji

Sax ji may na ma jàmm ne ñoyy, féete ma wet gu nekk, ba awma benn noon, te musiba dabu ma. ¹⁹ Fii ma nekk damaa fas yéene tabax kër, tudde sama Yàlla Aji Sax ji. Muy la Aji Sax ji waxoon sama baay Daawuda, ne ko: “Sa doom ji may def sa kuutaay ci sab jal moo may tabaxal kër, tudde ma ko.” ²⁰ Ci biir loolu ma di la ñaan, nga santaane, ñu goral ma banti seedar yu Libañ, te samay surga ànd ak say surga ci liggéey bi. Sa peyooru nit ñi dinaa la ko fey ak loo mana feyeeku, ndax yaw xam nga ne amunu ci sunu biir ñu mane yett bant ni waa Sidon.»

²¹ Ba Iram déggée li Suleymaan wax, am na ca mbéte mu réy. Mu ne: «Cant ñeel na Aji Sax ji tey jii, bi mu mayee Daawuda doom ju rafet xel, mu jiite xeet wu réy wii.» ²² Ci kaw loolu Iram yónnee ca Suleymaan, ne ko: «Dégg naa kàddu yi nga ma yóbbante. Man ci sama bopp dinaa la defal li nga bëgg lépp ci wàllu banti garabi seedar ak sippar*.²³ Samay surгаа koy diree Libañ ba ca géeg ga, rabat ko, ma jaarale ko ci géeg gi ba foo ma wax. Su ko defee ma tas ko foofa, nga yóbbu. Yaw nag nangul ma rekk li may sàkku, muy nga joxal ma sama waa kër ab dund.»

²⁴ Ba loolu amee Iram jox Suleymaan la mu bëgg ci banti garabi seedar ak sippar. ²⁵ Suleymaan ci wàllu boppam jox Iram ñaar fukki junni ak juróom ñetti (28 000) barigoy peppu bele, ak ñaar fukki barigo ak ñaar (22) ci diwu oliw gu ñu segal. Suleymaan di defal Iram noonu at mu ne. ²⁶ Bu loolu weesee Aji Sax ji mayoon na Suleymaan xel mu rafet, na mu ko ko dige woon. Jàmm it doxoon na diggante Iram ak Suleymaan, ba ñu fasante kóllère ñoom ñaar.

²⁷ Buur Suleymaan nag sas fanweeri junniy nit (30 000) ci Israyil gépp ay liggéeyi saful-bañ. ²⁸ Mu di leen yebal Libañ, weer wu nekk fukki junni (10 000) dem. Bu ñu amee Libañ weer, am seeni kër ñaari weer. Adoniram a jiite woon sas ya. ²⁹ Suleymaan sàkk juróom ñaar fukki junniy (70 000) yenukat, ak juróom ñett fukki junniy (80 000) yettkati doj ca tund ya, ³⁰ te bokkul ak ñetti junni ak ñetti téeméeri nit (3 300) ñi Suleymaan tabb, ñuy jiite liggéey bi, di saytu liggéeykat yi. ³¹ Buur santaane ñu jële fa doji tannéef yu réy yu ñuy yett, muy kenug kër Yàlla ga. ³² Ba mu ko defee tabaxkati Suleymaan ak tabaxkati Iram ak waa Gebal di yett ak a waajal bant yaak doj, ya ñuy tabaxe kër ga.

6

Suleymaan tabax na kër Yàlla ga

¹ Ca ñeenti téeméereelu at maak juróom ñett fukk (480), gannaaw ba bànni Israyil génnee réewum Misra, ca ñeenteelu atu nguug Suleymaan, ci weeru Siw, di ñaareelu weeru at ma*, ca la Suleymaan tàmbalee tabax kër Aji Sax ji.

² Kër gi Buur Suleymaan tabaxal Aji Sax ji, juróom benn fukki xasab† la guddaay bi am, yaatuwaay bi di ñaar fukki xasab, taxawaay bi di fanweeri xasab. ³ Buntu néeg bu mag bi ab dëru biti la jàkkaarloop, yaatuwaayu dër bi di ñaar fukki xasab, tollook yaatuwaayu kër gi. Guddaayam féete ci kanam kër gi, yokke guddaayu kër gi fukki xasab. ⁴ Mu defal miiri kër gi ay palanteer yu am feguwaay yu ñu we ay caax. ⁵ Mu tabax ay taax yu sës ca ñetti miiri kër gi. Taax yi dar ñaari miiri néeg bu mag bi ak miiru néegu biir bu sell bi ci gannaaw. Taax yi def ay néeg yu ndaw. ⁶ Taax mi féete suuf juróomi xasab mooy yaatuwaayam, taax mi ci tegu di juróom benni xasab. Taaxum kaw mi am yaatuwaayu juróom ñaari xasab; ndax dañooy bàyyi ay teguy làcc ci miiri kër gi, ngir xaddi taax yi baña jàpp ci miiri kër gi.

⁷ Kër ga, ba ñu koy tabax ay doj lañu ko tabaxe, muy doj yu ñu yett fa ñu ko jële ba noppi, moo tax du saddu, du sémmeñ mbaa lenn luy jumtukaayu weñ bu ñu dégg mu dal, diir ba ñuy tabax kër ga.

⁸ Buntu taax mi ci suuf ma nga féete woon ndijoor, nit mana jaare ci ay déggastal, yéeg jáll ci taaxum digg mi, jóge ci taaxum digg mi, jáll ci taax mi ci kaw.

⁹ Suleymaan tabax kër gi ba noppi, xadde ko dénki garabi seedar ak galluy seedar. ¹⁰ Taaxi kaw yi wër kër gépp, bu ci nekk juróomi xasab la def taxawaayam, lékklee ko peeri garabu seedar, ba mu sës ca kër ga.

¹¹ Ci biir loolu kàddug Aji Sax ji dikkal Suleymaan. Mu ne ko: ¹² «Kër gii de yaa ngi koy tabax. Waaye soo sàmmee samay dogal ak samay ndigal, di jéfe sama santaane yépp, di ci topp, su boobaa dinaa sottal li ma digoon sa baay Daawuda ci sa mbir. ¹³ Dinaa dëkk ci digg bànni Israyil, te duma dëddu Israyil, sama ñoñ.» ¹⁴ Ba mu ko defee Suleymaan tabax kër gi, ba sottal ko.

Liggéey nañu biir kër gi

¹⁵ Fa féete biir nag, mu lale miir yi xànqi seedar, dale ko ci suuf ba ci xadd bi. Dafa lal biir kër gi bant, lal dër bi xànqi sippar.

* 5:22 5.22 sippar garab la gu xeetook filaawo. * 6:1 6.1 weeru Siw moo yemook awril, jàpp me. † 6:2 6.2 xasab mooy guddaayu loxo, diggante catu baaramu digg ak conc.

¹⁶ Báyíi na itam ñaar fukki xasab ci biir kër gi ci gannaaw, muy néeg bu mu lale banti seedar ci suuf ba ci xadd bi ci kaw. Mu sàkk ko ci biir kër gi, mu dib néegu biir bu sell, di bérab bu sell baa sell. ¹⁷ Ñeent fukki xasab yi ko féete kanam di néeg Yàlla bu mag bi. ¹⁸ Banti seedar yi lale ci biir kër gi, dees cee yett ay nataali koog ak tóor-tóor yu focci; lépp di bantu seedar, ba xeer feeñul.

¹⁹ Néeg bu sell baa sell ca biir kër ga ca biir-a-biir la waajal, ngir yeb fa gaal gay def àlluway kóllérey Aji Sax ji. ²⁰ Néeg bu sell baa sell amoon na guddaayu ñaar fukki xasab, yaatuwaay ba di ñaar fukki xasab, taxawaay ba di ñaar fukki xasab; Suleymaan xoob ko wurusu ngalam. Sarx-alukaayu seedar ba jàkkaarlook néeg ba, moom it xoob na ko wurusu ngalam. ²¹ Ci biir loolu Suleymaan xoob biir néeg Yàlla ba wurusu ngalam. Mu tàllal ay cállalay wurus fi kanam néeg bu sell baa sell, ²² daldi xoob ci biir wurus ba mu daj.

Sarxalukaayu néeg bu sell baa sell, lépp la xoob wurus.

²³ Ci kaw loolu mu sàkk ca biir néeg bu sell baa sell ñaari malaakay serub yu ñu yette bantu oliw, jëmm ju ci nekk am taxawaayu fukki xasab. ²⁴ Benn serub bi laaf mu ci nekk juróomi xasab la, muy fukki xasab ci catal menn laaf mi ba ca catal laaf ma ca des. ²⁵ Fukki xasab it mooy taxawaayu ñaareelu serub bi, ndax ñaari serub yee tolloo dayo, bokk bind; ²⁶ taxawaayub serub bu ci nekk fukki xasab la.

²⁷ Suleymaan teg serub ya ca digg néeg bu sell baa sell, seeni laaf fireeku, catal laafu benn serub bi di laal genn wetu tabax bi, catal laafu serub ba ca des di laal geneen wetu tabax bi. Seen ñaari cati laaf yi ci des it di laale fa tollook digg néeg ba. ²⁸ Mu teg ca xoob serub yi wurus.

²⁹ Mu yettlu nag ay serub ci kaw miiri ñaari néegi kër gi, yettaale garabi ron aki tóor-tóor yu focci, wërale. ³⁰ Xoob na itam dëru tabax bi wurus, ci néegu biir bi ak ci biti.

³¹ Buntu néeg bu sell baa sell, kubeeri banti oliw la ko def, njëel bunt bi aki jënam bant lañu yu bindoo juróomi wet. ³² Ñaari kubeer yi banti oliw la; mu yettlu ca kawam ay malaakay serub aki ron aki tóor-tóor yu focci, ba noppi xoob lépp wurus, xoobaale serub yi wurus ak ron yi itam. ³³ Noonu it la def buntu néeg bu mag bi, ay jënam di bantu oliw, waaye bunt bi, jëwam aki jënam, bant lañu yu bindoo ñeenti wet. ³⁴ Ñaari kubeeram di bantu sippar, bu ci nekk di ñaari xàñq yuy

warangiku. ³⁵ Mu yettlu ci kaw kubeeri bunt yi jëmme serub aki ron aki tóor-tóor yu focci, daldi xoob lépp wurus.

³⁶ Suleymaan tabaxe miiru èttu biir bi ay xeeru yett ak xàñqi seedar, ba ñetti sésalantey xeer yu tegloo yu ne, benn sésalanteb xàñqi seedar tege ca.

³⁷ Ca ñeenteelu atu nguug Suleymaan, yemook ñaareelu weer wa, di weeru Siw, ca lañu teg kenug kër Aji Sax ji. ³⁸ Ca fukkeelu at maak benn, yemook juróom ñetteelu weer wa, di weeru Bul†, ca la kër ga sotti, mook mboolem la ca bokk ak na mu wara bindoo lépp. Suleymaan tabax na kër ga ci juróom ñaari at.

7

Suleymaan tabax na kërám

¹ Kërúg boppam nag, Suleymaan tabax na ko ci fukki at ak ñett, doora sottal kërám gépp. ² Ma nga jékka tabax kër ga ñuy wooye Gottub Libañ. Guddaay bi di téeméeri xasab, yaatuwaay bi di juróom fukki xasab, taxawaay bi di fanweeri xasab, def ñeenti sàppey jëni seedar yu yenu ay gálluy seedar yu ñu yett. ³ Ñu teg ay banti seedar ci kaw gállu, yi jën yi yenu: muy ñeent fukki gállu ak juróom, sàppe bu nekk fukki gállu ak juróom. ⁴ Mu am ñetti sésalantey palanteer yu ñu fege ay laat te ñu dékkaarloo ñett-ñett. ⁵ Bunt yépp ànd ak seen banti feguwaay, bunt bu ci nekk def ñeenti wet yu janoo màkk ñaar-ñaar; bunt yi sésaloo te dékkaarloo ñett-ñett.

⁶ Ci biir loolu mu defar néeg ba ñuy wooye Néegu jëni kenu ya. Guddaay bi di juróom fukki xasab, yaatuwaay bi di fanweeri xasab, ak beneen néeg ci kanamam, mu ànd ak ay jëni kenoom ak xaddam bu mbaari ci kanam. ⁷ Mu tabax néeg ba ñuy wooye Néegu ngàngune ma walla Àttekaay ba, mu di fa àttee. Mu dare néeg bi banti seedar ci suuf ba ci kaw.

⁸ Kërám ga mu dëkk it, ñu tabaxe ko noonu ci gannaaw Néegu ngàngune ma. Suleymaan teg ca tabaxal soxnaam doomu Firawna ja geneen kër gu nirook kërám.

⁹ Tabax yooyu yépp biir ak biti xeeru tànnéef yu ñu yett la, natt ko, xacc ko, rattaxal, dale ko ci kenu gi, ba ci cati xadd bi ci kaw, daleeti ci biti ba ci ètt bu mag bi. ¹⁰ Ñu defare kenu yi xeeru tànnéef yu mag; yii di fukki xasab, yii di juróom ñetti xasab. ¹¹ Xeer yi tege ci kenu gi, xeeru tànnéef la yu ñu yett, natt ko, yemale, booleek banti seedar. ¹² Miiru ètt bu mag bi dees koo wëralee ay xeeru yett aki xàñqi seedar: ñetti sésalantey xeer yu tegloo yu

† 6:38 6.38 weeru Bul moo yemook oktoobar, jàpp nowàmbar.

ne, benn sésalanteb xànqi seedar tege ca. Mu mel ni na ñu def èttu biir bu kër Aji Sax ja ak dëru buntu kër ga.

Tëgg ba def na wàllam

¹³ Ci kaw loolu Buur Suleymaan yónnee, jëli ca Tir ku ñuy wax Uram*. ¹⁴ Doomu jëtun la woon, bokk ci giirug Neftali. Baayam dëkkoon Tir†, di tëggub xànjär. Uram di ku xareñ lool, rafet xel te mane mboolem liggéeyu xànjär. Mu dikk ca Buur Suleymaan, liggéeyal ko la ñu ko sant lépp.

¹⁵ Mu móol ñaari xeri xànjär, wu ci nekk am taxawaayu fukki xasab ak juróom ñett, te wu ci nekk buumu fukki xasab ak ñaari a koy ub. ¹⁶ Ci biir loolu mu defar ñaari boppi xànjär yu mu xelli, teg ko ci kaw xer yi, bopp bu ci nekk am taxawaayu juróomi xasab. ¹⁷ Bopp yi ci kaw xer yi, bu ci nekk da koo rafetale ab caaxu cállala, bopp bu ci nekk am ci juróom ñaari. ¹⁸ Mu defar ñaari jaray gërënaat, solal ko caax yi, wëralee ko bopp yi, ci xer wu ci nekk. ¹⁹ Bopp yi nekkoon ci kaw xer yi ci kanam nag bindoo ni lëppi tóor-tóor te bu ci nekk di ñeenti xasab. ²⁰ Bopp yi ci kaw ñaari xer yi, bu ci nekk ñaari tééméeri gërënaat a ko wër ci kaw, feggook gamb bi ci wàllaa caax bi.

²¹ Mu samp jën yi ci kanam bunt néeg Yàlla bu mag bi; samp jënu ndijoor wi, tudde ko Yakin (Kiy taxawal), samp jënu càmмоñ wi, tudde ko Bowas (Kiy dooleel). ²² Kaw xer yi ay lëppi tóor-tóor yu ñu xellee ci tege. Liggéeyu xer ya daldi sotti.

²³ Ba mu ko defee Uram móol mbalkam njàpp mu weñ, ñu di ko wax Géej ga. Mbalka ma daa mërgalu, yaatoo fukki xasab, catu omb ba catu omb, taxawaay ba di juróomi xasab, ag buumu fanweeri xasab di ko ub. ²⁴ Ay gamb la ko sàkkal ci suufu kéméj gi, fukki gamb tollook xasab. Mu def gamb yi ñaari caq yu wër mbalka mi ba mu daj te ànd ak mbalka mi ci benn xelli. ²⁵ Mbalkam njàpp mi tege ci kaw fukki jëmми nag ak yaar; ñett jublu bėj-gàннаar, ñett jublu sowu, ñett jublu bėj-saalum, ñett jublu penku. Mbalka mi war nag yi, seeni gannaaw fèete biir, ñoom ñépp. ²⁶ Dëllaayu mbalka mi yaatuwaayu loxo la, kéméj gi mel ni gëmмиñu kaas, di nirook lëppi tóor-tóor. Naar tééméeri barigo la mbalka miy def. (200).

²⁷ Mu daldi sàkk fukki watiiri rootukaayi xànjär, wu ci nekk am guddaayu ñeenti xasab, yaatuwaayam di ñeenti xasab, taxawaayam di ñetti xasab. ²⁸ Ni ñu defare rootukaayi yi nii la: ay wetam lañu defare làcci xànjär, lëkklee làcc yi ay la. ²⁹ Muy

làcc yu Uram yett ci kawam ay gaynde, ay nag ak malaakay serub. Kaw laati yitam am na ci nataal yi. Mu yett ay caqi tóor-tóor yuy lang ci suufu gaynde yeek nag yi. ³⁰ Rootukaayu bu nekk am na ñeenti mbegey xànjär yu ñu lëkklee yeti xànjär. Mu am ay kenu yu ñu xellil rootukaayi bi ci ñeenti koñam, kenu yi yenu benn bagaan te am ay nataali tóor-tóor. ³¹ Gëmмиñu rootukaayu bu nekk amoon na omb bu mërgalu bu bagaan ndox biy tege. Xóotaayu gëmмиñ gi di xasab, yaatuwaayi bi di xasab ak genn-wàll. Ñu yett ci kaw gëmмиñ gi ay nataal ba tey. Rootukaayi bi mërgaluwul, waaye daa bindoo ñeenti wet yu janoo màkk ñaari-ñaari te yem kepp. ³² Ñeenti mbege yi ronu làcc yi, tóori weñ yi ci wewe sax ci rootukaayi bi. Mbege mu ci nekk am na taxawaayu xasab ak genn-wàll. ³³ Mbege yi bindoo ni mbegey watiiri xare. Tóor yeek mbege yi ak sidditi mbege yi ak ñanku yi, xànjär lañu ko xellee. ³⁴ Ñeenti kenu yi ci ñeenti koñi rootukaayi bi, bu ci nekk dees koo xelleendook weti rootukaayi yi, ba lépp di benn. ³⁵ Kaw boppu rootukaayu bu nekk, kéméj gi mërgaloo fèete ci kaw, taxawaayam di genn-wàllu xasab, njàppu yeek làcc yi sax ci, lépp di benn. ³⁶ Fi amul dara ci kaw njàppu yeek làcc yi, mu ñaas ci ay nataali serub aki gaynde aki garabi ron yu ñu wërale ay caqi tóor-tóor. ³⁷ Noonu la Uram defare fukki rootukaayi yi. Lépp bokk móol, yem dayo te bokk biind.

³⁸ Mu defar itam fukki bagaan xànjär; bagaan bu ci nekk tollook ñeenti xasab, di def lu xawa tollook juróomi barigo; bagaan bu ci nekk tegu cib rootukaayi, ba fukki rootukaayi yi daj.

³⁹ Ba mu ko defee mu taaj juróomi rootukaayi fa fèete kër Yàlla ga ndijoor ak juróomi rootukaayi fa fèete kër ga càmмоñ. Mu teg mbalkam jàpp mi fa fèete kër ga ndijoor, ca wetu bėj-saalum, jàpp penku.

⁴⁰ Iram sàkk itam ndaw yu ndaw yi ak ñiitukaayi yi ak kelli tuurukaayi yi.

Ci kaw loolu Iram sottal mboolem liggéey ba mu liggéeyal Buur Suleymaan ca kër Aji Sax ji: ⁴¹ muy ñaari jën yi, ak ñaari gamb yiy boppi jën yi, ak ñaari caaxi cállala yiy muur ñaari gamb yi, ⁴² ak ñeenti tééméeri gërënaat yiy ànd ak ñaari caax yi; caax bu nekk, ñaari caqi gërënaat, ñu dar ñaari gamb yiy boppi xer yi; ⁴³ ak fukki rootukaayi yi ak fukki bagaan yi ci kaw rootukaayi yi. ⁴⁴ Mbalkam jàpp mi it ci la, ak fukki nag ak yaar yi ronu mbalkam

* 7:13 7.13 Uram mooy Iram ba tey. Seetal it aaya 40 ak 45. † 7:14 7.14 Tir ab dëkk la bu bokkul ci Israyil.

jàpp mi. ⁴⁵ Bagaan yu ndaw yi bokk na ci, ak ñiitukaayi yi ak këll yi. Mboolem yooyu jumtukaayi kër Aji Sax ji, xànjari bu ñu jonj la Buur Suleymaan sant Uram, mu defaree ko. ⁴⁶ Ca joorug Yurdaan la ko Buur xellilu, ci móoli ban, diggante Sukkóot ak Sartan. ⁴⁷ Suleymaan daldi bàyyi jumtukaayi yépp noonu, ndax na mu baree lool, ba natteesul diisaayu xànjari ba ca dem.

⁴⁸ Gannaaw loolu Suleymaan defarlu na mboolem yeneen jumtukaayi kër Aji Sax ji: muy sarxalkaayu wurus ba, ak taabal ja ñuy teg mburum teewal ma[†] ⁴⁹ ak tegukaayi lãmpi wurusu ngalam yi, juróom ci wetu ndijoor, juróom ci wetu càmmoñ, fi kanam néeg bu sell baa sell; tóor-tóor yi ak lãmp yi ak ñiim yi, lépp di wurusu ngalam. Te it ngoosi wurus yi bunti néeg bi wewe, ñu di fa jaare dugg ca bérab bu sell baa sell, ak ngoosi wurus yi beneen buntu néeg bi wewe, ñu di fa jaare dugg ci néeg Yàlla bu mag bi, lépp wurus la.

⁵¹ Ba loolu amee, mboolem lu Buur Suleymaan liggéeyal kër Aji Sax ji daldi sotti. Mu boole xalis baak wurus waak jumtukaayi ya baayam Daawuda sellalaloon Aji Sax ji, yeb ko ca denc ya def alali kër Aji Sax ji.

8

Sancal nañu gaalu Yàlla ga

¹ Ba mu ko defee Suleymaan woolu magi Israyil. Mboolem kilifay giiri Israyil ak seen njitti kër maam ya daje Yerusaleem ca moom, ngir ñu àgg Siyon, gox ba ñu naan Kër Daawuda, ba yékkatee fa gaal ga kóllérey Aji Sax ji dence.

² Waa Israyil gépp nag daje ca Buur Suleymaan, ca weeru Etanim*, ca màggalu juróom ñaareelu weer woowu. ³ Ba magi Israyil ñépp dikkee, sarxalkat ya yékkati gaal ga. ⁴ Ñu boole gaalu Aji Sax ja, ak xaymab ndaje ma, ak mboolem jumtukaayi yi sell ya ca biir xayma ba. Sarxalkat ya ak Leween ña daldi gaddu lépp. ⁵ Buur Suleymaan ak mbooloom Israyil ma daje fa moom, ñoom ñépp a nga bokk ak moom, teew. Ñu jàkkaarlook gaal ga, di rendi ay gàtt aki nag yu kenn manula lim mbaa di ko waññ, ndax bare.

⁶ Gannaaw loolu sarxalkat ya yóbbu gaalu Aji Sax ja ca bérabam, ca biir néeg bu sell baa sell, ca ron laafi malaakay

serub ya. ⁷ Ndaxte jëmme serub ya, seeni laaf daa tàllalu, tiim bérabu gaal ga, laaf ya yiir kaw gaal ga aki njàppoom. ⁸ Njàppu ya daa guddoon, ba nit mana séen cat ya te fekk ko tollu ca bérab bu sell ba, ca kanam néeg bu sell baa sell. Waaye maneesula tollu ca biti di séen cat ya. Njàppu yaa nga fa ba tey jii. ⁹ Dara nekkuloon ca biir gaal ga, lu moy ñaari àlluway doj ya ca Musaa yeboon ca tundu Oreb†, fa Aji Sax ji fase woon kóllérey ak bànni Israyil, ba ñu génnee réewum Misra.

¹⁰ Ba sarxalkat ya génnee bérab bu sell ba, niir wa daa fees kër Aji Sax ja, ¹¹ ba sarxalkat ya talatunoo liggéey, ndax leeru Aji Sax jaa nekkoon ca niir wa, niir wa feesal kër ga.

Suleymaan àddu na

¹² Ba mu ko defee Suleymaan ne: «Aji Sax ji moo noon lëndem gu fatt lay màkkaanoo.» ¹³ Mu ne Aji Sax ji: «Tabaxal naa la kër gu màgg, màkkaan mooy dëkke ba faww.» ¹⁴ Ci kaw loolu Buur Suleymaan walbatiku, ñaanal mbooloom Israyil mépp, fekk mbooloom Israyil mépp a nga taxaw. ¹⁵ Mu ne: «Cant ñeel na Aji Sax ji, Yàllay Israyil, moom mi sottale loxol boppam, la mu waxoon Daawuda sama baay ci gémmiñam, ne ko: ¹⁶ «La dale bés ba ma génnee bànni Israyil, sama ñoñ ca Misra ba tey, taamuwuma benn dëkk, ci mboolem giiri Israyil, bu ñuy tabax kër, gu sama tur di nekk. Waaye maa taamu Daawuda, ngir mu falu ci kaw Israyil sama ñoñ.» ¹⁷ La doon yéney Daawuda sama baay nag moo doon tabax kër gu mu tudde Aji Sax ji, Yàllay Israyil. ¹⁸ Teewul Aji Sax ji wax Daawuda sama baay, ne ko: «Gannaaw yaa fasoon ci sa xol, yéney tabax kër, tudde ma ko, def nga lu rafet, ngir sa yéney xol la woon. ¹⁹ Waaye du yaw yaay tabax kër gi; sa doom ju goor ju soqikoo ci sa geño, moom mooy tabax kër gi, tudde ma ko.»

²⁰ «Aji Sax ji moo sotal waxam ja mu waxoon. Wuutu naa sama baay Daawuda, toog naa ci jalub Israyil, noonee ko Aji Sax ji waxe woon. Tabax naa kër gi, tudde ko Aji Sax ji, Yàllay Israyil. ²¹ Te it sàkk naa fa bérab bu ñeel gaal gi def àlluway kóllérey Aji Sax, ji mu fasoon ak sunuy maam, ba mu leen génnee réewum Misra.»

Suleymaan yékkati na kàddug ñaan

²² Gannaaw loolu Suleymaan taxaw jàkkaarlook sarxalkaayu Aji Sax ji, fa kanam mbooloom Israyil mépp. Mu daldi

† 7:48 7.48 mburum teewal mi mooy mburu mi ñuy teewal fi kanam Aji Sax ji. * 8:2 8.2 weeru Etanim moo yemook sàttambar, jàpp oktoobar, ñu daan ca amal màggalu Mbaar ya. † 8:9 8.9 Oreb mooy Sinayi ba tey.

tállal ay loxoom asamaan, ²³ daldi ne: «Yaw Aji Sax ji Yállay Israyil, amul jenn yàlla ju mel ni yaw fa kaw asamaan mbaa ci kaw suuf si mu tiim, yaw miy sàmm kóllère ak ngor, ñeel sa jaam ñiy doxe seen léppi xol, fi sa kanam. ²⁴ Yaa sàmm kàddu ga nga waxoon sa jaam ba, Daawuda sama baay, ci sa gémmiñu bopp, te yaa sottale sab loxo, sa kàddu bés niki tey.

²⁵ «Léegi nag Aji Sax ji, Yállay Israyil, ngalla sàmmal li nga waxoon sa jaam ba, Daawuda sama baay, ne ko: “Deesu la xañ mukki ci saw askan ku góor kuy tooge jalub Israyil fi sama kanam, ndegam saw askan a ngi moytu seenu yoon, tey doxe fi sama kanam noonee nga daan doxe fi sama kanam.” ²⁶ Kon nag yaw Yállay Israyil, ngalla saxalal wax jooju nga waxoon Daawuda, sa jaam ba.

²⁷ «Waaye yaw Yàlla! Ndax yaay dëkk ci kaw suuf sax? Seetal rekk, asamaan yi ba ca asamaani asamaan ya manu laa fat, waxumalaa kër sii ma tabax. ²⁸ Waaye Aji Sax ji, sama Yàlla, rikk, teewlul li ma lay ñaan, man sab jaam, di la ko dagaan; ngalla dëggal sama yuux, te nangu ñaan gi ma lay ñaan bés niki tey. ²⁹ Yal nanga ne jàkk guddeek béccég ci kër gii, bérab bi nga noon: “Fi la sama tur di nekk,” te yal nanga dégg ñaan gi ma jublu bérab bii, di ko ñaan, man sab jaam. ³⁰ Yal nanga may nangul sama dagaan, nangul Israyil sa ñoñ. Bu ñu jubloo bérab bii, ñaan la, yal nanga ko dégge bérab ba nga dëkke ca asamaan, ba nangul leen, jéggal leen.

³¹ «Ku ñu tuumaal ne moo tooñ mo-roomam, te yoon waatloo ko ba waat war ko, bu dikkee di waatsi fi sa kanam sarxalukaay bi ci biir kër gii, ³² Su boobaa, yaw rikk dégge ko asamaan, àtte say jaam, ngir teg ki tooñ, daanub tooñ, képp añu jéfam ci kaw boppam, te nga dëggal ki am dégg, jox ko dëggam gi mu yelloo.

³³ «Bu Israyil sa ñoñ daanoo fi kanam ab noon, ndax tooñ gu ñu la tooñ, bu ñu waññikoo ci yaw, sàbbaal saw tur, ñaan, sàkku saw yiw ci biir kër gii, ³⁴ su boobaa yaw, yal nanga dégge asamaan, ba jéggale bàkkaarub Israyil sa ñoñ, te nga delloo leen ca réew ma nga joxoon seeni maam.

³⁵ «Bu asamaan téjoo, taw amul ndax tooñ gu ñu la tooñ, bu ñu jubloo bérab bii, ñaan la, sàbbaal saw tur te dëddu seen bàkkaar ndax sa mbugal, ³⁶ su boobaa yaw ngalla nangool fa asamaan, te nga jéggale sa bàkkaaruu jaam ñi, Israyil sa ñoñ. Ngalla xamal leen yoon wu baax wi ñu wara doxe te nga tawal sa suuf, si nga joxoon sa ñoñ, muy seen cér.

³⁷ «Bu xiif amee ci réew mi, mbaa mbas, mbaa gàncax gi lakk, mbaa benaat xuural ko, mbaa mu diy njéeréer mbaa soccet,

mbaa su dee congum seen noon ci seen dëkki réew mi, mbaa muy mboolem luy musiba ak mboolem jàngoro, su boobaa, ³⁸ lépp lu ciy ñaan akug tinu gu bawoo ci képp ku mu doon mbaa ci mboolem Israyil sa ñoñ, te fekk ku ci nekk ranñee mititu xolam, ba tállal ay loxoom jublook kër gii, ³⁹ su boobaa, yaw, ngalla nangoo ko asamaan, mākkaan ma nga dëkke, ba jéggale, te nga jéf ba yool ku nekk kemu mboolem ay jéfam, yaw mi xam xolam, ndax yaw donj yaa xam xolu mboolem doom aadama. ⁴⁰ Su ko defee dinañu la ragal seen giiru dund ci kaw suuf si nga joxoon sunuy maam.

⁴¹ «Te itam doxandéem bu bokkul ci Israyil sa ñoñ bu jógee réew mu sore ngir sa tur, ⁴² ndax kat dees na dégg sa tur wu réy, ak sa dooley loxo ak sa kàttanu pèrèg, bu dikkee ba jublu ci kër gii, ñaan, ⁴³ su boobaa ngalla nangool asamaan, mākkaan ma nga dëkke, te nga defal doxandéem boobu mboolem lu mu la ñaan, ndax xeeti àddina yépp xam sa tur, ngir ragal la ni Israyil sa ñoñ, te xam ne saw tur lañu tudd ci kër gii ma tabax.

⁴⁴ «Bu sa ñoñ di xarejeek seen noon, ci yoon woo leen yebal, su ñu ñaane ci Aji Sax ji, jublook dëkk bii nga taamu, ak kër gii ma tabax ngir saw tur, ⁴⁵ su boobaa ngalla nangool asamaan, seenug ñaan ak seen dagaan te nga may leen ndam. ⁴⁶ Bu ñu la moyee, nde amul nit ku dul moy, ba nga mere leen, teg leen ci loxob noon, noon ba jàpp leen, yóbbu am réewam, mu sore mbaa mu jege, ⁴⁷ bu ñu demee ba seenum xel dellusee fa réew ma ñu leen yóbbu ngàllo, ñu tuub tey sàkku aw yiw fi yaw foofa ca réewum ña leen jàpp, ne la noo moy, noo ñaaw, noo def lu bon, ⁴⁸ bu ñu waññikoo seen léppi xol, ak seen léppi jëm m ci yaw, foofa ca seen réewu noon ya leen jàpp, ba ñaan la, jublook seen réew ma nga joxoon seeni maam, jublook dëkk bi nga taamu, ak kër gii ma tabax ngir saw tur, ⁴⁹ ngalla su boobaa, nangool ca asamaan, bérab ba nga dëkke, seen ñaan ak seen dagaan, te nga sàmm seen àq, ⁵⁰ te ita nga jéggal sa ñoñ ñi la moy, jéggal leen seen mboolem tooñ yu ñu la tooñ, te may leen yërmandey ña leen jàpp, ba ñu yèrè m leen. ⁵¹ Ndax kat ñooy sa ñoñ ñi nga séddoo, génnee leen Misra, taalu xelliikaayu weñ gu ñiul ga.

⁵² «Sang bi, teewlul bu baax samay tinu ak sa tinuy mbooloom Israyil mi, ba nangul leen mboolem lu ñu la jooy, ⁵³ ndaxte danga leena ber ci biir xeeti àddina yépp, séddoo leen, te waxoon nga ko, Musaa sa jaam ba jottli ko, ba ngay génne sunuy maam Misra, yaw Boroom biy Aji Sax ji.»

Suleymaan ñaanal na bànni Israyil

⁵⁴ Ba Suleymaan noppee ñaan Aji Sax ji mboolem ñaanam ya ak dagaanam yooyu, daa siggee ca sarxalukaayu Aji Sax, ja mu sukkoon tàllal loxo ya, jublu asamaan. ⁵⁵ Mu taxaw, di ñaanal mbooloom Israyil mépp, daldi àddu ca kaw ne: ⁵⁶ «Cant ñeel na Aji Sax, ji may Israyil mbooloom ab dal-lukaay, muy la mu waxoon lépp, ngir benn baat fanaanul àll ci digey jàmm yi mu dige woon yépp, Musaa jaamam ba jottli. ⁵⁷ Yal na sunu Yàlla Aji Sax ji ànd ak nun, na mu ànde woon ak sunuy maam. Yàlla bu nu wacc mukk mbaa mu di nu dèddu. ⁵⁸ Yal na nu xiir ci boppam, muy tegu ci yoonam yépp, di jéfe ay santaaneem aki dogalam ak àttey yoonam yi mu dén-koon sunuy maam. ⁵⁹ Sama kàddu yii ma ñaan fi kanam Aji Sax ji, yal na doon lu sunu Yàlla Aji Sax ji def yitteem guddeek bëccëg. Mu di ma dëggal, man jaamam, di dëggal Israyil ñoñam, saa yu nu ko soxlaa. ⁶⁰ Su ko defee xeeti àddina yépp dinañu xam ne Aji Sax ji mooy Yàlla, te amul moroom. ⁶¹ Waaye nag joxleen Aji Sax ji sunu Yàlla seen léppi xol, ngir ngeen mana tènku ciy dogalam tey jéfe ay santaaneem ni bésub tey.»

Suleymaan daloo na kër Yàlla ga

⁶² Ba mu ko defee Buur Suleymaan ànd ak Israyil gépp, sarxe ab sarax fi kanam Aji Sax ji. ⁶³ Mu defal Aji Sax ji saraxi cant ci biir jàmm, lépp di ñaar fukki junniy nag ak ñaar (22 000) ak téeméeri junniy gàtt ak ñaar fukk (120 000). Noonu la Buur ak bànni Israyil gépp amale xewu jagleb kër Aji Sax ji. ⁶⁴ Bésub keroog Buur sellal na digg ètt ba janook néeg Aji Sax ji, ndax fa la joxe saraxu rendi-dóomal ba, ak saraxu pepp ba, ak nebbonu saraxu cant ci biir jàmm, ndax sarxalukaayu xànjari ba fa kanam Aji Sax ji moo tuutoon ci defandoo saraxu rendi-dóomal ba, ak saraxu pepp ba, ak nebbonu saraxu cant ga ci biir jàmm.

⁶⁵ Suleymaan nag amal màggal ga jant yooyu, ànd caak Israyil gépp, muy ndaje mu réy mu jóge Lebo Amat ca běj-gànnar ba ca xuru Misra ca běj-saalum, di màggalsi fi sunu Yàlla Aji Sax ji, ba mu am juróom ñaari fan, tegaat ca juróom ñaari fan, muy fukki fan ak ñeent. ⁶⁶ Bésub juróom ñetteel ba nag Buur yiwi mbooloo ma, ñu ñaanal ko, daldi dellu seeni xayma, ci biir mbégte ak xol bu sedd ci mboolem lu baax la Aji Sax ji defal Daawuda jaamam ba, ak Israyil, ñoñam.

9

Aji Sax ji feeñu na Suleymaan

¹ Ba Suleymaan noppee ci tabax kër Aji Sax ji ak kër Buur, ak mboolem nammeelam gu mu bëggoona sottal, ² la ko Aji Sax ji feeñu ñaareel bi yoon, na mu ko feeñoo woon fa Gabawon. ³ Aji Sax ji ne ko: «Dégg naa sag ñaan, ak sab dagaan. Sellal naa kër gii nga tabax, ngir teg fi sama tur ba fàww. Samay gèt ak sama xol it fi lay nekk bés bu nekk.

⁴ «Yaw nag, soo doxee fi sama kanam ni Daawuda sa baay daan doxe cig mat akug njub, di def lépp lu ma la sant, di sàmm sama dogali yoon, ak sama àttey yoon, nga di ko sàmm, ⁵ kon dinaa saxal sab jal ci kaw Israyil ba fàww, na ma ko waxe woon Daawuda sa baay, ne ko: “Doo ñàkk ku góor kuy toog ci jalub Israyil.” ⁶ Waaye su ngeen ma dèddoo ba dèddu ma, yeen ak seeni sèt, ba jéfewuleen samay santaane, sama dogali yoon yi ma leen téralal, xanaa di topp aka jaamu yeneen yàlla, di leen sujjóotal, ⁷ su boobaa maay dagge bànni Israyil fi déndu suuf si ma leen jox, te kër gi ma sellal ngir sama tur, maa koy xalab, mu sore ma, te kon Israyil mujj di tur wu ñuy léeboo ak di ko kókklee ci biir xeet yépp.

⁸ «Su boobaa kër gii dina gent te képp ku ko romb dina yéemu tey musli ci lu ni mel. Dinañu ne: “Lu tax Aji Sax ji def nii réew mii ak kër gii?” ⁹ Ñu ne: “Xanaa li ñu dèddu seen Yàlla Aji Sax, ji jéle seeni maam réewum Misra, di topp yeneen yàlla, di leen sujjóotal ak a jaamu. Moo tax Aji Sax ji teg leen musiba mii mépp.»

Buur Suleymaan jéflante naak Buur Iram

¹⁰ Ñaar fukki at yi Suleymaan tabax ñaari kër yi, kër Aji Sax ji ak kër Buur, ba mu matee ¹¹ fekk na Iram buurub Tir jox Suleymaan ay banti garabi seedar ak sippar*, ak mboolem lu mu soxla ci wurus. Buur Suleymaan nag jox Iram ñaar fukki dëkk ci diiwaanu Galile. ¹² Ci kaw loolu Iram bàyyikoo Tir, seeti dëkk ya ko Suleymaan jox, waaye dëkk ya neexu ko. ¹³ Mu ne ko: «Sama waay, dëkk yi nga ma jox nag?» Mu daldi tudde dëkk ya réewum Kabul†, mooy turam ba tey jii. ¹⁴ Iram yónnee woon na Buur fanweeri barigoy wurus ak juróom.

¹⁵ Buur Suleymaan dafa dogaloon liggéeyu sañul-bañ bu mu sas ay nit. Ñu tabax kër Aji Sax ji ak kèru boppam ak

* 9:11 9.11 sippar: seetal ci 5.22. † 9:13 9.13 Kabul man naa firi Jarul dara. ‡ 9:15 9.15 Milo xur la wu doxoon diggante kër Yàlla ga ak gox ba ñu naan Kër Daawuda. Suleymaan sékklu ko.

sëkkub Milo[†] ak tatay Yerusalem ya ak dëkk yii di Accor, Megido ak Geser. Ni mu deme nii la: ¹⁶ Firawna buuru Misra moo daloon ci kaw Geser, nangu dëkk ba, lakk ko, rey Kanaaneen ña ca dëkkoon, daldi may dëkk ba doomaan jay soxnas Suleymaan, muy yebam. ¹⁷ Suleymaan tabaxaat Geser ak Bet Oron Suuf, ¹⁸ ak Baalat ak Tamar[§] ca mändinju réew ma, ¹⁹ ak mboolem dëkki dencukaayam, ak dëkki ya watiiri xare ya dence, ak dëkki gawar ya. Lu Suleymaan nammoona tabax daal, tabax na ko ca Yerusalem ak ca Liban ak mboolem réewum kiliftefam.

²⁰ Mboolem nit ña desoon ca Amoreen ñaak Etteen ñaak Periseen ñaak Eween ñaak Yebuseen ña, ñooñu bokkul ci bànni Israyil. ²¹ Seen sèt ya leen wuutu ca réew ma, te bànni Israyil manuñu leen woota faagaagal, Suleymaan moo leen dugal ci liggéeyu njaam ak sañul-bañ, ñu nekke ko ba tey jii. ²² Waaye ñi bokk ci bànni Israyil, Suleymaan defu leeni jaam, ndax ñoom ñoo doon ay xarekatam, aki dagam aki jawriñam, ak ñiiti xareem ak boroom watiiri xareem, ak dawalkati watiiram. ²³ Noo doon itam sayukat yi yore liggéeyi Suleymaan. Amoon na juróomi téeméeri jawriñam ak juróom fukk (550) yu daan jiite nit ñiy def liggéey bi.

²⁴ Doomu Firawna ju jigéen ja nag jóge gox ba ñu naan Kër Daawuda, séyi kërug boppam ga ko Suleymaan tabaxal. Gannaaw gi la Suleymaan tabax sëkkub Milo.

²⁵ Suleymaan di def ñetti yoon cim at ay saraxi rendi-dóomal, ak saraxi cant ci biir jamm, di ko sarxal ci kaw sarxaluukaay bi mu tabaxal Aji Sax ji, boole ci di taal cuuraay ci kaw sarxaluukaay bi, fi kanam Aji Sax ji. Mu daldi matal la war ca kër Yalla ga.

²⁶ Ay gaal yu mag itam Buur Suleymaan defarlu na ko ca Esiyon Geber ga ca wetu Elat, ca tefesu géēju Barax ya, ca réewum Edom. ²⁷ Iram yebal ay nitam, ñuy mool yu xam géej. Ñuy liggéeyandook niti Suleymaan ca gaal ya. ²⁸ Ñu daldi ànd dem Ofir, jële fa téeméeri barigoy wurus ak ñaar fukk, indil Buur Suleymaan.

10

Lingeer buurub Saba seetsi na Suleymaan

¹ Ci kaw loolu Lingeeru Saba dégg rirum Suleymaan ma turu Aji Sax ji waral. Mu dikk di nattusi am xelam, di ko cax cax yu jafe. ² Mu agsi Yerusalem, ànd ak topp mu takku lool ak giléem yu sêf ay ndàbb yu xeeñ ak wurus wu baree bare ak per yu

gànjare. Ba mu dikkee ba ca Suleymaan, mboolem la mu jàppoon ca xelam la ko wax. ³ Suleymaan tontu ko ca mbir ya mu laaj yépp; amul menn mbir mu tiin Buur ba leeralalu ko ko. ⁴ Lingeer buurub Saba gis mboolem xelam Suleymaan mu rafet, ak kër ga mu tabax, ⁵ ak ñjelu kërám, ak jataayu dagam ya, ak taxawaayu surgaam ña, ak seen col ga, ak ña yor ay naanam, ak saraxi rendi-dóomal ya muy joxe ca kër Aji Sax ji. Mu daldi yéemu, ba ag noowam réer ko.

⁶ Mu ne Buur: «jêw ba ma déggoon ca sama réew ci say mbir ak sa xel mu rafet kay, dégg la! ⁷ Gëwma ko woon ba bi ma dikkee, ba teg ci samay bët. Ndeke genn-wàll gi sax waxeesu ma ko woon. Wees nga riir ma ma déggoon ci yaw, ci xel mu rafet ak alal. ⁸ Ndokklee say nit! Ndokklee sa jawriñ ñii dëkke taxaw ci sa kanam, di dégg sam xel! ⁹ Cant ñeel na sa Yalla Aji Sax ji, moom mi la bége, ba teg la ci jalub Israyil. Aji Sax ji daa sopp Israyil cofeel gu dul jeex, moo tax mu fal la buur, ndax nga saxal fi dégg ak njekk.»

¹⁰ Ba mu ko defee Lingeer buurub Saba may Suleymaan fanweeri barigoy wurus ak juróom, ak cuuraayu ndàbb lu ne gâññ, ak per yu jafe. Cuuraayu ndàbb loola Lingeer buurub Saba mayoon Buur Suleymaan, lu ni mel dikkatu fa ndax bare.

¹¹ Ci kaw loolu itam gaali Buur Iram ya daan jële wurus ca réewum Ofir, jële Ofir lu takko takku ci banti sântaal ak per yu gânjare. ¹² Buur sàkke ca banti sântaal ya, ay sèppukaayi kaw taax ngir kër Aji Sax ji, ak kër Buur ak xeeti xalam ngir woykat yi. Banti sântaal bu ni mel masu faa dikk, te giseesu ko fi ba tey jii.

¹³ Buur Suleymaan itam may Lingeer buurub Saba mboolem lu mu sàkku, te bokkewul ak la ko Suleymaan joxal boppam ca loxoom bu tàlli ba buur yellow. Ba loolu amee Lingeer buurub Saba walbatiku, ñibbim réewam, mooki surgaam.

Suleymaan bare woon na alal

¹⁴ Wurur wa daan dikkal Suleymaan cim at, diisaay ba ñaar téeméeri barigoy wurus la, ¹⁵ te limaaaleesul galag ya jóge ca jaaykat ya ak jula yaak mboolem buuri Arabi, ak jaraafi réew ma.

¹⁶ Buur Suleymaan nag sàkklu ñaar téeméeri pakk yu mag yu wurus wu ñu tégg ba mu jekk, benn bu ci nekk jël juróom benni kiloy wurus, ¹⁷ ak ñetti téeméeri pakk yu ndaw yu wurus wu ñu tégg ba mu jekk, pakk bu ci nekk di kilo ak liibarur wurus. Buur boole ko denc ca kërám ga ñuy wax Gottub Liban.

§ 9:18 9.18 Tamar dees na ko wax Tadmor ba tey.

¹⁸ Buur teg ca sàkk ngàngune mu mag mu bëñi ñay, daldi koy xoob wurus wu set wecc. ¹⁹ Juróom benni dëggastal la ngàngune ma am, wéeruwaay ba ca kaw mērgalu. Mu am loxo wet gu nekk. Loxo yaa nga feggook ñaari jëmmei gaynde yu taxaw, wet gu nekk benn. ²⁰ Mu am it fukki jëmmei gayndeek ñaar yu taxaw ca ñaari weti juróom benni dëggastal ya, ñaari gaynde séq ndëggastal lu nekk. Sàkkeesul lu ni mel ci mboolem nguur yi!

²¹ Mboolem lu Buur Suleymaan daan naane wurus la, te mboolem ndabi kēram ga ñuy wax Gottub Libañ wurusu ngalam la. Dara du ca xaaalis, ndax xaaalis jàppeesu ko woon muy dara ca janti Suleymaan. ²² Te sax ay gaal yu mag la Buur amoon, ñuy ànd ak gaali Iram, benn yoon ci ñetti at yu nekk gaal ya yeb wurus ak xaaalis ak bëñi ñay, aki golo ba ciy dāngin.

²³ Buur Suleymaan dem na ba sut mboolem buuri kaw suuf ci wàllu alal, ak ci wàllu xel mu rafet. ²⁴ Mboolem àddinaa daan wuta giseek Suleymaan, ngir taataansi xelam mu rafet mi Yàlla def cib xolam. ²⁵ Nnooñu ñoo ko daan indil at ci kaw at, ku nekk ak sab teraanga, muy ay jumtukaayi wurus ak yu xaaalis aki mbubb aki gannaay aki cuuraay aki fas aki berkelle.

²⁶ Ba mu ko defee Suleymaan dajale watiir yaak fas ya, muy junni ak ñeenti téeméeri watiir (1 400), ak fukki junniy fas ak ñaar (12 000) yu mu yebal ca dëkk ya watiir ya féete, ak ca Yerusalem ga mu nekk. ²⁷ Buur Suleymaan a def xaaalis late biir Yerusalem bay safi doj, garabi seedar di fa saf garabi sikomoor yi ne xas ci suufu tund yi. ²⁸ Fasi Suleymaan, Misra lañu leen daan jëggaanee ak Silisi*, baana-baanay buur, ca Silisi lañu leen daan jēnde. ²⁹ Ab watiir bu ñu jëggaanee Misra, indi, juróom benni téeméeri dogi xaaalis (600) la leen daan dikke, aw fas di téeméer ak juróom fukki dogi xaaalis (150), te noonu lañu ca daan jēndaaleel mboolem buuri Etteen ña ak buuri Siri, indil leen.

11

Suleymaan moy na

¹ Ci biir loolu Buur Suleymaan bëggoon na jigéeni yeneen xeet yu bare te bokkul ak doomu Firawna ji mu jëlloon: ñuy ay jigéeni Mowabean ak jigéeni Amoneen ak jigéeni Edomeen ak jigéeni waa Sidon ak jigéeni Etteen. ² Nnooñu bokk ci xeet, yi

Aji Sax ji waxoon bànni Israyil ne leen: «Buleen jëli jabar ci ñoom, ñoom it buñu takksi ci yeen, ndax kon dinañu leen dëpp, ngeen topp seeni tuur.» Teewul Suleymaan bëgg leen, taq leen. ³ Mu denc ca juróom ñaar téeméeri lingeer (700) ak ñetti téeméeri (300) nekkaale. Soxnaam ya nag dëpp ko.

⁴ Ba Suleymaan demee ba màggat, ay soxnaam xiir ko ci topp yeneen yàlla, ba wéetalul Yàllaam Aji Sax ji, na ko Daawuda, baayam wéetale woon. ⁵ Ba loolu amee Suleymaan di topp tuur ya ñuy wax Astàrt* di tuuri waa Sidon, ak Milkom, tuuru Amoneen mu siblu ma. ⁶ Mu def lu ñaaw fi kanam Aji Sax ji. Suleymaan jeexul woon ci Aji Sax ji, na baayam Daawuda jeexe woon ci moom. ⁷ Ci biir loolu Suleymaan tabaxal Kemos, tuuru Mowab mu siblu ma, ab bérabu jaamookaay ca kaw tund wa féete Yerusalem penku. Mu tabaxaaleel ca Moleg†, tuur mu siblu ma Amoneen ñay jaamu. ⁸ Mu defal noonu mboolem soxnaam ya xeetoo feneen, ñuy taalal seeni tuur cuuraay, di leen rendil ay sarax.

⁹ Aji Sax ji nag mere Suleymaan ndax la mu ko dëddu, moom Aji Sax ji, Yállay Israyil ji ko feeñu woon ñaari yoon. ¹⁰ Dafa santoon Suleymaan ci mbir moomu, ne ko bumu topp tuuri yeneen xeet yi. Waaye deful li ko Aji Sax ji santoon. ¹¹ Aji Sax ji ne Suleymaan: «Gannaaw nii nga defe, sàmmoo sama kóllère, sàmmoo sama dogal yi ma la tegoon, dinaa foqatee nguurg ci say loxo, jox ko sab surga. ¹² Waaye duma ko def ci sag dund ngir sa baay Daawuda. Ci sa loxol doom ju góor laa koy foqatee. ¹³ Te ba tēy du nguurg gépp laay foqati. Dinaa bàyyee sa doom genn giir ngir Daawuda sama jaam ba ak Yerusalem gi ma tánn.»

Ay noon jógal nañu Suleymaan

¹⁴ Ba mu ko defee Aji Sax ji gemb ab noon bu jógal Suleymaan. Muy Adàdd, Edomeen ba askanoo ca buurub Edom. ¹⁵ Ba Daawuda di xareek waa Edom te Yowab njiital xareem demoon di suuli néew ya, Daawuda daa reyoon góori Edomeen ña ñépp. ¹⁶ Yowab ak Israyil gépp toog fa juróom benni weer, ba keroog ñu rey góori Edomeen ñépp. ¹⁷ Ci biir loolu Adàdd ànd ak ay Edomeen ñu bokkoon ci dagi baayam, daldi daw jēm Misra. Booba Adàdd xale bu góor bu ndaw la woon. ¹⁸ Ñu jóge Majan, dem Paran, ànd ak ay waa Paran dem

* 10:28 10.28 Silisi mooy Kewe ba tēy. * 11:5 11.5 Astàrt tuur mu jigéen la woon bu ay xeeti penku daan jaamu. Ñu yaakaaron ne dina leen may, ñu jur doom yu bare, seeni jur ak seeni tool it, lépp nangu ba bare. Ñu jàppoon ne Astàrt mooy jabaru tuur ma ñu naan Baal. † 11:7 11.7 Moleg ak Milkom jàpp nañu ne benn la.

Misra, ca Firawna buuru Misra. Firawna jox Adàdd suuf, may ko kër akub dund. ¹⁹ Firawna dafa bëggoon Adàdd lool, ba may ko jabar rakki Lingeer Tapenes, jabari boppam. ²⁰ Rakki Tapenes ja am ak Adàdd doon ju góor, di Genubat; Tapenes yor ko ca biir kër Firawna, Genubat nekk ak doomi Firawna, ca biir kër Firawna. ²¹ Ci kaw loolu Adàdd dégge fa mu nekk ca Misra ne Daawuda nelaw na, fekki ay maamam, te Yowab njiital xare la it dee na. Adàdd ne Firawna: «Yiwi ma, ma dellu sama réew.» ²² Firawna ne ko: «Ana loo ñàkk fii ci man, ba bëgga dellu nii sam réew?» Adàdd ne ko: «Du dara sax de, xanaa bëgg rekk, nga yiwi ma, ma dem.»

²³ Yàlla dellu gemb ab noon bu jógal Suleymaan. Muy Reson doomu Eliyada ma dawee woon ca Adadeser buurub Soba, sangam ba. ²⁴ Mu boole ay farandoom, ànd ak ñoom, jiite leen gannaaw ba Daawuda faagaagalee xarekati sangam. Ñu dem sanc Damaas, moom ko. ²⁵ Reson nag moo noonoo woon Israyil diir ba Suleymaan di dund, dollu ca la leen Adàdd lèjal. Ci kaw loolu Reson falu ca Siri, di bañaaleb Israyil.

²⁶ Keneen ku jógal Buur Suleymaan di Yerbowam doomu Nebat, Efraymeen bu dëkk Cereda, ndeyam tudd Ceruya, dib jétun. Ma nga bokkoon ca jawriñi Suleymaan. ²⁷ Ni mu jógale Buur nii la: Suleymaan da doon yékkati sèkkub Milo ba[‡], di fatt tatay gox ba ñu naan Kër Daawuda miy baayam. ²⁸ Booba Yerbowam xalelu góor bu jàmbaare la woon. Suleymaan jot koo nemmiku ci biir liggéeyam, ba tax mu tabb ko ca kaw mboolem liggéeykati sañul-bañ, ya askanoo ca Yuusufa.

²⁹ Mu am bés Yerbowam doon génne Yerusalem. Axiya, yonent bu dëkk Silo ba, dajeeek moom ca yoon wa. Ma nga sol mbubb mu bees. Ñoom ñaar rekk ci àll bi. ³⁰ Axiya daldi jàpp ci mbubb mu bees mi mu sol, ne ko tareet, dagg ko fukki dog ak ñaar. ³¹ Mu ne Yerbowam: «Jëlalal fii sa bopp fukki dog, ndax Aji Sax ji Yállay Israyil da ne: “Gisal, maa ngi dagge nguur gi ci loxol Suleymaan, te dinaa la ci jox fukki giir. ³² Waaye genn giir gi Suleymaan a koy moom ngir Daawuda sama jaam ba, ak Yerusalem, dëkk ba ma tanne ci mboolem giiri Israyil. ³³ Li ko waral mooy dañu maa dëddu, di jaamu Astàrt, tuur mu jigéen mu waa Sidon di jaamu, ak Kemos, tuuru Mowabeen ñi, ak Milkom, tuuru Amoneen ñi. Dañoob baña topp samay yoon, baña def li ma rafetlu, di sàmm samay dogal ak sama àttey yoon, na

ko Daawuda baayu Suleymaan daa defe. ³⁴ Waaye duma jële nguur gépp ci loxoom, ndaxte dama koo def njiit giiru dundam gépp ngir Daawuda sama jaam ba ma tànnal sama bopp, te mu doon jéfe samay santaane ak samay dogal. ³⁵ Du tee ma nangoo nguur gi ci loxol doomam ju góor, jox la ci fukki giir. ³⁶ Doomam nag dinaa ko jox genn giir gi ci des, ngir askanu Daawuda, sama jaam ba, baña fey mukk sama kanam ci biir Yerusalem, dëkk bi ma tànnal sama bopp, dëel fa sama tur. ³⁷ Yaw dinaa la jël, def la nga jiite fépp foo bëgg, di buurub Israyil. ³⁸ Te soo defee mboolem li ma la sant, topp samay yoon, di def li ma rafetlu tey jéfe samay dogal ak samay santaane, na ko Daawuda sama jaam ba daa defe, su boobaa dinaa ànd ak yaw te dinaa la sampal kër gu sax, ni ma ko sampale woon Daawuda, te dinaa la jox Israyil. ³⁹ Kon dinaa torxal askanu Daawuda waaye du doon ba fàww.”»

⁴⁰ Ba mu ko defee Suleymaan di fexee rey Yerbowam; Yerbowam daw ba Misra, fa Sisag buuru Misra. Mu toog foofa ca Misra, ba Suleymaan nelaw.

Suleymaan nelaw na

⁴¹ Li des ci mbiri Suleymaan ak mboolem lu mu def ak lu jëm ci xelam mu rafet, bindees na lépp moos ca téere ba ñu dippee Jaloorey Suleymaan. ⁴² Àpp bi Suleymaan nguuru fa Yerusalem, ci kaw Israyil gépp, ñeent fukki at la. ⁴³ Gannaaw loolu Suleymaan tédd, fekki ay maamam. Gox ba ñuy wax kër Daawuda baayam, fa lañu ko denc, doomam Robowam falu buur, wuutu ko.

Réew ma xàjjalikoo na

(Saar 12.1—22.54)

12

Israyil jàmbo na Robowam

¹ Ba loolu amee Robowam dem dëkk ba ñuy wax Sikem, ndax fa la Israyil gépp dajee woon, ngir fal ko buur. ² Yerbowam doomu Nebat dégge ko ca Misra ga mu dawoon dem, di fa làqu Buur Suleymaan, te toogoon foofa ca Misra ba booba. ³ Waa giiri bėj-gànnar woolu ko, ñu daldi ànd mook mboolo mépp ca Robowam. Ñu ne ko: ⁴ «Sa baay da noo tegoon njaam gu metti. Léegi yaw dangay woyofal sunu liggéey bu metti bi nu sa baay sèf, te yolomal buumu njaam gu teen gi mu nu gáll, kon nu jaamu la.» ⁵ Mu ne leen: «Demleen ba mu am ñetti fan, ngeen délsi.» Mbooloo ma dem.

[‡] **11:27** 11.27 Milo xur la wu doxoon diggante kër Yàlla ga ak gox ba ñu naan Kër Daawuda. Suleymaan sèkklu ko.

⁶ Buur Robowam giseek mag ña daa taxawu Suleymaan baayam ba muy dund. Mu ne leen: «Lu ngeen may digal, ma wax ko mbooloo mii?» ⁷ Ñu ne ko: «Soo nangulee tey mbooloo mii, déggal leen, wax leen kaddu yu rafet, say jaam lañuy doon ba faww.»

⁸ Robowam nag dégluwul waxi mag ña, xanaa dem giseek xale yu góor, ya mággandoo ak moom te di ko taxawu. ⁹ Mu ne leen: «Lu ngeen may digal ma wax ko mbooloo mii ne ma, ma yolomal buumu njaam gi leen sama baay gálloon?»

¹⁰ Xale yu góor ya mu mággandoo ne ko: «Mbooloo mii ne la sa baay da leena gálloon buumu njaam gu teen, waaye yaw yolomalal leen ko; li nga leen di wax mooy lii: “Sama baaraamu sanqleeñ moo géna diis sama tánku baay. ¹¹ Sama baay a leena tegoon njaam gu metti, waaye man maay yokk seen njaam, ba mu géna metti. Te sama baay ay yar la leen daan cawe, waaye man ay leraw yu ñu kor weñ laa leen di cawe.”»

¹² Ñetteelu bés ba Yerbowam ànd ak mbooloo ma mépp, dellu ca Robowam, noonee leen ko Buur waxe woon ne leen ñu dem ba mu am ñetti fan, ñu délsi. ¹³ Buur tontu mbooloo ma kaddu gu ñagag, bàyyi la ko mag ña digaloon. ¹⁴ Na ko xale yu góor ya digale la waxeek ñoom, ne leen: «Sama baay a leen tegoon njaam gu metti, waaye man maa koy yokk, mu géna metti. Te sama baay ay yar la leen daa cawe, waaye man ay leraw yu ñu kor weñ laa leen di cawe.» ¹⁵ Noonu la Buur tanqamloo mbooloo ma, te Aji Sax ji moo walbatee noonu mbir ma, ngir amal wax, ja mu waxoon Yerbowam doomu Nebat, Axiya waa Silo ba jottli.

¹⁶ Ba Israyil gépp gisee na leen Buur tanqamloo, dañu koo tontu ne ko: «Ana lu nu bokk ak Daawuda, lu nu séq ak doomu Yese? Bànni Israyiloo, ca seeni xayma! Yaw askanu Daawuda, xoolalal sa bopp sa kër.»

Ba mu ko defee bànni Israyil dellu ca seeni xayma; ¹⁷ Teewul bànni Israyil ya dékkoon ca dékki Yuda, Robowam wéy di seen buur. ¹⁸ Ci kaw loolu Buur Robowam yónni Adoram may sase liggéeyi sañul-bañ ya. Teewul Israyil gépp bokk dóor ko ay doj ba mu dee. Buur Robowam daldi gaaw war watiir, daw làquji Yerusaleem. ¹⁹ Noonu la Israyil fippoo ci kaw waa kër Daawuda ba sunu jonni yállay tey.

²⁰ Ci biir loolu Israyil gépp dégg ne Yerbowam délsi na; ñu woote ndaje, woo ko ca, fal ko buurub Israyil gépp. Kenn farul ak waa kër Daawuda, lu moy waa giirug Yuda donj.

²¹ Ci kaw loolu Robowam agsi Yerusaleem, daldi woo waa kër Yuda gépp, ñook giirug Beñamin, ñu daje di tééméer ak juróom ñett fukki junniy nit (180 000), diy ñeyi xare. Ñu nara xareek waa kër Israyil, ngir delloo nguur ga ca loxol Robowam doomu Suleymaan.

²² Ci biir loolu kaddug Yàlla dikkal góoru Yàlla gu ñuy wax Semaya. Mu ne ko: ²³ «Waxal Robowam doomu Suleymaan buurub Yuda, ak waa kër Yudad Beñamin ak mbooloo ma ca des, ne leen: ²⁴ “Aji Sax ji dafa wax ne: Buleen jóg di xeex ak seen bokki bànni Israyil. Na ku nekk ñibbi kéram, ndax ci man la mbir mii sababoo.”» Ñu dégg kaddug Aji Sax ji, walbatiku dem, noonee ko Aji Sax ji waxe.

Buurub Israyil bokkaale na

²⁵ Gannaaw loolu Yerbowam tabaxaat Sikem, dékk ba ca diiwaanu tundi Efrayim, daldi fay dékk. Mu jóge foofa tabaxaat dékk ba ñuy wax Penuwel. ²⁶ Yerbowam nag di wax ca xelam naa: «Léegi nguur gi dellu ci loxol waa kër Daawuda. ²⁷ Bu mbooloo mii demee di sarxali ca kër Aji Sax ji ca Yerusaleem, seen xol dina walbatiku ne napp ca seen sang, Robowam buurub Yuda. Su ko defee ñu rey ma, dellu ca Robowam buurub Yuda.»

²⁸ Ci kaw loolu Buur seetluwaat mbir ma, daldi sàkklu ñaari wélluy wurus. Mu ne mbooloo ma: «Yeen waa Israyil, bare ngeen lu ngeen di jaabante yoonu Yerusaleem. Xool-leen fii kay! Seen yàlla ya leen génne woon réewum Misraa ngi.» ²⁹ Ba loolu amee mu teg wenn wéllu wa ca dékk ba ñuy wax Betel, wa ca des mu tegi ko ca Dan. ³⁰ Mbir moomu doon bàkkaar. Mbooloo ma dox jiitu wenn wéllu wa, ba àgg Dan. ³¹ Ci kaw loolu Yerbowam tabax ay bérabi jaamookaay, ba noppi tabb ay sarxalkat ci baadoolo yu bokkul ci askanu Lewi.

³² Ba mu ko defee Yerbowam dogal mággalug fukki fan ak juróom ca weeru juróom ñetteel wa. Mu mel ni mággal gay am Yuda. Yerbowam rendi ay sarax ca sarxalukaay ba. Noonu la def Betel, rendil fa ay sarax wéllu ya mu defarlu woon, defal ko wéllu ya sarax. Ci biir loolu mu tabb ca Betel ay sarxalkat ngir bérabi jaamookaay yooyu mu sos. ³³ Nii la rendee ay sarax ca kaw sarxalukaay ba mu sàkklu ca Betel, ca fukki fan ak juróom ca weeru juróom ñetteel wa, muy weer wu mu tànnal boppam. Ba mu ko defee mu dogalal waa Israyil mággal googu, daldi yéeg ca kaw sarxalukaay ba, ngir taal fa sarax su ñuy lakk.

13

Nitu Yàlla àddu na ca Betel

¹ Yàlla-woo-yàlla, genn góoru Yàlla jóge Yuda, dikk ba Betel ci ndigalal Aji Sax ji, fekk Yerbowam taxaw ca sarxaluqaay ba, nara taal saraxu cuuraay. ² Góor ga xaacu, gédd sarxaluqaay ba ci ndigalal Aji Sax ji, daldi ne: «Yaw sarxaluqaay bi, éey sarxaluqaay bii! Aji Sax ji dafa wax ne: «Xamal ne doom ju góor dina juddoo kër Daawuda, Yosya lay tudd. Sarxalkati bérabi jaamookaay yiy taal saraxu cuuraay ci sa kaw, ñoom lees di rendi ci sa kaw. Yaxi nit lees di lakk ci sa kaw.»» ³ Góor ga joxe na ca bésub keroog ab takk; mu ne: «Takk bii la ci Aji Sax ji biral: «Seetluleen, sarxaluqaay bi dina xar ñaar, dóom bi ci kaw sottiku.»»

⁴ Naka la Buur Yerbowam dégg na góoru Yàlla ga xaacoo, gédd sarxaluqaayu Betel ba, mu daldi koy tállal loxoom, foofa ca sarxaluqaay ba. Mu ne: «Jäppleen ko!» Loxo ba mu ko tállal nag ne kádd, manatu koo bank. ⁵ Sarxaluqaay ba xar ñaar, dóom ba tuuroo ca sarxaluqaay ba, ne wàww. Muy takk ba góoru Yàlla ga joxe woon ci ndigalal Aji Sax ji. ⁶ Buur ne góoru Yàlla ga: «Rikk tinul ma sa Yàlla Aji Sax ji te ñaanal ma, sama loxo mana banku.» Góoru Yàlla ga tinul Buur Aji Sax ji, loxoom bankuwaat, mel na mu meloon.

⁷ Ci kaw loolu Buur wax góoru Yàlla ga ne ko: «Ñéwal nu dem kër ga, nga xéewlu, ba noppi ma am lu ma la may.» ⁸ Góoru Yàlla ga nag ne Buur: «Soo ma joxoon sa genn-wállu kër sax, duma ànd ak yaw te duma sex dugub it mbaa may naan um ndox ci bii bérab, ⁹ ndax loolu lañu ma sant ci ndigalal Aji Sax ji, ne ma: «Bul sex dugub, bul naan um ndox te bul walbatiku jaare yoon wa nga jaare woon bi ngay ñëw.»» ¹⁰ Góor ga nag awe feneen, baña walbatiku awe fa mu awoon ba muy dikk Betel.

Ab yonent nattu na moroomam

¹¹ Booba ab yonent bu màggat a nga woon ca Betel. Ay doomam yu góor dikk. Kenn ci ñoom nettali ko mboolem la góoru Yàlla ga def bésub keroog ca Betel ak la mu wax Buur. Ñu yegge ko seen baay. ¹² Seen baay laaj leen ne leen: «Ana yoon wu mu jaare?» Fekk na doomam yu góor ya gisoon nañu fa góoru Yàlla ga jaare woon, bàyyikoo Yuda. Ñu wax ko. ¹³ Mu ne leen: «Takkal-leen ma mbaam mi.» Ñu takkal ko mbaam ma, mu war, ¹⁴ toppi góoru Yàlla ga, fekk ko ci genn ker garabu terebent. Mu ne ko: «Yaa di góoru Yàlla gi jóge Yuda?» Mu ne ko: «Waaw.» ¹⁵ Mu ne ko: «Kaay, nu dem

kër ga, nga sex dugub, boog.» ¹⁶ Mu ne ko: «Duma mana walbatiku ànd ak yaw, manumaa sex dugub it mbaa may bokk ak yaw ndoxum naan ci bii bérab. ¹⁷ Ndaxte dañu maa wax ci ndigalal Aji Sax ji ne ma: «Bu fa sex dugub, bu fa naan um ndox te bul walbatiku jaare yoon wa nga jaare woon bi ngay ñëw.»» ¹⁸ Mu dellu ne ko: «Man itam yonent laa ni yaw. Malaaka wax na ma ci ndigalal Aji Sax ji ne ma: «Waññi ko, mu ànd ak yaw sa kër, sex dugub, naan ndox.»» Fekk na la muy wax amul. ¹⁹ Mu walbatiku ànd ak moom ca kër ga, sex fa dugub, naan fa ndox.

²⁰ Ba ñu toogee ca ndab la, kàddug Aji Sax ji dikkal yonent ba waññi góoru Yàlla ga. ²¹ Mu àddu ca kaw ne góoru Yàlla ga jóge Yuda: «Aji Sax ji dafa wax ne: Gannaaw tebbi nga waxi Aji Sax ji te defoo li la sa Yàlla Aji Sax ji sant, ²² xanaa walbatiku di sex dugub, di naan ndox ci bérab bi mu la waxoon ne la bu fi sex dugub, bu fi naan ndox, sab néew du fekki say maam ca seen bàmmeel.» ²³ Ba góoru Yàlla ga sexee dugub ba naan ndox, yonent ba ko waññi woon takkal ko mbaam ma. ²⁴ Mu dem, gaynde dogale ko, rey ko, néewam ne lareet ca yoon wa, mbaam maak gaynde ga taxaw ca wet ga. ²⁵ Naka la ay nit jaare foofa, séenuñu lu moy néew ba ne lareet ca yoon wa, gaynde ga taxaw ca wet ga. Ñu dem yegge ko waa dëkk, ba yonent bu màggat ba dëkkoon.

²⁶ Yonent booba ko waññi woon ca yoon wa nag dégg ko ne: «Góoru Yàlla gaa! Ka tebbi woon waxi Aji Sax ji, Aji Sax ji boole kook gaynde gi, mu fàdd ko, rey ko. Moom la ko kàddug Aji Sax ji waxoon.» ²⁷ Mu ne doom ya: «Takkal-leen ma mbaam mi.» Ñu takkal ko. ²⁸ Mu dem fekk néew ba ne lareet ca yoon wa, mbaam maak gaynde ga taxaw ca wet ga. Gaynde ga lekkul néew ba, fàddul mbaam ma. ²⁹ Yonent ba yékkati néewu góoru Yàlla ga, teg ko ca kaw mbaam ma, délloosi ko. Noonu la yonent bu màggat ba ñibbee dëkkam ngir rob ko, jooy ko. ³⁰ Mu denc néew ba ca bàmmeelu boppam. Ñu di ko jooy, naan: «Wóoy sunu mbokk ma!» ³¹ Gannaaw ba ñu ko robee, mu wax doomam yu góor ya ne leen: «Bu ma faatoo, nangeen ma rob ci bàmmeel bii ñu denc góoru Yàlla gi. Fi weti yaxam ngeen di téral samay yax. ³² Ndaxte li wér te wóor déy, wax ji mu jottli ci ndigalal Aji Sax ji, ba muy gédd sarxaluqaayu Betel bi ak mboolem bérabi jaamookaay yi ci dëkki Samari, wax jooju dina am.»

³³ Gannaaw loolu Yerbowam dëppul yoonam wu bon wa mu topp. Dafa dellu tabb ci biir baadoolo yi ay sarxalkat ngir

bérabi jaamookaaya ya. Ku bëgg rekk mu tabb la, ngay sarxalkat ca bérabi jaamookaaya ya.³⁴ Loolu nag di bàkkaar bu réy ci biir kër Yerbowam, ba tax askanam daanu, ba raaf fi kaw suuf.

14

Aw tiis dikkal na Yerbowam

¹ Ca yooyu jamono Abya doomu Yerbowam ju góor wopp. ² Yerbowam wax soxnaam, ne ko: «Ayca, doxal soppiji col, ba kenn du xam ne sama soxna nga, te nga dem Silo. Dama ne, Axiya yonent baa nga fa. Moo ma waxoon ne ma dinaa falu buur, jiite mbooloo mii. ³ Yóbbaaaleel fukki mburu ak nákk yu ndaw ak taxub lem te nga dem ca moom. Moom dina la wax nan la mbiri gone gii di deme.» ⁴ Soxnas Yerbowam def noona, daldi dem Silo, agsi kër Axiya.

Booba Axiya gisatul. Bët ya daa muuru ndax mąggat. ⁵ Waaye fekk na Aji Sax ji wax Axiya, ne ko: «Dama ne, soxnas Yerbowam a ngi ñëw di leerlusi mbirim doomam ju góor ci yaw, ndax dafa wopp. Bu dikkee keneen lay mbubboo.» Aji Sax ji ne Axiya, mu wax ko nangam ak nangam.

⁶ Ba loolu amee Axiya dégg tánk ndaw sa ca bunt ba. Mu ne ko: «Soxnas Yerbowam, agsil! Ana looy mbubboo keneen nii? Man de yóbbante nañu ma ci yaw xibaar bu tiis. ⁷ Demal ne Yerbowam: “Aji Sax ji, Yállay Israyil dafa wax ne: Dama laa yékkati ci biir mbooloo mi, fal la nga jiite Israyil sama ñoñ. ⁸ Damaa foqatee nguur gi ci loxol waa kër Daawuda, jox la ko. Waaye meloo ni Daawuda, sama jaam ba daan jéfe samay santaane, toppe ma léppi xolam, du def lu moy lu ma rafetlu. ⁹ Def nga musiba, ba raw mboolem ñu la jiitu, dem di sakkal sa bopp yeneen yàlla ak tuur yu ñu móole weñ, ba sama xol fees. Man mii nga xarab, dëddu ma. ¹⁰ Moo tax duma def lu moy wacce musiba ci kër Yerbowam.

Dinaa faagaagal ku mana taxaw, colol, te bokk ci Yerbowam, ba ci ku gëna néew doole te tumuranke fi digg Israyil.

Dinaa buub kër Yerbowam, sanni, ni ñuy buubee neefare, ba mu jeex tàkk.

¹¹ Ku Yerbowam deele ci dëkk bi, xaj yi lekk;

ku ca médd ca àll ba, njanaaw ya for. Aji Sax ji wax na ko.”

¹² «Yaw nag jógal ñibbi sa kër. Booy teg sa tánk ca biir dëkk ba rekk, gone gi dee. ¹³ Israyil gépp dinañu ko jooy. Kooku rekk déy lees di denc ci bàmmeel, ci ku bokk ci Yerbowam, ngir ci moom donj la Aji Sax ji Yállay Israyil gis lu baax,

ci waa kër Yerbowam. ¹⁴ Aji Sax ji dina falal boppam buur bu jiite Israyil, te kooku dina faagaagal waa kër Yerbowam. Bés bi taxaw na jeeg! Ana lu ciy topp? ¹⁵ Aji Sax ji dina fadd Israyil. Dinañu mel ni gattax guy foy-foyi cim ndox. Dina déjjatee Israyil ci suuf su baax sii mu joxoon seeni maam, tasaare leen ca wàllaa dëxu Efraat, ndax dañoo samp ay xer yu ñuy jaamoo Asera, di merloo Aji Sax ji. ¹⁶ Aji Sax ji dina wacc Israyil ndax bàkkaari Yerbowam yi mu bàkkaar te di ko bàkkaarloo Israyil.»

¹⁷ Ba loolu amee soxnas Yerbowam jóg, bàyyikoo fa, ba àgg Tirsa. Naka la agsi ca bunt kër ba, xale ba dee. ¹⁸ Ñu rob ko, Israyil gépp jooy ko, muy la Aji Sax ji waxoon, Yonent Yàlla Axiya jaamam ba jottli.

¹⁹ Li des ci mbiri Yerbowam, ay xareem ak na nguuram deme woon, bindees na lépp moos ca téere ba ñu dippee Jaloorey buuri Israyil ca seeni jant. ²⁰ At ya Yerbowam falu buur ñaar fukki at la ak ñaar. Gannaaw loolu mu saay, fekki ay maamam. Nadab doomam falu, wuutu ko.

Robowam falu na ca Yuda

²¹ Robowam doomu Suleymaan moo doon buurub Yuda. Amoon na ñeent fukki at ak benn ba muy falu. Fukki at ak juróom ñaar la péeyoo Yerusaleem, dëkk ba Aji Sax ji tann ci mboolem giiri Israyil, déel fa turam. Ndeyam di Naama, dib Amoneen. ²² Waa Yuda nag di def li Aji Sax ji ñaawlu, ba di ko fiirloo fiiraange gu raw ga ko seen maam daa fiirloo ndax seen bàkkaar. ²³ Dañoó sakkal seen bopp ay bérabi jaamookaaya, samp ay tuuri doj aki xer yu ñuy jaamoo Asera ca kaw mboolem tund wu kawe mbaa ker garab gu naat. ²⁴ Réew ma amoon na sax ñuy jaay seen bopp fa ñuy mąggale tuur ya. Ñuy def mboolem ñaawtéefi xeet ya Aji Sax ji dàqoon ngir bànni Israyil.

²⁵ Ba Buur Robowam faloo, ba dugg ci juróomeelu atu nguuram, Sisag buuru Misra song Yerusaleem. ²⁶ Ci kaw loolu Sisag jël alali kër Aji Sax ji, ak alali kër Buur. Lépp la jël ba ca mboolem pakki wurus ya Suleymaan defarlu woon. ²⁷ Ba mu ko defee Buur Robowam defarlu ay pakku xàñjar yu wuutu yu wurus ya. Mu teg ko ca loxoy njiiti dag yay wattu buntu kër Buur. ²⁸ Saa yu Buur dee duggsi ca kër Aji Sax ji, dag ya ñàbb pakk ya, bu ñu noppee delloo ko ca néegu dag ya.

²⁹ Li des ci mbiri Robowam ak mboolem la mu def, bindees na ko moos ca téere ba ñu dippee Jaloorey buuri Yuda ca seeni jant. ³⁰ Xare masula dakk diggante Robowam ak Yerbowam. ³¹ Gannaaw gi Buur Robowam téd, fekki ay maamam,

ñu denc ko fa ay maamam ca gox ba ñu naan Kër Daawuda. Ndeyam a doon Naama, Amoneen ba. Ci kaw lool doomam Abiyam falu buur, wuutu ko.

15

Abiyam falu na ca Yuda

¹ Ca fukki at ak juróom ñetteelu nguuruug Yerbowam, ca la Abiyam doomu Nebat falu buur ca kaw Yuda. ² Ñetti at la nguuru fa Yerusalem te yaayam moo doon Maaka doomu Abisalom*. ³ Muy roy nag baayam ca mboolem bákkaar ya mu daan def. Te it wéetalul woon Yällaam Aji Sax ji ni maamam Daawuda. ⁴ Terewul Daawuda tax Aji Sax ji Yällaam may ko doom ju góor ju koy wuutu ca Yerusalem, ndax askanu Daawuda baña fey, Yerusalem it mana ñonj. ⁵ Li ko waral mooy Daawuda da daan jéfe njub lu Aji Sax ji rafetlu, te giiru dundam gépp teggiwul lenn lu ko Aji Sax ji sant lu moy ci mbirum Uri Etteen ba.† ⁶ Xare masula dakk diggante waa kër Robowam ak Yerbowam giiru dundu Abiyam gépp.

⁷ Li des ci mbiri Abiyam ak mboolem lu mu def, bindees na ko moos ca téere ba ñu dippee Jaloorey buuri Yuda ca seeni jant. Xare it jiboon na diggante Abiyam ak Yerbowam. ⁸ Gannaaw gi Buur Abiyam tédd, fekki ay maamam, ñu denc ko ca gox ba ñu naan Kër Daawuda, Asa doomam falu buur, wuutu ko.

Asa falu na ca Yuda

⁹ Ba Buur Yerbowam faloo Israyil, ba dugg ñaar fukkeelu atu nguuram, ca la Asa falu buur, jiite Yuda. ¹⁰ Ñeent fukki at ak benn la Buur Asa péeyoo Yerusalem. Maaka doomu Abisalom ju jigéen moo doon maamam. ¹¹ Asa nag di def njub gi Aji Sax ji rafetlu, Daawuda maamam. ¹² Dàqe na ca réew ma ñu daan jaay seen bopp fa ñuy mǎggale tuur ya. Mu jéle ca réew ma kasaray tuur ya fa ay maamam defoon yépp. ¹³ Maaka maamam ju jigéen sax, Asa xañ na ko céru lingeer yaayu buur ba mu amoon, ndax Maaka moo sàkkaloon Asera tuur ma, ab xer bu seexluwu bu ñu koy mǎggale. Asa gor xeru maamam ja, lakk ko ca xuru Sedoron. ¹⁴ Waaye bérabi jaamookaay ya, jélees ko fa, doonte Asa, Aji Sax ji la wéetaloon cib xolam, giiru dundam gépp. ¹⁵ Moo indi ca kër Aji Sax ji, juntuukaay yu sell yu baayam ya, ak juntuukaay yu sell yu boppam, muy xalis ak wurus aki ndab.

¹⁶ Xare nag masula dakk diggante Asa ak Basa buurub Israyil seen giiru dund gépp. ¹⁷ Ci biir loolu Basa buurub Israyil song Yuda, daldi dàbbli dèkk ba ñuy wax Raama‡, ba kenn du dugg jëm ca Asa buurub Yuda mbaa muy génn. ¹⁸ Asa dajale mboolem luy xalis ak wurus wu desoon ca denci kër Aji Sax ji, ak denci kër Buur. Mu teg ko ci loxoy jawriñam ña. Ba mu ko defee Buur Asa yebal leen ca buurub Siri ba ca Damaas, di Ben Addàd doomu Tabrimon doomu Esiyon.

Asa nag ne Ben Addàd: ¹⁹ «Kóllèree dox sama digganteek yaw, na mu doxe woon sama diggante baay ak sa baay. Lii nag maa la ko may, xalis la ak wurus. Te nga dogoo rekk ak Basa buurub Israyil, ndax mu jóge samam réew.» ²⁰ Ben Addàd déggal Buur Asa, daldi yebal ñjiiti xarey gàngooram ca dèkki Israyil. Ni la nangoo dèkk ya ñuy wax Yon ak Dan ak Abel Bet Maaka ak diiwaanu Kineret gépp, boole ca diiwaanu Neftali gépp. ²¹ Ba ko Basa déggee, Raama ga mu doon dàbbli la ba, ba dem toogi Tirsas.

²² Ba loolu amee Buur Asa joxe ndigal, woolu waa Yuda gépp, kenn desul. Ñu ànd jéleji ca Raama doj yaak bant ya Basa doon tabaxe. Buur Asa tabax ca dèkk ba ñuy wax Geba gu giirug Beñamin, tabax ca Misa.

²³ Li des ci mbiri Asa ak mboolem njambaaram ak la mu def yépp ak dèkk ya mu tabax, bindees na lépp moos ca téere ba ñu dippee Jaloorey buuri Yuda ca seeni jant. Ba Asa demee ba mǎggat nag, jàngoroy tǎnk la ame woon. ²⁴ Gannaaw gi mu tédd, fekki ay maamam, ñu denc ko ca gox ba ñu naan Kër Daawuda maamam. Yosafat doomam falu buur, wuutu ko.

Nadab falu na ca Israyil

²⁵ Ba Asa buurub Yuda duggee ñaareelu atu nguuram, ca la Nadab doomu Yerbowam falu buur, jiite Israyil. Nadab jiite na Israyil ñaari at, ²⁶ di jéfe lu Aji Sax ji ñaawlu, aw ci tǎnki baayam, di bákkaarloo Israyil. ²⁷ Ci biir loolu doomu Axiya, ji giiroo ci Isaakar te ñu di ko wax Basa, daldi fexeel Nadab, jam ko ca Gibeton gu Filisteen ña. Fekk Nadab ànd ak Israyil gépp, gaw Gibeton. ²⁸ Basa daldi rey Nadab, yemook ba Asa buurub Yuda di dugg ñetteelu atu nguuram. Basa falu buur, wuutu Nadab. ²⁹ Naka la falu, daldi rey waa kër Yerbowam gépp. Bàyyiwul kenn kuy noyyi te bokk ci Yerbowam. Mu faagaagal leen, muy la Aji Sax ji waxoon,

* **15:2** 15.2 Abisalom ak Absalom jàpp nañu ne kenn ki la. † **15:5** 15.5 Seetal ci 2.Samiyel 11. ‡ **15:17** 15.17 Raama ma nga féete woon Yerusalem bėj-gànnar, tollu diggante ñaari réew yi. Mu nekkoon ci kaw tund wu aw yoon jaar, jóge péeyoo Israyil, jëm Yerusalem.

Axiya jaamam ba ca Silo jottli. ³⁰ Li ko waral mooy bàkkaar Yerbowam yi mu bàkkaar te bàkkaarloo ko waa Israyil, di merloo Aji Sax ji, Yállay Israyil, ba feesal xolam.

³¹ Li des ci mbiri Nadab ak mboolem lu mu def, bindees na ko moos ca téere ba ñu dippee Jaloorey buuri Israyil ca seeni jant.

³² Xare masula dakk diggante Asa ak Basa buurub Israyil, seen giiru dund gépp.

Basa falu na ca Israyil

³³ Ba Asa buurub Yuda duggee ñetteelu atu nguuram, ca la Basa doomu Axiya falu buur ca Israyil gépp, péeyoo Tirsa. Nguuru na ñaar fukki at ak ñeent. ³⁴ Da daan def li Aji Sax ji ñaawlu, aw ci tànkì Yerbowam ak bàkkaaram ya mu daan bàkkaarloo Israyil.

16

¹ Gannaaw loolu kàddug Aji Sax ji dikkal Yewu doomu Anani, di rèbb Basa. Mu ne ko: ² «Damaa fekk nga maaseek pëndub suuf, ma yékkati la, jitaal la, nga yilif Israyil sama ñoñ. Nga aw nag ci yoonu Yerbowam, di bàkkaarloo Israyil sama ñoñ, ba ma mer ndax seeni bàkkaar. ³ Kon dama ne, dinaa la far, yaw Basa, yaak sa waa kër. Dinaa def sa kër mel ni kër Yerbowam doomu Nebat.

⁴ Ku Basa deele ci dèkk bi, xaj yi lekk; ku médd ca àll ba, njanaaw ya for.»

⁵ Li des ci mbiri Basa ak la mu def ak njambaaram, bindees na lépp moos ca téere ba ñu dippee Jaloorey buuri Israyil ca seeni jant. ⁶ Gannaaw loolu Buur Basa saay, fekki ay maamam, ñu denc ko Tirsa. Ela doomam falu buur, wuutu ko.

⁷ Te itam ba kàddug Aji Sax ji dikkalee Yonent Yàlla Yewu doomu Anani ci mbirum Basa ak waa kërám, li ko waral mooy la Basa def lépp, di roy waa kër Yerbowam, Aji Sax ji ñaawlu ko ba xolam fees. Rax ci dollì Basa rey waa kër Yerbowam.

Ela falu na ca Israyil

⁸ Ba Asa buurub Yuda duggee ñaar fukkeelu atu nguuram ak juróom benn, ca la Ela doomu Basa falu buur, jiite Israyil. Péeyoo na Tirsa diiru ñaari at. ⁹ Simri, jawriñam ba yilifoon genn-wàllu watiiri xareem, moo ko fexeel. Booba Elaa ngay naan ba màndi ca kër Asa, ka yor mbiri kërám ca Tirsa. ¹⁰ Simri duggsi, jam ko, mu dee. Loolu yemook ba Asa buurub Yuda di dugg ñaar fukkeelu atu nguuram ak juróom ñaar. Simri falu, wuutu ko. ¹¹ Simri falu ba toog ci jal bi, daldi rey mboolem waa kër Basa. Bàyyiwu ca kuy taxaw, colol; du mbokk, du xarit. ¹² Simri faagaagal waa kër Basa gépp, muy la

Aji Sax ji waxoon, ba mu rèbbee Basa, Yonent Yàlla Yewu jottli. ¹³ Li ko waral di mboolem bàkkaar yi Basa ak doomam Ela bàkkaar te bàkkaarloo ko Israyil, ba feesal xolu Aji Sax ji Yállay Israyil ndax seen tuuri neen.

¹⁴ Li des ci mbiri Ela ak mboolem lu mu def, bindees na ko moos ca téere ba ñu dippee Jaloorey buuri Israyil ca seeni jant.

Simri falu na ca Israyil

¹⁵ Ba Asa buurub Yuda duggee ñaar fukkeelu atu nguuram ak juróom ñaar, ca la Simri falu. Mu nguuru diiru juróom ñaari fan ca Tirsa. Booba mbooloom xareem Israyil a nga jógal dèkkub Filisteen ba ñuy wax Gibeton. ¹⁶ Mbooloo ma ca dal ba dégg ñu naan: «Simri de lalal na Buur pexe, ba rey ko.» Israyil gépp daldi fal buur Omri, ma jiite woon mbooloom xarem Israyil. Mu moom Israyil bésub keroog ca dal ba. ¹⁷ Omri ak Israyil gépp bàyyikoo Gibeton, ànd gawi dèkk ba ñuy wax Tirsa. ¹⁸ Ba Simri gisee ne nangu nañu dèkk ba, daa dugg kër Buur, jàll ca biir-a-biir, daldi taal kër ga ca kawam, dee. ¹⁹ Li ko waral mooy bàkkaar yi mu bàkkaar, di def lu bon lu Aji Sax ji ñaawlu, aw ci tànkì Yerbowam, di bàkkaarloo Israyil.

²⁰ Li des ci mbiri Simri ak pexe ma mu laloon, bindees na lépp moos ca téere ba ñu dippee Jaloorey buuri Israyil ca seeni jant.

²¹ Ba mu ko defee mbooloom Israyil séddlikoo, def ñaari xaaj. Genn-wàllu mbooloo ma topp ca gannaaw Tibni, nar koo fal buur. Tibni nag, Ginat ay baayam. Genn-wàll ga ca des ànd ak Omri. ²² Mbooloom Omri épp doole mbooloom Tibni doomu Ginat. Tibni daldi dee, Omri di buur.

Omri falu na ca Israyil

²³ Ba Asa buurub Yuda duggee fanweereelu atu nguuram ak benn, ca la Omri falu buur, jiite Israyil. Omri nguuru na diiru fukki at ak ñaar. Mu péeyoo Tirsa juróom benni at. ²⁴ Omri nag dem ca Semer, jènde ca moom tundu Samari ci juróom ñaar fukki kiloy xaalis. Omri tabax ca kaw tund waa, dippee dèkk ba mu tabax Samari, mu dèppook Semer, turu boroom tund waa.

²⁵ Teewul Omri di def lu bon lu Aji Sax ji ñaawlu, ba gèna bàkkaar mboolem ña ko jütu. ²⁶ Daa aw ci tànkì Yerbowam doomu Nebat ci mboolem lu mu daan def ba ci bàkkaaram bi mu daan bàkkaarloo Israyil, di jógal xolu Aji Sax ji Yállay Israyil ci seen tuuri neen.

²⁷ Li des ci mbiri Omri aki jéfam ak njambaaram, bindees na lépp moos ca téere ba ñu dippee Jaloorey buuri Israyil

ca seeni jant. ²⁸ Buur Omri saay, fekki ay maamam, ñu denc ko ca Samari. Axab doom ja falu buur, wuutu ko.

Axab falu na Israyil

²⁹ Ba Asa buurub Yuda duggee fanweereelu atu nguuram ak juróom ñett, ca la Axab doomu Omri falu, jiite Israyil. Axab doomu Omri nguuru na Israyil ñaar fukki at ak ñaar, péeyoo Samari.

³⁰ Axab doomu Omri di def li Aji Sax ji ñaawlu, ba raw mboolem ña ko jiitu.

³¹ Mu sálloo bákkaari Yerbowam doomu Nebat. Loolu doyatu ko, mu jël jabar Yesabel doomu Etbal, buurub waa Sidon ña. Mu dem bay jaamu seen tuur mi ñuy wax Baal, di ko sujjóotal. ³² Mu yékkatil Baal ab sarxalukaay ca kër Baal, ga mu tabax ca Samari. ³³ Axab teg ca samplu xer wu ñuy jaamoo Asera. Axab def na lu rawati la mboolem buuri Israyil ya ko jiitu defoon, ba feesal xolu Aji Sax ji, Yállay Israyil.

³⁴ Ca jamonoy Axab la Iyel ma dëkk Betel tabaxaat Yeriko. Abiram taawam la Iyel ñàkk ba muy téral kenug tabax ba, teg ca ñàkk Segub, am caatam ba muy taxawal bunti dëkk ba. Mu dëppook kàddug Aji Sax, ja Yosuwe doomu Nuun jottli woon.*

17

Yonent Yàlla Ilyaa yégle na bekkoo

¹ Ci kaw loolu Yonent Yàlla Ilyaa, ma dëkk Tisbi ga ca Galádd, wax Axab, ne ko: «Giñ naa ci Aji Sax ji, Kiy Dund, di Yállay Israyil ji may jaamu: at yii nu nekk, du taw te du lay, lu moy dama koo wax ci sama lámniñ.»

² Kàddug Aji Sax ji dikkal Ilyaa ne ko: ³ «Jógeel fii, walbatiku jëm penku, te làquji ca xuru Kerit ca penkub dexu Yurdan. ⁴ Su ko defee, ca ndoxum xur wa ngay naane. Jox naa itam ndigal baaxoñ yi, ñu di la leel foofa.»

⁵ Ilyaa dem, def la Aji Sax ji wax, toogi ca xuru Kerit ca penkub dexu Yurdan. ⁶ Baaxoñ ya di ko indil mburu ak ndawal bëccëg, mburu ak ndawal ngoon, ndox may wal, mu di ca naan.

Ilyaa waar na jëtun ba

⁷ Mu am ay fan, xur wa ñiis, ndax réew ma tawluwul. ⁸ Kàddug Aji Sax ji dikkal ko ne ko: ⁹ «Demal Sarebta ga ca Sidon te toog foofa. Ma ne, sant naa fa ab jëtun, mu may la loo lekk.» ¹⁰ Ilyaa dem Sarebta. Ba mu agsee ca buntu dëkk ba, gisul lu moy ab jëtun buy taxan. Mu woo ko ne ko: «Ngalla may ma tuuti ndox ci njaq li, ma naan.» ¹¹ Mu dem di wuti ndox, Ilyaa dellu ko woo, ne ko: «Rikk sàkkal dogu

mburu, yótaale ma.» ¹² Jëtun ba nag ne ko: «Giñ naa ci Aji Sax ji sa Yàlla jiy dund, awma mburu. Awma lu moy barci-loxob sunguf ca njaq la ak as diw ca tax ba. Gis nga, may for nii ñetti bant, ba toggi ko, nu lekk, maak sama doom, doora dee ak xiif.» ¹³ Ilyaa ne ko: «Bul ragal dara, demal rekk, def ni nga wax. Waaye jëkk ma cee defaral mburu mu ndaw, indil ma, doora defaral sa bopp, yaak sa doom; ¹⁴ ndax Aji Sax ji Yállay Israyil dafa wax ne: “Njaqub sunguf bi du jeex; taxub diw bi it du jeex, ba keroog Aji Sax ji di taw ci réew mi.”»

¹⁵ Jigéen ja dem, def la ko Ilyaa wax, mook waa kërám ñu bokk ak Ilyaa lekk ay fan. ¹⁶ Njaqu sunguf ba jeexul, taxub diw ba jeexul. Muy la Aji Sax ji waxoon, Ilyaa jottli.

Ilyaa ñaanal na doomu jëtun ba

¹⁷ Ba loolu weesee jigéen, ja dese kër ga, doomam ju góor wopp. Mu mujj metti lool, ba noyyeetul. ¹⁸ Jigéen ja ne Ilyaa: «Éy góoru Yàlla gii! Ana lu ma séq ak yaw? Xanaa dangaa ñew sullisi sama bákkaar, ba tax nga rey sama doom ju góor jii?»

¹⁹ Ilyaa ne ko: «Jox ma sa doom!» Mu jële ko ca loxoy jigéen ja, yóbbu ko ca néeg ba mu dal ca kaw taax ma, téral ko ca kaw lalam. ²⁰ Ba mu ko defee Ilyaa ñaan ci Aji Sax ji, ne ko: «Éy Aji Sax ji, sama Yàlla, xanaa doo teg jëtun bii ma dalal, naqar wu tollu ni, di seetaan doomam ju góor muy dee?» ²¹ Ci kaw loolu mu tédd, tàlli ñetti yoon ca kaw xale bu góor ba, tey ñaan ci Aji Sax ji naan: «Éy Aji Sax ji sama Yàlla, rikk bàyyil bakkanu xale bii, mu dëlsi ci moom!»

²² Aji Sax ji nangul Ilyaa kàddug ñaanam, bakkanu xale bu góor ba dëlsi ca moom, mu dund. ²³ Ilyaa fab xale ba, jële ko ca néeg ba ca kaw taax ma, wacce ko ca biir kër ga, jox ko ndeyam. Mu ne ko: «Xoolal, sa doom a ngi dund!» ²⁴ Jigéen ja ne Ilyaa: «Léegi nag xam naa ne nitu Yàlla nga, te kàddug Aji Sax ji ngay waxe moos.»

18

Ilyaa daje naak surgab Buur Axab

¹ Ba ñu demee ba mu yàgg, kàddug Aji Sax ji dikkal Ilyaa, ca ñetteelu atu maral wa. Mu ne ko: «Demal jàkkaarlook Axab, ma daldi taw ci kaw réew mi.» ² Ilyaa tegu ca yoon wa ngir jàkkaarloojeek Axab.

Booba xiif ba metti na ca Samari. ³ Ci biir loolu Axab woolu Abdiyas ma yor kërám. Abdiyas doonoon ku ragal Aji Sax ji lool. ⁴ Ndax ba Yesabel jabari Axab di rey yonenti Aji Sax ji, Abdiyas a boole woon

* 16:34 16.34 Seetal ci Yosuwe 6.26.

téeméeri yonent, làq leen ci ñaari xuntiy xeer, xunti mu nekk juróom fukk. Mu di leen fa may lekk ak naan.

⁵ Axab nag ne Abdiyas: «Duggal ci biir réew mi te seet ci bëti ndox yeek xur yepp. Jombul nu gis ñax, ba mana rawale bakkani fas yeek berkelle yi, ba du jar nu di leen jekkli.» ⁶ Ba lolu amee ñu séddoo réew ma, ba mu daj, Axab fii, Abdiyas fee. ⁷ Abdiyas di dem, Ilyaas ne pemm dajeek moom ca yoon wa. Abdiyas xàmmi ko, sujjóotal ko, dëpp jë ba fa suuf, ne ko: «Kii Ilyaas a, sama sang?» ⁸ Mu ne ko: «Man a kay! Demal boog wax sa sang Axab, ne ko Ilyaas a ngoog de!»

⁹ Abdiyas ne ko: «Ana lu ma def lu bon, sang bi, ba nga di ma booleek Axab, mu di ma rey? ¹⁰ Giñ naa ci Aji Sax ji, sa Yàlla jiy dund, amul wenn xeet mbaa réew mu sama sang Axab yónneewul, di la seet. Te bu ñu nee nekkoo fa, mu giñloo waa réew maak xeet wa ne gisuñu la. ¹¹ Léegi nag nga naan ma: «Demal wax sa sang ne ko Ilyaas a ngoog.» ¹² Su ko defee su ma teqlikook yaw, ngelawal Aji Sax ji yóbbu la fu ma xamul, fekk ma dem wax ko Axab, te du la gis. Kon da may rey! Moona sang bi, man de, damaa masa ragal Aji Sax ji ba may ndaw ba tey. ¹³ Moo sang bi! Xanaa waxuñu la li ma def, ba Yesabel di rey yonenti Aji Sax ji? Maa làq téeméeri yonenti Aji Sax ji ci ay xuntiy xeer, xunti mu nekk juróom fukk, di leen may lekk ak naan. ¹⁴ Léegi nga naa ma: «Demal wax sa sang ne ko Ilyaas a ngoog!» Mu di ma rey?» ¹⁵ Ilyaas ne ko: «Giñ naa ci Aji Sax ji Boroom gangoori xare yi, moom mi may jaamu, tey dinaa jàkkaarloojeek Axab moos.»

Ilyaas jànkoonde naak Axab

¹⁶ Abdiyas dem ca Axab, yegge ko ko. Axab dikk taseek Ilyaas. ¹⁷ Naka la Axab gis Ilyaas, ne ko: «Kii yaw a, di lëmbe Israyil nii?» ¹⁸ Ilyaas ne ko: «Du maa lëmbe Israyil de. Yaw kay la, yaak sa kër baay, ndax yeena dëddu santaaney Aji Sax ji, di topp tuur yi nuy wax Baal. ¹⁹ Léegi nag wooteel, Israyil gépp daje, fekkxi ma ca tundu Karmel, ñu ànd ak ñeenti téeméeri yonenti Baal ak juróom fukk (450) ak ñeenti téeméeri nit (400) ñuy lekk njëlal Yesabel, te di yonenti Asera tuur ma.»

Ilyaas fenqoo naak waa kër Baal

²⁰ Ba lolu amee Axab yónnee ca waa Israyil gépp, woo yonent ya, ñu daje ca tundu Karmel. ²¹ Ilyaas dikk jàkkaarlook mbooloo ma mépp. Mu ne: «Yeen nag dungeen dakkal seen cinjiñ-canjañ ji ngeen nekke, wet gu nekk ngeen féete fa? Su Aji Sax ji dee Yàlla, toppleen ko; su dee

Baal, ngeen topp ko.» Mbooloo ma ne patt. ²² Ilyaas ne mbooloo ma: «Man de maa fi des ci yonenti Aji Sax ji, man donj, te yonenti Baal yi ñeenti téeméer lahook juróom fukk (450). ²³ Léegi nag, indil-leen nu ñaari yëkk. Bàyyleen yonenti Baal, ñu tànn wenn yëkk wi, def ko ay dog, teg ci kaw matt mi, bañ koo taal. Man it dinaa defar weneen yëkk wi, teg ci kaw matt mi, bañ koo taal. ²⁴ Su ko defee ngeen ñaan ci seeni tuur, man it ma ñaan ci Aji Sax ji. Su boobaa, Yàlla ju ci wuyoo sawara, kookoo di Yàlla.» Mbooloo ma mépp ne: «Waa, baax na!»

²⁵ Ci kaw lolu Ilyaas wax yonenti Baal ya ne leen: «Tànnleen wenn yëkk te jékka defar, ndax yeena gëna bare. Bu ngeen noppee, ñaanleen ci seeni tuur, waaye buleen taal.» ²⁶ Ñu jël yëkk wa mu leen jox, defar ko. Ñuy yuuxu, di woo Baal suba ba digg bëccëg, naan: «Baal, wuyu nu!» Waaye kenn àdduwul, kenn wuyuwul. Ña ngay cinjiñ-canjañi, di wër sarxalukaay ba ñu defar. ²⁷ Digg bëccëg jot, Ilyaas di leen ñaawal, naan leen: «Yuuxuleen ca kaw, waay! Mooy Yàlla moos; jombul daa am lu muy xalaat, mbaa mu jàpp, mbaa mu tukki, mbaa xanaa muy nelaw, ñu war koo yee.»

²⁸ Ba mu ko defee ñu gënatee yuuxu, di dagg seen yaram aki saamar aki xeej, ni ñu ko baaxoo, ba deret ja sang leen. ²⁹ Digg bëccëg wees, ñu gëna ràkkaaju di wax ay waxyu, ba saraxu ngonon jot. Waaye du lenn lu àddu mbaa lenn lu wuyu mbaa lu leen faale.

³⁰ Ba mu ko defee Ilyaas wax ak mbooloo ma mépp, ne leen: «Jegesileen fii!» Népp jegesi. Mu defaraat sarxalukaayu Aji Sax ja tasaaroo woon, ³¹ daldi jël fukki doj ak ñaar, mu tollook limu giiri doomi Yanqóoba. Yanqóoba la kàddug Aji Sax ja dikkaloon ne ko Israyil ay doon turam. ³² Ilyaas jël doj ya, defare ab sarxalukaay ngir Aji Sax ji, ba noppi gas kàmb gu mana def fanweeri liitar, kàmb ga wër sarxalukaay ba. ³³ Mu teg matt ma ba mu jekk, daggat yëkk wa, teg ca kaw. ³⁴ Mu ne leen: «Duyleen ñeenti njaqi ndox, tuur ci kaw yàpp week matt mi.» Ñu def ko. Mu ne: «Defaatleen!» Ñu defaat. Mu ne: «Defatileen, muy ñetti yoon!» Ñu def ko, ba muy ñetti yoon. ³⁵ Ndox ma wal, wër sarxalukaay ba, ba kàmb ga sax fees ak ndox.

³⁶ Ba saraxu ngonon jotee, Yonent Yàlla Ilyaas jegesi, ñaan ne: «Aji Sax ji, yaw Yàllay Ibraayma ak Isaaxa ak Yanqóoba, xamleel bésuub tey jii ne yaw yaa di Yàlla ci Israyil, ma di sab jaam bi def lii lépp ci sa ndigal. ³⁷ Nangul ma, Aji Sax ji, rikk

nangul wa, ba mbooloo mii xam ne yaw Aji Sax ji yaa di Yàlla te yaay déloosi seen xol ci yaw.»

³⁸ Ba loolu amee sawaras Aji Sax ji ne milib boole xoyom yàpp waak matt maak doj yaak suuf sa, ba far manq ndox ma ca kàmb ga.

³⁹ Ba mbooloo mépp gisee loolu, dañu ne gurub, dépp seen jê fa suuf, daldi ne: «Aji Sax jeey Yàlla! Aji Sax ji kay mooy Yàlla!»

⁴⁰ Ilyaas ne leen: «Jàppleen yonenti Baal yii. Bu kenn ci ñoom récc.» Ñu jàpp leen, Ilyaas yóbbu leen ba ca xuru Kison, rendi leen foofa.

⁴¹ Gannaaw loolu Ilyaas ne Axab: «Doxal lekki te naan, ndax taw bu réy a ngi riir di ñëw.» ⁴² Axab dem, lekk, daldi naan. Ilyaas moom yéegi ba ca kaw tundu Karmel, sukk, dépp jëem ca diggante bëti óomam. ⁴³ Mu ne surgaam: «Laggal séentuji wetu géej.» Surga ba séentuji, dikk, ne ko: «Dara newu fa.» Ilyaas ne ko mu dellu xool ba muy juróom ñaari yoon.

⁴⁴ Juróom ñaareelu yoon ba, surga ba ne: «Lee de niir la wu tuut, tollu ni loxol nit, jóge géej.» Ilyaas ne ko: «Demal ne Axab, mu takk watiiram te dem, bala koo taw bee ub.» ⁴⁵ Nes tuut asamaan ñuul kukk aki xàmbaar, ngelaw la jóg, taw ba sóob ak doole. Ci biir loolu Axab dawal watiiram, jëm Yisreel. ⁴⁶ Aji Sax ji nag dooleel Ilyaas. Mu takk ndigg la, daw jiitu Axab ba ca buntu Yisreel.

19

Ilyaas gedd na

¹ Gannaaw gi Axab nettali Yesabel la Ilyaas def lépp ak na mu rendee saamar mboolem yonent ya. ² Yesabel yónnee Ilyaas ndaw, ne ko: «Yal na ma tuur yi teg mbugal mu gëna réy, ndegam nэгëni éllég jëluma sa bakkan, ni nga jële bakkani yonent yii.»

³ Ilyaas gis na mu deme, daldi daw, ngir rawale bakkanam. Mu dem ba Beerseba ca réewum Yuda, bàyyi fa surgaam. ⁴ Moom ci boppam mu topp màndiñ ma lu tollook doxub benn bés, doora toog ci taatu benn gajj. Ma ngay ñaan dee, naan: «Doy na sèkk, Aji Sax ji, jëlal sama bakkan rekk, ndax man kat gënuma samay maam.»

⁵ Mu tédđ, ay nelaw jàpp ko ca taatu gajj ba. Yégul lu moy am malaaka mu ko laal, ne ko: «Jógal lekk!» ⁶ Ilyaas ne xiféet, yem ci mburu mu ñu lakke doj yu tàng, ak njaqub ndox. Ñu lekk, daldi naan, ba noppi tédđaat. ⁷ Malaakam Aji Sax ja dellu ñëw, laal ko, ne ko: «Jógal lekk, lu ko moy doo àttan yoon wi.» ⁸ Ilyaas jóg lekk, daldi naan, leqliku, ba dox ñeent fukki guddi ak ñeent fukki bëccég, ba ca Oreb, tundu

Yàlla wa. ⁹ Mu dugg foofa ca biir xunti ma, fanaan fa.

Aji Sax ji yónniwaat na Ilyaas

Ci biir loolu kàddug Aji Sax ji dikkal Ilyaas, ne ko: «Ana looy def fii, Ilyaas?» ¹⁰ Ilyaas ne: «Man kat damaa xéroona xér ci yaw Aji Sax ji Boroom gàngoori xare yi. Waaw, bànni Israyil dañoo fecci sa kòllèreek ñoom; say sarxalukaay, ñu màbb; say yonent, ñu jam saamar. Ma des man donj, ñuy wuta jël sama bakkan nii!» ¹¹ Aji Sax ji ne ko: «Génnal taxaw ci kaw tund wi, fi sama kanam, ndax kat man Aji Sax ji maa ngi waaja romb.» Ci kaw loolu ngelaw lu réy te bare doole jiitu Aji Sax ji, xar tund ya, rajaxe doj ya, waaye Aji Sax ji nekkul ca ngelaw la. Ngelaw la dal, suuf sa yéngu, waaye Aji Sax ji nekkul ca yéngu-yéngu suuf fa. ¹² Suuf sa dal, sawara dikk, waaye Aji Sax ja nekkul ca sawara wa. Sawara wa dal, ndéey lu suufe topp ca. ¹³ Ilyaas dégg ca, muuroo mbubbam, génn taxaw ca buntu xunti ma; déggul lu moy baat bu ko ne: «Ana looy def fii, Ilyaas?» ¹⁴ Mu ne: «Man kat damaa xéroona xér ci yaw Aji Sax ji Boroom gàngoori xare yi. Waaw, bànni Israyil dañoo fecci sa kòllèreek ñoom; say sarxalukaay, ñu màbb; say yonent, ñu jam saamar. Ma des man donj, ñuy wuta jël sama bakkan nii!»

¹⁵ Aji Sax ji ne ko: «Dellul topp say tànk te jaare ci màndiñ mi ba Damaas. Boo àggee, nanga diw Asayel, fale ko ko buurub Siri. ¹⁶ Yewu ma baayam di Nimsi it, diw ko, fal ko buurub Israyil; te Alyaasa, ma baayam di Safat, dèkk diiwaanu Abel Mewola, nanga ko diw, fal ko, muy yonent, wuutu la. ¹⁷ Su ko defee ku Asayel reyul ba nga raw, Yewu rey la; ku Yewu reyul ba nga raw, Alyaasa rey la. ¹⁸ Waaye dinaa déeg ci biir Israyil juróom ñaari junni (7 000) nit, di mboolem ñi sujjóotaloon Baal te seen gémmiñ masu koo foon.»

Ilyaas am na bëkk-néeg

¹⁹ Ilyaas bàyyikoo fa, fekk Alyaasa doomu Safat, Alyaasa di gàbb ak ñaar fukki nag ak ñeent yu ko jiitu, ñu likke leen ñaar-ñaar, moom ci boppam mu jital fukkeelu likke baak ñaar. Ilyaas dikk ba ca moom, sànni mbubbam ca kaw Alyaasa. ²⁰ Alyaasa bàyyikoo ca nagam ya, daw topp ca Ilyaas, ne ko: «Ngalla may ma, ma tàgguji sama ndey ak sama baay te topp la.» Ilyaas ne ko: «Doxal dellu; lu ma la def?»

²¹ Alyaasa bàyyi fa Ilyaas, dellu jël ñaari nag, rendi ko sarax, jël banti rangaay ya, togge yàpp wa, jox ko mbooloo ma, ñu lekk, ba noppi Alyaasa topp ci gannaaw Ilyaas, di bëkk-néegam.

20

Siri song na Samari

¹ Fekk na Ben Addàd buurub Siri woo mbooloom xareem mépp, ñu daje, ànd ak fanweeri buur ak ñaar yu mu faral, ñook seeni fas ak seeni watiir. Ñu dem song Samari, gaw ko. ² Ci kaw loolu Ben Addàd yónni ay ndaw ca biir dèkk ba ca Axab buurub Israyil. ³ Ñu ne ko: «Ben Addàd dafa wax ne: “Sa xaalís ak sa wurus, maay boroom. Say jabar it, ak ñi gèna dègèr ci say doom, maay boroom.”» ⁴ Buurub Israyil ne ko: «Loo wax rekk, Buur sang bi, maak lépp lu ma moom yaay boroom.» ⁵ Ndaw ya dikkaat ne ko: «Ben Addàd dafa wax ne: “Maa yónnee woon ci yaw, di sàkku nga jox ma sa xaalís ak sa wurus ak say jabar ak say doom yu góor. ⁶ Waaye nэгèni èllэг sax dinaa yónni samay jawriñ ci yaw, ñu seet ci sa biir kèr ak say kèr jawriñ. Mboolem luy sa alal dinañu ci teg loxo, nangu ko, yóbbu.”»

⁷ Buurub Israyil nag woolu magi réew ma mépp, ne leen: «Boo yeboo ngeen xam ne waa jii kat fitna lay wut; gis ngeen mu yeble ci man, bégga nangu samay jabar ak sama doom yu góor ak sama xaalís ak sama wurus, te bañaluma ko ci dara.» ⁸ Mag ñaak mbooloo ma mépp ne ko: «Bu ko déglu te bul nangu!» ⁹ Axab ne ndawi Ben Addàd ya: «Waxleen Buur, sama sang, ne ko: “Sa jaam ba nee mboolem la nga jèkkoonaa yónnee di ko sàkku dina ko def. Waaye lii nga mujja laaj moom, du ko def.”» Ndaw ya dem jottli tontam. ¹⁰ Ben Addàd dellu yeble ca moom ne ko: «Yal na ma tuur yi teg mbugal mu gèna tar, ndegam duma tas Samari, ba pèndu tabax du fi des buy fees loxoy mboolem ñi ma topp.»

¹¹ Buurub Israyil ne: «Waxleen ko ne ko: “Jóge xare, di bàkku moog gèn jèm xare, di bàkku.”»

¹² Ba Ben Addàd di jot ca kàddu googu, ma ngay naan, mook buur ya far ak moom ca mbaar ya. Mu jox ay nitam ndigal ne leen: «Takkuleen!» Ñu takku, ngir songi dèkk ba. ¹³ Ndeke ci biir loolu ab yonent dem na ca Axab buurub Israyil, ne ko: «Aji Sax ji dafa wax ne: Gis nga mbooloom xare mii mépp ak li ñuy bare lépp, xamal ne teg naa leen ci sa loxo bésuub tey, ndax nga xam ne maay Aji Sax ji.» ¹⁴ Axab ne ko: «Ku may defal loolu?» Mu ne ko: «Aji Sax ji nee: Dag yi kilifay diiwaan yi yebal lay doon.» Axab ne ko: «Kuy sooke xare bi?» Mu ne ko: «Xanaa yaw.»

Israyil daan na Siri

¹⁵ Ba mu ko defee Axab lim dag ya kilifay diiwaan ya yebal, ñuy ñaar téeméer ak

fanweer ak ñaar (232). Gannaaw loolu mu lim mbooloom Israyil gépp, ñuy juróom ñaari junni (7 000). ¹⁶ Ñu génn digg bèccég, fekk Ben Addàd a ngay màndi mook fanweeri buur ak ñaar ya mu faral, ca mbaar ya.

¹⁷ Dag ya kilifay diiwaan ya yebal a nga jiiitu. Ci biir loolu Ben Addàd yónnee, ñu wax ko ne ko: «Am na ñu jóge Samari, di ñew.» ¹⁸ Mu ne: «Su leen jàmm taxee jóg, jàppleen leen, ñuy dund; su leen xare taxee jóg it, jàppleen leen, ñuy dund.» ¹⁹ Ba mu ko defee daga kilifay diiwaan ya gènn ca dèkk ba, mbooloom xare ma topp ca seen gannaaw. ²⁰ Ku nekk jam noon ba nga janool, waa Siri daw, Israyil topp leen. Ben Addàd buurub Siri nag war fas, daw mooki gawaram. ²¹ Buurub Israyil nag song leen, rey fas ya, yaq watiir ya, daan waa Siri jéll bu réy. ²² Yonent ba dikk ca buurub Israyil ne ko: «Nanga dègèrluwaat te xam ni nga wara def, ndax nэгèni déwén buurub Siri dina la songaat.»

Siri songati na Israyil

²³ Ba loolu amee kàngami buurub Siri digal buurub Siri ci wàllu Israyil, ne ko: «Ñii, seeni tuur tuuri tund lañu; moo tax ñu èpp nu doole, waaye su nu xeexèk ñoom ci joor gi déy, su boobaa noo leen di èpp doole. ²⁴ Defal nii: follil buur yi ci sa gannaaw yépp, jèle leen fa ñu jiiite, teg fa jawriñ yu leen wuutu. ²⁵ Te yaw nga sosaat mbooloom xare mu mel ni ma nga amoon, fas ak fas, watiir ak watiir, ndax nu mana xareek ñoom ci joor gi. Su boobaa déy, noo leen di èpp doole.» Mu déggal leen, def noona.

²⁶ Ca déwén sa Ben Addàd lim waa Siri, daldi dem Afeg ca xare baak Israyil. ²⁷ Waa Israyil daje, sàkk ab dund, ba noppi dox wuti leen. Waa Israyil a nga dal janook ñoom, di saf ñaari gétti bëy. Waa Siri ñoom fees àll ba. ²⁸ Góoru Yàlla ga dikk ne buurub Israyil: «Aji Sax ji dafa wax ne: Gannaaw waa Siri dañoo yaakaar ne man Aji Sax ji, yállay tund laa, duma yállay xur, maay teg mbooloo mu réy mii mépp ci say loxo. Su ko defee ngeen xam ne maay Aji Sax ji.»

²⁹ Diiru juróom ñaari fan nag ñu jàkkaarloo ca seeni dal. Bésuub juróom ñaareel ba xare ba jib, waa Israyil daane téeméeri junniy xarekat (100 000) yu warul fas ca waa Siri ci benn bés bi; ³⁰ ña ca des daw ba Afeg, ca biir dèkk ba, tata ja màbb ca kaw ñaar fukki junniy nit ak juróom ñaar (27 000) ca ñoom. Fekk na Ben Addàd daw dugg ca biir dèkk ba, jàll ci biir néeg bu làqoo làqu. ³¹ Ay jawriñam ne ko: «Waaw, nun de dégg nanu ñu naa

buuri Israyil buur yu baax lañu. Tee noo sol ay saaku, tañlaayoo buum, toroxloo ko, te dem ca buurub Israyil? Jombul mu bàyyi la, nga dund.»³² Ñu teraxlaayoo ay saaku, tañlaayoo ay buum, dem ca buurub Israyil, ne ko: «Ben Addàd sa jaam ba nee, nga baal ko ngalla te bàyyi ko mu dund.» Mu ne: «Ndeke mu ngi dund ba tey? Moom sama mbokk a!»³³ Ndaw ya am njort lu rafet nag. Ñu gaaw naa: «Ben Addàd kay sa mbokk a!» Mu ne leen ñu dem indi ko. Ba Ben Addàd dikkee ba ca moom, mu waral ko ca watiram.

³⁴ Ben Addàd ne Axab: «Dèkk yi sama baay nangoo woon ci sa baay dinaa la ko delloo, te boo yeboo sàkkal sa bopp ay bérabi njaay ca Damaas, na sama baay def ca Samari.» Axab ne ko: «Man nag damay fasanteek yaw kóllère ci loolu, bàyyi la nga dem.» Ba loolu amee mu fasanteek moom kóllère, bàyyi ko mu dem.

Ab yonent sikk na Axab

³⁵ Ci biir loolu kenn ca kurélu yonent ya wax moroom ma ci ndigalal Aji Sax ji, ne ko: «Ayca, jam ma!» Waa ja länk, ne du ko jam.³⁶ Mu ne ko: «Gannaaw nanguwuloo déggal Aji Sax ji, dama ne, booy teqlikook man, gaynde fàdd la.» Naka la teqlikook moom, gaynde dajeek moom, fàdd ko.³⁷ Waa ja gisaat keneen ca ñoom ne ko: «Ayca, jam ma!» Kooka jam ko bu baax, ba gañ ko.³⁸ Yonent ba dem, taxaw ca yoon wa, soppi colam, fab kaala, takke bêt ya, di xaar Buur.³⁹ Buur romb, mu woo ko, ne ko: «Man de sang bi, damaa gaañu ci digg xare, nit dikk, indil ma keneen, ne ma: “Xoolal ma kii, su réccee, sa bakkan ay fey bakkanam, mbaa nga feye ko ñetti junniy (3 000) dogi xaalis.”⁴⁰ Waaye man damaa fekk ma japp wet gu nekk, waa ja nag récc.» Buurub Israyil ne ko: «Sab àttee ngoog, yaa ko waxal sa bopp.»⁴¹ Ci kaw loolu yonent ba ne muret kaala ga mu takkoon ca bêt ya; buurub Israyil xàmmi ko, xam ne ci yonent yi la.⁴² Mu ne ko: «Aji Sax ji dafa wax ne: Gannaaw yaa bàyyi ku ma aayaloon bakkanam, sa bakkan mooy fey bakkanam te say bokk ay fey bokkam.»⁴³ Ba loolu amee buurub Israyil mer, ne fónñ, daldi ñibbi kèram, ca Samari.

21

Buur Axab tooñ na Nabot

¹ Gannaaw ba loolu wéyee mu am lu xew, di mbirum toolu reseñu Nabot, waa ju dèkk Yisreel. Nabot daa amoon tool ca Yisreel, ca wetu kër Axab buurub Samari.² Axab ne Nabot: «Jox ma sa toolub reseñ

bi, ma def kob tóokër, ndax jege na sama kër. Dinaa la ko wecci toolub reseñ bu ko gën, walla su la gënalee ma delloo la njégam ci xaalis.»³ Nabot tudd Aji Sax ji, ne Axab: «Yàlla tere ma di la jox sama suufas maam!»

⁴ Axab ñibbi kèram, mer, ne fónñ ndax la ko Nabot waa Yisreel ba wax, ne ko du ko jox suufas maamam. Mu tédde ca lalam, gedd, baña lekk.⁵ Soxnaam Yesabel dikk ne ko: «Lu la tax ne fónñ nii? Lu la teree lekk?»⁶ Axab ne ko: «Damaa wax ak Nabot waa Yisreel bi, ne ko mu jaay ma toolub reseñam, ma fey ko xaalis mbaa su ko neexee ma wecci ko ko beneen toolub reseñ. Mu ne ma du ma jox toolub reseñam.»

⁷ Yesabel ne ko: «Xanaa du yaay buurub Israyil? Jógal lekk waay te bégal sa xol. Man maa lay jox toolu reseñu Nabot.»⁸ Ci kaw loolu Yesabel bind ay bataaxal ci turu Axab, def ci màndarga torlub Axab. Mu yónnee bataaxal ya ca mag ñaak gor ña ca dèkkub Nabot.⁹ Mu bind ca bataaxal ya ne: «Yéeneleen koor*, beral Nabot jataay ci kanam mbooloo mi,¹⁰ te teg ñaari nit ñu tekkiwul dara, ñu janook moom. Na ñoonu duural Nabot ne ko: “Saaga nga Yàlla, saaga Buur.” Su ko defee ngeen genne ko dèkk ba, dóor ko ay doj ba mu dee.»

¹¹ Ba mu ko defee waa dèkkub Nabot, mag ñaak gor ña daldi def la Yesabel santaane te bind ko ca bataaxal ya mu leen yónnee.¹² Ñu yéene koor, beral Nabot jataay ca kanam mbooloo ma.¹³ Ñaari nit ñu tekkiwul dara dikk toog janook moom. Ñu duural ko ca kanam mbooloo ma, ne Nabot daa saaga Yàlla, saaga Buur. Ñu génne Nabot dèkk ba, dóor ko ay doj ba mu dee.¹⁴ Ñu yónnee nag ca Yesabel ne ko dóor nañu Nabot ay doj ba mu dee.

¹⁵ Yesabel dégg ca, ne Axab: «Jógal nanguji toolu reseñu Nabot waa Yisreel bi. Moo la ko bañoona jaaye xaalis, waaye dundatul, dee na.»¹⁶ Axab dégg ca, daldi jubal toolu reseñu Nabot waa Yisreel ba, nangu ko.

Aji Sax ji dogal na mbugalu Axab

¹⁷ Ci biir loolu kàddug Aji Sax ji dikkal Ilyaa ma dèkk Tisbi, ne ko: ¹⁸ «Demal taseek Axab buurub Israyil ba ca Samari. Ma nga nee ca toolu reseñu Nabot ba mu nanguji.¹⁹ Wax ko ne ko: “Aji Sax ji dafa wax ne: Du dangaa rey nit, ba nangu alalam?” Nga teg ca ne ko: “Aji Sax ji dafa wax ne: Fa xaj ya xabe deret Nabot, ay xaj dina fa xabe sa deret, yaw itam.”»

* 21:9 21.9 koor googu dafa mel ni tuub ak toroxlu lañu ci jublu.

²⁰ Axab ne Ilyaas: «Āa, noon bi, gisati nga ma?» Ilyaas ne ko: «Gis naa la, ndax dangaa dogu ci def lu bon lu Aji Sax ji ñaawlu. ²¹ Aji Sax ji nee na: Dama ne, dinaa wacce lu bon ci sa kaw, fallas say sët, ba faagaagal ci digg Israyil kuy taxaw, colal, te bokk ci yaw Axab, muy gor, di jaam. ²² Dinaa def sa kër mel ni kër Yerbowam doomu Nebat mbaa kër Basa doomu Axiya, ndax merloo nga ma te bakkaarloo nga Israyil. ²³ Te itam Aji Sax ji wax na ci mbirum Yesabel ne: Ay xaj dina lekk Yesabel ca wetu tatay Yisreel.

²⁴ Ku Axab deele ci dëkk bi, xaj yi lekk; ku ci médde àll, njanaaw ya for.»

²⁵ Axab dafa dogu woon ci def lu bon lu Aji Sax ji ñaawlu, ba amu ci moroom moos, te jabaram Yesabel di ko ci xabtal. ²⁶ Axab daan na def ñaawtëef ju réy, di topp ay kasaray tuur, di def mboolem lu doon baaxu Amoreen ña Aji Sax ji dàqoon ngir bànni Israyil.

²⁷ Ba Axab déggee kàddu yooyu, daa xotti ay yéreeem, di woor, sol ay saaku, téddaale ko, di temp ndànk, ngir toroxlu. ²⁸ Ci biir loolu kàddug Aji Sax ji dikkal Ilyaas waa Tisbi ba, ne ko: ²⁹ «Gis nga ni Axab toroxloo fi sama kanam? Gannaaw toroxlu na nii ci sama kanam, duma wacce lu bon cig dundam. Ci jamonoy doomam ju góor laay wacce lu bon ci waa kërám.»

22

Axab songati na Siri

¹ Gannaaw loolu toog nañu ñetti at yu xare amul diggante Siri ak Israyil.

² Ca ñetteelu at ma, Yosafat buurub Yuda dikk ca buurub Israyil. ³ Fekk buurub Israyil wax aki jawriñam ne leen: «Xanaa xamuleen ne Ramot ga ca Galàdd noo ko moom? Te jéemunoo def dara, ba nangu ko ci loxol buurub Siri!» ⁴ Mu ne Yosafat: «Xanaa dinga ànd ak man ca xareb Ramot ga ca Galàdd?» Yosafat ne buurub Israyil: «Maa ngi, yaa ngi, samay nit ay say nit, te samay fas ay say fas.» ⁵ Yosafat teg ca ne buurub Israyil: «Jëkkala seet lu ci Aji Sax jiy wax.»

⁶ Buurub Israyil nag woy yonent yi, ñu daje, xawa tollook ñeenti tééméer. Mu laaj leen ne leen: «Ndax ma dal ci kaw Ramot ga ca Galàdd, am ma bàyyi?» Ñu ne ko: «Demal, ndax Boroom bi moo leen di teg ci sa loxo.» ⁷ Yosafat dellu ne: «Xanaa beneen yonentu Aji Sax ji da fee amatul, ba ñu mana seetlujeeti fa moom?» ⁸ Buurub Israyil ne Yosafat: «Am na ba tey genn góor gu ñu mana seetal ci Aji Sax ji. Waaye man maa ko jéppi, ndax du wax waxyu bu baax ci man, lu bon rekk; mooy Mise doomu Yimla.» Yosafat ne ko: «Buur, bul

waxe noonu.» ⁹ Buurub Israyil daldi woo ab jawriñam ne ko: «Demal indil ma gaaw Mise doomu Yimla.»

¹⁰ Buurub Israyil ak Yosafat buurub Yuda nag, ña nga toog, ku ci nekk ci ngànguneem. Ña nga solu ba jekk ca dàgga ja ca buntu Samari. Yonent yépp janook ñoom di biral ay waxyu. ¹¹ Fekk na Cedekiya doomu Kenaana, ma woon ci seen biir, defarlu ay béjjéni weñ. Ma nga naan: «Aji Sax ji dafa wax ne: “Yii ngay jame waa Siri, ba jeexal leen.”» ¹² Mboolem yonent ya ca des nag di waxe jenn waxyu jooju, naan: «Buur, songal Ramot ga ca Galàdd te jël ndam li, ndax Aji Sax ji moo leen teg ci say loxo.»

Mise yégle na jéllub Axab

¹³ Ci kaw loolu ndaw la wooyi Mise, dem ne ko: «Ma ne, kàddug yonent ya genn la: jàmmu Buur. Kon nag, na sa kàddu ànd ak seen kàddu di genn, te nga wax jàmm.» ¹⁴ Mise ne ko: «Giñ naa ci Aji Sax ji, Kiy Dund, li ma Aji Sax ji wax rekk laay wax.» ¹⁵ Ba Mise dikkee ba ca Buur, Buur ne ko: «Mise, ndax nu songi xare Ramot ga ca Galàdd, am nu bàyyi?» Mu ne ko: «Buur songal, daan, Aji Sax jee koy teg ci sa loxo!» ¹⁶ Buur nag ne ko: «Naata yoon laa lay giñloo ne la bu ma wax lu moy dëgg ci turu Aji Sax ji?» ¹⁷ Mise ne ko:

«Israyil gépp laa gis ñu tasaaroo ca tund ya,

mbete xar yu amul sàmm.

Aji Sax ji ne: “Ñii de amuñu boroom.

Na ku nekk ci ñoom ñibbi kërám ci jàmm.”»

¹⁸ Buurub Israyil ne Yosafat: «Waxuma la woon ne du wax waxyu bu baax ci man, xanaa lu bon?» ¹⁹ Mise teg ca ne ko: «Kon nag déglul kàddug Aji Sax ji. Gis naa Aji Sax ji, mu toog ci ngànguneem, mboolem gàngooru asamaan a nga taxaw ndijooram ba càmmoñam. ²⁰ Aji Sax ji nag ne: “Ana kuy nax Axab, mu songi Ramot ga ca Galàdd, ba daanu ca?” Kii ne nii, kee ne nee. ²¹ Noo ga dikk, taxaw fa kanam Aji Sax ji. Mu ne: “Man maa koy nax.” Aji Sax ji ne ko: “Nan?” ²² Mu ne: “Maay dikk, doon leel muy safaan dëgg ci làmmiñu yonentam yépp.” Mu ne ko: “Yaa koy nax, te man nga ko. Demal defe noonu.” ²³ Looloo waral lii. Aji Sax ji moo def xel muy safaan dëgg ci sa làmmiñu yonent yii yépp, te Aji Sax ji moo tudd musiba ci sa kaw.»

²⁴ Ba loolu amee Cedekiya doomu Kenaana talaata Mise, ne ko: «Ana fu Noowug waxyu gu Aji Sax ji jaare, ba jóge ci man di wax ak yaw?» ²⁵ Mise ne ko: «Yaw mii yaa koy gisal sa bopp, keroog ba ngay dugg néegoo néeg, di làqtu.»

26 Buurub Israyil ne ab surgaam: «Jáppal Mise, yóbbu ko ca Amon boroom dëkk bi, ak ca doomu Buur*». 27 Nga ne ko: «Buur dafa wax ne: Dugal-leen kii ndungsiin, di ko jox lekk gu néew ak ndox mu néew, ba kerooq may dikk ak jàmm.» 28 Mise ne: «Soo délseek jàmm déy, Aji Sax ji waxul, ma jottli.» Mu dellu ne: «Mbooloo mi, yeena ko déggandoo, yeen ñépp.»

Axab daanu na

29 Ba mu ko defee buurub Israyil ànd ak Yosafat buurub Yuda, ñu songi Ramot ga ca Galàdd. 30 Buurub Israyil nag ne Yosafat: «Damay soppo col, dugg ci xeex bi, waaye yaw solal sa mbubbam buur.» Buurub Israyil daldi soppig col, dugg ca xeex ba. 31 Fekk na buurub Siri jox ndigal fanweeri nitam ak ñaar, ñay jiite watiiri xare ya. Mu ne leen: «Buleen xeex ak kenn, du ku tuut, du ku réy, diirleen buurub Israyil, moom rekk.» 32 Ba loolu amee, ña jiite watiiri xare ya gis Yosafat, daldi ne: «Kii kay mooy buurub Israyil!» Ñu walbatiku ci kawam, ngir song ko. Yosafat nag àddu ca kaw, 33 njiiti watiiri ya xam ne du buurub Israyil, ñu walbatikuwaat, bàyyi ko. 34 Ci biir loolu mu am ku soqi ag fitt te teyu ko, mu dal buurub Israyil ci diggante ñaari walli pakk bi mu sol. Mu ne dawalkatu watiiram: «Waññiikul, génne ma ci xeex bi, gaafu naa!» 35 Naka la xare ba tàkkarnaase bésub kerooq bépp, ñu téye buur ba ca biir watiir wa, mu janook waa Siri, ba ca ngoon sa, mu doora dee. Jam-jam baa nga nàcc, ba taa ca biir watiir ba. 36 Jant baa ngay xalambaayu, yéene jib, ba dajal mbooloo ma. Ña nga naan: «Na ku nekk ñibbi sa dëkk, ca sam réew!» 37 Buur ba nag saay, ñu yóbbu ko Samari, denc ko foofa. 38 Ba ñuy raxas watiir ba ca déeg ba ñuy wax Samari, xaj ya di xab deret ja, gànc ya di sangu ca ndoxum déeg ma, muy la Aji Sax ji waxoon.

39 Li des ci mbiri Axab ak mboolem lu mu def ak kër ga mu tabax, rafetale ko bëñi ñay, ak mboolem dëkk ya mu tabax, loolu lépp, bindees na ko moos ca téere ba ñu dippee Jaloorey buuri Israyil ca seeni jant. 40 Buur Axab nag saay, fekki ay maamam, doomam Akasiya falu buur, wuutu ko.

Yosafat falu na Yuda

41 Axab moomu, ba mu faloo Israyil, ba dugg ñeenteelu atu nguuram, ca la Yosafat doomu Asa falu buur ca kaw Yuda. 42 Yosafat amoon na fanweeri at ak juróom, ba muy falu te ñaar fukki at ak juróom la falu ca Yerusaleem. Yaayam moo

doon Asuba, doomu Sili. 43 Yosafat ci tàñki baayam Asa la aw, jàddul fenn, xanaa di def njub lu Aji Sax ji rafetlu. 44 Teewul jèlewu fa bérabi jaamookaay ya. Askan wa dañu fa daa dem ba tey, di fa rendi saraxi jur, di fa taal cuuraay. 45 Séqoon na nag ak buurub Israyil jàmm.

46 Li des ci mbiri Yosafat ak njambaaram aki xareem, bindees na lépp moos ca téere ba ñu dippee Jaloorey buuri Yuda ca seeni jant. 47 La desoon ca ñay jaay seen bopp ca jaamookaayi tuur, ya fa desoon ca jamonoy baayam Asa, ba booba, Yosafat da leena jële ca réew ma.

48 Booba réewum Edom amuloon buur. Ab jawriñ lañu fa daan tabb.

49 Yosafat defaroon na ay gaal yu mag yu mu deme réewum Ofir, di wuti wurus. Waaye sottiwul, ndax gaal yaa nga suux ca Esiyon Geber. 50 Booba la Akasiya doomu Axab wax Yosafat ne ko: «Tee ngaa may samay nit, ñu ànd ak say nit ci gaal yi?» Yosafat lank.

51 Gannaaw gi Buur Yosafat tēdd, fekki ay maamam, ñu denc ko fa ñu denc ay maamam ca gox ba ñu naan Kër Daawuda maamam. Doomam Yoram falu buur, wuutu ko.

Akasiya falu na Israyil

52 Yosafat moomu, ba mu faloo Yuda, ba dugg fukkeelu atu nguuram ak juróom ñaar, ca la Akasiya doomu Axab falu buur ca Israyil, péeyoo Samari. Akasiya nguuru na Israyil ñaari at. 53 Da daan def lu bon, lu Aji Sax ji ñaawlu, topp tàñki ndeyam ak baayam ak tàñki Yerbowam doomu Nebat, ma doon bàkkaarloo Israyil. 54 Akasiya jaamu na Baal, tuur ma, di ko sujjóotal, ba merloo Aji Sax ji, Yállay Israyil, muy mboolem la baayam daa def.

* 22:26 22.26 Doomu Buur daa nañu ko wooye ndawal buur lu sasoo lenn ci liggéeyu èttu buur bi.

Buur ya di téereb ñaareel bi

Yonent Yàlla Ilyaas yar na Buur Akasiya

¹⁻² Ba Axab buurub Israyil saayee yàggul dara, Mowabeen ña daño fippu, jógal doomam Buur Akasiya.

Mu am bés Akasiya tollu biir néegam ca kaw taaxum kërám ga ca Samari, daldi xàwwikoo ca palanteer ba, daanu ba gaañu lool. Gannaaw gi mu yónni ay ndaw, ne leen: «Demleen seetal ma ca Baal Sehub, tuuru Ekkron, ba xam ndax dinaa dund gannaaw jéll bii ma daanu.»

³ Ci biir loolu malaakam Aji Sax ji wax Ilyaas, ma cosaanoo Tisbi, ne ko: «Demal gaaw dajee ndawi buurub Samari te laaj leen ne leen: “Xanaa Yàlla daa amul ci Israyil, ba ngeen di seeti ca Baal Sehub, tuuru Ekkron?” ⁴ Loolu tax na Aji Sax ji wax buurub Israyil ne ko: “Lal bi nga tédd doo ko wàcc, ndax dinga dee moos.”» Ci kaw loolu Ilyaas dem.

⁵ Ba ndaw ya wañnikoo, Buur Akasiya ne leen: «Lu leen wañni?» ⁶ Ñu ne ko genn góor a leen dogale, ne leen ñu dellu ci buur bi leen yónni, te wax ko ne ko: «Aji Sax ji nee: Ndax Yàlla daa amul Israyil ba ngay yónnee di seetuji ca Baal Sehub, tuuru Ekkron? Loolu tax na lal bi nga tédd doo ko wàcc, ndax dinga dee moos.» ⁷ Mu ne leen: «Waaw, góor gi leen dogale, wax leen loolu, nu mu mel?» ⁸ Ñu ne ko: «Góor ga boroom kawar la te ngembaal der la gembuu.» Akasiya ne: «Kooku Ilyaas mu Tisbi la.»

⁹ Ba mu ko defee Akasiya yebal njiitu juróom fukki dag, mu ànd ak juróom fukki nitam, dem ba ca Ilyaas. Gisufu lu moy mu toog ca kaw tund wa. Njiit la ne ko: «Ée góoru Yàlla gi, Buur nee nga wàcc.»

¹⁰ Ilyaas wax njiital juróom fukki dag ya, ne ko: «Ndegam góoru Yàlla laa, yal na sawara wàcce asamaan xoyom la, yaw yaak sa juróom fukki dag.» Sawara daldi bàyyikoo asamaan, ne jippét xoyom leen, mook juróom fukki dagam ya. ¹¹ Buur dellu yebal keneen ku jiite juróom fukki dag, mu ànd ak juróom fukkam ña. Njiit la dem ne Ilyaas: «Ée góoru Yàlla gi, Buur nee nga wàcc gaaw!» ¹² Ilyaas wax leen ne leen: «Ndegam góoru Yàlla laa, yal na sawara wàcce asamaan xoyom la, yaw yaak sa juróom fukki dag.» Sawaraw Yàlla bàyyikoo asamaan, xoyom njiit la, mook juróom fukki dagam ya. ¹³ Mu delluwaat yebal njiital juróom fukki dag, mu ànd ak juróom fukkam ña, muy ñetteel bi

yoon. Mu daldi dem ba àgg ca Ilyaas, ne gurub sukk ca kanamam; tinu ko ne ko: «Éy góoru Yàlla gi, ngalla wormaalal sama bakkan ak bakkani juróom fukk ñii, sang bi. ¹⁴ Gis nga ni sawara wàcce asamaan, xoyom ñaari njiiti juróom fukki dag yi ma jiitu, ñook seen juróom fukki dag, waaye rikk wormaalal sama bakkan.»

¹⁵ Malaakam Aji Sax ji ne Ilyaas: «Wàccal ànd ak moom, bu ko ragal.» Mu daldi wàcc ànd ak njiit la ba ca Buur, ¹⁶ ne ko: «Aji Sax ji nee: Yónni nga ay ndaw, di seeti ca Baal Sehub, tuuru Ekkron, mel ni Yàlla amul ci Israyil, ba ñu man koo laaj kàddoom. Loolu tax na lal bi nga tédd, doo ko wàcc, nde dinga dee moos!»

¹⁷ Ba loolu amee mu dee, muy la Aji Sax ji waxoon, Ilyaas biral ko. Rakkam Yoram nag falu buur, wuutu ko ca ñaareelu atu nguuru Yoram doomu Yosafat buurub Yuda. Fekk na Akasiya amuloon doom ju góor. ¹⁸ Li des ci mbiri Akasiya aki jéfam, bindees na ko moos ca téere bi ñu dippee Jaloorey buuri Israyil ca seeni jant.

2

Yonent Yàlla Ilyaas yéeg na

¹ Bés ba Aji Sax jiy yóbbu Ilyaas kaw asamaan ci biir callweer, ma nga bàyyikoo woon Gilgal, ànd ak Alyaasa.

² Ci biir loolu Ilyaas ne Alyaasa: «Xaaral fii rikk, ndax Aji Sax ji da maa yebal Betel.» Alyaasa ne ko: «Ak sama digganteek Aji Sax ji, Kiy Dund, nga fekke tey, duma teqlikook yaw mukk.» Ñu daldi ànd, dem Betel.

³ Kurélu yonenti Betel nag dikk ca Alyaasa ne ko: «Ndax xam nga ne bésuub tey jii Aji Sax ji dina la yenni sa kilifteefu sang Ilyaas?» Mu ne: «Man kay xam naa ko; waaye noppileen rekk.»

⁴ Ba mu ko defee Ilyaas ne Alyaasa: «Ngalla xaaral ma fii nag, ndax Aji Sax ji da maa yebal Yeriko.» Alyaasa ne ko: «Ak sama digganteek Aji Sax ji, Kiy Dund, nga fekke tey, duma teqlikook yaw mukk.» Ñu daldi ànd, dem Yeriko.

⁵ Kurélu yonenti Yeriko nag dikk ba ca Alyaasa ne ko: «Ndax xam nga ne bésuub tey jii Aji Sax ji dina la yenni sa kilifteefu sang Ilyaas?» Mu ne leen: «Man kay xam naa ko, waaye noppileen rekk.»

⁶ Gannaaw loolu Ilyaas ne Alyaasa: «Ngalla xaaral fii, ndax Aji Sax ji da maa yebal dexu Yurdan.» Alyaasa ne ko: «Ak sama digganteek Aji Sax ji, Kiy Dund, nga fekke tey, duma teqlikook yaw mukk!» Ñu ànd ñoom ñaar.

⁷ Ba loolu amee juróom fukki nit bawoo ca kuréli yonent ya, dikk taxaw, dand leen, janook ñoom fa ñu yem ñoom ñaar ca

tàkkal dexu Yurdan. ⁸ Ilyaas jël mbubbam, taxañ, ne ko tàrr ca ndox ma, mu xàjjalikoo yaar. Ñu jaar ci suuf su wow si, jàll ca wàlla.

⁹ Ba ñu jàllee, Ilyaas ne Alyaasa: «Wax ma lu ma lay defal bala ñu maa yóbbu, may teqlikook yaw!» Alyaasa ne ko: «Xanaa naa am lu mat sag leer ñaari yoon.» ¹⁰ Ilyaas ne ko: «Ñaan nga lu jafe. Waaye soo ma gisee bu ñu may jële fi ma nekk ak yaw, yóbbu, kon dinga ko am. Soo ma gisul nag, doo ko am.»

¹¹ Ci kaw loolu ñu ànd di waxtaan, di dem. Yéguñu lu moy watiiru sawara, wu ànd ak fasi sawara, ne jimeet, dox seen diggante ñoom ñaar; Ilyaas yiiroo aw callweer, yéeg kaw asamaan. ¹² Alyaasa gis loolu, daldi yuuxu, naan: «Wuy baayee, baay bóoy, yaay watiiru xarey Israyil aki gawaram!» Ba loolu amee gisatu ko. Mu ne séq ay yéreem, ne ko tareet, def ko ñaar ndaxu tiis, ¹³ doora for mbubb ma wadde ca Ilyaas; ne wërën, dem taxawi ca tàkkal dexu Yurdan. ¹⁴ Ba mu ko defee Alyaasa fab mbubb ma wadde ca Ilyaas, ne ko tàrr ca ndox ma ne: «Ana Aji Sax ji, Yállay Ilyaas? Ana mu?» Naka la Alyaasa dóor ca ndox ma moom itam, mu xàjjalikoo yaar, mu jàll.

¹⁵ Kuréli yonenti Yeriko ya doon seetaan a nga janook moom naa: «Leeru Ilyaas wàcc na ci kaw Alyaasa!» Ba loolu amee ñu gatandu ko, sujjóotal ko, dèpp seen jé ca suuf.

¹⁶ Ci kaw loolu ñu ne ko: «Xam nga lan la, sang bi? Am na ci nun juróom fukki nit ñu jámbaare. Nañu dem seetali la sa sang ba. Jombul leeru Yàlla yóbbu ko, teg ko ci kaw tund yii, wenn, mbaa mu teg ko ci biir xur yii, wenn.» Mu ne leen: «Déédéet, buleen leen yebal.» ¹⁷ Ñu soññ ko, ba mu am ca kersa, ne leen: «Waaw, yebal-leen leen.» Ñu daldi yebal juróom fukki nit, ñu seet diiru ñetti fan, gisuñu kenn. ¹⁸ Naka lañu dellu ca moom, fekk ko ca Yeriko, mu ne leen: «Newuma leen woon buleen dem?»

¹⁹ Gannaaw loolu waa dëkk ba ne Alyaasa: «Xam nga fi dëkk bi nekk baax na, sang bi, waaye ndox mi baaxul, te suuf si nanguwul.» ²⁰ Alyaasa ne leen: «Indil-leen ma ndab lu bees, te def ci xorom.» Ñu indil ko. ²¹ Mu dem ba ca bētu ndox ba, sànni ca xorom sa, ne: «Aji Sax ji nee: Laabal naa ndox mii. Dootu rey te dootu tax suuf si du nangu.» ²² Ndox ma daa laab ba tey jii, muy la Alyaasa waxoon.

²³ Alyaasa bàyyikoo fa, jëm Betel. Ma nga topp yoon wa di dem, ay gone jóge ca dëkk ba, di ko ñaawal, naan ko: «Boroom

nel, ca kaw! Ée boroom neleey, ayca ca kaw!» ²⁴ Naka la ne gees, ne leen jákk, daldi leen móolu ci turu Aji Sax ji. Ci kaw loolu ñaari urs* gënne ca àll ba, fàdd ca gone ya ñeent fukk ak ñaar. ²⁵ Mu bàyyikoo foofa jubal tundu Karmel, jóge fa dellu Samari.

3

Israyil ak Mowab jote nañu

¹ Ba Yosafat faloo Yuda, ba dugg fukkeelu atu nguoram ak juróom ñetti, ca la Yoram doomu Axab falu buur ca Israyil, péeyoo Samari. Yoram nguuru na fukki at ak ñaar, ² di def li Aji Sax ji ñaawlu. Waaye taxul mu dab ndeyam ak baayam: jële na fa doj wa ñuy jaamoo Baal te baayam sampoon ko fa. ³ Terewul mu sax ci xeetu bàkkaar ya Yerbowam doomu Nebat doon bàkkaarloo Israyil, bañ koo dëddu.

⁴ Ci biir loolu, Mesa buuru Mowab doonoon boroom jur, di fey buurub Israyil galagu téeméeri junniy xar (100 000) ak téeméeri junniy kuuy (100 000) yu ñu watul. ⁵ Buur Axab nag dee, buuru Mowab jógal buurub Israyil ba ko wuutu. ⁶ Ba mu ko defee Buur Yoram daldi génn Samari ca saa sa, lim mboooloom xarem Israyil mépp. ⁷ Ba loolu amee mu yónnee ca Yosafat buurub Yuda, ne ko: «Buuru Mowab fippu na, jógal ma. Ndax doo ànd ak man, nu xarejeek Mowab?» Mu ne ko: «Ahakay! Maak yaw benn lanu. Sama mboooloy sa mboooloo, samay fas di say fas,» ⁸ teg ca ne: «Fu nuy jaare, song leen?» Mu ne ko: «Xanaa ca mândirju Edom.»

⁹ Ba mu ko defee buurub Israyil ak buurub Yudak buurub Edom dem di dox diiru juróom ñaari fan, ba ñook jur gi ñu àndal, kenn amatu ci ndox. ¹⁰ Buurub Israyil ne: «Musiba am na walla! Nde Aji Sax ji da noo woo, nun ñetti buur yii, ngir teg nu ci loxol buuru Mowab.» ¹¹ Yosafat daldi ne: «Ndax yonentu Aji Sax ji nekkul fii, ba nu seetloo ko ci Aji Sax ji?» Kenn ca jawriñi buurub Israyil ne: «Alyaasaa ngi fi, mooy doomu Safat ji doonoon bëkk-néegu Ilyaas.» ¹² Yosafat ne: «Waaw, kàddug Aji Sax jaa ngi ci moom kay.»

Ba mu ko defee buurub Israyil ànd ak Yosafat buurub Yuda, ak buurub Edom, dem ca Alyaasa. ¹³ Mu wax ak buurub Israyil ne ko: «Ana lu ma séq ak yaw? Demal kay ca sa yonenti baay yaak sa yonenti ndey ya!» Buurub Israyil ne ko: «Déédéet, ndaxte Aji Sax jee nu fi woo, nun ñetti buur yii, ngir teg nu ci loxol Mowab.» ¹⁴ Alyaasa ne ko: «Giñ naa ci Aji Sax ji, Kiy Dund, Boroom gàngoori xare yi, moom mi may jaamu, bu dul woon ak

* 2:24 2.24 urs rab wu ñàng la; man naa épp gaynde.

Yosafat buurub Yuda mii teew, te ma rus ko, duma la xool sax mbaa ma di la faale. ¹⁵ Waaye indil ma ab xalamkat.» Mu indil ko.

Naka la xalamkat bay xalam, leeru Aji Sax ji dikkal Alyaasa. ¹⁶ Alyaasa ne: «Aji Sax ji nee: Gasleen ci xur wii ay kàmbi kàmb. ¹⁷ Ndaxte Aji Sax ji nee: Du ngelaw lu ngeen di gis mbaa taw, te du tee xur wii fees dell ak ndox, ngeen naan yeen ak seen gétt ak seen jur gu gudd. ¹⁸ Loolu yomb na Aji Sax ji te dina teg Mowab ci seen loxo it. ¹⁹ Dingen nangu mboolem dëkk bu mag bu ñu wëraley tata ak mboolem péey; garab gu baax ngeen gor; mboolem bëti ndox ngeen fatt, tool bu nangu ngeen yàq kooki xeer.» ²⁰ Ca suba sa, ba ñuy tollu ci rendi sarax rekk; ndox ma bàyyikoo yoonu Edom, wal, ba fépp fees ak ndox.

²¹ Ci biir loolu Mowabeen ñépp dégg ne buur ya ñëw nañu xareseek ñoom. Ñu woo képp ku àttan ngànaay, mag ak ndaw, ñu bokk taxaw fa seeni réew digaloo.

²² Ba ñu fanaanee ba ca suba sa, jant bay lérxat ca ndox ma. Waa Mowab tollu ca wàlla, di gis ndox ma xonq, mel ni deret. ²³ Ña nga naan: «Lee de deret la! Xam naa buur yaa xeexa xeex, ba reyante ca seen biir. Kon nag waa Mowab, ayca, ca lël ja!»

²⁴ Ba ñu dikkee ba ca dalub Israyil, waa Israyil jóg dal ca seen kaw, ba ñu won leen gannaaw, ne wéqet. Ñu dugg réewum Mowab, duma leen. ²⁵ Ba loolu amee ñu yàqte dëkk ya, mboolem tool bu nangu, kenn ku nekk sànni ca xeer ba mu fees, bëtu ndox bu nekk, ñu fatt, garab gu baax gu ne, ñu gor. Mujj na dëkk bu ñu naan Kir Eres donj a ne ñumm ak xeer ya ñu ko tabaxe. Teewul boroom mbaq ya gaw ko, song ko. ²⁶ Ba buuru Mowab gisee xeex bi di ko épp doole, daa woo juróom ñaar téeméeri boroom saamar, ànd ak ñoom ngir bëtt, ba àgg ca buurub Edom. Waaye sottiwul. ²⁷ Ba loolu amee mu jël taawam bu góor bi nara falu buur, wuutu ko, ne ko teqet rendi, def ko saraxu rendi-dóomal ca kaw tata ja. Waa Israyil ñaawlu jëf ja lool, daldi won buuru Mowab gannaaw, ñibbi seenum réew.

4

Alyaasa jot na jëtun ba

¹ Am na bés ku jëkkëram bokkoon ci yonent yi, di jooytu ci Alyaasa ne ko: «Sama jëkkër de sa ndongo la woon. Léegi nag faatu na, te yaw ci sa bopp sang bi, xam nga ne ku ragaloon Aji Sax ji la. Waaye ka mu ameloon bor moo dikk, bëgga yóbbu sama ñaari doom yu góor, ngir def leeni jaam.» ² Alyaasa ne ko: «Loo

bëgg ma dimbalee la ko? Wax ma loo am ca kër ga.» Mu ne ko: «Dara, sang bi. Awma dara ca kër ga lu moy taxub diw.»

³ Mu ne ko: «Demal àbbi ay ndab yu deful dara ci sa dëkkandoo yi la wër yépp, te bumu néew. ⁴ Su ko defee nga dellu tējoo say doom, ba noppi nga sotti diw gi ci ndab yooyu yépp, bu ci fees, nga ber.»

⁵ Mu bàyyikoo nag ca Alyaasa. Gannaaw gi mu tējuji, mooki doomam; ñu di ko jox, muy sotti. ⁶ Mu dem ba ndab ya fees, mu ne doom ja: «Jottli ma ndab leneen.» Mu ne ko: «Ndab desu fi de.» Diw gi it ne tekk, xelleetul. ⁷ Mu daldi dem wax ko góoru Yàlla ga. Mu ne ko: «Doxal jaay diw gi, fey say bor; la ca des nga dunde, yaak say doom.»

Alyaasa am nab dal

⁸ Am na bés Alyaasa jaare dëkk bu ñuy wax Sunem. As ndaw su bare alal woo ko lekk kërám, di ko soññ. Mujj na saa yu fa jaaree, daldi fay toog, ba xéewlu. ⁹ Ci biir loolu mu ne jëkkëram: «Aa, man déy, xam naa ne kiy fara dal ak nun góoru Yàlla gu sell la. ¹⁰ Tee nu koo tabaxal néeg bu ndaw ci kaw taax mi, defal ko ca ab lal ak taabal ak toogu akub làmp, ba bu ñëwatee dal ca?»

Alyaasa delloo na njukkal

¹¹ Noonu la Alyaasa dikke bés, dal ca néeg ba ñu ko tabaxal ca kaw taax ma, tédde fa. ¹² Ci kaw loolu mu ne surgaam Gewasi: «Wool ma ndawas Sunem sii.» Mu wool ko ko, mu dikk taxaw. ¹³ Mu ne surgaam: «Waxal ma ndaw sii ne ko: «Waaw, yaw de yaa ngi sonn ci nun coono bii bépp! Ana loo bëgg nu defal la ko? Ndax nu waxal la Buur lu jëm ci yaw, am nu wax ak njiital mbooloom xare ma?» Mu wax ko, mu ne ko: «Jërëjéf, waaye am naa teraanga ci sama biiri bokk.» ¹⁴ Alyaasa ne Gewasi: «Ana lu nu koy defal nag?» Mu ne ko: «Amul doom ju góor de, te jëkkëram mag la.» ¹⁵ Alyaasa ne ko: «Woo waat ko.» Mu woo ko; mu dikk, taxaw ca bunt ba. ¹⁶ Alyaasa ne ko: «Nègèni déwén dinga leewu doom ju góor.» Mu ne ko: «Déet, sang bi, góoru Yàlla gi, bu ma nax mukk, sang bi.»

¹⁷ Ndaw sa nag mujj ëmb; ca déwén sa mu am doom ju góor, ca jamono jooja, muy la ko Alyaasa waxoon.

¹⁸ Xale ba di màgg. Mu am bés mu dem fekki baayam ca ñay góob. ¹⁹ Mu jekki ne baayam: «Wóoy baay, sama bopp bi, sama bopp bi!» Baay ba ne surga ba: «Yóbbu ko ca yaayam.» ²⁰ Surga ba fab ko, yóbbu ca yaayam, mu uuf ko, ba ca digg bëccëg, xale ba dee. ²¹ Yaay ja yéeg, téral ko ca kaw lal góoru Yàlla ga, tēj bunt ba, daldi génn. ²² Mu woo jëkkëram, ne ko: «Rikk

boole maak kenn ci surga yi te jox ma menn mbaam, ma daw ba ca góoru Yàlla ga te ñiww gaaw.»²³ Mu ne ko: «Ana loo wuti ca moom tey, te du Terutel weer, du bésub Noflaay?» Mu ne ko: «Jàmm la.»

²⁴ Ba loolu amee ndaw sa takk mbaam ma, ne surgaam: «Doxal jiitu, bu ma taxawloo ci yoon wi te waxuma la ko.»

²⁵ Mu dem ba àgg ca góoru Yàlla ga, ca tundu Karmel.

Góoru Yàlla ga séen ko fu sore, ne surgaam Gewasi: «Xoolal, ndawas Sunem saa ngi. ²⁶ Dawal gaaw dajeek moom, laaj ko mbaa mu ngi ci jàmm mook jèkkèram ak doomam.» Mu laaj ko, mu ne ko: «Jàmm rekk la.» ²⁷ Mu agsi nag ca góoru Yàlla ga, ca kaw tund wa, ne fèlèn ca suuf, jàpp ca tànk ya. Gewasi dikk, bègg koo bèmèx, mu ne ko: «Bàyyi ko, xolam a naqari. Aji Sax ji nag nèbb na ma ko, xamalu ma lan la.» ²⁸ Ndaw sa ne ko: «Sang bi, ndax maa la ñaan doom ju góor? Newuma la woon bu ma nax?»

²⁹ Ba loolu amee Alyaasa ne Gewasi: «Takkul, nàbb sama yet ci sa loxo te daw dem. Koo mana taseel, bu ko nuyu te bu la nuyoo, bu ko fey. Boo àggee, tegal sama yet wii ca kaw kanamu xale ba.» ³⁰ Teewul yaayu xale ba ne ko: «Ak sama digganteek Aji Sax ji, Kiy Dund, nga fekke tey, дума la fi bàyyi.» Mu daldi jóg topp ca moom.

³¹ Fekk na Gewasi jiitu leen. Ba mu agsee, teg na yet wa ca kaw kanamu xale ba, waaye xale ba àdduwul, yènguul. Gewasi waññiku, dajeek Alyaasa ne ko: «Xale ba de yewwuwul!» ³² Ba Alyaasa agsee ca kër ga it, fekkul lu moy néewu xale bi tédd ca kaw lal ba. ³³ Naka la dugg, téj bunt ba, ñoom ñaar ca biir. Mu ñaan ci Aji Sax ji, ³⁴ ba noppi yéeg, daldi tàlli ca kaw xale ba, tafu ca kawam, gémmiñ ak gémmiñ, bêt ak bêt, biir loxook biir loxo. Naka la bóof ca kaw xale ba, yaram wa tàmbalee tangaat. ³⁵ Alyaasa jóg di jaabante ca biir néeg ba. Nes tuut mu yéeg, bóofaat ca kaw xale ba; xale ba daldi tislí ba muy juróom ñaari yoon, ne xiféet. ³⁶ Ba loolu amee Alyaasa woo Gewasi ne ko: «Wool ndawas Sunem soosu.» Mu woo ndaw sa, mu dikk. Mu ne ko: «Jèlal sa doom.» ³⁷ Ndaw sa ne gurub cay tànkam, sujjóot; ba noppi fab doomam, génn.

Alyaasa sekki na tooke ja

³⁸ Gannaaw loolu Alyaasa ñibbi Gilgal, mu yemook xiif am ca réew ma. Mu am bés kurélu yonent ya daje fa moom. Alyaasa ne surgaam: «Tegal cin lu mag li te toggal yonent yii mboom.» ³⁹ Ci kaw loolu kenn ca ñoom génn, dem ca àll ba,

di witti ay xob, daldi fa gis ag lawtan gu doom ya mel ni yomb, mu witt ca ba mbubbam fees. Mu dellu, fejat ko, yeb ca cinu mboom la, te kenn xamul lu mu doon.

⁴⁰ Ŋu yekkal ko nit ña, waaye manuñu koo lekk. Naka lañu mos rekk, yuuxoo ne: «Lekk-dee la cin li def de, góoru Yàlla gi!»

⁴¹ Alyaasa ne: «Indil-leen ma sunguf.» Ŋu indi, mu xépp ca cin la, daldi ne: «Sotttil-leen mbooloo mi, ñu lekk.» Ba loolu amee dara lu aay amatul ca cin la.

Alyaasa leel na mbooloo

⁴² Ba loolu wéyee jenn waay jóge Baal Salisa, indil góoru Yàlla ga mburum pepp ma jékka ñor, muy ñaar fukki mburuy lors, boole ciy gubi bele, yeb ko ci saakoom. Alyaasa ne ñu jox ko mbooloo mi, ñu lekk.

⁴³ Ka koy séddale ne ko: «Waaaw, nu may taajale lii téeméeri nit?» Mu ne ko: «Joxal mbooloo mi ñu lekk, ndax Aji Sax ji nee: Dinañu lekk ba mu des.» ⁴⁴ Mu taajal leen ko, ñu lekk ba desal, muy la Aji Sax ji waxoon.

5

Alyaasa faj na kilifa

¹ Bu loolu wéyee Naaman njiital xareb buurub Siri la woon. Sangam buurub Siri nawloo ko lool, def ko nitam, ndax ciy loxoom la Aji Sax ji jaarale ndam li mu mayoon waa Siri. Ku jàmbaare la woon, waaye daa amoon jàngoroy ngaana*.

² Fekk na ay xarekati waa Siri dem songi réewum Israyil, jàppe fa ab janq, def ko surgab jabaru Naaman. ³ Mu am bés janq ba ne njaatigeem: «Éy su sama sang bi demoon ca yonent ba ca Samari! Kon de dina ko teggil jàngoroy deram ji.»

⁴ Naaman nag dem wax Buur, sangam, ne ko janqub waa Israyil ba nee na nàngam ak nàngam. ⁵ Buurub Siri ne ko: «Demal kay, dinaa la yóbbante buurub Israyil bataaxal.» Mu dem, yóbbalee ñetti téeméeri kiloy xaalis, ak juróom benn fukki kiloy wurus, ak fukki mbubbi xew; ⁶ bataaxal ba mu yót buurub Israyil nag, lii lañu ca bind: «Bataaxal bii maa ko teg ci sama loxol surga Naaman, yebal ko ci yaw, ngir nga fajal ko ngaana gi ko dal.»

⁷ Naka la buurub Israyil jàngo bataaxal ba rekk, ne mbubb ma tareet ndax jaaxle, daldi ne: «Man dama di Yàlla bay rey, mbaa may dundal, ba kii di yebal nit ku may fajal ngaana! Seetleen lii rekk: kii da may wut!»

⁸ Ba Alyaasa, góoru Yàlla ga dégge ne buurub Israyil xotti na mbubbam, daa yónnee ca moom, laaj ko ne ko: «Ana lu tax nga xotti sa mbubb? Yebalal waa ji ci

* 5:1 5.1 ngaana: baat bi man naa èmb yeneen jàngoroy der juy law te aay, yu dul ngaana kese.

man rekk. Dina xam ne yonent a ngi ci Israyil.»⁹ Ba loolu amee Naaman yóbbaaale ay fasam aki watiiram, dikk taxaw ca bunt kër Alyaasa. ¹⁰ Alyaasa yebal ndaw ca moom ne ko: «Demal sanguji juróom ñaari yoon ca dexu Yurdan, sa yaram set, dellu mel na mu meloon.»

¹¹ Naaman nag mer. Ma ngay dem te naan: «Xoolal rekk, man mi noon day daldi génn taxaw ci biti, ñaan ci Yàllaam Aji Sax ji, tiimale loxoom èr bi, daldi teggi jàngoro ji!»¹² Te sax xanaa Abanaa ngi nii ak Parpar, di dexi Damaas, gën fopp mboolem ndox muiy wal ci Israyil? Ndax dama caa manuloona sangu, ba wér?» Mu walbatiku dem, mer lool.

¹³ Surgaam ya nag dikk, kenn ca ñoom ne ko: «Baay Naaman, su doon lu jafe la la yonent bi wax ndax danga ko dul def? Kon kay su la nee nga sangu rekk, set wecc, nga war koo def!»¹⁴ Naaman nag doora dem, sóobu ca dexu Yurdan ga, ba muiy juróom ñaari yoon, muiy la góoru Yàlla ga waxoon. Mu daldi wér, yaram wa mel ni yaramu xale bu góor bu ndaw, set wecc.

¹⁵ Ba loolu amee Naaman dellu ca góoru Yàlla ga, mook mboolem toppam ma. Mu dikk ba ca moom, taxaw ne: «Dama ne léegi wóor na ma ne amul jenn Yàlla ci mboolem áddina ju moy Yàlla ji ci Israyil. Kon nag sang bi, ngalla nangul lii, maa la ko may.»¹⁶ Alyaasa ne ko: «Déedéet. Giñ naa ci Aji Sax ji, Kiy Dund, moom mi may jaamu, duma ko jël.» Mu soññ ko, soññ, mu bañ. ¹⁷ Naaman ne ko: «Gannaaw bañ nga, sang bi, nañu ma may séfub ñaari berkelle ci suuf, ngir kat, sang bi, dootuma jébbal ay tuur saraxu rendi-dóomal mbaa yeneen sarax, xanaa Aji Sax ji donj†. ¹⁸ Waaye sang bi, lenn rekk laay ñaan, Aji Sax ji jéggal ma ko. Bu sama sang ba di dugg ca kër tuur ma ñuy wax Rimon, di ko sujjóotal, ba japp sama loxo, ma ànd ak moom sujjóot ca kër Rimon, yal na ma Aji Sax ji jéggal la ma fay sujjóot rekk, sang bi.»¹⁹ Alyaasa ne ko: «Demal ak jàmm.»

Gewasi lal na pexe

Ba Naaman bàyyikoo ca Alyaasa, dem ba xawa sore,²⁰ Gewasi surgab góoru Yàlla ga, Alyaasa, ne ca xelam: «Eewaay sama sang daal! Day bàyyi Naaman waa Siri bii mu dem noonu rekk; jëlul dara ci li mu indi. Giñ naa ko ci Aji Sax ji, Kiy Dund, dinaa daw dabi ko, ba am ci moom as léf.»

²¹ Gewasi daldi daw dabi Naaman. Ba ko Naaman séenee muiy daw wutsi ko, mu cèppoo ca watiiram dajeek moom, ne ko:

«Mbaa jàmm la?»²² Mu ne ko: «Jàmm la kay. Sama sang a ma yónni ne ma ma wax la ne ñaari xale yu góori yonent a agsi léegi, jóge diiwaanu tundi Efrayim. Nee ndax doo ko jox fanweeri kiloy xaalis ak ñaari mbubbi xew yu mu leen may?»

²³ Naaman ne ko: «Ahakay! Jëlal juróom benn fukki kiloy xaalis kay!» Mu soññ ko nag, ba mu èmb juróom benn fukki kiloy xaalis yi ci ñaari mbuus, boole ca ñaari mbubbi xew, jox ko ñaari surgaam, ñu gáddu, jiitu Gewasi. ²⁴ Gewasi agsi ca tund wa, jële ko ca seeni loxo, dem, denci ko ca biir kër ga, ba noppi yiwi leen, ñu dem.

²⁵ Ba loolu wéyee mu dellu ca sangam Alyaasa. Mu ne ko: «Foo jóge nii?» Mu ne ko: «Demuma fenn di, sang bi.»²⁶ Alyaasa ne ko: «Defe nga ne samag leer teewuloon, ba nit kay wáce ca watiiram, di dajeek yaw? Ndax danoo tollu ci jël xaalisu kenn aki mbubb mbaa ay tooli oliw aki tooli reseñ aki gátt aki nag aki jaam yu góor ak yu jigéen?»²⁷ Ngaañag Naaman dina la topp, yaak saw askan ba fàww!» Ba mu ko defee Gewasi bàyyikoo ca Alyaasa, daldi gaana, yaram wa ne fureet, weex furr.

6

Weñu sémmiñ ga tëmb na

¹ Am na bés mbooloom yonent ya wax Alyaasa ne ko: «Xoolal, fii nuy dajeek yaw daa xat. ² Nan dem ngalla ba ca tàkkal dexu Yurdan, ku nekk ci nun sàkk fa aw dénk, nu defaral fa sunu bopp bérab bu nu daje.» Alyaasa ne leen: «Demleen.»³ Kenn ca ñoom ne ko: «Sang bi, ñéwal nu dem kay!» Mu ne ko: «Waaw, nan dem.»⁴ Mu ànd ak ñoom dem ba ca dexu Yurdan, di fa gor ay garab. ⁵ Kenn ca ñoom doon gor, weñu sémmiñam wadd ca ndox ma. Mu jalu, ne: «Éy, sang bi, te dama koo àbboon kat!»⁶ Góoru Yàlla ga ne ko: «Fu mu wadd?» Mu won ko fa mu wadd, mu dog bant sanni foofa, weñ ga tëmb. ⁷ Mu ne ko: «Foral!» Mu yóotu, for ko.

Alyaasa sànk na gàngoor

⁸ Ba loolu wéyee buurub Siri doon na xareek Israyil. Ci biir loolu mu diisooki surgaam, ne leen bérab sangam lay def ab dalam. ⁹ Ci kaw loolu góoru Yàlla ga yónnee ca buurub Israyil, ne ko: «Nanga moytoo jaare bérab sangam, ndaxte fa la waa Siri jëm.»¹⁰ Buurub Israyil yónnee fa ko góoru Yàlla ga wax, ngir nemmiku foofa. Alyaasa di artoo Buur noonu, muiy faggandiku. Loolu am na bu dul benn yoon, du ñaar. ¹¹ Buurub Siri nag jàq lool ci loolu, daldi woolu ay jawriñam ne leen:

† 5:17 5.17 Naaman dafa yaakaaroon ne Aji Sax ji, Israyil rekk lañu ko mana jaamoo. Teewul mu defe ne ku sàkk suufas Israyil, tabaxal ko ca feneen sarxalukaay, Aji Sax ji man na faa nangu sa jaamu ba tey.

«Ana kan ci yeen moo fi nekkal buurub Israyil?»¹² Kenn ca jawriñ ya ne ko: «Du kenn, Buur sang bi; waaye Alyaasa, yonent bi ci Israyil mooy jottli buurub Israyil kaddu yi ngay wax ci sa biir néegu biir.»¹³ Mu ne: «Seetalileen ma ko, ma yónnee, jàpp ko.» Ñu mujj xamal ko ne: «Moom de, ma nga ca Dotan.»¹⁴ Buurub Siri yebal fa ay dag yu takku, yóbbaaale ay fas aki watiir. Mu agsi guddi, gaw dëkk ba.

¹⁵ Ci kaw loolu bèkk-néegub góoru Yàlla ga jóg ca suba teel, génn, gisul lu moy mbooloom xare mu gaw dëkk ba, aki fas aki watiir. Mu ne ko: «Éy sang bi, fu nu jëm?»¹⁶ Alyaasa ne ko: «Bul tiit, noo leen èpple ñu ñu àndal.»¹⁷ Alyaasa nag ñaan ne: «Aji Sax ji, ngalla ubbil ay bêtam, mu gis.» Aji Sax ji ubbi bėti surga ba, mu xool, ndeke tund waa nga fees aki fas aki watiiri sawara, wër Alyaasa.

¹⁸ Ba mu ko defee waa Siri wutsi Alyaasa, mu ñaan ci Aji Sax ji ne ko: «Rikk muural bėti mbooloo mii.» Aji Sax ji muur seeni bêt, na mu ko ko ñaane.¹⁹ Alyaasa nag ne leen: «Fii du yoon wi de, te du dëkk bi ngeen di seet it. Toppleen ma, ma yóbbu leen ci ki ngeen di seet.» Mu daldi leen yóbbu ba Samari.

²⁰ Ba ñu duggee Samari, Alyaasa dellu ñaan ne: «Aji Sax ji, ngalla ubbil bėti nit ñii, ñu gis.» Aji Sax ji muri seeni bêt, ñu xoolle rekk, gis ne ñu ngi biir Samari.²¹ Buurub Israyil gis leen ne: «Baay Alyaasa, ma rey leen? Áa, ma rey leen?»²² Mu ne ko: «Bu leen rey muuk. Xanaa ñoo jàpp cib xare sax doo leen rey? May leen ñu lekk, naan, te dellu ca seen sang.»²³ Ba loolu wéyee Buur berndeel leen bernde ju réy; ñu lekk, naan; mu yiwi leen, ñu ñibbi ca seen sang. Booba la waa Siri géjoona def gàngoori yàqkat, di dugg biir réewum Israyil.

Xiif ba tar na ca Samari

²⁴ Ba ñu demee ba yeneen jamono, Ben Addàd buurub Siri woo mbooloom xareem mépp, dem gawi Samari.²⁵ Xiif bu metti ama ca Samari ndax gaw ba, ba boppub mbaam-séf di jar juróom ñett fukki dogi xaalis, genn-wáll liibaru jonkanu pitax* di jar juróomi dogi xaalis.²⁶ Mu am bés buurub Israyil jaar ca kaw tata ja, senn as ndaw àddu ca kaw ne ko: «Buur, sang bi, ngalla wallu ma!»²⁷ Mu ne ko: «Bu la Aji Sax ji walluwul, nu ma lay walloo? Du pepp, du ndoxum reseñ ju ma la mana may.»²⁸ Mu teg ca ne ko: «Lan la sax?» Ndaw sa ne ko: «Ndaw sii da ma noon: “Indil sa doom, nu lekk ko tey, èllég nu lekk sama doom.”²⁹ Nu togg sama doom,

bokk ko lekk. Ma ne ko: “Su èllégee indil sa doom, nu bokk ko lekk.” Moom nag mu làq doomam.»³⁰ Ba Buur déggee kàdduy ndaw sa, daa xotti mbubbam ndaxu naqar. Ma ngay dox, di wéy ca kaw tata ja, mbooloo ma tollu ci suuf séenuñu lu moy saaku bi mu def ñjiitlaay, di ko ñaawloo.

³¹ Ma nga naan: «Yal na ma Yàlla teg mbugal mu géna tar ndegam bésuub tey jii boppub Alyaasa doomu Safat du teqlikook baatam.»³² Fekk na Alyaasa nga ca kèram toog, mag ña bokk toog ak moom. Buur yebal ndaw ca moom. Ndaw la agseegul, Alyaasa ne mag ña: «Xool-leen bóomkat bii yebal kuy dogsi sama bopp! Xam ngeen lan la, bu ndaw li agsee rekk, tējleen bunt bi, tere koo dugg; ndax du tãnk sangam laay dégg, mu topp ci moom sax?»

³³ Naka la Alyaasa di wax, ndaw la ne jimeet, jëm ca moom. Ma nga naan: «Gis nga musiba mii Aji Sax ji wacce. Kon ana lu may séentootti ci Aji Sax ji?»

7

¹ Ba loolu amee Alyaasa ne: «Dégluleen kàddug Aji Sax ji. Aji Sax ji nee: Négëni èllég benn nattub lëmm ci sunguf su mucc ayib benn dogu xaalis donj lay doon, ñaari natti lors it di benn dogu xaalis ca buntu Samari.»² Jaraaf ja daan ànd ak Buur saa su ne àddu ca ne góoru Yàlla ga: «Ma ne, su Aji Sax ji ubbi woon sàqi asamaan sax, ndax man naa tax loolu am?» Mu ne ko: «Dinga ci teg sa bêt déy, waaye doo ci lekk.»

Aji Sax ji wallu na Samari

³ Ci biir loolu amoon na ñeenti gaana yu nekkoon ca bunt dëkk ba. Ña nga naan ci seen biir: «Xanaa dunu toog fii ba dee?»⁴ Su nu demee ca biir dëkk ba, danuy dee ak xiif. Su nu toogee fii itam, dee ak xiif. Kon kan nan dem ca dalub waa Siri, jébbal leen sunu bopp. Su ñu nu bàyyee, nu dund, baax na. Su ñu nu reyye it, nu dee rekk.»

⁵ Ci kaw loolu ñu jóg timis, jëm ca dalub waa Siri. Ba ñu agsee ca peggub dalu waa Siri, gisuñu luy nirook nit sax.⁶ Booba fekk na Boroom bi dégtal waa dalub Siri ba riirum fas yu ànd aki watiiri xare ak gàngoor gu réy, ba tax ñu naan ca seen biir: «Áa! Loolu de, buuri Etteen ñaak buuri Misraa, Buurub Israyil fey leen, ngir ñu songsi nu!»⁷ Ba mu ko defee ñu jóge fa ca timis, bàyyi fa seeni xaymaak seeni fas ak seeni mbaam, wacc dal ba noonu, daw rawaleji seen bakkan.

* 6:25 6.25 jonkanu pitax: am na ñu jàpp ne jonkanu pitax xollitu peppu saxayaay la gu ñuy wooye noonu.

⁸ Ñeenti gaana ya nag dikk, ba jub dal ba, daldi jegesi, dugg cib xayma, lekk fa, naan, jële fa xalis ak wurus aki yére, dem nëbbi ko; dellu duggaati cib xayma jëleeti fa, dem nëbbi ko. ⁹ Ba loolu amee ñu ne ca seen biir: «Nun kat defunu njub. Bésub tey jii bésub jàmm la; nun, nu ne patt yéglewunu ko. Su nu xaaree ba jant bi leer de, àq dina nu topp. Kon nag aycaleen nu dem yeggeji ko waa kër Buur.» ¹⁰ Ñu daldi dem woo wattukati bunt dëkk ba, wax leen, ne leen: «Dem nanu ca biir dalu waa Siri; ndeke kenn nekku fa, baat jibu fa; dara lu moy fas yu yeeweek mbaam yu yeeweek xayma yu ne ñumm.»

¹¹ Wattukati bunt ba woote, yégle ko ca biir kër Buur. ¹² Buur jóg ca guddi, wax aki jawriñam ne leen: «Ma wax leen nag li nu waa Siri di fexeel. Xam nañu ne nu ngi dee ak xiif. Moo tax ñu jóg ca seen dal, laquji ca àll ba. Xam naa dañu ne: “Bu ñu génnée dëkk bi rekk, nu jàpp leen, ba noppi dugg ci biir dëkk bi.”» ¹³ Kenn ca jawriñ ya ne ko: «Nanu yónni rekk ay nit ñu war juróomi fas ci yi nu dese ci dëkk bi. Bu ñu leen reyee de, ñook mbooloom Israyil mi des ci dëkk bi yépp ay yem demin. Kon nanu leen yónni rekk te seet ba xam.»

¹⁴ Ba loolu amee ñu waajal ñaari watiir ak seeni fas, Buur yebal ay ndaw yu toppi mbooloom Siri, ne leen: «Demleen seeti.» ¹⁵ Ñu dem toppi leen ba ca dexu Yurdan, ndeke yoon wa fees na dell aki yéreeki jomtukaay yu waa Siri sànni, ba ñuy daw. Ndaw ya waññiku, wax ko Buur. ¹⁶ Mbooloo ma riir, génn wuti dalu Siri ba, sèxéto ko. Ci kaw loolu benn nattub lëmm ci sunguf su mucc ayib di jar benn dogu xalis donj, ñaari natti lors it di benn dogu xalis, muy la Aji Sax ji waxoon. ¹⁷ Fekk na Buur teg jawriñam ja mu doon àndal saa su nekk ca buntu dëkk ba, mu di ko wattu. Mbooloo ma nag di buuxante, ba dëggaate ko ca bunt ba, mu dee. Muy la góoru Yàlla ga yégle woon ba Buur dikkee ca moom. ¹⁸ Na ko góoru Yàlla ga waxe woon Buur, ne ko: «Nëgëni èllëg benn nattub lëmm ci sunguf su mucc ayib doon benn dogu xalis donj, ñaari natti lors it di benn dogu xalis ca buntu Samari,» noonu la ame. ¹⁹ Jaraaf ja da caa àddu woon ne góoru Yàlla ga: «Ma ne, su Aji Sax ji ubbi woon sàqi asamaan sax ndax man naa tax loolu am?» Mu ne ko: «Dinga ko gisal sa bopp déy, waaye doo ci lekk.» ²⁰ Loolu ci boppam moo ko dal itam, ndax mbooloo ma dañoo buuxante, ba dëggaate ko ca bunt ba, mu dee.

Ndawas Sunem sa jotaat na alalam

¹ Am na bés Alyaasa wax ndaw sa mu dekkaloon doomam ju góor ne ko: «Ayca, àndal ak sa njaboot, ngeen dali fu ngeen mana dal, ndax Aji Sax ji dogal na ab xiif ci réew mi, te dina am juróom ñaari at.» ² Ndaw sa fabu, def la ko góoru Yàlla ga wax, dem yoonam mook njabootam, dali ca réewum Filisteen ña, toog fa diiru juróom ñaari at. ³ Ba juróom ñaari at ya matee, ndaw sa jóg ca réewum Filisteen ña, ñibbsi. Mu dem ca Buur, di sàkku mu delloo ko kërám ak suufam. ⁴ Loolu fekk Buur di waxtaan ak Gewasi, surgab Alyaasa góoru Yàlla ga, naan ko: «Ayca, wax ma mboolem jalooore yi Alyaasa def.» ⁵ Gewasi nag di nettali Buur na Alyaasa dekkalee woon xale ba, rekk ndaw sa Alyaasa dekkaloon doomam ju góor ne jalañ, di sàkkusi ca Buur mu jox ko kërám ak suufam. Gewasi ne ko: «Ndaw saa ngii nag, Buur, sang bi. Doomam ju góor jii la Alyaasa dekkaloon.» ⁶ Buur laaj ndaw sa, mu wax ko lépp. Buur boole kook bëkk-néegam ne ko: «Fexeel ba ñu delloo ndaw sii lépp luy alalam ak dayob lépp lu suufam meññoon, la ko dale ca bés ba mu fi jógée ba tey jii.»

Asayel mujj na falu ca Siri

⁷ Am na it yoon wu Alyaasa demoon Damaas, péeyu Siri. Fekk Ben Addàd buurub Siri wopp. Ba ñu ko waxee ne ko: «Góoru Yàlla gi ñëw na fi.» ⁸ Buur ne Asayel, ab jawriñam: «Demal ca góoru Yàlla ga te yóbbaale loo teg ci loxoom, mu seetal ma ci Aji Sax ji. Laajal ma ko ne ko: “Ndax dinaa jóg ci sama wopp jii?”» ⁹ Asayel dem ca moom, yóbbaale lu mu ko jox, muy mboolem la gën ca Damaas, tollu ci sèfub ñeent fukki giléem. Mu dikk taxaw ca kanamam, ne ko: «Ben Addàd buurub Siri moo ma yónni fi yaw, ne ma: “Laajal ma Baay Alyaasa ndax dinaa jógée ci sama wopp jii.”» ¹⁰ Alyaasa ne ko: «Demal ne ko dina jóg moos, waaye Aji Sax ji won na ma ne dina dee déy!» ¹¹ Ba loolu amee góoru Yàlla ga ne dann, ne ko jàkk, ba Asayel rus. Mu daldi jooy.

¹² Asayel ne ko: «Sang bi, looy jooy?» Mu ne ko: «Damaa xam lu bon li ngay defi waa Israyil. Seeni tata ngay taal, seeni xale yu góor nga jam saamar ñu dee, seeni doom nga tas ci suuf, seeni jigéeni biir nga butti.» ¹³ Asayel ne ko: «Moo sang bi, man mi ab xaj gën, nu ma mana defe jooju jéf ju réy?» Alyaasa ne ko: «Aji Sax ji won na ma ne yaay doon buurub Siri.» ¹⁴ Asayel bàyyikoo ca Alyaasa, dellu ca sangam. Mu ne ko: «Lu la Alyaasa wax?» Mu ne ko: «Nee na ma de dinga jóg moos.» ¹⁵ Ca èllëg sa nag Asayel fab malaan, xooj ko ci

ndox, dëpp ko ca kanamu buur ba, fatt ko, mu dee. Gannaaw loolu Asayel falu buur, wuutu ko.

Yoram falu na Yuda

¹⁶ Ba buurub Israyil Yoram doomu Axab duggee juróomeelu atu nguuram, ca la Yoram doomu Yosafat buurub Yuda falu buur ca Yuda. ¹⁷ Fanweeri at ak ñaar la amoon ba muy falu buur, te juróom ñetti at la nguuru fa Yerusalem. ¹⁸ Tànkí buuri Israyil la topp, di roy waa kër Axab, ndax doomu Axab la jël jabar, di def li Aji Sax ji ñaawlu. ¹⁹ Waaye Aji Sax ji bugguloona tas Yuda ngir Daawuda, jaamam ba, ndax la mu ko digoona may ci ay doomam kuy saxal nguuram fàww, ba du fey.

²⁰ Ca jamonoy Yoram la Edomeen ña fippu, bañ moomeelu Yuda, ba fal seen buuru bopp. ²¹ Gannaaw loolu Yoram jáll ba Sayir, yóbbaaale watiiri xareem yépp. Moo jóg ag guddi, dal ca kaw Edomeen ña leen gawoon, moom ak njiiti watiiri xareem. Waaye gangooru Yuda ñoo daw, dellu ca seeni xayma. ²² Edomeen ñaa ngi bañ moomeelu Yuda ba tey jii. Jant yooyu la Libna itam fippu.

²³ Li des ci mbiri Yoram ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. ²⁴ Yoram nag tédd, fekki ay maamam, ñu denc ko ca bàmmeelu maamam ca gox ba ñu naan Kër Daawuda. Doomam Akasiya falu buur, wuutu ko.

Akasiya falu na Yuda

²⁵ Ba Yoram doomu Axab buurub Israyil duggee ca fukkeelu atu nguuram ak ñaar, ca la Akasiya doomu Yoram falu buur ca Yuda. ²⁶ Naar fukki at ak ñaar la Akasiya amoon ba muy falu buur, te menn at la nguuru fa Yerusalem. Atalyaa mooy yaayam, sëtub Omri buurub Israyil. ²⁷ Akasiya topp ca tãnkí waa kër Axab, di def li Aji Sax ji ñaawlu ni waa kër Axab, ndax goro la woon ca waa kër Axab. ²⁸ Akasiya ànd naak Yoram doomu Axab, xarejeek Asayel buurub Siri ca Ramot Galàdd. Waa Siri jam Yoram. ²⁹ Buur Yoram nag walbatiku fajuji ca Yisreel ndax jam-jami waa Siri ya ca Raama, ba muy xareek Asayel buurub Siri. Dooom Yoram, Akasiya buurub Yuda nag dem seeti Yoram doomu Axab fa Yisreel ndax jagadeem ga.

9

Alyaasa fal na Yewu

¹ Ci kaw loolu Yonent Yàlla Alyaasa woolu kenn ca kurélu yonent ya, ne ko: «Takkul, jël taxub diw bi, te dem ba Ramot Galàdd. ² Boo yeggee, seet fa Yewu doomu Yosafat doomu Nimsi. Fekk ko ca

ña muy àndal, jële ko ca seen biir, ànd ak moom, dugg néeg bu ngeen mana ñaaroo. ³ Su ko defee nga jël taxub diw bi, sotti ko ci kaw boppam te wax ko ne ko: «Aji Sax ji nee: Diw naa la, fal la ngay buurub Israyil.» Boo noppee, bul yeexantu. Ubbil bunt ba, daw.»

⁴ Ba loolu amee xale bu góor ba, yonent bu ndaw ba, dem ba àgg Ramot Galàdd. ⁵ Naka la agsi rekk, fekk njiiti mbooloom xare mi bokk toog. Mu ne: «Kilifa gi, bataaxal laa la indil.» Yewu ne ko: «Ku ko moom ci nun?» Mu ne ko: «Xanaa yaw, kilifa gi.» ⁶ Yewu jóg, ànd ak moom, dugg ca biir kër ga, mu sotti diw ga ca boppam, ne ko: «Aji Sax ji Yállay Israyil nee: Diw naa la, fal la buurub Israyil sama ñoñ. ⁷ Nanga tas sa kër sang Axab, te noonu laay toppe soxnaam Yesabel sama bakkani jaam ñépp: muy yonenti Aji Sax jeek ñi dul yonent. ⁸ Waa kër Axab yépp ay dee. Dinaa faagaagal képp kuy góor te bokk ci waa kër Axab, ci digg Israyil, muy gor di jaam. ⁹ Dinaa def kër Axab tas, mel ni kër Yerbowam doomu Nebat, mbaa kër Basa doomu Axiya. ¹⁰ Yesabel moom, ay xaj a koy lekk ca toolub Yisreel, kenn du ko suul.» Ba loolu amee mu ubbi bunt ba, daw.

¹¹ Yewu génn, dellu ca moroomi jawriñam ña. Ñu ne ko: «Mbaa jàmm? Lu indi dof bii ci yaw?» Mu ne leen: «Ah, xam ngeen nit kii aki waxam rekk!» ¹² Ñu ne ko: «Wax nu waay, bu nu nax!» Mu ne leen nee na ko nàngam ak nàngam, teg ca ne leen: «Mu ne: «Aji Sax ji nee: Diw naa la, fal la buurub Israyil.»» ¹³ Ba mu ko defee ñu gaaw, summi seeni mbubb ñoom ñépp, lalal ko ca kaw dëggastal ya, ba noppi wal liit ga naa: «Yewu falu na buur!»

Yewu fexeel na buur ya

¹⁴ Ba loolu amee Yewu doomu Yosafat doomu Nimsi fexeel Yoram. Fekk na Yoram ak waa Israyil yépp a ngay wattu Ramot ga ca Galàdd, ndax Asayel buurub Siri. ¹⁵ Booba Buur Yoram moom dem na Yisreel, fajuji ndax jam-jam ya ca xareem baak Asayel buurub Siri. Yewu nag ne: «Ndegam man ngeen àndal, bu kenn récce ci biir dëkk bi, di nettaliji waa Yisreel.» ¹⁶ Mu war watiir, jëm Yisreel, fekk Yoram a nga fa woon tédd ndax jam-jam ya. Akasiya buurub Yuda dikk, di ko seet. ¹⁷ Ci biir loolu jongrukat ba ca kaw tatay Yisreel seën gangoor ga Yewu àndal. Mu ne Buur Yoram: «Séen naa gangoor guy ñëw de.» Yoram ne ko: «Yebalal gawar bu leen gatandu, laaj leen mbaa jàmm la.» ¹⁸ Ci kaw loolu gawar ba gatanduji leen, ne leen: «Buur nee:

Mbaa jàmm la?» Yewu ne ko: «Ana luy sa yoon ci jàmm laam déet? Ayca, toppal sama gannaaw.» Jongrukat ba daldi yégle la xew, ne: «Ndaw la àgg na ca ñoom de, waaye déppul.»¹⁹ Yoram yebalaat beneen gawar. Ba mu àggee ca ñoom, ne leen: «Buur nee: «Mbaa jàmm?»» Yewu ne ko: «Ana luy sa yoon ci jàmm laam déet? Ayca, sama gannaaw.»²⁰ Ba loolu amee jongrukat ba dellu yégle la xew, ne: «Ndaw la àgg na ca ñoom de, waaye déppul. Te na kee di dawale mel na ni Yewu doomu Nimsi, ndax dawalinu dof lay dawal.»

²¹ Ba mu ko defee Yoram ne: «Takkleen!» Ñu takkal Yoram buurub Israyil watiiram, mu génn ànd ak Akasiya buurub Yuda, ku nekk ak sa watiir; ñu dawal dogaleji Yewu, taseek moom fa doonoon toolub Nabot mu Yisreel*.²² Yoram jàkkaarlook Yewu, ne ko: «Yewu, mbaa jàmm?» Yewu ne ko: «Ana nu jàmm di ame te sa bàkkaar buokkaaley ndey Yesabel jógu fi, mook xèrémam yi ne xas?»²³ Yoram ne wèrèñ daw, àddu ca kaw, ne Akasiya: «Akasiya, wor nañu nu!»²⁴ Yewu daldi sox fittam ak doole, fitt Yoram ca diggante mbaag ya, mu génne ca xol ba, Yoram ne lasiim ca watiiram.

²⁵ Ba loolu amee mu ne jaraafam ba ñuy wax Bitkar: «Foral sànni ci toolub Nabot mu Yisreel. Yaa ngi fàttliki ba nu bokkee watiir maak yaw topp ca baayam Axab te Aji Sax ji rëbb ko ne ko:»²⁶ «Aji Sax ji dafa wax ne: Deretu Nabot ak deretu doomam yi déy, gis naa mu tuuru fii démb. Kon nag dinaa la ko topp, nga fey ko ci tool bii. Loolu la Aji Sax ji wax†.» Kon nag yóbbul sànni ci tool bi, muy la Aji Sax ji waxoon.»

²⁷ Akasiya buurub Yuda gis loolu, daw jaare ca yoonu Bet Gan, Yewu dàqi ko, tey yuuxu naan: «Jamleen ko, moom itam.» Ñu jam ko ca kaw watiiram ca yoon wa ngay yéeg jëm Gur, ca wetu Yiblam. Mu daw ba Megido, dee foofa.²⁸ Ba loolu amee ay surgaam yeb ko ca watiiram, yóbbu Yerusalem, ñu denc ko ca bàmmeelam, fa ñu denc ay maamam, ca gox ba ñu naan Kër Daawuda.²⁹ Ca fukkeelu at ak benn ca nguurug Yoram doomu Axab la Akasiya falu buur ca Yuda.

Yesabel dee na

³⁰ Gannaaw loolu Yewu jubsu Yisreel, Yesabel yaayu Buur dégg ko, tusngalu, defaraat boppam, taxaw ca palanteer ba, di séentu.³¹ Naka la Yewu wees buntu dëkk ba, di duggsi rekk, mu ne: «Mbaa jàmme, Simri mu ndaw, bóomkatub sangam‡?»

³² Yewu séentu palanteer ba ne: «Ana ku far ak man fii waay?» Ñaar ba ñetti bëkk-néeg ne pëll ca kaw palanteer ba, séentu ko.³³ Mu ne: «Sànnileen ko ci suuf.» Ñu jàpp Yesabel, sànni ko fa suuf, deret ja tis ca kaw tax maak fas ya; Yewu dëggaate néew ba.

³⁴ Ba loolu wéyee mu jàll ca biir dëkk ba; lekk daldi naan ba noppi, ne: «Jubluleen ci jigéen ju alku jee te suul koo waay, ndaxte doomu buur la.»³⁵ Ba ñu demee, di ko suuli nag, fekkuñu dara ca moom lu moy kaan ma donj ak ndëgguy tãnk yaak cati loxo ya.³⁶ Ñu dellu wax ko Yewu, mu ne: «Loolu moo doon kàddug Aji Sax ja mu waxoon, Ilyaa mu Tisbi jaamam ba jottli ko, ne: «Ci toolub Yisreel la xaj yi di lekke Yesabel§.»³⁷ Néewub Yesabel dina mel ni mbalit ci àll bi, ci biir toolub Yisreel, ba kenn du man ne: Kii Yesabel a.»

10

Yewu bóom na waa kër Axab

¹ Buur Axab amoon na juróom ñaar fukki doom yu góor ca Samari. Yewu bind ay bataaxal, yónnee ca Samari ca kilifay Yisreel ak mag ñaak daga doomi Axab, ne leen: ² «Gannaaw yeenay wattu seen doomi sang te yeena yor watiir yeek fas yi, dëkke dëkk bi ñu wëraley tata, boole ci yore gannaay yi, bu ngeen dee jot ci bataaxal bii rekk,³ tãnnleen ki gën te gën di jambaar ci seen doomi sang, ngeen teg ko ci jalu baayam. Su ko defee ngeen xeexal seen waa kër sang.»⁴ Ñu am tiitaange nag lool, daldi ne ca seen biir: «Seetleen rekk ñaari buur a ngii yu manula të Yewu; mbaa nun dinanu ko mana të yee?»⁵ Ba loolu amee ka yilif kër buur ak ka yilif dëkk baak mag ñaak dag ya yónnee ca Yewu, ne ko: «Nun say surga lanu, lépp loo nu wax dinanu ko def. Dunu fal kenn buur. Loo def baax na.»

⁶ Ba mu ko defee Yewu bind leen ñaareelu bataaxal, ne leen: «Ndegam man ngeen àndal te sama kàddu ngeen di dégg, dogleen seen boppi doomi sang yu góor te fekk ma fii ci Yisreel nэгèni èllég.» Booba doomi buur yu góor juróom ñaar fukk lañu, nekk ak kàngami dëkk ba leen yar.⁷ Ba bataaxal ba agsee, kàngam yooyu boole doomi buur yu góor ya, rendi, ñuy juróom ñaar fukki góor. Ñu yeb seeni bopp ciy dàmba, yónnee Yewu ca Yisreel.⁸ Ndaw la agsi ne ko: «Indi nañu boppi doomi buur ya.» Yewu ne: «Defleen ko ñaari jal ca buntu dëkk ba, ba èllég.»⁹ Ca èllég sa mu génn taxaw ca kanam mbooloo

* 9:21 9.21 toolub Nabot mu Yisreel: seetal ci 1.Buur ya 21. † 9:26 9.26 Seetal ci 1.Buur ya 21.19. ‡ 9:31 9.31

Seetal ci 1.Buur ya 16.8-20. § 9:36 9.36 Seetal ci 1.Buur ya 21.19.

mépp ne: «Yeen defuleen dara. Man mii maa fexeel samab sang, rey ko. Waaye ana ku bóom ñii ñépp?» ¹⁰ Kon xamleen ne du lenn luy fanaan àll ci kàddug Aji Sax ji ci li mu wax ci waa kër Axab. Aji Sax ji sottal na la mu waxoon, Ilyaas jaamam ba jottli ko.» ¹¹ Ba mu ko defee Yewu rey mboolem ña desoon ca kër Axab ca Yisreel ak mboolemi kàngamam aki jegeñaaleem aki sarxalkatam, bàyyiwu ca kenn, mu récc.

¹² Gannaaw loolu Yewu fabu jëm Samari. Ba mu demee ba tollook Bet Eket, ca sàmm sa, ¹³ daldi dajeek bokki Akasiya buurub Yuda. Mu ne leen: «Yeenay ñan?» Ñu ne ko: «Bokki Akasiya lanu. Danuy nuyuji doomi Buur Axab, ak doomi Lingeer yaayu Buur.» ¹⁴ Mu ne: «Jàppleen leen!» Ñu jàpp leen, dem rendi leen ca wetu teenu Bet Eket; ñuy ñeent fukk ak ñaar, bàyyiwuñu ca kenn, mu récc.

¹⁵ Ba loolu wéyee Yewu bàyyikoo fa, gis Yonadab doomu Rekab, mu dikk dajeek moom. Mu nuyook moom, ne ko: «Mbaa ni ma fareek yaw te muy dëgg, ni nga fareek man te muy dëgg?» Yonadab ne ko: «Waawaaw.» Yewu ne ko: «Kon nag jox ma sa loxo!» Mu jox ko loxo; mu xécc ko, yéege ko ca watiir ba, ¹⁶ ne ko: «Ñéwal nu dem rekk, nga gis ni ma farloo ci mbiri Aji Sax ji.» Mu waral ko watiiram, yóbbu ko. ¹⁷ Ba Yewu àggee Samari, daa rey mboolem ña desoon ca waa kër Axab ca Samari, faagaagal leen, muy la Aji Sax ji waxoon Ilyaas.

Yewu fiir na waa kër Baal

¹⁸ Ba mu ko defee Yewu woo mboolu mu mépp, ne leen: «Axab tuuti la jaamu Baal. Man Yewu bu baax laa koy jaamu. ¹⁹ Ayca, wool-leen ma yonenti Baal yépp ak sarxalkatam yépp ak jaamukatam yépp. Bu kenn wuute, ndax sarax bu réy laay defal Baal. Képp ku ko wuute dina dee.» Booba Yewoo ngi fexee nax ñiy jaamu Baal, ba rey leen. ²⁰ Yewu ne leen: «Beralleen Baal am ndaje.» Ñu yéene. ²¹ Yewu nag yónnee ca Israyil gépp; mboolem ñay jaamu Baal dikk, kenn desul. Ci kaw loolu, ñu dugg kër Baal, ba kër ga fees dell. ²² Yewu ne ka yor cummikaay la: «Képp kuy jaamu Baal, indil ko mbubb.» Mu indil leen ay mbubb. ²³ Ba loolu amee Yewu ànd ak Yonadab doomu Rekab, dugsi biir kër Baal. Mu ne jaamukati Baal ya: «Xoolleen bu baax, ba gis ne yéenu neen la, te jaamukati Aji Sax ji raxu leen, xanaa jaamukati Baal rekk.» ²⁴ Ña ngay dugg, ne dañuy def ay saraxi rendi-dóomal ak yeneen sarax. Fekk na Yewu teg ca biti juróom ñett fukki nit, ne leen: «Ku ci

bàyyi kenn ci ñi ma leen reyloo, ba mu récc, sa bakkan ngay feye bakkanam.»

²⁵ Ba ñu noppee ca saraxi rendi-dóomal ya, Yewu ne dag yaak jawriñi xarekat ya: «Duggleen, fàdd leen. Bu kenn génñ.» Ñu daldi leen leel ñawak saamar, ñu daanu. Dag yaak jawriñ ya sànni néew ya ca biti, ba noppi dugg ca néegu Baal ba gëna biire. ²⁶ Ñu génne tuuri doj ya sampe woon ca kër Baal, lakk ko. ²⁷ Dañoon daane jëmme Baal ja, mabb kër Baal, boole ca, def kob sën, te moom la ba tey jii.

²⁸ Nii la Yewu raafale lu bokk ci Baal ci Israyil. ²⁹ Teewul mu baña dëddu bàkkaar ya Yerbowam doomu Nebat daan bàkkaarloo Israyil, ñuy jaamu ay sèlluy wurus la ko dale Betel, ba ba ngay àgg Dan.

³⁰ Aji Sax ji nag ne Yewu: «Gannaaw def nga lu baax, di jéfe li ma rafetlu te def nga waa kër Axab mboolem li ma béggoon, saw askan dina toog ci jalub Israyil ba ca sa sèt-sétaat.» ³¹ Terewul Yewu amuloon pastéefu toppe léppi xolam yoonu Aji Sax ji Yállay Israyil. Dëdduwul ba tey bàkkaari Yerbowam ya mu daan bàkkaarloo Israyil.

³² Ca jamono jooja nag la Aji Sax ji tàmbalee fell suufas Israyil, Asayel buurub Siri di leen duma ca réew ma mépp. ³³ Noonu lañu ñakke fa feete dexu Yurdan penku dale ca diiwaanu Galàdd bépp, boole ca suufas waa Gàdd ak waa Ruben ak waa Manase. Mooy la tàmbalee dëkk ba ñuy wax Arower ca kaw dexu Arnon ba ca diiwaanu Galàdd ak Basan.

³⁴ Li des ci mbiri Yewu ak mboolem lu mu def ak njambaaram gépp, bindees na ko moos ci téere bi ñu dippee Jaloorey buuri Israyil ca seeni jant. ³⁵ Noonu Buur Yewu saay, fekki ay maamam, ñu denc ko ca Samari. Doomam Yowakas falu buur, wuutu ko. ³⁶ Diir bi Yewu nguuru ci Israyil, péeyoo Samari, ñaar fukki at la ak juróom ñett.

11

Lingeer Atalyaa falu na Yuda

¹ Ci kaw loolu Atalyaa yaayu Akasiya xam ne doomam ju góor dee na, mu daldi faagaagal mboolem lu bokk ci askanu buur. ² Teewul jigéenub Akasiya, Yoseba doomu Buur Yoram, jàpp Yowas doomu Akasiya ju góor, jële ko ca biir doomi buur ya ñuy fexee rey, ba rawale ko. Ci biir loolu mu boole kook nàmpalkatam, tēj cib néeg ngir làq ko Atalyaa, ba kenn reyu ko. ³ Yowas nekk naak Yoseba fa kër Yàlla ga, làq fa juróom benni at, te Atalyaa di nguuru fa réew ma.

Yuda bañ na

⁴ Ca atum juróom ñaareel ma, Yoyada moo woolu waa Keret ya jiite kuréli téeméeri nit, ak yeneen dag ya, ñu wuysi ko ca kër Aji Sax ji. Mu fasook ñoom kóllère, giñloo leen ca kër Aji Sax ji, ba noppi nuvole leen ak doomu Buur. ⁵ Ci kaw loolu mu sant leen ne leen: «Li ngeen di def mooy lii: Yeen ñi aye liggéey bésub Noflaay, na seen xaajub ñetteel dénkoo dénkaaney kër Buur, ⁶ beneen xaajub ñetteel ba wattu buntu Sur ba, xaajub ñetteel ba ca des féeteek bunt ba ca gannaaw dawkat ya. Noonu ngeen di ay-ayloo wattub kër Buur. ⁷ Seen yeneen ñaari kuréli yi ayewul bésub Noflaay, nañu wattusi kër Aji Sax ji, ngir aar buur bi. ⁸ Yeen ñiy dar Buur, fegleen ko wet gu nekk, ku nekk ñàbb ngànaayam. Képp ku jëm ci seenug làng, dees koy rey, te àndleen ak buur bi buy dugg ak buy génn.» ⁹ Ci kaw loolu njiiti kuréli téeméer ya def mboolem la leen Yoyada sarxalkat ba sant. Ku nekk ànd ak say nit, ña aye bésub Noflaay ak ña ayewul bésub Noflaay, ñu bokk dikk ca Yoyada, sarxalkat ba. ¹⁰ Ba loolu amee, sarxalkat ba jox njiiti kuréli téeméer ya, xeej yaak pakki Buur Daawuda ya nekkoon ca biir kër Aji Sax ji. ¹¹ Dag ya nag dar buur ba, ku nekk ñàbb ay gannaayam, ñu dare kër Yàlla ga ak sarxalukaay ba, wetu ndijoor ba wetu càmmoñ, ngir yéew buur ba. ¹² Yoyada génne doomu buur ba, solal ko mbaxanam buur, jox ko kayitu doxalinu nguur ga; ñu fal ko nag buur, diw ko diwug pal. Ba loolu amee ñu tàccu, ne: «Guddalu fan, Buur!»

¹³ Ba Atalyaa déggee coowal dag yaak mbooloo ma, daa àgg ca mbooloo ma, fa kër Aji Sax ji. ¹⁴ Mu xool, yem ci buur ba taxaw fa kenu ga, na ñu ko baaxoo, kilifay xarekat yaak boroom liit ya dar Buur, waa réew ma mépp di bannexook a wal liit ya. Atalya ne tareet ay yéreem ndax naqar, daldi yuuxu ne: «Wor am naay, wor am na!» ¹⁵ Ci kaw loolu Yoyada sarxalkat ba sant njiiti kuréli téeméer ya, kilifay gangoor ga, ne leen: «Génneleen ko làng gi, te ku ko topp, jamleen ko, mu dee.» Fekk na Yoyada ne buñu ko rey ci biir kër Aji Sax ji. ¹⁶ Ba mu ko defee ñu teg ko loxo. Ba mu demee ba àgg kër Buur, bay tollook fa fas yay dugge, foofa lañu ko reye.

¹⁷ Ba loolu amee Yoyada digoo kóllère diggante Aji Sax ji, ak buur baak askan wa, ngir ñu doon ñoñi Aji Sax ji. Mu digoo ko itam diggante Buur ak askan wa. ¹⁸ Ci kaw loolu waa réew ma mépp ànd dem ca kër Baal. Ñu mabb ko, ay sarxalukaayam ak jëmmi nataalam, ñu tas

tasar, Matan sarxalkatu Baal ba, ñu rey ko ca kanam sarxalukaay ya. Ci biir loolu Yoyada sarxalkat ba teg ay wattukat ca kër Aji Sax ji. ¹⁹ Mu dellu nag woo njiiti téeméeri nit yaak waa Keret ñaak yeneen dag yaak mboolem waa réew ma, ñu jële Buur kër Aji Sax ji, jaare ca buntu dag ya, yóbbu ko kër Buur. Yowas daldi toog ca ngànguney buur ya. ²⁰ Waa réew mépp di bannexu, péey ba ne tekk. Atalya moom, fekk na ñu jam ko saamar ba mu dee ca kër Buur.

12

Yowas santaane na ñu defaraat kër Aji Sax ji

¹ Juróom ñaari at la Yowas amoon ba muy falu buur. ² Ca juróom ñaareelu atu nguuru Yewu buurub Israyil, ca la Yowas falu ca Yuda. Ñeent fukki at la nguuru fa Yerusalem. Yaayam mooy Sibiya ma cosaano Beerseba. ³ Yowas di def li Aji Sax ji rafetlu mboolem diir ba muy wéy ci ndigalal Yoyada. ⁴ Taxul nag ñu jële fa bérabi jaamookaay ya, te mbooloo ma noppiwuñu faa rendi ay sarax, di fa taal cuuraay.

⁵ Mu am bés mu wax sarxalkat ya ne leen: «Mboolem xalis bu ñu sellalal kër Aji Sax ji, muy xalisu njot-gi-bakkan*, mbaa xalis bu ñu wàccoo ngiñ, mbaa bépp xalisu saraxu yéene bu nit di indi kër Aji Sax ji, ⁶ na ko sarxalkat bu nekk nangoo ci seen loxoy xame, ngir ñu liggéeye ko kër Yàlla gi, fépp fu fi laaj ñu defaraat ko.»

⁷ Teewul Yowas dugg na ñaar fukkeelu atu nguuram ak ñett, te taxul sarxalkat ya defarluwaat lenn ci kër Aji Sax ji. ⁸ Buur Yowas woolu Yoyada, sarxalkat ba ak yeneen sarxalkat ya, ne leen: «Ana lu waral defaruleen lenn ci kër Aji Sax ji? Léegi nag buleen nangooti xalis ci seeni xame, waaye joxeleen ko, ñu defare ko kër Aji Sax ji.» ⁹ Sarxalkat ya déggal ko, jëlatuñu xalis ci mbooloo mi, sasootuñu liggéeyu defaraat kër Aji Sax ji.

¹⁰ Ba mu ko defee Yoyada sarxalkat ba wut waxande, bënn pax ca kubeer ga, teg ko ca wetu sarxalukaay ba, fa féete ndijoor, booy duggsi ci kër Aji Sax ji. Sarxalkat yay wattu bunt ba di def ca waxande wa mboolem xalis bu ñu indi ca kër Aji Sax ji. ¹¹ Ci kaw loolu saa yu ñu gisee ne xalis bu takkoo ngi ci waxande wi ci kër Aji Sax ji, bindkatub Buur ànd ak sarxalkat bu mag ba dikk, waññi ko, fas ko. ¹² Bu ñu takkee limu xalis ba, teg ko ca loxoy ña ñu tabb, ñu wara saytu liggéeyu kër Aji Sax ji. Su ko defee ñu

* 12:5 12.5 xalisu njot-gi-bakkan: seetal ci *Mucc ga* 30.11-16.

fey ca ñay liggéey ca kër Aji Sax ji, muy liggéeykatu bant yaak yeneen liggéeykat ya, ¹³ ak tabaxkat yaak yettkati doj ya, jënd ca bant ak doji yett, yi ñu soxla ci defarub kër Aji Sax ji, ak mboolem lu ñuy jënd ngir defar kër Aji Sax ji. ¹⁴ Waaye xalis bi ñuy indi ci kër Aji Sax ji defaraluñu ci kër Aji Sax ji ay mbalkay xalis mbaa ay paakaaki këllu tuuru mbaa ay liit ak lenn luy jumtukaayu wurus mbaa xalis. ¹⁵ Ñi yor liggéey bi daal lañu ko jox ngir ñu defaraat kër Aji Sax ji. ¹⁶ Soxlawuñu wona laaj dara nit ñi ñuy teg xalis bi ci seeni loxo ngir ñu fey liggéeykat yi, ndax maandu ga ñu daan jéfe.

¹⁷ Xalisu saraxu peyug tooñ nag ak xalisu saraxu pootum bákkaar daawuñu ko indi ci kër Aji Sax ji. Sarxalkat yaa ko moomoon.

Buur Yowas jeexal na

¹⁸ Ca jamono yooyu Asayel buurub Siri dem na songi Gaat, nangu ko, doora walbatiku nara dal ci kaw Yerusalem. ¹⁹ Buur Yowas nag dajale mboolem gänjar ga maamam ya, Yosafat ak Yoram ak Akasiya, jagleeloon Aji Sax ji, boole ca gänjar ga mu ko jagleeloon moom ci boppam, ak lépp luy wurus ca dencukaayi kër Aji Sax jeek kër Buur. Mu yónnee lépp Asayel buurub Siri, mu dëpp, bëyyi Yerusalem.

²⁰ Li des ci mbiri Yowas ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. ²¹ Gannaaw gi ay jawriñam fexeel ko ba bóom ko ca Bet Milo ca yoonu Sila. ²² Jawriñam ya ñuy wax Yosabàdd doomu Simeyat ak Yewosabàdd doomu Somer, ñoo ko jam, mu dee; ñu denc ko fa ay maamam ca gox ba ñu naan Kër Daawuda. Doomam Maciyya moo falu buur, wuutu ko.

13

Yowakas falu na ci Israyil

¹ Ba doomu Akasiya, Yowas buurub Yuda duggee ñaar fukkeelu atam ak ñett ci nguuram, ca la Yowakas doomu Yewu falu buur ca Israyil, péeyoo Samari. Nguuru na fukki at ak juróom ñaar. ² Muy def li Aji Sax ji ñaawlu, topp ci tànkì Yerbowam doomu Nebat, di ko roy ci bákkaar ya mu daan bákkaarloo Israyil, bañ koo dëddu. ³ Merum Aji Sax ji nag ne jippét ca kaw Israyil, mu teg leen lu yàgg ci loxoy Asayel buurub Siri ak Ben Addàd doomu Asayel. ⁴ Yowakas nag tinu Aji Sax ji, mu nangul ko, ndax fekk na mu gis fitnay Israyil ji leen buurub Siri fitnaal. ⁵ Aji Sax ji daldi may Israyil ku leen xettli, ba ñu génn ca loxol waa Siri. Ba loolu amee waa Israyil dellu nekk ca seeni kër ci jàmm, na woon démb

ak bëkk-démb. ⁶ Taxul ba tey ñu dëddu bákkaari waa kër Yerbowam ya ñu doon bákkaarloo Israyil. Dañu caa sax. Te it xer wa ñuy jaamoo Aseraa nga sampe woon ca Samari ba booba. ⁷ Muji na Yowakas desewuloon ca mbooloom xareem lu moy juróom fukki gawar ak fukki watiir ak fukki junniy xarekat (10 000), ndax buurub Siri moo faagaagal ña ca des ñépp, duma leen ba ñu ne mbëtt.

⁸ Li des ci mbiri Yowakas ak mboolem lu mu def aki njambaaram, bindees na lépp moos ci téere bi ñu dippee Jaloorey buurub Israyil ca seeni jant. ⁹ Ba mu ko defee Buur Yowakas saay, fekki ay maamam, ñu denc ko ca Samari. Doomam Yowayas falu buur, wuutu ko.

Yowayas falu na ca Israyil

¹⁰ Ba Yowas buurub Yuda duggee fanweereelu atu nguuram ak juróom ñaar, ca la Yowayas doomu Yowakas falu buurub Israyil, péeyoo Samari. Nguuru na fukki at ak juróom benn.

¹¹ Muy def li Aji Sax ji ñaawlu nag, dëdduwul lenn ci bákkaar ya Yerbowam doomu Nebat doon bákkaarloo Israyil. Da caa sax kay.

¹² Li des ci mbiri Yowayas ak mboolem lu mu def ak njambaar ga mu xareek Amaciya buurub Yuda, bindees na lépp moos ci téere bi ñu dippee Jaloorey buuri Israyil ca seeni jant. ¹³ Yowayas nag saay, fekki ay maamam, Yerbowam falu, wuutu ko. Ñu denc Yowayas fa ñu denc buuri Israyil ca Samari.

Yonent Yàlla Alyaasa faatu na

¹⁴ Ba Alyaasa téddee ca wopp ja ko wara yóbbu, Yowayas buurub Israyil seeti woon na ko, tiim ko, di jooy naan: «Éy baayoo, baay Alyaasa, yaay watiiru xarey Israyil aki gawaram!»

¹⁵ Alyaasa ne ko: «Indil xala aki fitt.» Mu indi. ¹⁶ Alyaasa ne ko: «Soxal.» Mu sox. Alyaasa teg ay loxoom ca kaw loxoom, ¹⁷ ba noppi ne ko: «Ubbil palanteeru penku bi.» Mu ubbi. Alyaasa ne ko: «Soqil!» Mu soqi. Mu ne ko: «Fittu ndamal Aji Sax jaa ngoog, di fitt gi ngay ame ndam ci waa Siri. Dinga daan waa Siri ca Afeg, ba faagaagal leen.» ¹⁸ Mu delluwaat ne ko: «Jélal fitt yi.» Mu jél. Mu ne ko: «Soqil fi suuf!» Mu soqi, ba muy ñetti yoon, bëyyi. ¹⁹ Góorug Yàlla ga nag mere ko, ne ko: «Soo jamoon juróomi yoon ba juróom benni yoon, dinga daan waa Siri, ba jeexal leen tàkk; waaye léegi nag ñetti yoon rekk ngay daan waa Siri.»

²⁰ Gannaaw gi Alyaasa faatu, ñu denc ko.

Loolu fekk na ndoortel at mu jotaan ay gàngoori yàqkati Mowabeen dugg ca

rée w ma. ²¹ Mu am bés ay nit doon rob, jekki-jekki gis gangooru yaqkat di dikki. Ñu sànni néew ba ca bàmmee lu Alyaasa, daldi daw. Naka la néew ba dal ca yaxi Alyaasa, rekk dekki, ne ñokket, taxaw.

Israyil duma na Siri

²² Ci kaw loolu Asayel buurub Siri di fitnaal Israyil mboolem diir ba Yowakas di buur. ²³ Aji Sax ji nag baaxe leen, yërëm leen, geesu leen ndax kóllëreem ak Ibraaymaak Isaaxaak Yanqóoba. Looloo tax buggu leena faagaagal, te ba tey jii xalabu leen. ²⁴ Ba Asayel buurub Siri deeyee, doomam Ben Addàd falu, wuutu ko. ²⁵ Ba mu ko defee Yowayas nangoo ci moom dëkki Israyil ya Asayel jële woon ca loxol baayam Yowakas ci xare. Ñetti yoon Yowayas duma na ko Ben Addàd, ba nanguwaat dëkki Israyil.

14

Buuri Israyil ak Yuda ngi xeexoo

¹ Ba buurub Israyil Yowayas doomu Yowakas duggee ñaareelu atu nguuram, ca la Amaciya doomu Yowas falu buur ca Yuda. ² Ñaar fukki at ak juróom la amoon ba muy falu, te ñaar fukki at ak juróom ñeent la nguuru fa Yerusalem. Yaayam moo doon Yowadan ma cosaanoo Yerusalem. ³ Def na njub gi Aji Sax ji rafetlu, waaye dabul Daawuda maamam. Mboolem noonee Yowas baayam daan jëfe, na la daan jëfe ⁴ Bérabi jaamookaay ya jëleesu ko fa. Mbooloo maa nga doon def ay sarax ca bérabi jaamookaay ya ba tey, di fa taal cuuraay. ⁵ Ba nguuru ga demee ba dëgër ci loxoom, moo bóom jawriñam ña bóomoon Buur baayam. ⁶ Waaye doomi bóomkat ya, bóom leen, ngir dëppook la ñu bind ci téereb yoonu Musaa, te Aji Sax ji santaane ko, ne: «Deesul rey baay ndax doom te deesul rey doom ndax baay. Nit ku nekk, bàkkaaruu boppam lees koy reye*.»

⁷ Moom Amaciya moo duma fukki junniy (10 000) waa Edom ca xuru Xorom wa, nangu dëkk ba ñuy wax Sela ca xare ba, tudde ko Yogtel, te noonu la tudd ba bésuub tey jii. ⁸ Ba loolu amee Amaciya yónni ay ndaw ca buurub Israyil Yowayas doomu Yowakas doomu Yewu. Mu ne ko: «Dëkk naa la, dikkal nu jàkkaarloo!» ⁹ Yowayas buurub Israyil yónnee Amaciya buurub Yuda tontam, ne ko: «Ndég ga ca Liban moo yónnee woon ca garabu seedar gu mag ga ca Liban, ne ko: “Sa doom jii, may ko sama doom jabar.” Ci kaw loolu rabu àllu Liban jaare fa, dëggaate ndég ga.

¹⁰ Dëgg la moos, yaa duma Edom, ba tax nag sam xel jay la. Tee ngaa bàkku te toog sa kër? Te sax ana looy dugge ci jote buy indi ay wu lay daane, yaw, daanewaale Yuda?»

¹¹ Amaciya nag faalewul wax jooju, Yowayas buurub Israyil jóg; ñu jàkkaarloo mook Amaciya buurub Yuda, ca Bet Semes ga ca Yuda.

¹² Ba mu ko defee muy jéllu Yuda fa kanam Israyil. Waa Yuda tasaaroo, ku nekk ñibbi ca sab xayma. ¹³ Yowayas buurub Israyil nag jàpp buurub Yuda, Amaciya doomu Yowas doomu Akasiya, ca Bet Semes. Gannaaw loolu mu dem Yerusalem mabb tata ja, la ko dale buntu Efrayim ba ca buntu ruq ba, muy ñeenti téeméeri xasab. ¹⁴ Ci kaw loolu mu jël mboolem lu doon wurus ak xaalis aki ndab ca kër Aji Sax ja, ak ca dencukaayi kër Buur, boole ca nit ñu mu jàpp, daldi dellu Samari.

Yowayas buurub Israyil saay na

¹⁵ Li des ci mbiri Yowayas ak li mu def ba ci njambaaram gi mu xareek Amaciya buurub Yuda, bindees na lépp moos ci téere bi ñu dippee Jaloorey buuri Israyil ca seeni jant. ¹⁶ Gannaaw gi Buur Yowayas saay, fekki ay maamam, ñu denc ko Samari, fa bàmmee lu buuri Israyil. Doomam Yerbowam falu buur, wuutu ko.

Amaciya buurub Yuda saay na

¹⁷ Amaciya doomu Yowas buurub Yuda dund na fukki at ak juróom gannaaw deewug buur Israyil Yowayas doomu Yowakas. ¹⁸ Li des ci mbiri Amaciya, bindees na ko moos ci téere bi ñu dippee Jaloorey buuri Yuda ca seeni jant. ¹⁹ Lalal nañu ko pexe ca Yerusalem, mu daw dem Lakis. Ñu yónnee dabi ko ca Lakis, rey ko foofa. ²⁰ Ba mu ko defee ay fas lañu yóbboo néew ba, denci ko Yerusalem, fa ay maamam, ca gox ba ñu naan Kër Daawuda.

²¹ Ba loolu wéyee waa Yuda gépp fal Asaryaa† buur, mu wuutu baayam Amaciya, fekk mu am fukki at ak juróom benn. ²² Moom moo tabaxaat dëkk ba ñuy wax Elat, delloo ko ci biir Yuda, gannaaw ba Buur Amaciya saayee, fekki ay maamam.

Yerbowam mu ndaw falu na ca Israyil

²³ Ba buurub Yuda Amaciya doomu Yowas duggee fukkeelu atu nguuram ak juróom, ca la Yerbowam doomu Yowayas falu ca Israyil, péeyoo Samari. Nguuru na ñeent fukki at ak benn. ²⁴ Muy def li Aji Sax ji ñaawlu, dëdduwul lenn ci

* 14:6 14.6 Seetal ci *Baamtug Yoon wi* 24.16. † 14:21 14.21 Asaryaa mooy Osiyas ba tey.

bákkaar ya Yerbowam doomu Nebat daan bákkaarloo Israyil. ²⁵ Moom moo delloo kemu réewum Israyil fa mu nekkoon, dale ko ca buntu dëkk ba ñuy wax Amat ba ca géēju Araba, muy la Aji Sax ji Yállay Israyil waxoon jaamam ba, Yonent Yàlla Yunus, ma baayam Ametay cosaanoo Gaat Efer, Yunus jottli ko. ²⁶ Fekk na Aji Sax ji gis Israyil gépp, gor ak jaam, nekke fitna ju metti te amul kenn ku leen wallu. ²⁷ Aji Sax ji nag nammul woona far turu Israyil, ba jant bi dootu ko tiim fenn. Moo tax mu may leen ku leen xettli, muy Yerbowam doomu Yowayas.

²⁸ Li des ci mbiri Yerbowam ak mboolem lu mu def ak njambaaram gi mu xaree te nangoo ko dëkk yi ñuy wax Damaas ak Amat gu Yuda, delloo ko Israyil, bindees na lépp moos ci téere bi ñu dippee Jaloorey buuri Israyil ci seeni jant. ²⁹ Gannaaw gi Buur Yerbowam saay, fekki maamam ya doon buuri Israyil. Doomam Sàkkaryaa† falu buur, wuutu ko.

15

Asaryaa falu na buur ca Yuda

¹ Ba Yerbowam buurub Israyil duggee ñaar fukkeelu at ak juróom ñaar ci nguuram, ca la Asaryaa* doomu Amaciya falu buur ca Yuda. ² Fukki at ak juróom benn la amoon, ba muy falu buur, te nguuru na juróom fukki at ak ñaar ca Yerusaleem. Yaayam mooy Yekolyaa ma cosaanoo Yerusaleem. ³ Asaryaa di def li Aji Sax ji rafetlu, mboolem noonee ko Amaciya baayam daan defe. ⁴ Terewul bérabi jaamookaay ya jélees ko fa. Mbooloo ma dañoo wéy di fa def ay sarax ak a taal cuuraay. ⁵ Aji Sax ji nag mbugal Asaryaa, teg ko jàngoroy ngaana ba kera bés ba mu deeyee. Ci néeg bu ñu ko ber la dëkk. Doom Buur Yotam moo jíte kër ga, yor kilifteefu askanu réew ma.

⁶ Li des ci mbiri Asaryaa ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. ⁷ Gannaaw gi Asaryaa tédd, fekki ay maamam, ñu denc ko ca bàmmeeli maamam ya, ca gox ba ñu naan Kër Daawuda. Yotam doomam moo falu buur, wuutu ko.

Sàkkaryaa falu na buur ca Israyil

⁸ Ba Asaryaa buurub Yuda duggee fanweereelu atu nguuram ak juróom ñett, ca la Sàkkaryaa doomu Yerbowam falu buurub Israyil, péeyoo Samari. Juróom benni weer la nguuru.

⁹ Muy def nag li Aji Sax ji ñaawlu, na ko ay maamam daa defe. Dëdduwul bákkaar yu Yerbowam doomu Nebat daan bákkaarloo Israyil. ¹⁰ Ci kaw loolu Salum doomu Yabes fexeel ko, jam ko ca kanam mbooloo ma, rey ko, daldi falu buur, wuutu ko. ¹¹ Li des ci mbiri Sàkkaryaa bindees ko moos ci téere bi ñu dippee Jaloorey buuri Israyil ca seeni jant. ¹² Loolu mooy kaddu ga Aji Sax ji waxoon Yewu ne ko: «Saw askan dinañu toog ci kaw jalu Israyil ba ci sa sèt-sëtaat.» Te noonu la amee.

Salum falu na buur ca Israyil

¹³ Ba Asaryaa buurub Yuda duggee fanweereelu atu nguuram ak juróom ñeent, ca la Salum doomu Yabes falu buur ca Israyil. Wenn weer la nguuru, péeyoo Samari. ¹⁴ Gannaaw loolu Menayem doomu Gadi bàyyikoo Tirsa ba Samari, daldi fa jam Salum doomu Yabes, bóom ko, falu buur, wuutu ko. ¹⁵ Li des ci mbiri Salum ak pexeem ma mu laloon, bindees na ko moos ca téere bi ñu dippee Jaloorey buuri Israyil ca seeni jant.

¹⁶ Booba la Menayem song dëkk ba ñuy wax Tifsa, rey ña fa nekkoon ñépp, boole ca faagaagal diiwaan ba dale Tirsa ba Tifsa, ndax ñoo ko gántal, bañ koo ubbi buntu dëkk ba. Mu butti jigéeni wérul ña fa nekk ñépp.

Menayem falu na buur ca Israyil

¹⁷ Ba Asaryaa buurub Yuda duggee fanweereelu atu nguuram ak juróom ñeent, ca la Menayem doomu Gadi falu buurub Israyil, péeyoo Samari. Nguuru na fukki at. ¹⁸ Muy def nag li Aji Sax ji ñaawlu; giuru dundam dëdduwul bákkaar ya Yerbowam doomu Nebat daan bákkaarloo Israyil. ¹⁹ Ci jamonoom la Tiglaat Pilsér† buurub Asiri song réew ma, Menayem jox ko ñetti téeméeri barigoy xalis ngir mu japple ko, ba nguuram géna dégër. ²⁰ Menayem dajale xalis boobu ci Israyil; jële ko ca mboolem boroom alal ya, ku nekk ci ñoom joxe juróom fukki dogi xalis, ñu yót ko buuri Asiri, mu doora jóge ca réew ma, ñibbi. ²¹ Li des ci mbiri Menayem ak mboolem lu mu def, bindees na ko moos ci téere bi ñu dippee Jaloorey buuri Israyil ca seeni jant. ²² Gannaaw loolu Buur Menayem saay, fekki ay maamam. Doomam Pekaxiya falu buur, wuutu ko.

Pekaxiya falu na buur ca Israyil

²³ Ba Asaryaa buurub Yuda duggee juróom fukkeelu atu nguuram, ca la Pekaxiya doomu Menayem falu buurub Israyil, péeyoo Samari. Nguuru na ñaari

† **14:29** 14.29 Sàkkaryaa mii wuute naak Yonent Yàlla Sàkkaryaa. * **15:1** 15.1 Asaryaa mooy Osiyas ba tay.

† **15:19** 15.19 Tiglaat Pilsér mbaa Pul ba tay.

at. ²⁴ Muy def li Aji Sax ji ñaawlu, dëdduwul bākkaar ya Yerbowam doomu Nebat daan bākkaarloo Israyil. ²⁵ Ba mu ko defee Peka doomu kilifag xarekatam Remalya, fexeel ko, ba rey ko ca Samari, ca tatay kër buur, jamaale Argob ak Arye. Remalyaa nga àndoon ak juróom fukki niti Galádd. Noonu la ko reye, falu buur, wuutu ko.

²⁶ Li des ci mbiri Pekaxiya ak mboolem lu mu def, bindees na ko moos ci téere bi ñu dippee Jaloorey buuri Israyil ca seeni jant.

Peka falu na buur ca Israyil

²⁷ Ba Asaryaa buurub Yuda duggee juróom fukkeelu atu nguoram ak ñaar, ca la Peka doomu Remalyaa falu buurub Israyil, péeyoo Samari. Nguuru na ñaar fukki at. ²⁸ Muy def li Aji Sax ji ñaawlu, dëdduwul bākkaar ya Yerbowam doomu Nebat daan bākkaarloo Israyil. ²⁹ Ci jamonoy Peka buurub Israyil, Tiglaat Pilser buurub Asiri dikk, nangu dëkk yi ñuy wax Yon ak Abel Bet Maaka ak Yanowa ak Kedes ak Accor ak diiwaani Galádd ak Galile ak mboolem réewum Neftali. Mu japp waa réew ma, yóbbu Asiri.

³⁰ Ba loolu amee ku ñuy wax Ose doomu Ela lalal Peka doomu Remalya pexe, jam ko mu dee. Mu daldi falu buur, wuutu ko. Loolu yemook ñaar fukkeelu atu nguurg buurub Yuda Yotam doomu Asaryaa. ³¹ Li des ci mbiri Peka ak mboolem lu mu def, bindees na ko moos ci téere bi ñu dippee Jaloorey buuri Israyil ca seeni jant.

Yotam falu na buur ca Yuda

³² Ba buurub Israyil Peka doomu Remalya duggee ñaareelu atu nguoram, ca la Yotam doomu Asaryaa falu buur ca Yuda. ³³ Amoon na ñaar fukki at ak juróom ba muy falu te nguuru na fukki at ak juróom benn ca Yerusalem. Yaayam mooy Yersa doomu Cadog. ³⁴ Muy def li Aji Sax ji rafetlu; mboolem na baayam Usiya daan defe la daan defe. ³⁵ Terewul jëleesu fa bérabi jaamookaay ya, xanaa mbooloo ma di def ay sarax ak a taal cuuraay ba tey, ca bérabi jaamookaay yooyu. Moom nag moo tabax buntu kër Aji Sax ja féete bëj-gannaar. ³⁶ Li des ci mbiri Yotam aki jéfam, bindees na ko moos ci téere bi ñu dippee Jaloorey buuri Yuda ca seeni jant. ³⁷ Ci jamonoom la Aji Sax ji tãmbalee xabtal Reccin buurub Siri ak Peka doomu Remalya ci kaw Yuda.

³⁸ Gannaaw gi Yotam tēdd, fekki ay maamam. Ca bàmmeelu maamam ya lees ko denc, ca gox ba ñu naan dëkku Daawuda, maamam. Doomam Axas falu buur, wuutu ko.

16

Axas falu na buur ca Yuda

¹ Ba buurub Israyil Peka doomu Remalya duggee fukkeelu atu nguoram ak juróom ñaar, ca la Axas doomu Yotam falu buur ca Yuda. ² Ñaar fukki at la Axas amoon ba muy falu buur. Nguuru na fukki at ak juróom benn ca Yerusalem, waaye deful li Aji Sax ji Yallaam rafetlu, na ko maamam Daawuda baaxoo woon. ³ Ca tãnki buuri Israyil la topp. Doomam ju góor sax def na ko sarax, lakk ko ngir tuur ya, di roy ñaawtéefi xeet, ya Aji Sax ji daqoon ngir bànni Israyil. ⁴ Rendi nay sarax, taal na cuuraay ca bérabi jaamookaay yaak ca kaw tund yaak mboolem ker garab gu naat.

⁵ Ci kaw loolu Reccin buurub Siri, ak buurub Israyil Peka doomu Remalya, jóg song Yerusalem xare. Ñu gaw Buur Axas, te manuu koo daan. ⁶ Jamono yooyu, fekk na Reccin nangu Elat, mu tãbbi ci loxol Siri. Mu génne waa Yuda Elat; Edomeen ña délsi Elat, dëkk fa ba bésul tey jii. ⁷ Axas nag yebal ay ndaw ca Tiglaat Pilser buurub Asiri, ne ko: «Man de, dama di sab jaam, te di sa doom. Kon nag ngalla dikkal xettli ma ci ñi ma jógal, di buurub Siri ak buurub Israyil.» ⁸ Axas jël xaalis ak wurus wa nekkoon ca kër Aji Sax ja ak ca dencukaayi kër Buur; defal ko buurub Asiri yóbbal. ⁹ Buurub Asiri nangul ko, dal ca kaw Damaas, nangu dëkk ba, japp waa dëkk ba, yóbbu Kir, ba noppi rey Reccin.

¹⁰ Gannaaw loolu Buur Axas dem ca Tiglaat Pilser buurub Asiri ca Damaas, gis fa sarxalukaay ba fa nekk. Ba mu ko defee Buur Axas yónnee ca Uri sarxalkat ba, nataalu sarxalukaay ba ak tabaxin waak mboolem na mu bindoo. ¹¹ Urya sarxalkat ba daldi tabax sarxalukaay bu dëppook mboolem tegtal ya bàyyikoo ca Buur Axas ca Damaas. Uri noppi na ko bala Buur Axas di ñibbsi. ¹² Ba Buur Axas ñibbsee, jóge Damaas, ba nemmiku sarxalukaay ba, daa dikk ba ca sarxalukaay ba, joxe fa sarax. ¹³ Taal na fa saraxu rendi-dóomalam, joxe ca saraxu peppam, sotti ca saraxu tuuroom, ba noppi xépp deretu saraxu cantam ci biir jàmm ca kaw sarxalukaay ba. ¹⁴ Sarxalukaayu xànjari ba tege woon ca kanam Aji Sax ji, mu jële ko ca kanam kër ga mu nekkoon, ca diggante sarxalukaay bu bees baak kër Aji Sax ji, teg ko ca wetu sarxalukaay bu bees ba, fa féete bëj-gannaar. ¹⁵ Ci biir loolu Buur Axas sant Uri sarxalkat ba ne ko: «Ci kaw sarxalukaay bu mag bi ngay joxe saraxu rendi-dóomalalu suba si, ak saraxu pepp bu ngon bi, ak saraxu rendi-dóomalalu buur bi, ak saraxu peppam, boole ci saraxu

rendi-dóomal bi ñuy joxeel mboolem waa réew mi, ak seen saraxu pepp, ak seen saraxu tuuru. Te nga xépp ci kawam mboolem deretu saraxu rendi-dóomal bi, ak deretu mboolem sarax su ñuy rendi. Sarxalukaayu xàñar bi moom, maa koy moom, di ko gindikoo ci Aji Sax ji.»¹⁶ Uri sarxalkat ba def la ko Buur Axas sant lépp.

¹⁷ Ci kaw loolu Buur Axas toj làccii rootukaay ya ñuy dawal*, jële bagaan ya woon ca kaw, teggi mbalka mu mag ma ñuy wax Géej te tege woon ca yékki xàñar ya ko yenu. Mu teg ko ci kawab dëru doj.¹⁸ Ci kaw loolu bëgg lu neex buurub Asiri tax mu soppo buntu bésub Noflaay, ba mbaar tiimoon ci biir kër Aji Sax ji, soppowaale buntu buur ba féete biti.

¹⁹ Li des ci mbiri Axas ak la mu def, bindees na ko moos ci téere bi ñu dippee Jaloorey buuri Yuda ca seeni jant.²⁰ Gannaaw gi Axas tédd, fekki ay maamam. Ca ay maamam lañu ko denc, ca gox ba ñu naan dëkku Daawuda, Esekiya doomam falu buur, wuutu ko.

17

Ose falu na buur ca Israyil

¹ Ba Axas buurub Yuda duggee fukkeelu atu nguuram ak ñaar, ca la Ose* doomu Ela falu buurub Israyil, péeyoo Samari. Nguuru na Israyil juróom ñeenti at,² di def li Aji Sax ji ñaawlu. Waaye dabul buurub Israyil ya ko jiitu.

³ Moom la Salmanasar buurub Asiri song, mu nangul ko, di ko fey galag.⁴ Gannaaw gi nag buurub Asiri gis ne Ose lal na pexe, ndax daa yónnee ay ndaw ca So buuru Misra, ba noppi lánk ne du fey galag at mu nekk. Buurub Asiri jàpp ko, tēj.

Samari, péeyu Israyil, tas na

⁵ Ba loolu amee Salmanasar buurub Asiri dal ca kaw réew ma mépp, dikk ba Samari, gaw ko diiru ñetti at.⁶ Ba Ose duggee juróom ñeenteelu atu nguuram, ca la buurub Asiri nangu Samari, jàpp waa Israyil, yóbbu Asiri. Ñii mu teg leen ca diiwaanu Ala, ñee ca Gosan ca wetu dex ga ñuy wax Abor, ña ca des mu dëel leen ca dëkki xeet wa ñuy wax Medd.

⁷ Li waral ñu nangu Samari mooy waa Israyil a bàkkaar, tooñ Aji Sax ji seen Yàlla ja leen génne réewum Misra, xettli leen ca Firawna buuru Misra. Waa Israyil di jaamu yeneen yàlla,⁸ di topp baaxi xeet ya Aji Sax ji dàq ngir ñoom, di topp baax yi buuri Israyil téralal seen bopp.⁹ Waa Israyil teg ca di jéema nébbuy def

ñjubadi gu seen Yàlla Aji Sax jiy tere; di tabax ay bérabi jaamookaay ca seen dëkk yépp, dale ko ca tatay wattukat ya, ba ca dëkk ya ñu wëraley tata.¹⁰ Ñu boole ca sampal seen bopp ay tuuri doj ak xer yu ñuy jaamoo Asera ci kaw mboolem tund wu kawe mbaa ker garab gu naat.¹¹ Ñuy taal cuuraay foofa ca mboolem bérabi jaamookaay ya, di roy xeet ya Aji Sax ji dàq ngir ñoom. Ñuy def daal ay ñaawtéef, di merloo Aji Sax ji,¹² di jaamu ay kasaray tuur, te Aji Sax ji waxoon leen ne buñu leen jaamu.¹³ Moonte Aji Sax ji àrtu woon na Israyil ak Yuda, mboolem yonentam yaak boroom peeñu ya jottli leen ko, ne leen: «Dëppleen seen yoon yu bon yii ngeen topp, te sàmm samay santaane, wormaal samay dogal, na mu dëppook mboolem yoon wi ma téralal seeni maam, yónnee leen ko, yonent yiy samay jaam jottli leen ko.»

¹⁴ Teewul ñu të ticc, saaju loos ni seen maam ya gëmuloon seen Yàlla Aji Sax ji.¹⁵ Dañoó xalab ay ndigalam ak kóllère ga mu fasoon ak seeni maam, xalab kàddu ya mu leen artoo woon. Ñu topp ay tuuri caaxaan ba mujj di niti caaxaan, di roy xeet yi leen wër, te Aji Sax ji tere woon leen ñu roy leen.¹⁶ Ba loolu amee ñu dëddu mboolem seen santaaney Yàlla Aji Sax ji; sàkkal seen bopp ñaari wëllu yu ñu móol, samp xer wu ñuy jaamoo Asera, di sujjóotal mboolem biddiwi asamaan tey jaamu Baal.¹⁷ Ci biir loolu ñuy lakk seen doom yu goor ak yu jigéen ngir ay tuur, di gisaaneek a xërëmtu, ba làggi ci jéfi mbon yu Aji Sax ji ñaawlu, ba tax mu mer.¹⁸ Moo tax Aji Sax ji mere Israyil lool, ba jële leen fi kanamam, ba giirug Yuda rekk des fa.

¹⁹ Waa Yuda it sàmmuñu seen santaaney Yàlla Aji Sax ji. Dañoó roy ci aada yi Israyil sos, di ko jéfe.²⁰ Moo tax Aji Sax ji xalab mboolem bànni Israyil, fitnaal leen, teg leen ci loxoy yaqkat yi, ba ni mu leen wacce.

²¹ Ba Aji Sax ji foqatee Israyil ca loxol waa kër Daawuda, dañoó fal Yerbowam doomu Nebat buur; Yerbowam dëddale Israyil ak Aji Sax ji, yóbbe leen bàkkaar bu réy;²² mbooloom Israyil topp Yerbowam ci bàkkaar ya muy def yépp, bañ koo dëddu,²³ ba Aji Sax ji dëddu leen, muy la mu waxoon, yonent yay jaamam jottli ko. Noonu la mujj génne Israyil réewam, yóbbu leen Asiri ba bésuub tey jii.

Waa Asiri sancal nañuy jaambur ca Samari

* 16:17 16.17 làccii rootukaay: seetal ci 1.Buur ya 7.27-29.

* 17:1 17.1 Ose mii wuute naak Yonent Yàlla Ose.

²⁴ Ci kaw loolu buurub Asiri jële ay nit dëkk ya ñuy wax Babilon ak Kuta ak Awa ak Amat ak Sefarwayim, dëël leen dëkki Samari, ñu wuutu bànni Israyil. Ñu daldi moom diiwaanu Samari, fëetewoo dëkk ya. ²⁵ Ba ñuy doora sanc foofa, ragaluñu woon Aji Sax ji, ba tax Aji Sax ji yebal ay gaynde ci seen biir, ñu di leen rey. ²⁶ Ñu wax buurub Asiri ne ko: «Xeet ya nga toxal, sancal leen ca dëkki Samari de, xamuñu yoonu Yállay réew ma. Yebal na ay gaynde ci seen biir. Ña nga leen di rey, ndax xamuñu yoonu Yállay réew ma.»

²⁷ Ba loolu amee buurub Asiri joxe ndigal ne: «Yebal-leen fa kenn ci sarxalkat ya ngeen fa toxale, mu dem toog foofa, jàngal leen yoonu Yállay réew ma.» ²⁸ Kenn ca sarxalkat ya ñu jële woon Samari nag dikk, dëkksi Betel, jàngal leen nu ñuy jaamoo Aji Sax ji. ²⁹ Terewul xeet wu ci nekk di sàkk ba tey seen tuuri bopp ca seen dëkk ya ñu fëete, ba dugal tuur ya ca bërabi jaamookaay, ya waa Samari defaroon. ³⁰ Ci biir loolu waa Babilon sàkk tuur ma ñuy wax Sukkóot Benoot, waa Kuta sàkk Nergal, waa Amat sàkk Asima; ³¹ waa Awa sàkk Nibaas ak Tartag, waa Sefarwayim di lakk seeni doom ngir tuuri Sefarwayim yi ñuy wax Addraameleg ak Anameleg. ³² Ñu boole ci di jaamu Aji Sax ji, tabb fu nekk ci seen biir ay sarxalkat ngir bërabi jaamookaay ya, ñu di leen sarxalal ca bërabi jaamookaay yooyu. ³³ Ñuy wormaal Aji Sax ji, di jaamuwaale seen tuuri bopp itam, na ñu ko baaxoo ca seen waa réewum cosaan ma ñu leen toxale. ³⁴ Ba tey jii ñu ngi topp seen aaday cosaan. Ragaluñu Aji Sax ji dëgg te sàmmontewuñook santaane yeek dogal yeek yoon week ndigal li Aji Sax ji joxoon askanu Yanqóoba mi mu tudde Israyil. ³⁵ Aji Sax ji daa fasoon ak ñoom kóllère, sant leen ne leen: «Buleen wormaal yeneen yàlla, buleen leen sujjóotal, buleen leen jaamu, te buleen leen sarxalal itam. ³⁶ Man Aji Sax ji leen génne réewum Misra ci sama kàttan gu mágg ak sama dooley loxo, man ngeen wara wormaal, di ma sujjóotal, di ma sarxalal. ³⁷ Te santaane yeek dogal yeek yoon week ndigal li ma leen bindaloon, fexeleen ba di sàmmonteeq moom ba fàww. Buleen wormaal yeneen yàlla. ³⁸ Kóllère gi ma fasoon ak yeen nag, buleen ko fàtte. Buleen wormaal it yeneen yàlla. ³⁹ Waaye man seen Yàlla Aji Sax ji ngeen di wormaal, ma xettli leen ci seen loxol mboolem noon.» ⁴⁰ Taxul ñu dëgg, xanaa sax rekk ci seen aaday cosaan. ⁴¹ Noonu la xeet yooyu daan wormaale Aji Sax ji, boole ci di jaamu seen jëmme tuur. Seen doom it noonu, ba tey seeni sèt di

def na seeni maam daan def.

18

Esekiya falu na buur ca Yuda

¹ Ba Ose doomu Ela buurub Israyil duggee ñetteelu atu nguuram, ca la Esekiya doomu Axas falu ca Yuda. ² Amoon na ñaar fukki at ak juróom ba muy falu buur. Nguuru na ñaar fukki at ak juróom ñeent, péeyoo Yerusalem. Yaayam nag mooy Abi doomu Sàkkaryaa. ³ Muy def li Aji Sax ji rafetlu, mboolem noonee ko Daawuda maamam daan defe.

⁴ Moom moo dindi bërabi jaamookaay ya, toj tuuri doj ya, gor xer wa ñuy jaamoo Asera, rajaxe jaanu xànjari ja Musaa defaroon. Ndax ba ca jamono yooya waa Israyil dañu daan taalal jaanu xànjari ja cuuraay, tudde ko Nexstan. ⁵ Ni Esekiya wóoloo woon Aji Sax ji Yállay Israyil amu ci moroom ci mboolem buuri Yuda yi topp ci moom mbaa yi ko jiiu. ⁶ Dafa sax ci Aji Sax ji, dëdduwu ko, xanaa di topp ndigal ya Aji Sax ji joxoon Musaa.

⁷ Aji Sax ji nag ànd ak Esekiya, mu am ndam ci mboolem lu mu sumb. Bañ na noteelu buurub Asiri, ba nangulatu ko. ⁸ Ci kaw loolu dàq na waa Filisti, ba ca dëkk ba ñuy wax Gasa ak diiwaanam, dale ko ca tatay wattukat ya ba ca dëkk yu mag ya ñu wëraley tata.

⁹ Ba Esekiya buurub Yuda duggee ñeenteelu atu nguuram, yemook ba buurub Israyil Ose doomu Ela duggee juróom ñaareelu atu nguuram, ca la Salmanasar buurub Asiri song Samari, gaw ko. ¹⁰ Gaw nañu Samari ba ca ñetteelu at ma, door koo nangu, ca juróom benneelu atu nguurug Esekiya, yemook ba Ose buurub Israyil duggee juróom ñeenteelu atu nguuram. ¹¹ Ba mu ko defee buurub Asiri jàpp Israyil, yóbbu Asiri, dëël leen diiwaanu Ala ak Gosan ga dexu Abor wale, ak ca dëkki xeetu Medd ya. ¹² Li waral loolu mooy waa Israyil a dëggalul seen Yàlla Aji Sax ji. Dañoo fecci kóllèreem ak moom, ba mboolem li Musaa, jaamu Aji Sax ji, santaane woon, faalewuñu ko, jëfëwuñu ko.

Asiri song na Yuda

¹³ Ca fukk ak ñeenteelu atu nguurug Esekiya buurub Yuda, ca la Senakerib buurub Asiri dikk song mboolem dëkki Yuda ya tata wër, daldi leen nangu. ¹⁴ Esekiya buurub Yuda yónnée ca buurub Asiri ca Lakis ne ko: «Tooñ naa de, waaye ngalla baal ma, te dem. Loo ma sas dinaa ko fey.» Buurub Asiri sas Esekiya buurub Yuda juróom ñeent fukki barigoy xalis ak juróom ñeenti barigoy wurus. ¹⁵ Esekiya joxe mboolem xalis ba nekkoon ca kër Aji

Sax ji ak ca dencukaayi kër Buur. ¹⁶ Booba la Esekiya xobbi wurus wa ñu xoobe woon bunti kër Aji Sax ji ak kenu ya, yónnee ko buurub Asiri.

¹⁷ Buurub Asiri nag tollu ca Lakis, yebal bummeem ak kilifay jawriñam ak bëkk-néegam, ñu ànd ak mbooloom xare mu takku, dem Yerusalem. Ba ñu agsee Yerusalem ba tollook solomu mbàndum kaw ma, fa feggook yoon wa jëm ca toolub fòotukaay ba, fa lañu taxaw. ¹⁸ Ci kaw loolu ñu woolu Buur. Gannaaw loolu bootalub buur Elyakim doomu Ilkiya moo ànd ak Sebna bindkat ba, ak ka yor téere ya, Yowa doomu Asaf, ñu dikk dajeek ñoom.

¹⁹ Ba mu ko defee Rabsake bëkk-néegu buurub Asiri ne leen: «Waxleen nag Esekiya ne ko: Buur bu mag ba, buurub Asiri dafa wax ne: “Sa yaakaar jii nga yaakaar, ana foo ko teg? ²⁰ Defe nga ne làmmiñ kese doy na pexeek njàmbaar cib xare? Ma ne: Ana kan nga yaakaar bay fippu ci sama kaw? ²¹ Misra daal, nga def sa yaakaar, bantu barax bu tas boobu di sokk képp ku ko wéeroo! Firawan buuru Misra de, mooy boobu bant ci képp ku ko yaakaar. ²² Xanaa doo ma ne seen Yàlla Aji Sax ji ngeen yaakaar? Xanaa du moom nga toxal béra bi jaamookaayam yeek sarxalukaayam, ba noppi ne waa Yerusalem ak Yuda sarxalukaay boobu ci Yerusalem lañuy sujjóotal?” ²³ Léegi daal, déggool rekk ak sama sang buurub Asiri, ma jox la ñaari junniy fas. Ndegam am ngay gawaram! ²⁴ Ana noo mana tēwe ki géna tuut ci sama jawriñi sang? May wax ngay yaakaare Misra ay watiiñ aki fas! ²⁵ Te sax, xanaa du Aji Sax ji laa àndal ba dalsi fi kaw bérab bii, ngir tas ko? Aji Sax ji ci boppam moo ma ne: “Songal réew mii, tas ko!”»

²⁶ Ci kaw loolu Elyakim doomu Ilkiya ak Sebna ak Yowa ñaan Rabsake, ne ko: «Ngalla, làkk nu arameen, dégg nanu ko. Bu nu wax ebré, mbooloo mi ci kaw tata ji di ci dégg.» ²⁷ Bëkk-néeg ba ne leen: «Ndax yeen ak seen sang doɗɗ la ma sama sang yóbbante kàddu yii? Ñi toog ci kaw tata ji dañu cee bokkul? Te ñu nara ànd ak yeen lekk seen jonkani bopp, naan seenum saw!» ²⁸ Ba loolu amee bëkk-néeg ba taxaw, xaacu ca kaw ci ebré ne: «Dégluleen kàddug buur bu mag bi, buurub Asiri. ²⁹ Buur dafa wax ne bu leen Esekiya nax, ndax manu leena xettli ci loxoom. ³⁰ Bu leen Esekiya yaakaarlool Aji Sax ji it, naan leen: “Aji Sax ji moo nuy xettli moos, te deesul teg dëkk bii ci loxol buurub Asiri!” ³¹ Buleen déglu Esekiya. Buurub Asiri kat dafa wax ne: Jámmooleen ak man te ngeen génn dëkk

bi, dikk nangul ma. Su ngeen ko defee, ku nekk ci yeen mana lekk ak jàmm ci garabu reseñam, lekk ak jàmm ci figgam, di naan ndoxum teenam, ³² ba kerooq may dikk, yóbbu leen réew mu mel ni seen reew wi, réewum pepp ak ndoxum reseñ, réewum mburu ak tooli reseñ, réewum garabi oliw, diw ak lem tuuru, ndax ngeen dund te baña dee. Bu leen Esekiya sànk, naan leen: “Aji Sax ji moo nuy xettli.” Buleen ko déglu! ³³ Ndax tuuri xeet yi mas nafoo xettli réewu wenn xeet ci buurub Asiri? ³⁴ Ana tuuri réew yii di Amat ak Arpádd? Ana tuuri Sefarwayim ak Ena ak Iwa? Ndax dañoo xettli Samari ci man? ³⁵ Tuuri réew yépp, ana mu ci xettli menn réew ak man, ba Aji Sax ji wara mana xettli, Yerusalem ak man?»

³⁶ Mbooloo ma nag ne cell, tontuwuñu ko baat, ndax Buur moo leen santoon ne leen buñu ko tontu. ³⁷ Ba loolu amee bootalub Buur, Elyakim doomu Ilkiya ak Sebna, bindkat ba, ak doomu Asaf, Yowa ma denc téere ya, ñoo dem ak seen yérey ñaawlu yu xottiku, ba ca Esekiya. Ñu daldi koy àgge kàddug bëkk-néeg ba.

19

¹ Naka la ko Buur Esekiya dégg, daldi xotti ay yéreem, sol saaku yu muy ñaawloo. Mu dem nag ca kër Aji Sax ji ² Ba loolu amee mu yebal Elyakim bootalub Buur ak Sebna bindkat ba, ak ñay mag ca sarxalkat ya. Ñu sol saaku yu ñuy ñaawloo, daldi dem ca Yonent Yàlla Esayi doomu Amocc. ³ Ñu ne ko: «Esekiya dafa wax ne: “Bésuub tey bésuub njàqare la ak mbugal ak gâcce. Mooy li ñuy wax naa: Doom a ngi ci buntub juddu, te dooley wasin réer! ⁴ Jombul nag sa Yàlla Aji Sax ji dégg mboolem kàdduy bëkk-néeg bi sangam buurub Asiri yebal, ngir mu kókkali Yàlla jiy dund. Te kon sa Yàlla Aji Sax ji mooy dogal mbugal mi war ci kàddu yooyu mu dégg. Yékkatil kàddug ñaan rekk, ngir ñi fi desagum.”»

⁵ Ba surgay Buur Esekiya àggee Esayi wax jooju leen seen sang wax, ⁶ Esayi da ne leen: «Waxleen seen sang ne ko: Aji Sax ji dafa wax ne: “Bul ragal kàddu yi nga dégg surgay buurub Asiri ñàkke ma ko kersa. ⁷ Maa ngii di ko sol xel mu ko gëmloo xibaar bu muy dégg, ba dellu réewam, ma fàdde ko ab saamar ca am réewam.”»

Asiri tooñati na Yuda

⁸ Gannaaw loolu Rabsake dégg ne buurub Asiri bàyyikoo na Lakis, bay xareek dëkk ba ñuy wax Libna. Mu walbatiku fekki ko foofa. ⁹ Booba buurub Asiri daa dégg ne Tiraka buurub Kuus moo leen di songsi. Mu dellu yebal ay ndaw

ca Esekiya, ne leen: ¹⁰ «Waxleen Esekiya buurub Yuda, ne ko: “Seen Yàlla ji ngeen yaakaar, bumu leen nax, naa leen deesul teg Yerusalem ci loxol buurub Asiri. ¹¹ Xanaa yaw ci sa bopp dégg nga li buuri Asiri def mboolem réew yi, faagaagal leen? Yaw nag, yaa ciy mucq? ¹² Xeet yi samay maam sànk, seeni tuur dañu leena musal, muy Gosan, di Karan, di Resef, di askanu Eden wa woon ca Telasar? ¹³ Ana buuri Amat ak Arpàdd ak Layir ak Sefarwayim ak Ena ak Iwa?”»

¹⁴ Ba Esekiya jèlee bataaxal ba ca loxol ndaw ya, jàng ko ba noppi, dafa dem ba ca kër Aji Sax ji. Mu daldi tàllal bataaxal ba fa kanam Aji Sax ji. ¹⁵ Esekiya ñaan fi kanam Aji Sax ji, ne ko: «Éy Aji Sax ji Boroom gàngoori xare yi, Yàllay Israyil mi toog fi tiim malaakay serub yi. Yaw donj yaa di Yàllay mboolem nguuri àddina. Yaw déy, yaa sàkk asamaan ak suuf. ¹⁶ Ngalla Aji Sax ji, dékkal sa nopp ba dégg; Aji Sax ji, xippil say gèt ba gis, te dégg kàdduy Senakerib yi mu yóbbante, ngir ñàkke la ko kersa, yaw, Yàlla jiy dund! ¹⁷ Aylayéwén Aji Sax ji, buuri Asiree tas xeet yeek seeni réew, ¹⁸ te ñoo sànni seeni yàlla ci sawara it, ndax yooyoo dul Yàlla, xanaa lu nit sàkke loxoom, bant ak doj, ba tax ñu sànk leen. ¹⁹ Kon nag Aji Sax ji sunu Yàlla, ngalla wallu nook moom, ba mboolem nguuri àddina xam ne yaw Aji Sax ji donj yaa di Yàlla.»

Yonent Yàlla Esayi yégle na jéllub Asiri

²⁰ Ba mu ko defee Esayi doomu Amocc yónnee ca Esekiya ne ko: «Aji Sax ji Yàllay Israyil dafa wax ne li nga ko ñaan ci Senakerib buurub Asiri, dégg na ko. ²¹ Lii moo di kàddu gi Aji Sax ji wax ci moom: Yaw, janq Siyon mu taaru da laa xeeb, di la ñaawal.

Yerusalem, dékk bu taaru booboo
lay wëcc bopp,

di la kekku sa gannaaw.

²² Ana kooy kókkaleek a ñàkke kersa?

Moo kooy yékkatil kàddu?

Kooy xool gëti xeebeel?

Xanaa du Aji Sell ju Israyil ji?

²³ Yaa yebal say ndaw, di kókkali Boroom bi,

te naa: “Sama watiir yi ne xas laa ware kawtey tund yi, jàll ba ca xolu Libanj.

Maa gor seedaram ya fa sut, ak tànnéefi garabi sipparam, maay àkki ba ca collub dalub tundu Libanj, ak gottam bu naat ba nib tóokër.

²⁴ Maa gas ay teen, naan ndoxum réewum jaambur,

maa joggatee sama téstèn, wali Misra yépp,

ñiisal ko.”

²⁵ «Waaye xanaa déggoo ne bu yàgg laa dogal loolu?

Ca jant ya woon laa ko nasoon,
tey ma sottal ko,
ba nga mana def genti jali tojtit, dëkk yu
tata wër.

²⁶ Waa dëkk ya ne yàcc, jàq, torox,
mel ni gàncaxu àll mbaa ñax mu yeess,
mbete caxum xadd,
balaa màgg lax.

²⁷ «Waaye boo toogee, boo génnee, boo
duggee,

xam naa,

boo xadaroo sama kaw it, xam naa.

²⁸ Yaa xadaroo sama kaw,
ba sag reewande tàbbi sama nopp!
Maa lay takkal ag nos akug laab,
waññi la, nga dellu yoon wa nga dikke
woon.

²⁹ «Lii, def ko ci, mu dib takk.

Dees na lekk ren peppum saxayaay,
déwén it dees na lekk lu saxal boppam.

Waaye déwén-jéeg,

ngéen ji, góob,

jëmbat tóokëri reseñ, lekk ca meññeef ma.

³⁰ Ndes wa des ca askanu Yuda

ñooy saxaat ay reen,

ba meññaat ay doom.

³¹ Yerusalem kay law ndes di génnee,

aw ndes ay récce tundu Siyonj,

te Aji Sax ji Boroom gàngoori yi

mooy sottal loolu ci xéraangeem.

³² «Moo tax Aji Sax ji wax ci buurub Asiri
ne:

“Du dugg ci dëkk bii,

du fi soqig fitt,

du fi taxawe ab pakk,

du fi jal jal bu muy gawe.

³³ Yoon wa mu dikke lay delloo,

biib dëkk du fi dugg.

Kàddug Aji Sax jee.

³⁴ Maay aar dëkk bii, musal ko

ngir man ci sama bopp,

ak Daawuda sama jaam bi.”»

³⁵ Guddig keroog malaakam Aji Sax ji
moo dikk, fàdd ca dalub Asiri téeméer
ak juróom ñett fukk ak juróomi junni
(185 000). Ca èllég sa ña mucc teela xëy,
yemuñu ci lu moy ñooña ñépp, diy néew.

³⁶ Ba loolu amee Senakerib buurub Asiri
daldi fabu, ñibbi. Mu toog nag ca Niniw.

³⁷ Gannaaw gi, ba muy sujjoot ca kër
tuuram ma ñuy wax Nisrog, Addraameleg
ak Sareser, doomam yu góor ñoo ko fa
fàdde saamar. Ñoom nag, ñu daw làquji
réew ma ñuy wax Araraat. Ci kaw loolu
doomam Asaradon falu buur, wuutu ko.

20

Esekiya wopp na, ba jóg

¹ Jant yooyu Esekiya moo woppoon bay waaja dee. Yonent Yàlla Esayi doomu Amocc dikk, ne ko: «Aji Sax ji dafa wax ne: Dénkaaneel sa mbiri kër, ndax dangay dee, doo jóg!» ² Mu walbatiku nag, jublook miir ba, ñaan ci Aji Sax ji ne ko: ³ «Éy Aji Sax ji, ngalla bàyyil xel ni ma àndeek yaw sama léppi xol, ci kóllère, te li nga rafetlu laa jéfe.» Mu jooy nag, jooy yu metti.

⁴ Ba loolu amee Esayi génn, weeseegul digg ett ba sax, kàddug Aji Sax ji dikkal ko ne ko: ⁵ «Dellul ba ca Esekiya, sama njiitu ñoñ, nga ne ko: «Aji Sax ji sa Yàllay maam Daawuda dafa wax ne: Dégg naa sag ñaan, gis naa say rongooñ. Maa ngii di la wéral, te bu gannaaw èllégee dinga dem kër Aji Sax ji. ⁶ Dinaa yokk ci saw fan, fukki at ak juróom. Buurub Asiri ak dooleem, maa la ciy xettli, yaw ak dëkk bii, te maay aar dëkk bii ndax man ci sama bopp ak Daawuda sama jaam bi.» ⁷ Esayi teg ca ne: «Indileen danku figg.» Ñu indi, teg ko ca taab ba, Esekiya wér.

⁸ Fekk na Esekiya ne Esayi: «Ana lu di takk biy firndeel ne Aji Sax ji dina ma wéral, ba ma mana dem gannaaw èllég ca kër Aji Sax ji?» ⁹ Esayi ne ko: «Takk biy bàyyikoo ci Aji Sax ji, di firndeel ne dina def li mu wax, yaar yii loo ci bëgg: ker gi mágg lu tollook fukki dëggastal, mbaa mu dellu gannaaw fukki dëggastal?» ¹⁰ Esekiya ne ko: «Ker gi mágg lu tollook fukki dëggastal moom, yomb na. Kon na dellu gannaaw fukki dëggastal.» ¹¹ Ci kaw loolu Yonent Yàlla Esayi ñaan ci Aji Sax ji, Aji Sax ji delloo ker ga gannaaw lu tollook fukki dëggastal ya mu wàccoon ca kaw iskaleb Axas ba.

Buuru Babilon yónnee na ca Esekiya

¹² Jant yooyu doomu Baladan Berodag Baladan* buuru Babilon moo yónnee Esekiya bataaxal ak yóbbal. Booba dafa dégg ne Esekiya daa woppoon. ¹³ Esekiya nag déglu ndaw ya, ba noppi won leen mboolem kërug dencukaayam: xaalis baak wurus waak ndàbb jaak diwu tànnéef gaak néegub gannaayam ak mboolem lu nekkoon cay dencam. Amul lenn lu leen Esekiya wonul ci biir kër am mboolem fu bokk ci kilifteefam.

¹⁴ Gannaaw loolu Yonent Yàlla Esayi dikk ne Buur Esekiya: «Lu la nit ñii wax ak yu ñu jóge sax ba fi yaw?» Esekiya ne: «Réew mu sore lañu bàyyikoo, dikk, réewum Babilon.» ¹⁵ Mu ne ko: «Ana lu ñu gis sa biir kër?» Esekiya ne ko: «Mboolem lu nekk sama biir kër, gis nañu ko. Amul

lenn lu ma leen wonul ci samay denc.» ¹⁶ Esayi ne Esekiya: «Déglul kàddug Aji Sax ji: ¹⁷ «Ay jant a ngii di ñew, dees na yóbbu Babilon lépp lu nekk sa biir kër, te say maam dencoon ko, ba tey jii. Du lenn luy des. Kàddug Aji Sax jee. ¹⁸ Te it ñenn ci sag njaboot, ñu soqikoo ci yaw, di ñoo meññ ci sa geño, dinañu leen jàpp, ñu doon jaam yu ñu tàpp ca biir kër buuru Babilon.» ¹⁹ Esekiya ne Esayi: «Kàddug Aji Sax ji nga jottli jàmm la.» Booba ma nga naan: «Xanaa du jàmm ju ne ñooy ay am sama giiru dund?»

Buur Esekiya saay na

²⁰ Li des ci mbiri Esekiya ak mboolemi njambaaram ak mbànd mi mu defar ak solomam, muy indi ndox ca biir dëkk ba, bindees na lépp moos ci téere bi ñu dippee Jaloorey buuri Yuda ca seeni jant. ²¹ Esekiya nag saay, fekki ay maamam. Doomam Manase falu buur, wuutu ko.

21

Manase falu na buur ca Yuda

¹ Fukki at ak ñaar la Manase amoon ba muy falu buur. Nguru na juróom fukki at ak juróom fa Yerusalem. Yaayam mooy Efsiba. ² Manase nag di def li Aji Sax ji ñaawlu, topp ñaawtéefi xeet ya Aji Sax ji dàqoon ngir bànni Israyil. ³ Moo tabaxaat bérabí jaamookaay ya Esekiya baayam tasoon, yékkatil tuur mi ñu naan Baal ay sarxalukaay, samp xer wu ñuy jaamoo Asera, noonee ko Axab buurub Israyil defe woon, boole ca di sujjóotal mboolem biddiwi asamaan, di leen jaamu. ⁴ Moo yékkati yeneen sarxalukaayi tuur ca biir kër Aji Sax ji, fa Aji Sax ji waxoon ne: «Fii ci Yerusalem laay dēj sama tur.» ⁵ Ay sarxalukaay it la tabaxal biddiwi asamaan yépp ca biir ñaari etti kër Aji Sax ji. ⁶ Te itam sarxal na doomam, lakk ko ngir ay tuur. Ci biir loolu jabar na, ñeengo na, jéflante naak boroom rawaan aki gisaanekat. Bare na lu mu def lu Aji Sax ji ñaawlu, ba merloo ko.

⁷ Moo dugal ba tey jëmm ja mu sàkkoon ngir tuur ma ñuy wax Asera, ca biir kër ga Aji Sax ji waxoon Daawudaak doomam Suleymaan ne leen: «Ci biir kër gi ci Yerusalem, gi ma tannée ci mboolem gi-iri Israyil, laay dēj sama tur ba fàww. ⁸ Ndegam bànni Israyil saxoo nañoo sàmm mboolem lu ma leen santoon, te mu dëppook mboolem yoon wi leen Musaa sama jaam ba sant ñu topp ko, dootuma leen wërloo, ñu wacc réew mi ma joxoon seeni maam.» ⁹ Waaye bànni Israyil ñoo dégluwul, ba Manase waññi leen, ñuy def

* 20:12 20.12 Berodag Baladan mooy Merodag Baladan ba tey.

ay ñaawtéef, ba raw xeet ya Aji Sax ji sánkoon fi kanam bänni Israyil.

¹⁰ Ba loolu amee Aji Sax ji wax, yonent yay jaamam jottli. Mu ne: ¹¹ «Manase buurub Yuda moo def yii ñaawtéef, ba jéfam ju bon raw mboolem lu Amoreen ña ko jiitu defoon, ba yóbbe waa Yuda ñuy moye ay kasaray tuur. ¹² Moo tax man Aji Sax ji Yállay Israyil damaa wax ne: «Maa ngii di wáce ci Yerusaleem ak Yuda musiba muy buur noppi képp ku ci dégg. ¹³ Dinaa nattoo Yerusaleem buumu beteex ba ma nattoo Samari ak nattuukaay ba ma nattoo waa kër Axab. Dinaa ñédd Yerusaleem, ba mu mel ni ndab lu ñu ñiit ba mu set, dépp ko. ¹⁴ Dinaa suur sama ndesu ñoñ te dinaa leen teg ci seen loxol noon yi, seen bañ yépp di leen futteek a sèxétoó, ¹⁵ ndegam li ma ñaawlu lañu masa def, di ma merloo, ba seeni maam génnee Misra ba tey jii.»»

¹⁶ Te it deretu nit ñu deful dara la Manase tuur, ba mu fees Yerusaleem dell, cat ba cat, te bokkul ak bàkkaar bi mu bàkkaarloo waa Yuda, ba ñuy def li Aji Sax ji ñaawlu.

¹⁷ Li des ci mbiri Manase ak mboolem lu mu def ak bàkkaaram ba mu def, bindees na lépp moos ci téere bi ñu dippee Jaloorey buuri Yuda ca seeni jant. ¹⁸ Gannaaw gi Manase saay, fekki ay maamam, ñu denc ko ci toolub kërám, di toolub Usa. Doomam Amon falu buur, wuutu ko.

Amon falu na buur ca Yuda

¹⁹ Ñaar fukki at ak ñaar la Amon amoon ba muy falu buur. Ñaari at la nguuru fa Yerusaleem. Yaayam moo doon Mesulemet doomu Arus ma cosaanoó Yotba. ²⁰ Amon di def nag li Aji Sax ji ñaawlu, la baayam Manase daan def. ²¹ Topp na baayam ci mboolem tánk ya mu jaaroon, di jaamu kasaray tuur yi baayam daan jaamu, di leen sujjóotal. ²² Daa déddu Aji Sax ji, Yállay maamam, baña jaar ci yoonu Aji Sax ji.

²³ Ci kaw loolu surgay Amon lalal Amon pexe, bóom ko ca biir kërám. ²⁴ Waa réew ma nag rey mboolem ña fexeeloon Buur Amon. Ba loolu amee waa réew ma fal buur doomam Yosya, mu wuutu ko. ²⁵ Li des ci mbiri Amon ak li mu def, bindees na ko moos ci téere bi ñu dippee Jaloorey buuri Yuda ca seeni jant. ²⁶ Ba loolu amee ñu denc ko ca bàmmeelam ca toolub Usa, Yosya doomam falu buur, wuutu ko.

22

Yosya falu na buur ca Yuda

¹ Juróom yetti at la Yosya amoon ba muy falu buur, te fanweeri at ak benn la nguuru fa Yerusaleem. Yaayam mooy Yedida doomu Adaya ma cosaanoó Boskat. ² Yosya di def li Aji Sax ji rafetlu, topp ci mboolem tánk yi maamam Daawuda jaaroon, jàddul fenn, du ndijoor, du càmmoñ.

³ Buur Yosya nag, ca fukk ak juróom ñetteelu atu nguuram, dafa yebal bindkat ba, Safan doomu Asalyaa doomu Mesulam, ca kër Aji Sax ji. Mu ne ko: ⁴ «Demal ca Ilkiya sarxalkat bu mag ba, ne ko mu yembal saraxi xaalís, yi wattukati bunti kër Aji Sax ji nangoo ci nit ñi. ⁵ Nañu ko teg ci loxoy liggéeykat yiy saytu liggéeyu kër Aji Sax ji. Ñooñu jox ko liggéeykat ya ca kër Aji Sax ji, di defaraat kër ga, ⁶ muy liggéeykati bant yi ak tabaxkat yi ak yeneen liggéeykat. Nañu ci jënd bant ak doji yett, defare ko kër gi. ⁷ Waaye buñu leen laaj nu ñu def xaalís bi ñu leen jox, ndax ñu maandu lañu ci seen liggéey.»

Téereb yoon wi feeñ na

⁸ Ilkiya sarxalkat bu mag ba nag ne Safan bindkat ba: «Téereb yoon wi de laa gis ci kër Aji Sax ji!» Ci kaw loolu Ilkiya jox Safan téere ba, mu jàng ko. ⁹ Ba loolu amee Safan bindkat ba dellu ca Buur, ágge ko gii káddu: «Sa surga ya sotti nañu xaalís ba nekkoon ca kër Aji Sax ji, ba teg ko ca loxol ñi yor liggéey bi te di saytukati kër Aji Sax ji.» ¹⁰ Safan bindkat ba teg ca xamal Buur ne ko: «Ab téere nag la ma Ilkiya sarxalkat bi jox.» Safan jàngal ko Buur.

¹¹ Ba Buur déggee kádduy téereb yoon wa, daa xotti ay yéreem ndax tiitaange. ¹² Mu wax Ilkiya sarxalkat ba, mook Ayikam doomu Safan, ak Agbor doomu Mikaya, ak Safan bindkat ba, ak Asaya bèkk-neeegu buur, ne leen: ¹³ «Demleen seetal ma ci Aji Sax ji, seetaaleel mbooloo meek Yuda gépp ci mbirum kádduy téere bii feeñ. Sànjum Aji Sax ji tàkk ci sunu kaw kat réy na, ndax sunuy maam a déggul kádduy téere bii, ngir jéfe mboolem li ñu nu ci bindal.» ¹⁴ Ilkiya sarxalkat ba daldi dem ánd ak Ayikam ak Agbor ak Safan ak Asaya, ba ca Ulda yonent bu jigéen bay soxnas wattukatub yéere ya, Salum doomu Tigwa doomu Aras. Ulda ma nga dèkkoon Yerusaleem ca sanc ba. Ñu wax ak moom.

¹⁵ Jigéen ja ne leen: «Aji Sax ji Yállay Israyil nee: Xamal-leen ki leen yebal ci man ne ko: ¹⁶ «Aji Sax ji nee: Maa ngii di wáce musiba ci bérabi bii ak ñi ko dèkke, muy mboolem kádduy téere bi buurub Yuda jàng. ¹⁷ Gannaaw ñoo ma déddu, di taalal yeneen yalla cuuraay, ngir merloo ma ci mboolem liggéey bu ñu defe seeni

loxo, samam sànj mooy tàkk fi bérab bii te du fey.”¹⁸ Buuru Yuda mi leen yónni, ngir ngeen seetlusi ci Aji Sax ji nag, waxleen ko ne ko: “Li Aji Sax ji Yállay Israyil wax ci kàddu yi ngeen dégg moo di: ¹⁹ Gannaaw yaa réccu ci sa xol, ba toroxlu ci kanam Aji Sax ji, ba nga dégge ni ma rëbbe bérab bii mook ñi ko dëkke, muy seen toroxteek seen alkànde, te yaa xotti say yére, jooy fi sama kanam, man it dégg naa la. Kàddug Aji Sax jee. ²⁰ Moo tax maa ngii di la yóbbu nga fekki say maam, dees na la yóbbu ak jàmm ca sa bàmmeeel, te say bët du tegu ci mboolem musiba mi may wàcce ci bii bérab.”» Ba loolu amee ñu dellu, yegge Buur kàddu ga.

23

Yosya sellal na réew mi

¹ Ci kaw loolu Buur yónnee, ñu woo mboolem magi Yuda ak Yerusalem, ñu dikk. ² Buur dem ca kër Aji Sax ji, ànd ak waa Yuda gépp, Yerusalem gépp; sarxalkat yaak yonent yaak askan wépp, ka gën a tuut ba ca gën a mag. Mu jàngal leen, ñuy dégg, mboolem kàdduy téereb kóllère* ba feeñ ca kër Aji Sax ji. ³ Buur nag taxaw fa kenu ga, feddli kóllère ga fa kanam Aji Sax ji, ngir topp Aji Sax ji, di sàmme léppi xol ak léppi bakkan, ay santaaneem ak seede yoonam, ak dogali yoonam, ngir saxal kàdduy kóllère googu ñu bind ci téere boobu. Askan wépp yebu ca kóllère ga.

⁴ Ba loolu amee Buur sant Ilkiya sarxalkat wu mag ba, mook sarxalkat ya ca topp, ak wattukati buntu kër Aji Sax ji, ne leen ñu génnee kër Aji Sax ji mboolem ndab ya ñu defaraloon Baal ak Aseraak biddiwi asamaan yépp. Mu génne lépp Yerusalem, lakk ko ca tooli Sedoron, ba noppi yóbbu dóom ba Betel. ⁵ Gannaaw loolu mu dàq sarxalkati tuur ya buuri Yuda faloon ñuy taal cuuraay ca bérab jaamookaay ya ca dëkki Yuda ak la wër Yerusalem, dàqaale ñay taalal cuuraay Baal, ak jant beek weer week xeeti dëlloof yeeq mboolem biddiwi asamaan yépp. ⁶ Bu loolu weese jële na kër Aji Sax ji tuur ma tudd Asera, génne ko Yerusalem ba ca xuru Sedoron, lakk ko foofa ca xuru Sedoron, wol ko ba muy sunguf, mu xépp ko ca ségi baadoola ya. ⁷ Màbb na it kéri nit ña doon jaay seen bopp fa ñuy màggale tuur ya ca biir kër Aji Sax ji, te jigéen ña daan fa ràbbal tuur ma ñuy wax Asera ay xayma.

⁸ Ba loolu wéyee Yosya indi Yerusalem mboolem sarxalkat ya doon sarxal ca

dëkki Yuda, diggante Geba ba Beerseba, daldi sobeel bérab jaamookaay ya ñu daan taal cuuraay, daaneel bérab jaamookaay ya ca bunt ya, boole ca ba nekkoon ca buntu Yosuwe, boroom dëkk ba, te féete càmmoñ booy jaare ci buntu dëkk ba di duggsi. ⁹ Mayuñu woon nag sarxalkati bérab jaamookaay ya ñuy dikk ba ca sarxalukaayu Aji Sax ji ci Yerusalem. Sañuñu woon lu moy bokk lekk mburu mu amul lawiir ñook sarxalkat yi ci des. ¹⁰ Ci kaw loolu Yosya sobeel na fa ñuy wax Tofet ca xuru Ben Inom, ba kenn dootu fa lakk sa doom ju góor mbaa ju jigéen ngir tuur wi ñuy wax Moleg. ¹¹ Jële na ca bunti kër Aji Sax ji fas ya ay buuri Yuda jagleeloon jant bi. Ña nga woon ca ètt ba, ca wetu néegu jawrii bu ñuy wax Netan Meleg. La ca tegu Yosya lakk watiir ya ñu jagleel jant bi. ¹² Ci biir loolu Buur daane sarxalukaay ya ay buuri Yuda yékkati woon ca kaw xaddub néegub kaw bu Axas, ak sarxalukaay ya Manase tabaxoon ca ñaari ètti kër Aji Sax ji. Mu jële fa lépp, def ko pënd, sànni ca xuru Sedoron. ¹³ Bérab jaamookaay ya féete woon Yerusalem penku ca bëj-saalumu tundu Alkànde, Buur Suleymaan tabaxaloon ko tuur ma ñuy wax Astàrt, kasaray waa Sidon ya, ak tuur ma ñuy wax Kemos, kasaray Mowabeen ña, ak tuuru Amoneen mu siblu ma ñuy wax Milkom, Buur Yosya daa boole lépp sobeel ko. ¹⁴ Rajaxe na tuuri doj ya, daane xer ya ñuy jaamoo Asera, wuutal fa ay jali yaxi nit, ba mu daj.

¹⁵ Naka noona mu boole ca sarxalukaay ba ca Betel ak bérabu jaamookaay ba fa doomu Nebat Yerbowam ma bàkkaarloo woon Israyil, yékkati woon. Sarxalukaay boobaak bérabu jaamookaay booba sax yàq na ko. Dafa lakk bérabu jaamookaay ba, wol ko ba mu mook, lakk xer wa ñuy jaamoo Asera. ¹⁶ Ba mu ko defee Yosya ne gees, gis bàmmeeel ya nekk foofa ca tund wa. Mu yeble, ñu sullil ko yax ya, mu lakk ko ca kaw sarxalukaay ba, sobeel ko noonu, muy kàddug Aji Sax ji góoru Yalla ga waxoon†, keroog ba Yerbowam taxawee ca sarxalukaay ba, bésuub màggal. Buur Yosya neeti gees, yem ci bàmmeeelu góoru Yalla ga biraloon waxu ba. ¹⁷ Mu ne: «Doj wee may seen bàmmeeelu kan a?» Waa dëkk ba ne ko: «Xanaa bàmmeeelu góoru Yalla ga bàyyikoo woon Yuda. Moo waxoon bu yàgg jéf jii nga def sarxalukaayu Betel bii tey.» ¹⁸ Mu ne: «Bàyyileen ko noonu! Bu kenn laal ay yaxam!» Ñu wacc fa ay yaxam ak yaxi yonent ba jóge woon

* 23:2 23.2 téereb kóllère gi mooy Tawreetu Yonent Yalla Musaa. † 23:16 23.16 Seetal ci 1.Buur ya 13.2.

Samari.

¹⁹ Mboolem bérabi jaamookaay ya nekkoon ca dëkki Samari yu mag ya te buuri Israyil tabaxoon ko, ba merloo Aji Sax ji, Yosya jële na ko fa, def ko na mu defoon ca Betel rekk. ²⁰ Gannaaw loolu mu rendi ca sarxalukaay ya mboolem ña fa doon sarxalkati bérabi jaamookaay ya, ba noppi lakk yaxi nit ca kaw, ngir sobeel lépp, doora dellu Yerusalem.

Màggalu bésub Mucc délssi na

²¹ Buur Yosya nag jox mbooloo mépp ndigal ne leen: «Màggal-leen bésub Mucc ga, ñeel seen Yàlla Aji Sax ji, ni ñu ko binde ci téereb köllère gii.» ²² Bésub Mucc booba, na ñu ko màggale atam, maseesu ko nee màggale ca jamonoy njiit ya yili-foon Israyil, ba ci jamonoy buuri Israyil ak Yuda. ²³ Ca fukk ak juróom ñetteelu atu Yosya donj lañu dellu màggal bésub Mucc boobu ca Yerusalem, ñeel Aji Sax ji. ²⁴ Rax ci dolli boroom rawaan yeek gisaanekat yeek gällaaji kër yeek kasaray tuur yeek mboolem kasara yu ni mel te ñu daan ko gis ca réewum Yudak Yerusalem, Yosya jële na ko fa ngir mana saxal kàdduy yoon wa ñu bind ca téere ba Ilkiya sarxalkat ba gisoon ca biir kër Aji Sax ji. ²⁵ Mboolem buur yi jiitu Yosya, kenn jubloowu ci Aji Sax ji léppi xolam ak léppi jëmmam ak kem kàttanam, bay sàmm yoonu Musaa wépp. Mboolem ñi ko wuutu it, kenn dabu ko ci.

²⁶ Teewul Aji Sax ji dèppul ci meram mu réy mi mu dale ci kaw Yuda ndax mboolem li Manase def, ba merloo ko. ²⁷ Aji Sax ji nag ne: «Yuda itam dinaa ko jële fi sama kanam, ni ma fi jëlee Israyil. Dinaa xalab dëkk bii ma tànn, di Yerusalem ak kër gii ma wax ne sama tur dina fi nekk.»

Buur Yosya saay na

²⁸ Li des ci mbiri Yosya ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. ²⁹ Ca ay jantam la Firawna Neko buuru Misra jóg jàppleji buurub Asiri ca wetu dexu Efraat, Buur Yosya dogaleji ko. Teewul ba ko Neko gisee la ko rey ca Megido. ³⁰ Ba loolu amee surgay Yosya yeb néew ba ci watiir, jële ko Megido, indi ko Yerusalem, denc ko ci bàmmeelu boppam. Askanu réew ma nag jël Yowakas doomu Yosya, diw ko diwug pal, fal ko buur, mu wuutu baayam.

Yowakas falu na buur ca Yuda

³¹ Naar fukki at ak ñetti la Yowakas amoon ba muy falu buur. Netti weer la nguuru fa Yerusalem. Yaayam mooy

Amutal doomu Yeremi ma cosaanoo Libna. ³² Muy def li Aji Sax ji ñaawlu, na ko ay maamam daan defe rekk. ³³ Firawna Neko moo laqoon jant bi Yowakas ca dëkk ba ñu wax Ribla ca réewum Amat, ba nguurootul ca Yerusalem. Mu teg réew ma galagu fanweeri barigoy xaalis, ak fanweeri kiloy wurus. ³⁴ Ci kaw loolu Firawna Neko fal Elyakim doomu Yosya buur, mu wuutu baayam Yosya, soppi turam, tudde ko Yowakim[†]; Yowakas moom mu jàpp ko, yóbbaaile Misra. Foofa la deeye.

Buur Yowakim fey na Misra galag

³⁵ Yowakim jox na Firawna Neko xaalis baak wurus wa mu laaj. Waaye waa réew ma la ko sas, ba jële ca ñoom xaalis baak wurus wa, ku nekk ak sab sas, daldi koy dajale, jox ko Firawna Neko.

³⁶ Naar fukki at ak juróom la Yowakim amoon ba muy falu buur, te fukki at ak benn la nguuru fa Yerusalem. Yaayam mooy Sebuda doomu Pedaya ma cosaanoo Ruma. ³⁷ Muy def li Aji Sax ji ñaawlu, mboolem noonee ko ay maamam defe woon.

24

¹ Ca ay jantam la Nabukodonosor buuru Babilon song réew ma. Yowakim nangul ko diiru ñetti at, doora walbatiku fippu.

² Ci kaw loolu Aji Sax ji yebal ci kawam ay yàqkati waa Babilon ak yàqkati Siri ak yàqkati Mowab ak yàqkati Amoneen ña. Aji Sax ji yebal leen Yuda ngir ñu yàgte ko, mu dèppook kàddu ga mu waxoon, yonent yiy surgaam jottli ko. ³ Ci ndigalal Aji Sax ji moos la loolu xew ca Yuda, ba mu mujj leen xarab ndax bàkkaari Manaseek li mu def lépp, ⁴ ak deretu nit ñi mu tuur te defuñu dara; ndax Manase daa feesal Yerusalem ak deretu jaamburi Yàlla, ba Aji Sax ji nanguwu koo baal.

⁵ Li des ci mbiri Yowakim ak mboolem lu mu def, bindees na ko moos ci téere bi ñu dippee Jaloorey buuri Yuda ca seeni jant. ⁶ Gannaaw gi Buur Yowakim téd, fekki ay maamam. Doomam Yowakin nag falu buur, wuutu ko. ⁷ Jamono yooyu buuru Misra génnatul réewam di xareji, ndax fekk na buuru Babilon nangu suufam sépp la ko dale ca xuru Misra ba ca dexu Efraat.

Yowakin falu na buur ca Yuda

⁸ Fukki at ak juróom ñetti la Yowakin amoon ba muy falu buur. Netti weer la nguuru, péeyoo Yerusalem. Yaayam mooy Newusta doomu Elnatan ma cosaanoo Yerusalem. ⁹ Muy def li Aji Sax ji ñaawlu, mboolem noonee ko baayam defe woon.

† 23:34 23.34 Ci seen aada, ku jox nit aw tur, fekk na nga am kilifteef ci kawam.

¹⁰Jamono jooja la jaraafi Nabukodonosor buuru Babilon, song Yerusalem, gaw dëkk ba. ¹¹Nabukodonosor dikk ca dëkk ba, fekk ay jaraafam gaw ko. ¹²Yowakin buurub Yuda génn fekki buuru Babilon, jébbal ko boppam, mook ndeyam aki surgaam aki jaraafam ak jawriñi kërám. Buuru Babilon nag jàpp ko. Looloo nga yemook juróom ñetteelu atu nguurug Nabukodonosor buuru Babilon. ¹³Nabukodonosor jële fa mboolem alali kër Aji Sax ji ak alali kër Buur, daldi buub lépp luy ndabu wurus lu Suleymaan buurub Israyil defarlu woon ci kër Aji Sax ji, muy la Aji Sax ji waxoon.

¹⁴Ci biir loolu buuru Babilon yóbbu Yerusalem gépp, muy mboolem jaraaf yeek jámbaari góor ñi, ñuy fukki junni, ñook mboolem liggéeykat yaak tégg ya. Kenn desul, lu moy baadoola ya gëna néew doole.

¹⁵Mu yóbbu Yowakin Babilon mook ndeyam aki soxnaam aki jawriñam ak kilifay réew ma. ¹⁶Buuru Babilon boole ca jappaale juróom ñaari junniy jámbaari góor (7 000), ak ñaari liggéeykat aki tégg, ñoom ñépp di boroom kàttan te tollu ci xare; mu boole leen jàpp jaam, yóbbu Babilon. ¹⁷Buuru Babilon moo fal Mataña, baayu Yowakin bu ndaw, mu wuutu Yowakin, daldi soppi turu Mataña, tudde ko Cedekiya.

Cedekiya falu na buur ca Yuda

¹⁸Ñaar fukki at ak benn la Cedekiya amoon ba muy falu buur; te fukki at ak benn la nguuru fa Yerusalem. Yaayam mooy Amutal doomu Yeremi ma cosaanoo Libna. ¹⁹Muy def li Aji Sax ji ñaawlu, mboolem noonee ko Yowakim defe woon. ²⁰Merum Aji Sax ji nag dikkal Yerusalem ak Yuda, ba mu mujj xarab leen.

Gannaaw gi Cedekiya fippu buuru Babilon.

25

Nangooti nañu Yerusalem

¹Ba Cedekiya tolloo ci juróom ñeenteelu atu nguuram, fukki fan ca fukkeelu weeram, ca la Nabukodonosor buuru Babilon ànd ak mbooloom xareem mépp ci kaw Yerusalem. Ñu dal fa janook ñoom, yékkati gawukaay, wërале ko. ²Dëkk ba gawe, ba keroog Cedekiya tollu ci fukkeelu atu nguuram ak benn. ³Keroog juróom ñeenti fan ca weer wa, xiif ba tar lool ca biir dëkk ba, ba waa réew ma amatuñu ab dund. ⁴Xarekati Yuda ya génn guddi daw. Fekk na waa Babilon gaw dëkk ba. Teewul ñu récc, jaare ca bunt ba ca diggante ñaari

tata ya, ca wetu toolu buur. Cedekiya daldi wuti xuru Yurdan. ⁵Waa Babilon nag topp Buur Cedekiya, ba dab ko ca jooru Yeriko, fekk mbooloom xareem mépp tasaaroo, wacc ko. ⁶Ñu jàpp ko, yóbbu ko ca buuru Babilon ca dëkk ba ñuy wax Ribla. Ñu dogal fa àtteem. ⁷Doomi Cedekiya yu góor lañu rendi, muy gis, ba noppi ñu tuur ay bêtam, jenge ko jengi xàñjar, yóbbu ko Babilon.

Yàq nañu kër Aji Sax ji

⁸Ba Nabukodonosor buuru Babilon tolloo ci fukkeelu atu nguuram ak juróom ñeent, ba am juróom ñaari fan ca juróomeelu weeru at ma, ca la bëkk- néegu buuru Babilon, Nebusaradan njiitu dag ya, dugg Yerusalem. ⁹Mu taal kër Aji Sax ji, taal kër Buur, ak keri Yerusalem gépp, boole ca keri boroom barke ya. ¹⁰Gàngooru Babilon gépp daldi ànd ak njiital dagi buur, ñu mább tata ya wër Yerusalem. ¹¹Gannaaw gi ña nekkoon ca dëkk ba ba booba, ak ña jébbaloon seen bopp buuru Babilon ak la desoon ca waa réew ma, Nebusaradan njiital dagi buur, boole leen yóbbu ngallo. ¹²Teewul ñenn ca baadooloy réew ma, njiital dag ya bàyyi leen fa, ñuy liggéey tóokéri reseñ yaak tool ya.

¹³Ci biir loolu kenuy xàñjar ya woon ca kër Aji Sax ji ak rootukaay yaak mbalkam xàñjar ma, waa Babilon toj lépp, boole xàñjar ja, yóbbu Babilon. ¹⁴Ñu yóbbaaale mboolem ndabi xàñjar yi ñuy liggéeye ci kër Aji Sax ji; ndab yiy def dóom, ak ñiitukaay yi, ak ñiimi feyukaayi lãmp yi, ak ndab yiy def deretu sarax yi, ak mboolem jumtukaayi xàñjar yu ñuy sarxalee. ¹⁵Njiital dag ya yóbbaaale and yaak ndab yiy def deret. Lu ciy wurus, mu ber, lu ciy xalis, mu ber. ¹⁶Ñaari kenu yooyu ak mbalka maak rootukaay ya, lépp di xàñjar bu Suleymaan defaraloon kër Aji Sax ji, maneesula takk diisaay ba. ¹⁷Taxawaayu kenu gu ci nekk fukki xasab* laak juróom ñett. Ab ponkub xàñjar a ci tege, bu taxawaay ba di ñetti xasab. Ab caax wodd ponk bi, ànd ak doomi gëreñaati xàñjar. Ñaari kenu yépp noonu, ànd ak seeni caax.

Jàpp nañu Yudeen ñi njaam

¹⁸Ci kaw loolu njiital dag ya jàpp Seraya sarxalkat bu mag ba, ak Cefaña sarxalkat ba ca topp, ak ñetti dagi bunt kër Aji Sax ja. ¹⁹Biir dëkk ba nag mu jële fa jenn jawriñ ju jiiite ay xarekat, ak juróomi niti dëkk ba ñu sés ci Buur, ak bindkatub njiital xare ba sasoo bind xarekat yi, ak juróom

* 25:17 25.17 xasab mooy guddaayu loxo, diggante catu baaraamu digg ak conc.

benn fukki Yudeen ñu mu fekk ca biir dëkk ba. ²⁰ Ba mu ko defee Nebusaradan, njiital dagi buur, boole leen yóbbu ca buuru Babilon ca Ribla. ²¹ Buuru Babilon nag jam leen, ñu dee, foofa ca Ribla, ca réewum Amat. Noonu la Yuda génne réewam, dem ngallo.

Nabukodonosor tabb na Gedalya ca Yuda

²² Mbooloo ma des ca réewum Yuda te Nabukodonosor buuru Babilon bàyyi leen fa nag, Gedalya doomu Ayikam doomu Safan la tabb mu jiite leen. ²³ Ba mboolem kilifay xare ya déggee ñook seeni nit ne buuru Babilon fal na Gedalya, dañoo ànd dikk ca Gedalya ca Mispa. Kilifa yooyu Ismayil doomu Netaña la woon, ak Yowanet doomu Kareya, ak Seraya doomu Tanumet ma dëkk Netofa, ak Yaasaña doomu waa Maaka ba, ñook seeni nit. ²⁴ Gedalya giñal leen ne leen: «Buleen ragala bokk ci surgay waa Babilon. Toogleen ci réew mi te nangul buuru Babilon, muy seen jàmm.»

²⁵ Gannaaw gi, ca juróom ñaareelu weeru at ma, Ismayil doomu Netaña doomu Elisama, bokk ci askanu buur, ànd ak fukki nit, dikk bóom Gedalya, bóomaale waa Yudak waa Babilon ya nekkoon ak moom ca Mispa. ²⁶ Ci kaw loolu mbooloo mépp fabu, baadoolook boroom barke, ñook kilifay xarekat ya, ñu daldi daw dem Misra ndax ragal waa Babilon.

Tijji nañu Yowakin buurub Yuda

²⁷ Yóbbu nañu Yowakin buurub Yuda ngallo ba mu am fanweeri at ak juróom ñaar, Ewil Merodag doora falu buur ca Babilon. At mooma, fukkeelu weer waak ñaar, ñaar fukki fan ak juróom ñaar ca weer wa, ca la Ewil Merodag siggil Yowakin buurub Yuda, daldi koy tijji. ²⁸ Ci biir loolu mu rafetook moom, jox ko cér bu sut cér ba mu jox yeneen buur ya mu bokkal curga ca Babilon. ²⁹ Yowakin nag teqlikook yérey kaso ya, ba noppi ñu may ko muy bokk ak Buur ndab giiru dundam. ³⁰ Ci biir loolu ñu dogal ko njëlam lu sax dakk, bàyyikoo ci Buur bés bu jot, giiru dundam.

Esra

Lu jëm ci dogalu Sirus

¹ At ma jëkk ca nguurug Sirus buuru Pers, Aji Sax ji moo nammoona sottal kaddu ga mu waxe ca gémmiñug Yeremi, ba tax mu xiir Sirus buuru Pers, mu siitwaane ab dogal ci mboolem réewam, boole ci bind ko ne:

² Sirus buuru Pers dafa wax ne: Mboolem réewi àddina, Yàlla Boroom asamaan* moo ma leen dénk, te moom moo ma tabb, ngir ma tabaxal ko kër ca Yerusalem ga ca Yuda. ³ Képp ku bokk ci mboolem ñoñam, yal na Yàllaam ànd ak moom, mu dem ba Yerusalem ga ca Yuda, tabax fa kër Aji Sax ji, Yállay Israyil, Yàlla ja ca Yerusalem. ⁴ Mboolem bànni Israyil, ak fu ci nit mana féete, na ko waa foofa indil ndimbal ci wàllu xaaalis ak wurus, alal aku jur ak saraxi yéene yu jëm ca kër Yàlla ga ca Yerusalem.

⁵ Ba mu ko defee ña jiiite waa kër Yuda ak Beñamin ak sarxalkat yaak Leween ña, képp ku ci Yàlla xiir rekk, mu daldi dem tabaxi kër Aji Sax ja ca Yerusalem. ⁶ Mboolem seeni dëkkandoo daldi def ci seen loxo jomtukaayi xaaalis ak wurus, alal akug jur ak gánjar, te bokkul ak mboolem seen saraxi yéene. ⁷ Ci biir loolu Buur Sirus génne ndabi kër Aji Sax, ja Nabukodonosor jële woon Yerusalem te yeboon ko ca kër tuuram ya. ⁸ Sirus buuru Pers nag sant Mittredat farbay alalam, mu génne ko, daldi koy waññal Sesbasar, boroom Yuda.

⁹ Lenn ci lim bi tédde nii: fanweeri ndabi wurus (30), ak junniy ndabi xaaalis (1 000), ak ñaar fukki paaka ak juróom ñeent (29), ¹⁰ ak fanweeri kèlli wurus yu ndaw (30) yu ànd ak ñeenti téeméeri kèll ak fukk yu ndaw yu xaaalis (410) ak junniy jomtukaay yeneen (1 000). ¹¹ Mboolem ndabi wurus yeek yu xaaalis yi juróomi junni la ak ñeenti téeméer (5 400). Sesbasar jële lépp Babilon, yóbbu Yerusalem, ba ngallo gay ñibbi.

2

Limeefu ngallo ga ñibbsi nii la

¹ Nii nag ñoo di niti diiwaanu Yuda, ña jóge njaam ca ngallo ga leen

Nabukodonosor buuru Babilon yóbbu woon, te ñu jóge ca ñibbsi Yerusalem ak Yuda, ku nekk ak fa mu dëkk. ² Ña nga ñibbi ca njiital Sorobabel ak Yosuwe* ak Neyemi ak Seraya ak Relaya ak Mardose ak Bilsan ak Mispas ak Bigway ak Reyum ak Baana.

Limeefu góori bànni Israyil nii la tédde: ³ Askanu Paros, ñaari junni ak téeméer ak juróom ñaar fukk ak ñaar lañu (2 172). ⁴ Askanu Sefatiya, ñetti téeméer ak juróom ñaar fukk ak ñaar lañu (372). ⁵ Askanu Ara, juróom ñaar téeméer ak juróom ñaar fukk ak juróom lañu (775). ⁶ Askanu Payat Mowab, soqikoo ci Yeswa ak Yowab, di ñaari junni ak juróom ñetti téeméer ak fukk ak ñaar (2 812). ⁷ Askanu Elam, junni ak ñaar téeméer ak juróom fukk ak ñeent lañu (1 254). ⁸ Askanu Sattu, juróom ñeenti téeméer ak ñeent fukk ak juróom lañu (945). ⁹ Askanu Sakay, juróom ñaar téeméer ak juróom benn fukk lañu (760). ¹⁰ Askanu Baani, juróom benni téeméer ak ñeent fukk ak ñaar lañu (642). ¹¹ Askanu Bebay, juróom benni téeméer ak ñaar fukk ak ñett lañu (623). ¹² Askanu Asgádd, junni ak ñaar téeméer ak ñaar fukk ak ñaar lañu (1 222). ¹³ Askanu Adonikam, juróom benni téeméer ak juróom benn fukk ak juróom benn lañu (666). ¹⁴ Askanu Bigway, ñaari junni ak juróom fukk ak juróom benn lañu (2 056). ¹⁵ Askanu Adin, ñeenti téeméer ak juróom fukk ak ñeent lañu (454). ¹⁶ Askanu Ater, soqikoo ci Esekíya, di juróom ñeent fukk ak juróom ñett (98). ¹⁷ Askanu Besay, ñetti téeméer ak ñaar fukk ak ñett lañu (323). ¹⁸ Askanu Yora, téeméer ak fukk ak ñaar lañu (112). ¹⁹ Askanu Asum, ñaar téeméer ak ñaar fukk ak ñett lañu (223). ²⁰ Askanu Gibar, juróom ñeent fukk ak juróom lañu (95).

²¹ Waa Betleyem, téeméer ak ñaar fukk ak ñett lañu (123). ²² Waa Netofa, juróom fukk ak juróom benn lañu (56). ²³ Waa Anatot, téeméer ak ñaar fukk ak juróom ñett lañu (128). ²⁴ Waa Asmawet, ñeent fukk ak ñaar lañu (42). ²⁵ Waa Kiryaat Yarim ak Kefira ak Berot, juróom ñaar téeméer ak ñeent fukk ak ñett lañu (743). ²⁶ Waa Raama ak Geba, juróom benni téeméer ak ñaar fukk ak benn lañu (621). ²⁷ Waa Migmas, téeméer ak ñaar fukk ak ñaar lañu (122). ²⁸ Waa Betel ak Ayi, ñaar téeméer ak ñaar fukk ak ñett lañu (223). ²⁹ Waa Nebo, juróom fukk ak ñaar lañu

* 1:2 1.2 Yàlla Boroom asamaan turu darajaal la bu ñuy waxe ci gáttal ne mooy Yállay asamaan ak suuf, muy wund ne du Israyil rekk lay seen Yàlla, waaye mooy Yállay àddina sépp. * 2:2 2.2 **Yosuwe:** Yeswa ci làkku ebré. Yosuwe lanu bind ci tekki bii, muy doomu Yoccadag te doon sarxalkat bu mag bi mujj lu jiiu ngallo ga ca Babilon. Yosuwe mii lu géna bare dees na ko tuddaaleek Sorobabel. Feneen yu ñu ne Yeswa ci téere bi, keneen a tax ñuy wax.

(52). ³⁰ Waa Magbis téeméer ak juróom fukk ak juróom benn lañu (156). ³¹ Waa Elam gu ndaw, junni ak ñaar téeméer ak juróom fukk ak ñeent lañu (1 254). ³² Waa Arim, ñetti téeméer ak ñaar fukk lañu (320). ³³ Waa Lodd ak Adidd ak Ono, juróom ñaar téeméer ak ñaar fukk ak juróom lañu (725). ³⁴ Waa Yeriko, ñetti téeméer ak ñeent fukk ak juróom lañu (345). ³⁵ Waa Sena, ñetti junni ak juróom benn téeméer ak fanweer lañu (3 630).

³⁶ Sarxalkat yi ñii la:

Askanu Yedaya, soqikoo ci waa kër Yosuwe, di juróom ñeenti téeméer ak juróom ñaar fukk ak ñett (973). ³⁷ Askanu Imer, junni ak juróom fukk ak ñaar lañu (1 052). ³⁸ Askanu Pasur, junni ak ñaar téeméer ak ñeent fukk ak juróom ñaar lañu (1 247). ³⁹ Askanu Arim, junni ak fukk ak juróom ñaar lañu (1 017).

⁴⁰ Leween ñi ñii la: Askanu Yeswa ak Kadmiyel. Mooy ñi bànqaasoo ci Odawya, tollu ci juróom ñaar fukk ak ñeent (74).

⁴¹ Jàngkat yi ñoo di: Askanu Asaf, di téeméer ak ñaar fukk ak juróom ñett (128).

⁴² Askanu fara bunt yi ñoo di: Askanu Salum, ak askanu Ater, ak askanu Talmon, ak askanu Akub, ak askanu Atita, ak askanu Sobay, ñépp di téeméer ak fanweer ak juróom ñeent (139).

⁴³ Liggéeykati kër Yàlla gi ñoo di: Askanu Ciya, ak askanu Asufa, ak askanu Tabawot, ⁴⁴ ak askanu Keros, ak askanu Siya, ak askanu Padon, ⁴⁵ ak askanu Lebana, ak askanu Agaba, ak askanu Akub, ⁴⁶ ak askanu Agab, ak askanu Samlay, ak askanu Xanan, ⁴⁷ ak askanu Gidel, ak askanu Gayar, ak askanu Raaya, ⁴⁸ ak askanu Reccin, ak askanu Nekoda, ak askanu Gasam, ⁴⁹ ak askanu Usa, ak askanu Paseya, ak askanu Besay, ⁵⁰ ak askanu Asna, ak askanu Meyunim, ak askanu Nefusim, ⁵¹ ak askanu Bagbug, ak askanu Akufa, ak askanu Arur, ⁵² ak askanu Baslut, ak askanu Meyida, ak askanu Arsa, ⁵³ ak askanu Barkos, ak askanu Sisera, ak askanu Tema, ⁵⁴ ak askanu Necciya, ak askanu Atifa.

⁵⁵ Askanu jaami Suleymaan ñii la: Askanu Sotay, ak askanu Asoferet, ak askanu Peruda, ⁵⁶ ak askanu Yaala, ak askanu Darkon, ak askanu Gidel, ⁵⁷ ak askanu Sefatiya, ak askanu Atil, ak askanu Pokeret Asbayim, ak askanu Aami.

⁵⁸ Mboolem liggéeykati kër Yàlla gi ak askanu jaami Suleymaan yi, ñetti téeméer ak juróom ñeent fukk ak ñaar (392).

⁵⁹ Ña bàyyikoo Tel Mela ak Tel Arsa ak Kerub Adon ak Imer te manuñoo firndeel ne seen waa kër maam ak seen askan ci Israyil lañu bokk, ñii la: ⁶⁰ Askanu Delaya,

ak askanu Tobbya, ak askanu Nekoda, di juróom benn téeméer ak juróom fukk ak ñaar (652).

⁶¹ Am na it ñu loolu daloon ci askanu sarxalkat yi, muy askanu Abaya, ak askanu Akocc, ak askanu Barsilay, ma doon denc doomu Barsilay waa Galàdd ba, ba tax ñu santale ko seen sant. ⁶² Ñooñu, seet nañu seen limeefu kër maam, waaye gisuñu ko. Ñu daldi leen doyalad, génne leen ci carxal gi. ⁶³ Boroom dèkk ba nag aaye leen ñu lekk ci ñam yu sell yaa sell, ba keroog ab sarxalkat di am lu leer ci ñoom ci jumentukaayi tegtal yi ñuy wax Urim ak Tumim.

⁶⁴ Limu mbooloo ma mépp ba mu daj, ñeent fukki junneek ñaar ak ñetti téeméer ak juróom benn fukk lañu (42 360), ⁶⁵ te limaalessul seen jaam yu góor ak yu jigéen, yi tollu ci juróom ñaari junni ak ñetti téeméer ak fanweer ak juróom ñaar (7 337). Amoon nañu itam ay jàngkat yu góor ak yu jigéen, yu tollu ci ñaar téeméer (200). ⁶⁶ Amoon nañu juróom ñaar téeméeri fas ak fanweer ak juróom benn (736), ak ñaar téeméeri berkelle ak ñeent fukk ak juróom (245), ⁶⁷ ak ñeenti téeméeri giléem ak fanweer ak juróom (435), ak juróom benni junniy mbaam ak juróom ñaar téeméer ak ñaar fukk (6 720).

⁶⁸ Ba ñu àggee ca kër Aji Sax ja ca Yerusalem, am na ñenn ca kilifa ya jitte seen kër baay, ñu joxe ay saraxi yéene ngir tabaxaat kër Yàlla ga ca gentam. ⁶⁹ Joxe nañu ku nekk la mu man, jème ca alal ja ñuy liggéeye, muy juróomi barigoy wurus ak fanweeri barigoy xaalís, ak téeméeri mbubbi sarxalkat.

⁷⁰ Ba loolu amee bànni Israyil gépp sancaat ca seen dèkki cosaan, sarxalkat yaak Leween ñaak ñenn ca baadoolo yaak jàngkat yaak fara bunt yaak liggéeykati kër Yàlla ga.

3

Njaamug Aji Sax ji feddliki na

¹ Ba juróom ñaareelu weer wa agsee, fekk na bànni Israyil sancaat ca seeni dèkk, mbooloo ma daje doon benn bopp ca Yerusalem. ² Ba mu ko defee Yosuwe doomu Yoccadag, mook moroomi sarxalkatam, ak Sorobabel doomu Selcel aki bokkam daldi tabax sarxalukaayu Yàllay Israyil, ngir sarxal ca saraxu dóomal ba, mu dèppook li ñu bind ci téereb yoonu Musaa, góorug Yàlla ga. ³ Ci kaw loolu ñu yékkatiwaat sarxalukaay ba, ca kenoom gu jèkk ga, doonte ragaloon nañu waasoy réew ma. Ba ñu noppee, defal ca Aji Sax ji ay saraxi dóomal subaak ngoon. ⁴ Ñu teg

ca amal mǎggalu Mbaar ya, mu dǎppook la ñu bind, boole kook saraxu dóomal yi war bés bu nekk. ⁵ Gannaaw loolu ñu joxe saraxu dóomal bi sax fǎww, ak saraxi Terutel weer ya, ak sarax yu sell yi war ci mboolem mǎggali Aji Sax ji, ak mboolem saraxi yéene yi ñuy indil Aji Sax ji. ⁶ Benn fan ca juróom ñaareelu weer wa lañu tǎmbalee defal Aji Sax ji ay saraxi dóomal, te fekkul ñu yékkatiwaat kenug kër Aji Sax ji. ⁷ Ci biir loolu ñu jox xaaalis yettkati doj yeek xaddkat yi, jox waa Sidon ak waa Tir ab dund, aki naan akug diw, ngir ñu jéleji Libañ ay banti seeder, jaarale ko ci géej gi ba Yafa, ci ndigalal Sirus buuru Pers.

⁸ Ba ñu dikkee ca kër Yalla ga ca Yerusaleem, ba ca déwén sa, ca ñaareelu weeru at ma, Sorobabel doomu Selcel, ak Yosuwe doomu Yoccadag ànd nañook ña des ca seeni bokk, sarxalkat yaak Leween ñaak mboolem ña jóge ca njaam ga délsi Yerusaleem. Ñu daldi tǎmbali liggéey bi. Ci biir loolu ñu tabb ay Leween ñu am ñaar fukki at, jëm kaw, ñuy saytu liggéeyu kër Aji Sax ja. ⁹ Yeswa nag jǎpp ca, mook doomam yu góor aki bokkam, ak Kadmiyel ak doomam yu góor, ñuy askanu Odawya. Ñu mǎnkoo di jiite liggéeykat yiy tabaxaat kër Yalla ga. Waa askanu Enadádd jǎpple nañu leen ci, ñook seen doom yu góor ak seen bokki Leween ña.

¹⁰ Ba tabaxkat ya lalee kenug kër Aji Sax ji, ñu tabb ay sarxalkat. Ñu solu ba jekk, yor ay liit, feggook Leween ña askanoo ca Asaf, ànd ak téggum weñ, di mǎggal Aji Sax ji, muy la Daawuda buurub Israyil digle woon. ¹¹ Ña ngay jàng, di mǎggal ak a sant Aji Sax ji, naan: «Kee baax.

Kee gore ba fǎww ci Israyil.» Ci kaw loolu mbooloo ma mépp xaacu, di ko mǎggale Aji Sax ji ngir kenug kër Aji Sax ja lale. ¹² Teewul ñu bare ca ña féete mag, diy sarxalkat aki Leween aki boroom kër, gisoon nañu kër gu jékk ga. Ba ñu gisee kenug kër gu bees ga, dañoo yékkati seen káddu ca kaw di jooy, ñu bare it di xaacu ndax mbégte. ¹³ Kenn manuloona raññee coowal mbégte laak jooy ya ndax riiru mbooloo mu réy, di àkki fu sore.

4

Liggéey baa ngi sooxe

¹ Ba nooni Yudak Beñamin déggée ne waa ngáallo, ga ñibbsee ngay tabaxal Aji Sax ji Yállay Israyil kër, ² ñew nañu ca Sorobabel ak ca kilifay kër ya, wax leen

ne leen: «Danuy ànd ak yeen tabax ndax danuy topp seen Yalla, ni yeen, te ca jamonoy Asaradon buurub Asiri, mi nu fi indi ba tey, Aji Sax ji lanuy defal sarax.» ³ Sorobabel nag ànd ak Yosuwe ak yeneen kilifay kër Israyil ya ne leen: «Dungeen bokk ak nun tabax sunu kër Yalla gi. Nun donj ay tabaxal Aji Sax ji Yállay Israyil, te loolu la Sirus buuru Pers santaane.» ⁴ Ci biir loolu waa réew ma di yoqiloo waa Yuda, di leen xoqtaal, ba ñu ragala tabax. ⁵ Diirub nguurg Sirus buuru Pers, ba ca nguurg Daryus, waa réew ma dañu daan fey ay xelalkati buur ngir ñuy nasaxal pexey bànni Israyil.

⁶ Ca ndoortel nguurg Aserus nag, ñu bind Aserus bataaxal buy duural waa Yuda Yerusaleem.

⁷ Ba tey ci janti Artaserses ku ñuy wax Bislam ak ku ñuy wax Mittredat ak Tabel aki nǎttongoom, bind nañu Artaserses buuru Pers bataaxal bu ñu doore nii ci lákku arameen bala ñu koo tekki:

⁸ Reyum boroom dèkk ba, ak Simsay bindkatam, ñoo bind Buur Artaserses bataaxal bii jëm ci Yerusaleem, di ko wax ne ko:

⁹ Bataaxal bii mu ngi bawoo ci Reyum, boroom dèkk bi, ak Simsay bindkatam, ak seen nǎttongoy àttekat yeek kàngam yeek saytukat yeek boroom téere yi*, ak waa Urug ak waa Babilon ak waa Sus, Elameen ña, ¹⁰ bawoo it ci yeneen mbooloo ya Asnapar† nu mag mu tedd ma toxaloon, sancal leen ca dèkki Samari ak li des ca Wállaa Dex, ak ñoom seen.

¹¹ Li ñu bind ci bataaxal ba jëm ca Buur Artaserses mooy lii:

Nun sa surga yii ci Wállaa Dex ak li ci topp, ¹² nu ngi lay xamal yaw Buur, ne Yawut ñi bàyyikoo fi yaw, ñew fii ci nun, agsi nañu Yerusaleem, dèkku fippukat bu bon bi, te ñu ngi koy tabaxaat. Ña ngay yékkati tata ya, gannaaw ba ñu lalaatee kenu ya. ¹³ Léegi nag Buur, xamal ne bu ñu tabaxaatee dèkk boobu, ba yékkatiwaat tata ya, galag mbaa njoti bopp mbaa juuti dootuñu ko fey, te kon koomu nguurg gi dina ko yég. ¹⁴ Gannaaw nag sunu njél Buur la, jekkul ci nun nuy seetaan mbir mii. Looloo waral, Buur, nu yónnee, di la ko xamal, ¹⁵ ngir ñu seet ci sa téereb xew-xewi maam. Kon dinga ko ci gis ba xam ne dèkk boobu dèkku fippukat la, te sonal na ay buur aki boroom dèkk, te naka jekk dañu daan fippu ci seen biir. Looloo

* **4:9** 4.9 Ñeenti xeeti ndomboy tǎnk yi ñu lim fii am na tekki yu fi wuutaal ñeenti turi dèkk. Su doon noonu dañu naan: ak seen nǎttongo ya ca Din ak Arfasatag ak Tarpel ak Afaras. † **4:10** 4.10 Asnapar: jombul mooy Asurbanipal, mi wuutu Aaccar Adon ci jalu Asiri.

tasoon dëkk boobu. ¹⁶ Buur, nu ngi lay xamal ne bu ñu tabaxaatee dëkk boobu, ba yékkatiwaat tata ya, wetu Wàllaa Dex gii dootu doon sag moomeel.

¹⁷ Ci kaw loolu Buur yónnee tont la Reyum boroom dëkk ba, mook Simsay bindkat ba, ak nàttongoom ya ca des te dëkk Samari ak la des ca Wàllaa Dex. Mu nyuu leen, ne leen:

¹⁸ Bataaxal bi ngeen ma yónnee, tekkees na ko, jàngal ma ko bu leer.

¹⁹ Ndigal tukkee na ci man, ngir ñu seet te gis nañu ne dëkk boobu kay yàgg nañoo fexeel buur yi, loolu indi fa ay fippooki pexey bañ. ²⁰ Yerusaleem nag amoon na buur yu am doole yu moom mboolem wet ga ca Wàllaa Dex, ñu di leen fey galag ak njoti bopp ak juuti.

²¹ Nangeen daldi joxe ndigal lu bàyyiloo nit ñooñu liggéey bi, ñu baña tabax dëkk boobu, ba keroog ma di ci joxe ndigal. ²² Fexeleen ba baña néewal mbir moomu bala muy law, ba doon loraange ci nguur gi.

²³ Naka lañu jàng bataaxalu Buur Artaserses fa kanam Reyum boroom dëkk ba, ak Simsay bindkat ba aki nàttongoom, ñu ne coww ba Yerusaleem, ca Yawut ña, jaay leen doole, gètèn leen, ñu bàyyi liggéey ba. ²⁴ Ci kaw loolu liggéeyu kër Yàlla ga ca Yerusaleem taxaw. Taxaw na ba ca ñaareelu atu nguurug Daryus buuru Pers.

5

Liggéey bi dooraat na

¹ Gannaaw loolu Yonent Yàlla Ase ak Yonent Yàlla Sàkkaryaa sëtub Ido, wax nañu ci turu Yàllay Israyil jiy seen Yàlla, ñeel Yawuti Yuda ak Yerusaleem. ² Booba la Sorobabel doomu Selcel, ak Yosuwe doomu Yoccadag tàmbalee tabaxaat kër Yàlla ga ca Yerusaleem. Yonenti Yàlla ya nag ànd ak ñoom, di leen jàpple.

³ Booba la Tatnay, boroom Wàllaa Dex, ànd ak Setar Bosnay ak seeni nàttongo, dikk ne leen: «Ana ku leen may sañ-sañu tabaxaat kër gii, bay yékkati miir bi?» ⁴ Ñu dellu ne leen: «Ana ñan sax ñooy tabax taax mi?»

⁵ Fekk na seen Yàllaa ngi ne jàkk ci magi Yawut ñi, ba kenn bàyyiwul liggéey ba, ba keroog ñuy yónnee xibaar ba Buur Daryus, ba jot ci bataaxalu tontam ca mbir ma.

⁶ Bataaxal ba ñu bind Buur Daryus, te Tatnay boroom Wàllaa Dex yónnee ko ko, mook Setar Bosnay, ak jawriñi Tatnay ca Wàllaa Dex, lii moo ca nekk. ⁷ Kàddu ga nii la tédde:

Buur Daryus, nu ngi lay bind, di la dikke sunu nuyooob jàmm ju sax. ⁸ Buur, nu ngi lay xamal ne dem nanu ca diiwaanu Yuda, ca kër Yàlla ju màgg ja. Ña nga koy tabaxe doj yu mag, di teg ay dénk ca miir ya. Liggéey baa ngay dox bu baax, di jëm kanam.

⁹ Ci biir loolu laaj nanu seen mag ñooñu, ne leen: «Ana kan moo leen may sañ-sañu tabaxaat kër Yàlla gii, bay yékkati miiram bii?» ¹⁰ Nu laaj leen itam ñan ñoo koy tabax, ndax nu mana bind seen turi njit, ba xamal la ñan la.

¹¹ Li ñu nu tontu mooy lii:

«Nun ay jaami Yàlla Boroom asamaan ak suuf lanu. Danuy tabaxaat kër Yàlla gi ñu tabaxoon lu jiiu ay at yu bare. Buurub Israyil bu mag moo ko tabaxoon ba sottal ko. ¹² Sunuy maam nag ñoo merloo Yàllay asamaan, ba tax mu teg leen ci loxoy Nabukodonosor buuru Babilon, ma askanoo ci waa Kalde. Mu toj kër gii, yóbbu xeet wi ngallo ca Babilon. ¹³ Terewul ca at ma jëkk ca nguurug Sirius buuru Babilon*, Buur Sirius joxe ndigal ngir ñu tabaxaat kër Yàlla gii.

¹⁴ Te sax ndabi wurus ak xaalis yu kër Yàlla ya Nabukodonosor jële woon ca Yerusaleem, te yóbbu ko ca kër tuuram ga ca Babilon, Buur Sirius jële na ko ca kër tuuram ga ca Babilon, teg ko ca loxol ku mu fal boroom dëkk, ñu di ko wax Sesbasar. ¹⁵ Mu ne ko: «Ndab yii, jël ko yóbbu ca kër Yàlla ga ca Yerusaleem, te nañu tabaxaat kër Yàlla ga fa mu nekkoon.» ¹⁶ Sesbasar moomu nag ñëw lal kenug kër Yàlla gi ci Yerusaleem. Booba ba léegi, ñu ngi koy tabax waaye noppeegul.»

¹⁷ Léegi nag Buur, su la soobee, nañu seet ca denci buur, foofu ci Babilon, ngir wóorlu ndax Buur Sirius joxe woon na ndigal ne ñu tabaxaat kër Yàlla gi ci Yerusaleem. Gannaaw loolu loo dogal ci mbir mi rekk, Buur, yónneel, jottli nu ko.

6

Buur Daryus joxe na ndigal

¹ Ba loolu amee Buur Daryus joxe ndigal, ñu seet ca kërug dencukaayi téere ya, fa ñu denc alali Babilon. ² Ñu gis ca Egbatan, péeyu diiwaanu Medd, taxañ bu ñu bind seede bii:

³ At ma jëkk ca nguurug Buur Sirius, Buur Sirius joxe na ndigal ci mbirum kër Yàlla ga ca Yerusaleem. Mu ne:

Nañu tabaxaat kër Yàlla gi, muy bérab bu ñuy sarxee ay sarax. Nañu dégéral

* 5:13 5.13 Sirius buuru Babilon bi ñuy wax fii mooy Buuru Pers rekk, ndax fekk na Pers moom nguurug Babilon.

kenu ya. Na taxawaayam di juróom benn fukki xasab*, yaatuwaayam di juróom benn fukki xasab, ⁴ te ñetti sésalantey doj yu mag yu tegloo yu ne, ab sésalanteb dénk tege ca kawam. Nañu génnee njég ga ca alali Buur, joxe ko. ⁵ Bu loolu weesee, ndabi wurus yaak yu xalis ya woon ca kër Yàlla ga, te Nabukodonosor jële woon ko ca kër Yàlla ga ca Yerusalem, indi ko Babilon, nañu ko delloo fa mu nekkoon ca kër Yàlla ga ca Yerusalem te fat ko fa.

⁶ Kon nag ñooñu di Tatnay boroom Wàllaa Dex ak Setar Bosnay ak seen nàttongo yay jawriñ ca Wàllaa Dex, nañu sore foofa. ⁷ Buleen tere liggéeyu kër Yàlla gee dox. Na boroom dèkki Yawut ñi ànd ak magi Yawut ñi, ñu tabaxaat kër Yàlla googu fa mu nekkoon.

⁸ Rax ci dolli ndigal a ngii tukkee ci man, jëm ci li ngeen wara defal magi Yawut yooyu ci biir liggéeyu kër Yàlla googu: Njég ga mu leen dikke, nañu leen ko fey ba mu mat, jële ko ca alali buur, ca galagi diiwaan ba ca Wàllaa Dex. Nañu ko fey ñooñu, ba liggéey ba baña taxaw. ⁹ Mboolem lu ci war, muy yëkk yu ndaw mbaa ay kuuy mbaa ay xar yu ndaw yu ñuy defal Yàlla Boroom asamaan saraxu dóomal, muy bele it mbaa xorom mbaa biiñ mbaa diw, lu ci sarxalkati Yerusalem laaj, nañu leen ko jox bés ak bés, te bañ koo sàggane. ¹⁰ Su ko defee ñu mana sarxalal Yàlla Boroom asamaan lu ko neex tey ñaanal Buur aki doomam gudd fan.

¹¹ Gannaaw loolu ndigal a ngii tukkee ci man ñeel képp ku tebbi bii dogal: Dees na roccee ca néegam ab xànq, yékkati ko, wékk ko ca, ba noppi def kéram ab sën ndax jéfam jooju. ¹² Yàlla ji dèel turam boobu bérab nag, yal na daaneel bépp buur mbaa xeet wuy fexee tebbi bii dogal, ba nara yaq kër Yàlla gii ci Yerusalem.

Man Daryus maa joxe ndigal lii. Nañu ci farlu.

¹³ Ba mu ko defee Tatnay boroom Wàllaa Dex, ak Setar Bosnay ak seeni nàttongo daldi xar seen tãngu tubéy ci jéfe ndigal la Buur Daryus joxe. ¹⁴ Magi Yawut ña nag tabax ba mu baax, mu dèppook kàdduy Yonent Yàlla Ase ak Sàkkaryaa, sètub Ido. Ñu tabax ba sottal, muy la Aji Sax ji Yàllay Israyil santaane woon, te dèppook ndigalul Sirus ak Daryus ak Artaserses buuru Pers. ¹⁵ Kër gaa nga sotti ci ñetti fanu weeru Adar, juróom benneelu atu nguurug Daryus. ¹⁶ Ci kaw

loolu mboolem Israyil ànd ak sarxalkat yaak Leween ñaak mboolem ña ñiibsee ca ngàllo ga, ñu daloo tabax ba ci biir mbégte. ¹⁷ Sarxe nañu ca dalooq kër Yàlla googu téeméeri yëkk, ak ñaar téeméeri kuuy ak ñeenti téeméeri xar yu ndaw, ak fukki sikket ak ñaar, dèppook limu giiri Israyil, def ko saraxu póotum bàkkaar, ñeel Israyil gépp. ¹⁸ Ci biir loolu ñu tabb sarxalkat ya, ca wàll ya ñu boka ak Leween ña ca seeni kurél, ñu sasoo liggéeyu Yàlla ji ci Yerusalem, muy la ñu bind ci téereb Musaa.

¹⁹ Fukki fan ak ñeent ca weer wu jëkk wa nag, ña ñiibsee woon ngàllo ga daldi mággal bésu Mucc ba. ²⁰ Fekk na sarxalkat yaak Leween ña laabal seen bopp, ba ñoom ñépp bokk laab. Ba loolu amee ñu rendi xarum bésu Mucc ba, ñeel mboolem ña ñiibsee ngàllo, ak ñoom sarxalkat yi ci seen bopp, ñook seeni bokk. ²¹ Ba mu ko defee, bànni Israyil ga ñiibsee ngàllo ga daldi bokk reerub bésu Mucc ba, ñook mboolem ña dogoo woon ak sobey yéefar yi ci réew mi, ngir sàkku Aji Sax ji, Yàllay Israyil. ²² Wormaal nañu it mággalu Mburu mu amul lawiir, diiru juróom ñaari fan, ci biir mbégte, ndax fekk na Aji Sax ji bégal leen lool ca na mu xiire buurub Asiri†, mu yéwéne leen ba ñimbali leen ci tabaxu kër Yàlla ga, Yàllay Israyil.

7

Buur Artaserses yéwéne na Esra

¹ Ba loolu weesee, ca jamonoy nguurug Artaserses buuru Pers, am na goor gu ñuy wax Esra, Seraya di baayam. Seraya, Asaryaa; Asaryaa, İlkiya; İlkiya, ² Salum; Salum, Cadog; Cadog, Ayitub; ³ Ayitub, Amarya; Amarya, Asaryaa; Asaryaa, Merayot; ⁴ Merayot, Seraya; Seraya, Usi; Usi, Bukki; ⁵ Bukki, Abiswa; Abiswa, Fineyas; Fineyas, Elasar; Elasar, Aaróona, sarxalkat bu mag ba. ⁶ Esra moomu jóge Babilon, nekkoon janglekat bu xareñ, bu géēju ci yoonu Musaa, wi Aji Sax ji Yàllay Israyil joxoon ñoñam. Aji Sax ji Yàllaam nag toppe ko yiwam, ba Buur defal ko mboolem lu mu ñaan.

⁷ Ca juróom ñaareelu atu nguurug Buur Artaserses, mu am ñeenti ci bànni Israyil ñu ànd, di ay sarxalkat aki Leween aki jàngkat aki fara bunt, ak liggéeykati kër Yàlla ga. Ñu daldi dem Yerusalem. ⁸ Esra nag bokkoon ca. Mu agsi Yerusalem ca juróomeelu weeru at mooma, di juróom ñaareelu atu buur ba. ⁹ Ca benn fanu

* 6:3 6.3 xasab mooy guddaayu loxo bu digg-dóomu diggante catu baaraamu digg ak conc.

† 6:22 6.22 Asiri gi ñuy wax fii, booba mu ngi ci loxol buuru Pers.

† 6:22 6.22 Asiri gi

weer wa jëkk la dooroon yoon woowu mu bëyyikoo Babilon. Mu agsi Yerusalem ca benn fanu juróomeelu weer wa, ci mbaaxu Yállaa mi ko toppe yiwam. ¹⁰ Esra nag doonoon ku pastéefu ci jàng yoonu Aji Sax ji, di ko sàmm tey jàngle ci Israyil ay dogalam ak ndigali yoonam.

Buur Artaserses bind na Esra

¹¹ Lii mooy li ñu bind ci bataaxal ba Buur Artaserses jox Esra, sarxalkat ba, jànglekat ba géēju ci mbiri santaaney Aji Sax ji ak dogalam yi ñeel Israyil.

¹² Bataaxal bii mu ngi bëyyikoo ci Artaserses, buuru buur yi, jëm ca Esra, sarxalkat biy jàngle yoonu Yàlla Boroom asamaan. Maa ngi lay nuy.

Gannaaw loolu nag, ¹³ ndigal tukkee na ci man ne mboolem kuy bànni Israyil ci samam réew, ba ci sarxalkat yeek Leween ñi, ku ci bëgga ànd ak yaw Yerusalem, man naa dem. ¹⁴ Man Buur, maa la yebal, maak sama juróom ñaari wóllère; noo la yebal Yerusalem ak Yuda, ngir nga gëstujil ma nu ñu fay toppe sa yoonu Yàlla, wi nga yor téereem ci say loxo. ¹⁵ Te nga yóbbaaale xaaalis beek wurus, wi ma joxe ci xol bu tàlli, jagleel ko Yállay Israyil ji ci Yerusalem, man Buur, maak samay wóllère, ¹⁶ boole ci mboolem xaaalis mbaa wurus woo mana jële ci diiwaanu Babilon bépp, ak itam saraxi yéene yi baadoolo yeek sarxalkat yi joxe ci xol bu tàlli, lépp ñeel seen kër Yàlla ga ca Yerusalem. ¹⁷ Ci biir loolu, xaaalis boobu nanga ko daldi jénde ay yëkk aki kuuy ak xar yu ndaw ak saraxi pepp ak saraxi tuuru yi muy àndal te nga boole ko, jooxe ca seen sarxalukaayu kër Yàlla ga ca Yerusalem. ¹⁸ Li des ci xaaalis beek wurus wi nag, defleen ko lu ngeen namm, yaak say bokk, na mu dëppook seen coobarey Yàlla. ¹⁹ Bu loolu weesee ndab yi ñu la jox, ñu di ko jaamoo ca seen kër Yàlla ga, nanga ko boole teg fa kanam Yállay Yerusalem. ²⁰ Leneen lu des it, loo wara def ci sa kër Yàlla gi, sañ nga koo géennee ci alalu buur.

²¹ Man Buur Artaserses, jox naa ndigal mboolem denckati alali buur ya ca Wállaa Dex, ne leen: Lépp lu Esra, sarxalkat biy jàngle yoonu Yàlla Boroom asamaan, sàkku ci yeen, nangeen ko daldi def; ²² ba ci fanweeri barigoy xaaalis, ñetti téeméeri barigoy bele, ñaar fukki barigoy biin, ak ñaar fukki barigoy diw, ak lu mu soxla ci xorom. ²³ Lépp lu Yàlla Boroom asamaan digle, nañu ko defe noonee ca kër Yàlla Boroom

asamaan, ndax meram baña dal ci sama kaw nguur gii ak ci sama kaw askan. ²⁴ Nu ngi leen di xamal itam ne képp kuy sarxalkat mbaa ab Leween, mbaa mu dib jàngkat mbaa fara bunt, mbaa mu di liggéykatu kër Yàlla gi, mbaa surga buy liggéey ci kër Yàlla googu, du galag bu ñu ko saña teg mbaa njotu bopp mbaa ab juuti.

²⁵ Yaw Esra nag, seetal ci xel mu rafet mi sa Yàlla digle ci yoonam wi nga yor, nga tabb ay njiit aki xaali, ngir ñuy àtte mboolem ñi xam sa yooni Yàlla ci diiwaanu Wállaa Dex. Te ñi ko xamul, nga xamal leen ko. ²⁶ Képp ku ci sàmmul sa yoonu Yàlla ak yoonu buur, nañu ko daldi teg mbugal mi war ci moom. Dee mooy doon àtteem, mbaa ñu géenne ko réew mi, mbaa ñu nangu alalam, mbaa ñu tēj ko.

Esra sant na

²⁷ Cant ñeel na Aji Sax ji, sunu Yállay maam, moom mi def nii ci xolub Buur yéene teral kër Aji Sax ji ci Yerusalem, ²⁸ te dawal ngor sama digganteek Buur aki wóllérem ak mboolem kangami buur yu mag yi! Man nag, nii la ma sama Yàlla Aji Sax ji toppe yiwam, ba ma dëgèrlu, boole njiiti Israyil, ñu daje, ànd ak man dem.

8

Lu jëm ci ñi ànd ak Esra

¹ Ñi jiite seen làngi kër maam ak ñi ñu bindaaleek ñoom ci limeef yi, te ñu ànd ak man Esra, jóge Babilon ca jamonoy Buur Artaserses, ñii la: ² Ci askanu Fineyas, Gersom la. Ci askanu Itamar, Dañeel la. Ci askanu Daawuda, Atus, ³ mi askanoo ci Sekaña la. Askanu Paros, Sàkkaryaa hawoo ca, ànd ak téeméeri góor ak juróom fukk (150). ⁴ Ci askanu Payat Mowab, Elyowenay doomu Seraya la, mook ñaar téeméeri góor (200). ⁵ Ci askanu Sattu*, Sekaña doomu Yasyel la, mook ñetti téeméeri góor (300). ⁶ Ci askanu Adin, Ebedd doomu Yonatan la, mook juróom fukki góor (50). ⁷ Ci askanu Elam, Esayi doomu Atalyaa la, mook juróom ñaar fukki góor (70). ⁸ Ci askanu Sefatiya, Sebadiya doomu Mikayel la, mook juróom ñett fukki góor (80). ⁹ Ci askanu Yowab, Obadiya doomu Yeyel la, mook ñaar téeméeri góor ak fukk ak juróom ñett (218). ¹⁰ Ci askanu Baani†, Selomit doomu Yosifya la, mook téeméeri góor ak juróom benn fukk (160). ¹¹ Ci askanu Bebay, Sàkkaryaa doomu Bebay la, mook ñaar fukki góor ak juróom ñett

* 8:5 8.5 Sattu: tekki bu jëkk ba ci làkku gereg moo indi turu Sattu. † 8:10 8.10 Baani: tekki bu jëkk ba ci làkku gereg moo indi turu Baani.

(28). ¹² Ci askanu Asgädd, Yowanan doomu Äkkatan la, mook téeméeri góor ak fukk (110). ¹³ Askanu Adonikam ñoo mujje, ñu di leen wax Elifelet ak Iyel ak Semaya, ñook juróom benn fukki góor (60). ¹⁴ Ci askanu Bigway, Utay la ak Sabudd, ñook juróom ñaar fukki góor (70).

¹⁵ Ci kaw loolu ma boole leen, ñu daje ca wetu dex, ga jëm Aawa, dal fa ñetti fan. Ma seetlu fa baadoolo ya, seet ca biir sarxalkat ya, gisuma kenn ku bokk ci Leween ñi. ¹⁶ Ma woolu njiit ya: Elyeser ak Aryel ak Semaya ak Elnatan ak Yarib ak Elnatan meneen ma, ak Natan ak Säckaryaa ak Mesulam, ak Yowarib ak Elnatan ma ca des, ñaari jànglekati yoon ya. ¹⁷ Ba mu ko defee ma yebal leen ca Ido, njiit la ca gox ba ñuy wax Kasifya, daldi leen wax káddu ya ñuy jottli Ido ak bokkam yay liggéeykati kër Yàlla, ya dëkk Kasifya, ndax ñu yónnee nu ay surga ci sunu liggéeyu kër Yàlla gi. ¹⁸ Sunu Yàlla nag toppe nu mbaaxu yiwam, ba ñu indil nu waa ju am xel, askanoo ci Maali sëtub Lewi doomu Israyil. Ñu di ko wax Serebya. Mu ànd ak doomam yu góor aki bokkam, ñuy fukk ak juróom ñett (18), ¹⁹ ñook Asabya ak Esayi sētu Merari. Ñu ànd ak seeni bokk ak seen doom yu góor, di ñaar fukki góor (20). ²⁰ Indaale nañu ñaar téeméeri liggéeykati kër Yàlla ak ñaar fukk (220), di ñu askanoo ca ña Daawudaaki jawriñam tannoos, bind seeni tur, ngir ñuy jàpple Leween ñi.

²¹ Ba loolu amee ma digle foofa koor ca tàkkal dexu Aawa, toroxloo ko fa sunu kanam Yàlla, ngir ñaan ko mu may nu yoonu jàmm, nook sunuy doom ak mboolem lu bokk ci nun. ²² Ndaxte rusoon naa ñaan Buur mu boole nook ay dag ak gawar yu nu aar ci noon yi ci yoon wi. Li ko waral mooy fekkoon na nu wax Buur ne ko: «Sunu Yàlla mooy toppe yiwam mboolem ku ko yaakaar, di ko defal jàmm, waaye meram dina dal ak doole ci kaw mboolem ku ko dëddu.» ²³ Nu woor, daldi dagaan sunu Yàlla mbir moomu, mu nangul nu. ²⁴ Ba loolu amee, ma tànn fukki sarxalkat ak ñaar yu mag, ñuy Serebya ak Asabya ak seen fukki bokk. ²⁵ Gannaaw loolu ma nattal leen xalis baak wurus waak ndab, ya Buur aki wólléereem aki jawriñam jooxe woon, ñook mbooloom Israyil ma fa teewoon, te lépp jëm ca sunu kër Yàlla ga. ²⁶ Natt naa ba teg ci seeni loxo ñaar téeméeri barigoy xalis ak fanweeri barigo ci jumtukaayi xalis ak fanweeri barigoy wurus, ²⁷ ak ñaar fukki koppi wurus yu wecci junniy poseti wurus, ak ñaari ndab yu jafe, yu xàñar bu ñu raxas ba muy melax, mel ni wurus. ²⁸ Ma

ne leen: «Yeen, dees leena sellalal Aji Sax ji, ni ñu sellale ndab yi, te xalis beek wurus wi di saraxu yéene ñeel Aji Sax ji, seen Yállay maam. ²⁹ Xool-leen ko te sàmm ko bu baax, ba kera ngeen koy natt ca denci kër Aji Sax ji ca Yerusalem, fa kanam kilifay sarxalkat yaak Leween ñaak ña jiiite seen làngi kër maam ci bànni Israyil.»

³⁰ Ci kaw loolu nu nattal sarxalkat yeek Leween ñi xalis baak wurus waak ndab yu sell ya, ngir ñu yóbbu ko ca sunu kër Yàlla ga ca Yerusalem. ³¹ Fukki fan ak ñaar ca weer wa jëkk lanu bàyyikoo dexu Aawa, daldi jëm Yerusalem. Sunu Yàlla nag toppe nu yiwam, ba musal nu ci noon akub saaysaay ci yoon wi.

³² Gannaaw loolu nu agsi Yerusalem, nopplu fa ñetti fan. ³³ Bésub ñeenteel ba nu natt diisaayu xalis baak wurus waak ndab ya ca sunu biir kër Yàlla ga, teg ko ca loxol Meremot doomu Uri, sarxalkat ba, mook Elasar doomu Fineyas, ak Leween ña, di Yosabàdd doomu Yeswa, ak Nowadiya doomu Binuy. ³⁴ Ñu limaat lépp, nattaat diisaay ba, daldi bind ca saa sa dayo ba bépp.

³⁵ Ba mu ko defee ña jóge njaam, ñibbsee ca ngàllo ga, daldi defal Yállay Israyil ay saraxi dóomal. Muy fukki yëkk ak ñaar, ñeel Israyil gépp ak juróom ñeent fukki kuuy ak juróom benn (96), ak juróom ñaar fukki xar yu ndaw ak juróom ñaar (77), ak fukki sikket ak ñaar yu ñu def saraxu póotum bàkkaar; ñu def lépp saraxu dóomal, ñeel Aji Sax ji. ³⁶ Ci biir loolu ñu jottli ndigali buur, ya jëm ca ay jawriñam ak njiiti Wàllaa Dex. Ñooñu it jàpple mbooloo ma ca liggéeyu kër Yàlla ga.

9

Askan wi rax na

¹ Gannaaw ba loolu wéyee njiit ya dikk, ne ma: «Du bànni Israyil, du sarxalkat yi, du Leween ñi, kenn ci ñoom teq-likoowul ak xeeti réew meek seen aada yu siblu. Dañuy jéfe ni Kanaaneen ñeek Etteen ñeek Periseen ñeek Yebuseen ñeek Amoneen ñeek Mowabeen ñeek waa Misraak Amoreen ñi. ² Jël nañu jabar ci ñoom, jëlal ci jabar seeni doom, ba jaxase jiwu mu sell mi ak waasoy réew yi. Njiit yeek mag ñi sax ñoo jiiitu ci gogoo fecci kóllère.»

³ Ba ma déggee loolu damaa xotti sama turki ak sama mbubb, xuuf sama kawaru bopp ak sama sikkim, daldi toog, ne tott. ⁴ Ba loolu amee mboolem ñi wormaal káddug Yállay Israyil daje, wër ma ndax ñàkk kóllèreg ña ñibbsee ca ngàllo ga. Ma toog, ne tott ba waxtuw saraxu ngon. ⁵ Saraxu ngon jot, ma jóge ca sama

jataayu toroxtaange, ba ma xottee sama turki baak sama mbubb ma. Ma ne gurub sukk, tàllal sama Yàlla Aji Sax ji loxo, ⁶ daldi ñaan, ne:

Éy sama Yàlla maa rus, maa torox, ba manumaa siggi fi sa kanam, ndaxte sunuy bàkkaar bare na, ba mëdd nu, sunuy moy tegloo ba àgg asamaan. ⁷ La ko dale ca sunu janti maam ba bésuh tey jii, nu ngi ci moy gu réy. Sunuy bàkkaar tax na buuri réew yi teg nu loxo, nook sunuy buur ak sunuy sarxalkat, ñu di nu rey, di nu jàpp njaam, di lèl sunu alal, di nu torxal ba sunu jonnii yàllay tey.

⁸ Waaye yaw Aji Sax ji sunu Yàlla, yàggul dara aw yiw bàyyikoo na ci yaw, musal ñenn ci nun, may nu ndègërllaay ca sa bérab bu sell ba. Yaw sunu Yàlla, yaa nu taxa leqliku, yaa nu dundalaat ci sunu biir njaam gi. ⁹ Ndax ay jaam lanu, waaye yaw sunu Yàlla, waccewoo nu sunug njaam. Yaa dawal ngor sunu digganteek buuri Pers, ngir mayaata nu dooley tabax sunu kër Yàlla, yékkatee ko ca gentam ba, may nu kiiraay ci Yerusalem ak ci Yuda.

¹⁰ Yaw sunu Yàlla, ana lu nuy waxati nag gannaaw lii? Ndax kat noo dèddu sa santaane, ¹¹ yi nga nu dénk, yonent yiy say jaam jottli ko, ne nu: «Réew mi ngeen di nangui, réew mu sobewu la ndax sobey waasoy réew ma. Feesal nañu kook seeni jéf ju siblu ak seen tilim, ba fépp daj. ¹² Kon nag seen doom yu jigéen buleen leen may seen doom yu góor, te seen doom yu jigéen buleen leen jèlal seen doom yu góor. Buleen seet muk seen jamm mbaa seen njariñ. Looloo leen di taxa am doole, bay xéewlu ci ngéneeli réew mi, ba wacce ko seen askan fàww.» ¹³ Loolu nu dal lépp, sunu jéf ju bon a tax, ak sunu tooñ gu réy. Terewul yaw sunu Yàlla, tegoo nu lu dul mbugal mu yées mi sunuy bàkkaar yellow. Terewul yaw sunu Yàlla, li nu bàkkaar mbugaloo nu ko, te moo nu fi taxa des di dund nii. ¹⁴ Nan lanu mana dellooti di xètt say santaane, di séyanteek xeet yii ak seen jéf ju siblu? Kon doo nu mere, faagaagal nu, ba kenn du desati mbaa muy récc? ¹⁵ Yaw Aji Sax ji Yàllay Israyil, yaay boroom njek. May nga nu bésuh tey jii nu dese bakkan. Nu ngi nii fi sa kanam ci biir tooñange, ba tax du kenn ci nun ku am lay fi sa kanam.

10

Fase nañu jaambur ñi

¹ Naka la Esra di ñaan ak a tuub, di jooy, ak a daanu fa suuf ca buntu kër

Yàlla ga, bànni Israyil yéew ko, bare lool, góor ak jigéen, ba ca xale ya. Mbooloo ma it di jooy jooy yu metti. ² Ci biir loolu Sekaña doomu Yeyel ma askanoo ci Elam, daldi wax Esra ne ko: «Noo tooñ sunu Yàlla, di jël ay jaambur jabar ci xeeti réew mi. Waaye loolu terewul Israyil am yaakaar ba tey. ³ Léegi kay nanu fasanteek sunu Yàlla kóllère, daldi fase jigéen ñooñu ñépp, ñu ànd ak seeni doom, muy ni nga ko diglee rekk, sang bi, yaak ñi normaala sunu santaaney Yàlla. Li yoon wi digle daal, na am. ⁴ Jógal nag, mbir maa ngi ci say loxo, te noo ngi ànd ak yaw. Kon dègèrlul te def ko.»

⁵ Ci kaw loolu Esra jóg, wax kilifay sarxalkat yaak Leween ñaak Israyil gépp, ne leen ñu giñ ne noonu lañu koy defe. Ñu giñ ko. ⁶ Ba loolu amee Esra bàyyikoo kër Yàlla ga, fatuji néegu Yowanani doomu Elyasib. La mu fa nekk nag lekkul, naanul, xanaa di ñaawlu na ngallo, ga ñibbsi feccee worma. ⁷ Ba mu ko defee ñu yéene ci Yerusalem ak Yuda, yégal mboolem ngallo ga ñibbsi, ne leen ñu daje ca Yerusalem. ⁸ Ñu ne képp ku teewul ci diiru ñetti fan, ni ko kilifa yeek mag ñi diglee, dees na teg alalam jépp loxo, te moom ci boppam dees na dagge ca ngallo, ga ñibbsi.

⁹ Ba ñu ca tegee ñetti fan mboolem góori Yudak Beñamin daje nañu Yerusalem, mu yemook ñaar fukki fan ca juróom ñeenteelu weer wa. Ña nga toog ñoom ñépp ca èttu kër Yàlla ga, di lox ndax solob ndaje ma, ak itam taw bu bare ba mu yemool. ¹⁰ Ci kaw loolu Esra sarxalkat ba jóg taxaw, ne leen: «Yeena fecci kóllère ndax yeena jël ay jaambur jabar, di yokk tooñaangey Israyil. ¹¹ Léegi nag tuubleen ci Aji Sax ji seen Yàllay maam te def coobareem. Teqlikooleen ak xeeti réew mi, teqlikook jigéen ñii diy jaambur.»

¹² Ci kaw loolu mbooloo mépp bokk àddu ca kaw ne ko: «Tigi, li nga wax rekk lanu wara def. ¹³ Waaye danoo bare, te muy jamonoy taw. Manunoo toog fii ci biti. Te it mbir mi maneesu koo lijjanti ci benn bés mbaa ñaar, ndax sunu tooñ ci mbir mii daa yaatu. ¹⁴ Kon daal na sunuy kilifa taxawal askan wi. Su ko defee mboolem ku nekk ci sunuy dèkk te jël ci jaambur ñi jabar day dikk, ku ci nekk ca bés ba ñu ko àppal, te mu ànd ak kilifa yaak àttekati dèkkam. Ñu topptoo mbir mi nag, ba keroog sunu merum Yàlla mu réy mi sababoo ci lii, dèddu nu.»

¹⁵ Mennum Yonatan doomu Asayel, ak Yaasya doomu Tigwa, ñoom donj, ñook Mesulam ak Sabtay, Leween ba, ñoo àndul ca loola. ¹⁶ Ci kaw loolu ngallo, ga ñibbsi daldi def la ñu wax. Esra sarxalkat ba

tànn nit ña jiite seen kër baay, ku nekk ak lãngam, ñoom ñépp ñu tudd seeni tur. Keroog benn fan ca fukkeelu weer wa nag, ñu toog ngir seet mbir ma. ¹⁷ Ca benn fanu weer wa jëkk ca déwén sa lañu lijjanti mbiru mboolem ña jëloon jabar ay jaambur.

Ñii ñoo jëggaani ay soxna

¹⁸ Ñu gis ne ñenn ci askanu sarxalkat yi jëloon nañu ay jaambur soxna:

Ci askanu Yosuwe doomu Yoccadag aki bokkam, Maaseya ak Elyeser ak Yarib ak Gedalya bokk nañu ca. ¹⁹ Ñu xas ne dinañu fase seeni soxna, daldi nangu ne tooñ nañu, ba noppi ku nekk ci ñoom sarxe am kuuy, muy peyug tooñam.

²⁰ Ci askanu Imer, Anani la ak Sebadiya.

²¹ Ci askanu Arim, Maaseya laak Ilyaas ak Semaya ak Yeyel ak Osiyas.

²² Ci askanu Pasur, Elyonay laak Maaseya ak Ismayla ak Netanel ak Yosabàdd ak Elasa.

²³ Ci Leween ñi: Yosabàdd laak Simey ak Kelaya, mooy Kelita ba tey, ak Petaya ak Yuda ak Elyeser.

²⁴ Ci jàngkat yi: Elyasib la.

Ci fara bunt yi: Salum laak Telem ak Uri.

²⁵ Bànni Israyil yi ci des:

Ci askanu Paros, Ramya laak Isya ak Malkiya ak Miyamin ak Elasar ak Malkiya ak Benaya.

²⁶ Ci askanu Elam, Mataña laak Sàkkaryaa ak Yeyel ak Abdi ak Yeremot ak Ilyaas.

²⁷ Ci askanu Sattu, Elyonay laak Elyasib ak Mataña ak Yeremot ak Sabàdd ak Asisa.

²⁸ Ci askanu Bebay, Yowanan laak Anaña ak Sabay ak Atlay.

²⁹ Ci askanu Baani, Mesulam laak Malug ak Adaya ak Yasub ak Seyal ak Yeremot.

³⁰ Ci askanu Payat Mowab, Adna laak Kelal ak Benaya ak Maaseya ak Mataña ak Besalel ak Binuy ak Manase.

³¹ Ci askanu Arim, Elyeser laak Isija ak Malkiya ak Semaya ak Simeyon, ³² ak Beñamin ak Malug ak Semarya.

³³ Ci askanu Asum, Matenay laak Matata ak Sabàdd ak Elifelet ak Yeremay ak Manase ak Simey.

³⁴ Ci askanu Baani, Madaay laak Amram ak Uyel ³⁵ ak Benaya ak Bedeya ak Keluyi ³⁶ ak Waña ak Meremot ak Elyasib ³⁷ ak Mataña ak Matenay ak Yasaaw ³⁸ ak Baani ak Binuy ak Simey ³⁹ ak Selemya ak Natan ak Adaya ⁴⁰ ak Magnadebay ak Sasay ak Saray ⁴¹ ak

Asarel ak Selemya ak Semarya ⁴² ak Salum ak Amarya ak Yuusufa.

⁴³ Ci askanu Nebo, Iyel la, ak Matitiya ak Sabàdd ak Sebina ak Yaday ak Yowel ak Benaya.

⁴⁴ Ñooñu ñépp jël nañu ay jaambur jabar, ba ñenn ci ñoom ami doom.

Neyemi

Neyemi am naw tiis

¹ Mbiri Neyemee ngi, góor gay doomu Akalya: Ca ñaar fukkeelu atu nguurug Artaserses, ci weeru Kislew*, man Neyemi maa nga woon ca Sus, péey ba. ² Ci kaw loolu Anani, kenn ci saay bokk bàyyikoo Yuda, ñd aki nit. Ma laaj leen ndesu Yawut ya rècee ca njaam ga, laaj leen it mbirum Yerusalem. ³ Ñu wax ma, ne ma: «Ña rawe ca njaam ga de, ña nga diiwaanu Yuda, ci njaqare ju réy akug toroxte. Tatay Yerusalem jaa nga tojatoo, bunt ya lakk.»

⁴ Ba ma déggee kàddu yooyu, damaa toog di jooy, ñaawlu ko ay fan, di woor ak a ñaan ci Yalla Boroom asamaan. ⁵ Ma ne: «Éy Aji Sax ji, yaw Yalla Boroom asamaan, Yàlla ju mággi ji te raglu, di sàmm kóllèreek ngor, ñeel ñi la sopp tey topp say santaane. ⁶ Ngalla Sang bi, teewlu ma, xippi say gèt, te déglu sama ñaan, yi may ñaanal guddeek bëccëg bànni Israyil, say jaam. Tegoo naa moy yi la bànni Israyil moy, te man sax maak sama waa kër baay, moy nanu la. ⁷ Lu ñaawa ñaaw lanu la def, te sàmmunu say santaaneek say dogal ak sa ndigali yoon ya nga dénkoon Musaa, sa jaam ba. ⁸ Rikk bàyyil xel kàddu ya nga dénkoon Musaa, sa jaam ba, ne ko: “Bu ngeen feccee kóllère, maa leen di tasaare ci biir xeet yi. ⁹ Waaye bu ngeen walbatikoo ci man, sàmm samay santaane, di ko jéfe, bu ñu yóbbu woon seeni ñoñ ba fa suuf digalook asamaan sax, fa laa leen di jéle, boole leen yóbbu ca bérab, ba ma taamoo déel sama tur.” ¹⁰ Ñooy say jaam, sa ñoñ ñi nga jote sa kàttan gu réy ak sa doole ju bare. ¹¹ Éy Boroom bi, Sang bi, rikk teewlul bu baax samag ñaan, ak sa ñaanu jaam ñi safoo wormaal saw tur. Ngalla Sang bi, nangul ma tey jii, may ma waa jii yéwéne ma.» Booba maa yore woon naani Buur.

2

Neyemi jot na ndigal

¹ Mu am bés, ci weeru Nisan, ñeenti weer gannaaw Kislew, yemook ñaar fukkeelu atu nguurug Artaserses, ma jël biñ ba taaje woon fa kanam Buur; di ko ko xellil. Booba maa nga ñd ak tiis, ne yogg; lu ma masula dal ca kanamam. ² Buur laaj ma, ne ma: «Lu la tax ne yogg te woppuloo? Mbaa du tiisu xol?» Maa ngi tiit lool. ³ Ma daldi ne Buur: «Guddalu fan, Buur! Nu may def ba duma ne yogg, te

dëkk ba samay maam tēdd gental, bunt ya lakk ba xoyomu?» ⁴ Buur wax ma, ne ma: «Ana looy sàkku?» Ma ñaan gaaw ci Yàlla Boroom asamaan, ⁵ door ne Buur: «Xanaa Sang bi, su la neexee rekk, nga yéwéne ma, yebal ma Yuda, dëkk ba ñu denc samay maam, ba ma tabaxaat ko.» ⁶ Buur nag wax ak man, fekk Lingeer soxnaam toog, feggook moom. Mu ne ma: «Boo demee, ana loo fay toog, doora délsi?» Ma wax ko. Gannaaw loolu Buur nangu maa bàyyi ma dem. ⁷ Ci kaw loolu ma ne Buur: «Buur, su la soobee, ngalla nañu ma jox ay bataaxal yu jëm ca kilifay Wàllaa Dex ya, ngir ñu jàllale ma, ba ma àgg Yuda; ⁸ akub bataaxal bu jëm ca Asaf may wattu toolu buur, ngir mu may ma bant yu ma defareji bunti tatay kër Yàlla ga, defaraale ca tatay dëkk baak kër ga may dali.» Buur nangul ma, ndax sama Yàlla ji ma toppe mbaaxam. ⁹ Ba loolu amee ma dem ba ca kilifay Wàllaa Dex ya, jox leen bataaxali Buur, fekk Buur boole maakay njiiti xare aki gawar.

¹⁰ Ba mu ko defee, Sanbalat ma dëkk Oron dégg mbir ma, mook Tobya, Amoneen ba, ndawal Buur. Ñu am lu leen soofa soof, te mooy li nit ñew, di sàkkusi njariñu bànni Israyil.

Neyemi xool na tata ja wër Yerusalem

¹¹ Ma àgg nag ba Yerusalem, toog fa ñetti fan. ¹² Gannaaw loolu ma jóg guddi, maak nit ñu néew, te waxuma kenn li ma sama Yàlla nammluo ngir ma defal ko Yerusalem. Yoruma woon jenn daamar ju moy ji ma war. ¹³ Ma génne dëkk ba guddi, jaare buntu tata ba ñuy wax Xur wa, wutali walu ndox ma ñuy wax walu Ninki-nànka, daldi jàll ba ca buntu Sèn ba. Ci biir loolu ma seetlu tatay Yerusalem ji toj fu nekk, bunt yi lakk ba xoyomu. ¹⁴ Ma jubal wutali bunt ba ñuy wax Bètu Ndox, jaare ca wetu déegu Buur: Amatul nag fu sama daamar ji ma war mana jaare. ¹⁵ Ma daldi topp xur wa ca guddi ga, di seetlu tata ji, ba noppi waññiku, jaare ca buntu Xur wu xóot wa, duggsiwaat. ¹⁶ Kilifay dëkk ba nag xamuñu fu ma demoon, mbaa lu ma doon def. Ndax fekkul woon ma wax kenn dara, du Yawut yi, du sarxalkat yi, du garmi yi, du kilifa yi te du keneen ci ñi wara sasoo liggéey bi.

¹⁷ Ba loolu amee ma ne leen: «Yeena gisal seen bopp toskare gi nu nekke. Yerusalem tas na, bunt yi lakk na. Aycaleen nu tabaxaat tatay Yerusalem ndax sunu gacce fajuu.» ¹⁸ Gannaaw loolu, ma nettali leen ni ma sama Yàlla toppe yiwam, ak kàddu yi ma Buur wax. Ñu ne ma:

* 1:1 1.1 weeru Kislew moo yemook juróom ñeenteelu weer wa ci seen nattin.

«Nanleen tabax!» Ñu daldi gëna pastéefu ca liggéeyu ngéneel ba.

¹⁹ Ba loolu amee Sanbalat ma dëkk Oron dégg ko, mook Amoneen ba Tobya, jawriñ ba, ak Gesem, Araab ba. Ñu di nu ñaawal ak a diiju naan: «Li ngeen di def nii lu mu doon? Dangeen di fexeel Buur?» ²⁰ Ma ne leen: «Yàlla Boroom asamaan moo nuy may ndam. Nun ñuy jaamam nooy jóg tabaxaat dëkk bi. Yeen nag amuleen wàll ci Yerusalem, te baaxoowuleen fi benn sañ-sañ!»

3

Ñu ngi tabaxaat tata ja

¹ Gannaaw loolu Elyasib sarxalkat bu mag ba ànd ak bokki sarxalkatam, ñu tabaxaat bunt ba ñuy wax Gàtt ya, sellalal ko Yàlla, taxawal laf ya, defaraat tata ja, ba ca soorooru Meya, sellalal ko Yàlla, jàppoo ko noonu ba ca soorooru Ananel. ² Waa Yerikoo nga feggook ñoom di tabax, Sakaur doomu Imri di tabax ca wet ga.

³ Bunt ba ñuy wooye buntu Jën ya, góori waa Sena ñoo daaj bant ya, taxawal laf ya, def ca tëjukaay yaak dénki galan ya muy àndal. ⁴ Meremot doomu Uri doomu Akocc, moo làng ak ñoom di defar; ka feggook ñoom di defar, di Mesulam doomu Berekiya doomu Mesesabel. Ka feggook ñoom di defar, di Cadog doomu Baana. ⁵ Ka feggook ñoom, ba tey, di defar di waa Tekowa. Seeni kilifa nag ñoo bañoona liggéey ci njiital jawriñ yi yore liggéey bi.

⁶ Buntu Cosaan ba, Yowada doomu Paseya ak Mesulam doomu Besodiya ñoo ko defaraat, daaj bant ya, taxawal laf ya, ak tëjukaay yaak dénki galan ya cay ànd. ⁷ Ña feggook ñoom di defar, di Melatiya ma dëkk Gabawon ak Yadon ma dëkk Meronot ak ñeneen waa Gabawon ak Mispa, gox ya ca kilifteefu boroom Wàllaa Dex. ⁸ Ka feggook ñoom di defar, di Uysel doomu Xaraya, téggu wurus ba. Ka feggook moom di defar, di Anaña, bokk ca defarkati cuuraay ya. Ñu sottal seen liggéey ca Yerusalem gannaaw ba ñu àggee fa tata ja gëna yaatoo. ⁹ Ka feggook ñoom di liggéey, Refaya doomu Ur la. Moo yilifoon genn-wàllu diiwaanu Yerusalem. ¹⁰ Ka ca topp di liggéey dog ba janook kërám, Yedaya la, doomu Arumaf; Atus doomu Asabneya feggook moom di defaraat. ¹¹ Am na weneen làccu tata wu Malkiya doomu Arim di defaraat, mook Asub doomu Payat Mowab; ñu defaraale sooroor ba ñuy wax Taal ya. ¹² Ka feggook moom di defaraat, di Salum doomu Aloyes, kilifag geneen wàllu diiwaanu Yerusalem, ay doomam yu jigéen di ko jàpple ca liggéey ba.

¹³ Buntu Xur wa, Anun a ko defaraat, mook ña dëkk Sanowa. Ñoo ko tabaxaat, taxawal laf ya, ak tëjukaay yaak dénki galan ya cay ànd. Ñu teg ca defaraat làccub juróomi teeméeri meetar ca tata ja, ba àgg ca buntu Sën ba.

¹⁴ Buntu Sën ba nag, ka ko defaraat Malkiya doomu Rekaab la, di boroom gox ba ñuy wax Bet Kerem. Moo ko defaraat, taxawal laf ya, ak tëjukaay yaak dénki galan ya cay ànd.

¹⁵ Bunt ba ñuy wax Bëtu Ndox ba, Salun doomu Kol Ose, boroom gox ba ñuy wax Mispa, moo ko defaraat. Moo ko tabaxaat, xadd ko, taxawal laf ya, ak tëjukaay yaak dénki galan ya cay ànd, ak itam tata ja ca déegub Silowe, bay suuxat toolu buur, ba ca déggastal ya ngay wacce, gënn gox ba ñuy wax Kër Daawuda. ¹⁶ Ka ca topp di defar, Neyemi doomu Asbug la, boroom genn-wàllu gox ba ñuy wax Bet Cur. Moo féeetewoo la dale fa janook sègi Daawuda ya, ba ca déeg ba nit ña sàkk, dem ba ca dalu Xarekat ya. ¹⁷ Leween ñaa ca topp di defaraat, di Reyum doomu Baani; ka dend ak moom, taxawal goxam di defaraat, di Asabya, may boroom genn-wàllu gox ba ñuy wax Keyla. ¹⁸ Ka topp ca moom di liggéey, di seen mbokk Binuy doomu Enadàdd, boroom geneen wàllu gox ba ñuy wax Keyla. ¹⁹ Ka feggook moom di liggéey, Eser la, doomu Yeswa, boroom Mispa. Muy defaraat làcc wa janook fa ngay yéege jëm ca dencu gannaay ya, ca koñu tata ja. ²⁰ Ka topp ca moom di liggéey ak pastéef Barug la, doomu Sabay. Muy defaraat weneen làccu tata ja dale ca koñ ba ca bunt kër Elyasib, sarxalkat bu mag ba. ²¹ Ka topp ca moom Meremot la, doomu Uri doomu Akocc. Muy defaraat làcc wa dale ca bunt kër Elyasib, ba fa kër ga yem. ²² Ña topp ca moom di defaraat, di sarxalkat ya dëkke la wër Yerusalem. ²³ Ña ca topp di liggéey, Beñamin la ak Asub. Ñuy defaraat làcc wa janook seen kër. Ka ca topp di liggéey, di Asaryaa doomu Maaseya doomu Anaña. Muy defaraat fa dendeek kërám. ²⁴ Ka ca topp di Binuy doomu Enadàdd. Muy defaraat làcc wa dale ca kër Asaryaa ba ca koñ ba, ca ruqu tata ja. ²⁵ Palal doomu Usay di defaraat diggante koñ ba ak sooroor bu kawé ba tiim kër buur, jàpp èttu dag ya. Ka ca topp di Pedaya doomu Paros. ²⁶ Liggéeykati kër Yàlla ya féeete Ofel ca tund wa, di liggéey, ba fa janook soorooru koñ, ba féeete buntu Ndox ma penku. ²⁷ Ña ca topp di waa Tekowa, di defaraat làcc wa ca topp, dale fa janook soorooru koñ bu kawé ba, ba ca tatay tund wa.

²⁸ La ko dale ca buntu Fas ya, ay sarx-alkat a fa doon liggéey, ku nekk janook kërám. ²⁹ Ka ca topp di liggéey, Cadog doomu Imer la. Muy defaraat fa janook kërám. Ka ca topp di defaraat, di Semaya doomu Sekaña; moo doon wattukatu buntu Penku ba. ³⁰ Ña topp ca moom di liggéey, di Anaña doomu Selemya ak Anun, juróom benneelu doomu Calaf. Muy defaraat làcc wa ca topp. Ka ca topp di liggéey, Mesulam doomu Berekiya la. Muy defaraat fa janook dëkkuwaayam. ³¹ Ka ca topp di defar, di Malkiya, bokk ca téggi wurus ya. Muy liggéey ba ca kéri liggéeykati kër Yàlla ga ak jaaykat ya, fa janook buntu Ndaje ba, jàpp ca néegu jongrukat bu kawe ba ca ruq ba. ³² Diggante néegu jongrukat bu kawe ba ca koñ ba, ak buntu Gàtt ya, ña fa doon liggéey téggi wurus ya la ak jaaykat ya.

Liggéey bi am na gállankoor

³³ Ba Sanbalat dégge ne nu ngi tabaxaat tata ja, am na naqar wu réy, mer lool. Muy ñaawal Yawut yi ³⁴ ca kanam bokkam yaak xarekati Samari ya naan: «Ana lu Yawut yi yaafus yii di jéema def nii? Ñu defe ne moos seen pexe dina sotti, ba ñuy def ay sarax? Fu ñuy noppee seen tabax bi bésub tey? Te yékkatiwñu lu moy ay doj yu ñu sulle ci jalub tojit yu lakk ba noppi?» ³⁵ Tobya Amoneen ba mu feggool nag ne ca tonet ne: «Tata ji ñuy tabax de, su ci wel sax yéegoon, mu ànd aki dojam, màbb.»

³⁶ Ci biir loolu ma ne: «Ngalla sunu Yàlla, déggal rekk xeebeel gi ñu nu xeeb te walbati seeni xaste, mu képpu ci seen kaw. Ngalla jébbal leen nit ñu sèxétoo seen alal ci réew mu ñu leen jàpp njaam. ³⁷ Bu leen jéggal seen tooñ, bul far seen bàkkaar, ndaxte ñoo naqaral ñiy tabax.»

³⁸ Ci kaw loolu nu tabaxaat tata ja, wërале ko ba mu àgg ca genn-wàllu taxawaayam, ndax fekk na mbooloo ma pastéefu ca liggéey ba.

4

¹ Sanbalat nag ak Tobyaak Araab yaak Amoneen ñaak Asdoddeen ña, ñoom ñépp dégg ne liggéeyu tatay Yerusalem a ngay jëm kanam, te xar-xar yaa ngay tãmbalee fatt. Ñu mer ca lool, ² daldi mànkoo, lal pexe ngir xareek Yerusalem, fitnaal leen. ³ Ba mu ko defee nu ñaan ci sunu Yàlla, ba noppi teg fa ay nit ñuy wattu guddeek bëccëg, ngir bàyyi leen xel.

⁴ Fekk na waa Yudaa ngi naan: «Dooley yenukat ñjiis, tojit jalee jale. Nu nuy tabaxeei jii tata?»

⁵ Ci biir loolu noon ya naan: «Bala ñu noo yég mbaa ñu di nu gis, nu ne saraax ci seen biir, rey leen, yemale fi liggéey bi.» ⁶ Yawut ya ñu dëkkal nag dikk waxsi nu fukki yoon ak juróom li ñu nuy waxeel, ne nu «Fu ne lañuy jóge, songsi nu.»

Neyemi gannaayal na ay wattukat

⁷ Ma teg nag ay nit ci bérab yu ne fàñj te suufe ca gannaaw tata ja. Ma def leen ay kurél, gu ci nekk ak làngam ak bérabam.

Ña nga gannaayoo seeni xeej ak seeni saamar ak seeni fitt. ⁸ Ba loolu amee ma xoolaat lépp, ba noppi wax ak kàngam yaak kilifa yaak mbooloo ma ca des ne leen: «Buleen leen ragal. Fàttlikuleen ne Boroom bi moo màgg te jara ragal te ngeen xeexal seeni bokk ak seen doom yu góor ak yu jigéen, ak seeni jabar ak seeni kër.»

⁹ Gannaaw gi noon ya xam ne yég nanu leen, te Yàlla nasaxal na seen pexe. Ba mu ko defee nu walbatikuwaat nun ñépp ca tata ja, ku nekk dellu ca liggéeyam. ¹⁰ La ko dale bésub keroog sama xaaju nit ña rekk a doon liggéey, xaaj ba ca des gannaayoo ay xeej aki pakk aki fitt ak kiiraayal dënn. Kilifa ya nag taxaw ca gannaaw mboolom waa Yuda. ¹¹ Ña doon tabax tata jaak ñay yenook ñay yene, ñépp di liggéeye benn loxo, loxo ba ca des ñàbb ngannaay. ¹² Te it ñay tabax, ku ci nekk, sab saamar a nga takke ci sa ndigg, ngay liggéey, boroom liit gi feggook man. ¹³ Ma wax ak garmi yaak kilifa yaak mbooloo ma ca des, ne leen: «Liggéey bi réy na, yaatu na, te nun danoo tasaaroo te soreyantoo ci tata ji. ¹⁴ Fu ngeen dégg liit gi jibe fa, fekkisileen nu fa. Sunu Yàlla dina nu xeexal.» ¹⁵ Nu nekk nag ci liggéey bi, genn-wàllu nit ñi yore ay xeej, dale ko ba bët di set, ba biddiww yiy feq.

¹⁶ Boobu it laa wax mbooloo ma ne leen: «Na ku nekk ànd ak ka muy liggéeyandool, fanaan ci biir Yerusalem. Su ko defee nu man di wattu guddi, di liggéey bëccëg.» ¹⁷ Booba kenn ci nun summiwul ay yéreem, du man, du samay bokk, du samay nit, te du wattukat yi ànd ak man. Ku nekk day ñàbb ngannaayam akam ndox.

5

Neyemi aar na néew-ji-doole

¹ Ci biir loolu askan waak seeni jabar di xultu lool ci seen kaw bokki Yawut. ² Ñii naan: «Nun danoo jaboot, nook sunu doom yu góor ak yu jigéen. Nañu nu jox pepp mu nu lekk, ba mana dund.» ³ Ñee naan: «Sunuy tool ak sunuy tóokéri reseñ ak sunuy kër lanuy tayle ngir am pepp ci xiif bi.» ⁴ Ña ca des naan: «Danoo àbb xaaalis, taylee ko sunuy tool ak tóokéri

reseñ ngir fey galagu buur. ⁵ Moona nun de, nook ñi nuy lebal benn lanu, diy bokk lenqe, te seeni doom gënuñu sunuy doom. Terewul nu ngi nara ñugal sunuy doom yu góor ak yu jigéen cig njaam. Am na sax ñenn ci sunuy doom yu jigéen, ñu nekk cig njaam ba noppi. Manunu ci dara ndax sunuy tool ak sunu tookeeri reseñ a ngi ci yeneen loxo.»

⁶ Ba ma déggée seeni xultook seen wax jooju, mer naa lool. ⁷ Ma daldi dogu ci sama xol ne dinaa yedd garmi yeek njiit yi. Ma ne leen: «Yeen yeenay lebal seeni bokk, di sàkku tegandaay.» Ci kaw loolu ma woote ndaje mu réy ci seen mbir. ⁸ Ma ne leen: «Nun def nanu sunu kem kàttan ngir jootaat sunu bokki Yawut yi ñu jaayoon ay jaambur. Léegi yeen ci seen bopp ngeen di jaay seeni bokk, nun nu war leena jootaat?» Ñu ne xerem, amuñu lu ñu wax. ⁹ Ma dellu ne leen: «Li ngeen di def de baaxul. Lu leen tee di ragal sunu Yàlla bala noo torox ci kanam noon yi dul Yawut? ¹⁰ Man itam, maak samay bokk ak samay nit, nu ngi lebal askan wi xaalis ak pepp. Waaye nanu leen baal bor bii. ¹¹ Dellooleen leen seeni tool, tey jii, ak seeni tookeeri reseñ ak seen garabi oliw ak seeni kër. Dellooleen leen itam li ngeen leen tegoon, muy benn ci téeméeri xaaj, ci xaalis ak pepp ak biiñ ak diw.» ¹² Ñu ne: «Li nga wax lanuy def. Dinanu leen ko delloo te dootunu leen laaj dara.» Ba mu ko defee ma woo sarxalkat ya, giñlool leen ca kanam sarxalkat ya, ne dinañu def li ñu wax. ¹³ Ba loolu amee ma yëlëb sama lafu mbubb wi may dence, daldi ne: «Yal na Yàlla yëlëbe nii mboolem ku sàmmul kàddu gi ci yeen, ba xañ ko kéram ak alalam. Yal nañu ko ni yëlbe, ba mu jeele tàkk.» Mboooloo ma mépp ne: «Amiin,» daldi bokk sargal Aji Sax ji. Mboooloo ma mépp nag def loolu ñu wax.

¹⁴ Bu loolu weese, la ko dale bés ba ñu ma falee boroom diiwaanu Yuda, ca ñaar fukkeelu atu nguurug Artaserses, ba ca fanweeru atam ak ñaar, muy fukki at ak ñaar, lekkunu alalu galag bu boroom diiwaan yellow, du man, du samay bokk. ¹⁵ Waaye boroom diiwaan yi ma jiiitu dañu daan not askan wi, di leen sëf seen dund ak seen biiñ, boole ci ñeent fukki dogi xaalis*. Seenii surga it di néesal askan wi doole. Man nag defuma noonu ndax ragal Yàlla. ¹⁶ Xanaa kay damaa saxoo jàpp ci liggéeyu tata jii. Masunoo jënd suuf, te sama nit ñépp a daan daje ci liggéey bi. ¹⁷ Rax ci dollu daan naa woo téeméeri kilifay Yawut

ak juróom fukk (150), di bokk ak ñoom sama njël, te limaalewuma ñi bàyyikoo ci jaambur yi nu séq, di nu feeksi. ¹⁸ Bés bu nekk daan nañu ma waajalal aw yëkk, ak juróom benni xari yar, ak boroomi dunq, ak lu baree bare ci mboolem xeetu biiñ, ñu di ko indi fukki fan yu nekk. Loolu taxul ma sàkku benn yoon galag bu boroom diiwaan di dunde, ndax liggéey bi diisoon na lool jeeg ci askan wi.

¹⁹ Kon nag rikk sama Yàlla, bàyyil xel ci man te baaxe ma, ndax mboolem li ma defal askan wii!

6

Tata ja noppi na

¹ Sanbalat ak Tobya nag dégg, ñook Gesem Araab baak noon ya ca des ne tabaxaat naa tata ja, ba xar-xar desatu ca, doonte taxawalaguma woon lafi bunt ya. ² Sanbalat ak Gesem yónnee ci man, ne ma: «Dikkal nu dem Kefirim ca xuru Ono, diisooji fa.» Booba ña nga may fexeel. ³ Ma yónnee leen ay ndaw, ne leen: «Damaa jàpp lool. Duma mana ñew. Xanaa duma dakkal liggéey bi, bàyyi ko fi, di leen fekki?» ⁴ Ñu yónnee ci man, wax ma loolu ba muy ñeenti yoon, sama tont di lenn. ⁵ Ba ko juróomeel Sanbalat yóbbanteeti ab surgaam genn kàddu gi, mu indaale bataaxal bu tējuwul, yor ko ci loxoom. ⁶ Ñu bind ci ne:

Dégg nañu ci xeet yi dul Yawut, te Gesem* sax dëggal na ko, ne yaw yaak sa bokki Yawut dangeen di fexee fippu. Ñu ne moo tax ngay tabaxaat tata ji. Wax nañu sax ne dangaa bëgga doon seen buur, ⁷ te xas ngaa tànn ay yonent yu wara yéene ci Yerusaleem, ne falu nga buur ci Yuda. Balaayag nag buuru Pers dina jot ci wax jooju. Kon nag dikkal, nu bokk diisoo ci.

⁸ Ma yónnee ca Sanbalat, ne ko: «Li nga wax amul. Yaw yaa ko fental sa bopp.» ⁹ Fekk na ñoom ñépp a nu doon jéema xoqtaal, yaakaar ne dinanu yoqi, ba liggéey bi du sotti. Ma daldi ne: «Léegi nag Yàlla, ngalla dooleel ma!»

¹⁰ Ci kaw loolu ma dem kër Semaya doomu Delaya doomu Metabel, fekk ko mu tēju cib néegam. Mu ne ma:

«Nan ànd dem ca kër Yàlla ga, ca néeg bu mag ba, nu tēju ca néeg bu mag ba balaa ñu lay reysi.

Guddi lañuy ñew, reysi la.»

¹¹ Ma ne ko: «Man duma kuy daw! Te sax gannaaw duma sarxalkat, nu may dugge

* 5:15 5.15 40 dogi xaalis: lim boobu mu ngi tollook liibaru xaalis. * 6:6 6.6 Gesem ak Gasmu kenn ki la. † 6:11 6.11 néeg Yàlla bu mag bi, sarxalkat yi rekk ñoo fa sañoona dugg. Keneen ku fa dugg, ku dul sarxalkat, day dee.

ci biir néeg Yàlla bu mag bi, di génaale bakkan†? Man kay demuma.»¹² Booba la ma leer ne ndeke Yàlla yónniwu ko, waaye Tobaak Sanbalat ñoo ko fey ngir mu birale ma noonu waxyu, di ma fexeel.¹³ Dañu koo feyoon ngir mu tiital ma, ma def noonu, muy bàkkaar. Su ko defee ñu yaq sama der, torxal ma.

¹⁴ Sama Yàlla, yal nanga bàyyi xel ci Tobaak Sanbalat te fey leen seen jéf jii, ñook Nowadiya, yonent bu jigéen beek yeneen yonent yi ma doon xoqtal.

¹⁵ Ba mu ko defee tata ji noppi ñaar fukki fan ak juróom ci weeru Elul†. Ñu liggéey ko ci juróom fukki fan ak ñaar.¹⁶ Ba ko sunu noon yépp yégee, ñook mboolem jaambur ñi ñu wër, am nañ tiitaange ak mbetteel mu réy, ndax xam nañu ne sunu ndimbalu Yàlla rekk lanu sottale boobu liggéey.

¹⁷ Ca yooya jamono garmiy Yuda daan nañu bindanteek Toba lu bare.¹⁸ Bare na sax ci waa Yuda ñu faroon ak moom ci kaw ngiñ, ndax la mu doon denc doomu Sekaña, ma Ara di baayam, te doomam Yowanani di denc doomu Mesulam ma Berekiya di baayam.¹⁹ Rax ci doli ñu di ma gëmloo ag mbaaxam, te di ko jottli samay kaddu. Toba nag yónnee ma ay bataaxal, di ma xoqtal.

7

¹ Gannaaw ba ñu tabaxaatee tata ja, ma taxawal lafi bunt ya, ba noppi dénk fara bunt ya seen liggéey, ñook jàngkat yaak Leween ña.² Ci kaw loolu ma sas sama mbokk Anani, mu jiite Yerusalem, mook Anaña boroom tata ja, ndax la mu gëna dëggu ñu bare, gën leena ragal Yàlla.³ Ma ne leen: «Bu bunti Yerusalem ubbiku li feek jant bi tàngul. Santleen fara bunt yi ñuy tēj bunt yi, sēs ci galani tējukaay yi, balaa waa dëkk biy tēdd. Na ku nekk ci waa Yerusalem di wattoo ca bérabu wattukaayam, mbaa buntu kërám.»

⁴ Booba dëkk ba réy na, yaatu na; waaye nit ña ca dëkk ñoo néew, te kër ya tabaxewaatul woon.⁵ Sama Yàlla xiir ma ma woo garmi yeek kilifa yeek baadoolo yi, ngir bind leen. Ci biir loolu ma gis limeefu làng ya jékka jóge ngallo ga, ba ñibbsi. Li ma fekk ñu bind ko ci mooy lii:

⁶ Ñii nag ñoo di niti diiwaanu Yuda, ña jóge njaam ca ngallo ga leen Nabukodonosor buuru Babilon yóbbu woon, te ñu jóge ca ñibbsi Yerusalem

ak Yuda, ku nekk ak fa mu dëkk.⁷ Ña nga ñibbi ca njiital Sorobabel ak Yosuwe* ak Neyemi ak Asaryaa ak Ramya ak Nayamani ak Mardose ak Bilsan ak Misperet ak Bigway ak Neyum ak Baana. Limeefu góori bànni Israyil nii la tēdde:

⁸ Askanu Paros ñaari junni ak téeméer ak juróom ñaar fukk ak ñaar lañu (2 172).

⁹ Askanu Sefatiya ñetti téeméer ak juróom ñaar fukk ak ñaar lañu (372).¹⁰ Askanu Ara di juróom benn téeméer ak juróom fukk ak ñaar (652).¹¹ Askanu Payat Mowab, soqikoo ci Yeswa ak Yowab, di ñaari junni ak juróom ñetti téeméer ak fukk ak juróom ñett (2 818).

¹² Askanu Elam junni ak ñaar téeméer ak juróom fukk ak ñeent lañu (1 254).¹³ Askanu Sattu juróom ñetti téeméer ak ñeent fukk ak juróom lañu (845).

¹⁴ Askanu Sakay juróom ñaar téeméer ak juróom benn fukk lañu (760).¹⁵ Askanu Binuy juróom benn téeméer ak ñeent fukk ak juróom ñett lañu (648).

¹⁶ Askanu Bebay juróom benn téeméer ak ñaar fukk ak juróom ñett lañu (628).¹⁷ Askanu Asgadd ñaari junni ak ñetti téeméer ak ñaar fukk ak ñaar lañu (2 322)

¹⁸ Askanu Adonikam juróom benni téeméer ak juróom benn fukk ak juróom ñaar lañu (667).¹⁹ Askanu Bigway ñaari junni ak juróom benn fukk ak juróom ñaar lañu (2 067).

²⁰ Askanu Adin juróom benn téeméer ak juróom fukk ak juróom lañu (655);²¹ askanu Ater soqikoo ci Esekiya, di juróom ñeent fukk ak juróom ñett (98);

²² Askanu Asum ñetti téeméer ak ñaar fukk ak juróom ñett lañu (328).²³ Askanu Besay ñetti téeméer ak ñaar fukk ak ñeent lañu (324).

²⁴ Askanu Arif téeméer ak fukk ak ñaar lañu (112).²⁵ Askanu Gabawon juróom ñeent fukk ak juróom lañu (95).

²⁶ Waa Betleyem ak Netofa téeméer ak juróom ñett fukk ak juróom ñett lañu (188).²⁷ Waa Anatot téeméer ak ñaar fukk ak juróom ñett lañu (128).

²⁸ Waa Bet Asmawet ñeent fukk ak ñaar lañu (42).²⁹ Waa Kiryaat Yarim ak Kefira ak Berot juróom ñaar téeméer ak ñeent fukk ak ñett lañu (743).

³⁰ Waa Raama ak Geba juróom benni téeméer ak ñaar fukk ak benn lañu (621).³¹ Waa Migmas téeméer ak ñaar fukk ak ñaar lañu (122).

³² Waa Betel ak Ayi téeméer ak ñaar fukk ak ñett lañu (123).³³ Waa Nebo gu ndaw juróom fukk ak ñaar lañu (52).³⁴ Waa Elam gu ndaw junni ak ñaar téeméer ak juróom fukk ak ñeent lañu (1 254).³⁵ Waa Arim ñetti téeméer ak

† **6:15** 6.15 weeru Elul moo yemook juróom benneelu weer ci nattinu yawut, muy ndeeteel ut, japp sàttumar.

* **7:7** 7.7 Yeswa ci lakkoo ebré. Yosuwe lanu bind ci tekki bii, muy doomu Yoccadag te doon sarxalkat bu mag bi mujj li jiiu ngallo ga ca Babilon. Yosuwe mii lu gëna bare dees na ko tuddaaleek Sorobabel. Feneen fu ñu ne Yeswa ci téere bi, keneen a tax ñuy wax.

ñaar fukk lañu (320) ³⁶ Waa Yeriko ñetti tééméer ak ñeent fukk ak juróom lañu (345). ³⁷ Waa Lodd ak Adidd ak Ono juróom ñaar tééméer ak ñaar fukk ak benn lañu (721). ³⁸ Waa Sena ñetti junni ak juróom ñeenti tééméer ak fanweer lañu (3 930).

³⁹ Sarxalkat yi ñii la:

Askanu Yedaya, soqikoo ci waa kër Yosuwe, di juróom ñeenti tééméer ak juróom ñaar fukk ak ñett (973). ⁴⁰ Askanu Imer junni ak juróom fukk ak ñaar lañu (1 052). ⁴¹ Askanu Pasur junni ak ñaar tééméer ak ñeent fukk ak juróom ñaar lañu (1 247). ⁴² Askanu Arim junni ak fukk ak juróom ñaar lañu (1 017).

⁴³ Leween ñi ñii la: Askanu Yeswa ma soqikoo ca Kadmiyel. Mooy ñi bàngaasoo ci Odawya, tollu ci juróom ñaar fukk ak ñeent (74).

⁴⁴ Jàngkat yi ñoo di: Askanu Asaf, di tééméer ak ñeent fukk ak juróom ñett (148). ⁴⁵ Askanu fara bunt yi ñoo di: Askanu Salum, ak askanu Ater, ak askanu Talmon, ak askanu Akub, ak askanu Atita, ak askanu Sobay, di tééméer ak fanweer ak juróom ñett (138).

⁴⁶ Liggéeykati kër Yàlla gi ñoo di: Askanu Ciya, ak askanu Asufa, ak askanu Tabawot, ⁴⁷ ak askanu Keros, ak askanu Siya, ak askanu Padon, ⁴⁸ ak askanu Lebana, ak askanu Agaba, ak askanu Salmay, ⁴⁹ ak askanu Xanan, ak askanu Gidel, ak askanu Gayar, ⁵⁰ ak askanu Raaya, ak askanu Reccin, ak askanu Nekoda, ⁵¹ ak askanu Gasam, ak askanu Usa, ak askanu Paseya, ⁵² ak askanu Besay, ak askanu Meyunim, ak askanu Nefusim, ⁵³ ak askanu Bagbug, ak askanu Akufa, ak askanu Arur, ⁵⁴ ak askanu Baslut, ak askanu Meyida, ak askanu Arsa, ⁵⁵ ak askanu Barkos, ak askanu Sisera, ak askanu Tema, ⁵⁶ ak askanu Necciya, ak askanu Atifa.

⁵⁷ Askanu jaami Suleymaan ñii la: Askanu Sotay, ak askanu Soferet, ak askanu Perida, ⁵⁸ ak askanu Yaala, ak askanu Darkon, ak askanu Gidel, ⁵⁹ ak askanu Sefatiya, ak askanu Atil, ak askanu Pokeret Asbayim, ak askanu Amon.

⁶⁰ Mboolem liggéeykati kër Yàlla gi ak askanu jaami Suleymaan yi, ñetti tééméer ak juróom ñeent fukk ak ñaar (392).

⁶¹ Ña bàyyikoo Tel Mela ak Tel Arsa ak Kerub Adon ak Imer te manuñoo firndeel ne seen waa kër maam ak seen askan ci Israyil lañu bokk, ñii la: ⁶² Askanu Delaya, ak askanu Tobyaa, ak askanu Nekoda, di

juróom benn tééméer ak ñeent fukk ak ñaar (642).

⁶³ Am na it ñu loolu daloon ci sarxalkat yi, muy askanu Abaya, ak askanu Akocc, ak askanu Barsilay, ma doon denc doomu Barsilay waa Galádd ba, ba tax ñu santale ko seen sant. ⁶⁴ Ñooñu seet nañu seen limeefu kër maam, waaye gisuñu ko. Ñu daldi leen doyadal, génne leen ci carxal gi. ⁶⁵ Boroom dëkk ba nag aaye leen ñu lekk ci ñam yu sell yaa sell, ba keroog sarxalkat ba di am lu leer ci ñoom ci jumtukaayi tegtal yi ñuy wax Urim ak Tumim.

⁶⁶ Limu mbooloo ma mépp ba mu daj, ñeent fukkii junneek ñaar ak ñetti tééméer ak juróom benn fukk lañu (42 360), ⁶⁷ te limaaalesul seen jaam yu góor ak yu jigéen, yi tollu ci juróom ñaari junni ak ñetti tééméer ak fanweer ak juróom ñaar (7 337). Amoon nañu itam ay jàngkat yu góor ak yu jigéen, yu tollu ci ñaar tééméer ak ñeent fukk ak juróom (245), ⁶⁸ ak ñeenti tééméeri giléem ak fanweer ak juróom (435), ak juróom benni junni mbaam ak juróom ñaar tééméer ak ñaar fukk (6 720).

⁶⁹ Am na ñu jiite seen kër baay, ñu def seen loxo ca liggéey ba. Boroom dëkk ba def na ca alal ja junni poseti wurus (1 000) ak juróom fukkii kèll (50) ak fanweeri mbubbi sarxalkat (30) ak juróomi tééméeri dogi xaaalis (500)[†].

⁷⁰ Ñenn ca ña jiite seen kër baay def nañu seen loxo ca alal ja ñu jagleel liggéey ba, mu tollu ci ñaar fukkii junni poseti wurus (20 000) ak ñaari junni dogi xaaalis (2 000) ak ñaar tééméer (2 200).

⁷¹ La des ca askan wa joxe na ñaar fukkii junni poseti wurus (20 000) ak ñaari junni dogi xaaalis (2 000) ak mbubbi sarxalkat yu tollu ci juróom benn fukk ak juróom ñaar (67).

⁷² Ba loolu amee bànni Israyil gépp sancaat ca seen dëkki cosaan, sarxalkat yaak Leween ñaak fara bunt yaak jàngkat yaak ñenn ca baadoolo yaak liggéeykati kër Yàlla ga.

8

Esra jàngal na mbooloo ma

Ba juróom ñaareelu weer wa teroo, ba bànni Israyil sancaat seeni dëkk, ¹ mbooloo mépp a daje, di benn bopp ca mbedd ma jàkkaarlook buntu Ndox ma. Ñu wax Esra bindkat ba, ne ko mu indi téereb yoonu Musaa wi Aji Sax ji dénk Israyil. ² Esra, sarxalkat ba, indi téereb yoon wi keroog benn fanu juróom

[†] 7:69 7.69 Fi ñu tudd fanweeri mbubbi sarxalkat yi ak juróomi tééméeri dogi xaaalis, am na ñu fi boole ñaari lim yoyou, moomale ko dayob mbubbi sarxalkat yi doñj.

ñaareelu weer wa, fa kanam mbooloo ma, góor ak jigéen, mboolem ña seeni at may ñu dégg ko. ³ Esra jàng na ko janook mbedd ma jækkaarlook buntu Ndox ma, dale ko ba bêt setee ba ca digg bëccëg. Mbooloo maa nga teew, góor ak jigéen, mboolem ña dégg la ca nekk. Ñépp nag di teewlu kàdduy téereb yoon wa.

⁴ Esra bindkat baa nga taxaw ca kaw dëxu bant ba ñu defaral bés ba. Ña feggook moom ca ndijoram di Matitiya ak Sema ak Anaya ak Uri ak Ilkiya ak Maaseya. Ña ko féete càmmoñ di Pedaya ak Mikayel ak Malkiya ak Asum ak Asbadana ak Sàkkaryaa ak Mesulam. ⁵ Ba Esra di ubbi téere ba, mbooloo mépp a ca teg seeni bêt, ndax mbooloo mépp la tiim. Mbooloo mépp nag jóg taxaw. ⁶ Esra daldi sant Aji Sax ji, Yàlla ju mágg ji. Mbooloo ma mépp ànd ne: «Eskëy, eskëy!» yékkati seeni loxo, sukk, sujjóotal Aji Sax ji, dëpp seeni jë fa suuf. ⁷ Ci kaw loolu Yeswa ak Baani ak Serebya ak Yamin ak Akub ak Sabtay ak Odiya ak Maaseya ak Kelita ak Asaryaa ak Yosabàdd ak Xanan ak Pelaya ak Leween ña di leeralal mbooloo ma yoonu Musaa. Mbooloo maa nga taxaw, kenn ku nekk benn bérab. ⁸ Ci biir loolu ñu di leen jàngal téereb yoonu Yàlla wi, njàng mu leer, di leen ko firil ba ñu xam li ñuy jàng.

⁹ Gannaaw loolu Neyemi boroom dëkk ba ànd ak Esra sarxalkat ba, di bindkat ba ba tey, ak Leween ñay xamal mbooloo ma, wax ak ñoom ñépp, ne leen: «Bésub tey jii, bés bu sell la, ñeel Aji Sax ji, seen Yàlla. Buleen ci naqarlu, buleen ci jooy.» Booba mbooloo ma mépp a doon jooy ca kàdduy yoon wa ñu dégg. ¹⁰ Esra ne leen: «Ayca demleen lekk lu géna duuf, naan lu neexa neex te sédd ci ñi amul lu ñu togg; ndax bésub tey bés bu sell la ñeel sunu Boroom. Kon buleen ci naqarlu kat, ndax bége Aji Sax ji mooy seen doole!» ¹¹ Leween ña nag di dëfal mbooloo ma mépp, naan leen: «Noppileen waay, ndax tey bés bu sell la. Kon buleen ci naqarlu.» ¹² Ba mu ko defee mbooloo ma mépp ñibbi, di lekk ak a naan ak a yekkle di bannexu bu baax. Fekk na ñu xam kàddu ya ñu leen doon xamal.

Feddli nañu mággalu Mbaar yi

¹³ Keroog ñaari fan ca weer wa nag ña yilif seen kër baay yépp ànd ak sarxalkat yaak Leween ña, ñu daje ca Esra bindkat ba, di géstu kàdduy yoon wi. ¹⁴ Ci kaw loolu ñu gis ne bind nañu ci yoon wi Aji Sax ji santaane, te Musaa jottli ko, ne: «Bànni Israyil dañoo wara dëkk ci ay mbaar diiru mággalu weru juróom

ñaareel wa.» ¹⁵ Ñu siiwal nag ndigal, ca mboolem seeni dëkk ak ca Yerusalem, daldi yéene ne: «Demleen ca tund ya, wuti ay cari garabi oliw, ak cari garabi pëe*, ak cari garabi mirt, ak cari garabi tàndarma, ak cari garab yu séq, ndax ñu defare ko ay mbaar, muy li ñu bind.» ¹⁶ Ba loolu amee mbooloo ma wuti ay car, defare ko ay mbaar ca seen kaw taaxi kër ak ca seeni biir ètt ak ca ètti kër Yàlla ga ak ca mbedd ma ca buntu Ndox ma ak ca mbedd ma ca buntu Efrayim. ¹⁷ Ci kaw loolu mboolem ña ñiibbsee ca njaam ga defar ay mbaar, dal ca mbaar ya. La ko dale jamonoy Yosuew doomu Nuun, ba bésub keroog bànni Israyil defatuñu woon lu ni mel. Muy mbégte mu réya réy. ¹⁸ Ci biir loolu ñuy jàng ci téereb yoonu Yàlla wi bés bu nekk, tàmbalee ko ca bés bu jëkk ba, ba ca bés bu mujj ba. Amal nañu mággal ga diiru juróom ñaari fan. Bésub juróom ñetteel ba nag ñu woote ca am ndaje mu sell, muy la ñu digle.

9

Kàdduy tuub jib na

¹ Keroog ñaar fukki fan ak ñeent ca weer woowa, bànni Israyil daje nañu, sol ay saaku, xéppoo suuf, di ko ñaawloo ci biir koor. ² Ci kaw loolu askanu Israyil beddeeku doxandéem yépp. Ñu taxaw nag, tudd seen bàkkaari bopp ak seen ñaawtéefi maam. ³ Ci biir loolu ñu taxaw, di jàng ca seen téereb yoonu Yàlla Aji Sax ji, diirub xaajaatu bés ba. Xaajaatu bés ba ca topp ñuy tuub ak a sujjóotal seen Yàlla Aji Sax ji. ⁴ Yeswa daldi taxaw ca kaw dëx ba ñu jagleel Leween ña, mook Baani ak Kadmiyel ak Sebaña ak Buuni ak Serebya ak Baani meneen ma, ak Kenani. Ña ngay àddu ca kaw, di wax ak seen Yàlla Aji Sax ji. ⁵ Yeswa nag ak Kadmiyel ak Baani ak Asabneya ak Serebya ak Odiya ak Sebaña ak Petaya, Leween ñooñu ñépp àddoondoo ne: «Mággal-leen seen Yàlla Aji Sax ji sax dàkk, ba fàww. Nañu mággal sa tur wu tedd, wi raw gépp cant ak ngèrëm.»

⁶ «Yaw Aji Sax ji, yaw kenn yaa sàkk asamaan yi, ba ca asamaan ya géna kawe ak seen gàngoor yépp, ak suuf ak lépp li ci kawam, ak gééj ak li ci biiram lépp. Yooyu yépp, yaay ki leen di may bakkam, te gàngoori asamaan, yaw lañuy sujjóotal. ⁷ Yaw yaa di Aji Sax ji, Yàlla ji tànn Ibraam, jële ko Ur gu waa Kalde, tudde ko Ibraayma. ⁸ Yaa gis mu nangul la ci xolam; nga fas ak moom kóllère, dig askanam réewum

* 8:15 8.15 garabi pëe xeetoo naak filaawoo.

Kanaaneen ñaak Etteen ñaak Amoreen ñaak Periseen ñaak Yebuseen ñaak Gîrgaseen ña. Te def nga li nga dige it, ndax yaw boroom njekk nga. ⁹ Ba nga gisee sunu toroxtey maam ya ca Misra, dégg seeni yuux ca tefasu gééju Barax ya, ¹⁰ yaa wàcce ay firndeeki kéemaan ca kaw Firawnaaki jawriñam ñépp ak askanu réewam mépp, ndaxte yégoon nga reewande ga waa Misra doon jêflanteek sunuy maam. Ca nga siwal saw tur ba tey jii. ¹¹ Gééj nga leen xaral, ñu jaare suuf su wow konj, ca digg gééj ga, ña leen doon dàq nag, nga fêl leen, ca biir xóote ya, ñu tàbbi niw doj ci ndox mu baawaan. ¹² Ci kaw loolu nga di leen jiitee bëccëg aw taxaaru niir; di leen jiitee guddi taxaaru sawara, di leen niital yoon wa ñuy jaare. ¹³ Ca tundu Sinayi wa nga wàcc, àddoo asamaan, wax ak ñoom, dénk leen ndigal yu jub, ak yoon yu dégg, ak dogali yoon ak santaane yu baax. ¹⁴ Sa bésu Noflaay bu sell it, yaa leen ko xamal, te say santaaneeki dogali yoon ak saw yoon, yaa leen ko dénk. Musaa, sa jaam ba, jottli leen ko. ¹⁵ Pepp mu tawe asamaan nga faje seen xiif, ndox mu balle ciw doj, nga faje seen mar, te ne leen ñu dem nanguji réew ma nga leen giñaloon.

¹⁶ «Sunu maam yooyu kay ñoo mujj fuuy, saju loos, ba sammuñu say santaane. ¹⁷ Ñoo baña dégg, baña bàyyi xel sa kéemaan yi nga def ci seen biir, te ñoo saju loos, fétteeral ba fal njiit, nara dellu ca seen njaam ga. Waaye yaw yaay Yàlla jiy boroom njéggal ak yiw ak yërmande, di muñ mer, te bare ngor; ba tax wacoo leen. ¹⁸ Dem nañu sax ba móolal seen bopp jëmmu wëllu te naan: “Yeen, seen Yàllaa ngi; moo leen génnee réewum Misra,” ñàkke la kersa lool. ¹⁹ Waaye yaw, ci sa yërmande ju réy, wacoo leen ca màndij ma. Taxaaru niir wa noppiwula taxaw ci seen kanam bëccëg bu nekk, di leen jiite ca yoon wa. Taxaaru sawara wa it noppiwula taxaw guddi, di leen niital yoon wa ñuy jaar. ²⁰ Sa xel mu rafet nga leen may ba ñu mana ràññee, sa mànn* it, noppiwuloo leen koo leel, teg ca ndox ma nga leen daan fajale mar. ²¹ Diiru ñeent fukki at nga leen dundal ca màndij ma, ñàkkuñu dara. Seeni yére ràppul, seeni tànk newiwul.

²² «Yaa leen moomale ay réew aki xeet, séddale leen suuf. Ñu nangu réewum Siwon, réewum buurub Esbon, teg ca réewum Og buuru Basan. ²³ Giiral nga

leen, ba ñu tollu ni biddiwi asamaan, ba noppi dugal leen ca réew ma nga waxoon seeni maam ñu nanguji ko. ²⁴ Ci kaw loolu seeni doom nanguji réew ma. Yaa leen nangulal Kanaaneen ña dëkkoon ca réew ma, teg ci seeni loxo buuri réew maak baadoola ya, ñu di leen def lu leen soob. ²⁵ Nangu nañu ay dëkk yu tata wër, ak suuf su nangu, aakimoo kër yu fees ak gépp ngèneel, aki teen, ak tókëri reseñ, ak garabi oliw, garab yay meññ, ne xas; ñuy lekk ba suur. Ñu regg, di xéewloo sa mbaax gu réy gi.

²⁶ «Waaye déggufñu ndigal, xanaa di la gantal. Dañoo sanni saw yoon seen gannaaw; sa yonent ya leen doon xiirtal ci délsi ci yaw, ñu rey leen, ba ñàkke la kersa lool. ²⁷ Nga daldi leen teg ci seen loxoy noon, ñu fitnaal leen. Teewul ñu jàq, woo la wall, nga dégge ko fa asamaan, ba jox leen ñu leen xettli, ci sa yërmande ju yaa, ñu xettli leen ci seen dooley noon. ²⁸ Naka lañu am noflaay, daldi dellu ci def lu bon fi sa kanam. Nga wacc leen nag ca seen loxoy noon, ñu moom leen. Ba ñu delloo woo la wall, yaa leen dégge fa asamaan, ba xettli leen ay yooni yoon ci sa yërmande ju réy. ²⁹ Artu nga leen ndax ñu dellu ci saw yoon, teewul ñu bew, ba sammuñu say santaane, xanaa di moy sa àttey yoon yiy taxa dund képp ku ci sammu. Ñuy danjiiral, saju loos, bañ laa déggal. ³⁰ Ndaxam muñal nga leen ay at yu bare, di leen artoo sam xel, say yonent di leen ko jottli; waaye taxul ñu déglu. Nga teg leen nag ci loxoy waa réew yi. ³¹ Sa yërmande ju réy nga topp, ba faagaaloo leen. Wacooloo leen it, ndax yaw Yàllay yiw ak yërmande nga!

³² «Kon rikk waay, yaw sunu Yàlla, Yàlla ju màgg, ji àttan te mata ragal, di sàmm kòllèreek ngor; ngalla bul xeeb mboolem toskare ji dikkal sa ñoñ, muy buur ak njiit, sarxalkat ak yonent, dale ca sunuy maam ba ci nun ñépp tey, ca janti buuri Asiri, ba sunu jonni yàllay tey. ³³ Yaw nag yaa yelloo njekk ci mboolem li nu dal, ndax worma nga jéfe, nun noo bon. ³⁴ Sunuy buur ak sunuy njiit nag ak sunuy sarxalkat ñoo dale ca sunuy maam, di baña topp sa yoon, baña sàmm say santaane, bàyyiwuñu xel it ci kàdduy seede yi nga leen artoo. ³⁵ Ba ñu moomee seenum réew, nekk ci sa teraanga ju réy ja nga leen may ca suuf su yaa, su nangu sa nga leen jox, jaamuwñu la woon te dëdduwñu seen manin yu ñaaw ya. ³⁶ Nu ngi nii tey diy jaam.

* 9:20 9.20 mànn: seetal ci *Mucc ga* 16.

Réew ma nga joxoon sunuy maam, ñuy lekk meññeefam aki ngéneelam, fi lanu doon nii ay jaam. ³⁷ Li suuf siy jur a ngi ne gâññ, di alalu buur yi nga teg ci sunu kaw, ndax sunuy moy. Dañu noo yilif, yilif sunug jur, nu mu leen neexe, nu nekke njàqare ju réy.»

10

Bànni Israyil dogu nañu

¹ Loolu yépp tax na nuy tëral takktoo bu dogu, bind ko, sunuy njiit ak sunuy Leween ak sunuy sarxalkat def ci seen màndargay torluukaay.

² Ñi ko torlu ñoo di:

Boroom dëkk bi Neyemi doomu Akalya, mook Cedekiya ³ ak Seraya ak Asaryaa ak Yeremi ⁴ ak Pasur ak Amarya ak Malkiya ⁵ ak Atus ak Sebaña ak Malug ⁶ ak Arim ak Meremot ak Obadiya ⁷ ak Dañeel ak Ginton ak Barug ⁸ ak Mesulam ak Abya ak Miyamin ⁹ ak Maasya ak Bilgay ak Semaya. Ñooñu ñoo di sarxalkat ya.

¹⁰ Leween ñi ñoo di:

Yeswa doomu Asaña, ak Binuy, kenn ca doomi Enadadd, ak Kadmiyel. ¹¹ Seeni bokk ca lañu, di Sebaña ak Odiya ak Kelita ak Pelaya ak Xanan ¹² ak Mika ak Reyob ak Asabya ¹³ ak Sakuur ak Serebya ak Sebaña ¹⁴ ak Odiya ak Baani ak Beninu.

¹⁵ Njiiti askan wi ñoo di:

Paros ak Payat Mowab ak Elam ak Sattu ak Baani ¹⁶ ak Buuni ak Asgadd ak Bebey ¹⁷ ak Adoña ak Bigway ak Adin ¹⁸ ak Ater ak Esekiya ak Asur ¹⁹ ak Odiya ak Asum ak Besay ²⁰ ak Arif ak Anatot ak Nebay ²¹ ak Magpiyas ak Mesulam ak Esir ²² ak Mesesabel ak Cadog ak Yaduwa ²³ ak Pelaca ak Xanan ak Anaya ²⁴ ak Oseyaa ak Anaña ak Asub ²⁵ ak Aloyes ak Pila ak Sobeg ²⁶ ak Reyum ak Asabna ak Maaseya ²⁷ ak Axiya ak Xanan ak Anan ²⁸ ak Malug ak Arim ak Baana.

Solob dogu baa ngi

²⁹ Bànni Israyil ga ca des nag fekki leen, muy sarxalkat yaak Leween ñaak fara bunt yaak jàngkat yaak liggéeykati kër Yàlla ga, di mboolem nun ñi beddeeku woon waasoy réew yi, ngir topp yoonu Yàlla wi, nook sunuy jabar ak sunu doom yu góor ak yu jigéen, mboolem ñi xam te xammee. ³⁰ Ci kaw loolu nu ànd ak sunu bokki garmi, waatook ñoom ne dinanu topp yoonu Yàlla wi mu dénkaane, Musaa jaamam ba jottli; di ko sàmm, di jëfe mboolem sunu santaaney Boroom Aji Sax ji, ak àttey yoonam ak dogali yoonam.

³¹ Nu ne nag dunu may waa réew mi sunu doom yu jigéen te dunu jëlal sunuy doom seeni doom yu jigéen.

³² Te itam bu waa réew mi indee am njaay mbaa lépp luy pepp, di ko jaay ci bés sub Noflaay, dunu ko jënd ci ñoom bés sub Noflaay mbaa bés bu sell, te atum juróom ñaareel mu nekk dinanu bale bépp bor.

³³ Ci biir loolu nu warloo santaaney joxe at mu nekk ñeenti garaami xaalis, bu jëm ca sunu liggéeyu kër Yàlla ga, ³⁴ jëm ca mburum wone ba, ak saraxi pepp yi war bés bu nekk, ak saraxi dóomal yu bés bu nekk, ak saraxi bési Noflaay, ak yu Terutel weer ak yu bési mággal yi, ak yeneen yu ñu sellalal Yàlla, ak saraxi póotum bàkkaar yi bànni Israyil di jotoo, ak mboolem la war ca sunu liggéeyu kër Yàlla ga.

³⁵ Ay bant lanu tegoo ci sunu biir, nun sarxalkat yeek Leween ñeek baadoolo yi, ngir dogalal waa kër gu nekk àpp ba ñu wara aye cim at, te ñu war caa yóbbu seen sasu matt ca sunu kër Yàlla ga, ngir taal ko ca sunu sarxalukaayu Yàlla Aji Sax ji, muy la ñu bind ci téereb yoon wi.

³⁶ Nu dogu ba tey ne dinanu yóbbu ca kër Aji Sax ji, at mu nekk, li sunu suuf jékka meññle ak lu garab yépp jékka ñorle. ³⁷ Ci biir loolu nu dogoo def li ñu bind ci yoon wi, di yóbbu ca sunu kër Yàlla ga sunu taaw yu góor ak lu sunu jur taawloo, gu gudd gaak gu gatt ga, di teg lépp ci loxoy sarxalkat ya fay liggéey. ³⁸ Ci kaw loolu nu wara yóbbu ca sunu néegi dencukaayi kër Yàlla ga lu jékk ci sunu notu sunguf, ak sunu jooxey pepp, ak sunu meññeefi garab yépp, ak sunu biiñ ak diw, di teg lépp ci loxoy sarxalkat yi. Ba tey nuy indil Leween ñi céru fukkeelub lépp luy meññee ci sunu suuf, ndax Leween ñeey dajalesi céri fukkeel yi ci gox yi nuy bey yépp. ³⁹ Sarxalkat bu askanoo ci Aaróona mooy gunge Leween ñiy jëlsi céri fukkeel yi. Su ko defee Leween ñi yóbbu fukkeelu céri fukkeel yi ba ca sunu kër Yàlla ga, fat ko ca néegi dencukaayi alal ya. ⁴⁰ Ci néeg yooyu la bànni Israyil ak askanu Leween ñi di yóbbu jooxey pepp ba ak biiñ baak diw ga; fa la ndabi bérab bu sell ba dence, te fa la sarxalkat, ya sasoo liggéey ba nekk, ñook fara bunt yaak jàngkat ya.

Nu dogu nag ne dunu sàggane sunu kër Yàlla ga.

11

¹ Ba mu ko defee njiiti mbooloo ma dëkk Yerusaleem. Ña des ca mbooloo ma tegoo bant ngir fukk ñu daje kenn génne ca, dëkk Yerusaleem, dëkk bu sell bi, juróom ñeent ñi ci des toog ca (seeni) dëkk yu ndaw. ² Mbooloo ma nag gërëm ñi nangul seen bopp ne dañuy dëkk Yerusaleem.

³ Dëkki Yuda ya bànni Israyil yaa ca dëkkoon, ñook sarxalkat yaak Leween ñaak, ña féetewoo liggéey yu sew ya ca kër Yàlla gaak ña askanoo ca jaami Suleymaan ya, ku nekk ak sa céru suuf, ca dëkk ba nga bokk. Nii ñuy lim nag ñooy njiiti diiwaan ñi dëkke Yerusalem. ⁴ Amoon na it ñu dëkkoon Yerusalem te bokk ci giirug Yuda ak giirug Beñamin.

Ñi bokk ci askanu Yuda Ataya la, ku góor ka Usiya di baayam; Sàkkaryaa di baayu Usiya; Amarya di baayi Sàkkaryaa; Sefatiya di baayi Amarya; Mayalel di baayi Sefatiya, Peres di baayi Mayalel; ⁵ ak Maaseya, ku góor ka Barug di baayam; Kol Xose di baayu Barug; Xasaya di baayu Kol Xose; Adaya di baayu Xasaya; Yowarib di baayu Adaya; Sàkkaryaa may doomu ku dëkk Silon di baayu Yowarib. ⁶ Waa askanu Peres ya dëkk Yerusalem ñeenti téeméeri jambaar lañu ak juróom benn fukk ak juróom ñett.

⁷ Ñi bokk ci askanu Beñamin Salu la, ku góor ka Mesulam di baayam; Yowet di baayu Mesulam, Pedaya di baayu Yowet; Kolaya di baayu Pedaya, Maaseya di baayu Kolaya, Itiyel di baayu Maasya, Yisaya di baayu Itiyel; ⁸ Gabay ak Salay topp ca Ñoom ñépp di juróom ñeenti téeméer ak ñaar-fukk ak juróom ñett. ⁹ Yowel doomu Sikkri moo leen jiite woon, Yewuda doomu Asenuwa topp ca, di ñaareelu kilifag dëkk ba.

¹⁰ Sarxalkat ya Yedaya doomu Yowarib Yakin bokk na ca, ¹¹ ak Seraya, baayam di Ilkiya, Mesulam di baayu Ilkiya, Sadog di baayu Mesulam, Merayot di baayu Sadog, Ayitub, njiital kër Yàlla ga di baayu Merayot. ¹² Ñoom ak ña ñu àndal ca liggéeyu kër Yàlla ga. Ñuy juróom ñetti téeméer ak ñaar fukk ak ñaar. Adaya ma Yerowam di baayam it bokk na ca. Pelaliya di baayu Yerowam, Amsi di baayu Pelaliya, Sàkkaryaa, di baayu Amsi, Pasur di baayu Sàkkaryaa, Malkiya di baayu Pasur. ¹³ Maam la ak ña mu àndal ca liggéey ba te ñu yilif seeni kër baay, ñuy ñaar téeméer ak ñeent-fukk ak ñaar. Amasay ma Asarel di baayam bokk na ca; Axsay di baayu Asarel; Mesilemot di baayu Axsay; Imer di baayu Mesilemot. ¹⁴ Moom la ak seeni bokk, yu jambaare te ñeme. Ñuy téeméer ak ñaar fukk ak juróom ñett. Sabdiyel ma Agdolim di baayam moo leen jiite woon.

¹⁵ Leween ña Semaya ma Xasub di baayam bokk na ca, Asrikam ay baayu Xasub; Asabiya di baa yu Asrikam, Buni di baayam Asabiya; ¹⁶ moom la ak Sabtay ak Yosabàdd, di ñaari kilifag Leween yu sasoo liggéeyu kër Yàlla ga, fa féete biti;

¹⁷ ak Mataña ma baayam di Mika. Sabdi mooy baayu Mika; Asaf miy baayu Sabdi moo doon kilifa gay jiite ci cant ak ñaan; ak Bagbukiya miy mbokkum Mataña tey njiit li topp ci moom ak Abda mi Samuya di baayam; Galal di baayu Samuya, Yedutun di baayu Galal. ¹⁸ Mboolem Leween ña dëkkoon ca dëkk bu sell ba ñaar téeméer lañu ak juróom ñett fukk ak ñeent. ¹⁹ Wattukati bunt ya Akub la woon ak Talmon ak seeni bokk. Ñoo doon wattu bunt ya, tollu ci téeméer ak juróom ñaar fukk ak ñaar.

²⁰ Ña des ci bànni Israyil nag, boole ca sarxalkat yaak Leween ña ca des daldi dëkke mboolem dëkki Yuda ya, ku nekk ak fa mu séddoo.

²¹ Ci kaw loolu ña féetewoo liggéey yu sew ya ca kër Yàlla ga dëkk Ofel, Siyxa ak Gisa jiite leen.

²² Kilifag Leween ña ca Yerusalem moo doon Utsi ma Bani di baayam; Xasabiya di baayu Bani, Mataña di baayu Xasabiya, Mika di baayu Mataña. Utsi bokkoon ci ñi askanoo ci Asaf te doonoon woykat yay woy ca kër Yàlla ga. ²³ Woykat ya sax ña nga nekkoon ca ndigalal Buur lu leen di dogalal la leen war bés bu nekk.

²⁴ Petaya ma baayam di Mesesabel mu bokk ci askanu Sera doomu Yuda moom la Buur dènkoon mboolem mbir yi soxal mboooloo mi.

²⁵ Ci wàllu dëkk yu ndaw yeek seeni àll nag am na waa kër Yuda yu dëkke woon Kiryaat Arba ak dëkk-dëkkaan ya ko wër, am ñu ca dëkke Dibon ak la ko wër, am ñu dëkke Yekabseel ak gox ya ko wër; ²⁶ am ñu dëkke Yeswa ak Molada ak Bet Pelet; ²⁷ ak Accar Suwal ak Beerseba ak la ko wër. ²⁸ Mu am ñu dëkke Ciglaag ak Mekona ak la ko wër; ²⁹ ak En Rimon ak Sora ak Yarmut; ³⁰ ak Sanowa ak Adulam ak gox ya ko wër ak Lakis aki àllam ak Aseka ak la ko wër. Noonu ñu dëkke la dale Beer Seba ba ca xuru Inom.

³¹ Noonu waa giirug Beñamin dëkke la dale Geba ak Migmas, boole ca Aya ak Betel ak la ko wër. ³² Mu am ñu ca dëkke Anatot ak Nob ak Anaña; ³³ ak Accor ak Raama ak Gitayim; ³⁴ ak Adit ak Seboyim ak Nebalat; ³⁵ ak Lot ak Ono ca xuru liggéeykat ya. ³⁶ Am na nag ay kuréli Yudeen ñu bàyyikoo Yuda sancí ca waa giirug Beñamin.

12

Ñii ñooy Leween ñeek sarxalkat yi jékka ñibbsi

¹ Sarxalkat yaak Leween ña ñibbsi, ànd ak Sorobabel doomu Selcel, ak Yosuwé sarxalkat bu mag ba, ñii la:

Seraya ak Yeremi ak Esra ² ak Amarya ak Malug ak Atus ³ ak Sekaňa ak Reyum ak Meremot ⁴ ak Ido ak Gintoy ak Abya ⁵ ak Miyamin ak Maadiya ak Bilga ⁶ ak Semaya ak Yowarib ak Yedaya ⁷ ak Salu ak Amog ak Ilkiya ak Yedaya. Nōoñooy kilifay sarxalkat yeek seeni bokk ca jamonoy Yosuwe.

⁸ Leween ñi ñoo doon Yeswa ak Binuy ak Kadmiyel ak Serebya ak Yuda ak Mataña may jiite jàngi cant ya, mooki bokkam. ⁹ Bagbukiya ak Uni ak seeni bokk janook ñoom ca liggéey ba.

¹⁰ Yosuwe, sarxalkat bu mag ba mooy baayu Yowakim. Yowakim di baayu Elyasib, Elyasib di baayu Yowada, ¹¹ Yowada mooy baayu Yonatan, Yonatan di baayu Yaduwa.

¹² Ca jamonoy Yowakim sarxalkat bu mag ba, ña jiite woon kër sarxalkat ya ñii la: Meraya ma bawoo ca waa kër Seraya ak Anaňa bawoo ca waa kër Yeremi, ¹³ Mesulam bawoo ca waa kër Esra, Yowanan bawoo ca waa kër Amarya, ¹⁴ Yonatan bawoo ca waa kër Malug, Yusufo bawoo ca waa kër Sebaňa, ¹⁵ Adna bawoo ca waa kër Arim, Elkay bawoo ca waa kër Merayot, ¹⁶ Sàkkaryaa bawoo ca waa kër Ido, Mesulam bawoo ca waa kër Ginton, ¹⁷ Sikkri bawoo ca waa kër Abya. Mu am ñu jóge ca waa kër Miñamin. Piltay bawoo ca waa kër Mowadiya, ¹⁸ Samwa bawoo ca waa kër Bilga, Yonatan bawoo ca waa kër Semaya, ¹⁹ Matenay bawoo ca waa kër Yowarib, Usi bawoo ca waa kër Yedaya, ²⁰ Kalay bawoo ca waa kër Salu, Eber bawoo ca waa kër Amog, ²¹ Asabya bawoo ca waa kër Ilkiya, Netanel bawoo ca waa kër Yedaya.

²² Ca janti sarxalkat yu mag ya, Elyasib ak Yowada ak Yowanan ak Yaduwa, ku nekk ak jamonoom, ña jiite woon keri Leween ña ak sarxalkat ya, bindoon nañu leen ci biir nguug Daryus buuru Pers. ²³ Ña jiite woon seeni kër baay te askanoo ci Lewi, ba ca jamonoy Yonanan sëtub Elyasib daan nañu leen bind ñoom ñépp ca téere ba ñu dippee Xew-xew ya.

²⁴ Njiiti Leween ñi ñoo doon: Asabya ak Serebya ak Yeswa doomu Kadmiyel, ñook seen bokk ña ñu daan awanteel lãng ak lãng ci jàngi cant, muy la Daawuda góoru Yàlla ga santaane woon. ²⁵ Mataña ak Bagbukiya ak Obadiya ak Mesulam ak Talmon ak Akub ñoo doon fara bunt ya, di wattu néegi dencukaay, ya ca bunt ya.

²⁶ Nōoñoo fa nekkoon ca jamonoy Yowakim doomu Yosuwe. Yosuwe, Yocadag mooy baayam. Nōo fa nekkoon itam ca jamonoy Neyemi boroom dëkk ba, ak Esra ma doon sarxalkat, di bindkat.

Daloo nañu tata ja

²⁷ Gannaaw gi, ca xewu daloog tatay Yerusalem ja, ñu wooye Leween ña mboolem fa ñu dëkke, indi leen Yerusalem, ngir ñu mǎggal daloo ga ci biir mbég ak jàngi cant; tégguum weñ ya jib, ànd ak xeeti xalam. ²⁸ Ci biir loolu ñu indi jàngkat ya ñoom it, boole leen jële ca diiwaan ba wër Yerusalem, ca dëkk yu ndaw ya ca Netofa, ²⁹ ak Bet Gilgal ak diiwaani Geba ak Asmawet. Fekk na jàngkat ya tabax ay dëkk yu ndaw fa wër Yerusalem.

³⁰ Ba loolu amee sarxalkat yaak Leween ña laabal seen bopp, doora laabal mbooloo ma, ak bunt yaak tata ja.

³¹ Ci kaw loolu ma yéegloo njiiti Yudeen ña ca kaw tata ja, daldi sos ñaari kuréli jàngkat yu mag. Genn ga di dox ca kaw tata ja ci wetu ndijoor, wuti buntu Sën ba. ³² Osaya ma nga topp ca seen gannaaw, ànd ak genn-wàllu njiiti Yudeen ña, ³³ ak Asaryaa ak Esra ak Mesulam, ³⁴ ak Yuda ak Beñamin ak Semaya ak Yeremi. ³⁵ Lenni sarxalkat yaa nga ca topp aki liit, di ñi ànd ak Sàkkaryaa doomu Yonatan. Yonatan, Semaya mooy baayam; Semaya, Mataña di baayam, Mikaya mooy baayam; Mikaya, Sakuur ay baayam; Sakuur, Asaf mooy baayam. ³⁶ Sàkkaryaa ànd aki bokkam, ñuy Semaya ak Asarel ak Milalay ak Gilalay ak Maay ak Netanel ak Yuda ak Anani. Ña nga yore ay juntuukaayi xumbéen yu Daawuda, góorug Yàlla ga. Esra bindkat ba moo leen jiite woon. ³⁷ Ñu dikk ba tollook buntu Ndox ma, janook dëggastal, ya jëm ca Kër Daawuda, fa ñuy yéeg jëm ca tata ja tiim kër Buur Daawuda. Ñu jubal nag ba ca buntu Ndox ma, ca penku.

³⁸ Ci biir loolu ñaareelu kuréli jàngkat ya doxe wetu cãmmoñ; man nag, ma topp ca seen gannaaw ca kaw tata ja, ànd ak genn-wàllu mbooloo ma. Nu jaare ca wetu sooroor ba ñuy wax Taal ya, ba fa tata ja yaatoo. ³⁹ Nu romb nag fa tiim buntub Efrayim ak buntu Cosaan ba, ak buntu Jën ya ak soorooru Ananel, wees soorooru Meya, ba àgg ca buntu Gàtt ya. Ña nga taxaw ca buntu Dag ya. ⁴⁰ Ci kaw loolu ñaari kuréli jàngkat ya taxaw ca biir kër Yàlla ga, man itam ma taxaw, maak genn-wàllu mbooloom jawriñ ñi ma àndal, ⁴¹ ak sarxalkat ya, di Elyakim ak Maaseya ak Miñamin ak Mikaya ak Elyonay ak Sàkkaryaa ak Anaňa, ñook seeni liit.

⁴² Maaseya ita nga ca woon ak Semaya ak Elasar ak Usi ak Yowanan ak Malkiya ak Elam ak Eser. Jàngkat ya daldi samp, Israya jiite leen.

⁴³ Sarxe nañu bésub keroog sarax yu réy tey bânneexu, ndax Yàllaa leen may bânneex bu réy. Jigéen ñaak gone ya it di bânneexu, mbégarey Yerusalem di dégtu fu sore.

⁴⁴ Ñu daldi tànn bésub keroog ay nit, dénk leen néegi dencukaay, ya ñuy yeb ay jooxe, ak saraxi ndoortel meñneef, ak céri fukkeel yu ñuy génne. Ñu war caa dajale nag cér ya yoon wi dogalal sarxalkat yeek Leween ñi, te mu jóge ci tool yi wër dëkk yi. Waa Yuda rafetlu ca taxawaayu sarxalkat yaak Leween ña. ⁴⁵ Leween ñaa dénkoo woon seen dénkaneey Yàlla, ak dénkaneey laabal ba, ak jàngkat yaak fara bunt yay topp la Daawuda santaane woon, mook doomam Suleymaan. ⁴⁶ Te naka jekk ca janti Daawuda ak Asaf amoon na ay njiiti jàngkat yuy jiite ay jàngki mággal ak jàngki cant, ñeel Yàlla. ⁴⁷ Ci biir loolu, ca janti Sorobabel ak ca janti Neyemi, askanu Israyil gépp daan nañu génneel jàngkat yeek fara bunt yi seen cér, bés bu nekk it, génneel Leween ñi seen cér, Leween ñi génneel askanu Aaróona seen cér.

13

Neyemi sopparñi na

¹ Bésub keroog jàng nañu ci téereb Musaa, mbooloo ma di dégg. Ñu gis ñu bind ca ne, muy Amoneen, muy Mowabeen, kenn du ci bokk ci ndajem bànni Israyil mu ñuy mággaale Yàlla, ba fàww. ² Li ko waral moo di ñoo bañoona dabe bànni Israyil aw ñam wu ñu lekk ak ndox mu ñu naan, xanaa di fey Balaam, jibar ba, ngir mu rébbal leen leen. Teewul sunu Yàlla soppi rébb ga barke. ³ Naka la mbooloo ma dégg la yoon wa digle, ñu daldi dàqe Israyil mbooloom askan wu raxe.

⁴ Lu jiitu loolu nag tabboon nañu Elyasib, sarxalkat ba, dénk ko sunu néegi dencukaayi kër Yàlla ga. Mu doonoon jegeñaaleb Tobya, ⁵ ba tax Elyasib jël néegu dencukaay bu yaatu, jox ko Tobya. Néeg booba lañu daan denc saraxi pepp yaak cuuraay yaak ndab yaak céri fukkeel ya, muy bele ak biiñ ak diw, te ndigal sédd ko Leween ñeek jàngkat yeek fara bunt yi. Foofu it lañu daan denc jooxe yi ñeel sarxalkat yi. ⁶ Booba yépp nag nekkuma woon Yerusalem, ndax fekkoon na ma dellu ca Artaseres buuru Babilon, ca fanweereelu atu nguuram ak ñaar. Toog naa fa lu yàgg, doora ñaan Buur, ba mu yiwivaat ma. ⁷ Ba ma ággee Yerusalem, ma yég tojaange gi Elyasib defal Tobya, jox ko néeg ca biir èttu kër Yàlla ga. ⁸ Ma ñaawlu ko lool, daldi boole yéfi Tobya, génnee néeg ba, sànni. ⁹ Ci kaw loolu ma santaane ñu laabal néeg ya, ba noppi ma yebaat ca

ndabi kër Yàlla ga ak saraxi pepp yaak cuuraay la.

¹⁰ Ma dégg itam ne joxuñu Leween ñi seeni cér, ba tax ku nekk ci Leween ñaak jàngkati kër Yàlla ga ne coww ca toolu boppam, bàyyi liggéey bi mu sasoo. ¹¹ Ma ñańñ jawriñ yi, ne leen: «Ana lu waral ñuy sàggane kër Yàlla gi?» Ci biir loolu ma woo Leween ñeek jàngkat yi, ñu daje, ma delloo leen ca seeni liggéey. ¹² Ba mu ko defee waa Yuda gépp dellu di indi ca biir néegi dencukaay ya céri fukkeel ya ñuy génne, di pepp ak biiñ aku diw. ¹³ Ba loolu amee ma tabb Seleya sarxalkat ba, ak Cadog bindkat ba, dénk leen dencukaay ya, ñook Pedaya Leween ba; ka leen ciy jàpple di Xanan doomu Sakuur. Sakuur, Mataña mooy baayam. Ñu doonoon nit ñu ñu ràñnee seen maandute, ba sas leen ñuy séddale sarax yi ci seen biir.

¹⁴ Rikk sama Yàlla, bàyyee ma lii xel, te bul far sama jéfi ngor ji ma jéfe ci sama biir kër Yàlla gi aki wartéefam.

¹⁵ Ci fan yooyu ma gis ci Yuda ay nit ñuy nal reseñ, bésub Noflaay. Mu am ñuy indi ay sabaari pepp yu ñuy séf ay mbaam, boole ca biiñ ak reseñ ak figg ak lu nekk, di ko yóbbu Yerusalem ci bésub Noflaay. Ma àrtu leen it ca la ñuy jaay seen yéf yooyu ci boobu bés. ¹⁶ Amoon na itam ay waa Tir yu féete Yerusalem, di fa indi ay jën ak mboolom xeeti njaay, di ko jaay waa Yudad Yerusalem ci bésub Noflaay. ¹⁷ Ma ñańñ kàngami Yuda, ne leen: «Lu ñaaw lii ngeen di def nag di teddadil bésub Noflaay?» ¹⁸ Xanaa du nii la seen maam ya daan def, ba tax sunu Yàlla wàcce ci sunu kaw musiba mii mépp, wàcce ko ci dëkk bii, yeen ngeen di wooti sànjum Yàlla ci kaw Israyil, di teddadil bésub Noflaay?»

¹⁹ Ci kaw loolu, balaa bésub Noflaay biy duggisi, bu bunti Yerusalem tàmbalee keppaaral ci ngoon si rekk, ma santaane ñu tëj, baña ubbeeti, ba bésub Noflaay bi wees. Ci biir loolu ma tànn ci samay nit, taxawal leen ca bunt ya, ngir ñu baña dugal ay séf bésub Noflaay. ²⁰ Ba mu ko defee jula yu mag yaak ñay jaayaatu lu nekk, fanaan benn yoon ba ñaar ca bitil. ²¹ Ma àrtu leen, ne leen: «Ana lu waral ngeen di fanaan ci taatu tatay dëkk bi? Bu ngeen ko defatee, dinaa leen teg loxo!» Booba lañu noppee dikk bésub Noflaay. ²² Ma sant it Leween ñi ñu laabal seen bopp te dem wattuji bunt ya, ngir sellal bésub Noflaay.

Ngalla sama Yàlla, bàyyee ma lii xel itam te yéréme ma sa ngor lu bare.

²³ Ma gisati ci jamono yooyu ay Yudeen ñu jël jabar ci waa Asdodd ak Amon ak Mowab. ²⁴ Seen genn-wàlli njaboot di làkk asdodd, ña ca des di làkk leneen

ci lãmmiñi doxandéem yi, te kenn ci ñoom manula wax yawut. ²⁵ Ma ñàññ leen, móolu leen, dóor ñenn ci ñoom, xuuf seen kawat, giñloo leen ci Yàlla ne dootuñu may seen doom yu jigéen ay doxandéem te dootuñu ci jëlal jabar seeni doom mbaa seen bopp. ²⁶ Ma ne leen: «Xanaa du nii la Suleymaan buurub Israyil bàkkaare woon? Li xeet yiy bare lépp amul benn buur bu meloon ni moom. Ku Yàllaam soppoon la te Yàllaa ko faloon buurub Israyil gépp. Waaye moom sax jigéeni doxandéem yi bàkkaarloo nañu ko. ²⁷ Bëggatunoo dégg ngeen di def gii ñaawtéef gu réy, bay ñàkke sunu Yàlla kóllère, di jël ay doxandéem jabar.» ²⁸ Fekk na kenn ci doomi Yowada doomu sarxalkat bu mag ba Elyasib sax, jël doomu Sanbalat mu Oron. Teewul ma dàq waa ji, mu daw ba sore ma.

²⁹ Ngalla sama Yàlla, bàyyil xel mbugal mu ñeel ñii teddadil liggéeyu carxal, fecci worma sasu carxal ak xeetu Leween.

³⁰ Ma laabal leen nag, ñu teqlikook lu bokk cig ndoxandéem, ba noppi sas sarxalkat yeek Leween ñi, ku nekk ca liggéeyam. ³¹ Ma dekkal saraxu matt yi ñu wara joxe bu àppam jotee, ak saraxi ndoortel meññeef.

Ngalla sama Yàlla, bàyyee ma lii xel ngir ngéneel.

Esteer

Buur Aserus a ngi xawaare

¹ Lii mu ngi amoon ci jamonoy Aserus*. Mooy Aserus ma falu woon, jiite tééméeri diiwaan ak ñaar fukk ak juróom ñaar, dale ko ca End ga woon, ba ca réewum Kuus. ² Jamono yooyu Buur Aserus moo toogoon ca jal ba ca Sus, péey ba†. ³ Ci ñetteelu atu nguuram mu maye bernde, ñeel kàngamam yépp ak jawriñam yépp, di ñjiiti xarey diiwaanu Pers ak diiwaanu Medd, garmi yeek kàngami dëkk yi bokk teew. ⁴ Ci diir bu takku, tollook tééméeri fan ak juróom ñiett fukk (180), mu di leen won alalu nguuram ju yéeme ak dayoom ak darajaam ju réy. ⁵ Ba fan yooyu matee, buur ba maye berndey juróom ñaari fan ci biir tóokéram, ñeel mboolem ña nekkoon ca Sus, péey ba, ka gëna magg ba ca ka gëna tuut. ⁶ Ay ndimoy wëñ gu èccu gu weex ak gu baxaa nga wékke ca buumi lée yu weex ak yu xonq curr, takke ci ay jaaroy xaalis yu wewe ci ay jën yu ñu tabaxe doju màrb. Ay lali wurus ak xaalis a nga tege fa suuf, sa ñu dëre doj yu gànjare: yu màrb ak yu pere ak yu ñuul. ⁷ Ña ngay maye naan ci ay kaasi wurus, bu ci nekk wuuteek moroom ma na mu bindoo. Biiñu buur di walangaan ni loxol Buur. ⁸ Kenn gawuloon kenn nag ci naan gi, ndax Buur joxoon na ndigal farbay kërám yépp, ne leen ñu topp ku nekk ci coobareem. ⁹ Ci biir loolu Lingeer Wasti moom it maye bernde ñeel jigéeni kër Buur Aserus.

¹⁰ Keroog bésub juróom ñaareel ba Buur Aserus naan biiñ, ba xolam seddl, mu sant juróom ñaari bèkk-néegam‡: Meyuman ak Bista ak Arbona ak Bigta ak Abagta ak Setar ak Karkas, ne leen ¹¹ ñu indil ko Lingeer Wasti, mu sol mbaxanam lingeeram, ngir won taaram ba nit ñaak kàngam ya, ndax jigéen ju rafetoon la. ¹² Teewul ba bèkk-néeg ya yeggee Lingeer Wasti ndigalal Buur, mu lánk, ne du ñew. Buur nag mer lool, ba xol bay bax. ¹³ Booba mboolem mbirum buur, xamkati jamono ya ci wällu yoon ak àtteb yoon lees koy diis. ¹⁴ Ña ca gënoona jege Buur di Karsena ak Setar ak Admata ak Tarsis ak Meres ak Marsena ak Memukan, ñuy juróom ñaari kàngami diiwaanu Pers ak Medd, di bokk ak Buur jataay te gëna kawe ca nguur ga. ¹⁵ Mu ne leen: «Ci yoon, ana lu war ci Lingeer Wasti, gannaaw déggul

ndigal li ma joxe, man, Buur Aserus, samay bèkk-néeg jottli ko ko?»

¹⁶ Memukan wax ca kanam Buur ak kàngam ya, ne leen: «Du Buur donj la Lingeer Wasti tooñ. Waaye tooñ na mboolem kàngam yi ak mboolem baadoolo yi ci mboolem diiwaan yi. ¹⁷ Nde jëfi lingeer jii dina yegg ci noppi jigéen ñépp, ba tax ñuy sofental seen jëkkër. Ndax dañu naan: “Xanaa Buur Aserus woowul Lingeer Wasti, mu lánk, ne du ñew?” ¹⁸ Li ko dale bésub tey, kuy garmi bu jigéen ci Pers ak Medd, bu déggee jëfi lingeer jii, noonu lay waxeek mboolem kàngami buur, mu indi yabeel ak réeroo bu dul jeex. ¹⁹ Kon nag Buur, ndegam soob na la, na ab dogal tukkee fi yaw, ñu bind ko ci ndigali yooni Pers ak Medd, yi dul toxu, di xamle ne Wasti dootu jàkkaarlooteek Buur Aserus. Te Buur, dangay nangu céru lingeeram, jox ko moroomam mu ko gën. ²⁰ Su ko defee bu ñu yéenee dogalu buur bi ci mboolem dëndu buur bu yaatu bii, jigéen ñépp dinañu weg seen jëkkër, boroom daraja ba ci baadoolo bi.»

²¹ Loolu nag neex Buur ak kàngam ya. Buur nag def la ko Memukan wax. ²² Ba mu ko defee mu yónnee ay bataaxal fépp ca réew ma, diiwaan bu nekk ak mbindum boppam, waaso wu nekk it ci lækku boppam. Mu biralal waaso wu nekk ci lækku boppam, ne leen na góor gu nekk doon kilifay kërám.

2

Buur Aserus wutal na Wasti kuutaay

¹ Gannaaw ba mbir yooyu amee, ba merum Buur Aserus giif, xelam dem ca Wasti ak la mu def ak la mu dogal ca moom. ² Ba loolu amee surgay buur yi koy topptoo ne ko: «Nañu la seetal ci janq ju rafet ji. ³ Buur, dangay yónnee ay ndaw ci sa mboolem diiwaani réew mi, ñu dajaleel la mboolem janq ju rafet ji, indi leen fii ci Sus, péey bi, dugal leen ci kër jigéen ñi, ñu teg leen ci loxol Ege, sa bèkk-néeg biy wattu jigéen ñi. Ñu jox leen lu ñuy defaroo ba rafet. ⁴ Su ko defee nag Buur, janq bu la ci neex doon lingeer, wutu Wasti.» Buur rafetlu la ñu wax, daldi def noona.

⁵ Fekk na jenn waayi Yawut a ngi ci Sus, péey ba. Ma nga tudd Mardose. Yayir di baayam. Yayir, Simey ay baayam. Simey, Kis ay baayam, bokk ci giirug Beñamin. ⁶ Mu askanoo ca ngallo ga Nabukodonosor buuru Babilon jële woon Yerusalem, boole leen ak Yekoña* buurub Yuda. ⁷ Mardose yoroon ku ñuy wax Adasa, muy Esteer

* 1:1 1.1 Aserus dees na ko wooye Serses itam. † 1:2 1.2 Sus, péey ba, walla Sus dëkk ba ñu dabbli. ‡ 1:10 1.10 bèkk-néeg yooyu, ay jaam yu ñu tàpp lañuy doon. * 2:6 2.6 Yekoña ak Yowakin kenn ki la.

ba tey, di doomu baayam bu ndaw, ndax amuloon ndey, amuloon baay. Xale bi nag rafet, jekk bind. Ba ndeyam ak baayam deeyee, Mardosee ko jël, yar ko ni doomam.

⁸ Gannaaw ba ñu yéenee ndigalu Buur ak dogalam ba, ñu dajale janq ju bare ca Sus, péey ba, teg leen ca loxol Ege. Noonu lañu indaalee Ester, ba ca kër Buur, teg ko ci loxol Ege may wattu jigéen ña. ⁹ Xale bi neex Ege, mu baaxe ko, gaaw indil ko lu mu defaroo, naddil ko ag lekkam, féetale ko juróom ñaari surga yu jigéen yu ñu tãne kër Buur. Ci kaw loolu mu dalal Ester mooki surgaam fa gën ca kër jigéen ña. ¹⁰ Fekk na Ester waxul askan wa mu bokk ak kër ga mu fekk baax, ndax Mardose da koo santoon ne ko bumu ko wax. ¹¹ Bés bu nekk nag Mardose doxantoo fa kanam kër jigéen ña, ngir xam lu Ester nekke ak nu ñu def ak moom.

¹² Booba bala ayu kenn ci xale yu jigéen ñiy agsi, ba muy dem ca Buur Aserus, day fekk mu matal fukki weer ak yaar yi ñu appal jigéen ñi, ngir ñu yokk ci seen taar. Juróom benni weer yi, ñu di leen diw ndább lu ñuy wax miir; juróom benni weer yi ci des, ñu di leen diw ay diw yu xeeñ ak yeneen yu jigéen ñiy defaroo. ¹³ Ni ndaw siy deme ca Buur nag nii la. Mboolem lu mu bëgg, dees ko koy jox, mu jële ko ca kër jigéen ña, yóbbaaale kër buur. ¹⁴ Bu ngoonee mu dem ca Buur, bu bët setee mu dellu kër jigéen ña, ca geneen wälla ci njiital Sasgas, bëkk-néeg bay wattu nekkaaley buur. Su ko defee ndaw sa du dellooti ca Buur lu moy ndaw si neex ko, mu ne: «Wool-leen ma diw.»

¹⁵ Ba loolu amee muy ayu Ester doomu Abyel, baayu Mardose bu ndaw, janq ba mu yaral boppam ni doomam. Mu wara dem ca Buur, te laajul dara lu moy la ko Ege bëkk-néegu buur bay wattu jigéen ña, sant. Mboolem ku gis Ester nag, xool ko bëtu yiw. ¹⁶ Ñu yóbbu Ester ca Buur Aserus, ca biir kërám, ca fukkeelu weer wa ñuy wax Tebet, ca juróom ñaareelu atu nguuram. ¹⁷ Ci kaw loolu Buur gëna bëgg Ester ci jigéen ñépp. Mu gëna baaxe Ester, gën koo sopp janq jépp. Ba mu ko defee mu solal ko mbaxanam lingeer, fal ko lingeer, mu wuutu Wasti. ¹⁸ Buur def bernde ju réy ngir mboolemi kàngamam aki jawriñam, terale ko Ester; daldi noppal diiwaan yi, teg ca naddil nit ñi ni mu ware buur.

¹⁹ Ba ñu dajalewaatee janq ja ñaareel bi yoon, fekk na Mardose am ndombol tànk ca buntu kër buur. ²⁰ Booba Ester waxul ba tey fa mu fekk baax ak fa mu bokk, muy la ko Mardose santoon. Ester wéye topp ndigali Mardose rekk, mel ni ba mu ko yoree ca kërám.

Pexe moy na

²¹ Jamono yooyu Mardose amee ndombol tànk ca buntu kër buur, ku ñuy wax Bigtan ak ku ñuy wax Teres, di ñaari fara buntu kër buur, ñoo am lu ñu meree lool Buur Aserus, bay lal pexe mu ñu ko bóome. ²² Teewul Mardose yég pexe ma, wax ko Lingeer Ester, mu yegge ko Buur, ci turu Mardose. ²³ Ba ñu seetloo mbir ma ba muy dëgg, dañu leena wékk ñoom ñaar ci bant†. Bindees na ko ci teewaayu Buur ci téere ba nu dippee Xew-xew ya.

3

Pexem sànk Yawut yi lale na

¹ Gannaaw ba xew-xew yooyu jállee, Buur Aserus teral ku ñuy wax Aman doomu Amdeta mi askanoo ci Agag*, yékkati ko, teg ko ci kaw mboolem kàngam yi ci wetam. ² Mboolem jawriñi buur yi féete buntu kër buur nag di sukkal Aman, di ko sujjóotal, ndax loolu la Buur santaane woon ci moom. Teewul Mardose länk, sukkal ko, sujjóotalu ko. ³ Yeneen jawriñi buur ya ca buntu kër buur wax Mardose ne ko: «Ana lu waral ngay gántal santaane Buur?» ⁴ Ñu di ko ko wax bés bu jot, mu länk, déggalu leen. Ñu wax ko Aman, di seet ba xam ndax la Mardose wax dina ca mujj. Fekk na mu wax leen ne moom Yawut la. ⁵ Ba Aman gisee ne Mardose du ko sukkal, du ko sujjóotal, daa mer ba fees dell. ⁶ Teewul mu siide fexeel Mardose donj, ndax booba waxoon nañu ko askan wi Mardose bokk. Ba loolu amee Aman di wuta sànk mboolem Yawut yi nekk ci mboolem réewum Aserus, di bokki Mardose. ⁷ Ca fukkeelu at maak ñaar ci nguurug Buur Aserus, ca weer wa jiitu, di weeru Nisan, ñu sànni ci kanam Aman juntuukaayu tegtal bi ñuy wax Pur, ngir seet bés bu baax ak weer wa, ci pexe ya mu nas. Ñu seet, mu yemook weeru Adar, di fukkeelu weer waak yaar.

⁸ Aman wax Buur Aserus ne ko: «Aw xeet a ngi fi, tasaaroo ci biir xeet yi, jax-asoo ci seen biir, ci mboolem sa diiwaani réew mi. Seeni aada daa wuuteek yu xeet yépp; yoon yi Buur téral, dañu ko jéfe, te jaaduwwul ci Buur mu di leen seetaan.

† 2:23 2.23 Jombul dañu leen daan rey ba noppi wékk seeni néew ci bant. * 3:1 3.1 Agag: Amalegeen ñi Buur Agag askanoo, ñook bànni Israyil, seenug noonoo cossaan la. Seetal ci *Mucc ga* 17.8-16 ak 1. *Samiyel* 15.

⁹ Ndegam neex na la, Buur, bindal ab dogal bu leen sànklu. Kon ñetti junniy barigoy xaalis laay teg ci loxoy saytukat yi, ñu yeb ko ci dencu buur.» ¹⁰ Ba mu ko defee Buur tekki jaarob torlukaayam ci baaraamam, jox ko Aman doomu Amdeta ma askanoo ca Agag, noonub Yawut ya. ¹¹ Buur ne Aman: «Xaalis bi téye ko, te xeet woowu nga def leen li la soob.»

¹² Gannaaw loolu ñu woolu bindkati buur ca weer wa jëkk ca at ma, yemook fukki fan ak ñett. Ñu bind ci bindinu diiwaan bu nekk, ak ci lakku xeet wu nekk mboolem lu Aman digle, mu jëm ca jawriñi buur ak boroom dëkk yaak kàngami xeetoo xeet. Ci turu Aserus lañu bind bataaxal yi, tay ko, mu ànd ak torlub buur. ¹³ Ñu daldi koy yónee, ay ndaw yóbbu ko ca mboolem diiwaani buur, ngir ñu sànk mboolem Yawut yi, rey leen, faagaagal leen, mag ak ndaw ba ca tuut-tànk yaak jigéen ña ci benn bés, mu yemook fukki fan ak ñett ci weeru Adar, di fukkeelu weer waak yaar. Seen alal it, ñu war koo lël. ¹⁴ Ba loolu amee ñu sotti dogal ba ñu bind, def ko ndigalu yoon, siiwal ko ci mboolem diiwaan, xamal ko xeet yépp, ngir ñu séentu bés booba.

¹⁵ Ndaw ya gaaw dem ci ndigalal buur, ñu biral dogal ba ca Sus, péey ba. Buur a nga toog ak Aman, di naan, waa Sus nekk ci njàqare.

4

Mardose lal na pexem muc

¹ Ba Mardose yégee la ñu def lépp, daa xottiy yéreem, sol ay saaku, sottikoo dóom, di ko ñaawloo, dugg ci biir dëkk bi, di yuuxu yuux gu réy te metti. ² Mu dem ba ca buntu kër buur, yem fa ndax deesul dugge kër buur yérey saaku. ³ Ci biir loolu mboolem diiwaani réew mi, fépp fu dogalu buur ak ndigalam àgg, muy ñaawlu gu réy ca Yawut ya. Ñu boole kook koor aki jooy aki yuux. Ñu bare sol ay saaku, sottikoo dóom, di ko toroxloo.

⁴ Ba surgay Ester yu jigéen yaak bëkk-néegam yu góor ya dikkee wax ko Ester, tiislu na ko lool, daldi yónee Mardose ay yérey, ngir mu summi saaku ya mu sol. Waaye Mardose nanguwul. ⁵ Ester woolu Atag, ma Buur féetaleek moom, te muy kenn ci bëkk-néegi buur. Mu yebal ko ci Mardose, ngir xam lan la ak lu waral loolu. ⁶ Atag dem ba ca Mardose, ca pénc ma janook buntu kër buur. ⁷ Mardose wax ko mboolem la ko dal, ak dayob xaalis ba Aman digee fey, nar koo def ca denci buur ngir mana sànk Yawut yi. ⁸ Mu jël sottib mbindum dogal ba ñu yéene ca Sus ne dinañu leen faagaagal, daldi ko koy jox,

ngir mu won ko Ester, xamal ko ko, ne ko mu gaaw dem ca Buur, ñaanal ko ko, tinul ko aw xeetam. ⁹ Atag dellu ca Ester, yegge ko kàdduy Mardose. ¹⁰ Ester ne Atag mu dem wax Mardose, ne ko: ¹¹ «Mboolem surgay buur ak waa diiwaani buur xam nañu ne yoon a toppe àtteb dee képp ku dugg kër buur, ba ci èttu biiram, muy góor mbaa jigéen, te wooyeesu la. Xanaa ku buur tállal yetu wurus wiy màndargaal nguuram. Man nag fanweeri fan a ngii wooyeesu ma fa Buur.» ¹² Ñu yegge Mardose kàdduy Ester; ¹³ Mardose dellu yónee ne ko: «Aay! Yaa ngi kër buur de! Waaye bul defe ne man nga muc, yaw donj, ci mboolem Yawut yi. ¹⁴ Ndax soo ci selanjoo ba selanjlu ci tey jii it, wall ak xettal dina bawoo feneen ñeel Yawut yi, waaye yaw yaak sa waa kër baay dingeen sànklu. Li nga dugg ci nguur gi sax, nga defe ne neen la? Jombul diggante bii nu tollu tey moo ko waral.» ¹⁵ Ester dellu yónee ca Mardose, ne ko: ¹⁶ «Demal woo mboolem Yawut yi, ci Sus, ñu daje. Te ngeen wooral ma: buleen lekk, buleen naan diiru ñetti fan, du guddi, du bëccég. Man it maak sama surga yu jigéen, nu woore noonu. Su ko defee ma dem ca Buur doonte yoon nanguwu ko. Su ma dee dee, ma dee rekk.» ¹⁷ Mardose nag dem, def la ko Ester sant lépp.

5

Ester woote na bernde

¹ Ba mu amee ñetti fan Ester sol yérey lingeer, taxaw fa janook kër buur ca èttu biiram, fekk Buur toog ca ngànguneem, ca biir néegam, janook buntu kër ga. ² Ba mu ko defee Buur gis Lingeer Ester, mu taxaw ca biir ètt ba. Mu baaxe ko, daldi koy tállal yetu wurus wa muy màndargaale nguuram. Ester jegesi, laal boppu yet wa, di ko ko sante. ³ Buur ne ko: «Lingeer Ester, lan la, ak looy sàkku? Su doon genn-wàllu nguur gi sax, dees na la ko jox!» ⁴ Ester ne ko: «Ngalla Buur, bu la soobee, ñewal yaak Aman ci bernde ji may woote tey.» ⁵ Buur ne: «Wool-leen ma Aman léegi, nu defal Ester li muy ñaan.» Ba loolu amee Buur ànd ak Aman dem ca bernde ja Ester woote. ⁶ Naka lañuy naan biiñ, Buur ne Ester: «Ana looy laaj, ñu jox la ko, ana looy sàkku, ba ci genn-wàllu réew mi, ñu defal la ko.» ⁷ Ester wax ko ne ko: «Li may ñaan, di ko sàkku de, ⁸ Buur, ndegam yéwéne nga ma, te may ma li may ñaan, defal ma li may sàkku di sa coobare, ngalla, Buur, àndal ak Aman, dikk ca bernde ja ma leen di waajjal. Kon bu subaa dinaa la wax li ngay laaj.»

Aman jógal na Mardose

⁹ Aman a ngay génn di dem, bésub keroog ànd ak mbégte, xol bay neex. Ba mu gisee Mardose ca buntu kër buur nag, te Mardose jógul, amul benn tiitaange ci moom, daa mer ba fees dell. ¹⁰ Terewul Aman ànd ak sagoom, ñibbi kërám. Ci kaw loolu mu yónnee, woolu ay xaritam ak Seres jabaram. ¹¹ Ba loolu amee Aman di leen limal alalam ju bare ak doomam yu góor yu bare ak mboolem ni ko Buur terale, yékkati ko, mu gëna kawe ci kàngami buur aki jawriñam. ¹² Aman teg ca ne: «Te kat amul ku Lingeer Esteer woo, mu wara ànd ak Buur ca bernde ja muy def, ku moy man. Èllég man la woo maak Buur. ¹³ Waaye loolu lépp doyu ma, li feek maa ngi gis benn yoon Mardose, Yawut bi, mu toog ca buntu kër buur.» ¹⁴ Seres jabaram ak xaritam ya yépp ne ko: «Dangay defarlu bant bu am taxawaayu ñaar fukki meetar ak juróom. Bu subaa nga ne Buur ñu wékk ci Mardose, ba noppi nga ànd ak Buur ca bernde ja, sa xol sedd.» Aman nag rafetlu xel ma, ba defarlu bant ba.

6

Aman am na mbetteel

¹ Guddig keroog Buur tëlee nelaw, daldi santaane ñu indil ko téere ba ñu dippee Xew-xew ya. Ci kaw loolu ñu di ko jàngal Buur. ² Ca lañu gis ñu bind ca ne Mardose moo boole woon Bigtan ak Teres, ñaari fara buntu kër buur ya laloon pexe ngir bóom Buur Aserus. ³ Buur ne: «Ana teraangaak njukkál lu ñu defal Mardose ci lii?» Surga ya ne ko: «Dara.» ⁴ Buur ne: «Ku nekk ci ètt bi?» Mu yemook Aman duggsi ci èttu buur, ba féete biti, ngir waxsi ko, ne ko ñu wékk Mardose ca bant ba mu ko waajalal. ⁵ Surga ya ne ko: «Aman déy a taxaw ci ètt bi.» Buur ne: «Na agsi!» ⁶ Aman duggsi, Buur ne ko: «Ana lees di defal waa ju buur namma teral a waay?» Booba Aman a nga naan ca xel ma: «Ana ku Buur namma teral ku dul man mii?» ⁷ Mu ne Buur: «Waa ji Buur namma teral déy, ⁸ nañu ko indil mbubbum buur mu Buur masa sol ak fas wu Buur masa war, ñu solal fas wi mbaxanam nguur. ⁹ Nañu jox mbubb meek fas wi kenn ci ñi gëna mágg ci jawriñi buur. Ñu solal waa ji Buur namma teral, waral ko fas wi, wërále ko pénc mi, ñu jiitu ko, di yéene naan: «Lii lees di defal waa ju Buur namma teral!» ¹⁰ Buur ne Aman: «Doxal jël mbubb meek fas wi, li nga wax rekk, te nga defal ko Mardose, Yawut biy toog ca buntu kër buur. Bul bëyyi dara ci mboolem li nga wax.»

¹¹ Ci kaw loolu Aman jëli mbubb maak fas wa, solal Mardose, waral ko, jiitu ko, di ko wërál pénc mi, tey yéene naan: «Lii lees di defal waa ju Buur namma teral!» ¹² Gannaaw loolu Mardose dellu ca buntu kër buur. Aman nag muuru, daw ñibbi kërám, ànd aku naqar. ¹³ Ba mu ko defee Aman nettali Seres jabaram ak ay xaritam la ko dal lépp. Ña koy xelal ak jabaram bokk ne ko: «Mardose mii nga tãmbalee torox ci kanamam, ndegam ab Yawut la de, du lenn loo koy manal. Dangay xala daanu rekk ci kanamam.» ¹⁴ Naka lañuy wax ak moom, ndawi buur ne jalañ, daldi gaaw yóbbu Aman ca bernde ja Esteer di waajal.

7

Yéene néeg la

¹ Ba loolu amee Buur ànd ak Aman dem ca berndey Lingeer Esteer. ² Ñu dem bay naan biiñ ca bésub ñaareel booba, Buur dellu ne: «Lingeer Esteer, ana looy ñaan, ñu may la ko. Looy sàkku? Ba ci genn-wàllu réew mi sax, ñu defal la ko.» ³ Lingeer Esteer àddu ne ko: «Buur, ndegam xool nga ma bëtu yiw te neex na la, may ma, ma mucç maak samaw xeet; moom laay ñaan te moom laay sàkku. ⁴ Ndax dañu noo fexeel maak samaw xeet, nar noo sànk, bóom nu, faagaagal nu. Su doon ay jaam yu góor ak yu jigéen sax lañu nuy fexee def, dama naan cell, ndax njàqare ju ni tollu sax jarul ñuy lèjal Buur.» ⁵ Buur Aserus wax ak Lingeer Esteer ne ko: «Kooku ku mu? Ana kuy mébét loolu, nar koo def?» ⁶ Esteer ne ko: «Waa ji nuy fexeel, di bañ, dib noon de, Aman mu bon mii la!» Aman nag tiit lool fa kanam Buur ak Lingeer. ⁷ Buur ne ñokket, mer ba fees, bëyyi fa biiñ ba, dugg ca biir tóokëram. Aman moom, des fa, di tinu Lingeer Esteer ngir bakkanu boppam, ndax booba xam na ne su dee Buur rekk, njekkaram taxaw na. ⁸ Ci kaw loolu Buur bëyyikoo ca tóokër ba, délsi ca èttu bernde ja, fekk Aman di sukk ca lal ba Esteer tédd. Buur ne: «Áa! Ba ci yekktaan Lingeer nag, te ma nekk ci biir kër gi?» ⁹ Naka la kàddu ga jibe ca gémmini Buur, ñu muur kanamu Aman, màndargaale ko àtteb deeyam. Ci biir loolu Arbona kenn ci bëkk-néegi buur ne: «Te kat bant bu épp ñaar fukki meetar ak nga sampe ca wetu kër Aman, di xaar Mardose mi waxoon jàmmi Buur.» Buur ne: «Wékkleen ko ca!» ¹⁰ Ba mu ko defee ñu wékk Aman ca bant ba mu waajaloon Mardose. Merum Buur doora giif.

8

Mardose falu, Yawut ya mucç

¹ Gannaaw loolu Buur Aserus jox bésub keroog Lingeer Esteer kër Aman, fitnaalkatu Yawut ya. Ñu woo Mardose ca Buur, ndax fekk na Esteer xamle ba noppi na Mardose bokkeek moom. ² Buur nag tekki jaarob torlukaayam ba mu nangoo ca Aman, jox ko Mardose. Esteer daldi teg kër Aman ci loxol Mardose, mu di ko saytu.

³ Esteer daldi dellu wax ak Buur, ne gurub cay tãnkam, jooy, tinu ko, ne ko mu fanq musiba mi Aman Agageen ba sooke ak pexe mi mu lalaloon Yawut yi. ⁴ Ci kaw loolu Buur tállal Esteer yetu wurus wa, Esteer jóg taxaw ca kanam Buur. ⁵ Mu ne: «Buur, ndegam neex na la, te xool nga ma bētu yiw, ndegam jaadu na ci yaw, te ma saf la, bindlul ndigal luy neenal bataaxal yi sosoo ci Aman Agageen ba, doomu Amdeta. Mu bindoon ko ngir faagaagal Yawut yi ci mboolem diiwaani buur. ⁶ Ana nu ma mana seetaane musiba di dal samaw xeet ak nu ma mana seetaane ñuy sànk samay bokk?» ⁷ Buur Aserus wax ak Lingeer Esteer ak Mardose Yawut ba, ne leen: «Ma ne, kër Aman jox naa ko Esteer; Aman, ma wékklu ko ca bant ba, ndax li mu dal ci kaw Yawut yi. ⁸ Yeen ci seen wàllu bopp nag, bindleen ci Yawut yi lu leen soob ci sama tur, man Buur. Tayleen ko, torloo ko sama jaaro. Ndax mbind mu ñu bind ci turu buur, tay ko, torloo ko jaarob buur, maneesu koo toxal.»

⁹ Ci kaw loolu ñu woo bindkati buur ca bés ba, di ñaar fukki fan ak ñett ca weeru Siwan, ñetteelu weer wa. Ñu daldi bind mboolem lu Mardose santaane, ca mbirum Yawut yaak jawriñ yaak boroom dëkk yaak kàngami diiwaan ya, dale ko ca End ba ca Kuus. Muy téeméeri diiwaan ak ñaar fuk ak juróom ñaar (127). Ñu bind ndigal ya ci mbindum diiwaan bu nekk ak ci lakku xeet wu nekk, Yawut ya it ak seen mbindu bopp ak seen lakku bopp. ¹⁰ Mardose bind ci turu Buur Aserus, tay bataaxal yi, torloo ko jaarob buur, yóbbante ko ay gawar yu war dawkatu naari góor yu ñu tãnn. ¹¹ Ñu bind ca bataaxal ya, ne Buur may na Yawut yi ci dëkkoo dëkk sañ-sañu taxawandoo, aar seen bopp. Sañ nañoo tas mbooloo mu leen mana song, ak xeet wu ñu bokk mbaa diiwaan bu ñu bawoo. Nañu sànk woowu xeet, rey leen, faagaagal leen ñook seeni jabar ak seeni doom, boole ca lël seen alal. ¹² Bés ba ñu mayee loolu ci mboolem diiwaani Buur Aserus di fukki fan ak ñett ci weeru Adar, fukkeelu weer waak ñaar. ¹³ Ñu wara siiwal ab sottib bataaxal ba, muy ndigalu yoon ci diiwaanoo diiwaan, biralal ko mboolem xeet yi, ngir bésub

keroog Yawut yi taxaw temm, feyoonteek seeni noon. ¹⁴ Ndaw ya war fasi buur yu diy dawkat, ñu saqi, gaaw, rëptal ci ndigalu buur. Ñu siiwal nag dogal ba ca Sus, péey ba.

¹⁵ Ba mu ko defee Mardose bàyyikoo ca Buur; ma nga sol yérey buur, baxa ak weex, ak mbaxanam buur mu wurus mu réy, ak mbubbum lée mu xonq curr. Dëkku Sus baa ngay riire mbégteek bannex. ¹⁶ Kanami Yawut yaa nga ne ràññ ci biir mbégteek bannex akub sag. ¹⁷ Mboolem diiwaan mbaa dëkk bu mag bu dogalu buur ba ágg, muy mbégteek bannex ca Yawut ya; ñu def ko bés bu rafet, di xawaare. Bare na sax ñu bokk ci xeeti réew ma, ñu walbatiku dugg ci diiney Yawut ndax ragal Yawut ya.

9

Yawut yaa man

¹ Gannaaw loolu fukki fan ak ñett ci weeru Adar, fukkeelu weer waak ñaar taxaw, ñu war caa amal dogalu buur ba. Muy bés ba nooni Yawut ya yaakaaroonna jekku Yawut ya. Mbiri ya nag mujj safaanoo, Yawut ya jekku seeni bañ. ² Yawut ya daje seeni biir dëkk ca mboolem diiwaani Buur Aserus, ngir dal ci kaw ñi leen di wuta lor. Amul ku leen mana tẽ ci xeet yépp, ndax tiitaange lu réy lu ñu am ci ñoom. ³ Ci biir loolu mboolem kàngami diiwaan yaak jawriñ yaak boroom dëkk yaak saytukati buur, ñoom ñépp di dimbali Yawut yi ndax tiitaange lu ñu am ci Mardose. ⁴ Mardose nag am daraja lool ci biir kër buur, bayreem dajal diiwaan yépp, muy gën di am doole.

⁵ Ba loolu amee Yawut ya di fàdd seen noon yépp, saamar yay dal, ñu di leen bóom ak a faagaagal. Ñuy def seeni bañ lu leen neex. ⁶ Ca biir Sus, péey ba, Yawut ya bóom nañu fa juróomi téeméeri nit (500), sànk leen. ⁷ Ñu bóom Parsandeta ak Dalfon ak Aspata, ⁸ ak Porata ak Adalya ak Arideta ⁹ ak Parmasta ak Arisay ak Aridey ak Wasata. ¹⁰ Ñuy fukki góor, di doomi Aman doomu Amdeta, fitnaalkatu Yawut ya. Bóom nañu leen, waaye seen loxo laalul alal ja.

¹¹ Bésub keroog ñu yegge Buur limu nit ña ñu rey ca Sus, péey ba. ¹² Buur ne Lingeer Esteer: «Biir Sus, péey bi, Yawut yi rey nañu ci juróomi téeméeri nit, reyaale fukki doomi Aman yu góor. Kon diiwaani buur yi ci des xawma nu ñu def ak ñoom. Ana looy ñaanati, ñu may la ko ak looy sàkkooti, ñu defal la ko?» ¹³ Esteer ne ko: «Buur, ndegam soob na la, mayeel èllég itam Yawut yi ci Sus mana wéyal dogalu tey bi. Te fukki doomi

Aman yu góor yi, ñu wékk seeni néew ci bant.»¹⁴ Buur joxe ndigal ngir ñu def noona. Ba loolu amee ñu siiwal ab dogal ca Sus, daldi wékk fukki doomi Aman yu góor ya.¹⁵ Yawut ya ca Sus nag daje ca fukki fan ak ñeent ci weeru Adar, bóom fa ñetti téeméeri nit, te seen loxo laalul alal ja.

¹⁶ Ci biir loolu Yawut ya ca des te dëkke yeneen diiwaani buur ya daldi daje ngir aar seen bopp, ba am jàmm ca seeni noon. Ñu rey ca seeni bañ juróom ñaar fukki junniy nit ak juróom (75 000), te seen loxo laalul alal ja.¹⁷ Loolaa nga am ca fukki fan ak ñett ci weeru Adar, èllég sa di fukki fan ak ñeent. Ñu nopplu, def ko bésu mbégtéek bannéex.¹⁸ Yawut ya nekk Sus te daje woon ca fukki fan ak ñett ak fukki fan ak ñeent ca weer wa nag, ña nga dal-lu ca fukki fan ak juróom ca weer wa, def ko bésu bernde ak bannéex.¹⁹ Looloo waral Yawuti kaw-kaw yi ci dëkk yu ndaw yi di wormaal fukki fan ak ñeent ci weeru Adar, def ko bésu bannéex ak bernde, di ci joqlantey teraanga.

Yoonal nañu màggalu bési Purim

²⁰ Ci kaw loolu Mardose ténk xew-xew yooyu ci mbind, daldi yónnee ay bataaxal yu jëm ca mboolem Yawuti mboolem di-iwaani Buur Aserus, mu jege, mu sore,²¹ ngir sas leen at mu nekk, ñu wara wormaal fukki fan ak ñeent ak fukki fan ak juróom ci weeru Adar,²² di ko baaxantale bés ya Yawut yi dal-loo ca seeni noon, ak weer wa seen naqar walbatikoo di mbégté, seen tiis di bésu jàmm, ngir ñuy wormaal yooyu bés, muy bési bernde ak bannéex yu ñuy joqlantey teraanga, di ci defal néew-ji-doole.²³ Ba mu ko defee Yawut ya sasoo la ñu tàmbali wona def, di wormaal yooyu bés, na leen ko Mardose bindale.²⁴ Aman doomu Amdeta, Agageen ba, fitnaalkatu bépp Yawut, moo fexeeloon Yawut yi, ngir faagaagal leen. Juntukaayu tegtal bi ñuy wax Pur lañu jéfandikoo woon, ngir jàpp bés ba mu leen wara faagaagal, sànk leen.²⁵ Waaye ba mbir ma ággee ca Buur, Buur a joxe ay ndigal yu ñu bind, ne pexe mu bon ma Aman nasaloon Yawut yi, na walbatiku képpu ci kaw boppam. Te mook ay doomam yu góor dees leen di wékk ci bant.²⁶ Moo waral ñuy wooye yooyu bés bési Purim, mu jóge ci baatu «Pur», di juntukaayu tegtal boobu. Mboolem la ñu bind ca bataaxal boobu nag ak itam la ñu gisal seen bopp ak la ñu daj,²⁷ moo tax Yawut yi di wormaal ñaari bés yooyu, sasoo ko, at mu nekk, bañ koo bàyyi, ñook seen askan ak ku ànd ak ñoom. Ñu war koo def, na ñu leen ko bindale, saa yu jotee at mu nekk.

²⁸ Bés yooyu di lu ñu wara bàyyi xel, di ko wormaal ci bépp maas ci kër gu nekk, diiwaan bu nekk ak dëkk bu mag bu nekk. Bési Purim yooyu Yawut yi waruñu koo noppee wormaal, te wareesu koo fàtte ci seen askan.

²⁹ Ci kaw loolu Lingeer Ester doomu Abyel, ànd ak Mardose Yawut ba, ñu bind ci sañ-sañ bu mat sékk, di dëggal ñaareelu bataaxal boobu jëm ci bési Purim.³⁰ Ñu yónnee ay bataaxal yu jëm ca mboolem Yawut ya ca téeméeri diiwaan ak ñaar fukk ak juróom ñaar (127) ca réewum Buur Aserus. Muy kàdduy jàmm ak kóllère,³¹ ngir saxal bési Purim yooyu saa yu jotee, na leen ko Mardose Yawut ba dogalale, mook Lingeer Ester. Mu dëppoo it ak na ñu dogalale seen bopp jamonoy koor ak ñaawlu, ñoom ak seen askan.³² Dogalu Ester ba nag wéral ndigal yooyu jëm ci bési Purim, ñu daldi koy bind ci téere bi.

10

Mardose daan na

¹ Gannaaw loolu Buur Aserus gáll ab galag ca réew ma mépp, ba ca duni gééj ga.² Mboolem jaloore ya Buur Aserus def, ca dooleem ak màggaayu darajaam ak na mu yékkatee Mardose, ba mu kawe, lépp bindees na ko moos ca téere ba ñu dippee Jaloorey buuri Medd ak Pers ca seeni jant.³ Mardose Yawut ba, moo séssoon rékk ca Buur Aserus, sut Yawut yépp, ay bokki Yawutam yu bare nawloo ko. Muy sàkku nag ngéneeli ñoñam, di waxal jàmm mboolem askanam.

Ayóoba Ubbite gi

Téereb Ayóoba moo nettali dundu nit ku baax ku musiba mu réy dal. Alalam jépp la jékka ñakk, teg ci ñakk doomam yépp, boole ci jàngoro ju daw yaram. Gannaaw loolu, téere bi indi na ñetti pàcci wàqante yu taalife yu Ayóoba séq aki xaritam, te lépp di biral seeni tont ci tiis yooyu. Li gëna fés ci seen werante moo di ni Yàlla farala jéflantee ak doom aadama, waaye Yàlla ci boppam moo mujj feeñu Ayóoba.

Xariti Ayóoba yi, ni ñu jàngate tiisi Ayóoba mooy ni ko aaday cosaan gise ci wàllu diine rekk. Foog nañu ne, gannaaw Yàlla mbaax la mas di yole jéf ju baax, di añale mbugal jéf ju bon, coono yi Ayóoba daj, añub bàkkaaram donj lay mana doon. Teewul Ayóoba xamle ne mbir mi yombewul noonu, te it yelloowul mbugal mu mettee ni li ko dal lépp, ndax moom ci boppam, mbaax geek njubte gi mu masa jàppoo, barewu ciy moroom. Xelum Ayóoba moo manula jàpp nan la Yàlla mana seetaane yooyu coono di dikkal ku mel ni moom. Moo tax mu am fitu dëkk Yàlla ci layoo bu mu bégga séq ak moom. Taxul Ayóoba gëmadi, waaye nammeelam moo di mu am dëgg fi kanam Yàlla, ak itam firnde ju setal deram, gannaaw moom nit ku baax la.

Li Ayóoba laaj nag, Yàlla àduwu ci, waaye ngëmu Ayóoba la tontoo kàddu gu jeexal aw lay, ci ab taalif bu mu misaale ne moo man te moo xam. Gannaaw loolu la Ayóoba nangu ne Yàlla mooy Buur te moom rekk a xam. Ci kaw loolu la tuub waxi meram ju épp.

Téjteb téere bi moo nettali ni Ayóoba mujje. Xariti Ayóoba ya nag la Yàlla sikke kàddu yu dëng ya ñu firee coonoy Ayóoba. Mennum Ayóoba donj moo njort ne mágug Yàlla weesu na ni xaritam yooyu fooge Yàlla, ci seen gis-gis bi leen diiney cosaan gisloo.

Ayóobaa barkeel, ragal Yàlla

¹ Amoon na ca réewum Ucc*, góor gu ñuy wax Ayóoba. Góor googu nekkoon ku mat te jub, ragal Yàlla te dëddu lu bon. ² Amoon na juróom ñaari doom yu góor ak ñetti ñu jigéen. ³ Alalam juróom ñaari junniiy (7 000) gätt la woon, ak ñetti junniiy (3 000) giléem, ak juróomi téeméeri (500) lëkkey nag yuy rijji, ak juróomi téeméeri (500) mbaam yu jigéen,

ak jaam yu bare lool. Góor googu daal moo èppoon daraja ca mboolem waa penku.

⁴ Doomi Ayóoba yu góor ya nag dañu daa ay-ayloo berndey biir kër, ku nekk ak bésam. Su ko defee ñu yónnee, woo ca seen ñetti jigéen ña, ngir ñu bokk di lekk ak a naan. ⁵ Bu ñu demaan ba ñépp fégal, Ayóoba day yónnee ngir sell-luloo leen. Ci biir loolu day teela xéy, daldi leen joxeel ñoom ñépp ba ñu daj saraxu rendidóomal, ku nekk benn. Booba Ayóoba da naan: «Jombul sama doom yii bàkkaar nañu mbaa ñu xarab Yàlla ci seen xel.» Noonu la Ayóoba jàppoo woon bés bu nekk.

Nattu nuyoo na

⁶ Mu am bés goney Yàlla dikk, teewsi fa Aji Sax ji. Seytaane tuumaalkat bi itam bokk ca. ⁷ Aji Sax ji ne Seytaane: «Ana foo jóge?» Mu ne: «Ci wër-wëraan ak doxantoo àddina laa jóge.» ⁸ Mu ne ko: «Xanaa seetlu nga Ayóoba, sama jaam bi! Amul moroom fi kaw suuf de! Ku mat la te jub, ragal Yàlla te dëddu lu bon.» ⁹ Mu ne ko: «Ayóoba daa ragal Yàlla ci neen a? ¹⁰ Xanaa du yaa ko ñag, ñag kërám ak mboolem alalam, ba mu daj? Liggéeyam, nga barkeel, ba ag juram law ci réew mi. ¹¹ Xàccil sa loxo rekk, dal ci mboolem lu bokk ci moom. Ndegam du jàkkaarlook yaw, xarab la.» ¹² Aji Sax ji ne Seytaane: «Ayca boog! Mboolem lu bokk ci moom a ngi ci say loxo, waaye moom ci boppam, bu ko sa loxo laal.» Ba loolu amee Seytaane bàyyikoo fa Aji Sax ji.

¹³ Mu am bés doomi Ayóoba yu góor ak yu jigéen bokk toog di lekk ak a naan biiñ ca seen kër taaw. ¹⁴ Ci biir loolu ndaw dikk ne Ayóoba: «Nag ya daal a doon rijji, mbaam ya di for ca wet ga. ¹⁵ Genn gàngooru yàqkat bàyyikoo Saba, dikk daanu ci seen kaw, yóbbu leen; surga ya, ñu leel ñawkay saamar. Mennum man mii maa ca rëcce ba àggesi la ko.» ¹⁶ Kooku daaneelagul kàddoom sax, keneen dikk ne: «Sawaraw Yàlla daal a wàcce asamaan, boole gätt yaak surga ya, jafal ba xoyom leen. Mennum man donj maa ca rëcce ba àggesi la ko.» ¹⁷ Kooka daaneelagul kàddoom, keneen dikk ne: «Kaldeen ñaa def ñetti gàngoor, dikk sèxëtoo giléem ya, yóbbu, surga ya, ñu leel leen ñawkay saamar. Mennum man donj maa ca rëcce ba àggesi la ko.» ¹⁸ Kooka daaneelagul kàddoom, keneen dikkati ne ko: «Sa doom yu góor ak yu jigéen a doon lekk ak a naan biiñ ca seen kër taaw. ¹⁹ Ngelaw lu mag jekki bàyyikoo ca wàllaa màndiñ ma, dal ca ñeenti weti

* 1:1 1.1 Ucc: jombul ma nga woon ca penkub Israyil, fi ñuy wax tey Arabi mbaa Yordani mbaa Siri.

néeg ba, mu màbb ca kaw gone ya, ñu dee. Mennum man donj maa ca réece ba àggesi la ko.»

²⁰ Ba mu ko defee Ayóoba jóg, ne tareet mbubban, ba noppi watu nel, di ko ñaawloo. Mu daanu fi suuf, sujjóot, ²¹ daldi ne: «Dunj laa génne sama biiru ndey te dunj laay delloo. Aji Sax jee maye, Aji Sax jee nangu. Cant ñeel na Aji Sax ji.» ²² Ci biir loolu lépp Ayóoba bàkkaarul, jiifil Yàlla lenn lu juunu.

2

Nattu nuyooti na

¹ Mu am bés goney Yàlla dikk, teewsi fa Aji Sax ji. Seytaane itam bokk ca, dikk teewsi fa Aji Sax ji. ² Aji Sax ji ne Seytaane: «Ana foo jóge nii nag?» Mu ne ko: «Ci wër-wëraan ak doxantoo àddina laa jóge.» ³ Mu ne ko: «Xanaa seetlu nga Ayóoba, sama jaam bi! Amul moroom fi kaw suuf de! Ku mat la te jub, ragal Yàlla te dëddu lu bon.» ⁴ Seytaane ne Aji Sax ji: «Bakkan a wuutu bakkan rekk. Mboolem lu nit am, man na koo weccee bakkanam. ⁵ Léegi xàccil sa loxo rekk, dal ci kaw jëmmam jépp. Ndegam du jàkkaarlook yaw, xarab la.» ⁶ Aji Sax ji ne Seytaane: «Kon mu ngoogu say loxo. Waaye bakkanam daal, sàmm ko.» ⁷ Ba mu ko defee Seytaane bàyyikoo fa Aji Sax ji. Ci kaw loolu mu sànni Ayóoba ay taab yu metti, dale ko ca tésstën ma, ba ca kaw bopp ba. ⁸ Mu wut tojitu njaq, di ko xasanoo, daldi toog ci biir jalub dóom. ⁹ Jabaram ne ko: «Yaa ngi ñoy ci sa mat gi ba tey? Xarabal Yàlla boog te dee!» ¹⁰ Mu ne ko: «Waxi jeeg bu dof daal ngay wax, yaw! Du Yàlla da nuy may lu baax, nu jël? Kon kay bu nu mayee safaan ba it, nu wara jël.» Ci biir loolu lépp Ayóoba bàkkaarul ciw làmmiñam.

Ayóoba am nay gan

¹¹ Gannaaw loolu ñetti xariti Ayóoba ñoo dégg mboolem musiba moomu ko dikkal. Ku nekk ci ñoom jóge kërám: Elifas waa Teman ba, ak Bildàdd waa Suwa ba, ak Cofar waa Naama. Ñu bokk daje ngir dikk mas-sawu Ayóoba, dëfal ko. ¹² Ñu dikk ba jub ko, di ko séentoo fu xawa sore, waaye xàmmeetuñu ko. Ñu daldi ne yikkét jooy. Ba ñu agsee ku ci nekk ne sa mbubb tareet. Ñuy ñaawlu, di tibt suuf, di sànni ca kaw, muy sottiku ci seen kaw bopp. ¹³ Bokk nañu toog ak Ayóoba fa suuf juróom yaari béccég ak juróom yaari guddi, kenn waxu ko baat, ndax dañoo gis mitit wa mu àndal tar lool.

3

Ayóoba rëbb na bésuub juddoom

¹ Gannaaw loolu Ayóoba àddu, ma ngay móolu bés ba mu juddoo. ² Mu ne:

³ Sànkute ñeel na bés ba ma juddoo, ba ca guddi ga noon: «Sosees na góor!»

⁴ Boobu bés yal na di lëndëmu neen, di bés bu Yàlla ma fa kaw faaleedi, te genn leer du ko leeralati.

⁵ Yal na lëndëmu njaniiw aakimoo boobu bés,

xàmbaar mbaaral ko, muy guddig digg béccég gu raglu.

⁶ Googu guddi yal na ko lëndëm moom, yàlla bumu bége fi digg bési at mi, yàlla bees ko limaaaleeti ci weer yi.

⁷ Googu guddi kay yàlla bu ci gone sosooti, yàlla bu ci sarxolle jolleeti.

⁸ Yal na alagkati bés yi alag googu guddi, alagkat yu mana xabtal ninki-nanka.

⁹ Yal na biddiwi njëlam giim, muy séentug leer te du am;

yàlla bumu gis fu njël di juppee,

¹⁰ gannaaw moo tējil sama biiru ndey, ba làq saay gët coono.

¹¹ Moo lu ma tee woona deeye biiru yaay? Lu ma tee ne putt, dog, boog?

¹² Ana lu may óom doon uufe?

Ana lu ma doon nàmpe ween?

¹³ Tédd koon naak jàmm biir bàmmeel, di nelaw, nopploondook

¹⁴ buur yeek jawriñi àddina,

yi tabaxal seen bopp, kəri buur yu gental tey.

¹⁵ Nopplu koon naak garmi yay boroom wurus,

te daan feesal seeni kër, xaalis.

¹⁶ Mbaa ma mel koon ni lumb wu làqu biir suuf,

mbaa cuux mu jotula gis ug leer.

¹⁷ Biir bàmmeel la ñu bon ñiy noppee sonle,

fa la ña jeele doole nopploo,

¹⁸ ña ñu tējooon ne finaax,

déggatuñu coowal ku leen di sas,

¹⁹ ku tuut ak ku mag di fa benn,

jaam noppi faa jaamu sangam.

²⁰ Boroom tiis, ana lees koy maye leeru kaw suuf?

Lu boroom naqar di doye bakkan?

²¹ Ku ni mel ku yàkkamti dee gu dikkul,

te gëna sàkku dee alal ju làqu,

²² ba bu gisoon bàmmeel,

di textexi ci biir mbég ak bàmneex.

²³ Ngóor sii aw yoonam làqu,

ana lu muy doye dund,

te Yàlla dar kepp ko?

²⁴ Samay binni di samaw ñam,

samay yuux fettax nim ndox.

²⁵ Tiitaange déy a ma dikkal,
li ma ragaloon kay a ma dab.

²⁶ Du jámm, dug dal, du noflaay bu ma am,
jallaañoo dikk na!

4

Elifas nee yaru Yàlla du ñàkk

¹ Elifas waa Teman ba àddu ne:

² Ma jéema àddu boog, soo ma talee!
Ndaxam noppeeti, maneesu ko.

³ Yaw de, ñu bare jàngal nga leen,
loxo yu toqi woon, nga dooleel,

⁴ ku jangoon, nga wax, mu taxaw,
kuy óomam dammoon, nga dэгéral.

⁵ Léegi muy yaw, nga yoqi;
mbir mi dal fi sa kaw, nga jánnaxe.

⁶ Xanaa du sag ragal Yàllaay sa céslaay,
sag maandute di sa yaakaar?

⁷ Seetal rekk, ana jaamburu Yàlla bu masa
sàнку?

Ana foo gis ku jub ku mujje yàqu?

⁸ Li ma gis daal, ku bey ñaawtéef,
ji coono, yaa koy goób.

⁹ Yàllaay wal noowam, nga sàнку,
sànjam gelaw, nga jeele.

¹⁰ Gaynde ñar, segg xiiru,
selli waxambaaney gaynde tojandoo.

¹¹ Gaynde ga ñàkk um pàdd, dee,
doomi gaynde ga tasaaroo.

¹² Man la kàddu dikkal ci kumpa,
sama nopp taataan ndéey la,

¹³ ci géntu guddi, fa xalaat di jaxasoo,
nelaw yu xóot dikkal boroom.

¹⁴ Tiitaange ne ma taral, may lox,
cér yépp di kat-kati.

¹⁵ Ngelaw lu sew jaare sama kanam,
sama kawari yaram ne sàyy-sàyyaaral.

¹⁶ Mu def ku taxaw, te xàmmiwuma ko,
di jëmm ju janook man, may gis.

Mu jëkke ne cell, mujje àddu, ma dégg.

¹⁷ Mu ne: «Nit man naa am njekk fa
kanam Yàlla?

Am man naa laab fi kanam ki ko sàkk?

¹⁸ Ndegam surgaam ya ca asamaan sax
wóoluw leen,

ay malaakaam sax, mu sikk leen,

¹⁹ gén ñi dëkke kéri ban,
cosaano ci pëndub neen,

gèna neexa nappaaje gunóor.

²⁰ Diggante subaak ngoon, ñu moxoñoó,
bala ngaa yég, ñu sàнку fàww,

²¹ seen buumi xayma foqatiku,
ñu dee ci biir ag umple.»

5

¹ Rikk wooteel, ndegam am na ku lay
wallu!

Ana ci ñu sell ñi, kan ngay sàнку ndimbal?

² Am sannax déy, naqari deret a koy rey,
ab téxét, xéraangee koy faat.

³ Maa gis am sannax, mu saxi reen,
ma jekki ñaan alkandey dëkkuwaayam.

⁴ Ay doomam ay sore younu mucc,
ñu di leen dэгgaate ca pénc ma,

te kenn du leen xettli.

⁵ Am ngóobam, ku xiif a koy lekk,
ba lekkaale la saxe biir dég ya,

te alalam, ku mar a koy ñaf-ñafee.

⁶ Aw ay du garab, bay fëlle biir suuf,
coono du jekki, jebbi.

⁷ Ku juddu, coono nga juddul,
mooy ferñent, kaw rekk la jëm.

⁸ Man de su ma doon yaw damay sàнку
Yàlla,

te kon Yàlla laay diis sama mbir.

⁹ Keey def jéf ju mággu ju nattuwwul,
di def kiraama yu limuwul.

¹⁰ Keey taw, suuxat suuf,
yónnee ndox, nàndal ub àll.

¹¹ Keey kaweel ku suufe,
kuy ñaawlu siggee mbégte.

¹² Keey neenal pexem ku muus,
ba mébétam du sotti.

¹³ Keey kepp boroom xel cig muusam,
ba pexem ndéngteem teela sooy.

¹⁴ Ñu ni mel, bëccég ñu dajeeek lëndëm,
di làmbatoo digg bëccég ni bu doon guddi.

¹⁵ Yàllaay musal néew-ji-doole ci saamaru
làmmiñ

ak loxol boroom doole,

¹⁶ néew-ji-doole jagoo yaakaar,
defkatu njekkar ub gémmiñug boppam.

¹⁷ Ma ne, ndokklee ku Yàlla jubbanti,
kon bul bañ yarub Aji Kawe ji.

¹⁸ Moom kat mooy mitital, di fajtal;
mooy gaañe, di wérale loxol boppam.

¹⁹ Juróom benni njàqare teew, mu xettli la
ca,

ba ko juróom yaareel sax, doo ca loru.

²⁰ Ab xiif, moo la cay jote ba doo dee,
ab xare, nga mucc ñawkey saamar,

²¹ aaytéefu làmmiñ, nga fegu ca,
te yàqule guy dikk, doo ko ragal.

²² Yàquleek yu xiif, nga kekku;
rabu àll, doo ko ragal.

²³ Doji àll bi sax, kólléreg jámm ngay séq
ak ñoom,

te ndundati àll bi dañuy jámmook yaw,

²⁴ nga xam ne sa xayma, jámm,
soo nemmikoo sa parlu, dara du ca wuute.

²⁵ Dangay raññee ni saw askan di yaatoo,
say sët di law ni gàncax.

²⁶ Ni pepp di ñore, ñu door koo goób,
ni ngay mággataale doole, doora dэгmal
bàmmeel.

²⁷ Lii kat lanu gis, te lii rekk la.
Dégg, jariñu.

6

Maa yey ne ba ma

- ¹ Ayóoba daldi ne:
² Éy su sama tiis wii doon lu ñuy natt diisaayam?
 Su sama ay wii wépp doon lees di mândaxe?
³ Kon tey mu gëna diis suufoo suufi géej.
 Moo waral sama kàddu yi ma rêcc.
⁴ Da di fetti Aji Man jee ma jam,
 ba tooke ji nàndal samam xel,
 mbugalu Yàlla yu raglu làng-déral ma.
⁵ Mbaamu àll dina ñaax te tiim ñax mu tooy a?
 Am nag dina nàññi te tiim um ngooñam?
⁶ Deesul lekk lu soof, loo deful xorom,
 rawatina lu weex li ci nen.
⁷ Sama xel a ko nanguwul,
 ñam la wu ma seexlu.
⁸ Éy kuy amal sama dagaan,
 ba Yàlla sottal sama yaakaar!
⁹ Yal na neex Yàlla mu nappaaje ma,
 yal na afal loxoom, ne ma tipp.
¹⁰ Konoon sama ndàmpaay di li ma gantalul
 kàdduy ku Sell ki,
 te kon ma bég, di fecce biir mitit wu dul dal.
¹¹ Ana doole ju ma amati bay muñ?
 Ana luy sama muj ba may dundati?
¹² Dama diw doj bay àttan lu ne?
 Am yaramu xànjari laa am?
¹³ Ndax amati naa wall,
 te pexe réer ma mèrr?
¹⁴ Ku ne lasiim, saña séentu xariti baaxe la,
 doonte fekkul nga ragal Aji Man ji.
¹⁵ Samay xariti a ma wor ni yol moo fekk ñiis.
 Daño mel ni dex yoo fekk ndox ma jeex,
¹⁶ te ba sedd bay taggo,
 ndox mu wayoon ànd caakam yuur, di seey,
 mu fees dell ak ndox mu nëx.
¹⁷ Waaye bu noor biy dikk, mu wow,
 tàngoor jam, mu ñiis.
¹⁸ Jëggi giléem ay wër um ndox, ba wacc seenu yoon,
 saaraan ca ndànd-foyyoy ga, réer.
¹⁹ Waa jëgg ya bawoo Tema di wër ay yol,
 tukkiat ya bawoo Saba di séentuy dex,
²⁰ ba àgg fa ñu ko fooge woon, yaakaar tas,
 seen kóolute mujje mbetteel.
²¹ Yeen déy, yeenay yooyu wal ci man.
 Yeena gis sama njàqare, jàq.
²² Dama leena masa ñaan dara,
 mbaa ma sakkoo ci seen alal ab ger,
²³ ngir ngeen xettli ma ci loxol noon,

mbaa ngeen jot ma ci boroom doole bu néeg?

- ²⁴ Xamal-leen ma, man ma ne cell!
 Ana fu ma juume? Wonleen ma ko!
²⁵ Kàddu yu jub da lay yey,
 ana li ngeen may yedde, lu mu doon?
²⁶ Dangeen di jéema sikk samay wax,
 di jappe ngelaw kàdduy xol bu jeex?
²⁷ Ab jirim sax àttan ngeen koo tegoo bant,
 seen xariti sax sañ ngeen koo jaay.
²⁸ Léegi nag, rikk walbatikuleen fi man,
 xanaa duma janook yeen di fen?
²⁹ Deltuleen gannaaw, bu njubadi am.
 Dellootileen gannaaw, sama der set na wecc!
³⁰ Ana fu ma waxe njubadi?
 Am damaa xamul lu njekkar di saf?

7

- ¹ Xanaa du fani doom aadama fi kaw suuf àppu doñ-doñ la,
 dundam di dundu liggéeykat bu ñu bind?
² Daa mel ni jaam bu namm keppaar
 mbaa mbindaan mu yakkamtig peyam.
³ Noonu laa séddoo ay weeri mititu neen,
 jagoo ni ay guddiy coono.
⁴ Damay tédd te naa:
 «Kañ laay jóg nag?»
 Waaye guddi gudda gudd,
 walbatiku ba fajar xar génnliku na ma!
⁵ Maa ngi sangooy sax ak àkki ban,
 sama der biy xar, di wal.
⁶ Kukkub ràbb sax
 ni samay fan di jeexee ko gaaw,
 poqe di jeex, te yaakaar amul.
⁷ Éy Yàlla, bul fàtte ne sama dund gii,
 ag noo donj la,
 te dootuma teg bët ngéneel.
⁸ Bët bi may gis tey du ma gisati,
 dinga ma niir, fekk nekkatuma.
⁹ Niir wu naaxsaay, ne mes,
 mooy ku wàcci njaniiw, du yéegati!
¹⁰ Du fiibeeti kërám,
 dëkkuwaayam dootu ko fat.
¹¹ Moo tax duma téye sama làmmiñ,
 xanaa di waxe biir njàqare,
 di jooye biir naqar.
¹² Dama di Géej menn mbaa Ninki-nànka,
 ba nga di ma booleek ku may wattu?
¹³ Dama naan: «Naa nopploo téraayub laltu,
 ba yennikoo ab lal sama tawat,»
¹⁴ nga di ma tiitale ay gént,
 di ma xoqtale ay jeneer,
¹⁵ ba ku ma xojoon sax, ma jël,
 nde dee a ma gènal dese yii yax.
¹⁶ Doy na sékk! Dunduma ba fàww;
 ba ma, samay fan genn noo la!
¹⁷ Luy nit ba nga di ko géddaal,
 bay def sam xel ci moom,
¹⁸ di ko nemmiku saa yoo xéyee,

di ko nattu saa su ne?

¹⁹ Doo ma dummóoyu boog,
may ma sax fu ma wonaasoo?

²⁰ Yaw miy seetlu jaam ñi,
ma bàkkaar, lu mu lay wàññi?

Ana lu tax nga di ma diiral sa bopp nii,
ba ma mujj diis la gann?

²¹ Lu tee kon nga baal ma samag moy,
jéggal ma samag tooñ?

Léegi tey ma tëri biir suuf,
nga di ma seeta seet, fekk nekkatuma.

8

Bildàdd nee musiba, añu boroom

¹ Bildàdd ma bàyyikoo Suwa, àddu ne:

² Ana foo àppal sa wax jii?

Ngay mbel-mbeli ni callweer!

³ Ana Yàllaak safaan yoon?

Ana Aji Man jeek safaan dëgg?

⁴ Bu ko sa doom yi moyee, kay,
mu ba leen ak seen añub tooñ!

⁵ Yaw nag soo sàkkoo Yàlla,
dagaan Aji Man ji aw yiwam,

⁶ soo muccee ayib te jub,
day daldi taxaw temm ci say mbir,

delloo la sa kërug njekk,

⁷ nga yokkoo yokku èllëg,
ba xeeb sa démb.

⁸ Laajal rekk maas gi nu jiitu,
te teewlu seen gëstuy maam ya.

⁹ Nun xamunu, démb rekk lanu,
sunu fani kaw suuf di takkndeer suy wéy.

¹⁰ Ñi ñu jiitoo lay xamal, wax la,
tibbe seen xol yii kàddu, dénk la:

¹¹ «Ndax jàqaar dina naate fu dul ban bu
tooy,

am barax dina saxe fu amul ndox?

¹² Bu ndox ma ñisee, mooy jékka lax,
te du ñoragum bay mata dog.»

¹³ Loolooy muju képp ku fàtte Yàlla,
yaakaaru yéefar, tas rekk,

¹⁴ cëslaayam màbb,
làquwaayam di lëndu jargoñ.

¹⁵ Mu wéeroo kèram, kër gay yëngu;
mu ñoyu ca, muy jaayu.

¹⁶ Ku gémadee ngi mel ñi garab
gu jant biy jam, mu naat;

car yay lawe tool ba mu saxe,
¹⁷ reen ya rawaasoo ci biir jalub xeer,

muy kërug dojam gu mu ñoy.

¹⁸ Nga buddee ko bérab ba mu sax,
bérab ba jambu ko, ne ko: «Masuma laa
gis!»

¹⁹ Geneen garab ay jebbi, wuutu ko.

Mu ngoog, ab yéefar, nii la mujam di
rafete!

²⁰ Dama ne: Yàlla du gântal ku maandu,
te du dooleel kuy def lu bon.

²¹ Moo lay may loo ree,

bay sarxolle,

²² say bañ gaccoo gacce,
xaymab ñu bon ña gental.

9

Ayóoba nee Yàlla du ku ñuy layool

¹ Ayóoba dellu ne ko:

² Waaw, noonu la moos, xam naa ko!

Ana nu nit di ame dëgg fa kanam Yàlla?

³ Ku bégga layook Yàlla it,
mu laaj la junni, doo tontu lenn.

⁴ Moo rafet xel, bare doole!

Ana ku koy jéema të, mu jig ko?

⁵ Keey randal tund yi te duñu ko yég;

keey mer, jállarbi leen,

⁶ gësëm suuf fa mu tege,
ay kenoom jaayu.

⁷ Keey gëdd jant bi, aaye koo fenk,
ub ràpp biddiwi asamaan.

⁸ Keey wéetoo di firi dëndi asamaan,
di daagoo kawtey géej.

⁹ Moo sàkk dëlloñ gi féete bēj-gànnaar
ak yaar yi ci digg asamaan,
ak ga ca néegi bēj-saalum.

¹⁰ Keey def jéf ju màgg ju nattuwul,
ak kiraama yu limuwul.

¹¹ Mu ngoog, daf may romb te duma ko gis,
jàll, wéy te duma ko yég.

¹² Kii, bu kèfee, ana ku koy tere?

Ana ku ko naa: «Looy def nii?»

¹³ Yàlla du dānk meram,
ciy tānkam la farandooy Raxab,
ninki-nānkay géej, di gappru!

¹⁴ Ana nu ma koy àddoo, man?
Ana kàddu yu may layook moom?

¹⁵ Su sama der setee it, duma mana àddu,
xanaa sama àttekat bii laay tinu.

¹⁶ Su ma ko wōon cib layoo, mu wuyu itam,
du tax mu wóor ma ne dina ma teewlu.

¹⁷ Moom mi may rajaxee ngelaw lu réy,
te di ma gaaña gaañ ci dara,

¹⁸ mayuma sax ma astandiku,
xanaa reggal ma aw naqar.

¹⁹ Su dee kàttan, kee bare doole!

Su dee wàllu yoon, kan moo ma cay woo?

²⁰ Ma am dëgg, sama kàddu sikkal ma,
ma mucc ayib, sama kàddu teg ma tooñ.

²¹ Maa mucc ayib a? Xam!

Maa sib sama dund gi!

²² Lépp benn la rekk! Moo tax ma ne:

«Ku mucc ayib ak ku bon lay boole
fàkkas.»

²³ Mbas ne jaas, rey ñu deful dara,
Yàlla di leen kekkook seen njàqare.

²⁴ Àddinaa ngi tege ci loxol ku bon,
te Yàllaa ngi muur gëti àttekat yi!

Su dul moom ana ku mu doon?

25 Ab dawkat sax ni samay fan di jeexee ko raw.
 Wone nañu gannaaw te gisuñu lu baax.
 26 Samay fan tarxiis nañu, wéy, woyof ni gaali barax,
 mbaa jaxaay ju naan jáyy cim rébbam.
 27 Su ma nee: «Naa fátte sama tawat, leeral kanam te bég,»
 28 du tee ma ragal mboolem samay mitit, nde xam naa ne du tee nga topp ma.
 29 Ndegam maa tooñ,
 ana lu may sonn, doye?
 30 Su ma raggoo woon saabu,
 ba raxasoo xeme sax,
 31 du tee nga tábbal ma cim leeñ,
 ba samay yére sax seexlu ma.
 32 Yàlla da dul nit ni man, ba may weran-teek moom,
 di ànd ak moom, layooji.
 33 Su amoon sax kuy dox sunu digg, jubale nu;
 sañ noo boole teg loxo,
 34 teggil ma yetam, mu sore ma,
 ba darajaam ju raglu dootu ma tiital,
 35 konoon ma wax ak moom te duma tiit.
 Waaye gannaaw demewul noonu, man laak man!

10

Ayóoba nee lu mu def Yàlla?

1 Maaka sib sama dund gii!
 Naa afal sama kàddug tawat,
 di àddoo naqaru xol.
 2 Dama naa Yàlla: Bu ma topp ug tooñ.
 Xamal ma kay li nga may topp, lu mu!
 3 Ana lu la note di jariñ,
 ba ngay bañ li nga sàkke sa loxol bopp,
 tey àntal pexem ku bon?
 4 Xanaa gèti nit donj nga am,
 am ni nit di gise rekk ngay gise?
 5 Say fan daa tollook fani doom aadama,
 am say at daa yem ak ati nit,
 6 ba ngay seet fu ma ñaawe,
 di liñbat fu ma moye?
 7 Moona xam nga xéll ne tooñuma,
 te amul kenn kuy xettli nit ci sa loxo.
 8 Say loxoo ma mooñ, tabax ma ba ma mat sèkk,
 léegi nga di ma yàq yaxee!

9 Rikk fàttlikul ne yaa ma tabax,
 ni bu ma doon ban,
 xanaa doo ma delloo xaat ci pëndub suuf?
 10 Xanaa du yaa ma xelli woon ni meew
 ci sama biiru ndey,
 wayal ma nim soow,
 11 wodde ma der ak suux,
 ràbbe ma yax aki siddit?
 12 Yaa ma may bakkan, won ma ngor,
 yaa sàmme sa yégeel samag noo.

13 Ndeke yoo lii nga dencoon ci sa xol,
 xam naa ne lii nga naroon:
 14 ne ma dann, ba su ma bàkkaaree,
 doo ma baal samag tooñ.
 15 Su ma defee lu bon, ngalla man,
 te bi ma defee njekk it, sañumaa siggi,
 gacce laa suure, sangoo toroxe.
 16 Waaye su may siggi rekk nga mel ni gaynde,
 di ma rébb,
 dellu di ma lore say kiraama,
 17 yónneeti ma say seede,
 gën maa songati,
 ay gàngoor di wuutante fi sama kaw.
 18 Ana loo ma doon génnee sama biiru ndey?

Doon naa dee te bêt du ma gis!
 19 Doon naa mel ni ku masula am,
 jóge ci biir, ñu yóbbu bàmmeel.
 20 Xanaa du fan yu néew laa dese? Ba ma boog!
 Xiddil, ma leqliku,
 21 bala may dèddu, délseetuma,
 bala may tàbbi réew mu lëndëm ga ne kèruus,
 22 réewum lëndëm,
 mu ne kèruus, salfaaño,
 ag leer sax, saf fa lëndëm!

11

Cofar nee tuub, raw

1 Cofar ma bàyyikoo Naama àddu, ne:
 2 Yii kàddu yu wale, deesu ko tontoo?
 Wax ju bare tax na nit a yey?
 3 Sa kebetu yii wedamal na kenn a?
 Am dangay ñaawle te deesu la tiñfal?
 4 Nee nga sa àlluwa wér na péññ,
 sa jëw rafet, Yàlla seede.
 5 Éy su Yàlla nammoona wax,
 ba àddu, wax ak yaw,
 6 àgge la kumpay xelam mu rafet,
 mi wees dég-dég,
 kon nga xam ne Yàlla jéllale na sa lenni tooñ!
 7 Dangaa mana gèstu mbóoti Yàlla, ba gis ko?
 Am yaa ñédd Aji Man ji?
 8 Lu gèna kawe kaw, ana loo ci man?
 Lu gèna xóot njaniw, ana loo ci xam?
 9 Mággaayu Yàllaa sut suuf,
 gèna yaatu géej!
 10 Su dikkee, tēj nit,
 woo ko péncum àtte, ku ci man dara?
 11 Moom mi xàmmeé ñi dul niti dara,
 mooy gis lu bon, te du laaj mu teewlu.
 12 Waaye ku boppam feesul, bu muusee,
 mbaamu àll a judduwaale nangu.
 13 Waaye yaw soo defee sa xel ci Yàlla,

dékk ko say loxo,
¹⁴ fabal say ñaawtéef, sànni,
 te baña xajal njubadi sa biir xayma,
¹⁵ kon déy, nga mucc gàkk, siggi;
 dēju te doo tiit,
¹⁶ sa coonob tey ngay fàtte,
 ni waltan mu wal ba wéy donj
 ni nga koy fàttlikoo,
¹⁷ te yaay gëna leer jantub njloor,
 ba lëndëm di saf leeru njël.
¹⁸ Kon nga am yaakaar ak kóolote,
 aaru, soo téddee, nelaw,
¹⁹ jaaxaan, kenn du la lëjal,
 ñu bare di la leewaayu;
²⁰ ku bon jàq, ba gët ya giim,
 rawtu réer ko,
 yaakaaratul lu moy noowam gu mujj.

12

Ayóoba nee Yàlla lu ko neex lay def

¹ Ayóoba àddu ne:
² Yeen daal yeenay nit;
 ngeen dee, xel mu rafet dee.
³ Ndaxam man it am naam xel ni yeen,
 duma seen cuune fenn,
 te lii ngeen wax, kenn umplewu ko.
⁴ Maay reetaanu xarit,
 te daan woo Yàlla, muy wuyu;
 tey ñuy reetaan ku jub, mucc ayib!
⁵ Ku neexlee ngi ñaawal ku safaan dab,
 defe ne safaan, ku tarxiis lay bëmëx.
⁶ Jàmm a nga ca xaymay yàqkat ya,
 te xel mu dal di céru tooñkati Yàlla yooyu,
 ñàbb seeni yàlla.
⁷ Laajal rekk rab yi, ñu xamal la;
 mbaa njanaaw yi, ñu wax la;
⁸ mbaa nga diisook suuf, mu xamal la;
 mbaa jëni géej, ñu nettali la.
⁹ Ana ku umple ci mboolem ñii,
 ne loxol Aji Sax jee def lii lépp?
¹⁰ Moo yor ci loxoom lépp luy dund,
 yor noowal képp kuy noyyi.
¹¹ Xanaa du nopp ay natt baat bu jib,
 denqleñ di mosu ñam?
¹² Mag ak xel mu rafet,
 fan wu gudd ak ràññee.
¹³ Waaye Yàllaa boole xel ak doole,
 moom pexeek ràññee.
¹⁴ Mu ngoog, keyy màbb te deesul tabax-
 aat,
 di tēj nit, te deesul tiji.
¹⁵ Mu ngoog, keyy aj am ndox, mu maral,
 mu afal am ndox, mu salfaañe àddina.
¹⁶ Kee am doole, keyy sottal,
 di boroom aji réer ak ka ko réeral.
¹⁷ Keey futti kàngam,
 dofloo kilifa.
¹⁸ Keey foq mbaxanam buur,
 jox ko gemmb, mu gemboo.

¹⁹ Keey futti sarxalkat,
 jàllarbi njiit lu riigu.
²⁰ Keey wedamal ku ñu wóolu,
 xañ mag xelum ràññee.
²¹ Keey torxal garmi,
 yolomal ngañaayu boroom doole.
²² Keey ñori lu làqoo xóotey lëndëm,
 leeral lu noon kèruus.
²³ Keey màggal aw xeet, teg ca fàkkas leen;
 keyy lawal aw xeet, teg ca toxal leen.
²⁴ Keey xañ njiitu xeet am xelam,
 wërloo ko ndànd-foyfoy lu yoon amul,
²⁵ muy lambatoo lëndëm gu genn leer
 amul,
 moo koy wërloo ni màndikat.

13

Ayóoba nee su layoo, yey

¹ Dama ne, lii lépp maa ko gis,
 dégg ko, xam ko.
² Li ngeen xam, man it xam naa ko;
 duma seen cuune fenn.
³ Waaye man Aji Man ji laay waxal,
 layook Yàlla laa namm.
⁴ Yeen nag yeenay rafetalkati fen,
 yeen ñépp di fajkati caaxaan.
⁵ Céy su ngeen noon cell,
 muy seen rafet xel!
⁶ Ngalla dégluleen sama tawat,
 teewluleen sama kàddug layoo.
⁷ Yàlla daal ngeen di waxal njubadi,
 di ko duural?
⁸ Yàlla ngeen faral,
 am Yàlla ngeen di layool?
⁹ Bu leen luqatu woon dina baax a?
 Am ni ñuy naxe nit ngeen koy naxe?
¹⁰ Su ngeen ko faraloon ci kumpa sax,
 du tee mu sikk leen moos.
¹¹ Xanaa màggaaayu Yàlla tiitalu leen?
 Am ragluwaayam èlëmu leen?
¹² Seenì tari, léebi neen,
 seeni tont, kiiraayu boob.
¹³ Xeremluleen, ba ma wax man
 ak lu ma mana dal.
¹⁴ Ana lu ma tax di yàpp sama pàllax,
 di jaay sama bakkan?
¹⁵ Su ma doon rey it moom laay yaakaar,
 maay janook moom, layool sama bopp.
¹⁶ Loolu it sama mucc a ngi ci,
 nde ab yéefar du dikk di janook moom.
¹⁷ Dégluleena déglu sama baat,
 sama kàddu ci seeni nopp.
¹⁸ Dégluleen maa, ma lañal ab layoo,
 bir na ma ne maay yey.
¹⁹ Ana ku may yey cib layoo?
 Kon de ma wedam te dee.
²⁰ Xanaa nga may ma jaar rekk,
 ba du jar ma di la làqu:
²¹ ngalla teggi ma sa loxo,
 te buma dabeeti tiitaange loo sabab.

22 Wooteel, ma wuyu,
mbaa ma wax, nga áddu ma.
23 Ana luy sama ñaawtéef aki moy?
Xamal ma samag toón ak sama moy.
24 Ana loo may làqe sa leeru kanam?
Danga maa jàppe sab noon?
25 Xob wuy wéy ngay xoqtaal?
Ana boob muy naaw, loo ciy topp?
26 Yaa ma bindal dogal yu wex,
añale ma sama ñaawtéefi ndaw!
27 Yaa ma jéng,
di sàmm fépp fu ma jaare,
topp sama tànk!
28 Sama bakkan a ngi ruus ni bant bu
fënëx,
mbaa mbubb mu maxe.

14

Addinaa gàtt, barew tiis

1 Ku jigéen jur,
yaa nēewi fan, géegal coono!
2 Dangay tóor rekk, lax,
wéy ni takkndeer, doo toog.
3 Mooy kii nag nga teg bët,
mooy man mii nga nara layool!
4 Lu sobewu, ana ku ci mana am lu laab?
Du kenn!
5 Ndegam yaa dogalal nit ay fanam,
lim ay weeram,
dogal àpp ba, te du jaas,
6 teggi ko boog say gèt, mu dal-lu,
ni liggéeykat bu jaanam wàcc ci bés.
7 Garab sax ñàkkul yaakaar.
Boo goree, mu jebbiwaat,
ba du ñàkk ay njebbat.
8 Reen ba man naa màggat,
èkk ba deeye biir suuf,
9 mu yég um ndox, rekk, jebbi,
saxaat nim njëmbat.
10 Waaye nit dee, doole réer,
bakkan rot, mu ne mes.
11 Day mel ni déeg bu njiis,
mbaa dex gu wow ba jeex.
12 Doom aadama it tédd, du jógati,
du yewwooti, asamaan fekke,
du jógeeti ciy nelaw.

Làq ma sa mer, ba giif

13 Éy soo ma nēbboon biir njaniiw,
làq ma, ba sa mer giif,
dogalal ma àpp, te bañ maa fàtte!
14 Ndax dees na dee, di dundati?
Konoon ma muñe ko sama fani coono
yépp,
ba keroog sama kuutaay yiwisi ma.
15 Konoon nga woo ma, ma wuyu,
te kon nga namm sa càkkéefu loxo.
16 Konoon yaay lim samay jéego,
te doo ma topp samay bàkkaar.
17 Konoon samag toón yebe

ci mbuus mu takke,
sama ñaawtéef, nga muure ko malaan.

18 Waaye aw tund day màbb, ruus;
aw doj di toxu,
19 am ndox di jonji xeer ba mu jeex,
waame buub suuf, yóbbu,
te noonu ngay neenale yaakaaru doom
aadama,
20 man ko, mu dèddu fàww,
kanam ga soppiku, nga jalax.
21 Doom ya tedd, yégul;
ñu tekkeedi, tinul.
22 Nit yégul lu moy mititu boppam
te bakkanu boppam lay tiisoo.

15

Nee ñu lu waay def, boppam

1 Elifas áddu, ne:
2 Ayóoba, ku xelu dina tontoo kàddu
ngelaw,
mbel-mbelam nib jaas bu feex dënnam a?
3 Ku xelu du layoo waxi caaxaan,
kàddu yu amul lenn njariñ.
4 Yaw de, yaa ngi neenal worma,
di yàq njàngat mi war fa Yàlla.
5 Saw làmmiñ déy, sa ndëngtee koy sa,
yaa taamu di wax njublaj.
6 Du man de, sa gëmmiñu bopp a la teg
daan,
sa làmmiñu bopp a la tuumaal.
7 Xanaa yaa jëkka juddu ci nit?
Am balaa tund yee sosu lañu la jur?
8 Ba Yállay féncoo yaa doon déglu,
ba mana aakimoo xel mu rafet?
9 Ana loo xam lu nu xamul
ak dég-dég boo am, te nu rafle ko?
10 Boroom bijjaaw ak màggat a ngi sunu
biir,
di ñu sut sa baay aw fan.
11 Kàddu yi la Yàlla di mas-sawoo da laa
doyul?
Boole ci li ñu lay waxe teeyu bakkan?
12 Ana looy waxe xol,
di saxaral kanam nii?
13 Ngay sippi Yàlla sa mer,
di ko wax lu mel nii!
14 Ana nit ku mana jub xocc?
Ana ku laab ku jigéen jur?
15 Yàlla wóluwul sax ñu sellam ña ca
asamaan,
te asamaan sellul ba doy ko,
16 rawatina nit, moom mi jara seexlu,
yàqu jikko,
di def njubadi ni ndoxum naan.
17 Déglu ma, ma wax la,
xamal la li ma gis,
18 muy lu ñu rafet xel ñi jottli,
jële ko ca seeni maam, te làquñu ko.

19 Ñoom, seeni maam doŋŋ a jagoo woon réew mi,
 ba leen doxandéem raxaguloon.
 20 Bésoo bés ku bon ay bittarñikoo biir njàqare,
 te diirub at yi ñu àppal ku néeg,
 21 coowal musiba mooy buur nopp ya,
 yàqkat bette ko biir jàmm.
 22 Dootu yaakaara mucc musiba,
 saamar a koy yoot,
 23 muy taxawaalu, tan ya mujj xontoo,
 mu xam ne bésuub safaan taxaw na.
 24 Njàqareek tiitaangee koy èlëm,
 song ko ni buur bu jekku xare.
 25 Moo xàccil Yàlla loxo,
 di jaay Aji Man ji njàmbaar,
 26 danñiiral, buur, wuti ko,
 yiirroo dèllaayu pakkam,
 27 te fekk ko yaflu ba gèt suulu,
 pooj ya duuf bay lob-lobi.
 28 Ku ni mel ay dèkke dèkk yu gental,
 ci kër yu kenn dul dèkke,
 kër yu nara doon jali tojit.
 29 Ku bon kooku du woomle, alalam du toog,
 te koomam du lawe miim réew.
 30 Du mucc musiba,
 mooy garab gu daay xoyom car yu yees ya,
 Yàlla wal, mu ne mes.
 31 Bumu yaakaar naxi neen, di nax bop-pam,
 nde neen ay doon ab añam.
 32 Balaa jantam a lang mu jot añam,
 te caram dootu naat.
 33 Day mel ni reseñ gu doom yay yolax,
 mbaa oliw gu tóor-tóor yay ruus.
 34 Waa làngu yéefar yi duñu am kuutaay,
 te xaymay lekk-kati ger yi la sawara di xoyom.
 35 Ñooy sos joote, wasin ñaawtéef,
 ñoom la seen biir di èmb wuruj.

16

Ayóoba gisatul yaakaar

1 Ayóoba àddu ne:
 2 Kàddu yu mel nii, dégg naa ko lu bare.
 Dèfalkati yokk joote yi ngeen doon, yeen ñépp!
 3 Sa waxi ngelaw yii da dul jeex?
 Ana lu la cuq, ba ngay wax rekk?
 4 Su ngeen doon man, may yeen,
 kon it ma mana wax ni yeen,
 tuur leen baati tuuma,
 wècc leen bopp.
 5 Waaye su doon man,
 ma wax ak yeen, ba dèfal leen,
 mas-sawu leen, ba ngeen giif.
 6 Waaye su ma waxee, mitit du giif;
 su ma noppee, du tax mu sore.
 7 Yàlla kay a jeexal sama doole,

tas sama gàngoor.

8 Moo ma jàpp, semmal ma;
 samab jeexaay seedeel ma tuuma.
 9 Meram la ma daggatee, jéppi ma,
 di yéyu ci sama kaw,
 daasal ma gèti noon, ne ma jàkk.
 10 Nit ñaa ngi ña nàpp fi sama kaw,
 sewal ma, di ma talaata,
 dajaloo, sam ma.
 11 Yàlla da maa wacce ab kàccoor,
 rattax ma ci loxoy ñu bon ñi.
 12 Féexoon naa, mu falaxe ma;
 séq sama ndodd, rajaxe ma,
 def ma diirukaayam,
 13 ay fittkatam gaw ma,
 mu di ma butti te yèrèmul,
 di tuur sama sébbriit fi suuf.
 14 Mooy buur ni xarekat fi sama kaw,
 di ma jamat.
 15 Ab saaku laa ñaw, taqoo,
 torox, ne dett fi suuf.
 16 Sama kanam a ngi xonq curr aki jooy,
 sama mbari bêt bàddoo lëndëm.
 17 Moona saay yoxo jèfewul coxor,
 te samag ñaan lal na worma.
 18 Suufoo, bul làq sama deret ji tuuru,
 te yal na sama yuux jollee fu af.
 19 Ma ne, tey fi tey, am naa ab seede kaw asamaan,
 sama seede kay a nga fa kaw.
 20 Ñi may kókkali, saay xarit a,
 waaye Yàlla laa koy jooy.
 21 Na ab seede layool nit fa Yàlla,
 ni doom aadama di layool moroom ma fi kaw suuf!
 22 At yu néew déy a ci des,
 ma dem yoon wu ma dul délisi.

17

1 Sama xol jeex,
 samay fan tàggoo,
 bàmmee! di ma xaar.
 2 Fu ma jublu ñu di ma ree,
 di ma ñaawal, may gis.
 3 Ngalla Yàlla, gàddul mab daan
 sama digg ak yaw,
 su dul yaw, ana ku may gàddu?
 4 Yaa fatt xelu ñii,
 kon nag bu leen may ndam.
 5 Nee ñu, ku njariñ tax nga wor xarit,
 say doom a cay loru.
 6 Man la nit ñi def léebukaay,
 di ma tifi ci kanam.
 7 Naqar tax na saay gèt giim,
 saa cér yépp jeex ba mel ni takkndeer.
 8 Ku jub a ngii jommi ci lii ma dal,
 ku tooñul a ngi xabtalul fi kaw yéefar yi.
 9 Waaye aji jub a ngi topp yoonam,
 boroom loxo yu set a ngi gèna am kàttan.

10 Waaye yeen ñépp, waxaatleen, ma dégg,
boroom xel daal duma ko gis ci seen biir!

11 Samay fan wéy na,
mébét yaqu,
yaakaar yàkki.

12 Ñii guddi lañu def bëccëg,
naan leer sorewul, te lëndëm teew.

13 Ndegam kërug njaniw laa yaakaarati,
te biir lëndëm laa nara téri,

14 ndegam maa naa paxum yàqute ma:
«Yaay sama baay!»
naa saxu bàmmee! «Yaay bóoy!» mbaa
«Jigéen sama!»

15 Kon ana sama yaakaar?

Ana ku gisati sama yaakaar?

16 Xanaa day ànd ak man tàbbi bàmmee!
nu bokk tēraayu pënd.

18

Bildàdd buurati na

1 Bildàdd mu Suwa àddu, ne:

2 Xanaa dungeen noppi muk?

Àndleen ak xel, nu wax.

3 Ay mala ngeen nu teg daal,
def nu ay naataxóona?

4 Yaw nag yaa topp sa mer ba loru!

Ayóobaa, àddina day gentel ngir yaw a?
Am aw doj ay toxal boppam ngir yaw?

5 Ku bon kay lag leeram di fey,
te taalam du jolli.

6 Xaymaam day lëndëm,
làmpam ba ko tiim ne kamaj.

7 Bu daa waaxu démb, di temp tey,
ay mébétam di ko mbas.

8 Moo dox ba tàbbi cib caax,
wēndeeloo biir mbaal,

9 tànk ba téqtaloog fiir,
ab racctal ne ko ràtt.

10 Buum ga koy lonk a nga suulu,
am yeer di ko xaarew ñal.

11 Lu ragloo koy darey mbetteel,
ne ko dann.

12 Mooy xiif ba doole réer ko,
musiba taxaw, xejjoo ko.

13 Jàngoro di ko ñacc,
woppi ndee di lekk cér ya.

14 Ku bon lees di ñoddee fa jàmmi xay-
maam,

diri ko ba fa kanam buuru musiba yi,

15 manees naa dēkke xaymaam, moomatu
ko,

tamarax lees fay suy.

16 Ku bon mooy garab gu dee kaw ak suuf,
reen wow, xob lax.

17 Turam tukkee kaw suuf,
ba deesatu ko tuddem pénc.

18 Dees koy bēmëxeg leer, tàbbal lëndëm,
dàqe ko àddina.

19 Du doom, du askan wu muy waccey
bokkam,

te kenn du desey dalam.

20 Waa sowa jommi cig mujam,
waa penku di rasu naa:

21 «Dalub kàccoor déy, lee di mujam,
ku faalewul Yàlla, nii la màkkaanam!»

19

Yàllaa may jot

1 Ayóoba àddu ne:

2 Dungeen ma noppee xañ jàmmi bakkan,
di ma séf wax ju dul jeex?

3 Fukki yoon a ngii ngeen di ma saaga,
te rusuleen maa sonal.

4 Su ma moyoon dégg sax,
maay bokk ak sama moy fanaan.

5 Defe ngeen ne yeena ma gën,
ba di ma sikke musiba mii ma dal?

6 Waaye xamleen ne Yàllaa ma tooñ,
ab caaxam a ma dar kepp.

7 May woote wall, wuyeesu ma,
ma ñaan ndimbal, àtteesu ma.

8 Manumaa jàll, Yàllaa fatt sama yoon,
lëndëmal samay jaaruwaay,

9 sàggi sama sag,
foq sama kaala,

10 tojat ma wetoo wet ba ma tàggo,
déjjati sama yaakaar ni garab,

11 jafalal mam sànjam,
boole ma ciy noonam,

12 ay gàngooram dikkandoo,
yékkatiy jal, gawe ma,

dal fi wër sama xayma.

13 Samay bokk, mu soreleek man,
samay xame sax ñooru ma.

14 Jegeñaale ba ma,
xame fàtte ma,

15 sama gani démb def ma ni jaambur tey,
samay mbindaan it noonu,
ñu def ma ni doxandëem.

16 Su ma doon woo sama surga, ba di ko
tinu sax,

da may tanqamlu.

17 Sama xetu gémmiñ dàq na sama jabar,
sama doomi ndey sax seexlu ma.

18 Gone yi sax a ngi may sewal,
su ma jógee di dem, ñu di ma baatal.

19 Sama wóllërey démb yépp a ma sib,
ma sopp leen, tey ñu dëddu ma.

20 Der aki yax laa dese,
daanaka dee naa.

21 Yërmandee, yërmande, yeen samay
xarit,

Yàllaa xàcci, fàdd ma!

22 Lu ngeen ma toñale nii ni Yàlla?

Xanaa yàppuleen ma ba suur?

23 Éy su samay kàddu tēnku woon ci
mbind!

Éy su ñu manooña xacc mbind ma cib téere,

²⁴ xacce ko xalimag weñ ak beteex mu ñaase fàww ciw doj!

²⁵ Waaye man xam naa ne sama jokat a ngi dund,

te mooy mujje taxaw fi kaw suuf.

²⁶ Bu sama der bi lekkoo sax, du tee ma dese suux wu ma xoole Yàlla,

²⁷ xoolal ko sama bopp, te du doon sama gan.

Maaka namm lii ci sama xol!

²⁸ Yeena ngi naan: «Ana nun koy tonjale, ba am lay wu ko tiññal?»

²⁹ Ragal-leen saamar!

Seen xadar jii ñaawtéef la, saamar ay àtteem,

xamleen ne àtte am na.

20

Cofar nee ku musiba dab, yaa tooñ

¹ Cofar mu Naama àddu ne:

² Kon ma àdooti ndax jaaxle, ba xol jallaañoo.

³ Dégg naa kàddug yedde gi nga may saagaa,

waaye samam xel a ma déey sa tont.

⁴ Xanaa xamoo lii? La dale ca cosaan, ba nit tegoo kaw suuf ba tey,

⁵ xamoo ne ku bon, ag sarxolleem àggul fenn,

te bannexu yéefar yàggul?

⁶ Bu màggoon ba tollook asamaan it, ba bopp ba àkki fa kawa kaw,

⁷ day mujj seey fàww niy jonkanam; ña ko daa gis naa: «Ana mu?»

⁸ Kenn du ko gisati, day réer ni gént, mbaa njeneeru guddi ju dàqu, wéy.

⁹ Bèt bu ko gisoon de du kóllanti, dèkkuwaayam dootu ko séen,

¹⁰ ay doomam ay dàmپ néew-ji-doole yi, ba delloo seen alal.

¹¹ Mooy ànd ak dooley ndawam, tèri biir bàmmeel.

¹² Lu bon la daa tàqamtikoo, log ko, làq ca suufu làmmiñ wa,

¹³ di ko siirantal te du ko wacc, xanaa taf ko ca digg denqleñ ma.

¹⁴ Waaye la muy lekk ay soppiku ca biiram, doon danjuru ñàngóor ca butit ya.

¹⁵ Moo dèrèxoon alal, moo koy goqi, ca biiram la ko Yàlla di yuree.

¹⁶ Ndeke tookey ñàngóor la muucu, mu rey ko ni mat-matu saamaan.

¹⁷ Yàlla bumu niir wali dex ak waltani lem ak soow.

¹⁸ Dina delloo lu mu amoon, du ko warax; te alal ju mu jula woon, du ko jariñoo.

¹⁹ Moo dèggaate néew-ji-doole, dèddu ko;

aakimoo kër jaambur te tabaxu ko.

²⁰ Biir ba du wéet, lu mu xemmem, du récc.

²¹ Dara du récc ab kollam, moo tax xéewalam du toog.

²² Fa mu regge lay jàqe, mépp musiba këppu ci kawam.

²³ Ba muy sol kollam

la ko Yàlla di yónnee tàngooru sànjam, tawal ko ko lu fees déqam.

²⁴ Mu daw ngànaayu weñ, fittu xànjari bétto ko,

²⁵ jam ko ba féll,

cat la bétto xol ba, di melax fa mu sare, tiitaangey ndee ne ko taral.

²⁶ Mboolem lëndem a làqu di ko xaar, te sawara wu loxo jafalul a koy xoyom, lakkaale lu desoon ca xaymaam.

²⁷ Asamaan ay weer ñaawtéefam, suuf jóg, seedeel ko tuuma.

²⁸ Koomum kèram day tukki, ne mes, keroog sànjum Yàlla ma.

²⁹ Lii moo di wàllu nit ku bon, fa Yàlla, muy cér bu ko Yàlla dogalal.

21

Ayóoba weddi na àlluway xarit ya

¹ Ayóoba àddu ne:

² Dégluleen maa, dégluleen sama baat, te mas-sawoo ma seenug teewlu.

³ Muñal-leen ma boog, ma wax, man, balaa nit a reeti.

⁴ Sama tawat lii, da di maak nit a?

Gannaaw du nit, ana lu ma tee xàddi?

⁵ Geesuleen ma, waaru,

ba loxo ub gémmiñ.

⁶ Su ma ko xalaatee, damay tiit, di kat-kati.

⁷ Lu tax ku bon di dund,

bay magal sax, di ànd ak doole?

⁸ Doomam day toog, mu fekke,

bay xool ay sètam,

⁹ kèram nekke jàmm, mucc safaan,

te yetu Yàlla du ko dal.

¹⁰ Ku bon, yèkkam day tèb te du moy, nagam di jur te du xacc.

¹¹ Day gis ay xaleem di bajantu,

goneem yépp di tébantu.

¹² Day xaacoondook um tegg aki xalam, di bége baatub toxoro,

¹³ Ku bon ay ñédd ay fanam ci biir ter-aanga,

doora jekki wacci njaniiw.

¹⁴ Moona kee noon Yàlla: «Xiddi ma!

Xam saw yoon soxalu ma.

¹⁵ Ana kuy Aji Man ji sax ba ma di ko jaamu?

Su ma ko tinoo, ana lu mu may jariñ?»

¹⁶ Kii xanaa du teraangaam a ngi ciy loxoom?

Ndaxam taxul ma roy ko fenn!

¹⁷ Ku bon, ana fu ag xuyyam kamaje?

Fu ko musiba dikkale?

Fu Yàlla mere, ba sédd ko safaan?

¹⁸ Ana fu ku bon mele nim ñax mu ngelaw wal,

mbaa boob mu callweer yóbbu?

¹⁹ Æa ku bon daal ay tooñ, Yàlla dencal doomam añ ba?

Ki tooñ kay, na ko fey, mu xam,

²⁰ gisal boppam sànkuteem,

ba jolu merum Aji Man ji!

²¹ Ana luy yoonu ku bon ci waa kërám, gannaawam,

te fekk limu fanam jeex?

²² Ana kuy jàngal Yàlla xam-xam,

moom miy àtte ñu kawe ña?

²³ Kii a ngi deeyaale dooleem,

xel ma dal, tiitul dara,

²⁴ yaram wa niin,

yax ya naat.

²⁵ Kee deeye naqaru xol,

masula ñam bânneex,

²⁶ te ñooy tēddandoo biir suuf,

bokk sàngooy sax.

²⁷ Mu ngoog! Maaka xam li ngeen foog,

te di ma ko fexee fitnaale!

²⁸ Ngeen ne: «Ana fu kër kàngam di mujje?

Ana xayma ba ku bon ka dēkke?»

²⁹ Xanaa laajuloo tukkikat yi?

Am gēmuloos seeni seede?

³⁰ Bésuub safaan ku bon ay mucc,

bésuub mbugal it, mooy raw.

³¹ Ana kuy janook moom, sikke ko jikkoom?

La mu def, ana ku ko koy fey?

³² Moom de bu deeyee, sēg ya lees koy robi,

te bàmmeelam, dees na ko wattu.

³³ Liy topp néew ba, day bare,

liy dox jiitu ko wees ab lim,

te suufu xur wa sax da koy sedde.

³⁴ Kon seeni mas-sawu, cóolooli neen!

Seeni tont, jinigali kесе!

22

Elifas nee tuub a war Ayóoba

¹ Ba loolu amee Elifas ma cosaanoo Teman àddu ne:

² Yàlla, ana lu ko nit mana jariñ?

Xanaa ku xelu jariñ boppam!

³ Ana lu sag njub mana yokk Aji Man ji?

Lu ko sag mucc ayib mana indil?

⁴ Xanaa du sag njullite la lay bantale,

bay àgg ak yaw ci layoo?

⁵ Du sag mbon gu réy a la ko yóbbe,

ak say tooñ yu amul kem?

⁶ Yaa lebal mbokk, aakimoo tayleem ci dara,

bay nangu mbubbam néew-ji-doole, mu ne dunj.

⁷ Yaa mayul ku mar ndox mu naan,

mbaa nga xañ ku xiif lu mu lekk.

⁸ Boroom doole jagoo réew mi,

ku ñu beral loxo dēkke.

⁹ Yaa bàyyi jētun, mu deme loxoy neen,

tey néewal doole ab jirim.

¹⁰ Moo tax ay ndēgg-sērēx di la dar kepp,

musiba jekki ne la taral,

¹¹ mbaa lëndēm gu la teree gis,

mbàmbulaan dikk, mèdd la.

¹² Xanaa Yàlla sutul asamaan?

Xoolal biddiiw ya gēna kawe!

¹³ Nga naa: «Ana lu Yàlla xam?

Ana nu muy àttee ci gii lëndēm gu tar?

¹⁴ Niir yee ko làq ba du nu gis,

fa muy doxantoo ca kaw taaxum asamaan!»

¹⁵ Dangaa nara topp ñallu démb,

wa nit ñu bon ña ñaloon?

¹⁶ Ñoo buube, ne mes te seen àpp jotul,

seen kenu màbb, wéy nim wal,

¹⁷ te ñoo doon naa Yàlla: «Xiddi nul!»

Ñii ana lu leen Aji Man ji di def?

¹⁸ Moona moo feesaloon seeni kër ay ter-aanga,

waaye ñu bon ñii, royuma leen fenn.

¹⁹ Aji jub ñeey gis sànkutey ñii, bég;

ñu mucc tuuma ñaa leen di kókkali,

²⁰ naan: «Na nu jógaloon sànkuwuñoom?

Seen koom ma xoyomuwwul a?»

²¹ Jubool ak Yàlla rekk, am jàmm, ngēneel dikkal la.

²² Nangool ndigal ci làmmiñam,

te dēxēni kàddoom ci sa biir xol.

²³ Dellul ci Aji Man ji rekk, ba taxawaat,

te nga sorele sa xayma njubadi.

²⁴ Tegal wurus ci suuf,

wacce wurusu ngalam doji xur,

²⁵ te Aji Man ji di sa wurus,

di sa jali xaalis.

²⁶ Su boobaa nga bége Aji Man ji,

mana siggi, séentu Yàlla,

²⁷ di ko ñaan, mu di la nangul,

yaw it ngay wàccook say dige,

²⁸ loo dogu, mu sotti,

foo jaare, mu leer,

²⁹ ba bu nit detteeloo, nga yékkati ko,

te ku toroxlu, Yàlla wallu la.

³⁰ Ku ñàkkula tooñ sax, mu xettli la,

te sag ñàkk sikk lees koy xettlee.

23

Ayóoba nee Yàlla noppi na

¹ Ba loolu amee Ayóoba àddu, ne:

² Ba tey maa ngi jooy jooy yu mettì,

di onk bay ub gēmmiñ,

³ Éy bu ma xamoon fa may gise Yàlla,

ba àkki péncam,

4 diis ko sama mbir,
 ágge ko lépp lu may tawat,
 5 ba xam lu di tontam,
 dégg li mu may wax.
 6 Ndax dooleem ju bare la may yeye?
 Déédéet xanaa! Dina ma teewlu moos,
 7 ba ku jub layoo faak moom,
 ma daldi mucc sama àttekat fàww.
 8 Seet naa wetu penku, Yàlla nekku fa,
 ma seet sowu, gisuma ko.
 9 Bu jappee fa wetu bèj-gànnàar, gisuma
 ko fa,
 bu jàllee bèj-saalum séenuma ko fa.
 10 Ndaxam moo xam fi ma jaare,
 te bu ma nattoo, ma génn ci
 ni wurus wu ñu xelli.
 11 Tànkam, sama tànk,
 yoonam laa tegu, moyuma ko.
 12 Dédduwma ay santaaneem,
 sama biir xol laa denc ay kàddoom.
 13 Yàlla de kenn la, ana ku koy waññi?
 Coobarey bakkanam lay def.
 14 Mooy sottal lu mu ma dogalal,
 te bare na lu mu ma nasal.
 15 Lee tax su ma janook moom, tiit,
 te lu ma gëna xalaat, gën koo ragal.
 16 Yàlla daal a réccal samaw fit,
 Aji Man jee ma tiital!
 17 Du lëndëm gi ma nekke moo ma
 wedamal,
 du lëndëm gii ma muur.

24

Ayóoba nee Yàllaa ngi tanqamlu

1 Lu tee Aji Man ji àppal nit bési mbugal,
 ba ku raññee Aji Sax ji fekke yooyu
 bésam?
 2 Nit a ngi toxal kemu suuf,
 nit a ngi sàcc ug jur, foral leen.
 3 Mbaamu jirim, ñu wommat, yóbbu;
 nagu jëtun, ñu jël kob tayle.
 4 Néew-ji-doole, ñu buuxe ko ciw yoon,
 baadoolo yi far bokk làquji.
 5 Néew-ji-doole yaa ngii mel niy mbaami
 àll ci màndiŋ mi,
 di fortaatu lu ñu lekk,
 àll bu wow bi yor seen xontu njaboot.
 6 Tooli jaambur lañuy góobaani,
 di wittaani reseñ ca tóokëri ñu bon ña.
 7 Duŋŋ lañuy fanaane ndax rafle,
 sàngoo seen der ci sedd bi.
 8 Nooy tawtee tund ya,
 di làqoo xunti yu ñu seeloo.
 9 Xoncees na jirim ci weenu ndeyam,
 jëlees na tayle alalu néew-ji-doole.

10 Duŋŋ lañuy wéye ndax rafle,
 biir wéet, ñuy gádduy sabaar,
 11 di nal diwu oliw ci tooli jaambur,

di dër reseñ ju ñu dul naan.
 12 Biir dëkk ba la nit ñay binnee,
 ña ñu gaañ di woote wall,
 te Yàlla toppul kenn tooñ.
 13 Née noonoog leer,
 faalewñu yoonu béccëg
 te duñu fa taxawaaloo.
 14 Bët di set, bóomkat jóg,
 bóom baadoolo bi néew doole,
 guddi jot mu dib sàcc.
 15 Moykat bu góor a ngi yeeru timis,
 fab ndimo, kaalawoo,
 naan bët du ko gis.
 16 Ñu ngi lëndëmtu, di toj kër yi,
 béccëg ñu tēju,
 xamuñug leer.
 17 Noom ñépp ñuulaayu guddeey seen
 béccëg,
 lëndëm gu ne këruiis lañu xejjool.
 18 Yal nañu wéye walum ndox,
 te suuf sa ñu séddoo alku,
 ba kenn dootu dëgmal tóokëru reseñ.
 19 Yal na maral ak tangoor ñjiisal seen
 ndoxum taw,
 te njaniw médd ña bàkkaar.
 20 Yal na leen seen ndey sax fàtte,
 sax yi muucu leen,
 ñu fàtte leen,
 ba njubadi déjjetiku ni garab.
 21 Ñu ni mel ay lekk alalu jigéen ju tëlee
 jur,
 te duñu baaxe jëtun.

22 Waaye Yàllaa mana dàq boroom doole,
 su nee tëll, mu xalaat bakkanam.
 23 Moo leen di may ñu wéeroo seen
 céslaay,
 tey xool fa ñuy jaare.
 24 Dañuy jóg, nes tuut ñu ne mes,
 wadd, ñu boole for,
 ñu daldi lax niy gub.

25 Su dul noonu, ana ku may fenloo?
 Ana ku mana neenal samay wax?

25

Deesul am dëgg fa Yàlla

1 Bildádd ma bàyyikoo Suwa áddu, ne:
 2 Yàllaa man te mata ragal,
 di def jàmm fa kawteem ya.
 3 Ay gàngooram limu naam?
 Ana ku mu dul jam ceñeeram?
 4 Ana nu nit di ame dëgg fa kanam Yàlla?
 Ku jigéen jur, nu mu mana laabe?
 5 Xoolal, weer wi sax leerul ba doy ko,
 te biddiww yeet gisul seen sellaa yu leer,
 6 astamaak nit kii tanewulu sax,
 doom aadama jii gëñul gasax.

26

Yaa mat wall

¹ Ayóoba àddu, ne:
² Ndaw ndimbal lu réy ci ku néew doole!
 Yaaka mana wallu ku amul kàttan!
³ Yaaka mana xelal ku xeluwul
 ak xam-xam bu yaa bi nga fi xamle!
⁴ Ana ci koo jële sa kàddu yii sax?
 Ak ku la xelal miim xel?

Yàlla kenn xamu ko.

⁵ Ndem-si-yàlla yaa ngay lox
 ca ron ndoxi biir suuf, ñook ña fa
 dëkke.
⁶ Fànñ la njaniw def fa kanam Yàlla;
 du genn kiiraay gu ko làq paxum sànkute.
⁷ Kee firi asamaan fu dara amul,
 sanjamtal suuf fu dara newul.
⁸ Kee gëndaley ndox ciy xàmbaarum,
 te taxul niir wa ñu laloo fàcc.
⁹ Keey firi aw niiram,
 yiire ngànguneem.
¹⁰ Kee rédd digu wérngal fi kaw géej yi,
 fa cat la leer ak lëndem digaloo,
¹¹ kenuy asamaan jaayu,
 di jommi ci kàddu yi muy géddee.
¹² Dooleem la mane géej,
 manoreem la rajaxee Raxab ninki-nànka
 ja.
¹³ Noowam wal, asamaan leer,
 loxoom jam jaan jay balaw-balawi.
¹⁴ Lii de, mooy lenni jalooreem!
 Ndaw ndéey lu tuut lu nu ci dégandeem!
 Ana ku mana xam riiru dooleem?

27

Ayóoba bañ na

¹ Ayóoba dellu yékkati kàddoom, ne:
² Yàlla miy dund seere na, moom mi ma
 xañ dëgg,
 moom Aji Man ji ma teg naqaru xol,
³ ne li feek may ànd ak bakkan,
 di noyyee noowal Yàlla,
⁴ sama gémmiñ gii du wax njubadi,
 sama lámmiñ wii laa ne, du tudd ay fen.
⁵ Yàlla buma leen jox dëgg,
 ba ba may dee дума weddi samag mucc
 sikk.
⁶ Sama njekk laay ñoy, дума ko ba,
 sama giiru dund sama xel du ma yedd.

Yéene néeg la

⁷ Yal na noon bokk ak ku bon demin,
 ku may fexeel bokk ak kàccoor ag muj.
⁸ Ana lu yéefar biy yaakaarati bu fàddoo,
 ba Yàlla moom bakkanam?
⁹ Bu ko njàqare di dikkal,
 Yàlla day dëgg yuuxam a?
¹⁰ Ndax Aji Man ji la daan bége,
 am daan na tudd Yàlla fu mu tollu?
¹¹ Ma xamal leen boog li ci dooley Yàlla,
 дума leen nëbb li Aji Man ji namum.

¹² Dama ne, yeen ñépp a ko gisal seen bopp
 sax,
 kon lu leen yebuloo nii ci neenug neen?

¹³ Lii mooy cér bi Yàlla sédd ku bon,
 mooy wàll wi Aji Man ji dencal ku néeg.
¹⁴ Njabootam ne xas, saamar jagoo,
 te balaa booba duñu lekk ba suur.
¹⁵ Ña koy wuutu, mbas a leen di rey,
 te ay jétunam duñu ko jooy.
¹⁶ Su doon jal xaalis ni suuf,
 yére yomb ko ni feppi suuf,
¹⁷ mooy dajale, aji jub sol;
 xaalis ba, kay def njub séddoo.
¹⁸ Mooy tabax kër gu tanewul
 mbaarum wattukatu tool,
 te lëndu jargoñ gèn koo dëgër.
¹⁹ Keey téraale alal ju mu dul gisati;
 day xippi, fekk mu ne mes.
²⁰ Musibaa koy dab nim wal,
 ngélénu guddi kër, yóbbu,
²¹ ngelawal penku déjjatee ko kërám,
 jalax, mu wéy.
²² Dees na ko diir, bañ koo ñéeb lu,
 mu daw, di wuta récc dooley saan ya.
²³ Dees na ko tacc-taccali loxo,
 di ko ciipoo fa kërám.

28

Xel mu rafet, fa Yàlla

¹ Xaalis déy am na mbellam,
 wurus am bérabu seggukaayam,
² weñ gu ñuul ci suuf lees ko jële,
 te xàñjar, ay doj lees di xelli, ba am ko.
³ Dees na taal, dàq ug lëndëm,
 di gëstu ba fu gëna làqu
 doji biir lëndëm gu ne kërúus.
⁴ Nit a ngi gas ay xunti fu soreeki
 dëkkuwaay,
 di sandaamtalook a jaayu fu kenn newul,
 te tànk jaarewu fa.
⁵ Kaw suuf day meññ ub dund,
 xóote ya mel ni lu sawara salfaañe.
⁶ Doj ya ca biir la peri safiir màkkaanoo,
 te pëndaxu wurus ñàkku fa.
⁷ Wii yoon, tan xamu ko,
 bëtú jaxaay du ko gis.
⁸ Rabu àll du fa joggi,
 te gaynde sax du fa jaare.
⁹ Loxol nit ay song doju kekk,
 buddi reeni tund, jàllarbi.
¹⁰ Ci biir xeer yi lay yettey xunti,
 ba bëtám di gis lu cay alal.
¹¹ Nit a ngi dogale wali ndox,
 ba lu làqu woon, mu leeral nàññ.
¹² Waaye xel mu rafet fees koy jële,
 ak fu ag dëgg màkkaanoo?
¹³ Doom aadama xamul njégam,
 te amul biir réewum aji dund ñi.

14 Xóote ya nee: «Xel mu rafet dëkku fi de!»

Géej ne: «Nekku fi de!»

15 Wurus mayewu ko, xaalis wecciwu njégam.

16 Deesu ko wecce wurusu ngalam it, mbaa peri onigsë ak safiir.

17 Deesu ko méngaleek wurus ak ngën-gi-per yuy tàkk,

te ngën-gi-gànjari wurus wecciwu ko,

18 waxeesuli xor ak yeneen xeeti per; xel mu rafet a gën per yu gëna jafe,

19 du moroomu peru topaas

ba ca réewum Kuus,

te wurusu ngalam daal wecciwu ko.

20 Xel mu rafet, ana fu mu jóge, ak fu ag dégg màkkaano?

21 Ump na bëtu lépp luy dund; njanaaw la fa kaw sax gisu ko.

22 Paxum sànkutee ngi àddoondook ndee naan:

«Dégmati nan ub jëwam de!»

23 Yàllaa ràññee yoon wa jëm xel mu rafet, te moo xam màkkaanam.

24 Kii daal ay jéer ba fa cati àddina, di gis mboolem lu asamaan tiim.

25 Ba Yàlla àppalee ngelaw diisaayam, nattal ndox ab dayoom,

26 ba mu sàkkalee ab taw dogalu yoonam, sàkkal melax ak dënu aw ñallam,

27 ca la nemmiku xel mu rafet, xamle ko, samp ko, gëstu ko,

28 daldi ne doom aadama:

«Ragal Boroom bi daal, mooy xel mu rafet, te dëddu lu bon mooy am ug dégg.»

29

Ayóoba jooj na démbam

1 Ayóoba tàmbaleeti ne:

2 Éy ku ma doon delloo jamono ya woon, fan ya ma Yàlla daa wattoo;

3 ba mu may tiim, di ma niital, may doxe ag leeram, biir lëndëm!

4 Ba ma tolloo sama digg doole, te Yàlla xejjoo sama xayma.

5 Booba Aji Man jaa ngeek man ba tey, sama gone yu goor yéew ma,

6 may jàngoom niw, seggukaay di ma walal ag diw.

7 Bu ma génnaa ba ca bunt dëkk ba, digg pénc ma laay jekkasndikoo,

8 waxambaane gis ma, ñooru, mag ña jóge, taxawal ma,

9 kàngam ne xerem, ub gémmiñam,

10 garmi ne selaw, làmmiñam taqoo denqleñam,

11 nopp dégg ma, ndokkeel ma, bët gis ma, seereel ma yiw.

12 Néew-ji-doole woote, ma wallu,

boole ci jirim bu tumurànke.

13 Ñaanu ku naroona sàнку di ma dal, may tooyal xolu jëtun.

14 Njekk laa woddoo woon, njekk wodd ma, te dégg laa defoon mbubub ak kaala.

15 Silmaxa, maa dooni gëtam; ab lafañ, ma diy tànkam.

16 Néew-ji-doole, maa doon baayam, ku ma xamul sax, may seet àqam.

17 Ku jubadi, ma dammi ñaamam, foqatee am pàddam cay sellam.

18 Ma noon samay fan dina neexook feppi suuf,

ma doora deeye sama biir njaboot.

19 Ma noon su ma doon garab samay reen fëllem ndox,

ab lay fanaanee faam car ya.

20 Ma noon darajaa may yeesalal nganam, may gëna ñaƴalati xala.

21 Man lees daa déglu, di ma xaar; ne cell, di taataan samam xel.

22 Samay kàddoo leen di dal, genn-genn, te su ma àddoo ba daaneel, kàddu jeex.

23 Booba lees ma daa séentu nib taw; ña ñàpp, di nég waamey waxset.

24 Samay ree gémeesu ko woon, xanaa ne siwa gis sama kanam gu leer.

25 Maa jiite woon, di dogal doxalin, toog toogaayu buur ci biir gàngooram, te di leen dëfal ci seen naqar.

30

Ayóoba jooj na coono

1 Tey ñi may diijoo ngii, te ñoo ma féete ndaw,

seeni baay a tekkiwuloon tus, ba ma siide leena jël,

ñuy sàmmandook samay xaj.

2 Ana njariñ lu ñu ma amaloon sax? Yooyu kooñoor yu jeele?

3 Ñii ndóol, xiif, desey yax, di jeeñaatoo biir àll,

fu lëndëm, gental, maral,

4 di witt ñax mu saxe ciy tan ak a gasi reen, di dunde.

5 Ñooñu lees dàqe fi biir nit ñi, di leen yuuxoo niy sàcc,

6 ñu dëkkey xur, ci biiri pax aki doj,

7 di ñaaxe biir gajj gi, dankaloo ci ron dëg yi.

8 Ñu sew lañu, ñu kenn yéguul, xanaa caw leen, génne réew mi.

9 Tey nag ñoo may woyantoo, di ma léeboo.

10 Dañu maa seexlu, ñooru ma, néeg maa serati ci kanam.

11 Yállaa ma nasaxal, torxal ma,
ba amatuñook man yemukaay.
12 Mii njurum baadoola mu féete ndijoor,
di ma téqtal,
di ma xállal yooni sànkute.
13 Ñu ngi may dogale, nar maa musibaal,
te soxlawuñu ci ndimbal.
14 Fu yaa lañu bëtte,
buure jali tojit, ne jàyy fi sama kaw.
15 Musiba da maa èlèm,
sama daraja naaw ni ngelaw,
sama teraanga naaxsaay niw niir.

16 Tey maa ngii sama bakkan di njiis,
bési njàqare ne ma taral.
17 Guddi dikk di bënn samay yax, muy rot,
mitit di ñereñ te du selaw.
18 Kii ne nikk sama mbubb,
ne ratt sama baatu mbubb,
19 xalab ma ci biir ban bi,
may nirook pénd akub dóom.
20 Woo naa la wall, wuyuwoo ma,
ma taxaw, nga niir ma.
21 Yaa soppiku, nége ma,
di ma soxoree sa diisaayu loxo.
22 Yaa ma ne siféet, waral ma ngelaw,
panti-pantee ma biir ngélén.
23 Xam naa xéll ne ci dee nga ma jème,
te mooy kërug ndajem képp kuy dund.

24 Ku sànkule du tàllal loxoo?
Ku musiba dab du woote wall?
25 Moona sama rongooñ a daan tuurul
boroom tiis,
sama xol di tiisoo aji ñàkk ji.
26 Lu baax laa yaakaar, lu bon ne jalañ,
leer laa séentu, guddi ne jaas,
27 sama xol lëmbaajoo, téë dal,
bési naqar dogale ma.
28 Maa ngi wéye ñuulaay bu ma tàngoore
teglu,
di taxawe biir ndaje, di woote wall.
29 Damaa mujj bokk ak till,
neexook looy,
30 ñuul, yaram di xub,
tàng, di bax,
31 sama xalam tiisal,
sama toxoro jooy.

31

Ayóoba waat na

1 Maa jaayantek samay gët.
Ana nu may xooleb janq?
2 Lu ko moy ana sama cér ca Yàlla ma fa
kaw?
Lu ma Aji Man jiy sédde fa kawte ya?
3 Xanaa du safaan a ñeel ku bon,
naqar ñeel ku ñaaw?
4 Du Yállaa ngi gis fu ma jaare,
di waññ sama bépp jéego?

5 Ndegam damaa doxe ndéngte,
mbaa ma gaawtoo njublan,
6 na ma Yàlla natte màndaxekaayu dëgg,
ba ràññee samag mat!
7 Ndegam samay tànk a moy yoonu njub,
mbaa sama xol topp saay gët,
mbaa sama yoxo yii gàkk fenn,
8 yal naa ji, keneen lekk,
ma jëmbat, ñu buddi.

9 Ndegam jabaru jaambur a ma xañ sago,
ba ma di ko yeeroo sama buntu kër mo-
roomu góor,
10 yal na sama jabar bojjal keneen,
ñeneen tiim ko.
11 Su ma ko defoon, muy jëfu yàqute,
di moy gu yeyoo pénc,
12 te di sawara wu may xoyom
ba ca paxum sànkute ma,
lu ma meññle, mu buubaale.

13 Ndegam maa sofental sama àqu jaam,
bu ñu may jooytu, diy góor mbaa jigéen,
14 bu ci Yàlla jógee, ana nu may def?
Bu ma ko laajee, ana lu ma koy wax?
15 Ki ma sàkk ci sama biiru ndey,
xanaa du moo leen sàkk ñoom itam?
Du kenn kee nu sos ci njurukaay?
16 Damaa masa xañ néew-ji-doole lu muy
sàkku,
mbaa ab jëtun wékk ma bët, ma tas
yaakaaram?
17 Am damaa masa wéetoo ab dog,
te sédduma ca jirim?
18 Ba may ndaw laa dala yor ab jirim ni
baayam;
te ba ma juddoo ci sama ndey laa dala
gindi ab jëtun.

19 Ndegam maa seetaan ku rafle nara
sànkú,
seetaan néew-ji-doole ju amul malaan,
20 te sànguma céram, mu sante ma ko,
di nugloo ndimo lu ñu ràbbe sama kawari
gàtt,
21 ndegam maa xàccil sama loxo ab jirim,
ndax yaakaar kiirilaay ca pénc ma,
22 yal na sama loxo teqlikook sama mbagg,
sama pèrëg fàqe ci conc li.
23 Mbugalu Yàlla kat laa ciy ragal,
te màggaayam xajul ci man.

24 Ndegam damaa def wurus sama
yaakaar,
bay tudde ngën-gi-wurus sama cés-laay;
25 ndegam maa bége sama alal ju bare,
bége koom gu ma sama doole may;
26 ndegam maa masa niir jant beek leer-
aayam,
mbaa weer wiy daagoo yànjaayam,
27 ba namma làqu, di ci jaamu lenn,
bay foon sama loxo, wormaale leen;

²⁸ konoon it muy ñaawtéef gu yeyoo àtte, nde kon ma weddi Yàlla ma fa kaw.

²⁹ Ndegam maa bége musibay bañ, mbaa ma bellaxndikoo loraange ju ko dab, ³⁰ te bàkkaarewuma sama làmmiñ sax, ba di ci ñaanal noon alkànde,

³¹ ndegam du samay bokk a ma seedeel ne: «Ana ku mu leelul ndawal ba mu regg?»

³² te biti, masumaa wacc doxandéem di fa fanaan,

sama bunt laay ubbil ku nekk ciw yoon,

³³ ndegam maa roy nit ñi, di nèbb samay tooñ,

di nèpp-nèppal sama sikkaange,

³⁴ ragaluma jèwu àddina de,

tiituma mbooloo mu ma nawloodi it, ba ne cell baña génn sama buntu kër.

³⁵ Ma ne éy ku may may nopp?

Sama torloo ngoog, na ma Aji Man ji tontul Su dee téereb tuuma bu ma ku may layool bindal,

³⁶ maa koy gàddu, kaalawoo.

³⁷ Maay limal Yàlla jéego bu ma séqi, di taxawi fa kanamam taxawaayu garmi.

³⁸ Ndegam sama tool a ma tuumaale ay jooy,

rongoofi toobo yay bas-baseendoo,

³⁹ ndegam maa lekk lu ca ñor, te dikkewuma dara,

ba xañ bakkan ña ma ko beyaloon,

⁴⁰ kon yal na ay dég wuutu bele ba, ñax mu bon wuutu lors ba.

Fii la kàdduy Ayóoba yem.

32

Ndaw nee na mooy tontu mag

¹ Fa la ñetti góor ñooña noppee tontu Ayóoba, ndax la Ayóoba gis njekkam.

² Ba loolul amee Eliyu doomu Barakel ma askanoo ci Buus, bokk ci làngu Ram daa mer ba futt ca la Ayóoba dëggal boppam fi kanam Yàlla, ³ ak la ñetti xariti Ayóoba ya ñàkk lu ñu ko tontu, ba tax ñu teg Yàlla tooñ. ⁴ Eliyu nag moo mujjoona wax ak Ayóoba, ndax moo féete ndaw ñett ña.

⁵ Mu gis ne ñetti góor ña amatuñu tont, xol ba sot, mu mer ba futt. ⁶ Ca la Eliyu doomu Barakel waa Buus ba, àddu ne: Man de damay ndaw, ngeen diy mag,

ba tax may teeylu, ragal leena biralal sama xam-xam.

⁷ Ma noon: «Na yàgga-dund wax, na dund-jopp xamle xel mu rafet.»

⁸ Ndeke xel mi ci nit

mooy noowal Aji Man ji koy may dég-dég.

⁹ Dund-jopp taxula rafet xel, te di mag taxula xam yoon.

¹⁰ Moo tax ma ne: «Déglu ma;

man it ma biral sama xam-xam.»

¹¹ Dama ne, négandiku naa seeni kàddu, teewlu seeni dëggin, ba ngeen di jeexi tont ba tay.

¹² Yeen laa doon teewlu,

te kat kenn ci yeen yeyu ci Baay Ayóoba, kenn joxu ko tontam.

¹³ Buleen ma ne:

«Xel mu rafet mi nu ci gis moo di:

Yàllaa ko mana tiifal waaye du nit.»

¹⁴ Du man la Baay Ayóoba jème kàddoom, kon du seeni wax laa koy tontoo.

¹⁵ Ñii kat jommi nañu, waxatuñu; ba kàddu dèddu leen!

¹⁶ Dama leen di xaar te waxuñu, xanaa taxaw, tontootuñu?

¹⁷ Damay tontu sama wàll, man it; damay biral sama xam-xam, man it kay!

¹⁸ Sama dënn a fees aki wax, te samam xel xiir ma ci wax.

¹⁹ Sama xol baa ngii mel ni lu sol biññ, ube ràpp,

mbete mbuus mu yees mu nara fàcc.

²⁰ Naa wax boog, ba féex, naa àddu, ba tontu.

²¹ Duma ci am xejj ak seen, te duma jay kenn.

²² Xawma sax nu ñuy jaye, nde konoon ki ma sàkk gaaw ma fee jële.

33

¹ Léegi Baay Ayóoba, ngalla déglul samay wax

te teewlu sama kàddu yépp.

² Xaaral, ma àddu boog, ba sama làmmiñ tudd li may bégga wax.

³ Xel mu dëggu laay waxe, samay kàddu di xam-xam bu wóor.

⁴ Ngelawal Yàllaa ma sos, noowal Aji Man ji daal a ma may bakkan.

⁵ Soo manee, tontu ma; defarul, janook man.

⁶ Maa ngii, yem ak yaw fa Yàlla; ci ban lañu ma mooñe man itam.

⁷ Du sama ñangaay bu lay tiital, du sama daraja ju la diis.

Yàlla du moroom

⁸ Yaa wax déy, ma dëgg,

te dëgg naa bu baax say kàddu.

⁹ Nga ne: «Set laa def, tooñuma; mucc ayib laa def, ñaawuma fenn.

¹⁰ Waaye Yàllaa ngii di ma wuta taqal, def ma ab noonam,

¹¹ jéng ma, di xool fépp fu ma jaare.»

¹² Foofu déy, moy nga dëgg, ma wax la ko, Yàllaa sut doom aadama.

¹³ Ana loo koy sikke,

naan du layool lenn ci mboolemi jéfam?

Yàlla dina wax ciy gént

14 Yàlla déy, dees koo teewluwul,
 waaye day wax benn yoon ba yaar
 15 ci biir peeñum géntu guddi,
 fa nelaw dabe nit,
 ba mu yàndoore kaw lalam.
 16 Mu ne ko rukk ndéey,
 boole kook màndarga, artoo ko ko,
 17 ngir dëdduloo doom aadama ji ay jëfam,
 musal jambaar cig réy,
 18 sorale bakkanam pax,
 ba ab xeej di ko bóom*.

Eliyu nee mitit ndéey la

19 Nit dina mbugaloo mitit wu ko tëral,
 muy kat-kati rekk.
 20 Day bañ dugub,
 seexlu ñam wu ko génoona neex,
 21 jeex tàkk bay réer ak a feeñ,
 yaxam ya ne fàññ te sàngu woon,
 22 dundam dëgmal ndee,
 bakkanam di jegeji pax.

Eliyu nee njotlaay du ñàkk

23 Waaye su nit ki amee malaakam àttekat,
 nay kenn sax ci junniy malaaka,
 ngir xamal nit ki li ko war,
 24 da koy baaxe, daldi ne Yàlla:
 «Musal ko ba du wàccagum biir pax.
 Maa ngeek njotlaayam.»
 25 Yaram wa jootaat tooyaayu ndaw,
 mu amaas dooley ngoneem;
 26 bu ñaane Yàlla, mu nangul ko,
 geesu ko, mu sarxolle,
 nde Yàllaay fey nit njekkam,
 27 nit ki seedeeli ko ca nit ña, ne:
 «Maa bàkkaar, maa xëtt njub,
 te feyeesu ma ko sax!
 28 Yàllaa ma jot ba jàlluma, jëm pax,
 xanaa dellu di gis ug leer.»

29 Lii lépp déy, la Yàlla di def,
 mook nit ñaari yoon ba ñett,
 30 ngir sorale bakkanam pax,
 bàyyee ko leeraangey àddina.
 31 Baay Ayóoba, teewluwul, déglu ma,
 neel cell, ma wax la, man.
 32 Soo amee lenn loo wax, àddul;
 waxal, ngir bëgg naa laa dëggal.
 33 Lu ko moy nag, yaa may déglu,
 ne cell, ma jàngal la xam-xam.

34

Eliyu nee Ayóoba moy na dëgg

1 Eliyu dellu ne:
 2 Yeen ñi xelu, dégluleen samay wax,
 yeen ñi xam, teewluleen ma.
 3 Purux déy ay mosu ñam,
 nopp natt kàddu.
 4 Kon nan ànd seet li dëggu
 te bokk ràññee li baax.

5 Baay Ayóoba kat nee moo yey,
 Yàlla xañ ko dëggam.

6 Mu am dëgg, ñu ne moo fen,
 tooñul, mu jam ko fittu ndee.

7 Ana ku mel ni Baay Ayóoba mii,
 di ñaawle ni muy naanem ndox,

8 di àndandook ñiy def lu ñaaw,
 di lëngook nit ñu bon ñi,

9 te naa: «Nit ki seet bànnexu Yàlla,
 ana lu mu koy jariñ?»

Yàlla du def lu bon

10 Kon yeen niti xel ñee, dégluleen ma,
 Yàlla jegewul fenn mbon!

Aji Man ji jegewul mukkk njubadi!

11 Jëfu doom aadama ji daal, moom la koy
 fey;

na nit kiy jëfe rekk la koy yoole.

12 Li wóor mooy Yàlla du def lu bon,
 Aji Man ji du jalgati yoon.

13 Ana ku ko dénkk kilifteefu dun bi?

Ana ku ko yen àddina wërngal kèpp?

14 Bu ci Yàlla yebu woon,

ba roccim xelam ak noowam,

15 bépp boroom bakkan ay bokk ne lasiim,
 doom aadama dellu di pëndub suuf.

Yàlla amul par-parloo

16 Ndegam am ngag dëgg, dëggal lii,
 teewluwul sama kàddu gii.

17 Manees naa jiite te bañ yoon?

Am dangay sikkal ki njubam matale?

18 Kii moo naan buur: «Yaa sew!»

naa garmi: «Yaa bon!»

19 Kii du far kàngam,

du teg ku am ci kaw ku ñàkk,

nde ñoom ñaar la boole sàkk.

20 Nes tuut, dee dikke xaaju guddi,

mbooloo fippu, kàngam ya ne mes,

boroom doole sàngu, te loxo laalu ko.

21 Yàlla déy a ngi ne jàkk ci jaar-jaari nit
 ki,

di xool bépp jéegoom.

22 Du fenn fu lëndëm mbaa fu ne këruus,

fu kuy def lu ñaaw mana làqoo.

23 Yàlla daal, soxlawula liñbat nit ki,

bala mu koy woo cib àtte.

24 Mooy rajaxe boroom doole te du laajte,

daldi fal keneen mu wuutu ko.

25 Moo ràññee moos jëfi boroom doole,

ba jàllarbi ko genn guddi, mu rajaxoo.

26 Moo koy dóore fu ne fàññ,

ni ñuy dóore ku bon.

27 Li ko waral di boroom doolee dëddu

Yàlla,

sofental mboolom digley yoonam,

28 ba yuuxi baadoola yi àgg fa moom,

mu dëgg yuuxi néew-ji-doole ya.

29 Bu Yàlla nee cell, ana ku koy ñàññ?

Bu làqee kanamam, ana ku koy niir?

Xeet yeek nit ñi la boole tiim,

* 33:18 33:18 Manees na koo jàngé nii itam: ba du jàllagum dexu ndee.

³⁰ ngir yéefar bi baña falu,
bay tàbbal aw xeet ci yiir.

Eliyu nee kàdduy Ayóoba du xel

³¹ Su nit ki nee Yàlla:

«Jot naa samab añ, dootuma bàkkaar.

³² Won ma sama tooñ yi ma gisul.

Su ma defee lu ñaaw, dootuma ko def!»

³³ Kooku, Yàlla dina ko mbugal a?

Lu ciy sa xalaat, yaw miy diiñat,
gannaaw yaay seet te du maay seet?

Waxal boog, loo ci xam!

³⁴ Niti xel ñi dinañu wax,

ñook ku rafet xel ku may déglu,

³⁵ ne ma: «Ayóoba mii waxewul xam-xam,
te kàddoom yi du xel.»

³⁶ Kon na àtteb Baay Ayóoba mii mat sèkk,
nde tontam bokk na ci tontu nit ñu bon ñi.

³⁷ Moo bàkkaar, doyatul muy diiñat,

di werante ci sunu biir,

di kebetu ci kaw Yàlla.

35

¹ Eliyu dellu ne:

² Defe nga ne lii yoon la?

Nga ne: «Maa am dëgg fi kanam Yàlla,»

³ te naan ko: «Ana lu ma ci soxal man,

ak lu ma ñàkka bàkkaar di jariñ?»

⁴ Man mii nag maa lay tontu,

yaak say xarit.

⁵ Séentul asamaan te xool,

niiral niir yii la tiim!

⁶ Soo bàkkaaree, lu muy wàññi Yàlla?

Man ngaa tooñ, tooñati ba def ko dara?

⁷ Ana njekk goo def ba may ko lenn,

ak lu muy jële sax ci say loxo?

⁸ Sag mbon, sa moroom nit lay lor,

sag njekk it doom aadama ni yaw lay jariñ.

⁹ Noteel law na ba nit ñiy yuuxu,

di woote ku leen wallu ci loxol boroom
doole.

¹⁰ Waaye kenn du ci ne: «Wóoy ana Yàlla
mi ma sàkk,

kiy fentloo woyi cant ci biir guddi,

¹¹ di nu xamal lu rabu àll xamul?

di nu may xel mu njanaaw amul?»

¹² Bu nit ñu bon ñiy woote wall, du wuy
ngir seenug réy.

¹³ Neen lañuy woote, nde Yàlla du leen
déglu,

Aji Man ji du leen faale.

¹⁴ Kon ngalla yaw mi ne gisoo ko,

te ne diis nga ko sa mbir, di ko xaar.

¹⁵ Nga neeti Yàlla du mer, di mbugale,

te yoonam newul ci njubadiy nit.

¹⁶ Ayóoba mii de, cóolóolu neen lay wax,

mbel-mbel ju àndul ak xam-xam.

36

Eliyu nee coonoy àddina am njàng la

¹ Eliyu dellu ne:

² Négal tuuti, ma xamal la;

ay kàddoo ngeeti yu may waxal Yàlla.

³ Fu xóot laay jukkee sama xam-xam,
ba delloo dëgg ki ma sàkk.

⁴ Sikk déy, nekkul ci li ma lay wax;

ku buural xam-xam a janook yaw nii!

⁵ Dama ne, Yàllaa mágge te du jalaxe,
moo mágge te réy um xel.

⁶ Du ba ku bon, mu dund,
te mooy jox néew-ji-doole àqam.

⁷ Du noppee xool aji jub ñi,

xanaa di leen dëj ci jali buur yi,
saxal seen toogaay, mággal leen.

⁸ Bu ñu demee ba ñu jéng leen,

mbaa buumi njàqare ñodaar leen,

⁹ Yàllaa leen koy artoe ci seeni jéf,
seen tooñi reewande.

¹⁰ Da leen di dégtal ndigal,

ne leen ñu dëddu ñaawtéef.

¹¹ Su ñu ko dégloo, déggal ko,

jeexale bés yu rafet,

mujje ati bânneex.

¹² Su ñu dégluwul, jàlli dëxu ndee,
faatu ndax xamadi.

¹³ Ab yéefar day denc mer,

te mbugal du tax mu woote wall.

¹⁴ Ku ni mel ay deeye ndaw,

ay fanam jeexe biir gacce.

¹⁵ Yàllaay wallu boroom tiis ciw tiisam,

di tege coono, ba ñu déglu ko.

¹⁶ Moom it moo lay xettli ci njàqare,

wecece la ko fu yaa fu la dara xatalul,
taajal la ñam wu duun te niin.

¹⁷ Waaye aña ku bon duunal na la,

dëgg ak yoon ne la taral.

¹⁸ Bu la kenn xiirtale alal,

te bu la ger bu réy jengloo.

¹⁹ Kon déy doo yuuxu ba mucc ci njàqare,
kër-kèreek doole it du la ca génne.

²⁰ Bul yàkkamti guddi;

ca law xeet di jekki buuboo seenum réew.

²¹ Moytula walbatiku di def ñaawtéef,

moo tax nattu dikkal la.

Yàlla mooy buur

²² Yàlla, kay, mooy ki dooleem kaweel!

Ana ku mana jàngle ni moom?

²³ Ana ku ko masa réddal yoonam?

Ak ku ko ne: «Def nga naka-su-dul-
noonu?»

²⁴ Bul di fáttee mággal jëfam,

yi ko nit ñiy woye.

²⁵ Mboolem doom aadama gis na ko;

nitoo nit séene ko fu sore.

²⁶ Yàlla, kay daa mágge ba wees xam-xam,

te ay atam, deesul xayma lim ba.

²⁷ Keey ñoddi toqi ndox,

mu def ub lay, tawal,

²⁸ niir yi sotti,

baawaanal doom aadama.

²⁹ Ana ku xam ni aw xiin di firikoo,

ba dënu fettaxe xaymab Yàlla ba?

³⁰ Keey taal melaxam, mu dajal asamaan,

sàng xóotey géej.

³¹Noonu lay saytoo xeet yi,
ba maye ñam wu ne gãññ.

³²Yaari loxoom lay n̄be melax gi,
dalal ko fa mu ko sant,

³³kàddu yéene ab taw,
jur gi yég ne mu ngi dikk.

37

¹Lii déy a rëccal sama fit,
muy tēf-tēfee fa mu sax.

²Dégluleena déglu dēnoom gay rāndan,
kàddu gay rēkke fa gēmniām,

³muy riiral fépp fu asamaan tiim,
di fettaxal melaxam ba cati àddina.

⁴Ca lay yēmmu,
dēnoo kàddoom gu màgg,

te dootu téye melax yi,
li feek baatam di jib.

⁵Yàllaay dēnu kéemtaan,
di def kiraama yu nu wees.

⁶Kee naan tawub yuur mu sóobal suuf,
di yebal taw ba ci waame yiy sóobe doole,

⁷daldi téye loxol képp ku doon liggéey,
ngir képp ku mu sàkk xam jéfam;

⁸Rabu àll duggi biir xunteem,
goori biir paxam,

⁹ngélén bawoo néegam
sedd ba tukkee fa ngelawi bēj-gànnaar.

¹⁰Yàllaay nokki, ndox way,
wali ndox rasu, ne kekk.

¹¹Keey séf xambaar, mu guux,
keey tasaare niir yi làmboo melaxam,

¹²ñu jargandalu ci ndigalam
di fexee sottal mboolem santaaneem
ci kaw àddina wērngal képp.

¹³mu mel ni yet wu muy bantale waa
àddinaam,

mbaa mu firndeele leen ko ngoram.

¹⁴Yaw Baay Ayóoba, teewlul lii,
neel tekk te jàngat kéemaani Yàlla yi.

¹⁵Dangaa xam nu Yàlla di sosey niiram,
ba melaxal melax gi ci niiram?

¹⁶Dangaa xam nu niir yiy ajoo ci jaww ji,
kiraamay ku buural xam-xam a ngoog!

¹⁷Yaw mi say yère di tàng,
bu ngelawu bēj-saalum di upp, suuf ne
tekk,

¹⁸ndax yaa ko lal-le woon déndub
asamaan,

mu dēgër ni weñ gu ñu xelli?

¹⁹Xamal nu boog lu nuy wax Yàlla!
Dunu mana lay ndax ñàkka xam.

²⁰Ndax dees koy yégal ne maay waaja
wax?

Ana nit kuy ñaan sànkutey boppam?

²¹Kenn manula xool jant bu ne ràññ,
gannaaw bu ngelaw walee niir yi ba mu
set.

²²Bēj-gànnaar la leeru wurus di dikke,
booba Yàllaa làmboo darajaam ju raglu.

²³Aji Man ji nu dul daj daa bare doole,

dēggu, bare njekk, du note.

²⁴Moo tax ñu ragal ko,
faalewul kenn ku naw um xelam.

38

Aji Sax ji àddu na

¹Ba loolu amee Aji Sax ji àddoo fa ngélén
la, ne Ayóoba:

²Ana koo doon, bay lēntal samay dogal,
di wax loo xamul dara?

³Takkul boog te góor-góorlu,
ma laaj la, nga xamal ma.

⁴Ana foo nekkoon ba may samp suuf?
Waxal su la ko sam xel mayee.

⁵Ana ku dogal dayo ya, umpu la?
Ku tàllal buum, natte ko ko?

⁶Ana fu kenu ya sampe?
Ak ku teg doju coll wa,

⁷ba biddiwi njël sarxolleendoo,
goney Yàlla yépp saxcoondoo?

⁸Ana ku tējoon lafi buntu géej,
ba muy buccikoo xóote ya, fettax,

⁹ba ma solal ko aw niir, mbubb,
laltaaye ko lëndem,

¹⁰dagg aw xélam, àppal ko kemu,
dogalee ko bunt bu tēje ràpp,

¹¹ba ne ko: «Fii ngay yem, doo fi wees.
Fii la say gannax di noppee buure?»

¹²Ana foo masa joxe suba ndigal,
ba xamal njël bérabam,

¹³ngir mu jàppe cati àddina, ag leeram,
yélebe ca ñu bon ñi,

¹⁴àddina mel ni ban bu ñu teg torluwaay,
tey saamandaay mbubb mu ñu suub,

¹⁵ñu bon ñi, ñu xañ leen seenug leer,
ba loxo ba ñu xàcci woon damm?

¹⁶Yaa àkki ba fa géej bēnne?

Am yaa daagoo ruqi xóotey géej?

¹⁷Dees laa won bunti ndee?

Am yaa gis bunt ya jēm lëndemu njaniiw?

¹⁸Dangaa ràññee yaatuwaayu suuf si?

Waxal, ndegam xam nga lii lépp!

¹⁹Ana yoon wa jēm fa leer dēkke,

ak fa lëndem mākkaanoo,

²⁰ba nga man leena yóbbu fa ñu digaloo,
te ràññee seen yooni kër?

²¹Xam nga ko moos, fekk na la juddu;
dund nga ay fani fan!

²²Yaa àkki ba fa mbàndi tawu yuur ya?

Am yaa gis mbàndi waamey donj yu sedd,
²³ya may dencal jamonoy njàqare

ngir bésuub ndajem xare?

²⁴Ana yoon wu jēm fa leer di tasaaroo?
Ak fu ngelawal penku di xàjjalikoo,

ba dajal suuf si?

²⁵Ana ku xàllal waame,

ak ku sàkkal melax ak dēnu aw yoon,

²⁶di taw fu kenn newul,

ci màndiq mu nit amul,

²⁷di suuxat gent bu maral,

ba saxal fam ñax?

28 Ab taw daa am baay?
 Ana ku geñoom sos toqi lay?
 29 Ana ku wasin ndox mu way,
 ak ku jur layub asamaan bu sedd ba wow,
 30 ba wali ndox yi dægër niw doj,
 déndu gééj fasu, ne kekk?
 31 Yaay faste genn délloofi gu ndaw
 gi ci digg asamaan?
 Am yaay yiwi délloofi gu mag ga mu
 dendal?
 32 Yaay def bu jotee, nga feeñal biddiwi yi?
 Am yaay wommat délloofi bėj-gannaar
 ak njabootam gu sew?
 33 Dangaa xam dogali yoon yi yor
 asamaan?
 Am yaay saytu kilifteefam fi kaw suuf?
 34 Yaay yékkatil niir yi kàddug ndigal,
 rekk waame sang la?
 35 Yaay yebal melax yi ñu dem,
 melaxi, délsi, ne la: «Nu ngi, ak fan?»
 36 Ana ku yeb xel mu rafet cib dënn,
 ak ku may ab xol dæg-dæg?
 37 Ana ku xareñ ba waññ niir yi?
 Ak kuy jolal mbuusi asamaan,
 38 ba suuf di bàq, dankaloo,
 defi donj, taqloo?

39 Yaay rëbbal gaynde?
 Am yaay reggal doomu gaynde
 40 ju goore biir paxam,
 mbaa mu waafem ngeer, di téroo?
 41 Ana kuy xont baaxoñ,
 fa doom yay wooye Yàlla wall,
 di tèref ndax ub xiif?

39

1 Yaa xam jamono ju kéwéli tund di jur?
 Am yaa gis fu kéwél di ame doom?
 2 Yaa lim weer yi muy èmb,
 am yaa xam fu njuram jote,
 3 ba mu sukk, jur,
 tàggook mititu matam,
 4 ak fa doom jay leqlikook a màgg ci àll bi,
 ba dem, te du délsi?

5 Ana ku yóbbu fasu àll, afal ko?
 Ana ku yiwi mbaamu àll, wacc ko?
 6 Moom mi ma jox màndinj mi, mu dëkke,
 ak jooru xorom, mu màkkaanoo?
 7 Yégul riirum taax,
 déggul coowal dawalkat.
 8 Tund yi lay wërem poram,
 di fa seete gépp gancax gu tooy.
 9 Ndax nagu àll a lay nangoo liggéeyal?
 Mbaa mu di la fanaanal ci sa ngédd?
 10 Man ngaa takk nagu àll cim rijji,
 ba mu topp la, rijjil lab tool?
 11 Yaa koy yaakaare dooleem ju bare,
 ba dénk ko sab liggéey?
 12 Yaay yaakaar mu fatal la jiwu,
 jëlil la ko ca dàgga ja?

13 Bànjóolee ngi tef-tëflu,
 te xodd gën koy laaf.
 14 Mooy wacci nenam fi suuf,
 bàyyee ko tangooru suuf.
 15 Xalaatul tànk bu ci joggi
 ak rabu àll wu ko dëggaate.
 16 Day soxore doom yi ni lu mu jurul,
 coonoom neen, yoonam.
 17 Yàllaa ko xañ xam-xam,
 te séddu ko xelum raññee.
 18 Waaye bu sàqee, ba sàqi,
 faalewul fas ak gawaram.
 19 Ndax yaa may aw fas, kàttan?
 Am yaa solal ndodd ma, ciiriir?
 20 Am yaa koy tēbloo nim soccet,
 bu firoom, fit rēcc?
 21 Fas a ngi bége dooleem, di curpee xur
 wa,
 riddi, dajeeek ngannaay.
 22 Yégul tiitaange, ragalul,
 dawul saamar.
 23 Mbarum fitt a ngay keser-keserji fa
 kawam,
 fa xeej ak jaasi lērxatandoo,
 24 mu buure xadar, taxañ suuf si,
 tēyeetul boppam ndax liit ga jolli,
 25 mu feeloo ko coowal wakkan ya.
 Fu sore lay xañtoo xare ba,
 ak kàdduy njiiti xare,
 ya riirandook xaacu ya.

26 Ndax sam xel la céeliy daayaarloo,
 ba firiy laafam, jēm bėj-saalum?
 27 Am yaa sant jaxaay mu naaw ba fa kaw,
 di tàgge kawte ya?
 28 Aw doj, mu màkkaanoo,
 di fanaan kaw catu doj
 wu ko kenn dul jote.
 29 Fa lay yeerom rëbbam,
 di ko niire fu sore.
 30 Ku ñu bóom, ma nga fa teew,
 doom yay xab deret ja.

40

1 Aji Sax ji dellu ne Ayóoba:
 2 Yaw miy layook Aji Man ji, dangay diinat?
 Yaw miy weranteek Yàlla, doo tontu?
 3 Ayóoba àddu ne Aji Sax ji:
 4 Man mi tekkiwul dara, nu ma lay tontoo?
 Sama loxo laa ube sama gémmiñ.
 5 Maa waxoon benn yoon, waxatuma;
 maa tollanti woon, dootu am.
 Yàlla dëkk na Ayóoba
 6 Aji Sax ji daldi àddoo fa ngélén la, ne
 Ayóoba:
 7 Takkul boog te góor-góorlu,
 ma laaj la, nga xamal ma.
 8 Sañ nga maa teg tooñ daal,
 di ma sikkal, ba am dëgg?

9 Dangaa am dooley Yàlla,
mbaa kàddu guy dènu ni gosam?
10 Ràngool boog màggaay ak teddnga,
te làmboo dayook daraja.
11 Yuril sa mer,
te xool képp ku bew, detteel ko,
12 xoolal képp ku bew, torxal ko,
te dèggaate ku bon fa mu taxaw.
13 Boole leen làq biir suuf,
tèjleen ràpp fu làqu fa,
14 Kon déy man maa lay sargal,
muy ndam lu la sa doole may.
15 Beyemot rab wu réy* waa ngii, maa ko
sàkk, sàkk la,
ñax lay lekk niw nag.
16 Doole jaa ngoogu ca ndigg la,
kàttan ga laloo suuxi biir ba,
17 geen ga ne kàdd ni garabu seedar,
sidditi lupp ya ñabaloo,
18 yax ya di ponki xànjär,
cér ya mel ni yeti weñ.
19 Moo gèna yéeme ci li Yàlla sàkk,
te ki ko sàkk donj a koy boccil saamar.
20 Xontam déy tund yee ko yor,
rabi àll yépp di foye fa wetam.
21 Keppaaruu déem lay goore,
làqoo barax ak ban,
22 déem ya keral ko,
garabi tàkk ga yéew ko.
23 Dex gu fees jaaxalu ko,
gannaxi Yurdan di ko talaata, mu ne tekk.
24 Ana ku koy jàpp te muy xoole?
Ak ku koy nos, ba téye ko?

25 Ninki-nànka† nag yaa koy nappé oos?
Am yaay yeewe làmmiñ wa ag buum?
26 Yaay nase wakkan ya ag buum?
Am yaay bètt ñaam wa, we ca lonku?
27 Xanaa ca la lay tinoo tinu,
di la lewetali kàddoom?
28 Xanaa kon mooy digook yaw,
ngir nga def ko jaam ba fàww?
29 Am yaa koy foye ni picc,
takkal ko sa janq ji, ñu di ko seetaan?
30 Dees na ko waxaaleendo?
Am ay julaa koy séddoo?
31 Yaa koy jamati xépp a?
Am yaa koy xaañ xeeju nappkat?
32 Teg ko loxo, seet;
dootoo fàtte boobu xeex,
te doo ko dolleeti.

41

1 Wii rab, yaakaar koo jàpp nax sa bopp la;
bu nee jaas, nga jóoru.
2 Kenn ñàngul, ba sañ koo merloo.
Kon ana kuy taxaw fi sama kanam man?
3 Ana ku ma abal lenn ba ma war koo
delloo?

* 40:15 40.15 rab wu réy wi am na ñu jàpp ne léebéer la.
† 40:25 40.25 ninki-nànka jii am na ñu jàpp ne jasig
la.

Lépp lu mboolem asamaan tiim, maay
boroom!
4 Rab wii, duma noppee waxtaaney céram,
kiraamay dooleem ak jekkaayu bindam.
5 Ana ku mana summib turkeem?
Ana ku mana bètt kiiraayu ñaar-caam?
6 Ana ku koy ñaal,
ak sellam yu dajal te raglu?
7 Gannaaw gi ay sàppey pakk la,
di ab tay bu tēja ràpp,
8 dugglante, benn-benn,
ba ngelaw sax xaju ca,
9 xanaa ñu ne ñàpp, ku ne taq sa moroom,
te duñu teqlikoo.
10 Bu tisleé, melax ne ràyy,
mu xippi, nga ne fajar ay xapp-xappal.
11 Jumi sawaraay tàkke ca gémmiñ ga,
ferñent ya jiiu,
12 saxar di sèl-sélee ca wakkan ya,
mbete cóoloolu cin luy bax.
13 Ngelawal bakkanam jafal nay xal,
sawara ne jippét, tàkke ca gémmiñam.
14 Ndoddam la doole daloo,
te fu mu dègmäl tēbum tiitaange fa la.
15 Ay ndombo la der ba def, dānkalikoo,
ne kēcc, ne degg.
16 Dēnn baa nga dēgēr niw doj,
ne kēcc ni doju wolukaay.
17 Bu jógee, jāmbaar ñi tiit,
muy rajaxe, ñu jommi.
18 Nga jam ko saamar, du dugg;
xépp akug fitt akub xeej, noonu.
19 Weñ gu ñuul di ko saf um mboob,
xànjär niru ko matt mu nèb.
20 Ndawal xala dawloowu ko,
doju mbaq di ngooñ mu koy ñiiramtal.
21 Bolde di ko saf ñax gu wow,
ab xeej riir, def koy ree.
22 Lu mel ni tojitu xandeer a lal biir ba,
di rijji bañ bi.
23 Mooy baxloo xóote yi, ni cin,
di fuural géej ni njaq lu garab xooje.
24 Gannaawam ay def xáll wuy lèrxat,
mbàmbulaan miy saf bijjaaw.
25 Amul niruwaale fi kaw suuf,
mii mbindeef mu dul tiit.
26 Képp ku réy, moo ko naa sutt, xool,
képp ku bew, muy sa buur.

42

Ayóoba tuub na

1 Ba loolu amee Ayóoba àddu ne Aji Sax
ji:
2 Xam naa ne lépp nga man;
du lenn loo tēle.
3 Nee nga ma: «Ana koo doon,
bay léntal samay dogal te xamoo?»
Maa wax moos te xawma lenn
ci kawtéef yu ma wees, ump ma.

⁴ Nee nga: «Déglul, maa lay wax.
Ma laaj la, nga xamal ma.»

⁵ Dé-g-dégu nopp laa amoon ci yaw,
tey bêt laa la teg.

⁶ Moo ma tax ne: «Wàqet, tuubi-ruubi,»
ba diwoo suuf akub dóom.

Yàlla leqli na Ayóoba

⁷ Gannaaw ba Aji Sax ji waxee Ayóoba yooyu kàddu, Aji Sax ji dafa wax Elifas ma cosaanoo Teman, ne ko: «Sama xol tàng na ci yaw, yaak sa ñaari xarit yi, ndax waxuleen dëgg ci man ni sama jaam bi Ayóoba waxe. ⁸ Kon nag sàkkleen juróom ñaari yëkk, ak juróom ñaari kuuy. Ngeen dem ba ca sama jaam ba Ayóoba, joxe ko fa saraxu rendi-dóomal, te Ayóoba ñaanal leen, ma seet ci moom ba bañ leena mbugale seenug ndof. Ndax waxuleen dëgg ci man ni sama jaam bi Ayóoba waxe.»

⁹ Ba loolu amee Elifas waa Teman ba, ak Bildàdd waa Suwa, ak Cofar waa Naama daldi dem, def la leen Aji Sax ji sant. Aji Sax ji seet ci Ayóoba. ¹⁰ Gannaaw ba Ayóoba ñaanalee xaritam ya, Aji Sax ji tiji wërsëgu Ayóoba. Aji Sax ji ful na ñaari yoon mboolem alalu Ayóoba. ¹¹ Ba loolu amee mboolemi bokkam, góor ak jigéen, ak mboolemi xameem ya woon, dikk boka ak moom bernde ca kërám. Ñu dëfal ko, mas-sawu ko ci bépp coono bu ko Aji Sax ji tegoon. Ku ci nekk jox ko dogu xaalís ak jaarob wurus. ¹² Aji Sax ji nag barkeel mujug Ayóoba lu raw ndoor-teem. Mu am fukki junniy gàtt ak ñeent (14 000), ak juróom benni junniy giléem (6 000), ak junniy lëkkey nag (1 000) yu muy rijjee, ak junniy mbaam yu jigéen (1 000). ¹³ Mu amaati juróom ñaari doom yu góor ak ñett ñu jigéen, ¹⁴ ka mag ca jigéen ña, mu tudde ko Yemima, ka ca topp di Keciya, ka ca toppaat di Keren Apug. ¹⁵ Mboolem jigéeni réew ma, amul ku rafete woon ni ñetti doomi Ayóoba yooyu. Seen baay nag sédd leen ndono lu tollook seen céri càmmiñ. ¹⁶ Gannaaw loolu Ayóoba dundaat na téeméeri at ak ñeent fukk (140). Gis na ay doomam, gis ay sëtam, ba muy ñeenti maas. ¹⁷ Ayóoba màggat na ba ñor xomm, doora dee.

Sabóor

1

Ñaari yoon a ngii

¹ Ndokklee yaw mi toppul tànkì ku bon,
taxawewuloo yoonu moykat,
toogewuloo jataayu ñaawlekat.

² Xanaa di bége yoonu Aji Sax ji,
di ko jàngat guddeek bëccëg.

³ Loo def mu àntu:
nga mel ni garab gu saxe walum ndox,
bu jotee meññ,
te xob wa du lax.

⁴ Loolu dalul moos ku bon,
kay mel ni xatax bu ngelaw li wal.

⁵ Moo tax ku bon du siggee àtte ba,
moykat du taxawe ndajem aji jub ña.

⁶ Aji Sax ji kay ay sàmm yoonu aji jub;
yoonu ku bon di sànk boroom.

2

Yàlla fal na buur

¹ Ana lu xeeti àddina di riir,
lu giir yiy nas pexey neen?

² Buuri àddinaa ngi dér,
boroom nguur yi daje,
di fexeel Aji Sax ji,
mook ki mu fal.

³ Ña nga naan: «Nanu dagg càllala yi,
sànni jéng yi!»

⁴ Ki ci jalub asamaan a ngay ree,
Boroom baa nga leen di kókkali,

⁵ mer, ba gédd leen,
xadaru, tiital leen ne:

⁶ «Man maa tabb buur, fal ko ci Siyon*
sama tund wu sell.»

⁷ Buur ne: «Ma biral dogalu Aji Sax ji,
moom mi ma ne: “Yaa di sama doom,
bés niki tey, maa la jur†.”

⁸ Ñaan ma xeeti àddina, ma sédd la ko,
nga moom ba ca cati àddina,

⁹ yilife leen yetu weñ,
rajaxe leen ni njaqal xandeer.”»

¹⁰ Kon yeen buur yi, muusleen,
kilifay àddina, fàgguleen.

¹¹ Jaamuleen Aji Sax ji, ragal ko,
di ko bége, ba yaram daw.

¹² Sujjóotal-leen doom ji, bala moo mer,
ngeen sànkoo seenu yoon;

meram day jekki ne jippét,
waaye ndokklee képp ku ko làqoo!

3

Aji jub a ngi woote wall

¹ Muy kàddug Sabóor, ñeel Daawuda, ba
muy daw Absalom doomam ju góor*.

² Éy Aji Sax ji, noon yeeka bare!

Ñu baree may jógal,

³ ñu baree may tooge naa:
«Yàlla du ko wallu!»

Selaw

⁴ Waaye yaw Aji Sax ji, yaa may feg,
di ma teral, di ma siggil.

⁵ Maay woo Aji Sax ji wall,
mu walloo ma fa tundam wu sell wa.
Selaw.

⁶ Maay tëdd nelaw, yewwu;
Aji Sax ji di ma aar.

⁷ Ñu dul jeex a ma jógal, gaw ma,
te дума ragal.

⁸ Éy Aji Sax ji sama Yàlla,
jógal, wallu ma!

Yaa toj kaabaabi noon yu bon yépp,
foq seeni sell.

⁹ Aji Sax ji, yaa moom wall,
sa mbooloo jagoo sa barke.

Selaw.

4

Ma gonloo ñaan

¹ Mu jëm ci njiital jàngkat yi, ànd aki
xalam, di kàddug Sabóor, ñeel Daawuda.

² Éy Yàlla, yaw mi may àtte dëgg,
maa ngi woote, wuyu ma;

maa xatoon, nga yaatal ma.
Ngalla baaxe ma, nangul ma.

³ Yeen boroom daraja yi,
buleen yàqati sama der,
buleen sopp caaxaan, di sos.

Selaw.

⁴ Xamleen ne Aji Sax ji day séddoo ku ko
ragal,

te bu ma wooyee Aji Sax ji, mu dëgg.

⁵ Loxleen te baña bàkkaar,
waxtaanleen ak seen ngegeenaay te noppi.

⁶ Rendileen seen sarax yi war,
te wóolu Aji Sax ji.

* 2:6 2.6 Siyon: Siyon fii mooy tund wa kër Yàlla ga nekkoon ca Yerusalem. Daan nañu ko tudde it dëkku Yerusalem mbaa réewum Israyil. † 2:7 2.7 Jur: su Yàlla nee moo jur buur bi, waxin la rekk. Bés bi ñuy fal buur bi la Yàlla di biral ne jappe na buur bi ni doomam. Ni doom di taxawale baayam, ni la buur biy taxawale Yàlla ci kaw suuf. Ni

baay di sàmme doomam it, ni la Yàlla di sàmme buur bi, ngir mu am ndam. * 3:1 3.1 Seetal ci 2.Samiyel 15—16.

7 Bare na ñu naan: «Ana ku nuy won lu baax?»
 Éy Aji Sax ji, baaxe nu saw yiw!
 8 May nga ma banneexu xol bu raw seen pepp mu tuurook biin bu wal.
 9 Jàmm laay tédde, nelaw,
 Aji Sax ji, yaw donɗ yaa may dëel fu wóor.

5

Ma jéluy ñaan

1 Mu jëm ci njiital jàngkat yi, ànd aki toxoro, di kàddug Sabóor, ñeel Daawuda.

2 Éy Aji Sax ji, maa ngi àddu, déglu ma, maa ngi onk, teewlu ma.
 3 Sama Buur, sama Yàlla, déglul, ma ne wallóoy!
 Yaw laay ñaan.
 4 Aji Sax ji, ag suba, ngay dégg sama baat, suba su ne ma diis la samay dagaan, di séentu.

5 Doo Yàlla ju safoo coxor, yaw lu bon du la daloo.
 6 Ku réy du taxaw fi sa kanam, kuy def lu ñaaw, bañ nga ko.
 7 Aji Sax ji, yaay sànk kuy fen, sib kuy bóomeek kuy wore.

8 Man nag, sa ngor lu yaa laa saña dugge sa kër,
 sujjóotal sa bérab bu sell, wormaale la.
 9 Éy Aji Sax ji, wommate ma sa njekk ndaxi noon,
 te xállal ma saw yoon.

10 Ñii, lu ñu wax, wérul, seen xol a mébét njekkar, seenug boli di bàmmeel bu ne nàpp, ñuy naxe làmmiñ wu neex.

11 Éy Yàlla, topp leen, ñu fakktaloo seeni pexe; xalabal ñii barey moy, ñoo la gántal.

12 Képp ku la làqoo, yal na bég, di saxoo sarxolle, nga di ko yiir, te ku la sopp di la bége.

13 Aji Sax ji yaw kat, yaay barkeel ku jub, yiire ko saw yiw, fege ko.

6

Jarag a ngi woote wall

1 Mu jëm ci njiital jàngkat yi, ànd ak xalamu juróom ñetti buum, di kàddug Sabóor, ñeel Daawuda.

2 Éy Aji Sax ji, bul mer, ba di ma rëbb, bul xadaru, ba di ma mbugal.
 3 Aji Sax ji, damaa néew doole, yërëm ma!
 Éy Aji Sax ji, sama yaram a tas, dàmp ma!

4 Sama xol a jeex tàkk.
 Aji Sax ji, loo deeti xaar nag?
 5 Éy Aji Sax ji, délsil, xettli ma!
 Walloo ma sa ngor.
 6 Deesul dee ba fàttliku la;
 ku dugg njaniw, nu mu lay sante?

7 Onk naa ba loof, di fanaanee jooy, sama lal di féey,
 ba far seeye rongooñ.
 8 Saay gèt a ngi xóot ndaxu naqar,
 boole ci giim ndax tooñi noonoo noon.

9 Yeen, defkati ñaawtéef yépp, xiddileen ma!
 Aji Sax ji dégg na saay jooy,
 10 Aji Sax ji dégg na saay dagaan,
 Aji Sax jii nangu na samag ñaan.
 11 Noon yépp a am gacce, ba jaq lool,
 ne wërëñ ak gaccege mbetteel.

7

Boroom tuumaa ngi woote wall

1 Muy woyu njàmbat, ñeel Daawuda. Mu woyaloon ko Aji Sax ji ci mbirum kàddu yu tukkee woon ca Kuus, ma bokkoon ci giirug Beñamin.

2 Éy Aji Sax ji, sama Yàlla, yaw laay làqoo!
 Musal ma, xettli maak ñi may dàq ñépp.
 3 Lu ko moy ñu fàdd ma ni gaynde,
 daggate ma te kenn du wallu.

4 Aji Sax ji sama Yàlla, ndegam maa def lii, ndegam maa taq fenn lu ñaaw,
 5 ndegam ku ma jàmmal laa feye aw ay, mbaa ma dimbali ku ko noonoo te defu ko dara,

6 yal na ma noon rëbb,
 dab ma, dëggaate ma,
 sàggi saab sag, téral ci pëndub suuf.
 Selaw.

7 Aji Sax ji, meral, jóg,
 dajeel maak xadaru noon yi!
 Ngalla teewlu ma; yaw, yoon nga santaane.

8 Yal na xeet yi daje, wër la, nga délsi tiim leen fu kawé.
 9 Yal na Aji Sax ji àtte xeet yi;
 Aji Sax ji, seetal ci sama njubteek sama maandute te dëggal ma.
 10 Yal na mbonug ku bon tees,
 te nga saxal kuy def njekk.
 Yaw Yàlla Boroom njekk, yaay natt xel ak xol.

11 Sama kaaraange, fa Yàlla, miy musal boroom xol bu dëggu.
 12 Yàllaay àtte dëgg.
 Yàllaay rëbbe bés bu ne.
 13 Ku tuubul, Yàlla nàmm saamaram,

bank xalaam, diir la.

¹⁴ Moom la waajalal ngánnaayi ndee,
def ko fitt yuy boy.

¹⁵ Ku bon a ngoog, di matu doomu
ñaawtéef.

Day sos njombe, wasin njoblanj.

¹⁶ Am kan lay gas, ba mu xóot,
te pax ma mu gas, moo ca tàbbi.

¹⁷ Fitnaam, kèpp ci boppam;
coxoram, xànjj cim kaanjam.

¹⁸ Naa sante Aji Sax ji njekkam,
ma woy Aji Sax jiy Aji Kawe ji.

8

Aji Sax ji teral na nit

¹ Mu jëm ci njiital jàngkat yi, ànd ak
xalam gu ñuy wax gitiit*, ñeel Daawuda,
di kàddug Sabóor.

² Aji Sax ji sunu Boroom,
sa tur aka màgg ci kaw suuf sépp!
Sag leer tiim asamaan.

³ Lämmiñu tuut-tànk, ba ci luy nàmp,
feeñal nga ca sa kàttan,
bañaaleek feyukat ne xerem.

⁴ Damay xool sa asamaan si nga móol,
ak weer week biddiwi yi nga fi teg.

⁵ Moo luy nit, ba nga di ko bàyyi xel?
Luy doom aadamaak loo koy yége?

⁶ Yaa def nit mu yées malaaka yi as lëf,
te yaa ko kaalaa teraangaak daraja,

⁷ fal ko ci kaw loo bind,
jox ko lépp, mu teg tànk:

⁸ jur gépp, gu gudd ak gu gàtt,
rabi àll it ca la,

⁹ ak njanaaw ak jën,
ak luy jaare yooni géej.

¹⁰ Aji Sax ji sunu Boroom,
sa tur aka màgg ci kaw suuf sépp!

9

Aji Sax ji dëgg lay àtte

¹ Mu jëm ci njiital jàngkat yi, dëppook
galan bu ñuy wax Deewug doom ju góor,
ñeel Daawuda, di kàddug Sabóor.

² Ma sante Aji Sax ji sama xol bépp,
di siiwal mboolemi kéemaanam.

³ Yaw Yàlla, dama lay bége, bannexoo la,
woy la, yaw Aji Kawe ji.

⁴ Noon yeey dellu gannaaw,
tërëf, sànkú fi sa kanam.

⁵ Yaa ma àtte yoon, dëggal ma,
toog ci sab jal, di àtte njub.

⁶ Rèbb nga xeet yi, sànkú ñu bon ñi,
far seeni tur ba fàww.

⁷ Noon ya raaf, gental ba fàww.

Yaa déjjati seeni dëkk, seenu askan fey.

⁸ Aji Sax jee sax dàkk,
samp jalam ngir àtte.

⁹ Moom mooy àtte àddina cig njub,
di dogalal xeet yi dëgg.

¹⁰ Aji Sax jeey laq néew-ji-doole,
mooy laqe bésuub njàqare.

¹¹ Aji Sax ji, yaw, ku la xam, wóolu la.

Aji Sax ji, yaw, ku lay sàkkú, doo ko wacc.

¹² Woyleen Aji Sax ji dëkke Siyon,
siiwal-leen ay jalooreem ci xeet yi!

¹³ Mooy topp nit bakkanu moroomam, di
ko ba xel,

te du fàtte yuuxi néew-ji-doole.

¹⁴ Éy Aji Sax ji, baaxe ma,
gisal naqar wi ma bañ yi teg.

Yaa may yékkatee fa bunti ndee,

¹⁵ ba ma siiwali sa woy yépp,
fa buntu Siyon, dëkk bu taaru ba,
di bannexoo sa wall gi!

¹⁶ Xeet yee tàbbi pax ma ñu gasoon,
fakktaloo fir ga ñu laqoon.

¹⁷ Aji Sax jaa ngi feeño, di àtte yoon;
ku bon teg ug fir, tàbbi ca.

Na jib ndànk. Selaw.

¹⁸ Ñu bon ñee dëddu, dem njaniiw,
ànd ak xeet yi fàtte Yàlla yépp.

¹⁹ Yàlla du tanqamlu ab ndóol ba fàww,
yaakaaru néew-ji-doole du tas muk.

²⁰ Aji Sax ji, jógal, bu la nit yab;
na xeet yi dikk fi sa kanam, nga àtte leen.

²¹ Rikk Aji Sax ji, yónnee leen tiitaange,
xamal leen ne nit donj lañu.

Selaw.

10

Néew-ji-doole sàkkú na yoon

¹ Éy Aji Sax ji, lu la taxa sore?

Xanaa dangay laqu, bésuub njàqare?

² Ku bon naagu na, ne dann néew-ji-doole,
lal ay pexeem, ba jàpp ko.

³ Ku bon déy a ngi téggo bannexoo
bakkanam,

ku bégge di ñàkke wormaak a teddadil Aji
Sax ji.

⁴ Ku bon danjiiral, seetul dara,
xalaatam yépp mooy Yàlla amul.

⁵ Saa yu fexee, juble,

* **8:1** 8.1 gitiit tur la wu réer ci làkkú ebrë. Man na doon xeetu xalam gu cosaanoo dëkk ba ñuy wax Gaat ci réewu Fiiisti. Man na nekk it galan bu ñu daan woye ci jamono bu ñuy witt reseñ, di ko nal.

te gisul sa ndigali yoon yi ko tiim.

Ma ngay ciipu bañam yépp.

⁶ Ma nga naan ca xelam: «Duma tërëf, safaan du ma dab tey ak èllëg.»

⁷ Ay móolu la gémmiñ ga fees, ak fen ak njublan,

njekkar ak ñaawtéef lal lãmmiñ wa.

⁸ Day tëroo ciy dëkk-dëkkaan,

làqu di bóom ku deful dara,

nëbbu di wootal néew-ji-doole.

⁹ Day làqu bérab, di yeeroo ni gaynde cim xunteem,

di yeeru aji ñàkk, ba jàpp ko,

laaw ko, ñoddi, yóbbu.

¹⁰ Ma ngay ségg ak a waaf,

ba aji ñàkk daanu ci loxoom.

¹¹ Mu naa ca xelam: «Yàlla fàtte na, dummóoyu na, du xoolati.»

¹² Aji Sax ji, jógal!

Éy Yàlla, xàccil sa loxo.

Bul fàtte néew-ji-doole.

¹³ Bul may ku bon mu sofental la,

te naan ci xelam: «Yàlla du ma ko topp.»

¹⁴ Yaw de yaay ki nemmiku,

di gis njekkar ak naqar,

ku mu dal, nga sàmm àqam.

Néew-ji-doole wéeroo la,

ab jirim, nga dimbali.

¹⁵ Ngalla dammal loxol ku soxor ak ku bon, topp leen seen coxor,

gi ñu yaakaaroon ne du feeñ.

¹⁶ Aji Sax jee di Buur ba fàww!

Xeet yeey sànkú, jeex cim réewam.

¹⁷ Néew-ji-doole dagaan, Aji Sax ji dégg,

dalal xelam, teewlu ko,

¹⁸ ngir sàmm àqu jirim ak néew-ji-doole,

ba nit kiy suufu kese dootu xèble.

11

Ma làqoo Aji Sax ji

¹ Mu jëm ci njiital jàngkat yi, ñeel Daawuda.

Aji Sax ji laa làqoo.

Ana lu ngeen ma naa: «Neel fëyy ni picc, tonj sa kaw tund.

² Xanaa du ñu soxor ñaa ngii, bank seen xala,

nas seenu fitt,

nara lëndëmtu, jam ku jub?

³ Bu ponki njub mabbëe, nu aji jub di def?»

⁴ Aji Sax jaa nga kërám gu sell.

Aji Sax jaa nga asamaan, kaw jalam, ne jàkk doom aadama, di ko seetlu.

⁵ Aji Sax ji day seetlu ku jub;

ku soxor, bègg fitna, mu bañ.

⁶ Day tawal ku bon ay mbugal; sawaraak tamarax akub jaas dib añam.

⁷ Aji Sax jee jub, sopp njub; kuy jubal, gis yiwam.

12

Kàddug Yàllaa wóor

¹ Mu jëm ci njiital jàngkat yi, ànd ak xalamu juróom ñetti buum, di kàddug Sabóor, ñeel Daawuda.

² Wallóoy, Aji Sax ji, ngor jee na!

Kóolute réer na doom aadama.

³ Dañuy fenante,

lãmmiñ dig lem, xol ba njuuy la.

⁴ Yal na Aji Sax ji tēj gémmiñu kuy naxe, ak kuy lãmmiñuy tēggu.

⁵ Ñu ngi naa: «Sunu lãmmiñ lanuy daane, nook sunu kàddu; ku nu manal dara?»

⁶ Ku ñàkk a ngi, ñu futti,

mu ngi binni, di néew-ji-doole.

Aji Sax ji nee: «Maa ngii, di ci jóg,

teg leen fi rawtu gu ñu ne siiw.»

⁷ Kàddug Aji Sax ji, kàddu gu sell la,

ni xaalis bu ñu xelli ci taalu ban,

settl ko juróom ñaari yoon.

⁸ Ngalla Aji Sax ji, sàmmal ku néewle,

aar ko saa su ne ci nitu tey.

⁹ Ñu bon ñaa ngi taxawaalu fu ne, jikko ju sew falu ci biir doom aadama yi.

13

Aji Sax ji, loo deeti xaar?

¹ Mu jëm ci njiital jàngkat yi, di kàddug Sabóor, ñeel Daawuda.

² Céy Aji Sax ji, loo deeti xaar?

Xanaa doo ma tanqamlu ba fàww?

Loo deeti xaar, bañ maa geesu,

³ ba ma tàggook bopp bu ubu

ak njàqarey xol bu sax,

ba noon dootu ma man?

⁴ Céy Aji Sax ji sama Yàlla, geesu ma, wuyu ma,

leqli ma, bala ma ne sërëx ci nelawi ndee,

⁵ noon ba naan: «Daan naa ko,»

bañ yay bége saab jéll.

⁶ Man de maa ngi dénkoo sa ngor,

di bannëexoo sag wall.

Naa woy Aji Sax ji,

ki may baaxe xéewalam.

14

Yàqute maase na

¹ Mu jëm ci njiital jàngkat yi, ñeel Daawuda.

Ab dof a ngi naa ci xelam: «Yàlla amull!»

Ñu ni mel ay def njekkar, seeni jéf siblu,
kenn defu ci lu baax.

² Aji Sax jee tollu asamaan, jéer doom
aadama,

di seet ku ci xelu, tey sàkku Yàlla.

³ Ñépp lajj,
bokk yàqu yaxeeet.

Kenn deful lu baax,
du kenn sax.

⁴ Aji Sax ji nee: «Xanaa ñiy def lu bon ñépp
xamuñu dara?»

Ñuy lekk sama ñoñ niw ñam,
te sàkkuwuñu Aji Sax ji.»

⁵ Foofu lañuy tiite tiitaange lu réy!

Du Yàllaa ngi ànd ak kuréli ñu jub ñi?

⁶ Ku néewlee yaakaar, ngeen tas ko,
waaye Aji Sax ji la làqoo.

⁷ Ana kuy xettlee Israyil fa Siyoñ?

Éy bés bu Aji Sax ji delloo ñoñam ndam,
ndaw mbégte ci giirug Yanqóoba!

Ndaw bannexx laa ne, ci Israyil gii!

15

Kuy aji jub?

¹ Muy kàddug Sabóor, ñeel Daawuda.

Aji Sax ji, kuy ganeji sa xayma?

Ana kuy dèkki sa tund wu sell?

² Xanaa ki wéye maandu,
di def njekk,

di wax dëggu xolam.

³ Du sos,

du tooñ dëkkandoo,

du baatal moroomam.

⁴ Ku siblu, mu sib,

ku ragal Yàlla, mu teral.

Mooy sàmm ngiñam,

su ko dee lor it.

⁵ Du leble, ba teg ca;

du nangu ger, ngir fexeel jaambur.

Lii ku koy jéfe doo jang.

16

Aji Sax ji laa séddoo, dund ak dee

¹ Muy taalifu Daawuda, ngir jàngle.

² Éy Yàlla, sàmm ma, maa ngi làqu fi yaw!

Maa ne Aji Sax ji: «Yaay sama Boroom,
awma alal ju la moy.»

³ Ñu sell ñi ci réew mi ñooy garmi yi,
sama mbégte mépp ñoom a.

⁴ Kuy sàkkuy tuur barew tiis,
man de duma leen tural deret,
sama làmmiñ du leen tudd.

⁵ Aji Sax ji, yaay wàll wi ma séddoo,
di sama ndabal xéewal.

Yaa yor sama wërsëg.

⁶ Maa muurloo bérab bu neex,
ndaw cér bu rafet!

⁷ Ma sant Aji Sax ji may xelal,
ba guddi sax sama xel di ma yedd.

⁸ Damaa saxoo ne jàkk ci Aji Sax ji
ndijoor la ma fare, ba duma téréf,

⁹ xanaa di bannexx, sama xol bég,
sama yaram finaax.

¹⁰ Doo ma wacc njaniiw moos,
sa wóllère wa, doo ko won yàqutey
bàmmeel*.

¹¹ Yaa may xamal yoonu ndund.

Fu bannexx mate, yaa teew,
xéewal sa ndijoor la saxe.

17

Aji Sax ji, jox ma dëgg

¹ Muy ñaanu Daawuda.

Éy Aji Sax ji, déglul liy dëgg,
déglul, ma woote!

Teewlul, ma dagaane la
làmmiñ wu mucc fen.

² Yal na sama àtte bawoo fi yaw,
nga gis sama njubte.

³ Natt nga saab xol, niir ma guddi,
settantal ma, gisoo dara.

Dogu naa ne duma moye wax.

⁴ Su may jéf it, di sàmm sa kàddu.

Maay moyu yoonu ku bon.

⁵ Sa tànk, sama tànk,
jàdduma fenn.

⁶ Éy Yàlla, maa lay woo, nga di ma wuyu;
teewlu ma te déglu ma!

⁷ Na sa ngor feeñ,
yaw miy walloo sa doole
ku la làqooy noonam.

⁸ Sàmm ma ni peru bêt;
làqe ma sa ker,

⁹ ma récc ñu bon ñi ma song,
noon ñii ma gaw, nar maa bóom.

¹⁰ Seen xol dàq yérmande,

seeni wax di reewande.

¹¹ Tanc nañu nu fépp,

ne nu jàkk, nar noo téral.

¹² Mbete gaynde gu namma fàdde,
gaynde gu mat guy téroo!

¹³ Éy Aji Sax ji, jógal dajeek moom, detteel
ko.

Xettlee ma sa saamar, ma récc ku bon.

¹⁴ Éy Aji Sax ji, walloo ma sa doole,
ma récc ñi séddoo dundu àddina.

Say soppe, nga reggal,

* 16:10 16.10 Woykat bi di wone fii kóoluteem ne Aji Sax ji du ko seetaan muy dee ci saa si, waaye dina ko musal ci dee gi ko doon yoot ca fan yooya. Seetal ci jéf ya 13.34-37.

seeni doom regg,
desalal seeni doom.

15 Man nag ma am dëgg, ne la jàkk,
yewwu, regge sa jëmm.

18

Buur daan, sant Aji Sax ji

1 Mu jëm ci njiital jàngkat yi, ñeel
Daawuda jaamub Aji Sax ji. Mu jagleel
Aji Sax ji woy wii, bés ba mu ko xettlee ci
mboolem noonam, xettli ko it ci Buur Sóol.
Kàdduy woy yaa ngii.

2 Mu ne:
Aji Sax ji, maa la sopp, yaw mi may dooleel.

3 Aji Sax ji laay sës,
mu di ma aar,
di ma wallu.
Mooy sama Yàlla, ji may sës, yiiru, fegu;
mooy Boroom doole ji may musal, di ma
làq.

4 Ki yelloo cant, Aji Sax ji,
moom laa woo, mucc ci samay noon.

5 Buumi ndee tanc ma,
walum kasara naq ma,
6 buumi njaniw laaw ma,
dee ne jaas, di ma fiir.

7 Ma jàq, woo Aji Sax ji,
ne sama Yàlla wallóoy,
mu dégge kërám.
Ma yuuxu, muy dégg.

8 Mu mer, suuf yëngu, di ker-keri;
kenuy tund ya jaayu, di reg-regi.

9 Saxar di sël-sélee ca wakkan ya,
sawara boye ca gémmiñ ga,
xal yu yànj tàkke ca.

10 Mu firi asamaan, wacc,
niir yu fatt lal tànq ya.

11 Ma nga war malaakam serub, di naaw,
daayaarloo laafi ngelaw.

12 Ma nga bàddoo lëndëm, làqoo,
làmboo ndox mu lëndëm aki xàmbaar,

13 leer a ko jiitu, xàmbaar ya topp ca,
ak tawub yuur ak xali sawara.

14 Aji Sax jee dënoo asamaan.
Aji Kawe jee addu,
muy tawub yuur ak xali sawara,

15 mu soqiy fitt ak jumi melax,
tasaare leen, fëlxe.

16 Aji Sax ji, dangaa gédd,
nokki, mu riir,
xuri géej ne fàññ,
kenuy suuf ne dunñ.

17 Aji Sax jee yóotoo fa kaw, jàpp ma,
seppee ma ca xóotey ndox ma,

18 musal ma ca noon yu mag,
ya ma bañ te man ma.

19 Ñu dajeek man, bés ba ma jàqee,
Aji Sax ji taxawu ma,

20 yaatal ma,
bége ma, ba xettli ma.

21 Aji Sax jee ma yool sama njekk,
samay loxoo set, mu fey ma.

22 Sàmm naa yooni Aji Sax ji,
bonuma, di moy sama Yàlla.

23 Dama ne jàkk ndigalam yépp,
xalabuma dogali yoonam.

24 May ànd ak moom, di jëfeg mat,
di moyoo tooñ.

25 Aji Sax jee ma yool sama njekk,
rafetlu sama mucc ayib.

26 Yaw Aji Sax ji, ku gore, fekk la gore;
ku matale, fekk la matale;

27 ku sellal, fekk la sell;
ku dëng, fekk laak say feem.

28 Yaw yaay musal xeet wu néew doole,
kuy danñiiral, nga detteel.

29 Yaw kay yaa may niital.
Aji Sax ji sama Yàllaay leeral sama
lëndëm.

30 Maak yaw kay, ma song gàngoor.
Maak sama Yàlla, ma téb um tata.

31 Yàllaa mat.
Kàddug Aji Sax jee wér te wóor.
Mooy feg képp ku ko làqoo.

32 Ana kuy Yàlla ku moy Aji Sax ji?
Ku jara sës ku dul sunu Yàlla?

33 Yàllaa may dooleel,
di ma xállal, yoon mat.

34 Moo ma gaawal ni kówél,
taxawal ma fu kawé.

35 Moo may tàggat ngir xare,
may bank xalag xàñjar.

36 Aji Sax ji yaa may feg, musal ma,
dooleel ma sa loxo,
nangul ma, darajaal ma.

37 Yaa ma xállalu yoon,
ba duma téréf.

38 Ma dàq noon yi, dab leen,
jekkli, doora dëpp.

39 Ma jam leen, jógatuñu,
xanaa féléñu, ma joggi.

40 Sol nga ma dooley xare,
sukkal ñi ma jógal, ñu féete ma suuf.

41 Won nga ma ndoddi noon,
ma boole bóom bañ yi.

42 Ñu ne wallóoy, wall amul;
ñu woo Aji Sax ji, faalewu leen.

43 Ma wol, ba ñu doon pénd, ngelaw wal,
ma wetti ni banu mbedd.

44 Xettli nga ma ci bokk yi fippu,
def ma, ma jiite ay xeet;

waaso wu ma xamul sax nangul ma,
45 ku ma ci dégg, déggal ma,

ay doomi doxandéem di ma raamal,

⁴⁶ ne yàcc,
génne seeni tata, di lox.

⁴⁷ Aji Sax jeey kiy dund.
Kii ma sës a jara sant.
Yàlla mi may musal moo màgg!

⁴⁸ Mooy Yàlla ji ma feyul,
nangulal ma xeet yi.

⁴⁹ Xettli nga maak noon,
kaweel ma, ma tiim ku ma jógal,
xettleeti ma cib soxor.

⁵⁰ Kon Aji Sax ji, ma sant la ci biir xeet yi,
kañ la!

⁵¹ Yaay may sa buuru ñoñ ndam lu réy,
yaay ji ngor ki nga fal,
muy man Daawuda, di sama askan ba
fàww.

19

Aji Sax ji màgg na

¹ Mu jëm ci njiital jàngkat yi, di kàddug
Sabóor, ñeel Daawuda.

² Asamaan nee Yàlla màgg na,
kaw ne màww, biral liggéeyu loxoom!

³ Bésoo bés kàddu seere ko,
guddee guddi xamle ca mbir.

⁴ Du làkk, duy wax,
du baat bu dégtu,

⁵ suuf sépp la seen ndéey jibal,
seen kàddoo àkki cati àddina.

Kaw la Yàlla sampal jant xayma,

⁶ mu mel ni boroom séet, génne néegam,
di mbër mu donjali, xéluw yoonam.

⁷ Asamaan lay fenke cat lii,
wèndeelu, sowi cat lee;
amul lu récc tàngooram.

⁸ Yoonu Aji Sax jee mat,
di leqli bakkan.

Lu Aji Sax ji seede dëgg la,
day xelal ku xeluwul.

⁹ Lu Aji Sax ji tegetale, njub la,
di bégal xol.

Lu Aji Sax ji santaane, leeraange la,
di leeral gis-gis.

¹⁰ Santaaneb ragal Aji Sax ji mooy li sell
te sax ba fàww.

Lu Aji Sax ji digle, dëgg la,
ak njekk gu sotti.

¹¹ Moo dàq wurus,
raw wurusu ngalam wu ne xas;
dàqati lem,
ëpp tem-tem.

¹² Man, Sang bi, ci laay leerloo,
ku ko sàmm yokku yool.

¹³ Nit juum na, umple ko,
baal ma tooñ gu ma umple.

¹⁴ Te Sang bi, musal ma ci bàkkaaruu teyeef,

mu bañ maa jiital,
ma mana maandu,
mucc moy gu réy.

¹⁵ Éy Aji Sax ji, lu saaw làmmiñ tudd
mbaa sama xol déey ma ko,
yal nay loo gërëm,
yaa may aar, yaa ma jot.

20

Yal na Buur daan

¹ Mu jëm ci njiital jàngkat yi, di kàddug
Sabóor, ñeel Daawuda.

² Buur, yal na la Aji Sax ji nangul bésu
njàqare,

yal na la turu Yàllay Yanqóoba aj fu kawee,
³ yal na la yónnee wallam fa këram,

jäpplee la fa, ca Siyoñ.

⁴ Yal na xool loo ko jébbal,
di rafetlu sarax soo ko lakkal.

Selaw.

⁵ Yal na la may li nga namm,
di sottal loo mébét,

⁶ ngay daan, nuy ree,
yéegé sunu raaya, màggal sunu Yàlla.

Yal na Aji Sax ji nangu loo dagaan.

⁷ Aji Sax jeey musal ki mu fal, bir na ma
tey.

Moo koy nangule fa asamaan su sell sa,
ci dooley ndijooram biy musle.

⁸ Ñiiki watiir,
ñeeki fas,

nun sunu turu Yàlla Aji Sax ji lanuy tudd.

⁹ Ñoom ñooy jeng ak a jóoru,
nun, nu jóg, taxaw jonn.

¹⁰ Éy Aji Sax ji, mayal Buur mu daan,
te bés bu nu ko ñaane, mu nangul nu.

21

Aji Sax ji baaxe na Buur

¹ Mu jëm ci njiital jàngkat yi, di kàddug
Sabóor, ñeel Daawuda.

² Céy Aji Sax ji, Buur a ngi bége sa doole,
di bänneexoo sag wall, rekk.

³ Yaa ko may nammeeli xolam,
gäntuwulooy dagaanam.

Selaw.

⁴ Yaa ko gatandoo barkey ngéneel,
kaalaa ko wurusu ngalam.

⁵ Mu ñaan mucc,
nga saxal jalam fàww,

⁶ sag wall a ko sagala sagal!

Teddngaak daraja nga ko sédd,

⁷ jagleel ko barke bu sax dàkk,
bégale ko sa kanam, mu bänneexu.

⁸ Buur wóolu na Aji Sax ji, moos,
du tërëf, Aji Kawe jee gore.

9 Buur, yaa naan sa noon yépp céex,
ne say bañ taral.

10 Soo nee jalañ, jafal, ñu boy.

Aji Sax ji mer, sànk leen,
sawara xoyom leen.

11 Yaay raafal seeni giir fi kaw suuf,
fey seen askan ci doom aadama yi.

12 Ñoo la mébal lu bon,
nasal la pexe, joyul.

13 Nga di leen diir fittu kanam,
ñu wone gannaaw.

14 Aji Sax ji, jógal ak sa manoore,
nu joobe la, woy sa jaloore.

22

Jëkke jàq, mujje sant

1 Mu jëm ci njiital jàngkat yi, di kàddug
Sabóor, ñeel Daawuda, dëppook galan bi
ñu dippee Kéwélu fajar.

2 Sama Yàlla, sama Yàlla, lu tax nga wacc
ma?

Ma binni, binneeti, wall sore.

3 Éy sama Yàlla, ma woote bëccég, wuyu-
woo;

woote guddi, nopploo ma.

4 Yaw de, yaay ku sell, tooge sab jal,
Israyil di la kañ.

5 Yaw la sunuy maam wóolu woon,
wóolu la, nga xettli leen.

6 Yaw lañu daa woo wall, mucc;
yaw lañu wóolu woon te rusuñu.

7 Man nag aw sax rekk laa, matuma nit.
Doom aadama sewal ma, aw xeet tuutal
ma.

8 Ku ma gis ñaawal ma,
biiñ ma, xeelu ma, naa:

9 «Na wéeroo Aji Sax ji, mu xettli ko;
su ko soppee, na ko wallu.»

10 Yaw de yaa ma roccee sama biiru ndey,
naxe ma sama weenu yaay.

11 Yaw laa dénkoo ba may juddu,
ba ma juddoo sama ndey, ngay sama Yàlla.

12 Bul ma sore,
musiba teew na, wall amul!

13 Noon yaa ngi ma gaw ni coggalu yëkk,
dar ma ni ponkali yëkk ya fa Basan.

14 Ñu ña ma, ñàpp,
ni gaynde, guy yëmmook a fàdde.

15 Doole ñiis,
yax yoqi,
fit ne soyox, seey.

16 Lämmiñ taqoo denqleñ,
doole jeex, ma wow koñj,
nga téral ma buntu bàmmeel.

17 Ay xaj a ma wër,
di gàngooru saaysaay, dar ma kepp,
bëtt samay yoxook samay tànk.

18 Maa ngii, mana waññ sama yax yépp,
ñoom ñuy xoolle, di ma seetaan,

19 séddoo samay yére,
tegoo bant sama mbubb.

20 Waaye yaw, Aji Sax ji, bul sore;
yaa may dooleel, gaawe ma.

21 Xettliil sama bakkan ci saamar,
ba sama benn bakkan bii mucc selli xaj!

22 Musal ma ci pàddum gaynde ak ndañum
nagu àll.

Yaa ma wallu woon!

23 Ma siiwali saw tur ci bokk yi,
màggale la digg mbooloo mi.

24 Yeen ñi ragal Aji Sax ji, santleen ko.

Yeen askanu Yanqóoba wépp, màggal-
leen ko.

Yeen bànni Israyil gépp, wormaal-leen ko.

25 Moom de sàgganewul boroom tiis,
làqu ko kanamam,

ba mu wootee, wuyu na ko.

26 Yaw laay sante ndaje mu mag,
sottalal la samay dige*, ñi la ragal seede.

27 Ku woyof a cay lekk ba doyal,
kuy wut Aji Sax ji, sant ko.

«Guddleena gudd fan!»

28 Àddina wërngal képp ay fàttliku,
walbatiku ci Aji Sax ji.

Làngi xeet yépp sukkalsi ko.

29 Aji Sax jeey boroom nguur,
moo yilif xeet yi.

30 Boroom barke xéewlu, sujjóotal ko,
ku jëm pax it, te bakkanam di lang,
di ko sukkal.

31 Askan wu dikkagul dina jaamu Boroom
bi,

ñiy ñëw te juddooguñu dees na leen wax
ay mbiram.

32 Ñu dikk, biral njekkam,
jottli xeet wu sosoogul jalooreem.

23

Aji Sax jee may sàmm

1 Ñeel Daawuda, di kàddug Sabóor.

Aji Sax jee may sàmm,
du lenn lu ma ñàkk.

2 Parlu mu naat la may gooral,
wal mu dal, mu tette ma ca,

3 leqli ma,
teg ma ci yooni njekk
ngir tedngay turam.

4 Su may jaare xuru ndee wu ne kërueus it,
duma ragal loraange:

yaw laak man,
sa bantu sàmm ak sa nguul,
yooyoo may dalal.

* 22:26 22:26 sottalal la samay dige: dige yooyu ay saraxi cant la yu ñuy bokk lekk. Ki koy joxe mooy ñaanal ñi mu ci woo jàmm ak wër ak barke.

⁵ Yaa ma berndeel,
noon yi gis,
nga diwal ma saa bopp, terale ma,
saab kaas rembat.
⁶ Mbaax ak ngor kay la ma Aji Sax jiy dare
sama giiru dund,
ma dëkke këram ba faww.

24

Ana kuy màggal Buur Yàlla?

¹ Ñeel Daawuda, di kàddug Sabóor.

Aji Sax jee moom suuf ak li ko fees,
ak àddina ak li ci biiram.

² Moo samp suuf biir gééj,
dëj ko ci kaw wal mi.

³ Ana kuy yéegi tundu Aji Sax ji,
kuy taxawi bérabam bu sell ba?

⁴ Xanaa ku mucc ayib, sell ab xol,
xemmemul caaxaani neen,
du giñey fen.

⁵ Kookooy jagoo barkeb Aji Sax ji,
ak njekku Yàlla, mi koy musal.

⁶ Ñooñooy waa làng, gi lay sàkku,
di maasug Yanqóoba, giy sàkku sa yiw.

Selaw.

⁷ Neleen bunt yi kulbét,
ubbileen buntí cunaan yi,
Buur Boroom ndam duggsi.

⁸ Buur Boroom ndam booboo di kan?

Xanaa Aji Sax ji Boroom dooleek
njambaar,

Aji Sax ji jambaaru xare ji.

⁹ Neleen bunt yi kulbét,
ubbileen buntí cunaan yi,
Buur Boroom ndam duggsi.

¹⁰ Buur Boroom ndam booboo di kan?

Xanaa Aji Sax ju gangoor yi.
Kookooy Buur Boroom ndam.

25

Aji Sax jeey gindee, di yiire

¹ Ñeel Daawuda.

Aji Sax ji, yaw laay diis sama bakkan.

² Sama Yàlla, yaw laa yaakaar.

Yàlla buma rus,
noon yi ree.

³ Deesu la séentu, ba rus.

Kuy wor ci neen mooy rus.

⁴ Éy, Aji Sax ji, won ma saw yoon,
xamal ma fi nga ma jaarloo.

⁵ Jiitee ma sag dëgg, jàngal ma.

Yaw yaay Yàlla ji may musal,
ma di la yendoo yaakaar.

⁶ Aji Sax ji, bàyyil xel sa yërmandeek sa
ngor.

Naka jekk sa jikkoo!

⁷ Bul xool li ma bàkkaare ndaw ak li ma
moy.

Aji Sax ji, xoolle ma sa ngor ngir sag mbaax.

⁸ Aji Sax jee baax, rafeti dogal,

di gindi moykat ci yoon wi,

⁹ di jiite ku woyof mbubb ci njubte,

di ko xamal aw yoonam.

¹⁰ Aji Sax ji ngor ak dëgg rekk lay jiitee
kuy samm kólléreem ak seedey yoonam.

¹¹ Éy Aji Sax ji, tooñ naa lool,
jéggal ma ngir saw tur.

¹² Ana kuy wormaal Aji Sax ji,

mu won ko yoon wi mata taamu,

¹³ muy dunde ngéneel,

askanam moom réew mi?

¹⁴ Ndéeyu Aji Sax ji, jagley ku ko ragal.

Kólléreem la koy xamal.

¹⁵ Samay gét jàkk rekk ci Aji Sax ji,

moo may zettli ci fiiru noon.

¹⁶ Ngalla geesu ma, baaxe ma,

maa wéet, néew doole,

¹⁷ sama xol feeseey xalaat.

Rikk, teggil ma njàqare!

¹⁸ Xoolal sama naqar ak sama tiis,

te baal ma bépp bàkkaar.

¹⁹ Xoolal noon yi ne gāññ,

bañ ma mbañeelu fitna.

²⁰ Éy, aar ma, musal ma!

Bu ma rusloo,

yaw laa làqoo.

²¹ Yal na ma maanduteek njub taxawu,

maa ngii, di la xaar.

²² Éy Yàlla, teggilal Israyil tiisoo tiis.

26

Ma waajal ndajem kër Aji Sax ji

¹ Ñeel Daawuda.

Aji Sax ji, àtte ma,

man de maandu laa wéye,

Aji Sax ji laa wóolu, jenguma.

² Aji Sax ji, nattu ma, seetlu ma,

seggal xel ak xol.

³ Maa ngi janook sa ngor,

di jéfe sa worma.

⁴ Toogumaak naxekat,

lëngoowumaak naaféq,

⁵ sib naa gangooru saaysaay,

toogumaak ku bon.

⁶ Aji Sax ji, maay jàpp ci biir mucc ayib,

di wër sa sarxalukaay,

⁷ àddu, sant la,

lim sa jépp jaloore.

⁸ Aji Sax ji, maa sopp sa dëkkuwaay,

bëgg bérab bi sag leer teew.

⁹ Bu ma buubaaleek bàkkaarkat, sànni,
di ma booleek bóomkat, bóom.
¹⁰ Seeni yoxoo nga sóobu ci mbon,
ndijoor ya fees aki ger.

¹¹ Man nag maandu laay wéye,
tee nga maa jot, baaxe ma?

¹² Ndokk bi ma taxawee joor gu wóor.
Ma màggal Aji Sax ji fi ndajey way-gëm ñi.

27

Xare jib, ma ànd ak Yàlla

¹ Ñeel Daawuda.

Aji Sax jee may leeral, di ma wallu.
Ana ku may ragal?
Aji Sax jee aar sama bakkan.
Ana ku may tiit?

² Ab soxor wutsi ma,
nar maa yàpp,
noonoo ma, bañ ma;
mooy téréf, fèlèñu.

³ Bu gàngoor booloo sama kaw,
duma raf.
Ab xare jib,
ma ànd ak Yàlla.

⁴ Lenn laa ñaan Aji Sax ji,
lii laay sàkku:
dèkk kër Aji Sax ji,
sama giiru dund,
di niir taaru Aji Sax ji,
te yémoo kèram.

⁵ Bésu ay, mu yiire ma mbaaram,
làq ma, ma làqoo xaymaam,
aj ma ciw doj, ma raw.

⁶ Ma doxe fa siggi,
tiim noon yi ma wër,
di sarxali fa xaymaam
saraxi sarxolle.
Naa woyal Aji Sax ji, joobe ko.

⁷ Éy Aji Sax ji, déglul, ma woote!
Ngalla baaxe ma, nangul ma.

⁸ Yaw la sam xel ne ma, ma sàkku la,
te it yaw Aji Sax ji laay sàkku.

⁹ Sang bi, bu ma làqu,
bul mer, jañax ma.

Yaa ma daa wallu.
Bu ma wacc, bu ma ba,
yaay Yàlla mi may musal.

¹⁰ Ndey ak baay man nañu maa wacc,
Aji Sax ji fat ma.

¹¹ Éy Aji Sax ji, joxoñ ma saw yoon,
jaarale ma joor gu wóor,
ngir ñi may tèru.

¹² Bu ma baye bânneexu noon.
Seeday naaféq a ma jógal,
di sos fitna.

¹³ Maay dajeek ngéneelu Aji Sax ji
fi kaw suuf sii.

Lii wóor na ma.

¹⁴ Yaakaaral Aji Sax ji,
dégèrlul te amu fit,
te yaakaarati Aji Sax ji.

28

Aji Sax jeey àtte ñoñam

¹ Ñeel Daawuda.

Éy Aji Sax ji, yaw laay woo,
di la wéeroo, bu ma tanqamlu.
Soo nee cell,
ma xawa tàbbim pax.

² Ngalla déglul, ma tinu la,
woo la wall,
dèkk lay yoxo,
jublu sa néegu biir bu sell ba.

³ Bu ma sànkaleek ab soxor,
di ma booleek kuy def lu bon,
di wax moroom ma jàmm,
te dencal ko ay ca xolam.

⁴ Fey leen seen liggéey,
seen kemu jéf ju bon.
Jox leen seen añu jéf,
yool leen seen yelleef.

⁵ Xooluñu Aji Sax jeeki jëfam,
ak liggéey bi mu def.
Da leen di yaqte,
te dootu leen yékkati.

⁶ Jaajéfe Aji Sax ji,
ki ma nangul samay dagaan!

⁷ Aji Sax jee may dooleel, di ma feg.
Moom laa wóolu, mu wallu ma,
sama xol tooy,
ma woy, sante ko.

⁸ Aji Sax jee dooleel ñoñam.
Mooy làq, di musal buur bi mu fal.

⁹ Ngalla musalal sa mbooloo,
barkeelal sa ñoñ ñii,
sàmm leen, boot ba fàww.

29

Aji Sax jeey boroom ndam

¹ Muy kàddug Sabóor, ñeel Daawuda.

Yeen goney Yàlla yi, seedeel-leen Aji Sax ji,
seedeel-leen ko teddngaak doole,

² seedeel-leen Aji Sax ji teddngay turam.
Sujjóotal-leen Aji Sax ji,
ki gànjaroo sellnga.

³ Aji Sax jeey àddu ca kaw ndox ma,
Yàlla mu tedd maa dènu,
Aji Sax jeey tiim ndox, mi ne màww.

⁴ Aji Sax jeey àddoo doole,
Aji Sax jeey àddoo daraja.

⁵ Aji Sax jeey àddu, falaxe garabi seedar,
Aji Sax jee rajaxe seedari Libañ.

⁶ Réewum Libañ, mu curpiloow ni wèllu,

tundu Siryon^{*} it, mbete yëkk wu ndaw.

⁷ Aji Sax jeey àddu,
fettaxal sawara, mu boy.

⁸ Aji Sax ji àddooti, yëngal màndiŋ,
Aji Sax jee yëngal màndiŋu Kades.

⁹ Aji Sax jeey àddu, kèwél matu,
garabi àll ruus,
biir kèram di mennum riir,
naan: «Màggal-leen ko!»

¹⁰ Aji Sax ji la mbënn ma fekk falu,
Aji Sax jee falu buur ba fàww.

¹¹ Aji Sax jeey kàttanal ñoñam,
di barkeeje jàmm ñoñam.

30

Mucc, bég

¹ Muy woyu Sabóor, ñeel Daawuda ca
daloob kër Yàlla ga^{*}.

² Aji Sax ji, dama lay kañ.
Yaa ma yékkati,
ba noon reetaanu ma.

³ Aji Sax ji sama Yàlla, maa la woo wall,
nga faj ma.

⁴ Aji Sax ji, yaa ma jukkee njaniiw,
may ma bakkan, ma tàggook ñiy tàbbi
njaniiw.

⁵ Yeen aji gëm ñi, woyleen Aji Sax ji,
njukkale ko sellngaam.

⁶ Meram di lu gàtt,
aw yiwam sax dàkk.
Rongooñ gane, fanaan,
ay ree xëysi.

⁷ Man damaa baaxle woon, ba ne:
«Deesu ma rëññeel muk.»

⁸ Aji Sax ji, booba yaa ma baaxe,
dëj ma, ma ne kekk niw tund.
Nga fuuyu, ma jàq.

⁹ Aji Sax ji, yaw laa woo wall;
Boroom bi, yaw laa ñaanu yi,

¹⁰ ne la: «Ma dee, tàbbi bàmmee,
ana lu mu lay jariñ?
Nu la pëndu pax di sante,
bay biral sa worma?»

¹¹ Aji Sax ji, déglul, baaxe ma;
éy Aji Sax ji, dimbali ma.»

¹² Yaa ma soppil samay rongooñ ay ree,
summi sama yérey tiis, solal ma bänneex.

¹³ Naa la woye xol, baña selaw.
Aji Sax ji, sama Yàlla, ma sant la ba fàww!

* 29:6 29.6 tundu Siryon mooy tundu Ermon ba tey. *
gannaaw mbas ma, ba mu jëndee dàgga ngir rendi fa sarax su dakkal mbas ma. Dàgga jooju lañu mujj tabax jaamookaay ba. Seetal ci 2.Samiyel 24, ak 1.Jaar-jaar ya 21.

31

Naa siggi, noon sègg

¹ Mu jëm ci njiital jàngkat yi, di kàddug
Sabóor, ñeel Daawuda.

² Aji Sax ji, yaw laa làqoo,
yàlla buma rus muk.
Yiwee ma sa njeck.

³ Teewlu ma,
gaawe ma,
may ma, ma sës ci yaw, fegu.
Aar ma, ma mucc.

⁴ Yaa may yiir, di ma aar,
jiite ma, wommat ma ngir yaw.

⁵ Génne ma fiir gi ñu may téroo;
yaw yaa di sama rawtu.

⁶ Yaw laa dénk sama bakkan.
Aji Sax ji, Yàlla miy dëgg, ngalla jot ma.

⁷ Maa bañ kuy topp tuuri neen.
Man, Aji Sax ji laa wóolu.

⁸ Damay bég, di bänneexoo sa ngor,
li nga xoole samaw tiis.
Ràññee nga sama njàqarey xol.

⁹ Waccoo ma ci loxol noon,
danga maa taxawal fu ma yaatoo.

¹⁰ Éy Aji Sax ji, baaxe ma, jàq naa!
Samay gët a ngi giim ndaxu tiis,
xol jeex, yaram jeex.

¹¹ Naqar a ngi may rey,
tiis di wàññi samay fan,
sama doole ñiis ndax sama njubadi,
samay yax semm.

¹² Noonoo noon a ma sewal,
dëkkandoo waxi noppi,
xame seexlu ma,
ku ma gis biti, di ma daw.

¹³ Kenn xalaatu ma, xanaa fàtte ma ni ku
dee,

ma mel ni ndab lu yàqu.
¹⁴ Damaa dëgg jëw yu bare,
lu raglu dar ma kepp.

Ñu ngi mànkoo, di ma fexeel,
di wut sama bakkan.

¹⁵ Man nag Aji Sax ji, ci yaw laa dénk.
Ma ne: «Yaay sama Yàlla.»

¹⁶ Yaa yor sama àpp.
Xettli maak ku ma noonoo
ak ku may sonal.

¹⁷ Leeralal ma sa kanam, Sang bi,
walloo ma sa ngor.

¹⁸ Éy Aji Sax ji, woo naa la wall,
yàlla buma rus.

Yal na ku bon rus,
ne xerem biir njaniiw.

* 30:1 30.1 Woyu Sabóor wii Daawuda da koy sante Yàlla sarax su dakkal mbas ma. Dàgga jooju lañu mujj tabax jaamookaay ba. Seetal ci 2.Samiyel 24, ak 1.Jaar-jaar ya 21.

19 Yal nanga tēj gémmiñu fen-kat
buy wax aji jub waxi reewande,
di réy-réylook a xeebaate.

20 Yälla yaa yaa ngëneel
loo dencal ku la ragal,
defal ko ku la làqoo,
doom aadama seede.

21 Yaa koy làq fa nga làqu,
fa pexey nit àggul.
Nga yiir ko, mu yiiru
ci ayu làmmiñ.

22 Teddnga ñeel na Aji Sax ji!
Ndaw kéemtaan ci ngor li mu ma jiwe
biir dëkk bu ñu gaw.

23 Man nag saalitoon naa ne:
«Yälla dagg na ma, sànni!»
Ndeke ba ma lay woo,
dëgg nga samay dagaan.

24 Képp kuy aji gëm, soppal Aji Sax ji.
Aji Sax jeey sàmm ku ko gëm,
di yool, ba wis kuy réy-réylu.
25 Képp ku yaakaar Aji Sax ji,
dégérulul te amu fit.

32

Njéggal barke la

1 Dib taalif, ñeel Daawuda.

Ndokklee yaw mi ñu baal bàkkaar,
jéggal la ag moy.

2 Ndokklee yaw mi Aji Sax ji toppul ag
tooñ,
te amoo xelum njublan it.

3 Ba ma nee cell,
damaa ràgg,
dëkke naqar.

4 Guddeek bëccëg
sa loxo diis gann ci man.
Sama doole ñiis
ni ndox mu jaas upp.

5 Ma xamal la ne moy naa,
làqatuma la sama ñaawtéef.
Ma ne: «Naa àgge Aji Sax ji sama
bàkkaar.»

Yaw nga baal ma peyug tooñ.

Selaw.

Selaw.

6 Nii, kuy aji gëm, na la ni ñaane,
ba ñaan jotee.
Mbënn mu baawaan, di wal sax,
du ko laal fenn.

7 Yaw laay làqoo,
nga di ma aar ciw ay,
may ma ñu ma yéew, di ko bége.

Selaw.

8 Nga ne ma: «Dama laa xelal,

xamal la fi ngay jaar,
digaal la, di la xool.

9 Buleen mel ni fas mbaa berkelle
mi amul ag dégg,
laab ak tarka di ko téye,
mu doora yem fi seen wet.»

10 Ku bon barew tiis.

Ku wóolu Aji Sax ji,
mu yiire la ngoram.

11 Yaw aji jub ji, bégal te bannexoo Aji
Sax ji.

Képp kuy def njub, sarxolleel!

33

Nan woy Boroom bi nu sàkk

1 Yeen aji jub ñi, sarxolleen ci Aji Sax ji;
kuy jubal, màggal war na la.

2 Xalamleen, sante Aji Sax ji,
xalamal-leen ko xalamu fukki buum.

3 Fental-leen ko woy,
xalam, mu neex, sarxolle jib.

4 Aji Sax jee jub kàddu.

Mooy jéfe lépp kóllère.

5 Moo sopp dégg ak yoon.

Aji Sax ji, ngoram a fees àddina.

6 Kàddug Aji Sax ji la asamaan sosoo,
ci baatam la gàngoori asamaan yépp
sàkkoo.

7 Moo boole ndoxi géej, jal,
yeb xóotey géej ciy mbànd.

8 Yeen waa àddina sépp, ragal-leen Aji Sax
ji;
yeen àddina wërngal képp, wormaal-leen
ko.

9 Moo àddu, mu am;
santaane, mu sotti.

10 Aji Sax jeey neenal li xeet yiy fexe,
di gántal li mbooloo yiy mébét;

11 Aji Sax ji nas, mu àntu ba fàww,
mu mébét, mu sottil maasoo maas.

12 Ndokklee yeen xeet wi Aji Sax ji di seen
Yälla,

yeen askan wi Aji Sax ji séddoo.

13 Asamaan la Aji Sax jiy jéere,
di gis doom aadama yépp.

14 Jal ba mu tooge

lay niire waa àddina sépp.

15 Moo tabax seen xol, ñoom ñépp;
lu ñu def, xam na ko.

16 Mbooloo mu réy mayul Buur ndam,
doole ju bare walluwul jambaar.

17 Yaakaar aw fas nax sa bopp la,
kàttanu fas dug wall.

18 Ma ne, Aji Sax jee naa jàkk ku ko ragal
tey wéeroo ngoram.

19 Day jot bakkanam,
di ko dundal cib xiif.

20 Nu ngi séntu Aji Sax ji,

moo nuy taxawu, di nu feg.

²¹ Ci moom la sunu xol di sedde, turam wu sell lanu wóolu.

²² Aji Sax ji, ngalla baaxe nu sa ngor, moom lanu yaakaar fi yaw.

34

Aji Sax ji du tanqamlu aji jub

¹ Ñeel Daawuda. Mooy ba muy wayadi-wayadilu ca kanam Abimeleg, ba Abimeleg dàq ko, mu dem*.

² Naa màggal Aji Sax ji saa su ne, di ko sant fu ma tollu.

³ Aji Sax ji laay sagoo, néew-ji-doole dégg, bég.

⁴ Kañleen Aji Sax ji, ànd ceek man, nu bokk wormaal turam.

⁵ Maa sàkku Aji Sax ji, mu nangul ma, tàggale maak lépp lu ma ragal.

⁶ Ku yaakaar Aji Sax ji bég, leer nàññ, gâcce du ko sèlèm.

⁷ Néew-ji-doole woote, Aji Sax ji wuyu, musal ko fu mu jàqe.

⁸ Ku ragal Aji Sax ji, malaakaam yiir la, di la wallu.

⁹ Mosleen, xam ne Aji Sax jee baax, ndokklee yaw mi ko làqoo.

¹⁰ Ragal-leen Aji Sax ji, yeen nitam ñu sell ñi;

ku ko ragal doo ñàkk dara.

¹¹ Gaynde man naa ndóol, xiif, nit sàkku Aji Sax ji, ñàkkul lenn lu baax.

¹² Dikkal doom, déglu ma, ma jàngal la ragal Aji Sax ji.

¹³ Ana ku dund neex, mu bégga gudd fan, ba gis ngéneel?

¹⁴ Na lámminiãam daw lu aay, dawi fen.

¹⁵ Na dèddu lu bon tey def lu baax, sàkku jàmm, saxoo ko.

¹⁶ Ay gèt la Aji Sax ji ne jàkk aji jub ji, te ay noppam la dékk wooteb wallam.

¹⁷ Aji Sax jeej rëbb kuy jéfe mbon, ngir dagge ko kaw suuf, far turam.

¹⁸ Ku jub yuuxu, Aji Sax ji dégg, fu mu jàqe, mu musal ko.

¹⁹ Sa yaakaar tas, Aji Sax ji jege la, sa xol jeex, Aji Sax ji wallu la.

²⁰ Musiba bare naa dal ku jub, Aji Sax ji musal ko ci lépp,

²¹ di ko sàmm,

ba benn yaxam du damm.

²² Musiba nag day rey ku bon, te ku bañ aji jub, yoon dab na la.

²³ Aji Sax jeej jot ab jaamam,

képp ku ko làqoo, yoon du la dab.

35

Aji Sax ji, àtte maak noon

¹ Ñeel Daawuda.

Éy Aji Sax ji, digaaaleel ak samay digaaale, xeexal maak ñi may xeex.

² Fèkkal sa pakk ak sa kiiraay, taxawusi ma,

³ xàcci sa xeej ak sa sémmiif, dajeeek ñi may dàq.

Déey ma, ne ma: «Sag mucc, man a.»

⁴ Ñiy wut sama bakkan, yal nañu rus ba torox;

ñi may fexee lor, yal nañu leen waññi, sewal leen.

⁵ Yal na leen malaakam Aji Sax ji bëmëx, nim ñax mu ngelaw wal.

⁶ Yal na leen malaakam Aji Sax ji dàq, ñuy lëndëmtyu tarxiis.

⁷ Defuma dara, ñu di ma fiir, defuma dara, ñu gas um yeer, di ma tëru.

⁸ Yal nañu sànkoo mbetteel, keppoo seen fiir,

sànkoo seenum yeer.

⁹ Su boobaa ma bége Aji Sax ji, bannexoo wallam,

¹⁰ di ko sante sama jëmm jépp,

naan: «Éy Aji Sax ji, ana ku mel ni yaw, di xettli néew-ji-doole ci boroom doole,

ak ku néewleek ku ñàkk ca ka leen di lekk?»

¹¹ Nit ku bon a ngi may duural, di ma jiiñ lu ma yégul.

¹² Ma ji leen njekk, ñu fey ma njekkar, ndaw tiisu xol!

¹³ Man de ba ñu woppee, maa ngi ñaawlu, di woor, toroxloo,

sukk, ñaanal leen,

¹⁴ tiisoo leen ni saab xarit mbaa doomu ndey,

di ñaawlook a yoggoorlu ni ku ñàkk yaay.

¹⁵ Ma daanu tey, ñu daje di ko bége, dajaloo fi sama kaw,

di ma fexeele te yéguma, di ma yàpp, tèè ba.

¹⁶ Tekkiwuñu dara, di ma ñaawal rekk te di ma màttu.

¹⁷ Éy Aji Sax ji, loo deeti seetaan?

Musal ma ci seenum pàdd, wallu ma ci yii gaynde,

sàmmal ma sama benn bakkan bii!

¹⁸ Maa lay sante fa ndaje yaatoo, màggal la digg mbooloo mu yaa.

* 34:1 34.1 Seetal ci 1.Samiyel 21.10-15. Akis buurub Gaat mooy Abimeleg ba tey.

19 Noon bu ma deful dara, yàlla bumu gis
lu mu ma damoo.

Ku ma bañ ci dara, yàlla bumu ma ree.

20 Waxuñu jàmm,
xanaa di ràbbal niti jàmm ci réew mi
ay kàdduy tuuma.

21 Ñu ngi ma ña ñàpp, di ma tuumaal,
naan: «Yaw a, yaw a, noo la gis!»

22 Éy Aji Sax ji, yaa ci gis, bul selanjlu,
éy Boroom bi, bul ma sore.

23 Jógal, sàmmal ma sama àq.

Sama Yàlla, Boroom bi, àtte ma yoon.

24 Aji Sax ji sama Yàlla, àttee ma sa dëgg,
ñu bañ maa ree!

25 Yàlla buñu ne: «Ñaw! Lii rekk lanu
bëggoon.»

Yàlla buñu ne: «Sàkkal nanu ko pexe.»

26 Ku bége sama njàqare,
yal nanga rus, ba torox.

Kuy réy-réylu ci sama kaw,
yal nanga am gacce, ne yàcc.

27 Ku bége sama der bu set,
yal nanga bannexu, di sarxolle,
foo tollu di biral naan:

«Aji Sax jee mägğ!
moom miy bége jàmmi jaamam.»

28 Man it ma tudd sa njekk,
di la dëkke mägğal!

36

Nit ñaaw, Aji Sax ji gore

1 Mu jëm ci njiital jàngkat yi, ñeel
Daawuda jaamub Aji Sax ji.

2 Kàddug tooñ ga ku bon wax mu ngi sama
xel mi.

Mu ne: «Ana lu may ragal ci Yàlla?»

3 Day gis boppam, naagu,
ba du gis sikkam, sib ko.

4 Ay waxam coxor aki fen,
jëfeetul lu rafet ak lu baax.

5 Day mébét lu ñaaw cib lalam,
taxawe yoon wu dëddu mbaax,
te du bañ lu bon.

6 Céy Aji Sax ji, gore nga ba kaw asamaan,
dëgg ba kaw-li-kaw.

7 Sa njekk a tiim tund yu mag yi,
sa àtte ne xéew ni xóotey géej.

Céy Aji Sax ji, nit ak mala, nga boole sàmm!

8 Céy Yàlla, yaa wéet ngor,
doom aadama yiiroo sa ker, yiiru;

9 yafloo sa njël lu duun,
sa xéewal wal, nga nàndale ko.

10 Ci yaw la dund di balle,
te sag leer lanuy leerloo.

11 Jotaleel sa ngor ku la xam,
jotale sa njekk kuy nas njub.

12 Yàlla bu ma ku reew teg tànk;
loxo ku bon, yàlla bumu ma taxa daw.

13 Defkati mbon yaa ngii, daanu,
ne lareet, télee jóg.

37

Bu sa xol jóg

1 Ñeel Daawuda.

Bu sa xol jóg ci ku bon,
bul ñee kuy def njombe.

2 Léegi mu wow nim ñax,
lax ni gàncax.

3 Dénkul ci Aji Sax ji, di def lu baax,
ba des ci réew meek jàmm.

4 Deel bannexoo Aji Sax ji,
mu may la say nammeel.

5 Jébbalul ci Aji Sax ji,
dénku ci moom, mooy sottal.

6 Day setal sab der ni jant bu fenk;
sab àtte ne ràññ ni njloor.

7 Neel tekk, xaar Aji Sax ji,
yaakaar ko.

Bu sa xol jóg ci kuy baaxle,
tey lal ay pexe.

8 Baal mer, dëddu xadar.
Xol bu jóg, loraangey neen.

9 Ku bon, ñu dagg, sànni;
ku yaakaar Aji Sax ji, jagoo réew mi.

10 Nes tuut, ku bon ne mes,
nga seet, seet, mu réer.

11 Waaye néew-dooleey jagoo réew mi;
jàmm ne ñoyy, ñu bége.

12 Ku bon fexeel ku jub,
di ko màttu,

13 Buur Yàlla di ko ree,
xam ne bésam a ngi ñëw.

14 Ku bon bocci saamar,
tàwwig fitt,
nara rey ku ñàkk, néewle,
nara bóom kuy jubal;

15 far jam boppam saamaru xol,
fittam damm.

16 Aji jub, as tuutam
moo gën koomu ku bon.

17 Ku bon kat, sa doole dëddu la;
ku jub, Aji Sax ji wallu la.

18 Ku maandu, Aji Sax ji yég la,
sab cér sax.

19 Bu mettee doo rus,
te bésub xiif dangay regg.

20 Ku bon sàнку;

noonub Aji Sax ji, taaru tool bu naat la,
bu tàkkee, jeex tàkk.

21 Ku bon leb, du fey;
ku jub yéwén, di joxe.

22 Aji Sax ji barkeel la, nga jagoo réew mi
moos;
mu alag la, nga dog.

23 Aji Sax jeey sopp saw yoon,
jiite say jéego.

24 Soo téréfee it, doo daanu.
Aji Sax jee lay walloo loxoom.

25 Ba may ndaw, ba tey may mag,
gisuma ku jub ñàkk ndimbal,
mbaa askanam di dunde yalwaan.

26 Day saxoo tabe, di leble,
askanam barkeel.

27 Dëddul mbon, di jéfe mbaax,
ba dëkke réew mi fàww.

28 Aji Sax ji kat daa sopp yoon,
te du wacc jaamam bu gore.

Day fegu ba fàww,
askanu ku bon dog.

29 Aji jub ay jagoo réew mi,
dëkke ko ba fàww.

30 Kàddug aji jub day xelu,
wax ja jub;

31 yoonu Yàllaam a nga ca xol ba,
du dox ba téréf.

32 Ku bon a ngi yeeru ku jub,
di ko wuta bóom.

33 Waaye Aji Sax ji du ko bàyyeek moom,
te deesu ko daan cib layoo.

34 Yaakaaral Aji Sax ji, sàmm yoonam,
mu teral la, nga jagoo réew mi,
ku bon sàнку, ngay gis.

35 Damaa gis ku bon di note,
te sèq ni garab gu naat fa mu fekk baax,

36 ma jaareeti fa, ndeke wuute na,
ma seet ko, gisuma ko.

37 Bàyyil xel ku maandu, xool ku jub;
muj, fa nitu jàmm.

38 Moykat yeey sànkoonduo,
ku bon amul muj.

39 Aji Sax jeey musal ku jub,
di ko aar bésub njàqare.

40 Aji Sax jee koy taxawu, wallu ko,
wallu ko ci ku bon, musal ko,
ndax li mu ko làqoo.

38

Maa wopp, tuub, di jooy

1 Muy kàddug Sabóor guy fàttlee, ñeel
Daawuda.

2 Éy Aji Sax ji, bul mer, di ma rébb;
bul xadaru, di ma mbugal.

3 Aji Sax ji, fitt nga maa fitt,
dóor nga ma.

4 Danga maa mere, ma wéradi;
maa bàkkaar, ba jagadi.

5 Samay ñaawtéef médd ma,
diisa diis, ba àttanuma ko.

6 Maa def ug ndof,
ba am dana yu bédd, ba xasaw.

7 Maa ngi sègg, ne yàcc, ne yasar,
di wéye tiis,

8 yaram tàng, di bax,
ma wéradi, ne làcc.

9 Sama yaram dee goyy, ma ne lasar,
jàq, di binni.

10 Boroom bi, yaa ngi ne jàkk ci samay
nammeel,

samay onk umpu la.

11 Sama fit a ngi téf-téfi, doole njiis,
gèt giim.

12 Xarit ak dëkkandoo di ma daw,
mbokk dànd ma.

13 Ñi may wuta rey a ngi may fiir,
di ma jéema lor, di ma waxal musiba,
yendu maa lalal pexe.

14 Man, ma mel nib t'ex, dégguma,
mel ni luu, àdduwma,

15 di saf ku dul dégg,
bay layoo.

16 Aji Sax ji, yaw laa yaakaar;
Boroom bi, sama Yàlla, yaa may nangul.

17 Ma ne, ngalla buñu ma ree,
di damoo samab jéll.

18 Maa ngii di waaja daanu,
dëkke metit.

19 Ma ne, aylayéwén def naa lu ñaaw,
sama bàkkaar tiital na ma.

20 Noon yaa ngi ne jonn ak seen doole,
bare na ñu ma bañ ci neen.

21 Ma ji leen njekk, ñu fey ma njekkar;
may sàkku lu baax, ñu di ma sikk.

22 Éy Aji Sax ji sama Yàlla, bu ma wacc,
bu ma sore.

23 Ngalla gaawe ma;
Boroom bi, yaa may musal.

39

Dund yàggul

1 Mu jëm ci Yedutun, njiital jàngkat yi, di
kàddug Sabóor, ñeel Daawuda.

2 Dama noon: «Damay moyu ba duma
moye làmmiñ.»

Li feek ku bon di teew,

may n̄alaab sama gémmiñ.

³ Dama noon cell, ne patt,
noppi, ba mu èpp;
sama njàqare yokku,

⁴ sama xol diis,
xel di xelaat, xol diis gann;
ma mujj àddu,

⁵ ne: «Éy Aji Sax ji, xamal ma sama muj
ak sama àppi fan,
ma xam ni sama dund gatte.

⁶ Yaatuwaayu loxo nga ma àppal ciy fan,
sama giiru dund du dara fi yaw.
Képp ku taxaw di cóolóolu neen.

Selaw.

⁷ Nit du lu moy takndeer buy dem,
cóolóolu neen lay kër-këri.
Nit a ngi dajale, xamul kuy for.

⁸ «Éy Boroom bi, lu may xaarati?
Sama yaakaar yaw a.

⁹ Musal ma ci sama mbugali tooñoó tooñ,
bu ma bàyyi, dof di ma reetaan!

¹⁰ Noppi naa, dootuma wax,
yaw yaa dogal lii.

¹¹ Waaye ngalla teggii sab yar,
sa diisaayu loxoo ngi may jekkli.

¹² Yaay mbugal ku bàkkaar, yar ko,
ronq ni max la mu gëna fonk.
Nitoo nit, cóolóolu neen.

Selaw.

¹³ Éy Aji Sax ji, déglul, ma ñaan la,
teewlul, ma woo la wall;
bul tanqamlu sama yuux,
doxandéem donj laa fi yaw,
di gan ni maam yépp.

¹⁴ Ngalla xiddi ma, ma muuñ,
bala maa dëddu, réer.»

40

Déggal Aji Sax jee am solo

¹ Mu jëm ci njiital jàngkat yi, ñeel
Daawuda, di kàddug Sabóor.

² May xaara xaar Aji Sax ji,
mu dégg may woote, geesu ma,
³ génnee ma ca kàmbug sànkute,
sippee ma ca xóotey ban ba,
cèppe ma ciw doj,
samp ma, ma dègër.

⁴ Moo ma may, ma fent,
woy wu ma woye sunu Yàlla.
Ñu baree seede, di wormaal
ak a dénku ci Aji Sax ji.

⁵ Ndokklee, yaw mi dénku ci Aji Sax ji,
te sàkkuwoó ku bew
ak kuy topp ay fen.

⁶ Yaw Aji Sax ji sama Yàlla, bare nga loo
def,
amuloo moroom!

Bare nga kéemaan aki mébét yoo nu
sottalal,
ma bégga xamle lépp,
te mu bare ba wees ab lim.

⁷ Saraxi gàtt mbaa pepp, taamuwuloo ko,
ay nopp nga ma bënnal,
saraxu rendi-dóomal, ak saraxu póotum
bàkkaar,
sàkkuwuloo ko.

⁸ Ma ne: «Maa dikk nii,
téereb yoon wi indi na li ñu bind ci man.

⁹ Sama Yàlla, maa soppa def sa coobare,
ci sama biir xol la sa ndigali yoon nekk.»

¹⁰ Siiwal naa sag njeck ca ndaje mu mag
ma.

Dama ne, Aji Sax ji duma noppi, xam nga
ko.

¹¹ Làquma sag njeck, ne cell ak moom.
Yaa wóor, di walloo, siiwal naa ko.

Làquma ndaje mu mag ma sa ngor ak sa
worma.

¹² Éy Aji Sax ji, bu ma xañ sa yërmande.
Sa ngor ak sa worma,
yal na ma feg ba fàww.

¹³ Ay musibaa ma tanc,
ne gâññ, ba wees ab lim.
Samay ñaawtéef a ma dab, ba gisatuma,
baree bare, ba èpp sama kawari bopp;
sama xol jeex tàkk.

¹⁴ Éy Aji Sax ji, yal na la neex, nga wallu
ma!

Éy Aji Sax ji, gaawe ma!
¹⁵ Képp kuy wuta fëkk sama bakkan,
yal na rus, torox ne tott.
Kuy bége sama loraange,
yal nañu ko duma, mu ne yàcc.

¹⁶ Ku may ñaawal,
yal nañu ko torxal, mu jommi.

¹⁷ Képp ku lay sàkku,
yal na bég, di la bânneexoo.
Képp ku safoo sag wall,
yal na jàppoo: «Aji Sax ji màgg na!»

¹⁸ Man, néew naa doole, ñàkk naa,
waaye yaw Aji Sax ji, dang ma yég.
Yaw yaa may wallu, xettli ma;
sama Yàlla, bu ma yeexe.

41

Jarag bu ñu tonj a ngi ñaan

¹ Mu jëm ci njiital jàngkat yi, di kàddug
Sabóor, ñeel Daawuda.

² Ndokklee yaw mi yég néew-ji-doole.
Aji Sax jee lay xettli, bésub njàqare.

³ Aji Sax jee lay aar, di sàmm sa bakkan,
nga jagoo barke ci réew mi,
te du la bàyyi noon def la lu ko neex.

⁴ Aji Sax jee lay dooleel soo woppee,

di soppo bu baax sa tëraay.

⁵ Dama ne: «Aji Sax ji, tooñ naa la; baaxe ma, faj ma.»

⁶ Noon yaa ngi may yéene lu bon, naan: «Xanaa kii du dee, ba ñu fàtte ko?»

⁷ Ku dikk, di ma seet, di jinigal tey fenti sos ci xolam, bu génnee, tasaare ko.

⁸ Bañ yépp a ngi may déeyoo, di ma fexeel lu bon,

⁹ naan: «Musiba dal na ko, du jógati!»
¹⁰ Sama am-di-jàmm bu ma wóolu sax jógal na ma, te daan lekk samaw ñam.

¹¹ Waaye ngalla Aji Sax ji, baaxe ma, yékkati ma, ma fey leen.

¹² Su noon damuwul ci sama kaw, ma doora xam ne bége nga ma.

¹³ Man, damaa maandu, nga taxawu ma, déj ma fi sa kanam, ba faww.

¹⁴ Cant ñeel na Aji Sax ji, Yállay Israyil. Moo masa yelloo cant, ba faww. Amiin, Amiin.

42

Maa namm Yàlla

¹ Mu jëm ci njiital jàngkat yi, di taalif bu ñeel askanu Kore wu góor.

² Yaw Yàlla, ni kéwél di sàkkoo walum ndox, maa la koy sàkkoo xol.

³ Maa mar Yàlla, Yàlla jiy dund!

Kañ laay teewi fa kanam Yàlla?

⁴ Rongoon laay dunde guddeek béccég,

noon yi di ma dëkke naa:

«Ana sa Yàlla ji?»

⁵ Lii laay fàttliku, sama xol jeex: dama daan jàll, jiite mboolo ma, jëm kër Yàlla ga, di sarxolleek a sant, ñu booloo di màggal.

⁶ Moo man, lu may yoggaaral nii? Lu may jàq?

Naa yaakaar Yàlla, ba dellu sante sama Yàlla wallam.

⁷ Maa ngi ne yogg, ba di la fàttlikoo fa réewum Yurdan ak tundi Ermon ak Misar.

⁸ Sa wal ya sotti, xóote awu moroom ma; say wal ak say gannax, lépp a jaare sama kaw.

⁹ Béccég Aji Sax ji baaxe ma ngoram, guddi ma fanaane koo woy, di ñaan Yàlla mi may dundal.

¹⁰ Naa wax Yàlla ji ma sës, ne ko: «Lu tax nga fàtte ma,

noon di ma fitnaal, may wéye tiis?»

¹¹ Noon yaa ngi may ñaawal, di ma yendoo naa:

«Ana sa Yàlla ji?»

Ma ne yàcc, ne yasar.

¹² Moo man, lu may yoggaaral nii? Lu may jàq?

Naa yaakaar Yàlla, ba dellu sante sama Yàlla wallam.

43

Éy Yàlla, àtte ma

¹ Éy Yàlla, àtte ma, layool maak xeet wu gorewul, xettli maak ku njublanj te dëng.

² Yaw Yàlla kat yaay sama rawtu. Lu tax nga wacc ma,

may wéye tiis, ci noteelu noon?

³ Ngalla yónneel sag leer ak sa dëgg, yal na ma yooyu jiite, yóbbu ma sa tund wu sell, sa dëkkuwaay ba.

⁴ Kon Yàlla, naa àgg sa sarxalukaay; yaw Yàlla, yaay sama mbégte, di sama bänneex.

Yaw Yàlla, sama Yàlla, naa la màggale xalam.

⁵ Moo man, lu may xàddi, ne yogg? Lu may jàq nii?

Tee maa yaakaar Yàlla, ba santati ko, moom sama Yàlla mi may wallu?

44

Xeet waa ngi jooy

¹ Mu jëm ci njiital jàngkat yi, di taalif bu ñeel askanu Kore wu góor.

² Éy Yàlla, noo dëggal sunu bopp, sunuy maam a nu wax

jëf ja nga jëf, ca seeni jant, bu yàgga yàgg.

³ Yaw ci sa bopp yaa dàq xeet yi, jëmbat fa maam ya;

yaa mbugal xeet yi, ñoom, nga yiwi leen.

⁴ Du seen saamar lañu nangoo réew mi moos,

seen dooley bopp it mayu leen ndam.

Yaa ko defe kàttan ak doole, geesoo leen sa leeru kanam,

ngir sa cofeel.

⁵ Yaay kiy sama buur, di sama Yàlla, mayal askanu Yanqóoba ay ndam.

⁶ Yaw lanuy dàqe bañ yi, sa tur lanuy dëggaatee ñi nu song.

⁷ Du fitt laa wóolu,

du saamar a may may ndam.

⁸ Yaa nuy musal ci bañ yi,

yaay gácceel noon ñi.

⁹ Yàlla lanuy damoo bésoo bés,
di màggal turam ba fàww.

Selaw.

¹⁰ Waaye danga noo wacc,
torxal nu,

ba àndulook sunu mboooloo yare.

¹¹ Waññi nga nu, nu won noon yi gannaaw,
ñu bañ nu, ba futti nu.

¹² Ni gàtt yu ñuy yàpp, ni nga nu joxee,
tasaare nu ci biir xeet yi.

¹³ Jaay nga sa mboooloo ci dara,
te jariñu la tus.

¹⁴ Tax nga sunuy dëkk di nu ree,
ñi nu séq di nu kókkaleek a ñaawal.

¹⁵ Tax nga xeet yi di nu lééboo,
jaambur yaa ngi nuy wëcc bopp!

¹⁶ Damaa dëkke gáce,
sëlmoo kersa

¹⁷ ndax kókkali yeek xastey nit
ñi ma bañ, di feyoontek man.

¹⁸ Lii lépp dal na nu,
te fàttewunu la, fecciwunu la kóllère.

¹⁹ Dëdduwunu la,
wàccunu saw yoon,

²⁰ teewul nga not nu, wacce nu xaj ya,
képp nu lëndëmu ndee.

²¹ Su nu la fàtte woon yaw, sunu Yàlla,
ba tàllal tuuri doxandéem yi loxo,

²² du la ump, yaw Yàlla,
mi xam kumpay xol.

²³ Yaa tax ñu yendu noo bóom,
dees noo jàppe ni xar yu ñuy tër.

²⁴ Éy Aji Sax ji, jógal! Looy nelaw?
Yewwul, bu nu wacc ba fàww.

²⁵ Loo nu làqe saw yiw,
di fàtte sunu njàqareek sunu coono?

²⁶ Nu ngi ne ñàyy ci pënd bi,
di watat koll fi suuf.

²⁷ Wallusi nu, jot nu
ngir sa ngor.

45

Buur a ngi séetal

¹ Mu jëm ci njiital jàngkat yi, dëppook
galan bu ñuy wax Tóor-tóor, ñeel askanu
Kore wu góor, dib taalif, te di woyu
mbèggeel.

² Woy wu neex a fees sama xol,
may taalifal Buur,
sama làmmiñ ni xalimag bindkatu
ndaanaan.

³ Yaa gëna góorayiwe ci àddina,
sa kàddu diw yiw,
ndax Yàllaa la barkeel ba fàww!

⁴ Jambaaroo, takkal sa saamar,

te yànj, am daraja;

⁵ ànd ak daraja, dawal ba am ndam,
di dawal dëgg ak yërmande ji war,
ba mana def ay jaloore.

⁶ Yaw Buur, say fitt a ñaw,
di jam say noon ci xol,
ay xeet daanu, nga tiim.

⁷ Yaw Yàlla, sab jal a sax dàkk ba fàww.
Njub nga ñanke sa nguur gi,

⁸ di sopp dëgg, bañ lu bon,
ba Yàlla, sa Boroom diwe la diwu mbég,
nga tiim say moroom:

⁹ sa yére yépp di gilli ndàbb, alowes akum
kanel,

ñu di la bégale xalam,
ca sa biir kër yu yànj.

¹⁰ Ay doomi buur a ngi ci jigéen ñi nga
teral,

sab lingeer féete la ndijoor,
takkoo ngëneelu wurus.

¹¹ Janq doom, gisal, déglul te teewlu ma,
fàtteel say bokk, fàtte sa kër baay,

¹² Buur xemmeme la sab taar;
mooy sab sang, wormaal ko.

¹³ Waa Tir a lay yótsiy may,
ay boroom alal di wut lu la neex.

¹⁴ Séetu Buur duggsi na, ne ràññ,
sol mbubb mu wurus way tàkk.

¹⁵ Ñu yóbbul ko Buur, mu ne boyy,
janq ja ànd ak moom, diy toppam, ñu indil
leen Buur,

¹⁶ ñu duggsi kër Buur,
ci biir mbégteek bannex.

¹⁷ Yal na la sa doom yu góor wuutu ci seen
jalu maam,

nga def leeni kàngam ci réew mi mépp.

¹⁸ Maa lay jooobe ba sa tur du fey mukk,
xeet yi saxoo laa sant ba fàww.

46

Aji Sax jee ànd ak man

¹ Mu jëm ci njiital jàngkat yi, di jàngin wu
ñeel askanu Kore wu góor, dëppook galan
bu ñuy wax Baatu jigéen.

² Sunu Yàllaa nuy rawale, di nu dooleel,
di nu wallu fu nu jaaxlee,

³ ba dunu tiit suuf su yéngu sax,
ba tund yiy tàbbi biir gééj,

⁴ mbaa gannax yuy riir, di fuur
ak a fuddu bay gësëm tund yi.

Selaw.

⁵ Ag dex a ngi defi wal, di bannexal dëkku
Yàlla,

sellngay dëkkuwaayi Aji Kawe ji.

⁶ Yàllaa ngi ci biir dëkk bi, du raf;
Yàllaa koy dimbali ba jant fenkee.

7 Ay giir a riir, ay réew yèngu;
mu àddu, suuf seey!

8 Aji Sax ji Boroom gàngoor yee ànd ak
nun,

Yállay Yanqóoba jee nuy rawale.

Selaw.

9 Dikkleen gis jaloorey Aji Sax ji,
ak yàqute gi mu dogal ci kaw suuf.

10 Mu ngi fey xare ci àddina sépp,
dog fitt, damm xeej,
lakk pakk.

11 Mu ne: «Dal-leen te xam ne maay Yàlla,
màgg ci biir xeet yi, màgg fi kaw suuf.»

12 Aji Sax ji Boroom gàngoor yee ànd ak
nun,

Yállay Yanqóoba jii a nuy rawale.

Selaw.

47

Yàllaay buur

1 Mu jëm ci njiital jàngkat yi, di kàddug
Sabóor, ñeel askanu Kore wu góor.

2 Na xeetoo xeet tàccu,
xaacu, sarxolleel Yàlla!

3 Aji Sax ji, Aji Kawe jee jara ragal,
mooy buur bu mag bi tiim àddina sépp.

4 Moo nu nangulal xeet yi,
nu teg tànk gàngoor yi.

5 Moo nu tànnal céru suuf,
muy sagu askanu Yanqóoba wii mu sopp.

6 Yàllaa yéeg, kàddu riir.
Aji Sax jee yéeg, bufta jolli.

7 Woyleen Yàlla, woyleen,
woyleen Yàlla sunu buur, woyleen.

8 Yàllaay buuru àddina sépp;
taalifleen, woy ko.

9 Yàllaa di buuru xeet yi,
Yàllaa tooge jalam bu sell.

10 Kàngami xeet yeey daje,
ànd ak ñoñi Yállay Ibraayma;
Yàllaa moom buur yi yiir àddina,
te moo kawee kawee.

48

Aji Sax ji aar na Siyon

1 Muy woyu Sabóor, ñeel askanu Kore wu
góor.

2 Aji Sax jee màgg, jara màggala màggal
ca sunu biir dèkku Yàlla, kaw tundam wu
sell.

3 Jekk taxawaayee tundu Siyon, catu bëj-
gànaar,

dèkku buur bu mag bi,
di mbégtem àddina sépp.

4 Yàllaa wone kaaraangeem
ca biir tatay dèkk ba.

5 Buur yaa ngoog daje,
àndandoo.

6 Nun noo gis, jommi,
tiit, fèx,

7 ne fay pat-pati,
jàq ni kuy matu.

8 Ngelawal penku, moom ngay tase
gaal gu mag.

9 La nu déggoon de lanu gis
ca dèkkub Aji Sax ji Boroom gàngoor yi,
sunu dèkku Yàlla ba.

Yàllaa koy dégèral ba fàww.

Selaw.

10 Céy Yàlla, nu ngi sa biir kër,
di xalaat sa ngor.

11 Céy Yàlla, sa tur ay sa woy
ba ca cati àddina.

Njekk la sa loxo fees.

12 Yal na waa tundu Siyon bég,
waa Yuda bannexoo say àtte.

13 Doxleen biir Siyon, wër ko,
waññleen ay soorooram,

14 nemmikuy tataam,

doxantoo kèri buur,

ba man koo yegge maasug èllég,

15 ne leen kii ay Yàlla, sunu Yàlla,
tey ak èllég.

Moo nuy jiite ba saa taxaw.

49

Alal day naxe

1 Mu jëm ci njiital jàngkat yi, di kàddug
Sabóor, ñeel askanu Kore wu góor.

2 Yeen, xeetoo xeet, dégluleen;

yeen, waa àddina yépp, teewluleen,

3 ngay ku tuut di ku mag,
nga bareleek nga néewle.

4 Li may wax xel la,

di xalaat yu déggu.

5 Damay teewlu kàddu yu xelu,

xalamal la sama tekkiteb cax.

6 Ana lu may tiit bés yu metti,
yu ma njublan yéewe seeni ñaawtéef,

7 di ñu wóolu seen am-am,

di kaño alal ju bare?

8 Ana ku mana jota jot sa bakkanu mo-
room,

mbaa mu di ko feyal Yàlla njot ga?

9 Njotug bakkan jafe na,

bu ci jéem dara.

10 Ana kuy dund ba fàww,

ba doo gis bàmmeel?

11 Xanaa gis ngeen ne xelu, dee;
dof, dee; naataxuuna it faatu rekk,

wacce keneen alalam.

12 Sa bàmmeel di sa kër, ba fàww,

di sa dèkkuwaay bu sax dèkk,

boo tudde woon sa bopp ay suuf sax.

¹³ Nit ak darajaam fanaanul,
mook aw rab a yem, sàнку rekk.

¹⁴ Nii la ku wóolu boppam di mujje,
mook ku ko topp, di safooy waxam.

Selaw.

¹⁵ Nara dee rekk niy xar,
ndee wommat, yóbbu,
njub fenk nib jant, ku jub moom leen,
njaniiw médd seen jëmm,
fu sore kërug daraja.

¹⁶ Waaye Yàllaa may musal ci dooley
njaniiw,
jot sama bakkan, ba jël ma.

¹⁷ Buleen yéemu ci ku barele,
teraangay kërám di yokku.
¹⁸ Du dee ba yóbbaaale dara,
teraangaam du ko topp biir bàmmeelel.

¹⁹ Na bége bannëexu bakkanam,
ñu di ko kañe koomam,
²⁰ ba tey, day dee, fekkiy maamam,
ña dootu gis ug leer ba fàww.
²¹ Nit ak darajaam fanaanul;
mook aw rab a yem, sàнку rekk.

50

Aji Sax ji xol lay gërëm

¹ Muy kàddug Sabóor, giiróo ci Asaf.

Yàlla, Aji Sax ji Yàlla àddu na,
di woo àddina, penku ba sowu.

² Ca Siyon, dëkk ba ca taar ba
la Yàlla feeñe ni leer gu jolli.

³ Sunu Yàllaa ngi ñëw te du ne cell,
sawaraa ko jiitu, di xoyome,
ngélén lu mag wër ko.

⁴ Ma ngay woo seede asamaan ak suuf,
ngir àtte ñoñam.

⁵ Mu ne: «Dajaleel ma sama wóllère
ñiy sarxal, di ko fase sama kóllèreek
ñoom.»

⁶ Asamaan a ngi biral njekkam,
ngir Yàllaay àtte.

Selaw.

⁷ «Yeen sama ñoñ, dégluleen, ma wax
leen;

yeen waa Israyil, ma sikk leen.
Maa di Yàlla, seen Yàlla.

⁸ Du seeni sarax laa leen di sikke,
mbaa seen saraxi rendi-dóomal yi sax fi
sama kanam.

⁹ Soxlawuma yékku yar
ak sikketu gétt.

¹⁰ Maay boroom raboo rabu àll,
ak junniy nag yuy fore tund ya.

¹¹ Xam naa njanaawi tund yi,
luy ndundatub tool maa ko moom.

¹² Su ma xiifoon, duma leen ko wax,
maa moom àddinaak li ci biiram.

¹³ Damay lekk yàppu nag
ak a naan deretu sikket a?

¹⁴ Deel jaajéfál Yàlla, sarxale ko,
di fey Aji Kawe ji loo dige,

¹⁵ di ma woo bésuub njàqare,
ma wallu la, nga màggal ma.»

¹⁶ Ñu bon ñi Yàlla ne leen:
«Lu ngeen di tari sama dogali yoon,
di waxe sama kóllère?»

¹⁷ Yeena ngii, bañ sama yar,
xalab samay kàddu.

¹⁸ Fu ngeen gis ub sàcc, neexook moom,
ab njaalookat, ngeen lëngool.

¹⁹ Dangeena afal seen gémmiñ ci mbon,
seen làmmiñ taqoo fen,

²⁰ ngeen di tooge seen mbokk,
di yaq deru doomu ndey.

²¹ Lii yeena ko def! Damay noppi,
ngeen defe ne damaa mel ni yeen?
Dama leen di sikk, tuumaal leen, ngeen gis!

²² «Yeen fàttekati Yàlla yi, déggleen lii,
bala maa fàdd te kenn du wallu.

²³ Ki may sarxale jaajéf moo ma teral;
ku topp yoon, ma won ko wallu Yàlla.»

51

Yàlla, yërëm ma

¹ Mu jëm ci njiitu wàngkat yi, di kàddug
Sabóor, ñeel Daawuda. ² Mooy ba ko
Yonent Yàlla Natan seetsee, gannaaw ba
Daawuda dëkkoo ndaw sa ñuy wax Bat-
seba*.

³ Éy Yàlla, ni nga goree, baaxe ma ni,
faryl samag tooñ ngir sa yërmande ju yaa.

⁴ Fóotal maa fóotal sama ñaawtéef,
raxasal ma sama moy.

⁵ Xam naa ne maa tooñ,
sama moy a ngi janook man saa su ne.

⁶ Yaw laa moy, yaw dorjñ.
Li nga ñaawlu laa def.

Kon boo waxee, yaa yey;
te soo àttee, wàcc nga.

⁷ Ñaawtéef daal laa judduwaale,
te sama ndey ëmbaale ma bàkkaar.

⁸ Dégg daal nga namm, déggu reenu xol,
kon déey ma xel mu rafet.

⁹ Wis ma ndox, ma sell;
sang ma, ma set wecc.

¹⁰ Yal nanga ma dégtal mbég ak bannëex,
ma bégati, gannaaw ba nga ma damma-
tee.

¹¹ Bul xool samay moy,
faryl sama ñaawtéef yépp.

¹² Éy Yàlla, sàkkal ma xol bu sell,

* 51:2 51.2 Seetal ci 2.Samiyel 11—12.25.

yeesalal ma pastéefu xol.

¹³ Bu ma xalab,

bu ma xañ sa noo gu sell.

¹⁴ May ma, ma bégeeti sag wall,

te dundale ma xol bu tàlli,

¹⁵ ma xamal tooñkat sa war,

ba moykat dellu ci yaw.

¹⁶ Céy Yàlla, yaw Yàlla mi may musal,

baal ma deret ji ma tuur,

ma siiwal sa njekk.

¹⁷ Boroom bi, may ma, ma wax,

ma delloo la njukkal.

¹⁸ Sàkkuwloo sarax, nde kon ma indi;

te soppuloo saraxu rendi-dóomal.

¹⁹ Saraxi Yàlla, xol bu tuub la,

yaw Yàlla, xol bu tuub ba mokk, doo gântal boroom.

²⁰ Ngalla baaxeel Siyon,

yal nanga tabax tatay Yerusalem.

²¹ Su boobaa nga nangu sarax yi war,

di saraxu rendi-dóomal.

Su boobaa ñu rendi ay yëkk ca sa sarx-
alukaay.

52

Yàllaa man boroom doole

¹ Mu jëm ci njiital jàngkat yi, di taalif bu ñeel Daawuda. ² Mooy ba Doweg, Edomeen ba, demee ca Sóol, ne ko Daawuda dem na kër Ayimeleg*.

³ Moo jàmbaar ji, looy damoo jëfi coxor?

Yàlla, ngoram, bés bu nekk la.

⁴ Ak sa làmmiñ wi ngay sose loraange,

mel ni saatu su ñu xacc,

rambaaj bi!

⁵ Lu bon a la gënal lu baax,

fen a la gënal wax dëgg.

⁶ Yaa bëgg jépp wax juy yàq,

waabajiba bi!

⁷ Yàlla da lay sànk ba fàww,

fëkke la sab xayma, yóbbu,

déjjatee la réewum aji dund.

⁸ Aji jub gis ko, yéemu,

di la ree, naa:

⁹ «Xool-leen jàmbaar ji làqoowul Yàlla,

xanaa di yaakaar alalam ju bare,

di yokkoo loraange.»

¹⁰ Man, ma mel ni garabu oliw gu naat

fa biir kër Yàlla,

di wóoloo Yàlla ngoram

tey ak èllëg.

¹¹ Naa la sante sa jëf ba fàww,

naa biral sa tur wu baax,

say wóllère teew.

53

Mbon maase na

¹ Mu jëm ci njiital jàngkat yi, dëppook galan bu ñuy wax Maalat, di taalif bu ñeel Daawuda.

² Ab dof a nga naa ca xelam:

«Yàlla amul,»

tey def njekkar,

njubadeem siblu,

kenn defu ci lu baax.

³ Yàllaa tollu asamaan, jéer doom aadama,

di seet ku ci xelu,

tey sàkku Yàlla.

⁴ Ñépp a dëddu,

bokk yàqu yaxeet.

Kenn deful lu baax,

du kenn sax.

⁵ Yàlla nee: «Xanaa ñiy def lu bon, xamuñu dara?

Ñuy lekk sama ñoñ niw ñam,

te sàkkuwuñu Yàlla.»

⁶ Waaye ñooy tiita tiit

fu tiitaange amul.

Yàllaay tasaare néewi nit ñi la gaw.

Yàllaa leen wacc, nga gâceel leen.

⁷ Ana kuy tollu Siyon, xettli Israyil?

Éy, bés bu Yàlla delloo ñoñam ndam,

ndaw mbégte ci giirug Yanqóoba!

Ndaw bannex ci Israyil giil!

54

Yàlla, dimbali ma

¹ Mu jëm ci njiital jàngkat yi, ànd aki

xalam, di taalif bu ñeel Daawuda. ² Mooy

ba waa Sif demee ca Sóol, ne ko Daawudaa

nga làqu ca seenum réew*.

³ Éy Yàlla, musal ma ngir sa tur,

jox ma dëgg, ci sa kàttan.

⁴ Éy Yàlla, déglul, ma ñaan,

teewlul, ma wax la.

⁵ Ay doxandéem a ma jógal,

di ñu néeg, bëgga jël sama bakkan,

te seetuñu ci Yàlla.

Selaw.

⁶ Yàllaa ngii, moo may dimbali;

Boroom bee yor sama bakkan.

⁷ Yal na ay wi képpu ci ñi may tëru,

yal na leen sa dëgg sànk.

⁸ Xol bu tàlli laa lay sarxale.

Aji Sax ji, yaa baax,

* 52:2 52.2 Seetal ci 1.Samiyel 21—22.

* 54:2 54.2 Seetal ci 1.Samiyel 23.14-28; 26.1-5.

ma sant la.

⁹ Lépp luy njàqare, yaa ma ci jële,
ma tiim samay noon.

55

Xarit wor na ma

¹ Mu jëm ci njiital jàngkat yi, ànd aki
xalam, dib taalif, ñeel Daawuda.

² Éy Yàlla, déglul, ma ñaan la,
bul làqu, dama lay dagaan.

³ Teewlu ma, nangul ma.

Li may tawat a ma xañ jàmm, ub sama
bopp;

⁴ coowal noon yee
ak coonob ñu bon ñi.

Dañu maa teg fitna,
di ma songe xadar.

⁵ Sama fit a ngi rëcc, di tef-tëfi;
tiitaangey ndee ne ma taral.

⁶ Njàqaree ma dugg, may kat-kati,
musiba mëdd ma.

⁷ Dama ne: «Éy ku may may laafi xati,
ma ne fërr, noppluji.

⁸ Xanaa ma naaw, ba sore,
fanaani màndij ma.

Selaw.

⁹ Naa gaawtu, seeluji
ngelaw lu riddi ak ngëlen.»

¹⁰ Éy, Boroom bi, beenal seeni wax, neenal
leen.

Damaa gis fitnaak xuloo ci dëkk bi,

¹¹ guddeek bëccëg ñuy wër,
ñaawtéef ak ayib bëttali leen.

¹² Yàq a nga ca biir,
te noteel ak njublanj jógul ca pénc ma.

¹³ Su doon noon bu may ñaawal,
ma muñ ko,
mbaa muy bañ bu may won ab dayo,
ma daw ko.

¹⁴ Waaye yaw la, sama nawle,
di sama wóllère, ma xam la.

¹⁵ Nu daan bokk bannexu diisoo,
ànd ak mbooloo, di jaamuji kër Yàlla ga.

¹⁶ Yal na leen dee bett,
ñu jekki tàbbi njaniiw,
ngir mbon ga seen biir ak seen
dëkkuwaay.

¹⁷ Waaye man, Yàlla laay woo wall,
te Aji Sax jee may wallu.

¹⁸ Subaak ngon ak njolloor,
may ñaxtook a ñurumtu,
mu dégg ma.

¹⁹ Moo may jot ak jàmm,
ba ma mucce ci xare ya ma ñu bare di
songe.

²⁰ Yàllaay dégg, duma leen,
moom mi nguuram yàgga sax.

Selaw.

Soppikuwuñu fenn
te ragaluñu Yàlla.

²¹ Kii a ngi xàccil ñi mu takktool,
di fecci kóllère,

²² làmmiñ wa daa neex ni lem,
te xare lal xol ba;
kàddu ya gëna nooy ag oliw
te di saamar bu génn mbaram.

²³ Sippikul Aji Sax ji lu la diis,
moom moo lay taxawu.
Du bàyyi muk k'aji jub, muy téréf.

²⁴ Waaye yaw Yàlla, yaa leen di tàbbal,
bóomkat ak naaféq ci pax mu xóota xóot,
te seenu fan xaajul.
Man nag, ma di la wóolu.

56

Yàlla laa wóolu, ragaluma nit

¹ Mu jëm ci njiital jàngkat yi, dëppook
galan bi ñu dippee Pitax mu luu, dëkk
fu sore; di taalifu jàngle bu Daawuda
fentoon, ba ko Filisteen ña jàppee ca
Gaat*.

² Éy Yàlla, baaxe ma,
nit a ngi may lakkal,
ab xeexkat a ma yendoo sonal.

³ Noon yee ma yendoo lakkal,
bare lool di xareek man.

Ku Màgg ki,
⁴ bés bu ma tiitee,
yaw laay wóolu.

⁵ Yàlla laay màggal kàddoom,
Yàlla laa wóolu, ragaluma.
Lu ma nit manal?

⁶ Béssoo bés ñu ngi jalgati samay wax,
seen mépp mébét di sama loraange.

⁷ Ñu ngi mànkoo, di ma yeeru,
topp sama tànk,
di wut sama bakkan.

⁸ Éy gii ñaawtéef! Ñii nu ñu mana mucce?
Éy Yàlla, yal na leen sa mer dal!

⁹ Tumuránke naa, nga gis.
Duyal samay rongooñ ci sa mbuus.
Du lim nga lépp?

¹⁰ Bés bu ma wootee wall,
dees na wañni noon yi,
ma xam ne Yàllaa ànd ak man.

¹¹ Yàlla laay màggal kàddoom,
Aji Sax ji laay màggal kàddoom,
¹² Yàlla laa wóolu, ragaluma.

* 56:1 56.1 Seetal ci 1.Samiyel 21.10-15.

Lu ma nit manal?

¹³ Éy Yàlla, maa tegoo la ma la giñal,
maa lay defal saraxi cant.

¹⁴ Yaa ma rawale, ba deewuma,
te duma tërëf.

Damay daagu fi kanam Yàlla,
ci biir leeru àddina.

57

Yàlla jógal, wallu ma!

¹ Mu jëm ci njiital jàngkat yi, dëppook
galan bi ñuy wooye Bul yàq, di taalifu
jàngale bu Daawuda fentoon, gannaaw ba
mu dawee Buur Sóol, ba dugg ca xunti
ma*.

² Éy Yàlla, baaxe ma, ngalla baaxe ma,
fi yaw laay làqu,
yiirroo sa kiiraay,
ba musiba yi jàll.

³ Ma woo Yàlla, Aji Kawe ji,
Yàlla, mi may matalal.

⁴ Mooy yónnee fa asamaan, musal ma,
dumaal ma ku may not.

Selaw.

Yàllaay yónnee jëfi ngoram ak wormaam.

⁵ Maa ngi tëdd ci biiri noon
yu mel niy gaynde, di yàpp doom aadama.
Seeni sell niy xeej aki fitt,
seen làmmiñ di saamar yu ñaw.

⁶ Éy Yàlla, yaa màgg, ba sut asamaan,
sag leer tiim suuf sépp.

⁷ Noon yi di ma fiir,
sama xol jeex.

Ñu gasal mam pax,
far tàbbi ca.

Selaw.

⁸ Yàlla, dogu naa,
dogu naa woy, di la kañ.

⁹ Na sama jëmm jépp yewwu,
xalam ak moroom ma yewwu;
ma yee leeru njël.

¹⁰ Boroom bi, naa lay gërëm ci biir xeet yi,
kañ la ci biir waaso yi.

¹¹ Sa ngor a màgg, ba àkki asamaan,
sa worma àkki fa kawa kaw.

¹² Éy Yàlla, yaa màgg, ba sut asamaan,
sag leer tiim àddina sépp.

58

Yàllaa mana mbugal

¹ Mu jëm ci njiital jàngkat yi, dëppook
galan bi ñuy wooye Bul yàq, di taalifu
jàngale, ñeel Daawuda.

* 57:1 57.1 Seetal ci 1.Samiyel 24.

* 58:10 58.10 Li ñu wax ci aaya wii am na werante.

* 59:1 59.1 Seetal ci

1.Samiyel 19.11-17.

² Yeen daal, su ngeen waxee, dëgg selaw.
Mbaa yeena ngi àtte nit ñi ci yoon?

³ Yeena ngi mébét njubadi,
di lawal fitna ci réew mi.

⁴ Ku bon day sosu rekk, dëng;
juddu, teggi yoon, dib fen-kat.

⁵ Day am danjar ni ñàngóor,
fatti noppam ni jaan ju t'ex:

⁶ du dëgg baatu jatkat,
mbaa jati ñeengokat bu ñang.

⁷ Yàlla, ngalla tojal seeni gëñ;
Aji Sax ji, foqal seen selli gaynde yii.

⁸ Yal nañu ne mes ni ndox muy wal,
yal nañu diir seen fitt, mu damm,

⁹ yal nañu mel ni ngummaan-tooye buy
dox, di seey,

mbaa lumb wu jigéen tuur, gisul jant.

¹⁰ Balaa seen cin a yég tangooru gajj,
muy gu tooy, muy guy boy,

yal na leen fekk sànk*.

¹¹ Aji jub day gis ñu feyul ko, mu bég,
muy jàngoo deretu ku bon.

¹² Ku ne naan: «Ku jub jot sab yool moos!
Te Yàllaa ngi fi moos, di àtte àddina!»

59

Wallu maak ñu bon ñi

¹ Mu jëm ci njiital jàngkat yi, dëppook
galan bi ñuy wooye Bul yàq, di taalifu
jàngale bu Daawuda fentoon. Mooy ba
Buur Sóol yónnee ay nit ñu ko xoolal kër
Daawuda, ngir rey ko*.

² Éy sama Yàlla, xettli maak noon yi,
làq ma ñi ma jógal.

³ Xettli maak ñiyy def lu bon,
wallu maak bóomkat yi.

⁴ Aji Sax ji, ñu ngii di ma tëru, nar maa rey,
di ma songe seen doole,
te tooñuma, moyuma.

⁵ Defuma lu ñaaw, ñuy xélu, di ma waajal;
ngalla, jógal taxawusi ma, ba gis.

⁶ Aji Sax ji, Yàllay Israyil, Yàlla Boroom
gàngoor yi,
yewwul, diikeel xeeti yéefar yépp, mbu-
gal!

Worikat yu bon yi, bu leen yërëm!

Selaw.

⁷ Bu ngoonee ñu wàccsi,
di xiiru niy xaj,
di wër dëkk bi.

⁸ Déglul li ñuy yebbee ci seen gémmiñ,
seen làmmiñ niy saamar;
ñu defe ne kenn déggu leen.

⁹ Te yaw Aji Sax ji, yaa ngi leen di ree,
yaa ngi kekku yéefar yii yépp.

¹⁰ Yaay sama doole, ma di la séentu,
yaw Yàlla, yaay sama rawtu.

¹¹ Sama Yàlla ju goree may gatandu.
Moo may may ndam ci noon yi, ma gis.

¹² Yàlla, bu leen rey,
lu ko moy samaw xeet fàtte.
Tasaaree leen sa doole, daane leen.
Boroom bi, yaa nuy feg.

¹³ Bàkkaar lañuy wax,
seeni kàddu, bàkkaari neen.
Yal nañu bew ba daanu,
yooloo ko seeni saagaak seeni fen.

¹⁴ Meral, jeexal leen,
jeexal leen, ba ñu jeex tàkk,
ba ñépp xam ne Yàllaay Buur ci giirug
Yanqóoba,
ba ca cati àddina.

Selaw.

¹⁵ Bu ngoonee ñu wàccsi,
di xiiru niy xaj,
di wër dëkk bi.

¹⁶ Ñuy wër di wut lu ñu lekk,
su ñu suurul, di ñurumtu.

¹⁷ Maa lay woye sa doole,
xëy, di sarxolle ngir sa ngor.

Yaay sama rawtu,
di sama làquwaay bésuub njàqare.

¹⁸ Sama doole yaw a, naa la woy,
Yàlla, sama rawtu, Yàlla, boroom ngor.

60

Yàllaa yor sunu mucc

¹ Mu jëm ci njiital jàngkat yi, dëppook
galan bu ñuy wax Seedeb Tóor-tóor, di
taalifu jàngle, ñeel Daawuda. ² Mooy
ba Daawuda di xareek waa Siri ña ca
Mesopotami ak waa Siri ña ca Soba te ba
ña ca bàyyikoo, Yowab duma fukki junniiy
Edomeen ak ñaara (12 000) ca xuru Xorom
wa*.

³ Éy Yàlla, wacc nga nu, bètt sunu kiiraay.
Mer nga, waaye ngalla xettli nu.

⁴ Yèngal nga suuf, xar ko;
ngalla jagalal, mu tēju, mu ngi jaayu!

⁵ Won nga sa mbooloo lu metti,
nàndal nu biiñu mbugal, ba nu miir.

⁶ Artu nga ñi lay jaamu,
ngir mucc fitt.

Selaw.

⁷ Walloo nu sa ndijoor, nangul nu,
ba say soppe xettliku.

⁸ Yàllaa àddoo fa kèram gu sell,
ne: «Maay damu, dogat suufas Sikem,
séddale xuru Sukkóot.

⁹ Maa moom diiwaanu Galàdd, moom
Manase,
Efrayim di sama mbaxanam xare,

Yuda di sama yetu nguur,

¹⁰ réewum Mowab di sama ndabal raxas-
ukaay,

Edom, ma teg tànk;
Filisti, ma xaacoo fa.»

¹¹ Éy Yàlla, ana ku may yóbbu dëkk ba tata
wër?

Ku may jiite ba Edom?

¹² Xanaa kay du yaw, Yàlla mi nu wacc,
yaw Yàlla, mi baña ànd ak sunu mbooloo
xare?

¹³ Ngalla dimbali nu ci bañaale;
doom aadama, wallam neen la.

¹⁴ Nook Yàlla, nu def njàmbaar;
moom mooy not sunuy noon.

61

Naa woote wall

¹ Mu jëm ci njiital jàngkat yi, ànd aki
xalam, ñeel Daawuda.

² Ngalla Yàlla, déglul, maa ne wallóoy,
teewlul, ma dagaan la.

³ Àll laa lay wooye,
sama xol jeex;

yéége ma doju rawtu wu ma jotul.

⁴ Yaw laa làqoo,
ngay tata ju dègër, fegal ma noon.

⁵ Naa dëkke sa xayma, ba fàww;
làqoo sa kiiraay.

Selaw.

⁶ Yàlla, yaa dégg samay dige,
sédd ma céru ñi la wormaal.

⁷ Ngalla féqal fani Buur,
ay atam bare, sèt ba sètaat.

⁸ Éy Yàlla, yal na Buur toog ba fàww fi sa
kanam,
nga sédd ko sa ngor ak sa worma, mu
fegoo;

⁹ kon ma woy la ba fàww,
di jéfe samay dige bésou bés.

62

Yaakaar; fa Yàlla

¹ Mu jëm ci Yedutun, njiital jàngkat yi, di
kàddug Sabóor, ñeel Daawuda.

² Yàlla donj ay dalal sama xel,
moo may wallu.

³ Moom donj mooy sama wéeru-mucc,
di ma rawale, ba duma sànkul!

⁴ Xanaa dungenen bàyyee songandoo nit,
nar koo sànk,
ni kuy màbb tabax bu joy,
mbaa ngay bàddi per mu ràpp?

* **60:2** 60.2 Seetal ci 2.Samiyel 8.3-14; 1.Jaar-jaar ya 18.3-13.

5 Seeni mébét, wàcce boroom daraja donj;
yeena ngi bége ay fen,
seeni kàddu diw yiw,
seen xalaat diy saaga.

Selaw.

6 Yal na Yàlla donj di dalal sama xel,
moom mi ma yaakaar.
7 Moom donj a di sama cēslaay, di sama wall,

di sama rawtu, duma tērēf.

8 Yàllaa may musal, di ma sagal,
ma di ko doolewoo.

Sama kiiraay, Yàllaa!

9 Bokk yi, wóoluleen ko fu ngeen tollu,
diisleen ko seen xol,
Yàllaay sunu kiiraay.

Selaw.

10 Doom aadama, ngelawal neen;
nit, naxi neen.
Booleel teg ci lu ñuy natte diisaay,
kaw la jëm.

Ñooy géna woyof ngelaw!

11 Bul wóolu ribaa,
bul yaakaar alalu càcc, neen la.
Bu sa alal yokku, nga taf ci sa xol.

12 Benn yoon la Yàlla wax,
yaari yoon laa dégg, ñu ne;
«Doole, fa Yàlla.»

13 Boroom bi, ngor, yaay boroom,
yaw daal, yaay yool nit jëfam.

63

Maa namm Aji Sax ji

1 Muy kàddug Sabóor, ñeel Daawuda.
Mooy ba mu nekkee ca màndiŋu Yuda*.

2 Yaw Yàlla, yaay sama Yàlla,
ma di la sàkku,
sama bakkan mar la,
sama jëmm namm la,
fu suuf mare ndox, ne seren.

3 Moo tax kër gu sell ga laa la séentoo,
ngir niir sa leer ak sa teddnga.

4 Xéewloo sa ngor moo daq dundu bakkan;
ma àddu boog, kañ la!

5 Dama lay sant, sama giiru dund kay,
yékkatiy loxo, sàbbaale la.

6 Sama xol di sedd, ni ku ñam wu duun
suural,
ma bég, sarxolle, màggal la.

7 Su ma téddee, fàttliku la,
waxtuw guddi dama lay xalaat.

8 Yaay sama ndimbal,
may làqoo sa kiiraay,
di sarxolle.

9 Sama xol taq la,
nga téyee ma sa ndijoor.

10 Waaye ñiy wuta faat sama bakkan
ñoo jëm xóotey njaniiw.

11 Ñu jébbal leen ñawkay saamar,
till séddoo.

12 Buur moom, di bége Yàlla;
képp ku koy giñe di ko kañoo,
fen-kat ne xerem.

64

Yàllaa man ag fitt

1 Mu jëm ci njiital jàngkat yi, di kàddug
Sabóor, ñeel Daawuda.

2 Éy Yàlla, déglul sama kàddug tawat;
ngalla aaral sama bakkan ci noon bu raglu.

3 Làq ma pexey ku bon,
ma récc gàngooru defkati ñaawtéef.

4 Ñu ngi daas seen làmmiñ niy saamar;
di fitte seeni kàdduy wextan,

5 di jam ku ñu tëru te deful dara;
jekki jam ko, te tiituñu ci dara.

6 Dañoo dogu ca lu bon la ñu nar,
di diisoo na ñuy làqe ay fiir,
te naan: «Kenn du ko gis!»

7 Dañuy lal pexem njubadi te naan:
«Lal nanu pexe mu mat sèkk.»

Nit aka xóot xel te xóoti mbóot!

8 Waaye Yàllaa leen di jamu fittam,
ñu jekki daanu.

9 Seen làmmiñ a leen di fakkastal,
ba ku leen xool wècc bopp.

10 Népp a ciy am tiitaange,
bay siiwal la Yàlla def,
tey xalaataat jëfam jooju.

11 Ku jub bége Aji Sax ji, làqoo ko.
Képp ku namm njub, damu.

65

Yàllaay nangul suuf

1 Mu jëm ci njiital jàngkat yi, di woyu
Sabóor, ñeel Daawuda.

2 Éy Yàlla, yaa jagoo cant fa Siyon,
yaw lees di jéfeel ab dige.

3 Yaw miy nangug ñaan,
yaw la képp di wuysi.

4 Samay ñaawtéef man na ma,
waaye sunuy tooñ, yaa nu koy baal.

5 Ndokklee koo tànn, woo ko,
mu dale say ètt,
di xéewloo sa ngéneeli kër,
ak sa sellngay dèkkuwaay.

* 63:1 63.1 Seetal ci 1.Samiyel 23.14; 24.2; 2.Samiyel 15.23.

⁶ Defal nga nuy kéemaan,
nangug ñaan ci njëkk,
yaw Yàlla, mi nuy wallu,
di yaakaaru àddina wèrngal këpp,
ba ca géej gu sore ga.
⁷ Yaa déje tund yu mag yi doole,
gañoo sa kàttan,
⁸ di dalal riirum géej aki gannaxam,
ak coowal xeet yi,
⁹ ba waa cati àddina yéemoo say firnde,
waa penkook sowu di sarxolle.

¹⁰ Yaa dikke suuf am wal,
nangul koo nangul.
Dexu Yàllaa fees ndox,
ngay may nit peppam,
ni nga ko waajale suuf si,
¹¹ di suuxat ngàbb mi,
maasalee ko jal yi,
sottiy waame, mu mokk,
cax ma, nga barkeel.
¹² Yaay tēja mbeyum at mi say ngéneel,
foo jaare, xéewal walangaan.
¹³ Parluy màndiñ yaa ngi walangaan,
li wër tund yu ndaw yi di xumbéen.
¹⁴ Joor gaa ngi, jur gi muur,
xur yi sàngoo pepp,
lépp di xaacook a woy.

66

Yàllaay aar nitam

¹ Mu jëm ci njiital jàngkat yi, di woyu Sabóor.

Yeen waa àddina sépp, sarxolleel-leen
Yàlla,

² woyleen teddngay turam,
darajaal-leen cantam.

³ Neleen Yàlla: «Yaaka yéemey jaloore!

Sa doolee bare, ba say noon rasu,

⁴ àddina yépp di la sujjóotal,
di la woy, di joobe sa tur.»

Selaw.

⁵ Dikkleen gis li Yàlla def,
jéf la ju yéeme, ñeel doom aadama yi.

⁶ Moo soppi géej ag joor,
maam ya dox jáll.

Nanu ko bége foofa.

⁷ Mooy nguuroo njambaaram ba fàww,
di topp xeet yeek bët.

Ku koy diinat, yàlla boo damu!

Selaw.

⁸ Yeen xeet yi, santleen sunu Yàlla,
te biral cantam!

⁹ Moo sàmm sunu bakkan,
te waccu nu, nu tërëf.

¹⁰ Éy Yàlla, nattu nga nu,
xelli nu, ni ñuy xellee xalis;

¹¹ laaw nga nu,

teg nu njàqare.

¹² May nga noon not nu,
nu jaare sawara, jaarem ndox;
nga génne nu, yaatal nu.

¹³ Maay duggaale sa kër ay saraxi rendi-
dóomal,

defal la samay dige,

¹⁴ yi ma waxoon ci sama gémmiñ,
sama lãmmiñ tudd ko, ba ma jàqee.

¹⁵ Jurug yafal, ma defal la saraxu rendi-
dóomal,

saxar sa jollee ca kuuyu sarax ya,
ma boole ca saraxu nag ak sikket.

Selaw.

¹⁶ Képp ku ragal Yàlla dikkal, déglu,
ma limal la li mu ma defal.

¹⁷ Moom laa woo wall,
àddu, mággal ko.

¹⁸ Su ma naroon ñaawtéef,
Boroom bi du ma déglu.

¹⁹ Waaye Yàlla dégg na ma,
teewlu na samag ñaan.

²⁰ Cant ñeel na Yàlla,
gântuwul samay ñaan,
xañu ma ngoram.

67

Yal na nu Yàlla barkeel

¹ Mu jëm ci njiital jàngkat yi, ànd aki
xalam, di woyu Sabóor.

² Éy Yàlla, yéwéne nu, barkeel nu,
te geesoo nu sa leeru kanam,

Selaw,

³ ba ñu ràññee sa loxo fi kaw suuf,
gis sag wall fi biir xeet yépp.

⁴ Yaw Yàlla, na la xeet yi sant,
na la xeet yépp sant.

⁵ Na xeet yiy bég, di sarxolle;
loo dogalal xeet yi njub la,
te yaay wommat xeet yi ci kaw suuf.

Selaw.

⁶ Yaw Yàlla, na la xeet yi sant,
na la xeet yépp sant.

⁷ Suuf si nangu na,
yal na nu Yàlla, sunu Yállay barkeel.

⁸ Yal na nu Yállay barkeel,
ba àddina wèrngal këpp ragal ko.

68

Yàlla daagu, daan

¹ Mu jëm ci njiital jàngkat yi, ñeel
Daawuda, di woyu Sabóor.

² Yàllaay jóg, noonam ya tasaaroo;
bañam ña daw, dèddu ko.

³ Yàlla wal, ñu naaw ni saxar.

Ñu bon ñi sànkú fi kanam Yàlla,
mbete dax ak sawara.

⁴ Ñu jub ñi nag bég, di bannexu fi kanam
Yàlla,

tey puukarewoo mbégte.

⁵ Woyleen Yàlla, teral turam,
xállal-leen kiy war niir yi,
Ki Sax moo di turam.

Bannexuleen fi kanamam.

⁶ Mooy baayoo jirim, di àtte jëtun,
kookoo di Yàlla ja fa dëkkuwaayu sell-
ngaam.

⁷ Yàllaay sàkkal ku wéet wéttal,
di afal ku ñu tējoon, bégal ko,
ku déggadi rekk ay dëkke suuf su ne
serej.

⁸ Céy Yàlla, yaa génn, jiitu sa mbooloo,
daagu, dugg màndin ja.

Selaw.

⁹ Suuf yèngu,
asamaan sóob
fi kanam Yàlla, boroom tundu Sinayi,
Yállay Israyil ja!

¹⁰ Yàlla, waame nga tawal,
leqlee ko réew mi nga séddoo, fa mu
sonne,

¹¹ sa mbooloo dëkke fa.
Yàlla yaa leel néew-ji-doole ci sag mbaax.

¹² Boroom beey joxe ndigal,
gàngooru jigéen indi xibaar:

¹³ «Buur yaak seeni gàngoor a ngay dawa
daw,
jongomay kër gi di séddale lël ja.

¹⁴ Yeen ñuy waaf ci gétt gi, bésub xare,
gánjar a ngi, di laafi pitax yu ñu xoob
xaalis,

dung ya teg wurus wuy ray-rayi.»

¹⁵ Ba fa Aji Man ji tasaaree buur ya,
tawub yuur a ngay sóobe tundu Calmon.

¹⁶ Yaw tundu yàlla yi, yaw tundu Basan,
tundu Basan, tund wi ci coll yi,

¹⁷ looy xeelook say coll, di fiire
tund wi Yàlla namma dëkke?
Aji Sax ji kat, fa lay dëkk ba fàww!

¹⁸ Watiiri xarey Yàlla di ñaar fukki junni
(20 000),

ba ci junni junni.
Boroom bi ne ca seen biir,
di boroom tundu Sinayi fa biir selngaam.

¹⁹ Yaa yéeg fa kawa kaw,
jàpp ay jaam, yóbbaaale.

Yaa nangooy galag ci nit ñi,
ba ci ñuy fippu
ndax li Yàlla Ki Sax dëkke Siyon.

²⁰ Cant ñeel na Yàlla bésoo bés.

Moo nuy jaboote. Yàllaa nuy musal.

Selaw.

²¹ Sunu Yàllaa di Yàlla jiy walloo,
Aji Sax ji Boroom beey musal bakkan.

²² Yàlla daal ay rajaxe boppi noonam
ak kaan mu séq mu boroom wéye tooñ.

²³ Boroom bi nee: «Basan laay waññee
noon yi,

waññee leen xóotey géej,

²⁴ ngeen mana xuus ci seen deret,
seeni xaj séddu ci seeni néew.»

²⁵ Céy Yàlla, gis nañu sa gàngoor di daagu,
sama Yàlla, sama buur, sa gàngoor ba ca
biir kër gu sell ga.

²⁶ Woykat ya jiitu, xalamkat ya mujje,
janq ji yéewe leen tēgg um njiin.

²⁷ Dajeleen, di sant Yàlla,

yeen askanu Israyil, santleen Aji Sax ji.

²⁸ Giirug Beñamin a ngi jiitu, gën cee néew,
njiiti Yuda topp caak seeni kurél,
njiiti Sabulon topp caak njiiti Neftali.

²⁹ Yeen, seen Yàlla dogalal na leen kattan;
éy Yàlla, jéfeel doole ja nga nu jéfeeloon.

³⁰ Sa kër gi tiim Yerusalem,
fa la la buur yiy indiley galag.

³¹ Nanga fa gédde rabu àll wi* ci barax yi,
ñooy gétti yékk yi, xeet yi ci des diy sellu.
Gédd leen, ba ñu sujjóotalsi laak dogi
xaalis.

Tasaareel xeet yooyu sopp xare,

³² ay kàngam bàyyikoo Misra aki galag,
réewum Kuus baral loxoom, indil Yàlla.

³³ Yeen waa réewi àddina, woyleen Yàlla,
teral-leen Boroom bi,

Selaw

³⁴ gawar bi ci asamaan,
asamaani démb.

Ma ngooguy àddu kàddug doole.

³⁵ Seedeleen ne doole, fa Yàlla,
mi tiime Israyil darajaam,
dooleem feeño xàmbaar ya.

³⁶ Céy Yàllaaka mata ragal fa kèram gu
sell!

Mooy Yállay Israyil,

di may mbooloo mi dooleek kattan.

Cant ñeel na Yàlla!

69

Ku ñu fitnaal a ngi ñaan

¹ Mu jëm ci njiital jàngkat yi, dèppook
galan bu ñuy wax Tóor-tóor, ñeel
Daawuda.

² Éy Yàlla, wallu ma!

Ndox maa ngi ma tollu ci put.

* 68:31 68.31 rabu àll wi: jàpp nañu ne jombul Misra lay doon.

³ May suux ci ban bu xóot,
te awma fu ma teg tànk.
Maa ngi nii ci ndox mu xóot,
gannax yi mëdd ma.

⁴ Ma woote wall ba tàyyi,
sama put gi wow ñonj.
Ma séentu la, yaw sama Yàlla,
ba samay gèt giim.

⁵ Sama kawari bopp sax,
ñi ma bañ ci daraa ko èpp.
Ñu bare doole, bëgg maa sànk,
noonoo ma ci dara.
Sàccuma, nara fey!

⁶ Yaw Yàlla, xam nga sama jëfi dof,
te samay tooñ umpu la.

⁷ Yàlla buma rusloo ñi la yaakaar,
yaw Boroom bi, Aji Sax ji Boroom gàngoor
yi,
yàlla buma gàcceel ñi la topp,
yaw Yàllay Israyil.

⁸ Yaa tax ma dékku, ñu di ma sewal,
ma rus ba sèlmoo gàcce.

⁹ Jaambur laa léegi ci saay bokk,
mel ni doxandéem sama biir doomi ndey.

¹⁰ Damaa xér ci sa kër gi, ba jeex tàkk,
te jëf ji ñu la sewale man la dal.

¹¹ May jooy, di woor,
ñu di ma sewal.

¹² Ma sol ay saaku, di ko ñaawloo,
ñu di ma léebu.

¹³ Waa pénc ma di ma tooge,
màndikat yi di ma woyal.

¹⁴ Waaye man, Aji Sax ji, yaw laay dagaan.
Éy Yàlla, na tey di bésub yiw.
Ngalla nangul ma ci sa ngor lu yaa
ak sa wall gu wóor.

¹⁵ Xettli ma ci ban bi, ma baña suux,
xettliki ci samay noon.

Rikk génne ma yii xóotey ndox,
¹⁶ ba gannax du ma mëdd,
xóotey géj du ma warax,
pax du ma kepp.

¹⁷ Éy Aji Sax ji, yaa rafet ngor, nangul ma!
Geesoo ma sa yërmande ju yaa!

¹⁸ Bu ma làqu, Sang bi.
Jàq naa, gaawe ma.

¹⁹ Jege ma, jot ma,
musal ma ci noon yi!

²⁰ Yaa gis ñu di ma sewal, di ma ruslook a
torxal,
yaa ngi ne jàkk ci noonoo noon.

²¹ Dees maa sewal, sama xol jeex, ma
wopp;
may sàkku yërmande, awma ko;
ku ma dëfal it, gisuma ko.

²² Tooke lañu ma leel,
ma mar, ñu nàndal ma lu forox.

²³ Yal na seen ndab di seenum yeer,

seeni am-di-jàmm di seenug fiir.

²⁴ Yal na seeni gèt giim, ba dootu gis;
yal na seen ndigg récc fàww.

²⁵ Yal nanga leen yuri mbugal,
sa mer tàkk, dab leen.

²⁶ Yal na seeni dal gent,
seeni xayma wéet.

²⁷ Yaw, nga дума ba noppi, ñu toppaat ca,
nga gaañ, ñu siiwal mitit wa.

²⁸ Dencal leen tooñ ci kaw tooñ,
te yàlla buñu tàbbi ci sag njekk.

²⁹ Yal nañu leen far ca téereb dund ba,
bañ leena limaale ca aji jub ña.

³⁰ Man de, damaa jàq, tiis.

Éy Yàlla, yal naa làqoo sag wall.

³¹ Damay woy Yàlla, teral ko,
màggal ko, sant ko.

³² Mu gènal Aji Sax ji saraxu yèkk,
aki béjjenam aki wewam.

³³ Néew-ji-doole di gis, bége,
kuy sàkku Yàlla yokku fit.

³⁴ Aji Sax ji day dégg néew-ji-doole moos,
te du sàggane ñoñam ñi ñu njoñ.

³⁵ Na asamaan ak suuf màggal Yàlla,
mook géj ak lu cay yèngoo.

³⁶ Yàlla kat mooy musal Siyon,
tabaxaat dèkki Yuda yu mag yi,
ay nitam moom, dèkke.

³⁷ Askanu jaamam ñee koy jagoo,
ay soppeem a koy dèkke.

70

Yàlla, gaawe ma

¹ Mu jëm ci njiital jàngkat yi, ñeel
Daawuda, di woy wuy fàttlee.

² Yàlla, wallu ma!
Éy Aji Sax ji, gaawe ma!

³ Kuy wut sama bakkan,
yal na rus, torox ne tott.
Kuy bége sama loraange,
yal nañu ko дума, waññi ko, mu ne yàcc.

⁴ Kuy ñaawle,
yal na dellu gannaaw, torox.

⁵ Képp ku lay sàkku,
yal na bég, di la bannexoo.
Képp ku sopp sag wall,
yal na jàppoo: «Yàlla màgg na!»

⁶ Man de, néew naa doole, ñàkk naa.
Éy Yàlla, gaawe ma.
Yaw yaa may wallu, xettli ma.
Éy Aji Sax ji, bu ma yeexe.

71

Mag a ngi séentu njekku Yàlla

¹ Aji Sax ji, yaw laa làqoo,

yàlla buma rus muk.

² Xettlee ma sa njekk, yiwi ma;
ngalla teewlu ma, te wallu ma.

³ Yal nangay sama céslaay, sama rawtu
bu may rawesi saa su ne,
te nga dogal sama muc.

Yaw yaa may téye, di ma aar.

⁴ Éy sama Yàlla, musal ma ci dooley ku bon
ak ab saaysaay ak ab néeg.

⁵ Boroom bi, Aji Sax ji, yaw de laa yaakaar,
dale laa wóolu ba may ndaw.

⁶ Yaw laa wéeroo ba may juddu;
yaw yaa ma rocce sama biiru ndey.

Yaa yelloo sama cant fàww.

⁷ Firndey alkànde la ma ñu bare xoole
woon,

te yaw ngay sama rawtu bu wóor.

⁸ Samay kàddu sag cant la fees
ak di la saxoo darajaal.

⁹ Ngalla bu ma wacc, mag laa;
bu ma ba fi doole jeexe.

¹⁰ Noon yaa nga may tooge,

ñi may tèroo ngay diisoo,

¹¹ naan: «Yàlla wacc na ko,

nan ko dàq, jàpp;
kenn du ko wallu.»

¹² Éy Yàlla, bu ma sore.

Sama Yàlla, gaawe ma.

¹³ Samay seytaane,
yal nañu leen rusloo, sànk leen.

Ñi may wuta lor,

yal nañu leen gacceel, sewal leen.

¹⁴ Man may saxoo yaakaar,
di la sant, di santati.

¹⁵ May siiwal sa njekk,

di yendoo waxtaane say wall,

doonte lim ba wees na ma.

¹⁶ Boroom bi, Aji Sax ji, ma dikke la sag
njàmbaar,

di tudd sa njekk gu wéet.

¹⁷ Éy Yàlla, ba may ndaw, nga ma xamal
say kéemaan,

te ba tay jii maa ngi koy biral.

¹⁸ Éy Yàlla, bu ma bijjaawee ba weex tàll
it, bu ma wacc,

ba keroog may xamal maasu tey sa doole,
xamal ñi ciy topp ñépp sag njàmbaar.

¹⁹ Céy Yàlla, sa njekk àkki na fa kawa kaw.
Def nga lu réy.

Yaw Yàlla, ana ku mel ni yaw?

²⁰ Won nga ma ay yoon coonooki tiis,

waaye yaa may dundalaat,
ma muc xóotey suuf.

²¹ Yal nanga ma gëna sagal,
gesu, bégal ma.

²² Man it sama Yàlla, ma xalam, sant la
ngir sa kóllère.

Aji Sell ji séddoo Israyil,

dama lay woy aki xalam,

²³ sarxolle, woy la,

bége sag njot.

²⁴ May yendoo siiwal sa njekk
nde ña ma doon wuta lor
lañu rusloo, sewal leen.

72

Nu ñaanal Buur

¹ Ñeel Suleymaan.

Céy Yàlla, mayal Buur sa xelum àtte,
mayal doomu Buur bii sa xelum njekk,

² muy àttee sa mbooloo njub,

di àttee sa néew-ji-doole ñi yoon,

³ tooli tund yu mag yi indil mbooloo mi
jàmm,

tooli tund yu ndaw yi xéewale leen njekk,

⁴ Buur di àtte néew-ji-dooley xeet wi,

di wallu doomi néew-ji-doole

tey dëggaate kiy nennoo.

⁵ Yal nañu la wormaal feek jant biy am,
feek weer wiy feq, sèt ba sètaat.

⁶ Yal na Buur di xéewalu réewam nib taw
cig ruujeef,

mbaa waame wuy suuxat suuf.

⁷ Janti Buur aji jub day woomle,

te ba keroog weer wiy fey, jàmm di law,

⁸ mu yilif gééj ba gééj

ak dex ba ca cati àddina.

⁹ Waa màndiñ mi di ko sukkal,

ay noonam mēq suuf,

¹⁰ buuri Tarsis ak dun ya

di ko indil ay galag;

buuri Saba ak Seba

di ko yótsi yóbbal,

¹¹ buuroo buur di ko sujjóotal,

xeetoo xeet di ko surgawu.

¹² Mooy xettliji aji tumuránke bu woote
wall

ak aji néewle ju sēsul fenn.

¹³ Mooy yèrēm ku néewleek ku tu-
muránke,

di sàmm bakkanu aji tumuránke,

¹⁴ boole leen jot ci notaangeek loraange,
ngir fonk seen bakkan.

¹⁵ Yal na Buur gudd fan,

yal nañu ko may wurusu Saba.

Nañu koy ñaanal saa su ne,

di ko saxoo, mu barkeel.

¹⁶ Yal na pepp ne gāññ ci réew mi,

yal na gub yay jaayu ca tund ya ni gottub
Libañ;

dëkk yu mag yi sēqi nit ba law,

¹⁷ yal na turam sax,

ba law fu jant tiim,

yal na xeet yépp barkeele ci moom,

te di ko ndokkle.

18 Cant ñeel na Yàlla Aji Sax ji,
Yàllay Israyil, mi wéetooy jalooreem.
19 Cant ñeel na teddngaam, ba fàwvw,
yal na teddngaam dajal suuf sépp!
Amiin, Amiin!
20 Naani Daawuda doomu Yese jeexe fii.

73

Am Yàllaa gën

1 Muy kàddug Sabóor, giroom ci Asaf.

Yàlla kay baax na ci Israyil,
baax ci ku rafet xol.
2 Waaye man de tuuti kon ma lajj,
tuuti ma tarxiis,
3 ngir maa ñee ku bew,
ndax gis mu baaxle te di ku bon.

4 Amuñu metit,
xanaa ne faaj.
5 Doñ-doñu nit dabu leen,
coonoy doom aadama dalu leen.
6 Moo leen taxa ràngoo reewande,
làmboo coxor.
7 Dañoos suur ba gèt suulu,
seen xalaati xel xètt yoon.
8 Dañuy ñaawle, di wax lu bon,
di réy-réylu, boole ci kàdduy jaay-doole.
9 Seen ñal-ñal àkki asamaan,
làmmiñ dajal suuf.
10 Moo tax ñoñi Yàlla walbatiku ci ñoom,
di jolu seen wax nim ndox
11 te naan: «Lu ci Yàlla xam?
Ana xam-xam fa Aji Kawe ji?»
12 Ñu bon ñaa ngoog!
Ne finaax, di gëna woomle.

13 Man kay maa sellal ci neen,
di sàmm sama der.
14 Bés bu ne yar dal ma,
saa yu ma xéyee, jot mbugal.
15 Su ma noon: «Naa waxe ni ñoom,»
kon de, ma wor sa askanu mbooloo.
16 Naka laay jéema ràññee lii,
mbir mi èlëm ma.
17 Ba ma àggee sa kër gu sell ga,
laa doora gis muju ku bon.

18 Yoonu tarxiis kay, nga leen teg,
daane leen, ñu sànkú,
19 Yàquleeka leena bett!
Musibaa leen ne fuuf, ñu ne mes!
20 Day mel ni gént goo yewwoo.
Céy Boroom bi, boo xippee, jëmmu gént ga
soof la.

21 Naqar laa amoon,
sama xol di dagg.
22 Booba ngaaka laa, xawma dara;
rab laa woon fi sa kanam.
23 Teewul ma des ak yaw,

nga jàpp sama loxol ndijoor.
24 Danga maa gindee sam xel,
teg ca dalale ma sa teddnga.
25 Ana ku ma am asamaan ku la moy?
Ku ma safoo kaw suuf ku la moy?
26 Kàttan ak pexe jeex,
Yàlla di ma dooleel,
ma séddoo ko fàwvw.
27 Ku la sore kat, sànkú;
képp ku la wor, nga fàkkas.

28 Man de, jege Yàllaa ma gënal.
Boroom bi, Aji Sax ji, yaw laa def kiiraay,
ngir siiwal sa jépp jéf.

74

Yàlla, bu la noon ree

1 Muy taalifu yeete, giroom ci Asaf.

Éy Yàlla, lu tax nga wacc nu fàwvw,
di dal ak xol bu tàng
ci sa xari parlu yii?
2 Bàyyil xel askan wi nga jënd bu yàgg,
yaa jot gi giir, séddoo leen.
Bàyyil xel tundu Siyon, fa nga dëkke woon.
3 Dikkal, xool gent bu yaa bii dul jeex,
noon yàq lépp ci biir kër gu sell gi.

4 Say bañ xaacu nañ fa sa digg bérabu
ndaje ma,
somp seen raaya.
5-6 Sémmiñ dal, wàkku awu.
Mbeté ñu xàcciy sémmiñ, di gori geer,
ba lu fa doon liggéeyu yett, tas.
7 Dañoos taal sa kër gu sell,
sa dëkkuwaayu tur lañu daaneel, ba
sobeel ko.
8 Ñu namm noo not ba nu nooy,
fuy bérabu ndajem Yàlla ci réew mi, ñu
lakk.
9 Sunuy takk réer na nu,
yonent amatul,
te kenn xamul fu lii di àkki.

10 Éy Yàlla, fu reetaani noon di dakke?
Xanaa bañ yi duñu la ñàkke kersa ba
fàwvw?
11 Looy téye sa loxol ndijoor?
Na sa loxo jóge sa dënn, nga buube leen.

12 Yàlla, yaa masa doon sama buur,
di ma walloo ci digg réew mi.
13 Yaa xàjjale géj gi ci sa doole,
toj boppi ninki-nànka ya ca ndox ma,
14 yaa rajaxe kaaji rab wa,
leele ko rabi màndij ma.
15 Yaa fettaxal fii bëti ndox akum wal,
ñiisal dex yu masa wal.
16 Yaa moom bëccég, moom guddi,
teg fi weer week jant bi.
17 Yaa rédd mboolem digi suuf,

sàkk noor ak nawet.

¹⁸ Kon xoolal, Aji Sax ji, noon a ngi ree, xeeet wu amul bopp a lay sewal.

¹⁹ Bul wacce rabu àll sam xati, bul sàggane sa néew-doole yi mukk.

²⁰ Ngalla xoolal ci kóllère gi, fu làqu ci réew mi, fitna dale fa ba dajal.

²¹ Yàlla bu néew-doole ñibbaale gacce, yal na ku ñàkk ak ku néewle di la santandoo.

²² Éy Yàlla, jógal ñoŋal sa dëgg, bàyyil xel dof bi la dëkkeew sewal.

²³ Bul tanqamlu sa coowal noon yi, ñii la jógal, seenum riir a ngi jolli saa su ne.

75

Yàllaay àtte

¹ Mu jëm ci njiital jàngkat yi, dëppook galan bi ñu dippee Bul yàq, di woyu Sabóor, giiroo ci Asaf.

² Yàlla, nu sant la, santati la; nu ngi lay woo, di siiwal say jaloore.

³ Yàlla nee: «Maay takk ab àpp, àtte ca njub.

⁴ Bu suuf di yëngu mook ñi ko dëkke ñépp, maay kiy téye ay kenoom.

Selaw.

⁵ Dama ne ku réy: “Bul réy-réylu,” ne ku bon: “Bul bew,

⁶ bul bewa bew, bay waxe reewande.”»

⁷ Du penku, du sowu, te du màndiŋ ma la daraja di jóge.

⁸ Yàllaay àtte: kii mu detteel, kee mu kaweel.

⁹ Merum Aji Sax ji dib kaas ci loxoom, biiñu njafaan bu wex di ca fuur, mu jol ko képp ku bon ci àddina, mu naan ba naanaale ginjrit ga.

¹⁰ Man may biral jëfam ba fàww. Damay woy Yàllay Yanqóoba.

¹¹ Mu ne: «Jépp dooley ku bon, ma neenal; dooley ku jub yokku.»

76

Yàllaa moom xare

¹ Mu jëm ci njiital jàngkat yi, ànd aki xalam, di woyu Sabóor, giiroo ci Asaf.

² Yàlla siiw na fa Yuda, aw turam màgg fa Israyil.

³ Xaymaam a nga Salem, di xunteem ma fa Siyoŋ.

⁴ Fa la rajaxee fitt yuy boy

ak pakk ak saamar ak ngànaayal xare.

Selaw.

⁵ Yàlla yaa ne ràññ te darajawu, ba raw tundi rëbbkat yi.

⁶ Futtees nay boroom fit, ñu ne nërëm, nelaw;

kuy ñeyi xare, say yoxo nasax.

⁷ Yaw Yàllay Yanqóoba, yaa gëdd, gawar ak fasam nelaw.

⁸ Yaw mii, yaa mata ragal; boo meree, ana kuy taxaw fi sa kanam?

⁹ Fa asamaan nga biraleb àtte; suuf tiit, ne cell.

¹⁰ Ca la Yàllay jóg, ngir àtte, ba wallu kuy néew dooley àddina.

Selaw.

¹¹ Doom aadamaak xadaram rafetal sa woy; desu xadaram, nga gañoo.

¹² Seen Yàlla Aji Sax ji, digooleen ak moom te jëfe ko.

Kee jara ragal.

Na ñi ko wër ñépp yótsiy teraanga.

¹³ Mooy sàggi sagu kilifa yi, di tiitaangey buuri àddina.

77

Yàllaa ngi seetaan

¹ Mu jëm ci Yedutun, njiital jàngkat yi, di kàddug Sabóor, giiroo ci Asaf.

² Naa xaacu, woo Yàlla, sama baat fa Yàlla, ngir mu déglu ma.

³ Bëccég, ma jaq, sàkku Boroom bi; guddi, ma tàllal loxo, toqiwuma.

Sama xol tēē sedd.

⁴ Ma bàyyi Yàlla xel, binni, xalaat, xol jeex.

Selaw.

⁵ Éy Yàlla, tere nga maa gëmm bët, ma jaaxle ba waxatuma,

⁶ xanaa xalaat janti démb, at ya woon.

⁷ Guddi may fàttliku sama woy, di waxtaan ak sama ngegenaay, sama xel di jéex te naa:

⁸ «Boroom bi da may gantal ba fàww, ba du ma baaxeeti mukk a?

⁹ Xanaa daa jeexal ngor tàkk?

Am kàddoom a deñ ba fàww?

¹⁰ Moo Yàlla daa fàtte ñeewantee?

Am meram a tēj buntu yërmandeem?»

Selaw.

¹¹ Ma ne, sama naqar daal mooy Aji Kawe ji daa soppi loxoom.

¹² Waaye naa fàttliku jaloorey Ki Sax rekk, fàttliku kéemaanam ya woon.

¹³ Naa xalaat sa bépp liggéey, di jàngkat say jéf.

14 Céy Yàlla, yaa sell jikko!
Jan yàllaa màgg ni Yàlla?
15 Yaa di Yàlla juy jéfi kéemaan,
yaa siiwal sa doole ci biir xeet yi.
16 Kàttan nga jote sa mbooloo ma,
sèti Yanqóobaak Yuusufa.

17 Yàlla, ndox maa la gis,
ndox maa la gis, di lox;
xóote yaa say,
18 niir ya yuri,
kàddu riire asamaan,
say fitt, fettaxandoo,
19 nga dēnoo biir callweer,
melax yi taal àddina,
suuf di lox, di reg-regi.
20 Biir géej di saw yoon;
saw xáll ci digg ndox mu ne xéew,
te kenn gisul foo teg tánk!
21 Wommat nga sa mbooloo ni ag jur,
Musaak Aaróona jiite.

78

Nit goreedi, Yàlla gore

1 Muy taalif bu giiroo ci Asaf.

Yeen sama xeet, dégluleen, ma digal leen;
teewluleen ma, ma wax leen.

2 Maa ngi leen di léeb,
di sulli kumpay démb,

3 muy lu nu dégg, xam ko,
sunuy maam xamal nu ko.

4 Dunu ko nèbb sunuy doom,
xanaa di ko jottli maas giy nēw,
xamal leen jaloorey Aji Sax ji
ak kàttanam aki kéemaanam.

5 Bindal na sèti Yanqóoba téereb seede,
muy yoon wi mu tegal Israyil.

Mu sant maam yi, ñu xamal ko seeni doom,
6 ngir ñiy juddu èllég xam ko,
am ay doom,

ñu màgg, ba xamal ko seeni doom,

7 ngir ñu wóolu Yàlla,

baña fátte jéfi Yàlla,
di jéfey santaaneem,

8 te baña roy seeni maam;
maas gu tè woon te déggadi,
ñu ñàkk pastéef

te sàmmuñu kóllérey Yàlla.

9 Waa giirug Efrayim ñoo soxi fitt,
te kerog xare ba ñoo daw.

10 Ñoo sàmmul kóllérey Yàlla,
gàntal yoonam,

11 ba fátte ay jalooreem,
di kéemaan yi mu leen won.

12 Fa seen kanami maam la def kéemaan,
fa diiwaanu Cowan, réewum Misra.

13 Moo xar géej ga, jal ndox ma nim tata,
jalle leen.

14 Bèccég mu jiitee leen aw niir,

ak leeru sawara guddi gépp.

15 Moo xar ay doj ca màndinj ma,
mbàmbulaan wal, mu nàndal leen;

16 mu sotti ndox mu balle ciw xeer,
walal, mu safi dex.

Selaw.

17 Teewul ñu wéy di moy Aji Kawe ji,
di ko gàntal ca màndinj ma.

18 Ñoo diinjate Yàlla xol,
di xemmem ñam wu bakkane.

19 Ñuy waxal Yàlla naan:

«Xam ngeen ne Yàlla manu noo taajal
ndab ci màndinj mi!

20 Dóor naw doj, moos, ndox ma fettax,
wal ma baawaan,

waaye aw ñam nag?

Daa mana leel mbooloo mii aw yàpp?»

21 Aji Sax ji dégg ci, mer lool;

xolam tàng ci sèti Yanqóoba,
am sànj tàkkal Israyil.

22 Dañoos gēmul Yàlla,
doyloowuñu wallam.

23 Mu digal niir ya fa kaw,
ubbi bunti asamaan,

24 tawal leen mànn, ñu lekk:

peppum asamaan la leen leel;

25 mburum jàmbaar la nit lekk,
mu wàcceel leen ca lu ne gāññ.

26 Yàlla wale ngelawal penku fa asamaan,
bēmèx ak dooleem ngelawal bēj-saalum.

27 Mu tawal leenu yàpp, mu saawe ni
pënd,

di njanaaw yu ne gāññ ni feppi suufas
géej,

28 wàcce ko fa seen digg dal ba,
mu dajal seeni dēkkuwaay.

29 Mu faj seen aajo,
ñu lekk ba suur kèll.

30 Teewul bala seen xel a dal,

seen lanc jàllagul sax,

31 Yàlla mer na, dal ci seen kaw,

bóom ña èpp doole ca ñoom,
fàdd waxambaaney Israyil.

32 Loolu lépp teewul ñuy bàkkaar ba tey
te gēmuñu ay kéemaanam.

33 Mu dagg seeni fan, mu wéy ni cóolóol,
faat seen bakkani ci safaan bu gaaw.

34 Ba leen Yàlla fàddee, ña des sàkku ko,
tuub, waññiku ci mood.

35 Ñu fàttliki ne Yàllaay seen cēslaay,
xam ne Yàlla Aji Kawe jeey seen njotlaay.

36 Teewul ñu di ko jéema naxey wax,
di ko fen.

37 Joxuñu ko woon xol,
sàmmuñu kólléreem.

38 Teewul mu yèrēm,
baal leen seen ñaawtéeef,
ba sànkku leen.

Muñ na meram, muñati,
te toppul xolam,

39 ndax xalaataat ne suuxu neen lañu,

di noo gu y dem te du délsi.

⁴⁰ Gàntal nañu ko ba tàyyi ca màndiñ ma, teg ko naqar ca ndànd-fo yfo y ga.

⁴¹ Ñu dellu di diinjat Yàlla, di naqaral Aji Sell, ji séddoo Israyil.

⁴² Fàtte nañu ndimbalam la, bés ba mu leen jotee ca noon ba, ⁴³ ba def ay firndeem ca Misra, muy kiraamaam ya ca Cowan.

⁴⁴ Moo soppli deret seen yooni ndox, ba naaneetuñu wal ya.

⁴⁵ Mu wàcce seen biir ndiiraanu weñ yu leen di lekk, ak mbott yu leen sànk.

⁴⁶ Mu jox soccet yi seen gàncax, jébbal njéeréer yi seen meñneef.

⁴⁷ Seen garabi reseñ, mu fóome tawab yuur,

seen garabi sikomoor, mu fóome waame. ⁴⁸ Seen jur gu gudd, mu bàyyeek tawab yuur,

seeni gätt, mu bàyyeek sawaray melax.

⁴⁹ Yàlla sotti leen tangooru xadaram, mu dim sànj ak naqar ak njàqare, lépp di gangooru ndaw yu indiy musiba.

⁵⁰ Mu afal meram, ba musalul seen bakkan, xanaa jébbal leen mbas ma.

⁵¹ Daa fàdd képp kuy taaw ca Misra te juddoo seen digg doole, fa xaymay sèti Xam*.

⁵² Mu génne ñoñam niy gätt, wommat leen ni gétt ca màndiñ ma,

⁵³ ba yóbbu leen fu wóor te tituñu; seeni noon, géeg ga médd leen.

⁵⁴ Mu yóbbu leen fa suufam su sell sa, fa tund woowu mu jènde dooleem.

⁵⁵ Da leena dàqal ay xeet, dogal leen céru suuf,

sancal giiri Israyil ca seeni xayma.

⁵⁶ Teewul ñuy diinjat ak a gántal Yàlla Aji Kawe ji,

sàmmuñu ay dénkaaneem,

⁵⁷ xanaa dèddu, di ko wor ni seeni maam, toogadi ni xala gu yolom.

⁵⁸ Ñu di ko merlook seen bérabi jaamookaay,

di ko fiirlook seen jèmmi tuur.

⁵⁹ Ba ko Yàlla yégee, mer na, ba jéppi Israyil lool.

⁶⁰ Mu genta dèkkuwaayam ba ca Silo, xaymaam ba mu sampoon ca doom aadama ya.

⁶¹ Mu jébbal ngallo màndargam dooleem†, may gànjarum ca loxol noon ba.

⁶² Daa bàyyee ñoñam saamaru noon, ndax mere yooya séddoom.

⁶³ Seeni waxambaane deeye xare, seeni janq lamb;

⁶⁴ seeni sarxalkat loroo saamar, te jètun jooyul.

⁶⁵ Ca la Boroom bi yewwu ni ku doon nelaw,

mel ni jàmbaar ju biiñ xabtal.

⁶⁶ Mu dóor noon ba yari gannaaw,

teg leen gacce gu dul fey,

⁶⁷ ba noppi xalab waa kër Yuusufa,

te tànnul giirug Efrayim,

⁶⁸ xanaa tànn giirug Yuda,

taamu tundu Siyoñ wi mu sopp.

⁶⁹ Mu tabax kèram gu sell, na mu mel fa kawa kaw,

dègër ni suuf, si mu samp ba fàww.

⁷⁰ Mu teg ca tabb Daawuda, jaamam ba,

jèle ko ca gétti xar ya,

⁷¹ fa mu doon topptoo jur ga;

mu sàmmal ko waa kër Yanqóoba,

askanu Israyil wi mu séddoo.

⁷² Daawuda sàmme leen xol bu mucc ayib, jiitee leen manoooreem.

79

Yàlla, feyul nu

¹ Muy kàddug Sabóor, giiroo ci Asaf.

Céy Yàlla, yéefar yi song nañu sa moomeel,

teddadil nañ sa kër gu sell,

gental nañ Yerusalem.

² Leel nañ tan yi sa néewi jaam ñi, leel nañ rabi àll yi sa suuxi wóllère yii.

³ Ñu tuur seen deret nim ndox,

ba Yerusalem daj,

te amul kuy rob néew yi.

⁴ Noo ngi nii di mbalitu dèkkandoo yi; ñu séqe nu ay kókkaleeki kekku.

⁵ Aji Sax ji, xanaa doo nu mere ba fàww, sa fiiraange ni sawara ci sunu kaw?

⁶ Sippil sa mer yéefar yi la xamul, ak réew yi wormaalul sa tur.

⁷ Noo sèxétoo giirug Yanqóoba, genta dèkkuwaayam.

⁸ Bul nu topp ñaawtéef ya woon, ngalla gaaw noo gatandoo sa yèrmande.

Danu ne dàll, ba ne dett.

⁹ Éy Yàlla, yaa nuy musal, wallu nu, ba sa seede rafet.

Xettli nu te baal nu sunuy bàkkaar, ba sa woy rafet.

¹⁰ Bul tax yéefar yi naa:

«Ana seen Yàlla?»

May nu, nu gis ni ngay mbugale yéefar yi,

* 78:51 78.51 sèti Xam mooy Misra ba tey. † 78:61 78.61 màndargam dooleem ji ñu wax fi mooy gaal gi àlluwu kóllérey Yàlla dence.

feye leen sa deretu jaam yi tuuru.

¹¹ Ñi ñu jàpp, yal na seeni onk àkki fa yaw.
Ñi ci tànkí ndee, yal nanga leen musale sa
doole ju màgg.

¹² Boroom bi, sewal gi la sunuy dëkk sewal,
këpp leen ko juróom yaari yoon,

¹³ te nun ñiy sa mbooloo, di sa gétt gi ngay
foral,

nu di la sant ba fàww,
di biral sa ngèrèm sèt ba sètaat.

80

Yàlla, suqlil sa njëmbat

¹ Mu jëm ci njiital jàngkat yi, dëppook
galan bu ñuy wax Tóor-tóor yi, di seede
Sabóor, giiróo ci Asaf.

² Éy yaw, Sàmму Israyil, teewlu nu;
yaw mi jiite Yuusufa ni ag jur,
yaw mi toogandook malaakay serub yi,
feqal sag leer.

³ Dawalal sa njambaar, ñeel Efrayim ak
Beñamin ak Manase,
te wallusi nu.

⁴ Éy Yàlla, suqli nu;
geesoo nu sa leeru kanam, nu raw.

⁵ Éy Aji Sax ji, Yàlla Boroom gàngoor yi,
foo àppal sa mer,
mi ngay wuyoo sa ñaanu mbooloo mi?

⁶ Leel nga nuw naqar,
nàndal nu mbàndum rongoon,

⁷ def nga dëkkandoo di nu xëccoo,
noon di nu ree.

⁸ Éy Yàlla Boroom gàngoor yi, suqli nu;
geesoo nu sa leeru kanam, nu raw.

⁹ Yaa déjjatee reseñ Misra,
dàq yéefar yi, indi, jëmbataat.

¹⁰ Nga wéex ko,
mu sampu, law, dajal réew mi;

¹¹ keppaaram muur tund yi,
ay caram sàng garabi seedar yu mag yi.

¹² Mu tàllal ay bànqaasam ba gééj,
lawal njebbit la ba dex ga.

¹³ Lu tax nga bètt ay miiram,
ba ku fa jaare witt ca,

¹⁴ mbaam àll di ko ruur,
ndundati àll di ca for?

¹⁵ Éy Yàlla Boroom gàngoor yi, geesul;
séentool asamaan, ba gis
te taxawusi reseñ jii.

¹⁶ Taxawusil njëmbat lii nga jëmbate sa
ndijoor,
ngarab sii nga dooleelal sa bopp.

¹⁷ Dees koo gor, taal;
yal na ñii sànkoo sa mbugal.

¹⁸ Yal nanga yiir ki nga tànn,

kii nga dooleelal sa bopp,

¹⁹ ba dootunu la dëddu.
May nu nu dund, nu wormaal sa tur.

²⁰ Éy Aji Sax ji, Yàlla Boroom gàngoor yi,
suqli nu,
geesoo nu sa leeru kanam, nu raw.

81

Déggal Yàlla, jariñu

¹ Mu jëm ci njiital jàngkat yi, giiróo ci Asaf,
te ànd ak xalam gu ñuy wax gitiit.

² Sarxolleleen ci Yàlla, mi nuy dooleel;
xaaculeen ci Yàllay Yanqóoba.

³ Yékkatileen woy te jiin,
xalam neex, ànd ak moroom ma.

⁴ Wal-leen liit gi ci Terutel weer wi,
ak weer wu birale bésu màggal.

⁵ Loolu wartéefu Israyil la,
di ndigalu Yàllay Yanqóoba,
⁶ di ndénkaane lu mu dénk waa kër
Yuusufa,

ba Yàllay dali ca kaw réewum Misra.
Baat bu ma xamul laa dégg, mu naan:

⁷ «Sippi naa leen,
woyofal seeni yoxo.

⁸ Ngeen jàq, woo ma, ma xettli leen,
wuyoo leen fa kiiraayal dënn ya,
te maa leen nattoo fa wal ma ca Meriba.

Selaw.

⁹ Yeen sama ñoon, dégluleen, ma dénk leen.

Éy Israyil, su ngeen ma déglu woon!

¹⁰ Buleen fat tuuru jaambur,
buleen sujjóotal tuuru doxandéem.

¹¹ Man, Aji Sax ji, maay seen Yàlla
ji leen yékkatee réewum Misra.

Ñaleen njafeet, ma reggal leen.

¹² «Waaye sama ñoon déggaluñu ma,
Israyil gi nangulu ma.

¹³ Moo tax ma bërgël leen ak seenug të,
ñuy wéye seeni pexe.

¹⁴ Éy su ma sama ñoon déggaloon,
éy su Israyil toppoon samay nammeel!

¹⁵ Ci saa si laay torxal seeni noon,
duma seeni bañ,

¹⁶ ba ku bañ Aji Sax ji di ko raamal,
te àppam du jeex ba fàww.

¹⁷ Kon yeen, ma leel leen ngèn-gi-pepp,
reggal leen lem ju doj xelli.»

82

Yàllaay àtte ndawi péncam

¹ Muy kàddug Sabóor, giiróo ci Asaf.

Yàlla toog na, di jiite ndajem boppam,
di àtte ndawi péncam, naan:

² «Dungeen bàyyi àtteb njublan,
ak di faral ku bon?

Selaw.

³ Sàmmléen àqu néew-ji-dooleek jirim,

tey àtte yoon ku ñàkk ak ku ndóol.

⁴ Walluleen néew-ji-dooleek walaakaana, di leen xettli ci ku bon.

⁵ «Ndawi péncum Yàlla yii xamuñu, dégguñu;

xanaa di doxe lëndëmu ñaawtéef, ba kenuy suuf yépp di jaayu.

⁶ «Dama ne ay yàlla ngeen, yeen ñépp di njabootu Aji Kawe ji.

⁷ Waaye du leen tee dee ni doom aadama, du leen tee daanu ni képp kuy njiit.»

⁸ Ngalla Yàlla, taxawal, àtte àddina, yaw yaa séddoo xeetoo xeet.

83

Yàlla, mbugalal noon yi

¹ Di yoyu Sabóor, giiroo ci Asaf.

Éy Yàlla, bul ne cell,

² rikk Yàlla, bul tanqamlu, ne patt.

³ Xoolal sa noon yiy riir, sa bañ yi fippu ba téen!

⁴ Sa ñoñ lañuy rabatal, di mànkool sa séddoo yii.

⁵ Ñu ne: «Aycu na far seen xeet wi, ba deesul fàttlikooti turu Israyil.»

⁶ Dañoò mànkoo kat, te yaw lañu takktool:

⁷ muy néegi Edom ak Ismayla, néegi Mowab ak Agar,

⁸ néegi Gebal, Amon ak Amaleg ak waa Filisteeek waa Tir;

⁹ réewum Asiri it fekki leen, di dooleel askanu Lóot wa.

Selaw.

¹⁰ Def leen na nga defoon waa Majan, def ko Sisera ak Yabin ca dexu Kison*.

¹¹ Ña nga sànkoo Endor, ba doon ub tos fi kaw suuf.

¹² Defal seeni njiit na Oreb ak Seeb, def seen kilifa yépp ni Seba ak Salmuna,

¹³ ña ne woon: «Nan séddoo parluy Yàlla yi.»

¹⁴ Éy Yàlla, wéndeel leen ni callweer, ñu mel ni boob mu ngelaw wal.

¹⁵ Éy Yàlla, ni daay di xoyome àll, sawara wa jafal tund ya,

¹⁶ yal nanga leen ni toppeek sa dooley ngelaw,

tiitale leen sa ngélën.

¹⁷ Aji Sax ji, sélëm leen gacce, ba ñu sàkku la.

¹⁸ Yal nañu rus, jàq ba fàww.

Yal nañu torox, sàнку.

¹⁹ Yal nañu xam ne yaw mi tudd Aji Sax ji donj

yaay Aji Kawe ji yilif àddina yépp.

84

Ku dal ak Yàlla bég

¹ Mu jëm ci njiital jàngkat yi, ànd ak xalam gu ñuy wax gitiit, ñeel askanu Kore wu góor.

² Aji Sax ji Boroom gàngoor yi, yaaka sopplub dëkkuwaay!

³ Damaa namm èttub Aji Sax ji, di ko gelu ba jeex tàkk, jëmm jeek xol bi, di xaacul Yàlla jiy dund.

⁴ Éy Aji Sax ji Boroom gàngoor yi, sama buur, sama Yàlla, sawoor sax tag, nga fat ko, mbelaar it sàkk tàggam, denc ay cuujam fa sa sarxalukaay.

⁵ Ndokkee ku dëkke sa kër, di la màggalati.

Selaw.

⁶ Ndokkee ku lay doolewoo, te namma topp njool ma jëm sa kër.

⁷ Buy jàll xuru Jooyoo, mu saf ko bëti ndox, céebo sànge xur wa barke, ⁸ muy gëna am doole, ba teewi fa Yàlla ca Siyonj.

⁹ Éy Yàlla Aji Sax ji Boroom gàngoor yi, déglul, ma ñaan la! Yállay Yanqóoba, teewlu ma.

Selaw.

¹⁰ Éy Yàlla, geesul Buur, sunu kiirilaay, ngalla niiral kii nga fal.

¹¹ Benn fan ci sab ètt de moo dàq junniiy fan feneen. Sama taxawaayu bunt kër Yàlla moo ma gënal tēraayu biir xaymab ku bon.

¹² Aji Sax ji Yàllaa mat jant, mat kiiraay; yiw ak daraja, Aji Sax ji joxe; te du ngëneel lu muy bañal ku mat.

¹³ Éy Aji Sax ji Boroom gàngoor yi, ndokkee ku la wóolu.

85

Aji Sax ji, suqleeti nu

¹ Mu jëm ci njiital jàngkat yi, di kàddug Sabóor, ñeel askanu Kore wu góor.

² Éy Aji Sax ji, yaa baaxe woon sa réew mi, ba suqli sèti Yanqóoba yi,

³ baal sa mbooloo seeni ñaawtéef, jéggal leen bépp bàkkaar.

* 83:10 83.10 Seetal ci Njiit ya 7—8.

4 Ba nga xadar ja,
muñ mer ma.

5 Éy Yàlla mi nuy musal, suqli nu,
te meddi.

6 Xanaa doo nu mere fàww,
ba ca sèt yaak sètaat ya?

7 Xanaa dinga leqli sa mbooloo,
ba ñu man laa bânneexoo?

8 Éy Aji Sax ji, won nu sa ngor,
baaxe nu sag wall.

9 Woykat ba nee: «Naa déglu
lu Aji Sax ji Yàlla di wax.»
Jàmm lay wax wóllèereem ñuy ñoñam,
ba duñu dellu ci jéfi dof.

10 Wallam aka jege ñi ko ragal,
te leeram dëgmál sunu réew mii!

11 Ngor ak kóllèreee daje,
njekk ak jámm saafonte,

12 kóllèreee jebbee fa suuf,
njekk séentoo asamaan,

13 Aji Sax ji it maye ngéneel,
sunu suuf meññal,

14 njekk jiitu Aji Sax ji,
di ko xállal yoonam.

86

Ma ñaan, bésub njàqare

1 Mu di ñaanu Daawuda.

Éy Aji Sax ji, teewlu ma, nangul ma,
damaa ñàkk, néew doole.

2 Maa gore, musal ma;
maay sa jaam bi la wóolu,
yaw, sama Yàlla, wallu ma.

3 Éy Boroom bi, baaxe ma;
yaw laay yendoo woo wall.

4 Boroom bi, bânneexalal sab jaam,
yaw laa dékk sama xol.

5 Boroom bi, yaa baax, di bale,
di nàddil sa ngor képp ku lay sàkku.

6 Éy Aji Sax ji, teewlul, ma ñaan la;
déglul, ma tinu la.

7 Bu ma la wooyee bésub njàqare,
yaa may nangul.

8 Boroom bi, doo moroomu tuur yi,
te jéf melul ni sa jos.

9 Boroom bi, mboollem xeet yi nga sàkk
ñoo lay sujjóotalsi,
di màggal sa tur.

10 Yaa màgg te yéemey jéf,
yaw donj yaa di Yàlla.

11 Éy Aji Sax ji, won ma sa nammeel,
ma doxe sa worma.

Tënkál sama xol ci ragal la.

12 Boroom bi sama Yàlla,
naa la sante xol bu fees,
màggal la ba fàww.

Selaw. 13 Ngor lu réy nga ma won,
sorele maak téraayu bàmmeel.

14 Éy Yàlla, nit ñu bew a ma jógal,
def gàngoor gu néeg, di rëbb sama
bakkán,
te seetuñu la ci.

15 Waaye yaw Boroom bi Yàlla, yaa
ñeewante, yèrëm,
yaa muñ mer, bare ngor ak worma.

16 Geesu ma, baaxe ma.

Dooleelal sab jaam,
wallul ki sa jaam sukk jur!

17 Ngalla def ma sa firnde y mbaax,
ba bañ yi gis ci, rus,
ndax yaw Aji Sax, ji ma dimbali, défal ma.

87

Siyon, yaay ndeyu xeet yi

1 Ñeel askanu Kore wu góor, di woyu
Sabóor.

Dëkkub Aji Sax ji, kenu yaa nga ca tund yu
sell ya.

2 Aji Sax jee sopp bunti Siyon gii,
mu génal ko fu askanu Yanqóoba dëkke.

3 Yaw, dëkkub Yàlla bi,
tuddees na say jaloore.

Selaw.

4 Yàlla nee: «Ma limaale Misraak Babilon,
ñi ma xam di dégg.

Xoolal Filisti ak Tir, ak réewum Kuus.
Nit a ngii, juddoo fa,»

5 te teewul ñu cosaanale ko Siyon,
ne kii ak kee fa bokk juddoo,

te Aji Kawe jee saxal Siyon.

6 Aji Sax jeey lim xeet yi, limaale leen
ne: «Kii fi la juddoo.»

Selaw.

7 Kuy fecc ak kuy woy ànd naan:
«Sunu cosaanoo cosaan fii la!»

88

Ma jàq, jooy

1 Muy woy Sabóor, ñeel askanu Kore wu
góor, jëm ci njiital jàngkat yi, dëppook
galan bu ñuy wax Maalat Leyanot, di
taalifu Eman, mi bokk ci giirug Esra.

2 Éy Aji Sax ji, Yàlla ji may musal,
béccég ma yuuxu,

guddi ma yuuxu fi sa kanam.

3 Yal na sama ñaan àgg fa yaw;
teewlul, ma woote wall.

4 Damaa suur kèll ay musiba,
ba soreetuma njaniiw,

5 ñu sóoraale maak ñi wàcci biir
bàmmeel.

Ma mel ni jàmbaar ju kenn amatul
yaakaar,

6 bokk ci néew, yi dara waratul,

mbaa ku ñu bóom, mu tëdd cim pax,
faaleetoo ko, xanaa dagg ko, wacc.

⁷ Tàbbal nga ma kàmb gu xóot,
biir xóotey lëndëm.

⁸ Yen nga ma sa xadar,
tance ma sa gannax yépp.

Selaw.

⁹ Dàqal nga may xame,
tax nga ñu seexlu ma;
ma tëju, génnatuma.

¹⁰ Samay gèt a ngi giim ndax naqar.

Éy Aji Sax ji, maa ngi lay woo bés bu ne,
dékk lay loxo.

¹¹ Ku dee, lu muy doyeeti say kéemaan?
Ndax néew dina jóg di la màggal?

Selaw.

¹² Dees na siiwal sa ngor biir bàmmeeel,
mbaa sa worma ci paxum sànkute?

¹³ Ana kuy yég say kéemaan ci googu
lëndëm?

Ku lay seedeel njekk réew ma fàtte faloo?

¹⁴ Aji Sax ji, man, yaw lay woo wall,
xéy, kare la gii ñaan, ne la:

¹⁵ Éy Aji Sax ji, loo may gântale,
di ma fuuylu?

¹⁶ Mitit bay laatikaaf, sama ngone ba tey;
sa mbugal yu raglu, ba bopp ubu ràpp!

¹⁷ Sa mer mëdd ma,
sa mbugal yu raglu sànk ma,

¹⁸ mëdd ma nim ndox bés bu ne,
gëndoo fi sama kaw.

¹⁹ Dàqal nga ma soppeek xarit,
ma far xejjoo lëndëm.

89

Aji Sax ji, loo dige woon?

¹ Muy taalif bu ñeel Etan mi bokk ci giirug
Esra.

² Aji Sax ji laay woye ngoram, ba fàww,
di biral wormaam sèt ba sètaat.

³ Dama ne, sa ngor dàkk la sax,
fa asamaan nga dèel sa worma.

⁴ Aji Sax ji nee: «Damaa fas kólléreek ki
ma tànn,

muy Daawuda sama jaam bi ma giñal ne
ko:

⁵ «Damay saxal sa askan ba fàww,
samp sab jal sèt ba sètaat.»»

Selaw.

⁶ Aji Sax ji, waa asamaan a ngi lay sante
say jaloore,

ndajem ñu sell ña di la joobee sa worma.

⁷ Ana kuy dab-dabal Aji Sax ji, fa kawa
kaw?

Ana ci goney Yàlla yi ku nirook Aji Sax ji,

⁸ Yàlla, ji ñu terala teral ci jataayu ñu sell
ñi,

te mu géna raglu lu ko wër?

⁹ Yàlla, Aji Sax ji Boroom gàngoor yi,
Ki Sax, ana ku tollook yaw doole?

Yaw mi worma féete fu ne!

¹⁰ Yaw yaa man géej gu sàmbaraax;
gannax ya fuddu, nga dalal.

¹¹ Yaa fàdd Raxab*, bóom ko,
tasaare say noon ci sa doole.

¹² Yaa moom asamaan, yaa moom suuf.

Àddinaak li ci biiram, yaa ko taxawal.

¹³ Běj-gànnaar ak běj-saalum, yaa ko
sàkk.

Tabor ak Ermon, tund ya, di sarxollee sa
tur.

¹⁴ Yaa àttan, jàmbaare;
sa loxo di dooley neen,

sa ndijoor ca kaw!

¹⁵ Njekk ak njub a lal sab jal,
ngor ak worma dox jiitu la.

¹⁶ Aji Sax ji, ndokklee mbooloo mu la xal
di sarxollee,

di niitoo saw yiw,

¹⁷ ànd di la bége bés bu ne,
sag njekk siggil leen.

¹⁸ Seen darajay doole, yaw a.

Boo nu baaxee, nu yokku kàttan.

¹⁹ Sunu kiirilaay lii, Aji Sax jeey boroom;
sunu buur bii, Aji Sell ji séddoo Israyil ay
boroom.

²⁰ Wax nga say wóllère ci peeñu,
ne leen: «Tànnè naa jàmbaar ci xeet wi,
dénk ko ndimbal.

²¹ Gis naa sama jaam Daawuda,

fale ko sama diw gu sell,

²² ànd ak moom, saxal ko,

di ko dooleel.

²³ Noon du ko bett,

ku bon du ko torxal.

²⁴ Ay bañam, ma rajaxe;

ay noonam, ma fàdd,

²⁵ sama wormaak sama ngor di ko gunge,

may yokk kàttanam.

²⁶ Géej, ma teg ci loxoom,

dex, ma ne ca tegg ndijooram.

²⁷ Moo ma naa: “Yaay sama baay,
di sama Yàlla, di sama wéeru-mucc.”

²⁸ Te it maa koy def samab taaw,

tiimale ko buuri àddina,

²⁹ sàmmal ko sama ngor ba fàww,

feddlil ko sama kóllère.

³⁰ Damay saxal askanam ba fàww,

yàggal ab jalam ni asamaan.

³¹ Bu ay sètam wàccee sama yoon,

baña doxe samay ndigal,

³² mbaa ñu xétt sama dogali yoon,

* 89:11 89.11 Raxab: mbaa ninki-nànka ba tey.

baña sàmmonteek samay santaane,
³³ ma bantale leen seenug moy,
 dumaa leen seen ñaawtéef.

³⁴ Waaye duma ko daggal sama ngor,
 te duma ko ñàkke worma.

³⁵ Duma fecci sama kóllère,
 te duma toxal sama kàddu.

³⁶ Benn yoon laa ko giñ ci sama sellnga,
 duma fen Daawuda:

³⁷ askanam, dàkk;
 ab jalam fi sama kanam ni jant bi,

³⁸ ak weer wi sax ba fàww,
 dib seede bu wér ca niir ya.»

Selaw.

³⁹ Ndaxam yaw Yàlla, jéppi nga ki nga fal,
 mere ko, wacc ko.

⁴⁰ Fecci nga sa kóllèreek sab jaam,
 foq nguuram, detteel ko.

⁴¹ Bètt nga miiram yépp,
 saam ay tataam,

⁴² ku fa jaare, jël ca alalam,
 mu doon mbalitu dèkkandoo yi.

⁴³ Yékkati ngay bañam,
 noonam yépp di ree.

⁴⁴ Dayal nga saamaram,
 te taxawuwloo ko cib xare.

⁴⁵ Xañ nga ko darajaam,
 rattax ngànguneem fa suuf.

⁴⁶ Dagg nga fani ngoneem,
 sang ko gacce.

Selaw.

⁴⁷ Éy Aji Sax ji, xanaa lii du jeex?
 Xanaa doo làqu fàww nii,
 sa mer di boy?

⁴⁸ Bàyyi ma xel, samay fan yàggul.
 Xanaa du neen a tax nga sàkk mboolem
 doom aadama?

⁴⁹ Ana kuy dund te du dee?
 Ku mana récc téraayu bàmmeel?

Selaw.

⁵⁰ Boroom bi, ana sa ngor la nga daan jéfe
 te nga giñale woon ko Daawuda ci sa
 worma?

⁵¹ Boroom bi, bàyyil xel ci sa gacceg jaam
 ñi,

ak xeet yu bare yi ma yenu yépp.

⁵² Aji Sax ji, say noon a ngi sewal
 buur bi nga fal, ne ko dann.

⁵³ Cant ñeel na Aji Sax ji ba fàww.
 Amiin, amiin.

90

Doom aadama yàggul

¹ Muy ñaanu Musaa, góorug Yàlla ga.

Boroom bi, yaa nu masa fat
 maasoo maas.

² Bala tund yee juddu,
 bala ngay sos suuf ak àddina,

yaa mas di Yàlla, ba fàww.

³ Yaay delloo doom aadama ci pënd,
 ne ko: «Yaw, doom aadama, dellul!»

⁴ Junniy at ci yaw
 daa gaaw ni démb ak tey,
 mbete waxtu yu néew ci wattub guddi.

⁵ Yaay buub nit, nelawal ko.

Suba mu jebbi nim ñax,

⁶ xëy, jebbi, naat;
 ngoon mu lax, wowal.

⁷ Soo meree kay, nu sànkú,
 nga xadaru, nu jàq.

⁸ Sunuy ñaawtéef a ngi janook yaw,
 te sunu mbóot leer na la.

⁹ Sunu giiru dund nga di nu mere,
 sunuy fan jeex ni noo guy naaw.

¹⁰ Sunu appu dund di juróom ñaar fukki
 at,

ku dègër ba dègër, juróom ñett fukk;
 li ci èpp di coonooku tiis,
 ne fëyy, nu wéy.

¹¹ Ana ku xam sa dooley mer
 ak sa xadar ju raglu?

¹² Yal nanga nu xiir ci lim sunuy fan,
 ba nu mana dawal xel mu rafet.

¹³ Aji Sax ji, délsil, loo deeti xaar?
 Ngalla yërëmal sa jaam ñi.

¹⁴ Nu xëy, nga reggal nu sa ngor,
 nuy sarxolle, bannexoo ko sunu giiru
 dund.

¹⁵ Bannexal nu limu fan yi nga nu mbu-
 gal,

diirub ati tiis yi nu dund.

¹⁶ Yal na sa jaloore leer sa jaam ñi,
 sa daraja leer seeni doom.

¹⁷ Boroom bi sunu Yàlla, ngalla baaxe nu.
 Sottalal nu sunuy liggéey,
 rikk, sottalal nu sunuy liggéey.

91

Aji Sax jee mat kaaraange

¹ Ku dèkke kiiraayu Aji Kawe ji
 yaa këroo keppaaru Aji Man ji.

² Dama naa Aji Sax ji:
 «Yaw laay làqoo, di la fegoo;
 ngay sama Yàlla ji ma doyloo.»

³ Kii kay moo lay musal cig fiir
 ak loraangey mbas.

⁴ Kiiraayam la lay sänge,
 nga yiiru, làqu;

wormaam yéew la, di la aar.

⁵ Doo ragal njàqarey guddi
 mbaa fittu béccëg

⁶ mbaa mbas mu yootej lëndëm,
 ak balaa buy fàdde njolloor.

⁷ Junni daanu fi sa wet,
 fukki junni (10 000) daanu fi sa ndijoor,
 du tax mu jege la.

⁸ Say gët nga ciy teg,
 di seetaan ku bon di jot yoolam.

9 Yaw mi màkkaanoo Aji Sax ji,
Aji Kawe jii di sama rawtu,
10 genn loraange du la dab,
balaa du jege sa xayma.
11 Ay malaakaam la lay booleel,
ñu di la sàmm foo jëm.
12 Seeni loxo lañu lay leewoo,
ba doo fakkastalooow doj.
13 Dangay falaxe jaan ak gaynde,
di rajaxe ñàngóor ak sibi.

14 Yàlla da naa: «Kii de man la safoo,
ma di ko xettli.
Man la xam, te maa koy teg fu wóor.
15 Mu woo ma, ma wuyu ko;
mook man ci biir njàqare,
ma xettli ko, darajaal ko,
16 reggal koy fan,
baaxe ko samag wall.»

92

Nu woy bésob Noflaay

1 Muy woyu Sabóor ngir bésob Noflaay.
2 Céy ngéneel li ci sant Aji Sax ji,
di la woy, yaw Aji Kawe ji,
3 xéye tudd sa ngor,
gonloo xamle sa worma,
4 xalamu fukki buum ànd ak moroom ma,
xeetu kooraa jibandoo.
5 Aji Sax ji, yaa ma bégale say jaloore,
may sarxolle ci say manoore.
6 Aji Sax ji, yaa réyi jëf;
xóoti pexe.
7 Ku ñàkk xel réere ko,
ku dofe umple ko.
8 Bu ku bon séqlee nim ñax,
képp kuy def lu bon di yokkule,
dañoò nara sànkú ba fàww rekk.

9 Waaye yaw ma fa kaw,
yaay Aji Sax ji ba fàww.

10 Aji Sax ji, sa noon yi kay, ndeke yoo;
ndeke yoo sa noon yi, sànkú rekk;
defkati mbon ñépp, fèlxxoo rekk.
11 May nga ma dooley nagu àll,
ma diwoo diw gu bees.
12 Maa gis jéllu noon yi,
dégg yuuxi ñu bon ñi may tëru.
13 Ku jub day naat nig tándarma,
màgg ni seedaru Libañ
14 gu ñu jëmbat biir kër Aji Sax ji,
muy naate sunu biir èttu Yàlla;
15 bu màggatee sax di meññ,
tooy xépp, séq lipp,
16 di biral njubtey Aji Sax ji,
sama césllaay ji dencul njubadi.

93

Ma bàkk Aji Sax ji

1 Aji Sax jeey buur, soloo daraja;
Aji Sax jee solu, gañoò doole:
àddinaa ngii, dèju te raful.
2 Sab jal a masa sax,
te yaa masa nekk.
3 Aji Sax ji, géej a riir,
géej a àddu, mu riir,
gannax ya rëkk, mu riir.
4 Waaye riirum wal mu walangaanoo,
ak géej gu sàmbaraaxoo,
Aji Sax ja fa kaw a rawati!
5 Say sàntaanee wér te wóor;
Aji Sax ji, sellnga la sa kër jagoo
bésob bés.

94

Yàllaay mbugal ku bon

1 Éy Aji Sax ji Yàlla, boroom mbugal!
Boroom mbugal, feqal sag leer!
2 Yaw miy àtte àddina, jógal
yool ku bew.
3 Aji Sax ji, fu ku bon kiy àkki?
Fu ku bon kiy kañu àkki?
4 Ñu ngi làmmiñoo reewande,
képp kuy def lu bon di damu.
5 Aji Sax ji, say ñoñ lañuy dèggaate;
say séddoo lañuy néewal.
6 Jëtun akub doxandéem, ñu faat;
ab jirim, ñu bóom,
7 te naa: «Ki Sax gisu ci,
Yállay Yanqóoba jii yégu ko.»
8 Yeen bokk yu dofe yi, moytuleen.
Gàtt xel yi, kañ ngeen di muus?
9 Ki jëmbati nopp, da dul dégg a?
Am ki xari gët, da dul gis?
10 Kiy yar yéefar yi, da dul mbugalee?
Du mooy kiy xamal nit?
11 Aji Sax ji xam na xalaatu nit,
xam ne cóoloolu neen la.

12 Ki Sax, ndokklee ki ngay yar,
tàggat ko ci saw yoon,
13 dèfal ko ci bési safaan,
ba keroog ñuy gasal ku bon.
14 Boroom bi kat du wacc ñoñam mukk,
du bàyyi ay séddoom.
15 Àtte dina dellu laloo njekk,
képp ku jub topp ca.
16 Ana ku may taxawal ci ñu bon ñi?
Ku may jógal ci biir ñiy def lu bon?
17 Su ma Aji Sax ji walluwlloon,
tuuti ma fanaani réew ma ne selaw.
18 Dama noon: «Tarxiis naa!»
Waaye yaa ma awoo sa ngor.
19 Ma bare xalaati xol,
nga dèfal ma, ma bég.
20 Loo séq ak njiit lu jubadi
luy yoonal njubadi?
21 Ñii dañoò mànkoo, di tëru ku jub,
di teg àtteb dee ku deful dara.

22 Waaye Aji Sax jeey sama rawtu, sama Yàlla laay sès, làqu.
 23 Moo leen di këpp seen ñaawtéef, sàнке leen seenug mbon. Sunu Yàlla Aji Sax jee leen di sànk.

95

Kaayleen, nu sant

1 Kaayleen, nu sarxolleel Aji Sax ji, nu xaacul ki nuy sès, mucc.
 2 Nanu ko dikke cant, woyal ko, mu riir.
 3 Aji Sax jeey Yàlla ju màgg ji, buur bu mag bi tiim yàllay xeet yépp.
 4 Moo moom xóotey suuf, moom colli tund yi,
 5 moom géej, sàkk ko, moom jéeri ji mu mooñ.
 6 Nan ségg, sujjóot, sukkal Aji Sax ji nu sàkk.
 7 Mooy sunu Yàlla, nuy xeet wi muy foral, diy gàtt ciy loxoom.

Bésub tey yal nangeen dégg kàddoom
 8 ga mu noon: «Buleen tẽ, na woon fa Meriba, jantub keroog fa Maasa, ca màndin ma,
 9 fa ma seeni maam doon nattoo, di ma seetlu te gis la ma def*.
 10 Neent fukki at laa jéppi googu maas, ma ne: “Xeet wu ñàkk wormaa ngi, te faaleedi samay santaane.”
 11 Moo ma taxa mer, ba giñal leen, ne duñu tàbbi fa sama noflaay.»

96

Buur Yàllaa ngi àttesi àddina

1 Woyleen Aji Sax ji woy wu yees, te àddina yépp woy Aji Sax ji.
 2 Woyleen Aji Sax ji, màggal turam, di yéene bés ak bés ne mooy musle.
 3 Siwal-leen tedngaam fi biir xeet yi, xamal waasoo waaso ay jalooreem.
 4 Aji Sax jee màgg, jara santa sant te gëna mata ragal lépp lu ñuy jaamu.
 5 Mboolem yàlla yi xeet yiy jaamu, yàllantu la, waaye Aji Sax jee sàkk asamaan.
 6 Màggaay ak daraja, fa moom, dooleek taar, fa këram gu sell.
 7 Yeen làngi xeet yi, seedeel-leen Aji Sax ji, seedeel-leen Aji Sax ji tedngaak doole.
 8 Seedeel-leen Aji Sax ji tedngay turam, yékkatil kob sarax, duggaale éttam.
 9 Sujjóotal-leen Aji Sax ji làmboo sellnga, te àddina wërngal këpp di ko loxal.
 10 Neleen xeet yi Aji Sax jeey buur:

àddinaa ngii, dëju te raful.
 Mooy àtte xeet yi njub.
 11 Asamaanoo, bégal! Suufoo, bannexul! Géejoo, riiral yaak li la fees,
 12 te mbooy mi di jaayu, mook lu ci biiram, garabi àll bi sarxolleendoo,
 13 gatandoo ko Aji Sax jiy dikk, àttesi àddina, di àtte dun bi njekk, tey àttee xeet yépp déggam.

97

Nguurug Aji Sax ji njekk la

1 Aji Sax jeey Buur, na àddina bég; dunoo dun bannexu.
 2 Ay xambaar a ko yéew, njekk ak njub lal ab jalam.
 3 Sawaraa dox, jiitu ko, di xoyomi noonam wetoo wet,
 4 ay melaxam leeral àddina, waa àddina gis, di pat-pati;
 5 tund yi ne soyox seey fi kanam Aji Sax ji boroom àddina sépp.
 6 Asamaan a ngi biral njekkam, xeetoo xeet di gis darajaam.
 7 Gàcce ñeel na kuy jaamu jëmme tuur, di puukarewoo ay yàllantu.
 Yeen yàllay xeet yépp, sujjóotal-leen kii,
 8 Siyon dégg ca, bég, waa Yuda it di bannexoo àttey Aji Sax jii.
 9 Aji Sax ji, Aji Kawe ji tiim suuf sépp; yaaka màgga màgg, ba sut tuuroo tuur.
 10 Yeen soppey Aji Sax ji, bañleen lu bon. Aji Sax jeey sàmm ay wóllereem, di leen musal ci ku bon.
 11 Jub, leerlu; jubal, bég.
 12 Yeen aji jub ñi, bannexooleen Aji Sax ji, sante ko sellngaam.

98

Woyleen Aji Sax jiy àttesi

1 Muy kàddug Sabóor.
 Woyleen Aji Sax ji woy wu yees, moo def ay jaloore, kàttanam ak sellngay dooleem jox na ko ndam li.
 2 Aji Sax jee xamleg wallam, feeñal njekkam, xeet yi gis.
 3 Moo dencal banni Israyil ngoram, dencal ko wormaam, àddina ba mu daj di gis ni nu sunu Yàlla walloo.
 4 Yeen àddina sépp, xaacul-leen Aji Sax ji, sampleen, sarxolle te woy!
 5 Xalamal-leen Aji Sax ji, woyal ko, xalamal ko, woyati.

* 95:9 95.9 Seetal ci *Mucc ga* 17.1-7.

⁶ Wal-leen liit yi, wal bufta yi
te xaacul Buur Aji Sax ji!

⁷ Na géej riirandook li ko fees,
mook áddinaak li ci biiram,
⁸ dex tàccu,
tund sarxolleendoo,
⁹ gatandoo ko Aji Sax jiy dikk,
àttesi áddina,
di àtte dun bi njekk,
tey àttee xeet yépp dëgg.

99

Aji Sax ji buur bu sell la

¹ Aji Sax jeej Buur. Yeen xeet yi, ragal-leen
ko!

Moo toogandook malaakay serub yi. Suu-
foo, soo yeboo, yèngu!

² Aji Sax ji fi Siyoŋ a màgg,
kawé, tiim xeetoo xeet.

³ Sa tur weeka màgg te raglu. Sàbbaal-
leen ko.

—Kee sell!

⁴ Buur, jéfe yoon mooy dooleem,
te yaa saxal njub, yoon ak njekk
ci askanu Yanqóoba.

⁵ Màggal-leen sunu Yàlla, Aji Sax ji,
te sujjóot fa ndëggastalam.

—Kee sell!

⁶ Musaak Aaróona bokk ciy sarxalkatam,
Samiyel bokk ca ñay tudd turam.

Ñuy ñaan Aji Sax ji, mu di leen nangul.

⁷ Fa biir taxaaru niir wa la waxeek ñoom,
ñu topp kàdduy seedeem ak dogalu
yoonam ba mu leen joxoon.

⁸ Céy sunu Yàlla Aji Sax ji, yaa leen
nanguloon,

di seen Yàlla ju leen di baal,
te di leen mbugale seeni jéf ju bon.

⁹ Màggal-leen sunu Yàlla, Aji Sax ji,
te sujjóot fa tundam wu sell wa.

—Sunu Yàlla Aji Sax jee sell!

100

Aji Sax jee baax

¹ Muy jàngi cant.

Yeen waa áddina sépp,
xaacul-leen Aji Sax ji.

² Nangeen jaamoo Aji Sax ji mbég,
dikke koy woy!

³ Seedeleen ne Aji Sax jeej Yàlla.
Moo nu sàkk, nuy ñoñam,
di gàttam yi muy foral.

⁴ Nangeen dugge kèram ag cant,
dugg èttam di màggal,
sant ko, teral turam.

⁵ Aji Sax jee baax, gore ba fàww,
worma ja sax dàkk!

101

Buur a ngi jaayanteek Yàlla

¹ Ñeel Daawuda, di kàddug Sabóor.

Ngor ak yoon laay woy.

Yaw Aji Sax ji laay jooobe.

² Naa teewlu yoonu maandute.

Ana kañ nga may dikkal?

Naa doxe maandute

fi sama biir waa kër.

³ Caaxaani neen, xooluma;

jéf ju wàcc yoon, bugguma,
taqu ma fenn.

⁴ Kuy nas njekkar, sore ma;

lu bon, xawma ko.

⁵ Kuy jèw moroomam, ma wedamal;
ku danjiiral ak ku reew, muñaluma la.

⁶ Ku dëggu ci réew mi, ma geesu,
ngir fat ko.

Te kuy wéye maandute,

kookoo may liggéeyal.

⁷ Kuy njublaj du tooge sama kër,

kuy fen du taxaw sama kanam.

⁸ Maay xèy, sànk képp ku bon ci réew mi,
ngir dagge ci dëkkub Aji Sax jii képp kuy
def lu ñaaw.

102

Yàlla, bu ma rey

¹ Muy ñaanu néew-ji-doole ju sonn, bay
diis Aji Sax ji njàqareem.

² Éy Aji Sax ji, déglul, ma ñaan la;
yal na sama yuux àgg fa yaw.

³ Bu ma dummóoyu bésu njàqare;
teewlu ma,

gaawe ma sama bésu woote!

⁴ Samay fan a ngi wéy ni saxar,
sama yax yi mel nib taal.

⁵ Sama xol bi wow ni ñax mu xuur,
ba lekk safatu ma.

⁶ Damaa jàq, di onka onk,
ba desey yax.

⁷ Ma mel nim tan ci màndiŋ mi,
mbete looy cib gent.

⁸ Nelaw tẽ;

ma mel ni picc mu wéetoo puju néeg.

⁹ Bés bu ne noon yi di ma sewal;

ñi may ñaawal di móoloo sama tur.

¹⁰ Lekkuma xanaa di diwoob dóom, torox-
loo;

te lu ma naan, tuur ca rongooñ,

¹¹ te sa mer ak sa xadar a tax,
nde yaa ma fab, xalab.

¹² Ker a ngi law, nara mëdd samay fan.

Maa ngi wowat nim ñax.

¹³ Waaye yaw Aji Sax ji, yaay des ba fàww,
saw tur saxal maasoo maas.

¹⁴ Yaw yaay taxaw, ñeewante Siyoŋ,
ndax baaxe ko jot na,

àpp ba kay mat na.

¹⁵ Sa jaam ñeeka sopp doji dëkk bii ñu màbb,

ñoo ñeewante tojiti gentam bii.

¹⁶ Na xeet yi wormaal turu Aji Sax ji, buuri àddina sépp wormaal darajaam,

¹⁷ nde Aji Sax jeey tabaxaat Siyon, nara feeñeg leeram.

¹⁸ Mooy nangul aji tumurànke, xeebul ñaanam.

¹⁹ Nañu bindal lii maasug èllég, ba xeet wu sosoogul màggal Ki Sax,

²⁰ nde Aji Sax jeey jéere fu sellam fa ca kaw,

di niire suuf fa asamaan,

²¹ ngir teewlu onki ñi ñu tëj,

nara ubbi ñi dee di seen àtte,

²² ba ñu siiwal turu Aji Sax ji fi Siyon, màggale ko fi Yerusalem,

²³ kera ba xeet yiy bokk daje,

ñook réew yi, ngir jaamu Aji Sax ji.

²⁴ Sama digg doole la ma semmale, gàttal samaw fan.

²⁵ Ma ne: «Ëy sama Yàlla, maasoo maas, say at du jeex.

Bu ma yóbboo sama diggi fan.

²⁶ Bu yàgg nga samp suuf, sàkke asamaan say yoxo.

²⁷ Ñoom ñuy jeex, yaw nga sax,

ñoom ñépp ràpp ni mbubb,

nga soppi leen niy yére, sànni;

²⁸ te yaw ngay kenn ki,

te say at amul kem.

²⁹ Sa doomi jaam ñeey dëkk; seen askan sax fi sa kanam.»

103

Ma sant Aji Sax ji

¹ Ñeel Daawuda.

Naa sant Aji Sax ji ci saa xol bii,

saa jëmm jépp di sàbbaal sellngay turam!

² Naa sant Aji Sax ji ci saa xol bii, te baña fàtte mboolem xéewalam!

³ Moo lay baal foo ñaawe,

di la wéral foo woppe.

⁴ Mooy jot sa bakkan,

kaalaa la ngor ak yërmande,

⁵ di reggal sa bakkan bânneex,

yeesalal lag ndaw,

nga màggataale doole nig jaxaay.

⁶ Aji Sax jeey def njekk,

di àtte jépp néew-ji-doole.

⁷ Moo xamal Musaa ay nammeelam,

xamal bànni Israyil ay jéfam.

⁸ Yërmandeeku yiw, fa Aji Sax ji.

Moo muñ mer te bare ngor.

⁹ Saxoowul di toppe,

dencul mer ba fàww.

¹⁰ Du sunuy bàkkaar la nu mbugal, du sunuy ñaawtéef la nu fey.

¹¹ Ni asamaan tiime suuf,

ni la ngoram yiire ku ko ragal.

¹² Ni penku soore sowu,

ni la nu soreleek sunu mbugali tooñ.

¹³ Ni baay yërème doom,

ni la Aji Sax ji yërème ku ko ragal.

¹⁴ Moo xam sunu bind,

di bàyyi xel ne pënd lanu.

¹⁵ Nit aki fanam di saxayaay

suy law ni tóor-tóoru àll;

¹⁶ ngelaw li wal, mu ne mes,

mel ni masu faa nekk.

¹⁷ Waaye ngoru Aji Sax ji naka jekk

ñeel na fàww ku ko ragal;

njekkam ñeel sètaati

¹⁸ kuy sàmm kóllèreem,

di saxoo jéfe tegtali yoonam.

¹⁹ Aji Sax jee samp asamaan ab jalam, nguuraam ñank lépp.

²⁰ Yeen malaaka yi, santleen Aji Sax ji, yeen jàmbaar yu mag yiy jéfe ndigalam,

di sàmm kàddoom.

²¹ Santleen Aji Sax ji, yeen gàngoori xa- reem yépp,

yeen dagam yiy jéfe coobareem.

²² Yeen bindeef yépp, nangeen sante Aji Sax ji

fépp fu mu tiim.

Naa sant Aji Sax ji ci saa xol bii!

104

Màggal-leen ki sàkk lépp

¹ Naa sant Aji Sax ji ci saa xol bii!

Aji Sax ji sama Yàlla, yaaka màgga màgg. Teddngaak daraja nga soloo,

² làmboo leer ni mbubb,

firi asamaan ni ndimo,

³ xadd say néegi kaw ci biir ndox mi,

def niir yi say waruwaay,

di daagoo kaw laafi ngelaw,

⁴ def ngelaw yi say ndaw,

ay sawara boy, di say jawriñ.

⁵ Yaa dēj suuf ciy kenoom,

deesu ko yèngal ba fàww.

⁶ Yaa ko sànge xóotey géey ni mbubb,

ndox ma taxaw, tiim tund ya.

⁷ Nga gèdd, ndox ma fëx;

nga dènu, mu daw,

⁸ wale kaw tund ya, wàccsi xur ya,

di bérab ba nga ko beral.

⁹ Ag kemu nga teg, du ko wees,

te dootu muur suuf si.

¹⁰ Yaa ballal bēti ndox ya ca xur ya,

ñuy wale digg tund ya,

¹¹ ngay nàndal bépp ndundatu àll,

di wégg mbaamu àll,

¹² njanaaw dëkke ca wet ga,

baatam jibe fa garab ya.

¹³ Yaa suuxate tund ya fa sa néegi kaw,
sa liggéey reggal suuf.

¹⁴ Yaa saxalal jur gi ñax
ak gâncax gu doom aadama di bey,
ba génnee ab dund fi suuf,
¹⁵ dugub di ko dooleel,
biññ di bégal xolam,
ag diw di leeral kanamam.

¹⁶ Garabi Aji Sax ja, seedari Liban,
ya mu jëmbat, regg nañu,

¹⁷ picc tagge ca,
xodd dëkke garab gu dul ruus,
¹⁸ tund wu mag ñeel kéwéli àll,
xunti di rawtub daman*.

¹⁹ Yaa sàkk weer, muy takku jamono,
sàkk jant, mu xam waxtux fatoom.

²⁰ Yaa def lëndëm, mu guddi;

bépp rabu àll di ca dox,
²¹ gaynde gu ndaw ñaral am pàddam,
di sàkkoo dundam fa Yalla.

²² Bu jant fenkee, ñu dellu,

goori ca seeni pax,
²³ doom aadama tàmbali kër-këram,
di yendoo liggéey ba ngoon.

²⁴ Éy Aji Sax ji, yaa bare loo liggéey,
te lépp di xel mu rafet.

Suuf daa fees ak say càkkéef.

²⁵ Géej a ngee réy te yaa,
la fay yëngu maneesu koo lim,
muy ndundat lu mag ak lu ndaw.

²⁶ Fa la gaal di daw,
ak ngaaka la nga bind, mu di fa foye.

²⁷ Ñoom ñépp yaw lañuy séentu,
ngir bu jotee, nga leel leen,

²⁸ may leen lu ñu for;
ñëbal leen, ñu suur ngëneel.

²⁹ Soo leen làqoo, ñu tiit;

nga rocci seen noo, ñu saay,
dellu di pënd.

³⁰ Yaay yónnee sag noo, ñu nekk;
te yaay yeesal li ci kaw suuf.

³¹ Yal na darajay Aji Sax ji sax,
yal na Aji Sax ji bégey jalooreem.

³² Kee naan jákk suuf, muy lox;
mu laal tund yi, ñuy saxar!

³³ Naa woy Aji Sax ji li feek may dund,
naa kañ sama Yalla li feek may tooy.

³⁴ Sama xalaat bii, yal na ko neex.
Man de maa ngi bége Aji Sax ji!

³⁵ Yal na bàkkaarkat raaf fi kaw suuf,
te ku bon noppee nekk.

Naa sant Aji Sax ji ci saa xol bii.
Màggal-leen Ki Sax!

105

Aji Sax ji sàm'm na kóllëre

* **104:18** 104.18 daman xeetoo naak njomboor.
mooy Misra ba tey.

¹ Santleen Aji Sax ji, tudd turam,
xamley jalooreem ci biir xeet yi,

² woy ko, tagg ko,
yégle mboolemi kéemaanam!

³ Damooleen turam wu sell.

Kuy wut Aji Sax ji, yal na am bânneexu
xol.

⁴ Gëstuleen Aji Sax jeek dooleem,
di ko sàkku saa su ne.

⁵ Fàttlikuleen ay jalooreem
aki misaalam aki àtteem.

⁶ Yeen askanu Ibraayma, jaamam ba,
yeen ñiy sėti Yanqóoba, ñiy tànnéefam,

⁷ Kee di sunu Yalla Aji Sax ji,
di àtte suuf sépp,

⁸ di fàttliku ba fàww kóllëreem,
di bàyyi xel ba ci junniy maas kàddoom

⁹ ga mu digoon Ibraayma,
giñal ko Isaaxa,

¹⁰ dëggalal ko Yanqóoba, sàrtal ko,
fase kook Israyil mooma kóllëre gu sax.

¹¹ Mu ne: «Yaw laay jox réewum Kanaan,
muy sa cér, nga séddoo.»

¹² Ba bànni Israyil dee ñu néew,
diy doxandéem ca réew ma,

¹³ di wëreelu ci biir xeetoo xeet,
ak nguuroo nguur,

¹⁴ mayul nit mu not leen,
te yaral na leen ay buur,

¹⁵ ne leen: «Buleen laal samay tànnéef,
buleen lor samay yonnet.»

¹⁶ Moo wàcce ab xiif ca réew ma,
dagge fa luy gub,

¹⁷ yónnee ku leen jiitu,
muy Yuusufa ma ñu jaayoon njaam,

¹⁸ tànk ya, ñu jéng jéng yu tar,
baat ba, ñu yeewe caqu weñ.

¹⁹ Kàddug Aji Sax ji di nattu Yuusufa,
ba keroog pirim ma dikk,

²⁰ Buur a yónni ku ko yiwi,
ku yilifi xeet a ko tijji.

²¹ Mu sas ko mu jiite këram,
di saytu mboolem alalam,

²² ba saña tënk jawriñi buur ci coobareem,
tey xelal mag ña.

²³ Israyil agsi Misra,
muy nganug Yanqóoba ga ca réewum
Xam*.

²⁴ Aji Sax ji giiral xeetam wa,

ba ñu gëna bare seeni noon,
²⁵ mu xiir waa Misra ci dëddu ñoñam,
ñuy fexeel jaamam ñooña.

²⁶ Mu yónni Musaa, jaamam ba,
tànn Aaróona, boole ca,

²⁷ ñu sotal ci seen biir firndeem ya mu
waxoon,

muy kéemaan ya ñu def ca réewum Xam.

²⁸ Moo yónnee lëndëm, lëndëmal,

* **105:23** 105.23 Israyil ak Yanqóoba, kenn ki la; réewum Xam

te Musaa ak Aaróona gántaluñu kàddoom.

²⁹ Moo soppi seen ndoxum réew deret, rey seeni jën,

³⁰ feesal seen réew ay mbott yu àkki seen biir néegi buur ya.

³¹ Moo àddu, weñ ya dikk, rayantaan ya dajal seen réew ma.

³² Mu def seenub taw tawub yuur, sawaray melax jafal seen réew ma.

³³ Mu dóor seen figg ak reseñ, foom seen garabi réew ma.

³⁴ Mu àddooti, ay soccet dikk, di njéeréer yu wees ab lim, ³⁵ ñu lekk luy gancax ca seenum réew, lekk lu suuf sa meññ.

³⁶ Moo fàdd luy taaw ca seenum réew, muy lu jékka soqekoo seen digg doole.

³⁷ Mu génne leen, ñu yóbbaale xalis ak wurus,

te kenn tërëful ca seeni giir.

³⁸ Misra daa bég ba ñu demee ndax tiitaange lu ñu leen tiital.

³⁹ Mu firiw niir, yiire leen, ak sawara, ñu niitoo guddi.

⁴⁰ Ñu sàkku, mu wacceey picci përentaan, teg ca reggal leen mburum asamaan.

⁴¹ Mu bënnu doj, ndox ma ball, di dex, wale joor gu wow.

⁴² Daa bàyyi xel kàddoom gu sell, ga mu waxoon Ibraayma, jaamam ba.

⁴³ Moo génne ñoñam, ñu bég, moo génne tànnéefam ña, ñuy sarxolle.

⁴⁴ Mu jox leen suufi yéefar ya, ñu jagoo ñaқи xet ya,

⁴⁵ ngir ñu sàmm ay dogali yoonam, topp ndigali yoonam.

Màggal-leen Ki Sax!

106

Israyil di wor, Yàlla di wóor

¹ Màggal-leen Ki Sax!

Santleen Aji Sax ji, kee baax, kee saxoo ngoram!

² Ana ku mana tudd jaloorey Aji Sax ji? Ana ku mana teesal woyam?

³ Ndokklee kuy sàmm yoon, di def njekk fu mu tollu.

⁴ Éy Aji Sax ji, séddaale ma ci sa yiwu ñoñ, ngalla, dikke ma sag wall,

⁵ ma gis ngéneelu ñi nga tànn, di bannexoo sa bannexu xet wi, tey damoondook ñoom ñi nga séddoo.

⁶ Noo bàkkaar, nook sunuy maam; noo def lu ñaaw, def lu bon.

⁷ Sunuy maam seetuñu ca say kéemaan ca Misra,

bàyyiwuñu xel ca sa ngor lu réy,

xanaa di fippu ca géej ga, géēju Barax ya. ⁸ Teewul Yàlla wallu leen ngir turam,

ba xamle njambaaram.

⁹ Dafa gédd géēju Barax ya, mu ne seren; xóotey géej mel ni màndin, mu jalle leen,

¹⁰ musal leen ci loxol bañaale, jote leen ca loxol noon ba,

¹¹ ndox ma mëdd bañ ya, kenn desu ca.

¹² Ca lañu gëm ay waxam, woy ko.

¹³ Nes tuut ñu fàtte jëfam ja, xaaratuñu ndigalam,

¹⁴ di ñaf-ñafi ca màndin ma, di diinaj Yàlla ca àll ba.

¹⁵ Yàlla jox leen la ñuy sàkku, waccaaleel leen woppi ràgg.

¹⁶ Ba ñu demee ba iñaane Musaa ca dal ba, boole ca Aaróona mu sell ma, nitu Aji Sax ja,

¹⁷ suuf a ne ñafeet, wonn Datan*, mèddaale gàngooru Abiram;

¹⁸ sawara ne jippét fa seen biir, tàkk ba lakk ñu bon ñoña.

¹⁹ Tëgg nañu aw nag ca tundu Oreb, di sujjóotal jëmm ju ñu móol,

²⁰ di jënde seen tedngay Yàlla ja jëmmu nag wuy for um ñax.

²¹ Dañoó fàtte Yàlla ma leen di musal te def jaloore ca Misra.

²² Mooy kéemaan ya fa réewum Xam†, kiraama ya ca géēju Barax ya.

²³ Yàlla da leen doon sànk, bu dul woon ak Musaa, xejjam ba ko kar, àtte leen, mu giif, ba fàkkasu leen.

²⁴ Dañoó gántal réew mu neex, gëmuñu kàddug Yàlla,

²⁵ xanaa di xultoo seen biiri xayma, baña déggal Aji Sax ji.

²⁶ Moo tax mu giñal leen

ne dina leen tëral fa màndin ma, ²⁷ tëral seen askan ci biir xet yi,

wasare leen ci réew yi.

²⁸ Ñuy darook tuurum Baal Pewor, di lekk lu ñu sarxal ay yàlla yu amul bakkam,

²⁹ di merloo Yàlla ci seeni jëf, ba mbas ne dàll fa seen biir.

³⁰ Fineyas taxaw, àtte;

mbas ma dal,

³¹ muy njekk lu ñu ko waññal tey ak èllég.

* **106:17** 106.17 Datan: seetal ci *Màndin ma* 16.27, 31-33.

† **106:22** 106.22 réewum Xam mooy Misra ba tey.

32 Ñu merlooti Yàlla ca ndoxum Meriba ma,
muy loraangey Musaa te ñoo ko waral.

33 Ñoo naqaral Musaa,
ba mu wax wax ju ko récc.

34 Te it faagaagaluñu yéefar,

ya leen Aji Sax ji waxoon,

35 xanaa di jaxasook yéefar yooya,

di roy seeni jéf,

36 di jaamu seeni tuur,

mu mujj dig fiir ca ñoom.

37 Ñuy sarxalal rab ya

seen doom yu góor ak yu jigéen,

38 di tuur deretu ñu deful dara,

te muy seen deretu doom yu góor ak yu jigéen

ya ñu sarxalal tuuri Kanaaneen ña,

deret ja sobeel réew ma,

39 seeni jéf sobeel leen,

ndax seen bokkaale.

40 Aji Sax ji mere ñoñam,

sib xeet woowu mu séddoo,

41 ba tax mu teg leen ca loxol yéefar ya,

seeni bañ yilif leen,

42 seen noon ya not leen,

ñu torox ca seeni loxo.

43 Ay yooni yoon la leen xettli,

teewul ñuy nas pexey fippu,

ba suux ci seeni ñaawtéef.

44 Mu gis nag seen njàqare,

dégg seeni tinu,

45 bàyyi xel ci kóllèreem ak ñoom,

topp ngoram lu réy, ba giif,

46 xiir ña leen jàpp ñépp,

ñu yèrèm leen.

47 Éy Aji Sax ji, sunu Yàlla, wallu nu,

génnee nu ci xeet yi, dajale nu,

nu sante la sa sellnga,

di sagoo sa tedngaa.

48 Santleen Aji Sax ji, Yàllay Israyil

cant gu sax dàkk, ba fàww.

Na ñépp ne: «Amin!»

Màggal-leen Ki Sax!

107

Aji Sax jeey xettlee

1 Santleen Aji Sax ji, kee baax,
kee saxoo ngoram!

2 Waxleen lii, yeen ñi Aji Sax ji jot,

jote leen ci loxol bañ,

3 dajalee leen fa réew ya,

jèle leen penkook sowu,

ak bëj-gànnar ak wetu géej.

4 Ñee ngi taxawaaloo màndin mu wéet,

gisuñu dèkkuwaay,

5 boole xiif ak mar,

ba bakkan di tàggoj.

6 Ñu jàq, woo Aji Sax ji wall,
mu xettlee leen seen njàqare,

7 jaarale leen yoon wu jub,

ngir ñu àgg cib dèkk.

8 Nañu sante Aji Sax ji ngoram

ak kéemaanam yi ñeel doom aadama yi.

9 Mooy màndal put gu wow,

di feesal ngéneel biir bu wéet.

10 Ñee ngi dèkke lëndèm gu tar,

ñu yeewe leen jéngi weñ yu tar.

11 Ñoo gantal waxi Yàlla,

néewal ndigalal Aji Kawe ji.

12 Mu teg leen naqar, ba torxal leen,

ñu ne nèrèm te kenn walluw leen.

13 Ñu jàq, woo Aji Sax ji wall,

mu walloo leen seen njàqare,

14 xar seeni jéng yaar,

génnee leen lëndèm gu tar.

15 Nañu sante Aji Sax ji ngoram

ak kéemaanam yi ñeel doom aadama yi.

16 Moo rajaxe bunti xàñar,

damm galani weñ.

17 Ñu dofe ñalee ngi topp yoonu moy,

loroo seeni ñaawtéef,

18 ba luy ñam di daw seen yaram,

ñu jege bunti ndee.

19 Ñu jàq, woo Aji Sax ji wall,

mu walloo leen seen njàqare.

20 Daa yónnee kàddoom, wéral leen,

kéfe leen cim yeer.

21 Nañu sante Aji Sax ji ngoram

ak kéemaanam yi ñeel doom aadama yi.

22 Nañ ko sarxal saraxi cant

tey sarxolle, siiwale koy jalooreem.

23 Ña ca des a ngi war gaal, dugg géej,

di liggéeye mbeex mu ne xéew.

24 Ñooño seede jaloorey Aji Sax ji,

ak kéemaanam ya fa xóote ya.

25 Day àddu, sant ngélèn,

mu yékkati gannax yi.

26 Gannax ya fettax ba ca kawa kaw,

xàwwikoo fa, tàbbi xóote ya.

Ñu jàq ba fit ne soyox,

27 di jang, di kayan-kayanji niy màndikat,

pexe jeex.

28 Ñu jàq, woo Aji Sax ji wall,

mu génnee leen seen njàqare,

29 dalal ngélèn la,

gannax ya selaw,

30 ne tekk, ñu bég,

mu gindi leen ba fa ñu bégga teer.

31 Nañu sante Aji Sax ji ngoram

ak kéemaanam yi ñeel doom aadama yi.

32 Nañu ko kañe ndajem mbooloo mi,

di ko màggale péncu mag ñi.

33 Mooy soppi wali ndox màndin,

soppi bëti ndox suuf su ne seren,

34 suuf su nangu doon jooru xorom
ndax mbonug ña ko dëkke.
35 Mooy soppi màndin it, ndox ya taa,
soppi suuf su ne serej bëti ndox;
36 dëel fa ñu xiif,
ñu sanc fab dëkk, dëkke,
37 ji ay tool, jëmbat ay reseñ,
mu meññ, ñoral,
38 Aji Sax ji barkeel, ñu giira giir,
te wàññiwul seenug jur.
39 Bu ñu wàññikoo, ba néew doole
ndax noteel ak coonooku tiis,
40 Aji Sax ji sib seen njiit yi leen not,
wërloo leen àll bu amul yoon.
41 Waaye mooy teggil néew-ji-doole
coonoom,
ful njabootam nig jur,
42 aji jub ñi gis ko, bég;
mboolem ku bon wedam.
43 Ku xelu ku ne, na ràññee lii
te seede li Aji Sax ji jëfe ngoram.

108

Yàlla, may nu ndam

1 Muy woyu Sabóor, ñeel Daawuda.

2 Yàlla, dogu naa,
damay woy, di la kañ;
sama jëmm jépp di la woy.
3 Na mboolem xalam yewwu,
ma yee leeru njël.
4 Aji Sax ji, dama lay gërëm ci biir xeet yi,
kañ la ci biir waaso yi.
5 Sa ngor a màgg ba sut asamaan,
sa worma àkki fa kawa kaw.
6 Éy Yàlla, yaa màgg ba sut asamaan,
sag leer tiim suuf sépp.
7 Walloo nu sa ndijoor,
nangul ma,
ba say soppe xettliku.
8 Yàllaa àddoo fa këram gu sell,
ne: «Maay damu, dogat suufas Sikem,
séddale xuru Sukkóot.
9 Maa moom diiwaanu Galàdd, moom
Manase,
Efrayim di sama mbaxanam xare,
Yuda di sama yetu nguur;
10 réewum Mowab di sama ndabal raxas-
ukaay,
Edom, ma teg tànk;
Filisti, ma xaacoo fa.»

11 Éy Yàlla, ana ku may yóbbu dëkk ba tata
wër?
Ku may jiite ba Edom?
12 Yàlla, xanaa du yaa nu wacc?
Éy Yàlla, yaa baña ànd ak sunu mboolooy
xare?
13 Ngalla dimbali nu ci bañaale;
doom aadama, wallam neen la.

14 Nook Yàlla, nu def njàmbaar;
moom mooy not sunuy noon.

109

Yal na Yàlla mbugal noon bi

1 Mu jëm ci njiital jàngkat yi, ñeel
Daawuda, di kàddug Sabóor.

Éy Yàlla mi may sant, bul tanqamlu!

2 Ku bon ak kuy fen a ma waxal,
sosal ma,

3 tance ma kàdduy mbañeel,
song ma ci dara.

4 Ma ji nit cofeel, mu sosal ma;
te man ma di ko ñaanal.

5 Sama jëf ju baax, loraange lañu ma ko
feye,
sama cofeel, ñu feye ma ko mbañeel.

6 Yal nanga fal ku bon ci kaw kii,
ab soskat féete ko ndijoor.

7 Bu ñu koy àtte, yal nañu ko yey,
te yal na ñaanam walbatiku di bàkkaar.

8 Yal naw fanam gätt,
keneen jagoo sasam.

9 Yal nay doomam diy jirim,
jabaram dib jëtun,

10 ay doomam di tambaambaluy yalwaan,
dëddu seeni gent, dem tàllal ay loxo.

11 Yal na ko kuy feyeeku futti,
ay doxandéem foqati ñaqam.

12 Yàlla bu ko kenn ji ngor,
yàlla bu kenn baaxe jirim yi ko wuutu.

13 Yal na askanam dagg.

Balaa geneen maas a wéy, yal na seenu tur
fey.

14 Yal na Aji Sax ji bàyyi xel ñaawtéefi
maamam.

Yàlla bu bàkkaarun deyam faru.

15 Yal na seeni moy sax fi kanam Aji Sax ji.
Yal na seen tur dagge fi kaw suuf.

16 Moo séddul ngor,
di topp ku néewle te sonn,
seen xol jeex, mu bóom.

17 Moo bëggoon di móoloo, yal na ko
këppoo;

soppul ag ñaan it, yal na ko barke sore.

18 Móolook sol mbubb la yemale,
yal nañu duy nim ndox ay móoloom ci
yaramam,

mu seeb ci biiri yaxam nig diw.

19 Yal nay móoloom di mbubbam,
te di laxasaay gu mu saxoo.

20 Lii, yal na ko Aji Sax ji feye ñi may sosal,
di teg lu ñaaw ci sama der.

21 Waaye Boroom bi Aji Sax ji,
defal ma li sa tur laaj.

Yaa baax, gore, xettli ma.

22 Damaa néewle te sonn,
sama xol dagg, ba jeex tàkk.

23 Maa ngi tàggoo ni keru ngoon,
 ñu di ma fé! ni soccet.
 24 Samay óom a ngi nasax ndax ñàkka lekk,
 desewuma lu moy yaxi neen.
 25 Maa ngii, ñu di ma sewal,
 ku ma gis, wëcc bopp.
 26 Éy Aji Sax ji, sama Yàlla, dimbali ma,
 walloo ma sa ngor,
 27 ba ñu xam ne lii sa loxoo,
 xam ne yaw Aji Sax ji, yaa ko def.
 28 Ñooy móolu, yaw nga barkeel;
 ñoo ma jógal, ñooy torox,
 man, ma bég, Sang bi!
 29 Yal na ñi may sosal sàngoo toroxte,
 làmboo gâce ni mbubb.
 30 Ma àddu, santa sant Aji Sax ji,
 di ko màggale digg mbooloo mu yaa.
 31 Mooy féete ndijoor néew-ji-doole,
 musal ko ci ku koy teg àtteb dee.

110

Yàlla fal na nitam

1 Ñeel Daawuda, di kàddug Sabóor.

Aji Sax ji daa wax sama Sang, ne ko:
 «Toogeel sama ndijoor,
 ba ma def say noon sa ndèggastal.»

2 Sa nguur la Aji Sax ji saxal, dale ko fa
 Siyonj.

Yilifal noon yi la wër!

3 Sa mbooloo taxawal seen bopp,
 sa bésub xare.

Ña nga soloo darajaak sellnga,
 faboo fa njël sosoo,
 diy ndaw, wàccsil la, mbeteb lay.

4 Aji Sax jee ko giñ,
 te du dellu gannaaw:
 «Yaa dib sarxalkat ba fàww,
 topp dayob Melkisedeg*.»

5 Sang baa ngi fi sa ndijoor
 te mooy rajaxe buur yi, bés bu meree.

6 Mooy mbugal xeet yi, jal seeni néew,
 di rajaxe kilifay àddina, ba mu daj.

7 Déeg ba feggook yoon wa, Buur a cay
 naan,
 te moo ko tax di siggi.

111

Yàlla la ay mbiram sax

1 Màggal-leen Ki Sax!
 Naa sante Aji Sax ji léppi xol
 ci biir ñu jub ñi bokk jataay.
 2 Liggéeyi Aji Sax ji réy na,
 ku ko safoo di ko gèstu.

* 110:4 110.4 Melkisedeg: buurub Salem la woon, di sarxalkat bu Yàlla faloon ci jamony Ibraayma, maanaam ñeenti téeméeri la laata Aaróonaa doon ab sarxalkat.

3 Jëfam teddnga laak daraja,
 njekkam di sax ba fàww.
 4 Moo dogal ñuy fàttlikuy kéemaanam;
 Aji Sax ji boroom yiw ak yërmande.
 5 Mooy leel ku ko ragal,
 di bàyyi xel kóllèrem gi ba fàww.
 6 Won na ñoñam dooley jëfam,
 ba mu leen joxee suufu xeet yi.
 7 Ay jëfam dëgg laak njub,
 tegtalam yépp mata wóolu,
 8 laloo dëgg ak njub,
 te sax dàkk ba fàww.
 9 Moo yónee xeetam wall,
 fas ak ñoom kóllère gu sax.
 Kee sell te jara ragal!
 10 Ragal Aji Sax ji di ndoortel rafet xel,
 dég-dég bu rafet ñeel ku koy wéye.
 Moo yeyoo cant ba fàww.

112

Ku ragal Yàlla gis njekkam

1 Màggal-leen Ki Sax!
 Ndoklee ku ragal Aji Sax ji,
 di tàqamtikoo ay saantaaneem.
 2 Aw askanam ay am doole ci réew mi.
 Ku jub saw xeet barkeel,
 3 alal ak koom am sa kër,
 sag njekk sax dàkk.
 4 Ceeñeeru biir lëndëm jollil na ku jub
 ak ku baax, di boroom yërmande ak njekk.
 5 Ki baaxle mooy ki laabiir, di leble,
 di jëflante cig njub.
 6 Ku jub du téréf mukk,
 te dees na ko fàttliki ba fàww.
 7 Du ragal dég-dég bu tiis,
 xel ma day dal, mu wóolu Aji Sax ji,
 8 fit wa toog, du ragal,
 ba kera muy gis noonam jóoru.
 9 Mooy nàddil néew-doole yi,
 njekkam sax dàkk,
 dooleem di yokku, ànd ak daraja.
 10 Soxor bi da koy gis, mer,
 ifaan bay yéyu, jeex tàkk;
 nde soxor, yaakaar ju tas rekk.

113

Buur Yàllaay walloo

1 Màggal-leen Ki Sax!
 Yeen ñiy jaamu Aji Sax ji, màggal-leen ko,
 màggal-leen turu Aji Sax ji!
 2 Yal nañu teral turu Aji Sax ji
 tey ak èllég!
 3 Li dale penku ba sowu,
 màggal-leen Aji Sax ji.
 4 Aji Sax jee kawé, tiim xeetoo xeet,
 teddngaam sut asamaan!
 5 Ana ku mel ni sunu Yàlla Aji Sax ji,

ki kaweel ab jalam, toog,
 6 di jéer asamaan ak suuf?

7 Mooy yékkatee ku néewle fa suuf,
 di seppee ku sonn cib sën,
 8 bokkal ko jataayu kilifa,
 ya jiite xeatam.
 9 Mooy déél jigéen ju tële woona jur,
 may ko mbégtém njureel.
 Mággal-leen Ki Sax!

114

Yàllaay walloo dooleem

1 Ba Israyil bàyyikoo fa Misra,
 ba waa kër Yanqóoba dëddu làkk-kat
 yooya,
 2 ca la Yuda doon kër Aji Sax ji,
 giirug Israyil googu doon ab jagleem.
 3 Géej gaa leen gis, daw,
 dexu Yurdan a deltu gannaaw,
 4 tund yu mag yiy curpi niy kuuy,
 di curpeendook tund yu ndaw yi niy
 mbote.

5 Moo géej, loo xewle bay daw?
 Yaw, dexu Yurdan, looy deltu gannaaw?
 6 Tund yu mag yee, lu ngeen di curpi niy
 kuuy?
 Yeen, tund yu ndaw yi, lu ngeen di curpi
 niy mbote?

7 Suufee, loxalal Boroom bi,
 Yállay Yanqóoba mii,
 8 ki soppliw doj ndox mu taa,
 xeer wu ne seren, mu def bētu ndox.

115

Ku wóolu Yàlla barkeel

1 Bu muy nun, Aji Sax ji, bu muy nun,
 saw tur nga wara teral,
 ngir sa ngor ak sa worma.
 2 Bu yéefar yi ne mukk:
 «Moo ñii, ana seen Yàlla?»
 3 Te yaw sunu Yàlla, yaa ngi asamaan,
 di def lu la soob.
 4 Seeni tuur xaalis laak wurus,
 di liggéeyu doom aadama:
 5 am gémmiñ te du wax,
 ami gët te du gis,
 6 ami nopp, du dégg,
 ami wakkan, du xañtu,
 7 ay yoxo it te du yég,
 ay tànk it te du dox,
 du xàddmiku sax.
 8 Ñi sàkk yii tuur, yal nañu mel ni ñoom,
 ñook ñi leen wóolu ñépp.

9 Éy Israyil, wóolul Aji Sax ji,
 moo lay jàpple, di la aar.

10 Yeen waa kër Aaróona, wóoluleen Aji
 Sax ji,
 moo leen di jàpple, di leen aar.
 11 Yeen ñi ragal Aji Sax ji, wóoluleen Aji
 Sax ji,
 moo leen di jàpple, di leen aar.

12 Aji Sax jee nuy bàyyi xel, di nu barkeel,
 di barkeel kër Israyil,
 di barkeel kër Aaróona.
 13 Aji Sax jee barkeel ku ko ragal,
 mag ak ndaw.

14 Yal na leen Yàlla ful,
 ful seeni doom.
 15 Yal nangeen barkeeloo Aji Sax ji,
 ki sàkk asamaan ak suuf.
 16 Asamaan, asamaanu Aji Sax jee,
 suuf la dénk doom aadama.
 17 Du ku dee mooy mággal Ki Sax,
 du kenn ku tàbbi réewum tàbbi-selaw!
 18 Nun, nooy sargal Ki Sax,
 tey ak èllég.
 Mággal-leen Ki Sax!

116

Ma sant Yàlla mi ma jot

1 Maa bégg Aji Sax ji: maa ko woo,
 dagaan ko, mu dégg ma.
 2 Teewlu na ma moos,
 dama koy woo li feek may dund.
 3 Buumi ndee a ma laawoon,
 njàqarey njaniiw dab ma,
 ma dajeek naqar aku tiis.
 4 Ma woo Aji Sax ji wall, ne ko:
 «Ngalla Aji Sax ji, xetli ma!»
 5 Aji Sax jee boroom yiw ak njekk,
 sunu Yàllaay boroom yërmande.
 6 Aji Sax jee aar ku xamul àddina;
 tumuránke woon naa, mu wallu ma.
 7 Bu ma yeboo sama xel dal,
 Aji Sax ji baaxe na ma!
 8 Xetli nga ma, ba deewuma,
 jàpple ma ba tërëfuma,
 feral nga it samay rongooñ.
 9 Damay topp Aji Sax ji
 ci biir réewum aji dund ñi.
 10 Ba ma naa: «Torox naa ba toskare,»
 teewul may ànd ak ngëm.
 11 Maa jàqoon ba naan:
 «Ñéppi fen-kat lañu!»
 12 Ana lu may njukkale Aji Sax ji,
 li mu ma baaxe lépp?
 13 Xanaa ma yékkati kaasu Aji Sax
 jiy misaal wallam,
 te may tudd turam.
 14 Samay digeek Aji Sax ji laay matal
 fi kanam ñoñam ñépp.
 15 Wóllérey Aji Sax ji,

bakkanam ñor na Aji Sax ji.

¹⁶ Aji Sax ji, maay sab jaam,
maay sab jaam, di sa doomu jaam bi ma
sukk jur.

Yaa yiwi samay buum,

¹⁷ yaw laay sarxalal saraxu cant,
te turu Aji Sax ji laay tudd.

¹⁸ Samay digeek Aji Sax ji laay matal
fi kanam ñoñam ñépp,

¹⁹ fi ètti kër Aji Sax ji,
fi digg Yerusalem.

Màggal-leen Ki Sax!

117

Na ñépp ànd ak Israyil sant Yàlla

¹ Yeen xeetoo xeet, màggal-leen Aji Sax ji,
réewoo réew, kañleen ko.

² Moo nu xéewale ngoram gu réy,
te wormay Aji Sax jee sax dàkk.

Màggal-leen Ki Sax!

118

Aji Sax jeek man, ma daan

¹ Santleen Aji Sax ji, kee baax,
kee saxoo ngoram!

² Rikk Israyil, neleen:

«Kee saxoo ngoram!»

³ Rikk waa kër Aaróona, neleen:

«Kee saxoo ngoram!»

⁴ Rikk yeen ñi ragal Aji Sax ji, neleen:

«Kee saxoo ngoram!»

⁵ Ci xat-xat laa wooye Ki Sax wall,
Ki Sax wuyu ma, yaatal ma.

⁶ Aji Sax jeek man, duma tiit.

Ana lees ma manal?

⁷ Aji Sax jeek man, di ma dimbali,
may seetaan bañ yi.

⁸ Làqoo Aji Sax jee gën

wóolu doom aadama,

⁹ Làqoo Aji Sax jee gën

wóolu garmi.

¹⁰ Yéefar yépp a ma sam,

ma bëmëx leen ci dooley Aji Sax ji.

¹¹ Ñu sam maa sam,

ma bëmëx leen ci dooley Aji Sax ji.

¹² Naka lañu ma sam niy yamb,

jekki ne kamaj ni taalu boob,

ma bëmëx ci dooley Aji Sax ji.

¹³ Dees maa jañaxa jañax, ma ter-teri,

Aji Sax ji dimbali ma.

¹⁴ Sama doole, sama kaaraange, Ki Sax a;
te mooy sama wall tey.

¹⁵ Ndam aki sarxolle ca xaymay ñu jub ña,
ndijooru Aji Sax jee def njàmbaar!

¹⁶ Ndijsoor la Aji Sax ji xàcci,
ndijooru Aji Sax jee def njàmbaar.

¹⁷ Duma dee moos, xanaa dund,
ba nettali jaloorey Ki Sax.

¹⁸ Ki Sax mbugal na maa mbugal,

waaye waccu ma, ma dee.

¹⁹ Ubbil-leen ma bunti njekk,
ma dugg santi Ki Sax.

²⁰ Buntu Aji Sax jaa ngi;

ñu jub ñee ciy dugge.

²¹ Dama lay sant, yaa ma nangul,
wallu ma tey.

²² Doj wi tabaxkat yi beddi woon,
moo mujj doju coll wi.

²³ Lii de, Aji Sax jee ko def,
nu gis ko, yéemu.

²⁴ Bésuub tey jii, Aji Sax jee;
nan ko bége, bänneexoo ko.

²⁵ Ngalla Aji Sax ji, wallu nu.

Ngalla Aji Sax ji, may nu ndam.

²⁶ Yal na Yàlla barkeel ki dikke turam.

Nu ngi leen di ñaanaale fi néegu Aji Sax ji.

²⁷ Aji Sax jee di Yàlla, di nu leeral.

Ñàbbleen car yi, màggale,
te dox ba ca bëjjéni sarxalukaay ba.

²⁸ Yaa di sama Yàlla, ma di la sant;

céy sama Yàlla, dama lay kañ.

²⁹ Santleen Aji Sax ji, kee baax,
kee saxoo ngoram.

119

Aji Sax ji, sa kàddu laay bége

¹ Ndokklee yaw mi maandu,
di wéye yoonu Aji Sax ji.

² Ndokklee yaw miy wattu kàdduy
seedeem,

di ko sàkkoo sa léppi xol.

³ Doo def njubadi,

di topp fi mu la jaarloo.

⁴ Aji Sax ji, yaa joxe sa tegtal
yi ñu wara toppa topp.

⁵ Yal naa saxoo

di sàmm sa dogali yoon,

⁶ di teewlu loo santaane,

ba duma rus.

⁷ Damay gëstu sa ndigal yu jub,

di la sante xol bu dëggu.

⁸ Sa dogali yoon laay sàmm;

ngalla bu ma wacca wacc.

⁹ Ana nu ndaw mana sellalee?

Xanaa di sàmm sa kàddu.

¹⁰ Sama léppi xol laa lay sàkkoo,

bul ma wacc, ma wàcc say santaane.

¹¹ Sama xol laa làq say wax,

ngir bañ laa moy.

¹² Jaajéfe, yaw Aji Sax ji,

jàngal ma sa dogali yoon.

¹³ Maa àddu, tari

mboolem lu sa kàddu digle.

¹⁴ Topp say tegtal laay bége
mbégtem jépp alal.

¹⁵ Say tegtal laay jàngat,
di teewlu say xáll.

¹⁶ Sa dogali yoon, ma tàqamtikoo,

sa kàddu, ma fat ba fàww.

17 Sang bi, baaxe ma, ma dund, ba mana sàmm sa kàddu.

18 Ngalla muril saay gèt, ma niir sa kéemaani yoon.

19 Doxandéem laa fi kaw suuf, bu ma làq say santaane.

20 Fu ma tollu ma ngi namm say ndigal ba sama xol ñiis.

21 Rébb nga ñu reew, ñu alku, ñiy dèddu say santaane.

22 Musal ma ciy kókkaleeki xaste, maa ngi topp sa kàdduy seede.

23 Te it kàngam yaa ngi may tooge, te may gèstu sa dogali yoon, Sang bi.

24 Sa kàdduy seede laay safoo, ñuy sama xejj yi may xelal.

25 Maa ngi ne ñàyy ci pënd bi, musal ma, yaa ko dige.

26 Wax naa la samay jaar-jaar, nga wuyu ma;

ngalla xamal ma sa dogali yoon.

27 Dégtal ma li sa tegtal yiy firi, ma jàngat say kéemaan.

28 Naqaru xol sonal na ma, may ma ndégërlaay, yaa ko dige.

29 Sorele maak yoonu fen, te baaxe ma saw yoon.

30 Yoonu worma laa taamu, jàkkaarlook say ndigal.

31 Éy Aji Sax ji, damaa langaamoo sa kàdduy seede, ngalla bu ma rusloo.

32 Sa yoonu santaane laay daw, yaa may may xol bu tàlli.

33 Aji Sax ji, xamal ma li sa dogali yoon yiy firi,

ma topp ko ba mu jeex.

34 May ma dég-dég, ma topp saw yoon, toppe ko xol bu tàlli.

35 Jiite ma ci sa xàllu santaane yi, mooy sama bânneex.

36 Joyantil sama xol, mu féeteek sa kàdduy seede,

te dummóoyu alal ju lewul.

37 May ma, ma fénati caaxaani neen, te musale ma saw yoon.

38 Sang bi, sottalal ma sa dige bi nga digook ku la ragal.

39 Moyale ma gacce gi ma ragal; yaa baaxi ndigal.

40 Maaka namm say tegtal, musale ma sag njekk!

41 Aji Sax ji, yaa ko dige,

dikke ma sa jéfi ngor ak sa wall,

42 ba ku ma kókkali, ma am tontam. Maa doyloo sa kàddu.

43 Bu ma xañ mukk kàddug dëgg,

say àtte laa yaakaar kat.

44 Maay topp saw yoon, sàlloo ko, saxoo ko ba fàww,

45 di daagoo sago,

nde say tegtal laay sàkku.

46 Maay àgge ay buur sa kàdduy seede, te duma rus.

47 Maay bége sa santaane

yi ma sopp,

48 di yóotu sa santaane yi ma sopp, di jàngat sa dogali yoon.

49 Bàyyil xel li nga ma dig, Sang bi; moom laa yaakaar.

50 Lii laay muñe samaw naqar, sa kàddoo may dundal.

51 Nit ñu bew ñi ñaawal nañu ma lool, waaye dèdduwma saw yoon.

52 Éy Aji Sax ji, damaa fàttliku sa àtte ya woon,

daldi muñ.

53 Sama xol daa fees ndax ñu bon ñiy wacc saw yoon.

54 Sa dogali yoon laay woyantoo, fu ma mana sance.

55 Aji Sax ji, tudd naa la guddi, di sàmm saw yoon.

56 Lii laa séddoo, maa topp sa tegtali yoon.

57 Aji Sax ji, yaw laa séddoo; di digee sàmm sa kàddu.

58 Sama léppi xol laa sàkkoo saw yiw, ngalla baaxe ma, yaa ko dige.

59 Damaa seetlu sama jéfin, dëpp, topp sa kàdduy seede.

60 Maa ngi gaawtu,

yeexewma say santaane moos!

61 Buumi ñu bon ñaa ngi may laaw, te sàgganewma saw yoon.

62 Xaaju guddi laay jóg, di la sante sa àttey njekk.

63 Maa xejjoo képp ku la ragal, tey topp say tegtal.

64 Aji Sax ji, sa ngor dajal na àddina; xamal ma sa dogali yoon.

65 Aji Sax ji, def nga la nga dige woon, Sang bi, defal nga ma ngéneel.

66 Xamal ma ngéneeli àtte ak xam-xam, maa doyloo say santaane.

67 Maa jàddoon, nga duma ma, léegi sa kàddu laay sàmm.

68 Yaaka baax tey baaxe; rikk xamal ma say tegtal.

69 Ñu bew ñee yàq sama der aki sos, te ma topp say tegtal, wéetal la.

70 Ñu ngi nii, seen bopp yi, tafas; te man may taqamtikoo saw yoon.

71 Ngéneel la ma duma yi jural, ngir jànge naa ci say tegtal.

72 Sa ngéneelu yoon wi nga digle
moo ma gènal ay junniy xalis ak wurus.

73 Say loxoo ma sàkk, tabax ma,
may ma ag dégg, ma mokkal say santaane,
74 ñi la ragal gis ma, bég;
nde sa kàddu laa yaakaar.

75 Aji Sax ji, ràññee naa ne say ndigal njekk
la,

te worma nga ma dumaa.

76 Ngalla dèfale ma sa ngor;
Sang bi, yaa ko dige.

77 Nanga ma ganesee sa yërmande, ma
dund;

saw yoon ay sama bannex!

78 Yal na ñu bew ñi torox,
ñoo ma lor ak seeni sos,
te man may gèstu say tegtal.

79 Yal na ku la ragal waññiku fi man,
ba xam sa kàdduy seede.

80 Yal naa toppe say tegtal xol bu mat sèkk,
ba duma rus.

81 Sàkku naa sag wall ba xol jeex,
di xaar sa kàddu.

82 Séentu naa sab dige, ba gèt giim;
kañ nga may xettli?

83 Damaa mujj ras ni mbuusum der mu
saxar jàpp,

waaye sàgganewma say tegtal.

84 Ñaata fan laay toogati, Sang bi?
Kañ ngay mbugal ñi ma topp?

85 Ñu bew ñi gasal nañu ma ay yeer,
yu saw yoon diglewul.

86 Sa santaane yépp worma la;
te dees maa toppey sos, wallu ma!

87 Nes tuut ñu sàнке ma fi kaw suuf,
te man dèdduwma say tegtal.

88 Musale ma sa ngor,
ba jèfe sa kàdduy seede.

89 Aji Sax ji, sa kàddoo sax dàkk,
taxaw jonn fa asamaan.

90 Sa worma, ba maasoo maas,
yaa samp suuf, saxal ko.

91 Ci sa ndigal la lépp taxawe ba tey,
lépp ànd, di la jaamu.

92 Su ma bégewuloon saw yoon,
sànkoo sama toskare ji.

93 Duma fàtte mukl say tegtal,
ci nga may musale.

94 Yaa ma moom, wallu ma;
say tegtal laay sàkku.

95 Man la ñu bon ñi tèru, nar maa sànk,
waaye sa kàdduy seede laay niir.

96 Gis naa ne lu mat lu ne am na kemu,
waaye sa santaane mat ba wees kemu.

97 Maaka sopp saw yoon,
di ko jàngat bés bu jot.

98 Li ma xelal ba ma raw noon yi,
mooy sa santaane, yi ma jagoo fàww.

99 Maa gëna ñaw képp ku may jàngal,
nde sa kàdduy seedeey sama njàngat.

100 Maa èpp mag ñi dég-dég,
nde say tegtal laa topp.

101 Luy yoon wu aay, ma moyu,
ba mana sàmm sa kàddu.

102 Say santaane it dèdduwma ko,
nde yaw yaa ma jàngal.

103 Sa kàddooka maa neex,
ba dàqal ma tem-temu lem!

104 Say tegtal laay ràññee,
ba tax ma bañ luy yoonu fen.

105 Sa kàddu laay niitoo samay tànk,
muy leeral samaw yoon.

106 Giñ naa te di ko dèggal,
ne dinaa sàmmonteeek sa ndigali njekk.

107 Toskare naa ba ci lool;

éy Aji Sax ji, musal ma, yaa ko dige.

108 Aji Sax ji, rikk nangul ma kàdduy cant
yi ma lay jébbal,

te xamal ma say ndigal.

109 Sama bakkan ci xott saa su ne,
waaye fàtewuma saw yoon.

110 Ñu bon ñi ma gasal um pax
taxul ma wàcc say tegtal.

111 Maa séddoo fàww sa kàdduy seede,
loolooy seral sama xol.

112 Damaa dogoo jèfe sa dogali yoon,
saxoo ko ba mu jeex.

113 Maa bañ kuy ñarale,
maa sopp saw yoon.

114 Sama rawtu, sama kiiraay, yaw a;
sa kàddu laay xaar.

115 Yeen ñiy def lu bon, xiddileen ma,
ba ma sàmmonteeek sama santaaney Yàlla.

116 Yaa ko dige, dooleel ma, ma dund;
bul tas sama yaakaar.

117 Kàttanal ma, ma raw,
di yittewoo say tegtal, ba fàww.

118 Yaay xarab képp ku wàcc sa dogali
yoon,

ay pexeem neen.

119 Yaay tonni ni purit képp ku bon fi kaw
suuf,

moo tax ma sopp sa kàdduy seede.

120 Sama yaram a ngi daw ndax ragal la,
ragal say àtte.

121 Def naa njub, def njekk;
bu ma wacce ñi may néewal.

122 Sang bi, gàddu ma, ma am jàmm,
bu ma ñu bew ñi néewal.

123 Séentu naa sag wall ak sa kàddug
njekk,

ba saay gèt giim.

124 Sang bi, jéfeel ma sa ngor,
xamal ma sa dogali yoon.

125 Sab jaam laa, may ma, ma ràññee,
ba xam sa kàdduy seede.

126 Aji Sax ji, jéf jot na,

ñee ngi jalgati saw yoon!

¹²⁷ Maa sopp say santaane, mu gënal ma wurus ba ci wurusu ngalam.

¹²⁸ Moo tax foo tegtale, ma rafetlu, lépp luy yoonu fen, ma bañ.

¹²⁹ Sa kàdduy seede kéemaan la, moo tax ma di ko toppe xol.

¹³⁰ Sa pirim kàddu day leeral, di xelal ku xeluwul.

¹³¹ Damaa ña ñafeet, di appaat, ngir namm say santaane.

¹³² Éy geesu ma te baaxe ma, ni nga baaxook ñi sopp sa tur.

¹³³ Dooleelal ma samay tànk, yaa ko dige, te bu ma lenn lu bon man.

¹³⁴ Jot ma ci noteelu doom aadama, ma mana topp say tegtal.

¹³⁵ Sang bi, geesoo ma sag leer, te xamal ma sa dogali yoon,

¹³⁶ ay wali rongoon ay wale saay gët, ndax sàmmeesul saw yoon.

¹³⁷ Aji Sax ji, yaaka jub, te say àtte di yoon.

¹³⁸ Yaa santaane sa kàdduy seede ci njekk ak worma ju yaa.

¹³⁹ Damaa gis bañ yiy sàggane say wax, xol bu tàng di ma rey.

¹⁴⁰ Sang bi, maaka sopp sa kàddu gi set ni weñ gu ñu xelli!

¹⁴¹ Nàkk naa solo, faaleesu ma, waaye sàgganewma say tegtal.

¹⁴² Sag njekk moo dig njekk ba fàww, te saw yoon a dëggju.

¹⁴³ Njekkar ak njàqare dab ma, say santaane di sama bannex.

¹⁴⁴ Sa kàdduy seede di njekk ba fàww, may ma, ma ràññee, ba dund.

¹⁴⁵ Aji Sax ji, woo naa la wall lu ma man, wuyu ma, ma topp sa dogali yoon.

¹⁴⁶ Dama ne: «Wóoy, wallu ma, ma sàmm sa kàdduy seede.»

¹⁴⁷ Damaa jëlu, di la woo, di xaar sa kàddu.

¹⁴⁸ Damay xoole guddi gépp, di jàngat sa kàddu.

¹⁴⁹ Aji Sax ji, sama baat bii, teewloo ko sa ngor,

te musal ma ni nga baaxoo muslee.

¹⁵⁰ Rabatkati pexe yaa ngi jegesi, di nit ñu sore saw yoon.

¹⁵¹ Waaye yaw Aji Sax ji, jege nga, te sa santaane yépp a dëggju.

¹⁵² Yàgg naa xam ne sa kàdduy seede wax la joo saxal dàkk.

¹⁵³ Xoolal sama coono te xettli ma; saw yoon déy, sàgganewma ko.

¹⁵⁴ Àtte ma, ba jot ma; musal ma, yaa ko dige.

¹⁵⁵ Ku bon sore sa wall, ngir sàkkuwul sa dogali yoon.

¹⁵⁶ Aji Sax ji, sa yërmande yaa na; musal ma ni nga ko baaxoo.

¹⁵⁷ Ñi ma topp ak ñi ma baña bare, te taxul ma dëddu sa kàdduy seede.

¹⁵⁸ Damaa gis workat yi, sib leen; ñoo sàmmul sa kàddu.

¹⁵⁹ Seetlul ni ma soppe say tegtal.

Éy Aji Sax ji, musal ma, yaa gore!

¹⁶⁰ Sa mboolem kàddu dëgg la, sa ndigal yépp di njekk, sax dàkk.

¹⁶¹ Ay kilifaa ma topp ci dara, te teewul ma wormaal sa kàddu.

¹⁶² Man de, maa ngi bége sa kàddu ni ku for alal ju bare.

¹⁶³ Fen, ma bañ, ba sib; sa yoon, ma sopp.

¹⁶⁴ Juróom yaari yoon ci bés mágale naa la ko say àttey njekk.

¹⁶⁵ Jàmm ju baree ñeel ku sopp sa yoon, te dara du ko fakktal.

¹⁶⁶ Aji Sax ji, sa wall laa yaakaar, say santaane laa jëfe.

¹⁶⁷ Sama xol laa toppe sa kàdduy seede, te sopp koo sopp.

¹⁶⁸ Damaa topp say tegtal ak sa kàdduy seede,

fépp fu ma jaar kay yaa ngi ciy gis.

¹⁶⁹ Aji Sax ji, yal na sama yuux àgg fa yaw; may ma, ma ràññee, yaa ko dige.

¹⁷⁰ Yal na sama dagaan àgg fa yaw; xettli ma, yaa ko dige.

¹⁷¹ Naa xaacu, woyal la, yaa may jàngal sa dogali yoon.

¹⁷² Naa woye sa kàddu, loo santaane, njekk la.

¹⁷³ Yal nanga ma dikke ndimbal, say tegtal laa taamu.

¹⁷⁴ Aji Sax ji, namm naa sa wall, sa yoon ay sama bannex.

¹⁷⁵ Yal naa dund ba mággal la, say ndigal di sama ndimbal.

¹⁷⁶ Lajj naa ni xar mu réer; gindi ma, Sang bi,

sàgganewma say santaane de!

120

Ma ñaan ci biir tuuma

¹ Muy jàngi yéeg, ñu di ko mágale Yàlla.

Ci sama njàqare laa woo Aji Sax ji wall, mu wuyu ma.

² Éy Aji Sax ji, musal ma ci gémmiñu fenkat,

ak làmmiñu njublan.

³ Yaw boroom làmmiñu njublan, ana lu ñu lay añale

ak lu ñu lay dollu?

4 Xanaa fitti mbër yu ñaw
ak xal yu yànj.

5 Wóoy man mi ganeyaani baadooloy
Meseg ya
tey dali fa xaymay waa Kedar ñu xayadi
ña!

6 Yàgg naa lool ci biir nit ñi bañ jàmm.
7 Man may wut jàmm,
te su ma waxee,
ñoom ñuy ayoo.

121

Ana ku may sàmm?

1 Muy jàngi yéeg, ñu di ko màggale Yàlla.

Damaa séentu tund ya,
te naan fu wall di jóge?
2 Sama wall a nga fa Aji Sax ji,
ki sàkk asamaan ak suuf.

3 Kii du la bàyyi nga tërëf,
sa sàmm bii gëmmul.

4 Kiy sàmm Israyil kay
gëmmul, nelawul.

5 Aji Sax jee lay sàmm,
Aji Sax jee lay yiir,
féete la ndijoor.

6 Du naaj wu lay dal bëccëg,
mbaa leer gu ndaw guddi.
7 Aji Sax jee lay sàmm ci gépp loraange,
di sàmm sa bakkan.
8 Aji Sax jee lay sàmm, dem ak dikk,
tey ak èllëg.

122

Nu ñaanal Yerusalem

1 Muy jàngi yéeg, ñu di ko màggale Yàlla,
ñeel Daawuda.

Maaka bég, ba ñu ma nee:
«Kër Aji Sax ji lanu jëm.»
2 Yaw Yerusalem, noo ngii taxaw sa bunt.

3 Céy, Yerusalem, dëkkub tabax bu baax,
bi booloo, di benn.

4 Fii la giiri Israyil di yéegsi,
di giir yi Ki Sax séddoo.

Ñu ngi santsi Aji Sax ji,
ni ko Israyil warloo.

5 Fii la ngànguney Israyil tege,
askanu Daawuda toog ca, di àtte.

6 Dagaanleen jàmmi Yerusalem:
«Yerusalem, yal na sa xeli soppe dal,
7 jàmm ne ñoyy fi say tata wër,
te xel dal ci biir kəri Buur.»

8 Mbokk ak xarit a waral
may ñaan jàmmi Yerusalem.

9 Sunu kër Yàlla Aji Sax jee ma tax

di sàkku ngëneelu Yerusalem.

123

Yàlla, fajal nu gacce

1 Muy jàngi yéeg, ñu di ko màggale Yàlla.

Yaw laay séentu,
yaw mi toog fa asamaan.

2 Ma ne, ni jaam bu góor di wékke sangam
bèt,
jaam bu jigéen di ko wékke bët sangam bu
jigéen,

ni lanuy wékke sunu Yàlla Aji Sax ji bët,
ba kerroog mu baaxe nu.

3 Éy Aji Sax ji, baaxe nu, rikk baaxe nu,
dañu noo torxal, ba nu ne tott.

4 Ñu reew ñaa ngi nuy ñaawal, sunu xol
fees,
ñu bew ñaa ngi nuy sewal.

124

Nanu sante Aji Sax ji wallam

1 Muy jàngi yéeg, ñu di ko màggale Yàlla,
ñeel Daawuda.

Éy su dul woon ak Aji Sax ji nu nekkal!
Israyiloo, waxati ko:

2 su dul woon ak Aji Sax ji nu nekkal,
ba ñu nu jógalee,

3 ba nit ña xadaroo sunu kaw,
dañu nu doon wonn, nuy dund,

4 dañu nu doon mëdd nim ndox,
def um wal, buub nu,

5 def waame wuy wal-wali,
buub nu, yóbbu.

6 Cant ñeel na Aji Sax ji,
ki nu bàyyiwul, noon yi yàpp nu.

7 Danu ne fërr, nim picc
mu récc fiiru rébb,
fiir ga toj, nu raw.

8 Sunu ndimbal a ngi ci turu Aji Sax ji,
ki sàkk asamaan ak suuf.

125

Ku doyloo Aji Sax ji raw

1 Muy jàngi yéeg, ñu di ko màggale Yàlla.

Ku doyloo Aji Sax ji,
yaay tundu Siyon, doo toxu;
dangay sax ba fàww.

2 Ni tund yi yéewe Yerusalem,
ni la Aji Sax ji yéewe ñoñam,
tey ak èllëg.

3 Nguur gu bon du saxe
kaw suuf su nit ñu jub muurloo.
Lu ko moy ñu jub ñi sàkku lu bon,
di ko jéfe.

⁴ Éy Aji Sax ji, baaxeel ku baax,
ak kuy mébét njub.

⁵ Waaye kuy topp yoonu ndéngte,
Aji Sax jee koy sànk,
boole kook kuy def lu bon.
Yal na jàmm dal Israyil.

126

Yàlla, delloo nu

¹ Muy jàngì yéeg, ñu di ko màggale Yàlla.

Ba Aji Sax ji delloo waa Siyon seen réew,
danoo meloon ni ñuy gént,
² di reek a sarxolle rekk.

Yéefar yi naa:

«Lu réy la Aji Sax ji defal ñii.»

³ Lu réy la nu Aji Sax ji defal moos,
nu bég.

⁴ Aji Sax ji, rikk delloo nu na woon,
ni ngay delloo wal yu ñiis, mu walaat ca
àllub Negew.

⁵ Kuy ji di jooy,
yal na góob, di sarxolle.

⁶ Ku doon wéya wéy, di jooy;
ñàbb mbuusam jiwoom,
yal na dikka dikk, di woy,
ñibbaale sabaaram.

127

Barkeb Yàllaa wóor

¹ Muy jàngì yéeg, ñu di ko màggale Yàlla,
ñeel Suleymaan.

Kër, su ko Aji Sax ji tabaxul,
ku ko tabax, neen nga doñ-doñi.
Ab dëkk, su ko Aji Sax ji wattuwul,
ku ko wattu, neen nga teewlu.

² Neen it la nit di teela jóg
ak a guddée téd, di doñ-doñi lu mu lekk:
Aji Sax ji leel na soppeem lu ni day,
fekk ko muy nelaw.

³ Ma ne, doom Aji Sax jee koy sédde,
njurum doom yool la.

⁴ Doom joo jure ndaw,
mooy fitt ci loxol jambaar;

⁵ ndokklee ku ci mbuusam fees,
ba bu ñu taseek ub noon ca pénc ma,
duñu am gacce mukk.

128

Ragal Yàlla, jàmmi kër

¹ Muy jàngì yéeg, ñu di ko màggale Yàlla.

Ndokklee képp ku ragal Yàlla,
di jéfe ay yoonam.

² Yaay lekk saw ñaḡ,
mbégteek ngéneel ñeel la.

³ Sa jabar ni garab gu nangoo sa wanag,

say doom wëra wër sa ndab ni njëmbat lu
jebbi.

⁴ Ki ragal Aji Sax jaa ngoog,
nii rekk lay barkeele.

⁵ Yal na la Yàlla barkeele fii ci Siyon;
yal nanga teewe xéewalu Yerusalem
sa giiru dund gépp,

⁶ te nga gis say sèt.
Yal na jàmm dal Israyil.

129

Noon manul Israyil

¹ Muy jàngì yéeg, ñu di ko màggale Yàlla.

Ba may ndaw ba tey, ñu ngi may sonala
sonal.

Israyiloo, waxati ko:

² Ba may ndaw ba tey, ñu ngi may sonala
sonal,

te taxul ñu man ma.

³ Sama gannaaw gi lañu gábba gább,
rèdd koo rèdd nib tool.

⁴ Waaye Aji Sax ji boroom njekk
dog na buumi ñu bon ña.

⁵ Képp ku noonoo Siyon
yal nañu ko dèpp, gacceel ko.

⁶ Yal nañu mel ni ñax mu saxem xadd,
balaa law, lax.

⁷ Du doyub ñëb ku ko dog;
du doyub say ku ko for.

⁸ Ku fa jaare it du ko ne:
«Jaajëf, Aji Sax ji barkeel;
jaajëfe yaw, yal na Aji Sax ji barkeel.»

130

Nu séentu njotug Yàlla

¹ Muy jàngì yéeg, ñu di ko màggale Yàlla.

Aji Sax ji, ci ay xóote laa lay wooye.

² Boroom bi, déglu ma,
teewlu ma, ma tinu la.

³ Ki Sax, yaw, soo doon lim bàkkaar,
Boroom bi, ana kuy taxaw?

⁴ Waaye yaay jéggale,
ñu ragal la.

⁵ Damay xaar Aji Sax ji, di ko xaare xol,
di yaakaar kàddoom.

⁶ Wattukat bi yàkkamti njël,
wattukat bi yàkkamti njël, laa ne,
ni ma yàkkamtee Aji Sax jee ko raw.

⁷ Éey Israyil, négandikul Aji Sax ji.
Aji Sax jee gore,
te yaatug njot.

⁸ Mooy jot Israyil ci ñaawtéefam yépp.

131*Damaa woyof, gëm Yàlla*

¹ Muy jàngí yéeg, ñu di ko màggale Yàlla,
ñeel Daawuda.

Éy Aji Sax ji, man de, réy-réyluwma,
danñiiraluma,
xintewoowma lu réy it,
mbaa lu ma èlëm.

² Xanaa ne tekk, ne cell,
ni perantal ak ndeyam;
sama xel dal ni perantal.

³ Éey Israyil, yaakaaral Aji Sax ji
tey ak èllég.

132*Yàlla digoo naak ki mu fal*

¹ Muy jàngí yéeg, ñu di ko màggale Yàlla.

Éy Aji Sax ji, bàyyil xel Daawuda,
ak gépp njàqareem.

² Moo giñaloon Aji Sax ji,
moo digook Mbërum Yanqóoba ma.

³ Mu ne: «Duma ñibbi,

⁴ duma tēddi sama kaw lal ba,
duma nelaw, duma gëmm sax bēt,
⁵ li feek sàkkaluma Aji Sax ji bérab,
ba dëkkal Mbërum Yanqóoba ma.»

⁶ Ma ne, Efrata lanu dégg gaalu Yàlla ga,
fekk ko àllub Yaar.

⁷ Nan dem ba kërám,
sujjootali ndëggēstalu tánkam ya.

⁸ Aji Sax ji, jógal agsi sa dal-lukaay,
yaak sa gaal gi jëmmal sa doole.

⁹ Say sarxalkat, yal nañu woddoo njekk,
sa wóllère yi sarxolleendo.

¹⁰ Xoolal ci Daawuda, sa jaam ba,
bul gântu ki nga fal.

¹¹ Aji Sax ji daa giñal Daawuda
dégg gu mu dul dēddu,
ne ko: «Ku jóge sa geño
laay wuutal ci sa jal bi,
¹² te say doom, bu ñu sàmmeé sama
kóllère,

ak sama kàdduy seede yi ma leen di xamal,
seeni doom it ñooy tooge
sa jal ba fàww.»

¹³ Aji Sax ji kat a tànn Siyon,
taamu faa dëkke.

¹⁴ Mu ne: «Fii laay dal-loo ba fàww,
fii laay dëkk, maa ko taamu.

¹⁵ Dund bi, ma barkeela barkeel,
néew-ji-doole yi, ma reggal;

¹⁶ sarxalkat yi, ma wodde njot;
way-gëm ñi di sarxollee sarxolle.

¹⁷ Fa laay dooleele Daawuda,
taalal ki ma fal,

¹⁸ ay noonam, ma wodde gâcee;
moom, kaalaam ne ràññ.»

133*Bokk, bennoo neex*

¹ Muy jàngí yéeg, ñu di ko màggale Yàlla,
ñeel Daawuda.

Céy liika baax te neexati,
ay bokk yu bokk dëkk, di benn!

² Daa neex ni diwu bopp gu xeeñ,
siite sikkim, bu mel ni sikkimu Aaróona,
rogalaat ba ci mbubbam,

³ neex ni layub tundu Ermon,
neex ni lay bu ni mel tey rogalaate tundi
Siyon.

Fa la Aji Sax ji dogal barke,
muy dund gu dul jeex.

134*Way-gëm ñaa ngi sant*

¹ Muy jàngí yéeg, ñu di ko màggale Yàlla.

Ayca, santleen Aji Sax ji,
yeen jaami Aji Sax ji yépp,
yeen ñiy taxawe kër Aji Sax ji guddi.
² Yékkatileen seeni loxo bérab bu sell ba,
te sant Aji Sax ji.

³ Yal na la Aji Sax ji barkeele fa Siyon,
moom mi sàkk asamaan ak suuf.

135*Aji Sax ji jot na Israyil*

¹ Màggal-leen Ki Sax!
Màggal-leen turu Aji Sax ji,
éey jaami Aji Sax ji, màggal-leen,
² yeen ñi taxawe kër Aji Sax ji,
fi sunu biir èttu Yàlla bi.
³ Màggal-leen Ki Sax, Aji Sax jee baax!
Kañleen ko, kee sopplu!
⁴ Ki Sax a taamu Yanqóoba,
muy Israyil mi mu séddoo.

⁵ Maa xam ne Aji Sax ji màgg na!
Sunu Boroom a sut lépp lu ñuy jaamu.

⁶ Lépp lu Aji Sax ji namm,
moom lay def asamaan ak suuf,
ak biir gééj ak xóote yépp.

⁷ Mooy yékkateey niir fa cati àddina,
sàkkal taw ay melax,

yebbee ngelaw cay dencam,
⁸ fàdd luy taaw fa Misra,
doom aadama, ba ci mala.

⁹ Yeen waa Misra, moo yónnee ay firndeeki
kéemaan fi seen biir,
ñeel Firawnaak jawriñam ñépp.

¹⁰ Moo duma ay xeeti xeet,
bóom buur yu mag yi,

¹¹ muy Siwon buurub Amoreen ña,
ak Og buuru Basan,
ak buuri Kanaan ñépp.

¹² Moo nangu seen réew, séddale,
bànni Israyil ñiy ñoñam séddoo.

13 Aji Sax ji, sa tur ba fàww;
 Aji Sax ji, sa woy a saxal maasoo maas.
 14 Aji Sax ji kay ay àtte ñoñam ñi,
 di ñeewante jaamam ñi.
 15 Tuuri yéefar yi, xalis ak wurus,
 loxoo ko sàkk.
 16 Am gémmiñ te du wax,
 ami gêt te du gis,
 17 ami nopp te du dégg,
 du sax noowal bakkan.
 18 Ñi sàkk yii tuur, yal nañu mel ni ñoom,
 ñook ñi leen wóolu ñépp.
 19 Éey waa kër Israyil, santleen Aji Sax ji!
 Éey waa kër Aaróona, santleen Aji Sax ji!
 20 Éey waa kër Lewi, santleen Aji Sax ji!
 Yeen ñi ragal Aji Sax ji, santleen Aji Sax ji!
 21 Nañuy sante Aji Sax ji Siyon,
 moom mi dèkke Yerusalem.
 Mággal-leen Ki Sax!

136

Yàllaa am kóllère

1 Nangeen sante Aji Sax ji mbaaxam.
 Kee saxoo ngoram!
 2 Santleen Yàllay yàlla yi.
 Kee saxoo ngoram!
 3 Santleen Sangu sang yi.
 Kee saxoo ngoram!
 4 Moo wéetoo jaloore yu mag yi.
 Kee saxoo ngoram!
 5 Moo sàkke asamaan manoore.
 Kee saxoo ngoram!
 6 Moo lal suuf ca kaw ndox ma.
 Kee saxoo ngoram!
 7 Moo sàkk leer yu mag yi:
 Kee saxoo ngoram!
 8 jant bi yilif bëccëg,
 Kee saxoo ngoram!
 9 weer ak biddiww, guddi.
 Kee saxoo ngoram!
 10 Moo fàdd taawi Misra yu góor ya,
 Kee saxoo ngoram!
 11 seppée bànni Israyil ca ñoom,
 Kee saxoo ngoram!
 12 ci dooley loxoom ak kàttanu pèrègam.
 Kee saxoo ngoram!
 13 Moo xar géēju Barax ya jaar,
 Kee saxoo ngoram!
 14 jàllale bànni Israyil ca digg ba.
 Kee saxoo ngoram!
 15 Moo xalab Firawnaak mbooloom ca
 géēju Barax ya.
 Kee saxoo ngoram!
 16 Moo jiite ñoñam ca màndij ma.
 Kee saxoo ngoram!
 17 Moo duma buur yu mag ya,
 Kee saxoo ngoram!
 18 bóom buur yu mágg ya,
 Kee saxoo ngoram!

19 reyaale Siwon buurub Amoreen ña,
 Kee saxoo ngoram!
 20 reyati Og buuru Basan.
 Kee saxoo ngoram!
 21 Moo nangu seen réew, joxe,
 Kee saxoo ngoram!
 22 sédde Israyil ma dib jaamam.
 Kee saxoo ngoram!
 23 Ci biir notaange la nu geesoo,
 Kee saxoo ngoram!
 24 ne nu siféet ci loxoy noon ya.
 Kee saxoo ngoram!
 25 Mooy leel bépp boroom bakkan.
 Kee saxoo ngoram!
 26 Santleen Yàlla mi ci asamaan!
 Kee saxoo ngoram!

137

Jooye nanu àll

1 Ca tàkkal dexi Babilon,
 foofa lanu daa toog,
 fàttliku Siyon, jooy.
 2 Ca garab ya
 lanu daa wékk sunuy xalam.
 3 Fa la nu sunuy sang daa woýloo,
 not nu, bëgg nu bégal leen,
 naan: «Woyal-leen nu ci woyi Siyon.»
 4 Moo nu nuy woye woyu Aji Sax ji
 kaw suufas yéefar?
 5 Éy Yerusalem, su ma la naree fàtte,
 yal na ma doole dèddu!
 6 Yerusalem, su ma la fàttlikuwwul,
 fonk la, ba gën laa bége lépp,
 yal na sama làmmiñ tafoo sama denqleñ.
 7 Aji Sax ji, fàttlikul Edomeen ña,
 keroog jantub Yerusalem,
 ba ñu naan: «Màbbleena màbb,
 ba kenug dèkk bi siif!»
 8 Yeen waa Babilon, gi ñu nara fàllas,
 ndokklee ku leen fey jéf,
 ja ngeen nu def!
 9 Ndokklee ku ne cas seeni fere,
 tas ciw doj!

138

Aji Sax ji waccu ma

1 Ñeel Daawuda.
 Ma sante la sama léppi xol,
 woy la, gàngooru Yàlla ga ca kaw seede.
 2 Ma sujjóot jublook sa kër gu sell gi,
 di wormaal saw tur,
 ngir sa ngor ak sa worma.
 Mággal nga sa tur ak sa kàddu,
 ba mu tiim lépp.
 3 Bés ba ma wootee, yaa ma wuyu,
 ñemeel ma, dooleel ma.

4 Aji Sax ji, na la buuri àddina yépp mǎggal,

ñoon dégg káddu yi nga wax.

5 Nañu woy say jaloore, naan: «Aji Sax jeeka mǎgg tednga!»

6 Aji Sax jee kawé!
Ku toroxlu, mu niir;
ku réy, mu ñooru.

7 Ma wéye njàqare,
nga musal ma,
dogalee sa loxo merum noon,
walloo ma sa ndijoor.

8 Aji Sax jee may feyul.
Éy Aji Sax ji, yaa saxoo ngor!
Bul wacc ñi nga binde sa loxo.

139

Aji Sax jee ma xam, ba jeexal ma

1 Mu jëm ci njiital jàngkat yi, ñeel Daawuda, di kàddug Sabóor.

Aji Sax ji, yaa ma natt, xam ma;
2 yaa xam sama toogaay ak sama tax-awaay,

di ràññee fu sore samay xalaat,
3 di càmbar samab dox ak sama tëraay,
yittewoo lépp lu may def.

4 Aji Sax ji, bala maa wax baat,
ndeke yaw, xam nga lépp.

5 Kanam ak gannaaw nga ma dare,
teg ma sa loxo.

6 Ni nga ma xame daa yéeme,
xóot lool, ba wees ma.

7 Fu ma jëm, ba sore la?
Fu ma daw jëm, foo teewul?

8 Ma ñalgu ba asamaan, yaa nga fa!
Ma tëri njaniiw, ndeke yaa nga fa!

9 Ma war laafi njël,
dèkki wàllaa géej,

10 nga tettee ma fa ba tey,
téyee ma sa ndijoor.

11 Su ma noon: «Na ma lëndëm mëdd boog,

ba leer gi far guddil ma.»

12 du tax lëndëm lëndemal la dara.
Guddi da laa leeralal ni bëccëg,
lëndëm dig leer fi yaw.

13 Yaa ma sàkkal xol ak xalaat,
ràbbe ma sama biiru ndey.

14 Naa la sante sama bind bu raglu bii te yéeme,

say jalooree di kéemaan, bir na ma!

15 Sama jëm jii umpu la,
ba muy bindu ci kumpa,
mel ni lu ñu ràbbe ci xóotey suuf.

16 Gis nga ma, ba ma diw lumb;
sa téere lim na
fan yi nga ma àppal,

ba ca benn dooragul.

17 Yàlla, say xalaat aka maa yéem!
Ndaw lim bu réy!

18 Su ma ko doon waññ, moo ëpp feppi suuf.

Maa ngii yewwu, ne feek yaw ba tey.

19 Éy sama Yàlla, soo reyoon ñu bon ñiii!
Yeen bóomkat yi, soreleen ma!

20 Ñii sa tur lañuy luubale,
noonoo la, di tudd sa tur ciy caaxaan.

21 Aji Sax ji, maaka bañ ñi la bañ
te sib ñi lay gántal.

22 Dama leena bañ ba fa mbañeel yem;
samay noon dégg lañu.

23 Yàlla, seetlu ma, ba ràññee sama xol;
natt ma, ba ràññee sama xalaati xol.

24 Xoolal ndax maa ngi doxe yoon wu aay,
te nga teg ma ci yoon wi sax.

140

Ku ñu toñal a ngi ñaana

1 Mu jëm ci njiital jàngkat yi, di kàddug Sabóor, ñeel Daawuda.

2 Éy Aji Sax ji, xettli ma ci ku bon,
musal ma ci nitu fitna,

3 kuy nas lu bon,
tey saxoo di sookey xare,

4 daas làmmiñam ni jaan,
guux danjaru ñàngóor.

Selaw.

5 Éy Aji Sax ji, aar ma ci loxol ku bon,
musal ma ci nitu fitna,
ku may fexee fakktal.

6 Ñu bew ñee ma làqali yeer,
lalal may buum aki caax,
feggal ma seeni fiir ci yoon wi.

Selaw.

7 Dama ne Aji Sax ji, yaay sama Yàlla;
Aji Sax ji, teewlul, ma dagaan la.

8 Aji Sax ji Boroom bi may walloo doole,
yaa ma yiir keroog bésub xare.

9 Aji Sax ji, bul may ku bon nammeelam,
bul joyal pexeem, muy yékkatiku.

Selaw.

10 Ñi ma sam, yal na seen ayu làmmiñ
képpu seen kaw bopp.

11 Yal nañu képpoo xali sawara,
tàbbi ciy pax te dootuñu jóg.

12 Kuy yaq der, yàlla bumu toog ci réew mi.

Nitu fitna, yal na ko ay topp, ba dal ci kawam.

13 Xam naa ne Aji Sax jeey jox néew-ji-doole dégg;
di sàmm àqu baadoolo.

¹⁴ Ku def njekk kay a lay sant;
ku jub dëkke saw yiw.

141

Yàlla, sàmmal sama làmmiñ

¹ Muy kàddug Sabóor, ñeel Daawuda.

Aji Sax ji, woo naa la, gaawe ma!
Bu ma lay woo, teewlu ma.

² Yal nanga ma nangul samag ñaan
ni cuuraay lu ñu la taalal,
yoxo yi ma la tàllal di saraxu ngoon soo
gërëm.

³ Aji Sax ji, sàmmal ma sama làmmiñ,
saytul ma sama kàddu.

⁴ Bu ma xiir ci lu aay,
may jëfe jëf ju bon,
ànd ceek ñiy jëf lu ñaaw,
di wàlli seeni bernde.

⁵ Kuy déggal Yàlla, man na maa dóor,
bantal ma ci ngor.

Loolu ngèneelu cuuraay la, duma ko bañ.
Waaye maa ngi saxoo ñaan pexey noon
moy.

⁶ Yal nañu fenqe seeni njiit ciw doj,
ba noon yi xam ne dëgg laa wax.

⁷ Ni ñuy gâbbe suuf ba mu ne ñafeet,
ni la njaniw di ñaye,
aw seeni yax yu tasaaroo.

⁸ Aji Sax ji Boroom bi, yaw laa wékki gët,
yaw laa làqoo,
bu ma seetaan, ma dee.

⁹ Musal ma ci yeer yi ñu ma gasal,
ak fiir yi ma defkati ñaawtéef yi tegal.

¹⁰ Yal na ku bon tàbbi cig fiiram,
te man ma teggi, wéy.

142

Aji Sax ji rekk a ma yég

¹ Muy taalifu ñaan bu ñeel Daawuda, ba
mu nekkee ca xunti ma.

² Ma àddu, ñaan Aji Sax ji;
àddu ca kaw, di tinu Aji Sax ji,

³ sippi ko sama tawat,
diis ko sama njàqare.

⁴ Bu ma yoqee,
ràññee nga samay jéego;
yoon wi may jaare
lañu ma làqal am yeer.

⁵ Ma geesu ndijoor, xool;
du kenn ku ma faale.

Rawtu réer ma,
du kenn ku sama bakkan saf.

⁶ Aji Sax ji, ma woo la wall;
ma ne, yaay sama kiiraay,
di sama séddoo fi kaw suuf.

⁷ Teewlul, ma ne wóoy,
damaa manatul,
xettli ma ci ñi ma topp,
dañu maa épp doole.

⁸ Ngalla génne ma fi ma tëje,
ma sant la.
Man la way-gëm ñi di yéew èllëg,
yaa may xéewale ab yool.

143

Aji Sax jeey sama yaakaar

¹ Muy kàddug Sabóor, ñeel Daawuda.

Éy Aji Sax ji, déglul, ma ñaan la;
teewlul, ma tinu la;
nangul ma ci sa wormaak sa njekk.

² Sang bi, bul layook man;
kenn jubul fi sa kanam, du kuy dund.

³ Noon a ma sambal,
daane ma, joggati,
dëel ma ci lëndëm
ni ku dee bu yàgg.

⁴ Sama doole jeex tàkk,
sama xol jeex, ma ne yàcc.

⁵ May fàttliku bu jëkkoon,
di xalaat sa jaloore yépp,
seetaat li nga def.

⁶ Ma tàllal lay loxo,
di la sàkku, ni suuf su mar di sàkkoo ndox.
Selaw.

⁷ Aji Sax ji, gaawal wuyu ma;
sama xol a jeex, ma ne yàcc,
bu ma xañ sa yiw,
ma yem ak kuy tàbbiji biir pax.

⁸ Xéye ma sa ngor,
yaw laa wóolu;

xamal ma fu may doxe,
yaw laa wékk sama bakkan.

⁹ Aji Sax ji, musal ma ci noon yi,
yaw laa làqoo.

¹⁰ Jàngal ma, ma jëfe sa coobare;
yaa di sama Yàlla.

Yal na ma sam xel jiitee mbaax
ci yoon wu tàlli.

¹¹ Aji Sax ji, musal ma ngir saw tur,
jëfeel sag njekk,
teggil ma njàqarey bakkan.

¹² Sànk'al ma noon yi ci sa ngor,
bóomal ma bépp bañ.

Man de, maay sab jaam!

144

Aji Sax ji, laggsil

¹ Ñeel Daawuda.

Cant ñeel na Aji Sax ji ma sës,
mu di ma jàngal xeex,

di ma tàggat ngir xare,

² di sama wóllère, di ma yiir,
di ma làq, di ma xettli,

di ma aar, ma di ko làqoo,
 mu di ma nangulal ay xeet.
³ Aji Sax ji, luy nit, ba nga di ko ràññee?
 luy doom aadama, ba nga di ko faale?
⁴ Nit ni ngelaw,
 ay fanam di takkdeer, wéy.
⁵ Aji Sax ji, firil asamaan, wàcc;
 laal tund yi, ñu saxar.
⁶ Melaxal, falaxe noon yi;
 fittal, ñu fêlfoo,
⁷ nga yóotoo ma fu kawe,
 xettli ma, wallu ma ci doxandéem
 yi def wali wal fi sama kaw,
⁸ di fen,
 di giñ ay fen.
⁹ Yàlla, naa la woyal woy wu yees,
 xalamal la xalamu fukki buum.
¹⁰ Yaay may buur yi ndam,
 yaa musal sa jaam ba, Daawuda
 ci saamar bu aay.
¹¹ Musal ma, xettli ma
 ci loxol doxandéem
 yiy fen, di giñ ay fen.

¹² Su boobaa sunu doom yu góor
 màgge ndaw, ni gàncax gu mat sèkk;
 sunuy janq jekk ni doji yett,
 yu ñu tabaxe kër buur.
¹³ Sunuy sàq feese wirgoy wirgo,
 sunuy gàtt jur junni,
 ba fukki junni (10 000) ci parlu yi,
¹⁴ nag yi èmb ba diis,
 du mbas, du biir bu yaqu,
 te deesu fi yuuxoo pénc ya.
¹⁵ Ndokklee xeet wu am lii!
 Ndokklee xeet wu yàllawoo Aji Sax ji!

145

Ma kañ Buur Yàlla

¹ Muy jàngi màggal, ñeel Daawuda.

Sama Yàlla, Buur bi, naa la màggal,
 teral sa tur ba fàww.
² Bésoo bés ma di la sant,
 di màggal sa tur ba fàww!
³ Aji Sax jee màgg te jara màggala
 màggal,
 kii màggam amul kemu!
⁴ Na maasoo maas di màggal say jaloore,
 di biral sa njambaarte.
⁵ Sa leeru tednga ji ne ràññ,
 ak sa jéf ju yéeme laay jàngat!
⁶ Sa dooley jéf ju raglu dees na ko jottli,
 te sa màggaay maa koy yéene.
⁷ Sa mbaax gu réy, dees na ko tari,
 te sag njekk, dees na ko woy.
⁸ Yiw ak yërmande, Aji Sax ji;
 kee muñ mer te bare ngor!
⁹ Aji Sax jee baaxe ñépp,
 di yèrèm lu mu sàkk.

¹⁰ Aji Sax ji, lépp loo sàkk a lay gèrèm,
 sa wóllère yi di la sant,
¹¹ di tudd sa tedngay nguur,
 tey dégtale sag njambaar,
¹² doom aadama xam say jaloore
 ak sa tedngaak sa darajay nguur.
¹³ Sa nguur ay nguur gu sax dàkk,
 sa kilifteef ñeel maasoo maas.

Aji Sax ji daa sàmm ay waxam,
 gore ciy jéfam.
¹⁴ Ku daanu, Aji Sax ji wallu;
 ku sègg, mu siggil.
¹⁵ Népp a la wékk bêt, di yaakaar,
 te bu jotee, yaa leen di leel,
¹⁶ tàllal sa loxo,
 reggal luy dund, ba xolam sedd.
¹⁷ Aji Sax ji, jéfinam jépp njekk la,
 jéfam jépp ngor la.
¹⁸ Aji Sax ji, képp ku ko woo wall, mu jege
 la,
 képp ku ko woo wall te muy dègg.
¹⁹ Nammeelu ku ko ragal, mu sottal;
 yuuxam, mu dègg, musal.
²⁰ Aji Sax jee sàmm kuy soppeem,
 di sànk képp ku bon.
²¹ Naa sàlloo sant Aji Sax ji,
 na luy dund saxoo dàkk di màggal sell-
 ngay turam!

146

Buur Yàllaa jara wóolu

¹ Màggal-leen Ki Sax!
 Naa màggale Aji Sax ji xol,
² li feek may dund, di ko kañ,
 li feek may noyyi, di woy sama Yàlla.

³ Buleen wóolu kilifa,
 doom aadama amul wall.
⁴ Noo ga day récc, mu dellu suuf;
 bu bés baa, pexeem jeex.

⁵ Ndokklee kuy dimbalikoo Yàllay
 Yanqóoba;
 di yaakaar Yàllaam Aji Sax ji,
⁶ ki sàkk kaw ak suuf,
 géej ak lu ci biiram,
 di sàmm dègg ba fàww,
⁷ di àtte néew-ji-doole,
 di leel ku xiif.
 Aji Sax jeej tiji ku ñu těj.
⁸ Aji Sax jeej xippil silmaxa,
 di siggil ku sègg.
 Aji Sax jee sopp ku jub.
⁹ Aji Sax jee sàmm doxandéem,
 taxawu jirim ak jètun,
 waaye mooy lajjal pexem ku bon.

¹⁰ Aji Sax jeej nguuru ba fàww.
 Yaw Siyon, sa Yàllaa ñeel maasoo maas.
 Màggal-leen Ki Sax!

147

Yállaa gën ci àddina, gën ci nit

¹ Mànggal-leen Ki Sax!

Kań sunu Yállaa baax,
mànggal koo neex te war.

² Aji Sax jaa ngi tabaxaat Yerusalem,
di délloosi ña ñu dàqe Israyil,

³ di faj naqaru xol,
fajtal góomi boroom.

⁴ Mooy lim biddiww yi,
tudd bu ci nekk.

⁵ Sunu Boroom a mągg, bare doole;
am xelam wees kemu.

⁶ Aji Sax ji, néew-ji-doole, mu yenni;
ku bon, mu daane ci suuf.

⁷ Woyeleen Aji Sax ji kaddug cant,
kañeleen sunu Yàlla jii ay xalam;

⁸ mooy sänge asamaan ay niir,
tawal suuf,

saxal tund yi am ñax,

⁹ leel mala,

xol liiru baaxoñ bu jooy.

¹⁰ Kii nawul dooley fas,
gërëmul kattanu jambaar.

¹¹ Ki Aji Sax ji gërëm mooy ki ko ragal
te di ko yaakaare ngoram.

¹² Yerusalem, sargal-leen Aji Sax ji!
yeen waa Siyon laa ne, mąggal-leen seen
Yàlla!

¹³ Mooy těj rąpp seen bunti dëkk,
barkeel seen askan wa ca biir,

¹⁴ jammal seen suufas réew,
reggal leen ngëneelu pepp,

¹⁵ yónee suuf ndigalam,
kaddoom ne coww, daw ca.

¹⁶ Mooy tawal yuur bu mel ni wëttéen,
di lay lay bu sedd, mel ni pënd ci suuf.

¹⁷ Mooy yuri tawub yuuram niy donj.
Bu ni seddee, ana kuy taxaw?

¹⁸ Mu yebal kaddoom, seeyal;
wal ngelawam, ndox walalaan.

¹⁹ Mooy wax Yanqóoba kaddoom,
dogalam yaak ndigali yoonam ñeel Israyil.

²⁰ Loolu defalu ko wenn xeet;
kenn xamu ci ndigali yoonam.

Mąggal-leen Ki Sax!

148

Na àddina wërngal kępp mąggal Yàlla

¹ Mąggal-leen Ki Sax!

Nangeen mąggale Aji Sax ji fa asamaan,
mąggale ko fa kawa kaw.

² Mąggal-leen ko, yeen malaakaam yépp,
mąggal-leen ko, yeen gąngooram yi.

³ Mąggal-leen ko, yeen jant beek weer wi,
mąggal-leen ko, yeen mboolem biddiww yii
di nes-nesi.

⁴ Mąggal-leen ko, yeen asamaani kaw-li-
kaw,

ba ca ndox ma tiim asamaan ya.

⁵ Nañu mąggal turu Aji Sax ji,
kii kat a santaane, lii lépp am.

⁶ Moo leen samp, ñu sax ba faww,
mu dogal ko, te du toxu.

⁷ Nangeen mąggale Aji Sax ji fa kaw suuf,
yeen ninki-nąnkay géej ak xóote yépp,

⁸ ba ca melax yaak doj yu sedd yay taw,
ak tawub yuur akub lay,

ba ca ngélén yu mag yay def ndigalam.

⁹ Mąggal-leen ko yeen tund yu mag yeek
yu ndaw yépp,

ba ci garab yiy meññ ak garabi seedar yi,
¹⁰ ba ci mala yépp, yu àll ak gépp jur

ak luy raam ak njanaaw,

¹¹ ak buuri àddinaak xeet yépp,
ak kilifa yeek njiiti àddina yépp,

¹² xale bu góor ak bu jigéen,
mag ak ndaw.

¹³ Mąggal-leen turu Aji Sax ji,
moom donj la turam kawe,

darajaam tiim asamaan ak suuf.

¹⁴ Moo dooleel ñoñam,
wólléereem ñiy mbooloom banni Israyil,

xeet wi mu xejjoo, di ko mąggal.
Mąggal-leen Ki Sax!

149

Na Israyil mąggal Ki Sax

¹ Mąggal-leen Ki Sax!

Woyleen Aji Sax ji woy wu yees,
mąggal ko fi ndajem wólléereem ñi.

² Na Israyil bége kii ko sakk,
doomi Siyon, laa ne, ñu bannéexoo seen
buur bi.

³ Nañu mąggale turam am pecc,
tęggal ko, xalamal ko.

⁴ Aji Sax jee safoo ñoñam,
di terale néew-ji-doole ag muc.

⁵ Na wóllérey Yàlla bannéexoo seen ndam,
bu ñu téddee sax, di sarxolle,

⁶ di xaacuy kañ Yàlla,
nàbbaale saamaru ñaari ñawka,

⁷ ngir дума yéefar yi,

mbugale ko yooyu xeet,

⁸ yeewe seeni buur ay callala,

jéngé seeni njiit jéngi weñ,

⁹ ngir sotalal leen àtte bi ñu bind,

muy ndamu wóllérey Yàlla yépp.

Mąggal-leen Ki Sax!

150

Mąggal-leen Ki Sax!

¹ Mąggal-leen Ki Sax!

Nangeen mąggale Yàlla biir kërám gu sell,
mąggale ko ca tatay asamaanam.

² Mąggaleen ko ay jaloooreem,
mąggale ko mąggam gu réy.

³ Mąggaleen kog liit,

màggale ko xalam ak moroom ma.

⁴ Màggaleleen ko njiin aki pooj,
màggale ko xalam ak toxoro.

⁵ Màggaleleen ko tēggum weñ mu xumb,
màggale ko tēggum weñ mu kawe.

⁶ Na lépp luy noyyi màggal Ki Sax!
Màggal-leen Ki Sax!

Kàddu yu Xelu

Li tax téere bi jóg

¹ Kàddu yu xelu yu Suleymaan buurub Igrayil, di doomu Daawuda.

² Li ko taxa jóg di nit ñi am xel mu rafet, am ab yar, ngir xam wax ju lal dég-dég, ³ ngir yaru ci jéfe xel ak njub ak yoon, di jubal, ⁴ ndax ab téxét di foog, ndaw li it xam tey xalaat. ⁵ Na boroom xel mu rafet déglu, yokk dég-dégam, te kiy ràññee di jariñooy ay tegtal, ⁶ ngir mana xam aw léeb aku taas ak kàddug boroomi xel yu rafet ak seeni cax.

⁷ Ragal Aji Sax ji di njàlbéenu xam-xam, te xel mu rafet akub yar, dof yaa ko xeeb.

Déglul, waajur àrtu la

(Saar 1.8—7.27)

⁸ Doom, toppal yaru baay, te bul wacc ndigalu yaay.

⁹ Kaala gu jekk la ci bopp, di gànjar ci baat.

¹⁰ Doom, bàkkaar kat bu la xiirtal, lànkal.

¹¹ Dañu la naan: «Dikkal, nu tëruji bakkan, yeeru ji jaambur bu deful dara.

¹² Nanu mel ni njaniiw, mëdd kuy dund, mu jekki tàbbi biir bàmmeele.

¹³ Mboolem alal ju réy, nu jagoo, yeb sunu biir kër, mu fees.

¹⁴ Dikkal nu far, mbus miy benn, nu bokk.»

¹⁵ Doom, bul ànd ak ñoom ciw yoon, bul jaare fa ñuy jaar,

¹⁶ ngir dañuy xélu, nar musiba, di gaawtuy sànk bakkan.

¹⁷ Doo firib caax, ba jàpp njanaaw luy xoole.

¹⁸ Nii kat seen bopp lañuy fiir, seen bakkanu bopp lañu sànk.

¹⁹ Képp kuy lekk lu lewul, nii lay mujje: wutin wu lewul jël bakkanu boroom.

Xel mu Rafet woote na

²⁰ Xel mu Rafet a ngay woote ca mbedd ma, di xaacu ca pénc ma.

²¹ Ma ngay wootee bérab yu gëna xumb, di dégtaley kàddoom, bunt dëkk ba.

²² Ma nga naan: «Moo téxét bi, foo àppal sa téxét gi?

Ñaawlekat bi, foo àppal sa ñaawle bi?

Dof bi, ñaata yoon ngay bañ xam-xam?

²³ Soo dèppee ba déglu, ma àrtu la. Ma ne, kon ma xelliil la samam xel, xamal la samay kàddu.

²⁴ Damaa woote, nga gántal, ma tàllal loxo, faaleesu ma.

²⁵ Sofental nga samay digle, nanguwoo samay àrtu.

²⁶ Kon boo sèngéemee, man it ma ree, njàqare dab la, may textexi.

²⁷ Njàqare di ngélén, dab la, sa musiba def callweer; buub la, njekkar ak fitna dal la.

²⁸ Keroog nga woo ma wall, duma wuyu, nga seet ma, seet, doo ma gis.

²⁹ Daa fekk nga baña xam, te ragal Yàlla du loo taamu.

³⁰ Dégluwoo samay digle it, xanaa xeeb samay àrtu yépp.

³¹ Waaye loo ci góobe, gar ko, say pexe suur la kèll.

³² Déggadi sànk ab téxét, naagu rey ab dof.

³³ Waaye déggal ma, dëkke jàmm, tàggook njekkar ak safaan.»

2

Muus, mucc

¹ Sama doom, déggal samay wax, fonk samay santaane.

² Teewlul xel mu rafet, sam xel di dégg.

³ Ngalla wutala dégg, wool dég-dég wall.

⁴ Sàkkul xel mu rafet ni xaalis, wut ko ni alal ju làqu.

⁵ Kon nga xam luy ragal Aji Sax ji, xam Yàllaa di kan;

⁶ ndax Aji Sax jeey maye xel mu rafet, kàddoom di taxa xam, di dégg.

⁷ Day dencalal ndam kiy jubal, di yiir ku mat.

⁸ Day wattu ku jub fu mu jaare, di sàmm wólléereem ciw yoon.

⁹ Kon nga xam njub ak yoon, xam jubal ak mboolem yoonu mbaax.

¹⁰ Ndax xel mu rafet miy tàbbi sa xol, nga xam, sa xol tooy,

¹¹ nga foog, fegu, am ug dégg, raw,

¹² mucc ci yoonu ku bon ak kuy wax lu jekkadi,

¹³ mucc ci kuy wacc yoonu njub, di jaare mbedd yu léndëm.

¹⁴ Kon nga mucc ci kuy def lu bon, tey bannéexoo lu jekkadi.

¹⁵ Yoonu ku ni mel day lunk, jaaruwaayam dëng.

¹⁶ Xel mu rafet da lay musal ci ndaw su yemadi,

bokk feneen, di wax lu neex.

¹⁷ Day dèddu wólléereem, ba muy ndaw, fàtte kólléereem ak Yàllaam.

¹⁸ Këram day joy wuti ndee, ay jaaruwaayam jëm njaniiw.

¹⁹ Ku dem ca moom dootoo délsi,

doo gisati yoonu dund muk.

²⁰ Kon nag aweel mbeddum waa ju baax, toppal yoonu ku jub,

²¹ ndax kuy jubal ay dëkke réew mi, te ku mat a fyi des.

²² Ku bon, ñu dagge ci réew mi; kuy fecci worma, ñu buddi, sànni.

3

Wóolul Yàlla

¹ Doom, bul fàtte sama njàngle, defal sa xel ci saay santaane,

² ngir fan wi gudd lool, nga gëna am jàmm.

³ Bu la ngor ak worma dëddu, booleel takk ci sa baat, bind ko ci sa àlluway xol.

⁴ Kon nga xam lu jaadu, neex Yàllaak doom aadama.

⁵ Nanga wóoloo Aji Sax ji, sa léppi xol, te bul wéeru ci saw déggin.

⁶ Loo mébét, bàyyil Yàlla xel, mu xállal la yoon.

⁷ Bul doylloo sa xel mu rafet, ragalal Aji Sax ji, dëddu mbon;

⁸ sa yaram wér, say cér naat.

⁹ Teralal Aji Sax ji ci sa alal ak loo jékka meññle,

¹⁰ say sàq day fees, ne xéew, say mbàndi ndoxi reseñ di wal.

¹¹ Doom, bul xeeb yaru Aji Sax ji, bul bañ mu waññi la,

¹² ndax Aji Sax ji, ku mu sopp, waññi la, ni baay, ak doom ju ko neex.

Li xel mu rafet di jariñ

¹³ Mbégtee ñeel ku daj xel mu rafet ak ku am ug dégg.

¹⁴ Am koo gën am xaaalis, te njariñ laa raw wurus.

¹⁵ Xel mu rafet a gën gànjar; loo mana bëgg moo ko raw.

¹⁶ Gudd fan, mu joxee ndijoor; càmmoñ ba, alal ak teraanga.

¹⁷ Fa muy jaare yiw la, fu mu awe jàmm la.

¹⁸ Mooy garabu gudd fan ci ku ko jàpp, di mbégtey ku ca ñoy.

¹⁹ Aji Sax ji xel mu rafet la sose suuf, lalé asamaan ag dégg.

²⁰ Ci xam-xaman la ndoxi xóote ya ne jàyy, ay niir di lay.

Rafet xel barke la

²¹ Sama doom, saxool xelu akug foog, dee ci xool foo tollu.

²² Day guddal saw fan, di rafetal sa jikko.

²³ Kon sab dox wóor, doo fakktalu.

²⁴ Soo téddee doo tiit; say nelaw day neex.

²⁵ Kon doo ragal njàqare lu bette ak saaysaay buy songe,

²⁶ ndax Aji Sax ji da lay yiir, di la musal cig fiir.

²⁷ Bul xañ njekk ku ko yelloo, ndegam man nga ko.

²⁸ Bul ne say dëkk: «Demal ba beneen, ma jox la,» te fekk la yor.

²⁹ Bul fexeel dëkkandoo bu dëkk ak yaw ci kóolute.

³⁰ Bul joteek kenn ci neen, te tooñu la.

³¹ Bul ñee ku néeg, te bu ko roy fenn.

³² Aji Sax ji daa sib ku deng, xejjoo kuy jubal.

³³ Aji Sax ji day alag kër ku bon, di barkeel waa kër ku jub.

³⁴ Kuy ñaawle, moo lay ñaawal, ku toroxlu, mu may law yiw.

³⁵ Teraanga di céru ku rafet xel, ab dof gàccoo gacce.

4

Ku dégg ndigal, jariñu

¹ Gone yi, tee ngeena dégg yaru baay, te déglu, ba am ug dégg?

² Maa ngi leen di jàngal lu baax, buleen fàtte sama njàngle.

³ Man it amoon naa baay, di benn bàjjo ci saa ndey.

⁴ Baay digal ma, ne ma: «Jàppal samay wax ci sam xel, di jéfe samay santaane, ba dund.

⁵ Amal xel mu rafet akug dégg. Bul fàtte te bul moy samay wax.

⁶ Bul dëddu xel mu rafet, da lay aar; sopp ko, mu sàmm la.

⁷ Njàlbéenu xel mu rafet mooy sàkku ko; ak loo mana am, amal ug dégg.

⁸ Nawal xel mu rafet, mu darajaal la; tafoo ko, mu teral la.

⁹ Da lay takkal kaala gu jekk, solal la mbaxanam buur.»

Moytul yoonu ku bon

¹⁰ Déglul, doom, te dégg saay wax, ndax nga gudd fan.

¹¹ Yoon wu xelu laa la teg, jaarloo la yoonu njub.

¹² Doo dox ba tērēf, doo daw, tēqtalu.

¹³ Noyal cib yar, bul yoqi, sàmm ko, moo yor sa bakkan.

14 Yoonu ku bon, bu ci tegu;
fu ab soxor di jaar, bu fa dox.
15 Moyul, bu fa jaare;
mbasal te wéy!
16 Ku bon du nelaw te lorewul,
du dajjant ba kera mu téqe.
17 Daa bon, def ko lekk,
di màndee coxoram.
18 Yoonu ku jub day leer,
ba ne ràññ ni bëccëg.
19 Yoonu ku bon ne kèruus,
du xam lu muy téqtaaloo.

Saxal ci lu baax

20 Doom, déglul samay kàddu,
teewlul samay wax.
21 Bu ci noppee ja jàkk,
te jàpp ko ci sa biir xel.
22 Mooy dundloo ku ci jàpp,
di wéral jëmmam jépp.
23 Sàmmala sàmm sab xol,
nde xalaati xol ngay jéfe.
24 Dàqal wor, mu sore la;
kàdduy naxe, na la dànd.
25 Xooleel, sa bët ne jàkk,
ngay xool sa kanam màkk.
26 Seetlul fi ngay teg tànk,
ba foo awe, mu wóor.
27 Bul jàdd, ndi Moor mbaa càmmoñ,
na sa tànk moyu lu bon.

5

Moytul njaaloo

1 Sama doom, déglul sama xel mu rafet,
teewlul sama déggìn,
2 kon nga saxoo foog,
say wax tegu ci xam-xam.
3 Lu mel ni lem la ndaw su yemadi di wax,
lámminñ wa ni diw gu ñu lay raay.
4 Muj ga mu wex xàtt,
di gaafne ni ñawkay saamar.
5 Tànk ya day bartalu wuti ndee,
ay jéegoom àkki njaniiw.
6 Réddul yoonu dund,
daa lajj, te xamu ko.
7 Kon, doom, déglu ma,
bul wacc samay kàddu.
8 Soreel ndaw soosu,
bul jege bunt kèram.
9 Kon nga ñàkk daraja, keneen jagoo;
ku néeg bóom la.
10 Jaambur jariñoos sa doole,
doxandéem jagoo saw ñaq.
11 Ngay mujje onk,
desey yax, jeex tàkk.
12 Nga naan: «Su ma yégoon, sopp ab yar
te baña sofental waxi ártu.
13 Lu ma tee woona dégg ku may digal,
tey teewlu sama waxi sèriñ ya?
14 Tuuti ma yàqu yaxeeet
fi kanam ñépp!»

Yemal ci sa jabar

15 Naanal ci sa mbalkam bopp,
ndox ma balle sa teenu bopp.
16 Xanaa doo wasaare sa bëti ndox ca biti,
mu def ay wal ca pénc ya?
17 Nay sa alal, yaw donj,
ku bokk feneen bokkul.
18 Yal na sa naanukaay barkeel,
nga bannexoo kiy sa jabar ba ngay ndaw.
19 Aka sopplu te jekk!
Na lay céram doy foo tollu,
na la xañ sago saa su ne.
20 Doom, ana looy xemmeme keneen,
bay foye céri jaambur?

21 Lu waay jéf, Aji Sax ji gis,
di xool mboolem fu mu jaare.
22 Jéf ju bon day fir ka ko sàlloo,
bàkkaaram di mbaal, jàpp ko.
23 Ñàkk yar, dee;
ndof gu réy, sànk.

6

Bul gàddul kenn bor

1 Doom, dangaa gàddul nit bor,
dige feyal jaambur,
2 saw lámminñ yeb la cim pax,
nga keppu?
3 Yaa ngi ci sa loxoy moroom,
kon defal nii, doom, ba récc:
doxal tinuji ko,
raamali ko.
4 Bul gëmm,
bul nelaw!
5 Dawal ni kéwél gu récc ub rébb,
ne férr ni picc mu raw ab firikat.

Bul yaafus

6 Yaafus bee, xoolal xorondom,
seetal ci moom, ba muus.
7 Du ku ko yilif mbaa ku koy sas,
te jiiiteesu ko.
8 Bu jotee mu denc ab dundam,
mu jot, mu for lekkam.
9 Moo yaafus bi, foo àppal téraay bi?
Loo deeti xaar ci yewwu?
10 Ngay dajjant ak a for bët,
di tegley loxook a jaaxaan.
11 Néewlee ngi lay dikkal nib sàcc,
ñàkk gannaayul la.

Ku dëng, nii lay mel

12 Ku tekkeedi te bon,
day wër di fen,
13 day piis, di wokkeb tànk,
di waxe baaraam,
14 jekkadiy xalaat, di mébét lu bon
aka yokku ay.
15 Moo tax musiba di jekki dal ko,
mu jekki yàqu, ba wees paj.

Aji Sax ji bañ na lii

16 Juróom benn a ngii yu Aji Sax ji bañ,

ba ci juróom jaar yu mu seexlu:

¹⁷ kuy danjjiiral,
kuy fen,
kuy rey nit ku deful dara,
¹⁸ kuy fexe lu bon ci xolam,
kuy gaawtuy def lu ñaaw,
¹⁹ seede buy fen rekk,
rawatina kuy yokku ay ci biiri bokk.

Ku njaaloo gis ko

²⁰ Doom, defal li la baay sant,
te bul wacc ndigalal yaay.
²¹ Takkal foo tollu, taf ci sa xol,
fas ko ci sa baat.
²² Booy dox mu di la jiite,
nga tëdd, mu di la sàmm,
nga yewwu, mu di la waxal.
²³ Santaane da lay niital,
ndigal leeralal la,
artook ub yar di yoonu dund.
²⁴ Da lay aar ci ndaw su bon
ak jabaru jaambur ak lammiiñam wu neex.
²⁵ Bu ko xemmeme taaram,
bumu la fiir aki lamsal.
²⁶ Dogu mburu fey nab gànc;
waaye jabaru jaambur, bakkanu lëmm.
²⁷ Te ku ne sawara cas, tafoo,
lakk say yére.
²⁸ Ku dox ciy xal it,
say tànkk ñor.
²⁹ Mooy ànd ak jabaru jaambur,
ku ko def gis ko.

³⁰ Deesul sikk ku sàcc aw ñam,
def ci biiram ndax xiif.
³¹ Waaye bu feeñee, fey boroom juróom
yaari yoon,
joxe alalu kërám yépp.
³² Njaaloo di ñàkk bopp,
kuy sànk bakkanam a koy def.
³³ Mbugal ak toroxte dib añaam,
te gacceem du deñ.
³⁴ Fiiraange day feesal xolu góor,
te du ñéeb lu buy feyu.
³⁵ Du faale ndàmpaay,
loo ko may, may, du giif.

7

Ndaw su yemadi da lay fiir

¹ Doom, sàmmal samay wax,
fonk samay santaane.
² Jéfeel samay santaane, ba dund,
jàppal samay ndigal sa fukki loxo.
³ Takkal ci say waaraam,
bind ko ci sa àlluway xol.
⁴ Safool xel mu rafet, muy sab jigéen,
te nga xejjoo dég-dég ni sa mbokk lenqe.
⁵ Dina la aar ci ndaw su yemadi,
bokk feneen, di wax lu neex.

* **7:14** 7.14 saraxu cant: ku masaana rendi gätt bu mu def saraxu cant ci biir jàmm, dangay jël lenn ci yàpp wi, bokk kook sa njaboot, lekk. Ci lekk googa la ndaw siy woo xale bu góor bi.

Ndaw su yemadi woote na

⁶ Damaa tollu sama palanteer,
séentu ca xarante ya,
⁷ séen ca biir téxét ya,
ku ma seetlu ca xale yu góor ya,
muy ku ñàkk bopp.
⁸ Muy dem ba fa ndaw say taxaw, ca selebe
yoon wa,
daldi wuti kër ndaw sa.
⁹ Ngoonug suuf la, jant biy lang,
muy lëndëm di gëna guddi.
¹⁰ Ndaw si jekki dajeek moom,
sol yérey gànc, lal pexeem.
¹¹ Daa xumb, të,
du toog kërám.
¹² Ma nga ca mbedd ma, ne ca pénc ya,
ruqoo ruq, ma ngay yeeroo.
¹³ Ndaw sa ne ko katam, foon,
ne wajj, ne ko:
¹⁴ «Tey matal naa la ma digoon Yàlla,
yàppu bernde waa nga kër ga, saraxu cant
la*»
¹⁵ Moo ma taxa dikk dajeek yaw.
Seet naa laa seet, ba gis la.
¹⁶ Lal naa saab lal, ba mu jekk,
di malaan yu yànj, bawoo Misra.
¹⁷ Lal ba, ma xeeñal, mu ne bann,
di ndàbb, cuuraay ak xas mu neex.
¹⁸ Dikkal, nu baanee baane, ba bët set,
te bannexu ci mbéggeel.
¹⁹ Sama jëkkër newu fa,
daa dem yoon wu sore.
²⁰ Mbuusum xalis la jàbb, yóbbu,
du ñibbsi ndare weer wi fees dell.»

²¹ Muy mocc ak a moccaat, ba nax ko,
di wax lu neex, ba man ko.
²² Waa ja jekki, topp ko,
mbete yëkk wu ñuy rendiji,
mbaa dof bu ñu jéng, di ko yari.
²³ Mooy picc mu tàbbi cig fiir.
Du xam ne day dee,
ba keroog fitt jam ko ci xol.

²⁴ Kon nag, doom, dégluleen ma,
teewluleen samay wax.
²⁵ Bu leen soosu ndaw xiir ci moy,
buleen teggi, topp ko.
²⁶ Bare na ku dee, moo ko rey,
maneesula waññ ñi nu rey ñépp.
²⁷ Kërám yoonu njaniw la,
daa bartalu, tàbbi néegi ndee.

Xel mu Rafet bàkku na

8

(Saar 8)

¹ Déggal! Soxna si, Xel mu Rafet a ngi
woote,
dég-dég di xaacu.

2 Ma nga taxaw ca selebe yoon ya,
 fu gêna kawe ca yoon wa.
 3 Ma nga bunt dëkk ba, taxaw;
 fa nit ñay jaare lay xaacoo naan:
 4 «Yeen mbooloo yi laay yéene,
 doom aadama yi laay joor.
 5 Tékét bi, deel foog,
 dof bi, déggal ndéey lu xelu.
 6 Déglul, ma wax la lu am solo,
 dégtal la njub.
 7 Dégg laay wax,
 di bañ wax ju bon.
 8 Lu ma wax njub la.
 Amul lu deng mbaa lu jekkadi.
 9 Lépp a dégggu ci ku am ug dégg,
 te jub ci ku for xam-xam.
 10 Na la samab yar gènal xaalis,
 xam-xam dàqal la ngèn-gi-wurus.
 11 Ndax man, xel mu rafet, maa gèn gànjar,
 loo bëgg maa ko raw.

12 «Man, Xel mu Rafet, foog di sama kër;
 xam-xam ak pexe, ma for.
 13 Ragal Aji Sax ji mooy bañ lu bon.
 Réy, xeebaate, yoonu mbon,
 ak wax ju jekkadi, ma boole bañ.
 14 Maa moomi digle, di maye gis-gis;
 maa am ug dégg, di boroom doole.
 15 Samay pexe la buur di jitee,
 killifa di ci àttee dégg.
 16 Ci samay pexe la njiit di saytoo,
 ñook kàngam yeek ñiy àtte dégg ñépp.
 17 Maa sopp ku ma sopp,
 ku ma seet tigi, gis ma.
 18 Alal ak teraangaa ngi fi man,
 am-am bu sax it ak yoolu njekk.
 19 Li may mayee gèn wurus, wa gèn,
 sama njariñ wees xaalis ba gèn.
 20 Yoonu njekk laay jaare,
 di jéfe li yoon àtte rekk.
 21 Ku ma sopp, ma nàddil la,
 feesal sab denc.»

Xel mu Rafet a mag lépp

22 Soxna si, Xel mu Rafet nee na:
 «Aji Sax ji jagoo na ma ca njàlbéen,
 ma jiiitu ca jéfam ya woon.
 23 Bu yàgg lañu ma dēj,
 ca ndoorte la, bala suuf a sosu.
 24 Ba may dikk, gééj amul,
 ndox ballul bay fees, di wal-wali.
 25 Dikk naa bala tund yu mag yee sampu,
 lu jiiitu tund yu ndaw yi,
 26 laata Yàllaa sàkk suuf aki àllam
 ak feppu pënd ci àddina.
 27 Ba muy taxawal asamaan, maa nga fa,
 ak ba muy rédd fa asamaan taseek gééj,
 28 ak ba muy teg niir ya fa kaw,
 ak ba muy dooleel ndoxi xóotey gééj,
 29 ak ba muy sàkkal gééj kemoom,
 ba du jàll fa mu wax.
 Ba muy rédd fa muy samp àddina,

30 man, Xel mu Rafet, maa doon ku xareñ
 ci wetam,
 di ko bannexal bés bu ne,
 tey bannexu fi kanamam.
 31 May bége wërngalu àddinaam,
 di bannexoo doomi aadama.»

Xel mu Rafet dénkaane na

32 «Kon nag, doom, dégluleen ma.
 Mbégte ñeel na ki may topp.
 33 Dégluleen ku leen di yar, daldi muus.
 Buleen ko sàggane!
 34 Mbégte ñeel na ki may déglu,
 di teewlu ca sama bunt bés bu nekk,
 di ma toogaanu sama bunt kër.
 35 Ku ma daj, gudd fan,
 Aji Sax ji bége la.
 36 Ku ma moy loru,
 ku ma bañ, daa repp.»

Ñaari berndee ngi

9

(Saar 9)

Xel mu Rafet a ngi berndeel

1 Soxna si, Xel mu Rafet daa tabax kèram,
 yett juróom yaari kenoom.
 2 Mu rendi ag juram,
 njafaan ay biiñam, xelli,
 taaj ay ndabam.
 3 Xel mu Rafet yónni ay janqam,
 di wootee fu kawee kawe ca dëkk ba,
 4 naan: «Képp ku téxét, jàddal ba fi!»
 Ku ñàkk bopp, mu ne ko:
 5 «Kaay, ma may la, nga lekk,
 xellil lay biiñ, nga naan.
 6 Dèddul jéfi téxét ba dund,
 di jubal ci yoonu dégg.»

Kuy xeloo ngi ak kuy ñaawle

7 Artu kuy ñaawle, feyoo saaga rekk,
 yedd ab soxor, yooloo loraange.
 8 Bul yedd kuy ñaawle, da lay jéppi;
 yeddal ku rafet xel, mu naw la.
 9 Xelalal ku xelu, mu yokku.
 Xamalal ku jub, mu yokk njàngam.
 10 Ragal Aji Sax ji di njàlbéenu rafet xel,
 xam Aji Sell ji di am ug dégg.
 11 Maay Xel mu Rafet, ku ma topp gudd fan,
 dund, dundati.
 12 Rafet xel, jariñu,
 kuy kókkalee, wéetook sa añ.

Ku dofee ngi berndeel

13 Jigéen ju dof day xumb,
 reew, du xam lu xew.
 14 Day toog bunt kèram,
 mbaa fu kawee kawe ca dëkk ba,
 15 di woo ña fay jaare
 te jubal seenu yoon.
 16 Ma nga naa: «Képp ku téxét, jàddal ba
 fi!»
 Ku ñàkk bopp, mu ne ko:

17 «Ndox mu lewul a neex,
ñamu làqu-lekk dàqati.»

18 Waaye kooka du xam ne waa njaniiw a
nga fa,
te ku wuyji, tàbbi biir bàmmeeel.

Kàddu yu Xelu yu Suleyman

10

(Saar 10—24)

¹ Kàddu yu xelu yu Suleyman.

Doom rafet xel, baay ba bég;
doom dof, ndey ja tiis.

² Alal ju lewul du jariñ;
jub, mucc ci gàtt fan.

³ Aji Sax ji du seetaan ku jub, di xiif,
waaye day xañ ab soxor la mu xemmem.

⁴ Yaafus, walaakaana;
farlu, woomle.

⁵ Ku ngóob jot, nga góob, xelu nga;
ngóob taxaw, ngay nelaw, gacce la.

⁶ Jub, barkeelu;
ku soxor, wax ja làq fitna.

⁷ Ku jub barkeel, saw tur du fey;
ab soxor, turam seey.

⁸ Ku rafet xel day jéfe santaane,
ab dof waxa wax, ba loru.

⁹ Maandu, fegu;
dëng, weeru.

¹⁰ Piiseek làq-làqal, sabab njàqare;
ab dof waxa wax, ba loru.

¹¹ Kàdduy ku jub bētu ndox la, day naatal;
waaye ku soxor, wax ja làq fitna.

¹² Mbañeelak ayoo;
cofeelak jéggale bépp tooñ.

¹³ Kuy dégg, say wax rafet;
te ku ñàkk bopp, yelloo yetu gannaaw.

¹⁴ Ku rafet xel day xam, ne cell;
bu dof noppiwul, yàqule teew.

¹⁵ Alal day aar boroom ni ab tata,
ñàkk di lor baadoolo.

¹⁶ Ku jub jot peyam, dunde;
ab soxor di bàkkaare alalam.

¹⁷ Yaru, gudd fan;
sàgganey àrtu, sànkú.

¹⁸ Ku la nēbbal mbañeel, da lay fen;
kuy wër di sos, ab dof la.

¹⁹ Wax ju bare, moy ñàkku ca;
ku moom sa làmmiñ, xelu nga.

²⁰ Kàddug ku jub di ngën-gi-xaalís,
xelum coxor amul solo.

²¹ Kàdduy ku jub jariñ na ñu bare,
dof ñàkk na bopp, ba far dee.

²² Barkeb Aji Sax jeey maye alal,
kër-këri taxula barele.

²³ Jéf ju bon la dof di foye;
ku am dég-dég safoo lu xelu.

²⁴ Ab soxor, li mu ragal moo koy dab;
nammeelu ku jub day sotti.

²⁵ Bu ngélén walee, ab soxor ne mes;
ku jub, sab reen sax ba fàww.

²⁶ Ndaw lu tayel ca ka yónnee
daa mel ni lu forox ciy gëñ
mbaa saxar ciy gët.

²⁷ Ragal Aji Sax ji, gudd fan;
soxor, gàtt fan.

²⁸ Ku jub day séentu mbégte, gis ko;
ab soxor yaakaar, yàkki.

²⁹ Aji Sax jeeki nammeelam rawtu la ci ku
mat,
di sànkute ci kuy def lu bon.

³⁰ Ku jub deesu ko daaneel mukk,
ku soxor du yàgg cim réew.

³¹ Kàddug ku jub day jur xel mu rafet,
ku wax njekkar ñu tēj sa gémmiñ.

³² Ku jub day xam wax ju yiw;
ab soxor sàlloo waxi njekkar.

11

¹ Aji Sax ji bañ na njuɓlaŋ ci nattub diisaay,
ay nattukaay na mat, muy bannexam.

² Ku réy-réylu rus;
woyofal ndax nga xelu.

³ Kuy jubal, jiital mat.
Njuɓlaŋ ak wor, detteelu.

⁴ Alal du jariñ bésu mbugal;
jub, mucc ci gàtt fan.

⁵ Ku mat, njekk xállal la;
coxor daaneel boroom.

6 Jubalal, sa njekk musal la;
ab workat day bëgge, ba far keppu.

7 Ab soxor saay, yaakaaram seey,
rawatina yaakaar ju sës ci alal.

8 Ku jub mucc ci njàqare,
ab soxor wuutu ko ca.

9 Ay sos la yéefar di loree,
waaye ku jub xam-xam la cay mucce.

10 Ku jub baaxle, waa dëkkam bânneexu;
ab saaysaay saay, mbégte dim riir.

11 Barkeb ku jub teral nab dëkk,
kàddug ku soxor tas nab dëkk.

12 Waxi xeebaate ñàkk bopp la,
ku am ag dégg day noppi.

13 Kuy wër di sos dangay wuññi sutura,
ku jara wóolu dangay am bàmmeelu biir.

14 Tegtal tumurànke, am réew suux;
digle bare, ndam dikk.

15 Bul gàddul kenn bor, di loru;
bañ koo dige, daldi am jàmm.

16 Jigéen, na yiw, ñu sagal ko;
góor gu néeg, alal donj.

17 Ku baax, boppam;
ku bon, boppam.

18 Coxor feyul boroom, day naxe;
deel def njekk, sag pey wóor.

19 Saxoo njekk, dund;
sàlloo mbon, dee rekk.

20 Aji Sax ji bañ na njoblanj,
safoo maandute.

21 Ab soxor mbugalam du jaas, wóor na;
te ku jub, saw askan mucc.

22 Taaru jongama ju xel ma gàtt,
mooy jaaro wurus ci noppu mbaam-xuux.

23 Ku jub, lu baax rekk lay sàkku;
soxor biy yaakaar, mujje mbugal.

24 Nit a ngi tabe, di yokkule;
nit di nëj-nëñi, gëna ñàkk.

25 Ku yéwén, woomle;
kuy suuxat, suuxu.

26 Nit a ngi móolu kuy denc pepp, ba mu
ñàkke, di gërëm ka koy jaay.

27 Wutala wut lu baax, ñu nawloo la;
ku sàkku lu bon, yaa koy yenu.

28 Ku yaakaar sa alal sab jéll a ngi ñëw,
ku jub day juble ni gàncax gu naat.

29 Kuy fitnaal sa waa kër doo donn dara,
ku dof, boroom xel yilif la.

30 Nit ku jub garab la, doom ya di dundal;
ku rafet xel wut nit ñi.

31 Ku jub, jot sa yool ci kaw suuf,
moykat beek soxor bi it daw raw.

12

1 Ku bëgga xam, bëgg ku la yedd;
ku bañ ku la àrtu, bàyyima nga.

2 Ku baax, Aji Sax ji bége la;
kuy fexe lu bon, mu daan la.

3 Ab soxor, taxawaayam du yàgg;
ku jub garab la, reen ba ne kekk.

4 Jeeg bu jàmbaaré day teral jëkkër ja,
jeeg buy rusloo day semmal jëkkër ja.

5 Ku jub, yoon lay mébét;
ab soxor di lal pexey wor.

6 Ab soxor, waxam am tëru la, day reye;
kàduy kiy jubal di musle.

7 Ab soxor bu daano, jeex na;
ku jub, sa kër taxaw, ne këcc.

8 Xel mu ñaw, jëw bu rafet;
sam xel jekkadi, ñu xeeb la.

9 Woyof mbubb, am benn surga donj,
moo gën réyal turki tey dee ak xiif.

10 Ku jub day topptoo ag juram,
ab soxor néeg cig juram.

11 Beyal sab tool, sab dund doy;
topp ay caaxaan ñàkk bopp la.

12 Ab soxor ay xemmem alal ju lewul,
ku jub garab la, reen baa ko meññal.

13 Bàkkaarul làmmiñ dugal na boroom,
ku jub mucc ci njàqare.

14 Làmmiñ reggal na boroom;
ñaq, jariñu.

15 Na dof di jëfe, njub la ci moom;
dégg ndigal rafet um xel la.

16 Ab dof bu meree, mu gaawa feeñ;

ku teey, tanqamlu saaga.

17 Ku dëgg, seede dëgg;
seede bu bon, fen rekk.

18 Làmmiñu waxkat, jam-jami jaasi;
kàddu gu xelu, garab la ci.

19 Kàdduy dëgg, day sax dàkk;
fen, xef xippi, mu wéy.

20 Kuy ràbb lu bon lal pexey wor;
kuy digle jàmm, am mbégte.

21 Ku jub du amu ay,
ab soxor du tàggook musiba.

22 Aji Sax ji sib na fen-kat,
safoo ku dëgg.

23 Nit ku ñaw day xam, ba ca;
ab dof siiwal waxi dofam.

24 Njaxlaf, jiitu;
yaafus, des gannaaw.

25 Njàqare day jeexal xolu boroom,
wax ju neex di tooyal xolam.

26 Ku jub day seetlu ku muy xaritool*;
soxor bi, jikkoom a koy sànk.

27 Ab yaafus bu rëbbee, sooy;
cawarte koom la.

28 Jaaral ci njekk, ba gudd fan;
yoon wu baax deesu fa dee.

13

1 Doom ju xelu dëgg yaru baay,
kuy ñaawle faalewuli àrtu.

2 Wax ju rafet yool na boroom,
workat fitna la namm.

3 Moom sa làmmiñ, sàmm sa bakkan;
rattaxle, yàqule.

4 Ab yaafus day yaakaar, du am;
ab njaxlaf sàkku, woomle.

5 Ku jub bañ na ay fen,
ku soxor di indi gâceek yeraange.

6 Ku mat day jub, ba fegu;
moykat soxor, ba sànk.

7 Nit a ngi am-amlu, amul dara;
nit di dee-deelu te fees dell.

* 12:26 12.26 Mbaa: Ku jub day teg moroomam ciw yoon.

8 Ku am ay fey alal, ba mucc;
ku amul deesu ko tèkku.

9 Ku jub day leer nàññ,
ab soxor mel ni taal bu fey.

10 Réy-réylu jote rekk lay jur,
ku dëgg ndigal a xelu.

11 Alal ju lewul day naaw;
foral benn-benn, ba biibal.

12 Yaakaar ju tas day jeexal xol,
aajo ju faju di suuxat bakkan.

13 Ku sofental ndigalu Yàlla, yàqule;
ku jëfe santaane Yàlla, yoolu.

14 Njàngle mu xelu day suuxat bakkan,
ba boroom du tàbbi ci fiiri ndee.

15 Dangay xam lu jaadu, ñu naw la;
yoonu workat day metti.

16 Képp ku teey jëfe xam-xam;
ab dof ay siiwal ndofam.

17 Ndaw lu bon day loru.
Ndaw lu wóor garab la ci nit.

18 Ku sàggane yoonu yar, séddoo ñàkk ak
gâce;
kuy dëggi àrtu, am teraanga.

19 Aajo ju faju tooyal na xol,
te ab dof jomb naa dëddu mbon.

20 Àndal ak ku xelu, sam xel rafet;
ku lëngook ub dof, loru.

21 Ay topp na moykat,
ku jub juble.

22 Ku baax, donale ba cay sëtam;
alalu moykat, muuru ku jub.

23 Ku néewle bey na, meññeef ne gāññ,
ñu àtte ko ñàkkal, mu ñàkk ko.

24 Ku dul bantal sa doom, bëggoo ko.
Ku bëgg sa doom teel koo yar.

25 Ku jub day lekk ba regg,
soxor ba dëkke xiif.

14

1 Jigéen, rafet xel, dimbali waa kërám,
su deeb dof, tas kërám.

2 Kuy jubal day ragal Aji Sax ji,
ku dëng teddadil nga ko.

³ Ab dof a ngi réy-réylu, làmmiñam yar ko; ku rafet xel, sa kàddu aar la.

⁴ Su yëkk takkul, bey, sàq wéet; mu beye dooleem, meññeef ne gāññ.

⁵ Seede bu dëgg, dëgg rekk, seede bu dëgguwul, fen rekk.

⁶ Ab ñaawlekat day wut xel mu rafet, mu réer ko; ku am ug dégg, xam yomb la.

⁷ Dàndal ab dof, du la yokk xam-xam.

⁸ Ku ñaw day xelu, xam li muy def; ab dof di nax boppam.

⁹ Ab dof, su bàkkaarée, yoonam! Te ñay jubal a séq yiwu Yàlla.

¹⁰ Tiisu xol, boroom a ko xam; mbégte ma it jaambur bokku ca.

¹¹ Ab soxor, kéram day tas, mbaarum ku jub di naat.

¹² Yoon a ngii, nit defe ne jub na, te mu jème ko ci dee.

¹³ Nit a ngi ree, xol ba tiis, te mbégte mujje na njàqare.

¹⁴ Ku def njekkar sab añ mat, ku baax gën law demin.

¹⁵ Ab téxét, loo wax mu gëm; ku ñaw xam fi ngay jaare.

¹⁶ Ku xelu day ragal, di dëddu lu bon; ab dof day ràkkaaju, du tiit.

¹⁷ Ku gaawa mer, def jëfi dof, te kuy fexeel nit, ñu bañ la.

¹⁸ Ab téxét ndof ay céram, ku ñaw jagoo xam-xam.

¹⁹ Ku bon, ku baax sut la; ku soxor ay toogaanu ku jub.

²⁰ Ku ñàkk, say dëkk sax bañ la; ku barele, barey xarit.

²¹ Ku xeeb sa dëkkandoo, bàkkaar nga; ku baaxe ku ñàkk, mbégte ñeel la.

²² Kuy mébét lu bon daa réer, kuy mébét lu baax am nga ngor ak worma.

²³ Kër-këri, jariñu; waxi neen, loxoy neen.

²⁴ Ku rafet xel jagoo alal, ab dof ràngoo ndofam.

²⁵ Seede bu dëgg day jot bakkan, kuy fen day wore.

²⁶ Ragal Aji Sax ji kaaraange gu wér la ci nit, di rawtu ciy doomam.

²⁷ Ragal Aji Sax ji day suuxat bakkan, ba boroom du tàbbi ci fiiri ndee.

²⁸ Su mbooloo baree, buur am ndam; fu nit ña néew, kilifa du fa dara.

²⁹ Muñ mer, dëggin wu yaa; gaawa tàng, gënatee dof.

³⁰ Xel mu dal, yaram wu naat; fiiraange semmal boroom.

³¹ Ku sonal ku ñàkk, tooñ nga ka ko sàkk; ku baaxe ku néewle, teral nga ka ko sàkk.

³² Coxor detteel boroom; ku jub fegoo maanduteem.

³³ Kuy dégg, sam xel saxoo rafet; ab dof sax xam na lu xelu.

³⁴ Njekk day teral aw xeet, moy di gâceel aw askan.

³⁵ Buur day bége jawriñ ju xelu, di mbugal nitu gâcee.

15

¹ Tont lu neex day giifal, baat bu ñagas di jógal xol.

² Ku xelu àddu, xam-xam rafet; ab dof di talalali.

³ Aji Sax ji moo gis lépp, di xool ku baax ak ku bon.

⁴ Wax ju neex garab la, doom ya di dundal, kàddu yu jekkadi di jeexal xol.

⁵ Ab dof day xeeb yaru baay ba, kuy dégg waxi àrtu, xelu nga.

⁶ Kër ku jub, koom gu yaa; ku jubadi, alalam jur fitna.

⁷ Ku xelu àddu, xam-xam law; ab dof amul xelam.

⁸ Saraxub ku soxor, Aji Sax ji bañ na ko; ñaanu kuy jubal da koy bége.

9 Jëfi ku bon, Aji Sax ji seexlu na ko;
ku sàlloo njekk, safoo na la.

10 Mbugal tar na, ñeel ku wacc yoon;
ku bañ waxi àrtu, dangay dee.

11 Njaniiw ak biir suuf, Aji Sax ji di gis,
xolu doom aadama waxi noppi.

12 Kuy ñaawle buggul ku ko àrtu,
te du laaji ku rafet xel.

13 Xol bu sedd, kanam gu leer;
xol bu tiis, boroom ne yogg.

14 Ku am ug dégg sàkku xam-xam,
ab dof di toppi caaxaan.

15 Xol bu tiis, naqar wu sax;
xol bu neex, bannex bu sax.

16 Néewle te ragal Aji Sax ji
moo gën barele, sa bopp ubu.

17 Njelu ñetti xob fa ñu la soppe
moo dàq yàpp wu duuf fu ñu la bañe.

18 Naqari deret, taalu ay.
Teey, fey fitna.

19 Yoonu yaafus, dégi neen;
kuy jubal, saw xàll yaa.

20 Doom rafet xel, baay ba bég;
te ab dof ay xeeb ndey ja.

21 Jëfi dof a neex ku ñàkk bopp,
ku am ug dégg def njub.

22 Diisoo ñàkk, pexe moy;
digle takku, pexe joy.

23 Nit bége na tontam lu dal,
kàddu gu jib fa mu ñoree neex!

24 Ku rafet xel, jubal nga yoonu gudd fan,
moyu teggi, ba jëm njaniiw.

25 Ku bew, Aji Sax ji màbb sa kër;
ab jëtun, Aji Sax ji ñoñal pàkkam.

26 Aji Sax ji bañ na mébét mu bon,
te wax ju yiw daa sell fa moom.

27 Wutin wu lewul, sonal sa waa kër;
ku bañ alalu ger gudd fan.

28 Ku jub day teeylu tontam;
ab soxor, wax ju ñaaw rekk.

29 Aji Sax ji day dèddu ab soxor,
di nangu ñaanu ku jub.

30 Kanam gu leer day seral xol;
xibaaru jàmm, jàmmu yaram.

31 Kuy dégg àrtu yu koy musal,
ku rafet xel a ngoog.

32 Xalab waxi yar, foye sa bopp la;
deel déggi àrtu, yokk sam xel.

33 Ragal Aji Sax ji day rafetel xel;
jèkke woyof, mujje tedd.

16

1 Nit ay dogu ci xolam,
Aji Sax ji dogal, mu sotti.

2 Lu waay def, daa jekk ca moom,
waaye Aji Sax jeey natt xol yi.

3 Loo bégga def, diis ko Aji Sax ji,
say mébét sotti.

4 Lu Aji Sax ji sàkk, mbir la ca namm,
ba ci ku soxor ak bésu mbugalam.

5 Aji Sax ji sib na ku réy,
da koy mbugal ci lu wér.

6 Ku jiital ngor ak worma, Yàlla jéggal la;
ku ragal Aji Sax ji, dèddu lu bon.

7 Ku Aji Sax ji rafetlu say jëf,
say bañ sax, mu jubaleek yaw.

8 Néewle te jub
moo gën barele te jubadi.

9 Nit ay sumb yoonam,
Aji Sax ji sottal.

10 Su buur àddoo cib àtte,
muy kàddu gu Yàlla dogal.

11 Nattub diisaay aki ndabam, na jub ngir
Aji Sax ji.
Moo sàkk mboolem nattukaay.

12 Buur daa sib kuy def lu bon,
ngir njekkay dègéral nguuram.

13 Wax ju dèggu, buur safoo boroom;
ku jub, buur bég sa kàddu.

14 Merum buur ndaw la, dee a ko yónni;
ku rafet um xel, giifal ko.

15 Buur, na kanam ga leer, sa bakkan mucc,
su la baaxee, mu mel ni taw bu topp um
nji.

16 Wutal xel mu rafet, bàyyi wurus;
taamul ag dégg, wacc xaalis.

17 Yoonu kuy jubal day moyu lu bon,
ku teeylu sa jéfin, sàmm sa bakkan.

18 Réy, yàqule;
xeebaate, jóoru.

19 Woyof, ànd ak ku néewle
moo gën séddook ku bew la mu lewal.

20 Ku teewlu mbir, baaxle;
ku wóolu Aji Sax ji, bég.

21 Ki rafet xel mooy kiy ràññee,
te su wax rafetee, dég-dég yomb.

22 Xel mu ñaw day suuxat bakkan,
te ab dof jéfi dofam a koy yar.

23 Ku rafet xel, say kàddu xelu;
soo waxee, yey.

24 Wax ju yiw di lem juy xelli,
neexa ñam, di jàmmi yaram.

25 Yoon a ngi, nit defe ne jub na,
te mu jème ko ci ndee.

26 Ku bëgg lu neex, liggéey;
ku bëgga faj sab xiif, njaxlaf.

27 Sagaru nit mooy sulli lu bon,
ay waxam sax sawara la.

28 Nitu njekkar day yokk réeroo,
ab soskat di féewaley xarit.

29 Ab soxor day yóbbaaale dëkkandoom,
jème ko ci lu bon.

30 Piise, ku nar njekkar;
màttu, ku def lu bon.

31 Bijjaawu bopp kaala gu yànj la,
njekk a koy maye.

32 Muñ mer, moo gën njàmbaar;
ténk sa bakkan moo raw nangub dëkk.

33 Tegoo bant nit a koy def,
dogal ba Aji Sax ji la.

17

1 Feppu dugub wu ànd ak dal
moo gën lu ne gǎññ kërug ayoo.

2 Surga, bu rafetee xel, tiim doom juy
rusloo,
séddu ni doom ci alalu sangam.

3 Xaalis ak wurus sawaraa koy xelli,
waaye nit, ab xolam, Aji Sax jee koy nattu.

4 Ku bon ay déglu wax ju bon,
fen-kat di teewlu ay sos.

5 Kuy ñaawal ku ñàkk, tooñ nga ka ko
sàkk;
kuy reetaan ku jàq, mbugalam du jaas.

6 Teraangay maam, sèt ba;
sagu doom, baay ba.

7 Waxi teggin jekkul cib dof,
ay fen ci as gor waxi noppi.

8 Alalu ger njiglaay la ca ka koy joxe,
ba fu mu jublu, mu nooy.

9 Bale tooñ, yokk cofeel;
sulliw ay, tas xarit.

10 Ku am ug dégg ngay yedd benn yoon,
ab dof téeméeri yar du ko waññi.

11 Ku bon fippu donj lay jéem,
te musibaa koy dikkal.

12 Taseek gaynde gu ñàkki doomam
moo gën taseek dof ak yéfi dofam.

13 Kuy feye mbon jéf ju baax,
lu bon du jóge sa kër.

14 Ndoortel ay di wal mu tàmbali,
luy indib xuloo, bàyyil.

15 Dëggal ku sikk ak daan ku jub,
Aji Sax ji sib na yooyu yaar.

16 Ab dof du am xaalis, jènde xel mu rafet;
buggu ca dara.

17 Xarit du bëgg, di bañ;
mbokk day bokk ak yaw say coono.

18 Ku ñàkk bopp ay dige feyal jaambur,
di ko gàddul boram.

19 Ku bëggu ay bëggi tooñ;
damu, yàqule.

20 Ku njublanj du baaxle,
kuy wax njekkar aña musiba.

21 Ku jur ab dof, am naqar;
ab dof waajuram du bég.

22 Xol bu sedd day garabal,
xol bu tiis day semmal.

23 Ku bon day nangu alalu ger ca suuf,
nara jalgati yoon.

24 Ku am ug dégg ne jàkk ci xel mu rafet,
ab dof ne xóll, xel ma sore lool.

25 Doom ju dof di tiisu baay ba ak naqaru ndey ja.

26 Ku deful dara, feyloo kob daan, dug njub; dóor as gor du yoon.

27 Ku moom sa làmmiñ am nga xam-xam, te ku teey am ngag dégg.

28 Ab dof sax bu noppee, nirook boroom xel; ku ne cell, ñu fooge lag muus.

18

1 Ab siis, bânneexu boppam rekk, loo ko digal mu xalab.

2 Ab dof wutul ag dégg, balaa caag muy jaay ag muus.

3 Bu mbon nuyoo, xeebeel topp ca; jëf ju ñaaw, gacce rekk.

4 Waxi nit ndox mu xóot la, bu bënnee, xelli, ñu di ca xelu.

5 Faral ku tooñ baaxul, bul xañ dégg ku deful dara.

6 Ab dof, làmmiñam sooke naw ay, ay waxam di sàkku yeti gannaaw.

7 Ab dof, waxam a koy sànk, làmmiñu boppam a koy dugal.

8 Waxi jëwkat di ñam wu neex wuy seey, jàll ca biir-a-biir.

9 Kuy sàggane sa liggéey, yaak kuy yàq a bokk.

10 Turu Aji Sax ji rawtu bu mag la. Ku jub daw làqu ca, raw.

11 Alal day aar boroom ni ab tata, mu xalaat ne maneesu koo bëtt.

12 Bew, yàqule; jëkke woyof, mujje tedd.

13 Tontu te déggagoo, ndof la, ak ñàkk kersa.

14 Ku bëgga dund, dékku woppi yaram, waaye xol bu jeex maneesu koo wéye.

15 Ku am ug dégg wut xam-xam, ku rafet xel sàkku xam-xam.

16 Deel maye, da lay ubbil bunt, di la àggle ci boroom daraja.

17 Ku jëkke layoo, ñu ne yaa yey, ba keroog ka nga joteel weddi la.

18 Tegoo bant day feyu ay, di àtte boroom doole yu jote.

19 Jubook mbokk moo tooñ, jéggi tataa ko gëna yomb, mbaa ubbi bunt yu tëje ràpp.

20 Làmmiñ feesal na biiru boroom, yoolu kàddu suur na boroom.

21 Dund ak dee a ngi ci làmmiñ, te wax garab la, ku ko bëgg, lekk ca doom ya.

22 Ku am jabar, am nga ngëneel, am nga yiwu Aji Sax ji.

23 Ku ñàkk a ngi leewaayu, boroom alal di ko jànni.

24 Barey àndandoo lor a ngi ci, waaye xarit a ngi gëna taq nit mbokkam.

19

1 Ñàkk te mat, moo gën dof, di wax njekkar.

2 Teeyadi baaxul, ku yàkkamti moy saw yoon.

3 Nit def na jëfi dof, ba sànk, walbatiku mere Aji Sax ji.

4 Ku barele, barey xarit; ku ñàkk, sab xarit dagg la.

5 Seede buy fen muccul mbugalam, kuy noyyee ay fen du rëcc àtteem.

6 Ñu baree ngi wuta neex boroom daraja, ku nekk a bëgga xaritook kuy joxe.

7 Ku ñàkk, sa bokk yépp dëddu la, sab xarit gën laa soreeti, ngay wax ak ñoom, dara.

8 Kuy sàkku xel, bëgg nga sa bopp; kuy wut ag dégg day baaxle.

9 Seede buy fen muccul mbugalam, kuy noyyee ay fen, mujje sànk.

10 Dund gu neex jekkul cib dof, surga buy jiite kilifa it moo yéés.

11 Ku xam lu jaadu, muñ mer, tanqamtu ku la tooñ ngay damoo.

12 Merum buur ni gaynde gu ñar;

yërmandey buur ni lay cig mbooy.

13 Doom ju dof naqaru baay baa,
te jabar ju pànk mooy senn bu dakkul.

14 Kër ak alal ngay donne ci baay;
jabar ju xelu, Aji Sax jee koy maye.

15 Ab yaafus, nelaw yu xóot,
te ku yàccaaral xiif.

16 Ku jéfe ndigal, sàmm sa bakkan;
ku moytuwul sa bopp, dangay dee.

17 Ku baaxe ku ñàkk, lebal nga Aji Sax ji,
te moo lay yool.

18 Yaral sa doom ba muy teel,
waaye bul topp sa xol, ba rey ko.

19 Ku naqari deret, sonal nga sa bopp;
ku la xettli, tóllanti ko.

20 Déggal ndigal te yaru,
ndax èllég nga xelu.

21 Bare na lu xol di mébét,
waaye Aji Sax jee dogal.

22 Li ñu sopp ci nit mooy ngor,
néewle moo gën fen.

23 Ragalal Aji Sax ji ndax nga gudd fan,
nopplu te baña loru.

24 Ab yaafus day yeb loxoom ci ndab,
tàyyi ko yékkati, sex.

25 Boo ñefee ab ñaawlekat, téxét ba jàngé
ca;
nga yedd kuy dégg, mu xame ca.

26 Kuy yàqal sa baay, di dàq sa ndey,
yaay indi gâceek yeraange.

27 Doom, soo noppee déglu ku lay yar,
sore nga kàdduy xam-xam.

28 Seedeab naaféq faalewul yoon,
ab soxor lu bon lay tàqamtikoo.

29 Na ñaawlekat bi séentu mbugal;
ab dof, yeti gannaaw.

20

1 Naan biñ ak ñaawle, naan ñoll, tanqale,
ku mu nax xeluwo.

2 Buur mer lool, mel ni gayndee ñar;
boo ko merloo, dangay xaru.

3 Moytuw ay, ndam la;

dof boo gis day bëgg xuloo.

4 Ab yaafus du gäbb ba mu jotee,
day wut am ngóob, du am dara.

5 Mébétu jaambur day teen bu xóot,
ku am ug dégg a cay root.

6 Ñu baree ngi naa: «Gore naa,»
waaye kuy boroom kóllère dégg?

7 Ku jub, di jéfeg mat,
doom ju la wuutu bég na.

8 Su buur toogee di àtte,
day gis, di raññee mboolem ayib.

9 Ana ku man ne fóot na xolam,
ba tàggook bàkkaar?

10 Nattu diisaay yu yemul ak lu ni mel,
Aji Sax ji bañ na ko.

11 Gone sax day jéf, nga gis jikkoom;
bu naree dégg te jub, nga xam.

12 Nopp buy dégg ak bêt buy gis,
Aji Sax jee sàkk lu ci nekk.

13 Bul bëggi nelaw, ba ñàkk dab la;
boo njaxlafee, lekk ba desal.

14 Kuy waxaalee ngi naan: «Baaxul de!»
Bu nee wërëñ, di damu naan: «Aka jar!»

15 Wurus am na ak gànjar yu bare,
waaye kàdduy xam-xam a gën per yu jafe.

16 Ku gàddul jaambur bor, jèlal mbubbam;
tayle ko, moo dige feyal jaambur.

17 Njublanj, lekk, jèkke neex,
mujj mel ni lancub suuf.

18 PeXe, ndigal a koy lal;
xare, ay tegtal.

19 Kuy wër di jëw, wuññi sutura;
ku réy lammiiñ, bul déeyook moom.

20 Ku saaga sa ndey mbaa sa baay
añe lëndëmu bàmmeel.

21 Alal ju gaaw
du mujje barkeel.

22 Bul feyantook ku la tooñ;
dénkul ci Aji Sax ji, mu wallu la.

23 Aji Sax ji bañ na nattu diisaay yu wuute,
njublanj ci natti diisaay baaxul.

24 Jéegoy jaam Aji Sax jee ko yor,

kenn xamul foo jëm.

²⁵ Bul gaawtuy digeek Yàlla, di dugal sa bopp;
bul giñ, di réccu.

²⁶ Buur, bu xeloo, ràññee ku bon,
mbugal ko, te du ko ñíeeblu.

²⁷ Xelum nit làmp la bu Aji Sax ji taal,
da koy niital ba ca biir xolam.

²⁸ Ngor ak worma day aar buur,
ngor ay saxal ab jalam.

²⁹ Sagu ndaw, doole ja;
gànjaru mag, bijjaaw ba.

³⁰ Dóor yu la gaañ faj na sag mbon,
ay yar fóot na xolu boroom.

21

¹ Xolu buur walum ndox la ci loxol Aji Sax
ji,
fu ko soob mu jëme ko fa.

² Lu waay def, daa jub ca moom,
waaye Aji Sax jeey natt xol yi.

³ Deel def dëgg ak njekk,
moo gënal Aji Sax ji ab sarax.

⁴ Xeebaateek réy-réylu
mooy bákkaar yi ñuy ràññee ku bon.

⁵ Farlu, woomle;
ku gaawtu, mujj néewle.

⁶ Alal ju la fen may,
cóolool la, day naaw, wut ko xaru la.

⁷ Coxor day sànk boroom,
ndax day baña def njub.

⁸ Ab saaysaay day dëngal,
nit ku dëggu di jubal.

⁹ Dëkkeb ruq cim saq
moo gën jabar ju pànk.

¹⁰ Ab soxor day namma lore,
te du yërëm moroomam.

¹¹ Boo mbugalee kuy ñaawle, ab téxét
jànge ca;
nga jàngal ku rafet xel, mu yokku.

¹² Aji Jub ji Yàlla xam na la ne ca biir kër
ku bon,
te mooy sànk ku bon.

¹³ Ku tanqamlu jooyi ku ñàkk

dina woote wall, wall ñàkk.

¹⁴ Ku mer, may ko ci sutura, mu giif;
boroom xadar, boqal ko neexal, mu dal.

¹⁵ Bu yoon amee, ku jub bég;
kuy def lu bon jàq.

¹⁶ Ku noppee jëfe xel,
noppluji njaniiw.

¹⁷ Ku topp sa bânneex, mujje ñàkk;
ku sopp biiñ ak lu niin du woomle.

¹⁸ Ku bon kèppoo ayu ku baax,
workat gàddu musibam kuy jubal.

¹⁹ Dëkke ndànd-foyfoy
moo gën jabar ju tàng, bare ay.

²⁰ Ku xelu denc këram ngëneeli alal aku
diw,
ab dof saax-saaxee josam.

²¹ Ku saxoo njekk ak ngor
am fan wu gudd, naataangeek daraja.

²² Ku ñaw mana daan jàmbaraari dëkk bu
mag,
ba màbb tata ja ñu yaakaaroon.

²³ Ub sa gëmmiñ, moom sa làmmiñ,
mucc ci njàqare.

²⁴ Ku réy te bew, mooy ñaawle,
day reew, ba jéggi dayo.

²⁵ Ab yaafus day bëgg lu mu amul ba dee,
ndax du nangoo liggéey;
²⁶ day yendoo xemmam, te du am,
ka jub di joxeek a joxewaata.

²⁷ Saraxu nit ku bon ñaawtéef la,
rawatina bu ci jubloo lu bon.

²⁸ Seede buy fen day sànk,
kuy dëgg, sa kàddu sax.

²⁹ Ku bon day ñeme-ñemelu,
ku jub la muy def da koy wóor.

³⁰ Nit xeluwul, amul ug dëgg ak peXe,
ba manal Aji Sax ji dara.

³¹ Nit ay takk, bésuub xare,
Aji Sax ji di maye ndam.

22

¹ Jëw bu rafet a gën barele,
wegeel gën xaalis ak wurus.

² Ku am ak ku ñàkk a bokk lenn:

Aji Sax jee leen boole sàkk.

³ Kuy foog, gisu ay, làqu;
ab téxét ne ca tëñèx, loru.

⁴ Woyofal te ragal Aji Sax ji,
am alal, gudd fan ak daraja.

⁵ Yoonu njublan, ay dég aki fiir;
ku sàmm sa bakkan sore ko.

⁶ Tegal gone ciw yoon,
ba bu màggee, du ko wacc.

⁷ Ku am ay yilif ku ñàkk,
koo leb di surgaam.

⁸ Ku ji njubadi, góob fitna,
yet wa muy dóore, damm.

⁹ Ku tabe am barke,
mooy kiy sédd ku ñàkk cib dundam.

¹⁰ Dàqal kuy ñaawle, ay jeex,
xulooki saaga dakk.

¹¹ Ku dèggu, wax ja yiw,
buur di xaritam.

¹² Aji Sax jee sàmm liy dègg,
di weddi waxi fen-kat.

¹³ Bul yaafus, ba naan: «Gayndee ngi ci
biti,
dañu may rey ci mbedd mi!»

¹⁴ Waxi ndaw su yemadi am yeer la,
ku Aji Sax ji rëbb moo cay tàbbi.

¹⁵ Yëfi dof daa sax ci xolu gone,
boo bantalee, mu tàggook moom.

¹⁶ Not néew-ji-doole ngir yokkule,
mbaa may boroom alal,
loo ci def mu wàññi la.

Fanweeri tegtal a ngi

¹⁷ Teewlul te déglu li boroom xel yi wax.
Defal sam xel ci li ma lay xamal.

¹⁸ Soo mokaalee, ba man koo tari,
muy sa mbégte.

¹⁹ Yaw laa koy xamal tey jii,
ndax nga wóolu Aji Sax ji.

²⁰ Dama laa bindal fanweeri dénkaane,

ci wàllu digal ak xam-xam,
²¹ ngir xamal la lu wér te dèggu,
nga yóbbaaale kàdduy dègg,

yoo tontoo ña la yebal.

[1]

²² Bul xañ néew-ji-doole; néew-ji-doole la.
Ku tumuránke, bu ko soxore cib àtte,

²³ Aji Sax ji da koy taxawu,
ku ko xañ, mu xañ la bakkan.

[2]

²⁴ Bul xaritook ku gaawa mer,
bul ànd ak ku tàng bopp.

²⁵ Lu ko moy nga mel ni moom,
te kon nga lonku.

[3]

²⁶ Bul bokk ci ñiy dige,
di gàddul nit bor.

²⁷ Soo amul loo ko feyale,
ñu yékkatee la sab lal, nangu ko.

[4]

²⁸ Bul toxal màndargam cosaan ci làccu
suuf
te say maam tegoon ko fa démb.

[5]

²⁹ Seetlul ku man liggéeyam,
buur lay liggéeyal,
du liggéeyal baadoolo.

23

[6]

¹ Soo bokkeek kilifa ndab,
xamal bu baax ni ngay lekke.

² Soo dee ku bëgg lekk,
téyeel sa loxo.

³ Bul xemmem daraam lu neex,
ñam woowu la lay naxe.

[7]

⁴ Bul rey sa bopp ci wut alal,
bu ko xalaat sax.

⁵ Ndax xef ak xippi mu wéy,
mel ni lu saxi laaf,
ne fëyy, naaw ni jaxaay.

[8]

⁶ Ab nay, bul lekke këräm,
bul xemmem daraam lu neex.

⁷ Ma ngay xool la ngay lekk, nu mu tollu,
naan la: «Lekkal, naanall!»
Te xol ba àndu ca.

⁸ Ndog soo ca lekk, waccu ko,
yiw woo ko wax daldi neen.

[9]

⁹ Bul wax akub dof,
day xeeb sam xel.

[10]

¹⁰ Bul toxal màndargam cosaan ci làccu
suuf,
bul aakimoo suufas jirim.

¹¹ Ki koy aar màgg na,
da koy taxawu, dal ci sa kaw.

[11]

¹² Defal sam xel ci yar,
te teewlu kàdduy xam-xam.

[12]

¹³ Bul ñéebloo yar gone,
bantal ko taxu koo dee.

14 Soo ko bantalee,
mu mana mucc.

[13]

15 Sama doom, soo xeloo,
sama xol neex.

16 Ngay wax njub,
ma béǵ.

[14]

17 Bul ñee bàkkaarkat,
saxool ragal Aji Sax ji,

18 ndax kat moo am muj,
te kon sa yaakaar du tas.

[15]

19 Déglul, doom, muusal
te yebu ci yoonu njub.

20 Bul bokk ci ñiy lekk lu ëpp,
ak a màndi,

21 ndax ku béǵg lekk ak a màndi, ñàkk dab
la,
dajjant it, rafle rekk.

[16]

22 Déglul sa baay bi la jur.

Bu sa ndey màggatee, bu ko sàggane.

23 Jëndal dëgg te bu ko jaay.

Sàkkul xel mu rafet ak yar akug dégg.

24 Su doom jubee, seral xolu baay.

Boo juree ku rafet xel, am nga bànnex.

25 Deel béǵal ndey ak baay,
rawatina ndey ji la jur.

[17]

26 Doom, teewloo ma xel
te roy ma.

27 Ab gànc yeer mu xóot la,
jabaru jaambur di teen bu xat.

28 Ma ngay tëroo nib sàcc,
góor ñu bare lay fecciloo worma.

[18]

29 Ana kuy tiislu, naan: «Wóoy, ngalla
man!»

Ana kuy xulook a jàmbat,
di gaañu ci dara,

bët ya xonq curr?

30 Xanaa kiy naan-naane biiñ,
di mosi yeneen njafaan?

31 Bul xool biiñ ak xonqaayam.
Aka yànj cib kaas

te neexa jolu!

32 Bu weese mu màtt la ni jaan,
ne la càppit ni ñàngóor.

33 Dangay mel ni kuy gis lu doy waar,
sam xel di ràbb lu jekkadi.

34 Nga mel ni ku tèdd biir géej,
di jaayu ca biir gaal ga,

35 nga naan: «Dañu maa dóor te
gaañuwuma,

duma ma te yéguma ko.

Moo! Duma yewwu nag,
ba naaneeti?»

24

[19]

1 Bul ñee ku bon,

bul wuta ànd ak moom,

2 ndax coxor lay nas ci xolam,
te fitna la ay waxam di yee.

[20]

3 Xel mu rafet ay tabax kër,
rafet déggina a koy samp.

4 Xam-xam ay feesal néeg ya
ak mboolem alal ju jafe te yànj.

[21]

5 Ku rafet xel di boroom doole,
ku xam, gëna man;

6 tegtal yu xelu lañuy xaree,
diisoo bu yaatooy maye ndam.

[22]

7 Wax ju xelu sut nab dof,
jataayu pénc du fa àddoo.

[23]

8 Kuy mébét lu bon,

ñu ne yaay rambaaj bi.

9 Pexem dof bàkkaar la,
te kuy ñaawle, ñu sib la.

[24]

10 Bu mettee, nga yoqi,
sa doolee néew.

[25]

11 Wallul ku ñuy reyi te tooñul,
xettlil kuy tërëf, ñu di ko reyi.

12 Soo nee sa yoon nekku ci it,
kiy natt xol yi, xam na,
moom miy wattu sa bakkan, xam na,
te kat mooy fey nit jëfam.

[26]

13 Doom, deel lekk lem, baax na,

lem ju xelli, boo sexee, mu tem-temi.

14 Xamal ne xel mu rafet ni la neexe;
soo xeloo, sa muj rafet,
te sa yaakaar du tas.

[27]

15 Soxor bi, bul tëru ku jub ci kéram,
bul yàq dëkkuwaayam.

16 Ku jub day daanu juróom yaari yoon,
jógaat,
ab soxor sërëx ci njekkar.

[28]

17 Bu sab noon daanoo, bu ko bànnexoo,
bu tërëfee, bu ko bége.

18 Lu ko moy Aji Sax ji gis la, ñaawlu ko,
daldi giif, dootu ko mbugal.

[29]

19 Bu sa xol tàng ci ku bon,
bul ñee ku soxor.

20 Ku bon amul muj,
ku soxor day mel ni taal bu fey.

[30]

²¹ Doom, ragalal Aji Sax ji, wormaal buur.
Bul lëngook kuy fippu.
²² Yàllaak buur a koy bette mbugal,
te kenn xamul musiba mu muy doon.

Yeneen tegtal a ngi

²³ Lii it ñi rafet xel a ko wax.

Par-parloo cib àtte baaxul.

²⁴ Ku ne defkatu lu bon: «Yaw, tooño»,
aw nit móolu la, mbooloo ñàññ la;

²⁵ ku ko ne: «Yaa tooñ», yaay baaxle,
taasoo barke bu yaa.

²⁶ Ki lay wax dëgg
sa soppe la.

²⁷ Ruujal sab tool, ji ko,
doora tabax sa kër.

²⁸ Bul tuumaal nit ci neen,
te bu ko seedeel ay fen.

²⁹ Bul ne: «Li mu ma def laa koy def,
damay feyu li mu ma def.»

Yaafus amul njariñ

³⁰ Toolub ku yaafus laa jaare,
ak tookeerub nit ku ñàkk bopp.

³¹ Ndeke lépp a nga saxi dég,
fépp fees akum ñax,
tabaxu doj ba ko wër màbb.

³² Maa ko gis, di xalaat,
xoolaat ko, jàngé ca.

³³ Booy dajjant ak a for bët,
di tegley loxook a jaaxaan,

³⁴ néewlee ngi lay dikkal nib sàcc,
ñàkk gannaayul la.

Yeneen kàddu yu xeloo ngi yu tukkee ci Suleyman

25

(Saar 25—29)

¹ Lii it ay kàddu yu xelu la, di yu
Suleyman, ay niti Esekiya buurub Yuda
sotti ko.

² Màggug Yàllaa ngi ci li mu làq,
darajay buur a ngi ci li mu feeñal.

³ Maneesula daj li ci xelu buur,
xalaatam daa kawé ni asamaan, xóot ni
suuf.

⁴ Xellil xaaalis, tonni lu ca rax,
ba ab tégg man caa am ndab.

⁵ Ab soxor it, dàqal, mu sore buur,
ngir njubte law, jalam sax.

⁶ Bul réy-réylu fi kanam buur,
bul tooge jataayu boroom daraja,
⁷ ndax ñu ne la: «Yéegal, jegesi fii»,
moo gën ñu torxal la ci kanam kilifa.

Boo gisalee sa bopp it,

⁸ bul gaawa layooji,
ana nooy def èllég, bu ñu la yeyee?

⁹ Naarool ak ki nga joteel,
te bul jéebaane jaambur.

¹⁰ Lu ko moy ñu dëgg ko, rusloo la,
sab der yàqu yaxeeet.

¹¹ Wax ju ñor di nataalu wurus
wu tege ci xaaalis.

¹² Kàddu yu lay yedd ci kuy dëgg,
jaarob wurus la mbaa gànjaru ngalam.

¹³ Ndaw lu wóor day seral xolu njaatigeem,
mooy ndox mu sedd ci tàngooru ngóob.

¹⁴ Kuy dige te doo joxe,
yaay xiin wu ngelaw, mu naaxsaay.

¹⁵ Muñ mer ay nax kilifa,
te wax ju neex, fu mu jaar, mu nooy.

¹⁶ Boo gisee lem, lekkal lu yem;
bu éppee, nga waccu ko.

¹⁷ Na sa tànk di gëj kër dëkkandoo;
boo ko sàppee, mu jéppi la.

¹⁸ Ku seedeel sa moroom ay fen,
yen nga ko aw njur mbaa saamar mbaa
fitt.

¹⁹ Bul wóolu workat bésub njàqare,
mooy bëñ bu bon mbaa tànk bu nasax.

²⁰ Kuy woy, boroom tiisu xol di dëgg,
yaa futti mbubham cib sedd,
mbaa nga jonj xorom ci góomam.

²¹ Bu sab noon xiifée, jox ko mu lekk,
bu maree, may ko mu naan,

²² day rus ba mel ni koo yeni xal,
te Aji Sax jee lay fey.

²³ Jëw, mer a cay topp;
mooy ngelawal taw, taw a cay topp.

²⁴ Dëkkeb ruq cim sàq
moo gën jabar ju pànk.

²⁵ Xibaaru jàmm, bawoo fu sore
mooy ndox mu sedd ci ku loof.

²⁶ Ku jub bu dee nangul ku bon, yàqu na,
ni seyaan bu nëx mbaa teen bu xàbb.

²⁷ Lekk lem ju éppe baaxul,
te wut waaw-góor du ngóora.

²⁸ Ku dul ànd ak sa sago,
yaa neexa song ni dëkk bu dara wërul.

26

Ràñneel ab dof

¹ Teraanga jekkul cib dof,
mooy seddub nawet mbaa taw cim ngóob.

² Ñaan-yàlla, soo tooñul, du la dal,
day mel ni picc muy naaw, tëë tonj.

³ Xiir, aw fas; laab, mbaam;
yetu gannaaw, ab dof.

⁴ Bul topp ab dof cig ndofam,
lu ko moy nga mel ni moom.

⁵ Waaye toppal ab dof cig ndofam,
lu ko moy mu defe ne daa muus.

⁶ Ku yóbbante ab dof kàddu,
yaa woo fitna, gor say tànk.

⁷ Kàddu gu xelu ci gémmiñug dof,
mooy tànki lafañ, amalú ko njariñ.

⁸ Kuy teral ab dof,
jël ngaw doj, takk ko ci mbaq.

⁹ Kàddu gu xelu ci gémmiñug dof
mooy car aki dégam, màndikat xàcci.

¹⁰ Njaatige luy liggeeyloo ab dof ak kuy
romb,

daa mel ni fittkat buy gaañ ku ne.

¹¹ Dof day def jëfi dof, dellu ca,
mooy xaj, bu wacoo, lekkaat ko.

¹² Ana koo gis mu ne: «Maa xelu»?
Kooku ab dof a ko gën demin.

Ab yaafus a ngi

¹³ Ab yaafus da naan: «Gayndee ngi ci
yoon wi!

Gayndee ngi ci mbedd mi!»

¹⁴ Ab yaafus day tëdd ak a walbatiku,
mooy bunt, day jaayu, demul fenn.

¹⁵ Ab yaafus day yeb loxoom ci ndab,
waaye yékkati ko, sex, da koy sonal.

¹⁶ Ab yaafus day foog ne moo gëna muus
juróom ñaari boroom xel yu xam tont.

Ay nit ñuy loree ngi

¹⁷ Kuy xuloo lu sa yoon newul,
yaa jàpp ci noppi xaj buy romb.

¹⁸⁻¹⁹ Nit kuy naxe,

naan: «Damay fo!»

yaay dof buy sànniy jum,
di fitteek a reye.

²⁰ Bu matt amul, ab taal fey,
fu soskat amul it, xuloo jeex fa.

²¹ Këriñ defi xal, matt xamb ub taal,
ab xulookat di xambu ay.

²² Waxi jëwkat di ñam wu neex,
wuy seey, jàll ca biir-a-biir.

²³ Kuy wax lu neex, tey mébét lu bon,
yaay xaalis bu rax, ñu xoob ca ndabal
xandeer.

²⁴ Ab noon làqoo na ay waxam,
lal pexey wor ca xolam.

²⁵ Buy wax lu neex, bul gëm,
ñaawtéef la xol ba fees dell.

²⁶ Su la nèbbalee mbañeel, di la nax it,
ag mbonam mujj bir ñépp.

²⁷ Ku gasal nit am yeer, yaa cay daanu;
ku béranju doj, ngir tance, yaay tancu.

²⁸ Kuy fen, dangaa bañ ka nga fenal,
te boroom làmmiñ wu neex day sánke.

27

Yeneen diglee ngi

¹ Bul damoo èllég,
ndax xamoo luy xew tey.

² Bul téggu, bàyyil ñu tagg la,
muy waxi keneen; yaw, bu ko wax.

³ Doj diis na, suuf dib sëf,
waaye fitnay dof a ko raw.

⁴ Xadar day ñàng, mer di wal mu baawaan,
waaye fiiraange amul moroom.

⁵ Artu yu ñu la biralal
moo gën cofeel gu la boroom ñooru.

⁶ Soppe, bu lay gaañ sax, wóolu ko.
Nit bañ na la, te di la foon lu bare.

⁷ Ku suur, bañ lem ju xelli,
waaye boo xiifée, lu wex lu ne neex la.

⁸ Ku sore fa nga bokk,
dangay mel ni picc mu sore tàggam.

⁹ Diwook suuru day naatal xol;
waaye li neex cib xarit, xol la lay digale.

¹⁰ Bul fátte sab xarit mbaa sa xaritu baay,
bul jàq ba seeti sa mbokk;
dëkkandoo bu jeege gën mbokk mu sore.

¹¹ Muusal, doom, ma bég,
ba mana tontu ku ma sikk.

¹² Kuy foog, gisu ay, làqu;
ab téxét ne ca tëñëx, loru.

¹³ Ku gàddul jaambur bor; jëlal mbubbam;
tayle ko, moo dige feyal ndaw su yemadi.

¹⁴ Nuyoo bu xumb, suba teel
mooki saagaa yem.

¹⁵ Jabar ju pànk
mooy senn bu dakkul, cib taw;

¹⁶ ku ko mana yemale,
mana téye ngelaw mbaa nga njëb ag diw.

¹⁷ Weñ ay nàmm weñ,
nit ay nàmm xelu moroom ma.

¹⁸ Ku aar garab, lekk ca doom ya;
ku topptoo sa sang, am ngërëm.

¹⁹ Ku xool cim ndox, gis sa kanam,
nga xool sab xol, gis sa jikko.

²⁰ Njaniiw ak biir suuf du fees,
bèt it du doylu mukk.

²¹ Xaalis ak wurus sawaraa koy xelli,
waaye àtteb nit ca jëëm.

²² Soo jëloon ub dof, yeb ci gënn,
booleek pepp, wol,
du tax ndof ga deñ.

²³ Xamal bu baax lu say gàtt nekke,
te def sa xel ci say gétt,

²⁴ ndax alal wéyul fàww,
ag pal du ñeel sètoo sèt.

²⁵ Gannaaw bu ñu gubee,
ba ñax saxaat,

ñu dajale ngoon ma ca tund ya * ,

²⁶ say xar da lay amal koddaay,
bëy yi génneel la njégu tool.

²⁷ Meewum bëy daldi am, ba doy la dund,
yaak sa waa kër
ak sa surga yu jigéen.

28

¹ Ku bon daw na te dàqeesu ko,
ku jub ñeme ni gaynde.

² Bu am réew dee fippu, kilifa ya bare;
réew mu jàmm sax, kilifa gaa am déggin
ak xam-xam.

³ Ku ñàkk, su jekkoo ab ndóol,
du ko bàyyil fepp, day mel ni waame.

⁴ Ku wacc yoon, gërëm ku bon;
ku wormaal yoon, jänkoonteeq ku bon.

⁵ Ku bon xamul njub,
kuy wut Aji Sax ji, xam nga njub bu wér.

⁶ Ñàkk te mat
moo gën barele te dëng.

⁷ Gone gu sàmm yoon am nag dégg,
ku ànd ak sagaru nit gacceel sa baay.

⁸ Kiy leble di tege, ba barele,
kay yéwéne néew-ji-doole lay dencal.

⁹ Soo dee tanqamlu yoon,
sag ñaan sax Yàlla suur na ko.

¹⁰ Ku yóbbe bàkkaar nit kuy jubal,
yeer ma nga gas, yaa cay tàbbi,
waaye ku mat di jagoo ngéneel.

¹¹ Waaya a ngi barele, defe ne xelu na;
ku néewle am ug dégg, gis ne xeluwul.

¹² Bu ku jub amee ndam, mbégte mu réy
la;
ab soxor falu, ñépp làquji.

¹³ Kuy làq say tooñ doo baaxle,
ku koy nangu, tuub ko, am yërmandey
Yàlla.

¹⁴ Mbégte ñeel na ku saxoo ragal,
waaye ku dëgër bopp tàbbi ci njekkar.

¹⁵ Kilifa guy soxore néew-ji-doole
mook gaynde guy yëmmoo yem, mbaa rab
wuy songe.

¹⁶ Kilifa gu amul ug dégg, day foqati rekk,
waaye ku bañ lu lewul, gudd fan.

¹⁷ Ku bóom nit, daw, ba tàbbi njaniiw;
bu ko kenn taxawu.

¹⁸ Mat, mucc;
dëng, dàll daanu.

¹⁹ Beyal sab tool, sab dund doy;
topp ay caaxaan, ndóol ba doyal.

²⁰ Boroom worma, bare barke;
ku yàkkamtee woomle, sa mbugal du jaas.

²¹ Par-parloo baaxul,
waaye dogu mburu moyloo na kilifa.

²² Ab nay day yàkkamtee barele,
te xamul, ba ko ñàkk di dab.

²³ Boo artoo nit, mu baaxe la èllëg;
yaa koy gënäl ku ko doon jay.

²⁴ Ku xañ say waajur seen alal
te defe ne tooño, yaa
neexook saaysaayu yàqkat.

²⁵ Ku bëgge day sooke ay,
te ku wóolu Aji Sax ji, woomle.

²⁶ Ku doylu sam xel, dof nga;
ku jëfe xel mu rafet, mucc nga.

²⁷ Kuy jox néew-ji-doole, doo ñàkk;
nga gëmm ne gisoo, bare ku la móolu.

²⁸ Bu ab soxor faloo, ñépp làquji,
bu daano, ku jub teg tànq.

29

¹ Ku ñuy àrtu, nga tè ticc,
dangay jekki yàqu, ba wees am paj.

² Ku jub falu, baadoolo bég;

* 27:25 27.25 Ca Israyil tund yaa èpp lu muy taw, te fa la ñax ma èppe.

ab soxor jiite, baadoolo binni.

³ Kuy jēfe xel, bégal sa baay;
nga ànd aki gànc, yàq alal.

⁴ Buur jub, am réew dēgër;
mu bēggi galag, réew ma sàнку.

⁵ Kuy jay sa moroom,
yaa ngi koy dugal.

⁶ Ku bon day moy, ba dugal boppam;
ku jub di woy ak a bànnexu.

⁷ Ku jub a xam àqu néew-ji-doole,
ab soxor xamu ca dara.

⁸ Ñaawlekat a ngi taal ab dēkk,
ku xelu di giifal mer.

⁹ Boroom xel, buy layook ub dof,
bu mereek buy ree, jàmm du am.

¹⁰ Ab bóomkat day sib ku mat,
di wuta bóom kuy jubal.

¹¹ Ab dof day mer, sàmbaar;
ku xelu, mer, ànd ak sagoom.

¹² Kilifa dégluy fen,
jawriñ yépp di ñu bon.

¹³ Ku ñàkk ak ka ko nennoo bokk lenn,
Aji Sax jee leen boole sàkk.

¹⁴ Buur àtte way-ñàkk ci dēgg,
ab jalam sax.

¹⁵ Deel bantal ak a yedde, day rafetal xel;
gone goo bay-bayal, mu gàccee ndeyam.

¹⁶ Bu ku bon féetee kaw, ag moy law,
waaye ku jub, fekke jéllu ku bon.

¹⁷ Yaral sa doom, mu noppal la,
bànnexal la.

¹⁸ Fu Yàlla feeñoowul, nit ña fétteeral,
waaye ku topp yoon, am mbégte.

¹⁹ Waxi neen yarul surga,
da lay dégg te du la déggal.

²⁰ Ana koo gis, mu rattaxle?
Kooku ab dof a ko gën demin.

²¹ Ku yàq sab surga ba muy ndaw,
bu èllégee mu defe ne doom la*.

²² Boroom xadar day sooke ay,
te ku tàng bopp moy, moyati.

²³ Réy-réylu, detteelu rekk;
woyofal, ñu naw la.

²⁴ Ku ànd akub sàcc, sa noonu bopp nga:
soo waxee dēgg, yoon topp la;
soo ko miimee, Yàlla topp la†.

²⁵ Ragal nit dugal sa bopp la,
ku wóolu Aji Sax ji, fegu.

²⁶ Ñu baree ngi sàkku kilifa baaxe leen,
moona Aji Sax jeejy àtteb jaam.

²⁷ Ku jub day sib ku dēng,
ku bon sib kuy jubal.

Kàddu yi Agur wax

30

(Saar 30)

¹ Lii waxi Agur la, góor gay doomu Yake
mu Maasa*. Góor ga daa wax ak Itiyel,
wax ak Itiyel ak Ukal. Mu ne:

² Maa dofe dēgg, ba yées ci nit ñi,
dég-dégu nit sax awma ko.

³ Jànguma, ba am xel mu rafet,
awma xam-xam ci Aji Sell ji.

⁴ Ana ku yégoon asamaan, ba wàcc?
Mbaa mu masa ñeb ngelaw ciy loxoom?
Ana ku masa èmb ndox ci ndimo?
Mbaa mu rédd mboolem kemi àddina?
Nu mu tudd ak nu doomam tudd?
Wax ma, yaw mi ko xam!

⁵ Lu Yàlla wax, mat na sèkk,
mooy yiir ku ko làqoo.

⁶ Bul yokk ay waxam,
mu weddi say fen, nga weeru.

⁷ Éy Yàlla, yaar laa la ñaan,
ngalla may ma ko sama giiru dund:

⁸ caaxaan aki fen, yal na ma sore,
néewleek barele, bu ma ci may lenn,
leel ma lu ma doy;

⁹ lu ko moy ma regg, weddi la,
ba naan: «Kuy Aji Sax ji?»
Mbaa ma ñàkk bay sàcc,
di la ñàkke worma, yaw sama Yàlla.

¹⁰ Bul sikkal ab surga ca njaatigeem,
da lay ñaan-yàlla, mu dal la.

¹¹ Ag maas a ngi saaga baay,
te wormaaluñu ndey.

* 29:21 29.21 Mbaa: bu èllégee mu jaaxal la. † 29:24 29.24 Yàlla topp la: seetal ci *Sarxalkat* yi 5.1: Bu nit bàkkaaree ndax lu mu dēgg wooteb seede cib àtte, ba noppi baña wax la mu gis mbaa mu xam ko ca mbir ma, dees na ko ko topp. * 30:1 30.1 Maasa bérab la bu genn giirug Israyil sancoon ca bëj-gànnaru Arabi.

12 Ag maas a ngi defe ne set nañu,
te taq ripp ak bàkkaar.

13 Ag maas a ngi danñiiral;
aka ñoo mana xeeloo!

14 Ag maas a ngi, seeni sell niy saamar,
seeni gëñ niy paaka,
ñuy lekk néew-ji-doole, ba raafal leen ci
réew mi,
ba ku ñàkk jeex ci biir nit ñi.

Ay kàddoo ngi yu ànd ak lim

15 Saxu watar du suur, ñaar ñu jigéen la
am:
Jox Ma ak Jox Ma.

Ñett a ngii ñu dul suur,
ba ci ñeent ñu dul ne doy na muk:

16 njaniw,
jigéen ju jaasir,
suuf, du màndi ndox,
sawara, du ne doy na muk.

17 Kuy xeelu sa baay,
di siidee déggal sa ndey,
baaxoñ génne ciw xur, luqi sa bët,
tan ya lekk.

18 Ñett a ngii, yéem na ma,
ba ci ñeent yu ma xamul:

19 yoonu jaxaay ci asamaan,
yoonu jaan ci kaw doj,
yoonu gaal ci diggu géej,
yoon wi góor di jaar as ndaw.

20 Jikkoy jigéenu moykat a ngi.
Day lekk, wommiku, te naan:
«Defuma dara la aay!»

21 Ñett a ngii, day yéngal suuf,
ba ci ñeent yu suuf àttanul:

22 jaam bu falu buur,
dof bu regg,
23 ndaw su bon su for jëkkër,
jigéen ju wuutu sangam bu jigéen.

24 Ñeent a ngii, di lu tuut ci kaw suuf,
te am xel, yaroo xel:

25 xorondom, néew na doole,
waaye bu jotee, mu denc dundam;
26 daman†, barewul kàttan,
te day dëkk ciy doj;
27 soccet, amul buur,
teewul ñuy àndandoo, diy gàngoor;
28 sindax, manees na koo njëb,
teewul ma nga biir kër buur.

29 Ñett a ngii, ñu jekk um ndaag,
ba ci ñeent ñu jekk doxin:

30 gaynde, mooy buuru rab yi,
ragalul kenn;

31 séq daagu, jekk taxawaay,
ab sikket,
ak buur ci biiri dagam.

32 Boo sàgganee bay téggu,
mbaa ngay mébét lu bon,
nanga téye saw làmmiñ.

33 Ndax ku ruux soow, am ca dax,
ku wañaar bakkan, mu nàcc,
te lu jógal xol, indiw ay.

Buur Lemuyel a ngi yeete

31

(Saar 31)

1 Lii waxi Lemuyel la, buuru Maasa*, te
ndeyam jàngal ko ko. Mu ne:

2 Ngóor si doom, saa doomi bopp!
Yaa di ñaan gu nangu, doom!

3 Bul jox jigéen ñi sa doole,
bul jox say siddit jigéen ñiy sànk buur:

4 Buur moomul di naan biiñ, Lemuyel,
buur moomu ko;
kilifa moomul di sàkku ñoll.

5 Lu ko moy mu naan, ba fàtte lu yoon
tèral,

xañ néew-ji-doole ju ne, àqam.

6 Bàyyeel ñoll kuy sànkú,
bàyyi biiñ ak boroom naqar.

7 Bu ñu naanee, fàtte seen néewle,
ba dootuñu fàttliku seenu tiis.

8 Nanga àddul ku amul kàddu,
ku sésul fenn, nga ñoñal àqam.

9 Deel àddu, di àtte njub;
ku ñàkk ak ku néewle, nga sàmm àqam.

Jeeg bu baax nii lay mel

10 Jeeg bu jambaare, ndaw lu jafe,
ba rawati gànjar!

11 Jëkkër ja da koy wóolu,
te jëkkër ja day am xéewal, du ko ñàkk.

12 Day defal jëkkëram lu baax, du ko lor,
tey ànd ak bakkan.

13 Day wut kawari gàtt aki wëñ,
di ca liggéeye mbégte.

14 Day mel ni gaalu jula,
di jëli dundam fu sore.

15 Day jóg te bët setul,
di waajal njëlu njabootam,
ak a sas ay janqam.

16 Day seetlu ab tool, jënd ko,
sàkk ciw ñaqam, jëmbat tóokër.

17 Day gañu di góor-góorlu,
ak a dëgéral pèrèg ya.

18 Day gis njartel liggéeyam,
te lãmpam du fey guddi.

19 Ma ngay yor poqe
ak kéccu, di ècc.

20 Day jox ku ñàkk,

† 30:26 30.26 Daman xaw na nirook njomboor.
bëj-gànaaru Arabi.

* 31:1 31.1 Maasa bérab la bu genn giirug Israyil sancoon ca

di sàkkal néew-ji-doole.

²¹ Tiitul ci njaboot gi sedd bu metti,
ndax ñoom ñépp ay tegley yére.

²² Mooy sàkkal boppam ay malaan,
ay yéreem mucç ayib te yànj.

²³ Dees na ràññee jëkkéram ca pénc ma,
fa muy toog ca magi réew ma.

²⁴ Ndaw su ni mel day ràbb ay yére, di
jaay,

aki gañaay, di jox jaaykat yi.

²⁵ Faaydaak jom la làmboo,
te èllég ubul boppam.

²⁶ Day wax lu xelu,
di digle ngor.

²⁷ Jigéen jooju mooy bàyyi xel ci nja-
bootam,

te du nangoo yàccaaral.

²⁸ Doom ya dañu ko naan: «Jarawlack!»
jëkkër ja di ko gërëm naan:

²⁹ «Jeeg bu jambaare bare na,
waaye yaw, yaa ci raw.»

³⁰ Melokaan wu jekk day naxe, taar day
wéy,

waaye jigéen ju ragal Aji Sax ji,
kookoo jara gërëm.

³¹ Joxleen ko njukkalu ñaḡam,
jëfam di woyam ca pénc ma.

Kàdduy Waare di téere bu ëmb ay gëstu ci solob dundu nit

¹ Lii kàdduy waarekat baa, di doomu
Daawuda te di buurub Yerusalem.

Luy solob àddina?

² Cóolóoloo cóolóol, waru waarekat ba,
cóolóoloo cóolóol,
léppi cóolóoli neen.

³ Ana sax luy njariñu doñ-doñoo doñ-doñ
ju nit di doñ-doñi fi kaw dun bi?

⁴ Ag maas wéy, ag maas teew;
àddina sax ba fàww.

⁵ Jant fenk, so,
ne coww dellu fa muy fenke.

⁶ Ngelaw jëm bėj-saalum,
wiiri jëm bėj-gànaar,

di wiir ak a wiiraat,
di delluy wëndeelu, topp yoonam.

⁷ Dexoo dex wal, wuti gééj,
te taxul gééj fees.

Fa dex wal jëm,
fa lay walati, jëm.

⁸ Jéfoo jéf ca jéfit,
lámmin tuddul lépp,
bët du suur,

nopp du buur.

⁹ Lu ayoon mooy ayati,
lu ñu jéfoon moom lañuy jéfati.
Dara yeesul fi kaw suuf.

¹⁰ Léf a ngii, nit naa:

«Lii de lu bees la,»
te mu ngi fi woon lu yàgg,
lu jiitu sunu juddu.

¹¹ Kenn du fàttliku ñi jiitu,
ñiy ñëwit,

ñi leen topp duñu leen fàttliku.

Ma seet lu ma doy

(Saar 1.12—2.23)

Rafet xel doyl

¹² Man waarekat bi,
buurub Israyil laa woon ci Yerusalem.

¹³ Damaa dogu ne damay gëstu,
teg ko ci xel mu rafet, di settantal
mboolem lu nit def fu jant bi tiim.

Ndaw sas wu tiis wu Yàlla sase,
ñu war koo sasoo!

¹⁴ Gis naa jépp jéf ju jéfe ci kaw suuf,
ndeke lépp cóolóoli neen la ak napp um
ngelaw.

¹⁵ Lu wafaaru, maneesu koo jubbanti;
lu teewul, maneesu koo lim.

¹⁶ Damaa wax ci saam xel naa:

Man de, maa ngii di gëna xelu,
ba sut ku ma jiitu ci jalub Yerusalem.

Damaa xuus ci xel mu rafet ak xam-xam,

¹⁷ di dogoo xam luy xel mu rafet,
xam luy nitoodi akug ndof.

Fekk loolu it napp um ngelaw la.

¹⁸ Ku gééjal xel mu rafet, gééjal naqar;
yokku xam-xam, yokku tiis.

2

Bànnexu neen doyl

¹ Saam xel da ne:

«Xaaral rekk, ma natt bànnex,
ñam lu neex ba xam.»

Ndeke loolu it, cóolóoli neen.

² Ma ne: «Reetaan ag nitoodi la;
te mbégte lu muy jariñ?»

³ Saam xel ne ma, ma naan biiñ boog,
béglou,

ba mel nib dof,
tey ànd ak sama xel,

ba gis lu ci baax,
ba doom aadama di ko def,
giiru dundam fi ko jant bi tiim.

⁴ Damaa liggéey lu réy.

Tabaxlu naa samay kër,
jëmbat sama toolub reseñ.

⁵ Ma sàkki tóokër aki tool,
jëmbat ca garab yuy meññ lu ne,

⁶ sàkklu samay déeg,
di ko suuxate, garab ya naat.

⁷ Ma jëndi jaam, góor ak jigéen;
ñu ami doom ci kër gi.

Ma am jur gu ne gãññ, gu gudd ak gu gàtt,
ba ëpple ku ma jiitu ci Yerusalem.

⁸ Ma dajale sama xalis ak sama wurus,
moom alali buur yeek diiwaan yi ma yilif,
tabb samay woykat, góor ak jigéen,
boole ci bànnex bi ci jabari jabar.

⁹ Ma am doole, yokku,
ba sut ku ma jiitu ci Yerusalem,
te teewul may jéfe xel.

¹⁰ Lépp lu saay gët xemmema,
xañuma ko sama xol.

Bañaluma sama bopp benn bànnex,
xanaa di bége lu ma liggéey,

yooloo ko la ma liggéey.

¹¹ Ma xoolaatal sama bopp

lépp lu ma sottal,
doñ-doñi ko, ba sottal,

ndeke lépp, cóolóoli neen ak napp um
ngelaw.

Nit gisul njariñ ci kaw suuf.

Rafet xel fanqul dee

¹² Ma geesu xoolaat xel mu rafet,
xool ag nitoodi akug ndof.

Ana ku may wuutuji ci nguur gi,
lu muy def lu moy lu ñu daan def?

¹³ Ma gis ne ni leer éppe lëndëm njariñ,
ni la xel mu rafet éppe ndof njariñ.

¹⁴ Ku xelu day xool fa muy jaare,
dof biy tēñex-tēñexi cig lëndëm.

Ma ne moona ñoom ñaar a bokk dogal moos.

¹⁵ Ma xalaataat, saam xel ne ma, dof bi noonu, man it noonu; ana lu may xeloo xelu doye?

Saam xel ne ma loolu it, cóolóoli neen.
¹⁶ Ku xelook ku dof, du yàgg ñu fàtte la; ay bés yu néew, ñu fàtte lépp. Acam! Dof, dee; rafet xel, dee.

¹⁷ Ma far bañ àddina.

Ndaw naqar ci jéfi kaw suuf, te lépp di cóolóol ak napp um ngelaw!

¹⁸ Sama doñ-doñ, ji fi kaw dun bi, génnliku na ma,

dama koy wacce ka may wuutuji rekk,

¹⁹ xameesul ku xeloom ku nitoodi lay doon, mooy moom lu ma doon doñ-doñi, te sama manoore manaloon ma ko fi kaw dun bi.

Loolu it, cóolóoli neen.

²⁰ Sama xol a jeex ci doñ-doñ ju ma doñ-doñi fi kaw dun bi.

²¹ Nit a ngi doñ-doñee xel, xam-xam ak manoore,

te ku doñ-doñiwuloon lay wacce alalam. Loolu it, cóolóoli neen ak naqar wu réy.

²² Ma ne ana lu nit di jariño

ci doñ-doñ ak xalaatu xol, yi muy doñ-doñaale fi kaw dun bi?

²³ Ndegam day yendoo tiis ak naqaru tès-tès,

ba far fanaanoo xel mu dalul.

Loolu it, cóolóoli neen.

Njariñ, fa Yàlla

(Saar 2.24—12.8)

Jàmm, fa Yàlla

²⁴ Kon nit amul lu gën di lekk ak a naan, di bannexoo ñaqam.

Ma gis ne loolu it Yàllaa koy maye.

²⁵ Ana kuy lekk ak a bannexu, te du Yàlla?

²⁶ Yàlla de, ku mu gërëm, xelal ko, xamal ko, bégal ko;

bakkaarkat bi, Yàlla teg ko, muy denc ak a dajale, ka mu gërëm jël.

Loolu it di cóolóoli neen ak napp um ngelaw.

3

Jamono, Yàlla

¹ Lu nekk ak jotam, jot gu nekk ak la ca war fi jant bi tiim.

² Day jot nga juddu, mu jot nga dee; mu jot nga jëmbat, mu jot nga buddi.

³ Mu jot nga rey, mu jot nga faj; mu jot nga toj, mu jot nga tabax.

⁴ Mu jot nga jooy, mu jot nga ree; mu jot nga ñaawlu, mu jot nga dukkat.

⁵ Day jot nga sànniy doj, mu jot nga dajale;

mu jot nga foon, mu jot nga baña foon.

⁶ Mu jot nga sàkku, mu jot nga ñàkk;

mu jot nga sàmm, mu jot nga xalab.

⁷ Mu jot nga xar, mu jot nga gaar;

mu jot nga selaw, mu jot nga wax.

⁸ Mu jot nga sopp, mu jot nga jéppi;

mu jot nga xare, mu jot nga jàmmoo.

⁹ Ana lu liggéeykat biy jariño ciw ñaqam?

¹⁰ Gis naa ne sas la bu Yàlla sase, nu war koo sasoo.

¹¹ Lépp la Yàlla def,

ba bu jotee rafet.

Moo may nit muy njort èllég,

te taxul mu mana raññee jéf ji Yàlla jéf, njàlbéen ba muj ga.

¹² Ma gis ne nit amul lu gën

bannex ak jàmmi bakkan cig dundam,

¹³ te nitoo nit, su dee lekk ak a naan,

di ñaq, jariño,

loolu mayu Yàllaa.

¹⁴ Ma xam ne lu Yàlla def,

loola day sax ba fàww.

Deesu ci yokk, mbaa di wàññi dara;

Yàllaa ko def, ngir nit di ko wormaal.

¹⁵ Lu ay tey, ayoon na,

lu ay èllég it ayoon na.

Yàllaay namma indi la woon.

Yaakaar feyul boroom

¹⁶ Ma dellu gis fi kaw suuf ne,

fu yoon moom, fa la njubadi ne,

fa njub moom it, fa la njubadi ne.

¹⁷ Saam xel ne ma,

ku jub ak ku bon la Yàlla di boole àtte, ngir mbir mu ne ak jéf ju ne ak bésam.

¹⁸ Saam xel neeti ma,

nun doom aadama, Yàllaa nuy nattu,

nu gis ne ay mala doñ lanu.

¹⁹ Dogalu doom aadama ji

ak dogalu mala mi,

benn dogal bee;

ni kii di deeye la kee di deeye,

genn noo gee, nu bokk ko.

Lu nit èpplee mala neen na,

ñoom ñépp, cóolóoli neen.

²⁰ Ñoom ñépp a bokk jëm benn bérab ba,

bokk jóge pëndub suuf,

bokk dellu suuf.

²¹ Ana ku mu wóor ne

bakkanu nit day yéeg asamaan,

bakkanu mala tàbbi suuf?

²² Ma gis nag ne nit amul lu gën di bannexoo ñaqam, loolooy wàllam.

Ana ku koy xamal gannaawam?

4

Alal doyul boroom

¹ Ma seetlooti gépp notaange gu am fi kaw suuf.

Ndeke néew-doolee ngi jooy,

amul ku ko dëfal.

Ki koy not a am doole,
te néew-doole ji amul ku ko dëfal.

² Dama ne ndokklee, yeen ñi dee jeeg,
nde raw ngeen ñiy dund!

³ Ki leen taneeti yeen ñépp di ki juddoogul
sax,

moom mi gisul jëf ju bon fi kaw suuf.

⁴ Ma gis ne nit ak kër-këram jépp
ak bépp manoorey liggéey,
iñaanantee ko waral.

Loolu it, cóolooli neen ak napp um ngelaw.

⁵ Dof banki loxoom, sànk boppam.

⁶ Waaye benn nëb bu ànd ak dal
moo gën ñaari nëbi doñ-doñ ci napp um
ngelaw.

Wéttalikoo gën wéet

⁷ Ma seetlu leneen luy cóolooli neen fi kaw
suuf.

⁸ Kenn a ngii, kenn ñaareelu ko,
du doom, du mbokk.

Doñ-doñam du dakk, te du doylu,
muji mu naan: «Kan laay doñ-doñil,
di xañ sama bopp bannex?»

Loolu it, cóolooli neen, di sas wu tiis.

⁹ Ñaar a man kenn;
doñ-doñoondoo, yoolu bu baax.

¹⁰ Kenn daanu,

moroom ma may ko loxo.

Waaye ngalla ku daanu
te amuloo ku la may loxo!

¹¹ Bu ñu téddee di ñaar it,
mana bokk nuglu.

Waaye soo dee kenn, nooy nugloo?

¹² Fu ñu mane kenn,

ñaar taxaw fa, jéngu,
te buumu ñetti xànc gaawula dog.

Kilifteef saxul

¹³⁻¹⁴ Kuy ndaw, génne kaso,
tàmbalee nguuru fa mu juddoo woon
mbaadoolo,

ndaw loolu su dee baadoolo te xelu it,
moo gën buur bu màggat, dofe, dégguli
àrtu.

¹⁵ Ma gis mboolem luy dund

tey dox fi kaw suuf,

di topp ndaw la wuutu buur.

¹⁶ Mboolo ngii mu janool,

bare lool ba wees ab lim,
te ña leen wuutu bégewuñ ki wuutu
buur.

Loolu it di cóolooli neen ak napp um
ngelaw.

Ragalal Yàlla

¹⁷ Moytul sa bopp booy dem kër Yàlla.

Duggal te déglu,

bala ngay def saraxi dof bu xamul ne mu
ngi def lu bon.

5

¹ Bul gaaw làmmiñ,
bul gaawa dikke Yàlla mbir.

Yàllaa ngi kaw asamaan,
yaw yaa ngi fi suuf.

Kon na say kàddu néew.

² Bu xalaat baree, indi gént;

bu wax baree, waxi dof jib.

³ Boo digook Yàlla,

bu ko yeexe;

Daray foontukat neexul,

defal li nga dige.

⁴ Baña digee gën dige loo deful.

⁵ Bu la sa làmmiñ yóbbe bàkkaar,
ba ngay lay ndawal Yàlla la, naan lii
njuumte la woon.

Ana lu jar Yàlla di la meree sa kàddu,
bay neenal saw ñaq?

⁶ Wax ju bare, caaxaani neen;

mook gént yu baree yem.

Kon, Yàlla, ragal ko.

Nguur bare na àq

⁷ Boo gisee ñuy not néew-ji-doole,
di jalgati dëgg ak yoon cib gox,

bumu la jaaxal;

kilifa gi, kilifaam a ko yiid;

ñoom it seen kilifaa leen yiid.

⁸ Xanaa ndax buur suqal mbey mi,
ba ñépp jariñoos suuf si.

Alal coono la

⁹ Bëggkatu xaalis du doyal xaalis,
bëggkatu alal du doyal tono,

te loolu it, cóolooli neen.

¹⁰ Bu koom yokkoo,

lekk-kat yi yokku.

Ana lu muy jariñ boroom koom ga,
xanaa di ko duufale bëtam?

¹¹ Surga, lekkam néew, bare,

mu nelaw, ba fàttey boram;

boroom alal regg,

du nopplu, du nelaw.

¹² Naqar wu réy laa gis fi kaw suuf:

Alal ju boroom dajale ba loru,

¹³ mbaa pexeem moy, mu sànkule;

ba bu amee doom it, du ko wacce dara.

¹⁴ Nga juddoo ci sa ndey loxoy neen,
walbatiku dellu na nga dikke woon.

Du dara loo ñaqoon ba yóbbaale ko.

¹⁵ Dikke ni, delloo ni,

loolu it tiis wu réy la.

Doñ-doñi, ngelawal neen,

ana jariñ la?

¹⁶ Ngay dunde tiis bésoo bés,

ak naqar ak wopp ak xol bu tàng!

Bànnexu bakkan, Yàlla

¹⁷ Lii daal laa ci gis, man.

Li gën te jaadu ci nit: Na lekk, naan

te bânneexoo ñaƙam wu mu ñaƙe kaw
suuf
giiru dund gi ko Yàlla may.
Loolu mooy céram.

¹⁸ Alal ak koom, ku ko Yàlla may,
may ko mu tal koo xéewloo,
mu nangu céram, bânneexoo ñaƙam,
loolu mayu Yàllaa.

¹⁹ Yàllaa koy bânneexal,
ba du tiisoo ay fanam.

6

Alal, na la jariñ

¹ Aw tiis a ngi wu ma gis fi kaw suuf,
di tiis wu diis doom aadama:

² Nit ku Yàlla may alal, koom ak daraja,
te mboolem lu mu namm, ñàkku ca lenn,
waaye Yàlla mayu ko mu tal caa lekk,
xanaa jaambur di ko xéewloo —
loolu cóolóoli neen la, di naƙar wu tar.

³ Ku giir téeméeri doom,
dund ati at,

ak lu at ya bare bare,
su bégewul teraanga ja mu am
te amul njégu bàmmeelam sax,
kooku lumb wu tuuroo ko tane.
⁴ Lumb wa ñëw na moos ci neen,
bàddoo lëndëm, turam sàngoo lëndëm.

⁵ Gisul jant, xamu ko,
waaye noflaay moo ko ëpple mag ma,
⁶ bu dundoon junniy junniy at sax
te amul jàmm.
Xanaa du benn bérab la ñépp jëm?

⁷ Nit ak doñ-doñam jépp, biiram,
te taxul mu doylu.

⁸ Ana lu boroom xel ëpplee ku dofe?
Nga ñàkk, xam doxalin,
lu mu lay jariñ?

⁹ Doyloo li nga gis a gën di wéye xemmem.
Loolu it, cóolóoli neen ak napp um ngelaw.

Nit dogalul

¹⁰ Lu masa ay, dees koo tuddoon;
lu doom aadama doon, xamees na ko,
te kenn du layook ku la sut.

¹¹ Loo ci wax wax,
solo sa gëna néew.
Kon ana loo ci jële?

¹² Ana ku xam lu gën ci nit ak fanam ni
cóolool,
toogadi ni takkndeer?
Ku koy wax luy am gannaawam fi kaw
suuf?

7

Nit am na pexe ciw tiisam

¹ Jëw bu rafet a gën diw gu xeeñ,
bésub dee a gën bésub juddu.

² Dem déj a gën wàlli bernde,

mooy muju képp.

Kuy dund, sóoraale ko.

³ Naƙar a gën xaxaloo;
aw tiis ñëkkal kanam, rafetal xol.

⁴ Ku xelu, xalaat kërug déj;
ku dofe, xalaat kërug puukare.

⁵ Déglu ku xelu di la àrtu
moo gën déglu dof bu lay woy.

⁶ Ab dof day textexi
ni dég yuy retete taal bu cin tege.
Loolu it di cóolóoli neen.

⁷ Foƙarñi kay day dofloo boroom xel,
te ab ger da lay gëlëmal.

⁸ Fa mbir mujjee gën fa mu doore,
te muñ a gën réy-réylu.

⁹ Bul gaawa mer;
mer, xolub dof la samp kéram.

¹⁰ Bul ne lu tax démb dàq tey,
loolu, laaj ko du xel.

¹¹ Xel mu rafet daa neex ni ndono,
njariñ la ci kuy dund.

¹² Xel mu rafet kiiraay la,
xaalis kiiraay la;
njariñu xam-xam mooy
xelu, mucc.

¹³ Xoolal ci li Yàlla def:

Ana ku mana jubbanti lu mu dëngal?

¹⁴ Su neexee, bânneexul;
su mettee, xoolal ne lu ci ne, Yàllaa ko def
ngir jaam bi umple gannaawam.

Lu ëpp tuuru

¹⁵ Lu ne laa gis
ci sama dund gu gàtt gii!
Nit a ngii jub, teewu koo sànkook njubam;
nit bon, ànd ak mbonam, gudd fan.

¹⁶ Bul jub ba mu ëpp,
bul wóolu sam xel ba mu ëpp,
lu ko moy nga yàqule.

¹⁷⁻¹⁸ Bu la mbon jiital,
te bul dofe.

Jàppool lii,
te baña wacc lee, mooy li gën,
lu ko moy nga dee te sa àpp jotul.
Ku ragal Yàlla kat
sàmm yooyu yaar.

Xel mu rafet réer na ma

¹⁹ Xel mu rafet day dooleel boroom,
ba mu man fukki kàngam cib dëkk.

²⁰ Amul moos ku jub ci kaw suuf,
kuy def lu baax te du bàkkaar.

²¹ Te it du lépp lu ñu wax,
ngay bàyyi xel.

Kon doo dégg surga bu la ñàññ,
²² ndax xam nga xëll ne yaw it
ñàññe nga ay yooni yoon.

²³ Loolu lépp maa ko natte xel mu rafet,
te naan: «Naa xelu,»

ndeke mbir ma sore na ma.

²⁴ Li wara am daa loq, te xóota xóot; ana ku ko mana daj?

²⁵ Ma walbatiku, di jéema xam, di wut, di càambar, di sàkkum piri, ngir xam li bon cig ndof, ak li dofe, cig ndof.

²⁶ Ma seetlu lenn lu gëna naqari dee: muy ndaw su la fiir. Kooku cofeelam mbaal la, yoxo ya dib jéng. Ku Yàlla gërëm a koy rëcc, bàkkaarkat bi lay jàpp.

²⁷ Waarekat ba nee: Xoolal li ma gis, benn-bennal ko, ngir gis lu mu firi.

²⁸ Ma seeta seet, gisuma.

Genn góor laa ràññee ci junniy góor, ràññeewuma kenn ci jigéen ñi ñépp.

²⁹ Lenn daal laa ràññee: Yàlla daa sàkk nit, jubal ko, nit di wuta sél fu ne.

8

Ana ku rafet xel?

¹ Ana ku rafet xel nu muy mel?

Ana ku xam piri?

Am xel rafet, kanam leer, gëna lewet.

² Dama ne déggalal Buur,

yaa ko giñoon ci Yàlla*.

³ Bul gaawa won buur gannaaw;

bul saxoo lu buur buggul;

Buur, lu ko neex lay def.

⁴ Kàddug buur kilifteef la.

Ana ku ko naan: «Looy def nii?»

⁵ Ku dégg ndigal

doom am lu la soof.

Ku xelu, xam lu jot,

xam doxalin.

⁶ Mbir mu mu doon kat ak jotam ak doxalinam,

waaye nit am na tiis wu ko diis.

⁷ Kenn xamul luy xew èllég,

kenn manula wax luy xew èllég.

⁸ Kenn moomul bakkanam, ba man koo dese,

kenn amul sañ-sañ ci bésub deeyam,

kenn muccul ci boobu xare, te mbon du ca wallu boroom.

⁹ Loolu lépp gis naa ko,

ba may xalaat ci jépp jéfi kaw suuf;

fi nit di yilife nit, muy loraange.

Bul roy lu bon.

¹⁰ Ma gis itam ñu bon ñu ñu rob,

ñu daan yaale kër Yàlla ga,

ñu di leen gërème tey seeni jéf ca dëkk ba.

Loolu it, cóolooli neen.

¹¹ Jéf ñaaw na, mbugal ma yeex,

ba tax doom aadama sóobu ci mbon.

¹² Nit bàkkaar na téeméeri yoon, te teewul mu gudd fan.

Xam naa it ne nee ñu ngéneel a ñeel ku ragal Yàlla, ndax wormaal ko.

¹³ Ku bon, du am lu baax,

fanam du màgg ni ker,

ndax wormaalul Yàlla.

¹⁴ Waaye cóolooli neen a ngi am fi kaw suuf:

Ku jub jot yoolu ku bon,

ku bon jot yoolu ku jub.

Ma ne loolu it cóolooli neen la.

¹⁵ Man daal damay digle bannex,

ndax nit amul lu gën fi kaw suuf

di lekk ak a naan ak a bannexu,

muñe ko doñ-doñam,

fan yi ko Yàlla may fi kaw suuf.

Yàlla, kenn xamu ko

¹⁶ Ma walbatiku xalaat, di jéema xam fu xel rafete,

di xoolaat li nit jàppoo fi kaw suuf,

ba guddeek bëccég, gëmmul bët.

¹⁷ Ma daldi gis li Yàlla def lépp.

Nit kay xel ma du daj liy xew fi kaw suuf.

Day seet ba sonn, du ko daj.

Boroom xel bu wax ne xam na ko it, du ko daj.

9

¹ Loolu lépp laa walbatiku xalaat,

ngir lépp leer ma:

Ku jub ak ku xelu ak seeni jéf,

lépp a ngi ci loxol Yàlla.

Mbëggeel ak mbañeel, xamoo lu la ciy xaar,

lépp a nga ca kanam.

² Ñépp a bokk benn dogal bi,

ku jub ak ku bon,

ku baax ak ku set, ak ku sobewu;

kuy sarxal ak ku dul sarxal,

muy ku baax ki, di bàkkaarkat bi,

muy kiy giñ, di ki ragal ngiñ.

³ Lu mettee ngi nii ci mboolem lu am fi kaw suuf:

Benn dogal la ñépp bokk,

te it nit a ngi sóobu ci mbon,

di mébét jéfi dof giiru dundam,

ba noppi fekki ña dee.

⁴ Képp kuy dund kat, am nga yaakaar,

te xaj buy dund a gën gaynde gu dee.

⁵ Kuy dund xam ne dangay dee,

waaye ku dee xamul dara,

te séentootul ab yool.

Ku dee, ñu fàtte la.

⁶ Muy sa cofeel, di sa mbañeel,

ba ci sa kiñaan ànd ak yaw seey.

* 8:2 8.2 Seetal ci 2.Buur ya 11.17.

Du lenn lu deeti sa wàll
ci jépp jéfi kaw suuf.

Bégeel sa bakkan

⁷ Kon doxal, lekk saw ñam, bége,
te naan sa biññ ci xol bu sedd.

Yàlla kat nangul na la jeeg say jéf.

⁸ Foo tollu, solul ba jekk,
te bul fàttee xeeñilu.

⁹ Banneexul yaak ndaw si nga sopp
ci fan wu gàtt wi la Yàlla may fi suuf,
ndax loolu nga séddoo

ci fan wu gàtt wii ngay doñi-doñaale fi kaw
dun bi.

¹⁰ Liggéey boo gis, liggéeyal;
def ci loo man.

Ndax muy jéf, di doxalin,
di xam-xam, di manoore,
dara amu ci njaniiw, ga nga jëm.

Àddina wóorul

¹¹ Ma seetlooti fi kaw suuf ne

du ku gaaw, yaay raw;

du ku jambaare, yaa moom xare;

du ku xelu, am loo dunde;

du ku muus, duunle;

du kuy xamkat, amu yiw;

ku nekk ak bésam ak wërsëgam.

¹² Doom aadama la bésu safaan bay bett,

jekki ne dàll fi kawam,

ni jën wu keppu cib caax, loru,

mbaa picc mu tancu cig fiir.

Doom aadama xamul bésam.

Xel mu rafet taxul ñu naw la

¹³ Lii it gis naa ko, muy lu ma yéem,

di mbirum xel mu rafet fi kaw suuf.

¹⁴ Ab dëkk bu ndaw la woon, nit ña néew.

Buur bu mag song dëkk ba, gaw ko,
jal jali suuf yu mag, sésal ca tata ja.

¹⁵ Fekk fa ku néewle te xelu.

Mu manoona xelal dëkk ba, xettli leen,
waaye kenn faalewu ko.

¹⁶ Man dama noon xel mu rafet a gën
doole!

Ndeke ku néewle ñu xeeb la,
tanqamlu say wax.

Li xel wuuteek ndof

¹⁷ Ku xelu, kàddoom yu dégtu ndànk
moo gën ñal-ñalu kilifa ci biir ñu dofe.

¹⁸ Xel mu rafet a gën ngannaayi xare,
waaye benn bàkkaarkat day yàq ngéneel
lu réy.

10

¹ As weñ tàbbi ci diw gu xeeñ, yàq ko;
ab dof it jëfam su tuut

neenal na xel mu rafet ak daraja.

² Xelu, jubal;

dofe, jàdd.

³ Te it ku dofe buy dox sax,
du ànd ak xelam;

ku ko gis, xam ne kii dof la.

⁴ Su la sa kilifa meree,

bul jóge fa ñu la teg;

toon yu mag, teey ba giif.

⁵ Lu mettee ngi lu ma gis fi kaw suuf,
lu mel ni njuumte lu récc kilifa:

⁶ Ab dof bu ñu jox cér yu bare,

boroom daraja féete suuf;

⁷ ma gis baadoolo war fas,
kilifa di rung ni baadoolo.

⁸ Ku gas um yeer, repp nga tàbbi ca;
ku bètt miir, repp jaan matt la;

⁹ kuy yett ay doj, repp nga caa gaañu;

kuy gor bant, repp nga caa loru.

¹⁰ Liggéeye weñ gu day te xaccesu ko,
góor-góorlu war na ca;

xelu, baaxle jariñoo.

¹¹ Jaan mätte, balees koo jat,
du njariñal jatkat ba.

¹² Ku xelu àddu, mu diw yiw;
ku dofe wax, sàнку.

¹³ Bu jékkee wax ju amul bopp,
daaneele ndof gu sotti.

¹⁴ Ab dof a ngi waxa wax,
te kenn xamul luy xew èllég.

Ana ku koy xamal gannaawam?

¹⁵ Ab dof ak kër-kéreem, coonoy neen;
du xam sax yoonu taax ya.

¹⁶ Ngalla yeen, réew mi gone falu buur,
jawriñ ña di xéye xawaare.

¹⁷ Ndokklee, yeen, réew ma as gor falu,
te bu jotee, jawriñ ñay xéewlu,
ngir am doole te baña mândi.

¹⁸ Tayel, puj bu mabb;
yaafus, néeg buy senn.

¹⁹ Aw ñam bégal,
aw ñoll bannexal,

xaalis tontu lu ne.

²⁰ Sam xel sax bu ca saaga buur,
sa néegu biir sax, bu fa saagaa boroom
daraja.

Xamoo picc muy yóbbu sa kàddu,
mbaa njanaaw luy siiwali mbir ma.

11

Kenn xamul, waaye beyal sa tool

¹ Dugalal sa alal, dawloo ko;

yàgg-yàgg nga jootaat ci.

² Séddal ab cér juróom yaari nit ba juróom
yett;

xamoo safaan buy dikkal àddina.

³ Xambaar bu duyee, ba fees,

fi kaw suuf lay soob.

Garab, bu daanoo ndijoor mbaa càmmoñ,
fa mu daanu lay des.

⁴ Kuy déglu ngelaw, doo ji,
kuy seetluy niir, doo géob.

⁵ Xamoo yoonu ngelaw,
xamoo nu doom di sosoo ci ndeyam;
kon manoo xam lu Yállay def,
moom miy def lépp.

⁶ Xëyal, ji sa jiwu,
gont, baña tàyyi;
muy lii di lee, xamoo lu ciy nangu,
am ñaar ñépp ay bokk baax.

Bégal te xam ne man saxul

⁷ Leer neex na,

gis jant neex na.

⁸ Ak lu say at bare bare,
bégeel at mu ci nekk,
waaye bàyyil xel lëndëmu bàmmeel,
lu yàgg lay doon,
te liy ñëw lépp, cóolóoli neen.

⁹ Xalelu góor bi, bàmneexul bi ngay gone,
bégalal sa xol bi ngay ndaw.

Toppal loo namm ak loo xemmem,
waaye xamal ne loolu lépp,
Yàlla da la koy laaj.

¹⁰ Félal naqaru xol,
dàq woppi yaram;
waaye ndaw ak kawar gu ñuul, cóolóoli
neen.

12

¹ Bàyyil xel ki la sàkk,
bi ngay dese ndaw,
bala bési safaan a taxaw,
ba jant ñëw, nga naa:
«Amatuma bàmneex.»

² Fa la jant di lëndëme,
weer giim, biddiim giim,
taw siwet, mu niru la lu xiinati.

³ Su bés baa wattukati kër gi di lox,
jàmbaari xare yi sëgg,
wolkat yi néew, ba wolatuñu,
ñiy séentu ci caax yi giimle,

⁴ bunt yi féeteek mbedd mi tëje,
coowal wol dal,
as picc sab, nelaw naaw,
janq ju doon woy, selaw.

⁵ Nga dem, ba ragal fu kawé,
am tiitaange ciw yoon,
garab tóor, ba weex furr,
soccet di yokokoki,
doomu garab tëë yékkati siddit,
nga jëm kër gu mujj,
waa dëj bi fees mbedd mi.

⁶ Bàyyil xel ki la sàkk,
balaa buumu xalis bi ne tipp,
ndabal wurus wi, tasar,
njaq la ñuy roote, rajax,
poli ba ca teen ba, tàllit.

⁷ Su boobaa pënd dellu suuf, na woon;
bakkán dellu fa Yàlla ma able woon.

⁸ Cóolóoloo cóolóol, waru waarekat ba.
Léppi cóolóoli neen.

Ma daaneel

⁹ Waarekat ba daa xelu,
di jànglewaale xam-xam,
di natt ak a gëstu,
di jekk-jekkal kàdduy xel yu takku.

¹⁰ Waarekat ba daa tànn baat yu saf,
bind ko, mu jub te dëggu.

¹¹ Waxi ku xelu day gindee, bantub sàmm
la;

tënk ba diy pont, sampe ca.

Loolu ag may la, jóge ci sàmm biy kenn.

¹² Doom, leneen lu ci tegu, moytu ko:
Yokki téere amul kemu,
njàng mu bare, coonoy boroom.

¹³ Ma daaneele fii, déggees na lii lépp:
Yàlla, ragal ko;

ay santaaneem, jëfe ko;
loolu rekk mooy nit.

¹⁴ Jépp jëf déy, la Yàlla di àtte,
ba ci lépp lu làqu,
muy lu baax, di lu bon.

Ngën-gi-woy

¹ Lii, di ngën-gi-woy, ñeel Suleymaan.

Ndaw si

² Foon maa, ngalla foon ma, sa cofeel a ma dàqal biññ.

³ Sa diw yi ngay xeeñoo neex, saw tur jib, mel ni lu xeeñ a xelli.

Moo tax janq ji nob la.

⁴ Yóbbaale ma, nu daw, dem.

Sama buur, yóbbu ma sa neég, nu bokk mbég ak bänneex, di taqamtikoo sa cofeel gi dàq biññ.

Ñoo yey nob la!

Njèkke ñooru, mujje xejjoo

Ndaw si

⁵ Yeen janqi Yerusalem, damaa ñuul, rafet;

ñuul ni xayma ya ca Kedar*, mel ni ridoy Buur Suleymaan.

⁶ Buleen ma xoole sama ñuulaay bi, jant bee ma lakk.

Samay càmmiñ a ma mere, di ma wattuloo tóokèri reseñ ya, te wattuwuma sama tóokèri bopp†.

⁷ Sama soppey xol, ngalla wax ma ana fooy foral,

di fa gooral, digg bëccég?

Lu ko moy may muuru, di la wër fi say xarit ak seeni gétt.

Waa ji

⁸ Aa! Xamoo koo?

Yaw mi dàq ci jigéen ñii!

Génnal rekk, topp wewi jur gi, sàmmi say tef,

fi dendeek mbaari sàmm si.

⁹ Xarit, xam nga lu ma lay xoole?

Yànjaayu wajan wu takk watiiru Firawna.

¹⁰ Sa lex yaa ngi tàkk fi digg sàdd yi!

Céy wii loos ak caqu peram!

¹¹ Sàddi wurus lanu lay defaral,

tapp ca xaalis.

Ndaw si

¹² Li sama buur téd, di xéewlu lépp, maa ngi gilli lu neex.

¹³ Sama nijaay di mbuusum ndàbb may fanaan sama digg ween.

¹⁴ Saa nijaay, saa cabbu tóor-tóoru fuddën, fa digg tóokèri Engedi‡.

Waa ji

¹⁵ Xarit, yaaka rafet, yaaka taaru!

Say gèt niy pitax.

Ndaw si

¹⁶ Nijaay, yaaka góorayiw,

yaaka maa neex!

Mbooy gu naat, nu laloo,

¹⁷ garabi seedar di sunu xànqi néeg, garab gu dul ruus xadd koŒ.

2

¹ Waaye man saxayaayu joor donj laa, nirook as tóor-tóor ciw xur.

Waa ji

² Xanaa as tóor-tóor su ne ràññ ci biiri dég! Kookooy sama xarit ci biir janq ji.

Ndaw si

³ Mbete garab gu gëna neex ci gott bi, kookooy sama nijaay ci biir xale yu góor yi.

May bége keppaaram, safoo doom ya.

⁴ Dugal na ma néegub sago-jeex-na, yiire ma mbèggeel.

⁵ Gaaweleen ma nàkki reseñ, ma dègër, leel-leen may meññeef, leqlee ma.

Wopp laa def ndax mbèggeel!

⁶ Sama càmmoñu waay, ma gegenoo, ndijooram, ma laxasoo.

⁷ Yeen janqi Yerusalem, waatal-leen ma ci taaru kéwél ak koobay àll bi, ne dungeen dakkal te dungeen sooke tēraayu mbèggeel te jotul.

Wootante jib na

Ndaw si

⁸ Dégluleen, sama nijaay a,

mu ngooguy ñëw,

di xéluy jéggi tund yu ndaw yi,

di tēb tund yu mag yiy dikk.

⁹ Sama nijaay a ngi mel ni kéwél,

mbaa kooba gu ndaw.

Mu ngi noonu taxaw ca gannaaw miir ba,

di séentu ci palanteer bi

ak a yër ci caax bi.

¹⁰ Sama nijaay ne ma:

«Xarit, ayca,

jongama sama, dikkal boog!

¹¹ Xoolal, tawub sedd wees na,

waame jàll, wéy*.

* **1:5** 1.5 Kedar diiwaanu Arabi la woon bu genn giirug Ismayla dèkke woon bu yàgg. Dañu daan defare seeni xayma ay deri bëy yu ñuul. † **1:6** 1.6 tóokèr ak càmm ay baat la yu ñuy méngalee ndaw si ci waxin. Seetal it ci 1.8. ‡ **1:14** 1.14 tóokèri Engedi bētu ndox la bu nekk ca sowub géēju Xorom ga. Engedi di tekki «bētu ndoxu bëy». § **1:17** 1.17 seedar ak garab gu dul ruus ay garab lañu yu neex xet. * **2:11** 2.11 Ci Israyil, jamonoy sedd day taw. Bu taw bi jeexee, tangoor wi dikk, gāncax gi jebbi, daldí naat.

12 Tóor-tóor yi lal na réew mi,
jamony woy dikk,
sabum pégét† jibe sunum réew.
13 Figg a ngi ñorsi,
reseñ tóor, di gilli.
Xarit, ayca,
jongama sama, dikkal boog!»

Waa ji

14 Soppe, sore nga ni xati mu dëkke xar-xari doj,
làqoo ruqi mbartal yi.
Won ma sa jëmm,
dégtal ma sa baat.
Sa baat a neex,
sa jëmm jekk!

Ndaw si

15 Jàppal-leen ma till yi,
till yu ndaw yiy ruur reseñ,
te sunu reseñ jiy tóor.

16 Sama nijaay, maa moom, man it, moo moom,
di fore digg tóor-tóor yi.
17 Nijaay, balaa jant a fenk,
ker toxu,
dellul gaaw ni kéwél,
mbaa kooba gu ndaw kaw tund yu xàjjalikoo ya.

3*Réeroo, gise**Ndaw si*

1 Sama kaw lal, guddi,
laa seet sama soppey xol.
Seet naa ko, gisuma ko.
2 Naa jóg, wër dëkk bi.
Mbedd yeek pénc yi
laay seete sama soppey xol.
Seet naa ko, gisuma ko.

3 Wattukat yee ma gis,
ba ñuy wër dëkk bi.
Ma ne leen: «Sama soppey xol, gisuleen ko?»
4 Ma romb leen tuuti rekk,
gis sama soppey xol.
Ma ne ko taral, bàyyeetuma ko,
ba yóbbu ko sama kër yaay,
ba sama biir néegu ndey ji ma jur.

5 Ngalla yeen, janqi Yerusalem, waatal-leen ma
ci taaru kéwél ak koobay àll bi,
ne dungeen dakkal te dungeen sooke
tëraayu mbéggeel
te jotul.

*Daagu, jëm toolu mbéggeel**Ñeneen*

6 Ana luy jóge màndinj ma nii,
mel ni taxaaru saxar,
suuroo ndàbb ak xas mu xeeñ
ak mboolem cuuraayi jula?

Ndaw si

7 Laltub Suleymaan a ngoog,
juróom benn fukki jàmbaar dar ko,
di jàmbaari Israyil.

8 Népp mane saamar,
ku ci nekk mokkal xare,
saamar ci pooj,

ngay fàggu mbettum guddi.

9 Ab toogu la Buur Suleymaan defarlu,
ñu defare ko bantu Liban,

10 ponku ya, mu def ko xaalis,
wéeruwaay ba wurus;
tooguwaay ba di ndimo lu xonq curr,
biir ba di liggéeyu ràbb
bu janqi Yerusalem ràbbe cofeel.

11 Yeen janqi Siyon, génnleen,
xool Buur Suleymaan ak mbaxanam céetal
mi ko yaayam solal ci bésus céetalam,
bésu bannexam.

4*Waa ji*

1 Yaaka rafet, xarit, yaaka taaru!
Sa gët yi niy pitax, làqoo muuraay bi,
njañ liy loy-loyee ngi saf gétu bëy yu ñuul
yu bartaloo kaw tundu Galàdd.

2 Sa gëñ yi weex ni xar yu ñu wat
ñuy yéegé ca sangukaay ba,
ku nekk ak seexam,
kenn wéetu ca.

3 Sa tuñ yi mel ni wëñ gu xonq curr,
ndaw gémmiñ gu jekk!

Sa lex yiy tàkk ni ñaali gërënaat,
làqoo sa muuraay bi;

4 sa loos wi ne coleet ni tatay Daawuda,
mërgalu ba jekk,
caq bay lang ni junniy kiiraayi jàmbaar.

5 Sa ween yi ni ñaari tef,
mbaa seexi kéwél yuy fore digg tóor-tóor yi.

6 Balaa jant a fenk,
ker gàddaay,
ma ne coww diggante tund wa ndàbb ne bann,
ak tund wa xas ma neexe.

7 Xarit, sa lépp a rafet,
sikk nekkul ci yaw.

8 Séet sama, jógeel Liban, jege ma,
bawool Liban, jegesi ma.
Wàcceel colli Amana
ak colli Senir ak Ermon.

† 2:12 2.12 pégét xeetu picc la mu nirool pitax.

Génnal xunti gaynde yooyook
tundi segg ya.

⁹ Jigéen sama, séet sama, benn yoon nga
ma xool,

sama fit ne tërit.

Sa benn peru caq rekk,

sama fit ne tërit.

¹⁰ Jigéen sama, séet sama,

sa mbëggeel a neex!

Sa mbëggeel a dàq biiñ,

sa diw yu xeeñ dàq luy cuuraay.

¹¹ Séet sama! Lem ay xellee sa gémmiñ,

lem ak meew lal sa lãmmiñ.

Sa xetu yére xetu àllub Liban̄ la.

¹² Jigéen sama, séet sama, yaay toókër bu
tëje,

yaay seyaan bu tëje,

di bëtu ndox bu saañe.

¹³ Yaa di toolub gërënaat bu naat,

meññ ngën-gi-meññeef

ak fuddën ak reen yu xeeñ,

¹⁴ muy reen yu xeeñ, safron̄, barax, kanel,

ak xasoo xas mu xeeñ,

ndàbb ak alowes

ak lépp lu xeeña xeeñ.

¹⁵ Yaa di bëtu ndox ci tool yi,

di teen bu fees ak ndox muy daw,

wale tundi Liban̄.

Ndaw si

¹⁶ Yaw, ngelawal bëj-gànnar, yewwul,

ngelawal bëj-saalum, dikkal,

wolal-leen ma sama tool bi,

mu gilli;

sama nijaay dugg toolam,

xéewloo ngën-gi-meññeefam.

5

Waa ji

¹ Jigéen sama, séet sama, dikk naa sama
tool,

sama ndàbb ak sama cuuraay, ma for,

sama lem xelli, ma lekk,

sama biiñ ak sama meew, ma naan.

Awu

Yeen soppe yi, lekkleen;

yeen ñi bëggante, naanleen ba màndi.

Xol jeex na, mujje neex

Ndaw si

² Maa ngi nelaw, te xol yewwu;

dégluleen, sama nijaay ay fëgg.

Mu ne: «Xaritoo, jigéen sama, ubbil ma,

sama nenne, alal sama!

Sama bopp a ngi laye ba tooy,

njañ li fanaanee guus.»

³ Ma ne ko: «Summiku naa de,

xanaa дума soluwaat?

Jàngu naa jeeg,
xanaa дума таqati?»

⁴ Sama nijaay yoor loxoom ci xarante bi,
sama yaram ne sàyy.

⁵ Ma ne bërét, di ubbil nijaay,
sama yoxo yi, diwu ndàbb di ca siit,

sama waaraam yi, ndàbb rogalaat
ba ci njàppul bunt bi.

⁶ Maa ubbil nijaay,

waaye nijaay waññiku na, ba wéy.

Ba mu waññikoo, tuuti ma dee.

Seet naa ko, gisuma ko;

ma woo ko, wuyuwul.

⁷ Wattukat yiy wër dëkk bi gis ma;

ñu dóor ma, gaañ ma,

ñori sama malaan.

Wattukati tata jaa!

⁸ Ngalla yeen, janqi Yerusalem, waatal-leen
ma

ne su ngeen gisee sama nijaay,

ne ko damaa wopp ndax mbëggeel.

Janqi Yerusalem

⁹ Yaw mi dàq ci jigéen ñi,

ana lu sa nijaay gëne keneen?

Ana lu mu ëpplee keneen,

ba nga di nu waatloo lii?

Ndaw si

¹⁰ Sama nijaay daa xees, leer;

kenn la ci fukki junniy góor.

¹¹ Kanam gi ni wurus, di wurusu ngalam;

njañ li lëmësu,

ñuul ni ndobin.

¹² Gët yi ni pitax yu feggook wali ndox,

sangoo meew,

feggook ndox mu ne xéew.*

¹³ Lex ya di tool,

gàncax ga ne ca bann,

tuñ ya diy tóor-tóor,

ndàbb wale ca, rogalaat.

¹⁴ Yoxo yi banti wurus la,

ngën-gi-per tappe ca;

jëmm ja rattax ni bëñu ñay

laloo peri safiir;

¹⁵ yeel yi kenuy doj wu jafe la,

sampe ci tàñki wurusu ngalam.

Meloom ni tundi Liban̄,

di tànnéef ni garabi seedar.

¹⁶ Gémmiñam, bànneexi neen,

jëmmam jépp jara xédd!

Yeen janqi Yerusalem,

sama nijaay a ngoog, samab xarit.

6

Janqi Yerusalem

¹ Yaw mi dàq ci jigéen ñi,

ana fu sa nijaay dem?

Wax nu fu sa nijaay jaar,

* 5:12 5.12 Li ñu wax fii ci làkku ebrë am na werante.

nu seetle la ko.

Ndaw si

² Sama nijaay dugg na biir toolam,
fa gâncax ga ne bann.
Mu ngi foral ci tool bi,
ak a fori tóor-tóor.
³ Man, nijaay a moom;
nijaay it, maa moom.
Mooy fore sama digg tóor-tóor yi.

Yaaka taaru

Waa ji

⁴ Xarit, taaru nga ni Tirsa ak Yerusalem,
péeyi buur ya,
yéeme nga ni péey yu kawe ya!
⁵ Wuy, geesul fee!
Soo ma nee jàkk, ma jànnaxe.
Sa njañ liy loy-loyee ngi saf géttu bëy yu
ñuul,
yu bartaloo kaw tundu Galádd.
⁶ Sa gëñ yi ni mbote yu weex,
yéege ca sangukaay ba,
ku nekk ak seexam,
kenn wéetu ca.
⁷ Sa lex yiy tàkk ni ñaali gërënaat,
làqoo sa muuraay bi.
⁸ Buur day am juróom benn fukki lingeer
ak juróom ñett fukki jongama
ak jeeg ju dul jeex.

⁹ Waaye sama nenne kenn la, matal ma
sëkk,
yaayam kennal ko,
muy ngëneelu biiru yaayam.
Janq ji gis ko, di ko jêwe mbégteem,
lingeeri buur aki jongamaam di ko kañ.

¹⁰ Na nga naa: «Ndaw sii ku mu?
Bu nee xiféet, nga ne fajar a xar,
rafet ni leer gu ndaw,
yànj ni jant bi,
yéeme ni gàngoori biddiww!»

¹¹ Damaa wàcc ba ca toolub saal ya,
xooli cax mu yees mi ci xur wi,
bu reseñ ji jebbee,
mbaa gërënaat ji tóor, ma gis.

¹² Damaa ràkkaaju bay lox,
mel ni ku war watiiru buur*.

7

Janqi Yerusalem

¹ Dikkal, janqu waa Sulam bee, dikkal;
dikkala dikk, nu niir la.

Waa ji

Moo, lu ngeen di seetaane janqub waa
Sulam bi
ni kuy fecc galanu Ñaari Dali Xare?
² Janqoo, lingeer sama,
sa tànk yee ka jekk ci sa dàll yi,

* **6:12** 6.12 Li ñu wax fi ci làkku ebrë am na werante.

sa mooco yi mërgalu niy jaaro
yu ndaanaanu tégg yette loxoom.
³ Sa jumbux bi di kaas bu mërgalu,
yàlla bumu ñàkk biiñu njafaan!
Sa biir bi di jalu pepp
mu ay tóor-tóor ñag.

⁴ Sa ween yi ni ñaari tef,
mbaa seexi kéwél.

⁵ Sa loos wi, coleet, rattax, ni tatay bëñi
ñay;

say gët di lèrxat ni déegi Esbon,
ya feggook buntu Bat Rabim.
Sa bakkan bi jub xocc ni tatay Liban
ja tiim Damaas.

⁶ Sa bopp siggi ni tundu Karmel,
njañ liy nes-nesi ni sooyu buur,
létt yay fëy-fëyi, ba laaw buur.

⁷ Rafet, sopploo!

Soppee, bânneex nga!

⁸ Sa taxawaay bii garabu tàndarma la,
sa ween yi di cëggi doom ya.

⁹ Ma ne, maay yéeg tàndarma gi,
ñëb doom yi.

Yal na say ween di sama cëggi reseñ,

sag noo jox ma doom yu xeeñ,

¹⁰ sa gémmiñ di xelli ngëneelu biiñ.

Ndaw si

Na walal sama nijaay,
tuurul ñiy nelaw.

¹¹ Man, nijaay a moom,
te maay nammeelam.

Ayca ca tool ba

Ndaw si

¹² Nijaay, ayca nu dem tool ba,
fanaani ca tóor-tóori fuddën ya*.

¹³ Nan teela xëyi ca tóokëri reseñ ya,
bu reseñ ji jebbee,

mbaa tóor-tóor yi focci,

mbaa gërënaat ji tóor, nu gis.

Fa laa lay jébbale mbéggeel.

¹⁴ Tóor-tóor yu xeeñ† yaa ngi gilli,

lépp luy doom yu neex aje sunu bunt néeg,
yu yees yaak ya woon,

ma boole dencal la, nijaay.

8

¹ Éy su meloon ni sama càmmiñ nga,
mel ni ku ma bokkal wenn ween,
ba ma dajeek yaw biti, sañ laa dar,
te du tax ñu sikk ma!

² Ma jàpp la, yóbbu sama néeg yaay,
moom mi ma yar,*

ma may la biiñ bu saf,

ak sama ndoxum gërënaat, nga naan.

³ Sama càmmoñu waay, ma gegenoo,

* **7:12** 7.12 Mbaa: ca dëkk yu ndaw ya. † **7:14** 7.14
tóor-tóor yu xeeñ yi màndaragoor la ci làkku ebrë. Ñu yaakaar ne, day may góor doole tey giiral jigéen. * **8:2**
8.2 Mbaa: nga jàngal ma baane,

ndijooram, ma laxasoo.

⁴ Yeen janqi Yerusalem, waatal-leen ma
ne dungeen dakkal te dungeen sooke
têraayu mbëggeel
te jotul.

ci kaw tund wi ci gâncax gu xeeñ gi.

Joxe naa xol

Janqi Yerusalem

⁵ Ana ndaw suy jóge màndin ma nii,
wéeroo nijaayam?

Ndaw si

Ci ron pom gi laa la yee,
fa la sa yaay jâppe ëmb,
jur la fa.

⁶ Teg ma ci sa xol ni torlukaay†,
mbaa ci sa përëg ni lamu màndarga.
Mbëggeel a bare doole ni ndee,
firaange xér ni bàmmeel.
Day jâpp jippët,

di jum bu Aji Sax ji taal.‡

⁷ Ndox mu ne xéew du fey mbëggeel,
ay dex du ko mëdd.
Ku koy weccee sa alalu kër gépp it,
ñu jéppi laa jéppi rekk.

Càmmiñi ndaw si

⁸ Sunub jigéen lu ndaw la,
ween sax amu ko.
Lu nuy defal sunub jigéen
bés bu ñu koy bëggsi?

⁹ Su doon am tata,
nu tabaxal ko soorooru xaaalis.
Su doon bunt,
nu aare ko xànqi seedar.

Ndaw si

¹⁰ Maa dim tata,
sama ween di sooroor ya;
moo tax waa ji xam ne
maa di jàmmam.

¹¹ Suleymaan am na reseñ ca Baal Amon.

Da koo dénk ay beykat.
Ku nekk di ko fey meññeef ma
junniy dogi xaaalis.

¹² Junniy dogi xaaalis yi,
Suleymaan, yaa ko moom;
ñaar téeméer yi, beykat yi.
Waaye sama toolub reseñ, maa ko moom.

Waa ji

¹³ Yaw mi tooge digg tool bi,
samay xarit a ngi teewlu sa baat,
waxal boog, ma dégg.

Ndaw si

¹⁴ Nijaay, dawsil,
melal ni kéwél,
mbaa kooba gu ndaw

† 8:6 8.6 torlukaay mooy juntuukaay bu mel ni lu ñuy tàmponee. ‡ 8:6 8.6 Mbaa: tàkki di sël-sëli.

Esayi Mucc a ngi ci Emanuwel

(Saar 1—12)

¹ Lii moo di peeñum Esayi doomu Amocc, di lu mu gis ci mbirum Yuda ak Yerusalem ci janti buuri Yuda yi ñuy wax Osiyas* ak Yotam ak Axas ak Esekiya.

Aji Sax ji sikk na ñoñam

² Asamaan, déglul; suuf, teewlul, Aji Sax jeey àddu:

«Ay gone laa yar, mággló leen, ñoom, ñu gântal ma.

³ Aw yëkk xam na boroomam, mbaam-séf xam gâmb,

bi ko boroomam di xonte, waaye Israyil xamul, sama ñoñ ñii xàmmeewuñu.»

⁴ Wóoy wii xeetu moykat, wii askan wu diisu ñaawtéef, mii njurum defkati mbon, yii doomi yàqute!

Ñoo wacc Aji Sax ji, ñoo teddadil Aji Sell ju Israyil, dèddu ko.

⁵ Xanaa dungeen wéye fippu, ñu gën leena duma, te bopp di góomi neen, xol jeex tàkk?

⁶ Bopp ba téstën, fenn jagul. Xanaa gaañu-gaañu aki dagg-dagg rekk, ak góom yuy nàcc, fajeesu ko, takkeesu ko, gajfaleesu kook ag diw.

⁷ Seenum réew gental, seeni dëkk xoyomu, seen suuf, doxandéem yi lekk fi seen kanam, muy gent bu doxandéem tas.

⁸ Siyon, dëkk bu taaru baa ngi wéet ni mbaarum tookeer mbaa dalub toolu xaal. Mbete dëkk bu ñu gaw!

⁹ Bu nu Aji Sax ji Boroom gàngoor yi waccalul woon li nu deseek as néew, ni Sodom† lanuy mel, Gomor lanuy neexool.

Aji Sax ji bañ na ngistal

¹⁰ Dégluleen kàddug Aji Sax ji, yeen njiiti Sodom, teewluleen sunu yoonu Yàlla, yeen askanu Gomor.

¹¹ «Lu may doye seen sarax yu bare?» la Aji Sax ji wax. «Damaa suur seen saraxi rendi-dóomali kuuy, suur nebbonu juru yar gi,

deretu yëkk ak xar ak sikket it, safu ma.

¹² Bu ngeen dikkee, teewsi fi sama kanam, ana ku leen sant ñu joggat-joggatee nii sama èttu kër?

¹³ Buleen fi indeeti saraxi caaxaan, seen saraxu cuuraay, lu ma seexlu la.

Terutel weer ak bésub Noflaay ak wooteb ndajee ci yem!

Duma mana dëkku ndajem diine mu rax njubadi.

¹⁴ Seeni Terutel weer ak seen bési mággal laa bañ ci sama xol;

yooyu mággal a ma diis ba àttanatuma ko.

¹⁵ Bu ngeen ma tàllaleey loxo, ma fuuyu.

Bu ngeen doon ñaan-ñaanee it, du maa leen di déglu:

seeni loxo, deret la taq ripp.

¹⁶ Raxasuleen ba set wecc, jëleleen seeni jéf ju bon fi sama kanam,

te ngeen ba lu bon.

¹⁷ Jàngleen di def lu baax, sàkku njub, waññi ab notkat, àtte dëgg, ab jirim, sàmm àqu jëtun.

¹⁸ «Kaayleen, nu waxtaan ba juboo,» la Aji Sax ji wax.

«Li seeni bàkkaar di xonq lépp, tàll lay weexeji.

Li muy xonq curr lépp, weex furr lay mujje.

¹⁹ Su ngeen ma nangoo déggal, ngéneelu réew mi ngeen di xéewloo.

²⁰ Waaye su ngeen lánkee, fippu, saamar a leen di xéewloo.»

Aji Sax ji déy a ko wax ci gémmiñam.

Mbugal mooy setal Yerusalem

²¹ Ana nu biib dëkk yàqoo, mbeteb gànc, te nekkoon dëkkub kóllère,

njubte mate fa, njekk lal fa panaan, tey ñu diy bóomkat!

²² Sa xalis doon na raxit, sa biiñ xormbet.

²³ Seeni njiit të, xejjoo ay sàcc, ñoom ñépp sopp ger,

di dàq ay neexal, ab jirim, sàmmuñu àtteem, àqu jëtun soxalu leen.

²⁴ Moo tax, kàddug Boroom bee, Aji Sax ju gàngoor yi,

Jàmbaaruu Israyil:

«Maay lijjanti samay bañ, ngalla ñoom! Maay fey samay noon!

²⁵ Yerusalem, maa lay teg loxo, maay seeyal sa raxit ni xeme,

* 1:1 1.1 Osiyas mooy Asaryaa ba tey. † 1:9 1.9 Seetal ci Njàlbéen ga 19.23-29.

ba dindi sa mbuubit mépp.

²⁶ Maay waññi say àttekat, ñu mel na woon,

say diglekat it dellu mel ni bu jèkkoon. Su boobaa ñu wooye la Dèkkub Njekk, ak Dèkkub Kóllère.»

²⁷ Siyonj dèppook yoon, mucc, ay tuubkatam wormaal njekk, raw;

²⁸ moykat ak bàkkaarcat yàqoondoo, dèddukati Aji Sax ji sànkoondu.

²⁹ Yeenay rus moos ci garab yu mag, yi ngeen soppoona daje, di xèrèmtu.

Yeenay am gâce ci tóokër, yi ngeen taamu woona daje, di bokkaale.

³⁰ Yeenay meli ni garab gu mag gu xob ya lax,

mbaa tóokër bu amul siitu ndox.

³¹ Boroom doole mel ni boob,

la mu liggéey di ferñent,

ànd ak moom ne jéppét,

te kenn du fey sawara wa.

2

Kilifteef gu bees taxaw na

¹ Mbir miì la Yàlla won Esayi doomu Amocc ci mbirum Yuda ak Yerusalem.

² Fan yu mujj ya, dees na taxawal tundu kër Aji Sax ji,

Aji Sax ji mooy gëna kawe ci tund yi, tiim tund yu ndaw yi,

xeet yépp riirandoo, wutsi ko.

³ Ay askan yu bareey dik, naan:

«Dikkleen nu yéegi tundu Aji Sax ji,

fa kër Yállay Yanqóoba,

mu xamal nuy yoonam,

ba nu doxe yooyu ñallam.»

Siyonj kat la ndigalu yoon di bawoo,

Yerusalem googu la kàddug Aji Sax ji di jóge.

⁴ Mooy àtte diggante xeet yi,

mooy dogalal ay askani askan,

ñu tégg seeni saamar ay illéer,

def seeni xeej ay sàrt;

aw xeet dootu xàccil moroom ma saamar,

te dootuñu jàngati xare.

⁵ Yeen waa kër Yanqóoba,

kaayleen nu doxe leeru Aji Sax ji!

Bew, yàqule

⁶ Boroom bi, bàyyi nga waa kër Yanqóoba, sa ñoñ,

ndax jéfi waa penku lañu feese,

aki gisaanekat, ba mel ni waa Filisti,

te ñooy tàppante pasook doomi doxandéem yi.

⁷ Seen réew maa ngi ne gáññ ak xaalis ak wurus,

alal du jeex,

fas ne xas,

watiiri xare du jeex.

⁸ Seen réew maa ngi fees aki yállantu;

ñuy sujjóotal seen liggéeyu loxo yooyu, te ñoo ko sàkkal seen bopp.

⁹ Doom aadama torox na, ku ne detteelu, waaye bu leen yékkati!

¹⁰ Ayca ca xunti ma,

làqujileen biiri pax,

ba sore tiitaange ji Aji Sax ji sabab,

sore darajay mággaayam.

¹¹ Bésuh keroog booba,

ku bew bay regeju mooy detteelu,

sagub nit sàggiku,

Aji Sax ji donj mooy jagoo kawe.

¹² Bés déy ñeel na Aji Sax ju gàngoor yi, ca lay xaare képp ku bew ak ku reew,

ba kuy danjiiral, detteelu.

¹³ Ca lay xaare garabi seedari Liban

yi ne coleet, ba kawe,

ak garab yu mag ya fa Basan.

¹⁴ Ca lay xaare wépp tund wu mag wu ne coleet,

ak bépp jànj bu kawe,

¹⁵ ak jépp tata ju gudd,

ak bépp miir bu ñu dàbbli,

¹⁶ ak gaalu Tarsis gu mag gu mu doon,

ak gépp gaal gu taaru.

¹⁷ Bésuh keroog booba,

kuy danjiiral, detteelu,

sagub nit sàggiku,

Aji Sax ji donj mooy jagoo kawe.

¹⁸ Yállantu yépp a naan mes,

¹⁹ nit ñi làquji biir xuntiy doj,

ruuruji biiri pax,

ba sore tiitaange ji Aji Sax ji sabab,

sore darajay mággaayam,

kera buy taxaw, ba suuf di lox.

²⁰ Bésuh keroog booba,

yállantuy xaalis ak wurus

ya nit sàkkal boppam, di leen su-jjóotal,

ñoom lay sànni ca jaar yaak njugub ya,

²¹ ba mana làquji ca xunti ya

ak xarantey doj ya,

ba sore tiitaange ji Aji Sax ji sabab,

sore darajay mággaayam,

kera buy taxaw, ba suuf di lox.

²² Baleen nit,

noowal bakkan kese la!

Ana lees koy nawe?

3

Yuda salfaañoo na

¹ Aji Sax ji Boroom bi, Aji Sax ju gàngoor yi kat,

mu ngi nii di jële Yerusalem ak Yuda,

lu doon wéeruwaay, di céslaay,

muy dugub ju ñu yaakaaron,

di ndox mu ñu yaakaaron,

² ak jambaar ak ñeyu xare,

akub àttekat akub yonent,

ak gisaanekat ak magum pénc,
³ ak njiitu juróom fukki dag, akub kàngam,
 ak diglekatu buur, ak ndaanaanu
 liggéeykat,
 ak jatkat bu xareñ.

⁴ «Maay def ay gone jiite leen,
 di ñu yaroo seen sago, yilif leen.

⁵ Nit ñiy soxorante,
 ku nekk ak moroomam, ku nekk ak
 dëkkandoom,
 ndaw di ñàkke mag kersa,
 sagaru nit sofental boroom daraja.

⁶ Nit dina ne nikk mbokk ma,
 ca biir kër baayam, ne ko:
 «Yaw mi dese mbubbi, jiite nu,
 ba lu bokk ci sunu gent bii, di sa kilifteef.»

⁷ Keroog kooka àddu ne ko:
 «Duma leen mana fajal dara!
 Du dugub, du mbubb fa sama kër,
 dungeen ma def njiit!»

⁸ Yerusalem day téqtalu,
 Yuda fêlêñu.
 Ñooy wax ak a jéf lu neexul Aji Sax ji,
 di gántal leeram gi teew.

⁹ Seen dëgër bêt tuumaal na leen,
 ñuy bakkaar ni waa Sodom,
 làquwuñu sax.

Wóoy, ngalla ñoom!
 nde ñoo lor seen bopp.

¹⁰ Neleen aji jub ji mooy baaxle,
 mooy yooloo añaam.
¹¹ Waaye wóoy ku bon, nde mooy bonle;
 la mu def rekk lees koy def.

¹² Bokk yi, ñu xalele ñoo leen di not,
 ay jigéen yilif leen.
 Bokk yi, seeni njiit a ngi leen di sànk,
 lëndémal nañu seeni yoon.

¹³ Aji Sax jaa ngi ci jataayu layoo,
 moo jóg di àtte ay xeet.

¹⁴ Aji Sax jeey yékkati kàddug sikkaange,
 jème ci magi ñoñam ak seeni kàngam.
 «Yeena sèxètoo tóokèru reseñ bi,
 la ñu foqatee ci néew-ji-doolee nga seeni
 kër.

¹⁵ Lu waral ngeen di dëggaate sama ñoñ,
 nappaa je néew-doolee yi?»
 Kàddug Boroom bee, Aji Sax ju gàngoor
 yi.

Puukare sànk na jigéeni Siyon

¹⁶ Aji Sax ji da ne:
 «Jigéeni Siyon a ngi danñiiral,
 di goñeet-goñeeti,
 di regejook a rékk-rékkal,
 samp um ndaag,
 kelejñal lami wéq.»

¹⁷ Moo tax Boroom beey wat jigéeni Siyon
 nel,
 Aji Sax jeey muri seen jë.

¹⁸ Bésuub keroog Boroom bi xañ leen
 gànjari tànk, ak takkaay yu bindoo ni jant,
 ak yu bindoo ni weer wu feeñ; ¹⁹ aki

lon-lon aki caq aki muuraay. ²⁰ Moo
 leen di xañ ay tañlaay ak lami pèrèg aki
 ngañaay ak téere yu xeeñ aki gällaaj,
²¹ xañ leen jaaroy torlu ak jaaroy bakkan,
²² ak mbubbi xew, aki mëlfe, ak séri
 càngaay, ak saagi loxo, ²³ ba ci yérey sooy
 ak yérey lée aki musóor aki kol.

²⁴ Su boobaa lu xasaw wuutu lu xeeñ,
 buum wuutu ngañaay,
 nel bu set wuutuy létt,
 yérey saaku wuutu ndoket bu rafet,
 toroxte wuutub taar.
²⁵ Yerusalem, say góor ay fàddoo saamar,
 say jambaar des xare.
²⁶ Su boobaa sa bunti dëkk sax di
 ñaawlook a jooj,
 mel ni ndaw su ñu futti,
 mu ne dett fi suuf.

4

¹ Su bés baa juróom yaari jigéen ñoyaalu
 genn góor, ne ko:
 «Sunub dund, nun a,
 sunu koddaa, nun a!
 Jox nu sag buum rekk,
 teggil nu gacce.»

Aji Sax ji aar na ndesu Yerusalem

² Su bés baa njebbitum Aji Sax ji
 doon lu yànj, darajawu,
 meññeefum réew mi di teraanga, dib sag,
 ñeel ñi dese bakkan fi Israyil.

³ Su boobaa ku mucç fa Siyon
 ak ku des fa Yerusalem,
 ku sell ki lees lay wooye,
 muy képp ku ñu bind turam,
 te mu wara dese bakkan ci Yerusalem.

⁴ Boroom beey wal noowal mbugal,
 noo guy lakk, sellal,
 fóote ko jonkani jigéeni Siyon,
 fetee ko deret ji ci Yerusalem, ba mu set.

⁵ Su boobaa tundu Siyon bépp,
 fépp fu ñuy dajee,
 Aji Sax ji sàkk fa niiru saxar bëccég,
 guddi mu def tàkk-tàkk bu ne ràññ;
 leeru Aji Sax ji di kiiraay, tiim lépp,
⁶ di mbaar mu ñuy serloo tangooru
 bëccég,
 di ko seelooob taw ak waame.

5

Woyu cofeel rax na

¹ Naa woy sama soppe
 woyu cofeel wu solowoo tóokëram.
 Sama soppee fi amoon tóokër,
 kaw tund wu suuf sa nangu lool.

² Mu gàbb ko, dindi doj ya,
 jëmbat ca ngèeneeli reseñ,
 tabax tóojub doj fa digg ba,
 ba yett ca mbalkam nalukaayu reseñ,
 tey yaakaar reseñ ju neex,
 mu meññ, wex.

3 Léegi yeen waa Yerusalem
ak yeen waa Yuda,
ngalla àtteleen maak sama tóokër.
4 Lu may defalati sama tóokër bi,
lu ma ca defuloon?
Lu waral ma di ko yaakaare reseñ ju neex,
mu meññ, wex xàtt?
5 Ma xamal leen nag
li ma naral sama tóokër bi.
Ñàggib ñagam, mu dim parlu;
màbb miiram, ñu dæggaate ko, jàll.
6 Dama koy gental,
mu saxi dég aki dagg,
deesu ko tenqi, deesu ko bey;
niir yeet, ma sant leen
ñu bañ koo tawal.
7 Tóokëru Aji Sax ji Boroom gàngoor yi kat,
mooy waa kër Israyil.
Niti Yuda it
ñooy njëmbat li mu safoo.
Mu di ko yaakaare njub,
njubadi ne jaas.
Mu yaakaar njekk,
yuuxi njekkar ne jaas.

Alkànde ñeel na kàngami Yuda

8 Wóoy ngalla ñii di dajale kër ak kër,
tool akub tool,
aakimoo fépp,
ba des ñoomu neen ci réew mi.
9 Maa dégg Aji Sax ji Boroom gàngoor yi,
mu ne: «Giñ naa ne
kër yu bareey gental déy,
kër yu yaa, rafet, kenn dëkku ca.
10 Tóokërub ñetti egtaar déy
du meññ juróom fukki liitari biiñ,
te jiwum tééméeri kiloy bele it,
fukki kilo donjñ a cay génne.»
11 Wóoy ngalla ñiy teela xëy,
daw wutiw ñoll,
gonloo biiñ ba tàng jérr.
12 Xalam yaak tabala yaak toxoro ya jolli,
biiñ xelli ca xawaare ja.
Seetluwuñu sax li Aji Sax ji def,
xooluñu li mu jo loxoom.
13 Moo tax ñoñi Aji Sax ji di duggi ngallo
ndax ñàkk xam-xam.
Seen kàngam ay deeye xiif,
seen baadoolo deeye mar.
14 Moo tax njaniw di yàkkli ag bóli,
gémmin ga ne ñafeet, amul kersa,
boroom darajaak baadoolay Yerusalem
doon xaxaloo, far tàbbi ca.
15 Doom aadama torox na,
nit detteelu na,
ku doon regeju, detteelu.
16 Aji Sax ji Boroom gàngoor yi, ab àtteem
lay fésale maggaayam,
Yàlla ju sell ji, ag njekkam lay firndeele
sellngaam.
17 Am xar a nara fore biir dëkk bi, mbetem
parlu,

màngaan lekke gentub boroom alal.
18 Wóoy ngalla ñiy ràngooy buum,
di diri ñaawtéefi neen,
ràngooy goj di diri seeni tooñ.
19 Ña nga naa: «Na Aji Sax ji gaaw!
Na baral liggéeyam, nu gis.
Na Aji Sell ju Israyil sottal mébétam,
mu sotti, nu xam.»
20 Wóoy ngalla ñiy gis lu bon, ne lu baax
la;
gis lu baax, ne lu bon la;
lëndëm, ñu tudde leer,
leer, ñu tudde lëndëm;
lu wex, ñu ne neex na
lu neex, ñu ne wex na.
21 Wóoy ngalla ñii defe ne ñoo xam,
yaakaar ne ñoo muus.
22 Wóoy ngalla ñiy jambaari naan biiñ,
diy ndaanaan ci njafaanu ñoll,
23 di dëggal ku sikk ndax ab ger,
tey xañ boroom njekk, ag njekkam.
24 Moo tax ni boob di jeexe ci sawara,
ngooñ xoyomoo ko cib taal,
ni la seenub reen di seeye ni lu maxe,
seeni tóor-tóor naaw ni pënd.
Ñoo gántal yoonu Aji Sax ji ci gàngoor yi,
ñoo sofental kàddug Aji Sell ju Israyil.
25 Moo tax merum Aji Sax ji tàkkal ñoñam,
mu xàcci loxoom, duma leen,
ba tund yi jaayu,
seeni néew wetar ni mbalit fi mbedd yi.
Loolu yépp taxul mu meddi,
loxoom baa ngi mu xàcci ba tey.

26 Aji Sax jeey yékkatil raaya, xeet wu sore,
wal ug liit, wooye leen fa cati àddina,
ñu jekki ne jaas, dikkal leen.
27 Kenn sonnu ci, kenn tërëfu ci,
kenn dajantul mbaa muy nelaw;
ngañaay yolomul, waruw dàll dogul.
28 Seeni fitt ñaw na,
seen xala yépp noppi na,
seen wewi tànkli fas ni xeer.
Bu tànkli watiir ya dawee,
nga defe ne callweer a.
29 Dañuy ñar ni gaynde,
ñarati ni gaynde gu mat;
yëmmu, ñank um rëbbam,
yóbbu te kenn du wallu.
30 Bésuub keroog ñu ñaral Yuda,
ñar yu mel ni géej gu sàmbaraax!
Foo geesu ci réew mi, xool,
doo gis lu moy lëndëm ak njàqare,
xàmbaar maase, ba leer giim.

6

Aji Sax ji setal na Esayi, yebal ko

1 At ma Buur Osiyas saayee, damaa gis
Boroom bi toog kaw ngàngune mu kawee
kawe, lafi mbubbam fees néeg bu sell bi.
2 Ay malaakay seraf ñoo taxaw, tiim ko,

ku ci nekk am juróom benni laaf: ñaar yu muur seen kanam, ñaar yu muur seeni tãnk, ak ñaar yu ñuy naawe. ³ Ku ci nekk di àddu, naan moroom ma:

«Kee sell te sell te sell,

keey Aji Sax ji Boroom gàngoori xare yi, àddina sépp a feese ag leeram!»

⁴ Ku ci àddu, kenuy bunt yay riir, néeg Aji Sax ji fees ak saxar. ⁵ Ma ne: «Wóoy man, sànkú naa! Man miy nit ku làmmiñam sobewu, xeetoo ci ñu seen làmmiñ sobewu, te samay gët tegu ci kaw Buur Aji Sax ji Boroom gàngoori xare yi.»

⁶ Kenn ci malaakay seraf ya naaw wutsi ma, yor aw xal wu mu keppe ag ñiim, jële ko fa sarxalukaay ba. ⁷ Mu laalale xal wi sama gémmiñ, ne ma:

«Mu ngoog, ndegam lii laal na sa gémmiñ, sag tooñ wàcc na, sa bàkkaar faru na.»

⁸ Ma dégg baatu Boroom bi, mu naan: «Ana ku may yebal, ana ku nuy demal boog?» Ma ne: «Xanaa man, yebal ma!»

⁹ Mu neeti: «Demal, wax askan wii, ne leen:

“Dégluleena déglu te buleen dégg, xool-leena xool te buleen gis.”

¹⁰ Nanga dêrkiisal xoli askan wii,

fatt seeni nopp,

taf seeni gët;

lu ko moy seeni gët gis,

seeni nopp dégg,

seen xol yég,

ñu dëpp, wér.»

¹¹ Ma ne: «Boroom bi, foo àppal loolu?» Mu ne: «Xanaa fii ba seeni dëkk gental, ba kenn dëkkatu ca, ba nit dootu nekk biir kër ya, suuf sa yaqu yaxheet, di ndànd-foyfoy. ¹² Aji Sax jeey yebal waa réew mi fu sore, tool yu bare booy. ¹³ Bu ca fukkeelu nit ña desoon, ñoom it dees na leen dellu taal. Waaye dañuy mel ni wenn ci xeeti garab yu mag yi ñuy gor, èkk ba dellu jebbi, èkku xeet wii, jiwu mu sell lay doon.»

7

Yaakaar Yàlla war na Buur Axas

¹ Janti buurub Yuda, Axas doomu Yotam miy doomu Osiyas, Reccin buurub Siri moo dal ci kaw Yerusaleem, ànd ak buurub Israyil, Peka doomu Remalya. Waaye manalu leen dara. ² Ba ñu yégalee Buur Axas sëtub Daawuda, ak waa kërám, ne ko waa Siri, Efrayim* lañu lèngool, mbir ma yèngal na Buur Axas ak waa réew ma, ba mel ni garabi gott bu ngelaw li gësëm. ³ Aji Sax ji wax Esayi ne ko: «Génnal gaaw, dajjeek Axas, yaak sa doom Seyar Yasub, ma nga ca catal solomu mbànd ma féete

kaw, ca yoonu toolu fóotkat ya. ⁴ Nga wax ko ne ko:

“Defal ndànk te ne cell.

Bul tiit, bul xàddi

ndax merum Reccin ak Siri,

ak doomu Remalya ji.

Duñu dara lu moy ñaari gil yuy saxar!»

⁵ Waa Siri ñoo ànd ak Efrayim ak doomu Remalya,

di la feexel naan:

⁶ ‘Nan songi Yuda,

tiital leen, nangu ko,

fal fa doomu Tabeel buur.’

⁷ Waaye Boroom bi Aji Sax ji dafa wax ne: ‘Loolu du sotti, du am.

⁸ Damaas a yilif Siri,

te Reccin yiliful lu moy Damaas.

Fii ak juróom benn fukki at ak juróom

Efrayim tas, ba xeet wa réer.’

⁹ Samaree yilif Efrayim,

te doomu Remalya ji yiliful lu moy Samari.

Dungeen mana saxoo dègër nag,

ndare ngeen sax ci Aji Sax ji.”»

Juddub Emanuwel firnde la

¹⁰ Aji Sax ji teg ca ne Axas: ¹¹ «Ñaanal sa Yàlla Aji Sax ji firnde. Ñaan ko ko, ak fu mu mana bawoo, fa suufa suuf, mbaa fa kawa kaw.» ¹² Axas ne: «Duma ko ñaan, ndax duma nattu Aji Sax ji.» ¹³ Esayi nag ne:

«Yeen waa kër Daawuda, dégluleen!

Tàyyiloo ngeen nit,

di tàyyiloo sama Yàlla itam.

¹⁴ Kon nag Boroom bi ci boppam moo leen di jox firnde:

janq bi moy èmb, jur doom ju góor, tudde ko Emanuwel (mu firi Yàllaa ngeek nun).

¹⁵ Soow ak lem lay lekk,

ba keroog muy mana taamu lu baax,

ba lu bon.

¹⁶ Bala xale bee ràññee lu baax ak lu bon, dees na gentar réew mii nga ragal seen ñaari buur.

¹⁷ Aji Sax jee lay dikke,

yaak saw xeet ak sa waa kër baay,

ay bés yu tar yu masula am,

ba Efrayim dèddoo Yuda ba tey,

te buurub Asiri la koy sababe.»

¹⁸ Bésub keroog Aji Sax ji ootal weñ,

ya fa catal wali ndoxi Misra,

ak yamb ya fa réewum Asiri,

¹⁹ ñu dikk, bokk tagesi mbartali xunti yi,

ba ci xar-xari doj yi,

ak gajjoo gajj, ak déegoo déeg.

²⁰ Bésub keroog saatu la Boroom biy wate,

te saatu ba moo di buurub Asiri,

mu àbbe ko ca wàllaa dex,

wat la nel,

* 7:2 7.2 Efrayim moo gèna yaatu ci fukki giir ya féete woon réewum Israyil ga ca bèj-gànaar, te moo taxawe taxawaayu Israyil.

wat say yeel,
 xuuf sab sikkim.
²¹ Bésub keroog nit du fa dundle
 lu dul wenn nag ak ñaari gätt,
²² meew ne gáññ, ndax nit ñu néew,
 di dunde am soow,
 nde soow ak lem la képp ku des ci réew
 ma di dundeji.
²³ Fu junniy reseñ taxaw tey,
 di jar junniy donji xalisu lëmm,
 bésub keroog ay dég aki dagg nangu ko.
²⁴ Xalaaku fitt lees fay deme,
 ndaxi dég aki dagg yu fees réew mi.
²⁵ Mépp mbartal mu ñu daan gább,
 deesu fa demati,
 ndax ragali dég aki dagg,
 aw nag a cay fore,
 am xar curpee ca.

8

Asiri workat la, matul wéeruwaay

¹ Gannaaw gi Aji Sax ji ne ma: «Jëlal àlluwa ju mag, ak xalima gu jàppandi, nga bind ci lii: “Maxer Salal Xas Bas”, (mu firi Sëxëtoow kéfit foqet).» ² Ma wut ci seede, won àlluwa ja ñaar ñu mat seede: ñuy Uri sarxalkat ba, ak Sàkkaryaa doomu Yeberekiya. ³ Ba loolu weese ma jaxasoo ak sama soxna, yonent bu jigéen ba, mu èmb, gannaaw gi mu am ca doom ju goor. Aji Sax ji ne ma: «Tudde ko “Maxer Salal Xas Bas.”» ⁴ Bala xale bee man ne “Baay” mbaa “Yaay” déy, dees na yóbbul buurub Asiri alal ju ñu foqatee Damaas, ak lël ju ñu kéfe Samari, nangu ko.»
⁵ Aji Sax ji dellu ne ma:
⁶ «Gannaaw askan wee teddadil ndoxum Silowe,
 mi ci wal mu teey mi,
 di bége Reccin ak doomu Remalya,
⁷ Boroom baa ngii di leen sottisi
 dexu Efraat gi ne xéew ak dooleem,
 te mooy buurub Asiri ak mboolem dara-
 jaam.
 Dex gi mooy génn xuram,
 fees fépp fu dig tàkkam,
⁸ wal-wali jàll Yuda,
 mbënn ma wal, taañaanaal,
 yéeg ba tollu ko ci put,
 firiku niy laaf ba dajal sam réew, yaw
 Emanuwel.»
⁹ Yeen xeet yi, xaaculeen, dees na leen
 rajaxe.
 Yeen waa cati àddina, teewluleen!
 Gañoo gañu, ñu rajaxe leen!
 Ma ne: Gañoo gañu, ñu rajaxe leen!
¹⁰ Ngeen mébét, dara!
 Ngeen diisoo, diisoo, tus!
 Yàllaa ànd ak nun!

Aji Sax jee jara ragal

¹¹ Aji Sax ji moo wax ak man,

ba mu ma nee nikk, àrtu ma,
 ngir ma baña roy askan wii. Mu ne ma:
¹² «Bul tudde wor,
 lenn lu askan wii tudde wor;
 lu ñu ragal it, bu ko ragal,
 bu ko tiit.
¹³ Aji Sax ji Boroom gàngoor yi daal ngay
 sellal,
 moom ngay ragal,
 moom ngay tiit.
¹⁴ Mu doon seen bérab bu sell,
 di doj wuy fakktale,
 xeer wuy féle, ci ñaari kéri Israyil,
 te dim yeer, dig fiir,
 ñeel ku dékk Yerusalem.
¹⁵ Ñu baree cay téréf,
 daanoo njaaxaanaay, damm,
 mbaa ñu sérëx, keppu.»

¹⁶ Dencal seede bii,
 jëlal lii ndigal, tay cib tayu,
 dénk ko samay dongo.
¹⁷ Maa ngi séentu Aji Sax ji,
 mu ngi won waa kër Yanqóoba gannaaw,
 waaye maa ngi koy yaakaar.
¹⁸ Man de, maa ngii, maak xale yi ma Aji
 Sax ji may,
 nu diy firnde fi Israyil te diy tegtal
 yu bàyyikoo fa Aji Sax ji Boroom
 gàngoor yi,
 ki dékke tundu Siyon.
¹⁹ Am na ñu naan:
 «Laajleen ñiy gisaanee nit ñu dee,
 ak boroom rawaan yiy kebetook a ñun-
 ñuni.
 Aw xeet sañ nañoo gisaanee seeni tuur,
 tey diis ñi dee mbiri ñiy dund.»
²⁰ Kon waxleen ne leen: «Ayca, ca ndigali
 yoon ya,
 ak seeday kàdduy waxyu ya.
 Kuy wax googu kàddu, ag leer fenkalu la.»
²¹ Nit ñi dinañu taxawaalu ci réew mi,
 boole njàqareek ub xiif,
 te bu ñu xiif, ñéññ,
 téen, xool kaw,
 saaga seen buur, saaga Yàlla,
²² dellu xool fi suuf,
 yem ciw tiis, ak lëndëmu njàqare,
 sóoboo guddi gu fatt taraj.
²³ Waaye lëndëm googu du sax
 ci réew mii jàq tey.
 Démb Aji Sax ji torxal na
 réewum Sabulon ak mu Neftali,
 waaye èllëg mu teral waa foofa,
 dale ko diiwaanu tefesu géej,
 ba ca wàllaa dexu Yurdan,
 boole ca sax Galile ga ca doxandëem ya.

9

Doom juddul na nu

¹ Askani wiy doxe lëndëm nii,

ñooy gis leer gu mag.

Ñooñu dëkke réewum ndee mu ne këruus,
ñoom la leer di fenkal.

² Aji Sax ji, yaay yokk xeet wi,
fulal leen bänneex,
ñuy bége fi sa kanam, mbégtem ngóob,
mel ni ñuy bänneexoo fa ñuy séddoo alalu
xare.

³ Yaa leen di sippil seen séf,
damm bant ba ñu leen gálloon,
ak yetu ña leen notoon,
na nga leen defaloon rekk ca xareb Majan.

⁴ Mboolem dàll wu ab noon dukkate ba
dikk,

ak turki bu màndi deretu xare,
sawara lees koy leel.

⁵ Nde gonee juddu, ñeel nu,
di doom ju góor ju ñu nu may,
mu yenu kilifteef gi,
ñu di ko wooye Digelekat bu yéeme bi,
ak Yàlla jàmbaar ji,
ak Baay bi sax dàkk,
ak Buuru jàmm bi.

⁶ Dooley kilifteefam ak jàmm ja du am
kemu,
fa jalub Daawuda ak nguuram,
ga muy samp, saxale ko njekk ak yoon,
tey ji, ba fàww.

Lii la Aji Sax ji Boroom gàngoor yi def ci
xéraangeem.

Aji Sax ji yokk na mbugalam

⁷ Boroom bee yónnee kàddu
gu dal Israyil, askanu Yanqóoba,

⁸ xeet wépp jot ca,
ba ca Efrayim ak waa Samari,
ñay damook a sagu naan:

⁹ «Ay móol màbb,
nu yett ponkali doj, tabaxaat,
xànqi garab yu ndaw daanoo ca,
nu wuutal ca garabi seedar yu mag.»

¹⁰ Aji Sax ji yékkati nooni Buur Reccin, fi
seen kaw,
gemb seeni bañ,

¹¹ Siri songe penku; Filisteen ña, sowu,
ñu sèxëtoo Israyil, wonn.

Teewul Aji Sax ji xàcci loxoom,
meddiwul ba tey.

¹² Waaye xeet wi delluwuñu ca ka leen
duma,

sàkkuwuñu Aji Sax ji Boroom gàngoor yi.

¹³ Moo tax Aji Sax ji doge Israyil bopp ak
geen,

boole tiir ak barax foom ci benn bés.

¹⁴ Mag meek kàngam li ñooy bopp bi,
yonent bi mokkal naaféq dib geen.

¹⁵ Ñi jiite askan wii ñoo leen di sànk,
ña ñuy jiite loru.

¹⁶ Moo tax Boroom bi du bége seeni xale
yu góor,
du yërëm seeni jirim ak seeni jëtun.
Ñoom ñépp a gémadi, di def lu bon,
ku ci nekk di wax lu amul bopp.

Teewul Aji Sax ji xàcci loxoom,
meddiwul ba tey.

¹⁷ Mbon a ngi tàkk moos
ni sawara, xoyom dég aki dagg,
jafal gajji gott bi,
mu ne jippét, saxar, naaw.

¹⁸ Merum Aji Sax ji Boroom gàngoor yi taal
na réew mi,

xoyom waa réew mi,
kenn yërëmul sa mbokk.

¹⁹ Nit ñaa ngi mätte ndijoor, te doyaluñu,
di xàmpe càmmon te suuruñu,
ku nekk di yàpp sa mbokk:

²⁰ Manase song Efrayim,
Efrayim song Manase,
ñu mànkoo, noonoo Yuda.

Teewul Aji Sax ji xàcci loxoom,
meddiwul ba tey.

10

Mbugal ñeel na kàngami Yuda

¹ Wóoy ngalla boroom dogal yiy dogal
njubadi,

bind ko, te muy jur coono,
² di ko àttee ñàkkal ku ñàkk,
di xañ àq sama néew-ji-dooley ñoñ,
bay lekk ab jëtun,
di sèxëtoo ab jirim.

³ Ana nu ngeen di def keroog bésuub mbu-
gal ba,

keroog ba safaan di bawoo fu sore?
Ana ku ngeen di daw wuti wallam?
Ana fu ngeen di denci seen teraanga?

⁴ Xanaa ànd ak ña ñu jàpp, ne yogg;
mbaa tèddandook ña ñu bóom, ne lareet.

Teewul Aji Sax ji xàcci loxoom,
meddiwul ba tey.

Asiri muccul ci mbugal

⁵ Wóoy ngalla Asiri miy sama yetu mer,
bolde bi ñu nàbb di samam sànj,

⁶ ma xabtal ko fi kaw xeet wu gémadi,
yebal ko ca askan woowu ma merloo,
ngir ñu sèxëtoo leen, nangu seen alal,
note leen ni banu mbedd.

⁷ Waaye Asiri gisewu ko noonu,
xalaatewul noonu;
bóome la xintewoo,
ba fàkkas xeeti xeet.

⁸ Mu ngi naan: «Xanaa du sama jawriñ
yépp a diy buur?»

* **10:9** 10.9 Kalne ak Karkemis ak Amat ak Arpádd ay dëkki Siri lañu.

⁹ Kalne daa gën Karkemis gee ma nangu?

Am Amat daa gën Arpàdd*?

Am Samari daa gën Damaas?

¹⁰ Maa дума réew yu seeni yàllantu,
seeni tuur sut tuuri Yerusalem ak
Samari.

¹¹ Na ma tege loxo Samari aki yàllantoom,
duma ni tege loxo Yerusalem aki tuuram?»

¹² Boroom bi nee:

«Bu ma sottalee liggéey fa kaw tundu
Siyonj ak fa Yerusalem,
maay mbugale buurub Asiri réy-réyloom
gi,
ak gëti xeebaateem.»

¹³ Moom moo ne: «Sama dooley përeg laa
defe lii,

maa xelu, ràññee;

ba randal kemi suufi xeet yi,

foqati seeni alal,

dañ boroom jal ya niw yëkk, wàcce leen.

¹⁴ Maa teg alali xeet yi loxo,

ni ku gis am tàgg.

Maa tonneendoo réewi àddina

ni ku for ay nen, tonni lépp,

laaf tef-tëfluwul, sàll newul ciib!»

¹⁵ Sémmiñ dina diir mbagg ka koy gore?

Am dogukaay dina réy-réylu ba sut ka koy
doge?

Mbete yet wuy xàcci ka ko nàbb;

mbaa bolde bu walbatiku nàbb boroom!

¹⁶ Moo tax Boroom bi,

Aji Sax ji Boroom gàngoori xare yi,
di yebal woppi ràgg fi kaw mbuxreem yi,
seen daraja tàkk, sawara xoyom ko.

¹⁷ Aji Sax ji, leeru Israyil mooy doon
sawara,

ku Sellam kooku mooy doon tàkk-tàkku
sawara,

xoyom taxasi Asiri aki dégam ci benn bés.

¹⁸ Gott bu naat ak tool bu meññ, mu ne
faraas foom,

ba mu mel ni ku wopp, yaram way seey,

¹⁹ gott ba dese garab yu néew
yu gone mana lim, bind ko.

Ndesu Israyil dina ñibbi

²⁰ Keroog bés booba

li des fi Israyil ak li rëcce kër Yanqóoba
duñu wéerooti ña leen дума.

Aji Sax ji lañuy wóolu, wéeroo ko,
Aji Sell ju Israyil.

²¹ Aw ndes ay délsi,
di ndesu askanu Yanqóoba,
ñeel Yàlla Jàmbaar ji.

²² Seen xeet wi ni feppi suufas géey lay
tollu,

te as ndes a ciy délsi.

Àtteb sànkute mooy taxaw,
yoon toppe ba mat sèkk.

²³ Sànkute déy mooy taxaw,
Boroom bi, Aji Sax ji Boroom gàngoor yi
di ko sottal fi réew mi mépp.

²⁴ Moo tax Boroom bi,
Aji Sax ji Boroom gàngoor yi
dafa wax ne:

«Yeen sama ñoñ ñi dëkke Siyon,
buleen ragal waa Asiri yi leen di dóor yet,
nàbbal leen bolde ni waa Misra daa def ak
yeen.

²⁵ Waaye fi leek lu néewa néew
mbugal jeex fi seen biir,
am sànj sippil Asiri seen sànkute.»

²⁶ Aji Sax ji Boroom gàngoor yee leen di
nàbbal kàccri,

na mu defoon waa Majan fa doju Oreb.

Mooy xàccii yetam, mu dal géey,

na mu defoon fa Misra.

²⁷ Bésuub keroog sêf bu ñu leen sêfoon
wàcc leen,

ngeen tàggook yet wu ñu leen ténke woon,
nde seen yaram ay naat, ba yet wa damm.

Noon yi songsi nañu

²⁸ Noon yeey songsi Ayat, jéggi Migron,
dem ba Migmas, teg fa seeni juntuukaay,

²⁹ jaare ca xunti ma

te naan: «Geba lanuy fanaani!»

Waa Raama tiit, waa Gibeya gu Sóol daw.

³⁰ Yeen waa Galim, yuuxuleen,

yeen waa Laysa, dégluleen,

yeen waa Anatot, feeluleen.

³¹ Waa Madmena ñooy fëlxxoo,

waa Gebim wuti rawtu.

³² Tey jii noon yaa ngay taxaw fa Noob,

di sànni loxo waa tundu Siyon,

di ko tēkkoo waa Yerusalem googu.

³³ Boroom baa ngoog, Aji Sax ji Boroom
gàngoor yi,

mu ngi gor garab yi, di rajaxe car yi,

njobbaxtal ya gëna kawe dog,

la ca gënoona siggi, wàcc.

³⁴ Mooy jël sémmiñ, goraale gajji gott bi,
Libanj loroo loxol boroom doole, ba jóoru.

11

Daawuda am na kuutaay

¹ Aw njebbit mooy saxe fa èkkub Yese*,
ab car soqEEKOO fa reen ya,

² xelum Aji Sax ji tegu fi kawam,

xelum rafet xalaat ak ràññee,

xelum digle ak njàmbaar,

xelum xam Aji Sax ji, ragal ko.

³ Ragal Aji Sax ji lay safoo,

du lu ko bétam may rekk lay àttee,

du lu ko noppam may rekk lay dogale,

⁴ xanaa di àtte ku ñàkk ci njekk,

di dogalal njub, néew-ji-dooley àddina.

Mooy dóore àddina, bantub kàddoom,

* 11:1 11.1 Yese mooy baayu Daawuda.

mooy reye ñu bon ñi, ngelawal
gémniñam.

⁵ Njekk lay gañoo,
takkoo kóllère.

⁶ Till ay bokk ak mbote ab dal,
segg bokk akub tef ab téraay,
wèllu ànd ak gaynde gu mat, ak juru yar,
tuut-tànk jiite leen.

⁷ Nag ak rab wu aay di forandoo,
seeni doom goorandoo,

gaynde di lekk um ngoon niw yëkk,
⁸ luy nàmp di foye paxum ndox-suuf,
perantal di laal tostanum nàngóor.

⁹ Deesatul gaañe mbaa di lore,
fi mboolem sama kaw tund wu sell wi,
ndax ni ndox di feese ba muur géej,
ni la àddina di feese nit ñu xam Aji Sax ji.
¹⁰ Bésub keroog car bawoo ca Yese, reen
ba,

taxaw di raaya buy gindi xeet yi,
xeet yi di ko sàkku,
dal-lukaayam ba jagoo teddnga.

¹¹ Bésub keroog Boroom bi jooti loxoom
ñaareel bi yoon,
ngir jootaat ndesu ñoñam,
wa des Asiri ak Misra, ak Pattros ak
réewum Kuus,
ak Elam ak Sineyaar,
ak Amat ak biir duni géej ya.

¹² Mooy yékkatil xeet yi raaya,
dajale góor ña ñu dàqe Israyil,
ak jigéen ña ñu jële Yuda, tasaare leen,
ñu jóge ñeenti weti àddina, booloo.

¹³ Fiiraangey Efrayim day jeex,
njéefoy Yuda dakk,
Efrayim dootu fiire Yuda,
Yuda dootu jéppi Efrayim.

¹⁴ Xanaa ñu ne cowa ba sowu,
ne jàyy cèppandoo
fa kaw waggi Filisteen ña,
waa penku, ñu sèxètoondoo;
Edom ak Mowab, ñu teg loxo;
Amoneen ña nangul leen.

¹⁵ Aji Sax jeey wowal walum ndox,
ma séle gééji Misra.
Mooy tàllal loxoom, tiimale dexe Efraat,
wal kook doole,
dóor ko, mu séddlikoo juróom yaari wal,
mu jaarale ca nit ñu caraxu,

¹⁶ def kow yoon, ñeel ndesu ñoñam,
ña dese fa Asiri,
mu mel ni yoon wa ñeeloon Israyil,
bésub keroog ba ñuy génn réewum Misra.

12

Cant jib na

¹ Bésub keroog dees na ne:
«Aji Sax ji, sant naa la;

yaa ma mere woon, meddi, dèfal ma.»

² Ma ne: «Yàllaa may wallu,
ma dal-lu, duma tiit.

Sama dooleek sama kaaraange mooy Ki
sax,

di Aji Sax ji,
te mooy sama wall.»

³ Mbégte ngeen di rooteji
fa wali mucx ya.

⁴ Bésub keroog ngeen ne:
«Santleen Aji Sax ji, tudd turam,
xamley jalooreem ci biir xeet yi,
fàttli maggaayu turam.

⁵ Woyleen Aji Sax ji,
moo kawey jéf!
Na lii siiw biir àddina sépp.

⁶ Yeen waa Siyon, serleen te sarxolleel
ku mággi ki fi seen biir,
Aji Sell ju Israyil.»

Yàllaa moom xeet yi

13

(Saar 13—23)

Yéeneb waxyu dal na Babilon

¹ Yéeneb bii ñeel na Babilon*,
muy peeñum Esayi doomu Amocc.

² Yéegeleen ab raaya kaw tund wu ne
duññ,

joorleen ñii,
tàllal-leen loxo,
ñu jàlle bunti kàngam yi.

³ Maa jox ndigal ñi ma beral sama bopp,
maa woo sama jambaar ñiy réy-réylu,
ne leen ñu sotal mbugal mi samam sànj
laaj.

⁴ Coowal mbooloo ngoog ca tund ya,
mel ni ñu baree bare!
Riirum nguuri nguur yu daje, di xeeti xeet!
Aji Sax ji Boroom gàngoor yi
mooy dajale gàngooru xare.

⁵ Mooy bawoo fu sore,
fa asamaan digalook suuf.
Aji Sax ji laak gàngoor gi muy mbugale,
ngir yaqtesii réew mi mépp.

⁶ Yuuxuleen! Bésub Aji Sax ji moo dëgmal,
te ni sànkute gu bawoo fa ci Aji Man ji lay
dikke.

⁷ Moo tax yoxoo yoxo yoqi, xoloo xol jeex,
⁸ ñu tiita tiit,

yaram di fuddook a metti,
ñuy baddaani ni kuy matu;
ku ne jàq, di xulli sa moroom,
kanam ya sèl-sèleendoo.

⁹ Bésub Aji Sax jaa ngii di ñew,
bés bu néeg, bésub mer ak sànj muy tàkk,
nara gental suuf,

te bàkkaarkat ya la fay fàkkas.

¹⁰ Biddiiw mbaa dèllooñ dootu leeral;
jant ay fenke lëndem,

* **13:1** 13.1 Babilon tollu na ay jant yu mu mujj di puukarey xeet yi, ngir dooleem, te moo mujj yóbbu Yuda ngàllo.

weer dakkal leeram.

¹¹ Maay delloo àddina mbonam,
yool ku bon tooñam,
maay sàggi sagub ku reew,
detteel puukarey ku néeg.

¹² Maay def nit géna jafee gis wurus,
ba doom aadama raw wurusu Ofir.

¹³ Moo tax maay gèsèm asamaan,
suuf yèngoo fa mu tege
ndax sànjum Aji Sax ji
Boroom gàngoori xare yi,
keroog ba meram di tàkk.

¹⁴ Ku nekk ay fekkiy bokkam,
rawi cam réewam,
mbete kéwél gu ñuy rébb,
mbaa xar mu amul sàmm.

¹⁵ Ku ñu ci gis, jam la,
ku ñu jàpp, saamar rey la;

¹⁶ seeni doom, ñu moxoñe fi seen kanam,
seeni kër, ñu sèxètoo,
seeni jabar, ñu tédde.

¹⁷ Maa ngii di xabtal fi seen kaw waa Medd,
ñi xintewoowul xaalis,
faalewuñu wurus.

¹⁸ Seenii fitt lañuy rajaxee xalelu góor,
duñu ñeewante gone,
duñu xool tuut-tànk gèti yërmande.

¹⁹ Babilon nag, mooy gànjaru réew yi ko
wër,

di teraanga ji Kaldeen ñiy sagoo,
waaye Yàllaa koy tas,
mu ne tasar ni Sodom ak Gomor.

²⁰ Deesatu fa dëkk,
xanaa gental ba fàww.
Màngaan dootu fa samp xayma,
sàmm dootu fa gooral.

²¹ Ay rabi àll a fay goore,
kër ya fees aki looy,
bànjóoli dëkke fa,
kéwél di fa curpee.

²² Bukki mooy sabe fa tata ya,
till nangu kër yu bakkane ya.

Àppu Babilon jege na, ay fanam du fi wees.

14

¹ Aji Sax ji kay mooy yèrëm askanu
Yanqóoba, dellu taamu xeetu Israyil wii.
Moo leen di sancaatal fa seen suuf,
doxandéem yi fekki leen; boole seen bopp
ci askanu Yanqóoba. ² Yeneen xeet yeey
delloo bànni Israyil ba seen réew, mooma
Aji Sax ji séddoo, bànni Israyil jàpp ca
ñoom njaam, góor ak jigéen, ba teg loxo ña
leen tegoon loxo, moom ña leen moomoon.
³ Bés bu leen Aji Sax ji teggilee seeni
coonook seeni fitna, ba ngeen tàggook
njaam gu metti, gi ñu leen doon jaamloo,
⁴ su boobaa nangeen woyal buuru Babilon
léeb wii, ne ko:
«Moo nu ki daan note mujje?

Nu mu mujjeek reewandee?

⁵ Aji Sax jee damm bant,
bi ñu bon ñi daan dóoree!

Moo damm seen yetu nguur,
⁶ wi ñu daan xadaruy dóor askan yi,
dóor yu dakkul,
di joggatee xeet yi xol bu tàng,
topp leen, tée ba.

⁷ Àddina yépp a féex, am jàmm,
sarxolle jolleendoo.

⁸ Garab yi dul ruus, ak seedari Liban sax
di bége sab jéll,
naan: “Ba nga daanoo ba tey,
ab gorkat jógalu nu.”

⁹ Njaniiw ga fa suufa suuf yàkkamti na la,
di la waaja gatandu,
ba yeel la ndem-si-yàlla yi doon njiiti
àddina yépp.

Moo yékkatee buuri xeet yépp seeni jal,
¹⁰ ñoom ñépp àddu, ne la:

“Yaw it mujj nga néew doole ni nun a?
yaak nun de a mujj yem kepp!”

¹¹ Sa puukare gee tàbbisi nii njaniiw,
yaak sa buumi xalam?

Ay duusu di sa laltan,
ay sax di sa càngaay!

¹² Moo yaw biddiiwu njël, bi noon ràññ,
tey nga xàwwikoo asamaan ba fii!

Yaw mi daa daan xeet yi,
tey ñu gor la, nga goor.

¹³ Xanaa du yaa doon wax ci sam xel, naa:
“Maay yéeg kaw asamaan,
maay aj sama jal kaw biddiiwi Yàlla,
maay toogi kaw tundu ndaje ma,
fa catal bėj-gànaar.

¹⁴ Maay yéeg fa kaw niir ya,
ba mel ni Yàlla Aji Kawe ji!”

¹⁵ Teewul nga tàbbi njaniiw,
àkki ba ca xóotey pax ma.

¹⁶ Ku la gis ne la jàkk,
xel ma ne ci yaw, mu naa:

“Xanaa du kii a doon loxloo àddina,
yèngal réewi réew,

¹⁷ def àddina wèrngal képp ndànd-foyfoy,
tas dëkk ya,

te du jàpp nit ba yiwi ko?”

¹⁸ Buuri àddina yépp, ba ñu daj,
ñépp a tédde teraayu teraanga,
ku ci nekk ak bàmmeelam.

¹⁹ Yaw, ñu xañ la bàmmeel, sànni la,
nga mel ni car bu ñu foñ.

Yaa ngi ne lareet ci biir néew yu saamar
bóom,

ñu tàbbal leen ci xeeri biir kàmb.

Yaa ngi mel ni médd mu ñuy joggati.

²⁰ Deesu la robaaleek yooyu buur,
yaa yàq sam réew,
faagaagal saw xeet.

«Deesul tuddati mukk askanu lorkat wii.

²¹ Waajal-leen fi ñuy rendi doom yi,
feye leen seen ñaawtéfi baay,

bala ñoo jógati, teg àddina loxo,
ba tabax fu ne ay dëkk*.»

²² «Maa leen di jógal.»

Kàddug Aji Sax jee, Boroom gàngoor yi.
Mu ne: «Maay tenqi turu Babilon, tenqim
ndesam

ba ca seeni doom ak seen askan.»

Kàddug Aji Sax jee.

²³ Mu ne: «Maa koy def kërug siññéel,
def ko ab tan,

ba buube ko buubub rajaxe.»

Kàddug Aji Sax jee, Boroom gàngoor yi.

Mbugal ñeel na Asiri

²⁴ Aji Sax ji Boroom gàngoor yee giñ ne:

«Lu ma nar déy mooy am,
lii ma mébét, mooy sotti.

²⁵ Maay joggati Asiri fi samam réew,
dëggaate leen fi sama kaw tund yi,
ba sama ràngi ñoñ rengiku,
seenub sêf sippiku.»

²⁶ Mii mébét lañu mébétal àddina sépp,
bii loxo lañu xàccil xeet yépp.

²⁷ Bu Aji Sax ji Boroom gàngoori xare yi
dogalee déy,

ana ku koy dogale?

Bu xàccee loxoom,

ana ku koy fommal?

Ab yéneeb waxyu ñeel na Filisti

²⁸ At ma Buur Axas saayee,

bii yéene jib na:

²⁹ Filistee, seen yetu gannaaw wi damm,
bu ko kenn ci yeen bége,
nde ci èkku jaan ji, la ñàngóor di génne,
am tostanam mujj di céebi.

³⁰ Su boobaa ñi géna walaakaana am lu ñu
for,

néew-doole ya goor, and ak dal.

Waaye yeen, maa leen di xiifal, ngeen dee
ba raaf,

xiif ba fàkkas ñi ngeen dese.

³¹ Yeen magi pénc mi, ñaawlwuleen!

Yeen waa dëkk bee, yuuxuleen!

Na Filisti gépp ne yácc!

Běj-gànnar déy la saxar jollee,

kenn du wuute gàngooru noon ya.

³² Lees di tontu xeet wi yónnee di laaj,

xanaa ne leen Aji Sax jee sanc Siyon,
te fa la baadooloy ñoñam di rawe.

15

Ab yéneeb waxyu ñeel na Mowab

¹ Yéene bii ñeel na Mowab:

Genn guddi déy la Ar Mowab, dëkk ba tas,
ne mes!

Genn guddi déy la Kir Mowab tas, ne mes!

² Nit ñaa ngi yéeg jëm kërug jaamookaay
ga ca Dibon,

ngir jooyi ca bérabi jaamookaay ya,
Mowab a ngay yuuxoo kaw tundu Nebo ak
Medeba,

boppoo bopp dib nel,

sikkimoo sikkim xuufu,

³ nit ña sol saaku, di ñaawlu fa mbedd ya,
ak kaw taax yaak pénc ya,

ku ne di jooyi ba say rongooñ wale.

⁴ Waa Esbon ak Elalee ngi yuuxu,

seen baat àkki ba Yaxacc,

xarekati Mowab dégg ca, yuuxoo,

ne yácc ne yasar!

⁵ Maay jooy Mowab jooyi xol,

nit ñaa nga fay dawe ba Sowar,

àkki ba Eglat Selisiya.

Ña ngay yéeg jëm Luwit, di jooyoo,

awe yoonu Oronayim, di jalu.

⁶ Dexu Nimrim wow na,

ñax wow, gancax lax,

dara naatatul.

⁷ Jël nañu lu ñu deseek lu ñu dencoon,

yóbbu, jáll ca wàllaa xuru Garab ya.

⁸ Yuux déy maase na réewum Mowab,

jooyoo ya ba Eglayim,

jooyoo ya ba Beer Elim.

⁹ Dexu Dimon déy fees na ak deret,

te ma nara wáceel Dimon lu ko raw,

ba ku rëcce Mowab,

ak ku des ci réew mi, ma booleek gaynde!

16

¹ Waa Mowab a nga naa:

«Yónneeleen boroom réew mi yóbbalu
kuuy yu ndaw,

jële ko Sela, jaare mândiñ ma,

yóti ko buurub Yuda fa tundu Siyon mu
taaru.»

² Jigéeni Mowab a nga ca jéggikaayu dexu
Arnon,

mel ni picc yu tasaaroo fa seeni tàgg,

di fêt-fêtluuy, naaw.

³ Ña nga naa njiiti Yuda:

«Xelal-leen nu, àtte nu,

latal nu bëccëg ndarakamm ker gu mel ni
guddi,

yiire ko daw-làqu, yi nu doon;

buleen nu wor te nuy wuta raw!

⁴ Mayleen nu nun ñi rëcce Mowab, nu dal
ak yeen,

te ngeen làq nu bóomkat.»

Kiy note déy day jeexal, sèxétooo dakk,

kiy lore ci réew mi jóge fi,

⁵ ab jal sampe fi ci ngon,

ki ci tooge jikko ju dëggu di askanu
Daawuda

te di njiit luy sàkku yoon, yàkkamti njekk.

⁶ Noo dégg ni Mowab réye,

réya réy, reew te bew,

seeni kañu di waxi neen.

* **14:21** 14.21 Manees na koo tekkee nii it: bay feesal suuf aku ay.

7 Moo tax Mowab di jooy ba ñeppi Mowab jooyoo,

ndax namm reseñ ja woon ca Kir Eres, ba ne yàcc, di binni.

8 Tool ya fa Esbon day wow, ñiiti xeet yee dëggaate ngëneelu reseñ gu Sibma,

te cabb ya laloon ba Yaser, ba àkki dëndu màndiŋ ma, car ya law ba wàllaa géej.

9 Jooyi waa Yaser laay jooy reseñ ga fa Sibma,

yeen waa Esbon ak Elale, ma sange leeni rongooñ,

nde fa ngeen di dajaleek fa ngeen di góobe, coowal mbégtee fay dakke.

10 Mbégteek bânneex ay toxoo seeni tool, ay woy aki sarxolle noppee jibe seeni tóokër,

te nalkatu reseñ naltil fa mbànd ya! Aji Sax jee dakkal coow li.

11 Maa ngi yèrëm Mowab, bay binni ni buumu riiti, sama yaram daw ci Kir Eres.

12 Mowab a ngoog ak coonoom, ba muy deme fa bérab yu kawe ya, dugg jaamookaayam di ñaan te du am.

13 Lii la Aji Sax ji waxoon bu yàgg ci mbirum Mowab,

14 tey Aji Sax ji wax ne: «Fileek ñetti at yu surga bu ñu bind waññ, dees na sàggi sagub Mowab, te li ñuy bare tey lépp, seenum ndes ay néew lool te tekkeedi.»

17

Ab yéeneb waxyu ñeel na péeyub Siri

1 Yéene bii ñeel na Damaas*:
Damaas a ngii, léegi mu noppee doon ab dëkk,

xanaa ab jalu tojit;
2 dëkki Arower gental,
gàtt yi jagoo,
goore fa, kenn du leen dàq.

3 Tata dina tukkee diiwaanu Efrayim, nguur foqe dëkk ba ñuy wooye Damaas, te ndesu Siri du épp bànni Israyil daraja. Kàddug Aji Sax jee, Boroom gàngoori xare yi.

4 Bésub keroog sagub Yanqóoba sàggiku, yaram wa réer ko, mu jeex tàkk.

5 Day mel nim ngóob mu loxol góobkat bay dal, di dajale gub ya. Day mel ni ngóob ma ca xuru Refayeen,

6 fa dara dul des lu moy am poraat; mu mel ni wittum oliw,

bu noppee ñaari doom ak ñiett ay des ca kaw,
mbaa ñeent ba juróom ci car yi meññ.
Kàddug Aji Sax jee, Yállay Israyil.

7 Bésub keroog nit sàkku Ki ko sàkk, ba ne jàkk Aji Sell ju Israyil.

8 Dootu sàkkooti lenn ci sarxalukaay yi mu sàkkal boppam.
Dootu sàkkooti yooyu mu defare loxoom, du xer yi ñuy jaamoo Asera,
du yeneen sarxalukaayi cuuraay.

9 Bésub keroog seen dëkk yi tata wër, dees na leen won gannaaw

ni dëkki Eween ñaak Amoreen ña†,
ba leen bànni Israyil dàqee,
lépp ay doon ab gent.

10 Yeena fátte Yàlla ji leen di musal, bawuleen xel seen céslaay jiy seen rawtu, xanaa di jëmbatal seeni tuur ay tooli ngëneel,

di ji jiwu mu bawoo feneen.

11 Bés ba ngeen ko jëmbatee, ngeen gis mu sax,

ëllëg ba bët setee, mu tóor,
te ngóob réer bésub wopp,
ci biir mitit wu amul paj.

12 Ndeysaan, mii riirum gàngoor yu mag!
Xeet yu bareey riir ni riirum géej,
ànd ñarandoo ni géej gu sàmbaraax,
gannax ya ñarandoo.

13 Xeet yaa ngi ñarandoo
ni ndox mu baawaan,
Yàlla gëdd leen, ñu daw ba sore;
ngelaw yéngu, ñu naaw,
ni boob, ba ca kaw tund ya,
mbete pënd bu ngélén wal, mu def call-weer.

14 Ngoon a ngay jot, tiitaange ne jaas, balaa bët a set lépp jeex.

Lii mooy añub ñuy sèxëtoo,
lii mooy deminu ñiy nangu sunu alal.

18

Waxyu jib na, ñeel réewum Kuus

1 Wóoy ngalla réew ma gunóor yay riire, ca tàkkal dexi réewum Kuus.

2 Yeen ñiy yónni biir géej, ay ndaw, ci gaali barax yu war mbeex mi; yeen ndaw yu gaaw yi, demleen, fékki xeet wu siggi, rattax yaram, askan wu ñu ragale fu jegeek fu sore, xeet wu am doole, di falaxee, te seenum réew defi wal.

3 Yeen waa àddina wërngal këpp, yeen ñi dëkke suuf si,

* 17:1 17.1 Damaas mooy péeyub Siri. † 17:9 17.9 Mbaa: ni gott yaak njobbaxtali tund ya,

séentuleen raaya ba sampe fa tund ya,
dég'luleen liit ga ñuy wali.

⁴ Aji Sax ji kat da maa wax ne:
«Maa ngi fi ma tollu di xool, ne tekk,
ni tangooru jant bu ne raññ,
mbaa lay bu defu niir ci tangooru ngóob.»

⁵ Bala ngóob di jot, te fekk lépp tóor,
ba tóor-tóor def reseñ ju xaay,
mu jël ab sàrt, dog car yu ndaw yi,
tenqi car yu mag ya, sànni;

⁶ ñu boole waccal njanaawi tund ya
ak rabi àll yi,
tan yi nawetoo ko,
rabi àll yépp nooroo ko.

⁷ Su boobaa ñu indil Aji Sax ji Boroom
gàngoor yi,
galag bu bawoo ci xeet wu siggi, rattax
yaram,

askan wu ñu ragale fu jegeek fu sore,
xeet wu am doole, di falaxee,
te seenum réew def wal,
galag ba agsi ba tundu Siyon,
fa Aji Sax ji Boroom gàngoori xare yi dëël
turam.

19

Ab yéneeb waxyu ñeel na Misra

¹ Yéene bii ñeel na Misra:

Aji Sax jaa ngii war niir wu gaaw,
jëm réewum Misra.

Yállantuy Misra yég ko, di lox,
fitu waa Misra récc.

² Maay xiir Misra ci kaw Misra,
kii song mbokkam, kii song xaritam,
ab dëkk jógal ab dëkk, diiwaan jógal
diiwaan.

³ Waa Misra jännaxe,
ma dëpp seen pexe.

Ñu seeti yállantu yeek njuuma yi,
ak gisaanekat yeek boroom rawaan yi.

⁴ Maay teg Misra ci loxol sang bu néeg,
buur bu dëgër xol jiite ko.

Kàddug Boroom bee, Aji Sax ji ci gàngoor
yi.

⁵ Ndoxum Niil ma day fer;
dex gaay ñiis, wow konj,

⁶ solom ya xasaw,
wali Misra diib ba far ñiis,
barax ak lu mu xeetool lax,

⁷ gancax ga leru dëxu Niil
ak ga saxe fa dex ga dabe géej,
ak lu ñu jiwoon ca wet ga,

lépp ay wow, naaw, ba jeex.

⁸ Nappkat di jàmbat,
kuy sànnib oos dëxu Niil di jooy,
kuy mbaal waaru,

⁹ kuy liggéey lëe am mbetteel,
kuy jàrt ak a ràbb poqe jommi.

¹⁰ Ñi yor réew mi dañuy sèngéem,

kuy liggéey di feyu am naqaru xol.

¹¹ Kàngam ya fa Cowan* dañuy teqlikook
seen sago,
diglekati Firawna yu xelu ya di digle ag
ndof.

Ma ne: «Yeen diglekat yi, nu ngeen mana
waxe Firawna naan:

“Nun ay boroom xel lanu,
sosoo ca buur ya woon?”»

¹² Firawnaa, ana say boroom xel?

Nañ la waxal boog, ba xamle
li Aji Sax ji Boroom gàngoor yi naral Misra.

¹³ Kàngami Cowan a ngi def yéfi dof,
kàngam ya fa Memfis, ñu nax leen,
te njiiti giiri Misra lajjal seen waa réew.

¹⁴ Aji Sax jee miirloo Misra,
gélëmal ko ci lépp lu muy def,
ni màndikat buy jang ba tarxiis cim wac-
coom.

¹⁵ Du lënn lu kenn manatee defal Misra,
bopp akub geen du ci am pexe,
te bantub tiir ak barax a ci yem.

Lu jëm ci muju Misra

¹⁶ Su bés baa waa Misra mel niy jigéen,
di lox ndax tiit loxo bi jóg,
te Aji Sax ji Boroom gàngoor yi xàccil-leen
ko.

¹⁷ Yuday doon tiitaangey waa Misra,
ba ku ñu ci tudd Yuda, nga tiit,
ngir la leen Aji Sax ji Boroom gàngoor yi
naral.

¹⁸ Su keroogee mu am juróomi dëkki
réewum Misra

yu nit ñay waxe lammifiñ ebrë,
di fa giñe Aji Sax ji Boroom gàngoor yi,
benn dëkk ba lañuy wooye Ir Ayeres,
dëkkub yàqute.

¹⁹ Bésub keroog ab sarxalukaay ñeel Aji
Sax ji,

fa digg réewum Misra,
aw xer it ñeel Aji Sax ji fa kemu réew ma,
²⁰ loolu di firnde, ñeel Aji Sax ji Boroom
gàngoor yi,

di lu ko seedeel fa biir réewum Misra.
Bu ñu leen sonalee ba ñu woo Aji Sax ji,
mu yónnee leen ku leen wallu,
taxawu leen ba xettli leen.

²¹ Bésub keroog Aji Sax ji ci boppam mooy
xamal Misra mooy kan,

ba waa Misra xam Aji Sax ji,
di jaamoo Aji Sax ji saraxi gàtt ak saraxi
pepp,

digook moom tey wàccook seeni dige.

²² Aji Sax jeey дума Misra

дума yu ànd akum paj,
ñu walbatiku ci Aji Sax ji,
mu nangul leen, faj leen.

* 19:11 19.11 Cowan ak Memfis ay dëkki Misra lañu.

²³ Su keroogee mbedd bawoo Misra ba Asiri,
waa Asiri di dikk ba Misra,
waa Misra di dem ba Asiri
te Misra di jaamoondook Asiri.

²⁴ Bésub kerog Israyil ñetteel Misraak Asiri,

di barke fi digg àddina.

²⁵ Aji Sax ji barkeel leen, ne:

«Barke ñeel na Misra, sama ñoñ,
ak Asiri mi ma sàkke samay loxo,
ak Israyil sama séddoo.»

20

Kàddug waxyu ñeel na Misra ak Kuus

¹ At ma bummib Asiri demee ca ndigalal Sargon buurub Asiri, ba songi dèkk ba ñuy wax Asdodd ca Filisti, ba mujj ko nangu,

² fekk na Aji Sax ji wax, Esayi doomu Amocc jottli. Mu ne ko: «Demal summi tubéyu saaku ji nga sol, te summi say dàll.» Mu def noona, di doxe yaramu neen, tãnki neen.

³ Gannaaw gi Aji Sax ji ne: «Esayi sama jaam bi def na yaramu neen, tãnki neen lu mat ñetti at, muy firnde, di tegtal ci mbirum Misra ak réewum Kuus.

⁴ Te noonu la buurub Asiri di yóbboo ngállo Misra, toxal waa Kuus, ñuy ay ndaw aki màggat. Yaramu neen, tãnki neen lañuy def, seen taat ne fàññ, muy gacceg Misra.

⁵ Dañuy boole njàqareek gacce ndax réewum Kuus mi ñu yaakaaroon, ak Misra gi ñu doon sagoo.»

⁶ Bu keroogee ku dèkke tefes googu dina ne: «Xanaa kay du ñii lanu yaakaaroon! Te nu dawoon di wuti ndimbal ci ñoom, ngir récc buurub Asiri! Léegi nag nu nuy mucce?»

21

Ab yéeneb waxyu ñeel na Babilon

¹ Yéene bii moo wàccal màndinj ma feg-gook géej ga:

Ni ag ngélén di riddee jaare Negew

ni la noon di bawoo màndinj ma, jóge réew mu raglu.

² Peeñu mu ñàng lañu ma ci wax.

Workat biy wor, yàqkat biy yàq.

Yeen waa Elam*, songleen; yeen waa Medd, gawleen leen.

Dakkal naa mboolem onk yu ñu sabab.

³ Lii a waral sama njàqareg xol,

mitit jàpp ma, mel ni mititu mat,

ma jaaxle ba déggatuma,

jàq ba gisatuma.

⁴ Bopp ubu, tiitaange jàpp ma;

sama ngonug bannex

soppiku guddi gu raglu.

* 21:2 21.2 Elam am réew la mu bokkoon ci nguurug Pers, te di ab diiwaan ci réewum Iraan mu jamonoy tey.

† 21:11 21.11 Duuma ci Arabi la féete, feggook Seyir mbaa Edom. Baat la itam buy tekki selaw, ci lakku yawut.

‡ 21:13 21.13 Dedan ak Teman ak Kedar ay xur la yu waa Arabi dèkke.

⁵ Ndab taaje, laltan lale,

ñuy lekk ak a naan.

Ñu jekki ne: «Yeen kilifa yi, jógleen!

Diwleen pakk yi!»

⁶ Boroom bi kat da maa wax, ne ma:

«Doxal taxawal ab jongrukut,

lu mu gis, wax ko.

⁷ Bu gisee gawar ci watiiru ñaari fas,

ak ñu wari mbaam ak ñu wari giléem,

na teewloo teewlu bu baax.»

⁸ Jongrukut ba àddu ca kaw ne:

«Sang bi, maa ngii yendoo séentu,

fanaane wattu fii ma taxaw.

⁹ Ma ne gawar a ngii,

war watiiru ñaari fas.

Nee: «Daanu nañoo, Babilon daanu na,

jëmme tuuram yépp tasaaroo fi suuf!»

¹⁰ Yeen bokk yi ñu bàcc ni pepp ca sama

dàgga ja,

la ma dégge ci Aji Sax ji Yállay Israyil

Boroom gàngoor yi,

wax naa leen ko.

Ab yéeneb waxyu ñeel na Duuma

¹¹ Yéene bii moo wàccal Duuma†:

Nit a ngi may wooye tundu Seyir, naan:

Jongrukut bi, lu des ci guddi gi?

Éy jongrukut bi, lu desati ci guddi gi?

¹² Jongrukut bi ne:

«Bèt set, mu guddeeti rekk,

Boo amee looy laaj, délsil laajaat ko.»

Ab yéeneb waxyu ñeel na Arabi

¹³ Yéene bii moo wàccal Arabi:

yeen cèggi askanu Dedan‡,

mbooyum Arabi ngeen di fanaane.

¹⁴ Yeen waa Tema, dajejileen ak ña mar,

yóbbul leen am ndox.

Dogileen ñay daw,

may leen ñu lekk.

¹⁵ Ay saamar de lañuy daw;

saamar bu ñu leen xàccil

ak fitt gu ñu leen diir

ak tàngooru xare.

¹⁶ Aji Sax ji de da maa wax ne ma:

«Fileek menn at mu surga bu ñu bind

waññ, sagub dèkk bii di Kedar dina

sàggiku, ¹⁷ li des ci jambaari fittkati Kedar

di lu néew.» Aji Sax ji Yállay Israyil wax na

ko.

22

Ab yéeneb waxyu ñeel na Yerusalem

¹ Yéene bii ñeel na xuru Peeñu ma:

Ana lu ngeen di yéeege,

yeen ñépp seen kawi taax?

² Lu waral coow li ak xaxaloo bi,

ba dèkk biy riir?

Ñi ngeen deele, saamar reyu leen,
bóomuñu leen ci xare.

³ Seen njiiti xare yépp a bokk daw,
ñu jàpp leen te taluñoo fitte.

Seen njiiti yi ñu gis yépp lañu jàpp,
te ñu dawoon ba sore.

⁴ Moo ma tax ne: «Buleen ma xool,
damay naqarlu, jooy.

Tàyyivleen maa dèfal ci sama bokk yi
sànkú.»

⁵ Lii kat bésub njommite laak coonook
toroxte,

bésu Boroom bi Aji Sax ji ci gàngoor yi,
ci biir xuru Peeñu mi.

Tata ja, ñu rékka rékk, mu màbb,
yuux jolli, àkki tund ya.

⁶ Waa Elam gállooy fitt,

ñenn ña war watiir, gawar ya war,
waa Kir njàbb pakk ya.

⁷ Seen xur yu nangu yaa fees aki watiir,
gawar taxaw temm buntu Yerusalem,

⁸ te Yuda ne dunj, dara wëru ko.

Su keroogee ngeen yaakaar ngànaay,
ya ca kër ga ñuy wooye Gott ba,

⁹ far gis ni ñu bëtt-bëttee tatay Yerusalem,
ji wër gox bi ñu naan Kër Daawuda.

Ngeen rooti ndox ca solom bu suufe ba,
denc ko,

¹⁰ boole ca waññ kəri Yerusalem,
màbb lenn, sàkk ca lu ngeen aare tata ya.

¹¹ Da leen di fekk sàkk mbànd diggante
ñaari tata yi,

ngir denc ca ndoxum déeg bu yàgg ba.

Waaye xooluleen ki dogal lii,
xalaatuleen ki nasoon lii bu yàgg.

¹² Bésub keroog Boroom bi,

Aji Sax ji ci gàngoor yi moo leen di
woo

ci jooyoo ak ñaawlu

ak wateefu nel, ak colu saaku ngir ñaawlu.

¹³ Te yeena ngii ci mbég ak bannex,

di rendi nag ak xar,

di yàpp ak a naan,

naan: «Nan lekk, naan, nde èllég, nu dee!»

¹⁴ Aji Sax ji Boroom gàngoor yi dégtal na
ma lii:

«Gii ñaawtéef déy deesu leen ko jéggal,
ba keroog ngeen di dee.»

Boroom bee ko giñ,

moom Aji Sax ji Boroom gàngoor yi.

Kàddug àrtu ñeel na Sebna

¹⁵ Boroom bi Aji Sax ji ci gàngoor yi dafa
wax ne:

«Ayca, demal ba ca Sebna,
bèkk-néegu buur sii, nga ne ko:

¹⁶ Ana loo fi am, ak koo fi am?

Nga di fi yettlu bàmmeeel, yett ko ca kawte
ya,

di gaslu kër gooy mujje?

¹⁷ Jàmbaar, dama ne Aji Sax jee lay xalab;
da la naa nikk,

¹⁸ fodonk la, rattax,

nga xalangoo àll bu ne màww.

Fa ngay dee,

te fa la watiir yi ngay puukarewoo di des,
muy sa gâcey waa kër sang.»

¹⁹ Aji Sax ji nee: «Maa lay jële sa liggéey,
foqatee la sa péete mu kawé.

²⁰ «Bésub keroog ma woo sama jaam
bi, Elyakim doomu Ilkiya, ²¹ solal ko

sa mbubb, dooleele ko sa ngañaay, teg
kilifteefu réew mi ci loxoom, ba mu

féete wàllu baay, waa Yerusalem, ak waa
kër Yuda. ²² Maa koy ràng caabiy kër

Daawuda, muy ubbi te kenn du tēj; di tēj te
kenn du ubbi. ²³ Maa koy samp fu dēgēr ni

ab wékkukaay, mu doon sagu kër baayam.

²⁴ Waa kër baayam ak seen daraja, ñépp
ay wékku ci moom, car yaak caraat ya.

Ndab yu ndaw yépp ca la, kopp ya ba ca
njaq ya. ²⁵ Bésub keroog,» kàddug Aji Sax

jee, Boroom gàngoor yi, mu ne: «bant ba
sampe woon fu wóor day simpiku. Dees
koy gor, mu fàq, la ca sèfe woon dog.» Aji
Sax ji déy wax na ko.

23

Ab yéneeb waxyu ñeel na Tir

¹ Yéene bii ñeel na dèkk ba ñuy wax
Tir*:

Yeen waa gaali Tarsis ñi deele, jooyleen!
Lépp a yàqu!

Du kër, du teeruwaa.

Fa dunu Sippar† lañu leen ko waxe.

² Yeen waa tefes,

yaw Sidon laa ne, na say jula ñaawlu,

yaw miy yónni nit ñu jaare gééj,

³ war ndox ya ne xéew,

peppum Sixor‡ di sa tono,

ak ngóobum Niil,

ma xeet yi daan jula.

⁴ Yaw Sidon, gâce ñeel na la,

gééj moo wax, tatay gééj a ne:

«Masumaa matu, masumaa jur,
yaruma gone gu góor, yarumab janq.»

⁵ Bu xibaar ba ággee Misra de,

ñu naqarlu deminu Tir.

⁶ Jállal ba Tarsis§,

yeen waa tefes ga fa ne, jooyleen jooyi dēj.

⁷ Xanaa lii du seen dèkk bu xumb ba,

te cósanaan di janti démb,

nit ña di fa jógey sancaani fu sore?

⁸ Ana ku fexeel lii Tir ma daan fale,

* **23:1** 23.1Tir ak Sidonay dèkk yu am solo la woon ca Fenisi, ci réew mi ñuy wax Liban tey. † **23:1** 23.1 Mbaa: dunu Kitim. ‡ **23:3** 23.3 Mooy dexu Niil. § **23:6** 23.6 Ab sanc la bu bokkoon ci Tir, ca wàllu España.

ay julaam diy kàngam,
 di jaaykat yi àddina teral?
⁹ Aji Sax ji Boroom gàngoor yee ko fexe,
 ngir sàggi sagub képp ku fiy damu,
 ba teddadil képp ku àddina teral.
¹⁰ Yeen waa Tir, defleen ni dexu Niil, walal
 seen réew;
 kenn tereetu leen.
¹¹ Aji Sax ji tàllal na loxoom, tiimale géej,
 yéngal réew yi,
 ba santaane ñu màbb tatay Kanaan.
¹² Nee yeen waa Sidon ñi mel ni janq bu
 ñu tédde,
 dootuleen xaxaloo.
 Ayca, dawleen jàlli ba dunu Sippar,
 te du tax ngeen am fa noflaay.
¹³ Xool-leen li dal réewum Kaldeen ñi.
 Dootuñu sax aw xeet.
 Asiri wacce na leen rabi màndiñ mi.
 Tabax nañu, gaw ko, màbb kéri buur ya,
 gental ko.
¹⁴ Yeen boroom gaali Tarsis, yuuxuleen ni
 ñu deele,
 seen tata màbb na!
¹⁵ Bu keroogee ñu fàtte Tir juróom ñaar
 fukki at, ni appu benn buur. Bu juróom
 ñaar fukki at yi matee, Tir xewle la ñu
 woyal gànc ba, ne ko:
¹⁶ «Yaw gànc bi ñu wacc, fabal sa xalam,
 wër dèkk bi,
 xalamala xalam te gèna woy,
 ndax ñu geesu la.»

¹⁷ Bu juróom ñaar fukki at yi matee,
 Aji Sax ji dikkal Tir, ñu delluy liggéey, di
 feyu, di gànctook mboolem réewi àddina
 fi kaw suuf ¹⁸ Waaye seen ñaq ak seen
 peyoor, dees koy sellalal Aji Sax ji, deesu
 ko dajaleek a denc. Ñi dèkk fi kanam Aji
 Sax jeey jagoo njariñ la, mu di leen dundal
 ba ñu regg, di leen solal col gu jekk.

Waxyu ñeel na mujug jamono

24

(Saar 24—27)

Mbugal daj na àddina

¹ Aji Sax jaa ngii di tas àddina,
 tasaare ko,
 salfaañe li fi dénd bi,
 wasaare ñi ko dèkke:
² sarxalkat beek baadoolo bi,
 sang akub jaam,
 njaatige lu jigéen ak ab janqam,
 jaaykat ak jèndkat,
 ablekat ak àbbkat,
 leblekat ak lebkat.
³ Àddinaa ne dunñ dunñaaral,
 dees koo futti ba mu ne furaas!
 Aji Sax ji kat wax na kàddu gii!
⁴ Suuf a ngi wowa wow, ne seren,

àddina ne làcc, ne seren,
 kàngami xeeti àddina ne làcc.
⁵ Suuf si la ñi ko dèkke sobeel,
 ñoo wàcc yoon yi,
 xètt ndigal,
 fecci kóllère gi sax dàkk.
⁶ Moo tax alkànde yàq suuf,
 ñi ko dèkke gàddu àq ji.
 Moo tax waa àddina raaf,
 ba ñi des di lu nées.
⁷ Biiñ ñàkk na,
 garabu reseñ lax,
 bépp xol bu tooyoon, binni.
⁸ Tabala ju xumb selaw na,
 ña daa xaxaloo dal,
 mbégtém buumi xalam dakk.
⁹ Kenn naanatul, di woy,
 ñoll wex na ka koy naan.
¹⁰ Dèkk bu gental tasaaroo na,
 kër yépp tēja, kenn duggul.
¹¹ Mbedd maa ngi soowaloo,
 ndax biiñ bu ñàkk,
 gépp mbégte fey,
 banneeXu àddina dèddu.
¹² Tojiti neen a des ci dèkk bi,
 bunt ba rajaxoo.
¹³ Noonu lay deme ci àddina,
 ci biir xeet yi,
 mbete benn-benni doomi oliw gu ñu
 gésèm,
 mbaa doomi reseñ yu des ca ndey ja,
 gannaaw bu ñu wittee ba sottal.

Ndes wi rëcc mbugal a ngi sant

¹⁴ Ña ngay xaacu di sarxolle,
 waa sowu di sàbbaal ci mággu Aji Sax ji.
¹⁵ Yeen waa penku, sargal-leen Aji Sax ji
 boog,
 yeen waa duni géej, teral-leen Aji Sax ji
 Yállay Israyil.
¹⁶ Cati àddina lay woy di jibe, nu dégg ñu
 naa:
 «Teddnga ñeel na Aji Jub ji!»

Coono jeexul

Waaye man dama ne: «Jeexle naa!
 Jeexle naa, wóoy man!
 Workat yaa ngi wora wor,
 ba far làggi ci wor.»
¹⁷ Yeen waa àddina,
 kat-kat, pax akub caax dègmal na leen.
¹⁸ Nga déggi yuux, daw,
 tàbbi biir pax,
 génne pax,
 laawoob caax.
 Mbàndi kaw kat ubbi na,
 kenug àddina di reng-rengi.
¹⁹ Suuf daa loroo loru,
 fetta fett,
 salfaañoo salfaañu.
²⁰ Suuf a ngi janga jang ni màndikat,
 ba joy ni mbaar,
 moyam diis ko gann,

mu daanu te du jógati.

Aji Sax jee y nguuru fa Siyon

²¹ Bu bésuub keroogee

Aji Sax ji dikke mbugal

gàngoor ya fa kawa kaw,
ak buuri áddina yi fi suuf.

²² Dees leen di boole denc cim pax,
ne leen ràpp těj,

ba mu am ay fani fan, ñu mbugal leen.

²³ Kersa la weer wiy am,

gàcce ñeel jant bi;

Aji Sax ji Boroom gàngoor yi daal,
mooy nguuru Yerusalem, kaw tundu
Siyon,

leeram ga jollée fa kanam magi ñoñam.

25

Cant jib na

¹ Aji Sax ji, yaay sama Yàlla,
dama lay teral, di la sant.

Yaa defñ jaloore,

muy dogal yu yàgg, wér te wóor.

² Yaa def dëkk bi jali doj,

dëkk biñ ñu dàbbli nga gental;

taaxu doxandéem yi noppee doon péey ba
fàww,

te deesu ko tabaxaat.

³ Moo tax xeet wu am doole di la màggal,
waa péeyu xeet yu néeg di la wormaal.

⁴ Yaa di rawtub néew-ji-doole,

di rawtub aji ñàkk, biir njàqare,

yaay mbaar mu ñuy yiroom waame,

di ker gu ñuy serloo ci tàngoor,

nde merum kilifa gu néeg

mooy waame wu ne yureet ci kaw miir.

⁵ Doxandéem yii diy noon,

ni ngay dàqe tàngoor fi bérab bu ne seren,

ni ngay dakkale seen coowal xare.

Ni aw tàngoor di dakke ndax aw niir,

ni la woyu ñu néeg ñi di selawe.

Bernde ñeel na xeet yépp

⁶ Aji Sax ji Boroom gàngoor yi,
mooy berndeel xeet yépp fi kaw tund wii,

bernde ju niin ak ngéneelu biññ,

yàpp wa duuf, yuq ja ne xéew,

ak tànnéefu biññ bu teey.

⁷ Fi kaw tund wii lay tukkile càngaay,

li sàng askanoo askan,

ak séru rabal bi ñu ràbbal xeetoo xeet.

⁸ Mooy mëdd ndee ba fàww!

Boroom bi, Aji Sax jee y fomme

gépp kanam rongooñi boroom.

Buumi gâcey ñoñam it,

moo koy doge fépp ci áddina.

Aji Sax ji kat wax na ko.

⁹ Bésuub keroog dees na ne:

«Sunu Yàllaa ngii nag!

Moom mii lanu yaakaaroon

te moo nuy wallu.

Aji Sax jii lanu yaakaaroon,
nan bég te bânneexoo wallam.»

Aji Sax ji tas na Mowab

¹⁰ Aji Sax ji kat teg na tund wii loxo,
te ni ñuy dëggaatee boobum leeñ,
ni lees fiy dëggaatee Mowab.

¹¹ Mowab dina féqoo féqu,

mel ni kuy jéema féey,

waaye Aji Sax jee leen di torxal,

ñook seen manoore.

¹² Seen tata yu kawe, mu fél, màbb;

rattax fi suuf, maasale.

26

Aji Sax jee y may ñoñam ndam

¹ Bésuub keroog dees na woy

wii woy fi réewum Yuda:

«Dëkk bu dëgër lanu am,

Yàllaa nu may kaarangey tata, biir ak biti!

² Ubbileen bunt yi,

ba xeet wi jub te sàmm ngëm duggsi!

³ Yaw Aji Sax ji,

ku dogu, pastéefu, wóolu la,

nga may ko jàmm ju mat,

nde moo la wóolu.

⁴ Wóoluleen Aji Sax ji tey ak èllëg;

Yàlla Aji Sax ji déy,

moo mat céslaay ba fàww.

⁵ Moo wacce ñi dëkke woon fa kaw,

moo detteel waa dëkk ba aju woon,

daaneel leen, ñu xalangu,

ba mēq suuf,

⁶ baadoola joggi, dëggaate,

néew-ji-doole note leen.»

⁷ Ku dëggu, yoonam day maase;

ku dëggu, Aji Jub ji jubal xàllam.

⁸ Aji Sax ji, nu ngi lay xaar,

fi sa kaw yoonu santaane yi,

di la sàkku, ba la xel,

lii déy, mooy sunu nammeelu xol.

⁹ Xol laa lay sàkkoo guddi,

sama jëmm jépp di la laaj.

Bu say àtte teewee fi kaw suuf,

waa áddina xame ca njekk.

¹⁰ Ku bon, boo ko yërèmee,

du xam njekk.

Biir réew mu nit ñay jubal

lay xal di luubale,

du faale kawewaayu Aji Sax ji.

¹¹ Aji Sax ji, yaa xàcci sa loxo,

waaye yéguñu ko.

Won leen ni nga nabe ci sa ñoñ, ñu rus,

te sawaraay xoyom sa noon yooyu.

¹² Aji Sax ji, yaa nuy defal jàmm,

te lépp lu nu def, yaa nu ko sottalal.

¹³ Aji Sax ji sunu Yàlla,

yeneen sang yu la moy moom nañu nu,

waaye saw tur rekk lanuy màggal.

¹⁴ Yooyu sang dee nañu, nekkatuñu,

wuute nañu, jógatuñu.

Yaa def nii, faagaagal leen,
ba far sax seen tur.

¹⁵ Aji Sax ji, yaa yokk xeet wi,
yaw mii yaa yokk xeet wi,
yaa fésal sa teddnaga,
yaa yokk mboolem kemi réew mi!

¹⁶ Éy Aji Sax ji, ci biir njàqare lañu la
sàkkoo;

ba ñu tegoo sa mbugal,
lañu la déey seenug ñaam.

¹⁷ Éy Aji Sax ji, ni kuy matu
lanu meloon fi sa kanam,
di wañaarook a yuuxu.

¹⁸ Danoo èmb bay matu
te jurunu lu moy ngelaw.
Indiwunu genn mucc ci àddina,
mayunu ci kenn lu ko taxa dund.

¹⁹ Waaye yaw askan wi, ñi nga deele
ñooy dellu dundaat,
seeni néew ay dekki,
ku doon nelaw sa biir bàmmeeel,
yewwu, sarxolle.
Aji Sax jeey yebal lay bu ànd aki leer,
suuf délloosi ña dèddu.

Mbugal ñeel na géej ak jéeri

²⁰ Yeen samaw askan, ayca duggleen seeni
néeg,

tēju ca biir.
Làquleen as lëf, ba sànj mi jàll.

²¹ Aji Sax ji kat a ngii di génne bérabam
ba,

nara dikke waa àddina mbugalu
ñaawtéef,

ba suuf wone deret ji ñu tuur fi kawam,
te dootu sàng ñi ñu bóom.

27

¹ Bésub keroog Aji Sax ji dikke saamaram
bu jambaare, ñàng te réy,
ba dal ci kaw Lewiyatan, jaan ja ca xél wa,
Lewiyatan jaan jay wañaaruy dem,
ninki-nànkay géej jooju lay rey.

Aji Sax ji juboo naak ñoñam

² Bésub keroog, tóokèru reseñ ju neex am,
nangeen ko woy,

³ te man Aji Sax ji maa koy topptoo,
di ko suuxat saa su ne,
di ko wattu guddeek bëccëg,
bala koo kenn a song.

⁴ Mereetuma tóokër bii,
waaye lu ciy dég aki dagg,
ma dox wuti ko, xareek moom,
boole lépp xoyom.

⁵ Xanaa ku langaamoo sama kiiraay
te jàmmook man,
ba jàmmook man.

* **28:1** 28.1 Efrayim mooy giir gu am solo ci fukki giir ya ca nguurug bëj-gànaar ga ñuy wax Israyil. Leeleeg muy tur wi ñuy wooye waa gox boobu. † **28:1** 28.1 coll mooy fa Samari nekk, di péeyub nguurug bëj-gànaar ga ñuy wax Israyil.

⁶ Ay bés a ngi ñëw Yanqóoba saxi reen,
Israyil moomooy tóor, law,
ba feesal dëndu àddinaak meññeef.

⁷ Defe ngeen ne Aji Sax ji duma na Israyil,
na mu dumaa ña leen duma woon?
Am bóomal na leen lu tollook

la seeni bóomkat bóomoon?

⁸ Ndànk-ndànk la jëflanteek ñoom,
ba mu leen toxalee,
dàqe leen noowam gu mag,
bésu ngelawal penku.

⁹ Nii la Yanqóoba jotoo ñaawtéefam,
nii la mujje am njéggalu bàkkaarom:
Day boole doji sarxalukaay bi yépp,
rajaxe ni doji kew,
xer wu ñuy jaamoo Asera dootu fa sampe,
mbaa sarxalukaayi suurukaay.

¹⁰ Dëkk bu ñu dàbbli mooy wéet,
gental, ne wëyën!

Fa la nag di fore,
fa lay goor, di lekk cari garab ya,
¹¹ car ya wow, damm,
jigéen ñi dikk, xambe.

Dañu di xeet wu dul dégg,
ba tax ki leen sàkk yèrmu leen,
moo leen bind te ñeewantewu leen.

¹² Bésub keroog Aji Sax ji bàcc,
dale ca dexu Efraat ba ca walum Misra,
te yeen bànni Israyil, dees na leen for
kenn-kenn, ba ngeen daj.

¹³ Bésub keroog liit gu mag jib,
ña lañoon réewum Asiri délsi,
ànd ak ña ñu tasaare woon biir réewum
Misra,

ba sujjóotalsi Aji Sax ji fa Yerusalem,
fa kaw tund wu sell wa.

Xibaaru mbugal ñeel na ay xeet

28

(Saar 28—33)

Mbugal ñeel na Samari

¹ Wóoy ngalla Efrayim*,
kaala gu yànj ga ay màndikatam di sago!
Taaram bu yéeme baa koy réer,
ni tóor-tóor yu wow,

te ma nga toñ ca coll†, wa ña biiñ man
dëkke,

fa tiim xur wu nangu wa.

² Dégluleen, jambaar ju am doolee ngi
dikkal Boroom bi,

di tawub doji yuur, ngèlén luy sàнке,
riddee riddi, sotti waame wu wale!
Loxoom la koy rattaxe fi suuf.

³ Dees na joggati kaala
gii màndikati Efrayim di sago.

4 Te tóor mu lax mi muy gànjaroo,
mu tege ca coll ya tiim xur wu nangu wa,
day mel ni figg ju ñor te jotul;
ka ko gis a koy gaaw witt, wonn.

5 Bésub keroog Aji Sax ji Boroom gàngoor
yi

di kaala gu yànj, gànjar gu yéeme,
ñeel ndesu ñoñam,

6 mooy sol noowug dëgg kuy toog di àtte,
di jambaaral ñiy waññi noon yi song dëkk
bi, xare.

7 Ñii itam ay naan biiñ bay tërëf,
màndiw ñoll, di jang:

sarxalkat akub yonent la aw ñoll di
tërëfloo,

biiñ jànnaxe leen,

ñu màndiw ñoll, di jang,
bu ñu amee am peeñu, di tërëf.

8 Seen taabal yépp a ngi taq ripp,
fépp di waccu ak mbalit.

9 Nu naa: «Ana ku Esayi mii di jàngal?

Ana ku muy àgge xibaar?

Xanaa ku yàggula fer,
di doora bàyyi ween?

10 Ca rèdd wii, ca rèdd wee,
nàngam sii, nàngam see,
as tuut fii, as tuut fee.»

11 Xanaa boog nit ñu seen wax leerul,
ñu diy làkk-kat,

la Aji Sax jiy waxeek askan wii?

12 Moo leen waxoon ne leen:

«Fii moo di nopplukaay bi,
noppal-leen ku soon.
Fii a di dal-lukaay bi!»

Waaye nanguwuñoo dëgg.

13 Moo tax seen kàddug Aji Sax mujj di:

«Ca rèdd wii, ca rèdd wee,
nàngam sii, nàngam see,
as tuut fii, as tuut fee.»

Moo tax ñuy tërëf,
daanoon njaaxaanaay ba damm,
di sërëx ak a keppu.

Doju doorukaay wee mat wéeruwaay

14 Kon nag yeen kókkalikat yi yilif
askanu Yerusalem wii,

dégluleen kàddug Aji Sax ji!

15 Yeena naay: «Danoo wóllëranteek ndee,
njaniiw lanu digool, ba du nu moom,
ba bu yaru musiba dikkeek diisaayam, du
nu laal?

Noo def ay fen sunu rawtu,
ay wor di sunu làquwaay.»

16 Moo tax Boroom bi Aji Sax ji wax ne:

«Maa ngii di déj fi Siyon aw doju coll,
muy doju collu tànnéef wu gànjare ngir
kenu gi,

te ku ko wéeroo doo gaawa daw.

17 Dëgg laay def nattukaay,
njekk di sama buumu beteex,
tawub doji yuur buub rawtub fen,
wal ma mëdd làquwaay,

18 seen wóllëranteek ndee neen,
seen digook njaniiw toxu,
yaru musiba dikk ak diisaayam,
wulli leen ba ngeen nooy.

19 Saa yu dikkee ne leen céex,
suba su ne mu ne jaas,
guddeek bëccëg, mu teew,
te bu jibee sax fit rëcc.»

20 Lal a gàtt ba deesu ci tàlli,

malaan cëkk ba matul càngaay†.

21 Aji Sax jeey jóg na woon
fa tundu Perasim,

xadaru na woon ca xuru Gabawon
ngir jëf jëfam,

jëfam ju yéeme ja!

Moo nara liggéey liggéeyam booba,
liggéeyam bu tumuránke ba!

22 Tee ngeena baña kókkalee

bala ñoo teenjal seeni jéng?
Sànkute kat moo di dogal bi ma dëgg,

mu bawoo fa Boroom bi, Aji Sax ji ci
gàngoor yi,

di luy dikkal réew mi mépp.

Aji Sax jee xam doxalin

23 Teeyluleen te déglu sama kàddu,
teewluleen ba dëgg samay wax.

24 Xool-leen ci lii: Ndax beykat bi day
dëkke gabb,

di rèdd ak a gabbat?

25 Bu gabbée ba toolam maase,

du day sànni jiwum nisel§,

wasare jiwum kumin,

daldi def bele bi ay saawo,

sànni lors ba fa mu ko rèddal,

doora suy bele bu dègër ba ca wet ya?

26 Dees koo xamal yoon wa,
te Yàllaam a ko ko jàngal.

27 Mbàccum nisel watiir amu ca yoon,

te deesul bàcc kumin itam, ba joggi ca
tànki watiir.

Mbàccum nisel, yet a koy def;

mbàccum kumin, bant bu yem.

28 Gubi bele, dees na ca jaare watiir,

waaye deesu ci dëkk;

watiir ngay takk, bàcce ko pepp,

waaye doo ko bàcc ba mu far mokk!

29 Xel moomu it fa Aji Sax ji

Boroom gàngoor yi la bawoo.

Ndigalam a ni yéemee,

pexeem màgge ni!

29

Mbugal ñeel na Aryel

† 28:20 28.20 lal beek malaan mi ñuy wax fii, mooy misaal Misra mi ñu yaakaaroon te du leen doy kiiraay. § 28:25

28.25 nisel ak kumin ay xeeti safal la. * 29:1 29.1 Tur la wu ñuy wooye Yerusalem. Man naa tekki itam taalub sarxalukaay ba woon ca kër Yàlla ga.

¹ Wóoy ngalla Aryelee, Aryel*,
dëkk ba Daawuda dale.
Dundleen at ak at,
amal-leen ci màggal ci kaw màggal.

² Du tee ma wàcceel Aryel musiba,
ñuy yuuxook a jooyoo.
Yerusalem ay mel ci man

ni Aryel, taalub sarxalukaay.

³ Maay dal ub dal, wër la,
gawe la ay tata,
jali jal, fuuge la.

⁴ Dinga suufe ba mel ni kuy àddoo biir
suuf,

sa baat di ndéey lu dégtoo xóote ya
pëndub suuf lale,
mel ni njuuma lu waxam bawoo biir suuf,
baatam yeloo xóote ya pëndub suuf lale.

⁵ Say noon ay def gàngoor ni feppi suuf,
di naaxu nit ñu néeg, ñu ngelaw liy wal
nib cox.

Loolooy jekki am, ca saa sa.

⁶ Aji Sax ji Boroom gàngoori xare yi moo
lay dikke

dénook suuf su yëngu ak riir mu réy,
ngelaw riddi, di ngélén,
ànd ak sawara wuy xoyome.

⁷ Mboolem xeet yu bare yiy xareek Aryel,
di song dëkk beeki tataam,
nar leena torxal,

ñoom ñépp ay mel ni gént mbaa njeneeru
guddi!

⁸ Su boobaa mu mel ni ku xiif,
géntul lu moy di lekk,
yewwu rekk, biir ba wéet;
mbaa ku mar, géntul lu moy di naan,
yewwu rekk, loof, put ga wow korŋ.
Noon la gàngooru xeet yépp di nekke,
mboolem xeet yooyu xaareji fa Siyon!

⁹ Tendeefal, jommi rekk!
Gëmm, gumba rekk.

Ñiika màndi te du biiñ,
ñuy jang te duw ñoll!

¹⁰ Aji Sax ji déy yeen la wal
ngelawal nelaw yu xóot,
taf seeni gët, te ngeen di yonent yi;
muur seeni bopp te ngeen di boroom
peeñu yi.

¹¹ Peeñum xew-xew yii yépp ump na leen,
ni leen kàdduy téere bu ñu tay umpe.

Boo ko joxee ku jàng, ne ko mu jàng ko,
mu ne la manu ko, nde dees koo tay;
¹² nga jox ko ku jàngul, ne ko mu jàng,
mu ne la manula jàng.

¹³ Boroom bi nee: «Askan wii, lammañ
lañu ma jegee,
lori neen lañu may wormaale,
te seen xol sore ma.
Seen ragal ak man it,
njàngum tari kepp la.

¹⁴ Moo tax maa ngii di dellu wéyeek askan
wii,
ay kéemtaan aki kiraama
yuy tiin boroom xel ak xelam,
réer xamkat ak xam-xamam.»

¹⁵ Wóoy ngalla ñiy làqu Aji Sax ji,
di loqal seen mébét,
ba lëndëm muur seen jéf,
ñu naan: «Ana ku nu gis?
Ana ku nu yég?»

¹⁶ Yeenaka juunum xel!
Dees na jaawale tabaxkatu njaq beek ban
bi?

Ndax li ñu sàkk dina ne ki ko sàkk:
«Kii sàkku ma?»

Am njaq leey waxtaane tabaxkat bi naa:
«Kii manula tabax?»

La woon day wonni

¹⁷ Xamuleen ne fi leek lu néewa néew,
àllub Liban sopplikub tóokër,
tóokër bi walbatiku meññ, ba ñu ne ab
gott la?

¹⁸ Su bés baa ab tēx dégg kàdduy téere,
silmaxa tàggook lëndëm, di gis,

¹⁹ néew-doole yi dellu bége Aji Sax ji,
ñi gëna ñàkk di bannexoo Aji Sell ju
Israyil.

²⁰ Ku néeg déy dina neen,
kuy ñaawle sànkū,
te képp kuy yeeru nu mu defe lu bon,
dees na la dagg.

²¹ Mooy ñiy tuumaal nit,
di fiir ab àttekat ca pénc ma,
di àtte ñàkkal nit ku jub ci dara.

²² Moo tax Aji Sax, ji jotoon Ibraayma,
wax ak waa kër Yanqóoba, ne leen:
«Léegi Yanqóoba du rusati,
du amati yaraanga.»

²³ Bu am meññeefam gisee
li sama loxo def fi seen biir,
dinañu sellal sama tur,
sellal ma, man Aji Sell ju Yanqóoba.

Dinañu ma wormaal, man Yállay Israyil,
²⁴ ba ñi réeroon, mujj xam;
ñurumtukat yi dégg ndigal.

30

Misra du mat Israyil cēsllaay

¹ Wóoy ngalla doom yii diy fippukat!
Kàddug Aji Sax jee.

Ñu ngi nas mébét yu ma diglewul,
di digoo digoo yu ma leen xelalul,
di tegle bàkkaar ci kaw bàkkaar.

² Noo dox wuti Misra te lajuñu ma,
xanaa di sàkku rawtub Firawna,
di keppaaroo keppaarug Misra*.

³ Rawtub Firawnaay mujj di seen gâce,

* 30:2 30.2 Misra lañu yaakaaroon mu aar leen ci Asiri.

† 30:4 30.4 Cowan ak Anes ci Misra lañu bokk.

keppaarug Misra di seen toroxte.

⁴ Seeni jawriñ a nga xaat ba Cowan, seeni ndaw ägg ba Anes†,

⁵ waaye ñoom ñépp kersa lañuy ame Misra,

googu leen dul amal njariñ.

Du ndimbal, du njariñ, xanaa gacceek toroxte.

⁶ Yéeneb waxyu bii ñeel na malay àllub Negew:

Réewum tiis laak njàqare, kërug gayndeeki segg, ak saamaan ak céebi, mbaam lañu sêf seen alal, jaare fa, giléem lañu sêf seeni denc, jême xeet wu leen dul jariñ.

⁷ Ndimbalu Misra, cóolóolu neen!

Moo tax ma tudde ko:

Raxab, ponkal mi ne yácc.

⁸ Aji Sax ji nee:

«Ayca, bind ko ci àlluwa, ñu gis!

Rédd ko cib téere,

ngir èllëg ak sibbir,

mu dib seede ba fàww.»

⁹ Wii xeet kat ay fippukat lañu,

yii doom a diy fen-kat

te nanguwuñoo sàmm yoonu Aji Sax ji!

¹⁰ Boroom ngis, ñu ne ko: «Bul gis,»

boroom peeñu, ñu ne ko: «Bu ñu firil peeñuy dégg.

Wax nu lu neex,

gisal nu ay nax.»

¹¹ Moyal yoon wi;

lajj, wàcc xàll wi,

te may nu jàmm ak Aji Sell ju Israyil.

¹² Moo tax Aji Sell ju Israyil wax ne:

«Gannaaw yeena xalab kàddu gii, yaakaaruleen lu moy doole ak pexey njubadi

yu ngeen wéeroo,

¹³ googu ñaawtéef ay mujj doon

seen xar-xaru tata ju kawé,

funki, tata ja jekki jóoru.

¹⁴ Da naan tassar ni njaqal xandeer

lu ñu naan rajax te ñéebuweesu ko,

ba deesul gis ca tojit ya, dog bu tibb xal,

mbaa mu as ndoxum déeg.»

¹⁵ Ndax Boroom bi Aji Sax ji,

Aji Sell ju Israyil dafa wax ne:

«Délsi, dal-lu moo leen di musal.

Ne tekk te wóolu maa leen di dooleel.

Waaye yeena buggul!

¹⁶ Yeena ne: “Déedéet, danuy war fas, daw!”

Dingeen daw moos!

Ngeen ne: “Daamar yu gaaw lanuy war.”

Ñi leen di dàq it di war daamar yu gaaw!

¹⁷ Junneey daw fu leen kenn gédde, juróom gédd, ngeen daw yeen ñépp,

ba ña des mel ni bantub raaya ci kaw tund, ne cundum ni raaya bu wéet ca coll wa.»

¹⁸ Aji Sax ji déy a leen namma baaxe, moo ko tax di jóg moos ngir yërëm leen, nde Aji Sax jeey Yállay njubte.

Ndokklee képp ku ko yaakaar!

¹⁹ Yeen waa Siyon, yeen waa Yerusalem, dootuleen jooy muk!

Bu ngeen jooyee, mu yërëm leen moos; bu leen di dégg, di leen nangul.

²⁰ Boroom bee leen di leel njàqare,

nàndal leen coono,

waaye moo leen di jàngal, dootu leen làqu; dingeen gis ki leen di jàngal,

²¹ di dégg kàddu guy jibe seen gannaaw,

naa leen: «Yoon waa ngii, jaareleen fi;»

bu ngeen awee ndijoor, mbaa càmmoñ.

²² Su boobaa ngeen sobeel seen jëmmi tuur yi ñu xoob xaalis;

ak wurus wu xoob seen tuur yi ñu móol,

ba boole lépp sànni ni sagar yu sobewu,

ne ko: «Sore nu!»

²³ Su boobaa Aji Sax ji tawal lu ngeen ji,

may leen pepp mu suuf meññ,

sakkan te nangu,

seen juri keroog di fore parlu yu yaa,

²⁴ Nag yeek mbaam yiy rijji sax,

di xontoo cox bu ñu xorom,

jóge ci mbàccum roq ak ngaska.

²⁵ Te tundoo tund wu kawé,

wu mag ak wu ndaw,

wali ndox a cay wale,

keroog bés ba deret di tuuroo tuuru,

tata ya jóoru.

²⁶ Weer day leer ni jant,

jant gënatee leer,

mel ni juróom yaari bëccëg,

bésub keroog ba Aji Sax jiy takk damm-

dammu ñoñam,

fajal leen góom yi ay dóoram sabab.

Aji Sax ji song na Asiri

²⁷ Aji Sax jaa ngii, jóge fu sore;

mer ma réy,

mu jógaale kàddug àrtu gu diis,

di waxe xadar ju mat sèkk,

baat ba mel ni sawara wuy xoyome,

²⁸ noo ga di wal mu baawaan,

tollu ci put;

mu nara segge xeet yi ab seggukaayu alkànde,

wewal xeet yi ag laab gu leen di réeral.

²⁹ Teewul, bokk yi, seen woy yay jib;

mel ni guddig màggal,

ànd ak mbégte ni kuy toxoro,

yéeg jëm kaw tundu Aji Sax ji,

céslaayal Israyil.

³⁰ Aji Sax jeey yékkati kàddoom gu màgg,

wone diisaayu loxoom,

ànd ak tangooru meram,

ak sawara wuy xoyome,

ak waameek ngélén, ak tawub doji yuur.

³¹ Káddug Aji Sax jeey jib,

Asiri tiit bay lox,

yetu Aji Sax ja dal,

³² te saa yu yet wa Aji Sax ji féetale Asiri dalee,

ngeen jibal am tegg aki xalam.

Aji Sax jeey xácci loxoom, xareek Asiri.

³³ Xambees na démb ab taal bu ñuy wax

Tofet[‡],

te buur ba lees ko waajalal;

dees koo xóotal, yaatal ko,

sawara way tàkk, matt ma ne gáññ,

noowal Aji Sax ji nar caa tàkke,

di sèl-séli ni walum tamarax.

31

Musiba ñeel na ku yaakaar Misra

¹ Wóoy ngalla ña wácci Misra, di wuti wall; di sukkandikoo ay fas,

tey yaakaari watiir ndax bare ga,

aki gawar ndax lim bu takku ba

te xooluñu ci Aji Sell ju Israyil,

sákkuwñu kooku di Aji Sax ji.

² Moona moom it xareñ na,

mane na safaan,

te du fommi digeem.

Kuy def lu bon, mu dal ci waa kèram;

kuy def lu ñaaw, mu song ay wallam.

³ Waa Misra, niti neen, duñu Yàlla;

seeni fas it, suuxu neen, duñu leneen.

Aji Sax jeey xácci loxoom,

kiy walloo mooy téréf,

ki ñuy wallu daanu,

ñoom ñépp bokk sàнку.

⁴ Aji Sax ji déy da maa wax ne ma:

«Gaynde gu mag ak gu ndaw, bu jàppee bay xiiru,

boo ko wooloon gàngooru sàmm it,

duñu soowaloo ba xébal ko,

duñu ñolñoli ba mu dellu gannaaw.

Noonu la Aji Sax ji Boroom gàngoor yiy wáce,

xaresi fi kaw tundu Siyoñ ak waa tund wa.»

⁵ Ni picc di daayaarlo, aar am tàggam,

ni la Aji Sax ji Boroom gàngoor yiy yüre Yerusalem.

Mooy aar, di xettli,

mooy musal, di yiwi.

⁶ Éy bokki Israyil, fippu ngeen Aji Sax ji ba sès, waaye walbatikuleen! ⁷ Bésub keroog ku ne sànni yállantuy xaaalisam, ak yállantuy wurusam yi mu sàkke woon loxoy bàkkaaram.

⁸ Asiri nag day daanu,

te saamaru nit du ko daaneel,

saamar bu doom aadama moomul a koy alag,

mu daw, won saamar gannaaw,

ay gone yu góoram dugg liggéeyu sañul-bañ.

⁹ Ñi ñu yaakaar dañuy tiit, ne wèqet,

seeni kilifa jàq, ba daw wacc raaya ba.

Káddug Aji Sax jee,

Boroom sawara wi ci Siyoñ,

Boroom taal bi ci Yerusalem!

32

Dëgg ay mujj

¹ Buur a ngii, njekk lay nguuroo,

jawriñ ñi it, yoon lañuy yilifee;

² ku ci nekk mel ni seelukaayu ngelaw,

di kiiraay ci ngélén,

mel ni wali ndox ci suuf su ne seren,

mbaa keppaaru doj wu mag ci àll bu mar.

³ Su boobaa gèti njàccaar yi dootuñu gëmm,

te noppi ñiy dégg dañuy teewlu,

⁴ ku yàkkamti di rañnee, ba mana xam,

làmmiñu ku dër gaawa wax lu leer.

⁵ Booba deesatul wooye ab dof, gor si,

te njublan dootu dégg «ku tedd ki.»

⁶ Ab dof, waxi dof lay wax,

xel ma di nas ñaawtéef,

mu nar jëf ju teddadi.

Lu ñaaw lay wax, jème ci Aji Sax ji,

di xiifal ku xiif,

di xañ ku mar lu mu naan.

⁷ Ab njublan, ay pexeem musiba la.

Njekkar lay nas,

ba bu néew-ji-doole sàkkoo dégg it,

mu fen ba lor ko.

⁸ Waaye gor si, ngor lay mébét,

te ngor lay wéye.

⁹ Yeen jigéen ñi dal xel,

taxawleen temm, déglu ma;

yeen janq ji féex,

teewluleen ma.

¹⁰ Yeen jigéen ñi dal xel,

fi leek at aki fan ngeen jàq;

witt mi du baax, ngóob du taxaw.

¹¹ Jigéen ñi dal xel, ragal-leen;

yeen ñi féex laa ne, tiitleen!

Futtikuleen, ba ne dunj;

gembooy saaku, ñaawloo.

¹² Fëggleen seen dënn,

jooy tooli bannex ya,

jooyleen reseñ ju nangu ja,

¹³ ak sama suufas bokk,

ya ay dég aki dagg nangu.

Jooyleen kay kër ya ca mbégte ma,

ak dëkk bu xumb ba.

¹⁴ Kër gu rafet sax, dees koy wacc,

dëkk baak riiram, dees koy dëddu;

tund ak tóoji doon ay xunti ba fàww,

mbaamu àll ne ca finaax, jur ga di ca fore,

¹⁵ ba keroog leeru xel sóobale nu fa kaw,

[‡] 30:33 30.33 Tofet mooy bérab ba ñu daan lakke ay gone yu ñu def sarax, ñeel tuur ma ñuy wax Moleg.

màndiŋ mi sopplikub tóokër,
 tóokër meññ, ba ñu ne ab gott la.
 16 Su boobaa yoon dëkke màndiŋ mi,
 njekk tooge tóokër bi.
 17 Su booba njekk ay jur jàmm,
 njekk ay dalal, di aare ba fàww,
 18 ba sama bokk yi dëkke sancub jàmm,
 ci dëkkuwaay yu wóor,
 dal-lukaay yu dal xel.
 19 Gott bi day daanu ci tawub doji yuur,
 dëkk bi detteelu ba ne dett.
 20 Waaye ndokklee yeen ñi tala ji fépp fuy
 ndox
 te saña afal nag ak mbaam.

33

Ña daan sàнке sàнку nañu
 1 Wóoy ngalla yaw bóomkat bi kenn
 bóomul,
 yaw workat bi kenn worul.
 Boo noppee bóome, ñu bóom la,
 te boo noppee wore, ñu wor la.
 2 Éy Aji Sax ji, ngalla baaxe nu;
 yaw lanu yaakaar!
 Xéyeel a dooleel wii xeet,
 wallu nu ci biir njàqare.
 3 Sam riir jib, xeet yi fëx;
 nga jóg, waaso yi fëlloo.
 4 Dees na sèxètoo sa alal sèxètoob soccet.
 Dees na ko sam ni njéeréer di sameel!
 5 Aji Sax jee kawe,
 moo dëkke fa kawa kaw,
 te mooy dajal fi Siyoŋ njekk ak yoon.
 6 Liy dalal seen jamono mooy
 koomu ndam; xel ak xam-xam,
 te ragal Aji Sax ji, loolooy seen alal.
 7 Xool-leen seen jàmbaar
 ñiy yuuxoo ci mbedd mi,
 ndawi jàmm yaa ngii,
 di jooyoo jooy yu metti.
 8 Yoon yaa ngi wéet,
 kenn jaareetul ci ñall wi!
 Kóllère fecciku na,
 xeebees na ay seede,
 te kenn faaletul doom aadama.
 9 Suuf a ngi maral, wow κοηη,
 gottub Liban am gâcece, lax,
 àllub Saron doon joor gu wow,
 garabi Basan ak Karmel yèngu, di ruus.
 10 Aji Sax ji nee: «Xaaral rekk ma jóg,
 xaaral rekk ma ne ñokket,
 xaaral rekk ma teewal samag kawe.
 11 Seeni mébét di boob,
 bu sottie dim ngoofi;
 seen noowug bopp mooy xamb sawara,
 wi leen di xoyom.
 12 Xeet yeey sàнку
 ni doj yu lakk ba doon kew,
 mbaa taxas yu ñu buub,

sànni ci sawara, mu tàkk.
 13 Yeen ñi sore, dégluleen li ma def;
 yeen ñi jege, xamleen ne maa am doole.»

14 Bàkkaarkati Siyoŋ tiit nañu,
 way-gémadi yaa ngay lox.
 Ana kan ci nun moo maña dal ak
 sawara suy xoyome*?
 Ana kan ci nun moo mana dal ak
 taal yu yànj ya dul fey?
 15 Xanaa kiy doxe njekk,
 di wax njub,
 bañ alalu foqati;
 loxo bay jalax ab ger,
 noppam di tanqamlu waxi bóome,
 bétam di gëmm, ba du gis lu bon.
 16 Ku ni mel, bérab bu kawe lay dëkke,
 doj yu ñu dàbbli di rawtoom,
 dundam doy,
 te ndoxam du ñàkk.

Yerusalem mucc na cib noon

17 Yaw mi mel nii, buur bi ci taar bi ngay
 teg bët;
 yaay gis réew mi ne màww.
 18 Sam xel dem ca sa tiitaange ja woon,
 nga ne: «Moo, ana ka doon waññ?
 Ana ka doon natt diisaayu galag?
 Ana ka doon waññiy tata?»
 19 Su boobaa dootoo gis xeet wii di jaay
 doole,
 xeet wii diisu lakk ba déggeesu ko,
 taqu lãmiin ba xameesul lu ñuy wax.
 20 Xoolal Siyoŋ, dëkk ba nuy mágale;
 yaay teg bët Yerusalem, dëkkuwaay bu dal
 ba,
 xayma bu deesul sempi,
 wewukaay ya deesu ko buddi muk,
 te luy buumu xayma ya it, deesu ko dog.
 21 Foofa déy la nu Aji Sax ju mágg ji
 di nekkal bérab bu defi dex aki wal,
 fu gaalu jooow dul dawé,
 te gaal gu mag du fa jaare,
 22 Aji Sax jee nuy jiite,
 Aji Sax jee nuy dogalal yoon.
 Aji Sax jee sunu buur!
 Moom moo nuy wallu.
 23 Yeen nag seen réew mi gaal la,
 gu goj ya yolom,
 ponk ba ca digg ba di yèngu,
 ba ndimol gaal gi firikuwul.
 Dees na séddoo lél ju ne gãññ,
 ba làggi ya sax séddu ca.
 24 Du kenn ci waa Yerusalem,
 ku neeti wopp na.
 Waa dëkk bépp ay am njéggalu bàkkaar.

Gannaaw mbugal, mbégte

34

(Saar 34—35)

* 33:14 33.14 sawara: seetal ci 30.27 ak 31.9.

Mbugal ñeel na Edom

- 1 Yeen xeet yi, jegesileen te déglu;
yeen askan yi, teewluleen!
Na suuf ak li ci biiram déglu,
muy àddinaak lépp lu mu jur.
- 2 Merum Aji Sax ji ñeel na xeetoo xeet,
am sànj ñeel gàngoori xeet yi.
Aji Sax ji faagaagal leen,
dogal ñu war leena rendi.
- 3 Seeni néew lees di xalab,
ñu médd, xet ga gilli,
seen deret la tund yiy sangoo.
- 4 Gàngooru asamaan gépp ay tasaaroo,
asamaan taxañe ni lémésub kayit,
gàngooram gépp ruus
ni xobu reseñ mbaa figg gu lax.
- 5 Aji Sax ji nee: «Saab saamar a reye fa
asamaan
ba màndi deret,
te mu ngii di waccal Edom,
xeet wi may faagaagal, ngir àttee leen ko.»
- 6 Aji Sax jee yor saamar bu màndi deret,
yafloo nebbon,
ak deretu kuuy mu ndaw ak bëy,
ak nebbonu dëmbéenu kuuy.
Aji Sax ji kat moo am ab sarax fa Boccra,
muy tër mu réy fa réewum Edom.
- 7 Nagi àll yaay ànd ak ñoom daanu,
ñook yëkk yu ndaw yaak yu mag ya,
seen réew mi màndi deret,
suuf sa niin batt ak nebbon.
- 8 Bésub feyu la, Aji Sax ji di ca feyoo;
mooy at mi Edom di yooloo la mu lóroon
Siyonj.
- 9 Wali Edom di ca soppliku koltaar,
pëndub suufam doon tamarax,
suufam mel ni koltaar buy lakk,
- 10 guddeek bëccëg, du fey,
saxar sa day gilli ba fàww,
réew ma gental giiru jamono,
te deesatu fa jaare muk.
- 11 Céeleek siññeel a koy nangu,
looy ak baaxoñ dëkke fa.
Buumu beteex lees koy natte, maasale,
ba mu ne maraas, ne wëyëj.
- 12 Garmi ya dootuñu fa teewe,
ba di fa samp nguur,
te seen kàngam yépp ay wuute.
- 13 Seen kër buur ya la dég ya di lawe,
gajj aki taxas saxe tata ya,
till dëkke,
bànjóoli tàgge,
- 14 rabi màndiñ mi di fa dajeeki bukki,
bëyu àll di fa wooye moroom ma.
Fa la rabu guddi di dal-loo,
fàkkal fa boppam ab dal.
- 15 Fa la luy nen di tàgge, nen fa,
bóof, ba tostan, yiire keppaaram;
tan ya bokk fa daje,
ku ci nekk ak moroom ma.
- 16 Seet ko ci téereb Aji Sax ji, jàng ko;

du menn mala muy wuute ca gent ba,
lu ci nekk a fay ànd ak moroom ma.
Aji Sax jee ko santaane ci gémmiñam,
moo leen di dajale, moom ci boppam.

17 Moom moo leen ko muurale,
sédd leen suuf sa ci loxoom,
ñu séddoo ko ba fàww,
màkkaanoo ko maasoo maas.

35*Yoonu ñibbi Siyonj taxaw na*

- 1 Màndiñ ak suuf su ne seren dina bég,
joor gu wow bannexu, tóor ba ne raññ.
- 2 Day tóora tóor,
di bannexu, bay sarxolle,
ba jagoo darajay gottub Liban
ak taaru àllub Karmel ak Saron.
Foofa lees di gise darajay Aji Sax ji,
sunu taaru Yàlla.
- 3 Ku yoqi, dooleel-leen ko,
ku óom yay fenqe, jappleleen ko.
- 4 Ku fitam récc, ne leen ko:
«Dégèrlul te bul tiit.
Sa Yàllaa ngii di la feyul,
ba yool say noon.
Moom mooy dikk, wallusi la.»
- 5 Su boobaa gëti silmaxa muriku,
noppi tëx sikkliku.
- 6 Su boobaa ab làggi ne jàyy ni kéwél,
ab luu sarxolle.
Am ndox ay fettaxe màndiñ ma,
ay wal wale joor gu wow,
7 suuf su wow doon ub déeg,
joor gu maral ballal bëti ndox.
Fa till fàkkoon, di fa goore,
gattax ak barax a fay sëqe.
- 8 Foofa law yoon di jaare,
ñu di ko wooye Yoon wu sell wi.
Ku sobewu du fa jaare,
ñi moom woowu yoon,
ñooy ñi koy topp.
Ab dof sax du fa lajje.
- 9 Gaynde du fa am,
rab wu aay du fa dox,
du lenn lees fay gis,
ku ñu jot rekk a fay jaare.
- 10 Ñi Aji Sax ji xettleeey dëlsi,
duggsi Siyonj, di sarxolle,
kaalawoo bannex bu sax.
Mbég ak bannex a leen di dab,
naqar aku tiis dëddu leen.

Lu jëm ci Buur Esekiya**36***(Saar 36—39)**Asiri song na Yuda*

- 1 Gannaaw gi, ca fukk ak ñeenteelu
atu nguurug Esekiya buurub Yuda, ca
la Senakerib buurub Asiri dikk song
mboolem dëkki Yuda ya tata wër, daldi

leen nangu. ² Buurub Asiri moo yebale fa dëkk ba ñuy wax Lakis, bëkk-néegam Rabsake, mu ànd ak mbooloo mu réy, ba ca Buur Esekiya ca Yerusalem. Ba Rabsake agsee ba tollook solomu mbàndum kaw ma, feggook yoon wa jëm ca toolub fòotukaaya ba, fa la taxaw. ³ Ba loolu amee bootalub buur Elyakim doomu Ilkiya moo ànd ak Sebna, bindkat ba, ak doomu Asaf, Yowa ma yor téere ya, ñu dikk dajeeq moom. ⁴ Rabsake bëkk-néegu buurub Asiri ne leen: «Waxleen nag Esekiya ne ko: Buur bu mag ba, buurub Asiri dafa wax ne: “Sa yaakaar jii nga yaakaar, ana foo ko teg? ⁵ Noon naa lammiiñ kese doy na pexeek njàmbaar cib xare? Ma ne: Ana kan nga yaakaar bay fippu ci sama kaw? ⁶ Misra daal, nga yaakaar, bantu barax bu tas boobu di sokk képp ku ko wéeroo! Firawna buuru Misra de, mooy boobu bant ci képp ku ko yaakaar. ⁷ Xanaa doo ma ne seen Yàlla Aji Sax ji ngeen yaakaar? Xanaa du moom nga toxal bérabi jaamookaayam yeek sarxalukaayam, ba noppi ne waa Yerusalem ak Yuda sarxalukaay boobu lañuy sujjóotal?” ⁸ Léegi daal, déggool rekk ak sama sang buurub Asiri, ma jox la ñaari junniy fas, ndegam am ngay gawaram! ⁹ Ana noo mana tēwe ki gēna tuut ci sama jawriñi sang? May wax ngay yaakaare Misra ay watiir aki fas. ¹⁰ Te sax, xanaa du Aji Sax ji laa àndal ba dalsi fi kaw réew mii, ngir tas ko? Aji Sax ji ci boppam moo ma ne: “Songal réew mii, tas ko!” ¹¹ Ba loolu amee Elyakim ak Sebna ak Yowa ñaan Rabsake, ne ko: «Ngalla, làkk nu arameen, dégg nanu ko. Bu nu wax ebré, mbooloo mi ci kaw tata ji di ci dégg.» ¹² Bëkk-néeg ba ne leen: «Ndax yeen ak seen sang doŋŋ la ma sama sang yóbbante kàddu yii? Ñi toog ci kaw tata ji dañu cee bokkul? Te ñu nara ànd ak yeen lekk seen jonkani bopp, naan seenum saw!» ¹³ Bëkk-néeg ba nag taxaw, xaacu ca kaw ci ebré ne: «Dégluleen kàdduy buur bu mag bi, buurub Asiri. ¹⁴ Buur dafa wax ne: “Bu leen Esekiya nax, ndax manu leena xettli. ¹⁵ Te bu leen Esekiya yaakaarloo Aji Sax ji, naan leen: ‘Aji Sax ji moo nuy xettli moos, te deesul teg dëkk bii ci loxol buurub Asiri!’ ¹⁶ Buleen déglu Esekiya. Buurub Asiri kat dafa wax ne: Jàmmooleen ak man te ngeen génn dëkk bi, dikk nangul ma. Su ngeen ko defee, ku nekk ci yeen mana lekk ak jàmm ci garabu reseñam, lekk ak jàmm ci figgam, di naan ndoxum teenam, ¹⁷ ba keroog may dikk, yóbbu leen réew mu mel ni seen réew mi, réewum pepp ak ndoxum reseñ, réewum mburu ak tooli reseñ. ¹⁸ Bu leen Esekiya sànk, naan leen: ‘Aji Sax ji moo nuy xettli.’ Ndax tuuri xeet yi mas nañoo xettli réewu

wenn xeet ci buurub Asiri? ¹⁹ Ana tuuri réew yii di Amat ak Arpàdd? Ana tuuri Sefarwayim? Ndax dañoo xettli Samari ci man? ²⁰ Tuuri réew yii yépp, ana mu ci xettli menn réew ak man, ba Aji Sax ji wara mana xettli, Yerusalem ak man?”»

²¹ Ñooña ne cell, tontuwuñu ko baat, ndax Buur moo leen santoon ne leen buñu ko tontu. ²² Ba loolu amee bootalub Buur, Elyakim doomu Ilkiya ak Sebna, bindkat ba, ak doomu Asaf, Yowa ma denc téere ya, ñoo dem ak seen yérey ñaawlu yu xottiku, ba ca Esekiya. Ñu daldi koy àgge kàddug bëkk-néeg ba.

37

¹ Naka la ko Buur Esekiya dégg, daldi xotti ay yéreem, sol saaku yu muy ñaawloo. Mu dem nag ca kër Aji Sax ji. ² Ba loolu amee mu yebal Elyakim bootalub Buur ak Sebna bindkat ba, ak ñay mag ca sarxalkat ya. Ñu sol saaku yu ñuy ñaawloo, daldi dem ca Yonent Yàlla Esayi doomu Amocc. ³ Ñu ne ko: «Esekiya dafa wax ne: “Bésuub tey bésuub njàqare la ak mbugal ak gacce. Mooy li ñuy wax naa: Doom a ngi ci buntub juddu, te dooley wasin réer! ⁴ Jombul nag sa Yàlla Aji Sax ji dégg kàdduy bëkk-néeg bi sangam buurub Asiri yebal, ngir mu kókkali Yàlla jiy dund. Te kon sa Yàlla Aji Sax ji mooy dogal mbugal mi war ci kàddu yooyu mu dégg. Yékkatil kàddug ñaan rekk, ngir ñi fi desagum.”»

⁵ Ba surgay Buur Esekiya àggee Esayi wax jooju leen seen sang wax, ⁶ Esayi da ne leen: «Waxleen seen sang ne ko: Aji Sax ji dafa wax ne: “Bul ragal kàddu yi nga dégg surgay buurub Asiri ñàkke ma ko kersa. ⁷ Maa ngii di ko sol xel mu ko gëmloo xibaar bu muy dégg, ba dellu réewam, ma fàdde ko ab saamar ca am réewam.”»

Asiri tooñati na Yuda

⁸ Gannaaw loolu Rabsake dégg ne buurub Asiri bàyyikoo na Lakis, bay xareek dëkk ba ñuy wax Libna. Mu walbatiku fekki ko foofa. ⁹ Booba buurub Asiri daa dégg ne Tiraka buurub Kusus moo leen di songsi. Ba mu ca déggee daa yebal ay ndaw ca Esekiya, ne leen: ¹⁰ «Waxleen Esekiya buurub Yuda ne ko: “Seen Yàlla ji ngeen yaakaar, bumu leen nax, naa leen deesul teg Yerusalem ci loxol buurub Asiri. ¹¹ Xanaa yaw ci sa bopp dégg nga li buuri Asiri def mbooloore réew yi, faagaagal leen? Yaw nag, yaa ciy mucc? ¹² Xeeet yi samay maam sànk, seeni tuur dañu leena musal, muy Gosan, di Karan, di Resef, di askanu Eden wa woon ca Telasar? ¹³ Ana buuri Amat ak Arpàdd ak Layir ak Sefarwayim ak Ena ak Iwa?”»

¹⁴ Ba Esekiya jëlee bataaxal ba ca loxol ndaw ya, jàng ko ba noppi, dafa dem ba ca kër Aji Sax ji. Mu daldi tàllal bataaxal ba fa kanam Aji Sax ji. ¹⁵ Esekiya ñaan Aji Sax ji, ne ko: ¹⁶ «Éy Aji Sax ji Boroom gàngoori xare yi, Yállay Israyil mi toog fi tiim serub yi. Yaw donj yaa di Yállay mboolem nguuri àddina. Yaw déy, yaa sàkk asamaan ak suuf. ¹⁷ Ngalla Aji Sax ji, dékkal sa nopp ba dégg; Aji Sax ji, xippil say gët ba gis, te dégg mboolem kàdduy Senakerib yi mu yóbbante, ngir ñàkke la ko kersa, yaw, Yàlla jiy dund! ¹⁸ Aylayéwén Aji Sax ji, buuri Asiree tas mboolem xeet yeek seeni réew, ¹⁹ te ñoo sànni yàlla ci sawara it, ndax yooyoo dul Yàlla, xanaa lu nit sàkke loxoom, bant ak doj, ba tax ñu sànk leen. ²⁰ Kon nag Aji Sax ji sunu Yàlla, wallu nook moom, ba mboolem nguuri àddina xam ne yaw donj yaa di Aji Sax ji.»

Yonent Yàlla Esayi yégle na jéllub Asiri

²¹ Ba mu ko defee Esayi doomu Amocc yónnee ca Esekiya ne ko: «Aji Sax ji, Yállay Israyil, mi nga ñaan ci mbirum Senakerib buurub Asiri, dafa wax ne: ²² Lii moo di kàddu gi Aji Sax ji wax ci moom:

Yaw, janq Siyoñ mu taaru da laa xeeb, di la ñaawal.

Yerusalem, dékk bu taaru booboo

lay wëcc bopp,

di la kekku sa gannaaw.

²³ Ana kooy kókkaleek a ñàkke kersa?

Moo kooy yékkatil kàddu?

Kooy xool gëti xeebeel?

Xanaa du Aji Sell ju Israyil ji?

²⁴ Yaa yebal say surga,

di kókkali Boroom bi, te naa:

«Sama watiir yi ne xas

laa ware kawtey tund yi,

jáll ba ca xolu Libañ.

Maa gor seedaram ya fa sut

ak tannéefi garabi sipparam:

maay akki ba ca collub kaw bu tundu

Libañ,

ak gottam bu naat ba nib tóokër.

²⁵ Maa gas ay teen, naan,

maa joggatee sama téstën, wali Misra

yépp,

ñjaisal ko.»

²⁶ Waaye xanaa déggoo ne bu yàgg laa dogal loolu?

Ca jant yu jëkk ya laa ko nasoon,

tey ma sottal ko,

ba nga mana def genti jali tojit, dékk yu tata wër.

²⁷ Waa dékk ya ne yàcc, jàq, torox,

mel ni gàncaxu àll mbaa ñax mu yees,

mbete caxum xadd

mbaa tool bu car jógagul.

²⁸ Waaye boo toogee, boo génnee,

boo duggee, xam naa,

boo xadaroo sama kaw it, xam naa.

²⁹ Yaa xadaru sama kaw,

ba sag reewande tàbbi sama nopp!

Maa lay takkal ag nos akug laab,

waññi la, nga dellu yoon wa nga dikke woon.

³⁰ Lii, def ko ci, mu dib takk.

Dees na lekk ren peppum saxayaay,

déwén it dees na lekk lu saxal boppam.

Waaye déwén-jéeg,

ngéen ji, goób,

jëmbat tóokëri reseñ, lekk ca meññeef ma.

³¹ Ndes wa des ca askanu Yuda

ñooy saxaat ay reen,

ba meññaat ay doom.

³² Yerusalem kay law ndes di génne,

aw ndes ay réecee tundu Siyoñ,

te Aji Sax ji Boroom gàngoor yi

mooy sottal loolu ci xéraangeem.

³³ Moo tax Aji Sax ji wax ci buurub Asiri ne:

«Du dugg ci dékk bii,

du fi soqig fitt,

du fi taxawe ab pakk,

du fi jal jal bu muy gawe!

³⁴ Yoon wa mu dikke lay delloo,

biib dékk, du fi dugg.

Kàddug Aji Sax jee!

³⁵ Maay aar dékk bii, musal ko

ngir man ci sama bopp,

ak Daawuda sama jaam bi.»

³⁶ Ba loolu amee malaakam Aji Sax ji dikk, fàdd ca dalub Asiri témeér

ak juróom ñett fuukk ak juróomi junni

(185 000). Ca èllëg sa ña mucce teela xëy,

yemuñu ci lu moy ñooña ñépp diy néew.

³⁷ Ba mu ko defee Senakerib buurub Asiri

daldi fabu, ñibbi. Mu toog nag ca Niniw.

³⁸ Gannaaw gi, ba muy sujjoót ca kër

tuuram ma ñuy wax Nisrog, Addraameleg

ak Sareser, doomam yu goor ñoo ko fa

fàdde saamar. Ñoom nag ñu daw làquji

réew ma ñuy wax Araraat. Ci kaw loolu

doomam Asaradon falu buur, wuutu ko.

38

Esekiyel wopp na ba jóg

¹ Jant yooyu Esekiya moo woppoon, bay

waaja dee. Yonent Yàlla Esayi doomu

Amocc dikk, ne ko: «Aji Sax ji dafa wax ne:

«Dénkaaneel sa mbiri kër, ndax dangay

dee, doo jóg!» ² Esekiya nag walbatiku,

jublook miir ba, ñaan ci Aji Sax ji. ³ Mu

ne: «Éy Aji Sax ji, ngalla bàyyil xel ni ma

àndeek yaw sama léppi xol, ci kóllère. Te

it li nga rafetu laa jéfe.» Mu jooy nag, jooy

yu metti.

⁴ Ci kaw loolu kàddug Aji Sax ji dikkal

Esayi, ne ko: ⁵ «Doxal ba ca Esekiya, nga

ne ko: Aji Sax ji sa Yállay maam Daawuda

dafa wax ne: “Dégg naa sag ñaan, gis naa say rongooñ. Maa ngii di yokk ci saw fan fukki at ak juróom. ⁶ Buurub Asiri ak dooleem, maa la ciy xettli, yaw ak dëkk bii, te maay aar dëkk bii.”

⁷ Lii nag ngay def ab takk bu bawoo ci Aji Sax ji, di firndeel ne Aji Sax ji dina def li mu wax: ⁸ Maa ngii di delloo ker gi gannaaw lu tollook fukki dëggastal, ya jant bi wàccoon ca kaw iskaleb Axas. Ci kaw loolu jant bi dellu gannaaw lu tollook fukki dëggastal ya mu jotoona wàcc.

⁹ Mbind mii nag Esekiya buurub Yuda moo ko bindoon, gannaaw ba mu téddee wopp, ba jóg:

¹⁰ Man de dama noon:

«Sama digg doole laay deme jaare bunti njaniiw, sama ndesu fan réer ma!»

¹¹ Ma noon: «Dootuma gisati* Aji Sax ji, duma gisati Aji Sax ji fi kërüg àddina.

Duma tegati doom aadama bët, dootu fii ci waa àddina.

¹² Sama dëkkuwaay lañu sempi, yóbbu fu sore,

mbete xaymab sàmm.

Sama àpp a taxañe, ni ndimo lu ab ràbb doge ca mbaam ma. Diggante bëccëg ak guddi, nga jekkli ma.

¹³ May xalaat, ba bët set;

Aji Sax jiy dammat samay yax ni gaynde, diggante bëccëg ak guddi, nga jekkli ma.

¹⁴ May ciib-ciibi ni wetwet mbaa ramatu, di binni nim xati, di séentu kaw ba saay gët giim.

Dama noon: Éy Boroom bi, loof naa, dimbali ma.»

¹⁵ Waaye lu may waxati?

Aji Sax jee ma wax, te moo jëf.

Kon, ma temp ndànk sama giiru dund ndax tiisu xol.

¹⁶ Boroom bi, ci sa kàddook sa jëf la nit di dunde

te ci laay noyee ba tey.

Yaa ma wéral, may ma, ma dund.

¹⁷ Ndeke sama tiisu xol wii, sama jàmm rekk a tax.

Sa cofeel a tax

nga sorele maak paxum sànkute.

Yaa sànni sa gannaaw sama bépp bàkkaar.

¹⁸ Njaniiw du la sant,

ndee du la gërëm,

te ku tàbbim pax yaakaaratul sa kóllère.

¹⁹ Kiy dund, kiy dund donj mooy ki la sant

ni man bésusb tey jii,

te baay mooy xamal doom sa kóllère.

²⁰ Aji Sax ji yaa may wallu, nu di la woy, ànd aki xalam,

sunu giiru dund,

fa sa biir kër, yaw Aji Sax ji.

²¹ Fekk na Esayi noon: «Indileen ab danku figg, ngeen jonj ko ci taabu Esekiya bi, kon dina dund.» ²² Ba Esekiya noon ko: «Ana lu di takk biy firndeel ne dinaa wér, ba dellooti kër Aji Sax ji?»

39

¹ Jant yooyu doomu Baladan, Merodag Baladan buuru Babilon moo yónnee Esekiya bataaxal ak yóbbal. Fekk na mu dëggoon ne Esekiya daa woppoon bay doora am tan. ² Esekiya am ca mbégte, daldi won ndaw ya, kërüg dencukaayam: xaaalis baak, wurus waak ndàbb jaak, diwu tànnéef gaak mboolem néegub gannaayam ya, ak mboolem lu nekkoon cay dencam. Amul lenn lu leen Esekiya wonul ci biir kërám, ak mboolem fu bokk ci kilifteefam. ³ Gannaaw loolu Yonent Yàlla Esayi dikk ne Buur Esekiya: «Lu la nit ñii wax ak fu ñu jóge sax ba fi yaw?» Esekiya ne: «Réew mu sore lañu bàyyikoo, dikk ba fi man, réewum Babilon.»

⁴ Mu ne ko: «Ana lu ñu gis sa biir kër?» Esekiya ne ko: «Mboolem lu nekk sama biir kër, gis nañu ko. Amul lenn lu ma leen wonul ci samay denc.» ⁵ Esayi ne Esekiya: «Déglul kàddug Aji Sax ji Boroom gàngoor yi: ⁶ «Ay jant a ngii di ñëw, dees na yóbbu Babilon lépp lu nekk sa biir kër, te say maam dencoon ko, ba tey jii. Du lenn luy des. Kàddug Aji Sax jee. ⁷ Te it ñenn ci sag njaboot, ñu soqikoo ci yaw, di ñoo meññ ci sa geño, dinañu leen jàpp, ñu doon jaam yu ñu tàpp ca biir kër buuru Babilon.» ⁸ Esekiya ne Esayi: «Kàddug Aji Sax ji nga jottli, jàmm la.» Booba ma nga naan: «Ndegam jàmm ju ne ñooy ay am sama giiru dund kay!»

Aji Sax jeey dàm্প xol yi

40

(Saar 40—66)

Xibaaru jàmm ñeel na Israyil

¹ Défal-leena défal sama ñoñ, la seen Yàlla wax!

² Waxleen lu dalal xelu Yerusalem, yéeneleen

ne leen seen xare jeex na, seen mbugal mat na.

Ñoo nangoo ci loxol Aji Sax ji lu fey ñaari yoon seen bépp bàkkaar.

³ Baat a ngi jib, naan:

«Xàll-leen yoonu Aji Sax ji ci màndin mi,

fàkkal-leen sunu Yàlla

* 38:11 38.11 gis Aji Sax ji mooy dem biir kër Aji Sax ji. Seetal ci aaya 22 ak *Sabóor* 27.4.

xàll wu jub fi joor gi.
⁴ Wépp xur lees di kaweel,
 tund wu magoo wu ndaw lees di suufeel;
 ba fu tunde mujj dig joor,
 fu ñagasoon maase,
⁵ darajay Aji Sax ji daldi feeñ,
 jaam ñépp bokk gis ko.
 Aji Sax jee ko wax ci lammañam.»
⁶ Baat a ngi naa: «Yéeneel!»
 Ma ne: «Lu may yéene?»
 Mu ne: «Neel:
 Bépp boroom suux am ñax doññ la;
 gépp ngoram mel ni tóor-tóoru àll.
⁷ Ñax ma wow,
 tóor-tóor ma lax
 fa ko noowal Aji Sax ji wale.
 Askan wi kay, am ñax doññ la.
⁸ Am ñax day wowal;
 tóor-tóor day lax.
 Waaye sunu kàddug Yàlla
 mooy sax ba fàww.»

⁹ Yaw Siyon, xibaarkatu jàmm bi,
 doxal yéegi tund wu kawe,
 te xaacook doole.
 Yaw Yerusalem, xibaarkatu jàmm bi,
 xaacul te bul ragal!
 Neel dèkki Yuda yi:
 «Seen Yàllaa ngi!
¹⁰ Boroom bi, Aji Sax jaa ngii,
 dikkaale doole
 ak kàttanu kilifteefam.
 Mu ngii ànd ak ñi mu yooloo,
 ñu dig peyam, dox jiitu ko.
¹¹ Mooy sàmm géttam bii ni kuy sàmm ug
 juram,
 boole mbote yi cib loxoom,
 taf cib dènnam, yóbbu;
 xar yiy nàmpal, mu wommat.»

¹² Ana ku natte géej biir loxoom?
 Ku xaymaa asamaan yaatuwaayu loxo?
 Ku mana fab suuf sépp, sol cib nattukaay?
 Ana ku natte ab màndaxekaay tund wu
 mag?
 Mbaa mu tam-tamal tund wu ndaw?
¹³ Ana ku mana xayma Aji Sax ji?
 Mbaa nga dib xejjam, ba di ko digal?
¹⁴ Ana ku mu diisool, ba kooka tegtal ko,
 jàngal ko yoonu njub,
 jàngal ko xam-xam,
 xamal ko yoonu dég-dég?
¹⁵ Xeet yaa ngii, mel ni aw toq ci biir
 bagaan,
 jàppeesu leen lu moy diisaayu feppu suuf!
 Dun yi lay yékkati ni pëndub suuf!
¹⁶ Gottub Liban xambul taalam,
 te mala ya ca ne doyu ko saraxu rendi-
 dóomal!
¹⁷ Xeetoo xeet du tus fi kanamam,
 te jàppewu leen lu moy neenug neen.
¹⁸ Ana kan ngeen di niruleek Yàlla,

ak nataal bu ngeen koy dendaleel?
¹⁹ Xanaa du jëmmu tuur ju liggéeykat
 móol,
 ab tégg xoobe ko wurus,
 takk ca caqi xaalis?
²⁰ Ku néewle ba amul jooxe bu ni tollu,
 mooy tànn bant bu dul nèb,
 seeti liggéeykat bu xareñ
 bu ko ci sàkkal jëmmu tuur ju dëgër!

²¹ Dangeena xamul lii?
 Am dangeena déggul lii?
 Dees leena waxul ca njàlbéen,
 am seen xel a jàppul nu kenug àddina
 sampoo?
²² Moom moo tooge kaw wèrngalu suuf,
 ñi ko dèkke mel niy soccet,
 moo tàllal asamaan ni ndimo,
 firi ko nib xayma, dèkke.
²³ Mooy sànk kilifa,
 di neenal njiitu àddina.
²⁴ Ba ñu sampoogul,
 toogaguñu sax,
 ba seeni reen di riigu,
 ca la leen Aji Sax jiy wal, ñu wow,
 ngèlén buub, yóbbu ni boob.
²⁵ Aji Sell ji ne:
 «Ana ku ngeen may niruleel,
 ba may moroomam?»
²⁶ Séentuleen kaw, xool-leen ki sàkk yii fi
 kaw!

Xanaa kiy daaguloo seen gàngoor gu mat,
 ñoom ñépp lay woo ci seen tur,
 ci kawewaayu dooleem ak màggaayu
 kàttanam,
 te kenn du ci wuute.
²⁷ Yeen askanu Yanqóoba, lu ngeen di
 jàmbat?
 Yeen Israyil laa ne, lu ngeen di jooy,
 naa: «Aji Sax ji gisul li nu dal,
 sunu Yàlla daal, daa réere sunu àq!»
²⁸ Dangeena xamul,
 am dangeena déggul
 ne Aji Sax jeey Yàlla ba fàww,
 sàkk suuf cat ba cat,
 du sonn, du tàyyi,
 te am xelam nattuwul?
²⁹ Mooy dooleel ku loof,
 di kàttanal ku jeele.
³⁰ Waxambaane sonn, loof;
 xalelu góor di téréfa téréf,
³¹ kiy yaakaar Aji Sax ji moom, di yeeslu
 doole;
 da naa féyy ni jaxaay juy naaw,
 di xélu te du xiix,
 di dox te du xoox.

41

Aji Sax jee yor jamono

¹ Yeen waa dun yi, xeremluleen, déglu ma;
 yeen askan yi, takkuwaatleen,
 jegesi te wax,

nu bokk teew, layoo.

² Ana ku ñu yékkatee penku,
woo ko ci tànkì njekk?

Ana ku ko jébbal xeet yi,
nangulal ko buur yi,
saamaram note ba ñuy pënd,
fittam jamat, tasaare ni boob?

³ Moo leen di dàq, ba jàll te jàmm a koy
dal,

ay tànkam sax du laal suuf.

⁴ Ana ku def lii, dogal ko?

Xanaa ki dale fa njàlbéen di woo maas yi!
Man Aji Sax ji maa jèkk,
te man laak ñi mujj ba tey!

⁵ Waa dun yee ko gis, tiit;
waa cati àddina di lox;
dox ba agsi;

⁶ ku nekk di jàpple moroom ma,
naa mbokk ma: «Góor-góorlul!»

⁷ Tèggu weñ ba di ñaax tèggu gànjar ba,
boroom wàkku soññ boroom dékk,
ñu naa: «Taqaaleb weñ yi baax na!»
tey daaj jèmmi xèrèm ja
ay pont yu koy dègèral.

Aji Sax jeey musal Israyil ciy noonam

⁸ Waaye yaw Israyil, sama jaam bi;
yaw Yanqóoba mi ma taamu,
yaw askanu Ibraayma, samab xarit!

⁹ Yaw mi ma jukkee fa cati àddina,
wooye la fa gèna sore,
wax la ne la: «Yaa di sama jaam,
maa la taamu te duma la wacc.»

¹⁰ bul ragal, yaw laa àndal,
bul tiit, maay sa Yàlla;
maa lay dooleel, dimbali la déy,
maa lay téyee sama ndijooru njekk déy.

¹¹ Ma ne, képp ku la mere,
dees koy rusloo, torxal ko.
Kuy joteek yaw day neen, sànkù.

¹² Dinga ko seet, doo ko gis,
kuy jànkoondeek yaw, du mujje doon tus,
te kuy xareek yaw it day mujj neen.

¹³ Man Aji Sax ji maay sa Yàlla;
téye sa loxol ndijoor,
di la wax ne la: «Bul tiit,
maa lay dimbali.»

¹⁴ Yaw Yanqóoba mi néew doole niw sax,
yeen góori Israyil.

Man, maa leen di dimbali.
Kàddug Aji Sax jee,
sab jotkat, Aji Sell ju Israyil.

¹⁵ Maa ngii di la def
ngay watiiru bàccukaay bu ñaw, yees peq;
ànd aki bënam,

ngay wol tund wu mag, raatale;
dèbb tund wu ndaw ba mu mel nib cox.

¹⁶ Yaa leen di bàcc, ngelaw wal,
ngélén tasaare;
yaw ngay bége Aji Sax ji,
di damoo Aji Sell ju Israyil.

¹⁷ Walaakaanaak néew-doolee ngi wër,
di wut um ndox, amul.

Seen put wow koññ ak mar.
Man Aji Sax ji, maa leen di nangul;
man Yàllay Israyil, duma leen wacc.

¹⁸ Maay walaley dex kaw coll ya ne dunñ,
bènn bëti ndox digg xur ya,
def màndinj ma ab déeg,
suuf su ne serenj laay ballalem ndox.

¹⁹ Maay def garabi seedar aki séng ca
màndinj ma,

saxal garabi mirt ak oliw ca joor ga,
sippar ak garabu pëe, ak yeneen garab yu
dèkke naat,
ma boole ca,

²⁰ ndax nit ñi gis, ba xàmmee,
ñoom ñépp nemmiku, ba xam ne
Aji Sax jee def lii ci loxoom,
xam ne Aji Sell ju Israyil a sàkk lii.

Aji Sax ji tiinaal na tuuri yéefar yi

²¹ «Waxleen seenu lay,» la Aji Sax ji wax,
«Biral-leen seeni firnde,» la buuru
Yanqóoba boobu wax.

²² «Woneleen ko te wax nu liy ñew.

Xamal-leen nu la woon, lu mu;
nu ba ci xel, ba xam lu muy jur,
te ngeen dégtal nu la dikkagul.

²³ Biralal-leen nu mbiri èllég,
nu xam ne ay yàlla ngeen.
Defleen rekk lenn, muy lu baax di lu bon,
ndax nu bokk ko gis, ba yéemu.

²⁴ Ma ne, yeen daal, dungeen tus;
seen liggéey du dara,
te ku leen taamu di ku seexluwu!»

²⁵ Maa yékkatee nit bëj-gànaar,
mu bawoo penkub jant,
di tudd sama tur.

Mooy note boroom dékk ni ban
mbaa binit bu defarkatu njaq di dèggaate.

²⁶ Ana ku yéene woon lii ca njàlbéen,
ba nu xam ko?

Ku ko yégle woon bu yàgg,
ba nu man koo dèggal?
Yéeneesu ko, yégleesu ko
te dèggeesul seeni kàddu.

²⁷ Waaye maa jékka yégal Siyoñ
ne leen: «Xool-leen, ñu ngii!»

Maa indil Yerusaleem ndaw lu indi xibaaru
jàmm.

²⁸ Xool naa xool ci tuur yi, gisuma kenn;
du kenn ci ñoom ku ciy xelale,
ba ma laaj ko, mu mana tontu.

²⁹ Ñoom ñépp a ngoogu, tekkiwuñu tus.
Seen liggéey, caaxaani neen,
seen jèmmi xèrèm du dara, cóoloolu kese.

42

Aji Sax ji yebal na jaamam

¹ «Xool-leen sama jaam bi ma yor,
sama tànnéef, sama soppey xol,

ci kawam laa teg samag noo,
 te mooy dogalal xeet yi yoonu àtte.
² Du xaacu, du biral;
 du jibal baatam ci mbedd mi.
³ Bant bu lemu sax, du ko damm,
 leer gu giim it, du ko fey.
 Mooy indi yoonu dëgg.
⁴ Du toqi, du nasax,
 ba keroog muy dēj àtteb yoon fi kaw suuf,
 fa waa dun ya di séentu ndigalu yoonam.»
⁵ Yàlla Aji Sax ji dafa wax,
 moom mi sàkk asamaan, firi ko;
 tàllal suuf ak lu mu jur,
 may noowal bakkam ñi ci kawam,
 ba ña cay daagoo di nooyi.
⁶ Mu ne: «Man Aji Sax ji, maa la woo cig
 njekk,
 jàpp la ci loxo,
 sàmm la, def la ngay kóllère sama digg ak
 nit ñi;
 def la ngay leeru xeet yi,
⁷ ngay gisloo gumba,
 di génne ku ñu tēj,
 ku dëkke woon lëndëm, génn kërug
 tējukaay.
⁸ Man, Aji Sax jeej sama tur,
 sama teddnga, дума ko joxe,
 te sama bàkk, дума ko wacce jëmme tuur.
⁹ Mbir ya jiiito ngoog, mat na;
 yu yees laa leen di yégal,
 balaa teew, ma yegge leen ko.»

Woyleen Aji Sax ji

¹⁰ Woyleen Aji Sax ji woy wu yees,
 yeen waa cati àddina, kañleen ko,
 ànd ak ñiy wàcci géej ak li ci biiram,
 ak duni géej ak ña ca dëkke.
¹¹ Na waa àll beeki dëkkam xaacoondoo,
 waa dalub Kedar
 ak waa Sela sarxolleendoo,
 kaw tund ya di riirum mbég!
¹² Nañu delloo Aji Sax ji teddngaam,
 te biral bàkkam biir duni géej.
¹³ Aji Sax jeej waaxu ni jambaar,
 xabtaluni ni ñeyu xare,
 àddu ca kaw, xaacu,
 tiime noon yi njambaaram.
Aji Sax ji soppa na
¹⁴ Aji Sax ji nee: «Damaa yàgga xeremlu,
 ne cell, téye sama bopp.
 Waaye léegi, ni kuy matu laay onke,
 di xiix ak a àppaat boole ca.
¹⁵ Maay tonni tund wu mag ak wu ndaw,
 lu cay gancax, ma foom;
 ag dex, ma def ag joor;
 ab déeg, ma ñiisal.
¹⁶ Maay doxloo silmaxa yi
 ci yoon wu ñu xamul,
 ñall wu ñu miinul laa leen di jaarale.
 Maa leen di soppil lëndëm gi fi seen
 kanam, ag leer,
 fu ñagas, ma maasaleel leen.

Lii laa leen di defal,
 te дума leen wacc muk!
¹⁷ Ñi wóolu ay jëmme tuur,
 naan jëmme yu ñu móol:
 “Yeenay sunuy yàlla,”
 dees na leen waññi, torxal leen.
¹⁸ «Yeen tēx yi, dégluleen;
 yeen silmaxa yi, xool-leen ba gis.
¹⁹ Ana ku silmaxa ku moy sama jaam bii?
 Ku tēx ba dab sama ndaw li ma yónni?
 Ana ku silmaxa ba dab kii ñu jàmmal?
 Ku silmaxa ba dab jaamu Aji Sax jii?
²⁰ Gis nga lu bare,
 waaye jàppoo ci dara.
 Nopp ne kótt, dég-dég tē!»
²¹ Aji Sax ji la soob ci njekkam,
 mu fésal mággaayu yoonam ak taar ba.
²² Waaye ñu ngii di xeet wu ñu futti,
 sēxētōo;
 ñépp tēje ciy pax,
 dence ci kēri tējukaay,
 ñu doon alalu xare
 fu leen kenn dul xettlee,
 xanaa ñu di leen sēxētōo,
 te kenn du ne ñu delloo leen.
²³ Ana kan ci yeen mooy dékk lii nopp?
 Kuy teewlu, ba doxe fa dégg?
²⁴ Ana ku jébbal Yanqóoba futtikat yi,
 ku jox Israyil gi, sēxētōokat yi?
 Xanaa du Aji Sax ji nu tooñ?
 Ñoo baña topp ay yoonam,
 baña sàmm ndigalu yoonam,
²⁵ ba mu yuri leen tàngooru sànjam,
 sotti leen tar-taru xare,
 mu jafal wetoo wet, te taxul ñu xam,
 xoyom na leen te bawuñu ci xel.

43

Jotkatub Israyil kenn la

¹ Léegi nag yaw Yanqóoba,
 yaw Israyil mii,
 Aji Sax ji la sàkk tabax la, dafa wax ne:
 «Bul tiit, jot naa la.
 Dama laa woo ci sa tur.
 Maa la séddoo.
² Booy xuus cim ndox,
 maa ngi ànd ak yaw;
 ag dex du la mëdd.
 Booy dox cib taal, doo lakk,
 sawara du la xoyom.
³ Man Aji Sax ji, maaya sa Yàlla;
 man Aji Sell ju Israyil,
 maa lay musal.
 Maa joxe Misra, feye la;
 ak Kuus ak Seba, ma weccikoo la.
⁴ Fonk la, teral la ak sopp la,
 moo tax ma joxey nit, weccikoo la;
 ay askan dee, wuutu sa bakkam.
⁵ Bul tiit, yaw laa àndal,

maay jële saw askan penku,
dajalee leen sowub jant.

⁶ Maa naa bëj-gànaar: “Èsi!”
ne bëj-saalum: “Bul téye!”

Jëleel sama doom yu góor fu sore, délloosi,
te jëleji sama doom yu jigéen fa cati
àddina.

⁷ Délloosil képp ku ñu ma tudde,
te sama màqaama tax ma sàkk ko,
tabax ko, sottal ko.»

⁸ Indileen ñii diy silmaxa te ami gët;
tèx te ami nopp.

⁹ Na xeet yépp daje,
askan yépp teewandoo.

Ana ku nu ci yégaloon lii xew,
mbaa mu xamal nu la wees?
Na seen seede teew, dëggal leen;
ba ñu dégg leen, ne noonu la.

¹⁰ Yeen sama ñoñ, yeenay samay seede.
Kàddug Aji Sax jee.

Yeenay sama jaam bi ma taamu,
ngir ngeen xam, ba gëm ma,
ba ràññee ne maay moom.
Sàkkeesul yàlla ju ma jiitu,
mbaa ju may wuutuji.

¹¹ Aji Sax ji, mennum man a;
amul jotkat bu ma moy.

¹² Maa dogal ag njot, sottal ko, biral ko,
ba tuuru doxandéem nekkagul seen biir.
Yeen nag, yeenay samay seede.
Kàddug Aji Sax jee.

Man maay Yàlla,

¹³ maa masa doon kenn ki,
te sama loxo, maneesu cee musle.
Su ma defee, kuy dindii?

¹⁴ Aji Sax jiy seen jotkat,
Aji Sell ju Israyil dafa wax ne:
«Yeen tax ma yebal ku songsi Babilon,
ba dàjji lu fay tējukaay,
ba xaxalooy Kaldeen ñoñu diy jooyoo* .

¹⁵ Maay Aji Sax ji, seen ku Sell ki;
maa sàkk Israyil, di seen buur.»

¹⁶ Aji Sax ji dafa wax,
moom mi sàkk yoon biir géej,
rèddu xàll, digg mbeex mu ne xéew;

¹⁷ xabtal watiiri xare aki fas,
ak gàngooru ñeyi xare,
ñu bokk tèdd, jógatuñu,
xanaa fey kamaj nib làmp.

¹⁸ Mu ne: «Buleen geesu la woon,
buleen seet ca la wees.

¹⁹ Maa ngii di def lu yees,
te mu ngii di feeñ xaat!
Ràññeewuleen koo?

Biir màndinj mi kay laay xàllu yoon;
fa ne sereñ, ma walal ay dex;

²⁰ dundooti àll bi di ma sàbbaal,
ñook njabootug bànjóoli,

nde maa mayem ndox fi màndinj mi,
dex ya wale fu noon sereñ,
ma nàndale sama ñoñ, sama tànnéef,
²¹ xeet wii ma bindal sama bopp,
te ñooy siiwal sama woy.»

²² Moona Yanqóoba, woowuloo ma,
yaw Israyil laa ne, sàppi naa la.

²³ Du xar mu ndaw moo ma defal saraxu
rendi-dóomal,

mbaa sarax yoo ma terale,
te du sarax su ma la teg it,
mbaa saraxu cuuraay bu ma la sonale.

²⁴ Du xalis boo ma jëndale barax bu xeeñ,
du nebbonu sarax boo ma reggale.
Xanaa lakkal maak say bàkkaar,
sonal maak say ñaawtéef.

²⁵ Mennum man mii maay far say moy ngir
man,

ba dootuma fàttliku bàkkaar.

²⁶ Fàttli ma saw lay, nu bokk layoo;
waxal boog yaw, ndax nga yey!

²⁷ Sa maam a jékka bàkkaar,
ñi lay teewal teg ca gántal ma,

²⁸ ba tax ma sobeel kilifay kër gu sell gi,
araamal Yanqóoba,
wacce Israyil njàññi noon.

44

Aji Sax jee mat cēslaay

¹ Yaw Yanqóoba, sama jaam bi, déglul
boog,

yaw Israyil sama tànnéef laa wax.

² Aji Sax ji dafa wax, moom mi la sàkk,
mooñ la fa sa biiru ndey,
di la dimbali.

Mu ne: «Yaw Yanqóoba sama jaam bi,
yaw Yesurun sama tànnéef laa wax,
bul tiit.

³ Maay sottim ndox suuf su mar,
ak wal yu waleg joor gu wow.

Maay sotti saw askan samag noo,
sama barke sottikul ñi nga meññ,

⁴ ñu màgg ni garabu saabsaab,
nirook garab yu mag yu feggook ndox.

⁵ Kii nee: “Aji Sax jee ma moom.”

Kee di tudoo turu Yanqóoba,
kale bind ca loxo ba: “Maa ñeel Aji Sax ji,”
tey wuyoo turu Israyil.»

Aji Sax ji dëkk na yállantu yi

⁶ Aji Sax ji dafa wax,
moom buurub Israyil, jotkatam,

Aji Sax ji Boroom gàngoor yi,
mu ne: «Maa jëkk, maa mujj,

te yàlla amul ndare man.

⁷ Ana ku mel ni man? Na àddu!

Na biral firndeem te taajal ma
la amoon ba may sos xeet wu yàgg wa,
ak li dikkagul.

* 43:14 43.14 Tekkittel aaya bii am na werante.

Na ko wax!

⁸ Buleen tiit, buleen ragal.

Dama leena biralul lii bu yàgg, yégal leen ko?

Yeenay samay seede.

Yàlla daa am ju ma moy?

Cëslaay amul, xawma ci kenn!»

⁹ Képp kuy tabax jëmme tuur, doo tus, xêrëm yooyu ñu safoo amul njariñ.

Ñooñu ñu def seede

te gisuñu, yéguñu,

muy seen gâcce!

¹⁰ Sàkk sam tuur,

móol sa jëmmu tuur,

te jariñu la tus!

¹¹ Képp ku ca bokk

sa gâcce lay doon,

ña koy yett sax ay nit donj lañu.

Nañu daje ñoom ñépp, taxaw,

bokk tiitaangeek gâcce.

¹² Ab tëgg jël juntuukaayam,

liggéey weñ ca taal ba,

wàkka wàkk, jëmmal;

def ci kem kàttanam,

teg ca xiif, doole jeex,

naanul it ba tax mu loof.

¹³ Liggéeykatu bant tàllal buumu nat-tukaay,

jël kew, nataale,

xacc, rëdde rëddukaayu wërngal,

jox ko bindu nit,

jekkal ba mu mel ni nit,

nar koo fat cib néeg,

¹⁴ ba tax mu gor garabi seedar,

sàkk banti sippar ak yu ni mel,

tànn ci garabi gott bi,

mbaa mu jëmbat garab yu dëkke naat,

ab taw màggal,

¹⁵ nit xambe, sàkk ci, jaaroo;

taal, lakke mburu;

sàkkaale ci jëmmu tuur, sujjóotal ko,

muy jëmm ju mu defar, di ko sukkal;

¹⁶ xaaju matt ma lay taal,

toggew yàppam, lekk,

wàjj, xéewloo ba suur,

jaaruwaale te naan:

«Mii njaar mu neex!

bii tàkk-tàkk bu yànj!»

¹⁷ Ndesu matt ma lay sàkke jëmmu tuur-ram,

sukkal ko,

sujjóotal ko, ñaan ko, naa:

«Yaay sama Yàlla, xetli ma!»

¹⁸ Ñii xamuñu, xàmmeewuñu,

seeni gèt lañu lëndemal, ba gisatuñu;

fatt seenum xel, ba xelootuñu.

¹⁹ Ku mel nii du délloosim xelam,

ba xam, ràññee ne:

«Xaaju matt mi laa taal,

lakke mburu,

wàjje yàpp, lekk;

mu des, ma di ko sàkke lu seexluwu lii?

Ab dogu bant laay sukkal?»

²⁰ Kee di jur gu fore ab dóom,

xelam nax ko, sànk ko.

Du keey musal bakkanam de!

Du kee naa: «Xanaa duy caaxaan laa njàbb nii?»

²¹ Aji Sax ji nee: «Yanqóoba, baal xel ci lii!

Ma ne Israyil, fàttlikul, yaa di sama jaam!

Ma bind la, ngay sama jaam,

yaw Israyil, duma la fàtte!

²² Maa far say moy, mu naaxsaay niw niir, say bàkkaar ne mes nib lay.

Délsil fi man, jot naa la.»

²³ Asamaan, sarxolleel, Aji Sax ji dikk na!

Yeen xóotey suuf, xaaculeen!

Yeen tund yi, neleen réllet, sarxolleendoo,

ak yaw gott beek sa bépp garab!

Aji Sax jee jot Yanqóoba,

te moom Israyil lay fésale darajaam.

Dees na dëkkewaati Yerusalem

²⁴ Aji Sax ji sa jotkat dafa wax,

moom mi la bind ba ngay sosu,

ne: «Man maay Aji Sax ji sàkk lépp.

Man donj maa tàllal asamaan,

lal suuf, kenn wéttaliwu ma ca.

²⁵ Maay neenal firndey maaman,

dofloo gisaanekat.

Maay weddi fóore,

def xam-xamam mu dig ndof.

²⁶ Maay dëggal sama kàddug jaam,

di sottal sama ndéeyal ndaw.

Maa naan ci Yerusalem:

“Dees na ko dëkke,”

dëkki Yuda, ma ne:

“Dees na leen tabaxaat,

ma dekkali gentam bi.”

²⁷ Maa naa xóotey mbeex mi: “Wowal,

te maay njiisal say dex.”

²⁸ Maa naa ci Sirius: “Sama sàmm bi!”

Mooy matal sama bépp nammeel,

te it moo naa ci Yerusalem:

“Nees ko tabaxaat,”

kër gu sell gi, laa ne:

“Nees ko yékkatiwaa!”»

45

Aji Sax ji dooleel na Buur Sirius

¹ Aji Sax ji dafa wax ki mu fal,

Buur Sirius mi mu jàpp ci lolox ndijooram,

ngir nangulal ko xeet yi,

yolomal ngañaayal buur yi,

lafal koy bunt,

ba bunti dëkk du tėje,

² mu ne: «Man maa lay jiitu,

maasale mbartal,

rajaxe buntu xàñar,

damm tējukaayu weñ.

³ Maa lay jagleel denc yu loq,

ak alal ju làqpe,

ba nga xam ne maay Aji Sax ji lay wooye
sa tur,
man Yállay Israyil.

⁴ Te Yanqóoba sama jaam bi,
Israyil moomu di sama tannéef moo tax
ma wooye la saw tur,
takal la ndombol tánk,
te xamuloo ma.

⁵ Aji Sax ji man a, du keneen;
kenn du yàlla ku dul man.
Maa la gemb,
te xamuloo ma,

⁶ ngir xamees penku ba sowu,
ne lu dul man neen la.

Aji Sax ji man a, du keneen.

⁷ Maay bind leer,
di def lëndëm.

Maay indi jàmm,
di def safaan.

Maay Aji Sax jiy def lii lépp!

⁸ Na asamaan wis-wisal,
niir yuri njekk,
suuf fett, meññal wall,
boole ci jebbil njekk.

Man Aji Sax ji, maa def lii!»

⁹ Wóoy ngalla kuy diinjat ka la tabax
te di ndabal xandeer ci biir ndabi xandeer!
Ana ban ak di wax tabaxkatam,
naa ko: «Looy def nii?
Yaw amulooy loxo.»

¹⁰ Wóoy ngalla ku naan baayu nit,
«Moo, lu sa geño meññ nii?»

Mbaa ku naan ndeyu nit,
«Li nga wasin lu mu?»

¹¹ Aji Sax ji, Aji Sell ju Israyil dafa wax,
moom mi ko bind,
mu ne: «Lu dikkagul, nu ngeen ma ko
ñemee laaje;
am dangeen may jox ndigal ci samay
doom,

jox ma ko ci li ma liggéeye samay loxo?

¹² Man maa amal suuf,
sàkk doom aadama fi kaw suuf.

Man mii la samay yoxo firi asamaan,
te maay jox gangoori asamaan lépp ndigal.

¹³ Man maay yékkati Sirius ci biir njekk,
xàllu yoonam.

Moom mooy tabax sama dëkk,
yiwi sama ñoñ ñi ñu toxal,
te du laaj pey mbaa neexal.»

Aji Sax ji Boroom gangoor yee ko wax.

¹⁴ Aji Sax ji dafa wax ne:
«Muy ñaqu Misra, di koomu waa Kuus,
ak waa Seba, ya ne sireet ca kaw,
ñoom ñépp ay jàllsi, nga jagoo.
Sa gannaaw lañuy topp,
yeewe, jàllsi;
sujjóotal la, di ñaan naan:

“Fi yaw daal la Yàlla ne,
du feneen,
te tuur neen la.”»

¹⁵ Yaw déy, yaa di Yàlla ju làqu,
yaw Yállay Israyil ji koy wallu.

¹⁶ Yettkati xërëm yaa ngoogu, rus,
torox, riixleendoo.

¹⁷ Israyil, yaay mucc fa Aji Sax ji
mucc gu sax dàkk!
Doo rus, doo torox
fii ak èllëg.

¹⁸ Aji Sax ji kat dafa wax,
moom mi sàkk asamaan,
moom Yàlla mi bind suuf,
tabax ko, dëj ko,
sàkkewu ko maraas,
xanaa tabaxal ñu ko dëkke.

Mu ne: «Aji Sax ji, man a, du keneen.

¹⁹ Làquwma, di waxe bérab bu lëndëm.

Newuma it askanu Yanqóoba:
“Sàkkuleen ma fu dara amul.”
Man Aji Sax ji maay wax dëgg,
di biral njub.»

²⁰ Yeen daw-làquy xeet yi,
dajeleen, dikk,
ànd, jegesi.

Képp ku gàddu tuuru bantam,
ak kuy ñaan tuur mu ko dul wallu,
kooka xamul dara.

²¹ Àdduleen, layoosi,
diisooleen fi seen biir kay!
Ana ku xamle woon lii bu yàgg,
yégle woon ko booba?

Xanaa du man Aji Sax ji?
Kenn du Yàlla ku dul man!

Yàlla ju jub, di walloo,
du kenn ku dul man!

²² Yeen waa àddina, catoo cat,
walbatikuleen fi man, mucc.
Man maay Yàlla, du keneen.

²³ Giñ naa ko ci man mii,
sama gémmiñ njekk a ciy jibe,
di kàddu gu dul randu.

Man la ñépp di sukkal seen bëti óom,
man it la bépp boroom lámmini di giñe.

²⁴ Dees na ma waxal ne:

«Aji Sax ji rekk a jagoo njekk ak doole!»
Mboolem ñi ma mereey ànd,
sëgg, fekksi ma.

²⁵ Ci Aji Sax ji la askanu Israyil gépp yeye,
bay damu.

46

Yii yàlla bootu, jii Yàlla di boote

¹ Tuur ma ñu naa Bel toqi na,
tuur ma ñu naa Nebo sukk,
mala ya féetewoo seeni jëmm,

* 46:1 46.1 Waa Babilon a doon gàddu seeni tuur, gannaaw ba leen Buur Sirius songee.

ñoom lees daan gàddu*, tey jur gi jagoo,
di leen sêf ba loof.

² Tuur yaa ngay sukk, bokk toqi;
manuñoo wallu seen jëmm ya,
xanaa doxal seen bopp, duggi ngallo.

³ «Dégluleen yeen waa kër Yanqóoba,
yeen ndesu kër Israyil gépp,
yeen ñi ma dale yor ba ngeen juddoo,
di leen fab ba ngeen génnee seen biiru
ndey.

⁴ Ba ba ngeen di magal, man la,
ba keroog ngeen di bijjaaw, maa leen di
boot.

Maa sàkk, maay yor;
maay boot, xettli!

⁵ «Ana ku ngeen may niruleel,
di ma nàttaleek a méngaleek moom,
ba ñu niroo lenn?

⁶ Ñii déy a yullee wurus ci mbuus,
sàkk xalis, natt diisaay ba,
fey tégg bu leen ci téggal am tuur
mu ñuy sukkal ak a sujjóotal,

⁷ yékkati teg ci mbagg,
yóbbu, teg bérab, mu des fa;
du jóge fa mu tege,
ku ko woo wall it, du wuyu,
ba jot ko ci njàqare.

⁸ Fàttlikuleen lii te dægèrluwaat!
Yeen bàkkaarkat yi, defleen lii ci seen xel.

⁹ Fàttlikuleen cosaan la woon.
Man mii maay Yàlla, du keneen.
Amul Yàlla ju mel ni man!

¹⁰ Maay yégle muj ca ndoorte la,
ak jéf ju amagul, lu jiitu bu yàgg.
Maa naa sama mébét a ngi, day am,
sama bépp nammeel sotti.

¹¹ Maay wooye jaxaay penku,
wooye réew mu sore, kuy sottal sama
mébét.

Maay àddu, amal;
maay nas, sottal.

¹² «Dégluleen maa, yeen dægèr bopp yi!
Yeenaka dèddu njekk!

¹³ Maa jegeñal sama njekk, soreetul;
sama wall a ngi, yàggatul.
Maay maye wall fi Siyoŋ gii,
ba Israyil gii di sama gànjar.»

47

Babilon falu, fêlêñu

¹ Yaw janq Babilon,
wàccal, toog ci pënd bi.
Yaw dèkkub Kaldeen bi ci taar bi laa ne,
toogal fi suuf, amatoob jal.

Dootoo dégg «Lewet, xay.»
² Fabal wolukaay, wol sunguf.
Dindil sa muuraay gi,
wogos sa mbubb,
èñ sas kumba,

xuus, jàll dex yi.
³ Na sa yaram feeñ,
say cér ne fanŋ.
Damay feyu,
te duma bale.

⁴ Sunu jotkat ay Aji Sax ji Boroom gàngoor
yi,
Aji Sell ju Israyil.

⁵ Yaw dèkkub Kaldeen bi ci taar bi,
toogal ne cell te fatu cig lëndëm,
deesatu la wooye lingeeru réew yi.

⁶ Maa mere woon sama ñoñ,
sobeel sama séddoo ñii,
teg leen ci sa loxo,

te wonoo leen yèrmande,
ba mag sax, nga teg ko lu diisa diis,
⁷ te naa: «Ba fàww maay lingeer!»
ba tax bàyyiwoo xel ca la ngay def;
xalaatoo la muy jur.

⁸ Diryànke bee, déglul lii:
Yaa ngi ne finaax te naa ci sam xel:
«Maa ko yor, man rekk, du keneen.
Duma jooy jèkkèr, duma jooy doom!»

⁹ Te yaar yooyoo lay dikkal ci benn bés.
Jooy doom, jooy jèkkèr ay yembandoo,
dal fi sa kaw ci sa biir xèrèmtu yi ne xas,
ak sa jat yu dul jeex.

¹⁰ Dangaa yaakaaroon sa pexe yu bon,
naan, «Kenn gisu ma!»
Sam xel ak sa xam-xam a la wacc,
ba tax nga naa: «Maa ko yor, man rekk.»

¹¹ Musibaa lay dikkal,
te doo xam fu mu fenke.
Njaaxum a lay dal,
te du looy mana fanq.
Sànkuteey jekki dale la foo yégul.

¹² Jàppool say jat rekk
ak sa xèrèm yu ne xas
yoo dale sonn ba ngay ndaw.
Jombul mu amal la njariñ,
mbaa ñu ragale la ko.

¹³ Yaaka sonn ci tegtali maa-man!
Nañ taxaw boog, wallu la!
Ñii di rédd nataalu asamaan,
di niiri biddiwi,
ak di xool weer wu feeñ,
xamle ca loo dikkleegul.

¹⁴ Ñu ngoog bokk ak boob bu sawara jafal,
demin,

duñu musal seen bakkan ca sawara sa,
te du doon ab taal bu ñuy lakke mburu
mbaa xal sooy uuf di jaaru.

¹⁵ Lii moo di muju ña la taxoon di sonn.
Ña nga dale jéflanteel ba ngay ndaw,
ña ngay tambaambalu tey, ku nekk ak
yoonam,
kenn walluwu la ci.

48

Yàlla sikk na Israyil

1 Yeen waa kër Yanqóoba, dégluleen;
yeen ñi ñu wooye turu Israyil,
yeen ñi bawoo bëti ndoxi Yuda,
di giñe turu Aji Sax ji,
yeen ñiy sàbbaal turu Yàllay Israyil
te dëgg ak njekk taxul,
2 moona yeena ngi sagoo turu dëkk bu sell
bi,
di wéeroo Yàllay Israyil
ji turam di Aji Sax ji Boroom gàngoor
yi.

3 Yàgg na maa biral lay jëkka am.
Tuddoon naa ko, yégle ko,
jekki jéf ko, mu sotti.

4 Xam naa ne ñu dëgër bopp ngeen.
Dangeen tē, wowle.

5 Moo tax ma yàgg leena biralal lii,
yégal leen ko balaa teew.

Lu ko moy ngeen ne:
«Sunu tuur mee ko def,
sunu tuuru bant bee,
sunu tuuru weñ gee ko amal di!»

6 Lii lépp déggoon ngeen ko;
xool-leen, xanaa dingeen ko nangu tey!

Bés niki tey dinaa leen yégal lu bees,
muy kumpa gu ngeen xamul woon.

7 Léegi lees ko amal,
du lu yàgg.

Lu jiitu tey masuleen koo dëgg
te dungeen ne xamoon ngeen ko.

8 Dégguleen, yéguleen,
seeni nopp masula bënn;
xam naa ne ay workati neen ngeen,
«njuddu-fippu» lañu leen di wooye.

9 Waaye sama tur tax na ma aj sama mer,
sama woy tax na ma muñal leen,
ba duma leen fakkas.

10 Ma ne, togg naa leen, xelli cib taal,
waaye du taal xellikaayu xaalís,
sawaras nattu laa leen xellee.

11 Samaw tur a tax,
sama tur laay jéfe.
Jomb naa ñaaw!
Te sama teddnga, duma ko joxe.

12 Dégluleen ma, yeen askanu Yanqóoba,
yeen bànni Israyil gi ma dégtal sama
woote.

Maay kenn, maa jëkk te maa mujj;

13 te sama loxo bee dēj suuf,
sama ndijoor bi firi asamaan.
Maa leen di woo, ñu bokk taxaw.

14 Bokkleen daje yeen ñépp te déglu!
Kan ci tuur yii moo yégle lii?

Ki Aji Sax ji sopp
mooy sottal nammeelu Aji Sax ji ci Babilon,
won Kaldeen ña fa dëkke diisaayu loxoom.

15 Maa àddu, man mii;
maa ko woo, indi ko,
te pexeem dina joy.
16 Jegesileen ma, déglu ma;
bu jëkk ba tey laquwma, di wax;
te ba muy xew, fa laa teew.

Tey Boroom bi Aji Sax ji da maa yebal
boole maakam xelam.

17 Aji Sax ji seen jotkat dafa wax,
Aji Sell ju Israyil da ne:
«Maay Aji Sax ji, seen Yàlla
ji leen di jàngal seen njariñ,
di leen awale fa ngeen wara awe.

18 Céy su ngeen sàmmoon samay santaane,
ba jàmm baawaanal leen,
njekk géegal leen,
19 seen geño sakkan ni suuf,
di seen meññeefu biir, tollook feppi suuf,
du dog, du sànkoo fi sama kanam!

20 «Génnleen Babilon,
dawleen Kaldeen ñi, tey sarxolle.
Biral-leen lii, yéene ko,
te yeggeji ko waa cati àddina,
ne leen Aji Sax ji jot na jaamam Yanqóoba.

21 Marewuñu bérab yu wow ya mu leen
jaarale woon,
ndox mu balle ciw doj la leen xellil,
moo xaru doj, ndox ma baawaan*.

22 Jàmm,» la Aji Sax ji wax ne,
«du ñeel ñu bon ñi.»

49

Surgab Aji Sax ji mooy leeru xeet yi

1 Yeen waa duni gééj, dégluleen ma;
yeen askan ya fu sore, teewluleen ma.
Fa sama biiru ndey la ma Aji Sax ji wooye,
moo tudd sama tur ba ma saa ndey juragul.

2 Moo ñawal sama kàddu ni saamar,
làqe ma keru loxoom.

Moo ma def may fitt gu ñaw,
yeb ma ci mbuusum fittam.

3 Moo ma ne: «Israyil yaa di samab jaam,
yaw laay wonee samag leer.»

4 Man nag ma noon:
«Maa sonn ci dara,
coonob cóolool bu amul njariñ.»
Teewul sama àttee nga fa Aji Sax ji,
sama yool a nga fa sama Yàlla.

5 Tey Aji Sax jee wax,
moom mi dale sama biiru ndey,
mooñ ma, ma dib jaamam
bi koy waññil askanu Yanqóoba ba ca
moom,

dajaleel ko bànni Israyil googu fa moom,
ba jagoo teraangay Aji Sax ji,
sama Yàlla jii di sama doole.

* 48:21 48.21 Seetal ci *Mucc ga* 17.1-7.

6 Mu ne: «Xeeb naa li ma la sas ngay sama jaam
biy siggil giiri Yanqóoba,
te wara déelloosi ndesu Israyil gii.
Tabb naa la, ngay leeru xeet yi,
di jotale waa cati áddina sama wall.»

7 Aji Sax ji jotkatub Israyil,
moom ku Sellam ki,
moo wax ak ki xeet yi xeeb, sib ko,
te muy surgawu kilifa yi,
mu ne ko: «Ay buur ay gis, jóg,
ay kàngam di sukk,
ngir Aji Sax ji boroom worma,
ngir Aji Sell ju Israyil ji la taamu.»
8 Aji Sax ji dafa wax ne:
«Bu bésúb yiw taxawee, ma nangul la;
bu bésúb mucc jotee, ma wallu la,
sàmm la,
def la ngay kóllère sama digg ak askan wi,
ngir yékkatiwaat réew mi,
séddalewaat ay cér, suuf sii gental tey,
9 ba ne ñi ñu tējoon: “Génnleen!”
Fa ñu nekkoon cig lëndëm,
laa naa leen: “Génnleen ci leer gi!”
Ñooy doon sama gàtt, dellu di fore aw
ñall,

ak wépp tund wu ne faraas tey.
10 Duñu xiif, duñu mar;
tàngooru mbóoya akub jant du leen sonal,
nde ki leen ñeewantee leen di wommat,
di leen yóbbu fu ndox bënne.
11 Sama tund yépp laay soppiy yoon,
sékkaat samay mbedd.
12 Ñu ngiy bawoo fu sore,
ñu ngii bawoo běj-gànnaar ak sowu,
ñee bawoo diiwaanu Sinim ca běj-
saalum.»
13 Asamaanoo sarxolleel, suufoo bégál,
te tund yi xaacoondoo!
Aji Sax jee dēfál ñoñam,
moo ñeewante néew-ji-dooleem ñii.

14 Siyonj a nga naa: «Aji Sax ji wacc na nu,
Boroom bi fátte na nu!»

15 «Ana jaboot juy fátte doomam juy
nàmp,
mbaa muy néege ku mu jur ci biiram.
Bu ko manoona fátte it,
man duma la fátte.
16 Sama biir loxo yii laa la ñaas,
say tataa janook man ba fàww.
17 Ñi lay tabaxaat dañuy gaaw,
te ñi la yàqteek ñi la gental
dañuy dem, ba la.
18 Séentul fi la wër te xool!
Ñépp a ngi daje, di la feeksi.
Ndegam maay Kiy Dund,»
káddug Aji Sax jee,
«ñoom ñépp ngay takkoo ni gánjar,
goyy gánjaroo nib séet.

19 Sa gentub tey bi déy a ngi wéet,
di réew mu yàqu yaxéet.
Waaye léegi déy mu fees ba far xat;
fu ña la sànkoon di soore.
20 Ñàkkoon ngay doom,
waaye ku nekk ci say doom ay dēkkalaat
yii kàddu ci sab nopp:

“Fii dafa xat,
xajal ma, fu ma dēkke!”
21 Dangay mujj naa:
“Moo, ku ma jural ñii ñépp?
Man mi ñàkkooni doom, manumaa jur,
ñu toxal ma, wacc ma;
ana ku leen yoroon te ma des, man kenn?
Ñii sax, fu ñu ne woon?”»
22 Boroom bi Aji Sax ji dafa wax ne:
«Maa ngii di tállal xeeti jaambur ñi loxo,
ñee ma yékkati raaya, wooye leen;
ñu fab say doom yu góor, indi,
tungóom sa doom yu jigéen, déelloosi;
23 Yaw la ay buur di baayoo,
seeni lingeer di la nàmpal.
Ñoo lay sujjóotal,
di la maral say tánk,
ba nga xam ne maay Aji Sax ji,
te ku ma yaakaar du rus.»

24 Manees naa foqati alalu sèxétoo ci loxol
jàmbaar a?
Am manees naa récc boroom doole bu la
jàpp?
25 Aji Sax ji déy dafa wax ne:
«Moona dees na foqati ku jàmbaar jàpp,
ba réccal alalu sèxétob boroom doole.
Say jotewaale, maay joteek ñoom,
te say doom, maa leen di wallu.
26 Ñi lay néewal, maa leen di leel
seen suuxu bopp.
Seen deret ni biññ bu bees, ma màndale
leen,
ba kuy boroom suux xam ne
maay Aji Sax ji lay wallu,
jàmbaar u Yanqóoba ji lay jot.»

50

Aji Sax ji waccul ñoñam

1 Aji Sax ji dafa wax ne:
«Damaa fase seen ndey?
Wonleen ma kayitu pase mi!
Maa leen jaay njaam, feyey bor?
Ana ku ma leen jaay?
Bu ñu leen jaayee, seeni ñaawtéef a.
Bu ñu fase woon seen ndey it, seeni moy
a.
2 Ana lu tax ba ma dikkee, kenn nekku fa?
Ma woote, kenn wuyuwul?
Damaa gátta gátt loxo, ba manumaa wal-
loo?
Am damaa ñàkk doole ju ma xettlee?
Xanaa du maay gédd géej, mu wow,
maay defi dex màndin, ndox tukki;

jën ya mar, dee ba yàqu?

³ Du maay sànge asamaan ag lëndëm,
mu mel ni ku ma solal saaku yu muy
ñaawloo?»

Siggall nañu jaamub Aji Sax ji

⁴ Boroom bi Aji Sax ji moo ma may
lãmmiñu ndongo lu mokkal,
ngir ma xam gan kãddu laay jãpplee ku
sonn.

Suba su ne mu yee ma, yeel ma nopp
bu ma teewloo ni dongo yi.

⁵ Boroom bi Aji Sax jee ma bënnali nopp,
te man it, gântalu ma ko,
deltuwwa gannaaw.

⁶ Gannaaw laa jox ku may dóor,
dëkk lex kuy xus sama sikkim,
te laquma sama kanam
ku may saagaak a serati.

⁷ Waaye Boroom bi Aji Sax jee may dim-
bali,

ba tax rusuma.

Moo ma taxa dogu ba dëgër,
ngir xam naa ne deesu ma rusloo.

⁸ Ki may dëggal jege na.
Ana kuy layook man? Nan bokk taxaw!
Kuy jãnkooteek man ci yoon? Na jegesi
boog!

⁹ Ma ne, Boroom bi Aji Sax jee may
dimbali.

Ana ku may daan?
Dama ne, ñoom ñëpp ay jeexal
ni yere yu saxe ba sagaroo.

¹⁰ Ana ku ragal Aji Sax ji ci yeen,
di déglu kãddug jaamam?

Képp kuy doxe lëndëm
te amul leeraange,
na wóolu Aji Sax ji,
te wéeroo Yällaam jii.

¹¹ Ma ne, yeen ñiy jafal ab taal ñëpp
tey gañoo jum yuy boy,
xuusleen ci sawara si ngeen jafal
ak jum yi ngeen boyal.
Maa leen dogalal lii:
yeenay téddeale mitit.

51

Barke ñeel na ñoñu Aji Sax ji

¹ Dégluleen maa, yeen ñiy wut njekk,
di sàkku Aji Sax ji.
Xool-leen doj wi ñu leen yette,
xool xóotey kãmb gi ñu leen seppée:

² Seen maam Ibraayma laa ne, moom
ngeen di xool,

xool ci Saarata mi leen meññ.

Ba muy kenn laa ko woo,
barkeel ko, ful ko.

³ Aji Sax jeey défal Siyon moos,
défalaale fépp fu fa dib gent,
ba def màndinjam ni toolub Àjjana,
jooram gu wow mel ni toolub Aji Sax ji,

mbégteek bannex teew fa,
ak cant gu woy feelu.

⁴ Yeen sama ñoñ, teewluleen ma,
yeen sama ñoñ, dégluleen ma.
Fi man la téereb yoon di bawoo,
te maay fettaxal sama àtte,
muy leeru xeet yi.

⁵ Sama wall jege na,
sama njekk dëgmal na,
ma nara àttee xeet yi sama dooley përeg.
Man la waa dun yiy xaar,
sama dooley përeg lañu yaakaar.

⁶ Séentuleen asamaan
te xool suuf si mu tiim.
Asamaan ay tasaaroo ni saxar,
suuf ràpp ni mbubb,
ñi ko dëkke dee niy weñ,
te du tee sama wall di sax ba fãww,
sama njekk it du dagg.

⁷ Yeen ñi xam njekk, dégluleen ma,
yeen, askan wi sama yoon yebu ci seen xol.
Buleen ragal nit ku leen sewal,
buleen tiit seeni xaste.

⁸ Sax a leen di lekk ni mbubb,
max ñeeñ leen ni ndimol kawaru gàtt;
te du tee sama njekk sax dàkk,
sama wall saxal maasoo maas.

⁹ Aji Sax ji, yewwul, ngalla yewwul;
wone sa doole.

Yewwul na bu jëkkoon,
bu yägga yägg.
Xanaa du yaa falaxe Raxab?
Du yaa jam ninki-nànka jooja?

¹⁰ Xanaa du yaa wowal gééj
ak ndoxum xuram wu ne màww,
def xóotey gééj aw yoon,
ña nga jot jalle ca?

¹¹ Ñi Aji Sax ji goreel, nii lañuy dellusee,
agsaaley sarxolle fa Siyon,
kaalawoo mbég mu sax,
mbégteek bannex wällsi,
naqar aku tiis daw.

¹² Man ci sama bopp maa leen di défal.
Ana lu ngeen di ragal ci nit kuy dee,
doom aadama ju bokk akum ñax aw
demin?

¹³ Dangeena fátte Aji Sax ji leen sàkk,
ki firi asamaan, dëj suuf?

Dangeen di dëkke bésóo bés,
di tiit xadaru boroom doole
buy waaja sánke?

Ana fu xadaru boroom doole mujje?

¹⁴ Ku diisoon ba waaf léegi nga féex;
doo deeye pax ma nga tjeje,
te doo ñàkk loo lekk.

¹⁵ Man maay seen Yälla Aji Sax ji,
kiy yëngal gééj, riiral gannaxam,
Aji Sax ji Boroom gangoor yi di sama tur.

¹⁶ Maa la sexal samay kãddu,
yiire la sama keru loxo,

aj asamaan, dēj suuf,
ne Siyonj: «Yeenay sama ñoñ.»

¹⁷ Yewwulee, yewwul, Yerusalemee jógal,
yaw mi Aji Sax ji ñandal kaasu mbugalam.
Kaas bu wex hay miirloo,
taata wa, yaa ko siitaatu.

¹⁸ Amul ci ñi nga jur, kenn koo dese
ku lay wommat.

Amul ci doom yi nga yar, kenn
ku lay jàpp ci loxo.

¹⁹ Yii yaar de dikkal na la:
Yàquleek sànkule.

Ana kuy bokk ak yaw saw naqar?
Xiif ak loraangey saamar!
Ana nu ma lay défale?

²⁰ Sa doom yi ne lasar,
mbete kooba yu fiir jàpp,
ñu ne lareet fépp fu mbedd daje,
képpoo sànjum Aji Sax ji,
sa Yàlla ji leen rébb.

²¹ Rikk déglul nag lii, yaw mi musiba dal,
nga màndi te du biiñ.

²² Sa boroom Aji Sax ji,
sa Yàlla jiy layool ñoñam
dafa wax ne: «Mu ngoog, maa jële ci sa
loxo,

kaas bu wex biy miirloo;
taatu kaas ba def sama mbugal,
dootoo ko naan.

²³ Maa koy teg ci loxol ñi la doon naqaral,
te naan la: “Séggal, nu joggi, jàll,”
nga def sa gannaaw gi aw yoon,
ñu joggi, wéy.»

52

Yerusalem dina suqtiku

¹ Yewwulee, yewwul,
Siyonjee, lãmbool sa doole!
Yerusalem, dëkk bu sell bi,
solul ba ne raññi!
Ndax du kenn ku xaraful mbaa ku sobewu
ku lay songati.

² Yaw Yerusalem, mi ñu jàpp njaam,
jógal fégtu,
yaw janq Siyonj mu taaru mi ñu jàpp
njaam laa ne,
tikkil buum gi ci sa baat.

³ Aji Sax ji déy dafa wax ne:
«Dees leena wànteroon ci dara,
te du xaañis lees leen di jotaate.»

⁴ Boroom bi Aji Sax ji déy dafa wax ne:
«Misra la sama ñoñ jëkka wàcc, dali fa,
Asiri door leena not ci dara.

⁵ Léegi nag ana lu fiy sama wàll?»
Kàddug Aji Sax jee.

Mu ne: «Jàpp nañ sama ñoñ njaam ci dara;
seeni sang a ngi téggu,

di dëkke ñakke teggin sama tur.»
Kàddug Aji Sax jee.

⁶ «Moo tax sama ñoñ di xam maay kan;
moo tax bésuub keroog
ñu xam ne maay wax te maa ngii!»

⁷ Ndaw leeka rafeti tànk,
kee bartaloo tund yi,
di la dégtalsi jàmm,
di la xibaar lu neex,
àgge la ag mucc,
ne la: «Éey, Siyonj,
sa Yàllaay Buur!»

⁸ Déglul sa jongrukat yi,
ña ngay xaacu, sarxollendoo.
Ñoo gisal seen bopp

Aji Sax ji di ñibbsi Siyonj.

⁹ Yeen genti Yerusalem, àndleen sarxolle;
Aji Sax jeey défal ñoñam,
mooy jot Yerusalem gii!

¹⁰ Aji Sax jee wone dooleem ju sell ji,
xeet yépp di gis,
ba ca cati àddina.

Ñépp ay gis sunu wallu Yàlla.

¹¹ Yeen ñiy yóbbu ndabi Aji Sax yu sell yi*
bu neeen di jóge Babilon,
déddeuleena déddu lu sobewu, bañ koo
laal,

setluleen te génn foofa.

¹² Dungeen gaawtu déy, di dem;
duy xél moos ngeen fay génne.

Aji Sax jeey dox jiitu leen,
te Yàllay Israyil laa ne, moo leen di féete
gannaaw.

Teraangay jaam bi wuutu na coonom

¹³ Aji Sax ji nee: «Sama jaam baa ngi,
mooy baaxle, kawé,
dees na ko yékkati, darajaal ko lool.

¹⁴ Moo dawoon yaramu ñu bare,
ndax yàqu ba nirootul nit,
bindootul woon ni doom aadama,

¹⁵ waaye noonu it lay waare ay xeeti xeet†,
ba buur yi wedam,
ngir lu ñu leen waxuloon, te ñu gis ko,
lu ñu dégguloon, te mujj ko raññee.»

53

¹ Ana ku gëm sunub dégtal?

Ana ku Aji Sax ji won dooley pèrègam?

² Kii mágge fi kanamam ni njëmbat,
te nirook reen bu fette ag kekk.

Dub taar, du yànjaay bu nu koy niire,
du meloom wu nu koy soppe.

³ Dees na ko xeeb, daw ko,
muy nit ku bare mitit
te miin naqar.

Mu mel ni ku ñuy dummóoyu,
dees koo xeeb te nawloowuñu ko.

* 52:11 52.11 Seetal ci 2.Buur ya 25.13-15. † 52:15 52.15 Manees na koo tekkee nii itam: xeet yu bare lay wis-wisal um ndox, setale leen ko.

⁴ Ndxam moom sunu wopp la yenu, sunuy mitit la sēfoo.
 Nun nu foog ne dees koo mbugal, foog ne Yállaa ko duma, torxal ko.
⁵ Te moom sunuy tooñ a waral ñu jamat ko;
 sunuy ñaawtéef a waral ñu dēggaate ko. Yar yi nu jammal moom la dal, te mooy ki nu wére ciy góomam.
⁶ Nun ñépp a laji niy xar, ku nekk walbatiku topp yoonam, te Aji Sax jee ko képp sunu gépp ñaawtéef.
⁷ Dees koo néewal doole, mitital ko te ubbiwul gémmiñam, xanaa mel ni xar mu ñuy rendiji, ne cell ni xar mu ñuy wat, ubbiwul gémmiñam.
⁸ Àtte nañu ko ñakkal, yóbbu, te ag maasam kenn teewluwu ci ne tooñ gu sama bokk yi tooñ lees ko dagge ci réewum aji dund ñi, te loolu lees ko fādde.
⁹ Ni ñuy robe saaysaay lañu ko robe, denc ko ci bàmmeelu boroom alal, soxorul, fenul.

¹⁰ Moona Aji Sax ji la soob, mu dēggaate jaamam bii, teg koy naqar, su nangoo doon saraxu peyug tooñ, gis askanam, aw fanam gudd, te coobarey Aji Sax ji ci moom lay sottee.
¹¹ Mooy sonn ba gis ug leer, doylloo ko, te ñu bareey xam sama jaam bii di Aji Jub, ba mu àtte leen àtteb njekk, sēfoo seeni ñaawtéef.
¹² Moo tax ma di ko jox ab cér ci biir ñu bare, mu séddoo ak ay kàngam alalu xareem, ngir moo jébbale bakkanu boppam, ñu limaale kooki tooñkat, moo gaddu bàkkaaruu ñu bare te mooy tinul moykat yi.

54

Aji Sax ji jēlaat na Yerusalem, soppeem

¹ «Yaw mi jaasir ba juroo, xaacul! Yaw mi xamul mititu mat, sarxolleel.»
 Aji Sax ji nee:
 «Ndaw si ñu foñ moo gēna jaboot kiy séy.
² Yaatalal sa xayma bi, fri sa sori xayma yu gēna yaa te bul yéem.
 Yokkal sa buumi xayma te samp say bant, mu dēgër.
³ Dinga saam ay doom ndijoor ak càmmoñ, saw askan moom ay xeet, sancaat dēkk yu gentaloon.
⁴ Bul tiit, doo rus muk. Bul jaaxle, deesu la kersaal muk.

Sa gacce ga ba ngay ndaw, dinga ko fátte, te sa tiisu jètun wa dootoo ko fàttliku.

⁵ Sa jèkkër, ki la sàkk,
 Aji Sax ji Boroom gàngoor yee di turam.
 Aji Sell yu Israyil moo la jot, te moo di Yállay àddina sépp.
⁶ Aji Sax jee la woo, nga dib jeeg bu ñu wacc,
 sa xol jeex tàkk,
 Mu ne la:
 «Nees di wacces ndaw,
 si nga takk ba ngay ndaw?»
 Sa Yállaa ko wax.
⁷ Mu ne: «Maa la wacc diir bu gàtt, dellu la jël ci yërmande ju yaa.
⁸ Sama xol a jóg,
 ma xañ la sama kanam ab diir, waaye maa lay yërème ngor gu sax.»
 Aji Sax, ji lay jot moo ko wax.

⁹ Mu ne: «Na ma defoon ak ndoxum Nóoyin ma mooy lii tey. Maa giñoon ne ndoxum Nóoyin ma, mu ni day dootu wale kaw suuf. Noonu it laay giñe ne duma la mereeti, duma la rēbbati.
¹⁰ Bu tund yu mag yi doon toxu, yu ndaw yiy raf sax, sama ngor du la toxul, te sama kóllérey jamm du raf.»
 Aji Sax ji la yèrém moo ko wax.

¹¹ «Ngalla yaw Yerusalem, mi ngélén pamti-pamtee ba nga jàq, te kenn dalalu la, man Aji Sax ji, maa ngii di la tabaxe doj yu ne raññ, samp la ci kenuy safiir.
¹² Maay defare sa kawi tata peri rubi, def say wunt per yuy lèrxat, def sa tata yi la wèr yépp doj yu bakkane,
¹³ mboolem sa doom yu góor ay jàngé ci Aji Sax ji, boole kook jamm ju ne ñoyy.
¹⁴ Njekk moo lay dēgéral, nga sore noteel, doo tiit; sore tiitaange, du la jege.
¹⁵ Xanaa dees na songe moos, waaye ku la song it, yebalu ma ko, te ku la song daanu fi sa kanam.
¹⁶ Xoolal, man maa sàkk ab tēgg buy wal taalu kériñ, defar ca ngannaay lu ne. Waaye maa sàkk it yàqkat buy rajaxe.
¹⁷ Ngannaay lu ñu la mana sàkkal, du sotti, te boroom làmmiñ wu la jógal cib layoo yaa koy tiñal.
 Ñiy jaamu Aji Sax ji, looloo di seen cér, looloo di njekk gi ma leen di dikke.»

Kàddug Aji Sax jee.

55

Aji Sax ji woote na njéggal

¹ «Éey, yeen ñi mar ñépp,
dikkleen ci ndox mi,

ba ci ku amul xaaalis sax!
Dikkleen jënd pepp, lekk!

Dikkleen jënd pepp mu xaaalis jëndul,
ak biññ ak meew mu amul pey.

² Ana lu ngeen di waññe xaaalis,
di ko jënde lu dul aw ñam?

Ana lu ngeen di sonn,
di jënde lu dul reggal?

Dégluleen maa déglu, ba lekk lu leen di
dundal,

di xéewloo seen ngéneelu bakkan.

³ Teewluleen te dikkk fi man.

Dégluleen, ba mana dund,
ma fas ak yeen kóllère gu sax,
gi ma baaxee Daawuda ci ngor gu
wóor.

⁴ Ab seedee ngoog, ñeel xeet yi,
muy njiit, yilif xeet yi.

⁵ Ma ne, aw xeet woo xamul ngay wooyi,
xeet wu la xamul ay dawsu ba ci yaw,

ngir sa Yàlla Aji Sax ji,

Aji Sell ju Israyil,

nde moo la teral.»

⁶ Sàkkuleen Aji Sax ji bi ngeen koy mana
gis,

wooleen ko bi muy jege.

⁷ Na ku bon ba jëfinam,
kuy def lu ñaaw fomm mébétam,
te walbatiku ci Aji Sax ji sunu Yàlla,
mu yërëm ko, yaatal njéggalam.

⁸ «Samay xalaat déy du seeni xalaat,
te samay jëfin du seeni jëfin.»

Kàddug Aji Sax jee.

⁹ Mu ne: «Ni asamaan tiime suuf,
ni la samay jëfin tiime seeni jëfin,
samay xalaat it tiime ko seeni xalaat.

¹⁰ Ab taw ak tawub yuur asamaan lay
wàcce,

du fa dellu,

te suuxatul suuf,

saxal ko, meññal ko,

ba kuy ji, mu may la jiwu;

kuy lekk, mu may lam pepp.

¹¹ Sama kàddu giy bawoo sama gémmiñ it,
noonu la.

Du délsee ag neen ci man

te deful li ma namm,

ba sottal li ma ko yebal.

¹² «Mbégte déy, ngeen di génne,

ñu yóbbu leen ci jàmm,

tund yu mag yeek yu ndaw yi

di leen sarxolleel,

garabi àll bi yépp tàccoondoo.

¹³ Garab gu dul ruus ay wuutub gajj,
garab gu dëkke naat wuutub taxas,
muy woyu Aji Sax ji,
te di firnde ju sax,
du dog mukkk.»

56

Xeet yépp la Aji Sax jiy ñoñoo

¹ Aji Sax ji dafa wax ne:

«Sàmmleen yoon, di def njekk.

Sama wall kat a ngi dikkk léegi,
sama njekk laa ne, léegi mu teew.

² Ndokklee kuy jëfe lii,

ndokklee doom aadama ju jàppoo lii,

di sàmm bésuub Noflaay,

bañ koo ñàkke worma,

di sàmm loxoom ci jépp jëf ju bon.»

³ Doomu doxandéem bu jokku ci Aji Sax ji,
bumu ne: «Aji Sax jee may beddee beddi
ci ñoñam.»

Jaam bu ñu xañ ngóora it bumu ne:

«Man garab gu jaasir donj laa.»

⁴ Aji Sax ji kat dafa wax ne:

«Jaam yi ñu xañ ngóora,

su ñu sàmmee sama bési Noflaay,

taamu sama coobare,

tey feddli sama kóllère,

⁵ maa leen di may ci sama biir kër, sama
biir ètt,

doj wu ñu leen di fàttlikoo

ak tur wu leen di gènal doom yu góor ak
yu jigéen.

Tur wu sax dàkk laay may

jaam yi ñu xañ ngóora,

te du fey mukkk*.»

⁶ Doomi doxandéem yi ànd ak Aji Sax ji,

ngir liggéeyal ko,

ngir sopp turu Aji Sax ji,

te di ay jaamam,

muy képp kuy sàmm bésuub Noflaay,

baña ñàkke worma bés bi,

xanaa di feddli kóllèreem,

⁷ mu ne: «Ñooñu, maa leen di yóbbu

sama kaw tund wu sell,

bànnexale leen sama biir kërug ñaan,

seen saraxu rendi-dóomal ak yeneen
sarax,

dees na leen ko nangul sama kaw sarx-
alukaay,

ndax dees na wooye sama “kër, kërug
ñaan”,

ñeel xeetoo xeet.»

⁸ Kàddug Boroom bi Aji Sax jaa ngi,

kiy dajale giiri Israyil yi tasaaroo,

mu ne: «Maay dajaleeti,

dolli ca la ma dajale woon.»

Ab daan ñeel na njiit yi

⁹ Yeen rabi àll yi,

* 56:5 56.5 Seetal ci Sarxalkat yi 21.16-20.

dikkleen ci bernde ji,
yeen rabi gott bi yépp.
10 Jongrukati Israyil yépp a silmaxa,
te xamuñu dara.
Ñoom ñépp a diy xaj yu luu,
manuñoo baw,
xanaa tëdd di jeneer,
soppi nelaw.
11 Xaj yu tiita tiit lañu,
xamuñu suur,
te ñooy sàmm yeey!
Ñoom ñépp, kenn manu cee xam dara,
seen yoonu bopp lañu topp,
ak seen amin wu lewul.
12 Na nga naa: «Dikkleen, ma indi biiñ,
nu mändeew ñoll; tey ak èllég;
li fi des du jeex.»

57

Ab daan ñeel na moykat yi

1 Aji jub ñaa ngi dee,
te kenn yégalu ko yaramam.
Gor ñaa ngi faatu,
te kenn rãññeewul
ne aji jub ji, faatoom, musiba la koy
moyale.
2 Kiy am jàmm èllég,
di am noflaay ci biir tēraayam,
mooy kiy wéye njub.
3 Waaye yeen, dikkleen fii,
yeen doomi xērēmkat yi,
yeen askanu njaalookat yiy gànctu,
4 ana ku ngeen di ñaawal?
Ana ku ngeen di ñoobi,
ak di ko kókkali?
Xanaa dungeen doomi moykat,
di askanu workat,
5 di xabtaloo bannex
ci ker garab yu mag yi,
ak ker garaboo garab gu naat,
di rendi seeni doom ci yoonu ndox yi,
ak xarantey doj yi?
6 Yaw Israyil, jēlal doj yu rattax
yi ci yoonu ndox wi, séddoo,
muy sa cér, nga muurloo!
Ñoom ngay tuural,
di leen defal ay saraxi pepp.
Waaye Aji Sax ji nee:
«Ndax damay jéllale?»
7 Tund wu mag te kawe,
nga fàkk fa tēraay,
yéeg fa, di fa sarxalal.
8 Yaa takk say baaxantal
ci sa lafu bunt ak sa jēni bunt,
yaa ma wacc, di ñorikoo feneen,
yéeg sab lal, yaatal.
Yaa takktook ñii nga soppa tëddal
te safoo di niir seeni cér.
9 Yaa tukki ba ca buur ba, yóbbaaleg diw,
ak cuuraay lu ne gāññ,

yebal say ndaw fu sore,
ba ñu àkki njaniw.
10 Tukki bu sore bu la sonal sax
taxu la ne: «Fomm naa.»
Bannex bi ngay séentu ngay leqlikoo,
ba tax sonnuloos.

11 Ana kooy tiit,
ak koo ragal ba di ma wor,
fàttlikootoo ma,
faaleetoo ma?
Damaa noppi lu yàgg daal,
ba tax ragalatoos ma?
12 Defe nga ne njekk nga def,
waaye dinaa la weer,
te sa jēf du la jariñ.
13 Boo wootee wall,
na la sa gàngooru tuur xettli.
Ñoom ñépp la ngelaw di buub,
callweer yóbbu leen.
Waaye ku ma làqoo,
kookooy moom réew mi,
séddoo sama tund wu sell wi.

14 Dees na ne: «Maasaleleenoo,
maasaleleen,
yaatal leen yoon wi,
te jēle luy pakk ci sama yoonu ñoñ.»
15 Ku màgg, ku kawe ki,
ki màkkaanam sax dàkk
te turam sell, daa wax ne:
«Fu kawe te sell laa màkkaanoo,
maa dèkk ak boroom xol bu mook,
te toroxlu,
ngir leqli ku toroxlu,
leqli boroom xol bu mook.
16 Duma wéye di sikke ba fāww,
duma saxoo di mer,
lu ko moy képp ku ma sàkk
day tàggook bakkanam.
17 Ñaawtēefi Israyil ak alalam ju lewul
moo ma merloo,
ma duma ko, xañ ko sama kanam,
waaye mu tē ticc, topp xolam.
18 Xam naa jikkoom,
waaye maa koy faj,
wommat ko,
dēfale koy xéewal,
mook ñiy ñaawloondook moom.
19 Maay teg ci seen làmmiñ kàddug cant.
Jàmm, na jàmm ñeel ñépp,
ku soreek ku jege.»
Kàddug Aji Sax jee.
Mu ne: «Maa leen di faj.»
20 Waaye ñu bon ñi, mbete géeg
gu sàmbaraax, tēē dal,
gannax yay baa je ban ak suuf.
21 Sama Yàlla nee:
«Jàmm du ñeel ñu bon ñi.»

58

Jaamu Yàlla, tuub, rafet jikkoo ci gën

¹ Aji Sax ji nee: «Xaacul loo man, te hul ñéebalu; àddul ni bufta, te yégal sama ñoñ seen bàkkaar, ngir waa kër Yanqóoba yii xam seeni moy.
² Man mii lañuy sàkku bés bu ne, di wuta xam sama coobare! Mbete xeet wuy def njekk, te waccul ndigalu yoonu Yàllaam. Ñu ngi may ñaan àttey njekk, di sàkku man Yàlla, ma jege leen,
³ te naa: “Ana lu nuy woor te xooloo ci? Lu nuy toroxlu te teewluwoo?” Ma ne: Bés bu ngeen woor, yeena ngi topp seen bakkan, di sèqatal seeni liggéeykat.
⁴ Xanaa du koor gu ànd ak xulook ñaayoo, ak di joqlantey këmèx yu metti? Su ngeen béggee seen ñaan àgg fa kaw, dungeen woor ni ngeen woore tey.
⁵ Ndax lii moo di koor gi ma taamu, ci bés bu nit kiy toroxlu? Koorug dèngal loos ni barax, lal saaku, sotti ab dóom, tèdd di ko ñaawloo? Loolooy seen koor, ci bés bu Aji Sax ji rafetlu?
⁶ «Xanaa du lii moo di koor gi ma taamu: yolomal jéng yu metti, fecci buumi noteel, afal ku diis; dog lépp luy xeetu noteel?
⁷ Xanaa du sédd ku xiif saw ñam, fat néew-ji-doole ju amul fu mu dëkk, gis ku raffle, wodd ko, te baña nèbbu mbokk mu soxla?
⁸ Su boobaa seen leer feq ni njël, seen góom gaawa wér, seen njekk jiitu leen, leeru Aji Sax ji féete leen gannaaw.
⁹ Su boobaa bu ngeen wooyee Aji Sax ji, mu wuyu; ngeen ne wallóoy, mu ne “Maa ngi.” Ndegam génne ngeen noteel ci seen biir, ak di joxoñeek a wax lu ñaaw,
¹⁰ di leel ku xiif lu ngeen gëna bégg, di reggal néew-ji-doole, su boobaa seen leer fenke biir lëndëm, seenug kèruus di ag njolloor,
¹¹ Aji Sax ji di leen jiite fu ngeen tollu, di leen màndale joor gu maral, dègèral seeni cér, ngeen mel ni tool bu ñu suuxat, mel ni bētu ndox bu dul ñiis,
¹² seeni nit tabaxaat gent ya woon, ngeen yékkatiwaat kenu yu yàgga yàgg. Dees na la wooye jagalkatu xar-xar yi,

mbaa kiy yeestal xàll yi, ngir dëkke réew mi.

¹³ «Su ngeen téyee seen tànk bésul Noflaay, baña def li leen neex sama bés bu sell; su bésul Noflaay di seen nammeel, di bésul Aji Sax bu sell bu ngeen teral; ngeen teral bés bi, bañ cee topp li ngeen jikkowoo, di topp seen bakkan ak wax ju dul jeex;
¹⁴ su boobaa ngeen bannéexoo Aji Sax ji, ma waral leen kawtey réew mi, leele leen seen céru maam Yanqóoba.» Aji Sax ji déy wax na ko.

59

Bàkkaar ñag na diggante Yàllaak ñoñam

¹ Ma ne, Aji Sax ji gàttul loxo ba télee walloo, noppam naqariwul ba tere koo dégg.
² Seeni ñaawtéef a dox seen digganteek seen Yàlla. Seeni moy a leen xañ kanamam, ba mu tanqamlu leen.
³ Seeni loxoo taq deret, ngeen ne liji ci ñaawtéef, làmmiñ di fen, di sos njekkar.
⁴ Du njekk gu kenn wut cib àtte, du dégg gu kenn sàkku cib layoo. Ñu ngi yaakaar caaxaan, di fen, di sos ayib, wasin ñaawtéef.
⁵ Nenu ñàngóor lañuy tostan, di ràbb lëndu jargoñ. Ku lekk ci nen yi dee, te boo ci tojebe nen, saamaan fëlle ca.
⁶ Seeni lënd du ràbbe ba solal nit, mbaa di sàng kenn; seenum ràbb ñaawtéef lay jur, seen loxo ya ko liggéey sabab fitna,
⁷ seeni tànk daw wuti lu bon, ñuy yàkkamtee tur deretu ku deful dara, seeni xalaat di ñaawtéef, yàquteek ñaaxum féete ca seeni yoon.
⁸ Xamuñu yoonu jàmm, te yoon amul fa ñuy jaare, xanaa sàkk seen yoon yu lunk te ku fa awe doo daj jàmm.
⁹ Lee tax yoon sore nu, te njekk du nu dab. Danuy yaakaar leer, lëndëm ne jaas, nuy séentuy ceeñeer, tey lëndëmtyu wéy.
¹⁰ Nu ngi làmbatub tabax ni silmaxa, di tēñex-tēñexi ni ku amuli gēt,

di fakktalu bëccëg ndarakàmm ni bu doon guddi,

dëkk ak ñu wér péng te mel ni ña dee.

¹¹ Nun ñépp a ngi xiiru ni rab wu aay, binnee binni niy xati, yaakaar yoon, yoon wuute, séentu wall, wall sore.

¹² Sunuy tooñ a bare fi sa kanam, sunuy moy a nu seedeel, sunuy tooñ a nu topp, te xam nan xéll sunuy ñaawtéef.

¹³ Noo tooñ Aji Sax ji, wor ko, te noo dëddoo sunu Yalla jii, kàdduy fitna ak fippu, ak fen yu nu mébët, nas ko,

¹⁴ ba yoon dellu gannaaw, njekk dänd, dëgg fakktaloo fa pénc ma, njub téë agsi.

¹⁵ Dëgg a tumurànke, ku dëddu mbon sax, ñu ñiori la, Aji Sax ji gis ci, ñaawlu ko, nde yoon a amul.

¹⁶ Daa xool, gisul kenn; mu tiisoo li ci kenn jógul, moo tax loxoom may ko ndam, te njekkam la sukkandikoo.

¹⁷ Moo sol kiiraayal njekk, mbaxanawoo muc, solati yérey mbugale, làmboo turkib xéraange.

¹⁸ Mooy delloo ku ne yool ba mu yelloo, mbugal ay bañam, fey ay noonam, ba delloo waa dun ya yool ba ñu yelloo.

¹⁹ Dees na wormaale turu Aji Sax ji fa sowu,

wormaale teddngaam ba penku. Bu noon bi agsee ni walum dex, ngelawal Aji Sax jee koy wal, mu daw.

²⁰ «Ab jotkat ay dikkal Siyon, ba jot ñi tuub seeni bàkkaar ci askanu Yanqóoba.»

Kàddug Aji Sax jee.

²¹ «Man nag, lii mooy sama kólléreek ñoom:

Sama xel mi tegu fi sa kaw, ak sama kàddu yi ma yeb ci sa gémmiñ, lenn du ci teqlikook sa gémmiñ ak sa gémmiñu askan, ak sa gémmiñu askanu askan, tey ak èllég.»

Aji Sax jee ko wax.

60

Leer dina fenkal Yerusalem

¹ Yerusalem, jógal ne ràññ, sag leer feq na; teddngay Aji Sax ji fenkal na!

² Lëndëm gaa ngii di muur àddina, mu ngi guddil askan yi, te yaw, Aji Sax ji fenkal la, leeru teddngaam feqal la.

³ Ay xeet ay fekksi sag leer, ay buur wutsi sa ceñeeru njël.

⁴ Séentul fi la wër ba gis: ñoom ñépp a daje, di la fekksi, sa doom yu góor a dikke fu sore, te sa doom yu jigéen it dees leena fab, indaale.

⁵ Yaa koy gis, sa kanam ne ràññ, fit tēf-tēfi, xol fees dell, nde dees na walbati xéewali gééj, indil la, alali xeet yi dikkal la.

⁶ Ndiiraanu giléem a lay fees ak njéggi Majan ak Efa, ñoom ñépp séfe Saba. Dees na indi wurus ak cuuraay tey kañaale Aji Sax ji.

⁷ Gétti Kedar yépp a lay dajesil, kuuyi Nebayot di la jariñ, te di sarax yu dajeek ngèrëm ci kaw sarxalukaayu Aji Sax ji, ma di ko darajaale sama teddngay kër.

⁸ Ana ñuy ñii di naaw niy niir, nirook ndiiraanu pitax yu jëm seeni tàgg?

⁹ Waa dun ya déy a nga may séentu, gaali Tarsis yu mag yaa nga jiiu, jële fu sore sa doom yu góor ya, indaale seen xaalis ak seen wurus, ngir sa Yalla Aji Sax ji, Aji Sell ju Israyil ji la teral.

¹⁰ Ay doomi doxandéem ay tabaxaat say tata,

seeni buur di la surgawu. Maa meroon, duma la, maa la baaxe, yèrëm la.

¹¹ Say wunt ay ubbiku saa su ne, guddeek bëccëg, du tēja, xanaa di la jàlleel alali xeet yi, seeni buur riixle ànd ca.

¹² Mu diw xeet, dim réew, ku la ci nangulul sàuku. Xeet yooyu yépp ay yàqu yaxeeet.

¹³ Taaru àllub Liban a lay ñibbsil, garabu sippar, pée ak geneen gu dëkke naat,

taaralsi sama kër gu sell gi, ba ma terale ci sama ndëggastalu tánk.

¹⁴ Ña la daa néewal, seeni doom a lay sukkalsi.

Ña la daa ñàkke worma, mujj di foon say tánk. Dees na la wooye «Dëkkub Aji Sax ji», mbaa «Siyon, makkanaanu Aji Sell ju Israyil.»

¹⁵ Dees laa foñ, jéppi la, ba kenn jaareetu fi.

Waaye maay def ñu di la sagoo ba fàww, di la bége sèt ba sètaat.

¹⁶ Yaay naan soowum xeet yi, nàmp weenu buur yi,

ba xam ne maay Aji Sax jiy walloo,
jambaaru Yanqóoba ji lay jot.

¹⁷ Maay wuutale xàñjar, wurus;
wuutale weñ gu ñuul, xaalis;
bant, xàñjar;
doj, weñ gu ñuul.

Jàmm laay def mu jiite la,
def njekk yilif la.

¹⁸ Deesatul dégg ci sam réew:

«Fitna ñëw na!»

deesatul dégg it fi sa kemu suuf:

«Yàqute ak Yàqulee ngi!»

«Mucc» ngay tudde say tata,

te «Cant» ngay tudde sa bunti dëkk.

¹⁹ Du jant a lay leeralati bëccëg,
te weer du la niital;

Aji Sax jeej doon sag leer ba fàww,
sa Yàlla jooju di sab taar.

²⁰ Sab jant du sooti,

sa weer du suuxati.

Aji Sax jeej doon sag leer ba fàww,
sa fani ñaawlu jeex.

²¹ Sa askan wépp ñu jub lañuy doon,
te ñooy moom réew mi ba fàww.

Ñooy sama njëmbat li ma jëmbatal sama
bopp,

sàkke leen samay loxo, ngir sama teddnga
teew.

²² Ki ci gëna tuut ay meññ junni,
ki ci gëna néew jur xeet wu mag.

Man Aji Sax ji, bu lii jotee,
ma gaaw koo sottal.

61

Ki Boroom bi fal dikk na

¹ Noowug Boroom bi Aji Sax jaa ngi fi sama
kaw,

ndax Aji Sax jee ma diw*, fal ma,
ngir ma àgge néew-doole yi xibaaru

jàmm.

Moo ma yebal ngir ma dëfal ñi seen xol
jeex,

yégal jaam yi, seen goreel,

yégal ñi ñu tēj, seen ubbite.

² Moo ma yónni ngir ma yéene atum yiwu
Aji Sax ji,

ak at mu sunu Yàlla di mbugalee.

Moo ma yónni ngir dëfal ñiy ñaawlu ñépp,
³ ngir tabb waa Siyon ñiy ñaawlu,

jox leen kaala gu wuutu dóom bi ñuy
ñaawloo,

ak diwu mbégte mu ñu weccikoo seenu
tiis,

ak mbubbam cant mu ñu weccikoo xol bu
jeex,

ba ñu naa: «Ñii ñoo di ponkali garabi
njekk yi,

njëmbat li Aji Sax ji jëmbat,
ngir teewal teddngaam.»

* **61:1** 61.1 Baat bi ñu tekkee diw, ci la baatub Almasi jóge. Ab sarxalkat mbaa buur lañu daan diw, fale leen ko bala ñoo door seen liggéey.

⁴ Ñooy tabaxaat gent ya woon,
yékkati bérab ya tasoon bu yàgg,
dekkal dëkk yu tas,
bérab yu gental ay maasi maas.

⁵ Ay gan ay dikk,
di leen àmmal seeni gétt,
ay doomi doxandéem di leen beyal tool
ak tóokëru reseñ.

⁶ Yeen nag lees di wooye:

«Sarxalkati Aji Sax ji,»

ñu naa: «Sunu surgay Yàlla yaa ngi!»

Alali xeet yi, yeena koy lekk,

di damoo seeni koom.

⁷ Sama ñoñ ay weccikoo seen gâcece

ñaari cérí teraanga,
sarxolley mbég di seen cér,
wuutu toroxte.

Ñaari cér lañuy am ca seenum réew,
mbégte mu sax ñeel leen.

⁸ Man Aji Sax ji, damaa sopp yoon,

bañ càcc ak ñaawtéef.

Maay dàm sama ñoñ ni mu ware,
fas ak ñoom kóllère gu sax.

⁹ Dees na xàmmee seen askan fi biir xeet
yi,

xàmmee lu meññe ci ñoom fi biir waaso
yi;

képp ku leen gis raññee ne

ñooy askan wu Aji Sax ji barkeel.

Almasi bége na mucc gi mu maye

¹⁰ Maa béga bég ci Aji Sax ji,

sama xol di sedd ci sama Yàlla jii.

Moo ma solal yérey mucc,

sàngé ma mbubbam njekk,

may nirook boroom séet bu kaalawu
ni sarxalkat,

ne xenjaw ni séet bu takki gànjaram.

¹¹ Ni suuf di fettalem njebbit,

ab tool di ko saxalem jiwu,

ni la Boroom bi Aji Sax ji di jebbille

njekk ak cant,

xeetoo xeet seede ko.

62

Yerusalem mooy siggi, mucc

¹ Siyon a tax дума selaw,

Yerusalem laa ne, moo tax дума noppi,

ba kera ceeñeeru njekkam teew,

jumu muccam dikkal ko.

² Su boobaa xeet yi gis sag njekk,

buur yépp gis sa daraja,

ba ñu di la tudde tur wu yees,

wu Aji Sax ji di tuddal boppam.

³ Yaay doon kaalag teddnga

ci loxol Aji Sax ji,

yaay doon mbaxanam buur,

ci sa biir loxol Yàlla jii.

⁴ Deesatu la wooye «Dëkk bi ñu wacc,»

deesatul wooye sam réew «Réew mu gen-
tal.»

Xanaa ñu wooye la «Dëkk bi ma neex,»
tey wooye sam réew «Boroom jëkkër,»
nde yaa neex Aji Sax ji,
te sa réew mi dina am boroom kër.

⁵ Ni xale bu góor di takke ab janq,
ni la la sa doom yu góor di moome ni
jëkkër*;

ni boroom séet di bégee ab séetam,
ni la la sa Yàlla di bégee.

⁶ Yerusalem, tabb naa ay jongrukat
ci sa kawi tata.

Buñu selaw, du guddi du bëccëg!
Yeen ñiy soññ Aji Sax ji,
buleen dal-lu.

⁷ Buleen may Aji Sax ji fu mu dal-loo,
ba kera muy taxawalaat Yerusalem,
ba def ko sababu cant fi kaw suuf.

⁸ Aji Sax jee giñ lii ci ndijooram,
giñ ko ci pèrëgam bi àttan,
ne: «Dootuma joxe sam pepp,
say noon dunde,
te doomi doxandéem dootuñu naan
sa biñ bu bees,
bi nga ame saw ñaḳ.

⁹ Ñi góob pepp mee koy lekk,
di ko sante Aji Sax ji.

Ñi witt reseñ jeey naan biñ bi,
fi sama biir ètt bu sell.»

¹⁰ Jàllsileen, jàllsileen bunti dëkk bi,
xàll-leen yoonu xeet wi,
maasaleenoo, maasaleen ngér mi,
dindi doj yi!
Yékkatileen raaya ju askan yépp gis.

¹¹ Aji Sax jaa ngoog,
yéene na lii ba ca cati àddina.

Mu ne: «Waxleen Siyoñ dëkk bu taaru bi,
ne ko:

“Sab jotkat a ngii di dikk!
Mu ngii ànd akub yoolam,
ñaḳu liggéeyam jjiitu ko.”

¹² Dees na leen wooye “Askan wu sell wi,”
“Ñi Aji Sax ji jot;”
te yaw Yerusalem dees na la wooye “Ki ñu
namm,”

“Dëkk bi ñu waccul.”»

63

Jambaaru Aji Sax ji am na ndam

¹ Ana kuy kii bawoo Edom*,
sol yére yu xonq, bawoo Bocra†?
Kii ak yéreem yu yànj,
di daagoo dooleem ju bare?
«Xanaa man mii di waxe njekk,

te am dooley walloo.»

² Lu waral sa xonqaayu mbubb mi,
sa yére yi mel ni ku doon dère
dërukaayu reseñ?

³ «Maa doon dère tànk, man kenn
ci ab dërukaayu reseñ,
xeet yépp kenn dërlewu ma ci.
Sama mer laa leen dère,
samam sànj laa leen dëggaatee,
seen deret tis ci samay yére,
ma taqal sama yére yépp.

⁴ Bésuub mbugal laa mébétoon,
te atum njot teew.

⁵ Ma xool,
gisuma ku ma dimbali,
ma tiislu li ma amul ku ma japple.
Ca la ma sama pèrëg wallu,
samam sànj japple ma ca.

⁶ Sama mer laa dëggaatee ay xeet,
samam sànj laa leen màndal,
sotti seen deret fi suuf.»

Yonent baa ngi soññ Aji Sax ji

⁷ Jéfi ngoru Aji Sax ji laay fàttlee
ak cant gi Aji Sax ji yelloo,
ngir li nu Aji Sax ji defal lépp;
mbaax gu réy gi mu ji waa kër Israyil,
defal leen ko ci yërmandeem,
ak jéfi ngoram gu réy.

⁸ Moo noon: «Sama ñoñ déy ñoom a!
Ñee di doom yu dul tas yaakaar.»
Mu daldi doon seen jotkat.

⁹ Seen gépp njàqare di njàqarey boppam,
malaaka mi mu jàkkaarloom musal leen ca.
Moo leen sopp, ñeewante leen,
ba jotal leen boppam,
te fu ñu masa jaare démb,
mu fab leen, boot.

¹⁰ Waaye ñoom ñoo fippu,
di naqaral xelam mu sell,
mu soppiliku seen noon,
ba mujj di xareek ñoom.

¹¹ Ñoñam ña daldi fàttliku janti Musaa ya
woon.

Ña nga naan: «Ana ki jalle woon Israyil
géej,
mook sàmmi géttam ga?
Ana ki yebaloon noowam gu sell ci seen
biir?»

¹² Ana ki dawaloon dooley pèrëgam bu
tedd ba,

ñeel ndijooru Musaa,
xaral leen ndox ma,
ba ame ca woy wu sax dàkk?

¹³ Ana ku leen doxloo woon biir xóote ya,
ñu mel ni fasi naari góor ci biir màndiñ,
te tërëfuñu?

¹⁴ Ni jur gu wàccew xur, di fa fore,
ni la leen Noowug Aji Sax ji

* 62:5 62.5 doom yu góor yi ñooy waa Yuda, te ñooy moom seen réew. * 63:1 63.1 Edom mi doon seexu
Yanqóoba, moom lañu dippee réewum Edom, te moo taxawe taxawaayu noonub Aji Sax ji. † 63:1 63.1 Bocra ab
dëkk la ci réewum Edom.

maye ab dal-lukaay.

Noonu nga wommate sa ñoñ,
ba ame ca woy wu rafet.

¹⁵ «Ngalla séntool asamaan,
xooleel fa sa kër gu sell ga ne ràññ.
Ana sa fiiraangeek sa njambaar?
Sag rafet xol ak sa yërmande ñooru na ma!
¹⁶ Yaw déy yaa di sunu Baay.

Ibraayma xamalu nu dara,
Israyil† xamu nu.

Yaw Aji Sax ji yaa di sunu Baay,
sa tur a di “sunu Jotkat naka jekk.”

¹⁷ Aji Sax ji, loo nuy wërloo fu sore say
yoon,

di nu dërkiisal, ba ragalatunu la?

Sang bi, délsil ngir nun,
sa giir yii nga séddoo.

¹⁸ Nun sa xeet wu sell wii,
moomunu réew mi lu yàgg,

te noon yi dëggaate nañu sa bérab bu sell.

¹⁹ Nu ngi mel ni xeet woo masula yilif,
xeet wu ñu masula tudde sa tur.

Éy soo xaroon asamaan, wàcc,
ba tund yi yéngu fi sa kanam!»

64

¹ Ni sawara di jafale boob,
baxale ko am ndox,
ni ngay xamalsee say noon, saw tur,
ba yooyu xeet di lox fi sa kanam.

² Ba ngay def kiraama ya ñu
séentuwuloon,

yaa wàcc, tund yi yéngu fi sa kanam.

³ Ca cosaan ba tey masesula dégg,
nopp masula dégmati,

bët masula gis yàlla ju la moy,
mu defal nii ku ko yaakaar.

⁴ Yaay gatandu kiy bége njekk gi muy jéfe
te di ba xel say yoon,

yi ñu mas di jaare, ba mucc.

Waaye kat, yaa nu mere, ndax noo
bàkkaar.

⁵ Nun ñépp a mujj mel ni sobe,
ni sagaru sobe la sunu gépp njekk mel.

Nu ngii nun ñépp mel ni xob wu lax,
sunuy tooñ buub nu, yóbbu ni ngelaw.

⁶ Du kenn kuy wormaal sa tur,
mbaa mu yewwu ba jàpp ci yaw,

yaa nu làq saw yiw,

yaa nu def ban bu tooy

ci sunu biir ñaawtéef yi nu tanc.

⁷ Waaye déy, Aji Sax ji, yaa di sunu Baay;
noo di ban, yaw ngay tabaxkatu njaq,
nun ñépp di sa liggéeyu loxo.

⁸ Éy Aji Sax ji, bul mer lool,

bul ba xel faww ci ñaawtéef.

Ngalla seetal ne nooy sa ñoñ, nun ñépp.

⁹ Sa dëkk yu sell doon nañu màndiñ,

Siyon ca la, doon na màndiñ.

Yerusalem laa ne, gental na!

¹⁰ Sunu kërug jaamookaay gu sell ga te
tedd,

fa la sunuy maam daa màggale,

sawara xoyom na ko,

mboolem lu nu soppoon yàqu yaxheet.

¹¹ Éy Aji Sax ji, lii lépp xanaa doo ci téye
sa loxo?

Xanaa doo ci selenju, teg nu gâce gu réy?

65

Aji Sax ji wuy na

¹ Maa may ay nit tont te laajuñu ma.

Maa leen may, ñu gis ma te seetuñu ma
woon.

Maa ne leen: Maa ngii, maa ngii!

te ñuy xeet wu dul tudd sama tur.

² Samay loxo laa yendoo tàllal askanu
fippukat,

nit ñuy doxe yoon wu baaxul,

topp seen xelum bopp.

³ Ñoo di xeet wu ma ne jàkk,

dëkke maa naqaral,

di sarxalali tuur ci biiri tool,

di leen taalal cuuraay ci kaw sarxalukaay
bu ñu tabax,

⁴ di tooge diggi bàmmeel,

di fanaan bérab yu làqu;

di lekk yàppu mbaam,

seeni cin def ñam yu sobewu,

⁵ te ñu naan: «Dellul gannaaw,

bul ma jege, maa la gëna sell!»

Lii déy daa mel ni saxar ci samay wakkan,
mel ni sawara su yendoo boy.

⁶ Ma ne dogal a ngii binde, fi sama kanam:

«Duma noppi déy, maa leen di fey,

maa leen di fey ba mu mat sëkk.»

⁷ Aji Sax ji nee: «Muy seeni ñaawtéef,

di seen ñaawtéefi maam,

ya daan taalali tuur cuuraay ca tund yu
mag ya,

di ma kókkali ca kaw tund yu ndaw ya,

lépp laa leen di fey ba mu mat sëkk,

muy seen añu jéf ja woon.»

⁸ Aji Sax ji dafa wax ne:

«Ni nit di gise cabbu reseñ ju fees dell,

ne: “Buleen ko yàq,

ngéneel a ngi ci,”

noonu laay def ngir sama jaam ñi,

baña boole lépp yàq.

⁹ Fi Yanqóoba laay soqee aw askan,

fi Yuda laa ne, fi laay jële lu séddoo samay
tund.

Samay tànnéef a koy séddoo,

sama jaam ñi kay a fay dëkke.

¹⁰ Joorug Saron ay dellu di parlub gätt gi,

xuru Akor di goorukaayu nag yi,

† 63:16 63.16 Israyil fii mooy maam Yanqóoba.

ñeel sama ñoñ ñi may sàkkuji.

11 «Waaye yeen ñi wacc Aji Sax ji, yeen ñi fàtte sama tund wu sell wi, di taajal ndab, Gàdd tuur mi*, di xellil biiñu njafaan, Meni tuur mi†, 12 maa leen di dogalal saamar, ngeen bokk sukk, ñu rendi leen, ngir maa woote, wuyuwuleen, ma wax, dégguleen, xanaa di def li ma ñaawlu, taamu li ma buggul.»

13 Moo tax Boroom bi Aji Sax ji dafa wax ne:

«Ma ne sama jaam ñeey lekk, yeen ngeen nekke xiif. Ma ne sama jaam ñeey naan, yeen ngeen nekke mar. Sama jaam ñeey bannexuji, yeen, ngeen nekke gacce.

14 Sama jaam ñeey sarxolleji ndax xol bu neex, yeen ngeen di yuuxu ndax naqaru xol, di jooyoo ndax xol bu jeex.

15 Seen tur wi ngeen bàyyi gannaaw la samay tannéef di móoloo, naan: «Yal na la Boroom bi Aji Sax ji rey ni diw ak diw,» waaye ñoom sama jaam ñi, tur wu yees lees leen di wooye, 16 ba képp ku namma barkeel fi kaw suuf, ci Yàlla jiy dégg la koy ñaane, te kuy giñ fi kaw suuf it, ci Yàlla jiy dégg la koy giñe. Day fekk njàqare ya jiitu di lu ñu fàtte, te di lu làqu saay gët.

Aji Sax ji yeestal na càkkéefam

17 «Maa ngii di sàkksi asamaan su yees ak suuf su yees. Deesul fàttlikooti yéf ya jiitu, xel dootu ci dem.

18 Bégleen kay, te saxoo di bannexoo li ma sàkk: Maa ngii di sàkk Yerusalemu mbégte, waa dèkk ba nekke bannex.

19 Maay bége Yerusalemu, bannexoo sama ñoñ.

Deesu fi déggati ay jooy, mbaa coowal njàqare.

20 Deesu fi gisati tuut-tànk bu dund fan yu néew, mbaa mag mu dee te ay fanam matul, ba ku am téeméeri at dee sax, di ku gàtt fan, te ku àggul téeméer, ñu ne alku nga.

21 «Ñooy tabax ay kër, dèkke, jèmbati tookeer, lekk ca meñneef ma.

22 Duñu tabax moos, keneen dèkke; duñu jèmbat moos, keneen xéewloo. Sama ñoñ ay tollook garab yi fan, sama xejj yeey jagoo seenu ñaq.

23 Duñu liggéeyati mukki ci neen te dootuñu jural mbas.

Ñoofooy askanu ñi Aji Sax ji barkeel, seeni doom nekk ak ñoom.

24 Su boobaa balees woote, man, maay wuyu; balaa ñoo daane seen kàddu, ma nangul leen.

25 Bukki ak mboteey bokk di for, gaynde niw nag, di for um ñax, jaan di dunde pënd. Deesatul gaañe mbaa di lore, fi mboolem sama kaw tund wu sell wi.» Aji Sax jee ko wax.

66

Ragal Yàlla du jéfi ngistal

1 Aji Sax ji dafa wax ne: «Asamaan sama ngàngunee, suuf di sama ndéggastal.

Ana kër gu ngeen may tabaxal man? Ana ban bérab ay sama dal-lukaay?

2 Mboolem yooyu, sama loxoo ko sàkk; nii la lépp ame.» Kàddug Aji Sax jee.

«Ku mel nii laay niir: néew-ji-doole ji xolam jeex, te muy déglu sama kàddu bay lox.

3 Kee moom mu ngi rendiw yèkk, sarxal, te teewu koo bóome.

Kee rendiw xar, sarxal, te teewu koo damm loosu xaj, sarxal.

Kee ngi joxe saraxu pepp, te teewu koo tuur deretu mbaam-xuux. Kee di taal saraxu baaxantalu cuuraay, tey jaamu ay tuur.

Ñoo taamu seen yoonu bopp, safoo seeni jéf ju seexluwu.

4 Man it maa leen di taamoo jox seeni mbugal,

dikke leen tiitaange yi ñu yellow, ngir maa woote, kenn wuyuwul, ma àddu, dégluwuñu ma. Xanaa di def lu bon lu ma ñaawlu, li ma buggul, ñu taamu ko.»

Aji Sax ji mujj na dikki

5 Dégluleen kàddug Aji Sax ji, yeen ñiy déglu kàddoom, di lox. Lii de mooy seen kàddug bokk, yi leen jéppi, di leen dàq ngir samaw tur. Ñu ngi naan: «Na Aji Sax ji darajaal boppam,

ba nu teewe seen mbégte, yeen ñii!» Waaye ñoom de ñooy rus.

6 Coowal xaree ngoog bawoo dèkk ba,

* 65:11 65.11 Gàdd mooy tuur mi ñu jiiñ wèrség.

† 65:11 65.11 Meni mooy tuur mi ñu jiiñ ndogal.

coow laa nga jóge kërug Yàlla ga,
coowal Aji Sax jee, mooy yool ay noonam.

⁷ Kii balaa matu, wasin na,
bala moo am mititu mat, jur na doom ju
góor.

⁸ Ku masa dégg lu mel nii?
Ku masa gis lu mel nii?
Am réew dina sosu ci benn bés a?
Am aw xeet dina jekki sosu ci wenn fan?
Siyonj de, moo tàmbali matu rekk,
jur doomam yu góor.

⁹ Aji Sax ji nee: «Man miy jàpple jigéen
ba èmbam mat,
dinaa ko xañ wasin?
Man miy wasinloo nit,
dinaa fatt njurukaayam?»
Sa Yàllaa ko wax.

¹⁰ Yeen soppey Yerusalem yépp,
bégandooleen ak moom,
te di ko bänneexoo.
Mboolem yeen ñi doon ñaawlu tiisu
Yerusalem,

bokkleen ak moom xolam bu sedd.

¹¹ Su ko defee ngeen nàmp ba suur
weenam wiy naxtaane,
su ko defee ngeen nàmp bay tàqamtiku
soowum weenam mi ne xéew.

¹² Aji Sax ji déy dafa wax ne:
«Maa ngii di yóbbu Yerusalem
ci jàmm ju mel ni géej,
ak waamey koom muy wal, bawoo ci xeet
yi.

Yeenay tooge lupp Yerusalem, di nàmp,
uufu ciy óom, mu di leen raay.

¹³ Man maa leen di naxtaan ba ngeen dal,
ni doom ju ndeyam di naxtaan ba mu dal,
ngeen am xel mu dal fi Yerusalem.

¹⁴ Yeenay teewe lii, seen xol tooy,
seen yaram leqliku ni ñax mu yég nawet.
Dooley Aji Sax ji la ay jaamam di xam,
te am sànjam la ay noonam di xam.

¹⁵ «Aji Sax ji déy a ngii dikke sawara,
ay watiiram mel ni ngélén,
mu nara sànju, sotti meram,
gédde sawara wuy sèlsèli.

¹⁶ Sawara déy la Aji Sax ji di mbugale,
saamaram ba dal mboolem doom aadama,
ñi Aji Sax ji bóom ne xas.

¹⁷ «Ñii di sellalu ak a sangu-set
bala ñoo duggi tool ya ñuy tuuroo,
di fa toppi ca gannaaw ka ca digg ba,
ñooñooy lekk yàppu mbaam,
ak yeneen yu seexluwu ni janax,
te ñooy bokk sàнку.»
Kàddug Aji Sax jee.

¹⁸ «Man maa xam seeni jëf ak seeni xalaat.
Bés bii taxaw lees di dajale xeetoo xeet aki
làkk,

ñu dikk ba niir samag leer.

¹⁹ Maay teg firnde fi seen digg,
ba jël ñenn ca ña dese bakkan ca ñoom,
yebal leen ci xeet yi,
yebal leen Tarsis, ak Pul ak Ludd,
ñooña di ñu mane fitt,
ma yebal leen ca waa Tubal ak Yawaan,
waa duni géej yu sore ya,
ñooñu masula dégg sama jaloore,
te masuñoo gis sama teddnga,
sama ndaw ñaa leen di xamal sama
teddnga.

²⁰ Xeet yooyooy indi seen bokk
yi bokk ak yeen ñépp,
jële leen ci mboolem xeet yi,
ñu doon sarax bu ñeel Aji Sax ji,
wari fas aki watiir,
ba ci watiir yu ñu mbaar,
aki berkelleeki giléem,
ba agsi sama tund wu sell,
wi ci Yerusalem.»

Aji Sax jee ko wax.
«Day mel ni noonu bànni Israyil di yóbbu
sarax,

yeb ko ci ndab lu sell,

yóbbu kër Aji Sax ji.

²¹ Te ñenn ci yooyu xeet, maa leen di jël,
def leen ay sarxalkat aki Leween.»

Aji Sax jee ko wax.

²² «Asamaan su yees sii,
ak suuf su yees sii may waaja sàkk déy,
ni seen taxawaay di yàgge fi sama kanam,
yeen, ni la seen askan ak seen tur di yàgge
fi sama kanam.

²³ Su ko defee Terutel weer ba Terutel
weer,

bésu Noflaay ba bésub Noflaay,
mboolem doom aadama di ma su-
jjóotalsi.»

Aji Sax jee ko wax.

²⁴ «Te bu ñu génnee, gis néewi
ñi doon fippu fi sama kaw,
seeni sax duñu dee muk, k,
seen sawara du fey muk,
te boroom suux bu leen gis, yaram wa
daw.»

Yeremi

¹ Muy kàddug Yeremi, góor gi baayam Ilkiya bokk ci sarxalkat yi dëkk Anatot, ca diiwaanu Beñamin. ² Kàddug Aji Sax ji dikkal ko ci jamonoy buuru réewum Yuda, Yosya doomu Amon. Mu yemook fukkeelu atu nguuram ak ñett. ³ Kàddug Aji Sax ji dikkal na ko ba tey ci janti buurub Yuda, Yowakim doomu Yosya, di ko dikkal, ba keroog nguurug Cedesyas, jeneen doomu Yosya ja di jeex. Mu yemook fukkeelu atu nguuram ak benn, ca juróomeelu weer wa. Booba lañu jàpp waa Yerusalem njaam, yóbbu leen.

Waxyu dal na Yuda

(Saar 1.4—25.14)

Yàlla woo na Yeremi

⁴ Kàddug Aji Sax ji dikkal na ma, ne ma: ⁵ «Laata ma lay sos ci sa biiru ndey, xam naa la; laata ngay juddoo ci sa ndey, séddoo naa la, def la ngay yonent ñeel xeet yi.»

⁶ Ma ne: «Éy Boroom bi Aji Sax ji, da di manumaa wax, gone dorŋ laa.»

⁷ Aji Sax ji ne ma: «Bul ne: “Gone laa.” Képp ku ma la yebal, dem ca; lépp lu ma la sant, wax ko.

⁸ Bu leen ragal, ngir yaw laay àndal, di la xettli.» Kàddug Aji Sax jee.

⁹ Aji Sax ji tàllal loxoom, laal sama gémmiñ.

Aji Sax ji ne ma:

«Mu ngoog, sexal naa la samay kàddu.

¹⁰ Ma ne, tabb naa la bés niki tey, ci kaw xeet yeek réew yi, ngay buddat, di fàqat, di yàqte ak a daaneel, di defar ak a jëmbat.»

Yàlla wone na ñaari misaal

¹¹ Kàddug Aji Sax ji dikkal ma, ne ma: «Yeremi, loo gis?» Ma ne ko: «Caru garabu saal laa gis.» ¹² Aji Sax ji ne ma: «Yaa ko gis, maa sálloo def sama kàddu, ngir sottal ko.»

¹³ Kàddug Aji Sax ji dikkalaat ma ñaareel bi yoon, ne ma: «Loo gis?» Ma ne: «Cin luy bax laa gis. Mu ngi joye bëj-gànnaar, jublook nun.» ¹⁴ Aji Sax ji ne ma: «Bëj-gànnaar la safaan bay fettaje, dal ci kaw waa réew mi mépp.

¹⁵ Maa ngii déy, di woo

mboolem waasoy réewi bëj-gànnaar ak seeni buur.»

Kàddug Aji Sax jee.

«Dañuy dikk, ku ne dëj ngànguneem fi janook bunti Yerusalem, jànkoonteek tataan yepp, ak dëkki Yuda yepp.

¹⁶ Maay biral samay àtteek ñoom ci seen mbon gi gépp: Dañu maa wacc, di taalal cuuraay yeneen yàlla, di sujjóotal lu ñu sàkke seeni loxo.

¹⁷ «Yaw nag takkul te wax leen lépp lu ma la sant.

Bul am tiitaange fi seen kanam, lu ko moy ma tiital la fi seen kanam.

¹⁸ «Maa ngii def la bésub tey nga mel ni dëkk bu mag bu tata wër, mel ni xeru weñ mbaa tatay xàñjar, jàkkaarlook réew mi mépp, muy buuri Yuda aki kàngamam, di sarxalkati réew mi ak baadoolo yi. ¹⁹ Dañu lay xeex te duñu la man, yaw laay àndal, di la xettli.» Kàddug Aji Sax jee.

2

Yàlla taxawu na Israyil

¹ Kàddug Aji Sax ji dikkal ma, ne ma:

² «Demal yéeneji lii, Yerusalem di dégg, nga ne: “Aji Sax ji dafa wax ne:

Maa ngi fàttliku sa ngor ba ngay ndaw, ak sa cofeel ba nga deeb séet, ba ngay topp sama gannaaw ca màndin ma,

ba ngay jaare fa dara dul sax.

³ Mooy ba Israyil dee lu ñu sellalal Aji Sax ji,

di ndoortel meññeefam*.

Képp ku ko sex, toppees ko ko, musiba dikkal ko.”»

Kàddug Aji Sax jee.

Bànni Israyil wor nañu

⁴ Dégluleen kàddug Aji Sax ji, yeen waa kër Yanqóoba, ba ci mboolem lãngi kër Israyil.

⁵ Aji Sax ji dafa wax ne:

«Ana sikk bu ma seeni maam gisal, ba tax ñu sore ma, di topp xèrëmi neen, ba far neen?»

⁶ Newuñu: “Ana Aji Sax, ji nu génne woon réewum Misra, jüte nu ca bir màndin ma, ca joor gu wow gaak xur ya, réewum maral ma lëndëm kèruus, jaarees fa, dëkkees fa?”

* 2:3 2.3 ndoortel meññeefam, Aji Sax ji lañu ko daan jagleel. Kenn sañu cee lekk.

7 Ma indi leen suuf su nangu,
ngir leel leeni meññeefam aki ngëneelam.
Ngeen dikk sobeel sama suuf sii,
ba sama céru suuf si siblu.

Aji Sax jaa ngi layoo

8 «Sarxalkat yi newuñu: “Ana Aji Sax ji?”
Ñi ñank yoon wi faaleetuñu ma,
njiit yi gántal ma,
yonent yiy waxe waxyuy Baal, tuur mi,
di topp lu leen dul jariñ.
9 Moo ma tax di layooteek yeen,
ba layook seeni sët.»
Kàddug Aji Sax jee.

10 «Jáll-leen ba ca duni Kitim fa sowu, te
xool;
yónneeleen Kedar fa penku, seetlu bu
baaxa baax
ndegam dingeen gis lu mel nii!

11 Fu aw xeet masa weccée yàllaam?
Moonte duñuy yàlla sax!
Moona xeet wi ma séddoo weccoo séen
darajay Yàlla
te du leen jariñ dara.

12 Asamaanee, waarul ci lii!
Jommil, ba jommaarall!»

Kàddug Aji Sax jee.

13 «Naari yoon la xeet wi ma séddoo
bàkkaar:
ma di bētu ndox muy dund,
ñu wacc ma, man,
di gasal seen bopp kàmbi dencukaayi
ndox,
te kàmb yi fett, di senn.

14 «Israyil da dib jaam a?
Am daa juddoo kërug njaam?
Ana lu tax ñu doon alalu sèxètoo?

15 Gaynde yaa ngi ñar ci seen kaw,
di leen xiiru!
Gaynde yee gental seenum réew,
ba seeni dëkk di gent yu kenn dëkkul.

16 Te it niti Memfiso niti Tapanes†
ñooy dikk wat leen nel.

17 Xanaa du yeena def seen bopp lii,
di wacc seen Yàlla Aji Sax ji,
ba mu leen di jiite ca yoon wa?

18 Léegi lu ngeen wuti Misra?
Dangeen di naani ca ndoxum Niil ma ca
Misraa?

Lu ngeen wuti Asiri?
Dangeen di naani ca dexu Efraat ca Ba-
bilon a?

19 Seenug mbon a leen di mbugal,
seen ñàkk kóllère yar leen.
Ñamleen ba gis ni ngeen ma dëddoo,
wormaalatuleen ma, man seen Yàlla Aji
Sax ji,

muy loraange ju leen wex.»
Kàddug Aji Sax jee, Boroom gàngoor yi.

Yuda amul worma.

20 «Yàgg ngeena yiwiku,
dog seeni jéng,
ba ne dungeen ma jaamu.
Kaw tundo tund,
ker garaboo garab gu naat,
gàncu ngeen fa.

21 Moona maa leen jëmbat, ngeen di
ngëneelu reseñ,
di jiwu mu mucç ayib.
Nu ngeen walbatikoo di baadooloy reseñu
áll?

22 Bu ngeen raggoon woon saabu,
ba raggooteek xeme it,
seen ñaawtéef gakk, may gis.»
Kàddug Boroom bi Aji Sax jee.

23 «Nu ngeen ñemee naa: “Sobeelunu
sunu bopp
te toppunu tuuri Baal?”

Seetleen li ngeen nekke ci xur wi‡,
xool-leen li ngeen di def,
mel ni giléem gu ndaw, di wodd-woddi,
fu ne mu daw jëm fa,

24 mbaa mbaamu àll mu miin màndiq mi,
xabtalo bakkanam, di xañtu ngelaw li.
Bu bëggee tēbu, ku ko mana tēye?

Kuuy mu koy sàkku du sonn,
bu ci tolloo rekk, mu jot ko.
25 Ma ne, buleen daw ba mujje tãnki neen
ak put gu wow.

Ngeen naa: “Bul sonn,
sopp nanu yállay doxandéem yi,
te ñoom lañuy topp!”»

26 «Gàcceg sàcc bu ñu jàpp
dees na ko gacceel waa kër Israyil,
ñook seeni buur ak seeni kàngam
ak seeni sarxalkat ak seeni yonent,

27 ñoom ñii naa bii bant: “Yaay sunu baay,”
naan wee doj: “Yaa nu sukk, jur.”
Wonuñu ma kanam, xanaa gannaaw,
te bu leen musiba dikkalee, ñu naa:
“Wallu nu boog!”

28 Waaw, ana seen yàlla yi ngeen sàkkal
seen bopp?

Bu leen musiba dikkalee,
nañ leen wallu, bu ñu ko manee!
Gannaaw yeen waa Yuda,
ni seeni dëkk tollu la seeni yàlla tollu!

29 Ana lu ngeen di layook man?
Yeen ñépp a ma gántal!»

Kàddug Aji Sax jee.
30 «Mbugal naa seeni doom, jariñul dara.

Dégguguñu yar,
bóom ngeen seeni yonent,
mbete gaynde yuy fàdde.

† 2:16 2.16 Memfis ak Tapanes dëkki Misra lañu. Fi ñu ne Memfis am na tekki yu fi indi turu Nof. ‡ 2:23 2.23 xur wi ñuy wax fii, mooy xuru Ben Inom ga ca Yerusalem te ñu daan fa def ay yéfi xèrém.

31 Éey niti Israyili tey,
teewluleen kàddug Aji Sax ji!

«Ni màndiŋ mi aaye, ndax mas naa nee
aaye ci Israyil?
Mbaa ma mel ni réewum lëndëm aki
loraangeem?

Lu waral sama ñoñ naa:

“Noo moom sunu bopp,
dootunu délsi fi yaw?”

32 Ab janq dina fàtte takkaayam?

Am ab séet dina fàtte mbubbum xewam?
Moona sama ñoñ fàtte nañu ma fan yu dul
jeex.

33 Yeen aka mokkal gànctu!

Jeeg ju bon ji sax di jänge ci yeen.

34 Te seeni pendal sax taq na

dereti néew-ji-doole yu deful dara,
fekkuleen leen it ñuy dàjji kër jaambur[§].
Loolu yépp terewul,

35 ngeen naan: “Nun de defunu dara,
merum Yàlla won na nu gannaaw moos.”
Gannaaw nee ngeen bàkkaaruleen,
maa ngii di leen àtte.

36 Yeen aka yomba soppi doxalin!

Waaye Misraa leen di bett,
na leen Asiri bette woon,

37 ngeen jóge ca yenu seeni loxo.

Aji Sax jee wacc ñi ngeen yaakaar,
ba dungeen baaxlee ci ñoom.»

3

Tuub jot na

1 Mu ne: «Su waay fasee jabaram,
mu dem doon jabaru keneen,

Su waa ja jëlaatee ndaw sa ëllëg,*
Loolu du sobeela sobeel réew mii?

Moona yeen gànctu ngeen aki fari far,
Ana nu ngeen mana délsee fi man?»

Kàddug Aji Sax jee.

2 «Téenleen, séentu tund† ya ne faraa!

Ana fu ñu leen fi tëddewul?

Ci yoon yi ngeen di yeeroo
ni manganam muy dogalee ci màndiŋ mi.

Sobeel ngeen réew meek seen gànctook
seenug mbon.

3 Moo tax waame aje,

taw yiy mujje dikkul.

Teewul ngeen dëgër bët nib ganc,
ñakk gacce!

4 Léegi ngeen di ma woo wall naa:

“Baay, yaay sama xeji ca ba may ndaw.

5 Xanaa deesul mer ba faww?

Xanaa xadar du sax?”

Ma ne: “Israyiloo, yeena ko wax,

waaye bon ngeen lu ngeen man.”»

Israyil woyof kumba, Yuda toogadi

6 Aji Sax ji nag wax ma ci jamonoy buur
Yosya ne ma: «Gis nga li Israyil Woyof-
Kumba-si def? Di dem kaw tundoo tund ak
ker garaboo garab gu naat, di fa gànctu.

7 Ma noon su ma defee loolu lépp ba
noppi, dina délsi, te délsiwul. Te doomu
ndeyam Yuda workat bi gis na ci. 8 Gis
naa ne it Israyil Woyof-Kumba-si gànctu
na ba ma yebal ko, jox ko kayitu pase, mu
dem, te taxul doomu ndeyam Yuda workat
bi ragal. Moom it daa dem di gànctu.

9 Ni gànctu yombe Israyil tax na réew mi
sobewu. Njaaloo naak yállay doj, njaalook
yállay bant. 10 Loolu yépp itam taxul Yuda
workat bi, doomu ndeyu Israyil, délsee
léppi xolam fi man, xanaa di jinigal rekk.»

Kàddug Aji Sax jee. 11 Aji Sax ji nag ne
ma: «Li Israyil di woyof kumba lépp sax
moo tane Yuda workat bi. 12 Demal yéeneji

kàddu yii fa bëj-gànnaar. Nga ne:

“Israyiloo, Woyof-Kumba, délsil.”

Kàddug Aji Sax jee.

“Duma la fasal kanam.

Man Boroom ngor laa,

te duma jàpp mer ba faww.”

Kàddug Aji Sax jee.

13 “Nangul ne ñaaw nga rekk,

te man sa Yàlla Aji Sax ji nga tooñ,

di wër di foye sa bopp ak yállay
doxandéem yi

ci ker garaboo garab gu naat,

te dégluwoo ma.”

Kàddug Aji Sax jee.

14 «Yeen doom yu woyof kumba yi,
délsileen.»

Kàddug Aji Sax jee.

«Maay seen boroom kër,

maay jële kenn ci bii dëkk,

ñaar ca bee gox,

boole indi Siyon,

15 tannal leen sàmm yu ma doy,

ñu sàmme leen xam-xam akug muus.

16 Janti keroog bu ngeen baree ba giir ci
réew mi,

deesul waxe gaalu kóllérey Aji Sax ji‡;

xel dootu ci dem,

deesu ko fàttliki sax,

te deesu ko namm,

deesu ko sàkkati sax.»

Kàddug Aji Sax jee.

17 «Janti keroog

Yerusalem, ngànguney Aji Sax ji lees koy
wooye,

xeetoo xeet di fi daje,

ngir Aji Sax, ji turam ñeel Yerusalem,

§ 2:34 2.34 Seetal ci *Mucc ga* 22.1. * 3:1 3.1 Yoonu Musaa mayul ku fase jabaram mu di ko jëlaat, gannaaw bu séyaatee ba tas. Seetal ci *Baamtug yoon wi* 24.1-4. † 3:2 3.2 tund: kaw tund yooyu lañu daan jaamoo tuur yi ñu foogoon ne dañuy nangul am njur. ‡ 3:16 3.16 gaalu kóllérey Aji Sax ji moo doon firndeel teewaayu Aji Sax ji ci digg bànni Israyil.

te dootuñu të ticc ci seen mébét yu bon.

¹⁸ Janti keroog waa kër Yuda ànd ak waa kër Israyil, bawoondoo réewum bëj-gànnaar, wuti réew ma ma séddoon seeni maam.

¹⁹ «Maa leen naroonna teral ni doom yu góor,

may leen suuf su xemmemlu, ngeen gënle xeet yépp suuf. Ma noon dingeen ma wooye baay te dungeen ma dëddu mukk.

²⁰ Teewul, yeen waa kër Israyiloo, ngeen wor ma,

ni as ndaw di wore faram.»

Kàddug Aji Sax jee.

²¹ «Coow dégtu na kaw tund ya ne faraa, bànni Israyil ay jooy ak a tinu.

Ñoo lajj seenu yoon, fátte seen Yàlla Aji Sax ji.

²² Yeen doom yu woyof kumba yi, waññikuleen, ma fajtal seen woyof kumba.»

Kàdduy tuub jib na

Nu ngi nii fekkisi la, yaw kay yaay sunu Yàlla Aji Sax ji.

²³ Naxi neen kay lañu jële ca xërëmi tund yu ndaw ya

ak coowal kaw tund yu mag ya.

Muccu Israyil kay, fi sunu Yàlla Aji Sax ji.

²⁴ Ba ñuy gone ba tey, tuur mu ruslu maa ngi neenal ñaqu maam yi,

seen jur gu gudd ak gu gàtt, ba ci seeni doom, góor ak jigéen.

²⁵ Nan gapproo sunu gacce, sàngoo sunu toroxte.

Nook sunuy maam déy,

ba ñuy gone ba tey jii, nu ngi tooñ sunu Yàlla Aji Sax ji, te dëggalunu sunu Yàlla Aji Sax ji.

4

¹ «Yaw Israyil, sooy waññiku, waññikul fi man.»

Kàddug Aji Sax jee.

«Soo jélee fi sama kanam

sa jëf ju siblu,

te jenguloo,

² xanaa di waate Aji Sax jiy dund,

ci dëgg ak njub ak ngor,

kon xeet yi di barkeeloo Aji Sax ji, di ko sagoo.»

³ Aji Sax ji déy dafa wax waa Yudak Yerusaleem, ne leen:

«Ruujeen seen tool,

buleen ji ciy dég.

⁴ Yeen waa Yudak Yerusaleem, deeleen xaraf ngir Aji Sax ji,

dogleen seen mbuñukay xol,

balaa sama xadar ne jippét ni sawara,

di tàkk te deesu ko fey

ndax seen jëf ju bon.

Xare jib na

⁵ «Nangeen yégle lii fa Yuda,

dégtale ko fa Yerusaleem,

yéenee koog liit fi biir réew mi

te xaacu seen kem kàttan ne leen:

“Dajeleen, nu dem ca dëkk ya tata wër.”

⁶ Yékkatileen raaya, jubale Siyon,

làqujileen, buleen taxaw,

musiba déy laay jële bëj-gànnaar,

muy safaan bu réy.

⁷ «Gayndee fëlle geeram,

fàkkaskatu xeet yee jóg, génne këram,

nara gental seeni dëkk,

ba ñu di gent yu kenn dëkkul.

⁸ Kon nag sol-leeni saaku, ñaawloo te yuuxu ne:

“Merum Aji Sax ji tàng na kat te moyu nu.”

⁹ Bésub keroog,» kàddug Aji Sax jee,

«xolu buur jeex, kàngam ne yacc,

sarxalkat waaru, yonent jommi.»

Yeremeey wax

¹⁰ Ma ne, «Éy Boroom bi Aji Sax ji,

yaa naxlu askan wii nax yu metti,

ba nga nee: “Yerusaleem jàmm lay am,”

te saamar tege ci putam.»

Mbugal taxaw na

¹¹ Janti keroog dees na wax askanu

Yerusaleem wii, ne leen:

«Jaas bu tàng a uppe kaw tund ya ne faraa ca màndij ma,

wuti sama ñoñ.

Du doon ngelaw lees di bàcceek a beese.

¹² Ngelaw lu ko ëpp doole laay indi.

Léegi maa leen di biral sama kàddug mbugal.»

Waa Yerusaleem ay wax

¹³ «Noon baa ngii, di jóg niy niir,

watiiri xareem ni ngélén,

fasam ya gëna gaawi jaxaay.

Wóoy ngalla nun, yàqu nan!»

Yàllaay wax

¹⁴ «Éey Yerusaleem, fóotal sa xol, jële ci lu bon,

ndax nga mucc.

Foo àppal sa mébėti xol yu bon?

¹⁵ Kàddug yéenee ngi jibe Dan,

musiba dégtu na, bawoo tundu Efrayim.

¹⁶ Jottlileen ko xeet yi,

neleen Yerusaleem:

“Songkat yaa ngii riire réew mu sore ma, xaacoondoo fi kaw dëkki Yuda.”

¹⁷ Ñooy gaw Yerusaleem ni wattukati tool, ndax man la gántal.»

Kàddug Aji Sax jee.

¹⁸ «Sa jëfin ak say jëf a la yóbbe lii,

sa musibaa ngook, wex la xàtt,

di dagg sa xol.»

Yeremi jàq na

19 Maaka jàq jàq bay jal-jali,
sama xol biy fuɗɗu!
Éy wii mititu xol!
Duma mana noppi,
maa dégg wooteb liit
ak yuuxi xare.

20 Yéenees na rajaxoo ci kaw rajaxoo,
réew mi mépp ne tasar kay!
Jekki-jekki samay xayma tasaaroo.
Xef-xippi ndimoy xayma ya xotatoo!
21 Xanaa duma gis ba fàww raayab noon,
liitu xare di ko feelu?

Aji Sax ji jéppi na ñoñam

22 «Dofe la sama ñoñ def.
Man, xamuñu maay kan,
mbetey gone yu dul xalaat dara;
dég-dég, tus;
seen xel mépp, lu bon rekk,
lu baax, xamuñu ci dara.»

Addina salfaaño na

23 Maa xool suuf,
ndeke ma nga ne maraas, ne wëyën;
ma xool asamaan,
leer amatu ca.
24 Ma xool tund yu mag yi,
ndeke ñu ngi yëngu,
tund yu ndaw yépp di jaayu.
25 Ma xoolaat, gisuma nit,
njanaaw yépp daw.
26 Ma xool, gis suuf su nangu sa
di ndànd-foyfoy,
dëkk yépp raaf
ndax Aji Sax jeek tangaayu sànjam.

27 Aji Sax ji déy dafa wax ne:
«Duma tas lépp tasar,
waaye réew mi mépp ay gental.

28 Loolooy tax suuf di ñaawlu,
asamaan di lëndëm.
Maa ko wax, maa ko dogu;
duma dëpp, duma deltu gannaaw.»

Yerusalem dugg na fitna

29 Gawar ak fittkat riir,
waa dëkk yépp fëx,
ñii tàbbiy gajj,
ñee ñalgu ci kawi doj,
ñu won dëkkoo dëkk gannaaw,
kenn desatu ca.

30 Yaw Yerusalem mu tas mi,
ana looy def nii,
di solu ba yànj,
gànjaroo wurus,
tusngalu, yàkkleey gët?
Yaa ngi caaxoñu ci neen:
say xéddkat wacc nañu la,
sa bakkan lañuy wut.
31 Baatu ndaw su jagadi laa dégg,
ma nga jàq, di matub taawam.

Baatub Siyon, dëkk bu taaru baa!
Ma ngay àppaat, tàllal yoxo ya,
naan: «Wóoy, ngalla man;
ne yàcc ci loxol bóomkat yi!»

5*Mbugal war na**Yàllaay wax*

1 «Wërleen mbeddi Yerusalem,
xool-leen, seet ciy péncam rekk ba xam
ndegam dingeen gis kenn,
kenn kepp kuy def njub,
di sàmm worma,
ma daldi leen baal.

2 Bu ñu nee sax: «Giñ naa ko ci Aji Sax jiy
dund,»
ay fen lañuy giñ.»

Yeremeey wax

3 Aji Sax ji, xanaa du worma ngay sàkku?
Dóor nga leen, safu leen;
nga làbbli, ñu tanqamlu,
wowle ba raw doj, baña dëpp.

4 Man nag, ma noon: «Ñii de ay baadoolo
rekk lañu,

di def jéfi dof,
xamuñu yoonu Aji Sax ji,
xamuñu lu seen àtteb Yàlla laaj.

5 Kon naa dem seeti kàngam yi,
wax ak ñoom.

Xanaa ñoom dinañu xam yoonu Aji Sax ji,
xam lu seen àtteb Yàlla laaj.»
Waaye ñoo bokk daggook Yàlla,
dogook moom.

6 Moo tax gaynde di génne ci gott bi, fàdd
leen,

bukkiy màndiñ mi di leen yàpp,
segg di tëru seeni dëkk,
ku ca génne, dees na la xotat.
Seeni moy a bare,
te seen ñàkk worma réy.

Yàllaay wax

7 «Yerusalem, ana lu tax ma di la baal,
te say doom wacc ma,
di giñe lu dul Yàlla.

Ma reggal leen, teewul ñuy njaaloo,
riixle, jëm kër ganc ya!

8 Mbete fas yu suur, tukkal,
ku ne ñexal, jëm sa jabaru moroom.

9 Lii, duma leen ko dumaa?»

Kàddug Aji Sax jee.

Mu ne: «Wii xeet, duma ko fey yoolam?»

Dëddu Yàlla, gis ko

10 «Yéegleen seeni tata, yàqte
waaye buleen leen jeejal tàkk.

Tenqileen lawit yi,
ñoñoño bokkul ci Aji Sax ji.

11 Waa kër Israyil ak waa kër Yuda kat,
ñoño ma wora wor!»

Kàddug Aji Sax jee.

12 Mu ne: «Ñoo fenal Aji Sax ji,

naan: “Moom du def dara,
musiba du nu dal,
saamaroo, xiifoo, dunu ci gis dara.
13 Yonent yi daal, ngelawal neen!
Kàddug waxyu newul ci ñoom;
li ñuy wax, na leen yenu!”»

14 Moo tax Aji Sax ji Boroom gàngoor yi
dafa wax ne:
«Gannaaw wax jii lañu wax,
maa ngii di def samay wax di sawara ci sa
gémmiñ,
askan wii di matt,
mu xoyom leen.

15 Éey waa kër Israyil,»
kàddug Aji Sax jee,
«maa ngii di indi fi seen kaw xeet wu
bawoo fu sore.

Xeet wu am kàttan lañu,
xeet wu yàgga yàgg,
wu ngeen xamul seen làmmiñ,
te dégguleen seeni wax.

16 Seen mbari fitt ñafal paxum bàmmeeel,
ñoom ñépp di ñeyi xare.

17 Nooy dikk, warax seen meññeef ak seen
ñam,

jeexal seeni doom, góor ak jigéen,
lekk seen jur gu gudd ak gu gàtt,
saax-saaxee seeni reseñ ak seeni figg;
te dèkk yi ngeen yaakaare seeni tata,
dooley saamar a koy tas.

18 Waaye bési keroog it,»
kàddug Aji Sax jee,
«duma leen jeexal tàkk.

19 Bu ñu nee:
“Ana lu waral sunu Yàlla Aji Sax ji teg nu
lii lépp?”

ne leen: “Yàlla nee:
Ni ngeen ma dèddoo, di jaamu yàllay
jaambur ci seenum réew,
ni ngeen di jaamujee ay jaambur
biir réew mu ngeen moomul.”»

Yàlla àrtu na xeet wi

20 «Jottlileen lii waa kër Yanqóoba,
biral-leen ko fa Yuda, ne leen:

21 Ngalla dégluleen lii,
xeet wu dofe, ñàkk xel wi ngeen doon,
ami gèt te dungeen gis,
ami nopp te dungeen dégg!

22 Man daal, dungeen ma ragal,
am tiituleen ma?»

Kàddug Aji Sax jee.
«Man mi teg gannuu, yemalee ko géej,
dogalal ko ko dàkk te du ko jàll,
lu mu wañax wañax du ko man;
gannax ya day riir, te du jàll!

23 Waaye wii xeet a dègër bopp te déggadi.
Dèddu nañu ma ba wéy.

24 Seen xel demul sax ba ne:
“Tee noo ragal sunu Yàlla Aji Sax,
jij jot, mu tawal nu,

taw yu jèkk ak yu mujj yi,
àppal nu ayi bési ngóob,
sédde nu?”

25 Yooyii seeni ñaawtéef a ko waññi,
seen bàkkaar a leen xañ ngéneel.

Mbon maase na ci xeet wi

26 «Waaw! Daa am ñu bon ci sama ñoñ,
ñuy tèrook a fiire
mbete nappkati picc.

27 Ni kaaf di feeseeki picc,
ni la seeni kër di feese alali càcc,
ba tax ñu yokku ba woomle,
28 yaflu, di nes-nesi.

Seenug mbon it amul kem:
duñu defal jirim njub,
duñu àtte néew-ji-doole dégg.

29 Lii, duma leen ko dumaa?»
Kàddug Aji Sax jee.
«Xeet wu mel nii duma ko fey yoolam?

30 Lu siblu te yées am na ci réew mi:

31 Yonent yiy wax waxuy fen,
sarxalkat yiy jiitee seen coobare,
te sama ñoñ soppe ko ni!
Moo bu muj ga taxawee, nu ngeen di def?»

6

Gawub Yerusalem nuyoo na

1 «Yeen askanu Beñamin, fëxleen,
gënn Yerusalem.

Wal-leen liit gi fa Tekowa,
jafaleen jum yi Bet Kerem, artoo ko,
musiba kat a ngi yère bëj-gannaar,
di safaan bu réy.

2 Yaw Siyon, dèkk bu taaru bi te xejj,
dama lay dammat.

3 Ay sàmm ak seeni gétt ci sa kaw,
ñu samp seeni xayma, wër la,
di foral, ku nekk ak pàccam.

4 Ñii ne: “Waajal-leen xare baak ñoom,
nu songi leen digg bëccëg.

Waaye wóoy nun, jant a ngi lang,
keru ngoon di law!”

5 Ñee ne: “Nan song congum guddi boog,
ba rajaxe seen kër yu yànj.”»

6 Aji Sax ji Boroom gàngoor yi déy da ne:

«Gorleeni bant,
sèkke Yerusalem, gaw ko!
Dèkk bii dees koy mbugal,
àqu noteel la fees dell.

7 Ni bëtu ndox di dawé,
ni lañuy dawale seenug coxor.
Fitnaak salfaañooy riir ci dèkk bi,
gisuma lu moy jagadeek loraange!»

8 «Yeen waa Yerusalem, deeleen dégg
bala ma leena dèddu,
ba gental réew mi
gent bu kenn dèkkul.»

Askan wa tẽ na

9 Aji Sax ji Boroom gàngoor yi dafa wax ne:

«Nañu witta witt ndesu Israyil, ni ñuy witte reseñ, ba nga dawalaat say loxo ca car ya.»
Yeremeey wax

10 Moo kan laay waxal, àrtu ko ba mu déglu, yii boroom noppi paaxee tëë teewlu! Kàddug Aji Sax jaa ngii, mel ni lu ñu rus, lu ñu safoowul!

11 Maa ngi meral Aji Sax ji ba fees ba manatuma koo dékku. Aji Sax ji nee: «Sippi ko tuut-tànk yi ci mbedd mi,

sippiwaale ko waxambaane yi daje, mu laawaale jèkkèr ak jabar, mag ak màggat,

12 seeni kër doon alali jaambur, ak seeni tool it ak seeni jabar.

Maay xàcci sama loxo déy, dal ci kaw waa réew mi.»

Kàddug Aji Sax jee.

13 «Ndax ki gëna tuut ba ki gëna mag, ñépp a ngi lewal lu lewul.

Yonent akub sarxalkat,

ñépp a ngi wor.

14 Sofental nañu sama pajum ñoñ ñi dammto,

naan: “Jàmm, lépp jàmm!”

te jàmm amul.

15 Ñu wara am gacce ci seen jëf ju siblu, te gacce gacceelu leen.

Xamuñu sax luy kersa!

Moo tax ñuy fèlënoondook ñiy fèlëñu.

Kera ba ma leen di dikkal, ñooy téréf.»

Aji Sax jee ko wax.

Pexey askan wi jur na musiba

16 Aji Sax ji dafa wax ne:

«Taxawleen ca selebe yoon wa, xool, te laajte yoon ya woon, ne: “Ana yoonu mbaax?”

Ngeen awe ca, am noflaayu bakkan.»

Ñu lànk ne: «Awunu ca.»

17 «Ma tabbal leeni wattukat

ne: “Teewluleen liit gu jib.”»

Ñu lànk ne: «Teewluwnu.»

18 «Moo tax yeen xeet yi, dégluleen; yeen waaso yi, seedeleen liy xaar ñii.

19 Yeen waa àddina, dégluleen!

Maa ngii di indil askan wii musiba, seeni pexe jural leen.

Ñoo faalewul samay kàddu,

gàntal sama yoon.

20 Lu may doye lii?

Ndàbb lu jóge Saba*,

diw gu xeeñ, bawoo réew mu sore?

Seeni saraxi rendi-dóomal safu ma; seen saraxi jur, bugguma.»

21 Moo tax Aji Sax ji wax ne:

«Maa ngii di tegal askan wii ay pakk, ñu fakkastaloondoo, baay ak doom, dèkkandook ub xarit, ñépp sànk.»

Noon sàqee na běj-gànnaar

22 Aji Sax ji dafa wax ne:

«Aw askan a ngii bàyyikoo réewum bėj-gànnaar,

xeet wu mag lañuy doon, sàqee fa cati àddina.

23 Fitt aku xeej lañuy nɛb,

néeg lool, duñu yèrém;

seen coow ni riirum géeej,

ñu war seeni fas, rɛpptaal,

làng-déral leen,

yeen waa Siyon, dèkk bu taaru bi.»

Waa Yerusalem ay wax

24 «Danoo dégg riir mi,

sunuy yoxo yoqi,

ñjaqare ne nu taral,

ni mititu mat.

25 Kii naa: “Bul génn ci àll bi!”

Kee naa: “Bul jaar ci yoon wi!”

Saamar kay a nga ca loxol noon ba,

tiitaange dajal fépp!»

Yeremeey wax

26 Éey bokk yi, sol-leeni saaku,

diwoo dóom, ñaawloo ko.

Ñaawluleen ni kuy dɛj benn bàjjo

te jooy jooy yu metti,

nde yaqkat bi day jekki,

ne sunu kaw dàll!

Yallaay wax

27 «Maa la def sama nattukatu ñoñ,

nga di leen nattu ni ñuy nattoo xaaalis,

te war leena seetlu, nemmiku seen jikko.»

Yeremeey wax

28 Ñoom ñépp a di fippukat yu fétteeral,

wër di sos,

dégërle ni xàñar ak weñ gu ñuul.

Ñoom ñépp di yaqkat.

29 Tègg wal taalam, mu yànj;

sawara seeyal beteex.

Xellees na koo xelli ci neen,

taxul li ci bon génn.

30 Dees na leen wooye mbuubitum xaaalis,

nde Aji Sax ji buub na leen, sànni.

7

Yeremi yedd na demkati kër Yalla yi

1 Kàddu gii dikkal na Yeremi, bawoo fa Aji Sax ji. Mu ne ko: ² «Taxawil fa bunti kër Aji Sax ji, nga yeene fa kàddu gii, ne leen: “Mboolem yeen waa Yuda ñiy jàlle bunt yii, di jaamusi Aji Sax ji,

* 6:20 6.20 Saba am réew la wu bokk ci sowu Arabi, fa féete suuf.

dégluleen kàddug Aji Sax ji. ³ Aji Sax ji Boroom gàngoor yi, Yállay Israyil dafa wax ne: Jekkal-leen seeni jikkook seeni jëf, ma dëël leen bii bérab. ⁴ Buleen naxe seen bopp kàdduy caaxaan, naan: 'Kër Aji Sax jaa ngi, kër Aji Sax jaa ngi fii, kër Aji Sax jee!' ⁵ Su ngeen jekkalee jekkal seeni jikko ak seeni jëf déy, di defa def yoon seen digg ak seen moroom, ⁶ te notuleen doxandéem, ab jirim akub jëtun, tuuruleen deretu jaamburu Yàlla, fi bii bérab, toppuleen yeneen yàlla bay loru, ⁷ su boobaa, ma dëël leen bii bérab, réew mi ma joxoon seeni maam, bu yàgg, ba fàww. ⁸ Yeena ngii di naxe seen bopp waxi caaxaan yu amul njariñ. ⁹ Yeen, nu ngeen mane di sàcc, di bóome, di jaaloo, di giñi fen, di taalal Baal, tuur mi cuuraay, di topp yeneen yàlla yu ngeen xamul, ¹⁰ tey dikk taxaw fi sama kanam, biir kër gii ñu ma tudde, te naan: 'Nun kay raw nanu,' ba tax ngeen di def mboolem lu siblu lii? ¹¹ rawtub sàcc daal ngeen def kër gii ñu ma tudde? Man de lii laa gis!' Kàddug Aji Sax jee.

¹² «'Demleen rekk kay ca sama bérab ba ca Silo, fa ma jëkkoonaa dëël sama tur, ngeen xool na ma ko def ngir mbonug Israyil, sama ñoñ.

¹³ «'Gannaaw def ngeen jëf jii jépp nag,' kàddug Aji Sax jee, "te ma waxoon leena wax ay yooni yoon, dégluween; woo leen, wuyuwleen, ¹⁴ kër gii ñu ma tudde, ngeen yaakaar ko, bérab bii ma leen joxoon, yeen ak seeni maam, na ma def Silo laa koy def. ¹⁵ Dama leen di dàq, ngeen sore ma, na ma dàqe woon seen bokk yépp, askanu Efrayim gépp*."

Yàlla gântal na

¹⁶ «Waaye yaw bul ñaanal askan wii, bu leen yékkatil kàddug ñaan, bu leen tinul fi man. Du maa lay déglu moos!

¹⁷ «Xanaa gisoo li ñu nekke fi dëkki Yuda ak ci mbeddi Yerusaleem? ¹⁸ Doom a ngi taxan, baay di taal, jigéen di not lu mu nàkkal ki ñuy wooye Lingeeru asamaan, di tuural ay naan yeneen yàlla, di ma ko naqarale! ¹⁹ Du man lañuy naqaral moos!» Kàddug Aji Sax jee. Mu ne: «Xanaa kay ñoo ciy rus!»

²⁰ Moo tax Aji Sax ji Boroom bi dafa wax ne: «Sama xadar a ngii di sottiku fi bii bérab, fi kaw nit ak mala, garab ak lu suuf meññ, lépp ne jippét, te deesu ko fey.»

²¹ Aji Sax ji Boroom gàngoor yi, Yállay Israyil dafa ne: «Seen juru saraxu rendi-dóomal, dollileen ko ci seen yeneen sarax,

te lekk yàpp wi†. ²² Bés ba may génnee seeni maam Misra déy, waxuma leen woon mbaa di leen sant mbirum saraxu rendi-dóomal ak yeneen sarax. ²³ Mbir mii déy laa leen santoon ne leen: "Déggal-leen ma, ma doon seen Yàlla; yeen ngeen doon sama ñoñ. Doxeleen wépp yoon wu ma leen sant, su ko defee ngeen baaxle." ²⁴ Waaye déggluwñu ma, teewluwñu ma, xanaa di jëfe seen xel ak seen dègèr bopp ak seen bon xol, ba tax ñu dellu gannaaw, jëmuñu kanam. ²⁵ La dale bés ba seeni maam génnee réewum Misra ba bésub tey jii, yónnee naa leen bés bu nekk mboolem sama jaam ñi, yonent yi. ²⁶ Waaye dégluwñu, teewluwñu ma, xanaa saju loos, di bon, ba yées seeni maam.

²⁷ «Dinga leen wax kàddu yii yépp, te duñu la déglu, nga woo leen, duñu la wuyu. ²⁸ Su ko defee nga ne leen: "Xeet a ngii wu dul déglu kàddug Yàllaam Aji Sax ji, nanguwñu yar, worma tumurànkeel leen, ba daggook seen làmmiñ."

Xuru Ben Inom di xuru ndee

²⁹ «Waa Yerusaleemee, seen njañ‡ li ngeen séddoo Yàlla,

xuufleen ko, sànni, ñaawloo ko, xaaculeen fa kaw tund ya ne faraaas, nde Aji Sax ji xalab na, wacc na seen maas gii sabab sànjam.

³⁰ Waa Yuda déy, ñoo def lu ma ñaawlu.» Kàddug Aji Sax jee. «Ñoo yeb yëf yu siblu fi biir kër gi ñu ma tudde, di ko sobeel.

³¹ Ñoo tabax ay jaamookaay ca Tofet fa xuru Ben Inom, di fa sarxe seeni doom, góor ak jigéen, lakk leen, te santaanewma ko, jaarul sax sama xel. ³² Moo tax ay bés a ngii di ñëw,» kàddug Aji Sax jee, «deesatul tudd Tofet mbaa xuru Ben Inom, xanaa xuru Bóomukaay.» Dees na rob ca Tofet ndax ñàkk suuf. ³³ Néewi xeet wii mujj di lekku njanaaw ak rabu àll, te kenn du leen mana dàq. ³⁴ Maay dakkal fi dëkki Yuda, dakkal fi mbeddi Yerusaleem coowal mbégteek bannex, dakkal kàddug boroom séet, dakkal kàddug séet, ndax réew mu tumuránke.

8

¹ «Su boobaa déy,» kàddug Aji Sax jee, «noon yeey sulli yaxi buuri Yuda ak yaxi kàngam yi ak yaxi sarxalkat yi ak yaxi yonent yi ak yaxi waa Yerusaleem, fa seeni bàmmeel,

* 7:15 7:15 Efrayim genn la ci fukki giiri bànni Israyil ya séq réewum Israyil, ba bëj-gannaaru réewum Yuda.

† 7:21 7:21 Ci yoon, saraxu rendi-dóomal, deesu ci lekk dara. Yàllaa ngi leen di ñaawal fii, di leen won ne gedd na seen bépp sarax. ‡ 7:29 7:29 njañ: seetal ci *Màndij* ma 6.1-8.

2 weer leen ci naaj week weer wi
ak mboolem biddiww yi ñu soppoon,
di leen jaamu, di leen topp ak a sàkku,
di leen sukkal.
Deesu ko dajale, deesu ko suul;
day mel niy jonkan fi kaw suuf si.
3 Dee mooy gënal dund
mboolem ku des ci njaboot gu bon gii,
ak mboolem fu ñu dese fa ma leen tasaare
woon.»
Kàddug Aji Sax jee, Boroom gàngoor yi.

Askan wi të na ticc

4 «Nanga leen wax ne leen:
Aji Sax ji dafa wax ne:
Ku daanu, da dul jógaat?
Am ku lajj, du délsi?
5 Lu tax xeet wii dëddu?
Lu tax Yerusalem gii lajj, baña délsi?
Ñu ngi langaamoo naxi neen,
baña délsi.
6 Teewlu naa, déglu naa;
du lu jaadu lañu wax.
Kenn tuubu ci mbonam,
ba ne: “Lu ma def nii?”
Ku nekk a topp yoonam,
ni fas wu mämm cib xare.
7 Ag xodd sax xam na bésib demam,
pitax, wetwet ak mbelaar it dem,
tey sàmm seen bésib délsi.
Waaye sama ñoñ faalewuñu àtteb Aji Sax
ji.
8 Nu ngeen man ne: “Am nan xel,
nungeek yoonu Aji Sax ji,”
te xalimay yoonalkat soppi ko fen?»
9 Dees na gacceel boroom xel yi,
ñu jaq, tarsu.
Kàddug Aji Sax jaa ngii ñu dëddu,
kon ana seenum xel?

10 «Maay joxe seeni jabar,
jox seeni tool ay foqatikat,
ndax ki gëna tuut ba ki gëna mag,
ñépp a ngi lewal lu lewul.
Ab yonent akub sarxalkat, ñépp a ngi wor!
11 Sofental nañu sama pajum ñoñ ñi
damntoo,
naan: “Jàmm, lépp jàmm!”
te jàmm amul.
12 Ñu wara am gacce ci seen jëf ju siblu,
te gacce gacceelu leen.
Xamuñu sax luy kersa!
Moo tax ñuy fêlëñoondook ñiy fêlëñu.
Kera ba ma leen di dikkal, ñooy téréf.»
Aji Sax jee ko wax.

Yaakaar tas na

Yàllaay wax
13 «Maa leen di witta witt.»
Kàddug Aji Sax jee.
«Garabu reseñ du dese doom,

figg du dese doom,»
kàddug Aji Sax jee,
«xob ya sax day wow.
Lu ma leen joxoon, récc na leen.»
Askan waay wax
14 «Ana lu nuy toog?
Fabuleen, nu dem ca dëkk ya tata wër,
deeyi fa.
Sunu Yàlla Aji Sax ji nar na sunu dee;
moo nu nàndal tookey mbugal,
nde noo tooñ Aji Sax ji.
15 Nuy yaakaar jàmm,
dara baaxul;
nuy séentum paj,
tiitaange ne jaas!
16 Seen noowi fas yaa dégtoo bëj-gànnaar
fa Dan,
seen naari góor di ñexal, suuf sépp yëngu.
Ñu dikk, tas réew mi tasar,
booleek li ci biiram,
ak dëkk beek ñi ci biiram.»
Yàllaay wax
17 «Maa ngii déy di leen yónnee
jaani ñàngóor yu déggul jat,
ñu di leen matt.»
Kàddug Aji Sax jee.

Yeremi am na naqar

Yeremeey wax
18 Ndaw naqar wu tiis,
ndaw xol bu diis!
19 Sama bokk yaa ngooguy yuuxu
yuux yu àkki fu sore,
naan: «Moo Aji Sax ji daa newul Siyon a?
Moo Buurub Siyon da fee nekkatul a?»
Yàllaay wax
«Lu tax ñuy yékkati sama xol
ak seen jëmme tuur yii,
seen yàllay doxandéem yi tekkiwul dara?»
Yeremeey wax
20 Ngóob wéy na, jamonoom wees,
te nun de muccagunu.
21 Sama bokk yi seen xol jeex
tax na sama xol jeex,
may tiislu, tancoo njàqare!
22 Moo diwu pajtal amul Galàdd a*?
Am fajkat a fi amul?
Ana lu waral bokk yi taneeguñu?
23 Éy ku may duyal sama bopp ndox,
saay gët di xellyi rongooñ
yu ma jooye guddeek bëccëg
bokk yi ñu bóom?

9

1 Éy ku ma mayoon ci màndiñ mi
dalù panaanum njëggaan,
ba ma teqlikook bokk yi, wacc leen,
dem, bëyyi leen?
Ñoom ñépp ay bokkaale,
di gàngooru workat.

* 8:22 8.22 Galàdd ab gox la bu féeete dexu Yurdañ penku te nekkoon fu bare gàncaxi pajtal.

*Dëgg jeex na
Yàllaay wax*

² «Ñu ngi tàwwi ni fittkat seen làmmiñu workat,

seen doole ci réew mi doxaluñu ci yoon.

Ñu ngii di def lu bon ci kaw lu bon, te man faalewñu ma.»

Kàddug Aji Sax jee.

³ «Na ku ne moytu dëkkandoom te baña wóolu menn mbokk.

Kuy mbokk déy lal nga pexem wuruj, di wuruj;

kuy dëkkandoo, sos ngay wéye.

⁴ Ku ne sa dëkkandoo ngay nax, te dëgg, doo ko wax.

Dañoó tàmmi fen,

di def njekkar ba sonn.

⁵ Yeena ngi dëkke njublan, njublanj rekk,

faaletuleen ma.»

Kàddug Aji Sax jee.

⁶ Moo tax Aji Sax ji Boroom gàngoor yi

wax ne: «Maa ngii di leen segg, nattu leen ni weñ gu sawara seeyal, xelli!

Ana nu may def neneen

ak sama ñoñ?

⁷ Seen làmmiñ di fitt guy bóome,

seeni wax dig njublanj.

Nit di wax moroomam jàmm,

te di ko tëru cim xelam.

⁸ Lii дума leen ko dumaa?»

Kàddug Aji Sax jee.

Mu ne: «Xeet wu mel nii дума ko fey yoolam?»

*Jooy jot na
Yeremeey wax*

⁹ Tund ya laay jooy, di yuuxu,

di jooy parluy màndinj ma,

fa lépp lakk, ba jaareesu fa,

déggeesul baatu jur;

njanaaw ak mala,

lépp daw, ne mes.

Yàllaay wax

¹⁰ «Maay def Yerusalem jali doj,

till yi dëkke;

ma def dëkki Yuda gent bu kenn dëkkul.»

Yeremeey wax

¹¹ Ana ku muus, ba xam lu waral lii?

Ku Aji Sax ji waxal,

mu wax nu lu waral réew mi sàнку,

gental ni màndinj mi,

kenn jaaru fi?

¹² Aji Sax ji neeti:

«Ñoo wacc sama yoon

wi ma leen tegaloon,

sàmmuñu sama kàddu,

jëfewuñu ko,

¹³ xanaa toppoo dëgër bopp,

topp tuuri Baal

yi leen seeni maam miinaloon.»

¹⁴ Moo tax Aji Sax ji Boroom gàngoor yi, Yàllay Israyil dafa wax ne:

«Maa ngii di leelsi xeet wii njàqarey xeme, nàndal leen tookey mbugal.

¹⁵ Maa leen di wasaare fi biir xeet yu ñu xamuloon,

du ñoom, du seeni maam.

Maa leen di tofal saamar, ba raafal leen.»

¹⁶ Aji Sax ji Boroom gàngoor yi dafa wax ne:

«Ne leen: Waajleena wooyi jigéeni jooykati dëj yi, ñu dikk;

yónneeleen ca ña gëna man, ñu dikk.»

Yeremeey wax

¹⁷ Nañu gaaw dëbbeel nuy jooy,

gët taa, rongooñ wal.

¹⁸ Yuux a ngoog, jibe Siyoñ.

Ñu naa: «Nooka rajaxoo,

torox ba ne tott,

noon màbb sunuy dëkkuwaay,

nu génn réew mi.»

¹⁹ Yeen jigéen ñi,

ngalla dégluleen kàddug Aji Sax ji,

taataan waxam,

ba jàngal seeni janq jooyi dëj,

jigéen ju ne jàngal moroomam yuuxi dëj.

²⁰ Ndee déy moo ñalgoo sunuy palanteer,

dugg sunuy kër yu yànj,

ngir fàdd gone yi ci mbedd mi,

ak xale yu góor yi ci pénc yi.

Yàllaay wax

²¹ «Ne leen: Kàddug Aji Sax jee.

Néew yeey wetaroo ci àll bi, mel niy jonkan,

ni gub yu góobkat won gannaaw, kenn forul.»

Ku xam Yàlla rekk a xelu

²² Aji Sax ji dafa wax ne:

«Ku xelu, bumu damoom xelam;

ku jàmbaraare, bumu damoo njàmbaraaram;

ku woomle, bumu damoom koomam.

²³ Kuy damu kay, na damoom xelam

mu ko may mu xam ma,

xam ne maay Aji Sax,

jiy jëfe ngor ak dëgg ak njekk fi kaw suuf.

Loolu déy mooy sama bannex.»

Kàddug Aji Sax jee.

Xaraf, na Yàlla tax

²⁴ «Ay bés a ngii di ñëw,»

kàddug Aji Sax jee,

«maay dikkal képp ku xarafam yem ci yaram,

²⁵ muy waa Misra, di waa Yuda,

di Edomeen ñeek Amoneen ñi,

di Mowabeen ñeek

mboolem ñiy wat seen peggu kawaru bopp

te dëkke mändin mi,
nde xeet yooyu, kenn xarafu ci dëgg,
waaye bànni Israyil gépp it
xarafuñu xarafu xol* .»

10

Aji Sax ji du moroomu xërëm

¹ Yeen bànni Israyil, dégluleen kaddu,
gi leen Aji Sax ji dégtal.

² Aji Sax ji dafa wax ne:

«Jikkoy xeeti yéefar yi, buleen ko roy;
mándargam asamaan, buleen ko tiit;
na ko yéefar yi tiit.

³ Aaday xeet yi kat neen la.
Garab lañuy dagge ca gott ba,
ab yettkat yette ko sëmfiñ,

⁴ rafetale xalis ak wurus,
daaj koy pont, dëgéral,
ba du yëngu;

⁵ muy saf kuñeental
ci biir tookeerub xaal.

Du wax, du séqi jéego,
ñu di ko ganjar-ganjaree.
Buleen ko ragal, du lore, du jariñe.»

Yeremeey wax

⁶ Aji Sax ji, kenn melul ni yaw,
yaaka mäg, jambaare, mäggu tur.

⁷ Yaw Buuru xeet yi, ana ku la dul ragal?
Yaw déy yaa yelloo ragal.
Mboolem ñi xelu ci xeet yi
ak mboolem seeni buur,
kenn melul ni yaw.

⁸ Ñoom ñépp a bokk dofe, ñakk bopp:
xam-xamu kasara, bant kese!
⁹ Xalis lañuy jële Tarsis, xoobe ko bant,
wurus wu jóge Ufas, ñu boole ca,
ndaanaan liggéey ko,
tëggu gànjar yett ko,
ñu solal ko ndimo lu yolet
ak lu xonq curr,
lépp di liggéeyu ràbb yu xareñ.

¹⁰ Waaye Aji Sax jeey Yàlla dëgg.
Mooy Yàlla jiy dund,
di buur ba fàww,
xadaram gësëm àddina,
meram man xeet yi.

¹¹ Lii nag, nangeen ko siiwal:
«Seen yàlla, yi sàkkul asamaan, sàkkuñu
suuf,
ñoooy sànk, jóge fi suuf ak fi asamaan
tiim.»

¹² Suuf, Aji Sax jee sàkke kàttanam;
dun bi, mu sampem xelam;
asamaan, mu lale xam-xamam.

¹³ Bu àddoo, ndoxum asamaan riir;
mu yéegey niir fa cati àddina,
yebbee ngelaw fa dencam ya,

daldi melax, taw.

¹⁴ Nitoo nit dim sannax, sore xam-xam:
te képp kuy tég sa jëmmu tuur, yaa aña
gacce.

Sa jëmme weñ ji nga xelli, di neenug neen,
noog bakkan, tus!

¹⁵ Cóoloolu neen, liggéeyu caaxaan;
bu bésam taxawee, mu sànk.

¹⁶ Ki séddoo Yanqóoba déy wuute naak yii
caaxaan.

Kookoo bind lépp,
te Israyil di giir gi mu séddoo.

Kookooy Aji Sax ji Boroom gàngoori xare
yi!

Mbugal dikk na

¹⁷ Yerusalemee, yeen ñi ñu gaw,
forleen seen ëmb.

¹⁸ Aji Sax ji déy dafa wax ne:
«Maa ngii naa xërr waa réew mi bii yoon,
teg leen njàqare, ba ñu yég ko.»

Yerusalem ay wax

¹⁹ «Wóoy man, yàqu naa!

Ndaw góom bu metti!
Dama noon lii jàngoro donj a,
naa muñ!

²⁰ Xayma xotatoo,
buumi xayma xëttandoo,
samay doom wacc ma, ne mes;
kenn sampatul sama xayma, firi ko.»

Yeremeey wax

²¹ Sàmme xeet weeka dofe:

Aji Sax ji, sàkkuwñu ko.

Moo leen taxa bonle,

seen jur gépp tasaaroo.

²² Xibaar a ngoog, di ñëw,
riir mu réy a yéngoo réewum bëj-
gannaar,

nara gentel dëkki Yuda yu mag yi,
till yi dëkke.

Yeremi tinu na Aji Sax ji

²³ Aji Sax ji, maa xam ne
nit moomul yoonam,
kuy dox moomuli jéegoom.

²⁴ Aji Sax ji, yar ma lu yem,
te bañ maa yare mer,
di ma semmal.

²⁵ Xéppal sa xadar yéefar yi la yégul,
ak làng yi la tuddul.

Ñoo bóom giirug Yanqóoba,
bóom leen ba fàkkas leen,
gentel seen dëkkuwaay.

11

Yuda fecci na kóllère

¹ Kaddu gii dikkal na Yeremi, bawoo fa
Aji Sax ji: ² «Dégluleen sàrti kóllère gii.

* **9:25** 9.25 Xeeti àddina yu bare baaxoo nañu di xaraf. Waaye xaraf ci la Yàlla nammoona birale kóllère gi dox digganteem ak bànni Israyil. Moo tax gépp góor gu bokk ci woowu askan waroona fésal ci yaramam mándargam xaraf miy firndeel googu kóllère, te ànd ceek xolu jéfe ko.

Te yaw Yeremi, nga àgge ko képp kuy waa Yuda ak waa Yerusalem. ³ Nga ne leen: «Aji Sax ji Yállay Israyil dafa wax ne: Alkànde ñeel na képp ku sàmmul sàrti kóllère ⁴ gii ma santoon seeni maam bés ba ma leen génnee réewum Misra, taalu xellikaayu weñ gu ñuul ba. Ma noon leen ngeen déggal ma te jéfe sàrti kóllère gi ni ma leen ko sase, ba doon sama ñoñ, man ma doon seen Yàlla. ⁵ Su ko defee ma wàccook ngiñ, la ma giñaloon seeni maam ne dinaa leen may réew mu meew maak lem ja tuuroo, muy fii tey.» Ma ne ko: «Tigi, Aji Sax ji.»

⁶ Aji Sax ji ne ma: «Yéeneel mboolem kàddu yii ci biir dèkki Yuda yu mag yi ak ci mbeddi Yerusalem, nga ne: «Dégluleen sàrti kóllère gii te jéfe ko. ⁷ Artu naa àrtu seeni maam, dale ko ba ma leen génnee réewum Misra, ba tey jii ma jàppoo di leen àrtu, naan leen ngeen déggal ma. ⁸ Waaye dégluwñu, teewluwñu, xanaa ku nekk di wéye dègër bopp, topp ag bon xolam. Moo tax ma wàcce ci seen kaw mboolem sàrti kóllère gii ma leen santoon ñu war koo jéfe te jéfewuñu ko.»

⁹ Aji Sax ji dellu ne ma: «Pexem fippu feeñ na ca Yuda gépp ak ca waa Yerusalem. ¹⁰ Dellu nañu ca seen ñaawtéefi maam, ya bañoona sàmm samay kàddu. Ñoom it topp nañu yeneen yàlla, di leen jaamu. Waa kër Israyil ak waa kër Yuda fecci nañu kóllère ga ma fasoon ak seeni maam.»

¹¹ Moo tax Aji Sax ji dafa wax ne: «Maa ngii di leen wàcceel musiba mu ñu dul mana récc. Dinañu ma ne wóoy te duma leen déglu. ¹² Su ko defee waa dèkki Yuda yu mag yeek waa Yerusalem dem jooytuji ca yàlla, ya ñuy taalal cuuraay, te duñu leen mana wallu mukc ci seen jamonoy musiba.

¹³ «Yaw Yuda, ni sa dèkk yu mag tollu, ni la say tuur tollu. Ni mbeddi Yerusalem tollu it, ni la sarxalukaay yi ñu fa saam tollu, ñu di fa taalal cuuraay Baal, tuur mu seexluwu mi.»

¹⁴ «Yaw nag Yeremi, bul ñaanal askan wii. Bu leen tinul, bu leen dagaanal. Ndax kat keroo bu ñu nekkee ci seen musiba, ba naan ma wóoy, du maay déglu.»

*Aji Sax ji dèddu na soppeem
Yàllaay wax*

¹⁵ «Ana lu samay soppe di defati sama kër? Ñu bare ci ñoom a ngi def lu bon. Ndax seeni sarax man naa far seen jéf ju ñaaw, ba tax bu ñuy def lu bon, di ko bége?»

¹⁶ Oliw naat, jekki doom; nii la leen Aji Sax ji tudde woon, waaye riir mu réy lay jibal,

jafal ko, mu tàkk, taar réer car ya, menjj.

¹⁷ Aji Sax ji Boroom gàngoor bi leen jëmbatoon, moo leen tuddal lu bon. Nee: «Waa kër Israyil ak Yuda ñoo def lu bon, di taalal Baal cuuraay ba merloo ma.»

Ñu ngi fexeel Yeremi

¹⁸ Aji Sax jee ma xamal, ma xam, ba gis seeni jéf.

¹⁹ Ndax damaa naagu woon ni xar mu ñu jème rendikaay ba. Xawma woon ne man lañuy lalal ay pexe, naan: «Nan gor garab ak doomam, dagge ko fi réewum boroom bakkan, ba deesul fàttlikooti turam.»

²⁰ Ma ñaan Aji Sax ji Boroom gàngoor yi, kiy àtte dègg, di nattu xel ak xol, ne ko: «Yaw laa diis sama mbir, won ma séen mbugal.»

²¹ Moo tax Aji Sax ji wax lii ci mbirum waa Anatot, ñiy wut sama bakkan, naan ma: «Baal di waxe waxyu ci turu Aji Sax ji, lu ko moy nu rey la.» ²² Moo tax kay Aji Sax ji Boroom gàngoor yi wax ne: «Maa ngii di wàccesi mbugal fi seen kaw; seen xale yu góor fàdoo saamar, seeni doom, góor ak jigéen, deeye xiif. ²³ Aw nit, duñu ko dese; maay wàcceel waa Anatot safaan, bu seen atu mbugal taxawee.»

12

Yeremie ngi ñaxtu

¹ Aji Sax ji, dèggu nga def, li may tawatsi fi yaw lépp. Teewul ma di la diis mbir: lu tax ku bon di baaxle, bépp workat bu bon di féex?

² Yaa leen jëmbat, ñu sampi reen, law ba meññ; jegeñal la seen làmmiñ, te fekk nga sore seen xol.

³ Waaye yaw Aji Sax ji, xam nga ma; gis nga ma, seetlu sama xol ci yaw. Diri leen niy xar yu ñuy rendi, beral leen bésuub rendi.

⁴ Ba kañ la réew mi naa seren, gancaxu tooloo tool di lax? Rabu àll ak njanaaw a ngi sànkun ngir mbonug ñi fi dèkk te naan: «Moom xoolul sunu muj!»

Yàlla tontu na

⁵ «Ndegam boroom ñaari tànk ngay rawanteel, xoox, nooy rawanteeki fas? Soo wóoluwwul lu moy àll bu ne yàmblan, nooy def ak gottub Yurdan?»

⁶ Say bokk ak sa waa kër baay sax, ñoom it wor nañu la, ñoom it xaacu nañu, sam la; te bu ñu lay wax jàmm it, bu leen gëm.»

Aji Sax ji dèddu na séddoom

⁷ «Dèddu naa sama kër, maa wacc sama séddoo, wacce sama soppex xol loxol noonam.

⁸ Sama séddoo ngi may niru léegi gaynde ci gott bi,

di ma xiiru, ba tax ma jéppi ko.

⁹ Sama séddoo baa ngi may saf tan mu todde

mu moroomi tanam gaw.

Doxleen dajaleji rabi àll yépp, indi leen ci bernde ji.

¹⁰ Gàngooru sàmm a sèxètoo sama tóokèru reseñ,

joggati sama waar,

def waar wi ma neex

màndin mu ne maraas.

¹¹ Def nañu ko gent buy jooy fi sama kaw, réew mi mépp gentala gental, te saful kenn.

¹² Tundoo tund wu ne faraas fi màndin mi, ay yàqkat a ngi ciy bawoo,

doon saamaru Aji Sax ji, di faagaagal réew mépp,

cat ba cat,

jàmm réer luy dund!

¹³ Jiwum pepp, goob ay dég;

sonn, ñakk yool,

xanaa mbetteel ci meññeef mii sababoo ci merum Aji Sax ji.»

Aji Sax ji àrtu na dèkkandooy Israyil

¹⁴ Aji Sax ji dafa wax ne: «Mboolem sama dèkkandoo yu bon, yi laal céru suuf bi ma sédd Israyil sama ñoñ, maa ngii di leen déjjatee seen réew, te waa kër Yuda, maa leen di seppex fi seen digg. ¹⁵ Waaye bu ma déjjatee yooyu xeet ba noppi, dinaa leen dellu yèrèm, ku nekk, ma delloo ko céram, ku nekk ak suufam. ¹⁶ Waaye bu ñu royee ba roy sama ñoñ, di jéfe ni sama ñoñ wara jéfe, di giñe sama tur naan: “Giñ naa ko ci Aji Sax jiy dund,” na ñu daan royloo sama ñoñ, ba ñuy giñe Baal, tur mi, su boobaa ñu sampu fi sama digg ñoñ. ¹⁷ Waaye xeet wu ma ci déggalul, xeet woowu dama koy déjjati, déjjat, sànk leen.» Kàddug Aji Sax jee.

13

Colu Yeremi misaal la

¹ Aji Sax ji da maa wax ne ma: «Demal jèndi njiitlaayu lèe*, nga woddoo ko, te bu ko ndox laal.» ² Ma jènd njiitlaay, woddu,

* **13:1** 13.1 njiitlaay li ñuy wax fii, séru njiitlaay lu gàtt lay doon. † **13:4** 13.4 Fara bérab la bu bokkul ak dexu Efraat doonte neexoo nañuy tur.

muy la Aji Sax ji wax. ³ Aji Sax ji dikkal ma ñaareel bi yoon, ne ma: ⁴ «Jèlal njiitlaay li nga woddoo, te daldi dem ba Fara†, nga làqi ko fa ca xar-xaru doj ya.» ⁵ Ma dem làqi ko Fara, muy la ma Aji Sax ji sant. ⁶ Ñu dem ba mu mat ay fan yu takku, Aji Sax ji ne ma: «Demal Fara, jèli njiitlaay la ma la santoon nga làqi ko fa.» ⁷ Ma dem fa ma làqoon njiitlaay la, sulli ko. Ndeke njiitlaay la yàqu na, ba amatul njariñ!

⁸ Kàddug Aji Sax ji dellu dikkal ma, ne ma: ⁹ «Aji Sax ji dafa wax ne: Ni lii yàqoo, ni laay sàggee sagub Yuda ak sagu Yerusalem bu réy bi. ¹⁰ Askan wu bon wii bañ maa déggal, tè ticc di wéye seen coobare, di topp yeneen yàlla, di leen jaamook a sujjóotal, nañu mel ni njiitlaay lii amul benn njariñ. ¹¹ Ndx ni njiitlaay di taqe ci lupp nit, noonu laa jèle woon waa kër Israyil ak waa kër Yuda, taqoo leen.» Kàddug Aji Sax jee. Mu ne: «Maa ko def ngir ñu doon sama ñoñ, teral sama tur, di sama ndam, di sama sag. Waaye déggaluñu ma.»

Yàlla misaal na meram

¹² «Nga wax leen kàddu gii: “Aji Sax ji Yàllay Israyil dafa wax ne: Njaqal biiñ, duy, mu fees. Bu ñu la nee: ‘Dañoò xamul xéll ne njaqal biiñ, duy, mu fees?’” ¹³ nga ne leen: ‘Aji Sax ji dafa wax ne: Muy buur yi toogal Daawuda cib jalam, di sarxalkat yi, di yonent yi, di mboolem waa Yerusalem, maa ngii di duysi mboolem waa réew mii, ba ñu fees ak màndite. ¹⁴ Su ko defee ma fenqe ku nekk ak mbokkam, fenqe wajaar ak doom, ñoom ñépp.’”» Kàddug Aji Sax jee. Mu ne: «Duma ñéebalu, duma yèrèm, duma leen ñeewantee faagaagal.»

Dégloo, balaa yeex

¹⁵ Dégluleen te teewlu, buleen fétteeral. Aji Sax ji kat wax na!

¹⁶ Teral-leen seen Yàlla Aji Sax ji, bala moo lèndèmal, ngeen téréfe tundi timis, di séentu leer, mu lèndèmal ba mu ne kèruus, fatt taraj

¹⁷ Bu ngeen déggul de, ma làqu, jooy seen reewande, sama rongooñ tuuroo tuuru, ma jooya jooy, nde dees na jàpp géttu Aji Sax ji, yóbbu.

Mbugal a ngi

¹⁸ Waxal Buur, wax Lingeer yaayu Buur ne leen:

«Dèjuleen fi suuf, seen mbaxanam nguur mu yànj foq na.

¹⁹ Dèkki Negew yu mag yi tège na,

te kenn du ko tiji.
Yuda gépp ca ngállo ga, Yuda ba mu daj,
ngállo ga.»

Yerusalem am na gáccé

²⁰ Yerusalemee, séentul, xool ñiy jóge bëj-gàннаar.

Moo ana gétt gi ñu la dénkoon,
sa gàtt yu rafet ya?

²¹ Sa xejj yi nga miinal sa bopp,
bu ñu walbatikoo tiim la,
ana looy wax nag?

Kon mitit du la jàpp,
nga mel ni kuy matu?

²² Soo nee ci sam xel:

«Lu tax lii dal ma?»

xamal ne sa ñaawtéef gu réy a waral
ñu ñori la, saaysaaye la.

²³ Ana ab Kuuseen bu mana soppi deram,
mbaa am segg mu mana fari tipp-tippam?
Kon nga mana def lu baax
te tàmma def lu bon!

Yàllaay wax

²⁴ «Maa lay tasaare ni boob muy naaw
mu ngelawal màndiñ mi wal.

²⁵ Loolooy sa wàll,
sa cér bi ma la nattal.»

Kàddug Aji Sax jee.

Mu ne: «Yaa ma fátte,
di yaakaari caaxaan.

²⁶ Man it maay èñ sa pendal,
muure sa kanam,
saw taat ne duññ.

²⁷ Sag njaalook sa ñexali caga,
sa gànctu gu ruslu
ci kaw tundi àll bi!

Maa gis sa jëf ju siblu jooju!

Musibaa yaw Yerusalem!

Foo àppal sa jëfi sobe ji?»

14

Maral dikk na

¹ Kàddug Aji Sax jii dikkaloon na Yeremi,
jëm ca maral ma. Mu ne:

² «Waa Yudaa ngi ñaawlu,
doole dëddu dëkk yi,
ñu ne yogg, ne lasar fi suuf,
yuux jollee Yerusalem.

³ Kàngam ya yebal seeni surga, ñu rooti;
ñu dem, gisuñu ndox ca mbalka ya,
délseek seen xotti ndab,

jàq, yaakaar tas, ñu muuru di tiislu.

⁴ Réew mi tawluwul, suuf si fett,
yaakaaru beykat tas, mu muuru, di tiislu.

⁵ Kéwél sax jur ci àll bi, sànni
ndax ñàkk um ñax.

⁶ Mbaamu àll taxaw ci tund yi ne faraas,
di àppaat niw till,
ñàkk parlu, gèt ya giim.»

Yeremeey wax

⁷ Dëgg la sunuy ñaawtéef a nu tuumaal,
waaye éy Aji Sax ji, jógal te saw tur tax,

doonte dëddu nanu la ay yooni yoon, moy
la.

⁸ Éy yaw, yaakaaru Israyil, mi nuy wallu
bésu njàqare,

bul ñooru ni doxandéem ci réew mi,
mbaa ku nekk ciw yoon, jàdd fi, fanaan.

⁹ Ngalla bul mel ni ku waaru,
mbaa jàmbaar ju manul walloo.

Yaw Aji Sax ji, yaa ngi sunu biir,
ñu di nu tudde saw tur.

Bu nu wacc!

¹⁰ Aji Sax ji dafa wax ci askan wii
ne: «Ñeeka bëgg ub taxawaalu, baña
téye seen tànk. Moo tax man Aji Sax
ji bégewuma leen. Léegi ma bàyyi xel
seenug mbon, ba mbugale leen seeni
moy.»

Waxyuy caaxaan jib na

¹¹ Aji Sax ji nag ne ma: «Bul ñaanal
askan wii. ¹² Su ñu ci boole woon koor sax,
duma déglu seeni dagaan. Su ñu ma doon
sarxalal saraxu rendi-dóomal ak saraxu
pepp it, du maa leen di nangul. Xanaa
saamar akub xiif ak mbas kay laa leen di
faagaagale.»

¹³ Ma ne ko: «Éy Boroom bi Aji Sax
ji, yonent yaa ngii di leen wax ne duñu
dajeek saamar, duñu xiif te jàmm ju ne
ñoyy nga leen di defal fi bii bérab.»

¹⁴ Aji Sax ji ne ma: «Waxyuy fen la
yonent yiy waxe ci sama tur. Yebaluma
leen, santuma leen ko, waxumaak ñoom.
Peeñuy fen ak ngisaaney neen ak nax yu
ñu fental seen bopp lañu leen di jottlee
waxyu.» ¹⁵ Moo tax Aji Sax ji dafa wax
ne: «Yonent yi ma yebalul te ñuy waxe
waxyu ci sama tur naan: “Saamar akub
xiif du am ci miim réew,” saamar akub xiif
ay mujje yooyu yonent. ¹⁶ Ñi ñu doon jottli
ay waxyu it, xiif ak saamar a leen di rey,
ñu sànni seeni néew ci mbeddi Yerusalem,
te duñu am ku leen rob, ñook seeni jabar
ak seeni doom, góor ak jigéen. Dinaa leen
xëpp seen ay.

¹⁷ Nanga leen yégal saw tiis, ne leen:

“Naa tuur rongooñ guddeek bëccëg,
te du fer;
sama bokki bopp yi damm ba dammtoo,
ndaw góom bu metti!

¹⁸ Ma dem, xool àll,
gisuma lu moy ñu saamar bóom,
ma dugg biir dëkk,
gisuma lu moy ñu ne làcc akub xiif,
yonent ak sarxalkat di wër réew mi,
xam-xam réer leen.”»

Yeremeey ngi tinu Aji Sax ji

¹⁹ Aji Sax ji, wacc ngaa wacc Yuda nii?

Am Siyoñ a la génnliku?

Lu tax nga di nu dumaa musiba mu amul
paj?

Nuy yaakaar jàmm, dara baaxul,
nuy séentum paj, tiitaange ne jaas!

²⁰ Aji Sax ji, xam nanu sunug mbon,
xam sunu ñaawtéefi maam;
moy nanu la moos.

²¹ Waaye xoolal ci yaw te bul xalab,
bul teddadil sa jal bu tedd.

Bàyyil xel te baña fecci sa kólléereek nun.

²² Xèrèmi neen yi yéefar yiy jaamu,
ana ku ci mana taw?

Am asamaan ay sóobal boppam ay
waame?

Du yaw la Aji Sax ji sunu Yàlla?

Yaw lanu yaakaar,
te loolu lépp, yaw a.

15

Aji Sax ji àddu na

¹ Aji Sax ji nag ne ma: «Musaa ak Samiyel sax, bu ñu taxawoon fi sama kanam, du tax ma faale askan wii. Dàqal, ñu sore ma, te wéy. ² Bu ñu la laajee ne la: “Fu nu jëm?” nga wax leen ne leen:

“Aji Sax ji dafa wax ne:

Kiy wopp dee, wopp dee;

kiy deeye saamar, deeye saamar;

kiy deeye xiif, deeye xiif;

kiy duggi ngàllo, duggi ngàllo.”

³ «Te dinaa wacce fi seen kaw ñeenti xeeti duma.» Kàddug Aji Sax jee. «Saa-mar di bóom; xaj diri yóbbu, njanaaw ak rabu àll for, mu jeex. ⁴ Dama leen di def, waa réewi àddina yépp, ku leen ci xool rasu. Te li ko waral di Buurub Yuda, Manase miy doomu Esekiya, ak li mu def ci digg Yerusaleem.»

Mbugalu Yuda du jaas

Yàllaay wax

⁵ «Yerusalemee, ku lay yèrèm?

Ku lay jooy?

Moo, ku lay geesu ne la: “Jàmm nga am?”

⁶ Yaw yaa ma wacc,» kàddug Aji Sax jee,

«dellu gannaaw,

ma duma la, sànk la.

Muñ naa ba sonn.

⁷ Maa leen bees ni ñuy beesem pepp

ci pénci réew mi.

Maa sànk sama ñoñ,

faat seeni doom,

ndax tuubuñu seeni jëfin.

⁸ Seeni jëtun laa ful,

ba ñu épp suufas géej,

ma indil leen pàddum njolloor;

mu reyal yaay doomi waxambaaneem,

képp ko tiitaangeek njàqare.

⁹ Yaayu juróom yaari góor loof, di àppaat,

jantam sowe bëccég ndarakàmm,

yaakaar tas, mu jaq,

seenu ndes, ma leel saamaru noon.»

Kàddug Aji Sax jee.

Aji Sax ji feddli na yebam

Yeremeey wax

¹⁰ Wóoy saa ndey,

loo ma doon jure!

Man mi réew mépp di xulook a layool,

leblewma, lebuma;

te ñépp di ma móolu.

¹¹ Ndaxam Aji Sax ji nee:

«Maa lay xettli déy, ngir sottal lu baax;

maa la defal sa noon di la tinu déy,

ci janti safaan ak njàqare.»

Yàllaay wax ak Yerusaleem

¹² «Ku mana toj weñ gu ñuul,

rawatina yetu weñu bëj-gànnaar, mbaa xànjjar?

¹³ Yeen waa Yuda, seen alal ak seeni denc

laay jox ñu ko sèxètoo te feyuñu

ndax seen gépp moy ci seen réew mépp.

¹⁴ Maa leen di def seen jaami noon

réew mu ngeen xamul,

sama mer jippét, tàkkal leen.»

Yeremeey wax

¹⁵ Yaw déy Aji Sax ji, xam nga!

Ngalla bàyyi ma xel, geesu ma;

feyul ma ñi ma sam.

Bu leen muñal ba sànk ma!

Xamal ne yaa ma tax di dékku saaga.

¹⁶ Sa kàddu laa gis, di ko dunde,

sa kàddu di ma bégal, bannexal sama xol.

Yaw Aji Sax ji Boroom gàngoor yi, déy,

sa tur lañu ma tudde.

¹⁷ Masumaa toogandook ñiy mbumbaay

bay xawaare.

Yaa ma jüte, ma beru, toog

ndax mer mi nga ma sol, ba ma fees.

¹⁸ Moo sama tiis wi du dakk a?

Bii góom bu metti, tée wér!

Yaw kay yaay waltan muy wal, di ñiis,

di tas sama yaakaar.

¹⁹ Moo tax Aji Sax ji dafa wax ne:

«Soo désee, ma délloosi la,

nga dellu di ma liggéeyal.

Soo dee wax ngéneel

lu soreeki caaxaan,

dinga mel ni yaay sama làmmiñ,

te nit ñeey délsi ànd ak yaw,

waaye du yaay délsi ànd ak ñoom.

²⁰ Maa lay def nga mel ak askan wii

ni tatay xànjjar ju ñu dàbbli,

ñu di la song

te duñu la man.

Maay ànd ak yaw,

di la wallu, di la xettli.»

Kàddug Aji Sax jee.

²¹ «Ab soxor jàpp la, ma àtte;

ab néeg ne la céex, ma foqati.»

16

Yeremi wéet na ci biiri bokkam

¹ Kàddug Aji Sax ji dikkalati ma, ne ma:

² «Bul jël jabar,

bul am doom ju góor mbaa ju jigéen ci bii bérab.»

³ Aji Sax ji kat dafa wax ci gone yu góor yeek gone yu jigéen

yi juddoo ci bii bérab,

wax ci seen ndey yi leen jur

wax ci seen baay yi leen meññ ci mii réew,

⁴ mu ne: «Jàngoroy ndee ak leen di rey.

Deesu leen jooy, deesu leen rob.

Seeni néew ay tosal suuf.

Saamar akub xiif a leen di sànk,

seeni néew leel njanaaw ak rabi àll.»

⁵ Te Aji Sax ji kat dafa wax ne:

«Bul dugg kërug dēj,

bu fa dem di ñaawlook a jaale.

Maa xañ askan wii sama jamm,»

kàddug Aji Sax jee,

«xañ leen sama ngor ak sama yërmande.

⁶ Ku mag ak ku ndaw ay dee ci réew mii,

te deesu leen rob,

deesu leen jooy.

Kenn du dagg yaramam

mbaa muy nelu, di ko ñaawloo.

⁷ Kenn du leen sédd aw ñam

wu ñuy dëfale ku deele,

kenn du leen jox ub kaas, dëfale leen,

doonte baay a dee mbaa ndey.

⁸ Kërug bernde it, bu fa dugg,

di toogandoo, di lekk ak a naan.»

⁹ Aji Sax ji Yállay Israyil Boroom gàngoor

yi kat dafa wax ne:

«Maa ngii di dakkal ci bii bérab,

ngeen teewe, fekke lépp

luuy coowal mbégtteek bânneex,

boroom séet ak séetam selaw.

¹⁰ «Su ko defee, boo waxee askan wii kàddu yooyu yépp, ñu ne la: “Ana lu waral

Aji Sax ji dogalal nu musiba mu réy mii mépp? Ana fu nu tooñe ak fu nu moye

sunu Yàlla Aji Sax ji?” ¹¹ Nga wax leen nag ne leen: “Seeni maam a ma wacc,»

kàddug Aji Sax jee, “di topp yeneen yàlla, di leen jaamook a sujjóotal. Man nag,

ñu dèddu ma; sama yoon it, ñu bañ koo sàmm. ¹² Yeen nag, ngeen di bon, ba

raw seeni maam. Yeena ngii, ku nekk tē ticc, topp xolam bu bon, bañ maa déggal.

¹³ Maa leen di dàqe ci réew mii, jème réew mu ngeen xamul, seeni maam xamuñu ko,

ngeen di fa jaamu guddeek bëccëg yeneen yàlla, ndax dootuma leen baaxe.»

Yaakaar jeexul

¹⁴ «Waaw ay bés a ngi ñew déy,» kàddug Aji Sax jee, «deesatul wax ne: “Giñ naa ko

ci Aji Sax jiy dund te génnee bänni Israyil réewum Misra.” ¹⁵ Waaye dañu naan: “Giñ

naa ko ci Aji Sax jiy dund, ki jële bänni

Israyil réewum bëj-gànnar, te jële leen mboolem réew ya mu leen sàнке woon.” Maa leen di délloosi seen réew ma ma joxoon seeni maam.»

Kenn rëccul mbugal mi

¹⁶ «Maa ngii di woolu nappkat yu bare.»

Kàddug Aji Sax jee. «Ñu napp ñii ba noppi

ma woo rëbb yu bare, ñu rëbb leen ci kaw mboolem tund wu mag ak wu ndaw, ba

ci bépp xar-xaru doj. ¹⁷ Samay bêt a ngi

ne jàkk déy ci seeni jëf. Dara umpu ma ci.

Seeni ñaawtéef, dara rëccu ma ci. ¹⁸ Dama

leen di jékka fey ñaari yoon seeni moy,

ndax ñoo sobeel sama réew meek seen

médidi tuur yu bon yi, feesal suuf sii ma

séddoo seen yéf yu siblu yooyu.»

Ñépp ay ràññeeji Aji Sax ji

Yeremeey wax

¹⁹ Yaw Aji Sax ji may dooleel,

di ma feg, di ma laq bésuub njàqare,

yaw la xeet yiy bawoo cati àddina,

fekksi la, naan:

«Caaxaani neen kay la sunuy maam baaxoo woon,

xërëmi neen yu amul njariñ.

²⁰ Nit man naa sàkkal boppam ay yàlla?

Te duñuy yàlla sax!»

Yàllaay wax

²¹ «Moo tax maa ngii di leen xamal bii yoon,

ba ñu xam sama diisaayu loxook sama doole,

xam ne maay Aji Sax ji.»

17

Aji Sax ji sikk na Yuda

¹ «Bàkkaar Yuda lañu binde xaccug weñ gu cat la di doj wu dëgër.

Dees koo ñaas ci seen àlluway xol,

ñaaas ko ci seen bëjjéni sarxalukaay.

² Seeni doom sax di bàyyi xel seeni sarxalukaay

ak seen xer yi ñuy mággaale tuurum Asera fi ker garab yu naat yeek

kaw tund yu mag yi

³ ak kaw tund yi ci àll bi.

Seen alal ak seen denc yépp

laay joxe, ñu lël ko,

booleek seen jaamookaay

ndax seen moy yi dajal réew mi.

⁴ Dingen xañ seen bopp cér bi ma leen séddoon,

ma def leen seen jaami noon

ci réew mu ngeen xamul,

ndax merloo ngeen ma

mer mu dul fey mukk.»

Aji Sax jee jara yaakaar

⁵ Aji Sax ji dafa wax ne:

«Alkànde ñeel na ku yaakaar doom aadama

ak képp kuy doolewoo nit,
dèddu Aji Sax ji.

⁶ Day mel ni gajjub ndànd-foyfoy,
du gis ngèneel luy dikk!

Day dèkke màndiŋ mu wow koŋŋ,
suufas xorom su kenn dèkkul.

⁷ Waaye barke ñeel na ku wóolu Aji Sax ji,
yaakaar Aji Sax ji.

⁸ Day mel ni garab gu saxe wetu ndox,
lawal ay reenam ca wal ma,
ragalul tangoor wu dikk,
xob ya di naat.

Du tiit atum maral,
du ñàkk meñneef.»

⁹ «Dara gënula dëng xelum nit,
laago la ci moom.

Ana ku ko mana xam?

¹⁰ Maay Aji Sax jiy seetlu xel,
natt ub xol,

di yool ku nekk jëfinam,
la yellook aŋam.

¹¹ Kuy jagoo alal ju lewul,
mooy picc mu toj lu mu nenul.
Kookooy tollu digg dooleem, alal ja dèddu,
mu mujje dof.»

Yeremeey wax

¹² Sunu bérab bu sell bi,
mooy ngànguney daraja, daa masa kawe.

¹³ Yaw Aji Sax ji yaakaaru Israyil,
ku la wacc, torox;

ku la dèddu daa repp.

Moo wacc Aji Sax ji, bëtu ndox miy dund.

Yeremi ñaan na Yàlla wall

¹⁴ Ey Aji Sax ji, faj ma, ma faju;
musal ma, ma mucc,
samag cant, yaw a.

¹⁵ Ñu ngii naa ma:

«Ana la Aji Sax ji waxoon?
Na dikk boog!»

¹⁶ Man de, bañuma laa sàmmal, topp la;
bésusb tiis it dagaanuma ko.

Yaw de xam nga ko.

Li ma wax it fi sa kanam la.

¹⁷ Bu ma teg tiitaange,
yaay sama rawtu bésusb safaan.

¹⁸ Ngalla gâceelal ñi ma topp,
te bu ma gâceel;

yal nañu tiit, ñoom,

te man, ma baña tiit.

Rikk dikke leen bésusb safaan,
rajaxe leen ñaari yoon.

Bésusb Noflaay ñeel na Aji Sax ji

¹⁹ Aji Sax ji da maa wax ne ma: «De-
mal taxawi ca buntu Doomi réew mi, fa
buurub Yuda di duggeek a génne. Te nga
taxaw itam ca mboolem bunti Yerusalem
ya ca des. ²⁰ Nga ne leen: “Dégluleen
kàddug Aji Sax ji, yeen buuri Yuda ak
yeen waa Yuda gépp ak képp ku dèkk
Yerusalem, di jaare bunt yii. ²¹ Aji Sax

ji dafa wax ne: Moytuleen seen bopp ba
baña gàddu lenn bésusb Noflaay, di ko
jaarale bunti Yerusalem. ²² Buleen génne
seeni kër lenn bésusb Noflaay te buleen ci
liggéey lenn. Waaye nangeen sellal bésusb
Noflaay, muy la ma santoon seeni maam.

²³ Ndaxam dégluwñu ma, teewluwñu ma,
xanaa tè ticc, baña dégg, di gantal ndigal.

²⁴ Waaye su ngeen ma déglu ba déglu
ma, kàddug Aji Sax jee, baña gàddu lenn
di jaare bunti dèkk bii bésusb Noflaay,
xanaa di sellal bésusb Noflaay, bañ cee
liggéey lenn, ²⁵ su boobaa buur yiy tooge
jalub Daawuda, tey dawal watiir aki fas,
ñook seeni kàngam, duñu noppee jaare
bunti dèkk bii, feggook seeni kàngam.
Waa Yudak waa Yerusalem it di jaare ci
bunt yii, dèkk bi sax dàkk. ²⁶ Dees na
bàyyikoo dèkki Yuda ak li wër Yerusalem
ak diiwaanu Beñamin, ca suufu tundu
waak kaw tund ya, ak ca diiwaanu Negew.
Ñuy indi ci kër Aji Sax ji ay saraxi rendi-
dóomal ak yeneen saraxi jur ak saraxu
pepp ak cuuraay. Nii di indi kër Aji
Sax ji saraxi cant. ²⁷ Waaye su ngeen
ma déggalul, baña sellal bésusb Noflaay,
baña moytoo gàddu lenn, di jaare bunti
Yerusalem bésusb Noflaay, su boobaa dinaa
taal dèkk bi taal buy xoyom kèri Yerusalem
yu yànj, te du fey.”»

18

Boroom njaq doon na misaal

¹ Kàddu gii dikkal na Yeremi, bawoo fa
Aji Sax ji. Mu ne ko: ² «Dalal di dem ca
tabaxkatu njaq ba. Foofa laa lay dégtale
sama kàddu.» ³ Ma daldi dem ba ca
kër tabaxkatu njaq ba. Ma fekk ko muy
liggéey ca tabaxukaayu njaqam. ⁴ Leeleeg
ndab li tabaxkat biy tabaxe ban, yàqu ci
loxo, mu dellu defaraat ba mu baax
ci moom. ⁵ Kàddug Aji Sax ji nag dikkal
ma ne ma: ⁶ «Ni tabaxkatu njaq bii di
def, dama koo manula def ak yeen, bànni
Israyil?» Kàddug Aji Sax jee. «Ban bii déy,
ni mu mel ci loxol tabaxkatu njaq bi, ni
ngeen mel ci sama loxo, yeen bànni Israyil.
⁷ Leeg-leeg ma wax lu jëm ci aw xeet mbaa
am réew, ne dinaa ko déjjati, daaneel ko,
tas ko, ⁸ xeet woowu tuub mbonam gi ma
leen doon artoo, ma fomm musiba mi ma
naroona wacce ci seen kaw. ⁹ Leeleeg it
ma wax lu jëm ci aw xeet mbaa am réew,
ne dinaa ko tabax, jëmbat ko, ¹⁰ ba noppi
ñu def lu ma ñaawlu, baña dégg sama
kàddu. Su ko defee ma fomm lu baax
la ma leen naroonaa baaxe. ¹¹ Kon waxal
boog waa Yuda ak waa Yerusalem ne leen:
“Aji Sax ji dafa wax ne: Maa ngi nii di
leen tabaxal musiba ci pexe mu ma leen
di fexeel. Kon na ku nekk dèpp yoonam

wu bon te jubbanti jikkoom aki jéfam.”
 12 Dañu naan: “Jaru ko, sunu xalaatu bopp lanuy topp, ku nekk të ticc di jéfe sa xel mu dëng.”»

Israyil fátte na Aji Sax ji

13 Moo tax Aji Sax ji dafa wax ne:

«Laajteleen rekk ci xeet yi!

Ku ci masa dégg lu mel nii?

Lu ñaawa ñaaw la Israyil, janq ba, def!

14 Ku masa gis fu tawub yuur gedde mbar-tali Liban,
 mbaa wal mu sedd ma cay wale fu sore ñiis?

15 Moona sama ñoñ fátte nañu ma;
 tuuri caaxaan, ñu taalal cuuraay,
 te tuur yi di leen fakktal ci seeni yoon,
 seen jaaruwaay ya woon,
 di leen jaarale ñall yu kenn xállul,

16 ba seenum réew gental,
 di lu ñuy muslu fāww,
 ku fa romb waaru, wécc bopp.

17 Maay mel ni ngelawal penku, tasaare leen,

ñu daw seeni noon.

Gannaaw laa leen di won,

waaye du doon kanam,

keroog seen bésu ay.»

Fexee nañu Yeremi

18 Ba mu ko defee, mu am ñu ne:
 «Aywaleen, nu lalal Yeremi pexe. Ndax kat soxlawunu ko ba di ci ñàkk dara: du njànglem sarxalkat, du digley boroom xel te du waxyu bu yonent biral. Nanu ko duural ba sànk ko te baña faale lenn ciy waxam.»

19 Waaye yaw Aji Sax ji, teewlu ma te déglu kàddug noon yi.

20 Lu baax dees na ko feye lu bon a?
 Moona gasal nañu ma am yeer, di ma tëru. Bàywil xel ba may taxaw fi sa kanam, di leen tinul ngir nga moyale leen sa mer.

21 Kon nag báywil seeni doom ñu xiif ba dee,

jañax leen ci ñawkay saamar,
 seeni jabar suul doom, suul jékkër,
 seeni góor loroo mbas,
 seeni waxambaane daanoo xare.

22 Boo jekkee yebal gàngoor,
 yal na yuux jibe seeni kër.

Ñoo gas um yeer, di ma rébb,
 làqal may fiir.

23 Waaye yaw Aji Sax ji, xam nga mépp pexe

mu ñu may fexee bóome.

Bu leen jéggal seen ñaawtéef,
 bul far seeni moy,

yal nañu nërmeelu fi sa kanam,
 jéflanteel ak ñoom bi ngay mer.

19

Njaq la toj na

1 Aji Sax ji dafa wax ne: «Demal ca tabaxkatu njaq ba, nga jëndi fa njaqu ban lu ndaw te ànd ak ñenn ci magi askan wi ak ñenn ci magi sarxalkat yi, 2 te nga dem ba ca xuru Ben Inom, ca buntu Tojitu njaq ya, daldi fay yéene kàddu yi ma lay wax.

3 Danga naan: “Yeen buuri Yuda, yeen waa Yerusalem, dégluleen kàddug Aji Sax ji. Aji Sax ji Yállay Israyil Boroom gàngoor yi dafa wax ne: Maa ngii di wàcce fi bii bérab, musiba muy buur noppi képp ku ci dégg.” 4 Li ko waral mooy dañu maa wacc, teddadil bérab bii, di fi taalal cuuraay yeneen yàlla yu ñu xamuloon, du ñoom, du seeni maam, du buuri Yuda. Te feesal nañu bérab bii deretu nit ñu deful dara. 5 Yékkatil nañu fi Baal tuur mi bérab i jaamookaay, di ci lakk seeni doom ngir Baal, defal ko ko saraxi rendi-dóomal, te santaanewma ko, waxuma ko, jaarul sax sama xel.

6 «Moo tax ay bés a ngii di ñëw,» kàddug Aji Sax jee, «su boobaa deesatul wooye bérab bii Tofet mbaa xuru Ben Inom, xanaa xuru Bóomukaay. 7 Maay neenale fii pexem Yudak Yerusalem. Maa leen di tërale seen saamaru noon, ñi leen di tëru, tër leen; seeni néew, ma leele njanaaw ak rabi àll. 8 Maay def dëkk bi ab gent bu ñuy muslu, ku fi jaare waaru, di muslu ci seen mbugal yépp. 9 Maa leen di yàpploo seen doom yu góor ak yu jigéen, ku nekk di yàpp sa moroom ci biir njàqare, ndax gaw bu metti, bu leen seen noon yi leen di tëru di gaw.

10 «Gannaaw loolu nanga toj njaq lu ndaw li fi kanam ñi nga àndal, 11 te nga ne leen: “Aji Sax ji Boroom gàngoor yi dafa wax ne: Askan wii ak dëkk bii, ni ñuy toje njaq, ba deesatu ko mana defaraat, ni laa koy tojate. Tofet gi dees na fi rob ndax ñàkk fu ñu robe. 12 Noonu laay def bérab bii,» kàddug Aji Sax jee, “ak ñi fi dëkk. Maay def dëkk bii ni Tofet. 13 Këri Yerusalem ak këri buuri Yuda dina fees ak sobe ni bérab bii di Tofet. Mooy mboolem kër yu ñu doon taalal cuuraay ca kaw taax ya ñeel biddiww yépp, ak di fa tuural yeneen yàlla.”»

14 Gannaaw ba Yeremi walbatikoo Tofet, ga ko Aji Sax ji yebaloon mu waxi fa waxyu, dafa taxawi ca ètti kër Aji Sax ji, daldi wax ak mbooloo ma mépp. Mu ne leen: 15 «Aji Sax ji, Yállay Israyil Boroom gàngoor yi dafa wax ne: “Maa ngii di wàcce ci kaw dëkk bii ak mboolem li ko wër, lépp luy musiba mu ma dige woon, ndax dangeena të ticc, baña dégg sama kàddu.”»

20

Těj nañu Yeremi

¹ Ci kaw loolu, doomu Imer, Pasur, sarxalkat ba jiite woon saytub kër Yàlla ga, dégg Yeremi muy biral kàdduy waxyu yooyu. ² Ba mu ko defee Pasur dóorlu Yonent Yàlla Yeremi, jéng ko ca buntu kër Aji Sax ja féete kaw, te ñu dippee ko Beñamin. ³ Ca suba sa Pasur yiwee ko ca jéng ba. Yeremi ne ko: «Aji Sax ji tuddeetu la Pasur; Magor-Misabib (mu firi Tiitaange lu dajal) la la tudde. ⁴ Ndax Aji Sax ji dafa wax ne: “Maa ngii di la wacceel tiitaange, yaak sa soppe yépp, seen saamaru noon daaneel leen, ngay gis; te Yuda gépp laay teg ci loxol buuru Babilon, ñii mu yóbbu leen ngàllo, ñee mu jam leen, ñu dee. ⁵ Maay joxe lépp luy alalu dëkk bii. Mboolem lu fiy njariñ, mboolem gànjar, mboolem denci buuri Yuda, dinaa ko teg ci seen loxol noon yi, ñu sèxëtoó, jël, yóbbu Babilon. ⁶ Yaw Pasur, yaak sa waa kër yépp ay duggi njaam ca Babilon. Babilon nga jëm te fa ngay dee, ñu rob la fa, yaak mboolem sa soppe ya nga daan wax ay waxyuy fen.”»

Yeremi ñaxtu na

⁷ Éy Aji Sax ji, naxtaan nga ma, ma naagu, nga nax ma, jaay ma doole, ba man ma. Ñu ngi may kekku bés bu ne, ku ne di ma kókkali.

⁸ Saa yu ma waxee, damay xaacu, fitnaak salfaañoo ma tax di yuuxu. Kàddug Aji Sax jee may yóbbey xas aki saaga bés bu ne.

⁹ Su ma nee: «Xaaral ma fátte ko, dootuma biral waxyu ci turam,» sama xol bi mel nib taal bu tàkk, tàbbi sama biir yax yi; may jéema muutuwaale sa kàddu, te duma ko man.

¹⁰ Dégg naa ñaawlaate yu bare, ñu naan: «Éey, Tiitaange-lu-dajal! Booleen ko, boole rekk!» Ñi ma séqal jàmm sax, di yeeru ma fakkastalu, naan: «Jombul mu juum, nu jekku ko, ba mana feyu.»

¹¹ Waaye Aji Sax jeek man, di ñeyi xare. Moo tax ñi may tēru di tēréf, ba duñu daan,

xanaa rus lool, ndax duñu baaxle; gacce gu yàgg lay doon te du fey.

¹² Aji Sax ji Boroom gangoor yi, yaw miy nattu ku jub, di gis xel ak xol, may ma, ma gis ni nga leen di feye; yaw de laa diis sama mbir.

¹³ Woyleen Aji Sax ji,

màggal-leen Aji Sax ji!
Mooy xettli néew-ji-doole
ci dooley ku bon.

¹⁴ Alkute ñeel na bés ba ma juddoo, bés ba ma saa ndey juree, yàlla bumu barkeel.

¹⁵ Alkute ñeel na ka ko yegge baay, ne ko: «Sa soxna am na doom ju góor,» ba tax baay béga bég.

¹⁶ Yal na kooku mel ni dëkk, yi Aji Sax ji tas te yèrëmu leen!
Yal na dégg yuuxi suba teel ak xaacuy xarey njooloor.

¹⁷ Moo ma reyul ci sama biiru ndey, ma bàmmeeloo sama ndey, te du wasin muk.

¹⁸ Ana lu ma doon génne ca biiram, di daj coonooku tiis, mujje gacce?

21

Jéllub Yerusalem jubsu na

¹ Kàddu dikkaloon na Yeremi, bàyyikoo fa Aji Sax ji. Mooy ba buur Cedesyas yebalee ca moom, Pasur doomu Malkiya, mook sarxalkat ba ñuy wax Cefaña doomu Maaseya. Mu ne ko: ² «Ngalla seetal nu ci Aji Sax ji, ndax Nabukodonosor buuru Babilon mu ngi nuy song xare. Jombul Aji Sax ji defaatal nu lenn ciy kéemaanam ba mu dellu gannaaw.» ³ Yeremi nag ne leen: «Waxleen Cedesyas ne ko: ⁴ «Aji Sax ji, Yàllay Israyil dafa wax ne: Seen dooley xare ji ngeen yor, di xeexEEK ñi ci biti, di buuru Babilon ak waa Babilon ñi leen gaw, maa ngii di ko walbati, dajale ko ci biir dëkk bii. ⁵ Man mii maay xareek yeen, won leen sama doole ak sama diisaayu loxo, xadaru, dikke leen mer mu réya réy. ⁶ Maay fàdd lu dëkk ci dëkk bii, nit ak mala bokk lóroo mbas mu réy. ⁷ Gannaaw loolu nag,» kàddug Aji Sax jee, “Cedesyas buuru Yuda, aki jawriñam ak askan week ñi des ci dëkk bii te réce ci mbas meek xare beek xiif bi, maa leen di teg ci loxol Nabukodonosor buuru Babilon, ak seen loxol noon, ak loxol ñi leen di wuta rey. Dina leen leel ñawkay saamar. Du leen baal, du ñeeblu, du yèrëm.”

⁸ «Te itam nga wax askan wii ne leen: “Aji Sax ji dafa wax ne: Maa ngii di teg fi seen kanam yoonu dund ak yoonu ndee.

⁹ Ku toog ci dëkk bii, dinga deeye xare mbaa xiif mbaa mbas. Ku génn jébbal boppam waa Babilon ñi leen gaw nag dinga dund, bakkanam di yoolu xareem. ¹⁰ Jógal naa dëkk bii déy, te loraange laa leen naral waaye du jàmm.” Kàddug Aji Sax jee. “Ci loxol buuru Babilon laa koy teg, mu jafal ko, lakk.”»

Xibaar ñeel na waa kër buur

¹¹ «Te it waxal waa kër buurub Yuda ne leen:

“Dégluleen kàddug Aji Sax ji!

¹² Yeen waa kër Daawuda,

Aji Sax ji dafa wax ne:

Àtte yoon, deeleen ko xéye,

di xettli ki ñu xañ dëgg

ci ki koy néewal doole,

balaa sama mer ne jippét,

di tàkk te deesu ko mana fey

ndax seen jëf ju bon.

¹³ Yeen ñi jataayoo xur wi,

yeen ñi ci kaw doj wu tell wi, maa ngii fi seen kaw.»

Kàddug Aji Sax jee.

“Yeen ñi naa: ‘Ku nu manal dara?

Ku jote sunu biiri rawtu?’

¹⁴ maa leen di dikke seen aña jëf.”

Kàddug Aji Sax jee.

“Maay jafal sawara, lakk seen gott bi, mu xoyom lépp lu leen wër.”»

22

¹ Aji Sax ji dafa wax ne: «Demal kër buurub Yuda, nga jottli fa kàddu gii. ² Danga naan: “Dégluleen kàddug Aji Sax ji, yaw buurub Yuda mi toog ci jalub Daawuda, yaak say jawriñ ak sa nit ñiy jaare yii bunt. ³ Aji Sax ji dafa wax ne: Deeleen jéfe dëgg ak yoon, di xettli ku ñu xañ dëgg ci ki koy néewal doole. Ab doxandéem, ab jirim akub jëtun, buleen leen lor, buleen leen fitnaal. Deretu jaambur bu deful dara it, buleen ko tuur ci bii bérab. ⁴ Su ngeen jéfee ba jéfe santaane bii déy, buur du noppee dugge yii bunt, di toogal Buur Daawuda fi jalam, di dawal watiir aki fas, ànd ak seeni jawriñ ak seeni nit. ⁵ Waaye su ngeen dégluwul sama santaane yii, glñ naa ko ci man mii.” kàddug Aji Sax jee, “ab gent rekk la gii kër di doon!”»

⁶ Aji Sax ji déy dafa wax ci mbirum kër buurub Yuda ne:

«Yaay sama àllub Galàdd,

sama collu tundu Libañ,

waaye déy, maa lay def ni màndin,

ngay dëkk yu kenn dëkkul.

⁷ Maa lay beralal yàqkat

yu fàggu seeni gannaay,

dàjji sa tànnéefi banti seedar,

sànni ca sawara sa.

⁸ «Doxandéem yu bare dinañu jaare dëkk bii, di laajte ci seen biir naan: “Ana lu waral Aji Sax ji def nii bii dëkk bu mag?”

⁹ Su ko defee ñu ne leen: “Xanaa li ñu fecci seen kóllérey Yàlla Aji Sax ji, di sujjóotal yeneen yàlla, di leen jaamu.”»

Lu jëm ci Salum buurub Yuda

¹⁰ Buleen jooy buur Yosya mi dee, buleen ko ñaawlul,

jooyleena jooy buur Salum miy dem, te du délseeti, ba gis réewum juddoom.

¹¹ Aji Sax ji kat dafa wax ci mbirum buurub Yuda, Salum mi wuutu baayam Yosya te bàyyikoo fii. Mu ne: «Du fi délseeti mukk. ¹² Waaye fa ñu ko yóbbu ngàllo, fa lay deeye. Réew mii, du ko gisati mukk.»

Lu jëm ci Yowakim, kuutaayu Buur Yosya

¹³ Wóoy ngalla kiy tabax kërám te seetu ci njekk,

di teg taaxi kawam te seetu ci yoon,

liggéeyloo moroomam ci dara,

feyu kow ñaqam.

¹⁴ Mu ngi naan: «Maay tabax kër gu yaa,

taaxi kaw ya yàmblañ.

Ma bënñ ay palanteer,

tafal kër gi banti seedar,

diw ko ba mu xonq curr.

¹⁵ «Épplante banti seedar da laa def buur? Sa baay daawul lekk ak a naan?

Teewu koo jéfe dëgg ak yoon,

muy njiglaayam.

¹⁶ Da daan sàmm àqu ku ñàkk ak ku néewal doole,

muy njiglaay.

Du looloo di xam maay kan?»

Kàddug Aji Sax jee.

¹⁷ «Yaw xooloo,

xalaatoo lu moy loo jariñoó,

ak noo tuure deretu jaamburu Yàlla,

di fitnaale ak a lore?»

¹⁸ Moo tax Aji Sax ji wax ci mbirum buurub Yuda, Yowakim doomu Yosya, ne:

«Kenn du ko jooy ca mbokkam mu góor mbaa mu jigéen,

naan: “Wóoy ngalla nun, bokk yi!”

Kenn du ko jooy,

naan: “Wóoy, sang ba, wóoy kilifa ga!”

¹⁹ Robu mbaam-séf lees koy rob:

diri génne Yerusalem,

sànni ca biti.»

Yeremi yégle na fitnay Yerusalem

²⁰ Aji Sax ji nee: «Yeen waa Yerusalem, yéegileen tundi Libañ, yuuxu.

Àddooleen fa Basan, xaacu,

te yuuxoo fa Abarim,

nde seen soppe yépp a rajaxoo!»

²¹ «Waxoon naa leen ko ba ngeen di am jàmm,

ngéen ne: “Dégluwnu!”

Noonu ngeen jàppoo ba ngeen di ndaw ba tey,

masuleen maa déggal!

22 Ngelaw dina sàmm seeni sàmm, sànk leen,
seeni soppe duggi njaam,
ba ngeen rus, torox
ndax seen gépp mbon.

23 «Yaw mi tooge Liban* ,
def um tàgg sa garabi seedar,
éy bu la mitit dikkalee,
nirook mititu mat,
ndaw binni yu réy!»

Lu jëm ci Kooña doomu Yowakim

24 Mu ne: «Giñ naa ko ci man miy dund,» kàddug Aji Sax jee, «yaw buurub Yuda, Kooña† doomu Yowakim, soo doon jaarob torlukaay ci sama ndijoor it, fa laa lay foqatee, 25 teg la ci loxol ñi lay tëru te nga ragal leen; muy Nabukodonosor buuru Babilon aki xarekatam. 26 Maa lay xalab, yaak sa ndey ji la jur, jème meneen réew mu ngeen juddoowul, te fa ngeen di deeye.

27 Réew mi ngeen namma délsi, dungeen fi délseeti.»

28 Nee ñu: «Waa jii Kooña da di njaq lu toj lu jarul daraa?

Am da di xottu ndab lu kenn buggul?
Lu waral ñu di ko sànni, mooki doomam,
xalab leen biir réew mu ñu xamul?»

29 Éy waa réew mi, waa réew mee, waa réew mi,

dégluleen Kàddug Aji Sax ji!

30 Aji Sax ji dafa wax ne:
«Bindleen ne waa jii amul doom!
Du baaxle cig dundam,
nde kenn ci geñoom du tekki,
ba tooge jalub Daawuda,
di jiiteeti fi Yuda.

23

Sàmm bu baax aye na

1 «Wóoy ngalla sàmm yiy sànk ak a tasaare sama gétt gi.» Kàddug Aji Sax jee. 2 Moo tax Aji Sax ji Yállay Israyil wax ci sàmm yiy sàmm ñoñam ne: «Yeena tasaare sama gétt gi, dàq leen, te tax-awuwleen leen. Kon maa ngii di leen taxawoo mbugal, yoole leen seen jéf ju bon.» Kàddug Aji Sax jee. 3 «Man nag, sama ndesu gétt, maa leen di dajalee mboolem réew yi ma leen dàqoon, jème; te maa leen di délloosi seen parlu, ñu meññ ba yokku. 4 Dinaa leen taxawalal ay sàmm yu leen di sàmm ba dootuñu tiit, dootuñu jaq, dootuñu wuute.» Kàddug Aji Sax jee.

5 «Ay bés a ngi ñëw,» kàddug Aji Sax jee, «maay jebbil Daawuda njebbitu njekk, mu falu di buur bu xelu, di jéfe njub ak njekk ci réew mi.

6 Ay jantam Yuda dina texe,
Israyil dèkke kaaraange,
te dees na ko tudde nii:
“Aji Sax ji sunu njekk.”

7 «Moo tax ay bés a ngii di ñëw,» kàddug Aji Sax jee, «deesatul wax ne: “Giñ naa ko ci Aji Sax jiy dund te génnee bànni Israyil ca réewum Misra.” 8 Xanaa dañu naan: “Giñ naa ko ci Aji Sax jiy dund te génnee askanu Israyil réewum bëj-gànnaar, génnee leen mboolem réew ya mu leen sàнкеji woon.” Su ko defee ñu dèkkewaate seen suufas bopp.»

Kàddu jógal na yonenti caaxaan

9 Mu jëm ci yonent yi:

Sama bopp a ubu ràpp, sama xol jeex,
sama yax yépp ne yalax,
ma mel ni ku biññ man,
ba mu màndi

ndax Aji Sax ji ak kàddoom yu sell.

10 Ay jaalookat la réew mi fees déy,
alkànde déy a waral réew mi maral,
parluw màndinj mi wowal.

Seeni xél loraange la,
seenug njàmbaar di naka-su-dul-noona.
Yàllaay wax

11 «Te it yonent ak sarxalkat ñoo bokk yàqu,

sama biir kër sax gis naa ci seenug mbon.»
Kàddug Aji Sax jee.

12 «Moo leen tax di tarxiise seenu yoon,
tàbbi lëndèm, fèlèñu.

Maa leen di wàcceel musiba déy
ca seen atum mbugal.»

Kàddug Aji Sax jee.

13 «Ca yonenti Samari it laa gis njekkar,
ñuy waxe waxyuy Baal tuur mi,
di réeral Israyil, sama ñoñ.

14 Waaye yonenti Yerusalem laa gisal lu yées:

ñuy jaaloo, di wéye ay fen,
di dooleel defkatu lu bon,
ba kenn dèdduwul mbonam.

Ñoom ñépp di ma niru waa Sodom,
waa Yerusalem it ni waa Gomor.»

15 Moo tax Aji Sax ji Boroom gàngoor yi wax lii ci mbirum yonent yi:
«Maa ngii di leen leelsi njàqarey xeme,
nàndal leen tookey mbugal,
nde fi yonenti Yerusalem la yàqute tukkee,
ba law ci réew mi mépp.»

* 22:23 22.23 Liban man naa doon misaalu Yerusalem. Seetal ci 1.Buur ya 7.2. † 22:24 22.24 Kooña turu gàttalu Yowakin la. Seetal ci 2.Buur ya 24.8-17.

16 Aji Sax ji Boroom gàngoor yi dafa wax ne:

«Buleen déglu yonent yi leen di wax ay waxyu;

cóolooli neen lañu leen di naxe, di fent ay peeñu, di wax ay waxyu, te du kàddug Aji Sax ji.

17 Ñi ma teddadil lañuy waxa wax, naan leen Aji Sax ji déy nee:

“Jàmm ngeen di am.”

Képp ku topp sa xelum déggadi, ñu ne ko: “Musiba du la dab mukk.”

18 «Waaye ana ku ci teewe woon jataayu Aji Sax ji?

Ku ci fekke, ba dégg kàddoom?

Ku ci teewlu kàddoom, ba dégg ko?

19 Ngélénu Aji Sax jaa ngoog, sànjam fettax na,

dig callweer,

callweeral boppu ku bon.

20 Merum Aji Sax ji du giif,

te deful ba sottal li mu nar.

Fan yu mujj yii, ngeen am ci lu leer.

21 Yebaluma yonent yii,

ñoom ñuy daw di yégle!

Waxumaak ñoom,

ñoom ñuy jottli waxyu!

22 Su ñu teewe woon sama jataay sax,

mana dégtal sama ñoñ samay kàddu,

ba waññee leen seen yoonu mbon ak seen jéfi mbon.

23 Xanaa du maay Yàlla?»

Kàddug Aji Sax jee.

«Fu jegeek fu sore, du maay Yàlla?

24 Ku mana làqoo làquwaay,

ba duma ko gis?»

Kàddug Aji Sax jee.

«Xanaa du asamaan ak suuf, maa ko fees?»

Kàddug Aji Sax jee.

25 «Dégg naa kàdduy waxyu yi yonent yooyuy waxe ci sama tur ay fen, naan gént nañu lii, gént nañu lee. 26 Fan la yonenti fen-kat yii àppal seeni xalaat, di wax waxyu naxe yu ñu fental seen bopp?

27 Seen gént yi ñuy nettalante, nammuñu ci lu moy sama ñoñ fàtte ma, ni ma seeni maam fàttee woon ndax Baal tuur mi.

28 Yonent bu ci am gént, na nettali géntam, waaye ku ci am sama kàddu, na ko àddoo, na ma ko waxe. Ana ñax akum pepp?»

Kàddug Aji Sax jee. 29 «Sama kàddu déy, daa mel ni sawara.» kàddug Aji Sax jee,

«mbaa saddu, di falaxew doj! 30 Moo tax maa ngii ci kaw yonent yi.» Kàddug Aji Sax jee.

«Ñu ngi sàccante samay kàddu. 31 Maa ngii ci kaw yonent yi.» Kàddug Aji Sax jee.

«Ñu ngi mbel-mbeli naan: “Kàddoo ngi.” 32 Maa ngii ci kaw ñiy waxe

waxyuy génti caaxaan.» Kàddug Aji Sax jee. «Ñu ngi nettali seeni gént, bay waññi sama ñoñ, ndax seen fen yu jéggi dayo, te man de yebaluma leen, santuma leen dara. Amaluñu askan wii benn njariñ.» Kàddug Aji Sax jee.

Yéeneb Aji Sax ji du ab yen

33 Aji Sax ji ne Yeremi: «Su la askan wii laajee mbaa ab yonent mbaa ab sarxalkat ne la: “Ana yéeneb waxyu bi la Aji Sax ji yóbbante?” Nga wax leen ne leen: “Yeenay yen bi te dinaa leen yenniku.”» Kàddug Aji Sax jee. 34 «Te muy yonent, muy sarxalkat mbaa kenn ci askan wi, ku ci ne: “Yéeneb waxyu bii la ma Aji Sax ji yóbbante ci yeen,” maay dikke mbugal kooku mook waa kèram. 35 Li ku nekk wara laaj moroomam mbaa mbokkam kay mooy: “Lu Aji Sax ji tontu?” mbaa “Lu Aji Sax ji wax?” 36 Waaye yéeneb waxyu bu Aji Sax ji, buleen ko fi tuddati. Jooju wax déy, yenu boroom lay doon. Ndax dangeena been sunu kàddug Yàlla, Yàlla Aji Sax jiy dund, Boroom gàngoori xare yi.

37 Li nit kiy laaj ab yonent mooy: “Ana lu Aji Sax ji tontu? Ana lu Aji Sax ji wax?” 38 Bu ngeen dee tudd ab yéeneb waxyub Aji Sax ji, te ma yóonnee ci yeen, ne leen buleen di tudd ab yéeneb Aji Sax ji, su boobaa Aji Sax ji dafa wax ne: 39 Maa leen di yenu déy, xalab leen, yeen ak dèkk bii ma leen joxoon, yeen ak seeni maam, ba ngeen sore ma. 40 Te maa leen di teg toroxte gu sax dàkk, ak gacce gu sax dàkk te du fey.»

24

Li ñaari dàmbi figg di misaal

1 Gannaaw gi Nabukodonosor buuru Babilon toxal na buurub Yuda Yekoña* doomu Yowakim, yóbbu ko Babilon, mook kàngami Yudak liggéeykati xarala yaak liggéeykati weñ ya. Ba loolu amee Aji Sax ji am lu mu ma won: da maa jekki gis ñaari dàmbi figg yu tege fi kanam kër Aji Sax ji. 2 Genn dàmb gi di figg ju baaxa baax, mel ni witt mu jèkk. Dàmb gi ci des di figg ju bona bon, ju kenn dul lekk ndax bon.

3 Aji Sax ji wax ma ne ma: «Yeremi, loo gis?» Ma ne ko: «Xanaa ay figg. Figg ju baax ji nag baax na lool, waaye ju bon ji daa bona bon, ba kenn du ko lekk ndax bon.»

4 Kàddug Aji Sax ji nag dikkal ma, ne ma: 5 «Aji Sax ji Yàllay Israyil dafa wax ne: Ni figg jii baaxe, ni laay geesoo mbaax ngálllog Yuda gi ma yebale bérab bii, jème leen réewum Babilon. 6 Maa leen di toppé

* 24:1 24.1 Yekoña ak Yowakin kenn ki la.

bētu mbaax, ba déelloosi leen ci réew mii. Maa leen di defar te duma leen daaneel; jëmbat leen te duma leen buddi. ⁷ Maa leen di may coobarey xam ma, te xam ne maay Aji Sax ji, ba ñu doon sama ñoñu bopp, man ma doon seen Yàlla. Dinañu délseek seen léppi xol ci man déy!»

⁸ Waaye Aji Sax ji déy dafa wax ne: «Ni figg jii bone, ba kenn manu koo lekk ndax bon, ni laay def Cedesyas buurub Yuda aki kàngamam ak ndesu Yerusalem. Muy ñi des ci réew mi, di ña toxuji Misra. ⁹ Maa leen di def ñu jara seexlu, di musibay mboolem réewi àddina, ba fépp fu ma leen sànni, seen tur di fa saaga te kuy lééboo ak kuy kókkalee mbaa ngay móoloo, ñoom ngay tudd. ¹⁰ Maay yebal saamar fi seen kaw ak xiif ak mbas, ba ñu raaf fi kaw suuf si ma leen joxoon, ñook seeni maam.»

25

Ab tënkub waxyoo ngi

¹ Kàddu gii dikkal na Yeremi, jëm ci waa Yuda gépp, ci ñeenteelu atu nguurug doomu Yosya Yowakim, buurub Yuda. Mu yemook at mi jëkk ci nguurug Nabukodonosor buuru Babilon. ² Yonent Yàlla Yeremi daa wax ak waa Yuda gépp ak waa Yerusalem gépp, ne leen:

³ Li ko dale fukkeelu at ak ñett ci nguurug doomu Amon, Yosya buurub Yuda, ba tey jii, di ñaar fukki at ak ñett, kàddug Aji Sax jaa ngi may dikkal, ma di leen ko jottli te tàyyiwma, waaye dégluween. ⁴ Aji Sax ji yónnee leen mboolem jaamam ñiy yonent yi. Yónni na leen ay yooni yoon. Waaye dégluween, teewluween. ⁵ Mu ne leen: «Na ku nekk ci yeen dëpp jéfinam ju bon ak jéfam ju bon, ba mana dëkke réew mi leen Aji Sax ji jox naka jekk, yeen ak seeni maam, ba fàww, ⁶ te buleen topp yeneen yàlla, di leen jaamook a sujjóotal; buleen ma merloo ndax yéfi neen yu ngeen sàkke seeni loxo. Su boobaa duma leen teg musiba. ⁷ Waaye dégluween ma». Kàddug Aji Sax jee. Mu ne: «Yeena ma merlook ak yéf yu ngeen sàkke seeni loxo, muy seen musiba.»

⁸ Moo tax Aji Sax ji Boroom gàngoori xare yi wax ne: «Gannaaw dégluween samay kàddu, ⁹ maa ngii di yónnee, jëli mboolem làngi bëj-gànnar.» Kàddug Aji Sax jee. «Maay yónnee it ca Nabukodonosor buuru Babilon mi ci samag curga, daldi leen boole indi ci kaw réew mii ak ñi ci biiram ak mboolem xeet yi ko séq. Maa leen di faagaagal, gental leen gent bu sax dàkk bu ñuy muslu. ¹⁰ Te muy kàddug mbégte di kàddug

bànnex, di kàddug boroom séet akub séetam, di wolukaay bu fiy jib mbaa leer gu ñuy niitoo, lépp maa ko fiy boole tukkal. ¹¹ Réew mii mépp ay gental, def ndànd-fofyo, xeet yii yépp di surgawu buuru Babilon diir juróom ñaar fukki at.

¹² «Su ko defee bu juróom ñaar fukki at yi matee, ma doora dikkal Babilon ak buuram ndax seeni ñaawtéef.» Kàddug Aji Sax jee. «Maay gental réewum Babilon ba fàww. ¹³ Maay wàcceel réew mii mboolem kàddu yi ma ko rëbbe woon, te ñu bind ko ci téere bii, Yeremi jottli xeet yépp waxyu bi.

¹⁴ «Ñoom waa Babilon it déy, dinañu surgawu ay xeet yu giir ak ay buur yu mag. Maa leen di fey seen aña jéf ju bon.»

Kàddug waxyu dal na xeet yi

(Saar 25.15-38)

¹⁵ Aji Sax ji Yàllay Israyil déy da maa wax ne ma: «Am kaasu biiñ bii ci sama loxo, di misaal kaasu mbugal, te nga nàndal ci mboolem xeet yi ma lay yebal, ¹⁶ ñu naan, téréf, di say ndax aaytéefu saamar laay yebal fi seen biir.»

¹⁷ Ma daldi jële kaas bi ci loxol Aji Sax ji, nàndal ci mboolem xeet yi mu ma yebal. ¹⁸ Ma nàndal waa Yerusalem ak dëkki Yuda ak seeni buur ak seeni kàngam ngir gental fépp, muy ndànd-fofyo bu ñuy muslu, di ko móoloo ba sunu jonnii yàllay tey.

¹⁹ Firawna buuru Misra it nàndal naa ko ca, mooki surgaam aki kàngamam ak waa réewam, ²⁰ ak mboolem xeeti njaxasaan yi ci seen biir, ak mboolem buuri réewum Ucc, ak mboolem buuri réewum Filisteen ña féete Askalon ak Gasa ak Ekkron ak la des ca Asdodd. ²¹ Ma boole ca nàndal Edomeen ñaak Mowabeen ñaak Amoneen ña, ²² ak mboolem buuri Tir ak mboolem buuri Sidon ak buuri dun ya ca wàllaa géej, ²³ ba ca waa Dedan ak Tema ak Bus ak mboolem ñiy wat seen pegg wawur bopp, ²⁴ ak mboolem buuri Arabi ak mboolem buuri xeeti njaxasaan yi dëkke mândiñ mi, ²⁵ ak mboolem buuri Simri ak buuri Elam ak mboolem buuri Medd, ²⁶ boole ca mboolem buuri bëj-gànnar, ñu jegeek ñu sore. Ma nàndal leen ñoom jépp, ba réewi àddina yi ci kaw suuf yépp daj. Buurub Sesag* topp ci ñoom, naan.

²⁷ Aji Sax ji nag ne: «Wax leen ne leen: “Aji Sax ji Boroom gàngoori xare yi, Yàllay Israyil dafa wax ne: Naanleen ba mândi, di waccu, fëlëñu, tée jóg ndax saamar bi may yebal fi seen biir.” ²⁸ Waaye su ñu

* 25:26 25.26 Sesag turu kumpa la, di Babilon ba tey.

bañee naan ci kaas bi nga leen tàllal nag, nga wax leen ne leen: “Aji Sax ji dafa wax ne: Dingen naan ba naanaatoo! ²⁹ Te kat dëkk bii ñu ma tudde sax, maa ngi koy tàmbalee musibaal. Kon yeen, nu ngeen mana fexee ba mucç? Dungen mucç moos, ndax saamar laay wool mboolem ku dëkke àddina.”» Kàddug Aji Sax jee, Boroom gàngoori xare yi.

³⁰ Aji Sax ji teg ci ne ma: «Yaw nag, jottli leen mboolem kàdduy waxyu yooyu. Te nga ne leen:

Aji Sax jee yëmmoo fa kaw ni gaynde, fa màkkaanam mu sell ma lay àddoo, ñara ñar ci kaw déndu suufam, xaacu xaacuy dërkati reseñ†, di ko gëdde mboolem waa àddina,

³¹ riir ma àkki cati àddina, ngir layoob Aji Sax jee xet yi, moom miy àtte mboolem boroom bakkan, ñu bon ñi, mu jébbal saamar.» Kàddug Aji Sax jee.

³² Aji Sax ji Boroom gàngoor yi dafa wax ne:

«Musibaa ngii, di lawal wii xet ba ca wee, ngélén lu réy a jollee cati àddina.»

³³ Bésub keroog nag ñi Aji Sax ji fàdd, fu ne lañuy tédde ci àddina, cat ba cat. Deesu leen jooy, deesu leen for, deesu leen rob. Ni neefare jonkan lañuy wetaroo ci kaw suuf si.

³⁴ Yeen sàmmi askan wi, serleen, yuuxu-leen;

yeen boroom gétt gi, xëppoolen suuf, ñaawloo;

seen bésub rendikat taxaw na, te dees na leen tasaare, ngeen daanu, rajaxoo ni njaqal tànnéef.

³⁵ Rawtu day réer sàmmi askan wi, laquwaay réer boroomi gétt yooyu.

³⁶ Yuuxi sàmm yaa ngoogu, jooyi boroom gétt yaa,

Aji Sax jee foom seeni parlu.

³⁷ Merum Aji Sax ju réy ji selawal na tooli jàmm ya.

³⁸ Gaynde wacc na geeram, seen réew ma di ndànd-foyfoy, ndax saamaru notkat bi ak tàngooru sànjum Aji Sax ji.

Yeremi dugg na coono

26

(Saar 26—45)

Ñu ngi tëru Yeremi

¹ Ba doomu Yosya, Yowakim buurub Yuda di doora falu, kàddu gii dikkaloon na Yeremi, bàyyikoo fa Aji Sax ji. Mu

ne: ² «Aji Sax ji dafa wax ne: Dangay taxawi ca biir èttu kër Aji Sax ji. Nga wax ak mboolem waa dëkki Yuda yiy jaamusi ci kër Aji Sax ji. Mboolem kàddu yi ma lay yóbbante ci ñoom, bu ci wacc baat. ³ Jombul ñu dégg, ba ku nekk dëpp yoonam wu bon. Su ko defee ma fomm musiba, mi ma leen di waajal ndax seen jëf ju bon. ⁴ Nga wax leen ne leen: “Aji Sax ji dafa wax ne: Su ngeen ma déggalul, toppuleen yoon wi ma leen réddal, ⁵ dégguleen sama kàdduy jaam ñiy yonent yi may yónni ci yeen ay yooni yoon, ngeen tée dégg, ⁶ su boobaa maay def kër Yàlla gii, na ma def ga woon ca Silo, te dëkk bii maa koy def lu mboolem xeeti àddina di tudd, di ko móloo.”»

⁷ Ba mu ko defee sarxalkat yaak yonent yaak mbooloo ma mépp dégg Yeremi di wax kàddu yooyu ca biir kër Aji Sax ji. ⁸ Naka la Yeremi wax ba sottal mboolem la ko Aji Sax ji santoon mu jottli ko mbooloo ma mépp, sarxalkat yaak yonent yaak mbooloo ma mépp ànd jàpp ko, ne ko: «Yaw, dee rekk mooy sab àtte! ⁹ Ana lu waral ngay biral waxyu ci turu Aji Sax ji, naan kër Yàlla gii dina tas, mel ni ga woon ca Silo, te dëkk bii day tas, kenn du fi des?» Mbooloo ma mépp nag sam Yeremi ca biir kër Aji Sax ji. ¹⁰ Kàngami Yuda dégg mbir ma, bàyyikoo kër buur, daldi yéegi ba kër Aji Sax ji. Ñu féncoo ca buntu kër Aji Sax ji ñuy wax bunt bu Bees ba. ¹¹ Sarxalkat yaak yonent ya wax kàngam yaak mbooloo ma mépp, ne leen: «Waa jii, dee mooy àtteem, ndax moo biral waxyu, di rëbb sunu dëkk bii. Yeena ko déggal seen bopp.»

¹² Ci kaw loolu Yeremi wax ak kàngam yépp ak mbooloo ma mépp, ne leen: «Aji Sax jee ma yebal ngir ma biral waxyu, rëbb kër gii ak dëkk bii, te mooy kàddu yi ngeen dégg yépp. ¹³ Léegi nag rafatal-leen seeni jëfin ak seeni jëf te déggal seen Yàlla Aji Sax ji. Su ko defee Aji Sax ji fomm musiba mi mu leen dogaloon. ¹⁴ Man nag maa ngii ci seen loxo! Lu ngeen xalaat ne moo gën te war ci man rekk, defleen! ¹⁵ Xamleen xéll rekk ne su ngeen ma reyee, bakkanu ku deful dara ngeen gàddu, yeen ak dëkk beek ñi ko dëkke, ndax ci lu wér Aji Sax jee ma yebal ci yeen, ngir ma yegge leen mboolem kàddu yii.» ¹⁶ Ba loolu amee kàngam yaak mbooloo ma mépp wax ak sarxalkat yaak yonent ya, ne leen: «Waa jii kay àtteb dee warul ci moom, ndax ci sunu turu Yàlla Aji Sax ji la nu waxal.» ¹⁷ Ci biir loolu ñenn ci magi réew mi jóg, wax ak mbooloo ma fa daje mépp, ne leen: ¹⁸ «Ku

† **25:30** 25.30 dërkati reseñ yi ñuy wax fii, seeni tànk lañu daan dère reseñ, te bu ñu tollu waan ci dër reseñ, dañuy wayaale.

ñuy wax Mise, dëkk Moreset, doon na biral waxyu ca jamonoy Esekiya buurub Yuda. Daa waxoon waa Yuda gépp ne leen: “Aji Sax ji Boroom gàngooru xare yi dafa wax ne:

Dees na gább Siyoñ nib tool,
Yerusalem diy tojit, jale;
tundu kërüg jaamookaay baay doon gajj
bu kawé.”

¹⁹ «Ndax tax na Esekiya buurub Yuda mbaa kenn ci waa Yuda reylu ko? Du Buur Esekiya daa wormaal Aji Sax ji, tinu ko, ba Aji Sax ji fomm musiba mi mu leen dogaloon? Nun nag musiba mu réy lanu nara indil sunu bopp.»

Yowakim reylu na ab yonent

²⁰ Ci jamono yooyu amoon na keneen ku doon biral waxyu ci turu Aji Sax ji. Muy Uri ma dëkk Kiryaat Yarim, di doomu Semaya. Uri doon biral waxyu, di rëbb dëkk baak réew ma, bokk ak Yeremi genn kaddu gi. ²¹ Buur Yowakim dégg ay kaddoom, mook mboolemi dagam ak kàngamam yépp. Ba mu ko defee Buur di ko wuta reylu, Uri yég ko, tiit, daw làquji Misra. ²² Buur Yowakim yebal ku ñuy wax Elnatan doomu Agbor ca Misra, mu ànd faak ñeneen. ²³ Ñu jëleji Uri ca Misra, yót ko Buur Yowakim, mu jam ko, sànni néewam ca armeelu baadoolo ya.

²⁴ Yeremi nag daa làqoo Ayikam doomu Safan, mu aar ko, ba tàbbiwul ci loxol askan wi, ñu rey ko.

27

Yeremi misaal na kiliftefu Babilon

¹ Ba doomu Yosya, Cedesyas* buurub Yuda di doora falu, kaddu gii dikkaloon na Yeremi, bàyyikoo fa Aji Sax ji. ² Aji Sax ji da ne ma: «Sàkkalal sa bopp ay der ak yeti ràngaru yëkk, nga boole lépp teg ci sa ndodd; ³ ba noppi nga yónnee yet yi buurub Edom ak buuru Mowab ak buurub Amoneen ñi ak buurub Tir ak buurub Sidon. Dangay teg yet yi ci seen loxoy ndaw yi dikk Yerusalem ci Cedesyas buurub Yuda, ñu yót leen ko. ⁴ Te nga yóbbante leen ca seeni sang ne leen: “Aji Sax ji Yállay Israyil, Boroom gàngoori xare yi dafa wax ne: Waxleen seeni sang ne leen: ⁵ Man maa sàkk suuf, sàkk doom aadama ak mala fi kaw suuf ci sama doole ju bare ak sama kàttan gu matale, te loolu lépp, maa ko jox ku ma neex. ⁶ Léegi nag teg naa réew yii yépp ci loxol Nabukodonosor buuru Babilon, mi ci sama curga, ba joxaale ko rabi àll yi sax, ñu nangul ko. ⁷ Mboolem xeet yee koy nangul,

nangul doomam ba ci sëtam, ba keroog moom itam, àppu réewam jot. Su boobaa am réewam nangul yeneen xeet yu giir ak buur yu mag. ⁸ Wépp xeet mbaa réew mu ci nangulul Nabukodonosor buuru Babilon, di baña wacce yetu buuru Babilon seen ndodd, saamar akub xiif ak mbas laay dikke woowu xeet.” Kàddug Aji Sax jee. “Noonu laay def, ba faagaagal woowu xeet ci loxoom.

⁹ «“Kon nag yeen, buleen déglu seen yonent yeek seetkat yeek firikati gént yeek boroom rawaan yeek ñeengokat yi leen di wax, naan leen dungeen tàbbi ci curgag buuru Babilon. ¹⁰ Ay waxyuy fen déy lañu leen di waxal te dinañu leen taxa toxoo seenum réew. Maa leen di sànni fu sore, ngeen sànk. ¹¹ Waaye xeet wu ci nangoo wacce yetu buuru Babilon seen ndodd, di ko surgawu, ñooñu, maa leen di saxal ci seen suuf.” Kàddug Aji Sax jee. “Ñu dëkke ko, di ko bey.”»

¹² Ci biir loolu Cedesyas buurub Yuda it, ma yegge ko kaddu yooyu yépp, ne ko: «Wàcceel yetu buuru Babilon saw ndodd, nangul ko, nangul ay bokkam, ndax ngeen dund. ¹³ Ana lu jar saamar akub xiif ak mbas di la rey, yaak sa waa réew mi, ni ko Aji Sax ji dige xeet wu ci nangulul buuru Babilon? ¹⁴ Buleen déglu yonent yi leen di wax naan leen dungeen tàbbi ci curgag buuru Babilon. Ay waxyuy fen déy lañu leen di waxal. ¹⁵ Man déy yónniwma leen.» Kàddug Aji Sax jee. «Te ñoom ñu ngi waxe waxyuy fen ci sama tur. Moo tax maa leen di dàqe fii, ngeen sànk, yeen ak yonent yi leen di waxyul.»

¹⁶ Gannaaw loolu sarxalkat yeek askan wii wépp wax naa leen ne leen: «Aji Sax ji dafa wax ne: Buleen déglu yonent yi leen di waxal ay waxyu, naan leen: “Ndabi† kër Aji Sax jaa ngii di délsi, jóge Babilon léegi, léegi.” Ay waxyuy fen lañu leen di waxal. ¹⁷ Buleen leen déglu. Nangul-leen buuru Babilon te dund! Ana lu jar dëkk bii di mujje doon jalub xeer?» ¹⁸ Bu ñu dee ay yonent kay, te kàddug Aji Sax ji nekk ci ñoom, nañu daldi tinu Aji Sax ji Boroom gàngoor yi, ngir ndab yi des kër Aji Sax ji ak kër buurub Yudad Yerusalem, te baña dem Babilon. ¹⁹ Aji Sax ji Boroom gàngoor yi de wax na ci mbirum jëni kërám geek mbalka meek watiiri rootukaay yi ak yeneen ndab yi des ci dëkk bii, ²⁰ Mooy ndab ya Nabukodonosor buuru Babilon yóbbalewloon, ba muy yóbbu ngàllo doomu Yowakim, Yekoña buurub Yuda, jële ko Yerusalem, jëme ko Babilon, mook kàngami Yudad Yerusalem.

* **27:1** 27.1 Fii ñu ne Cedesyas, am na sotti yu jëkk yu fi indi turu Yowakin. † **27:16** 27.16 Ndab yooyu gànjar la woon ndax wurus lay doon mbaa xaalis.

21 Lii déy Aji Sax ji Yállay Israyil Boroom gàngoor yi wax na ko ci ndab yooyu des ca kër Aji Sax ji ak kër buurub Yudak Yerusalem. 22 Mu ne: «Babilon lees koy boole yóbbu, te foofa lay des ba keroog bés ba ma ciy jóg.» Kàddug Aji Sax jee. «Gannaaw loolu dinaa ko fa jële, délloosi ko bérab bii.»

28

Yeremi tiñal na yonentu caaxaan

1 Ca menn at ma, fekk Cedesyas buurub Yuda di doora falu, yemook ñeenteelu atam, ca juróomeelu weer wa, am na doomu Asur ju ñuy wax Anaña, di yonent bu cosaanoo Gabawon. Mu wax ak Yonent Yàlla Yeremi ca biir kër Aji Sax ji, fa kanam sarxalkat yaak mbooloo mépp, ne ko: 2 «Aji Sax ji Yállay Israyil Boroom gàngoor yi dafa wax ne: Damm naa yet wi leen buuru Babilon ténke woon. 3 Fii ak ñaari at tembe dinaa délloosi fii mboolem ndabi kër Aji Sax ji Nabukodonosor buuru Babilon jële woon bérab bii, yóbbu Babilon. 4 Dinaa délloosi fii itam buurub Yuda Yekoña doomu Yowakim, te mboolem ngállag Yuda ga demoon Babilon, maa leen di délloosi bérab bii.» Kàddug Aji Sax jee. «Maay damm moos yetu buuru Babilon wi mu leen ténke.»

5 Ba loolu amee Yonent Yàlla Yeremi tontu yonent ba ñuy wax Anaña fa kanam sarxalkat yaak mbooloo ma taxaw fa biir kër Aji Sax ji mépp. 6 Mu ne ko: «Amiin! Yal na ko Aji Sax ji defee! Yal na Aji Sax ji sottal xa kàdduy waxyu yi nga wax, ba délloosee Babilon ba fii ndabi kër Aji Sax ji ak mboolem ña ñu fa toxal. 7 Waaye ngalla déglul bu baax kàddu gii ma lay wax, yaak mbooloo mi mépp. 8 Yonent yi feenoon naka jekk lu ma jiitu, jiitu la, jottli nañu réew yu yaatu ak nguur yu mag seen waxyuy xare ak musiba ak mbas. 9 Ab yonent nag bu dee biral waxyub jàmm, su jàmm ja dikkee, ñu xam ne Aji Sax jee ko yebal ci lu wér.»

10 Ba mu ko defee yonent ba ñuy wax Anaña yékkatee yet wa ca ndoddu Yonent Yàlla Yeremi, damm ko. 11 Anaña àddu fa kanam mbooloo ma mépp ne leen: «Aji Sax ji dafa wax ne: Nii laay damme yet wi buur Nabukodonosor buuru Babilon di ténkee. Fii ak ñaari at tembe dinaa jële yet wi ci ndoddu mboolem xeet yi mu ko ténke.» Ba loolu amee Yonent Yàlla Yeremi dem yoonam.

12 Gannaaw ba yonent ba ñuy wax Anaña yékkatee yet wa ca ndoddu Yonent Yàlla Yeremi ba damm ko, kàddug Aji Sax ji dikkal Yeremi, ne ko: 13 «Demal wax Anaña ne ko: “Aji Sax ji dafa wax ne: Yetu

bant nga damm, waaye dinga ko wuutale yetu weñ. 14 Ndxax Aji Sax ji, Yállay Israyil Boroom gàngoori xare yi dafa wax ne: Yetu weñ laay teg ci ndoddu mboolem xeet yii, ñu nangul Nabukodonosor buuru Babilon, di ko surgawo. Te rabi àll yi sax, maa leen di teg ci loxoom.”»

15 Gannaaw loolu Yonent Yàlla Yeremi ne yonent ba ñuy wax Anaña: «Anaña, déglul bu baax li ma lay wax: Aji Sax ji yebalu la, yaw ngay gëmloo askan wii ay fen. 16 Moo tax Aji Sax ji dafa wax ne: “Maa ngii di la yebal, nga jóge fi kaw suuf. Ren jii ngay dee, ndax kàdduy gántal nga waxal Aji Sax ji.”»

17 Yonent ba ñuy wax Anaña ca at mooma la dee ca juróom ñaareelu weer wa.

29

Yeremi bind na ngállu ga bataaxal

1 Yonent Yàlla Yeremi nag yónnee na bataaxal bu jóge Yerusalem, jëm Babilon ca ndesu magi ngállu ga, ak ca sarxalkat yaak yonent yaak mépp mbooloo ma Nabukodonosor jële woon Yerusalem, yóbbu leen ngállu ca Babilon. 2 Mooy gannaaw ba Buur Yekoña bàyyikoo Yerusalem, ànd ak Lingeer yaayu buur ak bëkk-néegi buur ak kàngami Yudak Yerusalem, ak liggéeykati xarala yaak liggéeykati weñ ya. 3 Yeremi yóbbante bataaxal ba Elasa doomu Safem, ak Gemarya doomu Ilkiya, ndaw ya Buur Cedesyas mu Yuda yebal Babilon ca Buur Nabukodonosor. Lii la bataaxal bi wax:

4 Aji Sax ji Yállay Israyil Boroom gàngoori xare yi dafa wax mboolem ngállu ga mu jële Yerusalem, yóbbu Babilon, ne leen: 5 Tabaxleen ay kër dèkke; jëmbat seeni tóokër, lekk ca meññeef ma. 6 Takkleen jabar, am ci doom yu góor ak yu jigéen. Takkal-leen seen doom ay jabar, maye seen doom yu jigéen, ñu am ñoom it doom yu góor ak yu jigéen. Yokkuleen fa, buleen fa néew. 7 Sàkkuleen jàmmu dèkk bi ma leen toxal, te ñaanal ko ci Aji Sax ji, ndax jàmmu dèkk bi mooy seen jàmm.

8 Aji Sax ji Yállay Israyil Boroom gàngoori xare yi kat dafa wax ne: «Seen yonent ak seen gisaanekat yi ci seen biir, buñu leen nax. Te it buleen déglu seen boroom gént yi ngeen di géntloo, 9 ndax waxyuy fen lañu leen di wax ci sama tur. Yebaluma leen.» Kàddug Aji Sax jee.

10 Aji Sax ji déy dafa wax ne: «Bu Babilon matalee juróom ñaar fukki ati kilifteefam, dinaa leen dikkal, sottal leen sama kàddug jàmm, ba délloosi

leen bérab bii. ¹¹ Ndax man déy, xam naa mébét yi ma leen mébétal.» Kàddug Aji Sax jee. «Du mébétal lo-raange, waaye mébétal jàmm laa leen mébétal, ngir may leen yaakaaru èllég. ¹² Su boobaa ngeen woo ma wall, dikk ñaan ma, ma nangul leen. ¹³ Su boobaa ngeen sàkku ma, daj ma, ndegam sàkkoo ngeen ma seen léppi xol, ¹⁴ maa leen di may ngeen daj ma.» Kàddug Aji Sax jee. «Maa leen di tijjil seen wërség, dajalee leen ci mboolem xeet ak mboolem bérab ya ma leen sànni woon.» Kàddug Aji Sax jee. «Maa leen di délloosi bérab bii ma leen yebale woon ngallo.»

¹⁵ Yeena ne: «Aji Sax ji yónnee na nuy yonent ci Babilon.» ¹⁶ Waaye Aji Sax ji dafa wax lu jëm ci buur bi toog ci jalub Daawuda, jëm ci képp ku bokk ci askan wi des ci Yerusalem gii di seen bokk ya àndul woon ak yeen, dem ngallo. ¹⁷ Aji Sax ji Boroom gàngoori xare yi dafa wax ne: «Maa ngii di leen yónnee saamar akub xiif ak mbas. Maa leen di def ñu mel ni figg ju nèb, ba kenn manu koo lekk ndax bon. ¹⁸ Maa leen di toppe saamar akub xiif ak mbas. Maa leen di def ñu seexlu leen ci mboolem réewi àddina, teg ci di musiba mu ñuy muslu ci biir mboolem xeet wu ma leen sànni, ba ku fay kókkalee, ñoom ngay tudd. ¹⁹ Li ko waral mooy ñoo ma déggalul.» Kàddug Aji Sax jee. «Dama leena yónnee yonent yiy samay jaam ay yooni yoon, te déggaluñu ma.» Kàddug Aji Sax jee.

²⁰ «Kon nag yeen mboolem ngallo gi ma yebale Yerusalem ba Babilon, dégluleen kàddug Aji Sax ji. ²¹ Aji Sax ji Yállay Israyil Boroom gàngoori xare yi dafa wax ci mbirum Akab doomu Kolaya ak Cedesyas doomu Maaseya, ñoom ñi leen di jottli waxuy fen ci turam. Mu ne: Maa ngii di leen teg ci loxol Nabukodonosor buuru Babilon, mu rey leen, ngeen di gis. ²² Dinañu tax mboolem kuy móoloo te bokk ca ngallog Yudeen ña ca Babilon, danga naan: “Yal na la Aji Sax ji teg la mu tegeon Cedesyas ak Akab, ña buuru Babilon lakk cib taal.” ²³ Li ko waral mooy njombe wi ñu def fi digg Israyil, di jaalook seen jabari dëkkandoo, di wax ci sama tur ay kàdduy fen yu ma leen santul. Maa ko xamal sama bopp, seede ko.» Kàddug Aji Sax jee.

Semaya jot na tontam

²⁴ «Yaw Yeremi nag, nanga wax Semaya, Neyelameen bi ne ko: ²⁵ “Aji Sax ji Yállay Israyil Boroom gàngoor yi dafa

wax ne: Yaw yaa yónnee ci sa turu bopp ay bataaxal ca askanu Yerusalem gépp, rawatina sarxalkat ba Cefaña doomu Maaseya, ak mboolem sarxalkat ya. Nga di ci wax ne: ²⁶ “Aji Sax ji da laa fal sarxalkat, nga wuutu Yoyada sarxalkat bi, ngir kër Aji Sax ji am ku ko yor, ba dof bu fiy wax-waxlu ay waxyu, nga jéng ko, yeewe ko cállalay weñ ci baatam. ²⁷ Ana lu tax waxuloo ci Yeremi mu Anatot nag, moom miy wax-waxlu ay waxyu fi seen biir? ²⁸ Léegi la nu yónnee Babilon bataaxal, ne nu: Dingen yàgg àll de, kon tabaxleeni kër, dëkke; jëmbatleeni tóokër, lekk ci meññeef mi.”»

²⁹ Ba Cefaña sarxalkat ba jàngee bataaxal boobu, Yonent Yalla Yeremi di dégg, ³⁰ kàddug Aji Sax ji dikkal Yeremi ne ko:

³¹ «Yónneel ca ngallo gépp ne leen: Aji Sax ji dafa wax ci mbirum Semaya Neyelameen ba, ne: “Semaya waxal na leen waxyu, gëmloo leen ay fen, te yebaluma ko. ³² Kon nag Aji Sax ji dafa wax ne: Maa ngii di mbugalsi Semaya Neyelameen bi, mook askanam. Ku bokk ci moom du toog ci biir xeet wii, bay gis ngéneel li may defal sama ñoñ.” Kàddug Aji Sax jee. “Moo xiirtal askan wi ci gántal Aji Sax ji.”»

Yeremi yéene na yeelug jàmm

30

(Saar 30—33)

Nii la yéene bi ténkoo

¹ Kàddu gii dikkal na Yeremi, bàyyikoo ci Aji Sax ji, ne ko: ² «Aji Sax ji Yállay Israyil dafa wax ne: Nanga bind cib téere kàddu yi ma la wax yépp. ³ Ndax kat ay bés a ngii di ñéw,» kàddug Aji Sax jee, «maay tijjil sama ñoñ seen wërség, muy Israyil di Yuda.» Aji Sax jee ko wax. «Maa leen di delloo ca suuf sa ma moomale woon seeni maam.»

Ay teraanga nuyoo na

⁴ Kàddu yii la Aji Sax ji wax ci mbirum Israyil ak ci mbirum Yuda.

⁵ Aji Sax ji déy dafa wax ne:

«Yuuxi tiitaange dégtu na, njàqare la, du jàmm.

⁶ Laajteleen te xool,

ndax góor day wasin léegi?

Moona maa gis jàmbaar ju ne jatu,

ni kuy matu,

kanam xoyy.

⁷ Wóoy boobu bés bu réy,

ba bés du ni mel!

Bésu njàqare lay doon

ñeel askanu Yanqóoba,

waaye dañuy muc.

⁸ «Bésub keroog,» kàddug Aji Sax jee, Boroom gangoori xare yi, «maay damm yet wi ñu leen ténke ci seen ndodd, dammat seeni jéng, ba dootufu doon jaamu doxandéem. ⁹ Waaye seen Yàlla Aji Sax ji lañuy jaamu ak seen buur bi ma leen di falal, mu toogal Daawuda.

¹⁰ Waaye yaw Yanqóoba sama jaam, bul tiit,» kàddug Aji Sax jee; «yaw Israyil, bul ragal. Fu sore laa lay wallujee, yaak sa askan wa ca réewum njaam ga, Yanqóoba dellu dal, fegu; kenn dootu ko tiital.

¹¹ Maa ngeek yaw, nar laa wallu.» Kàddug Aji Sax jee. «Maay fàkkas mboolem xeet ya ma la sànniji.

Yaw nag дума la fàkkas, дума la ñàkka topp moos, waaye li nga yelloo laa lay yar.»

¹² Aji Sax ji déy dafa wax ne: «Sa damm-damm du faju, sa góom du wér.

¹³ Amul ku lay sàmmal sa àq, te sab dana amul pajtal mu baax.

¹⁴ Sa soppe yépp a la fátte, kenn faalewu la ci, ndax dumay noon laa la дума, yar la yar bu tar ngir sa ñaawtéef ju réy ak sa bàkkaar yu bare.

¹⁵ «Damm-damm yu dul wér ak mitit wu tar jarul jooy.

Maa la teg lii, ndax sa ñaawtéef ju réy ak sa bàkkaar yu bare.

¹⁶ Waaye ku la lekk, dees na ko lekk; sa noon yépp lañuy jàpp njaam ba ñu daj. Ku la futti, dees na ko futti, ku la saax-saaxee dees na ko saax-saaxee.

¹⁷ «Ñu ngi la naan: “Waccees na la,” naan la: “Siyon yaw, faaleesu la,” waaye maa lay may wér, faj say góom.»

Kàddug Aji Sax jee.

¹⁸ Aji Sax ji dafa wax ne: «Maa ngii di tijji wèrségu askanu Yanqóoba,

ñibbsil leen, baaxe seeni dèkkuwaay, ba dèkk dekkee ca tundam wu gentoon, kër buur taxawaat bérabam,

¹⁹ cant jollee ca, di riirum mbégare.

Maa leen di ful,

te duñu wàññiku, darajaal leen, te dootufu tuut.

²⁰ Seenii doom dañuy mel na woon, seen mbooloo sax fi sama kanam, may mbugal ñi leen di sonal.

²¹ Su boobaa seen njiit di seen deret, di seen kilifa, soqikoo ci ñoom; ma woo ko, mu jege ma, nde nit jaayul bakkanam, ba jegesi ma te woowuma ko!»* Kàddug Aji Sax jee.

²² «Yeenay doon sama ñoñ, man, may seen Yàlla.»

²³ Ngélenu Aji Sax jaa ngoog, sànjam fettax na, dig callweer, callweeral boppu ku bon.

²⁴ Sànjam Aji Sax ju tàng ji du giif, te sotalul li mu nar. Fan yu mujj ya ngeen xam ci dara.

31

Israyil séentu na sancaatub réewam

¹ «Su boobaa,» kàddug Aji Sax jee, «maay doon Yàllay làngi Israyil yépp, ñoom ñuy sama ñoñ.»

² Aji Sax ji dafa wax ne: «Waa Israyil ñi récc ñawkay saamar, daje nañook yiw ci màndin mi, fekk ñuy sàkku noflaay.»

³ Ñu ne: «Bu yàgg la nu Aji Sax ji feeñu, ne nu: “Maa leen masa bëgg, ba tax ma sédd leen ngor.

⁴ Yaw Israyil mu taaru, maa lay defaraat, nga defaru, ba jiinaat sam njiin, wàlli peccum mbéx,

⁵ jëmbataat sa tóokëri reseñ ca mbartali Samari, te ku jëmbat, xéewlu ca.

⁶ Bés dina ñew déy, wattukat yéenee fa kaw tundu Efrayim ne: ‘Aycaleen nu yéegi tundu Siyon, fa sunu Yàlla Aji Sax ji.’”

⁷ Aji Sax ji déy dafa wax ne: «Sarxolleleen, bége askanu Yanqóoba, xaacul-leen xeet woowu jiitu, biral-leen cant te ne:

“Éy Aji Sax ji, wallul ndesu Israyil, sa ñoñ ñii.”»

⁸ «Maa ngii di jële sama ñoñ réewum bëj-gànaar, dajalee leen fa cati àddina.

* **30:21** 30.21 Leeru Yàlla, jegee ko noonu, bakkanu nit ki xaj na ci. Néegu biir ba ca kër Yàlla ga sax, du ñépp a fa mana àgg. Sarxalkat bu mag baa fa daa dugg benn yoon cim at. Keneen ku fa dugg dee. Seetal ci *Sarxalkat yi* 16.10; 21.17; 22.3.

Silmaxaa ngi ci akub lafañ,
jigéenu wérul it ak kuy wasin,
ñuy gàngoor gu mag, délsi fii.
9 Ñooy dikk di jooy, di leewaayu,
ma jiite leen, yóbbu,
jaare leen xáll wu jub wu ñu dul fakktaloo,
ba ca wali ndox ya,
ngir maay baayu Israyil,
Efrayim di sama taaw.

10 «Yeen xeet yi, dégluleen kàddug Aji Sax
ji,
yégleleen ko ca tefes yu sore ya.
Ne leen: “Ki tasaare woon Israyil, moo leen
di dajale,
sàmm leen ni sàmm ak géttam.”
11 Aji Sax jee goreel askanu Yanqóoba,
jot ko ci loxol ku ko épp doole.
12 Ñooy dikk, di sarxollee kaw tundu Siyon,
ne ràññ ndax ngéneeli Aji Sax ji,
pepp, biiñ aku diw,
gàtt aki nag,
bakkan ni tool bu ñu suuxat,
dootuñu yoggoorlu.
13 Su boobaa janq bégem pooj,
waxambaaneek mag feelu ko,
ma sopp seen ñaawlu mbégte, dëfal leen,
bànnexal leen, ñu dëddu naqar.
14 Maay yafal sarxalkat yi, ba reggal leen,
sama ñoñ ñi regge sama ngéneel.»
Kàddug Aji Sax jee.

15 Aji Sax ji dafa wax ne:
«Yuux dégtu na fa Raama,
ay jalooki jooy yu metti.
Rasel ay jooy ay doomam,
baña noppi,
ndax doomam ya wuute.»
16 Aji Sax ji nag ne ko:
«Baal sa jooy yi
te fomp say rongooñ,
dees na la yool sa coono.»
Kàddug Aji Sax jee.
«Say doom ay jóge réewu noon, ñibbsi.
17 Am nga yaakaaru èllég.»
Kàddug Aji Sax jee.
«Say doom ay délsi seenum réew.
18 Maa dégg moos askanu Efrayim di binni
naan: “Aji Sax ji, duma nga noo duma,
ni sèllu wu dese tàggat.
Ngalla waññi nu, nu waññiku;
yaw Aji Sax ji, yaa di sunu Yàlla.
19 Dëddu woon nanu la moos
waaye léegi réccu nanu.
Xam nan ne tooñ nanu,
ba tey nuy màttuy wiccam.
Danoo rus, torox
ndax sunu ñaawtéefi ndaw.”»

20 Aji Sax ji ne:
«Du Efrayim* ay sama doom ji ma sopp,
gone gi may bannexal?
Lu ma ko gédd gédd,
di ko bàyyi xel.
Moo tax sama xol di ko laaj,
ma yèrëm koo yèrëm.»
Kàddug Aji Sax jee.

21 «Sampal ay xàmmikaay ci yoon wi,
teg fi say màndarga.
Booy dem, defal sa xel ci yoon wii,
ñall wii nga topp.
Israyil mu taaru wi, ñibbsil,
ñibbsil sa dëkk yii.
22 Ndaw su toogadi si,
foo appal sa ciñiñ-cañiñ ji?
Aji Sax ji déy, sàkk na guléet kaw suuf:
yees ba mel ni jigéen juy jéflanteek goor†.»
23 Aji Sax ji Yállay Israyil Boroom
gàngoor yi dafa wax ne: «Bu ma tijjee seen
wèrség, kàddu gii dina jibati ci réewum
Yuda ak dëkk yi ko séq.
Dees na ne: “Yaw dëkkuwaayu njekk bii,
yaw, tundu Siyon wu sell wi,
yal na la Aji Sax ji barkeel!”
24 «Waa réewum Yuda ak dëkk-
dëkkaanam yépp ay bokk dëkk, ak beykat
yeek mangan yu yor gétt. 25 Maay nàndal
ku mar, leqli ku loof.»
Yeremeey wax

26 Ba loolu amee ma yewwu, ne xiféet,
xam ne samay nelaw neex na.

Aji Sax ji teewlul na Israyil

27 «Bés a ngii nag di ñëw.» kàddug
Aji Sax jee, «yu may jiwe kërug Israyil
ak kërug Yuda jiwum doom aadama ak
jiwum mala. 28 Te ni ma leen teewloo
woon ba ma leen di buddat, di leen faqat,
di leen daaneel, di leen yaqte ak a lor,
noonu laa leen di teewloo ngir defar leen,
jèmbat leen.» Kàddug Aji Sax jee. 29 «Su
boobaa deesatul ne:
“Baay lekk reseñ ju xaay,
mu uum bëñu doom ja.”
30 Su boobaa ku nekk sa bàkkaaru bopp
a lay rey. Ku lekk reseñ yu xaay, sa gëñi
bopp lay uum.

Köllère gu yees a ngi

31 «Ay bés a ngii di ñëw.» kàddug Aji
Sax jee, «yu may fas ak waa kër Israyil ak
waa kër Yuda köllère gu yees. 32 Du mel
ni köllère ga ma fasoon ak seeni maam
keroog ba ma leen jàppee ci loxo, génne
leen réewum Misra. Ndax ñoom ñoo fecci
sama köllère, te man may seen boroom
kër.» Kàddug Aji Sax jee. 33 «Waaye

* 31:20 31.20 Efrayim kenn la ci sèti Yanqóoba mi ñu dippee Israyil. Turu Efrayim wi fii askanu Israyil la fi taxawal.

† 31:22 31.22 Waxin la wu yéeme wuy wund jéfi guléet ju kenn séentuul, waaye xamuñu dégg la mu tekki
woon ca yooya jamono.

kóllère gi may fas ak waa kër Israyil gannaaw loolu.» kàddug Aji Sax jee, «nii lay deme: Maay yeb sama ndigali yoon ci seen xel, ci seen xol laa koy ñaas. Maay doon seen Yàlla, ñoom ñu doon sama ñoñ. ³⁴ Kenn dootu soxlaa jàngal kenn, muy moroomam mbaa mbokkam, naan ko: «Raññeel Aji Sax ji,» ndax ñoom ñépp a may raññee, ki gëna tuut ba ki gëna mag.» kàddug Aji Sax jee, «ndax maa leen di jéggal seeni ñaawtëef, te seeni bàkkaar, duma ci bàyyeeti xel.»

Lii mooy saxal Israyil

³⁵ Aji Sax ji dafa wax, moom ni dogal jant di leeral bèccëg, dogal weer ak bididiw di leeral guddi, yëngal géej, kiy gannax yi riir, kookooy Aji Sax ji Boroom gàngoor yi.

³⁶ Mu ne: «Bu askanu Israyil feyee ba faww, may gis, dogal yooyoo toxu, may gis.» Kàddug Aji Sax jee.

³⁷ Aji Sax ji dafa wax ne: «Su ma waccee mboolem askanu Israyil ndax li ñu def lépp, kon nit a mana natt kawewaayu asamaan, mbaa mu xayma xóotaayu suuf.» Kàddug Aji Sax jee.

³⁸ Mu ne: «Ay bés a ngi ñëw,» kàddug Aji Sax jee, «dees na tabaxalaat Aji Sax ji dëkk bi, dale ko ca soorooru Ananel ba ca buntu Ruq ba. ³⁹ Dees na fa rëddaat kemu dëkk bi, jubal ba tundu Gareb, wëri ba Gowa. ⁴⁰ Mboolem xuru nées yaak dóom ya ak mboolem tool ya, ba ca yoonu ndox ma ca Sedoron, ba ca ruqu buntu Fas ya ca penku: lépp lees di sellalal Aji Sax ji. Deesatu fa buddat mbaa di fa daaneel dara.»

32

Yeremi wone na dayob ngëmam

¹ Kàddu gi dikkaloon na Yeremi, bàyyikoo fa Aji Sax ji, ca fukkeelu atu nguurug Cedesyas buurub Yuda. Mu yemook ba nguurug Nabukodonosor buuru Babilon tolloo ca fukkeelu atam ak juróom ñett. ² Booba mbooloom xarem Babilon a nga gaw Yerusalem. Fekk Yonent Yàlla Yeremi nag moom, ma nga ñu tēj ca kër buurub Yuda, ca biir èttu dag ya, ³ fa ko Cedesyas buurub Yuda dencoon, ndax da ko noon: «Ana lu waral ngay wax bii waxyu? Nga ne: «Aji Sax ji dafa wax ne mu ngii di teg dëkk bii ci loxol buuru Babilon, mu nangu ko. ⁴ Te Cedesyas buurub Yuda du récc waa Babilon ndax dees na ko teg moos ci loxol buuru Babilon, ba Cedesyas wax, mu wax, seeni gët ñeent. ⁵ Babilon

lees koy yóbbu, te fa lay des, ba keroog may wax ci moom.» Kàddug Aji Sax jee. «Bu ngeen xareek waa Babilon it, dungeen am ndam.»

⁶ Yeremi da ne: Kàddug Aji Sax ji dikkal na ma ne ma: ⁷ «Xoolal, Anamel doomu Salum sa baay bu ndaw a ngooguy ñëw, naan la nga jënd toolam ba ca Anatot, ndax yaa ko saña jotaat.»

⁸ Ba loolu amee Anamel sama doomu baay bu ndaw dikk, na ma ko Aji Sax ji waxe. Mu fekk ma ci èttu dag yi, ne ma: «Rikk jëndal sama tool ba ca Anatot ca diiwaanu Beñamin ndax sa alal la ci yoon, yaa ko saña jotaat*. Kon jënd ko.» Ma xam ne loolu kàddug Aji Sax jaa.

⁹ Nii laa jënde tool ba ca Anatot ci Anamel sama doomu baay bu ndaw. Ma waññal ko xaalis bi, muy fukki donji xaalis ak juróom ñaar. ¹⁰ Ma bind kayitu njaay mi, màndargaale ko sama torlukaay, woo ciy seede, ba noppi natt diisaayu xaalis bi. ¹¹ Ma boole jël kayitu njaay bi tējewul ak kayitu njaay bi tėje, te yoonalu njaay meek sàrt yi ténke ci. ¹² Ma teg kayit yi ci loxol Barug doomu Nerya doomu Maaseya. Anamel sama doomu baay bu ndaw fekke na ko, seede yi torlu kayitu njaay mi fekke ko, ñook mboolem Yudeen ñi toogoon ci èttu dag yi.

¹³ Ma dënk Barug ci seen kanam, ne ko: ¹⁴ «Aji Sax ji Yállay Israyil Boroom gàngoor yi dafa wax ne: «Jëlal kayit yii, kayitu njaay bi tėje, ak kayit bi tējewul, nga boole yeb ci njaqal ban, ndax kayit yi mana yàgg. ¹⁵ Ndash Aji Sax ji Yállay Israyil Boroom gàngoor yi dafa wax ne: Dees na dellu di jënd ay kër aki tool ak tóokëri reseñ ci réew mii.»

Xelu Yeremi teey na

¹⁶ Gannaaw ba ma joxee kayiti njaay ma Barug doomu Nerya, damaa ñaan Aji Sax ji, ne ko: ¹⁷ «Éy saa Boroom, Aji Sax ji! Yaw déy yaa sàkk asamaan, sàkk suuf ci sa doole ju bare ak sa kàttan. Dara tēwu la. ¹⁸ Yaw miy jēfe ngor sa digg ak junniy maas, te bu baay ñaawee, nga topp ko ko, ba ci doomam. Yaay Yàlla ju mǎgg ji te jambaare. Yaa di Aji Sax ji Boroom gàngoori xare yi, ¹⁹ réyi pexe, mǎggi jaloore; say gèt ne jǎkk ci mboolem lu doom aadama def, ngay añale ku nekk jéfinam ak jéfam. ²⁰ Yaa def ay firnde aki kéemaan ca réewum Misra, di ko def ba tey jii ci Israyil, ak ci doom aadama yépp, ba may sa bopp woy wu réy wi nga am tey jii. ²¹ Génne nga Israyil say ñoñ, jële leen réewum Misra, ci kawi firnde aki kéemaan ak sa doole ju bare ak sa kàttan;

* 32:8 32.8 jotaat: seetal ci *Sarxalkat* yi 25.22-34.

mu jur tiitaange lu réy. ²² Nga jox leen réew mii nga giñaloon seeni maam. Muy réew mu meew meek lem ji tuuroo. ²³ Ñu dikk moom ko, te déggaluñu la, toppuñu saw yoon, jéfewuñu mboolem li nga leen santoon, ba tax nga wacce ci seen kaw mboolem musiba mii.

²⁴ «Sékki gawukaay yaa ngii ñu yékkatil dëkk bi, ngir nangu ko. Dëkk bi dina daanu ci loxoy waa Babilon ñi ko song, ndax saamar akub xiif ak mbas. Gis nga ko déy, li nga waxoon am na! ²⁵ Dëkk baa ngii nara daanu ci loxoy waa Babilon te moona Boroom bi Aji Sax ji, yaw yaa ma ne ma jende tool bi xaalis, ay seede seede ko.»

Aji Sax ji dalal na xelu Yeremi

²⁶ Ba loolu amee kaddug Aji Sax ji dikkal Yeremi, ne ko: ²⁷ «Du maay Aji Sax ji, Yállay képp kuy dund. Ana lu ma të?» ²⁸ Kon nag Aji Sax ji dafa wax ne: «Maa ngii di teg dëkk bii ci loxoy waa Babilon ak ci loxol Nabukodonosor buuru Babilon, mu nangu ko. ²⁹ Waa Babilon ñiy song dëkk bii dinañu dugg, taal ko, lakk ko ba mu jeex, lakkaale kër ya ñu doon taalal Baal tuur mi, cuuraay ca kaw taax ya, di fa tuural yeneen yalla ay saraxi naan, ba di ma merloo. ³⁰ Askanu Israyil ak Yuda kay, ca cosaan ba tey, defuñu lu moy lu bon fi sama kanam. Banni Israyil, mboolem lu ñu def, defuñu ko lu moy di ma merloo.» Kaddug Aji Sax jee. ³¹ «Mer dikkal na ma, xadar dikkal ma ci dëkk bii, dale ko ca ba ñu ko tabaxee ba bésub tey, ba tax ma di ko jële fi sama kanam, ³² ndax mboolem lu bon li banni Israyil ak Yuda def, di ma merloo, ñook seeni buur ak seeni kàngam ak seeni sarxalkat ak seeni yonent ak waa Yuda ak waa Yerusaleem. ³³ Wonuñu ma kanam, xanaa gannaaw, te ma artu leen ay yooni yoon. Waaye ñoom dégluwñu, dégguñu yar. ³⁴ Yeb nañu sax seen yéf yu seexluwu ci biir kër gi ñu ma tudde, ba sobeel ko. ³⁵ Tabaxal nañu Baal tuur mi ay bérabi jaamookaay ca xuru Ben Inom, di fa lakk seen doom yu góor ak yu jigéen ngir Moleg tuur mi, te masuma leen koo sant. Jooju jéf yu siblu jaarul sax sama xel ba ma leen di ko defloo, ñuy yóbbe Yuda bákkaar.

³⁶ «Yeena wax ci dëkk bii ne dina daanu ci loxol buuru Babilon ndax saamar akub xiif ak mbas. Waaye Aji Sax ji Yállay Israyil dafa wax ne: ³⁷ Maa ngii di leen dajalee ca mboolem réew ya ma leen sanni woon, ndax mere leen ak jéppi leen ba sama xol fees dell. Te maa leen di délloosi fii, dëel leen ci jàmm; ³⁸ ñu doon sama ñoñ, may seen Yalla. ³⁹ Maa leen di may benn xol ak benn jubluwaay ngir ñu di ma wormaal

seen giiru dund, muy seen ngéneel, ñook seen doom yi leen di wuutu. ⁴⁰ Maay fas ak ñoom kóllère gu sax dàkk gu ma leen dul xañati; xanaa baaxe leen, yeb ragal Yalla ci seen xol, ba dootuñu ma won gannaaw. ⁴¹ Maay am mbégtey baaxe leen, jëmbat leen bu wér ci réew mi, jëmbate leen sama léppi xol ak sama léppi jëmm.»

⁴² Aji Sax ji déy dafa wax ne: «Ni ma wacce ci kaw xeet wii musiba mu mag mii mépp, ni laay wacce fi seen kaw mboolem ngéneel li ma leen wax. ⁴³ Dees na dellu di jënd ab tool ci réew mii ngeen ne daanu na ci loxol waa Babilon, ba dib gent bu kenn nekkul, du nit, du rab. ⁴⁴ Dees na fi jende xaalis ay tool, bind fi kayiti njaay, torlu ko, tëj fi kanami seede ci suufes Beñamin, ak li wër Yerusaleem, ak biir dëkki Yuda, ak dëkki tund ya, ak dëkki suufu tund ya, ak ca dëkki diiwaanu Negew. Maay tijji moos seen wërsëg.» Kaddug Aji Sax jee.

33

Aji Sax ji du dige, di fomm

¹ Gannaaw loolu kaddug Aji Sax ji dikkal na Yeremi ñaareel bi yoon, fekk ko tëje ba tey ca biir èttu dag ya. Mu ne ko: ² «Aji Sax ji dafa wax, moom miy sàkk mbir, bind ko, taxawal ko, Aji Sax ji di turam. ³ Mu ne: “Woo ma, ma wuyu la, wax la lu réy te loq, loo xamul woon.”» ⁴⁻⁵ Aji Sax ji Yállay Israyil déy dafa wax ci mbirum kéri dëkk bii ak kéri buuri Yuda yii ñu màbb, di ko fegoo sékk bi ñu leen gawe te di ko làqoo saamaru waa Babilon ñi ñuy xareel. Mu ne: «Kër yi dina fees ak néewi nit ñi ma bóom ndax mer ak xol bu fees. Dinaa làq dëkk bii sama yiw ndax seen gépp mbon.

⁶ «Waaye du tee, maa leen di may tan, faj leena faj ba lu wér, won leen xéewalu jàmm ju dégg. ⁷ Maay tijji wërsëgu Yuda ak wërsëgu Israyil, sampaat leen na woon. ⁸ Maa leen di raxasal mboolem ñaawtéef gu ñu ma moye, baal leen mboolem ñaawtéef yu ñu ma moye, di ma gantal. ⁹ Dëkk bi daldi doon sama woy, di sama mbégte, di sama ndam, di sama sag ci biir mboolem xeeti àddina yi dégg ngéneel yi ma leen di defal yépp. Dinañu yéemu ba seen yaram daw ci lépp luy ngéneel ak jàmm ju ma leen di defal.»

¹⁰ Aji Sax ji dafa wax ne: «Bérah bii ngeen ne ab gent la bu kenn nekkul, du nit, du rab te muy dëkki Yudad mbeddi Yerusaleem yii gental, kenn neku fi, du nit, du rab, dees na fi déggati ¹¹ coowal mbégteek coowal bannex ak kaddug boroom séet ak kaddug séetam, ànd ak kaddug nit ñiy indi saraxi cant ci biir kër Aji Sax ji, di jàngaale naan:

«Santleen Aji Sax ji Boroom gàngoori xare yi.

Aji Sax jee baax, kee saxoo ngoram.»

Maay tiji wërsëgu réew mi, na woon.» Aji Sax jee ko wax.

¹² Aji Sax ji Boroom gàngoor yi dafa wax ne: «Bérah bii di gent bu kenn nekkul, du nit du rab ci dëkk yi fi nekk yépp, bérah bii dina dellu am parlu yu samm siy gooral seeni gätt. ¹³ Muy dëkki tund yi, di dëkki suufu tund yi, di dëkki diiwaanu Negew, di diiwaanu Beñamin, di li wër Yerusalem, di dëkki Yuda, gätt yi dina dellu ci loxol samm buy takk lim ba.» Aji Sax jee ko wax.

Askanu Buur Daawuda dina yeestu

¹⁴ «Ay bés a ngii di ñëw,» kàddug Aji Sax jee, «maay sottal ngéneel la ma dig waa kër Israyil ak waa kër Yuda.

¹⁵ Bés yooyu ci jamonoom, maay jebbil njebbit lu jekk ci askanu Daawuda,

muy jéfe njub ak njekk ci réew mi.

¹⁶ Bés yooyu Yuda day muc, Yerusalem dëkke jamm,

ñu di ko wooye:

«Aji Sax ji sunu njekk.»

¹⁷ Aji Sax ji déy dafa wax ne: «Daawuda du ñakk mukku ko wuutu ci jalu Israyil. ¹⁸ Sarxalkat yiy Leween it duñu ñakk ku leen taxawal fi sama kanam, di joxe saraxi rendi-dóomal, di taal saraxi pepp ak a sarxal ba faww.»

Kóllère gu dul toxoo ngi

¹⁹ Gannaaw loolu kàddug Aji Sax ji dikkal na Yeremi, ne ko: ²⁰ «Aji Sax ji dafa wax ne: Ndegam manees naa dog sama kóllère maak bëccëg mbaa sama kóllère maak guddi, ba bëccëg mbaa guddi baña teew ci waxtoom, ²¹ kon dees na mana dog sama kóllèreek Daawuda sama jaam bi, dogaaale sama kóllèreek sarxalkati Leween ñi may liggéeyal, ba Daawuda ñakk sët bu koy wuutu cib jalam. ²² Ni biddiwi asamaan weese lim, feppi suufas géej wees waññ, ni laay fule askanu Daawuda sama jaam bi ak askanu Leween ñi may liggéeyal.»

²³ Kàddug Aji Sax ji dellu dikkal Yeremi, ne ko: ²⁴ «Xanaa dégguloo li nit ñi wax? Ñu ne: «Naari làng ya Aji Sax ji tannoone de, wacc na leen,» moo tax ñu xeeb sama ñoñ, ba tegatuñu leen sax aw xeet.»

²⁵ Waaye Aji Sax ji dafa wax ne: «Ndegam du maa fas sama kóllère maak bëccëg ak guddi, te du maa saxalal asamaan ak suuf ay sàrt, ²⁶ kon dinaa wacc askanu Yanqóoba ak Daawuda sama jaam bi, ba dootuma taamoo ciw askanam kuy yilif

askanu Ibraaymaak Isaaxaak Yanqóoba. Maay tiji seen wërsëg moos, yërëm leen.»

34

Aji Sax ji wax na Buur Cedesyas mujam

¹ Ba Nabukodonosor buuru Babilon àndeek mbooloom xareem mépp ak mboolem réew yeek xeet yi mu teg loxo, ñu songandoo Yerusalem ak dëkk yi ko wër yépp, kàddu gii dikkaloon na Yeremi, bàyyikoo ci Aji Sax ji: ² «Aji Sax ji, Yállay Israyil dafa wax ne: Demal nga wax Cedesyas buurub Yuda ne ko: «Aji Sax ji dafa wax ne: Maa ngii di teg dëkk bii ci loxol buuru Babilon, mu taal ko. ³ Yaw Cedesyas nag doo ko récc. Dees na la jàpp moos te dees na la teg ci loxol buuru Babilon, mu wax ak yaw, seeni gët ñeent; nga dem Babilon.

⁴ «Waaye yaw Cedesyas buurub Yuda, déglul kàddug Aji Sax ji: Aji Sax ji dafa wax ne doo deeye saamar. ⁵ Ci jàmm ngay dee, te ni ñu taalale woon cuuraay say maami buur yi la jiiitu, terale leena ko ci seen dëj, ni lañu lay taalale cuuraay, di la jooy naan: 'Wóoy sunu sang ba dem na!' Jii wax, maa ko wax.» Kàddug Aji Sax jee.

⁶ Ci kaw loolu Yonent Yalla Yeremi jottli Cedesyas buurub Yuda mboolem kàddu yooyu fa Yerusalem. ⁷ Mu yemook ba mbooloom buuru Babilon di xareek Yerusalem ak mboolem dëkki Yuda ya desoon, di Lakis ak Aseka. Booba yooyu rekk a desoon ci dëkki Yuda yu tata wër.

Yiwi jaam yi war na

⁸ Kàddu gii dikkaloon na Yeremi, bàyyikoo ci Aji Sax ji, gannaaw ba Buur Cedesyas fasook mboolem waa Yerusalem ngir goreel jaam yi, ⁹ ku nekk wara goreel mbokkam mu Ebraam, góor ak jigéen, ñu moom seen bopp, te kenn baña jaamlooti mbokkam Ebraam. ¹⁰ Ba mu ko defee mboolem kàngam yeek nit ñi ko fasoo woon daldi nangoo goreel seen jaam yu góor ak yu jigéen, bañ leena jaamlooti, ñu moom seen bopp. Ñu daldi leen yiwi. ¹¹ Gannaaw gi nag ñu walbatiku, jëlaat seen jaam yu góor ak yu jigéen ya ñu goreeloon, dellooleen cig njaam, góor ak jigéen.

¹² Ba loolu amee kàddug Aji Sax ji dikkal Yeremi bàyyikoo ci Aji Sax ji, ne ko: ¹³ «Aji Sax ji Yállay Israyil dafa wax ne: Man maa fasoon kóllère ak seeni maam keroog bés ba ma leen génnee réewum Misra kërug njaam ga, ne leen: ¹⁴ «Saa yu ngeen waññee juróom benni at ba ca catal juróom ñaareel ma, na ku nekk ci yeen goreel mbokkam Ebraam mu ko jaayoon

* 34:14 34.14 Seetal ci Mucc ga 21.2-6.

boppam. Gannaaw bu ko liggéeyalee juróom benni at, na ko goreel, mu tàggook moom, daldi moom boppam*. Waaye seeni maam déggaluñu ma, teewluwñu ma. ¹⁵ Tey yeen, waññiku woon ngeen, ba def li ma rafetlu; ku nekk ci yeen biral goreelu mbokkam. Fasoo ngeen ko sax fi sama kanam ci biir kër gi ñu ma tudde. ¹⁶ Léegi nag ngeen di teddadil sama tur, dellu gannaaw, ku nekk jélaat jaamam yu góor ak yu jigéen, te ngeen goreeloon leen ba noppi, ñu moom seen bopp ni mu leen neexe. Néewal ngeen leen doole, ñu dellu di seeni jaam.»

¹⁷ «Kon nag, Aji Sax ji dafa wax ne: «Ku nekk ci yeen waroon naa goreel mbokkam dékkandoom, waaye yeen déy, déggaluleen ma. Man nag maa ngi nii di leen goreel,» kàddug Aji Sax jee, «ngir wacce leen saamar ak mbas akub xiif. Maa leen di def waa réewi áddina yépp seexlu leen. ¹⁸ Nit ñi fecci sama kóllère, sammuñu ponki kóllère gi ñu dige woon fi sama kanam, maa leen di def ni sèllu wa nit ña xaroon ñaar, jaare ca diggante xaaj ya, dogale ko seen ngiñ. ¹⁹ Muy kàngami Yuda, di kàngami Yerusalem, di bëkk-néeg yeek sarxalkat yi, ak mboolem waa réew mi jaare woon ci diggante ñaari xaaji sèllu wa, ²⁰ maa leen di teg ci seen loxoy noon ak ñiy wut seen bakkan; seeni néew, njanaaw yeek rabi àll yi for. ²¹ Cedesyas buurub Yuda, mook ay kàngamam, maa leen di teg ci seen loxoy noon, loxoy ñiy wut seen bakkan, teg leen ci loxoy mbooloom xarem buuru Babilon mi leen songoon, ba di leen doora bàyyi. ²² Maa ngi nii di joxe ndigal,» kàddug Aji Sax jee, «délloosi leen ci dëkk bi, ñu song ko, ba nangu ko, taal ko ba mu jeex. Maay gental dëkki Yuda, ba kenn du ca des.»»

35

Rekabeen raw na Yudeen

¹ Kàddu gii dikkaloon na Yeremi, bàyyikoo ci Aji Sax ji ci jamonoy buurub Yuda Yowakim doomu Yosya. Mu ne ko: ² «Demal ca Rekabeen ña, nga wax ak ñoom, indi leen kër Aji Sax ji, dugal leen ci néeg yi benn, te jox leen biiñ, ñu naan.»

³ Ma dem wooyi Yaasaña doomu Yeremi doomu Abàcciña, boole kook ay doomi baayam ak doomam yu góor yépp, làngi Rekabeen ñépp daal. ⁴ Ma yóbbu leen kër Aji Sax ji, dugal leen ca biir néegu taalibey Xanan, góorug Yalla gay doomu Igdalyaa; mooy néeg ba dendeek néegu kàngam ya, ca kaw néeg doomu Salum, Maaseya fara bunt ba. ⁵ Ci kaw loolu ma tegal Rekabeen ñi ay njaqi biiñ yu fees, aki kaas, ne leen: «Naanleen.» ⁶ Ñu ne: «Nun dunu naan

biiñ, ndax sunu maam Yonadab doomu Rekab da noo santoon ne nu: «Buleen naan biiñ muk, muy yeen ba ci seeni sèt, ba fàww. ⁷ Buleen tabax kër, buleen bey, buleen jëmbat tóokëru reseñ, bumu bokk ci seen alal. Waaye nangeen dëkkey xayma seen giiru dund gépp, su ko defee ngeen gudd fan ci biir réew mii ngeen diy mangan.» ⁸ Déggal nanu it sunu maam Yonadab doomu Rekab ci mboolem li mu nu santoon, ne nu bunu naan biiñ sunu giiru dund, nook sunuy jabar ak sunuy doom, góor ak jigéen, ⁹ bunu tabax kër yu nu dëkke, te tóokër ak tool lu ñuy bey, bumu bokk ci sunu alal. ¹⁰ Waaye ay xayma lanu dëkke, di sàmm ak a jéfe mboolem lu nu sunu maam Yonadab santoon. ¹¹ Waaye ba Nabukodonosor buuru Babilon songee réew mi lanu ne: «Nan duggi gaaw biir Yerusalem, ba récc mbooloom waa Babilon ak Siri.» Moo nu taxa toog nii ci biir Yerusalem.»

¹² Ba loolu amee kàddug Aji Sax ji dikkal Yeremi, ne ko: ¹³ «Aji Sax ji Yállay Israyil Boroom gàngoori xare yi dafa wax ne: Demal wax mboolem waa Yuda ak waa Yerusalem, ne leen: «Xanaa dungeen dégg ndigal, ba dégg samay kàddu?» Kàddug Aji Sax jee. ¹⁴ «La Yonadab doomu Rekab santoon ay doomam ne leen: ‘Buleen naan biiñ’ de, jéfees na ko. Duñu naan biiñ ba tey jii ndax wormaal seen santaaney maam. Man nag ay yooni yoon laa leen wax waaye déggaluleen ma. ¹⁵ Yónnee naa leen samay jaam, yonent yi, ay yooni yoon, ne leen: ‘Na ku nekk ci yeen dépp yoonam wu bon, di def lu baax, baña topp yeneen yalla, di leen jaamu, ndax ngeen dund ci réew mi ma leen jox, yeen ak seeni maam.’ Waaye teewluwleen ma, déggaluleen ma. ¹⁶ Sëti Yonadab doomu Rekab yii déy wormaal nañu santaane ba leen seen maam santoon, waaye xeet wii déggaluñu ma.»

¹⁷ «Kon nag Aji Sax ji Yállay Israyil, Boroom gàngoori xare yi dafa wax ne: Maa ngi nii di wàcceel Yuda ak képp ku dëkke Yerusalem mboolem musiba mu ma leen tuddaloon. Ndax damaa wax ak ñoom te dégluwñu; ma woo leen, wuyuwñu.»

¹⁸ Ba loolu amee Yeremi ne Rekabeen ña: «Aji Sax ji Yállay Israyil Boroom gàngoori xare yi dafa wax ne: Gannaaw wormaal ngeen seen kàddug maam Yonadab, topp santaaney yépp, ba jéfe lépp lu mu leen santoon, ¹⁹ loolu tax na Aji Sax ji Yállay Israyil Boroom gàngoori xare yi wax ne: «Askanu Yonadab doomu Rekab du ñàkk muk ku góor ku may liggéeyal ba fàww.»»

Yowakim def na musibaam

¹ Ba loolu wéyee, ci ñeenteelu atu ngu-urug buurub Yuda Yowakim doomu Yosya, kàddu gii dikkal na Yeremi, bàyyikoo ci Aji Sax ji, ne ko: ² «Jëlal taxañu bindukaay*, nga bind ci mboolem kàddu yi ma la wax ci mbirum Israyil ak Yuda ak mboolem xeet yi, te nga dale ko ba ma waxeek yaw ca jamonoy Yosya ba bésuub tey jii. ³ Jombul waa kër Yuda dégg mboolem musiba mi ma leen nara teg, ba tax ku ne ci ñoom dépp yoonam wu bon, ngir ma baal leen seen ñaawtéef ak seen moy.»

⁴ Yeremi woo Barug doomu Nerya, dégtal ko mboolem kàddu yi ko Aji Sax ji wax, mu bind ko ci ab taxañu bindukaay. ⁵ Yeremi nag wax Barug, ne ko: «Man damaa am ngànt. Duma mana dem kër Aji Sax ja. ⁶ Demal yaw bésuub koor, nga jàng taxañ, bi nga bind kàdduy Aji Sax, ji ma la dégtal, ña ca kër Aji Sax ji di dégg. Nanga ko jàng itam ci kanam mboolem Yudeen ña jóge seeni dëkk. ⁷ Jombul ñu tinu Aji Sax ji, ku nekk ci ñoom dépp yoonu mbonam, ndax mer mu réy ak xadar ji Aji Sax ji tuddal askan wii kat, nar naa metti.»

⁸ Barug doomu Nerya def mboolem la ko Yonent Yàlla Yeremi sant, daldi jàng ca kër Aji Sax ji taxañ ba ñu bind kàdduy Aji Sax ji. ⁹ Loolu yemook juróomeelu atu nguurug buurub Yuda, Yowakim doomu Yosya ca juróom ñeenteelu weer wa. Fekk ñu yéene koor fi kanam Aji Sax ji, ñeel waa Yerusalem gépp ak mboolem ña jóge dëkki Yuda. ¹⁰ Ci biir loolu Barug tollu ca néegu bindkat ba, Gemarya doomu Safan, ca kër Aji Sax ja. Mui jàng taxañ ba ñu bind kàdduy Aji Sax ji, mbooloo mépp di dégg. Néeg baa nga woon ca èttu kër Aji Sax ja ca kaw, fa féeteek bunt bu Bees ba. ¹¹ Mise doomu Gemarya doomu Safan dégg mboolem kàdduy Aji Sax, ja ca taxañ ba. ¹² Mu daldi wàcc, ba ca kër buur, jàll ca néegu bindkat ba, fekk fa kàngam yépp toog: Elisama bindkat ba, ak Delaya doomu Semaya, ak Elnatan doomu Agbor, ak Gemarya doomu Safan, ak Cedesyas doomu Anaña, ak jawriñ ña ca des ñépp. ¹³ Mise yegge leen lépp la mu dégg Barug jàng ko ca taxañ ba ca kanam mbooloo ma.

¹⁴ Ci kaw loolu kàngam yépp yebal Yewudi doomu Netaña doomu Selemya doomu Kusi. Ñu ne ko: «Demal ne Barug taxañ bi mu jàngal mbooloo mi, na ko jël te ñew, indaale ko.» Barug doomu Nerya ñabb taxañ ba ca loxoom, dem ba ca ñoom. ¹⁵ Ñu ne ko: «Toogal jàngal nu

ko, nu dégg.» Barug jàngal leen ko, ñu dégg. ¹⁶ Ba ñu déggee kàddu ya yépp, dañoo tiit, ku ne xool sa moroom. Ñu ne Barug: «Nun kat, nan yegge Buur mbir mii mépp.» ¹⁷ Ñu laaj Barug, ne ko: «Wax nu! Noo binde kàddu yii yépp. Yeremee la ko dégtal?» ¹⁸ Barug ne leen: «Moo ma dégtal kàddu yépp de, ma binde ko daa ci taxañ bi.» ¹⁹ Kàngam ya ne Barug: «Demal làquji yaak Yeremi, te bu kenn xam fu ngeen ne!»

²⁰ Ba loolu amee ñu wacc taxañ ba ca néeg Elisama bindkat ba, daldi ànd fekki Buur ca èttam. Ñu yegge ko mbir ma mépp.

²¹ Buur nag yebal Yewudi, ngir mu jéli taxañ ba. Mu jëleji ko ca néeg Elisama bindkat ba, daldi jàngal taxañ ba Buur, mook mboolem kàngam ya feggook moom. ²² Booba jamonoy sedd la woon, yemook juróom ñeenteelu weer wa. Buur a nga toog ca biir néegu njaaram; taal ba yànj, janook moom. ²³ Ci biir loolu saa yu Yewudi jàngee ñetti dog ba ñeent, Buur fab saatus bindkat, dagg dog ya, sànni ca taal ba. Mu di ko def ba taxañ ba lakk ca taal ba, ba jeex tàkk. ²⁴ Buur ak jawriñam ña ñépp dégg nañu kàddu ya, waaye tiituñu sax, astamaak di xotti seeni yére ni kuy tiislu di def. ²⁵ Elnatan ak Delaya ak Gemarya sax tinu nañu Buur, ngir mu baña lakk taxañ ba. Waaye Buur dégluw leen, ²⁶ xanaa mu sant Yerameel, kenn ci askanu Buur, mook Seraya doomu Asriyel, ak Selemya doomu Abdel, ne leen ñu jàpp Barug bindkat ba ak Yonent Yàlla Yeremi. Teewul Aji Sax ji làq leen.

²⁷ Gannaaw ba Buur lakkee taxañ, ba def kàddu ya Barug bindoon ca dégtalub Yeremi, kàddug Aji Sax ji dikkal na Yeremi, ne ko: ²⁸ «Dellul jël beneen taxañu bindukaay, nga dellu bind ca mboolem kàddu ya woon ca taxañ ba Yowakim buurub Yuda lakk. ²⁹ Yowakim buurub Yuda nag, nanga ko wax ne ko: «Aji Sax ji dafa wax ne yaw yaa lakk taxañ bii, naan lu waral ma bind ci ne buuru Babilon dina ñew moos te dina tas réew mii, faagaagal fi nit ak mala. ³⁰ Moo tax Aji Sax ji wax ci mbirum Yowakim buurub Yuda, ne: du am ku ko toogal ci jalub Daawuda. Néewam dees koy sànni ci biti, mu yendoo naaj, fanaanoo sedd. ³¹ Maa koy yen añu ñaawtéefam, mook njabootam aki surgaam. Maay wàcce ci seen kaw, ñook waa Yerusalem ak Yuda gépp, mboolem musiba mu ma leen digoon, te taxul ñu dégg.»

* 36:2 36.2 taxañu bindukaay ay dogiti der yu bare yu ñu ñawante lay doon, ba mu doon deru bindukaay bu mag bu ñuy taxañ ci bant. Mbind mi nag def ay dog yu dékkarloo.

³² Ci kaw loolu Yeremi jël beneen taxañu bindukaay, jox ko bindkat ba, Barug doomu Nerya. Mu dégtal ko, mu bind ca mboolem kàdduy taxañ, ba Yowakim buurub Yuda lakkoon ca taal ba. Yeneen kàddu yu bare yu ni mel sax, dolliku na ca.

37

Cedesyas sàkku na ndimbal

¹ Cedesyas doomu Yosya, ja Nabukodonosor faloon buur ci réewum Yuda moo wuutu Kooña* doomu Yowakim. ² Waaye muy Cedesyas, muy jawriñam ñi, muy waa réew mi, kenn dégluwu ci kàdduy Aji Sax ji mu wax, Yonent Yàlla Yeremi jottli.

³ Mu am bés Buur Cedesyas woo Yukal doomu Seleya, ak Cefaña sarxalkat bi, doomu Maaseya. Mu yebal leen ci Yonent Yàlla Yeremi; ñu ne ko: «Rikk ñaanan nu ci sunu Yàlla Aji Sax ji.»

⁴ Booba Yeremeexa nga doon dem ak a dikk nu mu ko neexe, kenn tējagu ko woon kaso. ⁵ Mu fekk mbooloom Firawna génn Misra, di ñew. Waa Babilon ña gawoon Yerusalem dégg ca, ba jóge fa, dellu gannaaw.

⁶ Ba loolu amee kàddug Aji Sax ji dikkal Yonent Yàlla Yeremi, ne ko: ⁷ «Aji Sax ji Yállay Israyil dafa wax ne: Buuru Yuda mi leen yebal, ngeen seetsi ma, waxleen ko ne ko: “Mbooloom Firawna mi génnoon di leen wallusi kat, dèpp na bay dellu Misra. ⁸ Waa Babilon dinañu dèlsi, song dèkk bii xare, nangu ko, lakk ko ba mu jeex.” ⁹ Aji Sax ji nag dafa wax ne: Buleen nax seen bopp naan: “Dem, ba nu, la waa Babilon di def.” Ndash duñu dem. ¹⁰ Bu ngeen fàddoon mbooloom xarem Babilon miy xareek yeen ñépp it, ba deslewuñu lu moy nit ñu ñu jamat, ñooñooy jógandoo taxaw ca seeni xayma, daldi lakk dèkk bii.»

¹¹ Gannaaw ba mbooloom xarem Babilon jógee Yerusalem, di daw mbooloom Firawna, ¹² Yeremi bàyyikoo dèkk ba, jëm diiwaanu Beñamin cay bokkam ngir jéli céram ci ab séddaleb suuf. ¹³ Ba mu demee ba tollook buntu Beñamin, daje faak njiitu dag ya, Irya doomu Seleya doomu Anaña. Irya taxawal Yonent Yàlla Yeremi, ne ko: «Áa, waa Babilon nga daw jëm!» ¹⁴ Yeremi ne ko: «Fen nga! Man du maay fekki waa Babilon!» Irya dégluwu ko, xanaa jàpp ko, yóbbu ca kàngami buur ya, ¹⁵ seen xol tàng ci Yeremi, ñu dóor ko ba noppi, tēj ko ca biir kër Yonatan bindkat ba, fa ñu defoon kaso.

¹⁶ Gannaaw ba ñu dencee Yeremi ca kaso bu xóot ba, ca biir kàmb ga, ba mu toog

fa ay fani fan, ¹⁷ Buur Cedesyas yónnee, woolu ko. Mu ñaarooq moom ca biir kèram, laaj ko, ne ko: «Mbaa am nga kàddu gu bawoo ci Aji Sax ji?» Yeremi ne ko: «Xanaa lii: “Ci loxol buuru Babilon lees lay teg.”» ¹⁸ Yeremi teg ca ne Buur Cedesyas: «Ana fu ma la tooñe, yaak say surga, mbaa askan wii, ba nga tēj ma kaso? ¹⁹ Te sa yonent yi la doon jottli waxyu, naan la buuru Babilon du dikk ci seen kaw, yaak waa réew mii, ana ñu léegi? ²⁰ Léegi nag Buur sang bi, dama lay ñaan ngalla, bul ma delloo kër Yonatan bindkat bi, ma di fa dee.»

²¹ Ba loolu amee Buur Cedesyas santaane ñu teg Yeremi ca biir èttu dag ya. Ñu di ko jox bés bu ne menn mburum lémm mu jóge ca mbeddu Lakk-kati mburu ya, ba keroog mburu di ñàkk ca dèkk ba. Yeremi nag toog ca èttu kër dag ya.

38

Tàbbal nañu Yeremi ca kàmb ga

¹ Mu am bés Sefatiya doomu Matan ànd ak Gedalya doomu Pasur ak Yukal doomu Seleya ak Pasur doomu Malkiya. Ñu dégg Yeremiy wax, ñépp di dégg, naan: ² «Aji Sax ji dafa wax ne: “Ku des ci biir dèkk bii, saamar rey ko, mbaa xiif, mbaa mbas. Waaye ku génn fekki waa Babilon, dina raw, bakkanam di ngañaa yu xareem, mu mucc.” ³ Aji Sax ji dafa wax ne: “Dees na teg moos dèkk bii ci loxol mbooloom buuru Babilon, mu nangu ko.”»

⁴ Kàngami buur yooyu dem ne Buur: «Waa jii, na dee rekk; mu ngi yoqil xarekat yi des ci dèkk bi, di yoqil ñépp ndax waxam jii mu leen di wax. Waa jii kat wutul jàmmu askan wii, xanaa musiba.»

⁵ Buur Cedesyas ne leen: «Mu ngoog ci seen loxo, manaluma leen dara!» ⁶ Ñu jàpp Yeremi, ngir denci ko ca kàmbug Malkiya, kenn ci askanu buur, ca biir èttu dag ya. Ñu yoore ko buum, ba ca biir, te kàmb ga amul ndox, bàq rekk a fa nekk. Yeremi nag tàbbi ca biir bàq ba.

⁷ Ci biir loolu Ebedd Meleg, Kuuseen ba, di bèkk-néeg ci biir kër buur, dégg ne tàbbal nañu Yeremi ca kàmb ga. Fekk Buur a nga toog ca bunt ba ñu dippee Beñamin. ⁸ Ebedd Meleg jóge kër buur, dikk ne ko: ⁹ «Buur sang bi, nit ñi de, lu bon lañu def Yonent Yàlla Yeremi; tàbbal nañu ko ca kàmb ga. Dina fa dee ak xiif ndax ab dund amatul ci dèkk bi.» ¹⁰ Buur sant Ebedd Meleg Kuuseen ba, ne ko: «Jéleel fii fanweeri nit, nga dem géne Yonent Yàlla Yeremi kàmb ga bala moo dee.» ¹¹ Ebedd Meleg jël nit ña, daldi dem

* 37:1 37.1 Kooña mooy Yowakin, di Yekoña ba tey.

biir kër buur; jäll ba ca suufu néegu denc ya. Mu jële fa yére yu ràpp aki sagar, boole lépp, yoore buum ca kàmb ga, jottli ko Yeremi. ¹² Ebedd Meleg ne Yeremi: «Ayca, booleel sagar yi, nga jiital ko ci say poqtaan, teg ci buum yi.» Yeremi def noonu. ¹³ Ñu xëcc buum yi, génne Yeremi kàmb ga. Gannaaw loolu Yeremi des ca biir èttu dag ya.

¹⁴ Ba loolu wéyee Buur Cedesyas yónnee, woolu Yonent Yälla Yeremi, ñaarook moom fa ñetteelu bunt ba ca kër Aji Sax ja. Mu ne Yeremi: «Dama lay laaj lenn. Bu ma nèbb dara.» ¹⁵ Yeremi ne Cedesyas: «Su ma la waxee li am, du danga may rey rekk? Te su ma la digalee it, doo ma déggal.» ¹⁶ Buur Cedesyas déey Yeremi, ne ko: «Giñ naa ci Aji Sax jiy dund te sàkkal nu bakkan, duma la rey te duma la teg ci loxoy ñii di wut sa bakkan.»

¹⁷ Yeremi ne Cedesyas: «Aji Sax ji, Yállay Israyil, Boroom gàngoor yi dafa wax ne: Soo nangoo génn rekk, jébbali sa bopp kàngami buuru Babilon déy, dinga rawale sa bakkan, te dëkk bii du lakk ba jeex. Dinga dund yaw, yaak sa waa kër. ¹⁸ Waaye soo jébbalul sa bopp kàngami buuru Babilon, dees na teg dëkk bi ci loxoy waa Babilon, ñu lakk ko ba mu jeex, te yaw doo leen récc.» ¹⁹ Buur Cedesyas ne Yeremi: «Man, ñi ma ragal mooy sunu bokki Yudeen ñi ñibbil waa Babilon; bu ñu ma tegee ci seen loxo, ñu torxal ma.» ²⁰ Yeremi ne ko: «Deesu la leen jox. Dangay déggal Aji Sax ji ci li ma la wax rekk, muy sa jàmm, nga mucc.» ²¹ Waaye soo lánkee, ne doo génn, mbir a ngii mu ma Aji Sax ji won. ²² Gisuma lu moy mboolem jigéen ñi des ci kër buurub Yuda, ña nga ñu jême ca kàngami buuru Babilon. Ña nga naan: «Buur aka baaxi xarit! Ñoom ñi ko nax, ba man ko, mu tàbbi ca bàq ba, ñu dëddu, ne mes!»

²³ Mboolem say soxnaak say doom, dees leen di yóbbu ca waa Babilon, te yaw ci sa bopp doo leen récc. Buuru Babilon da lay jàpp, te dëkk bii day lakk ba jeex.

²⁴ Cedesyas ne Yeremi: «Bu kenn dégg nag lii nu wax. Lu ko moy dinga dee. ²⁵ Su sama kàngam yi yégee ne wax naak yaw, ba dikk ne la nga nettali leen li nu waxante te bañ leena nèbb dara, lu ko moy ñu rey la, ²⁶ ne leen rekk danga ma doon tinu, ndax ma bañ laa delloo kër Yonatan, nga di fa dee.»

²⁷ Ba loolu amee kàngami buur yépp dikk, laaj Yeremi, mu wax leen la ko Buur digal. Ñu daldi noppi, ba ko; ndax kenn déggul woon la mu wax ak Buur.

²⁸ Yeremi nag des ca èttu dag ya, ba keroog bés ba ñu nangoo Yerusalem.

Babilon nangu na Yerusalem.

Ba ñuy nangu Yerusalem nag, nii la deme woon.

39

¹ Ba Cedesyas tolloo ci juróom ñeenteelu atu nguuram, ca fukkeelu weeram, ca la Nabukodonosor buuru Babilon ànd ak mboolem xareem mépp ci kaw Yerusalem, ñu gaw ko. ² Ba Cedesyas tolloo ci fukkeelu atu nguuram ak benn, juróom ñeenti fan ca ñeenteelu weeram, ca lañu bètt dëkk ba. ³ Mboolem kàngami buuru Babilon daldi dikk toog ca buntu dëkk, ba ca digg ba. Nergal Sareser a nga ca ak Samgar Nebo ak Sar Sekim njiitu bëkk-néegi buur ak Nergal Sareser meneen ma, njiitu gisaanekat yi, ñook mboolem kàngami buuru Babilon ña ca des.

⁴ Naka la leen Cedesyas buurub Yuda gis, mook xarekatam ya yépp, ñu daldi daw, génn dëkk ba guddi, jaare toolu buur, fëlle bunt bu nekk ca diggante ñaari tata ya, wuti jooru Araba. ⁵ Mbooloom Babilon dàq leen, ba dab Cedesyas ca jooru Yeriko. Ñu jàpp ko, indil ko Nabukodonosor buuru Babilon ca dëkk ba ñuy wax Ribla, ca réewum Amat. Nabukodonosor dogal fa àtteem. ⁶ Buuru Babilon daa rendi doomi Cedesyas yu góor ca Ribla, muy gis, mu rendiwaale mboolem kàngami Yuda. ⁷ Gannaaw loolu mu tuur bëti Cedesyas, jéngé ko jéngi xàñjar, yóbbu ko Babilon. ⁸ Kër Buur ak kəri waa dëkk ba nag, waa Babilon lakk leen, miiri Yerusalem, ñu mabb. ⁹ Nebusaradan njiitu dag ya moom, daa boole ña desoon ca biir dëkk ba, ak ña ko jébbaloon seen bopp, ak ña desoon ca askan wa, jàpp leen, yóbbu ngallo ca Babilon. ¹⁰ Ba mu ko defee lenn ci baadoolo yi amul dara, mu wacc leen ca réewum Yuda. Booba la leen jox ay tóokəri reseñ aki tool.

Yälla yiwi na ñaari jaamam

¹¹ Ci biir loolu Nabukodonosor buuru Babilon jox ndigal Nebusaradan njiitu dag ya ci mbirum Yeremi. Mu ne ko: ¹² «Demal jéli Yeremi, nga sàmm ko, te bu ko def dara lu metti. Lu mu la ñaan it, defal ko ko.» ¹³ Ba loolu amee Nebusaradan njiitu dag ya déggoo caak Nebukasban njiitu bëkk-néegi buur ak Nergal Sareser njiitu gisaanekat yi, ak yeneen jawriñi buuru Babilon ña, ¹⁴ ñu yónnee, jéli Yeremi ca èttu dag ya, teg ko ci loxol Gedalya doomu Ayikam doomu Safan, ngir Gedalya yóbbu ko kër ga. Yeremi nag des Yuda ca biiri bokkam.

¹⁵ Fekk na kàddug Aji Sax ji dikkal Yeremi ba ñu ko tëjee ca èttu dag ya, ne ko: ¹⁶ «Demal nga wax Ebedd Meleg, Kuuseen ba, ne ko: “Aji Sax ji Yállay Israyil Boroom gàngoor yi dafa wax ne: Maa ngi nii di sottalsi sama kàddu yi jëm ci dëkk bii, muy ayam te du doon jàmmam. Dina am ngay gis, bésuub keroog. ¹⁷ Bésuub keroog maa lay xettli,” kàddug Aji Sax jee, “ba deesu la teg ci loxol nit ñi nga ragal. ¹⁸ Maa lay wallu bu baax déy, ba saamar du la daaneel muk, waaye dinga moom sa bakkan, muy sa yoolu xare, ndaxte wóolu nga ma.”» Kàddug Aji Sax jee.

40

Yuda daje na ca Gedalya

¹ Ci kaw loolu Yeremi jot na kàddu gu bàyyikoo ci Aji Sax ji, gannaaw ba ko Nebusaradan njiitu dag ya yiwee, mu bàyyikoo Raama. Yeremee nga ñu jéngoon, mook ngálllog Yerusalem gaak Yuda ga jëm Babilon. Nebusaradan gënnee Yeremi ca seen biir, ² ñaarook moom, ne ko: «Sa Yàlla Aji Sax ji moo tuddaloon bérab bii musiba mii. ³ Aji Sax ji nag indi na ko te def na ko, na mu ko waxe woon. Yeena moy Aji Sax ji, déggaluleen ko ba tax lii dal leen. ⁴ Léegi nag yiwi naa la bés niki tey. Soo béggee ànd ak man Babilon, ñéwal, dinaa la topptoo. Soo buggul, toogal. Réew mépp a ngii ci sa kanam. Fu la ci neex ak foo ci taamu, dem fa.» ⁵ Balaa Yeremee walbatiku, Nebusaradan teg ca ne ko: «Man ngaa dellu ca Gedalya doomu Ayikam doomu Safan ba tey. Moom la buuru Babilon dénk dëkki Yuda. Man ngaa toog ak moom ci digg waa réew mi, mbaa nga dem daal fu la gënal.» Nebusaradan nag jox Yeremi yóbbal ak lu mu lekk ci yoon wi, daldi ko yiwi. ⁶ Ba mu ko defee Yeremi dem ca Gedalya doomu Ayikam ca Mispá. Mu toog ca moom ca digg nit ña des ca réew ma.

⁷ Fekk am na mboolooy Yudeen ñu desoon ci àll bi. Seeni njiit yépp nag dégg, ñook ña ñu àndal, ne buuru Babilon dénk na Gedalya doomu Ayikam réew mi, dénk ko ñenn ci baadoolo yi des Yuda, diy góor aki jigéen aki gone yu ñu yóbbuwul ngálllo ca Babilon. ⁸ Ñu bokk dikk ba Mispá ca Gedalya; Ismayil doomu Netaña ma nga ca woon, ak Yowanán ak Yonatan, ñaari doomi Kareya, ak Seraya doomu Tanumet, ak doomi Efayi ma bokk Netofa, ak Yesaña ma bokk Maaka, ñook seeni nit. ⁹ Gedalya waatal leen, ñook seeni nit, ngir dalal seen xel, teg ca ne leen: «Buleen ragala nangul waa Babilon. Toogeen ci réew mi rekk te nangul buuru Babilon, muy seen jàmm. ¹⁰ Man nag maa ngii toog Mispá, di leen

taxawal fi kanam waa Babilon, bu ñu fi dikkee; yeen dajaleen seen biin ak seen meññeef ak seen diwu oliw, ngeen denc ko te dëkke seen dëkk yi ngeen teg loxo.»

¹¹ Ci kaw loolu Yudeen ña woon ca Mowabeen ñaak Amoneen ñaak Edomeen ñaak mboolem réew ya, ñoom ñépp dégg ne buuru Babilon wacc na lenn ca askan wa, ñu des réewum Yuda, mu dénk leen Gedalya. ¹² Yudeen ña ñépp walbatikoo mboolem fu ñu leen sànni woon, daldi délsi réewum Yuda, fekksi Gedalya ca Mispá. Ba loolu amee ñu dajale biin ak tándarma ak figg, ba mu bare lool, ne gànñ.

¹³ Mu am bés Yowanán doomu Kareya ànd ak mboolem njiiti mbooloo ya des ca àll ba. Ñu dikk ca Gedalya ca Mispá, ¹⁴ ne ko: «Xanaa yéguloo ne Baalis buurub Amon yebal na Ismayil doomu Netaña, ngir mu rey la?» Gedalya nag gëmu leen. ¹⁵ Ba loolu amee Yowanán doomu Kareya déey Gedalya, ne ko: «Tee maa dem, rey Ismayil doomu Netaña fu kenn yégul? Xanaa deesu ko wacc mu rey la, Yudeen ñi daje woon fi yaw yépp di tasaaroo, ndesu Yuda sànkoo?» ¹⁶ Gedalya ne Yowanán: «Bul def loolu! Li ngay waxal Ismayil ay fen la!»

41

Ismayil bóom na ñu bare

¹ Ba ñu demee ba ca juróom ñaareelu weer wa ca at mooma, Ismayil doomu Netaña doomu Elisama, askanoo ci ñi moom Yuda te di njiitu jawriñi buur, ànd ak fukki nit ba ca Gedalya doomu Ayikam ca Mispá. Ci kaw loolu, ñu bokk di lekk ca kër Gedalya. ² Ismayil jekki jóg, mook fukki nit ña mu àndal. Ñu jam saamar Gedalya ma buuru Babilon dénkoon réew ma, ba rey ko. ³ Ismayil reyaale mboolem Yudeen ña nekkoon ak Gedalya ca Mispá ak xarekati Babilon ya fa nekkoon.

⁴ Ba ñu bóomee Gedalya ba ca èllég sa, fu kenn yégul, ⁵ mu am juróom ñett fukki nit ñu bàyyikoo Sikem ak Silo ak Samari. Ña nga wat seen sikkim, xotti seeni yère, dagg-daggee seen yaram, di ko ñaawloo. Ñu ñàbb saraxu pepp ak cuuraay bu ñu indil kër Aji Sax. ⁶ Ismayil gënnee buntu Mispá, gatanduji leen. Ma ngay dox, jëm ca ñoom, di jooy-jooylu ba dajee ñoom, ne leen: «Agsileen kër Gedalya doomu Ayikam!»

⁷ Naka lañu dikk ba ca biir dëkk ba, Ismayil ak ay nitam bóom leen, tàbbal néew ya ci kàmb. ⁸ Fekk na mu am fukki nit ñu bokk ci ñoom ñu ne woon Ismayil: «Tee nga noo baña rey? Nun de am nanub denc ci àll bi. Peppu belee nga ca ak

lors ak diw ak lem.» Loolu tax Ismayil fomm, ba boolewu leen ak seeni bokk, rey. ⁹ Kàmb ga Ismayil sànni néewi nit ña mu reyaaleek Gedalya mooy kàmb ga Buur Asa mu Yuda gasoon ba ko Buur Basa mu Israyil songee xare. Moom la Ismayil doomu Netaña feesal aki néew.

¹⁰ Gannaaw loolu mu jàpp mboolem ña des Mispa, di doomi buur yu jigéen ak mboolem ña des Mispa, te Nebusaradan, njiital dag ya, dénkoon leen Gedalya. Ismayil jàpp leen njaam, daldi wutali diiwaanu Amoneen ña.

¹¹ Ba loolu amee Yowanan doomu Kareya ak njiiti xare yi mu àndal yépp dégg musiba mi Ismayil doomu Netaña def mépp. ¹² Ñu ànd ak seeni nit, topp ko ngir xareek moom, ba dab ko ca déeg bu mag ba ca Gabawon. ¹³ Ba nit ña Ismayil jappe Mispa gisee Yowanan ak mboolem njiiti xare ya mu àndal, dañoo bég. ¹⁴ Ñoom ñépp walbatiku, daw fekki Yowanan doomu Kareya. ¹⁵ Teewul Ismayil doomu Netaña ak juróom ñetti nitam récc Yowanan, daw laquji réewum Amon. ¹⁶ Yowanan doomu Kareya ak mboolem njiiti xare yi mu àndal nag boole mboolem la des ca mbooloo, ma Yonatan xettli woon ca Ismayil doomu Netaña ca Mispa, gannaaw ba Ismayil bóomee Gedalya doomu Ayikam. Ay nit ñu Yowanan jële woon Gabawon a nga ca, diy góor: ay xarekat ak bëkk-néegi buur, aki jigéen aki gone. ¹⁷ Ñu dem ba dali ca dalukaayu Kimyam, ca wetu Betleyem, di waaj yoonu Misra, ¹⁸ ngir récc waa Babilon ñi ñu ragaloon, ndax la Ismayil doomu Netaña bóom Gedalya doomu Ayikam, ma buuru Babilon dénkoon réew ma.

42

Toogaani Misra gënul

¹ Gannaaw loolu njiiti xare yépp jóg, ñu rãññee ca Yowanan doomu Kareya ak Yesaña doomu Osaya. Ñu ànd ak askan wa wépp, dikk, ka gëna tuut ba ca ka gën di mag. ² Ñu ne Yonent Yàlla Yeremi: «Ngalla danu lay dagaan, nga ñaanal nu ngir ndesu askan wii ci sa Yàlla Aji Sax ji. Bare woon nanu, waaye gis nga lu néew li des ci nun. ³ Ñaanal nu ngir sa Yàlla Aji Sax ji xamal nu fan lanu wara jaare, ak lan lanu wara def.» ⁴ Yonent Yàlla Yeremi ne leen: «Baax na. Maa ngii di leen ñaanal seen Yàlla Aji Sax ji ni ngeen ko waxe. Lu leen Aji Sax ji tontu, dinaa leen ko yegge. Duma ci wacc baat.» ⁵ Ñoom it ñu ne Yeremi: «Mboolem kàddu gu la sa Yàlla Aji Sax ji yóbbante ci nun, bu nu ko deful, yal na Aji Sax ji doon seede bu wér, bu

déggu bi nuy seedeel ag tooñ. ⁶ Mu neex, mu naqari, sunu Yàlla Aji Sax, ji nu la yebal lanuy déggal, ngir su nu déggalee sunu Yàlla Aji Sax ji, dinanu baaxle.»

⁷ Ñu teg ca fukki fan, kàddug Aji Sax ji dikkal Yeremi. ⁸ Yeremi woo Yowanan doomu Kareya ak njiiti xare yi mu àndal yépp, woo mbooloo mépp, ñu dikk, ka gëna tuut ba ca ka gën di mag. ⁹ Yeremi ne leen: «Aji Sax ji Yàllay Israyil ji ngeen ma yóbbante seen dagaan, dafa wax ne: ¹⁰ Su ngeen nangoo toog ba toog ci réew mii, maa leen di defar te duma leen daaneel. Maa leen di jëmbat te duma leen buddat. Ndax ñeewante naa leen ci musiba mi ma leen teg. ¹¹ Buuru Babilon mii ngeen ragal, buleen ko ragal!» Kàddug Aji Sax jee. «Buleen ko ragal, ndax yeen laa àndal ngir wallu leen, xettli leen ci moom. ¹² Maa leen di yërëm ngir mu yërëm leen, delloo leen ca seen suuf.

¹³ «Waaye su ngeen bañee déggal seen Yàlla Aji Sax ji, naan: “Dunu toog ci réew mii, ¹⁴ xanaa nu dem réewum Misra, fa nu dul gise xare; coowal liitu xare sax dunu ko dégg. Dugub it dunu ko fa ñàkke. Foofa lanuy dëkki;” ¹⁵ su boobaa nag dégluleen li ci Aji Sax ji wax, yeen ndesu Yuda. Aji Sax ji Yàllay Israyil Boroom gàngoor yi dafa wax ne:

“Su ngeen dogoo ba dogu,
nara dem Misra,
ba dem toogaani fa,
¹⁶ saamar ba ngeen ragal
moo leen di dabe réewum Misra,
xiif bi ngeen di xalaat
topp leen fa Misra,
te fa ngeen di deeyi.
¹⁷ Képp ku dogu woona dem Misra,
ngir toogaani fa,
saamar lay deeye mbaa xiif mbaa mbas.
Du kuy mucc mbaa mu récc
musiba mi ma leen naral.”

¹⁸ «Aji Sax ji Yàllay Israyil Boroom gàngoor yi déy dafa wax ne: “Bu ngeen demee Misra, ni sama mer ak sama xadar yurikoo woon fi kaw waa Yerusalem, ni la sama xadar naan yureet fi seen kaw. Dingen doon gentu alkànde, ñu di leen móolook a sewal, te dungen gisati miim réew.”»

¹⁹ Yeremi teg ca ne: «Yeen ndesu Yuda, Aji Sax ji wax na leen ne leen: “Buleen dem Misra.” Nangeen xam xéll nag ne àrtu naa leen bésuub tey. ²⁰ Yeena sànk seen bopp ba ngeen ma yebalee ci seen Yàlla Aji Sax ji, ne ma ma ñaanal leen sunu Yàlla Aji Sax ji, te lépp lu sunu Yàlla Aji Sax ji wax, naa leen ko jottli, ngeen def ko. ²¹ Yegge naa leen tey jii li seen Yàlla Aji Sax ji wax, waaye faalewuleen lenn ci kàddu yi mu ma yóbbante ci yeen. ²² Léegi nag

xamleen xéll ne saamar akub xiif ak mbas moo leen di rey ca réew mooma ngeen namma dem, toogaani fa.»

43

Yóbbu nañu Yeremi Misra

¹ Gannaaw ba Yeremi waxeek mbooloo mépp, ba sottal mboolem káddu yooyu ko seen Yàlla Aji Sax ji santoon mu yegge leen ko, ² Asaryaa doomu Osaya ak Yowanan doomu Kareya ak nit ñu bew ñooñu ñépp jël káddu gi. Ñu ne Yeremi: «Dangay fen! Sunu Yàlla Aji Sax ji santu la nga fommloo nu sunu yoonu Misra ga nu bëgga toogi. ³ Xanaa Barug doomu Nerya kay moo lay xiirtal ci sunu kaw, ngir teg nu ci loxol waa Babilon, ñu rey nu, mbaa ñu yóbbu nu ngallo ca Babilon.»

⁴ Ci kaw loolu Yowanan doomu Kareya ak yeneen njiiti xare ya yépp ak mbooloo ma mépp gántal Aji Sax ji, baña des réewum Yuda. ⁵ Ba loolu amee Yowanan ak njiiti xare yépp yóbbu ña desoon ca Yuda ñépp, di mboolem ña ñu jëkkoona sànni ca biir xeet ya leen séq yépp, te ñu ñibbsi woon réewum Yuda, ⁶ góor ñaak jigéen ñaak gone yaak doomi buur yu jigéen ya. Yóbbu nañu mboolem ña Nebusaradan njiitu dag ya tegoon ci loxol Gedalya doomu Ayikam doomu Safan; ñu yóbbaa le Yonent Yàlla Yeremi ak Barug doomu Nerya. ⁷ Ñu dikk Misra, baña déggal Aji Sax ji, daldi àgg dëkk ba ñuy wax Tapanes.

⁸ Gannaaw loolu káddug Aji Sax ji dikkal Yeremi ca Tapanes, ne ko: ⁹ «Jéllal ñaari doj yu mag yooy suuli ca dëru ban ba ca bunt kër Firawna gi ci biir dëkk bi, te na ko waa Yuda fakke. ¹⁰ Nga wax leen ne leen: “Aji Sax ji Yállay Israyil Boroom gàngoor yi dafa wax ne: Maa ngi nii di yónnee, jëli Nabukodonosor buuru Babilon, mi ci samag curga, ba teg ngànguneem ci kaw doj yii ma fi suul, mu firi fi xaymaam. ¹¹ Bu dikkee dina tas réewum Misra: ku wara médd, médd; kuy dugg njaam, duggi njaam; kuy faddoo saamar, faddoo saamar. ¹² Nabukodonosor dina jafal kër tuuri Misra yi, lakk tuur yi, mbaa mu yóbbu leen. Ni ab sàmm di teeñe mbubbam, ni lay teeñe réewum Misra ba mu set wecc, daldi daagu, dem yoonam. ¹³ Dina rajaxe tuuri doj ya sampe ca Bet Semes ci biir Misra te dina lakk kéri tuur yi ci Misra.”»

44

Bokkaale sabab na mbugal

¹ Gannaaw gi káddu dikkal na Yeremi, jëm ci mboolem Yudeen ñi sancsi réewum Misra, te dëkke Migadol ak Tapanes ak

Memfis ak diiwaanu Pattros. Mu ne: ² «Aji Sax ji Yállay Israyil Boroom gàngoor yi dafa wax ne: Yeena gis mboolem musiba mi ma wacceel Yerusaleem ak dëkki Yuda yépp. Ñu ngi nii tey jii gental, kenn dëkku ca. ³ Li ko waral di lu bon li ñu def, di ma merloo; di taalal cuuraay ak a jaamu yeneen yàlla yu ñu xamul woon, du ñoom, du seeni maam. ⁴ Yónnee naa leen ay yooni yoon mboolem yonent yi, sama jaam ñi, ne leen: “Rikk buleen def jëf ju siblu jii ma bañ.” ⁵ Waaye dégluwñu, teewluwñu, ba dëddu seenug mbon, baña taalal yeneen yàlla cuuraay, ⁶ ba boole sama mer ak sama xadar, yuri, mu jafal dëkki Yudak mbeddi Yerusaleem, ba ñu mujj tey jii di gent yu tumuránke.

⁷ «Léegi nag, Aji Sax ji Yállay Israyil Boroom gàngoor yi dafa wax ne: Ana lu jar ngeen di teg seen bopp loraange ju réye nii, ba nar fee dagge réewum Yuda, góor ak jigéen, xale ba ci perantal, ba dungeen dese kenn? ⁸ Yeena ngi may merloo ndax li ngeen di def, di taalal yeneen yàlla cuuraay fii ci Misra gi ngeen toogaansi. Seen bopp ngeen dagg, sànni te dingeen mujj ñu di leen móolook a sewal ci digg xeeti àddina yépp. ⁹ Dangeena fátte seen mbonug maam ya ak mbonu buuri Yudak seen mboni jabar yaak seen mbonu bopp ak seen mbonu jabari bopp ga ñu nekke woon ca réewum Yuda ak mbeddi Yerusaleem? ¹⁰ Kenn ci yeen réccuwul ba tey jii. Kenn wormaalu ma mbaa mu jéfe sama yoon ak sama dogal yi ma leen tegal, tegal ko seeni maam.

¹¹ «Moo tax Aji Sax ji Yállay Israyil Boroom gàngoor yi dafa wax ne: Maa ngii di jákkaarlook yeen, ngir musibaal leen, ba dagge fi mboolem Yuda. ¹² Maay tonni ndesi Yuda gi dogu woon ba dikk réewum Misra, toogaansi fi. Dañuy dee. Ñoom ñépp réewum Misra gii lañuy daanoo. Saamar akub xiif lañuy faddoo, ki géna tuut ba ki gën di mag. Saamar akub xiif lañuy faddoo, te dinañu gental gentu alkànde, ñu di leen móolook a sewal. ¹³ Maay dikkal ñi sancsi réewum Misra ni ma dikkaale Yerusaleem, dikkaale saamar akub xiif ak mbas. ¹⁴ Du kuy récc mbaa kuy dese bakkan ci ndesu Yuda gi toogaansi fii ci réewum Misra. Te it duñu ñibbi réewum Yuda ga ñu namma ñibbi, lu moy ñu néew.»

¹⁵ Ñu baree nga fa woon, di mboolem ña xamoon ne seeni jabar dañuy taalal cuuraay yeneen yàlla ak mboolem jigéen ña teew. Ñuy mbooloo mu réy, ñépp ña sancsi Misra, ba ca diiwaanu Pattros. Ñu daldi ne Yeremi: ¹⁶ «Li nga nuy wax ci turu Aji Sax ji, dunu ko déglu. ¹⁷ Nooy def

ba defaatoo mboolem lu nu digoo woon, di taalal cuuraay Lingeeru asamaan, tuur mi, di ko tuural ay naan, na nu ko daan defe naka jekk, nook sunuy maam ak sunuy buur ak sunuy kàngam ci dëkki Yudak mbeddi Yerusalem. Teewul dañu daan doyal dugub, di woomle, te gisunu loraange. ¹⁸ Ba nu bàyyee taalal cuuraay Lingeeru asamaan, tuur mi, ak di ko tuural, ca lanu ñàkk lépp, teg ci saamar akub xiif di nu sànk.» ¹⁹ Jigéen ña teg ca ne: «Te sax ba nuy taalal cuuraay Lingeeru asamaan, di ko tuural, sunuy jëkkër dañu koo yégu? Xam nañu xéll ne nu ngi defal Lingeeru asamaan ay nàkk yu koy jëmmal, di ko tuural ay naan.»

²⁰ Ba mu ko defee Yeremi wax ak mboolem góor ñaak jigéen ña ko tontu loolu, ne leen: ²¹ «Saraxi cuuraay yi ngeen di taal, yeen ak seeni maam ak seeni buur ak seeni kàngam, ak baadoolo yi ci biir dëkki Yudak mbeddi Yerusalem, defe ngeen ne Aji Sax ji yégu ko, am da koo fátte? ²² Aji Sax ji manatula dëkku seen jéf ju bon ak seen jéf ju siblu ji waral seenum réew mel nii mu mel teg, di ndànd-foyofoy bu gental bu ñuy móoloo, te kenn dëkku ci, ²³ ndax yeena def saraxi bokkaale, moy Aji Sax ji, dégluween Aji Sax ji, te it kàddug yoonam ak dogali yoonam ak seedey yoonam, jëfewleen ci lenn. Moo waral musiba mi leen dikkal nii tey.»

²⁴ Yeremi teg ca wax ak ñépp, rawatina jigéen ña ñépp, ne leen: «Mboolem yeen Yudeen ñi ci réewum Misra, dégluleen kàddug Aji Sax ji. ²⁵ Aji Sax ji Yállay Israyil Boroom gàngoor yi dafa wax ne: “Yeen ak seeni jabar yeena wax ci seen làmmiñ, àggalee ko seeni jéf. Ngeen ne dingeen def ba defaatoo dige yi ngeen digee taalal cuuraay Lingeeru asamaan, tuural koy naan. Dëggal-leena dëggal seeni dige te jëfee jëfe seeni dige. ²⁶ Kon nag, yeen mboolem Yudeen ñi sanc Misra, dégluleen kàddug Aji Sax ji. Maa giñ ci sama tur wu màgg.” Aji Sax jee ko wax. “Ma ne: Sama tur, gémmiñug benn Yudeen dootu ko tudd fi mboolem réewum Misra naan: ‘Giñ naa ko ci Aji Sax jiy dund.’ ²⁷ Maa ngi nii di leen teewloo seen musiba, waaye du seen jàmm laa leen di teewloo. Te mboolem waa Yuda ñi ci réewum Misra dinañu sànkoo saamar akub xiif, ba keroog ñuy jeex tàkk. ²⁸ Ñu néew ay rëcci saamar, walbatikoo réewum Misra, ñibbi réewum Yuda. Waaye mboolem ndesu Yuda, ga dikoon toogaansi Misra, dinañu xam kan la kàddoom di sotti, man am ñoom. ²⁹ Te lii nangeen ko def ab tàkk.” Kàddug Aji Sax jee. “Maa ngii di leen dikke mbugal ci bii bérab, ba ngeen xam ne samay kàddooy sotti ba mat sèkk, di seen

loraange.” ³⁰ Aji Sax ji dafa wax ne: «Maa ngii di waaja teg Firawna Ofra buuru Misra ci loxol noonam yiy wut bakkanam, na ma tege woon Cedesyas buurub Yuda ci loxol noonam Nabukodonosor buuru Babilon ma doon wut bakkanam.»

45

Barug mucc na

¹ Kàddu gii Yeremi waxoon na ko Barug doomu Nerya, gannaaw ba Barug ténkee ci taxañu mbind, kàddu ya ko Yeremi dégtal ca ñeenteelu atu nguurug doomu Yosya, Yowakim buurub Yuda. ² «Aji Sax ji Yállay Israyil dafa wax ci yaw, Barug. ³ Nga ne: “Wóoy ngalla man! Aji Sax ji yokk na maw naqar. Onk naa ba tàyyi te awma noflaay.” ⁴ Aji Sax ji da maa sant ma wax la ne la: “Aji Sax ji dafa wax ne:

La ma tabaxoon a ngii,
maa ngi koy daaneel,
la ma jëmbatoon a ngii,
maa ngi koy buddat,
ba réew mépp daj.

⁵ Looy sàkku ku la beral loxo?

Jaru ko!

Maa ngii di wàcceel musiba képp kuy noyyi.”

Kàddug Aji Sax jee!

“Waaye may naa la sa bakkan di sa yoolu xare,

fépp foo jëm.”»

Kàddug waxyu dalati na xeet yi

46

(Saar 46—51)

¹ Kàddug Aji Sax jii dikkal na Yonent Yàlla Yeremi, jëm ci xeet yi.

Lu jëm ci Misra

² Firawna buuru Misra, bi ñuy wax Neko, ba ko Nabukodonosor buuru Babilon di duma, ma nga woon ca Karkemis ca tàkkal dexu Efraat. Mu yemook ñeenteelu atu nguurug doomu Yosya Yowakim buurub Yuda. Kàddug waxyu gii moo jëm ci Misra ci wàllu diggante ba seen mbooloom xare ma tollu woon.

³ «[J]àbbleen pakkoo pakk te xareji.

⁴ Takkleen fas yi, war naari góor yi, ba làng-déraale seen mbaxanay xare, nàmmaat xeej, sol yérey xare!»

⁵ «Ana lu ma gis?

Waa Misraa jaaxle bay dellu gannaaw, seeni jàmbaar falaxoo, ne wéqet, geesuwnu, tiitaange ubale.»

Kàddug Aji Sax jee!

⁶ «Bu nit gaaw ba raw

mbaa mu jambaare ba mucc.
 Běj-gànnar lañu fèete, feggook dexu
 Efraat,
 di tërëf, di daanu.

7 «Kii ku mu, muy fuddu ni dexu Niil,
 di fuur ni wali ndox?

8 Misraa, mooy fuddu ni dexu Niil,
 di fuur ni wali ndox.
 Mu naan: “Maay fuddu, mëdd àddina,
 sànk ab dëkk ak ña ca biir.”

9 Na fas buur, watiir fiddi,
 jambaar sàqi:
 waa Kuusoo waa Puut ak seeni pakk,
 ak waa Ludd ak seeni xala.
 10 Waaye bésuub keroog déy,
 Boroom bi Aji Sax ji Boroom gàngoor yee
 ko moom,
 muy bésuub feyu bu muy feyey noonam.
 Saamar suur suux,
 màndee deret.
 Boroom bi Aji Sax ji Boroom gàngoor yi
 mooy rendee réewum bėj-gànnar ab
 sarax,
 feggook dexu Efraat.

11 Yaw Misra mu taaru mi,
 demal ba Galadd wuti diw, dàmppoo.
 Faju, fajooti;
 dara du la wéral!

12 Xeet yeey dégg sa toroxte,
 sa yuux dajal àddina.
 Jambaar téqtaloo jambaar,
 ñu ànd ne fèlëñ!»

13 Kaddu gii dikkaloon na Yonent Yàlla
 Yeremi, ba Nabukodonosor buuru Babilon
 dikkee, di duma waa réewum Misra. Mu
 ne:

14 «Yéggleel lii Misra, yéene ko fa ca Mi-
 gadol,

yéene ko fa ca Memfis ak Tapanes.
 Neleen: “Dërleen, taxaw temm!
 Saamar kat a ngi lekk li leen wër.”

15 Lu Apis di daw?
 Lu tee seen yállay yëkk jooju taxaw?
 Xanaa Aji Sax jee ko bëmëx!

16 Moo bëmëx ñu bare,
 ku nekk naan moroom ma:
 “Jógal nu dellu ca sunuy bokk,
 ca sunu réewum cossaan,
 ba mucc saamaru noon.”

17 Dees na fa woyal Firawna buuru Misra,
 naan ko:
 “Coowal neen te bés wees.”

18 «Giñ naa ko ci man miy dund,»
 kàddug Buur Aji Sax jee, Boroom gàngoor
 yi di turam:
 «noon ay dikk, mel ni tundu Tabor ci digg
 tund yi,
 mbete tundu Karmel wi feggook géej.

19 Yaw mi dëkke Misra mu taaru mi,
 ëmbal sa ëmb, jëm ngálló;
 Memfis* dëkk bii kat ci gental la jëm,
 di ndànd-foyfoy lu kenn dëkkul.

20 Misra daa mel ni jeego nag bu yànj,
 weñ ne waa, waa, bawoo bėj-gànnar.

21 Seen xarekat yi ñu bind sax
 ñu ngi mel ni sèllu yu yaflu,
 ñoom it ànd ne wèrëñ, wèqet,
 kenn taxawul!

Bésu safaan a leen dikkal,
 seen mbugal taxaw,
 22 ñu daw di faraas-faraasiy wéy ni jaan.
 Doole la noon songe Misra,
 dikke leeni sémmiñ
 ni gorkati garab.

23 Lu gott fatt fatt, ñu gor.»
 Kàddug Aji Sax jee.
 «Ñoo gëna barey njéeréer,
 ba maneesu leena lim.

24 Gàcceel nañu Misra mu taaru mi,
 teg ko ci loxoy xeeti bėj-gànnar.»

25 Aji Sax ji Yállay Israyil, Boroom
 gàngoori xare yi wax na ne: «Maa ngii
 di dikke mbugal Amon, tuuru dëkk bii
 di Teeb, ak Firawnaak waa Misraak seeni
 tuur ak seeni kàngam, boole ci ñi yaakaar
 Firawna. 26 Maa leen di teg ci loxoy
 ñiy wut seen bakkan, di Nabukodonosor
 buuru Babilon aki jawriñam. Gannaaw
 loolu dees na dëkkewaaf Misra na woon.»
 Kàddug Aji Sax jee!

Israyil dina xettliku

27 «Yaw Yanqóoba sama jaam bi nag, bul
 tiit;

yaw Israyil, ma ne bul ragal.
 Maa ngii di la wallusi,
 jële la fu sore,
 jële sa askan
 fa seen réewu njaam ga,
 Yanqóoba délsi,
 dal, aaru, du tiitati.

28 Yaw Yanqóoba sama jaam bi, bul tiit.»
 Kàddug Aji Sax jee.

«Yaw laa àndal.
 Maay fàkkas mboolem xeet yi ma leen
 sànni woon,
 waaye yeen, duma leen fàkkas.
 Duma leen ñakka duma moos,
 waaye dinaa leen yar lu yem.»

47

Lu jëm ci Filisteen ñi

1 Kàddug Aji Sax ji dikkaloon na Yonent
 Yàlla Yeremi jëm ci Filisteen ñi, balaa
 Firawna di song dëkkub Filisteen ba ñuy
 wax Gasa. 2 Aji Sax ji dafa wax ne:
 «Ndox a ngay fuddoo bėj-gànnar,
 diy waame, walsi,

* 46:19 46.19 Memfis: Fii ñu ne Memfis, am na sotti yu fi indi turu Nof.

walal réew meek li ci biiram
akub dëkk ak ku ci biiram;
doom aadama yuuxu,
waa réew mépp serandoo.
³ Booba fas yaa ràmbal,
watiir ya riir;
mbegey watiir ya kar-kareendoo,
yoxo yoqi, ba baay geesuwul doom,
⁴ bésub sànkute dikkal képp kuy Filisteen,
ba dagge dëkk yii di Tir ak Sidon
ndimbal lu ñu dese woon.
Aji Sax jaa ngay sànk Filisteen, ña des
te cosaanoo dunu Keret.
⁵ Watu nel, ñaawloo, dikkal na Gasa,
te wedamloo nañu Askalon.
Yeen ñi dese joor gi,
fu ngeen àppal seen yaram,
wi ngeen di daggat, di ko ñaawloo?
⁶ Ngeen naa: “Wóoy saamaru Aji Sax jii,
xanaa doo selanlu?
Dellul sa mbar, boog,
dal-lu, ne tekk!”
⁷ Waaye yaw saamar, noo mana selanloo
te Aji Sax ji yebal la
ci kaw Askalon ak waa tefesu géej,
fa mu ko dogale?”

48

Lu jëm ci réewum Mowab

¹ Lu jëm ci Mowab, Aji Sax ji Yállay
Israyil, Boroom gàngoori xare yi dafa wax
ne:
«Ngalla waa Nebo, seen dëkk ba yaqu na!
Kiryaatayim, ñu torxal, nangu ko;
tata ja daanu, tasaaroo.
² Mowab amatul woy,
fa Esbon la leen noon ya fexeel lu bon,
ne: “Aycaleen nu raafal wii xeet!”
Yeen waa Madmen it, ñu wedamal;
saamar topp leen.
³ Yuux jibe na Oronayim,
ndaw salfaañook rajaxoo ju réy!
⁴ Mowab tas, ay fereem serandoo.
⁵ Ñay yéeg jëm Luwit, di jooyoo.
Ña ngay yéeg, di jooyoo.
Ñay wacci Oronayim
di dégg aji jaq jiy yuuxoo.
⁶ Ñu naan: “Dawleen, rawale seen bakkan,
ba tumurànkeji ni gajju mândin!”
⁷ Mowab, yeena yaakaar dooleek alal,
yeen it, dees na leen jàpp;
Kemos, seen tuur mi duggi ngallo,
mooki sarxalkatam aki kàngamam.
⁸ Dëkkoo dëkk ay yaqtoo,
benn dëkk du muccl!
Waa xur wii sàнку,
waa dëndu doj wu tell wee yaqtoo.»
Muy la Aji Sax ji wax.
⁹ «Gasal-leen Mowab,
day sàнку moos,
ay dëkkam gental,

kenn du fa des!
¹⁰ Alkànde ñeel na kuy sàggane liggéeyu
Aji Sax ji.
Alkànde ñeel na kuy xañ deret saamaru
Aji Sax ji.

¹¹ «Mowab a dale féex cag ndawam,
kenn jàppu ko njaam, yóbbu,
wàllanteesu ko ndab ak ndab,
xanaa mu ne degg ni biif bu taaje,
di saf, di xeeñ ba tey.
¹² Moo tax ay bés a ngii di ñew,»
kàddug Aji Sax jee,
«maa leen di yónnee ay nit ñu sotti diw gi,
ndab, soteet; njaq, rajax.
¹³ Yaakaaru Mowab ci Kemos tuur mi, tas,
ni yaakaaru waa kër Israyil ci Betel ma ñu
wóolu, tase woon.

¹⁴ «Mowabee, du yaay kañu,
naan jambaar ngeen,
diy ñeyi xare?
¹⁵ Song nañu la, yaqte say dëkk;
la man ci say ndaw daanu, fàddu.»
Kàddug Buur Aji Sax jee, Boroom
gàngoori xare yi.
¹⁶ «Musibay Mowab a ngi jegesi,
safaanam làbbleeti, wuti ko.
¹⁷ Mboolem yeen ñi wër xeet wii, joyleen
leen;
yeen ñi dégg seen tur ñépp, joyleen leen.
Neleen: “Moo, nu gii nguur mana foqe,
ba foqaale jii daraja?”

¹⁸ «Yeen waa Dibon, dëkk bu taaru bi,
wàccleen seen teddnga lu kawe
te tooge digg maral;
kiy yaqtesi Mowab kat song na leen,
di màbbi seeni tata.
¹⁹ Yeen waa Arower,
taxawleen fi yoon wi te teewlu;
góor gu fi jaare mbaa ndaw su rëcc, di
daw,
ngeen laaj ko ne ko: “Lu xew?”
²⁰ Ñu ne: “Gàcce ñeel na Mowab gii tas!”
Yuuxooleen, ne wóoy!
Yéeneleen fa tàkkal dexu Arnon,
ne Mowab tas na!
²¹ Mbugal dikkal dëndu doj wu tell wi,
dikkal dëkk yii di Olon, Yaxacc ak Mefat
²² ak Dibon ak Nebo ak Bet Diblatayim
²³ ak Kiryaatayim ak Bet Gamul ak Bet
Mewon
²⁴ ak Keryot ak Boccca,
mboolem dëkki Mowab daal,
fu jegeek fu sore.
²⁵ Sidditu Mowab day dog,
loxoom damm.»
Kàddug Aji Sax jee!
²⁶ «Du Mowab a doon diir Aji Sax ji mbagg?
Nañu leen mândal sànjum Aji Sax ji,
ba ñu waccu, di ca xuus,

ba ñoom it, ñu di leen ree.

²⁷ Mowabee, du yeena doon ree Israyil?
Dangeen leena fekk ci biiri sàcc,
ba fu ngeen leen tudde, wëcc bopp?

²⁸ Yeen waa Mowab,
baleen dëkk yi, dëkke paxi doj.
Defleen niy xati,
tàgge peggi xunti.

²⁹ «Noo dégg ni Mowab bewe,
bew lool,
réy, reew, di damu;
ne danj-danjiiral.

³⁰ Maa xam seen reewande,»
kàddug Aji Sax jee,
«seeni kañu neen la,
seeni jëf di neen.

³¹ Moo tax may jooy Mowab,
di wooteel wall Mowab gépp,
di yuuxul waa Kir Eres.

³² Yaw reseñu Sibma gi,
ma jooyal la lu raw la ma jooyal Yaser.
Yaw la say car jàlloon gééj,
àkki gééju Yaser,
sa figg jeek sa reseñ, noon yàqte.

³³ Tukkal nañu mbégteek bannex
fi tookeeri réewum Mowab.

Maa ñacc mbàndi biiñ ya,
kenn nalatu fa reseñ, di soowoo
coowal mbégte, xanaa ay yuux.

³⁴ Yuux jibe na Esbon, ba Elale,
àkki ba Yaxacc

ak Sower ba Oronayim ak Eglat Selisiya.
Ndoxi Nimrim sax ñiis na.

³⁵ Maay bóome biir Mowab.»
Kàddug Aji Sax jee.

«Maay bóom kuy joxe sarax ci
jaamookaay,
di taalal am tuuram cuuraay.

³⁶ Naa jooy Mowab jooyi xol,
yu toxoro di jooye ab dëj,
na toxoro di jooye dëju waa Kir Eres.
Lu ñu dajale woon sàngu na!

³⁷ Ñoom ñépp a nelu,
wat seeni sikkim,

daggat seeni loxo,
sol ay saaku, di ko ñaawloo.

³⁸ Kaw taaxi Mowab yépp aki péncam,
fépp ay yuuxoo di jib.

Maa toj Mowab
ni ndab lu kenn soxlaatul.»

Kàddug Aji Sax jee.

³⁹ «Yuuxooléen, ne leen: “Céy gii yàqtool!
Mowab gii wone gannaaw! Mowab rus
na.”

Ñi ko wër ñépp a koy reetaan, seen yaram
di daw ci ñoom.»

⁴⁰ Aji Sax ji déy dafa wax ne:
«Lu mel ni jaxaay a ngii naa jàyy,
firi y laafam, kéfsi Mowab.

⁴¹ Dees na teg Keryot ga ca Mowab loxo,
ne tata ya taral;
su keroogee fitu jàmbaar ne tërit,
mu mel ni kuy matu.

⁴² Mowab day sàngu, ba xeetam fey.
Ñoo doon diir Aji Sax ji mbagg.

⁴³ Yeen waa Mowab,
pat-pati rekk, di tàbbiy pax aki yeer.»
Kàddug Aji Sax jee.

⁴⁴ «Pat-patiy daw, tàbbim pax;
génn um pax, tàbbim yeer.
Maay yen Mowab, maa leen di yen moos,
seen atum mbugal.»

Kàddug Aji Sax jee.

⁴⁵ «Fa keppaar Esbon lañuy daw taxawi,
doole dëddu.

Booba sawaraa tàkke Esbon, di law;
sël-sélee foofa ca péeyu Buur Siwon,
ba dajal réewum Mowab, nitu coow ña,
boole jë akum kaanj xoyom.

⁴⁶ Wóoy, waa Mowab, ngalla yeen!
Yeen ñiy jaamu Kemos, sàngu ngeen!
Dees na jàpp seen doom yu góor njaam;
jigéen ñi it, njaam.

⁴⁷ «Du tee fan yu mujj ya,
ma tijji wërsëgu Mowab.»

Kàddug Aji Sax jee.

Fii la àtteb Mowab yem.

49

Lu jëm ci Amoneen ñi

¹ Lu jëm ci Amoneen ñi,
Aji Sax ji dafa wax ne:

«Israyil daa amuli doom?

Am daa amul dono?

Lu tax Milkom* tuur mi donloo suufas
Gàdd,

ba ay jaamukatam sanc dëkki Gàdd?

² Moo tax ay bés a ngii di ñëw,»

kàddug Aji Sax jee,

«maay dégtal Raba, dëkku Amoneen ñi,
coowal xare ci seen biir,

tund wa gental,

dëkk-dëkkaan ya tàkk ba jeex,
ba keroog Israyil futti ñooña ko futti
woon.»

Aji Sax jee ko wax.

³ «Éy waa Esbon, Ayi seen dëkk bi tas na,
yuuxuleen!

Yeen waa dëkk yi séq Raba,

sol-leeni saaku, ñaawloo,

jaab diggante tata yi, tiisloo.

Milkom seen tuur mi déy duggi na ngallo,
ànd aki sarxalkatam aki kàngamam.

⁴ Céy Raba, bii dëkk bu taaru, toogadi,
yeena doon damoo xur yi,
ba ci seen xur wu naat wii?

* 49:1 49.1 Milkom tuuru Amoneen ñi la woon, te Gàdd ci suufas Israyil la bokkoon.

Yeena yaakaaroon seeni denc,
 naan: “Ku ñemee dal sunu kaw?”
⁵ Maa ngii di leen wàcceel njàqare,»
 kàddug Boroom bi Aji Sax jee, Boroom
 gàngoor yi,
 «njàqare luy bawoo fi leen wër fépp,
 dàq leen, ku ne jubal yoonam,
 du kenn ku leen di dajaleeti.
⁶ Waaye bu loolu weesee,
 ma tijji wërsëgu Amoneen ñi.»
 Kàddug Aji Sax jee.

Lu jëm ci Edomeen ñi

⁷ Lu jëm ci Edomeen ñi, Aji Sax ji
 Boroom gàngoor yi dafa wax ne:
 «Xanaa boroom xel amatul fi Teman?
 Xanaa ndigal a réer xamkat yi?
 Am seen bopp a yàqu?
⁸ Yeen waa Dedan,
 walbatikuleen daw, ruuroo seeni pax.
 Maa ngi wàcceel askanu Esawu† safaan,
 seen mbugal taxaw na!
⁹ Su leen wittkati reseñ dikkalee, xanaa
 dinañu ca wacc ay doom?
 Su leen ay sàcci guddi dikkalee,
 du la leen doy lañuy sèxëtoo?
¹⁰ Waaye yeen askanu Esawu,
 man maa leen di ñori, ba ngeen ne dunj.
 Maay siiwal seeni rawtu,
 ba dootuleen mana làqu;
 seeni goneek seeni bokk, ñépp ay sàнку,
 seeni dëkkandoo sax, kenn du ca des ku
 naan:

¹¹ “Jirim yi ngeen bàyyi,
 maa leen di dundal,
 te seeni jëtun man nañu maa yaakaar.”
¹² Ndegam ñi yeyoowul mbugal
 ñooy jolu kaasu mbugal,
 nees leen di ñakka toppé, yeen?
 Dees na leen topp moos,
 ngeen jolu kaasu mbugal.
¹³ Giñ naa ko ci man mii, déy,»
 kàddug Aji Sax jee,
 «Bocra, dëkk bii day mujj di gent bu ñu
 doyadal,
 ndànd-fofyo bu ñuy móoloo,
 dëkk-dëkkaanam yépp gental ba fàww.»
Yeremeey wax
¹⁴ Ab dégtal laa dégg, mu bawoo fa Aji Sax
 ji,
 ndaw la yebal ci biir xeet yi, ne leen:
 «Dajeleen waajal xare te song Edom xare!
¹⁵ Yeen Edom, tuutal leen laay def ci biir
 xeet yi,
 ñu xeeblu ngeen di doon ci biir doom
 aadama yi.
¹⁶ Seen ragluwaay ak seen reewande sànk
 na leen,
 yeen ñi dëkke xuntiy doj,
 féetewoo colli tund yi.

Waaye su ngeen ajee seenum tàgg ni
 jaxaay it,
 fa laa leen di àjjee.»
 Kàddug Aji Sax jee.
¹⁷ «Edom day mujj gental,
 ku fa jaare waaru,
 di muslu ci mboolem li ko dal.
¹⁸ Edom day tas ni Sodom ak Gomor ak la
 ko wër.»

Aji Sax jee ko wax.
 «Nit du ca dëkk,
 doom aadama du fa dal.
¹⁹ Maa ngii di fëlle gottub Yurdan ni
 gaynde,
 wuti mbooy gu naat.
 Xef ak xippi déy, ma fëxale fa ñépp,
 ba tabb fa ki ma taamu.
 Ana moos ku mel ni man?
 Ku am sañ-sañ ci man?
 Ana njiit luy taxaw fi sama kanam?
²⁰ Kon dégluleen pexe mi Aji Sax ji waajal
 Edom,
 mébét yi mu mébétaal waa Teman ñooñu!
 Ndegam deesu leen wommat ni seen gàtt
 yu ndaw, yóbbu,
 ba yàq seen parlu yaxeeet.
²¹ Seen jéll day réy ba riiral suuf,
 seeni yuux àkki gééju Barax ya.
²² Lu mel ni jaxaay a ngii, naa fëyy,
 firiy laafam, kéfsi Bocra.
 Bésub keroog fitu jambaari Edom ne tërit,
 mel ni kuy matu.»

Lu jëm ci Damaas

²³ Lu jëm ci Damaas:
 «Dëkk yu mag ya ko wër,
 di Amat ak Arpàdd, jàq nañu;
 dég-dég bu tiis ba ñu dégg la.
 Dañu ne yàcc, jaxasoo,
 mbete gééj gu sàmbaraax, deesu ko dalal.
²⁴ Damaas a ne yasar, ne wërëñ, di daw;
 tiitaange ne leen nuus,
 njàqareeku mitit ne leen taral
 ni kuy matu.
²⁵ Lu tee ñu gental bii dëkk bu siiw,
 taax yii ma saf?
²⁶ Su bés baa kay, seeni waxambaane
 fëlëñoó pénc yi,
 seeni xarekat wedam.»
 Kàddug Aji Sax jee, Boroom gàngoor yi.
²⁷ «Maay taal ca tatay Damaas
 sawara wu xoyom kéri Buur Ben Addàd.»

Lu jëm ci Arabi Kedar ak Àccor

²⁸ Lu jëm ci Kedar ak nguuri Àccor
 yi Nabukodonosor buuru Babilon nangu
 woon, Aji Sax ji dafa wax ne:
 «Ñokket ci kaw Kedar,
 ba tas waa penku yooyu,
²⁹ nangu xaymaaki jur,

† 49:8 49.8 Esawu ak Edom kenn ki la. Askanu Esawu ñoo dëkke woon réewum Edom.

ak kiiraay ak luy jumtukaay,
 yóbbu seeni giléem,
 te biral leen, ne leen:
 “Musiba ubale na!”
³⁰ Yeen waa Àccor,
 fèxleen te dawa daw,
 ruurooji seeni pax.»
 Kàddug Aji Sax jee.
 Mu ne: «Nabukodonosor buuru Babilon
 déy,
 lalal na leen pexe,
 mébal leen.

³¹ «Ayca ci kaw xeet wii ne finaax,
 dèkke xel mu dal!»
 Kàddug Aji Sax jee.
 «Du bunt, du galanu weñ gu ñu fegoo,
 te ñoom rekk a dèkk.
³² Dees na nangu seeni giléem,
 tonni seen juroo jur,
 ma tasaare ñooñuy wat seen peggu
 kawaru bopp,
 ngelaw lu jóg, buub leen, yóbbu,
 ma yéewe leen seen musiba, wetoo wet.»
 Kàddug Aji Sax jee.
³³ «Àccor day doon dèkkub till,
 gental ba fàww;
 nit du fa dèkk,
 doom aadama du fa dal.»

Lu jëm ci Elameen ñi

³⁴ Kàddug Aji Sax ji dikkaloon na
 Yonent Yàlla Yeremi, jëm ci Elameen ñi,
 ci njàlbéenu nguurg Cedesyas buurub
 Yuda. Mu ne:
³⁵ Aji Sax ji Boroom gàngoori xare yi dafa
 wax ne:
 «Damay damm fittu Elam,
 seen ngéneelu ngànaay.
³⁶ Maay ngelawe ñeenti weti asamaan,
 dal fi kaw Elam,
 tasaare leen fépp fu ngelaw jublu,
 ba du am xeet wu daw-làquy Elam dul
 fekki.
³⁷ Maa leen di xoqtaal fi seen kanami noon,
 yiy wut seen bakkan,
 alage leen sama tangooru mer.»
 Kàddug Aji Sax jee.
 «Maa leen di toppe saamar,
 ba raafal leen.
³⁸ Maay déjjatee Elam buur ak bummi,
 samp fa samab jal.»
 Kàddug Aji Sax jee.
³⁹ «Waaye fan yu mujj ya,
 maay tiji wèrségu Elam.»
 Kàddug Aji Sax jee.

50

Babilon daanu na

¹ Kàddu gii la Aji Sax ji wax ci mbirum
 réewum Babilon, réewum Kaldeen ña, te
 Yonent Yàlla Yeremi jottli ko.

² «Waxleen xeet yi, yéeneleen,
 wonneleen misaal te yéene,
 waxleen lii, bañ cee làq dara.
 Neleen: “Dees na nangu Babilon,
 torxal Bel mbaa Mardug, tuur mi,
 tas ko,
 gâceel gàllaaj yi, tas kasaray tuur yi.”
³ Aw xeet kay ay bawoo bëj-gànaar, dal
 fi seen kaw.
 Ñooñooy gentalsi seenum réew,
 ba kenn dootu fi dèkk,
 nit ak mala, ne mott, ne mes.
⁴ Su bés baa, ci yooyu fan,»
 kàddug Aji Sax jee,
 «bànni Israyil ay ànd ak Yudeen ñi,
 dikk di jooy,
 di sàkku seen Yàlla Aji Sax ji.
⁵ Dinañu laaj yoonu Siyon, jublu fa
 te naan: “Ayca nu dajeyi fa Aji Sax ji,
 ci biir kóllère gu sax
 gu kenn dul fàtte.”
⁶ «Sama ñoñ ñi réer niy xar,
 seeni sàmm a leen lajjal,
 sànk leen fi kaw tund yi,
 ba tundoo tund, ñu yéegi fa,
 fàtte seen goorukaay.
⁷ Noon bu taseek ñoom warax leen
 te naan: “Nun defunu dara.
 Ñoom ñoo moy Aji Sax ji,
 te mooy dalukaayu njekk,
 ba seeni maam yaakaaroon.”
⁸ «Yeen gan ñi, fèxeleen Babilon,
 ba sore réewum Kaldeen ñooñu.
 Defleen niy sikket, daw jiitu jur gi.
⁹ Maa ngii déy di xabtal fi kaw Babilon,
 kurélu xeet yu mag, bawoo réewum bëj-
 gànaar,
 làng-déralisi Babilon!
 Seenii fitt di ñeyi xare,
 du moy, du sooy.
¹⁰ Réewum Babilon a doon alalu sèxètoo,
 bu ñuy sèxètoo ba doyal.»
 Kàddug Aji Sax jee.
¹¹ «Àa yeen waa Babilon, yeena sèxètoo
 xeet wi ma séddoo,
 di ko bégeek a bannexoo,
 di bajantu ni nag wuy bàcc pepp,
 di njaxal ni naaru góor?
¹² Ndaw gâce gu réy ci seen ndey,
 ndaw toroxte ci ki leen sukk jur!
 Réew maa ngii di geenu réew yi,
 di ndànd-foyfoy, gu wow koñj.
¹³ Kenn du fi des ndax merum Aji Sax ji,
 lépp ay gental,
 ba képp ku jaare Babilon,
 day waaru, di muslu
 ci mboolem mbugal ya fa dal.
¹⁴ Yeen fittkat yépp, làng-déral-leen Ba-
 bilon,
 gaw ko, soqendoo, baña yaxanal!

Ñoo moy Aji Sax ji!

¹⁵ Xaaculeen fi kawam, wër ko,
Babilon daanu na, ba joxe ndodd,
tata ya mabb,
dàbbli ya rajaxoo!
Aji Sax jeey feyu,
feyuleen!

Na mu defoon, defleen ko ko.

¹⁶ Daggeleen Babilon kuy ji ak kuy góob,
ku fay gan, na daw saamaru noon,
fëx jëm réewam,
dellu cay bokkam.

¹⁷ «Israyil diy gàtt yu tasaaroo,
yu ay gaynde dàq,
buurub Asiri di gaynde gi jëkka lekk,
Nabukodonosor buuru Babilon topp ca,
seeñu yax ya.»

¹⁸ Moo tax Aji Sax ji Yállay Israyil Boroom
gàngoor yi ne:

«Maa ngii di dikkal buuru Babilon ak waa
réewam,

na ma dikkale woon buurub Asiri.

¹⁹ Maa ngii di delloo Israyil parloom,
mu dellu di fore àllub Karmel ak Basan,
di regge tundi Efrayim ak Galàdd.

²⁰ Su bés baa, ci yooyu fan,»

kàddug Aji Sax jee,

«dees na seet fi Israyil lu ñaaw, du fi am;
fi Yuda it, deesu fi gis bàkkaar.

Maay jéggal moos ndes wi ma fi saxal.

²¹ «Songleen réewum Meratayim ak waa
Pekodd*,

jam leen, faagaagal seen gannaaw.»

Kàddug Aji Sax jee.

«Defleen mboolem li ma leen sant.

²² Coowal xaree ngi fi réew mi,
ak rajaxoo ju réy.

²³ Babilon, réew mi daan wàkk mboolem
àddina,

tey mu damttoo ba rajaxoo nii,

dib gent ci biir xeet yi!

²⁴ Babilon, maa la fiir,

nga tancu te yéguloo!

Dañu laa gis, ne la taral,

yaa dëkk Aji Sax ji,

²⁵ Aji Sax ji ubbi na waxandey xareem,

mer, génney gannaayam.

Liggéeyu Boroom bee, Aji Sax ji Boroom
gàngoor yi,

foofa ca réewum Babilon.

²⁶ Songeleen ko fu ne,

dàjji ay sàqam,

jal-jalee.

Fàkkasleen lépp, ba du dese dara.

²⁷ Jamleen seen jambaari yëkk yépp,

nañu dem ca rendikaay ba.

Wóoy, ngalla ñoom!

Seen bés taxaw na moos,

di seen àppu mbugal.

²⁸ Baatu daw-làqu yu récc a ngoog,

bawoo réewum Babilon,

di yeggesi waa Siyoŋ

mbugalum Aji Sax ji sunu Yàlla,

mbugal mi kërám waral.

²⁹ Wooleen fittkatoo fittkat fi kaw Babilon,

mboolem kuy tàwwi xala.

Gawleen ko,

bu kenn récc.

Feyleen koy jëfam;

def ko ni mu def moroomam.

Babilon a jaay reewande Aji Sax ji,

ku Sell ku Israyil ki.

³⁰ Moo tax bésub kerooŋ

goneem yu góor di daanooy péncam,

niti xareem di wedamandoo.»

Kàddug Aji Sax jee.

³¹ «Babilon mu reewee, maa ngii fi sa
kaw.»

Kàddug Boroom bi, Aji Sax jee, Boroom
gàngoori xare yi.

«Sa bés déy taxaw na,

di àpp bi ma la wara mbugale.

³² Ku reew keey téréf, fëlëñu,

te du am ku ko yékkati.

Maay jafal ay dëkkam,

sawara wa xoyom lépp lu ko wër.»

³³ Aji Sax ji Boroom gàngoor yi dafa wax
ne:

«Bànni Israyil ak Yuda, ñépp lañu notan-
doo.

Ñi leen jàpp ñépp téyee leen doole,

bañ leena ba.

³⁴ Waaye seen jotkat a am doole,

te mooy Aji Sax ji Boroom gàngoor yi.

Moo leen di layool seen layoo,

ngir jàqal réewum Babilon,

jámmal waa àddina yi ci des.

³⁵ Saamar ci kaw waa Babilon!»

Kàddug Aji Sax jee.

«Saamar ci kaw waa Babilon

aki kàngamam aki kaanam.

³⁶ Saamar ci kaw kebatukati diine yi,

ba seenug ndof feeñ.

Saamar ci kawi jambaaram,

ñu ne yàcc.

³⁷ Saamar ci kaw fas ak watiiram,

ak mboolem niti njaxasaan ñi mu fat,

ba ñu mel niy jigéen.

Saamar ci kawi dencam,

ñu séxëtoo.

³⁸ Maral ci kawi waltanam, mu rjiis;

mii réew mu nit ñiy jaamoo jëmme tuur,

ñooy say ndax seen yu ñàng yooyu

³⁹ Moo tax ay dundooti màndiŋ ak rabi àll

a koy këroo,

bànjóoli dëkke ko,

kenn dootu fa desati,

kenn dootu fa dëkk mukki ba fàww.

* 50:21 50:21 waa Meratayim and waa Pekodd ci Babilon lañu bokk.

40 Mu mel ni ba Yàlla tasee Sodom ak Gomor,
tasaale la ko wér.»
Kàddug Aji Sax jee.
«Nit du fa dèkkati,
doom aadama du fa dalati.»

41 «Aw askan a ngii, bàyyikoo bēj-gànnaar,
xeet wu mag lañuy doon, buur yu bare,
sàqee fa cati àddina.

42 Yeen waa Babilon, réew mu taaru mi,
fitt aku xeej la ñooñuy ñabb,
néeg lool, duñu yèrèm,
seen coow ni riirum géej,
ñu war seeni fas,
làng-déral leen ni benn bopp ngir xare.

43 Buuru Babilon dégg riir ma,
yoxo ya yoqi,
njàqare ne ko taral,
mu jàq ni kuy matu.

44 Maa ngii, di fèlle gottub Yurdan ni
gaynde,
wuti mbooy gu naat.

Xef ak xippi déy, ma fèxale fa lépp,
ba tabb fa ki ma taamu.

Ana moos ku mel ni man,
ku am sañ-sañ ci man?

Ana njiit luy taxaw fi sama kanam?

45 Kon dégluleen pexe mi Aji Sax ji waajal
Babilon,
mébét yi mu mébétal réewum Kaldeen
ñooñu!

Ndegam deesul wommat seen gàtt yu
ndaw, yóbbu,
ba yàq parlu ma yaxeeet.

46 Bu ñuy nangu Babilon,
riir ma day jolli ba riiral suuf,
seeni yuux àkki fa biir xeeti jaambur ya.»

51

1 Aji Sax ji dafa wax ne:
«Maa ngii di yebal fi kaw Babilon,
waa Lew Kamay gii,*
ngelawal yàqkat.

2 Maay yónee Babilon ay beeskat
yu ko bees, tonni réew ma, ba mu set.
Keroog bésu safaan ba déy,
fu ne lañu koy songe.

3 Buleen leen may fu ñu taxaweek seen
kiiraay, di fitte;
buleen ñéeb lu seeni waxambaane,
fàkkasleen seen gàngoor gépp.

4 Nii dee, ne wetar réewum Babilon;
ñee gaañu, ne lasar ca mbedd ya.

5 Israyil ak Yuda ñàkkuñu seen Yàlla,
Aji Sax ji Boroom gàngoor yi,
te réewum Babilon fees naaki moy
yu ñu moy Yàlla Aji Sell ji séddoo Israyil.

6 «Yeen gan ñi, génnleen Babilon,
ku ne rawaleji sa bakkan.
Buleen ñaawtéefu jaambur sankaale;
lii àppu mbugal la bu Aji Sax ji matal;
seen añ la, bu mu leen añaale.

7 Aji Sax jee yor Babilon ci loxoom, muy
kaasu wurus bu def xadaru xeet ya,

di màndal mboolem àddina;
xeet ya naan ca,
ba tax ñuy say.

8 Teewul Babilon jekki daanu, tasaaroo.
Jooyleen ko,
dàmp ko, seral mititam,
jombul mu wér.»

Gan ñaay wax

9 «Bu nu sañoon faj Babilon, mu wér,
waaye wérul.

Nan ko ba te dem,
ku ne ñibbim réewam.
Àtteb Babilon kat àgg na asamaan,
àkki na fa kaw niir ya.»

Bànni Israyil ay wax

10 «Aji Sax ji jox na nu dégg.
Nanu yeggeji waa Siyon
jaloorey Aji Sax ji, sunu Yàlla.»

Yàllaay wax

11 «Nàmmleen fitt yi, feesale mbar yi!
Aji Sax ji xabtal na buuri Medd fi kaw
Babilon,

nar koo tas.

Lii mbugalu Aji Sax jee,
mbugal mi kèram waral.

12 Yékkatil-leen tatay Babilon raayab xare,
yokkleen wattukat yi,
taxawal leen fa ñuy wattoo,
te waajal tèrukati yi.

Aji Sax ji def na li mu waxoon
ne dina ko def waa Babilon.

13 Yeen ñi dèkke weti ndox yu ne xéew,
seen alal ne xéew,
seen muj taxaw na,
seen buumu bakkan dog na.

14 Aji Sax ji Boroom gàngoor yi giñ na ci
boppam.

Mu ne: “Maa leen di same ay nit niy
njéeréer,
ñu xaacu, song leen.”»

Yeremeey wax

15 Suuf, Aji Sax ji sàkke kàttanam;
dun bi, mu sampem xelam;
asamaan, mu lale xam-xamam.

16 Bu àddoo ndoxum asamaan riir,
mu yégeg y niir fa cati àddina,
riddee ngelaw fa dencam ya,
daldi melax, taw.

17 Nitoo nit dim sannax, sore xam-xam,
te képp kuy tégg sa jèmmu tuur, yaa aña
gàcce.

Sa jèmmi weñ ji nga xelli, di neenug neen,
noowug bakkan, tus!

* 51:1 51.1 Lew Kamay li muy tekki mooy «xolu noon yi», di turu kumpa wu bànni Israyil daan wooye waa Babilon.

18 Cóolóolu neen, liggéeyu caaxaan;
 bu bésam taxaawee, mu sàнку.
 19 Séddoob Yanqóoba déy wuute naak yii
 caaxaan.
 Kee bind lépp,
 bind giir gi mu séddoo.
 Kookooy Aji Sax ji Boroom gàngoori xare
 yi!
Yàllaay wax
 20 «Yaw Babilon, yaa doon sama wàkku,
 di sama ngànnaaay,
 ma di la wàkke xeet yi,
 rajaxee la réew yi,
 21 wàkke la fas ak gawaram,
 wàkke la watiir ak dawalkatam,
 22 wàkke la góor ak jigéen,
 wàkke la mag ak ndaw,
 wàkke la waxambaaneek ub janq,
 23 wàkke la sàmm ak géttam,
 wàkke la beykat ak lèkkeb nagam,
 wàkke la kàngam ak jawriñ.
 24 Waaye mboolem lu Babilon ak waa réew
 mépp def ci Siyon,
 maa leen koy fey, ngeen di gis, yeen
 Yudeen ñi.»
 Kàddug Aji Sax jee.
 25 «Maa ngii déy, fi sa kaw, yaw Babilon,
 ponkalum yaqkat bi,»
 kàddug Aji Sax jee,
 «yaw miy yaq áddina sépp.
 Maay tàllal sama loxo fi sa kaw,
 taxañe la fa kaw doj ya,
 def la ponkalum jalu dóom.
 26 Deesul speppe fi yaw doju tabax wu ñuy
 lèkklee,
 mbaa doju tabax wu bokk ci kenu,
 nde gent ngay doon ba fàww.»
 Kàddug Aji Sax jee.
 27 «Yékkatileen ub raaya fi réew mi
 te walal liit gi xeet yi.
 Dajaleleen xeet yi fi kaw Babilon,
 te xabtal fi kawam réew yii:
 Araraat ak Minni ak Askenas.
 Tabbal-leen ko njiitu xare mu ko song,
 indil koy fas yu saf ndiiraani njéeréer.
 28 Dajaleleen xeet yi fi kaw Babilon,
 wooleen buuri Medd ak kàngam ya
 ak jawriñ ñaak mboolem réew mu ñu
 moom.
 29 Suuf a fuddu, wañaaru,
 mébéti Aji Sax jee sottalal Babilon,
 ngir réew ma dib gent bu kenn nekkul.
 30 Jambaari Babilon xareetuñu,
 ña nga des ca seeni tata,
 doole ñiis,
 ñu mel niy jigéen.
 Bunti dèkk bi dàjjiku,
 kër ya jàpp.
 31 Xélukat dab xélukat;
 ndaw jottli ndaw xibaar
 bu ñu yeggeji buuru Babilon, ne ko
 nangu nañu dèkkam ba wetoo wet,

32 nangu jàllukaayi dex ya,
 taal barax ya,
 xarekat ya raj-rajloo.»
 33 Aji Sax ji Yàllay Israyil Boroom gàngoori
 xare yi déy dafa wax ne:
 «Ñu ngi dèggaate Babilon mu taaru mi,
 ni ñuy dèggaatee dàgga ju ñuy bàccesi.
 Balaa yàgg ngóobu Babilon taxaw.»
Yerusalem ay wax
 34 «Buuru Babilon warax na ma.
 Da maa muucu,
 ñiit ma, ba ma set ni ndab.
 Da maa modd ni ninki-nànka,
 sole kollam li gën ci man,
 yàbbi la ca des.»
 35 Siyon ne: «Yal na sama yàpp ak sama
 coono topp Babilon.»
 Yerusalem ne: «Yal na sama deret topp
 waa Babilon!»
 36 Aji Sax ji nag dafa wax ne:
 «Maa ngii di leen layool seen layoo,
 ba feyul leen.
 Maay ñeeral géejam,
 ñiisal am walam,
 37 Babilon def jali doj,
 di paxum till,
 di gent bu ñuy muslu,
 kenn du ko dèkke.
 38 Ñu ngi ñarandoo niy gaynde,
 di xiiroo ni gaynde yu ndaw.
 39 Ñu tàng bay hégga dee,
 ma may leen ñu naana naan,
 màndal leen, ñu mana xawaare,
 tèdd nelaw nelawi fàww,
 duñu yewwooti.»
 Kàddug Aji Sax jee.
 40 Aji Sax ji nee: «Maa leen di wommat
 niy xar ba ca rendikaay ba,
 ñu mel ni kuuyi xar aki sikket.
Ngalla Babilon
 41 «Áa! Ana nees mana nangoo Sesag?
 Nees mana tege loxo ki áddina sépp di
 kañ?
 Ana nu Babilon mana gente fi digg xeet yi?
 42 Géej ay médd Babilon,
 mu sàngoo gannaxam yu jallaañoo,
 43 ay dèkkam gentel,
 réew mi ne seren, di ndànd-foyfoy,
 kenn du ko dèkke,
 doom aadama du fa jaare.
 44 Maay dikke mbagal Bel,
 tuur mi ci Babilon,
 yàbbiloo kob lancam.
 Xeet yi noppee def um wal, wuti ko,
 tatay Babilon it màbb.
 45 Yeen sama ñoñ, génneen fi seen biir,
 na ku ne rawale sa bakkan,
 ba mucc tàngooru sànjum Aji Sax ji.
 46 Bu seen fit rëcc,

ngéen di tiit xibaar yi ñuy yéene ci réew mi:

ren yéene jib,
déwén yéene jibati,
fitna law ci réew mi,
njiit ne njiit dann.

⁴⁷ Kon ay bés a ngii di ñëw,
yu may dikke mbugal tuuri Babilon,
réew mépp torox,

ña ñu bóom ñépp wetaroo fa biir.

⁴⁸ Su boobaa asamaan ak suuf
ak mboolem li ci biiram
sarxollendoo, di bége li dal Babilon.
Béj-gànnar kay la yàqkat yay bawoo.»
Kàddug Aji Sax jee.

Yeremeey wax

⁴⁹ Waa Babilon it dinañu daanu
ngir waa Israyil ñi ñu bóom,
ba ñu yem ak mboolem waa àddina yi ñu
bóom,

te ñu daanu ndax Babilon.

⁵⁰ Ée yeen ñi récc saamar,
buleen taxaw, demleen,
di fàttlikoo Aji Sax ji fu sore,
tey bàyyi xel Yerusalem.

Bànni Israyil ay wax

⁵¹ «Nooka rus ci saaga yi nu dégg,
ak gacce gi nu sèlmo
ndax doxandéem yi dugg
ci biir bérab bu sell bi ci kër Aji Sax ji.»

Yàllaay wax

⁵² «Moo tax, bés a ngii di ñëw,»

kàddug Aji Sax jee,
«maay dikke mbugal seen jëmmi tuur yi,
ñoom,

ña ñu jam di binnee fi réew mi mépp.

⁵³ Su Babilon yéegoon asamaan,
dàbbli fa tata ju ne kek sax,
du tee ay yàqkat bawoo fi man, dal ci
kawam.»

Kàddug Aji Sax jee.

Yeremeey wax

⁵⁴ Yuuxi njàqare fa Babilon,
réewum Kaldeen ñooña toj ba tojatoo.

⁵⁵ Aji Sax jee niy yàqtee Babilon,
tukkal fa riir mu réy.

Gàngoori noon yaa ngay buur ni gannaxi
géej,

seen riirum kàddu jolli.

⁵⁶ Yàqkat déy dikkal na Babilon,
jàpp ay jàmbaar,
dammatey fittam.

Aji Sax ji déy mooy Yàlla jiy yoole,
di fey pey gu mat sékk.

⁵⁷ Mu ne: «Maay màndal seeni kilifaak
seeni kaaj

ak seeni kàngam ak seeni jawriñ ak seeni
jàmbaar,

ña tèdd nelaw nelawi fàww,
duñu yewwooti.»

Kàddug Buur a, Aji Sax ji Boroom gàngoor
yi.

⁵⁸ Aji Sax ji Boroom gàngoor yi dafa wax
ne:

«Tatay Babilon yu mag yi
dees koy màbba màbb;
bunt yu kawé ya lakk ba jeex.
Xeet yee ñaq ci neen,
waaso yee sonnol sawara.»

Yeremi santaane na misaal

⁵⁹ Bèkk-néegu Buur Cedesyas moo doon
Seraya doomu Nerya doomu Maaseya. Ba
Cedesyas tolloo ca ñeenteelu atu ngu-
ram, la Seraya ànd ak moom Babilon.

⁶⁰ Fekk na Yeremi bind cib taxañ mboolem
safaan yiy dikkal Babilon, di mboolem
mbir yooyu jëm ci Babilon. ⁶¹ Yeremi sant
Seraya, ne ko: «Boo àggee Babilon, fexeel
ba biral kàddu yii yépp. ⁶² Te nga wax
ne: “Aji Sax ji, yaw déy, yaa xamle ne
dèkk bii dina tas, dara du ci dèkkati, du
doom aadama, du rab. Ab gent lay doon
ba fàww.” ⁶³ Boo jàngee taxañu mbind mii
ba noppi, nanga ci takk aw xeer, sànni ko
ci biir dexu Efraat. ⁶⁴ Su ko defee nga ne:

“Nii la Babilon di diige te du jógati ndax
safaan bi may wacce fi seen kaw, ba ñu
sonn.”» Fii la kàdduy Yeremi yem.

Kàdduy ndollant a ngi

52

(Saar 52.1-34)

¹ Naar fukki at ak benn la Cedekiya
amoon ba muy falu buur, te fukki at ak
benn la nguuru fa Yerusalem. Yaayam
mooy Amutal doomu Yeremi ma cosaano
Libna. ² Muy def li Aji Sax ji ñaawlu,
mboolem noonee ko Yowakim defe woon.
³ Merum Aji Sax ji nag dikkal Yerusalem ak
Yuda, ba mu muj xalab leen.

Gannaaw gi Cedesyas fippu buuru Ba-
bilon. ⁴ Ba Cedesyas tolloo ci juróom
ñeenteelu atu nguuram, fukki fan ca
fukkeelu weeram, ca la Nabukodonosor
buuru Babilon ànd ak mboolum xareem
mépp ci kaw Yerusalem. Ñu dal fa janook
Yerusalem, yékkati gawukaay, wérale ko.

⁵ Dèkk ba gawe, ba keroog Cedesyas tollu
ci fukkeelu atu nguuram ak benn. ⁶ Keroog
juróom ñeenti fan ca ñeenteelu weer wa,
xiif ba tar lool ca biir dèkk ba, ba waa
réew ma amatuñu ab dund. ⁷ Xarekati
Yuda ya génn guddi daw. Fekk na waa
Babilon gaw dèkk ba. Teewul ñu récc,
jaare ca bunt ba ca diggante ñaari tata
ya, ca wetu toolu buur. Ñu daldi wuti
xuru Yurdan. ⁸ Waa Babilon nag topp
Buur Cedesyas, ba dab ko ca jooru Yeriko.

Fekk mboolum xareem mépp tasaaroo,
wacc ko. ⁹ Ñu jàpp ko, yóbbu ca bu-
uru Babilon ca dèkk ba ñuy wax Ribla
ca réewum Amat. Nabukodonosor dogal
fa àtteem. ¹⁰ Buuru Babilon daa rendi

doomi Cedesyas yu góor, muy gis, mu rendiwaale mboolem kángami Yuda, ca Ribla. ¹¹ Gannaaw loolu mu tuur bëti Cedesyas, ba noppi jénge ko jéngi xàñjar, yóbbu ko Babilon, tēj ko fa, ba keroog bés ba mu deeyee.

¹² Ba Nabukodonosor buuru Babilon tolo ci fukkeelu atu nguuram ak juróom ñeent, ba am fukki fan ca juróomeelu weeru at ma, ca la bëkk-néegu buuru Babilon, Nebusaradan njiitu dag ya, dugg Yerusalem. ¹³ Mu taal kër Aji Sax ji, taal kër buur, ak kəri Yerusalem gépp, boole ca kəri boroom barke ya. ¹⁴ Gangooru Babilon gépp daldi ànd ak njiital dagi buur, ñu màbb tata ya wër Yerusalem. ¹⁵ Gannaaw gi ñenn ci baadoolo yi, ak ña nekkoon ca dëkk ba, ba booba, ak ña jébbaloon seen bopp buuru Babilon, ak ña desoon ca liggéeykat ya, Nebusaradan njiital dagi buur boole leen yóbbu ngálló. ¹⁶ Ñenn ca baadooloy réew ma nag, Nebusaradan njiital dag ya bàyyi leen fa, ñuy liggéey toókəri reseñ yaak tool ya. ¹⁷ Ci biir loolu kenuy xàñjar ya bokkoon ca kër Aji Sax ji, ak rootukaay yaak mbalkam xàñjar ma woon ca kër Aji Sax ji, waa Babilon toj lépp, boole xàñjar jépp yóbbu Babilon. ¹⁸ Nu yóbbaaale mboolem ndabi xàñjar yi ñuy liggéeye ci kër Aji Sax ji: ndab yiy def dóom, ak ñiitukaay yi ak ñiimi feyukaayi lãmp yi, ak ndab yiy def deretu sarax yi, ak and yu ndaw yi, ak mboolem juntuukaayi xàñjar yi ñuy sarxalee. ¹⁹ Njiital dag ya yóbbaaale ndab yu ndaw yaak and yaak ndab yiy def deretu sarax, ak ndab yiy def dóom, ak tegukaayi lãmp yaak and yu ndaw yaak kelli tuurukaay ya. Lu ciy wurus, mu ber, lu ciy xaalisi, mu ber.

²⁰ Ñaari kenu yooyu ak mbalka maak fukki nag ak ñaar ya ko yenu, ak rootukaay ya, lépp di xàñjar bu Buur Suleymaan defaraloon kër Aji Sax ji, ma-neesula takk diisaay ba. ²¹ Kenu yi, gu ci nekk am na taxawaayu fukki xasab* ak juróom ñett te fukki xasab ak ñaar a koy ub. Mu def pax ca biir te dëllaayu weñ ga di juróom ñeenti baaraam. ²² Kenu gu ci nekk ponku xàñjar a ca tege, taxawaayu ponk bi di juróomi xasab, ab caaxub xàñjar wodd ko, ànd ak doomi gërënaati xàñjar. Ñaari kenu yépp noonu, ànd aki gërënaat. ²³ Gërënaat yi juróom ñeent fukk laak juróom benn, wet gu nekk, boo ci boolee ya ca cat ya, muy téeméer, yu ub caax ba.

²⁴ Ci kaw loolu njiital dag ya jàpp Seraya sarxalkat bu mag ba, ak Cefaña sarxalkat ba ca topp, ak ñetti dagi bunt kër Aji Sax

ja. ²⁵ Biir dëkk ba nag, mu jële fa benn njiitu xare, ak juróom ñaari niti dëkk ba ñu sës ci Buur, ak bindkatub njiital xare ba sasoo bind xarekat yi, ak juróom benn fukki Yudeen ñu mu fekk ca biir dëkk ba. ²⁶ Ba mu ko defee Nebusaradan, njiital dagi buur, boole leen yóbbu ca buuru Babilon ca Ribla. ²⁷ Buuru Babilon nag bóom leen foofa ca Ribla, ca réewum Amat. Noonu la waa Yuda génne seen réew, dem ngálló.

²⁸ Lii mooy limu nit ñi Nabukodonosor toxal: Ñetti junniy Yudeen ak ñaar fukk ak ñett (3 023), loolu yemook juróom ñaareelu atu nguuram, ²⁹ ak juróom ñetti téeméer ak fanweer ak ñaar (832), loolu yemook fukkeelu atu nguuram ak juróom ñett, ³⁰ Ak juróom ñaar téeméer ak ñeent fukk ak juróom (745) yu Nebusaradan njiital dag ya, toxal. Loolu yemook ñaar fukkeelu at maak ñett ci nguug Nabukodonosor. Ñi ñu toxal ñépp di ñeenti junni ak juróom benni téeméer (4 600).

³¹ Yóbbu nañu Yowakin buurub Yuda ngálló ba mu am fanweeri at ak juróom ñaar, Ewil Merodag doora falu buur ca Babilon. At mooma, fukkeelu weer waak ñaar, ñaar fukki fan ak juróom ca weer wa, ca la Ewil Merodag siggil Yowakin buurub Yuda, daldi koy tiji. ³² Ci biir loolu mu wax ak moom lu rafet, jox ko cér bu sut cér ba mu jox yeneen buur, ya mu bokkal curga ca Babilon. ³³ Yowakin nag teqlikook yérey kaso ya, ba noppi ñu may ko muy bokk ak Buur ndab giuru dundam. ³⁴ Ci biir loolu ñu dogal ko njëlam lu sax dàkk, di bàyyikoo ci buuru Babilon bés bu jot, giiru dundam, ba keroog muy dee.

* 52:21 52.21 xasab mooy guddaayu loxo bu digg-dóomu, diggante catu baaraamu digg ak conc.

Kàdduy Jooytu

Yonent Yàlla Yeremi àddu na

¹ Ndeysaan! Dèkk beeka wéet tey!

Te ñoñam noon gànñ démb.

Ndeysaan! Mu ngi mel nib jétun tey,
te noon raññ fi biir xeet yi!

Moo doon lingeeru diiwaan yi,
tey mu sasoo liggéeyu sañul-bañ.

² Day fanaanee jooya jooy,
rongooñ yay bas-basi,
te du kenn ku koy dëfal
ci mboolemi soppeem.
Xaritoo xarit wor ko,
walbatiku diy noonam.

³ Ngàllo lañu yóbbu Yuda,
ci biir naqar ak njaam gu metti.
Ci biiri jaambur lañu dèkk,
amuñu fu ñu nopploo,
mboolem ña leen dàqa leen dab,
ba tance leen ca ruq ya.

⁴ Yoon yi jëm Siyon* jooy na wéet,
kenn jaareetu ca mąggalsi.
Pénc yépp a gental,
sarxalkat yay binni,
janq ja jàq,
Siyon gépp di naqarlu!

⁵ Seen noon yaa jiite tey,
seen bañ yooyoo ne finaax,
Aji Sax jee mbugale waa Siyon
seeni tooñ yu bare,
seeni doom duggig njaam,
di moomeel ub noon.

⁶ Lu doon sagub Siyon, dèkk bu taaru bi,
tey sàggiku na.
Seeni garmee ngi mel ni kéwél
yu amul parlu,
di koyon-koyoniy daw,
te rëbb ne leen dann.

⁷ Tey ci janti toroxte ak tumuránke,
la Yerusalem di fáttlikoo
mboolem ngéneeli démbam.
Aw askanam a tàbbi ci loxol noon,
te wall amul,
noon ba gis leen,
di textexi ci seenug yàqule.

⁸ Yerusalem a moya moy,
ba tax koo mujj di sobe;
ku ko teraloon, sofental ko,
ndax gis ko, mu ne dunj.

Moom ci boppam mu ngi binni,
fuuylu.

⁹ Sobey Siyon ca pendalam,
te bàyyiwul xel ag mujam.
Jéllam ba yéeme na,
te amul ku ko dëfal.
Siyon nee: «Éy Aji Sax ji, xoolal sama
njàqare;
noon bi déy, am na ndam!»

¹⁰ Loxo la noon bi teg ci
ngéneeli Siyon gépp.
Siyon kay a gis yéefar yi songsi
kéram gu sell gi,
te ci ñoom nga santaane woon, ne
buñu dugg sam ndaje.

¹¹ Waa Siyon gépp a ngi binni,
di wut ab dund†,
seeni ngéneel lañuy weccikoo aw ñam
wu ñu leqlikoo.

Yerusalem àddu na
Gisal Aji Sax ji, seetal
ni ma mujj tekkeedee!

¹² Yeen mboolem ñiy jaare yoon wi,
lii safu leen,
waaye seetleem rekk ba gis
ndax wenn mitit dab na
mitit wi ñu ma teg,
te Aji Sax ji naqarale ma ko
ci jantub tàkktel sànjam.

¹³ Fa kaw la Aji Sax ji sànnée sawara
ci sama biiri yax,
moo laaw ab caax ngir fakktal ma,
waññi ma, jànnaxe ma,
ma dèkke yoggooral.

¹⁴ Samay tooñ la Aji Sax ji ëmb,
fastee ko loxoom,
mu tege sama kaw ndodd,
ba jeexal sama doole.
Boroom bee ma tàbbal
ci loxo yu ma manula të.

¹⁵ Ku doon jàmbaar fi sama biiri,
la Boroom bi xalab.
Am ndaje la ma wooteel,
ngir falaxe sama ndaw yu góor.
Boroom bee dëggaate Janq Yuda mu taaru
mi,
ni reseñ ci biir nalukaay.

¹⁶ Looloo ma tax di jooy,
rongooñ di wal-wali,
te ku may dëfal sore ma,
mook kuy seral sama xol.

* 1:4 1.4 Siyon mooy Yerusalem itam. † 1:11 1.11 wut ab dund: li leen xañ ab dund mooy gaw bu yàgg bu ñu leen gaw, ba ñu mujj xiif lool. Seetal ci 2.Buur ya 25.1-3.

Samay doom a ngi jaaxle,
nde noon bi daan na.

Yeremi àddu na

¹⁷ Siyoŋ tàllal na loxoom,
waaye amul ku ko dëfal.
Aji Sax jee wool askanu Yanqóoba
seeni noon yi leen wër,
ba Yerusalem mujj di sobe fi seen biir.

Yerusalem àddu na

¹⁸ Aji Sax ji moo yey,
kàddoom laa gântal.
Yeen, xeetoo xeet, ngalla dégluleen
te xool samaw tiis.
Samay ndaw yu góor ak yu jigéen,
ñoo duggi ngallo!

¹⁹ Samay soppe laa woo wall,
ñoom ñu wor ma.
Samay sarxalkat ak samay mag di wuti ab
dund
bu ñu leqlikoo,
far faatu ci biir dëkk bi.

²⁰ Éy Aji Sax ji, xoolal sama njàqare,
samay butit di fuddu,
sama biir xol salfaañoo ndaxu tiis.
Man de maa gântal ba gântaaral,
ba fa biti, saamar di fa bóome,
te biir kër it di ndee.

²¹ Dégg nañu may binni,
te awma ku ma dëfal.
Noon yépp a dégg samaw ay
te di ko bége, nde yaa ko def.
Ngalla indil bés bi nga dige,
ba ñu daj li ma daj.

²² Yal na seen gépp mbon teew fi sa kanam,
ba nga mbugal leen
ni nga ma mbugale
ndax mboolem samay tooñ.
Samay onk bare na,
sama xol jeex tàkk.

2

Yeremi àddu na

¹ Ndeysaan Boroom bee mer ba xiinal Janq
Siyon
mu taaru mi.
Fa asamaan la rattaxe sagu Israyil fa suuf.
Keroog bésu meram ma, bàyyiwul xel,
ne këram googoo di ndëggastalam.

² Boroom bee modd te yërëmul
mboolem sancu Yanqóoba.
Ca meram ma la mabbé
tatay Janq Yuda mu taaru ma.
Moo detteel nguur ga aki garmeem,
sobeel leen.

³ Tàngooru sànjam la dagge
gépp kàttanu Israyil.
Fa kanam noon ba la roccee
dooley ndijooram.
Moo tàkkal Yanqóoba
ni sawara wuy sèlsëli,
ba xoyom mboolem la ko wër.

⁴ Boroom bee tàwwi ag fittam
mel ni ab noon,
moo diire ndijooram, mel ni bañ,
moo bóom mboolem lu neexa xool.
Ci biir xaymay janq Siyoŋ mu taaru ma
la yuri am sànjam ni sawara.

⁵ Boroom bee mel nib noon,
modd Israyil,
moddaale këram yu taaru yépp,
tas ay tataam,
ba fulal Janq Yuda mu taaru ma,
ay yuux aki jooy.

⁶ Moo tas mbaaram ni bu doon mbaarum
tool,
moo rajaxe bérabu ndajeem.
Aji Sax ji moo fàtteloo waa Siyoŋ
màggal ak bésu Noflaay,
te tàngooru meram la xalabe buur ak
sarxalkat.

⁷ Aji Sax jee jañax sarxalukaayam,
gedd bérabam bu sell.
Moo teg ci loxol noon tatay këram yi.
Biir kër Aji Sax ji la baat xaacoo,
ni bu doon bésu màggal.

⁸ Aji Sax jee dogoo rajaxe
tatam janq Siyoŋ mu taaru,
Moo tàllal buumu nattukaay, ngir tas ko,
bankul loxoom it te mabbu ko.
Moo jooyloo tata ak tabaxub fegukaay,
ñu ànd tojatao.

⁹ Bunti dëkk ba suulu na,
te moo yaqte, dammate weñi tējukaay ya,
buuram aki garmeem a tumurànkeji
ca yéefar ya,
te téereb yoon amul,
yonent it gisatul peeñu
mu bawoo fa Aji Sax ji.

¹⁰ Magi janq Siyoŋ mu taaru ña nga toog,
xeremlu,
xéppoo suuf, sol ay saaku, di ñaawlu.
Janqi Yerusalem ségg, seen bopp jëm suuf.

¹¹ Samay gët a giim ndaxi rongooñ,
samay butit fuddu,
xol ñiis, jeex tàkk:
ci tasteg samaw askan;
xale yeek gone yiy nàmp
ne lasar fi mbedd yi!

12 Seen yaay lañu naan:

«Ana fu nuy lekke, ba naan?»

Te ne lasiim ci mbeddi dëkk bi,
ni ñu gaañoo xare,
bakkan di tàggoo fa ñu uufoo
ca weenu yaay.

13 Yaw Janq Yerusalem mu taaru mi,
lu ma lay wax? Ku ma lay méngaleel?
Siyon mu jekk mu taaru mi laa ne,
ana ku ma lay dendaleel, ba seral sa
xol?

Yaw mi sab góom yaa ni géej,
ana ku lay faj?

14 Ag neen aki caaxaan la la say yonent
gisal,
te biraluñu sag ñaawtéef, ngir tijji sa
wërsëg,
xanaa di la yéeneel waxyuy caaxaan aki
nax.

15 Mboolem ñi fi jaareey tacc-taccali loxo,
ciipu, wëcc bopp ci gentub Yerusalem mu
taaru ma,
te naan: «Xanaa du biib dëkk lañu doon
tudd
sottiteb taar ba,
te muy mbégtém àddina sépp?»

16 Sa noon yépp a lay ñaawal,
di la kókkaleek a kekku,
te naan: «Sànk nanu leen nag!
Bii bés lanu yàggoona séentu,
te noo ko fekke tey.»

17 Aji Sax jee def la mu nammoon,
moo sottal kàddoom
ga mu santaane woon janti démb.
Moo fàdd te yërëmul,
ba may noon bége leen,
te moo kaweel sa kàttanu bañ yi.

18 Askan waa ngi jooy jooyi xol
fi kanam Boroom bi.
Éy yaw tatay janq Siyon mu taaru mi,
sottil say rongooñ ni walum dex gud-
deek béccëg;
bul nopplu, bul feral say rongooñ.

19 Jógal guddi, xaacu:
ndoortel wattub guddi, ngay yuri sab xol
nim ndox, jàkkaarlook Boroom bi.
Tállal koy loxo, ngir sa bakkani doom,
yi xiif tax ne lasiim fi boppu mbeddoo
mbedd.

Waa Yerusalem àddu na

20 Éy Aji Sax ji, xoolal, seetal rekk
ki nga def nii!

Xanaa du ndey mooy dem ba yàpp
doomam,

doom ju mu sukk jur, mu wér péññ!
Xanaa du sarxalkat akub yonent lañuy
bóom
fi bérabu Aji Sax bu sell bi!

21 Mag ak ndaw a ngi ne lareet fi suuf
ci mbedd yi;
sama janq jeek sama xale yu góor yi téd, d,
fàddoo saamar.
Yaa rey ci sa bésuub mer,
yaa rendi te yërëmoo.

22 Yaa woote ni su doon bésuub màggal,
tiitaange dar kepp ma.
Bésuub merum Aji Sax ji, kenn rëccul,
kenn muccul.
Doom yi ma jur, yar leen,
noon bi fàkkas leen!

3

Nit a ngi tawat

1 Man maay nit ki gisu naqar,
naqar wu ko yarub sànjum Aji Sax ji
teg.

2 Man la jañax, te lëndëm la ma doxloo,
dug leer.

3 Man doññ lay yen aka yenaat loxoom,
bésuub bés.

4 Moo ràppal sama der ak samaw suux,
tas samay yax.

5 Moo tabax fi sama kaw, tanc ma,
gawe ma tooke ak coono.

6 Bérab yu lëndëm la ma dëel,
ni ña dee bu yàgg.

7 Moo ma ñag ba manumaa bëtt,
te jéng yu diis la ma jéng.

8 Su ma yuuxoo, woote wall it,
mu tanqamlu samag ñaan.

9 Ay doji yett la ñage samay yoon,
te moo lajjal samay ñall.

10 Moo di segg mu may tère,
di gaynde gu waafe làqukaayam.

11 Samaw yoon la ma wàcce, xotat ma,
tumurànkeel ma.

12 Moo ma bankal xalaam,
diire mag fittam.

13 Sama xóotey xol la soqil ay fittam.

14 Maa mujj di reetaanukaayu bokk yépp,
di seen woyu bés bu nekk.

15 Moo ma reggal wextan,
màndal ma lu mel ni xay.

16 Yéyloo na may doj,
déggaate ma ci pënd bi.

17 Jàmmi xol a ma réer,
ma fàtte sax luy mbégte.

18 Ca laa ne sama doolee (/muñukaaya/
darajaa) jeex!

ak sama yaakaar ci Aji Sax ji.

19 Baal xel sama naqar ak sama tu-
muränke,

wii wextan akug tooke!

20 Dama ciy xalaat aka xalaataat,
sama xol jeex tàkk!

21 Waaye li may dëkke bàyyi xel,
ba dese yaakaar mooy lii:

22 Aji Sax ji, ngoram du dakk,
te yërmandeem du jeex.

23 Xanaa di yeeslu jant bu nekk.
Kee bare köllère!

24 «Samab séddoo, Aji Sax jee»
la sama xol wax,
te moo tax ma di ko xaar.

25 Aji Sax jee baax ci ñi ko yaakaar,
baax ci ki koy sàkku.

26 Li baax mooy muñ,
xeremluy xaar wallu Aji Sax ji.

27 Li baax ci nit mooy
nga nangoo muñ ba ngay ndaw.

28 Bu la Aji Sax ji tegee nattu,
berul te muñ.

29 Dëppal sa kanam ci suuf,
jombul yaakaar nuyoo.

30 Dékkal ub lex ku lay mbej,
di la tifaari saaga, ba nga tooy.

31 Boroom bi déy du la wacc ba fàww.

32 Bu la tegee naqar it, yërëm la,
ngoram a ni baree.

33 Du bänneexam lay tege coono,
aka naqaral doom aadama.

34 Bu ñuy dëggaate mboolem ñi ñu tëj cim
réew,

35 di jalgati yelleefu nit fi kanam Aji Kawe
ji,

36 di been dëgg cib layoom,
Boroom bi da ko dul gis?

37 Ana ku wax, mu am,
te Boroom bi dogalu ko?

38 Muy lu baax, di lu aay,
du Aji Kawe jeey àddu, amal?

39 Kuy dund, ana loo deeti jàmbat,
bu ñu la añalee sa bàkkaar?

40 Nan càambar, ba xoolaat jikko yi
te dellu ci Aji Sax ji.

41 Nan tàllal sunu xol ak sunuy loxo
Yàlla ja fa asamaan,

42 noo tooñ, noo fippu,
ba tax yaw jéggalewoo.

43 Sam sànj nga làmboo, topp nu,
di rey te néebluwoo,

44 aw niir nga sàngoo,

ba ag ñaan du ko jàll.

45 Mbuubitum sèn nga nu def
fi biir xeet yi.

46 Sunu noon yépp a nuy waxal,
47 tiitaange ak pax dikkal na nu,
ak yaquteek sànkute.

48 Saay gèt a ngi wal ndax sama askan
w1 rajaxoo.

49 Saay gèt a ngi rogalaat, du fer, du ñiis,
50 ba keroog Aji Sax ji séentoo asamaan, ba
gis.

51 Bi ma gisee li dal jigéeni dëkk bi yépp,
la sama xol jeex.

52 Ñi ma bañ ci dara ñoo ma kèpptala
kèpptal
ni picc.

53 Cib teen lañu ma tàbbal, ube kow doj,
te may dund,

54 ndox ma mëdd ma,
ma ne: «sàнку naa.»

55 Aji Sax ji, fa xóotey pax ma
laa la wooye

56 Sama baat nga dégg, ma ne la:
«Bul fattal sab nopp, samay onk
ak samay yuux.»

57 Bés ba ma la wooyee nga dikk,
ne ma: «Bul tiit.»

58 Boroom bi, yaa sàmm sama àq,
yaa jot sama bakkan.

59 Aji Sax ji, yaa gis ni ñu ma tooñe,
jox ma sama àtte.

60 Yaa gis seen mboolem mébetu feyu,
seen mboolem pexe yi ñu may lalal.

61 Aji Sax ji, yaa dégg seeni kókkalee,
ak mboolem pexe yi ñu may lalal.

62 Ci man la noon yiy diisoo aka déeyoo,
bés bu nekk.

63 Xoolal, bu ñu toogee ak bu ñu jógee,
man lañuy léeboo.

64 Aji Sax ji, jox leen seenub añ,
seen kemu liggéeyu loxo.

65 Dërkiisalal seen xol (Tegleen njàqarey
xol / Muural seenum xel.)
na leen sag alkànde ñeel.

66 Toppe leen sa mer, te nga sàнке leen
mboolem fu asamaanu Aji Sax ji tiim.

4

Ku mucc xare wax na

¹ Ndeysaan, wurus wa giim na!

Ngéneelu wurus soppiku na.

Doj yu sell yaa wasaaroo,
ca boppu mbedd yépp.

² Doomi Siyoŋ yu góor yu jar ya!

Wurus lees leen daan nàtablee,

ndeysaan tey, ñu jàppe leen ni njaqu ban
lu tabaxkatu njaq liggéeye loxoom.

³ Ag till sax joxe na weenam,
nàmpal doomam,
te sama bokk yi mujj néeg
ba mel ni bànjóolig màndiñ.

⁴ Luy nàmp a nga mara mar,
ba làmmiñ taqoo denqleñ.
Gone yaa ngi ñaan mburu,
te kenn daggalu leen.

⁵ Ñi daan xéewloo ay bernde,
tey ñoo xiif, ne lasar ca mbedd ya.
Ña yaroo woon yérey tãneeef,
tey ñoo goore jalu mbuubit.

⁶ Sama ñaawtéefu askan wee màgg,
ba raw ñaawtéefu waa Sodom*,
dëkk ba jekki jállarbiku,
te loxo laalu ko.

⁷ Sunu kàngam ya setoon wecc,
seen yaram mucc gàkk,
di lèrxat bay tàkk,
wér péññ, leer nãññ.

⁸ Tey ñu gëna lëndëm bànqanoos,
xàmmeesu leen ci mbedd yi,
ñu ngi lax, di yaxi neen,
der wow konj ni matt!

⁹ Ña saamar rey a gënu demin
ña deeye xiif,
jeex tàkk, ne lasar,
ndax ñàkk meññatum tool.

¹⁰ Ndey ak xolu njureelam,
moo togge loxoom, doomu boppam,
def ko njëlam,
ci sama biir toskareg askan wi!

¹¹ Aji Sax jee xëpp am sànjam,
sotti tàngooru meram,
moo jafal sawara fi Siyon,
ba xoyom kenu ya.

¹² Du benn buur fi kaw suuf bu gëmoon,
du kenn ci mboolem waa àddina
ne bañ akub noon dina dem
ba bètt bunti Yerusaleem.

¹³ Seen bàkkaari yonent yaa,
seen ñaawtéefi sarxalkat yaa;
ñoo tuur fa digg dëkk ba
deretu aji jub ñi.

¹⁴ Ña ngay tēñēx-tēñēxi

niy gumba ci mbedd yi,
deret ja sobeel leen ba maneesula laal
seeni yérey.

¹⁵ Ñoom lañuy gëdd naan:
«Soreleen nu, nit ñu sobewu ñi!
Soreleen, soreleen, buleen nu laal.»
Ñu daw di tambaambalu ba ca yeneen
xeet;
ñooña ne leen: «Dootu fii!»

¹⁶ Aji Sax ji ci boppam moo leen tasaare,
faaleetu leen;
cér lees séddul sarxalkat,
te teraleesul mag.

Waa Yerusaleem àddu na

¹⁷ Ba tey sunu gët a ngi giim,
ndax ndimbal lu nuy séentu ci dara.
Fa sunuy tata lanu séentoo wenn xeet
wu nu manula wallu.

¹⁸ Sunuy tànk lees di topp,
ba manatunoo daagoo sunuy mbedd;
sunu bés jege,
sunu àpp di matal,
sunu saa taxaw!

¹⁹ Ñi ñuy dàqa gëna gaaw ay jaxaay,
ci kaw tund yi lañu nu ne dann,
màndiñ mi, ñu di nu fa tēroo.

²⁰ Ki nuy noyyee, Buur bi Aji Sax ji fal,
ca seeni yeer la tance,
te nu noon ci keppaaram lanuy dëkke
fi digg xeet yi.

Yeremi àddu na

²¹ Bégleen te bannexxooy,
yeen Edomeeni† réewum Ucc,
ci yeen it la kaasu mbugal di jállsi,
ngeen màndi, futteeku, ne dunjñ.

²² Yaw Siyon, sa mbugal mat na,
deesatu la yóbbu ngallo;
yaw Edom laa ne, Aji Sax jee lay fey
sa ñaawtéef,
feeñal say bàkkaar.

5

Yeremee ngi ñaan

¹ Éy Aji Sax ji, bàyyil xel li nu dal,
xoolal, gisal sunu toroxte!

² Sunu suuf toxu ciy jaambur,
sunuy kër ñeel ay doxandéem.

³ Baay dëddu, nu diy jirim;
ndey dib jëtun.

⁴ Sunum ndox, xaalisi lanu koy feye, naan,
sunu matt ak njégam la mu nuy dikke.

* 4:6 4.6 Sodom: seetal ci *Njàlbéen ga* 19.24-25. † 4:21 4.21 Edomeen ñaa nga bàyyikoo fa bēj-saalumu Yuda jàpp penku. Ñu ngi soqikoo ci Esawu, magu Yanqóoba, kon bokki Israyil lañu woon, waaye dañoo faroon ak noonni Israyil.

- 5 Sunuw loos lañu ràng,
 nu loof, te noppaleesu nu.
 6 Nu nangul Misra,
 nangul Asiri ngir ab dund.
 7 Sunuy maam a moyoon, tey nekkatuñu;
 nun, noo gàddu seeni mbugal.
 8 Ay surgaa nu yilif, te amunu
 ku nu wallu ci seen loxo.
 9 Bu nu lekkee, sunu bakkan lanu jaay,
 nde saamar a ngi ci màndiñ mi.
 10 Sunu yaram nib taal la tànge
 ndax tàngoourub xiif.
 11 Jigéeni Siyoñ lañuy tédde,
 ak janqi dèkki Yuda.
 12 Kàngam yi, ñu jàpp, wékk;
 te mag ñi, teraleesu leen.
 13 Waxambaane yee yenu doji wolukaay,
 gone yu góor yi séfoo sayi matt, di tërëf.
 14 Mag dakkal na jataayu pénc,
 te waxambaane talatula xalam.
 15 Xol nux-nuxeetul,
 te ay rongooñ a wuutuy pooj.
 16 Sunu mbaxana foq na!
 Wóoy ngalla nun ñi moy!
 17 Lee jeexal sunu xol,
 lii moo nu jooyloo, ba gët giim:
 18 tundu Siyoñ wi gental,
 ba till yi di fi daagoo.
 19 Yaw Aji Sax ji, yaay toog ba fàww,
 sab jal, sèt ba sètaat.
 20 Ana lu waral nga fátte nu fàww,
 ba nu jant yu yágge nii?
 21 Éy Aji Sax ji, délloosi nu fi yaw, nu
 dellusi,
 yeasalal sunuy jant, mu mel na woon.
 22 Xanaa doo nu wacca wacc,
 mere nu mer mu amul kemu?

Esekiyel

Esekiyel daje naak leeru Aji Sax ji

¹ Am na bés, mu yemook sama fan-weereelu at, juróomi fan ca ñeenteelu weer wa, booba maa nga bokkoon ca ña ñu toxal ca tàkkal dexu Kebar*. Asamaan daa ubbiku, ma daldi gis ay peeñuy Yàlla.

Bindkat a ngi joxe tegtal ca moomu peeñu

² Juróomi fani weer wa moo yemook juróomi at gannaaw ba ñu toxalee Buur Yowakim. ³ Kàddug Aji Sax ji moo dikkal Esekiyel doomu Busi, sarxalkat ba fa réewum Kaldeen ña ca tàkkal dexu Kebar. Te foofa la loxol Aji Sax ji dikke fa kawam.

Nii la peeñu ma bindoo

⁴ Naka laa xool rekk, ngelaw lu réy jekki dikke bëj-gannaar, ànd ak niir wu mag, sawara di ca fettaxe, ag leer gu ne ràññ wër ko; digg ba mel ni weñ guy tàkk. ⁵ Digg ba, jëmme ñeenti bindeef a ca feeñ yu ame melokaanu nit. ⁶ Ku ci nekk am na ñeenti kanam ak ñeenti laaf. ⁷ Seeni tànk daa jub, téstën ya mel ni weyi sëllu di melax ni xànjir bu ñu jonj. ⁸ Seen laaf, loxoy nit a nga ca suufam ci seen ñeenti wet yépp, ñoom ñeent ñépp ak seeni kanam ak seeni laaf. ⁹ Seen ñeenti cati laaf a ngay laale, te ku nekk man naa jubal màkk fépp fu genn kanam jublu te du jar muy warangiku. ¹⁰ Seen melokaanu kanam nag nii la bindoo: ku ci nekk am nga kanamu nit fa féete kanam ak kanamu gaynde ci sa ndijoor. Ku ci nekk itam am nga kanamu yékk fi sa càmmoñ ak kanamu jaxaay fa féete gannaaw. ¹¹ Seeni kanam a ngoogu. Ku ci nekk sa ñaari laaf a jëm kaw, di laal sa laafi moroom. Sa ñaari laaf yi ci des sàng sa yaram. ¹² Ku nekk man naa jubal màkk fépp fu genn kanam jublu. Fépp fu Noowug Yàlla jublu, ñu jublu fa te warangikuwuñu. ¹³ Jëmme bindeef yaa nga am melow xali sawara yu yànj, mel niy jum, sawara way dem ak dikk ci seen biir. Sawara waa nga ne ràññ, ay melax di ca fettaxe. ¹⁴ Bindeef yaa ngay naaw, di dem ak a dikk, mel ni melax.

¹⁵ Naka laa xool, daldi gis ay mbege fi suuf, mbege mu ci nekk feggook menn mbindeef, mook ñeenti kanamam. ¹⁶ Mbege yaa ngay nirook peru kirsolit, ci melokaan ak ci bind. Ñoom ñépp a

niroo. Seen melokaan ak seen bind daa mel ni, mbege mu ci nekk, mbege nekk ca biiram, ¹⁷ mbege yay dawee ñeenti wet te warangikuwuñu. ¹⁸ Taxawaayu mbege ya daa réy ba raglu te mu ci nekk ay gèt la sàngoo ba daj. ¹⁹ Bu bindeef ya dawee, mbege ya feggook ñoom daw; bu ñu naawee, mbege ya naaw. ²⁰ Fu noo gi wale jublu fa rekk, fa lañu jëm, mbege ya jógandook ñoom, ànd ak noo gi. Noowal boroom bakkan yi daal moo nekk ci mbege yi. ²¹ Bu ñu dawee, ñu daw; bu ñu taxawee, ñu taxaw. Bu ñu jógee ci suuf, yékkatiku, ñu ànd ak ñoom yékkatiku. Noowal boroom bakkan yi daal moo nekk ci mbege yi.

²² Lu mel nib dénd a tiim boppi bindeef ya, raglu, leer nàññ ni doju kiristaal†. ²³ Mbindeef mu ci nekk sa yenn ñaari laaf a ngi ci suufu dénd bi, tàlli, dékkarloo; ñaari laaf yi ci des sàng sa yaram. ²⁴ Bu ñuy naaw, may dégg seen coowal laaf yi, mu mel ni géej mbambulaan, melati ni kàddug Aji Man ji, di saf riirum xare. Bu ñu taxawee, daldi wacce seeni laaf. ²⁵ Saa yu ñu taxawee ba wacce seeni laaf nag, ag kàddu di jollee ca kaw dénd ba ca seen kaw bopp ya.

²⁶ Ca kaw dénd ba tiim seeni bopp, ba tey, am na luy nirook ngànguney peru safiir, te jëmme nit nekk ca kawa kaw lay nirook ngàngune. ²⁷ Ma gis nag lu mel ni weñ guy tàkk, wër ko; dale ca lay niru ndigg la, jëm kaw; daleeti ca lay niru ndigg la, jëm suuf. Ma gis lu mel ni sawara akug leer wër ko. ²⁸ Mu mel ni xon ci biiri niir, bésub taw. Loolooy melokaanu leer ga ko wër. Muy melokaan muy jëmman leeru Aji Sax ji. Naka laa ko gis, daldi ne gurub, dépp sama kanam fi suuf. Ma dégg nag kàddu gu jib.

2

Aji Sax ji yebal na Esekiyel

¹ Ba loolu amee boroom kàddu ga ne ma: «Yaw nit ki, jógal taxaw, ma wax la.»

² Naka la ma wax loolu, ngelaw solu ma, ne ma yékkét, ma taxaw, di dégg kiy wax ak man. ³ Mu ne ma: «Yaw nit ki, maa lay yebal ci bànni Israyil, xeeti fippukat yi fippu ci sama kaw; ñook seeni maam dañu maa masa tooñ ba bésub tey jii. ⁴ Ci nit ñu dëgër bopp te dërkiis laa lay yónni. Wax leen, ne leen: “Li Boroom bi Aji Sax ji da koo wax.” ⁵ Ñoom nag, su ñu la déglóok su ñu gántalee ndax kërug fippukat gi ñu jikkowoo, dinañu xam ne ab yonent a ngi

* 1:1 1.1 dexu Kebar a nga woon ca Babilon, ga buuram Nabukodonosor dencoon bànni Israyil, gannaaw ba mu leen jàppee ba yóbbu leen fa ngàllo. Yonent Yàlla Esekiyel ab sarxalkat la fa woon ca biir bokki bànni Israyilam.

† 1:22 1.22 kiristaal daa mel ni weer bi ñuy defare ab kaas.

ci seen biir. ⁶ Waaye yaw nit ki, bu leen ragal, bul ragal seeni wax. Xam naa ne ay taxas aki dég a lay wër, nga toog ci kawii jiit. Waaye bul ragal seeni wax te bul tiit seen kanam doonte kërug fippukat lañu. ⁷ Nanga leen agge samay wax, ñu déglook ñu gántal, nde ay fippukat lañu. ⁸ Yaw nit ki nag, déglul lii ma lay wax. Bul fippu ni kërug fippukat gii. Sexal, te lekk li ma lay jox.»

⁹ Naka laa xool, yem ci loxo bu ñu ma tàllal. Ndeke taxañub téere moo ci nekk. ¹⁰ Mu tàqarñi ko fi sama kanam, muy lu ñu bind biir ak biti, mbind ma di kàdduy jooy aki onk aki yuux.

3

Aji Sax ji dooleel na Esekiyel

¹ Mu ne ma: «Yaw nit ki, lii ngay gis, lekk ko. Lekkal taxañ bii te dem wax ak waa kër Israyil.» ² Ma ña, mu leel ma taxañ ba. ³ Mu ne ma: «Yaw, nit ki, lekka taxañ bii ma la jox, ba suur këll.» May lekk, mu neex ni lem.

⁴ Mu ne ma: «Yaw nit ki, demal ba ca waa kër Israyil, te nga agge leen samay wax. ⁵ Du ci waaso wu xóotu làkk te diisu làmmiñ lees la yebal. Ca waa kër Israyil nga jëm. ⁶ Bare na waaso yoo xamul seeni wax, yu xóotu làkk te diisu làmmiñ. Te su ma la yebaloon ci ñoom, ñu déggal la. ⁷ Waaye waa kër Israyil duñu la nangoo déggal, ngir nanguwuñu maa déggal; ndax waa kër Israyil gépp a dégër bopp te dërkiis. ⁸ Maa ngii di la may kanam gu ñemee ni seen kanam, ba nga dégër bopp ni ñoom. ⁹ Jamaa moo raw doj te ni laay dégërle sa bopp. Bu leen ragal, bu leen tiit, li ñuy kërug fippukat yépp.»

¹⁰ Mu teg ca, ne ma: «Yaw nit ki nag, mboolem li ma lay wax, dégloo ko nopp, te teewloo ko xel. ¹¹ Nanga dem ba ca sa bokki ngállo ga, nga wax leen, ñu déglook ñu gántal, ne leen: “Lii Boroom bi Aji Sax ji da koo wax.”»

¹² Ci kaw loolu ngelaw ne ma siféet, may dégg sama gannaaw, riirum kàddu gu xumb gu ne: «Cant ñeel na tedngay Aji Sax ji fi màkkaanam.» ¹³ Mu ànd ak riirum laafi bindeef yay fenqoo, ak coowal mbege ya ñu feggool, muy riir mu xumb. ¹⁴ Ba loolu amee ngelaw ne ma siféet, yóbbu. Maa ngay deme naqar ak xol bu tàng, te loxol Aji Sax ji diis gann ci sama kaw. ¹⁵ Ma àgg ba ca ngálllog Tel Abib, ga dèkke tàkkal dexu Kebar. Foofa ñu dèkk laa toog, jommi ci seen biir diiru juróom ñaari fan.

¹⁶ Ba juróom ñaari fan ya matee, kàddug Aji Sax ji dikkal ma, ne ma: ¹⁷ «Yaw nit ki, tabb naa la wattukatub waa kër Israyil.

Nangool sama gémmiñ kàddu, artool ma leen ko. ¹⁸ Su ma nee nit ku bon ki: “Dee rekk ay sa àtte,” te fekk àrtuwoo ku bon ka, waxuloo lu ko waññee ca mbonam ga, ba mu mucc, ku bon kaay dee ndax tooñam, waaye bakkanam yaw laa koy laaj. ¹⁹ Waaye su dee yaa àrtu ku bon ki te taxul mu waññiku, dèddu mbonam nag, tooñu boppam a ko reylu, waaye yaw musal nga sa bopp. ²⁰ Su dee boroom njekk bu dèpp yoonu njekkam, di def ndéngte, maa koy gállankoor, mu dee. Soo ko àrtuwul ndax bàkkaarum, dina dee, te deesul bàyyi xel njekkal démbam la, waaye bakkanam, yaw laa koy laaj. ²¹ Waaye nag su dee yaa àrtu boroom njekk bi, ba tax bàkkaaratul, dina dund déy, ndax kàddug àrtu ga, te yaw it musal nga sa bopp.»

Tēju te tëlee wax misaal la

²² Gannaaw loolu loxol Aji Sax ji dikk na fa ci sama kaw. Mu ne ma: «Génnaal ba ci joor gi, ma wax faak yaw.» ²³ Ma génnsi ba ca joor ga. Ndeke jëmmu leeru Aji Sax jaa nga foofa, taxaw mel ni jëmmu leer, ga ma gisoon ca tàkkal dexu Kebar. Ma ne gurub, dèpp sama kanam fa suuf. ²⁴ Ci kaw loolu ngelaw solu ma, ne ma yékkét, ma taxaw. Mu wax ak man, ne ma: «Doxal, tējuji sa biir néeg. ²⁵ Te kat yaw nit ki, dees na la fa takke ay buum, yeew la ba dootoo mana génn, dem ci nit ñi. ²⁶ Sa làmmiñ laay taqal ci sa denqleñ, nga luu ba doo leen mana yedd, ndax kërug fippukat lañu. ²⁷ Waaye bu ma amee lu ma lay wax, dinaa ubbi sa gémmiñ. Su ko defee nga ne leen: “Lii Boroom bi Aji Sax ji da koo wax.” Kuy dégg, dégg; kuy gántal, gántal. Ndax kërug fippukat lañu.»

4

Esekiyel yégle na gaw ba

¹ Aji Sax ji ne: «Yaw nit ki, jèlal móolu ban, teg fi sa kanam, nga rédd ci ab dèkk, mu misaal Yerusalem. ² Nga gaw ko, tabb ab gawukaay bu ko wër, sèkk ko, ba noppi sàkkal ko ay dali xare, wërle ko dénki dájjiikaay ba mu daj. ³ Su ko defee nga jël saafukaayu weñ, teg ko, mu mel ni miiru weñ bu dox sa diggantek dèkk bi, te nga janook dèkk bi. Noonu nga koy gawe, mu gawu. Loolu di misaal, ñeel waa kër Israyil.

⁴ «Gannaaw loolu nanga tédde sa wetu càmmoñ. Googu wet ngay gàddoo ayu waa kër Israyil. Diiru fan yi ngay tédde wet ngay gàddoo seen ay. ⁵ Man nag àppal naa la limu fan yu tembook limu ati ayu

waa kër Israyil*, muy ñetti téeméeri fan ak juróom ñeent fukk (390) yooy tegoo ayu waa kër Israyil. ⁶ Boo noppee ci loolu nanga tédde wetu ndijoor. Noonu ngay gaddoo ayu waa kër Yuda diiru ñeent fukki fan, at mu nekk, ma defal la ko benn fan. ⁷ Te nga jækkaarlook gawub Yerusalem, tàllal ko sa pèrègu neen, daldi biral waxyu ci kawam. ⁸ Te kat dinaa la yeewe ay buum ngir doo mana walbatiku tédde geneen wet, ba keroog ngay sottal say fani gaw.

⁹ «Te kat nanga sàkk bele ak lors ak ñebbe ak lantim ak dugub ak bele bu dègër. Nga boole lépp ci lènn ndab. Moom ngay lekk diiru fan yi ngay tédde wet. Diiru ñetti téeméeri fan ak juróom ñeent fukk (390) nga koy dunde. ¹⁰ Sa njèlu bés nag na doon ñaar fukki siikal† yooy lekk bés ak bés. ¹¹ Sa ndoxum naan it dees koy natt, mu tollook benn liitar bés bu nekk. ¹² Mburum lors ngay lekk te jonkani nit nga koy lakke, nit ñuy gis.» ¹³ Aji Sax ji teg ca ne: «Noonu la bànni Israyil di lekkeji seen ñamu sobe ci biir xeet yi ma leen di tasaareji.»

¹⁴ Ma ne ko: «Āhā! Boroom bi Aji Sax ji, man de masumaa sobeel sama bopp. Muy lu médd, di lu aw rab fàdd, masuma koo lekk ba may gone ba tey. Wenn yàpp wuu daganul masula dugg sama gëmmiñ.» ¹⁵ Mu ne ma: «Baax na, kon defal naa la ko ndéef, mu wuutu jonkanu nit, dinga lakke ko sa mburu.» ¹⁶ Mu neeti ma: «Yaw nit ki, maa ngii di dagge fi Yerusalem lépp luy dugub. Ci biir njàqare lañuy lekke as mburu te xol bu jeex lañuy naane siitum ndox. ¹⁷ Su ko defee ñu ñàkk lekk, ñàkk naan, di xoolante gèti tiitaange, jeex tàkk ndax seeni ñaawtéef.»

5

Dogal dikkal na Yerusalem

¹ «Yaw nit ki, jèlal saamar bu ñaw, nga def ko sa saatus watukaay te nga wate ko sa bopp ak sa sikkim. Nga jël ab màndaxekaay, séddalee ko kawar gi ay cér. ² Benn cér bi, nanga ko lakk ci digg nataalu dèkk bi, gannaaw bu fani gaw bi matee. Beneen cér bi, nga dóore ko saamar bi, kawar gi tasaaroo fi wër dèkk bi. Netteelu cér bi, nga sànni ko ci ngelaw li, man ma toppe ko saamar. ³ Waaye nanga sàkk tuuti ci kawar gi, fas ci sa lafu mbubb. ⁴ Nga dellu sàkk cooca, sànni ca sawara sa, lakk ko. Ca la sawaray jóge, tàkkal mboolem waa kër Israyil.

⁵ «Boroom bi Aji Sax ji dafa wax ne: Yerusalem a ngoogu. Ci digg xeet yi laa ko teg, réew yi wër ko. ⁶ Nnoo gántal sama àttey yoon, ba gèna bon xeet yi, gántal samay dogal, ba gèna bon réew yi leen séq. Xalab nañu sama àttey yoon te jèfèwuñu samay dogal.

⁷ «Moo tax Boroom bi Aji Sax ji dafa wax ne: Gannaaw seen reewande wees na reewandey xeet yi leen séq, samay dogal, jèfèwuleen ko; sama àttey yoon, sàmmuleen ko; sàmmuleen sax àttey xeet yi leen wër, ⁸ kon nag Boroom bi Aji Sax ji dafa wax ne: Maa ngii ci seen kaw, man itam. Maay wàcce fi seen biir ay mbugal, xeet yi teg ci seeni gèt. ⁹ Maay def fi seen biir lu ma masula def te duma defati lu ni mel, ndax seen mboolem jéf ju siblu. ¹⁰ Moo tax baay dina yàpp doom, doom yàpp baay fi biir Yerusalem. Maay wàcce ay mbugal fi yeen, te maay tasaare seenu ndes wépp fépp fu ngelaw jublu.

¹¹ «Moo tax, dogu naa ci man miy dund, kàddug Boroom bi Aji Sax jee, gannaaw yeena def seen wépp njombe ak seen jépp jéf ju siblu, di sobeel sama bérab bu sell bi, man itam, maa leen di wat nel te duma leen xool bētu ñéebalu, duma leen ñeewante. ¹² Seen ñetteelu xaaj, mbas lañuy deeye mbax xiif bu leen di sànk ci biir dèkk bi. Beneen ñetteelu xaaj bi, saamar lañuy fàddoo ci seen dig-digal bi. Xaajub ñetteel bi ci des, fépp fu ngelaw jublu laa leen di tasaare, te saamar laa leen di toppe. ¹³ Maa leen di ñaccal sama mer, sotti leen sama xadar ba giif, te bu ma leen ñaccalee sama mer, ñu xam ne man Aji Sax ji, maa waxe sama fiiraange. ¹⁴ Yeen waa Yerusalem maa leen di gental, sewal leen ci biir xeet yi leen séq, ku fi romb, di ci gis. ¹⁵ Keroog bu ma leen wàccleele àtteb mer ak xadar ak dumay xadar, seen dèkk beey doon dèkkub toroxte bu ñuy kókkali, dèkk bu gental buy yedd xeet yi leen séq. Man Aji Sax ji maa ko wax.

¹⁶ «Nnoom bu ma leen soqee fitti xiif yu aay, fitti faagaagalkat yooyu may fitt ngir faagaagal leen, xiif laa leen di yokkal, ba dagge dugub fi seen biir. ¹⁷ Maay yebal ci seen kaw ab xiif ak rabi àll yu leen di xañ ay doom; mbas ak deret ju tuuru gane leen, saamar, ma indil leen. Man Aji Sax ji, maa ko wax.»

6

Tuur yi indi na mbugal

¹ Gannaaw loolu kàddug Aji Sax ji da maa dikkal, ne ma: ² «Yaw nit ki,

* 4:5 4.5 Gannaaw ba Buur Suleyman nelawee, am réewam xàjjalikoo na ñaari pàcc, benn ba di Israyil ca bèj-gannaar, ba ca des di Yuda ca bèj-saalum. † 4:10 4.10 ñaar fukki siikal mooy ñaar téeméeri garaam.

jàkkaarlool ak tundi Israyil, nga waxal leen waxyu. ³ Neel:
 “Yeen Tundi Israyil,
 Dégluleen kàddug Boroom bi, Aji Sax ji.
 Boroom bi Aji Sax ji moo wax lii,
 jème ci tund wu mag ak wu ndaw
 ak xunteeku xur, ne:

Maa ngi nii di leen wàcceel saamar,
 maay màbb seen jaamookaayi tuur,
⁴ seen sarxalukaay gental,
 seen suurukaayi tuur tasaaroo,
 ma tëral seeni nit ñu ñu bóom fi seen
 kanam kasaray tuur.

⁵ Maay tegal seen kasaray tuur néewi
 bànni Israyil.

Maay wasaare seeni yax fi wër seeni
 sarxalukaay.

⁶ Fu ngeen mana sance,
 seeni dèkk ay gental,
 seen jaamookaayi tuur wéet,
 seeni sarxalukaay yaqu, gental,
 seen kasaray tuur rajaxoo ba jeex,
 seen suurukaayi tuur màbb,
 seeni liggéey réer.

⁷ Dees na leen bóom,
 ba ngeen xam ne maay Aji Sax ji.

⁸ Waaye maay déeg lenn ci yeen,
 ñu rëcc saamar, tasaaroo ci xeet yi,
 ci biir réewi jaambur.

⁹ Su boobaa seenu ndes di ma fàttlikoo
 fa biir xeet ya ñu leen yóbbu njaam,
 fa may jeexale seen xolu gànc, bi ma
 dèddu,

ak seen gèt yi ñuy gànctook seeni tuur.
 Su boobaa ñu jéppi seen hopp
 ndax lu bon li ñu def ak seen jépp jéf ju
 siblu.

¹⁰ Dinañu xam ne maay Aji Sax ji,
 te du neen laa leen artoo,
 ba ma leen di tëkkoo mii musiba.

Aji Sax jeey am ndam

¹¹ “Boroom bi Aji Sax ji dafa wax ne:
 Fenqeel say loxo, dóor sa tànk fi suuf te ne:
 ‘Ñaw!’

ci mboolem jéfi waa kër Israyil ju bon ju
 siblu.

Saamar ak xiif ak mbas lañuy fàddoo.

¹² Ku sore deeye mbas,
 ku jege fàddoo saamar,
 ku ca mucce, deeye xiif,
 ma ñaccal leen sama xadar.

¹³ Dingenge xam ne maay Aji Sax ji,
 bu seeni néew nee xas fi seen biiri tuur,
 ak fi wër seeni sarxalukaay,
 ak kaw tund wu mag ak wu ndaw,
 ak mboolem ker garab gu naat,
 ak mboolem garab gu mag te séq,
 fépp fu ngeen di taale cuuraay, ñeel seen
 mépp tuur.

¹⁴ Maa leen di dóor sama loxo,

réew mi, ma gental koo gental,
 dale ko màndiñ ma ba Dibla,
 ak fépp fu ñu mana sance.
 Su boobaa ñu xam ne man maay Aji Sax
 ji.”»

7

Jeexle dikk na

¹ Gannaaw loolu kàddug Aji Sax ji da
 maa dikkal, ne ma: ² «Léegi nag, yaw nit
 ki, Boroom bi Aji Sax ji dafa wax réewum
 Israyil ne ko:

“Jeex na tàkk!

Jeexal dikkal na ñeenti weti réew mi.

³ Jeexal nga nag léegi!

Maay yebal sama mer fi sa kaw.

Maa lay mbugale say jéfin,
 yool la sa jépp jéf ju siblu.

⁴ Duma la xool bētu ñéebalu,
 duma ñeewante.

Say jéfin laa lay yool,
 sa jéf ju siblu ji ci sa biir.

Su boobaa ngeen xam ne man maay Aji
 Sax ji”».

⁵ Boroom bi Aji Sax ji dafa wax ne:

«Céy wii ay, guléet wii ay!

Mu ngii di dikk.

⁶ Jeexlee ngoog, jeexle dikk na,
 jekki, yewwul la.

Mu ngii, di dikk!

⁷ Yaw nitu réew mee, sànkute dikkal na la.
 Àpp mat,

bés dègmal,
 tiitaange wuutu ca mbéx fa kaw tund ya.

⁸ Du yàgg dara ma xépp la sama xadar,
 ñaccal la sama mer,

mbugale la say jéfin,
 yool la sa jépp jéf ju siblu.

⁹ Duma xool bētu ñéebalu,
 duma ñeewante.

Say jéfin laa lay yool
 ak sa jéf ju siblu ji ci sa biir.

Su boobaa ngeen xam ne maay Aji Sax jiy
 dumaa.

¹⁰ «Bés baa ngi, mu ngooguy dikk,
 sànkute sàqi na,

yetu njubadee tóor,
 reewande jebbi.

¹¹ Fitnaa taxaw, di yet wuy dóoral coxor.
 Seen lenn du des,

du seen mbooloo,
 du seen alal,

du seen daraja.

¹² Àpp mat,

bés jege.

Bu ca jëndkat tala bég,
 bu ca jaaykat tala naqarlu!
 Am sànj a dikkal askan wépp.

¹³ Bu jaaykat bi muccee it,

du jootaat ca njaayam.

Peeñu mi jëm ci askan wépp, daal, du toxu,
ku nekk ñaawtéefam lay dunde,
ba du leqliku.

¹⁴ Liitu xareey jib, ba lépp jekk ngir xare,
te kenn du xareji,
samam sànj a dikkal askan wépp.

¹⁵ Saamar biti,
mbas akub xiif ci biir,
ki ci àll bi deeye xare,
ki ci biir dëkk bi, xiif ak mbas rey ko.

¹⁶ Ña rècc, rawi ca tund ya,
waru pitaxi xur ya,
ñoooy binneendo ndax seeni tooñ.

¹⁷ Yoxo yépp yoqi,
tànk tooy xépp.

¹⁸ Ñoooy sol ay saaku di ko ñaawloo,
seen yaram wépp daw,
gépp kanam sëlmooy gacce,
bopp ya di nel yu set wecc.

¹⁹ Seen xaalis, ñu sànni ci mbedd yi,
seen wurus di leen saf sagaru sobe.
Keroog bésus sànjum Aji Sax ja,
du xaalis, du wurus wu leen di xettli.
Du leen fajal xiif,
du leen reggal,

xanaa tàbbal leen cig njubadi.

²⁰ Noo doon sagoo seen gànjar gu yànj,
di ci sàkk jëmme tuur yu jara bañ te
jomblu,

ba tax ma defal leen ko sagaru sobe.

²¹ Maa koy teg ci loxoy doxandéem, ñu
foqati ko,
muy alal ju sagari niti àddina sèxétooy,
teddadil ko.

²² Maa leen di dummóoyu,
maay bàyyi nit ñi teddadil sama ngéneelu
bérab,

ay sàcc a cay tàbbi, teddadil ko.

²³ Waajal-leen càllala yi,
tuur nañu deret ba réew mi fees,
dëkk bi fees ak fitna.

²⁴ Maay indi xeet yi gëna néeg,
ñu nangu seeni kër,
ma daldi sàggi sagu boroom doole yi,
sobeel seen bérab yu sell.

²⁵ Tiitaangee ngi dikk,
ñuy sàkku jàmm, jàmm réer.

²⁶ Ay ci kaw ay a ngi dikk,
xibaar ci kaw xibaar,
ñuy sàkku peeñum yonent ci neen,
ndigalu yoon réer sarxalkat,
pexe réer mag.

²⁷ Buur dina tiislu,
garmi làmboo séri ñaawlu,
baadoolay réew mi di kat-kati.
Seeni jëfin laay jéfeek ñoom,
seeni àtte laa leen di àttee,
ñu xam ne maay Aji Sax ji!»

8

Bokkaale feeñ na ca kër Yàlla ga

¹ Keroog juróomi fan, ca juróom ben-
neelu weer wa, ca juróom benneelu at
ma*, damaa toog sama biir néeg, magi
Yuda bokk ak man toog. Fa la loxol
Boroom bi Aji Sax ji dal fi sama kaw.

² Ma xool, yem ci jëmm ju ame
melokaanu nit. Li ko dale fiy niroom lupp
yi, jëm suuf, sawara la. Li dale ci lupp
yi jëm kaw ame melokaanu leer, mel ni
weñ guy tàkk. ³ Mu tàllal lu bindoo
ni loxo, daldi sèq sama kawaru bopp,
lenn ngelaw yékkati ma ba ca diggante
kaw ak suuf, yóbbu ma ba Yerusalem ci
biir peeñum Yàlla, ba ca buntu èttu biir
kër Yàlla ba janook bėj-gànnar; fa ñu
teg jëmmu bokkaale, jay sabab fiiraange.

⁴ Ma jekki gis foofa leeru Yàllay Israyil ca
melokaanam, ma ma ko gise woon ca joor
ga.

⁵ Mu ne ma: «Yaw nit ki, séenul
wetu bėj-gànnar.» Ma séenu wetu bėj-
gànnar, yem ca jëmmu bokkaale jooju
féeteek bunt ba dendeek sarxalukaay ba,
ca bėj-gànnaram. ⁶ Mu ne ma: «Yaw
nit ki, gis nga li ñuy def, tojaange yu réy
yi waa kër Israyil di def fii, ba di ma
soreleek sama bérab bu sell bi. Te dinga
gis tojaange yu gënatee mág.»

⁷ Mu yóbbu ma ba ca buntu ètt ba, ma
yem ci menn pax mu nekk ca miir ba.

⁸ Mu ne ma: «Yaw nit ki, ayca, gasal fii
miir bi!» Ma gas rekk, gis ab jállukaay.

⁹ Mu ne ma: «Jállal, ba gis tojaange yu
bon yi ñu fiy def.» ¹⁰ Naka laa jáll ba xool,
yemuma ci lu moy ay nataal yu ñu ñaas
ci miir bi bépp, di mboolem dundoot yuy
ramm-rammi ci suuf, ak rab yu jara seexlu,
ak mboolem jëmme kasaray tuur yu waa
kër Israyil di jaamu. ¹¹ Juróom ñaar fukki
magi kër Israyil a nga taxaw, janook nataal
ya. Yaasaña doomu Safan a nga ca. Ku ci
nekk a nga ñàbb sab and, cuuraay la jolli.
¹² Mu ne ma: «Yaw nit ki, du yaa gis li magi
kër Israyil di def ci lëndem gi, ku nekk ak
fa ñu jagleel sa nataalu tuur. Ña nga naan:
“Aji Sax ji gisu nu, Aji Sax ji wacc na réew
mi.”» ¹³ Mu dellu ne ma: «Te dinga gis
tojaange yu gënatee mág yu ñu nekke.»

¹⁴ Gannaaw loolu mu yóbbu ma ba ca
buntu kër Aji Sax ja féete bėj-gànnar.
Ndeke jigéen ñaa nga foofa toog, di jooy
deewug tuur mu ñuy wax Tamus. ¹⁵ Mu
ne ma, yaw nit ki, yaa ko gisal sa bopp! Te
dinga gis tojaange yu gëna mágati yii.

¹⁶ Mu yóbbu ma ba ca èttu biiru kër
Aji Sax ji, ndeke foofa ca buntu néeg Aji
Sax ji, diggante dal-luwaayu bunt baak

* 8:1 8.1 Mu yemook juróom benneelu at gannaaw ba Buur Yowakin duggee ngallo.

sarxalukaay ba, lu wara tollook ñaar fukki nit ak juróom a nga fa, ñu won gannaaw bérab bu sell bi, jublu penku, di sukkal jant bi, dépp seen jë fi suuf. ¹⁷ Mu ne ma: «Yaw nit ki, du yaa gis lii? Moonte tojaange gi waa kër Yuda di def fii doyu leen. Xanaa ñuy wasaare fitna ci réew mi, di gëna yékkati sama xol. Xoolal! Ñu ngooguy def jëfi yéefar, jël caru garab, di foon. ¹⁸ Man it maa leen di feye xadar. Duma xool bëtü ñéebly, duma ñeewante. Dinañu yuuxu yuux yu réy, may dégg te duma leen faale.»

9

Rey nañu bokkaalekat yi

¹ Gannaaw loolu Aji Sax ji àddu ca kaw, may dégg. Mu ne: «Yeen mbugalkati dékk bi, kaayleen, te na ku nekk ñàbb sa ngànaayal reyukaay.» ² Ca saa sa juróom benni góor jóge yoonu bunt ba féete kaw te janook běj-gànaar, ku nekk ñàbb sa ngànaayal reyukaay. Keneen a nga ca seen biir, ku sol ndimol lée, ak mbarum bindukaay ba ca ndiggam. Ñu dikk taxaw ca wetu sarxalukaayu xàñar ba. ³ Ci kaw loolu leeru Yállay Israyil, ja woon ca kaw jëmmu malaakay serub ma, yékkatikoo fa, jubal buntu kër ga. Mu woo boroom ndimol lée baak mbarum bindukaay ba ca ndiggam. ⁴ Aji Sax ji ne ko: «Wèral dékk bi, ci biir Yerusaleem. Foo gis kuy onk ak a binni, di ko naqarloo gépp tojaange gu ñu fiy def, nga rédd aw rédd ci jëem.» ⁵ Ba loolu wéyee mu wax ak ña ca des, may dégg. Mu ne leen: «Toppleen ko ca biir dékk ba te ngeen rey. Buleen xool bëtü ñéebly, buleen ñeewante. ⁶ Mag ñu góor ñeek xale yu góor yi, jeeg jeek janq ji, ba ci tuut-tànk yi, reyleen ñépp, faagaal leen. Waaye ku ci am réddu jë, buleen ko laal. Dooreleen ko ci sama bérab bu sell bi.» Ñu tàmbalee bóom mag ña ca kanam kër Yàlla ga. ⁷ Aji Sax ji ne leen: «Feesal-leen ètt yeeki néew, sobeel-leen kër gi, doora génn.» Ba ñu noppee, daldi jàll ca biir dékk ba, di rey.

⁸ Naka lañu dem, reyi, ma des fa man donj. Ma daldi daanu, dépp sama kanam fa suuf, daldi àddu ca kaw, ne: «Éy Boroom bi Aji Sax ji, xanaa doo sànk mboolem ndesu Israyil ci sa xadar jii ngay xépp ci kaw Yerusaleem?» ⁹ Mu ne ma: «Tooñaangey waa kër Israyil ak Yuda moo épp loxo lool. Réew maa ngi fees ak deret, dékk bi fees ak yàqute. Nee nañooy: “Aji Sax ji wacc na réew mi. Aji Sax ji gisul dara.” ¹⁰ Man it duma xool bëtü ñéebly, duma ñeewante. Seen jëfin laay képp ci seen kaw bopp.» ¹¹ Ci kaw loolu boroom mbubbam lée baak mbarum bindukaay ba

ca ndiggam, ne jimeet, délsi. Mu ne: «Def naa lépp na nga ma ko sante.»

10

Leer ga dëddu na

¹ Ba loolu wéyee ma téen, daldi yem ci lu mel ni ngànguney peru safiir ci kaw dénd bi tiim boppi malaakay serub yi. ² Aji Sax ji ne boroom ndimol lée ba: «Doxal ci diggante mbege, yi ronu jëmmi serub yi, nga tibb say loxo ba mu fees ci xal yu yànj yi, te nga dem wasaare ko ci kaw dékk bi.» Kooka dem, may gis.

³ Ba waa jay agsi, jëmmi serub yaa nga taxaw fa féete kër Yàlla ga ndijoor, niir wa daldi fees èttu biir ba. ⁴ Ba leeru Aji Sax ji yékkatikoo ca serub ya, dem ba ca buntu kër ga, niir wa daa fees kër ga, ètt ba fees dell ak leeru Aji Sax ja ne ràññ. ⁵ Coowal laafi malaakay serub yaa ngay jib ba ca ètt ba féete biti, mel ni kàddug Yàlla Aji Man ji.

⁶ Ba Aji Sax ji santee boroom mbubbam lée ma, ne ko mu sàkk sawara ci diggante mbege yi ci digg jëmmi serub yi, waa ja dem, taxaw feggook menn mbege. ⁷ Ci kaw loolu kenn ci malaakay serub yi yóotu sawara si ci seen digg, daldi sàkk ci xal yi, def ci loxoy boroom mbubbam lée ma, mu jël ko, daldi génn. ⁸ Ba loolu amee lu mel ni lolol nit feen ca ron laafi serub ya.

⁹ Ma xoolaat, yemuma ci lu moy ñeenti mbege yu feggook ñeenti serub yi, menn mbege ci wetu serub bu ne, te mbege yi ne ràññ, ame melokaanu peru kirsolit. ¹⁰ Ñoom ñépp a niroo, te mbege mu ci ne mel ni mbegee nekk ca biiram, ¹¹ ba tax ñu mana dawwe ñeenti wet te duñu warangiku. Fu boppu serub jublu, mbege yi daw jublu fa, te du tax ñu warangiku. ¹² Serub yi nag, mboolem seen yaram, seen gannaaw ak seen cati loxo ak seeni laaf, lépp ay gët la sàngoo ba daj, ba ci seen ñeenti mbege yi. ¹³ Mbege yooyu laa dégg ñu tudde leen mbegey callweer. ¹⁴ Malaakam serub mu ci nekk am na ñeenti kanam. Genn kanam ga di gu serub, ñaareelu kanam ga di gu nit, ñetteel ba di gu gaynde, ñeenteel ba di gu jaxaay. ¹⁵ Serub ya nag jëm kaw. Serub yooyu ñooy bindeef, ya ma gisoon ca tàkkal dexu Kebar. ¹⁶ Bu ñu dawee, mbege ya feggook ñoom daw, bu ñu firee seeni laaf, jëm kaw, mbege ya du teqlikook ñoom. ¹⁷ Bu ñu taxawee, mbege yi taxaw, bu ñu jógee jëm kaw, ñu ànd ak ñoom, jëm kaw. Noowal boroom bakkan yi daal moo nekk ci mbege yi.

¹⁸ Ba loolu amee leeru Aji Sax ji bàyyikoo fa buntu kër ga, daldi taxawi ca kaw serub ya. ¹⁹ Serub ya firi seeni laaf, jóge suuf,

jëm kaw, may gis, ñu jógandook mbege ya ñu ñandal, daldi taxawi ca wetu buntu penkub kër Aji Sax ja, leeru Yállay Israyil tiim leen lu kawe. ²⁰ Nñoñooy bindeef ya ma gisoon Yállay Israyil tiim leen ca tàkkal dexu Kebar. Ca laa xam ne ay malaakay serub lañu. ²¹ Ñeenti kanam la ku ci nekk am, ak ñeenti laaf, ak lu mel ni loxoy nit yu ron seeni laaf. ²² Seen bindu kanam ya mooy kanam ya ma gisoon ca tàkkal dexu Kebar. Ci seen melokaan, ñoom rekk la. Ku nekk man naa jubal màkk fépp fu genn kanam jublu.

11

Digeb yiw a gën jàmmu tey

¹ Ba loolu wéyee ngelaw ne ma siféet, yóbbu ma ba ca buntu penkub kër Aji Sax ja janook penku. Foofa ca bunt ba, yemuma ci lu moy ñaar fukki nit ak juróom. Ma xàmmi ca Yaasaña doomu Asur ak Pelaca doomu Benaya, di njiiti askan wi. ² Aji Sax ji ne ma: «Yaw nit ki, ñii ñooy mébétkati ñaawtéef ñiy digle lu bon ci dëkk bii. ³ Ñu ngi naa: “Bunu tabaxagum ay kër; dëkk bii daa mel ni ndab, nun nu fegu ni yàpp wu ca ube.” ⁴ Kon nag yaw nit ki, waxal waxyu ci seen kaw. Jottlil waxyu.» ⁵ Noowug Aji Sax ji daldi dal fi sama kaw, ne ma: «Neel: “Aji Sax ji dafa wax ne: Yeen waa kër Israyil, yeena waxe nii, seeni mébét, xam naa ko. ⁶ Bóom ngeena bóom seen bokki dëkk bii, ba mbedd yi fees dell aki néew. ⁷ Moo tax Boroom bi Aji Sax ji dafa wax ne: Dëkk bi kay ndab la, seen bokki néew yi ngeen fi saam di yàpp wi ci ube,

waaye yeen dees na leen fi génnee.

⁸ Saamar ngeen ragal, saamar laa leen di indil. Kàddug Boroom bi Aji Sax jee.

⁹ Maa leen di génne biir dëkk bi, teg leen ci loxoy doxandéem, wàcceel leeni mbugal.

¹⁰ Saamar ngeen di fàddoo, fa catal Israyil laa leen di mbugale, ngeen xam ne maay Aji Sax ji.

¹¹ Dëkk bii du doon seen ndab, te dungeen yàpp wu cay ube. Fa catal Israyil laa leen di mbugale.

¹² Su boobaa ngeen xam ne maay Aji Sax, ji ngeen sàmmul dogali yoonam, jéfewuleen àttey yoonam, xanaa di jéfe aaday xeet yi leen séq.”»

¹³ Naka laay biral waxyu, Pelaca (mu firi Aji récc ju Yàlla) doomu Benaya jekki rekk, dee. Ma ne fèlën, dèpp sama jë fa suuf, daldi àddu ca kaw, ne: «Éy Boroom bi Aji Sax ji, yaay faagaagal ndesu Israyil nii?»

¹⁴ Ba loolu wéyee kàddug Aji Sax ji dikkal ma, ne ma: ¹⁵ «Yaw nit ki, gannaaw sa bokk yooyu nga bokkal, ñuy say bokk lenge, di mboolem waa kër Israyil ñi nekk ngallo, ñoom la waa Yerusalem di siis, naan:

“Soreleen Aji Sax ji; réew mii, nun la ko sédd.”

¹⁶ Kon nag, waxal ne: “Boroom bi Aji Sax ji dafa wax ne:

Maa soreel moos seen bokk yooyu fa biir yéefar ya,

maa leen wasaare biir réewoo réew, te du tee ma teewal leen ni bérab bu sell fa réew ya ñu sancaani.”

¹⁷ Moo tax nanga wax ne: “Boroom bi Aji Sax ji dafa wax ne:

Maa leen di dajalee fa xeet ya, boolee leen fa réew ya ngeen wasaaroo, ba joxaat leen suufas Israyil.”

¹⁸ Bu ñu ñibbee, jële fa mboolem lu jomblu ak lépp lu siblu.

¹⁹ Maa leen di may beneen xol ak xel mu yees.

Xolu doj bi laay roccee ci seen suux, weccee leen ko xolu suux.

²⁰ Su ko defee sama dogali yoon lañuy doxe,

te sama àttey yoon lañuy sàmm, di ko jéfe. Su boobaa ñuy sama ñoñ, may seen Yàlla.

²¹ Waaye nit ña seen xol jengal seen jëf ju jomblu,

ak seen yëf yu seexluwu, maay képp seen jëfin ci seen bopp.

Kàddug Boroom bi Aji Sax jee.»

²² Ba loolu amee malaakay serub ya firi seeni laaf, ànd ak mbege ya, leeru Yállay Israyil tiim leen fa kawa kaw. ²³ Gannaaw loolu leeru Aji Sax ji yékkatikoo fa digg dëkk ba, dem, taxawi fa kaw tund wa ca penkub dëkk ba. ²⁴ Ba loolu amee ngelaw ne ma siféet, yóbbu ba ca waa ngallo ga ca réewum Babilon, lépp ci peeñu, ci dooley Noowug Yàlla. Peeñu ma ma gis nag yem fa. ²⁵ Ba loolu amee ma àgge waa ngallo ga mboolem mbir ya ma Aji Sax ji won.

12

Ngallo xeeñ na

¹ Gannaaw loolu kàddug Aji Sax ji da ma dikkal ne ma:

² «Yaw nit ki, digg kërug fippukat nga dëkke, ñu ami gët te duñu gis, ami nopp te duñu dégg, ndax kërug fippukat lañu.

³ Yaw nag nit ki, dajaleel digg bëccëg, ñépp gis, sa jumtukaayi ku jëm ngallo te nga sancu feneen, ñépp teg ci bët. Jombul ñu gis ne kërug fippukat lañu. ⁴ Sab èmb ngay jëkka génne digg bëccëg ni ku jëm ngallo,

ñépp teg ci bêt. Te yaw nga génn ngoon ni ku jëm ngállo, ñu teg ci bêt. ⁵ Dangay bëtt ci miir bi, ñuy gis, pax mooy yooore sab ëmb. ⁶ Nañu la gis nga gaddu sab ëmb, génn ci lëndëm gi. Booy génn di dem, sa kanam ngay muur, ba doo mana gis suuf si, ngir misaal laa la def, ñeel waa kër Israyil.»

⁷ Ma def loolu noonee ñu ma ko sante. Samab ëmb laa génne digg bëccëg ni ku jëm ngállo. Ca guddi ga ma bëtte miir ba loxoy neen, ñépp di gis. Ci lëndëm gi laa gaddu sama ëmb, ñuy gis.

⁸ Gannaaw loolu kàddug Aji Sax ji dikkal ma ca ëllëg sa ca suba, ne ma: ⁹ «Yaw nit ki, xanaa waa kër Israyil, kërug fippukat gi, newuñu la: “Ana looy def nii?”

¹⁰ Waxleen, ne leen: “Boroom bi Aji Sax ji dafa wax ne: Boroom Yerusaleem la àrtu bii ñeel, mook mboolem waa kër Israyil gi fi dëkk.” ¹¹ Neel:

“Man maay seen misaal.

Nii ma def rekk lees leen di def, ngállo lees leen di jàpp, jëme.

¹² Seen boroom dëkk beey gàddub ëmbam,

génng dëkk bi ci lëndëm gi.

Miiru dëkk bi lees di bëtt, jaarale ko ca.

Kanam ga lay muur,

ba tax du gis suuf si.

¹³ Maa koy laaw samab caax,

mu keppoo samag fiir,

ma yóbbu ko Babilon mu Kaldeen ña.

Réew ma, du ko gis te fa lay deeye.

¹⁴ Mboolem ña ko dar,

ay toppam ak mboolem gàngooram,

maa leen di wasaare fépp fu ngelaw jublu,

toppati leen ak saamar.

¹⁵ Bu ma leen tasaaree ci biir xeet yi,

wasaare leen ci réew yi,

ñu xam ne maay Aji Sax ji.

¹⁶ Du tee ma ba ñenn ci ñoom,

ñu mucc saamar, mucc xiif, mucc mbas,

ba nettaliji seen gépp tojaange

ca digg xeet ya ñu jëm.

Su boobaa ñu xam ne maay Aji Sax ji.»

¹⁷ Gannaaw loolu kàddug Aji Sax ji dikkal ma ne ma:

¹⁸ «Yaw nit ki, lekkal saw ñam, di kat-kati,

naane njàqare sam ndox, di rag-ragi,

¹⁹ te nga wax waa réew mi,

mbirum waa Yerusaleem ga ca suufas Israyil,

ne leen Boroom bi Aji Sax ji dafa wax ne:

njàqare lañuy lekkeji seenu ñam,

te xol bu gental lañuy naane seenum ndox,

ndax seen réew mu gental, ñakk lépp lu ko feesoon,

ngir coxoru mboolem ñi ko dëkke.

²⁰ Dëkk yu xumboon, mujj wéet,

réew mi doon ub gent,

ba ngeen xam ne maay Aji Sax ji.»

Waxyuy nit, waxi caaxaan

²¹ Gannaaw gi kàddug Aji Sax ji dikkal ma ne ma: ²² «Yaw nit ki, du lii ngeen defati aw léeb ci biir réewum Israyil? “Bés yaa ngi bëgga baree, te peeñu sottiwul!”

²³ Kon wax leen ne leen: “Boroom bi Aji Sax ji dafa wax ne:

Maay dakkal woowu léeb, ba muy léebtil fi Israyil.”

Waxleen kay ne leen:

“Bés a ngi jubsii,

peeñoo peeñu sotti.

²⁴ Du peeñuy caaxaan muy amati mbaa ngisaaney jayaate, fi biir kërug Israyil.

²⁵ Man Aji Sax ji,

maay wax li may wax,

mu sotti te dootu fomm.

Kërug fippukat gi ngeen doon,

maay àddu kàddu, sottal ngeen fekke,

kàddug Boroom bi Aji Sax jee!”

²⁶ Gannaaw loolu kàddug Aji Sax ji dikkal ma, ne ma: ²⁷ «Yaw nit ki, waa kër Israyil déy a nga naan, “Peeñu yi kii di gis,

des na ay fani fan, ci lu soore sore lay biral ab waxyu!” ²⁸ Moo tax wax leen ne leen:

“Boroom bi Aji Sax ji dafa wax ne:

Sama genn kàddu dootu fomm.

Léegi kàddu gu ma àddu, sottal ko.

Kàddug Boroom bi Aji Sax jee.”»

13

Mbugalu yonent yi taxaw na

¹ Ba loolu amee kàddug Aji Sax ji dikkal ma ne ma: ² «Yaw nit ki, waxal waxyuy ci kaw yonenti Israyil yiy waxe ay waxyuy. Nanga wax ñiy waxe waxyuy ci seen xelum bopp, ne leen:

“Dégluleen kàddug Aji Sax ji:

Boroom bi Aji Sax ji dafa wax ne:

³ Wóoy ngalla yonent yu ñakk xel,

yiy topp seen xelum bopp te gisuñu tus!

⁴ Yeen yonenti Israyiloo,

mbete till yuy foreb gent!

⁵ Yéeguleen ca biir bëttukaayi tata ja,

jagalaguleen tata ju aar Israyil,

ngir taxaw, waajal xare ba,

keroog bésuu Aji Sax ji.

⁶ Seeni peeñu caaxaan la,

seeni ngisaane diy fen.

Ñu naa: ‘Kàddug Aji Sax jee,’

te Aji Sax ji yebalu leen!

Teewul ñuy xaar kàddu gu sotti.

⁷ Xanaa du peeñuy caaxaan ngeen gis?

Du ngisaaney fen ngeen di waxe,

naan: ‘Kàddug Aji Sax jee,’

te man àdduwma?

⁸ «“Kon nag Boroom bi Aji Sax ji dafa wax ne:

Gannaaw yeena waxi caaxaan, gisi fen,

maa ngii nag, di dal fi seen kaw.
 Kàddug Boroom bi Aji Sax jee!
⁹ Sama loxooy dal yonent,
 yiy gis peeñuy caaxaan,
 di gisaaney fen.
 Sama péncum ñoñ, duñu fa teewe,
 limeefu kër Israyil, deesu leen ca bind,
 te réewum Israyil, duñu fa dellu.
 Su boobaa ñu xam ne maay Boroom bi Aji
 Sax ji.

¹⁰ Kon nag gannaaw ñu ngi lajjal sama
 ñoñ,
 naan leen lépp jàmm! Te jàmm amul,
 mu mel ni miiru digaloo bu sew bu ñu ñab-
 ñabal,
 te ñii defuñu lu moy raax ca weexal,
¹¹ waxal raaxkati weexal yi, ne leen:

'Tata jeey màbb,
 nde waameey wal,
 ponkali doji yuur ne yureet,
 ngélén riddi, bètt tata ja!'

¹² Bu tata ji jekkee ne jànjan,
 deesu leen laaj fu weexal ba ngeen ca
 raaxoon jaar?

¹³ Kon Boroom bi Aji Sax ji dafa wax ne:
 Maay xadaru, riddil ngélén,
 mer, walal waame,
 am sànj yuri ponkali doji sànkute.

¹⁴ Maay màbb tata ji ngeen raax weexal,
 mëqal ko suuf,
 kenu ya siiñ,
 lépp jóoru, ngeen jekkliku ca biir.

Su boobaa ngeen xam ne maay Aji Sax ji.

¹⁵ Maay xèpp sama xadar ci kaw tata ji
 ak ña ko raaxoon weexal,
 ne leen: 'Tata mes,
 weexalkatu tata mes!'

¹⁶ Mooy yonenti Israyil yi jottli Yerusalem
 waxyu,
 di leen gisal peeñum jàmm,
 te jàmm amul.'
 Kàddug Boroom bi Aji Sax jee!"

¹⁷ «Yaw nit ki,
 janool ak sa bokk yu jigéen,
 yiy waxe waxyu ci seen xelum bopp,
 nga wax waxyu fi seen kaw.

¹⁸ Neel: "Boroom bi Aji Sax ji dafa wax ne:
 Wóoy ngalla jigéen ñiy sàkkal ku ne jarab
 xèrém,

di ràbbal ku ne muuraayu xèrém bu ko jot,
 di ko moome nit ñi!

Man ngeena aakimoo sama bakkanu ñoñ
 tey sàmmaale seen bakkanu bopp?

¹⁹ Bu ngeen di fen sama ñoñ ñiy dégluy
 fen,

yeena ngi may teddadil fi sama ñoñ,
 ngir nêbu peppum lors ak dogu mburu,
 ba tax leen di rey bakkan yu warula dee,
 di musal bakkan yu warula dund.

²⁰ Moo tax Boroom bi Aji Sax ji dafa wax
 ne:

Maa ngii di dal ci seen kaw jaray xèrém,
 yi ngeen di nappe ay bakkan niy picc.
 Seeni jara laay foqatee ci seeni loxo,
 ba yiwi bakkan, yi ngeen di napp niy picc.
²¹ Maay foqati seeni muuraay,
 géenne sama ñoñ ci seeni loxo,
 ñu noppee doon seenum pàdd,
 ba ngeen xam ne maay Aji Sax ji.

²² Gannaaw yeena fen ba jeexal xolu aji
 jub,

te du maa ko tegu naqar,
 gannaaw yeena dooleel ku bon,
 tere koo dèpp yoonu mbonam ba dund,

²³ dungeen gisati nag peeñuy caaxaan,
 dungeen gisaaneeti.

Maay géenne sama ñoñ ci seeni loxo,
 ngeen xam ne maay Aji Sax ji."»

14

Dèppleen

¹ Ba loolu wéyee ay magi bànni Israyil
 dikk janook man, toog. ² Kàddug Aji Sax
 ji dikkal ma ne ma: ³ «Yaw nit ki, ñii
 seen kasaray tuur lañu def ci seen xol,
 muy ay wu leen di gállankoor, te ñu ne ci
 jàkk. Ñii dinaa leen wacc moos, ñuy sàkku
 leeraange ci man? ⁴ Waxal ak ñoom nag,
 ne leen: "Boroom bi Aji Sax ji dafa wax
 ne: Kèpp ku bokk ci waa kër Israyil, ku
 yékkati kasaray tuuram, def ci xolam, muy
 ay wu koy gállankoor, te mu ne ci jàkk,
 ba noppi muy seetluji ci ab yonent; man
 Aji Sax ji maa koy tontu tont lu dèppook
 limu kasaray tuuram. ⁵ Maay def loolu
 ngir nanguwaat xolu waa kër Israyil, gi
 ma dèddu ngir seen mboolem kasaray tuur
 yi." ⁶ Kon nag waxal waa kër Israyil, ne
 leen: "Boroom bi Aji Sax ji dafa wax
 ne: Dèppleen te dèddu seen kasaray tuur.
 Mboolem seen yéf yu siblu, dèdduleen ko.

⁷ «Kèpp ku bokk ci waa kër Israyil,
 mbaa muy doxandéem bu dal ci biir Is-
 rayil, bu ma wacce, ba yékkati kasaray
 tuur, def ci xolam, muy ay wu koy
 gállankoor, te mu ne ci jàkk, kooku bu
 dikkee cib yonent di sàkku leeraange ci
 man, man Aji Sax ji maa koy tontul sama
 bopp. ⁸ Nit kooku maa ko naa jàkk, def
 ko muy firnde, di ku ñuy lééboo, te maa
 koy wàññee ci sama ñoñ, ba ngeen xam
 ne maay Aji Sax ji.

⁹ «"Su fekke ne yonent baa am lu
 ko nax, ba àddul boppam genn kàddug
 waxyu, day fekk man Aji Sax ji maa nax
 yonent ba. Maa koy dumaa sama loxo,
 sàanke ko digg Israyil, sama ñoñ. ¹⁰ Kay
 seetlu ca yonent ba, aw ayam, mook ayu
 yonent ba, benn lay doon. Ñooy bokk
 gàddu seenu ay. ¹¹ Su ko defee waa
 kër Israyil dootuñu ma wacc, di lajj, te
 dootuñu sobeel seen bopp ci seen bépp

bàkkaar. Sama ñoñ lañuy doon, man ma doon seen Yàlla. Boroom bi Aji Sax jee ko wax.»

Yerusalem gépp a yellow mbugal

¹² Ba loolu amee kàddug Aji Sax ji dikkal ma ne ma: ¹³ «Yaw nit ki, bu ma am réew dee moye jéfi ñàkk worma, ba ma dumaa leen sama loxo, dagge fa mburu, yónnee leen ab xiif, ba boole doom aadamaak mala dagge fa, ¹⁴ su Nóoyin ak Dañeel ak Ayóoba bokkoon nekk ca seen biir sax, ñoom ñett donj la seen bakkan di mucc ndax seenug njub. Boroom bi Aji Sax jee ko wax. ¹⁵ Su ma dajaloon réew meek rabi àll yu ko jeexal, ba muy réew mu gental mu koo jaareetul ndax rab ya, ¹⁶ te mu fekk ñett ñooñu ca biir réew ma, giñ naa ko ci man miy dund, kàddug Boroom bi Aji Sax jee, ñooñu ñett duñu mana musal seen jenn doom, du góor du jigéen; ñoom donj ay mucc, te réew ma dina gental. ¹⁷ Su ma wàccee saamar ci miim réew it, ba sant saamar ne ko mu jaar ci biir réew mi, dagge fi nit ak mala, ¹⁸ te mu fekk ñett ñooñu ci biir réew mi, giñ naa ko ci man miy dund, kàddug Boroom bi Aji Sax jee, du seen jenn doom, góor ak jigéen ju ñuy mana musal. Noom ñett donj ay mucc. ¹⁹ Su ma yebalee mbas ci kaw réew mii it, ba xépp fi samam sànj ci biir deret ju tuuru, ngir dagge fi nit ak mala, ²⁰ te mu fekk Nóoyin ak Dañeel ak Ayóoba ci biir réew mi, giñ naa ko ci man miy dund, kàddug Boroom bi Aji Sax jee, ñooñu ñett duñu mana musal seen jenn doom, góor ak jigéen. Seen njubteg bopp mooy musal seen bakkan.

²¹ «Boroom bi Aji Sax ji déy dafa wax ne: Sama ñeenti mbugal yu tar yii laay yebal ci kaw Yerusalem. Nuy saamar akub xiif ak rabi àll aku mbas, ngir dagge ci réew mi nit ak mala. ²² Waaye du tee mu am ndes mu ca rëcce, diy góor aku jigéen, ñu ñuy génneji réew mi. Ñu ngooguy génn, di leen fekki, te bu ngeen gisee seen jikko ak seeni jéf ju bon, seen xol dina sedd ci musiba mi ma wàcce ci kaw Yerusalem, ak mboolem lu ma fi wàcce. ²³ Seen xol dina sedd ndax bu ngeen gisee seen jikko ak seeni jéf, dingeen xam ne mboolem li ma def ci dëkk bi, defuma ko ci neen. Kàddug Boroom bi Aji Sax jee.»

15

Bantu reseñ matul matt

¹ Gannaaw loolu kàddug Aji Sax ji dikkal na ma ne ma:

* **16:3** 16.3 Amoreen ñeek Etteen, ña dëkke woon diiwaanu tund ya, ay jaamukati tuur lañu woon ñu bokkoon ca askanu Kanaaneen ña. Du Yawut yaa sanc Yerusalem, waaye Kanaaneen ñaa ko sancoon. Seetal ci *Amos* 2.10.

† **16:8** 16.8 Seetal ci *Ruut* 3.9.

² Yaw nit ki, ana lu bantu reseñ gëne ci bant yi, ak mboolem caru garab bu mu doon ci gott bi?

³ Ndax dees na ca sàkk bant, liggéeye ko? Am dees na ca sàkke wékkukaay, wékk ca lenn?

⁴ Xanaa sànni cib taal, xambe, ñaari cat ya lakk, digg ba xoyomu. Ana lu deeti njariñam?

⁵ Ndegam ba mu nee ñumm, lees ci dul liggéey dara,

gën ba mu jappee ba xoyomu.

⁶ Kon nag Boroom bi Aji Sax ji dafa wax ne:

Dees na xamb caru reseñ, mu bokk ci banti garab yi ma joxe, ñu xamb lépp,

te noonu laay xambe waa Yerusalem.

⁷ Maay jànkoontee k ñoom,

ñu rëcc sawara,

sawara lakk leen.

Bu ma jànkoontee k ñoom,

dingeen xam ne maay Aji Sax ji.

⁸ Maay gental réew mi,

ñoo def jéfi ñàkk worma.

Kàddug Boroom bi Aji Sax jee.

16

Yerusalem yemul ci boroom kërám

¹ Ba loolu amee kàddug Aji Sax ji dikkal ma ne ma: ² «Yaw nit ki, nanga xamal Yerusalem jëfam ju siblu ji. ³ Ne leen: «Boroom bi Aji Sax ji dafa wax ne: Sa cosaan ak sab juddu réewum Kanaan la. Sa baay dib Amoreen, sa ndey dib Etteen*. ⁴ Ba nga juddoo, ca bés ba nga juddoo, dooñeesu la, sangeesu la ba nga set, jonjeesu la xorom, laxaseesu lay laytaay. ⁵ Xoolesu la bétu ñeewante ngir defal la lenn ci yooyu ngir yërmande. Dees laa sànni ci àll bi bés ba nga juddoo ndax jéppi la. ⁶ Maa fa jaare, seen la ngay wéqú, sangoo sa deret. Ma ne la: Sangoo nga sa deret waaye, dunda! Neeti la: Sangoo nga sa deret, waaye dunda. ⁷ Maa la séqal ni caxum tool, ngay màgg, di màgg ba mat sèkk, saxi ween, sa kawar sèq, te nga ne dunj-dunjaaral. ⁸ Ma jaareeti fa, xool la, gis ne mat ngaa séy. Ma tàllal sama mbubb, sange ko sa yaramu neen, ba noppi giñal la, dikke la kóllère†. Kàddug Boroom bi Aji Sax jee. Nii laa la moome.

⁹ «Ma daldi lay sang, raxas sa deret ba mu set, diw la, ¹⁰ solal la ndimo lu yànj ak dàlli der, muure la ndimol lée, tegal la ca sooy. ¹¹ Ma takkal lay gànjar;

takkal la lami loxo, akub caq, ¹² ba noppi takkal la jaarob bakkam ak jaaroy nopp, solal la mbaxanam lingeer mu yànj. ¹³ Nga takkoo wurus ak xaaalis, sol ndimol lée ak sooy ak ndimo yu yànj, di lekk sunguf su mucu ayib ak lem ak diw. Nga mujj taaroo taaru ba jot darajay lingeer, ¹⁴ siiw ba xeet yépp xam la ndax taar bu sotti ndax sama gànjar gu yànj gi ma la takkal. Kàddug Boroom bi Aji Sax jee.

¹⁵ «Teewul nga gis sab taar, di gànctoo sa bayre ngànctu gu ne xéew, ku romb yaa moom. ¹⁶ Yaa tànn ci sa yére yu yànj, rafetale sa jaamookaayi tuur, ba noppi di ca gànctu; lu masula am te du amati muk. ¹⁷ Yaa jël sa gànjaru wurus ak xaaalis yi ma la jox, sàkk ca céri góor, di ca gànctu, ¹⁸ te yaa jël sa yére yu yànj, sànge say tuur, sama diw ak sama cuuraay, nga taajal leen. ¹⁹ Sama dugub ja ma la joxoon, sunguf su mucu ayib saak diw gaak lem, ja ma la doon leele, lépp yaa leen ko taajal, defal leen ko saraxu neexal bu xeeñ. Mu ngoog! Kàddug Boroom bi, Aji Sax jee.

²⁰ «May wax, nga jël sa doom yu góor ak yu jigéeni yi nga ma jurat, di leen sarxalal say tuur, leele leen. Gànctu da laa doylu? ²¹ Yaa rendil ay tuur samay doom, yoole leen. ²² Ci biir mboolem sa jéf ju siblu jooju ak sa gànctu, fàttlikuwoo benn yoon ba ngay lu tuut, ne dunj-dunjaaral, di wéqu, sangoo sa deret.

²³ «Gannaaw sa mbon googu gépp nag, wóoy, wóoy ngalla yaw! Kàddug Boroom bi Aji Sax jee. ²⁴ Tabaxal nga sa bopp ab néeg, sàkkal sa bopp bérab bu kawé ci péncoo pénc. ²⁵ Selebe yoon wu ne, tabax nga fa sa jaamookaay, di fa teddadil sab taar, ku romb, nga ràccal ko say tànk ci sa gànctu gu dul jeex. ²⁶ Gànctu ngaak waa Misra, sa dèkkandoo yu alde yi, di gènatee gànctu, di ma naqaral.

²⁷ «Booba nag laa la dóor sama loxo, wàññi sa njël, wacce la sa coobarey noon ya, janqi Filisti ya†. Ñoom sax am nañu kersa ci sa jéfinu yàqute gi. ²⁸ Doyaloo, xanaa di gànctook waa Asiri§. Gànctu ngaak ñoom te taxu laa doyal ba tey. ²⁹ Ngay gènatee gànctu, ba ca Babilon, réewum jula ya, te loolu taxu laa doyal ba tey.

³⁰ «Yaaka weex bêt, kàddug Boroom bi Aji Sax jee,

lii lépp di jéfi gànctoo bu dægër bêt.

³¹ «Tabax nga ab néeg selebe yoon wu ne, sàkk sa jaamookaay péncoo pénc, te ab gànctoo sax tane la, nde yaw laajoo

ag pey. ³² Cim! Jigéenu njaalookat bi nga doon, ay doxandéem saxa gènal la sa jèkkër. ³³ Mboolem caga yi dañu feyeeku! Waaye yaw yaay neexal sa far yépp, di leen fey ñu jóge fu ne, di la tédde. ³⁴ Yaw kay sag ngànc bokkoo kook gànctoo yi. Kenn sàkkuwu la. Yaw kay yaay feye, kenn feyu la. Kon yaw meloo ni benn gànctoo!

³⁵ «Kon nag Yerusaleem gànctoo bee, déglul kàddug Aji Sax ji. ³⁶ Boroom bi Aji Sax ji dafa wax ne: Gannaaw yaa wasaare sa alal, ñoriku ne dunj, di gànctook sa far yii, muy sa mboolem kasaray tuur, bay tuur sa deretu doom yi nga leen rendil, ³⁷ maa ngii nag di dajale mboolem sa far yi la doon bége, ñi nga bégg ñépp ak ñi nga bañ ñépp. Maa leen di dajalee fu nekk ci sa kaw, ba noppi ñori la yaramu neen, ñu gis la nga ne dunj. ³⁸ Maa lay attee àtteb jigéeni njaalookat, jigéeni tuurkati deretu nit. Maa lay xépp deretu xadar ak fiiraange. ³⁹ Maa lay wacceek say far, ñu mabb say néeg, tas say jaamookaay, futti la, nangu sa gànjar gu yànj gépp, wacc la yaramu neen, nga ne dunj. ⁴⁰ Dinañu sañaxal gàngoor ci sa kaw, ñu ànd jóor lay doj, dogate la seeni saamar. ⁴¹ Dinañu lakk say kër, teg la mbugal, jigéeni ñu bare di gis. Maay dakkal ngànc gi nga nekke, te dootoo feyati aw far. ⁴² Maa lay xépp samam sànj ba mu jeex, bala ma laa moyale sama xadaru fiiraange, doora dal, ba meddi.

⁴³ «Yaa fàttlikuwul ba ngay ndaw, yaa def lii lépp ba merloo ma. Kon man it, sa jéfin kat laa lay képp ci bopp, feye la ko. Kàddug Boroom bi Aji Sax jee. Du yaa gànctu, dollu ci sa jépp jéf ju siblu?

⁴⁴ «Yaw Yerusaleem, képp kuy lééboo dina la lééboo ne la: 'Ndey ja, doom ja!' ⁴⁵ Yaa mat doom sa ndey, ji sib jèkkèram aki doomam. Yaa mat doomu ndey sa doomi ndey, ya sib seen jèkkèr ak seeni doom, yaa donn sa ndey Etteen ba, donn sa baay, Amoreen ba. ⁴⁶ Sa mag ju jigéeni ji la féete càmmoñ di Samari aki janqam, sa rakk ju jigéeni ji la féete ndijoor, di Sodom aki janqam*. ⁴⁷ Yemuloo rekk ci roy seen jéfin ak seen jéf ju siblu. Tuuti na! Yaa leen gèna yàqu ci sa mboolem jéfin. ⁴⁸ Yaw Yerusaleem, giñ naa ko ci man miy dund, kàddug Boroom bi Aji Sax jee, sa rakk ju jigéeni ja, Sodom, mooki janqam defuñu li nga def yaw, yaak say janq. ⁴⁹ Lii de, moo doon bàkkaaruu Sodom, sa rakk ja, mooki janqam: réy, fuqle, naagu, ne finaax ak ñàkka dimbali ku ñàkka ak ku néewle,

† 16:27 16.27 janqi Filisti yamooy dèkki Filisti yi gèna am solo, te nangu woon lenn ci suufas Yuda. § 16:28 16.28 Réew yu bare dañu doon lékkoo ak réewum Asiri ca yooya jamono ndaxte ñoo éppoon doole lu jiitu Babilon di sut ci réewi àddina. * 16:46 16.46 Janq ji mooy dèkk yu ndaw yi bootu ci Sodom.

50 ba mujj reew bay def jéf ju siblu, may gis. Looloo waral ma heddi leen nii, nga gis. ⁵¹ Samari nag, sa genn-wállu bàkkaar, bàkkaar ko. Yaa épp fopp sa doomi ndey yii jéf ju siblu, te tax nga ñu far mel ni ñu def njekk ndax mboolem jéf ju siblu joo def. ⁵² Léegi nag gàddul sa toroxte gi nga maye sa doomi ndey aw lay ndax jéf ju siblu joo jéf, ba yées leen. Gën nañu la. Kon nag séddool gacce te gálloo toroxte, nde tax nga sa doomi ndey yi niru ñu def njekk.

⁵³ «“Waaye maay tijji seen wërség, maay tijji wërségu Sodom aki janqam, tijji wërségu Samari aki janqam, yaw it ma tijjiwaale sa wërség. ⁵⁴ Su ko defee nga gaddu sa toroxte, torox ci mboolem li nga def, ba ruccanti sa doomi ndey yi. ⁵⁵ Sa rakk yi, Sodom aki janqam dinañu dellu na ñu nekke woon. Samari aki janqam dellu na ñu nekke woon, yaw it yaak say janq, ngeen dellu na ngeen nekke woon. ⁵⁶ Xanaa du ba nga bewee yaa saxaloon ci saw lammiiñ kàddug baatal Sodom? ⁵⁷ Booba sag mbon fàñjaaralagul. Léegi tey janqi Edom ak mboolem ñi ko wër ñoo lay sewal, janqi Filisti yi la séq it xeeb la. ⁵⁸ Sag yàqute ak sa jéf ju siblu nag, yaa koy gaddu. Kàddug Aji Sax jee.

⁵⁹ «“Boroom bi Aji Sax ji déy dafa wax ne: Ni nga def rekk ni laay def ak yaw, mi sofental kàddug ngiñ, fecci kóllère. ⁶⁰ Waaye man maay bëyyi xel sama kóllère gi ma fasoon ak yaw ba ngay ndaw. Maa lay saxalal kóllère guy wéy ba fàww. ⁶¹ Yaay fàttliku say jéfin, ba am kersa keroog booy dalal sa doomi ndey yu jigéen, ñi la mag ak ñi la féete ndaw. Maa la leen di may niy doom, doonte loolu bokkul ci sama kóllèreek yaw. ⁶² Maay saxal sama kóllèreek yaw, nga xam ne maay Aji Sax ji. ⁶³ Su ko defee nga fàttliku démb, daldi rus, torox ba ne xerem keroog ba ma lay jot ci mboolem loo def. Kàddug Boroom bi Aji Sax jee.”»

17

Fecci kóllère, peyam du jaas

¹ Gannaaw loolu kàddug Aji Sax ji dikkal na ma, ne ma: ² Yaw nit ki, caxal waa kër Israyil aw cax, ci biir léeb woo leen di léebal. ³ Ne leen: «Boroom bi Aji Sax ji dafa wax ne: Jaxaay* ju mag la woon, réyi laaf, guddi dung, séq lipp, yànj lool.

* **17:3** 17.3 jaxaay ji mooy Buuru Babilon, Nabukodonosor mi nangu woon Yerusaleem. † **17:4** 17.4 dagg car bu ndaw mooy ba ñu yóbboo Buur Yowakin ngállo ca Babilon. ‡ **17:5** 17.5 jiwum réew mi mooy Cedesyas baayu Yowakin bu ndaw. Buur Cedesyas la Nabukodonosor dénkoon nguurug Yuda. § **17:7** 17.7 jeneen jaxaay ju mag mooy Firawna buuru Misra.

Mu dikk ba Liban, jàpp ci collu genn garabu seedar,

⁴ dagg car bu ndaw† ba ca gëna kawé, yóbbu ba menn réewum jula, jëmbat ko ca biir dèkkub jaaykat ya.

⁵ Mu sàkk ci jiwum réew mi‡, def ko ci suuf su nangu, dendale kook ndox mu ne xéew, ni kuy jëmbat garabu sóol.

⁶ Mu jebbi, dig reseñ, gëna yaatu te gàtt taxawaay.

Car ya ne coleet wuti jaxaay ja, reen ya des ca suufam.

Mu di reseñ gu saxi car, firiy bànqaas.

⁷ «Jeneen jaxaay ju mag§ daldi ne jimeet, réyi laaf, séq lipp.

Reseñ ja jekkee jekki tàllal koy reenam, di ñaf-ñafi, firiy bànqaasam, wuti ko, ngir mu suuxat ko fa mu jëmbate woon.

⁸ Tool bu nangu bu feggook ndox mu ne xéew la jëmbate woon, ngir naat, meññ, ba doon reseñu ngéneel.

⁹ «Neel, Boroom bi Aji Sax ji dafa wax ne: Mbaa jooju reseñ dina baaxle?

Mbaa jeneen jaxaay ja du buddiy reenam, buur doom ya,

ba lu mu jebbile woon lax, ba buddi reen ya du laaj pèrèg bu réy, mbaa nit ñu bare?

¹⁰ Ma nga noonu jëmbate, waaye mbaa dina baaxle yee?

Mbaa ngelawal penku du ko laal rekk mu laxa lax?

Mbaa du lax fa mu saxe?»

¹¹ Ba loolu amee kàddug Aji Sax ji dikkal ma ne ma: ¹² «Waxal waa kër fippukat yi, ne leen: “Xamuleen lu mbir yooyu di wund?” Ne leen: “Mu ngoogu, buuru

Babilon a dem Yerusaleem, jàpp buur baak kàngam ya, ànd ak ñoom, yóbbu Babilon.

¹³ Moo tànn ku bokk ci askanu buur, fasook moom kàddu, giñloo ko ne dina ko nangul, daldi yóbbu njiiiti réew mi,

¹⁴ ngir nguurug Yerusaleem suufe, baña yékkatikatu, di wéye surgawu Babilon, ni ñu ko fasoo woon.

¹⁵ Ka bokk ci askanu buurub Israyil nag fippu, yónni ay ndaw réewum Misra, ngir ñu jox ko ay fas ak mbooloo mu takku. Moo ka def loolu dina baaxlee? Mbaa dina mucc? Nu mu cay mucc te wor kàddu, ga mu fasoo woon?

¹⁶ «“Giñ naa ko ci man miy dund, kàddug Boroom bi Aji Sax jee, ci biir réewum buur boobu ko fal, te mu sàggane

la mu ko giñaloon, wor kàddu ga mu fasante woon ak moom, ci biir Babilon googu lay deeye. ¹⁷ Firawnaak mbooloom mu réy ak gàngooram gu mag sax duñu ko mana wallu ci xare, kerooq bu ñuy yékkati ab sèkk, tabax ab gawukaay ngir bóom ñu bare. ¹⁸ Moo sàggane ngiñ, moo wor kàddu ga mu fasante woon. Mu ngoog, moo joxe kàddoom, ba noppi walbatiku def lii lépp. Du mucc muk.

¹⁹ «Moo tax Boroom bi Aji Sax ji dafa wax ne: Giñ naa ko ci man miy dund, maay këpp jëfam ci kaw boppam ndax ngiñ li mu ma giñal la sofental, kàddu gi mu fasanteek man la wor. ²⁰ Maa koy laaw sama mbaal, mu lonkoo samab caax, ma yóbbu ko Babilon, layoo faak moom ñàkke worma gi mu ma ñàkke worma. ²¹ Mboolem ñay dawe ca gàngooram yépp, saamar lañuy fàddoo; ña cay rëcce, fépp fu ngelaw jublu lañuy tasaarooji, ba ngeen xam ne man Aji Sax ji maa wax.

²² «Boroom bi Aji Sax ji dafa wax ne: Man ci sama bopp maay sàkke ab car ca njobbaxtal garabu seedar gu kawega, sàkkal ko bérab.

Car yu ndaw ya ca kaw laay fàqe car bu nooy, jëmbatal ko sama bopp ci kaw tund wu mag te kawe.

²³ Ca kaw tundu Israyil wu mag wa laa koy jëmbat, mu sèq, meññal, ba doon garabu seedar gu am daraja, mboolem picc dëkke ko, mboolem njanaaw mākkaanoo keram.

²⁴ Garabi àll bi yépp dinañu xam, ne man Aji Sax ji maay gattal garab gu gudd, di guddal garab gu gatt. Maay wowal garab gu naat, di naatal garab gu wow. Man Aji Sax ji maa wax, maay jëf.»

18

Jëf, jël

¹ Gannaaw loolu kàddug Aji Sax ji dikkal na ma ne ma: ² «Ana lu waral waxin wi ngeen di waxe fi Israyil naan:

“Baay lekk reseñ ju xaay, mu uum gëñi doom ja?”

³ «Giñ naa ko ci man miy dund, kàddug Boroom bi Aji Sax jee, dootuleen waxe woowu waxin fi Israyil. ⁴ Mu ngoog, bépp bakkan maay Boroom. Muy bakkanu baay, di bakkanu doom, maa moom. Bakkan bi bākkaar daal mooy dee.

⁵ Su nit dee boroom njekk, di jëfe yoon ak njekk,

⁶ tund ya ca saraxi tuur ya, lekkejiwu ca,

kasaray tuuru waa kër Israyil, wékku cay gétam,

jabaru jaambur, sobeelu ko, jigéen ju gis baax, jegewu ko,

⁷ du kenn ku mu néewal, xanaa ab tayle, mu delloo ku ko ameel,

alalu jaambur it, foqatiwu ko, xanaa ku xiif, mu leel,

ku raffle, mu wodd,

⁸ aw ndollant taxu koo leble,

ab tegandaay, jëlu ko,

xanaa luy njubadi, mu moyu,

àtteb dëgg, mu doxal diggante nit ak nit,

⁹ sama dogali yoon, mu di ca doxe,

sama àttey yoon, muy jëfe worma:

kooku boroom njekk la,

te mooy dund déy!

Kàddug Boroom bi Aji Sax jee.

¹⁰ «Jii waay su juree doom ju néeg juy tuur deretu jaambur

mbaa muy def lenn ci yii,

¹¹ te moom miy baayam jëfewu ci lenn,

tund ya ca saraxi tuur ya, doom ja di ca lekki,

jabaru jaambur, mu sobeel,

¹² ku ñàkk ak ku néewle, mu néewal,

alalu jaambur, mu foqati,

ab tayle, delloowu ko ku ko ameel,

xanaa kasaray tuur, mu wékki gèt,

jëf ju siblu, mu jëfe,

¹³ ndollant lay leblee,

ab tegandaay, mu jël.

Moo kii nu muy dunde?

Kii kay du dund!

Ak mboolem jëf ju siblu jii mu def,

dee rekk mooy àtteem.

Bakkanam lay gàddu.

¹⁴ «Waaye kooka nag su amee doom,

doom ja gis mboolem li baayam bākkaar,

mu teg ci bétam te taxul mu roy ko;

¹⁵ tund ya ca saraxi tuur ya, lekkiwu ca,

ay gétam, wékku ko kasaray tuuri waa kër Israyil,

jabaru jaambur, sobeelu ko,

¹⁶ du kenn ku mu néewal,

ab tayle, jëlu ko, sàkkuwul ku ko tayle lenn,

alalu jaambur, foqatiwu ko,

xanaa ku xiif, mu leel,

ku raffle, mu wodd,

¹⁷ néew-ji-dooole, looxoom dalu ko,

ndollant ak ab tegandaay, jëlu ko,

sama àttey yoon lay jëfe,

sama dogali yoon lay doxe.

Kooku du dee ngir ñaawtëefu baayam.

Dina dund déy!

¹⁸ Baayam a jaay doole,

moo foqati alalu mbokk,

lu baaxul la def ci biiri bokkam.

Kon nag mooy dee ngir ñaawtéefu bop-pam.

19 «Ngeen neeti: “Lu tax doom du gàddu bàkkaar baay?”

Xanaa du njub ak njekk la doom ji jéfe, sama dogali yoon yépp, mu di ko sàmm, di ko jéfe?

Dina dund kay!

²⁰ Ki bàkkaar daal mooy dee.

Doom du gàddu ñaawtéefu baay, baay it du gàddu ñaawtéefu doom.

Njekk réerul boroom, mbon réerul boroom.

21 «Waaye ku bon ki su dèddoo mboolem moy yi mu moy,

di sàmm sama mboolem dogali yoon, di jéfe yoon ak njekk,

dina dund déy,

du dee moos!

²² Mboolem tooñam ya mu tooñoon, deesu ko ko dencal.

Njekk li mu jéfe moo koy taxa dund. ²³ Ana bânneex bu ma am ci deewug ku bon?

Kàddug Boroom bi Aji Sax jee.

Xanaa bu dèddoo jikkoy mbonam, ba dund!

24 «Waaye su dee ku juboon, ba noppi dèddu njubte

di def njubadi,

di roy mboolem jéf ju siblu ju ku bon def, koku nu muy dunde?

Mboolem njekk gu mu defoon,

deesu ko ko dencal.

Ag ñàkk wormaam ak bàkkaaram moo koy taxa dee.

25 «Yeen nag ngeen ne: “Boroom bi, ni muy doxale jaaduwwul!”

Waa kër Israyiloo, dégluleen!

Sama doxalin a jaaduwwul,

am seeni doxalin a jaaduwwul?

²⁶ Boroom njekk bu dèddoo njekkam, di def njubadi ba dee,

njubadeem ga mu def moo ko taxa dee.

²⁷ Waaye ku bon nag, bu dèddoo mbonam ga mu nekke,

di def njub ak njekk,

moom moo musal bakkanu boppam.

²⁸ Ndegam moo xoolaat, ba dèddu mboolem tooñam yu mu tooñ, dina dund déy. Du dee moos. ²⁹ Moonte waa kër Israyil nee: “Boroom bi ni muy doxale jaaduwwul.”

Waa kër Israyiloo, samay doxalin a jaaduwwul, am seeni doxalin a jaaduwwul?

³⁰ «Lii moo tax yeen waa kër Israyil, ma di leen àtte, ku nekk ciy jéfam. Kàddug Boroom bi Aji Sax jee. Dèppleen te dèddu mboolem seeni tooñ, ngir seenu ay bañ leena gállankoor. ³¹ Xalableen mboolem tooñ yi ngeen di tooñ. Sàkkuleen xol bu yees ak xel mu yees. Yeen waa kër Israyil, lu jar ngeen di dee? ³² Man de, bugguma kenn dee. Kàddug Boroom bi Aji Sax jee. Dèppleen ba dund!»

19

Jooy ngarmig Israyil war na

¹ Aji Sax ji ne ma: «Yaw nag jooyal garmiy Israyil. ² Neel:

“Céy sa ndey, ndaw gaynde, fi biir gaynde yi!

Moo goor fi biir gaynde yu ndaw yi, di fa yar ay doomam.

³ Moo tàggat kenn ciy goneem*, ba muy gooru gaynde gu ndaw,

mana pàdd um pàddam, di yàpp doom aadama.

⁴ Ba ko xeet ya déggee, dañu koo fexeel, mu sèrèx ca seenum yeer, ñu lonk, yóbbu réewum Misra.

⁵ «“Ndey gaynde xaara xaar, ba gis ne yaakaar jee na,

mu jël keneen ciy goneem†, def ko gooru gaynde gu ndaw.

⁶ Daa ànd ak moroomi gayndeem, màgg, doon gooru gaynde gu ndaw,

ba mana pàdd am pàddam, di yàpp doom aadama.

⁷ Mu tédde seeni jétun, gental seen dèkk yu mag,

réew maak la ca biiram tiit ca coowal ñaram.

⁸ Teewul xeeti diiwaan ya ko séq ànd, dal fa kawam,

laaw ko seenum caax, sèrxal ca seenum yeer.

⁹ Ñu lonk, dugal cib kaaf, yóbbul ko buuru Babilon,

těj ko ca biir ab tata, ba kenn déggatuli ñaram fa kaw tundi Israyil.

¹⁰ «“Sa ndey a la niru, mel ni reseñ gu ñu jëmbat fi wetu ndox,

meññ, séq lipp,

ndax ndox mu ne xéew.

¹¹ Mu am car yu dègër,

yu man yeti nguur,

daldi màgg ba àkki niir ya,

ràññiku ci taxawaay ak sèqaay.

¹² Waaye am sànj a ko buddi, sànni fi suuf,

* 19:3 19.3 Wax ji ci Buur Yowakas la jëm. Seetal ci 2.Buur ya 23.31-34. † 19:5 19.5 Wax ji ci Buur Cedesyas la jëm. Seetal ci 2.Buur ya 24.18-20 ak 25.1-7.

ngelawal penku wowal doom ya, banqaasam yu dægër ya faq, lax, sawara xoyom ko.

¹³ Tey mu ngi jëmbate fi màndiñ mi, ci réew mu wow, maral.

¹⁴ Sawaraa takke fa banqaasam, xoyom njebbit ak meñneef.

Du car bu dægër bu ca des
bu mana doon yetu nguur.”

Woyu dëj a ngii wu ñuy jooyeb dëj.»

20

Israyil wor, Aji Sax ji gore

¹ Gannaaw ba loolu wéyee ca atum juróom ñaareel ma, fukki fan ca juróomeelu weer wa*, ay nit ñu bokk ci magi Israyil ñoo dikki fi man, di seetlu ci Aji Sax ji. Ñu toog fi sama kanam. ² Kàddug Aji Sax ji nag dikkal ma ne ma: ³ «Yaw nit ki, nanga wax ak magi Israyil, ne leen: “Boroom bi Aji Sax ji dafa wax ne: Seetlu ci man moo leen indi? Giñ naa ko ci man miy dund, du maa leen di won li ngeen di seetlu. Kàddug Boroom bi Aji Sax jee.” ⁴ Yaw nit ki, tiinaal leen, tiinaal leen kat, seen jëfu maam ju siblu ji, xamal leen ko.

⁵ «Nanga leen wax, ne leen: “Boroom bi Aji Sax ji dafa wax ne: Ba ma tannée Israyil, maa giñal askanu waa kër Yanqóoba woowa. Maa leen xamal maay kan ca réewum Misra, giñal leen, ne leen: Man Aji Sax ji maay seen Yàlla. ⁶ Bésuub keroog laa leen giñal ne maa leen di génnee réewum Misra, yóbbu leen réew mu ma leen beralal, mu meew maak lem ja tuuroo, fa gëna taaru ci réew yépp.” ⁷ Ma ne leen: “Tuur yi ngeen wékki gët yeen ñépp, xalableen leen. Kasaray tuuri Misra, buleen ci sobeel seen bopp. Man Aji Sax ji maay seen Yàlla.” ⁸ Teewul ñu gántal ma, nanguwñu maa déglu. Kenn nanguwula xalab tuur yu seexluwu yi mu wékki gët, kenn dëdduwul kasaray tuuri Misra. Ma nar leena xépp samam sànj, ñaccal leen sama mer ci biir réewum Misra. ⁹ Teewul ma sédd ci sama teddngay tur, ngir xeet yi ñu nekk ci seen biir bañ maa sikk. Ndax ba may xamal bànni Israyil sama bopp, di leen génne Misra, xeet yooyaa ko seede woon. ¹⁰ Ma génne leen réewum Misra, yóbbu leen ca màndiñ ma. ¹¹ Ma jox leen sama dogali yoon, xamal leen sama àttey yoon yooyu guddal fanu képp ku koy jéfe. ¹² Sama bési Noflaay itam maa leen ko jox, muy màndarga sama digganteek ñoom, ngir ñu xam ne man Aji Sax ji maa leen sellal.

¹³ «Waaye waa kër Israyil dañu maa gántal ca màndiñ ma. Sama dogali yoon,

jëfewuñu ko, sama àttey yoon yiy guddal fanu képp ku koy jéfe, ñu xalab. Nàkke nañu worma lool sama bési Noflaay. Ma nar leena xépp samam sànj ca màndiñ ma, sànk leen. ¹⁴ Teewul ma sédd ci sama teddngay tur, ngir xeet, ya seede woon ba ma leen di génne, bañ maa sikk. ¹⁵ Ba tey maa leen giñal ca màndiñ ma, ne duma leen yóbbu réew ma ma leen jox, fa meew maak lem ja tuuroo, fa gëna taaru ci réew yépp. ¹⁶ Li ko waral mooy sama àttey yoon yi ñu xalab, ak sama dogali yoon yi ñu jëfewul, ak sama bési Noflaay yi ñu ñàkke worma, ndax xol lañu topp seen kasaray tuur yi. ¹⁷ Teewul ma xool leen bëtü ñeewante ba sànkuma leen, faagaagaluma leen ca màndiñ ma. ¹⁸ Ma wax nag seeni doom ca màndiñ ma ne leen: “Seen dogali baay, buleen ko jéfe; seen àttey yoon, buleen ko topp; seen kasaray tuur, buleen ca sobeel seen bopp. ¹⁹ Man Aji Sax ji maay seen Yàlla. Sama dogali yoon, jëfeleen ko; sama àttey yoon, ngeen sàmm ko, di ko jéfe. ²⁰ Sama bési Noflaay, sellal-leen ko, muy firnde sama digganteek yeen, ngir ngeen raññee ne man maay seen Yàlla Aji Sax ji.”

²¹ «Waaye doom ya dañu maa gántal. Sama dogali yoon, jëfewuñu ko, sama àttey yoon yiy guddal fanu képp ku koy jéfe, sàmmuñu ko. Sama bési Noflaay lañu ñàkke worma. Ma nar leena xépp samam sànj, ñaccal leen sama mer ca màndiñ ma. ²² Teewul ma téye sama loxo, sédd ci sama teddngay tur, ngir xeet, ya seede woon ba ma leen di génne, bañ maa sikk. ²³ Ba tey maa leen giñal ca màndiñ ma ne dinaa leen tasaare ci biir xeet yi, wasaare leen ci biir réew yi. ²⁴ Li ko waral mooy sama àttey yoon yi ñu jëfewul, ak sama dogali yoon yi ñu xalab, ak sama bési Noflaay yi ñu ñàkke worma, ak topp gi ñu topp seen kasaray tuuri baay, wékki leeni gët. ²⁵ Ba tey maa leen bérgal ak àttey yoon yu amul njariñ ak dogali yoon yu taxul kenn a dund. ²⁶ Maa leen sobeel ak seen sarax yi ñuy sarxal tuur yi, ci seen bépp taaw bu ñu lakk ngir tuur yi. Li ma ci jublu mooy ñu jommi, ba raññee ne man maay Aji Sax ji.

²⁷ «Moo tax, yaw nit ki, nanga wax ak waa kër Israyil, ne leen: “Boroom bi Aji Sax ji dafa wax ne: Seeni baay a ma dellu ñaññ, fecci ma kóllère. ²⁸ Maa leen yóbbu réew ma ma leen giñaloona jox, teewul fu ñu gis tund wu kawé, mbaa garab gu séq, rendi nañu fa seeni sarax, jooxe fa seen jooxe yi may merloo, taal fa seen saraxi cuuraay, tuural fa seeni tuur. ²⁹ Ma ne leen: Ana lu waral bérabu jaamookaay bii

* **20:1** 20.1 Mu yemook fukki weer ak benn gannaaw peeñu ma jiitu mii. Seetal ci 8.1.

ngeen di dem?” Bérabu Jaamookaay lañu koy wax ba tey jii.

³⁰ «Kon nag nanga wax ak waa kër Israyil ne leen: “Boroom bi Aji Sax ji dafa wax ne: Seen tànkì baay ngeen topp, di sobeel seen bopp, topp seen tuur yu siblu, di gànctook ñoom?” ³¹ Bu ngeen di joxe ay sarax, di lakk seeni doom ngir ay tuur, yeena ngi sobeel seen bopp ba tey jii ci seen tuur yii yépp. Man nag ngeen defe ne maa leen di bàyyi, ngeen seetlusi fi man, yeen waa kër Israyil? Giñ naa ko ci man miy dund, kàddug Boroom bi Aji Sax jee, duma leen bàyyi mukk ngeen seetlu fi man. ³² Li ngeen mébèt ci seen xel du am mukk. Yeena ngi naan: ‘Nan mel ni xeet yépp, mel ni waasoy réew yi, di jaamu bant ak doj.’ ³³ Giñ naa ko ci man miy dund, kàddug Boroom bi Aji Sax jee, sama dooley loxo ak sama kàttanu pèrèg, ak sànj mu naan soteet laay nguuroo ci seen kaw. ³⁴ Maa leen di génnee ci askan yeek réew yi ngeen tasaaroo ci seen biir. Sama dooley loxo laa koy defe ak sama kàttanu pèrèg, ak sànj mu naan soteet fi seen kaw. ³⁵ Maa leen di yóbbu màndin ma ñuy wooye Màndinju Askani yi, layoo faak yeen, di leen xool, ngeen di ma xool. ³⁶ Noonee ma layoo woon ak seen baay ca màndinju réewum Misra, ni laay layook yeen. Kàddug Boroom bi Aji Sax jee. ³⁷ Maa leen di lime sama yetu sàmm, kenn-kenn, tènkk leen ci pas-pasu kòllère gi. ³⁸ Maay xettee fi seen biir ñi may gántal ak ñi may tooñ. Réew ya ñu wàlliyaani, fa laa leen di jële, te réewum Israyil, duñu fa duggi. Su boobaa ngeen xam ne maay Aji Sax ji.

³⁹ «Léegi nag yeen waa kër Israyil, Boroom bi Aji Sax ji dafa wax ne: Aca, na ku ne jaamuji kasaray tuuram! Dungeen mujje lu moy déggal ma, ba sama tur wu sell wi, dootuleen ko teddabile seeni sarax ak seeni tuur. ⁴⁰ Fa kaw sama tund wu sell wa, fa tundu Israyil wu kawe wa, kàddug Boroom bi Aji Sax jee, foofa déy la ma waa kër Israyil gépp di jaamujee, ñoom ñépp ca réew ma. Fa laa leen di nangule. Fa laay sàkkoo seeni jooxe ak seen ngéneeli sarax, ak lépp lu ngeen ma sellalal. ⁴¹ Maa leen di nangul seen saraxu cuuraay, gannaaw bu ma leen génnee fa biir xeet yaak réew ya ngeen tasaaroo ca seen biir, ba dajale leen. Su boobaa maay jéfe sellnga fi seen biir, xeet yi seede. ⁴² Dingen xam ne maay Aji Sax ji, gannaaw bu ma leen délloosee ci biir suufas Israyil, réew ma ma giñaloon seeni maam, ne dinaa leen ko jox. ⁴³ Fa ngeen di fàttlikoo seeni jéfin, mboolem seeni jéf yu ngeen sobeele woon

seen bopp, daldi jéppi seen bopp ndax seen mboolem jéf ju bon. ⁴⁴ Yeen waa kër Israyil, duma jéflanteek yeen li seen jikko ju bon yelloo ak seen jéfi yàqute, waaye sama teddnagay tur laa ciy seet, ba ngeen xam ne man maay Aji Sax ji. Kàddug Boroom bi Aji Sax jee.»

21

Woyu saamar jib na

¹ Kàddug Aji Sax ji dikkal na ma ne ma: ² «Yaw nit ki, neel jàkk yoonu ndijoor, sànnil kàddu ci kaw běj-saalum googu, waxal waxyu ci kaw gottub Negew boobu* . ³ Dangay wax waa gottub diiwaanu Negew, ne leen: “Déglul kàddug Aji Sax ji. Boroom bi Aji Sax ji dafa wax ne: Maa ngii di jafal ci sa biir, daay guy xoyom sa garab yépp, gu naat ak gu wow. Dara du ko mana fey. Daay ga day jóge běj-saalum ba běj-gànnaar te ñépp a cay lakk, ⁴ ba mboolem kuy dund xam ne man Aji Sax ji maa ko taal te du fey.» ⁵ Ma ne ko: «Éey Boroom bi Aji Sax ji, ñii déy a ngi wax ci man, naan: “Kii moom xanaa day léeb ak a léebaar rekk?” ⁶ Ba loolu amee kàddug Aji Sax ji dikkal ma ne ma: ⁷ «Yaw nit ki, jàkkaarloor ak Yerusalem, nga sànni kàddu bérab yu sell yi te nga wax waxyu ci kaw réewum Israyil. ⁸ Waxal réewum Israyil ne ko: “Aji Sax ji dafa wax ne: Maa ngi nii fi sa kaw. Maay boccee sama saamar mbaram, daldi dagge fi yaw ku jub ak ku bon. ⁹ Dagge fi yaw ku jub ak ku bon moo may taxa boccee sama saamar mbaram, dal ci mboolem kuy dund, běj-saalum ba běj-gànnaar, ¹⁰ ba képp kuy dund xam ne man Aji Sax ji maa bocci sama saamar, te du dellu mbaram.” ¹¹ Yaw nit ki, binnil, neel yàcc, di binnee naqar, ñuy gis. ¹² Dees na la laaj ne la looy binni. Nga ne leen: “Xanaa mbir mi ma dégg. Bu agsee fit yépp ay rècc, loxo yépp nasax, xol yépp jeex, oom yépp di fenqoo. Mu ngooguy dikk te dina am. Kàddug Boroom bi Aji Sax jee.»

¹³ Ba loolu amee kàddug Aji Sax ji dikkal ma ne ma: ¹⁴ «Yaw nit ki, waxal bii waxyu, nga ne: “Boroom bi dafa wax ne: Saamar a ngoog, saamar bu ñu xacc, jonj ko! ¹⁵ Dees koo jonj ngir bóome, jonj koo jonj ba muy tàkk. Ana nu nu mana bége lii? Ngeen ne Aji Sax ji nee: ‘Yetu nguuruug Yuda sama doom a ngi fi.’

Waaye saamar bi faalewul benn bant!

¹⁶ Santaane nañu ñu jonj saamar bi, ba loxo man koo téye,

* 21:2 21.2 Waxyu bii mu ngi jëm ci wàllu Yuda gi fèete běj-saalum.

ñu xacc ko, jonj ko,
nar koo teg ci loxol bóomkat.
17 Yaw nit ki, yuuxul, jooyal,
saamar bi dikkal na sama ñoñ,
dikkal mboolem kàngami Israyil,
boole leen ak sama ñoñ, jalax ci kaw
saamar.
Kon nag, màttul, wiccax!
18 Nattu bi metti na!
Bu yetu nguur, wi saamar bi xeeb, demee,
ana luy xew?
Kàddug Boroom bi Aji Sax jee.”

19 «Yaw nit ki, jottlil waxyu,
ñèbal bii loxo, dóor ca bee.
Na saamar bi dal benn yoon, ñaari yoon,
ba ñett,
saamaru ndee la, saamar baay bóom ñu
bare,
gaw leen,
20 yóbbuw fit,
tèréfloo ñu bare.
Seen buntoo bunt laa teg saamaru
bóomkat.
Ndeysaan, bii saamar bu ñu defar ba muy
tàkk,
xacc ko ngir bóome.

21 Saamar, ñaweel sa ndijoor,
walbatiku, jëm càmmoñ,
ak foo mana jublu,

22 man it ma ñèb bii loxo, dóor ca bee,
ba giifal sama xadar.

Man Aji Sax ji maa ko wax.»

23 Ba loolu amee kàddug Aji Sax ji dikkal
ma ne ma: 24 «Yaw nag nit ki, sàkkal
ñaari yoon yu saamaru buuru Babilon di
jaare dikk; ñaari yoon yuy bàyyikoo menn
wan réew. Tegal fa buntu yoon wu ci
nekk màndarga muy tegtale dèkk ba yoon
wa jëm; 25 wenn yoon wa jème saamaru
Babilon ca Raba, dèkkub Amoneen ñi; wa
ca des jème ko Yerusalem, dèkk ba ñu
dàbbli, ca Yuda. 26 Buuru Babilon a ngay
taxaw ca selebe yoon wa, fa ñaari yoon ya
séddlikoo, ngir gisaane. Dina yéngal fitti
seetukaay yi, xool ci terafim yi, juntuukaay
yi ñuy gisaanee, te dina xool ci resu jur.
27 Fitt giy misaal Yerusalem ndijooram
lay wadd. Mu sès dénki dájjiikaay yi,
yéene ndigalu bóome, xaacu, daldí sès
dénki dájjiikaay yi ci bunt yi, yékkati sèkk
yi, ngir taxawal ab gawukaaay. 28 Waa
Yerusalem foog ne ngisaane googu misaal
seen jéll, caaxaan la, ndax ngiñ moo lal
seen kaaraange, ba du deñ. Waaye buuru
Babilon a leen di fàttli seenug tooñ, ba
jàpp leen njaam.

29 «Moo tax Boroom bi Aji Sax ji dafa
wax ne: Gannaaw yeena fàttliki seen
ñaawtéef, seeni tooñ ne fàññ, seeni

bàkkaar fés ci seen jéf jépp, gannaaw
yeena ñaaw ñaawtéef gu ñu leen di
fàttlikoo, dees na leen jàpp.

30 «Waaye yaw garmib Israyil bu teddadi
bu bon bi,

sa bés dikk na, sa àppu mbugal mat na.†

31 Boroom bi Aji Sax ji dafa wax ne:

Dindil kaala gi, foq mbaxanam buur mii;
la woon wonni na,

ku noon dett jóg, ku jóg, detteelu.

32 Tasaaroo, tasar, maa ko naa tasar!

Lépp ay wonni,

ba keroog boroom àtte bi dikk, ma jox ko
ko.

33 «Yaw nag nit ki, jottlil bii waxyu, nga
ne: “Boroom bi Aji Sax ji dafa wax ci
mbirum Amoneen ñeek seeni saaga ne:

Saamaroo saamar,

bocciku, nara bóome,

xacce ba mana yàppe,

di tàkk ni melax.

34 Gisal nañu leen peeñuy caaxaan,
gisaaneel leeni fen.

Teewul saamar ba di tege ca ndoddi

ñu bon ñi ñu nara bóom,

seen bés taxaw,

seen mujjantalu mbugal teew.

35 «Léegi dellooleen saamar ci mbaram.

Saamaroo, fa ñu la sàkke woon,

ca réew ma nga cosaanoo, fa laa lay àttee.

36 Maa lay xépp samam sànj,

wal sama sawaras xadar fi sa kaw,

jébbal la nit ñu néeg,

ñu xareñ ci sàнке.

37 Yaay doon mattum sawara wa,

sa deretu boroom ne xéew fi digg réew mi,
ba deesatu la fàttliki.

Man Aji Sax ji maa ko wax!»

22

Yerusalem def nay tojaange

1 Kàddug Aji Sax ji dikkal na ma ne ma:

2 «Yaw nit ki, doo tiinaal ñii? Doo tiinaal
waa dèkku tuurkati deret yii? Xamal leen

seen jéf ju siblu jépp. 3 Ne leen: “Boroom
bi Aji Sax ji dafa wax ne: Ab dèkk a ngii

buy tuur deret fi biram, ba tax bésam di
jubsi. Mu ngi sàkk ay kasaray tuur, di

sobeel boppam. 4 Yaw dèkk bii, gàddu nga
bàkkaar ndax deret ji nga tuur, sobeel nga

sa bopp ndax kasaray tuur yi nga sàkk.
Kon gàttal nga saw fan, agsi nga ci sa àppu

at. Moo tax maa lay def ku mboolem xeet
yi di sawal, ku mboolem waa réew yi di

kókkali. 5 Dèkk bu yaqu bi nga doon, ku
jegeek ku soree lay kókkali. Boroom der

bu yaqu bi, sa lépp a salfaañoo! 6 Kàngami

† 21:30 21.30 Buur Cedesyas lañuy wax fii. Cedesyas mooy buur bi mujj ci askanu Daawuda. Seetal ci 2. *Buur* ya 25.4-7.

Israyil a ngii fi sa biir, di jaay doole bay tuur deret. ⁷ Ndey ak baay, ñu tuutal fi sa biir; doxandéem bi, ñu lekk àqam fi sa biir; jirim akub jëtun, ñu néewal fi sa biir. ⁸ Sama mbir yu sell, nga sàggane, sama bési Noflaay, nga ñàkke worma. ⁹ Ay soskat a ngi fi sa biir, di lor ay bakkan. Kaw tund yi lañuy lekke ñam wu ñu sarxeel ay tuur fi sa biir, tey def jéfi yàqute fi sa biir. ¹⁰ Baay la doom di teddadil lalam fi sa biir, ku gis baax, ñu tédde fi sa biir. ¹¹ Kii ak jabaru jaambur ci jéf ju siblu, kee sobeel jabari doomam ci biir yàqute, kale di tédde rakkii doom baayam fi sa biir. ¹² Alalu ger, ñu jël fi sa biir, ngir lor ay bakkan. Ndollant ci kaw tegandaay, nga jël feyeekoo bor, di wute alal sa àqu moroom. Man nag, nga fátte ma. Kàddug Boroom bi Aji Sax jee.

¹³ «“Maa ngii nag di fenqe samay loxo, di ko mititloo alal ju lewul ji nga dajale, ak sa dereti nit ji ñu tuur fi sa biir. ¹⁴ Mbaa keroog bés ya may jéflanteek yaw, dinga am fit ak doole joo ko dékkoo? Man Aji Sax ji maay wax, jéfe ko. ¹⁵ Maa lay tasaare fi biir xeet yi, wasaare la fi réew yi, ba tàggale laak sa sobe. ¹⁶ Dinga teddadil sa bopp, xeet yiy gis, ba nga xam ne maay Aji Sax ji.”»

¹⁷ Ba loolu wéyee kàddug Aji Sax ji dikkal ma ne ma: ¹⁸ «Yaw nit ki, waa kër Israyil mbuubitu weñ gu raxe lañu ci man léegi. Ñoom ñépp duñu lenn lu moy xàñjar ak weñ gu weex ak gu ñuul ak beteex ci biir taalub tégg. Mbuubitu xalis rekk lañu. ¹⁹ Moo tax Boroom bi Aji Sax ji dafa wax ne: “Gannaaw doon ngeen yeen ñépp mbuubitu weñ, maa ngii nag di leen dajale fi digg Yerusaleem. ²⁰ Ni ñuy boolee xalis ak xàñjar ak weñ gu ñuul ak beteex ak weñ gu weex ci biir ab taal, xamb sawara wa ngir seeyal ko, ni laa leen di boolee ci sama biir mer ak sama xadar, jóor leen, seeyal leen. ²¹ Maa leen di saam fi digg Yerusaleem, jafale leen sama tangooru xadar, ba ngeen seey ci biir. ²² Ni xalis di seeye ci biir taal, ni ngeen di seeye ca biir. Su boobaa ngeen xam ne man Aji Sax ji maa leen xépp sama xadar.”»

²³ Gannaaw loolu kàddug Aji Sax ji dikkal ma ne ma: ²⁴ «Yaw nit ki, waxal Yerusaleem ne ko: “Yaa di suuf su ñu dindiwul sobeem, te tawluwul keroog bés sub sànj ma.” ²⁵ Ay yonentam a ngi déeyoo fi biiram; ñu ngi xiiru ni gaynde guy xotat pàddam, di lekk doom aadama yi, foqati alal ak gànjar, ful jëtun yi ci biiram. ²⁶ Ay sarxalkatam xétt nañu sama yoon, teddadil nañu sama yéf yu sell. Lu sell ak lu sellul, ràññeewuñu ko; lu set ak lu sobewu, xamlewuñu ko; sama bési

Noflaay, ñu jéllale ko, ba ma mujj teddadi fi seen biir. ²⁷ Kàngamam yi ci biiram a ngi mel ni saafaandu yuy dogat am pàdd, tuur deret ja, di sànk ay bakkan ngir nangu alali boroom. ²⁸ Ay yonentam di leen diwal weexal ci kaw loolu lépp, ci peeñuy caaxaan ak ngisaaney fen, naan: “Boroom bi Aji Sax ji dafa wax ne,” te Aji Sax ji waxul. ²⁹ Waa réew maa ngi lekk àq, di sàcc. Baadoolo yeek walaakaana yi, ñu néewal; doxandéem bi, ñu not, xañ ko àqam. ³⁰ Ma seet ci seen biir kuy defaraat tata ji, janook man ci bëttukaay bi, ngir taxawal réew mi, ba duma tas réew mi, waaye gisuma kenn. ³¹ Ma daldi leen xépp samam sànj, fakkase leen sama tangooru xadar, képp leen seen aña jéf ci seen kaw bopp. Kàddug Boroom bi Aji Sax jee.»

23

Samari ak Yerusaleem bokkaale nañu

- ¹ Kàddug Aji Sax ji dikkal ma ne ma:
- ² «Yaw nit ki, ñaari jigéen la woon, ñu bokk jenn ndey,
- ³ di gànctu ca Misra,
- te doon fa gànctu ca seenug ndaw.
- Fa lañu doon lãambe seeni ween,
- di motoxal seen cusi janq.
- ⁴ Ku mag kaa doon Owola,
- rakk ja di Owoliba.
- Ñu di samay soxna,
- jural may doom, góor ak jigéen.
- Owola mooy Samari,
- Owoliba di Yerusaleem.
- ⁵ Owola di sama soxna tey gànctu,
- di xédd ay faram, waa Asiri xarekat ya.
- ⁶ Ña nga sol seen mbubbi baxa,
- diy kàngam aki jawriñ,
- ñoom ñépp di xale yu góor yu sopplu,
- di ndaanaani gawar.
- ⁷ Boppam la daan jox tannéefi doomi Asiri
- yooyu yépp,
- di sobeel boppam ak mboolem tuuri
- ñoofu mu xédd.
- ⁸ Gànctoom ga woon ca Misra, bawu ko.
- Moom lañu daan tédde cag ndawam,
- te ñoo daa motoxal cusi janqam,
- ba sotti ko seen yàqute.
- ⁹ Moo tax ma teg ko ca loxoy faram ya,
- loxoy waa Asiri ya mu daan xédd.
- ¹⁰ Ñoo ko ñori ba mu ne duñj,
- doomam yu góor ak yu jigéen, ñu nangu,
- moom, ñu jam ko saamar, rey ko.
- Nii lañu sottale ay mbugalam,
- ba mu yedd jigéen ñépp.
- ¹¹ «Owoliba rakk ja gis ca
- te gëna yàqu magam,
- di gànctu ba raw mag ja.
- ¹² Moom it waa Asiri ya la xédd,
- ñuy kàngam aki jawriñ,

xarekat yu ràngu ba solu ba jekk,
 di ndaanaani gawar,
 ñoom ñépp di xale yu góor yu sopplu.
¹³ Ma gis ni mu sobeele hoppam,
 muy wenn yoon wu ñu bokk ñoom ñaar.
¹⁴ Teewul rakk ja gëna gànctooti,
 gis nataali góor yu ñu yett ciy tabax,
 di jëmmi waa Babilon yu ca ñaase, xonq
 curr.
¹⁵ Ña nga takk ngañaay ca seen ndigg,
 tañlaayu bay langal,
 ñoom ñépp di nirooki kàngam,
 di saf doomi Babilon,
 réewum Kalde di seen cosaan.
¹⁶ Rakk ja teg nataal ya bët rekk, xédd leen,
 yónnee leeni ndaw fa Kalde.
¹⁷ Doomi Babilon ya dikk,
 fekkxi ko ci kaw lal baane,
 sobeel kook seen yàqute,
 mu sobeel hoppam ak ñoom ba ñu sàppi
 ko.
¹⁸ Moo siwal gànctoom,
 wone yaramu neenam,
 ba sàppi ma ni ma magam sàppee.
¹⁹ Mu gën di gànctooti,
 di ko baaxantale janti ndawam,
 ba muy gànctu ca réewum Misra.
²⁰ Muy xédd ay faram
 yu seeni ngóora di saf yu mbaam,
 te ñu aldee alde ba mel niy fas.
²¹ «Yaw Owoliba de, yaa namm sa yàqute
 ga woon ba ngay ndaw,
 ba waa Misra di motoxal say cus,
 ngir bannexoo sa weeni janq.
²² Moo tax Boroom bi Aji Sax ji dafa wax
 ne:
 «Owolibaa, maa ngii di xabtalsi say far ci
 sa kaw;
 ñi la sàppi, ñoom laay bàbbee fi la wër,
 xiirtal leen fi sa kaw:
²³ waa Babilon, Kaldeen ñépp,
 muy waa Pekot, di waa Sowa, di waa
 Kowa,
 ànd ak waa Asiri yépp,
 di xale yu góor yu sopplu,
 ñoom ñépp di kàngam aki jawriñ,
 di kilifa yu ràññiku,
 ñoom ñépp war ay fas.
²⁴ Dañuy dal fi sa kaw,
 aki gannaay, watiir aki mbege ak
 kurélu xeeti xeet,
 ñabb pakk bu mag ak bu ndaw, sol mbax-
 anam xare,
 dar kepp la.
 Maa leen di jox sañ-sañu mbugal,
 ñu mbugal la, ni ñu baaxoo mbugale.
²⁵ Maa lay yen sama fiiraange,
 te yaw lañuy jëflanteel ak xadar,
 sa bakkan ak say nopp, ñu njoof,
 saw ndes fàddoo saamar.
 Say doom, góor ak jigéen, ñu nangu,

sa kuutaay lakk ba xoyomu.
²⁶ Dañuy futti say yére, foqati say gànjar.
²⁷ Maay dakkal sa jëfi yàqute,
 ak sa gànctu ga dale ca réewum Misra,
 ba dootoo ko geesoo gëti nammeel,
 te dootoo fàttliku Misra.
²⁸ Boroom bi Aji Sax ji kat dafa wax ne:
 Maa ngii di la teg ci loxol ñi nga bañ,
 loxol ñi la sàppi.
²⁹ Mbañeel lañuy jéfeek yaw,
 foqati ñaqoo ñaq,
 wacc la, nga ne dunj dunjpaaral.
 Sa gànctu gu ñakk kersa dina feeñ,
 ak dëgër bët gi ngay cagatoo.
³⁰ Ñoo lay def jii jëf
 ndax sa gànctu gi nga toppe yéefar yi,
 di sobeel sa bopp ak seen kasaray tuur.
³¹ Yaa topp sa tãnk mag,
 kon maa lay nãndale kaasu mbugalam.
³² Boroom bi Aji Sax ji dafa wax ne:
 Sa kaasu mag ngay naane,
 xóot, yaatu,
 duy ba ne xéew,
 xellil la ay ñaawleeki kekku.
³³ Mãnditeeku tiis ngay feesi,
 kaasu wéetaay ak wéetle di sa kaasu mag
 Samari.
³⁴ Yaa koy naan ba siitaatu ko,
 yéy tojit ya, xotate say ween.
 Man de maa ko wax.
 Kàddug Boroom bi Aji Sax jee.
³⁵ «“Moo tax Boroom bi Aji Sax ji dafa wax
 ne:
 Yaa ma fàtte,
 jalax ma sa gannaaw.
 Kon nag gàddul sa ayu ñakk gacceek sa
 gànctu.”»
³⁶ Aji Sax ji nag ne ma:
 «Yaw nit ki, doo tiinañ Owola ak Owoliba?
 Kon nag biral leen seeni jëf ju siblu:
³⁷ Ñoo njaaloo, ñoo bóome,
 ñoo njaalook seen kasaray tuur.
 Doyatu leen, doom yu góor yi ñu ma jural,
 ñu di leen lakk ngir ay tuur, leele leen.
³⁸ Lii itam, ñoo ma ko def:
 Bésu keroog lañu sobeel sama kër gu sell,
 teddadil sama bési Noflaay.
³⁹ Ñoo rendil seen kasaray tuur seeni
 doom,
 ba noppi dugg sama biir kër gu sell ci bés
 bi,
 ba teddadil kër gi.
 Loolu déy, moom lañu def fi sama digg kër
 gi!
⁴⁰ Te sax ñoo yeble, wutiy góor,
 yónnee ndaw lu leen jële fu sore,
 ñu daw dikk,
 fekk leen sangu, tusngalu, gànjaru,
⁴¹ tooge lal bu yàn,

taabal taaje fa kanam,
sama cuuraay ak sama diw gu xeeñ tege
ca.

⁴² Muy coowal gàngoor gu amul xalaatu
àddina;

doom aadama ju nekk a nga ca,
ba ci ay màndikat yu ñu jële ca màndin
ma,

ñoofna di leen takkal lami loxo,
di leen solal mbaxanam lingeer.

⁴³ Booba laa wax ci ndaw sii njaaloo ba
ràpp, ne:

“Ndaw sii lañuy gànctool ba tey?”

⁴⁴ Mu daldi ànd ak moom ni ñuy àndeek
caga rekk.

Nii lañu àndeek Owola ak Owoliba.

Ñii jigéen ñu ñàkk gâce!

⁴⁵ Waaye ay nit ñu jub a ngii,
ñoo leen di atteji àtteb njaalookat yu
jigéen,

àtteb bóomkat yu jigéen,

nde ay njaalookat lañu,

te ay bóomkat lañu.

⁴⁶ «Boroom bi Aji Sax ji déy dafa wax ne:

Wool gàngoor ci seen kaw,
bâyee leen tiitaange aki sèxëtookat.

⁴⁷ Gàngoor gaa leen di dóor ay doj,

jam leeni saamar, ñu dee,

seeni doom, góor ak jigéen, ñu bóom;

seeni kër, ñu taal,

⁴⁸ ma dakkale noonu yàqute ci réew mi,

jigéen ñépp jàngé ca,
baña jéfeeti yàqute ju mel ni seen jos.

⁴⁹ Dees na leen képp seen yàqute,

ngeen yenu seen bàkkaarri kasaray tuur,

ba xam ne man maay Boroom bi Aji Sax
ji.»

24

Mbugalu Yerusalem, misaal maa ngi

¹ Kàddug Aji Sax ji dikkal na ma ca
juróom ñeenteelu at ma, fukki fan ca
fukkeelu weer wa. Mu ne ma: ² «Yaw nit
ki, bindal bés bii, bés bii ci boppam, ndax
buuru Babilon gaw na Yerusalem bés niki
tey. ³ Léebalal kërug fippukat yi aw léeb,
ne leen: «Boroom bi Aji Sax ji dafa wax ne:
Taalal, teg cin li, teg ko, sotti ci ndox.

⁴ Booleel dogi yàpp yi, def ci:

dog yu baax yépp, fallare jeek tànkú
kanam bi,

te feccalee ko cér ya gëna baax.

⁵ Li gën ci gétt gi ngay sàkk,
nga jal matt ci suufu cin li,
xamb, baxala baxal, ba baxalaale yax yi.»

⁶ Boroom bi Aji Sax ji kat dafa wax ne:

«Wóoy ngalla bii dëkku tuurkatu deret!

Mooy cin lu teg àkki xëmit,

cin lu dul tàggook xëmitam.

Wenn-wenn ngay seppi dogi yàpp yi,
te bul tegoo bant la ngay seppi.

⁷ Deret ji mu tuur a ngi ci biiram ba tey;

doj wu amul dara la ko sotti,

sottiwu ko ci suuf, fu muy suuloo.

⁸ Man maay wacc deret ja ca doj wa amul
dara,

fa mu naan fànɗɗ, du suulu,

ngir mu doon sànj muy wàcce mbugal.»

⁹ Boroom bi Aji Sax ji déy dafa wax ne:

«Wóoy ngalla bii dëkku bóomkat!

Man it dinaa yokk jalú matt mi.

¹⁰ Jalala jal matt mi, xamb taal bi.

Baxalal yàpp wi bu baax, ñeerall,

ba yax yi far xëm.

¹¹ Boo noppee tegal cin li deful dara ci xal
yi,

mu tàng ba xàñar bi xonq curre;

tilim ja seey ca biir,

xëmit ja xoyomu.

¹² Coonoy neen, xëmit ja ne xéew du deñ,
sawara sax dindiwu ko.

¹³ Sa sobeey sa yàqute!

Maa la setal te taxu laa set.

Dootuloo tàggook sa sobe,
ba keroog may giifal sama xadar fi sa kaw.

¹⁴ Man Aji Sax ji maa wax,

mu dikk, ma jéfe ko.

Duma bàyyi, duma ñéebalu, duma yërëm;

say jikko ak say jéf lees lay àttee.

Kàddug Boroom bi Aji Sax jee.»

Soxnas Esekiyel faatu na

¹⁵ Gannaaw loolu kàddug Aji Sax ji
dikkal na ma ne ma: ¹⁶ «Yaw nit ki,
maa ngii di nangusi sa bannexu bêt cim
pàdd. Bul yuuxu, bul jooy, bu sa rongooñ
wadd. ¹⁷ Binnil ndànk te bul ñaawlu. Bul
tàggook sa kaala, bul tàggook say carax,
bul muur sa tuñum kaw ba ci sikkim di
ko ñaawloo. Bul lekk ñam wu la njaal mi
indil.*»

¹⁸ Wax naak mbooloo mi ci suba, ci
ngoon si sama soxna dee. Bêt set ma def
li ñu ma sant. ¹⁹ Mbooloo mi nag ne ma:
«Xanaa doo nu wax lii ngay def nii, lu muy
wund ci nun?» ²⁰ Ma ne leen: «Kàddug Aji
Sax jee ma dikkal, ne ma: ²¹ Waxal waa
kër Israyil, ne leen: «Boroom bi Aji Sax ji
dafa wax ne: Maa ngii di teddadil sama
bérab bu sell bii, seen sag bii ngeen di
doolewoo, di seen bannexu bêt, di seen
nammeelu bakkan. Seen doom yu góor
ak yu jigéen ya ngeen bàyyi Yerusalem,
saamar dina leen téral. ²² Te nangeen def
nii ma def. Buleen muur tuñum kaw ba ci
sikkim te buleen lekk ñam wu leen njaal
mi indil. ²³ Buleen tàggook kaala, buleen
tàggooki carax. Buleen yuuxu, buleen

* 24:17 24:17 Ku deele daawul togg. Waa njaal mi ñooy indi ñam wu ñu lekk ci dēj bi.

jooy. Waaye dingeen jeex tàkk ndax seeni ñaawtéef, ngeen ànd di binni.”²⁴ Mu ne: “Na Esekiyel di seen misaal. Bu jotee, mboolem nu mu def, nangeen ko def, ba xam ne man maay Boroom bi Aji Sax ji.”

²⁵ «Yaw nit ki, bés bu ma nangoo ci ñii seen tatay daraja ji ñuy bége, muy seen bannexu bët, di seen xintey bakkan, ba nanguwaale seen doom yu góor ak yu jigéen, ²⁶ bésu keroog ku ca récce dina dikk ba ci yaw, àgge la xibaar bi. ²⁷ Bésu keroog sa gémmiñ dina ubbiku, nga noppee luu, ba wax ak ka récc. Su boobaa yaay doon misaalu mbooloo mi, ba ñu xam ne maay Aji Sax ji.»

25

Kàddug waxyu dal na xeet yi

Waxyu dal na Amon

¹ Kàddug Aji Sax ji dikkal na ma ne ma:
² «Yaw nit ki, neel jàkk Amoneen ñi, nga wax waxyu ci seen kaw. ³ Waxal Amoneen ñi, ne leen:

“Dégluleen kàddug Boroom bi Aji Sax ji. Boroom bi Aji Sax ji dafa wax ne: yeena noon: ‘Ñaw!’ ba ñuy teddadil sama kër gu sell,

réewum Israyil gental, waa kër Yuda jëm ngàllo.

⁴ Maa ngii nag di leen jébbal màngaani penku,

ñu moom leen, samp seeni dal fi seen biir, yékkati fa seeni xayma.

Ñooy lekk seen meñneef, naan seen meew.

⁵ Maay soppi Raba seen péey ab parlub giléem,

maay def réewum Amon goorkaayu gàtt, ba ngeen xam ne maay Aji Sax ji.

⁶ Boroom bi Aji Sax ji déy dafa wax ne:

Yeena doon tàccu, di fecc, bége tiisu réewum Israyil, di leen sewal lu ngeen man.

⁷ Maa ngii nag di leen dóor sama loxo, te maa leen di jébbal xeet yi, ñu sèxëtoo leen.

Maa leen di dagge fi digg xeet yi, maa leen di fare ci réew yi, faagaagal leen,

ba ngeen xam ne maay Aji Sax ji.”»

Waxyu dal na Mowab

⁸ «Boroom bi Aji Sax ji déy dafa wax ne: Waa Mowab ak Seyir a ne: “Xool-leen waa kër Yuda ñii ni ñu mujje, ñook xeet yépp a yem!”

⁹ Maa ngii nag di ñafal réewum Mowab, ba xañ leen mboolem seen dëkk ya gëna taaru sax,

di Bet Yesimot ak Baal Mewon ak Kiryaatayim.

¹⁰ Màngaani penku laa leen di jébbal, jébbalaale leen Amon, ba kenn du fàttlikooti Amon ci biir xeet yi, ¹¹ te maay wacceel Mowab ay mbugal, ba ñu xam ne maay Aji Sax ji.»

Waxyu dal na Edom

¹² «Boroom bi Aji Sax ji dafa wax ne:

Edom a feyu ci waa kër Yuda, feyu ga mu feyu di tooñaange gu réy.

¹³ Moo tax Boroom bi Aji Sax ji dafa wax ne:

Maay dóor Edom sama loxo,

dagge fa nit ak mala, maa koy def ab gent,

la dale Teman ba Dedan, saamar lañuy fàddoo.

¹⁴ Maay дума Edom, te Israyil sama ñoñ laa leen di dumaa.

Ñooy jëflanteek Edom la méngook sama mer,

tollook sama xadar, ba ñu ñam sama mbugal.

Kàddug Boroom bi Aji Sax jee.»

Waxyu dal na Filisti

¹⁵ «Boroom bi Aji Sax ji déy dafa wax ne: Filisteen ñee jiital seen mbañeel gu sax, ñoo jéppée jéppi seeni noon, feyoo feyu, ba faagaagal leen.

¹⁶ Moo tax Boroom bi Aji Sax ji dafa wax ne:

Maa ngii di dóor Filisteen ñi sama loxo, maay dagg ñoofu di askanu Keret, maay fàkkas ndes wa ca tefesu géej.

¹⁷ Maa leen di feye mbugal xadar yu mag, te bu ma leen yenee sama peyu mbugal, ñu xam ne maay Aji Sax ji.»

26

Waxyu dal na Tir

¹ Ba loolu amee, ca fukkeelu at maak benn, yemook benn fanu weer wa, kàddug Aji Sax ji dikkal ma ne ma:

² «Yaw nit ki,

Tir dëkk ba moo ree Yerusalem, ne: “Ñaw! Buntu dëkk bi xeet ya daan jaare dajjiku na!

Léegi man la bunt ubbikul, léegi maay woomle, Yerusalem gental na.”

³ Boroom bi Aji Sax ji dafa wax ne:

Yaw Tir, maa ngii fi sa kaw.

Ni géej di yéegée ay gannaxam, ni laay yéegloo fi sa kaw xeet yu bare.

⁴ Ñooy mabb say miir, daane say tata, ma buube fa pënd ba, def ko doj wu ne dunj.

⁵ Tir ay doon wéerukaayu caax ci digg gééj gi,
maa ko wax, kàddug Boroom bi Aji Sax jee.
Dèkk bii mooy doon sèxètoom xeet yi,
⁶ dèkk-dèkkaan yi bootu ci mbooyam fàddoo saamar;
ñu xam ne maay Aji Sax ji.

⁷ «Boroom bi Aji Sax ji déy dafa wax ne:
Maa ngii di jële bēj-gànnaar, indi ci kaw Tir,
Nabukodonosor buuru Babilon, buuru buur yi,
aki fas aki watiir aki gawar, ak mbooloo mu takku.

⁸ «Dèkk-dèkkaan yi bootu ci sa àll bi, saamar la leen di reye.

Mooy yékkati fi la wër ab gawukaay, jal ay sèkk, gawe la,
yékkati kiiraayu xare yu ràbbaloo ba def um taax, janook yaw,

⁹ mooy rēkke say miir dénkū dājjiikaay, mooy mabbē say tata ay sēmminam,
¹⁰ ay fasam yu bare sange la pēnd, riiru gawar yaak mbege yaak watiir ya riiral say miir,
mu jalle say wunt, dugg, ni ñuy bētte dèkk,
bu ñu bētt tataam.

¹¹ Tānki naari góoram lay note sa mbeddoo mbedd,

sa mbooloo mi, mu bóome saamar; sa kenuy tabax yu dēgēr jóoru fi suuf.

¹² Nōoñooy foqati sam koom, sèxètoo sa alal,

mabb say miir; daane sa kēr yu bakkane, boole doj yaak bant yaak pēnd ba, tabbal ca mbeex ma.

¹³ Maay dakkal say woy, ba say xalam du fi jibeeti.

¹⁴ Maa lay def doj wu ne dunj, bérabu wéerukaayu caax ngay doon, te deesu la tabaxati mukk.
Man Aji Sax ji déy maa ko wax!
Kàddug Boroom bi Aji Sax jee.

¹⁵ «Boroom bi Aji Sax ji dafa wax Tir, ne ko:

Keroog sa coowal jéll ba, ba ñuy bóome fa sa biir;
ñay dee di binni,
dun yaa cay dégg, di lox moos!

¹⁶ Mboolem buuri tefes yaay wàcc seeni ngàngune,
futti seeni mbubb,
tàggook seen yére yu yànj,
bàddoo tiitaange,
ne dett fi suuf,
dèkke kat-kat,
seen yaram dawe saw demin.

¹⁷ Nōoy yékkati kàddu, jooye la, ne la:
“Yaaka sànkū tey, yaw dunu gééj bu xumb bi woon,

yaw dèkk bu siiw bi woon, di jàmbaarū waa gééj,
yaak say nit a daa tiital mboolem ñi leen wër.

¹⁸ Tey sa bésūb jéll bii,
dun yeey xala lox.
Duni gééj yeey tiit ci sa sànkūte gi.”

¹⁹ «Boroom bi Aji Sax ji déy dafa wax ne:
Bu ma lay def dèkk bu gentā, nga mel ni dèkk yu nit ña ne mes,
ba ma waral xóote ya fi sa kaw,
ba wali ndox ya mèdd la,

²⁰ keroog maa lay wàccaaleek ñay wàcci biir pax,

nga fekki xeetu dēmb.
Maa lay dēl taati biir suuf,
fu mel ni genti cōsaan ya,
nga fekki pax ña fa jèkkōona wàcc,
ngir deesatu la dèkke,
te doo amati cēr réewum aji dund ña.

²¹ Demin wu raglu laa lay sédd,
ba nga ne mes,
ñu di la seet, te deesu la gisati mukk.
Kàddug Boroom bi Aji Sax jee!»

27

Esekiyel jooy na Tir

¹ Kàddug Aji Sax ji dikkal na ma ne ma:
² «Yaw nag nit ki, yékkatil kàddu, jooye ko dèkkub Tir. ³ Waxal Tir mi tooge buntu gééj, jula yooyuy jéflanteek xeeti dun yu bare, nga ne ko: “Boroom bi Aji Sax ji dafa wax ne:

Yaw Tir yaa noon:
‘Maaka matub taar!’

⁴ Yaw mi sa kemu suuf àkki xolu gééj, say tabaxkat a mottli sab taar.

⁵ Dañu laa tabax ni ñuy tabaxe gaal, sàkke xànqi sippar fa tundu Senir; defare ca sa xott wépp,
sàkk bantu seedaru Liban,
defare ponku diggu gaal ga.

⁶ Ñu gorati garabu seen yu Basan,
defare say joowu,
kaw gaal gi, ñu defare ko banti sippar yu bawoo tefesi Gééj gu mag ga,
rafetale ko bēñi ñey.

⁷ Lée bu hawoo Misra lañu ràbb ba mu jekk,

def ko ndimoy wiiru gaal gi,
nga raayawoo ko,
cuub gu baxa ak cuub gu xewar hawoo dunu Elisa,

di sa malaan,

⁸ waa Sidon ak Arwàdd doonoon say joowkat.

Yaw Tir, yaa yeb ñu rafet xel,
ñuy say mool,

⁹ magi Gebal ñeek nitam ñu xareñ ñi fi yaw fēetewoo di jagal.

Mboolem gaal yu mag yi ak ña cay liggéey di dal ak yaw,

waa gaal ya di jënd sam njaay.

¹⁰ Waa Pers ak waa Ludd ak waa Puut, ñépp a nga woon ca sa mboolum xare, di wékk fa yaw seeni pakk ak seen mbax-anay xare.

Ñooño la darajaal.

¹¹ Arwàddeen ñeek sa niti bopp a daan wattoo ca sa kaw miir yépp,

Gammàddeen ñi di wattu say tata, seeni gannaay wékke, wër say miir.

Ñooño mottli sab taar.

¹² «Tarsis dëkk baa doon sab jula ndax sa gépp xeetu alal ju bare, di indi xalis, weñ gu ñuul ak gu weex ak beteex, di ko weccikoo seen alal. ¹³ Waa Geres ak Tubal ak Meseg di say jula, di leen indil ay doom aadama ak ndabi xanjar yu ñuy weccikoo seen koom. ¹⁴ Waa kër Togarma indi ay fas aki gawar aki berkelle, di ko weccikoo seen alal. ¹⁵ Dedaneen ñi di say jula, koomu dun yu bare di jaare say loxo, ñu di la feye bëñi ñey ak bantu jalambaan. ¹⁶ Waa Siri it di say jula, di jèndeek yaw lu bare loo defar, di ko wecci per yu jafe, ak ndimo yu xewar, ak séri ràbb ak lée ak peri koray ak peri rubi. ¹⁷ Yudak réewum Israyil it di say jula, di la wecci bele bu bawoo Minit, ak dugub ak lem ak diwu togg ak diwu yaram. ¹⁸ Dëkkub Damaas di la jula lu bare loo defar ak jépp alal joo barele, di la ko weccee biiñ bu jóge Elbon, ak kawaru xar gu weex. ¹⁹ Waa Weden ak Yawaan bàyyikoo Usal, di la wecci sa koom weñ gu ñu tégg, ak xasum kaas, ak barax bu xeeñ. ²⁰ Waa Dedan it di say jula, indil la seen ndimoy tegi fas. ²¹ Waa Arabi ak mboolem garmiy Kedar it di julanteek yaw, feye la ay tàppaanga aki kuuy aki bëy. ²² Julay Saba ak Raama it di julaak yaw, di la indil ngèn-gi-safal ak mboolem peru gänjar, ak wurus yu ñuy weccikoo sa alal. ²³ Waa dëkk yii di Karan ak Kane ak Eden ñoom it di say jula, ñook julay Saba ak Asur ak Kilmàdd. ²⁴ Nooño doon say jula yu lay indil yérey tànnéef, ak turki yu yolet, ak yérey ràbb, ak malaan yu yànj, ak goj yu rawaasoo yu wér. ²⁵ Ay gaali Tarsis yu mag a daan yóbbu sam njaay.

Nga fees dell, diis gann fi digg xolu géej.

²⁶ Say joowkat waral la mbeex mi ne màww,

ba digg géej, teewul ngelawal penku damm la.

²⁷ Sa alal ja, sab yeb, sa njaay ma, sa niti géej, say mool, say jagalkat, say jaaykat,

ak mboolem sa dag yi ci sa biir,

ak mboolem sa gàngoor gi ci sa biir,

ñoo y tabbeendoo xolu géej keroog sa bésub jéll ba.

²⁸ Bu say mool yuuxoo,

tefes yaay riir,

²⁹ képp kuy njàbb joowu wàcce gaalam.

Nitu géejoo mboolem mool,

ñépp fi suuf lañuy taxaw.

³⁰ Noo lay jooyal,

di yuuxu yuux yu metti,

xéppoo suuf,

fèrènqu cib dóom.

³¹ Yaay tax ñuy nelu,

sol ay saaku di ko ñaawloo,

di la jooye naqaru xol ak yuux yu metti.

³² Nèey am tiis, yékkatil la kàddug jooy,

jooy la ne:

‘Ana dëkk bu mel ni Tir,

mi ñu wedamal nii biir géej?’

³³ Ba ngay yebbee géej sam koom,

yaa daan reggal ñu bare.

Sa alal ak sa koom gu bare nga woomale buuri àddina.

³⁴ Léegi rajaxoo nga biiri gannax ca biir xóotey géej,

sa koom ak sa gàngoor gi ci sa biir, lépp jóoru.

³⁵ Waa dunoo dun a la tiisoo,

seen yaramu buur ya dawa daw ba ñu ne yasar.

³⁶ Julay xeet yaa ngi muslu ci saw demin.

Raglu nga mujje,

te doo tekkeeti ba fàww!”»

28

Nguurug Tir foq na

¹ Kàddug Aji Sax ji dikkal na ma ne ma:

² «Yaw nit ki, waxal Boroom Tir, ne ko:

“Boroom bi Aji Sax ji dafa wax ne:

Dangaa fuuy ba naan:

‘Maay Yàlla, ji tooge toogub yàlla yi, fi xolu géej!’

Waaye yaw doom aadama nga, doo Yàlla, dangay yàlla-yàllalu rekk.

³ Xèy na yaa sut Dañeel am xel,

du genn kumpa gu la ump!

⁴ Sam xel ak sa manoore nga ame alal,

am wurus, am xalis,

yeb ci say denc.

⁵ Sa xelum jula mu réy nga yokke sa alal, alal ji tax laa fuuy.

⁶ Moo tax Boroom bi Aji Sax ji dafa wax ne:

Gannaaw dangay yàlla-yàllalu,

⁷ maa ngii di la indil ay làkk-kat,

yéefar yi géna néeg.

La nga sottale xel mu rafet, ñoo koy boccil saamar,

te ñoo yàq sab taar.

⁸ Pax lañu lay tàbbal,

nga deeyi xolu géej deewug ku ñu bóom.

⁹ Xanaa doo janook ki lay rey, naati yaay yàlla?

Boo tàbbee ca sa loxoy jamkat ya,
keroog nga noppee doon yàlla, di nitu
kese.

¹⁰ Deewug yéefar bu xaraful ngay deeye ci
loxol làkk-kat yi.

Man déy, maa ko wax!
Kàddug Boroom bi Aji Sax jee.”»

¹¹ Kàddug Aji Sax ji dikkalati ma ne
ma: ¹² «Yaw nit ki, yékkatilal buurub Tir
kàddug jooy! Nga ne ko: “Boroom bi Aji
Sax ji dafa wax ne:

Yaa matoon royukaay,
géejum xel, sottib taar.

¹³ Yaa nga woon biir Àjjana, toolub Yàlla
ba,

ràngoo lépp luy gànjari per,
sarduwan ak topaas ak jamaa ak kirsolit
ak onigsé ak jàspè ak safiir ak
emérodd ak eskarbukal.

Fegukaay yaak wewukaay ya di wurus,
te bés ba ñu la sàkkee, fekk na ñu waajal
yooyu.

¹⁴ Yaa doon malaakam serub mu ne ràññ,
di aare,

ma tabb la fa kaw tundu Yàlla wu sell wa,
ngay daagoo digg doj yuy tàkk.

¹⁵ Ba ñu la sàkkee, nga dale mat ci say
jëfin,

ba keroog njubadi di feeñ ci yaw.

¹⁶ Sa liggéeyu jula bu yaatu moo la feesal
fitna,

nga bàkkaar, ba ma nangoo sa tednga fa
tundu Yàlla wa,

sànk la, yaw malaakam serub miy aare,
nga jóge digg doj yuy tàkk.

¹⁷ Sab taar a la fuuyloo,
sa daraja tax nga yaq sam xel!

Fi suuf laa la rattax,
fi kanam buur yi laa la detteel, ñu di la
seetaan.

¹⁸ Sa ñaawtéef yu bare ak njublan gi ngay
julaa,

looloo teddadil sa jaamookaay yu sell,
ba ma jafale sawara fi sa biir,

mu xoyom la.
Maa la def ub dóom fi suuf,

ñépp di la xool.

¹⁹ Mboolem ñi la xam ci xeet yi,
seen yaram dina daw ci yaw.

Ku raglu ngay doon,
te doo tekkeeti ba fàww.”»

Waxyu dal na Sidon

²⁰ Kàddug Aji Sax ji dikkalati ma ne ma:

²¹ «Yaw nit ki, neel jàkk Sidon*, nga biral
waxyu fi kawam. ²² Neel:

“Boroom bi Aji Sax ji dafa wax ne:

Yaw Sidon, maa ngii fi sa kaw.

Dees na ma sargal fi sa biir,

ba ñu xam ne maay Aji Sax ji

ndax mbugal yi ma fiy wàccesi,
ba fésal fi sama sellnga.

²³ Maa fiy yebal mbas,
deret tuuroo mbedd yi,
saamar dajal dèkk bi,
bóom nit ñi, téral,
ba ñu xam ne maay Aji Sax ji.”

²⁴ «Su boobaa waa kër Israyil, seen
dèkkandoo yi leen di sewal,
dootuñu leen lèjal ni dagg yu ñaw ak
dég yuy jame.

Su boobaa ñu xam ne maay Boroom bi Aji
Sax ji.

Aji Sax jeey yiwi Israyil

²⁵ «Boroom bi Aji Sax ji dafa wax ne:
Bu may dajale waa kër Israyil, di leen jële
digg xeet yi ñu tasaaroo, ca laay fésal sama
sellnga fa seen biir, yéefar yi gis, ñu dèkke
seen suufas bopp, sa ma joxoon Yanqóoba
sama jaam ba. ²⁶ Xel mu dal lañu fay
dèkke, tabax fa ay kër, jèmbat seeni reseñ.
Bu ma wàccееее ay mbugal mboolem ñi
leen di sewal te séq leen, dinañu dèkke ba
xam ne maay seen Yàlla Aji Sax ji.»

29

Waxyu dal na Misra

¹ Ca fukkeelu at ma, fukki fan ak ñaar ca
fukkeelu weer wa, kàddug Aji Sax ji dikkal
na ma ne ma: ² «Yaw nit ki, neel jàkk
Firawna buuru Misra, nga biral waxyu fi
kawam ak fi kaw Misra gépp. ³ Waxal, nga
ne: “Boroom bi Aji Sax ji dafa wax ne:

Maa ngii fi sa kaw, yaw Firawna buuru
Misra,

yaw ninki-nànka ju mag ji goore sa diggi
dex,

te naan: ‘Maa moom sama dex,
man ci sama bopp maa ko sàkk!’

⁴ Waaye maay we ay lonku ci say ñaam,
jël sa jëni waltan,

ñoyal leen ci say waasintóor,
diree la say waltan,

sa jëni waltan yépp ñoy ci say waasintóor.

⁵ Ma wacc la ca màndiñ ma,
yaw yaak mboolem sa jëni waltan.

Ci àll bi nga naa ñàyy,
deesu la for, deesu la fat.

Dundooti àll beek njanaaw yi, yaw laa leen
di leele,

⁶ ba waa Misra gépp xam ne maay Aji Sax
ji.

«“Seen ndimbal ak Israyil mooy ndimbalu
bantu barax,

⁷ ñu jafandu ko, mu ne tàllit,
ne xureet mbagg yépp,

ñu wéeroo ko, mu ne tipp,

* 28:21 28:21 Sidon dèkk la bu bootu woon ci Tir, ca wetu bëj-gànnaram.

ndigg yépp récc.

⁸ «“Moo tax Boroom bi Aji Sax ji dafa wax ne:

Yaw Misra, maa ngii di la indil saamar, ba dagge fi yaw nit ak mala.

⁹ Réewum Misraay gental, di ndànd-foyyoy,

ba ñu xam ne maay Aji Sax ji.

Moo ne: ‘Dex gi maa ko moom, man maa ko sàkk!’

¹⁰ Moo tax maa ngii fi sa kaw, yaak say wali dex.

Maay def réewum Misra gent bu ne seren, mu gentale Migadol ca bëj-gànaar, ba Asuwan,

fa mu digalook réewum Kuus ca bëj-saalum.

¹¹ Tàнку doom aadama du fa jaare,

tàнку mala du fa jaare,

te deesu fa dëkke diiru ñeent fukki at.

¹² Maay def Misra gëna gental ci réew yi gental,

ay dëkkam gëna gental ci dëkk yi diiru ñeent fukki at.

Maay tasaare waa Misra ci biir xeet yi, wasaare leen ci biir réew yi.

¹³ Boroom bi Aji Sax ji déy dafa wax ne:

Bu ñeent fukki at yi matee, ma dajalee waa Misra fa digg xeet ya ñu tasaaroo woon.

¹⁴ Ca laay tijjee wërsëgu Misra, delloo leen réewum Patros ca bëj-saalum,

seen réewum cosaan,

ñu doon fa nguur gu suufe,

¹⁵ gëna suufe ci nguur yi,

ba dootuñu damu fi kaw xeet yi.

Maa leen di tuutal ba dootuñu yilif xeet yi.

¹⁶ Waa kër Israyil dootuñu yaakaar Misra, xanaa ñuy fàtliliku na ñu ñaawe woon démb,

ba ñuy làqoo waa Misra,

te dinañu xam ne maay Boroom bi Aji Sax ji.”»

¹⁷ Ca ñaar fukkeelu at maak juróom ñaar, benn fan ca weer wa jëkk, kàddug Aji Sax ji dikkal na ma, ne ma: ¹⁸ «Yaw nit ki, Nabukodonosor buuru Babilon teg na mbooloom xareem, coono bu metti ca seen xareek Tir. Seen kawari bopp yépp ruus na, seen wagg yépp tēccu, te coonoom ba mu sonn ca Tir, yooloowu ca dara, du moom, du ay nitam.

¹⁹ «Moo tax Boroom bi Aji Sax ji dafa wax ne:

Maa ngii di jox réewum Misra, Nabukodonosor buuru Babilon,

mu yóbbu alal ja,

wéq ko ba mu set,

sëxëtoo mboolem lu mu amoon,

muy peyooru mbooloom xareem,

²⁰ di yoolu coonoom.

Maa ko jox réewum Misra,

feye ko la ma ay nitam liggéeyal.

Kàddug Boroom bi Aji Sax jee.

²¹ Bésub keroog maay yokk dooley waa kër Israyil,

yaw nit ki, ma jox la sañ-sañu àddu fi seen biir.

Su boobaa ñu xam ne maay Aji Sax ji.»

30

Babilon song na Misra

¹ Ba loolu amee kàddug Aji Sax ji dikkal ma ne ma: ² «Yaw nit ki, jottliil waxyu! Neel: “Boroom bi Aji Sax ji dafa wax ne:

Jooyleen, ne: ‘Wóoy bii bés!’

³ Bés jubsi na déy,

bésub Aji Sax ji jubsi na!

Bésub xambaar, jantub xeet yi.

⁴ Saamar ay dikkal Misra,

fépp di jal-jal ba ca Kuus,

aw nit, ñu bóom ca Misra,

nangu alalu réew ma,

kenu ya mább.

⁵ Waa Kuus ak Puut ak Ludd

ak xeet yu raxe yépp ak waa Libi,

boole ci ñenn ci réewum kóllère gi,

ñoom ñépp saamar lañuy fàddoo.

⁶ «“Aji Sax ji dafa wax ne:

Wéeruwaayi Misra ya day jóoru,

doole ja Misray sago ñiis;

la dale Migadol ba Asuwan, saamar lañuy fàddoo.

Kàddug Boroom bi Aji Sax jee.

⁷ Ñooy gëna wéet ci réew yi,

seeni dëkk gëna gentel ci dëkk yi.

⁸ Bu ma taalee Misra,

ba wéeruwaayam yépp rajaxoo,

dinañu xam ne maay Aji Sax ji.

⁹ Bésub keroog dees na dugg ay gaal, génn ci sama ndigal,

ngir indil tiitaange réewum Kuus ma ne finaax,

muy seen jal-jal keroog bésub Misra ba.

Bés baa ngii déy di dikk!

¹⁰ «“Boroom bi Aji Sax ji dafa wax ne:

Maay jeexal mbooloom Misra mu réy, jaare ko ci Nabukodonosor buuru Babilon.

¹¹ Mooy ànd ak ñoñam,

di ñi gëna néeg ci yéefar yi,

dikk yaqtesi réew mi;

ñooy bocci Misra saamar,

ba feesal réew mi ay néew.

¹² Maay def wali Niil ag joor,

maay jaay réew mi nit ñu aay.

Maay alag réew meek li ci biiram,

jaare ko ci ay doxandéem.

Man Aji Sax ji, maa ko wax.

13 «Boroom bi Aji Sax ji dafa wax ne: Maay sànk kasaray tuur yi ak yállantu ya ca Memfis.

Buur dootu tooge jalu réewum Misra, te maay indi titaange biir Misra.

14 Maay yaqte Pattros, taal dëkk bi ñuy wax Cowan, ba sottal sama mbugal ci kaw dëkk bi ñuy wax No.

15 Maay sottil sama xadar Ciin, rawtub Misra,

te maay tenqi gàngooru No.

16 Maay taal Misra, dëkk ba ñuy wax Ciin di rag-ragi; dëkk ba ñuy wax No, ñu bëtt ko; Memfis, noon yi nangu ko digg bëccëg.

17 Xaleli góori On ak Pi Beset, saamar lafiuy fàddoo,

waa dëkk yooyu ca des njaam lañu jëm.

18 Bu ma dogee sidditi Misra, ba doole ja muy sago ñiis, jant dootu fenkal Tapanes, aw xiin ay sàng dëkk bi, te dëkk-dëkkaanam ya, njaam lañu jëm.

19 Nii laay wàccéele Misra ay mbugal, ba ñu xam ne maay Aji Sax ji.»

Doole réer na Misra

20 Ca fukkeelu at maak benn, juróom ñaari fan ca weer wa jëkk, kàddug Aji Sax ji dikkal na ma ne ma:

21 Yaw nit ki, damm naa pèrëgu Firawna buuru Misra, mu ngii, deesu ko takk, ba mu faju, deesu ko lëmës, ba mu mana ñàbb saamar.

22 Léegi nag Boroom bi Aji Sax ji dafa wax ne:

«Maa ngii fi kaw Firawna buuru Misra. Ñaari pèrëgam yépp laay damm;

bu baax beek bi damm ba noppi, maay waddal saamaram bi ci loxoom,

23 maay tasaare Misra fi biir xeet yi, wasaare leen fi biir réew yi.

24 Maay dooleel pèrëgu buuru Babilon, teg sama saamar ci loxoom,

gannaaw ba ma dammee pèrëgi Firawna, muy binni binniy ku ñu jam fi kanamam.

25 Maay dooleel pèrëgi buuru Babilon moos,

pèrëgi buuru Misra yoqi.

Maay teg sama saamar ci loxol buuru Babilon,

mu xacciil ko réewum Misra, ba ñu xam ne maay Aji Sax ji.

26 Maay tasaare Misra fi biir xeet yi, wasaare leen fi biir réew yi, ba ñu xam ne maay Aji Sax ji.»

31

Ponkal daanu na

1 Ba loolu amee ca fukkeelu at maak benn, benn fan ca ñetteelu weer wa, kàddug Aji Sax ji dikkal ma ne ma: 2 «Yaw nit ki, waxal Firawna buuru Misra ak gàngooram, ne ko:

“Ana koo neexool daraja?”

3 Asiree ngoog, garabu seedar la woon ca Liban,

rafeti bànqaas, naatalub gott, siggi ca kaw, njañ lay àkki niir ya.

4 Bèti ndox suuxat ko, ndoxi xoote yi mággal ko,

wal ma dajaloo ca reen ya, doxe fa yónee garabi àll bi yépp ay waltan.

5 Moo ko taxa sut garabi àll bi, ay bànqaasam sèq, car ya lawa law ndax ndox mi koy ballal a ne xéew.

6 Picc yépp ay tàgge ay caram, rabi àll yépp di jure fa suufam, askanoo askan wu mag di tooge keram.

7 Taaram a nga ca taxawaayam ak guddaayu caram ya,

ngir reenam ba sóoboo ndox mu ne xéew.

8 Du genn garabu seedar ca toolub Yàlla, gu ko yóbbuloo dara,

du garabu sippar yu ko niruy car,

mbaa garabu palataan bu ko niruy bànqaas.

Du genn garab ci toolub Yàlla, gu taaroo ni moom.

9 Maa ko rafetale njañam lu sèq,

ba garabi Àjjana, toolub Yàlla bi, ñoom ñépp ñee ko!

10 «“Moo tax Boroom bi Aji Sax ji dafa wax ne: Yaa siggi woon ca kaw, kii la njañam àkki woon niir ya, muy damoo taxawaayam. 11 Maa koy jébbal ku jiite ay xeet, mu fey koo fey coxoram, ma dàq ko.

12 Ay doxandéem a dikk, bokk ci xeet yi gèna néeg, gor ko, wacc, ay bànqaasam wadde kaw tund yeek xur yi, ay caram dammtoo ci xuntiy àll bi yépp, waa réew yépp dawé keram, wacc ko, 13 picc yépp di tage peram bi tédđ fi suuf, rabi àll yépp di goore caram yi fi suuf. 14 Su boobaa genn garab gu feggook ndox dootu siggi ca kaw, ba njañ lay àkki niir ya, genn garab dootu mändim ndox, bay damu ci kawi moroomam. Ñoom ñépp déy lañu àppal ndee, ñu jëm xóotey suuf, tédđi biir bàmmeel ni waa àddina sépp.

15 «“Boroom bi Aji Sax ji dafa wax ne: Bés ba seedar ga tàbbee njaniiw, maa dogal ag ñaawlu: Maa sàng xóote ya ndax moom, téye dexi biir suuf, wali ndox yi noon xéew, taxaw. Maa ñaawluoo gottub Liban ci loolu, garabi àll bi yépp doxe ca lax. 16 Maa def xeet yi dégg jéllu seedar gi, di lox, ba ma ko tàbbalee njaniiw, boole kook mboolem ñuy tàbbim pax, ba

mboolem garabi Àjjana gëna taaru, ak yay ngëneeli Libañ, ak mboolem ya màndim ndox, ñoom ñépp di fa muñe seen demin, la seedar ga teew ni ñoom biir xóotey suuf.
 17 Ñoo bokk ak seedar gi wàcci njaniiw, ànd caak ña fa saamar tèral, ñoom ñi ko doon dooleel, xeet yi daan tooge keram.
 18 Ana kan nga neexool teddngaak daraja ci biir garabi Àjjana? Ndaxam dees na la booleek garabi Àjjana, tàbbal xóotey suuf. Yaay goorandook yéefar, yi saamar tèral. Loolooy deminu Firawnaaki gàngooram. Kàddug Boroom bi Aji Sax jee.”»

32

Jàmbaarú àddina, baadooloy njaniiw

1 Ca fukkeelu at maak ñaar, benn fan ca fukkeelu weer waak ñaar, kàddug Aji Sax ji dikkal na ma ne ma: ² «Yaw nit ki, yékkatil kàddug jooy, ñeel Firawna buuru Misra. Nga ne ko:
 “Dangaa meloon ni waxambaanew gaynde ci biir xeet yi,
 mel ni ninki-nànkay biir géeej,
 di fettaxe say wal,
 di wéquy nêxal ndox mi,
 di tilimal dex gi.
³ Boroom bi Aji Sax ji dafa wax ne:
 Maa lay laaw sama caax fi biir ndajem xeet yu bare,
 ñu ñoddee la mbaal ma, génne.
⁴ Maa lay wacc fi suuf, sànni la ci àll bi, dèèl njanaaw yépp fi yaw,
 ba reggal rabi àll yépp ci saw yaram.
⁵ Maay lale tund yi sa suux,
 ba feesale xur yi sa jalu néew yi.
⁶ Maay nàndale suuf sa deret,
 mu wale ca tund ya,
 ba feesal yooni ndox yi.
⁷ Bu sa leer feyee, maay muur asamaan,
 lëndëmal ay biddiiwam,
 sànge jant bi aw niir,
 weer wi noppee leeral.
⁸ Mboolem leeri asamaan laay giimal fi sa kaw,
 ba teg lëndëm fi sam réew.
 Kàddug Boroom bi Aji Sax jee.
⁹ «“Maay jaqloo xeet yu bare,
 bu ma leen àggee sa musiba
 ci biir réew yoo xamuloon.
¹⁰ Saw demin laay tiitale xeet yu bare,
 ba seen yarami buur yi di dawa daw.
 Keroog sa bésuub jéll ba, bu may xàcci sama saamar fi seen kanam,
 duñu noppee lox, ku nekk ay xalaat bakkanu boppam.
¹¹ «“Boroom bi Aji Sax ji déy dafa wax ne:
 Saamaru buuru Babilon a lay dikkal.

12 Saamari jàmbaar laay tèrale sa mbooloo,
 ñoom ñépp bokk ci xeet yi gëna néeg,
 te ñooy sàggi sagub Misra;
 gàngooram gépp sànkú.
¹³ Maay faagaagal sa mboolem jur,
 gi feggook ndox mi ne xéew,
 ba tànkú nit dootu ko nêxal,
 wewu jur dootu ko nêxal.
¹⁴ Su boobaa ma dalal seeni ndox,
 dawal ndànk seeni wal nig diw.
 Kàddug Boroom bi Aji Sax jee.
¹⁵ Bu ma defee réewum Misra ab gent,
 ba réew mi feesoon, ne faraa,
 bu ma dumaa mboolem ku ci dèkkoon,
 su boobaa ñu xam ne maay Aji Sax ji.”

16 «Kàddug jooy a ngoog gu ñuy jooyi,
 janqi xeet yeey jooye yooyu jooy Misraak gàngooram gépp.
 Kàddug Boroom bi Aji Sax jee.»

Misra wéetul ca toroxteem

17 Ca fukkeelu at maak ñaar, fukki fan ak juróom ca weer woowa, kàddug Aji Sax ji dikkal na ma ne ma: ¹⁸ «Yaw nit ki, yuuxul mbooloom Misra, gungee ko seen jéll, ñook janqi xeet yu mag yi, ñu ànd tàbbiji xóotey suuf, fekk fa ña tàbbi woon pax. ¹⁹ Ne leen:
 “Misraa, ana koo èpp ub taar?
 Tàbbil, ñu boole laak paaxe yi tèral.”
²⁰ Fi digg ñi fàddoo saamar la waa Misra di tédde.
 Saamar ba génn na,
 ñu diri Misra, booleek gàngooram yépp yóbbu.
²¹ Biir njaniiw la jàmbaari xare yay tollu,
 di waxtaane Misraaki farandoom, naan:
 “Wàccsi nañu, ne lareet,
 Yéefar yi fàddoo nañu saamar!”
²² «Buurub Asiree nga faak gàngooram gépp,
 bàmmeeli xarekatam ña wër ko.
 Ñoom ñépp lañu jam, ñu fàddoo saamar.
²³ Seeni bàmmeel a nga féete fa xóotey xóote ya,
 ñu yéew bàmmeelu buurub Asiri.
 Ñoom ñépp lañu jam, ñu fàddoo saamar,
 te daan tiital waa réewum aji dund ña.
²⁴ «Buurub Elam a nga faak gàngooram gépp,
 seeni bàmmeel yéew bosam.
 Ñoom ñépp lañu jam, ñu fàddoo saamar.
 Paaxe lañu wàccaale xóotey suuf,
 te daan tiital waa réewum aji dund ña.
 Seen gacce lañu gálloo,
 ànd ak ñay wàcci biir pax.
²⁵ Buurub Elam kay a nga tédde ca biir ña ñu bóom,

mook gàngooram gépp, seeni bàmmeel yéew ko.

Paaxe yooyu yépp a fàddoo saamar, te daan tiital waa réewum aji dund ña. Seen gâce lañu gálloo, ànd ak ñay wàcci biir pax, ñu boole leen ak ña ñu bóom ab téraay.

²⁶ «Buuri Meseg ak Tubal a nga faak seen gàngoor gépp, seen bàmmeeli xarekat yéew leen. Paaxe yooyu yépp a fàddoo saamar, nde ñoo daan tiital waa réewum aji dund ña.

²⁷ Robaalesu leen ak jàmbaar ña ànd ak seen gannaayi xare, wàcci biir njaniiw, ñu gegen leen seen saamar, terale leen, te seen ay war seeni yax, nde ñoo daan tiital waa réewum aji dund ña.

²⁸ Waaye yaw itam Misra, yaa ngii rajaxoo fi digg yéefar yi, bokk ngaak ñi fàddoo saamar ab téraay.

²⁹ «Edom a nga fa, mooki buuram ak garmi yépp, seenug njàmbaar teewul ñu denc leen fa ñu denc ñi fàddoo saamar, ñu bokk ak paaxe yi ab téraay, ànd ak ña jëm biir pax.

³⁰ «Kàngami běj-gannaar yépp a nga fa, ak mboolem waa Sidon, ña ànd ak ña ñu bóom, tédði pax, te seenug njàmbaar doon tiitale démb, tey, ñu ànd ak ñi saamar bóom, tédðale seenug kéefar.

Ñoo ràngoo seen toroxte, ànd ak ñay wàcci biir pax.

³¹ «Ñoom la Firawna di gis, muñe leen deminu gàngooram gépp, moom mi fàddoo saamar, mooki nitam ak mbooloom mépp. Kàddug Boroom bi Aji Sax jee.

³² «Maa defoon Firawna di tiitale ci réewum aji dund ñi. Waaye tey moo bokk téraay ak yeneen paaxe yi fàddoo saamar, mook gàngooram gépp. Kàddug Boroom bi Aji Sax jee.»

33

Tabb nañu Esekiyel jongrukat

¹ Kàddug Aji Sax ji dikkal na ma ne ma: ² «Yaw nit ki, waxal ak sa bokk yi, nga ne leen: “Am réew, su ma wàccee xare ci kawam, waa réew ma tanne ci seen biir kenn, def ko seen jongrukat, ³ su

kooka séenee congum xare muy dikk ci réew mi, daldi wal liit gi, àrtu waa réew mi, ⁴ ku dégg baatu liit ga te fàgguwul, bu cong mi agsee ba yóbbaaale ko, mooy gàddu bakkanu boppam. ⁵ Gannaaw dégg na baatu liit ga, te taxu koo fàggu, mooy gàddu bakkanu boppam. Ku déggoon ba fàggu nag, moo musal boppam. ⁶ Su jongrukat ba séenee congum xare may dikk te walul liit ga, loolu waral waa réew mi fàgguwñu, ba cong ma agsi, ba rotal bakkanu kenn ca ñoom, su boobaa njubadiy jongrukat baa ko rotal, te bakkanu nit kooka, jongrukat ba laa koy topp.”

⁷ «Yaw nit ki nag, jongrukat laa la tabb, ñeel waa kër Israyil, ba boo déggee baat bu jibe sama gémmiñ, war leen koo artoo ci sama ndigal. ⁸ Bu ma nee ku bon ki: “Yaw ku bon ki, dee rekk mooy sa àtte,” te yaw waxuloo ko ko, àrtu ko ngir mu wacc yoonu mbonam, ku bon kooka aw ayam mooy àtteb deeyam. Waaye bakkanam, yaw laa koy topp. ⁹ Waaye yaw soo artoo nit ki ngir mu wacc yoonu mbonam, te taxu koo wacc yoonu mbonam, moom la aw ayam di àtteb deeyam, waaye yaw yaa musal sa bopp.

¹⁰ «Yaw nit ki, waxal ak waa kër Israyil, ne leen: “Ngeen ne dungeen mana mucc ndax seeni tooñ ak seen bàkkaar yu leen diis ba semmal leen?” ¹¹ Waxleen ne leen: “Giñ naa ko ci man miy dund, kàddug Boroom bi Aji Sax jee, awma bannex ci deewug nit ku bon. Sama bannex mooy mu wacc yoonu mbonam, ba dund. Kon yeen waa kër Israyil, waccleen, ngalla waccleen seen yoonu mbon. Ana lu jar ngeen di dee?”

¹² «Yaw nit ki, waxal sa bokk yi, ne leen: “Boroom njekki démb li, su tooñee tey, njekkam loola du ko musal. Ku bon ki itam, bu waccee yoonu mbonam, tey, mbonu démbam ga du ko lor. Boroom njekki démb li nag, su bàkkaaree, njekkal démbam la du ko may mu dund.

¹³ Doonte maa ne boroom njekk li dina dund moos, te gannaaw gi mu yaakaar njekkal démbam la, bay def safaan ba, su boobaa gépp njekkam ga woon, deesu ci bàyyi xel, te safaan bi mu def tey mooy doon àtteb deeyam. ¹⁴ Su ma nee ku bon ki: ‘Yaw dee rekk mooy sa àtte,’ mu mujj dèddu bàkkaaram, di jéfe njub ak njekk, ¹⁵ di delloo alalu tayle ju mu laajoon, di fey lu mu sàccoon, di jéfe dogali yoon yiy taxa dund, tey baña jéfe njubadi, su boobaa dina dund moos te àtteb dee toppu ko. ¹⁶ Mboolem lu mu bàkkaaroon, deesu ko ko bàyyil xel. Njub geek njekk gi mu mujje moo ko may mu dund.”

¹⁷ «Sa bokk yi nee ñu: “Ni Boroom biy doxale du noonu.” Te ñoom la seen doxalin dul noonu! ¹⁸ Boroom njekk li daal, su dëddoo njekkam di def njubadi, njubadi gaay doon àtteb deeyam. ¹⁹ Ku bon ki nag, su dëddoo mbonam, di jéfe njub ak njekk, loolaa koy may mu dund.

²⁰ «Yeen waa kër Israyil, ngeen ne: “Ni Boroom biy doxale du noonu.” Nit ku nekk daal, jëfinaam laa koy àttee.»

Jëf ju bon daane na Yerusalem

²¹ Ca fukkeelu atu ngallo ak ñaar, keroog juróomi fan ca fukkeelu weer wa, jenn waaya a récce ca jéllub Yerusalem ba, dikk ne ma: «Dëkk ba daanu na!» ²² Fekk na ngoon ga jiitu dikkam, Aji Sax ji teg ma loxo, ba tijji sama gémmiñ. Ba waa ja récc agsee fa man ca èllég sa ca suba, fekk na sama gémmiñ tijjiku, luuwatumaa.

²³ Gannaaw loolu kàddug Aji Sax ji dikkal ma ne ma: ²⁴ «Yaw nit ki, ñi dëkke genti réewum Israyil mii ñu ngi naan: “Ibraayma kenn la woon te moo moomoon réew mi. Kon nun ñiy ñu bare noo ko ci géna yey.” ²⁵ Kon nag nanga leen wax ne leen: “Boroom bi Aji Sax ji dafa wax ne: Yeen ngeen di boole yàpp ak deret di ko lekk, di wékki gët kasaray tuur, di tuur deretu jaamburi Yalla, ba noppi di moom réew mi? ²⁶ Yeen wóoluwuleen lu moy seen saamar, ngeen di def jëf ju siblu, ku nekk di jaalook jabaru moroomam, ba noppi di moom réew mi?” ²⁷ Wax leen ne leen: “Boroom bi Aji Sax ji dafa wax ne: Giñ naa ko ci man miy dund, ku nekk ci yeen ci biir gent yi, saamar lay fàddoo; képp ku nekk ci biir àll bi, rab yi laa koy jox, ñu lekk ko; te képp ku laqoo tata yeek xunti yi, mbas a koy rey. ²⁸ Maay def réew mi gent bu wéet, sagu réew mi sàggiku, tundi Israyil ne faraa, kenn du ca jaare. ²⁹ Bu ma defee réew mi gent bu wéet ndax seen mboolem jëf ju siblu, dinañu xam ne maay Aji Sax ji.”

³⁰ «Léegi nag, yaw nit ki, sa bokk yaa ngi lay waxtaane ci keppaari tata yi ak ci bunti kër yi. Ñu ngi waxante ci seen biir, ku nekk naa mbokkam: “Aycaleen nu dem dégluji gan kàddoo tukkee ci Aji Sax ji.” ³¹ Noonu la sama ñoñ di dajesee fi yaw, toogaanu la, di la déglu. Dañuy déglu say wax, waaye duñu ko jéfe muk. Lu neex lañuy wax waaye amin wu lewul rekk la seen xol di sàkku. ³² Dañu laa jàppe rekk ni boroom woy yu neex, ku neex baat, te mane xalam. Dañuy déglu say wax te duñu ci jéfe dara. ³³ Waaye sa wax jaa ngii di waaja sotti, te bu sottee dinañu xam ne ab yonent a ngi woon fi seen biir.»

34

Waxyu dal na sàmm su bon si

¹ Kàddug Aji Sax ji dikkal na ma ne ma: ² «Yaw nit ki, waxal waxyu fi kaw sàmmi Israyil. Biralal waxyu ci kaw sàmm soosu, ne leen: Boroom bi Aji Sax ji dafa wax ne: Wóoy ngalla sàmmi Israyil yiy sàmm seen bopp! Xanaa du jur gi, la sàmm si wara sàmm? ³ Yeen, nebbon ji, ngeen lekk; kawari jur gi, ngeen def yére, sol; li ci duuf, ngeen rendi, te jur gi sàmmuleen leen! ⁴ Yeen, li ndóol ci jur gi, leqliwuleen; li ci wopp, fajuleen; li damm, yeewuleen; li ci lajj, gindiwuleen; li réer, seetuleen. Doole daal ngeen leen yilife, di leen soxore. ⁵ Jur gi tasaaroo na ndax ñàkk ku leen sàmm, ñu mujj doon ndawal mboolem rabi àll yi. Tasaaroo nañu! ⁶ Sama gätt yaa ngi tambaambalu kaw tundo tund wu mag ak wu ndaw. Biir réew mi mépp la sama gätt yi tasaaroo. Kenn wërul, kenn seetul.

⁷ «Moo tax yeen sàmm si, dégluleen kàddug Aji Sax ji. ⁸ Mu ne: Giñ naa ko ci man miy dund. Kàddug Boroom bi Aji Sax jee. Gannaaw sama gätt yi ñàkk nañu sàmm, ba ñu di leen sèxétoo, ñu mujj di ndawal rabi àll yépp, te sama sàmm si wëruñu sama jur gi, sàmmuñu leen, xanaa di sàmm seen bopp, ⁹ gannaaw noonu la, yeen sàmm si, dégluleen kàddug Aji Sax ji. ¹⁰ Boroom bi Aji Sax ji dafa wax ne: Maa ngii di dal fi kaw sàmm si. Maay nangoo sama gätt ci seeni loxo, dakkal seenug sàmm, ndax ñu noppe sàmm seen bopp. Maay foqatee samag jur ci seeni sell, ba dootuñu leen ndawaloo.

¹¹ «Boroom bi Aji Sax ji déy dafa wax ne: Man ci sama bopp, maa ngii di wër samag jur, maa leen di seet. ¹² Ni ab sàmm di seete ag juram fu ñu tasaaroo, ni laay seete samag jur, ba xettlee leen mboolem fu ñu tasaarooji woon bésub ngélén bu lëndëm. ¹³ Maa leen di seeppe ci xeet yi, génnee leen ci réew yi, dajale leen, yóbbu leen seen suufas bopp. Maa leen di foral, sàmm leen kaw tundi Israyil ak biir xunti yaak mboolem fu ñu dëkke ci biir réew mi. ¹⁴ Ay parlu yu baax laa leen di forale, kaw tundi Israyil yu kawe ya di seen parluwaay. Foofa lañuy goore parluwaay yu baax, te ñax mu naat lañuy fore foofa ca kaw tundi Israyil. ¹⁵ Man mii maay foral samay gätt te maa leen di gooral. Kàddug Boroom bi Aji Sax jee. ¹⁶ Bu ci réer, maa lay seet; bu ci lajj, maa lay délloosi; bu ci damm, maa lay takkal; bu ci néew doole, ma leqli la. Waaye bu ci duuf, am doole, maa lay sànk, foral la li war ci yaw.

17 «Waaye Boroom bi Aji Sax ji dafa wax ne: Yeen sama gätt yi, maa ngii di ättesi diggante xar ak moroom ma, ak diggante kuuy yi ak sikket yi. 18 Xanaa fore parlu mu baax mi da leena doyul, ba ngeen di dëggaate li des ci seen parlu mi? Am naan ndox mu teey doyatu leen, ba bu ngeen naanee ba mändi, di wéguy nēxal ndox mi? 19 Luy ndeyi sama gätt yi ci des di fore li ngeen dëggaate, di naane ndox mi ngeen nēxal?

20 «Moo tax Boroom bi Aji Sax ji da leena wax ne: Maa ngi nii di ättesi diggante gätt bu duuf ak gätt bu yooy. 21 Gannaaw yeen wet ak mbagg ngeen di buuxee, di dañe seeni bëjjén mboolem gätt yu néew doole yi, ba tasaare leen ca biti, 22 man maay wallu samag jur, ba deesatu leen fadd te maay ätte diggante gätt ak moroom ma.

23 «Gannaaw loolu maa leen di waajalal ab sàmm bu leen di sàmm. Kookooy Daawuda sama jaam bi. Moom moo leen di foral, mooy doon seen sàmm. 24 Man Aji Sax ji maay doon seen Yàlla, Daawuda sama jaam bi mooy askanoo nguur fi seen biir. Man Aji Sax ji maa ko wax. 25 Maa fas ak ñoom kóllèreg jàmm, maay far ci réew mi wépp rab wu aay. Su boobaa ñu dëkke mändiñ mi ci xel mu dal, di fore bët biir gott bi. 26 Maa leen def ñuy barke, ñook fi wër sama tund wi, bu jotee ma tawal leen, te tawu barke lay doon. 27 Garabi àll bi di meññ, suuf si nangu, ñu dëkke seen suufas bopp ci xel mu dal. Bu ma dammee seeni jéng, xettli leen ci dooley ñi leen doon jaamloo, dinañu xam ne maay Aji Sax ji. 28 Dootuñu doon sèxètoom xeet yi, te rabi àll yi dootuñu leen lekk. Dañuy dëkke xel mu dal, te kenn du leen tiitalati. 29 Maa leen di sàkkal tóokèru jàmm ba ab xiif dootu fi lore ci réew mi, te dootuñu jànkoonteek kókkaliy yéefar yi. 30 Su boobaa ñu xam ne maay seen Yàlla Aji Sax ji ànd ak ñoom, ñoom ñuy waa kër Israyil sama ñoñ. Kàddug Boroom bi Aji Sax jee. 31 Yeen sama jur gi, sama juru parlu mi, yeenay nit ñi may sàmm, may seen Yàlla. Kàddug Boroom bi Aji Sax jee.»

35

Waxyu dal na Edom

1 Kàddug Aji Sax ji dikkal na ma ne ma: 2 «Yaw nit ki, neel jàkk tundu Seyir*, nga biral waxyu fi kawam. 3 Nga wax ko, ne ko: «Boroom bi Aji Sax ji dafa wax ne: Yaw tundu Seyir, maa ngii fi sa kaw. Maa lay dóor sama loxo, nar laa def gent bu wéet.

* 35:2 35.2 Seyir mooy réewum Edom, cosaanu Esawu sètub Ibraayma. † 35:10 35.10 ñaari làngi giir yi Israyil laak Yuda.

4 Say dëkk, jali doj laa koy def, nga gental, ba xam ne maay Aji Sax ji.

5 «“Dangaa masa bañ bànni Israyil. Ba musibay bànni Israyil taxawee, ba seen àppu mbugal mat sékk, yaa leen jañax ci kaw ñaawkay saamar.

6 Moo tax giñ naa ko ci man miy dund, kàddug Boroom bi Aji Sax jee, deret laa lay sange, deret topp la, ndegam bañuloo tuur deret, deret a lay topp.

7 Maay def tundu Seyir gent bu wéet, maa fay dagge nit ku fay génne ak ku fay dugge.

8 Maay feesaley tundam nit ñu ñu bóom, tundam yu ndaw aki xuram aki xunteem, fa la ñi fàddoo saamar naan lareet.

9 Ay gent yu gental fàww laa laay def, say dëkk, deesu ko dëkkeeti. Su boobaa ngeen xam ne maay Aji Sax ji.

10 «“Aji Sax ji nekk fi, nga naan:

‘Ñaari làngi giir yii† dëkke seen ñaari réew yii, maa leen moom, noo ciy teg loxo.’

11 Moo tax giñ naa ko ci man miy dund, kàddug Boroom bi Aji Sax jee, ni nga mbugale bànni Israyil ci sa biir mer, ak sa kiñaan ak sa mbañeel, ni laa lay mbugale.

Maay dogal sab ätte, ba xamal ñii maay kan.

12 Su boobaa nga xam ne man Aji Sax ji, maa dëgg sa jépp waxi ñàkk kersa ja nga nee:

‘Tundi Israyil a ngii ne tasar, dim sèxètoo mu ñu nu wèrségale.’

13 Yeenay damu fi sama kaw, di ma wax waxi reewande ju bare! Maa dëggal sama bopp.

14 Boroom bi Aji Sax ji dafa wax ne: Bu àddina sépp di bannexu, yaw, ab gent laa lay def.

15 Yaa doon bége suufas Israyil su gental. Noonu laa lay def.

Ab gent ngay doon, yaw tundu Seyir, yaak Edom gépp ba mu daj. Su boobaa ñu xam ne maay Aji Sax ji.”

36

Barke ñeel na tundi Israyil

1 «Yaw nit ki, waxalal waxyu tundi Israyil. Neel:

“Yeen tundi Israyil, Dégluleen kàddug Aji Sax ji.

2 Boroom bi Aji Sax ji dafa wax ne:

Gannaaw noon bee ne leen: ‘Ñaw!
Seen kawte yu yágg yii,
tey nooy boroom.’”

³ Kon waxal waxyu bii, ne leen: “Boroom
bi Aji Sax ji dafa wax ne:

Wet gu ne lañu leen same, yaqte leen,
ba ngeen mujj di moomeelu yéefar yi,

ñépp di leen jëw ak a tooge,

⁴ Kon nag yeen tundi Israyil,

dégluleen kàddug Boroom bi Aji Sax ji.

Boroom bi Aji Sax ji dafa wax ak tund yu
mag yeek yu ndaw yi,

ak xunti yeek xur yi,

ak ndànd-foyfoy yu wéet yeek dëkk yi
gental,

te xeet ya ñu dëkkal sèxëtoo leen, yab
leen.

⁵ Boroom bi Aji Sax ji nag dafa wax ne:

Maa ngii déy di waxe sama tangooru
fiiraange

ak xeet yi dul yawut, boole ci Edom
gépp,

ñoom ñi jiital seen xeebeel,

te suuf si ma séddoo, ñu aakimoo ko,

te di ko bége mbégte mu mat sékk,

ngir sèxëtoo parluy réew mi.”

⁶ Kon nag, waxalal waxyu suufas Israyil
te wax ak tund yu mag yeek yu ndaw yi
ak xunti yeek xur yi, ne leen:

“Boroom bi Aji Sax ji dafa wax ne:

Maa ngii di waxe fiiraange ak xadar
ndax toroxte gi leen xeet yi teg.

⁷ Loolu tax na Boroom bi Aji Sax ji dafa
wax ne:

Man maa giñ ne yéefar yi leen séq ñooy
tegoo toroxte.

⁸ «“Waaye yeen tundi Israyil, yeenay naat,
di meññal Israyil sama ñoñ,

te léegi ñu ñibbsi.

⁹ Maa ngii déy maak yeen,

maa leen di geesu,

ba ngeen ruuje, jiwe.

¹⁰ Maa leen di fulal aw nit, ci biir Israyil
gépp, ba mu daj,

ñu dëkkewaak dëkk yu mag yi,

tabaxaat bayaal yi.

¹¹ Maa leen di fulal nit ak mala,

ñu giir, nangule.

Maay def ñu dëkke leen na woon,

baaxe leen lu raw démb,

ba ngeen xam ne maay Aji Sax ji.

¹² Yaw suuf, maay doxloo nit fi sa kaw,

muy waa Israyil sama ñoñ,

ñu jagoo la, séddoo la,

te dootoo sabab seenug deele.”»

¹³ Boroom bi Aji Sax ji dafa wax ne:

«Nee ñu réewum Israyil mooy dëmm buy
dëmm boppam.

¹⁴ Kon yaay réew mu dootu dëmm,

bay reylu saw xeet.

Kàddug Boroom bi Aji Sax jee.

¹⁵ Dootuma la dégtal ñàkk kersay yéefar
yi,

dootoo dékku yabeelu xeet yi,

te dootoo reylu saw xeet,

kàddug Boroom bi Aji Sax jee.»

Israyil yeeslu, Yàlla di sell ba tey

¹⁶ Kàddug Aji Sax ji dikkalati ma ne ma:

¹⁷ «Yaw nit ki, ba waa kër Israyil dëkkee
seen suufas bopp, dañu koo sobeele seen

jikko ak seeni jëf, seen jëfin mel ni sagaru
sobe ci man. ¹⁸ Ma xépp leen sama xadar

ndax deret ji ñu tuur ci réew mi, ak
kasaray tuur yi ñu ko sobeele. ¹⁹ Ma

tasaare leen ci biir yéefar yi, ñu wasaaroo
fi biir réew yi. Seen jikko ak seeni jëf laa

leen àttee. ²⁰ Waaye fu ñu dem ca biir
yéefar ya, teddadil nañu fa sama tur wu

sell, nit ña di leen waxtaane, naan: “Ñii
de, ñoñi Aji Sax ji lañu, teewul réewam ma

lañu bàyyikoo nii.” ²¹ Ma daldi seet ci sama
teddngay tur wu sell, wi waa kër Israyil di

teddadil fi biir yéefar yi ñu fekki.

²² «Moo tax nanga wax waa kër Israyil,
ne leen: “Boroom bi Aji Sax ji dafa wax ne:

Yeen waa kër Israyil, li may waaja def, du
yeen laa ci seet, li ma ci seet mooy sama

teddngay tur wu sell, wi ngeen teddadil fi
digg yéefar yi ngeen fekki. ²³ Kon dinaa

fésal sama sellngay tur wu màgg, wi ñu
teddadil fi biir yéefar yi, sama tur wi

ngéen teddadil fi seen biir. Ci yeen laay
fésale sama sellnga, yéefar yiy gis, ba xam

ne maay Aji Sax ji. Kàddug Boroom bi Aji
Sax jee. ²⁴ Maa leen di seppce ci yéefar

yi, dajalee leen mépp réew, délloosi leen
seen suufas bopp. ²⁵ Maa leen di wis ndox

mu set, ngeen set. Mboolem seen sobe
ak mboolem seen kasaray tuur laa leen di

setalal. ²⁶ Maa leen di jox xol bu yees, te
xel mu yees laay def ci seen dënn. Xolu doj

bi laay roccee ci seen suux, weccee leen ko
xolu suux, ²⁷ te samam xel laay yeb fi seen

biir dënn, ba dogal ngeen mana topp sama
dogali yoon, di sàmm ak a jëfe sama àttey

yoon. ²⁸ Su boobaa ngeen mana dëkke
réew mi ma jooxon seeni maam, di sama

ñoñ, may seen Yàlla. ²⁹ Maa leen di musal
ci seen mboolem sobe, maay woo am pepp,

ful ko, te dootuma leen teg ab xiif. ³⁰ Maay
ful doomu garab ak meññeefum tool, ba

dootuleen am gaccey xiif fi digg yéefar
yi. ³¹ Su boobaa yeenay fàttliku seen jikko
yu bon yaak seen jëf ju baaxul. Su ko

defee ngeen jéppi seen bopp ndax seeni
ñaawtéef ak seen jëf ju siblu. ³² Du yeena

tax nag may jëfe noonu. Kàddug Boroom
bi Aji Sax jee. Na leen loolu wóor. Kon nag

waa Israyiloo, rusleen ba ne tott ci seeni
jëfin.”»

³³ «Boroom bi Aji Sax ji dafa wax ne: Bés bu ma leen setalee ba ngeen taggook seen mboolem ñaawtéef, dinaa delloo dëkk yu mag yi aw nit, gent yi tabaxewaaf. ³⁴ Mbooy gu wéet gi, dees na ko beyaaf, ba mu wuuteek wéetaay, ba képp ku fa jaare seede woon. ³⁵ Su boobaa dees na ne: 'Xool-leen miim réew, ak mbooy gi mu doonoon, tey mu naat ni toolub Ajjana! Dëkk yeet ay gent la woon, wéet, tojatao, tey ñu dabbli lépp, ba dëkke nii!' ³⁶ Su boobaa seen dëkkandooy yéefar yi fi des dinañu xam ne man Aji Sax ji maa tabaxaat dëkk yu mag yi tojatao woon, jëmbataaf mbooy gi. Man Aji Sax ji, maa wax te maay jéf.

³⁷ «Boroom bi Aji Sax ji dafa wax ne: Lii laay nangulaatal waa kër Israyil, defal leen ko: maay ful nit ñu niy gätt. ³⁸ Bu mäggal masaa am, Yerusalem day fees ak gätt yu ñuy rendi, sarxal. Nit ñuy dëkkewaaf genti tey yii, noonu lañuy baree. Su boobaa ñu xam ne maay Aji Sax ji.»

37

Israyil dekki na

¹ Gannaaw loolu loxol Aji Sax ji da maa dikkal. Aji Sax ji yóbboo ma Noowam, ba teg ma ca digg joor ga, fekk joor ga fees dell aki yax. ² Mu wërloo maa wërloo ca biir yax ya, ndeke yax yaa nga bare lool te wow koññ ca biir joor ga. ³ Mu ne ma: «Yaw nit ki, ma ne, yii yax man naa dundaaf a?» Ma ne ko: «Boroom bi Aji Sax ji, loolu de, yaw doññ fi ko xam.» ⁴ Mu ne ma: «Waxal waxyu fi kaw yax yii, ne leen: «Yeen yax yu wow yi, dégluleen kàddug Aji Sax ji: ⁵ Boroom bi Aji Sax ji dafa wax yax yii, ne leen: Maa ngii di leen sol ag noo, ngeen dund. ⁶ Maa leen di may ay siddit, saxal leen aw suux, sänge leen ab der, sol leen ag noo, ngeen dund, ba xam ne maay Aji Sax ji.» ⁷ Ma biral waxyu na mu ma ko sante. Naka laa biral waxyu rekk, coow daldi jib, ànd akum riir, fekk yax yaay booloo, bu nekk ak ba muy àndal. ⁸ Ma gis ay siddit taq ca, aw suux sax ca kaw, ab der dikk, tege ca kaw, te genn noo amu ca. ⁹ Mu ne ma: «Yaw nit ki, waxalal Noo gi waxyu, waxal ko waxyu ne ko: «Boroom bi Aji Sax ji dafa wax ne: Yaw Noo gi, bàyiyikool ñeenti yooni ngelaw yi te dikk, wal fi biir ñii ñu bóom, ba ñu dund.» ¹⁰ Ma def la mu ma sant, waxyu, noo ga dikk, duggsi, ñu dundaaf, jóg taxaw, di gàngoor gu baree bare.

¹¹ Mu ne ma: «Yaw nit ki, yax yii ñooy mboolem waa kër Israyil. Ñu ngi naan: «Nun de, ay yaxi neen yu wow koññ lanu, sunu yaakaar tas na, nun kay yaqu nanu.»

¹² Kon nag biralal waxyu, ne leen: «Boroom bi Aji Sax ji dafa wax ne: Yeen sama ñoñ, maa ngii di ubbisi seeni bàmmeeel, dekkale leen ca seeni bàmmeeel, délloosi leen kaw suufas Israyil. ¹³ Yeen sama ñoñ, bu ma ubbee seeni bàmmeeel, ba yékkatee leen ca seeni bàmmeeel, dingeen xam ne maay Aji Sax ji. ¹⁴ Maa leen di sol samag noo, ngeen dund, ma samp leen seen suufas bopp, ba ngeen xam ne man Aji Sax ji maa wax, maa def. Kàddug Aji Sax jee.»

Israyil, genn giir, benn buur

¹⁵ Ba loolu wéyee kàddug Aji Sax ji dikkal ma ne ma: ¹⁶ «Yaw nit ki, sàkkal aw dénk, nga bind ci kaw lii: «Ñeel Yuda ak giiri Israyil yi mu àndal.» Nga sàkkaaf weneen dénk, bind ci kawam: «Ñeel Yuusufa bantub Efrayim ak waa kër Israyil yi mu àndal,» ¹⁷ te nga boole ñaari dénk yi, ñu booloo, di wenn dénk ci sa loxo. ¹⁸ Bu la sa bokk yi laajee, ne la: «Xanaa doo nu wax lii lu muy tekki?» ¹⁹ nanga leen wax ne leen: «Boroom bi Aji Sax ji dafa wax ne: Maa ngii di jël dénk Yuusufa wi ci loxol Efrayim, mook giiri Israyil yi mu àndal, boole kook dénk Yuuda, daldi def lépp wenn dénk, ñu booloo di wenn ci sama loxo.»

²⁰ «Nanga ñàbb dénk yi nga bind, ñuy gis, ²¹ te nga wax leen ne leen: «Boroom bi Aji Sax ji dafa wax ne: Maa ngii di jëleji bànni Israyil ca biir xeet ya ñu fekki, dajalee leen wet gu nekk, délloosi leen seen suufas bopp. ²² Maa leen di def wenn xeet doññ ci réew mi, ci kaw tundi Israyil, ñoom ñépp bokk benn buur. Dootuñu doon ñaari xeet te dootuñu xàjjalikoo ñaari nguur. ²³ Dootuñu soebel seen bopp ci ay kasaray tuur, ak seen jéf ju siblook mboolem seeni tooñ. Maa leen di walloo ci mboolem seen ñàkk kòllère. Ma setal leen, ñu doon sama ñoñ, ma doon seen Yàlla.

²⁴ «Daawuda sama jaam baay doon seen buur, di seen bennub sàmm ñoom ñépp. Sama àttey yoon lañuy doxe, sama dogali yoon lañuy sàmm, di ko jéfe. ²⁵ Ñooy dëkke réew mi ma joxoon Yanqóoba sama jaam ba, te seeni maam dëkke woon ko. Ñu dëkke ko ñoom it, ñook seeni doom ak seeni sèt, ba fàww, te Daawuda sama jaam ba mooy doon seen boroom jal ba fàww. ²⁶ Maay fas ak ñoom kòllèreg jàmm, gu sax. Maa leen di samp, ful leen, maay samp sama bérab bu sell fi seen biir, ba fàww, ²⁷ sama dëkkuwaay nekk fi seen biir, may seen Yàlla, ñuy sama ñoñ. ²⁸ Bu sama bérab bu sell nekkee fi seen biir ba fàww, xeet yi dinañu xam ne man Aji Sax ji maa sellal Israyil.»

38

Kàdduy waxyu dal na Gog

¹ Kàddug Aji Sax ji dikkal na ma ne ma:

² «Yaw nit ki, neel jàkk Gog ma ca réewum Magog, boroom Meseg ak Tubal, te nga biral waxyu fi kawam. ³ Neel: “Boroom bi Aji Sax ji dafa wax ne:

Yaw Gog, boroom Meseg ak Tubal, maa ngi nii fi sa kaw.

⁴ Maa lay waññi, we say ñaam ay lonku, génne la yaak sa mbooloo mépp ak fas ak gawar,

ñépp gannaayu ba diis, di gangoor gu yaa, ak pakk yu mag ak yu ndaw,

ñépp mane saamar.

⁵ Waa Pers, waa Kuus ak waa Puut ay ànd ak yeen,

ñoom ñépp fàggoo pakk ak mbaxanam xare.

⁶ Gomeer indaale gangooram gépp, ak Bet Togarma ga ca catal bëj-gannaar, ak gangooram yépp, ñuy xeet yu takku, ànd ak yaw.

⁷ «Nanga waajala waajal, yaak mboolem sa ndaje mi dajesi fi yaw, nga doon seen wattukat.

⁸ Feek lu yàgg dees na la woo.

Bu ay at jalle ba jeex, yaay songi am réew mu nit ña récc saamar, ba jóge ci ay xeeti xeet, dajaji ca kaw tundi Israyil ya yàggoona wéet.

Ñoonoo seppikoo ci xeeti àddina yi, ñoom ñépp dèkksi fa ci biir xel mu dal.

⁹ Waaye yaa naa jàyy ni ngélén, mel ni aw xiin, muur réew mi, yaak sa gangoor yépp, ak xeeti xeet yi ànd ak yaw.

¹⁰ «Boroom bi Aji Sax ji dafa wax ne:

Bésub keroog ay xalaat dikkal la, nga mébét mébét mu bon,

¹¹ daldi ne: ‘Maay songi réew mu ne ñàpp, maay dali ca kaw waa réew mu ne finaax, dèkke xel mu dal,

te du tata ju wër fu ñu dèkke, ñoom ñépp, du buntu dèkk, du tëjukaayu bunt.’

¹² Yaay dikk ngir foqati, sèxëtoo sèxëtoo alal,

daldi aakimoo genti démb yu ñu dèkke tey, ña fa ne di mbooloo mu ñu seppée ci xeet yi,

am ug jur aki alal, te dèkke léegi digg àddina.

¹³ Waa Saba ak Dedan ak julay Tarsis, ak mboolem seeni boroom daraja ñoo lay wax ne la:

‘Nangu alal a la yékkatee?’

Sèxëtoo alalu xaree la taxa bàbbi sa gangoor,

ngir yóbbu xaalis ak wurus, nangu jur ak alal, ba dajalee ca xare ba koom gu takku?”

¹⁴ «Kon nag yaw nit ki, biralal waxyu, waxal Gog, ne ko: “Boroom bi Aji Sax ji dafa wax ne:

Bésub keroog déy, bu Israyil sama ñoñ sancsee xel mu dal, dinga ko yég,

¹⁵ ba bàyyikoo sa màkkaan, ca catal bëj-gannaar,

yaak xeet yu bare yu ànd ak yaw, ñoom ñépp war fas, di gangoor gu mag, mbooloo mu bare.

¹⁶ Yaay songi Israyil, sama ñoñ, mel ni aw niir, muur réew ma.

Fan yu mujj ya la loolu di am, maa lay yóbbu yaw Gog, ba ca réew ma ma séddoo.

Maa lay firndelee sama sellnga, ngir xeet yi gis, ba xam maay kan.

¹⁷ «“Boroom bi Aji Sax ji déy dafa wax ne: Yaw déy, laa doon wax bu yàgg, yonenti Israyil, sama jaam ña jottli ko ca yooya jant,

ñu biral waxyu ay ati at, ne maa lay dal-loo sama kaw ñoñ.

¹⁸ Bésub keroog, ba Gog di dalsi ca kaw réewum Israyil,

kàddug Boroom bi Aji Sax jee, sama xadaru mer ay fettax.

¹⁹ Sama fiiraange ak sama tangooru xadar laa birale ne:

bésub keroog déy, suuf dina yèngoo Israyil lool;

²⁰ jën ak njanaaw di lox fi sama kanam, ñook ndundati àll bi ak mboolem luy raam ak kuy nit fi kaw suuf.

Tund yi màbb, doji mbartal ya fàqandoo, tata yépp jóoroondoo.

²¹ Ca laay wool mbooloom Gog saamar fa sama kaw tund yépp,

kàddug Boroom bi Aji Sax jee, mbokk di jam mbokk saamar.

²² Maa koy mbugale mbas ak deret ju tuuru,

ak wali waameek doji yuur, ak tawub sawaraak tamarax, mooki gangooram,

ak xeet yu bare yi ànd ak moom.

²³ Maay biralee noonu sama màggaay ak sama sellnga,

maa niy xamlee sama bopp,

yéefar yu bare di gis,

ba xam ne maay Aji Sax ji.”»

39

Gàngooru Gog sànk u na

¹ «Yaw nit ki nag, waxal waxyu ci kaw Gog, nga ne: “Boroom bi Aji Sax ji dafa wax ne: Maa ngii fi sa kaw, yaw Gog, boroom Meseg ak Tubal. ² Maa lay waññi, yóbbu la, jële la catal bëj-gànnaar, yéége la kaw tundi Israyil. ³ Maay féle sa xala ci sa loxol càmmoñ, féle say fitt ci sa loxol ndijoor, waddal. ⁴ Ca kaw tundi Israyil ngay daanu, yaak mboolem say gàngoor, ak mbooloo yi ànd ak yaw. Tan yeek lépp luy njanaaw ak ndundati àll bi laa lay jox, leele la leen. ⁵ Ci biir àll bi nga naa lareet. Man de maa ko wax! Kàddug Boroom bi Aji Sax jee. ⁶ Maay yebal sawara fa Magog, ak fa waa dun ya dëkke jàmm, ba ñu xam ne maay Aji Sax ji. ⁷ Sama tur wu sell laay xamle fi digg Israyil sama ñoñ, di dootuma seetaan ñuy teddadil sama tur wu sell. Yéefar yi dinañu xam ne maay Aji Sax ji, ku Sell ku Israyil ki.

⁸ “Bés baa ngii di ñew te dina dikk, kàddug Boroom bi Aji Sax jee. Bés bii laa waxoon. ⁹ Waa dëkki Israyil ay génnandoo, booley ngànaay, xambëb taal; pakk bu mag ak bu ndaw, xalaak fitt, ngajjook xeej, taaloo ko diiru juróom ñaari at, ¹⁰ ba dootuñu taxani, dootuñu gori ca gott ya, gannaay ya lañuy taaloo, te ñooy futti ñu leen futti woon, di sèxètoo ña leen sèxètoo woon. Kàddug Boroom bi Aji Sax jee. ¹¹ Bés sub keroog laay may Gog ab pàkk, mu def ko sèg fi biir Israyil; mooy xuru jaarukaay wiy dog yoonu képp ku fa jaare, te féete yoonu penku wi jëm géēju Xorom ga. Fa lañuy rob Gog ak gàngooram gépp, ñu di ko wooye xuru Gàngooru Gog. ¹² Juróom ñaari weer waa kër Israyil di leen rob, ngir setal réew mi. ¹³ Waa réew mépp a leen di robandoo, te bés sub keroog ma darajaal sama bopp, ñu doxe ca siiw. Kàddug Boroom bi Aji Sax jee. ¹⁴ Dañuy tabb nit ñu fèetewoo di wër réew mi, ñu àndandook tukkikat yi, di rob néew yi des ci àll bi, ngir setal ko. Bu juróom ñaari weer yi jeexee ñu tàmbalee seetaat. ¹⁵ Wërkat yooyooy wër réew mi ba mu daj, ku ci gis yaxi nit, sàkk xàmmikaay ca wet ga, ngir robkat yi dikk, robi ko ca xuru Gàngooru Gog, ¹⁶ ba far am dëkk bu ñuy wooye Amona (mu firi Gàngoor). Noonu lañuy setale réew mi.”

¹⁷ «Yaw nit ki nag, Boroom bi Aji Sax ji dafa wax ne: Waxal picc yi ak mboolem njanaaw yi ak rabi àll yépp, ne leen: “Dajalooleen, jóge fu ne, dikk, dajesi ci sama sarax si ma leen di rendil, muy sarax su mag fa kaw tundi Israyil, ngeen lekk yàpp, naan deret. ¹⁸ Yàppu xarekat ngeen di lekk, naan deretu garmiy réew mi, ñooy seeni kuuy, aki tàppaanga aki bëy aki yëkk, ñoom ñépp mel ni juru yafal yuy fore jooru Basan. ¹⁹ Dingeen lekk

nebbon ba regg, naan deret ba màndi ci sama sarax si ma leen rendil. ²⁰ Sama ndab ngeen di regge méddu fas ak boroom watiir ak méddu jambaar ak méddu bépp xarekat.” Kàddug Boroom bi Aji Sax jee. ²¹ Maay biralal yéefar yi sama teddnga, yéefar yépp gis àtte yi ma dogal ak sama diisaayu loxo bi ma leen teg. ²² Bés sub keroog la waa kër Israyil di dale xam ne maay seen Yàlla Aji Sax ji.

Aji Sax ji ñoñal na sellngaam

²³ «Kon yéefar yi dinañu xam ne ñaawtéefi waa kër Israyil mo leen yóbbe ngallo ndax la ñu ma ñakke worma, ba ma xañ leen sama kanam, teg leen ci seen loxoy noon, ñu fàddoondoo saamar. ²⁴ Seeni sobeek seeni tooñ laa jéflanteek ñoom, ba xañ leen sama kanam.

²⁵ «Kon nag Boroom bi Aji Sax ji dafa wax ne: Léegi maay tijji wërsëgu Yanqóoba, maay ñeewante waa kër Israyil googu gépp, te maay fiire sama tur wu sell wi. ²⁶ Bu ñu dëkke seenum réew ci xel mu dal, kenn lèjalu leen, ñooy gaddu seen gacce, ak gépp ñakk worma gu ñu ma ñakke woon worma, ²⁷ Bu ma leen jëlee ci xeet yi, délloosi leen, maa leen di dajalee ca seen réewi noon yooya, maa leen di fésale sama sellnga, yéefar yu bare teg ci bët. ²⁸ Dinañu xam ne maay seen Yàlla Aji Sax, ji leen yóbbu woon ngallo ca yéefar ya, ba noppi délloosi leen seen suuf, te bawuma kenn gannaaw. ²⁹ Gannaaw bu ma walee waa kër Israyil sama noo, dootuma leen xañ sama kanam. Kàddug Boroom bi Aji Sax jee.»

40

Esekiyel gis na kër Yàlla gu bees

¹ Ba ñu duggee ca ñaar fukkeelu at maak juróom gannaaw ba ñu nu yóbboo ngallo, mu yemook fukki at ak ñeent gannaaw ba ñu nangoo Yerusaleem, bés sub keroog booba yemook fukki fan, loxol Aji Sax ji dikk na fi sama kaw. Mu yóbbu ma ba foofa. ² Ci biir peeñuy Yàlla la ma yóbbu ba réewum Israyil, wacce ma ci kaw tund wu kawee kawe. Mu am fa ca wetu bëj-saalum luy nirook tabaxi dëkk bu mag. ³ Ba mu ma yóbbu ba foofa, ma jekki yem ci nit ku am melow xànjari, ñabb buumu lëe ak yetu nattukaay. Ma nga taxaw ca buntu dëkk ba. ⁴ Waa ja ne ma: «Yaw nit ki, xoolal bu baax, teewlool say nopp te def sam xel ci mboolem li ma lay won. Ngir won la moo tax ñu indi la ba fii. Mboolem loo gis, nanga ko àgge waa kër Israyil.»

Natt nañu miir baak bunt ba féete penku

⁵ Ma jekki gis ab miir bu wër kër Yàlla gi ba mu daj. Waa jaa nga nàbb yetu nattuqaay bu gudde juróom benni xasab* yu teg yaatuwaayu catu loxo†. Mu natt talaayu miir ba, muy wenn yet, taxawaay ba it di wenn yet‡. ⁶ Mu dem ca bunt ba féete penku, yéeg déggastal ya, daldi natt guddaayu dëxu biir bunt ba, muy wenn yet. Benn dëx bi rekk, wenn yet la. ⁷ Néegi wattukat yi làng ak jaaruwaayu mbaaru bunt bi, bu ci nekk ab kaare la bu wetam di wenn yet. Diggante ñaari néeg yu nekk, miiru juróomi xasab moo ca dox. Dal-luwaayu mbaar ma ca biir, ab dëxam wenn yet la. ⁸ Mu natt dal-luwaayu mbaaru bunt ba ca biir; ⁹ muy juróom ñetti xasab, ay jënam dëlle ñaari xasab. Dal-luwaayu mbaar maa nga ca biir, janook néeg Yàlla ba. ¹⁰ Néegi wattukati bunt ba féete penkub kër Yàlla ga, ñett la wet gii, ñett wet gee, yépp tolloo, te jën yi leen séq ñoo tolloo yaatuwaay.

¹¹ Waa ja natt yaatuwaayu buntu mbaar mi, bu ubbikoo, muy fukki xasab, yaatuwaayu bunt bi di fukki xasab ak ñett, boo ci boolee jën yi. ¹² Fi janook bunti néegi wattukat, yi bindoo juróom benni xasab wet gu nekk, ab dëx a fa tédde xasab, talaayu dëx ba di xasab. ¹³ Mu natte mbaar ma ca xadd ba, diggante miiru biiru benn néeg, ak miiru biiru moroom, ma mu jækkaarloop, muy ñaar fukki xasab ab juróom. ¹⁴ Mu def ñaari jëni mbaar mi§ juróom benn fukki xasab, èttu kër Aji Sax ji féete mbaaru bunt bi wet gu nekk. ¹⁵ Diggante kanam mbaaru bunt ba, ba fa dal-luwaayu mbaar ma jeexe, juróom fukki xasab la. ¹⁶ Néegi wattukat yi ak seeni jën am nañu ay palanteeri biir yu ànd aki caax, te wër néeg yi ba dajal. Dal-luwaayu mbaaru bunt bi itam am ay palanteeri biir yu wër ba dajal. Jën wu ci nekk, ay nataali garabi tándarma lañu ñaas ca kawam.

Natt nañu èttu biti ba

¹⁷ Waa ja yóbbu ma, ba ca èttu biti ba. Mu am fa ab dër bu dajal ètt ba, fanweeri néeg séq ko. ¹⁸ Dër ba daa wër mbaari bunt yi waaye dëru èttu biti bi nag moo gëna suufe bu èttu biir ba. ¹⁹ Waa ja natt diggante mbaaru bunt ba féeteek èttu biti ba, ak mbaaru ètt ba féete biir, muy téeméeri xasab. Loola di wetu penku, mu teg ca bëj-gànnar.

Natt nañu bunt ba féete bëj-gànnar

* **40:5** 40.5 xasab ñeent fukki santimeetar laak juróom. † **40:5** 40.5 catu loxo bu digg-dóomu di juróom ñaari santimeetar ak genn-wáll. ‡ **40:5** 40.5 yet wi di ñetti meetar yu teg tuuti. § **40:14** 40.14 jëni mbaar yooyu jën yenuwul dara, dañoo taxaw noonu rekk.

²⁰ Mu natt guddaay ak yaatuwaayu mbaaru bunt ba féete bëj-gànnar, te jëm ca èttu biti ba. ²¹ Néegi wattukat ya ñu tabaxaale mbaar ma di ñett genn wet, ñett ca ga ca des. Dayoy jën yaak dal-luwaayu mbaar ma, mook yu buntu penku ba, ñoo bokk yem: guddaay ba di juróom fukki xasab, yaatuwaay ba di ñaar fukki xasab ak juróom. ²² Ay palanteeram ak dal-luwaayam ak nataali garabi tándarmaam it, lépp a bokk ak yu buntu penku ba dayo. Juróom ñaari déggastal ngay yéeg, janook dal-luwaayu ba. ²³ Niki buntu penku bi rekk, buntu bëj-gànnar ba daa janook bunt bay jállale ca èttu biir ba. Mu natt diggante ñaari bunt ya jækkaarloop, am téeméeri xasab.

Natt nañu bunt ba féete bëj-saalum

²⁴ Mu yóbbu ma wetu bëj-saalum, ma yem ci buntu bëj-saalum ba. Mu natt ay jënam ak dal-luwaayu mbaaram, dayo ya bokk ak yu bunt ya jiitu, di benn. ²⁵ Foofu itam am na ay palanteer yu wër dal-luwaayu mbaaru bunt ba ba mu daj, nirook yu jëkk ya. Dayo yeet di benn: juróom fukki xasab ci guddaay, ñaar fukki xasab ak juróom ci yaatuwaay. ²⁶ Juróom ñaari déggastal ngay yéeg dal-luwaay ba. Ay nataali garabi tándarma lañu ñaas ca kaw jën ya, wet gu nekk genn. ²⁷ Foofu it èttu biir ba am na bunt bu féete bëj-saalum. Waa ja natt diggante ñaari bunti bëj-saalum yi jækkaarloop, am téeméeri xasab.

Natt nañu bunt ya jëm èttu biir ba

²⁸ Waa ja jaarale ma ca buntu bëj-saalum ba, dugal ma ca èttu biir ba. Mu natt buntu bëj-saalum boobee, ay dayoom di benn. ²⁹ Néegi wattukatam yaak jënam yaak biir dal-luwaayu mbaar ma, lépp a bokk ak ya jiitu ay dayo. Mbaaru bunt ba ak dal-luwaayam am ay palanteer ba dajal, guddaayu mbaaru bunt ba di juróom fukki xasab, yaatuwaay ba di ñaar fukki xasab ak juróom. ³⁰ Néeg yu ndaw yi wër èttu biir bi ba mu daj, ñaar fukki xasab ak juróom la ci guddaay, juróom ci yaatuwaay. ³¹ Bunti dal-luwaayi mbaar yaa ngay ubbikoo ca èttu biti ba, ñu rafetale jën ya ay nataali garabi tándarma. Juróom ñetti déggastal lañu cay dugge.

³² Waa ja jaare penku, dugal ma ca èttu biir ba. Mu natt buntu penku boobu, dayo ya di benn. ³³ Ay néegam aki jënam ak biir dal-luwaay ba, lépp a bokk ak ya ca des ay dayo, juróom fukki xasab ci guddaay, ñaar fukki xasab ak juróom ci yaatuwaay.

Mbaaruu bunt ba ak dal-luwaayam am na ay palanteer ba dajal. ³⁴ Dal-luwaayu bunt baa ngay ubbikoo ca èttu biti ba, ñu ñaas ca kaw jëni bunt ba ay nataali garabi tãndarma, di ca dugge juróom ñetti dëggastal.

³⁵ Waa ja yóbbu ma ba ca buntu bëj-gànnaar ba. Mu natt ko, mu bokk ak ya jütu ay dayo. ³⁶ Bunt ba daa ànd aki néegam aki jënam ak dal-luwaayam ak palanteer yu ko wër, ba mu daj. Guddaay ba di juróom fukki xasab, yaatuwaay ba di ñaar fukki xasab ak juróom. ³⁷ Mbaaruu bunt baa ngay ubbikoo ca èttu biti ba; ay jënam am wet gu nekk nataali garabi tãndarma, te ñu di ca yéegge juróom ñetti dëggastal.

Natt nañu néegu carxal gi

³⁸ Am na néeg buy ubbikoo ci biir mbaaruu bëj-gànnaar ba féete biir. Fa lañuy raxase yàppu saraxu rendi-dóomal. ³⁹ Biir dal-luwaay boobu, ñeenti taabal a nga ca, ñaari taabal cat lu nekk. Ca lañuy rey juri sarax yi. Muy saraxu rendi-dóomal, di saraxu póotum bàkkaar, di saraxu peyug tooñ. ⁴⁰ Néegu peggu boobu ngay jëkka jot, soo jóge ca biti, ñaari taabal a nga fa, féeteek dëggastal yi ñuy yéegge buntu bëj-gànnaar bi ak yeneen ñaari taabal fa féeteek biir dal-luwaay ba. ⁴¹ Lépp di juróom ñetti taabal, ñeent wet gi ak ñeent wet gee, ñu di ca rendi. ⁴² Ñeenti taabali saraxu rendi-dóomal ba, doji yett lañu ko defare. Bu ci nekk di xasab ak genn-wáll, wet gu nekk, taxawaay ba di xasab. Ñu di ca teg juntuukaay yi ñuy rendee saraxu rendi-dóomal ak yeneen sarax. ⁴³ Ñu sàkk ay lonku yu gudde catu loxo, wërãle lonku ya ba mu daj ca biir, yàppu sarax ya di tege ca kaw taabal ya.

Natt nañu èttu biir ba

⁴⁴ Mu jãlle ma ca èttu biir ba. Ay néegi jàngkat a nga ca èttu biir ba, benn bi ci wetu mbaaruu bunt bëj-gànnaar bi, jàkkaarlook bëj-saalum, beneen néeg bi ci wetu mbaaruu buntu penku bi, jàkkaarlook bëj-gànnaar. ⁴⁵ Waa ja ne ma: «Néeg bii jàkkaarlook bëj-saalum ñeel na sarxalkat yi dénkoo dénkaneey kër Yàlla gi. ⁴⁶ Néeg bi jàkkaarlook bëj-gànnaar nag ñeel na sarxalkat yi dénkoo dénkaneey sarxalukaay bi. Nõoñu ñooy Leween ñi askanoo ci Cadog te bokkuñook kenn sañ-sañu jege Aji Sax ji, ngir liggéeyal ko.»

⁴⁷ Waa ja natt èttu biir ba, muy téeméeri xasab wet gu nekk. Sarxalukaay baa nga fa kanam néeg Yàlla ba.

Natt nañu néeg Yàlla ba

⁴⁸ Mu jãlle ma ca dal-luwaayu mbaaruu néeg Yàlla ba, daldi natt ñaari jëni dal-luwaay ba, muy juróomi xasab, wet gu nekk. Bunt ba di fukki xasab ak ñeent, ñaari weti biir mbaaruu ma di ñetti xasab, wet gu ci nekk. ⁴⁹ Dal-luwaayu mbaaruu mi gudde ñaar fukki xasab, yaatoo fukki xasab ak benn. Mu am dëggastal yu ñuy yéegge, jãll ca biir, ñaari jën séq ko, wet gu nekk, wenn.

41

¹ Ba loolu amee waa ja jãlle ma ba ca bunt néeg bu mag ba. Mu natt jën ya séq bunt ba, mu dëlle juróom benni xasab ci ñaari wet yépp. ² Yaatuwaayu bunt ba fukki xasab la, ñaari miiri wet yi ko séq, bu ci nekk di juróomi xasab. Mu natt néeg bu mag bi ci boppam, guddaay bi di ñeent fukki xasab, yaatuwaay bi di ñaar fukki xasab. ³ Moom nag moo jãll ca néegu biir ba, daldi natt jëni bunt ba, mu dëlle ñaari xasab, diggante ñaari jëni bunt bi di juróom benni xasab, yaatuwaayi ñaari miiri wet yi séq bunt bi, bu ci nekk di juróom ñaari xasab. ⁴ Mu natt néegu biir bi ci boppam, muy ñaar fukki xasab wet gi, di ñaar fukki xasab wetu néeg bu mag ba. Mu ne ma: «Fii mooy fu sell fee sell.»

Natt nañu toftalu néeg Yàlla bi

⁵ Mu natt miiru néeg Yàlla bi, mu dëlle juróom benni xasab, yaatuwaayu néegi wet, yi wër néeg Yàlla bi ba mu daj, bu ci nekk di ñeenti xasab. ⁶ Néegi wet yooyu ñetti taax yu tegloo la, tollook néeg Yàlla bi ab taxawaay, taax mu ci nekk di fanweeri néeg. Mu am ay cëslaay yu saxe ci miiru néeg Yàlla bi, te téye néegi wet yooyu, ba sésuñu rékk ci néeg bi ci boppam. ⁷ Taax mu la gëna kawe, gën laa yaatu, miir ba ànd ak moom gëna sew fi wër néeg Yàlla bi ba mu daj. Noonu lañuy yéegge ay dëggastal, jóge ci suuf, jaare ca taaxu digg ba, ba ca taax ma ca kaw.

⁸ Ma gis ne néeg Yàlla bi ab dëx a ko yenu, yenuwaale néegi wet yi wër néeg Yàlla bi, taxawaayu dëx bi di wenn yet wu mat, tollook juróom benni xasab. ⁹⁻¹⁰ Néegi wet yi, seen miiru biti dëlle na juróomi xasab. Ñu bàyyi diggante néegi wet yi ak taaxi sarxalkat yi, bérab wu tollook ñaar fukki xasab, wër néeg Yàlla bi ci ñetti wetam. ¹¹ Am na ñaari bunt yu sare ci néegi wet yi wër néeg Yàlla bi, jëme ci pegg bu dara amul. Benn bunt ba féete bëj-gànnaar; benn ba, bëj-saalum, yaatuwaayu pegg, bi wër néeg bi ba mu daj, di juróomi xasab.

Ber nañu ab tabax ca gannaaw

¹² Tabax bi féeteek dig-digalu feguwaay bi ci sowub néeg Yàlla bi, yaatuwaayam

juróom ñaar fukki xasab la, guddaayam di juróom ñeent fukki xasab, dëllaayu miir ba di juróomi xasab.

¹³ Waa ja daldi natt néeg Yàlla bi, guddaay bi di téeméeri xasab; la dale dig-digalu feguwaay ba, ba ca catu tabaxu sowu ba aki miiram itam di téeméeri xasab. ¹⁴ Kanamu néeg Yàlla bi féete penku téeméeri xasab la, boo ci boolee dig-digali feguwaay ya séq néeg Yàlla bi. ¹⁵ Mu natt yaatuwaayu tabax ba ca gannaaw te janook dig-digalu feguwaay ba, boole ca ñaari poot ya séq tabax ba, muy téeméeri xasab.

Bérab bu sell bi nag, muy néeg bu mag bi, di néegu biir bi, di mbaaru bunt bi jàkkaarlook ètt bi, ¹⁶ ak dëxi bunt yeek palanteeri caax yeek jaarukaay yi ci ñetti wet yépp, ak ci kanam dëx yi, lu ci nekk bant a ko lal. Ci suuf ak ci kaw miir bi ba ca palanteer ya it noonu, palanteer ya am ay caax. ¹⁷ Ci kaw buntu néeg Yàlla bi, ba ci biir néeg Yàlla bi, jëm biti, ak kaw miir bi ko wër, biir ak biti, lépp lañu natt. ¹⁸ Ñu yett ca miir ya ay malaakay serub ak garabi tândarma; ñaari serub yu ne, garabu tândarmaa nga ca digg ba, te serub bu ne am na ñaari kanam, ¹⁹ genn gi di kanamu nit, jublook genn tândarma, geneen gi di kanamu gaynde, jublook geneen tândarma. Noonu lañu wërlee néeg bi ba mu daj. ²⁰ Li ko dale ci suufu néeg bu mag bi, ba ci kaw bunt yi, ak ci miir yi, fépp lañu yett serub yeek tândarma yi. ²¹ Njëël bunt bi ak dëx bi, ak pegg yi ko téye ab kaare la. Buntu néegu biir bu sell ba it noonu la.

²² Sarxalukaay bi bant la, taxawaayam di ñetti xasab, guddaayam di ñaari xasab, yaatuwaayam di ñaari xasab. Mu ami coll akub tegukaay aki wet, lépp di bant. Waa ji ne ma: «Taabal jii mooy janook Aji Sax ji.»

²³ Buntub ñaari laf lañuy dugge ca néeg bu sell bu mag ba, di dugge beneen bunt bu ni mel ca néegu biir bu sell ba. ²⁴ Bunt yooyu, bu ci nekk ñaari laf yuy warangiku la. ²⁵ Ñu yett ca buntu néeg bu mag ba ay malaakay serub, ak garabi tândarma yu mel ni ya ñu yett ca kaw miir ya. Catu xaddu mbaaru bunt ba ca biti, aw dënk lañu ko def. ²⁶ Palanteeri caax yi ak miiri néegi wet yi ak miiri mbaar mi ak ca kaw catu xadd bay lang, wet gu ne, ay nataali tândarmaa nga ca.

42

Natt nañu taaxi sarxalkat yi

¹ Ba loolu amee waa ji jaarale ma buntu bëj-gannaar, génne ma ci èttu biti bi. Mu yóbbu ma wetu sowu, dugal ma ca

tabax ba janook dig-digalu feguwaay ba te sésook miiru biir ba ca wetu bëj-gannaar.

² Tabax boobu, guddaayam ci wetu bëj-gannaar ga féeteek bunt ba, téeméeri xasab la, yaatuwaay ba di juróom fukki xasab. ³ Ci genn wet tabax booboo ngi janook ñaar fukki xasab yu bokk ci èttu biir bi, geneen wet gi janook dëru èttu biti bi. Tabax bi def na ñetti sàppey taax yu tegloo. ⁴ Ci kanam néeg, yi féeteek èttu biir bi, am na jaarukaay bu yaatoo fukki xasab, guddu téeméeri xasab. Néeg yooyu wetu bëj-gannaar lañu cay dugge. ⁵ Ñaari taax ya ca kawam nag, mu ci nekk yaatuwaayam a yées ma ko féete suuf, ndax taax mu géna kawee moo èpp jaarukaay bu mu bàyyi fi kanamam. ⁶ Ñetti sàppey taax la yu amul ay jën ni néegi ètt bi ame ay jën. Moo tax ruumi taaxum kaw ma géna xat yoy taaxum digg ma, ak ma féete suuf. ⁷ Mu am miir bu làng ak néeg yooyu, tegale leen ak èttu biti bi, guddaayu miir bi di juróom fukki xasab. ⁸ Ndax néeg yooyu féeteek èttu biti ba, guddaay ba bëpp juróom fukki xasab la. Waaye sàppey néeg, ya sésook néeg Yàlla ba, guddaayam téeméeri xasab la. ⁹ Ca suufu néeg yooyu la am jaarukaayu penku bu jème ca biir néeg ya féete penku, boo jógee ca èttu biti ba.

¹⁰ Am na sàppeb néeg bu janook dig-digalu feguwaay ba, ak tabax ba ca gannaaw néeg Yàlla ba. Sàppeb néeg boobu ma nga làng ak miiru biti, yi yaatuwaayam féete penku. ¹¹ Mu ngi janook ab jállukaay. Sàppey néeg yooyu daa bindoo ni bi féete bëj-gannaar te bokk ak ñoom guddaay ak yaatuwaay, seeni bunt ak seeni dayo yépp di benn. ¹² Bunti sàppey néeg ya ca bëj-saalum it noonu la. Ca catal jaarukaay ba, ab bunt a nga fa, janoo màkk ak miir ba féete penku.

¹³ Ba loolu amee waa ji ne ma: «Néegi bëj-gannaar yeek néegi bëj-saalum yi janook dig-digalu feguwaay bi, ñooy néeg yu sell yi sarxalkat yi jege Aji Sax ji, di lekke sarax yu sell yee sell. Ca lañuy yeb sarax yu sell yee sell it, muy saraxu pepp yeek saraxu pootum bàkkaar yeek saraxu peyug tooñ yi, ndax bérab bu sell la. ¹⁴ Sarxalkat yi, bu ñu dugge ci bérab bu sell bi, dootuñu man daldi génni ci èttu biti bi. Ci néeg yii lañuy wacc seen yére yi ñuy liggéeyale Aji Sax ji, ndax yooyu yére yu sell la. Ñu solaat nag yeneen yére bala ñoo dellu ca ètt ba mbooloo may daje.»

Natt nañu miiru biti bu kër Yàlla gi

¹⁵ Ba waa ja nattee dayoy biir néeg Yàlla bi ba noppi, da maa jaarale ca mbaaru bunt ba féete penku. Mu tãmbali di natt bayaal bi wër kër gi. ¹⁶ Mu natte yet waa

wetu penku, lépp di juróomi téeméeri yet, yemook kilomeetar ak genn-wáll. ¹⁷ Mu natte yet wa wetu bėj-gànnar, lépp di juróomi téeméeri yet, ¹⁸ wetu bėj-saalum ba it, mu natte ko yet wa, muy juróomi téeméeri yet. ¹⁹ Mu walbatiku, natte yet wa wetu sowu, muy juróomi téeméeri yet. ²⁰ Noonu la natte miir bi ub bayaalu kër Yàlla gi ba mu daj, muy kaare bu wetam di juróomi téeméeri dayo, te teqale fi sell ak fi sellu.

43

Leeru Yàlla dellu na kèram

¹ Waa ja nag jiite ma ba ca bunt ba, bunt ba féete penku. ² Ma jekki gis leeru Yállay Israyil, mu dikke penku, ànd ak kàddu gu mel ni kàddug géey mbàmbulaan, suuf si di lèrxate fa leeram ga. ³ Moomu peeñu nirook peeñu ma ma jèkkoona gis ba may dikk ca yaqum Yerusalem, nirook ma woon ca tàkkal dexu Kebar. Ma daldi daanu, àdèpp sama kanam fa suuf. ⁴ Ba loolu amee leeru Aji Sax ja jaare ca buntu penku ba, dugg ca néeg Yàlla ba. ⁵ Ngelaw nag ne ma cas, yóbbu ma ca biir èttu biir ba, leeru Aji Sax ji jekki fees néeg ba. ⁶ Ma dégg kuy wax ak man ku féete fi biir néeg Yàlla bi, te fekk waa ji ma dugal a ngi taxaw fi sama wet ba tey. ⁷ Mu ne ma: «Yaw nit ki, sama màkkaanu ngàngunee ngi, bérab bii laay teg samay tãnk, di fi dèkke fi digg bànni Israyil ba fàww. Bu waa kër Israyil dellu teddadil sama tur wu sell, nòok seeni buur ci seen gànctu, ak seen néewi buur yi ñuy denc ci seeni jaamookaay. ⁸ Seen buur yi ñoo féetale seen dèxi bunt ak seen jèni bunt ci sama weti dèxi bunt ak sama jèni buntu kër. Miir donj a doxoon diggante sama kër ak seen kër. Noo def seen jéf ju siblu, ba teddadil sama tur wu sell, ma mer, faagaagal leen. ⁹ Léegi nag nañu ma sorele seen gànctu ak seen néewi buur yi, ndax ma mana dèkk fi seen biir, ba fàww.

¹⁰ «Yaw nit ki, waxal waa Israyil ni kër gi wara mel. Nañu kersawoo seeni ñaawtéef te ñu natt nataalu kër gi. ¹¹ Bu ñu kersawoo mboolem seeni jéf nag, nanga leen xamal bindu kër gi ak téralinam aki duggukaayam aki génnukaayam, bindam bépp, ak dogali yoon yi mu laaj yépp. Nanga bind lépp, ñu gis, ba mana sàmm mboolem bindu kër gi, ak mboolem dogali yoon yi mu laaj, te di ko jéfe. ¹² Ndigalu yoon yi jëm ci kër Yàlla gi ñu wara tabax mooy lii: ci kaw tund wi ak fi ko wër fépp, fu sella sell lay doon. Loolu mooy ndigalu yoon wi, ci wàllu kër Yàlla gi.»

Natt nañu sarxalukaay bi

¹³ Lii nag mooy dayoy sarxalukaay bi ciy xasab, xasab bu ci nekk tegu yaatuwaayu catu loxo. Toogub sarxalukaay bi féete suuf, taxawaayam xasab la, yaatuwaayam di xasab, mu ànd ak kéméjam gu ko wër ba mu daj, te taxawaayu kéméj gi tollook yaatuwaayu catu loxo. Toogub sarxalukaay bi noonu la bindoo. ¹⁴ Ñaari xasab a dox diggante toogu bi ci suuf, ba ci cat li ngay jèkka jot, te yaatuwaayu cat li di xasab. Neenti xasab a dox diggante cat li ngay jèkka jot, ba ca cat la ca kaw, te yaatuwaayam it di xasab. ¹⁵ Taxawaayu taalub sarxalukaay bi féete kaw ñeenti xasab la, ñeenti béjjén sampe ci ñeenti coll yi, coll wu nekk, benn béjjén. ¹⁶ Lakkukaayu sarxalukaay bi ab kaare la, wet gu ci nekk di fukki xasab ak ñaar. ¹⁷ Kon toogub lakkukaay bi fukki xasab ak ñeent la ci ñeenti wetam, dib kaare, kéméj gi wër toogu bi am taxawaayu genn-wàllu xasab, te toogub lakkukaay bi, wère lakkukaay bi cat lu yaatoo xasab. Dèggastal bi ñuy yéege ci sarxalukaay bi nag penku la féete.

Sàrtal nañu sarxalukaay bi

¹⁸ Waa ji ne ma: «Yaw nit ki, Boroom bi Aji Sax ji dafa wax ne: Lii mooy dogali yoon yi jëm ci sarxalukaay bi, bés bu noppee, ci wàllu saraxi rendi-dóomal, ak deret ji ñu ci wara tuur. ¹⁹ Sarxalkati Leween ñi askanoo ci Cadog, te jege ma, ngir di ma liggéeyal, kàddug Aji Sax jee, nanga leen jox yèkk wu ndaw, muy saraxu pootum bàkkaar. ²⁰ Nga sàkk ci deret ji, taqal ci ñeenti béjjéni sarxalukaay bi, ak ñeenti colli kaw gi ak ci kéméj gi ba mu daj, nga laabale ko sarxalukaay bi, defale ko ko njetlaayam. ²¹ Nga génne bérab bu sell bi yèkku saraxu pootum bàkkaar mi, te nga lakk ko bérab ba mu ware ci èttu kër Yàlla gi. ²² Bésuub ñaareel ba nanga indi ab sikket bu amul sikk, muy saraxu pootum bàkkaar bu ñuy laabale sarxalukaay bi; ñu laabale ko sarxalukaay bi, na ñu ko laabale woon yèkk wu ndaw wa. ²³ Boo ko laabalee noonee ba noppi, nanga sàkk aw yèkk wu ndaw wu amul sikk ak kuuy mu amul sikk. ²⁴ Nga boole indi fi kanam Aji Sax ji, sarxalkat yi suy leen xorom, ñu def leen saraxu rendi-dóomal, ñeel Aji Sax ji. ²⁵ Diiru juróom ñaari fan ngay joxe bés bu nekk ab sikketu pootum bàkkaar akaw yèkk akum kuuy, te na lu ci nekk mucc sikk. ²⁶ Diiru juróom ñaari fan lañuy def njetlaayal sarxalukaay bi, setal ko, doore ko sasu sarxalukaay bi. ²⁷ Bu àpp boobu matee, la ko dale ca bésuub juróom ñetteel ba, na sarxalkat yi joxe ci kaw sarxalukaay bi, seen saraxi rendi-dóomal, ak seen saraxi cant ci biir jàmm,

ma daldi leen nangul. Kàddug Boroom bi Aji Sax jee.»

44

Ay jagle ñeel na boroom jal bi

¹ Ba loolu amee waa ji delloo ma ca mbaar bitu bu kër Yàlla ba féete penku, fekk bunt ba tėje. ² Aji Sax ji ne ma: «Mbaar mii, buntam day dëkke tėje. Kenn du ko tijji, kenn du ci jaare ndax Aji Sax ji Yállay Israyil fii la duggé. Kon nag na tėje. ³ Boroom jal bi* nag, gannaaw mooy boroom jal bi, sañ na faa tooge, lekk fi kanam Aji Sax ji. Waaye ci dal-luwaayu mbaar mi lay duggé te fi lay génne itam.»

Jege bérab bu sell bi du wàllu ñépp

⁴ Gannaaw loolu waa ji jaarale ma ca buntu běj-gànaar ba ca kanam néeg ba, ma jekki gis leeru Aji Sax ji fees néeg Aji Sax ji. Ma daanu, dëpp sama kanam fa suuf. ⁵ Aji Sax ji ne ma: «Yaw nit ki, xippil, ubbil say nopp te def sa xel ci mboolem lu ma la wax ci wàllu dogali yoon yi jëm ci kër Aji Sax ji ak mboolem digali yoonam. Defal sa xel bu baax ci duggukaayi kër gi ak mboolem ginnukaayi bérab bu sell bi. ⁶ Nanga wax fippukati waa kër Israyil yii, ne leen: Boroom bi Aji Sax ji dafa wax ne: Yeen waa kër Israyil, seen jéf ju siblu ji jépp doy na sèkk. ⁷ Bu ngeen ma daan indil sama céru ñam, muy nebbon, di deretu sarax yi, dangeen di dugalaale sama biir bérab bu sell bi ay doxandéem yu xaraful, du ci jëm, du ci xol. Noonu ngeen sobeele sama kër gi. Fecci ngeen sama kólléreek yeen ndax seen jépp jéf ju siblu. ⁸ Dénkoowuleen dénkaane yi jëm ci sama yéf yu sell yii, xanaa di ko dénk ñeenen ñu koy dénkoo fi sama biir bérab bu sell bi.» ⁹ Boroom bi Aji Sax ji dafa wax ne: «Bépp doxandéem bu xaraful ci xol, xaraful ci jëm, bumu duggati sama bérab bu sell bi, muy doxandéem bu mu mana doon, bu dëkk ci biir bànni Israyil.»

Leween ñi am nañu seen wartéefi bopp

¹⁰ «Leween ñi ma sore woon ba bànni Israyil jàddee, ba dèddu ma, di topp seen kasaray tuur, ñooy gàddu seenu ay. ¹¹ Ay surga aki fara bunti kër rekk lañuy doon ci sama bérab bu sell bi, te ñooy tegoo liggéeyu kër gi. Ñooy rendil xeet wi saraxu rendi-dóomal, ak gépp jur gu ñuy sarxal, te ñooy nekk ci waawu xeet wi, di leen surgawu. ¹² Gannaaw ñoo doon dox diggante xeet week seen kasaray tuur, ba yóbbe leen ay wu leen gállankoor, maa leen gñal ne, kàddug Boroom bi Aji Sax

jee, ñooy gàddu seenu ay. ¹³ Buñu ma jege, di ma sarxalal, buñu jege sama lenn lu sell ak lu sella sell. Ñooy gàddu seen toroxte ak seen añu jéf ju siblu ji ñu def. ¹⁴ Waaye maa leen di def ñuy nit ñuy dénkoo dénkaaney kër gi ci mboolem liggéeyu bu mu laaj, ak mboolem lees di def ci biir.

Askanu Cadog am nañu seen wartéefi bopp

¹⁵ «Waaye sarxalkat yiy Leween, sètoo ci Cadog, te daa dénkoo dénkaaney bérab bu sell bi ba bànni Israyil jàddee, ñooñooy may jege, di ma liggéeyal; ñooy dikki fi man, di indi saraxi nebbon ak deret. Kàddug Boroom bi Aji Sax jee. ¹⁶ Ñoom donj ay dugg sama bérab bu sell bi, ñoom donj ay jege sama taabal, di ma liggéeyal, di dénkoo sama ndénkaane.

¹⁷ «Bu ñu dee jàll buntu èttu biir bi, yérey lée lañuy sol. Buñu sol ndimol kawaru jur, bu ñuy liggéey fu wees buntu èttu biir bi, jëm ca biir-a-biir. ¹⁸ Kaalag lée lanuy kaalawoo, tubéyu njiitlaayu lée lañuy jitaal, te duñu sol dara lu leen di ñaqloo. ¹⁹ Bu ñuy génn ca èttu bitu ba, ètt ba mbooloo may yem, nañu summi seen yére ya ñuy sarxale, fat yére ya ca néeg yu sell ya, daldi sol yeneen yére, ndax baña sédd mbooloo mi sellnga, di leen lor†.

²⁰ «Buñu watu nel, buñu jañu, waaye nañu dagg seen kawar ba mu yem. ²¹ Biiñ, bu ko benn sarxalkat naan, buy dugg ci èttu biir bi. ²² Ab jétun ak ku ñu fase, sarxalkat du ko jël jabar. Su dee janq bu askanoo ci waa kër Israyil mbaa ab jétun bu sarxalkat doon denc, sañ nañu koo jël. ²³ Sama ñoñ nag nañu leen rañneeloo lu sell ak lu sellul; te xamal leen lu set ak lu sobewu.

²⁴ «Bu jote amee, ñoom ñooy àtte, ba dogal àtte bi ci sama àttey yoon. Sama digal yeek sama dogali yoon yi jëm ci sama mággal yépp, ñoo koy sàmm, te sama bési Noflaay, ñoo koy sellal.

²⁵ «Nit ku dee nag, ab sarxalkat du ko jege, di sobeel boppam, ndare ki dee di baayam mbaa ndeyam, mbaa doomam ju góor, mbaa ju jigéen, mbaa doomam ndeyam ju góor mbaa ju jigéen ju amul jëkkër, ba mu sañ caa sobeel boppam. ²⁶ Su ni demee ba mu sobeel boppam, na setlu te négandiku juróom ñaari fan, doora dellu ca liggéeyam. ²⁷ Bés ba muy dellu ca èttu biir ba, ngir liggéey ca biir bérab bu sell ba, na indi saraxu pootum bàkkaar. Kàddug Boroom bi Aji Sax jee.

* 44:3 44.3 Seetal ci 34.23-24 ak 37.24-25. † 44:19 44.19 Aay na ci képp ku ñu sellalul, muy laal mbaa ñu di ko laalal lenn lu sell. Man na cee dee sax. Seetal ci 2.Samiyel 6.6-7.

²⁸ «Sarxalkat yi am nañu seen céru boope: man maay seen cér. Du jenn moomeel ju ngeen leen di jox ci suufas Israyil. Man maay seen moomeel. ²⁹ Saraxu pepp ak saraxu pootum bàkkaar ak saraxu peyug tooñ, ñoom ñoo koy lekk, te lépp lu ñu jagleel Aji Sax ji ci Israyil, ñoo koy moom. ³⁰ Li gën ci mboolem ndoortel meññeef, ak seen bépp jooxe ak bu mu mana doon, sarxalkat yee ko moom. Li gën ci seen notu sunguf, nangeen ko jox sarxalkat yi, ndax barke waccal seen kër.

³¹ «Gannaaw loolu mboolem lu médd mbaa lu ñu fàdd, muy boroomi laaf akug jur, sarxalkat yi duñu ko lekk.

45

Lu jëm ci suuf si ñu jagleel Aji Sax ji

¹ «Bu ngeen demee bay tegoo réew mi bant ngir séddoo ko, nangeen jooxeel Aji Sax ji dogu suuf bu gudde ñaar fukki junniy xasab ak juróom (25 000), yemook fukki kilomeetar ak ñett, yaatoo ñaar fukki junniy (20 000) xasab, yemook fukki kilomeetar ak genn-wáll. Suuf soosu sépp ba fa mu yem, lu sell lay doon. ² Biir pàkk boobu, nañu ci waccal bérab bu sell bi ab dénd bu kaare, wet gu nekk di juróomi téeméeri xasab, yemook ñaar téeméeri meetar ak juróom fukk; ak bayaal bu wër dénd bi, yaatoo juróom fukki xasab, yemook ñaar fukki meetar ak juróom wet gu nekk. ³ Ci biir dogu suuf bu mag boobu gudde ñaar fukki junniy xasab ak juróom (25 000) te yaatoo fukki junniy xasab (10 000), yemook juróomi kilomeetar ak xaajaat, ci ngay nattal bérab bu sell bi, di fu sell fee sell. ⁴ Bérab bu sell a ngoog bu ñuy sàkke ci réew mi, ñeel sarxalkat yiy liggéey ci bérab bu sell bi, tey jege Aji Sax ji, di ko liggéeyal. Foofu lañuy am ay kër te foofu lañuy beral ab pàkk bérab bu sell bi. ⁵ Beneen dénd bu gudde ñaar fukki junniy xasab ak juróom (25 000), yaatoo fukki junniy xasab (10 000), na ñeel Leween ñiy liggéeyal kër Yàlla gi, ngir ñu am dëkk yu ñu dëkke.

⁶ «Suufas dëkk bi, nanga ko àppal yaatuwaayu juróomi junniy xasab (5 000) ak guddaayu ñaar fukki junniy xasab ak juróom (25 000), mu làng ak dog bi ñu sàkkal bérab bu sell bi. Suuf soosu na ñeel waa kër Israyil gépp. ⁷ Boroom jal bi nag, nañu ko jagleel ñaari wet yi séq suufas bérab bu sell beek pàkkub dëkk bi. Suufas buur soosu jóge sowu ba gééj ga, jógeeti penku ba fa Israyil yem, na guddaayam

tollook guddaayu suufu giirug Israyil gu ci nekk. ⁸ Loolooy doon céru suufu boroom jal bi ci Israyil. Su ko defee boroom jal yi ma fal dootuñu xañ sama ñoñ suuf. Dañuy wacce giiri waa kër Israyil li des ci réew mi.

Sàrt yii war na boroom jal bi ci wàllu kër Yàlla gi

⁹ «Boroom bi Aji Sax ji dafa wax ne: Yeen ñiy tooge jalu Israyil, na doy nag! Coxor geek jaay-doole bi, baleen ko. Njub ak njekk ngeen war di jéfe. Bàyyileen di nangu sama alali ñoñ. Boroom bi Aji Sax jee ko wax. ¹⁰ Seen màndaxekaay na doon njub, efab nattukaayu sol-sotti di njub, seen bat bi ñuy natte lu ñuy xelli di njub. ¹¹ Na benn efa ak benn bat yem dayo, lu ci nekk wara def céru fukkeelu benn omer*, bi yemook ñaar téeméeri liitar ak ñaar fukk (220), mbaa téeméeri kilo ak juróom fukk (150). Te na benn omer di dayo bi ngeen di natte. ¹² Benn siikal, na wecciku ñaar fukki gera†, te boo boolee nattu ñaar fukki siikal, ak nattu ñaar fukki siikal ak juróom, ak nattu fukki siikal ak juróom, mu wara wecciku benn natt bi ñuy wax miin.

¹³ «Lii nag mooy doon seenub jooxe: muy bele, di lors, na doon seen benn céru juróom benn fukkeelu meññeef, di ñaari kilook genn-wáll ci téeméeri kilook juróom fukk yu nekk. ¹⁴ Su dee ag diw, bat bi ñuy natte lu ñuy xelli lañu koy natte, benn bat yemook fukkeelu natt bi ñuy wax omer, mbaa fukkeelu natt bi ñuy wax kor, di ñaari liitar yu tombal ñaar (2,2) ci ñaar téeméeri liitar ak ñaar fukk (220) yu nekk. ¹⁵ Ci wàllu parluy Israyil, benn ay génn ci ñaar téeméeri gätt yu ne, gätt yooyu ñeel saraxi pepp, ak saraxi rendi-dóomal, ak saraxi cant ci biir jàmm ngir njotlaayal askan wi. Kàddug Boroom bi Aji Sax jee. ¹⁶ Boobu jooxe, mboolem waa réew mee ciy def seen loxo, indil ko ki tooge jalub Israyil. ¹⁷ Li war ki tooge jal bi, saraxu rendi-dóomal ci la, ak saraxu pepp, ak saraxi biiñ yi ñuy joxe bésu mággal, yu mel ni mággal Terutel weer ak bési Noflaay, ak yeneen bés yu bànni Israyil taamoo daje. Moom it mooy joxe saraxu pootum bàkkaar, ak saraxu pepp, ak saraxu rendi-dóomal, ak saraxu cant ci biir jàmm ngir njotlaayal waa kër Israyil.

¹⁸ «Boroom bi Aji Sax ji dafa wax ne: Benn fanu weer wi jëkk, nanga jël yëkk wu ndaw wu amul sikk ngir laabal bérab

* 45:11 45.11 benn omer am na ñu jàpp ne mu ngi tollook ñeenti téeméeri liitar ak juróom fukk, mbaa ñetti téeméeri kilo. Natt yii, seeni dayo daan na soppiku, topp jamono yaak bérab ya ñu ko daan jëfandikoo. † 45:12 45.12 Moo doon natt ba génoona tuut ci wàllu diisaay, yemook genn-wàllu garaam.

bu sell bi. ¹⁹ Sarxalkat bi day sàkk ci deretu saraxu póotum bàkkaar boobu, taqal ci jëni bunt yi, ak ñeenti colli kaw sarxalukaay bi, ak jëni buntu èttu biir bi. ²⁰ Noonu it ngay def ca juróom ñaareelu fanu weer wa, ngir daboo ko nit ku jádd yoon te yégu ko mbaa teyu ko. Su ko defee ngeen def njotlaayal kër Yàlla gi.

²¹ «Fukki fan ak ñeent ci weer wu jëkk wi mooy seen màggalu bésu Mucc ba. Juróom ñaari fan la màggal giy am, te mburu mu amul lawiir lañu ciy lekk. ²² Bés boobu la ki tooge jal bi di joxeel boppam ak mboolem waa réew mi, yëkk wu ndaw wuy doon saraxu póotum bàkkaar. ²³ Juróom ñaari fan yooyu dina sarxal Aji Sax ji bés bu nekk juróom ñaari yëkk yu ndaw ak juróom ñaari kuuy yu amul sikk, def ko saraxu rendi-dóomal, ak ab sikketu sarax ngir peyug tooñ, bés bu nekk. ²⁴ Yëkk wu ci nekk ak kuuy mu ci nekk, da koy booleek saraxu benn efab† pepp, di fukki kiloy pepp ak juróom, ak efab pepp bu ne, benn xiinu diw, di ñetti liitari diw ak genn-wáll.

²⁵ «Ci wàllu màggal giy door fukki fan ak juróom ci juróom ñaareeli weer wi[§], na ki tooge jal bi def niki ci màggalu bésu Mucc ba. Juróom ñaari fan, yi màggal giy def, yenn sarax yooyii rekk lay joxe, muy saraxu póotum bàkkaar, ak saraxu rendi-dóomal, ak saraxi pepp ak diw.

46

¹ «Boroom bi Aji Sax ji dafa wax ne: Buntu èttu biir bi féete penku, na tėje diiru juróom benni fan yi ñuy liggéey. Waaye bésu Noflaay ba cay topp, na ubbiku. Bésu Terutel weer it, na ubbiku. ² Na ki ci jal bi jaare ci dal-luwaayu mbaar mi féete biti te na yem ci jëni buntu èttu biir bi. Na fa xaar sarxalkat yi def saraxu rendi-dóomal, ak saraxi cantam ci biir jàmm. Su ko defee mu sujjóot ci dëxu bunt bi, ba noppi, génn. Bunt bi nag du tėje ba ngon jot. ³ Bésu Noflaay ak Terutel weer, baadooloy réew mi ci bunt boobu lañuy sujjóote fi kanam Aji Sax ji.

⁴ «Saraxu rendi-dóomal, bi ki ci jal biy indil Aji Sax ji bésu Noflaay, juróom benni xar yu ndaw yu amul sikk lay doon, ak kuuy mu amul sikk. ⁵ Saraxu pepp biy ànd ak kuuy mi benn efa* lay doon, di fukki kiloy pepp ak juróom, ak dayob pepp bu mu àttan buy ànd ak xar yu ndaw yi ak xiinu diw, yemook ñetti liitari diw ak genn-wáll ci efab pepp bu nekk. ⁶ Bésu

Terutel weer, wenn yëkk wu ndaw lay doon wu amul sikk ak juróom benni xar yu ndaw akam kuuy, te lépp mucc sikk. ⁷ Na ci boole saraxu benn efab pepp buy ànd ak yëkk wi, ak benn efab pepp ngir kuuy mi, ak lu mu man ci pepp, mu booleek xar yu ndaw yi, ak benn xiinu diw ci efab pepp bu nekk.

⁸ «Dal-luwaay bunt, bi ki ci jal biy jaare duggsi, fi lay jaare génn. ⁹ Baadooloy réew mi nag bu ñuy teewesi bésu ndaje fi kanam Aji Sax ji, ku ci jaare mbaar buntu bėj-gannaar, di sujjóotsi, bu noppee na jaare mbaar buntu bėj-saalum ba. Te ku dugge mbaar buntu bėj-saalum, bu noppee na géne mbaar buntu bėj-gannaar ba. Deesul delloo bunt bi nga dugge. Bunt bi mu jakkaarool lees di géne. ¹⁰ Ki ci jal bi ci boppam, bu baadoolo yiy dugg, na duggandook ñoom, bu ñuy génn, mu génnandook ñoom.

¹¹ «Su dee bési màggal ak bési ndaje yi, saraxu pepp mi benn efa lay doon ngir yëkk wi, yemook fukki kiloy juróom, ak benn efa ngir kuuy mi, ak dayo bu ñu àttan ngir xar yu ndaw yi, efab pepp bu ne ànd ak benn xiinu diw, di ñetti liitar ak genn-wáll.

¹² «Buntu èttu biir bi féete penku it lañuy ubbil ki ci jal bi, buy joxe saraxu yéene: muy saraxu rendi-dóomal, di saraxu cant ci biir jàmm, di beneen saraxu yéene bu ñeel Aji Sax ji, ngir mu joxe saraxu rendi-dóomal, mbaa saraxu cantam ci biir jàmm, ni mu koy defe ci bésu Noflaay. Bu noppee, génn, ñu tēj bunt bi.

¹³ «Am xarum menn at mu amul sikk lees di defal Aji Sax ji bés bu nekk saraxu rendi-dóomal, te suba su ne lees koy def. ¹⁴ Nañu ci boole suba su ne benn céru juróom benneelu efab pepp, yemook ñaari kiloy liibar, ànd ak liitaru diw, yemook benn céru ñetteelu xiinu diw buy tooyal sunguf si. Loolooy saraxu pepp mi, ñeel Aji Sax ji, di dogali yoon yu sax dàkk. ¹⁵ Muy xar mu ndaw mi, di saraxu pepp mi, di diw gi, suba su nekk lees koy def, muy saraxu rendi-dóomal bu sax dàkk.

Boroom jal bi sañul lépp ci suufam

¹⁶ «Boroom bi Aji Sax ji dafa wax ne: Su ki ci jal bi mayee kenn ci doomam yu góor lenn ci céru suufam, kookoo koy jagoo, te alal jooju, céru doomi kooka lay doon. ¹⁷ Waaye su ki ci jal bi mayee kenn ciy surgaam lenn ci suufam, ba keroog atum Yiwiku ma rekk la surga ba di moom suuf sa, waaye bu atum Yiwiku teewee, suuf si

† 45:24 45.24 benn efa, am na ñu jàpp ne fanweeri kilo lay tollool, benn xiin wara tollook juróom ñetti liitar, lim yooyu mat ñaari yoon li nu am fi. § 45:25 45.25 Màggalu bési Mbaar yi lay doon. Seetal ci *Sarxalkat* yi 23.33-34.

* 46:5 46.5 benn efa: seetal ci 45.24.

day dellu ci loxol ki ci jal bi. Suuf soosu, céru doomi boroom jal bi donj lay doon. ¹⁸ Ki ci jal bi nag du nangu lenn ci suufas baadoola yi, di leen xañ seen alal. Alalu boppam donj la saña sédd doomam yu góor. Su ko defee kenn ci sama ñoñ du ñàkk alalam.»

Sàkkal nañu kër Yàlla gi ay waañ

¹⁹ Ba loolu amee waa ja génneeti ma ca jállukaay ba feggook buntu bėj-gàннаar. Mu dugal ma ca néeg yu sell ya ñu beral sarxalkat yi. Ndeke bérab a nga foofa ca ruq ba, ca biir-a-biir; ca wetu sowu. ²⁰ Mu ne ma: «Bii bérab, fi la sarxalkat yiy togge yàppu saraxu peyug tooñ ak saraxu póotum bàkkaar, di fi lakk saraxu pepp mi, ngir baña génne lenn lu sell ca èttu biti ba, bay sédd nit ñi sellnga gu leen di lor.»

²¹ Gannaaw loolu waa ji génneeti ma ba ci èttu biti bi, yóbbu ma ci ñeenti collam yépp. Ndeke coll wu ci nekk, ber nañu ca ètt bu ndaw, ²² bu gudde ñeent fukki xasab, yaatoo fanweeri xasab, te ñeenti ètt yu ndaw yi ci coll yi yépp a tolloo. ²³ Ñeenti ètt yu ndaw yi, bu ci nekk miir bu gätt a ko ub, ay toggukaay tege ci suufam, leru miir bi ba mu daj. ²⁴ Waa ji ne ma: «Lii mooy waañ yi liggéeykati kër Yàlla gi di togge yàppu saraxi askan wi.»

47

Am wal balle na kër Yàlla ga

¹ Waa ji nag delloo ma ca buntu néeg Yàlla ba. Gisuma lu moy am ndox muy balle ci suuf, di génne ci dèxu buntu penku bi. Kanam néeg baa ngi féete penku, ndox miy wale wetu bėj-saalumu néeg bi, fa féeteek bėj-saalumu sarxalukaay bi. ² Mu génnee ma buntu bėj-gàннаar, wërале ma ca buntu biti ba féete penku. Gisuma lu moy ndox muy wale ci suufu buntu penku bi, ci wetu bėj-saalum.

³ Waa jaa nga jubal penku, nàbb buumu nattukaayam, daldi natt junniy xasab. Mu jàlle ma ba foofa, ndox ma yem ma ci kostan. ⁴ Mu nattaat yeneen junniy xasab, ndox ma yem ma ciy óom. Mu dellu natt junniy xasab, jàlle ma, ndox ma yem ma ci ndigg. ⁵ Mu nattati yeneen junniy xasab, wal ma xóot ba manatumaa xuus, ba jàll. Maneesatu koo jàlle tànk, xanaa féey.

⁶ Mu ne ma: «Yaw nit ki, du gis nga ci?» Ba loolu amee mu delloo ma ba ca tàkkal dex ga. ⁷ Ma agsi ca tàkkal dex ga, daldi yem ci garab yu baree bare ci ñaari weti dex gi yépp. ⁸ Waa ji ne ma: «Ndox mii mu ngi jëm diiwaanu penku, wàcci jooru Araba, jàlli biir géēju Xorom

ga. Te bu ndox mi duggee biir gééj, géēju ndox mu bon ma, ndox ma day daldi neex. ⁹ Mboolem mbindeef muy def ndiiraan day daldi mana dunde mboolem fu wal mii jëm. Jën yi day takku lool ngir la fa ndox mii àgg, ba neexal mooma ndox. Mboolem fu wal mii àkki daal, lépp a fay dund. ¹⁰ La ko dale Engedi ba Eneglayim, ay nappkat lay doon. Nu weer seeni caax ci tefes gi. Wirgoy jën wu am gééj gu mag ga rekk, dina am foofa, bare lool. ¹¹ Waaye tan yaak déeg ya mu feggool du neexaat, xorom saa koy féetewoo. ¹² Wirgoy garab yu ñuy lekk yu nekk ñooy saxe ñaari weti wal ma. Xob ya du lax, doom ya du rag, xanaa di meññ weer wu nekk, ndax ndox mi koy suuxat ca bérab bu sell ba lay wale. Meññeef ma, ñu lekk; xob ya, ñu fajoo.»

Aji Sax ji joxe na kemuy réew mi ñuy séddoo

¹³ Boroom bi Aji Sax ji dafa wax ne: «Fukki giiri Israyil yeek ñaar nag, kemi céri suufi réew mi ñuy séddoo, nii la wara tédde: na wàllu giirug Yuusufa di ñaari cér. ¹⁴ Nangeen ko séddoo, ku nekk yem ak sa mbokk cér, ndax maa giñal seeni maam, ne dinaa leen ko jox. Kon réew mii, seen cér bu leen lew la. ¹⁵ Na lii di kemu réew mi ci wetu bėj-gàннаar: gééj gu mag ga lay dale, topp yoon wa jaare Ettlön ak Lebo Amat, ak Cedàdd, ¹⁶ jaare dèkk yi ñuy wax Berota ak Sibrayim te nekk diggante réewum Damaas ak Amat, jaare Accer Tikon, fa digalook Oran. ¹⁷ Kon kemu googu day dale Gééj gu mag ga, ba àgg gox ba ñuy wax Accar Enan ca penku ba. Kemu bėj-gàннаaram di Damaas ak Amat. Loolooy wàllu bėj-gàннаaram. ¹⁸ Kemu penku ba day dale diggante Oran ak Damaas, topp xuru Yurdan, diggante diiwaanu Galàdd ak réewum Israyil, dem ba àgg Tamar ca géēju penku ba* . Loolooy wàllu penkoom. ¹⁹ Wetu bėj-saalum, kemu ga day dale fa Tamar ba ca xuru Meriba ca Kades, daldi leri walu Misra ma, ba àkki gééj gu mag ga. Loolooy wàllu bėj-saalumam. ²⁰ Wetu sowu, gééj gu mag gaay doon kemu ga, dale bėj-saalum ba ca Lebo Amat ca bėj-gàннаar. Loolooy wàllu sowoom.

²¹ «Suuf si ci diggante kemu yooyu, nangeen ko séddale giiri Israyil yi. ²² Nangeen ko tegoo bant, séddoo ko ci seen biir; yeen ak doxandéem yi sanc ci seen digg te jaboot ci réew mi. Nangeen leen jàppe ni ay njuddu-ji-réew fi digg Israyil. Nañu am seen céru suuf ni yeen, bokk ci yem ak giiri Israyil. ²³ Ak giir gu ci doxandéem bi mana wàlli, foofa ngeen

* 47:18 47.18 géēju penku ba, mooy géēju Xorom ga.

koy féetale céru suufam. Kàddug Boroom bi Aji Sax jee.

48

Daggal nañu suuf giiri bėj-gànnaar

¹ «Lii mooy limeefu giiri Israyil, ak céru suuf bi giir gu ci nekk di féetewoo. Céru Dan moo féete catu bėj-gànnaar. Kemoom day topp yoonu Ettlou ba Lebo Amat, jáll ba Àccar Enan ga digalook Damaas, Amat féete ko bėj-gànnaar. Suufas Dan day jàpp penku ba sowu, ca géej gu mag ga, di benn pàcc. ² Suufas Aser day digalook sos Dan, jàpp, moom it, penku ba sowu, di benn pàcc. ³ Suufas Neftali day digalook sos Aser, jàpp penku ba sowu, di benn pàcc. ⁴ Suufas Manase day digalook suufas Neftali, jàpp penku ba sowu, di benn pàcc. ⁵ Suufas Efrayim day digalook sos Manase, jàpp penku ba sowu, di benn pàcc. ⁶ Suufas Ruben day digalook sos Efrayim, jàpp penku ba sowu, di benn pàcc. ⁷ Suufas Yuda day digalook sos Ruben, jàpp penku ba sowu, di benn pàcc.

Daggal nañu Aji Sax ji céram bu sell

⁸ «Suuf sa digalook Yuda ca wetu bėj-gànnaar, te dale penku ba sowu, mooy doon pàkk bi ñuy jooxe. Naar fukki junniy xasab ak juróom (25 000), fukki kilomeetar ak ñett, lay yaatoo, gudde ni suufas genn giir gu ci nekk, te bérab bu sell bi nekk ci digg bi. ⁹ Pàkk bi ngeen di jooxeel Aji Sax ji ci dog boobu, day am guddaayu ñaar fukki junniy xasab ak juróom (25 000) yemook fukki kilomeetar ak ñett ak yaatuwaayu fukki junniy xasab (10 000), di juróomi kilomeetar ak xaajaat. ¹⁰ Cér bu sell a ngoog, ñeel sarxalkat yi. Naar fukki junniy xasab ak juróom (25 000) lay am wetu bėj-gànnaar, yaatoo fukki junniy xasab (10 000) wetu sowu, yaatoo fukki junniy xasab (10 000) wetu penku, gudde ñaar fukki junniy xasab ak juróom (25 000) wetu bėj-saalum, te bérabu Aji Sax bu sell bi nekk ci digg bi. ¹¹ Dig-digal bu sell boobu, na ñeel sarxalkat yi askanoo ci Cadog, ñoom ñi sàmmoon sama ndénkaane, bafaa ànd ak bànni Israyil, di lajj ni seen yeneen bokki Leween ñi. ¹² Jooxeb suufas réew mi, nañu ci jooxeel sarxalkat yi bérab bu sella sell, mu feggook suufas Leween ñi. ¹³ Na suufas Leween ñi digalook sos sarxalkat yi, di pàkk bu gudde ñaar fukki junniy xasab ak juróom (25 000), te yaatoo fukki junniy xasab (10 000). Bu ci nekk na am guddaayu ñaar fukki junniy xasab ak juróom (25 000) ak yaatuwaayu fukki junniy xasab (10 000). ¹⁴ Cér boobu mooy tannéeefu suuf si. Maneesu cee jaay, mbaa

di ci weccikoo lenn, te lenn du ci tàbbi ciy loxo, ndax cér bu sell la, ñeel Aji Sax ji.

Daggal nañu suuf waa dëkk bi ak boroom jal bi

¹⁵ «Pàkk bay des ci yaatuwaayu dog boobu dina yaatoo juróomi junniy xasab (5 000), gudde ñaar fukki junniy xasab ak juróom (25 000); suufas ñépp la pàkk boobu di doon, ngir dëkk bi. Man naa doon ay dëkkuwaay aki parlu, te na dëkk bi ci boppam féetewoo digg ba. ¹⁶ Na dëkk bi bindoo ab kaare bu wet gi di ñeenti junniy xasab ak juróomi téeméer (4 500), di ñaari kilomeetar ak genn-wáll. ¹⁷ Parlub dëkk bi nag, na féeteek ñeenti weti dëkk bi, te doon fa wet gu nekk bayaal bu yaatoo ñaar téeméeri xasab ak juróom fukk (250). ¹⁸ Fi feggook dog bu sell bi ñu beral Aji Sax ji, dina des pàkk bu ñuy bey, bu gudde fukki junniy xasab (10 000) wetu penkub dëkk bi, ak beneen pàkk bu ni tollu ci wetu sowu. Ca lañuy jéle leku liggéeykati dëkk bi. ¹⁹ Waa dëkk bi koy bey, ci giiri Israyil yépp lañuy báyikoo. ²⁰ Mboolem pàkk boobu ñuy jooxe, na doon kaare bu wet gi di ñaar fukki junniy xasab ak juróom (25 000), te pàkk boobu ñuy jooxe, pàkk bu sell bi ci la, dëkk bi, ci la.

²¹ «Li féete penku ak li féete sowu yépp nag te des ci suuf si, gannaaw cér bu sell bi, ak suufas dëkk bi, buur bi ci jal bee koy moom; wet gu ci nekk yaatoo ñaar fukki junniy xasab ak juróom (25 000), gii àkki kemu Israyil ga féete penku, gee àkki kemu Israyil ga féete sowu, cér bu sell beek kër gu sell gi nekk ci digg bi. ²² Kon suufas Leween ñi ak suufas dëkk bi day bokk féete ci diggu suufas boroom jal bi, suufas boroom jal bi nekk diggante céru Yuda ba ca bėj-gànnaar, ak céru Beñamin ca bėj-saalum.

Daggal nañu suuf giiri bėj-saalum

²³ «Limeefu giiri Israyil yi ci des, seeni suuf nii lay tédde: Li dale kemu penku ba, ba ca géej gu mag ga ca sowu, benn pàcc lay doon, Beñamin féetewoo ko. ²⁴ Suufas Simeyon feggook sos Beñamin, jàpp penku ba sowu, di benn pàcc. ²⁵ Suufas Isaakar jàpp penku ba sowu, feggook sos Simeyon, di benn pàcc. ²⁶ Suufas Sabulon feggook sos Isaakar, jàpp penku ba sowu, di benn pàcc. ²⁷ Suufas Gàdd feggook sos Sabulon, jàpp penku ba sowu, di benn pàcc. ²⁸ Suufas Gàdd, kemug bėj-saalumam mooy doon kemug réew mi. Day dale fa Tamar ca penku ba, ba ca yoonu ndoxu Meriba ca Kades, Ieru walum Misra, ba ca géej gu mag ga. ²⁹ Noonu ngeen di séddalee réew mi giiri Israyil yi, giir gu ci nekk, ngeen dogale ko noonu

céru suufam. Kàddug Boroom bi Aji Sax jee.

Yerusalem: tur wu yees, fukki bunt ak ñaar, ni giir yi

³⁰ «Bunti dëkk bi nag nii lay tédde: Ñeenti miiri dëkk bi, bu ci nekk day am guddaayu ñeenti junniy xasab ak juróomi téeméer (4 500). ³¹ Miir bu ci nekk dina am ñetti bunt yu ñu dippee ñetti giiri Israyil. Wetu bëj-gàннаar, benn buntu Ruben ak benn buntu Yuda ak benn buntu Lewi. ³² Wetu penku am miiru ñeenti junniy xasab ak juróomi téeméer (4 500) ak ñetti bunt: benn buntu Yuusufa ak benn buntu Beñamin ak benn buntu Dan. ³³ Wetu bëj-saalum am miiru ñeenti junniy xasab ak juróomi téeméer (4 500) ak ñetti bunt: benn buntu Simeyon ak benn buntu Isaakar ak benn buntu Sabulon. ³⁴ Wetu sowu am miiru ñeenti junniy xasab ak juróomi téeméer (4 500) ak ñetti bunt: benn buntu Gàdd ak benn buntu Aser ak benn buntu Neftali. ³⁵ Wurmbalu dëkk bi bépp fukki junniy xasab ak juróom ñett (18 000) lay doon. Turu dëkk bi nag, dale ko ca bés ba, di “Aji Sax jaa ngi fi.”»

Dañeel Dañeel gore na ci biir nguuru kéefar

(Saar 1.1—6.29)

Dañeel aki xaritam tàbbi nañu ci liggéeyu kër Buur

¹ Ca ñetteelu atu nguurug Yowakim buurub Yuda, Nabukodonosor buuru Babilon daa dikk, gaw Yerusalem. ² Boroom bi nag teg Yowakim buurub Yuda ciy loxoom, boole ca lenni juntuukaayi kër Yàlla ga. Nabukodonosor yóbbu juntuukaay ya réewum Sineyaar, ga ñuy wax Babilon itam, ca biir kërug tuuram. Mu daldi fat juntuukaay ya ca denci kër tuuram.

³ Ba loolu amee Buur jox ndigal Aspenas, kilifay bëkk-néegam, ngir mu tannée ci bànni Israyil, ñenn ci askanu buur ak ci garmi yi. ⁴ Ñu diy waxambaane yu amul benn sikk ci seen yaram, di ñu goorayiw, mane bépp xeetu njàng, bare xam-xam te am déggin, ba mana liggéeyal Buur ci biir kërám. Ñu di leen jàngal làkku waa Babilon ak seen mbind. ⁵ Ci biir loolu Buur dogalal leen bés bu nekk ab cér ci njëlam ak ci biinam. Mu ñaana kilifag jawriñ ya nag tudde leen yeneen tur. Dañeel, mu tudde ko Beltasar, Anaña mu tudde ko Sadarag, Mikayel tudd Mesag, Asaryaa di Abet Negro.

⁸ Ci biir loolu Dañeel fas yéene ci xolam ne du sobeel boppam ci njëlu buur ak biinam. Mu ñaana kilifag jawriñ ya mu may ko, mu bañ cee sobeel boppam. ⁹ Yàlla def kilifag jawriñ ya baaxe Dañeel, yërëm ko. ¹⁰ Teewul kilifag jawriñ ya ne Dañeel: «Man de damaa ragal Buur sama boroom, moom mi leen dogalal seen lekk ak seen naan. Su Buur gisee ngeen gëna yoy seen moroomi xale yu goor yi nag? Sama bakkan xaj na ci del!»

¹¹ Ba mu ko defee Dañeel wax ak dag, ba kilifag jawriñ ya sant mu wattu leen, mook Anaña ak Mikayel ak Asaryaa. Mu ne ko: ¹² «Ngalla sang bi, seetlu nu diiru fukki fan, ñu di nu jox ci meññeef mi rekk ak ndoxum naan; ¹³ te nga xool nu, xool xale yu goor yiy lekk ci njëlal Buur. Su ko defee nga seet nooy def ak nun ci ni nga nu gise, sang bi.» ¹⁴ Waa ja ànd ak ñoom ci loolu, seetlu leen diiru fukki fan. ¹⁵ Ba fukki fan ya matee, seen kanam gëna leer te ñu gëna suur mboolem xale yu goor yay lekk ca njëlal Buur. ¹⁶ Ci kaw loolu wattukat ba di yóbbu seen njël ak seen biin, wacce leen

ko meññeef. ¹⁷ Yàlla nag may ñeenti xale yu goor yoyu xel ak raññee ci mboolem lu ñu bind ak wàllu xam-xam. Dañeel moom mana firi mboolem peeñu ak gént.

¹⁸ Ba diir ba leen Buur àppal matee, ñu war leena indi, kilifag jawriñ ya yóbbu leen fa kanam Buur Nabukodonosor. ¹⁹ Buur wax ak ñoom te gisul ci ñoom ñépp kenn ku mel ni Dañeel ak Anaña ak Mikayel ak Asaryaa. Ñu daldi tàbbi ci liggéeyu buur. ²⁰ Mboolem wàllu xam-xam ak xel mu leen Buur seetlu rekk, gis ne ñoo ci sut fukki yoon taryaax yeek ñeengokati réewam mépp.

²¹ Dañeel nekk na ca liggéeyu buur, nekk ca ba ca at ma jékk ca nguurug Buur Sirus.

2

Dañeel nettali na géntu Buur

¹ Ca ñaareelu atu nguurug Nabukodonosor la Nabukodonosor gént gént gu ub boppam lool, ba manatula nelaw. ² Mu woolu taryaax yi ak ñeengokat yi ak jibar yi ak xërëmkat yi, ngir ñu firil koy géntam. Ñu agsi taxaw ca kanamam. ³ Buur ne leen: «Damaa gént lu ub sama bopp, ma bégga xam lu muy firi.» ⁴ Xërëmkat ya ne Buur ci làkku arameen: «Guddalu fan Buur, sang bi! Wax nu gént gi, nu firi ko.»

⁵ Buur wax xërëmkat ya ne leen: «Dogal bu wér a ngii tukkee fi man. Su ngeen ma waxul gént gi, wax ma piri mi, ay dog lañu leen di dog, seeni kër doon ay sën. ⁶ Waaye su ngeen waxee gént gi, wax ma piri mi, ay weexal aki yool ak teraanga ju réy ngeen di jële ci man. Kon nag waxleen ma gént gi, wax ma piri mi.»

⁷ Gannaaw gi ñu dellu ne Buur: «Sang bi, waxal gént gi, nu wax la pireem.»

⁸ Buur dellu ne: «Gis naa nag bu baax ne dangeena bégga yàggal mbir mi, ndax xam ngeen ne dogal bu wér tukkee na ci man ⁹ ne su ngeen ma waxul gént gi, àtte bi di benn ci yeen ñépp. Gise ngeen ba nar maa wax ay fen aki caaxaan, di yaakaar jamono soppiku. Waxleen ma gént gi rekk, ma xam ne man ngeen maa wax pireem.»

¹⁰ Xërëmkat ya ne Buur: «Buur, amul kenn ci kaw suuf ku mana wax li ngay laaj. Te it benn buur ak nu maggaayam ak dooleem mana tollu, masula laaj lu mel nii benn taryaax mbaa ñeengokat mbaa xërëmkat. ¹¹ Li ngay laaj daa jafe, Buur. Kenn manu la koo wax ku moy yàlla yi, Buur, te ñoom dëkkuñu ci biir nit ñi.» ¹² Ci kaw loolu Buur mer lool ba fees dell, daldi joxe ndigal ne ñu rey mboolem boroom xam-xami Babilon.

¹³ Ba mu ko defee ñu siiwtaane dogal ba, nara reylyu boroom xam-xam ya. Ñuy seet nag Dañeel aki ñandandoom ngir rey leen.

¹⁴ Dañeel def ug teey, jiital xelam, wax ak Aryog, kilifag dagi buur, fekk kooku di dem, nara reyli boroom xam-xami Babilon.

¹⁵ Mu laaj Aryog ndawal Buur, ne ko: «Waaw, lu waral bii dogal bu diis tukkee ci Buur?» Aryog xamal Dañeel mbir ma. ¹⁶ Dañeel nag dem ca Buur, ñaan ko mu may ko jot gu mu ko joxe piriim gént ga.

¹⁷ Ba loolu amee Dañeel ñibbi, daldi xamal mbir ma Anaña ak Mikayel ak Asaryaa, ñandandoom ya, ¹⁸ ngir ñu sàkku yërmandey Yàlla Boroom asamaan ci wàllu mbóot moomu, ndax ñu bañ leena rey mook ñandandoom yaak yeneen boroom xam-xami Babilon. ¹⁹ Ca guddi ga nag, ñu won mbóot ma Dañeel ci biir peeñu. Ci kaw loolu Dañeel sant Yàlla Boroom asamaan, ²⁰ daldi ne:

«Cant gu amul ndoorde amul kemu ñeel na Yàlla,

xam-xam ak kàttan mooy boroom.

²¹ Mooy walbati jamono, di soppi demin, di fal buur, di folli.

Mooy xelal boroom xel mu rafet, di xamal boroom xel mu ñaw.

²² Mooy feeñal mbóot mu laqu, xam li ci biir lëndem, te leer màkkaano ko.

²³ Sama Yàllay maam, maa lay gërëm, di la sant.

Yaa ma may xam-xam ak manoore, xamal ma li nu la laaj.

Yaa nu xamal mbirum Buur mii.»

²⁴ Gannaaw loolu Dañeel dem ca Aryog mi Buur santoon mu rey boroom xam-xami Babilon. Ba mu demee ne ko: «Boroom xam-xami Babilon yi, bu leen reylyu. Yóbbu ma ca Buur, ma jox ko piri mi.»

²⁵ Aryog gaaw yóbbu Dañeel ba ca Buur, wax ko ne ko: «Gis naa ci ngállag Yudeen ñi ku la mana firil sa gént gi.» ²⁶ Buur wax ak Dañeel, mi ñu naan Beltasar, ne ko: «Wóor na la ne man nga maa wax li ma gént, wax ma li mu yiri?»

²⁷ Dañeel ne Buur: «Buur, li nga laaj amul benn boroom xam-xam mbaa ñeengokat mbaa taryaa ak seetkat bu la ko mana xamal. ²⁸ Waaye, Buur Nabukodonosor, Yàllaa ngi biir asamaan, di xamle ay mbóot te moo la won liy am jamono yiy ñew. Sa gént gaak la nga ca gis ca sa kaw lal, lii la:

²⁹ «Buur, ba nga téddee ca sab lal, sa xel daa dem ci liy xew bu jamono jii weesee. Kiy feeñal mbóot daldi lay won liy xew.

³⁰ Man nag du caageenu xam-xam bu ma ëpple mboolem kuy dund. Mbóot mii

dañu ma koo won, ndax yaw Buur, nga xam piri mi, xam li ub sa bopp.

³¹ «Buur, danga jekki xool, daldi gis jëmm ju mag ju ñu defar. Jëmm ja réy na lool te yàñaayam yeeme. Ma nga taxaw janook yaw, melokaanam raglu. ³² Boppu jëmm ji wurus la wu raxul, dënn beek loxo yi di xaaalis, biir beek pooj yi di xànjjar, ³³ yeel yi di weñ gu ñuul, ndëgguy tãnk yi nag lenn li weñ gu ñuul la, li ci des di ban bu ñu lakk. ³⁴ Naka ngay xool, aw doj wu loxo sànniwul fàq, daldi dal ca tãnk jëmm ja bindoo weñ ak ban bu ñu lakk, daldi koy rajaxe. ³⁵ Ci kaw loolu weñ gaak ban baak xànjjar jaak xaaalis baak wurus wa lépp bokk rajaxoo, mel ni xataxu dàggay lolli. Ngelaw li buub ko yóbbu, ba mu ne mes. Doj wa daloon ca jëmm ja nag doon tund wu mag, fees àddina sépp.

³⁶ «Loolooy gént gi. Nu wax la piri mi nag, Buur. ³⁷ Yaw Buur, buuru buur yi, yaw mi Yàlla Boroom asamaan jox nguur ak kàttan ak dooleek ndam, ³⁸ te Yàlla teg ci say loxo doom aadama yeek rabi àll yeek njanaaw yi, nga boole leen yilif ñoom ñépp ak fu ñu mana dëkke: yaw yaay boppu wurus bi.

³⁹ «Sa gannaaw geneen nguur* dina taxaw, gën laa suufe, ñetteelu nguur ga topp ca di xànjjar, tiim àddina sépp.

⁴⁰ Ñeenteelu nguur ga day dëgër ni weñ. Ni weñ di toje lépp ba rajaxe lépp ba mu rajaxoo, noonu lay toje ba rajaxe yooyu nguur yépp. Mu mel ni ni weñ gu ñuul di rajaxee lépp. ⁴¹ Soo gisee ndëgguy tãnk yeek baaraami tãnk yi, lenn li di ban, lenn li di weñ, nguur la guy xàjjalikoo. Lenn li dëgër dëgëraayu weñ ndax weñ gi nga gis, mu jaxasook ban bi. ⁴² Te baaraami tãnk, yi lenn li di weñ, lenn li di ban, ni la nguur ga di ame doole cig wet, néew doole cig wet. ⁴³ Li nga gis weñ gu jaxasook ban mooy tekki ne buur yi dinañu booloo ci seeni pexe, waaye seen bennoo du mujj; dafa mel ni weñ rekk, du jaxasook ban.

⁴⁴ «Ci jamonoy buur yooyu Yàlla Boroom asamaan dina samp nguur gu dul tas muk, te wenn xeet du ko yilif muk. Nguur googu dina tasaare mboolem yeneen nguur yooyu, ba genn du ci des, waaye moom day sax ba fàww. ⁴⁵ Moo waral nga gis doj wu loxo sànniwul, mu fàqe tund wa, daldi rajaxe weñ gaak xànjjar jaak ban baak xaaalis baak wurus wa. Buur, Yàlla ju magg ji moo la xamal liy ñew. Gént gi wér na, piri mi mata gëm.»

⁴⁶ Ci kaw loolu Buur Nabukodonosor ne gurub, dëpp kanamam fa suuf, sujjootal Dañeel, joxe nag ndigal ñu jox ko ay weexal ak cuuraay. ⁴⁷ Ba loolu amee Buur

* 2:39 2:39 geneen nguur: manees naa wax it weneen askanu buur.

wax Dañeel, ne ko: «Aylayéwén, sa Yàlla mooy Yàllay yàlla yi, di Sangu buur yi, te it mooy kiy feeñal mbóot, gannaaw feeñal nga mii mbóot.»

⁴⁸ Ba mu ko defee Buur teral Dañeel, may ko lu baree bare, ba noppi def ko kilifag diiwaanu Babilon gépp, teg ci fal ko, mu yilif boroom xam-xami Babilon yépp. ⁴⁹ Ci biir loolu Dañeel ñaan Buur mu tabb Sadarag ak Mesag ak Abet Nego, ñu yore saytub diiwaanu Babilon. Dañeel moom nekk ca èttu buur.

3

Sànni nañu xariti Dañeel cib taal

¹ Mu am bés Buur Nabukodonosor de-farlu jëmme wurus, taxawaay ba di fan-weeri meetar, yaatuwaay ba di ñetti meetar. Mu taxawal ko ca jooru Dura ga ca diiwaanu Babilon. ² Buur Nabukodonosor nag woolu jawriñ yaak laman yaak jaraaf yaak kàngam yaak farbay alal yaak àttekat yaak ndawi buur yaak mboolem kilifay diiwaan ya, ngir ñu ñëw ca bernde ja mu maye ca daloob jëmm ja mu samp. ³ Ba loolu amee jawriñ yaak laman yaak jaraaf yaak boroom xel yaak farbay alal yaak àttekat yaak ndawi buur yaak mboolem kilifay diiwaan ya, ñépp daje ngir bernde jëmm, ja Buur Nabukodonosor samp; ñu daldi taxaw ca kanam jëmm ja.

⁴ Yéenekat ba nag xaacu, ne: «Dégluleen li ñu leen sant, yeen waa mbooloo yépp ak xeet yépp, ak làkk yépp. ⁵ Bu ngeen di dégg bufta gi ak toxoro gi ak xalam gi ak riiti gi ak kooraa gi ak liit gi ak mboolem jomtukaayu xumbal yi, nangeen sujjoot, mággaale ko jëmmu wurus wi Buur Nabukodonosor samp. ⁶ Képp ku sujjootul mággal ko, dees koy daldi sànni ci biir taal bu yànj.»

⁷ Loolu nag waral saa yu nit ña déggée bufta gaak toxoro gaak xalam gaak riiti gaak kooraa gaak mboolem jomtukaayu xumbal ya, ñoom ñépp ay bokk sujjoot, mággal jëmmu wurus ja Buur Nabukodonosor samp, muy mbooloo yaak xeet yaak làkk ya.

⁸ Ci biir loolu ay xërëmkat dikk, di boole Yawut ya. ⁹ Ñu wax Buur Nabukodonosor, ne ko: «Buur, guddalu fan. ¹⁰ Buur sang bi, xam nga yaa joxe ndigal ne: “Képp ku dégg bufta geek toxoro geek xalam geek riiti geek kooraa geek liit geek mboolem jomtukaayu xumbal, dangaa wara sujjoot, mággal jëmme wurus ji. ¹¹ Te képp ku sujjootul mággal ko, dees na ko sànni ci biir taal bu yànj.” ¹² Dafa am ay Yawut yoo tabb, ñu yore saytub diiwaanu Babilon.

Ñu di leen wax Sadarag ak Mesag ak Abet Nego. Nooñu de Buur, déggaluñu la; say yàlla, jaamuwuñu leen; sa jëmmu wurus ji nga samp it, mággaluñu ko.»

¹³ Nabukodonosor daldi mer lool, ba fees dell. Mu woolu Sadarag ak Mesag ak Abet Nego; ñu indi leen ba fa kanam Buur. ¹⁴ Nabukodonosor àddu ne leen: «Ndax dégg la, yeen Sadarag, Mesag ak Abet Nego, yeena baña jaamu samay yàlla, baña mággal jëmmu wurus ji ma samp? ¹⁵ Léegi, bettuma leen. Bu ngeen di dégg bufta geek toxoro geek xalam geek riiti geek kooraa geek liit geek mboolem jomtukaayi xumbal yi rekk, sujjooteen, mággaale ko jëmm ji ma sàkk. Waaye su ngeen ko mággalul, dees na leen daldi sànni ci biir taalu sawara bu yànj. Ana yàlla ju leen di musal ci man?»

¹⁶ Sadarag Mesag ak Abet Nego ne Buur Nabukodonosor: «Buur, soxlawul ñu di la lay dara. ¹⁷ Ndegam Yàlla ji nuy jaamu man nanoo musal ci taalu sawara bu yànj bi, musal nu ci yaw mii, dina nu musal. ¹⁸ Su demewul noonu it nag Buur, xamal ne say yàlla dunu leen jaamu, sa jëmmu wurus ji nga samp it, dunu ko sujjootal.»

¹⁹ Ci kaw loolu Nabukodonosor mer lool ba fees dell, kanam gay sël-séli janook Sadarag Mesag ak Abet Nego. Mu santaane ñu xamb taal ba, ba mu gëna tàng juróom ñaari yoon na mu daan tange; ²⁰ ba noppi mu sant ay dag yu am kàttan ci mbooloom xareem, ngir ñu yeew Sadarag ak Mesag ak Abet Nego, sànni leen ca biir taal bu yànj ba. ²¹ Nooñu yeew leen na ñu soloo, ñook seeni mbubb ak seeni tubéy ak seeni mbaxana, daldi leen sànni ca biir taal bu yànj ba. ²² Ndigalu Buur nag jampa jamp, sawara wa boya boy, ba tàkk-tàkku sawara wa rey dag, ya ca sànni Sadarag ak Mesag ak Abet Nego. ²³ Sadarag, Mesag ak Abet Nego, ñoom ñett ñépp yeewe ba ne ñodd, tàbbi ca biir taalu sawara bu yànj ba.

²⁴ Ci kaw loolu Buur Nabukodonosor jommi, ne bërét taxaw, daldi laaj ay dagam ne leen: «Xanaa du ñett lañu yeew, sànni ci sawara wi?» Ñu ne ko: «Ahakay, Buur!» ²⁵ Mu ne: «Xool-leen, ñeent ñu yeewewul laa gis, ñuy daagu ci biir sawara wi te dara dalu leen. Neenteel baa ngi mel ni jëmm ju nirook Yàlla.» ²⁶ Nabukodonosor nag jegeñsi buntu taal bu yànj ba, daldi àddu ca kaw ne: «Éey Sadarag, Mesag, Abet Nego, jaami Yàlla jiy Aji kawé ji, gënnleen fii!»

Sadarag ak Mesag ak Abet Nego daldi gënné ca biir sawara sa. ²⁷ Ba loolu amee jawriñ yaak laman yaak jaraaf yaak dagi Buur yéew leen. Ñu gis nag ne sawara wi

lakkul seen yaram fenn, seen kawaru bopp xoyomuwwul, seeni yére yàquwwul, xeeñuñu sax xetu sawara.

²⁸ Nabukodonosor wax ne: «Cant ñeel na Yállay Sadarag ak Mesag ak Abet Nego, moom mi yónni malaakaam, mu wallu jaamam ñi ko wóolu, ba xëtt sama ndigal man Buur, te jaay seen bakkan gënal leen ñuy jaamu mbaa di sujjóotal jeneen yàlla ju dul seen Yàlla. ²⁹ Dogal tukkee na ci man ne: muy mépp mbooloo ak bépp xeet ak wépp làkk, képp ku ci ñàkke kersa Yállay Sadarag ak Mesag ak Abet Nego, ay dog lees koy dog, te kërám dees na ko def ab sën, ndax kat amul jenn yàlla ju mana walloo ni moom.»

³⁰ Ba loolu wéyee Buur gëna teral Sadarag ak Mesag ak Abet Nego ca dii-waanu Babilon.

Buuru yéefar sàbbaal na Aji Sax ji

³¹ Bataaxalu Buur Nabukodonosor a ngii, jëm ci mépp mbooloo ak wépp xeet ak wépp làkk, ak fu ñu dëkke ci àddina sépp:

Yal na seen jàmm yokku. ³² Màndarga yeek kéemaan yi ma Yàlla Aji Kawe ji defal, maa ngi am bànnex ci xamle ko.

³³ Ndaw màndargaam yu màgg, ndaw kéemaanam yu réy!
Nguuram ay nguur yu sax dàkk, kilifteefam ñeel maasoo maas.

4

¹ Man Nabukodonosor maa ngi woon ci sama jàmmi kër ak sama teraangay màkkaan. ² Ma tédde sama lal, daldi am gént gu ma tiital, ak xalaat ak peeñu yu ma indil njàqare. ³ Ma joxe ndigal, woolu boroom xam-xami Babilon yépp, ngir ñu xamal ma piri gént gi. ⁴ Ci kaw loolu taryaax yeek ñeengokat yeek xërëmkat yeek seetkat yi dikk. Ma nettali leen gént gi, waaye waxuñu ma piri mi. ⁵ Ñu mujj ma indil Dañeel, di Beltasar, mi ñu tudde sama yàlla, di ku xelu yàlla yu sell yi nekk ci moom. Ma wax ko gént gi.

⁶ Ma ne ko: «Beltasar, kilifay taryaax yi, man ci sama bopp xam naa ne xelum yàlla yu sell yaa ngi ci yaw, te menn mbóot jaaxalu la. Peeñum gént gi ma gént, wax ma piri mi. ⁷ Li ma gis daal ci sama kaw lal mooy lii:

Damaa jekki gis garab ci digg àddina si, mu gudd lool.

⁸ Garab gay màgg, di réy, ba njobbaxtal la di laal asamaan, ñu di ko séen ba ca cati àddina sépp.

⁹ Xob yaa nga naat, meññeef ma ne gāññ, mana dundal ñépp. Muy keppaaral rabu àll, di tàggal njanaaw,

di dundal bépp boroom bakkan.

¹⁰ «Fi ma tédde ci sama lal, ma jekki gis ab wattukat bu sell wàcce asamaan. ¹¹ Mu àddu ca kaw ne:

“Daaneleen garab gi te gor ay bànqaasam. Wittleen xob yi, tasaare meññeef mi.

Na rab yi jóge ci keppaaral, daw, njanaaw yi ciy bànqaasam, naaw.

¹² Waaye èkk beek reen yi, bàyyileen ko fi suuf,

ci digg mbooy mi,

te jéngé ko càllalay weñ ak xànjär.

Na ko layub asamaan di faam,

muy dunde ñax nig jur.

¹³ Mu nitoodi,

ame xelum mala

diiru juróom ñaari jamono.

¹⁴ Ndogal a ngoog bu wattukat yi téral,

àttee ngoog bu ñu sell ñooñu digle,

ngir aji dund ji xam ne

Aji Kawe jee yilif nguurug nit,

di ko jox ki ko soob,

di ca fal ki gëna tuut.”

¹⁵ «Loolu laa gént, man, Nabukodonosor. Yaw Beltasar nag, wax ma piri mi. Nday boroom xam-xam yi ci sama réew mi, kenn manu ma cee wax piri mi. Waaye yaw man nga ko, ngir xelum yàlla yu sell yaa ngi ci yaw.»

¹⁶ Ba loolu amee Dañeel ma ñuy wax Beltasar ne dann ab diir, jaaxle, xalaat yu ko tiital dikkal ko. Buur àddu ne ko: «Beltasar, gént geek piri mi bumu la tiital.» Beltasar ne ko: «Sang bi, su ma sañoon de muy sa géntug noon te pireem topp say bañaale. ¹⁷ Garab gi nga gis muy màgg di réy, njobbaxtal lay laal asamaan, ñu di ko séen ci àddina sépp, ¹⁸ mook xobam yu naat ak meññeefam mu ne gāññ, mana dundal ñépp; muy keppaaral rabu àll, di tàggal njanaaw: ¹⁹ Buur de, garab googu yaw la. Yaa màgg, di bare doole; di màgg ba laal asamaan, sa kilifteef àkki cati àddina.

²⁰ «Buur, li nga gis kenn ci wattukat yu sell yi wàcce asamaan, àddu ca kaw ne:

“Daaneleen garab gi, tas ko,

waaye èkk beek reen yi, bàyyileen ko fi suuf,

ci digg mbooy mi,

te jéngé ko càllalay weñ ak xànjär.

Na lay biy wàcc, di ko faam,

muy dunde ñax nig jur

diiru juróom ñaari jamono.”

²¹ Piri maa ngii, Buur, di dogalu Aji Kawe, ji dal ci sa kaw, Buur, sang bi. ²² Yaw lañuy dàqe ci nit ñi; rabi àll yi ngay dëkkal, ñax di sam xont niw nag, lay biy wàcc di la faam diiru juróom ñaari jamono, ba kera ngay xam ne Aji Kawe jee yor nguurug nit, di ko jox ku ko neex. ²³ Li ñu santaane ñu bàyyi èkk beek reeni garab gi mooy tekki

ne nguur gi dees na la ko delloo keroog boo xamee ne Boroom asamaan mooy Buur. ²⁴ Kon nag Buur, ngalla nangul li ma lay digal: say moy ak say bākkaar, daboo ko di def njekk ak di baaxe néew-ji-doole ndax sa teraanga sax.»

²⁵ Loolu lépp dal na Buur Nabukodonosor. ²⁶ Ba ñu ca tegee fukki weer ak yaar yu mat, muy doxantu ca kaw taaxum kër buur ca Babilon. ²⁷ Ma ngay wax naan: «Xanaa lii du Babilon gu mag gi ma tabax man, ci sama doole ju réy, muy péeyu buur, di sama ndam ak sama daraja?»

²⁸ Kàddug Buur ga daanoogul sax, baat jibe asamaan àddu ne: «Yaw Buur Nabukodonosor, dogal ñeel na la ne nguur gi récc na la. ²⁹ Dees na la dàqe ci nit ñi, nga dëkk ak rabi àll yi, ñax di sam xont niw nag diiru juróom ñaari jamono, ba kera ngay xam ne Aji Kawe yee jor nguurug nit, di ko jox ku ko neex.»

³⁰ Ca saa sa kàddu ga sotti ñeel Nabukodonosor. Ñu dàqe ko ci nit ñi, muy dunde ñax niw nag, lay biy wàcc di ko faam, ba kawar gi séq ni dunqi jaxaay, ay wewam di saf yu njanaaw.

Nabukodonosor xippi na

³¹ Ba àpp ba matee, man Nabukodonosor, maa séentu asamaan, sama sago délisi. Ma sant Aji Kawe ji, sargal Kiy dund ba faww, mággal ko:

kilifteefam sax faww,
nguoram ñeel maasoo maas.

³² Mboolem waa àddina

di neen ci moom.

Nu ko neex lay def

ak gàngoori xarey asamaan

ak waa suuf,

te kenn du féll loxoom

mbaa mu naa ko: «Ana looy def nii?»

³³ Ba sama sago délsee, ca laa jotaat ndam ak daraja ngir sama teraangay nguur. Ba loolu amee samay jawriñ ak samay jaraaf jëlsi ma; ñu dējaat ma ci nguur gi, ma gēnatee mágg. ³⁴ Léegi nag man, Nabukodonosor, maa ngi sant Boroom asamaan, di ko sargal, di ko mággal. Lu mu def dëgg la, fu mu jaare njub la, te kuy réy-réylu man na laa suufeel.

5

Buur Baltacar a bew ba sàнку

¹ Am na bés Buur Baltacar defal ay jaraafam bernde ju réy. Ña nga tollu ci junni, muy naan nag ca seen kanam. ² Biññ ba jay Baltacar, mu joxe ndigal,

ñu indi ndab, yu xalis yaak yu wurus ya baayam* Nabukodonosor jële woon ca jaamookaayu Yerusalem, ngir ñu naane ca, mooki jaraafam aki soxnaam aki nekkaleem. ³ Ba mu ko defee ñu indi ndabi wurus ya ñu jële woon ca jaamookaay ba, kër Yàlla ga ca Yerusalem. Buur di ca naan, mooki jaraafam aki nekkaleem. ⁴ Ña ngay naan biññ, di sàbbaal yàllay wurus yaak yu xalis yaak yu xànjay yaak yu weñ yaak yu bant yaak yu doj ya.

⁵ Ca saa sa baaraami loxob nit buy bind feeñ fa janook tegukaayu làmp ba, ca kaw miiru kër buur, ba ñu weexal. Buur di xool catu loxo bay bind. ⁶ Kanamu Buur nag soppiku, njàqare dikkal ko, ba ndigg la ne yalax, oom yay fenqoo.

⁷ Buur daldi àddu ca kaw, di woolu ñeengokat yeek xèrèmkat yi ak seetkat yi. Mu wax ak boroom xam-xami Babilon yooyu ne leen: «Képp ku jàng mbind mi te wax ma lu mu tekki, dees na ko solal yérey buur yu xonq curr, takkal ko caqu wurus, jox ko kilifteef gu koy tofal ci bummi.»

⁸ Ba loolu amee boroom xam-xami Buur yépp dikka ba ca biir, waaye manuño jàng mbind ma, bay xamal Buur la muy tekki.

⁹ Buur Baltacar nag gēnatee tiit, kanam ga gēna soppiku, jaraafam ya it jàq.

¹⁰ Ci biir loolu Lingeer, ndeyi Buur, dëgg coowal Buur aki jaraafam, daldi duggsi ci biir néegu xawaare bi. Mu ne: «Buur, guddalu fan! Bul tiit, bu sa kanam lëndém.

¹¹ Am na góor gu nekk ci sa réew mi; xelu yàlla yu sell yaa ngi ci moom, te ci sa jamonoy baay, gis nañu ci moom ag ràññee ak xel ak xam-xam bu nirook xam-xamu yàlla yi. Buur Nabukodonosor sa baay nag fal ko, mu jiite taryaax yeek ñeengokat yeek xèrèmkat yeek seetkat yi; ¹² loolu yépp ndax daño gis ci kooku Buur tudde Beltasar, xel mu ñaw akum njàng ak ràññee. Day firi gént, di teqental ay cax ak a lijjanti ay jafe-jafe. Kookooy Dañeel; kon nañu ko woo, mu wax piri mi.»

¹³ Ci kaw loolu ñu indi Dañeel fa kanam Buur. Buur ne Dañeel: «Du yaay Dañeel mi bokk ci Yudeeni ngàllo, ga Buur saa baay jële Yuda? ¹⁴ Dëgg naa sab jëw, ñu naan noowi yàlla yaa ngi ci yaw, te gis nañu ci yaw ag ràññee akum xel ak xam-xam bu takku. ¹⁵ Léegi indiloon nañu ma boroom xam-xam yeek ñeengokat yi, ndax ñu jàngal ma mbind mi, xamal ma pireem. Waaye xamuñu pireem. ¹⁶ Dëgg naa nag ne man ngaa firi lool ak a lijjanti mbir yu jafe. Soo ma manee jàngal mbind mi, wax ma lu muy tekki, dees na la solal yérey buur yu xonq curr, takkal la

* 5:2 5.2 baay bi ñuy wax fii, am na ñu jàpp ne maam la woon ci moom mbaa buur bu ko jiiitu woon ci nguur gi rekk, waaye du baayub geño.

caqu wurus, jox la kilifteef gu lay tofal ci bummi.»

¹⁷ Dañeel nag janook Buur ne ko: «Buur, dencal sag may te jox keenen say neexal. Du tee ma jàngal la mbind mi, firil la ko.

¹⁸ «Buur, Yàlla Aji Kawe ji daa joxoon sa baay Nabukodonosor nguur gi, muy ku màgg, am ndam ak daraja. ¹⁹ Màggaay ga mu ko mayoon tax waa mbooloo yeek xeet yeek làkk yépp ragal ko, bay lox ci kanamam. Ku ko soob, mu rey; ku ko soob, mu bàyyi; ku ko soob, mu fal; ku ko soob, mu torxal. ²⁰ Waaye ba mu bewee, tē ticc bay réy-réylu, dañu koo jàllarbee ca nguuram, nangu ndam la, ²¹ dàqe ko ci nit ñi, def xel ma xelum rab. Mu dëkk ak mbaami àll yi, am ñax dim xontam niw nag, lay biy wàcc, di ko faam, ba kera ba mu xamee ne Aji Kawe jee yor nguurug nit, di ko jox ku ko neex.

²² «Yaw Baltacar miy doomam nag, xam nga loolu lépp te taxu laa toroxlu, ²³ xanaa ngay diirook Boroom asamaan, bay san-taane ñu indil la ndabi kërám, nga di ci naan biññ, yaak say jawriñ ak say soxna ak say nekkaale, wgeen di sàbbaal ay yàllay xaalis ak yu wurus ak yu xànjár ak yu weñ ak yu bant ak yu doj, te du ci lenn luy gis mbaa muy dégg mbaa mu xam dara. Waaye Yàlla ji yor sa bakkan tey ak èllég sàbbaaloo ko. ²⁴ Moo tax Yàlla yónni loxo bi, mu rédd mbind mii.

²⁵ «Mbind mi ñu rédd mooy: WANÑ, WANÑ, NATT, SÉDDALE. ²⁶ Li muy firi mooy:

WANÑ: Yàlla waññ na sa nguur, ba jeexal ko.

²⁷ NATT: Nattees na sa diisaay ci nattukaay bi, nga yées.

²⁸ SÉDDALE: Séddale nañu sam réew, ba jox ko xeeti Medd ak Pers.»

²⁹ Ca la Baltacar joxe ndigal, ñu solal Dañeel yérey buur yu xonq curr, takkal ko caqu wurus, daldi yégle ne moo topp ci bummi.

³⁰ Guddi googa lañu rey Baltacar, buurub waa Babilon.

6

Dañeel tàbbi na paxum gaynde

¹ Ci kaw loolu Daryus waa Medd ba, jot ca nguur ga, fekk ko mu am juróom benn fukki at ak ñaar.

² Mu neex Daryus nag, mu fal tééméeri jawriñ ak ñaar fukk ca réew ma, ñuy saytu nguur ga gépp; ³ ak ñetti saytukat yu leen jiite, kenn ka di Dañeel. Saytukat yooyu nag di leen xamal lu ñuy liggéey, ngir Buur baña yàqule dara. ⁴ Ci biir loolu Dañeel di ku raññiku ci biir saytukat

yaak jawriñ ya, ndax rafet um xel; ba tax Buur di seet nu mu koy fale, mu yilif nguur gépp. ⁵ Ba loolu amee saytukat yaak jawriñ ya di wuta tuumaal Dañeel ci mbiri nguur gi, te gisuñu genn tooñ mbaa sikk ci moom, ndax ku amoon kóllère la, te giseesul ci moom genn néewal mbaa sikk. ⁶ Ñu daldi ne: «Dunu gis mukk lenn lu nu tuumaal Dañeel. Xanaa nu gis ko ci yoonu Yàllaam.»

⁷ Ba mu ko defee saytukat yaak jawriñ ya ànd rungumloo ba ca Buur, ne ko: «Buur Daryus, guddalu fan! ⁸ Saytukati nguur gépp ak laman yeek jawriñ yeek boroom xel yeek jaraaf yi mànkoo nañu, téral dogalu buur bi yoonal aaye bii: ci diiru fanweeri fan, képp ku ñaan ci jenn yàlla mbaa ci nit ku la moy, yaw Buur sang bi, dees na ko sànni ca kàmbu gaynde ya. ⁹ Léegi nag, Buur, dogalal aaye bi, te torlu mbind mi, ba dootu tebbiku, mu déppook yoonu waa Medd ak waa Pers, wi dul toxu.» ¹⁰ Ci kaw loolu Buur Daryus torlu mbindum aaye ba.

¹¹ Ba Dañeel yégee ne torlu nañu dogal ba, teewul mu ñibbi, yéeg ca néeg ba ca kaw taax, ma palanteer ya jublook Yerusalem, na mu ko daan defe naka jekk ñetti yoon ci bés. Mu sukk fa, di ñaan ak a sant Yàllaam. ¹² Ci kaw loolu nit ña rungumloo, fekk ko muy ñaan ak a dagaan Yàllaam, ¹³ ba noppi ñu dem fekki Buur, ngir wax ak moom ca aaye ba mu téral, ne ko: «Xanaa du yaa torlu aaye bi ne: képp ku ñaan jenn yàlla mbaa nit ku la moy, yaw Buur, diiru fanweeri fan, dees na ko sànni ca kàmbu gaynde ya?» Buur ne: «Dogal bi kay wér na, déppook yoonu waa Medd ak Pers, wi dul toxu.»

¹⁴ Ñu ne ko: «Buur, Dañeel mi bokk ca ngállóg Yudeen ña de, faalewu la, yaak aaye bi nga torlu. Ñetti yoon ci bés lay ñaan ay ñaanam ba tey.» ¹⁵ Buur dégg ko, am tiis wu réy. Mu daldi fas yéene ne dina musal Dañeel. Ba jant so ma ngay wut pexe mu mu ko musale.

¹⁶ Ci kaw loolu nit ña rungumlooti ba ca Buur, ne ko: «Buur, xamal ne yoonu waa Medd ak Pers téral na ne mboolem aaye mbaa dogal bu buur déggal dootu toxu.»

¹⁷ Buur nag joxe ndigal, ñu yóbbu Dañeel, tàbbal ko ca kàmbu gaynde ya. Buur ne ko: «Sa Yàlla ji nga saxoo jaamu, yal na la xettli.»

¹⁸ Ba mu ko defee ñu indi aw doj, dēj ko ca buntu kàmb ga, Buur bēs ca jaarob torlukaayam ak jaarob torlukaayu jaraafam ya, ba dara dootu mana soppiku ci deminu Dañeel. ¹⁹ Ba loolu wéyee Buur dellu kërám. Lekkul guddi gi yépp, sàkkuwul lu koy bégal, te nelaw tē ko.

²⁰ Ba njël jotee, ba bët di bégga set, Buur jóg, daldi gaaw dem ca kàmbo gaynde ya. ²¹ Naka la jub kàmbo ga, daldi woo Dañeel; baat baa nga tiis. Mu ne ko: «Éy Dañeel, jaamu Yàlla jiy dund; sa Yàlla ji nga saxoo jaamu, mbaa mujj na laa xettli ci gaynde yi?»

²² Dañeel daldi ne Buur: «Buur, guddalu fan! ²³ Sama Yàlla yebal na malaakaam, mu tēj gémmini gaynde yi, ba defuñu na dara. Ndax kat mucc naa ci tuuma sama digganteek moom ak sama digganteek yaw it, te defuma dara lu bon.»

²⁴ Buur nag am mbégte mu réy. Ci kaw loolu mu joxe ndigal, ñu génne Dañeel kàmbo ga. Ba ñu génnee Dañeel kàmbo ga, gaafuwul fenn, ndax daa wóolu Yàllaam.

²⁵ Ba loolu wéyee Buur joxe ndigal, ñu indi nit ña tuumaaloon Dañeel, ñu tábbal leen ca kàmbo gaynde ya, ñook seeni doom ak seeni jabar. Àgguñu suuf sax, gaynde ya alawti leen, dammate seen yax yépp.

²⁶ Gannaaw loolu Buur Daryus bind waa mbooloo yépp ak xeet yépp ak làkk yépp, di waa àddina seep, ne:

«Jàmm ngeen!

²⁷ «Dogal tukkee na ci man, ne mboolem fu bokk ci sama nguur, nañu fa ragal Yàllay Dañeel, wormaal ko, keey Yàlla jiy dund, kee sax fàww, nguuram du tas, kilifteefam du jeex.

²⁸ Keey musle, di xettlee, di def ay màndarga aki kéemaan, kaw asamaan ak suuf. Kee musal Dañeel ca pàddum gaynde ya.»

²⁹ Dañeel nag géna am cér diirub nguurug Daryus ak nguurug Sirius waa Pers ba.

Aji Sax ji feeñu na Dañeel

7

(Saar 7.1—12.13)

Dañeel gis na ñeenti rabi géej

¹ At ma jèkk ca nguurug Baltacar buuru Babilon, Dañeel daa gént, peeñu dikkal ko ci kaw lalam. Mu bind nag gént gi, doore ko nii. ² Dañeel da ne: «Damaa gis guddi ci peeñu mi; mu jekki-jekki am ngelaw lu jóge ñeenti wet, riddeendoo, di yéngal géej gu mag ga. ³ Ci kaw loolu ñeenti rab yu réy génne ca géej ga, rab wu nekk wuuteek sa moroom.

⁴ «Rab wu jèkk waa nga mel ni gaynde, am laafi jaxaay. Naka laay xool, ñu buddi laaf yi, yékkatee ko ci suuf, taxawal ko, mu

taxawe ñaari tànk ni nit, ba noppi ñu jox ko xelum nit.

⁵ «Ñaaareelu rab wa ne jimeet, nirook urs*. Mu ngi taxawe wet, ñank ñetti faar. Ñu ne ko: “Jógal lekk yàpp wu bare.”

⁶ «May xool ba tey, yem ci rab wu mel ni segg, am ñeenti laaf. Rab waa ngi am ñeenti bopp, ñu jox ko kilifteef gi.

⁷ «May xool ba tey ci biir peeñum guddi mi, daldi yem ci ñeenteelu rab wu raglu, ñàng, te am doole ju jéggi dayo. Mu ngi am bëni weñ yu réy yu muy moxoñee, di warax, di nappaaje la ca des. Moom nag wuute naak rab yi ko jiitu yépp, te fukki béjjén la am.

⁸ «Ni ma ne jàkk ci béjjén yi, beneen béjjén bu ndaw ne pèll, génn ci seen biir, ñett ca béjjén ya jiitu buddeeku. Béjjén bu ndaw baa nga am bët yu mel ni bëti nit ak gémmini gu muy waxe kàdduy damu.»

⁹ «May xool ba tey, ñuy teg ay gàngune, góor gu mag gi dik, toog. Mbubb maa nga weex furr, kawaru boppam weex tàll, ngànguneem ma di saf sawara, wuy sèl-sèli,

mbegey ngàngune ma bindoo ni sawara wu yanj,

¹⁰ dexu sawara di wal, balle fa kanamam. Junniy junnee nga koy jaamu, mbooloooy mbooloo dar ko.

Waa pénc ma toog, téere ya ubbiku.

¹¹ «May xool ba tey ndax kàdduy damu yooyu béjjén biy wax, ma gis ñu rey rab wa, sànni méddam ca taal bu yanj ba, mu sànk. ¹² Rab ya ca des nag, ñu nangu seen kilifteef. Teewul ñu bàyyi leen ñu dundaat ab diir.

¹³ «May xool ba tey ci biir peeñum guddi ma, gisuma lu moy jémm ju mel ni doomu nit di ñew, mook niiri asamaan, jëm ci góor gu mag gi; ñu yóbbu ko ba ca moom. ¹⁴ Ci kaw loolu ñu jébbal ko kilifteef gaak ndam laak nguur ga. Ci biir loolu waa mbooloo yépp ak xeet yeek làkk yi di ko wormaal. Kilifteefam day sax fàww, du jeex, te nguuram du foq muk.

¹⁵ «Ba mu ko defee, man Dañeel, ma am njàqare; sama peeñu yooyoo ma tiital.

¹⁶ Ma dem ba ca kenn ca ña fa taxaw, laaj ko lan la mbir moom mépp di tekki. Mu wax ak man, xamal ma piri ma, ne ma:

¹⁷ «Ñeenti rab yu mag yooyu, ñeenti buuri àddina† lañu yuy ñew. ¹⁸ Waaye aji sell yu Aji Kawe ji dinañu jot ci nguur gi, moom ko fàww, saxoo ko dàkk.»

* 7:5 7.5 urs rab wu ñàng la; man naa épp gaynde. †

7:17 7.17 ñeenti buur yooyu, buuri waa Babilon la woon

ak Pers ak Medd ak Geres.

¹⁹ «Ba loolu wéyee ma bëgga am lu leer ca ñeenteelu rab, wa wuuteek ya ca des yépp, ñàng lool, am ay bëñi weñ ak weyi pèrèm, di moxoñeek a warax, di nappaaje li ci des. ²⁰ Ma bëgga am lu leer ba tey ci fukki béjjén yi ci bopp bi ak beneen ba génn, ba ñett daanu ca kanamam; mu am ay bêt ak gémmiñ, di wax kàdduy damu, te èpp yi ci des. ²¹ May xool, béjjén boobu di xareek aji sell yi, di leen daan, ²² ba keroog góor gu mag gi dikk, daldi jox dëgg aji sell yu Aji Kawe ji; àpp bi nag mat, aji sell yi moom nguur gi.

²³ «La ca topp mu neeti ma: “Ñeenteelu rab wi mooy ñeenteelu nguur giy taxaw ci kaw suuf, wuuteek nguur yépp. Dina mëdd áddina sépp, nappaaje ko, rajaxe ko. ²⁴ Fukki béjjén yi fukki buur lañu, yuy yore nguur googu. Beneen buur dina falu, wuutu leen. Dina wuuteek ña ko jiitu te dina folli ñetti buur. ²⁵ Dina yékkati ay kàddu dal ci Aji Kawe ji, dina fitnaal aji sell yu Aji Kawe ji te dina fexee sopp takkinu jamono yi ak yoonu Yàlla wi. Dees na teg aji sell yi ci loxoom diiru ñetti jamonook genn-wáll. ²⁶ Waa pénc mi toog, ñu nangu kilifteefam, tas ko, neenal ko ba fàww. ²⁷ Palug mboolem nguur yi asamaan tiim, ak kilifteef gaak daraja ja dees na ko boole, jébbal aji sell yu Aji Kawe ji. Nguurug mbooloo moomu day sax ba fàww, kilifa yépp di ko dëggal, di ko wormaal.”

²⁸ «Fii la mbir mi yem. Man Dañeel nag, ma am njàqare lool, ba sama kanam soppiku, ma denc kàddu yooyu ci sama xel.»

8

Dañeel gis na kuuy ak sikket

¹ Ca ñetteelu atu nguurug Baltacar, man Dañeel am naa meneaen peeñu, gannaaw peeñu ma ma jëkkoonaa am. ² Ca biir peeñu ma, maa ngi Sus, péeyub diiwaanu Elam. Ma gis ci peeñu mi ne maa ngi ci wetu yoonu ndox ma ñu gas te ñu di ko wax Ulay. ³ Ma séntu, xool, yem ci kuuy mu taxaw feggook yoonu ndox ma, am ñaari béjjén yu gudd te benn bi géna gudd ba ca des. Waaye bi géna gudd moo mujja sax. ⁴ Ma gis kuuy may dañ, di jublu sowu ak bëj-gannaar ak bëj-saalum. Menn mala manu koo tē, te maneesula xettli kenn ci moom. Ma ngay def lu ko neex tey géna mągg. ⁵ May xool, ab sikket jóge sowu, jaare dëndu suuf sépp te laalul suuf. Sikket baa nga am béjjén bu yéeme ci diggante bêt yi. ⁶ Mu dikk ba tollook kuuyum ñaari béjjén, mi ma gisoon ci wetu yoonu ndox mi, daldi koy

songe xadaru dooleem. ⁷ Ma gis ko nag, mu dikk ba ca moom, song kook xadar, dóor kuuy mi, damm ñaari béjjénam, te kuuy mi manu koo tē. Mu daane ko ci suuf, note ko, te kenn manu koo teqaleek moom. ⁸ Sikket bi mujj mągg lool; ba fa kàttanam yem, béjjén bu gudd ba damm, ñeenti béjjén yu yéeme sax, wuutu ko, jublook ñeenti ngelawi asamaan. ⁹ Ci kaw loolu béjjén bu ndaw géne ci béjjén yooyu benn, daldi lawa law jublu bëj-saalum ak penkook réew ma géna rafet*. ¹⁰ Muy mągg nag bay diir mbagg gąngoori xarey asamaan, ba daaneel lenn ci ñoom, ak lenn ci biddiww yi, nappaaje leen. ¹¹ Muy damu bay diir mbagg Njiital gąngooru xare gi, daldi dakkal sarax ba ñu ko daan defal bés bu jot, mąbb bérabam bu sell ba. ¹² Gąngooru xare gi tegu na ciy loxoom, boole kook saraxu bés bu jot bi, lépp cig tooñam. Béjjén bi dal ci kaw dëgg, daaneel ko fi suuf, ay pexeem joy.

¹³ Ba loolu amee ma dëgg jenn aji sell di wax, jeneen aji sell ne ko: «Lan mooy àppu peeñu mii ñu gis, ñu di ci dakkal sarax biy am bés bu jot, di teddadil gąngooru xare gi, ak a tooñ, di yàq lépp?» ¹⁴ Mu ne ma: «Àpp bi ñaari junni laak ñetti téeméer ciy guddeeki bëccég. Gannaaw loolu dees na taxawalaat bérab bu sell bi.»

¹⁵ May xool ci biir peeñu mi, man Dañeel, di jéema xam lu muy tekki, jëmm juy nirook góor, ne jimeet taxaw ci sama kanam. ¹⁶ Ci kaw loolu ma dëgg baatu nit jibe ca digg yoonu ndox ma ñuy wax Ulay. Mu àddu ca kaw ne: «Jibril, waxal kii peeñu mi.» ¹⁷ Jibril dikk nag ba fi ma taxaw. Ba mu jegesee, ma tiit lool, ba daanu, sama kanam dëppu fi suuf. Mu ne ma: «Yaw doom aadama ji, nanga xam ne peeñu mii mujug jamono la.» ¹⁸ Bi muy wax ak man, dëpp naa sama kanam fi suuf, ba daanu leer. Mu laal ma, taxawalaat ma fa ma taxawoon. ¹⁹ Mu ne ma: «Maa ngi lay xamal luy xew keroog ba merum Yàlla di jeex, ndax muj ga mooy àppu mer ma. ²⁰ Kuuy mi nga gis mu am ñaari béjjén, buuri waa Medd ak waa Pers la. ²¹ Sikket bi buuru réewum Geres la. Béjjén bu gudd bi ci diggante bêt yi mooy buur bu jëkk bi. ²² Dañu koo damm, ñeenti béjjén wuutu ko, di ñeenti nguur yu soqeeqoo ca xeet wa, waaye duñu am doole ni ga jiitu. ²³ Bu nguur yooyu jeexee, ba bàkkaarkat yi buural, buur bu néeg te bare pexe dina falu. ²⁴ Dina géna am doole, waaye du doon dooley boppam. Yaqam dina jéggi dayo, te ay pexeem dina joy. Dina faagaagal ñu am doole ba ca mbooloom aji sell yi. ²⁵ Xelum njublanam lay naxee, di

* 8:9 8.9 réew ma géna rafet fii réewum Israyil a tax ñuy wax.

réy-réylu, ba bett ñu bare, faagaagal leen, te dina dëkk kilifay kilifa yi. Waaye mooy sànkú, te loxo du ko laal. ²⁶ Peeñum ngon meek mu bëccëg mi la dikkal lu wër la. Yaw nag neel cell ak peeñu mi, ndax des na fan yu bare.»

²⁷ Ba loolu amee ma ne làcc, wopp ay fan, man Dañeel. Gannaaw gi ma jóg, dellu ca liggéeyu buur. Ma waaru nag ca peeñu ma, ndax daa wees sama dég-dég.

9

Dañeel jàngat na waxyu bu Yeremi biral

¹ At ma jëkk ca jamonoy Daryus, ma bokk ca waa Medd, di doomu Aserus te falu woon buurub waa Babilon, ² ca at ma jëkk ca nguuram, man Dañeel damaa gis ci téere yi limu at yi kàddu Aji Sax ji xamal Yonent Yàlla Yeremi, muy àpp bi Yerusalem wara gental, di juróom ñaar fukki at. ³ Ma walbatiku jublook Boroom bi Yàlla. Maa ngi sol saaku, diwoo dóom boole kook koor, toroxloo ko, di ko ñaan ak a dagaan. ⁴ Ma ñaan sama Yàlla Aji Sax ji, tuubal ko samay bàkkaar, ne ko: «Yaw Boroom bi, Yàlla ju mággi ji mata ragal, yaw miy sàmm kóllère ak ngor sa digganteek ñi la bëggi, di sàmm say santaane. ⁵ Bàkkaar nanu, ñaaw nanu, tooñ nanu, gántal la, dèddu say santaane ak sa ndigali yoon. ⁶ Dégluwunu say jaam, di yonent yi jottli sa kàddu sunuy buur ak sunuy kilifa ak sunuy maam ak mbooloom réew mi mépp. ⁷ Yaw Boroom bi, njub ñeel na la, waaye nun gacce ñeel na nu bésu tey jii, muy waa Yuda, muy waa Yerusalem, di waa Israyil gépp, ku jegeek ku sore, ci biir mboolem réew yi nga leen dàq, yóbbu, ndax li ñu la ñàkke kóllère. ⁸ Aji Sax ji, nun kay gacce ñeel na nu, nook sunuy buur ak sunuy kilifaak sunuy maam, ndax moy nanu la. ⁹ Boroom bi sunu Yàlla, yaay Boroom yérmandeek njéggal moos, ndax gántal nanu la. ¹⁰ Noo baña déglu sunu kàddu Yàlla Aji Sax ji, di topp yoonam yi mu nu jox, yonent yiy jaamam jottli nu ko. ¹¹ Israyil gépp a moy sa yoon, jàdd, baña déglu sa kàddu, ba képpoo sa alkàndey ngiñ, gi ñu bind ci yoonu Musaa, sa jaam ba, ndax danu laa tooñ. ¹² Matal nga sa kàddu gi nga wax ci nun, nook sunu kilifa yi nu yilif, ba nga wàcce ci sunu kaw, ci Yerusalem, musiba nu réy mu masala am feneen fu mboolem asamaan tiim. ¹³ Ni ñu ko binde ci yoonu Musaa, ni la nu musiba moomu mépp dik kale, te tinuwunu la, yaw, sunu Yàlla Aji Sax ji. Dèdduwunu sunuy bàkkaar it

te séddunu sa worma. ¹⁴ Aji Sax ji, looloo waral nga dogu ci wàcce musiba mi ci sunu kaw, ndax yaw sunu Yàlla Aji Sax ji, njekk nga jéfe lépp loo jéf, waaye noo dégluwul sa kàddu.

¹⁵ «Léegi nag yaw Boroom bi, sunu Yàlla ji nu génnee Misraak doole, nun sa mbooloo, nga siiwale ca sa tur ba sunu jonni yállay tey, noo bàkkaar, noo tooñ. ¹⁶ Boroom bi, seetal ci sa gépp njekk, ba waññi sa mer ak sa xadar, mu moy Yerusalem, sab dëkk, saw tund wu sell. Ndash kat sunuy bàkkaar ak sunu ñaawtéefi maam tax na mboolem ñi ñu wër di sewal Yerusalem ak sa mbooloo.

¹⁷ «Kon nag yaw sunu Yàlla, Sang bi, rikk nangul li ma lay ñaan, di la ko dagaan. Boroom bi, ngalla geesul ngir yaw ci sa bopp sa jaamookaay ba ñu gental. ¹⁸ Rikk sama Yàlla, teewhlul, déglul te xippi, ba gis sunu gent yi ak sa dëkk ba ñuy tudd sa tur. Du sunu njekk lanu lay dagaane moos, waaye sa yérmande ju yaa rekk a tax. ¹⁹ Boroom bi, ngalla Boroom bi, déglu nu te baal nu! Rikk Boroom bi sama Yàlla, teewhlul ngir yaw ci sa bopp, te bañ noo yeexe, ndax saw tur lañu tudde sa dëkk ak sa mbooloo.»

²⁰ Maa ngay wax ak a ñaan, di tuub sama bàkkaar ak a tuubloo Israyil sama ñoñ tey dagaanal sama tundu Yàlla wu sell wi*, ci sama Yàlla Aji Sax ji. ²¹ Maa ngay wax ci ñaan gi, waa ja Jibril ma ma gisoon lu jitu ci peeñu mi, daldi naawa naaw, dik ba ci man, yemook waxtuw saraxu ngon. ²² Mu xamal ma, ne ma: «Dañeel, léegi damaa ñew ngir leeralal la. ²³ Ba nga tàmbalee ñaan la kàddu dik. Maa la ko yégalsi, ndax yaw ku ñu naw nga. Déggal kàddu gi te déggi peeñu mi.

²⁴ «Juróom ñaar fukki ayi bés lañu àppal sa mbooloo ak sab dëkk bu sell, ngir dakkal tooñ gi, jeexal moy gi, jotu ñaawtéef, saxal njubte ba faww, matal peeñum yonent, ba delloo bérab bu sella sell ag sellngaam. ²⁵ Nanga xam kon xéll ne: li ko dale keroog ba ñuy siiwtaane dogal ba jëm ci leqli Yerusalem, tabaxaat ko, ba keroog njiit li ñu fal di feeñ, juróom ñaari àppi juróom ñaar la. Te ci juróom benn fukk ak ñaar ci àppi juróom ñaar lañuy tabaxaat pénc ak kàmb gu ñu aare dëkk bi. Waaye jamono yu metti lay doon. ²⁶ Bu juróom benn fukk yeek ñaar ciy àppi juróom ñaar weesee, dees na bóom ku ñu fal, te kenn du ànd ak moom. Gannaaw loolu kilifa dina ñew, ànd ak gàngooram, yàqte dëkk beek jaamookaay bi. Waaye kilifa googu lu mel ni mbénn a koy mujje. Dogal nañu ne yàqte gi dina wéy ba keroog

* 9:20 9.20 tundu Yàlla wu sell wi Yerusalem la.

xare biy jeex. ²⁷ Dina feddli kóllère diggam ak ñu bare ci benn àppu juróom ñaar, te ci diggu àppu juróom ñaar ba lay dakkal sarax yi ñuy rendi ak yeneen sarax. Ci genn wetu sarxalukaay bi la yaqkat biy taxawal lu siblu†, di sabab yaqute, ba kerog muj gi ñu ko dogalal ne milib ci kawam.»

10

Dañeel gis na boroom col gu weex

¹ Ci ñetteelu atu nguurug Sirus buuru Pers, kàddu daa dikkal Dañeel ma ñuy wax Beltasar. Kàddu googu di gu wóor tey yégle xare bu mag. Mu dégg kàddu gi, xam pirim peeñu mi.

² Jant yooyu, man Dañeel maa nga doon ñaawlu diiru ñetti ayi bés. ³ Ñam wu neex lekkuma ko, te yàpp ak biiñ jaarul sama gémmiñ. Diwuuma it ba ñetti ayi bés yi mat. ⁴ Kerog ñaar fukki fan ak ñeent ci weer wi jëkk ci at mi, maa nga ca tàkkal dex gu mag gi ñuy wax Tiigar. ⁵ Ma séentu, xool, yemuma ci ku moy genn goor gu sol yérey wëñ gu èccu, gañoo ngañaaal wurus wu raxul. ⁶ Yaram waa nga rafet ni peru gànjar, xar-kanam ba mel ni melax, bët ya mel ni jumi sawara, loxo yeek tànk yi mel ni xànjar bu ñu jonj, riiru baatam mel ni coowal mbooloo.

⁷ Man Dañeel donj maa gis peeñu mi. Ñi ma àndal gisuñu ko. Tiitaange lu réy nag jàpp leen, ba ñu daw, làquji. ⁸ Ba loolu amee ma des fa man rekk, ne jàkk ci peeñu mu réy moomu. Waaye deseetuma woon doole, damaa jeexal tàkk, amatuma genn kàttan. ⁹ Ci kaw loolu ma dégg baatam. Naka laa dégg baatam, daldi daanu leer, sama kanam deppu fi suuf. ¹⁰ Yéguma lu moy ab loxo bu ma laal, yékkati ma, ma teg sama bëti óom ak sama tenqi loxo fi suuf, di lox. ¹¹ Mu ne ma: «Dañeel, yaw mi ñu naw, déggal kàddu yi ma lay wax. Jógal taxaw sa taxawaay, ndax dañu maa yebal ci yaw nii.» Naka la ma wax kàddu yooyu, ma ne ñokket, di lox. ¹² Mu ne ma: «Dañeel, bul tiit. Bés bu jëkk ba nga fasee yéene xam, ba toroxlu ci sa kanam Yàlla, ca lañu dégg say kàddu te sa kàddu yooyoo ma taxa ñew. ¹³ Waaye rawaanu nguurug Pers moo ma dogale ñaar fukki fan ak benn. Mikayel nag, kenn ci malaakay wattukat yu mag yi ñew, wallusi ma. Yàgg naa ca buuri Pers ya. ¹⁴ Léegi ñew naa ngir xamal la liy dikkal sa mbooloo ci jamono yiy ñew ndax peeñu mi ëmb na jamono yooyu itam.»

¹⁵ Bi mu may wax kàddu yooyu, maa ngi sègg, sama kanam jublu ci suuf, manumaa wax. ¹⁶ Jekki-jekki jëmm ju mel ni nit dikk, laal samay tuñ. Ma ña, àddu, daldi wax ak ki taxaw sama kanam ne ko: «Sang bi, peeñu mi tax na ma jaq, ba amatuma benn doole. ¹⁷ Te it sang bi, nu may mana waxeek yaw, sang bi? Amatuma doole te deseetuma ngelawal gémmiñ.» ¹⁸ Ba loolu amee jëmm jiy nirook nit dellu laal ma, ma amaata doole. ¹⁹ Gannaaw loolu mu ne ma: «Yaw nit ki ñu naw, bul tiit. Jàmm la. Góor-góorlu!» Muy wax ak man, may amaata doole, ba ne ko: «Waxal sang bi, dooleel nga ma.» ²⁰ Mu ne ma: «Ndax xam nga lu ma taxa dikk? Léegi ma dellu xarejeek rawaanu réewum Pers; te bu may dem, rawaanu Geres dikk. ²¹ Waaye dinaa la xamal li ñu bind ci téereb dégg gi. Kenn jàppewu ma ci ñooñu ku dul Mikayel, seen malaakam wattukat, yeen bànni Israyil.

11

¹ Man ci sama wàllu bopp nag, maa nga woon ca wetam, di ko aar ak a jàpple, ca at ma jëkk ca nguurug Daryus waa Medd ba.

Buur bëj-gànaar ak buur bëj-saalum a ngi jote

² «Léegi, maa ngi lay xamal lu wér. Dama ne, dina amaata ñetti buur yuy falu ci réewum Pers, ñeenteel ba dikk, dajale alal ju bare, ba èpple leen ñoom ñepp. Bu demee ba alalam may ko doole, dina def lépp lu mu man ngir xabtal ñepp ci kaw nguuru Geres. ³ Waaye buur bu jambaare dina falu, di boroom kilifteef gu yaatu, di def lu ko soob. ⁴ Naka lay jóg rekk, nguuram daldi foq, tas, ñeenti ngelawi asamaan tasaare, yóbbu. Aw askanam du moom nguur ga, te nguur ga dootu am doole ja mu amoon. Nguuram day foq, tàbbi ci loxoy ñeneen ñu dul askanam.

⁵ «Buur bëj-saalum* dina am doole, waaye kenn ca ña mu jiital a koy èpp doole, te kilifteefam mooy géna yaatu.

⁶ «Gannaaw ay at, buur bëj-saalum ak buur bëj-gànaar dinañu mánkoo. Doomu buur bëj-saalum mooy séysi kër buur bëj-gànaar, ngir dégéral diggante bi. Waaye nguurug doom ja du yàgg, boroom kër am it du dundaat lu yàgg mook seen doom. Doomu buur bëj-saalum day dee, mook toppam ak baayam ak boroom kër am. ⁷ Kenn ci waa kër am mooy wuutu baayam, dikk, dal ca mbooloom xarem buur bëj-gànaar, jàll ba ca wàllaa tatay

† 9:27 9.27 lu siblu sarxalukaayu tuur la, bu ñu samp ca jaamookaayu Yàlla ba, di ko sobeel. * 11:5 11.5 buur bëj-saalum: réewum bëj-saalum bii ñuy wax buuram, Misra la. Réewum bëj-gànaar di Siri.

buur bėj-gannaar, jėflanteek ñoom, duma leen, ba daan. ⁸ Dinañu lėl sax seen jėmmi tuur yu ñu móol, yóbbu Misra, boole kook seen gånjaru xaalis ak wurus. Gannaaw loolu dina toog ay at te du laaleek buur bėj-gannaar. ⁹ Gannaaw gi buur bėj-gannaar dina dem réewum bėj-saalum, doora dellu réewam.

¹⁰ «Ay doomam yu góor nag dinañu waajal xare, dajale gangoor yu takku. Ñu jubal, bėtt, jáll nim wal, daldi ñoqli, songi noon ba ca dėkk ba ñu wėralee tata.

¹¹ «Buur bėj-saalum dina sigiñu, songi buur bėj-gannaar. Kooku waajal mbooloom xare mu mag, waaye mbooloom moomu dees na leen teg ci seen loxoy noon. ¹² Mbooloo moomu dees na leen faagaagal, buur bėj-saalum di ca réy-réyly. Dina rey ay junniy nit nag, waaye du ko taxa am ndam. ¹³ Li ko waral mooy buur bėj-gannaar day dellu waajalaat mbooloo mu ěpp ma jıitu. Bu amee ay at dina dikkaat, ñd ak mbooloom xare mu mag ak ngannaay lu takku. ¹⁴ Jamono yooyu ñu bare dinañu jógal buur bėj-saalum, te ay nit ñu soxor ñu bokk ci saw xeet dinañu fippu, ni ko peeñu indee, waaye duñu ko man. ¹⁵ Buur bėj-gannaar dina ñew yėkkati ay jal, gaw dėkk bu ñu wėrale tata, nangu ko. Mbooloom xarey bėj-saalum ak seen ñeyi xare duñu leen mana tē. Duñu am doole ju ñu leen tēwe. ¹⁶ Ki leen di song dina leen def li ko soob, ndax kenn du ko tē. Dina toog ci réew mu taaru ma†, te am dooley tas ko. ¹⁷ Dina fas yéenee dikk ak dooley nguuram gépp, ba dégéral digganteem ak buur bėj-saalum. Da koy may doomam soxna, ngir di ko fexee sánk. Waaye loolu du sotti, ndax pexe ma du joy. ¹⁸ Gannaaw loolu dina wuta moom fa féeteek dun ya, ba nangu ca ay réew, waaye dina am njiitu xare lu dakkal jėfi réy-réyloom ji muy torxale, ba fey ko añam. ¹⁹ Bu loolu weesee dina walbatiku dal ci dėkk yi ñu wėralee tata ci biir réewu boppam, waaye du sotti. Day daanu, ne mes. ²⁰ Ki koy wuutu dina yebal kuy foqati ay galag yu ñuy yokke puukarey nguur gi, waaye du yágg dara, ñu faagaagal ko ci sutura, te du doon ci xare.»

Buur bėj-gannaar ěpp nay loxo

²¹ «Ku siblu moo koy wuutu, ku yel-loowul darajay nguur. Day duggsi ndánk, lal ay pexeem, ba nangu nguur gi. ²² Mbooloo xare yi dinañu def um wal nig dex, dal ci kawam, waaye dees na leen rajaxe, ñook genn kilifay mbooloom kólléreg

Yalla gi. ²³ Gannaaw bu ñu wóllėranteek moom, dina wor. Dina gėna am doole, te amul mbooloo mu bare. ²⁴ Day dug ndánk ba ca biir gox ya gėna woomle ca diiwaan ba. Dina fa def lu ay baayam aki maamam masula def. Dina lėl ay réew, séddale ay farandoom alal jaak koom ga. Dina lal pexe yu mu songe ay tata, waaye loolu ab diir lay doon.

²⁵ «Bu loolu weesee dina ñd ak mbooloo mu bare, daldi yebook doole ak pastėef ci kaw buur bėj-saalum. Buur bėj-saalum waajal xare, ñd ak mbooloo mu réy te bare doole lool, waaye sottiwul ndax pexe yu ñu koy lalal. ²⁶ Ci biir loolu ay nit ñuy bokk ak buur bėj-saalum ndab ñooy sánk buur bėj-saalum, ba mbooloom jóoru, ñu bare tēdd. ²⁷ Naari buur yi dinañu nas lu bon ci seen xol; di bokk ndab tey waxantey fen. Waaye seeni pexe du mujj fenn, ndax du fekk muj ga jot. ²⁸ Gannaaw gi buur bėj-gannaar dina dellu réewam, yóbbale alal ju takku. Dina fexeel mbooloom kóllėre gu sell gi‡, doora ñibbi réewam.

²⁹ «Bu ãpp bi jotee, buur bėj-gannaar dina dal ci kaw réewum bėj-saalum. Waaye boobu yoon du deme na woon. ³⁰ Ay boroom gaal yu mag dinañu jóge sowu, songsi ko, ba tax mu xáddi, ba dēpp. Mu daldi mer lool, sippi ko mbooloom kóllėre gu sell gi, tey ñd ak ñi dēddu kóllėre gu sell gi. ³¹ Ay xarekat yu mu yebal dinañu dem teddadil jaamookaay, bi ci tata ji; dinañu dakkal sarax si ñu fa saxal fãww, ba noppi teg fa lu siblu§ luy jur yàqute. ³² Ñi sãmmul kóllėreg Yalla ay nax la leen di fãbbe, waaye askan wi rãñnee seen Yalla, pastėef lañuy jėfeji. ³³ Te it boroom xel yu rafet yi ci mbooloo mi dinañu gindi ñu bare. Nattu dina leen dikkal ab diir; ñii saamar jaar ci seen kaw, ñii ñu lakk leen, ñee ñu nangu seen alal, tēj leen. ³⁴ Te bu leen nattu dikkalee, ndimbal lu néew lañuy am, ndax ñu bare naaféq lañuy fareek ñoom. ³⁵ Ñenn ci boroom xel yu rafet yi dinanu jaare ci nattu yu leen di sellal, fóot leen ba ñu set wecc, ba kerog mujug jamono. ãpp ba nag des na.

³⁶ «Buur bi dina def lu ko soob. Dina réy-réylook a damu, ba weesale boppam tuur yépp, te dina wax gilaawaali jėme ci Yalla ji sut lépp. Dina am ndam nag ba kerog sãnjum Yalla ñoral ko. Li ñu dogal déy dina am. ³⁷ Buur bi du faale tuuri maamam, du faale tuur mi jigėen ñi sopp*.

† **11:16** 11.16 réew mu taaru ma: Israyil la. Seetal it ci 11.41. ‡ **11:28** 11.28 mbooloom kóllėre gu sell gi banni Israyil la. § **11:31** 11.31 lu siblu: seetal ci 9.27. * **11:37** 11.37 tuur moomu lañu gėmoon ne man naa nangul am njur.

Du faale menn tuur, ndax day damu ba weesale hoppam lépp. ³⁸ Xanaa kay tuur mi yor kaaraangey tata yi lay jaamu, muy tuur mu ay maamam xamul woon. Dina ko jaamoo wurus ak xaalis ak xeer yu jafe ak yeneen gånjar. ³⁹ Tuuri jaambur yooyu lay doolewoo, di song dëkk yi ñu wëralee ay tata. Ku ko nangul, mu teral la, def la kilifag ñu bare, ba noppi yoole la ay suuf. ⁴⁰ Ca mujug jamono buur bëj-saalum dina fenqoo ak buur bëj-gànnaar. Te itam buur bëj-gànnaar dina mel ni ngélaani, ne milib ci kawam, ànd ak watiiri xare aki gawar ak gaal yu mag yu bare. Dina dugg ci ay réew, bëtt, jàll nim wal. ⁴¹ Gannaaw loolu dina dugg ci réew mu taaru ma, te ñu bareey daanu. Waaye Edomeen ñaak Mowabeen ñaak njiiti Amonen ñi dinañu récc. ⁴² Dina teg loxoom yeneen réew, te réewum Misra sax du ca mucc. ⁴³ Dina aakimoo alali Misra, muy wurus, di xaalis ak mboolem gånjar. Waa Libi ak waa Kuus it dinañu ko nangul. ⁴⁴ Waaye nag xibaar dina bawoo penku ak bëj-gànnaar, tiital ko lool. Noonu mu jóg ak xadar, rey ñu baree bare, faagaagal leen. ⁴⁵ Dina samp xaymay kër buur ci diggante géej geek tund wu taaru wu sell wa†. Waaye dina dee, te kenn du ko taxawu.»

12

Mujug jamono taxaw na

¹ Malaaka ma waxati ma, ne ma:
«Jamono yooyu ci la Mikayel,
malaakam wattukat mu mag,
miy taxawu sa mbooloo, di jóg.
Muy jamonoy njàqare ju masula am,
cosaanal xeet yi ba tey jii.
Bu keroogee sa bokk yay mucc,
di ñi ñu bind ci téereb dund bi.
² Ñu baree ngi nelaw,
keroog ñu yewwoo fa pëndub suuf.
Ñenn ña nara dund fàww,
ña ca des aña gacceek njàqare fàww.
³ Ña rafet xel leer naññ
ni leeraayu déndub asamaan.
Ñi doon xiir mbooloo mi ci ngor
ne boyy niy biddiww, ba fàww.
⁴ «Yaw nag Dañeel, dencal kàddu yii,
muy kumpa te nga tēj téere bi, tay ko ba
mujug jamono jub. Su keroogee ñu bare
dinañu gëstu fu ne, ba xam-xam yokku.»

Dañeel gis na ñaari malaaka

⁵ Noonu man Dañeel, may xool ci biir
peeñu mi, daldi yem ci ñeneen ñaar ñu
taxaw, séq dex gi. ⁶ Kenn ki wax ak ka sol
mbubbam wëñ gu èccu ba sew, te taxaw
ca kaw dex ga, ne ko: «Ana fu kéemaan

yii yem?» ⁷ Ma dégg ka sol mbubbam wëñ
gu èccu te taxaw ca kaw dex ga. Ma nga
yékkati loxo ndijoor baak bu càmmoñ ba
te naa: «Giñ naa ko ci Kiy Dund fàww ne
ñetti jamonook genn-wàll lay doon. Xew-
xew yooyu yépp a ngi dakk keroog bu
dooley mbooloo mu sell mi jeexee tàkk.»

⁸ Maa ngi ciy dégg waaye xawma lu muy
tekki. Ma ne: «Sang bi, ana nu xew-xew
yooyu di mujje?» ⁹ Mu ne ma: «Dañeel,
demal rekk, ndax mbir yii dees koo làq,
dëxëñ ko, ba keroog muj ga taxaw. ¹⁰ Ñu
bare dees na leen sellal, fóot leen ba ñu
set wecc. Waaye ñu bon ñi wéy di bon, te
kenn du ci xam liy xew, teewul ñi rafet xel
dinañu ko xam. ¹¹ Jamono ja ñuy dakkal
sarax si wara sax fàww, di keroog ba ñuy
taxawal lu siblu* lay jur yàqute, junniy
fan ak ñaar téeméer ak juróom ñeent
fukk (1 290) dina ca topp. ¹² Ndokklee ku
muñ nag diiru junniy fan ak ñetti téeméer
ak fanweer ak juróom (1 335). ¹³ Waaye
yaw Dañeel, muñal ba fa muy mujje. Su
keroogee fekk la nelaw, doora jóg jël sab
yool, ca mujug jamono.»

† 11:45 11.45 tund woowu Yerusalem la. * 12:11 12.11 lu siblu: seetal ci 9.27.

Téereb Yonent Yàlla Ose

¹ Kàddug Aji Sax jii moo dikkaloon Ose, góor giy doomu Beeri, ci janti buuri Yuda, Osiyas, ak Yotam ak Axas ak Esekiya, ak ci janti buurub Israyil Yerbawam doomu Yowas.

Njabootu Ose misaal la

² Ba Aji Sax ji tàmbalee yóbbante Ose kàddoom, Aji Sax ji da ne ko: «Demal takki jabaru gànc, nga am ca doomi ngànctu, ndax réew maa ngi gànctu ngànctu gu réy, dèddu ma man Aji Sax ji.»

³ Ose dem takki Gomer doomu Diblayim. Mu èmb, gannaaw gi mu am doom ju góor.

⁴ Aji Sax ji ne ko: «Tudde ko Yisreel*. Des na tuuti dinaa mbugal askanu buur Yewu ndax deret ji ñu tuur ci Yisreel. Dinaa jeexal nguurug Israyil. ⁵ Su bés baa maay damm ngànaayu Israyil ca xuru Yisreel.»

⁶ Mu dellu èmb, gannaaw gi mu am doom ju jigéen. Aji Sax ji ne: «Tudde ko Lo Ruwana» (mu firi Ki ñu yèrèmul), mu ne: «ndax dootuma yèrèm waa kër Israyil, dootuma leen baal. ⁷ Waaye waa kër Yuda, maa leen di yèrèm. Seen Yàlla Aji Sax ji laa leen di walloo, waaye duma leen walloo fitt mbaa saamar, mbaa ay xare, mbaa ay fas aki gawar.»

⁸ Ba Gomer feralee Lo Ruwana, èmbaat na, ba am doom, muy góor. ⁹ Aji Sax ji ne ko: «Tudde ko Lo Ami» (mu firi Du sama ñoñ), mu ne: «ndax dungeen sama ñoñ, te man duma seen dara.»

2

Aji Sax jeey dalalaat ñoñam

¹ «Du tere askanu Israyil tollu ni suufas géej. Deesu ko mana natt mbaa di ko waññ, te foofa ñu leen noon: “Yeen, dungeen sama ñoñ,” fa lees leen naa: “Yeenay doomi Yàlla jiy dund.” ² Askanu Yuda ak askanu Israyil dañuy dellu boooloo, daldi tabbal seen bopp genn kilifa, te dinañu sèq ci réew mi, ndax bésub Yisreel ba dina réy. ³ Nanga wooye sa bokk yu góor: “Ñoñi Aji Sax ji,” sa bokk yu jigéen, nga ne leen: “Ñi Aji Sax ji yèrèm.”

Ab layoo rax na kàddug tinu ci Israyil

⁴ «Tiiñal-leen seen ndey, tiiñal-leen ko, ndax moom du sama jabar, te man duma jèkkèram. Nee ko mu bàyyi gànctu

te noppee tegoo màndargam njaaloo.

⁵ Lu ko moy ma futti ko ba mu ne dunj, def ko ni bés ba mu juddoo, melal ko ni màndij.

Maa koy def ni joor gu wow, marloo ko ba rey ko.

⁶ Ay doomam, duma leen yèrèm, nde doomi ngànctu lañu.

⁷ Ñoom seen yaay moo gànctu, ki leen èmb moo def lu gàccelu, naan: “Damay toppi sama far, yi may jox sama lekk ak samag naan, ak samag wèñ ak sama lèe ak samag diw ak sama biñ.”

⁸ «Moo tax maa ngii di ñage yoonam ay déj,

gawe ko ag wurmbal, ba yoon réer ko.

⁹ Mooy topp ay faram te du leen dab; mu seet leen, du leen gis.

Su boobaa mu ne: “Naa dellu ca saa jèkkèr ju jèkk ja, nde ca laa gènoonu demin.”

¹⁰ Moom xamul woon ne man maa ko doon jox

pepp meek biñ bu bees beek diw gi, di ko yéwéne xalis ak wurus, ñu di ko jaamoo Baal.

¹¹ Kon nag fa ngóob jote laay nangoo sama pepp,

fa wittum reseñ jote it laay nangoo sama biñ bu bees, maay foqati sama wèñ ak sama lèe, ba mu daan sange yaramam.

¹² Léegi maa koy futti, mu ne dunj, ay faram di gis,

te kenn du ko xettli ci sama loxo.

¹³ Maay dakkal gépp mbéxam; ay mággalam, ay Terutel weeram, ay bési Noflaayam, ak mboolem bési ndajeem.

¹⁴ Maay foom garabi reseñam aki figgam, yi mu noon: “Lii sama peyoor la!

Samay far a ma ko jox.”

Maa koy def ay dédd, rabi àll yi di ko lekk.

¹⁵ Maa koy feyu bési mággal yu tuuri Baal, ya mu leen daan taalale cuuraay, takk ay jaarooki gänjar, toppiy faram, fàtte ma.» Kàddug Aji Sax jee.

Aji Sax ji sàkkuwaat na cofeelu Israyil

¹⁶ «Moo tax maa ngii di ko naxtaan, maa koy yóbbu ca màndij ma, ba déey ko lu xolam dégg.

¹⁷ Foofa laa koy delloo tóokéri reseñam, defal ko xuru Akor* di buntu yaakaaram.

* 1:4 1.4 Xuru Yisreellañuy misaale deret ju wale, ndax lañu fa bóomoon ñu bare. Seetal ci 2.Buur ya 9.7-10.31.

* 2:17 2.17 xuru Akor mooy xuru Musiba. Seetal ci Yosuwe 7.24-26.

Fa la may feeloo na woon
 ca janti ndawam,
 ba muy génn réewum Misra.
¹⁸ Bésuh keroog,» kàddug Aji Sax jee,
 «Ca nga may wooye “Sama jëkkër,”
 te dootoo ma wooye “Sama Baal.”»
¹⁹ Turi tuuri Baal laay jële ci sa gémmiñ,
 ba deesatul fàttliiku seen tur.
²⁰ Bésuh keroog maa leen di fasal kóllère
 ak rabi àll yeek njanaaw yi,
 ak ndégmeent yi.
 Fitt ak saamar akub xare it,
 maa koy dagge ci réew mi,
 te maa leen di may téraayu jàmm.

²¹ «Yaw laay digool ba fàww, ab séy,
 te njekk ak njub ak ngor ak yërmande
 ci laay digook yaw ab séy.
²² Ci kóllère laay digook yaw ab séy,
 ba nga xam Aji Sax ji.
²³ Bésuh keroog, maay nangu,»
 kàddug Aji Sax jee,
 «maay nangul asamaan,
 moom, mu nangul suuf;
²⁴ suuf nangul pepp ak biññ ak diw,
 ñu bokk nangul Yisreel.
²⁵ Maa koy jëmbatal sama bopp ci réew
 mi,
 maay yërëm ki tuddoon “Ki ñu yërëmul.”
 Ki tuddoon “Du sama ñoñ,”
 ma ne ko: “Yaay sama ñoñ,”
 moom mu ne ma: “Sama Yàlla.”»

3

Aji Sax ji xiir na Israyil ci cofeel

¹ Aji Sax ji ne ma: «Demaatal bëggi
 jigéen ju faram bëgg, te muy moykat.
 Bëgg ko ni Aji Sax ji bëgge bànni Israyil,
 doonte dañuy walbatiku ci yeneen yàlla te
 bëgg seen saraxi nàkki reseñ.»

² Ci kaw loolu ma takk ko ci fukki poseti
 xaalís ak juróom, ak ñeenti téeméeri kiloy
 lors ak juróom fukk (450). ³ Ma ne ko:
 «Ay fan yu bare ngay toog fi man; bul
 gänctu, bul ànd ak genn góor. Noonu
 laay def ak yaw, man itam.» ⁴ Ndax
 kat ay fan yu bare la bànni Israyil di
 toog te duñu am buur, duñu am kàngam.
 Duñu rendi sarax, duñu am tuuri doj,
 duñu am xar-sànni, duñu am gállaaaji
 kër. ⁵ Gannaaw loolu bànni Israyil dinañu
 walbatiku, sàkku seen Yàlla Aji Sax ji, ak
 Daawuda seen buur. Ca jant yu mujj ya,
 xolub ragal Aji Sax ji lañuy dikke fi moom,
 akug mbaaxam.

4

Aji Sax ji tiinaal na kilifay ñoñam

¹ Yeen bànni Israyil, dégluleen kàddug
 Aji Sax ji,

Aji Sax ji kat moo séq ab layoo ak waa réew
 mi:
 «Du kóllère, du ngor, du gennug ràññee
 Yàlla
 ci réew mi.
² Xanaa ay móolu aki wor, bóome, càcc ak
 njaaloo.
 Dañoo ràkkaaju, di tuur deret ci kaw
 deret.
³ Moo tax réew mi wawal,
 mboolem lu fi dëkke ràgg,
 ba ci rabi àll yi, ak njanaaw yi,
 jëni géej itam day réer.

⁴ «Waaye bu ci kenn layoo,
 bu ci kenn sikke,
 ndax sa bokk yee mel ni ñuy layook
 sarxalkat yi.

⁵ Dingen tērēf bëccëg,
 yonent yi ànd ak yeen tērēf guddi,
 te maay sànk seen ndey.
⁶ Sama ñoñ a sànk ndax ñakka xam;
 yeen, xam-xam ngeen gantal,
 ma gantal seenug carxal.
 Yeena fàtte seen yoonu Yàlla,
 man it maay fàtte seeni doom.
⁷ sarxalkat yi ñu gëna baree, gën ma nee
 moye,

seenub sag, gacce laa koy soppi.
⁸ Sama saraxi pótum bákkaari ñoñ
 lañuy dunde*,
 tey yakkamti ñu def njubadi.

⁹ Waaye niki askan wi, niki sarxalkat yi,
 maa leen di dikke seen añu jikko,
 maa leen di fey seeni jëf.

¹⁰ Ñooy lekk te duñu regg,
 di gänctu te duñu giir,
 nde Aji Sax ji lañu noppee topp.
¹¹ Ngänctu ak biññ bu yàgg ak bu bees,
 moo yóbbu seenum xel.

¹² Sama ñoñ, seen bant lañuy seeteey,
 seenu yet di leen waxaleey.
 Xelum ngänctu moo leen wacc,
 ñooy gänctu, lajje fa seen Yàlla.

¹³ Ca kaw tund yu mag ya lañuy rendee ay
 sarax,

cuuraay, ñu taale ca tund yu ndaw ya,
 ak ca taatu gii garab gu mag, ba ca gee,
 fa ker ga neexe.

Moo tax seeni doom di gänctu,
 seen séeti doom di jaaloo.

¹⁴ Duma mbugal seeni doom
 ndax li ñuy gänctu
 mbaa seen séeti doom
 ndax li ñuy jaaloo,

ndax ñoom sarxalkat yi ci seen bopp,
 ay ganc lañuy teggeendool
 te ganc yi ci jaamookaayi xërëm yi,
 ñoom lañuy indeendool jooxe.
 Askan wu amul ug dëgg, sànkku.

* 4:8 4.8 Seetal ci Sarxalkat yi 6.19-22.

15 «Yeena ngi gànctu, yeen bànni Israyil, waaye na Yuda mucc ci googu tooñ.
Buleen dugg Gilgal†,
buleen yéegi Bet Awen‡
di giñ ci Aji Sax jiy dund.
16 Ndegam ni aw nag tēwe ni la Israyil tēwe,
ndax léegi Aji Sax jee leen di foral
nim xar ci parlu mu ne màww?
17 Efrayim§ googu laa ne, moo lēngook
jēm̄mi tuur!
Seetaan leen.
18 Seenu ñoll giiful sax, ñuy gànctoo
gànctu,
te gáccee gēnal seeni kilifa.
19 Callweero a leen di wal,
ñu kersawoo seen jooxey tuur.

5

Njiiti Israyil lajj nañu

1 «Dégluleen lii, yeen sarxalkat yi!
Teeyluleen, yeen waa kër Israyil!
Teewluleen, yeen waa kër buur!
Yeen la àtte bi ñeel.
Ag fiir ngeen tegoon ca Mispá,
ab caax ngeen laloon ca tundu Tabor;
2 Fippukat yi gēn nañoo xuus ci seen
bóome,
waaye maa leen di yar, ñoom ñépp.
3 Maa xam Efrayim,
Israyil laa ne, umpu ma.
Efrayim, yaa gànctu,
Israyil laa ne, yaa sobeel sa bopp.
4 Seeni jéf a leen mayul ñu dellu ci seen
Yàlla,
nde ngelawal ngànctoo wale fa seen biir,
te Aji Sax ji, faalewuñu ko.
5 Israyil, ag reewandeam a ko tiinaal,
Israyil ak Efrayim ñooy fakktaloo seenug
ñaawtéef,
Yuda it ànd ak ñoom fakktalu.
6 Seen jur gu gudd ak gu gàtt lañuy àndal,
di seet Aji Sax ji, duñu ko gis,
te moo leen dēddu.
7 Aji Sax ji lañu wor,
nde doomi po lañu jur;
Léegi la leen màggalug Terutel weer
di booleek seen suuf, sànk leen.

Yàlla dēkk na Israyil ak Yuda.

8 «Wal-leen bufta gi ca Gibeya,
jibal liit gi ca Raama
te yéene ca Bet Awen*.
Moytul sa gannaaw, Beñamin.
9 Efrayim day gental kera bésu mbugal,
maa xamle ci biir giiri Israyil lu wér péññ.

10 Kàngami Yuda mujj mel ni
ñuy toxal màndargam làccu suuf.
Ci seen kaw laay yuri samam sànj nim
ndox.
11 Efrayim lees di not,
joggati ay yelleefam,
nde moo dogoo topp yoonu caaxaan.
12 Man nag ni ñaawat laay def ak Efrayim,
te ni sànkaw laay def ak Yuda.
13 Ba Efrayim gisee jàngoroom,
Yuda gis ab danaam,
Efrayim a dem Asiri,
yónnee ca Buur Yareb†.
Waaye manu koo wéral,
mbaa di ko fajal ab danaam.
14 Man déy ni gaynde laay mel ak Efrayim,
ni gaynde gu ndaw laay mel ak waa kër
Yuda.

Man, man mii maay xotat, wéy,
maay yóbbu te kenn du wallu.
15 Ma daldi ñibbi, ba ñu nangu seenug
tooñ,
sàkku ma.
Bu ñu jàqee lañuy daw wutsi ma.»

6

Wooteb tuub jib na

1 Ca ngeen naan: «Nan dellu ci Aji Sax ji.
Moo nu xotat, te moo nuy wéral.
Moo nu дума, te moo nuy takkal sunuy
góom.
2 Ñaari fan, mu leqli nu,
ñetteel ba mu yékkati nu,
nuy dund fi kanamam.
3 Nan ràññee, di saxoo faale Aji Sax ji.
Ni jant bu fenk la dikkam wóore,
ni ab taw la nuy dikkale,
ni ab tawu mujjantal buy seral suuf.»
4 «Ana nu ma lay def, yaw Efrayim?
Nu ma lay def yaw Yuda?
Te sa ngor di xiinu suba,
mbaa ab lay, jekki ne mes.
5 Moo tax yonent yi laa leen di dumaa,
sama kádduy gém̄miñ laa leen di reye.
Seen àttee leen di jollil ni ceeñeeru njél.
6 Ndax ngor laa namm, dub sarax,
ràññee Yàllaa ma gēnal saraxi rendi-
dóomal.
7 «Waaye ñoom ca dēkk ba, Adam lañu
feccee kóllère,
foofa lañu ma wore.
8 Galàdd mooy dēkkub defkati ñaawtéef,
taq ripp ak deret.
9 Ni saaysaay siy tēroo,

† 4:15 4.15 Gilgal bérab la bu ñu daan bokkaalee, ba tur wi mujj taxawe jikkoy dēddu Aji Sax ji. ‡ 4:15 4.15 Bet Awen: li mu firi mooy kërug ñaawtéef. Muy tur wu waxi kókkali dendale ak Bet El, tur wi firi Kër Yàlla. § 4:17 4.17 Efrayim, genn la ci giiri Israyil ga ca bēj-gànnaar, moom la Ose faral di wooye réewum Israyil gépp. * 5:8 5.8 Seetal 4.15. † 5:13 5.13 Yareb man naa tekki «xeexkat.»

ni la sarxalkat yi lëkkoo,
di bóome ca yoonu Sikem.
Ndaw jéf ju ñaaw!

¹⁰ Ci kërug Israyil laa gis lu yées:

Fa la Efrayim di gänctoo,
Israyil googu laa ne moo sobeel boppam.

¹¹ Yuda yaw it, sam ngóob ma ngay taxawe,
kera bu may tiji sama wërségu ñoñ.

7

Israyil mooy mburu mu desee ñor

¹ «Bu may faj Israyil
foofu ca Efrayim la seeni ñaawtéef di
feeni,

and ak mbonu Samari seen péey.

Dañuy njublaj,

sàcc yiy bëtt ci biir kër yi,

gàngoori saaysaay di songe ci biti.

² Taxul ñu jàpp ci seenum xel ne
seen mboolem jéf ju bon laa bàyyi xel.

Léegi seeni jéf a leen wër ndombo,
ne màkk fi sama kanam.

³ Seenug mbon lañuy bégale buur,
seeni fen di bégal kàngam.

⁴ Ñoom ñépp a diy jaalookat.

Ñu mel ni taalu mburu bu yànj,
taal bu lakk-kat ba soxlawula xamb,

ca tooyal ba, ba kera xóoy bay funki.

⁵ Bu sunu buur xewlee,
kàngam yi naan ba wopp,

buur tàllal loxo ay ñaawlekat.

⁶ Seenub xol lañu waajal nib taal, di téroo,
Seen lakk-katu mburu fanaanee nelaw*,

bèt set taal ba yànj, di fër-fëri.

⁷ Ñoom ñépp a tàng jérr nib taal,

te ñooy xoyom seeni njiit,

seen buur yépp a daanu,

te kenn ci ñoom woowu ma wall.

⁸ Efrayim moo jaxasook askani jaambur,
Efrayim moo di mburu mu ñu walbatiwul

cib taal.

⁹ Ay doxandéem a jeexal dooleem, te xamu
ko,

aw liir tege ci kawam weex tàll, te yégu
ko.

¹⁰ Israyil, ag reewandeem a ko tiiñal,

te taxul ñu délsi ci seen Yàlla Aji Sax ji.

Loolu yépp taxul ñu sàkku ko.

¹¹ Efrayim daa mel ni pitax,

dofe, ñàkk xel,

di woo wall Misraak a dem Asiri.

¹² Bu ñuy dem, maa leen di laaw samab
caax,

niy njanaaw laa leen di woddale fi suuf,
fa ma dégge seenum ndaje laa leen di

mbugale.

* **7:6** 7.6 Ki jite pexe mu bon mi moo fanaanee nelaw ca guddig xawaare ja, bët set mu jóg, joxe ab tegtal, ngir ñu sottal pexe ma. † **7:14** 7.14 Ni daan jaamu Baal mi ñu jiiñ ne mooy nangul suuf, ñoo aadawoo woon di dagg seen yaram, di tuur seen deret ci suuf, ngir foog ne loolu mooy tax seen mbey nangu.

* **8:5** 8.5 jëmmu wëllu wi: seetal ci 1. *Buur ya* 12.25-30.

¹³ Ngalla ñoom, nde ñoo ma daw,
yàqute ñeel na leen, nde ñoo ma gantal.

Doon naa leen jot

waaye ñoo ma fenal.

¹⁴ Du seen xol lañu ma wooye wall,

xanaa di salliiru ci seen kaw lal,

pepp ak biññ tax ñuy dagg seen yaram†,
dëddu ma.

¹⁵ Maa leen jàngal, dëgéral seeni përeg,
te man lañuy fexeel lu bon.

¹⁶ Bu ñu waññikoo it, du fi Aji Kawe ji.

Ni xala gu yolom lañu mel,

te seeni kàngam ay faddoo saamar

ndax seen sànjum lammifñ,

te loolu lees leen di reetaane

ca réewum Misra.

8

Ku ji as ngelaw, yaay goób ngélén

¹ «Sexleen bufta gi!

Jaxaay jàyy ci waa kër Aji Sax ji,

nde ñoo fecci sama kóllèreek ñoom,

samaw yoon lañu gantal.

² Man la Israyil xaacu, ne ma:

“Éy sama Yàlla, maa la ràññee!”

³ Israyil a xalab lu baax,

ba ab noon dàq ko.

⁴ Ñoo fal ay buur te du sama ndigal,

ñoo tabb ay kàngam, te yéguma.

Seen xaalis ak seen wurus lañu sàkke
jëmme tuur,

muy seen sànkute.

⁵ Yeen waa Samari, seen jëmmu wëllu wi*
dàqu na!

Sama mer tàkkal na leen.

Lu ngeen deeti xaar ci mucç ayib?

⁶ «Israyil la lii jóge,

te ab liggéeykat moo ko sàkk.

Kon lii du Yàlla!

Ay tojit la wëlluw Samari di mujje.

⁷ «As ngelaw lañu ji, ñooy goób ngélén.

Gub du jóg, pepp du focci,

te bu pepp amoon it,

jaambur a koy wonn.

⁸ Dees na wonn Israyil;

tey ñu ngi ci biir xeeti jaambur yi,

mel ni ndab lu kenn buggul.

⁹ Ñoo demal seen bopp Asiri.

Mbaamu àll day beru yoonam,

waaye waa kër Efrayim ñooy jënd ay far.

¹⁰ Ci xeeti jaambur ñi lañuy jénde,

waaye du tee ma dajale leen.

Léegi ñu tegoo notaangey buur aki
kàngam.

¹¹ Efrayim a yokk ay sarxalukaay ngir moy,

ñu doon ay sarxalukaayi moyukaay donɗi!

¹² Naa ko bindal sama fukki junniy ndigali yoon,

yéfi jaambur lees koy jàppe.

¹³ Ñooy sarxe jur gi ñu may jooxeel, lekk yàpp wi,

Aji Sax ji buggu ci dara.

Maay bàyyi xel ci seen ñaawtéef, mbugale leen seeni moy,

te ñoom Misra lañuy dellu.

¹⁴ Israyil moo fàtte ab sàkk-katam, di tabax kër yu yànj.

Yuda moom yokki dëkk yu tata wër.

Maay yebal sawara ci kawi dëkkam, mu xoyom ay tataan.»

9

Yoonu ngàllog Israyil taxaw na

¹ Yeen waa Israyil, buleen béglu, buleen bânneexu ni yeneen xeet yi, nde yeena gänctu, dëddu seen Yàlla, yeena safoo peyu ngänctu

ci mboolem dàgga ju ñuy bàcce pepp.

² Ndaxam dàgga ak nalukaayu reseñ du leen regg,

te biiñ du leen doy.

³ Dungeen des ci réewum Aji Sax ji.

Efrayim, Misra lay dellu,

te ca Asiri, lu daganul lañu fay lekkeji.

⁴ Duñu tuural Aji Sax ji saraxu biiñ,

te seeni sarax du ko neex.

Seen ñamu sarax day mel ni ñam wu ku nekk fu nit deeye, sobeel,

ba ku ca lekk sobewu*.

Seenu ñam, seenub koll lay ñeel, waaye du dugg ci kër Yàlla gi.

⁵ Ana nu ngeen di def nag, ci bésu ndaje, bésub màggal bu Aji Sax ji?

⁶ Ñu ngoogu dem ndax tasteg réew mi,

Misraa leen di fat, Memfis suul leen,

seen tànnéefu xaalís, mbooy mee koy nangu,

te xaaxaam ay saxe seen biiri xayma ya woon.

Fexeel nañu yonent yi

⁷ Bési mbugal dikk na,

bési añale taxaw na,

na ko Israyil xam.

Yonent lañu jàppe ab dof,

ku yor waxyu di ku wéradi,

ndax seen ñaawtéef gu réy,

ak seen mbañeel gu tar.

⁸ Yonent bi mooy jongrukat

biy wattul Yàlla, Efrayim,

waaye ag fiir lees ko lalal

ci mboolemi yoonam,

te mbañeel a ngi ci biir kër Yàllaam.

⁹ Ñoo sóobu ci xóotey yàqute,

na woon ca janti Gibeya†,

te Yàlla mooy bàyyi xel seenug ñaawtéef, ba mbugale leen seeni moy.

Israyil wor na Aji Sax ji

¹⁰ «Ni cabbu reseñu biir màndin, ni laa fekke Israyil.

Ni ndoortel doomi figg ju ndey ja taawloo, ni laa gise seeni maam.

Waaye ñoom ñoo dem Baal Pewor,

ñoo sédd seen bopp Baal, tuur mu ruslu mi,

ba tax leena seexluwu ni kooku ñu sopp.

¹¹ Efrayim, ab sagan ni picc lay naawe,

du njurum doom, dub ëmb, du doom ju sosu sax.

¹² Bu ñu yaroon seeni doom it, maa leen leen di xañ,

ba kenn du des.

Te it ngalla ñoom, bu ma leen dëddoo.

¹³ Ni ma dogule Tir dëkk ba,

bi jëmbate ci parlu mu naat,

ni laay dogule Efrayim,

ba yóbbul ay doomam ab bóomkat.

¹⁴ Aji Sax ji, yool leen!

Ana loo leen di yool?

Yool leen biir yu yàqu,

ak ween yu ne sereñ.

¹⁵ «Seen gépp mbon moo feeñ ca Gilgal‡, te fa laa leen jéppe ndax mbonug seeni jéf.

Sama kër laa leen di dàqe,

te dootuma leen bégg,

seeni njiit yépp a diy fippukat.

¹⁶ Fàddees na Efrayim,

ay reenam wow,

du meññ benn doom.

Bu juron itam, maay rey

ngëneelu biiram.»

¹⁷ Sama Yàlla moo leen di xalab,

nde ñoo ko déggalul,

te ñooy taxawaaluji ci biir xeeti jaambur yi.

10

Israyil ñarale na

¹ Israyil di reseñ gu naat,

meññal boppam lu ne gáññ,

te lu meññeef ma gëna yokku,

mu gëna yokkati sarxalukaayi tuur.

Lu am réewam gëna baaxle,

mu gëna baaxal ay xeri tuur.

² Ñooy boroom xolub jinigalkat,

* 9:4 9.4 Bokk ag lekk ci néeg bu nit deeye daan na sobeel ña fa lekk. Seetal ci *Màndin* ma 19.14-22. † 9:9 9.9

Ca Gibeya lañu bóome woon as ndaw, ba ñu mujj dagg ko ay dog yu ñu def firnde, yónnee ko bànni Israyil gépp.

Seetal ci *Njiit* ya 19-21. ‡ 9:15 9.15 Gilgal mooy dëkk bu ñuy misaale jéfi bokkaale. Seetal ci *Ose* 4.15.

te tey ñooy gàddu seen bàkkaar.
 Aji Sax ji mooy toj seeni sarxalukaay,
 tas seen xeri tuur.
³ Léegi ñu ne: «Amunu buur,
 ndax noo wormaalul Aji Sax ji,
 te su nu amoon buur it, lu mu nu manal?»
⁴ Ñooy wax seeni wax,
 di giñe ay fen yu ñuy fasoo kóllère,
 ba yoon mel ni gāncaxu tooke
 ju law ca tooboy tool ya.»
⁵ Waa Samaree ngi am tiitaange ci
 sèllu wu ñu xelli ca Bet Awen*,
 askan wa di tiislu tuur ma,
 ay xèrèmkatam di lox ndax darajay sèllu,
 ji leen dèddu, dem ngàllo.
⁶ Moom it lees di yóbbu Asiri,
 defal ko buur bu mag ba ab galag.
 Gàcce mooy jàpp Efrayim,
 Israyil laa ne, mooy rus ci mébétam.
⁷ Samari lees di tas, mook buuram,
 mu mel ni bant buy tēmb di dem.
⁸ Jaamookaay yu kawe ya ca Bet Awen,
 bàkkaarukaayi Israyil yooyu lees di
 tas.
 Ay dég aki dagg ñooy sax ca seeni sarx-
 alukaay,
 dees na ne tund yu mag yi: «Méddleen
 nu,»
 te naan tund yu ndaw yi: «Daanuleen ci
 sunu kaw.»
⁹ «Israyiloo, ca janti Gibeya† nga dala
 moye,
 te foofu la waa réew mi tollu ba tey.
 Luy tee xare dabe nit ñu jubadi ñi ca
 Gibeya?»
¹⁰ Saa yu ma soobee ma yar leen.
 Ay xeet ay daje, jógal leen,
 jéng leen ndax seen ñaari ñaawtéef.
¹¹ Efrayim aw nag wu nangu la woon,
 te sawaroon baàc am pepp.
 Maa ràng loosam wu jekk.
 Maa takk Efrayim,
 Yuda gább, Yanqóoba rijjil boppam.
¹² Jiwal-leen seen bopp njekk,
 ba góobe ca lu ngor maye.
 Gàbbleen ag mbooy,
 sàkku Aji Sax ji jot na,
 ba kera muy dik, tawal leen njekk.
¹³ Yeena bey ag coxor,
 góob ag mbon.
 Yeena lekk meññeefum fen,
 nde yeena wóolu seen pexey bopp,
 ak seen jambaar yu bare.
¹⁴ Am riir mooy jollee ca sa biir gāngoor,
 sa tata yépp tas, na Salman tase woon Bet
 Arbel,
 keroog bésuub xare ba,

ba ñu jélee ndey, fenqaleek doom, ñu
 rajaxoo.
¹⁵ Noonu lees leen di def, yeen waa Betel
 ndax seen mbon gu réy.
 Jant a ngay fenk, buurub Israyil dee wett.

11

Cofeel la Aji Sax ji tontoo fippug Israyil

¹ «Maa soppoon Israyil ba muy ndaw,
 Fa Misra laa ko wooye, muy sama doom.
² Lu ñu leen gēna woo,
 ñu gēn maa sore.
 Ay tuuri Baal lañuy defal ay sarax,
 te ay xèrēm lañuy taalal cuuraay.
³ Ndaxam man maa tette Efrayim, fab ko,
 te ràññeewuñu ne maa leen topptoo.
⁴ Ay goji nit laa leen ñoddee,
 ay buumi cofeel.
 Maay ki leen yolomalal ñalaabi ñaam,
 ségg, leel leen.
⁵ Duñu dellu réewum Misra*.
 Waa Asiri ñooy doon seen buur,
 nde ñoo baña délsi fi man.
⁶ Ab saamar ay wēndeelu ca seen dēkk yu
 mag,
 dàjji seen bunti dēkk,
 ba warax leen ndax seeni mébét.
⁷ Sama ñoñ dañoo làggi ci ñàkke ma
 kóllère,
 wooyees na leen fa kaw,
 te kenn ci ñoom jógul.
⁸ «Efrayim, ana nu ma lay baye,
 yaw Israyil laa ne, nu ma lay tege ciy loxo?
 Ana nu ma lay defe ni Atma?
 Nu ma lay yemandleek Ceboyim†?
 Sama xol a bépp,
 sama yërmandee yēngu.
⁹ Duma wéye di tàkkal sama mer,
 duma yàqteeti Efrayim,
 ndax maay Yàlla, duma nit,
 maay Aji Sell ji ci seen biir,
 duma dikke am sànj.
¹⁰ Dees na topp ci gannaaw Aji Sax ji,
 muy yēmmu ni gaynde.
 Mooy yēmmu moos ni gaynde,
 ay doomam di lox, jóge sowu.
¹¹ Ni njanaaw lañuy loxe, jóge Misra,
 mel nim pitax, bawoo Asiri.
 Maa leen di dēel seeni kër.»
 Aji Sax jee ko wax.

12

Aji Sax ji layoo na ak Israyil ak Yuda

¹ «Efrayim, ay fen la ma gawe,
 waa kër Israyil laa ne,
 ñoo ma yéewe ag njublan,

* **10:5** 10.5 Seetal ci Ose 4.15. † **10:9** 10.9 Gibeya: seetal ci *Njiit* ya 19-21. * **11:5** 11.5 Loolu mooy duñu dellu
 ci njaam ga ñu nekke woon ca Misra. † **11:8** 11.8 Ceboyim ak Atma ñooy ñaari dēkk yu Yàlla boole ak Sodom ak
 Gomor, dēkk ya ñu dendaloon, tas leen.

waaye Yudaa ngi änd ak Yàlla ba tey,
di sàmm kólléerek Ku Sell ki.»

² Efrayim mooy sàmmkatub ngelaw,
yendoo topp ngelawal penku,
di yokki fen ak fitna,
fasoo kóllére ak Asiri,
yónnee yóbbalu diw ba Misra.

³ Aji Sax ji moo séq ak Yuda ab layoo,
mooy mbugale Yanqóoba ay jéfinam,
añale ko ay jéfam.

⁴ Ci biiru ndeyam la kii suufoo ab seexam;
kii moo tollu ci dooleem, bëreek Yàlla.

⁵ Kee bëreek malaaka, ba génn ca,
kee jooy di sàkku aw yiwam.

Fa Betel la ko fekk,
te foofa la Yàlla waxeek nun.

⁶ Aji Sax ji Yàlla Boroom gangoor yi,
Aji Sax jee di turu bàkkam.

⁷ Yaw nag, ca sa Yàlla nga wara dellu,
ngor ak njub, sàmm ko,
te nga saxoo yaakaar sa Yàlla.

⁸ Ni Kanaaneen biy jula, ni la Efrayim
yore màndaxekaayu njublanj cib lox-
oom,
bègga naxe.

⁹ Efrayim a ngi naan: «Woomle naa,
maa amal sama bopp alal,
te mboolem samaw ñaq, giseesu ci
toónaange ju di bàkkaar.»

¹⁰ «Man Aji Sax ji dale di sa Yàlla ca Misra,
maa lay deélaat ciy xayma,
na woon ca bésub ndaje.

¹¹ Maa wax ak yonent yi,
yokk peeñu yi,
te yonent yi, maa leen waxyu ay misaal.»

¹² Su Galàdd dee dèkkub defkati ñaawtéef,
dañoo tekkiwul dara.

Fa Gilgal lees di rendee ay saraxi yèkk,
te seeni sarxalukaay ni jali xeer lay mel
ci ay tooboy tool.

¹³ Yanqóobaa dawoon ba réewum Siri,
Israyil laa ne, moo liggéey ngir am jabar,
wut jabar tax koo sàmm ag jur.

¹⁴ Ci loxol yonent la Aji Sax ji génnee
Israyil Misra,
te ab yonent la sàmmloo Israyil.

¹⁵ Waaye Efrayim moomoo ko merloo,
naqaral ko.

Deret ji mu tuur la Boroomam di këpp ci
kawam,
añub tooñam la koy fey.

13

*Mbugalum fippu ci kaw Aji Sax ji du
jaas*

¹ Bu Efrayim daan wax, ñèpp ay lox;

mu amoon daraja fi digg Israyil.

Waaye moo sikkal boppam ci tuuri Baal,
ba dee.

² Léegi ñu ngi gën di bàkkaar,
di xellee ci seen xaalis jëmmu tuur,
ay jëmmi xërëm yu ñu sàkke seen xareñte,
lépp di càkkéefu ay liggéeykat,
te ci ñoom la nit ñi naan:

«Rendikati sarax yaa ngi foon ay tuuri
wëllu.»

³ Moo leen tax di naaxsaay ni niiru suba,
mbaa layub njël,
mbaa mboob mu naawe dàgga ja,
mbaa saxar su gillee ci jankub néeg.

⁴ «Man Aji Sax ji, fa Misra laa dale di seen
Yàlla,

xamuleen Yàlla ju dul man,
te kenn du musle ku ma moy.

⁵ Man maa leen ràññee ca màndinj ma,
ci biir réewum maral.

⁶ Ngeen wëtti ba regg,
regg, bew, ba tax ngeen fàtte ma.

⁷ Moo tax ma mel ni gaynde ci yeen
di tèroo ni segg ciw yoon.

⁸ Maay dajeek yeen ni rab wu aay
wu ñu xañi doom,

maay xotti seen mbuusum xol,
fa laa leen di yàppe ni gaynde,
te rabu àll moo leen di xotat.

⁹ «Israyiloo, yàqu nga,
te maa yor sa wall.

¹⁰ Ana seen buur boog,
ba mu xettli leen ci seen mboolemi dèkk?
Ana seen njiit yi ngeen sàkku woon, ba ne
ma:

“Falal nu buur aki kàngam?”

¹¹ Ci biir mer laa la falal buur,
te ci samam sànj laa ko follee.

¹² «Takkees na ñaawtéefi Efrayim,
rënkees na ay moyam.

¹³ Lu mel ni mititu mat moo dikkal waa jii,
te muy doom ju amul xel,
ba juddu jot, génnul biiru ndeyam.

¹⁴ «Man nag maa leen di musal ci njani-
iwa?

Maa leen di jot ci ndee?
Moo yaw ndee, ana say mbas?
Yaw njaniiw laa ne, ana sa tooke?
Fomm làqu na ma!

¹⁵ Efrayim moom, su naatee ci biiri
bokkam it,

fa màndinj ma la ngelawal penku*,
ngelawal Aji Sax ji di uppe,

bèti ndoxam tëju,
ay teenam déy.

Kii mooy sèxétooo ab dencam,

* 13:15 13.15 Wetu penku la réewum Asiri féete woon Efrayim, ngelawal penku di taxawe congum Asiri.

ak mboolem lu cay alal.»

14

¹ Dees na topp waa Samari,
nde ñoo fippu ci seen kaw Yàlla.
Saamar lañuy fàddoo,
seeni doom, ñu rajaxe leen,
seen jigéeni wérul, ñu butti.

Dëpp, am njéggal

² Israyiloo, dellul ci sa Yàlla Aji Sax ji,
fakktaloo nga sag ñaawtéef.

³ Waajal-leen ay kàddu te dellu ci Aji Sax
ji,

ne ko: «Baal nu mboolem ñaawtéef
te nangul nu,
nu yékkati kàdduy màggal
yu wuutu saraxi yëkk.

⁴ Asiri du nu xettli,
ay fasi xare it, dunu ko war,
te dootunu wax lu nu sàkke sunuy loxo, ne
ko:

“Yaw yaa di sunu Yàlla.”
Li nuy wax kay mooy yaw yaay kiy yèrëm
jirim.»

⁵ Aji Sax ji nee: «Maay garabal seenug
déggadi,

maa leen di bëggal sama bopp,
nde mereetuma leen.

⁶ Maay mel nib taw ci Israyil,
ñu focc ni tóor-tóor,

seeni reen sampu ni garabi Libañ,

⁷ car ya law, yànj nig oliw,
xeeñ ni gottub Libañ.

⁸ Ñooy délsi, keppaaroo ko,
dellu ji, pepp dundaat.

Dañuy giir nig reseñ,
am bayre ni biiñu Libañ.

⁹ Yeen Efrayim, lu ma masa séq ak jëmmi
tuur?

Man maa leen di nangul, di leen wattu,
di leen keral ni garab gu naat gu dul ruus,
sa meññeef bawoo fi man.»

¹⁰ Ku rafet xel, na dégg lii,
kuy ràññee na ko xam.

Yooni Aji Sax ji kat day jub,
te kuy jubal jaare ca,
ab jàddkat moo cay téréf.

Téereb Yonent Yàlla Yowel

1

¹ Kàddug Aji Sax jii moo dikkal Yowel doomu Petuwel.

Njéeréer ak maral jubsí na

² Dégluleen, yeen mag ñi, teewluleen, yeen waa réew mi ñépp. Ndax lii mas naa am ci seeni jant, mbaa seen janti maam?

³ Waxleen ko seen doom yi ngeen jur, doom yi ngeen jur wax ko doom yi ñu jur, doom yi ñu jur wax ko geneen maas.

⁴ Ndesu soccet yi la njéeréer yi lekk, ndesu njéeréer yi, seenu tostan lekk, seen ndesu tostan, sallee yi lekk.

⁵ Mándikat yee, yewwuleen, jooyoo. Naan-kati biñ yee, jooyleen biñ bu bees, bi ñu foqatee ci seen gémmiñ.

⁶ Aw xeet a dal ci samam réew, am kàttan, wees ab lim, seeni sell di selli gaynde gu góor, seeni ñaam di ñaami gaynde gu jigéen.

⁷ Samag reseñ lañu foom, samag figg lañu xasa xas, ba mu set, ñu sànni, car ya weex tàll.

⁸ Neeleen wóoy ni janq bu woddoob saaku, di ko ñaawloo jëkkéram, ja ñu ko dencaloon ba muy lu tuut.

⁹ Saraxu pepp ak saraxu tuuru dagg na ca kër Aji Sax ji. Sarxalkat yi, boroom dénkaaney Aji Sax ji, ñu ngi ñaawlu.

¹⁰ Tool yi yàqu yaxheet, suuf sèngéem ciw tiis; pepp yàqu, biñ bu bees wow, ag diw ñiis.

¹¹ Yeen beykat yi, rusleen; boroom tóokèri reseñ yi, yuuxoolen, ndax peppum bele baak lors ba, nde ngóob mi sàngu na.

¹² Ag reseñ wow, figg lax, gèrénaat, tiir, ak pom, mboolem garabi tool, wow koñj.

Mbég daal a rasu doom aadama.

Wooteb koor ak ñaan jib na

¹³ Yeen sarxalkat yi, gembuleen te tiislu, yeen ñi dénkoo sarxalukaay bi, yuuxuleen, yeen boroom dénkaaney sama Yàlla, dikkleen,

sol ay saaku yu ngeen fanaanoo, ngir toroxlu,

nde xañees na seen kërug Yàlla ga saraxu pepp ak saraxu tuuru!

¹⁴ Sellal-leen ag koor, woote am ndaje, wooleen mag ñi, ak mboolem waa réew mi,

ca seen kër Yàlla Aji Sax ji,

te ngeen woo Aji Sax ji wall.

Bésub Aji Sax ji dëgmál na

¹⁵ Céy, bii bés! Bésub Aji Sax ji moo dëgmál,

te ni sànkute gu bawoo fa Aji Man ji lay dikke.

¹⁶ Xanaa du ag lekk a dagg, nuy gis, te mbég ak bânneex tukkee sunu kër Yàlla ga?

¹⁷ Aw jiwu wow na, suule ciy donji suuf, dencukaay yi wéet, sàq yi dàjjiku, am pepp wow.

¹⁸ Céy ni mala yiy binnee! Gétti nag yaa ngi jànnaxe, ndax ñàkk parlu, gàtt yi itam loof.

¹⁹ Yaw Aji Sax ji laay woo, sawara moo lekk parlu àll bi; ag daay a xoyom garabi àll bi yépp.

²⁰ Rabi àll yeet ñu ngi àppaat, jublook yaw, nde wali ndox yee ñiis, te sawara xoyom parlu àll bi.

2

Congum noon yi nuyoo na

¹ Wal-leen bufta ca Siyonj, dégtal-leen ab yéene ca sama kaw tund wu sell.

Na waa réew mi mépp lox, nde bésub Aji Sax jaa ngi dikk te dëgmál na.

² Bésub lëndëmu xàmbaraari guddi gu ne kèruus, mbete bânqanoos bu lale ci kaw tund yi.

Gàngoor gu mag te am doolee ngi, gu ni mel masula am muk, te dootul am feeki at, ba maasoo maas.

³ Lu leen jitu, sawara lekk; lu leen topp, ag daay xoyom.

⁴ Ni toolub Àjjana la réew mi ci seen kanam di mel, ñu won ko gannaaw, muy mândinj mu wéet, te kat dara du leen récc.

⁵ Seen melo ni melow fas, ñuy daw ni fasi xare.

⁶ Ni watiiri xare di ker-keree, ni lañuy cèppoo ca kaw tund ya, mbete sawara wuy lakk boob, di fet-feti. Gàngoor gu am doole lañuy dikke, làng-déral xare!

⁷ Népp a leen di gis, jaq, kanam yépp di tàkk.

⁸ Niy jàmbaar lañuy songe, ni ñeyi xare lañuy yéége am tata. Ku nekk ay jubalu yoonam, kenn wàccul aw ñallam.

⁹ Kenn buuxul moroom ma, ku nekk aw sélam lay topp, ci biir saan yi lañuy xuus, jàll it,

te duñu taxaw.

⁹ Dëkk bi lañuy song,
ci kaw tata ji lañuy dukkate,
ci kaw kër yi lañuy yéeg it,
te ci palanteer yi lañuy jaare dugg niy
sàcc.

¹⁰ Bu ñu jubsee, suuf yëngu,
asamaan rëng-rëngi,
jant ak weer giim,
biddiww yi fat seenug leer.

¹¹ Aji Sax jeey àddu fi kanam mbooloom
xareem,

dalam ba réy lool,
te kiy jéfe ndigalam am kàttan.
Bésub Aji Sax ji kay moo réy te raglu lool!
Ana ku ko mana dékku?

Dellu ci Aji Sax ji jot na

¹² «Terewul ba léegi,» kàddug Aji Sax jee,
mu ne: «Dêseeleen seen léppi xol ci man,
boole kook koor aki jooy aki yuux.

¹³ Du seeni yére dorj ngeen di zotti,
ngir ñaawlu,
seenub xol ngeen di zottiwaale, ñaawloo
ko.

Waññikuleen ci seen Yàlla Aji Sax ji,
mooy boroom yiw ak yërmande;
mer maa diib, ngor ga bare,
muy fomm mbugal.

¹⁴ Jombul mu dëpp, fomm,
bàyyi gannaawam barke,
ba ci saraxu pepp ak saraxu tuuru,
ñeel seen Yàlla, Aji Sax ji.»

¹⁵ Wal-leen bufta fa Siyoŋ,
sellal-leen ag koor, te woote am ndaje.

¹⁶ Dajaleen askan wi,
sellal-leen mbooloo mi,
wooleen mag ñi,
te ngeen dajale gone yi ba ci ñiyy nàmp.

Na boroom séet génn ub néegam,
séet ba génn xaymab céetam.
¹⁷ Diggante buntu néeg bu sell beek sarx-
alukaay bi,

sarxalkat yi, boroom dénkaaney Aji Sax ji,
nañu fi taxaw jooy;
nañu ne: «Aji Sax ji, yërëmal sa ñoñ;
bul wacce say séddoo gâcce,
ak ñaawley xeeti jaambur yi.

Lu jar ñuy wax ëllëg ci biir askani jaambur
yi,
naan: “Ñii, ana seen Yàlla ji?”»

Aji Sax ji nangu na ñaan

¹⁸ Aji Sax ji moo fiire am réewam,
ñeewante ñoñam.

¹⁹ Aji Sax jee àddu, ne ñoñam:
«Maa ngii di leen yóñnee am pepp,
ak biñ bu bees akug diw,
ba ngeen regg,
te dootuma leen gâcceel
ci biir xeeti jaambur yi.

²⁰ Waa bëj-gànnaar, maa leen di soreleek
yeen,
maa leen di dàq, jème réew mu maral te
wéet,

gàngoor ga jiitu jubal géēju penku,
ga féete gannaaw jubal Ogéēju sowu,
ba seeni néew gilli, xasaw ba ubale,
ngir jëf ju réy ji ñu def!»

²¹ Yaw suuf, bul tiit, bégal te bânneexu,
nde Aji Sax ji moo def ay jalooore!

²² Yeen rabi àll yi, buleen tiit,
parluy àll yi day naat, garab yi meññ;
figg ak reseñ di baaxee seen xéewal.

²³ Yeen doomi Siyoŋ, bégleen,
te bânneexu ci seen Yàlla Aji Sax ji.
Moo leen di may taw yu jëkk, muy njekk,
moo leen di sottil taw yu jëkk,
ak taw yu mujj, na woon.

²⁴ Dägga yi day fees ak pepp,
mbànd yi rembat ak biñ bu bees aku diw.

²⁵ «Sama mbooloom xare mu réy,
mi ma yebaloon fi seen biir,
te ñuy njéeréer yeek seen tostan,
ak sallee yeek soccet yi,
maa leen di delloo ati mbey yi ñu leen
lekkal.

²⁶ Dingen lekka lekk, ba regg,
di sàbbaal seen turu Yàlla Aji Sax,
ji leen defal kéemaan,
te sama ñoñ dootuñu rus muk.

²⁷ Dingen xam ne ci biir Israyil laa ne,
man,
maay seen Yàlla Aji Sax ji, du keneen,
te sama ñoñ duñu rus muk.

3

Ñépp la Aji Sax ji di sotti ag Noowam

¹ «Gannaaw loolu maay tuur samag Noo
ci kaw wépp suux,
seeni doom, góor ak jigéen di biral waxyu,
seeni màggat di gént ay gént,
seeni xale yu góor di gis ay peeñu.

² Kera jant yooyu, jaam yi sax, góor ak
jigéen,
maa leen di tuur samag Noo.

³ Maay def ay kiraama fi asamaan ak fi
suuf;

deret ak sawara ak saxar su jolli.

⁴ Jant beey soppliku ag lëndëm,
weer wi doon deret,
bésub Aji Sax ji doora taxaw,
bés bu réy bu raglu ba!

⁵ Su boobaa mboolëm ñi woo Aji Sax ji wall
ciw turam,
ñoooy raw.

Tundu Siyoŋ ak biir Yerusalem kay
fa la aw ndes di ame,
na ko Aji Sax ji waxe woon,
te ñi Aji Sax ji woo ñoooy bokk ci ñi dese
bakkan.

4

Aji Sax ji tiñal na nooni ñoñam

¹ «Jant yooyu, ci boobu bés,
bu ma tijee wërségu Yuda ak
Yerusalem,

² maay dajale mboolem xeet yi,
wáce leen ca xur wa ñu dippee «Aji Sax
jeey àtte.»

Fa laay layook ñoom ci mbirum sama ñoñ,
mbirum Israyil sama séddoo,
bi ñu tasaare ci biir xeet yi,
ak sama mbirum suuf si ñu séddoo.

³ Sama ñoñ lañu tegoo bant,
xale bu góor, ñu weccikoo ab gànc;
xale bu jigéen, ñu jaaye biiñ, naan.

⁴ Yeen it waa Tir ak Sidon,
ak gox-goxaani Filisti yépp,
ana lu ngeen joteek man?

Xanaa dama leena def, lu ngeen di feyu?
Su ngeen dee feyu nag,
ma gaaw leena képp seen aña jéf
ci seen kaw bopp.

⁵ Sama xaalis ak sama wurus, ngeen jël,
samay denc yu baax, ngeen yóbbu
ca seeni jaamookaay.

⁶ Waa Yuda ak waa Yerusalem,
yeena leen jaay Gereg yi,
ngir sorele leen ak seen suuf.

⁷ Maa ngii di leen yékkatee foofa,
fa bérab ba ngeen leen jaaye,
te yeen, maa leen di képp seen peyu jéf ci
bopp.

⁸ Seen doom yu góor ak yu jigéen
laay jaay waa Yuda,
ñu jaayaat leen waa Saba, doomi réew mu
sore.»

Aji Sax jee ko wax!

Wooteb xare jib na

⁹ Yégleleen lii ci biir xeet yi: «Waalal-leen
xare,

yékkatileen ñeyi xare yi,
na xarekat yépp dikk, songi xare.

¹⁰ Seeni illéer ngeen di tégg ay saamar,
tégg seeni xépp ay xeej,
te na ku néew doole ne: “Jambaar laa!”

¹¹ Dikkleen gaaw, yeen xeet yépp,
ba fépp daj,
ngeen bokk daje.

Aji Sax ji, foofa ngay yebal say jambaar.

¹² Na xeet yi jóg te songi xare ca xur,
wa ñu dippee «Aji Sax jeey àtte,»
foofa déy laay toog di àtte mboolem xeet
yi,
ba fépp daj.

¹³ Dawal-leen sàrt bi, nde ngóob mi ñor na,
dikkleen nal, nalukaayu reseñ bi fees na,
te mbànd yi rembat na, nde seen bàkkaar
a réy.

¹⁴ Ndaw gàngoori gàngoor ca xuru Àtte
ba,

nde bésuub Aji Sax jee dëgmal ca xuru Àtte
ba!

¹⁵ Jant ak weer giim,
bididiw yi fat seenug leer.

¹⁶ Aji Sax ji fa Siyon lay ñare,
foofu ca Yerusalem lay àddoo,
asamaan ak suuf rëng-rëngi.
Waaye Aji Sax jee dib rawtu, ñeel ñoñam,
moo dim tata, ñeel bànni Israyil.

¹⁷ «Su boobaa ngeen xam ne maay seen
Yalla Aji Sax,
ji dëkke Siyon, sama tund wu sell,
Yerusalem day daldi sell,
doxandéem dootu fa jaare.

Naataange ñeelati na Israyil

¹⁸ «Bésuub keroog tund yu mag yi
di rogalaat biiñ bu bees,
tund yu ndaw yi di xelli meew,
dexi Yuda yépp la am ndox di wale,
te kër Aji Sax ji, bētu ndox a cay balle,
di suuxat xuru Akasiya ya.

¹⁹ Misra ag ndànd-foyfoy lay doon,
réewum Edom di màndiñ mu wéet,
ndax coxor ga ñu soxore waa Yuda,
nde ñoo tuur deretu jaambur ñu deful
dara
ca seenum réew.

²⁰ Yuda lees di dëkke ba fàww,
Yerusalem ñeel maasoo maas.

²¹ Seen bakkan bi ma teggilul woon àtteb
yoon,
bi ko topp,
maa koy teggil àtteb yoon, bi ko topp.»
Aji Sax ji Siyon lay màkkaanoo.

Amos

¹ Kàdduy Amos a ngi, di boroom jur bu dëkkoon Tekowa*. Mu am peeñu mu jëm ci Israyil ci janti Osiyas† buurub Yuda ak janti doomu Yowayas, Yerbowam buurub Israyil. Loolu tollu ci ñaari at lu jiitu yëngu-yëngu suuf ba. ² Mu ne: Aji Sax jee yëmmoo fa Siyon‡, Yerusalem lay àddoo, parluy sàmm si ne faraa, mbooyum kaw tundu Karmel lax.

Aji Sax ji mbugal na xeet yi

(Saar 1.3—2.16)

³ Aji Sax ji da ne:

«Ñetti bàkkaar, su ma yeboo ne ñeent, laay sikke waa Damaas§, te дума fomm seeni дума.

Ñoo bàcce waa Galàdd bàccukaayi weñ.

⁴ Maay yebal sawara seen waa kër Buur Asayel,

mu xoyom taaxi Buur Ben Addàd.

⁵ Maay dàjji bunti dëkkub Damaas,

faagaagal waa xuru Awen*,

boole ca boroom Bet Eden†.

Waa Siri dugg ngallo, dellu Kir‡.»

Aji Sax jee ko wax.

⁶ Aji Sax ji nee:

«Ñetti bàkkaar, su ma yeboo ne ñeent,

laay sikke waa Gasa§,

te дума fomm seeni дума.

Ñoo jàpp njaam mbooloom lëmm, jalax Edomeen ña.

⁷ Maay yebal sawara ca tatay Gasa,

mu xoyom ay taaxam.

⁸ Maay fàkkas waa Asdodd,

fàkkas boroom yetu nguur fa Askalon,

fél Ekkron,

ndesu Filisteen ña sànk.»

Boroom bi Aji Sax jee ko wax.

⁹ Aji Sax ji nee:

«Ñetti bàkkaar, su ma yeboo ne ñeent,

laay sikke waa Tir*,

te дума fomm seeni дума.

* 1:1 1.1 Tekowa sorewul ak Yerusalem, péeyu Yuda. Ba bànni Israyil xàjjalikoo ñaari réew gannaaw ba Buur Suleymaan nelawee, réewum Israyil daa péeyoo Samari; réewu Yuda péeyoo Yerusalem. † 1:1 1.1 Osiyas mooy Asaryaa itam. ‡ 1:2 1.2 Siyon mooy tund wa kër Yàlla ga nekk ca Yerusalem. Daan nañu ko tudde it dëkku Yerusalem. § 1:3 1.3 Damaas mooy péeyu réewum Siri.

* 1:5 1.5 xuru Awen mooy tekki xuru Ñaawtéef.

† 1:5 1.5 Bet Eden mooy kërug Ajjana, muy tekki fii Kërug Xawaare. ‡ 1:5 1.5 Kir la Arameen ñi cossanoo.

Gannaaw gi lañu sancii réewu Siri. Seetal ci 9.7. § 1:6 1.6 Gasa benn la ci juróomi dëkki Filisti yu mag; yeneen

yi di Asdodd ak Askalon ak Ekkron, ak Gaat. Seetal ci 6.2. * 1:9 1.9 Tir dafa mel ni Sidon. Ay dëkk yu mag lañu

woon ca réewum Fenisi. † 1:11 1.11 Edomeen ñaa nga bàyyikoo fa bëj-saalumu Yuda jàpp penku. Ñu ngi soqikoo

ci Esawu, magu Yanqóoba, kon bokki Israyil lañu woon, waaye dañoo faroon ak noonni Israyil. ‡ 1:12 1.12 Teman

ak Bocra ay goxi Edom yu mag la woon. Bocra moo doon péeyu Edom. § 1:14 1.14 Raba péeyu Amon la woon.

* 2:2 2.2 Keryot dëkku Mowab bu réy la woon.

Ñoo jàpp mbooloom lëmm, jalax ca Edomeen ña, te sédduñu ci kóllëreg bokk.

¹⁰ Damay yebal sawara ca tatay Tir, mu xoyom ay tataam.»

¹¹ Aji Sax ji nee:

«Ñetti bàkkaar, su ma yeboo ne ñeent, laay sikke waa Edom†,

te дума fomm seeni дума.

Ñoo toppe seen bokki bànni Israyil saamar,

jalax yërmande,

mer mer mu dul meddi

ak xadar ju dul giif mukk.

¹² Maay yebal sawara fa Teman,

mu xoyomaale tatay Bocra‡.»

¹³ Aji Sax ji nee:

«Ñetti bàkkaar, su ma yeboo ne ñeent, laay sikke Amoneen ñi,

te дума fomm seeni дума.

Ñoo butti ay jigéeni biir ca Galàdd

ba ñuy xare ngir yokk seen suuf.

¹⁴ Maay jafal ca kaw tatay Raba§,

mu xoyom ay taaxam,

yuux ya jib bésuub xare,

ci biir callweer bésuub ngélén.

¹⁵ Seen buur ay duggi ngallo,

mooki kàngamam.»

Aji Sax jee ko wax.

2

¹ Aji Sax ji nee:

«Ñetti bàkkaar, su ma yeboo ne ñeent, laay sikke waa Mowab,

te дума fomm seeni дума.

Ñoo lakk yaxi buurub Edom, def ub dóom.

² Maay yebal sawara réewum Mowab,

mu xoyom tatay Keryot*.

Mowab deeye biir riirum xare,

yuux ak liitu xare jibandoo.

³ Maay dagge fa seen biir seen njiit,

booleeki kàngamam, bóom.»

Aji Sax jee ko wax.

⁴ Aji Sax ji nee:

«Ñetti bàkkaar, su ma yeboo ne ñeent,

laay sikke Yudeen ñi,
te дума fomm seeni дума.
Ñoo gàntal sama yoon man, yoonu Aji Sax
ji,
te sàmmuñu sama dogali yoon.
Seen tuuri caaxaan ya seeni maam top-
poon
sànk na leen.

⁵ «Maay yebal sawara ci kaw Yudeen ñi,
mu xoyom tatay Yerusalem.»

Israyil a gëna yelloo mbugal

⁶ Aji Sax ji nee:

«Ñetti bàkkaar, su ma yeboo ne ñeent,
laay sikke Israyil,
te дума fomm seeni дума.
Ñooy jaay jaam aji jub ngir xaaalis bu mu
leen ameel,

jaay aji ndóol bu manul fey dàlli carax.

⁷ Ñooy déeggaate néew-ji-doole ci pëndub
suuf,

di xañ way-ñàkk àqam.

Nit ak baayam di tédde as ndaw,
di teddadil sama tur wu sell.

⁸ Yérey tayle yu ñu nangoo ci néew-ji-
doole sax,

ñu lal, ne ñàyy ci wetu mboolem sarx-
alukaay.

Ku leen ameel, ñu feyloo la biiñ,
naan ca seen biir kër tuur ya.

⁹ «Ndaxam maa leen reyaloon Amoreen
ñu gudd ña te réy, mbete garab yu mag.
Ma boor doom ya,
buur reen ya.

¹⁰ Fekk yeen, ma génnee leen réewum
Misra,
jaarale leen màndiñ ma diiru ñeent fukki
at,

ngir ngeen nanguji réewum Amoreen ñi.

¹¹ Maa tabboon ci seen doom yu góor ay
yonent,

tànné ci seen xale yu góor ay séddoo†,
— am déet, yeen bànni Israyil?»

Kàddug Aji Sax jee.

¹² «Yeen nag ngeen di naanloo samay
séddoo biiñ.

Yonent yi, ngeen ne leen: “Buleen biral
waxyu!”

¹³ «Maa ngii di yëngal suuf si ngeen joggi,
ni watiir wu fees aki sabaar di yëngale
suuf.

¹⁴ Rawtu dina réer ku gaaw,
boroom doole du tala jariñoo dooleem,
jàmbaar sax du mana rawale bakkanam.

¹⁵ Fittkat du taxaw,
mana daw du taxa raw.

Ab gawar it du rawale bakkanam.

¹⁶ Bésub keroog, jàmbaar ju èppu fit,
dunj lay def, di daw.»
Kàddug Aji Sax jee.

Aji Sax ji dige na mbugal

3

(Saar 3.1—6.14)

¹ Dégluleen kàddu gii Aji Sax ji wax
ci yeen, bànni Israyil, mu jëm ci seen
mboolem xeet wi mu génnee réewum
Misra. Mu ne:

² «Yeen donj laa ràññee
ci mboolem askani suuf.

Moo tax ma di leen mbugal
ndax seen ñaawtéef gépp.»

³ Ñaar dina ànd te digewuñub dajee?

⁴ Gaynde dina ñarem ngeer te fàddul?

Am gaynde gu ndaw dina xiroom paxam
te jàppul?

⁵ Picc dina keppu te fiireesu koo?

Am ag fiir dina fettax te jàppul?

⁶ Bu liitu xare jibee, waa dëkk ba du tiit a?
Am aw ay dina dab ub dëkk te du Aji Sax
ji?

⁷ Du lenn moos lu Boroom bi Aji Sax ji def,
te déeyu ko yonent yiy jaamam.

⁸ Bu gaynde yëmmoo, ana ku dul tiit?

Ana ku saña baña biral waxyu,
bu ko Boroom bi Aji Sax ji waxee?

⁹ Yéeneleen ca biir taaxi Asdodd
ak ca biir taaxi Misra.

Neleen: «Dajeleen ca kaw tundu Samari,
ba gis na Samari salfaañoo,
ak notaange ga fa nit di daj.

¹⁰ Xamuñu sax def njub.»

Kàddug Aji Sax jee.

«Dañuy jal alalu fitnaak yàqute
ci seen biiri taax.»

¹¹ Moo tax Boroom bi Aji Sax ji ne:

«Ab noon dina gaw seenum réew,
néewal leen doole, lël seeni taax.»

¹² Aji Sax ji nee:

«Wallub sàmm ak gàtt bu gaynde fàdd
weesul ñaari yeel, dogitu nopp.

Kuy wallu bànni Israyil ga ca Samareet,
xanaa dogu basaj, dammitu lal.

¹³ Dégluleen te àrtu waa kër Yanqóoba.»

Kàddug Boroom bi Aji Sax jee,

Yàlla ji ci gàngoori xare yi.

¹⁴ «Bés bu may mbugale Israyil ay
bàkkaaram,

damay tasaale sarxalukaayi Betel.

Béjjén yi ci cati sarxalukaayi ba dog, rot.

¹⁵ Maay màbbaale kèru taax ak kèru àll,
kër yu ñu rafetale béñu ñay dina yàqu,
te kër yu bare dootu taxaw.»

Kàddug Aji Sax jee.

† 2:11 2.11 séddoo yooyu nasireen lañu leen di wooye. Seetal ci *Màndiñ ma* 6.

4

¹ Dégluleen kaddu gii, yeen jigéeni tundu Samari,
yeena ngi suur ni nagi diiwaanu Basan.
Yeen ñiy torxal néew-ji-doole,
di not aji ñàkk
te naan seeni jèkkèr: «Indil ñoll waay,
ñu naan!»
² Boroom bi Aji Sax ji giñ na ci sellngaam
ne: «Ay bés a ngii déy, di ñëw,
dees na leen kor, yóbbu,
ku nekk ci yeen koru niw jën,
³ ñu diri ko jaarale fu xar-xaru tata gëna
jegee,
sànni ko ca Armon*.»
Kàddug Aji Sax jee.

⁴ Aji Sax ji nee:
«Demleen Betel, bàkkaare fa,
dem Gilgal†, bàkkaareeti fa.
Rendileen seenub sarax ca èllég sa,
joxe seen saraxi fukkeeli alal ca gannaaw
èllég sa,

⁵ te ngeen lakk mburu, def ko saraxu cant.
Yégleleen seen saraxi yéene te siawal ko,
dégg ngeen?

Ndegam loolu ngeen namm, yeen bànni
Israyil.»

Kàddug Boroom bi Aji Sax jee.

⁶ «Maa wéetal seeni biir seen dèkkoo
dèkk,
dugub ñàkke fépp fu ngeen moom,
te taxul ngeen waññiku fi man.»
Kàddug Aji Sax jee.

⁷ Mu ne:

«Maa leen xañ ub taw
bu leen may ngóob ci ñetti weer.
Ma taw ci bii dèkk,
tawuma ca bee.

Wii waar tawlu,
wee waar lax.

⁸ Ñaari dèkk ba ñett di deek mar, wuti
beneen,

naane fa, te duñu màndi.
Taxul ba tey ngeen waññiku fi man.»
Kàddug Aji Sax jee.

⁹ «Maa leen dumaa gub yu yàqu, di saxee
saxe,

wowal seeni tool aki tóokër,
garabu figg ak oliw, njéeréer yi lekk.
Taxul ba tey ngeen waññiku fi man.»
Kàddug Aji Sax jee.

¹⁰ «Maa leen yónnee mbas mu mel ni mu
waa Misra.

Maa reylu seeni waxambaane ci xare,

* **4:3** 4.3 Fi ñu ne ca Armon manees na ne yooni tundu Ermon. † **4:4** 4.4 Betel ak Gilgal ay bérabi jaamookaay lañu woon. † **4:11** 4.11 Seetal ci *Njàlbéen ga* 19.1-29. * **5:5** 5.5 Gilgal fa la bànni Israyil dugge woon réewum Kanaan gannaaw ba ñu génnee ca njaamu réewum Misra. Seetal ci *Yosuwe* 4.20-22. † **5:5** 5.5 Betel ak Gilgal ak Beerseba ay jaamookaay lañu woon.

jàpplu seeni fas,
gillil xetu néew ya ca seeni dal.
Taxul ba tey ngeen waññiku fi man.»

Kàddug Aji Sax jee.

¹¹ «Maa jàllarbi lenn ci yeen,
na ma jàllarbee woon waa Sodom ak
Gomor‡.

Ngeen réece ca ni gillit
gu ñu fèkke cib taal.

Taxul ba tey ngeen waññiku fi man.»

Kàddug Aji Sax jee!

¹² «Moo tax ma di leen def lii, yeen bànni
Israyil.

Gannaaw lii laa leen di def nag,
waajleena dajeek seen Yàlla, yeen bànni
Israyil.»

¹³ Kii kat moo móol tund,

di sàkk ngelaw,

di xamal nit nammeelam.

Kee di soppi lëndëm ag leer,

di daagoo kawte ya.

Kookoo di Aji Sax ji Boroom gàngoor yi.

5

¹ Amos ne:

Yeen bànni Israyil, dégluleen mii pent:
maa ngi leen di jooy, yeen bànni Israyil!

² Fèlëñ!

Israyil janq ba dootu jógati.

Ma nga ñu wacc ca suufas réewam,
te amul ku ko yékkati.

³ Boroom bi Aji Sax ji déy dafa wax ne:

«Junniy xarekat ay génne fii,

téeméer délsi;

téeméeri xarekat génne fee,

fukk délsi,

ñeel waa kër Israyil.»

⁴ Aji Sax ji da ne waa kër Israyil:

«Sàkkuleen ma,

ba dund.

⁵ Buleen sàkkuji fa Betel,

buleen dem Gilgal*,

te buleen jàll Beerseba†.

Gilgal ay gálloo ngàllo;

Betel neen.»

⁶ Sàkkuleen Aji Sax ji,

ba dund.

Lu ko moy mu ne jippét ci kaw askanu
Yuusufa,

lakk waa Betel lakk gu dul fey.

⁷ Wóoy yeen ñiy walbati àtteb yoon, mu
mel ni xay,

tey jalax dégg fi pëndub suuf!

8 Kee sàkk biddiwi lolli ak biddiwi cooroon,

mooy walbati lëndëm bët set,
def bëccëg di guddi.

Keey woo walum géej,
walal fi kaw suuf.

Kookoo di Aji Sax ji.

9 Moo naan musiba jàyy ci kaw boroom doole,

musiba wàccal am tata.

10 Yeena bañ kuy yedde ci pénc,

te sib boroom lammañ wu maandu.

11 Gannaaw yeenay not néew-ji-doole,
di foqati nĕbu peppam,

tabax ngeen kĕri boroom barke,
waaye dungeen ko dĕkke.

Jĕmbat ngeen tóokĕri reseñ juy tem-temi,
waaye dungeen naan ca biñ ba.

12 Raññee naa seen bàkkaar yu bare
ak seen moy yu dul jeex.

Yeenay tooñ aji jub, di geru,
di xañ néew-ji-doole dĕgg ci pénc.

13 Moo tax ku xelu ci jii jamono ne cell.
Céy jii jamono ju bon!

14 Sàkkuleen lu baax, ba lu bon,
ba dund,

Aji Sax ji Boroom gàngoor yi ànd ak yeen,
muy li ngeen wax.

15 Bañleen lu bon, bëgg lu baax,
di doxal yoon ci pénc.

Jombul Aji Sax ji Boroom gàngoor yi
baaxe ndesu askanu Yuusufa.

16 Moo tax Boroom bi Aji Sax ji, Yàlla ji ci
gàngoori xare yi, dafa ne:

«Bayaaloo bayaal ubalee ki yuux,
mbeddoo mbedd riir aki wóoy!

Dees na woo beykat bi ciy jooy,
woo jooykati dĕj ciy joooy.

17 Tóokĕroo tóokĕr ay ubalee ki yuux.
Foofu fépp maa fay jaare.»

Aji Sax jee ko wax.

18 Wóoy kuy yàkkamti bésub Aji Sax ji!

Ana lu ngeen am ci bésub Aji Sax ji?

Dug leer, xanaa lëndëm.

19 Day mel ni kuy daw gaynde,
ne pemm cim segg, rĕcc,

ñibbi, teg loxoom ca tabax ba,
jaan ne ko càppit.

20 Xanaa du lëndëm gu dara leerul la bésub
Aji Sax jiy doon,

ne kĕruus, dara lĕrxatu ca?

21 «Maa bañ, maa sib seeni màggal,
seen ndajey diine génnliku na ma.

22 Ngeen defal ma saraxu rendi-dóomal,
mbaa saraxi pepp it, duma ko nangu.

Seen saraxu jur guy cant ci biir jàmm,

faalewuma.

23 Xiddileen maak seen coowal jàng.

Seen powum xalam safu ma.

24 Na yoon wal xanaa, nim ndox,
te dĕgg mel ni wal mu sax.

25 «Yeen bànni Israyil, saraxi gàtt ak saraxi
pepp,

ndax man ngeen ko daan indil

diiru ñeent fukki at ca màndij ma?

26 Te ngeen di yékkati seen tuur yi ngeen
sàkk:

Sikkut, di seen buur, di seen tuur,

Kiyun di biddiww bu ngeen di jaamu.

27 Maa leen di yóbbu ngàllo ca wàllaa
Damaas.»

Aji Sax jee ko wax, kookooy Yàlla Boroom
gàngoori xare yi.

6

Boroom alal naagu na

1 Wóoy ña ne finaax ca Siyoñ,

wóoy ña naagu fa tundu Samari!

Ñooy kàngami xeet wi gĕna màggeey,
niti Israyil di leen diis-si soxla.

2 Jàll-leen ba Kalne, xool;

jóge fa jĕm Amat dĕkk bu mag ba*,
wàcci Gaat, dĕkkub waa Filisti ya.

Ana fu ñu tanee yii réew?

ak fu ñu leen ĕpplee suuf?

3 Wóoy yeen ñiy jĕema fanq bésub njàqare
tey woo nguug fitna!

4 Yeen ñi tĕdd ci seen lal yu yànj,

ak a sóonoo seen laltu yu nooy,

di yàpp mbote yu baax

ak sĕllu yu duuf,

5 yeena ngi foyantoo xalam,

di fent yoy yu ànd ak xalam ni Daawu-
daay.

6 Yeena ngi jolu seen kĕlli biñ,

di diwoo ngĕn-gi-diww,

sànkutey askanu Yuusufa soxalu leen.

7 Moo tax yeenay jiituji ngàllo ga,
tĕraayu xawaare dakk.

8 Boroom bi, Aji Sax jee ko giñ ci boppam,
kàddug Aji Sax ji Yàllaa, Boroom gàngoori
xare yi.

Nee: «Maaka sib réy-réylug askanu
Yanqóoba,

ba seen kĕr yu yànj soof ma!

Maay jébbale seen péey ak mboolem li ci
biir.

9 Su boobaa, fukk ñu làqu ci kĕr, du leen
teree dee.»

10 Ku warloo waajal mbokkam mu dee
dina dugg ca kĕr ga, ngir yóbbu néew ya,
te naan ka ca biir-a-biir: «Kenn desul foofu
ci yaw?» Mu ne ko: «Jeex na,» bëgg caa

* 6:2 6.2 Kalne ak Amat ay dĕkki Siri lañu woon.

teg baat, mu ne ko: «Déet! Noppil, bul tudd turu Aji Sax ji.»

¹¹ Aji Sax jee ngii déy, buy joxe ndigal rekk, daldi tas kër gu mag, rajaxe kër gu ndaw.

¹² Moo fas dina daw ciy doj a?

Am dees na ràng aw nag, di gàbb doj?

Moona walbati ngeen àtteb yoon, def ko tooke,

yoon mel ni xay.

¹³ Yeena ngi damu ca dèkk ba ñuy wax Lodebar (mu firi Amul njariñ) te naan: «Xanaa du sunu dooley bopp lanu nangul sunu bopp dèkk bu am doole ba ñuy wax Karnayim (mu firi Ñaari béjén)†?» ¹⁴ Aji Sax ji, Yàlla, Boroom gàngoori xare yi da ne:

«Yeen bànni Israyil,

maa ngii di yékkati weneen xeet fi seen kaw,

ñu not leen, dale ko fa kaw, fa buntu Amat ba ca xuru Araba, fa suuf.»

Aji Sax ji misaal na mbugalu Israyil

7

(Saar 7.1—9.10)

Peeñu mu jèkk mi

¹ Am na bés Boroom bi, Aji Sax ji won ma am peeñu. Ndeke ma ngay sàkk naaxu soccet. Fekk na ñu góobal Buur, ba gancax giy saxaat. ² Soccet yiy lekk gancaxu réew mi, ba mu bégga jeex, ma ne: «Éy Boroom bi Aji Sax ji, ngalla déet! Askanu Yanqóoba àttan na lii am? Lu néew doole lañu.» ³ Aji Sax ji fomm ko, ne ma: «Kon du am.»

Peeñum ñaareel bi

⁴ Boroom bi, Aji Sax ji dellu ma feeñu. Ndeke Boroom bi, Aji Sax ji day waaja mbugale ñoñam sawara. Mu xoyom xóotey géej mbàmbulaan, bay waaja xoyom réew ma. ⁵ Ma ne: «Boroom bi, Aji Sax ji, ngalla taxawal. Askanu Yanqóoba àttan na lii am? Lu néew doole lañu.» ⁶ Boroom bi Aji Sax ji fomm ko ne ma: «Liitam du am.»

Peeñum ñetteel bi

⁷ Mu feeñooti ma, gisuma lu moy Boroom bi taxaw ci ab tata, mu ñu natte buumu beteex ba ñu koy tabax. Ma nga yor buumu beteex ca loxoom. ⁸ Aji Sax ji ne ma: «Amos, ana loo gis?» Ma ne ko: «Xanaa buumu beteex.» Boroom bi ne: «Maa ngii di natte buumu beteex fi digg Israyil, sama ñoñ. Dootuma leen baal dara.»

⁹ Dees na tas fu askanu Isaaxa di mággaale, ba gentat bérabi Israyil yu sell.

Maay jèlal askanu Buur Yerbowam saamar.»

Dàq nañu Amos

¹⁰ Ba mu ko defee Amaciya sarxalkatu Betel yónnee ca Yerbowam buurub Israyil, ne ko: «Amos a ngi lay fexeel ci digg Israyil. Réew mi du àttan waxam ji. ¹¹ Mu ngi naan ci xare ngay deeye, te dees na jële Israyil suufam moos, yóbbu ngallo.»

¹² Gannaaw loolu Amaciya ne Amos: «Yaw boroom peeñu mi, dawal, làquji réewum Yuda, nga waxe fa waxyu, am fa loo dunde. ¹³ Betel gii nag, bu fi waxeeti waxyu, ndax fii jaamookaayu buur la, te it jaamookaayu réew mi la.»

¹⁴ Ba loolu amee Amos ne Amaciya: «Man de dumab yonent te bokkuma ci kurélu yonent. Sama gétt laa yor, te maa ngi topptoo ay tooli figg. ¹⁵ Aji Sax jee ma jële fa ma doon sàmme samay gätt. Moo ma ne: “Demal biralal ma waxyu ci Israyil sama ñoñ.” ¹⁶ Léegi nag, déglul kàddug Aji Sax ji. Yaa ma ne: “Bul biralal waxyu ci Israyil te bul kebetu ci kaw askanu Isaaxa.” ¹⁷ Gannaaw noonu la, Amaciya, Aji Sax ji nee:

“Sa jabar ci biir dèkk bi lay gänctoo,

say doom, góor ak jigéen, saamar tëral;

sam réew, ñu natte buum, séddoo.

Yaw nag, réewum yéefar ngay deeyeji;

Israyil, ñu jële kom réewam, gáll ngallo.”»

8

Peeñum ñeenteel bi

¹ Gannaaw gi Boroom bi, Aji Sax ji dellooti feeñu ma. Ma jekki gis dambu meññeef. ² Mu ne ma: «Amos, ana loo gis?» Ma ne ko: «Xanaa dambu meññeef mu ñor.» Aji Sax ji ne ma: «Mbugal ñoral na Israyil, sama ñoñ. Dootuma leen baal dara. ³ Bésuub keroog jàngi kër Buur doon ay jooy.»

Kàddug Boroom bi Aji Sax jee:

«Néew yi, xas,

fu ne ñu jalax, lépp selaw!»

Bégge indi na musiba

⁴ Amos ne:

«Dégluleen lii, yeen jula yiy dèggaate aji ñàkk,

di jeexal néew-ji-dooley réew mi,

⁵ te naan: «Xanaa mággaal Terutel weer wi du jeex

ba nu jaay sunu pepp?

Waay, na bésuub Noflaay jàll gaaw,

ba nu ubbi saq yi,

† 6:13 6.13 Ñaari béjén: kàttan lay misaal.

tuutal nattu sol-sotti, diisal doomu nat-tukaay,
tey naxee sunuy màndaxekaayi njublan,
6 ba jënd njaam ku tëlee fey boram
ak aji ñàkk ju tëlee fey dàlli carax;
ba cox sax, nu buub, jaay.”»

7 Aji Sax ji giñ na ci turam wi askanu
Yanqóobay damoo, ne:

«Duma fàtte mukk lenn ci seeni jéf.

8 Moo tax réew mi nara yëngu moos,
muy tiisu ku ci dëkk;

suuf fuddoondoo, fees ni dexu Niil,
di jóg ak a rës ni dexu Misra.

9 Ay bés a ngii déy, di ñëw,»

kàddug Boroom bi Aji Sax jee:
«maay sowal jant digg bëccëg,
lëndëmal suuf bëccëg ndarakamm.

10 Maay soppli seeni màggal ab dēj,
seen woyoo woy diy jooy.

Maay wodde bépp lupp saaku yu ñuy
ñaawloo,

bépp bopp, ma wat ub nel,
def ko mu mel ni dēju benn bājjo bu góor,
muj ga di bés bu tar.

11 «Ay bés a ngii déy, di ñëw,»

kàddug Boroom bi Aji Sax jee:

«maay wàcce xiif ci réew mi.

Du doon xiifub dugub mbaa marum ndox,
kàddug Aji Sax ji lañuy xiif.

12 Dees na tambaambalu, géej ba géej,
běj-gànnar ba penku,

di wëraaluy sàkku kàddug Aji Sax ji,
te deesul dajeeq moom.

13 Bésuub keroog janq ju taaru jaak
xale yu góor ya deek mar.

14 Noofooy giñe tuuri Samari,

naa: “Giñ naa ko ca tuur may dund ca
Dan* ,

giñ ko ca yoonu Beerseba wa dul fey.”

Dinañu daanu, dootuñu jóg.»

9

Peeñum juróomeel bi

1 Ma gis nag Boroom bi, mu taxaw ca
sarxalukaaya ba.

Mu ne: «Dóorleen ci kaw jëni jaamookaay
bi,

ba kenu yi yëngu,
te ngeen màbb ko ci kaw boppi ñépp;

ña mucc, ma reylu ci xare.

Du kuy fëx ba récc,

du kuy daw ba raw.

2 Bu ñu bëttoon, ba biir njaniiw it,
fa laa leen di yóotoo.

Ñu yéeg asamaan,

ma wàccee leen fa.

3 Bu ñu nëbbu woon kaw tundu Karmel it,
fa laa leen di fekk, yóbbu.

Ñu làqoo ma ca taatu géej,
ma sante fa jaani géej, mu màtt leen.

4 Su ñu demee, diy jaam ñu seeni noon
jiital,

fa laay sante boroom saamar, mu bóom
leen.

Du bētu jàmm laa leen di xoole,
bët bu aay laa leen di xoole moos!»

5 Boroom bi, Aji Sax ji Boroom gàngoori
xare yi,

kiy laal suuf, mu ne soyox seey,
mboolem lu ci biiram di jooyoo;

suuf fuddoondoo ni dexu Niil,
dellu rës ni dexu Misra.

6 Kee tabax kaw asamaan néegi biiram,
samp ub xaddam, yiire suuf.

Keey woo walum géej,
walal fi kaw suuf.

Kookoo di Aji Sax ji.

Mbugal yell na

7 «Bànni Israyiloo, xanaa du yeen ak waa
Kuus laa yemale?»

Kàddug Aji Sax jee.

«Xanaa du ni ma leen génnee réewum
Misra

laa génnee Filisteen ñi réewum Kaftor,
génnee ni waa Siri réewum Kir?

8 Boroom bi, Aji Sax jaa ngi ne jàkk
réewum bàkkaarkat mi.

Maa koy sàanke kaw suuf,
waaye ba tey дума fàkkas faraaas waa kër
Yanqóoba.»

Kàddug Aji Sax jee.

9 «Maa ngii déy di sant xeetoo xeet,
ñu gësëm waa kër Israyil,

ni ñuy gësème tameb suuf,
te doj du rot.

10 Saamar ay rey mboolem sama
bàkkaarkati mbooloo

mi naan: “Yàlla du wacc musiba di nu jege,
ba di nu dab.”»

Waa kër Buur Daawuda faluwaat nañu

(Saar 9.11-15)

11 «Bésuub keroog maay yékkati mbaarum
Daawuda mi joy,

ba fattaat xar-xar yi,
defaraat gent bi,

tabaxaat ko na woon.

12 Su boobaa bànni Israyil nangu ndesu
Edom,

ak mboolem suufi xeet yi ñu ma tudde
woon.»

Kàddug Aji Sax jee, te moom lay def.

13 «Ay bés a ngii déy, di ñëw,»

kàddug Aji Sax jee,

* 8:14 8.14 Dan la Buur Yerbawam yékkati woon tuur yu ñu jëmmale wëlluy wurus. Seetal ci 1.Buur ya 12.29-30.

«kuy gàbb dina dab kuy góob,
 kuy nal reseñ dab ka koy ji.
 Biiñ bu bees di rogalaate ca tund yu mag
 ya,

di wale tundoo tund wu ndaw.
¹⁴ Maay tiji wërsëgu Israyil, sama ñoñ;
 ñu tabaxaat seeni gent, dëkke;
 jëmbat seen tókëri reseñ,
 naan seen biiñ,
 bey ay tool,
 lekk ca meññeef ma.

¹⁵ Maa leen di jëmbat fi seen suuf,
 te deesatu leen déjjatee fi seen suuf
 si ma leen jox.»
 Seen Yàlla, Aji Sax jee ko wax.

Téereb Yonent Yàlla Abdiyas

1 Peeñum Abdiyas a ngi. Boroom bi Aji Sax ji moo wax lii ñeel askanu Edom* .

Lu jëm ci mbugalum Edomeen ñi
Ab dégtal lanu dégg, mu bawoo fa Aji Sax ji,

ndaw lañu yebal ci biir xeet yi,
mu ne: «Jógleen, nu jóg song Edom xare.»

2 Aji Sax jee ne waa Edom:

«Tuutal leen laay def ci biir xeet yi
yeen, ñu xeeblu lool ngeen di doon.

3 Seen reewande sànk na leen,
yeen ñi dëkke xar-xari doj,

te seen dëkkuwaay sore kaw,
ba tax leen naa ci seenum xel:

“Ana ku ñu mana daane fi suuf?”

4 Su ngeen kaweeloon nig jaxaay,
ba seenum tàgg làqe ci biiri bididiw it,
fa laa leen di wàccee.»

Kàddug Aji Sax jee.

5 «Su leen ay sàcc dikkalee, mbaa
sëxëtookati guddi,
yeenakay yàqule!

Waaye xanaa du la leen doy lañuy sàcc?

Su leen wittkati reseñ dikkalee,
xanaa dinañu ca wacc ay doom?

6 Waaye céy ni ñuy sëxëtoojee askanu
Esawu!

Céy ni ñu nara jeexaato seeni denc!

7 Mboolem ñi ngeen fasooll kóllère
ñoo leen di waññi ba ca seen kemu
réew,

seeni am-di-jàmm ñoo leen di nax ba man
leen,

ñiy lekk seenu ñam tegal leen ag fiir ci
seeni tànk,

ndax Edom moo amul ag dégg.

8 «Xanaa du bésub keroog,» kàddug Aji
Sax jee,

«fi Edom laay tukkale boroomi xel,
tundu Esawu wouwu laay jële luy taxa
dégg.

9 Yeen waa Teman†, seeni jambaar ay jàq,
ba mboolem waa tundu Esawu fàddu.

Lii moo waral mbugal mi

10 «Soxore gi ngeen soxore seen mbokk
Yanqóoba

moo leen tax di sangoo gâcce,
te dees na leen dagg sànni ba fàww.

11 Bésub keroog ba ngeen taxawee,
janook seen mbokk,

bésub keroog ba jaambur ñay

yóbbu seen alali bokk,
ay doxandéem song bunti dëkkam,
bay tegoo bant teraangay Yerusaleem,
yeen itam, ni noon yooyu ngeen def.

12 Waruleen woona seetaan ci seen bésub
mbokk,

bésub njekkaram,
Waruleen woona bége deminu Yudeen ñi
ci seen bésub sànkute,
mbaa ngeen di réy làmmiñ,
ci bésub njàqare.

13 Waruleen woona dugg sama dëkku ñoñ,
ci seen bésub tiis.

Waruleen woona bokk ci ñiy seetaan seenu
ay

ci seen bésub tiis.

Waruleen woona teg loxo seeni teraanga,
ci seen bésub tiis.

14 Waruleen woona taxaw fa selebe yoon
ya,

di dogale ña récce ca ñoom,
waruleen woona delloo ña dese bakkan
ca loxol noon ya,
ci bésub njàqare.

Bésub Aji Sax ji xeet yépp la ñeel

15 «Bésub Aji Sax ji déy, dëgmal na,
ñeel xeetoo xeet.

Li ngeen def rekk lees leen di def,
seenug pey këppu ci seen kaw bopp.

16 Yeen waa kër Yanqóoba,
ni ngeen naane sama kaasu mbugal
ca sama kaw tund wu sell,

ni la xeet yépp di naane ba fàww,
di naan ak a jolu ba mel ni masuñoo nekk.

17 Waaye kaw tundu Siyon la aw ndes di
rawe,

te dina doon bérab bu sell,
waa kër Yanqóoba it moomaat seeni
moomeel.

18 Kër Yanqóoba sawara lay doon,
kër Yuusufa dib tàkk-tàkk,
kër Esawu di boob

mu ñuy lakk, xoyom ko,

ba kenn du dese bakkan ci kër Esawu.»

Aji Sax jee ko wax.

19 «Waa bëj-saalumu Yuda ñooy moom
tundu Esawu,

waa suufu tund ya moom waa Filisti,
ñooy moom itam réewum Efrayim, ak
réewum Samari,

giirug Beñamin moom diiwaanu Galàdd.

20 Ngàllo gay waa Israyil, gàngoor googu
ñooy moom

réewum Kanaaneen ña, ba ca Sarebta,
te ngàllo gay waa Yerusaleem ca Sefarat,

ñooy moom dëkki Negew ca bëj-
saalum.

21 Ay xettlikat ñooy yéeg kaw tundu Siyon,

* 1:1 1.1 Edom mooy xeet wi soqikoo ci Esawu seexu Yanqóoba mi meññ Israyil. † 1:9 1.9 Teman, sëtub Esawu lañu dippee dëkkub Edomeen ba woon ca bëj-gànnaru réew ma, te moo taxawe fi réewum Edom gépp.

ngir yilif tundu Esawu,
nguur gi di moomeelu Aji Sax ji.»

Yunus Ubbite gi

Yonent Yàlla Yunus waa réewum Israyil la woon, te fa la nekkoon ba muy jot ndigalal Yàlla, la ko yebal ca waa dëkk ba ñuy wax Niniw, te féeteek réewum Iraag ci jamonoy tey. Niniw nag bokkul woon ci Israyil. Péeyu Asiri la woon. Waa Asiri askan wu néeg lañu woon, bokkoon ci nooni Israyil yi gënoona aay ci ñoom. Beneen dëkk bi ñuy wax ci téere bii mooy Tarsis. Ci waxinu jant yooyu, Tarsis a nga woon ca catu àddina, soreyaatoo lool ak Israyil ak Niniw.

Ci Tënk:

Saar 1 Yunus gântal na Yàlla ba daw

Saar 2 Yunus ñaan na ci biir njàqareem

Saar 3 Yunus jéfe na ndigal la jibaat ñeel ko

Saar 4 Yunus déggoowul ak Yàlla ci ni mu gise

Yunus jot na ndigal lu ko diis

¹ Am na bés kàddug Aji Sax ji dikkal Yunus, mi Ametay di baayam. Mu ne ko:

² «Jógal dem Niniw, dëkk bu mag ba, nga rëbb leen, ndax seen mbon agsi na ba fi man.»

³ Yunus nag jóg jëm Tarsis, ngir daw Aji Sax ji. Mu àgg fu ñuy wax Yafa, fekk fa gaal gu mag gu jëm Tarsis. Mu fey njég ga, dugg, ànd ak ña ca nekk, jëm Tarsis, ngir daw Aji Sax ji.

⁴ Aji Sax ji itam sànni ngelaw lu réy ca gééj ga, muy ngélén lu réy ca gééj ga, ba gaal ga nara tas. ⁵ Ba loolu amee mool ya tiit di yuuxoo, ku nekk di woo sa yàlla wall. Ñu sànni biir gééj la ñu yeboon ca gaal ga ngir gëna woyof. Fekk na Yunus wàcc ca suufu gaal ga, tèdd di nelaw ba yàndoor. ⁶ Ci kaw loolu njiitu mool ya dikk ba ca moom, ne ko: «Yaw, ana looy nelaw? Jógal kay woo sa yàlla wall! Jombul mu geesu nu, ba dunu sànkú.»

⁷ Ci biir loolu ku nekk naan sa moroom: «Ayca nu tegoo bant, ba xam musiba mi nu dal, ku nu ko yóbbe.» Ñu tegoo bant, mu dal ca kaw Yunus. ⁸ Ñu ne ko: «Dinga nu wax nag ku nu yóbbe mi musiba! Ana luy sa liggéey, ak foo bàyyikook fuy sam réew, ak xeet woo bokk sax yaw?»

⁹ Mu ne leen: «Ab Ebré laa. Aji Sax jiy Yàllay asamaan laay jaamu, moom mi sàkk gééj ga jéeri.» ¹⁰ Ci kaw loolu nit ña tiit tiitaange lu réy, ne ko: «Yaw, li nga def lu mu doon?» Fekk na Yunus xamal leen ne Aji Sax ji lay daw.

¹¹ Gééj ga nag di gëna sàmbaraax. Ñu ne ko: «Nu nu lay def nag, ba gééj gi

dalal nu?» ¹² Yunus ne leen: «Fableen ma, sànni ci biir gééj gi. Kon gééj gi dal. Ndax xam naa xéll ne ngélén lu réy lii, maa leen ko yóbbe.» ¹³ Terewul nit ña joow, joow rekk, wuti tefes, mu té ndax gééj ga gëna sàmbaraax ca seen kaw.

¹⁴ Ba loolu amee ñu ñaan Aji Sax ji, ne ko: «Céy Aji Sax ji, ngalla bu nu bàyyi nu sànkú ndax bakkanu nit kii, te bu nu gàdduloo bakkanu jaambur, ndax yaw Aji Sax ji, sa coobare nga def.» ¹⁵ Ñu daldi fab Yunus, sànni ca biir gééj ga, gééj ga giif, ne tekk. ¹⁶ Nit ña nag am tiitaange lu gënatee réy ci Aji Sax ji, daldi rendil Aji Sax ji sarax, ba noppi xasal ko aw xas.

2

Yunus a ngi tinu

¹ Ci kaw loolu Aji Sax ji yebal jën wu mag, mu wonn Yunus. Mu nekk ca biiru jën wa ñetti bëccëg ak ñetti guddi.

² Yunus ñaan ci Yàllaam Aji Sax ji, fa mu tollu ca biir jën wa. ³ Mu ne:

Maa jàq, woo Aji Sax ji, mu wuyu ma.

Ca xóotey njaniiw laa wootee wall, nga dégg ma.

⁴ Yaa ma xalab xóotey xolu gééj, ndaw ma mëdd ma.

Say wal ak say gannax, lépp a jaare sama kaw.

⁵ Man nag ma naan: «Dàqees na ma, ba ma sore la, waaye maay dellu gis sa kër gu sell ga!»

⁶ Ndox maa ma tanc ba ci put,

xóotey gééj mëdd ma,

waag ba laxasu sama bopp.

⁷ Ca reeni tund ya laa suuxi, caabiy suuf féete ma gannaaw ba fàww, waaye ca kan ma nga jukkee sama bakkan, yaw, sama Yàlla Aji Sax ji.

⁸ Noowal bakkan a nga may récc,

sama xel ne yarr ci yaw, Aji Sax ji,

sama ñaan àgg fa yaw,

ca sa kër gu sell ga.

⁹ Ñiy wormaal neenug neen daal,

ñoò dëddu seen yiw fa Yàlla.

¹⁰ Man nag, ci biir cant laa lay sarxale.

Li ma xas laay sottal.

Wall, fa Aji Sax ji!

¹¹ Ci kaw loolu Aji Sax ji wax ak jën wa, mu goqi Yunus ca tefes ga.

3

Yunus fomm na

¹ Ba loolu wéyee kàddug Aji Sax ji dikkal Yunus ñaareel bi yoon. Mu ne ko: ² «Jógal dem Niniw, dëkk bu mag ba, nga yegge leen kàddu gi ma lay dénk.» ³ Yunus jóg dem ba Niniw, muy la ko Aji Sax ji wax.

Niniw nag def dëkk bu réya réy, ba doxub ñetti fan a koy wër.

⁴ Ba mu ko defee Yunus tàmbalee wër bés bu jëkk ba, di yéene naan: «Ñeent fukki fan gannaaw tey Niniw dina tas.»

⁵ Waa Niniw nag gëm Yàlla, daldi yéene koor. Ci biir loolu ku nekk sol ay saaku, di ko ñaawloo, dale ko ca ka gën di mag, ba ca ka gën di ndaw. ⁶ Mbir ma àgg ca buurub Niniw. Mu ne ñokket, jóge ca ngànguneem, ne futeet mbubbam bu-uram, sàngoo saaku, daldi toog cib dóom, di ko toroxloo. ⁷ Ci kaw loolu mu yénelu dogal bii ca Niniw, ne: «Ci ndigalal Buur aki kàngamam; muy nit aku jur, gu gudd ak gu gàtt, bu ci dara dugg ci seen gémmiñ. Buñu lekk, te ndox, buñu ko naan. ⁸ Na nit ak jur sàngoo saaku te ñu woo Yàlla wall lu ñu man. Na ku nekk dëddu jëfinam ju bon ak jëfi coxoram. ⁹ Jombul Yàlla dëpp ba fomm, daldi dëddu tàngoору meram, ba dunu sàнку.»

¹⁰ Yàlla nag gis seeni jëf, gis na ñu dëddoo seen jëfin ju bon. Yàlla daldi fomm mbugal ma mu leen naraloon, ba mujju koo def.

4

Aji Sax ji yedd na Yunus

¹ Ba loolu amee Yunus mer mer mu réy, ba xol bay bax. ² Mu ñaan Aji Sax ji, ne ko: «Céy Aji Sax ji, xanaa du lii laa waxoon ba ma génnagul sama réew? Moo taxoon ma jëkka daw, jëm Tarsis! Ndax xamoon naa ne yaw Yàlla yaay boroom yiw ak yërmande, sa mer a diib, sa ngor bare, ngay fomm mbugal. ³ Léegi nag Aji Sax ji, rikk jëlal sama bakkan rekk, ndax dee sax a ma gënal dund!» ⁴ Aji Sax ji ne ko: «Waaw, mbaa yaa yey am xol bu tàng ci loolu?»

⁵ Yunus daldi génn dëkk ba, dem toogi fa féete dëkk ba penku, mbaaral fa boppam, toog ca keppaar ga, di seet nu dëkk bay mujje. ⁶ Ba mu ko defee Aji Sax ji Yàlla yebal ag lawtan, mu law, tiim Yunus, keral boppam ngir xettli ko. Yunus bég mbégte mu réy ca lawtan ga. ⁷ Ca ëllég sa, ba jant bay fenk, Yàlla yebal aw sax, mu song lawtan ga, mu wow. ⁸ Naka la jant ba fenk, Yàlla yebal ngelawal penku lu tàng jérr; jant ba jam boppu Yunus, ba mu xawa xëm, bëggatul dara ci bakkanam. Mu naan: «Dee sax a ma gënal dund!»

⁹ Ci kaw loolu Yàlla ne Yunus: «Waaw, mbaa yaa yey am xol bu tàng ci lawtan gi?» Mu ne: «Maa yey am xol bu tàng ba dee sax!» ¹⁰ Aji Sax ji ne ko: «Waaw yaw, yaa ngi xalaat lawtan gi nga sonnul, lawaloo ko; guddi la sax, guddi ga ca topp mu dee. ¹¹ Man nag, Niniw, dëkk bu mag

bii ëmb lu ëpp fuuf téeméeri junniy nit ak ñaar fukk (120 000), ñu ràññeewul seen ndijoor ak seen càmmoñ, ak mala yu bare, duma leen xalaat?»

Téereb Yonent Yàlla Mise

¹ Kàddug Aji Sax jii moo dikkaloon Mise miy waa Moreset, ca janti Yotam ak Axas ak Esekiya, buuri réewum Yuda, na seen nguur topplantee. Lii la Mise gis ci mbirum Samari ak Yerusalem*.

Aji Sax ji yékkati na kàddug tuuma

² Dégluleen, yeen, xeetoo xeet, teewlul, yaw àddina ak li ci sa biir, ba Boroom bi Aji Sax ji seedeel leen tuuma, Boroom beey àddoo fa màkkaanam mu sell ma.

³ Aji Sax jaa ngii di génne ca bérabam ba, mooy wàccsi, daagoo kawtey suuf.

⁴ Tund ya mu joggi da naan soyoX seey, xur ya xar, wàyyi ni dax ju jege sawara, def ni ndox mu wale kaw mbartal.

⁵ Bàkkaaruu Yanqóobaa waral lii lépp, moyi Israyil googu la.

Ana luy bàkkaaruu Yanqóoba?

Da dul Samari?

Ana fuy bérabi jaamookaayi xërëm ci Yuda?

Da dul Yerusalem?

⁶ «Maay saam Samari, def ko jalu tojit ci mbooy gi,» la Aji Sax ji wax.

«Maa koy def jëmbatukaayub reseñ, maay yuri ay doji tabaxam ca xur wa, ñori ay kenoom.

⁷ Seen jëmme tuur yépp ay rajaxoo, te mboolem seen peyoor yu sobewu day lakk ba jeex.

Maay tas tasar mboolem seen jëmme xërëm†,

seen peyi ganc a leen ko may, kon na ko seen moroomi ganc feyeekoo.»

Ñaawlu dikkal na Yuda

⁸ Lee ma tax di jooy ak a yuuxu, ne dunj, deme tãnki neen, di ko ñaawloo. Naa yuuxu nig till, naa sab sabum looy ndaxu naqar.

⁹ Góom bi Aji Sax ji teg Samari kat amul paj,

te moo law ba Yuda, àkki ba buntu Yerusalem, ca saay bokk.

¹⁰ Buleen ko nettali fa Gaat†,

buleen jooy benn yoon.

Xalanguleen fa pëndub suuf sa ca Bet

Leyafra§,

di ko ñaawloo.

¹¹ Yeen waa Safiir*, jáll-leen, ak gacce ak yaramu neen.

Waa Caanan† sañuñoo génn,

te wall du bawoo fa waa Bet Eccel†, ñay jooy seeni néew.

¹² Waa Marot a mar jamm,

te aw ay a wacce fa Aji Sax ji,

ba agsi buntu Yerusalem§.

¹³ Yeen waa Lakis*, takkleen fasi dawkat ak watiir.

Yeena jékka moyloo janq Siyoñ mu taaru, ci yeen lañu jékka gise bàkkaari Israyil.

¹⁴ Yeen waa Yuda, mayleen waa Moreset

Gaat†

lu ngeen taggtook ñoom,

këri Agsib† wori neen lay doon ci buuri Israyil.

¹⁵ Yeen waa Maresa§ laay indil ku leen moom,

te ca Adulam* la ñi Israyil di damoo di làquji.

¹⁶ Watuleen nel, ñaawloo ko

doom yi leen doon bannexal.

Neluleen nel yu set nim tan, naqarloo, nde ngallo lañu jëm, teqlikook yeen.

2

Mbugal dal na aakimookat yi

¹ Wóoy, ngalla ñiy mébét ñaawtéef,

di ràbb lu bon ci seenub téraay,

bèt set, ñu jéfe ko,

ndax xam ne man nañu ko.

² Ñooy xemmeme tool, foqati,

ay kër, ñu nangu,

tey not waay ak waa këram,

ak nit ci céru suufam.

* **1:1** 1.1 Gannaaw ba réewum Yawut xàjjalikoo, Samari moo doon péeyub Israyil ca bėj-gannaar, Yerusalem di péeyub Yuda ca bėj-saalum. † **1:7** 1.7 jëmme xërëm yooyu, su tojee it di gánjar gu ñu mana wecci xalis. † **1:10** 1.10 Gaat dëkku Filisti la woon. Yeneen juróom ñeenti dëkk yi ci topp ñoo séqoon Moreset Gaat, dëkku cossaanu Mise. Ni baatub Gaat di jibe ci ebré dafa neexoo ak baat biy tekki «nettali.» § **1:10** 1.10 Bet Leyafra kërug pëndub suuf lay tekki, te neexoo na ak baatu ebré bu mana tekki «pëndub suuf.» * **1:11** 1.11 Turu dëkk bii, Safiir, man naa tekki «taaru,» taar bi nag woroo ak gacce gi ñu wax ci aaya bi. † **1:11** 1.11 Caanan neexoo na ak baatu ebré bu mana tekki «génn.» † **1:11** 1.11 Eccel niroo na ak baatu ebré bi mana tekki «gántal,» wax ji di wund ne «wall gántal na.» § **1:12** 1.12 Turu Yerusalem wi indi na baatu ebré bu mana tekki «jamm,» mu woroo ak ay wi ñu ne mooy agsi Yerusalem, woroo itam ak Marot, baatu ebré bi jegewoo ak «wextan.» * **1:13** 1.13 Turu dëkk bi, Lakis lañu nirule ak baatu ebré bu mana tekki «fasi dawkat.» † **1:14** 1.14 Turu dëkk bii, Moreset, baat bi mu jegewool ci Ebré man na tekki «ab séet.» Aaya 10 moo wax ci «Gaat.» † **1:14** 1.14 Agsib neexoo na ak baatu ebré bu mana tekki «wor.» § **1:15** 1.15 Maresa neexoo na ak baatu ebré bu mana tekki «nangukatub réew.» * **1:15** 1.15 Adulam mooy xunti ma Daawuda làqu woon, ba muy daw buur Sóol.

³ Moo tax Aji Sax ji dafa wax ne:
 «Maa ngii di nasal googu làng aw ay,
 ay wu ngeen dul teggee ci seenu loos,
 te dungeen daagu, siggi,
 nde jant yu metti lay doon.
⁴ Bésub keroog lees leen di fental aw léeb,
 woyal leen woy wu tiis,
 te naa: «Sotti na, yàqu nanu yaxee!
 Sama suufu askan dugg na ciy loxo,
 ba sore ma,
 ab fippukat lañu jox sunuy tool!»
⁵ Moo tax bu mbooloom Aji Sax ji waree
 jotaat ci seen suuf,
 kenn ci yeen du am cér, ba ñu di ko tàllalal
 buumu nattukaay.

Yonenti caaxaan yaa ngi diinjat

⁶ Seen yonent yeey waare naa:
 «Buleen waare!
 Nii kat deesu ko waaree,
 gâcce du nu dab!»
⁷ Bànni Israyil, ndax dees na waxe nii:
 «Aji Sax ji day xàddee?»
 Am: «Jooju jéf da di jikkoom?»

«Sama kàddu jàmm la ci kuy def njub.
⁸ Yeen sama ñoñ, démb rekk ngeen jóg nib
 noon;
 yeena ngi nangoo ci nit mbubbum xewam,
 fekk muy romb, buggul xare, foogul dara.
⁹ Jigéen ñi ci sama ñoñ ngeen dàqe
 seen kéri mbégte,
 te seeni doom, yeena leen xañ
 sama barke ba fàww.
¹⁰ Jógleen dem, fii du bérabu noflaay,
 nde sobewu na, ba nara yàqe yaxeeet.
¹¹ Nit man naa wër, toppi caaxaan aki fen,
 naan: «Maa lay yégal waxyub biññ aku
 ñoll,»
 te kookooy jottlikatub waxyu bi askan wii
 yellow!

Aji Sax jeey dajale ndesu ñoñam

¹² «Yeen askanu Yanqóoba, maa leen di
 dajalee
 dajalee yeen ñépp,
 maay boolee boole ndesu Israyil.
 Benn bopp laa leen di def, niy xar ca gétt
 ga,
 niy gàtt ci seenum parlu,
 coowal nit ña jolli.
¹³ Kiy bëtt mooy dox, jiitu leen,
 ñu bëtt, jàll bunt bi, dem.
 Seen buur mooy jàll jiitu leen,
 Aji Sax jeey dox fa seen kanam.»

3

Aji Sax ji tiñal na njiiti Israyil

¹ Dama ne:
 «Ngalla dégluleen yeen njiiti Yanqóoba,
 yeen kilifay kër Israyil!
 Xanaa du yeena wara xam yoon?

² Te yeenay bañ-kati lu baax,
 di bëgg-kati lu bon.
 Yeenay fees sama ñoñ te ñuy dund,
 yeenay rocci suux wi sàng seeni yax.
³ Yeenay yàpp samay bokk,
 fulli seen der,
 damm seeni yax, dogat,
 def ko ni toggug kawdir,
 mbete ndawal ci cin.»
⁴ Lee tax noggatukat yii di woo Aji Sax ji
 wall,
 te du leen wuyu,
 kanamam la leen di laq, bésub keroog,
 nde ñoo bonal seeni jéf.

Aji Sax ji àrtu na yonent yu bëgge yi

⁵ Lii la Aji Sax ji wax ci yonent
 yiy lajjal samay bokk:
 «Bu ñu saqamee ab lanc, yéene jàmm;
 ku leen leelul, ñu biral waxyub xare.
⁶ Moo tax yeen, guddi moo leen di ñeel,
 ba peeñu réer,
 lëndëm a leen di dikkal, ba ngis tukkil leen,
 jant mooy sowal yonent yi,
 bëccég lëndëmäl leen.
⁷ Seetkat yi dañuy rus,
 boroom ngis yi torox,
 ñoom ñépp jàpp seen gémmiñ;
 ndax Yàllaa leen du faale.»

⁸ Teewul man, may feese doole,
 feese Noowug Aji Sax ji,
 ak dëgg ak njambaarte,
 ngir biralal askanu Yanqóoba,
 bàkkaaram,
 ngir tuddal bànni Israyil googu moyam.

Aji Sax ji tiñalaat na njiiti Israyil

⁹ Ngalla dégluleen lii, yeen njiiti kër
 Yanqóoba;
 yeen kilifay kër Israyil.
 Yeen ñi seexlu dëgg,
 lunkal wépp yoonu njub.
¹⁰ Deret ngeen tabaxe Siyoñ,
 njubadi ngeen tabaxe Yerusaleem googu.
¹¹ Seen njiit, alalu ger lañuy àttee,
 seeni sarxalkat di feyeekuy jàngle,
 seeni yonent di weccikoo xaalis
 seenum ngisaane,
 te Aji Sax ji lañuy dëgërloo, naan:
 «Xanaa du Aji Sax jaa ngi ci sunu biir?
 Musiba du nu dab!»
¹² Kon nag dees na gabb Siyoñ nib tool,
 Yerusaleem googu diy tojit, jale,
 tundu kërug jaamookaay baay doon gajj
 bu kawé.

4

Aji Sax ji, ca tundam lay saytoo xeet yi

¹ Fan yu mujj ya, dees na taxawal
 tundu kër Aji Sax ji,
 mooy gëna kawé ci tund yi,
 tiim tund yu ndaw yi,

askan yi riirandoo, wutsi ko.
² Xeet yu bareey dikk te naan:
 «Dikkleen nu yéegi ca tundu Aji Sax ji,
 kër Yállay Yanqóoba,
 mu xamal nuy yoonam,
 ba nu doxe yooyu ñallam.»
 Siyoŋ kat la ndigalu yoon di bawoo,
 Yerusalem googu la kàddug Aji Sax ji di
 jóge.

³ Mooy àtte diggante xeet yu bare,
 mooy dogalal askan yu am doole te sore,
 ñu tégg seeni saamar ay illéer,
 def seeni xeej ay sàrt.
 Aw xeet dootu xàccil moroom ma saamar,
 te dootuñu jàngati xare.

⁴ Ñoom ñépp ay toog, ku nekk ci kerug
 reseñam,
 mbaa keppaarug garabu figgam,
 kenn du leen xoqtal.
 Aji Sax ji Boroom gàngoor yee ko wax.

⁵ Askan wu nekk ci yaakaaru turu yàllaam
 lay doxe.
 Nun nag ci yaakaaru sunu turu Yàlla Aji
 Sax ji
 lanuy doxe, tey ak èllég, ba fàww.

⁶ Bésuub keroog, kàddug Aji Sax jee,
 «Naa jëli kuy soox, booleek ku ñu tox-
 aloon,
 te ma mbugaloon leen.

⁷ Maay def liy soox aw ndes,
 la ñu dàq fu sore, ma def ko askan wu am
 doole,
 te Aji Sax jeey doon seen buur ca kaw
 tundu Siyoŋ,
 li ko dale tey ba fàww.

⁸ «Yaw, tatay gétt gi,
 yaw tundu Ofel*,
 yaw janq Siyoŋ mu taaru mi,
 yaw lees di ñéwal,
 yaw la kilifteef ga woon di dikkal,
 nguur gi, janq Yerusalem mu taaru lay
 ñeel.»

Coono jur na jant bu yees

⁹ Ana lu la tax di yuuxoo yuuxu tey?
 Buur daa amul fi sa biir?
 Am ki lay xelal a dee, ba mitit jàpp la nii,
 nga mel ni kuy matu?
¹⁰ Wañaarul te yuuxu ni kuy matu ndax
 mitit,
 yaw janq Siyoŋ mu taaru,
 nde dèkk bi ngay génn, màkkaanoo àll
 bi,
 dinga dem Babilon†,
 te fa lees lay xettlee,
 fa la la Aji Sax jiy jote ci loxol say noon.

¹¹ Tey ci sa kaw, la xeet yu bare daje, yaw
 Siyoŋ,
 te naan: «Nees ko tédde,
 nanu seetaan Siyoŋ!»

¹² Booba ñoom xamuñu lu ciy xalaati Aji
 Sax ji,
 ak luy mébétam,
 nde moo leen di dajale niy sabaar ca dàgga
 ja.

¹³ «Yaw janq Siyoŋ mu taaru, jógal bàcci
 leen,
 sa béjjén laay def ag weñ,
 say wewi tànk, ma def ko xàñar,
 nga rajaxe xeet yu bare.»
 Yaay faagaagal seen alal ju lewul, ñeel Aji
 Sax ji,
 seen koom ñeel Boroom àddina sépp.

Betleyem la kilifa di juddoo

¹⁴ Léegi yaw, dèkkub gàngoor yi,
 defal sa bopp ay gàngoor,
 ab gaw lees nu yékkatil,
 te yetu ñaam lees di dóor njiital Israyil.

5

¹ «Yaw Betleyem Efrata,
 lu tuut ci làngì Yuda,
 ci yaw la ku may yilifal Israyil di génne,
 cosaanam di jant yu yàgga yàgg,
 bu jèkkoon.»

² Moo tax Aji Sax ji di leen wacc
 ba keroog jant, ba kiy matu mucc.
 Ca la bokkam ya dese bakkam di dellu,
 fekki seen bokki bànni Israyil.

³ Kilifa gaay taxaw, sàmme
 ci dooley Aji Sax ji,
 ci màggug turu Yàllaam Aji Sax ji,
 ba ñu dèkke jàmm,
 nde léegi lay doon ku màgg
 ba turam dajal cati àddina.

⁴ Kookooy doon buntu jàmm,
 ba bu waa Asiri songee sunum réew,
 ba daagoo sunu kawi tata,
 juróom ñaari njiit lanu koy yékkatil,
 ba juróom ñetti garmi.

⁵ Ab saamar la ñooñuy yilife Asiri,
 réewum Nimróot mooma ca biiri buntam.
 Kilifa gi ñu dige moo nuy xettleek Asiri, bu
 ñu nu songee,
 ba joggati sunu suuf.

Ndesu Israyil dina am doole

⁶ Ci biir askan yu bare la ndesu Yanqóoba
 di nekk,
 mel nib lay bu bawoo fa Aji Sax ji,
 nirook waame wu wàccal gàncax,
 xaarul lenni nit,
 lenni doom aadama la séentuwwul.

* 4:8 4.8 Ofel aw tund la woon ca Yerusalem, ñu tabax ca tata ju ñu dàbbi. Daawuda moo ko nangu woon ca Yebuseen ña. † 4:10 4.10 Lu wara tollook téeméeri at gannaaw gi, ba Buur Esekiya deeyee la Yerusalem tàbbi ci loxol Babilon. Seetal ci 1.1.

7 Ci biir askan yu bare la ndesu Yanqóoba di nekk,
 ci biir xeeti áddina,
 mbete gaynde ci biir rabi àll yi,
 nirook gaynde gu ndaw ci biiri gàtt;
 fu mu jaare, joggati, zotat,
 te kenn du wallu.

Cëslaay réer na bokkaalekat

8 Aji Sax ji, sa loxo ca kaw, tiim say bañ,
 mboolem say noon lees di dagge ci kaw suuf.

9 «Bésub keroog,» kàddug Aji Sax jee,
 «maay dagge fi sa biir, sa fasi xare,
 te maay sànk sa watiiri xare.

10 Maa fiy dagge sa dëkki réew mi,
 màbb sa tata yépp.

11 Maay foqatee ay xërëm ci sa loxo,
 te ay gisaanekat, dootuloo ko am.

12 Maay dagge fi sa biir say tuur,
 ak sa xeri jaamookaay,
 te dootoo sujjóotal loo sàkke say loxo.

13 Maay buddee fi sa biir xeri jaamookaayi
 Asera

tuur mi,
 te maay tas say jaamookaay.

14 Mer akum sànj laay feye xeeti yéefar,
 yi déggul ndigal.»

6

Aji Sax ji tudd na sikkaangey ñoñam

Mise mooy wax

1 Dégluleen rekk li Aji Sax ji wax:
 Jógal layoo, tund yu mag yi seede,
 tund yu ndaw yi dégg la.

2 Yeen tund yu mag yi, dégluleen
 layoob Aji Sax ji,

ak yeen kenuy suuf yi sax dàkk.

Aji Sax jee joteek ñoñam,
 mooy wàqanteek Israyil.

Aji Sax jeey wax

3 Yeen sama ñoñ, ana lu ma leen def?
 Ana fu ma leen sonale?

Waxleen ma!

4 Yeen maa leen génnee réewum Misra,
 kërug njaam googa, maa leen fa jote,
 ba yebal fi seen kanam, Musaa ak
 Aaróonaak Maryaama.

5 Yeen sama ñoñ, fàttlikuleen rekk
 la leen Balag buurub Mowab fex-
 eeloon,
 ak la ko Balaam doomu Bewor tontu
 woon.

Doxub diggante Sitim ba Gilgal* it, baleen
 ci xel,

ba ràññee njekku Aji Sax ji.

Nit ñeey wax

6 Ana lu may dikkaale fi kanam Aji Sax ji,

ba sujjóotal Yàlla jooja fa kaw.

Tee ma koo dikke ay rendi-dóomal,
 ay wëlluy menn at?

7 Mbaa dina ma nangul junniy kuuy,

ak fukki junniy dexi diw?

Am samab taaw laay joxe

saraxu peyu bàkkaar,

sama meññeefum biir di sama saraxu
 peyug tooñ ?

Mise mooy wax

8 Yaw nit ki, waxees na la li baax,

ak li Aji Sax ji sàkku ci yaw,

te loolu moyul di def yoon, sopp jëfi ngor

te woyof nooy toppe sa Yàlla.

Mbugal ñeel na waa Yerusalem ñi fecci kóllère

9 Baatub Aji Sax ji mooy joor dëkk bi,

te ndam mooy ñeel ñi wormaal sa tur.

«Dégluleen seen yetu mbugal, ak ki ko
 yebal,

10 ndax alalu njublan a ngi ci biir kéri
 njublan yi ba tey,

mook nattukaayi alkànde yu tuut ya ñuy
 jaaye?

11 Ana nu may ñàkka toppe màndaxekaayi
 njublan,

ak mbuusum doomi naxekaay yees cay
 natte?

12 Boroom alal yi ci sa biir, aw ay lañu fees,
 waa dëkk bi di fen,

te lu seen làmmiñ tudd ay nax la.

13 Man it moo tax ma di la duma
 ba nga wopp,

gental la ndax say bàkkaar.

14 Yaw de dinga lekk, te doo suur,
 xanaa wéye biir bu wéet.

Dinga fat loo dul mana denc fu wóor,
 te loo denc fu wóor it, ab saamar laa koy
 jox.

15 Yaw de yaay ji te doo góob,

nga nal doomi oliw te doo ca diwu,
 nal doomi reseñ te doo naan biññ.

16 Dogali Buur Omri daal lees di topp,
 ak mboolem jëfni waa kër Buur Axab†.

Seeni pexe ngeen topp,

ba tax may def dëkk bi di lu daw yaram,
 waa dëkk bi di ñu nit ñiy muslu ci seenu

demin,

te gâceceg sama ñoñ, yeena koy gálloo.»

7

Yàqute maase na

1 Wóoy, ngalla man mi mel ni kuy forsi,
 te meññeef ma fatu,

may raasaatu, te du cabbu reseñ ju nit
 lekk,

* 6:5 6.5 Sitim la Israyil tàmbalee woon seenub dox, jeexale Gilgal, ca wàllaa dexu Yurdan ga feesoona gannaaw ba ñu ko jàlle. Seetal ci *Yosuwe* 3.1-5.12. † 6:16 6.16Omri ak doomam Axab ay buuri Samari lañu woon, ñu ràññeeku ci jalgati yoon, ak lawal ag bokkaale.

du figg ju bees ji ma namm.

² Ngor a jeex ci réew mi,
njub tumurànke ci nit ñi.

Ñépp, ku ñu tuur deretam lañuy tëru,
ku nekk, mbokkam lay fiir.

³ Lu bon la seeni loxo mane:
kàngam di laaj, ab xaali di sàkkub ger,
boroom daraja moom, di wax fuqley
bakkanam,

ñu ànd ràbbum pexe.

⁴ Ki gén ci ñoom, neexook ag dég,
ki ci jub yées ag taxas.

Bés ba say jongrukat yégle woon,
sa bésu mbugal taxaw na,
léegi lees di waaru.

⁵ Buleen gém ab xarit,
buleen wóolu ab xejj,
fi kanam ndaw siy tédd sa gannaaw sax,
sàmmal sa bunti gémmiñ.

⁶ Doom ju góor a ngi dofloo baay ba,
ju jigéen ja jógal ndey ja,
jabar jógal ndeyu jëkkër ja,
nooni nit ki di waa kërám.

⁷ Man nag Aji Sax ji laay séentu,
Yàlla ji may musal laay xaar,
te sama Yàllaa may nangul.

Yërmande wuutu na mbugal ñeel Siyon

⁸ Yaw samab noon, bu ma ree;
maa daanu, maay jóg.
Ci biir lëndëm laa toog,
waaye Aji Sax jeey samag leer.

⁹ Maa moy Aji Sax ji,
kon naa tegoo meram,
ba mu layool ma, dëggal ma,
génne ma ci leer gi,
ma gis ag njekkam.

¹⁰ Ndaw siy samab noon moo koy seede,
sèlmoo gâcee,
moom ma doon naa: «Ana sa Yàlla Aji Sax
ji?»

Samay gët a naa ndaw soosu jàkk,
ñu di ko dëggaate ni banu mbedd.

¹¹ Bés a ngii bees di tabaxaat say tata,
su bés baa lees di yokk sa kemu suuf.

¹² Su bés baa ci yaw lees di dikk,
bawoo Asiri ak dëkki Misra,
bawoo diggante Misra ba ca dex ga,
ak géej ba géej, tund ba tund.

¹³ Àddina ab gent lay doon
ndax ñi ko dëkke,
muy añub seeni jëf.

¹⁴ Ngalla nanga sàmme saw yet sa ñoñ,
sa gàtt yi nga séddoo,
te ñu màkkaanoo gott bi ñoomu neen,
fi digg parlu mu naat.
May leen ñu fore àlli Basan ak Galàdd
na jant ya woon.

¹⁵ Aji Sax ji nee: «Maa leen di won ay
kiraama,
na woon ba ngeen di génn réewum
Misra.»

¹⁶ Xeet yee ciy gis, rus,
te seen gépp njàmbaar du tee ñu ub seen
gémmiñ,
seeni nopp buur.

¹⁷ Ñooy mēq suuf ni jaan,
ak ndëgmeenti suuf,
di lox, génne seeni tata,
te su boobaa yaw sunu Yàlla Aji Sax ji
lañuy tiit,
ragal la.

¹⁸ Ana Yàlla ju mel ni yaw,
di bale ag tooñ, di jéllale ag moy,
ñeel ndesu ab séddoom.

Kii du denc mer ba faww,
te moo bëgg di yéwéne.

¹⁹ Moo nuy yërëmati;
sunuy ñaawtéef lay joggiy tãnkam,
te biir xóotey géej lay tàbbal sunuy
bàkkaar.

²⁰ Yaay sàmm kóllère ak Yanqóoba,
yéwéne Ibraayma,
na nga ko giñale woon sunuy maam, janti
dëmb.

Téereb Yonent Yàlla Nawum

¹ Yéeneb waxyu bu dal dëkk bi ñuy wax Niniw a ngi, di téereb peeñum Nawum ma dëkk Elkos.

Aji Sax jeey jambaar ju raglu te baax

² Aji Sax ji mooy Yàlla ju fiir, te mooy mbugale,

Aji Sax ji mooy mbugale, te di boroom sanj. Aji Sax ji mooy mbugal ay bañam, mooy sanju ci kawi noonam.

³ Aji Sax ji la mer ma diib, doole ja bare; te du ñakka topp ku tooñ, ag tooñaangeem.

Aji Sax jeey daagoo biir callweer ak ngélén,

niir yi di pëndub tãnkam.

⁴ Mooy gédd géej, wowal; mboolem dex, mu njiisal; parluu Basan ak Karmel, mu laxal; tóor-tóori àllub Liban, mu laxal.

⁵ Tund yu mag yi di ko lolal, tund yu ndaw yi seey, suuf fuuddu fi kanamam, mook àddina ak mboolem li ci biiram.

⁶ Bu sãnjoo, ana kuy taxaw?

Ana kuy dékku tangooru meram? Am sãnjam a naan soteet ni sawara, doj yi rajaxoo fi kanamam.

⁷ Aji Sax jee baax, moo dib rawtu, bésuub njàqare, te moo ràññee ñi ko làqoo.

⁸ Mbàmbulaan lay walal ba faagaagal dëkk bii, te mooy toppi noonam ba ca biir lëndëm ga.

Njàqare ji du ñaar

Ñeel Yuda

⁹ Ana lu ngeen di fexeel Aji Sax ji?

Mooy neenal, lépp neen; njàqare ja du ñaar.

¹⁰ Niy taxas la ay noonam di laxasoo, mel ni ñu naan ba mândi, te ni boob mu wow lañuy lakke ba xoy-omu.

Ñeel Niniw

¹¹ Ci yaw dëkk bii la nit génne, di fexeel Aji Sax ji lu bon, di mébét pexey ndéngte.

Ñeel Yuda

¹² Aji Sax ji moo ne:

«Bu ñu matoon, ne gãññ it ni lees leen di dagge, ñu ne mes. Maa la mitital, dootuma la mitital.

¹³ Léegi buum gi ñu la yeewe laay dog, say jéng laay dagg.»

Ñeel buuru Niniw

¹⁴ Aji Sax ji moo santaane lii ci yaw. Mu ne: «Lu bokk ci saw tur du lawati, kërug say yàlla laay dagge xërëm ak jëmmei weñ gu ñu xelli, te maay waajal sa bàmmeel, nde tekkiwuloo tus.»

2

Ñeel Yuda

¹ Ndaw a ngii dawé kaw tund ya, di indi kàddu, xibaaru jàmm.

Yaw Yuda, bégeel sa bési màggal, te wàccook say xas.

Nit ku bon ki dootu jaare fi yaw; léppam lees di dagg, sànni.

Ñeel Niniw

² Ki lay falaxe buur na, wutsi la! Sàmmaal sab tata, wattu saw yoon, takkal sa ndigg, te dëgërli bu baax.

Ñeel Yuda

³ Aji Sax ji moo yeesal darajay Yanqóoba, darajay Israyil moomu. Ay taskat a ko tason, yaqte ay caram.

Dëkkub noon daanu na

⁴ Pakki jambaaram ña lañu suub xonq, ñeyi xare ya sol lu xonq curr, watiiri xare yay melax ni luy tàkk, ca bés ba ñu waajal xare, xeej ya jóg.

⁵ Ca mbedd ya la watiiri xare yay riire, riddi jaare pénc ya, mel niy jum, di ray-rayi niy melax.

⁶ Ca la njiit la di woolu kàngami xareem, ñuy gaawtu bay tērēf*. b Tata ja lañuy gaaw wutali, ba yékkati ay kiiraay.

⁷ Bunt ya jëm dex ga ñooy jekki ubbiku, kër buur màbb.

⁸ Futtees na jongama,† yóbbu, janqam jay binni niy xati, di fégg seen dënn.

⁹ Niniw la ay nitam di daw, mu mel ni mbànd

mu ndox may senn, ñu naan leen: «Taxawleen, taxawleen,» te kenn geestuwul.

¹⁰ Sëxëtooleen xaalis, sëxëtoo wurus, alal du fi jeex te mboolem gänjar a jale.

¹¹ Dëkk bi lees di raatale, maasale,

mu ne faraa, fit rëcc, óom yiy fenqe,

* 2:6 2.6 Seetal ci 3.3. † 2:8 2.8 jongama ji jombul jëmmu tuur la mu ñu ne mooy nangul am njur. Man naa doon it dëkk bi ci boppam.

ndigg yépp di kall-kalli,
kanam yépp di sël-sëli.

Doole réer na gaynde

¹² Moo ana paxum gaynde ga?
Ana àllub gaynde yu ndaw ya,
fa góoru gaynde daa daagoo,
mook jeegub gayndeem ak doom ya,
te dara tiitalu leen!

¹³ Gaynde di fa fàdd lu doy ay doomam,
reyal ay jeegi gayndeem,
feesal xunteem akum rëbbam,
feesal paxam akum pàddam.

¹⁴ «Maa ngii fi sa kaw», kàddug Aji Sax jee,
Boroom gàngoor yi.

«Say watiiri xare laay lakk, saxaral,
sa gaynde yu ndaw, saamar lekk leen,
te sam pàdd laay dagge ci réew mi,
ba deesul déggati baatu ndaw loo yebal.»

3

Ab safaan ñeel na Niniw

¹ Wóoy, ngalla dëkkub tuurkatu deret bi,
ñépp di fen, fees aku ay,
te foqati alalu jaambur du dakk!

² Kàccri dal,
ay mbege riir,
fas rëpptal,
watiir kar-kari.

³ Gawar buur,
saamar melax,
xeej lërxtat,
ñu bare ne lasiim,
ñi dee jale,
néew ya tēē jeex,
ñuy fakkastaloo néew ya.

*Aw léeb ñeel na Niniw, gànc biy
xërëmtu*

⁴ Lépp ndax ngànctu gu bare,
gi gànc bi nekke!
Jekk tànkee, boroom xërëm yi,
ci ngànctu nga jaaye ay xeet,
te xërëmtu nga naxe ay giir.

⁵ «Maa ngii fi sa kaw,»
kàddug Aji Sax jee, Boroom gàngoor yi.

«Sa pendal laay ñori,
ba muur sa xar-kanam,
won xeeti jaambur yi sa yaramu neen,
gisloo waa réew yi sa gâcee.

⁶ Maa lay xépp mbalit, sewal la,
def lam ceetaan,

⁷ ku la gis, daw la
te naan: “Niniw tas na!
Moo ku koy jooy?”
Ana fu ma koy wutale ñu ko dëfal?»

⁸ Moo Niniw, dangaa gën Teeb, péeyub
Misraa?

Dëkk ba dëju fa digg wali Niil ya,
am ndox wër ko,
am tataam di géej,
miiram di ndox mu wale géej,
⁹ réewum Kuus di ndëgërlaayam,
Misra di ko dooleele doole ju dul jeex,
réewum Puut ak Libi di ko jàpple.

¹⁰ Teewul ngàllo la dem, cig njaam;
ay goneem, ñu falaxe leen
ci mboolem selebe yoon;
ay kàngamam, ñu tegoo bant;
kilifaam yépp, ñu jéng leen.

¹¹ Niniw yaw it dinga bilimbaane,
jànnaxe, di wuta raw ab noon.

Doole réer na Niniw

¹² Sa tata yépp ni garabi figg
yu ñoral ndoortel meññeef lay mel,
soo yëlbee, doom ya rot,
gémmiñu lekk-kat aw.

¹³ Say gàngoor a ngii diy jigéen fi sa biir,
sa bunti réew lafal say noon,
ne ñàpp-ñàppaaral,
sawara xoyom tējukaay ya!

¹⁴ Niniwee, ndox moo fàggoo ab gaw,
ngay rooti te dàbbli say tata.

Duggal ci bàq bi, note ban bi,
te ne cas móolukaay bi!

¹⁵ Fa la la sawara di xoyome,
saamar xottee la fa,
raafal la ni soccet di def.

Niniw day raaf

Fulal saw nit niy soccet,
ñu tollu niy njéeréer.

¹⁶ Ay jula nga barele,
ba ñu èpp biddiwi asamaan,
te ñoo mel niy soccet, tojtal, naaw.

¹⁷ Say kàngam it niy soccet,
say jawriñ ni naaxu gunóor
yu dale kaw tata, bésuub sedd,
jant bi jóg, ñu daw,
te deesul xam fu ñu nekk.

Woykat jooy na Niniw

¹⁸ Buurub Asiree, say sàmm a saay,
say garmi nelaw,
sa gàngoor tasaaroo kaw tund wa,
te ku leen dajale wuute.

¹⁹ Sa damm-damm amul paj,
sab góom metti,
ba mboolem ñi dégg li la dal
di tàccu ci sa kaw,
nde ana ku sa mbon gi dul jeex lorul?

Téereb Yonent Yàlla Abakug

¹ Ab yéenee ngi bu ñu won Yonent Yàlla Abakug.

Abakug tàmbali naa jooy

² Éy Aji Sax ji, foo àppal lii,
may woote wall, dégluwoo ma?

Ma di la jooy aw ay, te walloowo!

³ Ana loo may wone lu bon,
tey seetaan noteel?

Yàquteeku ay fi sama kanam,
xuloo di wéy, ñaayoo jolli.

⁴ Moo tax yoon lafañ,
te àtteb dëgg du feen mukk.

Ku bon a tanc ku jub,
ba tax ab àtte jalgatiku.

Aji Sax ji tontu na

⁵ «Xool-leen ci biir xeet yi ba gis,» la Aji
Sax ji wax.

Jaaxleelen ba jàq, nde jëf a ngi jëfe ci seeni
jant,

bu ñu leen ko waxoon, dungeen ko gëm.

⁶ Maa ngii di dooleel waa Babilon,
xeet wu wex, ràkkaaju,

di wër déndi àddina,
di nangu màkkaani jaambur.

⁷ Ñu ñàng, raglu,
te di dogalal seen bopp àtteb yoon
ak sañ-sañ.

⁸ Seenii fas a gëna gaawi segg,
gëna aay tilli timis.

Fu sore la seeni gawar jóge, tèbal,
naaw nig jaxaay

ju ne jàyy, lekkum rëbbam.

⁹ Aw ay lañuy dikke, ñoom ñépp,
buurandoo, jubal màkk seen kanam,
te ñi ñuy jàpp njaam bare ni feppi suuf.

¹⁰ Ñooñu ay buur lañuy ñaawal,
boroomi daraja di seen reetaanukaay;

ñii lépp luy tata lañuy kekku,
jalal ko suuf, nangu ko.

¹¹ Jàll, wéy lañu cay teg ni ngelaw,
tegoog tooñ, te seen doole di seen yàlla.»

Abakug jooyati na

¹² Waaye Aji Sax ji, xanaa du yaa masa
nekk?

Sama Yàlla sama Aji Sell ji, doo saay.

Aji Sax ji, ab àtte nga tabbe ñii,
yaw sama cëslaay, mbugal nga fi dëje ñii.

¹³ Sa gët yu sell jomb naa niir lu bon,
te manoo seetaan noteel!

Ana looy seetaan ay workat?
Looy noppi te ku bon di mëdd
moroomam mu ko gëna jub?

¹⁴ Yaa def doom aadama mel niw jën,

mbaa ndiiraanu ndundoot lu amul njiit,
¹⁵ te ñoom ñépp la ku bon di korandoo,
diri leen ciy mbaalam,
dajale ciy caaxam,
ba tax ko di bég aka bânneexu.

¹⁶ Moo tax muy rendil mbaalam ab sarax,
di taalal ab caaxam saraxu cuuraay,
te naan moo niinal njêlam,
duunal ab dundam.

¹⁷ Mbaa du nii lay yuree mbaalam,
di wéye fàllas ay xeet te yërëmul?

2

¹ Fa may jongroo laay taxaw,
ne temm fa kaw tata ja,
ba xam ana lu mu ma Aji Sax ji di àddu,
ak lu may waxaat ci samab tawat.

Aji Sax ji àddooti na

² Aji Sax jee àddu, ne:

«Bindal peeñu mi,
leeral ko ci àlluwa yi,
ba njàng mi yomb.

³ Peeñu mi seede la, ñeel jant
ba ñu ko àppal,
seede su wóor ci na mbir may mujje,
te du fen.

Su diibee it, xaar ko,
day dikk moos te du yàggati.

⁴ «Xol baa ngay xoggliku, te ag njub nekku
ca,

waaye ku jub ndax kólléreem mooy dund.

⁵ Biñ day wore,

jàmbaar ju bew jii* nag du dal-lu,
xanaa yàkkli puruxam ni njaniw,
du doylu, mbete ndee,
moom miy buubandoo xeetoo xeet,
dajale askanoo askan, aakimoo.

⁶ «Xanaa du ñi mu teg loxo ñépp a koy
léebuji,

fental ko woy wu ñu ko kókkalee, naan:
«Wóoy ngalla kii di dajale lu mu moomul,
lii ba kañ?»

Kii di séfoo nii ay bor!»

⁷ Moo ñi la lebal duñu jekki jóg a?

Ñooñu la tiital ñooy jekki yewwu,
te yaay doon seenum cëxëtoo.

⁸ Yaa sèxëtoo woon ay xeet yu bare,
mboolem ndesu askan yee lay sèxëtooji,
ndax deretu nit ji nga tuur, soxore ay réew,
aki dëkk, ak mboolem ña ca biir.

⁹ «Wóoy ngalla kuy dajaleel kèram

alalu yàqute ju lewul
tey aj am tàggam fu kawe,
ngir fegu ci yàqule.

¹⁰ Gàcce nga nasal sa kër,
ba nga sánkee ay xeeti xeet,
te yaa tooñ sa bopp.

¹¹ Doju tata dina riir déy,

* 2:5 2.5 Jàmbaar ju bew jii mooy waa Babilon.

aw dénk áddoo ca jank ba, feelu ko.

12 «Wóoy ngalla ku tabaxe ab dëkk,
deret ju mu tuur,
ku sanceb dëkk, ag njubadi.

13 Xanaa du ci Aji Sax ji

Boroom gàngoor yi la lii bawoo:
Sawara la askan yiy ñaḡal,
ag neen la waasoo yiy doñ-doñil?

14 Waaye ni ndox muure xóotey géej ba mu
daj,
ni la darajay Aji Sax jiy ràññikoo ci áddina
sépp.

15 «Wóoy ngalla yaw mi nàndal sab
dëkkaale,
sotti sa ndabal sànj, màndale ko,
ngir niir ko, mu ne duññ!

16 Gacce ngay géna regg teraanga,
naanal yaw it te wone sa mbuñuka!
Ci yaw la kaas bi ci ndijooral Aji Sax ji
di walbatiku,

sa toroxte wuutu sa teraanga.

17 Ay wi nga teg Libañ mooy képpu
ci sa kaw,

te sànkuteg rabi àll yi sa tiitaange lay jur.
Yaa tuur deretu nit, indi aw ay ci réew mi,
ak dëkk beek mboolem ñi ci biiram.

18 «Ana luy njariñal yett jëmmu xërëm
ju ki ko sàkk yett,
mbaa jëmmu xërëm ju ñu xelli,
di ci gëmloo nit ay fen?

Sàkk sa yéfi bopp, wóolu ko,
xërëm yoo móol te manula wax!

19 Wóoy, ngalla ku naan bant: “Xippil,”
naan doj wu ne selaw: “Yewwul!”
Ana lu yooyii di xamle?

Ma nga, ñu xoobe ko xaalis ak wurus,
te du gennug noo ci biiram.

20 Aji Sax ja moom, ma nga ca màkkaanum
sellngaam,
na áddina sépp selaw fi kanamam.»

3

Abakug ñaan na ci Yàlla

1 Ñaanu Yonent Yàlla Abakug a ngii,
galanu woy wi di galanu njàmbat.

2 Éy Aji Sax ji, maa dégg sab jëw,
Aji Sax ji maa yéemu ci sa jaloore!
Ngalla yeesalal say jaloore, nu fekke,
xamleel say jaloore, nu fekke,
bu la am sànj teree geesu, yërëm.

3 Yàllaa ngi jóge Teman,

Aji Sell ji foofa ca tundu Paran* lay bawoo.
Selaw

Darajaam moo dajal asamaan,

teddngaam fees kaw suuf.

4 Kee di leer gu ne ràññ,
ay ceeñeer fettaxe ci loxoom,
te fa la dooleem làḡe.

5 Mbas moo dox, jiiu ko,
jàngoro topp ciy tànkam.

6 Kee taxaw, yèngal suuf;
kee xoole, loxloo xeet yi,
tund yu mag ya woon naka jekk rajaxoo,
tundi cosaan yu ndaw ya maasaloo.
Kii moo moom yooni cosaan yi.

7 Njàḡare laa gis ca xaymay Kusan,
te ndimoy xaymay waa Majan† yèngu na.

8 Aji Sax ji, dex yi nga sànjul?
Am dex yi nga mere?

Am géej nga sàmbaaral,
ba war say fas,
dawal sa watiiri dawal-daan?

9 Yaa génne sa xala mbaram,
feesal sa mbuusum fitt.

Selaw.

Yaa xare suuf ay dex.

10 Tund yi gis la, jaayu;
waame wàcc, wéy;

xóote ya riir,
gannaxam ya jolli fa kaw.

11 Jant ak weer ne tekk fa seen màkkaan,
janook sa leeru fitt yi soqi,
ak melax gi tàkke ci sab xeej.

12 Am sànj nga daagoo fi kaw suuf,
mer nga dèggaatee xeet yi.

13 Yaa génn ngir wallusi sa ñoñ,
wallusi ki nga fal.

Yaa rajaxe puju néegu ku bon ki,
xar ko ñaar, geen ba ci put.

Selaw.

14 Ba noon ya riddeendoo, di nu tasaaresi,
seen xeeju bopp nga bëtte seen bopp,
fekke leen ñuy xaxaloo, ni ñuy waaja
sèxëtoo

ay néew-ji-doole, fu kenn yégul.

15 Yaa jaabal say fas biir géej,
yèngal mbàmbulaan ma.

16 Ba ma ca déggee, samay butit a yèngu,
coow la tax samay tuñ di lox,
sama yaram dee goyy,
may lox fi ma taxaw,

te ne cell, di séntu àsëb njàḡare,
bay dikkal xeet wi nu song.

17 Ndaxam garabu figg foccul,
doomu reseñ amul ca ndeyam,
njurum garabu oliw àntuwul,
tool yi meññil aw ñam,

gàtt it tukkee na ca gétt ga,
du genn jur gu gudd ci wurmbal,

18 te man may bannëexoo Aji Sax ji,

* 3:3 3.3 Teman ak Paran ay gox lañu yu féeteek fa Yàlla bawoo tundu Sinayi, jëmsi Israyil. † 3:7 3.7 Kusan ak Majan ay mbooloo yu dëkke ay xayma ci màndiñu Sinayi.

Yàlla ji may wallu laay bége.

¹⁹ Aji Sax ji Boroom bi mooy sama doole,
moo ma defal samay tàn̄k mel ni yoy
kéwél,

te fa kawte ya la may daaguloo.

Mu jëm ci njiital jàngkat yi, ànd ak samay
xalam.

Téereb Yonent Yàlla Cefaña

¹ Kàddug Aji Sax jii moo dikkaloon Cefaña doomu Kusi. Kusi, Gedalya mooy baayam; Gedalya, Amarya, Amarya, Edekiya. Mu yemook janti buuru Yuda, Yosya doomu Amon.

Am sànj taxaw na

² «Lépp laay buube ba mu set fi kaw suuf.» Aji Sax jee ko wax.

³ «Doom aadama ak mala, njanaaw ak jèn laay buub, ak luy fakktale, booleek ñu bon ñi. Maay dagge doom aadama fi kaw déndub suuf.»

Aji Sax jee ko wax.»

⁴ «Maay xàccil sama loxo, Yuda, ak mboolem waa Yerusalem. Maay dagge fi bii bérab ndesu tuuri Baal, ak turu sarxalantukatam yeek sarxalkatam yi,

⁵ ak ñiy sujjóotal ci kawi taax gàngoori biddiww yi, ak ñiy sujjóotal aka giñal Aji Sax ji tey giñe Milkom, yállantu ji,

⁶ ak ñi dèddu Aji Sax ji, wutuñu Aji Sax ji, sàkkuwuñu ko.»

⁷ Miigi! Fi kanam Boroom bi Aji Sax ji, bésusb Aji Sax ji kat dègmal na; Aji Sax jee waajal ab sarax, te moo ca sellal ay ganam.

⁸ «Keroog bésusb saraxu Aji Sax ji, maay dikke mbugal kàngam yeek doomi buur yi, ak boroom coli ndoxandéem yi.

⁹ Bésusb keroog maay dikke mbugal képp ku aw tuuram tax mu aadawoo di tēb dēxu bunt*, ak ñiy feesal seen kēr yállantu ak alal ju aw ay ak njoblanj maye.

¹⁰ Su bés baa,» Aji Sax jee ko wax, «yuux dina jibe fa buntu Jēn ya, wóoy jibe fa Sanc ya, rajaxoo ju réy jollee ca tund ya.

¹¹ Yeen waa goxu Ja ba, yuuxooleen, nde jula yépp ay sàнку, mboolem kuy natt donji xaalis lees fay dagge.

¹² Jantub keroog ay làmp laay niite Yerusalem, ba dikke mbugal ña fa ne degg,

taaje ni biiñ ci kaw ginjriitam, te naa ci seen xel: «Aji Sax ji baaxewul, lorewul.»

¹³ Seen alal lees di sèxētooji, seeni kēr gental, ñu tabax ay kēr yu ñu dul dēkke; jēmbat toókēri reseñ yu ñu dul biiñoo.»

¹⁴ Bésusb Aji Sax bu mag bee dēgmal, moo dēgmal te tànk yu gaaw lool lay jēgesee.

Kàddug bésusb Aji Sax ji dēgtu na, te ca la jàmbaar di yuuxoo yuux yu metti.

¹⁵ Bésusb keroog bésusb sànj lay doon, bésusb njàqare ak tumurànke, bésusb gental ak gentle, bésusb lëndēmu xàmbaari guddi gu ne kēruus,

¹⁶ bésusb bufta ak wootey xare ca kaw dēkk ya ñu dàbbli, ak kaw tata yu kawe ya.

¹⁷ «Ca laay jàqale doom aadama yi, ñuy tēñēx-tēñēxi ni silmaxa, nde Aji Sax ji lañu moy, te seen deret lees di sotti fi pēndub suuf, seen yérey biir ni neefare fi suuf.

¹⁸ Du seen xaalis, du seen wurus wu leen di mana xettli. Keroog bésusb sànjum Aji Sax ji, ak sawaras fiiraangeem, àddina sépp ay xoyomu. Mooy raafal moos mboolem ñi dēkke àddina si, te raafal gu raglu lay doon!»

2

Wooteb tuub jibal na Yuda

¹ Yeen xeet wi dul rus, dajeleena daje,

² balaa dogal bee taxaw, bésusb mbugal ne jaas ba wéy ni boob, bala leen tàngooru merum Aji Sax jee dikkal,

bala leen bésusb merum Aji Sax jee tax-awal.

³ Sàkkuleen Aji Sax ji, mboolem yeen néew-dooley réew mi, yeen ñiy jēfe àttey yoonam, sàkkuleen njekk te sàkkoo toroxlu, jombul ngeen yiiru, kera bésu merum Aji Sax ji.

Waxyub mbugal ñeel na xeet yu bare

⁴ Gasa dēkk ba lees di wacc, Askalon gental, Asdodd, digg bëccēg lees leen di buub, gēnne,

* **1:9** 1.9 tēb dēxu bunt bi, li ñu ci jublu mooy moytu loraange ju ñu gēm ne tuur mi man na leen koo yóbbe, bu ñu joggée dēxu bunt bi. Seetal ci *1.Samiyel* 5.5. * **2:4** 2.4 Dēkk yii ay dēkki Filisti lañu woon, fa féete ak tefesu géej te dale bëj-gànnaar ba bëj-saalum. † **2:5** 2.5 Nooy waa Filisti, seen cosaan moo doon dun bi ñuy wax Keret.

te Ekkron* lees di déjjati.

⁵ Wóoy ngalla yeen waa tefesu géej,

yeen xeetu Kereteen† ñi,
kàddug Aji Sax ji dal na leen.

Yeen waa Kanaan, réewum Filisteen ñi,
maa leen di sànk ba dungeen dese
kenn‡,

⁶ tefesu géej doon àllub parlu,
ak dëkkuwaayu sàmm seek gétt gi.

⁷ Tefes ga, ndesu kër Yuda koy moom§,
ñu di ca fore,

bu ngoonee ñu tëri néegi Askalon.
Seen Yàlla Aji Sax jee leen di dikkal,
tiji seen wërsëg (/yiwileen cig njaam.)

⁸ «Maa dégg nàññi Mowab,
kàddu yu ñaaw yi Amoneen ñiy nàññe
sama ñoñ,

tey damu, nara nangu seen suuf.

⁹ Moo tax, giñ naa ko ci man miy dund,»
kàddug Aji Sax ju gàngoor yee, Yàllay
Israyil,

«Mowab déy ni dëkkub Sodom lay mujje,
Amoneen ñi mel ni Gomor,
ay dég ak paxi xorom a koy nangu,
mu gentel ba fàww.

Sama ndesu ñoñ a leen di sèxëtoo,
ndesu xeet wi ma séddoo moo leen di
moom.»

¹⁰ Loolu lañuy yooloo seen reewande,
nde ñoo doon nàññe aka damu
ci kaw ñoñi Aji Sax ji Boroom gàngoor
yi.

¹¹ Nu raglu la Aji Sax jiy dale ci seen kaw,
te mooy ràggal yàllay àddina yépp,
ba xeet yi di ko sujjóotale dunoo dun,
wu ci nekk ak fa nga fare.

¹² Yeen waa Kuus, itam
yeen lees di fàdde sama saamar.

¹³ Keey xàccil loxoom bëj-gànaar,
keey sànk réewum Asiri,
keey def Niniw ab gent bu wow ni màndiŋ.

¹⁴ Ca digg dëkk ba la jur gay goore,
ak xeetu rab wu nekk;
looy aki saaw fanaane kaw jëni bunt ya,
ay sab jibe ca palanteer ya,
tojit ya dala jale ca bunt ya,
xànqi seedar ya ne durŋ.

¹⁵ Ana dëkk bu xumb ba dëkke woon
kaaraange,
te naan cim xelam: «Man rekk a, du
keneen?»

Nan la doone nii ab gent,
bérab bu rab yiy goore,
mboolem ku fa jaare, ub gémmiñam, jalu.

3

Yerusalem déggadi na

¹ Wóoy ngalla fippukat bu sobewu bi,
dëkkub notkat yi.

² Dégluwul baat, nanguwul kàddu guy
yare,

du Aji Sax ji la wóolu,
du Yàllaam jooju la jege.

³ Kàngam yi ci biiram di gaynde yuy ñar,
ay njiitam di tilli timis yu dul pannal,

⁴ ay yonentam reew, diy workat;
ay sarxalkatam teddadil sellnga, xëtt yoon.

⁵ Ndaxam Aji Sax jiy boroom njekk a ngi ci
biiram,

te du def njubadi,
jantoo jant mu fenkal ab àtteem,
te du wuute fu bët sete.

Ab wurujkat kay moo xamul gacce.

⁶ «Maa fàkkas ay xeet,
seeni tata tasaaroo,
ma wéetal seeni mbedd,
ba kenn jaareetu fa,
seeni dëkk a tas ba kenn desul,
kenn dëkkatu fa.

⁷ «Maa noon Yerusalem: “Xanaa moos
dinga ma ragal,
déggal ab yar.”

Su ko defee dëkkuwaayam du tas,
ndax mboolem mbugal yi ma ko dikke,
waaye moo yàkkamtee ñaaw ci jépp
jéfam,

⁸ moo tax, xaar ma rekk,» kàddug Aji Sax
jee,

«ba keroog may jóg, nara sèxëtooji,
nde maa dogala dajale xeet yi,
dajale nguur yi,

ngir xépp leen samam sànj,
mboolem sama tàngooru mer.
Sama sawaras fiiraange déy,
ci la mboolem àddina di xoyomu.

Yàlla mooy tuubloo xeet yi

⁹ «Su boobaa ma soppi làmmiñu xeet yi,
setal ko,

ngir ñuy tudd ñoom ñépp turu Aji Sax ji,
di ko jaamoondoo benn bopp.

¹⁰ Sama jaam ñi, sama ñoñ ñi tasaaroo,
ca wàllaa dexu Kuus lañuy bawoo,
ba indi samab sarax.

Yàlla soppi na xolu ndesu Israyil

¹¹ «Su bés baa gacce dootul am ci sa
mboolem jéf,

ji nga ma moye,
nde maay jële fi sa biir ñiy bége sab sag,
te doo damooti ci sama kaw tund wu sell.

† 2:5 2.5 Mbugal mii moo sottal alkànde gi toppoon waa Kanaan. Seetal *Njàlbéen ga* 9.25. § 2:7 2. 4-7 Réewum Kanaan mi la Yàlla digoon Ibraayma ne moom lay jox aw askanam. Seetal ci *Njàlbéen ga* 12.6-7.

12 Waaye maay wacc fi sa biir
 askan wu woyof te néew doole,
 ñu yiiroo turu Aji Sax ji.
 13 Ndesu Israyil dootuñu ayibal, dootuñu
 fen,
 deesatu leen déggal kàdduy wor,
 ñoom donḡ it ñooy for, di goor,
 te kenn du leen tiital.»

Yerusalem dina leqliku

14 Yaw janq Siyoḡ mu taaru, sarxolleel,
 Éey Israyil, xaacul,
 yaw janq Yerusalem mu taaru, bégal,
 te bânneexoo xol bu sedd guyy!
 15 Aji Sax ji moo teggi say mbugal,
 waññi sab noon.
 Buurub Israyil, Aji Sax jaa ngi fi sa biir,
 dootuloo tiit lu bon.
 16 Bésub keroog lees di wax Yerusalem, ne
 ko:
 «Yaw Siyoḡ, bul tiit, bul yoqi.
 17 Aji Sax ji sa Yallaa ngi fi sa biir,
 di jambaar juy walloo.
 Moo lay bége ci biir bânneex,
 leḡlee la cofeelam,
 bége la bay sarxolle.

18 «Ñi amu naqar te sore ndajey bernde,
 ñooñu la sore, te tegoo woon gâcce,
 maa leen di dajale, teggil leen gâcce tey.
 19 Ma ne jant yooyu laay jêflanteek
 mboolem ñi leen di sonal.
 Ci laay wallu kuy sukkóot,
 fat ku tumurânke,
 may leen teraanga aku tur,
 fépp fu ñu ruse woon ci àddina.
 20 Yeen, jant yooyu laa leen di indi,
 jant yooyu laa leen di dajale,
 nde maa leen di defal aw tur ak teraanga
 fi biir mboolem askani àddina,
 maay tijji seen wërsëg, ngeen gis.»
 Aji Sax jee ko wax.

Téereb Yonent Yàlla Ase

Tabaxaat jaamookaay bi jot na

¹-Ca ñaareelu atu nguuru Buur Daryus*, ca juróom benneelu weer wa, yemook benn fan ca weer wa, kàddug Aji Sax ji moo diikk ci jottlib Yonent Yàlla Ase, ñeel doomu Selcel, Sorobabel boroom Yuda, ñeel itam doomu Yoccadag, Yosuwe sarxalkat bu mag ba. Mu ne: ² Aji Sax ji Boroom gàngoor yi dafa wax ne: «Askan wii dañu ne àpp bi jotagul; àppub kër Aji Sax ji moo jotagul, ba ñu war koo tabaxaat.» ³ Kàddug Aji Sax ji nag diikk ci jottlib Yonent Yàlla Ase. Mu ne:

⁴ «Àpp bi daal yeen la jotal,

ba ngeen dèkke biir kër yu ay xàñq lale, te kër gii dib gent?

⁵ Kon nag léegi Aji Sax ji Boroom gàngoor yi dafa wax ne:

Teewlooleen xel seeni jaar-jaar.

⁶ Yeenay ji lu bare, góob tuuti;

lekk, suuruleen;

naan, màndiwuleen;

solu, nugluwuleen;

boroom peyoor feyeeku,

yeb ci mbuus mu bënn.»

⁷ Aji Sax ji Boroom gàngoor yi dafa wax ne:

«Teewlooleen xel seeni jaar-jaar.

⁸ Yéegleen tund wi, wuti bant, tabax sama kër gi;

ma bannèexoo, darajawoo ko,»

la Aji Sax ji wax.

⁹ «Lu bare ngeen séentu, ndeke as tuut la, ngeen fat ko ci kër gi,

ma wal, mu naaw.

Li ko waral lu mu?» Kàddug Aji Sax ji boroom gàngoor yee.

«Li ko waral mooy sama kër gi gental, te ku ne ci yeen di dawal sa kër bopp.

¹⁰ Kon nag yeena tax asamaan téye ab layam,

suuf téye meññeefam,

¹¹ ma wool bekkoor suuf seek kaw tund yi,

ak pepp ak ndoxum reseñ,

ak diw ak lu suuf meññal,

ak doom aadama aku jur,

ak mboolem liggéeyu loxo.»

Askan wi tontu na

¹² Ba loolu amee doomu Selcel, Sorobabel, ak doomu Yoccadag, Yosuwe sarxalkat bu mag ba, ak mboolem ña des ca askan wa, ñoom ñépp déggal seen wooteb Yàlla Aji Sax ji, ak kàddug Yonent Yàlla

Ase, noonee ko ko seen Yàlla Aji Sax ji yóbbantee. Askan wa nag ragal Aji Sax ji. ¹³ La ca tegu Ase, ndawal Aji Sax ji, jottli askan wa yóbbanteb Aji Sax ji. Mu ne leen: «Maa ànd ak yeen, kàddug Aji Sax jee.»

¹⁴ Ba mu ko defee Aji Sax ji yékkati sidditi doomu Selcel, Sorobabel boroom Yuda, ak sidditi doomu Yoccadag, Yosuwe sarxalkat bu mag ba, ak sidditi ña des ca mbooloo ma ñépp, ba ñu sottali liggéeyi kër Yàlla Aji Sax ji Boroom gàngoor yi, seen Yàlla. ¹⁵ Loola yemook ñaar fukki fan ak ñeent ca juróom benneelu weer wa.

2

Darajay jaamookaay bi dina yokku

¹ Ca ñaareelu atu nguuru Buur Daryus, Ca juróom ñaareelu weer wa, yemook ñaar fukki fan ak benn*, kàddug Aji Sax ji moo diikk ci jottlib Yonent Yàlla Ase. Mu ne: ² «Waxal nag doomu Selcel, Sorobabel boroom Yuda, ak doomu Yoccadag, Yosuwe sarxalkat bu mag bi, ak ñi des ci askan wi, nga ne leen:

³ Ana ci yeen ñi fi des, ku gisoon kër gii ca darajaam ja woon?

Ak nu ngeen ko gise tey?

Xanaa du ag neen la leen di niru?

⁴ Léegi nag, Sorobabel, góor-góorlul, Aji Sax jee ko wax.

Yaw doomu Yoccadag, Yosuwe sarxalkat bu mag bi,

góor-góorlul;

yeen mboolem askanu réew mi, góor-góorluleen,

kàddug Aji Sax jee. Mu ne: Liggéeyleen,

maa ànd ak yeen déy,

Aji Sax ji Boroom gàngoor yee ko wax.

⁵ Googu kàddu laa jaayante woon ak yeen, ba ngeen di génne Misra.

Samag Noo laa taxawe fi seen biir,

buleen tiit.

⁶ Aji Sax ji Boroom gàngoor yi kat dafa wax ne:

Fileek lu néew, maa ngii di yéngalaat asamaan ak suuf, ak géej ak jéeri.

⁷ Maay yéngal xeetoo xeet,

alali xeetoo xeet duggsi,

ma feesal kër gii ak teraanga,

Aji Sax ji Boroom gàngoor yee ko wax;

⁸ Maa moom xaalis, moom wurus;

kàddug Aji Sax jee, Boroom gàngoor yi.

⁹ Daraja ji kër gii di mujje mooy sut ja woon,

Aji Sax ji Boroom gàngoor yee ko wax.

Mu ne: Ci bii bérab laay mayee jamm,

kàddug Aji Sax jee, Boroom gàngoor yi.»

* 1:1 1.1 Daryus buuru Pers bu mag la woon.

* 2:1 2.1 Bés boobu moo mujjoon ci mággalu bési Mbaar yi.

Jēfi sobe àndul ak barke

¹⁰ Ca ñaar fukki fan ak ñeentu juróom ñeenteelu weer wa†, yemook ñaareelu atu nguuru Buur Daryus, kàddug Aji Sax ji moo dikkal Yonent Yàlla Ase, ne ko: ¹¹ Aji Sax ji Boroom gàngoor yi dafa wax ne: «Sàkkul nag ndigal ci sarxalkat yi, nga ne leen, ¹² waaw, su nit yoree ci lafu mbubbam, aw yapp wu ñu sellal, ba noppi lafu mbubbam laal mburu mbaa lu ñu togg, mbaa biiñ mbaa ag diw mbaa ñam wu mu doon, ndax loola day daldi sell?» Ase laaj ko sarxalkat ya, ñu ne ko: «Déédéet.» ¹³ Ase dellu ne leen: «Nit ku sobewu ndax ab néew bu mu laal, su laalee lenn ci mboolem ñam yooyu, ndax ñam wa sobewu na?» Sarxalkat ya ne ko: «Sobewu na kay.» ¹⁴ Ase nag wax leen, ne leen:

«Noonu la ci askan wii,
noonu la ci xeet wii sama kanam.
Kàddug Aji Sax jee.
Noonu la ci mboolem seen liggéeyu loxo,
ak sarax su ñu fi indi, loolu lépp a sobewu.

Déggal Aji Sax ji, baaxle

¹⁵ «Léegi nag seetaatleen seen xel bu baax, dale ko bésusb tey jii.

Bi aw doj tegoogul woon ci aw doj,
ci tabaxub kër Aji Sax ji,

¹⁶ ku wuti waan ñaar fukki natti pepp,
fukk lay fekk sàq ya;
mu wuti ca nalukaay ba juróom fukki natti
biiñ,

fekk fa ñaar fukk.

¹⁷ Maa leen dumaa gancax gu benaat,
ak gu xuur, ak tawub doji yuur
ci mboolem seen liggéeyu loxo,
te taxul ngeen délsi fi man,
kàddug Aji Sax jee.

¹⁸ Seetaatleen seen xel bu baax,
dale ko bésusb tey jii,
dale ko ci ñaar fukki fan ak ñeentu
juróom ñeenteelu weer wi,
daleleen ci bés bii kenug néegu Aji Sax ji
tegee,
ngeen seetaat seen xel.

¹⁹ Ana am jiwooti ci sàq yi?
Mbaa lennati ci reseñ ak figg?
Mbaa garabi gèrénaat ak oliw? Du lenn lu
meññ.

Waaye li ko dale bésusb tey jii, maay
barkeel.

Ab dige ñeel na Sorobabel

²⁰ Kàddug Aji Sax ji nag dikkal Ase ñaareel
bi yoon,
yemook ñaar fukki fan ak ñeent ci weer
wi. Mu ne:

²¹ «Waxal Sorobabel†, boroom Yuda, ne ko:
Maa ngii di yèngalsi asamaan ak suuf.

²² Maay jàllarbi ngànguney nguuri yi,
nasaxal dooley nguuri yéefar yi,
jàllarbi watiir ak ay dawalkatam,
fas yeek seeni gawar nërmeelu,
ku nekk fàddoo saamaru mbokkam.

²³ Bésusb keroog, kàddug Aji Sax jee,

Boroom gàngoor yi,
maa lay jël, yaw samab jaam,
Sorobabel doomu Selcel,
kàddug Aji Sax jee,
te jaarob torlukaay laa lay def,
nde yaw laa taamu.
Kàddug Aji Sax jee, Boroom gàngoor yi.»

† 2:10 2.10 Mu yemook ñetti weer gannaaw ndoortel tabaxu kër Yàlla ga. ‡ 2:21 2.21 Sorobabelmi soqikoo ci Daawuda moo taxawe buur bi feddli kàddug Aji Sax ja mu noon mooy taxawal nguuri gu sax dàkk, ñeel askanu Daawuda. Seetal ci 2.Samiyel 7.11- 16, ak Macé 1.12-13.

Téereb Yonent Yàlla Sàkkaryaa

Waññiku ci Aji Sax ji weesul

¹ Ci juróom ñetteelu weeru ñaareelu atu nguurug Daryus buuru Pers, kàddug Aji Sax ji moo dikkal Yonent Yàlla Sàkkaryaa, doomu Berekiya doomu Ido. Mu ne ko: ² «Aji Sax ji mere na seeni maam mer mu réy. ³ Kon nag waxal askan wi, ne leen Aji Sax ji Boroom gàngoor yi dafa wax ne: “Dellusileen ci man,” kàddug Aji Sax jee, Boroom gàngoor yi, “kon dinaa dellusi ci yeen.” Aji Sax ji Boroom gàngoori xare yee ko wax. ⁴ Buleen mel ni seen maam, ya yonent yu jèkk ya biraloon ne leen: “Aji Sax ji Boroom gàngoor yi dafa wax ne: Dèdduleen seeni jikko yu bon ak seeni jéf ju bon.” Te dégluwuñu, faalewuñu ma.» Kàddug Aji Sax jee. ⁵ «Seeni maam, ana ñu tey? Yonent yi nag, ndax ba fàww lañuy dund? ⁶ Teewul sama kàdduy artu ak sama dogali yoon ya ma yóbbante woon sama jaam ña, yonent ya, du lépp a dab seeni maam? Ñu dèpp nag daldi ne: “Noonee Aji Sax ji Boroom gàngoor yi nammoona def ak nun, feye nu ko sunuy jikko ak sunuy jéf, noonu la def ak nun.” »

Misaal mu jèkk: Ay fas aki gawar

⁷ Ca ñaar fukki fan ak ñeent, ca fuk-keelu weer waak benn, di weeru Sebat, ca ñaareelu atu nguurug Daryus, kàddug Aji Sax ji moo dikkal Yonent Yàlla Sàkkaryaa doomu Berekiya doomu Ido. Sàkkaryaa ne: ⁸ Maa jekki gis, ag guddi, nit ku war fas wu xonq. Moom nag mu ngi taxaw ci biir garabi mirt ci aw xur, li ko féete gannaaw di fas yu xonq, ak yu ngëlembu, ak yu weex, ak seeni gawar. ⁹ Ma ne: «Ñii lu ñu wund, Sang bi?» Malaaka miy wax ak man ne ma: «Maa lay won lu ñii wund.» ¹⁰ Waa ja taxaw ca biir garabi mirt ya àddu, daldi ne: «Ñii ñooy ñi Aji Sax ji yebal, ngir ñu wër àddina.» ¹¹ Ci kaw loolu gawar ya àddu, wax ak malaakam Aji Sax ji taxaw ci biir garabi mirt yi. Ñu ne: «Wër nanu biir àddina, ndeke àddina sépp a ngi ci jàmm, ne tekk.»

¹² Malaakam Aji Sax ji ne: «Éy Aji Sax ji Boroom gàngoor yi, loo deeti xaar, doo noppee xañ yërmande Yerusaleem ak yeneen dèkki Yuda? Juróom ñaar fukki at a ngii yoo leen mere*!»

¹³ Aji Sax ji nag àddu, wax ak malaaka ma doon wax ak man, kàdduy mas-sawu

yu neex. ¹⁴ Ca la ma malaaka ma doon wax ak man, ne ma: «Yéeneel, nga ne: Aji Sax ji Boroom gàngoor yi dafa wax ne: “Maa fiire Yerusaleem, maa fiire Siyon firaange ju réy. ¹⁵ Waaye mer mu réy laa mere xeet yii naagu. As léf laa meroon, waaye ñoom ñoo yokk aw ay†.» ¹⁶ Moo tax Aji Sax ji dafa wax ne: “Yërmande laay dellusee Yerusaleem. Sama kër lees fay tabaxaat.” Kàddug Aji Sax jee, Boroom gàngoor yi. Mu ne: “Buumu nattukaay dina tállalu ci kaw Yerusaleem.” ¹⁷ Nanga yéeneewaat, nga ne Aji Sax ji Boroom gàngoor yi dafa wax ne: “Samay dèkk ay walewaat ak alal, te Aji Sax ji mooy défalati Siyon, mooy taamooti Yerusaleem googu.”»

2

Ñaareelu misaal: Ay béjjén ak ay tégg

¹ Ba mu ko defee, ma séentu, gisuma lu moy ñeenti béjjén*. ² Ma ne malaaka ma doon wax ak man: «Béjjén yii nag?» Mu ne ma: «Béjjén yii ñoo tasaare Yuda ak Israyil ak Yerusaleem.» ³ Ci kaw loolu Aji Sax ji won ma ñeenti tégg. ⁴ Ma ne: «Lan la ñii di defsi?»

Mu wax ma, ne ma: «Béjjén yii tasaare Yuda ba kenn siggeetul, tégg yii ñoo dikk ngir tiital leen, ba jállarbi béjjéni xeet yi jóg song réewum Yuda, tasaare ko.»

Ñetteelu misaal: Nit kuy natt Yerusaleem

⁵ Ma séentu, gisuma lu moy jenn waay ju ñabb buumu nattukaay ci loxoom. ⁶ Ma ne ko: «Foo jëm?»

Mu ne ma: «Xanaa natti Yerusaleem, ba xam nu mu yaatoo, ak nu mu guddé.»

⁷ Fa la malaaka ma doon wax ak man jekki di dem, meneen malaaka dikk dajeek moom. ⁸ Mu ne ko: «Dawal, nga wax xale bu góor bii ne ko: “Yerusaleem lees di dèkke, te tata wéro ko; ñapp lay def, ndax barewaayu nit ñeek jur gi ci biiram. ⁹ Te man ci sama bopp,” kàddug Aji Sax jee, “maa koy nekkal tatay sawara ji ko ub ràpp. Te it maay doon daraja ji ci biiram.”

¹⁰ «Éey, éey yeen, dawleen génne réewum béj-gannaar,»

kàddug Aji Sax jee.

«Ni ñeenti ngelawi asamaan tasaaroo, ni laa leen tasaaree.»

Kàddug Aji Sax jee.

¹¹ «Éy Siyon, réccal,

yaw mi dèkke janq Babilon mu taaru mi.»

¹² Aji Sax ji Boroom gàngoor yi déy dafa wax, moom mi ma yebal ngir teddngay

* **1:12** 1.12 Juróom ñaar fukki at la waa Yuda nekk cig njaam. ca Babilon. † **1:15** 1.15 Xeet yooyu ñoo tegoon Yuda notaange gu jéggi dayo, ba raw la leen Yàlla naraloon. * **2:1** 2.1 Béjjén ñaare doole lay taxawe.

boppam, ci mbirum xeet, yi leen sèxëtoowoon,
nee: «Képp ku leen laal kat, laal na sama reeni xol.

¹³ Maa ngii déy di xàcci sama loxo ci seen kaw,
te ñoom la seeni jaam di sèxëtooji.»

Kon dingeen xam ne Aji Sax ji Boroom gàngoor yi moo ma yebal.

¹⁴ «Sarxolleel te bânneexu, yaw janq Siyoŋ mu taaru,
nde maa ngii di dikk, màkkaanoo fi sa biir.»

Kàddug Aji Sax jee.

¹⁵ «Bésuub keroog la xeet yu bare di taqook Aji Sax ji,

ba doon sama ñoñ,
ma màkkaanoo fi sa biir.»

Kon nga xam ne Aji Sax ji Boroom gàngoor yi moo ma yebal ci yaw.

¹⁶ Aji Sax jeey séddoo Yuda, muy wàllam ci suuf su sell si,
te mooy taamooti Yerusalem.

¹⁷ Na wépp suux ne cell fi kanam Aji Sax ji,
ma ngoogu sàqee fa màkkaanam mu sell ma.

3

Ñeenteelu misaal: Yosuwe am na col gu yeas

¹ Gannaaw gi Aji Sax ji won ma Yosuwe sarxalkat bu mag ba, mu taxaw fa kanam malaakam Aji Sax ji, Tuumaalkat bi taxaw fèete ko ndijoor; ngir tuumaal ko. ² Aji Sax ji ne Tuumaalkat bi: «Aji Sax ji rëbb na la, Yaw Tuumaalkat bi, Aji Sax ji taamu Yerusalem rëbb na la. Xanaa Yosuwe mii du lenn lu moy gillit wu ñu fëkke cib taal?»

³ Yosuwee ngi sol yére yu dand, taxaw fi kanam malaaka mi. ⁴ Malaaka ma wax ak ña taxaw fa kanamam ne leen: «Summileen yéree yu dand yi.» Mu teg ca ne Yosuwe: «Dama ne, far naa sa bàkkaar; te dinaa la solal lu jekk.» ⁵ Ma daldi ne: «Nañu teg kaala gu set ci boppam.» Ñu tegal ko kaala gu set ci boppam, solal ko yeneen yére. Malaakam Aji Sax jaa nga taxaw.

⁶ Malaakam Aji Sax ji nag dénk Yosuwe ne ko: ⁷ «Aji Sax ji Boroom gàngoor yi dafa wax ne: Su fekkee ne samay yoon ngay awe te sama ndénkaane nga dénkoo, su boobaa yaw it dinga saytu sama kër, di sàmm samay ètt. Te maa lay jox ay cér yu la yaatal ci biir ñii fi taxaw.

⁸ Déglul bu baax, yaw Yosuwe sarxalkat bu mag bi,

yaak sa xarit yi toog fi sa kanam te taxawe ab tegtal,
nde maa ngii di indi samab jaam,
ki ñuy wax Njebbit li.

⁹ Doj waa ngii ma teg fi kanam Yosuwe,
te wenn doj wi, juróom ñaari gët a ngi ci kawam.

Maa ngii di ci ñaas mbind mi ci war,»
kàddug Aji Sax jee, Boroom gàngoor yi,
«te maay far bàkkaar réew mii ci benn bés.»

¹⁰ «Bésuub keroog,» kàddug Aji Sax jee,
Boroom gàngoor yi,

«ku nekk ci yeen ay woo moroom ma ci ker garabu reseñam,
ak ker garabu figgam.»

4

Juróomeelu misaal: ay tegukaayi lãmp ak garabi oliw

¹ Ba loolu amee malaaka ma doon wax ak man délsi, yee ma, mel ni ku ñu yee ciy nelaw. ² Mu ne ma: «Loo gis?» Ma ne: «Damaa xool, gisuma lu moy ab tegukaayu lãmp bu lépp di wurus, ak kopp bu tege ci kawam, ak juróom ñaari lãmp ci kawam, bu ci nekk ak juróom ñaari gémmiñam ca kaw. ³ Ak ñaari garabi oliw ca wet ga: Genn ca ndijooru kopp ba, ga ca des ca càmmoñam.»

⁴ Ma dellu wax ak malaaka ma doon wax ak man, ne ko: «Yéf yii nag, lu mu wund, Sang bi?»

⁵ Malaaka ma doon wax ak man ne ma: «Xamuloo lu yéf yii wund?» Ma ne ko «Déédéet, Sang bi.»

⁶ Mu wax ma ne ma: «Lii moo di kàddug Aji Sax ji dikkal Sorobabel, di wax ne:

Du cig njamboor,
du ci doole,

ci samag Noo la.

Aji Sax ji Boroom gàngoor yee ko wax.»

⁷ Yaa di kan, yaw tund wu mag wi?

Boo janook Sorobabel*, maase, dig joor,
te mooy génne ci yaw doju mujjantal wi,
riir ma jolli, ñu naan: «Aw yiw ñeel na ko!
Aw yiw ñeel na wii doj!»

⁸ Kàddug Aji Sax ji dikkalati ma, ne ma:

⁹ «Loxol Sorobabel a teg kenug kër gii,
loxoom a koy sottli itam,»

ngeen daldi xam ne Aji Sax ji

Boroom gàngoor yi

moo ma yónni ci yeen.

¹⁰ Ana kuy xeeb bés bii lu tuut sottée?

Nañu bége kay buumu beteeb bi ñu gis ci loxol Sorobabel!

«Juróom ñaar yii nag gëti Aji Sax jee,

* 4:7 4.7 Moo soqikoo ci Buur Daawuda. Mooy kàngam la jiite woon mbooloo ma jóge woon ca ngállóg Babilon.

ñoom ñooy wër àddina sépp.»

¹¹ Ma dellu ne ko: «Ñaari garabi oliw yii nag, genn gi ci ndijooru tegukaayu lãmp bi, gi ci des ci cãmmoñam, lu ñu wund?»

¹² Ci kaw loolu ma dellooti ne ko: «Ñaari cari oliw yi feggook ñaari solomi wurus yiy xelli diw nag, lu ñu wund?»

¹³ Mu ne ma: «Xamuloo lu yooyu wund?» Ma ne ko: «Déedéet, Sang bi!»

¹⁴ Mu ne ma: «Ñooñu ñoo di ñaar ñi ñu diw, fal leen, ngir ñu liggéeyal boroom àddina sépp.»

5

Juróom benneelu misaal: Taxañu mbind buy naaw

¹ Ci kaw loolu ma dellu séentu, gisuma lu moy taxañu mbind buy naaw. ² Malaaka mi ne ma: «Loo gis?» Ma ne: «Taxañ buy naaw laa gis, guddaayam di ñaar fukki xasab, yaatuwaayam di fukki xasab.»

³ Mu ne ma: «Lii mooy alkute giy wàccsi ci kaw réew mi mépp. Li taxañ bi wax ci genn wetam mooy képp kuy sàcc, dees na ko fi dàqe, te li mu wax ci wetam gi ci des mooy képp kuy giñ ci ay fen, dees na ko fi dàqe. ⁴ Maay wacce alkute gi,» kàddug Aji Sax ji Boroom gàngoor yee, «mu dugg ba ci biir kër sàcc bi, ak kër nit kiy giñe sama tur, ay fen; ci biir kër gi la alkute giy fanaan, ba raafal banti kër gi, aki dojam.»

Juróom ñaareelu misaal: ndab lu jigéen toog ca biir

⁵ Ci kaw loolu malaaka ma doon wax ak man dikk ne ma: «Séentul rekk ba gis lii di dikk.» ⁶ Ma ne: «Lu mu doon?» Mu ne: «Ndabal nattukaay beey génn,» tegaat ca ne: «Lii mooy seen bàkkaar ci biir réew mi mépp.»

⁷ Ci biir loolu kubeeru beteex ga ca kaw ndab la jekki yékkatikou, ndeke jenn jigéen a nga toog ca biir ndab la. ⁸ Mu ne: «Jigéen jii mooy mbon,» daldi koy bëmëx ca biir ndab la, fél kubeeru beteex ga, ubaat ndab la.

⁹ Ba loolu amee ma séentu, yem ci ñaari jigéen ñuy dikk, ngelaw li wal seeni laaf. Laaf yu mel ni laafi xodd lañu am. Ñu daldi yékkati ndabal nattukaay la, ba ca diggante asamaan ak suuf.

¹⁰ Ma ne malaaka ma doon wax ak man: «Ana fu ñii jëme ndabal nattukaay bi?»

¹¹ Mu ne ma: «Ag kër lañu koy tabaxali ca réewum Sineyaar. Bu noppee, fa lañu koy teg, ca kaw tegukaayam.»

6

Juróom ñetteelu misaal: ay watiiri xare

¹ Ma dellu séentu, yem ci ñeenti watiir uy dikk diggante ñaari tund. Tund yi nag di tundi xanjar. ² Watiir bu jëkk bi, fas yu xonq a ko takk, ñaareelu watiir bi, fas yu ñuul a ko takk, ³ ñetteelu watiir bi, fas yu weex a ko takk, ñeenteelu watiir bi, fas yu tippante ko takk, te fas yépp di yu am kàttan.

⁴ Ma ne malaaka ma doon wax ak man. «Sang bi, watiir yii lu ñu wund?»

⁵ Malaaka mi ne ma: «Ñii ñooy ñeenti ngelawi asamaan yi génne fa ñu teewe woon fa kanam Boroom àddina sépp.» ⁶ Bi fas yu ñuul yi takk, réewum běj-gannaar la jëm; bi fas yu weex yi takk topp seen gannaaw; fas yu tippante yi nag, réewum běj-saalum* lañu jëm.

⁷ Fas yu am kàttan yooyu yépp nag génn, yàkkamtee wëri àddina. Aji Sax ji ne leen: «Demleen wëri àddina.» Ñu daldi dem, wëri àddina.

⁸ Ci kaw loolu mu àddu ca kaw, ne ma: «Xoolal, ñi jëm réewum běj-gannaar, samag Noo lañuy sànni ca kaw réewum běj-gannaar.»

Fal nañu buur sarxalkat bu mag bi

⁹ Ba loolu amee kàddug Aji Sax ji dikkal ma, ne ma: ¹⁰ «Yóbbalub Elday ak Tobya ak Yedaya, bokk yooyu ñu toxal, nanga dem jëli ko bésub tey jii, ca kër Yosya doomu Cefaña, fa ñooñu jóge Babilon, dal.

¹¹ «Jëlal yóbbal boobu, di wurus wi ak xalis bi, nga sàkk ci mbaxanam buur, te teg ko ci kaw hoppu sarxalkat bu mag bi†, Yosuwe doomu Yoccadag. ¹² Nga wax ko ne ko: «Aji Sax ji Boroom gàngoor yi dafa wax ne:

Nit a ngi nii, Njebbit‡ la tudd, ci bérabam lay jebbee, ba tabaxi kër Aji Sax ji.

¹³ Mooy tabax kër Aji Sax ji te mooy soloo daraja, mooy toog, di jiite cib jalam, di sarxalkat bi cib jalam, te mébétu jamm mooy dox diggante ñaar yooyu mu sasoo.»

¹⁴ «Mbaxanam buur mi baaxantal lay doon ci biir kër Aji Sax ji, ñu di ko fàttlikoo Elday§ ak Tobya ak Yedaya, ak mbaaxug Yosiya doomu Cefaña. ¹⁵ Ñu sore ñooy dikk tabaxsi kër Aji Sax ji, ba ngeen xam ne Aji Sax ji Boroom gàngoor yi moo ma yebal ci yeen. Loolu mooy am, ndegam déggal

* **6:6** 6.6 Běj-saalum ak běj-gannaar ñaare ñooy wet yi nooni Israyil féete woon. † **6:11** 6.11 Liggéeyu carxal ak nguur, ñaari sas yooyu, ci yoon, du woon lees di boole yor ci Israyil. ‡ **6:12** 6.12 Njebbit ndombol tànk la bu Almasi jagoo. Seetal ci *Yeremi* 23.5-6 ak Sàkkaryaa 3.8. § **6:14** 6.14 Elday man naa doon Elem itam.

ngeen ba déggal seen kàddug Yàlla Aji Sax ji.»

7

Leeraange ci mbirum koor dikk na

¹ Ci ñeenteelu atu nguuru Daryus, ci ñeenti fani juróom ñeenteelu weer wi, di weeru Kisle, kàddug Aji Sax ji moo dikkal Sàkkaryaa. ² Fekk na Betel Sareser kàngamu buur aki nitam yónnee ngir dagaansi Aji Sax ji. ³ Ñu wax ak sarxalkati kër Aji Sax ji Boroom gàngoor yi, ak yonent yi, ne leen: «Ndax danoo wara wéye jooy ak di woor ci weeru juróomeel, ni nu ko baaxoo at yii yépp?»

⁴ Ba mu ko defee kàddug Aji Sax ji Boroom gàngoor yi dikkal ma, ne ma: ⁵ «Waxal askanu réew mi mépp, ak sarxalkat yi, nga ne leen: “Ba ngeen dee woor ak a ñaawlu ci weeru juróomeel, ak weeru juróom ñaareel, ci diiru juróom ñaar fukki at yii, ndax man mii ngeen doon woorala wooral? ⁶ Te su ngeen lekkee ak su ngeen naanee, xanaa du seen bopp ngeen lekkal ak a naanal?” ⁷ Xanaa du yii kàddu la Aji Sax ji biraloon ci jottlib yonent yu jékk ya, jant ya waa Yerusaleem ak dékk ya ko wër nekkee ci jàmm, te diiwaani Negew, ak suufu tund ya am ñu ko dékke?»

⁸ Gannaaw gi kàddug Aji Sax ji dellu dikkal ma, man Sàkkaryaa, ne ma: ⁹ «Aji Sax ji Boroom gàngoor yi dafa wax ne: Àtteb dégg, nangeen ko àttee, te ngor ak yërmande it, deeleen ko jéflantee. ¹⁰ Ab jétun, ak ab jirim, ak ab doxandéem, ak ab néew-doole, buleen ko not. Lu bon it, buleen ko mébétalante ci seen xol.»

¹¹ Teewul ñu baña déglu, tè ticc, fatt seeni nopp, ngir baña dégg. ¹² Seen bopp lañu dègéral niw doj, ba faaleetuñu ndigalu yoon wi, ak kàddu yi Aji Sax ji Boroom gàngoor yi yónnee ag Noowam, ci jottlib yonent yu jékk ya. Muy sànj mu réy nag, bawoo fa Aji Sax ji Boroom gàngoor yi. ¹³ «Ba ma wootee.» Aji Sax ji Boroom gàngoor yee ko wax, «wuyuwuñu; moo tax ba ñu wootee, wuyuwuma. ¹⁴ Maa leen tasaare ni callweer ci biir mboolem xeet yu ñu xamul woon, réew mi gentaal seen gannaaw, ba kenn jaareetu fi dem ak a délsi. Nii lañu defe ab gent, réew mu bakkane.»

8

Mbéx wuutu na koor

¹ Ba loolu amee kàddug Aji Sax ji Boroom gàngoor yi dellu dikkal, ne:

² «Aji Sax ji Boroom gàngoor yi dafa wax ne:

Maa fiire Siyon firaange ju réy,

am sànj mu réy laa koy fiiree.»

³ Aji Sax ji dafa wax ne:

«Maay dellu Siyon,
Yerusaleem googu laay màkkaanoo,
ba ñuy wooye Yerusaleem dèkkub Worma,
foofu di tundu Aji Sax ji Boroom gàngoor
yi,
lees di wooye tundu Sellnga.»

⁴ Aji Sax ji Boroom gàngoor yi dafa wax ne:

«Mag ñu góor ñeek ñu jigéen ñeey dellu
tooge
pénci Yerusaleem,
ku ci nekk ak bantam cib loxoom,
ndax at yu bare.»

⁵ Pénci dékk bi, ay gone lay feese,
góor ak jigéen, di foye ca pénc ya.»

⁶ Aji Sax ji Boroom gàngoor yi dafa wax ne:

«Su loolu dee kawtéef ci gis-gisu ndesu
askan wi
ci yooyu jant,
ndax tax na muy kawtéef ci sama gis-gis
itam?»

Kàddug Aji Sax jee, Boroom gàngoor yi.

⁷ Aji Sax ji Boroom gàngoor yi dafa wax ne:

«Maa ngii di walloo sama ñoñ
fa réewum penku, ak réewum sowub
jant.»

⁸ Maa leen di indi,
ñu màkkaanoo digg Yerusaleem,
di sama ñoñ, may seen Yàlla,
ci biir worma ak njekkk.»

⁹ Aji Sax ji Boroom gàngoor yi dafa wax ne:

«Yeen ñi dégg kàddu yii tey
ci gémmiñu yonent yi fекке woon
ba ñuy teg kenug kër Aji Sax ji Boroom
gàngoor yi,
ngir tabaxaat kër gi,
nangeen góor-góorlu.»

¹⁰ Ndax lu jitu fan yooyu, nit feyeekuwwul
peyoor,

te mala it indilul nit peyoor,
kuy dem ak kuy dikk amul woon jàmm cib
noon,
nde maa xabtaloon ku nekk ci kaw mo-
roomam.

¹¹ Waaye léegi du na woon laay def
ak ndesu askan wii.»

Kàddug Aji Sax jee, Boroom gàngoor yi.

¹² «Ndax jiwum jàmm lay doon,
garabu reseñ meññ doomam,
suuf si meññ gàncaxam,
asamaan di lay.

Loolu lépp laay sédd ndesu askan wii.

13 Na ngeen doone woon alkànde ci biir
xeet yi,
yeen waa kër Yuda, ak waa kër Israyil,
ni laa leen di walloo, ba ngeen doon barke.
Buleen ragal. Góor-góorluleen.»

14 Ndax Aji Sax ji Boroom gàngoor yi déy
dafa wax ne:

«Na ma leen nammoona mbugale
te delluwuma ci gannaaw,
ba ma seeni maam merloo,»

Aji Sax ji Boroom gàngoor yee ko wax,

15 «ni laa nammatee baaxe, ci janti tey jii,
Yerusalem, ak waa kër Yuda.
Kon buleen ragal.

16 «Ndigal yii, nangeen ko jêfe:

Deeleen waxante dëgg,
te dëgg ak yoon, nangeen ko àttee àtteb
jämm
ci seen ètti àttekaay.

17 Ku nekk ci yeen, loraangey moroomam,
bumu ko mébét cib xolam,
te kàddug ngiñ ci ay fen, buleen ko safoo,
nde loolu lépp laa bañ.»
Kàddug Aji Sax jee.

18 Kàddug Aji Sax ji Boroom gàngoor yi
dellu ma dikkal ne ma:

19 Aji Sax ji Boroom gàngoor yi dafa wax
ne:
«Muy koorug weeru ñeenteel, di koorug
weeru juróomeel,
ak koorug weeru juróom ñaareel, ak
koorug weeru fukkeel*,
lépp janti mbég ak bànneex,
ak bési ndaje yu rafet lay nekkal waa
kër Yuda
Waaye dëgg ak jämm, sopleen ko.»

20 Aji Sax ji Boroom gàngoor yi dafa wax
ne:

«Ay askan ñooy dikkati, di waa dëkk yu
bare,

21 waa dëkk bii dem ne bee:
“Nan dema dem dagaani Aji Sax ji,
nan sàkkuji Aji Sax ji Boroom gàngoor yi,”
Ñu ne leen: “Nun it kay, nu ngi dem.”»

22 Askan yu bare, ak xeet yu am doole ñooy
dikk,
di sàkkusi Aji Sax ji Boroom gàngoor yi ci
Yerusalem,
di dagaansi Aji Sax ji.

23 Aji Sax ji Boroom gàngoor yi dafa wax
ne:

«Janti keroog yooyu, fukk ñuy làkk
mboolem làkki xeet yi,

ñooy langaamoo catu mbubbu benn
Yawut, naan ko:
“Nun, yeen lanuy àndal,
nde noo dëgg ne Yàllaa ngeek yeen.”»

9

*Mbugal mu mucc topp dal na askani
diiwaan bi*

1 Yéeneb kàddug Aji Sax jii moo rot
ci kaw réewum Addarag*,
ba dali ca kaw Damaas.

Du ci mboolem giiri Israyil rekk
la Aji Sax ji ne jàkk bêtam,
waaye doom aadama yépp la ne jàkk.
(xg / Gëti nit ñi, ba ci giiri Israyil gépp kat,
ñu ngi ne jàkk ci Aji Sax ji.)

2 Kàddu gi dal na itam Amat,
ga digalook Damaas,
dal Tir ak Sidon, ak la ñuy muus lépp.

3 Tir moo tabaxal boppam tata,
moo dajale xaalis ni feppi suuf,
ak wurus wu ne xas ni donji banu mbedd.

4 Ndeke Aji Sax ji moo koy moom,
xalab alalam biir géej,
te sawaraa koy xoyom.

5 Askalon moo koy gis, tiit;
Gasa gis ko, jàq njàqare lu réy,
mook Ekkron it ndax yaakaar ju tas.

Gasa la buur bay réere,
Askalon ñàkk ku ko dëkke.

6 Xeet wu raxe mooy sancu Asdodd,
te maay sàggi sagub Filisteen ñi.

7 Ci seen gémmiñ laay foqatee deret ji ñuy
lekk,
yàbbiloo leen seen ñam yu seexluwu
yi ñu ñank.

Seenu ndes it dina ma def seen Yàlla,
mel nig làng ci giirug Yuda,
Ekkron it ci sama ñoñ lay bokk ni
Yebuseen ñi†.

8 Maay taxaw wattu fi wër sama kër,
aar ko ci ñiy dem ak a dikk,
ba boroom doole dootu not sama waa kër,
nde léegi samay gët laa leen ne jàkk.

Buur Almasi dikk na

9 Bégala bég, janq Siyoj mu taaru,
janq Yerusalem mu taaru laa ne:
Xaacul, sa buur a ngoog, jëmsi ci yaw,
moo jot njekk ak mucc,
te teewu koo woyof, war mbaam,
cumbur doomu mbaam.

10 Maay dagge watiiru xare diiwaanu
Efrayim,
dagge fasu xare fi Yerusalem,
xalay xare damm,
muy wax xeet yi jämm,

* **8:19** 8.19 Bési koor yooyu ba bànni Israyil nekkee ngàllo ca Babilon lañu ko daan sàmm, di ko ñaawloo seen jaar-jaar yu metti. * **9:1** 9.1 Addarag Ci diiwaanu Siri la nekk, mook dëkk yi ci aaya 1 ba 8 ñoo dale bėj-gànnar ba bėj-saalum te nekk ci tefesu géej gu mag ga. Seetal ci *Màndiñ mi* 34.5-6. † **9:7** 9.7 Yebuseen ñi ñoo dëkkoon Yerusalem lu jiiu te mujj bokk ci Israyil. Seetal ci *Yosuwe* 15.63.

kilifteefam dale géej ba géej,
dale dexe Efraat ba ca cati àddina.

Aji Sax ji mooy xeexal ñoñam

¹¹ Yaw nag, deret ji feddli sama kóllèreek yaw,

ci laay seet ba yiwi sa nit ñi ñu tëj
biir kàmb gu ndox amul.

¹² Yeen ñi ñu tëj, ngeen di dunde yaakaar,
delluleen ca tata ja.

Bésub tey jii sax maa dogu ne
ñaari yoon laa leen di yool.

¹³ Yuda déy laay bank, muy samag xala,
te Efrayim laa koy soxe, muy fitt gi.

Yaw Siyon, sa doom yu góor laay yékkati
ci sa kaw doom yu góor, yaw réewum
Geres (/Yawaan).

Doomi Siyon laay def saamaru jàmbaar.

¹⁴ Su boobaa Aji Sax jeey feeñ fi leen tiim,
ag fittam tàkk nig melax.

Buŋa gi la Boroom bi Aji Sax ji di wal,
ànd ak ngéléni bėj-saalum, dikk.

¹⁵ Aji Sax ji Boroom gàngoor yi mooy aar
ñoñam,

ñuy falaxe, di joggati doji mbaq,
di naan ak a xaacu ni ñu màndi.

Ni ndabi deretu juru sarax di feese,
ni lañuy feese ak deretu noon yi,

taq ci ripp ni cati sarxalukaaya ba.

¹⁶ Bésub keroog seen Yàlla Aji Sax ji
mooy sàmm ñoñam nig jur,

ñuy lèrxat cim réewam

ni peri gànjar di ray-rayee ci mbaxanam
buur.

¹⁷ Ndaw bânneex akub taar ca ñoom!

Pepp yafal xalelu góor,
biññ bu bees naatal yaramu janq.

10

Xërëm neen la

¹ Bu suuf maree, ñaanaal Aji Sax ji ab taw,
Aji Sax ji mooy sàkk ay xàmbaar,

sóobal nit ab taw,
saxalal ku ne am ñax ci àll bi.

² Xërëm, waxi neen,

gisaanekat gisi fen,
seeni gént, nari neen,

te caaxaani neen lañuy dalalee.
Moo tax mbooloo mii di taxawaalu niy xar,
tumurànke ndax ñàkkub sàmm.

Yiwiku ñeelati na Israyil

³ «Sàmm yi la sama mer tàkkal,
ñoom sikket yooyu laay dikke mbugal.

Aji Sax ji Boroom gàngoor yi kat mooy
taxawu

kèrug Yuda, géttam,
te moo leen di def aw fasam wu am daraja,
ngir xare.

⁴ Fa Yuda la doju collu tabax di bawoo,
jènu xayma, fa moom,
xalay xare, fa moom,

mboolem njiit yi ba ñépp daj, fa moom.

⁵ Ni ñeyi xare lañuy mel,
di joggati banu mbedd mi ci biir xeex bi.
Noonu lañuy xaree, nde ñoom la Aji Sax
jiy àndal,

ñuy torxal gawar yi.

⁶ Maay jàmbaaral waa kër Yuda,
maay wallu waa kër Yuusufa,
suqlí leen, ñeewante leen,
ñu mel ni masuma leena xarab,
nde man maay seen Yàlla Aji Sax ji,
te maa leen di nangul.

⁷ Waa Efrayim ni ñeyi xare lañuy mel,
seen xol neexe ni bânneexu biññ,
seeni doom gis ko, bég,
seenub xol di bânneexoo Aji Sax ji.

⁸ Maay waliis, dajale leen,

nde maa leen di jot,

ñu bareeti na ñu baree woon.

⁹ Fi biir xeet yi laa leen saawi,
waaye fa bérab yu loq ya lañu may
fàttlikoo,

di fa dund ñook seeni doom,
ba keroog ñuy délsi.

¹⁰ Fa réewum Misra laa leen di waññee,
te fa Asiri laa leen di dajalee,
yóbbu leen réewum Galàdd ak Liban,
te deesu fa gis fu ñu xaj.

¹¹ Maay jáll géēju njàqare ga,
fàdd gannax ya,

mboolem xóotey dexe Niil wow,
sagub Asiri sàggiku,
nguurug Misra foq.

¹² Ci Aji Sax ji laa leen di jàmbaarale,
ciw turam lañuy daagoo.

Kàddug Aji Sax jee!»

11

¹ Libañéey, ubbil say wunt,
sawara xoyom sa garabi seedar.

² Yaw garabu sippar, yuuxul,
garabu seedar daanu na,
garab yu darajawu rajaxoo na.
Yeen garabi seen ya ca Basan, jooyooleen,
nde gott bu fatt baa sèngéem.

³ Jooyi sàmm ya jib na,
seen daraja réer na,
ñari gaynde ya it jolli na,
nde gajjug tàkkal Yurdan a tas.

Sàmm bu baax jotul yoolam

⁴ Aji Sax ji sama Yàlla dafa wax ne:
«Sàmmal gétt gi ñuy rendiji.

⁵ Ñi leen jënd di leen rendi,
te jàpp ne yoon toppu leen ci;
ñi leen jaay naan: “Sant Aji Sax ji, woomle
nanu,”

gétt gi la seeni sàmm yèrèmul.

⁶ Dootuma yèrëm waa réew mi (/àddina)
déy,»

Kàddug Aji Sax jee!

«Maa ngii di teg doom aadama yi,

ku nekk ci loxol moroomam,
ak ci loxol buuram,
ñu not réew mi,
te duma leen xettli ci seen loxo.»

⁷ Ba loolu amee may sàmm xar yi tee-
fonke yi nara rendiluji, rawatina ñi gëna
sonn ci gétt gi. Ca laa jël ñaari yeti sàmm.
Benn bi ma tudde ko Xejjoo, bi ci des ma
tudde ko Bennoo. Ci kaw loolu may sàmm
gétt gi. ⁸ Gannaaw gi, ñetti sàmm laa dàq
ci wenn weer. Ci kaw loolu ma doyal ci
xar yi, ñoom it, ma génnliku leen. ⁹ Ma
ne gétt gi: «Dootuma leen sàmm. Na ñiy
dee, dee; ñiy sànk, sànk; ñi dese bakkan
yàppante ci seen biir.»

¹⁰ Ba mu ko defee ma jël sama wenn yet
wi, Xejjoo, damm ko, ngir doge ko sama
kóllère gi ma fasoo woon ak askan yépp.
¹¹ Bésub keroog la kóllère ga dog, teefonke
yi may xool daldi xam ne loolu kàddug Aji
Sax ji la.

¹² Gannaaw loolu ma ne leen: «Su leen
neexee, joxleen ma sama peyoor, su leen
neexul téyeleen ko.» Ñu waññ fanweeri
donji xaalis, feye ma.

¹³ Aji Sax ji ne ma: «Ndaw njëg gu réy
gu ma leen jaral! Sànni ko ca boroom njaq
ya.» Ma jël fanweeri donji xaalis ya*, sànni
ko boroom njaq ya, ca kër Aji Sax ji.

¹⁴ La ca tegu ma damm sama ñaareelu
yetub sàmm ba, Bennoo, ngir dog bokk gi
dox diggante Yuda ak Israyil.

¹⁵ Aji Sax ji nag neeti ma: «Léegi jëlal
jumtukaayu sàmm bu ñakk bopp. ¹⁶ Maa
ngi nii kat di taxawal ab sàmm ci réew mi.
Lu ci réer, faalewu ko; lu ci lajj, du ko seet,
lu ci gaañu, du ko faj, lu wër du ko xont,
te lu ci duuf, mu yàpp, ba toj seeni we.

¹⁷ Wóoy bii yambarub sàmm
buy wacci gättam.
Yal na saamar laggal loxoom,
fuq bëtu ndijooram.
Yal na loxoom lax ne làcc,
bëtu ndijooram giim ba gëmm fatuus.»

12

Yerusalem yiwiku na

¹ Ab yéenee ngi, di kàddug Aji Sax ju
dikkal Israyil. Kàddug Aji Sax jee, ki firi
asamaan, lal suuf, te bind noowug doom
aadama ci biir doom aadama. ² Mu ne:
«Maa ngii di waaja def Yerusalem, mui
ndabal sànj luy màndee, ñeel mboolem
xeet yi ko wër, te kera bu ñuy gaw
Yerusalem, Yuda gépp ca lay bokk. ³ Bésub
keroog maay def Yerusalem di doj wu diis
gann ci xeet yépp. Képp ku ko jéema

* **11:13** 11.13 Mooy ndàmpaay li ñuy fey sang bu ñu gaañ jaamam. Seetal ci *Mucc ga* 21.32. * **12:11** 12.11 Adàdd Rimon mooy fa ñu doon jooye deewug Buur Yosiya. Seetal ci *2.Jaar-jaar ya* 35.21-25. † **12:12** 12.12 Natan kenn la ci doomi Daawuda. Seetal ci *2.Samiyel* 5.14. ‡ **12:13** 12.13 Simey ab sët la ci Lewi. Seetal ci *Mucc ga* 6.16-17.

yëngal, da ciy gaañoo gaañu rekk. Te
xeeti àddina yépp ay daje ci kawam. ⁴ Su
keroogee,» Aji Sax jee wax: «ngëlëmte
laay dumaa wépp fas, te ag ndof laay
dumaa gawaram. Kër Yuda nag laa naan
jàkk samay gët, te ag cilmaxa laay dumaa
wépp fasu xeet yi. ⁵ Su ko defee njiiti Yuda
ci seen xol lañu naa: «Waa Yerusalem,
sunu doolee ngi ci sunu Yàlla, Aji Sax ji
Boroom gàngoor yi.» ⁶ Bésub keroog maay
def njiiti Yuda mel ni ab taal bu jafal jalu
matt, mbaa jum bu ñu jafal ci sabaaru
pepp; wetu ndijoor ak wetu càmmoñ lañuy
xoyome mboolem xeet yi leen wër, te
Yerusalem toog bérabam, di Yerusalem ba
tey.

⁷ «Aji Sax ji Yuda lay jékka wallu, ndax
darajay waa kër Daawuda, ak darajay waa
Yerusalem baña màgg ba èpple Yuda.
⁸ Bésub keroog Aji Sax jee doon kiiraayal
waa Yerusalem. Ñi gëna néew doole ci
ñoom sax ñook Daawudaay tolloo doole,
waa kër Daawuda jiite leen ni Yàlla,
ni malaakam Aji Sax ji. ⁹ Su bés baa
laay tàmbalee faagaagal mboolem xeet yiy
songsi Yerusalem.

Ñaawlu dikkal na réew mépp

¹⁰ «Bu loolu amee maay sottil waa kër
Daawuda ak waa Yerusalem, noowug yiw
aki dagaan, ba ñu geesu ma man, mi
ñu jam ba mu sar, te dinañu ko jooy ni
ñuy jooye benn bàjjo, di ko naqarlu ni
ñuy naqarloo deewug taaw. ¹¹ Su bés
baa yuuxi dëj yu réy ay jibe fi Yerusalem,
mel ni yuuxi dëj ya ca Adàdd Rimon*, ca
jooru Megido. ¹² Waa réew meey jooy
seenub dëj, làng gu nekk beru ñoomu
neen. Làngu kër Daawuda di ñoomu
neen, seeni jabar di ñoomu neen; làngu
kër Natan† di ñoomu neen, seeni jabar
it di ñoomu neen. ¹³ Làngu kër Lewi di
ñoomu neen, seeni jabar di ñoomu neen;
làngu Simey‡ di ñoomu neen, seeni jabar
di ñoomu neen. ¹⁴ Mboolem làng yi ci des
it, làng gu ci nekk di ñoomu neen, seeni
jabar di ñoomu neen.

13

Ay tuur ak yonenti caaxaan day jeex

¹ «Bésub keroog bëtu ndox dina bënnaal
kër Daawuda, ak waa Yerusalem, ngir setal
bàkkaar ak sobe.

² «Bésub keroog,» kàddug Aji Sax jee,
Boroom gàngoor yi, «Turi xërëm laay
dagge ci réew mi, ba deesatu leen fàttliku.
Yonent yeek xelum xërëmtu it, maa koy

tukkal ci réew mi. ³ Te képp kuy biralati waxyu, ay waajuram, baayam ak ndeyam nañu ko wax ne ko: “Doo dese bakkan, ndax yaa fen ci turu Aji Sax ji.” Ay waajuram, baayam ak ndeyam nañu ko jam ba mu dee, ca ba muy biral waxyu.

⁴ «Su bés baa, bépp yonent buy biral waxyu, kersa lay am ci am peeñoom. Kenn du sol ni yonent yi, yérey der yu ànd ak kawaram, ngir di naxe. ⁵ Kenn ku ne da naan: “Man de dumab yonent, beykat laa. Ab surga laa masa doon ba may ndaw ha tey.” ⁶ Te su ñu ko nee: “Légét yii ci sab denn nag?” Da naan: “Lii de ay légét la yu ma jële ca sama kër xarit ya*.”»

Kóllère feddliku na

⁷ «Éey saamar, yewwulal sama sàmm bi, sama jambaar jii ma lèngool,» kàddug Aji Sax jee, Boroom gàngoor yi. «Dóoral sàmm bi, xar yi tasaaroo, ma walbati sama loxo, jublu ci jur gu ndaw gi.

⁸ Su boobaa ci réew mi mépp, kàddug Aji Sax jee,

ñaari xaaj yi lees di dagg, ñu sànkun, ñetteel ba ca des lees fay wacc.

⁹ Ñetteel bi laay tàbbal ci sawara, xelli ko ca ni ñuy xellee xaalis, nattu ko ni ñuy nattoo wurus cib taal. Xaaj boobu moo may woo ci sama tur, ma wuyu ko.

Moom laay wax: “Sama ñoñ,”

Moom mu ne: “Aji Sax jee sama Yàlla.”»

14

Xare bu mujj jib na

¹ Bés a ngii di dikkal Aji Sax ji, ca lees di séddoo fi seen biir, alal ju ñu nangoo ci yeen.

² Xeet yépp laay dajale ci kaw Yerusalem, ngir xare.

Dëkk bi lees di nangu, sèxëtoo kër yi, tédde jigéen ñi.

Genn-wàllu dëkk beey génn, jëm ngàllo, waaye ndesu askan wi, deesu leen dagge ci dëkk bi.

³ Su boobaa la Aji Sax jiy génn, xeex ak yooyu xeet, ni mu baaxoo xeexe ci bésus xare.

⁴ Bésus keroog, kaw tundu Oliw ya la tánkam yay sampe, fa janook Yerusalem, ca penku, tundu Oliw ya xar ca digg ba, penku ba sowu,

def xur wu yaa, genn-wàllu tund wa randu, jëm bėj-gànaar; genn-wàll ga jëm bėj-saalum.

⁵ Xur wa ca diggante sama tund ya ngeen di jaare daw, ndax xur wa ba Accal lay àkki.

Na seeni maam dawee woon ngeen di dawee, ba suuf fa yéngoo,

ca janti Osiyas buurub Yuda. Sama Yàlla Aji Sax ji mooy dikki,

ànd ak mboolem ñu sell ñi.

⁶ Bésus keroog, dug leer,

dub sedd, te du benn tawub yuur.

⁷ Benn bésus boppam lay doon

bu Aji Sax ji donj xam;

du doon bëccég, du doon guddi,

te bu ngoonee mu leer.

⁸ Bésus keroog Yerusalem la ndox muy

dund di wale,

genn-wàll gi jëm géēju penku,

genn-wàll gi, géēju sowu,

te noor ak nawet lay doon.

⁹ Aji Sax ji mooy doon buuru àddina sépp,

bésus keroog Aji Sax ji di kenn,

turam di wenn.

¹⁰ Réew mi mépp ag joor lay soppliku,

dale ko Geba ba Rimon ca bėj-saalum

Yerusalem,

Yerusalem tooge bérabam, tiim la ko wër,

dëkk bi dale ca buntu Beñamin,

ba fa bunt ba woon,

jàll ba ca buntu Jàddukaay ba,

daleeti ca tatay Ananel ba ca nalukaayi

reseñi buur*.

¹¹ Dees na ko dëkke te deesatu ko faagaa-gal,

kaaraange la Yerusalem di dëkke.

¹² Yii duma la Aji Sax jiy duma

mboolem xeet yi xareek Yerusalem:

Seen suux mooy yaqu te ñu ne jonn taxaw,

seeni gët yaqu ca seen biir paxi gët,

seenu làmmiñ nëb ca seen biir gëmmiñ.

¹³ Bésus keroog tiitaange ju réy mooy tukkee ci Aji Sax ji

wàcc ci seen biir;

ku nekk jàpp sa loxol moroom,

ñu songoo.

¹⁴ Yuda it day feksi Yerusalem ci xeex bi, te dees na dajale alali xeet yi leen wër

yépp;

wurus, xaalis ak yérey, bare, ne gànñ.

¹⁵ Yooyu duma it mooy dal fas,

ak berkelleek giléem ak mbaam-séf,

ak lépp luy jur ci biir dal yooyu,

noonu lees di dumaa mala yépp.

¹⁶ Su boobaa mboolem ndesu wépp xeet

wu songoon Yerusalem,

Yerusalem lay yéegi at mu ne,

* **13:6** 13.6 xarit ya li mu tekki mooy tuur yi, ci waxin. aaya bi wax ne mooy tiim diiwaan bi ko wër.

* **14:10** 14.10 Mboolem Yerusalem, ak ci wetam yépp la

ngir sujjóotali Buur Aji Sax ji Boroom
gàngoor yi,
tey màggalsi màggalu Mbaar yi*.

¹⁷ Te gépp làngu kaw suuf gu yéegsiwul
ba Yerusalem,

ngir sujjóotali Buur Aji Sax ji Boroom
gàngoor yi,
googu làng du tawlu.

¹⁸ Làngu Misra it, su ñu yéegul ba dikk,
duñu tawlu;

dinañu jot ci duma yi Aji Sax jiy duma
xeet yi yéegul ba màggalsi màggalu
Mbaar yi.

¹⁹ Loolooy doon dumay Misra ngir seen
bàkkaar,

di dumay wépp xeet ngir seen bàkkaar,
ndax ñàkka yéeg ba màggalsi màggalu
Mbaar yi.

²⁰ Bésuh keroog jóolooliy fas yi sax
dees na ci bind:

«Sell na ñeel Aji Sax ji.»

Te ni ndabi tuurukaay yi fi kanam sarx-
alukaay bi selle,

cin yi gëna néew daraja ci biir kër Aji Sax
ji sax
noonu lañu selle.

²¹ Su boobaa luy cin ci Yerusalem ak Yuda,
Aji Sax ji Boroom gàngoor yi lees koy
sellalal,

ba mboolem ñi dikk di sarxalsi,
ci lañuy jël, togge.

Te bésuh keroog ab jula dootu am
ci biir kër Aji Sax ji Boroom gàngoor
yi.

Téereb Yonent Yàlla Malasi

¹ Yéeneb kàddug Aji Sax jii moo ñeel Israyil, ci jottlib Malasi.

Cofeelu Aji Sax ji kóllëreem la laloo

² Aji Sax ji nee: «Dama leena sopp,»
yeen ngeen ne: «Ana noo nu sopp?»
Mu ne: «Xanaa Esawu du seexub
Yanqóoba?»

Kàddug Aji Sax jee,
«moona Yanqóoba laa sopp,
³ te Esawu laa foñ.

Maa def ay tundam ab gent,
ab céru suufam, ma def ko dëkkuwaayu
tilli mändin mi.

⁴ Su Edom* nee: “Dees noo rajaxe,
waaye nooy tabaxaat gent bi,»
Aji Sax ji Boroom gàngoor yi moom dafa
wax ne:

“Ñooy tabax, maay màbb.”
Ñoom lees di wooye waa diiwaan bu bon
bi,
askan wi Aji Sax ji mere ba fàww.

⁵ Yeena koy gisal seen hopp,
yeenay seede ne: “Mággaayu Aji Sax ji
jéggi na kemu réewum Israyil.”

Aji Sax ji tiñal na sarxalkat yi

⁶ «Doom teral baayam,
jaam, sangam.
Man, su ma dee baay, ana saab teraanga?
Su ma dee ab sang, ana saab cér?»
Aji Sax ji Boroom gàngoor yee ko wax,
mu ne: «Yeen sarxalkat yi teddadil ngeen
sama tur,
yeen ngeen ne: “Ana nu nu teddadile sa
tur?”»

⁷ Xanaa di indi ñam wu sobewu
fi sama sarxalukaay.
Yeen ngeen ne: “Ana nu nu la sobeele?”
Xanaa xalaat ne sañees naa teddadil
sarxalukaayu Aji Sax ji.

⁸ Bu ngeen ma sarxalsee jur gu gumba,
dara aayu ci?
Am bu ngeen ma sarxalsee jur guy soox,
ak jur gu wopp, dara aayu ci daal!
Yóbbul leen ko seen boroom dëkk rekk,
ba xam ndax moo leen di nangul,
mbaa mu siggil leen!»
Aji Sax ji Boroom gàngoor yee ko wax.

⁹ «Ngeen ne: “Léegi nag tinuleen Yàlla
rekk,
mu baaxe nu!”

Yeena tooñ, ndax day siggil kenn ci yeen?»
Aji Sax ji Boroom gàngoor yee ko wax.

¹⁰ «Éy bu kenn ci yeen tējoon bunt yi far,
te baña jafal ab taal ci sama kaw sarx-
alukaay ci dara.

Awma benn bannex ci yeen!»
Aji Sax ji Boroom gàngoor yee ko wax.
«Ab sarax, дума ko nangoo ci seeni loxo.
¹¹ Waaye li ko dale penku ba sowub jant,
fu ci nekk la sama tur mágge ci biir xeet
yi,

te fépp lees di taale cuuraay, ngir sama tur,
boole ci sarax su set,
nde sama tur a ni mágge fi biir xeet yi.»

Aji Sax ji Boroom gàngoor yee ko wax.
¹² «Waaye yeen yeena teddadil sarx-
alukaayu Aji Sax ji,

nde yeena xalaat ne lu sobewu la,
te aw yáppam, aw ñamam jarul dara.

¹³ Yeena ngi naa: “Ndaw lu soof,» di
ciipatu.»

Aji Sax ji Boroom gàngoor yee ko wax.
«Jur gu ñu sàcc ngeen may indil,
ak guy soox, ak gu wopp,
loolu mooy seen sarax!
Nu ma koy nangoo ci seeni loxo?»
Aji Sax jee ko wax.

¹⁴ «Alkànde ñeel na ab jinigalkat bu am ci
géttam
am kuuy mu mu xasoo sarxe,
te di sarxalal Boroom bi jur gu sikk,
nde man, buur bu mag laa!»
Aji Sax ji Boroom gàngoor yee ko wax.
«Sama tur moo jara ragal fi biir xeet yi.

2

¹ «Léegi nag, sarxalkat yi, santaane bii
yeen la ñeel.

² Su ngeen dégluwul,
te defuleen seen xel ci teral sama tur,»
Aji Sax ji Boroom gàngoor yee ko wax,
«alkànde laay yebal fi seen biir,
ba alagaale seeni barke,
te alag naa ko jeeg,
nde defuleen seen xel ci teral ma.

³ Maa ngii di yar seen askan,
sèlëm leen sébbriit,
mi jóge ci seen saraxi mággal,
ñu tonniwaale leen ak sébbriit mi.

⁴ Su boobaa ngeen xam ne
maa leen yónnee santaane bii,
ngir saxal sama kóllëreek Lewi*.»
Aji Sax ji Boroom gàngoor yee ko wax.

⁵ «Sama kóllëre moom laa ko séqal,
mu jur ndund ak jàmm,
maa ko may loolu ngir mu ragal ma,

* **1:4** 1.4 Edomeen ñi ñoo askanoo ci Esawu, bànni Israyil askanoo ci Yanqóoba seexu Esawu. Esawu moo teddadil li taxawe kóllërey Aji Sax ji, ba mu sàgganee céruub taawam. Seetal ci *Njálbëen ga* 25.34. Edomeen ñi ñoo dëddu Israyil mi Aji Sax ji taamul hoppam. Seetal ci *Abdiyaa* 10-14. * **2:4** 2.4 Leween ñi jéfe woon firaange ci Aji Sax ji, ñoom lay wax. Seetal ci *Mucc ga* 32.25-29.

ragaloon na ma it, bay yéemu ci sama tur.
 6 Njànglem dëgg la dëkkaloon ci gëmniñam,
 te ag njubadi, déggeesu ko ciw lammañam,
 xanaa di ànd ak man ci jamm ak njub,
 tey baloo ñu bare yoonu ñaawtéef.

7 «Kàddug sarxalkat déy day sàmm xam-xam,
 te ciy waxam la nit ñi di sàkkoo àlluwa,
 nde mooy ndawal Aji Sax ji Boroom gàngoor yi.

8 Waaye yeen dangeena moy yoon wi,
 seenum njàngle ngeen fakktale ñu bare,
 te yeena fecci kólléreg Lewi.»

Aji Sax ji Boroom gàngoor yee ko wax.

9 «Moo tax man it ma def xeet wépp xeeb leen,
 sewal leen,
 feye leen ko seen ñakka sàmm samay yoon,
 ak par-parloo gi ngeen di diglee yoon wi.»

Aji Sax ji du nangu saraxi workat yi

10 Xanaa du benn baay lanu am, nun ñépp?
 Te jenn Yàlla jee nu sàkk?

Lu waral ku ne di wor mbokkam,
 ba fecci kóllérey maam ya?

11 Yuda wor na,
 lu jomblu lees def
 fi Israyil ak Yerusalem.

Yuda déy moo teddadil li Aji Sax ji sopp
 te mooy bérabam bu sell:

Yuda moo takk janqub yállay doxandéem.

12 Ku def lii, yal na Aji Sax ji dagge
 ci xaymay Yanqóoba, gépp kuutaayam,
 boole ci kuy indil ab sarax, Aji Sax ji
 Boroom gàngoor yi.

13 Lii itam yeena ngi koy def:

Yeena ngi tawal ay rongoon sarxalukaayu
 Aji Sax ji,
 di jooy ak a binni,

ndax moo geesootul seen sarax,
 te nangootul lenn ci seen loxo.

14 Ngeen naa: «Ndax lan?»

Ndax Aji Sax ji moo seede seen diggante
 ak seen jabar ja ngeen jël ba ngeen di
 ndaw,
 tey ngeen wor ko, te mu doonoon seen
 wéttal,

seen jabar ju ngeen séqal kóllère.

15 Kenn deful lii te desem xel.

Kenn donj a ko defoon. Ndax lan?

Kuutaay li ko Yàlla digoon la doon wut.

Kon nag sàmmleen seenum xel,

te buleen wor seen jabar ja ngeen jël

ba ngeen di ndaw.

16 «Pase laa bañ,»

Aji Sax ji, Yállay Israyil moo ko wax,

«ak ku làmboo jëfi loraange ni mbubb.»

Aji Sax ji Boroom gàngoor yee ko wax.

Kon nag sàmmleen seenum xel,
 te buleen wor.

Aji Sax ji, dëgg lay àtteji

17 Soof ngeen Aji Sax ji ak seeni wax,
 ngeen naan: «Nu nu ko soofe?»

Xanaa naan: «Képp kuy def lu bon
 mooy ki baax ci Aji Sax ji,
 te kooku la safoo.»

Mbaa ngeen naa: «Ana Yàlla jiy àtte dëgg
 sax?»

3

1 «Maa ngii di yebal sama ndaw,
 mu xállal ma aw yoon.

Sang bi (/Boroom bi) ngeen di sàkku

mooy jekki agsi kèram,
 malaakam kóllère moomu (/ ndawal
 kóllère loolu), ki ngeen safoo,
 mu ngooguy dikk.»

Aji Sax ji Boroom gàngoor yee ko wax.

2 Waaye bésab dikkam, ana ku ko mana
 dékku?

Bu teewee ana kuy taxaw?

Nde moom daa mel ni sawaras tëgg

buy xelli weñ,
 melati ni xemey fóotkat.

3 Fa mbaxana dee benn lay tooge
 ni xellikat ak seggkat,

te mooy segg sèti Lewi, xelli leen
 ni xaalis ak wurus,

ba ñu doon niti Aji Sax ji,
 ñi koy indil sarax ci njekk.

4 Su boobaa la saraxu Yuda ak Yerusalem
 di neex Aji Sax ji,
 na jant ya woon, at ya woon.

5 «Maa leen di dikke ab àtte,

di ab seede bu taxaw temm

ci tuumaal ñeengokat yeek njaalookat yi,
 ak ñiy fene ngiñ,

ak ñiy xañ ab liggéeykat peyooram,
 di noggatu ab jëtun akub jirim,

di beddi doxandéem te ragaluñu ma.»

Aji Sax ji Boroom gàngoor yee ko wax.

6 «Man Aji Sax ji déy, duma soppiku,
 te yeen noppiwuleen di askanu
 Yanqóoba*, ay workat.

Waññiku ci Aji Sax ji moo war

7 «Ca seen janti maam

ngeen dëddoo sama dogali yoon,
 sàmmuleen ko.

Waññikuleen fi man, ma waññiku fi
 yeen,»

Aji Sax ji Boroom gàngoor yee ko wax.

«Yeena ngi naa:

“Ci lan lanuy waññikoo?”

8 Waaw, nit dina sàcc Yàlla?

* 3:6 3.6 askanu Yanqóoba mooy askan wi soqikoo ci Yanqóoba mi suufu woon ab seexam.

Ndaxam yeen yeena ngi may sàcc
te yeena ne: “Ana nu nu la sàcce?”
Xanaa ci seen cérub fukkeelu alal akub
jooxe.

⁹ Alkànde ju réya ngi leen di dikkal,
nde man ngeen di sàcc, yeen mboolem
askan wi.

¹⁰ Indileen mboolem céru fukkeel
ca kërug denc ya,
ba ab dund am sama biir kër,
te ngeen seetloo ma ko rekk.»
Aji Sax ji Boroom gàngoor yee ko wax,
«ndegam duma leen ubbil bunti asamaan,
ba sottil leen barke bu doy.

¹¹ Maa leen di gëddal njééréer,
ba du leen yàqal meññeefum suuf,
te reseñug tool du leen jaasiral.»

Aji Sax ji Boroom gàngoor yee ko wax.

¹² «Xeet yépp ñu barkeel ñi lañu leen di
wooye,

nde réewum bânneex ngeen di dëkke.»
Aji Sax ji Boroom gàngoor yee ko wax.

Aji Sax ji dina fésal njubteg àtteem

¹³ «Kàddu yu ñagas ngeen teg ci sama
kaw,»

Aji Sax jee ko wax.

«Te yeena ne: “Ana kàddu yu ñu la
waxal”?»

¹⁴ Yeena ne: “Jaamu Yàlla ag neen la.
Ana lu nu jële ci dénkoo ndénkaaneem,
tey wéye toroxlu

fi kanam Aji Sax ji Boroom gàngoor yi?

¹⁵ Moo tax nu ne nit ñu bew ñi ñooy ñi
barkeel,

ñiy def lu bon kay ñoo baaxle,
ñoom ñiy diinjat Yàlla, teg ca récc.»

¹⁶ Ca la ñi ragal Aji Sax ji diisoo ci seen biir,
Aji Sax ji teewlu, déglu leen.

Ñu bind fi kanamam téereb fàttliku,
bu lim ñi ragal Aji Sax ji,
te teral aw turam.

¹⁷ «Sama moomeelu bopp la ñooñuy
doon,»

Aji Sax ji Boroom gàngoor yee ko wax,
«ca bés ba may jéfi, sama gànjar lañuy
doon,

te ni baay di baaxee as ngóoram su ko
taxawu,

ni laa leen di baaxee.

¹⁸ Ca ngeen di rāññaatlewaat diggante
ku jub ak ku bon,
kuy jaamu Yàlla,
ak ku ko jaamuwul.

¹⁹ Bés ba déy a ngii di ñëw,
di tàkk ni taal bu yànj.

Képp ku bew ak kuy def lu bon,
ca lay mel ni boob,

te bés sub keroog baa koy jafal.»

Aji Sax ji Boroom gàngoor yee ko wax.

«Du leen waccal tus, dub reen, dub car.

²⁰ Waaye yeen ñi ma ragal
la jantub njekk di fenkal,
yiire leen ceññeer yuy wéral,
ngeen génn di tébantu ni ay sélluy yar.

²¹ Yeenay joggi ñu bon ñi,
ñu doon pénd fi seen ron téstën,
keroog bés ba may jéfi.»

Aji Sax ji Boroom gàngoor yee ko wax.

²² «Bàyyileen xel ci yoonu Musaa, sama
jaam ba,

yoon wa ma ko dénkoon fa tundu Oreb,
ñeel Israyil gépp,
mu diy dogal ak àttey yoon.

²³ Maa ngii di yebal ci yeen, Ilyaas yonent
bi,

balaa bés sub Aji Sax jee teew,
di lu màgg te raglu.

²⁴ Mooy delloo xolu baay ca doom ja,
delloo xolu doom ca baay ba,
lu ko moy ma dikk duma réew mi, ba
faagaagal ko.»

Xibaaru jàmm bu Almasi Yeesu, ci jottlib Luug Ubbite gi

Luug ak Jéf ya benn téere la bu ëmb ñaari pàcc. Ñaar ñépp a indi ni Yàlla jékka wooye bànni Israyil ba noppi, doora woo mboolem xeet yi, ngir ñu barkeele ci Ibraayma.

Ci pàcc bu jékk bi, nettalib Luug Yerusalem la dox jëm, èttu kërug cosaanu askanu Yawut. Ñaareelu pàcc bi, Jéf ya, Yerusalem la bawoo, jëm ci xeeti àddina yi ci des, doora tėje fi Póol birale nguuru Yàlla ca dèkk ba ñuy wax Room, péeyu nguuru gu mag ga.

Pàcc bu jékk bi nettali dundu Almasi Yeesu, ni ko Luug indee, ñetti dog la.

Dog bi ci jiitu moo di liggéeyu Yeesu ca Galile ca Israyil, wetu bej-gannaaram.

Ñaareel bi moo di yoonam wu yàgg wa mu jême Yerusalem. Ci biir woowu yoon la dalale nit ñi ci àlluwa ju yees ju leen xamal ni Yàlla taxawale nguuram, te mu woroo ak ni kaan-fóorey Israyil dégge nguuru Yàlla ca yooyu jant.

Ñetteelu dog bi, ci la Luug indi ni Almasi Yeesu sarxee bakkanam ca Yerusalem, te gannaaw gi mu dekki, ba firndeel ne moo di buuru Israyil, te moo di Sangub àddina dëgg.

¹ Bare na ñu fexee bind ab nettalib mbir, yi sotti woon ci sunu biir, ² noonee nu ko jote ca ña ko fекke woon ca ndoorte la, te seede yooyu mujj doon jawriñi kàddug Yàlla. ³ Moo tax man it, ma fas laa yéenee bindal lépp ba mu jekk, yaw Tewofil mu tedd mi, gannaaw ba ma gëstoo mbir mépp, dale ko ca ndoorte la, ba mu leer nàññ. ⁴ Su ko defee nga xam xéll ne li ñu la jàngal, lu wér péjñ la.

Malaaka yégle na juddub Yaxya

⁵ Jant ya Erodd dee buuru réewum Yawut yi, ab sarxalkat la woon bu ñuy wax Sàkkaryaa, bokk ci làngu sarxalkat, yi askanoo ci Abiya, te soxnaam Elisabet askanoo ci Aaróona. ⁶ Ñoom ñaar ñépp a juboon, Yàlla seede, te mucc ayib ni ñuy jéfe santaane yeek ndigali yooni Boroom bi. ⁷ Amuñu woon doom nag, ndax Elisabet manul woona am doom, te it booba ñoom ñaar ñépp a dem ba mággaat.

⁸ Sàkkaryaa la làngam aye woon, muy def liggéeyu carxalam fa kanam Yàlla. ⁹ Ba ñu tegoo bant, na ko sarxalkat yi baaxoo woon, moom la bant ba dal, mu wara dugg

biir néegu Boroom bi, ngir taal fa saraxu cuuraay.

¹⁰ Mbooloo mépp nag a nga woon ca biti di julli, ca waxtuw saraxu cuuraay boobu.

¹¹ Ci biir loolu menn malaakam Boroom bi jekki feeñu Sàkkaryaa, ca wetu ndi-jooru sarxalukaayu cuuraay ba. ¹² Ba ko Sàkkaryaa gisee daa jaaxle, tiitaange jàpp ko. ¹³ Malaaka ma ne ko: «Sàkkaryaa, bul tiit, ndax sa ñaan nangu na. Elisabet sa soxna dina am doom ju góor, nanga ko tudde Yaxya. ¹⁴ Dinga am mbégte ak bannex, te ñu bareey béng ci juddoom, ¹⁵ ndax ku mágga lay doon, Boroom bi seede. Biiñ ak lènn luy màndee nag, du ko naan, Noo gu Sell gi mooy dale ca biiru ndeyam, solu ko ba fees. ¹⁶ Niti bànni Israyil ñu bare, moo leen di waññi ci Boroom bi seen Yàlla. ¹⁷ Mooy ndaw li koy jiitu, ànd ak leer ga ak xam-xam, ba woon ca Yonent Yàlla Ilyaa, ba waññi xolu baay ci doomam, waññi ku déggadi ci xelum aji jub, loolu yépp ngir waajal aw xeet ba ñu jekk ngir Boroom bi.»

¹⁸ Sàkkaryaa nag ne malaaka mi: «Lu may def ab takk ci loolu ba mu bir ma? Ndax man mággaat naa, te sama soxna it làq na ay fan.» ¹⁹ Malaaka ma ne ko: «Man maay Jibril miy taxaw fi kanam Yàlla. Dañu maa yónni ngir ma wax ak yaw, yégal la bii xibaaru jàmm. ²⁰ Léegi nag, dama ne, gannaaw gémuloo sama kàddu, giy jot, sotti, dinga luu te dootuloo mana wax, ba kera loolu di am.»

²¹ Ci biir loolu mbooloo maa ngay xaar Sàkkaryaa, jaaxle lool ndax yàggaayam ca biir néeg Yàlla ba. ²² Ba mu génee nag, manula wax ak ñoom. Ñu daldi xam ne am na lu ko feeñu ca néeg Yàlla ba. Ma nga leen di liyaar, manatula wax.

²³ Naka la Sàkkaryaa fégal ayu carxalam, daldi ñibbi. ²⁴ Gannaaw gi, soxnaam Elisabet ëmb. Lèlu na juróomi weer. Ma nga naan: ²⁵ «Lii Boroom bee ma ko defal ci jant yi mu ma geesoo, ba teggil ma sama gacce gi ci biir nit ñi!»

Jibril yégle na juddub Yeesu

²⁶ Ba Elisabet tolloo ci juróom benni weeram, ca la Yàlla yebal Jibril malaaka mi, dèkk bi ñuy wax Nasaret ca diiwaanu Galile, ²⁷ ci janq bu digoo séy ak waa ju ñuy wax Yuusufa te bokk ci waa kër Daawuda. Janq ba Maryaama lañu koy wax. ²⁸ Malaaka ma agsi ba ca moom, ne ko: «Jàmm nga am, yaw mi ñu baaxe, Boroom bi yaw la àndal.»

²⁹ Waxi malaaka ma nag jaaxal Maryaama, muy xalaat lu nuyoo boobu mana tekki. ³⁰ Malaaka ma ne ko: «Maryaama, bul tiit, ndax daje nga ak yiwu Yàlla. ³¹ Dinga ëmb, ba jur doom ju

góor; nanga ko tudde Yeesu. ³² Ku màgg lay doon, te dees na ko wooye Doomu Aji Kawe ji. Boroom bi Yàlla moo koy jagleel nguurug Daawuda maamam. ³³ Mooy nguuru fi kaw waa kër Yanqóoba ba fàww, te nguuram du foq mukk.»

³⁴ Ci kaw loolu Maryaama laaj malaaka mi ne ko: «Nu loolu di ame, te man xawma góor?» ³⁵ Malaaka mi ne ko: «Noo gu Sell gi mooy wàccsi ci yaw, dooley Aji Kawe ji yiir la. Moo tax itam ku Sell kiy juddoo ci yaw, dees na ko wooye Doomu Yàlla. ³⁶ Te kat Elisabet sa mbokk mi itam ëmb na doom ju góor te fekk ko màggat. Ki ñu doon wooye jigéen ju jaasir, mu ngi nii ci juróom benni weeram, ³⁷ ndax Yàlla, dara tëwu ko.» ³⁸ Maryaama daldi ne: «Maa ngi, di jaamub Boroom bi. Nii nga waxe, na ame noonu ci man.»

Ba loolu amee malaaka ma bàyyikoo ca moom, dem.

Maryaama seeti na Elisabet

³⁹ Ci fan yooyu la Maryaama fabu gaaw, jëm diiwaanu tund ya, ca dëkkub Yude, ⁴⁰ ba Sàkkaryaa dëkke. Mu agsi ca kër ga, nuyu Elisabet. ⁴¹ Naka la Elisabet dégg nuyoob Maryaama, doom ja mu ëmb yëngu ca biiram. Elisabet daldi feese Noo gu Sell gi. ⁴² Mu àddu ca kaw ne: «Yaa gëna barkeel ci jigéen ñi, sa doom ji nga ëmb it barkeel na! ⁴³ Ana ku ma doon ba sama ndeyu Sang di ma seetsi? ⁴⁴ Naka la sa kàddug nuyoo tàbbi sama nopp rekk, sama doom ji yëngu ci sama biir bi ndax béq. ⁴⁵ Ndokklee yaw mi gëm ne mbir mi ñu la yégal, te mu tukkee ci Boroom bi dina sotti!»

Maryaama woy na mbaaxu Yàlla

⁴⁶ Maryaama nag ne:
⁴⁷ «Sama xol laay màggale Boroom bi, samag noo laay bége Yàlla mi may musal,
⁴⁸ moo geesu bii jaamam bu tekkeedi, ba maasoo maas doxe fi wooye ma boroom mbég mi,
⁴⁹ nde Kiy Boroom doole moo ma defal jaloore,
 sellnga ñeel naw turam.
⁵⁰ «Yërmandeem a ñeel ay ragalkatam, maas ci kaw maas.
⁵¹ Dooley loxoom la defe ay jaloore, tasaare ñi jikkowoo réy-réylu,
⁵² wàcce buur yi ci seeni gàngune, yékkati baadoolo yi.
⁵³ Ñi xiif, mu reggal leen lu neex, ñi duunle, mu dàqe loxoy neen.
⁵⁴ Moo wallu bànni Israyil, jaamam, bàyyee ko xel yërmandeem,
⁵⁵ noonee mu ko dige woon sunuy maam, ñeel Ibraayma ak askanam ba fàww.»
⁵⁶ Maryaama toog na fa Elisabet lu wara tollook ñetti weer, sooga ñibbi.

Lu jëm ci juddub Yaxya

⁵⁷ Gannaaw gi Elisabet dem ba àppam mat, mu mucc, am doom ju góor. ⁵⁸ Dëkkandoom yaak ay bokkam yég noonu ko Boroom bi xéewalee yërmandeem, ñu bokk ak moom mbégte ma.

⁵⁹ Ba bés ba délsee, ñu dikk xarfalsi xale ba, bégg koo tudde Sàkkaryaa, dippee ko baayam. ⁶⁰ Yaayam nag ne leen: «Déet, Yaxya lay tudd.» ⁶¹ Ñu ne ko: «Waaye kenn ci say bokk tuddul noonu!»

⁶² Ci kaw loolu ñu liyaar baayam, ngir xam nu mu bégg ñu tudde xale bi. ⁶³ Sàkkaryaa laaj àlluwa, ñu jox ko, mu bind ci: «Yaxya mooy turam.» Ñépp waaru. ⁶⁴ Ca saa sa gémmiñ ga ubbiku, làmmiñ wa nangu, muy wax, daldi sant Yàlla. ⁶⁵ Ba loolu amee tiitaange dikkal mboolem ña leen séq, mbir moomu mépp nag doon waxtaan ca diiwaanu tundi Yude gépp. ⁶⁶ Ña ca dégg ñépp daldi bàyyi xel ca mbir ma, te naan: «Lu xale bii nara doon èllég?» ngir manoorey Boroom bee àndoon ak moom.

Sàkkaryaa sant na Yàlla

⁶⁷ Ci kaw loolu Sàkkaryaa baayu Yaxya feese Noo gu Sell gi, daldi tàmbalee biral kàddug waxyu, ne:

⁶⁸ «Cant ñeel na Boroom bi Yàllay Israyil, moo seetsi ñoñam, ba jot leen!
⁶⁹ Moo nu feeñalal Musalkat bu manoorewu,
 fi biir kër Daawuda jaamam ba,
⁷⁰ noonee mu ko waxe woon ca jant yu jëkk ya, yonentam yu sell ya woon jottli,
⁷¹ moo nu musal ci sunuy noon, jële nu ci sunu loxoy mboolem bañaale.
⁷² Moo jëfe yërmande ñeel sunuy maam, tey bàyyi xel kóllëreem gu sell,
⁷³ ak ngiñ la mu giñaloon sunu maam Ibraayma,
⁷⁴ ne moo nuy may nu mucce ci loxoy noon,
 ba man koo jaamoo xel mu dal
⁷⁵ ci biir sellnga ak njub ci kanamam, sunu giiru dund.
⁷⁶ «Ngóor si nag yaw, yonentu Aji Kawe ji lees lay wooye,
 nde yaay dox, jiitu Sang bi, xállal kow yoonam,
⁷⁷ ngir yégal ñoñam ag njot guy topp seen njéggalug bàkkaar.
⁷⁸ Sunu Yàllaa yaatu yërmande,
 moo nu fenkal ab jant,
⁷⁹ di niital ñi tooge biir lëndëm ak takkn-deeru ndee,
 di nu gindi, teg nu ci yoonu jàmm.»

⁸⁰ Ngóor sa nag di màgg, xel ma di yokku. Mu dèkk ca màndiŋ ma, ba bés ba mu feeñoò bànni Israyil.

2

Yeesu juddu na ca Betleyem

¹ Jant yooyu ndigal moo tukkee woon ci buur bu mag bu ñuy wax Sesaar Ogust. Mu ne na ñépp binduji ca limeef ya. ² Mbindu mooma mooy mu jèkk ma, yemook ba Kiriñus dee boroom réewum Siri. ³ Ci kaw loolu ñépp binduji, ku nekk ca sa dèkku cosaan. ⁴ Ku ñuy wax Yuusufa itam jóge Nasaret ca diiwaanu Galile, jëm ca diiwaanu Yude ca Betleyem, dèkk ba Daawuda cosaanoo, ndax ci waa kër Daawuda la askanam bokk. ⁵ Maryaama mi digook moom séy la àndal binduji, te fekk ko mu èmb. ⁶ Naka lañu dal Betleyem, waxtuw muccam agsi. ⁷ Mu am doom ju góor, mu dib taawam. Mu laxas ko, téral ko ca gàmbug jur ga*, ndax ñàkk fu ñu xaj ca néegu gan ba.

Malaaka feeñu na ay sàmm

⁸ Booba ay sàmm a nga ca gox boobee, di fanaanee wattu seenug jur. ⁹ Am malaakam Boroom bi jekki feeñu leen, leeru Boroom bi melax, wër leen, ñu tiit tiitaange lu réy. ¹⁰ Malaaka mi ne leen: «Buleen tiit, ndax kat maa leen indil xibaaru jàmm bu doon mbég mu réy, ñeel askan wépp. ¹¹ Bésuub tey jii ca dèkku Daawuda, juddule ngeen ab Musalkat, te mooy Almasi, di Sang bi. ¹² Li ngeen ciy def ab takk moo di: dingeen gis liir bu ñu laxas, téral ko ci gàmbug jur.»

¹³ Ca saa sa gàngooru asamaan gu mag ànd ak malaaka mi, di sàbbaal Yàlla, ne:

¹⁴ «Daraja ñeel na Yàlla fa asamaan sa gèna kawé,

jàmm ci kaw suuf ñeel ñi Yàlla baaxe.»

¹⁵ Ba malaaka ya bàyyikoo ca sàmm sa, dellu asamaan, ñuy wax ca seen biir, naan: «Nanu dem boog Betleyem, seeti la fa xew, te Boroom bi xamal nu ko.»

¹⁶ Ñu gaaw dem ba foofa, daldi gis Maryaama ak Yuusufa, ak liir ba tédd ca gàmbug jur ga. ¹⁷ Naka lañu leen gis, daldi leen xamal la ñu leen wax ca mbirum xale ba. ¹⁸ Mboolem ña dégg la leen sàmm sa wax nag waaru lool. ¹⁹ Teewul Maryaama moom, bàyyi woon na xel ci mbir moomu mépp, di ko xalaat ci xolam. ²⁰ Ba loolu amee sàmm sa dellu, di sàbbaal ak a sant Yàlla ci mboolem la ñu dégg, gis ko, te lépp ame noonee ñu leen ko waxe woon.

* ² 2:7 gàmbug jur ga: nit ñi ak jur gi ñoo daan bokk fu ñuy fanaan, doonte dañoò sàkkaloon jur gi bérab bu gèna suufe, gàmbug jur gi dox seen diggante ak nit, ñay féete fu gèna kawé. † **2:22** 2.22 setlu: ab diir lañu àppaloon wasin-bees gannaaw bu taawloo góor, bala moo yóbbu xale bi kër Yàlla ga, ngir def sarax yi setlu wasin-bees laaj. Seetal ci *Sarxalkat yi* 12.6-8.

Yóbbu nañu Yeesu ca kër Yàlla ga ca Yerusalem

²¹ Ba juróom ñetti fani xale bi matee, ñu xarfal ko, tudde ko Yeesu, na ko malaaka ma tudde woon, bala moo sosu.

²² Gannaaw ba seen fani setlu† matee, ni ko yoonu Musaa laaje, ñu yóbbu xale bi Yerusalem, ngir teewal ko fi kanam Boroom bi, ²³ noonee ñu ko binde ci yoonu Boroom bi ne: «Bépp taaw bu góor, dees koy tudde séddoo bu sell, ñeel Boroom bi.»

²⁴ Ñu yóbbaaale sarax bi ci war, ni ko yoonu Boroom bi santaanee: «ñaari pitaxu àll mbaa ñaari xati yu ndaw.»

Simeyon sàbbaal na Yàlla

²⁵ Amoon na nag ca Yerusalem ku ñuy wax Simeyon; ku juboon, ragal Yàlla, di séentu jamono ji nekinu bànni Israyil di ame ag tan, te Noo gu Sell gi àndoon ak moom. ²⁶ Ndéey nag tukkee ci Noo gu Sell gi, xamal ko ne ko du dee mukk te gisul Almasi bu Boroom bi. ²⁷ Ci kaw loolu mu dem ba ca biir kër Yàlla ga ci dooley Noo gu Sell gi. Gannaaw loolu waajuri Yeesu indi Yeesu ngir defal ko li aaday yoon wu laaj. ²⁸ Simeyon itam jël xale bi, leewu ko, daldi sàbbaal Yàlla, ne:

²⁹ «Léegi nag Buur Yàlla, yiwiil sab jaam, mu dem ak jàmm, noonee nga ko waxe woon.

³⁰ Nde saay gèt tegu na ci mucc gi nga dogal,

³¹ waajal ko fi kanam askan yépp,

³² mu dig leer, ñeel jaambur ñi, sagal Israyil sa ñoñ.»

³³ Baay bi ak ndey ji nag yéemu ci kàddu yooyu ñu wax ci xale bi. ³⁴ Ba loolu amee Simeyon ñaanal leen, ba noppi ne ndeyam Maryaama: «Dama ne, kii lañu yebal ngir sànkutey ñu bare mbaa seenug leqliku ci digg Israyil, ngir itam mu doon firnde ju ñuy gántal. ³⁵ Yaw nag, sab xol la aw naqar wu mel ni saamar di xar, ba ñu bare la seen xalaati biir xol di feeñ.»

Aana sant na Yàlla

³⁶ Jigéen ju ñuy wax Aana, ab yonent la woon ca Yerusalem, di doomu Fanuwel mi askanoo ci giirug Aser. Mag la woon lool. Ba muy janq la séy, nekk ak jèkkèram juróom ñaari at. ³⁷ Jèkkèr ja faatu, mu toog, séyaatul, ba booba mu amee juróom ñett fukki at ak ñeent (84). Daawul jóge ca kër Yàlla ga, koor ak julli la daan jaamoo guddi ak bèccég. ³⁸ Aana nag dikk moom it ca waxtu woowa, daldi delloo Yàlla njukkal. Ci kaw loolu muy waxtaane

mbirum xale bi ak mboolem ña doon séentu bésu goreelug Yerusalem.

³⁹ Ci kaw loolu ñu matal mboolem lu yoonu Boroom bi laaj, doora dellu Nasaret, seen dëkk ba ca diiwaanu Galile. ⁴⁰ Xale bi nag di magg, di dëgër, feese am xel, te yiwu Yàlla ànd ak moom.

Yeesu feñ na ca kër Yàlla ga

⁴¹ At mu jotaan nag waajuri Yeesu dem Yerusalem, ngir maggali bésu Mucc ba. ⁴² Ba Yeesu amee fukki at ak ñaar, ñu dem maggali na ñu ko baaxoo woon. ⁴³ Ba maggal ga tasee, ñu ñibbi, ngóor sa Yeesu moom des Yerusalem, te ay waajuram yéguñu ko. ⁴⁴ Ñu xalaat ne, Yeesu daa ànd ak ñu ñu bokkaloos yoon. Dox nañu bésu lëmm, door koo wëri ci seeni bokk ak seeni xame, ⁴⁵ te taxul ñu gis ko. Ñu daldi dellu Yerusalem, seeti ko.

⁴⁶ Ca gannaaw ëllëg sa lañu ko fekk ca kër Yàlla ga, mu toog ca digg jànglekat ya, di leen déglók a laaj. ⁴⁷ Mboolem ña ko dégg yéemu ci dégginan aki tontam. ⁴⁸ Ay waajuram gis ko, waaru. Yaayam ne ko: «Doom, li nga nu def nag? Maak sa baay a ngi jaaxle, di la seet!» ⁴⁹ Mu ne leen: «Lu ngeen may seete? Xamuleen ne sama kër Baay laa wara nekk?»

⁵⁰ Ay waajuram ñoom déggguñu kaddu googu mu leen wax. ⁵¹ Gannaaw loolu Yeesu ànd ak ñoom, dellu Nasaret, tey saxoo déggal ay waajuram. Yaayam nag takk mbir yooyu yépp ci xolam. ⁵² Yeesu moom, ma ngay magg ci dayo ak xel mu rafet, ak cérub yiw fi Yàlla ak nit ñi.

3

Yaxya waare na

¹ Ca fukkeelu at ak juróom ci nguurug buur bu mag ba Tibeer Sesaar, ba Poñsé Pilaat yilifee diiwaanu Yude, Erodd yilif diiwaanu Galile, Filib magam yilif diiwaanu Iture ak bu Tarakonit, Lisañas yilif Abilen, ² jant yooyu Anas ak Kayif dee sarxalkat yu mag ya, ca la kaddug Yàlla dikkal Yaxya doomu Sakkaryaa, ca mândiñ ma. ³ Yaxya dugg mboolem àll, bi wër dexu Yurdan, di waare lu jëm ci tubeel gu nit ñi wara fésale ag sóobu cim ndox, ngir ñu jéggal leen seeni bàkkaar.

⁴ Loolu lañu bind ci téereb waxi Yonent Yàlla Esayi ne:

«Baat a ngi xaaco ca mândiñ ma, naan: «Xàll-leen yoonu Boroom bi, jubal-leen ay xállam.

⁵ Xur yépp ay sèkke, tund wu magoo wu ndaw maasaloo,

yoon ya lunkoon, jubbantiku, ya ñagasoon, nooy,

⁶ ba wépp suux gis mucx gi Yàlla dogal.»

⁷ Yaxya nag di wax mbooloo may ñëw ngir mu sóob leen ci ndox, naan leen: «Yeen njurum jaan mee, ku leen artu, ba ngeen di daw sànj miy dikk?» ⁸ Kon nag jéfeleen jëf ju yelloo ag tuubeel, te baña nax seen bopp naan: «Nun, Ibraayma mooy sunu maam,» ndax maa leen ko wax, doj yii, Yàlla man na cee sakkal Ibraayma aw askan. ⁹ Te itam sémmiñ xáccil na reenu garab ba noppi. Kon nag gépp garab gu ci meññul doom yu baax, dees koy gor, sànni ca sawara sa.»

¹⁰ Mbooloo ma itam laaj ko ne ko: «Ana lu nu war nag?» ¹¹ Mu ne leen: «Ku am ñaari turki, na sédd ki amul. Ku am aw ñam itam, na defe noonu.» ¹² Ay juutikat itam dikk, ngir sóobusi; ñu ne Yaxya: «Sëriñ bi, ana lu nu war?» ¹³ Mu ne leen: «Xanaa baña sàkku lenn lu moy li jaadu.» ¹⁴ Ay takk-der itam ne ko: «Nun nag, nu nuy def?» Mu ne leen: «Buleen néewal kenn doole, mbaa di duural kenn ngir jëlal ko dara; doylloo leen seen peyoor.»

¹⁵ Ci kaw loolu askan wa di séentu, ñëpp di seetaat ci seen xel, ndax Yaxya mooy Almasi. ¹⁶ Yaxya wax leen ñoom ñëpp ne leen: «Man de ci ndox laa leen di sóob. Waaye ku ma sut a ngi ñëw, kooku, buumi caraxam sax, yeyoowuma ko koo feccil. Moom, ci Noo gu Sell gi ak sawara la leen di sóob* . ¹⁷ Ab layoom a ngi ci loxoom, mooy jéri dagggaam, ba mu set wecc; pepp mi lay fat cim sàqam, waaye xatax bi, da koy lakk ci sawara su dul fey mukk.»

¹⁸ Bare na yeneen dénkaane yu Yaxya doon xamale nit ñi xibaaru jàmm bi. ¹⁹ Erodd boroom diiwaan ba nag, Yaxya sikkoon na ko ndax Erojadd jabaru magam ja mu nekkaloon, ak mboolem yeneen ñaawtéef yu Erodd def. ²⁰ Mu tegati leneen ca loolu lépp: jàpp Yaxya, téj ca kaso ba.

Yaxya sóob na Yeesu ci ndox

²¹ Noonu Yaxya doon sóobe ñëpp cim ndox, ni la deme ba Yeesu dikk, mu sóob ko ci ndox. Ci biir loolu Yeesu yékkati kaddug ñaan, asamaan ubbiku. ²² Ba loolu amee Noo gu Sell gi moo bindoo ni pitax, wàcc ci kawam, baat jibe asamaan, ne: «Yaa di sama Doom, sama soppe; yaa may bannéexal.»

Lu jëm ci cosaanu Yeesu Almasi

* **3:16** 3.16 Sóobu gi ci Noo gu Sell gi ak ci sawara moo leen di sol doole ju bawoo ci Noo gu Sell gi, ak itam setal leen ni sawara di setale weñ gu am lu ko rax. Sawara dina taxawe itam cérú mbugal mu ñeel ñi déggalul Yàlla. Seetal ci 12.49 ak jëf ya 2.3.

²³ Yeesu ci boppam ba muy door, amoon na lu tollu ci fanweeri at, di doomu Yuusufa, ni ko xel mana jàppe.

Yuusufa, Eli mooy baayam, ²⁴ Eli, Matat.

Matat, Lewi; Lewi, Melki;

Melki, Yanayi; Yanayi, Yuusufa;

²⁵ Yuusufa, Matacas; Matacas, Amos; Amos, Nawum; Nawum, Esli; Esli, Nagayi.

²⁶ Nagayi, Maat; Maat, Matacas; Matacas, Semeyin; Semeyin, Yoseg; Yoseg, Yoda.

²⁷ Yoda, Yowanan; Yowanan, Resa; Resa, Sorobabel; Sorobabel, Selcel; Selcel, Neri;

²⁸ Neri, Melki; Melki, Adi; Adi, Kosam; Kosam, Elmadam; Elmadam, Er.

²⁹ Er, Yeesu; Yeesu, Elyeser; Elyeser, Yorim; Yorim, Matat; Matat, Lewi;

³⁰ Lewi, Simeyon; Simeyon, Yuda; Yuda, Yuusufa; Yuusufa, Yonam; Yonam, Elyakim.

³¹ Elyakim, Meleya; Meleya, Mena;

Mena, Matata; Matata, Natan;

Natan, Daawuda. ³² Daawuda mooy doomu Yese;

Yese, Obedd; Obedd, Bowas; Bowas, Sala; Sala, Nason.

³³ Nason, Aminadab; Aminadab, Admin; Admin, Arni;

Arni, Ebron; Ebron, Peres; Peres, Yuda;

³⁴ Yuda, Yanqóoba; Yanqóoba, Isaaxa; Isaaxa, Ibraayma;

Ibraayma, Teraa; Teraa, Naxor;

³⁵ Naxor, Serug; Serug, Rew; Rew, Peleg; Peleg, Eber; Eber, Sela;

³⁶ Sela, Kenan; Kenan, Arpagsádd; Arpagsádd, Sem; Sem, Nóoyin; Nóoyin, Lemeg;

³⁷ Lemeg, Matusalem; Matusalem, Enog; Enog,

Yeredd; Yeredd, Malaleel; Malaleel, Kenan;

³⁸ Kenan, Enos; Enos, Set; Set, Aadama;

Aadama, Yàlla.

4

Yeesu dékku na pexey Seytaane

¹ Yeesu moo feese woon Noo gu Sell gi, bàyyikoo dexu Yurdan, ci njiital Noo gi, ca biir màndiŋ ma. ² Ñeent fukki fan la ko fa Seytaane fiir, lekkul dara diir boobu bépp. Gannaaw ba fan yooyu wéyee, mu xiif.

³ Seytaane nag ne ko: «Ndegam yaa di Doomu Yàlla, neel doj wii mu soppliku mburu.» ⁴ Yeesu ne ko: «Bindees na ne du aw ñam donj la nit di dunde.»

⁵ Seytaane yéegé na ko itam, won ko mboolem nguuri áddina, ci xef ak xippi.

⁶ Seytaane ne Yeesu: «Yaw laay may mboolem kilifteef gi ak daraja ji mu ándal, ndax man lees ko jox, te ku ma soob

laa koy may. ⁷ Kon nag soo ma sujjootalée, yaa moom lépp.» ⁸ Yeesu ne ko: «Bindees na ne: “Boroom bi sa Yàlla ngay sujjootal, te moom donj ngay jaamu.”»

⁹ Seytaane yóbbu na ko Yerusalem, aj ko ca njobbaxtalú kër Yàlla ga, ne ko: «Ndega yaa di Doomu Yàlla, tébeel fi, wàcc, ¹⁰ ndax bindees na ne:

“Ay malaakaam lay jox ndigal ci sa mbir, ñu sàmm la, ¹¹ te seeni loxo lañu lay leewoo,

ba doo fakktaloo aw doj.”»

¹² Yeesu ne ko: «Bindees na ne: “Bul seetlu Boroom bi sa Yàlla.”»

¹³ Seytaane lalal na Yeesu gépp fiir ba sottal, doora dem, bàyyi ko ab diir.

Lu jëm ci Yeesu fa Nasaret

¹⁴ Ba loolu amee Yeesu dellu Galile ci manoorey Noo gi, ab jëwam nag law ca diiwaan ba bépp ba mu daj. ¹⁵ Muy jàngle ca seeni jàngu, ñépp di ko kañ.

¹⁶ Yeesu moo dikkoon Nasaret ga mu fekk baax, daldi dugg ca jàngu ba, na mu ko baaxoo woon ci bésug Noflaay. Mu taxaw ngir biral ab dog. ¹⁷ Ñu jox ko téereb Yonent Yàlla Esayi. Mu ubbi téere bi, gis dog bi ñu bind ne:

¹⁸ «Noowug Boroom baa ngi fi sama kaw, moo ma fal,

ngir ma yégal néew-doole yi xibaaru jàmm bi.

Da maa yebal ngir ma yégal jaam yi ne dees na leen goreel,

yégal gumba yi ne dinañu gis, yégal ñi ñu not, ne dees na leen jot,

¹⁹ tey yégle atum yiw wu Boroom bi.»

²⁰ Ci kaw loolu mu ub téere bi, delloo ko jawriñ ba, daldi toog. Ña ca jàngu ba ñépp nag ne ko jàkk. ²¹ Mu áddu, ne leen: «Tey jii la mbind mii mat, ngeen dégg.» ²² Ñépp a doon seedeel Yeesu lu rafet, tey yéemu ci kàdduy yiw yi tukkee ci gémmiñam. Ñu naan: «Xanaa kii du doomu Yuusufa ji?»

²³ Mu ne leen: «Xam naa ne dingeen ma waxal waxin wi ñu naan: “Fajkat bi, fajal sa bopp.” Mboolem li nu dégg ne moo xew Kapernawum, def ko fi ci sa réewum bopp itam.» ²⁴ Mu neeti: «Maa leen ko wax déy, amul benn yonent bu ñu teral ci réewum boppam. ²⁵ Maa leen wax ne liy dégg moo di, ca jamonoy Ilyaas, ba asamaan téjoo diiru ñetti at ak juróom benni weer, ba xiif bu metti am ca réew mépp, ay jëtun ñu baree nga woon ca Israyil. ²⁶ Moona du kenn ci ñoom ku ñu yebal Ilyaas ca moom ku moy jëtun ba dëkke Sarebta, ca Sidon. ²⁷ Jamonoy Yonent Yàlla Alyaasa itam, ay gaana yu baree nga woon ca Israyil. Waaye fajeesu ci kenn ku moy Naaman, waa Siri ba.»

²⁸ Ba mboolem waa jàngu ba déggee loolu dañoo mer ba fees. ²⁹ Ñu jóg, bëmëx ko ba génne ko dëkk ba, yóbbu ko ca kéméju tund, wa seen dëkk ba sance, ngir xalab ko ci suuf. ³⁰ Teewul moom mu jaare ci seen biir, dem yoonam.

Yeesu faj na ku rab jàpp

³¹ Ba mu ko defee Yeesu dem Kaper-nawum, ab dëkk ca diiwaanu Galile, di leen jàngal ca bési Noflaay ya. ³² Nit ña nag yéemu ca njangleem, ndax sañ-sañ ba muy waxe. ³³ Ndeke foofa ca jàngu ba, jenn waay ju rab jàpp a nga fa woon. Waa ji jekki xaacu, ne: ³⁴ «Moo yaw Yeesum Nasaret, lu nu joteek yaw? Alagsi nu mooy say tánk? Xam naa yaa di kan, yaa di Aji Sell ju Yàlla ji!» ³⁵ Yeesu nag gëdd ko, ne ko: «Noppil te génn nit ki!» Rab wa daaneel nit ki ca digg mbooloo ma, doora génn te gaafu ko fenn.

³⁶ Ba loolu amee ñépp a waaru, di wax ci seen biir, naan: «Gii kàddu lu mu doon? Moom de sañ-sañ ak xam-xam lay joxe rab yi ndigal, ñu génn.» ³⁷ Coowal Yeesu nag law ba fépp fu bokk ca diiwaan ba.

Yeesu faj na jarag yu bare

³⁸ Yeesu jóge jàngu ba, dem kër Simon, daldi fekk yaayu jabaru Simon and ak tàngooru yaram wu réy. Ñu ñaan ci Yeesu ndimbal. ³⁹ Mu dikk, tiim soxna sa, daldi gëdd tàngooru yaram wa, tàngoor wa teqlikook moom. Soxna sa jóg ca saa sa, di leen toptoo.

⁴⁰ Ba jant sowee, mboolem ña amoon ay jarag yu ame ay jàngoroy jàngoro, daldi leen indil Yeesu. Moom it, mu teg kenn ku ci nekk ay loxoom, wéral la. ⁴¹ Ay rab itam di génn ñu bare, di yuuxu, te naan: «Yaay Doomu Yàlla!» Teewul mu gëdd leen, aaye leen ñu wax, ndax xamoon nañu ne mooy Almasi.

⁴² Njël gu jëkk ca èllëg sa la Yeesu génn dëkk ba, dem ba bérab bu wéet. Mbooloo ma nag di ko seet, ba dikk, di ko téye, bañ mu dem, ba leen. ⁴³ Mu ne leen: «Yeneen dëkk yeet, war na ma faa yégleji xibaaru jàmm bu nguug Yàlla, ndax loolu lañu ma yebale.» ⁴⁴ Ci kaw loolu muy waare ca jànguy diiwaanu Yude.

5

Yeesu woo na ay taalibe

¹ Yeesoo taxawoon ca tàkkal dexu Senesaret*, mbooloo ma tancaloo ci kawam, di déglu kàddug Yàlla. ² Ci biir loolu mu gis ñaari gaal yu taxaw ci tàkk gi, nappkat ya ca wacce, di fóot seeni mbaal. ³ Mu

dugg ci genn gaal gi, muy gu Simon. Mu ñaan ko mu bëmëx ba dand tefes gi as lëf. Mu defal ko noonu, Yeesu toog, tàmbalee jàngal mbooloo ma fa mu tollu ca biir gaal ga.

⁴ Naka la jàngle ba noppi, ne Simon: «Bëmëxal ba ca xóote ba, te ngeen sànni seeni mbaal ba jàpp.» ⁵ Simon ne ko: «Njaatige, coono lanu fanaane biig te jàppunu dara. Xanaa ma sànni ko rekk ci sa ndigal.»

⁶ Naka lañu sànni mbaal yi, daldi jàpp jën yu baree bare, ba mbaal ya di xëtt. ⁷ Ba loolu amee ñu liyaar seen moroom, ya ca geneen gaal ga, ngir ñu dimbalisi leen. Ñu dikk, yebandook ñoom, feesal ñaari gaal yépp, ba ñuy bégga suux. ⁸ Simon Piyeer nag gis loolu, daldi sukk fa kanam Yeesu, ne ko: «Sang bi, ngalla sore ma, ngir man nitu bàkkaarkat laa!», ⁹ ndax tiitaange lu ko jàpp, mook mboolem ña mu àndal, ca jën yu bare ya ñu jàpp. ¹⁰ Yanqóoba ak Yowaan doomi Sebede ya mu bokkaloon liggéey ba itam noonu lañu tiite. Yeesu ne Simon: «Bul ragal dara; gannaaw-si-tey, ay nit ngay napp.» ¹¹ Ci kaw loolu ñu teeral gaal ya ca tefes ga, daldi bàyyi lépp, topp ca moom.

Yeesu faj na ku gaana

¹² Yeesoo nekkoon cib dëkk, ndeke jenn waay a nga fa, ju jàngoroy ngaana dajal yaram wa. Ba mu gisee Yeesu, daa daanu, dépp jëem ci suuf, sarxu ko, ne: «Sang bi, su la soobee, man nga maa setal.» ¹³ Yeesu tàllal loxoom, laal ko ne: «Soob na ma, setal.» Ca saa sa ngaana ga teqlikook moom. ¹⁴ Yeesu dénk ko ne ko: «Bu ko wax kenn, demal rekk ca sarxalkat ba, ngir mu seet la, te nga génne sa jooxeb setlu, ni ko yoonu Musaa santaanee, muy firnde ci ñoom†.» ¹⁵ Teewul jëwub Yeesu gënatee law. Mbooloo yu bare daje, di ko déglu tey faju, ba tàggook seeni jàngoro. ¹⁶ Moom nag muy rocceekuy dem ba ci bérab yu wéet, di fa ñaaneji.

Yeesu faj na ab lafañ

¹⁷ Yeesu moo doon jàngle bés, fu ay Farisen ak ay jànglekati yoonu Musaa tooqe, jóge ca mboolem dëkki Galile ak Yude ak Yerusalem, te manoorey Boroom bi teew faak moom, ngir faj jarag ja.

¹⁸ Ci biir loolu ay nit ne jalañ, jàppoo ab lafañ bu ñu téral cig laltu. Ñu di ko wuta dugal, ngir téral ko ca kanam Yeesu. ¹⁹ Waaye gisuñu fu ñu koy awale ndax mbooloo ma. Ñu yéeg ca kaw néeg ba, xeddi lenn ca xadd ba, yoor waa jaak

* 5:1 5.1 dexu Senesaret mooy dexu Galile ba tey. † 5:14 5.14 Ci yoonu Musaa, jàngoroy der juy law ju mel ni ngaana sobe la woon ca ka mu dal, te du set li feek wérul. Seetal ci *Sarxalkat* yi 13.45-46; 14.1-32.

laltu ga, wàcce ko ca digg ba, fa kanam Yeesu. ²⁰ Yeesu nag gis seen ngem, daldi ne lafañ ba: «Mbokk mi, jéggalees na la say bàkkaar.»

²¹ Firikati yoonu Musaa yi ak Farisen yi tàmbalee nàttable ci seen xel, naan: «Kii di saaga Yàlla mooy kan? Ana ku mana jéggaley bàkkaar ku dul Yàlla donj?»

²² Yeesu nag xam la ñuy nàttable ci seen xel, daldi àddu, ne leen: «Lu ngeen di nàttable ci seen xel? ²³ Ana lu gëna yomb ci yii yaar: ne «Jéggalees na la say bàkkaar,» am ne: «Jógal te dox?» ²⁴ Kon nag dingeen xam ne Doomu nit ki am na ci kaw suuf, sañ-sañ jéggale ay bàkkaar.» Mu ne lafañ ba: «Dama ne, jógal, jël sag laltu te dem ñibbi.» ²⁵ Nit ka daldi ne ñokket ca kanam ñépp, jël laltu ga mu téddoon, jëm kërám, di sàbbaal Yàlla. ²⁶ Ba loolu amee mbooloo mépp a neey, di sàbbaal Yàlla, tiitaange jàpp leen, ñu naan: «Gis nanu tey mbir yu tiiñ am xel.»

Yeesu woo na Lewi

²⁷ Gannaaw loolu Yeesu génn, gis ab juutikat bu ñuy wax Lewi, mu toog ca juuti ba. Mu ne ko: «Kaay, topp ma.» ²⁸ Lewi jóg, bàyyi lépp, topp ca moom. ²⁹ Ci kaw loolu Lewi waajalal ko bernde ju réy ca kërám. Mbooloo mu bare teew, ay juutikat ak yeneen gan, ñu bokk toog, di lekk. ³⁰ Farisen yi ak seeni firikat nag di xultu ci kaw taalibey Yeesu yi, ne leen: «Lu tax ngeen di lekkandoo ak a naanandoo ak juutikat yeek bàkkaaraki yi?» ³¹ Yeesu ne leen: «Du ñi wér ñoo soxla fajkat, ñi wéradi ñoo ko soxla. ³² Du ñi jub nag laa woosi, bàkkaaraki yi laay woo, ngir jëme leen cig tuubeel.»

Koor du wartéef ci gëmkatub Yeesu

³³ Dañoo wax Yeesu, ne ko: «Taalibey Yaxya de, dinañu faral di woor; di julli. Farisen yi it noonu, waaye sa ñoñ, lekk ak a naan lañu wéye.» ³⁴ Yeesu ne leen: «Ndax man ngeena woorloo ay gan ñu wàlli ag céet, li feek boroom séet biy teew ci seen biir? ³⁵ Waaye ay bés a ngi ñëw, dees na jële boroom séet bi ci seen biir. Kera bés yooyu nag, dinañu woor.»

³⁶ Yeesu léebati leen, ne leen: «Mbubb mu bees, deesu ci xotti ab sekkit, ngir daaxe ko mbubb mu ràpp. Lu ko moy mbubb mu bees mi xottiku ba noppi, te du tax sekkit wu bees wi ànd ak mbubb mi ràpp. ³⁷ Te it mbuus yu ràpp, deesu ci duy biiñ bu bees. Lu ko moy biiñ bu bees bi fácc mbuus yi; biiñ bi tuuru, mbuus yi yàqu. ³⁸ Biiñ bu bees daal, ci mbuus mu bees lees koy denc. ³⁹ Te itam deesul naan

biiñ bu yàgg, di bëggati bu bees, xanaa nga ne: «Bu yàgg bee baax†.»

6

Bésub Noflaay, Yeesu mooy boroom

¹ Bésub Noflaay la woon, Yeesu doon jaare ay tool yu ñor, taalibeem ya fàqe ca ay gub, di boxom, di lekk. ² Ñenn ca Farisen ya ne leen: «Lu waral ngeen di def lu yoon mayewul ci bésub Noflaay?» ³ Yeesu ne leen: «Xanaa jànguleen la Daawuda defoon, ba mu xiifee, moom, ak ña mu àndaloon? ⁴ Ba mu duggee ca kër Yàlla ga, mburum teewal ma la jël, lekk, jox ca ña mu àndal, te yoon mayewul kenn ku ca lekk ku dul sarxalkati yi.» ⁵ Mu neeti leen: «Bésub Noflaay, Doomu nit ki mooy boroom.»

Yeesu faj na nit ku loxoom làggi

⁶ Beneen bésub Noflaay, Yeesu dugg ca jàngu ba, di jàngle. Jenn waay ju loxol ndijooram làggi ma nga fa woon. ⁷ Firikati yooni Musaa yaak Farisen yaa ngay xool Yeesu, ba xam ndax dina ko faj ca bésub Noflaay ba, ngir ñu am lu ñu ko tuumaale. ⁸ Yeesu nag xam seen xalaat, daldi ne boroom loxo ba: «Jógal taxaw fii ci digg bi.» Mu jóg taxaw. ⁹ Yeesu ne leen: «Laaj naa leen, ana lu yoon maye ci bésub Noflaay; def lu baax am lu bon? Musal bakkan am lore?» ¹⁰ Ci kaw loolu mu dawal bëtam, xool ña ko yéew ñépp, ba noppi ne waa ja: «Tállalal sa loxo.» Mu tàllal, loxo ba wér. ¹¹ Ñu mer nag ba fees, di diisoo ci seen biir nu ñuy def ak Yeesu.

Yeesu tànn na fukki ndaw ak ñaar

¹² Fan yooyu la Yeesu dem kaw tund wa ngir ñaani fa; mu fanaane faa ñaan ci Yàlla. ¹³ Ba bët setee, mu woo ay taalibeem, tànn ca fukk ak ñaar ñii, tudde leen ay ndawam:

¹⁴ Simon mi Yeesuy wooye itam Piyeer, ak Àndre mi bokk ak Piyeer ndey ak baay,

ak Yanqóoba ak Yowaan,
ak Filib ak Bartelemi,

¹⁵ ak Macé ak Tomaa,

ak Yanqóoba doomu Alfe,

ak Simon mi ñuy wax farlukatu moom-sa-réew,

¹⁶ ak Yuda doomu Yanqóoba,

ak Yuda Iskaryo ma mujj wor.

Nekkinu tey, yoolub èllég

¹⁷ Ci kaw loolu Yeesu ànd ak ñoom, wàcc, daldi taxaw ca joor ga. Ay taalibeem yu baree nga fa woon ak mbooloo mu réya réy: ay nitü Yude gépp, ak Yerusalem ak Tir ak Sidon, dëkki wetu tefes ga. ¹⁸ Ñu

† 5:39 5.39 Biiñ, nee ñu lu mu gëna yàgg rekk moo gën.

dikk, di ko déglu tey faju ba tàggook seeni jàngoro. Ñi rab jàpp it, wér. ¹⁹ Mbooloo mépp a ko doon wuta laal ndax leer guy bàyyikoo ca moom, di faj ñépp.

²⁰ Yeesu nag xool ay taalibeem, ne leen: «Ndokklee yeen ñi néewle, nde nguurug Yàlla, yeenay boroom.

²¹ Ndokklee yeen ñi xiif tey, nde dingeen regg.

Ndokklee yeen ñiy jooy tey, nde dingeen ree.

²² Ndokklee yeen, bu leen nit ñi bañee, daggook yeen, saaga leen, sikkal seen der ndax Doomu nit ki. ²³ Bésub keroog, bégleen te bânneexu bay fecc ndax seen yoolub èllég bu réy, nde noonu la seen maami bañ yooyu daan def ak yonent ya.

²⁴ Waaye wóoy ngalla yeen ñi barele, ndax neexle ngeen ba noppi.

²⁵ Wóoy ngalla yeen ñi regg tey, ndax dingeen xiif èllég.

Wóoy yeen ñiy ree tey, ndax dingeen tiislu, dingeen jooy.

²⁶ Wóoy ngalla yeen, bu leen ñépp dee waxal lu baax, ndax noonu rekk la maami ñooñu daan jêfe ak yonenti caaxaan ya.

Soppleen seeni noon

²⁷ «Yeen ñi may déglu, dama ne, seeni noon, soppleen leen, seeni bañ, defalleen leen lu baax. ²⁸ Ñi leen di móolu, yéeneleen leen lu baax, ñi leen di soxore, ñaanal-leen leen. ²⁹ Ku leen talaata cib lex, dékkleen ko ba ca des. Ku nangu seen mbubb mu mag, buleen ko teree jélaale seenub turki. ³⁰ Képp ku leen ñaan, maybeen ko; ku nangu seen yéf, buleen ko ko laaj. ³¹ Lu ngeen bégg nit ñi defal leen ko nag, nangeen leen ko defale noonu.

³² «Su dee ñi leen sopp donj ngeen sopp, ana lu ngeen ci wara yooloo? Bàkkaarkat yi sax, ñi leen sopp, sopp nañu leen. ³³ Te su dee ñi leen defal lu baax donj ngeen defal lu baax, ana lu ngeen ci wara yooloo? Bàkkaarkat yeet noonu donj lañuy jêfe.

³⁴ Te su dee ñi ngeen yaakaare ndelloo donj ngeen lebal, ana lu ngeen ci wara yooloo? Bàkkaarkat yi it, yaakaare ndelloo lu mat sèkk moo tax ñuy leblante. ³⁵ Yeen kay, soppleen seeni noon, defleen lu baax, lebleleen te baña yaakaare ndelloo. Su boobaa seenub yool réy, ngeen di doomi Aji Kawe ji, ndax moom de ñi santadi te bon, moo leen di baaxe. ³⁶ Ni seen Baay ame yërmande nag, nangeen ni ame yërmande.

³⁷ «Buleen di sikkale, su boobaa deesuleen sikkal. Buleen yeyale kenn ab daan, ngir ñu bañ leena yeyale ab daan. Baleleen, ñu baal leen. ³⁸ Mayeleen, ñu may leen; natt bu duun bu ñu rokkas, yéngal, mu fees bay tuuru, moom lees

leen di naddil ci seen mbubb. Ndax natt bi ngeen di nattale, moom lees leen di nattale.»

Ndimbal, koo tane

³⁹ Yeesu léebati leen, ne leen: «Ndax gumba dina wommat gumba? Mbaa duñu ànd tàbbi ci kàmb? ⁴⁰ Taalibe sutul sériñam, waaye bépp taalibe bu jàng ba wàcc, tollook sériñam.

⁴¹ «Ana looy xoole xatax bi ci sa bētu mbokk te gänj gi ci sa bētu bopp gisuloo ko? ⁴² Ana noo mane ne sa mbokk: “Mbokk mee, xaaral, ma dindil la xatax gi ci sa bêt,” te yaw ci sa bopp gänj gi ci sa bêt, gisuloo ko? Jinigalkat bi! Jèkkala dindi gänj gi ci sa bêt. Su boobaa dinga gis bu baax xatax gi ci sa bētu mbokk, ba dindil ko ko.

Doom ja, ndey ja

⁴³ «Garab gu neex du meññ doom yu naqari, te garab gu naqari it du meññ doom yu neex. ⁴⁴ Garab gu nekk, meññefam lees koy xàmme. Ag dédd, deesu ci witte doomi figg; ay dagg it, deesu ci jële doomi reseñ. ⁴⁵ Nit ku baax, dencub ngéneel ba ca biir xolam, ca lay jële lu baax la mu sàlloo; nit ku bon it, dencub safaan ba ca biir xolam, ca lay jële safaan ba mu sàlloo. Gémmiñ daal, la fees xolu boroom lay wax.

Ñaari tabaxkat a ngi

⁴⁶ «Ana lu ngeen ma naa “Sang bi, Sang bi,” te jéfewuleen samay wax? ⁴⁷ Képp ku ñew ci man, dégg samay wax te di ko jêfe, dinaa leen won nu muy mel. ⁴⁸ Dafa mel ni nit kiy tabax kër, gasa gas ba mu xóot, daldi samp kenu ga ca kaw doj wa ca suuf. Mbënn ma dikk, wal ma rëkk kër gaak doole te manu koo yéngal ndax tabax bu wér ba ñu ko tabaxe. ⁴⁹ Waaye ku dégg te jéfewoo, dangaa mel ni nit ku tabax kër ci suuf, te amul kenu. Wal maa koy rëkk ak doole, kër ga jekki mabb, yàqu yaxeeet.»

7

Njiitu takk-der ba yooloo na ngëmam

¹ Yeesu wax na kaddoom googu gépp, askan way dégg, mu doora jàll biir Kaper-nawum. ² Foofa nag ab njiitu takk-der bu waa Room a nga fa woon, ab jaamam wop-poon bay bénga dee, te njiit la soppoon ko lool. ³ Ba njiit la déggee mbiri Yeesu, daa yebal ñenn ca magi Yawuti dékk ba ca moom, ñaan ko ngir mu dikk xettli jaamam. ⁴ Magi dékk ba agsi ca Yeesu, tinu koo tinu, ne ko: «Ki nu yebal ci yaw de, yellow na sa ndimbal, ⁵ ndax ku sopp sunuw xeet la, te sunu jàngu bi sax, moo nu ko tabaxal.»

⁶ Yeesu daldi ànd ak ñoom. Naka la jubsi kër ga, njiit la yóbbante ay xaritam kàddoom, ñu gatandu Yeesu, ne ko: «Sang bi, jarul ngay sonn, ndax sab tànki sama biir kër, man yeyoowuma ko.» ⁷ Moo ma la tee gatandul sama bopp, ndax jàpp naa ne loolu jomb na ma. Waxal genn kàddu rekk, sama surga wér. ⁸ Ndax man ci sama bopp ci kilifteef laa ténku, te man itam ay takk-der a ngi ci sama ndigal. Su ma nee kii: «Demal,» mu dem. Ma ne kee: «Néwal,» mu ñéw. Te sama jaam bu ma ne: «Defal lii,» mu def ko.»

⁹ Ba Yeesu déggee loolu daa yéemu ca njiit la. Mu ne gees mbooloo ma topp ga moom, ne leen: «Dama ne, gii ngém gu réy, bànni Israyil sax, gisuma ko ci.» ¹⁰ Ndaw ya daldi dellu ca kër ga, fekk jaam ba wér.

Yeesu dekkal na doomu jétun ba

¹¹ La ca tegu Yeesu demati dëkk bu ñuy wax Nayin, ay taalibeem ak mbooloo mu bare ànd ak moom. ¹² Ba mu jubsee buntu dëkk ba, yemul ci lu moy ab rob, ka dee di doomu jétun, te moom rekk la amoon. Niti dëkk ba def mbooloo mu bare, ànd ak soxna sa. ¹³ Sang bi nag gis ko, ñeewante ko, ne ko: «Bul jooy.» ¹⁴ Mu dikk ba teg loxoom ca jaat ga, ña ko jàppoo taxaw. Mu ne: «Ngóor si, yaw laay wax, jógal.» ¹⁵ Néew ba jóg toog, di wax, mu delloo ko yaay ja. ¹⁶ Tiitaange nag jàpp ñépp, ñu sàbbaal Yàlla, naan: «Yonent bu mag feeñ na ci sunu biir!» te naan «Yàllaa wallusi ñoñam!»

¹⁷ Coow loolu nag law ca mboolem réewum Yawut ak mboolem fa ko wér.

Yeesu jàngle na ci mbirum Yaxya

¹⁸ Ci kaw loolu taalibe Yaxya àgge Yaxya loolu lépp. Mu woo ñaar ca taalibe ya, ¹⁹ yebal leen ci Sang bi, laaj ko ne ko: «Ndax yaw yaa di Ki wara ñéw, am keneen lanuy séentu?» ²⁰ Taalibe ya dikk ne ko: «Yaxya moo nu yebal, di la laaj ndax yaa di Ki wara ñéw, am keneen lanuy séentu?»

²¹ Waxtu woowa tembe nag Yeesu faj na ñu bare, tàggale leen aki jàngoro aki jagadi aki rab, silmaxa yu bare, mu baaxe leen, ñuy gis. ²² Mu ne ndaw ya: «Li ngeen gis te dégg ko, demleen àgge ko Yaxya. Silmaxa yaa ngi gis, lafañ yi dox, gaana yi wér, t'ex yiy dégg, néew yi dekki, néew-doole ñi dégg xibaaru jàmm bi*.» ²³ Ku ma taxul nga xàcc sa péete ak man nag, ndokklee yaw.»

²⁴ Ba ndawi Yaxya demee, Yeesu daldi wax ak mbooloo ma ci mbirum Yaxya, ne

leen: «Lu ngeen seetaani woon ca màndinj ma? Xanaa barax bu ngelaw liy yèngal?»

²⁵ Kon lu ngeen seetaani woon? Boroom yére yu rafet? Waaye boroom yére yu yànj yooyu te seen dund bakkane, ci kéri buur lañu dëkk. ²⁶ Kon nag lu ngeen seetaani woon? Ab yonent? Waawaaw, maa leen ko wax, te wees na ab yonent sax. ²⁷ Ci moom moomu lañu bindoon ne:

“Maa ngii di yebal sama ndaw, mu jiitu la, xállal la saw yoon.”

²⁸ Maa leen ko wax, li jigéen jur, kenn sutu ci Yaxya. Waaye ki gèna tuut ci nguurg Yàlla sax moo ko su.»

²⁹ Mboolem ña déglu Yeesu, ba ca juutikat ya sax, déggal nañu Yàlla, ndax nangu nañoo sóobu sóobeb Yaxya. ³⁰ Waaye Farisen ya ak xamkati yoon ya ñoo gántal la leen Yàlla nammaloon, ba Yaxya sóobu leen ci ndox.

³¹ Yeesu neeti: «Ana kon lu may niruleel niti tey jii? Ana lu ñuy nirool?» ³² Ñu ngi nirook xale yu toog ca pénc ma di awoonte, naan:

“Noo leen toxorool, fecculeen, nu déjal leen, jooyuleen.”

³³ Ndaxte Yaxya daa feeñ, lekkul dugub, naanul biñ, ngeen nee: “Aw rab la àndal.”

³⁴ Doomu nit ki feeñ, di lekk ak a naan, ngeen naay: “Kee fuqle, naan-katub biñ biy xaritook juutikat yeek bákkaarkat yi.”

³⁵ Waaye xel mu rafet, mboolem la mu jur mooy la koy déggal.»

Yeesu gane na Simon Farisen ba

³⁶ Kenn ca Farisen ya moo woo woon Yeesu, ngir ñu bokk lekk. Yeesu agsi kër Farisen ba, daldi dikk ca ndab la.

³⁷ Ndeke senn as ndaw a nga ca dëkk ba, ab moykat la woon. Mu yég nag ne Yeesoo nga ca kër Farisen ba, di lekk. Mu dikk, indaale njaqal doju albatar lu def diwu xeeñlu. ³⁸ Mu dikk ba fa Yeesu sóonu, ca gannaawam, fa tànki Yeesu féete, daldi taxaw, di jooy, rongooñ ya tooyal xépp tànki ya. Ndaw sa nag di fompe tànki Yeesu kawaru boppam gay lang, di foon tànki yaak cofeel, di ca sotti diwu xeeñlu ga.

³⁹ Farisen ba woo Yeesu nag gis loolu, naan ci xelam: «Kii su doon ab yonent, dina xam ndaw sii di ko nabb-nabbee ku mu doon, ak lu mu doon: jigéenu moykat!» ⁴⁰ Yeesu nag àddu, ne ko: «Simon, dinaa la wax lenn.» Mu ne ko: «Waxal, sériñ bi.»

⁴¹ Yeesu ne ko: «Ñaari boroom bor la woon ak seenub leblekat. Boru kenn ka di tééméeri junni (500 000) ci xaalis, ka ca des fukki junni (50 000)†.» ⁴² Waaye ñoom ñaar ñépp, kenn manu cee fey. Mu far

* 7:22 7.22 Seetal ci *Esayi* 35.5-6 ak 61.1. Muy kàddug waxyu gu jëm ci Almasi. † 7:41 7.41 tééméeri junni: maanaam juróomi tééméeri dinaar; fukki junni: maanaam juróom fukki dinaar. Seetal Xaalis ci Leeral yi.

jéggal leen ñoom ñépp. Ana kan ci ñaar ñooñu nag moo ciy géna fonk leblekat bi?»
⁴³ Simonj ne ko: «Xanaa ki épple lu ñu ko jéggal.»

Yeesu ne ko: «Sab átte jub na.»
⁴⁴ Mu walbatiku ca ndaw sa, daldi ne Simonj: «Gis nga ndaw sii de? Dugg naa sa kër, mayewoo ndox mu ma jàngoo. Waaye moom, ay rongooñam la tooyale samay tànk, fompe ko kawaru boppam.
⁴⁵ Foonuloo ma, dalale ma, waaye moom, ba ma duggsee ba léegi noppiwula foon samay tànk. ⁴⁶ Ag diw, diwewoo ko sama bopp, waaye moom, diwu xeeñlu la diw samay tànk. ⁴⁷ Moo tax ma di la wax, ne bàkkaaram yu bare yi ñu ko jéggal moo waral fonkeelam gu bare. Waaye njéggal lu tuut, fonkeel gu tuut rekk.»

⁴⁸ Yeesu nag ne ndaw sa: «Jéggalees na la say bàkkaar.» ⁴⁹ Ci kaw loolu ña mu toogandool di lekk, naan ci seen xel: «Kii mooy kan bay jéggaley bàkkaar sax?»
⁵⁰ Yeesu nag ne ndaw sa: «Sa ngëm musal na la, demal ak jàmm.»

8

Jiwu wuute na ag muj

¹ Gannaaw loolu Yeesu wër dëkkoo dëkk bu mag ak bu ndaw, di waare, di yégle xibaaru jàmm bu nguurug Yàlla, ànd ak fukki taalibe yaak ñaar, ² ñoom ak jigéen ñii mu fajoon, ba tàggale leen ak rab yu bon aki jagadi: Maryaama, mi ñuy wax Magdala, ma ñu tàggaleek juróom ñaari rab, ³ ak Yowaana jabaaru Kusa, saytukatub Erodd; ak Susaana, ak ñeneen jigéen ñu bare ñu daan dimbalee ñoom Yeesu seen alal.

⁴ Mbooloo mu mag a daje woon, jóge dëkkoo dëkk, fekksi Yeesu. Mu léeb leen, ne leen: ⁵ «Boroom jiwu moo demoon jiyi. Naka lay saaw ab toolam, ndeke lenn ca jiwu maa nga wadde ca kaw yoon wa, nit ñi joggati ca, picc yi dikk, lekk ko. ⁶ Leneen wadde fu barey doj. Naka la sax rekk, daldi wow, ndax ñàkk ndox. ⁷ Leneen la wadde biiri xaaxaam, jógandoo ak xaaxaam ma, daldi fatt ba wow. ⁸ La des ca jiwu ma wadde suuf su nangu, daldi sax, ba meññal lu ko mat téeméeri yoon.»

Ci kaw loolu Yeesu àddu ca kaw ne: «Ku am nopp yu mu dégge kat, na dégg.»

⁹ Ay taalibeem laaj ko lu léeb woowu di tekki. ¹⁰ Mu ne leen: «Yeen lañu may, ngeen xam mbóotum nguurug Yàlla, waaye ñi ci des ñoom, ci ay léeb lees koy dëxëñ, su ko defee:

“Ñuy xoolle te duñu gis, di dégg te duñu xam.”

¹¹ «Lii la léeb wi di tekki. Jiwu wi moo di kàddug Yàlla. ¹² Ñi féeteek yoon wi mooy ñi dégg. Seytaane nag mooy dikk, foqati kàddu gi ci seen xol, ngir ñu baña gëm ba muc. ¹³ Ñi féete fu bare ay doj, ñoo dégg kàddu gi, nangoo ko xol bu sedd. Waaye ñooñu, ab reen lañu amul. Ab diir rekk lañuy gëm, bu janti nattu dikkee, ñu dellu gannaaw. ¹⁴ Li wadde ci ay xaaxaam mooy ñi dégg kàddu gi, te ay xalaat ak alal, ak bannexu bakkan fatt leen, ba tax meññaluñu lu ñor. ¹⁵ Li ci suuf su baax si nag, mooy ñi dégge kàddu gi xol bu dégggu te rafet, ñoy ca, te saxoo muñ ba meññal.

Ab làmp du làqu

¹⁶ «Deesul taal ab làmp, dèppe ko ndab, mbaa nga dugal ko ci ron lal. Dees koy aj kay ba kuy duggsi, di gis leer gi. ¹⁷ Mboolem lu làqu dina feen, te mboolem lu nèbbu dina siiw ba ne fàññ. ¹⁸ Kon nag teewluleen ni ngeen di dégge. Ku am, dees na ko dolli, waaye ku amul, la mu xalaatoon ne am na ko sax, dees na ko nangu.»

Déggal Yàllaa gën boka ak Yeesu

¹⁹ Yaayu Yeesu ak ay rakkam ñoo dikkoon di seet Yeesu te manuñoo agsi ci moom ndax nit ñu bare. ²⁰ Ñu ne ko: «Sa yaay ak say rakk a ngi taxaw ci biti, bègg laa gis.» ²¹ Mu ne leen: «Sama yaay ak samay rakk, ñoo di ñiyi dégg kàddug Yàlla, te di ko jéfe.»

Yeesu dalal na ngelaw li

²² Benn bés la Yeesu duggoon gaal, mook ay taalibeem. Mu ne leen: «Nanu jàll ca wàllaa dex gi.» Ñu daldi dem. ²³ Naka lañuy dem nag, Yeesu nelaw. Ngelaw lu réy dal ca kaw dex ga, gaal gi fees ak ndox, ba ñu nara sànk. ²⁴ Taalibe yi yee Yeesu, ne ko: «Njaatige, njaatige, nu ngi sànk!»

Mu yewwu, gëdd ngelaw li ak gannax yu réy yi. Lépp dal, ne tekk. ²⁵ Yeesu ne taalibe ya: «Ana seen ngëm?» Ña nga boole tiitaange ak kéemtaan te naan ca seen biir: «Kii nag moo di kan bay jox ndigal ngelaw leek ndox mi sax, ñu déggal ko?»

Yeesu faj na ku rab jàpp

²⁶ Ci kaw loolu ñu tëmb ba teereji ca diiwaanu waa Serasa, fa jàkkaarloo ak diiwaanu Galile. ²⁷ Ba Yeesu wácece ca tefes ga, jenn waayu dëkk ba dikk dajeek moom. Waa ja, ay rab a ko jàpp. Yàgg naa def yaramu neen te dëkkul ci kër, xanaa sèg ya. ²⁸ Ba mu gisee Yeesu, daa yuuxu, daanu fa kanamam, daldi xaacu ne: «Yaw Yeesu Doomu Yàlla Aji Kawe ji, ana lu ma joteek yaw? Dama lay tinu, bu ma mbugall!»

²⁹ Booba Yeesu tàmbali naa sant rab wi, mu génn waa ji. Rab wi jàpp na waa ji ay yooni yoon. Su ko defee ñu yeewe ko ay càllala, jéng ko, ngir wattu ko, mu di ko dagg, rab wi di ko xabtal, jème bérab yu wéet.

³⁰ Yeesu ne ko: «Noo tudd?» Mu ne ko: «Coggal.» Ndax rab yu baree duggoon waa ji. ³¹ Rab yi nag tinu Yeesu, ngir mu bañ leena yebal ca xóote ba*.

³² Ag coggalu mbaam-xuux yu baree nga woon foofa, di fore ca tund wa. Rab ya tinu Yeesu, ne mu may leen, ñu dugg mbaam-xuux ya. Mu may leen ko. ³³ Rab ya nag génn nit ka, dugg mbaam-xuux ya, coggal ga bartaloondoo, tàbbi ca dex ga, daldi lab. ³⁴ Sàmm ya gis la xew, daldi daw, nettaliji ko waa dèkk ba, ak dèkk-dèkkaan ya. ³⁵ Nit ña riire ca, di seet la xew.

Naka lañu dikk ba ci Yeesu, yem ci nit ki rab wi teqlikool, mu ànd ak sagoon, solu, toog ca wetu Yeesu. Ñu daldi tiit. ³⁶ Ña ko fekke woon nag, nettali leen na boroomi rab ba jote wall. ³⁷ Ci kaw loolu mbooloom diiwaanu Serasa gépp tinu Yeesu ngir mu jóge ca seen biir te dem ndax tiitaange lu réy lu leen jàpp. Naka la Yeesu dugg gaal, di dem, ³⁸ nit ka teqlikook rab yi di ko sarxu ngir ànd ak moom. Teewul Yeesu yiwi ko, ne ko: ³⁹ «Ñibbil, te nga xamle li la Yàlla defal lépp.» Waa ja it dem di siiwal ca dèkk ba bépp, mboolom la ko Yeesu defal.

Yeesu faj na, dekkal na

⁴⁰ Ba Yeesu delloo ca wàllaa dex, mbooloo maa ko teertu, ndax ñoom ñépp a ko doon xaar. ⁴¹ Ci kaw loolu rekk jenn waay dikk, ku ñuy wax Yayrus, di njiitu jàngu ba. Mu ne gurub fi kanam Yeesu, sarxu ko ngir mu ñew kèram, ⁴² ndax kenn la amoon ci doom, janq bu am fukki at ak ñaar, te ma nga doon waaja dee.

Yeesoo ngay dem, nit ña raj-rajloo, tanc ko. ⁴³ Senn as ndaw a nga ca woon, diiru fukki at ak ñaar, ma nga doon xépp deret, te def na ci alalam jépp, kenn manu koo faj. ⁴⁴ Mu doxe Yeesu gannaaw, teg loxoom ca catal mbubbam, deret ja dal ca saa sa.

⁴⁵ Yeesu nag ne: «Ana ku ma laal?» Ku nekk di miim. Piyeer ne ko: «Njaatige, mbooloo mépp a la yéew, dar la.»

⁴⁶ Teewul Yeesu ne: «Am na ku ma laal kay, ndax yég naa leer gu bàyyikoo ci man.» ⁴⁷ Ndaw sa xam ne feeñ na. Mu daldi dikk, di lox, ne gurub fa kanam Yeesu, daldi wax ca kanam ñépp la waral mu teg ko loxoom, ak na mu wére ca saa sa. ⁴⁸ Yeesu ne ko: «Janq, sa ngém faj na la. Demal ak jàmm.»

⁴⁹ Naka la Yeesu di wax, jenn waay jóge ca kër njiitu jàngu ba, dikk ne: «Matatul ngay sonal sériñ bi, sa janq ba faatu na.»

⁵⁰ Yeesu dégg ca, ne njiit la: «Bul tiit. Gëmal rekk, mu daldi mucc.»

⁵¹ Bi Yeesu agsee ca kër ga, mayul kenn ànd ak moom dugg, ku moy Piyeer, ak Yowaan ak Yanqóoba ak baayu xale bi, ak ndeyam. ⁵² Ñépp a ngay jooy ak a tiislu janq bi. Yeesu nag ne leen: «Buleen jooy. Janq bi deewul, day nelaw rekk.» ⁵³ Ci kaw loolu ñu di ko kókkali, ndax xamoon nañu xéll ne dee na. ⁵⁴ Yeesu itam jàpp ca loxol janq ba, daldi àddu ca kaw, ne ko: «Janq, jógal.» ⁵⁵ Noo ga délsi, mu ne ñokket. Yeesu ne ñu may ko, mu lekk. ⁵⁶ Waajuri xale bi nag waaru. Teewul Yeesu dénku leen, ne leen bu ñu wax kenn la xew.

9

Yeesu yebal na fukki taalibe yi ak ñaar

¹ Yeesu moo woo woon Fukk ñaak ñaar, jox leen xam-xam ak sañ-sañu dàq mboolom rab tey faj ay jàngoro. ² Ci kaw loolu mu yebal leen ngir ñu yégleji nguurug Yàlla tey faj jarag ji. ³ Mu ne leen: «Bu ngeen di dem, buleen yóbbaaale dara ngir fàggu yoon wi; du yet, du mbuus, du aw ñam, du xaaalis. Bu ci kenn yor ñaari turki sax. ⁴ Kër gu ngeen dugg, fa ngeen di dal, ba kera ngeen dem. ⁵ Fépp fu ñu leen dalalewul, génnleen dèkk booba te ngeen faxas fa seen pëndub ndégguy tànq, seedelee leen ko seen ngántal.»

⁶ Ñuy dem nag, di wër dèkk ak dèkk, di yégle xibaaru jàmm bi, di faj jarag ji.

⁷ Ci kaw loolu Erodd boroom Gallie dégg mboolom la xew, boppam nag ubu, ndax ñenn ñu noon Yaxya moo dekki, di Yeesu.

⁸ Ñee ne Ilyaas moo délsi, ñeneen ba tey, ne kenn ca yonent yu jèkk yaa dekki.

⁹ Erodd daldi ne: «Yaxya, man maa doglu boppam. Kon ki ma déggal jéf jii, mooy kan?» Ba loolu amee mu di ko fexee gis.

Yeesu leel na mbooloo

¹⁰ Ba ndaw ya délse, dañoo nettali Yeesu mboolom la ñu def. Mu ànd ak ñoomu neen ba sore, ca wetu dèkk ba ñuy wax Beccayda. ¹¹ Teewul nit ña yég ne fa la dem, daldi ko topp. Yeesu dalal leen, di leen wax ci mbirum nguurug Yàlla, ña aajowoo am paj, mu wéral leen.

¹² Ba jant di sowat, Fukk ñaak ñaar dikk ne Yeesu: «Yiwil mbooloo mi, ñu dugg ci dèkk yu ndaw yii ak dèkk-dèkkaan yi ko wër, ngir ñu gis lu ñu lekk ak fu ñu fanaan, ndax fii àllub neen la.» ¹³ Mu ne leen: «Yeen, joxleen leen lu ñu lekk.» Ñu ne ko: «Nun de amunu lu dul juróomi

* 8:31 8.31 Seetal ci Peeñu ma 20.2-3.

mburu ak ñaari jën. Xanaa nu dem, nun ci sunu bopp, jëndali mbooloo mii mépp lu ñu lekk!»¹⁴ Lu wara mat juróomi junniy góor a nga fa woon. Yeesu ne taalibe ya: «Dangeen leen di toogal, ñu def géewi juróom fukki nit.»¹⁵ Ñu def noonu, toogal ñépp.

¹⁶ Ba mu ko defee Yeesu jël juróomi mburu ya ak ñaari jën ya, xool kaw asamaan, daldi yékkati kàddug cant, ba noppi dagg mburu ya, jox taalibe ya, ngir ñu taajal ko mbooloo ma.¹⁷ Ñépp lekk ba regg, ba ñu yóbbu dog ya ca des, muy fukki pañe ak ñaar.

Piyeer xam na kuy Yeesu

¹⁸ Yeesu moo beru woon, di julli, taalibe ya feggook moom. Ci kaw loolu mu laaj leen ne leen: «Ana ku nit ñi ne moom laa?»¹⁹ Ñu ne ko: «Ñii nee ñu yaa di Yaxya; ñee ne yaa di Ilyaa; ñale ne kenn ci yonent yu jékk yaa dekki, di yaw.»

²⁰ Yeesu ne leen: «Yeen nag, ngeen ne maay kan?» Piyeer ne ko: «Yaa di Almasib Yàlla.»²¹ Mu femmu leen nag, sant leen ñu bañ koo wax kenn.²² Mu neeti: «Fàww Doomu nit ki sonn lu bare, ba dajeek mbañeelu magi askan wi ak sarxalkat yu mag yi, ak firikati yoon yi, te dees na ko rey, ba ñetteelu fanam, mu dekki.»

²³ Yeesu nag wax leen ñoom ñépp, ne leen: «Képp ku bégga dikk topp ma, fátteel sa bopp, te nga gáddu bés bu nekk, bant bi ñu lay daaj, door maa topp.»²⁴ Ndax képp ku namma rawale sa bakkan, yaay ñàkk sa bakkan, waaye képp ku ñàkk sa bakkan ngir man, yaa musal sa bakkan.²⁵ Ndax nit ki, su jagoo àddina sépp sax, te nara ñàkk bakkanam mbaa mu sànk, ana lu mu koy jariñ?²⁶ Képp ku kersawoo sama jëmm, kersawoo topp samay wax, yaw itam Doomu nit ki dina la kersawoo, bés bu dikkee ci darajaam ak darajay Baay bi, ak darajay malaaka yu sell yi.²⁷ Maa leen ko wax déy, ñenn a ngi fii taxaw tey, duñu dee te gisuñu nguurug Yàlla.»

Leeru Yeesu jolli na

²⁸ Ba lu wara tollook juróom ñetti fan wéyee gannaaw kàddu yooyu, Yeesu àndoon na ak Piyeer ak Yowaan ak Yanqóoba, ñu yéeg ca kaw tund wa ngir julli.²⁹ Naka lay julli, xar kanamam sop-piku, ay yéereem weex tàll, di melax.³⁰ Ci kaw loolu ñaari nit jekki feeñ, di waxtaan ak moom; ñuy Yonent Yàlla Musaa ak Yonent Yàlla Ilyaa.³¹ Noo feeñ ci ag leer, di waxtaane dèddug Yeesu, ga mu doon waaja sottale fa Yerusaleem.³² Booba ngëmment a ngay man Piyeer ak ña mu àndal. Ba ñu teewloo nag lañu gis leeru Yeesu, ak ñaar ña mu taxawal.³³ Ba ñu

demeer ba ñaari nit ñooñu di bàyyikoo fa Yeesu, Piyeer ne ko: «Njaatige, su nu toogoon fii de, mu baax ci nun; nan yékkati ñetti mbaar, benn yaw, benn Musaa, benn Ilyaa.» Waaye booba Piyeer xamul la muy wax.³⁴ Naka lay wax loolu, aw niir dikk yiir leen, taalibe ya tàbbi ca biir niir wa, tiitaange jàpp leen.³⁵ Ci biir loolu baat jibe ca niir wa, ne: «Kii moo di sama Doom, ki ma taamu; dégluleen ko.»

³⁶ Ba baat ba selawee, Yeesu donj a feeñ. Taalibe ya nag ñoom ne cell, waxuñu kenn lenn jant yooyu, ca la ñu gis.

Yeesu fajati na ku rab jàpp

³⁷ Ca èllég sa ba ñuy wácee tund wa, mbooloo mu baree dikk dajeek Yeesu.³⁸ Jenn waay jekki xaacoo ca mbooloo ma, ne: «Sèriñ bi, dama lay ñaan, nga xoolal ma sama doom, ndax moom donj laa am.³⁹ Rab kat moo ko jàpp, mu jekki di yuuxu, di say, gémmiñ giy fuur. Daanaka du teqlikook moom te sonal na ko.⁴⁰ Ñaan naa say taalibe ngir ñu dàqal ma ko, waaye manuñu ko.»⁴¹ Yeesu ne leen: «Céy niti tey, yeena gémadi te dèng! Maak yeen ba kañ, te di leen muñal? Indi sa doom fii.»

⁴² Naka la xale bi jubsu Yeesu, rab wi sànni ko ci suuf, muy say. Yeesu itam gédd rab wa, wéral xale ba, delloo ko baayam.⁴³ Ñépp nag waaru ci mágguug Yàlla.

Naka la ñépp di yéemu ca mboolom la Yeesuy def, mu ne taalibeem ya:⁴⁴ «Ubbileen seeni nopp te teewlu bu baax kàddu yii: Doomu nit ki lees di wor, ngir teg ko ci loxoy nit ñi.»⁴⁵ Taalibe ya nag dégguñu kàddu googu, ndax fekk na piri ma làqu leen, ngir ñu bañ koo daj, te ñemewuñu koo laaj Yeesu.

Daraja réer na ku ko sàkku

⁴⁶ Werante moo dikkaloon taalibe yi, ñuy seet kan moo géna kawe ci ñoom.⁴⁷ Yeesu nag ràññee seen xalaat. Mu daldi indi ab xale, taxawal ko ci wetam.⁴⁸ Mu ne leen: «Xale bii, képp ku ko dalal ndax sama tur, man nga dalal; te képp ku ma dalal, dalal nga ki ma yebal; ndax ki géna tuut ci yeen ñépp, kooku moo géna mággu.»

⁴⁹ Ci kaw loolu Yowaan àddu, ne: «Njaatige, danoo gis nit kuy dàqe sa tur ay rab, nu aaye ko, ndax bokkul ci nun.»⁵⁰ Yeesu ne ko: «Buleen ko aaye, ndax ku la sotul, yaw la faral.»

Samari gântal na Yeesu

⁵¹ Ba ñu demee ba bés bi ñu wara yéeg Yeesu di jubsu, Yeesu moo dogu ngir dem Yerusaleem.⁵² Mu yebal ay ndaw, ñu jiitu ko. Ñu dem, ba agsi ab dèkk ci diiwaanu Samari, nar ko faa waajal ab dal.⁵³ Waa Samari nag nanguwuñu koo dalal, ndax Yerusaleem ga mu nammoona

jëm*.⁵⁴ Taalibe ya ñuy wax Yanqóoba ak Yowaan gis loolu, daldi ne: «Sang bi, soo béggee nu jox sawara ndigal, mu wacce asamaan, faagaagal leen?»⁵⁵ Teewul Yeesu geesu, femmu leen.⁵⁶ Ba loolu amee ñu jáll jëm beneen dëkk.

Gëmkatu Yeesu du xool gannaawam

⁵⁷ Ca yoon wa ñu awe la jenn waay ne Yeesu: «Yaw laay topp fépp foo jëm.»⁵⁸ Yeesu itam ne ko: «Till ak kãmbam, njanaaw akub tàggam, waaye Doomu nit ki de, amul fu mu wéer boppam.»⁵⁹ Mu neeti keneen: «Toppal ci man.» Mu ne ko: «Sang bi, may ma, ma jékka dem robi sama baay.»⁶⁰ Mu ne ko: «Bâyil néew yi, ñu rob seeni néew, waaye yaw demal, yégleji nguurug Yàlla.»⁶¹ Keneen neeti ko: «Sang bi, yaw laay topp, waaye may ma, ma jékka tàggtook sama waa kër.»⁶² Yeesu ne ko: «Képp ku tàmbalee gább tey xool gannaawam, jekkoo ci nguurug Yàlla.»

10

Yeesu yebal na juróom ñaar fukk ak ñaar

¹ Gannaaw loolu Sang bi tabb na yeneen juróom ñaar fukkí taalibe ak ñaar, yebal leen, ñaar, ñaar, ñu jiituji ko ca mboolem dëkk yaak gox, ya mu nammoona dem moom ci boppam.² Mu ne leen: «Ngóob mee yaatu, te surga yi néew. Kon nag ñaanleen Boroom ngóob mi, ay surga yu mu yebal cim ngóobam.»³ Demleen! Xamleen ne maa leen yebal, mbete ay gátt ci biiri bukki.⁴ Buleen yóbbaaale dencukaayu xaalís, mbaa mbuusu, mbaa ay carax te buleen taxaw di saafoonde ak kenn ci yoon wí.

⁵ «Gépp kër gu ngeen dugg, jëkkleen ne: «Jámm ñeel na leen.»⁶ Su fa nitu jámm nekkee, seen jámm dal ko. Lu ko moy, mu délsi ci yeen.⁷ Dal-leen ca kër googa, di lekk ak a naan ca la ñu leen jox, ndax liggéeykat yellow na peyooram. Buleen di wër nag kër ak kër.

⁸ «Bépp dëkk bu ngeen dugg, ñu dalal leen, la ñu leen taajal, lekkleen ko.»⁹ Wéral leen jaragi dëkk ba, te ngeen wax waa dëkk ba, ne leen: «Nguurug Yàlla dëgmal na leen.»¹⁰ Waaye bépp dëkk bu ngeen dugg te dalaluñ leen, demleen ca pénc ma te ngeen ne leen:¹¹ «Seen pëndub dëkk bi ci sunu ndëgguy tànk sax, nu ngi koy faxas, seedelee leen ko seen ngántal. Waaye nag xamleen ne nguurug Yàlla dëgmal na.»¹² Maa leen ko wax, bu bés baa, boobu dëkk, Sodom a koy génu demin.

¹³ «Wóoy ngalla yeen waa Korasin, yeen waa Beccayda it, wóoy ngalla yeen, nde kéemaan yi sottee fi seen biir, su doon fa waa Tir mbaa fa waa Sidon la sottee, kon bu yágg lañu doon sol ay saaku, xëppooob dóom, ngir tuub.¹⁴ Moo tax it, kera átte ba, waa Tir ak Sidon a leen di génu demin.¹⁵ Yeen waa Kapernawum nag, dees na leen yékkati ba asamaan a? Xanaa ba fa njaniiw kay ngeen di wàcci.

¹⁶ «Ku leen déggal nag, man nga déggal; ku leen gántal, man nga gántal. Te ku ma gántal, gántal nga ki ma yebal.»

¹⁷ Ba juróom ñaar Fukk ñaar ñaar demee ba délsi, mbégte lañu àndal. Ñu ne: «Sang bi, rab yi sax, danu leen di jox ndigal ci sa tur, ñu nangul nu.»¹⁸ Yeesu ne leen: «Séen naa Seytaane mu fáqe asamaan ni ag melax.¹⁹ Dama ne, maa leen jox sañ-sañu joggi ci kawi jaan aki jiiit, joggati mboolem dooley bañaale bi, te dara du leen mana gaañ mukk.²⁰ Noonu leen rab yi nangule nag, buleen ko bége, bégeleen kay la seen tur binde fa asamaan.»

²¹ Ca waxtu woowa tembe la kemta-laayu mbégte tukkee ci Noo gu Sell gi, dugg Yeesu, mu daldi ne: «Baay, Boroom asamaan ak suuf, sant naa la, nde yaa làq lii boroom xam-xam yeek boroom xel yi, xamal ko tuut-tànk yi, nde loolu de, Baay, mooy li la soob.²² Lépp la ma sama Baay dénk, te kenn xamul kuy Doom ji, ku dul Baay bi; kenn it xamul kuy Baay bi, ku dul Doom ji, ak képp ku ko Doom ji namma xamal.»

²³ Ci kaw loolu Yeesu walbatiku ca taalibe ya, wax leen ñoomu neen, ne leen: «Ndokklee ñi seeni gët gis li ngeen gis.²⁴ Ndax maa leen ko wax, bare na ay yonent ak buur yu béggoona gis li ngeen gis, te gisuñu ko, ak itam dégg li ngeen dégg, te dégguñu ko.»

Texe am na yoon

²⁵ Benn xamkatu yoonu Musaa moo jekki woon jóg, di fexee fiir Yeesu. Mu ne ko: «Sëriñ bi, ana lu may def, ba texe ba faww?»²⁶ Yeesu ne ko: «Yoonu Musaa, ana lees ci bind? Loo ci jänge?»²⁷ Mu ne ko: «Boroom bi sa Yàlla, nanga ko soppe sa léppi xol ak sa léppi bakkan ak sa léppi doole ak sa léppi xel, te ni nga soppe sa bopp, nanga ko soppe sa moroom*.»²⁸ Yeesu nag ne ko: «Wax nga dégg. Noonu ngay def, daldi texe.»²⁹ Waa ja nag namma wutu lay, ne Yeesu: «Sama moroom mooy kan?»

³⁰ Yeesu neeti ko: «Jenn waay a jóge woon Yerusaleem, jëm Yeriko. Mu dajeeek ay

* 9:53 9.53 Waa Samari ay nooni Israyil lañu woon. * 19.18.

10:27 10.27 Seetal ci *Baamtug Yoon* wi 6.5 ak *Sarxalkat* yi

sàcc, ñu futti ko, dóor ko, daldi dem, bàyyi ko, muy waaja dee. ³¹ Yàlla woo yàlla ab sarxalkat bu jaare yoon woowa, séen nit ka, daldi teggi. ³² Jenn waay ju soqikoo ci giirug Lewi it noonu; daa dikk ba tollu foofa, séen waa ja, daldi teggi. ³³ Jenn waay ju dëkk Samari nag doon tukki, dikk ba jege waa ja, xool ko, yërëm ko lool. ³⁴ Mu dikk, sotti diw ak biññi ca gaañu-gaafu ya, lëmës ko. Ci kaw loolu mu teg ko ci mbaamam, yóbbu ko ci ab dalukaay, di ko toptoo. ³⁵ Ca èllég sa, mu yékkati ñaari poseti xaalis†, jox ko boroom dal ba, ne ko: «Topptoo ko waa ji. Loo ci dolli, bu ma dèppee, maa la koy delloo.»

³⁶ Mu teg ca ne ko: «Ñett ñii, kan nga foog ne moo ci taxawu waa ja dajeek sàcc ya, taxawaayu nit ak moroomam?» ³⁷ Mu ne ko: «Xanaa ki ko defal yërmande.» Yeesu nag ne ko: «Demal boog, di defe noonu.»

Maryaama raw na Màrt

³⁸ Yeesu ak ay taalibeem ñoo toppoon seenu yoon, ba tollook ab dëkk. Ba ñu dikkee, senn as ndaw su ñuy wax Màrt, ganale ko. ³⁹ Ci kaw loolu rakkam ju ñuy wax Maryaama toog ca wetu Sang bi, di déglu kàddoom, ⁴⁰ te fekk Màrt japp lool ca liggéeyu waañ wa. Mu dikk ne Yeesu: «Sang bi, xanaa gisoo sama rakk ji ma bàyyeek liggéeyu waañ wi, man doñj? Wax ci boog, mu japple ma.» ⁴¹ Sang bi ne ko: «Màrt, Màrt, yitte yi nga xintewoo, di ci doñ-doñi moo bare. ⁴² Ndaxam lenn doñj a manula ñàkk. Maryaama nag, cér bi gën la taamu, te deesu ko nangu ci moom.»

11

Kàddug julli am na yoon

¹ Yeesu moo doon julli benn bérab. Ba mu noppee, kenn ca taalibeem ya ne ko: «Sang bi, jàngal nu julli noonee Yaxya jàngale julli ay taalibeem.» ² Yeesu ne leen: «Bu ngeen dee julli, ne leen:

Baay, sellnga ñeel na saw tur,
na sa nguur dikk.

³ May nu bés ak bés sunub dundu bés bu nekk.

⁴ Baal nu sunuy bàkkaar,
ni nuy baale nun itam, mboolem ñi nu tooñ,

te bu nu dugal ci nattu.»

⁵ Yeesu teg ca ne leen: «Ana kan ci yeen moo seeti ab xaritam xaaju guddi, ne ko: «Xarit, lebal ma ci ñetti mburu. ⁶ Sama xarit bu nekk ciw yoon moo dikk sama kër, te awma dara lu ma ko taajal,» ⁷ te xarit

ba àddoo ca biir néegam, ne ko: «Bu ma sonal, téj naa ba tèdd, maak samay doon; manumaa jóg, di la jox dara?» ⁸ Maa leen ko wax, su jógul jox ko la mu laaj ndax ug xaritoo it, la ko kee amul kersay yee ngir sàkku ndimbal mooy tax mu jóg, jox ko mboolem lu mu soxla. ⁹ Moo tax ma ne leen, ñaanleen, ñu may leen; seetleen, ndax ngeen gis; fëggleen, ñu ubbil leen. ¹⁰ Ndaxte képp ku ñaan, dinga am; ku seet, dinga gis; ku fëgg it, dees na la ubbil. ¹¹ Ana kan ci yeen mooy baay bu doomam ñaan aw jën, mu jox ko jaan? ¹² Mbaa mu ñaan ko nen, mu jox ko aw jii? ¹³ Ndegam yeen ñi bon yeena mana may seeni gone lu baax nag, astamaak Baay ba fa asamaan. Moo leen ko dàq fuuf, nde mooy may Nogu Sell gi, ñi ko ko ñaan!»

Beelsebul xeexul boppam

¹⁴ Yeesu moo doon dàq aw rab wu duggoon nit ba mu luu. Ba rab wa génnee, luu ba wax, mbooloo ma waaru. ¹⁵ Teewul ñenn ca ñoom ne: «Ci Beelsebul, buuru rab yi lay dàqe ay rab.»

¹⁶ Ñeneen nag di ko fiir, di sàkku ci moom firnde ju bawoo asamaan. ¹⁷ Yeesu itam ràññee seen xalaat, ne leen: Gépp nguur guy xàjjalikoo ci biiram, day tas, yii kër mabb ca kaw yee. ¹⁸ Seytaane itam, su xàjjalikoo ci biiram, ana nu nguuram di yágge, gannaaw yeena ne Beelsebul laay dàqe ay rab? ¹⁹ Te it ndegam man Beelsebul laay dàqe rab yi, seen ñoñ nag ñoom, kan lañuy dàqe ay rab? Kon kay seen ñoñ a leen tiññal. ²⁰ Waaye su dee loxol Yàlla laay dàqe rab yi nag, kon nguurug Yàlla agsi na ba ci yeen.

²¹ «Su ponkal gannaayoo ba diis, wattu kërám, alalam dina raw. ²² Waaye bu ko ku ko man songee, ba daan ko, day nangu mboolem ngannaay lu mu yaakaaroon, ba noppi séddale alalam. ²³ Ku farul ak man nag, man ngay xeex, te ku àndul ak man di dajale, yaa ngi tasaare.

²⁴ «Aw rab wu bon, bu jappee nit ba génn ko, day wër bérab yu fendi, di wut fu mu noppoo, te du ko gis. Su ko defee mu ne: «Naa dellu ca sama kër, ga ma jóge.» ²⁵ Bu dikkee fekk kër gi buube, defare ba jekk, ²⁶ day dem indi yeneen juróom ñaari rab yu ko yées, ñu bokk sancsi. Su ko defee ni nit kiy mujje mooy yées na mu jëkke.»

²⁷ Naka la Yeesu di wax loolu, jenn jigéen ca mbooloo ma àddu ca kaw, ne ko: «Ndokklee ki la èmb ci biiram, nàmpal la ci weenan!» ²⁸ Moom nag mu ne ko: «Xanaa kay, ndokklee ñiy déglu kàddug Yàlla te di ko jëfe.»

† **10:35** 10.35 Benn poset bu ci nekk, benn dinaar la tollool, te moo doon peyooru benn bés sub lëmm. Seetal Xaalis ci Leeral yi.

Yonent Yàlla Yunus doy na firnde

²⁹ Naka la mboooloo may gëna takku, Yeesu ne: «Niti tey jii, nit ñu bon lañu. Firnde lañuy wut, waaye deesu leen jox jenn firnde ju moy firndeY Yunus. ³⁰ Nɗax na Yunus nekke woon firnde ca waa Niniw, noonu la Doomu nit ki nekke firnde ci niti tey jii. ³¹ Keroog àtte ba, Lingeeru běj-saalum dina jóg, janook niti tey jii, tiññal leen; ndax moo bàyyikoo woon ca catal àddina, ngir déglusi xam-xamu Suleyman, te tey jii, ku sut Suleyman a ngi fi. ³² Waa réewum Niniw iti keroog àtte ba dinañu taxaw, layook niti tey jii, tiññal leen ndax ñoo tuube woon ca waareb Yunus, te tey jii, ku sut Yunus a ngi fi.

Bèt mooy lãmpu yaram

³³ «Deesul taal ab lãmp, di ko dugal fu làqu, mbaa ci suufu leget. Dees koy aj kay, ba kuy duggsi gis muy leer. ³⁴ Bèt mooy lãmpu yaram. Bu sa bêt wéree, sa yaram wépp a ciy leerloo, waaye bu sa bêt bonee, sa yaram wépp a ngi ci lëndëm. ³⁵ Kon seetal ndax leer gi nga foog ne mu ngi ci yaw du ag lëndëm. ³⁶ Bu sa yaram wépp dee leerlu nag te lenn nekku ci cig lëndëm, su boobaa la sa yaram di mana leerlu ba ne raññ, mel ni bu la ab lãmp niitee, ne raññ ci sa kaw.»

Yeesu xas na niti diine ñi

³⁷ Ba Yeesu waxee ba noppi, ab Farisen da koo woo këram, ngir bokk ak moom lekk. Mu nangu, dem ba duggsi, daldi toog ca lekkukaay ba. ³⁸ Farisen bi nag jaaxle, ndax la Yeesu setluwul bala moo waaja lekk. ³⁹ Sang bi ne ko: «Yeen Farisen yi, bitib kaas bi ak ndab li daal ngeen di raxas, te fekk leen feese jikkoy jagoo lu lewul, akug mbon ci biir!» ⁴⁰ Yeena ñàkk xel! Xanaa du ki sàkk biti moo sàkk biir itam? ⁴¹ Li ci biir kay ngeen di sarxe! Su boobaa seen lépp ay set. ⁴² Waaye wóoy ngalla yeen Farisen yi! Xobi naana ak yeneen safal yu mel ni ru* ak wépp xeeu lujum, yeena ngi ciy génne cérub fukkeel, ngir asaka, njubte ak cofeelu Yàlla nag, ngeen sàggane. Lii de war na leen, waaye lee it, waruleen koo sàggane. ⁴³ Wóoy ngalla yeen Farisen yi! Yeenay sàkku péete yu kaname ca jàngu ya, ak nuyooob gèddaal ca pénc ma. ⁴⁴ Wóoy ngalla yeen, yeena ngi mel ni ay bàmmeele yu amul xammikaay, nit ñiy dox ca kaw te xamuñu ko.»

⁴⁵ Kenn ci xamkati yoon yi nag àddu ne: «Sëriñ bi, loolu nga wax de, nun itam, xasaale nga nu ci.» ⁴⁶ Yeesu itam ne: «Yeen xamkati yoon yi itam, wóoy ngalla yeen, yeen ñi sêf nit ñi sêf yu ñu

àttanul, te yeen ci seen bopp, seen benn baaraam sax du ci laal. ⁴⁷ Wóoy ngalla yeen, yeenay tabax bàmmeele yonent yi, te seeni maam reyoon leen. ⁴⁸ Kon yeena seede noonu ne seen jëfi maam ya, ànd ngeen ci, ndax ñoom ñoo leen rey, yeen ngeen tabax seeni bàmmeele. ⁴⁹ Looloo tax itam kàddug Yàlla giy xel, biral ne: «Maay yebal fa ñoom ay yonent aki ndaw, ñii ñu bóom, ñee, ñu bundxatal.» ⁵⁰ Su ko defee yoon topp niti tey jii, deretu mboolem yonent yi tuuru, dale ko ca cosaanu àddina. ⁵¹ La dale ca deretu Abel ba ca deretu Sàkkaryaa!, ma ñu rey ca diggante sarxalukaay ba ak bérab bu sell ba, maa leen ko wax déy, dees na ko topp niti tey jii. ⁵² Ngalla yeen xamkati yoon yi, yeena sànk caabyi xam-xam; yeen dugguleen, ñiy duggsi, ngeen tere leena dugg.»

⁵³ Ba Yeesu génnee foofa, ca la Farisen ya ak firikat ya tàmbalee xabtal ci kawam, di ko seetloo ay laaj ci mbir yu bare, ⁵⁴ di ko yeeru, tey wuta kéf kàddu gu rëcce ci gémmiñam, ngir tuumaal ko.

12

Yeesu aaye na jinigal

¹ Mboooloo ma nag mujj na dajaloo ba mat ay junniy junniy nit, bay joggeente. Ci biir loolu Yeesu tàmbalee wax, jëkke ko ci ay taalibeem, ne: «Wattuleen lawiiru Farisen ñi, te mooy jinigal. ² Mboolem lu nèbbu dees na ko feeñal, te lu làqu dees na ko xam. ³ Moo tax mboolem lu ngeen waxe biir lëndëm, dees na ko dégg beccég ndarakàmm, te mboolem lu ngeen déeye ci néegu biir, dees na ko biral ci kawii taax.

⁴ «Maa leen ko wax, yeen samay soppe, buleen ragal ñu manul lu wees rey seen yaram, ndax gannaaw loolu dootuñu leen manal lu ko raw. ⁵ Ma xamal leen nag ki ngeen wara ragal: kiy rey ba noppi, am sañ-sañu sànni ca sawara sa, kooku déy laa leen ne, ragal-leen ko. ⁶ Juróomi picci ramatu, xanaa jarul ñaari dërëm donj? Moona Yàlla fàttewula geesu menn ci ñoom. ⁷ Yeen nag seen kawari bopp sax, waññees na lépp. Buleen ragal dara, nde ndiiraanu ramatu, yeena ko gën.

⁸ «Te it maa leen ko wax, képp ku dëggal fi kanam nit ñi, ne man nga féeteel, Doomu nit ki itam dina dëggal fa kanam malaakay Yàlla ya, ne moom nga féeteel. ⁹ Waaye ku weddi fi kanam nit ñi, ne man nga féeteel, dees na weddi fa kanam malaakay Yàlla ya, ne man nga féeteel. ¹⁰ Képp ku jème kàddug safaan ci Doomu

* 11:42 11.42 ru gancax la. Xob yi dees na ko togg, di ko fajoo. † 11:51 11.51 Seetal ci 2.Jaar-jaar ya 24.20-22.

nit ki, dees na la jéggal, waaye ku saaga Noo gu Sell gi, deesu la jéggal.

¹¹ «Bu ñu leen yóbboo ca jàngu ya, ca kanam kilifa ya, ak àttekat ya, buleen jaaxle ci nan ngeen di yékkatee kàddug layoo, ak luy doon seenu lay, mbaa lu ngeen di wax, ¹² ndax su boobaa Noo gu Sell gi moo leen di xamal ca waxtu woowa la ngeen wara wax.»

Yoolu Yàlla donj mooy alal

¹³ Kenn ca mbooloo ma moo noon Yeesu: «Sëriñ bi, waxal ci sama mag, mu jox ma sama wàll ci ndono li nu bokk.» ¹⁴ Yeesu ne ko: «Waa jii, kan moo ma fal àttekat mbaa miraaskat ci seen kaw?» ¹⁵ Ci kaw loolu mu ne leen ñoom ñépp: «Moytuleen wépp xeetu bégge, ndax loo barele barele, sa bakkan ajuwul ci sa alal.»

¹⁶ Mu léeb leen nag, ne leen: «Nit la woon ku woomle, te ab toolam nangu. ¹⁷ Mu naan ca xel ma: “Nu may def nag? Amatama sax fu ma denc sama ngóob mi!” ¹⁸ Ci kaw loolu mu ne: “Nii laay def: samay sàq laay daaneel, daldi defaraat sàq yu gëna mag, denc ci sama pepp ak mboollem lu ma am. ¹⁹ Su ko defee ci samam xel laa naan: ‘Céy sama waa jii, yaa ngeek alal ju bare ju mana dem ay ati at; neel finaax, di lekk, di naan ak a bége.’” ²⁰ Yàlla nag ne ko: “Ñakk xel! Guddig tey jii, dees na jël sa bakkan. Kon li nga waajal, ana kuy doon boroom?”

²¹ «Kuy dajaleel boppam alal te woomle-woo fa Yàlla, loolu mooy saw demin.»

Ku gëm Yàlla, wóolu ko

²² Gannaaw loolu Yeesu ne ay taalibeem: «Moo tax ma ne leen, buleen seen bakkan jaaxal, ngir lu ngeen lekk, te it buleen seen yaram jaaxal ngir lu ngeen sol, ²³ ndax lekk gi, bakkan bee ko épp solo, te koddaay li it, yaram wee ko épp solo. ²⁴ Seetleen ci baaxoñ: du jii, du góob, amul ub denc mbaa am sàq. Teewul Yàlla di ko dundal. Yeen nag, ñaata yoon ngeen gën picc yi! ²⁵ Ana kan ci yeen mooy jaaxle, di xalaata xalaat bakkanam ba mana yokk lu tollook xef ak xippi ci àppam? ²⁶ Ndegam loolu gëna tuut sax moo leen të, ana lu ngeen di xalaat ci leeneen?»

²⁷ «Seetleen ni tóor-tóor yiy saxe. Sonnuñu, èccuñu, waaye maa leen ko wax, Suleymaan ak darajaam jépp sax, soluwwul woon ni benn ci ñoom. ²⁸ Ndegam ñaxum tool miy dund tey, te léegi ñu sànni ko cib taal, moom la Yàlla solale noonu, xanaa astamaak yeen kay? Yeenaka néew ngëm! ²⁹ Yeen nag, buleen tiisoo lu ngeen lekk, mbaa lu ngeen naan; te bu yooyu xalaat ub seen bopp. ³⁰ Ndax loolu lépp, xeeti yéefari áddina, ñoo koy tiisoo, te yeen, Baay bi xam na ne soxla ngeen ko.

³¹ Waaye tiisooleen nguuram, su boobaa dees na leen ci lollii loolu.

³² «Buleen ragal dara, yeen jur gu sew gi, ndax seen Baay la soob, mu jagleel leen nguur gi. ³³ Jaayleen seen alal, sarxe xaalis bi, sàkkuleen mbuus yu dul ràpp, muy dencu èllëg bu dul jeex fa asamaan, fa ko sàcc dul jege, max du ko yaq. ³⁴ Ndax fu sab denc nekk, sab xol it a nga fa.

Teewlu war na

³⁵ «Takkuleen te seeni làmp di tàkk. ³⁶ Mel-leen ni nit ñuy séentu seen njaatige lu jóge céet, ndax bu dikkee ba fëgg bunt ba, ñu daldi ko ubbil. ³⁷ Ndokklee surga yooyu seen njaatige dikk fekk ñu teewlu. Maa leen ko wax déy, njaatige leey takku, toogal leen ba noppi dikk, taajal leen, ñu lekk. ³⁸ Ndegam ba guddi ga xaajee la njaatige la ñibbsi, ba fekk surga ya teewloo noonu, am ba suuf seddee la, lu mu ci mana doon, ndokklee ñoom. ³⁹ Waaye lii de xamleen ko: boroom kër, su xamoon wan waxtu la ab sàcc di ñëw, du ko wacc moos, mu dàjjiy, dugg kërám. ⁴⁰ Kon yeen itam waajleen ba jekk, ndax waxtu wu ngeen foogul, ci la Doomu nit ki di ñëw.»

⁴¹ Piyeer nag ne Yeesu: «Sang bi, ndax nun donj nga léeb lii, am ñépp a ko moom?» ⁴² Sang bi ne ko: «Ana kan nag mooy saytukat bu wóor te muus, ba njaatigeem batale ko curgag kërám, ngir mu di leen jox seen njël ca ba muy jot? ⁴³ Ndokklee surga bu njaatigeem dikk, fekk ko muy doxale noonu. ⁴⁴ Maa leen ko wax déy, alalam jépp la ko njaatige la di far dénk. ⁴⁵ Waaye su jawriñ ja nee ci xelam: “Sama njaatige dikkagul léegi,” ba tax mu tãmbalee dóor surga ya, góor ak jigeen, di lekk ak a naan, di màndi, ⁴⁶ su boobaa njaatige laay dikk bés bu mu ko séenuwul ak waxtu wu mu foogul, te mbugal wu metti la koy mbugal, sédd ko ci añub gëmadikat ñi.

⁴⁷ «Jawriñ jooju xam nammeelu njaatigeem, te taxul mu waaj ko, ba jéfewu ko, ay yetam dina bare. ⁴⁸ Waaye jawriñ jii xamul nammeelu njaatigeem, te teewu koo def lu yelloo ay duma, yet yu néew lay am. Képp ku ñu jox lu bare, dees na la topp lu bare. Képp ku ñu dénk jopp, dees na la feyeeku lu ko épp.

Ngëm indi na féewaloo

⁴⁹ «Sawara laa taalsi ci kaw suuf, te maaka béggoon mu ne jippét xaat! ⁵⁰ Am na nag sóobu gu ma wara sóobu, waaye ndaw njàqare ci man li feek loolu sottiwul. ⁵¹ Foog ngeen ne maye jàmm ci kaw suuf moo ma indi? Déet kay. Maa leen wax lii, xanaa ag féewaloo. ⁵² Gannaaw-si-tey, bu juróomi nit bokkee genn kër, dinañu

féewaloo; ñett féewaloo ak ñaar, ñaar féewaloo ak ñett. ⁵³ Baay dina féewaloo ak doomam ju góor, doom ja féewaloo ak baayam; ndey féewaloo ak doomam ju jigéen, doom ja féewaloo ak ndeyam; ndey féewaloo ak jabaru doomam, jabar ja féewaloo ak ndeyu jèkkër ja.»

Xam pirim jamono war na

⁵⁴ Yeesu neeti mbooloo ma: «Bu ngeen gisee nu xiine sowa, dangeen dal naan: «Taw baa ngi ñew, te noonu lay ame. ⁵⁵ Bu ngelaw bawoo bėj-saalum, ngeen ne: «Tàngaay wu metti lay doon,» te mooy am. ⁵⁶ Jinigalkat yi ngeen doon! Melow asamaan ak suuf, man ngeen koo firi. Xew-xewi janti tey jii nag, nu ngeen umplee pireem?»

⁵⁷ «Te itam lu leen tee àtte njub, yeen ci seen bopp? ⁵⁸ Boo àndeek sab jotewaale, ngeen jëm ca àttekat ba, fexeela jubook moom ci yoon wi. Lu ko moy mu yóbbu la ci yoon, yoon jébbal la ndawal buur, mu ne la ràpp tēj. ⁵⁹ Ma ne la, doo fa génne mukk te feyuloo lépp, ba ci poset bi gëna tuut.»

13

Ku tuubul, sàнку

¹ Jamono jooju tembe la aw nit dikk, àgge Yeesu mbirum waa Galile yu Pilaat bóomoon, jaxase seen deret ak seen dereti juru sarax yu ñu jagleel Yàlla. ² Yeesu ne leen: «Foog ngeen ne waa Galile yooyu dañoo gëna bàkkaar mboolem seen bokki Galile ya ca des, ba tax ñu daj mitit wu ni tollu? ³ Maa leen ne déedéet kay, te su ngeen tuubul, noonu ngeen di sànkoo yeen ñépp. ⁴ Fukki nit ak juróom ñett ñooñu tata ja ca Silowe daanu ci seen kaw, ba rey leen nag, ngeen foog ne ñoo gën diy tooñkat ci Yerusalem gépp? ⁵ Maa leen ne déedéet kay, te su ngeen tuubul, yeen ñépp ay sàнку ni ñoom.»

⁶ Mu léeb leen lii nag, ne leen: «Garabu figg la nit amoon ci tookéram. Mu dikk di ko raas-si, gisu ca dara. ⁷ Mu ne surga ba: «Ñetti a ngii may dikk, raas-si garab gii, gisuma ci dara. Kon gor ko, da fiy xatal rekk.» ⁸ Surga ba ne ko: «Sang bi, bàyyiwaat ko at mii rekk, ba ma wéex ko, def ci tos. ⁹ Jombul mu meññ déwén; lu ko moy, nga gor ko.»

Yeesu faj na nit bésusb Noflaay

¹⁰ Benn bésusb Noflaay, Yeesoo doon jàngle ci ab jàngu. ¹¹ Ndeke jenn jigéen a nga fa woon; rab a ko woppal lu wara mat fukki at ak juróom ñett, mu xuuge, manula fexe ba siggi. ¹² Yeesu gis ko, woo ko, ne ko: «Jongama, teqlikoo nga ak sa laago.» ¹³ Mu teg ko ay loxoom, mu siggi ca

saa sa, di sàbbaal Yàlla. ¹⁴ Njiitu jàngu ba nag yékkati kàddug ñaawlu ndax bésusb Noflaay ba Yeesu faje. Mu ne mbooloo ma: «Juróom benni fan la nit ñi wara liggéey. Kon ci fan yooyu ngeen wara fajusi, waaye du ci bésusb Noflaay.» ¹⁵ Sang bi ne ko: «Jinigalkat yi ngeen doon! Xanaa du ci bésusb Noflaay la kenn ku nekk ci yeen di yiwee aw yékkam mbaa mbaamam ca gétt ga, ngir wéggi ko? ¹⁶ Jigéen jii di sètub Ibraayma, te fukki at ak juróom ñett a ngii Seytaane laggal ko, wareesu koo yiwi, teggil ko laago jii ci bésusb Noflaay?»

¹⁷ Ba mu waxee loolu, noonam yépp a rus, mbooloo ma nag di bége mboolem jéf ju yéeme, ja muy def.

Doomu fuddën misaal na nguurug Yàlla

¹⁸ Yeesu neeti: «Ana lu nguurug Yàlla di nirool? Ana lu ma koy niruleel? ¹⁹ Mu ngi mel ni doomu fuddën bu nit jël, sànni cib toolam. Mu sax, mągg ba doon garab gu njanaaw yi tàgg ciy caram.»

Lawiir misaal na nguurug Yàlla

²⁰ Mu dellu ne: «Ana lu may niruleel nguurug Yàlla? ²¹ Mu ngi mel ni lawiir yu jigéen sàkk, def ko ci ñetti natti sunguf, ba tooyal bépp mujj funki.»

Buntu texe xat na

²² Yeesu moo doon jaare ay dèkk yu mag ak yu ndaw, jëm Yerusalem, di jàngle ca yoon wa. ²³ Mu am ku ko ne: «Sang bi, xanaa ñiy mucc ñu néew lay doon?» Mu ne leen: ²⁴ «Góor-góorluleen ba dugge ci bunt bu xat bi, ndax maa leen ko wax, ñu bareey jéema dugg, waaye duñu ko man. ²⁵ Bu boroom kër gi xasee jóg, ba tēj bunt bi, fa ngeen di doxe des biti, di fégg naan: «Sang bi, ubbill nu!» Mu ne leen: «Xawma fu ngeen bokk.» ²⁶ Su boobaa ngeen naan: «Noo daan bokk di lekk ak a naan, te sunuy pénc nga daan jànglee.» ²⁷ Mu neeti leen: «Nee naa leen xawma fu ngeen bokk. Soreleen ma yeen ñépp, defkati njubadi yi!» ²⁸ Foofa la ay jooj ak naqarlu bay yéyu di ame yoon, kera bu ngeen gisee seeni maam Ibraayma ak Isaaxa ak Yanqóoba ak yonent yépp ca biir nguurug Yàlla, te fekk yeen ci seen bopp, ñu dàq leen ca biti. ²⁹ Penku ak sowa, bėj-gànnar ak bėj-saalum, la aw nit di bawoo, dikk toog ca ndabal bernde la ca nguurug Yàlla. ³⁰ Su ko defee nag, ñienn a ngi mujje tey, waaye èllég ñooy jiitu; te ñienn a ngi jiitu tey, waaye èllég ñooy mujje.»

Dees na tas Yerusalem

³¹ Ca jamono jooju tembe la ay Farisen dikk, ne Yeesu: «Jógeel fii, te dem, ndax Buur Erodd da laa nara rey.» ³² Mu ne leen: «Demleen wax njomboor moomu, ne ko: «Maa ngii di dàq rab yi, di maye

ag wér, tey ak èllëg. Bésuh ñetteel ba nag ma sottal.”³³ Waaye tey ak èllëg ak sibir, fàww ma dem, ndax ab yonent wareesu koo bóome fenn fu dul Yerusalem.

³⁴ «Yerusalem, Yerusalem, yaw miy bóom yonent yi, di sànni ay doj ñi ñu yebal ci yaw, ba ñu dee, ñaata yoon laa namma dajale say doom, uuf ni ganaar di uufe ay cuujam, te nanguwuloo?»³⁵ Mu ngoog, waccees na laak sa kër nag, waaye maa ne la doo ma gisati ba kera jant ba nga naa: «Na barke wàccal ki ñëw ci turu Boroom bi!»

14

Yeesu jàngal na Farisen ya

¹ Benn bésuh Noflaay la Yeesu reeri woon kër genn kilifag Farisen ya. Ñoom nag ñu di ko bàyyi xel bu baax. ² Ndeke jenn waaya nga fa janook moom, yaram wépp a sadd. ³ Yeesu àddu, ne xamkati yoon yaak Farisen ya: «Waaw, pajum bésuh Noflaay, yoon maye na ko, am déet?»

⁴ Ñu ne cell. Yeesu teg waa ja loxo, wéral ko, daldi ko yiwi. ⁵ Mu ne leen: «Ana kan ci yeen la doomam mbaa aw yëkkam daanu cib teen, mu bañ koo daldi génne ci bésuh Noflaay?» ⁶ Lu ñu ca teg nag të leen, ñu ne xerem.

⁷ Ci biir loolu Yeesu gis na gan ñay taamoo toogu yu kaname, mu léeb leen, ne leen: ⁸ «Bu la boroom xew wooyee ci berndeg céet, bul wàllisi, ba tooge toogu ba gëna kaname, xamoo fu ku la sutu daraja di wuysee boroom xew ma. ⁹ Su boobaa moom mi la woo, woo ko, mooy dikk, ne la: «Mayal kii, mu toog.» Nga am nag gâcey walbatiku toogi fa gëna gannaawe. ¹⁰ Bu ñu la wooyee am xew kay, demal tooge fa gëna gannaawe, ba ka la woo dikk ne la: «Xarit, agsil ci kanam.» Su boobaa muy sa teraanga ci kanam mboolem ña nga bokkal bernde ja. ¹¹ Ndaxte képp kuy réylu, dees na la toroxal, ka toroxlu lees di yékkati.»

¹² Ci kaw loolu Yeesu ne waa ja ko woo bernde: «Boo dee waajal bernde, añ mbaa reer, bul woo say xarit, mbaa say doomi ndey, mbaa say bokk, mbaa say dëkk yu am alal, nde ñoom itam dañuy walbatiku, woo la rekk, mu doon sag pey. ¹³ Boo dee waajal bernde kay, wool néew-doole yi ak lagg yi, ak ñiy soox ak silmaxa yi. ¹⁴ Su boobaa ndokklee yaw, nde amuñ sag pey, waaye dees na la fey, kera ndekitel aji jub ñi.»

Dàq sa teraanga, romb sa njariñ

¹⁵ Kenn ca gan ña nag dégg loolu, ne Yeesu: «Ndokklee ku lekk ca bernde ja ca nguurug Yàlla!»¹⁶ Yeesu ne ko: «Jenn

waay moo waajaloon bernde ju mag, woo ca ñu bare. ¹⁷ Ba waxtuw lekk jotee, mu yebal ab surgaam ca ña mu woo woon, ne leen: «Ñëwleen, lépp sotti na léegi.»

¹⁸ «Ñu tàmbalee gantal nag ñoom ñépp. Kii ne ko: «Ab tool laa jënd, te fàww ma xooli ko. Dama lay ñaan rekk, nga jéggal ma.» ¹⁹ Kee ne: «Ay lëkkey yëkk, ci laa jënd juróom, damay dem nii, jéemloo leen ba xam. Dama lay ñaan rekk, nga jéggal ma.» ²⁰ Kale ne ko: «Ab séet laay sooga takk, looloo tax duma mana ñëw.»

²¹ «Surga ba dellu, daldi koy agge boroom kër ga, njaatigeem. Mu mer, ne surga ba: «Demal gaaw ca pénc yaak mbeddi dëkk bi, te nga indi fii néew-doole yi, ak lagg yi ak silmaxa yi ak ñiy soox.»

²² «Surga ba dem ba délsi, ne ko: «Sang bi, li nga santaane de def naa ko, waaye kër gi feesagul.» ²³ Njaatige li ne ko: «Demal topp yoon yi, leri ñag yi, te nga soññ nit ñi, ñu dikk ba sama kër fees.» ²⁴ Maa leen ko wax, ñi ma woo woon ci sama bernde ji, kenn du ci mos.»

Topp Yeesu am na lu mu laaj

²⁵ Yeesu moo doon dem, mbooloo mu réy dar ko. Mu geestu ne leen: ²⁶ «Képp ku ñëw ci man, te bañuloo sa baay ak sa ndey, ak sa jabaar, ak sa doom, ak sa bokk yu góor, ak sa bokk yu jigéen, bañuloo sa bakkanu bopp sax, doo mana doon sama taalibe. ²⁷ Képp ku gadduwal sa bantu bopp bu ñu lay daaj, te topp ci man, doo mana doon sama taalibe. ²⁸ Ana kan ci yeen sax mooy namma tabax taaxum kaw, te jëkkula toog, wafñi la mu koy dikke, ngir seet ba xam ndax am na lu ko aggale, ²⁹ bala moo teg kenug taax ma, te amul dooley sottal tabax bépp, ba ña koy seetaan di ko ñaawal, ³⁰ naan: «Waa jii moo tàmbalee tabax, te manula aggale!» ³¹ Am ban buur mooy xarejeek beneen buur te jëkkula toog, seet ba xam ndax man naa ànd ak fukki junniy xarekatam, ngir xarejeek ku ko songseek ñaar fukki junniy xarekat? ³² Su ko manul nag, ba buur bee di soreegum lay yebal kurel ca moom, ngir seet nu mu mana sàrtoo ak moom jamm. ³³ Naka noonu itam, kenn ci yeen du mana doon sama taalibe te dëdduwal mboolem lu mu am.

³⁴ «Xorom déy baax na, waaye bu sàppee, ana lees koy safaleetee?»
³⁵ Jariñatul suuf, jariñatul ab tos. Ca biti lees koy tuuri. Ku ami nopp kat, déglul.»

15

Sàmm bége na menn xaram mu feeñ

¹ Mboolem juutikat yeek bàkkaarkat yi ñoo daan ñëw ci Yeesu, di ko déglu. ² Ci biir loolu Farisen ya ak firikati yoon ya

di ñurumtu naan: «Kii moom bàkkaarkat yi lay neexool, di bokk ak ñoom lekk!»³ Yeesu nag léeb leen lii, ne leen: ⁴ «Ana kan ci yeen mooy am téeméeri xar, réerle ci menn, te bëyyiwul ca àll ba juróom ñeent fukki xar ya ak juróom ñeent (99), ngir toppi ma réer, ba gis ko?»⁵ Bu ko gisee lay bég, teg ko ca mbagg ma, yóbbu kër ga. ⁶ Te bu ággee ca kër ga, xarit yaak dëkk ya lay woo, ne leen: “Kaayleen nu bége, sama xar ma réeroon, gis naa ko!”

⁷ «Maa leen wax, ne leen: bu benn bàkkaarkat donj tuubee, noonu rekk lay doone mbégte fa asamaan, ba raw mbégte ma fay am, bu juróom ñeent fukk ak juróom ñeenti nit jubee, te soxlawuñoo tuub.

Jigéen bége na takkaayam lu feeñ

⁸ «Te it ana jan jigéen mooy am fukki libidoor, benn réer ca, te taalul ab lãmp, buub néeg ba, seeta seet, ba gis ko?»⁹ Bu ko gisee, xarit yaak dëkk ya lay woo, ne leen: “Kaayleen nu bége, libidoor ba réeroon, gis naa ko.”¹⁰ Maa leen wax ne leen: noonu rekk lay doone mbégte fa malaakay Yàlla ya, bu benn bàkkaarkat donj tuubee.»

Baay bége na doomam ju feeñ

¹¹ Yeesu neeti: «Nit a amoon ñaari doom yu góor. ¹² Ka gën di ndaw ne baay ba: “Baay, jox ma cér bi ma yoon may ci sunu alal.” Ba loolu amee baay ba séddale leen alalam. ¹³ Ay fan yu néew gannaaw gi, ka gën di ndaw jaay léppam, daldi tukki réew mu sore, di topp bakkanam ba yàq fa alalam. ¹⁴ Gannaaw ba mu sánkee lépp, xiif bu metti dikkal réew ma, mu daldi tàmbalee ñàkk. ¹⁵ Ci kaw loolu mu dem, di surgawu ku cosaanoo ca réew mooma, kooku yebal ko ca ay toolam, muy sàmm ay mbaam-xuux. ¹⁶ Mu dem ba noon géeja lekk ca xolliti doomi garab ya mbaam-xuux yay lekk, fajeb xiifam, te kenn mayu ko ca. ¹⁷ Xel ma mujj délsi, mu ne: “Ñaata surga la sama baay am, seen lekk ne gāññ, man, ab xiif di ma rey fii! ¹⁸ Naa jóg, dem ca sama baay, ne ko: “Baay, tooñ naa Yàlla, tooñ la; ¹⁹ yeyootumaa tuddoo sax sa doom; léegi def ma ni ku bokk ci say surga.”

²⁰ «Mu jóg, ngir dellu kër baayam. Fu sore la ko baayam séene, muy dikk. Mu ñeewante ko, daw, laxasu ko, foon ko. ²¹ Doom ja ne ko: “Baay, tooñ naa Yàlla, tooñ la; yeyootumaa tuddoo sax sa doom.” ²² Teewul baay ba ne ay surgaam: “Gaawleen indi mbubb mi gēna rafet, solal ko, te ngeen takkal ko ab jaaro ci loxoom, solal ko ay dàll. ²³ Indileen sèlluw yafal wa, rey, nu lekk, te bànnèexu; ²⁴ ndax sama doom jii moo dee woon te dekki

na, moo réeroon te feeñ na.” Ñu daldi tàmbalee bànnèexu.

²⁵ «Loolaa nga fekk mag ja ca tool ya. Ba mag ja dikkee ba jub kër ga, ca la dégg po ma ak pecc ma. ²⁶ Mu woo kenn ca xale ya, laaj ko lu xew. ²⁷ Mu ne ko: “Sa rakk jaa délsi, sa baay rey sèlluw yar wa, ndax li mu délseek jàmm.”

²⁸ «Mag ja nag mer, nanguwula agsi, baayam gēnn, di ko soññ. ²⁹ Mu àddu, ne baayam: “Seetal ñaata at laa la liggéeyal, sa ndigal, masuma koo moy, te man, masuloo maa may sax as tef su nu bégloo, maak samay xarit. ³⁰ Sa doom jii dikk, gannaaw ba mu yàqee sa alal ci ay gānc, nga reyal ko sèlluw yafal wi!” ³¹ Mu ne ko: “Doom, yaw de naka jekk man nga nekkal, te mboolem lu ma am, yaa ko moom. ³² Waaye mbégte ak bànnèex war na, ndax sa rakk jii moo dee woon te dekki na, moo réeroon te feeñ na!”»

16

Saytukat bu dëng def na ag muus

¹ Yeesu neeti ay taalibeem: «Jenn waay ju am alal la woon, ñu boole ko ak ab saytukatam, ne ko day pasar-pasaree alalam. ² Waa ja woo ko, ne ko: “Li ma la déggal, lu mu doon? Limal ma sag caytu, ndax dootoo ma mana saytul.”

³ «Saytukat ba nag ne ca xelam: “Nu may def nag, gannaaw sama njaatigee ngi nangu caytu gi ci man? Dem gābbi? Awma kattanam. Yalwaani? Rus naa ko.” ⁴ Gannaaw loolu mu ne “Xam naa ni may def, ba su ma ñàkkee sama liggéey it, dees na ma fat.” ⁵ Mu daldi woolu kenn, kenn, ña ameel njaatigee bor. Kii ñëw, mu ne ko: “Ñaata nga ameel sama njaatige?” ⁶ Mu ne ko: “Téeméeri xāndiy diwu oliw.” Mu ne ko: “Sa kayit a ngi, toogal gaaw te bind juróom fukk.” ⁷ Kee, mu ne ko: “Yaw nag, ñaata nga ko ameel?” Mu ne ko: “Téeméeri saakuy pepp.” Mu ne ko: “Sa kayit a ngi, bindal juróom ñett fukk.” ⁸ Njaatige li nag naw saytukat bu njublan boobu ca muus ga mu defe. Ndax kat niti tey jii ñoo gēna muus doomi leer ñi, ci ni ñuy doxale seen digganteek seeni nawle.»

⁹ Yeesu teg ca ne: «Maa leen wax ne leen: Alalu àddina ji lãmboo njubadi, sàkkooleen ko ay xarit, ngir bu alal ja jeexee, xarit yooya fat leen ca dal yu sax ya. ¹⁰ Ku maandu ci lu néew nag, maandu ci lu bare; ku jubadi ci lu néew it, jubadi ci lu bare. ¹¹ Kon su ngeen maanduulw ci alalu àddina, alal ji dégg, ana ku leen koy dénk? ¹² Te su ngeen maanduulw ci alalu jaambur, ana ku leen di dénk seen alalu bopp?»

¹³ «Ab jaamu kër nag manula jaamu ñaari sang; day dëddu kii, sopp kee; mbaa mu fonk kii, cof kee. Manuleena jaamondoo Yàlla ak Alal.»

¹⁴ Farisen ñu bëgg xaalis ña nag dégg loolu Yeesu wax lépp, ba noppi di ko ñaawal. ¹⁵ Yeesu ne leen: «Yeen yeenay jub-jublu ci kanam nit ñi, waaye Yàlla xam na seen xol. Ndax li nit ñi gëna naw, lu seexluwu la fa Yàlla.»

¹⁶ «Yoonu Musaa wi ak waxi yonent yi la woon ba kera ba Yaxya dikkee. Waaye ba mu dikkee lañu yégle nguurug Yàlla, ñépp di ci jëema dugge seen doole. ¹⁷ Waaye nag asamaan ak suuf raaf moo gëna yomb genn maaska rote ci mbindum yoonu Musaa.»

Pase daganul

¹⁸ «Képp ku fase sa jabar, takk keneen, jaaloo nga; te ku jëkkëram fase, képp ku ko takk, jaaloo nga.»

Aji texeedi sàkku na yërmande

¹⁹ «Jenn waay la woon ju bare alal, di sol yérey tànnéef yu rafet, di dunde lu neex bés bu set. ²⁰ Ab baadoolo bu ñuy wax Lasaar nag farala tédde buntu kër waa ji, yaram wa ne fureet aki góom, ²¹ te noon ngéeja fajeb xiifam lu ruuse ci ndabal boroom alal bi. Rax ci dolli xaj yiy dikk, di mar ay góomam.»

²² «Ba baadoolo ba deeyee, malaaka yi yóbbu ko ba ca wetu Ibraayma. Boroom alal ba itam dee, ñu rob ko. ²³ Ci kaw loolu ñu dugal ko sawara. Ca biir mbugal mu tar ma la dawale bëtam, daldi séen fu sore Ibraayma ak Lasaar ci wetam. ²⁴ Mu xaacu ne: «Maam Ibraayma, yërëm ma! Yebalal Lasaar, mu sèpp catal baaraamam ci ndox, dikk seralal ma sama lammañ, sawara sii metti na lool!» ²⁵ Ibraayma ne ko: «Doom, fàttlikul ne na nga séddoo woon sa bänneex ca àddina, noonu la Lasaar nekke woon aw tiis. Waaye fii nag moo neexle, yaw nga mitile. ²⁶ Bu loolu yépp weese itam, sunu digg ak yeen kàmb gu xóot a fi dox; moo tax ku bëgga jóge fii jëm ci yeen, mbaa mu jóge foofu jëmsi ci nun, du ko man.»

²⁷ «Ci kaw loolu boroom alal ba ne: «Kon nag maam, ngalla yebalal Lasaar ca sama kër baay, ²⁸ ndax sama juróomi rakk a nga fa. Na leen ártu, ngir ñu baña ñëw ñoom itam ci bërabu metit bii.» ²⁹ Ibraayma ne ko: «Waaye ñoom am nañu yoonu Musaa, am nañu téerey yonent yi. Nañ leen déggal.» ³⁰ Mu ne ko: «Loolu doyul, Maam Ibraayma, waaye su kenn báyikoo ci ñi dee, dem ba ca ñoom, dinañu tuub.» ³¹ Ibraayma nag ne ko: «Su ñu dégluwul Musaa, dégluwñu yonent yi kay, ku dekki, báyikoo ci ñi dee sax du tax ñu gëm.»»

17

Bàkkaarloo nit aay na

¹ Yeesu neeti ay taalibeem: «Ag fiir guy bàkkaarloo manula ñàkk, waaye wóoy ngalla ka koy lal. ² Ñu takkoon doj wu réy ci baatam, sànni ko biir gééj moo gën ci moom muy yóbbe bàkkaar kenn ci xale yii. ³ Wattuleen seen bopp.»

Jéggal-leen ku leen tuubal

«Bu la sa mbokk tooñee, yedd ko. Bu tuubee, baal ko. ⁴ Su la tooñoon juróom ñaari yoon ci bés bi, te walbatiku juróom ñaari yoon, ne la: «Tuub naa ko,» baal ko rekk.»

Ngëm maye na kéemtaan

⁵ Ci kaw loolu ndaw ya ne Sang bi: «Yokk nu ngëm.» ⁶ Sang bi ne leen: «Su ngeen amoon ci ngëm, lu tollu ni peppu fuddën sax, ba ne garab gii: «Buddeekul, dem jëmbate ca gééj ga,» su boobaa garab gi déggal leen.»

Ab jaam du sàkku jaajëf

⁷ «Kan ci yeen la ab jaamam di beyi mbaa mu sàmmi ba jóge toom, dikk, mu ne ko: «Kaay, nu lekk?» ⁸ Xanaa kay da koy wax ne ko: «Defaral sama reer, te takku, taajal ma, ba ma lekk, naan, nga doora lekk, naan.» ⁹ La jaam ba jëfe ndigal tax na sangam sant ko? Déedéet kay. ¹⁰ Yeen itam noonu. Bu ngeen defee li ñu leen sant lépp ba noppi, dangeena war ne: «Ay jaam rekk lanu. Sunu warugar lanu def.»»

Yeesu faj na fukki gaana

¹¹ Ci biir yoon woowu Yeesu jëmooon Yerusaleem, ma nga jaare fa Samari ak Galile digaloo. ¹² Mu dem bay duggsi cib dëkk, fukki gaana dikk, dajeek moom, ba dänd ko, daldi taxaw. Ñu xaacu ne: ¹³ «Yeesu, Njaatige, yërëm nu!» ¹⁴ Yeesu nag gis leen, ne leen: «Demleen seetluji seen yaram ca sarxalkat ya.»

Ba ñuy dem ca sarxalkat ya lañu wér, seen yaram set. ¹⁵ Kenn ci ñoom gis ne wér na, daldi walbatiku, di xaacuy sàbbaal Yàlla. ¹⁶ Mu dikk, ne gurub, dépp jëm fa tãnk Yeesu, sant ko. Waa ja nag nitu Samari la woon. ¹⁷ Ba loolu amee Yeesu ne: «Xanaa du fukk a wér? Juróom ñeent ña nag, ana ñu? ¹⁸ Amu ci kenn ku ñëw, delloo Yàlla njukkal ku dul doxandéem bii!» ¹⁹ Yeesu nag ne ko: «Jógal dem; sa ngëm faj na la.»

Nguurug Yàlla door na ba noppi

²⁰ Farisen yi ñoo laajoon Yeesu, ne ko: «Kañ la nguurug Yàlla di dikk?» Mu ne leen: «Dikkug nguurug Yàlla du ànd akum ceetaan. ²¹ Deesul ne it: «Xool-leen, mu ngi» mbaa: «Ma ngee,» ndax kat nguurug Yàlla mu ngi ci seen biir.»

²² Mu ne taalibe ya: «Ay jant a ngi ñew yu ngeen naa ngeejoo fekke benn bés ci bési Doomu nit ki, te dungeen ko fekke. ²³ Te it, dees na leen ne: “Ma ngeel!” mbaa: “Mu ngii!” Buleen dem, buleen ca topp. ²⁴ Ndax ni melax di xuyye gi wetu asamaan, ba ne ràññ ca gee, noonu la Doomu nit kiy def keroog bésam. ²⁵ Waaye balaa booba fàww Doomu nit ki am coono yu bare, jànkoonteek diinatu niti tey jii.

²⁶ «Noonee mu deme woon ca janti Nóoyin, ni lay deme ca janti Doomu nit ki. ²⁷ Nit ñaa nga doon lekk ak a naan, di jël jabar ak a séyi, ba keroog bés ba Nóoyin duggee ca gaal ga, mbènn ma dikk, sànk ñèpp.

²⁸ «Noonee itam la deme woon ca janti Lóot. Nit ñaa nga doon lekk ak a naan, di jënd ak a jaay, di jëmbat ak a tabax. ²⁹ Waaye bés ba Lóot génnee Sodom, la tawub sawara ak tamarax wáce asamaan, sànk ñèpp. ³⁰ Noonu donj lay deme, bés bu Doomu nit kiy feñ.

³¹ «Bésu keroog boobee, ku mu fekk ci kaw am taax, te say yëf ne ca biir kër ga, bul wàcc, di ko jéli. Te ku mu fekk tool ba itam, bul dellu. ³² Fàttlikuleen jabaru Lóot ja! ³³ Képp kuy wuta rawale sa bakkan, yaay ñàkk sa bakkan, waaye képp ku ñàkk sa bakkan, yaay dund. ³⁴ Maa leen ko wax: guddig keroog ñaar ay bokk benn lal, kenn ki, ñu yóbbu ko, ka ca des, ñu ba ko. ³⁵⁻³⁶ Ñaar di wolandoo, kenn ki, ñu yóbbu ko, ka ca des, ñu ba ko.»

³⁷ Taalibe yi ne Yeesu: «Loolu fan la, Sang bi?» Mu ne leen: «Fu médd nekk, fa la tan yay daje.»

18

Saxoo ñaan wareef la

¹ Yeesu dellu leen léeb lii, ngir ñu wareefoo di sax ci ñaan te baña xàddi. ² Mu ne: «Ab àttekat la woon cib dëkk; ragalul Yàlla, yégul nit. ³ Ab jëtun a nga woon ca dëkk boobee. Daan na ñew ca moom, naan ko: “Àtte ma ak sama jotewaale!” ⁴ Àttekat ba bañ na ay yoon, waaye gan-naaw gi mu ne ci xelam: “Ragaluma Yàlla, yéguma nit, ⁵ waaye jigéen jii da maa lakkal; naa ko àtte, bala moo dèrr-dèrri ba mujj jekkli ma.”»

⁶ Sang bi teg ca ne: «Jàngatleen li àttekat bu bon bi wax. ⁷ Kon ndax Yàlla man naa baña sàmm àqu tannéefam ñi koy woo wall guddi ak bëccég, xanaa di leen yeexe? ⁸ Maa leen ne, mooy sàmm seen àq ci lu gaaw. Waaye bu Doomu nit ki dikkee, mbaa dina fekk ngëm ci kaw suuf?»

Ag njub, bu ko boroom gis

⁹ Yeesu léebati lii, ngir ñiy damoo seenug njub, tey doyadal ñi ci des. ¹⁰ Mu ne: «Ñaari nit a julliji woon ca kër Yàlla ga. Kenn ki di ab Farisen, ki ci des dib juutikat. ¹¹ Farisen baa nga taxaw di yelu, naan: “Yàlla, maa ngi lay sante li ma melul ni ñeneen ñi doonul lu moy ay lekk-kati àq, ay njublay aki jaalookat, rawatina juutikat bii. ¹² Maa ngi woor ñaari yoon, ayu bés gu nekk, di joxe asaka benn céru fukkeelu mboolem lu ma am.”»

¹³ «Juutikat ba moom, ma nga taxaw fu sore, ñemewula siggi sax, xool asamaan, xanaa di fégg dënnam te naan: “Éy Yàlla, yèrëm ma, man bàkkaarkat bi.”»

¹⁴ Yeesu teg ca ne: «Maa ne leen, kooku moo ñibbaale këràm àtteb ku jub, waaye du Farisen ba. Ndaxte képp kuy réylu, dees na la toroxal, waaye ki toroxlu lees di yékkati.»

Tuut-tànk am na cér

¹⁵ Doon nañu indil Yeesu ay tuut-tànk sax, ngir mu teg leen ay loxoom. Taalibe ya gis loolu, di leen jànni. ¹⁶ Yeesu nag woolu xale yi, ne: «Bâyyleen xale yi, ñu ñew fi man, buleen leen aaye, ndax ñu mel ni ñoom ñoo yelloo nguugug Yàlla. ¹⁷ Maa leen ko wax déy, képp ku baña nangul nguugug Yàlla ni ab xale, doo ca dugg mukk.»

Dèddu lépp, topp Yeesu jafe na

¹⁸ Kenn ci njiiti Yawut yi moo laajoon Yeesu, ne ko: «Seriñ bu baax bi, ana lu may def, ba texe fàww?» ¹⁹ Yeesu ne ko: «Lu tax nga naa ma ku baax ki? Kenn baaxul ku moy Yàlla donj. ²⁰ Xam nga ndigal yi: “Bul jaaloo, bul bóom, bul sàcc, bul seede lu dul dégg, teralal sa ndey ak sa baay.”» ²¹ Mu ne ko: «Loolu lépp, ba may ndaw laa ko dale sàmm ba tey.» ²² Yeesu dégg loolu, ne ko: «Lenn rekk nga deseleti. Mboolem loo am, jaay ko, séddale ko néew-doole yi. Su ko defee nga woomle fa asamaan. Boo noppee, ñewal, topp ci man.» ²³ Ba waa ji dégge loolu, am na tiis wu réy, ndax barele woon na lool. ²⁴ Yeesu gis loolu, daldi ne: «Boroom alal tàbbi ci nguugug Yàlla, ndaw lu jafe! ²⁵ Boroom alal dugg ci nguugug Yàlla de, giléem jaare bën-bènu puso moo ko gëna yomb.» ²⁶ Ña cay dégg nag ne: «Kon ku mana mucc nag?» ²⁷ Yeesu ne leen: «Li të nit, tëwul Yàlla.»

²⁸ Piyeer daldi ne: «Nun de, noo ngii, dèddu la nu amoon, topp la.» ²⁹ Yeesu ne leen: «Maa leen ko wax déy, amul kenn kuy dèddu kër, mbaa jabar, mbaa mbokk, mbaa waajur, mbaa doom, ngir nguugug Yàlla, ³⁰ te jotaatul lu ko èpp ay yooni yoon, tey jii, akug texe ba fàww, èllég.»

Yeesu baamooti na coono yi koy xaar

³¹ Yeesu nag yóbbu Fukk ñaak ñaar, wéetook ñoom, ne leen: «Nu ngii jëm Yerusalem, te mboolem lu yonent yi bindoon ci mbirum Doomu nit ki dina sotti. ³² Ndax dees na ko jébbal jaambur ñi dul Yawut, dees na ko ñaawal, saaga ko, tifi ko. ³³ Dinañu ko caw, rey ko, ba ca ñetteelu fanam, mu dekki.»

³⁴ Waaye ndaw ya, ñoom, xamuñu dara ci jooju wax, ndax mbóotu kàddug Yeesu gaa leen laqu, ba tax ñu umple la mu wax.

Yeesu faj na silmaxa

³⁵ Ba Yeesu di jubsii dëkk ba ñuy wax Yeriko, ab silmaxaa nga tooge ca peggoo yoon wa, di yalwaan. ³⁶ Silmaxa ba dégg mbooloo may romb, mu daldi laaj lu mu doon. ³⁷ Ñu ne ko Yeesum Nasaret moo fa jaare. ³⁸ Ci kaw loolu mu àddu ca kaw ne: «Yeesu, Sétub Daawuda, yërëm ma!» ³⁹ Ña jiitu femmu ko, ngir mu noppi. Teewul mu gëna xaacooti, ne: «Sétub Daawuda, yërëm ma!» ⁴⁰ Yeesu nag taxaw, ne ñu indil ko ko. Ba mu dikkee, ne laaj ko, ne ko: ⁴¹ «Loo bégg ma defal la ko?» Mu ne ko: «Xanaa may gis, Sang bi.» ⁴² Yeesu ne ko: «Gisal! Sa ngëm faj na la.» ⁴³ Ca saa sa muy gis, daldi topp ci Yeesu, di sàbbaal Yàlla. Mbooloo mépp gis loolu, di sant Yàlla.

19*Yeesu dal na ak bàkkaarkat ba*

¹ Gannaaw loolu Yeesu dugg biir Yeriko, jaare biir dëkk ba, di dem. ² Ndeke jenn waay a nga fa, di kilifag juutikat bu bare alal, ñu di ko wax Sase. ³ Mu bëgga gis nag kuy Yeesu, te mbooloo ma tax manu koo gis, ndax ndaama la woon. ⁴ Ci kaw loolu Sase daw, jiituji, daldi yéeg ci genn garab ca yoon woowu Yeesu wara jaare, ngir mu man koo gis. ⁵ Yeesu dikk ba tollu foofa, téen ne ko: «Sase, wàccal gaaw, ndax sa kër laa wara dali tey jii.»

⁶ Sase daldi wàcc gaaw, bége koo dalal lool. ⁷ Népp gis loolu, di ñurumtu naan bàkkaarkat bi la Yeesu dem kërám, dal ak moom. ⁸ Sase nag taxaw ne Sang bi: «Sang bi, ma ne, sama genn-wàllu alal, jox naa ko néew-doole yi, te jépp alal ju lewul ju ma masa jëlal kenn, dinaa fey ñeentam.» ⁹ Yeesu ne ko: «Bés niki tey, mucc dikkal na kër gii, ndax waa jii kat ci askanu Ibraayma la bokk, moom itam. ¹⁰ Ndax Doomu nit ki, ñi réer la seetsi, ngir musal leen.»

Ndénkaane aw sas la

¹¹ Naka la nit ña dégg loolu, Yeesu léebati leen, ndax booba jege na Yerusalem, te fekk na ñu foog ne nguurug

Yàlla day daldi teew ca saa sa. ¹² Moo tax mu ne: «Boroom juddu bu réy la woon. Muy waaja dem réew mu sore, ngir ñu fal ko fa buur, mu doora ñibbsi. ¹³ Ci biir loolu mu woo fukki surgaam, jox leen ku nekk benn posetub wurus bu gänjare, ne leen: «Liggéeyleen ci, ba ma ñibbsi.» ¹⁴ Waaye waa réewam ña dañu koo bañoon. Ci gannaawam lañu yónni ndaw, ne: «Kii, bugguñu muy sunu buur.»

¹⁵ «Gannaaw ba ñu ko falee buur, ba mu délsi, daa woolu surga, ya mu joxoon wurus wa, ngir xam ñaata la leen ca seen liggéey jural. ¹⁶ Kenn ka dikk, ne ko: «Sang bi, sa poset ba jur na fukki poset.» ¹⁷ Mu ne ko: «Jaaraamaa, surga bu baax bi. Gannaaw ci lu tuut nga wóore nag, falul ci fukki dëkk.» ¹⁸ Keneen dikk, ne: «Sang bi, sa poset ba indi na juróomi poset.» ¹⁹ Mu neeti kooka: «Yaw, falul ci juróomi dëkk.» ²⁰ Keneen dikk ne: «Sang bi, sa poset baa ngii ma fasoon ciw sekkit. ²¹ Dama laa ragal, ndaxte ku néeg nga. Dangay foqati loo dénkaanewul woon, di dajale loo jiwuloon.» ²² Mu ne ko: «Say wax laa lay àttee, surga bu bon bi! Xamoon nga ne nit ku néeg laa, di foqati lu ma dénkaanewul woon, di dajale lu ma jiwuloon. ²³ Lu la tee woona dénkaaneji sama alal ca dencukaay ba, ngir bu ma dikkee jot ko, boole ca tonoom?»

²⁴ «Ci kaw loolu mu ne ña fa taxawoon: «Nanguleen poset bi ci moom, jox ko boroom fukki poset yi.» ²⁵ Ñu ne ko: «Sang bi, kee ngeek fukki poset ba noppi!» ²⁶ Mu ne: «Ma ne leen, képp ku am, dees na ko dolli, waaye ku amul, la mu am as néew sax, dees na ko nangu. ²⁷ Sama noon yooyu buggul woon ma doon seen buur nag, indileen leen fii, te rendi leen ci sama kanam.»»

Yeesu dugg na Yerusalem

²⁸ Ba Yeesu waxee loolu ba noppi, ca la jiitu, jëm Yerusalem. ²⁹ Ba Yeesu dikkee ba jub dëkk ya ñuy wax Betfase ak Betani, ca wetu tund wa ñuy wax tundu Oliw ya, dafa yebal ñaari taalibeem, ³⁰ ne leen: «Demleen ci dëkk bi ci kanam. Bu ngeen agsee, dingeen gis cumbur bu yeewe, ju kenn masula war. Yiwileen ko, indi. ³¹ Bu ñu leen nee: «Lu tax ngeen di ko yiwi?» ne leen: «Sang bee ko soxla.»»

³² Ba ndaw ya demee, na leen ko Yeesu waxe lañu ko gise. ³³ Naka lañuy yiwi cumbur ba, ay boroomam ne leen: «Lu tax ngeen di yiwi cumbur bi?» ³⁴ Ñu ne: «Boroomam moo ko soxla.» ³⁵ Ñu indil Yeesu cumbur bi, sanni seeni yére ca kawam, daldi waral Yeesu.

³⁶ Naka la Yeesuy dem, nit ñi di ko lalal seeni yére ca yoon wa. ³⁷ Ba ñu jubsee Yerusalem, bay wàcce ca mbartalum tundu Oliw ya, mbooloom taalibe mépp la mbégte jàpp, ñu tàmbalee sàbbaal Yàlla ca kaw ndax kéemaan ya ñu gis. ³⁸ Ña nga naan:

«Na barke wàccal buur bi ñëw ci turu Boroom bi!

Jàmm fa asamaan; daraja fa bérab ya géna kawe!»

³⁹ Yenn Farisen ya woon ca mbooloo ma nag ne Yeesu: «Sériñ bi, yeddal sa taalibe yi!» ⁴⁰ Mu ne: «Maa leen ko wax, su ñii noppi woon, doj yi ñooy xaacu.»

⁴¹ Ba Yeesu jubsee ba séen dëkk ba, jooj na ndax moom. ⁴² Mu ne: «Céy yaw itam, boo xamoon bésu tey jii li lay may jàmm! Waaye fii mu ne, làqu na say gët. ⁴³ Ay bés a ngi dikk ci sa kaw, keroog say noon a lay gawe ab sékk, yéew la, tance la wet gu nekk. ⁴⁴ Ñoo lay nappaaje ci suuf, yaak say doom yi ci sa biir, te duñu bàyyi doj ci kaw doj ci sa biir, ndax ba sa bésu wall dikkee, yaa ko ràññeewuloo.»

Yeesu jàngle na ca kër Yàlla ga

⁴⁵ Gannaaw loolu Yeesu dugg ca kër Yàlla ga, daldi dàq ña fay jaaye. ⁴⁶ Mu ne leen: «Bindees na ne: “Sama kër gi kërug julli la, waaye yeen, moom ngeen def rawtub sàcc!”»

⁴⁷ Yeesu nag di jàngle bés bu nekk ca kër Yàlla ga. Ba mu ko defee sarxalkat yu mag ya, ak firikati yoon ya, ñook njiit wa, di ko wuta rey. ⁴⁸ Waaye xamuñu nu ñuy def, ndax ñépp a ko doon déglu, teewlu ko lool.

20

Diñat nañu sañ-sañu Yeesu

¹ Mu am bés bu Yeesu doon jàngal askan wi ca kër Yàlla ga, di xamle xibaaru jàmm bi. Sarxalkat yu mag ya ak firikati yoon ya ne jalañ, ñook njiit ya. ² Ñu ne ko: «Wax nu, lii ngay def, ci ban sañ-sañ nga koy defe, mbaa kan moo la jox boobu sañ-sañ?» ³ Yeesu ne leen: «Ma laaj leen man itam leen, waxleen ma, ⁴ sóobe Yaxya ci ndox, asamaan la ndigal la bawoo, am ci nit ñi?» ⁵ Ñu diisoo ci seen biir, daldi ne: «Su nu nee: asamaan la ndigal la bawoo da naan lu tax kon gëmunu Yaxya?» ⁶ Te su nu nee: ci nit ñi la ndigal li bawoo, mbooloo mépp a nuy sànni ay xeer, ndax wóor na leen ne Yaxya ab yonent la woon.»

⁷ Ñu daldi ne ko: «Xamunu fu mu ko jële.» ⁸ Yeesu ne leen: «Kon man itam duma leen wax ci ban sañ-sañ laay defe lii.»

Beykat ya def nañu lu épp

⁹ Ci kaw loolu Yeesu léeb askan wa, lii, ne leen: «Jenn waay moo jëmbatoon ab tóokëru reseñ, batale ko ay beykat, daldi dem yoon wu yàgg. ¹⁰ Ba tóokër ba ñoree, mu yebal ca beykat ya ab surga, ngir ñu jox ko wàllam ca meññeef ma. Beykat ya dóor surga ba, ba noppi dàq ko, mu dellu loxoy neen. ¹¹ Mu dellu yónni beneen surga, ñu dóor ko moom itam, torxal ko, dàq ko, mu dellu loxoy neen. ¹² Mu dellu yónni ñetteelu surga, kooku it, ñu gaañ ko, sànni ko ca biti.»

¹³ «Boroom tóokër ba ne: “Nan laay def nag? Naa yónni sama doomu bopp ji ma sopp boog, xanaa moom, dinañu ko rus!”

¹⁴ Teewul ba beykat ya gisee doom ji, dañu ne ci seen biir: “Kii mooy donn; nanleen ko rey, su ko defee ndono li féeteek nu.” ¹⁵ Ba loolu amee ñu génne ko tóokër ba, rey ko.»

«Ana nu boroom tóokër biy def beykat yi nag? ¹⁶ Xanaa dikk, rey beykat yooyu, dénk tóokër ba ñeneen.» Nit ña dégg loolu daldi ne: «Yàlla tere!» ¹⁷ Yeesu ne leen jàkk, daldi ne: «Kon nag lii ñu bind, lu muy tekki!

“Doj wi tabaxkat yi beddi woon, moo mujj di doju coll wi.”

¹⁸ Woowu doj, képp ku ci dal, dammtoo, te ku mu dal, rajaxe la.»

¹⁹ Firikati yoon yaak sarxalkat yu mag ya nag, ca saa sa lañu doon fexee teg Yeesu loxo, ndax xamoon nañu ne ñoo moom léeb woowu, waaye nit ña lañu ragal.

Buur ak jagleem, Yàlla ak jagleem

²⁰ Ba mu ko defee ñu bàyyi Yeesu xel, daldi yebal ay yeerukat, sas leen ñu yiwi-yiwlu te di ko fiir ci kaw kàddu ba jàpp ko, ngir jébbal ko boroom dëkk bay boroom kilifteef ga ak sañ-sañ ba. ²¹ Yeerukat ya dikk ne Yeesu: «Sériñ bi, xam nanu ne njub ngay wax, di ko jàngle. Amuloo parlàqu itam, waaye ci kaw dégg ngay jànglee yoonu Yàlla. ²² Wax nu nag ndax yoon maye na, nu fey Buur Sesaar galag, am déet.»

²³ Teewul Yeesu ràññee seen pexe. Mu ne leen: ²⁴ «Joxleen ma ab posetub dinaar, ma gis. Nataal bii ak tur wii ci binde, kuy boroom?» Ñu ne ko: «Sesaar.» ²⁵ Mu ne leen: «Kon kay yéfi Sesaar, joxleen ko Sesaar; te yéfi Yàlla, ngeen jox ko Yàlla.»

²⁶ Manuñu koo fiir ba jàppe ko menn mbir ca kanam mbooloo ma, xanaa waaru ca tontam, ba wedam.

Sadusen ya fiirati nañu Yeesu

²⁷ Ñenn ci Sadusen, yi weddi ne ndeendekki am na, ñoo dikoon ca Yeesu. Ñu ne ko: ²⁸ «Sériñ bi, Musaa da noo bindal ne ku góor, su ku mu bokkal waajur

faatoo te amul ak jabaram doom, na jël jabaram, ngir amal mbokkam ma dee, kuutaay. ²⁹ Léegi juróom ñaari góor ñu bokk ndey ak baay la woon. Taaw ba takk jabar, gannaaw gi mu faatu, te bàyyiwul doom. ³⁰ Tofo ba, ³¹ ak ñaareelu tofo ba, ku ci nekk donn na ndaw sa ca magam, ñu topplantee ko noonu, ba juróom ñaar ñépp dee te amuñu ca doom. ³² Gannaaw gi ndaw sa it dee. ³³ Ndaw si nag, keroog ndekkite la, kan la ciy doon jabaram, gannaaw juróom ñaar ñépp a ko jéloon jabar?»

³⁴ Yeesu ne leen: «Ci áddina sii la góor ñi ak jigéen ñi di séy. ³⁵ Waaye ña ñu yeyale ndekkitel èllég, yeyale leen bakkan ci áddina siy ñëw, ñooñu, su boobaa, kenn du ci am jabar mbaa jëkkër. ³⁶ Dootuñu mana dee it, ndax niy malaaka lañuy mel. Ay doomi Yàlla lañuy doon, ndax da leen di fekk dekki. ³⁷ Te Musaa ci boppam xamle na ne ñi dee dañuy dekki, na ko téere indee ca mbirum ngarab sa*. Mooy ba mu wooyee Boroom bi: “Yállay Ibraayma, Yállay Isaaxa, Yállay Yanqóoba.” ³⁸ Kon moom du ñi dee lay seen Yàlla, xanaa ñiy dund, ndax fa moom, ñépp a ngi dund.»

³⁹ Ci kaw loolu ñenn ca firikati yoon ya áddu ne ko: «Dëgg nga wax, Sériñ bi!»

⁴⁰ Gannaaw loolu ñemeetuñu koo laaj dara.

Almasi sët la, Sang la

⁴¹ Yeesu neeti leen: «Nees mana waxe ne Almasi, Sëtub Daawuda la? ⁴² Daawuda ci boppam moo ne ko téereb Sabóor:

“Boroom bi moo ne sama Sang: “Toogeel sama ndijoor,

⁴³ ba ma def say noon, sa ndëggastal†.”

⁴⁴ Gannaaw Daawudaaw wooye Almasi “Sang bi,” nu mu nekke ab sëtam?»

⁴⁵ Yeesu nag wax ak ay taalibeem, askan wépp di dégg. Mu ne: ⁴⁶ «Moytuleen firikati yoon yi taamoo jaagar-jaagareek seen mbubb yu réy, di sàkku nuyooob gëddaal ca pénc ma, ak toogu yu kaname ca jàngu ya, ak péetey teraanga ca bernde ya. ⁴⁷ Ñooy saax-saaxee alalu jétun ñi tey julli julliy ngistal yu dul jeex. Ñooñu la seen mbugal di gëna tar.»

21

Sarax néew na te ëpp yool

¹ Ci kaw loolu Yeesu xoolaat, daldi gis boroom alal yi, ñuy dugal seen sarax ca boyetu kër Yàlla ga. ² Mu gis itam ab jétun bu néew doole, mu def ca ñaari poseti xàñjar*. ³ Yeesu ne: «Maa leen ko wax déy, jétun bii, ñii ñépp, moo leen ëpple lu

mu joxe. ⁴ Ndax ñii ñépp, la ñu woomle, ca lañu sompe, def ci boyetu sarax bii; waaye moom ci biir ag ñàkkam la jël mboolem ab dundam, def ci.»

Yerusalem tas, Doomu nit ki délsi

⁵ Mu am nag ay nit ñu doon wax ca kër Yàlla ga, ak taaru doji tànnéef, ya ak yeneen alali jooxe ya ñu ko rafetale. Yeesu itam ne leen: ⁶ «Lii ngeen gis nii, ay jant a ngi ñëw yu fi doj dootul des ci kaw doj, lépp ay jóoru.»

⁷ Ñu laaj ko ne ko: «Sériñ bi, loolu kañ lay doon? Ak luy doon ub takk buy xamle ne looloo ngi waaja dikk?» ⁸ Yeesu ne: «Moytuleen, ngir ñu bañ leena nax, ndax ñu bareey dikk, tuddoo sama tur, naan: “Man a,” te naan: “Waxtu wi jege na.” Buleen leen topp. ⁹ Bu ngeen dégge ay xare aki salfaañoo, buleen tiit, ndax fàww loolu jëkka am. Waaye du doonagum muj ga, ca saa sa.»

¹⁰ Mu neeti leen: «Aw xeet dina jógal aw xeet, am réew jógal am réew. ¹¹ Ay yéngu-yénguy suuf yu réy dina am, ay xiif aki mbas dikke fu bare, te xew-xew yu raglu dina am, ak firnde yu mag yu jóge asamaan. ¹² Waaye laata loolu lépp, yeen, dees na leen teg loxo, fitnaal leen, jébbal leen kuréli jàngu ya, tēj leen kaso. Dees na leen yóbbu ci kanami buur aki boroom dëkk ndax sama tur, ¹³ ngir ngeen doxe ca yékkati kádduy seede. ¹⁴ Kon nag defleen bu baax ci seen xel, ne soxlawuleena waajal káddug layoo. ¹⁵ Ndax man maa leen di jox lámmini wu ánd ak xel, wu seen benn noon dul mana daq mbaa di ko weddi. ¹⁶ Pexe mu leen jàpplu dina sababoo sax ci seeni waajur ak seen doomi ndey ak seeni jegeñaale ak seeni xarit, te dees na rey ñenn ci yeen, ¹⁷ Népp a leen di bañ ndax sama tur. ¹⁸ Waaye seen genn kawaru bopp sax du sàнку. ¹⁹ Saxooleen muñ nag, daldi muc.

²⁰ «Bu ngeen gisee gàngooru xare gu gaw Yerusalem, su boobaa xamleen ne tasteem dégmal na. ²¹ Su boobaa ña mu fekk ca diiwaanu Yude, nañu daw jëm kaw tund ya, ñi ci biir dëkk bi, nañu daw gënn, te ña mu fekk ca tool ya, buñu duggsi ci biir dëkk bi. ²² Ndax janti mbugal lay doon, ngir sottal mboolem lu ñu bindoon. ²³ Wóoy ngalla jigéeni wérul ña, ak ñay nàmpal ca yooyu jant! Ndax tiis wu réy lay doon ci réew mi, akam sànj ci kaw askan wii. ²⁴ Dinañu fàddoo ñawkey saamar, te dees na leen jàpp njaam, yóbbu ci mboolem xeet yi. Te jaambur ñi dul Yawut ñooy joggati Yerusalem, ba kera àppu ñooñu dul Yawut di mat.

* **20:37** 20.37 Seetal ci *Mucc* ga 3.6. † **20:43** 20.42 Seetal ci *Sabóor* 110.1. * **21:2** 21.2 Mooy posetub lepton. Seetal Xaalis ci Leeral yi.

²⁵ «Ay firnde dinañu feeñ ci jant bi ak weer wi ak biddiwi yi. Ci kaw suuf njàqare ak tiitaange mooy ñeel xeet yi ndax riirum géeg j ak gannax yi, ²⁶ nit ñiy séentu li nara dikkal àddina, di xëm ndax tiitaange, nde dooley asamaan dina saqi. ²⁷ Su boobaa dees na gis Doomu nit ki di ñew ciw niir, ànd ak manoore ak daraja ju réy. ²⁸ Bu xew-xew yooyu tàmbalee sotti nag, taxawleen te siggi, ndax seenug njot dëgmal na.»

²⁹ Ci kaw loolu Yeesu léeb leen ne leen: «Xool-leen garabu figg mbaa geneen garab. ³⁰ Bu ngeen gisee mu jebbi, ca ngeen di xamal seen bopp ne nawet jubsu na ba noppi. ³¹ Bu ngeen gisee xew-xew yooyu sotti, noonu itam ngeen di xame ne nguuruq Yàlla dëgmal na.»

³² «Maa leen ko wax déy, niti tey jii duñu wéy mukk, te loolu lépp sottiwul. ³³ Asamaan ak suuf dina wees, waaye samay wax du wees mukk.»

³⁴ «Moytuleena yaafusal seen bopp ci naan gu épp ak màndite ak xalaati àddina, lu ko moy bés ba jekki dal ci seen kaw, ³⁵ ndax ni mbaal di bettee, noonu la bés bay jekkee dal ci kaw mboolem ñi ci kaw suuf. ³⁶ Teewluleen boog, tey ñaan saa su nekk, ba mana mucc ci mboolem looluy nara xew, ngir ngeen taxaw fi kanam Doomu nit ki.»

³⁷ Bés bu nekk nag Yeesoo nga doon yendoo jàngle ca kër Yàlla ga, bu guddee mu fanaani ca kaw tund wa ñuy wax tundu Oliw ya. ³⁸ Mbooloo mépp a daan jèlu, fekki ko ca kër Yàlla ga, ngir déglu ko.

22

Njiiti yoon yi fexeel nañu Yeesu

¹ Màggalu Mburu mu amul lawiir, te ñu di ko wax bésub Mucc, moo jubsu woon. ² Ci biir loolu sarxalkat yu mag ya ak firikati yoon ya di seet nu ñuy fexee ba rey Yeesu, waaye dañoo ragaloon nit ña. ³ Seytaane nag dugg Yuda, mi ñuy wooye Iskaryo te mu bokkoon ca Fukk ñaak ñaar. ⁴ Yuda daldi diisooji ak sarxalkat yu mag ya, ak kilifay wattukati kër Yàlla ga, ngir xam nan lay tege Yeesu ci seeni loxo. ⁵ Ñu am ca mbégte, digook moom, ngir jox ko xaalis. ⁶ Yuda nangu, di wut nag yoon wu mu wore Yeesu, fu mbooloo ma teewul.

Yeesu tàggoon na

⁷ Ci kaw loolu bésu màggalu Mburu mu amul lawiir agsi, ñu war caa rendi gattub bésub Mucc. ⁸ Yeesu yebal Piyeer ak Yowaan ne leen: «Demleen, waajalal nu bésub Mucc bi, ba nu reeri.» ⁹ Ñu ne ko: «Foo bëgg nu waaje ko fa?» ¹⁰ Mu ne leen: «Bu ngeen di dugg ca dëkk ba

rekk, dingeen dajeek waa ju yenu njaqas ndox. Toppleen ci moom ba ca biir kër ga mu jëm, ¹¹ te ngeen ne boroom kër ga: «Sëriñ bi nee: Ana néegu gan, bi may reere reeru bésub Mucc, maak samay taalibe?» ¹² Kooku moo leen di won néegub kaw bu yaa bu ñu defar ba noppi. Foofa ngeen di waajale.»

¹³ Ba ñu demee, noonee leen ko Yeesu waxe, na lañu gise lépp. Nu daldi waajal reer ba.

¹⁴ Ba waxtuw reer jotee, Yeesu toog ak ndaw ya, ¹⁵ ne leen: «Yàkkamti woon naa lool bokk ak yeen reeru bésub Mucc bii, bala maa tàbbi coono. ¹⁶ Ndax maa leen ko wax, dootuma ko reer mukk, ba keroog solob reer bi di sotti ca nguuruq Yàlla.»

¹⁷ Ci kaw loolu mu jël ab kaas, yékkati kàddug cant, daldi ne: «Jël-leen kaas bii, te ngeen séddoo ko. ¹⁸ Ndax maa leen ko wax, gannaaw-si-tey dootuma naan ndoxum reseñ, ba kera nguuruq Yàlla dikk.»

¹⁹ Gannaaw loolu mu jël mburu, yékkati kàddug cant, dagg ko, jox leen ko ne: «Lii moo di sama yaram wi ñu jooxe ngir yeen. Deeleen def lii, di ma ko fàttlikoo.»

²⁰ Kaas ba itam noonu la def ak moom gannaaw reer ba, ne leen: «Kaas bii mooy kóllère gu yees gi fasoo ci sama deret ji leen nara tuurul. ²¹ Waaye nag ki may wor, loxoom a ngi ci ndab lii nu bokk. ²² Doomu nit ki déy, ni ñu ko dogale, noonu lay deme, waaye wóoy ngalla ki pexe mi ñu koy wore di jaare ci moom.» ²³ Ci kaw loolu taalibe yi di laajante ci seen biir, kan ci ñoom moo nar jooju jëf.

²⁴ Ab werante itam dikkal leen, ñuy xëccoo ci seen biir ku wara gëna kawe ci ñoom. ²⁵ Yeesu nag ne leen: «Buuri xeeti àddina doole lañuy nguuroo ci seen kaw, teewul ñi leen di néewal doole, baaxekati nit ñi lañu leen di wooye. ²⁶ Yeen nag bumu deme noonu ci seen biir. Ki gëna kawe ci yeen, na mel ni moo gën di ndaw, te njiit li, na mel ni ab surga. ²⁷ Ki ñu taajal ndab li, ak surga bi ko taajal, ana ku ci gëna kawe? Xanaa du ki ñu taajal? Moonte man, ci seen biir laa tooge toogaayu surga! ²⁸ Yeen nag yeenay ñi des ak man ci sama biir coono. ²⁹ Man itam ni ma sama baay dénke nguur, ni laa leen koy dénke. ³⁰ Yeenay lekk ak a naane ca sama ndab, ca sama nguur, te yeenay tooge ay gàngune, di jiite fukki giiri bànni Israyil ak ñaar.»

³¹ Yeesu neeti: «Simon, Simon! Seytaane kat mu ngi sàkku ab sañ-sañ ngir man leena jéri ni am pepp. ³² Waaye man tinul naa la, ngir sa ngëm baña giim. Yaw nag boo waññikoo, nanga dooleel sa bokki gëmkat.» ³³ Piyeer ne ko: «Sang bi, jekk

naa ci ànd ak yaw kaso, ak ci ànd ak yaw dee.» ³⁴ Yeesu ne ko: «Piyeer, maa la ko wax, bala ganaar a sab tey jii, dinga weddi ñetti yoon ne xam nga ma.»

³⁵ Yeesu neeti leen: «Ba ma leen yebalee te du dencukaayu xaalis, du mbuus, du carax yu ngeen yóbbaaale, ndax ñàkk ngeen dara?» Ñu ne ko: «Déedéet.» ³⁶ Mu ne leen: «Léegi nag képp ku am dencukaayu xaalis, na ko jël, ku am mbuus it, na ko jël; ku amul saamar, na jaay mbubbam, jënde saamar. ³⁷ Ndax maa leen ko wax, li ñu bind ne, “Mook defkati mbon yi lañu boole ab àtte,” fàww mu am ci man, te loolu jëm ci sama mbir mu ngi sottisi.» ³⁸ Ñu ne ko: «Sang bi, ñaari saamar a ngi fi.» Mu ne leen: «Doy na.»

Yeesu ñaan na ca tundu Oliw ya

³⁹ Ci kaw loolu Yeesu génn, jëm ca tundu Oliw ya, na mu ko baaxoo woon, taalibe ya topp ci moom. ⁴⁰ Ba mu agee ca bérab ba, da ne leen: «Ñaanleen, ngir baña tàbbi cig fiir.» ⁴¹ Ba loolu amee mu dând leen lu tollook saanu xeer, daldi sukk, di ñaan. ⁴² Mu ne: «Baay, su dee sa coobare, teggil ma kaasoo naqar bii. Bumuy sama coobare nag, waaye yaw, na sa coobare am.» ⁴³ Malaaka mu bawoo asamaan daldi koy feeñu, dooleel ko. ⁴⁴ Njâqare nag jàpp Yeesu, mu géntee ténku ci kàdduy ñaanam, ba aw ñaqqam mujj mel ni lumbi deret, di dal ci suuf.

⁴⁵ Mu ñaan ba noppi, daldi jóg, délsi ci taalibe yi, fekk leen ñuy nelaw, sonn lool ndax aw tiis. ⁴⁶ Mu ne leen: «Lu ngeen di nelaw? Jógleen ñaan, ngir baña tàbbi cig fiir.»

Jàpp nañu Yeesu

⁴⁷ Naka la Yeesu di wax, daaneelagul, mbooloo ne jimeet, ka ñuy wax Yuda, di kenn ca Fukk ñaak ñaar jiite leen. Yuda dikk ba ci Yeesu, bëgg koo foon. ⁴⁸ Yeesu ne ko: «Yuda, foon ngay wore Doomu nit kil!» ⁴⁹ Ña ànd ak Yeesu nag gis la ca nara topp, ñu ne: «Sang bi, nu jame saamar boog?» ⁵⁰ Kenn ci ñoom daldi caw surgab sarxalkat bu mag ba, njoofo noppu ndijooram. ⁵¹ Teewul Yeesu ne: «Bâyivleen, na fi yem.» Mu laal noppu waa ja, wéral ko.

⁵² Ba loolu amee Yeesu wax ak ña ko jàppsi: sarxalkat yu mag ya, ak kilifay wattukati kër Yàlla ga, ak mag ña. Mu ne leen: «Mbetete dama di ab fippukat, ba ngeen dikkey saamar aki njur. ⁵³ Moona bés bu nekk, maak yeen la woon ca kër Yàlla ga, te teguleen ma loxo. Waaye seen waxtu la léegi, bi kilifteefug lëndem ayee nii.»

Piyeer jàmbu na

⁵⁴ Ba mu ko defee ñu jàpp Yeesu, yóbbu ko ba ca kër sarxalkat bu mag ba, Piyeer dând fu sore, topp ca. ⁵⁵ Fekk na ñu taal sawara ca digg ètt ba, toog yéew sawara wa, Piyeer dikk toog ca seen biir. ⁵⁶ Ab surga bu jigéen nag gis ko, mu toog fi kanam taal bi, mu ne ko jàkk, ne: «Kii it ci la, moom la àndaloon!» ⁵⁷ Piyeer nag miim, ne: «Soxna si, xawma kooku!» ⁵⁸ Nes tuut keneen gis ko ne: «Yaw it ci ñoom nga!» Piyeer ne ko: «Waa jii, du man!»

⁵⁹ Ba ñu ca tegee lu mat waxtu, keneen jaarat ca wax ja ne: «Kii kay wax-dëgg, moom la àndaloon, nde waa Galile la.» ⁶⁰ Teewul Piyeer ne ko: «Waa jii, li ngay wax, xawma ma ko de!» Ca saa sa, ganaar sab, te kàddug Piyeer daanoogul sax. ⁶¹ Ci kaw loolu Sang bi geesu, ne jàkk Piyeer, Piyeer fattliki la ko Sang bi waxoon ne ko: «Bala ganaar a sab tey jii, dina fekk nga jàmbu ma ñetti yoon.» ⁶² Piyeer nag génn, di jooy jooy yu metti.

Mitital nañu Yeesu

⁶³ Ci kaw loolu ña jàpp Yeesu, di ko kókkali ak a dóor. ⁶⁴ Ñu muur kanam gi, naan ko: «Yaw, waxal nu kàddug waxyu boog, ana ku la dóor?» ⁶⁵ Yeneen saaga yu bare tifaar nañu ko ko.

Yeesu janoo naak Pilaat ak Erodd

⁶⁶ Ba bêt setee, mbooloom magi askanu Yawut, ak sarxalkat yu mag ya, ak firikati yoon ya, ñépp daje. Ñu yóbbu Yeesu ca seen kurélu àtte ba. ⁶⁷ Ñu ne ko: «Soo dee Almasi, wax nu ko.» Mu ne leen: «Su ma leen ko waxee, dungeen ma gëm. ⁶⁸ Te su ma leen laaje, dungeen tontu. ⁶⁹ Waaye gannaaw-si-tey, Doomu nit ki mooy toog ci ndijooru Yàlla, Aji Man ji.» ⁷⁰ Népp daldi ne: «Kon yaay Doomu Yàlla?» Mu ne leen: «Yeena waxal seen bopp ne man la.» ⁷¹ Ñu ne nag: «Lu nu doyeeti seede, gannaaw nun ci sunu bopp noo ko dégge ci gémmiñam!»

23

¹ Gannaaw loolu mbooloo ma mépp jóg, daldi yóbbu Yeesu ca Pilaat. ² Ñu tàmbali di ko sosol, naan: «Kii lanu fekk muy fàbbi askan wi, di aaye ku fey Sesaar galag, te naan moom ci boppam mooy Almasi, di buur.» ³ Pilaat laaj ko ne ko: «Yaa di buurub Yawut yi?» Mu ne ko: «Yaa ko wax.» ⁴ Pilaat ne sarxalkat yu mag ya ak mbooloo ma: «Waa jii, gisuma ci moom genn tooñ.» ⁵ Teewul ñu géna dëggal seeni wax, ne: «Mooy yékkati askan wi, ndax li muy jàngle ci mbooloom réewum Yawut, dale ko ca Galile ba fi.»

6 Pilaat dégg loolu, daldi ne: «Waa jii waa Galile la?» 7 Ba mu wóoree Pilaat ne ca diiwaan, ba ca kilifteefu Erodd la Yeesu bokk, ca la ko yónnee Erodd, yemook Erodd itam nekk Yerusalem ca fan yooya.

8 Ba Erodd gisee Yeesu, bég na lool, ndax yàggoon na koo bégga gis, ngir la mu déggoon ay mbiram, ba tax mu yaakaara teewe ay kéemaanam. 9 Mu laaj ko lu bare, Yeesu tontuwu ko. 10 Sarxalkat yu mag ya ak firikati yoon yaa nga taxaw, di ko tuumaal ak doole. 11 Erodd aki dagam nag sewal Yeesu, di ko ñaawal. Gannaaw loolu mu solal ko mbubb mu yànj, delloo ko Pilaat. 12 Erodd ak Pilaat, bésub keroog ay xarit lañu, doonte ay noon lañu woon.

13 Ci kaw loolu Pilaat woo sarxalkat yu mag ya, ak njiit ya ak askan wa. 14 Mu ne leen: «Yeena ma indil waa jii, ne ma mooy lajjal askan wi. Man nag laaj naa ko ci seen kanam, waaye gisuma ci moom genn tooñ ci li ngeen ko tuumaal. 15 Erodd itam gisul lenn ci moom, ndax moo nu ko yónneewaat. Mu ngoog, waa jii deful lenn lu jar àtteb dee. 16 Kon nag dama koy dóorlu, yiwi ko.» 17 Booba fàww Erodd bàyyil leen kenn ca bésu màggal ga. 18 Népp daldi xaacoondoo, ne: «Reyal kii te yiwil nu Barabas!»

19 Barabas nag fippu gu amoon ca dèkk ba, ak nit ku ñu fa bóom, moo waral ñu tēj ko kaso. 20 Pilaat namma bàyyi Yeesu, daldi waxaax ak mbooloo ma. 21 Teewul ñuy xaacu, naan: «Daaj ko ci bant! Daaj ko ci bant!»

22 Pilaat ne leen ñetteel bi yoon: «Ana lu bon lu kii def? Lenn lu jar dee, gisuma ko ci moom. Kon nag, dama koy dóorlu, yiwi ko.» 23 Ñu génatee xaacu, di sàkku ñu daaj ko ci bant. Seen coow la mujj ko èpp doole. 24 Ci kaw loolu Pilaat dogal ñu defal leen la ñu sàkku. 25 Mu yiwi ka ñu ko ñaanoon, te jéfi fippu ak nit ku ñu bóom taxoon ñu tēj ko kaso. Yeesu nag, mu teg ko ci seeni loxo, ngir ñu def ko lu leen neex.

Daaj nañu Yeesu ci bant

26 Ba ñuy yóbbu Yeesu, jenn waay ju dèkk Siren, ñu di ko wax Simon, moom lañu dajeel, mu jóge ca tool ya. Ñu teg bant ba ñuy daaj Yeesu, ngir mu gàddu ko, topp ca moom. 27 Nit ñu bare nag topp ko, jigéen ñay yuuxu, di ko jooy. 28 Yeesu geesu leen, ne: «Yeen jigéeni Yerusalem, buleen ma jooy! Jooyleen seen bopp ak seeni doom. 29 Ay jant a ngi ñëw kat, dees na ca ne: “Ndoklee jigéen ju télee am doom, masula jur, masula nàmpal!” 30 Su boobaa,

“Nit ñee naan tund yu mag yi: ‘Daanuleen ci sunu kaw!’,
naan tund yu ndaw yi: ‘Sul-leen nu!’ ”

31 Ndegam bant bu tooy lees di def nii, ana nu bant bu wow di mujje?»

32 Yóbbaaale nañu itam ñaari saaysaay, ngir boole leen ak Yeesu, rey leen. 33 Ba ñu agsee ca bérab, ba ñuy wax Kaanjo bopp, fa lañu daaj Yeesu ci bant, daajaale ñaari saaysaay ya, kenn ca ndijooram, ka ca des ca càmmoñam.

34 Ci kaw loolu Yeesu ne: «Baay, baal leen, ndax li ñuy def, xamuñu ko.» Ñu daldi tegoo bant ay yéreem, ngir séddoo ko. 35 Mbooloo maa nga taxaw di seetaan, njiit ya ñoom di ko kókkali, naan: «Musal na ay nit; na musal boppam nag, ndegam mooy Almasib Yàlla, ki ñu fal!» 36 Takkerder ya it di ko ñaawal. Ñu diikk, tàllal ko bineegar, ngir mu naan. 37 Ñu ne ko: «Gannaaw yaa di buurub Yawut yi, musalal sa bopp!»

38 Ñu bindal ko nag fa ko tiim, mbind mii: «Kii mooy buurub Yawut yi.»

39 Kenn ca saaysaay ya ñu wékkoon ci bant, di ko xas, naan ko: «Xanaa du yaw yaay Almasi? Wallul sa bopp te wallu nu!» 40 Moroom ma nag femmu ko, ne ko: «Ragaloo sax Yàlla, te yaa ngi ci menn mbugal mii?» 41 Nun sax, lii jaadu na ci nun, ndax sunu yoolu jéf lanu jot. Waaye kii deful dara lu teggi yoon!» 42 Mu teg ca ne: «Yeesu, boo délsee ci sa nguur, fattliiku ma!» 43 Yeesu ne ko: «Yaw laa ne déy, bésub tey jii, man ngay nekkal fa Ajjana.»

Yeesu saay na

44 Ba ñu demee ba tollu wetu fukki waxtu ak ñaar ca bëccég, ag lëndëm a wàcc ca réew ma mépp, ba fukki waxtu ak juróom ca ngon. 45 Naka la jant bi giim, ridob biir néeg Yàlla ba xar ca digg ba.

46 Ci kaw loolu Yeesu àddu ca kaw, ne: «Baay, jébbal naa la samag noo!» Ba mu waxee loolu la dee. 47 Njiitu takkerder ba ko teewe woon nag sàbbaal Yàlla, ne: «Aylayéwén, waa jii ku jub la.»

48 Ba loolu amee mboolem ña fa daje woon di seetaan te teewe loolu, ñépp dellu seeni kër, tey fègg seen dënn ndaxu tiis. 49 Mboolem xamey Yeesu, ak jigéen ña ko toppe woon ca Galile, ña nga dànd lu sore, di seetaan.

Rob nañu Yeesu

50 Ndeke jenn waay ju ñuy wax Yuusufa, ma nga bokkoon ca kurélu àttekati Yawut ya. Ku baax, ku jub la woon. 51 Kooku ànduloon ca àtteb kurél ga ak seen jéf jooju. Ma nga cosaanoo woon dèkkub Yawut ba ñuy wax Arimate, te moom itam, nguurug Yàlla la doon séentu. 52 Moom moo dem ca Pilaat, sàkku ci moom, mu jox ko néewub Yeesu. 53 Gannaaw loolu mu wàccee ko ca bant ba, sànge ko càngaayal

lêe, denc ko ci bàmmeel bu ñu yett ciw doj, te maseesu caa denc ab néew. ⁵⁴ Bésuub Waajal la woon, bésuub Noflaay bi ci topp di waaja taxaw. ⁵⁵ Fekk na jigéen ña dale woona ànd ak Yeesu ca Galile, ña nga topp ca Yuusufa. Ñu gis bàmmeel ba, ak na ñu ca dence néew ba. ⁵⁶ Ba loolu amee ñu dellu, waajali cuuraay ak diwu xeeñlu ngir néew ba. Bésuub Noflaay nag taxaw, ñu dal-lu, ni ko yoon santane.

24

Yeesu Almasi dekki na

¹ Ca èllég sa, di ndoortel ayu bés, jigéen ña jëlu dem ca bàmmeel ba, yóbbaale cuuraay la ñu waajal. ² Ñu agsi bàmmeel ba, fekk ñu randal doj wa uboon bunt ba, laf ko ca wet ga. ³ Ñu dugg, fekkuñu fa néewu Sang Yeesu. ⁴ Naka lañu nekke seenug njaaxle ci loolu, ñaari góor ne jimeet fa seen wet, sol yére yuy melax. ⁵ Naka la leen tiitaange jàpp, ba ñu sukk, dèpp seen jë fa suuf, ñu ne leen: «Kiy dund, lu tax ngeen di ko seet ci biir ñi dee? ⁶ Nekku fi; dekki na. Fàttlikuleen la mu leen waxoon, ba mu génagulee Galile. ⁷ Da noon: «Fàww ñu teg Doomu nit ki ci loxoy bàkkaar kat yi, ñu daaj ko ci bant, rey ko, ba ñetteelu fanam, mu dekki.» ⁸ Booba lañu fàttliku kàddug Yeesu googu. ⁹ Ñu jóge ca bàmmeel ba, dem àgge loolu lépp Fukk ñaak benn, ak ña ca des ñépp. ¹⁰ Jigéen ña àgge loolu ndaw ya ñoo doon Maryaam Magdala, ak Yowaana, ak Maryaama yaayu Yanqóoba, ak itam ñeneen jigéen ñu àndoon ak ñoom. ¹¹ Teewul ñu def waxi jigéen ña ay caaxaan, ba gëmuñu leen. ¹² Piyeer nag jóg, daw, ba ca bàmmeel ba. Mu ségg, yër, gisul lu dul càngaay la. Mu daldi ñibbi, jaaxle lool ca mbir ma.

Yeesu feeñ na ca yoonu Emayus

¹³ Ndeke ca bés booba ñaar ca taalibe yaa nga woon ca yoonu dëkk bu ñuy wax Emayus, digganteem ak Yerusaleem wara tollu ci fukki kilomeetar. ¹⁴ Ña ngay waxtaane mboolem xew-xew yoyu. ¹⁵ Naka lañuy waxtaan ak a diisoo, Yeesu ci boppam dab leen, ànd ak ñoom. ¹⁶ Teewul seeni gët tēlee ràññee, ba manuñu koo xàmmi. ¹⁷ Yeesu ne leen: «Lu ngeen di waxtaane nii ci yoon wi?» Ñu daldi taxaw, seen kanam lëndem ndaxu tiis. ¹⁸ Kenn ci ñoom, ku ñuy wax Kelyopas ne ko: «Xanaa yaw rekk de, yaa dal Yerusaleem te umple li fi xew fan yii?» ¹⁹ Yeesu ne leen: «Lu fi xew?» Ñu ne ko: «Mbirum Yeesum Nasaret. Mu doonoon ab yonent bu manoorewu ci jëf ak ci kàddu, Yàlla ak askan wépp seede. ²⁰ Waaye sunu

sarxalkat yu mag ak sunuy njiit ñoo ko teg ciy loxo, ngir ñu teg ko àtteb dee, daaj ko ci bant. ²¹ Nun nag danoo yaakaaroon ne mooy jotsi Israyil. Loolu lépp teewul nu ngii ci ñetteelu fan, ba mbir yoyu amee ba tey. ²² Ay jigéen ñu bokk ci nun nag ñoo nu jaaxal. Ndax ñoo jëlu dem ca bàmmeel ba, ²³ waaye fekkuñu fa néewam. Ñu dikk, ne ay malaakaa leen feeñu, xamal leen ne Yeesoo ngi dund. ²⁴ Ñenn ci sunuy àndandoo it dem nañu ca bàmmeel ba, fekk ko noonee ko jigéen ña waxe. Waaye moom, gisuñu ko.»

²⁵ Ci kaw loolu mu ne leen: «Yeen daal, yeena ñàkk xel, yeena naqarim xel, ndegam ba tey gëmaguleen mboolem li yonent yi xamle woon! ²⁶ Xanaa du fàww Almasi daj boobu coono, doora dugg ci teraangaam?» ²⁷ Mu tàmbalee nag ci Yonent Yàlla Musaa, jaare ci yonent yépp, tekkil leen mboolem lu Mbind mi indi ci mbiram.

²⁸ Naka lañuy jub dëkk, ba ñu jëm, mu mel ni ku nara jubal yoonam. ²⁹ Ñu daldi koy téye, ne ko: «Dalal ak nun, ndax jant baa ngi so, léegi mu guddi.»

Ba loolu amee mu dugg, dal ak ñoom. ³⁰ Ba reer jotee mu toog ak ñoom ca ndab la, jël mburu ma, yékkati kàddug cant, daldi dagg, jox leen. ³¹ Ca la seeni gët ubbiku, ñu xàmmi ko. Moom nag, mu ne mes, réer leen. ³² Ba loolu amee, ku nekk naan sa moroom: «Ndax yéguloo woon cawartey xol bu tooy, ba muy wax ak nun ci yoon wi, di nu firil Mbind mi?»

³³ Ñaari taalibe ya daldi jóg ca waxtu woowu tembe, dellu Yerusaleem, ca Fukk ñaak benn. Ñu fekk leen ñu dajeek seeni àndandoo. ³⁴ Ci kaw loolu ñu ne ñaar ña jóge Emayus: «Ndeke Sang bi kay, dekki na; feeñu na Simoj!» ³⁵ Ñaari taalibe ya ñoom it, nettali leen la xewoon ca yoon wa ak na ñu xàmmee Yeesu, ba mu daggee mburu ma.

Yeesu feeñu na ay taalibeem

³⁶ Ba ñaari taalibe ya di nettali loolu, ca la Yeesu ci boppam ne jimeet taxaw ci seen biir, ne leen: «Jàmm seen!» ³⁷ Tiitaange lu réy jàpp leen, ñu foog ne njuuma lañu gis. ³⁸ Yeesu nag ne leen: «Lu ngeen di jaaxle, ak lu ngeen di xel-yaar nii? ³⁹ Xoolleem samay loxo ak samay tãnk. Man la. Làmbleen ma, ba xam! Njuuma amul suux, amuli yax, nii ma ko ame, ngeen gis.» ⁴⁰ Loolu la leen wax, daldi leen won ay loxoom aki tãnkam. ⁴¹ Taalibe ya nag boole mbég akug jaaxle ba tax manuñu koo gëm. Mu ne leen: «Lu ngeen fi am, lu ñuy lekk?» ⁴² Ñu jox ko dogu jën wu ñu lakk. ⁴³ Mu jël ko, lekk ci seen kanam.

⁴⁴ Ci kaw loolu mu ne leen: «Lii moo di kàddu ya ma leen waxoon ba ma nekkee ak yeen. Noon naa leen: Mboolem li ñu bind ci samay mbir ci yoonu Musaa, ak ci téerey yonent yi, ak ci Sabóor, fàww lépp sotti.» ⁴⁵ Ca la ubbi seen xel, ngir Mbind mi leer leen. ⁴⁶ Mu ne leen: «Nii lees binde, ne fàww Almasi dee ci biir coono, ba ñetteelu fanam, mu dekki, ⁴⁷ te ciw turam, dees na dale ci Yerusalem, yégal xeet yépp, tuubeel gu jur njéggalug bàkkaar. ⁴⁸ Loolu yeena ko seede. ⁴⁹ Man ci sama bopp maa leen di yónnee li sama baay dige. Waaye yeen toogleen ci dëkk bi, ba kera ñu leen solee manoore ju bawoo fa kaw.»

Yeesu tàggooti na

⁵⁰ Gannaaw loolu Yeesu yóbbu leen ca wetu Betani. Ci kaw loolu mu yékkati ay loxoom, barkeel leen. ⁵¹ Ba mu leen di barkeel, ca la teqlikoo ak ñoom, ñu yéegge ko asamaan. ⁵² Noom nag, ñu sujjóotal ko, daldi dellu Yerusalem, ànd ak mbég mu réy. ⁵³ Saa su nekk, ña nga woon ca kër Yàlla ga foofa, di sant Yàlla.

Jëfi ndaw yi Almasi yónni

Yeesu Almasi yéeg na asamaan

¹ Yaw Tewofil, sama téere bu jëkk ba, def naa ca mboolem ndoortel jëfi Yeesu ak njàngleem, ² ba ca bés, ba ñu ko yéegée, gannaaw ba mu joxee ndaw ya mu tannoos, ay ndigal, Noo gu Sell gi jottli. ³ Ndaw yooyu itam la teew fi seen kanam ci firnde yu leer te bare, gannaaw ay coonoom. Diiru ñeent fukki fan la leen feeñu, di leen wax lu jëm ci nguug Yàlla.

⁴ Ba mu nekkee ak ñoom, da leena sant, ne leen: «Buleen jóge Yerusalem, négleen digeb Baay bi ngeen dégge ci sama gémmiñ. ⁵ Ndax cim ndox la Yaxya daan soobe, waaye yeen ci Noo gu Sell gi lees leen di soob fii ak fan yu néew.»

⁶ Naka lañu daje fa moom, daldi koy laaj, ne ko: «Sang bi, ndax ci jii jamono ngay sampaat nguug Israyil?» ⁷ Mu ne leen: «Du yeena wara xam jamono jeek bés, bi Baay bi jàpp ci sañ-sañu boppam. ⁸ Waaye Noo gu Sell gi mooy wàcc ci yeen, ngeen soloo dooleem, daldi doon samay seede ci Yerusalem, ak ci diiwaanu Yude gépp ak ci Samari, ba ca cati àddina.»

⁹ Naka la wax loolu, ndaw yay xoolé, ñu jekki yéegée ko fa, aw niir daldi leen koy làq. ¹⁰ Ña nga téen, ne jàkk asamaan, Yeesu di wéy. Ci biir loolu ñaar ñu sol yéere yu weex ne seef ci seen wet. ¹¹ Ñu ne leen: «Yeen waa Galile, lu ngeen di taxaw nii di séentu asamaan? Yeesu male ñu yéegée fi seen biir; yóbbu asamaan, nii ngeen ko gise, mu jëm asamaan, ni lay dëlsee.»

Maccas wuutu na Yuda Iskaryo

¹² Booba la ndaw ya jóge ca tund woowu ñuy wax tundu Oliw, te digganteem ak Yerusalem tollook kemu dox bi yoon maye ci bésul Noflaay, yemook benn kilométer. Ñu dellu nag Yerusalem. ¹³ Ñu agsi, yéeg ca néegu kaw taax ma, fa ñuy dal naka jekk.

Piyeer a nga ca, ak Yowaan,
ak Yanqóoba ak Àndre,
ak Filib ak Tomaa,
ak Bartelemi ak Macë,
ak Yanqóoba doomu Alfe,
ak Simon farlukatu moom-sa-réew ba,
ak Yuda doomu Yanqóoba.

¹⁴ Ñu mànkoo ñoom ñépp ngir saxoo ñaan ci Yàlla, ànd ceek jigéen ñi ak Maryaama ndeyu Yeesu, ak rakki Yeesu yu góor.

¹⁵ Ci fan yooyu la Piyeer taxaw ca digg bokk ya, ña fa daje di mbooloo mu tollu ci téeméer ak ñaar fukk (120). Mu ne leen: ¹⁶ «Bokk yi, Mbind mi moo waxe woon Noo

gu Sell gi lu jiitu, ci gémmiñu Daawuda, wax ju jëm ci Yuda mi jiite nit ña, ba ñu jàpp Yeesu. Mbind moomu nag fàww mu sotti. ¹⁷ Ci nun la Yuda bokkoon, te amoon na it céer ci sunu liggéey bii.»

¹⁸ Yuda nag gannaaw ba mu jëndee ab tool ca peyu ñaawtéefam ja, ca la daanu, jiital boppam, biir ba fàcc, butit ya tuuru. ¹⁹ Waa Yerusalem yépp a ko yéeg, ba tax ñu tudde tool ba Akeldam, mu firi Toolu deret, ci seen làkk. ²⁰ «Ndax bindees na ci téereb Sabóor ne:

“Yal na kërnam gental,
yàlla bu fa kenn dëkkeeti,
yal na keneen jagoo sasam.”

²¹ Am na nag ay nit ñu àndoon ak nun mboolem diir bi Sang Yeesu dee dem ak a dikki ci sunu biir, ²² dale ko ca ba ko Yaxya soobee ci ndox, ba bés ba ko Yàlla jélee fi sunu biir, yéegée ko. Kon nag kenn ci ñooñu war naa bokk ak nun, seede ndekkitel Yeesu.»

²³ Ci kaw loolu ñu tudd ñaar: Yuusufa, mi ñu dippee Barsabas, te ñu di ko wax Yustus itam, ak Maccas. ²⁴ Ñu daldi ñaan ne: «Boroom bi, yaw mi xam xolu ñépp, won nu ki nga tànn ci ñaar ñii, ²⁵ mu jël wàllam ci liggéey bi, te muy céru ndaw bii Yuda wacc, ba fekki wàll wa mu yelloo.» ²⁶ Ñu tegal leen nag bant, bant ba dal ca Maccas, mu dolliku ca fukki ndaw yaak benn.

2

Noo gu Sell gi dikk na

¹ Ba bésu mággalu Pántakot agsee, ñoom ñépp a bokk daje benn bérab. ² Ca saa sa coow jollé asamaan, mel ni riirum ngelaw lu bare doole, daldi fees dell biir kër ga ñu toog. ³ Ci kaw loolu ay làmmiñ yu mel ni tàkk-tàkki sawara feeñu leen, làmmiñ ya séddlikoo, daldi toj ci kaw kenn ku nekk. ⁴ Ñoom ñépp nag feese Noo gu Sell gi, tàmbalee làkk làkk yu wuute, na leen ko Noo gi manloo.

⁵ Booba ay toppkati yoonu Yawut a nga dëkke Yerusalem, te bawoo ci xeeti àddina yépp. ⁶ Naka la coow li jolli, nit ñi daje, ku nekk ci mbooloo mi dégg ñuy làkk sa làkku bopp, mbooloo ma jaaxle. ⁷ Ñu boole waaru ak yéemu, naa: «Ñii di wax nii ñépp, xanaa duñu waa Galile? ⁸ Ana nu kenn ku nekk ci nun nag mana dégge ñuy wax ci làmmiñ wi nga nàmp? ⁹ Muy waa Pàrt, ak Medd ak Elam ak Mesopotami ak Yude ak Kapados ak Pont ak Asi, ¹⁰ ak Firisi ak Pamfili ak Misra ak wàllu Libi ga dendeek Siren, ak gan ñi jóge Room, ¹¹ ak Yawuti njuddu-ji-réew yeek tuubeen ñi, ak waa Keret ak Arabi, nun ñépp a leen dégg ci sunu làmmiñ bopp, ñuy siiwtaane

jaloore yu Yàlla!»¹² Ñépp waaru, ba jànnaxe, di wax ci seen biir naa: «Lii lu muy tekki nag?»¹³ Teewul ñienn ñay ñaawle, ne: «Ñii daal biiñ bu bees donj lañu naan ba màndi.»

Piyeer yee na mbooloo ma

¹⁴ Ci kaw loolu Piyeer taxaw, mook Fukk ñaak benn, daldi àddu ca kaw, ne: «Yeen bokki Yawut yi, ak mboolem yeen ñi dëkke Yerusalem, dégluleen bu baax sama kàddu, ba xam lii lu mu doon.»¹⁵ Ñii màndiwuñu, ni ngeen ko fooge, ndax yoor-yoor donj a jot.¹⁶ Lii kay mooy kàddu ga Yonent Yàlla Yowel jottli woon, ne:

¹⁷ «Yàlla nee:

Mujj jamono, maay tuur samag Noo
ci kaw wépp suux;

seeni doom, góor ak jigéen di biral waxyu,
seeni xale yu góor di gis ay peeñu,
màggat ñi di gént ay gént.

¹⁸ Kera jant yooyu, sama jaam ñi, góor ak jigéen,

maa leen di tuur samag Noo,
ñuy biral waxyu.

¹⁹ Te maay def ay kiraama fi asamaan
aki firnde ci dun bi fi suuf;

muy deret ak sawara ak niiru saxar.

²⁰ Jant beey soppliku ag lëndëm,
weer wi doon deret,

bésusb Boroom bi doora taxawe màggaay
ak daraja.

²¹ Su boobaa, ku woo Boroom bi wall ciw
turam,

dinga raw.»

²² «Yeen bokki Israyil, dégluleen wax jii! Yeesu waa Nasaret bi, Yàlla moo firndeele ag dëggoom, ay kéemaan aki kiraama aki firnde yu mu sottale jëmmu Yeesu moomu fi seen biir, te loolu xam ngeen ko xéll.»²³ Nit kooku ñu jébbale ni ko Yàlla dogale te nasoon ko lu jiitu, yeena ko daajloo yéfar yi ci bant, reylu ko.²⁴ Waaye moom la Yàlla yiwee ci mititu ndee, dekkal ko, ndax dee amul kàttanu tënk ko.²⁵ Daawuda wax na ci mbiram ne:

«Maa doon gis Boroom bi fi sama kanam
saa su nekk,

ndijoor la ma fare,
ba duma tërëf.

²⁶ Moo tax sama xol di nux-nuxi,
samaw làmmiñ di textexi,
samaw suux sax nara nopplujee yaakaar.

²⁷ Doo ma wacc njaniw moos,
doo seetaan sa waa ju sell, mu yàqu.

²⁸ Yaa ma xamal yoonu dund,
yaa may wéttali ba matal sama mbégte.»

²⁹ «Bokk yi nag, Maam Daawuda, ma-
nees na leena wax ci lu wér ne nelaw na,

ba ñu denc ko, te bàmmee lam a ngi fi, nuy gis ba tey jii.»³⁰ Waaye yonent la woon, te xamoon na ne Yàllaa ko gñaloon ne ku bokk ci geñoom lay teg cib jalam.³¹ Kon li mu gis te dikkagul mooy ndekkitel Almasi, te ci mbiram la wax ne bàyyeesu ko biir njaniw, te yaramam du yàqu.³² Yeesu moomu nag, Yàllaa ko dekkal, nu seede ko, nun ñépp.³³ Yàllaa ko yéeg fa ndijooram, te jot na ci Baay bi Noo gu Sell ga mu dige woon. Moom la tuur nii tey, ngeen gis ko, dégg ko.³⁴ Ndax kat du Daawuda yéeg asamaan, waaye moom ci boppam moo ne:

«Boroom bi daa wax sama Sang, ne ko:

‘Toogel sama ndijoor,

³⁵ ba ma def say noon, sa ndëggastalu
tànk.’»

³⁶ «Kon nag na wóor waa kër Israyil gépp ne Yeesu moomu ngeen daajoon ci bant, Yàllaa ko def Sang ak Almasi.»

³⁷ Ba mbooloo ma dëggée loolu, naqar wu mel ni jam-jamu xol la leen def. Ñu ne Piyeer ak ndaw ya ca des: «Bokk yi, nu nuy def nag?»³⁸ Piyeer ne leen: «Tuubleen te ku nekk ci yeen sóobu ci ndox ci turu Yeesu Almasi ngir njéggalug bàkkaaram, ngeen daldi jot ci Noo gu Sell giy maye.»³⁹ Ndax dige bi, yeen ak seen askan a ko moom, ak jaambur ñi féete fu sore ñépp, mboolem ñi sunu Yàlla Boroom bi woo.»⁴⁰ Yeneen kàddu yu bare soñne na leen ko, ñaaxe leen ko, ne leen: «Muccléen ci gii maas gu dëng.»

⁴¹ Ña nangu kàddug Piyeer nag, ñu sóob leen ci ndox; bésusb keroog lu wara mat ñetti junni (3 000) yokku nañu ca gëmkat ña.

Gëmkat ñi bennoo, Yàlla barkeel

⁴² Ci kaw loolu ñu pastéefu ci njànglem ndaw yi ak ci dundal ag bokkoo, ak ci dagg mburum bokkoo mi*, ak ci jataayi julli.

⁴³ Ba loolu amee ag ragal jàpp ñépp, ay kiraama yu bare aki firnde daldi sottée ca jëfi ndaw ya.

⁴⁴ Gëmkat ñépp benn lañu woon te ñoo bokkoon lépp.

⁴⁵ Ci biir loolu seeni suuf ak seen alal sax, ñu jaay, séddoo ko ñoom ñépp na mu dëppook seeni soxla.

⁴⁶ Bés bu nekk nag ñu doon benn bopp, saxoo teew ca kër Yàlla ga,

di dagg mburum bokkoo ci kéroo kër, tey bokk lekk ci biir mbég ak woyoflu.

⁴⁷ Ñuy màggal Yàlla, ñépp naw leen. Bés bu nekk nag Boroom bi di yokk ca mbooloo mooma,

nit ña jota muccl.

3

Piyeer doxloo na ab lafañ

* 2:42 2.42 Dagg mburu: moom la gëmkat ñi aadawoo woon, bu ñuy lekk. Dagg mburu, moom lañu mujj di wooye Reeru Sang bi.

¹ Piyeer ak Yowaan ñoo doon duggsi kër Yàlla ga, ngir jullig digg njolloor. ² Fekk ñu indi fa waa ju judduwaale lafañ, ñu daan ko teg bés bu nekk ca bunt, ba ñuy wooye bunt bu Rafet, ca kër Yàlla ga, ngir mu sarxu ñay duggsi. ³ Waa ja gis Piyeer ak Yowaan, ñuy dugg ca kër Yàlla ga, mu di leen sarxu. ⁴ Ci kaw loolu Piyeer ne ko jàkk, mook Yowaan, ne ko: «Xool nu.» ⁵ Lafañ bi teewlu leen, di leen séentoo ab sarax.

⁶ Piyeer nag ne ko: «Xaalis ak wurus de, yoruma ko. Waaye li ma am, jox naa la ko: ci turu Yeesu Almasi waa Nasaret bi, doxal!» ⁷ Mu jàpp ci loxol ndijooram, yékkati ko. Ci saa si ay tãnkam aki kostanam dëgër. ⁸ Mu ne layy, taxaw, tàmbalee dox, ànd ak ñoom dugg ca kër Yàlla ga, di dox ak a tēbantū, tey sant Yàlla. ⁹ Mboooloo mépp gis ko, muy dox, di sant Yàlla. ¹⁰ Ñu xàmmi ko, xam ne moo daan toog, di yalwaan ca bunt bu Rafet ba ca kër Yàlla ga. Ñu jommi ba jommaaral, ba far gëlēm ca la ko dikkal.

Piyeer waare na

¹¹ Ba loolu amee waa ji taq ci Piyeer ak Yowaan, ñépp dawsī, sago jeex, ñu yéew leen ca mbaaru bunt ba ñu dippee Suleymaan. ¹² Piyeer nag gis loolu, àddu, ne mboooloo ma: «Yeen bokki Israyil, lu ngeen di waaru ci lii? Lu ngeen nu naa jàkk, mel ni sunu manoorey bopp mbaa sunug njullite lanu doxloo kii?» ¹³ Moom Yàllay Ibraayma, di Yàllay Isaaxa, di Yàllay Yanqóoba, te di sunu Yàllay maam kay, moo màggal jawriñam Yeesu. Yeen nag yeena ko teg ciy loxo, jàmbo ko fa kanam Pilaat, te mu naroon koo bàyyi. ¹⁴ Yeen, yeena jàmbo Ku sell ki te jub, tinul ab bóomkat. ¹⁵ Bóom ngeen Kiy dundloo, waaye Yàllaa ko dekkal, nu seede ko. ¹⁶ Gēm aw turam moo waral turam woowu dooleel nit kii ngeen gis, xam ko. Kon ngēm moo waral lii; ngēm gu sababoo ci Yeesu moo ko may mu wér péññ ni ci seen kanam, yeen ñépp.

¹⁷ «Teewul nag bokk yi, xam naa ne ñàkka xam moo leen taxa jéfe noonu, te loolu it moo dal seeni kilifa. ¹⁸ Waaye Yàlla moo sottale noonu la mu yégle woon lu jitu, yonent yépp jottli, ne Almaseem dina sonn. ¹⁹ Kon nag tuubleen te dëpp, ndax seeni bàkkaar faru. ²⁰ Su boobaa jamonoy péex ay bawoo ci Boroom bi, te mooy yebal Almasi mu leen jagleel, te muy Yeesu. ²¹ Moom la asamaan wara dalal, ba kera jamono ja lépp di dellu jag, na ko Yàlla waxe woon, yonent yu sell ya woon jottli. ²² Musaa kay noon na: «Boroom bi seen Yàlla mooy seppée ci seenu xeet ab yonent ni man; nangeen ko déggal ci

lépp lu mu leen wax. ²³ Képp ku déggalul yonent boobu, dees na la xettee ci xeet wi, sànk la.»

²⁴ «Te it mboolem yonent yi wax, dale ko ci Samiyel ak ñi ko wuutu, ñoom it yégle woon nañu bés yii yu dund. ²⁵ Yeen nag yeenay donoy yonent yi te yeenay séddu ci kóllère, gi Yàlla fasoon ak seeni maam, ba mu nee Ibraayma: «Ci saw askan la xeeti àddina yépp di barkeel.» ²⁶ Yeen la Yàlla jékka wool jawriñam, daldi koy yebal ci yeen, ngir barkeel leen, waññee kenn ku nekk ci yeen, mu moy jikkoom yu bon.»

4

Piyeer ak Yowaan daje nañook àttekat ya

¹ Naka la Piyeer ak Yowaan di wax ak mboooloo ma, sarxalkat yaak jawriñu kër Yàlla gaak Sadusen ya ne jimeet ci seen kaw. ² Fekk na leen ñéññ ca la ñuy waare ak a yégle ndekkitel Yeesu, te loolu di déggal ne ndee-ndekki, lu am la. ³ Ñu daldi leen teg loxo, tēj leen ba ca èllèg sa, ndax booba guddi na. ⁴ Fekk na nag, ñu bare ca ña jotoona dégg kàddu ga gēm nañu, ba limu gēmkat ña tollu ci juróomi junni (5 000).

⁵ Ca èllèg sa kilifay Yawut yi ak mag ñi ak firikati yoon yi daje Yerusalem. ⁶ Anas, sarxalkat bu mag ba ca la, ak Kayif ak Yowaan ak Alegsàndar, ak mboolem bokki sarxalkat bu mag. ⁷ Ñu taxawal Piyeer ak Yowaan ca digg ba, laaj leen ne: «Yeen, lii ngeen def, ci ban xam-xam, ak ci wan tur ngeen ko defe?»

⁸ Fa la Piyeer feese Noo gu Sell gi, ne leen: «Yeen kilifay xeet wi ak mag ñi, ⁹ ndegam yoon moo nuy laaj lu jēm ci ndimbal lu ab lafañ jagoo, ak ci man pexe la lafañ bi mucce, ¹⁰ xamleen xéll, yeen ñépp ak bànni Israyil gépp, ne ci turu Yeesu Almasi waa Nasaret bi, ki ngeen daajoon ci bant, te Yàlla dekkal ko, ci turam donñ la kii wére, ba taxaw ci seen kanam. ¹¹ Yeesu moomu mooy:

“Doj wi ngeen heddi woon, yeen tabaxkat yi,

te mu mujj di doju coll wi.”

¹² Mucc kat amul ci keneen, ndax fi asamaan tiim, mayeesul fi nit ñi weneen tur wu nu wara mucce.»

¹³ Ba waa kurélu àttekat ya gisee fit, wi Piyeer ak Yowaan àndal, te ñu xam ne niti neen ñu masula jàng lañu, dañoo waaru. Xamoon nañu nag ne ñook Yeesoo nekkoon. ¹⁴ Te itam ka ñu wéral a nga taxaw fa seen wet, ñuy gis. Manuñu caa tegati dara. ¹⁵ Ba mu ko defee ñu joxe ndigal, gënne leen, daldi gise ci seen biir. ¹⁶ Ñu ne: «Lu nuy def ak ñii? Ndax kat

firnde lu leer sottee na fi ci ñoom; leer na nàññ waa Yerusaleem gépp, te manunu koo weddi. ¹⁷ Waaye kat bu mbir mi gëna siiw ci xeet wi. Nan leen tëkku, ngir aaye leen ñu waxati kenn tur woowu.»

¹⁸ Ñu woo leen nag, aaye leen, ne leen mayatuñu leen benn yoon ñu waxati lenn, mbaa ñuy jàngale ci turu Yeesu. ¹⁹ Piyeer ak Yowaan ne leen: «Ndax li jaadu fa Yàlla mooy nu déggal leen, yeen, bàyyi Yàlla? Yeenay àtte loolu. ²⁰ Waaye nun, li nu gis, dégg ko, manunu koo baña wax.» ²¹ Ba loolu amee ñu tëkkuwaat leen, door leena yiwi, ñu dem, gannaaw manuñu leena mbugal te amuñu bunt ci ñoom ndax mbooloo ma, te ñépp di manggal Yàlla ca la xew, ²² ngir waa, ja kéemtaan ga wérloo amoon na lu wees ñeent fukki at.

Mbooloom gëmkat ñi ñaan na ci Yàlla

²³ Gannaaw ba ñu yiwee Piyeer ak Yowaan, ñu dem ca seen bokki gëmkat, nettali leen mboolom la leen sarxalkat yu mag yaak mag ña wax. ²⁴ Ba ko bokk ya dégge, ñoom ñépp a mánkoo, daldi yékkati kàddug ñaan fa Yàlla, ne: «Buur Yàlla, yaa sàkk asamaan ak suuf ak géj ak lépp li ci biir. ²⁵ Yaa waxe Noo gu Sell gi ci sunu gëmminu maam Daawuda sa jaam bi, nga ne:

“Lu xeeti àddina di riir?

Lu xeet yiy lal pexey neen?

²⁶ Buuri àddinaa jógandoo, kilifa yee lëkkoo ci kaw Boroom bi ak Almaseem.”

²⁷ Dégg la moos, ndax ci dëkk bii la Erodd ak Poisë Pilaat lëkkoo, ànd ak xeeti àddinaak bànni Israyil ci kaw Yeesu, sa ndaw lu sell li nga fal. ²⁸ Noonu it lañu sottale mboolom li nga dogale woon sa loxo ak sa coobare. ²⁹ Lééj nag Boroom bi, bàyyil xel seeni tëkkoo te nga may nu, nun say jaam, nuy waxe sa kàddu fit wu mat sékk. ³⁰ Ngalla tàllalal sa loxo ngir di wéral ak a amal ay firnde aki kéemaan ci turu Yeesu, sa ndaw lu sell li.»

³¹ Ba ñu ñaane ba noppi, bérab ba ñu daje daa yëngu, ñu feese Noo gu Sell gi ñoom ñépp; ñu daldi tãmbalee waxe fit kàddug Yàlla gi.

Gëmkat ñi ñoo bokkoon lépp

³² Ci kaw loolu mboolom gëmkat ñi bokk menn xel, ak benn xalaat. Du kenn ku ne moo moom lenn ci alalam, waaye ñoo bokkoon lépp ci seen biir. ³³ Ndaw yi nag di seede doole ju réy ne Sang bi Yeesu dekki na, yiw wu yaa di leen dikkal ñoom ñépp. ³⁴ Kenn ci ñoom ndóolul, ndax képp ku ciy boroom suuf mbaa ay kër, da koy jaay, indi njég li, ³⁵ teg ko ci kanam ndaw yi. Su ko defee ku nekk séddu ca la dèppook soxlaam.

³⁶ Ku mel ni Yuusufa, bokk ci giirug Lewi, te dëkke dunu Sippar, ndaw yi daan ko wax Barnaba, mu firi Ñaaxekat bi, ³⁷ ab tool la amoon. Da koo jaay, indi xalis bi, teg fi kanam ndaw yi.

5

Mbugal dab na Anañas ak Safira

¹ Naka noonu ku ñuy wax Anañas, te ku ñuy wax Safira di jabaram, daldi jaay aw làccu suuf. ² Mu yégook jabaram, daldi làq lenn ca njég ga, ba noppi indi la ca des, teg ko ca kanam ndaw ya.

³ Ba loolu amee Piyeer ne ko: «Anañas, lu waral Seytaane di fees sab xol, ba ngay wor Noo gu Sell gi, di làq lenn ci njégu tool bi? ⁴ Ba mu jaragul, du yaa doon boroom? Gannaaw ba mu jaree it, xanaa du njég gaa ngi sa loxo ba tey? Ana noo mana xajale mii mébét ci sa xol? Du nit nga wor de, waaye Yàlla nga wor.»

⁵ Naka la Anañas dégg kàddu yooyu, daldi daanu, dee. Tiitaange lu réy nag dikkal ña ko dégg ñépp. ⁶ Ba loolu amee xale yu góor ya dikk, sàng ko, yóbbu suuli.

⁷ Ñu teg ca lu wara tollook ñetti waxtu, jabaram duggsi, te yéguul la xew. ⁸ Piyeer ne ko: «Wax ma, nangam ngeen jaaye tool bee?» Mu ne ko: «Waaw, nangam la.»

⁹ Ci kaw loolu Piyeer ne ko: «Ana lu ngeen di mánkoo, di nattu Noowug Boroom bi? Déglul, tànk yi suuli woon sa jëkkër a ngoogu ci bunt bi di la yóbbusi yaw it.» ¹⁰ Ca saa sa ndaw sa daanu cay tànkam, dee. Xale yu góor yi duggsi, fekk ko mu dee; ñu yóbbu ko, suul ko ca wetu jëkkëram. ¹¹ Ba loolu amee tiitaange ju réy a jàpp mbooloom gëmkat ñépp, ak ña ko dégg ñépp.

Ndawi Almasi faj nañu ñu bare

¹² Ci kaw loolu ay firnde ak kéemaan yu bare di sottee ci loxol ndaw yi, ci biir askan wi. Gëmkat ñi nag di bokk daje ñoom ñépp fa ñuy wax Mbaarum Suleymaan, ca biir kër Yàlla ga, ¹³ waaye kenn ca ña ca des ñemewula jaxasoo ak ñoom. Teewul askan wa nawloo leen lool. ¹⁴ Gëmkati Sang bi nag di gëna bare, ñuy wàllisi, ba doon mbooloo mu mag, góor ak jigéen. ¹⁵ Nit ñi dem bay gënne jarag ji ci mbedd yi, teg leen ci ay laltu aki basan, ngir bu fa Piyeer jaaree, lu bon bon takknderam mana dal ñenn ci ñoom. ¹⁶ Ci biir loolu nit ñu bare babbekoo ca dëkk ya séq Yerusaleem, indi ay jarag ak ñu rab yu bon sonal; ñoom ñépp daldi wér.

Fitnaal nañu ndaw yi

¹⁷ Ba mu ko defee xolu kañaan dugg sarxalkat bu mag ba, ak mboolom ña ko dar, te di waa ngérum Sadusen ña. ¹⁸ Ñu

teg ndaw ya loxo, tëj leen ca kaso ba.
¹⁹ Ca guddi ga nag malaakam Boroom bi ubbi bunti kaso ba, génne leen, ne leen:
²⁰ «Demleen taxaw ca digg kër Yàlla ga, ngeen xamal askan wi mboolem lu jëm ci dund gii.»
²¹ Gannaaw ba ñu déggee loolu, ba bët set, ñu dugg ca kër Yàlla ga, di waare.

Ci biir loolu sarxalkat bu mag ba ak ña ko dar, dikk, woolu kurélu àttekat ya, mboolem kurélu njiiti bànni Israyil; ñu yónnee, ngir jëli ndaw ya ca kaso ba.
²² Dag ya nag dikk, fekkuñu leen ca kaso ba, ñu dellu yégleji ko, ²³ ne: «Danoo fekk kaso ba tëje ràpp, wattukat ya taxaw ca bunt ya. Nu tijji, fekkunu kenn ca biir!»

²⁴ Jawriñu kër Yàlla ga ak sarxalkat yu mag ya dégg loolu, daldi jaaxle lool ci ndaw yi, di xalaat nu mbir miy mujje.

²⁵ Mu am ku dikk, ne leen: «Ña ngeen tëjoon kaso déy a nga noonu ca kër Yàlla ga, di waare.»
²⁶ Ci kaw loolu jawriñu kër Yàlla ga ak dag ya jëli ndaw ya ndànk, bañ leena jaay doole, ngir ragal nit ñi sànni leen ay doj.

²⁷ Ñu indi leen, taxawal leen ca kanam kurélu àttekat ya, sarxalkat bu mag ba laaj leen, ²⁸ ne: «Xanaa aayewunu leen woon ne buleen waareeti mukki ci woowu tur? Yeena ngi nii ubale Yerusaleem ak seen waare, ngeen nar nu cee gadduloo bakkanu nit kii!»

²⁹ Piyeer ak ndaw ya ca des nag ne leen: «Yàlla lees wara déggal, waaye du nit.
³⁰ Sunu Yállay maam moo dekkal Yeesu, mi ngeen wékk ci bant, bóom ko. ³¹ Moom la Yàlla yékkati ci wetu ndijooram, def ko muy Njiiti, di Musalkat, ngir may bànni Israyil ag tuubeel ak njéggalug bàkkaar.
³² Nun noo seede loolu, nook Noo gu Sell, gi Yàlla jagleel ñi ko déggal.»

³³ Ba ñu déggee loolu, dañoo mer ba fees, nar leena rey. ³⁴ Ab Farisen bu ñuy wax Gamalyel, di jànglekatu yoonu Musaa bu ñépp nawloo, daldi taxaw ca digg kurélu àttekat ya. Mu joxe ndigal ngir ñu ngeen leen ab diir: ³⁵ Ba ñu génnee, mu ne waa kurél ga: «Yeen bokki Israyil, moytuleen bu baax li ngeen di def ak nit ñii. ³⁶ Ndaxte bu yàggul la Tédas jóg, di jaay daraja, bu lu wara tollook ñeenti téeméeri nit far ak moom. Ñu rey ko, ña ko toppoon ñépp tasaaroo, seen pexe mujjewul fenn. ³⁷ Gannaawam it Yuda mu Galile jóg, ca jant ya ñu doon lim waa réew mi; mu yóbbaaale mbooloo mu ko topp. Moom itam dee, ña ko toppoon ñépp tasaaroo. ³⁸ Léegi nag, dama ne, maanduleen ci ñii, te ba leen, ngir su seen mébét mbaa seen jêf bawoo ci nit, day

yàqu rekk. ³⁹ Waaye su bawoo fa Yàlla nag, dungeen ko mana fanq, moytuleena jänkoonte ak Yàlla.»

Ñu daldi fekksi Gamalyel, ⁴⁰ woowaat ndaw ya. Ba loolu amee ñu dóor leen, aaye leen ñu waxati lenn ci turu Yeesu, door leena yiwi.

⁴¹ Ndaw ya nag bàyyikoo ca kurélu àttekat ya, di bég, gannaaw ñoom lañu jàpp ne ñoo yelloo toroxte ga ñu leen teg ndax Tur wi*.
⁴² Ci kaw loolu bés bu nekkaan, muy ca kër Yàlla, di ca biir kër ya, noppiwuñoo jàngle ak a xamle xibaaru jàmm bi yéene ne Yeesu mooy Almasi.

6

Tabb nañu taxawukati mbooloo gëmkat ñi

¹ Jant yooyu nag, naka taalibe yi di géna bare, Yawut ñiy làkk gereg tàmbalee ñaxtu ci kaw Yawut ñiy wax seen làmmiñu bopp ndax néewal gu ñu gis ñu néewal ko seeni jëtun ca na ñuy séddalee ag ndimbal bés bu nekk. ² Ba mu ko defee fukki ndaw ya ak ñaar woo mbooloom taalibe ya, ne leen: «Nu sàggane kàddug Yàlla, di topptoo mbirum séddalee daal, jekkul ci nun. ³ Kon nag bokk yi, seeleen ci seen biir juróom ñaar ñu rafet seede, soloo Noo gu Sell gi te rafet xel, nu dénk leen sas woowu. ⁴ Nun nag nanu wéye julli gi, ak liggéey bi ci kàddu gi.»

⁵ Wax jooju daldi neex mbooloo mépp. Ñu seppi Eccen, nit kufeese ngëm ak Noo gu Sell gi, seppi Filib ak Porokor ak Nikanor ak Timon ak Parmenas ak Nikolas, ma dëkke Ancos te dib tuubeen bu duggoon lu jiiitu ci yoonu Yawut. ⁶ Ñu indi leen fa kanam ndaw ya, ñu ñaanal leen, teg leen loxo.

⁷ Ba loolu amee kàddug Yàlla di law, limu taalibe yi yokku ba bare lool ci biir Yerusaleem, sarxalkat yu bare daldi topp yoonu ngëm wi.

Teg nañu Eccen loxo

⁸ Ci kaw loolu Eccen, mi yiwu Yàlla def ag leer fees ko, di def ay kéemaan ak firnde yu mag ci biir askan wi. ⁹ Ba loolu amee ñenn ca jàngu ba ñuy wax jàngub waa Goreel ga, daldi jóg, di tàmbalee weranteek Eccen. Ay niti waa Siren a nga ca, ak waa Alegсандiri, ak waa diiwaani Silisi ak Asi. ¹⁰ Teewul àttanuñu xelam mu rafet, ak Noo gi muy waxe.

¹¹ Ñu daldi ger ay nit ngir ñu duural ko, ne: «Noo ko dégg, mu yékkati kàdduy saaga, jëme ci Musaa ak ci Yàlla.»
¹² Ba loolu amee ñu xabtal nit ñi ak njiit yi, ak firrikati yoon yi, ñu ne jalañ, jàpp Eccen,

* 5:41 5.41 Tur wa mooy turu Sang Yeesu Almasi.

yóbbu ca kurélu àttekat ya. ¹³ Ñu indeeti foofa ay seeday naaféq yu ne: «Kii du bàyyee wax mukk lu juunoo ak bérab bu sell bii ak yoonu Musaa. ¹⁴ Noo ko dégg mu ne Yeesu Nasareen boobu dina màbb bérab bii te dina soppo aada yi nu Musaa bàyyee.»

¹⁵ Mboolem ña ca jataayu àttekat ya nag ne jákk Eccen; ñu gis xar-kanam ba ne ràññ ni xar-kanamu malaaka.

7

Eccen layoo na

¹ Sarxalkat bu mag ba ne ko: «Ndax loolu dégg la?» ² Eccen ne ko: «Yeen bokk yi, yeen samay baay, dégluleen! Yàlla, miy Boroom daraja moo feeñu woon sunu maam Ibraayma, ba mu nekkee réewum Mesopotami, bala moo sanc Karan. ³ Mu ne ko: “Jógeel sam réew, jóge ci say bokk, te nga dem ca réew, mi ma lay won.”

⁴ «Mu daldi jóge réewum waa Kalde, sanc Karan. Fa la ko Yàlla toxale gannaaw ba baayam faatoo, sancal ko ci réew mii ngeen dëkk tey. ⁵ Taxul mu muurale ko lenn ci réew mii, du sax fu mu teg tãnkam. Teewul mu dig ko, ne moom lay moomale réew mi, mook askanam wa koy wuutuji, te fekkul sax mu am doom. ⁶ Yàlla ne ko: “Saw askan dinañu toxuji bitim réew, te dees na leen def ay jaam, mitital leen diiru ñeenti témeéri at (400).” ⁷ Yàlla neeti ko: “Xeet wi leen di jaamloo nag, man maa leen di mbugal. Gannaaw loolu dinañu fa génne, jaamusi ma ci bérab bii.” ⁸ Yàlla daldi fasook Ibraayma kóllère gu mu màndargale xaraf. Moo tax Ibraayma xarfal doomam Isaaxa, ba mu juddoo ba am juróom ñetti fan; Isaaxa, Yanqóoba, Yanqóoba, fukki maam yaak ñaar.

⁹ «Maam yooyu nag iñaane seen doomu baay Yuusufa, ba jaay ko njaam, ñu yóbbu ko Misra. Teewul Yàlla ànd ak Yuusufa, ¹⁰ xettli ko ci coonoom yépp, rafetal xelam, may ko itam Firawna buuru Misra baaxe ko; mu def ko kilifa ci Misra ak ci biir èttu kéram gépp.

¹¹ «Ci kaw loolu ab xiif dikkal Misra gépp ak réewum Kanaan. Mu metti lool. Sunuy maam nag amatuñu ab dund. ¹² Yanqóoba dégg ne ab dund am na Misra. Ca la fa jëkka yebal sunu maam ya. ¹³ Seen ñaareel bi yoon la Yuusufa xàmniku ay doomi baayam, Firawna nag doxe ca xam cosaanu Yuusufa. ¹⁴ Ci kaw loolu Yuusufa yehle, indi baayam ak bokkam yépp, ñuy juróom ñaar fukki nit ak juróom. ¹⁵ Noonu la Yanqóoba deme Misra, ba faatoo fa, mook sunuy maam. ¹⁶ Gannaaw gi lañu toxal seeni yax ca Sikem, denc leen ca

bàmmeel, ba Ibraayma weccikoo woon xaaalis ca doomi Amor ca Sikem.

¹⁷ «Ñu dem ba dige ba Yàlla giñaloon Ibraayma di waaja sotti, yemook xeet wi yokku, di gëna bare ci Misra, ¹⁸ ba beneen buur bu xamul Yuusufa falu ci Misra. ¹⁹ Buur boobu nag di muusaatu sunu xeet wi, di mitital sunuy maam, di leen sànniloo seeni liir, ngir ñu baña dund.

²⁰ «Booba la Musaa juddu, rafet ba fa kanam Yàlla, ñu yor ko ñetti weer ci biir kër baayam. ²¹ Ba ñu ko sànnée, doomu Firawna ju jigéen a ko foral boppam, yar ko ni doomam ju mu jur. ²² Musaa nag di ku mokkal mboolem xam-xamu Misra, te ràññiku lool ci wax ak ci jéf.

²³ «Ba ñeent fukki atam matee, xelum seeti bokki bànni Israyilam dikkal ko. ²⁴ Ci kaw loolu mu gis ca ku ñuy néewal doole, mu sotle ko, daldi rey waayi Misra ja, feyul ka mu néewal. ²⁵ Booba Musaa foog na ne ay bokkam xam nañu ne ciy loxoom la leen Yàlla di indile wall, ndeke xamuñu ko. ²⁶ Ca èllég sa mu juux ci ay Yawut yuy xeex, di leen jéema jubale, ne leen: “Yeen ay bokk ngeen, lu tax ngeen di lorante?” ²⁷ Ka doon néewal doole moroom ma bëmëx Musaa, ne ko: “Yaw, ku la def njiit mbaa àttekat ci sunu kaw? ²⁸ Xanaa danga maa nara rey, na nga reye waayi Misra ja démb?” ²⁹ Musaa dégg kaddu googu, daldi gaddaay, dem dali réewum Majan, ba am fa ñaari doom yu góor.

³⁰ «Mu teg ca ñeent fukki at, malaaka feeñu ko ca màndiñu tundu Sinayi, ci biir tàkk-tàkku sawara wu jafal ab gajj. ³¹ Musaa gis peeñu moomu, yéemu; mu dikk ba jege ko ngir niir ko, káddug Boroom bi daldi jib. Mu ne: ³² “Man maay sa Yállay maam, maay Yállay Ibraayma ak Isaaxa ak Yanqóoba.” Musaa tiit bay lox, ñemeetula xool. ³³ Boroom bi ne ko: “Summil say dàll, ndax fii nga taxaw, suuf su sell la. ³⁴ Gis naa bu baax sama coonob ñoñ ci Misra; maa dégg seeni onk, ba wàcc ngir wallusi leen. Léegi nag dikkal, ma yebal la Misra.”

³⁵ «Musaa moomu ñu weddi woon, ne ko: “Ku la def kilifa ak ab àttekat?” Moom nag la Yàlla def kilifa ak ab jotkat, yebal ko ci ñoom, malaaka ma feeñu Musaa ca gajj ba, daldi koy jottli yóbbante ba. ³⁶ Moo leen génne réewum Misra, moo def ay kéemaan aki firnde ca réew ma, ak ca géēju Barax ya, ak ca màndiñ ma, diiru ñeent fukki at. ³⁷ Musaa moomu moo noon bànni Israyil: “Yonent bu mel ni man la leen Yàlla di feeñalal ci seen biiri bokk.” ³⁸ Moom it moo nekkoon ak mbooloo ma ca màndiñ ma, mook malaaka ma doon wax ak moom ca kaw tundu Sinayi ca sunu wetu maam ya. Moo jot ci kaddu yuy

dund, ngir jottli nu ko. ³⁹ Kooku la sunuy maam nanguwul woona déggal. Dañu koo far xarab, namma walbatiku dellu Misra. ⁴⁰ Ñu ne Aaróona: “Sàkkal nu ay yàlla yu nu jiite, ndax Musaa mii nu génne réewum Misra, xamunu lu ko dal.” ⁴¹ Jant yooyu lañu sàkk jëmmu sèllu, defal jëmm ja ab sarax, di bânneexoo lu ñu sàkke seeni loxo. ⁴² Yàlla nag dëddu leen, bàyyi leen, ñuy jaamu biddiww yi, ni ñu ko binde ci téereb yonent yi, ne:

“Yeen waa kër Israyil, saraxu jur ak yeneen sarax,
ndax man ngeen ko daan indil diiru ñeent fukki at ca màndiñ ma?

⁴³ Molog seen tuur mi, ngeen yóbbaaale xaymab jaamookaayam,
ak seen biddiww yàlla ji ñu naa Refan, jëmm yooyu ngeen sàkk, di leen sujjóotal! Kon nag maa leen di toxal ca wàllaa Babilon.”

⁴⁴ «Xaymab seede baa nga woon ak sunuy maam ca màndiñ ma, ñu sàkke ko na ko ka doon wax ak Musaa sante, dëppale kook misaal ma Musaa gisoon. ⁴⁵ Xayma ba la sunuy maam jot, dugal ko ci kilifteefu Yosuwe ca biir réewum xeet, ya leen Yàlla dàqal. Xayma ba nekk fa, ba ca janti Daawuda. ⁴⁶ Daawuda, ma Yàlla baaxe woon, sàkku woon na am màkkaan ngir Yàllay Yanqóoba. ⁴⁷ Waaye Suleymaan moo ko mujj tabaxal kër.

⁴⁸ «Moona Aji Kawe ji du dëkke lu loxo defar, mooy la yonent ba ne:

⁴⁹ “Asamaan sama ngàngunee, suuf di sama ndëggastal.

Ana kër gu ngeen may tabaxal? Boroom bee ko wax.

Mu ne: Ana ban bérab laay nopploo?

⁵⁰ Loolu lépp, xanaa du sama loxoo ko sàkk?”

⁵¹ «Yeena dëgër bopp, yeenay boroomi xol ak noppi yéefar! Dungeen noppee tē Noo gu Sell gi? Maam ya, doom ya rekk!

⁵² Kan ci yonent yi la seeni maam fitnaalul? Ñoo rey démb ña yégle woon ñëwug Aji Jub, ji ngeen wor tey, bóom ko. ⁵³ Yeen de yeena jotoon ci yoonu Musaa, wi ay malaaka jottli, te taxul ngeen jéfe ko.»

Bóom nañu Eccen

⁵⁴ Naka lañu dégg loolu, seen xol fuddu, ñuy yéyu ci kawam. ⁵⁵ Eccen nag feese Noo gu Sell gi, ne jàkk asamaan, daldi gis leeru Yàlla, gis Yeesu taxawe fa ndijooru Yàlla. ⁵⁶ Mu ne: «Asamaan a ngii ma gis, mu ubbiku, Doomu nit kaa ngii taxaw fi ndijooru Yàlla!»

⁵⁷ Ba loolu amee ñu yuuxu ca kaw, dar seeni nopp, daldi ànd, ne milib ca kawam; ⁵⁸ ñu wat-watee ko, génne ko dëkk ba, di ko dóor ay doj. Fekk na seede ya summi seeni

mbubb, juug ca tàniki benn xalelu góor bu ñuy wax Sóol.

⁵⁹ Ñuy dóor Eccen ay doj, moom muy ñaan Yàlla, naam: «Sang Yeesu, nangul sama bakkan!» ⁶⁰ Mu ne gurub, samp bēti óomam, daldi addu ca kaw, ne: «Sang bi, bu leen topp bii bàkkaar.» Naka la wax loolu, daldi nelaw.

8

¹ Sóol nag rafetlu woon na la ñu bóom Eccen.

Fitnaal nañu mbooloo mi

Bésub keroog teg nañu mbooloom gëmkat ña ca Yerusalem fitna ju metti ba, lu moy ndawi Almasi, ñoom ñépp a tasaaroo ca diiwaani Yude ak Samari. ² Ay nit ñu ragal Yàlla nag rob Eccen, ñaawlu deeyam lool. ³ Ci biir loolu Sóol moom, ma ngay jéema faagaagal mbooloom gëmkat ñi, di dugg ci kër yi, diri góor ak jigéen, génne, ñu sànni kaso.

Filib waare na ca Samari

⁴ Gëmkat ña tasaaroo di xamle fépp fu ñu jaare, xibaaru jàmm bu kàddu gi. ⁵ Noonu la Filib deme péeyub Samari, di siiwtaane Almasi. ⁶ Ba waa dëkk ba déggee mbaa ñu gis kéemaan ya muy def, ñoo bokk teewlu ay waxam. ⁷ Ndx bare na ca ñu rab yu bon jàppoon te mujj bàyyi leen, génne yuux yu réy; bare na ca it ñu lafañ ak ñu làggi woon te mujj wér. ⁸ Muy mbég mu réy nag ca dëkk boobee.

Ab ñeengokat gis na ku ko jonj

⁹ Ku ñuy wax Simon nag yàggoon na ca dëkk ba, di ñeengo. Ku waar waa Samari la woon, te doon tuddoo nit ku magg. ¹⁰ Ñépp, mag ak ndaw, teewlu ko, naam: «Kii mooy dooley Yàlla ci boppam. Moom lañuy wax “Maggge”.» ¹¹ La ñu ko teewloo woon moo di jéfi ñeengo ya mu leen yàgga yéeme. ¹² Waaye ba ñu gémee Filib, ma leen xamal xibaaru jàmm, bi jëm ci nguuruq Yàlla ak turu Yeesu Almasi, góor ak jigéen daldi nangu, ñu sóob leen ci ndox. ¹³ Simon ji boppam gëm, moom it, ñu sóob ko ci ndox. Simon nag bàyyeetlu Filib. Ba mu gisee firnde yaak kiraama yu mag yay am, moom moo yéemu.

¹⁴ Ba ndaw ya ca Yerusalem yégee ne waa Samari nangu nañu kàddug Yàlla, Piyeer ak Yowaan lañu fa yebal. ¹⁵ Ñu agsi Samari, ñaanal gëmkat ña, ngir ñu jot Noo gu Sell gi. ¹⁶ Ndx booba Noo gi waccagul woon ci kenn ci ñoom, dees leena sóoboon rekk ci ndox ci turu Sang Yeesu. ¹⁷ Ba loolu amee Piyeer ak Yowaan teg leen loxo, ñu jot Noo gu Sell gi.

¹⁸ Simon nag gis noonee mayug Noo, gi sababoo ci tegeb loxo bu ndaw ña amal,

ba tax mu indil leen xaalis. ¹⁹ Mu ne leen: «Mayleen ma man itam xam-xam bii, ngir ku ma teg loxo, nga jot Noo gu Sell gi.» ²⁰ Piyeer ne ko: «Na sa xaalis ànd ak yaw asaru, ndegam ab xaalis nga yaakaara jènde mayu Yàlla! ²¹ Amuloo benn wàll mbaa ab cér ci lii, ndax sa xol a jubul ci kanam Yàlla. ²² Réccul nag sa mbon gii, te ñaan Boroom bi; jombul mu baal la sa mébétu xol. ²³ Ndax gis naa ni nga sóoboo ci wextanu kañaan, keppu ci ndéngte.» ²⁴ Simoj ne leen: «Ñaanal-leen ma Boroom bi, yeen ci seen bopp, ngir li ngeen wax lépp, lenn bañ ma cee dab.»

²⁵ Gannaaw ba Piyeer ak Yowaan seedelee kàddug Boroom bi, biral ko, Yerusalem lañu dellu, di xamle xibaaru jàmm bi ci ay dèkki Samari yu bare.

Filib yee na ab jaraafu Ecopi

²⁶ Menn malaakam Boroom bi nag wax Filib, ne ko: «Fabul jubal bëj-saalum; yoon wa kenn jaareetul te bartaloo Yerusalem, jëm Gasa.» ²⁷ Filib fabu, dem. Ndeke am na jenn waayu Ecopi* ju màggalsi woon Yerusalem. Nit kooku doonoon moraange, te di jaraaf ju mag ju Kàndas Lingeeru Ecopi; moo doon saytu mboolem alalu Lingeeru Ecopi. ²⁸ Naka la jaraaf ja màggalsi bay dellu Ecopi, toog ca watiiram, di jàngaale téereb Yonent Yàlla Esayi, ²⁹ Noowug Yàlla ne Filib: «Doxal, dab watiir bale.»

³⁰ Filib dabsi waayi Ecopi ja, daldi dégg muy jàng téereb Yonent Yàlla Esayi. Mu ne ko: «Ndax xam nga li ngay jàng?» ³¹ Mu ne ko: «Nu ma ko mana xame, te kenn firilu ma ko?» Ba loolu amee mu ne Filib, mu yéeg, toog ak moom. Filib yéeg. ³² Lii nag mooy dogu mbind ma mu doon biral:

«Dees koo yóbbu ni xar mu ñuy rendiji; mbete mburt mu ne cell ci kanam ki koy wat, ubbiwul gémmiñam.

³³ Ci biir toroxteem lañu ko xañ déggam; kuutaayam nag, ana ku ci mana wax? Ndegam bakkanam lañu toxale kaw suuf.»

³⁴ Jaraaf ja ne Filib: «Yaw laay laaj, ci kan la yonent bi wax lii? Boppam lay wax am keneen?» ³⁵ Filib daldi àddu, tàmbalee ci dog boobu, xamal ko xibaaru jàmm bi ci mbirum Yeesu.

³⁶ Ba loolu amee ñu topp yoon wi, ba yem ci am ndox. Jaraaf ja ne ko: «Ndox a ngii, ana lu tee ma sóobu ci?» ³⁷ Filib ne ko: «Soo gémeé ci sa léppi xol, sañ nga ko.» Mu ne ko: «Gëm naa ne Yeesu Almasi mooy Doomu Yàlla.»

³⁸ Ci kaw loolu jaraaf ja santaane ñu taxawal watiir ba; Filib ak jaraaf ja wàcc, ñu dugg ñoom ñaar ca ndox ma, Filib sóob ko ca. ³⁹ Naka lañu génne ca ndox ma, ngelawal Boroom bi ne cas Filib, yóbbu, jaraaf ja gisatu ko. Teewul mu topp yoonam, ànd ak mbég. ⁴⁰ Filib moom, dèkk ba ñuy wax Asot la gisaat boppam. Mu wéye di xamle xibaaru jàmm bi ci dèkkoo dèkk, ba àgg Sesare.

9

Sóol tuub na

¹ Ci biir loolu Sóol moom, noyyeewul lu moy di tékkook a jéema bóom taalibey Sang bi. Mu dem nag ca sarxalkat bu mag ba, ² di sàkku ay bataaxal yu ñeel jànguy dèkk ba ñuy wax Damaas, bataaxal yu yóbbante ndigal lu yeewlu képp ku ñu fa gis ku bokk ci Yoon woowu, góor ak jigéen, ngir mu jàpp leen, indi Yerusalem.

³ Naka la Sóol dem ba jub Damaas, ag leer bawoo asamaan, jekki ne ràyy ci kawam. ⁴ Mu daanu ci suuf, daldi dégg baat bu ko ne: «Sóol, Sóol, lu tax nga di ma bundxatal?» ⁵ Mu ne: «Yaay kan Sang bi?» Mu ne: «Man maay Yeesu, mi ngay bundxatal. ⁶ Léegi nag, jógal, dugg ci dèkk bi, dees na la wax li nga wara def.» ⁷ Nit ña ànd ak moom a nga taxaw, jommi ba ne cell; dégg nañu baat bi te gisuñu kenn. ⁸ Sóol jóg, xippi, gisul dara; ñu daldi koy wommat, dugal ko biir Damaas. ⁹ Diiru ñetti fan gisul dara, lekkul, naanul.

¹⁰ Ab taalibe bu ñuy wax Anañas nag ma nga woon ca Damaas. Sang bi feeñu ko, ne ko: «Anañas!» Mu ne ko: «Maa ngi, Sang bi.» ¹¹ Sang bi ne ko: «Demal ba ca mbedd, ma ñuy wax Mbedd mu jub, te nga seet ca kër Yuda ku ñuy wax Sóol te dèkke Tàrs. Ma ngay ñaan. ¹² Dafa gis cim peeñu ku ñuy wax Anañas duggsi, teg ko loxo, ngir mu dellu di gis.» ¹³ Anañas nag ne ko: «Sang bi, maa dégge ci ñu bare mbirum kooku, ñu seede mboolem jëf ju bon ji mu def say nit ñu sell ci biir Yerusalem. ¹⁴ Te moy yor ndigal lu tukkee ci sarxalkat yu mag yi, ngir yeewlu képp kuy tudd saw tur.» ¹⁵ Sang bi ne ko: «Demal, ndax kooku juntuukaay laa ko tanne, ngir mu xamali sama tur, xeeti jaambur yi ak seeni buur, xamal ko itam bànni Israyil. ¹⁶ Maa koy won mboolem coono bi mu wara dékku ngir sama tur.»

¹⁷ Ci kaw loolu Anañas dem, dugg ca kër ga, teg Sóol loxo, ne ko: «Mbokk mi Sóol, Sang Yeesu, mi la feeñu woon ci yoon wi nga dikke, moo ma yebal ci yaw, ngir nga dellu di gis te feese Noo gu Sell gi.» ¹⁸ Ca

* 8:27 8.27 Ecopi ga woon, dees na ko wooye Kuus itam, muy diiwaan bu feggoo woon ak dexu Niil, te nekkoon diggante bëj-gànaaru Sudan ak bëj-saalumu Misra.

saa sa lu mel niy waasintóor wadde ca bêt ya, mu dellu di gis. Mu daldi jóg, ñu sóob ko ci ndox. ¹⁹ Ba loolu wéyee, mu lekk, doora am doole.

Sóol toog na ak taalibe ya ca Damaas ay fan. ²⁰ Ca saa sa la tãmbalee xamle Yeesu ca jàngu ya, naan Yeesu mooy Doomu Yàlla. ²¹ Mboolem ña ko dégg, daldi waaru, naan: «Xanaa du kii moo doon bóom ñiy tudd woowu tur ci Yerusalem? Du moo fi dikoon, ngir yeewlu leen, yóbbu ci sarxalkat yu mag yi?» ²² Teewul Sóol gëna am manoo, ba far jaaxal Yawut ñi dëkke Damaas, di firndeel ne Yeesu mooy Almasi.

²³ Ba ñu ca tegee ab diir bu xawa yàgg, Yawut yi féncoo, ngir reyly ko. ²⁴ Sóol nag yég seen mébét. Guddi ak bëccëg lañu doon wattu bunti dëkk ba, ngir bóom ko. ²⁵ Teewul taalibe yi yeb ko ag guddi ci ag damba, jalle ko ca wàllaa miir ba, yoor ko.

²⁶ Ba Sóol agsee Yerusalem, jéem naa jaxasook taalibe yi, waaye ñépp a ko ragal, ndax ñakka gëm ag taalibeem. ²⁷ Ci kaw loolu Barnaba ànd ak moom, yóbbu ko ca ndaw ya. Barnaba nettali leen, ni Sóol gise Sang bi ca yoon wa, ba mu wax ak Sóol, ak fit wa Sóol waaree ca Damaas ci turu Yeesu. ²⁸ Ba loolu amee Sóol ànd ak ndaw yi di dem ak a dikk ci biir Yerusalem, di waaree aw fit ci turu Sang bi. ²⁹ Mu boole ci di wax ak a werante ak Yawut ñiy làkk gereg, te ñoom ñu di ko fexee rey. ³⁰ Bokki gëmkat ña nag yég ko, daldi koy yóbbu Sesare, yebale ko foofa, mu dem Tàrs.

³¹ Ba mu ko defee mbooloom gëmkat ñi ci mboolem diiwaani Yude ak Galile ak Samari daldi am jamm. Ñuy gëna dëgër, di wéye ragal Yàlla, tey yokku ci ndimbalal Noo gu Sell gi.

Piyeer faj na nit

³² Piyeer mi doon wër fu nekk nag, am na bés mu jaare ca ñu sell ña dëkke Lidd. ³³ Mu gis foofa waa ju ñuy wax Ene. Fekk na diiru juróom ñetti at, cib lal rekk lay téd ndax yaram wu làggi. ³⁴ Piyeer ne ko: «Ene, Yeesu Almasi wéral na la; jógal, lal sa bopp.» Mu jóg ca saa sa. ³⁵ Mboolem waa diiwaani Lidd ak Saron nag gis ko, ñoom ñépp waññiku ci Sang bi.

Piyeer dekkal na nit

³⁶ Dëkk ba ñuy wax Yope, ab taalibe bu jigéen a nga fa woon, ñu di ko wax Tabita mbaa Dorkas ci làkku gereg. Def lu baax ak sarxe la saxoo woon. ³⁷ Ci fan yooyu, mu daanu wopp, daldi faatu. Ñu sang ko, dugal ko ca néegu kaw taax ma. ³⁸ Ci biir loolu taalibe yi dégg ne Piyeer a nga Lidd, te Lidd sorewul Yope. Ñu yebal ñaari nit

ca moom, ngir ñaan ko mu ñëw te baña yeex.

³⁹ Piyeer jóg, ànd ak ñoom, ba agsi. Ñu yéeg ko ca néegu kaw taax ma. Ay jëtun a nga fa woon. Ñoom ñépp di jooyoo, yéew Piyeer, won ko turki yaak mbubb ya Dorkas defaroon ba muy nekk ak ñoom.

⁴⁰ Ci kaw loolu Piyeer dàq ñépp ca biti. Mu sukk, ñaan, daldi walbatiku jublook néew bi, ne: «Tabita, jógal!» Mu ne xiféet, gis Piyeer, jóg toog. ⁴¹ Piyeer may ko loxo, yékkati ko. Ba loolu amee Piyeer woo ñu sell ña, ak jëtun ña, won leen ndaw sa, muy dund. ⁴² Mbir na nag siw ca Yope gépp, ñu bare gëm Sang bi. ⁴³ Gannaaw loolu Piyeer dal na Yope ay fan, kër wullikat bu ñuy wax Simoñ.

10

Korney woo na Piyeer

¹ Ku ñuy wax Korney, njiitu takk-der la woon ca Sesare. Ma nga bokkoon ca mbooloo ma ñu dippee Gàngooru Itali. ² Ku jullite la woon te ragal Yàlla, mook waa kërám gépp; bare woon na sarax yu muy yéwéne askan wi, te ñaan ci Yàlla la saxoo woon.

³ Am peeñu nag dikkal ko digg njolloor, mu gis ci lu leer malaakam Yàlla, mu duggsi, ne ko: «Korney!» ⁴ Korney ne ko jàkk, tiit, ne ko: «Sang bi, lu mu doon?» Mu ne ko: «Say ñaan ak say sarax yéeg na fa Yàlla, ba mu bàyyi la xel. ⁵ Léegi nag yebilee ca Yope, nga wooluji fa ku ñuy wax Simoñ, ñu di ko dàkkentale Piyeer. ⁶ Ma nga dal ak meneen Simoñ ma, wullikat ba kërám féete wetu géej.»

⁷ Naka la malaaka ma wax ak Korney ba dem, mu woo ñaar ciy surgaam, ak benn takk-der bu jullite te bokk ciy suqam. ⁸ Mu nettali leen lépp nag, daldi leen yebal Yope.

⁹ Ca èllëg sa, ñu dem bay jub dëkk ba, yemook Piyeer yéeg ca kaw taax ma ci digg bëccëg, ngir ñaan. ¹⁰ Mu dem ba xiif, bëgga lekk, ñu di ko toggal nag lu mu lekk. Ci biir loolu mu daanu leer. ¹¹ Mu daldi gis asamaan ubbiku, lu mel ni sér bu mag bu ñu téyee ñeenti lafam, wàcce asamaan, jëm suuf. ¹² Sér baa nga def mboolem boroom ñeenti tãnk, ak dundoot yiy raam, ak mboolem njanaaw. ¹³ Mu am baat bu jib, ne ko: «Piyeer, jógal, rey te lekk.» ¹⁴ Piyeer ne ko: «Mukk, Sang bi, ndaxte masumaa lekk lenn lu daganul mbaa lu setul.» ¹⁵ Teewul baat bi wax ak moom ñaareel bi yoon, ne ko: «Lu Yàlla setal, bu ko daganadil.» ¹⁶ Menn peeñu moomu dikkal na ko ñetti yoon. La ca tegu ñu yéeg kef ka asamaan. ¹⁷ Piyeer a nga jaaxle lool, di seet cim xelam lu peeñu ma ko dikkal di tekki, ndeke nit ña Korney

yebaloon laaj nañu kër Simon, ba dikk taxaw ca bunt ba. ¹⁸ Ñu woote, laajte, ne: «Simon, mi ñuy wax Piyeer, fi la dëkk?»

¹⁹ Naka la Piyeer di xalaat ba tey ca peeñu ma, Noo gi ne ko: «Ñetti nit a ngi nii, di la seet. ²⁰ Wàccal boog, ànd ak ñoom te bul nàttable, ndax man maa leen yebal.» ²¹ Piyeer wàcc nag ne nit ñi: «Maa ngii; ki ngeen di seet, man la. Lu doon seeni tànk?» ²² Ñu ne ko: «Njiitu takk-der ba Korney, ku jub, ragal Yàlla, te rafet seede bu ko xeetu Yawut wépp seedeel, moo jote ci malaaka mu sell, ndigalal woolu la kërám, ngir déglu say kàddu.» ²³ Ci kaw loolu Piyeer dugal leen, dalal leen.

Piyeer wuyji na Korney

Ba bët setee, Piyeer ànd ak ñoom, ñenn ca bokki gëmkat ña dëkke Yope gunge ko. ²⁴ Ca èllëg sa Piyeer agsi Sesare. Fekk na Korney di ko séentú, daldi woo ca kërám ay bokkam, ak xaritam yi ko gëna jege. ²⁵ Ba Piyeer duggeese, Korney gatandu ko, ne gurub ca tànk Piyeer, sujjóot. ²⁶ Piyeer yëkkati ko, ne: «Déet jógal, man it, nit donj laa.» ²⁷ Piyeer di waxtaan ak moom, ba duggsi, yem ca nit ñu bare ña fa daje. ²⁸ Mu ne leen: «Yeen de xam ngeen ne ab Yawut, mayeesu ko mu jaxasoo ak xeetu jaambur; mbaa mu seeti ko. Waaye man nag Yàlla ma won ne du kenn nit ku ma naan daganula jaxasool, mbaa setul. ²⁹ Looloo tax, bi ngeen ma wooloo, ma ñew te tendeefaluma benn yoon. Ma di leen laaj nag li waral ngeen woolu ma.»

³⁰ Ci kaw loolu Korney ne: «Bëkkaati-démb ci waxtuw digg njolloor wii nu tollu tey, ci laa doon ñaane sama biir néeg. Mu am ku jekki ne jaas ci sama kanam, sol yére yu ne ràññ. ³¹ Mu ne ma: «Korney, nangu nañu say ñaan, te nemmiku nañu say sarax fa kanam Yàlla. ³² Kon nag yehleel Yope, nga woolu Simon, mi ñu dàkkentale Piyeer; ma nga dal ca kër meneen Simon, wullikat ba ca wetu géeg ga.» ³³ Ca saa sa nag laa yeble ci yaw. Yaw it def nga lu baax, bi nga dikkee. Léegi nag nun ñépp a ngi fi ci kanam Yàlla, ngir déglu mboolem lu la Boroom bi sant.»

³⁴ Ba loolu amee Piyeer àddu, ne: «Dégg-dégg gis naa ne Yàlla daal du gënaatile, ³⁵ waaye xeetoo xeet, ku ko ci ragal tey def njekk, mooy ki ko neex. ³⁶ Moo yónnee kàddoom bànni Israyil, àgge leen xibaaru jàmm, biy maye jàmm ci Yeesu Almasi, miy Sangu ñépp. ³⁷ Yeen ci seen bopp xam ngeen li xewoon ci mboolem réewum Yawut yi, te dale ci diiwaanu Galile, gannaaw ba Yaxya wootee, di sóobe cim ndox, ³⁸ ak ni Yàlla ànde ak Yeesum Nasaret, ba jagleel ko pal gu mu dogale

Noo gu Sell geek xam-xam bi mu ko sotti, muy wër; di def lu baax, di faj mboolem ñi Seytaane notoon.

³⁹ «Nun ci sunu bopp noo seede li mu def lépp ci réewum Yawut yi ak Yerusaleem. Moom mi ñu wékk ci bant, ba rey ko, ⁴⁰ moom la Yàlla dekkal ci ñetteelu fanam, ba may ko mu feeñ. ⁴¹ Du askan wépp la ko won, xanaa nun, seede yi Yàlla tànnoon lu jiitu, nu bokk ak moom lekk ak naan, gannaaw ndekkiteem. ⁴² Moo nu sant nag nu xamal askan wi te seede ne moom la Yàlla tabb àttekatub aji dund ñi, ak aji dee ñi. ⁴³ Moom la yonent yépp seedeel, ne képp ku ko gëm, jot nga sa njéggalug bàkkaar ciw turam.»

⁴⁴ Ba Piyeer di wax kàddu googu, Noo gu Sell gi daldi wàcc ci kaw mboolem ñay déglu kàddu ga. ⁴⁵ Ba loolu amee mboolem gëmkati Yawut ya ànd ak Piyeer, waaru ca na mayug Noo gu Sell gi tuuruwaalee ca xeeti jaambur ña, ⁴⁶ ndax dañu leena dégg ñoom itam, ñuy làkk yeneen làkk, ak a màggal Yàlla.

⁴⁷ Piyeer dellu ne: «Ñii jot Noo gu Sell gi ni nun, ndax manees na leena baña sóob ci ndox?» ⁴⁸ Mu santaane nag ñu sóob leen ci ndox ci turu Yeesu Almasi. Gannaaw loolu ñu ñaan Piyeer, mu toog ci ñoom ay fan.

11

Piyeer layoo naak waa Yerusaleem

¹ Ci kaw loolu ndaw yaak bokki gëmkat ña ca réewum Yawut, dégg ne jaambur ñi dul Yawut déggal nañu kàddug Yàlla, ñoom itam. ² Ba Piyeer delloo Yerusaleem nag, gëmkat ñi bokk ci askanu Yawut di ko sikk, ³ naan: «Yaa dem ca ña xaraful, di bokk ak ñoom lekk!»

⁴ Piyeer daldi leen benn-bennalal mbir mi. ⁵ Mu ne: «Man de damaa nekkoon ca Yope, di fa ñaan. Ci biir loolu ma daanu ag leer, daldi gis ci peeñu lu mel ni sér bu mag bu ñu téyee ñeenti lafam, mu wàcce asamaan, ba agsi ci man. ⁶ Ma xool ko jàkk, niir ko, daldi cay gis boroom ñeenti tànk yi, ak rabi àll yi, ak dundoot yiy raam ak njanaaw yi. ⁷ Maa dégg itam baat bu ma ne: “Piyeer, jógal, rey te lekk.” ⁸ Ma ne: “Mukk, Sang bi, ndax lenn lu daganul mbaa lu setul masula dugg sama gëmmeñ.” ⁹ Baat ba nag àddoo asamaan ñaareel bi yoon, ne ma: “Lu Yàlla setal, bu ko daganadil.” ¹⁰ Menn peeñu moomu dikk na ba muy ñetti yoon, ñu doora yéegé lépp asamaan.

¹¹ «Saa soosa tembe, ca la ñetti nit ña ñu yebale Sesare ba ca man, agsi ca kër ga nu dal. ¹² Noo gi nag ne ma: “Àndal ak ñoom, te bul nàttable.” Juróom benni bokk yii ngeen di gis ñoo ma gunge, nu

dem ba dugg ca kër Korney. ¹³ Mu xamal nu ne malaakaa ko feeñu ci néegam, ne ko: “Yebleel ca Yope, nga woolu Simon, ma ñu dàkkentale Piyeer. ¹⁴ Dina la àgge kàddu yu lay musal, yaw ak sa waa kër gépp.”

¹⁵ «Naka laa tàmbalee wax ak ñoom Korney, Noo gu Sell gi daanu ci seen kaw, na mu jèkkoona daanoo ca sunu kaw. ¹⁶ Ma daldi fàttliku kàddug Sang, ba mu noon: “Yaxya, cim ndox la daan sóobe, waaye yeen, ci Noo gu Sell gi lees leen di sóob.” ¹⁷ Gannaaw nag Yàllaa leen jagleel genn may, ga mu nu jagleeloon, ba nu gëmee Sang Yeesu Almasi, ana ku ma doon, man, bay gállankoor Yàlla?»

¹⁸ Ba ñu déggee loolu lañu dal, daldi màggal Yàlla. Nu ne: «Kon xeeti jaambur yi, ndeke ñoom it Yàlla may na leen ñu tuub, ba dund!»

Mbooloo sosu na ca Àncos

¹⁹ Gëmkat ña tasaaroo woon nag ndax fitna ja woon, ca mbirum Eccen, mujj nañu jàll ba diiwaanu Fenis, ca dunu Sippar ak ca Àncos, waaye àggewuñu kàddu gi ñeneen ñu moy Yawut yi. ²⁰ Terewul ay gëmkat ñu dèkke Sippar ak Siren, bàyyikoo ca, dikk Àncos, wax ak làkk-kati Gereg yi, ñoom itam, ba àgge leen xibaaru jàmm bu Sang Yeesu. ²¹ Boroom bi nag gungee leen loxoom, ba ñu bare gëm, waññiku ci Sang bi.

²² Ba mbir ma siiwee, ba mbooloom gëmcati Yerusalem jot ca, dañoo yebal Barnaba ca Àncos. ²³ Ba Barnaba dikkee ba gis yiw, wi leen Yàlla may, dafa bég, di leen ñaax ngir ñu noye seen xol ci Sang bi. ²⁴ Ndaxte Barnaba nit ku baax la woon, feese Noo gu Sell gi, ak ngëm. Mbooloo mu takku nag dolliku ci Sang bi.

²⁵ Ba loolu wéyee Barnaba jëm Tàrs, di seeti Sóol. ²⁶ Ba mu ko gisee, da koo indi Àncos. Ba mu ko defee, atum lëmm ñuy daje ca mbooloom gëmkat ña, di jàngal nit ñu takku. Ca Àncos lañu jékka wooye gëmkat ñi ay gëm-Almasi.

²⁷ Ci fan yooyu la ay yonent jóge Yerusalem, dikk Àncos. ²⁸ Kenn ca ñoom, ku ñuy wax Agabus daldi yéglee Noo gu Sell gi, ne xiif bu metti dina am, ci àddina sépp. Te looloo nga yemook ayug buur bu mag bu ñuy wax Kèlód. ²⁹ Taalibe ya nag fas yéenee boole kem kàttanu ku nekk ca ñoom, ngir ndimbal lu ñuy yónnee bokki diiwaanu Yude. ³⁰ Noonu lañu def, yónnee ko magi Yude, Barnaba ak Sóol jottli ko.

¹ Ca jamono jooju la Buur Erodd jàppoon ñenn ca mbooloom gëmkat ña, di leen mitital. ² Noonu la bóome ab saamar Yanqóoba, doomu ndeyu Yowaan. ³ Mu gis nag na mbir ma neexe Yawut ya, ba tax ma teg loxo Piyeer, moom itam; loola yemook bési màggalu Mburu mu amul lawiir. ⁴ Naka la ko jàpplu, daldi koy tēj kaso, teg ko ci loxoy ñeenti kurél yu ñeenti takk-der, ngir ñu wattu ko; booba ma ngay xaar ba bésu Mucc bi wees, mu door koo yóbbu ca kanam askan wa.

⁵ Naka lañu tēj Piyeer ca kaso ba, mbooloom gëmkat ñi saxoo koo ñaanal Yàlla.

⁶ Ba ñu demee ba ca guddi, ga jjiitu bés ba ko Erodd wara yóbbu, Piyeer a ngay nelaw ci diggante ñaari takk-der, ñu yeewe ko ñaari cállala, ay dag di wattu buntu kaso ba. ⁷ Ci kaw loolu am malaakam Boroom bi ne jaas, taxaw, ag leer ne ràyy ca biir kaso ba. Malaaka ma laal Piyeer ci wetam, yee ko, ne ko: «Jógal gaaw!», cállala yi daldi rote ciy loxoom.

⁸ Malaaka ma ne ko: «Takkal sa geño te sol say dàll.» Mu def noonu. Mu ne ko: «Solal sa mbubb te topp ci man.» ⁹ Piyeer génn, topp ci moom, te xamul sax ndax li ko dikkal noonu te sababoo ci malaaka mi, dégg la. Yaakaaroon na ne am peeñu la. ¹⁰ Ñu jàll dalu wattukat bu jékk bi, teg ci ñaareel bi, ba agsi ci buntu weñ, ba jëm ca dékk ba, bunt ba daldi tijjikul boppam. Ñu génn, topp menn mbedd, malaaka ma jekki teqlikook Piyeer.

¹¹ Naka la xelum Piyeer délsi, mu daldi ne: «Léegi nag xam naa xéll ne, Boroom bee yebal malaakaam, te moo ma musal ci loxol Erodd, ak mboolem li Yawut yi séentu woon.» ¹² Gannaaw ba Piyeer ràññee loolu, daa dem kër Maryaama, ndeyu Yowaan Màrk, fekk ñu bare daje foofa, di ñaan. ¹³ Piyeer fëgg buntu kër ga, mbindaan mu ñuy wax Rodd dikk. ¹⁴ Ba Piyeer waxee, mbindaan ma xàmmi baatan, daldi bég ba talu koo ubbil, xanaa daw dellu ca biir, ne Piyeer a nga foofa ca buntu kër ga. ¹⁵ Ñu ne ko: «Xanaa dangaa dof?» Teewul mbindaan mi ne moom la. Ñu daldi ne: «Kon malaakaam la.» ¹⁶ Ci biir loolu Piyeer a ngay fëgg ba tey. Ñu tijji, muy moom, ñu waaru. ¹⁷ Piyeer liyaar leen, ngir ñu noppi, daldi leen nettali, ni ko Boroom bi génnee kaso ba. Mu ne leen: «Yégal-leen ko Yanqóoba ak yeneen bokki taalibe yi.» Ba loolu amee mu génn, dem feneen.

¹⁸ Ba bët setee takk-der ya ne kër-kër, ne képp, ne: «Ana fu Piyeer jaar?» ¹⁹ Erodd nag santaane ñu wër Piyeer, te taxul mu

12

Yàlla yiwi na Piyeer

gis ko. Mu daldi àtte wattukat yi, ba noppi joxe ndigal ngir ñu rey leen.

Buur Erodd dee na

Ba mu ko defee Erodd jóge diiwaanu Yude, dem Sesare, toog fa. ²⁰ Fekk na Erodd dëngoo lool ak waa dëkk yi ñuy wax Tir ak Sidon. Ci kaw loolu waa Tir ak Sidon mánkoo, dikk ba ci Erodd. Ñu daldi fexe ba jubook Balastus, bëkk-néegu Buur, ba noppi di sàkku jàmm, ndax seen dundub réew, ca dundu Buur Erodd la daan jóge.

²¹ Ba bés ba ñu jàpp agsee, Erodd sol colu buuram, toog ca jal ba, di leen àgge kàddug kilifteefam. ²² Mbooloo maa ngay àddu ca kaw, naan: «Lii kay baatu Yàlla la, du baatu nit!» ²³ Ca saa soosa tembe la ko malaakam Boroom bi fàdd, ndax la mu delloowul Yàlla njukkal. Ba loolu amee, ay sax ronq ko, mu dee.

²⁴ Ci biir loolu kàddug Yàlla di gëna siiw, di gëna law.

²⁵ Barnaba ak Sóol nag, gannaaw ba ñu sottalee seen liggéey, dañoo jóge Yerusalem, ñibbi, ànd ak Yowaan mi ñuy wax Màrk.

13

Yàlla yónni na Barnaba ak Sóol

¹ Ca biir mbooloom gëmkat, ña woon ca dëkk ba ñuy wax Àncos, amoon na ay yonent ak ay jànglekati: ñuy Barnaba, ak Simeyon mi ñu dippee Ñuule, ak Lusiyus mi bawoo Siren*, ak Manayen mi yaroon-doo ak Erodd boroom Galile, ak Sóol. ² Ñooñoó daje woon di màggal Boroom bi, boole kook koor. Ci biir loolu Noo gu Sell gi ne: «Beral-leen ma nag Barnaba ak Sóol ngir liggéey, bi ma leen wooye.» ³ Ba loolu amee ñu woor, boole kook ñaan, daldi leen teg seeni loxo, ba noppi yiwi leen.

Dunu Sippar jot na ci kàddug Yàlla

⁴ Ñooñu la Noo gu Sell gi yebal, ñu dem dëkk ba ñuy wax Selusi, dугge fa gaal, jëm dun ba ñuy wax Sippar.

⁵ Ña nga teereji dëkk ba ñuy wax Salamin, daldi fay yégle kàddug Yàlla ca jànguy Yawut ya, ku ñuy wax Yowaan Màrk ànd ak ñoom, di leen jàpple.

⁶ Ci biir loolu ñu wër dun ba bépp, ba yegg Pafos, péey ba. Ñu tase faak ab ñeengokatub Yawut buy yonent-yonentlu, ñu di ko wax Bar Yeesu. ⁷ Ma nga bokkoon ca toppum Sergiyus Póolus† boroom dëkk ba, nit ku rafet xel. Kooku namma dégg kàddug Yàlla, daldi woolu Barnaba ak Sóol. ⁸ Elimas, mu firi Ñeengokat bi, di leen gállankoor nag, tey jéema fàbbi

boroom réew ma, ba du gëm. ⁹ Ci kaw loolu Sóol mi ñuy wax Póol feese Noo gu Sell gi. Mu xool ñeengokat bi jàkk, ¹⁰ ne ko: «Yaw nit ki fees ak gépp xeetu njublan ak ndëngte, doomu Seytaane ji, noonu gépp njub, doo bàyyee lunkal yoni njub yu Boroom bi?» ¹¹ Léegi nag loxol Boroom baa ngii fi sa kaw; dinga gumba, ba dootuloo gis jant bi ab diir.» Ca saa sa gis-gis bu naqari akug lëndëm ne milib ci kawam, muy wëndeelu, di wut ku ko wommat. ¹² Ba loolu amee boroom dëkk ba gis la xew, daldi gëm, di yéemu ci li mu jänge ci Sang bi.

Waa Pisidi jot nañu ci kàddug Yàlla

¹³ Póol ak ñi mu àndal nag bàyyikoo Pafos, dugg gaal, jëm Perge, ca diiwaanu Pamfili. Yowaan moom tàggoo ak ñoom, delu Yerusalem.

¹⁴ Ci kaw loolu, ñoom ñu jóge Perge, jàll ba Àncos ca diiwaanu Pisidi. Ñu dem jàngu ba, dugg, toog ca bésul Noflaay ba. ¹⁵ Gannaaw ba tarib dog ya ca téereb yoonu Musaa, ak téereb yonent ya sottee, njiiti jàngu ba yóbbante leen kàddu, ne leen: «Bokk yi, bu ngeen amee kàddu gu ngeen ñaaxe mbooloo mi, waxleen.» ¹⁶ Póol jóg, tàllal loxoom, nee leen:

«Yeen bokki Israyil ak yeen jaamburi ragalkati Yàlla yi, dégluleen! ¹⁷ Yàllay bànni Israyil jii moo tannoon sunuy maam, moo yaatal xeet wi, ba ñuy ganyaan ca Misra; moo leen fa génnee kàttanu loxoom. ¹⁸ Lu tollook ñeent fukki at la leen muñal ca màndinj ma. ¹⁹ Moo faagaagal juróom ñaari xeet ca réewum Kanaan, daldi muurale sunuy maam réewum Kanaaneen ña. ²⁰ Loolu lépp a ngi am ci diiru ñeenti téeméeri at ak juróom fukk (450).

«Gannaaw loolu moo sàkkal sunuy maam ay njiit, ba ci jamonoy Yonent Yàlla Samiyel. ²¹ Ba loolu wéyee, ñuy sàkku buur, Yàlla jox leen doomu Kis, Sóol, mi soqikoo ci giirug Beñamin, mu falu diiru ñeent fukki at. ²² Mu jële ko fa, sampal leen Daawuda, muy buur bu mu seedeel ne: “Maa ràññee Daawuda doomu Yese, ji sama xol jubool, te mooy jéfe mboolem samay coobare.”

²³ «Ci askanu kookii la Yàlla indee Yeesu, na mu ko digee woon, muy Musalkat ñeel Israyil. ²⁴ Laata muy ñew, Yaxya moo doon yéene ngir waa bànni Israyil gépp sóobu cim ndox, jëmmale ko seenug tuubeel. ²⁵ Ba Yaxya di jeexal aw sasam la ne: “Ana ku ngeen foog ne moom laa? Duma ki ngeen foog, waaye am na kuy ñew nii

* 13:1 13.1 Siren ab dëkk la bu nekkoon ci tefesu bëj-gànaaru Afrig te féete Misra sowu. † 13:7 13.7 Sergiyus Póolus waa Room la woon bu yore kilifteefu diiwaan ba, ci njiital ab kurélu Room.

sama gannaaw, ku ma yeyoowula summil sax ay dàllam.”

²⁶ «Bokk yi, yeen askanu Ibraayma, yeen ak jaamburi ragalkati Yàlla yi ci seen biir, nun lañu yónnee kàddug mucc gii. ²⁷ Waa Yerusalem, ak seeni kilifa nag xàmmiwuñu woon Yeesu, te ba ñu daanee Yeesu lañu sottal waxu yonent, ya ñu daan biral bésu Noflaay bu nekk. ²⁸ Gisufu ci moom lenn lu ko àtteb dee dabe, te teewul ñu sàkku Pilaat reylo ko. ²⁹ Gannaaw ba ñu matalee mboolem lu ñu bind ci moom, lañu ko wàccee ca bant ba, dugal ko bàmmeel. ³⁰ Waaye Yàllaa ko dekkal, ³¹ te diiru fan yu bare la feeñu ña àndoon ak moom, jóge diiwaanu Galile, dem Yerusalem, te ñooñoo ay seedeem tey ci askan wi. ³² Nun nag noo leen di àgge xibaaru jàmm bii: li Yàlla digoon sunuy maam, ³³ nun sèt yi la ko defal, ba mu yékkatee Yeesu, te noonee lañu ko binde ci ñaareelu saaru Sabóor, ne:

“Yaa di sama Doom, bés niki tey maa la jur.”

³⁴ Noonu ko Yàlla dekkale ndekkite lu dee toppatul, te yaramam du yaqu mukk, noonee la ko Yàlla waxe woon, ne:

“Maa lay jox barkey Daawuda yu sell yi te wóor.”

³⁵ Moo tax mu waxaat feneen ne:

“Doo bàyyi sa ku Sell ki, mu yaqu.”

³⁶ Daawuda moom, gannaaw ba mu defee coobarey Yàlla ci jamonoom, nelaw na, ba ñu rob ko ca weti maamam ya, te yaqu na. ³⁷ Waaye moom mi Yàlla dekkal, yaquwul.

³⁸ «Kon nag bokk yi, xamleen ne ci Yeesu moomu lañu leen birale njéggalug bàkkaar. Te mboolem lu ngeen tële woona wàccool, ba seen njub mat ci yoonu Musaa, ³⁹ képp ku gëm Yeesu, ci moom lay wàccook loolu lépp, ba ag njubam mat. ⁴⁰ Wattuleen nag ba li ñu wax ci téerey yonent yi bañ leena dal. Ñu ne:

⁴¹ «Yeen xeebaatekat yi, xool-leen, jommileen te ne mes, ndax jéf ji may def ci seen jamono, ku leen ko waxoon sax, dungen ko gëm.»

⁴² Ba ñu gënnee ca jàngu ba, dañu leena ñaan ñu baamtu kàddu googu bésu Noflaay ba ca topp. ⁴³ Ba mboolo ma tasaaroo, bare na ay Yawut ak tuubeen yuy jaamu Yàlla yu topp ci Póol ak Barnaba. Ñuy wax ak nit ñi, di leen ñaax, ngir ñu sax ci doyloo yiwu Yàlla.

⁴⁴ Bésu Noflaay ba ca topp, daanaka waa dèkk bépp a daje, ngir déglu kàddug Boroom bi. ⁴⁵ Ba Yawut yi gisee mboolo ma nag, kiñaan man leen, ñuy weddi waxi Póol, di ko saaga. ⁴⁶ Ba loolu amee fit la leen Póol ak Barnaba tontoo, ne leen:

«Yeen Yawut yi de lanu wara jékka yégal kàddug Yàlla gi, waaye gannaaw gántal ngeen ko, ba jombale seen bopp ag texe ba fàww, nu ngii di walbatiku ci jaambur ñi. ⁴⁷ Ndax noonu la nu ko Boroom bi sante ba mu nee:

“Maa la tabb ngay leeru jaambur ñi, ngir nga jottliji mucc gii, ba ca cati àddina.”»

⁴⁸ Ba jaambur ña déggee loolu, dañoo bég, di mággal kàddug Boroom bi; ci biir loolu ña dogal ba jagleel ag texe ba fàww, ñoom ñépp daldi gëm.

⁴⁹ Kàddug Boroom bi nag di law ca diiwaan bépp. ⁵⁰ Teewul Yawut ya xiirtal tuubeen yu jigéen yi gëna ràññiku, ak kàngam yu góor yi ci dèkk bi. Ñu daldi bundxatal Póol ak Barnaba, génne leen réew ma. ⁵¹ Póol ak Barnaba nag fègg seen pëndub ndégguy tánk, seedeel leen ko seen ngántal, doora dem dèkk ba ñuy wax Ikoñum. ⁵² Ci biir loolu taalibe ya dese mbég ak Noo gu Sell gi, ba seen xol fees.

14

Póol ak Barnaba waare nañu ca Ikoñum

¹ Ba Póol ak Barnaba nekkee Ikoñum, noonu lañu dugge itam ca jàngub Yawut ya. Ñu waare, ba mboolo mu mag gëm, ay Yawut aki Gereg. ² Yawut yi gëmul nag di xiirtal jaambur ñi dul Yawut, di yaq seen xel ci bokki taalibe yi. ³ Teewul Póol ak Barnaba toog Ikoñum diir bu yagg lool. Fit lañu doon waaree ngir Boroom bi, Boroom bi maye ay firnde aki kéemaan yu jaare ci ñoom, ngir seeree ko kàddug yiwam gi ñuy biral. ⁴ Ba loolu amee waa dèkk bi xàjjalikoo, ñii far ak Yawut yi, ñale far ak ndaw ya. ⁵ Jaambur ñeek Yawut yi nag ànd ak seeni kilifa, di leen waaja mitital ak a dóori doj. ⁶ Ñu yég ko, daw làquji diiwaanu Likawni, ca dèkk ya ñuy wax Listar, ak Derbe ak la ko wër. ⁷ Foofa itam ñu di fa xamle xibaaru jàmm bi.

Póol ak Barnaba waare nañu ca Listar

⁸ Jenn waay a nga daan toog ca Listar, tánk ya baaxul woon; laago la judduwaale, te masula dox. ⁹ Kookoo dégg Póol muy waare, Póol xool ko jàkk, gise ne am na ngëm gu muccam mana jaare. ¹⁰ Mu àddu ca kaw, ne waa ji: «Jógal taxaw jonn!» Waa ji ne bërét, jóg, daldi dox.

¹¹ Ba mboolo ma gisee la Póol def, ca kaw lañu àddu ci làkku Likawni, ne: «Yàlla yee soppliku melow nit, wàccsi ci sunu biir!» ¹² Ci kaw loolu ñu tudde Barnaba Sés, kilifay yállay Gereg yi, Póol nag gannaaw moo farewoo woon kàddug waare ga, ñu tudde ko Ermes, ndawal

yállay Gereg yi. ¹³ Jaamookaayu Sës ma nga woon ca buntu dëkk ba. Sarxalkat ba daldi indi ca bunti dëkk ba ay yëkk yu ñu takkal caqi tóor-tóor. Sarxalkat ba ànd ak mbooloo ma, nara rendi jur ga, sarxal ko Póol ak Barnaba.

¹⁴ Ci kaw loolu Póol ak Barnaba yég la xew. Ñu xotti seeni yére ndax ñaawlu ko. Ñu buur nag ba ca biir mbooloo ma, daldi àddu ca kaw ne: ¹⁵ «Yeen, lu leen xiir ci lii? Nun itam ay nit lanu, bokk ak yeen benn bind. Xibaaru jàmm bi lanu leen di xamal, ngir ngeen wacc yéfi neen yii te walbatiku ci Yàlla, kiy dund te sàkk asamaan ak suuf ak gééj ak mboolem lu nekk ci biir. ¹⁶ Moo mayoon démb xeet yépp, ñu awe seen yooni bopp. ¹⁷ Moona noppiwula seereel boppam ci mbaaxam gi muy jéfe, di leen wacceel fa asamaan, taw ak naataange, reggal leen, bégal leen ba seen xol sedd.»

¹⁸ Loolu lépp ndaw ya wax nañu ko te tuuti kon ñu télee tere mbooloo ma ñu rendil leen sarax.

¹⁹ Ci kaw loolu ay Yawut yu jóge Àncos gu Pisidi ak Ikoñum, fexe ba fàbbi mbooloo ma, daldi dóor Póol ay doj, diri ko ba génne ko dëkk ba, yaakaar ne dee na. ²⁰ Naka la ko taalibe ya yéew, mu jóg, daldi dellu ca biir dëkk ba. Ca èllég sa, mu ànd ak Barnaba, dem Derbe.

Délsi nañu Àncos gu Siri

²¹ Gannaaw ba ñu xamlee fa Derbe xibaaru jàmm bi, ba am fa taalibe yu bare, dañoo dellu Listar ak Ikoñum ak Àncos gu Pisidi. ²² Ñuy feddli pastéefu taalibe yi, di leen ñaax ngir ñu saxoo ngëm, ne leen: «Coono yu baree ngii, fàww nu jaare ci, ngir tàbbi ci nguugug Yàlla.» ²³ Mbooloom gëmkat mu nekk nag, ñu tabb ci ay mag; ci biir loolu ñu ñaan, boole kook koor, daldi dénk mag ña Sang bi ñu gëm. ²⁴ Gannaaw loolu ñu jaare biir diiwaanu Pisidi, ba àgg Pamfilii. ²⁵ Ñu daldi siiwtaane kàddu gi ca Perge, doora wacci ba Atali.

²⁶ Foofa lañu dugge gaal, dellu Àncos gu Siri, ga ñu leen denke woon Yàlla ciw yiwam, ngir liggéey ba ñu sotal, ba délsi noonu. ²⁷ Ba ñu agsee, dañoo woo mbooloom gëmkat ña, àgge leen mboolem na Yàlla def ak ñoom, ak na mu ubbilee jaambur ñi dul Yawut buntu ngëm. ²⁸ Ñu toog nag ak taalibe ya diir bu xawa yàgg.

15

Péncoo am na ca Yerusaleem

¹ Ñenn nit ñu bàyyikoo Yude dikki Àncos, ñoo doon digal bokki taalibe yi, ne leen: «Su ngeen xaraful*, ni ko aaday Musaa santaanee, dungen mana mucc.»

² Mbir ma nag mujje féewaloo ak werante wu xawa metti, te Póol ak Barnaba séq ko ak ñooñu. Ba loolu amee ñu ne, na Póol ak Barnaba, ak ñenn ca gëmcati Àncos, ànd dem Yerusaleem ca ndawi Yeesu, ak mag ña, ba lijjanti mbir moomu.

³ Ci kaw loolu mbooloom gëmkat ñi yebal leen, ñu jaare Fenisi ak Samari, daldi àgge waa foofa ni jaambur ñi dul Yawut tuube, ba bokki gëmkat ñépp bég ca lool. ⁴ Gannaaw loolu, ñu agsi Yerusaleem, mbooloom gëmkat ñi, ak ndawi Yeesu yi, ak mag ñi, dalal leen, ñu nettali leen mboolem ni Yàlla def ak ñoom.

⁵ Ba mu ko defee ñenn ci gëmkat ñi bokk ci ngérum Farisen yi, daldi taxaw temm, ne gëmkat ñi dul Yawut, fàww ñu xarfal leen, sàmmloo leen yoonu Musaa.

⁶ Ba loolu amee ndawi Yeesu yi ak mag ñi bokk daje, ngir seet mbir moomu.

⁷ Werante wu réy am ca. Ci kaw loolu Piyeer jóg ne leen: «Bokk yi, yeen xam ngeen ne bu yàgg la ma Yàlla seppée ci seen biir, ngir jaambur ñi dégge ci sama lammañ, kàddug xibaaru jàmm bi, ba doon ay gëmkat. ⁸ Yàlla, mi xam xolu nit nag moo seereel jaambur ñi, ba mu leen mayee Noo gu Sell gi, ni mu nu ko maye nun itam. ⁹ Yàlla amul xejj ak seen sunu digg ak ñoom, ndax seen ngëm la raxase seen xol. ¹⁰ Léegi nag lu tax ngeen di diiñat Yàlla, di teg taalibe yi yen bu nu masula àttan, cay maam ba ci nun? ¹¹ Yiwu Sang bi Yeesu daal lanu gëm ne ci lanuy mucce, te ñoom itam, noonu rekk.»

¹² Ba loolu wéyee mbooloo mépp ne xerem. Ñu déglu nag Barnaba ak Póol, ñu xamle mboolem firnde yeek kéemaan, yi Yàlla defe seen ñaari jëm ci biir jaambur ñi. ¹³ Ba ñu noppee, Yanqóoba àddu ne: «Bokk yi, dégluleen ma. ¹⁴ Simoñ† xamle na, ni Yàlla yége jaambur ñi ca njàlbéen, ba sàkke ci seen biir, xeet wu mu tudde turam. ¹⁵ Te loolu déppoo na ak kàdduy yonent yi, ndax bindees na ne:

¹⁶ «Boroom bi nee:

Gannaaw loolu dinaa délsi;

maay yékkati kër Daawuda gi daanu,

maay yékkati gent yi, joyanti ko,

¹⁷ ngir ndesu nit ñi sàkku Boroom bi,

te ñooñoo di jaambur ñi ñu tudde sama tur.

¹⁸ Boroom bee xamle loolu bu yàgga yàgg.»

* 15:1 15.1 Seetal ci 7.8. † 15:14 15.14 Simoñ mooy Piyeer ba tey.

¹⁹ «Kon nag sama xalaat mooy: bunu gétèn jaambur ñi tuub, ba waññiku ci Yàlla. ²⁰ Xanaa nu bind leen, ne leen ñu moytu lu ay xèrèm sobeel, moytu powum séy, moytoo lekk yàppu mala mu ñu tururul deretam, ak lekk deret ci hoppam. ²¹ Ndaxte ca njàlbéen ga ba tey ay nit a ngi waaree yoonu Musaa ci dèkk bu nekk, ñu di ko jàng ci jàngu yi bés sub Noflaay bu nekk.»

Ndaje ma bind na ñi dul Yawut

²² Ba loolu amee ndaw yi ak mag ñi mànkoo ak mbooloom gëmkat ñépp, ngir tannée ci seen biir ay nit, yebal leen Àncos, boole leen ak Póol ak Barnaba. Nooñoo di Yuda, mi ñu dippee Barsabas, ak Silas, ñu diy mag ca bokk ya.

²³ Ñu yóbbante leen bataaxal, bind ci ne:

Nun ndawi Yeesu, ak mag ñi, seen bokki Yerusalem, noo leen bind, yeen sunu bokki gëmkat ñi dul Yawut te dèkke Àncos ak Siri ak Silisi. Nu ngi jiital sunub nuyoo. ²⁴ Dégg nanu ne ay nit ñu bawoo ci nun, ñoo leen lèjal ak seeni wax, di jaxase seen xel, te nun joxunu leen lenn ndigal. ²⁵ Moo tax nu mànkoo ci tànn ay nit ñu nu yebal ci yeen, boole leen ak sunuy soppe Barnaba ak Póol, ²⁶ ñoom ñi jaay seen bakkan ngir sunu Sang Yeesu Almasi. ²⁷ Kon nag noo yebal Yuda ak Silas, ngir ñu àgge leen ci seen gëmmiñu bopp, lii nu leen bind. ²⁸ Ndaxte Noo gu Sell gi moo mànkoo ak nun ci bañ leena teg benn coono, xanaa lii manula ñàkk: ²⁹ Ngeen moytu yàpp wu ñu sarxal ay tuur, ak deret, ak yàppu jur gu ñu tuurul deretam, ak powum séy. Yooyii, bu ngeen ko moytoo bu baax, def ngeen lu baax. Jàmm ak jàmm.

³⁰ Ba loolu amee ñu tàggtóo, daldi dem ba Àncos. Ci kaw loolu ñu woo mbooloo mi, jébbal leen bataaxal bi. ³¹ Ba ñu jàngee bataaxal bi, kàddu ga dèfal leen, seen xol sedd. ³² Yuda ak Silas it gannaaw ay yonent lañu woon, wax nañu ak bokk yi lu yàgg, ngir ñaax leen, feddli seen ngëm. ³³⁻³⁴ Ba loolu amee ñu toog fa ab diir, bokk yi door leena ñaanal yoonu jàmm, yiwi leen, ngir ñu dellu ca ña leen yebaloon. ³⁵ Póol ak Barnaba nag des Àncos. Ñu ànd ak ñineen ñu bare, di jàngle ak a xamle kàddug Boroom bi.

Póol ak Silas ànd nañu

* **16:3** 16.3 Póol dafa jàpp ne gëmkatub Almasi man naa xaraf ba tey, te du yàq ci ngëmam dara. Moo tax Póol xarfal Timote, ndax xamoon na ne xaraf donj moo manoona tax Timote mucc ci sikkaangey Yawut yi gëm Almasi.

† **16:10** 16.10 Li waral nu mooy Luug mi bind *Jéf ya* mooy wax.

³⁶ Ba ñu ca tegee ay fan Póol ne Barnaba: «Nan dellu seeti bokk yi ci mboolem dèkk yi nu yégle woon kàddug Boroom bi, ba gis nu ñu def.» ³⁷ Barnaba nag béggoon ñu yóbbaae Yowaan, mi ñuy wax Màrk. ³⁸ Teewul Póol jàpp ne gannaaw Yowaan Màrk moomu moo leen wacoon ca Pamfili te àndul woon ak ñoom ci liggéey bi, yóbbaae ko warul.

³⁹ Mbir mi nag mujje dèngoo bu metti, ba ñu teqlikoo. Barnaba ànd ak Yowaan Màrk, dugg gaal, jëm Sippar. ⁴⁰ Póol moom, taamu Silas, daldi ànd ak moom dem, gannaaw ba leen bokk ya dénkee Boroom bi ciw yiwam. ⁴¹ Ci kaw loolu mu jaare diiwaani Siri ak Silisi, di ñaax mbooloooy gëmkat ña.

16

Timote fekkisi na Póol ak Silas

¹ Ci kaw loolu Póol agsi Derbe, teg ci dèkk ba ñuy wax Listar. Ndeke ab taal-ibee nga fa bu ñuy wax Timote; ndeyam di gëmkatub Almasi bu bokk ci askanu Yawut, baayam di Gereg. ² Muy ku rafet seede ci biir bokki dèkk yooyu di Listar ak Ikoñum. ³ Póol nag bégg mu ànd ak moom, ba tax mu yóbbu ko, xarfal* ko ndax Yawut ya dèkke woon gox ba, ngir ñépp a xamoon ne baayam ab Gereg la. ⁴ Ba loolu amee ñuy wër dèkk ya, di jottli dogal yi tukkee ca ndawi Yeesu yaak magi Yerusalem, ngir ñu sàmm ko. ⁵ Mbooloooy gëmkat ñi di gëna feddliki ci wàllu ngëm, seeni lim di yokku bés ak bés.

Yàlla feeñu na Póol

⁶ Xel mu Sell mi nag tere leena yégleji kàddu gi ca diiwaanu Asi, ba tax ñu jàlli biir diiwaanu Firisi ak Galasi. ⁷ Ñu dem ba ca kemu Misi, nara jàlli biir diiwaanu Bitini, Xelum Yeesu mayu leen ko. ⁸ Loolu tax ñu jàlle biir Misi, àkki dèkk ba ñuy wax Torowas. ⁹ Ci biir loolu am peeñu dikkal Póol ca guddi: mu gis aw nitu Maseduwan taxaw, di ko tinu, ne ko: «Jàllsil Maseduwan, wallusi nu!» ¹⁰ Naka la jot peeñu ma, mu daldi nu† bir ne Yàllaa nu yebal ngir nu xamleji foofa xibaaru jàmm bi. Ca saa sa nu fexee jàll ba Maseduwan.

Lidi gëm na Almasi ca Filipi

¹¹ Ci kaw loolu nu dugge Torowas gaal, jubal dunu Samotaras, jógeeti fa, teereji Neyapolis ca èllég sa. ¹² Nu bawoo fa jàll ba Filipi, dèkku gox ba jèkk ca diiwaanu Maseduwan te di moomeelu Room. Nu toog fa ay fan.

¹³ Ba bésu Noflaay ba taxawee, nu génn ca buntu dëkk ba, ca wetu dex ga, daldi fay gis bérab bu nu foog ne ab jullikaay la. Nu toog fa nag, di waxtaan ak jigéen ña fa daje. ¹⁴ As ndaw a nga ca, di déglu; ku ñuy wax Lidi, dëkk Catir; di jaaykatub cuubi tànnéef yu xonq curr; te di jaamukatu Yàlla. Boroom bi nag ubbi xolam, ba mu teewlu bu baax kàdduy Póol. ¹⁵ Ci kaw loolu ñu sóob ko ci ndox, moom ak waa kërám. Mu daldi nu ñaan, ne nu: «Ndegam ab gëmkatub Sang bi ngeen ma jappe, agsileen, dal ak man ca sama kër.» Mu soñi nu ba nu nangu.

Tëj nañu kaso Póol ak Silas

¹⁶ Noo doon dem jullikaay ba, ab surga bu jigéen bu rabu gisaane japp, dajeeek nun. Alal ju bare la ay njaatigeem daa jële ci ngisaaneem. ¹⁷ Ndaw sa topp ci Póol ak nun, di xaacu, naan: «Nit ñii jaami Yàlla Aji Kawe ji lañu; dañu leen di yégal yoonu muc.» ¹⁸ Noonu la jappoo ay fani fan, ba Póol mujj xajootu ko. Mu walbatiku ne rab wa: «Maa la sant ci turu Yeesu Almasi, génnal ci ndaw si.» Rab wa daldi génn ca saa sa.

¹⁹ Ba loolu amee alal ja njaatigey ndaw sa yaakaaroon, réer leen, ñu japp Póol ak Silas, diri, yóbbu ca pénc ma, fa kanam njiit ya. ²⁰ Ñu taxawal leen fa àttekat ya, ne: «Ñii ñoo yéngal sunu dëkk bi, di ay Yawut ²¹ yuy xamle aada yoy, nun ñuy waa Room, sañunu koo nangu, sañunu koo jëfe.»

²² Ci kaw loolu mbooloo ma it dal ci seen kaw; àttekat ya futti seeni yére, daldi santaane ñu dóor leen ay yar. ²³ Ñu dóor leen ay yar yu bare, sànni leen ca kaso ba, boole ca jox boroom kaso ba ndigalal wattu leen bu baax. ²⁴ Ndigal loolu nag tax mu sànni leen ca néeg ba gëna ruqe ca kaso ba, jéng leen.

²⁵ Ba guddi gay xaaj, Póol ak Silas a ngay ñaan, di sàbbaal Yàlla, ñeneen ña ñu fa tēj di leen déglu. ²⁶ Ci kaw loolu suuf jekki yéngu yéngu bu mag ba kenug kaso ba di réng-réngi; bunt yépp jekki ubbiku, jéngi ñépp dajjiku. ²⁷ Boroom kaso ba tiite ciy nelaw, gis bunti kaso bi ubbiku. Mu bocci saamaram, nara xaru, yaakaar ne ña ñu tēj daño récc. ²⁸ Póol nag àddu ca kaw ne: «Bul lor sa bopp, nun ñépp a ngi fi.»

²⁹ Ba loolu amee boroom kaso ba indilu ab làmp, daldi ne saraax dugg, ne gurub fa kanam Póol ak Silas, di lox. ³⁰ Gannaaw gi mu génne leen ca biti ne leen: «Sang yi, ana lu ma wara def, ba muc?» ³¹ Ñu ne ko: «Gëmal Sang Yeesu, daldi muc, yaak sa waa kër.» ³² Ba loolu amee ñu xamal ko kàddug Sang bi, moom ak waa kërám gépp. ³³ Mu yóbbu leen nag ci waxtuw

guddi woowu, raxas seeni gaañu-gaañu, ñu sóob ko ci ndox ca saa sa, moom ak waa kërám gépp. ³⁴ Gannaaw loolu mu yóbbu leen kërám, jox leen ñu lekk, tey bégeendo ak waa kërám gépp ci ngëm gi ñu gëm Yàlla.

³⁵ Ba bët setee, àttekat ya yebal alkaati ya, ñu ne boroom kaso ba: «Ñii, yiwi leen.» ³⁶ Boroom kaso ba àgge Póol ndigal la, ne ko: «Àttekat yi kat ñoo fi yeble, ne ñu yiwi leen. Kon nag man ngeena génn te dem ak jamm.»

³⁷ Póol nag ne alkaati ya: «Ñoom ñu dóor nu ci kanam nit ñi, àtteesu nu sax te nu diy gor ci Room gi, rax ci doli ñu sànni nu ci kaso bi. Léegi ñu bëgg noo dàq ndànk ci biti? Mukk! Nañu ñew, ñoom ci seen bopp, génne nu.»

³⁸ Ba mu ko defee, alkaati ya àgge àttekat ya kàddu googu, ñu xam ne ay gori waa Room lañu, tiitaange japp leen. ³⁹ Ñu dikk, jéggalu, génne leen ci biti, ñaan leen, ñu génn dëkk ba. ⁴⁰ Noonu lañu génne kaso ba, dellu kër Lidi. Ñu gise faak bokki gëmkat ña, ñaax leen, doora dem.

17

Xibaaru Yeesu yéngal na Tesalonig

¹ Ba mu ko defee ñu jaare dëkk ya ñuy wax Amfipolis ak Apoloni, doora àgg Tesalonig, ga Yawut ya amoon ab jàngu. ² Póol nag di leen fa fekk, na mu ko baaxoo. Diiru ñetti bési Noflaay, mu di leen waxal ci Mbind mi. ³ Mu di leen tekkil Mbind mi, di leen ci firndeel ne coonob Almasi ak ndekkiteem manul woona ñàkk. Mu ne leen: «Yeesu mii ma di leen xamal, mooy Almasi.» ⁴ Ba loolu amee ñenn ca Yawut ya gëm, fekkisi Póol ak Silas, ñoom ak Gereg yu bare yu ragal Yàlla, ak jigéen ñu raññiku ñu bare.

⁵ Yawut ya nag am ca kañaan, daldi foraato ca mbedd ma ay taxawaalukat, dajale ay gàngoor, ba yéngal dëkk ba. Ñu song kër Yason, di seet Póol ak Silas, ngir yóbbu leen ca waa dëkk ba. ⁶ Ci kaw loolu gisuñu leen, ñu diri Yason ak yeneen bokki gëmkat ba ca kanam àttekat ya. Ña ngay biral, naan: «Nit ñi tas àddinaa ngii, agsi nañu fi, ⁷ te Yason a leen dala. Ñoom ñépp a xëtt ndigali buur Sesaar, te naan am na beneen buur bu ñuy wax Yeesu.» ⁸ Ba mbooloo ma ak àttekati dëkk ba déggee loolu, daño jaaxle. ⁹ Ba loolu amee ñu feyloo Yason ak ña ca des daan ba ca war, door leena yiwi.

Póol ak Silas dem nañu Bere

¹⁰ Ba mu ko defee bokki gëmkat ña yebal ca saa sa Póol ak Silas ca guddi ga, ñu jëm Bere. Ñu agsi, dem ca jàngub Yawut

ya. ¹¹ Waa Bere nag gëna am déggin waa Tesalonig. Ñu gëm kàddu gi, xér ci lool, bés bu nekk ñuy niir Mbind mi, ngir xam ndax la ñu leen di wax noonu la. ¹² Ci kaw loolu Yawut yu bare gëm, ñoom ak jigéeni Gereg ñu ràññiku, ak ay goóri Gereg ñu bare.

¹³ Ba loolu amee Yawuti Tesalonig dégg ne Póol a ngay xamle kàddug Yàlla ca Bere itam. Ñu dikkati, yëngal nit ña, ñu def ay gàngoor. ¹⁴ Ca la bokki gëmkaat ñi yebal Póol ca saa sa, mu jëm tefes ga, Silas ak Timote ñoom, des ca Bere. ¹⁵ Ña dar Póol nag gunge ko ba ca dëkk ba ñuy wax Aten, ñu doora dépp, jottliji Silas ak Timote kàddug Póol, ngir ñu fekksi ko nu mu gëna gaawe.

Póol waare na ca Aten

¹⁶ Diggante ba Póol di nég Silas ak Timote ca Aten, xolam jeex na ndax dafa gis na dëkk ba yeboo ci jaamu ay tuur. ¹⁷ Ci biir loolu muy wax ak Yawut yaak jaamburi ragalkati Yàlla ya ca jàngu ba, di wax it ak waa pénc ma bés bu nekk.

¹⁸ Ci kaw loolu ay boroom xam-xam yu bokk ci ngérum Epikur* ak ngérum Estowisen†, di werante ak moom. Nenn ña ne: «Kebatukat bii, lu muy wax nii?» Ña ca des dégg Póol di waare xibaaru jàmm bi ci Yeesu ak ndekkiteem, ñu ne: «Daa mel ni ay tuur-tuuraani doxandéem lay waareel.» ¹⁹ Ñu jàpp ko nag, yóbbu ko ca éttub àttekaay ba ñuy wax Areyopas. Ñu ne ko: «Ndax man nanoo xam njàngle mu bees mii ngay siawal, lu mu doon? ²⁰ Ndax li ngay wax kat sunu ngan-gi-nopp la. Nu bégga xam nag loolu lu muy tekki.» ²¹ Booba waa Aten ñépp, doxandéem ak njuddu-ji-réew, xintewuñu lenu lu moy di nettali ak a déglu xew-xew yu bees.

²² Ci kaw loolu Póol taxaw ca digg éttub Areyopas, ne leen: «Yeen waa Aten, gis naa ne ci wet gu nekk ñu farlu ngeen ci diine. ²³ Ndax maa doon doxantu, di seet seeni jaamookaay, ba yem ci bu ñu bind mii mbind: “Ñeel yàlla ji nu xamul.” Loolu ngeen di mággal te xamuleen ko nag, moom laa leen di xamal.

²⁴ «Yàlla mi sàkk àddina ak mboolem li ci biiram, di Boroom asamaan ak suuf, dëkkewul màkkaan mu ay loxo sàkk. ²⁵ Te it jariñoowul loxol nit, mbete ku soxla lenu, ndax mooy may ñépp bakkan akug noo, ak lu mu mana doon. ²⁶ Moo sàkke xeeti àddina yépp ci kenn nit, ñu

dëkke dëndu suuf sépp, te moo leen àppal seeni jamono, réddal leen seen kemi dëkkuwaay. ²⁷ Yàllaa def loolu, ngir xeeti àddina wut ko, làmbatu ba daj ko, ndegam man naa am, doonte sorewul kenn ku nekk ci nun. ²⁸ “Ndax sunu bakkan ak sunu yëngu ak sunug nekk, lépp ci moom la.” Mooy ba tey la ñenn ci seeni woykat ne: “Nun itam aw xheetam lanu.” ²⁹ Ndegam nag xeetu Yàlla lanu, warunoo nirule Yàlla ak lenn luy wurus, mbaa xaalis mbaa aw doj te sosoo ci xareñtey nit akum xelam. ³⁰ Yàlla nag jéllale na janti ñàkka xam googa woon, waaye tey mu ngi woo ñépp, ak fépp fu ñu féete, ngir ñu tuub. ³¹ Ndaxte Yàlla jàpp na bés bu muy àttee àddina ci dégg, àtte bu nit ki mu taamu di sottali; te loolu Yàlla jox na ci ñépp firnde lu wóor, ba mu dekkalee kooku mu taamu, ndekkite lu dee toppul.»

³² Naka lañu dégg waxi ndee-ndekki, ñenn ña di ko foontoo, ña ca des ne ko: «Dinanu la déglu, nga waxalaat nu ci moomu mbir.» ³³ Ba loolu amee Póol bàyyikoo ca seen biir. ³⁴ Teewul mu am ñu ko fekksi, ba mujj gëm; Denis mi bokk ci éttub Areyopas ci la, ak jigéen ju ñuy wax Damaris, ak ñineen.

18

Póol tiñ na waa Korent

¹ Ba loolu wéyee Póol bàyyikoo Aten, dem Korent. ² Mu daje fa ak Yawut bu ñuy wax Akilas, fekk baax diiwaanu Pont. Muy sooga jóge réewum Itali, ànd ak soxnaam Pirsil, ndax Buur bu mag ba Kélódd moo joxe woon ndigal ne na Yawut yépp génn Room. ³ Póol nag miinante ak ñoom, te fekk ñu bokk benn liggéey, di defarkati xayma ni moom. Loolu tax mu far dal ak ñoom, di liggéey.

⁴ Ci kaw loolu bésub Noflaay bu nekk Póol di waare ca jàngu ba, di yee Yawut yi ak Gereg yi. ⁵ Ba Silas ak Timote dikkee, bàyyikoo diiwaanu Maseduwan, Póol xintewootul lu moy di xamle kàddu gi, di seereel Yawut yi ne Yeesu mooy Almasi. ⁶ Yawut ya nag gántal, di ko ñaññ, mu yëlëb ay yéreem, misaale ko ne jaanam wàcc na. Mu ne leen: «Yeenay gàddu seen bakkanu bopp. Man set naa ci wecc. Gannaaw-si-tey, ci jaambur ñi dul Yawut laa jëm.»

⁷ Mu jóge foofa, dem kër jaamburub jaamukatu Yàlla bu ñuy wax Tisyus Yustus, te kërám sésook jàngu ba. ⁸ Teewul Kirispus njiitu jàngu ba moom, gëm Sang bi, mook

* **17:18** 17.18 Ngérum Epikur mooy kurélu njànglem Epikur, mi dee 270 at lu jiitu Almasi. Ngérum Epikur dañoo jiital seen bakkan, te fonk bânneex. † **17:18** 17.18 Ngérum Estowisen kurélu la woon, gu njànglem Senon lal. Dee na 265 at lu jiitu Almasi. Ngérum Estowisen ñoo weesale seen bopp yég-yégu yaram mbaa xol yu mel ni bânneex mbaa naqar, te di ñaaxe ci muñ gu ànd ak pastéefu boroom.

waa këràm gépp. Ñu bare ci waa Korent a gëm, gannaaw ba ñu déggee kàddu gi, ba ñu sóob leen ci ndox.

⁹ Ba loolu amee Sang bi wax ak Póol ag guddi ci biir peeñu, ne ko: «Bul tiit dara, waaye waxal te bul noppi, ¹⁰ ndax maa ànd ak yaw, kenn du la song, def la lu bon, ndax xeet wu yaa laa am ci dëkk bii.» ¹¹ At ak juróom benni weer la Póol toog ci seen biir, di jàngle kàddug Yàlla.

¹² Jant ya Galyon moomee diiwaanu Akayi, Yawut ya dañoo mànkoo, jógal Póol, jàpp ko, yóbbu ca àttekaay ba. ¹³ Ñu ne: «Kii dafa juuyoo ak yoon ci ni muy xiire nit ñi ci jaamu Yàlla.»

¹⁴ Póol dem bay àddu, far Galyon ne Yawut ya: «Yeen Yawut yi, su doon ag njubadi mbaa jëf ju aay lool ju ngeen di tawat, kon xel dina nangu ma déglu leen. ¹⁵ Waaye su dee ag dëngoo ci wàllu wax, mbaa ay turi nit, mbaa seen yoonu bopp nag, seetal-leen ko seen bopp. Àtte loolu moom, duma ko nangu.» ¹⁶ Galyon daldi leen dàqe ca àttekaay ba. ¹⁷ Ci kaw loolu ñépp jàpp Sosten, njiitu jàngu ba, dóor ko ca àttekaay ba, te taxul Galyon yégal ko yaramam.

Póol délsi na Àncos gu Siri

¹⁸ Ba loolu wéyee Póol toogaat na fa fan yu bare, doora tàggtoo ak bokk ya, dugg gaal jëm Siri, ànd ak Pirsil ak Akilas. Fekk na mu watu nel ca teerub Señsere, firndeele ko aw xas wu mu xasoon.

¹⁹ Ba ñu teeree Efes, fa la Póol bàyyi Pirsil ak Akilas. Mu dem ca jàngu ba, ba diisoo fa ak Yawut ya. ²⁰ Ñooñu ñaan ko, mu toogaat fa ab diir, mu gantal. ²¹ Naka la tàggtoo ak ñoom, ne leen: «Dinaa leen seetsiwaat, bu soobee Yàlla.» Ba loolu amee mu dugg gaal, bàyyikoo Efes, ²² teereji Sesare. Mu dem nag Yerusalem, nuyuji mbooloom gëmkat ña, doora dem Àncos gu Siri.

Póol tukki na ñetteel bi yoonam

²³ Póol toog na Àncos ay fan, jóge fa wër diiwaanu Galasi, teg ca Firisí, di ñaax mbooloom taalibey foofa.

²⁴ Ab Yawut nag bu ñuy wax Apolos te cosaanoo Alesándiri, moo dikoon Efes. Ku rafet kàddu, te xam Mbind mi lool. ²⁵ Kooku jotoon naa jàng yoonu Sang bi. Mu ànd ak cawarte, di waare ak a jàngle lu wër péñj ci mbirum Yeesu, doonte xam-xamam a ngi yemooon ci sóobeb Yaxya ci ndox. ²⁶ Mu tàmbalee waxe kóolute ca jàngu ba. Pirsil ak Akilas dégg ko, woo ko cig wet. Ñu daldi koy gëna leeralal yoonu Yàlla wi.

²⁷ Ba mu ko defee Apolos namma jáll ba Akayi, bokk ya rafetlu mébétam. Ñu bind taalibey Akayi, ngir ñu dalal ko. Ba Apolos agsee Akayi, dimbali na lool ña fa yiw may ñu doon ay gëmkat. ²⁸ Ndax fa kanam mbooloo ma la doon tiññale Yawut ya ay firnde yu mat sëkk, firil leen Mbind mi, ba leeralal leen nàññ ne Yeesu mooy Almasi.

19

Póol jàngle na ca Efes

¹ Diir ba Apolos nekkee Korent, Póol a nga jaare ca diiwaan yu tunde ya, ba wàccsi Efes. Mu daje faakay taalibe, ² ne leen: «Ndax ba ngeen gëmee, jot ngeen ci Noo gu Sell gi?» Ñu ne ko: «Nun de yégunu woon sax ne Noo gu Sell gi am na.» ³ Mu ne leen: «Kon gan sóobu ngeen sóobu?» Ñu ne ko: «Xanaa sóobeb Yaxya *.» ⁴ Póol ne leen: «Yaxya, sóobeb tuubeel la daan sóobe ci ndox, di waxaale askan wi ne leen ñu gëm kiy topp ci moom, te mooy Yeesu.» ⁵ Ba ñu déggee loolu lañu sóobu ci ndox ci turu Sang Yeesu. ⁶ Ba leen Póol tegee loxoom, Noo gu Sell gi dikkal leen, ñu tàmbalee làkk yeneen làkk, boole ci di biral waxyu. ⁷ Taalibe yooyu yépp a ngi wara tollu ci fukk ak ñaar.

⁸ Ci kaw loolu Póol dem ca jàngu ba, diiru ñetti weer muy waaree aw fit, di waxal waa jàngu ba kàddu yu mata gëm ci mbirum nguurug Yàlla. ⁹ Ñenn ña nag té ticc, baña gëm, di nàññ Yoon wi ca kanam mbooloo ma. Ba loolu amee Póol bàyyi leen, daldi berook taalibe ya, bés bu nekk muy diisoo ak ñoom ca kërug jàngukaay gu Tiranus. ¹⁰ Loolu moo wéy diiru ñaari at, ba mbooloom waa diiwaanu Asi dégg kàddug Sang bi, muy Yawut, di Gereg.

Waa Efes waaru nañu

¹¹ Ba mu ko defee Yàlla di def ay kéemaan yu mag yu mu sottale loxoy Póol. ¹² Mujj na sax ñuy yóbbul jarag yi ay kaala aki taraxlaay yu laaloon yaramu Póol, ba lu leen daloon teqlikook ñoom, rab wu leen jàppoon, ba leen.

¹³ Ci kaw loolu ay Yawut yuy wër di faj ku rab jàpp, tàmbalee roy, di tuddal ñi rab jàpp turu Sang Yeesu, naan rab yi: «Maa la dàq ci turu Yeesu, mi Póol di xamle.» ¹⁴ Ña doon def jëf jooju ñooy juróom ñaari doom yu góor yu Sewa, sarxalkatub Yawut bu mag. ¹⁵ Loolu lañu doon jéem bés, rab wu bon wa ne leen: «Yeesu déy, xam naa ko. Póol it xam naa ko. Waaye yeen, yeenay ñan?» ¹⁶ Ci kaw loolu nit ka rab jàpp song leen, teg leen loxo ñoom ñépp, pamti-pamtee leen, gaañ leen, ba ñu dawé kër ga yaramu neen.

* 19:3 19.3 Seetal ci Màrk 1.4.

¹⁷ Mboolem Yawut yaak Gereg ya dëkke Efes nag yég mbir moomu, tiitaange dikkal leen ñoom ñépp, daraja ju réy doxe ca ñeel turu Sang Yeesu. ¹⁸ Ba mu ko defee ñu bare ca gëmkat ña dikk, biral seenug tooñ, daldi xamle yu bon ya ñu daan jéfe. ¹⁹ Ci biir loolu ñu bare ñu daan ñeengo, boole seeni téere, indi, lakk ko fa kanam ñépp. Ba ñu xaymaa njég la, tolloo naak juróom fukki junnii poseti daraxma (50 000).

²⁰ Noonu la kàddu gi lawe ba féete kaw ci kàttanu Boroom bi.

Efes yèngu na

²¹ Gannaaw ba loolu wéyee, Póol ci ndigalal Noo gu Sell gi am mébéturn jaare diiwaani Maseduwan ak Akayi, teg ca Yerusalem. Mu ne: «Gannaaw bu ma ággee foofu, war namaa jáll ba Room itam.» ²² Mu daldi yebal fa Maseduwan, ñaari jaraafam, Timote ak Eràst, moom mu toogaat ab diir ca Asi.

²³ Jant yooyu nag yemook yèngu-yèngu bu réy bu amoon ci mbirum Yoon wi. ²⁴ Ku ñuy wax Demetirus, ab téggu xaalís, moo daan defar jëmme jaamookaay yu ndaw yu tuur mi ñu dippee Artemis, muy njariñ lu réy ci liggéeykat yiy nawleem. ²⁵ Mu woo leen, ñook ña farewool liggéey yu ni mel, ne leen: «Bokk yi, xam ngeen ne liggéey bii, ci la sunu teraanga nekk. ²⁶ Yeena gis nag mbaa ngeen déggal seen bopp ni Póol moomu di naxee ba fàbbi mbooloo mu bare, te du ci Efes gii rekk, daanaka Asi gépp la: Mu naay: “Yàlla yu loxol nit sàkk du yàlla.” ²⁷ Loolu, jéllale naa ni mu mana gakkale sunu liggéey bii, waaye dina tax ñu teddadil jaamookaayu Artemis, yàlla ju jigéen ju mag ji, ba darajaam mujj neen, moom mi mboolem Asi ak àddina sax di jaamu.»

²⁸ Mbooloo ma dégg kàddu yooyu, daldi mer lool, di xaacu naan: «Artemis mu Efes mág na!» ²⁹ Ci kaw loolu dëkk bépp ne kër-kër, ne képp. Ñu jàpp Gayus ak Aristàrk, waa Maseduwan ya àndoon ak Póol ca tukki ba. Ñu daldi riirandoo wuti èttu jonantekaay ba. ³⁰ Póol nag bëgga teewi ca kanam mbooloo ma, taalibe ya bañ. ³¹ Ñenn ñay ay soppeem ca kàngami nguur ga sax, yónnee nañu ca moom, di ko àrtu ngir mu baña foye bakkanam, di dem ca èttu jonantekaay ba. ³² Ndajee maa nga rëb lool, ñii xaacu ne lii, ñee xaacu, ne lee, te ña ca èpp sax xamuñu lu waral ndaje ma. ³³ Ci kaw loolu mbooloo ma am lu ñu digal ku ñuy wax Alesgàndar, Yawut ya jañax ko ca kanam, mu daldi tàllal loxoom, ngir layool boppam ca digg mbooloo ma. ³⁴ Naka lañu xam ne ab Yawut la, kàddu

ga di benn, jibe ca mbooloo mépp, diiru ñaari waxtu. Ñu naan: «Artemis mu Efes mág na!»

³⁵ Ndawal buur la nag mujj giifal mbooloo ma, ne leen: «Yeen waa Efes, ana moos ku xamul ne Efes gii mooy dëkk biy wattukatub jaamookaayu Artemis, ak jëmman ji wàcce asamaan? ³⁶ Loolu maneesu koo weddi. Kon nag, dangeena wara teey, baña sañaxuy def lenn. ³⁷ Ndax nit ñii ngeen fi indi, teddadiluñu ay jaamookaay te waxuñu lu ñàkke sunu yàlla kersa. ³⁸ Su dee Demetirus ak liggéeykat yi ànd ak moom ñoo jote ak kenn ci ñoom, ay ètti layoo am na fi, ay kàngam a ngi fi di àtte. Nañu fa layooji. ³⁹ Su dee leneen lu ngeen di sàkku nag, ca ndajem àtte ba lees koy lijjantee. ⁴⁰ Ndax kat repp nanu ñu jiñ nu ag fippu, te amul lenn lu nu mana lay, ba lewal mii ndaje.» Naka la wax loolu, daldi tas mbooloo ma.

20

Póol jaare na Maseduwan ak Geres

¹ Ba yèngu-yèngu ba jeexee, Póol daa woo taalibe ya, ñaax leen, ba noppi tàggtoo ak ñoom, jóge fa, dellu diiwaanu Maseduwan. ² Ba loolu amee mu wër gox yooyu, ñaaxe gëmkat ña kàddu yu takku, doora dem réewum Geres. ³ Mu toog fa ñetti weer. Gannaaw gi muy waaja dugg gaal jëm Siri, far pexe mu ko Yawut ya lalal feeñ, mu fomm, nara dellu jaareji Maseduwan. ⁴ Ña àndoon ak moom ñoo di Sopater doomu Pirus ma cosaanoo Bere, ak Aristàrk ak Segond, waa Tesalonig ya, ak Gayus, ma dëkke Derbe, ak Timote, ak waa diiwaanu Asi ya, Tisig ak Torofim. ⁵ Ñooñu ñoo jiitu, di nu nég ca dëkk ba ñuy wax Torowas. ⁶ Nun nag ba mággalu Yawut, ga ñuy wax Mburu mu amul lawiir weesee lanu dugga gaal fa dëkk ba ñuy wax Filipi, am juróomi fan ca yoon wa, door leena feeksi ca Torowas, toog fa juróom ñaari fan.

Póol dekkal na nit ca Torowas

⁷ Ca ndoortel ayu bés ba, naka lanu daje ngir dagg mburum bokkoo mi*, Póol, yékkati kàddu, di wax ak gëmkat ñi, ndax fekk na mu bëggoona dem ca èllég sa. Wax ja nag law ba guddi ga xaaj. ⁸ Ay lãmp yu baree nga woon ca néegu kaw taax ma ñu daje woon. ⁹ Ci biir loolu ab xale bu góor bu ñuy wax Ètikus ma nga tooge kéméju palanteer ba. Ngëmment dab ko, te kàddug Póol ga yàgg lool. Ay nelaw nag jàpp waa ji, mu xàwwikoo ca ñetteelu

* **20:7** 20.7 Dagg mburu: moom la gëmkat ñi aadawoo woon, bu ñuy lekk. Dagg mburu, moom lañu mujj di wooye Reeru Sang bi.

taax ma, daanu, ñu yékkati ko, fekk mu dee.

¹⁰ Ba loolu amee Póol wàcc, tiim ko, daldi koy téye ci diggante ñaari loxoom, ne leen: «Buleen jaaxle, mu ngi dund.» ¹¹ Mu yéegaat, dagg mburu ma, lekk. Waxaat na lu yàgg, ba ñjël jot, mu sooga dem. ¹² Xalelu góor ba moom, nit ñaa ko yóbbu, muy dund, seen xel doora dal bu baax.

Póol tàggtoo naak gëmcati Efes

¹³ Nun nag nu jiiuji, dugg gaal jëm Asos, fa nu nara yebe Póol, na mu ko mébéte woon, ndax Póol ci boppam moo xalaatoona jaare ci yoonu suuf si ba fekkisi nu fa. ¹⁴ Ba mu nu fekksee ca Asos, nu yeb ko, daldi dem Mitilen. ¹⁵ Nu jóge fa, tẽmb ba agsi ca ẽllẽg sa fa janook dunu Kiyos, bés ba ca topp, nu àgg Samos, bés ba ca toppaat, nu àgg Mile. ¹⁶ Ndax Póol daa fason yéenev teggi Efes, ngir baña yàgg diiwaanu Asi; booba day gaawtu, ngir màggalu Pàntakot man koo fekk Yerusalem.

¹⁷ Fa Mile la Póol yónnee ca Efes, woolu magi gëmkat ñi. ¹⁸ Ba ñu dikkee, mu ne leen:

«Yeen ci seen bopp xam ngeen bu baax, ca bés ba ma jékkee teg sama tãnk Asi, ba tey jii, ni ma masa doxale ak yeen, ¹⁹ di jaamoo Boroom bi ag woyof gu mat sèkk, ci biiri rongooñ ak nattu yu ma pexey Yawut yi teg. ²⁰ Te amul lenn lu leen di jariiñ, lu ma leen nẽbb, bañ leen koo xamal; jàngal naa leen ci mbeddum buur ak ci biir kër yi. ²¹ Dẽnk naa Yawut yi ak Gereg yi ne leen, ñu tuub ci Yàlla te gëm sunu Sang Yeosu.

²² «Léegi maa ngii ci curgag Noo gu Sell gi, di dem Yerusalem, lu ma fay dal sax, xawma ci dara, ²³ lu moy li ma Noo gu Sell giy seereel ci dèkkoo dèkk, ne ma ay jéng aki coono moo may nég. ²⁴ Waaye sama bakkan soxalu ma, xanaa ma bey samaw sas, ba sottal liggéey, bi ma Sang Yeosu dẽnk, te mooy seedeel xibaaru jàmm bu yiwu Yàlla wi.

²⁵ «Léegi nag xam naa ne mboolem yeen ñi ma duggoon ci seen biir, di yégle nguurug Yàlla, dootuleen ma gis. ²⁶ Moo ma tax di seere bésuub tey, ne wàccoo naak ñépp, deesu ma topp benn bakkan. ²⁷ Ndax mboolem li Yàlla nar bañuma leen cee xamal lenn. ²⁸ Wattuleen nag seen bopp, wattu mboolem gétt, gi leen Noo gu Sell gi sàmmlou, te ngeen foral mbooloom gëmcati Yàlla, mi Yàlla jote deretu boppam. ²⁹ Man nag xam naa ne gannaaw bu ma demee, ay bukki yu ñàng dinaña tàbbi ci seen biir te duñu ñéebli

gétt gi. ³⁰ Ci seen biir sax la aw nit di jóge taxaw, di wax ndéngte, ngir xiirtal taalibe yi, ba ñu topp leen. ³¹ Teewluleen nag te fàttliku ne diiru ñetti at, guddi ak béccég, masumaa noppee àrtu kenn ku nekk ci yeen, bay jooy sax.

³² «Léegi nag, dẽnk naa leen Yàlla ak kàddug yiwam, gi leen mana dooleel, dencal leen seen muur ci biir mboolem nit ñi ñu sellal. ³³ Du lenn lu ma xemmem ci kenn; du xalis, du wurus du koddaay. ³⁴ Yeen ci seen bopp, xam ngeen ne, muy sama soxlay bopp, di yoy ñi ànd ak man, sama loxo yii laa liggéeye lu ma ko faje. ³⁵ Nu nekk laa leen wone ne sunu wartéef mooy nu liggéeye noonu bu baax, ngir dimbali néew-doole yi, tey fàttliku kàddug Sang Yeosu, ga mu noon: “Nangu, joxee ko èpp barke.”»

³⁶ Naka la wax loolu, daldi sukkandoo ak ñoom ñépp, ñaan. ³⁷ Ba loolu amee ñépp jooyoo jooy yu metti, laxasu ko, foon ko. ³⁸ La leen yokk aw tiis nag mooy kàddu ga mu leen wax, ne leen: «Dootuleen ma gis.» Ba mu ko defee, ñu gunge ko ba ca gaal ga.

21

Póol jublu na Yerusalem

¹ Gannaaw ba nu tàggtoo ak ñoom, nu dugg gaal, jubal dunu Kos, teg ca teeri ca dunu Rodd, jóge fa, jàll ba Patara. ² Nu gis fa gaal gu jëm Fenisi, dugg ca, daldi teddi. ³ Naka lanu dem ba seen dunu Sippar, wacc ko nag sunu wetu càmmoñ, jublu diiwaanu Siri, ba teeri Tir, ndax fa la gaal gi waroona yebbi ab yebam. ⁴ Nu seet taalibey foofa, ba gis leen, toog ak ñoom juróom ñaari fan. Ci biir loolu Noo gu Sell gi di leen xiir ci wax Póol, ne ko bumu dem Yerusalem. ⁵ Ba nu fa amee fan yooyu lanu fa bàyyikoo, dem, ñu gunge nu, ñoom ñépp, ñook seeni soxna ak seeni doom. Nu dem ba génn dèkk ba, daldi sukk ca tefes ga, ñaan. ⁶ Ba loolu amee nu tàggtoo ba noppi, dugg ca gaal ga, ñoom ñu ñibbi.

⁷ Nun nag ba nu jógee Tir, danoo ñoqli ba teeri Patolemaysi. Nu nuoyo faak bokki taalibe ya, toog faak ñoom benn fan. ⁸ Ca ẽllẽg sa nu dem ba àgg Sesare. Nu dem kër Filib, xamlekatu xibaaru jàmm, bi bokk ci Juróom ñaar ñi*. Nu dal ak moom. ⁹ Filib moomu amoon na ñeenti doomi janq yuy waxe ay waxyu.

¹⁰ Gannaaw ba nu fa toogee ay fan, ab yonent bu ñuy wax Agabus jóge Yude, agsi. ¹¹ Mu dikk ba ci nun, jël ngañaayal Póol, yeewe ko ay tãnkam aki loxoom, daldi ne: «Noo gu Sell gi dafa wax ne: “Ki moom

* 21:8 21.8 Juróom ñaar ña ñooy ñi doon séddale ndimbalu mbooloom gëmkat ña ca Yerusalem. Seetal ci 6.5.

ngañaay lii, nii la ko Yawut yiy yeewe ca Yerusalem, jébbal ko jaambur ñi dul Yawut.»

¹² Ba nu déggee loolu, nun ak waa gox baa tinu Póol, ne ko bumu dem Yerusalem. ¹³ Ci kaw loolu Póol ne: «Lu ngeen di def nii, di jeexal sama xol? Waxuma ñu yeew ma rekk, waaye dee sax nangu naa koo def ci Yerusalem ngir Sang Yeesu.» ¹⁴ Naka lanu wax, wax, mu të, nu bàyyi, daldi ne: «Kon nag yal na Boroom bi sottal coobareem!»

¹⁵ Gannaaw fan yooyu lanu fabu, ngir dem Yerusalem. ¹⁶ Ci biir loolu ay taalibe yu dëkke Sesare ànd ak nun, yóbbu nu fa nu wara dali, ca kër ku ñuy wax Manason, ma cosaano Sippa, te di taalibe bu yágg.

Póol agsi na Yerusalem

¹⁷ Ba nu agsee Yerusalem nag, bokki taalibe ya bége nañu noo dalal. ¹⁸ Ca èllég sa Póol ànd ak nun, seeti Yanqóoba, fekk mag ñépp a nga fa teew. ¹⁹ Póol nuyook ñoom, ba noppi benn-bennalal leen jêf, ji Yàlla sottale liggéeyam ci biir jaambur ñi.

²⁰ Ñu dégg ca, daldi sàbbaal Yàlla, ba noppi ne ko: «Mbokk mi, xoolal ñaata junniy Yawut a doon ay gëmkat, te ñoom ñépp di ñu xér ci yoonu Musaa. ²¹ Ñoo dégg nag sab jêw, ñu ne dëddu yoonu Musaa mooy li ngay jàngal mboolem Yawut yi dëkk ci biir jaambur ñi, naan leen buñu xarfal seeni doom, te buñu topp sunuy aada. ²² Lu ciy pexe nag? Ndax kat duñu umple ne dikk nga. ²³ Léegi daal, dangay def li nu lay wax nii: nu ngi feek ñeenti nit ñu am lu ñu xasal Yàlla. ²⁴ Ñoom ngay àndal, nga bokk ak ñoom setlu, te nga gàddu seen peyu wateefu bopp, wi boroom xas wu ni mel aadawoo. Su ko defee ñépp ay xam ne li ñu lay jêwe, dara amu ci, te yoonu Musaa ngay jêfe, di ko sàmm. ²⁵ Naka gëmkat ñi dul Yawut nag, bind nanu leen li nu dogal, ne leen ñu moytu ñam wu ñu sarxal ay xërëm, moytoo lekk deret ak yàppu mala mu ñu tuurul deretam, te moytu powum séy.»

²⁶ Ca èllég sa Póol ànd ak nit ña, bokk ak ñoom setlu, dugg ca kër Yàlla ga. Mu daldi xamle bés ba seen àppu setlu di mat, ba jooxe ba ci war génn, ñeel kenn ku nekk ci ñoom.

Jàpp nañu Póol

²⁷ Ba àppu juróom ñaari fan yay waaja jeex, Yawut ya jóge diiwaanu Asi gis Póol ca kër Yàlla ga. Ñu yéngal mbooloo mépp, jàpp ko, ²⁸ di xaacu naan: «Wallee, bokki Israyil! Waa jii, mooy kiy wër fépp, di waare ñépp kàddu gu safaanook njarifaal xeet wi, ak yoonu Musaa ak bérab bii. Rax ci dolli mu indi ci kër Yàlla gi ay Gereg, ba

sobeel bérab bu sell bii.» ²⁹ Booba Torofim mu Efes la ñu gisoon ca dëkk ba, mu ànd ak Póol, ñu yaakaar ne Póol da koo yóbbu ca kër Yàlla ga. ³⁰ Ba loolu amee dëkk ba bépp mább, nit ña ne kër-kër, ne këpp, ñu jàpp Póol, génne ko kër Yàlla ga rekk, daldi tëj bunt ya.

³¹ Naka lañu koy wuta rey, ñu àgge njiital gàngooru Room ba yore kilifteef ga, ne ko Yerusalem gépp salfaañoo na. ³² Ca saa sa mu ànd ak ay dag, ak njiiti takk-der, ne jaas ca biir mbooloo ma. Yawut ya nag gis njiital gàngoor ga ak dag ya, daldi dakkal yar ya ñu doon dóor Póol.

³³ Ci kaw loolu njiit la agsi, jàpp ko, daldi santaane ñu jéngé ko ñaari càllala. Ba loolu wéyee mu laajte, ne: «Kii ku mu doon, ak lu mu def?» ³⁴ Ñenn ca mbooloo ma xaacu ne lii, ña ca des ne laa. Nólñol ja nag tax manu caa xam dara lu leer. Mu daldi santaane, ñu yóbbu ko ca biir tata ja. ³⁵ Ba Póol àgge ca dëggastali tata ja, mbooloo ma daa sànju ak doole, ba takk-der ya mujj fab Póol, gàddu ko. ³⁶ Ndax booba mbooloo mu réy a ko topp, di xaacu naa: «Na dee!»

Póol layoo na ak Yerusalem

³⁷ Naka lañu koy waaja dugal ca tata ja, Póol ne njiitu gàngoor ga: «Ndax man naa laa wax baat?» Mu ne ko: «Ndeke dégg nga gereg?» ³⁸ Kon du yaay waayu Misra jooju yéngaloon dëkk bi ci fan yii, te yóbbu woon ñeenti junniy Bóomkat ya (4 000 ca màndij ma?) ³⁹ Póol ne ko: «Man de ab Yawut laa, di as goru Tàrs, dëkk bu ñàkkul tur ba ca diiwaanu Silisi. Dama lay ñaan, nga may ma, ma wax ak mbooloo mi.» ⁴⁰ Mu may ko. Póol taxaw ca dëggastal ya, tàllal mbooloo ma loxo, ñu ne selaw. Mu wax ak ñoom ci yawut, ne:

22

¹ «Yeen bokk yi, yeen samay baay, dégluleen léegi li ma leen di wax.» ² Ba ñu déggee yawut ya muy waxe ak ñoom, ñu gën ne xerem.

Póol ne leen: ³ «Man ab Yawut laa, juddoo Tàrs ca diiwaanu Silisi, yaroo ci dëkk bii. Ci keppaaru Gamalyel laa jàngé, njàng mu dëppoo bu mat sékk ak sunu yoonu maam. Ma doonoon ku xér ci Yàlla ni mboolem yeen ñii tey. ⁴ Yoon wii tey, daan naa fitnaal ñi ko gëm ba sabab seenu dee. Yeew naa góor, yeew jigéen, tëjlu leen kaso. ⁵ Sarxalkat bu mag bi, ak mboolem kurélu mag ñi man nañu ma cee seede. Ci ñoom sax laa nangoo woon bataaxal bu jëm ca bokki Yawut ya ca Damaas, ga ma jëmnoon, ngir yeewe fa

gëmkati Yoon wii nekkoon foofa, ba indi leen Yerusalem, ngir ñu mbugal leen.

⁶ «Yàlla def ma topp yoon wa, ba jub Damaas ci digg bëccëg rekk, ag melax gu mag jekki fettaxe asamaan, ne ràyy fi ma wër. ⁷ Ma ne dàll fi suuf, daldi dégg baat bu ma ne: “Sóol, Sóol, lu tax nga di ma bundxatal?” ⁸ Ma ne ko: “Sang bi, yaa di kan?” Mu ne ma: “Man maay Yeesum Nasaret, mi ngay bundxatal.” ⁹ Ni ma àndaloon gis nañu leer gi, waaye ki wax ak man, xamuñu li mu wax. ¹⁰ Ma ne ko: “Sang bi, nu may def?” Sang bi ne ma: “Jógal dem Damaas, dees na la wax foofa mboolem li ñu la sas, nga def ko.” ¹¹ Gisatuma woon dara ndax leeraayu melax ga; ña ma àndal ñoo ma mujj wommat, ba ma agsi Damaas.

¹² «Ku ñuy wax Anañas nag ma nga woon ca Damaas. Ku am diiney yoonu Musaa te rafetub jëw ci biir mboolem Yawuti dékk ba. ¹³ Mu dikk taxaw fi sama wet, ne ma: “Mbokk mi Sóol, gisal na woon.” Ca saa sa, may gis na woon, di ko xool. ¹⁴ Mu ne ma: “Sunu Yállay maam moo la dencal cérú ràññee coobareem, ak gis Aji Jub ji, dégg ko, muy wax ak yaw. ¹⁵ Ndax li nga gis, dégg ko, yaa koy seedeel nit ñëpp. ¹⁶ Léegi nag, looy nég? Jógal, ñu sóob la ci ndox, nga set, teqlikook say bákkaar, te tudd turu Yeesu.”

¹⁷ «Yàlla def, gannaaw ba ma délsee Yerusalem, ma doon ñaan ca kër Yàlla ga, daldi daanu leer. ¹⁸ Ma gis Sang bi, mu ne ma: “Gaawal, daw génn Yerusalem, li nga may seedeel, duñu ko nangu.” ¹⁹ Ma ne ko: “Sang bi, ñoom ci seen bopp xam nañu ne jàngu ci kaw jàngu, maa fa daan tëjlu ak a cawlu ñi la gëm. ²⁰ Te it ba ñuy tuur deretu Eccen, sa seede ba, man it maa nga fa woon, juboo caak ñoom, te ña ko rey, maa leen doon wattul seeni yére.” ²¹ Mu ne ma: “Demal, man, fu sore laa lay yebal ca ña dul Yawut.”»

Póol as goru Room la

²² Ba ba muy wax loolu, mbooloo maa nga koy déglu. Ba ñu déggee kàddu yooyu lañu xaacu ne: «Jëleleen ko ci kaw suuf! Ku mel ni kii yeyoowula dundi!» ²³ Na ngay yuuxoo, di sànni seeni yére, tibb suuf, callmeeru. ²⁴ Ci kaw loolu njiitu gàngoor ga santaane, ñu dugal Póol ca tata ja te laaje ko ay yar, ngir xam lu waral ñu di ko yuuxoo noonu. ²⁵ Naka lañu ko yeew ngir dóor ko ay kacciri, mu ne njiitu takk-der ba fa taxaw: «As goru Room bu yoon dabul, mbaa am nga sañ-sañu dóorlu ko?»

²⁶ Njiitu takk-der ba dégg loolu, daldi dem ba ca njiital gàngoor ga, xamal ko ko, ne ko: «Li ngay def nag? Nit kii as goru Room la!» ²⁷ Njiital gàngoor ga dikk, ne

Póol: «Yaw wax ma, ndax as goru Room nga?» Mu ne: «Waaw.» ²⁸ Mu ne ko: «Man de xaalis bu bare laa jënde sañ-sañu doon as goru Room.» Mu ne ko: «Man nag moom laa judduwaale.» ²⁹ Na ko doon waaja laaje ay dóor nag dànd ko ca saa sa. Njiital gàngoor ga it tiit na, ba mu yégee ne Póol as goru Room la, te fekk mu yeewlu ko.

Póol taxaw na ca kurélu àttekati Yawut ya

³⁰ Ca èllëg sa nag njiital gàngoor ga bëgga am lu ko leer naññ ca la Yawut ya jiiñ Póol. Mu yiwi ko, woolu sarxalkat yu mag ya, ak mboolem kurélu àttekat ya. Ci kaw loolu mu indi Póol, taxawal ko ci seen kanam.

23

¹ Ba loolu amee Póol xool jàkk waa kurél ga, ne leen: «Bokk yi, man de xel mu dala dal laa masa jéfe fi kanam Yàlla, ba bésut tey jii.» ² Anañas sarxalkat bu mag ba nag sant ña taxaw ca wetu Póol, ne leen: «Fél-leen gémmifam.» ³ Póol ne ko: «Fél la yaw, moom la Yàlla di waaj, jinigalkat bee, mbete miir bu ñu weexal! Yaa ngi toog, topp yoon, di ma àtte, te teewul nga xëtt yoon, di ma dóorlu!» ⁴ Waa géew ba ne ko: «Sarxalkatub Yàlla bu mag bi ngay xas nag?» ⁵ Póol ne leen: «Bokk yi, xawma woon ne mooy sarxalkat bu mag bi, ndax bindees na ne: “Sa kilifag askan, bu ko wax naka-su-dul-noonu.”»

⁶ Fekk na Póol xam ne lenn ca kurél gaa nga bokk ca ngérum Sadusen ya, ña ca des bokk ca ngérum Farisen ya. Mu daldi àddu ca kaw ca biir géew ba, ne: «Bokk yi, man de ab Farisen laa, di doom Farisen; li ñu may àttee nag mooy sunu yaakaar ak sunu ngëm gi nu bokk ci mbirum ndee-ndekki.» ⁷ Naka la wax loolu Farisen yaak Sadusen ya tàmbalee werante, ba mbooloo ma xàjjalikoo. ⁸ Ndax Sadusen yi dañu ne ndee-ndekki ak malaaka ak rab, dara amu ci, te Farisen yi ñoom, yooyu yépp lañu déggal.

⁹ Ci kaw loolu coow lu réy jib. Nenn ca firikati yooni làngu Farisen ya, ne bérét, àddook doole, ne: «Gisunu lenn lu bon ci nit kii. Ku xam ndax aw rab a wax ak moom, mbaa malaaka?» ¹⁰ Xuloo ba nag gëna tàng, ba njiital gàngoor ga mujj ragal ñu sèxëtoo Póol, ba def ko ay dog. Mu daldi sant lenn ca xarekat ya ñu wàcc, jële Póol ci biir nit ñi, yóbbu ko ca tata ja. ¹¹ Ca guddi ga Sang bi feeñu Póol, ne ko: «Na sa xel dal. Ni nga ma seedelee ci Yerusalem, noonu nga ma wara seedeleeji ca Room.»

Yawut ya fexeel nañu Póol

¹² Ba bét setee Yawut ya daje, daldi xasoo, ne duñu lekkati, duñu naanati, ba kera ñu reyee Póol. ¹³ Na lal pexe moomu, èpp nañu ñeent fukk. ¹⁴ Ñu dem ca sarxalkat yu mag ya ak mag ña, ne leen: «Danoo giñ ne dunu dugalati dara sunu gëmmiñ, ba kera ñu reyee Póol. ¹⁵ Léegi nag yeen ak kurélu àttekat yi, ñaanleen njiital gàngoor gi, mu indi Póol ba ci yeen, mu mel ni dangeena bégga seetaat bu baax mbiram. Nun nag fagaru nanu, ngir bala moo agsi, nu rey ko.»

¹⁶ Jarbaatub Póol bu góor nag yég tēru ma. Mu daldi dem ba ca tata ja, dugg, yégal ko Póol. ¹⁷ Póol woo kenn ca njiiti takk-der ya, ne ko: «Yóbbul xale bu góor bii ba ci njiital gàngoor gi, ndax am na lu mu ko wara wax.» ¹⁸ Njiital xare ba ànd ak xale ba, yóbbu ko ca njiital gàngoor ga, ne ko: «Póol, mi ñu tēj, moo ma woo, ñaan ma, ma indil la xalelu góor bii, ndax am na lu mu lay wax.»

¹⁹ Ba loolu amee njiital gàngoor gi jàpp ci loxel xalelu góor bi, wéetoo ak moom, ne ko: «Ana loo may xamal?» ²⁰ Mu ne ko: «Yawut yi ñoo mánkoo ci ñaan la, nga yóbbu Póol èllég ca kurélu àttekat ya, mu mel ni dañoo bégga seetaat bu baax mbiram. ²¹ Yaw nag bu leen ko may, ndax lu èpp ñeent fukk ci ñoom a koy tēru, te xasoo nañu ne dootuñu lekk, dootuñu naan, ba kera ñu ko reyee. Fagaru nañu ba noppi, di xaar sa ndigal.» ²² Njiital gàngoor ga daldi koy yiwi, ne ko: «Bul wax kenn ne ko àgge nga ma lii.»

Yóbbu nañu Póol Sesare

²³ Ba mu ko defee mu woo ñaari njiiti takk-der, ne leen: «Waajal-leen ñaar téeméeri xarekat ak juróom ñaar fukki gawar ak ñaar téeméeri boroom xeej, ngir ngeen dem Sesare bu juróom ñeenti waxtu jotee ci guddi. ²⁴ Te itam nangeen waajalal Póol daamar, waral ko, ngir yóbbu kook jàmm ba ca Feligsé, boroom réew mi.» ²⁵ Mu bind nag bataaxal bu ne:

²⁶ Ñeel la yaw boroom réew mi, Feligsé mu tedd mee tedd, bawoo ci man Kélódd Lisiyas, mi lay nuyu. ²⁷ Nit kii la Yawut yi jàppoon, di ko waaja rey, far ma dikk ànd ak lenn ci gàngoor gi, wallu ko, ndax fekk na ma yég ne as goru Room la. ²⁸ Ma béggoona xam nag lan lañu koy sikk, ba tax ma yóbbu woon ko ca seen kurélu àttekat ya. ²⁹ Ma gis nag ne li ñu ko jiiñ, ci seen mbiri yoonu diine rekk la, waaye du lenn lu jar rey, mbaa jéng. ³⁰ Ba ñu ma àggee am tēru mu ko Yawut yi waajaloon nag, ci laa ko yebal ci yaw ci saa si. Jox naa itam

ndigal ñi ko sikk, ne leen ñu wax ci sa kanam, gan tooñ lañu ko toppe.

³¹ Ba loolu amee xarekat ya def la ñu leen digal, yóbbu Póol ci guddi ba ca dèkk ba ñuy wax Antipataris. ³² Ca èllég sa takk-der yay deme tànk waññiku, dèlsi ca tata ja, bàyyi gawar ga, ñu gunge Póol ba mu àgg. ³³ Gawar ga àgg Sesare, daldi jébbal boroom réew ma bataaxal ba, jébbal ko Póol itam. ³⁴ Boroom réew ma jàng bataaxal ba, daldi laaj ci ban diiwaan la Póol bokk, ba xam ne diiwaanu Silisi la bokk. ³⁵ Mu ne ko: «Xaaral ba say tuumaalkat itam dikk, ma déglu la.» Mu santaane nag, ñu denc ko ca kër buur Erodd.

24

Póol layoo na ci kanam boroom réew ma

¹ Ñu teg ca juróomi fan, Anañas sarxalkat bu mag ba dikk, ànd ak ay mag, ak ab layookat bu ñuy wax Tertul. Ñu jébbalsi boroom réew ma, tuuma ja ñu teg Póol. ² Ñu woo Póol, Tertul daldi yékkati kàddug tuuma, ne: «Kilifa gi, ci yaw la jàmm ju yaa ame, te yaa fàgguy ay coppite yu ñeel askan wi. ³ Saa su nekk, ak fépp fu nu tollu lanu raññee loolu, yaw Feligsé mu tedd mi, te di la ko sante lool. ⁴ Gannaaw buggunu laa yeexal nag, rikk baaxeeti nu, déglu nu tuuti. ⁵ Waa jii lanu gis ne ab rambaaj la buy sabab réeroo ci biir Yawuti àddina sépp. Moom mooy njiitu ngér mu sikk mi ñuy wax Nasareen ñi. ⁶⁻⁷ Kër Yàlla ga sax jéem na koo teddadil, noo ko jàpp. ⁸ Yaw ci sa bopp, soo ko laajaatee ci mbir moomu mépp, dinga gis li nu koy jiiñ.» ⁹ Yawut ya itam déggal tuuma ja, ne noonee la mbir ma ame.

¹⁰ Ba loolu amee boroom réew ma jox Póol kàddu gi. Mu ne: «Xam naa ne at yu baree ngii ngay àtte xeet wi. Moo tax ma am cawartey layool sama bopp. ¹¹ Man ngaa leerlu sa bopp ne ba ma demee Yerusalem di màggali ak léegi weeseegul fukki fan ak ñaar. ¹² Te giseesu ma man werante, mbaa may yéngal mbooloo; du ca kër Yàlla ga, du ca jàngu ya, du ca biir dèkk ba. ¹³ Te itam li ñu may jiiñ nii tēy, manuñu cee firndeel. ¹⁴ Lenn de man naa la koo nangul. Yoon woowu ñu ne mooy ngér mu sikk, moom laay topp, di ko jaamoo sunu Yállay maam. Teewul mboolom lu ñu bind ci yoonu Musaa ak téerey yonent yi, gëm naa ko. ¹⁵ Yaakaar ji ma am, mooy yaakaar ji ñu am ñoom itam, ne ñi jub ak ñi jubadi, ñépp ay bokk dekki èllég. ¹⁶ Moo tax fu ma tollu, man

itam, may def lu ma man ngir am xel mu dal, wàccoo ak Yàlla, wàccoo ak nit ñi.

¹⁷ «Samay tànƙ nag, gannaaw gëjeb at yu bare, moo doon indil samaw askan, ay ndimbak ak ay sarax yu ñeel Yàlla. ¹⁸ Ci biir loolu lañu ma fekk ca biir kër Yàlla ga, ma setlu, te du mbooloo, du coow lu ma indaale. ¹⁹ Xanaa ñenn Yawuti diiwaanu Asi ña ma fa fekkoon. Nñoñoo ma waroona tuumaal fi sa kanam, ndegam am nañu lenn lu ñu ma sikke. ²⁰ Mbaa boog, na nit ñii ci seen bopp wax gan ndéngte lañu ma gisal, kerooƙ ba ma taxawee ca kurélu àttekati ya! ²¹ Xanaa genn kàddu ga ma taxawoon ca seen biir, àddu ko ca kaw ne: «Mbirum ndee-ndekki gi ma gëm, moom lañu may àttee ci seen kanam tey!»

²² Booba Feligsë jotoon naa am lu ko leer ci mbirum Yoon wi. Mu yiweegum leen nag, ne leen: «Bu Lisiyas njiital gangoor gi dikkee, dinaa àtte seen mbir.» ²³ Ci kaw loolu mu sant njiitu takk-der ba, ne ko mu may Póol bët, woyofal ko jataayu kasoom te baña aaye ay nitam ñu topptoo ko.

²⁴ Ñu teg ci ay fan, Feligsë dikk, ànd ak soxnaam Dursil, mi dib Yawut. Mu woolu Póol, déglu kàddoom ci ngëm gi sababoo ci Yeesu Almasi. ²⁵ Naka la Póol wax ci mbirum njub, ak moom sa bakkan, ak àtteb bés-pénc, Feligsë daldi tiit, ne ko: «Léegi, man ngaa demagum, bu ma ko talee, dinaa la wooluwaat.» ²⁶ Ci biir loolu Feligsë yaakaar itam ne jombul mu jële xaalisiib neexal ci Póol, ba tax mu woolu ko ay yooni yoon, ngir waxtaan ak moom.

²⁷ Ba ñu ca tegee ñaari at yu mat, ku ñuy wax Porsiyus Festus wuutu Feligsë. Feligsë nag bëggoon lu neex Yawut ya, ba tax mu bayyi Póol ca kaso ba.

25

Póol layoo na ca kanam Festus

¹ Festus nag toogsi diiwaanam ba am fa ñetti fan. Gannaaw loolu mu dem Yerusaleem. ² Sarxalkat yu mag yi, ak njiiti Yawut yi boole ko ak Póol. Ñu dagaan ko, ³ tinu ko ngir mu woolu Póol Yerusaleem, ndax fekk na leen lal pexem rey ko ca yoon wa. ⁴ Festus itam ne leen Póol a nga ñu tēj kaso ca Sesare, te moom ci boppam, fa la nara gaaw, dellu. ⁵ Mu ne leen: «Kon nag, na nit ñu am baat ñu bokk ci yeen, ànd ak man, tuumaali waa ji, ndegam am na fenn fu mu tooñe.»

⁶ Festus toogaatul ak ñoom lu wees juróom ñett ba fukki fan, doora dellu Sesare. Ba mu agsee ba ca èllég sa la toog ca àttekaay ba, joxe ndigal, ñu indi Póol. ⁷ Ba Póol dikkee, Yawut ya jóge Yerusaleem

yéew ko, teg ko tuuma yu bare te réy, te manuñu cee firndeel lenn.

⁸ Ci kaw loolu Póol weddi tuuma yi, ne: «Muy yoonu Yawut yi, di kër Yàlla gi, di Buur bu mag bi Sesaar, tooñuma ci kenn.» ⁹ Festus nag bëgg lu neex Yawut yi, tax mu ne Póol: «Ndax nangu ngaa dem Yerusaleem, ñu àttee la foofa ci mii mbir ci sama kanam?»

¹⁰ Póol itam ne ko: «Maa ngi nii taxaw ci kanam àttekaayu Buur Sesaar; te fii lañu ma wara àttee. Yawut ñi nag, defuma leen dara, te yaw ci sa bopp, wóor na la. ¹¹ Su ma tooñee, su ma defee lenn lu dee di àtteem, tinuwma ngir baña dee. Waaye su lenn amul ci li ma ñii di jiiñ, kenn amul sañ-sañu jébbal ma leen. Buur Sesaar nag laa dénk sama bopp!»

¹² Ci kaw loolu, Festus gise ak waa kurél ga, ba noppi ne ko: «Sesaar nga dénk sa bopp, ca Sesaar nga jëm.»

Festus diisoo na ak buur Àggripa

¹³ Gannaaw ab diir buur Àggripa ànd ak jigéenam Berenis ganesi Sesare, ngir nuysi Festus. ¹⁴ Ba ñu fa amee ab diir, Festus diis Buur Àggripa mbirum Póol, ne ko: «Jenn waay ju ñu tēj kaso la nu Feligsë bàyyee. ¹⁵ Ba ma demee Yerusaleem, moom la ma sarxalkat yu mag yeek njiiti Yawut yi booleeloon, di sàkku ci moom ab daan. ¹⁶ Ma ne leen: «Aaday Room daal nanguwul ñu jébbale nit, ngir ñu rey ko, te jékkula jàkkaarloo ak ñi ko tuumaal, ba mana layal boppam ci mbir mi ñu ko tuumaal.» ¹⁷ Ba ñu dikkee fekk ma fii itam, yàggaluma ci dara, ca èllég sa sax laa toog ca àttekaay ba, daldi joxe ndigal, ñu indi waa ji. ¹⁸ Ba tuumaalkat ya taxawee nag, feeñaluñu jenn tuuma ju bokk ci yu bon, yi ma foogoon, ¹⁹ xanaa seen yenn yéfi diiney bopp yu ñu jubooowul, ak mbirum ku ñuy wax Yeesu mu dee woon, te Póol moomu di dëggal ne mu ngi dund ba tey. ²⁰ Loolu nag jaaxal ma, ba ma laaj ko ndax nangu naa dem Yerusaleem, ñu àttee ko fa ci moomu mbir. ²¹ Póol itam sàkku ñu dencagum ko kaso, tey sàkku ci mbiram, àtteb buur bu tedd bi. Ma daldi joxe ndigal, ngir ñu dencagum ko kaso, ba ma yebal ko ca Sesaar.»

²² Ci kaw loolu Àggripa ne Festus: «Kooku de, man sax bëgg naa koo déglu.» Festus ne ko: «Bu èllégee dinga ko dégg.»

Póol teew na ci kanam Àggripa

²³ Ca èllég sa Àggripa ak Berenis ànd ak topp mu raññiku, duggsi ca èttub àttekaay ba, feggook njiiti gangoor ya, ak kàngami dëkk ba. Festus joxe ndigal, ñu indi Póol.

²⁴ Ba mu dikkee, Festus ne: «Buur Àggripa, yeen mboolem ñi fi bokk ak nun teew, gis ngeen kii, moom la ma askanu Yawut wépp booleel, muy ca Yerusalem ak fii itam, ñuy xaacu naan: «Kii yelloowula dundati.» ²⁵ Man nag damaa gis ne deful dara lu jar àtteb dee. Waaye gannaaw moo dénk boppam buur bu tedd bi, man dogu naa ko koo yónnee. ²⁶ Mbiram nag laa amul dara lu ma wóor, ngir ma bind ko sang bi. Moo tax ma indi ko ci seen kanam, rawatina ci sa kanam, Buur Àggripa, ngir gannaaw bu ñu ko dégloo, ma mana am lu ma bind. ²⁷ Ndaxte jállale ku ñu jàpp te tudduloo tuuma yi ñu koy topp daal, lu juunu la ci man.»

26

Póol layoo na fa kanam Àggripa

¹ Ci kaw loolu Àggripa ne Póol: «Léegi sañ ngaa waxal sa bopp.» Póol nag tállal loxoom, layool boppam, ne:

² «Buur Àggripa, mbégte laa am ndax dinaa layool sama bopp ci sa kanam tey, ngir tontu mboolem lu ma Yawut yi jiiñ. ³ Rawatina ba ma xamee ne ku géēju nga ci aaday Yawut, ak werante yi ci seen wàllu yoon. Kon dama lay ñaan rekk, nga muñal ma, déglu ma.

⁴ «Mboolem fi ma jaare ci samag dund, dale ko ca samag ndaw, ca ndoorte la, ba ma nekkee ca sama biir xeet, ak ca Yerusalem, lépp, mboolem Yawut yi xam nañu ko. ⁵ Xam nañu ma bu yàgg, te su leen neexee ñu seede ne ngérum Farisen mi gëna diis ci sunu diine, ci laa masa bokk. ⁶ Sama taxawaayu tey ci èttub àttekaay bii nag, mooy yaakaar ji ma am ci dige bi Yàlla digoon sunuy maam. ⁷ Te mooy dige bi fukki giir ak ñaar yu bànni Israyil di séentu mu sottil leen, ba tax guddi ak bëccëg ñu xér ci jaamu Yàlla. Yaakaar jooju nag, Buur, moo tax Yawut yi tuumaal ma! ⁸ Ana lu leen taxa jàpp ci seen biir ne xel nanguwul Yàlla di dekkal ñi dee?

⁹ «Man ci sama bopp, gântal lu ma man turu Yeesum Nasaret, sama warugar laa ko defoon. ¹⁰ Def naa ko ci Yerusalem, te it bare na ñu sell ñu ma tējlu ci kaw sañ-sañ bu ma sarxalkat yu mag yi jagleel, te saa yu ñu leen tegaan àtteb dee, dama daan biral kaddu gu leen àtte ñàkkal. ¹¹ Jàngoo jàngu laa leen daan tege mbugal ay yooni yoon, ngir xaccloo leen. Maa daan sànju ba xaabaabal ci seen kaw, topp leen ba ci biir dëkki jaambur yi.

¹² «Yoon wu mel noonu laa doon dox, jëm Damaas, ci ndigalal ak ndénkaanel sarxalkat yu mag yi. ¹³ Ba ma demee ba wetu digg bëccëg, Buur, ca laa gis

ag melax gu leer ba raw jant bi, fettaxe asamaan, ne ràyy fi ma wër, maak ñi ma àndal. ¹⁴ Nu ne dàll fi suuf. Ma dégg baat bu ma wax ci làkku yawut, ne ma: «Sóol, Sóol, lu tax nga di ma bundxatal? Dangay sonal sa bopp rekk, mbete fas wu manula wonjeetu ba wéq dëgël bu koy jam.»

¹⁵ «Ma ne ko: «Sang bi, yaa di kan?» Sang bi ne ma: «Man maay Yeesu, mi ngay bundxatal. ¹⁶ Jógal taxaw nag. Dama laa feeñu ngir def la ngay sama surga, ngir nga di ma seedeel peeñum tey, ak peeñu yi ma lay feeñooji èllég. ¹⁷ Maa lay musal ci askanu bànni Israyil, ak ci jaambur ñi ma lay yebal, ¹⁸ ngir nga xippil leen, jële leen ci lëndëm, tàbbal leen ci leer, seppee leen ci noteelu Seytaane, indi leen ci Yàlla, ñu am njéggalug bàkkaar, am cér ci biir nit ñi ñu sellal ndax ngëm, gi ñu ma gëm.»

¹⁹ «Kon nag buur Àggripa, peeñum asamaan moomu, woruma ko. ²⁰ Waaye li dale Damaas ak Yerusalem ba ci réewum Yawut gépp, ba ca ñi dul Yawut, ñoom ñépp yégal naa leen seen wartéef, muy tuubeel ak waññiku ci Yàlla, ak jéf ju tuubeel yellool. ²¹ Loolu moo waral Yawut yi jàppe ma ca kër Yàlla ga, di ma fexee rey. ²² Ndimbalal Yàlla nag moo ma may may dund ba tey jii, di ko seedeel ci mag ak ndaw, te waxuma lenn lu moy la yonent ya ak Musaa waxoon ne dina am. ²³ Dañu noon fàww Almasi jaar ci ay coono te mooy jékka dekki, ba siiwtaane leer gu jolli, ñeel bànni Israyil ak jaambur ñi itam.»

²⁴ Naka la layool boppam noonu, Festus mu àddu ca kaw, ne ko: «Póol, yaw dangaa dof! Sa njàng mu réy mee la dofloo.»

²⁵ Póol ne ko: «Dofuma de, Festus mu tedd mi, dégg gu ànd ak xel kay, laay biral. ²⁶ Lii ma wax, buur bi xam na ko, moo tax ma ñeme koo wax ci kanamam, ndax bir na ma ne, amul lenn lu ko ump ci lii, ngir du cib ruq la xewe. ²⁷ Buur Àggripa, xanaa gëm nga yonent yi? Xam naa xéll ne gëm nga.»

²⁸ Àggripa nag ne Póol: «Nga defe ne man nga maa gaawa def noonu ab gëmkatub Almasi?» ²⁹ Póol ne ko: «Mu gaaw, mu yeex, waxuma yaw rekk, waaye yaak mboolem ñi may déglu laay ñaan Yàlla, ngeen fekksi ma ci lépp, lu moy cállala yii ñu ma jéngel!»

³⁰ Ci kaw loolu buur bi ak boroom réew mi jóg, ñook Berenis ak ña ñu toogal. ³¹ Na ngay dem, te naa ca seen biir: «Kii kat deful dara lu jar dee mbaa ay jéng.» ³² Àggripa moom ne Festus: «Kii kay su dénkuloon mbiram Sesaar, nu man koo yiwi.»

27

Póol dugg na gaal, jëm Room

¹ Ba loolu wéyee ñu dogu noo dugal gaal, jëme nu réewum Itali. Ñu teg Póol ak ñeneen ñu ñu tëjooon, ci loxool njiitu takk-der bu ñuy wax Yulyus, bokk ci mbooloom xarem buur bu mag bi. ² Nu dugg gaalu dëkk ba ñuy wax Áddramit tey jaareji teeruy Asi, daldi tàbbi biir gééj, Aristàrk jenn waay ju dëkke Tesalonig ca diiwaanu Maseduwan, ànd ak nun.

³ Ca èllég sa nu teeri Sidon; Yulyus nag baaxe Póol, may ko nu dem ci ay xaritam, ngir ñu topptoo ko. ⁴ Nu jóge fa, dellu gééj, ngelaw li softu nu, nu leru tefesu Sippar, jaare wet gu nu fegoo ngelaw li. ⁵ Ci kaw loolu nu jáll gééj, gi janook diiwaani Silisi ak Pamfili, daldi teeri Mira ca Lisi. ⁶ Foofa nag njiitu takk-der ba gis gaal gu jóge Alegsàndiri, jëm Itali, nu dugal nu ca. ⁷ Ba loolu amee nuy deme ndànk ay fani fan; sonn nanu lool doora jub Kanidd, waaye ngelaw li mayu nu nu teer. Nu leru tefesu Keret, jaare wet gu nu fegoo ngelaw li, janook Salmon. ⁸ Sonn nanu lool bala noo romb foofu, doora agsi fa ñuy wax Neex Teeru, te dend ak dëkk ba ñuy wax Lase.

⁹ Fekk na nag nu yàgg ca yoon wa, ba tollu ci jamono ju tukkib gééj aaytal, ndax fekk na Koorug Yawut* wees. Loolu tax Póol digal leen ne: ¹⁰ «Bokk yi, gis naa ne yoon wii loraange ak yàqule gu réy la. Waxuma gaal gi ak li mu yeb, waaye sunuy bakkan sax xaj na ci.» ¹¹ Teewul njiitu takk-der ba sobental waxi Póol, déggal dawalkat ba ak boroom gaal ga. ¹² Te itam teeru boobu neexul woona lollikoo. Loolu waral ña èpp ca waa gaal ga mànkoo ci jóge fa, dellu gééj, te fexe nu ñu àgge Fenigsè, ngir lollikoo fa. Mooy teerub dunu Keret bi jublu sowub suuf ak sowub kaw.

Ngélén sàqi na

¹³ Ci kaw loolu ngelawal bëj-saalum wal ndànk, ñu njort ne man nañoo sotalle seen pexe. Ñu wégg diigal, daldi tafoo tefesu Keret. ¹⁴ Teewul nes tuut ngelaw lu réy lu ñuy wax Penkub kaw, riddee ca dun ba. ¹⁵ Gaal gi buubu, manatula dékku ngelaw li, ba nu mujj bayliku, daldi yal. ¹⁶ Nu leru nag dun bu tuuti bu ñuy wax Koda, jaare wet gu nu fegoo ngelaw li, teg ci sonn lool doora téye loocob rawtu bu gaal gi. ¹⁷ Ñu yéegge looco ba, daldi jël ay buum yu ñu laxas ca yaramu gaal ga, dàbblee ko

ko. Ci kaw loolu ñu ragala ngiroji ca beef bu ñuy wax Sirt, ba tax ñu sànni diigal, ngir yeexal gaal ga, daldi yalal. ¹⁸ Ca èllég sa ngelaw la wéye noo pamti-pamtee, ba ñu mujj wàññi ca yebu gaal ga, sànni biir gééj. ¹⁹ Ca gannaaw èllég sa, seen loxoy bopp lañu jële yenn jumtukaayi gaal ga, sànni. ²⁰ Ay fani fan jant beek biddiiw yi ne menñ, te ngelaw liy ridde rekk, ba nu noppee yaakaar ne dinanu rekk.

²¹ Loolu nag fekk na ñu gëjoona lekk. Póol daldi taxaw ca seen biir ne: «Bokk yi, su ngeen yégoon déggal ma, baña jóge Keret, ba moyu loraange gi ay yàqule gi. ²² Léegi nag dama leen di ñaax, ngir ngeen dalal seen xel, ndax kenn ci yeen du ñàkk bakkanam, gaal gi rekk ay yàqu. ²³ Ndash malaakam Yàlla ji ma moom, te ma di ko jaamu, moo ma dikkal biig. ²⁴ Mu ne ma: “Póol, bul tiit; fàww nga taxawi fa kanam Sesaar, te it Yàlla moo la baaxe muccug mboolem ñi nga àndal ci gaal gi.” ²⁵ Kon nag, bokk yi, dalal-leen seen xel, ndax gëm naa Yàlla, xam naa ne ni mu ko waxe, ni lay ame. ²⁶ Du ñàkk aw dun wu nu lufeji.»

Gaal ga tas na

²⁷ Ca fukkeelu bés baak ñeent, nu ngay yal-yalee fu ne ca géēju Adiratig; ba guddi ga xaajee mool ya njort ne nu ngay jegesi ab tefes. ²⁸ Ñu sànni nattukaay ba biir gééj, gis ndox ma xóote ñaar fukki dayo, xawa yemook ñeent fukki meetar. Ñu demati tuuti, sànniwaat ko, daldi gis ndox ma xóote fanweeri meetar, xawa yemook fukki dayo ak juróom. ²⁹ Ci kaw loolu ñu ragala lufeji bérab bu ami doj, ba tax ñu sànnée ca geenu gaal ga, ñeenti diigal, tey ñaan jant fenke leen. ³⁰ Teewul mool ya ñoom di fexee raw, daldi dem ba yoori loocob rawtu ba biir gééj, tey taafantoo ne ay diigal lañuy sànnée ca boppu gaal ga. ³¹ Póol nag ne njiitu takk-der ba ak xarekat ya: «Ñii bu ñu desul ci gaal gi, yeen dungeen raw.» ³² Ca la takk-der ya dog buum ya téye looco ba, bàyyi, mu wéy.

³³ Naka la jant di waaja fenk, Póol ñaax ñépp, ngir ñu lekk; mu ne leen: «Fukki fan ak ñeent a ngii, yeena ngi toog, lekkuleen, sexuleen dara. ³⁴ Dama leen di ñaax nag ngir ngeen lekk, ndax noonu donñ ngeen mana rawe. Du genn kawar sax guyy rote ci boppu kenn ci yeen.» ³⁵ Loolu la wax, daldi jël mburu, sant Yàlla ci kanam ñépp, ba noppi dagg, lekk. ³⁶ Ba loolu amee, ñépp dellu sawar, daldi lekk ñoom itam. ³⁷ Ña nekkoon ca gaal ga ñépp ñaar téeméer ak

* 27:9 27.9 Koorug Yawut, ca fukkeelu fanu juróom ñaareelu weer wa lay am, mu yemook sàttumbar, jàpp oktoobar. Mooy bésuub Njotlaay bi. Bés boobu la sarxalkat bu mag ba daan yóbbu deretu jur fa bérab bu sell baa sell, ngir Yàlla baal bànni Israayil seeni bàkkaar. Bés bu sella sell la woon, bu ñu daan yendoo woor. Seetal ci Sarxalkat yi 16.

juróom ñaar fukk ak juróom benn (276) lañu. ³⁸ Ñu lekk ba suur, daldi sànni pepp ma biir gééj, ngir woyofal gaal ga.

³⁹ Ba bêt setee, xàmmiwuñu réew ma, waaye ab catu tefes lañu séen. Nu fas yéene caa teerali, ndegam manu na. ⁴⁰ Ba mu ko defee ñu dagg diigal ya, wacc biir gééj, yiwiwaale goj ya téye jowu yay dawal gaal ga. Ci kaw loolu ñu firi wiiru kanam ga, wacce ak ngelaw la, nu wuti tefes ga. ⁴¹ Teewul ñu dal fu ñaari ndaw daje, ci ab tundu beeñ, gaal ga luf. Boppu gaal ga nuur ca suuf sa, yéngootul, geenu gaal ga tas ndax dooley gannax ya.

⁴² Ba loolu amee takk-der ya nara rey ña ñu téj, bala ñoo féey, ba raw. ⁴³ Njiitu takk-der ba nag namma rawale bakkanu Póol, ba tax mu aaye loolu. Mu sant ñi mana féey, ne leen ñu jékka sóobu, wuti tefes ga. ⁴⁴ Ña ca des nag, topp ca, ñii langaamoo ay dénk, ñee, tojiti gaal ga. Noonu la ñépp mujje jot tefes ga ci jàmm.

28

Póol gane na dunu Mált

¹ Gannaaw ba nu rawee, nu yég ne dun ba Mált lañu koy wax. ² Waa réew ma nag laaye nu biir lool. Fekk na mu tãmbalee taw, ànd akub sedd. Ñu taalal nu am njaar, dalal nu nun ñépp. ³ Póol daldi taxan aw say, di ko teg ca taal ba, jaan géenne ca ndax tãngoor wa, mätt ko ba taq ci loxoom. ⁴ Waa réew ma gis jaan ja langaamoo loxol Póol, ñu naan ca seen biir: «Nit kii kay ab bóomkat lay doon, ndegam moo récce gééj, te taxul Ndogal may ko mu dund.»

⁵ Teewul Póol yélëb jaan ja ca sawara sa, te dara jotu ko. ⁶ Nit ña nag di ko xoole yaram wu newi, mbaa mu jekki ne dàll, dee. Naka lañu xool lu yágg ba gis ne dara jotu ko, ñu xalaataat, daldi ne Póol yàlla la.

⁷ Ca wetu tefes googee nu teere nag, fa la toolub kilifag dun ba féete woon, ñu di ko wax Publiyus. Mu dalal nu, ganale nu ngan gu neex diiru ñetti fan. ⁸ Fekk na baayu Publiyus a nga tédndax tãngooru yaram ak biiru taññ. Ci biir loolu Póol dem seeti ko, ñaanal ko, teg ko ay loxoom, mu wér. ⁹ Ba loolu amee jarag ya ca dun ba dikk, daldi wér ñoom itam. ¹⁰ Teraanga yu bare terale nañu nu ko fa, te ba nuy dem, jox nañu nu la nu soxla.

Àgg nanu Room

¹¹ Gannaaw ba nu fa amee ñetti weer lanu dugg gaal gu lollikoo woon ca dun ba. Gaal gaa nga bàyyikoo woon Alegsàndiri, di xàmmikoo jëmme tuur ya ñuy wax Kastor ak Polugse*. Nu daldi tàbbiwaat

biir gééj. ¹² Nu teeri dëkk ba ñuy wax Sirakus, toog fa ñetti fan. ¹³ Nu jóge fa, leri tefes ga, ba agsi Resiyo. Ca èllëg sa ngelawal běj-saalum jóg, nu daldi àgg teerub Pusol ci ñaari fan. ¹⁴ Gis nanu fa ay bokki gëmkat, ñu ñaan nu, ba nu toog fa ñoom juróom ñaari fan. Gannaaw loolu nu dem Room. ¹⁵ Ba bokki gëmcati Room yégee ne nu ngi dikk, ñoo nu gatandusi ba fa ñuy wax péncu Apiyus ak fa ñuy wax Ñetti dalu gan ya. Ba leen Póol gisee, daa sant Yàlla, daldi gëna sawar. ¹⁶ Ba nu dikkee Room nag may nañu Póol, mu am daluwaayu boppam, ab takk-der di ko wattu.

Póol waare na ca Room

¹⁷ Ñu teg ca ñetti fa, mu woolu njiiti Yawuti dëkk ba. Ba ñu dajee, mu ne leen: «Bokk yi, man defuma dara lu dëngook sunuw xeet mbaa sunu aaday maam. Teewul ñu jappe ma fa Yerusalem, teg ma ci loxoy Room. ¹⁸ Nooñu seet sama mbir, gisuñu ci man tuuma ju yelloo àtteb dee, ñu nar maa bàyyi. ¹⁹ Ba Yawut ya bañee nag, amatuma pexe mu dul dénk sama mbir Sesaar, doonte du lenn lu may toppe samaw xeet. ²⁰ Mbir moomu nag moo tax ma woolu leen, ngir giseek yeen, diisook yeen, ndax yaakaaru bànni Israyil moo waral sama jéng yii.»

²¹ Ñu ne ko: «Nun de, du benn bataaxal bu nu jot bu jóge Yude ci sa mbir, te du kenn ci bokk yi, ku dikk wax mbaa mu seedeel la lenn lu bon. ²² Waaye bëgg nanoo dégg ci sa gëmminu bopp li nga gëm, ndax li nu xam daal mooy, ngër moomu nga bokk, fu nekk lañu koy diijate.»

²³ Ci kaw loolu ñu jox ko bés, bés ba dikk, ñu bare dikk, fekski ko ca daluwaayam. Suba ba ngonon mu di leen jàngal, di leen seedeel lu jëm ci nguurg Yàlla, di leen won ci mbirum Yeesu, firnde yu leen gëmloo te tukkee ci yoonu Musaa ak ci yonent yi. ²⁴ Ñenn ña nag gëm la mu wax, ña ca des weddi. ²⁵ Ba ñu werantee ca seen biir, bay dem te juboowuñu, Póol teg ca ne leen: «Noo gu Sell gee yeyoon wax lii seeni maam, Yonent Yàlla Esayi jottli. ²⁶ Mu ne:

“Demal ci xeet wii, nga ne leen: ‘Yeenay déglóo déglu, dungeen dégg; ngeen xoolee xoole, dungeen gis.’

²⁷ Xolu xeet wee dërkiis, seeni nopp fatt, ñu gëm fatuus, ba seeni gët du gis, seeni nopp du dégg, seen xol it du yég, ba ñu tuub,

* 28:11 Kastor ak Polugse: ñoo doon seexi Sës, yállay Gereg yi. Ñoom lañu gëm ne ñoo daan musal waa gééj.

ma wéral leen.”

²⁸⁻²⁹ «Xamleen nag ne xibaaru mucc gii tukkee fa Yàlla, yóbbante nañu ko ñi dul Yawut, te ñoom dinañu ko déglu.»

³⁰ Diiru ñaari at la Póol dal Room ci kërug boppam gu muy fey, di fa àggale mboolem ña koy seetsi. ³¹ Muy yégle nguurug Yàlla, di jàngle mbirum Sang Yeesu Almasi ci teeyug bakkanam te amul benn gállankoor.

Bataaxal bi Yàlla may Póol, mu bind ko waa Room

¹ Ci man Póol miy jaamub Almasi Yeesu la bataaxal bii bawoo, man miy ndawam ci kaw woote bu ma tabb, sédd ma sasu xamle xibaaru jàmm bu Yàlla. ² Xibaaru jàmm boobu Yàlla dige woon lu jiiu, te yóbbante ko ay yonentam ci Mbind mu sell mi, ³ moo jém ci Doomam, ji soqikoo ci askanu Daawuda, ci wàllu àddina. ⁴ Waaye ci wàllu Noo gu Sell gi, mooy ki dogal ba tabb muy Doomu Yàlla ji jagoo doole ndax ndekkiteem, te mooy sunu Sang Yeesu Almasi. ⁵ Ci Almasi lanu jote aw yiwu doon ay ndaw, ngir nit ñi déggal yoonu ngém wi, ci biir mboolem xeeti àddina, ngir aw turam. ⁶ Te yeen ñi ñu woo ci Yeesu Almasi itam, ci ngeen boka.

⁷ Bataaxal bi ñeel na mboolem yeen ña fa Room, di ñu Yàlla sopp, woo leen, ngreen doon ñu sell. Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

Póol sant na Yàlla

⁸ Ma doore sant sama Yàlla ci Yeesu Almasi ngir yeen ñépp, ndax seen ngém siwu na ci àddina sépp. ⁹ Yàlla mi may jaamoo xol, ci ni may siiwtaanee xibaaru jàmm bu Doomam, moom seere na ne noppiwuma leena fàttliku. ¹⁰ Xanaa di saxoo dagaan ci samay ñaan, su ci Yàlla àndee, yoon wu jub wu ma mujj dikke ba ci yeen. ¹¹ Yàkkamti naa leena gis, ba jottli leen mayug yiw gu bawoo ci Noo gu Sell gi, ngir dooleel leen, ¹² te loolu mooy ma boka ak yeen lu dëfal sama xol, dëfal leen, ci seen ngém ak sama gos.

¹³ Boka yi, bugguma ngeen umple ne ay yooni yoon laa leen mébéta seetsi, ba liggéey ci seen biir lu leen jariñ, ni ma ko defale yeneen xeet; waaye ay gallankoor a ma téye ba tey jii. ¹⁴ Muy sama digg ak Gereg yu xay yi, mbaa ñu xayadi ñi, ak ñi rafet xel, mbaa ñi ñàkk xel, am na lu ma war ci ñoom ñépp. ¹⁵ Moo tax, yeen waa Room itam, ma yàkkamti leena àggesi xibaaru jàmm bi.

Manooree ngi ci xibaaru jàmm bi

¹⁶ Awma lu may rus ci xibaaru jàmm bi, ndax kat mooy manoorey Yàlla jiy musal képp ku ko gém, dale ci Yawut bi, teg ci ki dul Yawut. ¹⁷ Ci xibaaru jàmm bi lañu feeñal ni Yàlla di joxe nit ñi àtteb ñu jub, te lépp aju ci ngém, ca ndoorte la, ba ca

njeexital la. Noonu la Mbind mi indee ne: «Ku jub ndax ngémam mooy dund*.»

Nit ñépp a tooñ Yàlla

¹⁸ Sànjum Yàlla fa asamaan lay dale feeñ, ba wàcc ci mboolem ngémadi, ak njubadiy nit ñuy fatt ag dëgg ci biir ag njubadi. ¹⁹ Ndaxam lees mana xam ci Yàlla, leer na ci seen biir, nde Yàlla moo leen ko leeralal. ²⁰ Ndax kat, li gisuwul ci Yàlla, te di manooreem gi dul jeex, ak jikko ji mu wéetoo ndax li muy Yàlla, ba àddina sosoo ba tey, xel man na koo ràññee ci ay liggéeyam, te looloo leen taxa ñàkku lay.

²¹ Gannaaw ba ñu xamee Yàlla, taxul ñu mággal ko ngir li muy Yàlla, taxul ñu delloo ko njukkal, xanaa réer ci seen xalaati neen, ba seen xel mu wayadi far tàbbi cig lëndëm. ²² Xel mu rafet lañuy jaay ba mujj diy dof. ²³ Leeru Yàlla ji dul dee lañu weccee jëmmu nit ki deeyam dul jaas, ak picc, ak boroom ñeenti tànk, ak ndëgmeent.

²⁴ Moo tax Yàlla bërgal leen ak seen xemmmentéef yu bon yi ci seen xol, ba ñu sóobu ci jëflantey sobe yu jott teddadil seen yarami bopp. ²⁵ Ñoo weccee dëggu Yàlla, aw feni, di sujjóotal ak a jaamu mbindeef, bàyyi Bindkat bi yellow cant ba fàww. Amiin.

²⁶ Loolu moo tax Yàlla bërgal leen ak seen bëgg-bëgg yu teddadi. Seeni jigéen sax dëddu nañu jaxasoo gi leen bindub juddu sédde, ba jublu ci lu woroo ak seen bindub juddu. ²⁷ Naka noonu, góor ñi it noppee jaxasoo ak jigéen, ni leen ko bindub juddu sédde, bay xabtaloo ci seen biir; seen bëgg-bëggi bakkan yu tar; ay góor di séq ak seen moroomi góor jëf ju gâccelu, ba tax leena jot ci seen jëmme bopp, seen añub réeraange.

²⁸ Gannaaw ràññee Yàlla jaralu leen dara, Yàlla it bërgal leen ak seen xel mu doyadi, ba ñuy def jooju jëf ju jekkad. ²⁹ Dañoo dem ba feese gépp xeetu njubadi, akug mbon, akug bëgge, akug coxor. Noyyeewuñu lu moy kiñaan, ak pexey bóome, ak ñaayoo, akug njublañ, ak jëf ju sew. Ay jëwkati lañu it, ³⁰ te di yàkqati der, ñu bañ Yàlla lañu, ñu reew, réy, di téggu, ñu xareñ ci fexe lu bon, te déggadil seeni waajur. ³¹ Amuñu xel, amuñu kóllère, amuñu xol, amuñu yërmande. ³² Moonte xam nañu xéll ne ñuy jéfe noonu, Yàlla moo daganal àtteb dee ci ñoom, te teewul ñu di ko jéfe, rax ci dolli di farle ñi koy jéfe.

2

Yàlla mooy àtte

* 1:17 1.17 Seetal ci *Abakug* 2.4.

¹ Yaw nit kiy sikke nag, amoo aw lay, ndax boo sikkee keneen, sa bopp nga sikk, nde yaw miy sikke, jooju jëfin ngay jëfe. ² Waaye wóor nanu ne àtteb Yàlla bi muy añale ñiy jëfe jooju jëfin, dëgg lay dëppool. ³ Yaw nit kiy sikk ñiy jëfe yooyii, te di ko def, ndax defe nga ne yaw ci sa bopp dinga récc àtteb Yàlla? ⁴ Am dangay sofental mbaaxu Yàlla gu réy, akug jéllaleem, akug muñam, ndax ñakka xam ne li Yàlla namm ci baaxe la, moo di nga tuub?

⁵ Waaye sag dëgër bopp, ak sa xol bu tuubadi, ci ngay jóore sànjum Yàlla ci sa kaw bopp, keroog bésub sànj ma, fa àtteb Yàlla bu jub di feeñe. ⁶ Ca lay fey ku nekk ay jëfam. ⁷ Ñi saxoo di jéema def jëf ju baax, ngir di ko sàkkoo ndam, ak teraanga, ak texe gu sax, ñooñu, texe gu sax dàkk mooy doon seenub añ. ⁸ Waaye ñi fetteeral ci seen sàkkuteefi bopp, nanguwuñoo topp liy dëgg, xanaa ag njubadi nag, ñooñu, am sànj ak mer mu ne jippét lañuy yooloo. ⁹ Njàqare ak musiba daal, mooy dal ci kaw képp kuy def lu bon, te Yawut bi jiitu ci, waaye ki dul Yawut it topp ci; ¹⁰ daraja, ak teraanga, ak jàmm nag moo ñeel képp kuy def lu baax, te Yawut bi jiitu ci, waaye ki dul Yawut it topp ci. ¹¹ Ndax kat xejj ak seen amul fa Yàlla.

¹² Mboolem ñi bàkkaar nag te fekku leen ci yoonu Musaa, yoonu Musaa toppu leen, waaye du leen teree sànk. Mboolem ñi bàkkaar it, te mu fekk leen ci yoonu Musaa, ci yoonu Musaa lees leen di daane. ¹³ Ndax kat du déglukati yoonu Musaa lees di joxee àtteb ñu jub fa kanam Yàlla, waaye jëfkati yoonu Musaa lees di joxe nit àtteb ku jub. ¹⁴ Jaambur ñi dul Yawut, te amuñu yoonu Musaa, ndegam teewu leena topp bindub juddu, bay jëfe li yoonu Musaa laaj, dafa fekk ñoom ci seen bopp, ñuy seen yoonu bopp, doonte amuñu yoonu Musaa. ¹⁵ Noonu lañu wérale ne jëf ji yoonu Musaa santaane moo binde ci seenub xol, ba seen yég-yégu xol seede loolu. Li koy firndeel it di seen xel miy def leeg-leeg mu sikk leen, leeg-leeg mu dëggal leen. ¹⁶ Te noonu lay deme kera bés ba Yàlla di àtte mbiri kumpa yu nit ñi, ci saytub Yeesu Almasi, ni ko sama xibaaru jàmm bi indee.

Yoonu Musaa na jariñ ki ko topp

¹⁷ Ma dikk nag ci yaw miy wuyoo turu Yawut, te yaakaar yoonu Musaa, boole ci di sagoo Yàlla. ¹⁸ Yaa xam coobarey Yàlla, te yaa jänge ci yoonu Musaa, ba xam li am solo dëgg. ¹⁹ Yaw mi mu wóor ne yaa di wommatkatub gumba yi,

te di leeru ñi ci lëndëm gi, ²⁰ yaa di jànglekatub naataxuuna yi, di sèriñub tuut-tànk yi, gannaaw yaa jagoo ci yoonu Musaa, mboolem luy jëmmu xam-xam, ak lépp luy dëgg. ²¹ Kon yaw miy jàngle, doo jàngal sa bopp? Yaw miy waare, di aaye sàcc, mbaa doo sàcc? Yaw miy aaye njaaloo, mbaa doo jaaloo? ²² Yaw mi bañ bokkaale, mbaa doo sèxëtoo jaamookaayi bokkaalekat yi? ²³ Yaa ngi sagoo yoonu Musaa te di ko moy bay teddadil Yàlla! ²⁴ Yeen de yeena tax ñuy ñakke teggin turu Yàlla ci biir xeeti jaambur yi dul Yawut, te noonu la ko Mbind mi indee.

Xaraf na jariñ boroom

²⁵ Aaday xaraf nag amal na la njariñ, ndegam sàmm nga yoon wi ko digle. Waaye soo dee moykatub yoon wi, sag xaraf, ñakka xaraf lay doon. ²⁶ Kon kay ki xaraful, tey jëfe njub gi yoonu Musaa santane, ñakka xarafam, deesu ko ko waññal ag xaraf? ²⁷ Ki xaraful ciw yaramam, te teewu koo sàmm yoonu Musaa, moo lay teg ab daan, yaw mi boole mbindum yoonu Musaa, ak sag xaraf, te teewu la di moykatub yoon wi. ²⁸ Ab Yawut, du ci melo wuy feeñ lees koy nekke, te xaraf it du ci màndarga muy feeñ ciw yaram. ²⁹ Waaye ab Yawut dëgg, kumpag biir xol la koy nekke, xaraf it mbirum xol la; ci xel mi lay sottee, waaye du ci mbindum yoon. Ngèrëm la it du ci nit lay jóge, xanaa Yàlla.

3

Lu jëm ci jagley Yawut yi

¹ Kon nag ana lu ab Yawut rawe ci nit ñi? Ak luy njariñal xaraf? ² Xanaa lu bare, ci wet gu nekk. Li ci jiitu moo di ñoom lañu dënk kàdduy Yàlla. ³ Su ci ñennat ñakkee kóllère, ndax seenug ñakk kóllère day fanq kóllèreg Yàlla? ⁴ Mukk kay! Fàww Yàlla wéye di ku dëgg, te ñëpp di ay fen-kat, te noonu la Mbind mi indee ne:

«Soo waxee, am dëgg,

te soo àttee, yey*.»

⁵ Waaye su sunug njubadi fésalee njubteg Yàlla, ana lu loolu mana tekki ci nun? Ma waxe ko nu ko nit mana dëgge; ma ne, kon bu nu Yàlla wàcceelee am sànjam, deful ag njubadeem? ⁶ Mukk kay! Su njubteg Yàlla matul woon, ana nu muy àttee àddina? ⁷ Mbaa ñu neeti: «Su fekkee ne dëgguteg Yàlla, sama ñakka dëgg lay gëna kaweel, te loolu di ndamam, kon man, ana lees may joxe àtteb bàkkaar kat?» ⁸ Ana kon lu tee nit waxe noonee nu soskat yi tuumaale ne

* 3:4 3.4 Seetal ci Sabóor 51.6.

nooy wax naan: «Nanu def lu bon, ngir mu jur lu baax»? Ñooñu mbugal lañu yelloo.

Kenn jubul

⁹ Ana kon nun Yawut yi, lu nu gëne ci nit ñi? Du ci lenn! Ndax firndeel nanu ba noppi ne, muy Yawut bi, di ki dul Yawut, ñépp a ngi ci kilifteefu bàkkaar. ¹⁰ Noonu it la Mbind mi indee ne:

«Kenn jubul, du kenn sax.

¹¹ Kenn xeluwul, kenn wutul Yàlla.

¹² Ñépp a lajj ba bokk yàqu yaxeeɗ,

Kenn deful lu baax, du kenn sax!†

¹³ Seenug boli di bàmmeeɗ bu ne ñàpp,

seen lammiiñ di ràbb njoblan,

seeni kàddu aay ni danjaru ñàngóor‡.

¹⁴ Seen gémmiñ, waxi móolu ak wextan la feese§,

¹⁵ seeni tànk bar ci yoonu tuur deretu jaambur,

¹⁶ te fu ñu jaare yàqute la ak musiba.

¹⁷ Yoonu jàmm, xamuñu ko*,

¹⁸ te ag ragal Yàlla jégewu leen†.»

¹⁹ Xam nanu nag ne lépp lu yoonu Musaa wax, ñi ci yoonu Musaa la ko wax, ngir aw lay jeex tàkk, ngir itam mu leer nàññ ne àddina sépp a sikk fi kanam Yàlla. ²⁰ Ndax kat deesul jox kenn àtteb ku jub fa kanam Yàlla ndax jéf ju mu def, ngir sàmm yoonu Musaa; solob yoon wi daal, mooy ci lees di ràññee bu baax luy bàkkaar.

Yàlla ubbi na buntu mucc

²¹ Waaye léegi Yàlla moo feñal nu nit di ame fa kanamam, àtteb njobam gu ajuwul ci yoonu Musaa. Te yoonu Musaa, ak yonent yi seede nañu loolu. ²² Googu njub fa kanam Yàlla nag, ci gëm Yeesu Almasi lees koy ame, te mboolem ñi ko gëm la ñeel, amul xejj ak seen. ²³ Ndax kat ñépp a bàkkaar, ba jotewuñu leeru Yàlla, ²⁴ te ci yiwu Yàlla wu àndul ak genn pey lees di joxe ñépp àtteb ñu jub, ndax njot gi sottee ci Almasi Yeesu. ²⁵ Moom la Yàlla tudɗ muy njot gu ngëm di maye, ci kaw deretam ji tuuru. Noonu la Yàlla firndeele ne njobteem mat na sèkk doonte tanqamlu woon na bàkkaari niti jamono ya woon, ²⁶ nde Yàlla ci biir ag jéllaleem la firndeel njobteem ci janti tey jii, ngir mu leer ne moo wéye njub, te képp ku gëm Yeesu, moo koy jox àtteb ku jub.

²⁷ Kon ana lees di bàkkoo? Dara! Ci lan lañu koy teg sax? Ci jéf ju yoon santaane? Mukk! Xanaa yoonu ngëm donj. ²⁸ Ndax

jàpp nanu ne ci kaw ngëm lees di jox nit, àtteb ku jub, waaye du ci jéfam ju yoon santaane. ²⁹ Am Yàlla da di Yàllay Yawut yi donj? Da dul Yàllay jaambur yi dul Yawut itam? Ahakay, mooy Yàllay jaambur ñeet kay! ³⁰ Gannaaw Yàlla kenn la, mooy jox ñi xaraf, àtteb ñu jub ci kaw ngëm; ñi xaraful it, moo leen di jox àtteb ñu jub ci kaw ngëm. ³¹ Ndax loolu day tekki ne ngëm lanu jél, neenale ko yoonu Musaa? Mukk! Xanaa dañu koo dëggal kay.

4

Njubteg Ibraayma du ci jéfam

¹ Ibraayma sunu maam ci wàllu njureel nag, ana lu nuy wax ne moom la gis ci moomu mbir? ² Bu fekkoon ne Ibraayma, ci kawi jéfam lees ko jox àtteb ku jub, kon mu man koo damoo, waaye demewul noonu fa Yàlla. ³ Ana lu ci Mbind mi wax? Da ne: «Ibraayma moo gëm Yàlla, ñu waññal ko ngëmam ag njub*.»

⁴ Kuy liggéey, ag peyooram du taxawe ag may, waaye wartéef la. ⁵ Waaye ki jéful te gëm Yàlla miy jox ab yéfar sax, àtteb ku jub, ngëmam googu, ag njub lees ko koy waññal. ⁶ Ci moomu mbir la Daawuda doon wax, ba muy biral mbégtém nit ku Yàlla waññal ag njub gu jotewul dara ak ay jéfam. ⁷ Mu ne:

«Mbégte ñeel na ñi ñu jéggal seeni tooñ, ñeel na ñooñu ñu baal seeni bàkkaar.

⁸ Mbégte ñeel na ku Boroom bi

waññalul ag moyam†.»

⁹ Kon moomu mbégte xanaa Yawut yiy xaraf donj la ñeel? Ñi xaraful it dañu cee bokkul? Ndax kat danu ne Ibraayma lañu waññal ngëmam ga, ag njub‡. ¹⁰ Nan lees ko ko waññale? Gannaaw ba mu xarafee, am ba mu xarafagul? Du gannaaw ba mu xarafee, waaye ba mu xarafagul la. ¹¹ Gannaaw gi la jagoo màndargam xaraf, mu firndeel àtteb njobam gi ngëmam waral, te fekkul mu xaraf. Noonu la Ibraayma mana nekke maamu mboolem gëmkaat ñi. Looloo tax muy maamu mboolem ñi xaraful, te gëm, ndax ñu waññal leen seen ngëm, ab àtteb ñu jub. ¹² Looloo tax it Ibraayma di maamu ñi xaraf, te du xaraf gu ñu toppe aada, xanaa ñu boole ca topp ci tànk ngëm ga sunu maam Ibraayma amoon ba mu xarafagul.

Ibraayma gëmoon na digeb Yàlla

¹³ Ndax kat digeb Ibraayma ba sédde Ibraayma àddina si, moom ak askanam§,

† **3:12** 3.12 Seetal ci *Sabóor* 14.3; 53.4. ‡ **3:13** 3.13 Seetal ci *Sabóor* 5.10; 140.4. § **3:14** 3.14 Seetal ci *Sabóor*

10.7. * **3:17** 3.15-17 Seetal ci *Esayi* 59.7-8. † **3:18** 3.18 Seetal ci *Sabóor* 36.2. * **4:3** 4.3 Seetal ci *Njàlbéen ga*

15.6. † **4:8** 4.7-8 Seetal ci *Sabóor* 32.1-2. ‡ **4:9** 4.9 Seetal ci *Njàlbéen ga* 15.6. § **4:13** 4.13 Seetal ci *Njàlbéen*

ga 12.1-3; 17.5.

sàmm gu mu sàmm yoonu Musaa taxul, waaye àtteb njub bi mu jagoo ndax ngëmam, moo ko waral. ¹⁴ Nde su dee ñi ci yoonu Musaa la dige bi ñeel, kon ngëm dootu tekki dara, te kon digeb Yàlla ba day neen. ¹⁵ Yoonu Musaa daal, am sànj lay jur, te fu yoon wees di sàmm amul, genn moy amu fa.

¹⁶ Kon nag dige Yàlla boobu, ngëm moo ko waral, ngir mu di aw yiw donj. Noonu la dige bi doone lu wóor, ñeel ñi soqikoo ci Ibraayma ñépp; du ñi bokk ci yoonu Musaa rekk, waaye ñeel na itam ñi bokk ci ngëmu Ibraayma, miy sunu maam, nun ñépp. ¹⁷ Noonu la Mbind mi indee ne: «Maa la def ngay maamu xeet yu bare*.» Ibraayma mooy sunu maam fi kanam Ki mu gëm, te muy Yàlla miy delloo ñi dee, bakkan, tey woo lu nekkul, mu doon lu nekk.

¹⁸ Ba bunti yaakaar yépp tējee, Ibraayma moo dese woon yaakaaram, wéye ngëmam, ba doon maamu xeet yu bare, loolu déppook kàddu ga noon: «Noonu la saw askan di tollu†.» ¹⁹ Ngëmu Ibraayma waññikuwul, doonte ba mu xoolaatee boppam, xam na ne yaramam dee na daanaka, ndax fekk na ay atam xawa tollu ci téeméer, te njurukaayu Saarata it fekk na ko dee. ²⁰ Teewul digeb Yàlla ba la ne jàkk, nàttawul, gëmadiwul, xanaa dëgërloo dooley ngëmam rekk, sant Yàlla. ²¹ Dafa wéeroon Ibraayma péññ ne li Yàlla dige, man na koo def. ²² Moo tax it, ñu waññal ko ngëmam ag njub. ²³ Ba ñu bindee ne ngëmu Ibraayma, moom lees ko waññal àtteb ku jub‡, du Ibraayma donj la mbind ma ñeel. ²⁴ Nun itam ci lanu; dees na nu waññal sunu ngëm, àtteb ñu jub, nun ñi gëm Ki dekkal sunu Sang Yeesu, ²⁵ mi ñu teg ciy loxo, mu dee ndax sunuy tooñ, ba dekkal ko, ngir nu jagoo àtteb nit ñu jub.

5

Almasi moo nu jubale ak Yàlla

¹ Gannaaw nag dees noo jox àtteb ñu jub ci kaw ngëm, jàmmoo nanu ak Yàlla ndax sunu Sang Yeesu Almasi. ² Ci ndimbalam lanu ame ngëm ba mana àgg fi yiwu Yàlla wii nu taxaw taxawaay bu dëgër. Te it sunub sag moo di yaakaar ji nuy séentoo ab cér ci leeru Yàlla. ³ Te yemunu ci, xanaa di sagoo sunuy tiis itam, nde xam nanu ne dékku aw tiis mooy taxa muñ; ⁴ te muñ mooy jur kóllérey biir coono; kóllérey biir coono mooy jur yaakaar. ⁵ Te yaakaar jooju du tas, ndax cofeelu Yàlla gi baawaan

ci sunu xol, ci ndimbalal Noo gu Sell gi mu nu may.

⁶ Ndax kat, ba nu amul menn pexem mucc, ca la Almasi deeyal yéefar yi nu doon, ba mu jotee. ⁷ Barewul ku nangoo deeyal nit ku jub, doonte jombul mu am ku nangoo deeyal ku baax. ⁸ Waaye Yàlla moom, ni mu firndelee cofeelam ci nun, moo di, ba nu dee ay bàkkaarkat, ca la nu Almasi deeyal!

⁹ Gannaaw joxees nañu nu àtteb ñu jub ndax deretam ji tuuru nag, ñaata yoon lees nuy gënatee musal ci am sànj ndax moom? ¹⁰ Ndegam ba ñu dee ay bañaaley Yàlla lees nu jubalee deewug Doomam, ñaata yoon lees nuy gënatee musale ag dundam, gannaaw ba ñu nu jubalee ak Yàlla? ¹¹ Te yemunu ci, xanaa di sagoo Yàlla itam ndax sunu Boroom Yeesu Almasi, mi nu jubale ak moom.

Aadamaa nu xañ bakkan, Yeesu delloo nu ko

¹² Bàkkaar moo jaare ci kenn nit dugg ci àddina*, dee jaare ci bàkkaar, dikk, ba dikkal ñépp, ndax ñépp a bàkkaar. ¹³ Bàkkaar a ngi woon ci àddina ba ca janti yoonu Musaa, waaye deesul waññale bàkkaar te aw yoon amul. ¹⁴ Teewul la dale ca Aadama ba ca Musaa, ci kaw àddina sépp la dee doon nguuru, ba ci kaw ñi bàkkaarul noonee Aadama xette woon ndigal. Aadama mooy takkndeeru ki doon dikk.

¹⁵ Waaye ni moyug Aadama deme, yiwu Yàlla demewu ni. Moyug kenn nit, Aadama, tax na ñu bare dee; waaye yiwu Yàlla ak mayug yiw gu kenn nit, Yeesu Almasi, ñaata yoon la gënatee baawaan, ñeel nit ñu bare? ¹⁶ Ni njeexitalu tooñu kenn nit deme, laa ne, mayu Yàlla demewu ni. Benn bàkkaar moo waral àtte bi indi mbugal. Waaye moy yu bare moo waral may gi teggi tuuma. ¹⁷ Moyug kenn nit ki, ci la dee jaare ci kenn nit kooku, ba falu, kon ñi jot ci xéewalu yiw, ba jagoo àtteb njub, ñaata yoon lañuy gënatee falu ci biir dund gu ñu ame ci keneen nit kiy Yeesu Almasi?

¹⁸ Kon nag noonee moyug kenn jure mbugalu nit ñépp daal, noonu la jenn jëfu njekk† jurale ñépp dundin wu yees ci kaw àtteb njub bu leen jenn jëf ja may. ¹⁹ Noonee déggadig kenn nit taxe ñu bare doon ay bàkkaarkat, noonu it la déggug ndigalu kenn nit taxe ñu jox ñu bare àtteb nit ñu jub.

²⁰ Yoonu Musaa moo dikk ngir fésal barewaayu moy, waaye fu bàkkaar bare,

* 4:17 4.17 Seetal ci Njàlbéen ga 17.5. † 4:18 4.18 Seetal ci Njàlbéen ga 17.5. ‡ 4:23 4.23 Seetal ci Njàlbéen ga 15.6. * 5:12 5.12 Seetal ci Njàlbéen ga 3.17-24. † 5:18 5.18 Seetal ci Room 3.25.

aw yiw gën faa bareeti, ²¹ ba tax na, noonee bàkkaar doone woon buur, ndax dee gi mu yilife ñépp, ni la aw yiw wuutoo, di buur moom itam, ndax àtteb njub gi aw yiw jural nit ñi, ba jëme leen ci texe gu sax dàkk, ci sunu ndimbalal Boroom Yeesu Almasi.

6

Bàkkaar yilifatul gëmkatub Yeesu

¹ Ana lu loolu di tekki nag? Ndax kon danuy wéye bàkkaar, ngir yiwu Yàlla gëna yokku? ² Mukk kay! Nun ñi ndee tàggale ak bàkkaar ba noppi, ana nu nuy saxootee bàkkaar? ³ Dangeena umple ne mboolem nun ñi ñu sóob ci Yeesu Almasi, cig deeyam lañu nu sóobaale? ⁴ Ci sóobu googu lañu nu boole ak moom suul, ngir noonee Almasi dekke ci màggug Baay bi, nun itam nu dekki bay dund dundin wu yees.

⁵ Gannaaw dees noo bennale ak moom ci dee gu ñu nirule ak deeyam, dees nuu bennale itam ak moom ci ndekkite lu niru ndekkiteem. ⁶ Li nu bir moo di nun ña woon démb, ca bantub Yeesu ba lees nu daajaale, ngir xewil sunu yaramu bàkkaar, ba nu noppee doon ay jaam, bàkkaar di sunub sang. ⁷ Ndax ki dee ba noppi, joxees na ko àtteb ku jub, mu tàggook noteelu bàkkaar.

⁸ Gannaaw noo deeyandoo ak Almasi nag, gëm nanu ne nooy dundandoo ak moom. ⁹ Ndax kat xam nanu ne Almasi mi dekki dootu dee, te ndee manalatu ko dara. ¹⁰ Deeyam ga mu dee ca la deeyal bàkkaar benn yoon ba faww, te dund gi mu y dund tey, Yàlla la koy dundal.

¹¹ Naka noonu, yeen itam jappeleen seen bopp nit ñu deeyal bàkkaar, te di dundal Yàlla, ci Yeesu Almasi. ¹² Kon nag bu bàkkaar yilif seen yaramu ndee wii, ba di leen nanguloo ay xemmemtéefam yu bon. ¹³ Buleen jébbal seeni cér bàkkaar, mu def leen juntuukaayi njubadi; gannaaw yeena dekki bay dundaat, jébbal-leen Yàlla seen bopp te jébbal ko seeni cér, ngir def leen ay juntuukaayi njub. ¹⁴ Ndax kat bàkkaar yilifatu leen, nde du ci kilifteefu yoonu Musaa ngeen nekk, waaye ci aw yiw ngeen tàbbi.

Ku gëm Yeesu, ag njub ngay surgawu

¹⁵ Ba ci lan boog? Ndax kon danuy bàkkaar, gannaaw du ci kilifteefu yoonu Musaa lanu nekk, waaye ci aw yiw lanu tàbbi? Déet kay! ¹⁶ Xanaa xamuleen ne képp koo jébbal sa bopp, nangul ko, ab jaamam nga? Yaar ngeen diy jaam, bàkkaar di seen sang, jëme leen ci ndee; mbaa ngeen déggal Yàlla, mu jox leen àtteb ñu jub. ¹⁷ Waaye cant ñeel na

Yàlla, nde ay jaami bàkkaar ngeen woon, waaye gannaaw gi, seenub xol ngeen déggale misaalub àlluwa, ji ngeen di ndénkaaneem. ¹⁸ Noonu lees leen yiwee, tàggale leen ak noteelu bàkkaar, ngeen doon ay surgay njub.

¹⁹ Ni ko nit mana dégge rekk, ni laa leen woyofalale kaddu gii, ndax seen néew dooley nitu neen. Noonee ngeen jébbale woon seeni cér, def leen ñuy jaami sobe, ak ndéngte gu jur ndéngte, noonu ngeen wara jébbale seeni cér, def leen ñuy jaami njub gu jur sellnga. ²⁰ Ba ngeen dee jaami bàkkaar, teewuleen wooka moom seen bopp, ci seen digganteek njub. ²¹ Seen jéfi démb ja leen gacceel tey, ana njariñ lu mu leen jural? Mujug jéf ja de, seenug dee la doon doon. ²² Waaye tey bi ñu leen yiwee, ba ngeen doon ay surgay Yàlla, ag sellnga la leen loolu jural, te muj ga di texe gu sax dàkk. ²³ Ndaxte peyooru bàkkaar mooy dee, waaye yiw wi Yàlla di maye mooy tey gu sax dàkk fi Almasi Yeesu, sunu Boroom.

7

Yoonu Musaa wàcc na gëmkatub Almasi

¹ Am, bokk yi, yeen ñi xam yoon wi laay waxal, dangeena umple ne yoon yiliful nit ki lu moy ci giiru dundam? ² Dafa mel ni ndaw suy séy; li feek jékkëram di dund, yoon a yeew buumu jékkëram ci baatam. Waaye su jékkër ji deeyee, ndaw si teqlikoo na ak yoon wi ko yeewoon buumu jékkëram. ³ Kon nag, li feek jékkëru ndaw si di dund, su séyee ak geneen goor, ab jaalookat lees koy wax. Su jékkër ji deeyee nag, yoon yiwi na ndaw si, te su séyee ak keneen, du doon njaaloo.

⁴ Noonu la deme ak yeen itam, bokk yi. Yaramu Almasi wi ngeen bennool, ci ngeen doone ñu deeyal yoonu Musaa. Noonu ngeen doone moomeelu keneen, te kooku mooy ki dekki, ngir nu meññ njariñ lu ñeel Yàlla. ⁵ Ba nu toppee sunu bakkam, sunu bëgg-bëgg yu bon yi ndigali yoonu Musaa yee, ñoo daan liggéey ci sunuy cér, ngir nu meññ lu nu jëme ci ndee. ⁶ Waaye tey ci sunu digg ak yoon wi nu ténku woon, la nu di ñu dee, ba teqlikoo ak moom. Moo tax nu doon ay jaam yu tegoo kilifteef gu yees, gi Noowug Yàlla indi, gannaaw ba nu wàccoo ak kilifteefu mbindu yoonu Musaa ma woon.

Yoonu Musaa moo wone ne bàkkaar moo yéees

⁷ Ana lu loolu di tekki? Xanaa kon yoonu Musaa bàkkaar la? Mukk kay! Waaye yoonu Musaa moo ma xamal luy bàkkaar. Ndax kat su dul woon ak yoon

wi ne: «Bul xemmemtéeŋ yéfi jaambur*,» kon xemmemtéeŋ sax duma xam lu mu doon. ⁸ Waaye bàkkaar moo jaare buntub ndigalu yoon, ba yee ci man mboolemi xemmemtéeŋ yu bon. Ndax kat, su yoonu Musaa amul woon, bàkkaar di lu dee. ⁹ Man de, bu jèkkoon, ba ma xamagul yoonu Musaa, teewul woon may dund. Waaye ba yoonu Musaa dikkee, ca la bàkkaar ne xiféet, di dund, ¹⁰ man nag, ma dee. Kon ndigalu yoon wi wara jème ci ag dund, moom ci boppam moo ma mujj jème ci ndee. ¹¹ Bàkkaar moo ma jekkoo ndigalu yoon, ba nax ma, te ndigalu yoon la ma reye it.

¹² Kon yoonu Musaa lu sell la, ndigalam di lu sell, te jub te baax. ¹³ Lu baax loolu di yoonu Musaa, xanaa kon moo ma taxa dee? Déet kay! Bàkkaar moo feeñale noonu meloom; moo jéfandikoo lu baax, ba rey ma, ngir ndigalu yoon di juntukey bu bàkkaar fésale gépp mbonam gu jéggi dayo.

Ab gëmkat namm na lu mu tëlee jéfe

¹⁴ Xam nanu ne yoonu Musaa ci Yàlla la bokk, te man may nitu suuxu neen, dib jaam bu ñu jaay bàkkaar. ¹⁵ Xawma sax lu waral may jéfe ni may jéfe; li ma namm, du loolu laay jéfe, waaye li ma bañ, moom laay jéfe. ¹⁶ Gannaaw li ma buggul, moom laay def nag, juboo naa ak yoonu Musaa ci dëggal ne yoonu Musaa baax na. ¹⁷ Kon nag dootu man maay jéfe noonu, waaye dooley bàkkaar bi ci man la. ¹⁸ Xam naa ne man, sama bindu suuxu neen wii, lenu lu baax dëkku ci. Yéene jaa ngeek man, kàttanu jéfe lu baax moo fi nekkul. ¹⁹ Ndax kat du lu baax li ma namma jéfe laay jéfe, waaye lu bon li ma nammul, moom laay jéfe. ²⁰ Te su dee li ma nammul, moom laay def, kon kay dootu man maa koy def, waaye dooley bàkkaar bi dëkk ci man moo koy def.

²¹ Takk bi ma ci gis daal mooy lii: bu ma nammee def lu baax, lu bon a may teewalsi. ²² Ndaxam ci sama biir xol, yoonu Yàllaa ma neex. ²³ Waaye gis naa ci samay cér, weneen yoon wuy xeex ak yoon wi samam xel jubool, te yoon woowoo ma jàpp njaam, jébbal ma dooley bàkkaar bi dëkke samay cér. ²⁴ Céy maaka réy aw tiis! Ana ku may wallook sama yaramu ndee wii? ²⁵ Waaye cant ñeel na Yàlla mi nuy walloo jëmmu Yeesu Almasi, sunu Sang.

Kon daal man, ci sama bopp, ci sama wàllu xel, yoonu Yàlla laay surgawu, waaye ci sama wàllu yaramu suux wii, yoonu bàkkaar laay surgawu.

8

Noowug Yàlla moo jiite gëmkat bi

¹ Kon nag léegi, amul benn daan bu ñeel ñi bokk ci Almasi Yeesu. ² Ndax kat, dooley Noo giy maye bakkan te nekk ci Almasi Yeesu moo la yiwi, ba nga mucc ci dooley bàkkaar ak ndee. ³ Li yoonu Musaa tële woon ndax néew dooley nitu suuxu neen, mooy lii Yàlla def: Doomam la yónni, mu dikke melow nit, te nit di bàkkaar, di suuxu neen, ngir Doomam fajtal mbirum bàkkaar. Yaramu suux wu nit kooku la Yàlla sottale mbugal gi war ci bàkkaar, ⁴ ngir njub gi yoonu Musaa laaj mana sotti ba mat sékk ci nun, ñi toppatul sunu bindu suux, xanaa Noowug Yàlla.

⁵ Ndax kat ñi topp seen bindu suux, mbiri bakkan donj lañu xinte, waaye ñi topp Noowug Yàlla ñoom, mbiri Noowug Yàlla mooy seen xinte. ⁶ Xintey bakkan nag ci ndee lay jème, waaye xintey Noowug Yàlla ndund ak jàmm lay jur. ⁷ Ndaxte boroom xintey bakkan ab noonu Yàlla la, nde dëggalul yoonu Yàlla, te manu ko sax. ⁸ Moo tax ñi wéye seen bindu suuxu neen duñu mana neex Yàlla.

⁹ Yeen nag nekkatuleen ci kilifteefu bindu suuxu neen, waaye ci kilifteefu Noo gi ngeen nekk, ndegam kay Noowug Yàllaa ngi màkkaanoo ci yeen. Ku amul Noowug Almasi, kooku du nitam. ¹⁰ Su Almasi nekke ci yeen, seen yaram dina dee moos ndax bàkkaar, waaye du tee seenug noo di dund, ndax àtteb njub bi ngeen am ba noppi. ¹¹ Noowug ki dekkal Yeesu moo màkkaanoo ci yeen. Kon nag ki dekkal Almasi mooy dekkal itam seen yarami ndee, ndax Noowam googu màkkaanoo ci yeen.

¹² Kon nag bokk yi, bor topp na nu, waaye du sunu bindu suux lanu ameel lenu lu nu taxa topp sunu bakkan; ¹³ Ku topp bakkanam, fàww mu dee, waaye ku rey jéfi yaramam ci ndimbalal Noowug Yàlla, dina texe. ¹⁴ Ndax kat, mboolemi ñiy dox ci njiital Noo gi, ñooñu ay doomi Yàlla lañu. ¹⁵ Mayeesu leen noo gu leen di desloo cig njaam, ba tax leena dellu cig ragal, waaye Noowug doom yu ñu doomoo, moom lees leen may, te looloo nu tax di wooye Yàlla: «Abba*,» mu tekki «Baay.» ¹⁶ Te Noowug Yàlla, moom ci boppam, moo mànkoo ak sunu noowug bopp, di seede ne ay doomi Yàlla lanu. ¹⁷ Gannaaw ay doom lanu nag, ay boroom cér lanu, ay boroom cér yu Yàlla sédd, cér yu nu bokk ak Almasi, gannaaw noo bokk ak moom ab coono tey, ngir bokk ak moom teraangay èllég.

* 7:7 7.7 Seetal ci *Mucc ga* 20.17.

* 8:15 8.15 Abba baatu arameen la.

Teraangay ëllëg ñeel na gëmkat ñi

¹⁸ Jàpp naa ne sunu coonob tey du dara, soo ko xoollee ci teraanga ji ñu nuy feeñalal ëllëg. ¹⁹ Càkkéefu àddinaa ngi séentu, ndax yàkkamti bés ba doomi Yàlla di feeñ. ²⁰ Ndax kat, càkkéef gépp, li ñuy déggal neenug neen la, te du seen coobare, waaye ki leen ci ténk la neex, ba tax ñuy yaakaar, ²¹ ñoom ñi bokk ci càkkéef googu itam, ne dees na rengi seen buumi njaam gi leen ndee ak yàqutey yaram ràng, ngir ñu am cér ci goreelug doomi Yàlla yi, am cér ci seen teraanga.

²² Xam nanu ba fii nu tollu ne mboolem càkkéef gaa ngi binni ndax mitit, ni kuy matu. ²³ Te du càkkéef gi rekk, waaye nun ci sunu bopp itam, ci lanu, nun ñi jot ab dawal ci Noo gi, nun ci sunu bopp sax nu ngi binni sunu biir xol, ndax yàkkamtee jot céru doomi Yàlla, ba sunu njotug yaram mat. ²⁴ Ndax kat sunu mucc, yaakaar la taxaweegum, te yaakaar joo teg sa bët, dootu yaakaar. Li nit ki teg bëtam, nu mu koy yaakaaratee? ²⁵ Li nu gisul kay lanuy yaakaar, di ko séentook a muñe yaakaar ji.

²⁶ Te itam Noo gi moo nuy dimbali ndax sunug néew doole, nde xamunu sax li jaadoo sàkku ci sunuy ñaan, waaye Noowug Yàlla moo nuy tinule ay onk yu wees kàddug làmmiñ. ²⁷ Te kiy xool li ci biir xol yi, xam na liy xintey Noo gi, nde ni ko Yàlla bégge, ni la Noo giy tinool ñu sell ñi.

²⁸ Te itam nag xam nanu ne Yàlla mooy def mboolem lu xew, daje ba jur njariñal ñi sopp Yàlla, ñi mu woo, noonee ko ab dogalam namme. ²⁹ Ndax ñooñu Yàllaa leen ràññee woon lu jiitu, te it la mu dogaloon lu jiitu ci ñoom moo di ñu niru Doomam, ngir Doomam di taaw, ci biir rakk yu bare. ³⁰ Ñi Yàlla tuddaloon loolu lu jiitu, moo leen woo itam; ñooñu mu woo, moo leen jox itam àtteb ñu jub; te ñooñu mu jox àtteb ñu jub, moo leen darajaal itam.

Cofeelu Yàllaa ngi ci Almasi

³¹ Ana lu nuy waxati nag? Gannaaw Yàllaa ànd ak nun, ku nu manal dara? ³² Moom mi nu bañalul Doomu boppam, xanaa jooxeel nu ko, nun ñépp, ana nu mu nuy baña baaxee gépp yiw, boole ci? ³³ Ñi Yàlla taamu, ana ku leen di tuumaal? Yàlla de mooy jox nit àtteb ku jub. ³⁴ Ana kuy tegeb daan? Almasi Yeesu de moo dee, rax ci dolli, mu dekki, te moo toog fa ndijooru Yàlla, di nu fa ñaanal! ³⁵ Ana ku nuy

tàggaleek cofeelu Almasi? Du ay nattu, te du njàqare, du it coonoy bundxatal, mbaa ab xiif, mbaa rafle, te du genn aaytéef, ba cib saamar. ³⁶ Noonu la Mbind mi indee ne:

«Yaa tax ñu yendu noo bóom,

dees noo jàppe ni xar yu ñuy tēr†.»

³⁷ Waaye ci mboolem lu nu dikkal, nooy am ndam lu mat sèkk, ci ndimbalal ki nuy soppeem. ³⁸ Ndax kat bir na ma ne du ag ndee, du ag ndund, du ay malaaka, duy boroom nguur, du tey, du ëllëg, duy boroom doole†, ³⁹ du lu kawe, du lu xóot, mbaa meneen mbindeef mu mu doon; dara manu noo tàggale ak cofeel, gi nu Yàlla won ci Almasi Yeesu sunu Sang.

9

Yàlla moo taamu bànni Israyil

¹ Dëgg laay wax, Almasi seere na ko, fenuma. Sama xol moo ma seereele Noo gu Sell gi, ne lii may wax dëgg la: ² Li may wax moo di tiis wu réy laa am, ak naqaru xol wu dakkul, ³ nde man doon naa ñaana alku sax, daggoo ak Almasi, ngir jàmmi sama bokki xeet, sama bokki deret.

⁴ Ñooñu di xeetu Israyil wu xéewloo céru doon doomu Yàlla, xéewloo daraja, xéewloo kóllère yi, ak ndigali yoon wi, ak liggéeyu jaamu Yàlla gi, ak dige yi; ⁵ ñoo xéewloo itam maam ya; ci wàllu doom aadama it, ci ñoom la Almasi soqikoo, di Yàlla, tiim lépp, te yelloo cant ba fàww. Amiin.

⁶ Du caageenu kàddug Yàlla moo neen, ndax ñi bokk ci xeetu Israyil ñépp duñu Israyil tigi. ⁷ Te it sèti Ibraayma yépp bokkuñu ci askanam, waaye li Mbind mi indi moo di: «Ci Isaaxa lees di tudde saw askan*.» ⁸ Loolu di tekki ne du sèti Ibraayma yi ci wàllu deret ñoo di doomi Yàlla, waaye doom yi seenub juddu déppoo ak digeb Yàlla, ñoom lañu jàpp ne ñooy askanu Ibraayma. ⁹ Ndax kat kàddug dige ba nii la jibe: «Nègèni sii déwén laay délsi, te Saarata dina am doom ju góor†.»

¹⁰ Te yemul foofu rekk, waaye Rebeka it moo am ay seex yu genn góor jur, muy sunu maam Isaaxa. ¹¹ Doom ya nag juddooguñu woon bay def lenn lu baax, mbaa lu bon. Yàlla moo defe noonu ngir wéyal dogal bu déppoo ak tannéefu boppam ¹² bu ajuwul ci kawi jéf, xanaa ci kiy woote. Rebeka† la kàddu gii dikkal: «Mag ji mooy surgawu rakk ji§.» ¹³ Noonu la Mbind mi indee ne: «Askanu Yanqóoba

† 8:36 8.36 Seetal ci *Sabóor* 44.23. † 8:38 8.38 Seetal ci *Efes* 6.12. * 9:7 9.7 Seetal ci *Njàlbéen ga* 21.12.

† 9:9 9.9 Seetal ci *Njàlbéen ga* 18.10, 14. † 9:12 9.12 Rebeka mooy soxnas Isaaxa. § 9:12 9.12 Seetal ci

Njàlbéen ga 25.23. * 9:13 9.13 Seetal ci *Malasi* 1.2-3.

rakk ji laa sopp, foñ askanu Esawu mag ji* .»

Sànjum Yàlla rax na yèrmande

¹⁴ Ana lu nu ci mana wax nag? Yàlla daa wàcc foofu yoon? Mukk kay! ¹⁵ Ndax kat moo noon Musaa:

«Maay yèrèm ku ma neex,

te maay ñeewante ku ma neex†.»

¹⁶ Kon nag mbaaxug Yàlla ajuwul ci coobarey nit ki, mbaa aw ñaqam, waaye lépp yèrmandey Yàlla la. ¹⁷ Mbind mi moo indi kàddu ga dikkaloon Firawna, ne ko: «Maa la yékkati, te li ko waral mooy lii ci boppam: ngir fésal sama doole ci yaw, ngir itam ñu sàbbaal sama tur ci àddina sépp†.» ¹⁸ Kon nag Yàlla mooy yèrèm ku ko neex, te ku ko neex lay dègéral xolam.

¹⁹ Xam naa dinga ma ne: «Ana kon lu Yàlla di sikkeeti? Coobarey Yàlla, ana ku koy fanq?» ²⁰ Waaye yaw nit ki, yaay kan bay weddi Yàlla? Ndax kèf ku ñu tabax dina ne ka ko tabax: «Lu tax nga sàkke ma nii?» ²¹ Tabaxkatu ndab bi daa amul sañ-sañ ci ban bi muy liggéeye, ngir tabax ci bennub tooyal, lenn ndabal teraanga, ak leneen ndabal njoogaan?

²² Yàlla mi namma wone am sànjam, xamle dooleem, su dee moo muñal lool ay ndab yu yelloo am sànjam, te seen sànkute ñoroon xomm nag? ²³ Su dee Yàlla moo def loolu nag ngir fésal mæggaayu teddngaam, ñeel ay ndab yu xéewloo yèrmande, te mu waajaloon leen teraanga? ²⁴ Nun ci ndabi yèrmande yi Yàlla woo lanu bokk, te du ci Yawut yi rekk lees nu seppee, waaye ci jaambur ñi dul Yawut itam. ²⁵ Moom la wax it ci téereb Ose ne:

«Ñi dul woon sama ñoñ, ñoom laay wax sama ñoñ, ñooñu dul woon samab xejj, ñoom laay xejjoo. §»

²⁶ «Te foofa ñu leen noon: “Yeen, dungeen sama ñoñ,” fa lees leen naa: “Yeenay doomi Yàlla jiy dund*.”»

²⁷ Ci mbirum Israyil la Yonent Yàlla Esayi itam xaacu woon ne:

«Su bànni Israyil tolloo ni feppi suufas géej sax,

as ndes a ciy mucct†.

²⁸ Ndax kàddu gi Boroom bi wax, moo koy sottal ci lu gaaw ci kaw suuff†.»

²⁹ Mooy itam la Esayi waxoon lu jiitu, ne:

«Su nu Boroom gàngoori xare yi waccalul woon kuutaay, ni Sodom lanuy mel, Gomor lanuy neex-ool§.»

Bànni Israyil dèggoowul ak xibaaru jàmm bi

³⁰ Ana lu nu ci mana wax? Xeet yu dul Yawut te sàkkuwuñu woon ag njub, ñoo jagoo àtteb njub, te mooy njub gi ngëm di maye. ³¹ Waaye xeetu Israyil wi sàkku woon yoonu njub, ñoo moy yoon wi. ³² Ndax lan? Ngëm lañu sukkandikoowul, xanaa ay jéf. «Doj wuy fakktale,» moom lañu fakktaloo. ³³ Noonu la Mbind mi indee ne:

«Maa ngii di dèj fi Siyoñ doj wuy fakktale, mooy xeer wuy daaneel,

waaye ku ko wéeroo ngëm, doo rus*.»

10

¹ Bokk yi, sama yéeneey xol, ak ñaan gi may ñaanal Israyil ci Yàlla moo di ñu muc. ² Ñoom laa seedeel seenug parlute ci Yàlla, waaye dañu koo tegul ci xam-xam bu doy. ³ Yoonu njub gi Yàlla di joxe nit ki, àtteb ku jub, moom lañu umple tey jéema dèggal seen njubteg bopp. Moo tax nanguluñu njubte gi Yàlla di maye. ⁴ Ndax kat Almasi moo sottal yoonu Musaa, ngir àtteb ku jub ñeel képp ku ko gëm.

Coobarey Yàlla mooy ñépp muc

⁵ Njub gi sàmm ndigali yoon di maye, li ci Musaa bind moo di: «Kuy jéfe digal yooyu, yaay dund ndax ñoom*.» ⁶ Waaye njub, gi ngëm di maye, li muy digle mooy:

«Bul wax ci sa xel, ne: “Ana kuy yéeg fa kaw?”»

nde loolu mooy Almasi wàcc ngay sàkku.

⁷ «Bul ne it: “Ana kuy wàcci njaniiw?”»

nde loolu mooy Almasi dekkiwaat ngay sàkku. ⁸ Li mu wax moo di:

«Kàddu gaa ngi ci sa wet; mu ngi ci saw làmmiñ ak ci sa xol†.»

Te loolu mooy kàddug ngëm gii nuy xamle.

⁹ Saw làmmiñ, soo ci biralee ne Yeesu moo di Boroom bi, *sab xol* it, nga gëm ci ne Yàlla dekkal na Sang Yeesu, dinga muc.

¹⁰ Ndax kat ab xol lees di gême, ba am àtteb ku jub, te aw làmmiñ lees di birale ngëm gi ba muc. ¹¹ Mbind mi moo ne:

«Képp ku ko gëm, doo rus†.» ¹² Ag wuutale amul diggante ab Yawut, ak jaambur bu dul Yawut; ñépp a bokk benn Boroom biy yéwéne mboolem ñi koy woo wall. ¹³ Ndax

† 9:15 9.15 Seetal ci *Mucc ga* 33.19. † 9:17 9.17 Seetal ci *Mucc ga* 9.16. § 9:25 9.25 Seetal ci *Ose* 2.25. * 9:26 9.26 Seetal ci *Ose* 2.1. † 9:27 9.27 Seetal ci *Esayi* 10.22. † 9:28 9.28 Seetal ci *Esayi* 10.23. § 9:29 9.29 Seetal ci *Esayi* 1.9. * 9:33 9.33 Seetal ci *Esayi* 8.14; 28.16. * 10:5 10.5 Seetal ci *Sarxalkat* yi 18.5. † 10:8 10.6-8 Seetal ci *Baamtug Yoon wi* 9.4; 30.12-14. † 10:11 10.11 Seetal ci *Esayi* 28.16. § 10:13 10.13 Seetal ci *Yowel* 3.5.

kat waxees na ne: «Képp ku woo Boroom bi wall ciw turam, mooy rawŦ.»

¹⁴ Waaye nees di wooye koo gëmul? Nees di géme koo déggul turam? Nees di dégge turam, te yégleesu ko? ¹⁵ Nees di yéglee xibaar, te yebaleesu la? Noonu la Mbind mi indee ne: «Ñeeka rafeti tànk, ndaw yii di yégleesi xibaari jàmm*!»

¹⁶ Waaye du ñépp a nangul xibaaru jàmm bi; moo tax Esayi ne: «Boroom bi, ana ku gëm sunub dégtal†?» ¹⁷ Kon boog ngëm ci dég-dég lay juddoo, dég-dég ba bawo ci kàddug waare gi jem ci Almasi.

¹⁸ Waaye dama ne: xanaa dañoo déggul? Ahakay! Ndax

«Àddina sépp la seen baat jibal, cati suuf sépp la seen kàddu dajal†.»

¹⁹ Ma neeti: xanaa bànni Israyil dañoo xamul? Ahakay! Musaa moo leen jëkkoona jottli la Yàlla noon:

«Yeen, maa leen di fiireloo xeet wu tekki-wul dara, ci waasow naataxuuna laa leen di merlooŦ.»

²⁰ Esayi it am fit ba ne:

«Ñi ma seetul woon, gis nañu ma, ca ña ma laajul woon laa feeñe*.»

²¹ Israyil nag la wax ci mbiram ne:

«Bëccëg bëpp laa yendoo tàllal samay loxo, askanu fippukat wu déggadi†.»

11

Yàlla waccul bànni Israyil

¹ Ma ne kon, xanaa Yàlla daa wacc ñoñam? Mukk kay! Man ci sama bopp ci Israyil laa bokk, askanoo ci Ibraayma, giroom ci Beñamin. ² Yàlla waccul ñoñam ñi mu raññee woon lu jiiu. Am dangeena xamul li Mbind mi indi ci mbirum Ilyaa, ba mu dikkee Yàlla njàmbat lu jem ci Israyil? Mu ne: ³ «Boroom bi, say yonent, rey nañu leen; say sarxalukaay, màbb nañu leen; man doñj maa fi des, te ñu ngi wut sama bakkan.*» ⁴ Ana lu ko Yàlla tontu? Da ne: «Beral naa sama bopp juróom ñaari junniy (7 000) nit ñu sujjóotaluloon Baal tuur mi†.» ⁵ Kon nag naka noonu itam ci jamonoy tey jii, aw ndes a ngi fi, te ci kaw yiw lees leen taamoo. ⁶ Gannaaw aw yiw a tax nag, dootu seen peyu jëf, lu ko moy aw yiw noppee doon aw yiw.

⁷ Kon léegi nag? Li am moo di li bànni Israyil doon wut, amuñu ko. Ñi ñu taamu ñoo ko am, ña ca des, seenum xel a dërkiis.

⁸ Noonu lees binde ne:

«Yàlla moo leen jox xelum ngëmment, ak bët yu dul gis, ak nopp yu dul dégg, ba bésut tey jii†.»

⁹ Daawuda it wax na ne:

«Yal na seen ndab di seenum yeer, boole ci dib caax, te di fiir gu ñuy daanu, muy seenub yool.»

¹⁰ Yal na seeni gët giim, ba duñu gisati, yal nañu ségg ba fàwwŦ.»

Lu jem ci muccug ñi dul Yawut

¹¹ Moo tax ma ne xanaa ba bànni Israyil téréfee, jëll bu ñu dul jógati lañu daanu? Mukk kay! Waaye tooñug bànni Israyil moo waral muccug jaambur ñi dul Yawut, ba tax bànni Israyil siis leen.

¹² Gannaaw tooñug bànni Israyil mooy xéewalu àddina si, seenug néewle di xéewalu jaambur ñi dul Yawut, kon bu bànni Israyil yembee, ndaw xéewal gu génatee baawaan!

¹³ Léegi nag yeen jaambur ñi dul Yawut laay waxal. Gannaaw maay ndaw li ñu yebal ci jaambur ñi dul Yawut, samab yónnent laay teral. ¹⁴ Jombul sama liggéey dina yee fiiraangey sama bokki Yawut ñi, ba ñenn ci ñoom mucc. ¹⁵ Ndax kat ba Yàlla dàqee Israyil, ca la àddina juboo ak Yàlla. Kon nag bu leen Yàlla délloosee, ana lu muy jur lu moy ndee-ndekki? ¹⁶ Ndax kat ab jooxe bu génnée ci tooyalub sunguf, di ndoortel meññeef, su boobu jooxe sellée, tooyalub sunguf bëpp ay sell. Ndax su reenu garab sellée, car ya it sell.

¹⁷ Waaye su ñu tenqee lenn ci cari oliwu kër, te yaw ngay caru oliwu àll, ñu indi la, jabtal ci oliwu kër gi, nga wutu car ya ca fàqee, ba mana xéewloo meen miy wale ci reenu oliwu kër gi, di ko dundal, ¹⁸ bumu tax nga bàkku ci kaw car ya fàqee. Soo dee bàkku, xamal ne du yaa yenu reen bi, waaye reen bee la yenu.

¹⁹ Xam naa dinga ne: «Car yooyu, dees leena tenqi, ngir jabtal ma.» ²⁰ Dégg it; waaye ngëmadi moo leen fa tenqee, te yaw, ngëm a la fa teg. Bu ko réy-réyloo, waaye ragalal. ²¹ Ndegam cari judduwaale ya la Yàlla déegul, moytul mu bañ laa déeg yaw itam.

²² Xoolal kon ni Yàlla baaxe, ak ni mu ragloo; ci ñi déggadi la raglu, baax ci yaw,

* **10:15** 10.15 Seetal ci *Esayi* 52.7. † **10:16** 10.16 Seetal ci *Esayi* 53.1. ‡ **10:18** 10.18 Seetal ci *Sabóor* 19.5.

§ **10:19** 10.19 Seetal ci *Baamtug Yoon wi* 32.21. * **10:20** 10.20 Seetal ci *Esayi* 65.1. † **10:21** 10.21 Seetal ci

Esayi 65.2. * **11:3** 11.3 Seetal ci *1.Buur ya* 19.10, 14. † **11:4** 11.4 Seetal ci *1.Buur ya* 19.18. ‡ **11:8** 11.8 Seetal

ci *Baamtug Yoon wi* 29.3 ak *Esayi* 29.10. § **11:10** 11.9-10 Seetal ci *Sabóor* 69.23-24.

ndegam cig mbaaxam nga sax; lu ko moy dees na la tenqi yaw itam. ²³ Car ya fàqe woon itam, su ñu wéyewul ngémadi, dees leen di delloo ca ndey ja, nde Yàlla man na leen caa saxalaat. ²⁴ Ndax kat, ndegam yaw lañu tenqee ci oliwu àll gi, jabtal la ci oliwu kër gi dul sa ndey, astamaak car yi oliwu kër gi di seen ndey, nde saxalaat leen ca mooy gëna yombati.

Yàlla ñépp la yërëm

²⁵ Bokk yi, moytuleena defe ne seen xel mu rafet a leen may li ngeen am. Bugguma ngeen umple mii mbóot: Ag déggadi moo dikkal lennati bànni Israyil, ba kera xeet yi dul Yawut duggsi, ba seenub lim mat. ²⁶ Su boobaa nag, bànni Israyil gépp ay mucc, noonee ko Mbind mi indee ne:

«Siyon la wallukat bay jóge,
mooy tenqee ngémadi ci askanu
Yanqóoba.

²⁷ Looloo doon sama kólléreek ñoom,

kera ba may far seeni bàkkaar*.»

²⁸ Ci wàllu xibaaru jàmm bi, ay noon la Yawut ñi taxawe, te muy xéewal ci yeen ñi dul Yawut. Waaye ci wàllu dogal bi taamu Yawut ñi, ay soppe lañu, te seeni maam tax. ²⁹ Ndax Yàlla kat, ay mayam akub wooteem, lenn du ci toxu. ³⁰ Yeena déggadi woon, waaye tey daj ngeen yërmande, ndax déggadig Yawut yi. ³¹ Noonu itam la Yawut yi déggadee tey, ba ni ngeen daje yërmande, ñoom it ñu daje ni yërmande. ³² Yàlla moo tēj nit ñépp ci seenug déggadi, ngir yërëm leen ñoom ñépp.

Yàllaa yellow tednga

³³ Céy xóotaayub koomu Yàlla ak xel ma, ak xam-xam ba! Deesul natt ay dogalam, deesul ràññee ay jéfinam!

³⁴ «Ana ku xam xalaatu Boroom bi?

Ana ku ko digal†?»

³⁵ «Ana ku ko dawlul lenn,

ba mu war koo delloo‡?»

³⁶ Ci moom la lépp sosoo, ci moom la lépp sottee, te moom la lépp ñeel. Moom la daraja ñeel ba fàww! Amiin.

12

Nii la gëmkat bi wara jaamoo Yàlla

¹ Kon nag bokk yi, ma ñaax leen, te yërmandey Yàlla tax, ngir ngeen jébbal ko seen yaram wépp, def ko jooxe buy dund, sell te neex Yàlla. Loolu déy mooy njaamu, gi leen war. ² Buleen roy jamonoy tey jii, waaye yeessuleen ci ni ngeen di xalaate ba

soppiku, ngir ngeen mana ràññee liy coobarey Yàlla, muy li baax, di bânneexam te mat sëkk.

³ Ma àrtu leen ci kaw yiw wi ma Yàlla may; bu kenn ci yeen teg boppam fu mu àggul, waaye xalaate leen sago, te ku nekk déppoo ak céru ngëm bi ko Yàlla sédd.

⁴ Ndax kat dafa mel ni sunu yaram wiy wenn, te cér yi bare, doonte cér yépp a wuuteek seen moroom nu ñuy liggéeye.

⁵ Noonu lanu doone ñu bare, bokk wenn yaram nun ñépp ci Almasi mi nu gëm, te ku nekk di sa cérub moroom. ⁶ Ay may yu wuute lanu am, may yu yemook céru yiw bi ñu sédd ku nekk ci nun.

Su dee biral kàddug waxyu mooy sag may, biraleel kàddug waxyu sa kemu ngëm; ⁷ su dee wàllu jàpple, deel jàpple; su dee wàllu njangle, ngay jangle; ⁸ Su dee wàllu kàddu yuy yokke, ngay wax luy yokk gëmkat ñi;

su dee wàllu joxe, deel joxe te Yàlla rekk tax; su dee wàllu jiite, taxawal temm ci liggéeyub jiite; su dee wàllu baaxe nit ñi, nay loo bége.

⁹ Na seen cofeel mucc ci ngistal, se-exluleen lu bon te ñoy ci lu baax. ¹⁰ Na leen mbéggeelug bokk taxa fonkante, te ngeen farlu ci di terlante. ¹¹ Sawarleen te baña yoqi, jaamuleen Boroom bi, ànd ceek pastéefu xol. ¹² Bégeleen seen yaakaar, di muñ ci biir tiis, tey saxoo ag ñaan. ¹³ Deeleen def seen loxo ci lu faj soxlay gëmkat ñu sell ñi, te boole ci am teraanga.

¹⁴ Ñi leen di bundxatal, ñaanal-leen leen, ñaanal-leen leen te bañ leena móolu.

¹⁵ Ñi ci mbégte, bokkleen ak ñoom seen mbégte; ñi ci naqar, ngeen bokk ak ñoom seen naqar. ¹⁶ Mänkooleen, buleen xéccu daraja, waaye nanguleena jonjoo ak ñi féete suuf, te baña jàppe seen bopp bo-

roomi xel.

¹⁷ Buleen feyantoo, fexeleen di def lu rafet, ñépp seede ko. ¹⁸ Su manee am, jàmmooleen ak ñépp, ndegam ci yeen la aju. ¹⁹ Samay soppe, buleen di feyul seen bopp, xajal-leen am sànj, am sànj fajal boppam, ndax bindees na ne: «Man maay feye, maay añale*.»

Boroom bee ko wax. ²⁰ Li mu wax kay mooy:

«Bu sab noon xiifée, jox ko mu lekk, bu maree, may ko mu naan.

Soo defee noonu, day rus, ba mel ni koo yen ay xal†.»

²¹ Bu leen lu bon man, waaye defleen lu baax, ba man lu bon.

* **11:27** 11.26-27 Seetal ci *Esayi* 59.20-21; 27.9 ak *Yeremi* 31.33-34. † **11:34** 11.34 Seetal ci *Esayi* 40.13. ‡ **11:35**

11.35 Seetal ci *Ayóba* 41.11. * **12:19** 12.19 Seetal ci *Baamtug Yoon wi* 32.35. † **12:20** 12.20 Seetal ci *Kàddu yu Xelu* 25.21-22.

13

Na ñépp déggal njiit yi

¹ Na ku nekk déggal njiit yi yor kilifteef, nde amul njiit lu bawoowul fa Yàlla, te njiit yi toog, Yàlla moo leen tabb. ² Moo tax kuy bañal njiit, tëralinu Yàlla nga bañal, te ñi bañal njiit, ñoo wool seen bopp mbugal. ³ Kuy def lu baax nag, doo ragal kilifa yi, kiy def lu bon moo leen di ragal. Soo bëggee mucc ci ragal kilifa nag, defal lu baax, jot ngërëmam. ⁴ Ndax kilifa gi mooy ndaw li Yàlla yebal ngir sa jàmm. Waaye soo dee def lu bon, ragalal, ndax kilifa gi yorul ab saamar cig neen; mooy ndawal Yàlla liy añale, te mooy jottli am sànj mu wàccal kuy def lu bon. ⁵ Moo tax nangul njiit di wartéef, ndax njariñal nangul njiit yemul rekk ci mucc ci am sànj, waaye xel mu dal a ngi ci.

⁶ Loolu moo waral it ngeen di fey galag, ndax njiit yi koy feyeeku kat, ñooy jawriñi Yàlla yi sasoo googu kilifteef. ⁷ Joxleen ku nekk li ngeen warlook moom; ku ngeen wara fey galag, feyleen ko ko; ku ngeen wara fey juuti, feyleen ko ko; ku ngeen wara weg, wegleen ko; ku ngeen wara teral, teral-leen ko.

Cofeel moo tënk yoonu Musaa

⁸ Buleen ameel kenn bor, lu moy borub soppante; ndax ku sopp sa moroom, yaa matal yoonu Musaa. ⁹ Ndax ndigal yii kat: «Buleen jaaloo, buleen bóom, buleen sàcc, buleen xemmem*,» ak leneen ndigal lu mu mana doon, ci genn kàddu gi la tënke: «Ni ngeen soppa seen bopp, nangeen ko soppa seen moroom†.» ¹⁰ Cofeel du waral kenn def moroomam lu bon; kon cofeel moo matal sèkk yoonu Musaa.

Teewlu war na gëmkat ñi

¹¹ Li tax ngeen wara gëna farlu ci loolu mooy, xam ngeen jant yi nu tollu; seen waxtuw yewwu jot na ba noppi, nde léegi lu nu mucc gëna jege ba nuy doora gëm. ¹² Guddi gi màgगत na, bët a ngi bëgga set. Kon nag nanu bàyyi jëfi lëndëmtu te ràngoo gannaayu yi ñuy xaree cig leer. ¹³ Nanu jëfe jëfin wu jekka def bëccëg; nanu sore xawaare ak màndite, sore baane bu lewul, ak yàqute yu ni mel, te sore ñaayoo ak kiñaan. ¹⁴ Waaye yiiroolen Sang Yeesu Almasi, te ngeen baña yittewoo seen bakkan, ngir di topp seeni xemmemtéef.

14

Bul sikkal sa moroom

¹ Ku ngëmam dëgëruul nag, xajooleen ko, te bañ cee càmbar gis-gis yu wuute. ² Mu mel ni tey, kii ngëmam moo ko may mu saña lekk lu nekk; kee, ngëmam lujum donj la ko ngëmam gu dëgëruul may mu lekk. ³ Kiy lekk, bumu ko xeebe ki lekkul; ki lekkul it, bumu sikk kiy lekk, ndax Yàllaa ko xajoo. ⁴ Yaw miy sikkal jaamub jaambur, yaay kan? Su baaxalee mbaa mu bonal, sangam a koy seet! Te day baaxal ndax Boroom bi man na koo baaxal.

⁵ Naka noonu kii jàpp na ne bés gën naa rafet moroom ma; kee jàpp ne bés yépp a yem. Na ku nekk seet la ko doy, te yem ca. ⁶ Ndax kiy taamu béa, Boroom bi la koy taamul; naka noonu kiy lekk, Boroom bi la koy gërëme, nde moom lay sant doora lekk; ki lekkul it Boroom bi lay sàkkoo ñàkka lekkam, te Yàlla lay sant. ⁷ Ndax kat kenn ci nun dundul ngir boppam, te kenn deewul ngir boppam. ⁸ Su nuy dund, Boroom bi lanuy dundal, su nuy dee it, Boroom bi lanuy deeyal.

⁹ Loolu sax moo waral Almasi dee, ba noppi dekki, dellu di dund, ngir ñi dee ak ñiy dund ñépp, muy seen boroom. ¹⁰ Yaw nag ana looy sikke sa mbokkum gëmkat, ak itam, ana looy xeebe sa mbokkum gëmkat? Ndax kat nun ñépp ay taxawi fa kanam jalub àttekaayu Yàlla. ¹¹ Ndaxte bindees na ne:

«Ndegam maay Kiy Dund, Boroom bee ko wax,

man la ñépp di sukkal seen bëti óom, te man Yàlla la lãmmiñu ñépp di sàbbaal*.»

¹² Kon ku nekk ci nun, yaay layool sa bopp fa Yàlla.

Bul yóbbe sa moroom bàkkaar

¹³ Kon nag bunu di seetati lu nu sikkantee, li ngeen di seet kay mooy nu ngeen fexee ba dungeen yóbbe mbokkum gëmkat lu koy fakkat, mbaa lu koy daane ci bàkkaar. ¹⁴ Xam naa nag, wér na ma it te Sang Yeesu tax, ne amul lenn lu sobewu ci wàllu boppam, ba daganula lekk; waaye ki jàppe lenn muy lu sobewu, ci moom la loola di lu sobewu. ¹⁵ Soo dee lekk lenn ba tax sa mbokk am ci lu ko naqari, noppi ngaa doxe cofeel. Bu sag lekk sànk ku Almasi deeyal. ¹⁶ Li dagan ci yaw, bu ko jariñoo ba may kenn lu mu ñaññee. ¹⁷ Ndax kat solob nguuruug Yàlla jotewul dara akug lekk mbaa ag naan, waaye solob nguuru Yàlla moo di njub ak jàmm, ak mbégte ci ndimbalal Noo gu Sell gi. ¹⁸ Noonu kat ku koy jaamoo Almasi, yaa neex Yàlla, am ngërëmal nit ñi.

* **13:9** 13.9 Seetal ci *Mucc ga* 20.13-15, 17.

† **13:9** 13.9 Seetal ci *Sarxalkat* yi 19.18.

* **14:11** 14.11 Seetal ci

¹⁹ Kon nag nanu sàkku luy indi jàmm, ak lu nu feddalantee. ²⁰ Aw ñam, bumu la yaqloo liggéeyu Yàlla. Dëgg la, wépp ñam set na, waaye lekk ga nga koy lekk, su gakkalee ngëmu keneen, def nga lu aay. ²¹ Li gën sax mooy nga baña lekk yàpp, mbaa nga baña naan biiñ, mbaa leneen lu mu doon lu mana fakkatal sa mbokkum gëmkat.

²² Yaw ci sa wàllu bopp, ngëm gi nga ci am, yemale ko ci sa bopp, fi kanam Yàlla. Ndokklee ki sikkul boppam lenn ci jëfin wu mu dogul boppam ne noonu lay jêfe. ²³ Waaye ki am xel-yaar, su lekkee, ab daan topp na ko, nde jëfewul ngëm, te lu ngëm lalul bàkkaar la.

15

Na gëmkat yiy xajoonte

¹ Nun ñi fendii ci wàllu ngëm, fàww nu xajoo tëley ñi néew doole, te baña sàkku sunu bannexu bopp. ² Na ku nekk ci nun sàkku bannexu moroomam, ci lu koy jariñ, ngir feddli ngëmam. ³ Ndax Almasi kat sàkkuwul bannexu boppam, te noonu it la Mbind mi indee ne: «Ni lay saaga, seeni saaga, ci sama kaw la dal*.» ⁴ Ndaxte mboolem lu ñu bindoon, bu jëkk, jàngal nu moo taxoon ñu bind ko, ngir Mbind mi may nu xolu muñ, te ñaax nu, ba nu am yaakaar. ⁵ Kon nag Yàlla miy maye xolu muñ, di ñaaxe, yal na leen may mánkoo gu mat sèkk, ni ko Almasi Yeesu bëgge, ⁶ ngir nu bokk jenn yéene ak genn kàddu gu ngeen sàbbaale Yàlla, sunu Baayu Sang Yeesu Almasi.

Xibaaru jàmm bi ñépp la dikkal

⁷ Kon nag, ni leen Almasi xajoo, nangeen ko xajoonte, ngir teddgay Yàlla. ⁸ Dama leen di wax ne leen, bëgga fésal ne Yàlla ku dëggu la moo waral Almasi dikk, def boppam jawriñu Yawut yi, ngir sottal dige ya Yàlla digoon seeni maam. ⁹ Leneen li indi Almasi mooy may jaambur ñi dul Yawut lu ñu mǎggale Yàlla, te muy yërmandeem. Noonu it la Mbind mi indee ne:

«Looloo waral ma sant la ci biir xeet yi, sàbbaal la†.»

¹⁰ Mu neeti:

«Yeen xeet yi, bëgandooleen ak ñoñam‡.»

¹¹ Mu dellu ne:

«Yeen xeetoo xeet, mǎggal-leen Boroom bi,

réewoo réew, kañleen ko§.»

¹² Esayi it neeti:

«Ab car ay bawoo ca Yese* reen ba, mooy taxaw, yilif jaambur ñi dul Yawut, te moom la ñi dul Yawut di yaakaar†.»

¹³ Kon Yàlla miy maye yaakaar, yal na leen feesale gépp mbég, ak jàmm ci biir ngëm, ba ngeen géejule yaakaar, ci manoorey Noo gu Sell gi.

Póol xamle na sababu bataaxalam

¹⁴ Bokk yi, man ci sama bopp, li ma bir ci seen mbir moo di yéene ju rafet ngeen fees, te buural ngeen bépp xam-xam, man ngeena artoonte it. ¹⁵ Teewul mu am ci wet yu ma leen ñemee binde kàddu yu ma ñéebulwul, ngir fàttli leen li ngeen xamoon ba noppi. Noonu ma binde nag, li ko waral moo di yiw wi ma Yàlla baaxe, ¹⁶ ngir ma doon jawriñu Almasi Yeesu, ñeel jaambur ñi dul Yawut, may wàccoo ak liggéeyu carxal bi xibaaru jàmm bu Yàlla laaj; su ko defee ñi dul Yawut mana doon ab jooxe bu Yàlla nangu, jooxe bu Noo gu Sell gi sellal. ¹⁷ Moo tax ma saña puukarewoo Almasi Yeesu mi may liggéeyloo ci mbiri Yàlla. ¹⁸ Sañumaa tudd lenn nag lu moy li Almasi sottale sama jëmm, ngir jaambur ñi dul Yawut dëggal Yàlla, te muy lu mu sottale samay wax ak samay jéf, ¹⁹ ci kaw firnde yu manoorewu, aki kéemaan, lépp ci manoorey Noowug Yàlla. Loolu tax na, li dale Yerusalem, wèndeelu, ba ca diiwaanu Iliri, yégle naa fa xibaaru jàmm bu Almasi, ba mu mat sèkk. ²⁰ Noonu laa masa xintewoo di xamle xibaaru jàmm bi fu ñu xamewul Almasi asi, ngir baña bey sas wu fa keneen jotoona dal. ²¹ Noonu ma jêfe it moo dëppoo ak ni ko Mbind mi indee ne: «Na ñu waxul woon mbiram, dinañu gis, te ña dëgguloon, dinañu raññee‡.»

Póol dige naa seeti waa Room

²² Sama liggéey boobu sax moo ma gállankoor lu bare ba dikkaguma seetsi leen. ²³ Waaye léegi jeexal naa sama sas ci gox yii, te gannaaw at yu baree ngii, ma namma dikk ba seetsi leen, ²⁴ bu may dem Espaañ, dinaa leen seetsiwaale. Yaakaar naa leena gis bu ma fa jaaree, ba ngeen yiwi ma, ma jalli Espaañ, gannaaw, lu mu néew néew, ay fan yu ma nammantikoo ak yeen. ²⁵ Waaye fii ma tollu, Yerusalem laa jëm, ngir ndimbal lu ñeel ñu sell ña féete foofa. ²⁶ Ndaxte gëmkati Maseduwan ak Akayi ñoom la soob ñu sàkke lenn ci seen alal, ngir dimbalee ko ñu sell ña diy néew doole ca Yerusalem. ²⁷ Seen coobarey bopp lañu ko defe, waaye ñoo ko ameel waa Yerusalem it nag. Ndaxte gannaaw ñoom

* 15:3 15.3 Seetal ci *Sabóor* 69.9. † 15:9 15.9 Seetal ci *Sabóor* 18.49. ‡ 15:10 15.10 Seetal ci *Baamtug Yoon* wi 32.43. § 15:11 15.11 Seetal ci *Sabóor* 117.1. * 15:12 15.12 Yese mooy baayu Daawuda. † 15:12 15.12 Seetal ci *Esayi* 11.10. ‡ 15:21 15.21 Seetal ci *Esayi* 12.15.

ñiy jaambur, gëmkati Yerusalem ñoo leen sédd ci xéewal yi leen ngëm may, kon ñoom jaambur ñi itam war nañu leena sédd ci seen alal. ²⁸ Teewul nag bu ma noppee ci lii, ba teg teraanga jii ca loxoy waa Yerusalem, Espaañ laa jëm, te fa yeen laay jaare. ²⁹ Te xam naa ne bu ma dikkee fa yeen, barkeb Almasi bu mat sékk laay dikke.

³⁰ Gannaaw loolu bokk yi, li ma leen di ñaan ngir sunu Boroom Yeesu Almasi, ngir itam cofeel gi Noo gu Sell giy maye, moo di ngeen fekksi ma ci xareb ñaan ngir man. ³¹ Ñaanal-leen ma, ngir ma mucc ci aji gëmediy Yude, te itam ndimbal li may yóbbul ñu sell ña ca Yerusalem, ñaanleen ngir ñu nangu ko. ³² Su ko defee, ci coobarey Yàlla, ma dikke mbégte ba fa yeen, ba dal-luwaale as lëf fa yeen. ³³ Yal na Yàlla miy boroom jàmm ànd ak yeen ñépp. Amiin.

16

Póol nuyu na waa Room

¹ Boole naa leen nag ak sunub jigéen Febe, mu di ab taxawukatub mboooloom gëmkat ma dëkke Señsere. ² Dalal-leen ko ci turu Boroom bi, ni ko ñu sell ñi yellow, te ngeen jàpple ko ci lépp lu mu aajowoo, nde moom itam xettli na ñu bare, ba ci man mii.

³ Nuyul-leen ma Pirsil ak Akilas, sama bokki liggéeykat ci liggéeyub Almasi Yeesu. ⁴ Noom ñoo jaay seen bakkan ngir ma mucc, te du man donj maa leen ameel njukkal, waaye mbooolooy gëmkat yu jaambur ñi dul Yawut yépp a leen ameel njukkal.

⁵ Nuyul-leen ma itam mboooloom gëmkat miy daje ca seen kër. Nuyul-leen ma sama soppe Epaynet, miy jooxeb ndoortel meññeef, ma génne ca dii-waanu Asi, ñeel Almasi. ⁶ Nuyul-leen ma Maryaama, mi sonn lool ci yeen.

⁷ Nuyul-leen ma Andoronikus ak Yuña, sama bokki Yawut, yi ñu ma tējandooloon; ñu ñu nawloo lañu ci ndaw yi, te ñoo ma jékka gëm sax Almasi.

⁸ Nuyul-leen ma Ampilyaatus, mi ma soppal sama bopp ndax Sang bi.

⁹ Nuyul-leen ma it Urben, sunu mbokkum liggéeykat ci liggéeyub Almasi, ak Estakis, sama soppe; ¹⁰ nuyul-leen ma Apeles mi firndeel kóllère gi mu am ci Almasi, te ngeen nuyul ma waa kër Aristobul, ¹¹ ak Erojon sama mbokkum Yawut, te ngeen nuyul ma waa kër Narsis ñi gëm Sang bi.

¹² Nuyul-leen ma Tirifen ak Tirifos, jigéen ñu sonn ci liggéeyu Boroom bi, ak it ndaw si Persidd mi sonn lool ci liggéeyu Boroom bi.

¹³ Nuyul-leen ma Rufus, mi Boroom bi taamul boppam, ak yaayam jiy sama yaayu bopp. ¹⁴ Nuyul-leen ma Asànkirit ak Felegon ak Ermes ak Patarobas ak Ermas, ak mboolem bokk yi nekk ak ñoom.

¹⁵ Nuyul-leen ma it Filolog ak Yuli, ak Nere ak jigéenam, ak Olimpás ak mboolem ñu sell ñi nekk ak ñoom.

¹⁶ Saafonteelen foonante yu sell. Mbooolooy gëmkati Almasi yépp nuyu nañu leen.

Kàdduy àrtu ak tàggoo ñeel na waa Room

¹⁷ Léegi nag bokk yi, dama leen di ñaax, ràññeeleen ñi gántal àlluwa ji ngeen jàngé, di féewale, ak a téqtale, te ngeen moytu leen. ¹⁸ Nu ni mel liggéeyaluñu Almasi sunu Boroom, seen koll lañuy liggéeyal. Lámniñ yu neex, ak kàddu yuy jaye lañuy naxe ñi seenum xel foogadi.

¹⁹ Yeen nag seenug dégg ndigal siiw na ba bir ñépp, moo tax ma di leen bége. Waaye damaa bëgg ngeen xelu ci lu baax, te seenum xel mucc ci lu bon. ²⁰ Su ko defee Yàlla miy boroom jàmm mooy dër Seytaane ci lu gaaw, fi ngeen ko joggi seeni tànk.

Yal na sunu yiwu Boroom Yeesu ànd ak yeen!

²¹ Timote sama mbokkum liggéeykat nuyu na leen, mook Lusiyus ak Yason ak Sosipater sama bokki Yawut.

²² Man Tersiyus mi bind kàdduy bataaxal bi ci sama loxo nag, nuyu naa leen ci turu Boroom bi.

²³ Gayus mi may dalal, di dalal mboooloo mi mépp kërám, nuyu na leen; Eràst saytukatub alalu dëkk bi it, nuyu na leen, mook mbokk mi Kàrtus.

²⁴ Yal na sunu yiwu Boroom Yeesu Almasi ànd ak yeen! Amiin.

Teddnga ñeel na Yàlla

²⁵ Kooku leen mana dooleel nag ndax sama xibaaru jàmm, ak waareb Yeesu Almasi, mi mu feeñal mbiram tey, gannaaw ba mu nekkee mbóot mu làqu woon naka jekk, ²⁶ mbóot mu bindi yonent yi fésal tey, ba xamal ko xeet yépp ci ndigalal Yàlla ji sax, ngir xeet yépp gëm ba dégg ndigal, ²⁷ kooku mooy Yàlla mi wéetoo xam-xam, te moom la teddnga ñeel ba fàww, ndax Yeesu Almasi! Amiin.

Bataaxal bu jëkk bi Yàlla may Póol, mu bind ko waa Korent

¹ Ci man Póol mi ñu woo ci sasub doon ndawal Almasi Yeesu, ci coobarey Yàlla, ci man la bataaxal bii bawoo, bawoo itam ci Sosten mbokk mi, ² ñeel mbooloom Yàlla, mi ci Korent, yeen ñi ñu sellal ci jëmmu Almasi Yeesu, te ñu woo leen ngir ngeen doon ñu sell, ñeel itam mboolem ñiy tudde fépp fu mu mana doon, sunu turu Boroom Yeesu Almasi, mi leen moom, moom nu. ³ Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

Sant Yàlla war na

⁴ Santal leen sama Yàlla laa saxoo, ci yiw wi mu leen may ci Almasi Yeesu, ⁵ ndax lépp ngeen woomle ci moom, ci gépp kàddu, ak bépp xam-xam. ⁶ Loolu di firndeel ne la nu seedeeloon Almasi, sotti na ci yeen. ⁷ Loolu tax na ñàkkatuleen genn may, léegi bi ngeen di séentoogum peeñum sunu Boroom Yeesu Almasi. ⁸ Moo leen di dooleel ba ca mujjantal ga, ngir ngeen mucc sikk, keroog sunu bésu Sang Yeesu Almasi. ⁹ Yàllaa am kóllère, moom mi leen woo, ngir ngeen bennoo ak Doomam Yeesu Almasi, sunu Sang.

Na mbooloo mi juboo

¹⁰ Bokk yi nag, dama leen di ñaax, ci sunu turu Sang Yeesu Almasi, ngir seen kàddu di genn, te féewaloo baña am ci seen biir, xanaa ngeen bennoo ci lépp, bokk menn xel, ak benn jëmu. ¹¹ Ndax kat bokk yi, dégge naa ci waa kër Kelowe, ne am na ay dëngoo ci seen biir. ¹² Li may wax mooy ku nekk ci yeena ngi naan: «Man ci Póol laa bokk!», «Man nag Apolos!» «Man Sefas!» «Man de Almasi!»

¹³ Ndax Almasi dafa xaajalikoo? Ndax Póol lañu daajoon ca bant ba ngir yeen? Am ci turu Póol lañu leen sóobe ci ndox? ¹⁴ Maa ngi sant Yàlla, ba ma sóobulee kenn ci yeen ci ndox, ku dul Kirispus ak Gayus, ¹⁵ ngir kenn du ne ci sama tur lañu leen sóobe. ¹⁶ Ahakay! Maa sóob waa kër Estefanas itam. Waaye bu loolu weesee, fàttlikuwuma fu ma sóobe keneen. ¹⁷ Ndax du sóobe cim ndox la ma Almasi yebale, xanaa ngir ma yégle xibaaru jàmm bi, te bañ koo defe xareñtey kàddu, ngir baña neenal bantub Almasi, ba ñu ko daajoon.

Xam-xam, fa Yàlla

¹⁸ Ndax kat kàddu gi jëm ci bantub Almasi, ba ñu ko daajoon, ag ndof la ci ñiy sànk. Waaye manooore Yàlla la ci nun ñi mucc. ¹⁹ Ndaxte bindees na ne:

«Maay yaq xam-xamu xamkat yi, ñi xelu, ma neenal seenum xel*.»

²⁰ Ana kuy xamkat? Ana kuy firikatub yoon? Ana waxkatub àddinay tey jii? Xanaa du Yàllaa def xam-xamu àddina si ag ndof? ²¹ Yàlla moo dogal ci xam-xamam, àddina tële koo xam ci xam-xamu boppam. Moo tax mu soob Yàlla, mu jëfandikoo xibaaru Almasi, biy ag ndof ci nit ñi, ngir musale ko gëmkat ñi. ²² Yawut yi, ay takk lañuy laaj, Gereg yi di wut xam-xam. ²³ Nun nag, nuy waare Almasi bu ñu daaj ci bant, muy njombe ci Yawut yi, di ag ndof ci jaambur ñi dul Yawut. ²⁴ Waaye ci ñi ñu woo, ñuy Yawut, di Gereg, Almasi mooy manooorey Yàlla, di xam-xamu Yàlla. ²⁵ Ndaxte li ñu jappe ag ndof fa Yàlla moo sut xam-xamu nit, te li ñu jappe néew dooley Yàlla moo raw dooley nit.

²⁶ Bokk yi, seetleen ñan ngeen woon, ba ñu leen di woo. Barewul ci seen biir ay xamkat, ci gis-gisu nit ñi, barewul ci yeen ay boroom doole, barelewuleen ñu rafet ab juddu. ²⁷ Waaye li àddina jappe ag ndof, moom la Yàlla taamu, ngir rusloo ko xamkat yi, te li néew doole ci àddina, moom la Yàlla taamu, ngir rusloo ko li bare doole. ²⁸ Li tuut ab juddu ci àddina, ak li xeeblu, li tekkiwul dara, moom la Yàlla taamu, ngir neenale ko li tekki, ²⁹ ba tax kenn du mana damu ci kanam Yàlla. ³⁰ Te moom it moo tax ngeen bokk ci Almasi Yeesu, mi ñu def muy sunu xam-xam bu bawoo fa Yàlla, di sunu njekk, di sunu sellte, di sunug njot, ³¹ su ko defee, noonu ñu binde ne: «Kuy damu, na damu ci Boroom bi†,» noonu lay ame.

2

¹ Man ci sama bopp, bokk yi, bi ma dikkee ci yeen, du ci puukarey kàddu yu gëna taaru, ak xam-xam bu ma leen yégalsee mbóoti Yàlla. ² Doguwuma woota xam lann ci seen biir, lu moy Yeesu Almasi, kooku ñu daaj ca bant ba. ³ Man daal, ci sama biir néew dooley bopp, ak ragal bay kat-kati, laa nekke woon ak yeen. ⁴ Sama kàddu ak samam njangle jotewul woon dara ak neex lammiiñ gu xam-xamu nit ràbb, waaye dafa di ay firnde yu manooereg Noowug Yàlla lañal, ⁵ ngir seen ngëm baña sukkandiku ci xam-xamu nit, te sukkandiku ci manooereg Yàlla.

*Xelum Yàlla mooy xamle xam-xamu
Yàlla*

* 1:19 1.19 Seetal ci *Esayi* 29.14. † 1:31 1.31 Seetal ci *Yeremi* 9.23.

⁶ Moona xam-xam lanuy xamle ci biir gëmkat ñi mat, waaye du xam-xamu xarnu bii, ak bu njiiti xarnu bii, di nit ñuy wéy. ⁷ Li nuy biral kay, da di mbóotum xam-xamu Yàlla mu laqu woon, te Yàlla dogaloon nu koo terale, laata àddina di sosu. ⁸ Boobu xam-xam, kenn ci njiiti xarnu bii xamu ko woon, ndax su ñu ko xamoon, kon duñu daaj Sang bu tedd bi ci bant. ⁹ Mooy noonu ñu binde rekk ne: «Lu bët gisul, nopp déggu ko, xel daju ko,

Yàllaa ko dencal ñi ko sopp*»

¹⁰ Waaye nun la ko Yàlla feeñalale am Xelam.

Ndaxte Xelum Yàlla lépp lay gëstu ba ci xóotey mbóoti Yàlla. ¹¹ Kan ci nit ñi moo xamal kenn nit, lenni biiram? Xelum nit ki ci biir nit ki donj moo mana xam biiram. Yàlla itam noonu la. Kenn xamul mbirum Yàlla, ku moy Xelum Yàlla. ¹² Nun nag du xelum àddina lanu jot, waaye Xel mi bawoo fa Yàlla lanu jot, ngir nu mana raññee li nu Yàlla baaxe. ¹³ May yooyu lanuy biral, te waxewunu ko njànglem xam-xamu nit, waaye njànglem Xelum Yàlla lanu koy waxe, di jéfandikoo kàddu yu lãmboo Xel mi, ngir teqantal ay mbir yu lãmboo Xel mi.

¹⁴ Nitu neen nag du nangu lu aju ci Xelum Yàlla. Ag ndof lay doon ci moom; du ko mana xam, ndax loolu Xelum Yàlla lees koy natte. ¹⁵ Nit ki ànd ak Xelum Yàlla nag moo mana natt lépp, te moom ci boppam, kenn du ko mana natt. ¹⁶ Moo tax ñu ne:

«Ana ku xam xalaatu Boroom bi, ba man koo digal†?»

Waaye nun nag noo yor xalaatu Almasi.

3

Par-parloo warul gëmkat ñi

¹ Man nag bokk yi, manuma woona wax ak yeen ni ñuy waxe ak ñu ànd ak Xelum Yàlla, waaye ni niti suuxu neen rekk laa manooa waxe ak yeen, mbete ñu diy tuut-tànk ci yoonu Almasi. ² Meew laa leen jota nàndal, waaye leeluma leen dugub, ndax àttanuleen ko woon, te ba léegi sax àttanuleen ko, ³ nde yeena ngi ba tey ci seenug nitey suuxu neen. Ndax gannaaw kiñaan ak ñaayoo ngi ci seen biir, du ay niti suuxu neen ngeen ba tey, di doxale ni niti àddinay kese? ⁴ Bu kenn naan: «Man ci Póol laa bokk,» keneen naa: «Man nag Apolos,» ndax kon dungeen niti àddinay kese?

⁵ Ana kuy Apolos sax? Ak kuy Póol? Xanaa ay surga donj yu ngeen jaare, ba gëm, ni Boroom bi jagleele kenn ku nekk ci nun, aw sasam. ⁶ Maa jëmbat, Apolos suuxat, waaye Yàlla moo jebbil. ⁷ Ki jëmbat nag, ak ki suuxat, kenn du ci dara, xanaa Yàlla miy jebbil donj. ⁸ Ki jëmbat, ak ki suuxat ñoo yem kepp, waaye ku ci nekk kemu liggéeyu boppam lay yooloo. ⁹ Noo bokk diy surga ci liggéeyu Yàlla bi; yeen ngeen di toolu Yàlla, di tabaxub Yàlla.

¹⁰ Yiwu Yàlla wi mu ma may nag, ci laa lalle kenu gi, ni tabaxkat bu xareñ, keneen di tabax ca kaw. Waaye na ku nekk xool bu baax na mu cay tabaxe. ¹¹ Geneen kenu moom maneesu koo lal, xanaa gi xasa lalle, te mooy Yeesu Almasi. ¹² Ku tabax ci kaw kenu gi nag, nga tabaxe wurus, mbaa xaalis, mbaa per, mbaa dénk, mbaa gattax, mbaa boob, ¹³ ku ci nekk, sab liggéey dina feeñ, ndax bés baa koy xamle, nde sawara lees koy feeñale. Ku ci nekk, ak lu sa xeetu liggéey mana doon, sawara lees koy natte. ¹⁴ Ku liggéeyoon ba la nga tabaxoon ca kaw kenu ga des, dinga yoolu. ¹⁵ Waaye ku sab liggéey lakk, ñàkk nga. Yaw ci sa bopp nag dinga mucc, mel ni ku rëcce cig lakk rekk.

¹⁶ Xanaa xamuleen ne kër Yàlla ngeen, te Noowug Yàlla moo dëkk ci yeen? ¹⁷ Ku yàq kër Yàlla nag, kooku Yàlla dina ko yàq, ndax kër Yàlla dafa sell, te mooy li ngeen doon.

¹⁸ Bu kenn nax boppam: Ku teg boppam ci yeen, boroom xam-xam, ni xarnu bii jàppe xam-xam, kooku na doon ab dof, ngir am xam-xam bi wóor. ¹⁹ Ndaxte xam-xamu àddina sii, ndof la fa Yàlla. Moo tax bindees na ne: «Mooy kiy jàpp ñi muus ci seen pexey muusaatu*,» ²⁰ tegati ca ne: «Boroom bi xam na xalaati boroom xel yi te xam na ne neen la†.»

²¹ Kan nag bu kenn puukarewoo ay nit, ndax lépp, yeena ko moom, ²² muy Póol, di Apolos, di Sefas, di àddina, di dund, di ndee, di tey, di èllëg, lépp, yeena ko moom. ²³ Yeen nag, Almasi moo leen moom, te Almasi, Yàllaa ko moom.

4

Àtteb Yàlla doy na Póol

¹ Dees noo wara jàppe ay surgay Almasi, ay saytukati mbóoti Yàlla. ² Te itam li ñuy sàkku ci ay saytukat moo di ñu jara wóolu. ³ Man nag, su dee yeena dogal samab àtte, mbaa kurélu nit a dogal samab àtte, soxaluma lool, te dogalaluma sama bopp ab àtte it. ⁴ Ndax amul dara lu may yedde sama bopp. Waaye nag loolu mayu ma

* 2:9 2.9 Seetal ci *Esayi* 64.3.

† 2:16 2.16 Seetal ci *Esayi* 40.13.

* 3:19 3.19 Seetal ci *Ayóoba* 5.13.

† 3:20

njekk, nde kiy dogal samab àtte mooy Boroom bi. ⁵ Moo tax buleen àtte lenn te jotul, lu jiitu Boroom biy dikk. Moom mooy leeral li laqoo ag lëndem, di laññi mēbēti xol. Su boobaa ngērēm la ku nekk yelloo, fa Yàlla lay bawoo.

⁶ Bokk yi, loolu de laa natte ci Apolos ak ci man, ñeel leen, ngir ngeen jänge ci sunu ñaari jëmm, ba sàmm solob kàddu gii: «Bu seen xalaat jàll ca wàlla li Mbind mi wax.» Su ko defee dungeen réy-réyloo far ak kenn, di beddi keneen. ⁷ Ana ku la def nga gën ci nit ñi? Ana loo am lu ñu la joxul? Te ndegam dees la koo jox, ana loo koy puukarewoo, mbete lees la joxul?

⁸ Yeen daal suur ngeen xaat! Woomle ngeen xaat! Yeena ngi tãmbalee nguuru, te xaaruleen nu ci sax! Céy su ngeen doon nguuru léegi, ba nun itam nu mana nguuroondoo ak yeen! ⁹ Ndaxte damaa foog ne, nun ndawi Almasi, Yàllaa nu fésal ca sàppeb gannaaw ba, mbete nit ñu ñu teg àtteb dee, ngir nu doon ceetaanum àddina wërngal këpp, malaaka ak nit. ¹⁰ Nun, ay dof lanu ngir Almasi; yeen, yeena muus nu ngeen bokke ci Almasi! Nun noo néew doole; yeen, yeena am doole. Yeen it lañu naw, waaye nun, dees noo xeeb! ¹¹ Ba fii nu tollu, xiif ak mar ak rafle, aki dóor lanu nekke, di taxawaalu. ¹² Danuy ñaḡ, di dunde sunu liggéeyu loxo, nit ñi di nu saaga, nu di leen ñaanal, ñu di nu bundxatal, nuy muñ. ¹³ Nu ngi nuy baatal, nun nuy wax lu rafet ci nit ñi, nu mujj mel ni mbalitu àddina, di mbuubitu ñépp ba fii nu tollu.

¹⁴ Kersaal leen nag taxul ma bind leen lii, waaye dama leen koy artoo, ndax yeenay sama doomi bopp. ¹⁵ Su ngeen amoon fukki junniy njiit yu leen di sàmm ci yoonu Almasi it, du tax ngeen am lu wees benn baay, te man maa leen àgge xibaaru jàmm bi, ba tax ma di seen baay ci yoonu Almasi Yeesu. ¹⁶ Kon nag maa ngi leen di tinu, ngir ngeen roy ci man. ¹⁷ Looloo tax ma yebal ci yeen Timote, sama doomu bopp, ji sax ci yoonu Sang bi. Moo leen di fàttli samay doxalin ci yoonu Almasi, noonu ma koy jànglee fépp, ci mépp mbooloom gëmkat.

¹⁸ Am na nag ñuy réy-réylu ci seen biir, mbete duma délseeti ci yeen. ¹⁹ Waaye maa ngi dikk léegi ba ci yeen, ndegam soob na Boroom bi, ba nattal sama bopp manoore ju réy-réylukat yooyu am, te duy kàddu kese. ²⁰ Ndaxte nguurug Yàlla du ci waxi kese, waaye manoore la. ²¹ Ana lu leen gēnal? Ma dikke leen ab yar, am ma dikke leen cofeel ak yērmande?

5

Buleen xajoo powum séy

¹ Déggees na nag ci lu wér, ne powum séy am na ci seen biir, te powum séy mu ni mel, giseesu ko sax ci biir xeeti yéefar yi. Dem na sax ba nit nekk ak jabaru baayam. ² Moona yeen de, yeena ngi ciy réy-réylu te waroon koo ñaawlu, ba dàqees kiy def jéf ju ni tollu ci seen biir! ³ Man ci sama wàllu bopp nag, jëmm ji wuute na, waaye xel mee fa teew. Ki def jooju jéf nag, niki su ma teewoon, dogal naa xaat ab àtteem, ⁴ ci turu Sang Yeesu. Bu ngeen dajee, te ma bokk ak yeen teewe ko samam xel, ci sunu kàttanu Boroom Yeesu, ⁵ dàqleen nit kooku, jébbal ko Seytaane, ngir sànkutey yaramam, ndax aw fitam mucc, keroog bésu Boroom bi.

Lawiir misaal na bàkkaar

⁶ Seen damu gii de jekkul dara. Xanaa xamuleen ne as lawiir tooyalu sungul bépp lay funkil? ⁷ Setal-leen seen bopp boog, génneleen lawiir* bu yàgg bi ci seen biir, ba mana doon tooyal bu bees bu mucc lawiir, nde doon ngeen ko ba noppi, ndax Almasi, sunu gàttub bésu Mucc biy sunub sarax, rendilees na nu ko. ⁸ Kon nag, nanu mággal sunu bésu Mucc te bañ koo mággaale lawiir bu yàgg, mbaa lawiiru yàqute akug mbon, xanaa nu mággaale ko mburu mu mucc lawiir, mburum xol bu set te dëggu.

⁹ Bindoon naa leen ca sama bataaxal ba, ne buleen amlante ak fokati séy yi. ¹⁰ Waaye moos fokati àddina sii taxul woon may wax, mbaa bégge yi ak nàppaaral yi ak bokkaalekat yi, nde kon fàww ngeen gēnn àddina. ¹¹ Dama leena bind, ne leen buleen amlante ak ku tuddoo mbokkum gëmkat, te di fokatub séy, mbaa mu dib bégge, mbaa mu dib bokkaalekat, mbaa ab saagakat, mbaa màndikat, mbaa ab nàppaaral. Ku ni mel, buleen bokk ak moom lekk sax.

¹² Ana sax luy sama yoon ci waa biti ba di leen àtte? Su dee waa biir mbooloom gëmkat ñi nag, yeena leen wara àtte. ¹³ Waa biti ñoom, Yàlla moo leen di àtte. Yeen, nag: «Tenqeeleen ku bon ci seen biir.»

6

Layoob biiri bokk rafetul

¹ Te it ku ci jote ak mbokkum gëmkatam, ana nu mu saña àttelujee mbir mi ci aji jubadi, ñi séq èttu yoon, te bañ koo àtteluji ca aji sell ña? ² Xanaa xamuleen ne aji sell ñi ñooy àtteji àddina? Ndegam yeenay àtteji àddina, xanaa àtte mbir yi géna tuut

* 5:7 5.7 Seetal ci Mucc ga 12.3-21.

jombu leen? ³ Am xamuleen ne malaaka yi sax, nun noo leen di àtteji, astamaak mbiri dund gii? ⁴ Kon nag bu ngeen amee ay jotey dund gii, ana lu ngeen diiseji seen mbir, ay nit ñu mbooloom gëmkat ñi nawloowul? ⁵ Li may wax gâce la ci yeen. Xanaa amul ci seen biir, benn boroom xel bu mana àtte ay bokkam? ⁶ Ab gëmkat daal mooy yóbbu mbokkum gëmkatam ci yoon? Te loolu ci kanam aji gëmadi ñi sax lañu koy defe far!

⁷ Layoo bi ci seen biir rekk firndeel na xaat ne daanu ngeen jéll bu réy. Lu leen tee muñ ag tooñ? Lu leen tee faaleedi alal ju ñu leen jélal? ⁸ Waaye yeen ci seen bopp sax yeenay tooñ aka jélal ay nit? Te seen bokki gëmkat ngeen koy def!

⁹ Am xamuleen ne aji jubadi ñi amuñu cér ci nguurug Yàlla? Bu leen kenn nax: Muy fokati séy yi, di bokkaalekat yi, di jaalookat yi, di góor-jigéen yi, ak ñiy ànd ak ñoom, ¹⁰ ak sàcc yi ak bégge yi ak màndikat yi ak saagakat yi ak ñappaaral yi, duñu am cér ci nguurug Yàlla. ¹¹ Te loolu la ñenn ci yeen doonoon. Waaye Yàllaa leen fóot, sellal leen, jubal leen, ci turu Sang Yeesu Almasi, ak ci sunu Noowug Yàlla.

Na yaramu gëmkat bi teral Sang bi

¹² «Lépp laa am sañ-sañam,» lañu wax. Waaye du lépp ay jariñe. Lépp laa am sañ-sañam, waaye duma nangu lenn man ma. ¹³ Ñenn a ngi naan: «Aw ñam, biir la ñeel; te biir it, aw ñam la ñeel.» Muy dëgg it, te Yàlla mooy neenal ñam wi, ak biir bi mu jëm. Waaye taxul yaramu gëmkat bi ñeel powum séy. Sang bi kay la yaramu gëmkat bi ñeel, te Sang bi it, ñeel yaram wi. ¹⁴ Yàlla, mi dekkal Sang bi nag, mooy dekkal it sunu yaram ci kàttanam. ¹⁵ Xanaa xamuleen ne, seen yaram mooy céri Almasi? Waaw, ndax damay jël céri Almasi, def ko céri gànc bu jigéen? Yàlla tere! ¹⁶ Xanaa xamuleen ne, kuy taqoo ak ab gànc bu jigéen, mook moom, jenn jëmm lañuy doon? Ndaxte noonu lañu waxe ne: «Ñoom ñaar ay mujj di wenn suux donj*.» ¹⁷ Waaye ku taqoo ak Sang bi, yaak moom genn noo ngeen di doon.

¹⁸ Dawleen powum séy! Mboolem bàkkaar bu nit mana def, bàkkaar ba du jote dara ak yaramam, waaye fokat bi, yaramu boppam lay lore bàkkaaru powam. ¹⁹ Dangeena xamul ne seen yaram mooy màkkaanu Noo gu Sell, gi ci yeen, Noo gi ngeen jote ci Yàlla? Moomuleen seen bopp, ²⁰ ndax dees leena jot, ba fey

njég ga. Kon nag seen yaram, terale leen ko Yàlla.

7

Lu jëm ci mbirum séy

¹ Sama tont ci mbir mi ngeen ma bind nag, moo di lu baax la ci góor, mu mucc ci jigéen*. ² Waaye moytu powum séy war naa tax ba góor gu nekk am jabaram, jigéen ju nekk it, am jëkkëram. ³ Jëkkër ji war naa def warugaru jëkkër ci jabaram; naka noonu it, jabar ji war naa def warugaru jabar ci jëkkëram. ⁴ Jigéen ji moomul yaramam, moom donj, waaye jëkkër ji it am na ci sañ-sañ. Naka noonu it, jëkkër ji moomul yaramam, moom donj, waaye jabar ji it am na ci sañ-sañ. ⁵ Buleen di xañante seen bopp, ndare du yeena mànkoo ab diir, ngir bokk ténku ci ñaan. Waaye gannaaw loolu, delluleen di ànd, bala leena Seytaanee xiirtal ci moy, ndax tëlee téye seen bopp. ⁶ Loolu ma leen wax nag mooy li leen yoon may, waaye du ndigal. ⁷ Ndaxte xu ma sañoon kay ñépp toog ni man; waaye ku nekk ak jagleb boppam bu ko Yàlla baaxe, kii lii, kee lee.

⁸ Li may wax gëmkat ñi séqul ak kenn ab séy, ak ñi seen jëkkër faatu daal moo di, su ñu wéye toog noonu ni man mii, lu baax la ci ñoom. ⁹ Waaye su ñu manula maandu, nañu séy, ndax séy moo gën seen xéraangey bakkan xabtal leen.

¹⁰ Ni séq ab séy nag, maa leen dénk lii, te du sama ndigal, ndigalal Boroom bee. Jabar ji, bumu teqlikoo ak jëkkëram. ¹¹ Te bu teqlikoo ak jëkkëram it, na toog, baña séyaat, mbaa mu juboo ak jëkkëram. Te jëkkër ji it bumu fase jabaram.

¹² Ni ci des nag, li ma xalaat te du Boroom bee ko wax, maa ko waxal sama bopp, moo di: ab gëmkatub Almasi, bu amee jabar ju gëmul, te teewul mu nangu koo séyal ba tey, bumu ko fase. ¹³ Ab gëmkatub Almasi it, bu amee jëkkër ju gëmul, te teewul mu nangoo nekk ak moom, bumu tas. ¹⁴ Ndaxte jëkkër ji gëmul day daldi séddu sellnga ndax jabaram ja dib gëmkat, te jigéen ji gëmul it day séddu sellnga ca jëkkëram jay gëmkat. Su dul woon noonu doom yu ngeen ca am di ñu sobewu, te bir na ne doom yu ngeen ca am, ñu sell lañuy doon. ¹⁵ Ndegam nag ki gëmul daa bégga dem, na dem. Su demee noonu, mbokkum gëmkat bu góor bi, mbaa ku jigéen ki amatul benn gállankoor, waaye ci jàmm la leen Yàlla woo. ¹⁶ Yaw miy jabar ji nag sa texey

* 6:16 6.16 Seetal ci *Njàlbéen ga* 2.24.

* 7:1 7.1 Li Póol ne lu baax la ci góor, mu mucc ci jigéen, jombul mu waxi boppam. Waaye man naa doon it waxi waa Korent yu mu jottli.

jëkkër man naa jaare ci yaw, jombul; yaw jëkkër ji it, sa texey jabar jaare ci yaw, jombul. ¹⁷ Lu ko moy nag, ku ci nekk, cër ba la Boroom bi séddoon, noonee nga nekke woon ba la Yälla di woo, nanga ko wéye. Loolu laa santaane ci mboolooy gëmkat ñépp. ¹⁸ Ki xarafoon bala ñu koy woo, bumu laq màndargam xaraf ma. Ki xaraful woon ba ñu koy woo, bumu xaraf. ¹⁹ Xaraf amul solo, ñàkka xaraf amul solo. Li am solo moo di topp ndigali Yälla. ²⁰ Ku nekk, nekkwi nga nekke woon ba ñu lay woo, nanga ko wéye. ²¹ Ndax ab jaam nga woon, ba ñu lay woo? Amul solo. Waaye soo manee yiwiku, yiwikul. ²² Ki ñu woo ci Sang bi, fekk ko mu dib jaam, mooy ki Sang bi goreel. Naka noonu, gor si ñu woo, ab jaamu Almasi lay doon. ²³ Gannaaw feyees na seen njég ba jot leen nag, buleen doon jaamub nit. ²⁴ Bokk yi, ku ci nekk daal, nekkwi nga nekke woon ba ñu lay woo, wéye ko rekk fi kanam Yälla.

²⁵ Ci wàllu janq ji séyagal, awma ci ndigalu Boroom bi, xanaa ma wax ci sama xalaat bu mata gëm, ndax yërmande ji ma Boroom bi baaxe. ²⁶ Lii mooy li ma foog ne mooy li baax, ndax njàqarey jamonoy tey. Li baax ci nit ki daal mooy mu wéye li muy dund tey. ²⁷ Dangaa am jabar? Bul sàkku pase. Am amuloo jabar? Kon bul sàkku jabar. ²⁸ Waaye nag soo takkee jabar, bàkkaaruloo; ab janq it, bu séyee, bàkkaarul. Waaye ñi séq ab séy dinañu am naqaru àddina, te naqar woowu laa leen bëggoona fanqal.

²⁹ Li may wax, bokk yi, moo di, li des yàggatul. Kon nag bés niki tey, na ñi am jabar mel ni bu ñu ko amul woon; ³⁰ ñiy jooy mel ni ñu jooyul; ñi bég, mel ni ñu bégul; ñi jënd, mel ni ñu moomul li ñu jënd; ³¹ ñiy jariño alalu àddina, bañ cee xér, ndax melow àddina sii tey, day wees.

³² Sama coobare mooy, yeen gëmcati Almasi, ngeen mucc ci xalaat yu ub seen bopp. Te ku amul jabar, mbiri Boroom bi lay xalaat, ak nu muy dabe bannexu Boroom bi. ³³ Waaye ku am jabar, mbiri àddina lay xalaat, ak nu muy dabe bannexu jabaram, ³⁴ mu daldi ñarale. Jigéen ju séyul, mbaa ab janq, mbiri Boroom bi lay xalaat, di namma sellal yaramam akum xelam. Waaye kiy séy, mbiri àddina lay xalaat, ak nu muy dabe bannexu jëkkëram. ³⁵ Lii nag, seen njariñ a ma ko taxa wax, nammuma leen koo tege ab gállankoor, li ma ci namm mooy ngeen di def li jekk, te taxawal temm Boroom bi, taxawaay bu leen benn xalaatu àddina dul féle.

³⁶ Waaye su amee ku jàpp ne jëfewul nu jekk, ak janq bu mu digool ab séy, te janq ba jëm mag[†], ba mu xalaat ne takk ko rekk moo ci war, na matal yéeneem, takk ko. Su defee noonu, bàkkaarul. ³⁷ Waaye ki dogu dëgg ci xolam, te du ndigalu gantal lu mu sañula bañ, xanaa ci sagoy boppam donj la dogoo ne du jël janq bi mu digooloon ab séy, kooku ba tey, def na lu baax. ³⁸ Kon ki jël ab janqam bu mu digool ab séy, def na lu baax, waaye ki jëlul ab janqam moo def li gën.

³⁹ Jabar nag, buumu jëkkëram a ngi ci baatam, li feek jëkkëram a ngi dund. Waaye su jëkkër ji faatoo, sañ naa séy ak ku ko neex, ndegam gëmkatub Almasi la séyal. ⁴⁰ Doon na gëna bég nag, su toogoon, baña séyaat, ci sama xalaat, te man it defe naa ne Noowug Yälla mu ngi ci man.

8

Lu jëm ci ñam wu ñu sarxal ay tuur

¹ Su dee wàllu ñam wu ñu sarxal ay tuur, dëgg la, nun ñépp am nanu xam-xam ci moomu mbir. Xam-xam nag day tax nit a réy-réylu, waaye cofeel day yokke. ² Ku xalaat ne yaa xam lenn, xamaguloo ni nga wara xame. ³ Waaye ku sopp Yälla, Yälla xam la.

⁴ Kon su dee wàllu ñam wu ñu sarxal ay tuur, xam nanu ne ay tuur du dara ci àddina, te Yälla kenn la. ⁵ Doonte am na yu ñuy wooye ay yälla, te muy lu nekk ci asamaan mbaa ci suuf, te dëgg la, bare na ñu ñu neey ay yälla lañu, bare na it ñu ñu neey ay sang lañu. ⁶ Teewul ci sunu wàllu bopp, jenn Yállaa am, muy Baay bi lépp jóge ci moom, te sunu bakkan ñeel ko, benn Sang donj a am, muy Yeesu Almasi, bi lépp ame ci moom, te sunu bakkan, ci moom la ame.

⁷ Waaye du ñépp a xam loolu. Am na gëmkat ñu seen miineelu tuur yi bàyyeegul, ba léegi, te moo tax bu ñu lekkee ñam wu ñu foog ne saraxi tuur la, seen xel mu daladi moo leen di foogloo ne sobe toppe na leen ca ñam wa. ⁸ Waaye du wenn ñam wu nuy jegele ak Yälla. Nu lekk ko, ak nu bañ koo lekk, du nu yokk, du nu wàññi.

⁹ Waaye ni ngeen di dunde seen sañ-sañu bopp, dangeen ciy xool ñi seen ngëm dëgërul, ngir ngeen bañ leena yóbbe bàkkaar. ¹⁰ Yaw mi réy xam-xam, ku la gis ca ndab la ca jaamookaayu tuur ya, su dee ab gëmkat bu xelam daladi ndax ngëm gu desee dëgër, mbaa du ko xiir ci roy la, ba mu lekk ca ñamu sarax sa? ¹¹ Te su

† 7:36 7.36 Manees na ko tekkee nii itam: te xemmemtéefam ci ndaw si épp ko doole.

demeo noonu nag, su boobaa sa xam-xam bu réy ngay sänke sa mbokkum gëmkat bu néew doole boobu Almasi deeyal! ¹² Su ngeen tooñee noonu bokki gëmkat ñi, ba yaq seen xel mu daladi, kon de Almasi ngeen tooñ. ¹³ Moo tax, su dee aw ñam wu ma lekk mooy tax ma bákkaarloo sama mbokkum gëmkat, dootuma lekk mukl aw yàpp ci àddina, ngir baña bákkaarloo sama mbokkum gëmkat.

9

Póol muñ na lu ko lew

¹ Du maa moom sama bopp? Am du man, ndawal Almasi laa? Xanaa gisuma Yeesu sunu Boroom? Xanaa du sama liggéey ci Sang bi, moo di yeen ci seen bopp? ² Ndegam ci ñeneen, man duma ndawal Almasi, xanaa ci yeen boog, moom laa, ndax liy firndeel sama sasu ndaw ci Sang bi, yeen la.

³ Lii nag moo di sama tont ak ñi may sikkal: ⁴ xanaa nun amunu sañ-sañu jël ag lekk ak ag naan, ngir liggéey bi nu sasoo? ⁵ Am sañunoo yóbbaaale mbokkum gëmkat buy sunu soxna, ni yeneen ndawi Almasi, ak doomi ndeyi Sang bi, ak Sefas? ⁶ Am boog mennum man ak Barnaba donj noo amul sañ-sañu ñakka daan sunu doole?

⁷ Kan moo masa rangu liggéeyu coldaar, te léppam war ko? Ana kuy jëmbat tookeerub reseñ, te du lekk ca doom ya? Mbaa kan mooy sàmm ag jur, te du naan ca soowum jur ga? ⁸ Te lii may wax sax, du ci gis-gisu nit donj laa ko teg, xanaa du yoonu Yàlla itam, loolu la wax? ⁹ Bindees na ci yoonu Musaa kay ne: «Bul sunjuñ gëmmiñu nag te fekk koy bojj am pepp.» Ndax Yàlla nag yi donj la tiisoo? ¹⁰ Am du noo tax muy wax? Nun kay noo tax ñu bind loolu, ndax kuy bey, sañ cee yaakaar, kuy bojj it, sañ cee yaakaar wàllam. ¹¹ Ndegam alali xol lanu ji ci yeen, su nu góobee koomu àddina gu bawoo ci yeen, day èpp a? ¹² Ndegam ñeneen a jagoo boobu sañ-sañ ci yeen, astamaak nun.

Waaye nag jariñoowunu sañ-sañ boobu. Lépp lanu far muñ, ngir baña gállankoor yoonu xibaaru jàmm bu Almasi. ¹³ Xanaa xamuleen ne, ñiy liggéeye ci kërug Yàlla gi, ci kërug Yàlla gi lañuy jële seen lekk, te ñi sasoo sarxalukaay bi, am nañu wàll ci sarax ya ñu fa joxe? ¹⁴ Naka noonu it, Sang bi moo digle ne ñiy yégle xibaaru jàmm bi, nañu ci dund.

¹⁵ Waaye man jariñoowuma lenn ci sañ-sañ yooyu, te binduma lii it ngir defalees

ma noonu. Xanaa dee sax a may gënal—boobu sañ-sañu kañu daal, kenn du ma ko yàqal! ¹⁶ Yégle xibaaru jàmm bi moom, du lu may kañoo. Wartéef la wu ñu ma sas, te ngalla man, su ma yéglewul xibaaru jàmm bi! ¹⁷ Su ma yebu wonna def lii ci sama coobarey bopp, dinaa ci am peyoor. Waaye gannaaw dees maa dénk ag caytu, te ajuwul ci sama coobare, ¹⁸ kon ana lu ciy sama peyoor? Xanaa ma man di yégle xibaaru jàmm bi ci dara, ba duma jariñoow sañ-sañu dunde xibaaru jàmm bi may yégle.

¹⁹ Te itam as gor laa, kenn moomu ma; teewul jaamu népp laa def sama bopp, ngir gëna iril Sang bi aw nit. ²⁰ Ba ma nekkee ci biir Yawut yi, ni Yawut yi laay def, ngir iri leen. Ba ma nekkee ak ñi tegoo yoonu Musaa, damaa mel ni yoonu Musaa laa tegool, ngir iri ñi tegoo yoonu Musaa, te man ci sama bopp, tegoo wuma yoonu Musaa. ²¹ Maak ñi amul yoonu Musaa, damaa mel ni ku amul yoonu Musaa, ngir iri leen, doonte ñakkuma yoonu Yàlla, gannaaw maa ngi ci yoonu Almasi. ²² Maak boroom ngëm yi desee dëgër, damaa mel ni ku ngëmam desee dëgër, ngir iri leen. Lépp laa def sama bopp ci ñépp, ak nu mu mana deme, ba musal ñennat. ²³ Loolu lépp def naa ko ndax xibaaru jàmm bi, ngir am ci wàll.

²⁴ Xanaa xamuleen ne, ab rawante, ñépp a cay daw, waaye kenn donj ay jël ndam li? Dawleen nag ba jël ndam li. ²⁵ Jonantekati tàggat yaram yi, dañuy yar seen yaram bu metti, te ñooñu kaalag ndam guy seey donj lañu ci yaakaar, waaye nun, kaalag ndam gu sax dàkk lanu ci yaakaar. ²⁶ Man nag noonu laay dawe, waaye samaw xél ñakkul ab jëmu. Noonu laay këmëxee it, waaye dóoruma ci jaww ji. ²⁷ Damay yar sama yaram yar bu metti kay, ba moom ko, ndax èllëg ñu bañ maa doyadal, gannaaw bu ma xamalee ñeneen kàddu gi ba noppi.

10

Jaar-jaari maam yedd na sët ya

¹ Bokk yi, bugguma ngeen umple ko, sunu maam yépp la niir wa yiiroon, te ñoom ñépp a jàll géey ga*. ² Ñoom ñépp lañu soob soobe Musaa, ca biir niir wa, ak ca biir géey ga. ³ Noom ñépp, wenn ñamu kéemaanu Yàlla wa, moom lañu lekk, ⁴ te ñoom ñépp, menn ndoxum kéemaanu Yàlla ma lañu naan, ndax ñoo doon naane ca dojw kéemaanu Yàlla ga, doj wa leen doon gunge, te doj wa Almasi

* **10:1** 10.1 Ba bànni Israyil nekkee ca màndiñ ma, Boroom bi moom ci boppam moo leen jiite woon, mel ni aw niir, ag bëccëg ngir gindi leen, su guddée mu doon taxaaru sawara, ngir niital leen. Seetal ci *Mucc ga* 13.20—14.31.

la woon. ⁵ Teewul ñi ëpp ci ñoom, Yàlla amul woon lu ko neex ci ñoom, ba tax ñu daanu, dee ca màndiñ ma.

⁶ Yooyu xew-xew ay misaal la, ngir nu baña xemmey yëf yu bon, na ko maam ya daan xemmeme. ⁷ Buleen doon ay jaamukati tuur, ni ko ñenn ci ñoom doone woon. Noonu lañu binde ne: «Mbooloo ma toog, di lekk ak a naan, nes tuut ñu jóg, di mbumbaay†.» ⁸ Bunu jëfe powum séy, ni ko ñenn ci ñoom daa defe, ba tax ñaar fukki junni ak ñett (23 000) ca mbooloo ma bokk dee ci benn bés. ⁹ Bunu wut itam Almasi, ni ko ñenn ci ñoom wute woon, ba tax ay jaan rey leen. ¹⁰ Buleen jàmbat, ni ñenn ci ñoom doon jàmbate, ba tax malaakam reykak ba rey leen.

¹¹ Xew-xew yooyu dal maam ya ay misaal la, te dees koo bind ngir nu jàngé ci, nun ñi mujug jamono yemool. ¹² Moo tax ku yaakaar ne taxaw nga, nanga moytu bala ngay daanu. ¹³ Benn nattu dabu leen bu moy nattu yiy dale. Te it Yàllaa jara wóolu. Yàlla du nangu ngeen tegoo nattu bu ngeen àttanul, waaye nattu ba lay booleek pexe, ma leen cay génne, ba ngeen man koo dékku.

Dawleen bokkaale

¹⁴ Kon kat, samay soppe, dawleen bokkaale. ¹⁵ Njort naa ne boroomi xel laay waxal. Kon àtteel-leen seen bopp li ma leen wax. ¹⁶ Kaasu barke bi nuy barkeeloo, xanaa du mooy bokk gi nu bokk ci deretu Almasi? Te mburu mi nuy daggoo, du mooy bokk gi nu bokk ci yaramu Almasi? ¹⁷ Gannaaw menn mburu la nag, doonte ñu bare lanu, kon wenn yaram lanu, ndax nun ñépp, menn mburu mi lanu bokk.

¹⁸ Xool-leen bànni Israyil ci wàllu deret. Ñiy lekk yàppu juru sarax gu ñu rendi, xanaa bokkuñu ak sarxalukaay bi ab céram? ¹⁹ Ana kon lu sama wax jiy wund? Ndax daa wund ne yàpp wu ñu sarxal tuur yi tekki na lenn? Am daa wund ne tuur yi tekki na lenn? ²⁰ Li may wax kay moo di yooyu sarax, rab yi la ñeel, waaye du Yàlla, te buggama ngeen bokk ak rab yi lenn. ²¹ Dungeen mana naan ci kaasu Sang bi, naan ci kaasu rab yi. Dungeen mana bokk lekk ci ndabal Sang bi, bokk lekk ci ndabal rab yi. ²² Am danuy yékkati firaangey Sang bi? Danu koo ëpp doole?

Jëfeel say sañ-sañ tey sóoraale nit ñi

²³ «Sañees na lépp,» lañu wax. Waaye du lépp ay jariñe. «Sañees na lépp,» waaye du lépp ay yokke. ²⁴ Bu kenn sàkku njariñal boppam, waaye sàkkuleen seen njariñal moroom.

²⁵ Mboolem luy jaay ca ja ba, sañ ngeen koo lekk te bañ cee luqatu lenn luy indi ngànt cim xel, ²⁶ ndax Boroom bee moom àddina, ak li ci biiram.

²⁷ Bu leen ku gëmül wooyee lekk, su ngeen nangoo, mboolem lu mu leen taajal, lekkleen, te bañ cee luqatu luy indi ngànt cim xel. ²⁸ Waaye bu leen kenn nee: «Lii ñam wu ñu sarxal tuur yi la,» buleen lekk, ndax ka leen ko xamal, ndax itam, ngànt lu wax jiy indi cim xel. ²⁹ Waxuma seenum xel yeen, waaye xelu keneen ka laay wax.

Ana sax lu waral sama sañ-sañu bopp di aju ci àtteb keneen ku am xelam amal ngànt? ³⁰ Bu ma yékkatee kàddug cant ba lekk sama wàll, ana lees may sikke ci aw ñam wu ma sante Yàlla?

³¹ Kon nag su ngeen di lekk, mbaa ngeen di naan, mbaa ngeen di def leneen, lépp lu ngeen di def, wutleen koo terale Yàlla. ³² Buleen may kenn lu muy def njombe: du Yawut yi, du jaambur ñi, du mbooloom Yàlla mi. ³³ Noonu laay def man ci sama bopp: ñépp laay wuta neex, ci lépp. Sàkkuwuma sama njariñal bopp, waaye njariñal lim bu gëna takku, moom laay sàkku, ngir ñu texe.

11

¹ Ni may roye Almasi, man ci sama bopp, royeleen ma noonu.

Póol digle na ñu jekkal jataayu julli

² Maa ngi leen di sant ci ni ngeen may fàttlikoo ci lépp, ak ni ngeen saxoo samay dénkaane, ni ma leen ko dénke.

³ Waaye nag bëgg naa ngeen xam ne gépp góor, Almasi moo di boppam; jigéen, góor moo di boppam, te Almasi, Yàlla moo di boppam. ⁴ Kon gépp góor guy julli, mbaa muy waxe kàddug waxyu, bu muuree boppam, suufeel na Almasi, miy boppam. ⁵ Waaye jépp jigéen juy julli, mbaa muy waxe kàddug waxyu, te muurul boppam, suufeel na jékkëram jiy boppam. Day mel ni bu nelu woon rekk. ⁶ Jigéen ju nanguwula muuru, bu yehoo xuuf kawaram. Ndegam am na kersay xuuf kawaram, mbaa mu nelu nag, fàww mu muur boppam. ⁷ Góor moom du muur boppam, ndax mooy takkndeeru Yàlla te moo taxawe darajay Yàlla. Waaye jigéen moo taxawe darajay góor; ⁸ ndax góor kat, jëleesu ko ci jigéen, waaye jigéen kay lañu jële ci góor. ⁹ Góor itam, sàkkeesu ko ngir jigéen, waaye jigéen kay lañu sàkk ngir góor. ¹⁰ Looloo tax jigéen wara fésal kilifteef ci kaw boppam, ndax malaaka yi teew*. ¹¹ Teewul nag ci yoonu Sang bi, jigéen manula ñàkka wéeru ci góor, góor

† 10:7 10.7 Seetal ci *Mucc ga* 32.6. * 11:10 11.10 Seetal ci *Efes* 3.10.

it manula ñakka wéeru ci jigéen, ¹² ndax ni jigéen bëyyikoo ci góor, noonu la góor juddoo ci jigéen, te lépp fa Yàlla la bawoo.

¹³ Seetal-leen ko seen bopp rekk, ndax jekk na ci jigéen, muy julli ci Yàlla, te muurul boppam? ¹⁴ Xanaa ni àddina ci boppam tédde xamalu leen ne yar kawar gacce la ci góor? ¹⁵ Ndaxam kawar gu bare sagu jigéen la. Jigéen lañu jagleel kawar gu bare, muy muuraayam. ¹⁶ Waaye ku bëgga werante ci leneen it, nun loolu du sunu baax, te du baaxu mbooloom Yàlla mi.

Jekkal-leen reeru Sang bi

¹⁷ Waaye lii ma leen digal, am na ci lu ma leen gèrèmwul, ndax du njariñ la seeni ndaje di jur, xanaa loraange. ¹⁸ Benn, dégg naa am na ay féewaloo ci seeni ndaje, te am na lu ma ci gëm. ¹⁹ Faww sax mu am ay xaajaloo ci seen biir, ngir ñi seen ngëm wér mana fés ci seen biir. ²⁰ Bu ngeen dajee benn bérab, bokk reeru Sang bi taxul, ²¹ ndax bu ngeen dee lekk, ku nekk, reeru boppam lay jékkantee lekk, ba tax ñenn ci yeen xiif, fu ñeneen naane ba màndi. ²² Xanaa amuleen kër yu ngeen di lekke ak a naane? Am mbooloom Yàlla mi ngeen sofental, di rusloo ñi amul? Ana lu ma leen di wax? Dama leen koy gèrème? Loolu de дума leen ci gèrèm.

²³ Man, li ma jële ci Sang bi, moom laa leen jottli: Sang Yeesu, guddi gi ñu ko woree, dafa jël mburu, ²⁴ yékkati kàddug cant, dagg ko, ne: «Lii moo di sama yaram wi leen ñeel. Deeleen def lii, di ma ko fàttlikoo.» ²⁵ Noonu itam la def ak kaas ba, gannaaw reer ba, ne leen: «Kaas bii mooy kóllère gu yees gi fasoo ci sama deret. Deeleen def lii, di ma ko fàttlikoo, saa yu ngeen ci naanee.» ²⁶ Saa su ngeen lekkee mburu mi, mbaa ngeen naan ci kaas bi, yégle ngeen deewug Sang bi, ba kera muy ñëw.

²⁷ Moo tax, képp ku jekkadi nu mu lekke ci mburu mi, ak nu mu naane ci kaasu Sang bi, tooñ nga yaramu Sang bi, ak deretam. ²⁸ Kon na ku nekk seetlu boppam, doora lekk ci mburu mi, naan ci kaas bi. ²⁹ Ndax ku lekk mburu mi, naan ci kaas bi, te gèddaalul yaramu Almasi, mbugalu boppam la lekk, naan ko. ³⁰ Looloo tax ngeen bare ñu néew doole, ak ñu xiibon, ba lim bu takku dee. ³¹ Su nu doon àtte sunu bopp, deesu nu àttee noonu. ³² Waaye Boroom bee nuy àttee ay mbugalam ngir yar nu, ba deesu nu mbugalaale ci biir àtteb àddina.

³³ Kon nag bokk yi, bu ngeen dajee, ngir bokk lekk, xaaranteleen. ³⁴ Ku xiif, na

lekke kèram, ngir seeni ndaje bañ leena yóbbe mbugal.

Yeneen mbir yi nag, bu ma dikkee, dinaa ko leeral.

12

May bare na te wuute

¹ Léegi nag bokk yi, bugguma ngeen umple ci wallu mayi Noowug Yàlla. ² Bokk yi, xam ngeen ne ba ngeen dee ay yéefar, dees leena buuboon, lajjal leen, jême ci ay tuur yu tēlee wax. ³ Moo tax ma di leen biral ne amul kenn kuy waxe Noowug Yàlla ku naan: «Alkànde ñeel na Yeesu.» Te it kenn manul ne: «Yeesu moo di Sang*» te du lu ko Noo gu Sell gi xamal.

⁴ Mayi Noo gi wuute na, waaye genn Noo gi la. ⁵ Liggéeyin yi man naa wuute, waaye benn Boroom bi la. ⁶ Jéf ji it man naa wuute, waaye jenn Yàlla ji mooy jéf lépp ci ñépp.

⁷ Ku nekk nag, ak na mayu Noo giy feeñe ci moom, ngir jariñe. ⁸ Kii ci Noo gi la jote kàddu gu xelu, kee séddoo kàddug xam-xam ci genn Noo gi. ⁹ Kale jagoo ngëm ci genn Noo gi, ka ca des jële mayug faje ci genn Noo googu. ¹⁰ Kii itam di def ay kéemaan, kee di waxe kàdduy waxyu, kale mana raññatle noo yu wuute, keneen di làkk xeeti làkk yu wuute, ka ca des mana firi ay làkk. ¹¹ Loolu lépp, genn Noo googu moo koy def, ku nekk, mu sédd la ci, ni mu ko soobe.

Cér bare na, te yaram di wenn

¹² Noonu yaramu nit nekkee wenn te di cér yu bare, ak noonu mboolem céri yaram dee wenn yaram wi, ak li cér yiy bare lépp, noonu rekk la itam ci Almasi. ¹³ Ci genn Noo gi lañu nu sóobe ci biir wenn yaram wi, nun ñépp, nu diy Yawut, mbaa nu diy jaambur, nu diy jaam, mbaa nu diy gor, te nun ñépp, genn Noo gi lañu nu nàndale.

¹⁴ Yaram du bennab cér, waaye cér yu bare la. ¹⁵ Bu tánk noon: «Gannaaw man дума loxo, kon bokkuma ci yaram,» loolu du ko teree bokk ciw yaram. ¹⁶ Te bu nopp noon: «Gannaaw дума bèt, kon bokkuma ciw yaram,» loolu du ko tee bokk ciw yaram. ¹⁷ Su yaram wépp doon bèt, ana nooy dégge? Su lépp doon nopp, ana nooy xañtoo? ¹⁸ Waaye Yàlla moo teg cér bu ci nekk ci yaram wi, ni mu ko soobe. ¹⁹ Bu lépp doon benn cér, kon ana yaram wi? ²⁰ Cér yi daal bare nañu, waaye wenn yaram wi la.

²¹ Bèt nag manul ne loxo: «Soxlawuma la!» Te bopp it manul ne ay tánk: «Soxlawuma leen!» ²² Céri yaram yi gèna niru lu néew doole sax, ñooy cér

* 12:3 12.3 Li nu wax fii mooy Yeesu gannaaw ba mu deeyee, ba dekki mooy Sangu àddina wèrngal képp.

yi manula ñàkk. ²³ Cér yi ñu gëna jàpp ne jarula gëddaal, cér yooyu sax lañu gënatee gëddaal. Sunu cér yi amul sutura, ñoom lañu gëna suturaal, ²⁴ te yi am sutura soxlawuñoo suturaal. Waaye Yàlla moo sàkk sunu yaram, sàkkin wu mu ràññee cér yi gëna néew gëddé, te moo leen gëddaal, ²⁵ ngir xaajaloo baña am ciw yaram, te cér yi mànkoo ci di bàyyeente xel. ²⁶ Bu benn cér mettee, mook cér yépp ay bokk metit wi. Bu dee benn cér lañu teral, mook cér yépp ay bokk bannneexu.

²⁷ Yeen nag yeenay yaramu Almasi, te yeena diy céram, ku ci nekk ak wàllam. ²⁸ Ñi Yàlla tabb ci biir mbooloom gëmkat ñi, ñi ci jiitu ñoo di ndawi Almasi. Naaareel bi di ñiy waxe kàddug waxyu, ñetteel bi di jànglekati kàddu gi. Ñi ci topp di ñiy def ay kéemaan, ñi ci topp di ñi am mayu faje, ak ñi mane dimbalee, ak ñi mane jiite, ak ñiy làkk yeneen xeeti làkk. ²⁹ Ndax ñépp ay ndawi Almasi? Am ñépp ay waxe kàdduy waxyu? Am ñépp ay jànglekati kàddu gi? Am ñépp ay def ay kéemaan? ³⁰ Am ñépp a am mayu faje? Am ñépp ay làkk yeneen làkk? Am ñépp a mane tekki ba? ³¹ Teewul nag, nangeen sàkku may yi gën.

Cofeel moo gën lépp

Waaye dinaa leen xamal yoonu dundin wi gën ci lépp.

13

¹ Su ma doon làkk làkki nit ñi, ak yu malaaka yi sax, te jéfewuma genn cofeel, jóolóoli bu xumb donj laa, mbaa téggum weñ muy riir. ² Su ma jotoon ci kàddug waxyu, boole ci xam mboolem kumpa, ak mboolem xam-xam, ak ngëm gu mat sékk ba mana toxal ay tund, te jéfewuma cofeel, duma dara. ³ Te it su ma sarxe woon mboolem sama alal, ba sarxe sama yaramu bopp ngir ñu lakk ko*, su ma jéfewul cofeel, loolu du ma jariñ dara.

⁴ Cofeel nag, muñ ak mbaax la. Cofeel bokkul ak kiñaan, bokkul ak jikkoy kañu ak a damu. ⁵ Bokkul ak jéf ju jekkadi, ak jiital sa njariñal bopp, bokkul ak naqari deret, bokkul ak denc mer. ⁶ Bokkul ak bége lu jubadi it, waaye moo di bége liy dégg. ⁷ Cofeel moo di: lépp, nga bale; lépp, nga gëm; lépp, nga yaakaar; lépp, nga dékku.

⁸ Cofeel nag du jeex muk. Su dee kàdduy waxyu, dina wéy; su dee ay làkk, dina selaw; su dee xam-xam, dina xewi. ⁹ Ndaxte as ndog lanu xam, te as ndog lanuy waxe kàddug waxyu. ¹⁰ Waaye keroog bu li matale dikkee, ndog si wéy.

¹¹ Ba ma dee tuut-tànk, ni tuut-tànk laa doon waxe, di dégge dégginu tuut-tànk, di xalaate ni tuut-tànk. Waaye bi may mag laa xewil yéfi tuut-tànk. ¹² Tey jii ci ab seetu lanuy gise gis-gis bu lént. Waaye bu keroogee, makk lanuy jækkaarloo ak li nuy xool. Tey jii, as ndog laa xam, waaye su keroogee, ni ñu ma xame, ni laay xame ba mu mat sékk.

¹³ Léegi nag liy sax moo di: ngëm ak yaakaar ak cofeel; yii yett la, te li sut ci yooyii moo di cofeel.

14

Lu jëm ci waxyu, aki may ci wàllu làkk

¹ Xintewoolen cofeel, te ngeen sàkku mayi Noo gi, rawatina mayug waxe kàddug waxyu, ² ndax kiy làkk weneen làkk, du nit ñi lay waxal, waaye Yàlla lay waxal, gannaaw kenn déggul li muy wax. Teewul ci Noo gi lay waxe ay kumpa. ³ Waaye kiy waxe kàddug waxyu, nit ñi lay waxal, di feddlee, di ñaaxe ak di naabe. ⁴ Kiy làkk yeneen làkk, boppam lay feddli, waaye kiy waxe kàddug waxyu, mbooloom gëmkat ñi lay feddli seen ngëm. ⁵ Su ma sañoon ngeen di làkk yeen ñépp yeneen làkk, waaye ngeen di waxe kàddug waxyu moo ma gënal. Kiy waxe kàddug waxyu moo épp njariñ kiy làkk yeneen làkk, ndare ñu tekki li muy làkk, ba mbooloom gëmkat ñi jële ca lu ñu feddlikoo. ⁶ Léegi bokk yi, su ma leen dikke woon yeneen làkk yu may làkk, ana lu ma leen di jariñ? Dara, xanaa ma ägge leen kàddug peeñu, mbaa xam-xam, mbaa waxyu, mbaa digle. ⁷ Noonu la itam ci juntuukaayi po yi dundul tey jibal coow; muy toxoro mbaa xalam. Su yooyu juntuukaay jibalul galan yu leer; ana nees di xame li toxoro ji, mbaa xalam giy wax? ⁸ Ag liitu xare it, su jibalul woote bu leer; ana kuy waajal ab xare? ⁹ Noonu la ci yeen itam. Seen làmmiñ, su ngeen ci waxul kàddu gu leer; ana nees di xame li ngeen di wax? Ci jaww ji rekk ngeen di wax! ¹⁰ Ak li làkki àddina bare te wuute lépp, wenn ñàkku ci am piri. ¹¹ Baat bu jib nag, su ma xamul tekkiteem, ab jaambur laay doon ci kiy wax, te kiy wax it, ab jaambur lay doon ci man. ¹² Kon yeen itam, gannaaw ñu xér ngeen ci mayi Noo gi, fexeleen cee am lu ne xéew, ngir feddli mbooloom gëmkat ñi.

¹³ Moo tax kiy làkk weneen làkk wara ñaan ngir ñu xam pirem. ¹⁴ Su may ñaan ci weneen làkk, sama xol ay ñaan, waaye samam xel liggéeyul. ¹⁵ Kon ana nees di def? Naa ñaane sama xol, tey ñaane samam xel itam. Naa sàbbaale sama xol, tey sàbbaale samam xel itam.

* 13:3 13.3 mbaa ba man koo damoo.

¹⁶ Soo yékkatee kàddug cant goo waxe xol donj, ana nu nit ku xamul ku ko teewe naan: «Amiin,» te xamul li ngay wax? ¹⁷ Ndaxam yaw, rafet nga kàddug cant, waaye sa kàddu feddliwul keneen ku ciy dégg.

¹⁸ Sant naa Yàlla ndegam maay làkk yeneen làkk ba raw leen, yeen ñépp. ¹⁹ Waaye fu mbooloom gëmkat ñi daje, juróomi baat yu ma waxe samam xel ngir jàngle, moo ma gënal junniy baat yu ma waxe weneen làkk.

²⁰ Bokk yi, buleen doon ay xale ci wàllu déggin. Su dee lu bon, nekkeen ci ay tuut-tànk, waaye màggleen ci wàllu déggin. ²¹ Bindees na ci téereb yoon wi ne:

«Ay niti làkk-kat,
ay làmmiñi doxandéem,
ci laay waxe ak askan wii,
te taxul ba tey ñu déglu ma.

Boroom bee ko wax*.»

²² Kon nag, yeneen làkk, kàddu ya du ci gëmkat ñi la di firnde, waaye ci ñi gëmul la di firnde. Te it waxe kàddug waxyu, du ci ñi gëmul la di firnde, waaye ci gëmkat ñi la dib firnde. ²³ Léegi nag su mbooloom gëmkat mépp dajeé bérab, ñépp di làkk yeneen làkk, bu ay nit ñu xamul mbaa ñu gëmul duggsee, duñu ne dangeena dof? ²⁴ Waaye su ñépp dee waxe kàddug waxyu, ba ku gëmul, mbaa ku xamul duggsi, kàddu ga la ko ñépp di tiññale, àggee ko ko ab àtteem, ²⁵ ba la làqu woon ca biir xolam, daldi leer. Su ko defee mu ne dàll dépp jëem ci suuf, sujjóotal Yàlla, te naan: «Aylayéwén Yàllaa ngi ci seen biir!»

Ndajem gëmkat ñi jar naa rafetal

²⁶ Kon nag ana nees di def, bokk yi? Bu ngeen dajeé, kii am woyu cant, kii am lu muy jàngle, kee am am peeñu, kale am lu muy waxe weneen làkk, keneen am am piri, loolu lépp na ko feddli ngëm taxa jóg. ²⁷ Su dee weneen làkk lees di wax, na ñaar ba gën gaa bare, ñett, toppante, te kenn di firi. ²⁸ Su amul kuy firi, bu kiy làkk làkk wi biral lenn ci jataayu mbooloo mi. Na yelu, ngir boppam ak Yàlla.

²⁹ Ñiy waxe kàddug waxyu, na ci ñaar ba ñett wax, te ñi ci des natt wax ji. ³⁰ Su keneen ci jataay bi amee am peeñu, na ki doon wax noppi. ³¹ Ndax kat yeen ñépp man ngeena kenn-kennoo, di waxe kàddug waxyu, ngir ñépp jàngle ca, ba gëna farlu. ³² Biralkati kàddug waxyu yi ñoo wara jiite xel mi ñuy waxe. ³³ ndax Yàlla du Yàllay salfaañoo, Yàllay jàmm la.

Ci mbooloom mbooloo ñu sell ñi nag, ³⁴ na jigéen ñi noppi ci biir mbooloo yi,

ndax mayeesu leen ñu wax ci yooyu jataay. Na jigéen ñi nangu, ni ko yoon wi ci boppam diglee. ³⁵ Su amee lu ñu bégga xam, ca kër ga lañu koy laaj seen jëkkër, ndax jigéen di wax ci biir mbooloom gëmkat ñi, gáce la.

³⁶ Ndax ci seen biir la kàddug Yàlla bàyyikoo? Am ci yeen donj la agsi? ³⁷ Ku ci xalaat ne moom jottlikatub kàddug waxyu la, mbaa boroom ag may la ci Noo gi, war naa xam xéll ne lii ma leen bind, santaaneb Boroom bi la. ³⁸ Ku ci xamul loolu nag, kooku, xameesu ko.

³⁹ Kon bokk yi, farluleen ci di waxe kàddug waxyu, te buleen aaye kuy làkk yeneen làkk. ⁴⁰ Waaye na lépp teggine te aw yoon.

15

Lu jëm ci ndekkitel Almasi

¹ Léegi nag bokk yi, ma fàttli leen xibaaru jàmm bi ma leen xibaaroon, muy lu ngeen gëm, sax ci, ² te ci ngeen texee, ndegam jàpp ngeen bu dëgër ci kàddug xibaaru jàmm bi, ni ma leen ko xamale. Lu ko moy ci neen ngeen gëm.

³ Li ma jotoon laa leen jëkka jottli, te moo di: Almasi moo dee ngir njotug sunuy bàkkaar, te noonu la ko Mbind mi indee. ⁴ Denc nañu ko, mu dekki ca ñetteelu fanam, te noonu la ko Mbind mi indee. ⁵ Mu feeñu Sefas, teg ca feeñu fukki taalibe ya ak ñaar. ⁶ Gannaaw gi mu feeñu lu épp juróomi téeméeri bokki taalibe yu ko gisandoo, te li épp ci ñooñu, ñu ngi dund ba léegi, doonte am na ñu ci nelaw. ⁷ Gannaaw gi mu feeñu Yanqóoba, teg ca feeñu ndawi Almasi yépp. ⁸ Man nag la mujja feeñu, te ma dib liir bu ab juddoom moy bésam, ⁹ ndax kat maa gëna ñàkk solo ci ndawi Almasi, te yeyoowuma sax turu ndaw, gannaaw maa doon bundxatal mbooloom Yàlla mi. ¹⁰ Ci yiwu Yàlla daal laa doone ki ma doon, te yiw woowu ma ñeel neenul. Xanaa yeneen ndaw yépp sax, maa leen gëna liggéey. Du ci man nag, waaye yiwu Yàlla, wi ànd ak man la. ¹¹ Kon muy man, di ñoom, noonu lanu waaree, te noonu it ngeen gëme.

Dekkal tëwul Yàlla

¹² Ndegam biral nañu ne Almasi dekki na, ana nu ñenn ci yeen mane ne ñi dee duñu dekki? ¹³ Su fekke ne ñi dee duñu dekki, kon Almasi it dekkiwul. ¹⁴ Su Almasi dekkiwul, sunu waare neen na, te seen ngëm it neen na. ¹⁵ Te su boobaa nag ñu war noo jàppe ay seedey fen-kati Yàlla, ndax noo seedeel Yàlla, ne moo dekkal Almasi te dekkal ko, gannaaw ñi

* 14:21 14.21 Seetal ci *Esayi* 28.11-12.

dee duñu dekki. ¹⁶ Ndaxte ñi dee, su ñu dul dekki kay, Almasi it dekkiwul. ¹⁷ Su Almasi dekkiwul nag, seen ngëm amul njariñ, te yeena ngi ci seeni bàkkaar ba tey. ¹⁸ Te kon it ñi dee gannaaw ba ñu gëmee Almasi, sànk nañu. ¹⁹ Su dee ci giiru dund gii donj lanu ame yaakaar ci Almasi, kon de noo gëna toskare ñépp.

²⁰ Waaye nag Almasi dafa dekki moos, te mooy saraxu ndoortel meññeef, bi ñu sàkke ci ngóobum bakkani nit ñi dee. ²¹ Ci nit la ndee dikke ci àddina. Moo tax ci nit itam la ndekkite dikke ci àddina. ²² Noonu nit bokke ci Aadama, ba tax ñépp di dee, noonu la ñépp mana bokke ci Almasi, ba tax ñu dundalaat leen, ñoom ñépp. ²³ Waaye ku nekk ak ayam. Jooxeb ndoortel meññeef mi, Almasi la. Gannaaw loolu ñoñi Almasi ñooy aye, keroog bu délsee. ²⁴ Gannaaw loolu la muj ga, te ca lay delloo nguur gi kuy Yàlla, di Baay, fekk mu neenal mboolem luy kilifteef, ak mboolem sañ-sañ ak doole. ²⁵ Ndaxte fàww Almasi nguuru, ba kera Yàlla di sukkal mboolem ay noonam ciy tãnkam. ²⁶ Noon bu mujj, bi ñuy neenal mooy ndee, ²⁷ ndax «Lépp la Yàlla di jébbal Almasi, teg ko fi ron ndégguy tãnkam*.» Waaye bu Yàlla nee, «lépp la koy jébbal,» bir na ne moom mi ko jébbal lépp, bokku ci. ²⁸ Bu ñu ko jébbalee lépp nag, su boobaa moom Doom ji ci boppam mooy jébbal boppam, ki ko jébbal lépp, ngir Yàlla di lépp ci lépp.

²⁹ Su fekkee ne ñi dee duñu dekki, kon ñi ñu sóob ci ndox ngir ñi dee, lu ñu koy def, doye? Gannaaw ñi dee duñu dekki, ana lees leen di sóobe ngir ñi dee? ³⁰ Te kon nun it, ana lu jar nuy jaay sunu bakkan waxtu wu nekk? ³¹ Bokk yi, man de bés bu nekk ma jàkkaarlook ndee, ak sag bi ma leen di sagoo ndax Yeesu Almasi sunu Boroom, mi ngeen gëm. ³² Su yaakaaru nit ci àddina donj taxee may xeex ak ay rabi àll ca Efes, ana lu mu may jariñ. Gannaaw ñi dee duñu dekki, kon kay mooy li ñu ne: «Nanu lekk te naan, nde èllëg nu dee†.»

³³ Bu leen kenn nax: «Ànd bu bon yaq na jilkko ju baax.» ³⁴ Déllóosileen xel yi ci njub te bàyyi bàkkaar, ndax ñàkka xam lenn ci Yàlla, moom la ñenn ci yeen nekke, te loolu gacce la ci yeen, laa wax!

Yaram bare na te wuute

³⁵ Teewul nit a ngi naan: «Nan la ñi dee di dekke? Wan yaram lañuy dekkeale?»

³⁶ Gàtt xel! Li nga ji, yaw ci sa bopp, du dundaat li feek deewul ba noppi. ³⁷ Te li nga ji du yaramu gancax giy ñëw, aw fepp kese la, man naa doon bele, mbaa weneen

jiwu. ³⁸ Waaye Yàllaa koy yaramal ni mu ko soobe, te jiwu wu nekk ak yaramu gancaxam. ³⁹ Suux yépp nag du wenn suux wi. Wii suux wu nit la, wee wu mala, wale wu picc, wa ca des wu jën. ⁴⁰ Am na itam ay yaram wu farewoo asamaan, ak ay yaram yu farewoo suuf. Yaram wu farewoo asamaan nag, ag leeram wuute na ag leeru yaram wu farewoo suuf. ⁴¹ Jant bi ak leeru boppam, weer wi ak leeru boppam, biddiww yi ak seen leeru bopp, te biddiww sax wuute naak moroom ma, ag leer.

⁴² Noonu itam la ndekkittel ñi dee di deme. Li ñu suul mooy jiwu wiy yaqu, te bu dekke dootu yaqu. ⁴³ Ci ag teddadi lañu ji nëew bi ñu suul, te teraanga lay dekkeale. Ci nëew doole lees ko ji, mu dekkeale doole. ⁴⁴ Li ñu suul mooy yaramu judduwaale wi ñu ji, mu dekki di yaram wuy dunde Noo gi. Ndaxte ni yaramu judduwaale ame, ni la yaram wuy dunde Noo gi ame.

⁴⁵ Noonu lañu binde ne: «Aadama, nit ku jëkk ka, lañu def jëmm juy dund‡,» waaye Aadama mu mujj mi moo di Noo giy dundloo. ⁴⁶ Du yaram wi bindoo ag noo nag mooy jiitu, waaye yaramu judduwaale wi mooy jiitu, yaram wi bindoo ag noo topp ci. ⁴⁷ Aadama mu jëkk ma, ci suuf la jóge woon, di suuf; Aadama ñaareel mi jóge fa asamaan. ⁴⁸ Kooka di suuf nag, na mu mel, ni la niti suuf mel. Ku asamaane ka it, na mu mel, ni la ñu asamaane ñi mel. ⁴⁹ Te ni nu doone tey, takkndeuru nitu suuf ka, noonu lanuy dooneji takkndeuru ku asamaane ka.

⁵⁰ Li may wax bokk yi, moo di suux ak deret du am cér ci nguuru Yàlla, te luy yaqu manula am cér ci lu dul yaqu. ⁵¹ Kaayleen ma xamal leen mbir mu umpe. Dunu dee nun ñépp, waaye nun ñépp ay soppiku. ⁵² Lu gaawa gaaw lay doon, ci xef ak xippi, bu liit gu mujj ga jibee; nde liit ga mooy jib, ñi dee, dekki, di ñu dul yaqooti, nun nag, nu soppiku. ⁵³ Sunu yaramu judduwaale wii nara yaqu, fàww mu sol weneen wu dul yaqu; sunu yaramu ndee wii, fàww mu sol yaramu deetil. ⁵⁴ Bu yaramu judduwaale wii nara yaqu solee weneen wu dul yaqu, ba yaramu ndee wii sol yaramu deetil, su boobaa la kàddu gii ñu bind di mat:

«Méddees na ndee ci géēju ndam§.

⁵⁵ Moo yaw ndee, Ana sa ndam?

Moo yaw ndee, ana sag fitt*?»

⁵⁶ Ndee, ag fittam mooy bàkkaar, te bàkkaar, dooleem mooy Yoon wi. ⁵⁷ Waaye

* 15:27 15.27 Seetal ci *Sabóor* 8.7. † 15:32 15.32 Seetal ci *Esayi* 22.13. ‡ 15:45 15.45 Seetal ci *Njàibéen ga* 2.7.

§ 15:54 15.54 Seetal ci *Esayi* 25.8. * 15:55 15.55 Seetal ci *Ose* 13.14.

cant ñeel na Yàlla, mi nu may ndam ci sunu Sang Yeesu Almasi!

⁵⁸ Kon nag yeen sama bokk yi ma soppal sama bopp, farluleen, bu leen dara yëngal, te saxooleena jëm kanam ci liggéeyu Sang bi, te ngeen xam ne seenu ñaq, ci seenub ànd ak Sang bi, du neen.

16

Lu jëm ci ndimbal lu ñeel gëmkati Yerusalem

¹ Ci wàllu ndimbal li jëm ci gëmkat ñu sell ñi, noonu ma ko digale mboolooy gëmkati diiwaanu Galasi, yeen itam defeleen ko noonu. ² Bés bu jëkk ci ayu bés yi, na ku nekk gënne as lëf ca la mu am, na mu ko àttane, te mu dencal ko boppam, ngir bu ma dikkee, dootu soxlaa wër, di dajale. ³ Bu ma dikkee, ñi ngeen tànn, ñoom laay yebale ab bataaxal, ngir ñu yóbbu Yerusalem seen ndimbal. ⁴ Su aajoo ma dem man itam, ñu ànd ak man.

Póol mébét na, dénkaane na

⁵ Dinaa dikk ba ci yeen, gannaaw bu ma jaaree diiwaanu Maseduwan, ndax Maseduwan laay jaare. ⁶ Man naa am ma yàgg ci yeen, jombul sax ma lollikoo fi yeen. Su ko defee ngeen yiwi ma, ma dem, ak fu ma mana jëm. ⁷ Ndaxte itam, buggumaa jaare fi yeen rekk, jàll, waaye yaakaar naa toog ci yeen ab diir, su ko Boroom bi mayee. ⁸ Waaye ci Efes gi laay toog ba màggalu Pàntakot, ⁹ ndax bunt ubbikul na ma fi ñàpp, ngir liggéey bu am njariñ, te noon yi bare nañu.

¹⁰ Bu Timote dikkee nag, fexeleen ba bumu am lu muy tiit ci seen biir, ndax liggéeyu Boroom bi lay liggéey ni man. ¹¹ Kon bu ko kenn xeeb. Gannaaw loolu nangeen ko yiwi ak jàmm, ba mu délsi ci man, ndax moom laay xaar, mook bokk yi itam.

¹² Mbokk mi Apolos nag moom, soññ naa ko lu bare, ngir mu dikk ba ci yeen, ànd ak bokk yi, waaye fii nu tollu yebuwu ci dara. Teewul bu jekkoo, dina dikk.

Yeneen ndigal a ngi aki tàggtoo

¹³ Teewluleen te saxoo ngëm, góor-góorluleen te dëgërлу. ¹⁴ Lépp lu ngeen di def, defeleen ko cofeel.

¹⁵ Bokk yi, xam ngeen ne Estefanas ak njabootam ñooy jooxeb ndoortel meññeef ci diiwaanu Akayi, te jàpple ñu sell ñi lañu séddoo. Kon dama leen di ñaan, ¹⁶ ngeen nangul nit ñu mel noonu, ñoom ak mboolem ñu bokk ak ñoom liggéey bi ak coono bi. ¹⁷ Maa ngi bége teewaayu Estefanas ak Fortunatus ak Akaykus, ndax bi ngeen wuutee tey, ñoo leen taxawal.

¹⁸ Dalal nañu sama xel, ak seen mos, yeen itam. Kon nit ñu mel noonu, fonkleen leen.

¹⁹ Mboolooy gëmkati diiwaanu Asi nag ñu ngi leen di nuyu. Akilas ak Pirsil, ñu ngi leen di nuyu bu baax ci turu Sang bi, ñoom ak mbooloom gëmkat ñiy daje seen kër. ²⁰ Bokk yépp a ngi leen di nuyu.

Saafonteelen foonante yu sell.

²¹ Man Póol maa bind nuyoo bii ci sama loxol bopp.

²² Ku buggul Sang bi, na alku. Maranata (mu firi sunu Sang, dikkal!)

²³ Yal na yiwu Sang Yeesu ànd ak yeen.

²⁴ Sama cofeel ñeel na leen, yeen ñépp, ci Yeesu Almasi mi nu bokk.

Ñaareelu bataaxal bi Yàlla may Póol, mu bind ko waa Korent

¹ Ci man Póol, ndawal Almasi Yeesu ci coobarey Yàlla, ci man la bataaxal bii bawoo, bawoo itam ci Timote mbokk mi, ñeel mbooloom Yàlla mi ci Korent, ak mboolom ñu sell ñi ci diiwaanu Akayi gépp. ² Aw yiw ak jamm ñeel na leen, bawoo fa Yàlla sunu Baay, ak Sang Yeesu Almasi.

Yàlla mooy dëfal xol yi

³ Cant ñeel na Yàlla sunu Baayu Sang Yeesu Almasi, Baayu yërmande yi, Yàlla jiy dëfale nu nekk, ⁴ moom mi nuy dëfal ci sunu jépp njàqare, ngir noonu nu jote nun ci sunu bopp, ndéfalaay lu nu dëfalo fa Yàlla, nu man koo dëfale ñi nekke mboolom xeeti njàqare. ⁵ Ndax kat coonoy Almasi, nu mu gëna yokkoo ci sunu kaw, ndax li nu ko gëm, noonu itam la ndéfalaay liy bawoo ci Almasi di yokkoo. ⁶ Su nu jaaree ci njàqare, seen ndéfalaay ak seen jamm lay doon. Sunu amee ndéfalaay it, seen ndéfalaay lay doon, ngir coono yi nuy dékku, ngeen man koo dékku, yeen itam. ⁷ Te itam am nanu yaakaar ci yeen bu baax. Xam nanu ne ni ngeen bokke ak nun coono, ni ngeen di bokke ak nun ndéfalaay.

⁸ Ndax kat, bokk yi, buggunu ngeen umple njàqare, ji nu daj ci diiwaanu Asi. Daj nanu coono bu jéggi dayo, te wees sunu kàttan, ba yaakaaratanu woona dund sax. ⁹ Nun ci sunu wàllu bopp, jàppoon nanu ne sunu àtteb dee moo taxaw. Waaye loolu tax na nu bañatee yaakaar sunu bopp, xanaa di yaakaar ci Yàlla, miy dekkal ñi dee. ¹⁰ Moo nu wallu ci googu dee gu naroonu metti, moo nuy walluwaat, te moom lanu yaakaar mu wallooti nu. ¹¹ Yeen itam, ni ngeen nu ciy jàpplee mooy ngeen di nu ñaanal. Su ko defee yiw, wa nu ñu bare ñaanal ba nu am ko, dina tax ñu bare biral ag cant ci sunu mbir.

Póol biral na jéfnam ak mébétam

¹² Li nuy damoo nag moo di seede bi nu sunu xel mu dal seedeel, ne xol bu set ak jikko ju dëggu ju bawoo fa Yàlla, mooy li nu doxale ci áddina si, rawatina sunu digg ak yeen, te du lu nu sunu xam-xamu nitu neen may, waaye yiwu Yàlla moo nu ko may. ¹³ Bindunu leen leneen lu moy mbind moomu ngeen jàng te man koo xam. May

yaakaar nag ne dingeen xam ba mokkal, ¹⁴ noonu ngeen xawa xame ne nun, man ngeen noo damoo, te nun it, yeen la nuy damoo, keroog bésu Sang Yeesu.

¹⁵ Kóolote gu ma amoon ci ni ngeen nuy damoo moo tax ma naroonu jékka dikka ba ci yeen, ngir seen yiw mana yaar, ¹⁶ ba bu ma jógee ci yeen, daldi jaareji diiwaanu Maseduwan, bu ma jógee Maseduwan, dikkaat ci yeen, ba ngeen yiwi ma, ma jëm Yude. ¹⁷ Ndax ñàkk pastéef laa mébéte moomu mébét? Am ni nitu suuxu neen di mébéte rekk laa topp bay xel-yaar, naan «waaw» te naan «déet»?

¹⁸ Yàlla mi mata gëm de seere na ne kàddu gi nu leen di wax du «waaw, déet,» ¹⁹ ndax Doomu Yàlla, Yeesu Almasi, mi nu biral ci seen biir, man ak Silas* ak Timote, du kàddug «waaw, déet,» «waaw» donj a nekk ci moom. ²⁰ Ak li digey Yàlla di bare lépp, ci Almasi la ay digeem di doone «waaw». Moo tax itam, ci moom lanu naan Yàlla: «Amin», ngir delloo ko njukkal. ²¹ Te ki nuy saxal ci Almasi, nook yeen, moo nu tabbe diwu pal gi, te moo di Yàlla. ²² Moo nu màndargaale xàmmikaayam, te moo yeb dawalub Noo gu Sell gi ci sunu biir xol.

²³ Man nag seede Yàlla laa ciy sàkku, giñ naa ko ci sama bakkam, bañ leena yokku naqar moo tax délsiwuma Korent. ²⁴ Du caageenu yilif seen ngëm nag, ndax ci ngëm ngeen sax, waaye nook yeen ay liggeey, ngir seen mbégte.

2

¹ Man nag li ma dogu mooy lii: Du teg leen aw naqar laay délsee ci yeen, ² ndax su ma leen naqaralee, ana kuy serral sama xol ku dul yeen ñi ma naqaral? ³ Looloo taxoon ma binde noonu, ngir bu ma dikkee, baña am naqar ci ñi ma waroonu bégal. Li ma wóor ci yeen ñépp moo di sama mbégte mooy seen mbégte, yeen ñépp. ⁴ Ci biir njàqare, ak xol bu fees, ak rongooñ yu bare laa leen bind. Binduma leen ngir naqaral leen, waaye cofeel gu réy gi ma am ci yeen moo tax.

⁵ Su nit tegee aw naqar, man naa ne du man rekk la ko teg, waaye yeen ñépp la teg aw naqar, mbaa boog ma ne ñenn ci yeen, ngir baña réyal bir mi lool. ⁶ Tiiñal, gi ko li épp ci mbooloo mi tiiñal, doy na ko mbugal. ⁷ Kon kay xanaa ngeen jéggal ko, te dëfal ko, ngir mu baña sóobu ci naqar wu ko épp doole. ⁸ Kon dama leen di ñaan, ngeen feddli seen mbéggeel ci moom. ⁹ Leneen lu ma jublu woon ci bind leen, moo di nattu leen ba xam, ndax dingeen dégg ndigal ci lépp. ¹⁰ Ku ngeen

* 1:19 1.19 Silas mooy Silwan ba tey.

jéggal ag tooñ, ma jéggal ko, man itam. Man nag, su ma jéggalee, ndegam am naa lu ma jéggalee, yeena tax ma def ko, ci kanam Almasi, ¹¹ ngir Seytaane bañ noo nax, ndax ay pexeem, umplewunu ko.

Póol jaaxle na, féex na

¹² Ba ma àggee Torowas, ngir yégle fa xibaaru jàmm bi ci Almasi, bunt ubbikul na ma ndax Boroom bi. ¹³ Waaye sama xel dalul woon, ndax gisuma woon sama mbokk, Tit. Teewul ma tàggtoo ak ñoom, jém diiwaan Maseduwan.

¹⁴ Waaye cant ñeel na Yàlla*! Moom mi Almasi tax mu di nu yóbbaaale saa su nekk, ci njaab miy fésal ndamam, te cuuraayal xam-xamam, nun ñii la koy wasaaree fépp, ¹⁵ ndax kat nun nooy cuuraayal Almasi fa Yàlla, ñeel ñi ci yoonu texe, ak ñi ci yoonu sànkute. ¹⁶ Teewul muy ci ñii, xetu ndee gu jème ci ndee, te di ci ñee, xetu dund gu jème ci dund. Boobu sas nag, ana ku ko àttan? ¹⁷ Nun nag danoo melul ni ñu bare, ñiy julaa kàddug Yàlla, waaye ci ndigalal Yàlla ak fi kanam Yàlla la nuy waaree xol bu set, ci Almasi mi nu gém.

3

Póol a ngi layool sasub ndawam

¹ Danuy tàmbaleetee seedeel sunu bopp ne noo yelloo ngèrèma? Am danoo soxla ni ñoon nit ñi, ay bataaxal yu jëm ci yeen, mbaa mu bawoo ci yaan, ngir seedeel nu ngèrèm? ² Sunu bataaxal kay, yeen la, te dees koo bind ci sunu xol, ba ñépp xam ko, jàng ko. ³ Bir na ne bataaxal Almasi bu jottlikoo ci sunub liggéey, moom ngeen, te du daa lees ko binde, waaye Noowug Yàlla jiy dund lees ko binde. Du ci àlluway doj lees ko rédd, waaye ci àlluway xoli suux, lees ko rédd.

⁴ Googu kóolute lanu am ci Yàlla ndax Almasi. ⁵ Du caageenu doylloo sunu manoorey bopp, ba yaakaar ne lenn man naa sottee ci sunu wàllu bopp, waaye sunu manoore ci Yàlla la jóge. ⁶ Moo nu may manoorey doon ay liggéeykati kóllère gu bees gu ajuwul ci mbindum ndigali yoon, xanaa kóllère guaju ci Noo gi. Ndaxte mbindum ndigali yoon day rey, te Noo gi di dundloo.

⁷ Mbindum ndigali yoon wi, ci aw doj lees ko réddoon, te Musaa moo sasoo woon liggéeyu yoon woowuy jème ci ndee. Teewul muy liggéey bu làmboo ag leer gu doon lèrxat ca kanam ga, ba bànni Israyil téle koo xool jàkk, doonte leer guy wéy la woon. ⁸ Waaye liggéeyu Noo gi, leer gu

gènatee réy la làmboo. ⁹ Ndegam liggéey boobuy tege ab daan moo làmboo ag leer, kon liggéeyu Noo, giy maye njekk moo ko gènatee làmboo ag leer. ¹⁰ Soo ko xoollee noonu, leer ga woon, du woon sax ag leer, ci leer gi ko raw tey, ¹¹ ndax ndegam liy wéy moo làmboo woon ag leer, astamaak li fi sax.

¹² Gannaaw am nanu jooju yaakaar nag, fit wu réy lanuy deme, ¹³ te baña def ni Musaa ma daan muur kanam ga, ndax bànni Israyil bañ ne jàkk ci leer guy wéy, di giim, di giim ba jee. ¹⁴ Waaye seenum xel a ñeekiis. Ba tey jii, bu ñuy jàngge biir mbooloo, téereb kóllère gu jèkk gi, muuraay googoo fi des; murikuwul, ndax ci Almasi lay deñe. ¹⁵ Waaw, ba tey jii kay, saa yu ñuy biral yoonu Musaa, ag muuraay a ngi tege ci seen xol. ¹⁶ Waaye saa su nit wañnikoo ci Boroom bi, muuraay gi day muriku. ¹⁷ Boroom bi mooy Noo gi, te fu Noo gi ñeekiis, fa la nit di moome boppam. ¹⁸ Nun ñépp nag, kanam gu muriku lanuy xoolle niki cib seetu, leeru Boroom bi, ba tax nuy soppiku, doon takkndeeram, tey làmboo leer guy mág, di gèna mág. Looloo di liggéeyu Boroom bi, moom miy Noo gi.

4

Njaqi bani kese yeb na ngèneeli alal

¹ Ndegam boobu liggéey lanu sasoo, ci yèrmandey Yàlla, dunu yoqi. ² Waaye danoo dàq jépp jéf ju gâccelu ju nit di jéfe làq-làqal. Doxunu ag njublañ te soppaariwunu kàddug Yàlla. Liy dègg kay lanuy fésal, ba am kóoluteg ñépp, fi kanam Yàlla. ³ Sunu xibaaru jàmm nag, su muuroo, ñi nara sànkul la muurul. ⁴ Aji gémadi ñooñu la Seytaane yállay xarnu bi gèlèmal seenum xel, ngir ñu baña gis ceeñeeru xibaaru jàmm bu leeru Almasi, miy melokaanu Yàlla. ⁵ Nun kat, du sunu bopp lanuy waare, waaye li Yeesu Almasi dib Sang moom lanuy waare, te nun ci sunu bopp nooy seeni jaam, ndax Yeesu. ⁶ Ndaxte Yàlla mi ne: «Na leer gi leere ci biir lèndèm gi,» moo leeral sunu xol, ngir leeraangey xam-xamu leeru Yàlla, te leeraange googu mooy lèrxat ci xar-kanamu Yeesu Almasi.

⁷ Nun nag nooy njaqi bani kese yi yeb jooju alal, ngir mu bir ne manoore ju yéeme ji alal ji làmboo, manoorey Yàllaa, waaye du sunu jos. ⁸ Nu nekk lees nuy tance, waaye deesu nu nappaaje. Dinanu jaaxle, waaye dunu jàq. ⁹ Dees na nu bundxatal, waaye deesu nu wacc. Dees na

* 2:14 2:14 Gannaaw ba Póol daje ak Tit ba mu xamal ko ni waa Korent rafetloo bataaxalam ba mu doon jooye, loolu firndeel na ko ne Yàlla dèggal na sasu ndawam. Moo tax muy sàbbaal Yàlla ci woowu yiw. Seetal 7.5-16.

nu daaneel, waaye deesu nu jekkli. ¹⁰ Dee gi Yeesu dee woon, moom lanu ñandal ci sunu yaram, fu nu tollu, ngir dundug Yeesu itam mana fése ci sunu yaram. ¹¹ Saa su nekk, nun ñiy dund, ñu ngi nuy jébbal ndee ndax Yeesu, ba tax dundu Yeesu it mana fése ci sunuw suux wi jëm ndee. ¹² Kon nag ndee mooy def liggéeyam ci nun, ndund di def liggéeyam ci yeen.

¹³ Bindees na ne: «Damaa gëm, moo tax ma wax*.» Nun it, wenn xeetu ngëm wi lanu am. Danoo gëm, moo tax itam nuy wax. ¹⁴ Ndaxte xam nanu ne ki dekkal Sang Yeesu, moo nuy dekkal itam, nook Yeesu, te moo nuy yóbbu ba nu teewi, nook yeen, fa kanamam. ¹⁵ Loolu lépp yeena tax, ngir yiwu Yàlla lawa law, ba cant gu ne gànñ tukkee ci ñi épp ci nit ñi, ngir mággu Yàlla.

Yaakaar lanu saxoo

¹⁶ Moo tax dunu ñàkk yaakaar. Doonte sax sunu bitib jëm m a ngi gën di bon, sunu jëm mu biir moom, mu ngi yeel bés ak bés. ¹⁷ Sunu coono bu woyof bii ci àddina, ci diggante bu gätt nag, moo nuy jural teraanga ju diisaay ba jéggi dayo, teraanga ju sax dàkk. ¹⁸ Moo waral xoolunu ci li bët mana gis, waaye li bët dul gis, ci lanuy xool, ndax li bët mana gis day wéy, waaye li bët dul gis moo sax ba faww.

5

¹ Xam nanu ne sunu yaram, sunu kèru kaw suuf gii di ab xayma, bu daanoo it, am taax lanu am fa Yàlla, kër gu sax dàkk, gu loxol nit tabaxul. ² Moo nu tax di onk ci biir xayma bii nu nekk, ndax yàkkamtee soloo sunu dëkkuwaayu asamaan, teg ko ci kaw bii nu jital, ³ nde bu nu soloo noonu, dunu def yaram neen. ⁴ Noo ngi onk ndax diis, li feek nu ngeek sunuw yaram, xayma bi nu soloo nii. Du summiku lanu namm, waaye solu teg ko ci lanu namm, ngir li jëm ndee, daldi suux ci biir ndund. ⁵ Googu muj ci boppam lanu Yàlla mooñe woon, te Noo gi mu nu jox lanu ci dawalal.

⁶ Moo tax nu saxoo ñeme, te xam ne sunu desagum biir kër, ci yaram wi, mooy sunu desagum fu sore Sang bi, ⁷ ndax ngëm lanuy doxe, waaye doxewunu ab gis-gis. ⁸ Kon ñeme lanu def, te li nu gënal di génn, des bitib sunu yaramu tey, ngir dëkki ak Sang bi. ⁹ Kon nag, nu des biir kër gii, mbaa nu gënn, dëkki bitib kër gii, li nu xintewoo daal moo di nu neex Sang bi. ¹⁰ Ndax kat, nun ñépp faww nu taxawi fa jalub àttekaayu Almasi, ngir ku nekk

yooloo kemu jéf ja mu jéfe yaramam, muy lu baax, mbaa lu bon.

Jubooleen ak Yàlla

¹¹ Danoo xam lan mooy ragal Boroom bi nag, te moo nu tax di wax lu gëmloo nit ñi. Yàlla de ràññee na bu baax nooy kan. May yaakaar ne yeen itam, ci seen biir xol, ràññee ngeen bu baax nooy kan. ¹² Seedeelatunu sunu bopp lu jar ngërëm de, danu leen di may lu ngeen nu mana sagoo, ndax ngeen am tontal ñi sagoowul li ci biir xol, xanaa di sagoo am peeñ. ¹³ Ndegam danoo teqlikoo ak sunu sago, Yàlla la ñeel. Su nu àndee ak sunu sago nag, yeen la ñeel. ¹⁴ Ndaxte cofeelu Almasi daal moo nu jite, nun ñi ràññee lii: Gannaaw kenn moo deeyal ñépp, kon ñépp a dee. ¹⁵ Te ki deeyal ñépp, daa deeyal ñépp ngir ñiy dund bañatee dund ngir seen bopp, xanaa di dund ngir ki leen deeyal, ba dekki.

¹⁶ Kon nag gannaaw-si-tey, ni nitu suuxu neen di xoolle moroomam, nun xoolleetunu ko kenn. Doonte ni nitu suuxu neen lanu xoolle woon Almasi, léegi xoolleetunu ko noonu. ¹⁷ Kon bu nit ki bokkee ci Almasi, mbindeef mu bees lay doon. La woon day wonni, li teew nag, di lu yees. ¹⁸ Loolu lépp ci Yàlla la jóge, moom mi nu jubale ak boppam ci Almasi, te moo nu sas, ngir nuy waare juboo googu. ¹⁹ Loolu di firi ne ci Almasi la Yàlla jubale waa àddina, ak jëm mu boppam, ba toppu leen seeni tooñ, te moo nu dénk kàddug juboo gi. ²⁰ Kon nag Almasi, noo diy ndawam, te ci nun la Yàlla di wootee. Kon ci turu Almasi, danu leen di ñaan: nanguleena juboo ak Yàlla. ²¹ Almasi mi masula bàkkaar, moom la Yàlla sëf sunu bàkkaar, ngir nu mana ame ci moom àtteb nit ñu jub fa Yàlla.

6

¹ Nun ñi bokk ci liggéey bi nag, noo leen di ñaan ngeen baña nangu yiwu Yàlla ci neen. ² Ndaxte Yàlla moo ne: «Jant ba mu jotee laa la nangul, bésu mucc ba laa la wallu*.» Te nag, tey jii la jantam jote; tey kat, la bésu mucc.

Liggéeyal Yàlla ñàkkul aw tiis

³ Buggunu kenn sikk sunub liggéey, moo tax buggunoo jéfe lenn luy doon tojaange ci kenn. ⁴ Ci lépp kay lanu bégga seedeel sunu bopp, ne noo yelloo ngërëm, te ay jawriñi Yàlla lanu, di ñu muñ lu bare ci biir coono, aki mitit, aki njàqare; ⁵ ci ay dóor, ak néegi kaso, ci biir mbooloo yu nu jógal, ci doñ-doñ ju metti, ak fanaanee xoolle, akub xiif; ⁶ te nuy setal sunu dund,

* 4:13 4.13 Seetal ci Sabóor 116.10.

* 6:2 6.2 Seetal ci Esayi 49.8.

di ànd ak xam-xam, ci biir muñ, akug mbaax, ci biir Noo gu Sell gi, ak cofeel gu amul jinigal, ⁷ ci biir kàddug dëgg, ak kàttanu Yàlla; ci kaw gannaayi njubte yi ci sunu loxol ndijoor ak lu càmmoñ; ⁸ ci biir teraanga, ak ci biir toskare; ci biiri baatal, ak jëw yu rafet. Dees noo jappe ay mbubbookati dëgg, te nuy nit ñu dëgg; ⁹ jappe nu ñu kenn xamul, te nuy ñu siiw; jappe nu ñuy waaja dee, te nuy dund; jappe nu ñu ñu wara mbugal, te bañ leena teg àtteb dee. ¹⁰ Dees noo jappe boroomi tiis, te nu dëkke mbég; jappe nu ay néewji-doole, te nu woomal ñu bare; jappe nu ñu amul dara, te nu moom lépp.

¹¹ Yeen bokki Korent, wax nanu leen sunu biir yépp, ubbil leen sunu xol. ¹² Genn ñooru jógewul ci nun, waaye yeen yeena nu ñooroo seen xol. ¹³ Léegi nag, yeen, feyleen nu bor bi boog, ma wax ak yeen ni samay doom, ubbil-leen nu seen xol!

Baleen bokkaale

¹⁴ Buleen lëkkoo ak gëmadikat ñi. Gan lëngoo la njub ak ndëngte séq? Gan booolo la leer ak lëndëm séq? ¹⁵ Gan juboo la Almasi ak Seytaane séq? Wan wàll la gëmkat bi bokk ak gëmadikat bi? ¹⁶ Gan takktoo la kër Yàlla séq ak ay tuur? Ndax kat, nun, nooy kër Yàlla jiy dund, te noonu la ko Yàlla waxe ne:

«Maay dëkk ci seen biir, di dox ci seen biir, di seen Yàlla, ñuy sama ñoñ†.»

¹⁷ Kon nag:

«Nangeen génne ci seen biir, te teqlikoo ak ñoom,»

la Boroom bi wax.

«Lu sobewu, buleen ko laal‡.»

Su boobaa, maa leen di dalal§.

¹⁸ Maay doon seen baay,

ngeen di samay doom, góor, ak jigéen*,»

la Boroom bi, Aji Man ji wax.

7

¹ Gannaaw noo moom yii dige nag, soppe yi, nanu setal sunu bopp ci mboolem sobey yaram, ak ju xel, te nu matal sellnga ci ag ragal Yàlla.

Póol bége na tuubeelu waa Korent

² Xajal-leen nu. Tooñunu kenn; lorunu kenn; naxunu kenn, lekkunu alalu kenn.

³ Du teg leen tooñ laay waxe lii, ndax wax naa ko ba noppi, yeena ngi ci sunu xol, ngir nu bokk dund, mbaa nu bokk dee.

⁴ Kóolute gu réy laa am ci yeen, te sag bi ma ame ci yeen réy na. Mbégte mu seral sama xol laa feese, te bannexx laa rembatle, ci biir sunu mboolem njàqare!

⁵ Ba nu àggee diiwaanu Maseduwan, sunuw yaram noppluwul, waaye daj nanu bépp coono: xeex ci biti, njàqare ci biir.

⁶ Teewul Yàlla miy seral xolu ñi xàddi, tàñki Tit la serale sunu xol, ⁷ te du tàñki Tit rekk la serale sunu xol, waaye itam, seral ga Tit ne, moom ngeen serale woon xolam. Yégal na nu seen nammeel gu réy, ak seeni jooy, ak seen xéraange ci man, ba ma gënatee bég.

⁸ Ndegam sax dama leena tegoon aw tiis ndax bataaxal ba ma leen bind, réccootuma ko, doonte réccu woon naa ko, ndax gis naa ne bataaxal boobu teg na leen aw tiis, lu mu gàtt gàtt. ⁹ Waaye tey bég naa, te du tiis wu ngeen tegoo laay bége, waaye li leen tiis wi tuubloo, laay bége, ndax woowu xeetu tiis la Yàlla namm ci yeen, moo tax it yóbbewunu leen jenn loraange. ¹⁰ Ndaxte tiis wu Yàlla namm, ag tuubeel gu jëme cig muccl lay jur, te loolu du tiis wees di tiisoo. Waaye tiisu àddina, ndee lay jur. ¹¹ Gisleen nag, seen tiis wi leen Yàlla teg ci coobareem, li mu leen jural: gii farlute; gii kàddug layoo gu ngeen yékkati, rawati; mii mer mu war, rawati; gii ragal Yàlla rawati; gii nammeel rawati; gii xéraange rawati; gii pastéef ci yar ki tooñ rawati! Nu nekk ngeen setale seen bopp wecc ci mbir moomu. ¹² Kon nag su ma leen bindee, ki tooñ taxul, ki ñu tooñ it taxul, waaye dama leena bind, ngir farlute gi ngeen am ci nun, mana fés, fi kanam Yàlla, ngeen gisal ko seen bopp.

¹³ Loolu seral na sunu xol. Te yemunu ci xol bu sedd, waaye gënati nanoo bége mbégtem Tit, mi ngeen dalal am xelam, yeen ñépp. ¹⁴ Dëgg la, damoo naa leen as léf fi kanam Tit, waaye gacce fekku ma ci. Dëgg lanu leen masa wax, waaye la nu leen doon damoo fa kanam Tit itam, noonu la mujje doon dëgg. ¹⁵ Te saa yu Tit xoolaatee ni ngeen dëgge ndigal, yeen ñépp, ak wegeel gi ngeen ko dalale, ànd ceek ragal Yàlla bay lox, cofeelam ci yeen di gënatee yokku. ¹⁶ Bég naa, ndax wóolu naa leen ci lépp!

8

Yéwénleen

¹ Gannaaw loolu bokk yi, danu leen di xamal li yiwu Yàlla maye ci biir mboooloy gëmkati diiwaanu Maseduwan. ² Doonte jaar nañu ci nattub njàqare bu mag, seen mbégtee rembat ci seen biir ñàkk gu tar, ba géegal seenug tabe. ³ Seen kemu am-am lañu joxee, maa ko seede, lu wees seen am-am sax lañu joxee xol bu sedd. ⁴ Dañu noo ñaan, ba di nu tinu, ngir nu may leen,

† 6:16 6.16 Seetal ci *Sarxalkat* yi 26.12.

‡ 6:17 6.17 Seetal ci *Esayi* 52.11.

§ 6:17 6.17 Seetal ci *Esekiyel* 20.41.

* 6:18 6.18 Seetal ci *2.Samiyel* 7.14.

ñu def seen loxo ci ndimbalu jappante gi jëm ci gëmkat ñu sell ñi* .⁵ Li nu séentu woon sax wees nañu ko, nde Sang bi lañu jékka jébbal seen bopp, door noo jébbal seen bopp, te noonu la ko Yälla bégge.⁶ Looloo tax nu soññ Tit, ngir noonee mu tãmbalee woon ci yeen, ndajalem ndimbal li, mu àggalee ko ci yeen.⁷ Gannaaw nag yeena duunle ci lépp; muy ci wàllu ngëm, ak wàllu kaddu yu rafet, ak wàllu xam-xam, ak cawarte ci lépp, ak ci cofeel gu nu leen xiir, kon ndajalem ndimbal lii it, ngalla duunleelen ci.

⁸ Du ndigal lu ma leen jox, waaye njaxlafug yeneen gëmkat, moom laay natte seen xol, ngir xam nu seen cofeel dëggoo.⁹ Xam ngeen kat sunu yiwu Boroom Yeesu Almasi, moom ni woomle woon, te yeena tax mu ñàkk, ngir woomale leen ag ñàkkam.

¹⁰ Ab xalaat laa am ci mbir mii, te mooy doon seen njariñ. Du jëf ji rekk ngeen jékke woon, waaye yeena jëkkoon biral daaw, yéney dimbali.¹¹ Kon nag léegi, mottileen jëf ji. Noonu ngeen xère woon ci seen yéene, mottileen ko noonu ci seen kem am-am.¹² Ndax kat ab joxe, bu àndee ak yéene rekk, la boroom joxe bi amul, deesu ci natt lees koy nangul, waaye li mu am, ci lees koy nangul ab joxeem.

¹³ Du caageenu nag, teg leen coono, ngir teggil ñenn ñi, waaye ag tollale war na ci.¹⁴ Tey jii seenug rembatle mooy faj soxlay ñeneen, ngir èllëg, rembatley ñooña faj seeni soxla, yeen itam. Su ko defee ag tolloo am.¹⁵ Noonu lañu binde ne: «Ki dajale lu bare èpplewul, te ki dajale lu tuut ñàkkul†.»

Yõnnentub Tit am na sabab

¹⁶ Cant ñeel na Yälla, mi def ci xolu Tit, mu xér ci yeen ni ma xére ci yeen!¹⁷ Ba nu ñaane Tit mu dikk ba ci yeen, nangul na nu, waaye yemu ca, nde ci xéraangeem la yebul boppam ne mooy dikk ba ci yeen.¹⁸ Noo ko yebal, boole kook menn mbokk mu mboolooy gëmkat ñépp gërëm, ndax liggéeyam ci xibaaru Almasi bi muy xamle.¹⁹ Rax ci dolli, mboolooy gëmkat ñi ñoo ko tabb, ngir mu ànd ak nun, ba nu yóbbu ndimbal li, muy tedngay Boroom bi ci boppam, te di sunu firndey cawarte ci dimbalee.²⁰ Noonu lanu fàggo, ndax kenn bañ noo sikk ci ndimbal lu bare lii nu wara saytu.²¹ Li nuy xinte moo di li baax ci kanam Boroom bi, te baax ci kanam nit ñi itam.

²² Boole nañu leen itam ak sunu mbokk mu nu nemmiku xéraangeem ay yooni

yoou, ci fann yu bare, te mu gênatee xér bii yoon ndax koolute gu réy gu mu am ci yeen.²³ Su dee mbirum Tit, mooy sama wéttal, di ma japple ci liggéey bi, ngir yeen. Sunu bokk, yi ànd ak moom nag, ñooy ndawi mboolooy gëmkat ñi, te ñooy teraangay Almasi.²⁴ Kon nag wonleen leen lu firndeel seen cofeel ci ñoom, ak ci kanam mboolooy gëmkat ñi, firndeel itam ne noo yey wóolu leen.

9

¹ Ci mbirum ndimbal lu jëm ci ñu sell ñi, jarul ma di leen bind,² ndax xam naa seen yéene ju réy, te moom laay damoo ci kanam waa Maseduwan, naan leen: «Daaw fekk na waa Akayi* noppi.» Te seen xéraange jooju ngeen nekke xiirtal na ñu bare.³ Maa yebal bokk yi, di yaakaar ngeen noppi ni ma ko waxe woon, ngir la nu leen doon damoo ci mbir mii, baña neen.⁴ Lu ko moy bu niti Maseduwan dikkee, ànd ak man, te fekkuleen noppi, koolute googu sunu gacce lay doon, rawatina seen gos.⁵ Moo tax ma noon naa soññ bokk yi, ñu jiiu ma ci yeen, ba waajal ndimbal lu takku li ngeen dige woon, ba mu noppi, te baña doon sompi ñott, xanaa di ndimbal lu duun.

Ku ji lu bare, góob lu bare

⁶ Lii rekk la: ji lu tuut, góob lu tuut; ji lu bare, góob lu bare.⁷ Kon na ku nekk joxe, ni mu ko waaje ci xolam, te bañ koo tiisoo, bañ koo joxee ñàkk pexe, ndax kiy joxee xol bu sedd, Yälla sopp na ko,⁸ te Yälla man na leena baawaanal wépp yiw, ba ngeen saxoo am lu leen doy ci lépp, ak koom gu bare, ngir jépp jëf ju baax.⁹ Noonu lañu binde ne:

«Mooy naddil néew-doole yi, te njekkam sax dàkk†.»

¹⁰ Te kiy jagleel beykat bi am jiwu, ak mburu mu nit di dunde nag, kooku moo leen di jox jiwu mu ne gáññ, te mooy ful seen meñneefum njekk.¹¹ Su ko defee ngeen woomle ci lépp, mana yéwén ci wet gu nekk, ba seen jëf ji sottee ci nun, mana jur cant gu bare, ñeel Yälla.

¹² Ndax liggéey bi ndimbal lii laaj kat, yemul rekk ci faj soxlay ñu sell ñi, waaye itam dina baawaanal cant gu bare, ñeel Yälla.¹³ Liggéey bi ci ndimbal lii nag, nit ñi dinañu natt soloom bu réy, bay sàbbaal Yälla, ndax ni ngeen firndelee ne déggal ngeen xibaaru jàmm bu Almasi, ak ni ngeen yéwéne ci seen jappante, jëme ci ñoom ak ci ñépp.¹⁴ Cofeel gu réy nag lañu leen di ñaanaale, ndax yiw wi leen

* 8:4 8.4 Seetal ci Room 15.26. Ndimbal loolu ca gëmkat ña néew-doole ca Yerusalem la jëmnoon. † 8:15 8.15

Seetal ci Mucc ga 16.18. * 9:2 9.2 waa Akayi: Korent mooy péeyu diiwaanu Akayi. † 9:9 9.9 Seetal ci Sabóor 112.9.

Yàlla géegal, yeen. ¹⁵ Cant ñeel na Yàlla ci mayam gu tiif aw làmmiif.

10

Póol tontu na ñi koy ñaani

¹ Man Póol ci sama wàllu bopp nag, maa leen di ñaaxe teeyug Almasi, akug lewetaayam, man miy teew ci seen biir, di ab ragaleey, fi seen kanam, te bu ma soree donj laa leen di ñemeey, ² rikk buleen ma taxa teew, bay ñemee jéfe kóolote, gi ma nara ñemee jéfe, ak ñenn ñi xalaat ne ni nitu suuxu neen donj lanuy doxale. ³ Dégg la, nitu suux lanu, waaye xeexewunu ni nit di xeexe. ⁴ Ndaxte gannaay, yi nuy xeexe du gannaayi suuxi neen, waaye da di gannaay yu am fa Yàlla, kàttanu daane ay tata. Te xalaatin yu jubul, noo leen di daaneel, ⁵ mook lépp luy réy-réyloo ab taxaawayam, di jonante ak xam-xamu Yàlla, te nooy japp njaam bépp xalaat, ngir déggal-loo ko Almasi. ⁶ Te kerooq bu seen dégg ndigal matee, fas nanu yéenee mbugal képp ku déggadi.

⁷ Xanaa ci melow biti donj ngeen di xool*! Su amee ku mu wér péññ, moom ci boppam ne ci Almasi la bokk, na dellu japp moom ci boppam, ne ndegam ci Almasi la bokk, nun itam, ci Almasi lanu bokk. ⁸ Te doonuma am benn kersa, su ma éppaloon sax ci damoo sañ-sañ bi nu Boroom bi jox, te du sañ-sañu sànk leen it, xanaa yokk seen ngem. ⁹ Buggumaa mel ni ku leen di xébale ay bataaxal nag. ¹⁰ Ndaxte bataaxal yi kat lañu ne: «Dañoos ñagas, te tàng, waaye bu teewee moom ci boppam, da naan yàcc, te ay kàddoom xeebu.» ¹¹ Lii nag, kiy waxe noonu, na ko xam: ni nu mel ci kàddu ci sunuy bataaxal, bu nu wuutee, noonu lanuy mel ci jéf, bu nu teewee.

¹² Ñenn ci ñooñu di seedeel seen bopp ne ñoo yelloo ngèrëm nag, nun ñemewunoo boole sunu bopp ak ñoom, mbaa nuy méngale sunu bopp ak ñoom. Waaye ñoom dañoo amul xel, ndax nattukaay bi ñuy nattoo, di ko méngalantee ci seen biir, ñoom ñoo ko sàkkal seen bopp! ¹³ Nun, sunub damu dafa am kemu bu mu dul wees. Sunu kemu moo di dëndub tool bi nu Yàlla sas, te ci biir tool bi lanu liggéeye, ba agsi ci yeen. ¹⁴ Moo tax weesunu sunu kemu sas, mbete agsiwunu woon ba ci yeen. Waaye noo agsi ba ci yeen, indil leen xibaaru jàmm bu Almasi. ¹⁵ Weesunu kemu, bay damu ci liggéeyu ñeneen. Waaye am nanu yaakaar ne nu seen ngem gëna yokkoo, ni la sunuw sas di gëna yokkoo, lépp ci biir kemu gi ñu nu appal. ¹⁶ Su ko defee nu mana wees

fa yeen, ba jáll yégleji xibaaru jàmm bi ca wàlla, te baña damoo lu ñeneen def ba noppi, ci seen biir sas. ¹⁷ Kuy damu daal, na damu ci Boroom bi†.

¹⁸ Ndax ki ñu naw mooy ki Boroom bi gèrëm, waaye du ki gèrëm boppam.

11

Póol wuute na ak ndawi naaféq yi

¹ Céy bu ngeen ma muñaloon, ba ma dof-doflu tuuti! Muñal-leen ma rekk. ² Maa leen di fiiree fiiraangey Yàlla ci boppam, ndax jenn jèkkër donj laa leen digool ab séy, te mooy Almasi mi ma leen namma jébbal, te fekk leen di janq bu set wecc. ³ Waaye na jaan ja naxe woon Awa, ca pexeem, ragal naa seenum xel yàqoo noonu, ba dèddu ngem gu déggu te set gu ngeen ñoye woon ci Almasi. ⁴ Ndax kat gaaw ngeena xajoo lool, nit ku dikk, di leen waare meneen Yeesu mu nu waarewul, mbaa geneen noo gu ngeen jot te jotuleen ko woon, mbaa beneen xibaar bu ngeen déggal, te mu wuute ak ba ngeen déggoon. ⁵ Moona ndaw yu mägga mäggyooyeey, foog naa ne duma seen cuune ci lènn. ⁶ Su ma dee ku xareñul ci wàllu wax it, du ci wàllu xam-xam, te nu nekk lanu leen wone loolu, ci bépp fànn.

⁷ Am boog damaa tooñ ca na ma toroxloo ngir darajaal leen, ndax la ma leen laajul ag pey, ba ma leen di ägge xibaaru jàmm bu Yàlla bi? ⁸ Yeneen mbooolooy gëmkat de laa jëlal, nde maa nangoo ag peyoor ca ñoom, ba man leena liggéeyal, yeen, ci neen. ⁹ Te ba ma nekke ci yeen te soxla dab ma, wéeruwuma ci kenn ci yeen, ndax la ma ñàkkoon, bokk ya jóge Maseduwan ñoo ma ko indil. Fexe naa ba du lènn lu ma leen diisale, te noonu laay saxoo. ¹⁰ Ak déggu Almasi gi ci man, kàddug damu googu, kenn du ma ko xañ, ci diiwaanu Akayi gépp. ¹¹ Lu tax? Ndax dama leena buggul? Yàlla xam na ne «ahakay!» ¹² Noonu may def rekk laay saxoo, ngir xañ aw lay, ñiy wut aw lay wu ñu damoo, naan ñook nun a yem kepp daraja. ¹³ Ñooñu ay ndawi caaxaan lañu, ay liggéeykat yu njublan yu mbubboo ndawi Almasi. ¹⁴ Te loolu jarula waaru, ndax Seytaane ci boppam, malaakam leer lay mbubboo. ¹⁵ Kon bu ay ndawam itam di mbubboo ndawi njub, du doon lu yéeme. Waaye seenug muj, seeni jéf lay yemool.

Póol am na ay nattu ci biir yónnentam

¹⁶ Ma baamu ko, bu ma kenn jappe ab dof, mbaa boog, ngeen muñal ma ni ñuy muñale ab dof, ba ma damu tuuti, man

* 10:7 10.7 Mbaa: Xool-leen jàkk mbir mi. † 10:17 10.17 Seetal ci Yeremi 9.23.

itam. ¹⁷ Li may wax nag, waxewuma ko ci ndigalal Boroom bi, waaye taxawaayu dof laa koy waxe, gannaaw mbirum damu la. ¹⁸ Ndegam ñu baree ngi damu ni niti suuxu neen di damoo, naa damu, man itam. ¹⁹ Yeen boroom xel yi, yeenaka nangoo muñal ay dof, ²⁰ nde muñal ngeen ku leen jaamloo, muñal ku leen lekk, muñal ku leen futti, muñal ku leen jaay daraja, muñal ku leen talaata! ²¹ Ma waxe ko gacce, mbete noo néew doole, ba manunoo jéfe ak yeen noonu!

Ndaxam, ma wax waxi dof, lu waay ñemee damoo, ñeme naa koo damoo, man it. ²² Xanaa ay Ebrë lañu? Ak man itam. Xanaa ci xeetu Israyil lañu bokk? Ak man itam. Xanaa ay sėti Ibraayma lañu? Ak man itam. ²³ Xanaa ay surgay Almasi lañu? Naa rækkaaju nag, te ne maa leen ko gëna doon. Bu dee ci liggéey yu metti, maa man fopp; bu dee ci fani kaso, maa ëpple fopp; bu dee ci ay yar, maa ëpple ay yooni yoon, te bare na lu ma riisu ndee, ba raw leen: ²⁴ ci Yawut yi lañu ma dóore juróomi yoon, ñeent fukki káccri yu yées benn. ²⁵ Ñetti yoon lañu ma dóori yet, dóor may doj benn yoon. Ñetti yoon laa dugg gaal, mu suux. Fanaan naa, yendu naa biir xóotey géej. ²⁶ Bare na lu ma tukki, ay aaytéef xaare ma ay dex, xaare ma ay sacc, xaare ma ay pexe yu ma samaw xeet lalal, ak yu ma jaambur ñi lalal. Ay aaytéef xaare na ma biir dëkk, xaare ma biir mândin, xaare ma biir géej, xaare ma ci biir bokki taalibe yu ko mbubboo. ²⁷ Doñ-doñ, akub coono ci la, te bare naa lu ma fanaanee xooole. Xiif naa, mar naa, te bare na lu ma ñakk ab dund. Liw naa, rafle naa, ²⁸ te gannaaw li ci des lépp sax, sama xintey bés bu nekk a ngi fi, njàqare ji ma am ci mboolooy gëmkat ñépp. ²⁹ Ana ku ci néew doole, te taxul ma néew doole, man it? Ana ku ñu ci bàkkaarloo, te awma ci tiis wu taal ab xol?

³⁰ Su damu waree de, samag néew doole laay damoo. ³¹ Yàlla sunu Baayu Sang Yeesu, moom mi yelloo cant ba faww, xam na ne fenuma. ³² Ba ma nekkee Damaas, ga boroom dëkk ba di jawriñu Buur Aretas, boroom dëkk baa santaane ñu wattu buntu dëkk ba, ngir jàpp ma. ³³ Waaye ca palanteeru tatay dëkk ba lañu ma yooore cig dàmba, ba ci suuf. Noonu laa ko rëcce.

12

Póol am na am peeñu, akub nattu

¹ Damu war na, moonte amul njariñ, waaye naa jáll ba tey ci mbir yu ma Sang bi gisloo, ak peeñu yu mu ma won. ² Maa

xam aw nitu Almasi, ba ñu ko yéegge ba ñetteelu asamaan*, fukki at ak ñeent la tey. Ndax aw yaramam lees ko yéegaale woon? Xawma, ndax yéegaaleesu ko aw yaramam? Xawma, Yàlla rekk a xam. ³ Xam naa ne nit kooku, ndegam yaramam lees ko booleel, am booleesu ko ak yaramam? Xawma, Yàlla rekk a xam, ⁴ Waaye yéegees na ko ba Ajjana, mu dégg fa mbir mu waxuwul, te mayeesul nit mu tudd ko. ⁵ Nit ku mel noonu laay damoo, waaye du sama bopp laay damoo, xanaa ma damoo diggante yu ma néewe doole. ⁶ Su ma nammoona damu it, du doon ag ndof, ndax dégg laay wax. Waaye damay moytoo damu, ngir kenn bañ maa fooge lu wees li mu gis, may def, ak li mu dégg, may wax.

⁷ Te it, waccalees na ma ndégu biir suux, mu taxawe ndawal Seytaane, di ma mitital, ngir ma baña bew ndax peeñu yu yéeme. ⁸ Mbir moomu, ñetti yoon laa ci ñaan Sang bi, ngir mu sorele maak moom. ⁹ Mu ne ma: «Sama yiw doññ nga soxla; sama manoore, ci ag néew doole lay mate.» Kon kat dinaa gëna bégati ci damoo diggante yu ma néewe doole, ngir manoorey Almasi wacc ci sama kaw. ¹⁰ Looloo ma tax di bannexu ci biir diggante yu ma néewe doole, ak ci biiri saaga, ak ci biir ag ñakk, ak ci biir coono yu ñu may bundxatale, ak ci biir njàqare yu ma dal ngir Almasi. Ndaxte bu ma néewee doole, booba laa am kattan.

Póol bëgg na waa Korent

¹¹ Mujj naa dib dof nag, te yeena ma ko yóbbe, nde gërëm maa leen waroon, ndax doonte duma dara sax, ndaw yu mágga mágg yooyeey, duma seen cuune ci lenn. ¹² Firnde yiy mândargaal ndawal Almasi, feeñalees na ko ci seen biir, lépp ci ag muñ gu mat sékk: firnde yeek kéemaan yeek jaloore yi. ¹³ Ci lan ngeen yéesle yeenen mboolooy gëmkat ñi? Xanaa sama soxlay jëmmu bopp jii ma leen wéerul. Kon baal-leen ma, maa tooñ!

¹⁴ Maa ngii di leen waaja ganesi ñetteel bi yoon, te duma wéeru ci yeen. Wutsiwuma lu ngeen am, yeen laa soxla. Ndaxte doom du dencal waajuram, waaye waajur mooy dencal doom. ¹⁵ Man nag xol bu sedd laa yeboo ci jaay mboolem lu ma am, ba jaay sama dooley bopp ngir seen jëmme bopp. Xanaa duma leen ji gii cofeel gu réy, di feyoo cofeel gu ko yées? ¹⁶ Xanaa dees na ne, man ci sama wàllu bopp diisaluma leen moos, waaye samag njublanj laa fexee ba nax leen?

¹⁷ Ndax am na kenn ku ma jëfandikoo, ci ñi ma yebaloon ci yeen, ba lekkal leen

* 12:2 12.2 Ci gis-gisu Yawut yi, ñetteelu asamaan moo gëna kawee.

lenn? ¹⁸ Maa soññ Tit, ngir mu seetsi leen, te maa yebal mbokk moomu, boole kook moom. Ndax Tit da leena lekkal? Xanaa du maak mooma bokk menn mébét, ak wenn doxalin?

¹⁹ Mbaa fooguleen ne sunu bopp lanuy layal nii fi seen kanam? Fi kanam Yàlla de lanu waxe, ndax Almasi mi nu gëm, te lépp, soppe yi, seen yokkute la ñeel. ²⁰ Ragal naa, bu ma dikkee, fekke leen nu ma neexul, yeen it, ngeen gise ma nu leen neexul. Ragal naa ay réeroo ci seen biir ak kiñaan ak mer mu ëpp, ak diiroo mbagg, ak waxi sos aki jëw, ak réy-réylu, akug salfaañoo. ²¹ Ragal naa, bu ma dikkee, sama Yàlla ruslooti ma ndax yeen, may tiisoo ñu bare ñu wéye seen bàkkaar ya woon, te tuubuñu jéfi sobe ji, ak powum séy mi, ak yàqute gu af, gi ñu nekke.

13

Ay kàdduy artoo aki tàggtoo ngi

¹ Ñetteel bi yoon a ngii, bu ma leen di ganesi. «Ci kàddug ñaari seede ba ñett nag la àtteb mépp mbir di wére*.» ² La ma waxoon ba noppí ca sama ñaareelu ngan, tey bi ma wuutee, moom laay baamtu, artoo ko ñi jëkkoona bàkkaar, ak ñi ci des ñépp: su ma délsee, duma ñéebly kenn, ³ gannaaw yeenay wut lu firndeel ne ci man la Almasi di waxe ak yeen, te moom néewul kàttan, diggam ak yeen, waaye ku manoorewu la ci seen biir. ⁴ Cig néew doole lees ko daaje ci bant ba rey ko, waaye tey ci manoorey Yàlla lay dunde. Nun itam sunug bokk ci Almasi moo tax nu néew doole, waaye ci manoorey Yàlla lanuy bokk ak moom di dund, bu nuy jéflante ak yeen.

⁵ Xoolaatleen seen bopp, ba xam ndax yeena ngi ci yoonu ngëm wi. Nattleen seen bopp, xanaa xam ngeen ne Yeesu Almasee ngi ci yeen? Ndegam du seen gëmadi, la natt ba firndeel! ⁶ May yaakaar nag ne nun, dingeen xam ne firndeel nanu sunu taxawaay. ⁷ Teewul nuy ñaan Yàlla, ngeen baña def dara lu bon, te ñaanunu loolu am, ngir nu man koo firndeele sunu taxawaay, waaye bu sunub taxawaay doonul woon lu firndewu itam, sunu yéene mooy ngeen di def lu baax. ⁸ Ndax kat manunoo def dara ba sot liy dëgg, manunu lu dul liggéeyal liy dëgg. ⁹ Bu nu néewee doole, te ngeen am doole, bég nanu. Lii itam, nu ngi koy ñaan, te mooy ngeen yokku ba mat sèkk. ¹⁰ Looloo tax ma bind leen lii bala maa dikk, ba buma dikkee, du jar may mettil ni may jéflante ak yeen, ci kaw sañ-sañ bi ma Boroom bi jox. Ndax kat sañ-sañ

bi, yokke moo ko taxa jóg, waaye deesu ko yàqe.

¹¹ Ma tëje fii nag, bokk yi, bégleen, yokkuleen ba mat sèkk, ñaaxanteleen, mánkooléen te jàmmoo. Su ko defee Yàlla miy Yàllay cofeel ak jàmm mooy ànd ak yeen.

¹² Saafonteelen foonante yu sell. Ñu sell ñépp a ngi leen di nuyy.

¹³ Sunu yiwu Sang Yeesu Almasi nag, ak cofeelu Yàlla, ak bennoo geek Noo gu Sell gi, yal nañu bokk ànd ak yeen ñépp.

* **13:1** 13.1 Seetal ci *Baamtug Yoon wi* 19.15.

Bataaxal bi Yàlla may Póol, mu bind ko waa Galasi

¹ Ci man Póol, ndaw li bàyyikoowul ci ay nit, jottliwul yónnentu nit, xanaa Yeesu Almasi, ak Yàlla Baay bi ko dekkal, ci man la kàddu gii bawoo, ² bawoo itam ci mbooloom bokk yi nekk ak man, ñeel mbooloom gëmkat yu diiwaanu Galasi. ³ Aw yiw ak jàmm ñeel na leen, tukkee ci Yàlla sunu Baay, ak Sang Yeesu Almasi, ⁴ mi maye bakkanam ngir njotug sunuy bàkkaar, ba musal nu ci jamonoy tey ju bon ji, ci coobarey Yàlla sunu Baay, ⁵ bi daraja ñeel, tey ak èllëg ba fàww. Amiin.

Xibaaru jàmm bi benn la

⁶ Man de jaaxle naa ci nii ngeen gaawa dèddoo Yàlla mi leen woo ci boppam, ci ndimbalal yiwu Almasi, bay topp xaat beneen xibaaru jàmmëey! ⁷ Te beneen dafa amul sax, xanaa ñenn ñi leen di jaxase, te bëgga sopparñi xibaaru jàmm bu Almasi. ⁸ Waaye nun ci sunu bopp, mbaa malaaka mu bawoo asamaan sax, ku leen ci àgge woon beneen xibaaru jàmm bu dul bi nu leen àgge, kooku yal na alku! ⁹ Wax nanu ko ba noppi, ma waxati ko tey: képp ku leen àgge beneen xibaaru jàmm bu moy bi ngeen xasa jot, yal na alku!

¹⁰ Léegi nag ndax nit ñi laay sàkkoo jubool, am Yàlla? Am nit ñi laay wuta neex? Su ma bëggoona wéye neex nit ñi de, duma doon jaamub Almasi.

Almasi moo dénk Póol xibaaru jàmm bi

¹¹ Bokk yi, ma xamal leen ne leen xibaaru jàmm bi may yégle, bàyyikoowul ci nit. ¹² Te it man jélewuma ko, jàngewuma ko ci nit, xanaa ci peeñum Yeesu Almasi.

¹³ Ndax kat dëgg ngeen ni ma doon jéfe bu jëkk, bi ma nekke ci yoonu Yawut, bundxatal gu jéggi dayo ga ma daan teg mbooloom gëmkat Yàlla mi, di ko yaq. ¹⁴ Yoonu Yawut, maa ci rawoon ñu bare ci sama maas gi ma bokkal askan, te maa leen gënoona xér fuuf ci sunu aaday maam. ¹⁵ Waaye ca sama biiru ndey la ma Yàlla séddoo, woo ma ci boppam ci kaw yiwam, te moom la soob, ¹⁶ mu feeñalal ma Doomam, ba ma àgge jaambur ñi dul Yawut, xibaaru jàmm bi ci mbirum Almasi. Ci saa si diisoowuma ci ak kenn. ¹⁷ Demuma sax Yerusaleem, seeti ñi ma jékka doon ndawi Almasi, waaye Arabi laa dem, doora délsi Damaas.

¹⁸ Gannaaw ba ñu ca tegee ñetti at laa doora dem Yerusaleem, ngir xamanteji

ak Sefas, toog fa moom ñaari ayi bés. ¹⁹ Teewul gisuma kenn ci ndaw yi ci des, ku dul Yanqóoba, rakku Sang bi. ²⁰ Li ma leen bind nii nag, Yàlla mi nu tiim seere na ne du ay fen. ²¹ Gannaaw gi laa dem diiwaani Siri ak Silisi. ²² Waaye ba boobu, mbooloom gëmkat Almasi ya ca diiwaanu Yude xamuñu ma woon. ²³ Déggoon nañu rekk ñu naan: «Ki nu daan bundxatal bu jëkk, di yaq sunu yoonu ngëm wi de, léegi mooy yégle xibaaru jàmm bi koy xamle!» ²⁴ Mbooloom gëmkat yooyu nag di sant Yàlla ci man.

2

Ndawi Almasi ya doylloo nañu Póol

¹ Fukki at ak ñeent gannaaw gi laa dellu Yerusaleem, ànd ak Barnaba, yóbbaae Tit itam. ² Sama tànk yooyu nag am peeñu moo ko waral. Ca laa wéetoo ak ña ñu jàppoon ne ñooy kàngami mbooloom gëmkat ña, faramfàcceel leen xibaaru jàmm bi may yégl jaambur ñi dul Yawut, ngir ragal sama liggéey bi ma jota def, te di ko wéye, doon coonob neen. ³ Moonte Tit mi ma àndaloon sax, tegeesu ko fa wartéefu xaraf, te ci askanu geger yi dul xaraf la bokk. ⁴ Doonte booba, ay nit ñu tuddoo bokki gëmkat ñoo yoxoosu ba tàbbi ci sunu biir, di nu yèddu, ngir luqatu ni nu moome sunu bopp ndax Almasi Yeesu mi nu gëm, te li ñu ci jublu di delloo nu ci buumi njaam. ⁵ Waaye ñooñu, nangulunu leen lu tollook simili sax, ndax bëgg leena sàmmal yeen, dëggug xibaaru jàmm bi, ba mu sax ci yeen.

⁶ Teewul ñooñu ñu jàppe woon ay kàngam, ak daraja ju ñu masoona am, amalu ma solo, nde Yàlla amul xejj ak seen, ñooñu yokkuñu lenn ci kàddu gi may xamle. ⁷ Xanaa kay li ñu gis moo di ni Yàlla yebale Piyeer ngir mu àgge askanu Yawut xibaaru jàmm bi, noonu la ma yebale ngir ma àgge ko jaambur ñi xaraf, ⁸ ndax ki liggéey ci Piyeer, ngir mu doon ndawam ci Yawut yi, moo liggéey ci man itam, ngir may ndawam ci yeneen xeet yi. ⁹ Na ñu jàppoon ne ñooy kenuy mbooloom gëmkat ña nag, te ñuy Yanqóoba ak Sefas ak Yowaan, ba ñu rãñnee yiw wi ñu ma jagleel, maak Barnaba lañu jox loxo, ngir nun nu liggéeyi ca jaambur ña, te ñoom ñu liggéeyi ci Yawut yi. ¹⁰ Laajuñu lu moy nu fàttliku néew doole yi, te loolu di lu ma pastéefoo jéfe.

Póol yedd na Sefas ca Àncos

¹¹ Waaye ba Sefas dikkee Àncos, jàkk laa ko def, weddi ko, ndax moo nekkul woon ci dëgg. ¹² Ndax kat balaa aw nit a dikk, bàyyikoo fa Yanqóoba, Sefas da daan bokk lekk ak jaambur ñi dul Yawut. Waaye ba

ñoonu dikkee la rocciku, daldi beddeeku jaambur ñi, ndax ragal waa làng, ga jàpp ne aaday xaraf wartéef la. ¹³ Yeneen Yawut ya it di jinigalando, ba Barnaba sax lajj topp leen ci seenug jinigal.

¹⁴ Waaye ba ma gisee ne doxewuñu njub gi dëggug xibaaru jàmm bi laaj, maa wax Sefas ci kanam ñépp, ne ko: «Ndegam yaw miy ab Yawut, yaa jëfewul ni ab Yawut, xanaa di jéfe ni xeeti jaambur ñi, ana lu tax ngay értal jaambur ñi dul ay Yawut, ngir ñu yawutal?»

Ngëm a takku

¹⁵ Nun danoo juddu diy Yawut, te bakkunu ca xeet yee diy bàkkaar. ¹⁶ Xam nanu nag ne nit ki, du ci jéfi sàmm ndigali yoon la ko Yàlla di joxe àtteb ku jub, xanaa ci ngëm gu mu gëm Yeesu Almasi. Te nun itam, Almasi Yeesu lanu gëm, ngir Yàlla jox nu àtteb ku jub ci kaw gëm gu nu gëm Almasi, te du ci kaw jëf ju nu sàmme ndigali yoon. Ndax kat du ci jéfi sàmm yoon lees di joxe kenn àtteb ku jub.

¹⁷ Ba tey su nu dee sàkku àtteb ku jub, ndax li nu gëm Almasi, te teewul nit ñi gis ne nu ngi bàkkaar, nun itam, ndax loolu day wund ne Almasi mooy xiirtale ci bàkkaar? Mukk kay! ¹⁸ Ndaxam su dee tabaxub ndigalu yoon bi ma tojoon, moom laa tabaxaat, maa def sama bopp moikatub yoon. ¹⁹ Su dee wàllu yoonu Musaa nag, man nit ku dee laa, te yoonu Musaa moo ko waral, ngir ma mana dund dund gu ñeel Yàlla. Dees maa boole ak Almasi rey ca bant ba. ²⁰ Moo tax dootu man maay dund, waaye Almasi mooy dund léegi ci man. Sama dundu yaramu suux wii tey nag, ci ngëm gi ma gëm Doomu Yàlla laa koy dunde, moom mi ma sopp, ba jébbale boppam ngir man. ²¹ Duma neenal yiwu Yàlla, ndax kat su doon ci sàmm ndigalu yoon lees di ame àtteb ku jub, konoon Almasi moo dee cig neen.

3

Dellu ci yoonu Musaa du xel

¹ Yeen waa Galasi, yeena ñàkk xel! Ku leen gëlëm, te na Yeesu Almasi deeye ca bant ba di lu ñu leen leeralal ba mu mel ni lu ngeen gise seeni bët? ² Lenn rekk laa bëgg ngeen xamal ma ko: ndax ci jéfi sàmm ndigalu yoon ngeen jote Noowug Yàlla gi, am li ngeen dëgg xibaaru jàmm bi ba gëm ko moo leen ko may? ³ Ana nu ngeen mana ñàkke nii xel? Ngeen tàmbalee ci Noo gi, ba noppi di jéema mottlikoo jéfi nitu suuxu neen! ⁴ Dangeena

dékku yii coono yépp ci neen? Xanaa déet kay! ⁵ Ki leen di may Noo gi, tey sottal ay kéemaan ci seen biir, ndax li ngeen sàmm yoon moo tax mu di ko def, am li ngeen dëgg, ba gëm mo tax?

⁶ Noonu la Ibraayma gëme Yàlla, «ñu waññal ko ngëmam ag njub*.»

⁷ Xamleen boog ne nit ñiy boroom ngëm, ñoonu ñoooy doomi Ibraayma. ⁸ Mbind mi moo waajaloon lu jiitu ne ci kaw ngëm lees di joxe xeet yi dul Yawut, àtteb nit ñu jub. Moo taxoon mu yégal Ibraayma lu jiitu, bii xibaaru jàmm: «Xeeti àddina yépp ci yaw lañuy barkeele†,» ⁹ ba tax na, boroom ngëm yi lees di booleek Ibraayma miy boroom ngëm, barkeel leen.

¹⁰ Mboolem ñi yaakaar seen jëf ju ñu sàmme yoonu Musaa, repp nañoo alku, nde bindees na ne: «Alkànde ñeel na képp ku saxoowul mboolem digal yi ñu bind ci téereb yoon wi, ngir di ko jéfe‡.» ¹¹ Li sàmm yoon taxul kenn jot àtteb ku jub fi kanam Yàlla sax, lu leer nàññ la, nde: «Ku jub ndax ngëmam mooy dund.» ¹² Yoon wi nag ajuwul ci ngëm, nde: «Kuy jéfe digal yooyu, yaay dund ndax ñoom§.»

¹³ Almasi moom, moo nu jot ci alkàndey yoon wi, ba mu doonee ku alku ngir nun, nde: «Alkute ñeel na képp ku ñu rey, wékk ko ci bant*.» ¹⁴ Noonu la deme ngir barkeb Ibraayma wàccal xeet yi dul Yawut ndax Almasi Yeesu, ngir itam nu jot ci digeb Noo gu Sell gi, ci kaw ngëm.

Yoonu Musaa fecciwal kóllère

¹⁵ Bökk yi, ma misaale ko mbiri doom Aadama. Kayitub donale bu nit donj bind, su dee lu wóor, deesu ko neenal, mbaa di ci yokk dara. ¹⁶ Te Ibraayma lañu digoon dige yi mook ki taxawal askanam. Newuñu: «ñi taxawal ay askanam,» mbete ñu bare lañuy wax, waaye wenn rekk la: «ki taxawal askanam,» te ki taxawal askanam moo di Almasi. ¹⁷ Li ma ciy wax mooy lii: kóllèreg Yàlla gi taxawe ni kayitu donale gu mu dëggal, yoonu Musaa, wi dikk ñeenti téeméeri at ak fanweer gannaaw kóllère gi, manu koo neenal, ba fomm digeb† Yàlla. ¹⁸ Su doon ci yoonu Musaa la ndonale ga aju, kon dootul doon lu digeb Yàlla waral. Waaye ci kaw ab dige la Yàlla baaxee Ibraayma aw yiwam.

Ku gëm Almasi, yoonu Musaa wàcc na la

¹⁹ Waaw kon yoonu Musaa, ana luy njariñam? Dees koo toftal ca dige ba,

* **3:6** 3.6 Seetal ci *Njàlbéen ga* 15.6. † **3:8** 3.8 Seetal ci *Njàlbéen ga* 12.3. ‡ **3:10** 3.10 Seetal ci *Baamtug Yoon wi* 27.26. § **3:12** 3.12 Seetal ci *Sarxalkat yi* 18.5. * **3:13** 3.13 Seetal ci *Baamtug Yoon wi* 21.23. † **3:17** 3.17 Seetal ci *Njàlbéen ga* 17.1-8.

ngir muy fésal moyi nit ñi ba keroog boroom dige, bi taxawal askanu Ibraayma, dikk. Ay malaaka ñoo biral yoon wi, ci ndimbalal ab jottlikat[‡]. ²⁰ Ab jottlikat nag ñaar a koy ség, te Yàlla kenn donj la.

²¹ Ndax kon yoonu Musaa dafa juuyoo ak digey Yàlla? Mukk kay. Ndax kat su fekkoon ne daño maye wenn yoon wu mana may nit ku ko sàmm, mu dund, konoon àtteb ku jub fi kanam Yàlla mana jóge dëgg ci sàmm gu nit ki sàmm yoon wi. ²² Waaye mbind mi biral na ne mboolem àddina moo ténku ci kilifteefu bàkkaar, ngir dige bi gëm Yeesu Almasi di jagle, mana dikkal aji gëm ñi.

²³ Balaa yoonu ngëm wee dikk, dees noo jàppoon ténk ci yoonu Musaa, ba kera yoonu ngëm wi feeñee. ²⁴ Noonu la yoonu Musaa doone sunu njaatige, tette nu ba ci Almasi, ngir nu jagoo àtteb nit ñu jub ci kaw ngëm. ²⁵ Waaye léegi, bi yoonu ngëm wi dikkee, nekkatunu ci kilifteefu njaatige.

Doomi Yàlla ngeen

²⁶ Yeen ñépp doomi Yàlla ngeen, ndax li ngeen gëm Almasi Yeesu. ²⁷ Ndax kat mboolem yeen ñi ñu sóob sóobeb Almasi, jëmmu Almasi ngeen soloo. ²⁸ Kon nag amul Yawut ak ku dul Yawut, amul ab jaam ak as gor, amul góor ak jigéen. Yeen ñépp benn ngeen ci Almasi Yeesu. ²⁹ Te su ngeen bokkee ci Almasi, yeen ay askanu Ibraayma, te yeena jagoo dige ba.

4

¹ Li ma leen di wax nag mooy lii: boroom ndono li ci kër gi, li feek mu dib tuut-tànk, wuutewul akub jaam, doonte mo moom lépp. ² Ci kilifteefu ay wattukat aki saytukat lay nekk ba kera mu àggee ca at ya ko baayam àppaloon. ³ Nun itam naka noonu, ba nu dee ay tuut-tànk yu nekk ci kilifteefu mbiri àddina, ay jaam lanu woon. ⁴ Waaye ba àpp ba jotee, Yàlla moo yónni Doomam, mu juddoo ci jigéen, juddoo ci biir curgag yoonu Musaa, ⁵ ngir jot ñi ci curgag yoon wi, ba nu jagoo cérub doom. ⁶ Li ngeen diy doom nag tax na Yàlla yebal Noowug Doomam ci seen biir xol, ba Noo gi naan: «Abba», mu firi Baay. ⁷ Moo tax dootuloo ab jaam, doom nga. Gannaaw doom nga nag, boroom cér nga it fa Yàlla sa baay.

Póol am na njàqare ci waa Galasi

⁸ Bu jëkk, ba ngeen xamul Yàlla, ay yàlla yu dul dëgg ngeen daan jaamu. ⁹ Waaye léegi bi ngeen xamee Yàlla, mbaa bi leen Yàlla ràññee, nu ngeen mana delluwaate ci mbiri àddina yooyu boole tële ak ñàkk

ngiri, bay nekkaat seeni jaam? ¹⁰ Yeena ngi wormaal yenn bés yi, aki weer, ak ay fan, aki at! ¹¹ Li may ragal ci yeen daal mooy sama coono ci yeen neen.

Póol tinu na waa Galasi

¹² Yeen laay tinu, bokk yi, mel-leen ni man, ci yooyu mbir, ndax man itam ni yeen laa mel. Toofuleen ma benn yoon. ¹³ Xam ngeen ne tëleg yaram moo ma mayoon yoon wa ma leen jëkka àgge xibaaru jàmm bi. ¹⁴ Nattu ba leen sama woppi yaram tegoon it taxul ngeen jéppi ma, taxul ngeen beddi ma. Ni malaakam Yàlla ngeen ma dalale, mbaa ni Yeesu Almasi ¹⁵ Ana seen mbég mooma woon nag? Ndax kat maa leen seedeel ne su manoon am sax, seeni bët ngeen di luqi, jox ma. ¹⁶ Xanaa li ma leen di wax dëgg daa tax ma mujj di seenub noon?

¹⁷ Yitte ju réy ji ñenn ñiy taqoo ak yeen de, jubluwuñu ci lu baax. Dañu leena bégga tàggale ak nun, ba ngeen taq leen. ¹⁸ Yitte ju réy ju ñu am ci nit ki nag, ndegam lu baax lees ci jublu, saa su nekk lay baax, waaye du rekk saa yu ma teewee ci seen biir. ¹⁹ Yeen samay doom! Maa ngi dellooti ci mat wu ma leen jure woon ni jigéen, ba keroog Almasi mate sékk ci yeen. ²⁰ Maaka béggoona nekk ak yeen tey, ba gëna misaale sama baat, nde jàq naa lool ci yeen!

Ajara ak Saarata ay misaal lañu

²¹ Waxleen ma, yeen ñi bégga nekk ci kilifteefu yoonu Musaa, xanaa xamuleen li yoon wi wax? ²² Bindees na ne Ibraayma ñaari doom yu góor la am; kenn ki jaam bi jur, ak ki gor si jur. ²³ Doomu jaam bi moo juddu ci kaw coobarey bakkanu nit, waaye ki gor si jur, ci kaw digeb Yàlla la juddu*.

²⁴ Mbir mi misaal a ngi ci. Ñaari jigéen ñi ñaari kóllère lay bijji. Genn kóllère gi bawoo tundu Sinayi moo meññ lu ñeel njaam, te kooku mooy Ajara. ²⁵ Ajara moomu mooy tundu Sinayi, wa ca réewum Arabi, te moo taxawe Yerusalem gii tey, dëkk bii dib jaam mook doomam yi ko dëkke. ²⁶ Waaye Yerusalem, ga fa kaw, mooy gor si, te moom mooy sunu ndey. ²⁷ Ndax kat bindees na ne:

«Yaw mi jaasir, ba juroo, xaacul, yaw mi xamul mititu mat, sarxolleel, nde ndaw si ñu foñ moo gëna jaboot kiy séy†.»

²⁸ Yeen nag bokk yi, yeenay doomi digeb Yàlla, ni ko Isaaxa doone. ²⁹ Waaye doom ji juddoo ci coobarey bakkanu, noonu mu daan bundxatale, bu jëkkoon, doom ji

‡ 3:19 3.19 jottlikat bi mooy Musaa. * 4:23 4.23 Seetal ci *Njàlbéen* ga 15.4-6 ak 17.15-21. † 4:27 4.27 Seetal ci *Esayi* 54.1.

juddoo ci Noowug Yàlla, noonu rekk lay deme ba tey jii. ³⁰ Te lu ci Mbind mi wax? Mu ne: «Dàqal jaam bu jigéen bii ak doomam, ndax doomu jaam bi du donnandoo ak doomu gor si†.» ³¹ Kon nag bokk yi, nun dunu doomi jaam bi, waaye nooy doomi gor si.

5

Buleen delluwaat cig njaam

¹ Almasi da noo yiwi, ngir nu yiwiku, kon nag saxooleen ko, te baña laxasooti buumi njaam.

² Dama ne, man Póol maa leen wax ne leen: su ngeen demee ba ñu xarfal leen kay, Almasi amalatu leen lenn njariñ. ³ Ma artooti képp ku dem ba ñu xarfal ko, ne ko mboolem yoon wi la wara jéfe. ⁴ Yeen ñiy sàmm yoonu Musaa, di ko sàkkoo àtteb njub fa kanam Yàlla, daggoo ngeen ak Almasi, ñàkk ngeen yiwu Yàlla. ⁵ Ndax nun kat, ci ndimbalal Noo gi, ak ci sunu kaw ngëm lanu yaakaare ñu jox nu àtteb njub bi nuy séentu. ⁶ Ci Almasi Yeesu mi nu gëm, xaraf ak ñàkka xaraf, dara amu ci solo; li am solo mooy ngëm, gi jéfi cofeel di firndeel.

⁷ Seen njàlbéenu xél de baax na! Ana ku leen gállankoor ba toppuleen dëgg gi? ⁸ Loolu leen fàbbi de jógewul ci ki leen woo. ⁹ As lawiir, tooyalub sunguf bépp lay funkil. ¹⁰ Man de gëm naa ndax Boroom bi, ne dungeen wuuteek man xalaat benn yoon ci lii. Waaye kiy jaxase seenum xel, ak ku mu mana doon, mooy gaddu mbugalam. ¹¹ Man nag bokk yi, su ma dee xiirtale ci xaraf, ana lees may bundxataleeti? Konoon kay sama waareb deewu Almasi ca bant ba dootu doon ag tooñ ci kenn. ¹² Ñi leen di lëjal ak waxi xaraf, nañu xuuf boog seen ngóorag bopp benn yoon!

Doxeleen Noowug Yàlla

¹³ Yeen de bokk yi, cig yiwiku lees leen woo. Moytuleen lenn rekk: bu seenug yiwiku diw lay, ngir topp seen bakkan, waaye deeleen surgawoonte ngir cofeel. ¹⁴ Ndax yoonu Musaa wépp, ci lenn ndigal lii la ténku: «Ni ngeen soppe seen bopp, nangeen ko soppe seen moroom*.» ¹⁵ Waaye su ngeen dee mättante ak a lekkante kat, moytuleena far yàqante yax-eet!

¹⁶ Li ma leen di wax moo di: dox-eleen Noowug Yàlla, su boobaa dungeen topp seen xemmementéfi bakkan. ¹⁷ Ndax bakkan, la muy xemmem, daa dëngoo ak Noo gi; Noo gi it, la muy xemmem dëngoo

ak bakkan. Dañu di jaar yu féewaloo, te moo tax dungeen def la ngeen nammoona def. ¹⁸ Waaye su leen Noo gi jiitee, su boobaa nekkatuleen ci kilifteefu yoon wi.

¹⁹ Jéfi bakkan nag yomb naa xàmmi, te mooy: powum séy, ak jéfi sobe, ak yàqute, ²⁰ ak bokkaale, ak xërëm, ak mbañeel, ak féewaloo, ak kiñaan, ak mer mu épp, ak jiital say bëgg-bëgg, ak réeroo, ak xàjjalikoo, ²¹ ak ñeetaane, ak mändite, ak mbumbaay, ak yeneen yu ni mel. Ma àrtu leen nag na ma leen artoo woon, ñiy jéfe noonu, amuñu cér ci nguuruug Yàlla.

²² Meñneefum Noowug Yàlla nag moo di: cofeel, ak mbég, ak jàmm, ak xolu muñ, ak mbaax, akug tabe, ak ngëm, ²³ akug teey, ak moom sa bakkan. Yu mel noonu, wenn yoon bañu ko. ²⁴ Ñi bokk ci Almasi Yeesu nag, ñoo daaj ca bantam ba, seen bakkan, daajaale ko ak sàkkuteefam yu tar, aki xemmementéefam. ²⁵ Gannaaw nag Noowug Yàlla moo nu dundal, nanu topp Noo gi. ²⁶ Bunu di yég sunu bopp, di merloonte ak a iñaanante.

6

Dimbalanteleen

¹ Bokki gëmkat ñi, su ñu bettee nit ci ag tooñ, yeen ñi topp Noowug Yàlla, waññileen ko ndànk, te kenn ku nekk ci yeen xoolaat boppam bu baax, ngir seen bakkan bañ leena xiirtal, ba ngeen daanu ci fiir gu ni mel. ² Yennikoonteleen seeni yen, su boobaa ngeen di topp yoonu Almasi ba mu mat sékk. ³ Ku foog ne moo am solo, te du dara nag, boppam lay nax. ⁴ Ku ci nekk, jéfi boppam, na ko niir. Su ci amee lenn lu mu mana sagoo, na ko yemale ci boppam, te baña sagoo lenni boppam lu mu xool ci ñeneen, ⁵ nde ku nekk ak sa aña jéfi bopp.

⁶ Ki ñuy jàngal kàddug Yàlla nag war naa sédd ki koy jàngal ci mboolem alalam.

⁷ Bu leen lenn nax; Yàlla deesu ko foon-too. Nit ki, li mu ji, moom lay goób. ⁸ Ku jiyal bannexu bakkanam, ci bannexu bakkanam lay jële ngóobum yàqute; ku jiyal Noowug Yàlla, ci Noo gi ngay goobe texe gu sax dàkk. ⁹ Bunu tàyyi ci def lu baax, nde bu jotee rekk nooy goób, ndegam yoqiwunu. ¹⁰ Kon nag bi nu koy jekku, nanuy def lu baax, ngir ñépp, rawatina waa kër yoonu ngëm wi.

Na gëmkat bi doon mbindeef mu bees

¹¹ Seetluleen mbind mi; ci araf yu mag yii ngeen wara xàmme, ne sama loxol bopp laa ko binde!

¹² Ñi leen di gëten ci xaraf mooy ñi ngistal tax ñu bëgg nit ñi gërème leen

† 4:30 4.30 Seetal ci *Njálbéen ga* 21.10.

* 5:14 5.14 Seetal ci *Sarxalkat yi* 19.18.

seen melow yaram, te jubluwuñu ci lu moy raḡal ku leen bundxatal ndax deewug Almasi gi ñuy xamle ne mooy taxa mucc.

¹³ Ñi xaraf ñoom ci seen bopp sax toppuñu yoon wi. Teewul ñu bëgg ngeen xaraf, ngir mana damoo seen màndargam yaram, yeen ñi ñu xarafloo. ¹⁴ Waaye man de Yàlla buma damoo lenn lu moy deewug sunu Boroom Yeesu Almasi ca bant ba. Bant boobu moo tax àddina di lu ñu ma daajal ci bant, ba àddina dee; man it may lu ñu daajal àddina ci bant ba ma dee.

¹⁵ Xaraf ak ñàkka xaraf, dara amu ci solo. Li am solo mooy doon mbindeef mu bees.

¹⁶ Mboolem ñiy sàmm ndigal lii nag, te di Israyilu Yàlla, jàmm ak yërmande ñeel na leen.

¹⁷ Li ci des moo di gannaaw-si-tey, bu ma kenn lëjalati, ndax légét yi ci sama yaram, samag bokk ci Yeesu la màndargaal.

¹⁸ Bokk yi, yal na sunu yiwu Boroom Yeesu Almasi ànd ak seenum xel. Amiin.

Bataaxal bi Yàlla may Póol, mu bind ko waa Efes

¹ Ci man Póol, ndawal Almasi Yeesu ci coobarey Yàlla, ci man la kàddu gii bawoo, ñeel ñu sell ña ca Efes te di ñu sàmm seen kóllère ak Almasi Yeesu. ² Aw yiw ak jàmm ñeel na leen, bawoo fa Yàlla sunu Baay, ak Sang Yeesu Almasi.

Ay barkee ngi ci Almasi

³ Cant ñeel na Yàlla sunu Baayu Sang Yeesu Almasi, mi nu baaxe bépp barkey biir, ci Almasi mi nu bokk, fa déndi asamaan ya. ⁴ Te mooy noonu mu nu taamoo ba àddina sosoogul ndax Almasi mi nu bokk, ngir nu doon ñu sell te mucc sikk fa kanamam. Ci biir cofeel ⁵ la dogaloon lu jiiu, ne ci Yeesu Almasi la nuy defe ay doomi boppam, te muy bànnexam, di coobareem. ⁶ Moo tax cant ñeel ko, ndax yiwam wu màgg wi mu nu baawaanal ci Soppeem bi.

⁷ Ci moom lanu ame njot gi nu sotalal njéggalug moy, ndax deretam ji tuuru, noonu ko Yàlla defe ci yiwam wu yaa, ⁸ wi mu nu baawaanal, mayaale nu mépp xel mu rafet akug dégg. ⁹ Moo nu xamal mbóotum coobareem, mi mu nammoona sotalle naka jekk ci Almasi, na mu ko neexe. ¹⁰ Li Yàlla namm, bu fan yi matee, moo di dajale lépp ci kilifteefu Almasi, mboolem la fa asamaan, ak li fi suuf. ¹¹ Ci moom lanu jote sunu muur ci kaw dogalu Yàlla mi nu taamu lu jiiu, moom miy sotalal lépp ni mu ko namme ci coobareem. ¹² Moo tax nu di ko sante màggaayam, nun ñi jékka wékk sunu yaakaar ci Almasi.

¹³ Kooku, yeen ñi dul Yawut, ba ngeen déggee, yeen itam kàddug dégg gi, xibaaru jàmm, bi jëm ci seenug mucc, gannaaw ba ngeen gêmee, ci moom itam lañu leen màndargaale Noo gu Sell gi ñu dige woon. ¹⁴ Noo gi moo di dawal bi nu jotagum ci sunu muur, ba kera njotug ñoñi Yàlla matee, ba nit ñi sante Yàlla màggaayam.

Póol sant na, ñaan na

¹⁵ Moo tax man it, bi ma déggee ba tey, seen ngem ci Sang Yeesu, ak seen cofeel ci ñu sell ñépp, ¹⁶ noppiwumaa sant Yàlla ndax yeen, te maa ngi leen di fàttliku ci samay ñaan, ¹⁷ ngir Yàllay sunu Sang Yeesu Almasi, Baay bu màgg bi, sol leen xel mu rafet, ak ngis, ngir ngeen man koo xam bu baax. ¹⁸ Ngir itam seen bëti xol leer ba ngeen gis yaakaar ji ci wooteem, ak ni ay ngëneelam géejoo te yéeme, ñeel ñu sell ñi mu séddoo. ¹⁹ Ngeen boole ci

xam manoooreem gu nattuwal gi mu nu lañalal, nun gëmkat ñi. Manooore googu feeñ na ci jëf ji sottee ci kàttanam ak dooleem, ²⁰ ji mu fésal ci Almasi, ba mu ko dekkalee, dëël ko ci ndijooram, fa déndi asamaan. ²¹ Foofa la Almasi tiime lu sore gépp nguur, ak bépp sañ-sañ, ak gépp manooore, ak gépp kilifteef, ak wépp tur wees di tudd, muy tey, di èllég. ²² Yàlla moo teg lépp fi suufu ndégguy tànkam, te moo ko def muy bopp bi tiim lépp, ñeel mbooloom gëmkat ñi, ²³ mbooloo miy aw yaramam. Ci mbooloo mi nag la Almasi teewe teewaa yu bat sékk, te Almasi mooy matal lépp ci ñépp.

2

Gëm, soppi

¹ Yeen dangeena dee woon ndax seeni moy ak seeni bàkkaar, ² yi ngeen doon dunde démb, ngeen àndoon ci ak doxalinu àddinay tey jii, ak ku bon kiy kàngamu boroom baat yi ci jaww, ji asamaan tiim, boroom noo gi wéye liggéeyam ci biir aji déggadi ñi, tey. ³ Ci ñoom lanu bokkoon nun ñépp itam; mas nanoo topp sunu bakkam, di jéfe lu sunu bakkam, ak sunum xel xemmeme. Sunu bindu nit taxoon na noo yeyoo am sànj ni ñépp.

⁴ Waaye Yàlla mi bare yërmande, ci kaw cofeel gu réy, gi mu nu sopp, ⁵ nun ñi doon nit ñu dee ba noppi ndax sunuy moy, moo nu booleek Almasi, dundalaat nu. Ci kaw yiw daal ngeen mucce. ⁶ Ci sunu bokk ak Yeesu Almasi la nu Yàlla dekkalandoo ak moom, dëëlandoo nook moom fa déndi asamaan. ⁷ Mbaax gi nu Yàlla won ci Almasi Yeesu, moom lay firndeete mboolem xarnu yiy ñew, ni yiwam yaatoo ba tiif am xel. ⁸ Ndax kat ci yiw ngeen mucce ci kaw ngem, te loolu jógewul ci yeen, mayu Yàlla la; ⁹ du peyu jëf, ba kenn di ci kañu. ¹⁰ Ndax kat noo di liggéeyu Yàlla; Yàllaa nu yeestal ci Almasi Yeesu, ngir nu wéye jëf ju rafet, ja mu nu fàgguloon ca njàlbéen, ngir nu di ko jéfe.

Gëmkati Almasi benn lañu

¹¹ Kon nag, yeen jaambur ñi dul Yawut cib juddu, yeen ñi ñuy wooye yéefar yi xaraful, te ñi leen ko dàkkantale woon di Yawut yi xarafe ci loxol nit ku leen xarfal ci seen yaram, fàttlikuleen seen démb. ¹² Jant yooyu amuleen woon benn cér ci Almasi, te amuleen woon jenn yelleef ci mbootaayu bànni Israyil. Bokkuleen woon ci kóllère yi èmb digeb Yàlla, te mu fasoo ko ak ñoom. Nàkk yaakaar, ak nàkka xam Yàlla ngeen nekke woon ci àddina. ¹³ Waaye yeen ñi sore woon, léegi bi ngeen nekke ci Almasi Yeesu, jege ngeen ndax deretu Almasi ji tuuru.

¹⁴ Ndaxte moom mooy sunu jàmm, moom mi boole ñaar, Yawut bi ak jaambur bi dul Yawut, def leen kenn. Ci suuxu yaramam wa ñu daaj la ñaggee ñagu mbañeel bi doxoon sunu diggante. ¹⁵ Yoonu Musaa ak santaane yaak ndigal ya, moom la xewil, ngir yeestal ñaar ñi, Yawut beek jaambur bi, ci jenn jëmmu boppam, ñu doon kenn nit ku yees, ba jàmmoo. ¹⁶ Ñaar ñi la Almasi boole ci jenn jëmm, jubale leen ak Yàlla, ca bant ba ñu ko daajoon, te bant ba la dakkale sunub tongoo. ¹⁷ Moo dikke xibaaru jàmm buy yégle jàmm ju leen ñeel, yeen jaambur ñi ko sore woon, te ñeel nu, nun ñi ko jege, ¹⁸ ndax nun ñaari xeet yépp, ci moom Almasi lanu jote ci Baay bi, ci ndimbalal genn Noo gi.

¹⁹ Kon nag dootuleen ay gan mbaa ay doxandéem, waaye ay nawley ñu sell ñi ngeen, te waa kër Yàlla ngeen. ²⁰ Yeena di tabax, bi ndawi Almasi ak yonent yi di kenu gi, te Almasi Yeesu ci boppam di doju coll wi. ²¹ Ci moom la tabax bi bépp di temboo, ba jóg, doon jaamookaay bu sell ngir Boroom bi. ²² Ci Almasi ngeen bokke ci tabax bi, yeen jaambur ñi itam, ba mana doon dëkkuwaayu Yàlla, ci ndimbalal Noo gu Sell gi.

3

Póol xamle na mbóotum Yàlla

¹ Moo ma tax di ñaan, man Póol mi ñu tēj ngir Almasi, ndax ñi dul Yawut, yeen jaambur ñi, ² ndegam yég ngeen sas wi ma Yàlla sas ciw yiwam, ñeel leen. ³ Ci am peeñu lañu ma xamale mbóot mi, noonu ma leen ko ténkale woon ci bataaxal. ⁴ Bu ngeen jàngee loolu, dingeen rãñnee bu baax, ni ma dégge mbóot mi ci mbirum Almasi. ⁵ Moomu mbóot, xamaleesu ko woon doom aadama yi, ca janti maas ya woon, ni ñu ko feeñalale tey, ñu sell ñi diy ndawam ak yonent yi, ci ndimbalal Noo gu Sell gi, ⁶ ba mu leer ne jaambur ñi dul Yawut ñooy bokk ak Yawut yi benn cér bi, ñooy doon wenn yaram, te ñooy bokk benn dige bi ci Almasi Yeesu, ni ko xibaaru jàmm bi xamlee.

⁷ Xibaaru jàmm boobu lañu ma def ab jawriñam, te Yàlla, ciw yiwam, moo jéfe manooreem, ba jagleel ma boobu cér. ⁸ Man mi yées ci ñu sell ñépp lañu may woowu yiw, ba may xibaar jaambur ñi dul Yawut, xéewal yu amul kem yi ci Almasi. ⁹ May niital ñépp, ni Yàlla nara sottale mébétam, miy mbóot mu làqu woon naka jekk fa moom Yàlla mi sos lépp. ¹⁰ Su

ko defee boroom nguur yeek boroom sañ-sañ ya fa déndi asamaan, mana xame ci mbooloom gëmkati Almasi, ni xelum Yàlla rafete ci wet gu nekk. ¹¹ Loolu moo doon naka jekk nammeelam gi mu sottale ci Almasi Yeesu sunub Sang. ¹² Ci Yeesu, ci kaw ngëm gu nu ko gëm lanu ñemee ágge fit wu mat sèkk, fa kanam Yàlla. ¹³ Kon nag dama leen di ñaan, ngeen baña yoqi ngir coono, yi may sonn ndax yeen; lépp seen teraanga la.

Saxoo gëm moo mata ñaan

¹⁴ Looloo ma taxa sukk sama bëti óom, janook Baay bi, ¹⁵ ki gépp njabootug asamaan ak suuf, jële aw tur. ¹⁶ May ñaan nag, mu may leen, ci koomu teraangaam, seen jëmmu biir feddlikoo kàttanu Noowam gu Sell. ¹⁷ Su ko defee seen ngëm tax Almasi dëkke seen xol, ngeen sax ay reen yu sampe ci biir cofeel, ¹⁸ ngir yeen ak mboolem ñu sell ñi, seenum xel mana jàpp, ni mu leen ware, luy yaatuwaayub cofeelu Almasi, ak guddaay ba, ak kawewaay ba, ak xóotaay ba. ¹⁹ Ngeen boole ci daj cofeelu Almasi, gi wees xam-xam, ngir ngeen fees, ba fees dell ak koomu Yàlla.

²⁰ Moom mi mana jéfoo kàttan giy liggéey ci nun, ba sottal mboolem lu nu ñaan ak lu nu xalaat, ba wees loola fuuf sax, ²¹ moo yelloo daraja ci biir mbooloom gëmkat ñi, ak ci Almasi Yeesu, tey ak èllég, ba fàww. Amiin.

4

Mbooloom gëmkat ñi wenn yaram la

¹ Dama leen di dénku nag, man mi ñu tēj ndax Sang bi, ngir ngeen dund dundin wu yellook wooteb Yàlla, bi mu leen woo. ² Saxooleen woyof, lewet, te deeleen muñ, di muñalante ngir cofeel. ³ Defleen seen kem kàttan, ngir di jàmmoo, ba mana sàmm seenug bennoo ci biir Noo gi ngeen bokk.

⁴ Wenn yaram a fi nekk, ak genn Noo, ak jenn yaakaar ju leen wooteb Yàlla jéme. ⁵ Benn Sang bi la it, ak genn ngëm, ak genn sóobu cim ndox*. ⁶ Te it jenn Yàllaa am; mooy Baayu ñépp, moom tiim ñépp, di jéf ci ñépp te nekk ci ñépp.

⁷ Waaye ku nekk ci nun ak mayam, ci yiwu Yàlla, ni ko nattub Almasi séddalee.

⁸ Moo tax ñu ne:

«Moo yéeg fa kawa kaw, yóbbaaale gàngoor gu mu jappe xare, te moo séddale nit ñi ay may†.»

⁹ Li ñu ne «moo yéeg,» ana lu mu tekki lu moy wàccoon na it ba fu gëna suufe? ¹⁰ Kooku wàccoon mooy kenn ki yéegaat ba tiim asamaan yépp, ngir def

* 4:5 4.5 sóobu cim ndox la gëmkatub Almasi di firndeete ngëmam. † 4:8 4.8 Seetal ci Sabóor 68.19.

lépp feese jëmmam. ¹¹ Moo may ñii di ay ndawam, ñee di ay yonent, ñee di ay xamlekati xibaaru jàmm bi, ñale di ay sàmmi mbooloom gëmkat ñi, mbaa ay jànglekat. ¹² Almasi moo waajale noonu ñu sell ñi, ba ñu mana bee seen sas ci liggéeyam, ngir tabax mbooloom gëmkat, mi taxawe yaramu Almasi. ¹³ Su ko defee nu mana màgg nun ñépp ba doon benn ci ngëm, ak ci xam-xam bu mat ci Doomu Yàlla ji, ba kera nuy doon magum jëmm, bay tollook taxawaayu Almasi bi mat sèkk.

¹⁴ Su boobaa nu noppee doon ay tuut-tànk yu nit ñuy muusaatoo kàddu yu mel ni gannax yu nuy baaje, ak ngelawal mbooloom àlluwa ju bees ju nuy panti-pamtee ci seen biir pexey naxe ak njublan, ngir fàbbi nu. ¹⁵ Su boobaa kay, dëgg gu nu wodde cofeel lanuy wéye, tey màgg ci bépp fànn, ci moom Almasi miy bopp bi. ¹⁶ Ci moom miy bopp bi la yaram wépp di dëggo, témboo ndax ndimbalal mbooloom tenqo yi koy saytu, na mu dëppook wàllu cér bu ci nekk. Su ko defee yaram wiy yokku, di màgg ci biir cofeel.

Ku gëm Almasi war koo roy

¹⁷ Lii nag maa leen ko wax, te di ko biral ci turu Boroom bi: Ni xeeti yéefar yiy jéfe, topp seen xalaat yu tekkiwul dara, buleen jéfeeti noonu. ¹⁸ Seenum xel a tàbbi ag lëndëm, ñu tumuránke dundin wi Yàlla di maye, te umple gi ci ñoom moo tax, ndax seenug dëgër bopp. ¹⁹ Dañooy mujj dërkiis, yebu ci topp seen bakkan, ba xaabaabal ci jépp jéfi sobe.

²⁰ Yeen nag du loolu ngeen jàngé ci Almasi, ²¹ ndegam kay Yeesu ci boppam ngeen dëgg mbiram, ba jàngé ci moom, dëgg gi bawoo ci moom, ²² te mooy ngeen ba seen jikko ju jëkk ja, ngeen teqlikoo ak seen jëmmu démb ja masa topp bannexi bakkan yuy naxe, ba sóobu ci yàqute. ²³ Su ko defee ngeen mana yeeslu ci seenum xel, ci ndimbalal Noo gi, ²⁴ te ngeen soloo jëmm ju yees ji Yàlla sàkke ci takkndeeram, di jéfe njub, ak sellnga ji dëgg di jur.

Póol lim na meloy gëmkat bu dëgg

²⁵ Kon nag bàyyileen fen, te ku nekk di wax sa moroom, dëgg, ndax ku nekk ci yeen sab cérú moroom nga. ²⁶ Buleen mer ba bàkkaar, te bu jant bi sowe seen mer; ²⁷ buleen xajal Seytaane. ²⁸ Sàcc bi, na ba sàcc te nangoo sonn, di liggéeye loxoom liggéey bu rafet, ba man cee dimbali néew-ji-doole ji.

²⁹ Bu genn kàddu gu bon génne seen gëmmin, xanaa su ko jaree ngeen wax lu baax, luy jariñe, te diw yiw ci ñi koy dëgg. ³⁰ Te it buleen tiisal Noowug Yàlla gu Sell, gi leen màndargaale xàmmikaayam

ngir bésob njot ba. ³¹ Lépp luy wextan, ak naqari deret, ak mer mu épp, ak coow, ak wax ju ñaaw, na lépp buube, ba génne ci seen biir, mook mbooloom jéfi coxor. ³² Baaxleen ci seen diggante, di ñeewantante, tey balante, ni leen Yàlla baale ci Almasi.

5

¹ Kon nag doonleen ay roykati Yàlla, gannaaw yeenay doomam yi mu sopp, ² te ngeen di doxale cofeel, ni Almasi mi nu sopp, ba jooxeel nu bakkanam, def ko saraxu sawara, ngir xetug jàmm, ñeel Yàlla.

³ Lu jëm nag ci powum séy, ak jépp jéfi sobe, mbaa ag bégge, li jekk ci ay nit ñu sell, moo di ñu bañ koo tudd sax ci seen biir, ⁴ te ag ñàkk kersa, ak waxi caaxaan, ak kaf yu bon, dara jekku ci, waaye saxooleen kàdduy cant. ⁵ Ndax lii kat na leen wóor: képp ku nekke powum séy, mbaa jéfi sobe, mbaa ag bégge, kooku amul cér ci nguurug Almasi ak Yàlla, ndax ku bégge ab bokkaalekat la.

Jéfeleen ni niti leer

⁶ Bu leen kenn naxe waxi ngelawal neen, ndax yooyu ma lim naxe wacce sànjum Yàlla ci kaw aji dëggadi ñi. ⁷ Kon nag buleen séq ak ñooñu dara. ⁸ Ag lëndëm ngeen woon démb, waaye tey ag leer ngeen ci Boroom bi ngeen bodd. Jéfeleen nag ni niti leer. ⁹ Li leer gi ci yeen di meññ moo di mbooloom luy mbaax ak njub ak dëgg. ¹⁰ Ràññeelen li neex Boroom bi; ¹¹ jéfi lëndëm amul njariñ, buleen ci bodd, xanaa ngeen feeñal ñaawtéefu jéf ja. ¹² Ndax kat li nit ñooñu di làquy def, waxtaane ko sax, lu ruslu la. ¹³ Waaye mbooloom lu ñu feeñal, leer ga ñu ko leerale moo ko wone, ¹⁴ te lépp lu ñu wone ci ag leer, di ag leer. Moo tax ñu ne: «Yaw miy nelaw, yewwul, dekkil, Almasi leeral la.»

¹⁵ Kon nag xool-leen bu baax seen jéfin, defleen jéfinu nit ñu am xel, te baña mel ni ñu ñàkk xel, ¹⁶ Jariñooleen lu ngeen man, jot gi ngeen amagum, ndax jant yu bona ngii tey. ¹⁷ Moo tax buleen def jéfi ñàkk bopp, waaye jéemleena xam coobarey Boroom bi. ¹⁸ Buleen naan biiñ ba màndi, màndite ci afal seen bakkan la leen jëme, waaye na leen Noo gi fees, ¹⁹ ngeen di jàngalante jàngi Sabóor, ak jàngi cant, ak jàng yu bawoo ci Noo gi leen fees, te ngeen di woy aka kañ Boroom bi, ci seen xol. ²⁰ Fu ngeen tollu, ak ci mbir mu mu mana doon, santleen Yàlla Baay bi ci sunu turu Sang Yeesu Almasi, ²¹ te ngeen rus Almasi, ba tax ngeen di nangulante.

Jabar makk, jëkkër sopp

²² Na jabar nangul jëkkëram ni mu nangule Sang bi. ²³ Almasi moo di musalkatu mbooloom gëmkat ñi, mbooloo mi di aw yaramam. Te itam ni Almasi dee boppu mbooloom gëmkat ñi, ni la jëkkër ji dee boppu jabaram. ²⁴ Kon nag ni mbooloo mi nangule Almasi, ni la jabar ji wara nangule jëkkëram ci lépp.

²⁵ Jëkkër nag, na sopp jabaram ni Almasi sopp mbooloom gëmkat ñi, ba jooxeel leen bakkanam. ²⁶ Moo defal loolu mbooloo mi ba man koo setale cangaayal ndox mu ànd ak kàddoom, ngir sellal ko. ²⁷ Li mu ci namm moo di teewal mbooloo mi fi kanamam, mu mel ni ab séetam bu ne ràññ, gakkul, rasul, taqul lenn, xanaa sell, mucc sikk.

²⁸ Noonu la jëkkër ji wara sopp jabaram, ni mu sopp yaramu boppam rekk. Sopp sa jabar sopp sa bopp la, ²⁹ ndax kenn masula bañ suuxu boppam, xanaa mu di ko dundal, di ko topptoo, ni Almasi ak mbooloom gëmkat ñi, ³⁰ nde noo di céri yaramam. ³¹ Ni ko Mbind mi indee: «Looloo tax goor di bàyyikoo ci ndeyam ak baayam, daldi taqoo ak jabaram, ba ñoom ñaar di wenn suux*.» ³² Mbóot mu xóota ngi ci dog boobu, waaye man, li may wax moo di dog bi moo misaal diggante, bi Almasi séq ak mbooloo mi. ³³ Teewuleen koo moom yeen itam; kon na ku nekk sopp jabaram ni mu sopp jabaram, te ku nekk weg jëkkëram.

6

Waajur na yar; te njaboot di dégg

¹ Naka yeen xale yi, déggal-leen seeni waajur, ngir Boroom bi, ndax moo war. ² «Teral-leen seen ndey ak seen baay*,» mooy ndigal li jëkka ànd akub dige, ³ ndax da ne: «ngir ngeen baaxle te gudd fan ci kaw suuf†.»

⁴ Yeen ñiy baay it, buleen xoñoñal xale yi, waaye yarleen leen, di leen jubanti, di leen xamal coobarey Boroom bi.

Na jaam ak sangam déggal Boroom bi

⁵ Yeen jaam yi, déggal-leen seen sangi àddina, ànd ceek ragal Yàlla bay katkati, ak xol bu déggu. Ni ngeen déggale Almasi, nangeen leen ni déggale. ⁶ Buleen ko defe ngistal, mbaa ngeen di ko sàkkoo lu leen neex, na di yéene ju ngeen tibbe ci seen xol, ngir jéfe liy coobarey Yàlla, ni mu ware ay jaami Almasi. ⁷ Liggéeyal-leen leen ci xol bu tàlli, ba mu mel ni Boroom bi ngeen ko defal, waaye du nit donj, ⁸ te ngeen xam ne nit ki, mu dis gor mbaa ab

jaam, mboolem lu mu def ci lu baax, loola la ko Boroom biy delloo.

⁹ Yeen it sang yi, jéfeleen noonu seen diggante ak seeni jaam, bàyyileen di tèkkoo, te ngeen xam ne yeen ak ñoom a bokk benn Boroom fa asamaan, te xejj ak seen amul fa moom.

Xare bi nook Seytaane la

¹⁰ Li ci des nag moo di ngeen manooorewo Boroom bi, te ngeen sàkkoo ndimbal ci dooleem ak kàttanam gi amul kem. ¹¹ Ràngooleen mboolem gannaayi Yàlla, ngir ngeen mana jànkoonte ak pexey Seytaane. ¹² Ndax kat sunub xare du nook boroomi deret ak suux, waaye ñi ñu ko séqal ay boroom nguur lañu, ak ay boroom sañ-sañ, ak ay boroom doole yu nekk ci àddina ju lëndëm jii, di ay daji Seytaane yu fare déndi asamaan. ¹³ Kon nag jël-leen gannaayi Yàlla yépp, ba bu bésuub safaan taxawee, ngeen mana jëflante, ba sottaal, te wéye taxaw temm.

¹⁴ Taxawleen kon temm. Defleen dégg di ngañaay li ci seen ndigg, njub di seen kiiraayal dënn. ¹⁵ Xibaaru jàmm bi indi jàmm nag, defleen ko muy dàll yu dëgëral seen taxaway. ¹⁶ Te fu ngeen tollu njàbbleen pakk biy seen ngëm, ci ngeen mana fanqe mboolem jumi sawaray ku Bon ki. ¹⁷ Mbaxanam xare miy seen kaaraange, jël-leen ko, sol, jël-leen itam saamar bi Noo giy joxe, te muy kàddug Yàlla. ¹⁸ Deeleen ñaan fu ngeen tollu, gépp xeetu ñaan aki dagaan ci ndimbalal Noo gi, ànd ci aki teewlu fu ngeen tollu, ak gépp farlute, te ngeen di ñaanal mboolem gëmkat ñu sell ñi.

¹⁹ Man itam, booleleen ma ci, ngir saa yu ma ubbee sama gëmmiñ, mana xéewloo ndéey lu ma xamlee fit wu dëgër, mbóoti xibaaru jàmm bi, ²⁰ xibaar bi ma di ndawam lu ñu ténke ay jéng. Waaye ñaanal-leen ma ma di ko waxee fit, ni mu ma ware.

Póol tàggu na waa Efes

²¹ Dingen mana xam nag lu jëm ci man, ak li may def, ndax Tisig, mbokk mu ñu sopp, jawriñ ju wóor ci liggéeyu Boroom bi, moo leen di xamal lépp. ²² Loolu ci boppam sax moo waral ma yónni ko ci yeen, ngir mu xamal leen ni nu nekke, ba serral seen xol.

²³ Yal na jàmm ñeel bokki gëmkat ñi, ak cofeel gu ànd ak ngëm, bawoo fa Yàlla Baay bi, ak Sang Yeesu Almasi. ²⁴ Na aw yiw ñeel mboolem ñi sopp sunu Sàng Yeesu Almasi, cofeel gu dul fey.

* 5:31 5.31 Seetal ci Njàbbéen ga 2.24. * 6:2 6.2 Seetal ci Mucc ga 20.12. † 6:3 6.3 Seetal ci Baamtug Yoon wi 5.16.

Bataaxal bi Yàlla may Póol, mu bind ko waa Filib

¹ Man la Póol, Timote miy jaamub Almasi Yeesu ni man ànd ak man ci lii, ñeel mboolem ñu sell ñi gëm Almasi Yeesu, te dëkke Filib, yeen ak seeni njiit ak taxawukati mbooloo mi. ² Aw yiw ak jàmm ñeel na leen, bawoo fa sunu Baay, ak Sang Yeesu Almasi.

Póol ñaanal na waa Filib

³ Damay sant Yàlla saa Boroom saa yu ma leen fàttlikoo, ⁴ te saa su ma leen di ñaanal, mbég laa leen di ñaanaale yeen ñépp, ⁵ ndax seen loxo bi ngeen jo ci xamle xibaaru jàmm bi, te dale ko ca bés bu jëkk ba ba tey. ⁶ Te lii kat, bir na ma; ki tàmbali jii jéf ju baax ci yeen, dina ko àggale ba kerooq bésub Almasi Yeesu.

⁷ Maa yey nag njortal leen loolu yeen ñépp, ndax ci sama xol laa leen def, te it muy ci wàllu jéng yi ñu ma jéngé, di ci wàllu kàddu guy waxal xibaaru jàmm bi, ak di ko feddli, yeen ñépp am ngeen wàll ci sama añaub yiw. ⁸ Yàlla seede na ne sopp naa leen yeen ñépp, cofeel gu Almasi Yeesu ci boppam àttana tibbe ci biir xolam.

⁹ Li may ñaan nag moo di seen cofeel yokku tey gën di yokku, te ngeen ànd ceek xam-xam bu matale ak gépp ràññee, ¹⁰ ba mana xàmmi li gën. Su ko defee ngeen set wecc te mucc sikk, ngir kerooq bésub Almasi. ¹¹ Su boobaa ngeen meññal ba woomle ci njub, gi Yeesu Almasi di maye, ngir fésal màggug Yàlla, jollil ag cantam.

Jéngi Póol jéngul kàddug Yàlla

¹² Damaa bëgg, bokk yi, ngeen xam ne lii ma dal, xibaaru jàmm bi la far jëmale kanam. ¹³ Ndax kat, bir na mboolem dagi boroom dëkk bi te bir na ñeneen ñépp ne Almasee tax ñu jéng ma. ¹⁴ Te it li gëna bare ci bokki gëmkaat ñi, sama jéng yi ma nekke nii moo leen yokk aw fit, ba tax ñu gëna ñemee waxe kàddu gi te ragaluñu ci dara.

¹⁵ Dëgg la am na ñuy waare turu Almasi ci kaw kiñaan ak diiroo mbagg, waaye am na itam ñu koy defe yéene ju rafet. ¹⁶ Nooñu cofeel a leen tax di waare, ndax xam nañu ne waxal xibaaru jàmm bi laa sasoo. ¹⁷ Waaye ñale, xelum wujje lañuy siiwtaanee Almasi, du yéene ju rafet ju ñu ci am, xanaa defe ne seeni pexe man na maa yokk coono ci diggante bii ñu ma jéngé.

¹⁸ Ana lu ci topp nag? Ba tey rekk, ak nu mu mana deme, muy waareb jinigal, mbaa waare bu dëgg, turu Almasi moo ci jollee, muy sama mbégtem tey, dellu di sama mbégtem èllég, ¹⁹ ndax xam naa ne loolu lépp ay walbatiku di samag mucc, ndax seeni ñaan, ak ndimbalal Noowug Yeesu Almasi. ²⁰ Loolu laa ne siiw, yaakaar ko, te duma rus mucc, xanaa di saxoo aw fit, démb niki tey, ngir ma mana fésale sama jëmm jépp, tedngay Almasi, su may dund ak su may dee. ²¹ Ndax samag dund, Almasi la ñeel, samag dee dàqati. ²² Su dee nag damaa wara wéye sama bakkan bii, ngir mana sottal ab liggéey bu am njariñ, ana lu ma gënal ci diggante dund ak dee? Xawma ko. ²³ Ci diggante yaar yooyii laa tance: yàkkamti ma mana yiwiku ba fekki Almasi, te loolu moo dàqati fuuf. ²⁴ Waaye ma deseegum bakkan moo gëna jamp ci yeen. ²⁵ Gannaaw loolu bir na ma nag, xam naa ne dinaa desagum, desandoo feek yeen ñépp, ngir ngeen jëm kanam, tey bége seen ngëm, ²⁶ ba bu ma délsee fi yeen, ngeen gëna mana puukarewuo Almasi Yeesu ndax man.

²⁷ Fexeleen rekk ba di jéfe ni mu yellow ak xibaaru jàmm bu Almasi, ngir bu ma leen seetsee, mana seede, mbaa su ma wuutee it, di dëgg ni ngeen saxoo di mànkoo, bokk jenn yéene, di xeex ngir saxal ngëm gi sukkandiku ci xibaaru jàmm bi. ²⁸ Buleen ragal seeni noon ci lènn. Seen fit mooy màndargaal sànkutey noon yi, te yeen it, mooy màndargaal seenug mucc gu bawoo fa Yàlla. ²⁹ Ndax kat yeen la may ci jëmmu Almasi, yiwu gëm Almasi, rax ci dollu, ngeen sonn ndax moom, ³⁰ coonoy benn xare bi ngeen bokk ak man, te gise woon ma ko démb, ba tey, ngeen di ma ko dëgge.

2

Ni Almasi woyofe mooy royukaay

¹ Ndegam amees na lènn lu yokk aw fit ci Almasi mi nu gëm, ndegam lenni cofeelam lu mana dëfal am na, ndegam amees na benn cér ci Noo gu Sell gi, ndegam it, amees na lènn lu bawoo fi moom, ci wàllu xol bu rafet, ak yërmande, ² kon dëgg waay, mottlileen sama mbég, ba mànkoo, te ngeen soppantee genn cofeel, jubale seeni xol, te bokk benn jëmu. ³ Buleen def dara ci kaw wujje, mbaa réy-réylu, waaye doyardiluleen, ba jàpp ne seen moroomi gëmkaat a leen gën. ⁴ Bu kenn ci yeen xintewoo njariñal boppam, waaye na ku nekk bàyyi xel moroomam. ⁵ Noonu Almasi Yeesu doon doxale, deeleen ko doxale ci seen biir:

⁶ Moom mi nekke nekinu Yàlla

te njoyaaloowul dayob boppam,
bi ko def nawleb Yàlla.

⁷ Xanaa mu njacc boppam,
nangoo jagoo nekkinu surga.
Mu mujj mel ni nit donj,
di ku ñu xàmmee jëmmu nitam.

⁸ Moo toroxlu,
moo nangu, ba dee fekk ko ci,
ak mbugalu bant ba ñu ko daaj.

⁹ Moo tax Yàlla kaweel koo kaweel,
baaxe ko tur wi tiim wépp tur,

¹⁰ ba turu Yeesu tax ñépp sukk seen bëti
óom,

muy kaw asamaan, di kaw suuf, di biir
suuf,

¹¹ lammifü ñépp it biral ne Yeesu Almasi
mooy Sang bi,
te muy ndamu Yàlla Baay bi.

Doonleen ay leer ci àddina

¹² Kon nag soppe yi, noonu ngeen
masa dégge ndigal, démb ba may teew,
rawatina tey bi ma wuutee, nangeen ko
wéye, di jéfe seenug muc, te ànd ceek
ragal Yàlla bay lox, ¹³ ndax Yàlla mooy
liggéey ci yeen lu tax ngeen mana namma
jéfe coobareem, ba man koo jéfe.

¹⁴ Mboolem lu ngeen di def nag, buleen
ci boole kulture mbaa xuloo, ¹⁵ ngir seen der
set wecc, te kon deesuleen mana gakkal ci
lenn. Ay goney Yàlla yu amul sikk ngeen
di doon, ci biir maas gu dëng te yaqu,
ngeen di lérxat ci seen biir, ni ay leer
ci àddina si, ¹⁶ ànd ak kàddug dund gi
ngeen di xamle. Su ko defee kerooq bésub
Almasi, ma mana damoo ne dawuma cig
neen, te sonnuma cig neen. ¹⁷ Su ma ci
deeyee sax, ba sama dund mel ni sarax
su ñu tuur, tofal ko ci sarax, bi seen
ngëm taxawe, su boobaa it maa ciy bég,
te di leen woo, ngir bokk ak yeen ñépp
bànnexu. ¹⁸ Yeen itam nangeen ci bég te
bokk ak man bànnexu.

Póol gërëm na Timote ak Epafrodit

¹⁹ Yaakaar naa nag, ne bu soobee Sang
Yeesu, dinaa leen yónnee Timote balaa
yàgg, ngir xam nu ngeen def, ba man ci
sama bopp, sama xel dal. ²⁰ Ndaxte awma
fi kenn ku ko moy, ku bokk ak man xinte,
ba seeni mbir yiiteel ko dégg. ²¹ Ñi ci
des ñépp, seen njariñal bopp lañuy sàkku,
waaye du li soxal Yeesu Almasi. ²² Timote
nag xam ngeen ne ku rafet ab jëw la. Ni
doom di taxawoo baayam, ni la bokke ak
man liggéey, bi ci xamle xibaaru jàmm bi.
²³ Sama yaakaar nag moo di, bu may am lu
leer ci sama mbir rekk, moom laay daldi
yebal ci yeen. ²⁴ Teewul mu bir ma ne,
bu soobee Boroom bi, man ci sama bopp,
balaa yàgg, dinaa leen seetsi.

²⁵ Ci wàllu Epafrodit, sama mbokkum
gëmkat la, di sama naataango, di sama

mbokkum xarekat, te di seen ndaw li
ngeen ma yóbbante ndimbal lu faj samay
soxla. Waaye jàpp naa ne fàww ma
delloo leen ko, ²⁶ ndax namm na leen
lool, boole ci tiisoo li ngeen dégg ag
jagadeem. ²⁷ Woppoon na it ba xawa
dee, waaye Yàllaa ko yërëm, te du moom
rekk la yërëm, waaye man itam, ngir
ma baña am tiis ci kaw tiis. ²⁸ Moo
tax ma yakkamtileen koo delloo, ngir bu
dikkee, ngeen man koo bégewaaf, te man
itam, samaw tiis wàññiku. ²⁹ Teertooleen
ko mbégte mu mat sékk ngir Sang bi,
te it nawleen ñu mel ni moom, ³⁰ ndax
liggéeyal Almasi tax na koo riisu ndee;
ba ngeen amee ngànt lu leen teree mot-
tilil seen bopp, seen yéene, moo jaay
bakkanam ngir wuutu leen, ba yótsi ma
seen ndimbal.

3

Gii njekk a wóor

¹ Li ci des bokk yi, ma waxati, bégleen ci
Boroom bi. Di leen bind genn kàddu googu
rekk, diisu ma, te di leen ko baamtu moo
gëna wóor ci yeen.

² Moytuleen xaj yi, defkati mbon
yooyu laa ne, moytuleen leen, moytuleen
njoofkat yooyu jiital aaday xaraf. ³ Ndaxte
nun noo xaraf tigi, nun ñuy jaamoo Yàlla
Noowam gu Sell, di damoo Almasi Yeesu,
te yaakaarunu aaday nitu suuxu neen.

⁴ Moona man de, waroon naa mana
yaakaar aaday suuxu neen. Ak keneen
ku mana xalaat ne sañ naa yaakaar
aaday nitu suuxu neen, maa ci raw.
⁵ Man mi xaraf ba ma amee juróom ñetti
fan, askanoo ci bànni Israyil, giiroo ci
Beñamin, di ab Ebrè bu ñaari Ebrè jur,
te bokk ci ngérum Farisen, ci wàllu yoonu
Musaa. ⁶ Su dee ci mbirum xéraangey
diine, maa daan bundxatal mbooloom
gëmkati Almasi, te su dee ci wàllu njubtey
sàmm yoon wi, maa muc sikk.

⁷ Waaye la ma jàppe woon ag ndollant,
moom laa def tey ag wàññeent ndax
Almasi. ⁸ Rax ci doli, lépp sax laa far jàppe
ag wàññeent, ndax ngëneel li sut lépp, te
mooy xam kuy sama Sang Almasi Yeesu.
Moom moo ma taxa nangoo ñàkk lépp,
def lépp ni mbuubit, ngir tonoo Almasi,
⁹ ngir ma mana feeñe ci biir Almasi, fu ma
yaakaarul sama njekku bopp gu ma feyoo
sàmm yoonu Musaa, xanaa di yaakaar
njekk gu laloo ngëm gi ma gëm Almasi.
Njekku googu fa Yàlla la bawoo te gëm
Almasi moo koy maye. ¹⁰ Sàkkuwuma lu
moy xam ko, xam manoore ji ko dekkal,
ak itam séddu ci ay coonoom, ba bokk ak
moom deeyam, ¹¹ tey yaakaara dekki, ak
nu mu mana deme.

Jëm kanam moo am solo

¹² Du caageenu damaa ägg ci loolu lépp ba noppi, mbaa damaa mat sëkk xaata, waaye maa ngi wéye samaw xél, di jéema jot ci neexalu rawante bi, gannaaw ba ma Almasi Yeesu jotee ci man itam. ¹³ Bokk yi, fooguma ne jot naa ci, xanaa kay lenn: damay fâtte li ci gannaaw, te def lu ma man, ngir fexee yóotuji li ci kanam, ¹⁴ daldi xélu dëgmal naanukaay ba, ngir jot ca neexal ba nu Yàlla di wooye fa kaw, ci Almasi Yeesu.

¹⁵ Kon nag, nun ñi jota màgg ba di magi jëmm ci wàllu ngëm, nanu ko bokk gise noonu. Su ci amee lenn lu ngeen gise neneen nag, loola, Yàlla moo leen koy leeralal. ¹⁶ Ak lu ci mana am, yoon wii nu doxe ba fii nu tollu, nanu ko bokk topp.

¹⁷ Bokk yi, royleen ma; jox nanu leen ab royukaay, xool-leen ci ñi koy jéfe, te ngeen topp ci seeni tànk. ¹⁸ Ndaxte ñu baree ngii ñu seeni jëf tax ñu di nooni bantub Almasi. Loolu wax naa leen ko ay yoon, ma waxati leen ko tey aki jooj. ¹⁹ Ñooñu sànkute lañuy mujje; seen koll lañu def seen yàlla, seen gacce lañuy damoo, te yéfi àddina doññ a leen soxal. ²⁰ Nun nag sunum réew a nga fa asamaan, fa nuy séntoo sunu Musalkat, Sang Yeesu Almasi. ²¹ Mooy kiy liggéeye manoooreem ji mu ténke lépp cig curgaam, ba soppañi sunu yaram wu doyadi wii, nirule kook yaramam wi ànd ak teddnga.

4

¹ Kon nag yeen samay bokk, soppe yi ma namm, di leen bége, te ngeen di sama kaalag ndam, gi ma yooloo ci sama liggéey, ngalla soppe yi, nangeen saxe noonu ci Boroom bi!

Póol dénkaane na

² Bu loolu weesee, Ewodi laay tinu, di tinu Santis, ñaari jigéen ñooñu, ngir ñu fexe ba juboo, ngir Boroom bi ñu bokk. ³ Yaw itam sama mbokkum surga bu dëggu bi, dama lay ñaan nga jàpple leen ci, ñoom ñaar ñooñoo bokkoon ak man coonob xamle xibaaru jàmm bi, ñoom ak ñoom Keleman, mboolem sama bokki liggéeykat yi seeni tur binde ca téereb dund ba.

⁴ Bégleen ci Boroom bi fu ngeen tollu, ma waxati ko, bégleen! ⁵ Na seen lewetaay wóor ñépp, Sang bi jegesi na. ⁶ Buleen jaaxle ci dara, waaye ci mbir mu mu mana doon, deeleen dikke Yàlla seeni soxla, di ko ñaan ak a dagaan te boole ci di ko sant. ⁷ Su boobaa jàmmu Yàlla, ji wees ab takk, mooy sàmm seen xol, ak seenum xel ndax Almasi Yeesu.

⁸ Li ci des nag bokk yi, moo di lii: mboolem lu dëggu, ak mboolem lu tedd, ak mboolem luy njub, ak mboolem lu set, ak mboolem lu jekk, ak mboolem lees di rafetlu, ndegam lu nawlu la te yellow ngërëm, na leen loola soxal. ⁹ Li ngeen jänge ci man te jële ko ci man, ak li ngeen dëgge ci man, gise ko ci man, jéfeleen ko. Su boobaa Yàlla miy boroom jàmm mooy ànd ak yeen.

Póol gërëm na waa Filib

¹⁰ Maa ngi bége Boroom bi lool ci nii ngeen mujj yeesale tey, seen yitte ci man, yitte yu ngeen amoon moos naka jekk, xanaa dangeena ñàkkoonu jekku seen ndimbal. ¹¹ Ag ñàkk nag taxul may waxe nii, nde tàmm naa di doylu ci diggante bu ma mana tollu. ¹² Miin naa néewle, man naa naataange. Fépp fu ma tollu, ak ci lépp, làqoo naa pexe mu ma manee jant yu ma regge, ak yu ma xiife, ci biir naataange akug ñàkk. ¹³ Lépp laa mane ci ndimbalal Ki may manal. ¹⁴ Teewul seen ndimbal lii di jëf ju rafet ju ngeen bokke ak man, sama njàqare.

¹⁵ Yeen waa Filib, xam ngeen xéll ne ba waareb xibaaru jàmm bay door, te ma bàyyikoo diiwaanu Masedwan, amul woon menn mbooloom gëmkat mu ma séqaloon ab joqlanteb ndimbal, xanaa seen mennum mbooloo. ¹⁶ Ba ma nekkee Tesalonig sax, yónnee ngeen ma ay yoon, lu ma faje samay soxla. ¹⁷ Du caageenu ndimbal lu ma leen di sàkku, li may sàkku kay moo di yokkuteb yool bu leen ñeel. ¹⁸ Fii ma tollu jot naa li ma aajowoo lépp, maa ngi ci naataange; doyle naa sëkk, gannaaw ba ma nangoo ci loxol Epafrodit, seenub yóbbante, te sarax su ñu nangu la, di xeeñ xetug jàmm, te neex Yàlla mi mu ñeel. ¹⁹ Te sama Yàlla itam mooy sàkke ci koomam gu yeéme gi ci Almasi Yeesu, ba fajal leen seen soxla yépp.

²⁰ Daraja ñeel na Yàlla sunu Baay, tey ak èllëg ba fàww. Amiin.

Tàggtoo jib na

²¹ Nuyul-leen ma mboolem ñu sell ñi gëm Almasi Yeesu. Bokki gëmkat ñi ànd ak man, ñu ngi leen di nuyu. ²² Te it gëmkat ñu sell ñépp a ngi leen di nuyu, rawatina waa kër Buur Sesaar.

²³ Yal na yiwu Sang Yeesu Almasi ànd ak seenum xel.

Bataaxal bi Yàlla may Póol, mu bind ko waa Kolos

¹ Man Póol ndawal Almasi Yeesu ci coobarey Yàlla, maa bind lii, ànd ceek mbokk mi Timote, ² ñeel waa Kolos ñu sell te wóor te di bokki gëmkati Almasi. Aw yiw ak jàmm ñeel na leen, bawoo fa Yàlla sunu Baay.

Póol ñaanal na waa Kolos

³ Sant Yàlla sunu Baayu Sang Yeesu Almasi, lanu saxoo, saa su nu leen di ñaanal; ⁴ dégg nanu ngëm gi ngeen gëm Almasi Yeesu, ak cofeel gi ngeen sopp gëmkat ñu sell ñépp, ⁵ te li waral ngëm googu ak cofeel googu, di seen yaakaara jot ca cér ba ñu leen dencal fa asamaan. Mooy yaakaar ja ngeen dale am ba ngeen jëkkee dégg kàddug dégg gu xibaaru jàmm bi. ⁶ Ni leen xibaaru jàmm bi dikkale nag, ni la dikkale àddina sépp, te nu ngi meññ, di law, na mu ko dale defe fi seen biir, ca bés ba ngeen déggee lu jëm ci yiwu Yàlla, ba raññee ko dégg. ⁷ Noonu ngeen ko jàngce ci Epafras, sunu mbokkum surga biy sunu soppe, te di jawriñu Almasi bu wóor bi nu japple*, ⁸ te moo nu xamal itam cofeel gi leen Noo gi may.

⁹ Moo tax nun itam, ba nu déggee seen mbir ba tey, noppiwunu leena ñaanal, di sàkku ngeen feese xam-xam ci lépp luy coobarey Yàlla, te ngeen ànd ceek lu mat sékk ci wàllu xel, ak gis-gis bu Noo gi maye. ¹⁰ Su ko defee ngeen di dunde dundin wu yellook Boroom bi, ngir bànnéexal ko ci wet gu nekk, seen meññeef it di jépp jéf ju baax, te ngeen gën di xam Yàlla. ¹¹ Ngir itam ngeen manoorewoo jépp manoore, na leen ko Yàlla manloo ci kàttanam gu màgg, ba ngeen mana dékkoo lépp, xolu muñ, ¹² te ngeen di sante Baay bi, mbég, moom mi leen yellale ak cér ca muuru ñu sell ña, ca réewum leer ga.

Almasi jubale na nit ak Yàlla

¹³ Yàlla kat moo nu wallu ba génne nu ca kilifteefu réewum lëndëm ga, toxal nu ci biir nguuruq Doomam ji mu sopp. ¹⁴ Ci moom lanu ame ag njot, te moo nu jéggal sunuy bàkkaar.

¹⁵ Doom jooju moo di niruwaale Yàlla, mi kenn manula gis, mooy taaw bi, ki jiitu mépp mbindeef. ¹⁶ Ndax moo di ki Yàlla sàkke lépp lu nekk asamaan, ak lu nekk ci suuf, lu gisu, ak lu gisuwul, muy boroom gàngune yeek, boroom ndomboy tãnk yeek, boroom nguur yeek, boroom

sañ-sañ yi. Lépp ci moom lees ko sàkke, te mooy ki tax ñu sàkk lépp. ¹⁷ Mooy ki nekkoon naka jekk balaa daraa nekk, te lépp ci moom la sottee ba temboo. ¹⁸ Mooy boppu yaram, wiy mbooloom gëmkat ñi, mooy njàlbéen, mooy taaw bi jëkka dekki, ndekkite lu dee toppul, ba tax muy ki jiitu ci lépp, ¹⁹ ndax Yàlla la soob mu dëël gépp matam ci moom. ²⁰ Deretam ja tuuru ca bant ba, ca la Yàlla defe jàmm, ba sottale ci moom, pexe mi mu jubalee boppam ak lépp, muy lu nekk ci kaw suuf, ak la fa asamaan.

²¹ Te yeen ñi masoona sore lool Yàlla, doonoon ay noonam ci wàllu xalaat, ak jéf ju bon, ²² tey, deewug yaram, deewug suux, gi Almasi dee, moom la leen Yàlla jubalee ak boppam, ba teewal leen fi kanamam, ngeen di ñu sell, mucc sikk, seen der set wecc. ²³ Noonu la deme, ndegam kay fekk na leen sèsoo ngëm gu ngeen déjoo ba dëgër, te baña nangu lenn di leen sorele ak yaakaar ji ci xibaaru jàmm, bi ngeen dégg, te ñu biral ko, ñeel mépp mbindeef. Man Póol nag, ci yégle xibaaru jàmm boobu laa di ab jawriñ.

Póol tiisoo na waa Kolos

²⁴ Léegi nag maa ngi bége coono yi ma jànkoondeef ngir seen njariñ; li des ci tiisi Almasi, moom laay mottalee coono yooyu ma daje sama yaramu suux wii, ngir njariñal mbooloom gëmkat, miy yaramu Almasi. ²⁵ Ci moomu mbooloo laa dib jawriñ, te Yàllaa ma sase noonu, ñeel leen, ngir ma xamle kàddug Yàlla ba mu mat sékk. ²⁶ Kàddu googu moo di mbóot mi masoona làqu maasoo maas, waaye tey Yàllaa ko xamal ay nitam ñu sell. ²⁷ Ñoom la Yàlla nammoona xamal ni mbóot mi yaatoo te yéeme, ñeel jaambur ñi dul Yawut: mbóot mi moo di Almasee ngi ci yeen ñi dul Yawut itam, loolu di seen yaakaar ci ndam lu leen ñeel.

²⁸ Almasi moomu nag lanuy xamle; na mu gëna xeloo lanuy àrtoo nit ku nekk, te ni lanuy jàngale nit ku nekk, ngir àgge nit ku nekk ba fa kanam Almasi, fekk ko mat sékk, na mu ware ku ànd ak Almasi. ²⁹ Loolu moo ma tax di góor-góorlu ci xare bii may xaree dooleem, ak manoorey jéfam, jiy liggéey ci sama jëmm jii.

2

¹ Bëgg naa nag, ngeen xam xare bu metti, bi ma leen di xareel, yeen ak waa Lawdise ak mbooloom gëmkat ñi ma masula teg bët, ² ngir ngeen gëna am fit, mànkoo ci biir cofeel, te géeju ci gis-gisu xol bu leer naññ te wóor, ba mana daj dégg, mbóotum Yàlla, miy Almasi ci

* 1:7 1.7 Mbaa: jawriñu Almasi bu wóor ngir yeen.

boppam. ³ Ci moom la mboolem alal ji ci xel ak xam-xam, dëxëñe. ⁴ Loolu laa leen di wax, ngir kenn bañ leena réerale ay kàdduy naxe yu mbubboo ag dëgg. ⁵ Ndax jëmm ji kat teewul, waaye xol baa ngeek yeen, di bégee gis seen doxalin wu jekk, ak seen ngëm gu wér gu ngeen gëm Almasi.

Jëfeleen ni ñu bokk ak Almasi

⁶ Kon nag, ni ngeen nangoo Almasi Yeesu di Sang bi, àndleen ak moom, jëfe noonu. ⁷ Sampleen seeni reen ci moom, tabaxuleen ci moom, feddikuleen ci wàllu ngëm, ni ñu leen ko jàngale, ba seenub xol baawaanal kàdduy cant.

⁸ Moytuleen ba kenn bañ leena këfe kàdduy naxi neen yu ñu jappe xam-xam bu xelu, kàddu yu sukkandikoowul Almasi, xanaa aaday nit, ak cëslaayi àddina.

⁹ Ndax kat ci Almasi, ci yaramu nitam la léppi Yàlla dëkke, ba mat sëkk ci moom, ¹⁰ ci moom ngeen mate it, te mooy kilifay mboolem boroom nguur yi, ak mboolem boroom sañ-sañ yi. ¹¹ Ci moom ngeen xarafe xaraf gu loxol nit deful, ndax noonu kuy xarfal nit ki di doge as lëf ci yaramu nit ki, ni la Almasi di doge ba mu set, buumu njaam gi leen dooley bækkaar ténke woon. Noonu la Almasi di xarfalee. ¹² Ni ñu leen booleek moom suul, keroog ba ñu leen sóobee cim ndox, noonu ngeen dekkeendoo ak moom, ndax yeena wóolu dooley Yàlla mi ko dekkal.

¹³ Yeen ñi doonoon ndee fa kanam Yàlla ndax seeni moy, ak seen ñakka xaraf, ndax li ngeen dul Yawut, Yàllaa leen booleek Almasi dundalaat leen. Moo nu baal sunu moy yépp. ¹⁴ Kayitu bor bi nu tiifaloon, te dogali yoon toppé nu ko, moom moo far mbind ma, yóbbu kayit ga, daajaale ko ak Almasi ca bant ba. ¹⁵ Moo dog sidditi boroom nguur yeek boroom sañ-sañ yi ci jaww ji, ñu doon ay jaam yu mu jappe xare. Moo leen weer it ci kanam ñépp, diriwaale leen ca biir njaab ma topp ca ndam, la Almasi ame ca bant ba.

¹⁶ Kon nag bu leen kenn sikkal ci ñam wu ngeen lekk, mbaa lu ngeen naan, mbaa mággal bés bu rafet, mbaa Terutel weer, ak bésub Noflaay. ¹⁷ Loolu lépp takkndeeru yaram wuy jëmmal lu dikkagul, moom rekk la woon. Waaye yaram wi dëgg moo di Almasi. ¹⁸ Buleen nangu kenn ku leen sikkal, te di kuy teg boppam jëfi toroxlu, di jaamu ay malaaka, topp seen gis-gisi peefiuy bopp. Ñu ni mel ñooy réy-réyloo xalaati neen yu ñu fente seen yég-yégi bakkan. ¹⁹ Nooñu jokkuwuñu ci Almasi, miy bopp bi, te ci bopp bi la yaram wi wépp di jëfandikoo siddit yeek tenqo yi, ba suuxatu, ngir lépp mánkoo ba mana mág, ni ko Yàlla di mágale.

²⁰ Ndegam nag yeena bokk ak Almasi dee, ba teqlikoo ak li àddina def cëslaay, ana lu tax ngeen mel ni ñu bokk ci àddina ba tey, di tegoo ay dogali yoon yu mel nii: ²¹ «Bul jël lii, bul ñam lee, bul laal la ca des.» ²² Te mboolem yéf yooyu dogali yoon yi jëm day jeex donj bu ñu leen jëfandikoo. Loolu ay santaane aki àlluway nit donj la. ²³ Dëgg la, xel man naa nangu dogali yoon yu ni mel, ndax laaj na nit ki pastéefu ci diine ju mu tegool boppam, laaj na it toroxlu, ak coonoy yaram yu tukkee ci yar bu metti bu nit kiy tegoo, waaye jariñul dara ku bëgga moom bakkanam.

3

Gëmkatub Almasi, dundin wu yees

¹ Gannaaw nag yeena dekkeendoo ak Almasi, sàkkuleen la fa kaw, fa Almasi tooge ca ndijooru Yàlla. ² La fa kaw, xintewooleen ko, te ngeen ba li fi suuf, ³ ndaxte dee ngeen, ba seenug dund ànd ak Almasi, laqe fa Yàlla. ⁴ Seenug dund dëgg Almasi la, te keroog bu Almasi feeñee, yeen itam ay ànd ak moom feeñ, ba séddu ci ndamam.

⁵ Kon nag reyleen seen cér yi bokk fii ci kaw suuf; lu mel ni powum séy, ak jëfi sobe, ak ñakk sago ci lu jekkadi, ak xemmemtéef yu bon, ak bëgge, te loolooy bokkaale ba tey, ⁶ yooyooy wacce sànjum Yàlla ci kaw ñi dëggadi. ⁷ Yeen itam noonu ngeen daan jëfe bu jëkk, ba seenug dund bokkee fii ci kaw suuf. ⁸ Waaye léegi lii lépp baleen ko: tàng xol, ak mer mu épp, ak coxor, ak saaga, ak waxi ñakk kersa. ⁹ Buleen di fenante, gannaaw seen jëmm ja woon démb, boole ngeen kook jëfinam ja mu àndal, summi, ¹⁰ ba sol seen jëmm ju yees, jiy gën di yeesu, te di gëna niru ki leen ko sàkkal, ba kera ngeen xamee, xam-xam bu mat sëkk. ¹¹ Dundin wu yees woowu amul jaambur akub Yawut, amul ku xaraf ak ku xarafu, amul ab doxandéem ak ku xayadi, amul ab jaam ak as gor, waaye Almasi mooy lépp te moo nekk ci ñépp.

¹² Yeenay ñi Yàlla taamu, sellal leen, sopp leen. Kon nag solooleen xolu yërmande, akug mbaax, ak woyoflu, ak jikko ju lewet, ak xolu muñ. ¹³ Muñalanteleen te di balante, ndegam kenn a am lenu lu mu sikke moroomam. Ni leen Boroom bi baale, deeleen balantee noonu. ¹⁴ Ci kaw loolu lépp nag, tegooleen cofeel; mooy xànc gi leen faste, ba seenug bennoo mat sëkk.

¹⁵ Na jàmmu Almasi saytu seen xol. Ci jooju jàmm lañu leen woo, fekk leen ngeen di wenn yaram donj, te it saxooleen cant. ¹⁶ Na leen kàddug Almasi dëkke,

bay baawaan, ngeen di jariñoo xel mu mat sèkk mu ngeen di jànglantee, ak a artoonte. Woyeleen xolub cant, ñeel Yàlla, ay taalifi Sabóor, ak woyi tagg Yàlla, ak woy yu fentoo ci Noo gi. ¹⁷ Lu ngeen mana def, muy ci wax, di ci jéf, defleen ko ci turu Sang Yeesu, tey sant Yàlla Baay bi ci moom.

Rafetooléen

¹⁸ Jigéen ñi, nangul-leen seen jëkkër, noonu mu jekke ci ku bokk ci Boroom bi.

¹⁹ Góor ñi, soppelen seen jabar, te buleen leen soxore.

²⁰ Xale yi, déggal-leen seeni waajur ci lépp, nde loolu mooy li Boroom bi rafetlu.

²¹ Yeen ñiy baay, buleen yékkati seen xolu doom, ngir baña jeexal seen xol.

²² Jaam yi, nangul-leen ci lépp seen sang yi ci àddina. Buleen ko defe ngistal, mbaa ngeen di ko sàkkoo lu leen neex, waaye defeleen ko yéeneey xol bu dëggu, ndax ragal Boroom bi. ²³ Lu ngeen mana def, liggéeyeleen ko xol bu talli, ni bu ñeelul woon nit donj, xanaa Boroom bi. ²⁴ Te ngeen xam ne ci loxol Boroom bi ngeen di nangoo yool bi ngeen muurloo. Sang Almasi mooy ki ngeen di jaamu. ²⁵ Waaye ku def njubadi, njubadi ga mu def lay yooloo, te xejj ak seen du ci am.

4

¹ Yeen ñiy sang yi, yorleen seeni jaam, yorin wu jub te aw yoon, te ngeen xam ne yeen itam am ngeen ab Sang fa asamaan.

Yeneen warugar a ngi

² Ag ñaan nag, saxooleen ko, te ngeen teewlu ci, boole ci ag cant. ³ Te ngeen ñaanaale nu ci itam, ngir Yàlla ubbil nu buntu xamle kàddu gi, ngir siiwtaane mbóot mi ci Almasi, li waral ñu jéng ma.

⁴ Ñaanleen ma man koo waxe ba mu leer nàññ ni mu ma ware.

⁵ Jéfeleen xel mu rafet seen diggante ak aji gëmadi ñi ci biti, te jot gu ngeen am, fexeleen ba jariñoo ko. ⁶ Na seen kàddu ànd ak yiw te am solo, te ngeen xam nu ngeen di tontoo ku nekk, tont li war.

Póol tàggu na waa Kolos

⁷ Mboolem lu jëm ci man nag, Tisig dina leen ko xamal. Mbokk la, soppe la, jawriñ ju wóor la, te it sama mbokkum jaam la, ci liggéeyu Boroom bi. ⁸ Lii sax moo tax ma yónni ko ci yeen: xamal leen lu jëm ci nun, ak itam, teewaayam bu dëfal seen xol. ⁹ Onesim lay àndal, sunu mbokk mu wóor, di sunu soppe, te mu bokk ci yeen. Ñoo leen di xamal mboolem lu fi xew.

¹⁰ Aristàrk mi ma bokkal kaso bi, mu ngi leen di nuyu, moom ak Màrk rakku Barnaba. Ci mbiru Màrk moomu ngeen jotoon ndigal, ngir bu dikkee, ngeen teral

ko. ¹¹ Yeesu mi ñuy wax Yustus itam, mu ngi nuyoo. Li bokk ci askanu Yawut, ñoom rekk ay liggéeyandoo ak man ngir nguurug Yàlla, te ñoo seral sama xol.

¹² Ab nuyoo it ñeel na leen, tukkee ci jaamub Almasi Yeesu, Epafras, mi bokk ci yeen. Ku jàmbaare ci saxoo leena ñaanal, ngir seenub taxawaay sotti te mat sèkk ci jéfe mboolem luy coobarey Yàlla.

¹³ Maa ko seedeel ne coonoy ñaan bu réy la nekke, ngir yeen ak waa Lawdise ak waa Yerapolis. ¹⁴ Ab nuyoo it ñeel na leen, tukkee ci sunu soppe, Luug, doktoor bi, ak Demas. ¹⁵ Nuyul-leen nu bokk yi dëkke Lawdise, ak sunub jigéen Nimfa, ak mbooloom gëmkat, miy daje kërám.

¹⁶ Gannaaw bu ngeen jängee biral, bataaxal bii ci seen biir, fexeleen it ba ñu jàng ko, biral, fa mbooloom gëmkat ma fa Lawdise, te yeen it bataaxal ba ngeen di jote Lawdise, nangeen ko jàng biral.

¹⁷ Waxal-leen ma Arsipp ne ko: «Neel jàkk ci liggéey bi nga sasoo ci Boroom bi, ngir nga sottal ko.»

¹⁸ Man Póol nag maa leen bind nuyoo bii ci sama loxol bopp. Fàttlikuleen ne dañu maa těj kaso. Yal na aw yiw ànd ak yeen!

Bataaxal bu jëkk bi Yàlla may Póol, mu bind ko waa Tesalonig

¹ Man la Póol, mi ànd ak Silwan ak Timote ci kàddu gii ma yékkati, ñeel mbooloom gëmcati waa Tesalonig, ñi bokk ci Yàlla Baay bi ak Sang Yeesu Almasi. Yiw ak jàmm ñeel na leen.

Waa Tesalonig am nañu aw yiw

² Nu ngi sant Yàlla fu nu tollu ci yeen ñépp, te noppiwunu leena fàttliku ci sunuy ñaan, ³ ak di baamtu fi kanam Yàlla sunu Baay, jëf ji juddoo ci seen ngëm, ak liggéey bi sottee ci seen cofeel, ak yaakaar ji ngeen saxoo di séentu sunu Sang Yeesu Almasi.

⁴ Yeen bokki gëmkat ñi Yàlla sopp, xam nanu ne moom moo leen taamu, ⁵ ndax sunu xibaaru jàmm, bi nu leen àgge, dikewu leen ay wax rekk, waaye manoo la leen dikkaale, ak ndimbalal Noo gu Sell gi, ak kóolute gu mat sèkk gu ngeen am. Xam ngeen moos na nu nekke woon ca seen biir; di xintewoo seen njariñ. ⁶ Aw ngeen sunuy tànk, aw it ci tànk Sang bi, nde yeena jot ci kàddu gi, ci biir njàqare ju bare, te di ko bége ci ndimbalal Noo gu Sell gi. ⁷ Moo leen taxa doon royukaay ci mboolem gëmcati diiwaani Maseduwan ak Akayi. ⁸ Ci seen biir kay la kàddug Boroom bi jollée, te yemul ci Maseduwan ak Akayi rekk, waaye seen ngëm Yàlla fépp la siiwe, ba soxlawunu cee waxati fenn dara. ⁹ Nit ñi ci seen bopp ñoo nuy waxal fépp, na sunu ngan ak yeen deme, ak ni ngeen walbatikoo ci Yàlla, dèddu tuur yi, bay jaamu Yàlla ju dëggju jiy dund, ¹⁰ tey séentu Doomam Yeesu mi mu dekkal, mu dikk bàyyikoo asamaan, moom mi nu jot ci sànj miy dikk.

2

Nganug Póol neenul

¹ Yeen ci seen bopp kay, bokk yi, xam ngeen ne sunu ngan ak yeen neenul. ² Xam ngeen na nu jëkkoonna sonne, ak na ñu nu torxale woon ca Filib, dëkk ba, bala noo dikk fa yeen. Teewul ci sunu ndimbalal Yàlla, nu ñeme leena àgge, ci biir xeex bu metti sax, xibaaru jàmm bu Yàlla bi. ³ Ndaxte sunub woote laloowul pexem sàнке, ak mébét mu setul, akug njublanj. ⁴ Xanaa kay noonu nu Yàlla doylloo, ba dénk nu liggéeyu xibaaru jàmm bi, noonu lanuy waaree li neex Yàlla miy seet ab xol, te dunu ci wut bannexu nit ñi.

⁵ Masunoo jaye, xam ngeen ko, ag bëgge it masunoo taxa jóg, Yàlla seede na ko; ⁶ masunoo sàkku ngërëmal nit, du ci yeen, du ci ñeneen. ⁷ Manoon nanoo taafantoo li nu diy ndawi Almasi, ba diisal leen, waaye danoo leweton domm ci seen biir; mel ni jaboot juy topptoo ay doomam. ⁸ Noonu lanu nabe woon ci yeen, ba buggunu woona yem ci xamal leen donj xibaaru jàmm bu Yàlla, waaye danu leena sopp ba yéene woon leena jox sunu bakkan sax boole ci, ndax fi ngeen nu mujj tollu ci sunu xol. ⁹ Xanaa bokk yi, yeena ngi fàttliku sunu doñ-doñ ak sunu coono? Diir ba nu leen di yégal xibaaru jàmm bu Yàlla bi, guddi ak béccég lañu daan liggéeyaale, ngir baña diisal kenn ci yeen.

¹⁰ Yeena seede, Yàlla itam seede, sellnga ak njub, ak mucc sikk ga nu doon jéfe fa seen biir; yeen ñi gëm. ¹¹ Xam ngeen ne fi baay féete doomam lanu féete kenn ku nekk ci yeen. ¹² Naax nanu leen, défal leen, dénk leen, ngir ngeen di jéfe jëfin wu yelloo ak Yàlla, mi leen woo ci nguuram ak teraangaam.

¹³ Leneen lu nu dul noppee sante Yàlla, moo di lii: ba ngeen nangoo ci sunu làmmiñ kàddug Yàlla gi nu leen dégtal, te melul ni kàddug nit donj ngeen ko nangoo, waaye kàddug Yàlla gi mu doon ci lu wér, moom ngeen ko jéle, te kàddu googu mooy liggéey ci seen biir; yeen gëmkat ñi. ¹⁴ Ndax kat bokk yi, yeena aw ci tànk gëmcati Almasi Yeesu ya fa mbooloo Yàlla, ya fa réewum Yuda, nde coono ya ñu daj ca Yawut ya, yeen it seeni waa réew teg nañu leen lu ni mel. ¹⁵ Yawut ñi ñoo rey Sang Yeesu, na ñu reye woon yonent yi, te ñoo nu bundxatal tey. Neexuñu Yàlla, te nooni ñépp lañu. ¹⁶ Ñoo nuy aaye nu àgge jaambur ñi dul Yawut, kàddu gi leen di musal. Noonu lañu matale seen jóorub bàkkaar yi ñu nekke naka jekk, waaye am sànj a leen mujj dab.

Póol namm na waa Tesalonig

¹⁷ Nun nag bokk yi, teqale nañu nu ak yeen ab diir, waaye xol yi sorewaa-toowul, xanaa jëmm yi rekk. Waaye sunu nammeel gu réy tax na noo def sunu kem kàttan, ndax yàkkamtee gise waat ak yeen. ¹⁸ Moo tax nu bëggoon leena seetsi, waaye Seytaane moo nu gállankoor. Te man Póol, jéem naa leena seetsi bu dul benn yoon du ñaar. ¹⁹ Ndax kat, ana kan mooy sunu yaakaar, di sunu mbég, te di sunu kaala gu nuy sagooji? Xanaa du yeen, kera ca sunu kanam Boroom Yeesu, bu feeñee? ²⁰ Yeen déy, lanuy damoo, di leen bége.

3

¹ Ba ñu muñee ba tële nag, ca lanu nangoo des ca Aten, nun doŋŋ. ² Nu daldi yónni Timote, muy sunu mbokk, di jawriñub Yàlla bu nuy liggéeyandool ci xibaaru Almasi. Su ko defee Timote dooleel leen, feddli seen ngëm, ³ ngir kenn baña jaq ci biir tiis yii, ndax yeen ci seen bopp xam ngeen ne loolu lanu séddoo. ⁴ Ba nu nekkee ak yeen sax lanu leen jëkkoon wax ne dinanu daj ay coono, te xam ngeen ne noonu la ame. ⁵ Moo tax ba ma muñee ba tële, ma yónnee, ngir xam fu seen ngëm tollu, ndax ragal ne Fiirkat bi da leena fiir, ba sunuw ñaq neen.

⁶ Waaye léegi bi Timote délsee, bawoo ci yeen, xibaaru jàmm la nu àgge ci seen ngëm, ak seen cofeel, ak ni ngeen ndax bégee di fàttliku saa su nekk, te namm nu lool ni nu leen namme, nun itam. ⁷ Kon nag bokk yi, ci sunu biir mitit ak njàqare, sunu xol sedd na ci yeen ndax seen ngëm. ⁸ Léegi kay nu ngi dundaat, gannaaw yeena ngi sax ci Boroom bi. ⁹ Ndaw njukkall lu nuy dellooti Yàlla ngir yeen, ndax mboolem mbég mi nu leen di bége fi sunu kanam Yàlla! ¹⁰ Guddi ak béccëg, pastéefu xol lanuy dagaane Yàlla, ngir man leena gisaat, ba mottli li yées ci seen ngëm.

¹¹ Yal na Yàlla sunu Baay ci boppam, ànd ak sunu Sang Yeesu, ngir jubal sunuw yoon ba nu agsi ci yeen. ¹² Nii sunu cofeel ak yeen baawaane, yal na ko Boroom bi yokke ba baawaanal ag cofeel ci seen biir, ak ci seen diggante ak nit ñépp. ¹³ Yal na Boroom bi dooleele noonu seen xol, ngir kera ba sunu Sang Yeesu délsee, ànd ak ñoñam ñu sell ñépp, fekk leen sell te mucc sikk, fa kanam Yàlla sunu Baay.

4

Sellal wartéef la

¹ Li ci des nag, bokk yi, moo di yeena nangoo ci sunu làmmiñ, jéfin wi ngeen wara jéfe ba neex Yàlla, te it moom ngeen nekke. Waaye danu leen di tinu, di leen ñaax, ci turu Sang Yeesu, ngir ngeen gënati koo jéfe. ² Xam ngeen ndigal, yi nu leen jox ci turu Sang Yeesu. ³ Lii moo di coobarey Yàlla: ngeen sellal te mucc ci powum séy. ⁴ Su ko defee kenn ku nekk ci yeen mana moom yaramu boppam ci biir sellnga ak teddnga, ⁵ te ngeen ànd ak sago ci seeni xemmemtéef, baña mel ni niti xeet yi xamul Yàlla. ⁶ Ci moomu mbir, bu kenn ci yeen tooñ mbokkam, di aakimoo yelleefam, ndax waxoon nanu leen ko, ba artooti leen ne leen jéf ju ni mel, Boroom bee koy fey ña ko def. ⁷ Yàlla kat ci sellnga la nu woo, waaye du ci jéfin wu setul. ⁸ Kon

nag ku jalax ndigal lii, du nit nga jalax, xanaa Yàlla, moom mi leen jox Noowam gu Sell.

⁹ Ci wàllu mbéggeel gi war ci biiri bokk, soxlawuleen ku leen ci bind dara, ndax yeen ci seen bopp, Yàlla tàggat na leen ci soppante, ¹⁰ te moom ngeen nekke seen digg ak mboolem bokki diiwaanu Maseduwan gépp. Teewul nag, bokk yi, nu di leen ñaax, ngir ngeen gënate jéfe noonu. ¹¹ Sàkkuleen di jéfe jéfin wu dal, te ngeen di topptoo lu seen yoon nekk, tey dunde seenu ñaq, na nu leen ko sante woon. ¹² Kon dingeen jekk nu ngeen di jéflante ak ñu gëmül ña ca biti, te dungeen soxlaal kenn dara.

Tiislu bu ëpp warul

¹³ Bokk yi nag, buggunu ngeen réere mbirum way dawlu ñi, bay tiislu ni ñeneen ñi amul jenn yaakaar, di tiisloo. ¹⁴ Ndegam gëm nanu ne Yeesu dee na, ba dekki, noonu it lanu wara gëme ne Yàlla mooy dekkal way dawlu ñi gëmoon Yeesu, ba boole leen ak Yeesu, indaale.

¹⁵ Lii nu leen di àgge, te muy kàddug Boroom bi de, moo di nun ñi fiy dese bakkan ba kera Sang biy délisi, dunu jitu way dawlu ñi fa moom. ¹⁶ Sang bi ci boppam, woote bu xumb lay wàccaalee asamaan, baatu kilifag malaaka jib, ànd ak coowal liitu Yàlla. Su ko defee ña seenug dee fekk ñu gëm Almasi ñooy jékka dekki. ¹⁷ Gannaaw loolu nun ñi fi dese bakkan lees di kéfandoo ak ñoom, jëme ca niir ya, ngir nu dajeeek Sang bi fa jaww ja, nu daldi nekk ak moom ba fàww. ¹⁸ Kon nag deeleen défalante yooyu kàddu.

5

¹ Waaye nag bokk yi, lu jëm ci ay àpp, ak bés ya loolu di am, soxlawuleen ku leen ci bind, ² ndax yeen ci seen bopp, xam ngeen xéll ne Sang bi, ni sàccub guddi lay dikke. ³ Fa nit ñi naan: «Jàmm ak kaaraange dikk na,» fa la sànkute di dale ci seen kaw, ni aw mat di jekkee dal ci kaw jigéenu wérul, te kenn du ca récce. ⁴ Waaye yeen bokk yi, nekkuleen cig lëndëm, ba bés boobu di leen bett ni ab sàcc di bettee. ⁵ Yeen ñépp ay doomi leer ngeen, doomi béccëg ndarakàmm; nun bokkunu dara ak guddi, mbaa ag lëndëm. ⁶ Kon nag bunu nelaw ni ñi ci des, waaye nanu teewlu, te ànd ak sunu sago. ⁷ Ndaxte ñiy nelaw, guddi lañuy nelaw; ñiy màndi it, guddi lañuy màndi. ⁸ Waaye nun ñiy waa béccëg, nanu ànd ak sunu sago, te def ngëm ak cofeel, sunu kiiraayal dënn; yaakaaru texe di sunu mbaxanam xare. ⁹ Ndax kat Yàlla séddu nu am sànj, waaye ag mucc la nu moomale ndax sunu Sang Yeesu Almasi.

¹⁰ Su nuy dund, ak su nuy dee, moom moo nu deeyal, ngir nu mana ànd ak moom, dund. ¹¹ Kon nag noonu ngeen di ñaaxantee, aka yokkante, nangeen ko wéye.

Dénkaane yii la Póol tëje

¹² Gannaaw loolu bokk yi, danu leen di ñaan, ñi fheetewoo coonob liggéey ci seen biir te jüite leen ci yoonu Boroom bi, di leen yee, nangeen leen yég. ¹³ Nangeen leen nawe seen kem kàttan te soppe leen noonu ndax seen liggéey. Gannaaw loolu, nangeen jàmmoo. ¹⁴ Bokk yi, danu leen di dénku; yaafus yi, femmuleen leen; ñi néewu fit, ñaaxleen leen; néew-doole yi, dimbalileen leen, te it muñal-leen ñépp. ¹⁵ Fexeleen ba kenn du feyantoo. Waaye lu baax, deeleen ko deflante ci seen biir; te di ko defal ñépp.

¹⁶ Fu ngeen tollu bégleen, ¹⁷ saxooleen ñaan, ¹⁸ te deeleen sant, ak nu mu mana deme, ndax loolu mooy coobarey Yàlla ci yeen ñi ànd ak Almasi Yeesu.

¹⁹ Buleen giimal taalub Noowug Yàlla gi, ²⁰ buleen gattañlu ay kàdduy waxyu. ²¹ Waaye lu mu mana doon, settantal-leen ko, li baax, ngeen jàpp ci, ²² te lu bon, ak nu mu mana bindoo, dàndleen ko.

²³ Yàlla ci boppam, moom miy Boroom jàmm, yal na leen sellal, ba ngeen mat sèkk, te seen léppi xel, ak seen léppi xol, ak seen léppi yaram sàmmu, ba mucck sikk, ba kera bés bu sunu Sang Yeesu Almasi feeñee. ²⁴ Ki leen woo de ku wóor la, te moo koy def it.

Póol tàggtoo na ak waa Tesalonig

²⁵ Bokk yi, nun itam, ñaanal-leen nu.

²⁶ Nuyul-leen nu bokk yépp, te foonal-leen nu leen na mu gëna selle. ²⁷ Maa ngi leen di dénku nag, ngir Boroom bi, jàngleen biral bataaxal bii ngir bokk yépp.

²⁸ Yal na sunu yiwu Boroom Yeesu Almasi ànd ak yeen.

Ñaareelu bataaxal bi Yàlla may Póol, mu bind ko waa Tesalonig

¹ Man la Póol, mi ànd ak Silwan ak Timote ci kàddu gii ma yékkati, ñeel mbooloom gëmkati waa Tesalonig, ñi bokk ci Yàlla sunu Baay, ak Sang Yeesu Almasi. ² Aw yiw ak jàmm ñeel na leen, tukkee ci Yàlla sunu Baay, ak Sang Yeesu Almasi.

Cant war na ci waa Tesalonig

³ Bokk yi, manunoo ñàkka sant Yàlla ci yeen fu nu tollu, te muy lu jaadu, gannaaw seen ngëm a ngi yokku bu baaxa baax, te cofeelu ku nekk ci yeen ñépp di gënatee law, digganteem ak moroomam. ⁴ Moo tax nun, nu di leen damoo fi biir mboolooy gëmkati Yàlla yi, ndax seenug muñ, ak seen ngëm, ci biir mboolem ni ñu leen di bundxatale, ak njàqare yi ngeen di jànkoondeel.

Njekk feeñ na ci àtteb Yàlla

⁵ Loolu lépp di firndeel njecku àtteb Yàlla, bi leen di yellale nguurug Yàlla, gi tax ngeen di sonn. ⁶ Te kat njecku Yàlla dina feeñ ndax coono ba muy delloo ñi leen teg ab coono. ⁷ Dina feeñ it ndax noflaay ba nu nuy booleek yeen ñiy dékku ab coono, sédde nu ko, kera bés bu Sang Yeesu feeñee, ànd ak ay malaakaam yu lãmboo manoooreem, wàcce asamaan. ⁸ Ci biir sawara wuy sèlsèli lay doon. Ca lay mbugal ñi xamul Yàlla, ak ñi baña déggal xibaaru jàmm bi jëm ci sunu Boroom Yeesu. ⁹ Nooñu lees di mbugale sànkute gu sax dàkk, fu sore Boroom bi, sore tedngay manoooreem, ¹⁰ kera bés bu délsee ba jot ci tedngaam ci biir ñoñam ñu sell ñi, ba mboolem ñi ko gëm di ko yéemoo. Te yeen ci seen bopp, ci ngeen di bokk, ndax yeena gëm la nu leen seedeelon.

¹¹ Moo tax nu saxoo leena ñaanal, ngir sunu Yàlla yellale leen ab wooteem, ngir itam mu sottale kàttanam seen mboolem mébét mu baax, ak seen jépp jéf ju laloo ngëm. ¹² Su ko defee sunu turu Sang Yeesu mágge ci yeen, yeen it, ngeen mágge ci moom, ci sunu ndimbalal yiwu Yàlla, ak Sang Yeesu Almasi.

2

Ndëngte ju mag mooy jiitu bésu Sang bi

¹ Léegi nag, bokk yi, ci wàllu dellusig sunu Sang Yeesu Almasi, ak sunu dajéji fa

* 2:3 2.3 Mbaa: di doomu alkute ji.

moom, li nu leen di ñaan moo di: ² bu leen lenn gaawa xañ sago ba ngeen ñàkka ànd ak seenum xel, mbaa mu di leen jaaxal; du lu ñu ne kàddug waxyu la, du genn kàddu mbaa bataaxal bu ñu nu moomale, te di leen gëmloo ne bésu Sang bi dikk na ba noppi. ³ Bu leen kenn naxe nenn, ndax bés ba du dikkagum, te fippu gu mag ga jëkkula dikk, ba ki jëmmal ndëngte te dëgmal alkute*, feeñ. ⁴ Kooku mooy jànkoondeeka damu ci kaw mboolem lees di wooye yàlla, mbaa lees di jaamu, te mooy mujj toog ca kër Yàlla ga, ba far tudde boppam Yàlla.

⁵ Xanaa fàttlikuwuleen ne waxoon naa leen ko, ba ma nekkee ak yeen? ⁶ Te xam ngeen li ko téye léegi, ba du mana feeñ lu dul ca bésam. ⁷ Kumpa la dooley ndëngte ji baddoo te mu ngi def liggéeyam xaata, xanaa kay ki ko téye ba tey moo koy téye rekk ba keroog jélees fi ki ko téye. ⁸ Su boobaa la ku dëng ka di feeñ, te Sang Yeesu moo koy jállarbee ngelawal gëmniñam, te moo koy rajaxee ca na muy feeñee bu délsee. ⁹ Peeñum ku dëng ki liggéeyu Seytaane lay àndal, te dina wone wépp xeetu manooore, aki firnde ak kéemaani feni neen, ¹⁰ ak mboolem xeeti naxe yu njubadi lal, ñeel ñi nara sànkun ndax ñàkka sopp dëgg gi, ngir nangu ko ba mucc. ¹¹ Looloo tax Yàlla yóonnee leen jéf juy sàнке, ngir ñu gëm aw fen. ¹² Su ko defee mbugal dal mboolem ñi gëmul dëgg gi, xanaa di xejjoo njubadi.

Taxawleen bu dëgër

¹³ Nun nag bokk yi, manunoo ñàkka sant Yàlla fu nu tollu, ci yeen ñi Boroom bi sopp, ndax yeen la jékka taamu, ngir sellale leen Noo gu Sell gi, ak itam seen ngëm gi ngeen gëm dëgg gi, ngir texeel leen. ¹⁴ Ci loolu it la leen woo ba mu jéfandikoo xibaaru jàmm bi nu leen àgge, ngir ngeen séddu ci sunu ndamal Boroom Yeesu Almasi. ¹⁵ Kon nag bokk yi, taxawleen bu dëgër te ñoy ci dënkaane yi nu leen àgge ci sunu lãmmiñu bopp, ak yi nu leen bind ci sunuy bataaxal.

¹⁶ Sunu Sang Yeesu Almasi ci boppam, ak Yàlla sunu Baay, mi nu sopp, te may nu ciw yiwam, jàmmi xol ju sax dàkk, ak yaakaar ju wér, ¹⁷ yal nañu leen may jàmmi xol, te may leen dooley wéye jépp jéf ju baax, ak gépp kàddu gu rafet.

3

Ñaanleen ci Yàlla

¹ Li ci des nag bokk yi, moo di ngeen ñaanal nu, ngir kàddug Boroom bi gaawa law te am ndam na mu ko ame woon fa

yeen, ² ngir itam nu mucc ci nit ñu soxor ñu bon ñi, ndax du ñépp a gëm. ³ Waaye Boroom bi mooy ki jara wóolu, te moo leen di dooleel, musal leen ci Ku bon ki. ⁴ Am nanu it kóolute gu nu Boroom bi may, ne li nu leen sant, moom ngeen nekke, te moom ngeen di wéye. ⁵ Yal na Boroom bi wommat seen xol, jême ci cofeelu Yàlla ak muñ gi ci Almasi.

Yaafus warul

⁶ Ndigal li nu leen di jox ci sunu turu Boroom Yeesu Almasi, moo di ngeen dänd mépp mbokk mu nekke ag yaafus, te baña dëppoo ak dénkaane yi ngeen nangoo ci nun. ⁷ Yeen ci seen bopp, xam ngeen ne ci sunuy tànk ngeen wara awe, te du ag yaafus lanu nekke woon ci seen biir. ⁸ Lekkunu ñamu kenn ci neen, xanaa di yëngu guddi ak bëccëg, ci coonob daan sunu doole, ngir baña diisal kenn ci yeen. ⁹ Moona du sañ-sañ bu nu ci ñàkk, xanaa bëgg leena won lu ngeen nu roye, ba ngeen aw ci sunuy tànk, ¹⁰ ndax ba nu nekkee ak yeen, ndigal lanu leen joxoon moo di lii: «Ku nanguwula liggéey, bumu lekk.»

¹¹ Dégg nanu nag ne ñenn a ngi ci seen biir, ñu nekke ag yaafus, duñu yëngu ci dara, lu moy di topptoo lu seen yoon nekkul. ¹² Ñu ni mel lanuy sant ak a déngu ngir Sang Yeesu Almasi, ngir ñu dal, tey yëngu, di dunde seen ñaagu bopp. ¹³ Yeen nag bokk yi, buleen tàyyi ci def lu baax.

¹⁴ Ku ci déggul sunu kaddu yi ñu bind ci bataaxal bii nag, bàyyileen ko xel, te baña jaxasoo ak moom, ngir gacceel ko. ¹⁵ Bumu tax ngeen def ko ab noon, waaye yeddleen ko, ndax mbokk la.

Fii la Póol tėje bataaxalam

¹⁶ Gannaaw loolu, Boroom bi moom jàmm, yal na leen mayal boppam jàmmi lépp ak fépp. Yal na Boroom bi ànd ak yeen ñépp.

¹⁷ Tàggoo bii, man Póol maa ko bind ci sama loxol bopp, te nii laay binde ci bépp bataaxal. ¹⁸ Sunu yiwu Boroom Yeesu Almasi ñeel na leen yeen ñépp.

Bataaxal bu jëkk bi Yàlla may Póol, mu bind ko Timote

¹ Ci man Póol, ndawal Almasi Yeesu, ci ndigalal Yàlla sunu Musalkat, ak Almasi Yeesu sunu yaakaar, ci man la bataaxal bii bawoo, ² ñeel Timote, sama doomu bopp ci wàllu ngëm. Aw yiw ak yërmande ak jàmm ñeel na la, bawoo ci Yàlla Baay bi, ak sunu Sang Almasi Yeesu.

Njàngle mu jub day yokke

³ Na ma la ko dénke woon ba may dem diiwaanu Maseduwan rekk, nanga toog Efes googu, ngir ña fay jàngle leneen, nga aaye leen. ⁴ Ne leen ñu baña topp léebi neen, ak limi maam yu dul jeex, ndax loolu ay werante donj lay jur, te jariñul dara ci liggéeyu njotug Yàlla gi sottee ci ngëm. ⁵ Ndenkaane lii nag, li ko taxa jóg mooy luy yee ag cofeel gu bawoo ci xol bu rafet, ak xel mu dal, ak ngëm gu mucc jinigal. ⁶ Am na ñu moy woowu yoon, ba lajj jëm ci wax ju tekkiwul dara. ⁷ Nnooñu ay jànglekati yoonu Musaa lañuy xëccoo doon, te xamuñu li ñuy wax, bay xam lenn ci li ñuy dëggal.

Yoonu Musaa am na ñu mu taxa jóg

⁸ Xam nanu nag ne yoonu Musaa baax na, ndegam na mu ware lees ko jêfe. ⁹ Lii itam xam nanu ko: ñi jub taxuñu yoon wi jóg, xanaa ñi jubadi ak ñi dëggadi, ak ñemekati Yàlla yi, ak bàkkaarkat yi, ak ñi wormaalul lu sell, ak ñi wormaalul Yàlla, ak bóomkati baay, ak bóomkati ndey, ak reykati nit ñi, ¹⁰ ak fokati séy yi, ak géor-jigéen yi, ak jàppkati jaam yi, ak fen-kat yi, ak giñkati fen yi, ak ñiy jêfe leneen lu woroo ak njàngle mu baax, ¹¹ mi dëppoo ak xibaaru jàmm bi ñu ma dénki, xibaaru Yàlla Aji Tedd ju mággi ji.

Nanu sante Yàlla yërmandeem

¹² Damay sant sunu Boroom Almasi Yeesu mi ma dooleel, moom mi ma natt ba wóolu ma, tabb ma ci liggéey bi, ¹³ te ma nekkoon ab tooñkatam, di ab bundx-atalkat, di ab néeg. Waaye yërmande laa dajeel, ngir ñakka xam ga ma daan jêfe, te ñakka gëm tax. ¹⁴ Sunu yiwu Boroom moo ma baawaanal, booleel ma ci ngëm gi, ak cofeel, gi gëmkatub Almasi Yeesu jagoo. ¹⁵ Mboolem kàddu gii may wax, lu wóor la te jara gëm: Almasi Yeesu moo dikk ci áddina, ngir musal bàkkaarkat yi, te maa ci raw! ¹⁶ Waaye loolu moo tax man bàkkaarkat bi ci raw, ma dajeek yërmande, ngir, ci lépp lu nu Almasi Yeesu

di muñal, ma doon ci misaal, ñeel ñi ko nara gëm èllég, ba texe ba fàww.

¹⁷ Yaw Buur bi sax dàkk,

doo dee, te bët manu laa gis,

yaw Yàlla miy kenn, yaa tedd, yaa mággi, tey ak èllég ba fàww. Amiin!

¹⁸ Kon nag Timote doom, loolu mooy ndigal li ma la dénki, te mu dëppook kàdduy waxyu yi jotoona jib te jëm ci sa mbir. Gannaayool kàddu yooyu ngir di ci xaree xare bu baax bi, ¹⁹ te nga saxoo ngëm ak xel mu dal. Am na ñu tanqamlu seen ndéeyum xel ba suuxal seen ngëm. ²⁰ Ci ñooñu la Imene ak Alegсандар bokk; Seytaane laa leen jébbal, yare leen ko, ngir ñu bañatee saaga Yàlla.

2

Póol sàrtal na jataayub mággal Yàlla

¹ Kon nag li jiitu ci mboolem li may dénkaane mooy ngeen di dagaan, di ñaan, di tinu ak a sant, ñeel doom aadama yépp, ² ñeel buur yi, ak mboolem boroom baat yi, ngir nu mana nekke jàmm akug dal, tey wéye gépp njullite, ak wépp dundin wu tedd.

³ Loolu moo rafet te neex Yàlla sunu Musalkat, ⁴ bi bèggi ñépp mucc te ràññee liy dëgg. ⁵ Ndax kat jenn Yàlla donj moo am, benn Defarekat donj it moo am diggante Yàlla ak nit ñi, te mooy nit ki Almasi Yeesu, ⁶ mi maye bakkanam ngir jot ñépp, te jéf jooju lañu seedelee ca ba mu jotee, la Yàlla nammoon. ⁷ Ci boobu seede lañu ma tabbe ab yéenekat, ak ndawal kàddu gi, ak itam ab sériñ, ñeel xeet yi dul Yawut, ngir ma xamal leen yoonu ngëm ak dëgg. Fenuma, dëgg donj laay wax.

⁸ Kon li ma bèggi moo di géor ñi di ñaane fépp, tàllal loxo yu mucc sikk, te bañ cee boole meroo ak mbiicoo. ⁹ Naka noonu, na jigéen ñi di sol col gu yiw, gu teggine te yem. Buñ jiiital di defaroo ay létt yu épp, ak gänjari wurus, aki per, ak yérey tannéef, ¹⁰ waaye nañu gänjaroo jéf ju baax, ndax mooy li jekk ci jigéen ñuy seede ne ñoooy ragalkati Yàlla.

¹¹ Te it bu ñuy jàngle, na jigéen ñiy noppi, te woyof toyy. ¹² Mayuma jigéen mu jàngle mbax mu jiite géor, waaye na noppi. ¹³ Ndax kat Aadama lañu jékka bind, Awa topp ca. ¹⁴ Te it du Aadama lañu nax, waaye jigéen lañu nax ba mu xëtt ndigal. ¹⁵ Teewul muccu jigéen a ngi ci njurum doom, ndegam saxoo na ngëm, ak cofeel, ak jéfin wu sell te yem.

3

Lii lañu séentu ci njiitu mbooloo mi

¹ Wax ju wóor a ngii: kuy sàkku sasub jiite mbooloom gëmkiat ñi, liggéey bu rafet

lay xëccu. ² Njiit li nag fàww mu mucc sikk, di ku dencul lu wees jenn jabar, ku moom bakkanam, jiital am xelam, di ku nawlu, man gan, te mana jàngle. ³ Bumu di ab màndikat, mbaa bèggkatub xeex, waaye na lewet, bañu ay, te bumu di bèggkatub xaalís. ⁴ Kërüg boppam nag, na ko yor yorin wu rafet, te na mana yar ay doomam ba ñu nangul ko te sédd ko cër bu mat sèkk. ⁵ Ndax ku tèlee yor kërüg boppam, ana nu mu mana sàmme mbooloom gëmcati Yàlla yi? ⁶ Te it bumu dib tuubeen bu bees, lu ko moy ag réy-réylu man na koo gélémal, ba mu tàbbi ci mbugal ni Seytaane. ⁷ Te it ñi ci biti te gëmuñu, la ñu ko seedeel nay lu rafet, ba deram du yàqu, nde kon mu tàbbi ci fiiru Seytaane.

Lii lañu séentu ci taxawukatub mbooloo mi

⁸ Naka noonu ab taxawukatub mbooloo mi, na di ku tedd, bumu di boroom ñaari kàddu. Bumu di ku sàngara jiital, mbaa kuy sàkku am-am bu lewul. ⁹ Na ñoy ci mbóotum ngëm mii feeñ te ànd ceek xel mu dal. ¹⁰ Dees koy jékka seetlu nag, ba muy ku mucc sikk, ñu door koo dugal ci liggéeyu taxawukatub mbooloo mi. ¹¹ Naka noonu, na jigéen ñiy taxawu mbooloo mi* di ñu tedd, buñu diy soskat, nañu moom seen bakkan, te jara wóolu ci lépp.

¹² Ab taxawukatu mbooloo mi bumu denc lu wees jenn jabar te na yor ay doomam, ak kërám, yorin wu rafet. ¹³ Ñi ci wàccoo ak seen sasub taxawukat nag, seenub liggéey lañu jènde taxawaay bu rafet, te ñooy mana waxe fit, seen ngëm gi ñu gëm Almasi Yeesu.

Mbóotum yoonu ngëm wi màgg na

¹⁴ Lii laa lay bind, te di la yaakaara seetsi ci fan yu gàtt, ¹⁵ ngir su ma ye-exee itam, nga xam nooy doxale ci kër Yàlla, ci biir mbooloom Yàlla jiy dund. Mbooloom gëmkat mi mooy kenug dëgg gi, di céslaayam. ¹⁶ Deesul nàttable moos màggaayu mbóot mii feeñe ci sunu yoonu ngëm:

Kii moo feeñe ci yaramu suux,
Noowug Yàlla dëggal ko,
malaaka ya niir ko;
moom lañu waaree ci xeet yi,
gèmees na ko ci kaw suuf it,
te yéegees na ko fa leer ga.

4

Alluway ceptaane yàq na am xel

¹ Noowug Yàlla wax na ci lu leer ne ci mujug jamono, dina am ñu wacc yoonu ngëm wi, di topp ay xalaat yuy fábbee ak ay alluway ceptaane, ² yu leen ay jinigalkat, ay fenkat yu dërkiis ab xol, di naxe. ³ Ñooñu ñooy aaye ab séy, di digle ñàkka lekk yenn ñam yu Yàlla sàkk, ngir gëmkat ñi xam liy dëgg, man cee jariñu te di ko sante Yàlla. ⁴ Ndaxte li Yàlla sàkk lépp a baax, du lènn lees ciy aayal, ndegam kàddug cant lees ko jariñoo. ⁵ Lu mu mana doon, kàddug Yàlla akug ñaan moo koy sellal.

Lii la liggéeyu jawriñu Almasi laaj

⁶ Soo dee xamal loolu bokki gëmkat ñi, yaa di jawriñu Almasi Yeesu ju baax ju xontoo kàdduy yoonu ngëm wi, ak alluwa ju rafet ji nga topp naka jekk. ⁷ Waaye nettali yu yittewoo lu dul Yàlla, ak léebi jeeg ju màggat ji, bañ ko, te nga tàggatu ci ag njullite. ⁸ Ndax kat tàggat aw yaram, as njariñ a ngi ci, waaye ag njullite, ci lépp lay jariñe, te moo moom digeb àddinay tey ak èlléy. ⁹ Kàddu gii may wax, lu wóor la te jara gëm ba mu mat sèkk. ¹⁰ Loolu kat moo nu tax di sonn aka góor-góorlu, ndax Yàlla jiy dund lanu yaakaar, moom miy musal ñépp, rawatina gëmkat ñi.

¹¹ Digleel loolu, te di ko jàngle. ¹² Bu la kenn xeebe sa at yu néew, waaye nanga doon royukaayu gëmkat ñi ci wax ak jéfin, ak cofeel, ak ngëm, ak dundin wu set. ¹³ Ba keroog may dikk, saxool di jàng-biral Mbind mi, di ñaaxe aka jàngle. ¹⁴ Bul sàggane may gi ci yaw, te di lu ñu la baaxee ag kàddug waxyu wu ànd ak tegeb loxo, ba la mag ñi defaloon. ¹⁵ Loolu ngay def sam xel, mbir yooyu ngay pastéefoo ba sag yokkte bir ñépp. ¹⁶ Sàmmal sa bopp nag, sàmml sa alluwa, te saxoo ko; soo ko defee, dinga mucc, musal ñi lay déglu.

5

Ay ndigal ñeel na jëtun ñi

¹ Bul gëdd mag, waaye ñaax ko ni bu doon sa baay. Ndaw it, def ko ni sa rakk. ² Jigéen ju mag, def ko ni sa yaay; jigéen ju ndaw, nga def ko ni sab jigéen, te seen diggante set wecc.

³ Teralal jëtun ñiy jëtun dëgg. ⁴ Waaye su dee ab jëtun bu ami doom mbaa ay sèt, ñooñoo wara jékka jéema jéfe ag ragal Yàlla ci seen biir kër, ba delloo njukkal seen waajur, ndax loolu la Yàlla rafetlu.

⁵ Waaye kiy ab jëtun dëgg te di ku wéet, mooy ki yaakaar Yàlla, te saxoo ay dagaan aki ñaan, guddi ak bèccëg. ⁶ Ku ci nekkewul lu moy bannexu bakkanam nag, ndee luy dox la. ⁷ Loolu ngay

* 3:11 3.11 jigéen ñiy taxawu mbooloo mi: manees na ko tekki nii it: seeni soxna.

dénkaane, ndax ñépp mucck sikk. ⁸ Ku fàggulul ay bokkam nag, rawatina waa kèram, yoonu ngëm wi la gântal, te moo yées ku gëmül.

⁹ Limeefu jëtun ñi ndimbal ñeel, deesu ci bind ku am lu yées juróom benn fukki at, te na di ku masul am lu wees jenn jëkkër donj, ¹⁰ te di ku ñu seedeel jëf ju rafet; lu mel ni yar ay gone, ak man gan, ak teral gëmkat ñu sell ñi,* ak dimbali ñi tollu diggante, ak di jàppoo jépp jëf ju baax.

¹¹ Jëtun ñiy ndaw nag, génne leen ci, ndax bu leen bëgg-bëggu bakkan sorelee ak Almasi, dinañu namma séyaat, ¹² te su boobaa mbugal war ci ñoom, ndax worma ja ñu fecci. ¹³ Te itam ca lañuy tàmmè am ug jot, di taxawaalu kër ak kër. Te duñu yem ci am ag jot rekk, waaye dañuy làmmiñu, di dugg lu seen yoon nekkul, tey wax lu leen warul. ¹⁴ Moo tax ma bëgg, jëtun ñiy ndaw séyaat, ami doom, yor seen kër, ba noon bi du am lu mu yaqe sunub der. ¹⁵ Ndax kat am na ci xaat yenn jëtun ñu lajj, ba topp Seytaane.

¹⁶ Gëmkat bu jigéen bu ci am mbokkum jëtun nag, na ko dimbali ba yenni mbooloo mi. Su ko defee mbooloo mi mana dimbali ñiy jëtun dëgg.

Ay ndigal ñeel na mag ñi

¹⁷ Mag ñiy jiite mbooloo mi bu baax nag, nañu leen yellale ag njukkal ñaari yoon, rawatina ñi boole coony waare ak njàngle. ¹⁸ Ndax kat Mbind mi nee: «Bul takkal ngise nag wuy boj am pepp†,» nee it: «Ku ñaq, jariñu‡.» ¹⁹ Bul déglu tuuma ju ñu waxal magum mbooloo mi, lu moy ci kaw kàdduy ñaari seede mbaa ñett. ²⁰ Waaye ñi ciy bàkkaar, tiñnal leen, ndax ñi ci des ragala bàkkaar.

²¹ Maa ngi lay àrtu nag fi kanam Yàlla, ak Almasi Yeesu, ak malaaka yi ñu tabb, ngir nga sàmm loolu te baña jeng, mbaa nga jëfe lenn loo defe xejj ak seen. ²² Bul di gaawa teg loxo kenn, ngir fal ko njiit. Bul séddu ci bàkkaari jaambur, te yaw ci sa bopp, sàmmool dundin wu set.

²³ Te itam bul di naanati ndox mu ñuul donj, waaye deel jëfandikoo tuuti biin, ndax mu baax ci sa biir, ak yeneen xeeti wéradi yu la farala dal.

²⁴ Ñenn a ngi ñu seeni bàkkaar fés, te àtteesagu leen, waaye ñenn a ngi ñu seeni bàkkaar làqu ba tax yoon dabagu leen. ²⁵ Naka noonu, jëf ju baax day fés, te lu ci fésul it, du wéye làqu.

6

Ay ndigal ñeel na jaam yi

¹ Mboolem ñi ci buumu njaam, nañu jàpp ne seeni sang yelloo nañu gépp wegeel, ngir kàddu gu teddadi baña tege ci turu Yàlla, ak sunu àlluwa. ² Jaam yi seeni sang di bokki gëmkat, buñu yab seeni sang, ndax li ñuy bokki gëmkat, waaye na tax ñu gënati leena jaamu, ndax seen sang yooyu di jariñoo seenu ñaq, ay gëmkat lañu, ay soppe lañu.

Ragal Yàlla mooy alal

Loolu nga wara jàngle, di ko dénkane. ³ Waaye ku ciy jàngle leneen, te toppul kàddu yu wér yi tukkee ci sunu Sang Yeesu Almasi, toppul àlluwa ji dëppoo akug njullite, ⁴ kooku, ab xoggilukat la te xamul dara. Woppi werante ak xuloo ci baati kese, moo ko dal, te loolu mooy jur ñeetaane, ak ñaayoo, aki saaga, ak ñaaw njort, ⁵ ak jote yu dul jeex yu boole ay nit ñu seenum xel mu yaqu xañ àlluway dëgg. Nit ñooñoo mbubboo ag njullite, te def ko wutukaayu alal.

⁶ Teewul njullite gu ànd ak doylu, di alal ju réy. ⁷ Ndax kat indaalewunu dara ci àddina, te manunoo yóbbaaale dara. ⁸ Kon su nu amee lu nu lekk, ak lu nu sol, nanu ko doylu. ⁹ Waaye ñi sàkkoo barele, ñooy tàbbi ci nattub bakkan, aki fiir, ak lu bare ciy xemmemtéef yu tekkiwul dara, xemmemtéef yuy lore, tey suuxal seeni boroom ci yaqule ak sànkute. ¹⁰ Ndax sopp xaalis kat mooy reenu mboolem xeeti loraange. Am na ñuy ñaf-ñafi, di ko wut, far lajj yoonu ngëm, ba teg seen bopp tiis yu bare.

Xareb ngëm jib na

¹¹ Yaw miy nitu Yàlla nag, dawal loolu, te topp njub ak njullite ak ngëm ak cofeel ak muñ akug teey. ¹² Jonanteel jonante bu baax bi, ngir yoonu ngëm wi, te nga ñoy bu baax ci texeg fàww gi ñu la woo, ba tax nga dëggal sa ngëm nu rafet noonu nga ko dëggale woon fa kanam seede yu bare.

¹³ Dama lay ñaax fi kanam Yàlla mi may bakkan lépp luy dund, ak fi kanam Almasi Yeesu, boroom seede su rafet sa fa kanam Poñsé Pilaat, ¹⁴ sàmmal santaane bi, te bañ koo gakkal, bañ koo sikkal, ba kera sunu Sang Yeesu Almasi di feeñ,

¹⁵ te ki koy feeñal bu àppam jotee, di ku Tedd ki wéetoo nguuram,

Buuru buur yi, Sangu sang yi.

¹⁶ Moom donj moo dul dee, moo màkkaanoo leer gu kenn jotewul, te mooy ki nit masula gis te tële koo gis. Teddnga ak kàttan ñeel na ko ba fàww. Amiin.

* 5:10 5.10 Mbaa: raxas tànkì gëmkat ñu sell ñi, † 5:18 5.18 Seetal ci Baamtug Yoon wi 25.4. ‡ 5:18 5.18 Seetal ci Luug 10.7.

¹⁷ Ñi barele alalu àddinay tey nag, dénk leen ñu baña réy te baña yaakaar alal ju wóoradi, te ñu yaakaar Yàlla mi nuy xéewale lépp, ngir nu di ko bége. ¹⁸ Ñi barele na ñuy def lu baax, nañu barele jéf ju baax, di joxee xol bu tàlli, yéwén te nangoo dimbalee. ¹⁹ Noonu lañuy dajalee alal, muy céslaay lu dègër ngir èllég, ndax ñu jot ci dund giy dègg.

²⁰ Ngalla waay Timote, sàmmal li ñu la dénk! Moytul kebetuy àddinay kese, ak werantey diinatkat yu tuddoo boroom xam-xam. ²¹ Boobu xam-xam la ñenn ñi topp ba lajj yoonu ngëm.

Aw yiw ñeel na leen.

Ñaareelu bataaxal bi Yàlla may Póol, mu bind ko Timote

¹ Ci man Póol, ndawal Yeesu Almasi ci coobarey Yàlla, ngir xamle digeb dund gi ci Almasi Yeesu, ci man la bataaxal bii bawoo, ² ñeel Timote, sama doom, sama soppe. Aw yiw ak yërmande ak jàmm ñeel na la, bawoo ci Yàlla Baay bi, ak sunu Sang Almasi Yeesu.

Feddlil sa ngëm

³ Maa ngi lay fàttliki ci samay ñaan guddeek bëccég, fu ma tollu te di ci sant Yàlla, mi may jaamoo xel mu dal, ni ko samay maam daan defe. ⁴ Yàkkamti naa lool gisati la, ba sama xol sedd guyy, nde maa ngi fàttliki sa rongooñi keroog ya. ⁵ Maa ngi fàttliki ngëm gu dëggu gi ci yaw, te jëkkoonna nekk ci sa maam ju jigéen Lowis, ak sa yaay Ènis, te mu wóor ma ne moom nga saxoo itam. ⁶ Moo tax li ma lay fàttli moo di nga xamb taalub mayu Yàlla, ga nga jote ca ba ma la tegee samay loxo. ⁷ Ndax kat Noo gi nu Yàlla jox taxu noo ragal, xanaa kay da noo may doole, ak cofeel, ak jëfin wu laloo am xel.

⁸ Bul kersawoo di seedeel sunu Sang, mbaa nga di ma kersawoo, man mi ñu téj ngir moom, waaye jëlal sa wàll ci coonob xibaaru jàmm bi, ni la ko manoorey Yàlla manloo.

⁹ Moo nu musal,
woo nu woote bu sell te sunuy jëf taxul,
waaye coobarey boppam a tax,
ak yiwam wi ñu nu may
ci Almasi Yeesu, balaa ay jamonoy
jamonono di sosu.

¹⁰ Woowu yiw, la ko fésal moo di dikkug
sunu Musalkat Almasi Yeesu,
mi neenal ndee, te niital nu yoonu
texe,
ak ndee gu fomm ba fàww,
ni ko xibaaru jàmm bi xamlee.

¹¹ Te ci xibaaru jàmm boobu lañu ma tabb,
ba ma di yéenekatu xibaar bi, di ndawam,
di jànglekatam. ¹² Looloo tax may daj yii
coono. Waaye rusuma ci, ndax xam naa
ki ma gëm, te wóor na ma ne moo mana
sàmm li ma ko dénk ba keroog bés ba.

¹³ Royal ci kàddu yu wér yi nga dëgge
ci man, te nga ànd ceek ngëm, ak cofeel gi
Almasi Yeesu di maye, ¹⁴ te lu baax li ñu la
dénk, nanga ko sàmm ci ndimbalal Noo gu
Sell gi ci nun ñi ko gëm.

¹⁵ Xam nga ne waa diiwaanu Asi gépp a
ma won gannaaw, te Fusel ak Ermosen ci
lañu bokk. ¹⁶ Yal na Yàlla baaxe nag waa

kër Onesifor, yërmandeem, ndax dëfal
na ma lu bare, te kersawoowul li ñu ma
téj kaso, ¹⁷ waaye ba mu dikkee Room,
da maa seeta seet, ba gis ma. ¹⁸ Yal na
ko Boroom bi may mu daj bésub keroog
booba, yërmandey Boroom bi. Taxawu na
ma lool ca Efes, te xam nga ko xéll.

2

Beyal saw sas

¹ Kon nag yaw doom, doolewool yiw,
wi Almasi Yeesu di maye. ² Li nga
dëgge ci man te seede yu bare teewe ko,
nanga ko jottli nit ñu wóor ñu ko mana
xamal ñeneen. ³ Jëlal sa wàll ci coono
bi takk-derub Almasi Yeesu bu wóor di
jànkoonteel. ⁴ Ab takk-der bu bégga neex
ka ko solal kat, du xintewoo mbiri nit ña
soluwul. ⁵ Kuy jonante it, deesu ko kaala
te jonantewul ci yoon. ⁶ Te it beykat bi yor
coonob liggéey bi, moo wara jékka séddu
ca meñneef ma. ⁷ Defal sam xel ci li ma la
wax. Boroom bi moo lay leeralal lépp.

Yeesu mooy boroom kóllère

⁸ Bàyyil xel ci Yeesu Almasi mi ñu dekkal
te mu soqikoo ci Daawuda, ni ko sama
xibaaru jàmm indee. ⁹ Xibaaru jàmm
boobu moo tax may daj coono yu metti ni
defkatu mbon, ba ci jéng yii ñu ma jéng.
Waaye kàddug Yàlla moom, deesu ko jéng.
¹⁰ Looloo ma tax di muñ lépp, ngir ñi ñu
taamu, ndax ñoom it ñu dajeeq mucc gi ci
Almasi Yeesu, boole ci teraanga ju sax.

¹¹ Kàddu gu wóor a ngii:
Su nu deeyandoo ak Almasi,
nooy dundandoo ak moom itam;
¹² su nu muñee,
nooy bokk nguuru.
¹³ Su nu ko gántalee,
moom it dinanu gántal;
su nu ko ñàkke kóllère,
mu saxoo kóllèreem,
ndax manula gántal boppam.

Surga day sàkku ngërëmu njaatigeem

¹⁴ Loolu, dee ko fàttlee, te ngay
dénkaane fi kanam Yàlla, ñu bañ di xuloo
ci ay baat, ndax amul njariñ, ñi koy dëgg
donj lay sànk. ¹⁵ Defal sa kem-kàttan
ba boo teewee fa kanam Yàlla, di ku
mu gërëm, ab liggéeykat bu mucc gâce,
di xamle kàddug dëgg gi ni mu ware.
¹⁶ Waaye ay kebetuy àddinay kese, moytu
ko, ndax ngëmadi gu ko yées rekk lay
yóbbée, ¹⁷ te kàdduy ñooñu day law ni
ngal. Ci ñooñu la Imene ak Filet bokk.
¹⁸ Noo lajj yoonu dëgg, ba naan ñiy dekki,
dekki nañu ba noppi, te seen wax jooju, am
na ñenn ñu muy yaq seen ngëm. ¹⁹ Teewul
céslaay lu dëgër, li Yàlla tabax, mu ngi ne
kekk, te màndarga ma ca nekk, kàddu yii

la: «Boroom bi xam na ay ñoñam*,» ak: «Kuy tudd turu Sang bi, na daw njubadi.»

²⁰ Kër gu mag nag, du ndabi wurus ak xaalis rekk a fa am, waaye yoy bant a nga fa, ak yoy ban; yii di ndabi teraanga, yee di ndabi njooagaan. ²¹ Ku setal sa bopp nag ba mucc ci yu bon yooyii, yaay doon ndabal teraanga lu sell te amal sangam njariñ ngir jépp jéf ju baax.

²² Xemmemtéefi ndaw nag, daw ko, te nga topp njub, ak ngëm ak cofeel, ak jàmm, ànd ceek ñiy tudde Boroom bi xol bu set wecc. ²³ Waaye werante yu xeluwul te du xam-xam, moyu ko, te xam ne ay ñaayoo lay jur. ²⁴ Te jaamub Boroom bi warul di ñaayoo, waaye day lewet ci ñépp, mana jàngle tey muñ. ²⁵ Jaamub Boroom bi ndànk la war di jubbanti diijatkat yi, nde jombul Yàlla may leen ñu tuub, ba xam liy dëgg. ²⁶ Su ko defee seenum xel dellusi, ba ñu rëcc fiirug Seytaane, mi leen jàpp, di leen defloo coobareem.

3

Mujug jamono dina tar

¹ Lii, nanga ko xam: mujug jamono, jant yu tar dina dikk. ² Nit ñi, seen bopp donj lañuy bëgg, ay bëggkati xaalis lañuy doon, ay damukat, nit ñu réy, di ay saagakati Yàlla, ñu dëggadil waajur, ñu santadi te selladi. ³ Duñu am ab xol, duñu meddi, ay soskat lañuy doon, ñu ñàkk sago, ñu néeg te bañ lu baax; ⁴ ay workat lañuy doon, ñu teeyadi, ñu danjiiral te di ñu bëgg seen banneexu bopp, ba mu gënäl leen Yàlla. ⁵ Ag njullite lañuy mbubboo tey xalab leer ga leen ko wara manloo. Ñooñu, dëddu leen.

⁶ Nenn ci ñooñu ñooy yoxoosuy dugg ci biir kër yi, di fàbbi jigéen ñu ñàkk bopp, ñi seeni bàkkaar man, te seen xemmemtéef yu bare jiital leen. ⁷ Gëstu ay àlluwa la jigéen ñooñuy wéye, waaye duñu mana xam liy dëgg muk. ⁸ Noonee Sànnes ak Sàmbres* doon jànkoonteek Musaa, ni la góor ñooñu di jànkoontee ak dëgg gi; ñooy nit ñu seenum xel yaqu, te ñu doyadi ci wàllu ngëm. ⁹ Waaye duñu soreeti, ndax seenug ndof dina bir ñépp, na ñaar ñooña mujje woon.

Póol dénkooti na Timote

¹⁰ Yaw nag seetlu nga bu baax sama àlluwa, ak sama dundin, ak sama mébét, ak sama ngëm, ak samag muñ, ak sama cofeel, ak samag ñeme coono, ¹¹ ak itam bundxatal yaak njàqare ya ma dikke woon fa dëkk yooyu di Àncos ak Ikoñum ak

Listar†. Céy na ñu ma bundxatale, waaye Sang bee ma musal ci lépp! ¹² Te kat képp ku namma nekke ag njullite ci yoonu Almasi Yeesu, dees na la bundxatal. ¹³ Waaye nit ñu bon ñi, ak maa-man yi dañuy gën di bon rekk, di naxe tey nax seen bopp.

¹⁴ Yaw nag saxal ci li nga jàng, muy lu la wóor, nde xam nga ña nga tanqe. ¹⁵ Bi ngay lu tuut nga dale xam Mbind mu sell mi, te moo la mana may xel mu la jème ci mucc gi gëm Almasi Yeesu di maye. ¹⁶ Mboolem Mbind mu sell mi la Yàlla wal ag Noowam, ba mu am njariñal jàngal nit ñi, femmu leen, jubbanti leen, yar leen ciq njub. ¹⁷ Su ko defee nitu Yàlla ki mat sèkk te matley jumtukaay ngir jépp jéf ju baax.

4

¹ Kon nag dama lay dénk fi kanam Yàlla ak Almasi Yeesu, miy àtteji ñiy dund ak ñi dee, di la dénk ci darajay bésam ba muy feeñ, ak ci darajay nguuram, ² waareel kàddug Yàlla te taxaw ci temm, su neexee ak su naqaree; di yedde, di femmoo, di ñaaxe, tey saxoo muñ ci sam njàngle. ³ Ndax kat ay jamonoo ngi ñëw, nit ñi dootuñu xajoo àlluwa ju wër, waaye seeni bëgg-bëggi bopp lañuy topp, bay fortaatoo fu nekk, ay sériñ yu leen di wax lu leen neex. ⁴ Dëgg lañuy tanqamlu, lajj, wuti léebi neen. ⁵ Waaye yaw, àndal ak sa sago, ak diggante boo mana tollu, te ñeme coono. Jàppal ci liggéeyub jottli xibaaru jàmm bi, beyal sa waar ba mu mat sèkk.

⁶ Man nag, daanaka saraxu tuuru bu sottiku laa ba noppi; sama waxtuw dem dëgmäl na. ⁷ Xare bu baax bi, xare naa ko, rawante bi, sotal naa ko, ngëm gi ma am, sàmm naa ko. ⁸ Léegi nag kaalag njekk a may xaar, te Boroom bi, Attekat bu jub bi moo ma koy yool, keroog ca bés ba, te du man rekk la koy yool, waaye itam képp ku koy séuntu te yàkkamti bés ba muy feeñ.

Fii la Póol tėje ay dénkaaneem

⁹ Defal sa kem-kattan, ba fekksi ma nu mu gëna gaawe. ¹⁰ Ndax kat Demas, àddinay tey la sopp ba tax mu wacc ma, dem Tesalonig, te Keresënsé dem na dii-waanu Galasi, Tit dem dii-waanu Dalmasi. ¹¹ Luug rekk a des fi man. Indaaleel Märk, ndax amal na ma njariñ ci liggéey bi. ¹² Tisig nag laa yebal Efes. ¹³ Mbubb ma ma waccoon ak Karpus ca Torowas, booy ñëw, indaaleel ma ko, ak itam téere yi, rawatina téerey der yi.

¹⁴ Alegšandar tégg bi def na ma lu bon lu réy, waaye Boroom bee koy fey jéfam.

* 2:19 2.19 Seetal ci *Mündiñ mi* 16.5.

* 3:8 3.8 Sànnes ak Sàmbres ay tur la yu Yawut yi baaxoo tudde luskxati

Misra, ya doon fexee joñante ak Yonent Yàlla Musaa. † 3:11 3.11 Ikoñum ak Listar ay dëkk ci dii-waanu Galasi lañu woon, fa Póol tàmbalee yenam, di waare xibaaru Almasi.

¹⁵ Yaw itam, moytu ko bu baax, ndax moo gântal lool sunu àlluwa.

¹⁶ Keroog ba ma jèkke di layool sama bopp, kenn taxawuwma, ñépp a ma daw, yàlla bu leen seen jéf topp. ¹⁷ Waaye Boroom bee ma dimbali, dooleel ma, ngir kàddu gi siiwe ci man, ba xeeti jaambur yépp dégg ko, te Boroom bee ma musal ci pàddum gaynde. ¹⁸ Boroom bee may wallu ci jépp jéf ju bon, te moo may aar ba tàbbal ma fa nguuram ga fa asamaan. Daraja ñeel na ko, tey ak èllég ba fàww. Amiin.

Póol tàggu na ñoom Timote

¹⁹ Nuyul ma Piriska* ak Akilas ak waa kër Onesifor. ²⁰ Eràst moom, Korent la des, waaye Torofim, Mile laa ko bàyyi, ndax daa woppoon. ²¹ Gaawala ñëw, balaa seddub lolli di jam. Ab nuyoo ñeel na la, tukkee ci Èbulus ak Pudeñsë ak Linus ak Këlójaa ak bokk yépp. ²² Yal na Boroom bi wéttali sam xel. Aw yiw ñeel na leen.

* **4:19** 4.19 Piriska mooy Pirsil ba tey. Seetal ci *Jéf ya* 8.2.

Bataaxal bi Yàlla may Póol, mu bind ko Tit

¹ Ci Man Póol la bataaxal bii bawoo, man jaamub Yàlla, biy ndawal Yeesu Almasi, mu yebal ma, ngir ma dugal ñi Yàlla tànn ci yoonu ngëm ak xam-xamu dëgg, giy taxa jullite. ² Ngëm googu, ak xam-xam boobu, ñu ngi sukkandiku ci yaakaar, ji nu am ci texe ba fàww, te googu texe, Yàlla mi dul fen, moo ko dige ba àddina sosoogul. ³ Waaye tey bi mu jotee, Yàlla sunu Musalkat moo feeñal kàddoom ci biir waare bi mu ma dénk man, te moo ma digal ma xamle ko. ⁴ Bataaxal bi ñeel na Tit, sama doomu yoon ci kaw ngëm gi nu bokk. Aw yiw ak jàmm ñeel na la, bawoo fa Yàlla Baay bi, ak Almasi Yeesu sunu Musalkat.

Póol sas na Tit ca réewum Keret

⁵ Li tax ma bàyyi la gannaaw ca réewum Keret mooy nga mottli la desoon ca liggéey ba, te nga tabb ay mag ñu jiite mbooloo mi ci dëkk bu nekk, na ma la ko sante woon, man ci sama bopp. ⁶ Ndegam nit a nga ca seen biir ñoom, di ku mucc sikk, te dencul lu wees jenn jabar, te ay doomam di ay gëmkat ñu ñu tuddul ci afal seen bakkan akug dëggadi, nanga tabb ku mel noonu. ⁷ Ndax kat, njiit li war na di ku mucc sikk, gannaaw ab saytukatu kër Yàlla la. Bumu di ku bew, mbaa ku gaawa mer, mbaa ab màndikat, mbaa bèggkatub xeex, mbaa wutkatub am-am bu lewul. ⁸ Waaye war na di ku man gan, ku xejoo lu baax, jiital am xelam, jub, sell te moom boppam. ⁹ Na jàpp bu dëgër ci kàddu gu wóor gi, ni ñu ko ko jàngale, ngir mu man di ñaaxe jooju àlluwa ju wér, tey tiññal weddikati yi.

Gëmkati Keret jar nañoo femmu

¹⁰ Ndax kat bare na ñu të, rawatina ci tuubéen ñi bokk ci askanu yawut, ay waxkati neen lañu, te ñooy yaq xeli nit ñi. ¹¹ Li war moo di tëj seen gëmniñ, ndax kəri ñemm lañuy tase àlluwa ju yi amul sañ-sañam, ngir di ko sàkkoo am-am bu lewul. ¹² Ma wax ko waru jenn waay, ab waa Keret buy seen yonentu bopp. Mu ne: «Waa Keret, ay fen-kati neen, soxor niy rabi àll, fuqle, yaafus.» ¹³ Loolu mu leen seedeel mooy dëgg, te moo tax nga war leena femmoo kàddu yu dëgër, ngir seen ngëm tegu ci àlluwa ji wér, ¹⁴ te baña topp léebi neen yu Yawut yi, ak sanaaney nit ñi dëddu liy dëgg. ¹⁵ Nit ñi set nag, seen lépp ay set, waaye ñi boole sobewu ak gëmadi, seen dara setul, seen xalaat ak

seenum xel, ñooy bokk sobewu. ¹⁶ Xam Yàlla lañuy woote, te seeni jéf weddi Yàlla; nit ñu jara jéppi, ñu dëggadi lañu, te tëlee def lenn lu baax.

2

Àlluwa ju wér lii lay xamle

¹ Yaw nag waareel li dëppook àlluwa ji wér, ² te mooy na mag ñi moom seen bakkan, di ñu tedd, jiital seenum xel, te pastéefu ci wàllu ngëm, ak cofeel, akug muñ.

³ Naka noonu, jigéen ñu mag ñi itam, nañu jéfe ni mu jekke ci ay nit ñu sell; buñu yaq der, bu leen sàngara jiital, te nañuy jàngle lu baax, ⁴ ngir tàggat jeeg ju ndaw ji ci sopp seen jëkkër, sopp seeni doom, ⁵ di ñu jiital seenum xel, set jikko, di liggéey ca seeni kër, baax, nangul seen jëkkër, ba kenn du baatal kàddug Yàlla.

⁶ Naka noonu, xale yu goor yi itam, ñaaxleen ci jiital seenum xel. ⁷ Te nanga doon, yaw ci sa bopp ab royukaay, ci lépp ndax sa jéf ju baax, te nga boole ko ak àlluwa ju dëgg te tedd, ⁸ ak kàddu gu wér gu kenn dul mana weddi, ngir rusloo ab noon bu amul lenn lu bon lu mu nu baatale.

⁹ Jaam yi, nañu nangul seeni sang ci lépp, di sàkku seen bannexu sang, te ñu bañ di tontoonte ak moom, ¹⁰ mbaa di randal. Waaye nañu firndeel ne ñoo yelloo kóolote gu mat sèkk, su ko defee dinañu sagal ci lépp, àlluwa ji ñu jàngle, te muy ju Yàlla, sunu Musalkat.

¹¹ Ndax yiwu Yàlla kat feeñ na, te looloo indil ñépp ag mucc. ¹² Yiw woowu moo nu digal nu dëddu ñeme Yàlla, ak xem-memteefi àddina, te jiital sunum xel, di jéfe njub, te nekke ag njullite ci àddinay tey jii. ¹³ Loolu lees nu digal, li feek nu ngi séentu yaakaaru mbég ma, keroog bésu peeñum sunu màggaayu Yàlla, miy Yeesu Almasi, Musalkat bi. ¹⁴ Moo maye bakkanam ngir nun, moo nu jot, ba nu mucc ci gépp njubadi, moo nu def askan wu mu setalal boppam, séddoo nu, nuy askan wu farlu ci jéf ju baax.

¹⁵ Googu kàddu ngay waaree, di dénkoo ak di femmoo, te boole ci fulla ju mat sèkk. Bu la kenn yah.

3

Ku gëm jéfe lu baax

¹ Fàttli leen ne leen ñu nangul kilifay nguur gi, ak boroom sañ-sañ yi, di dëgg ndigal, tey fàggu ngir jépp jéf ju baax. ² Buñu yaq der te buñu bègggu ay, waaye nañu di bèggkati jàmm, te nañuy jéfe lewetaayu gu mat sèkk, seen digg ak ñépp.

³ Ndax nun itam kat, ñu ñàkk xel lanu woon te déggadi, ñu réer, tènku ci lu doon ay xemmentéef, ak bânneexi bakkan, tey wéye def lu bon, ak ñeetaane, ñu jara bañ te bañante ci sunu biir. ⁴ Waaye ba Yàlla sunu Musalkat feeñalee mbaaxam ak mbéggeelam ci doom aadama, ⁵ ca la nu musal, te du jenn jëfu njekk ju nu def, ba tax mu musal nu, waaye ci yërmandeem la nu musale, sang nu cangaay lu nu taxa judduwaat, boole ci yeesele nu Noo gu Sell, ⁶ gi mu nu awale ci Yeesu Almasi sunu Musalkat, ba baawaanal ko ci sunu kaw. ⁷ Noonu la nu Yàlla joxe àtteb ñu jub ci kaw aw yiwam, ba nu mujj séddu ci texe gu sax dàkk, ni nu ko séentoo.

⁸ Googu kàddu wóor na te damaa bëgg nga sàmmoo déggal loolu, ngir gëmkati Yàlla yi saxoo def jëf ju baax. Loolu moo baax te am njariñ ci nit ñi. ⁹ Waaye ay werante, ak limi maam, aki xuloo, aki jaayante xam-xam ci yoonu Musaa, moytu ko, ndax loolu amul njariñ, amul solo. ¹⁰ Ab féewalekat nag, yedd ko benn yoon ba ñaareel bi yoon, doora daggook moom, ¹¹ te xam ne ku ni mel daa làggi ci bàkkaaram, te moo daan boppam.

Póol tàggu na Tit

¹² Gannaaw bu ma la yónnee Artemas mbaa Tisig, defal loo man ba fekksi ma Nikopolis, ndax fa laa fas yéenee lollikooji.

¹³ Naka Senas xamkatub yoon bi, ak Apolos, fexe leena waajalal, ba duñu ñàkk lenn lu ñu soxla ci seen yoon. ¹⁴ Na sunuy ñoñ tàggatu ci jëf ju baax ju ñu saxoo ba faj soxla yu taxaw, ngir ñu baña ñàkk njariñ.

¹⁵ Mboolem ñi ma nekkal ñu ngi lay nuyu. Nuyul nu sunuy soppe ci yoonu ngém wi nu bokk. Aw yiw ñeel na leen, yeen ñépp.

Bataaxal bi Yàlla may Póol, mu bind ko Filemon

¹ Ci man Póol, mi ñu tëj kaso ngir Almasi Yeesu, ci man ak itam ci Timote miy mbokkum gëmkat la bataaxal bii bawoo, ñeel Filemon, sunu soppe bi bokk ak nun liggéey bi. ² Mu ñeel itam sunub jigéen Afya, ak Arsipp sunu mbokkum xarekat, ak mbooloom gëmkat miy dajee sa kër. ³ Yeen la aw yiw ak jàmm ñeel, bawoo fa Yàlla sunu Baay, ak Sang Yeesu Almasi.

Póol a ngi sant ci biir ñaan

⁴ Sant sama Yàlla laa dëkke saa yu ma la fàttlikoo ci samay ñaan, ⁵ ndax dégg naa sa gëm Sang Yeesu, ak sa cofeel ci mboolem ñu sell ñi. ⁶ Damay ñaan nag sa ngëm, gi nu bokk amal la njariñal ràññee mboolem ngéneel, yi nu am ci Almasi. ⁷ Mbokk mi, mbégte mu réy, ak xel mu dal laa am ci sa cofeel, ndax ni nga serale xolu aji sell ñi.

Póol tinul na Onesim

⁸ Lii nag sañoon naa la koo digal ci turu Almasi, ndax mooy li la war, ⁹ waaye tinu la ci ngir cofeel, mooy li ma taamu, man Póol mu màggat mii, boole ci léegi ténku biir kaso ndax Almasi Yeesu. ¹⁰ Damay tinul Onesim, sama doomu tuubeen ji ma tuubloo ba mu mel ni maa ko jur ci diir bi ma nekke fii ci kaso bi. ¹¹ Amalu la woon njariñ* démb, waaye tey yaak man la amal njariñ.

¹² Maa ngi koy yebal ngir mu dellu fi yaw, te di kenn ci man. ¹³ Dama koo bëggoona téye fi sama wet, ngir mu taxawal la, di ma dimbali, li feek maa ngi ci kaso bi ngir xibaaru jàmm bi. ¹⁴ Waaye buggumaa def dara loo àndul, ngir mu baña doon ndimbalu ñàkk pexe, xanaa loo defe xol bu tàlli. ¹⁵ Jombul itam dees koo tàggale ak yaw ab diir, ngir nga jootaat ci moom ba fàww, ¹⁶ ba dootu doon sab jaam, waaye day wees ab jaam, di mbokk, di soppe, ma sopp ko lool, te nga war ma koo gëna sopp, ngir jëmmu boppam, ak Sang bi ngeen bokk.

¹⁷ Ndegam nag sa waay nga ma def, dalal ko ni su doon man. ¹⁸ Su la tooñee, mbaa mu ameel la lenn, topp ma ko. ¹⁹ Man Póol maay bind fii ci sama loxol bopp: maay fey loolu, duma ci tuddaale bor bi nga ma ameel, te muy sa njotug bakkanu bopp! ²⁰ Kon nag mbokk mi, may ma googu njekk ngir Sang bi, te nga seral sama xol ndax Almasi. ²¹ Wóor na ma ci diggante bii may bind bataaxal bi, ne dinga ma déggal, te

xam naa ne dinga def sax lu wees li may wax.

²² Te itam nanga ma waajalaale ab dal, ndax yaakaar naa ne dees na ma délloosi fi yeen, ndax seen ñaan yu nangu.

²³ Epafras, mbokk mi ñu ma tëjandool ndax Almasi Yeesu, mu ngi lay nuy, ²⁴ mook Màrk ak Aristàrk ak Demas ak Luug, bokk yi may liggéeyandool.

²⁵ Yal na yiwu Sang Yeesu Almasi ànd ak seenum xel.

* 1:11 11 njariñ: ci làkku gereg turu Onesim mooy tekki «Ku am njariñ.»

Bataaxal bi jëm ca Yawut ya

Yàlla moo feeñ ci Doom ji

¹ Bu yàgg la Yàlla waxoon ay yooni yoon ak maam ya, ci waxin yu bare, yonent yi jottli. ² Ci fan yu mujj yii, Doom ji la waxe ak nun, ki mu jagleel lépp, ki mu sàkke àddina wërngal képp. ³ Kooku mooy lèrxat leeru Yàlla, te mooy ki jëmmal nekkug Yàlla. Moo téyee lépp kàddoom gu manoorewu. Gannaaw ba mu setalee bàkkaar yi nag, fa ndijooru Aji Màgg ji la toog, fa kawte ya, ⁴ te ni turam wi mu séddoo gëna mägge turi malaaka yi, ni lees ko yékkatee, ba mu gëna mägğ malaaka yi.

Doom jee gëna mägğ malaaka yi

⁵ Ndax kat, ana kan ci malaaka yi la Yàlla masa wax ne ko:

«Yaa di sama Doom,
bés niki tey, maa la jur*,»
ba neeti:

«Maay doon Baay ci moom,
muy Doom ci man†?»

⁶ Buy indiiwaat taaw bi ci àddina nag, ci la naan:

«Na ko malaakay Yàlla yépp sujjóotal.»

⁷ Malaaka yi la Yàlla wax ci ñoom ne:

«Moo def ay malaakaam diy ngelaw,
jawriñam ñooñu la def tàkk-tàkki
sawara‡.»

⁸ Waaye Doom ji la Yàlla ne:

«Yàlla, sab jal tey la ak èllég ba fàww,
te sa yetu nguur njub lay doon.

⁹ Yaa safoo njubte, seexlu njubadi,
moo tax yaw Yàlla, sa Yàlla diwe la diwu
mbég,

nga tiim say moroom§.»

¹⁰ Mu neeti:

«Yaw Sang bi, yaa sos àddina ca njàlbéen,
te asamaan yi, sa liggéeyu loxoo.

¹¹ Yooyu day réer,

waaye yaw yaay des,
lépp ay ràpp ni ay yére.

¹² Yaa leen di taxañ ni malaan,
ni yére di soppikoo it lañuy soppikoo,
te yaw, ngay kenn ki,

say at du jeex*.»

¹³ Ana kan ci malaaka yi la mas ne:

«Toogeel sama ndijoor,

ba ma def say noon, say dëggastal†?»

* 1:5 1.5 Seetal ci *Sabóor* 2.7. † 1:5 1.5 Seetal ci 2.*Samiyel* 7.14. ‡ 1:7 1.7 Seetal ci *Sabóor* 104.4. § 1:9 1.8-9

Seetal ci *Sabóor* 45.7-8. * 1:12 1.12 Seetal ci *Sabóor* 102.26-28. † 1:13 1.13 Seetal ci *Sabóor* 110.1. * 2:8

2.8 Seetal ci *Sabóor* 8.5-7. † 2:12 2.12 Seetal ci *Sabóor* 22.23. ‡ 2:13 2.13 Seetal ci *Esayi* 8.17-18.

¹⁴ Xanaa malaaka yépp duñu ay ngelaw yu ñu sas ab liggéey, yebal leen ngir ñu taxawu ñi wara jagoo ag mucc?

2

Nanu teewlu pexem mucc mi Yàlla waa-jal

¹ Moo tax nu wara yokka teewlu kàddu yi nu dégg, bala noo lajj, taañaañal.

² Gannaaw nag kàddug Yàlla ga jibe woon ci gëmmiñu malaaka yi, mujj na di lu wér péññ, te képp ku ko masa xëtt, mbaa mu déggadi ko, jot nga añ bi war ci sag tooñ,

³ ana kon nun ci sunu bopp, nan lanuy rëcce mbugal, su nu sàgganee pexem mucc mu réy mii Sang bi jëkkoono biral, te ñi ko dégg dëggalal nu ko? ⁴ Te Yàlla moo doon dëggale seede y ñooñu, ay firnde aki kéemaan, ak wépp xeeti kawtéef, ak ay mayi Noo gu Sell gi, may yi mu séddalee ni mu ko soobe.

Yeesu moo rammu jaam ñi

⁵ Ndax kat du ci kilifteefu malaaka yi la Yàlla teg àddinay èllég ji nuy wax, ⁶ waaye am na ku yékkatee bérab, kàddug seede, ne:

«Ana luy nit ba nga di ko faale?

Ana luy doom aadama, ba nga di ko yég?

⁷ Yaa ko def mu gëna suufe as lëf malaaka yi,

yaa ko kaalaa teraanga ak daraja,

⁸ yaa teg lépp ci kilifteefam, ci suufu ndëggul tànkam*.»

Ba Yàlla tegee lépp ci kilifteefam it, bàyyiwul dara lu mu tegul ci kilifteefam. Dëgg la, fii nu tollu gisagunu ne lépp a ngi ci kilifteefam, ⁹ Yeesu mi ñu def mu gëna suufe as lëf malaaka yi, moom lanu gis deeyam gi mu dee tax mu jagoo kaalag teraanga. Noonu la deeyale ñépp ci kaw yiwu Yàlla.

¹⁰ Ndax kat Yàlla mi lépp lu sàkke ñeel, te lépp sàkkoo ci moom, moo nammoona wommat gone yu bare ba sédd leen daraja. Moo tax muy lu jaadu, mu sottale matug Yeesu ay coono, ndax Yeesu moo xállal gone yooyu yoonu mucc. ¹¹ Yeesu miy sellal nit ñi, moom ak ñi muy sellal, ñoo bokk lenqe, te moo tax Yeesu rusu leena wooye ay bokk. ¹² Mu ne:

«Maay biralal saw tur samay bokk,
maa lay kañe fi digg mbooloo mi†.»

¹³ Mu waxaat ne:

«Man maay am kóolute ci moom.»

Dellooti ne:

«Maa ngi nii, maak gone yi ma Yàlla jox‡.»

¹⁴ Gone yooyu nag, bindeefi suux ak deret lañu bokk doon, ñoom ñépp. Moo tax Yeesu itam dikk bokk ak ñoom woowu nekk, ngir mana dee ba def deewug boppam pexe mi mu neenale ka yoroon dooley ndee, te mooy Seytaane. ¹⁵ Noonu la goreele mboolem ñi seenug ragala dee ténkoon cig njaam, seen giiru dund. ¹⁶ Ndax kat du ay malaaka la Yeesu xettlisi, waaye askanu Ibraayma la xettlisi. ¹⁷ Moo tax faww mu niru woon ay bokkam ci bépp fann. Su ko defee mu mana doon seen sarxalkat bu mag bu am yérmande te wóor fa kanam Yàlla, ngir mana defal askan wi seen njotlaayal bakkan. ¹⁸ Coonoy nattu bi mu dékku nag tax na mu mana wallu ñi ci nattu.

3

Doom jee gëna màgg Musaa

¹ Kon nag bokk yu sell yi, yeen ñi bokk ci wooteb asamaan, ràññeeleen Yeesu, ndaw li, sarxalkat bu mag bi ci yoon wi nu gëm. ² Ku wóor la woon, ñeel ki ko tabb, noonee Musaa wóore woon ci mboolem waa kër Yàlla. ³ Waaye ni ab tabaxkat éppe tednga kër ga muy tabax, ni la Yeesu yelloo daraja ju épp ja Musaa yelloo woon. ⁴ Ndax kër gu nekk am na ku ko tabax, waaye ki tabax lépp mooy Yàlla. ⁵ Musaa déy «jawriñ bu wóor la woon ci biir mboolem waa kër Yàlla*,» di seedeel Yàlla káddu ya ñu fa wara wax. ⁶ Almasi nag mooy Doom ju wóor ji jiiite kër Yàlla, te nun nooy kërám, ndegam kay nu ngi wéye aw fit, ak yaakaar ji nuy puukarewo.

Almasi moo jara déggal

⁷ Kon nag ni ko Noo gu Sell gi waxe: «Bésub tey jii bu ngeen déggee baatam, ⁸ buleen tē na woon ca fippu ga, keroog bésub seetlu Yàlla, ba ca màndinj ma†,» ⁹ «fa ma seeni maam doon seetloo, di ma diinjat, te gisoon samay jaloore, ¹⁰ diiru ñeent fukki at. Moo tax ma mere googu maas, ba ne: “Seen xol a dékke lajj, te nanguwuñoo xam samay yoon.” ¹¹ Moo ma taxa giñe sama biir mer, ne: “Duñu tàbbi mukk ci samag noflaay†.”» ¹² Bokk yi, wattuleen bala kenn ci yeena am xolub gëmadi bu bon bu koy xiir ci dëddu Yàlla jiy dund. ¹³ Waaye bés bu nekk deeleen soññante li feek muy bésub

tey agum, bala bàkkaar a nax kenn ci yeen, ba mu mujj dërkiis. ¹⁴ Ndax kat noo di àndandooy Almasi, ndegam wéye nanoo ñoy bu dègër ci sunu kóolote ga nu doore, ba kera muj ga. ¹⁵ Waxees na ne:

«Bésub tey jii bu ngeen déggee baatam, buleen tē na woon ca fippu ga§.»

¹⁶ Ana ñan ñoo déggoon te teewuleena fippu? Xanaa du mboolem ña gënne woon Misra ci njiital Musaa? ¹⁷ Ana ñan la Yàlla mere lu mat ñeent fukki at? Xanaa du mboolem ña bàkkaaroon te seeni nēew mujj tēdd ca màndinj ma? ¹⁸ Te it ana ñan ñu moy ña déggadi woon, la Yàlla giñaloon ne duñu tàbbi mukk ci noflaayam? ¹⁹ Kon nu gis ne seen gëmadee tax manufu ca wona tàbbi.

4

¹ Kon nag gannaaw digeb tàbbi ci noflaayal Yàlla mu ngi sax ba tey, nanu ragal kenn ci yeen taxawe melokaanu ku ca jotul. ² Ndax kat ni ñu nu ággee xibaaru jàmm bi, noonu lees leen ko ággee, waaye káddu ga ñu dégg moo leen jariñul dara, ndax ña ko dégg ñoo ko déggewul ngëm. ³ Nun ñi gëm donj nooy tàbbi ci noflaayam, noonu mu ko waxe, ne: «Maa giñe sama biir mer, ne:

“Duñu tàbbi mukk ci samag noflaay*.”» Ndaxam ca cosaanu áddina la liggéeyi Yàlla sotti woon ba noppi, ⁴ nde waxees na lu jëm ci bésub juróom ñaareel ba, ne: «Bésub juróom ñaareel ba nag, Yàlla dal-
lu

ci mboolem liggéeyam†.» ⁵ Te moo wax itam ci lii nu jékka jukki, ne:

«Duñu tàbbi mukk ci samag noflaay.» ⁶ Kon nag am na ñenn ñu ci wara tàbbi ba tey. Te ñi ñu jèkkoona ágge xibaaru jàmm bi, tàbbiwuñu ca ndax seenug déggadi. ⁷ Looloo waral Yàlla jàppaat beneen bés bees di tàbbe ci noflaayam, bés bu mu tudde «tey jii», te mooy ba mu waxee lu yàgga yàgg, gannaaw gi, ci gëmniñug Daawuda, káddu gii ñu jota jukki: «Bésub tey jii bu ngeen déggee baatub Yàlla, buleen tē.»

⁸ Su leen Yosuwe tàbbaloon ca googa noflaay, kon gannaaw gi Yàlla du wax lu jëm ci beneen bés. ⁹ Kon des na ba tey noflaayu bésub juróom ñaareel bu ñu waajalal ñoñu Yàlla. ¹⁰ Ndax ku tàbbi ci noflaayu Yàlla kat, na Yàlla dal-loo woon ca ay liggéeyam, ni ngay dal-loo ci say

* 3:5 3.5 Seetal ci *Màndinj ma* 12.7. † 3:8 3.8 Seetal ci *Mucc ga* 17.1-7. ‡ 3:11 3.7-11 Seetal ci *Sabóor* 95.7-11. noflaay: Yàlla moo digoon bànni Israyil ag noflaay, te mooy jàmm ju mu leen digoon ne dinañu ko dèkke biir Kanaan, gannaaw bu ñu fa duggee. Waaye ñi déggal Yeesu Almasi, ñoo jagoo teeweji jataayu Yàlla, te loolu mooy doon seen noflaay. § 3:15 3.15 Seetal ci *Sabóor* 95.7-8. * 4:3 4.3 Seetal ci *Sabóor* 95.11. † 4:4 4.4 Seetal ci *Njàlbéen ga* 2.2.

liggéey. ¹¹ Nanu def sunu kem-kàttan boog, ngir tàbbi ci googu noflaay, bala kenn a daanu ndax déggadi gu mel ni gu maam ya. ¹² Kàddug Yàlla de luy dund la, ànd ak doole, te moo gëna ñaw saamaru ñaari ñawka bu gëna ñaw. Day sar ba fa xel akug noo digaloo, ba fa yax ak yuq dajee, te man naa càmbar ay xalaat ak mébété xol. ¹³ Te it amul mbindeef mu laqu fi kanam Yàlla. Lépp a ne duññ, ne fàññ, muy gis, te moom lanuy waxal bés-pénc.

Yeesu mooy sarxalkat bu mag bi

¹⁴ Gannaaw nag am nanu kilifag sarxalkat bu mag bu jáll ba biir asamaan, te mooy Yeesu Doomu Yàlla, nanu ñoy ci yoonu ngëm wi. ¹⁵ Ndax sarxalkat bu mag bi nu am du ku tëlee yég sunuy néew doole, waaye ni nun rekk lees ko nattoo wet gu nekk, te taxul mu bàkkaar. ¹⁶ Kon nag nanu ñemee dikki ba ca ngàngunem yiw ma, ndax nu jot yërmande te dajeeek aw yiw wu nu wallu fu nu ko soxlaa.

5

¹ Bépp sarxalkat bu mag nag, ci biir nit ñi lees ko jële, fal ko ngir nit ñi, ci seen diggante ak Yàlla, muy jébbale ay jooxe ak saraxi jur ngir seeni bàkkaar. ² Dina mana sédd cér ñi xamul ak ñi moy ndax moom ci boppam ci ag néew doole la tënku. ³ Néew doole googu moo tax mu wara joxeel boppam, tey joxeel askan wi ay sarax, ngir seeni bàkkaar.

⁴ Te it kenn jagoowul boppam teraangay carxal, ndare du Yàllaa ko ci woo, na woon ca Aaróona. ⁵ Noonu la woon itam ci Almasi. Tegoowul boppam darajay doon sarxalkat bu mag, waaye Yàllaa ko ne:

«Yaa di sama Doom,

bés niki tey maa la jur*.»

⁶ Noonu it la waxe feneen, ne:

«Yaa dib sarxalkat ba fàww,

topp dayob Melkisedeg†.»

⁷ Fan yi Almasi dee dund dundu nitu suuxu neen, ay ñaan aki dagaan yu ànd aki yuux aki jooy la daan yékkati jëme fa ki ko mana wallu ba du dee, te nangule na it, ndax na mu ragale woon Yàlla. ⁸ Li muy Doom lépp, terewu koo tàggatu ci dégg ndigal, ndax coono yi mu daj. ⁹ Noonu lees matale Almasi sèkk, ba mu doon cosaanu mucc gu dul jeex, ñeel mboolem ñi ko déggal. ¹⁰ Ci biir loolu Yàlla tudde ko sarxalkat bu mag, bi topp dayob Melkisedeg.

Nanu jëm kanam

¹¹ Moomu mbir nag bare na lu nu ciy wax, waaye tekki ko mooy jafe ndax seen

déggin wu diib. ¹² Ndax kat nëgëni tey waroon na leena fekk diy sèriñ, waaye aajowoo ngeen ba tey ku leen jàngal ndoortel waxi Yàlla. Nàmp um soow ngeen mujj aajowoo, ndax ñakka àttan ñam wu dègër. ¹³ Képp ku tollu ci nàmp um soow nag, tuut-tànk nga, doo mana xam dara ci kàddug njub. ¹⁴ Mag ñi kay ñoo yelloo ñam wu dègër, ñoo tàmma jéfoo seenum xel, ngir ràññee lu baax ak lu bon.

6

¹ Kon nag nanu jóge ci ndoortel àlluway Almasi, daldi jáll jëm ci njàngum mag, te ñu baña lalaat kenu gi. Kenu gi mooy gëm Yàlla gannaaw tuubeel gi war ci jëf ju bon ji nit kiy def te muy jëfi ndee. ² Kenu gi mooy itam njànglem xeeti njàpp, ak ñaan gu ànd ak tegeb loxo, ak mbirum ndee-ndekki, ak àtteb bés-pénc biy sax dàkk. ³ Nanu jëm kanam, te moom lanuy def, ndegam soob na Yàlla.

⁴ Ñi ñu xasa leeral nag, te ñu jota mos may gu bawoo asamaan, séddu ci Noo gu Sell gi, deesu leen mana defal dara. ⁵ Ñoo mos kàddug Yàlla gu baax gi, ak manoore yu jamono jiy ñëw, ⁶ ba noppi xàcci. Kon deesu leen waññi, ngir ñuy tuubati, nde ñoo daajaatal seen bopp Doomu Yàlla ji ci bant, teg ko toroxte ju ne fàññ.

⁷ Ndax suuf kat, su naanee ndox mu mu tawlu ay yoon, ba meññal ñi ñu koo beyal, gàncax gu leen jariñ, soosa suuf dina séddu ci barke bu bawoo fa Yàlla. ⁸ Waaye su meññee ay dég aki xaaxaam, amul njariñ, alkuteem lees di tudd léegi, te lakk lay mujje.

⁹ Waaye nag soppe yi, nii nuy waxe ak yeen teewul nu di leen yaakaare ci lu wér, li leen gëna amal njariñ, te bokk ci seenug mucc. ¹⁰ Yàlla ñàkkul worma bay fàtte seen liggéey, ak cofeel gi ngeen sopp turam, te firndeete ko ni ngeen taxawoo ñu sell ñi, démb ak tey. ¹¹ Waaye danoo bëgg kenn ku nekk ci yeen wéye gann farlute googu ngeen nekke, ba kera muj ga, ngir seen yaakaar sotti ba mat sèkk. ¹² Su ko defee dungeen yàccaaral, waaye dangeen di roy ci ñi gëm te muñ, ba jagoo dígey Yàlla.

Digeb Yàlla du jaas

¹³ Mu mel ni Ibraayma, ba Yàlla di digoo ak moom, Yàlla manul woona giñe ku sut Yàlla. Moo tax mu giñal ko ci boppam, ¹⁴ ne ko: «Maa lay barkeela barkeel déy, ful laa ful*.» ¹⁵ Noonu la Ibraayma muñee, ba kera mu jote ca dige ba.

* 5:5 5.5 Seetal ci *Sabóor* 2.7. † 5:6 5.6 Melkisedeg: buurub Salem la woon, di sarxalkat bu Yàlla faloon ci jamonoy Ibraayma, maanaam ñeenti téeméeri at laata Aaróona doon ab sarxalkat. Seetal ci *Sabóor* 110.4. * 6:14 6.14 Seetal ci *Njálbéen* ga 22.17.

¹⁶ Nit nag, ku ko sut lay giñe, ngir dogal kàddu, ba teesal wépp werante. ¹⁷ Yàllaa bëggoona firndeel nu mu gëna leere ñeel ñi moom dige bi, ne ab dogalam du tebbiku muk. Moo tax mu dogale ngiñ ab digeem. ¹⁸ Naar yooyu du tebbiku ndax Yàlla du fen, te nun ñi daw làqusi ci moom, ci lanu ame ndëgërlaay lu réy lu nu ñoye ci yaakaar ji ci sunu kanam. ¹⁹ Yaakaar jooju lanu am, mu mel ni diigalub gaal, diigal bu dëgër te wóor, ñeel sunu xol, te yaakaar jooju mooy bëtt rido ba, ba jàll ca néegu biir bu Yàlla ba. ²⁰ Fa la ndaw li nu jiitu dugg ngir nun, te kookooy Yeesu mi ñu fal sarxalkat bu mag ba fàww, mu topp dayob Melkisedeg.

7

Melkisedeg moo sut Ibraayma ak Aaróona

¹ Melkisedeg moomu doon buurub Salem te nekkoon sarxalkatub Yàlla Aji Kawe ji, ba Ibraayma délsee jóge xareem baak buur ya mu duma, kooku moo ko gatandu woon, ñaanal ko*. ² Moom la Ibraayma jox fukkeelu cérub mboolem cëxëtoo ma. Ni ñu jëkka dëgge aw turam Melkisedeg, ci tekki, mooy «buur bu jub». Bu loolu weesee itam moom mooy buurub Salem, muy «buuru jàmm». ³ Melkisedeg nag du baay, du ndey, du askanu maam wees ko xamal. Du ndoortel gane àddina, du njeextel dund wees ko xamal. Dees koo def mu niru Doomu Yàlla, te saxoo di ab sarxalkat ba fàww.

⁴ Seetleen ni mu ràññikoo, moom la Ibraayma maamu cosaan ma ci boppam jëbbal fukkeelu cérub cëxëtoo ma! ⁵ Te sarxalkat yi bokk ci giirug Lewi† ni ko yoon wi térale, ñoom lañu sant ñu nangu céri fukkeeli alali askan wiy seeni bokk, te soqikoo ñoom itam ci geñog Ibraayma. ⁶ Waaye Melkisedeg mi ñu askanalewul giirug Lewi, ci Ibraayma la nangoo cérub fukkeel. Te it moo ñaanal barke Ibraayma mi jagoo digey Yàlla. ⁷ Te amul benn werante ne ki féete suuf, moom la ki féete kaw di ñaanal barke. ⁸ Kon ci gii wet ay nit ñuy dee donj ñooy nangu ay céri fukkeel, ca gee wet nag ku ñu seedeel ne mu ngi dund ba tey moo jagoo cérub fukkeel. ⁹ Léegi nag ci waxin, Lewi miy nangu cérub fukkeel, moo gënné cérub fukkeel bu mu feye ci loxol Ibraayma. ¹⁰ Ndax ba Melkisedeg di gatandu Ibraayma, Lewi ma nga woon ca geñog Ibraayma maamam.

Melkisedeg misaal na Almasi

¹¹ Kon liggéeyu carxal gu Leween, ñi yoroon yoonu Musaa, wi ñu dénkkoon bànni Israyil, su doon liggéey buy taxa mat sëkk, ndax dees na soxlaati beneen sarxalkat bu jóg topp dayob Melkisedeg, te toppul dayob Aaróona? ¹² Carxal gi nag su soppikoo, fàww yoon wi itam soppiku, ànd ak moom. ¹³ Ki kàddu yii jëm ci moom, fa mu bokk, geneen giir la, te kenn ci giiram masu cee liggéeye ca sarxalukaay ba. ¹⁴ Li wér te wóor it moo di sunu Sang ci Yuda la soqikoo, te googu giir, Musaa waxu ci lenn lu jëm ci sarxalkat yi. ¹⁵ Mbir mi gëna leerati gannaaw ba beneen sarxalkat feeñee te mel ni Melkisedeg. ¹⁶ Te kooku, du santaaneb ndonol deret bu mu wàccool moo ko taxa doon ab sarxalkat, waaye manoorey dundam gu amul àpp moo ko def ab sarxalkat. ¹⁷ Ndax kat, gii kàddu, seedeleees na ko ko:

«Yaa dib sarxalkat ba fàww, topp dayob Melkisedeg.»

¹⁸ Kon ci genn wet, santaane ba woon, moom lañu neenal, ndax matadig santane ba, ak ñàkka jariñeem, ¹⁹ ndax yoonu Musaa sotalul dara ba mu mat sëkk. Ci geneen wet, yaakaar ju gën moo nuyoo, di yoon wu nuy jaare ba àgg fa Yàlla.

²⁰ Te it palug sarxalkat bii ñàkkula ànd ak ngiñ, nde sarxalkat yee, ñoom lees daan fal pal gu àndul ak ngiñ. ²¹ Waaye Yeesu mii la ag palam ànd ak ngiñ lu jibe ca ka ko wax ne ko:

«Boroom bee ko giñ te du dellu gannaaw:

“Yaa dib sarxalkat ba fàww.”»

²² Ci kaw ngiñ lu réy loolu la Yeesu nekke ki wérale jëmmam, ne kóllère gu gën taxaw na.

²³ Ñi ñu masa fal sarxalkat nag bare nañu, te télee wéye fàww seen sas moo tax, gannaaw ñoom ñépp ay dee. ²⁴ Waaye Yeesu mi sax ba fàww, moo sasoo carxal gu sax dàkk. ²⁵ Looloo waral mu mana musal mucc gu mat sëkk, ñiy awe fi moom, dikk fa Yàlla, ndax mooy dund ba fàww, ngir di leen tinul.

²⁶ Boobu sarxalkat bu mag lanu soxla; moo sell, mucc sikk, mucc sobe, moom lañu teqale ak bàkkaarkat yi, te moom lañu kawee ba fa tiim asamaan. ²⁷ Bokkul ak yeneen sarxalkat yu mag yi; soxlawula jiital bés bu nekk, saraxi jur ngir bàkkaari boppam, door cee teg ay sarax ngir bàkkaari askan wi. Benn yoon la Yeesu sarxal, mu doy, te mooy ba mu sarxee boppam. ²⁸ Ndax kat yoonu Musaa, ay nit ak seenug néew doole la fal ay sarxalkat yu mag. Waaye kàddug ngiñ li topp ci yoon

* 7:1 7.1 Seetal ci Njálbéen ga 14.17-20. † 7:5 7.5 Lewi mooy maamu Aaróona ak Musaa.

wi, moo fal sarxalkat bu mag, Doom ji ñu matal sékk ba fàww.

8

Kóllère gi gën la Yeesu Sarxalkat bi indi

¹ Kàddu yii nu wax nag, lii moo di ponk bi: boobu sarxalkat bu mag lanu am, mu tooge ndijooru ngànguney ku Màgg ka fa asamaan. ² Mooy liggéeye kër gu sell ga, ca biir xaymab jaamookaay bu dëggu, ba Boroom bi samp, te nit sampu ko.

³ Gannaaw nag ab sarxalkat bu mag bu mu mana doon, dees koo fal, ngir muy jébbale ay jooxe ak saraxi jur, kon fàww sarxalkat bu mag bii itam am lu mu sarxe. ⁴ Bu doon ci àddina, du nekk sax ab sarxalkat, gannaaw ay sarxalkat a ngi fi, di jébbale ay sarax, ni ko yoonu Musaa laaje. ⁵ Sarxalkat yooyu, jaamookaay bi ñuy liggéeye, ab misaal la, takkndeeru yéf yu dëggu ya fa asamaan la. Ndax ba Musaa di waaja yékkati xaymab jaamookaay ba, noonu lees ko artoo woon ne ko: «Nanga xool te def lépp, mu dëppook misaal mi ñu la won ci kaw tund wi*.» ⁶ Waaye tey la Yeesu jot ci liggéeyu carxal gu sut gu jékk ga fuuf, te kóllère gi mu fas diggante Yàlla ak nit ñi, noonu la gène gu jékk ga; dige yi lal kóllère gu yees gii it, noonu la gène dige ya laloon gu jékk ga.

⁷ Bu kóllère gu jékk ga muccon sikk nag, deesul soxlaa xajal geneen. ⁸ Waaye Yàllaa sikk bànni Israyil, ba mu nee:

«Ay fan a ngii di ñew, la Boroom bi wax, mu ne maay fas ak kër Israyil ak kër Yuda, kóllère gu yees gu bokkewul ak ga ma séqoon ak seeni maam,

⁹ ba ma leen jàppee ci loxo, gënne leen réewum Misra. Gannaaw ñoo sàmmul sama kóllère nag, man it geesuwuma leen, la Boroom bi wax.

¹⁰ «Lii nag moo di kóllère gi may fas ak kër Israyil, gannaaw yooyu fan, la Boroom bi wax, mu ne:

Maay yeb sama ndigali yoon ci seenum xel, ci seen xol laa koy ñaas. Maay doon seen Yàlla, ñoom ñu doon sama ñoñ.

¹¹ Kenn dootu soxlaa jàngal moroomam, mbaa mbokkam, naan ko: “Ràññeel Boroom bi!”

Ndax ñoom ñépp a may ràññee, ki gëna tuut ba ci ki gëna mag.

¹² Maa leen di jéggal seeni njubadi, te seeni bàkkaar, дума ci bàyyeeti xel†.»

¹³ Bu Yàlla wooyee kóllère gii gu yees nag, daa fekk mu wonnil gu jékk ga. Lu

wonni te di lu yàgg nag, mu ngi ci tànkii wees.

9

Yoonu Musaa sàrtaloon na nu ñuy jaamoo Yàlla

¹ Kóllère gu jékk ga amoon na moom itam, ay ndigalam yu jëm ci ni ñu wara jaamoo Yàlla, ak bérabam bu sell bi fi kaw suuf. ² Xaymab jaamookaay ba ñu sàkkoon ñaari néeg la woon. Bu jékk ba, ca la tegukaayu lãmp ba nekkoon, ak taabal ja, ak mburum teewal ma. Moo doon bérab bu sell ba. ³ Néeg ba ca wàllaa ñaareelu rido ba, moom lañu daan wooye bérab bu sell baa sell. ⁴ Ca la sarxalukaayu wurus ba ñuy taal cuuraay bokkoon, gaalu kóllère ga nekk moom donj ca biir néeg bu sell baa sell, ñu xoox ko wurus ba mu daj. Gaal ga moo yeboon njaqal wurus la defoon ñam wa ñuy wax mànn, ak yetu Aaróona wa jebbi woon, ak àlluway kóllère ga. ⁵ Ca kaw gaal ga la ñaari jëmmi malaakay serub nekkoon, di tegtale leeru Yàlla, seeni laaf keppaaral kubeer ga ñuy amale ag njotlaay. Waaye yooyu dunu ko mana daldi faranfàccee léegi.

⁶ Ba ñu waajalee noonu yooyii ba mu jékk, sarxalkat yaa daan dugg saa su nekk ca néeg bu jékk ba, di def seen liggéey. ⁷ Waaye ñaareelu néeg ba, sarxalkat bu mag ba donj moo ca daan dugg, benn yoon cim at, te du ñakka duggaale deret ju muy jooxe ngir boppam, ak itam ngir bàkkaar yi askan yi def te du ag teyeeef. ⁸ Noonu la Noo gu Sell gi firndeel ne yoon wu maye dugg ca bérab bu sell baa sell feefagul woon, te fekk néeg bu jékk ba di taxaw ba tey. ⁹ Loolu misaal la, ñeel jamonoy tey, di firndeel ne jooxe yi ak saraxi jur yi ñu daan jébbale manuñoo dindi yaraangeg jaamukatub Yàlla bi, ba mu set wecc. ¹⁰ Sarax yooyu, ci aw ñam ak ag naan, ak xeeti njàpp donj la jëm, lépp yittewoo yaramu suuxu neen, te di ndigal yu leen waroon ba keroog bésuub coppite taxaw.

Almasi moo far bàkkaar, fas kóllère gu bees.

¹¹ Almasi nag moo dikk tey, di sarxalkat bu mag, bi yor xéewal yi teew ba noppi. Moo dugg ca biir xayma ba gëna màgg te mat sékk, xayma bu loxol nit deful, te loolu mooy xayma ba bokkul ci càkkéefug àddina sii. ¹² Du deretu sikket mbaa yékk la duggaale, waaye deretu boppam la dugga benn yoon ba fàww ca bérab bu sell baa sell, te moom la amale njotlaay gu sax dàkk. ¹³ Ndegam deretu sikket ak yékk, ak

* 8:5 8.5 Seetal ci Mucc ga 25.40. † 8:12 8.12 Seetal ci Yereemi 31.31-34.

nag wu jigéen wu ñu lakk, ngir suy dóom ba nit ku sobewu, yooyu lees daan sellale nit ñi, ngir seen cetug yaramu suuxu neen, ¹⁴ te Almasi di ki def boppam sarax bu mucc sikk ñeel Yàlla, ci dooley Noo gu Sell gi, kon nag ñaata yoon la deretu Almasi gëna mana setal sunu yaraange ji sababoo ci sunu jëf ju bon ju jëme ci ndee, ba nu mana jaamu Yàlla jiy dund! ¹⁵ Looloo tax Yeesu di defarekat bi fas köllère gu bees, ngir ñi ñu woo mana jot ci muur gu sax dàkk gi ñu leen dig. Deeyam gi mu dee, moom la leen jote ci bàkkaar yi ñu xëtte köllère gu jëkk ga.

¹⁶ Kayitu ndono nag fu mu teew, fàww joxees fa firndey deewug ka donale, ¹⁷ ndax kayitu ndono du wër lu moy gannaaw bu nit ka deeyee. Du jàppandi mukki li feek ki donalee ngi dund. ¹⁸ Looloo waral it köllère* gu jëkk ga ci boppam, dooreesu ko woon te deret tuuruwul. ¹⁹ Keroog ba Musaa biralalee bànni Israyil gépp mboolem santaane, na ko yoon wi laaje, ba mu noppee, deretu wëllu la jël, ak ju sikket, akum ndox, ak caru garabu isob bu mu lexas kawaru xar mu xong. Mu capp ko ca deret ja, wis-wisal ca kaw téereb yoon wa, ak mbooloo mépp. ²⁰ Mu ne: «Lii mooy deretu köllère gi Yàlla fas ak yeen†.» ²¹ Xayma ba, ak mboolem ndabi carxal ya it, noonu la wis-wisale ca kaw. ²² Ndax ci yoonu Musaa sax, deret lees di setale daanaka lépp, te bu deret tuuruwul, njëggal amul.

²³ Jumtukaay yooyi di ay misaali yëf ya fa asamaan, yooyu sarax lees ko waroona setale. Kon yëfi asamaan ya ci boppam, sarax yu ko gën lees ko wara setale. ²⁴ Ndax bérab yu sell yu nit tabax, te muy royaalub bérab bu dëggu ba donj, du ci la Almasi dugg. Waaye biir asamaan ci boppam la dugg ngir teewal nu tey, fa kanam Yàlla. ²⁵ Duggul biir asamaan it ngir di sarxe ak a sarxewaata boppam, noonee sarxalkat bu mag ba daan duggé at mu nekk fu sell faa sell, yóbbaaale deret ju dul josam. ²⁶ Lu ko moy ca njálbéenu àddina lay dale sonn ay yooni yoon. Waaye tey ci mujug jamono yi la feeñ benn yoon donj, ba sarxe boppam, ngir far bàkkaar. ²⁷ Kon ni ab dogal sédde nit ñi benn yoon donj bu ñuy dee, seenub àtte topp ci, ²⁸ noonu itam la Almasi doone ab sarax benn yoon, ngir gaddu bàkkaar nit ñu bare, te dina teewsiwaat, ci yoon wu joteetul dara ak bàkkaar, ngir indil ñi koy séntu seenug mucc.

10

¹ Yoonu Musaa takkndeeru xéewal yiy ñëw donj a ci nekk, waaye xéewal ya ci seen bopp nekku ci. Looloo tax sarax yi yoon wi laaj ñu war koo saxoo jébbale at mu nekk, manula setal mukki wecc ñiy jaamusi. ² Su sarax yi taxoona set wecc, deesu ko dakkal? Bu ca jaamukati Yàlla yi doon sete wecc benn yoon kay, xanaa dootufu am yaraangey bàkkaar! ³ Sarax yooyu ay bàkkaar lay fàttlee at mu jot, ⁴ ndax deretu yëkk, ak ju sikket kat manula far ay bàkkaar.

⁵ Moo tax ba Almasiy dikk ci àddina la wax ne:

«Saraxug jur aki jooxe, taamuwuloo ko, waaye aw yaram nga ma waajalal.

⁶ Saraxi dóomal ak saraxi pootum bàkkaar, safoowuloo ci dara.

⁷ Ca laa ne: «Maa dikk nii, te téereb yoon wi indi na li ñu bind ci man, maa defsi sa coobare, yaw Yàlla*.»

⁸ Dafa jëkk ne: «Saraxi jur aki jooxe, saraxi dóomal ak saraxi pootum bàkkaar, bugguloo, safoowuloo, doonte yoon wee laaj yooyu sarax. ⁹ Mu teg ca ne: «Maa ngii defsi sa coobare.» Noonu la fare lu jëkk la, ngir wuutal fa ñaareel bi. ¹⁰ Coobarey Yàlla googu moo waral ñu sellale nu sarax, bi Yeesu Almasi sarxe yaramam, benn yoon ba fàww.

¹¹ Mboolem sarxalkat a ngi taxaw bés bu nekk ci liggéeyam, di jébbale ak a jébbalewaat yenn sarax yooyu, te lenn du ci masa mana far bàkkaar. ¹² Waaye kii de, ba mu sarxee ngir ay bàkkaar, bennub sarax, mu doy ba fàww, ca la tooge fa ndijooru Yàlla. ¹³ Fa la doxe di xaar bés ba ñu koy defal ay noonam, ndëggastalu tãnkam. ¹⁴ Kon bennub sarax boobu, ci la matala sékk ba fàww, nit ñi ñu sellal.

¹⁵ Mooy li Noo gu Sell gi itam seede, ñeel nu, ¹⁶ nde gannaaw ba mu nee:

«Lii moo di köllère gi may fas ak ñoom, bu fan yooyu weesee, Boroom beey wax, mu ne maay yeb sama ndigali yoon ci seen xol,

ci seenum xel laa koy ñaas;

¹⁷ lii la ca teg: seeni bàkkaar ak seeni tooñ, duma ci bàyyeeti xel†.»

¹⁸ Yooyu nag fu ñu ko jéggalee, aajootul sarax su koy far.

Nanu àgg fa Yàlla

¹⁹ Léegi nag bokk yi, am nanu sañ-sañu dugg ca bérab bu sell baa sell, ngir deretu Yeesu, ²⁰ deretu Yeesu jiy yoon wu yees, yoonu dund gu mu nu xállal, jállale ko

* 9:18 9.18 köllère: benn baat mooy tekki «köllère» ak «kayitu ndono.» † 9:20 9.20 Seetal ci *Mucc ga* 24.8.

* 10:7 10.5-7 Seetal ci *Sabóor* 40.7-9. † 10:17 10.16-17 Seetal ci *Yeremi* 33-34.

rido ba, te rido ba moo di yaramu suuxam wi mu sarxe. ²¹ Am nanu itam sarxalkat bu mag bu jiite kër Yàlla. ²² Kon nag nanu agsee fi Yàlla xol bu dëggu, ak fit wu mat sékk wu ngëm waral, gannaaw wisees na sunum xel ndoxum setlu, ba mu tåggoob bépp gákk bu mu nu sikkale, te raggees na sunu yaram ci ndoxum setlu. ²³ Nanu ñoy ci yaakaar, ji nu biral ne moom lanu am, te nu baña yoqi, nde ki dige ku wóor la. ²⁴ Nanu seet itam ci sunu biir nu nuy xiirtalantee ngir cofeel ak jéf ju baax. ²⁵ Te bunu def ni ñenn ñi, di daggoo ak sunuy ndaje, waaye nanuy ñaaxante, rawatina tey bi ngeen gisee bés bi dëgmal.

²⁶ Gannaaw bu nu xamee xéll liy dëgg ba noppi nag, su nu bàkkaaratee te di ko tey, su boobaa ab sarax bu far yooyu bàkkaar amatu ci. ²⁷ Xanaa tiitaangey séentu mbugal ma, ak sawara wu yànj wiy xoyom fippukat yi. ²⁸ Képp ku masoona xëtt yoonu Musaa, daawuñu ko ñéebli; ci kaw seedye ñaari nit ba ñett lees ko daan rey. ²⁹ Kon ki dëggaate Doomu Yàlla ji, teddadil deret ji ñu sellale kóllère gi, te ñakke teggini Noowug Yàlla gi nu indil aw yiw, kooku, mbugal ga mu yelloo, ñaata yoon lay gënatee metti, ngeen defe? ³⁰ Xam nanu ki wax ne: «Ag pey, maay boroom, man maay añale,» neeti: «Boroom bi mooy àtte ñoñam†.» ³¹ Céy ku nara tàbbi ci loxoy Yàlla jiy dund, ndaw lu raglu!

³² Fàttlikuleen bés yu jëkk ya, gannaaw ba ngeen jotee ci leeru Yàlla, na ngeen dëgërloo woon ca xeex bu mag ba te metti. ³³ Leeg-leegaa ñu saaga leen, bundxatal leen ci kanam nit ñi; leeg-leegaa yeen ay taxawu nit ñi ñu teg lu ni mel. ³⁴ Ndax yeena bokk ak ñi ñu těj seen coono, te yeena muñe xol bu sedd ni ñu foqarñee seen moomeel, ngir xam ngeen yeen ci seen bopp ne am ngeen alal ju ko gën tey sax ba fàww.

³⁵ Kon nag buleen teqlikook seenu fit, yool bu réy a ngi ci. ³⁶ Li leen war moo di muñ, ba sottal coobarey Yàlla, su ko defee ngeen jot li mu dige. ³⁷ Ndax kat,

«Des nas tuut, as tuut rekk,
kiy dikk, dikk te du yeex.

³⁸ Sama nit ku jub nag mooy dund ndax ngëm ga,

waaye ku dellu gannaaw,

sama xol bégewu la§.»

³⁹ Nun nag bokkunu ci ñiy dellu gannaaw te nara sàñku, waaye nooy ñi saxoo ngëm te nara mucc.

11

Yàlla rafetlu na ngëm

¹ Ngëm nag mooy cëslaayal yaakaar te mooy firndeey li bët gisul. ² Ngëma taxoon maam ya rafet ub jëw.

³ Ngëm a nu xamal ne Yàlla seose àddina wërngal képp ag kàddoom, li gisu daldi sàkkoo ci lu gisuwul.

⁴ Ngëm la Abel jébbale Yàlla sarax su gën saraxub Kayin, te ngëm lees seedelee Abel ne moo jub, kera ba Yàlla ci boppam seede ne ay saraxam a nangu. Ngëm it moo waral Abel dee, te di wax.

⁵ Ci kaw ngëm lees yóbboo Enog, te deewul. Da ne mes, ndax Yàlla ko yóbbu*. Bales koo yóbbu kay, lees ko seedeelon ne moo bannexal Yàlla. ⁶ Ku amul ngëm nag doo mana neex Yàlla, ndax kiy dikk fi Yàlla, fàww nga jékka gëm ne Yàlla am na, gëm it ne ñi koy sàkkoo, moo leen di yool.

⁷ Ngëm la Nóoyin dëgge waxyub Yàlla bu jëm ci lu kenn gisagul woon, te ragal Yàlla la sàkke gaal, ngir musal njabootam. Ngëmam it la tiññale àddina, ba ab céram di njub gi ngëm di maye.

⁸ Ba Yállay woo Ibraayma, ngir mu gén, jëm bérab ba mu mujj muurloo, ngëm la dëggale Yàlla, ba gén, dem te xamul woon fu mu jëm. ⁹ Ngëm la Ibraayma daleji ca suuf, sa ñu ko digoon, ba dëkke ay xayma ni ab doxandéem ci réewum jaambur, moom ak ñi mu séddool benn dige bi, te ñuy Isaaxa ak Yanqóoba. ¹⁰ Booba Ibraaymaa ngay séentu dëkk ba ca kenu ya, te Yàlla di ki yor xaralag tabax bi, boole ci di tabaxkat bi.

¹¹ Ci kaw ngëm itam la Saarata ci boppam mana embe ba jur tey mag ba wees njurum doom, ndax moo njortoone ne ka dige ku wóor la. ¹² Looloo waral genn góor donñ, ku dee rekk dese, aw askan mana soqikoo ci moom, tollu ni biddiwi asamaan ndax bare, wees ab lim ni feppi suufas géey.

¹³ Ñoom ñépp ngëm lañu deeyaale te jotaguñu woon la ñu leen digoon. Waaye fu sore lañu ko séene, di ko séentu, tey ràññee ne ay doxandéem aki mangan lañu ci àddina. ¹⁴ Nooñuy dëggal ne ay doxandéem aki mangan lañu ci àddina nag, ñoo firndeel ci lu leer ne réew mu ñu moomal seen bopp lañu doon wut. ¹⁵ Bu ñu nammoon réew ma ñu jóge, manoon nañoo dellu. ¹⁶ Waaye réew mu ko gën lañu doon sàkkoo, te mool réewum asamaan. Looloo tax Yàlla rusul ñu di ko

† 10:30 10.30 Seetal ci *Baamtug Yoon* wi 32.35-36.

§ 10:38 10.37-38 Seetal ci *Abakug* 2.3-4.

* 11:5 11.5 Seetal

ci *Njálbéen* ga 5.24.

tudde seen Yàlla, ndax waajalal na leen ab dëkk.

¹⁷ Ibraayma, ba ñu ko nattoo, ngëm la jooxee Isaaxa ngir sarax. Ibraayma mi ñu jagle dige yi, Isaaxa jenn doomam ju góor ji mu am, moom la doon jooxe, ¹⁸ te Yàlla noon ko: «Ci Isaaxa lees di tudde saw askan†.» ¹⁹ Waaye Ibraayma njortoon na ne su Isaaxa dee woon it, Yàlla man na koo dekkal. Moo tax itam ci misaal, Isaaxa délsi ciy loxoom, mel ni daa dekki.

²⁰ Ba tey ngëm la Isaaxa ñaanale Yanqóoba ak Esawu, ngir barkey ëllëg.

²¹ Ba Yanqóoba di waaja nelaw, ngëm la ñaanale ñaari doomi Yuusufa yépp, doora sujjóot, jafandoo boppu yetam‡.

²² Ba Yuusufa di waaja nelaw, ngëm la waxe lu jëm ci mbirum gaddaayug bànni Israyil gay bawoo Misra, bay dënkaane ci mbiri yaxam.

²³ Ba Musaa juddoo, ngëm la ko ay waajuram làqe woon ñetti weer, ndax gis na xale ba taaroo woon, ba ragaluñu ndigalal buur ba. ²⁴ Ba Musaa mäggee, ngëm a taxoon mu bañ ñu wooye ko doomu doomu Firawna ju jigéen. ²⁵ Bokk ak ñoñi Yàlla ab coono moo ko gënaloon muy bannexooqum ci biir bàkkaar. ²⁶ Toroxtaange gu ñu koy teg ndax Almasi, moom la defoon muy alal ju ëpp denci Misra, ndax yoolub ëllëg ba la doon séentu. ²⁷ Ngëm la bàyyikoo Misra, te ragalul sànjum buur, xanaa dogu rekk, mbete kuy gis ki gisuwul. ²⁸ Ngëm la Musaa aadaale mággalu bésub Mucc ba, ak wis-wisalub deret ja, ndax malaakam bóomkat bi baña laal taawi bànni Israyil.

²⁹ Ngëm la bànni Israyil jalle géēju Barax ya, mu mel ni yoonu suuf su wow koññ, waa Misra jéema jàll topp ca, daldi lab.

³⁰ Ngëm moo waral tatay Yeriko mabb, gannaaw ba ko bànni Israyil wéree lu mat juróom ñaari fan. ³¹ Ngëm moo waral ba Raxab ganc ba dalalee jamm nemmikukati réew ma, àndul ak ñu gémadi ña dee.

³² Ana lu ma ciy tegati? Jot gee ko dul mate, su ma narooona nettali mbirum Sedeyon ak Barag ak Samson ak Yefte ak Daawuda ak Samiyel ak yonent yi.

³³ Nnoñu ngëm lañu tege loxo ay nguur, ngëm lañu defe njekk, ci kaw ngëm la ay dige sottee, ñeel leen, te ci lañu tëje gëmmiñi gaynde ya. ³⁴ Ngëm lañu feye dooley sawara, ngëm lañu rëcce ñawkay saamar, ngëm a waral ñu weccikoo kàttan seenug néew doole, ci kaw ngëm lañu doone ay ñeyi xare, ba dàq gàngoori yeneen réew. ³⁵ Ngëm a waral aw jigéen dekkile ñu ñu deele woon; ngëm a waral

ay góor ñu ñu mitital, baña dellu gannaaw, weccikoo ko seen njotug bakkan, ndax yaakaara dekki, ba gëna dundati ëllëg. ³⁶ Ngëm la ñeneen dëkkoo ay kókkali aki yar, ba ciy jéng ak tëjtee kaso. ³⁷ Nii, ñu dóor ay doj ba ñu dee, ñee, ñu xeet leen ba xar leen ñaar, ñee, ñu bóome leen saamar, ñii di wëndeelu, sol deri xar mbaa bëy, te diy ndóol, ñu di leen bundxatal, di leen mitital. ³⁸ Nnoñu àddina sax yeyoowu leen woon, te àll yi lañu doon wéree loo, ak tund yeek xunti yeek kàmb yi.

³⁹ Mboolem nnoñu am jëw bu rafet ndax seen ngëm, jotuñu sax lees dige woon, ⁴⁰ ndax daa fekk Yàlla gisal nu demin wu gën ci nun. Moo tax boroom ngëm yooyu waruñu wona àgg ci tolluwaay bu mat sëkk, te fekk nun dikkagunu ba bokk ko ak ñoom.

12

Buleen xeeb yaru Boroom bi

¹ Kon nag gannaaw gii ndiiraanu seede wu réy moo nu yéew, nanu sippiku mboolem sëf bu nuy yeexal, ak bàkkaar bu nu yomba tëqtal. Nñ daw nag xél wi ñu nu waajalal, te baña yoqi. ² Nanu ne jàkk Yeesu, kiy sos, di sottal ngëm, moom mi mbég mi ñu ko waajalal tax mu dëkku bant ba ñu ko daaj, tegul muy dara toroxtaange ja ko ca fekk, te doxe ca toog ca ndijooru jalub Yàlla. ³ Xoolleen ci moom mi bàkkaar kat yi doon xeex, bala ngeena yoqi bay xàddi. ⁴ Yeen kat xareeguleen ak bàkkaar, ba seen deret tuuru ci. ⁵ Te it fàtte ngeen kàddu yii ñu leen ñaaxe, ni nit aki doomam:

«Doom, bul xeeb yaru Boroom bi, bul xàddi, bu la waññee,

⁶ ndax Boroom bi, ku mu sopp, yar la,

mooy bantal jépp doom ju ko neex*.»

⁷ Muñleen coono bu leen di yar. Ni ay doom la Yàlla di jëflanteek yeen. Ana doom ju baay ba dul yar. ⁸ Bu ñu leen xañee yar bi jépp doom am wàll, dafa fekk ngeen di doomi po, waaye du ngeen doomi yoon. ⁹ Te itam am nanu ay baay ci wàllu deret, ñoo nu daan yar, te danu leena wegoon. Kon nag xanaa du Baay bi yor ug noo lanu wara gënatee nangul, ngir nu dund? ¹⁰ Sunuy baay a nu yar fan yu néew, na mu jaadoo woon ci seenum xel. Waaye sunu Baay bii, sunu njariñal bopp lanuy yare, ngir nu séddu ci sellaaayam. ¹¹ Dégg la, benn yarub tey neexul, xanaa naqari. Waaye la yar bay mujj jural ña nu tàggat, jamm la ak njub.

† 11:18 11.18 Seetal ci *Njàlbéen ga* 21.12.

‡ 11:21 11.21 Seetal ci *Njàlbéen ga* 47.31.

* 12:6 12.5-6 Seetal ci

Kàddu yu Xelu 3.11-12. † 12:12 12.12 Seetal ci *Esayi* 35.3.

¹² Kon nag «dëgëral-leen loxo yi toqi, ak óom yi bañ†,» ¹³ te «ngeen xállal seen bopp xáll yu jub yu ngeen di jaare seeni tànk†,» ngir kuy soox doxe ca wér te baña gëna tële.

Buleen tanqamlu Yàlla

¹⁴ Sàkkuleen jàmm seen diggante ak ñépp, te it sàkkuleen sellnga, nde ku sellul du gis Boroom bi. ¹⁵ Moytuleen balaa kenn di ñàkk yiwu Yàlla. Moytuleen bala ab reenu wextan di fëll, di lëjle, ba rax mbooloom lëmm. ¹⁶ Moytuleen bala kenn a yebu ci powum séy, mbaa mu teddadil lu sell ba mel ni Esawu mi weccee woon ag lekk, céru taaw ba mu yelloo. ¹⁷ Xam ngeen ne gannaaw gi, ba mu bëggee jot ca barke ba, dees koo gantal. Amul woon fenn fu mu jaare it ba sopparñi deminam, te jéem na ko bay jooy.

¹⁸ Yeen kat du yeena agsi woon ba jege tund wu ngeen mana laale seen loxo, muy tàkk, ànd aki xàmbaar, ak lëndëm gu ne kërúus, ak ngelaw lu réy. ¹⁹ Du yeena dégg liit gu jib, ak coowal baat bu jib te ñay dégg kàddu ya di ñaan ñu bañ leena dégtalati benn baat bu ni mel. ²⁰ Manuñu wona xajoo ndigal la ne: «Mala sax, su laalee tund wi, dóorleen koy doj ba mu deeŝ.» ²¹ Peeñu mooma moo raglu woon ba Musaa ne: «Damaa tiit bay lox*.»

²² Waaye yeen fi ngeen agsi moo di tundu Siyon, dëkku Yàlla jiy dund, te mooy Yerusalem ga ca asamaan, yeena ágg fa junniy junniy malaaka, dajee di mággal; ²³ yeena ágg fa ndajem taaw, ya seeni tur binde fa asamaan. Yeena ágg fa Yàlla, àttekatub ñépp; yeena ágg fa noowi aji jub ña ñu matal sèkk. ²⁴ Yeena ágg fa Yeesu, Rammukat bi dox kóllère gu yees gi, yeena ágg fa deret jiy setal tuuroo, te kàddug deret ja gëna neex kàddug deretu Abel ga jiboon.

²⁵ Wattuleen bala ngeena tanqamlu kiy wax ak yeen. Ndegam ña tanqamlu woon ka yékkati woon kàddoom, wax ak ñoom ci kaw suuf ñoo réccul, aste nun ñii, su nu dëddoo kiy waxe fa asamaan. ²⁶ Booba baatam la yéngale woon suuf, waaye tey moo dige ne: «Beneen yoon, maay yéngalati suuf, te du suuf donñ, waaye asamaan itam†.»

²⁷ Li mu ne «beneen yoon», di wund ne lees mana yéngal, lay dindi, te mooy li sàkke, ngir lees manula yéngal sax ba fàww.

²⁸ Kon nag gannaaw nguuru gu deesul yéngal lanu jagoo, nanu jàppoo cant, di jaamu Yàlla ni mu ko bëgge cig njullite akug ragal, ²⁹ ndax kat «sunu Yàlla, sawara wuy xoyome la†.»

13

Dundin wu rafet moo neex Yàlla

¹ Cofeel gi war ci bokki gëmkat, sax-ooleen ko. ² Buleen sàggane di terle, nde am na ñu seen teraanga tax ñu fat ay malaaka te xamuñu ko woon. ³ Bàyyileen xel ñi ñu tëj, ni su ñu leen boole woon ak ñoom tëj, ak itam ñi ñuy mitital, ndax yeen itam, aw yaram ngeen am.

⁴ Na ñépp wormaal diggante bu ab séy dox, te ab lalu séy na mucc sobe, ndax fokati séy yi, ak jaalookat yi, Yàlla moo leen di daan.

⁵ Buleen jikkowoo bëgg ub xaalis; doyo-looleen li ngeen am, ndax Yàlla moo ne:

«Duma la bàyyi mukk, duma la wacc mukk*.»

⁶ Moo tax nu mana am fitu wax ne:

«Boroom beey sama ndimbal, duma tiit.

Ana lees ma manal†?»

⁷ Fàttlikuleen seen njiit, yi leen àgge kàddug Yàlla. Nemmikuleen li seenug dundin meññ, te ngeen roy seen ngëm.

⁸ Yeesu Almasi menn mi la woon démb ak tey ba fàww.

⁹ Buleen nangu ay àlluwa yu bare te woroo ak sunu ngëm, di leen fàbbi. Li baax mooy ngeen di yokke aw yiw, seen pastéefu xol. Buleen yokke pastéefu xol, ay ndigal yu jëm ci aw ñam, te ña koy sàmm, jariñu leen dara.

¹⁰ Sunu sarxalukaayu bopp, la ñu cay jooxe, ñay liggéeye ca xaymab jaamookaay ba, sañuñu caa lekk. ¹¹ Ndax kat, jur ga sarxalkat bu mag ba daan yóbbu seen deret ca bérab bu sell baa sell, ngir njotlaayal bàkkaar, seen yaram lees daan lakk ca bitib dal ba. ¹² Moo waral Yeesu itam deeye ca bitib dëkk ba, ngir sellale askan wi, deretu boppam. ¹³ Kon nag, nanu ko fekki ca bitib dal ba, ba tegoo toroxtaangeem ga mu tegoo woon, ¹⁴ ndax amunu fii ci àddina dëkk bu sax ba fàww, waaye dëkk biy ñëw, moom lanuy sàkku.

¹⁵ Kon nag saa su nekk, nanuy jooxee ci Yeesu, sunu saraxu cant, ñeel Yàlla, muy sarax su bawoo ci sunuw lammañ, ñu di ko birale aw turam. ¹⁶ Te it di def lu baax, ak di dimbalee, buleen ko fàtte, ndax sarax yu mel noonu la Yàlla gërëm.

† 12:13 12.13 Seetal ci *Kàddu yu Xelu* 4.26. § 12:20 12.20 Seetal ci *Mucc ga* 19.12-13. * 12:21 12.21 Seetal ci *Baamtug Yoon wi* 9.19. † 12:26 12.26 Seetal ci *Ase* 2.6. † 12:29 12.29 Seetal ci *Baamtug Yoon wi* 4.24. * 13:5 13.5 Seetal ci *Baamtug Yoon wi* 31.6. † 13:6 13.6 Seetal ci *Sabóor* 118.6.

¹⁷ Déggal-leen seeni njiit te nangul leen, ndax sàmm bakkani ñi ñu jiite mooy seenub liggéey, te moom lees leen di laaj èllég. Su ko defee ñu defe ko xol bu sedd, te bañ koo def di binni, ndax loolu du seen njariñ.

¹⁸ Deeleen nu ñaanal nag. Li nu wóor de, moo di sunum xel yeddu nu fenn, te it di def lu baax ci lépp moo di sunu bëgg-bëgg. ¹⁹ Ma di leen gëna tinooti, ngir ngeen ñaanal nu, ba ma délsil leen nu mu gëna gaawe.

²⁰ Yalla miy boroom jàmm, moom mi dekkal sunu Sang Yeesu, Sàmm bu mag bi, ci dooley deret ji mu fase kóllère gu sax dàkk, ²¹ yal na leen matal sèkk ci lépp lu baax, ngir ngeen di jéfe coobareem. Yal na def ci nun bânneexu boppam bu mu sottale Yeesu Almasi, mi daraja ñeel ba fàww. Amiin.

²² Kon nag bokk yi, dëgg waay, muñleen ma ñaaxe leen gii kàddu. Bañ naa ko ba gàttal bataaxal bii ma leen bind.

²³ Xamleen ne sunu mbokk Timote génn na kaso. Su dikkee léegi, moom laay àndal, seetsi leen.

²⁴ Nuyul-leen ma mboolem seeni njiit, ak mboolem gëmkat ñu sell ñi. Waa Itali ñu ngi leen di nuyu.

²⁵ Yal na aw yiw ànd ak yeen ñépp.

Bataaxal bi Yàlla may Yanqóoba mu bind ko

¹ Ci man Yanqóoba, jaamub Yàlla ak Sang Yeesu Almasi, la bataaxal bii bawoo, ñeel fukki giir ak yaar yi tasaaroo ci àddina. Maa ngi leen di nuyy.

Lu jëm ci nattu ak ngëm

² Bokk yi, bu ngeen jaaree ci mboolem xeeti nattu, jappeleen ko mbég mu mat sékk, ³ te xam ne bu seen ngëm nattoo, ñeme coono la leen di jural. ⁴ Na ag ñeme coono sottal liggéeyam ci yeen, ngir ngeen sotti, mat sékk, te baña yéese fenn.

⁵ Ku desele am xel mu rafet nag, na ko ñaan Yàlla, mu may ko ko, ndax Yàlla mooy yéwéne ñépp te du sikk kenn.

⁶ Waaye ngëm la koy ñaane te bumu ci am benn sikki-sákka, ndax kiy sikki-sákka daa mel ni gannaxu géej bu ngelaw liy yóbbu, di ko lémbaaje. ⁷ Kooku bumu yaakaar dara ci Boroom bi. ⁸ Boroom xel-yaar la, xel maa toogul ci lenn lu muy def.

Néewle kawe, barele suufe

⁹ Mbokkum gëmkat mi suufe daraja, na sagoo ab kawewaayam; ¹⁰ te ki barele it na sagoo ag suufeem, ndax ni tóor-tóoru saxayaay di ruuse, noonu lay wéye. ¹¹ Naka la jant di fenk, ba naaj wi tàng jérr, saxayaay lax, tóor-tóoram ruus, taar ba réer ko mérr. Noonu itam la ki barele di jeexlee ci biiri yëngoom.

Yàllaay nattoo waaye du fiir kenn

¹² Ndokklee ku muñ ab nattu, nde su ca amee ngërëm, mooy yooloo kaalag dund, gi Yàlla dig ñi ko sopp.

¹³ Képp ku dajeeq lu koy xiirtal, bumu ne: «Yàllaa ma xiirtal,» ndax maneesula xiirtal Yàlla ci lu bon, te moom ci boppam du xiirtal kenn. ¹⁴ Waaye ku nekk, xa xemmemtéefu bakkanu bopp moo lay xiirtal, ootal la ba nax la. ¹⁵ Te xemmemtéefu bakkan bu émbee, bàkkaar lay wasin, te bàkkaar bu matee, ndee lay jur.

¹⁶ Bokk yi, soppe yi, buleen juum ci lii: ¹⁷ gépp may gu baax, ak bépp jagle bu mat, fa kaw la bawoo, di lu wacce fa Baay biy boroom leer yi, ki soppikuwul ci lenn, te genn ker gu toogadi nekkul ci moom. ¹⁸ Moom la soob mu jure nu kàddug dëgg, ba nu taxawe ab jooxeb ndoortel meññeef, ci biiri bindeefam.

Jëfeleen kàddug Yàlla

¹⁹ Bokk yi, soppe yi, nangeen xam lii: na ku nekk di gaaw ci déglu, di yeexa wax tey

yeexa mer. ²⁰ Ndax merum nit du jur njub fa Yàlla. ²¹ Kon nag baleen jépp jikko ju tilim, ak mboolem xeeti mbon yi ne gànñ, te ngeen nangu ci biir ag woyof, kàddu, gi jëmbate ci yeen te man leena musal.

²² Doonleen jëfekati kàddu gi, buleen di ay déglukat donj, di nax seen bopp. ²³ Ndax kat kuy déglu kàddu gi te jëfewoo ko, kooku daa mel ni kuy niir kanamam cib seetu: ²⁴ bu niiree boppam, dem daldi fàtte ca saa sa lu muy nirool. ²⁵ Waaye ki ne jàkk yoon wu mat sékk, wiy goreel ku ko topp, saxoo yoon wi te bañ koo dëgg, fàtte; xanaa di dëgg, jéfe, kooku mooy bége jëfam.

²⁶ Ku yaakaar ne moo jullite te moomul lammañam, boppam lay nax te ag njulliteem amul njariñ. ²⁷ Njullite gu set te mucc sikk fa kanam Yàlla Baay bi moo di lii: di nemmiku jirim akub jëtun ci seen njàqare, tey sàmmu ba mucc ci gækki àddina.

2

Gënaatle warul

¹ Bokk yi, bu leen di gënaatle te di gëmkati sunu Sang Yeesu Almasi, Boroom leer. ² Ndax su nit duggsee seenum ndaje, takk jaarob wurus, solu ba jekk; ku néew doole it duggsi, limboo ay sagaram, ³ su ngeen seetloo boroom col gu jekk gi, ne ko: «Toogeel fii, moo baax ci yaw,» te ne néew-ji-doole ji: «Yaw, taxaweel nee, mbaa nga toog fii sama tànki toogu, fi suuf,» ⁴ su boobaa xanaa du yeena ngi gënaatle ci seen biir, tey àttee ay mébët yu bon?

⁵ Bokk yi, soppe yi, dégluleen. Xanaa du Yàlla moo taamu ñi àddina jappe ñu néew doole, ngir ñi barele ngëm, boole ci jagoo nguur, gi Yàlla dig ñi ko sopp? ⁶ Yeen nag ngeen di teddadil néew doole yi! Xanaa du boroom alal yi ñoo leen di noggatu, di leen diri ba fa mbaxanaa dee benn? ⁷ Xanaa du ñooñu ñooy ñàkke kersa tur wu tedd wi ngeen di wuyoo?

⁸ Ndegam nag yoonu Buur Yàlla ngeen matal sékk, di sàmmonteeq Mbïnd mi ne: «Ni ngeen soppe seen bopp, nangeen ko soppe seen moroom*,» su boobaa waawleen góor! ⁹ Waaye su ngeen gënaatlee, bàkkaar ngeen, te yoon topp na leen, ndax yeena ko xëtt. ¹⁰ Ndax kat képp ku sàmm yoon wépp, ba mu des lenn ndigal donj lu mu téréfe, ab daanu ku moy yoon wépp ñeel na ko. ¹¹ Ndax ki ne: «Bul jaaloo,» moo ne itam: «Bul bóome†.» Ku jaaloowul te bóome nag, xëtt na yoon. ¹² Deeleen waxe tey jéfe ni mu jekke ci nit ñu ñuy séddeji àtteb yoon wiy goreel.

* 2:8 2.8 Seetal ci Sarxalkat yi 19.8. † 2:11 2.11 Seetal ci Mucc ga 20.13, 14.

13 Daan bu àndul ak yërmande, moom lees di àttee ña daawul jéfe yërmande. Yërmande nag kekku na ab daan.

Gëm, jéfe

14 Bokk yi, ku ne gëm na, te jéfewu ko, ana lu mu koy jariñ? Ndash googu ngëm man na koo musal? 15 Su mbokk mu góor mbaa jigéen raflee, mbaa mu ñàkk lu mu dunde bés bu nekk, 16 ba kenn ci yeen ne mbokk mi: «Demal ak jàmm, solul nag te lekk ba regg.» te fajul aajoom, loolu lu muy jariñ? 17 Noonu la ngëm deme, su amul jéf ju mu àndal, ngëm gu dee la.

18 Waaye jombul nit ne: «Yaw, ngëm nga am, waaye man, jéf laa am.» Dama ne, won ma sa ngëm gu àndul ak jéf; man, samay jéf laa lay wone sama ngëm. 19 Yaa gëm ne Yàlla kenn la; waaw góor, waaye rab yu bon yi it loolu lañu gëm bay lox.

20 Yaa ñàkk bopp, dangaa bègg lu la firndeel ne ngëm gu àndul ak jéf, amul njariñ? 21 Sunu maam Ibraayma, xanaa du ci jéf lees ko joxe àtteb ku jub, ndax jéf ja mu jooxee doomam Isaaxa ca sarxalukaay ba?

22 Kon gis nga ne ngëm gaa liggéeyandoo ak jéfam ja, te ca jéf ja la ngëm ga mate sékk. 23 Mbind ma daldi sotti, na mu dikke woon ne: «Ibraayma moo gëm Yàlla, ñu waññal ko ngëmam ag njub†,» ba ñu di ko wooye xaritu Yàlla. 24 Ngeen gis kon ne ci jéf lees di joxe nit àtteb ku jub, waaye du ci kaw ngëm dorj.

25 Xanaa du noonu it lañu joxe Raxab§ gànc ba, àtteb ku jub, ci kaw jéfam, ndax la mu dalaloon ndawi Yawut ya, ba awale leen feneen? 26 Yaram wu àndul akug noo daal, ni mu deeye, noonu la ngëm gu àndul aki jéf, deeye.

3

Moom sa làmmiñ cig mat la bokk

1 Bokk yi, bu ñu bare ci yeen wuta doon sèriñi mbooloom gëmkat mi, ndax xam ngeen ne nun ñiy jàngle nooy gëna metti ab àtte. 2 Bare na lu nuy tooñ, nun ñépp. Ku dul tooñ ci kaddu nag, kooku nit ku mat la, te man naa moom yaramam wépp, boole ci.

3 Aw fas, ñalaab gi nuy def ci gëmmiñam, mu déggal nu lanu ci jublu, te moom lanuy walbatee yaramu fas wi wépp. 4 Xool-leen gaal yi it, ak ngelaw lu réy lu leen mana jañax, weñ su tuut la dawalkat biy walbatee gaal gi, jème fu ko neex. 5 Noonu itam la aw làmmiñ dee cér su tuut te réy aw bàkk.

Seetleen ni ferñett su tuut di lakke gott bu yaa. 6 Aw làmmiñ itam sawara la; làmmiñ a bokk ci sunuy cér, te di àddinay

mbon, di gakkal jëmm jépp. Aw làmmiñ, giiru dundu nit ki lay jafale ab taal bu takke fa sawara.

7 Mboolem xeeti rabi àll yeek njanaaw yi, ak ndégmeent yi, ak rabi géej yi, dees na leen tàggat, te nit a leen di tàggat ba ñu mukk. 8 Waaye aw làmmiñ, kenn manu koo tàggat ba mu mukk. Mooy aayteef gu kenn manula dánk, fees dell ak tookey ndee.

9 Aw làmmiñ lanuy sante kiy Boroom bi, di Baay, te it ci lanuy móoloo nit ñi bindoo takkndeeru Yàlla. 10 Genn gëmmiñ gi, ci la kaddug cant ak gu móolu di jibe. Bokk yi, warula deme noonu kat. 11 Benn bētu ndox ndax dina ballandoo ndox mu neex, ak ndox mu wex, ci menn pax mi? 12 Bokk yi, ag figg man naa meññ oliw? Am ag reseñ dina meññ doomi figg? Bētu ndoxum xorom it du nàcc mukk ndox mu neex.

13 Ana ci yeen ku rafet xel te xam àddina? Na ko firndeele dundin wu rafet wu feeñ ci jéfam ju teey ndax xel mu rafet. 14 Waaye ku denc ci sab xol, wextanu kañaan, ak mébétum sàkku sa darajay bopp, bul damoo xel mu rafet, nde kon nga moy dégg. 15 Moomu xel jógewul fa kaw, àddina sii la bokk, di yéfi bakkan, te di mbiri Seytaane. 16 Ndash kañaan ak sàkku sa darajay bopp, fu mu ame, fa la salfaañoo di ame, ak mboolem jéfi ñaawtéef.

17 Waaye xel mu rafet ma bawoo fa kaw, set la jékka def, teg ci ànd ak jàmm, akug dal. Day taxa neexa jubool, feese yërmande, di meññ jéf ju baax, te mucc ci par-làqu akug jinigal. 18 Meññeefum njub nag, ci jàmm lees koy ji, ci biir doxkati jàmm yi.

4

Nangul-leen Yàlla

1 Ana fu jote yeek xuloo yi ci seen biir jóge fu moy seen bannexi bakkan, yiy xare ci seen yaram? 2 Yeenay xemmeme lu ngeen dul am. Yeenay bóome, di ñaane lu ñeneen am, te manuleen koo am. Yeenay xuloo ak a jàppante. Dungeen am, ndax yeena ñaanul. 3 Te su ngeen ñaane, dungeen am, ndax mébét mu bon ma ngeen ñaane, ngir am lu ngeen toppe seen bakkan.

4 Bokkaalekat yi ngeen doon! Xanaa xamuleen ne xaritoo ak àddina moo di noonoo ak Yàlla? Kon nag ku namma def àddina ab xarit, ab noonu Yàlla ngay doon. 5 Am defe ngeen ne ag neen la Mbind mi indee ne: «Xemmémteef gu ànd

† 2:23 2.23 Seetal ci Njálbéen ga 15.6. § 2:25 2.25 Seetal ci Yosuwe 2:1-21.

ak fiiraange la Yàlla am ci noo gi dëkk ci nun.»⁶ Waaye yiw wu gënatee baawaan la maye. Moom la Mbind mi ne: «Yàlla, ñi réy lay xeex,

ñi toroxlu, mu may leen aw yiw*.»

⁷ Kon nag nangul-leen Yàlla, te bañal Seytaane, mu daw, ba sore leen. ⁸ Jegeleen Yàlla, mu jege leen. Yeen bàkkaarkat yi, raxasleen seeni loxo, yeen ñaralekat yi laa ne, setal-leen seen xol. ⁹ Tiisluleen te ñaawlu bay jooy. Na seeni ree soppiku ay jooy, seen mbég doon njàqare. ¹⁰ Toroxluleen fi kanam Boroom bi, mu yékkati leen.

Buleen sikkal kenn

¹¹ Bokk yi, buleen ñàññante. Ku ñàññ sa mbokk mbaa nga sikkal sa mbokk, yoon wi nga ñàññ, yoon wi nga sikkal. Ku sikkal yoon wi nag doo sàmmkatub yoon wi, sikkalkatub yoon wi nga. ¹² Boroom yoon wi, kenn donj la, te mooy àtte; moo mana musle, mbaa mu sàanke. Te yaw miy sikkal sa mbokkum gëmkat sax, yaay kan?

Èllég, èllègu Yàllaa

¹³ Kaayleen nag ma wax leen, yeen ñi naan: «Tey mbaa èllég ma dem ba dëkk sàngam, def fa at, julaa fa ba tonu.» ¹⁴ Yeen xamuleen sax lu èllég di doon? Ana luy seen bakkan? Yeen ngeen di as lay suy feñ léegi, nes tuut mu ne mes! ¹⁵ Li ngeen di wax kay moo di: «Bu soobee Boroom bi, dinanu dund ba def nàngam sii mbaa nàngam see.» ¹⁶ Léegi daal dangeena bew bay damoo seeni mébét! Googu damu de, lu bon la. ¹⁷ Ku xam lu baax loo wara def te defoo ko nag, bàkkaar nga.

5

Boroom alal bumu tooñ néew-ji-doole

¹ Kaayleen nag ma wax leen, yeen boroom alal yi, jooyleen te yuuxu, ndax mitit yi leen di dikkal. ² Seen alal nèb na, seeni yére maxe, ³ seen wurus ak seen xaalis xomaag. Xomaag ja dib seede bu leen tuumaal, di xoyom seenu suux ni sawara. Yeena dajale alal ca fan yu mujj ya. ⁴ Dégluleen! Peyoor, ga ngeen xañ ña gub seen tool, mooy yuuxu noonu. Jàmbati goobkat ya tàbbi na ca noppi Boroom gàngoori xare yi. ⁵ Dund gu nooy ak bannexu bakkan daal ngeen nekke ci kaw suuf, di yaflu ci bésuub rendi. ⁶ Yeena daan ba reylu aji jub, te jéemula bañ.

Muñ war na gëmkatub Almasi

⁷ Kon nag bokk yi, muñleen, ba Boroom bi délsi. Seetleen ci beykat biy séentu njariñal meññeef mu jóge fi suuf si. Ma ngay muñ, céebo ba bët wàcc. ⁸ Yeen itam

muñleen te takk seenu fit, ndax bés ba Boroom biy dikk dëgmal na. ⁹ Bokk yi, buleen di ñaxtoonte, lu ko moy dees na leen daan, te Daan-kat baa ngii taxaw ci bunt bi!

¹⁰ Bokk yi, yonent yi wax ci turu Boroom bi, di dékku aw tiis, ak di muñ, defleen leen seeni royukaay. ¹¹ Xam ngeen ne ñi muñ lanu foog ne ñoom la mbég ñeel. Dégg ngeen na Ayóoba muñe woon, ak muj ga ko Boroom bi jagleel, ndax Boroom bi moo bare yërmande akug ñeewante.

¹² Li ci raw nag bokk yi, moo di buleen giñ, bu muy ci asamaan mbaa ci suuf mbaa ci leneen lu mu mana doon. Na seen waaw di waaw, seen déet di déet, bala ngeena tàbbi ci mbugal.

Ñaan gu ngëm lal day dal

¹³ Ana ci yeen ku nekk ciw tiis? Na ñaan. Ana ku ci am mbég? Na sàbbaal. ¹⁴ Ana ku wopp ci yeen? Na woo magi mbooloom gëmkat ñi, ñu ñaanal ko, raayaale ko ag diw ci turu Boroom bi. ¹⁵ Ñaan gu ànd ak ngëm day musal ki wopp, ba Boroom bi yékkati ko. Su dee daa bàkkaar, dees na ko jéggal. ¹⁶ Kon nag tuddanteleen seeni bàkkaar tey ñaanalante, ndax ngeen wér. Aji jub ji, ag ñaanam, doole lay dale.

¹⁷ Ilyaa nit la woon ku bindoo ni nun, waaye ba mu saxee ci ñaan ngir mu baña taw, ndox laalul suuf diiru ñetti at ak genn-wàll. ¹⁸ Mu dellu ñaan, asamaan taw, suuf meññ meññeefam*.

¹⁹ Bokk yi, su amee ci yeen ku moy yoonu dëgg, keneen ku ko waññi, ²⁰ xamleen ne ku waññee bàkkaarkat ci yoonu sànkuteem, musal na bakkanam, te faral na ko bàkkaar yu bare.

* 4:6 4.6 Seetal ci *Kàddu yu Xelu* 3.34. * 5:18 5.18 Seetal ci *1.Buur* ya 17.1; 18.1, 42-45.

Bataaxal bu jëkk bi Yàlla may Piyeer mu bind ko

¹ Ci man Piyeer, ndawal Yeesu Almasi la bataaxal bii bawoo, ñeel askan wi Yàlla taamu, te ñu toxuji diiwaani Pont ak Galasi ak Kapados ak Asi ak Bitini*. ² Yeen la Yàlla Baay bi ràññee lu jiitu, ci ni mu leen sellale Noo gu Sell gi, ngir ngeen mana déggal Yeesu Almasi, boole ci tooyloo deretam, mu setal leen. Aw yiw ak jàmm ju ne xéew ñeel na leen.

Yaakaar juy dund lanu am ci Almasi

³ Cant ñeel na Yàlla, sunu Baayu Sang Yeesu Almasi! Moo nu judduwaatal ci yërmandeem ju yaa, ci dooley ndekkitel Yeesu Almasi, ngir may nu yaakaar juy dund. ⁴ Loolu moo am ngir ab cér bu dul yàqu, du sobewu, du seey, cér bu dence fa asamaan ñeel leen, ⁵ yeen ñi seen ngëm tax ngeen yiiru ci manoorey Yàlla, mi leen di nége mucc ga mu waajal te di ko feeñal ca bés bu mujj ba.

⁶ Loolu bégeleen koo bége, doonte tey ñàkkul ngeen nekke njàqare ab diir, ndax ay nattu nattu. ⁷ Yooyu nattu, ni sawara di natte wurus, ni lay natte seen déggutey ngëm, te ngëm a gën wurus fuuf, nde wurus day jeex. Su ko defee seen ngëm gu déggu jural leen ag cant, ak daraja ak teraanga, bés bu Yeesu Almasi feeñee. ⁸ Moom mooy ki ngeen gisul te sopp ko. Tey fi tey gisuleen ko, waaye gëm ngeen ko, ba tax leena bég lool, mbég mu màgg mu làmmiñ manula tudd, ⁹ ndax yeena ngi jot ci yool bi ngëm di yóotu, te mooy texe.

¹⁰ Googu texe, yonent ya jottli woon waxyub seen yiw wi leen dikkal, niir nañu ko, càambar ko. ¹¹ Gëstu nañu jan jamono, ak yan xew-xew la Noowug Almasi ga nekkoon ci ñoom, tegtale woon. Mooy ba Noo gay seede lu jiitu, coonoy Almasi, ak ndam ya cay topp. ¹² Yonent yooyu, xamalees na leen ne du seen njariñal bopp lañuy liggéeyal xibaar boobu, xanaa yeen. Ñi leen agge xibaar bi tey ñoo di ñiy waare xibaaru jàmm bi ci dooley Noo gu Sell, gi ñu yebale asamaan, te muy mbir mu malaaka yi sax, noon siiwa nemmiku.

Sellal moo warj

¹³ Kon nag teewlooleen seen xel, te ànd ak seen sago, te ngeen wékk seen jépp yaakaar ci yiw wa ñu leen di dikke kera

bu Yeesu Almasi feeñee. ¹⁴ Gannaaw gone yu dégg ndigal ngeen, buleen toppati seen xemmemtéefi bakkan ya woon, ba ngeen xamulee. ¹⁵ Waaye ni ki leen woo selle, yeen itam nangeen selle noonu ci seen mboolem jéfin. ¹⁶ Ndax kat bindees na ne: «Sell-leen, ndax man ku Sell laa†.»

¹⁷ Gannaaw nag kiy àtte nit ku nekk ci ay jéfam te amu ci xejj ak seen, Baay ngeen koy wax, sàllooleen koo ragal, seen diirub ngan ci kaw suuf. ¹⁸ Xam ngeen ne yéf yuy wéy yu mel ni xaalis mbaa wurus, du moom lees leen jote ci seen dundinu neen wa ngeen donne ca seeni maam, ¹⁹ waaye seenug njot moo di deretu Almasi ju jafe, ji taxawe deretu xar mu sikkul, gàkkul. ²⁰ Bu yàgg, ba àddina sosoogul la Yàlla tuddaloon Almasi loolu, waaye léegi ci mujug jamono jii la ko Yàlla feeñal ngir yeen, ²¹ ñi Almasi tax ngeen gëm Yàlla. Te Yàllaa ko dekkal, may ko ndam, ba tax Yàlla di ki ngeen gëm, yaakaar ko.

²² Kon nag gannaaw setal ngeen seen xol, ndax dégg gi ngeen déggal, ba tax ngeen am cofeel gu mucc jinigal, ci bokki gëmkaat ñi, nangeen soppantee xol bu set, cofeel gu mat sékk. ²³ Ndax kat dangena judduwaat, te jiwu wi ngeen judduwaate mooy kàddug Yàlla giy dund te sax dàkk; du jiwu wuy yàqu, waaye mooy jiwu wu dul yàqu mucc. ²⁴ Ndax bindees na ne:

«Bépp boroom suux, nim ñax la mel, mboolem darajaam mel ni tóor-tóoru àll, ñax ma wow, tóor-tóor ma ruus.

²⁵ Waaye kàddug Boroom bi mooy sax ba faww†.»

Kàddu googu moo di xibaaru jàmm bi ñu leen agge.

2

Almasi mooy kenug mbooloom gëmkaat ñi

¹ Kon nag baleen mboolem xeetu mbon, ak mboolem njublan, ak jinigal, ak kfiñaan, ak mboolem xeetu yàq der. ² Ni liir buy doora juddu yàkkamtee nàmpe, ni ngeen wara yàkkamtee nàmp soow mu set miy Kàddug Yàlla. Mooy tax ngeen màgg ci seen dundug texe, ³ gannaaw mos ngeen ci mbaaxug Sang bi.

⁴ Dikkleen ci moom, mooy doj wuy dund. Nit ñee ko beddi moos, waaye Yàllaa ko fal, fonk ko. ⁵ Te yeen itam yeen ay doji céslaay yuy dund, doj yi Noo gi tabaxe kërug Yàlla, ñeel liggéeyu carxal gu sell, ngir ngeen di ko jébbal ay sarax yu Noo gi

* 1:1 1.1 Dafa mel ni, ñi gëm Almasi ci bànni Israyil la wax, te ñu dëkk ci diiwaan yooyu. Juróomi diiwaan yooyu yépp, réew mi ñuy wax Tirkii tey, ci lañu bokkoon. † 1:16 1.16 Seetal ci *Sarxalkat yi* 19.2. ‡ 1:25 1.24-25 Seetal ci *Esayi* 40.6, 8.

rafetlu, sarax yu Yàlla nangu ndax Yeesu Almasi. ⁶ Moo waral lii dikk ci Mbind mi: «Maa ngii di dēj fi Siyon, aw doju doorukaay, doju tànnéef wu gànjare.

Wii doj, ku ko wéeroo, doo rus mukk*.»

⁷ Kon nag yeen ñi gëm, yeen la gànjar gi ñeel. Waaye ci ñi gëm, nag:

«Moo di doj wa tabaxkat ya beddi woon, te mu mujj di doju coll wi†.»

⁸ Te it:

«Mooy doj wuy fakktale, di xeer wuy daaneel‡.»

Ñoo ko fakkastaloo nde ñoo gëm, kàddu gi, te it loolu la leen dogal ba séddoon.

⁹ Waaye yeen nag yeen ay giir giy tànnéef, yeenay sarxalkati Buur, yeen ay askan wu sell, yeen ay xeet wi ñu jot, ngir ngeen biral jaloore yu wéet yi ñeel ki leen woo, génnee leen cig lëndëm, indi leen ci leeram gu yéeme. ¹⁰ Yeen ñi dul woon sax aw xeet, démb, tey yeen ay xeet wi Yàlla ñoñoo§; dajaguleen woon yërmande, waaye tey daj ngeen yërmande.

Liy wàllu gëmkatu Almasi ci àddina

¹¹ Soppe yi, ay gan ngeen, ay doxandéem ci kaw suuf. Kon nag li ma leen di dénk moo di ngeen moyu xemmentéefi bakkan yiy xeex ak ab xol. ¹² Seen dundin ci biir jaambur ñi gëm, rafetal-leen ko, ba su ñu leen waxaloon ne ay defkati lu bon ngeen itam, seen jëf ju rafet lañuy gis, te moom lañuy sàbbaale Yàlla, kera bésuub dikkam.

Déggal-leen njiit yi

¹³ Nangul-leen gépp kilifteef gu tege ci àddina ngir Boroom bi; muy buur bu mag bi gëna kawe, ¹⁴ mbaa boroom dëkk yi diy ndawam, te mu tabb leen, ngir ñu mbugal ñiy def lu bon, te sargal ñiy def lu baax. ¹⁵ Ndax coobarey Yàlla kat moo di ngeen di def lu baax, ba wedamal nit ñu ñakk bopp ñi xamul dara. ¹⁶ Ay gor ngeen, waaye jaami Yàlla ngeen. Kon buleen taafantoo li ngeen diy gor ba def lu bon. ¹⁷ Népp nag ngeen di teral; mbooloom gëmkat ñi, soppelen leen; Yàlla, ragal-leen ko; te buur, teral leen ko.

Nanu muñ coono, roye ko Almasi

¹⁸ Yeen jaam yi, nangul-leen te weg wegeel gu mat sëkk seeni sang, te du sang yi baax te lewet donj, waaye ñu wex ñi itam ci lañu. ¹⁹ Ndax nit ki su séddee Yàlla ab cér, ba tax mu muñ tiis ak coono bu ko yoon tegul, loolu aw yiw la. ²⁰ Muñ ay dóor yu la fekk tooñ, ana lu ciy ndam? Waaye

soo muñee coono boo daj ngir lu baax loo def, loolu de aw yiw la fa kanam Yàlla. ²¹ Ci loolu sax lañu leen woo, ndax Almasi itam sonnal na leen, te moo leen bàyyeel ab royukaay, ngir ngeen jaar ciy tãnkam.

²² «Moo bàkkaarul, fenul*.»

²³ Saaga nañu ko te feyuwul, daj na coono te tēkkoowul, waaye boppam la dénk kiy àtte dēgg. ²⁴ «Moom ci boppam moo gaddu sunuy bàkkaar, moo ko tegoo ci yaramu boppam ca bant ba,» ngir nu deeyal bàkkaar te dundal njub; «moom mooy ki ngeen wére ci ay góomam†.»

²⁵ «Yeena réeroon niy xar‡,» waaye délsi ngeen tey ci seenub sãmm, seen wat-tukatub xol.

3

Jëkkër sang la, jabar di nawle

¹ Naka noonu yeen jigéen ñi, nangul-leen seen jëkkër, ngir jëkkër ju ci nanguwula gëm kàddu gi it, mana gindiku te wax du ci am yoon, ngir na jabaram di jëfe, ² ndax day xool ci yeen ak seenug sellal gu ànd ak wegeel.

³ Seen gànjar bumu doon gànjaru biti bu yem ci ay létt yu rafet, ak takkaayi wurus, ak yére yu yànj, ⁴ waaye nay lu laqoo jëmmu biir, nay gànjar gu dul jeex, te mooy lewetaay akug tey, ndax looloo réy njarte fa Yàlla. ⁵ Bu jëkkoon loolu moo doon gànjaru jigéen ñu sell ña yaakaaroon Yàlla te nangul seen jëkkër, ⁶ noonu Saarata déggale woon Ibraayma, naan ko «Sang bi». Yeen jigéen ñi nag, yeen ay doomi Saarata, li feek yeena ngi def lu baax te bañ cee ragal ku leen xupp.

⁷ Naka noonu yeen góor ñi, bàyyileen xel ni ngeen dëkke ak seeni jabar, tey sóoraale néew dooley jigéen. Séddleen leen teraangay nawle, gannaaw yeena bokk wenn yiw wi leen may ngeen dund dēgg. Su ko defee dara du gállankoor seeni ñaan.

Soppanteleen te saxoo baax

⁸ Li may ténke nag moo di yeen ñépp, ngeen mánko, yéngante, béggante ni mu ware ay bokki gëmkat, baaxeenteleen te woyof. ⁹ Lu bon, buleen ko feye lu bon; ay saaga it, buleen ko feye ay saaga. Xanaa ngeen ñaanal leen, feye leen ko, ndax ci loolu lees leen woo, ngir ngeen jagoo barke. ¹⁰ Ndax kat:

«Ku bégga bége bakkanam, fekke bés bu rafet, na lãmmiñam daw lu aay, daw i fen.

* 2:6 2.6 Seetal ci *Esayi* 28.16. † 2:7 2.7 Seetal ci *Sabóor* 118.22. ‡ 2:8 2.8 Seetal ci *Esayi* 8.14. § 2:10 2.10 Seetal ci *Ose* 1.6, 9 ak 2.25. * 2:22 2.22 Seetal ci *Esayi* 53.9. † 2:24 2.24 Seetal ci *Esayi* 53.5. ‡ 2:25 2.25 Seetal ci *Esayi* 53.6.

11 Na daggook lu bon, tey def lu baax, na sàkku jàmm, saxoo ko.

12 Ndax ay gèt la Boroom bi ne jàkk aji jub ñi, te ay noppam la dékk seeni ñaan, waaye Boroom bi, kanamam lay téjal ñiy def lu bon*.»

Na seenug njub waral seen coono

13 Te it su ngeen dee ñu njaxlaf ci def lu baax, ana ku leen di def lu bon? 14 Te sax su ngeen doon jànkoondeeki coono ndax seenug njub, ndokkleee yeen. Buleen am jenn tiitaange ci seeni xuppe, te buleen jaaxle. 15 Waaye Sang Almasi ngeen di sellal ci seen xol, te waajal nu ngeen di tontoo ku leen laaj lu jëm ci yaakaar ji ngeen am. 16 Waaye nay tont lu rafet te ànd akub yar. Saxooleen di jéfe li dalal seenum xel, ba mbir ma ñu leen di baatali, ñooñuy nàññ seen dundin wu rafet wi leen Almasi manloo, gacce rekk lañuy jële ca mbir ma ñu leen di baatali.

17 Coono yu la jéf ju baax yóbbe kat, ndegam da di coobarey Yàlla, moo gën coono yu la jéf ju bon yóbbe. 18 Almasi itam benn yoon la daj coono ndax bàkkaari nit ñi, moom miy ki jub moo leen ko defal yeen ñi jubadi, ngir yóbba leen fa Yàlla; moom lañu rey yaramu suuxam, waaye moo dundaat ci dooley Noo gi. 19 Ci dooley Noo googu la deme ba waari bindeef ya seeni fit tēja†, 20 ñooña gëmadi woon bu yàgg, jant ya Yàllay muñ, di négandiku, te Nóoyin di yett gaal, ga lim bu néew, juróom ñett, mucce woon ca ndox ma. 21 Ndox mooma di misaalub sóobu gi leen musal tey; du sóobu guy dindi tērub yaram, waaye moom ngeen di wuyoo wooteb Yàlla ci xel mu dal, te li leen di misal mooy ndekkittel Yeesu Almasi, 22 mi yéeg asamaan, toog fa ndijooru Yàlla, ki malaaka yeek boroom sañ-sañ yeek boroom doole yi, bokk nekk cig curgaam.

4

Nekkal-leen Yàlla

1 Gannaaw Almasi nag moo daj coonob yaramam, yeen itam gannaayooleen boobu yéene, ndaxte ku daj coonob yaram, tàggoo naak bàkkaar, 2 ngir bañatee topp xemmemtéefi bakkan, xanaa di topp coobarey Yàlla, diir bi ko dese ci kaw suuf. 3 Ndax démb kat yàgg ngeena def coobarey xeet yi xamul Yàlla, ci ay ñaawtéef, ak topp seen bakkan. Dangeen daa màndi ak a xawaare, dèkke naan biiñ, di jaamu tuur yu seexluwu, waaye na fi yem nag. 4 Ña ngeen ci daa

àndal ñoo waaru tey, ba di leen sosol, ndax li ngeen àndatul ak ñoom, daw wuti googu yàqute gu af, 5 waaye ñoo koy layoo ak ki nara àtte ñiy dund, ak ñi dee. 6 Li ñu ci jublu moo di, ñi dee tey sax, ñu àgge leen xibaaru jàmm bi, ngir bu ñu leen àttee àtteb nit ñu seen yaramu suux wara dee sax, du tee ñuy dund tey, ndax Noowug Yàlla.

Bennoo moo war gëmkat ñi

7 Te itam mujug lépp dégmal na; kon nag jiital-leen seenum xel, te ànd ak seen sago, ngir ngeen man di ñaan. 8 Waaye li ci raw mooy soppanteleen cofeel gu mat sékk, ndax cofeel, bàkkaar yu bare lay far. 9 Ganalanteleen te baña jàmbat. 10 Kenn ku ci nekk, may gi ko aw yiw jagleel, na ko taxawoo ñépp. Noonu ngeen di doone ay saytukat yu baax yu yiwu Yàlla wu yaa. 11 Kuy wax, na waxe nu mu jottlee kàddug Yàlla. Kuy taxawoo, na taxawoo ci dooley Yàlla, ngir mágguug Yàlla feeñe ci lépp, ndax Yeesu Almasi, mi yelloo daraja ak kàttan, tey ak èllèg ba faww. Amin.

Bu ngeen di sonn, na Almasi tax

12 Soppe yi, tangooru nattu bi ngeen nekke nii, bumu leen jaaxal ba mel ni lu jaaduwwul moo leen dikkal. 13 Waaye noonu ngeen séddoo ci coonoy Almasi, bégeleen ko, ngir bu ndamam feeñee, ngeen gënatee bég. 14 Su ñu leen jànnée sax ndax turu Almasi, ndokkleee yeen, ndax Noo gu darajawu gi, Noowug Yàlla moo wàcc ci yeen. 15 Waaye rey nit, mbaa sàcc, mbaa def lu bon, mbaa dugg ci yéfi jaambur; bumu waral coonoy kenn ci yeen. 16 Ku sonn ndax li muy gëmkatub Almasi nag, bumu ci rus, na sàbbaal Yàlla kay, ci woowu tur. 17 Ndax kat tey la àtte bi wara tàmbaalee ci waa kër Yàlla. Ndegam ci nun lay tàmbaalee nag, ñi gëmül xibaaru jàmm bu Yàlla, ana fu ñu jëm? 18 Te it: «Aji jub ji, su ko mucc jafee, yéefar bi, bàkkaarkat bi moom, fu mu jëm*?»

19 Kon nag ñiy sonn te coobarey Yàlla tax, nañu dénk seen bopp Yàlla, Sàkk-kat bu wóor bi, te ñuy saxoo def lu baax.

5

Sàmmal-leen Yàlla gëttam

1 Mag ñi ci seen biir di seeni njiit nag, dama leen di ñaax, man miy njiit ni ñoom, di seedebe coonoy Almasi, te di boroom cér ci ndam li nara feeñ. 2 Foral-leen gëtt gi ñu leen dénk. Sàmmleem ko, te bañ koo defe ñàkk peXe, xanaa xol bu tàlli, ni ko Yàlla bégge. Buleen ko defe it kopparty

* 3:12 3.12 Seetal ci Sabóor 34.12-16. † 3:19 3.19 Seetal it ci 2.Piyeer 2.4 ak Yudd 1.6.

* 4:18 4.18 Seetal ci

Kàddu yu Xelu 11.31.

kese, waaye farluleen ci. ³ Buleen jaay kilifteef ñi ñu leen dénk, waaye doonleen ay royukaay ci jur gi, ⁴ ba bu Sàmm bu mag bi feeñee, ngeen jot kaalag daraja gu dul furi.

⁵ Naka noonu yeen ndaw ñi, nangul-leen magi mbooloom gëmkat ñi. Yeen ñépp nag toroxluleen ci seenug jëflante, ndax: «Yàlla, ñi réy lay xeex,

ñi toroxlu, mu may leen aw yiw*.»

⁶ Ci suufu loxol Yàlla bi am doole la leen Yàlla di yékkatee bu jotee, su ngeen toroxloo, ⁷ ci ni ngeen di sippikoo ci kawam, mboolem seenu tiis, nde mooy ki leen tiisoo.

⁸ Àndleen ak sago te teewlu! Seenub noon Tuumaalkat bi, mu ngi ñar ni gaynde, tey wër, di rébb ku mu warax.

⁹ Pastéefu ngëm ngeen di xeexe te xam ne benn coono bi ngeen di daj, moom la mboolem seen bokki gëmkat yi ci àddina di daj. ¹⁰ Te gannaaw bu ngeen sonnee ab diir, Yàlla miy boroom wépp yiw te woo leen ci ndamam lu sax dàkk ndax Almasi, moom ci boppam moo leen di jagal, dooleel leen, dëgéral leen ba ngeen dëju. ¹¹ Moom la kàttan ñeel ba fàww. Amiin.

Piyeer tàggo na

¹² Silwan†, miy mbokkum gëmkat mu wóor, ci sama xalaat, ci ndimbalam laa leen bind kàddu yu gàtt yii, di leen ñaax aka seedeel ne lii kat moo di yiwu Yàlla dëgg. Taxawleen ci bu dëgër.

¹³ Ab nuyoo ñeel na leen, tukkee ca mbooloom gëmkat ma ca Babilon‡ te di ñu ñu taamu ni yeen, tukkee itam ci sama doom Màrk. ¹⁴ Nuyooleen te foonantee ag cofeel. Jàmm ñeel na mboolem yeen ñi gëm Almasi.

* 5:5 5.5 Seetal ci *Kàddu yu Xetu* 3.34. † 5:12 5.12 Silwan mooy turu waa Room, wi Gereg yi naan Silas. Seetal *Jëf ya* 15.22, 40. ‡ 5:13 5.13 Babilon ci waxin mooy Room rekk.

Ñaareelu bataaxal bi Yàlla may Piyeer mu bind ko

¹ Ci man Simon Piyeer*, miy jaamub Yeesu Almasi, di ndawam, ci man la bataaxal bii bawoo, ñeel ñi ñu may ngëm gu njég ga réye ni sunu gos, ci sunu njekku Yàlla, Musalkat bi Yeesu Almasi. ² Aw yiw ak jàmm baawaan na, ñeel leen, ndax xam gu ngeen xam Yàlla, ak sunu Sang Yeesu.

Dëggal-leen wooteb Yàlla

³ Su dee nag mboolem lu dund gu ag jullite laaj, Yàllaa nu ko maye dooleem, ba mu nu xamalee ne darajay boppam, ak jalooreem ju wéet lanu wooye. ⁴ Ci jooju daraja, ak jooju jaloore ju wéet lees nu baaxee ay dige yu réy njég te mäg. Yooyu dige nag, bu ngeen ci jotee, ci ngeen di séddu ci jikkoy Yàlla, gannaaw bu ngeen muccee ci yàqutey àddina, gi xemmemtéefu bakkan waral.

⁵ Loolu ci boppam wara tax ngeen def lu ngeen man, ba dolli ci seen ngëm, njàmbaar; seen njàmbaar, ngeen dolli ci xam-xam; ⁶ seen xam-xam, ngeen dolli ci moom seen bakkan; moom seen bakkan, ngeen dolli ci ag muñ; seenug muñ, ngeen dolli ci ag njullite; ⁷ seenug njullite, ngeen dolli ci bëgg seen bokki gëmkat; bëgg seen bokki gëmkat, ngeen dolli ci cofeel. ⁸ Ndax yooyu jikko kat su ngeen ko amee, ba mu law, dungeen yaafus, dungeen ñakk njariñ nu ngeen xame Sang Yeesu Almasi. ⁹ Waaye yii jikko, ku ko ñakk, daa fekk mu gàtt gis-gis ba far gumba, te fàtte ne dees koo ffootoon ba mu set, teqlikook bàkkaarri dëmbam.

¹⁰ Kon nag bokk yi, nangeen gënatee def lu ngeen man ba dëggal woote bi ñu leen woo, ak taamu gi ñu leen taamu. Su ngeen ko defee kat, dungeen daanu muk. ¹¹ Noonu lees leen di ubbile bunt bu yaa bu ngeen di tàbbee ca nguur gu sax gay sunu moomeelu Sang, sunu Musalkat, Yeesu Almasi.

Yàlla waxyul na yonent yi

¹² Moo waral ma fas yéene di leen dëkke fàttli loolu, doonte xas ngeen koo xam, ba tax ngeen taxaw bu dëgër ci dëgg gi leen nuyusi. ¹³ Li jaadu ci sama gis-gis moo di, li feek may màkkaanoo aw suux, dinaa leen ko fàttli, ngir soñ leen. ¹⁴ Ndax damaa leer, ni ma ko sunu Boroom Yeesu Almasi leeralale, bés bi may summi sama

màkkaanu suux bii dëgmal na. ¹⁵ Waaye dinaa def sama kem-kàttan, ba fu ngeen tollu, di fàttliku mbir yooyu, gannaaw bu ma dëddoo.

¹⁶ Du ay léeb yu xel mu xareñ fent lanu leen xamale woon sunu manoorey Boroom Yeesu Almasi, ak na muy dikke, waaye noo teewe mäggaayam. ¹⁷ Ndax kat moo nangoo ci Yàlla Baay bi, teraanga ak daraja, ba ko baat ba jibalee, bawoo fa Boroom daraja ju yéeme ja ne: «Kii moo di Sama Doom, sama Soppe; ci moom laa ame bänneex.†» ¹⁸ Baat booba jóge asamaan, moom lanu dëgg, ba nu nekkee ak moom ca tund wu sell wa.

¹⁹ Rax ci dolli nu ngeek waxi yonent yi, muy wax ju wóor ju jara gëm, te yeena yey teewlu waxi yonent yi, ni ñuy teewloo ceeñeeru làmp bu tàkke biir lëndëm, ba kera fajar di xar, ba biddiiwu njël feqal seen xol. ²⁰ Waaye li ngeen wara jékka xam moo di amul ci Mbind mi, benn waxyu bu yonent ba ko waxe, firee xelum boppam. ²¹ Ndax kat du genn kàddug waxyu gu masa soqikoo ci coobarey nit, waaye ci xiirtalub Noo gu Sell gi la aw nit daan waxe waxyu bu bawoo fa Yàlla.

2

Sànkute ñeel na jànglekati caaxaan

¹ Waaye na mu ame woon ci askanu bànni Israyil ay yonenti caaxaan, ni lay ame ci seen biir ay sèriñi caaxaan yuy sèrxal ay àlluway sànkute yuy weddi sax Sang bi leen jot, ba yóbbe seen bopp sànkute yu bette. ² Ñu baree leen di topp ci seen nawtéef gu épp, ba tax yoonu dëgg gi tegoo ay saaga ndax ñoom. ³ Seenug bëgge lañuy ràbbe ay kàddu yu ñu leen di koppartoo. Ñooñu la seenub daan yàgga yoot, te seen sànkute nelawul.

⁴ Ndax Yàlla kat, ndegam moo jéggalul malaaka ya bàkkaaroon, xanaa tàbbal leen kàmbu mbugal, wacce leen ay jéngi biir lëndëm gu ne kéruus, di leen nége àtte ba; ⁵ ndegam àddina sa woon it Yàlla jéggalu ko, xanaa Nóoyin ma daan waare njekk tey kenn ci juróom ñetti nit ña mu musal, ba mu walalee mbënn ma ci àddinay nit ñu gëmadi; ⁶ ndegam dëkk ya ñuy wax Sodom ak Gomor it, la mbugale seenub taste, def leen ab dóom, ba def leen misaal mu ñeel aji gëmadiy èllëg, ⁷ te mennum Lóot aji jub ji, di kenn ki mu musal, te mu sonnoon lool, ndax ñaawtéefi nit ñu dëng ñooñu, ⁸ ndax Lóot aji jub ja dëkkoon ci seen biir kat, la mu nekke woon ci biir xolu njubam, moo di naqarlu, ndax jéfi ndéngte ya muy gis, di

* 1:1 1.1 Turu Simon ci làkku gereg mooy Simeyon ci làkku ebré. † 1:17 1.17 Seetal ci Macè 17.5.

ko dégg, bés bu nekk. ⁹ Su demee noonu kay, kon Boroom bi def loolu lépp, xam na nu muy musale nit ñu jullite cib nattu, ak nu muy xaare nit ñu dëng ñi, ngir seen mbugal kera bésu àtte ba.

¹⁰ Rawatina nag boroom xemmemtéefi yàqute, yi topp seen bakkan te faalewuñu genn kilifteef. Ñu fétteeral lañu te bew, ragaluño saaga sax boroom daraja yu kawe ya fa asamaan. ¹¹ Moona malaaka yi épp doole ak manooxe sax, ñemewuñoo yékkati kàdduy saaga yu ñuy sikke yooyu boroom daraja, fa kanam Boroom bi. ¹² Waaye ñoom ñooñu mel ni mala yu amul xel, seen yég-yégi judduwaale jiital leen, te li leen taxa juddu di jàpp leen, rey donj, ñooy saaga lu ñu xamul. Dees na leen rey ni ñuy reye ay mala. ¹³ Loraange lees leen di feye loraange gi ñu sabab.

Seen mbégte mooy xawaarey bëccëg ndarakàmm. Ñooñooy diy gàkk, aki sikk, ndax seen teewaay gacce la ci seen biir yeen, bu ñuy bakk ak yeen bernde, te ca lañuy bânneexoo ay nax. ¹⁴ Seeni gët xoolul lu moy ku ñu jaalool, te duñu bakkaar ba regg muk; ku dëgërul, ñu yóbbaa la. Ñooñu la seenub xol tàggatu ci ag bëgge, mii njurum alkànde! ¹⁵ Ba ñu wàccee yoon wu jub wi lañu lajj topp yoonu Balaam, doomu Bosor*, mi soppoon peyooru njubadi. ¹⁶ Waaye Balaam, ag tooñam tax na ñu femmu ko; ab waruwaay manula wax, te moo waxe baatub nit†, ba dakkal jéfi ndofi yonent booba.

¹⁷ Ñooñooy teen yu dëy, ñooy xiin wu callweer tas, te lëndëm gu fatt taraj di seenub añ. ¹⁸ Kàddu yu réy yu tekkiwul dara lañuy naxee, di fàbbee xemmemtéefi bakkan yu jéggi dayo, ay nit ñu yàggula rëcce ci ñeneen ñu nekk cig réer. ¹⁹ Ag ngoreel lañu leen di dig, te ñoom ci seen bopp, ay jaami yàqute lañu, nde lu la man, yaa dib jaamam.

²⁰ Ndax kat gannaaw bu ñu xamee bu baax sunu Boroom, sunu Musalkat Yeesu Almasi, ba rëcc sobey àddina, bu ñu ca sòobuwaatee ba mu man leen, su boobaa seenug muj moo yées seenug njàlbéen. ²¹ Ndax kat ñàkkoona xam yoonu njub wi sax moo doon gën ci ñoom, xam ko ba noppi, dëddu ndigal lu sell la ñu leen ca àgge woon. ²² Li léeb wii wax te muy dégg, moo leen dikkal: «Xaj waccu, lekkaat ko; te cangaayu mbaam-xuux, teewu koo xalangootee poto-poto.»

3

Bésu Boroom bi du jaas

* **2:15** 2.15 Bosor mooy Bewor ci làkku Yawut yi; Gereg yi ñoo koy wax Bosor. † **2:16** 2.16 Seetal ci *Màndiŋ* ma 22.

¹ Soppe yi, sama ñaareelu bataaxal a ngi nii, te bu ci nekk am na lu ma leen ci fàtli, ngir xiirtal leen ci xalaatin yu set, ² ba ngeen fàtliku kàddu ya yonent yu sell ya jottli woon, ak sunu ndigalu Boroom, sunu musalkat, ndigal la jottlikoo ca ndaw ya ñu yebaloon ci yeen.

³ Li ngeen wara jékka xam moo di bés yu mujj ya, ay niti ñaawlekat ay dikk, di nit ñu topp seen bakkan. ⁴ Ñooñooy naan: «Ki dige woota ñew, ana mu? Ba maam ya nelawee de yàgg na, waaye lépp a ngi wéye na woon ca njàlbéen àddina.» ⁵ Li ñuy fàtte te di ko tey moo di ci kàddug Yàlla la asamaan nekke bu yàgg, te ci kàddoom la suuf bindoo ci ndox, ba génne ci ndox. ⁶ Te ci yooyii la àddina sa woon sànkoo woon ca mbënn ma. ⁷ Waaye asamaanu tey jii, ak suuf, genn kàddug Yàlla googu moo leen yeb cib denc, ñeel sawara, kera bésuub àtte ba, bésu sànkuteb aji gëmadi ñi.

⁸ Soppe yi, leen a ngii, buleen ko umple: benn bés ni junniy at la mel ci Boroom bi; junniy at mel ni benn bés ci moom. ⁹ Du caageenu yeexe gu Boroom bi yeexe dige ba, noonu ko ñenn ñi fooge ag yeex. Yeen la muñal kay, ndax buggul yeen sànkoo, xanaa ñépp dem ba tuub. ¹⁰ Waaye bésu Boroom bi nib sàcc lay dikke. Ca la asamaan yi di dëddoo ci biir coow lu réy, lu ko sosoon seey ndax tàng, suuf ak jëf ju ci biiram xoyomu.

¹¹ Gannaaw loolu lépp, noonu lay seeye nag, xamleen bu baax li leen war! Jëfin wu sell akug njullite, ¹² ak yàkkamti bésu Yàlla ba, di jéfe li koy taxa gaawa dikk, ba asamaan yi lakk ba jeex, lu ca jëmmu lakk ba seey. ¹³ Waaye asamaan su bees ak suuf su bees sa njub di dëkki bu keroogee, moom lanuy séentu, na nu ñu ko dige woon.

¹⁴ Kon nag soppe yi, li feek ngeen di séentu loolu, defleen seen kem-kàttan, ba bésuub keroog fekk leen ci jàmm, te ngeen baña am benn gàkk, mbaa sikk ci gis-gisu Yàlla. ¹⁵ Sunu Boroom nag, ag muñam, jàppleen ne moo dig mucc, noonee leen ko sunu soppe, mbokk mi Póol binde woon ci xel mu rafet mi ñu ko baaxe. ¹⁶ Loolu la bind ci mboolem bataaxal yi mu waxe ci moomu mbir, te mu am ci ponk yu jafee xam, ba ñi dese am njàng te seenum xel toogadi, di walbati waxam, ni ñuy def ak yeneen bind yépp, ba far sànk seen bopp.

¹⁷ Kon nag yeen soppe yi, gannaaw xam ngeen loolu ba noppi, wattuleen bala leena réeraangey moykati yoon yi yóbbaaale, ba yolomal seenub taxawaay. ¹⁸ Waaye

màggleen ci wàllu yiwu sunu Boroom,
sunu Musalkat Yeesu Almasi, ak ci wàllu
xam-xam bu ngeen ko xam. Ndam ñeel
na ko tey, ba kera bés bu sax dàkk. Amiin.

Bataaxal bi Yàlla may Yudd mu bind ko

¹ Ci man Yudd miy jaamub Yeesu Almasi, di raku Yanqóoba, ci man la bataaxal bii bawoo, ñeel leen yeen ñi ñu woo, yeen ñi Yàlla Baay bi sopp, te sàmmal leen Yeesu Almasi. ² Yërmande ak jàmm ak cofeel baawaan na, ñeel leen.

Weddi Yàlla amul ag muj

³ Soppe yi, yàkkamti woon naa leena bind ci mbirum mucc gi nu bokk, waaye fàww ma bind leen, ngir ñaax leen ci xeexal yoonu ngëm, wi Yàlla xasa dénk ñu sell ñi, benn yoon ba fàww. ⁴ Ndaxte ñenn a ngi ñu ñu yàgga bind seenub àtte, te ñoo yoxoosu ci seen biir, di ñu ñeme Yàlla; ñooy taafantoo yiwu Yàlla ngir yoonal ag yàqute, di weddi Buur biy kenn, te di sunu Boroom Yeesu Almasi.

⁵ Doonte xam ngeen loolu lépp ba noppi, dama leen di fàttli rekk ne Boroom bi moo jékka musal ñoñam, génne leen réewum Misra, te gannaaw gi moo raafal ña gëmul woon ca ñoom. ⁶ Te it malaaka ya yemul woon ca daraja ja ñu amoon, xanaa wacc seen dëkkuwaayu bopp, Yàlla moo leen denc ci lëndëm gu ne kërnuus, yeewe leen buum yu dul deñ, ngir àtteb bés bu mag ba. ⁷ Naka noonu itam Sodom ak Gomor, ak dëkk ya leen wër, ñoo yebu woon ci powum séy, ak jaxasoo gu woroo ak bindub judduwaale, ba ñu def leen misaal, ñeel ña nara tegoo mbugalum sawara wu sax dàkk.

⁸ Géntkat yii itam noonu rekk lañuy sobeele seen yaramu bopp, boole ci di sofental kilifteef, ak di saaga boroom daraja ya fa asamaan. ⁹ Moonte Mikayel, may kilifag malaaka sax, ba muy xëccoo ak Seytaane néewub Musaa, di wàqante ak Seytaane, taxul mu ñeme woon koo sikk ba boole ciy saaga. Da ko ne rekk: «Yal na la Boroom bi mbugal!» ¹⁰ Waaye nit ñii de, lu ñu xamul lañuy saaga, te xam-xam yi leen seen bindu judduwaale xamal, ni ay rabi àll di xame, ci lañuy far yàqoo.

¹¹ Ngalla ñii! Ñoo jaare yoonu Kayin; ñoo lajj, topp Balaam cig réeram ngir ag peyoor; ñoo diijjat ba sànkú ni Kore*.

¹² Ñooñooy gakkal seen jataayu lekk yi gëmkat ñiy bokk, di ñóox te amuñu ci jenn jom; ñooy xiin yu naaxsaay yu ngelaw li yóbbu; ñooy garab yu dee ñaari yoon, du meññ waxtoom, reen ya buddiku. ¹³ Ñooy

gannaxi géej gu sàmbaraax, di gëç seen puuriti gâce; ñooy biddiww yu faç di taxawaalu, te lëndëm gu ne kërnuus di cër bu ñu leen sédde ba fàww.

¹⁴ Enog†, juróom ñaareelu maam ma gannaaw Aadama, ñooñu la jottli woon waxyu bu leen dal, ne: «Boroom baa ngii dikk, ànd ak ay junniy junneem ñu sell, ¹⁵ ngir àtte ñépp, ba tiñal mboolem yéefar yi, ndax mboolem nu yéefare ni ñu jéfe seen jéfi yéefar, ak mboolem kàddu yu ñaaw yi bàkkaarkati yéefar yi teg cib deram.» ¹⁶ Ñooñooy di ñaxtu ak a jàmbat, te topp seen bakkan; kàdduy damu yu réy ay jibe seen gëmniñ, te ñooy jay ñi ñu yaakaare njariñ.

Góor-góorluleen

¹⁷ Waaye yeen samay soppe, fàttlikuleen la ndawi sunu Boroom Yeesu Almasi waxoon lu jitu. ¹⁸ Nu ne leen: «Mujug jamono, dina am ay ñaawlekat yu topp seen bakkan, wéye seen kéefar.» ¹⁹ Ñooñu ñooy féewalekat yi, ñoo topp seen bindu judduwaale, te Noowug Yàlla nekkul ci ñoom. ²⁰ Waaye yeen samay soppe, sam-puleen ba dëgër ci seen yoonu ngëm wu sell wee sell, te ngeen di ñaane ci Noo gu Sell gi. ²¹ Fexeleen ba des ci biir cofeelu Yàlla, tey séentu sunu yërmandey Boroom Yeesu Almasi, ngir ag texe gu sax dàkk. ²² Ñiy nàttable, ñeewanteleen leen, ²³ ñii ngeen wallu leen, foqatee leen ci sawara, ña ca des, ngeen yërëm leen yërmande ju ànd akug ragal, ba far seexlu ab turki bu seen yaram sobeel ndax seeni bàkkaar.

Cant ñeel na Yàlla

²⁴ Ki leen mana aar ci bépp jéll, ba taxawal leen fa muy teewejee darajaam, te fekk leen ñàkk sikk, seen mbég mat sékk, ²⁵ Yàlla miy kenn, sunu Musalkat, ci sunu ndimbalal Sang Yeesu Almasi, daraja ak mággaay ak kàttan ak sañ-sañ ñeel na ko, démb ak tey ak èllég, ba fàww! Amiin.

* 1:11 1.11 Kayin: seetal ci *Njàlbéen ga* 4.8. Balaam: *Màndij ma* 22.7-35; 31.16. Kore: *Màndij ma* 16.

† 1.14 Enog: seetal ci *Njàlbéen ga* 5.21-24.

Kàdduy Waxyoo ngi, ñeel Yowaan ci biir Peeñum Almasi Yeesu

Ubbite gi

¹ Lii peeñum Yeesu Almasi la, mu ko Yàlla jox ngir mu won ay jaamam yenn xew-xew yu dëgmal. Malaakaam la yebal ci Yowaan ngir xamle ko. ² Yowaan moo seede mboolem li mu gis, te mu jëm ci kàddug Yàlla ak seedes Yeesu Almasi. ³ Ndokklee képp ku jàng ak mboolem ñi déglu yii kàdduy waxyu, tey sàmm li ñu ci bind, ndaxte waxtu wi jege na.

Ab nuyoo ñeel na juróom ñaari mboooloy gëmkat

⁴ Lii mu ngi tukkee ci man Yowaan, ñeel juróom ñaari mboooloy gëmkat ña ca diiwaanu Asi. Na leen yiw ak jàmm ñeel, tukkee fa Ki masa Nekk, Ki Nekk, di Kiy Dikk, tukkee it fa boroom juróom ñaari noo ya* fa kanam ngànguneem†, ⁵ tukkee itam fa Yeesu Almasi, seede bu wóor bi, moom taaw bi†, ki jékka dekki, jóge ci ñi dee, di kilifay buuri kaw suuf.

Moom mi nu sopp, yiwee nu deretam, ba nu teqlikook kilifteefu sunuy bàkkaar, ⁶ ba noppi def nu nuy askanu sarxalkati Buur Yàlla Baayam§, na ko daraja ak kàttan ñeel tey ak èllëg ba fàww. Amiin.

⁷ Mu ngoogu di dikk, indaale niir yi, te ñépp a koy teg bët, ba ca ña ko jamoon sax, te giiri kaw suuf yépp ay jooy ndax moom. Noonu la moos. Amiin.

⁸ «Man, maay Alfa, di Omega*», la Boroom bi Yàlla wax, moom Ki masa Nekk, Ki Nekk, di Kiy Dikk èllëg, te di Aji Man ji.

Yowaan am na peeñu ca dunu Patmos

⁹ Man Yowaan seen mbokk, mi séddook yeen nattu ak barkeb nguurug Yàlla, ak muñ gi ci Yeesu, maa nga woon fa ñu ma toxaloon, ca dun ba ñuy wax Patmos. Li ko waral di sama waare ci kàddug Yàlla ak seedeel Yeesu. ¹⁰ Maa nekkoon ci biir Noowug Yàlla benn bésub Sang bi, ma dégg ci sama gannaaw baat bu xumb nig liit. ¹¹ Mu ne: «Mboolem loo gis, bind ko cib téere, nga yónnee ko juróom ñaari

mboooloy gëmkat ña ca dëkk ya ñuy wax Efes ak Samirin ak Pergam ak Catir ak Sàrd ak Filadelfi ak Lawdise.»

¹² Naka laa geestu, di seet kuy wax ak man, ma daldi gis juróom ñaari tegukaayi lãmp yu wurus. ¹³ Ca digg tegukaayi lãmp ya, jëmm juy nirook nit† a fa nekk. Ma nga sol mbubb mu tollu ci ndëgguy tãnk yi, takkoo ngañaayal wurus ci dënn bi. ¹⁴ Kawaru bopp baa nga weex tãll, gët ya di tãkk ni sawara, ¹⁵ tãnk ya mel ni xànjir bu yànj bu ñu xelli, baat bay riir ni gannaxi géej. ¹⁶ Ma nga yor ca loxol ndijooram juróom ñaari biddiiv, ab saamaru ñaari ñawka bu ñaw di lange ca gemmiñ ga, xar-kanam baa nga leer nàññ ni jantub njolloor.

¹⁷ Naka laa ko gis, ne dàll daanu ci ay tãnkam ni ku dee. Mu teg ma loxol ndijooram, ne ma: «Bul tiit. Maay Ki Jëkk, di Ki Mujj. ¹⁸ Maay Kiy Dund, maa dee woon, maay dund nii tey ak èllëg ba fàww te maa yor caabyi dee ak njaniiv. ¹⁹ Kon nag bindal li nga gis: Li am nii tey ak itam liy ñew gannaaw lii. ²⁰ Kumpa gi ci juróom ñaari biddiiv yi nga gis ci sama loxol ndijoor, ak juróom ñaari tegukaayi lãmp yu wurus yi, li muy firi mooy: juróom ñaari biddiiv yi ñoo di malaakay juróom ñaari mboooloy gëmkat ñi; juróom ñaari tegukaayi lãmp yi ñoo di juróom ñaari mboooloo yi.»

2

Bindees na waa Efes

¹ «Malaakam mboooloom gëmkat ña ca Efes, bind ko ne ko:

«Lii moo di kàdduy Ki yor juróom ñaari biddiiv yi ci loxol ndijooram, di doxe digg juróom ñaari tegukaayi lãmp yu wurus yi. Mu ne: ² Gis naa say jëf, gis sa liggéey ak sag muñ. Xam naa ne manuloo dekku ñu bon ñi. Seetlu nga ñi tuddoo samay ndaw, ba gis ne ay fen-kat lañu. ³ Xam naa it ne muñ nga te sonn nga moos ngir man te xàddiwoo.

⁴ «Waaye li ma la sikke moo di sa cofeel ga nga jëkke woon, moom nga wacc. ⁵ Kon nag fàttlikul fu kawe fa nga xàwwikoo ba fii, te nga tuub, di jëfe jëf ja nga jëkke woon. Lu ko moy maay dikk ba fi yaw, daldi jële sa tegukaayu lãmp fa bérabam, ndegam tuubuloo. ⁶ Waaye lu baax lii

* 1:4 1.4 juróom ñaari noo ya: seetal ci 4.5 ak 5.6. † 1:4 1.4 ngàngune ma mooy fa buur biy toog. ‡ 1:5 1.5 taaw bi: taaw mooy ki jékka juddu, waaye ab juddu taxul ñuy wax fii. Li Yeesu Almasi jékka dekki ndekkite lu dee toppatul moo tax ñuy wax. Mooy taaw ci kaw darajaam ndax moo suuf ñépp, yilif lépp luy mbindeef, te ci darajaam la ñépp di dekke. § 1:6 1.6 Baayam: seetal ci Luug 3.23, 38. * 1:8 1.8 Alfa, Omega: ci lãkku gereg, alfa moo jëkk ci araf yi, omega mujj ci. Kuy Alfa ak Omega nag moo jëkk, moo mujj. † 1:13 1.13 Seetal ci Dañeel 7.13. * 2:6 2.6 ngérum Nikolas mooy ñiy taafantoo sañ-sañ bu ñu am gannaaw bu ñu gêmee Yeesu, ngir daganal yenn aada yu ñaaw yu mel ni lekk lu ñu sarxal ay tuur, ak powum séy.

nag yaay boroom: ni ma sibe jëfi ngérum Nikolas*, ni nga ko sibe. ⁷ Ku ami nopp kat, na dégg li Noowug Yàlla wax mbooolooy gëmkat ñi. Ku am ndam nag, maa lay may nga lekk ci garabu dund gi ci Ajjana, toolub Yàlla.

Bindees na waa Samirin

⁸ «Malaakam mboooloom gëmkat ña ca Samirin nag, bind ko ne ko:

«Lii moo di kàdduy Ki jëkk te Mujj, Ki dee woon te dekki. Mu ne: ⁹ Gis naa sa coono ak sag ñakk, moona yaaka duunle! Gannaaw loolu it, waxi yaq-der yi tukkee ci ñooñu tuddoo Yawut te duñu Yawut, duñu lenn lu moy jàngub Seytaane, dégg naa ko. ¹⁰ Bul ragal mukkk mitit wi nga nara daj. Seytaanee ngi noonu di dugal kaso ñenn ci yeen, ngir nattu leen. Dingeen am coono diiru fukki fan. Nanga saxoo kóllère ba dee fekk la ci, ma kaalaa la kaalag dund.

¹¹ «Ku ami nopp kat, na dégg li Noowug Yàlla wax mbooolooy gëmkat ñi. Ku am ndam nag doo loru mukkk ci ñaareelu dee gi.†

Bindees na waa Pergam

¹² «Malaakam mboooloom gëmkat ña ca Pergam nag, bind ko ne ko:

«Lii moo di kàdduy Boroom saamar bi ci ñaari ñawka yi. Mu ne: ¹³ Xam naa fa nga dëkk, fa la Seytaane samp nguuram. Teewul nga ñoy ci sama tur te weddiwoon ne man nga gëm ba sax ca fan, ya nit ña reye ca seen biir, Antipas sama seede bu am kóllère ba, foofa Seytaane dëkk.

¹⁴ «Waaye lenn a ngi lu ma lay sikke: yaa ngi uuf foofu ay nit ñuy saxal njànglem Balaam, moom mi doon xiirtal Balag‡ ci tegal Israyil ndëgg-sërëx, ngir ñu lekk ñam wu ñu sarxal ay tuur, ak di gänctu. ¹⁵ Naka noonu itam yaa ngi uuf ay nit ñuy saxal njànglem ngérum Nikolas. ¹⁶ Kon nag tuubal. Lu ko moy maay dikk léegi ba fi yaw, te saamar biy lange sama gémmiñ, moom laay xareek nit ñooñu.

¹⁷ «Ku ami nopp kat, na dégg li Noowug Yàlla wax mbooolooy gëmkat ñi. Ku am ndam nag, maa lay may ci mànn§ mu làqu mi, nga lekk, maa lay jox it aw doj wu weex; doj wu ñu bind tur wu bees wu kenn xamul, ku dul ka ko jot.

Bindees na waa Catir

† **2:11** 2.11 ñaareelu dee gi: seetal ci 20.14 ak 21.8. ‡ **2:14** 2.14 Balaam, Balag: Balaam moo doon mbubboo turu yonent, di fexee rébb bànni Israyil, ngir sàkku alal ci Balag buuru Mowab ci jamonoy Yonent Yàlla Musaa. Seetal ci *Màndinj* ma 22—23. § **2:17** 2.17 mànn moo di ñam wa Yàlla wàcceeloon Musaa ak bànni Israyil, ba ñu gaddaayee Misra, jëm ca réew ma leen Yàlla digoon. * **2:18** 2.18 Doomu Yàlla: tur wii tekkiwul ne Yàlla moo jur Yeesu mook Maryaama. Tekkiwul it ne dañoo maggal nit, ba di ko méngale ak Yàlla. Waaye day tekki ne Yeesu mooy Kàddug Yàlla, mooy màndargam jëmmu Yàlla, ci jikkoom ji géna biire. Ku gis doom, man ngaa xam nu baayam mel. Ku gis Yeesu kon, mana xam nu Yàlla mel.

¹⁸ «Malaakam mboooloom gëmkat ña ca Catir nag, bind ko ne ko:

«Lii moo di kàdduy Doomu Yàlla ji*, ki ay gëtam mel ni sawara wu yànj, ndëgguy tãnkam mel ni xànjār bu ñu jonj. Mu ne: ¹⁹ Gis naa say jëf ak sa cofeel ak sa ngëm ak sa liggéey ak sag muñ. Xam naa ne sa jëf yu mujj moo ëpp jëf yu jëkk ya.

²⁰ «Waaye lenn laa lay sikke: dangaa bàyyi Yesabel, jigéen joojuuy tuddoo yonent, muy jàngleek a réeral sama jaam ñi, ngir ñuy gänctu ak a lekk ñam wu ñu sarxal ay tuur. ²¹ May naa ko ab diir, ngir mu tuub, waaye moo buggula tuub ngänctoom. ²² Kon nag maa ngii di ko rattax cib lal, te ñi mu àndal di gänctu it, maa leen di soob ci mitit wu réy, su ñu tuubul jëf ja ñu koy roye. ²³ Am mbas laay fàdde ay taalibeem. Su ko defee mbooolooy gëmkat ñëpp dinañu xam ne man maay nattu xol ak xel, te maay fey ku nekk ay jëfam.

²⁴ «Waaye yeen ñi ci des ñëpp nag, yeen waa Catir ñi toppul moomu njàngle te jotuleena xam loolu ñu naan xóotey xam-xamu Seytaane, maa ne leen, duma leen séf beneen séf. ²⁵ Noyleen rekk ci li ngeen am, ba kera may dikk.

²⁶ «Ku am ndam nag, ku saxoo jëf ji ma soob, ba kera muj ga, maa lay jox sañ-sañ ci kaw xeet yi:

²⁷ Ni ñuy rajaxee ndaal xandeer, noonu nga leen di sàmmeji yetu weñ, ²⁸ te man ci sama bopp, noonee laa jote sañ-sañ bi ci sama Baay. Maa lay jox itam biddiwi njël. ²⁹ Ku ami nopp kat, na dégg li Noowug Yàlla wax mbooolooy gëmkat ñi.

3

Bindees na waa Sàrd

¹ «Malaakam mboooloom gëmkat ña ca Sàrd nag, bind ko ne ko:

«Lii moo di kàdduy Boroom juróom ñaari noo yu Yàlla yi ak juróom ñaari biddiwi yi. Mu ne: Gis naa say jëf. Dañu laa jappe kuy dund te fekk la dee. ² Teewlul te nga leqli ndes wi ngay waaja deele. Ndax kat, gisuma sa jëf ju mat fa sama kanam Yàlla. ³ Kon nag fàttlikul la nga jotoon te dégg ko; nga sàmm ko, te tuub. Soo teewluwul nag, dinaa ñëw nib sàcc, te doo xam mukkk wan waxtu laa naa jimeet fi sa kaw.

⁴ «Moona am nga foofu ci Sàrd nit ñu néew ñu tilimalul seen mbubb. Nooñooy ànd ak man, sol lu weex, ndax ñoo ko yeyoo. ⁵ Ku am ndam mooy soloo noonu mbubb mu weex, te turam, duma ko far ci téereb dund bi, waaye maa koy wuyul ci sama kanam Baay ak ay malaakaam. ⁶ Ku ami nopp kat, na dégg li Noowug Yàlla wax mboolooy gëmkat ñi.

Bindees na waa Filadelfi

⁷ «Malaakam mbooloom gëmkat ña ca Filadelfi nag, bind ko, ne ko:

«Lii moo di kàdduy ku Sell ki, kiy Dégg, te yor caabiy Daawuda, di tiji te kenn du tëj, di tëj te kenn du tiji. Mu ne: ⁸ Gis naa say jëf. Maa def fi sa kanam, bunt bu tijjiku bu kenn manula tëj. Ndax néew nga doole, waaye sàmm nga sama kàddu te weddiwoow ma. ⁹ Ñenn ci jàngub Seytaane bi, ñooñuy fen, di tuddoo ay Yawut te duñuy Yawut, maa ngii di leen xiirtal, dikklóo leen, sujjóotloo leen fi sa kanam, ba ñu xam ne man maa la sopp. ¹⁰ Gannaaw yaa sàmm sama kàddu, ba muñ ni ma la ko sante, man itam dinaa la sàmm ci waxtuw nattu biy wàccsi ci àddina sépp, ngir nattu waa kaw suuf.

¹¹ «Maa ngi ñëw léegi. Noyal ci li nga yor, ngir kenn baña fékk sa kaalag ndam. ¹² Ku am ndam nag, maa lay def nga doon ag kenu fi sama biir néeg Yàlla, te doo fa génnati muk. Maay bind fi sa kaw sama turu Yàlla ak sama turu dëkku Yàlla, te mooy Yerusalem gu bees, giy wàcce fa kaw, bëyyikoo fa sama Yàlla, maay bind it fi sa kaw sama tur wu yees. ¹³ Ku ami nopp kat, na dégg li Noowug Yàlla wax mboolooy gëmkat ñi.

Bindees na waa Lawdise

¹⁴ «Malaakam mbooloom gëmkat ña ca Lawdise nag, bind ko, ne ko:

«Lii moo di kàdduy Wawu Yàlla ji, Seede bi wóor te déggu, Ndeuy càkktéefu Yàlla ji. Mu ne: ¹⁵ Xam naa say jëf; xam naa ne seddoo, tângoo. Su ma sañoon nga sedd mbaa nga tâng. ¹⁶ Gannaaw nii nga nugge nag; tângoo, seddoo, dinaa la yàbbi. ¹⁷ Gannaaw yaa ngi naan: “Am naa alal, barele naa, soxlaatuma dara,” te yaw xamuloo ni nga toroxe, jara yërëm, ñàkk, gumba, ne dunj, ¹⁸ dama lay digal, nga jënd ci man wurus wu ñu xellee ci sawara ba mu set wecc, ngir nga am alal. Jëndal itam yére yu weex yoo soloo, ba làq sa dunjaaral gu gàccelu gi; ak tuufaay looy tuufoo, ngir nga gis.

¹⁹ «Man, képp ku ma sopp, maa koy jubbanti, yar ko. Kon nag farlul te tuub! ²⁰ Maa ngi nii taxaw ci bunt bi, di fégg. Ku

dégg sama baat, ba ubbil ma, dinaa agsi moos sa néeg, nu bokk reer:

²¹ «Ku am ndam nag, maa lay may nga toog ak man fi sama ngàngune, na ma ame woon ndam, ba toog ak sama Baay fi ngànguneem. ²² Ku ami nopp kat, na dégg li Noowug Yàlla wax mboolooy gëmkat ñi.»

4

Buur Yàlla toog na ca ngànguneem

¹ Gannaaw loolu damaa xool, rekk yem ci bunt bu ubbiku fa asamaan. Ci biir loolu baat ba ma jëkkoona dégg muy wax ak man te mel nig liit, ne ma: «Yéegal fii, ma won la liy topp ci loolu.» ² Ma jekki rekk nekk ci biir Noowug Yàlla. Ci kaw loolu, yemuma lu moy ci am ngàngune mu tege ca asamaan, mu am ku toog ca ngàngune ma. ³ Meloom a ngay niru peru jàspé ak peru sarduwan, ag xon gu mel ni peru eméródd, wër ngàngune ma. ⁴ Yeneen ñaar fukki gàngune ak ñeent a ko wër, ñaar fukki mag ak ñeent toog ca gàngune ya. Ña nga sol mbubb yu weex, ay kaalay wurus tege ca seen bopp. ⁵ Ay melax aki kàddu aki dënu ñooy bawoo ca ngàngune ma, juróom ñaari jumi sawara di tàkk fa kanam ngàngune ma, jum ya di juróom ñaari noo yu Yàlla yi. ⁶ Fi janook ngàngune mi lu mel ni géju kiristaal, leer nàññ. Fi wër ngàngune mi ci wet gu nekk, ñeenti bindeef a ngi fi, fees aki bët ci kanam ak ci gannaaw. ⁷ Mbindeef mu jëkk maa ngi mel ni gaynde, ñaareelu mbindeef mi mel niw yëkk, ñetteelu mbindeef mi ame kanamu nit, ñeenteel ba mel ni jaxaay juy naaw. ⁸ Ñeenti bindeef yi am nañu ku nekk juróom benni laaf, fees aki bët ba daj, biir ak biti, te guddi ak bëccég duñu selaw, xanaa naan:

«Kee sell, Kee sell, Kee sell,
Key Boroom bi Yàlla Aji Man ji,
Kee masa Nekk, Kee Nekk, Key Dikk.»

⁹ Saa su bindeef ya di mággal ak a teral ak a sant Boroom toogaayu ngàngune miy dund ba fàww, ¹⁰ ñaar fukki mag ñeek ñeent ne gurub sukk fi kanam ki toog ci ngàngune mi, di ko sujjóotal, moom miy dund ba fàww. Ñuy sànni seeni kaala fi kanam ngàngune mi te naan:

¹¹ «Yàlla sunu Boroom, yaa yeyoo daraja ak teraanga ak kàttan,
ndaxte yaa sàkk lépp,
lépp lu am, yaw la soob,
nga sàkk ko.»

5

Gàttub Yàlla jël na téere ba

¹ Ci biir loolu ma gis ci loxol ndijooru ki toog ci ngàngune mi, taxafub téere bu

ñu bind biir ak biti, tay ko juróom ñaari tayu. ² Ma gis malaaka mu am doole, muy yéenee baat bu xumb, naan: «Ana ku yeyoo tàyyi tayuy téere bii, ubbi ko?» ³ Du kenn nag ci asamaan mbaa kaw suuf, mbaa biir suuf, ku manoonaa ubbi téere bi, ba yër ko. ⁴ Ma jooy jooy yu metti, ndax giseesul kenn ku yeyoo ubbi téere bi, ba yër ko. ⁵ Kenn ci mag ñi ne ma: «Bul jooy. Ma ne, Gayndeg giirug Yuda, njebbital Buur Daawuda daan na. Mooy ubbi téere beek juróom ñaari tayoom.»

⁶ Ma daldi gis gätt bu mel ni lu ñu rendi, mu taxaw fi digg ngàngune mi, ñeenti bindeef yeek mag ñi yéew ko. Gätt bi juróom ñaari béjjén la am, ak juróom ñaari bêt, di juróom ñaari noowi Yàlla, yi ñu yebal ci àddina sépp. ⁷ Gätt bi dikk, jël téere bi ci loxol ndijooru ki toog ci ngàngune mi. ⁸ Ba mu jélee téere bi, ñeenti bindeef yi ak ñaar fukki mag ñeek ñeent ne gurub sukk fi kanamam, ku nekk yor xalam ak andi wurus yu fees ak cuuraay, cuuraay li di ñaani aji sell ñi.

⁹ Ñuy woy nag woy wu yees, naan:

«Yaa yeyoo jël téere bi,
tàyyi tayu yi,
ndax yaw lañu rendi,
te sa deret nga jote, ngir Yàlla,
ay niti gépp giir ak wépp lammiiñ ak wépp
xeet ak wépp askan.

¹⁰ Yaa leen def ñu doon nguurug sarxalkat yi, ñeel sunu Yàlla,
te dinañu nguuru ci àddina.»

¹¹ Ma xoolaat, daldi dégg baati malaaka yu bare, ñu yéew ngàngune mi ak bindeef yi ak mag ñi, seen lim di ay junni, ba ci junniy junni. ¹² Ña ngay àddu ca kaw, naan:

«Gätt bi ñu rendi woon moo yeyoo kàttan
ak alal,
yeyoo xel ak doole,
moo yeyoo teraanga, yeyoo darajaak cant.»

¹³ Ba loolu amee mboolem dundooti asamaan, ak kaw suuf, ak biir suuf, ak géej, ak mboolem li ci seen biir, ñoom ñépp di wax, may dégg, naan:

«Ki toog ci ngàngune mi ak Gätt bi,
nañu jagoo cant ak teraanga, ak darajaak
kàttan, tey ak èllég ba fàww.»

¹⁴ Ñeenti bindeef yi ne: «Amin.» Mag ñi ne gurub sukk, sujjóot.

6

Gätt bi tàyyi na tayu yi

¹ Ma gis nag Gätt bi di tàyyi genn ci juróom ñaari tayu yi. Ci biir loolu ma dégg kenn ci ñeenti bindeef yi àddoo baat buy riir ni dënu, ne: «Dikkal!» ² Ma xool rekk, gis fas wu weex, gawaram yor ag fitt. Ñu

jox ko kaala, mu daldi dem yoonu daan-kat, ngir daani.

³ Ba Gätt bi tàyyee ñaareelu tayu gi, ma dégg ñaareelu mbindeef mi ne: «Dikkal!»

⁴ Weneen fas ne jimeet, di wu xonq, ñu may gawaram mu jële jàmm ci kaw suuf, ngir nit ñi di reyante ci seen biir. Ñu jox ko saamar bu mag.

⁵ Ba mu tàyyee ñetteelu tayu gi, ma dégg ñetteelu mbindeef mi ne: «Dikkal!» Ma xool rekk, gis fas wu ñuul, gawaram yor ab màndaxekaay. ⁶ Ma dégg lu mel ni baat bu jibe ci diggante ñeenti bindeef yi, ne: «Benn kilo peppu bele, peyu bëccégu lëmm; benn kilo peppu lors, peyu bëccégu lëmm, te diw ak biñ, bu ko kenn yàq.»

⁷ Ba Gätt bi tàyyee ñeenteelu tayu gi, ma dégg ñeenteelu mbindeef mi ne: «Dikkal!» ⁸ Ma xool rekk, gis fas wu gel, turu gawaram di Dee, njaniiw topp ci moom. Ñu jox ko sañ-sañ ci ñeenteelu xaaju àddina, ngir muy bóome saamar akub xiif, di bóome mbas ak ay rabi àll.

⁹ Ba mu tàyyee juróomeelu tayu gi, ma gis ci suufu sarxalukaay bi, bakkani ñi ñu bóom ndax kàddug Yàlla ak seede si ñu ci seede. ¹⁰ Ñu àddu ca kaw ne: «Buur bu sell, bu dégg bi, loo deeti xaar ci àtte waa àddina, feyul nu sunu deret ji tuuru?» ¹¹ Ñu jox ku ci nekk mbubb mu weex, ne leen ñu négandiku tuuti, ba kera seeni bokk ak ñi ñu bokkal liggéey bi, te ñu war leena bóom ni ñoom, ñépp dikk, ba lim bi mat.

¹² Ma gisati bi muy tàyyi juróom benneelu tayu gi, suuf daldi yèngu bu baaxa baax, jant bi ñuul kukk, weer wi wépp xonq curr ni deret. ¹³ Bididiw yi faqe asamaan, wadd ci suuf, ñu doom yu xaay yu ngélén gësëm seen ndey. ¹⁴ Asamaan si dellu ni basañ gu ñu taxañ, tund yépp ak dun yépp toxoo fa ñu nekkoon. ¹⁵ Ba mu ko defee buuri àddina yeek kilifa yeek njiiti gàngoor yeek boroom alal yeek boroom doole yeek, mboolem jaam yeek gor ñi, ñépp làquji ci xunti yeek doji tund yi. ¹⁶ Ñu ne tund yeek doji yi: «Daanuleen ci sunu kaw, làq nu kanamu ki toog ci ngàngune mi ak sànjum Gätt bi, ¹⁷ ndax seen bésub sànj bu mag taxaw na, ana ku ko àttan?»

7

Jaamukati Yàlla yi mucc nañu

¹ Gannaaw loolu ma gis ñeenti malaaka yu taxaw ci ñeenti colli àddina. Ña nga téye ñeenti ngelawi àddina, ngir ngelaw baña wale fenn; du ci jéeri, du ci géej, du ci genn garab. ² Ma gis meneen malaaka, mu yéege penku, yore torluwaayu Yàlla jiy dund. Mu àddu ca kaw, wax ak ñeenti

malaaka ya ñu mayoon ñu yàq géej ak jéeri, ³ ne leen: «Buleen yàqagum jéeri ji ak géej gi ak garab yi, li feek torluwunu ci jéwi ñiy jaamu sunu Yàlla, màndargaale leen.»

⁴ Ma dégg limub ña ñu màndargaale torluwaay ba; ñuy téeméer ak ñeent fukk ak ñeenti junni (144 000), bawoo ci mboolem giiri bànni Israyil:

⁵ Giirug Yuda, fukki junneek ñaar (12 000) lañu ci màndargaal,

giirug Ruben, fukki junneek ñaar,

giiru Gàdd, fukki junneek ñaar,

⁶ giirug Aser, fukki junneek ñaar,

giirug Neftali, fukki junneek ñaar,

giirug Manase, fukki junneek ñaar,

⁷ giirug Simeyon, fukki junneek ñaar,

giirug Lewi, fukki junneek ñaar,

giirug Isaakar, fukki junneek ñaar,

⁸ giirug Sabulon, fukki junneek ñaar,

giirug Yuusufa, fukki junneek ñaar,

giirug Beñamin, fukki junneek ñaar.

Mbooloo mu réy am na ndam

⁹ Gannaaw loolu ma jekki gis mbooloo mu réy mu kenn manula waññ, ñu bawoo ci askan yépp ak giir yépp ak xeet yépp ak làmmiñ yépp. Ñu ngi taxaw fi kanam ngàngune mi ari Gàtt bi, sol mbubb yu weex, ñàbb ay cari garabi tàndarma. ¹⁰ Ña ngay àddu ca kaw, naan:

«Texee ngi fi sunu Yàlla, ki toog ci ngàngune mi,

ak ci Gàtt bi!»

¹¹ Malaaka yépp a nga taxaw, yéew ngàngune ma ak mag ñaak ñeenti bindeef ya. Ñu ne gurub sukk, dèpp seen jé fa kanam ngàngune ma, sujjóotal Yàlla, ¹² ne: «Amiin! Na sunu Yàlla jagoo màggal ak daraja ak xel ak cant ak teraanga ak kàttan ak doole, tey ak èllég ba fàww. Amiin!»

¹³ Ci kaw loolu kenn ci mag ñi ne ma: «Boroom mbubb yu weex yi, ñooy ñan ak fan lañu jóge?»

¹⁴ Ma ne ko: «Sama sang, loolu de xanaa yaa ko xam.» Mu ne ma: «Ñoo di ñi jóge ca nattu bu réy ba. Fóot nañu seeni mbubb, ba weexal ko ci deretu Gàtt bi. ¹⁵ Loolu moo leen taxa

teew fi kanam ngàngunem Yàlla, di ko jaamoo biir màkkaanam guddi ak bëccëg,

te ki toog ci ngàngune mi moo leen di yiir.

¹⁶ Dootuñu xiif, dootuñu mar.

Dootuñu loru ci jant bi mbaa weneen tangoor,

¹⁷ ndaxte Gàtt bi ci diggu ngàngune mi moo leen di sàmm,

yóbbu leen ca bëti ndoxum dund ma, te Yàllaa leen di fompal wépp rongooñ.»

8

Gàtt ba tàyyi na juróom ñaareelu tayu ga

¹ Bi Gàtt bi tàyyee juróom ñaareelu tayu gi nag, asamaan da ne selaw lu mat genn-wàllu waxtu. ² Ci kaw loolu ma gis juróom ñaari malaaka yi taxaw fi kanam Yàlla, ñu jox leen juróom ñaari liit.

³ Bi loolu amee meneen malaaka dikk, taxaw ci wetu sarxalukaay bi. Mu ngi yor andu cuuraayu wurus. Ñu jox ko cuuraay lu bare, ngir mu boole kook ñaani mboolem aji sell ñi, jooxe ko ci kaw sarxalukaayu wurus bi ci kanam ngàngune mi. ⁴ Saxaras cuuraay laa ngi gillee ci loxol malaaka mi, ànd ak ñaani ñu sell ñi, di yéeg fa Yàlla. ⁵ Malaaka mi jël andu cuuraay bi, tibbe ci sarxalukaay bi ay xal ba and bi fees. Mu daldi koy sànni ci kaw àddina, rekk ag dënu riir, kàddu ràndanj, ag melax tàkk, suuf yëngu.

Liit yi jib na

⁶ Ba mu ko defee juróom ñaari malaaka yi yor juróom ñaari liit yi di waaja liit.

⁷ Malaaka mu jëkk mi wal liitam, tawu doji yuur topp ci, ak sawara wu ànd ak deret, ñu boole lépp sànni ci kaw suuf, ñetteelu xaaju suuf si daldi lakk, ñetteelu xaaju garab yi it lakk, ñax mu naat mépp lakk.

⁸ Ñaareelu malaaka mi wal liitam, mu am lu mel ni tund wu réy wuy tàkk, ñu sànni ko ci géej gi, ñetteelu xaaju géej gi soppiku deret, ⁹ ñetteelu xaaju bindeefi géej dee, ñetteelu xaaju gaal yi yàqu yaxee.

¹⁰ Ñetteelu malaaka mi wal liitam, bid-diiw bu réy buy tàkk nig jum xàwwikoo asamaan, wadd ci kaw ñetteelu xaaju dex yi ak bëti ndox yi. ¹¹ Biddiiw bi Wextan la tudd. Ñetteelu xaaju ndox yépp la wexal, ñu bare naan ci, daldi dee, ndax wextanu ndox mi.

¹² Ñeenteelu malaaka mi wal liitam, mu dal ñetteelu xaaju jant bi, ak ñetteelu xaaju weer wi, ak ñetteelu xaaju biddiiw yi, ba tax seen ñetteelu xaaju leer giim, ñetteelu xaaju bëccëg bi daldi lëndëm, ñetteelu xaaju guddi gi it géna lëndëm.

¹³ Ma xoolaat, daldi dégg jenn jaxaay ju naawe digg asamaan. Mu àddu ca kaw ne: «Wóoy, wóoy, wóoy, musibay waa àddina yiy sababoo ci yeneen baati liit yi ñetti malaaka yi ci des, di waaja liit.»

9

¹ Juróomeelu malaaka mi wal liitam, ma gis, biddiiw bu xàwwikoo woon asamaan, ba wadd ci kaw suuf. Ñu jox ko caabiy kàmbu xóote ba. ² Mu ubbi buntu kàmbu

xóote ba, saxar su mel ni saxaras taal bu mag jolle ca, jant bi ak jaww ji, lépp lëndëm ndax saxaras kàmb gi. ³ Ba loolu amee ay njéeréer génne ci saxar si, daldi tasaaroo ci biir àddina, ñu may leen nag danjar ju mel ni danjaru jànkalaar. ⁴ Ñu ne leen, buñu laal menn um ñax, mbaa genn gancax, mbaa genn garab, xanaa ñu jublu rekk ci nit ñi amul màndargam torluwaayu Yàlla ci seen jë. ⁵ May nañu leen ñu mitital leen diiru juróomi weer, te bañ leena rey, xanaa mitital leen lu tembook mititu fittu jànkalaar. ⁶ Bési kerooq nit ñeey sàkku dee, te duñu ko daj, ñu ne siiwa dee, ndee daw leen.

⁷ Njéeréer yaa ngi nirook fas yu ñu waajal ngir xare, kaalawoo lu mel ni kaalay wurus, seen kanam nirook kanamu nit, ⁸ seen kawar mel ni kawaru jigéen, seeni sell nirook selli gaynde. ⁹ Ñu ngi sol kiiraayi dënn yu mel ni kiiraayi weñ gu ñuul, seen coowal laaf yi mel ni coowal watiiri xare yu bare. ¹⁰ Geen gu am fitt lañu am ni jànkalaar. Danjaru geen googu lañuy mititale nit ñi diiru juróomi weer. ¹¹ Seen buur a leen jiite, di malaakam xóote bi, turam ci ebrë di Abadon, Apolyon ci làkku gereg, (mu firi Yàqkat bi).

¹² Naka la musiba mu jëkk mi jàll rekk, yeneen ñaari musiba dikk, topp ci.

¹³ Ba mu ko defee juróom benneelu malaaka mi wal liitam. Ma dégg baat bu jóge ci ñeenti béjjeni sarxalukaayu wurus, bi ci kanam Yàlla. ¹⁴ Baat bi wax ak juróom benneelu malaaka mi yor liit, ne ko: «Yiwil ñeenti malaaka, ya yeewe ca Efraat, dex gu mag ga.»

¹⁵ Ca lañu yiwi ñeenti malaaka, ya ñu waajaloon ñeel waxtu woowu, ci bés boobu, weer woowu, at moomu, ngir ñu rey ñetteelu xaaju nit ñi. ¹⁶ Limu gawari mbooloo ma doon xareji ñaar téeméeri junni junni la (200 000 000). Maa dégg lim bi.

¹⁷ Nii laa gise ci peeñu mi fas yi ak ñi leen war: ñu ngi sol kiiraay yu xonq ni sawara, baxa ni safiir, te mboq ni tamarax. Boppi fas yaa ngi nirook boppi gaynde, sawara ak saxar ak tamarax di génne ci seen gémmiñ. ¹⁸ Ñetti musiba yooyii, sawara seek saxar seek tamarax biy génne ci seen gémmiñ, daldi rey ñetteelu xaaju nit ñi. ¹⁹ Danjaru fas yaa ngi ci seen gémmiñ ak ci seen geen, ndax seen geen yaa ngi mel ni ay jaan, ami bopp yu ñuy mititalee.

²⁰ Ndesu nit ñi musiba yooyii reyul nag, taxul sax ñu tuub seeni jëf, ba bañatee jaamu ay tuur, ak jëmmei xërëmi wurus ak xaalis ak xanjar ak xeer ak dénk; xërëm yu gisul, déggul, doxul. ²¹ Rax ci

dolli, tuubuñu bóome gi ak ñeengo gi ak powum séy meek càcc gi ñu nekke.

10

Àtte bu mujj ba agsi na

¹ Ci kaw loolu ma gis meneen malaaka mu am doole, muy wacce asamaan, lãmboo aw niir, ag xon tege ci bopp bi, kanam gi mel ni jant bi, tãnk yi mel ni jumi sawara. ² Mu ngi yor ab téere bu ndaw bu ñu ubbi. Mu teg tãnk ndijooram ci géej gi, teg tãnk cãmmoñam ci jéeri ji. ³ Mu xaacu ca kaw, mel ni gaynde guy yëmmu. Naka la xaacu, juróom ñaari dënu jib. ⁴ Naka la juróom ñaari dënu yi jib, may waaja bind, daldi dégg baat bu jóge asamaan, ne ma: «Loolu juróom ñaari dënu yi wax de, gas ko, suul, bu ko bind.»

⁵ Ba mu ko defee malaaka, ma ma gisoon mu ñarale géej geek jéeri ji yékkati loxol ndijooram, jême asamaan. ⁶ Mu giñ ci Kiy dund ba fãww, Ki sàkk asamaan ak li ci biiram, ak suuf ak li ci biiram, ak géej ak li ci biiram. Mu ne: «Négandiku wees na, ⁷ waaye bu bési kàddug juróom ñaareelu malaaka mi taxawee, ba mu tãmbalee wal liit gi, su kerooqee pexem Yàlla miy kumpa dina sotti, na mu ko waxe woon ay jaanam, yonent yi.»

⁸ Ba loolu amee baat, ba ma déggoon, mu bawoo asamaan, dellu wax ak man, ne ma: «Demal jël téere bu ndaw bi ñu ubbi ci loxol malaaka, mi ñarale géej geek jéeri ji.»

⁹ Ma dem ba ci malaaka mi, ne ko mu jox ma téere bu ndaw bi. Mu ne ma: «Jël ko te lekk ko. Dina wex ci sa biir nag, waaye ni lem lay neexe ci sa gémmiñ.»

¹⁰ Ma jël téere bu ndaw bi ci loxol malaaka mi, lekk ko, mu neex ci sama gémmiñ ni lem, waaye naka laa ko wonn, mu wex xàtt ci sama biir.

¹¹ Gannaaw loolu ñu ne ma: «War ngaa waxati ay waxyu ngir xeet yu bare, ak askan yu bare, ak niti lãmmiñ yu bare, ak buur yu bare.»

11

Ñaari seede yi bey nañu seen waar

¹ Ba loolu amee ñu jox ma nattukaay bu mel niw yet, ne ma: «Jógal, natt néeg Yàlla bi ak sarxalukaay bi, te nga waññ ña fay jaamu Yàlla. ² Waaye èttu bitib kër Yàlla gi, bàyyi ko, bu ko natt, ndax ñi dul Yawut lees ko jox, te ñooy déggaate dékk bu sell bi diiru ñeent fukki weer ak ñaar. ³ Dinaa may nag sama ñaari seede yi, ñu biral waxyu diiru junni ak ñaar téeméeri fan ak juróom benn fukk (1 260) yu ñuy sol ay saaku, di ko toroxloo.»

4 Ñaari seede yi ñoo di ñaari garabi oliw* yeek ñaari tegukaayi lãmp, yi taxaw ci kanam Boroom suuf si. ⁵ Ku leen nara lor, sawaraay génne seen gémmiñ, lakk seeni noon. Képp ku leen nara lor, noonu ngay deeye. ⁶ Am nañu sañ-sañu tēj asamaan, ba du taw diiru fan yi ñuy biral waxyu, am nañu itam sañ-sañ ci ndox mi, ngir soppi ko deret, ak sañ-sañu wacceel suuf wépp xeetu musiba, saa su leen soobee.

⁷ Gannaaw bu ñu seedee ba noppi nag, rab wiy jóge ci xóote bi mooy xareek ñoom, daan leen, ba rey leen. ⁸ Seeni néew da naan lareet ci péncum dékk bu mag boobu ñuy misaale turu Sodom mbaa Misra, fa ñu reye woon seen Sang ci bant. ⁹ Diiru ñetti fan ak genn-wáll lañuy weeru, niti wépp xeet, ak gépp giir, ak wépp lãmmiñ, ak wépp askan di seetaan seeni néew, te duñu bàyyi kenn suul leen. ¹⁰ Waa àddina dinañu bége seen dee, di bannexu, di joqlante ay njukkal, ndaxte ñaari yonent yooyu ñoo lakkaloon waa àddina.

¹¹ Waaye bu ñetti fan yeek genn-wáll wéyee, noowug dund giy bawoo fa Yàlla moo leen di solu, ñu jóg, taxaw, tiitaange lu réy daldi jàpp waa ceetaan ma. ¹² Ba loolu amee ñaari seede yi dégg baat bu xumb jibe asamaan, ne leen: «Yéegleen fii.» Ñu yéeg asamaan ci biir aw niir, seeni noon di gis. ¹³ Ca waxtu wa, suuf daldi yéngu lool, ba benn fukkeelu dékk ba màbb. Juróom ñaari junni nit (7 000) dee ci yéngub suuf ba, ña ca des tiit, di sàbbaal Yállay asamaan.

¹⁴ Ñaareelu musiba mi wéy na, waaye kat ñetteel baa ngi nii di ñéw.

Juróom ñaareelu liit ga jib na

¹⁵ Ba mu ko defee, juróom ñaareelu malaaka mi wal liitam, baat yu xumb jibe ca asamaan, ne:

«Léegi nag nguuruq àddina ñeel na sunu Boroom ak Almaseem.

Mooy nguuru ba fãww.»

¹⁶ Ba loolu amee ñaar fukki mag ak ñeent, ña toogoon ca seen ngàngune ca kanam Yàlla, daldi ne gurub sukk, dépp seen jé ca suuf, sujjóotal Yàlla. ¹⁷ Ñu ne:

«Boroom bi Yàlla Aji Man, ji nekk te nekkoon,

nu ngi lay gërëm,

ndax yaa ràngoo sa kàttan gu màgg,

taxawal sa nguur.

¹⁸ Askan yee meroon,

waaye sa mer a dikk tey;

tey jii ngay àtte ñi dee,

yool say jaam, yonent yi,

yool ñu sell ñeek ñi la ragal, mag ak ndaw, tey it ngay sànk ñiy sànk àddina.»

¹⁹ Ci kaw loolu néeg Yàlla bi ci asamaan ubbiku, gaalu kóllèreg Yàlla ga† di feeñ ca biir màkkaanam ma, melax ya tàkk, kàddu yaak dènu ya riir, suuf sa yéngu, tawu doji yuur bu metti daldi sóob.

12

Ninki-nànka ji fexeel na ndaw si

¹ Firnde ju màgg nag moo feeñoon asamaan: Ndaw su lãmboo jant bi, weer wi ronu ndégguy tànk yi, mu kaalawoo fukki biddiww ak ñaar. ² Jigéenu wérul juy matu la. Mu ngi yuuxu ndax mititu mat wu tar. ³ Ci kaw loolu jeneen firnde feeñ asamaan. Du leen lu dul ninki-nànka ju réy, xonq curr, am juróom ñaari bopp ak fukki béjjén, juróom ñaari mbaxanay buur tege ci bopp yi, bopp bu ne, menn. ⁴ Geenam gi daldi buube fa asamaan benn ñetteelu biddiww yi, rattax leen ci suuf. Ninki-nànka jaa ngi taxaw ci kanam ndaw siy matu, ngir bu xale bi juddoo rekk, mu lekk ko. ⁵ Ndaw si nag wasin doom ju góor, te muy ki wara yilif xeeti àddina yépp, di leen jiitee yetu weñ. Ci kaw loolu ñu fèkk doom ja, jàlle fa Yàlla, ca ngànguneem. ⁶ Ndaw si nag daw, ba ca màndinj ma, ci ab rawtu bu ko Yàlla waajaloon, ngir ñu leel ko fa diiru junni ak ñaar téeméeri fan ak juróom benn fukk (1 260).

⁷ Ab xare nag jibe fa asamaan. Mikayel aki malaakaam di xareek ninki-nànka ji, ninki-nànka jeeki malaakaam it di xare, ⁸ ñu néewal leen doole, ba amatuñu fu ñu nekk ci asamaan. ⁹ Ñu xalab ninki-nànka ju réy ja, jaanu cosaan joojee ñuy wax Tuumaalkat bi, di ko wax Seytaane, naxekatu mboolem àddina. Ci kaw suuf lañu ko xalab, mooki malaakaam.

¹⁰ Ci kaw loolu ma dégg baat bu xumb bawoo asamaan, ne:

«Léegi nag texe teew na,

ànd ak sunu kàttanu Yàlla ak nguuram,

ak sañ-sañu Almaseem,

ndax xalab nañu ki daan tuumaal sunu bokk yi,

di leen sosal guddeek bëccég

fi sunu kanam Yàlla.

¹¹ Sunu bokk yee daan ndax deretu Gàtt bi,

ak seen kàddug seede,

te soppuñu seen bakkan ba ragala dee.

¹² Kon nag yaw asamaan, bégal,

* **11:4** 11.4 oliw: garabu oliw dafa xawa mel ni sump, te am doom yu ñuy nal, ngir am ci diw gu ñuy togge, mbaa ñu di ko taaloo. † **11:19** 11.19 gaalu kóllère ga: gaal gi ñuy wax fii waxande la, wu ñu denc àlluwa, ya ñu bind yoonu Yàlla te Yonent Yàlla Musaa jottli ko. Yàlla moo joxoon Musaa àlluway xeer yooyu, bind ca yoon wa lal kóllère ga mu fas ak bànni Israyil.

yaak mboolem ñi ci sa biir!
 Waaye wóoy ngalla yeen gééj ak jéeri!
 yeen, ñi Seytaane wàccaale mer mu tàng
 fi yeen,

ndax xam ne fan yu néew a ko dese.»

¹³ Ninki-nànka ja nag xam ne xalab nañu ko ci kaw suuf, mu ne dann ndaw sa jur doom ju góor ja. ¹⁴ Ñu jox ndaw si ñaari laafi jaxaay ja, ngir mu naaw, récc ninki-nànka ji, dem mändinj ma, ca rawtoom ba ñu koy leele lu tollook ñetti diir ak genn-wáll*. ¹⁵ Ba mu ko defee ninki-nànka ji buusu ndox mu bare ni dex, ndox ma topp ndaw sa, ngir wal ma yóbbaaale ko. ¹⁶ Ci kaw loolu suuf wallu ndaw sa, ña, daldi naan dex, ga gémmini ninki-nànka ja buusu woon. ¹⁷ Ninki-nànka ja mere ndaw sa, daldi dem, xeexi ak ndesu doomam, yi topp santaaney Yàlla tey saxoo seedeel Yeesu. ¹⁸ Mu taxaw nag ca tefesu gééj ga.

13

Ñaari rab yu aay falu nañu

¹ Ci kaw loolu ma gis rab wu génne ci gééj gi, am juróom ñaari bopp ak fukki béjjén, béjjén yi sol fukki mbaxanay buur, béjjén bu ne menn, bopp bu nekk ak tur wuy saaga Yàlla. ² Rab wi ma gis ni segg la mel, tànk yi mel ni yu urs*, gémmini gi mel ni gu gaynde. Ninki-nànka ji jox ko kàttanam ak nguuram ak sañ-sañam bu réy. ³ Benn ci bopp yi nag, rab wi da cee gaañu ba mel ni lu ñu rendi, ba mu dee. Teewul gaañu-gaañu boobu ko waroona rey daldi wér. Waa àddina sépp yéemu, topp ci rab wi. ⁴ Ba loolu amee ñu sujjóotal ninki-nànka ji ndax la mu jox rab wi sañ-sañ bi, di sujjóotal rab wi, naan: «Ana kuy moroomu rab wii, ak ku mana xeex ak moom?»

⁵ Ñu may rab wi nag muy kañu ak a saaga Yàlla, may ko it mu saña wéye noonu diiru ñeent fukki weer ak ñaar. ⁶ Muy tifaar Yàlla ay saaga, di saaga aw turam, ak màkkaanam, ak ñi dèkke asamaan. ⁷ Ñu may ko itam mu xareek ñu sell ñi, duma leen, boole ci may ko sañ-sañ ci kaw niti gépp giir ak wépp xeet ak wépp lámmini ak wépp askan. ⁸ Mboolem waa àddinaa koy sujjóotal, mboolem ñi ñu bindul seen tur ca ndoortel àddina ci téereb dund† bu Gàtt, bi ñu rendi.

⁹ Ku ami nopp kat, na dégg.

¹⁰ Ku wara dem ngallo,
 ngallo nga jëm,
 ku wara deeye saamar,

saamar ngay deeyeji.

Looloo tax ñu sell ñi wara saxoo muñ ak ngëm.

¹¹ Ci kaw loolu ma gis weneen rab wu génne ci suuf, am ñaari béjjén ni ab gàtt, tey wax ni ninki-nànka. ¹² Muy jéfe mboolem sañ-sañu rab wu jëkk wa, ci turu rab wu jëkk wa, di sant suuf ak ñi ko dèkke ñu sujjóotal rab wu jëkk, woowu gaañu woon ba nara dee te mujj wér.

¹³ Naareelu rab wi nag di def kéemaan yu réy, bay wacce ci kaw suuf sawara wu jóge asamaan, nit ñi di gis. ¹⁴ Naareelu rab wi nag nax waa àddina ci kéemaan, yi mu am sañ-sañu def ci turu rab wu jëkk wi. Mu sant waa àddina, ñu sàkk jëmmu rab, wi ñu jamoon saamar te muy wéye bakkanam. ¹⁵ Gannaaw loolu mayees na ko mu sol ag noo jëmmu rab wu jëkk wi, ba muy wax, di reyly képp ku ko sujjóotalul. ¹⁶ Ba mu ko defee, mag ak ndaw, boroom alal ak baadoolo, as gor akub jaam, ñépp, mu defal leen màndargam loxol ndijoor mbaa jë, ¹⁷ ba kenn du mana jënd mbaa jaay te amul màndargam turu rab wi mbaa lim bi méngook turam.

¹⁸ Fii nag xel la laaj: ku am ug dégg, na waññ limu rab wi, ndax boobu lim turu nit la taxawe, di juróom benni téeméer ak juróom benn fukk ak juróom benn (666).

14

Kurél gu sell gi topp na Gàtt bi

¹ Ma xoolaat, gisuma lu moy Gàtt bi fa mu taxaw ci kaw tundu Siyoj* ak téeméer ak ñeent fukk ak ñeenti junniy nit (144 000) ñu ànd ak moom, te ñu bind ci seen jë turu Gàtt bi ak turu Baayam.

² Ma dégg baat bu jóge asamaan, nirook riirum gééj, mel ni dënu gu réy, melati ni ay xalamkat yuy xalam. ³ Ña ngay woy woy wu yees ca kanam ngàngune ma, ca kanam ñeenti bindeef yaak mag ña, te kenn manula mokkal woy wi, ku dul téeméer ak ñeent fukk ak ñeenti junni ñooñu ñu jote àddina. ⁴ Ñooñu ñoo ñi masula ànd ak jigéen, di sobeel seen bopp, ndax masuñoó séy. Ñooñoo topp Gàtt bi fépp fu mu jëm. Ñooñu lañu jote ci biir nit ñi, def leen lu mel ni jooxeb ndoortel meñneef, ñeel Yàlla ak Gàtt bi, ⁵ te kàddug fen masula jibe seen gémmini. Gàkkuñu fenn.

Ñetti malaaka yégle nañu àttey Yàlla

⁶ Ci kaw loolu ma gis meneen malaaka muy naaw ci digg asamaan, ànd ak

* **12:14** 12.14 ñetti diir ak genn-wáll: seetal ci 12.6.

† **13:8** 13.8 téereb dund bi: seetal ci 17.8.
 ci kawam.

* **13:2** 13.2 urs rab wu ñàng la. Man naa épp gaynde te gën

* **14:1** 14.1 tundu Siyoj mooy tund wa ñu tabax Yerusalem

xibaaru jàmm bi sax dàkk, ngir baaxe ko waa àddina: niti wépp askan ak gépp giir ak wépp làmmiñ ak wépp xeet. ⁷Ma ngay àddu ca kaw, naan: «Ragal-leen Yàlla te màggal ko, ndax waxtuw àtteem jot na. Kon nag jaamuleen ki sàkk asamaan ak suuf ak géj ak bëti ndox yi.»

⁸Meneen malaaka, topp ci, di ñaareel bi. Mu ne: «Babilon a daanoo, dëkk bu mag ba daanu na! Moom ma daan màndal askanoo askan biiñu moyam muy indi am sànj.»

⁹Meneen malaaka, topp ci, di ñetteel bi. Mu àddu ca kaw, ne: «Képp ku sujjóotal rab wi ak jëmm ji ñu ko sàkkal, ba ñu defal ko màndargam jë mbaa loxo, ¹⁰kooku dina naan biiñu sànjum Yàlla bu kenn raxul, ñu xelli ko ci kaasu sànjum. Te dees na ko mbugale sawara ak tamarax ci kanam malaaka yu sell yi ak Gàtt bi. ¹¹Seen saxaru sawaras mbugal day saxoo dàkk, di gilli ba fàww. Guddeek bëccëg, ñooñuy sujjóotal rab wi ak jëmm ji ñu ko sàkkal, ak mboolem ku ñu màndargaale turu rab wi, kenn du ci nopplu.»

¹²Kon nag ñu sell ñiy wormaal santaney Yàlla te saxoo gëm Yeesu, looloo tax ñu wara muñ.

¹³Ci kaw loolu ma dégg baat bu jibe asamaan ne: «Bindal: “Bés niki tey ndokklee aji dee ñi deeyaale gëm Sang bi.” Noo ga daldi ne: «Waawaaw, ndax coono dina leen wàcc, ngir seeni jéf a leen topp.»

Ngóobum àddina tar na

¹⁴Ma xoolaat, gisuma lu moy niir wu weex, ak jëmm ju ca toog, di nirook doom aadama, kaalawoo kaalag wurus, nàbb ab sàrt bu ñaw. ¹⁵Meneen malaaka génne ca néeg Yàlla ba, daldi àddu ca kaw, wax ak ki toog ci niir wi, ne ko: «Dawalal sa sàrt te goób, ndaxte ngóob jot na, ngóobum àddina ñor na.»

¹⁶Ci kaw loolu ki toog ci kaw niir wi dawal sàrtam ci kaw suuf, daldi goób àddina.

¹⁷Meneen malaaka nag génne ca néeg Yàlla ba ca asamaan, nàbb moom itam, sàrt bu ñaw. ¹⁸Ba loolu ameen meneen malaaka mi yilif sawara, jóge ca sarx-alukaay ba, daldi àddu ca kaw, wax ak malaaka, mi yor sàrt bu ñaw bi, ne ko: «Dawalal sa sàrt bu ñaw bi, nga dagg cëggi reseñ gi ci àddina, ndax reseñ ji ñor na.»

¹⁹Malaaka ma dawal sàrtam ci àddina, dagg reseñ ji, sànni ci biir nalukaay bu mag bu sànjum Yàlla ba. ²⁰Ñu dëggaate reseñ ja ca nalukaay, ba ca gannaaw dëkk

ba, deret génne ca, taa ba tollook laabi fas yi, wala wal ba dajal digganteb ñetti téeméeri kilomeetar.

15

Musibay mujjantal agsi na

¹Ma xoolaat, gisuma ci asamaan lu moy jeneen firnde ju màgg te yéeme: juróom ñaari malaaka yu taawu juróom ñaari musiba. Musiba yu mujj yaa nag, ngir ca la sànjum Yàlla di mate. ²Ma gisati lu mel ni géēju kiristaal bu jaxasook sawara. Ci biir loolu ña daanoon rab waak jëmmu nataalam, ak lim bi méngook turam, ñu ngi taxaw ci kaw géēju kiristaal gi, yore ay xalami Yàlla. ³Ña ngay woy woyu Musaa jaamu Yàlla ba, ak woyu Gàtt bi, naan:

«Yaw Boroom bi Yàlla Aji Man ji, yaa réy te yéeme ay jaloore.

Yaw Buuru askan yi,

yaa jub te dëgguy doxalin.

⁴Boroom bi, ana ku la ragalul?

Ku dul màggal saw tur?

Yaw donj yaa sell.

Askan yépp ay dikk, sujjóotsil la,

ndax yaa jubi dogal.»

⁵Gannaaw loolu ma xoolaat, daldi gis màkkaan ma fa asamaan, xayma ba fat seede si*, mu ubbiku. ⁶Juróom ñaari malaaka, yi taawu juróom ñaari musiba yi nag, génne ci màkkaan mi. Ñu ngi sol mbubbi lée yu set, ne ràññi, ay ngañyaayi wurus takke ci seen dënn. ⁷Kenn ci ñeenti bindeef yi nag jox juróom ñaari malaaka yi, juróom ñaari ndabi wurus yu fees ak sànjum Yàlla jiy dund ba fàww. ⁸Ba mu ko defee màkkaan ma fees ak saxar su bawoo ci leeru Yàlla ak kàttanam. Kenn nag manatula dugg ci màkkaan mi, ba kera juróom ñaari musibay juróom ñaari malaaka yi matee.

16

Sànj ma sottiku na

¹Ma daldi dégg baat bu xumb bu bawoo ci màkkaan mi. Mu ne juróom ñaari malaaka yi: «Demleen sotti juróom ñaari ndabi sànjum Yàlla yi ci kaw suuf.»

²Malaaka mu jëkk mi dem, sotti ndabam ci kaw suuf, mu def ay taab yu bon te aay ci kaw nit ñi am màndargam rab wi, tey sujjóotal jëmmu nataalu rab wi.

³Ñaareelu malaaka mi sotti ndabam ci géj gi. Mu soppiku deret ju mel ni lu nàcce ci ku ñu bóom. Lépp lu doon dund biir géj daldi dee.

⁴Ñetteelu malaaka mi sotti ndabam ci dex yeek bëti ndox yi, mu doon deret. ⁵Ma dégg malaaka mi yilif ndox yi ne:

* 15:5 15.5 seede si mooy àlluway seede yi fukki santaney Yàlla ya binde woon.

«Yaw Aji Sell ji nekk te nekkoon,
yaa yey dogal yii àtte.

⁶ Deretu ñu sell ñeek deretu yonent yi lañu tuur,

nga nàndal leen deret, feye leen.»

⁷ Ma dégg sarxalukaay ba ne:

«Waawaaw, Boroom bi Yàlla, Aji Man ji,
say àtte dégg la, yoon la.»

⁸ Ba loolu amee ñeenteelu malaaka mi sotti ndabam ci kaw jant bi. Ñu daldi may jant bi muy lakke nit ñi tàngooru sawaraam. ⁹ Ci kaw loolu tàngooru naaj wu metti di lakk nit ñi. Nit ñi nag tuubuñu, sàbbaal Yàlla; xanaa di saaga Yàlla, ji dogal yooyu musiba.

¹⁰ Juróomeelu malaaka mi sotti ndabam ci kaw ngàngunem rab wi, nguuram daldi sóobu ci lëndëm, nit ñi di yéyu ndax metit, ¹¹ tuubuñu seeni jéf, xanaa di saaga Yállay asamaan ndax seeni mitit ak seeni taab.

¹² Juróom benneelu malaaka mi sotti ndabam ci dex gu mag, gi ñuy wax Efraat, dex gi daldi ñiis, ngir sàkkal buuri penku yiy dikk, aw yoon. ¹³ Ci kaw loolu ma gis ñetti njuuma yu mel niy mbott, kenn ki génne ci gémmiñu ninki-nànka ji, kenn ci gémmiñu rab wu jékk wi, ki ci des ci gémmiñu ñaareelu rab wi mbubboo yonent. ¹⁴ Nòoñu nag ay njuumay Seytaane lañu, yuy def ay kéemaan, tey dajaleji buuri àddina sépp, ngir xareb bés bu mag bu Yàlla Aji Man ji.

¹⁵ Mu ne: «Maa ngi nii yoot, di dikk nib sacc. Ndokklee, yaw mi teewlu, fàggu say yére, ba doo deme gacceg yaramu neen, ñu di la seetaan.»

¹⁶ Ci kaw loolu njuuma yi dajale buur yi ci bérab bu ñuy wax Armagedon*, di baatu ebré.

¹⁷ Ba mu ko defee juróom ñaareelu malaaka mi sotti ndabam ci kaw ngelaw li, baat bu xumb jóge ca ngàngune ma ca màkkaan ma, ne: «Sotti na!» ¹⁸ Ba loolu amee, ay melax tàkk, ay kaddu aki dënu riir, suuf yëngu yëngu bu réy bu masula am ba nit teewee ci kaw suuf ba bésuub keroog. Noonu la yëngub suuf ba yéemee te réy. ¹⁹ Dékk bu mag ba xar ñett, dékk yu mag yu askani àddina yi màbb. Babilon gu mag ga nag, Yàlla bàyyi ko xel, ngir nàndal ko kaasu biññu sanjam muy bax. ²⁰ Dun yépp daldi dëddu, tund yi ne mes. ²¹ Tawu doji yuur yu benn talaj, yemook ñeent fukki kilo, daldi sóobe asamaan ci kaw nit ñi, ñuy saaga Yàlla ngir musibam doji yuur yi, ndax musiba mu réy ba jéggi dayo.

17

Mbugal ñeel na jigéenu moykat ju mag ji

¹ Kenn ci juróom ñaari malaaka, yi taawu juróom ñaari ndab yi nag dikk, ne ma: «Kaay, ma won la mbugalu jigéenu moykat ju mag, ji toog ci ndox mu bare.

² Moom la buuri àddina àndal di moy, te biiñu moyam la waa àddina di màndee.»

³ Ci kaw loolu malaaka mi yóbboo ma Noowug Yàlla ba ca màndij ma. Ma gis jigéen ju war rab wu xonq wu am juróom ñaari bopp ak fukki béjjén, te yaram wi fees ak tur yuy saaga Yàlla. ⁴ Jigéen jaa ngi sol lu yolet te xonq, takk wurus ak jamaa aki per. Mu ngi yor kaasu wurus bu fees ak ñaawtéef ak sobey moyam. ⁵ Jé bi nag, tur wii lañu ci bind, muy kumpa: Babilon gu mag gi, ndeyu jigéenu moykat yeek ñaawtéefi àddina yi. ⁶ Ma gis ne jigéen ji daa naan ba màndi ci deretu ñu sell ñi ak deretu ñi doon seedeel Yeesu.

Ba ma ko gisee, jaaxle naa lool. ⁷ Malaaka ma ne ma: «Looy jaaxle? Man maa lay xamal kumpag jigéen ji ak rab, wi mu war, boroom juróom ñaari bopp yeek fukki béjjén yi. ⁸ Rab wi nga gis mas naa nekk waaye nekkatul. Dina génne ca xóote ba, waaye day sàнкуji. Waa àddina, ñi ñu bindul woon seeni tur ci téereb dund bi ba àddinay door nag, bu ñu gisee rab wi, dinañu yéemu, ndax la mu masoona nekk, tey nekkatul, te èllég muy nekkatul.

⁹ «Fii nag xel mu ñaw la laaj. Juróom ñaari bopp yi ñooy juróom ñaari tund, yi jigéen ji toog, te juróom ñaari buur lañu itam: ¹⁰ juróom daanu nañu, kenn kaa ngi fi, ki ci des nag dikkagul, waaye bu dikkee, ab diir rekk la fiy am. ¹¹ Rab wi masoona nekk te nekkatul nag, moom ci boppam moo di juróom ñetteelu buur bi, kenn la ci juróom ñaari buur yi jiitu itam, te day sàнкуji.

¹² «Fukki béjjén yi nga gis, fukki buur lañu yu jotagul ci seen nguur. Waaye diirub wenn waxtu, lañuy jot sañ-sañu nguur, ñook rab wi. ¹³ Menn mébét lañu bokk, te dinañu yékkati seen doole ak seen sañ-sañ, jox ko rab wi. ¹⁴ Dinañu xare ak Gàtt bi, waaye Gàtt bee leen di daan, ndax mooy Sangu sang yi, di Buuru buur yi. Mooy daan mook ñoñam, ñi mu woo, tànn leen te ñu saxoo topp ko.»

¹⁵ Mu neeti ma: «Ndox yi nga gis jigéenu moykat ji toog ci nag, mooy niti xeet yeek mbooloo yeek askan yeek làmmiñ yi. ¹⁶ Fukki béjjén yi nga gis, ñook rab wi, dinañu won jigéenu moykat ji mbañeel. Dañu koy futti ba mu ne dunñ, ñu lekk aw suuxam, ba noppi lakk ko. ¹⁷ Ndaxte Yàlla

* 16:16 16.16 Armagedon ag joor la ci réewum Kanaan.

def ci seen xol pastéefu sottal mébétam, ba ñu bokk sottal menn mébét mi, daldi jébbal rab wi seen nguur, ba kera kàddug Yàlla mat sèkk. ¹⁸ Jigéen jii nga gis, moo di dèkk bu mag, bi yilif buuri àddina.»

18

Babilon daanu na

¹ Gannaaw loolu ma gis meneen malaaka mu am sañ-sañ bu réy wàcce asamaan, àddina di leere cig leeram. ² Mu àddu ca kaw, ne: «Babilon a daano! Dèkk bu mag ba daanu na, ba doon dèkkukaayu jinne ak mboolem njuuma lu sobewu ak mboolem picc ak rabu àll wu sobewu te siblu. ³ Kaasu biiñu sànj, bi sababoo ci moyam, moom la askani àddina yépp di naan. Moom la buuri àddina àndal di moy, te doylloodig bakkanam gu réy woomal na julay àddina.»

⁴ Ci kaw loolu ma dégg beneen baat bu jóge asamaan, ne: «Yeen sama ñoñ, génneen dèkk bii, bala ngeena bokk ak moom ay bàkkaaram, bay séddu ci mbugalam. ⁵ Ndaxte ay bàkkaaram jalu na ba àkki asamaan, te Yàlla bàyyi na xel ay ñaawtéefam. ⁶ Na mu jéfe ak yeen, jéfeleen ko ak moom, feyleen ko ñaari yoon ay jéfam. Kaas bi muy xellile am njafaan, feesalal-leen ko njafaan lu ko èpp doole ñaari yoon. ⁷ Joxleen ko ci toskare aku naqar, kemu daraja jaak dund gu bakkane ga mu jagoo woon. Gannaaw moo ne cim xelam: “Maa tooge jalu lingeer, dumab jétun, duma deele muk,” ⁸ looloo tax ci benn bés la musiba yiy képpoondoo ci kawam: mbas, deele akub xiif, te dees na ko lakk ba mu jeex, ndax Boroom bi Yàlla mi ko mbugal moo am doole.»

⁹ Buuri àddina yi àndoon ak dèkk bii ci moy ak dund gu bakkane, bu ñu séenee saxaras lakkam, ñoom ñépp ay yuuxu, di ko jooy. ¹⁰ Fu sore lañuy dànd, ndax ragal toskarey dèkk bi, te naan:

«Wóoy, wóoy ngalla dèkk bu mag ba!

Babilon ma ca doole ja!

Ci wenn waxtu rekk la sa àtte dikk!»

¹¹ Julay àddinaa ngay yuuxu, di ko jooy, nde am njaayam du jarati: ¹² wurus ak xalis, ak doji gànjar aki per ak lée ak ndimo lu yolet ak sooy, ak ndimo lu xonq curr, ak bépp bant bu xeeñ, ak wépp xeetu jumtukaayi béñi ñey, ak jumtukaayi dénkun gèneel ak yu xànjjar, ak yu weñ gu ñuul, ak yu doju màrb, ¹³ ak kanel ak yeneen safal, ak ndàbbu miir ak cuuraay-libarj ak yeneen cuuraay, ak biiñ ak diwu oliw ak

sunguf ak pepp ak nag ak xar ak fas, aki watiir aki jaam, ak nit ñu ñu jàpp xare.

¹⁴ Dinañu ne: «Doomi garab yi nga soppoon sore na la, mboolem lu neex ak lu yànj réer na la mèrr!»

¹⁵ Ña daan jula yooyii ci dèkk bi ba woomle, fu sore lañuy dànd, ndax ragal toskarey dèkk bi, di yuuxook a jooyoo, ¹⁶ naan:

«Wóoy, wóoy ngalla dèkk bu mag ba!

Ngalla yaw, dèkk bu mag,

ba daa woddo lée ak ndimo lu yolet ak lu xonq curr,

takkoo wurus ak doji gànjar aki per,

¹⁷ wenn waxtu rekk, alal ju baree nii neen!»

Dawalkati gaal yeek julay géeg yi, ak mool yi, ak mboolem ñiy dunde géeg, ñoom ñépp a ngi dànd fu sore, ¹⁸ seen saxaras lakku dèkk bi di jalu, naan: «Bii dèkk bu mag, ana dèkk bu masa nirook moom?»

¹⁹ Dañuy xépp suuf seen kaw bopp, di yuuxook a jooy ak a naqarlu, naan:

«Wóoy, wóoy, ngalla dèkk bu mag ba!

Sa koom a woomal mboolem boroom gaal ci kaw géeg,

wenn waxtu rekk, nga gental.»

²⁰ Ndokklee, asamaan,

Ndokklee, yeen ñu sell ñi itam, ak ndawi Yàlla yeek yonent yi,

ndaxte Yàlla leen àtteek dèkk bii, mbugal ko.

²¹ Ba loolu amee malaaka mu am doole yékkati doj wu mel ni doju wolukaay wu mag, sànni ko biir géeg, daldi ne:

«Babilon dèkk bu mag bi, nii lañu koy sànneek doole,

mu ne menjj.

²² Buumi xalam ak baatu woykat, tox-rooku liit,

lenn du ci jibeeti fi yaw.

Liggéeykat bu xareñ bu mu mana doon,

deesatu ko gis fi yaw,

doju wolukaay du riireeti fi yaw,

²³ làmp du niiteeti fi yaw,

te baatu boroom séet akub séetam du jibeeti fi yaw muk,

ndax say julaa éppoon doole ci àddina,

te say xèrèm a sànk askanoo askan.»

²⁴ Ci yaw it lañu fekk deretu yonent yeek ñu sell ñi ak mboolem ñi ñu rey ci kaw suuf.

19

Aleluya!

¹ Gannaaw loolu damaa dégg lu mel ni coow lu xumb, bawoo ci mbooloo mu bare mu àddoo asamaan, ne:

* 19:1 19.1 aleluya waxu yawut la, juy tekki «Cant ñeel na Boroom bi.»

«Aleluya*!

Texe ak daraja ak kàttan ñeel na sunu Yàlla.

² Ay àtteem dëgg la, yoon la!

Moo mbugal jigéenu moykat bu mag,

bi yaq àddinaak moyam,

feye ko deretu jaami Yàlla yi mu tuure loxoom.»

³ Ñu neeti:

«Aleluya!

Saxaras lakku dëkk ba kay day jolli rekk, ba fàww!»

⁴ Ci kaw loolu ñaar fukki mag ñeek ñeent ak ñeenti bindeef yi ne gurub sukk, sujjootal Yàlla, mi toog ci ngàngune mi. Ñu bokk ne:

«Amiin! Aleluya!»

⁵ Ba loolu amee kàddu jibe ngàngune ma, ne:

«Màggal-leen sunu Yàlla,

yeen jaamam ñépp,

ak yeen ñi ko ragal, mag ak ndaw.»

⁶ Ma daldi dëgg lu mel ni coowal mbooloo mu bare, mu àddoo ni riirum gééj, tey nirook kàddug dënu gu réy, ne:

«Aleluya!

Sunu Boroom Yàlla Aji Man ji mooy Buur!

⁷ Nanu bég, di bannexu te màggal ko, ndax céetu Gàtt bi agsi na, ab séetam defaru na ba noppi!

⁸ Jox nañu ko mbubbum lée mu set, ne raññ, mu sol.»

Lée boobu mooy jëfi njekk yu nit ñu sell ñi.

⁹ Malaaka ma nag ne ma: «Bindal lii: “Ndokklee ñi ñu woo ci berndey céetu Gàtt bi.”» Mu teg ca ne ma: «Loolu kàddu yu dëgg yu Yàlla la.»

¹⁰ Ma daldi ne gurub sukk ciy tànkam, ngir sujjootal ko. Mu ne ma: «Déet, épp naa def. Sa mbokkum jaam donj laa, ni yaak sa bokk yi jàppoo seedeel Yeesu. Sujjootalal Yàlla. Ndaxte seedeel Yeesu moo di Noo giy dundal waxyu.»

Gawar war na fas wu weex

¹¹ Ba loolu wéyee ma gis asamaan ubbiku, fas wu weex daldi feeñ. Ki ko war, «Wóor te Dëgg» lañu koy wax te njub lay àttee, di ko xaree. ¹² Ay gëtam a ngi mel ni sawara wuy tàkk, bopp bi, mbaxanay buur yu baree ci tege, ñu bind ci kawam tur wu kenn xamul ku dul moom. ¹³ Mbubb ma mu sol, dees koo sóob ci deret, te turam wi ñu ko xame di «Kàddug Yàlla.»

¹⁴ Xarekat yi ci asamaan a ko topp, war fas yu weex, sol mbubbum lée mu weex, set wecc. ¹⁵ Gémmiñ gi, saamar bu ñaw a ciy lange, mu di ko cawe askan yi. Moo leen di jütee yetu weñ, te mooy dëggaate ci

biir nalukaay bi, reseñ ji ñuy segale biiñu sànj mu tàng mu Yàlla Aji Man ji. ¹⁶ Ci kaw mbubbam ak ci luppam, aw tur lañu ci bind te moo di: «Buuru buur yi, Sangu sang yi.»

¹⁷ Ma gis nag menn malaaka mu taxaw ci jant bi. Mu àddu ca kaw, wax ak mboolem picc, yiy naaw ci digg asamaan, ne leen: «Dikkleen, dajesileen ci bernde ju mag ju Yàlla ji, ¹⁸ ndax ngeen lekk suuxi buur ak suuxi njiiti gàngoor, suuxi jambaar ak suuxu fas ak gawaram, suuxu ñépp; gor ak jaam, mag ak ndaw.»

¹⁹ Ba loolu amee ma gis rab wi, mook buuri àddina yeek seeni gàngoor, ñu daje ngir xareek ki war fas week gàngooram. ²⁰ Ñu daldi jàpp rab wi, mook yonentu caaxaan, bi defoon ci turu rab wi ay kéemaan yu mu sànce ña ñu màndargaale woon màndargam rab wi, te ñu doon jaamu jëmmu nataalu rab wi. Ñoom ñaar ñépp lañu sànni, ñuy dund ca déegu sawara waak tamarax bay bax. ²¹ Ña ca des, ñu reye leen saamar bay lange ca gémmiñu ka war fas wa, picc yépp lekk ca seen suux ba regg.

20

Almasi mooy nguuru junnii at

¹ Ba mu ko defee ma gis malaaka mu wacce asamaan, yor caabiy xóote bi, ak càllala gu réy. ² Mu jàpp ninki-nànka ja, jaani cosaan joju di Tuumaalkat bi, di Seytaane ba tey. Malaaka mi yeew ko diiru junnii at. ³ Da koo sànni ci xóote bi, tēj ko, sakk buntu xóote bi, ndax du naxati askan yi, ba kera junnii at yi mat. Gannaaw loolu nag fàww ñu yiwi ko diir bu gàtt.

⁴ Ci kaw loolu ma gis ay gàngune yu ñu jox ña ca toog, sañ-sañu àtte. Ma daldi gis bakkani ñi ñu doogon seen bopp ndax la ñu doon seedeel Yeesu ak la ñu gëmoon kàddug Yàlla, ña sujjootalul woon rab wi ak jëmmu nataalam, te amuñu màndargam rab wi ci seen jë mbaa seen loxo. Ñu dekki bay nguuroondoo ak Almasi diiru junnii at. ⁵ Loolu moo di ndekkite lu jëkk li. Yeneen néew yi nag, duñu dekki li feek junnii at yi matul. ⁶ Ndokkle ak sellnga ñeel na ñi séddu ci ndekkite lu jëkk li! Ñooñu, ñaareelu dee gi manalu leen dara. Ñooy doon it sarxalkati Yàlla ak Almasi, te ñooy nguuroondoo ak Almasi junnii at.

Seytaane moo mujje déegu sawara sa

⁷ Bu junnii at yi matee, dees na yiwi Seytaane, gënnée ko ca kasoom, ⁸ mu dik, naxsi askani ñeenti colli àddina, yi ñuy

* 20:8 20.8 Gog ak Magog ñooy misaal bañaaley Yàlla ak ñu sell ñi. Seetal ci *Esekiyel* 38 ak 39.

wax waa Gog ak Magog*. Mu dajale leen ngir xare, ñu bare ñi feppi suufas géej. ⁹ Dañuy sam déndub suuf sépp, daldi yéew dalub nit ñu sell ñi ak dëkk bu jar bi. Ci biir loolu sawara wacce asamaan, lakk leen. ¹⁰ Ñu japp nag Seytaane, mi leen daan nax, sànni ko ci déegu sawaraak tamarax ba, mu fekki fa rab waak yonentu caaxaan ba. Dees na leen fa mitital guddi ak bëccëg, ba faww.

Bés-pénc taxaw na

¹¹ Ci kaw loolu ma gis ngàngune mu mag mu weex, ak ku ci toog. Asamaan ak suuf daldi dawé fa kanamam, ne mes. ¹² Ma gis néew ya, mag ak ndaw, ñu taxaw ca kanam ngàngune ma, ay téere ubbiku, beneen téere ubbikooti, di téereb dund ba. Ñu daldi atte néew ya ca seeni jéf, na ñu ko binde ca téere ya. ¹³ Ba mu ko defee géej jébbale néew ya woon ca moom, ndee ak njaniiw jébbale néew ya woon ca moom, ñu daldi atte ku nekk ca say jéf. ¹⁴ Ba loolu amee ñu japp ndee ak njaniiw, sànni ca déegu sawara sa. Ñaareelu dee gi nag moo di déegu sawara si. ¹⁵ Képp ku ñu gisul ñu bind la ci téereb dund bi, ci déegu sawara si lees la sànni.

21

Asamaan ak suuf am nañu kuutaay

¹ Ma daldi gis asamaan su bees ak suuf su bees. Fekk na asamaan su jëkk sa ak suuf su jëkk sa wéy, te géej amatul. ² Ma gis nag dëkk bu sell bi, Yerusalem gu bees gi, mu wacce asamaan, fa Yàlla, mel nib séet bu defaru ba jekk ngir jëkkëram. ³ Ma dégg kàddu gu xumb jibe ca ngàngune ma, ne: «Màkkaanu Yàllaa ngii ci biir nit ñi. Mooy dëkk ak ñoom, ñu diy ñoñam. Yàlla ci boppam mooy dëkk ak ñoom, di seen Yàlla. ⁴ Mooy fomp seen wépp rongooñ: Dee dootu am, lù jëkk laay wéy.»

⁵ Ci kaw loolu ki toog ci ngàngune mi ne: «Maa ngii di yeasal lépp!» Mu teg ci ne ma: «Bindal, yii kàddu yu wóor la te dëggu.» ⁶ Mu neeti ma: «Sotti na! Maay Alfa, di Omega, di njálbéen, di muj. Ku mar, maa lay may nga naan ci bētu ndoxum dund mi, te doo fey dara. ⁷ Képp ku am ndam nag, loolooy doon sab cér. Maay doon sa Yàlla, nga doon sama doom, ⁸ waaye ñu ragal ñi ak aji gëmadi ñi ak defkati ñaawtëef yi ak bóomkat yi ak moykat yi ak xërëmkat yi ak bokkaalekat yi, mboolem niti fen ñi, seen añ a nga ca déegu sawara waak tamarax ba. Loolu moo di ñaareelu dee.»

⁹ Ba loolu amee menn malaaka dikk. Mu ngi bokk ci juróom ñaari malaaka, yi yor juróom ñaari ndab yi fees ak juróom ñaari

musiba yu mujj yi. Mu ne ma: «Dikkal, ma won la séet bi, soxnas Gàtt bi.»

¹⁰ Ci kaw loolu mu yóbboo ma Noowug Yàlla ba ci tund wu mag te kawé, daldi may won dëkk bu sell bi, Yerusalem, muy wacce asamaan, fa Yàlla. ¹¹ Dëkk baa nga ànd ak darajay Yàlla, leeraayam ba mel ni peru gánjar, nirook peru jaspé, leere ni kiristaal. ¹² Tata ju réy te kawé la am ak fukki bunt ak ñaar yu fukki malaaka ak ñaar taxawe, ay tur binde ca kaw bunt ya, di turi fukki giiri Israyil yaak ñaar. ¹³ Wetu penku ba, ñetti bunt la; wetu bëj-gànnar di ñetti bunt; wetu bëj-saalum, ñetti bunt; wetu sowu ba, ñetti bunt. ¹⁴ Tatay dëkk baa nga sampe ci fukki doji kenook ñaar yu ñu bind fukki tur ak ñaar yu ndawi Gàtt bi.

¹⁵ Kiy wax ak man nag, mu ngi yor yetu nattukaayu wurus, ngir natt dëkk bi aki buntam ak tataam. ¹⁶ Dëkk bi dafa kaare; guddaay bi tollook yaatuwaay bi. Mu natte dëkk bi bant bi mu yor, guddaay bi ak yaatuwaay bi ak taxawaay bi, lépp tollo, di fukki junneek ñaari dayo (12 000), yemook ñaari junneek ñaar tééméeri kilomeetar (2 200). ¹⁷ Malaaka mi natt tata ji, muy tééméeri xasab ak ñeent fukk ak ñeent (144) yu malaaka mi natte, ni ko nit ñiy natte naka jekk, te yemook juróom ñaar fukk ak ñaari meetar (72). ¹⁸ Tata ji peru jaspé lañu ko liggéeye, dëkk bi di wurusu ngalam, leer naññ ni kiristaal. ¹⁹ Doju kenug dëkk bi, xeeti gánjar ju nekk lañu ko rafetale.

Doju kenu gu jëkk gi di jaspé; ñaareel bi di safiir; ñetteel bi di kalseduwan; ñeenteel bi di emëródd; ²⁰ juróomeel bi di sarduwan; juróom benneel bi di kornalin; juróom ñaareel bi di kirsolit; juróom ñetteel bi di beril; juróom ñeenteel bi di topaas; fukkeel bi di kirsoparas; fukkeel beek benn di yasant; fukkeel beek ñaar di ametistë.

²¹ Fukki bunt yeek ñaar, fukki per ak ñaar lañu. Bunt bu nekk sakkoo ci benn per kepp, péncum dëkk bi di wurusu ngalam, leer naññ ni kiristaal.

²² Ab jaamookaay nag, gisuma ko fenn ci biir dëkk bi, ndax Boroom bi Yàlla Aji Man ji ak Gàtt bi ñooy jaamookaay bi. ²³ Te dëkk bi soxlawul jant bu koy leeral mbaa weer, ndax leeru Yàllaa koy leeral, Gàtt bi di làmpam. ²⁴ Askani àddina, leeru dëkk bi lañuy doxe, buuri àddina di fi indi seen teraanga. ²⁵ Bunti dëkk bi du tëje mukk bëccëg, te foofa sax guddi amu fa. ²⁶ Dees na fa indi darajaak teraangay askan yi. ²⁷ Du lenn lu sobewu lu fay dugg nag, mbaa

defkatu jéf ju ruslu ak njoblan. Ñi ñu bind ci téereb dund bu Gàtt bi donj ñoo fay dugg.

22

Walum dund mi feeñ na

¹ Ci kaw loolu malaaka mi won ma dexu ndoxum dund mu leer nàññ ni doju kiristaal, ndox ma wale ca ngàngunem Yàllaak Gàtt ba, ² di tuuru ci digg péncu dëkk bi. Ci ñaari tàkki dex gi, garabu dund a ngi ci, di meññ fukki yoon ak ñaar, weer wu nekk benn yoon, xob yi di faj askani àddina. ³ Alkànde nag du fa amati, te ngàngune mu Yàllaak Gàtt bi ci biir dëkk bi lay nekk, jaamu Yàlla yi di ko sujjóotal, ⁴ di gis kanamam, turam binde ci seen jë. ⁵ Guddi du amati, te deesul soxlaati làmp mbaa naaj, ndax Boroom bi Yàlla moo leen di leeral. Te dañuy nguuru ba fàww.

⁶ Ba loolu amee malaaka mi ne ma: «Lii wax ju wóor la te dëggu. Boroom bi Yàlla miy xelal yonent yi, moo ye bal malaakaam, ngir mu won jaamam ñi mbir yi dëgmal te du jaas.»

Yeesu Almasi dina délsi

⁷ «Maa ngii di ñew léegi. Ndokklee yaw miy sàmm kàdduy waxyuy téere bii.»

⁸ Man Yowaan maa dégg mbir yii, gis ko. Ba ma ko dégge, gis ko, dama ne gurub sukk ci tànkì malaaka, mi ma ko won, nar koo sujjóotal. ⁹ Mu ne ma: «Épp naa def, sa mbokkum jaam donj laa, ni yaak sa bokki yonent yeek ñiy sàmm kàdduy téere bii. Sujjóotalal Yàlla.» ¹⁰ Mu neeti ma:

«Bul làq kàdduy waxyuy téere bii, ndax waxtu wi jege na. ¹¹ Ku jubadi, na saxoo njobadi; ku yàqu, saxoo yàqute; ku jub, wéye def njub; ku sell it, wéye sell.»

¹² «Maa ngii di ñew léegi, ànd ak sama pey, ngir delloo ku nekk jéfam. ¹³ Man maay Alfa di Omega; maa jëkk, maa mujj, maay njàlbéen, maay mujj.

¹⁴ «Ndokklee yeen ñi fóot seeni yére, ngir saña lekk ci garabu dund gi, jàlle bunt yi, dugg ci biir dëkk bi. ¹⁵ Ci biti, xaj yaa fa nekk ak xèrëmkat yi ak moykat yi ak boomkat yi ak bokkaalekat yi, ak képp ku sopp fen te di ko jéfe.

¹⁶ «Man Yeesu maa yónni sama malaaka, ngir mu seede mbir yii ci yeen, ñeel mboooloy gëmkat ñi. Man maay njebbitu Daawuda, di kuutaayam, maa di biddiiwu njël bi ne raññ.»

¹⁷ Noo gi ak Séet bi neeñu: «Ñewal!»

Ku ci dégg it, neel: «Ñewal!»

Ku mar, ñewal; ku bëgg ci ndoxum dund mi, jëlal, ñu may la.

¹⁸ Man Yowaan, seede naa ñeel képp ku dégg kàdduy waxyuy yu téere bii, ne: Képp ku ci yokk lenn, Yàlla dina la yokkal mbugal, yi ñu bind ci téere bii. ¹⁹ Te ku wàññi lenn ci kàdduy waxyuy yu téere bii, sa wàll la Yàlla di wàññee ci yooyii ñu bind ci téere bi, muy garabu dund gaak dëkk bu sell ba.

²⁰ Kiy seede mbir yii nee: «Waawaaw, maa ngi ñew léegi.»

Amiin, Sang Yeesu, ñewal!

²¹ Yal na yiwu Sang Yeesu ànd ak ñépp.